

●钦定四库全书

弇州续稿卷一

（明）王世贞 撰

○赋部

△赋

静姬赋

吴王时有静姬者国之东海下邑某氏女也家世华隳父母爱之既饶令姿重以修能读书史闲内则及笄而选得入宫掖备六尚之官阶至姪娥视中二千石颇亦贵矣而性好闲静贞孤自树不善为蛊又不善事其长循性而行见憎后进以谗赐退居永巷中乃为此赋以自解其辞曰

惟婺精之下摄兮锺灵淑于琅琊嫩心形之窈窕兮不饰步而阿傺娟然与先后而杂处兮挺瑶干于蒹葭嘉命忽其贲临兮遂托乘乎九霄（叶）回天瞬之微矚兮备九嫔之姪娥又得尚君之司馭兮乘上介于陵园出不敢窃君之薄怒兮入不敢覬君之异恩居多避而少进兮藉礼义而自藩贵何希乎饰瑱兮佚胡羨乎乘轩彗三株之蔽月兮妯娒藉以擅宫众望风而魄摄兮肩日胁以先容余独安此拙薄兮足遭回与心应众既啄余之蛾眉兮遂饰余以强项乘骊龙之熟寐兮屏余返乎永巷白日匿光不回照兮蒙气抑邑而干霏彗既鼓夫裂地之衡飙兮又结横天之妖虹纷余悯此同仇兮晨彷徨而筵筭忧后命之叵测兮窃有冀于将然更申申而詈余兮荃岂畏天日而甘此冥昏擲欢乐于俄顷兮就沈悵之大年余既不获前众以矫进兮又安敢后众而虞退荃方极意于姬姜兮宁暇惜此营蒯追昔誓而自数兮觉面目之可示夜夷然其赴枕兮亦何恨于床第忽钧天之自西兮丙夜其犹未竟内忻忻其若偕兮吾王庶几无疾病将玉体之不任兮宗社岌乎其焉凭彼彗亦何知兮唯快心于一诳晨盥漱而就巾帼兮倦玉阶之履綦红女薄伎不足婴兮聊发篋而陈书诗感鸣商之牝鸡兮岐圣方重此关睢弃周鼎而宝康瓠兮恐外庭之类兹噫噉长门之若岁兮心悅君而不可得班寄悵于白华兮终鬱鬱

而难释夫大椿亦遒尽兮矧凛秋之飞藿余将夷长信于未央兮恣逍遥而无极

后静姬赋

王既绌静姬之七年采谏臣言追罚嬖幸之长以次就理下教大长秋故姬某婉嫕而文以礼自闲孤之不聪擿不中紫永巷省愆为日已久其赐汤沐袭冠服仍守故尚加秩一等使者临致命静姬固谢称疾笃不任行使者去乃为赋以自广其辞曰

岁际阙逢之湑滩兮摄提贞于孟陬荡明河使涤两曜兮妖彗遁乎穷霄念娥媯之淑清兮王纶涣发于长秋妾久处此永巷兮实冥心乎九幽室向隅而回照兮水覆地以再收感余髮之昔鬢兮今曲局而不可沐红颜包其弗明兮体骨立而肤剥脂泽黯其无光兮业已奋而中缩裳衣颠倒以思御兮寻沈吟而就幙燕啁啾其若贺兮鸡喔喔以噉鸣邻女惊而九起兮惭阿监之不见征抑攻中之壮袞兮强修颜而舆行曰天听忽卑兮帝命不于常舍冥冥之昏垫兮就昭昭之白日增成赐袂而召见兮辅属体而若一兰膏煜以烛夜兮椒风温温乎甲室芬芳溢于北宫兮余辉傍暎乎西术饮五齐之捫乳兮啖以粃粒与餼餽二八代射而侍寝兮轻輦出入于洞房目穷葢珠之煜煜兮耳饱天乐之锵锵冠华鬢之七宝兮足下丝履五文章惟吾侪之蠖伏兮荃独际而鹄伸胡恋恋此蹄涔兮若夜鱼之爱鰈感粲者之见导兮宁独瞽而心非人叹君泽之难保兮往事耿其在顰甫调饥之相迫兮糗草甘而自腴胡啖余以八珍兮饒余而侈其喉得失若循环兮实销颜之冶垆羌侘傺于一朝兮痛前辙之不须舆卧拖绅而冒絮兮不敢发乎君蒙衔回枯之至仁兮虽槁死其奚能忘惭陋质之么■〈麻外骨内〉兮敢偃蹇而自托乎贞姜惟寢瘵之沾倡兮忍以荐乎君王感雨露之汪濊兮愿均施乎万卉彼怨女啐啄于深宫兮诚畏停乎余耳念宗祧之鼎维兮又重虞乎玉体昔余皈诚于西母兮侍真餐焉而启齿重曰生理有涯兮欲无涯元真易去兮不易归有情无情兮我媚我勞恬澹寂寞兮千龄为期

白鸚鵡赋

鸚鵡纯綠色以其喙红黑为雄雌见铁围山丛谈而白者红者五色者最不易得北户録桂海志皆称白者稍大于它鸚鵡冠有五羽若護华作轻黄色怒则尽张尾截于鹄外粉内蜜余从友人徐子与所见之果尔而灵慧秀俊依人可怜子与以余之喜之也举笼以赠而征一赋焉其视正平不能彷彿视延年摩诘或差有致耳

猗西域之慧羽稟金方之淑润频迦授以仙音孟亏锡其美胤倘瑶池之托质何青

鸟之传信冠拟鵷而三秀尾如鸽而偏俊若乃孕别雄雌喙分丹黑黑则片叶破霜丹则微苞坼白岂辨口之象人实灵心之天锡忽乎穿林闪银梭之透机舒而饮泉俨螺觞之承沥于是虞人怱怱以进罗射师屏营而却弩虽靡逃乎一目幸毋损其片羽强彷徨而就食中掩抑而思土块焉独处悄然私语彼越裳之遥使何异德而并依此陇首之下俦复质是而文非出入珠罍夷犹紫微感异梦于司空受真经乎贵妃尔其性含雅驯度絶惊怒皓魄增辉飞霰夺素璧人出则一市尽倾玉奴入则六宫争妬何郎傅粉以清言杞妇被縞而悲诉偶失身于置网遂长辞于林樾足何辜而见维翻奚妨而遭铄嗟半菽之示恩均辙涔以苟活顾壶冰以怜影临绮颺而扞舌乃有谢豹劝归仓庚和歌闻音似友辨字则叱彼栖鹑之濯濯或舞鹤之傴傴伊长狄之来鲁郊非族类其奈何是以絶念戎荒甘心谢庭藉玉树以长栖顾瑶草而怡情啜三危之澄浆饭九光之秀茎愿得臣弇州之大鸟相与诵圣瑞于千龄

红鹦鹞赋

余赋白鹦鹞之再岁而家仲氏以覲归自江右则携一红鹦鹞云左伯张春字氏所赠者色殷翠可爱亡它杂羽双趾亦如之唯喙黄耳虽语不能四五而皆明了间作歌音宛转流利若中节奏仲氏甚珍之再携之江右则为邻院焚尸衣烟触死矣余感其薄命而天聊为咏言昔谢庄赋成袁淑掩卷今其存者虽不十五皆摘其尤而事鲜旁证味同嚼蜡语云才难不其然乎余之此赋虽不足鼓吹正平庶为此鸟传神耳

粤古西王母命彼青鸟使于祝融祝融宾之便■甚口靡所不通爰祈孟亏遴报聘者百羽遁尽而得鹦鹞锡之绯服毋与绿伍其绯伊何则猩猩氏之所润色也辞命伊何又猩猩氏之所训译也惟是瑶台介绍皆曰殷鲜朱鸟以为上客王母异之栖以珊瑚之树而荐以火齐之席鞞鞞堆盘樱桃的历琥珀映觞琼浆流液仙姬羣醉两辅差敌瞥焉长辞东越流沙虞人睥目毕弋交加惜衔命之未达忽中构乎网罗感炎荒之故主誓矢死而靡他主人爱之长离斯亚白玉为笼黄金横架饲以丹实酌以清泠岂无寸心与貌偕頽将结咽而无言虞不鸣之见烹于是诵弥陀祝天帝称千秋与万岁灿齿贾姬破颜褒姒声何贵乎裂帛貌胡择乎射雉若乃展清歌流妙音如中宫商因风浮沈咬咬袅袅绵蛮冶淫感韩娥之停耳将师延之写心或翩然其翻袂呈巧舞于君之掌忽窈窕以穿林又徘徊而侵幌烂烂兮落霞剪秋颺湛湛兮芙蓉受朝晖凝睇则朱绂斯皇过隙则景天夕飞心摇扬而欲逝寻眷恋以长依感新恩之瑰渥不羞呈乎百伎苟贱质其未糜唯一人之斯媚天岂夺尔胭脂之山忽粉消而红瘁将妖梦之是践处深篝而遭鸷悲日南之永隔虽少君其弗可致嗟乎佳人含轸于薄命才士流惜于短年马嵬之血渍土江夏之魄施烟彼固授汝以般若之经而赠汝以春容之篇者也尚先汝而璧碎亦奚贵乎瓦

全辞曰天命玄鸟降生商兮帝官白雀胤上卿兮汝才百倍等螭螂兮魂乎归来毋尽伤兮为汝传神永不亡兮彼词寥寥胡谢庄兮

红倒挂鸟赋

丁丑之春余栖弇园有自郡来者言客携红鹦鹉求售其直为六金余杀其五醵得之至则非鹦鹉也其体量小十之六首尾红色如猩血而两翅各一二茎如翡翠腹毛隐隐作鹅黄觜差类鹦鹉而小色亦黄其音婉丽轻细极驯扰出入人懷袖间竟不能辨为何鸟而时时挂一足于架倒悬移晷尺不动则意其为倒挂鸟也居一岁死葬之先月亭后土冈丛条下考苏子瞻词有所谓倒挂绿毛么凤刘绩霏雪录谓即李赞皇所赋扇中五色桐花凤也成都大岷江矶多植紫桐每至春暮来集桐花以饮朝露花落散去不知所向又李之仪有词云朱唇玉羽下蓬莱佳时近早梅自注云此鸟以十二月来一名收香倒挂又名探花使性极驯好集美人钗上宴客终席不去人爱之无所害唐僧隐诗亦云美人买得偏怜惜移向金钗重几铢杨用修复绿刘绩录以倒挂为桐花凤然其至也李之仪以为十二月而德裕乃以为暮春子瞻之词绿而之仪之词则白差小不同复考范成大桂海虞衡志则谓彼地有五色倒挂鸟极驯狎可爱而一种奇者昼则能聚诸香羽间夜分倒悬于架徐出之费氏星槎胜览直云爪哇国有五色收香倒挂鸟则彼地所出皆善收香者也今不闻成都有此鸟疑德裕所谓桐花五色灵禽者别为一物而赋辞则云发长袂之清香掩短歌之孤啭又似收香倒挂将所谓发香掩啭为赋扇也耶余所得此鸟稍大于燕或不类而峭洁婉丽时时倒挂又有不可晓者赋而纪之以俟博闻者考焉

荧惑之精瑶光之星锤自南服命之帝庭曰尔为赤而不为乌又弗肯与燕雀徒既俊而翱洵美且都昔张翁之纂刘佳白羽之知归既胤之以上卿又申锡以朱绯仓鹳帝服尔其相之睨皖徽音厥亦差池调节柔骨巧态多姿其穿叶也若頰鳞之的的其栖枝也若丹荔之离离远则熠熠之曳簪迤则金梭之透机若乃蜂蜡点唇鹅黄裹肚穿袒入袂敛羽就辅如恋如■〈目匿〉或歌或诉又如娇女需责乳哺岂青雀之入懷宁饥鹰之暂依忽倦栖而思奋翹一足以累累夫孰不困于倒悬汝乃敛息而乐之抑千岁之伏翼脑初重而下垂将挂藤之渴猿俯以窥夫深池尔其丙帐聚芬甲夜吐篆霏雾时扑缕烟不断昼既烂兮目成宵复通乎鼻观得非从天女游而啄香积饭者耶惟德惟色皆汝之羸而斯伎之未能彼辟寒之鸟同汝并栖乎妓膺彼以轻而见怜此毋以重而或憎余皆不汝责而恃汝以老将毕吾耳目之好胡溘焉而就冥使房椳之如扫乱曰如意未展珊瑚碎兮玫瑰陨魄沈波际兮娇音在梁有余媚兮葬汝兹麓毋为厉兮吴王小女挟汝侍兮

驯鸽赋

余有驯鸽数十头颇极美丽飞雒循性饮啄得所聊为赋之

惟中国之珍禽有兹羽之殊质貌皛皛而自分性温然其如一秋则篱鞠并丽于浔阳春则木药均华于洛室指未易屈谱不能悉尔乃玉觜朱眸危冠卑趾或冰质而彩其双翅或雪毛而黔其首尾或若汉绣之就机或若商彝之出水山鸡莫调家雉无文尔独驯狎云锦成羣饥而儿女之昵昵饱矣童稚之欣欣方捐心以委质忽耸身而入云舒徐兮停霞之碎剪燁疾兮奔星之迭发忽天乐之鐙鉦知传铃于尻末始顺风而扬声奈回飊之错节若夫昂首耸肩周旋中规婉态柔音逐雄媚雌无别差惭乎匹鸳悒淫少愧乎关雎然而知足知止毋乃天机当抱卵之绵绵若返听乎玄府怜弱雏之艰食更呕哺而不辞苦感主人之微禄日彷徨兮未忍去嗟德曜之肥丑恐终罗乎鼎俎彼夫好水之败以为尔罪端阳之射与器俱碎霜风冽野鹰隼方厉托慈荫于佛日指招提而趋避曷若狂夫袷铁思妇流黄辽阳一信为致君傍辞曰洛中黄耳为日长上林雁素竟茫茫不辞天衢遠銜恩酬稻粱

△哀辞

魏考功懋权哀辞

魏郡魏允中字懋权弱冠为博士弟子者十年试娄第一最后试于京兆复第一遂赫然有海内声明年屈于礼部又三年复得第三人暨廷对为丙科第一人拜太常博士久之特迁吏部司勳主事寻移考功中寒疾医者药之误以死春秋仅四十二而已懋权之父太公用明经仕为（阙）倅垂九载移疾归犹弗具橐有三子皆以文行取甲第懋权其仲也长身疎眉目伟姿槩为人尤简直朗鼎齿在卑穉身犹逢掖而志意雄千古材气冠一世余故起家饬魏之兵事得懋权于诸生中而异之会行屯邢之黄寺堡挟以从懋权所试治举子义虽步骤不中程然识其必千里也已搜其橐得诗数章遂以古文辞进余览之虽未就剗琢然识其必清庙器也故为韵语以赠之至末云还将代兴意对酒颂如澠其属意懋权者非轻浅也既别懋权于举子义益精古文辞益成长岁丙子余与王大参阳德饮于其使院使急足徼顺天録而语之启録而魏某第一者鼓于门不第一不鼓也抵暮鼓发则懋权果第一相与讙叫绝倒久之记此事殆如昨日耳余性不喜当人师有贄币而称门弟子者掩耳避之若浼至懋权之授书而以门弟子礼来虽一再辞然不至作掩耳避者余非谓足当懋权师以余之知懋权深也呜呼懋权今已矣海内之

操七寸管而治举子义者将叹且诧曰吾曹失一指南矣其稍慕为古文辞者将曰失一名士矣其慷慨持论依傅风节者将曰失一赤帜矣廊庙之上念及药笼者将曰失一珍饵矣而余犹以为未尽余所惜者令懋权不死必能为县官作汲长孺韩稚圭其又不死而进之虽抗颜而谈理性若王仲淹张子厚挹汾渭之流而俎豆洙泗之傍亦无艰者今复何望也懋权为博士时数以不依阿师长持议谔谔其语入执政耳执政伎欲修郤于懋权未及发而殒无何懋权之兄侍御史懋忠指摘后执政语绝不可闻后之执政竟虽小示左而旋收之更拔懋权要地夫以执政之欲修郤于庶僚反掌耳其竟者既如此而伎者又如彼天之于懋权当不为无意也博士于格为谏官以懋权之直而为谏官事必争争必得危小者官大者身今去懋权之危而置之格之上以伸之固人也亦未必非天意也懋权之生四十二年矣天固无所不厚一旦而夺之者何也懋权忠于君孝于亲笃于兄弟信于友非有所致夺也夫以余之无似陆沈于朝省恣睢于林野者踰三纪而其猖狂翰墨亦如之晚节傲天子之命以老而卒无所见乃不死而使懋权死者何也懋权既厄于年不获竟二立而中复薄古文辞以为雕虫末技耳不足以烦吾思譬之果然之腹必鼎簋而厌壶箠竟从贸贸者以死岂尽不幸哉余既为懋权惜为懋权之父兄惜为国家惜为世之操觚者惜而悲其志之大而惧其竟泯泯也草哀辞一通手书寄其兄使焚之懋权之輶左而别留藁于篋以示后世毋遂泯泯懋权其文曰

呜呼夫何灵禽三产于丹穴兮长离独翹然于中央冠南金之彪炳兮五彩陆离其文章望阿阁而矫吭兮龠音协而中宫商天老俯伏而告祥兮后夔击石而扬浩倡荫以峰阳之翠盖兮荐以嶰谷之芳穗接■〈口矍〉容与于玄圃兮万目睽睽而拭眦忽葳蕤其吉光兮曾不得终贲乎昭代乃召巫阳而讯之兮将招魂乎四裔阳曰帝意恻怛莫可控揣忽予忽夺焉覩所在阳愧失职自窜大荒发楛布占当涂之庆后四千年文明以昌猗毕氏之树滋兮感土王而来聚白眉皦其独良兮长头伟而最怒瑶姿頽以晚颜兮饶百能修且媻挟象龙之文麓兮指康衢而驰骤焚都梁于木末兮顺飙扬乎天路畴不仰荃之芬菲兮逐臭之夫乃掩鼻而却步夕赐沐于椒寝兮晨播媿乎中涓众方狺狺而逐荃之蛾眉兮争饰辅而胁肩袖攘挽而思■〈才必〉兮尹徊徨而声自吞若朝霞特出于晦霭兮一身当乎三千余岂夸荃之逞意兮实宗祧乎是赖乃大命之弗延兮先秋卉而凋瘁气犹晬晬而神王兮将毋咎此质■肉谢骨而就腐兮嗟众口之甫脍少妻夜号于逆旅兮俨寡鹄之啼风老父晨咽而倚闾兮念舐犊之何从季子目断于青门兮长君魂摇于白下悼人琴之俱绝兮哀埙篥之和寡指苍天而为正兮天胡至此极也岂造物者之好戏兮何喜怒并于顷刻也彼迷阳偃蹇而从生兮兰玉茁而见鉏狐狼交迹于五父兮祥麟诧而遽屠羌淫沴之积厉兮人亦乘之以为虐生与时而终左兮亦焉知夫死之不乐重曰然欤否耶咄咄喑喑太和蒸兮斯汝造明良际兮爰汝好汝得世兮聊以逞世得汝兮以为宝鹏何铄兮扶摇骥何蹶兮中衢得汝兮无双失汝兮不再微辞宛兮

若新曼容杳兮焉在覩伦常之盛际兮汝安能愬焉而遽背鞭鲸馭虹太恍惚兮孰与京洛之重载佺期矫矫称先进兮何似誅荡而友吾曹淮南守厕不得代兮曷若地肺之消摇笑巫阳失职而久遁兮魂偷佚而不可追登徒忽忽有从往兮卒不覩夫灵均之归乱曰人生百年等暮旦兮所贵不朽在末筭兮追琢荆珣为圭瓚兮未器而毁能无叹兮奉此昭昭归汗漫兮化为列星丽天汉兮

商城令孝廉翼亭沈君哀辞

前进士商城令孝廉沈君以葬其封工部铁山公哀瘁之极临窆立逝窃悲其志媿其节而惜其未下寿也撰哀辞一通以侑浆脯君其庶几醮余哉

呜呼在壬午之秋中兮封公先而弃公夕发讣而号恸兮晨策蹇以南东衿绅怅焉其莫可攀兮稚老狂追而巷欲空相与隩商邑之息壤兮尸而祝之循吏之宫惟余掩迹于萎渚兮岁黯黯其将穷偕季子以见访兮悴然墨乎其容谓微言之可托兮悲冥驾之莫从遂衔戚以卜藏兮送旌倾乎吴之渚素旒天矫而前驱兮翼绋弥漫于川塢彼原剧之为侠兮曾何足以比数念临穴之惨栗兮誓以身蓐乎黄土嗟嗟孝廉真死孝兮夫孰鉴此荼苦生人变化在俄顷兮使余臆结而不得吐追崦岭之一夕兮竟倏歛而成今古惟愚子之乏训兮幸得尚公之令女谢姻娅之旧好兮恂恂逊余以前哲夫既政成于商邑兮谓卓鲁其非所屑抚朱弦而三叹兮将以寄荣名于白雪忽超然而遐览兮厌浊世之羈继不悟余之非罔象兮玄珠炯炯其可擷岂司命之见妬兮或帝真之所切逐霞旌之惝恍兮驾云车以飘瞥昔余束发而登朝兮王父辱收之以交谊封公倏乎其玉立兮遂复申乎世契愧斑管之如椽兮咸不朽之余寄既博观于昭代兮曷有如公之善继冠切云之崔嵬兮杂众芳以为佩甫弱冠而歌鹿兮公交车踣躅于中岁分薇垣以百里兮美锦成乎强仕陋夫太史之传滑稽兮曾不覩西门之威惠吾独叹昌黎之志马氏兮感行藏乎三世后死者之与斯文兮能无踟蹰乎前逝乱曰于忽乎嗟哉千载一日兮恻恻不可究质兮何以托惊椒浆兰蒸兮回风灵旗卒莫可凭兮岂不尔思隔幽明兮庶几来歆鉴我诚兮

△辞

植桃辞（时植桃于司刑之署入夏未荣故有感也）

署何托兮幽狴桃胡植兮夕庭忽春徂兮朱夏仆夫痛兮告予以未荣憔悴兮若中霜又若长逵兮初折上枝兮若髡下枝兮若继迎风兮欲有言风过兮咽复吞中夜兮长

太息不言兮请对以臆此何辜兮墙阴彼何幸兮上林流苏障兮的歷七宝楯兮沈深不然归兮武陵径千秋兮畴伐山窈窕兮天地水潺湲兮日月惜尔兮匪处蹇覩质兮薄土大钧兮何忍亦奚恫兮老圃

翫鱼辞

中庭兮寻宸翫翫兮为池修鳞兮下上朱华兮参差綠苹波兮乍惊盼繁英风兮照歷乱下上兮星列参差兮霞绚容何为兮頽且都意何为兮圉未舒聊鼓沫兮就人怳若怯兮潜于虚予懷兮未敢言相对兮各茫然沧波兮万顷目断兮谁传期振袂兮清泠何升斗之足怜（二章旧軼稿也其辞稚矣惜其寄而存之）

徽士有立而其二亲久背者友人沈明臣为署曰白云遗思而以三章系之王子乃和焉

南山龍嵒兮云吐其封北山庵霭兮云栖其胸云之白兮逾舜华两辅接兮阳阴以和阳阴和兮蒸霖雨润汝膏汝兮俾无苦云之来兮况有倪云條去兮返无期云有族兮承南离轮困兮五色葳蕤爵以卿兮非汝好饰以喬兮汝告予以弗耀重曰昔贤瞻兮亲在其下今我瞻兮亲于何所安得从龙兮薄太清引吭哀鸣兮为我少停

弇州续稿卷一

●钦定四库全书

弇州续稿卷二

（明）王世贞 撰

○诗部

△拟古乐府

白云謠

白云西来弥漫四垂虽有赤麓畴能不迷将子暂留有桃如饴

穆天子謠

予洽东夏偕化人居岂无羣后唯子是仪执袂而腾不以胫驰

易水歌

荆卿将入秦客送之易水荆卿歌焉而客和之

易水立兮虹縹天壮士一出兮秦为燕

垓下歌

羣雄伏兮嬰授首纵孤豚兮嚙人肘虞兮雅兮弃若遗天亡我兮将告谁

大风歌

高帝幸沛宴父老歌大风中大夫贾跪而和焉

大风发兮扬天威一剑游兮万乘归愿得五臣兮赞无为

秋风辞

武帝渡汾河中流击楫而歌秋风文园令相如跪而和焉

秋风谡谡兮霜未飞草木忍雕兮待恩晖晋有璧兮汾有珠君心恻兮自敷腴金
钲兮雷大鼓神鱼跃兮黄鹄舞志谈荡兮媒慨慷来日短兮去日长望岵嶽兮耸双龙恭
已无为兮垂舜裳后天地兮凋三光

李夫人歌

人耶仙耶宛然而来者畴为汝之权耶

仙耶人耶翩然而去者畴为汝之身耶

平城歌

汉使来胡马死汉使归死马起生何致致汉天子

其二

曲逆腹如脰髓不能出一奇彼有阏氏此有戚姬

其三

开一角纵汉兵汉天子有神灵

其四

汉天子何神灵韩彭死冒顿生

其五

阏氏妬妬汉女单于乐乐翁主金珠纨縠压驼马

乌孙公主歌

妾人自惭兮诸侯女谬托嘉名兮汉翁主宠我饵我兮作远婚匈奴贱种兮号乌孙
昆弥老兮非我偶少王壮兮实余后念欲一死兮为国忧失身苟活兮贻国羞丞相何人
兮爵通侯

躡林歌

六骥马白羽箭嫖姚物故天助我单于自将会躡林左贤一矢贯两禽

敕勒歌

银服匿紫醪酪宁胡阏氏奏汉乐北风掇羊一万角十道壮马不得索

娇女诗

娇女好姿首不为他人媚阿母手簪花花掷弃之地作女任汝骄作妇恐不易

三洲歌

阿母见钱喜女今见钱悲金铸估客身不得好心期

其二

万斛峩珂舟人道是珍贿一头载红妆一头载绿蚁

其三

舡过第三洲日落门前树定有可憎人依今不肯住

襄阳蹋铜蹄

襄阳老龙堤爨石铁作泥骏马骄凿落真是蹋铜蹄

其二

买得樊城酒来醉襄阳伎人道江波险依道是平地

其三

宜城七十里朱楼与云齐无地着酒馆眼饱肚中饥

其四

醉倒习家池扶郎郎不归道依工下泪去看羊公碑

宿阿曲

天门三十六地户七十二门与户户一一一天帝

石城曲

石城诸郎子结束种种新眼角多留媚是依昨夜人

其二

广陵细腰女搵搵裁一束不敢望同生一宵抱亦足

莫愁乐

家家迎莫愁人人说莫愁莫愁歌一字恰恰印心头

其二

十万作纒头莫愁不肯留银缸黯欲尽翻为莫愁愁

休洗红

休洗红洗多渐成碧裁作侬衣不中饰红随逝水杳不归何似当初但为白

千里马

千里马胡不疲五帝渐以骤三王不免驰焉能饱食安步歌皇羲上乘此马将何之

轶深井里门行有叙

余读太史公所著刺客传意独取聂政谓养母而不以身许人孝也母死而后捐七尺以殉所知烈也弃髦百镒之金而却之廉也取万乘之君若相于夹铍之中若承螭勇也死而皮面决眼使不可识以全其姊弟也其姊盖深知之故捐脰以伸其名于后世虽然政非特欲全姊也意实欲全严仲子于何知之其言曰多人不能无生得失生得失则语泄是韩举国而与仲子为雠之言也所以皮面决眼使不可识者此也嗟乎使豫让之

捷若政必能快意于襄子以下报智伯荆卿之谋果若政必能轻身以刺祖龙而匿燕丹之遣惜哉前乎此而未有政也后乎此而政不作也据史刺侠累因并韩哀侯传误

韩国嬖大夫轶深里中客车马委巷过贵贱不相敌长跪觞母前别致金百镒为母隐狗屠未敢轻七尺惟有径寸丹耿耿桂其臆母死服已除慨焉欲有伸大夫不共天侠累相且亲偻行至韩国仗劔入其闾长戟五百队戢戢若鱼鳞傍睨陛楯间眇若无一人挺刃不三挥立斫其君臣所当悉糜碎愤血射青旻皮面屠出肠顷刻捐其身法当购主名千金尸诸市亲友皆避匿乃独惊其姊抚尸独呼天是轶深井里聂姓以政名心借严仲子捐躯为其友毁形为其姊弟昔从母生姊今从弟死仲子愿已酬株累亦可矣安能顾区区千秋掩贤弟我欲竟此曲一曲酒百卮宁如豫与荆身歿有余悲

信陵行

太史公传四公子吾独取信陵君无忌焉夫孟尝平原春申皆以国重者也信陵能重国者也信陵在魏不亡亡信陵而魏继之悲夫三公子非真能下士也所下亦非真士也真下士者一信陵君而已其声施后世至高帝而犹为之置守冢有以也夫

侯嬴夷门监朱亥猪狗屠薛公卖浆者毛公一博徒公子枉见之腰膂屈若无上客气未平下客眼为枯疇击晋将军疇窃宫中符疇能动公子趣驾返魏都一战王齧走再战蒙骜逋邯鄲复称赵大梁不为墟五国所宾从响应复景趋秦间一何亲令弟一何疎秦王一何狡魏王一何愚少来不纵酒亦不恋名姝称病不复朝谢客日都卢宁为汴郊鬼勿作咸阳俘英风感异代天子酹其丘可怜安厘王不得麦一孟客从咸阳来几作诸侯奴亦言骊山足久已窟妖狐

鲁朱家行

太史公游侠传其在战国者皆别见之所著鲁朱家以下不数人而独朱家最贤其巧喻奇举善藏不伐大指出鲁仲连而卒能自保牖下田仲剧孟稍祖述之郭解翁伯不尽得其意而加以阴贼行之平世宜其及也

朱家昔在汉与高帝同世为侠不沾沾中心实自喜藏活豪贤以百数余人不胜纪斥买十钳奴中有季将军画策谒滕公上为赦其罪得复拜郎中将军既尊贵若遗忘故恩朱家终身不相见亦不复自言将军与弟心共乃师其意一勇一诺闻诺者至死长负愧侠儿有田孙有剧任侠不已郭翁伯嗟嗟膂断族亦赤

鸱夷子行

太史公传货殖以十数余独取陶朱公陶朱公者鸱夷子皮也夫其佐句践灭夫差为田常殲子我所至必成功功成而弃之若遗出筭致贿数十年而三散千金尚能听息于子孙以致巨万盖先几若蓍蔡出没变化若鬼神矣度其后先所更歷当且余百岁或云七雄灭公变名姓卖药市中盖仙去不死也

计然有七策少伯五用之刍粟如丘山坐使会稽肥灭吴既强越弃之忽若遗扁舟适齐邦自称鸱夷子皮为田僂子我阴使齐社移忽复谢所宗以其重宝归陶适天下中众贿所化居黄金直千万三致三复挥少子诛了不悲老氏张翕吾所师神龙变化那可羈安用区区相印为

雁门太守行

太史公传酷吏吾独取郅都都公廉忠信而不得免坐临江王冤死耳夫临江王故皇太子也都以景帝多猜疑其臣即予纸笔上书而上切责以囚安得上书谁与纸笔者且及我在而貳其心为异日地故禁弗予而王得之魏其侯乃自杀矣都亦不得为无罪第不可遽坐之酷耳至其面止上搏熊而救贾姬揖丞相条侯岂齷齪寤成义纵伍都为雁门太守匈奴畏之不敢近边者终其身至为偶人象都纵骑驰射莫能中其见惮如此嗟嗟岂易言哉

太守未行屯与敌共雁门雁门得太守始复为汉有太守来匈奴走碧眼番儿射雕手目曠舌噤畏木偶临江死太守生长信官中气未平太守死单于喜未央宫中上拊髀曷不早赦临江王孝子忠臣两无伤

东方曼倩行

太史公传滑稽吾独取东方生焉所欲称者具夏侯孝若赞矣彙括其事歌之

孝武帝时有东方生长九尺余月请一囊粟不能并侏儒用奇钓上闻待诏始离公交车射覆多巧中往往解上頤舌折郭舍人戟止馆陶儿拔剑割伏肉殿上或小遗恠哉辨秦狄驹牙表降夷歌郑必终雅为谏不废直偶尔乞大官无官意亦得上赐颇不费梁肉金钱帛悉送宛若家相与行交接海鸥一世主儿戲诸王公首阳呼为拙柱下始云工

宁学公孙丞相脱粟不令春厨车载渭桥巫蛊满东宫挥手谢世人竦身白云中

颍水浊

颍水浊灌氏族灌氏族魏其僂结交莫结侠结侠身似叶使气莫使酒酒中三尺铁
捐身为名名不美当时悔作有心鬼不教田蚡磔东市

莫跋扈

莫跋扈付丁旰莫俯张付桓康半面哭半面啼死与生在一时壤长城犹自啮蚀明
月我灭我

古押衙

蛙黾在沟中求吃天鹅肉仙客小鰥夫思从宫嫖宿明珠故自珍龙颌有逆鳞富平
古押衙一片有心人一片心几腔血杀人灭口身并灭淮西有李朝有裴七尺不售君王
奇坐忍万姓皆攢眉

施殿司

施殿司不了事可怜一片心化作千载泪窃国误国凡几辈夜博毘毘满堂醉千人
鬻眉万人指不见头颅化为水我疑古来少劔客不然劔客非男子

贾团练

循州窜漳州窜懊恼吴团练不见贾团练芜湖覆临安覆生憎陈都督死为贾都督
当时失刑赖虎臣虎臣小臣何足论惜哉宋季终无人

顶生王

顶生王福德圆三十二相种种全生时七宝俱见前遂冯金轮王四天一天一王二
万年帝释之宫须弥颠天厨天乐天无边愿分半席长周旋欢娱不足贪念至欲逐桓因
夺其位咄咄未絶倏堕地七宝俄然尽捐弃铁围城中火方炽烧君四大能不悔

阿修罗

阿修罗报生大海中金银为阙琉璃宫五欲约畧人间同寿亿万岁永无终犹恨不及帝释天贪嗔在心吻吐烟耸身直上须弥颠两手欲掩日月圆却敌城头戟如霜四天奔波悉勤王法华宝经置中央修罗万众倏败亡藕丝中细不得藏事已非空倨骂缚汝不杀特汝赦何颜复立须弥下

琉璃王

琉璃王母为波斯匿王女宫中小婢称翁主不产麒麟产狼虎儿时漫陟狮子座释种小语摩诃祸琉璃王嗔心一起火燎冈十万劔戟横清霜倒曳宰堵躡佛场可怜诸释种不蓄四兵抱头死血作阿耨池头水云胡破戒呼婢子琉璃王水中有火如汝嗔火车拥入阿鼻门嗟嗟能仁未为仁死不能救称宿因

无忧王

无忧王昔作童子戏抔沙奉世尊遂登铁轮位以此夙因皮肉窟宫中为欢不成娱三千娇女并就屠拔将蔑戾车生主阿鼻狱镬汤与火床碓剉诸业毒但入不得出入者已非一不独祸平人行复赚王入烹烧恶狱主划平生阿鼻昔作无厌杀今作无厌施发取八万四千佛舍利立造八万四千宰堵波一夜役鬼神为我分置娑婆九十六千亿黄金不如当时一掬沙金器银器及铜瓦不如最后半河摩勒果摩登伽鸯崛摩一念回向成阿罗福德可似人王多倘不蚤悔将奈何

乐府变十章

叙曰不佞于嘉靖末盖多浮沈闾里云而以尝备皂衣西省故时时闻北来事意不能自己偶有所纪被之古声以附于寺人漆妇之末其前集取亡害者半留之几欲削去其余既复自念三百篇不废风风人之语其悼乱恶谗不啻若自口出乃犹以依隐善托称之诗亡然后春秋作至直借赏罚之柄而不闻有议其后者秦兴而始禁偶语焚载籍然不久而汉竟洗之以国家宽大显信其必亡虑于它可推已余老矣夫又安能刺刺颊舌之恤乃复收而录诸篋笥不敢希太师之采庶几以备异时信史一二云尔

楚愍王

楚愍王坐武昌金瓶酒寒夜未央中弦调移角奋扬铁椎交飞血从横可怜玉匣黄金床不得全殒置中央太子距跃不下堂美人如花列两行含辛饮泪娱新王焉用擗棘茨垣墙御史来鼓彭彭黄纸当头槛车迎长安大人食泉羹食泉羹语泉子而泉之父亦如此

黄河来

黄河西来昆仑小复前汇玉关自是白羊楼烦汉将所筑城犬牙其间（一解）敌阑入之不休橐駝騊駼牦牛控弦穹庐四周自我失新秦州与敌杂治共繇（二解）大夫大夫曾君忧虞人吏买马具车诘朝慷慨就途上请誓劔玺书（三解）咄嗟大夫不覩长安之城武安魏其日夜引绳断断千金偏行奚为金吾白发之赫哉天威（四解）咄嗟大夫不见兵出玉关乃见藁街之西不悬郅支乃悬大夫万水东流鱼西上钩谁独为敌人快私讎咄嗟大夫乃为相君快其讎（五解）咄嗟大夫气尽不复謹謠离离山下苗托荫山上桃风吹桃根堕苗行代桃焦可怜生无常生死借人骄（六解）

商中丞

喏女商中丞胡不冠而惠文逍遥坐高堂谁令六师女张皇高天下有白日不照将军之门喏女中丞白日又不照未央肘腋之祸私所详欲言未言以彷徨喏女中丞曷不为良臣势迫难为良念欲为忠臣忠臣罹祸殃甲士三十万东西若风云喏女中丞自有君子六千人不愿隶大将军愿隶主上察不臣喏女中丞雷霆蔽天来一何殷殷不收脱女惠文之冠三木而囊头朝备席上僚暮列庭下囚喏女中丞养犬吠发宵人之奸后宫乃得脯腊养犬以饗餐喏女中丞编槿衡御阑入之暴臣陬者乃得剪撤编槿以为薪诏使驰入壁■归定遠符前庭族将军后庭出赦书肉如嶠賜大舖健儿擦血马歎珠还我冠冠中丞争呼四望追锋车喏女中丞覆盆之光独不开饮丝茹纶向泉台日出之日胡为哉

石头变

百鹞能击鹰百蚁能嚙虫石头众儿郎晨起各汹汹劲足扶老拳立蹴肥司农可怜肥司农七尺气如虹小如一孤雏引脰悬高空捋搯大司马蒲伏中山公鹄立羣公卿鼠窜血肉中九日不解甲十日不开营金帛捆载来坊市无人行黄纸诏书下朝鼓何瞳瞳尽赦诸军罪追夺司农名司农孤椽归儿女泣吞声诸军欢呼散大酒肥羊羹杀人不抵偿不追首事踪司马不削官中山不削封扬扬众公卿还复休其官弱者饿欲死强者醉

晋天时无贺六浑焉知散财结少年

暴公子

汉武帝时有一暴公子自称直指使者来治齐鲁黄纸为前驱从史持绣斧使者如雷霆雷霆当头下使者未行来墨吏纷纷解绶去田里手即平准书口即冠军语使者既行来墨吏不肯去去者乃老博士扶服道傍戚戚仰天大泣涕有何乡老公积镪万千念非■〈日间〉氏豪不敢属县官告密一见闻束縛妻子若牛羊东家盗遗骸西家斲古冢来证此老公就死不得控念欲北走边严刑重阨出念欲南走越汉地今为一念欲向天上横天置罗网念欲蹈泉下妻子恐偕徃蓟门使者居中有夜行途金银络绎去但去莫次且乌毕逋赦书驰归来相贺归无家安用主上金鸡为

大地变

黄河自天浩荡东奔破泾浊渭以趣龙门仙掌失跣铲其冠莲二室终南划吻室咽富媪躩踞痠痛遍体函关改途砥柱徙水连城拉然峩薨倒悬千井横流万灶罢烟土欲压人不避豪族何所非髻谁适为服遗火四焚与怜接照人鬼竞号莫辨两曜雍并之黎将靡孑遗粥我衣我惟帝是祈帝坐细旃上相相焉曰古尧汤数莫敢奸灵蓍之囿不产恶草岂伊善良而遭凶天呜呼天乎存不恤亡而亡是讎且吾已矣夫

辽阳悼

涿水左三千里室县罄地如赭东邻初种禾半岁不得雨禾苗向下生不复肯出土西邻改种麦一雨六十日麦根萎烂尽何处结颗粒邊马来边马来令女力尽负弓刀那能顾锄与犁我欲食榆榆无皮我欲齧堇堇为泥爷易儿儿行抱爷啼爷当幸饱死儿死终苦饥曷不覩建康城中三万人白刃手血司农臣司农致白粲少府致金钱绫锦出北巷货贝出南廛索饭得脯索浆得酒苍鹰击攫靡取不有耿雉■〈ㄛ离〉襪棘螫黄口可怜辽阳忠义儿白骨相籍朽

直中丞

死事易成事难君不见直中丞披龙鳞食马肝万死不死脱狴犴胸中无黑白止有径寸丹中丞未下马安得中丞与白日俱出来照我中丞既按部安得中丞与白日俱向暮中丞嚙贵豪不能令贵豪助弱民但纵逸口狺狺中丞寬租税不益田家饘粥但饱吏

胥腹小家裹干糗日日寫讼词大家不得寝金钱米帛出参差一分贿吏胥一分与小家一分充餽赎从此转无涯讼师人人富但恨无十腕两腕指节痛吏胥人人富但恐作富人复来小家讼小家人人富作富不得均展转自为閩江南百万户户户泣且诉生不爱冰与雪但爱得雨露中丞自廉亦自直百损不得希一益咄嗟哉齐文宣未可忽龙逢比干非俊物

太保歌

北山虎而翼南溟鲸而爪生世不谐锦衣帅作太保太保入朝门缙骑若云屯进见中贵人人人若弟昆太保从东来一步一风雷行者阑入室居者颌其颞太保赐颜色黄金立四壁一言忤太保中堂生荆棘缙骑走八方方方俱太保太保百亿身所至倏如扫鸡鸣甲舍开争先众公卿御史给事中不惜称门生欢饮丞相邸刻臂为父子生非真骨月子贵父不喜但呼太保名能止小儿啼鬼伯一何慙荷索便相催县官为震动急救治丧事少府供金钱东园给秘器后帅朱都督特遣护其家起冢像阴山焱炭插云霞吊客虽以繁不及贺者多可怜堂中哭不胜巷中歌今皇帝时御史白发阴私称诏籍家财金宝尽流离妻子逐归故郡兄弟作长流家人大小鼠窜不窜作俘囚赐冢踏为田松栢摧为薪已无牛羊地可上何云近前太保嗔金鸡鼓两翼万户初帖席土马行不得万人各加额有权勿遽欢无权勿终酸无权保庐井有权不保七尺棺我歌太保歌贵者蹙其颞已令前人后人笑莫令后人笑后人

袁江流钤山冈当庐江小妇行

汤汤袁江流截嶮钤山冈钤山自言高袁江自言长不知何星宿独火或贪狼降生小家子为灾复为祥瘦若鸛雀立步则鹤昂藏朱蛇戢其冠光彩烂纵横孔雀虽有不能掩文章十五齿邑校二十荐乡书三十拜太史矻矻事编摩五十天官卿藻镜在留都六十登亚辅少保秩三孤七十进师臣独秉密勿谟八十加殊礼内殿敕肩輿任子左司空孽孙执金吾诸儿胜拜跪一一赐银绯甲第连青云冠盖罗道途倬直不复下中禁起周庐凉堂及便房事事皆相宜文丝织隱囊细锦为床帷尚方铸精鏐胡盃杯苾篱雕盘盛玉膳黄票封大糒五尺凤头尖时时遣问遗黄绒团蟒纱织作自留司匹匹压纱银百两颇有余煎作百和香染为混元衣温凉四时药手自剂刀圭日月报薄蚀朝贺当暑祁但卧不必出称敕撰直词御史噤莫声缙骑勿何谁相公有密启为复未开封九重不斯须婕妤贴当胸密诏下相公但称严少师或字呼惟中县官与相公两心共一心相公别有心县官不得寻相公与司空两心同一心司空别有心相公不得寻昔逐诸城翟黄冠归田里后谄贵溪夏朝衣向东市戈矛生髻咳齏粉成睚眦朝疏论相公槿榜夕以至宁

忤县官生不忤相公死相公犹自可司空立杀尔凌晨直门开九卿前白事不复问诏书但取相公旨相公前报言但当语儿子儿子大智慧能识天下体九卿不能答次且出门去不敢归其曹共过城西邸司空令传语偶醉未可起去者归其曹留者当至未九卿面如土九卿足如积为复且忍饥以次前白事司空有德色相公直庐喜司空稍嗫嚅相公直庐恚不复问相公但取司空旨县官有密诏急取相公对相公不能对急复呼儿子儿子大智慧能识天下体一疏天怒回再疏天颜喜九边十二镇诸王三十国中外美达官大小员数百各各黄金铸一一千金直南海明月珠于阗夜光玉猫精鸦鹘石洒黄祖

■〈王母〉绿红紫青靺鞨大者如拳蕨蔷薇古刺水伽南及阿速瑞脑真龙涎十里为芬馥古法书名画何止千百轴玉躔标金题煌煌照箱篋妖姬回鹘队队皆殊色银床金丝帐玉枕象牙席杏衫平头奴丝滕双蹴鞠酒阑呼不见潜入它房宿生理冯子都烂煮秦宫肉生者百丛花歿者一丛棘近即龙床底远至阴山后凡我民膏脂无非相公有义儿数百人监司迨卿寺以至大节镇侯家并戚里逶迤洙泗步灿灿西京手老者相公儿少者司空子谓当操钧柄天地俱长久御史上弹章天眼忽一开诏捕少司空究核诸赃罪三木囊赭衣炎方御魑魅金吾一孙戍余者许归侍意犹念相公续廩存晚计舳舻三十艘满载金珠行相公船头坐谁敢问讯征啸傲郾坞间足夸富家翁司空不之戍还复称司空广征诸山材起第象紫宫募卒为家卫日夜声汹汹从奴蹋邑门子弟郡国雄不论有反状讹言所流腾宗社万不忧黔首或震惊御史再发之天威不为恒御史乘飞置捕司空至京司空辞相公再拜泣且絮今当长相别儿不负阿父相公心自言阿父宁负汝不识一丁字束髮辟三府月请尚书奉冠服亚汝父汝父身不保安能相救取重息监行客少入别诸姬归者吾而配不归而鬼妻诸姬心自言司空何太痴归者吾而配不归人人妻还抚诸儿郎阿爷生别离金银空饶积高与钐山齐不得铸爷身及身儿始知儿郎心自言阿爷何太痴有金儿当使无金儿自支监行两指挥各携铁银铛程程视洩寝步步相扶将有酒强为歌无酒夜彷徨秋官爰书上顷刻飞骑传一依叛臣法砒死大道边有尸不得收纵施羣鸟鸢家贖巨千万少府司农钱上宝入尚方中宝发助边不得称相公没入优老田片瓦不盖头一丝不着肩诸孙呼践更夕受亭长鞭僮奴半充成余者他州县夜半一启门诸姬鸟兽窟里中轻薄子媒妁在两腕相公逼饥寒时一仰天叹我死不负国奈何坐儿叛傍人为大笑惜汝一何愚汝云不负国国负汝老奴谁令汝生儿谁令汝纵舆谁纳庶僚贿谁腴诸边储谁僇直谏臣谁为开佞谀谁仆国梁柱谁剪国爪牙土木求神仙谁独称先驱六十登亚辅少保秩三孤七十进师臣独秉廊庙谟八十加殊礼内殿敕肩輿任子左司空孽孙执金吾诸儿胜拜跪一一赐银绯甲第连青云冠盖罗道途以此称无负不如一娄猪食君圈中料为君充庖厨以此称无负不如一彘

■〈羊历〉食君田中草为君御霜雪以此称无负不如鞞中鹞虽饱则掣去毛羽前嚙决以此称无负不如鼠在厕虽有小损伤所共多污秽相公寂无言次且复彷徨颊老不能赤泪老不盈眶生当长掩面何以见穹苍死当长掩面何以见高皇殓用六尺席殓用

七尺棺黄肠安在哉珠襦久还官狐兔未称尊一丘不得安为子能负父为臣能负君遗臭污金石所得皆浮云

行台芝有叙

余尝读汉史元封二年有灵芝生于甘泉斋房人主异之下乐官采其事被之乐府所谓斋房产草九茎莲叶宫童効异披图按谍是也甘泉往往多淫祀而元封自张汤赵禹后文网猬密酷苛之吏争献其技民至重足而立怪哉之告则有旃何所感而为芝乃今天子圣哲道化隆蔚五时无渎百神受成而侍御某君奉绣斧出按某地四履所临庶狱庶慎平亭伊始雷雨开霁讴謡继之星月垂灿俄有白芝九茎产于行御史院之前荣英英如玉叩之声若句磬三事大夫以至裾绅褐博咸嗟美其异形之咏歌流于吴苑余不佞考之瑞命纪云王者仁慈则芝生抱朴子曰白云芝白盖二重味甘辛小苦服之体轻意者某君能布上德意牛斗之分其民纖巨无冤气愁思以来兹应耶夫岂唯君一人葆生之饵将国家大庆请缀数言以俟太师之采

斗气何辉辉御史乘驄来雷雨维有解救宥乃得施御史未受牒蒙气鬱不开御史受牒竟星月朗不亏（一解）凜凜栢台霜百卉皆避之何意三秀草韡韡吐葳蕤亭亭如车盖皎皎涅不缁又似三素云剪为仙人綉（二解）商山一何卑祇用以疗饥句漏何狡狴百种神且奇御史承德意君王霈大慈上等尧除莠下協舜龄期（三解）

古乐府六解寿王夫人

夫婿宦东方千骑最上头夫婿归去来素封千户侯（一解）夫婿称邦君夫人君夫人内政肃不器外政始如神（二解）夫婿工治经夫人工治生为德于永嘉争先仁义声（三解）有子读父书有妇代姑职有孙复娟娟美于双白璧（四解）有橘大于斗有桃大于升二八更递侍鼓簧复吹笙（五解）三十帔已霞五十鬢未秋主夸百年案客夸万年酬（六解）

中丞行当雁门太守（七解）

中丞行者吴人为郭公思极作也公善政在三吴非一而以谗解节当徙镇吴人挽留之不得故为乐府歌之

陆行疲车马水行费舟航壮男罢耕耒小妇抛蚕筐商贾为废市担者弛其装老父

携弱儿踉跄趋且僵一州十七邑倾都以彷徨借问何所之云送我郭公（一解）郭公未下车十室九尚空郭公下车后流徙即其宫朝下赈粟书夕上蠲租章去彼蝨与螟树我稻与桑一檄饱我饥再檄起痍伤三檄潢池内帖帖波不扬（二解）连城千万家家有郭公百吏当灏案案案有郭公原田锄春雨公若亲劝农横海出楼船公若亲在行弱者忘其弱强者讳其强日为郭公日霜者郭公霜（三解）初旭映东嵎郭公坐堂皇出则剖盈庭入则理堆床退食无三簋解劳仅三觞目不覩优施耳不听清商席客唯笱豆实筐鲜玄黄不发居间书不畏黄门郎（四解）谁妬我郭公嗟嗟彼狡童彼狡亦何知畴能掩帝聪臣某诚无状臣斥分固当贝锦亦有丝蕙苴亦有囊浮尘翳明镜磨之当益光重褰襦都梁发之当益芳（五解）德星在女牛一夜徙他方甘霖正霖霖改润隔滕秧蹇驴困康庄骐骥眼大荒伯乐一相顾天路遂腾骧愿公健匕箸愿公寿无疆公以袞衣来竹马满道傍今日悲相别别后莫相忘（六解）

三节妇行凡五解

两儿奉一父累累三少年数促理则绵欣欣在黄泉（一解）两妇奉一姑皤皤三华颠神往形尚留戚戚總帷前（二解）死者当不生生者须竟死冥冥剖冰心戚戚报君子（三解）天上亦有星地下亦有山山山粲者何万古同精坚（四解）我歌节妇行采风荐彤史后有曹大家前有刘中垒（五解）

弇州续稿卷二

●钦定四库全书

弇州续稿卷三

（明）王世贞 撰

○诗部

△四言古诗

瑞禾诗瑞禾美司马屠氏也忠而见绌寛慈靖终爰有嘉禾产自窆封是故美之

蜿若游龙矫若归鸿入自巽方鍾为幽宫无从藁蕘无蔓迷阳芄芄嘉禾产此高冈

此燥而冈彼湿而杭恶乎宜乎天定发祥在昔圣臣诚不见明皇灵动变郊迎返风同颖之禾唐伯荐王王不自有以归姬公唯子之昔经营四方日笃不懈拱翼世皇角巾东归口不挂功含弘树惇惠此家邦是故大归上启帝聪我闻寸田可菑以耕培尔孙枝岂惟子躬是穰是褰其滋必丰请用荐尝标此苾庸

燕燕诗

燕燕于庭其掠也適人以为乐我知其忧惟垒之葺而翼子是谋 鱼鱼在藻其泳也逸我知其忧人以为适惟餌之芳而口腹是迫 人乐其忧我则知之出与利投剧与名偕或蕃子孙或寿考惟祺 我忧其乐人安能度利令智昏名令实削或子孙我役或寿考我缚 忧乐之来匪我敢抡我不自天亦不自人澹兮寂兮以葆厥真

右燕燕五章章六句

帝省礼门颂张母也母寡而贞底孺于成行年七十祝之使养禄也

帝省礼门爰毓之祥俾女于宋而妃于张宜尔宗祧宜尔舅璋 帝宁不勤恤而张是痛有凤九苞殒于天衢琢之磨之试以百罹 莫苦匪荼视汝则芥莫畏匪醜视汝则醴先君之思以勗孺子 伯孺而穀先君所衷夜如何其诵声隆隆惟此诵声若自杼中战战栗栗以保七袞虽则七袞皎若一日祝之厘之不家食吉

右帝省五章章六句

朴庵诗为顾生作

子有精庐有巢是师结绳为枢剪茅而茨太朴不琢以还吾天虽有输倕巧曷施焉太朴不饰以保吾素虽有五采曷如其故蛾眉自妍混沌畏之身既隱矣安用文为子庵曰朴请对以默诗不云乎不大声色

贞以沈魄荷蒙真师上援圣祖大士慈念拯拔方图旦夕供奉而喜知识殷子以补陀落迦山全像见赠妙好端严种种具足感慰之深聊述四言一章为谢

昔我大士无央劫前从音入道超谛妙圆上等佛慈下同众虔三十二应一一现全烁迦罗首八万四千清淨宝目母陀罗臂毛孔世界亦复如是普度有情广施无畏爰有

巧工陶甃为器补陀落迦色肖咸备如佛世尊说法切利旃檀表忆妙好无异惟贞小子
下土矧臣赖我慈祖赐拔沈沦甫事薰修忽征胜因悦挾沈鬻中现金轮始悟寸衷欲仁
得仁貽者商京结善识根灵鹫之颠舍妄归真

以双玉杯假敬美暂留赵吴兴所书莲花经成此

汉有双璜以为双笋其别若缕哲泽而古侍女于行酌彼清醑吸醇畅馐如覩伯雅
汝奉莲经佛所秘语吴兴笔之则羣玉府我幡我诵如奉慈父紬女缁縠又似覩女比及
三载各复其所由证入悟筌蹄是舍而况兹器视等直土吾言亦赘一笑首俯

世贞旧尝供奉三教圣容朝夕叅礼近慕鍾吕七真之事方拟募工图写而信阳王
太史忽以元人名迹见遗精彩焕发惊感之余聊成短述以谢

惟古先生无上法言悯众为卑超万为尊我祖文宣师资玄元因机现用派别流奔
迷者相讎悟则一源我仪图之在三谊存玄元之秘谁欤挾焉东华震器云房仍孙吕创
大还混迹乾坤刘辞贵卿不娶嫁婚是皆入室夫岂窥藩默开重阳遂探化原匪禅而禅
高研道园法子法从上为喆昆七叶金莲况涌朝暎畴萃一图如百宝盆悟大叅同辟不
二门玉局侍臣遥种慧根用彼昭昭启余昏昏何以酬之至仁无恩

应襄王教题木石居

遠游不御黼袞不加有楠不刻有阶不华坐倚盘石行倚乔柯其去野人能复几何
一闻善言沛若江河慕彼侧微削此巍峩仁遠乎哉欲之即至舜何人哉为之即是

应襄王教题观囿榭

阳春被天冠此王圻吾王不游民何以怡循览灵囿亦有灵台灌木崇霄祥卉覆阶
白云英英黄鸟喈喈育物对时靡惊不谐陋彼田齐周文是仪

张伯子五十寿言

昔在世皇肃外台纲谁其苾臣乃有二张等彼二荀叔慈慈明慈明内润智以仁藏
积厚而鍾伯子发祥惟我伯子隼声英英立破万卷躡百氏场吐为艺文陆离洗洋中权
所指锋孰敢当薄游贤关如锥处囊天慙挾扶畴适雄飞敛尔壮心杜尔德机不顺以施

日胜而肥懷珠川媚蘊玉山辉君曰宁尔容彭所希黄金为饵同类为妃驂虬御鸾翱翔
九围人有恒言五十知非君知其非大雄是皈离照中天万磷息辉谁缚谁解何顺何违
六轡在御惟汝指麾不慕独觉宁希小乘不贪转轮何况小荣着为微言撇捩纵横荡乎
漆园又似淨名其子和之玉振金声独立须弥俯挹太清怒马脂车如袭百蝇封人之祝
如一蝇鸣我有半偈乃驻君听四十九年无法可称杜口毘邪息心化城大家团栾共证
无生

石禅斋诗

友人卓征甫作高斋曰石禅居士欲攀天目山柴煨此石作灰不若以数语解之

以禅呼石石不点头指石为禅禅笑不休禅亦强名况石赘疣石在汝臆滞汝西游
曷不椎碎置之东流自在无碍荡荡悠悠汝既坚顽如石水投取指譬月求劔刻舟石言
则妖我何哓哓飞霰洪垆才点即消

中泠馆诗

天一之精汇为天潢播于人间洵广且长九曲曰河九派曰江止水之潘中泠最良
武昌王孙凿井其城濯彼心魄导之清澄爰荫崇馆爰饰嘉名何必金山始为中泠惟此
中泠与阿耨水长安帝城乃有二异时无万回且鲜太尉沈冥其中曷识真味

△五言古

二友篇

吾取友于天下李于鳞以文字实伯仲焉杨仲芳之以节义相切劘亦庶几也不幸
中道弃我今者頼天之灵元驭拔我于雕虫而进之太上刮濯而就之我友也实我兄也
敬美匡我保我我弟也实我友也元驭尚矣收敬美于出处之后夫谁能以僭讥我

王宗伯锡爵

太原吾闰彦弱小负灵植三馆抗清标八座回正色步武鼎铉间弃之如遗迹荣名
冠寰宇紛绅所趋翼望望若将浼空空类无识五十孺子慕扳哀变原栢伊余麻中蒲谬
充他山石晚途乍折节感此三不惑芰荷良可依薇蕨足充食荆玉竟夕辉恐为世工得

吾弟学宪世懋

吾弟一世才孝友复天性感慨家难余需徐傲时聘兴文良鬱跂流翰亦彪炳熟复循吏篇所莅必响应人诵关西学家传豫章政一戢秣艳规夷然遂无竞稍阑坟素业颇寄农圃兴所患余有身衰来遂为病起色待尔发肉枯宁天幸窃从毛君教相将访真境

重纪五子篇

余昔为五子篇则济南李攀龙吴兴徐中行南海梁有誉武昌吴国伦广陵宗臣其人也已而其友稍益则为后五子篇豫章余曰德歛汪道昆蒲圻魏裳铜梁张佳胤汝宁张九一其人也盖三十年而同矍圃之观去已半矣今其存者位虽有显塞而名业俱畅志行无变盖惓然欣然之感一时集焉故为五章以追志之

汪司马道昆

司马诚国器豁落不庸庸兼济文武资南北倚折冲爱弟若一身怜才见春风五十佐元枢犹在塞与通高卧黄山表健笔吐如虹珠玑走荒裔金石耀幽宫如发汲郡藏孰当檀左锋自余友太原恣然畏雕虫济南贵叶玉物论时不同所以千秋叶唾手归宗工

吴叅政国伦

昔我先司马列棘遴楚士于时独明卿哀然拔其萃拓落厌时趣纵横富篇制已窥正始格复探作者意失鹄必反求贯革有余锐颇余东方谗不作公孙媚吏道亦自工时违巧相避二始稍见收三斥竟成蹶桃李倾骄日幽兰自憔悴开径樊口田卖文成活计却问诸少年畴能一兼诣

余宪副曰德

德甫宦不达衔饥卧西山散髮听樵歌轻舫弄潺湲宁无临川屐不踏城市间举世称高节吾独叹微言昔闻双井徒胝蹶趋险艰旦夕费雕搜不救岩石顽解曾一决之浊流遂泛澜左蠡稍自清匡庐出孱颜遂令洪都瑟疏越表三叹正始岂必多滥觞良亦难

张御史大夫佳胤

岷峨孕才秀铜梁嗣临邛昔托艺苑盟均年如弟兄岂无竹林隼坦陀让山公处则若渊停沛则九有丰五领开府节三奏保障功谈笑杯俎间立除肘腋凶既表文士用复解书生穷追锋一召入立拜留侯封黔黎既膺悦翰管亦景从而我独何为亹亹称赤松

张中丞九一

胎簪昔中折桐栢亦涓涓张生一振之矫矫遂无前平原称盗骊霜夜拭龙渊昔与宗生角推锋互瑕坚一矢银潢漏再矢月胁穿隼声絳灌耳沦落二十年晚途始见收改服事戎旃密饵间阏氏飞书降右贤山甫城朔方吉甫颂其贤自非如椽笔畴能勒燕然

末五子篇

余老矣蜗处一穴不能复出友天下士而乃有五子者俨然而以文事交于我则余有深寄焉自此余不复操觚管矣夫汝师者向固及之然而未竟厥诣也是以不妨重出云

赵太史用贤

天地有完气汝师乃锺之苦心为人纲九鼎系一丝杜门从耕牧欲然不矜持顺风礼空同再拜称天师（谓晁阳子也）偃仰思立言余工犹下帷百子杂毫端弭节为我驰窃窥中兴象在起八代衰

李叅政维禎

本宁名家后况复产郢里高倡白雪言谁能不披靡弱冠白虎帷授简平津邸絳灌中自疑袁伏能无诋迂地迳长沙移官逾二始一秉西京铎洋洋复盈耳赐环夫岂难懷璧不吾以

屠仪部隆

屠郎天下才著作日不休如叩海人居一券万金酬错落多夜光鱼目非所忧仰窥二都闕悦与六代游麈尾有真铨清言凌素秋芥彼区中士释我薄书邮割荣差为力挫名方乃优

魏博士允中

昔余游天雄毫翰殊寂寞懋权起诸生朗若鸡羣鹤甫荐博士言遽申风雅托歌鹿
冠神京仪鹓瑞阿阁逶迤霄汉表犹能念丘壑词组垂光景千秋纵挥霍季君何沉沉长
君正谔谔

胡先辈应麟

胡郎天挺豪弱龄富篇咏突窥济南室摆脱信阳境高岭秀繁条何所不辉映顺风
扬妙音畴能不倾听沈思穷正变广心饶比兴牛耳终自归蛾眉竟谁并已覩千仞翔徒
劳众口竞

四十咏

诸贤操觚而与余交远者垂三纪迹者将十年不必一一同调而臭味则畧等矣屈
指得四十人人各数语以志区区大约德均以年才均以行非有所轩轻也

皇甫佺事沔

安定饶世业八龙得其半叔氏独挺出兴辞恣璀璨齐梁大篇错钱刘小言冠时嗟
安仁拙终籍长卿翫岿然鲁灵光拉遯非所叹

莫方伯如忠

俯仰子墨林所覩无长者莫公岂不文宛若田父社有抱不自璧虽完詎为瓦饥来
翫清泌衡门亦潇洒时藻汰欲空居然余大雅

许长史邦才

殿卿若春风所拂无不柔酒德日颓然禅语聊厌酬耕我謹阴田爱此鹄湖幽楚璞
不自贵良工琢为璆取友何必多一李成千秋

周山人天球

硕果寒不食词林见前辈典刑足御俗文彩亦被世一工临池业碑板光四裔义取
无虚月笔耕尽良岁却顾迂叟谋寂寞身后事

沈山人明臣

嘉则少负奇从事车骑幕侠气贯秋旻藻词丽朝膺千人废暗鸣百氏从挥霍屠子
一代盟朱生九原诺族贵文亦就是以不落莫

王太史祖嫡

太史瑚琏姿葆真铲光相与余一谈秋潇洒神俱王倾盖岂必深慨焉成辨谤蕴籍
叔度流纵横东京上疏草就磨灭苦心将谁向

刘金事凤

西京祀以遠浸淫成六季杨马虽沈沦余波尚绮丽子威负奇者冥搜复傍缀遂令
一代业灿若云锦制所虞白凤凰飘瞥毫端逝

张先辈凤翼

伯起初艺成白皙美少年一芬墨池藻众工归我妍薄游燕昭台兴尽剡溪船自谓
千秋业不假公交车传晨着潜夫论夕奏锺期弦

朱王孙多■〈火贵〉

天潢无浊流洪都饶国琛宗良虽晚成力窥作者林穷搜自冥合有造必苦心飞书
渐寂蔑神交岂在今垂当忘言际聊以表知音

顾山人孟林

至人不皮相文士不灭迹山甫一荒伧而乃癯山泽虽谢伯鸾春尚输柴桑获日暮
负薪归商歌中金石犹有身后名时时一沾臆

殷进士都

无美攻六艺乃在卯角时濩落四十年识者亦为疑侠气标肺腑壮心见须弥跌宕
词翰林煜煜吐色丝异时平津拜不言公交车迟

穆考功文熙

穆君义侠人强被名教用有才思挽俗信己必违众幡然悟此身实为千秋重力鞭
北地足冀追少陵鞞千里在毫髮逊心敢忘讽

刘先辈黄裳

诸贤世皇朝重庆冠时选俊鸷抟谏垣彩骝躡文苑余志属象贤凤毛何宛宛赋海
几玄虚谈天类邹衍襜褕故未报托寄良非浅

张太学献翼

吾怜张幼于天才尤卓绝十六游龙门（谓文氏也）遂富长者辙结客聊自偷治
生非所屑诗登上卿席名缀下士列畴不和朱弦谁软赏白雪

王太学穉登

百谷命世才兴文自绮岁既饶江氏锦时新许公制欸段羣蹠躡骅骝瞥先逝月旦
摇吻间风烟染毫际詎学空门子无诤入三昧

王山人叔承

词苑足肤立王郎独竒骨有吐必匠心徃徃自天发以此振侠声所友必贤杰贵者
虽自贵视之同毛髮一醉即陶然相将向超忽

周选部弘禴

周生应公交车故多天人畧骀荡一世名匠心成述作上书欲有陈雅非絳灌乐鼓
雪停楚云秋兰芬丛薄毋听渔父谈清时宁濩落

沈尚玺思孝

百年一罗生弱丝系九鼎继者四五人纯甫尤耿耿出日瘴雾披清霜毒炎冷赐环
岂不荣栖迟还定省三复行戎篇令人贵五岭

魏考功允贞

考功昔在台属当鼎革际再疏轻逆鳞必取第一义旋返长沙谪小寃绛灌议东省
一冰壶清光铄羣媚穆如新诗来知君不遐弃

喻杭州均

邦相强项人焉能事言路流落湘楚间深衷托骚赋循吏足自寃文苑雅相慕登我
弇山堂握手遂成故嫫母犹在宫毋使蛾眉妬

邹黄州迪光

吾爱邹齐安才行一何姣有造必开先微言穷窈眇春至赤壁青霜落大江小人云
江山助所得殊不少却笑眉山公晚来未了了

畚明府翔

陶令谢彭泽畚令辞全椒俱言以酒废无乃为折腰陶影不出山畚迹不入里当其
愧俄时千载如一轨新诗亦自佳能谐世人耳

张将军元凯

时平介冑间风雅亦一诣我怜张将军摆脱谢流辈傍采元嘉风不踏会昌地卷白
气若麤杀青心自细试问锦鸛已从酒家质

张京兆鸣凤

羽王拙宦人沈精托文鞅颇修邳下言突过景龙际沾沾意自伐汲汲取相媚十载

七徙官青衫转成敝徒令五彩翰零落偏荒裔

邢侍御侗

齐风故懦志子愿乃温然书探会稽室文匠东京前抗志凌九霄降体纳百川伊余
安时汰君子衷所怜邁若饮醇醪睽若思婵娟

邹吏部观光

吏部弱冠年其名已张楚籍籍尚书郎小遂厌珪组晞■〈髟上乃下〉朱鸟颠探
珠骊龙府岩壑与廊庙但悟即千古毋泥五君篇溪刻徒自苦

曹山人昌先

曹生菰芦人须作猬毛磔孝友自天就侠游聊寄迹睥睨一世间降心见超识玄依
子云阁相卜汤源宅铁网沈珊瑚冥搜十年得

徐太学益孙

徐生貌温如骨节不茅靡兴词虽沃若所造有根柢拂袞平原门掩关骠骑里不为
造物弄翛然事名理勗哉出世资毋轻慕才鬼

瞿太学汝稷

瞿生状眇小气雄三军帅有志必自酬无锋可令避合掌西竺言兴文遂余事禅那
有四病宗门无一字却问阿难陀恐为博闻累

顾太史绍芳

女家不乏材顾生尤翘楚一赋回帝颜羣姝让眉妩视草缓铜龙横经高白虎归卧
昆山阳夜光未轻吐时俗易为工逊志在千古

朱王孙器封

王族饶天藻旧条困宗正子厚舞象年奕奕着才行太息自试表含轸黄初令不睹
曹子桓凯握真宰柄感此有尽年剧称文章盛

黄先辈廷绶

昔予忝晋棘所荐多名士黄生独哀然博雅轻流辈惠我锦绣段示我瑶华制苦心
济南室转与时趣避为汝一解嘲知希身转贵

徐司理桂

司理宦不达遂作身后计呕心出奇语意表见新致摆脱尘中好雕镂千古诣放心
山水间虚舟了无系晚合未为迟逼人良可畏

王山人伯稠

王生托清狂贫不解工俗对客无寒暄匕筋恣所欲及乎命笔时纷纷坠珠玉秀色
若可餐清音宛相属忌者攻其瑕虽瑕意亦足

王茂才衡

太原人中龙有子汗必血■〈足必〉跋秣苑场歛尔电同掣僇声亦麋至雅非衷
所屑物表托金兰尘中莹冰雪置余父子间孤蓬亦成节

汪太学道贯

仲淹司马弟友于一何笃不作阿奴攻但经平子目心期偏韦布酒语易肝腹折节
西京言翩翩标二陆遂令碁中植蘼芜亦芬馥

华太学善继

孟达才故饶结思在幽沈江左有新契中原非故钦澹尔秋山色泠然流水音有弟
能挫名转迹入青林未却方中轨焉知尘外心

张府幕九二

吾爱张中丞颉颃有难弟窥豹昭蔚文食牛吐生气人传火攻横不晓璧聯贵彩笔
生纵横青山晚憔悴踟躅手板间犹歌蜀道易

梅秀才鼎祚

梅生抱超识雅复与才会上下千载间有造无不诣袅娜出余态泓渟饶深致三十
而逢掖同学多已贵长卿宁当过过乃扬得意

吴文学稼澄

中丞昔谈艺磊落在嘉靖季子甫离髻豹文已彪炳宁唯代为箕其力乃超乘突过
元和表穷探杜陵境游汝父子间令人泪潜迸

八哀篇

八哀者吾郡八人也皆长于吾皆屈年而与吾善初以不尽同调故畧之今先后逝
矣当时亦不觉有异屈指眼底渐鲜其伦不胜山阳酒垆之感因次第咏之共八篇

陆征士治

叔平少侠游秉志乃自纯丹青虽余事亦足走世人种菊支硎傍不与俗客亲挟余
两洞庭一一貌其真墓草渐已宿其迹犹若新

彭征士年

孔嘉丽文辞耿介独天赋脱屣公交车门掩鼻平津府与余虽晚遇阔达成尔汝酒
德时温然令人感叔度每愧墓中言未足昭千古

文学正嘉

休承名家后无所不具体既衍子墨流复工丹青理晚节始挂冠余映被桑梓客携
问奇酒门多乞言轨八十而委化翕然称趾美

陈方伯鑿

子兼性坦陀友余实忘年岂乏一世用沈冥文酒间上书谢不任归耕太湖田右伯亦已尊家具尚萧然至今绰楔表蛟龙鬱相纏

陆尚宝师道

陆公昔射策天子异其对世路方易工悠然成孤退折节酬古欢畅情在游艺既成一家言聊滋暮年味凤德匪遽衰鸿心终何异

黄山人姬水

淳父负奇癖形骸更土木伤时伯鸾噫感遇嗣宗哭呕心一锦囊瑰丽时自足霏霏吐屑金宛宛成叶玉岂不悟千秋眼底怨局促

顾山人圣之

季狂为诸生避仇夜中走自诧侗颊雄不操吴音久颇鲜鳞甲腹仅余雌黄口大厯元和间纵横无不有归骨闽天长遗编知在否

钱布衣谷

叔宝事丹青徃徃得其意虽游文翁门厥祿繇沈氏藏书盈万卷一一手铨次伏枕归婴儿毋亦造物忌生亦无异人死还知汝异

余自解郟节归耕无事屈指贵遊申文外之好者得十人次第咏之

袁太常洪愈

抑之司徒裔秉操更清絶当其谢九卿依然卧寒雪坦陀若可亲磊砢竟难悅逃名雅非意名至亦不屑事事皆愧君难从世人说

刘大司马光济

伊昔歌鹿年公兄我如弟誅蕩寬酒德參差偕宦軌北風吹轉蓬升沈自茲始何言
伯同命乃繇巨源啟窺窺上臣心非繇植桃李

陸廷尉光祖

廷尉負雄辨袞袞不可竭乘時握銓衡所登必耆喆肮脏平津門栖遲步兵轍篇章
亦流暢要非中所悅窺慕西去津將無東海筏

胡中丞執禮

中丞夙精悍斤斤握銓柄未底不惑年賜履徧吳境精心搜伏匿用重抑貪橫何來
蠶絲毀遂諧與人咏一疏表遺直庶几松栢性

趙少宰賢

昔余客武昌詣台受束約夫君實同好居體意相托天然珪璋器何必問雕琢乘時
佐銓府和光聊畫諾循吏乃其餘映照亦不薄

徐中丞學謨

中丞雅自負珠玉生唾咳出牧抗悍王黔黎有深愛開府襄漢濱與余實為代上相
匪自今夙昔蒙眄睇推轂故亦公登樞寧無待

劉廷尉一儒

劉君瑚琏姿溫文實天至避歲時自遠履榮恒若澆于物不取贏苦縣有深契論交
何必數一面亦自慰致語何必煩默默兩相貴

顧廉憲章志

勝流奚必遠居然在親故孝友出名家之子饒遠度托隱不違俗御華時抑素天意
篤象賢翱翔亘云路物情漸麴集岩穴安得固

李叅政頤

俯仰天地间有才不易真李侯治吴兴裨阖乃如神秋霜有时抑春雨靡不伸酒语
时启予衰魄为之振安能托宇下朝夕庇斯人

郭中丞思极

郭公交若浅三吴自深惠精心拊黔首眈眼摄墨吏昔者揽辔余今兹杖钺地欲发
未发辰千人万人泪即令负俗讥浊泾有清渭

弇州续稿卷三

●钦定四库全书

弇州续稿卷四

（明）王世贞 撰

○诗部

△五言古诗

（阙）

卿勉为让汰者亦不违鄴侯恶平阳易箠乃不私如何鼎铉间腹刃日相排既安成
功退起狱复中之天道亦昭昭循环无已时

其三

唐虞建官百夏商始加倍周官固兼摄乃不为禄计王畿仅千里纷纷错采地但读
妖莽书可望亡新治为食裁冗官省官仍省事任怨理则然曲徇反成累

其四

许由辞四岳高蹈箕山侧饮水而弃瓢谁能伺其迹千载一羊裘吾恨堪物色图南

就嘉征通明叅秘画自为大药资终招隱沦擿

其五

太公有丹书于道若卓尔剪殷首骏勋开齐垂世纪阴谋实种种安能涂人耳信史未敢凭吾闻诸夫子变鲁标深讥观乐示微旨却美齐桓正尊王固如此

其六

韩起执晋政下临东诸侯所觊一玉环再请再不售辞者既引义听者但包羞岩岩魏太子旦夕宰神州所获一玉玦卑辞谢鍾繇丞相时晨起中郎或晏休充庭尽璆琳但领不问酬似移勃律河拱置车门头

其七

穰侯太后弟勋贤无与伦握秉五十年山东半为秦唾手夺相印咄咄一旅人輜重东出关黄金贱于薪人生畏失职所忧岂在贫应侯功不多况乃疎间亲解绶不待晚翛然保其身

其八

翩翩原尝辈散金买虚名独有魏公子好义复知兵取士识其真肺腑为之倾一战邯鄲完再战大梁宁五国从若风强秦闭崤■〈山崑〉积弱幸以强昏主墮维城身死社不木异代感英声

其九

秦皇与汉武雄畧盖一世如何求神仙毕死不能致醇秣日濡首二八更代侍一念杀机发九有为腥秽于力岂不饶于道转成悖所以雪山翁先辞转轮位

其十

商君挟强力焉能使秦王牖下亦已隃华袞徒滋谤如何羣小谋复树中丞相仲达策有走燕公讎可忘人巧一旦伸天威畴能抗万事翻覆手虽变理非诬

其十一

战国一子舆其德几素王仁义不获施千载訾齐梁侃侃程正叔矫矫朱紫阳宋室
有遗恨不登中书堂造物护其偏欲令见所长微言在竹素千秋扬耿光

其十二

孙吴工用整起翦工用强神哉淮阴侯变化乃无常举目尽乌合出手成龙骧百战
取中原黥彭那得方精诚拒武涉小谬请假王高帝抚孤雏魂魄忧未央见谓高鸟尽谓
可良弓藏遗恨在匈奴冒顿骄大荒

其十三

石乞相白公能使楚社倾事覆不庇身怡然九鼎烹王邑卫渐台父子死汉兵磔肉
县五父狗亦厌其腥淫女徇所欢一死犹胜生不覩西市倡改服奏银箏

其十四

汉祖提一劔西行取天下所过降名城畴非背主者两贤岂相阨丁公悔其舍刑赏
在须臾乃复为名假不然卖国儿项伯开茅社宁如我高皇福寿独褒借

其十五

韩彭既已族萧相请室归留侯始长叹赤松将见依受刼建成侯于事亦已危幸辞
高皇网复受吕后羈百穀土地腥既辟复食之商山自有人四皓了不知

其十六

秦始修封禅白骨尸撑连汉武修封禅宇内尽骚然开元修封禅妖女彘其间文彩
涂人目万眸自眈眈隋帝既平陈能为长者言虚言诬上帝薄德报名山

其十七

孝武驱三方快若风扫翳及乎遇匈奴往往不得志长平既雄武冠军复慄銳横穿
单于幕直夺金人祭拓地城五原雪雒光九世是时李飞将子长所深寄天幸与数奇词
组成轩轻竟令挾伐威寥寥无可记

其十八

项羽千载雄淮阴万人敌兵谋归蒲山盗道推建德友谅据上流势压江南坼或臣
或假手或抗或相扼天顾要有真人巧无不悉宁知嬴与赵攻瑕易为力

其十九

魏其既罢相武安客如云独有灌太仆捐身奉故君长平事势改舍旃趨冠军谁如
任司直胶漆逾不分寸心既无负薄俗亦少敦信史表其贤异乎吾所闻七尺人自有安
能老它门

其二十

汉武鞭九有所寄三腹心公孙为丞相脱粟一布衾张汤为大夫家不满千金弘羊
为搜粟钩较穷飞沈横赏五十年民力犹可任即论守与才隱然亦国琛古人不足古今
人良愧今

其二十一

李广僂降羌百战侯不成虞诩僂降羌百口不一增所以辛酒泉终屈赵营平天子
诛南越霜戈荡烟箐畴举螳螂臂鹵级千万羸斗印悬肘间焉能使无腥

其二十二

淮阴独登坛高密初杖策抵掌下关中缓颊定河北孔明出茅庐三分已先画人主
恐不真真则鱼水得人才恐不真真则寄社稷豎儒就功名往往贱贫迫

其二十三

子孟秉精忠其功在受遗身死骨未寒五宗遂参夷林甫易君聰九有为之隳生时

享万鍾没不保其尸天威在人间臣子安得私所以余殃及贤否同一揆高皇罢丞相赫哉千古师

其二十四

煌煌炎汉业九有将为新吏民颂功德四十三万人蜀叟方著书醜醜留其醇祸患将见迫仓皇成剧秦夫岂能钓荣苟在完其身一入霸儒手名尽言亦沦

其二十五

建武薄三公尚书领西掖虽复当枢要厥佩犹铜墨久次文无害始为二千石尾大终压身备物仍典册千载同兹恨学士充内职上可蔽主权下不膺吏责却顾九列人黯黷无颜色

其二十六

阳都当国秉五侯竞骄怙是时谷司农矫矫衡言路批鳞击君瑕凭社忧主悟张禹舐犊翁循默滋巨蠹孔光首鼠徒依回市炎祚天下不为刘识者了其故彼莽何能为谏臣与两辅

其二十七

宋弘初宦汉仕莽为并牧承鼎建武中虽壮齿亦足抗言辞帝婚俛首甘新禄李密既陈情无何徇除目赋诗怨积薪曾是念初服翹首坐上尊晋耶当为蜀苟窃义孝名千秋宁无恧

其二十八

石显攻微文忠言被巧诋如何久不败与帝相终始惜哉匡说诗晚节终藿靡侵盗丽丹书经术遂不齿后贤小其规天权煽表里九重开宸断八柄俄在己虽复加诸膝委之若敝屣

其二十九

安史扇余氛河北成异域睚眦五十载国威为之屈时维田侍中精诚贯白日手挈六州归力收叛藩■〈骨或〉时宰不覩机捐之饱狂獠布也枕戈恨悍卒宁见恤何以报君亲刳心万事毕

其三十一

翟相持短丧除服起视事皦皦刘司徒复明先王制侃侃富韩公千载伸兹谊嵩之触众喙不能保其位念非衽金革谁当使弗避亡论权君亲为君者谁氏

其三十二

汉明敦友于感自东海强唐明昵昆弟成器为子臧地远天性出迹拟人伦妨断断隐太子纠纠巢刺王既迫螫手忧能辞喋血伤所以斗粟谣终愧鹤鹑章

其三十三

东京夸汝南北魏推弘农友于列九命祖祢尽三公名德冠时英礼让世所宗董卓盗天常尔朱纵穷凶贤哲俱骈首清渭为之红盛极必有衰世污以己隆虽无绍与侃宁能保丰终

其三十四

梁冀挟椒房人主在股翼一朝尸二公举朝皆胁息八使行按部先埋都亭辄带劔入尚书跪领张陵叱乐安与京兆犹能僂其客死者代相禅生者不改直宁如书生贵横行于八极

其三十五

和熹昔临朝文彩冠东都立幼擅天权不救昆弟诛宣仁善革故圣泽沛皇图荣名伸敌国不免子孙诬追惟正统初莹然五尺孤太后坐深宫格心但诗书九有颂慈孝千载仰深谟

其三十六

范公悲汉亡坐卧一车裊三十六载中不笑亦不嘯声在咽喉间畴能闭其呻万古宇宙间一见有心人次则颜见遠慨然能致身宁为江陵鬼不作建康臣顿令首阳薇奕奕神更新

其三十六

仲举诛左铛谋叅闻喜席其人虽可言其地终外戚何进屠酷儿一死媒汉贼扬汤而息沸焉能令沸息新莽盗汉炎隋坚成鼎革赫赫我皇猷万世垂内则

其三十七

梁侯既伏法伯始亦解宦元相死制狱缙也同兹难鼎足共承君械口以成乱伴食犹可言窃脂良足叹方进媾红阳幸叨帝恩道却条厚善者九列俱流窜于世虽已张于颜能无汗

其三十八

维汉有宣哀隆亲仅王号知者犹谓私凜然太和诏窃窥仁人志既考而复庙批鳞见臣节因心亦子道权佐修其郗陈章托媚奥自詫万古纲能无万古笑

其三十九

永明感竒征微言自西竺后果摄往因如环代相续楚英慕之诛崔浩排之族姚秦炽之亡周武熄之促趣舍同一途畴能明罪福是以有漏因智者了不録

其四十

东都蔽阍宦仪曜尽为腥八俊复三君皦皦露其羸林宗巧弥缝遑遑竟无成太邱为包茹嘿嘿以苟生鯨波挟衡飈一苇安得争唯见黄叔度鸿飞独冥冥

其四十一

孔明讨汉贼祁山凡六出威惠等春膏精诚贯秋日讴謡道相属身死名不没阳都佐东主举朝服明决如何反掌间名身并適灭即论新城挫不掩徐塘伐成败遂低昂千

秋令中热

其四十二

曹氏据七州威力方盖世云长鼓偏师一战挫其锐似忆白马围欲徙铜驼避国贼
碧眼儿窃败乃公事昭烈与孔明兹时诚失计三万黄头军顺流下白帝退可伐贼谋进
当厚师继既蹶兴愤师中原了无意竟令涪江水酿作永安泪

其四十三

文若本名家志在匡社稷周览六合间畴能托其迹降心事阿瞒相与图僂力迅扫
羣雄尽彼奸愈得职九锡从邳来一死明夙昔宁如寄奴相忧在后石画死犹擅元功生
不念王室

其四十四

张鲁世竒衰乘险保梁州及乎降曹公五子万户侯全义亦盗雄所事无恩讎胙土
享真王晚节更优游梁州无碁盎河南但锄耰是时二邦外柱骨如山丘乱世能庇民食
报宁不优

其四十五

昔有王彦方闇然敦古谊讼者将取平望庐慝而逝淑问既已昭弓旌遂麋至一旦
讎其身佞酷以自秽始悟矜名客良非终隱计众恶几于道吾闻之老氏

其四十六

文王实剪魏叔夜尸于市天子不为讎讎乃作天子当时侍中君衔愤栖田里新沓
竟怜才终烦司徒启惜哉荡阴役终乃为讎死王哀恻蓼莪独行表君子

其四十七

晋武弛王度隋文擅天刑于德实不竞乘瑕乃合并苻秦任景畧七州差荡平慨然
念大统夫岂徒佳兵淮淝误一蹶中原遂土崩豎儒轻相薄志士叹无成

其四十八

五胡肉晋室聪勒独狩凶王族无完领万姓一釜中靳準小竖子而乃夷聪宗冉闵
差强意羯血三台红伊昔新城役坑秦快六雄天地诚不仁代报以无终

其四十九

晋昭实剪商诞也谊弗受麾下数百人一一田横友矫矫继汉龙夫岂称魏狗攸之
扶宋倾迴为宇文守二李起南北慨焉捐其首于心岂尽纯于道良无疚奉玺者何人心
死亦已久

其五十

晋元起微弱夷吾为始兴武德中不竞因事就功名当时铮铮者仅一陶士行坐观
武昌变齟齬歷阳兵珍贿倾王室睥睨折翼征竖儒不覩事谬比于孔明所以柴桑叟愤
然振家声

其五十一

太元抗强秦江左一安石惜哉饶远量而乃乏远策车骑实堪胜用胜良未得淮淝
再鼓后全秦皆丧魄胡不遂长驱归来偷宴息坐视慕容炽依然限南北

其五十二

伯仁负高名惟能日洪醉深源负高名老大不晓事不用人若失用之反成累俯仰
宇宙间名虚复何冀处仲与灵寶犹能乱人世

其五十三

明德擅轩龙不及宋贵人元魏为残忍立庶戕其亲亚子矫之谬嫡后为大嫔苟在
快其私毋乃乖天伦胤体登宸极往往称并尊并尊无乃过隆养礼亦均

其五十四

吴卒脱瘦冰功当冠国臣但求百斛酒陶然竟其身园卒为蕲王致贖巨万缗依然抱一瓮老作灌园人始悟范少伯得之犹未真辞越复居陶忧死复忧贫何似两卒贤名与利俱泯

其五十五

鲁霸倾储宫大帝为之惑及乎登见废霸亦当大辟魏秦倾储宫势已危夺嫡承干用反削秦遂均州谪岂唯覬觐解亦使愤惋释始悟英雄人为舛亦不极

其五十六

营平不贪功获伸于明主清源不贪功主骄方黜武封拜跬步间见之弗肯取供君一念快使我万骨腐禄儿方开边曷不惭入土

其五十七

元嘉修内政江左乃宴宁淳熙急外攘庶事实励精再举再辱师戎马反纵横拓跋威方振完颜治复平两劲迫自完谁能问合并少保痛朱仙太尉悔崑■〈山龟〉事机苟一失千载遂无成

其五十八

曹马虽窃禅犹存故君礼灵寳存晋安刘宋縁之起是以零陵王掩恨归蒿里一念逞所私千秋成厉轨诸子岂尽嚚人人不良死不然寄奴勋夫岂阿瞞比

其五十九

彦国领元枢坚辞格外赐一赐何足言难沮格外事老臣于举动往往见深意鼎足共承君染指不自制椒房与左铛相与徼恩惠患得己不忧得之了不愧

其六十

东昏逞屠僂勋庸一朝尽赫赫萧兰陵雍州义师振岂惟感家难九有同兹愠奈何

吴娃恋竟媒彭城衅不闻夏殷灭喜姐皆来嫔人纲既已乖天道良可信更读巢刺编令人发深恨

其六十一

武陵怙酒德法兴寄腹心湘东肆豪猜佃夫当喉襟名轻行既劣俾制嗣君淫幸门既四辟八座皆聋瘖片纸夕下来晨即委刀礮物情虽云快隐忧良亦深

其六十二

景倩实孝廉精心事苦块虽详褚公譬谁能使居位一朝遘国忧扶携入趋卫宋栋垂欲倾一木焉足赖父子同所归怡然见先帝子野竖儒生咄咄计成败

其六十三

彦回秉清令须髯矗如戟会之负挺劲长身若立壁坚请天水社力抗山阴逼生死在须臾岂尽为名饰一念偶已非滔天遂焉极赫赫两师尹能无发深惜

其六十四

每读梁史残愀然感僧辨奸雄志逐麋肘腋遂中变焚骨饮其灰王颁解修怨论功不受赏竟免丹书谴良胜伍行人终成徇知恋此身复为奢沈冤竟谁唁龚壮更超然巴山从所愿

其六十五

宋彧剪诸昆建安亦就图忠勋在宗社不获保头颅魏恪猜羣叔彭城首见疎明德格乾坤未免当门鉏储胥既自彻羽翼孑然孤唾手授萧郎遗藁召尔朱人事与天心默应良不诬

其六十六

谢朓箕山节恨为子季卖出处自当心取决人譬效赫赫司徒公谁能使之拜辞萧初若遠仕鸾岂无害指口但饮酒优游于禅代当时保身者名位两不败千载思胜业令

人有余慨

其六十七

晋有一仁人开府羊荆州梁有一仁人车骑韦严侯弱者懷其德强者伐其谋俭慈不敢先老氏羊所优竺教横天来举世皆荡流韦也守中庸不忤复不求

其六十八

昭明秉岐嶷其用稍文弱晋安一继之靡靡成轻薄而况于湘东豹文乃羊鞞何必侯司徒然后成危削奚俟宇文公江陵方面缚人主执天权操念为美恶浑浑西京词已矣不可作

其六十九

尔朱起秀容结侠倾魏室众不满万人所至无衡敌立空葛荣众远授天光策有才足为乱惜靡戡乱德贺六曹瞞亚黑獭仲谋匹混合由真运鼎峙乃材力咄咄广武叹令人歌阮籍

其七十

魏氏起索头统万驾勃勃太武及文成兵氛犹未歇高祖力用夏三灵为之悅人文外以炳天纲内多缺易世曾几何奄然遂改物礼着忠信薄斯言吾敢蔑

其七十一

高氏恣淫昏为周剪明月炯炯血一泓划之终不灭英辟风后人吠尧亦昭雪易世有狂童舍旃寻故辙亲贤若齐王睚眦见屠裂为隋抑何厚为周抑何蔑掩卷感废兴令人思明哲

其七十二

周武平晋阳六合在掌指如何后嗣昏庙社同齐址诚臣抱吁虑直哉乌丸轨徐方接陈壤守经以俟死卫瓘终不免伯阳竟远徙为身计若疎为君斯可矣

其七十三

唐公固隋臣宇文启茅土阿■〈麻外女内〉隃商辛毒乃痛海宇何必禅让迹无害干戈取为德固未深功亦肩周武反顾靡愧心高光絶千古若夫黄虞上赫赫我皇祖

其七十四

唐高甘聚麀妖嬰窃皇纲淫臙易庙社三灵为惨伤维城拉然崩蹠血染天潢莽卓为一人寸斩不足偿惜哉无絶母完归于上阳当时极兵威万愤亦少扬养虎自遗啗遗恨在英王

其七十五

梁公古明德昭代实无伦濒死不改节所莅惠必臻婉谏复皇储密引皆俊民五龙既夹日万古归其仁危哉再相时齿暮宦亦陈万一先朝露此志竟何伸阿姨自有子不作女主臣

其七十六

少陵实沈雄太白擅豪华当其盘礴时口吻皆烟霞一字翰墨林千秋归大家生平宦不达晚节各天涯奉谴窜夜郎乞食困浣花而我独何幸获保青门瓜

其七十七

文饶一材臣所至树风谊会昌式微代皇纽将解坠立决万里策手挈三镇地宠多器不任为汰复为忤垂老涉鲸波白骨无所寄但称裴司徒不及李太尉

其七十八

唐德初告衰宇宙正佳兵前有郭汾阳百折必东倾万死不易心后有李西平万古立人极岂惟宗社楨彼燧亦何论为罪亦已盈惜哉临淮谬遗恨在齐名

其七十九

裴公大将材不解深州围韩公大将材不戢好水师决胜或先登宁如一偏裨及乎
坐庙堂天子所蓄龟词组转乾坤匹身系安危信哉尼父言大受难小知

其八十

唐室将贾乱高明俱倦勤轩龙不安位鹤驭将帝宾两武称贤助二李亦纯臣云陞
下家事何必问外人爱州与荆州不惮批逆鳞幸以首领完沈沦竟终身

其八十一

兴庆帝父尊重华天下养如何猜疑际天伦遂板荡抱景等幽囚跬步同流放生时
亿兆主弥留向谁傍牝鸡一司晨豺虎成兹谤

其八十二

牛李相树敌进退为是非刺刺唇吻间人主至宵衣如何洛蜀党贤者亦为之涣羣
表大易不比有明规矛盾起方寸所读何书诗窃窥五鬼章至今令人疑

其八十三

阳公为谏议四载闕其口一作惊人鸣出为道州守鱼羹及稻糜与众均所受催科
自注考能令督邮走兄弟凡三人相与日饮酒醉即共衾宿不娶竟无后钓竒性理僻于
道能知否

其八十四

顺宗长谅阴任文遂窃柄生终被窜僂死犹蒙佞幸及观所厘革往往多敝政颇收
遗老还力与中贵竞柳吕一自没欲速成蹭蹬不覩快心人时有膏肓病

其八十五

自古负心人毋与朱三伍狙诈曹瞒流狞凶亚石虎狂锋既犯蹕王公尽碓斧沙陀
首弄兵乘时窃边土破巢稍臣分劫揆仍凶虜力屈聊避尊夫岂崇故主窃陋司马公帝

纪安足数

其八十六

天厌五季腥时复一扫之存者旦暮人焉能辨华夷冯公岂不伟于节安所施信心白刃间荣贵保期颐千秋蒙垢污所救亦不訾二石一海鸥古称图澄师儒者所不道西竺将取斯

其八十七

有宋躬柔德台谏执天衡与帝争是非物论时见凭念无九苞彩爪距若苍鹰桧胄肉饒之搏击中所憎士气一为夺千秋犹不胜侧耳平津馆嗷嗷承明廷咬咬双鸛■〈彡勅鸟〉豸角何峥嵘窜头复摇尾宁不愧其名

其八十八

艺祖惇友于淳熙不良弟空宫闕丘嫂阴刃戕二嗣奚必柱斧声然后乃成弑普也社稷臣驱除每先意其悞不在今悞在书金柜何物一老姬乱经狗所庇每读梁孝书窃贤窳詹事

其八十九

宣和负与国复渝海上盟一念不胜贪宇宙遂佳兵朱仙十三诏竟分南北形奕世言恢复聊尔美其名开禧大辱国符离亦无成孱然史越王持重见讥评贵寿复世延毋乃当帝情

其九十

伯纪与德遠忠志贯金石量隘而才疎焉能剪强敌忠简差练事其气已萧索等彼王与谢雍容叅揆席矫首眺大河苍苍七陵色安得刘寄奴纯心为宗国

其九十一

强敌震四垂天地为之裂铁骑过独松宋胆悉以夺信公仗孤忠羣僚乃乌合弱卵

压泰山犹能整其辙天运久已去人事那得说掩卷惜公才世儒但称节

其九十二

赞皇谢膺试鲁公戒求辟于中岂泊然大小犹有择奈何策华腴而夺隐士职前辙既已迷后轨践其迹是巧靡不师畴能已日革浮云翳其眸欲辨人间色何如皓魄澄羣暄自辟易

其九十三

天厌一世人英雄生马足兵刃周八荒所至皆鱼肉中原冠带地几希付樵牧时维耶律公捐身不违俗宛转中所嗜从容解其毒遂令孑遗民生齿成代续万古祠禹功从配当不忝

其九十四

边马躡中原遂扫东南陲天地尽为元生人安敢违伦物俱湮尽存者仅一丝许生当色辰强起修饰之虽复风俗頽犹守六经遗奈何拘方士断断生呢斯不闻夫子言吾欲居九夷

其九十五

巴延善居功师出能以律中废同汾阳晚荣等高密廉公当鼎沸一出秦陇谥正色抑降臣改颜崇儒术莫谓秦无人江左乃无匹天意惜未纯阿桑时间出

其九十六

高皇提一劔力抉乾坤翳圣武振八荒荣名迈五帝时维中山王独任心腑寄坐连百万兵手挈中原地才宏识更远功大心转细两都对珥貂茅土垂世世

其九十七

开平卒于师曹卫亦早逝所以保令名爵赏亦延世宋公拓中原功多罪亦细颍公辟西南未种織介戾苟免鍾室诛难辞杜邮赐为燕剪名将焉知非天意

其九十八

韩公佐开国雅若何在汉尊当百僚师威则东第冠贵富既已极君恩未终涣胡陈
小竖子何乃与其乱投繯应星陨谁能明非叛但读虞部章窃深投杼叹

其九十九

吾怜革除际诸贤何不辰齐黄既首裊希直亦谋臣白刃亘天来谁能保生存桓桓
铁尚书血战挫燕人捐脰不肯回一死识其真魏公椒房旧大义乃灭亲下见武宁王慨
焉不辱身

其一百

己巳边马狂上皇困鱼服举朝一于公嶷然回地轴天子忧万年鹤驾将改卜代言
当上赏孤卿尽公禄于独再坚辞于心了无恧彼权借文伎谁知非实录

弇州续稿卷四

●钦定四库全书

弇州续稿卷五

（明）王世贞 撰

○诗部

△五言古

肖甫有中山开府之报喜而有寄

衡门掩疲病稍与尘事绝峥嵘岁莫天覆盆何由雪忽枉故人问令我履齿折尚书
尺一下符玺行当发蹙金双蟠螭天子所赐钺铁冠嶷其角豸绣殷猩血内台揆眼鼻左
辅当喉咽始知中山篋更成中山节太阳吐朝晖羣翳俱消灭崇兰泛宾筵亩蕙成私悦

荣卑虽异势物性区以别子其奋驰骛余衰安寂蔑

奉安道经一藏于阁西室敬述

太上携众真逍遥于玉清蚁观下土土秽浊锢三灵慈悯激流徽贯珠自泠泠精微
缀宸章错绣何青荧轩辕启阴符玄女驻缙緌灵威抉潜宫禹文不沈冥隐约五千言致
柔澹无营洗漾漆园叟游戏与道并内景散葢珠洞玉启丹扃南真紆初秘縁■〈口受〉
在兴宁滥竽昉灵期殒玉实光庭及乎宣和季紫色复蝇声误解抱朴书九咽焰烟生
妄讴紫阳咏况焉丧其精罔象获玄珠中智谓非诚将配西天言及我东鲁经含辉各垂
照皦若日月星澄乳出醍醐和美故无争分流虽殊派不悖当并行小兆匪南董慨焉慕
赤明上论九玄度下纪万椿生窃从玄卿后良常勒新铭

孔阳宗侯有亭曰依隱亭四傍皆竹余为赋之

东方昔翫世大隱金门侧（朔传云依隱翫世）之子固沈沦宗正通属籍家有淮
王招人歌岁星谪饱殮淇澳菴啸弄潇湘碧唐李百万叶疎者曰太白结友栖竹溪举世
宗六逸子亭以子名子名借亭得试一展吾诗是否人间色

周郎蚤夭项女未适而死殉之合葬于周

君是岐路人女是父母身父母业已许那能不属君君今既玉折女岂独瓦全生当
愧白日死当快黄泉丹旄从东去素旄从西来两旄东西合纏绵不得开黄蘗化为松那
知苦中久十六项家女千年周家嬪君面女不知女心君应得不似邳家儿仓舒浑未识
团栾女贞树煜若银河洗不似韩凭木将情作连理伯夷岂殷民为殷表君臣首阳一抔
土万古归其仁我欲竟此曲此曲悲且长结为金与石融为冰与霜

题双松卷盖岭南萧公之手植而其子别驾君读书其下者也

赤松游南海手实贻萧郎白云温山种鸾凤所庇藏峭蒨双乔柯矫若龙双翔东树
延夕春西枝媚朝阳归云不只栖偃盖必相当谡谡元礼风劲节抗玄霜飏飏弘景颺清
音韵素商有子饌铜盘书声出琅琅丁梦终见叶贾对良岂荒下当种灵珀上当栋明堂
宁学家少府斋前俱白杨

答赠曹子大同

荆玉游中土连城不复偿武夫迫相淆璠玕蔽其光所以神自泣黯然思陵阳空谷
产猗兰无人自芬芳菘菹羣来狎根株不相当所以希拂拭愿登君子堂淮南富耆硕曹
子乃其良渔猎六代藪驰骋百氏场五十困公交车六十钓沧浪著书累万言不博俸一
囊鷓雀暮来栖万目呼凤凰窃悲千秋瑞长铗五色章惠而好我音携我以同行知己何
必多寸心暴秋阳结交何必早岁晚见冰霜

敬美弟杜门信州移文乞休赋此寄之

寒霜日夜零廓落成晏岁羈羽坐空条畴能不愁思愁思望故乡安为久留滞故乡
足稻粱处者甘其惠伏罗更以详忽来诚可畏不覩双飞凤摩空适其志晦显何足陈无
营乃为贵

其二

侯生縻抱关会计委宣尼不复知身贱焉知贵为谁大块博物形自古多参差得失
若浮萍泛者偶值之高位多折腰韦縞乃信眉黄鹄游于田尺鷃笑其卑狎世诚非易避
人良岂宜

其三

彭蠡汇大江洪波浩洋洋零雨久滞淫牛斗掇其光匣中双飞龙生不铲名王一旦
埋槁壤时时啸寒霜（阙）貌若兰不因风菲芳盛年中自失垂晚怨朝阳逝晷不我还
抚壮当自详无为爱一壑坐使玄鬓苍

题小桃源图

出郭只十里种桃近千树主人非避秦亦不嫌客顾有酒且赏花酒尽应须去试语
刘麟之何如此中住

胡楚玉法门之龙象也虽混迹■〈尸外立内〉士而超契应真一旦别余游五台
礼文殊大士感此赋古体一章以赠

五台小五岳梵天作真境一岳为一台秀出太行顶青分鹫岭润白破鸡足暝七宝

蟠紫空（树也）三珠喷香井（泉名）灵花时自秀法雨长夏冷吾闻古师利结法当
兹岭不避老宿嫌时时神貌骋楚公乘古来少小发精猛服从居士便心作苾芻静托钵
行别余去去入幽迴圣灯悟来现佛日尘内永不畏毒龙摄所畏在光景若叩清凉台儵
然在衣领

赠卓征甫光禄见访弇园作

我爱卓王孙隼声满人口床头一鹈鹕时时为客有己工光禄吟复耽步兵酒白榜
叩紫荆青丝系杨柳不为噉名来能谈尘外否

凌大夫且适园

为园何必广聊以答吾寄胜从莘洲采嫩许芴林媿水石有真色桑榆信所植好雨
东南来百卉欣自媚时禽宛宛鸣儵鱼悠然逝念彼非有托叶此成偶契谷愚岂真徙河
清焉可俟尺鷃与云鹏逍遥不相倍有待终愧烦无营乃为贵

王丈汝止偕张牧过祇园作

皇穹不爱道爰产良知翁奔走举世豪先生得其宗说法五十年甘雨天南东张牧
如平阳避舍舍盖公轻榕白接■〈𠂔离〉坐我祇园风恢谐与觴桀盎然皆春融我闻
罗什师时时迹淫躬及乎饭棘针亦与常饭同乃知青莲华无妨淤泥中语罢一自笑廓
落高天空

唐伯虎画牡丹下睡猫题者不甚快意因戏为作之

白日当卓午狸奴睛一线胡为尚颓然曲肱掩其面得非薄苛醉毋乃干陬倦风吹
木芍药时时堕芳片堕者作裊褥留者充帷帘高卧时未至雄才晚方见纵横羣鼠辈未
解事机变牙爪攢戟霜飞腾掣弓电讎止无当锋谁与敢奔殿剝裂惩狡贪吮咀慰酣战
能令此辈空不爱通侯券丹青何人手唐子少豪健卖骏足偶蹶屠龙技方贱韬精恣鼓
跌含意在荒晏鲑鰕苟不乏猫鼠各自便犹胜李騫州摇尾媚娘殿（萧妃以媚娘他生
当为鼠也騫州即李猫）

送印上人归铜梁诗有序

上人铜梁人也十九薙髮从师求道寻入铁围山内观久之恍若有悟乃徧游藁林叅访耆宿证其所得西登五台瞻礼文殊道场因附舟渡江栖止诸名刹一日别余曰吾且归铜梁矣余谓上人犹有铜梁在乎上人无答亡何所赍衣钵为一行者持去上人示悴色而语之余谓上人犹有衣钵在乎复无答已而又曰行矣必得子之一言而重余谓上人犹有不佞之一言在乎复无答余谓此世法也苟顺世而无罣碍归铜梁与不归俱可衣钵之存与失俱可不佞之一言与不得俱可子之乡有嵒岷先生者能顺世者也试以予问质之于是上人行而余为一古体以赠且用青莲句作起语

大师铜梁秀托钵娄江浔向余忽西笑笑指叩山深出既无定所归应无住心吾闻梵天界步步莲花金兹地且不恋况乃思故林两足随世縁耆宿有知音

题弇山园

惟古弇州西国以君子称其人皆胡耆少者亦籛铿中有五色鸟仰吭向天鸣金母饒周满琬琰镌令名海上吐三山俨若芙蓉城云根秀特出风岩类削成游者诧天工焉知人所营转徙一亩宫其寛不容肱徇情岂不怡余适乃忘情长生岂不佳余学在无生

题■〈禹佳〉菴园

昔当邁时屯掩迹遯闾井所难近市喧复深在原警选地不在遐步武得佳境云来白石古雨去苍苔静淪茗爇妙香为我回酩酊指麾勤剪刈毋使菴葦逞斯物岂余讎虞为芝兰梗晚途悔别择返心皈平等怨戚与愚贤相将共箕颡

题澹圃

吾弟善为幻荆榛忽繁丽春风弥天来为汝雕万彙绮目无不足炙口有余脆时维八九月独往足余憇水涸天根见木凋地肥既丹腹俱剥蚀唯余一真际进我天人粮翛然禅悅味冶游诸少年五都竞为媚毋以鸡肋观夺我羊枣嗜

题约圃

余有先人庐不能饬衡荆樵苏来共之鸟雀自从横吾儿慕老圃聊为一经营梅桃凡几树修竹百余茎取胜唯一池弱不任扬舲茅屋八九间文之轩若亭小丘仅踰仅强亦以山名又复名其圃曰约差胜盈君看芥子中须弥了不羸

入龛州园北抵小祇林西抵知津桥而止

维东有萧寺澄潭面若镜步武稍逶迤林香发幽兴茶■〈廿糜〉组春翫橘柚文
秋订祇林未易攀仙源或堪侦胎禽引圆吭万树窍相应游履自麋集毋劳开蒋径

入小祇林门至此君轩穿竹径度清凉界梵生桥達藏经阁

衡门枕游径往往严扃鑄中有小年日不与俗客说幽亭抱修篁三垂碧于玦残阳
过林表余映散琐屑长者所布金苍苔互明灭径穷胜自出地转天亦豁白榆荫银河恍
疑梵王设穹阁树杪呈二藏各安列空王本不空苦县有真悦余本一蠹鱼安能不自役

度萃胜桥入山沿涧岭至缥缈楼

兹桥绾羣流并割三山半举头一峯尊翼者亦簪汉下有突星濼恠石鸟兽窜宵行
或见怵燕坐出深翫窈窕径复通蜿蜒势中断白石紆清流信意可枕盥稍南穴其背忽
得天地观却顾所入山依依在几案念此回环机欣然一笑粲

自缥缈楼絶顶而下东穿潜虬洞

高楼足怡旷展眺意已穷俯身狎鸟道侧足探虬宫回光一乘隙羣玉皆玲珑下汇
湛湛流盘石居其中雀跃三过之前复畏蒙茸西南一虚窠隱隱复溶溶遥与突星会迤
则天镜通幽閭难久留吾将泛空蒙

由西山别磴至乾坤一草亭西北望城楼西南望武安王庙

沿泝石濼傍十磴突平地本谓入山深那知出山易旋螺结湫顶步武一茅亭俯看
墙外隴郁郁黄云平落日满丽譙粉堞尤冪歷箫鼓发丛祠野火起枯栢兴尽欲下来曲
水弄余晖忽过金粟岭天香逗人衣

穿西山之背度环玉亭出惜别门取归道

青虹跨高岭雌霓隱其下傍穿度窈窕忽上得潇洒钓矶字忘鱼亦复无钓者万玉
出素妆微红露妖冶俄为出山路使我恨眼蹙一步一回首谁能遽成舍

由月波桥而东望梵音阁

飞桥挂西岭遥与中龛通明月组文波万颖射蛟宫诸峯一十二献巧争为雄奋肩
若饥猊垂首如渴虹憔悴欲沈湘飘飘独凌风仰盼云间质梵语错青红一柱锦突兀孤
峯玉玲珑虽疲子猷接未悲阮径穷

穿率然洞入小云门望山顶却与藏经阁背隔水相唤

迤邐山深洞盘石不盈步欲幡藏中言于兹可唤渡阁影施峻嶒诸峯借丹腹回屐
探薜门介然见云路阳崖纳绮照阴壑含冰沍枝樛幄成结涧古藤堪度拊石何泠泠爽
然若韶护

壶公楼之背对广心池之小浮玉

中龛固饶竒其阳颇陜塞未畅目界观而以疲足力兹楼既北启恍若天地阔流峙
贾其华明晦异昕夕当眸小浮玉宛宛自为色呼酒一酌之与尔相主客却笑壶公壶假
幻成所适

泛广心池穿散花峡之东泠桥

残潦足沧浪沆漭亦蹄涔况此鱼鸟地俯仰见宏深刺榜故有余扬帆稍不任曲几
列殽觞岚翠时见侵宛转娱晖渡彷徨嘉树林飞瀑当面来势若泻千寻回濑敛东峡高
岸吐阴森轻飏散红萼沾者酒自斟虽复拘方士那能不披襟

度东泠桥蟹螯峯下娱晖滩

巘峦谢雄丽花竹入萧闲点缀一二峯映带远近山醉举毕氏螯忽掣向云间流杯
石芙蓉凿井青连环径转目忽开焉辞足蹒跚藉磴坐青葱临址弄潺湲窃为忘归咏风
流庶可攀

由云根嶂之背度双井转嘉树亭

蹶屐穿云根恍见双明星下有百尺泉辘轳破泓渟出没沿涧喷向背临溪亭老树

何年植郁作虬龙形逗云拥芋眠蔽日结沈冥广池无烦暑曲檻有清泠何必平泉石憇
此酒亦醒

自分胜亭沿留鱼涧度玢碧梁

孤亭介林端隱显表异岐高树上干霄万卉发华滋絕涧若修蛇屈曲复透迤微飙
激清波鳞甲忽叅差游鱼迷故径落英恋回漪絕壑架飞梁可以探翠微所至与目谋焉
知足力疲

由玢碧梁踰险得九龙岭

涧穷路欲絕兹梁忽中亘下当舍身壑上当侧足径虽尔蹉跎中悠然见宏胜偃蹇
九丈夫相观易为劲晨露被膏沐夕飈发清听生不愿秦封但愿不违性

傍广心池为敛霏亭与振屨廊相对

夕景无不佳此亭有余姿紫翠在诸峯回光弄涟漪倦鸟将趋宿犹复念渴饥儵鱼
惊隙照羣跃不支持虽尔近昏黄呼酒且自怡为乐当迟暮兹意将告谁

登来玉阁俯广心池与西山对下为振屨廊

昔我栖兹阁兹阁临广池澄月激文波滟滟破帘帷揽衣起彷徨恍然见三垂皎镜
中天悬万玉正叅差下有振屨声故人龕中来屨声一何厉语笑何柔怡为我标来玉比
德良不亏

文漪堂临广池前为小浮玉

崇轩俯朱栏修廊耸层观文漪綠颺起儵鱼时泮涣近岛如覆敦遥岫若层案聊携
二三子相与同兹翫青山入我屋素壁光凌乱书以赏心辞咏言仍三叹

穿竹径度知还桥入文漪堂

遥冈织丛翠导我穿冪歷鸟倦亦知还况乃游人屐窈窕得平桥夷犹坦緜席相慰
目已饱相劳足初息有酒故可呼无酒茗亦得

先月亭后拥竹前俯广心潭

初日固自雄不如初月色诸岭犹黯■〈雨上黹下〉此亭最先得微辉现眉宇潜颖窥间隙丛筱玉破碎澄波金融液呼杯一受之晶荧若琥珀使我肺腑间廓如广寒宅

答寄屠长卿

人固未易知知人亦未易之子非倾盖兴辞远相媚谬以良璞珍入眼岂为贵余本崎嶇者失身堕文艺龙卧苟不坚奔走成晚岁雕虫不利人浮讥满天地昌歎栖江沚谬中圣贤嗜愧无琼玖报赠言或可继一念百里间春荣与秋悴范生始文苑班公仅循吏毋以簿牍烦此中有精意

为张叟题听庵

山神饶伎俩时时恶声进吾子既庵居不闻亦无尽云胡以听名徒然扰方寸自言百不入一唯天是信既传天听卑复道天语近五十命已知六十耳当顺自此从心年的应无悔吝我语君莫听君听我当论何以絶听根悠然空五蕴

张山人寓侯先生适园得诗廿二首见示因留宿我弇州园五日而赠以此诗

读君适园诗留君弇园住试拈弇园景何如适园趣徃徃清夜游亦有曹刘句所少但乳柑乞栽三百树

题三笑图

苏子瞻题三笑图不言为何人后人引以为虎溪故事而谓为陶靖节逵公陆修静者或是宋元嘉初陆修静非梁普通中陆修静也吾尝游东林寺其前一小沟潺潺流一石桥踞界之僧指以为虎溪然太近恐非故虎溪也其面为香垆峯苍翠拂天此画景不甚似而人颇古雅戏题一诗

逵公白莲社郁若人天师破戒饮陶令违誓过虎溪远方一大笑陶意竟攢眉乃知病维摩不受弥勒窥何物陆道士千载亦传疑

王鸿胪同穀乞归以养母也黎惟敬内翰合燕中诸名士以诗送之而题曰青山招
隱属不佞次焉

昔读招隱篇白云栖桂树矫首望白云吾亲在其处是以夕上书朝即挂冠去陋此
介推怨龙蛇安所慕笑彼东方达朝藪终何据躬耕慧山麓菽水足旦暮身隱竟焉文吾
诗耳当污

安履山房二章为醉梦生赋上言感下言适也

吾闻天池生宏览周九輿踟躅公交车门生不与愿俱委骨傍要离虽侠非所愉顾
瞻长山址可托千载躯玉树埋土中谁能废歔歔有子不逮养兹焉恒结庐啜此泉下惊
毕力共扫除慨彼尘中观委懷在诗书悠哉复悠哉成子山泽癯

其二

丙舍依墓田丁年托林藪平湖址吾前崇山障其后苍翠日夕滋时能逗牕牖梅花
及桃李谷量若升斗造物使之奢何必皆已有主人不恒出出则呼顾叟缓步以当车信
足足不负是故安履名无妨狗俗口益以废丘瘠与室长相守

答汪子且志规也

和璧不易采骊珠诚难摘当其入手时天地为动色岂无秦廷念所戒在一失重襴
戢其光惧为狙者识是以希世宝往往韬山泽

其二

峩峩岩桂芬因风来拂鼻冉冉谷中兰幽芳当自媚受质宁有殊畴能违势地今人
贵钱刀古人贵意气韦布而千秋默成乃为贵

其三

东家炼凡铅将用给其贫西家富丹砂鼎轟杂然陈未窥先天旨安能妙形神彼妄
固已妄此真詎云真彼妄特误人此真将误身

明卿以古诗见贻谓同日得吾兄弟书且感子与之讷辞旨酸楚仆所倚和几不忍读矣

北风摧雁行一飞一栖止虽不冒网罗相距数千里嗷嗷双鸣声何当堕江泛赖此同心人征弦寄流水俯仰天地间慨焉数知己晨宿次第沈夕照易迁晷毋为往者叹来者孰离此生味日以漓代舍日以圯抱此百世知有涯谁为纪荆棘旦暮长幸其当涂轨寄声勉加餐相将保田里

孙节妇寿言

高材孟坚妹节烈孙奇妇心将髮共素影与灯相守玉润王家郎再拜前称寿右挟彤管书左操巨罗酒试读五贞篇畴能如母否

张芝罟孝廉来请大司马公志铭成一诗送之因订后约

汉有张释之贤声腾九棘长公乃不然一官即成擢清朝视三釜永昼耽六籍长者多造请公子敬爱客高义薄云天谁能不披恠今晨孝廉舩系我祇园侧布帽笼悴姿欲请复摧抑天子所赐莹先公将就窆片言借华袞千秋垂金石搦管辞不惭终篇泪潜拭庶几王生语少酬廷尉德挂劔倘有时共饱东湖色

为范母题晚节寒香卷

离离涧傍竹英英篱边菊芬不逐众卉荣不依凡木凡木岂无阴众卉先竞馥畴能傲霜霰谁欤安幽独中色比黄金清心映碧玉所以范母贤挺然范闺淑天泽岂不广晚施意仍笃嘉命播中州清风蔼然郁太师倘有陈彤管将见录

奉和诸真有待无待篇

翔龙曜金景灵旗逗珠树廓落兆里遥和颺蔼然度有待不即来无待来何遽无待有待间或来仍或去强作无待观内深有待趣聚幻如聚真真往幻常住翹盼玉清阙太上不我顾回首方寸乡灵真不我驻是以无待门长繇夸者误

寄顾山甫

山甫山泽癯也岁杪见过新诗斐然近间客谢都尉所成二章寄之

君是吴阊人不踏吴阊迹野菜佐蒸藜一饱枕白石岁邸偶相见眉宇寒山碧却笑柴桑叟被人唤彭泽名者果何物于身了何益新诗不杜机终难辞物色

其二

晨起便无营宁为晚饗计青山不碍人藜杖信所憇酒半双颊红徃徃吐豪鸷譬彼咏荆卿毫端劒光至调笑主人公侠儿谢都尉但作蓬户观朱门岂为累

何仁仲鸿胪千里枉驾杯酒论文甚适也亡何乞一诗以别余感其意聊为赠之

楚产日以良千里申所向谈锋永嘉后词格黄初上吾爱次道真几欲倾家酿榜子语潮生翻令结惆怅

其二

之子通隱流乃僻千载慕不爱叔夜鎗携余一诗去却愁沅江阔风波日云暮余光久以沦蛟龙不成妬

苦魔娆

我昔魔宫■〈尸外立内〉所作无不获魔事偶然止亦得暂休息今我厌魔乐皈心向空寂魔仍不时至分我清净席我自忽为魔魔岂强我即但令一切空无縛亦无释魔当住魔天我当安我宅

和苏长公南华寺韵

身自祖戒来未识祖戒面偶然赖拈出一见不再见紫马白玉堂所得等露电鲸海人鲊滩厥药始瞑眩悔不先师禅荡荡一白练濡首六欲尘惊心九重谴云胡岭外归绮语纷如霰但使能所空何烦焚笔研

和苏长公妙高台韵

佛印老秃翁片言拄苏子禅床咫尺间忽掷千万里不解弦中调如风过牛耳却望妙高台峩峩插天起俊鷗摩空没波平四如砥意气稍得舒归来对隱几卷我广长舌避汝坚利齿初若锥遇锤契则针投水欲识苏子谁长爪梵志是不向无智生宁向有智死

遇故将军袁泽知其为太常柳庄先生裔也因出洪武永乐中诸贤所贻先生诗文示之且赠以五言长体一章

汝家老天纲逆旅识马周鸢肩复火色腾上不久留人主狎片言车前呵八驂耳孙曰庭玉间行至幽州文皇薄朱邸钓竒出旁搜环卫十二介一一雄貔貅中有天人姿胡髯挺如虬太华压千岩海王朝万流再拜献祲符契若钵水投老官太常丞不爱鸣雌侯象贤如客师宛尔绍箕裘邂逅覩之子倜傥非常流白云少衿裾亦晓攻坟丘献书光范门十上九不酬是以飘然去立挟南夷酋金印垂入腰弃之若蜉蝣落魄宇宙间耻与鸟鼠俦晚知太常裔令我慨前休示汝卷一编汝当思聿修七尺长彪躯燕颌仍虎头未审投笔时亦曾揽镜否吾闻公侯始其后必见收七叶鸣珂巷带砺等河丘徃徃靖难勲昔受若祖谋勿孤人相编貂蝉在兜鍪

张幼于舍别墅为言子祠敬用志媿

句吴诚佳丽其始未雕朴三让道故尊居然一鱼服人文萃东鲁垂晖耀南陆言游遂北学与商获偕目以彼弦歌化革此诸离俗遂令大江表儒林被膏沐洵美张仲生尚友一以笃家有五亩宫傍托素王宿愿言祀言子寒泉配幽菽窃陋法护施庶希范氏躅文学千载标沾沾意良足俎豆乎其间非子谁当属

题沈启南画林居图和韵专诸要离

春风荡乡国徧地成小草岂不养浮名末路难自保清泉激幽赏长松托遥抱念彼先达迹空为后人悼青山一见属方知此图好便欲移住之与山长不老絶胜中书堂二十有四考以为黄鹤樵此樵叶图早是故必隱沦白石翁所造

即事

夜雨■〈彳 虢〉■〈彳 虢〉来与漏相终始不惊少年卧偏滴老人耳陆沈渐相迫天漏犹未已西邻晓炊罢白粥清映底今年犹自可明年饮寡水东舍得顺风号呼应鞭捶可怜征求骨共作鱼鳖饵忽逢黄冠客叩门谈玄理烧金事已谬辟穀谋可耻那能

一身活坐看羣黎死

弇州续稿卷五

●钦定四库全书

弇州续稿卷六

（明）王世贞 撰

○诗部

△五言古

奉题师真十札后

圍溷游蛆虫爽然谓清冷即且甘其帶了不悟腐腥扰扰蛮触间忽已迫頽齡和璧
点来多无地不青蝇幸遇慈悲母悯念我顽冥洒以甘露津挽我胎气零授以黄冠绦系
我垂解形密契托盟辞彷彿梦乍醒累纸皆小隶煜若周天星至寶杂流沙谁能简其英
緗縹白玉轴奉之同六经月窟骊龙居所至必服膺得鱼良世覲忘筌岂余情

答帅礼部机

武夫各自珍片言别和子歎段以康庄目前弃千里日余成苟步迷阳来见枳一饱
清泌流杜门掩其耳夫君厌承明分曹佐三礼俯仰六代间愀焉叹茅靡思祛青云尚遐
结中林轨开械何所有有兰复有芷虽复重襴之芬芳不能已金陵羣少年断断啗其齿
自非旷士识安能排众毁佩璧宁佩瑕买骏宁买死千秋自有伸谁能更论此

授产儿辈作

今日何宴会毕享馐其余儿女前跪列手授一束书汝祖饘粥资非窘亦非舒斋中
歌九友汝父日与居弃之忽若遗不复意踣蹢缓步西南去落日照精庐一瓢挂空壁其
乐当何如

其二

仲儿仅十三少者乃十二颇解学占毕不晓人世事一旦付以家母乃为之累吾患在有身况彼儿女计兴者任其兴废者任其废何必学龐公尽抛洪涛内斗大一团焦寬然若天地

其三

吾笑向子平读易无多日既欲遊名山何待婚嫁毕向平亦笑吾汝能弃家室胡不蓬累游局如禪中虱但令方寸寬彼得此宁失不见阿闍界掌之置容膝大有终南人白首为名役

病疟作

今年气候恶疟鬼何太横三家两家泣十人九人病延医医伏枕呼覩覩不竞余方侍师次骤热如就甌杖剑叱此鬼么魔当敬听速各归其所毋为索余禱鬼拜前致辞小邪敢干正唯是旦夕间徃徃遠相偵坐卧必当风果餌非时釘四大不自持三尸转成横不然吾曹力焉能操公柄公但时自爱鬼当奉公命洒然梦初觉撮念入清淨从此尼连河尽作四禅境

答钱功甫文学

钱郎嗜读书巧若蜂采蜜发而为诗歌诵者齿流溢余事乃临池入品果能逸新篇左司价小草素师笔（二公皆钱姓）三絕名总高一贫筴安出扫叶煨地炉不暖悬罄室汤药近戢身晨昏长绕膝无心问月旦有口从甲乙貽余游仙咏白云为萧瑟晚合方自怜况乃清狂疾胸际祖龙火都焚惠施帙握中灵蛇珠翻从象罔失分无英琼瑶来美不酬一老余东山卧勉尔西京日

张伯起丈创悔世緣闭關缮性投诗见貽超然之致聊尔有答

我爱张平子清标冠吴趋夷然忘四愁不复赋三都白苕明下童寶玦酒家胡一草思玄篇弃之忽若无甘露沃灵根莲花产双趺魔冤伏大力其始乃乌刍惜哉夸毗子别心趣尘途纵复浮名至是身安得居拂軫报知音毋令流水孤

谒昙阳仙师纯节祠

皎月出高天团团照灵祠中有一片心晦朔长不亏秉介在韶年抗节矢幽闺宁希世人是况乃论情私临当就羽化金剪裁绿丝芙蓉秀朝日根不弃涂泥过客尽回车而我思夷齐何必沾殷粟然后首阳薇智者快其仁愚者惜其饥焉知非冲举千载复来仪

吊徐郎新墓是仙师留髮处

郁郁徐垄柏盘盘若车轮新冢埋旧棺旧鬼作新人伊昔盛年子薄命多苦辛结愤向黄泉千载永不晨何意灵仙顾嘘枯起沈沦虽靡萧史谐不共韩凭伦留魄侑纯心逍遥于八垠匪直夫妇纲再回父子仁过者无愚喆畴不羞芷苹嗟嗟一髮微其系乃千钧

从弟瞻美保氏五十以诗代觞得古体四百二十字

睢陵肇京洛始兴振江介宏誉笼一时休风润遥裔至今青箱学犹擅乌衣最王父雅树滋馘歷徧中外肯构得若翁工冶差有赖惜哉君子泽徃徃食之既丹穴终自深苞彩未云坠跌宕纨袴间潇洒见吾弟颀然一野鹤忽凌鸡羣至十五二十时三日两日醉百万盘龙掷二八桃花伎歌翻阿鹊盐舞按回鹞队胡笳作人语羯鼓解琴矇时时沈冥中徃徃露狡狴中岁稍折节读书猎大意晋谈自风格吴妆出姿制姓名借客重裘马从友敝虽靡公业田而耽文举会手折冯驩券身避周赧责任侠鲜倦时问产无完岁偶沾一命荣肯作五斗计温清幸无缺甘旨巧自致何必欣捧檄然后成毛义伯仲不待年遗孤我衣食余泽沾闾左英声喷朋辈余解山南节颇谐道州契花发不孤赏玉頰或先睡醒让白眉良醉思火攻利汝衰俄开五髮宣面犹醉相与追曩者彼此如梦寐悬弧嘉平末荏冉见春事璫树十万枝枝枝吐新媚北堂胜事饶南荣赏心萃芳压珊瑚滴寒凝水晶脍燕寝瑞龙涎中宵鳳凰泪是时月过午长庚蚌珠配老余慕独醒对汝谢尊觶却听万年酬问解罗衿未毋论尔知非亦不解我是醉者与醒者各各葆真气竞挥鲁阳戈顿挽羲和轡从此无累身相将共天地

自警

饮光迹乐章形天舞干戚业从定中现死作生时剧习气苟尚存穷劫犹未息所以西竺言荡然淨八识而我独胡为苦搜纸上迹浅或解焚诵粗能节衣食忽起人我相纷纷填胸臆虽或祛之早犹恐中伏匿森风突如来吹入罗刹国恶固不可为善亦竟何益善恶了不思如如湛常寂

郁人文弃诸生见访道院

怜君负奇尚抱膝梁溪濱一日成黄绮千秋安素臣访我白莲社啖之青涧莼春风
穆然来小语破沈沦何必呼浊酒然后寃君颦

匡南王孙爽台

襄王意不悻与客登兰台倚醉纳雄风披襟呼快哉时无宋大夫俊语为飘埃朱邸
出豫章阿阁表崔嵬瑶阶拔地起寶楯中天开一叶将秋气疑自匡山来沆瀣日夜零注
我芙蓉杯一吸润枯肺再举化浊胎主人仍郢倡和者皆仙才笑彼吹与繁日夕市尘埋

题懷白草堂为朱王孙赋

知白启玄宗醉白慕芳规詎若瞻君宇宛然白华思同姓诸侯王汝父皎不緇河间
茂经术陈留摛令辞玺书一见旌不亿称宗师斯人老空谷朱邸垂素丝勗哉念羹墙毋
令墨子悲

感事偶成

燕坐环堵中蝇声杂然至世路岂我妨物情各自为有身亦何患无诤乃三昧瞬息
风雨过水轮絶纖翳加我我不戚语彼彼转恚一饭两粥余饱即腾腾睡

赠无住道人徐孟孺

孟孺强余颜其羯磨之室余谓孟孺于道可谓精进矣第其居平敦孝友则思齐曾
闵坚操履则思衡宪次精训诂则思凌服郑工文字则思楷左马虽种种善胜于相若
有所住者兹举将无类是乎审尔恐无以当竺千古先生玉宸大道君首肯也为颜之曰
无住而系以数语

汝不从相生亦不从相灭云胡为相住幻作一切法有住閻室中触眼不见物无住
日丽天畴能遁毫髮六用时现前真空了不涉超然三界外何縛亦何脱我本绮语人
年来畏犁舌为汝说无住乃至无可说

晨起作

秋夜初未央秋暑渐已辞笼鸡养来懒欲啼复何迟是时盥漱毕皈礼三界师首开贝叶编清梵珠累累金刚般罗蜜观音陀罗尼大易老氏经人天所并持读罢出中除海色正希夷黄庭发清唱余音逗回飏稍稍见东林徐徐吐半规山蔬佐脱粟啖之甘若饴灞桥霜滑处景阳月沈时小亦锥刀竞大则轩冕羈而我独何幸获与木石居四体岂不勤中心澹无为住五百日所得宁可訾肯学汉太常不斋便如泥

题子威侍御赠其宗人刘大恒诗后

子威手真诰时讽运题象激诡慕元迹熹微仿清唱颇矜南华博亦取岁星放把臂中垒生宗盟欣喆匠志凌绛庭杳气挟玄图壮将无鸿寶■〈口受〉不惜骊珠贖余叨尘中晤未解无始障是以安挫名怡然餐物谤所虞江乘泄苟免曼都诳去去勿复轻鳌趾有风浪

题离蕘园小山

离蕘园之壶隱亭小山东西仅三丈南北半之高不能二仞中汇一小池南北仅五尺东西半之而下有泉脉非大旱不至涸中藏磴岭涧壑桥梁之属皆具体而微遂名之曰壶隱山为赋古体一章

昔余陟叅山秦楚寬自坼大小七十峯峯峰插空碧纷来眩目境独徃疲足力及乎泛洞庭黏天四无壁日月涵两丸鱼龙荡九罏如何举武间亦具仁智德冷然一蹄涔緣以数拳石窈窕若径庭沿洄似无极步步苔误綦时时蔓钩幘山矾作古树瓦松仅盈尺不任祖龙鞭宁堪巨灵擘被以涧岭名居然无惭色勿归壶公袖为我媚几席昔觀何足竒天地有时窄

黄宪子先辈弱冠受知吾家敬美今年秋闰过吴门扁舟访我龛上出所撰临华新草及北征稿读之盖洋洋矣赋虽吐一斑足窥全豹灵光洞箫将来当不过此至于近体出入初中时挟梁栋之气不耐点检恐指南之车切玉之剑未便可已也仆既钦其才嫩其志因成一章以效微箴宪子当不逆耳哉

威鳳虽未仪其彩必九苞诵君河东赋煜然见一毛矫翼叩天阍长鸣瑞圣朝大雅既寂蔑正始出刘曹齐梁傅脂泽肤立复牙髯景龙辟康庄天寶挺羣豪体变虽尚俳骨

胜神自超子其慎尔趋通蔽勿轻殫璞玉希连城宁辞劬琢劳

杨翁八十述寿一章

昔多长者游弱冠忝公交车是时杨翁父业已八十余啖我园中橘酌醴鲙神鱼翁时侍其侧恂恂复怡愉转盼能几何翁寿差亦如已损负郭田仅存立壁庐人是羲皇人居即畏垒居但贵心朴诚何必口诗书笑彼夸毗子营营锥刀趋所窃若已盈所得无乃虚劝君安桑梓化日正舒徐

仲氏弃官学道投诗见依抒此为答

三教星月日精光或相铄识者探其真从乳出酥酪么么任蛙紫法象炳丹腹仲氏窥甘源欣然顶门勺至味中自赏大饱无余嚼朝疏发馥函夕舂下伊洛岂伊微罪好徇此孤臣托置网弥川原那能纂寥廓序中所私鸿冥偕足乐世亲皈大乘其自虽无着玄奘梵天来长捷潜井络驾言定录君仰资太元格窃窥远游品翻与思玄邈从义兄则安当仁尔毋却所虞皦皦地象罔窃真药

其二

大道宁徇人俗情能不睽安见污潦内有物吐虹霓茅翁答叔申调達谤牟尼肝腑不相烛何况大阐提名利巧愚人徃徃使识迷喧如百蚊蚋溺若一酰鸡寶彼九秋条谓等三春萸俯仰天地间慨焉思夷齐吾弟税輶轩改服友鹿麕竦身二华巅紫气为之低濯濯青莲花以根拔涂泥而我尚攻中焚结不受觸西畏弱水航上惭玉京梯晚途仅自克何肉与周妻耕则共地肺居则保天倪

腕疮剧病不寐戏成示敬美

冉冉月堕楛淅淅竹敲瓦呻吟不成寐数至街鼓罢我羨毕陵伽视身如土苴■〈才弃〉此半残足博得全般若四大非我有谁为受痛者此义颇亦闻其如不能舍

前诗似欲得吾弟一转语耳乃报札谓不能分痛又云四大为累只得调耐因更成数语

后痛犹未来前痛已过去唯有刹那痛与我复无与欲觅止痛者亦复不知处是以

忽见寃寢息了如素循览分痛言将无手足故与约更不痊割弃门外路

永嘉朱叟去吾州学正后五十年而其邑人陈子继之庄秀才逊学后先获事焉乞余言为赠曰东嘉继美

东嘉比东鲁礼乐何臻臻窥经见崔服问姓乃朱陈先后博士师作我萎侯宾绛帐宛而旧青衿俱已新惟应垂白者犹是守玄人

封君沈翁七十寿言

父书既读尽遂读天下书两儿佩庭训比翼升公交车大者汝南君小者承明庐脱汝白苎衫饰以黄金鱼充庭尽和气遶膝皆璠玕有时写八咏虹霞吐阶除忽尔钓四腮日月付樵渔能令纸价贵又使俗情疎楚泽纵元绪鲁门飡爰居喧寂太非性拟公安得如我有盈觞酒微规以当誉愿保四余言永为百岁储

辰玉应试留都赋此赠之兼赠孟孺

欲识操觚业为之无以为熟若转丸蜚專则抱卵鸡灵台仅一寸武火安所施

其二

棘日垂没际秋榜将放时要须觅真我勿述未波驰一番锻炼过大道将庶几

其三

鹿鸣歌甫罢红潮登脸色十里卷珠帘三衢缓金勒勿起人我相须藉恬澹力

其四

徐卿子同好翩翩厉风翼今日双南金他时契与稷毋轻露宵光世眼易为白

冯京兆先生挂冠其子咸甫赴公交车言别需一言之赠

冯唐厌郎署拂衣卧沧洲有子字王孙颇与史长游冥志越三坟英风隘九州岛飘

然赴公交车甲第焉足酬三语司空掾一疏富人侯鄙意稍不然良玉戒暗投不覩长安
市谈笑生戈矛桃李驾春风献态不自羞憔悴离根株零落委道周窃窥松与栢偃蹇若
潜虬郁作清庙材竟为匠石收出当承八柱处当傲千秋

答伯起丈见梦之作

张卿留侯裔中岁慕黄石蚁观一世豪消摇于八极寄此漆园蝶薄彼天门翼宵分
嘗梦余披襟话玄白恍若杨侍晨亲綯子乔烏绪语犹可寻清徽倏难即起覩银汉秋白
榆何歴歴裁诗纪相赠意我或有得而我未解脱凡情宛如昔焉能他心通作汝屋梁色
欲驰乐令驾一解卫生惑试观醒后身何如梦中覩

宜兴吴詹簿见贻山海珍错走笔为谢

岩卧应未深故人迹能继虽辞何胤肉尚余许询饋麋脍披玉鲜茵藁缕丝细食指
了不惊馋口喧儿辈亦知人天供奈此禅悅味

为汀州王别驾大颐赠彭司理而珩

汉庭贵张赵文吏争读律吾独爱彭宣时时饰经术霖霖使车雨晶澗讼庭日数登
谢公楼一挥始兴笔推按汀溪写拄笏西山入别驾老安丰为余颂画一乞诗代虔刀三
事行可必

岁暮即事杂言六章

晨粥荡一瓯饥即煨芋栗拥衾就蓐腾堦避萧瑟守令不见存山人无厯日有厯
固自佳无厯亦不必谁道不知年新年是初一

其二

七尺虎躯将自言能学道舌底吐莲花心头发残烧东家怨除目西家盼邸报欲出
中既热欲处唇亦燥何似两不關蘧蘧睡一觉

其三

冲寒裹头出剥啄何太紧征诗胜征税责文如责进才枯思复竭拒之则不忍何不
焚笔研深山采薇菌慳心久已无名根或难尽

其四

名场走豚犬秋风偶先登乍闻亦欣然门户或可冯双眉岂必蛾谣啄从此兴兼复
天雨雪时时念凌兢记取未遘时廓然泯爱憎

其五

天地岂不仁来为乡邑讎疫鬼日夜侵尽室委阳侯长吏佐凶岁存者复累囚丈夫
具七尺岂但妻子谋朝粥与夕蔬一饱良足羞

其六

玄冥多骖驾羲魄鲜停轸故人偕密戚落落晨星陨沈沦酰中鸡促数露下菌新事
久已知偶然生不忍却顾净居天花冠亦萎顿

送周子礼太岳玄帝宫

北极下明神寄治参之峯金宇薄太清玄旗散灵风皇王隆秩视万姓皆朝宗周郎
江东彦冥心事真空胡为挟瓣香竭蹶趋其宫我闻天大将九有托帡幪焉知非冒索现
身于其中蕞尔酰鸡士窥管安得通勗哉颡子思归语将无同

即事

爱弟不赴官顽儿不登第世法若小亏于我乃私慰积阴乍收豁春风满天地大家
团圞头相与明得意得意者为何共此恬憺味

初晴策杖东郊作

二月行欲尽寒阴始微蠲今朝策藜杖行散步郊原何不命浊醪亭午自醺然柔绿
犹未匀枯楫乃望妍造物不自功偶然成后先但使受嘘拂迟莫亦何言

为印师设夜供偶然作

适闻印师归咄嗟供草具燕笋斲春云枸杞吠朝露辛香溢楚芹柔甘调薯蕷徐进宜城粥玉脂恋湘箸何必五鼎烹所得良已饫回思鹄形子半菽犹未固一甘纵足快万古谁为度与汝诵五观毋为口腹误后

杂言六首

食肉无马肝不为不知味饮酒无葡萄不为不成醉软饭一两瓯饱即熙熙地浊醪五六杯醺即腾腾睡毋论昔者非但晓今者是

其二

有产不能问粗足供朝暮有子不能教亦足知门户屈指无累人眼底殊有数不畏去时景不觅来时路役役笔研间终为阿堵误

其三

朝礼观世音夕礼阿弥陀不愿乘金台不愿产莲花聊以销宿慳摄心使不它贵人背相笑禅者面讥诃我亦不敢言自问各如何

其四

割肝救父疾父愈丧其身舍身餒饿虎虎饱噬千人怨亲虽殊致违道恐亦均孝者信其孝仁者信其仁古圣贤为之我则何敢论

其五

由来大乘地不踏小乘径满口说大乘何曾有一证或请丞相田或借中涓柄开筵珊瑚拥发篋黄金进未必小乘人肯作大乘行

其六

客有冠盖来强我谈京洛昨日颂伊周今日詈莽卓或笑佞人非或嗤世情薄自古

良已然二端俱不错是以颍水人洗耳安寂寞

偶闻有荐予者儿子自公交车书来微及出处一笑答之

君平昔弃世归从此心卜采药北山阿诛茅南涧曲事佛始解勤爱书亦不读昔者甘白简今何叨荐牍纵令借作眉岂堪下同目汝意或鸡肋吾事已蛇足终入壶公壶长伴鹿门鹿以此无竞心塞汝有窍欲尚愧未忘言何如坦其腹

有荐新蚕豆樱桃麦蚕者邀印师共尝之戏成一章

麦秋麦作蚕蚕月蚕名豆豆作绿珠圆蚕似碧玉皱家老悯我馋倾筐前为寿樱桃况初熟可以佐春酌念无水晶盘写自翡翠袞野人欣及新俭岁享惭厚印师独不然入口如倾溜天厨与贫里等付一饱后迦叶须菩提妄心分去就

送顾子韶臬使之山东并为故人李于鳞子驹有托

昔我游济中于兹二纪徂叨陪雪宫宴地底喷真珠斗雹跑突泉弄蟾大明湖东南华不注灼若芙蓉敷间携济南生促膝黄公垆卷波白浩荡瞪眼青模糊回首万事空千载亦须臾君今持节去奄有齐鲁墟齐风复泱泱鲁道不崎岖惜哉弦中雪不与寒山居倘式元礼门长松余几株窃申孝标愧为我抚遗孤

沈铁山先生葬光福山挽歌一首

沈约千载人风流一朝息素旒发吴江送舟倾原剧邓尉聊卜邻光福栖真宅黄鸟声自悲春原树为白埋玉向土中谁能不心恻宁知龙变化夷犹于八极

感事

山鹊营树颠垒枝犹未固一雏复一雏宛转伺其嗉毛羽尚未成忽去不返顾纵无矰弋虞葳蕤恐中路念我非慈乌焉能希反哺生自当风暄为人慰朝暮

寿安母王太孺人六十

夫人相国孙婉嫕闲内则及乎佐安秉素封日从辟七诫以次修千指欣受职从夫

既已荣海子乃终吉翩翩宫彩衣昔从断机织嗟嗟大官供复自丸胆得何以万年觴膝前双白璧

族孙亮臣少而孤伯子詹录教之成乡荐赋赠伯子

仪部昔弥留手抚二尺孤岂不念芳馥畴当庇其雏有梓代为乔结荫亘天衢风霜不见侵雨露日夜敷青葱两玉树慨此同根株既成孝廉名重为割膏腴千秋许少府友让名不孤

为襄王题中和轩

天运不暂息辰枢秉贞凝阴阳长调畅品物乃流形一哉君王心偏陂了不生坐见春风来熙恬顺吾情所以陈思训中和诚可经

为襄王题懋德斋高斋

何沉沉君王养渊默征姿却郑袖选藻疎唐勒岷山不自高汉水何知益极目平楚遥油然被膏泽乃知大王风来自君子德

题襄王收春台

春风何处多城东大堤路君但收春来莫便留春住散作襄阳春烟花十万户

题襄王含春亭

初曦启羣象兹亭独先得君子感退藏翛然闭一室珠玉岂不光含之润山泽

题坦庵老人诗画册为甥金博士

坦庵一老人荡荡躬履素里多明哲士琅琅相标署词翰犹若新人与庵非故居易仰前修宅平谐所慕介然桃李蹊迷阳安得妬方寸苟不夷羊肠起中路寄言宅相子毋为狭邪误

洪山人自永嘉偕肖甫司马过吴门轻舟入访云将入燕赴平津之约余时病起为

蔬食以供从容久之因成一章为别

白日丽中天群星环北极麟鳳既郊游猿鹤不遑息策杖辞永嘉呼舫凌震泽欣陪元礼济将首顛君席余时病初起苍苔绣行迹一刺破衡门胡床下东壁暂割周顛嗜聊充井丹食宿酝桐乳浓新炊菰米黑饭罢何所为嗒然竟日夕空名无可借实际嗟何得试看眉宇间宁无首阳色

先师移龕日忽已三周晨兴作供感叹有述

昔在岁庚辰仲冬月二吉于时自徐墓少女风转疾冒雨扶师龕仓皇以身袒密冪无际云熹微露隙日倏尔四垂淨荧然一星出千旌斗缤沓万户奏芬苾师龕既已奠余亦宁耳室虽谢衾枕殫而多笔研役厌事事转多问心心或轶良友多中溃竖子时见嫉三载俄已周所得无一实夜雪射晶荧晨霞吐鲜霏仿佛灵驾过能无内惭怵更矢蹈海言仰希出世术将从咫尺地泛扫万緣毕

见有演關侯斩貂蝉传奇者感而有述

董姬昔为吕貂蝉居上头自夸预帷幄肯作抱衾裯一朝事势异改服媚其仇心心托汉寿语语厌温侯忿激义鹞拳毗裂丹鳳眸孤魄残舞衣腥血溅吴钩兹事岂必真可以快千秋旦闻抱琵琶夕弄他人舟售者何足言受者能不羞宁如楚虞姬一死不徇刘

周子家会稽狮山傍因以狮屏自号其游吴也诸生多从受经魏子请余赋之

会稽有狮山之子庐其岫生平富经术所至必教授精言散不乱雄气掇羣斗坛專师利座义夺法王吼雾豹奚足言云龙终有邁何必拥皋比诸生羣且就

题赠虹皋子

昔覩蓬莱虹维时午初霁恍若梵天桥旌拂拥螺髻有桥吴江湄列星七十二连蜷下饮水夭矫垂虹势结庐栖近皋之子托深契文彩成五色中含不平气虽等望云渴毋取贯日锐变幻俄顷间造物小儿戏何似以桥名千秋恒利济

题海峯图为故金同文先生作

六鳌既失守十洲俄半摧苍然东海色忽堕一峯来插云斗柄出浴日扶桑开停琴
听洪涛乘桴问九垓鲁连无世念安期有仙才高踪不可即披图良快哉

张秀才母七十

夫人昔归张中道损欢燕清心玉同洁劲节霜不变有子熊丸训早登鸿都选岁裁
尚方服日割大官膳夫人不色喜谓尔必陈善持纲忤上宰积媾承严谴相与耕绵田夷
然了无怨今来赐环日再展添筹宴欲知孟母贤请诵子輿传

用韵自警

寂尔当春昼恍然现余过仅晓身外师不识师中我逞笔亡所裁几复酿语祸回涂
涂转迷蹈海海仍苦所执但空花而乃希真果俯惭抖擞念仰愧慈悲父名欲一线牵百
誓成子母搜之若微细任之终失堕真一苟有亏毕生莫能补冉冉崦嵫照沉沉北邙土
不解去日愁为昧来时路试一唤王生王生必回顾惺惺与昏昏两反当两助于此尚因
循贤圣莫能度

弇州续稿卷六

●钦定四库全书

弇州续稿卷七

（明）王世贞 撰

○诗部

△五言古

赠别邢氏邢子愿按吴吴人德之而迁楚藩少叅以去不佞尤有慨焉因成二章盖
比兴之义胜云尔

三吴昔沴疠原野何葳蕤灵雨从北来为我日夜滋破块将作膏润枯将作萁旱魃
何相仇狂飈中夺之一展衡巫云再展七泽■〈雨资〉吴民泣相响焉用真宰为虚矣

诅楚言楚氓仍见私

其二

日余困邁轴上书方乞骸感君纏绵意报君纏绵懷北风荡征尘昼暝十二街我以为兄弟焉知虎与豺青镜光不亏浮尘焉见霾韶年负竒蓄胜际未讨涯堪衫黄金带紫盖白鼻駟楚遊诚云乐和郢况不乖

袁母劳夫人六十

吾友袁汝南英英瑚璉器晚达仍坎轲才高遽倾弃少寬黔娄橐未毕向平累七女仅一儿右军邁全异矫矫劳夫人为之代终事婚嫁悉以偿庐产母中废海子必义方不迂隃孟氏头角俄嶄然箕裘当有继雅闻甲子周轩冕光照地桑榆藹余照松栢绵晚翠道韞无报客贤声自吴会

故将军何维圣自维扬来礼县师毕即出新编见示斐然之感遂成四韵赠之

何逊在扬州轻舸访娄泚骠骑雅佞佛将军不好武旃檀裊犹馥牟尼炯还吐母使罔象求留之媚灵腑

送顾吏部迁山东臬副并托访于鳞冢

顾荣江左彦藻翰复超絕一辞笠泽云十倡钟山雪水镜含春温冰壶朗秋月时烦巨源启遂佐东秦臬褰帷风泱泱摇笔霜列冽旧游三十年约畧为子说上有华不注下有和郢骨微言犹若新与山斗■〈山截〉嶠吾子虽异时同调必心悅倘表郑公乡千古偕不灭

余登第日一接故大叅瓿东公二十年而遇公伯子思尧君为赋曲池草堂诗又十七年而君之子季輿来謁出新诗一编云将有遠遊且乞数言之贈感旧怀贤情见乎辞

早识叅知公矫矫一世师东序悬钟鏞西清列敦彝及乎覲象贤宛然慨风仪奈何同阿閼一见忽失之接汝通家刺诵汝幼妇辞旧感热中腸新好溢须眉别业创湖溇有无余曲池答言九州岛慕焉系一壑私伊子论交日是我挫名时敢夸大父行勿言丈人知

赠慧永叅五台毕复礼落伽过访有赠

上人宗门秀双瞳剪秋碧夕踢汾山餅晨操赵州锡插汉清凉台截溟补陀石一见不再见欲得无可得吾意且暂归法堂草三尺

封户部大夫次泉李德润先生其先自關中徙豪卫京师遂为京师人补博士弟子通经术有声而不获第有子今仪部君早达以其官封先生不色喜惟杜门读书缮性而已仪部用直言获谴先生不色忧旋被召迁今官迎先生养先生亦不色喜其夷然泊然者如故也弇州生闻之曰先生其有道者欤选部魏子曰子以先生有道者则子之言徧天下而乃嗇于有道者何也辞弗获已为古风一章歌以寿之

函右表地灵天京萃人杰英英李夫子徙豪自先喆三藉方朔余七工枚生发鸿都艺良就鹿鸣歌中咽束书怜肮脏抚腹笑豁达慷慨舍類宫栖迟瞻魏阙伏枥虽已乖有驹早汗血粉署郎地官冰壶镜秋月一登考功最遂叅大夫末紫诰标义方乌纱冒宣髮闾里前为寿雅非公所悅君恩固沈深汝职何琐屑维时上台拆望治羣志切虽更覆餗鼎未监摧庄辙桃李丛要津狐鼠窜深穴寒素多失职膏腴转轩揭御史一有陈幙被谢朝谒维时雷霆下臣才理其说夫苟利社稷焉能避鈇钺天听不为开物情转成郁槐简拖綠衫引愿谢亲闕公为喜加餐汝志吾弗夺畴拥黄屋尊谁伏青蒲热堂堂中兴代鸣鳳何寥阔既同臧洪日宁辞道州罚御魅夫岂遥无官自足活天心在仁直阴翳俄朗豁宣室既生还絳灌亦心折金陵佳丽地建礼鸞鸾列试问三釜隆胡殊菽水啜拄笏龙江霞曳杖鸡阜雪有时指鳳游翛然羨高洁气养神自王意澹精不汨父道师友兼君德天地埒我称万年觴盖言不磨灭

二瑞篇为靖江朱生颂其令陈君也陈君自台出为靖江有异政而感甘露嘉麦之瑞故颂也

皇灵大动变鼎席乃频移天泽不自秘屯膏布宏施江介有神君卓鲁受良规欲观驯雉化稍戢神羊威湛湛秋夜零灑灑露未晞承之炯如玉味之甘如饴大地春风来来牟亦吐竒同颖表一心共穗昭两岐昔闻上元令清心感恩滋复闻渔阳守异政假灵祇赫赫我仁君斯瑞乃兼之祝君寿无疆惠我乐不支

兰谷辞为沈子赋也

菀菀谷中兰习习微风吹馨香自相媚焉用傍人知陋彼灵均子九畹广见滋被以
大国名贡之白玉墀违性离故土虽贵非所怡欲识幽人贞请听兰谷辞

李本宁兄过访挟客曰来君者其名相如其字不疑与谈而悟则吾贞吉先生也喜
而赋长篇赠之

本宁别燕中十见秋草白忽通应门刺使我倒双烏鸦鬓犹未苍虬髯顿成赤寒暄
未及展已进所携客轻裾乍飘扬朱辅吐温皙晬然一顾盼光彩曠萝薜姓疑护儿后名
自长卿得稍停见隆準夔语通促膝始悟自陶徙翻称范少伯纵复紫可怜宁夺南离色
不戴遠游冠却杖遠遊策黄鹄摩天来肯作樊笼翻剥枣温浊醪展歌恣欢噓床头挂君
画袖中出君迹神交复会面数载今一夕却顾斗柄间参商当不隔勿问王孙归所愁關
尹识

赠别陈从训时余且入山矣

少年不见值晚合便成离以我絕弦际逢君纳履时初听有心磬旋展无声诗云雾
勿轻墮风流犹在兹还闻金螯背差堪笙鹤期

俞山人公临卜筑阳羨赋寄一首

京洛饶贤贵吴会富华腴虽复堪身筴要非中所愉仰希上皇风俯卜静者庐荆渚
无浊流阳羨有幽区山自离墨来溪由罨画舒以兹畊蚕业不复废诗书春问茶女茶秋
逐渔父渔朝饥拾野穗晚供剪畦蔬蓬累故何滞鷄适当更余窃从柴桑叟相为咏移居
毋使车马知令汝苍苔疎

曾舜征令长洲有古循吏声实而台抨当调作此送之

伊余窜草莽忽忽末景驰闾井有公言贤令将解龟忠恕佩家训三省日孜孜云何
贝锦繁致此投杼疑圆魄丽中霄織云来翳之回光或不瞩真体乃无亏膏雨乘春布沮
洳称不宜宁为流潦故悔此天泽施即墨非吾恨中牟竟而师追魯内逾密委运外自夷
但使素丝存宁受墨子悲勿以黄绶屈遽咏陶生辞泰二苟朋亡知当未遐遗赠子幽谷
兰一佩三纫之清芬幸无故行当被条颺

张助甫中丞自夏州遣信问存侑以三月俸曰为米汁费报谢一章

上元之来夕有鸿自征羌中丞三月俸使者万里粮上言识区区下言结不忘书穷
递角见朱提烂生光冰雪满衡荆藹然自春阳日来不饮酒酒家无鸛鷀亦复不噉肉屠
门毋责偿蹲鴟足饱饥悬鶉有余裳念欲返君嘉友道非所当西寺充檀越东邻佐贫丧
南陌饭苾刍北渚成徒杠以此无住施为君彼岸梁窃聆叔则言载佩原思章吾儒亦云
云毋使廉惠伤

寿九房三仲季之母范六十

昔我伯父行魁然乡耆宿生平恃豪举晚始虞嗣续络秀来为偏熊罴瑞相属鼎立
丈夫子遶膝皆峙玉伯仁故亭亭阿奴不碌碌季春寿筵开琅玕纷触目始歌三妇艳继
以将雏曲但夸河东鳳何论羈栖鹄不学西邻女幽兰媚空谷

成化乙酉世大父郎中公捷留省遂破吾族天荒今年复为乙酉而犹子士驷入太
学应试恰与大父同庚赋此期之

昔岁乙在酉伯祖尚书郎只手探月肋一枝破天荒遂令素士族重唤乌衣王冠冕
蝉连来一百二十霜桑梓有余晖兰桂无不芳汝生在庚申雅与伯祖当昔阻上水滩今
来顺风樯汝父游成均不能掩夜光诸生皆避席祭酒为下堂汝兄歌鹿鸣矫矫千人场
余祥发麟趾胜事征鴈行努力崇明德淮水日汤汤

元瑞计偕过吴入访弇中留饮有赠

日子欲无言吟咏亦随废塞耳空谷中足音胡然至之子匪俗欢夙昔申末契掩關
二载余日与黄卷对鹵莽一世眸宰落千古事圣主御明堂汝乃随计吏应门故所习踉
跄手其刺一见肝胆披软语若相媚中厨出旨酒亦复饶异味鸾刀缕黄頰雕盘钉朱柿
秋色在芙蓉客醒主已醉四坐且勿惊见有此人未但诵子虚篇何待杨得意

寿旧幕僚宜兴吴君六十

我建襄汉牙君叅芙蓉幕皎镜壶中冰昂藏鸡羣鹤摄邑貽邑思辞官鲜官橐摆脱
墨绶荣经营寝丘薄溪山相暎带心迹双寂寞十味茗笋新两收鱼鸟乐素封亦何道红
友时斟酌地僻日似年身闲梦不恶念予嗣嘉遯所愧名未削遠信勤柿栗饱殮慰藜藿
甲子君一周精神迥如昨窃致三叟言用为千秋药长作武陵人桃花任开落

题鳳凰集图为陈德清应召

鳳凰出丹穴万羽相因依今者集君庭孤寡以徘徊匪为听箫韶毋乃揽德辉阿阁
丽层霄雄鸣应朝晖肯学颍川守终贻鶡雀讥

送喻隱云先生归常德

余学道七年矣而未有所得今年冬常德喻先生自建昌来自言拜南岳王薛二仙
人之秘余受而行之不三日而证奇妙种种不可殫述去今而往唯有无思无为勿忘勿
助而已先生别矣余无以报先生愿先生韬光隱迹必择志士仁人而后授之异日云輶
霓罕间不令猥杂致罡风吹堕可也

清微大赤天徃徃多阙职欲铸人间人去充蓋珠伯晷师诞先登余乃甘旧谪七载
犹滯滯三环同弃擲幸逢喻少君喜气满大宅银海湛澄波玉池漱灵液倾盖若古欢披
襟庆新得自云少无赖陆博恣酒色行尸鲜生望立骨怆期迫偶从衡岳归乍迷襄城迹
道逢二仙长不饮亦不食揖我雾露中栖我石崖侧蹲鸱餒我饥苍藓分我席夜分仍见
怜软语相慰藉玄牝岂异门谷神有真的一气皎指南众星皆拱北始若晋阳甲祛除靖
肘腋继如时雨师九有咸荡涤铁鼓以次开金轮长不息坎离本天媾任督宁二脉九宫
渐充盈百体各轻适何必守庚申然后蠲死籍余意了不疑三宿而自获方欣顺风拜忽
杳凌空舄邂逅成睽违仓皇悸心魄叶叶云四起亭亭鹤一只宛宛武陵红迢迢洞庭碧
君担日月行遗余天地塞前因已小露后果莫轻悉大道故不私元机帝深惜

栢溪翁写竹妙得彭城墨派而不轻为人作以故传世颇鲜此纸仅以数枝寓意耳
而姿态溢出乃子尚书公刻之石摹本示余不胜仰止敬题于后

子猷爱此君不能一传神谁为传神者峭蒨得其真前有文湖州后有王舍人沈翁
天机活不借丹青色尽吸淇澳秋缩入文园墨披梢鳳尾振写箨龙鳞坼兴来两三枝势
若一万尺翁乘葛溪杖转叩湘君宅零落吉光裘片羽千金直幸有鳳沼儿摹之于乐石
石能使竹寿竹能救石顽遂令风云气长留天地间羹墙莫深慕徒益泪痕斑

挽七十六翁少和盛先生古体一章

秦人刺扁生曹公僂华氏念非遭凶残此曹会不死盛翁擅秘方且复精名理肘有

青囊书舌余上池水出奇不为恒所治人立起手诊贫儿腕巷停富客轨义声冠当时颠
癖亦尔尔昨岁冬仲朔冲寒过吾里宗戚若而辈赖翁锡余齿华筵簇高张郑声奏绮靡
翁去不复顾自抱琵琶妓风流一朝尽有药它人饵七十六年春花飞逐湍驶犹举逸少
云乐死胜二子为惊虽不同伤生亦如此惜哉三仙翁制命不在己

咏碧莲花花初正碧久之则纯白矣

苞蕊色正碧碧如碧瑶冠舒英渐纯白白胜白玉盘双成妆甫毕西母宴将阑醉馥
群鹤苦雪翎尽摧残

送印上人朝五台

僧朝五台去毛孔皆文殊及乎五台返文殊为有无清凉即烦恼欲界是仙都吾爱
仰山弟从他来意孤

谭道人自豫章来致宗良王孙诗一编为订而序之复成兹章示宗良

客从西江来鲤鱼衔双结鱼腹了不腥兰芬中自发王孙天潢秀兴词何勃郁奔腾
失前辈摆脱谢时杰调古意必新才工理非别力回彭蠡澜欲表匡庐截四顾无当心徬
徊取真悦敬礼昔杳然玄宴本虚劣笑此垂尽躯为君千秋设

吾州赵僉事先生伯京自号震洋盖即东海也先生官白下时白下诸名贤皆为之
咏歌署题至图画其事四纪来则先生久游道山而诸贤亦无在者其嫡孙太学某出以
示余不胜望洋之感因题短章于后而复志之

昔闻西竺言于东有震旦百谷万古输黏天浩无畔赤日蒸绮霞光彩交凌乱夫子
锺其灵少小富篇翰齐汨摇地轴泓渟茹星汉羣贤悉河伯恍然失其观是以必朝宗骊
珠挹无算中乖仲尼志遂兴鲁连叹化鹏得逍遥骑鲸归汗漫焉覩云气中期羨不相唤

赠别胡生

晚途颇厌常胡生实奇絶磊落饶意气昂藏秀风骨春城喧吴趋弦管中夜发忽弹
广陵散寄思在寥阔冷然中心赏焉能媚时悦无竽耻齐滥有璞甘楚别少年易窥人不
为儿曹说

元日探梅前坞得数枝作

条风煦元正令我宽眉头偶成探梅句遂作探梅游舍策凭小僮拄颊枉前丘一点
两点疎千枝万枝稠目境固有殊会心并悠悠行人且莫折留媚我清幽

题朱上林所赠钱舜举太白观瀑图后即还上林

匡庐万古瀑太白千秋才两奇偶相值后人何有哉及展舜举图恍登文殊台立起
青莲枯来听万壑雷始知丹青力可以回寒菱

其二

昔余赏朱生（上林父太学邦宪也）飒爽埒李白喉间白龙挂宛若瀑布直此图
传李神即呼朱亦得急还其家儿置汝高斋壁好待寒月来悠然想颜色

将赴留都司马出门作凡四章

五十始加一倏然向岩居六十寻己三乃复就征书一念苟不坚百悔与之俱倦马
临畏途十步五踟蹰问我何所恋问我何所须我亦无所须但顾我头颅

其二

今辰复何辰二月吐严霜敝庐非我室故里非我乡病弟强巾栉病妻尚帷床小语
报国恩勿作儿女伤出亦以彷徨入亦以彷徨泪下如縲縻欲答不忍详

其三

徘徊杨林陌顾瞻先人墓螭首松柏椒垂垂泫珠露王纶既三沐瞑者忽若寤白首
街弓旌岂以浮荣故小欲酬帝恩或可扶天步衰弩有如此终应问归路

其四

晓步城南隅入辞导师庐恋此萝竹幽愀然就征车于道岂有当供奉十年余候吏

满河干旌旄溢川涂不知为谁子顾我了若无虽乖箕颖尚恬憺庶未渝

游摄山栖霞寺颇得泉石之胜因访明征君僧绍故址读江令诸篇遂效其体

宿雨敛西昏翔阳舒东白松涧纷相悦溪喧若趋敌迤邐叩山椒熹微露榜额焚香
礼空王问饭得香积灵骨吐双图佛螺现千碧兴来不虚返缘源渐有获飞泉激冰雪余
韵铿金石一线脂蚁通双崖巨灵劈如闻大士音恍作海潮色征君毕世栖冥心自乐国
江令终宵憩返念仍焰宅伊余迷晚径一壑乖定力已惭战胜肥虚恋器中寂逝言涤无
明将从度公析

纵步摄山颇穷名胜有作

兹山实灵秀葑郁如团伞窈窕隙日穿芊眠泄云散忍草屐不妨名药囊堪满涌瀆
胜垂乳迭石疑丛卵易窥法王像难迹征君馆忽有岩梅发如逢胜流欵酌水当醴觞抚
松韵清管日昃不知归焉顾足力短明发望台城戒徒心更缓

追和江令静卧栖霞山房望徐祭酒作有懷赵祭酒

夜静絕梵呷地幽宿岚阴警鹞振栖羽飞泉来遠音因探作者咏时搅故人心讲席
鱣初俎经坛杏欲林西方既中返北面敢希钦幸以衰迟感毋复望臣深

古意寄伯玉司马

古道邈以乖雅尚人自疑日余与君子结髮媚清时弃置何足言千秋以为期邹律
嘘春阳被者尚参差见龙虽在田文明光四垂鳳衰将何道六融犹未摧逝将因风往消
摇于咸池

其二

金陵富英彦甲第亘中逵短刺日夕驰迹徃神不偕宁知尘中尚乃在黄山陲容城
既璧隕济南复兰摧俯仰宇宙间知己日以稀纫袖双郁金香三枯芬渐衰幸其未为莠持
用表心期

答汪仲淹

日余栖崆峒九阳坐晞髮承子问道言词组不能答今者游金陵双驹日暄喝过耳了不停当机时自发真宰失玄珠宁为罔象设顶生慕帝释举念成一蹶有身亦何患无生宁待说摆脱有无关悠然得真诀

承大宗伯姜公少司寇李公邀同大司寇陆公少司徒方公陟牛首山有述

金陵信佳地兹山仍丽观标形自牛首遥势应龙盘从楸入昼暝长松当夏寒云梯界危梵宇绘层峦仰窥象纬逼俯觉尘世宽江拖万里练岩横千仞丹追昔始兴议聊深冶城叹胡云表双阙毋乃文偏安巨明一开辟奕世乃胜残文祖时驻蹕神孙此回銮天子自有真奸萌焉得干雝雝鳳游圃衍衍鸿渐盘朱衫杂缙素白社容簪冠方藉禹功大况值尧世难

将至祖堂过岭返望牛首

脉从牛首来胜自兹岭始足力虽小疲目境殊未已午照苍松巅千崖被红紫恍如帝释天镡金饰睥睨色相故以空羨心何縁起

祖堂

大道本无统兹统乃融师智岩敷五叶鹤林横一枝任尔黄梅发差强未熟时

泰和萧京兆感异梦得地构楼甫成而拜勅命之锡俾余以诗纪之

梁德一何长照灼光来裔八叶秉台衡余休犹未替侯其名家子通显身自致杰构入幽梦竒征协雄思武姥当倚栏淇塘曲环砌云霞郁缭绕竹栢献葱翠燕贺客席初鳳銜王纶至臣冈百稽首奉之踰六瑞山君日来朝斗使夕相媚非由地灵藉詎表天文丽赫赫萧京兆食息銜恩賜

右司马私署之允隅有轩三楹前列数石若冈阜植以时卉一命觞觞之繫以长语

昔余圃离資垒石当轩牖间借凝霰崇暂收停云黝麋鹿性所便鷓鷃愿毋负不谓志转奢遂辟畝中亩莽苍跨陇植歴落排空阜却顾旧所栖旷若吞八九昼泛穷渊源宵游墮参斗主席或不冠客衣从短后易世非所论此生毕吾有何意咫尺书遂夺匹夫守

问我官何署叨从司马右问我居何所尚书巷西口既鲜履道竹亦阙彭泽柳造物或见
怜谓我癖如旧石颇余数拳地仅盈十肘敢烦离蕢较宛尔一培塿植以朝荣花听杂野
生莠亭午初散衙欣然缓其绶尚儿致盘飧海儿捧卮酒何必高轩过傀俄自称寿人生
百年内所值皆归偶安能歌五侯且复艳三妇却问洛城南金谷今在否

酬屠长卿谈道

汉武招炎柄神威鞭八荒贵富无终极欢娱焉得长上感西母精譬说将万方灵药
点行尸非腐仅成僵太白宦不达蓬累因风翔白云大还就毛骨皆灵香逍遥竟八极婉
娉凋三光采石一醉归鲸背天茫茫得意失意人于道皆有妨其言快人耳其事令心伤
云■下璇霄绛节丽朝霜下迎扫除者不问陶华阳栢叶瞿仙童远胜其师黄冈象获玄
珠智者空遑遑窃为聪明凿羊用岐路亡才鬼与顽僊其究安得当僊成故不顽才鬼沦
披猖余计业已失谋君安得臧不覩襄城辙大雾迷康庄自非小儿言七圣俱彷徨

古体寿钱澹庵翁八十

昔人颜子渊于道实心冥一窥太山练遂尔销神形乃知元气锺厚薄良径庭钱翁
志圣学仰鑽无时停苦行类攻玉雄谈如建瓴頽宫何煌煌三十荐明经四十歌鹿鸣五
十对虞廷彳亍郎署间拮据不遑宁真宰欲佚之为汝匣青萍闲放雪溪棹或酺若下醺
有时深玄观有时称独醒七袞古已稀况乃加十龄宛然两颧红上暎双眉青劲翻凌秋
空修鳞纵大溟翁曰毋云尔我欲固吾扃不见卫武公大耋勤箴铭逸宕散真我多思凿
性灵余有天一浆湛然殊清冷当此陶唐世为翁灌千奠

沈银台大朴园

隱侯赋郊居有圃非遠而春至百卉芬珍木郁参差畴为当心者名朴了不奇直上
三百尺旁樛千万枝雨雪避弥漫日月为蔽亏上覆柴桑庐下荫中散池微风荡浮萍莹
作青琉璃时时手一编骄矜我何知返照自西来胡床与俱移怪柳不盈把樵采来相欺
豫章甫蔽牛匠石已见窥人命故匪长巧者复凿之请以庄生社咏为大朴辞

余老乞骸而汝师大司成亦在告聊成一章问之

称疾太学师真衰右司马俱露乞骸章言寻故园社天听如许卑方舟问吴下桑榆
我荏苒松桂君潇洒君以道不行我岂行道者所念各杜门浊醪难独把非繇惠德音何

以征风雅

弇州续稿卷七

●钦定四库全书

弇州续稿卷八

（明）王世贞 撰

○诗部

△五言古

恭谒太祖高皇帝御容有述

寶篋启葳蕤恍然覩天容恒嵩表隆準日月开重瞳仿佛御座傍杂沓繚云虹我闻元运衰真人起隆中降自帝释天一扫烟尘空至今万水流畴能不趋东匪覩胼胝状宁窥神禹功

恭谒成祖文皇帝御容有述

琐琐一虬臣手叩玉京扉巍巍两天人色夺金殿姿尧彩既璀璨舜瞳复昭回飘鬣翹然举俨若双龙綉如日丽璇霄九有皆光辉奚必须袁生始辨天子髭遗蜕燕山阳游神沙漠陲

咏诸功臣像

故开国辅运推诚宣力武臣特进光禄大夫左柱国叅军国事太傅中军右丞相征北大将军魏国公中山徐武宁王达

高皇挽天河手欲洗乾坤烟尘既荡除万古黄屋尊桓桓徐魏公二十握橐鞬唾手縛僭王长驱定中原昼余耕桑地夜絶殍鬼魂赫奕奏凯归屏营杜军门勋超齐尚父德遠韩王孙两都对开国高栋亚天闾飒爽见英标藹然眉宇温

故特进荣禄大夫上柱国太子少保平章军国重事征北左副将军赠太保开平常忠武王遇春

高皇下江南鄂公实军冠喑鸣人尽靡跳荡敌中断彭蠡赭汉宫吴台筑京观长驱搏燕都单于夜奔窜遂与中山王功割天下半辕门落天星短造屈长算如砺身后盟抚髀异时叹寂寂踰百年帝纶复昭焕

故开国辅运推诚宣力武臣特进荣禄大夫右柱国征北将军大都督府左都督同知军国事曹国公岐阳李武靖王文忠

神龙排丹霄云表饶介鳞何况于曹公实托肺腑亲弱冠屏浙东气欲吞吴人遗孽窜故都游魂荡边尘挺刃躡虎穴六羸夜亡奔虜其名王归驼马百千羣珍货若山积籍之奉至尊带砺表忠勲将与魏邓伦易世隳家汰继絶荷皇仁

故开国辅运推诚宣力武臣特进荣禄大夫右柱国大都督府右都督征西将军同叅军国事卫国公宁河邓武顺王愈

卫公田家子神勇自天授十六冠军锋二十寄戎首洪都既如盘襄樊同拉朽长驱扫中原曹宋相先后功大心转细爵崇以卑守西羌十万帐一战皆吾有辕门将星坠悲声咽刁斗武顺以易名帝念良不负

故开国辅运推诚宣力武臣特进光禄大夫左柱国大都督府左都督同叅军国事信国公东瓯汤襄武王和

信公里闾旧蚤托干城寄征行出必先遇敌坚始厉功多冠彻侯心小取高位及乎瞿塘郟稍似失帝意终念丰沛私遂尔同英卫晚途解兵柄称病力不制所以恩泽终颖宋乃反是

故开国辅运推诚宣力武臣特进荣禄大夫柱国征南将军西平黔宁沐昭靖王英

西平少沈勇亲寄异诸儿三十二元枢遂副西羌师虜其名王归万族尽累累六诏抗天权三帅张帝威颍川首排荡永昌翼摧劓侯其寄留后剪棘抚伤痍一战贼胆夺七纵酋心归身没担王爵翼世秉公主至今二百年黄屋等崔嵬

故开国辅运守正文臣资善大夫护军诚意伯赠太师刘文成公墓

有一冠貂蝉白晳美眉姿皎如张文成不愧帝者师元厦将就倾良禽择其枝一见寄帷幄再见糸鼎司是吐无不倾灼灼若蓄龟峻往鲜回互巧者能间之终藉帝恩深归魄于山陲荣名施后代百世永不隳

故翰林院学士承旨知制诰宋文宪公濂

皇天厌元运英主革其物荡雪万象昏被之以黼黻宋公始膺聘遂尔糸密勿一草十制成顿回天颜悦远增鸡林织近补龙袞阙青宫重师资抗表久始决金侈疏傅赐诗荣贺监发覆水忽不收君恩长断絶

故太子太傅嗣魏国公徐辉祖

中山既星陨嗣公乃霞升仁孙藉肺腑荀息为干城大义当灭亲一死以自明敢援椒风顾忘此板荡诚捧心见家王茅土幸未倾焉知百年后崇祀表芳名

故奉天靖难推诚宣力武臣特进荣禄大夫右柱国太子太傅征夷将军成国公东平朱武烈王能

文皇倡义旗百战躬自将毋论大将谁偏裨皆称良淇公与成公雄武雅相当应敌面面身倡勇人人强成公实少年受赈辟南荒武侯未渡泸伏波已告亡帝倦殊深笃胙茅等真王至今东第中华栋郁相望

故奉天靖难推诚宣力佐理武臣特进光禄大夫左柱国太师英国公定兴张忠烈王辅

河间建王畧中道乃摧折令子实继之神武绍休烈已悬彻侯印遂秉将坛钺长驱扫南交富良波为血三缚叛王归干城归版籍首发吴淞谋精诚昭日月晚辞北军柄遂冠坐论列舆尸豎子哉玉石同兹孽

故光禄大夫柱国少师兵部尚书华盖殿大学士赠太师杨文贞公士奇

长陵寄台阁所拔凡七臣文贞一王官超等肺腑亲青宫借羽翼监国日咨询遂令寰宇间雅归储皇仁师保歷三朝夙夜奉一人间饰文雅观未漓造化淳末路厄权珙有志时屈伸终然保清白易名畴与伦

故光禄大夫少保太子太傅兵部尚书赠太傅于肃愍公谦

熙世孽祸萌妖竖擅天纲时危巨公出赤手障八荒三十官司马奄有梁晋强煦若凌冬日凜若亢夏霜惟时帝蒙尘群议沸蝮螭独公屹不摇大都自金汤九重借嘏笑百辟羨飞扬所以杀机发委命燕市场人定天亦回骨腐名更香

故荣禄大夫太子太保吏部尚书赠太保王忠肃公翱

昔在英景朝天步实多艰矫矫一巨公降崧自钟山受脈奠辽海飞檄扫南蛮再入司统均晚际一何殷不诡亦不比侃侃曹石间遠迹苞苴絶旦暮军门闲左掖造膝归屹然冠朝班眉寿古所希荣名安可攀

故荣禄大夫少保吏部尚书华盖殿大学士赠特进太傅商文毅公辂

商公一书生三表羣英冠偶然值屯夷遽尔叅涣汗中蹶乃复起不修睚眦怨嗣李务含宏佐彭出谋断密雪庙社功景皇复昭焕力发肘腋奸权珙稍知惮事违奉身退儵然严滩畔所以马钧阳懷贤发浩叹

故光禄大夫柱国太子太保吏部尚书赠太师王端毅公恕

昔在成化朝群小为蛊惑贡橐杂苞苴中使日络绎三原抚炎徼抗章夺坚魄及乎钥留畿十疏表忠直天听时一回国论若有植白简入都门倾朝为动色拂衣南山陞过者必垂式孝皇嗣龙飞元纁慰耆德既專铨衡寄复叅坐论席罄欬若一身谗来微扞格高空揭太华狂澜回碣石何以昭令终上公特殊锡

故特进光禄大夫左柱国少师兼太子太师吏部尚书华盖殿大学士赠太师刘文靖公健

孝皇昔御天九宇开人文朴哉刘文靖力欲使之淳秉揆若无言造膝时有陈六卿握斗杓盎然万物春及乎弥留际千古一君臣时移道乃见事屈志恒伸高卧洛水阳遠

与文富伦九十称地仙去亦当明神

故光禄大夫柱国少师兼太子太师吏部尚书赠太师马端肃公文升

马公河岳锺器宏神亦王折冲东西垂屹然金汤壮秉节忤权珙寄命一边障晚途
复登庸台纲肃清亢中枢借筹筴铨府推藻镜片言折羣江一柱抵崩浪八十而悬车犹
云无恃杖緬想成弘际令人发深怆

故特进光禄大夫左柱国少师兼太子太师吏部尚书赠太师李文正公东阳

矫矫李长沙髫年见囊锥及乎操文柄万流所趋归宏基树层构五彩实彰施新皇
善逸豫羣蛊争媚之公卿轰然散而乃独依依洁身岂不佳王室阽艰危回澜非所任调
剂亦不訾苟存巨公度焉恤少年讥

故光禄大夫太子太保兵部尚书赠太保刘忠宣公大夏

茂陵志佳兵华容司职方力拙徼功士失毋令得偿及乎孝皇代经营膂力刚锡圭
黄河流杖钺岭海邦抚此蒸黎瘵如保赤子伤君门逮遐陬磅礴皆春阳晚途彻帝聪所
披无不当造膝若一身密语沃中肠鼎湖泣遗弓挥手白云乡岂无沈几哲妖竖乱天纲
身名竟璧完令德假穹苍

故资政大夫都察院左都御史赠太子太保戴恭简公珊

敬皇急治理虚懷寄羣公造膝日有陈心腑一华容浮梁乃亚之有召无不双夔语
可易传徃徃回重瞳国体既以尊台纲亦从崇从容乞骸骨恍然恻帝衷有身但殉君何
必首故塋

故特进光禄大夫左柱国少师兼太子太师吏部尚书华盖殿大学士赠太保杨文
忠公廷和

蜀江汇岷峨新都独神王十九读中秘雅负公辅望五十备鼎铉遂叅焦李行皇天
亦佳祸阍武肆波荡穆馭穷遐迹居守艰万状用藏体犹在机密身不丧及乎弥留际经
纶始聊畅片纸缚元凶余党皆磔盍一诏苏九垂允矣救时相事久名始易危身以奉上

故特进光禄大夫左柱国少师兼太子太师吏部尚书华盖殿大学士赠太保杨文襄公一清

杨公少颖脱所职在文墨倏然受边寄颇多殷褚惑战守境外専安危幄中画逆竖擅天权王公俱辟易振落股掌间于中出奇策黄金若流水出入恣所适颇采名流誉兼收死士力老愈术亦穷良为智者惜

故奉天翊运推诚宣力守正文臣特进光禄大夫柱国南京兵部尚书兼都察院左都御史总督四省军务新建伯赠新建侯王文成公守仁

明有两文武新建尤卓萃少多宏竒藻而抱纵横畧抗疏得投荒精神始收着时清出奇邁才真任恢拓唾手收逆王易如秋振落虚懷綏叛酋藹若春磅礴信心见良知千古开絶学俯仰宇宙内卓然负先觉却顾素王宫堂庀殊龙螭

故光禄大夫柱国少师太子太师吏部尚书华盖殿大学士赠太师张文忠公孚敬

永嘉天人表渥颜飘其须濩落湖海间垂艾荐公交车属当帝初元尊亲意未舒一疏帝心动再疏皇览俞片喙折众咻五载拜三孤维时颇用壮物情或不愉中收大珰权万姓赖以苏旋表开国侯戚畹从削除人主固明断公实赞厥图笑彼富民侯安足称庙谟

故特进光禄大夫柱国少师太子太师吏部尚书华盖殿大学士赠太师徐文贞公阶

华亭湖泖英秀发自眉宇弱冠取高第雋声菁华圃珥笔侍丹螭横经进白虎师道万古隆焉惜君相忤折腰非所论察眉良独苦秉铎两巨藩赐环歴华臚佐铨复掌礼以至入政府开济触巨僚勤诚结英主彼僚以败归公始大攄吐万里却苞苴黄金尽为土载观轮台诏■〈宀禹〉内皆鼓舞始收遇巷功不虞若濡雨

谒表忠祠有述

表忠祠者祠故死难诸臣若徐魏公辉祖齐司马泰铁司马铉黄太常子澄方学士孝孺景中丞清陈宗伯迪暴司寇昭练中丞子宁凡数十曹者也于乎何忍称革除哉万厯之诏伟矣其于植伦常表忠愤光圣德鼓士气宁浅浅也祇谒之余不胜感叹斐然成

圣皇肇貽厥元孙嗣绳其武略或不竞文治所优为诸王擅国封分布若置棊称诏行罚赏匠意创车旗是时上威令颇不出京师黄齐托肺腑力以身任之周叔既远甯齐谷复长羈北平有髭王属尊功不卑望气若龙虎养卒皆熊貔削地错已愚夺国宁所宜谋泄汉使僂渔阳动征鼙横驱属国胡席卷燕南垂庙谟太草草名使乳臭儿蹀血白沟河肉骨蔽陵坻盛侯颇能军平保壮偏裨一此或一彼天心詎能知桓桓铁尚书矫矫六出奇东昌不茅靡济南汤其池有斐天台生密勿主所葵肆赦赦不行用间间不疑大厦既将颠一木焉能支飞檝渡大江羣情遂乖离三辅拟勤王姚守已俘累朱邸献重關将相请密期举宫为煨烬谁辨真龙尸魏公元勲后不以密戚移甘作请室囚竟终首阳饥始祸复何言纵体任封■天台乃甚口五宗悉参夷铁公气犹劲慷慨了不悲自余诸名俊卿尹暨曹司俱懷吠犬忠不识尧为谁而彼景中丞趋朝独逶迤荆卿术未讲豫让心空驰嘔血喷北风捐脰付东馗如闻九原辙故主未可追长寝事已毕何烦论安危笑彼崩角者次第死胥靡拂郁二百年身碎节不亏君王沛明诏彷彿异代思加恩录后人所在为致祠建康殉节地羣灵当格斯故主犹若敖焉能不攢眉侑食懿园席行当待来兹

金陵懷古

金陵古都会天堑横称固天矫诸苍山龙虎相盘踞所以定鼎占殊叶明哲度仲谋志分割羣英为之辅晋元保东迁亦以多才故宋武挺雄杰中原振天步晚途急鼎革狼狽沮内顾绍伯窃国权畴当永其祚梁高感家难稍近君子怒事佛不止贪讳杀反滋蠹兴国名却敌其究乃自树昇也慚君亲苟得延旦暮千秋夸帝居偏安非所慕汉兵既东出明师仍北渡世有真主生宁为形势误

同内外守备叅赞诸公大阅有述

高皇荡八荒金陵为帝畿带甲五十万寓宇摄神威军实虽徙燕师名故不移留守握中权今晨大合围矛刃相戛札四牡何駢駢炮火击迅雷旭日煜旌旗壮夫前献伎丸钩纵横飞射士不虚发一镞贯两豨酒酣方陈赏缙彩溢陵坻念当承平世胆勇不获施俯仰金汤固焉用封侯为

与羣公恭阅都城有述

恭承帝嘉命春秋阅重關透蛇羣公后迤邐万雉颠青盖拂流云鸣吹沸苍烟宫阙

何参差车马日骈阗踞虎苞石城蟠龙表钟山高皇御六师决江荡烽烟于兹首定鼎万
■〈宀禹〉悉来旋南标指铜柱北碣立阆颜嗣圣虽迁殷亳顾可不颀盛德为金汤千
祀永无蹇

恭谒孝陵有述

元运昔告衰真人起淮甸车书际番落日月光■〈宀禹〉县久道化乃成耄期驾
方晏飞龙太清表蜕骨钟山巘佛锡让甫成龟玉瑞先现紫气昼夜腾祥云藹千变恍惚
列圣朝趋跽百僚见干纲既北振坤维永南奠衣冠不出游樽俎时勤荐

恭谒故宫阙有述

高皇御朱邸草创业未备南郊甫三让北阙雄五位是时李韩公实当萧何寄虽谢
茅茨陋终靡未央丽黄屋屹然尊青宫从鳞次锤岳旦夕来千扉腾紫气业移众星拱犹
表宸居制彷彿殿陛间如闻清跸至

后湖

炯炯澄湖色濯濯堤柳姿云水相荡潏洲屿正参差六季日寻兵元武集舟师帆樯
蔽秋空组练射晨曦高皇重民数坚墉四周之自非负版吏有楫不敢窥魴鲤忘所惊悠
然各扬鬣天鹅白于雪鸣声一何怡鱼鸟自相骄游子安所之可怜水如镜无分照蛾眉

游燕子矶即事

遥望北郭门逶迤带崇墉东峰矗灵祠西岭梵音宫双阙排云上表里瞰大江奇石
縁其址瑰怪含玲珑呼觞慰登顿语笑方从容阴云翳白日四起不周风帆樯交凌乱号
呼莫可从挥金募篙师飞楫挽危篷起者十二三余已蛟腹中人命在须臾万变靡不同
夜草乞骸章晨兴附征鸿

休沐归里值大旱山池龟坼募工徙河满之有述

弇中故饶水澄潭连曲渠今年旱暵甚魅鬼烧吾庐窟洞走饿獭园丁焚枯鱼未论
水不足陡惊地有余幸逢八月潮滚滚入城闾五昔桔槔声此潭仍湛如小舫媚夕阳清
光来望舒停云相映带纖鳞欣故居余本泽国人焉能与之疎

广心池中有小岛颇碍目境适旱涸募工去之殊更快然

壶公对文漪中为一小屿石笋四五株垂杨两三树有之固不恶无之更成趣极目增浩淼轻舫辞抵牾譬彼太清表織云絶点污游者或不然请为明其故

有瘦瘠比丘拖丈八铁链■〈足敝〉■〈足敝〉行街市间不从人问衣钵而日候余冀得一言之赠悯而应之得一百廿字

有一苦行僧鹄形尼干面丈八铁银铛项锁复腰纏胡跪合掌言沙门有深愿不爱摩衲衣不乞伊蒲馔公是白尚书灵山旧法眷为我施词组欲作西归传我已堕疑城地狱急如箭斗大青莲花对眼未能见汝缚汝自解无缚汝从便有言添汝缚无言当汝荐何烦贤圣偈况乃凡夫谚勿学文畅师生买昌黎钱

侍御京山孙君既以绩最赠其二尊人矣尚以不及终侍为永思之图以志感王子歌以宽之

御史台中栢哑哑乌夜啼返哺既以乖风木不宁栖子心安可穷物理故难齐峩峩京山阡上有黄金题丹纶标玄德彤管写青闺谁云二枯骨忽若吐云霓我诵孝终篇不为御史凄

题鳳麓图为姚使君赋

消摇朱雀桁栖托乌龙宫下有百顷筠上有千尺桐彩翮西北来丹霞蔽长空宁非希世瑞阿阁不见容感作嶰谷鸣鸣声何雝雝俗耳故寡谐伶伦安所从我欲谱此曲此曲不忍终

耿大夫入为司徒领太仓事时余方上书乞骸赋此赠别

白日丽中天氛翳浩纵横饥虎欲啗人何必避豪英夫子邦司直焉能不持衡抗疏排九阍天听时未恒徙公大司农欲以平两争伊余非良璧委路任青蝇但令识者怜甘为忌者憎公其振霄路余当返岩耕

其二

大道无町畦万类时并育苟非日相啮焉在伤局促余岂工宦人逝当返空谷嗟此
尧汤世三岁穀不熟所患已剥肤岂惟仅蒿目矫矫耿寿昌常平初见属浼汗今大号屯
膏古明勗窃因有氏言君以百姓足（时余方避言）

章丘张虞部子发考绩便道归寿其父母为成古体应之

我昔游阳丘其土秀而丰近有女郎山远有丈人峯蒸为芝与兰扬芬于帝宫鳳皇
从北来口衔紫泥封云霞光照耀山峯对龍嵒堂上双鼐鸣音声何雝雝制锦为彩衣割
禄充朝饗俱称千金寿行乐浩无终

不佞故尝为冢宰杨公歌桃花岭矣复以郡丞王侯请得五言古体一章知公梦寐
兹岭当不厌余言之渎也

仙人至东海遗此瑶台核谁云下土薄种之不遽植二月三月来千枝万枝拆悬旭
恒炫昼蒸霞仍烂夕雨过媚紫琼风回碎红珀四皓岂避秦偶如武陵客攀条掇其英乐
与同颜色何必结实成然后生羽翼却指上林春春光渐狼籍

吴子故泰伯之后思追至德自名曰守让而别号吴荆余为赋之

泰伯让天下窜迹在荆蛮虞仲表从兄文身志亦全季子让其国归耕梁溪田当其
欲然时自制造物权奈何后人役役锥刀间仰惭神明胃俯愧夜气專吴生感至德千
载思齐焉无欲道恒尊不竞心故闲吾闻之孔经当仁在师先

由太平堤诣省作

辰出太平门褰帷太平堤不知身上下苍山时高低右鉴渺平湖左缺汇清溪残綠
稽芰荷小白散鳧鹭是时秋始暮风物繁以凄迤邐贯索垣愀然念圜■〈β〉〈非上土
下〉〉冥冥天就寒冉冉日沈西首领且不顾焉问母与妻比屋苟可封咎繇亦易齐

小泛入三台洞

浩荡万里流屹立万古壁下有蛟人居沈冥不可识真宰欲献奇冲波为洗剔恍尔
日御来呀然坤维坼云去挟飞檣涛来溅坐席礧隈涸细鳞雪乳县伏翼四顾若已穷傍

有梯空石与客倾一卮呼童进双屐陋矣三台名此岂五丁力

别留都诸公卿大夫

君王眷故都所命必国桢八坐饶耆喆叅陪皆俊英皎皎素丝风蔼蔼披赤诚不以
菅蒯微欢爱若同生宴游恒相籍有吐靡不倾缅懷止足分休沐荷时清桑梓有余暎鹄
鸿寻夙盟挥手谢羣公努力赞休明迹遠心不睽何慕在合并

其二

爰居飡鲁门虩虩念大荒枯藿因风起虽高故不长余本山泽癯晚收窃岩廊夕陪
鸾鳳栖朝与羣龙翔荏苒歷再秋鬢髮日以霜萋菲亘天至其究乃我臧归计业已成离
思故难忘愿垂金石契申此繾綣章

太宰前司寇陆公少司寇朱公中丞石公廷尉陈公同乡右宗伯赵公太常顾公及
苏侍御汤考功俞驾部孙右军诸君追饯摄山栖霞寺遇达公小谈

夕奉赐骸书晨趋古兰若候舟少滞留敛迹栖寂寞午景悬松杉金紫忽萦络上宰
追古欢三卿示哀托及我维桑友结兰谊不薄欸欸续绪言厌厌恣深酌羈鸟快摩空犹
然懷饮啄非繇开士喻畴为脱纏缚宁直解离忧兼忘思归乐

别秋省诸郎

少习城旦言谬窃文苑迹晚途不自意秋省忝常伯峩峩贯索垣一星化为客诸贤
感诚契送我太平陌言别无期会我衰何足惜曾氏语哀矜杨公称不惑此身勿易视此
日勿轻掷勿以簿牍繁于心生别择心境苟未光诗书有徽纆

客中贵谈中军朱大夫王光禄追饯栖霞有作

归辙何所爱爱此中林幽感叹我良友驱马迫相求晨供伊蒲饌晚橐出珍羞贵人
徇新知涕泗纵横流中军追故欢莹然若无俦慷慨朱大夫誓欲命扁舟沉沉王光禄悔
不昔綢繆志士歌伐木頽老恋首丘诚知中肠异别泪不可收

恩许归田重过摄山栖霞言念旧游有感因扣达观法师

前岁栖霞来萋萋怨芳草今岁栖霞去恰恰欣黄鸟来似江总持去则明僧绍偶然
分别心山色成丑好出处何足言生死尚未了欲了此一關应须叅达老

为王学士题金鸡山

山作金鸡鸣海收银蟾魄俄顷天地开五岭同一白主人不雄冠委蛇备其德为草
形竿赦时僊玉堂直异日拜相晨不惊翰音翼

题琢庵卷赠白大夫

白玉白于雪琢作芙蓉觥云龙隱成粟煜煜夜光明一朝献秦廷价夺十五城皜然
绛州守何异此壶冰

弇州续稿卷八

●钦定四库全书

弇州续稿卷九

（明）王世贞 撰

○诗部

△七言古

题昆山精舍是潘中丞读书处

清遠吴兴古山水昆山去郡不十里一塔飞英到峰墮万井炊烟并云起梁国才人
柳侍中构亭争胜白苹风棠阴欲尽兔葵出千载风流指顾空仿佛山灵诉天帝遣作中
丞读书地洗砚池含星斗文题诗壁吐云霞气修廊复阁冠坡陀美筱苍藤衣涧阿花如
懷县斋前密果比闲居赋里多我歌一贈昆山长为是浮家易来往糟丘好酿三百斛莫
遣王猷信仍爽

奉寿御史大夫杨公五袞长歌

余未获识杨公面第闻其德业朝着勲名鼎彝私心慕向之欲有通而未及也公今年五十而余已加二适里中子张复至自帅阃谓余解天雄虽不及待公薄有交承之谊谒一诗为寿不揆鄙陋遂成长篇酒间倘命张生雅歌奏之亦祭征虜佳事也

公不见杨伯起關西处处称夫子四世犹传掌武冠千秋尚说衔环里又不见杨楼船银黄若若悬腰间已惊三组冠朝列复展百里家函關公今自是名贤裔少小长懷请纓志天子临轩下玺书单于遠塞知名字有时扫氛瀚海头有时夺幕王庭秋浴铁争听白羽扇赐金仍侑紫貂裘辽海波澄塞烽熄降将辕门但嘖嘖从尔和戎魏大夫我自屯田赵充国初登服政鬢未霜已闻召命出明光万八千户彻侯印二十四考中书堂野夫恨识荆州未倘公偶记交承事试言文举报曹公公今五十余加二

戴仲德善诗酒过余吴中寻当游楚乘醉歌以送之

我不能学郗氏子为安道营剡下宅令汝四明老狂客又不能学吴趋儿为仲若卜吴中室令我湖山长秋色惟有新诗书卷头送汝扁舟凌七泽楚天看尽歌归来少文故事亦快哉壁间指点旧游处一处同倾一百杯

公瑕为余书道德经戏谢

晁■〈石襄〉村头夜雷雨敕取真文向天去天上唯贪逸少书人间岂断伯阳语周郎妙摄山阴魂一扫重覩五千言厌说笼鹅成故事揖余袖手返吴门

题王叔明湖山清晓图

谁捐吴绫写萧瑟乍看无乃王摩诘即非摩诘或思训敢谓黄鹤樵人笔黄鹤夜半不肯眠欲换凡翼求真筌吸将三斛碧沆瀣吐作八尺青婣娟空青蒙碧犹未已似有天鸡唤山起零露枝枝瓔珞珠初阳处处葡萄绮问余展卷胡留连欲言不言心惘然市朝少选车马急方信此中殊有天

题栢舟画卷赠高母

谁言卫风荡乃有共姜妇谁言吴趋薄亦有高令母当时髣髴歌栢舟今日青灯照

白头纵令淇澳清彻底争似胥江不肯流

挽雪林赵老

偶然一作侯门客懒向侯门借颜色偶然一艺能通神懒向人间称艺人南阳杞菊甘谷水前身恐是天随子谁言见画如见君石头城外多愁云

张守有温甫学士擘窠书老栢行余以仲昭太卿画竹配之时万厯丁丑之八月廿五日守诞辰也眷属在里中将就馆者并以为祝

君有温甫手书老栢行槎牙爪距八法锋纵衡我贻仲昭手画竹数茎鸾鸾鳳舞叶叶排空青欲将此竹配此栢挂君高斋八月动霜色劲节原从造化留虚心岂仗栽培得竹既嶰谷十二声一一将向朝阳鸣栢亦郁作苍虬吟和出万古萧龙音饮君酒上君寿赤水三条珠在手更闻阿段报山阴夜雨龙鳞箨中剖

赠郑山人

田父归来畏争席生不能学天目徐卿典衣沽酒长醉客弇园勺水一拳石又不能学太湖三万六千顷洞庭七十二峯粘天插天碧郑子移家西洞庭雅与徐卿称莫逆人生获此二絶良以快忽复担簦剥啄破我衡门色汝既不愿作万户侯又何必要识韩荆州牛腰一束尽行卷快语自足夸千秋男儿脚底路何限内则五岳外十洲郑子黑髭须其根雪千茎饮酒不三勺盎然双颊頰口如崩峡江涛倾■〈口展〉然一笑谓我胜徐卿谓胜徐卿已非偶复谓弇园自佳岂复须洞庭亦知前言戏我耳君不读蒙庄子斥鷃抢榆大鹏九万里逍遥之游竟如此

褚临兰亭歌用旧题定武韵

温奴误躡骊山陌上帝依然秘真迹欲窥日表少传神但觅云仍便灾石河南急利射雕手除却率更谁劲敌只字宁输永师贵八法疑从白云获纵令学步太婣娟肯作重儻依俗格颠米何劳据舷取王孙已为炊玉易对展双疑雕鸮翻别看总是云霞色未从道士换鹅羣要与君王留马式小儒岂解襄阳狡偶然弓失偶然得枯树支屏未为复位武经瓌亦非匹即容懷瓘中下估试与绍京千万直笑杀萧斋一字萧少室山人为卖宅

寿顾翁七袞一篇元章苏本有马式语

顾翁静者寿有余鬓毛未霜頰尚朱园如辟疆客不孤夹池翠竹庭苍梧有鸟五色
双鹤雏少者雛鸣觀清都其一息羽需搏扶翁今不乐何为乎毋论古稀古所无

吕别驾祝佳酒冠絕诸名家因作长歌谢之且订后约

野人睡起春冥冥手书数卷皆酒经秫成雀鼠已多耗醅熟儿童先不醒以兹卖文
有余鏹趋向阳昌问醪■〈酉灵〉吕君妙得仪氏法柔旨之中饶典刑勺勺流霞出缸
面点点湛露开灵扁丹田去路有余润华胥返驾无留醒徐倾细醪窺妙理焉用丝竹蛾
眉青报君新诗与君约一月须酬双玉瓶不然持螯卧瓮侧有绳可缚长庚星

宫詹求美长兄七十歌以寿之

我兄昔年二十余秃骑大宛汗血驹手谈不爱东山墅角抵能双西域胡自从折节
攻经史老作公交车数奇士十上空瞻光范门一官久滞长干里耻言越甲鸣吴军奏书
自试俱报闻挂冠神虎动天听卖剑买犊耕春云归来但读神僊传中夜披衣事修链子
午功成姹女归庚申守罢尸虫变以兹左肘生杨枝短髮萧然时杖藜乘兴看调支遁马
治生亲养祝翁鸡酌兄大斗为兄醉莫论七十年间事白日须同我辈长青云且任儿曹
致

竹庄卷

吾宗雅语世所闻何可一日无此君汝今卜居但种竹凡卉不敢骄相羣箨龙个个
进春雨尾鳳枝枝干碧云晨呼阿段汲溪润洗出潇湘双泪文慎莫学辟疆驱大令又莫
学张廌逃右军扁舟但过医俗士把臂相将醉夕曛

周稚尊忽欲游五岳留我山园少时得一歌为饯且留之

周郎旧是菰芦人北不能过长淮一问津忽然瓢笠别我去脚底五岳青嶙峋吾闻
太华不可上望里莲花犹未真恒山斗削大荒外其址徃徃飘边尘嵩高似宋襄偶然执
牛耳兵力岂足当吴秦何不西入蜀置足青城问絕顶雪岭远拂蛾眉颿先朝特进太和
秩神宫帝阙纷金银罗浮障色避冰霰匡庐斗柄摇星辰有山何必尽五岳尚残天柱称
昆仑周郎且暂留醉我祇园春但石如拳水如盎芥子可以藏吾身君不见大鹏九万鷄
仅尺万古并作逍遥论

王司训被奖

先生昔年曾拜章拟复古乐施明堂先生今年坐皋比要令弟子人解頤三台使者知名姓旌语煌煌考功令先生既是湖州人湖人可晓胡安定

寄寿戚大将军五十

渔阳健儿日欢諠东风融冰作驼酥问谁得此造物手云台大将世所无尺捶提来鞭谷蠡一书飞去扫撑涂千兵注目铁如意万马回头金仆姑堪紫衫围麟刻带茜红纓挂虎盘符东方别献肃慎罽西域潜输天马驹帐下剖符诸部曲军前解甲五单于绯衣将炙紫衣酒服匿留犁竞前寿弹琴峡口无杀声挂甲峪头多息肘久传名姓勒扶桑近道君王夸细柳鬓经百战霜不辞心为孤忠日堪剖矍铄远居新息上丹青肯落营平后直置鹰扬四十年表君青社能归否

赠休承八十

我昔避地吴闾居是时太史八十余何人不爱虎头画若个能轻龙爪书两郎亭亭两玉立无论箕裘世谁及倏忽流光一弹指仲君最少今八十停云馆头谖谖风见君再见太史公墨池流出天地派彩笔补尽烟霞功衰劣惭余比蒲柳辱君父子呼小友拟向洪崖借一瓢君当满贮长春酒

李孝甫大仆有弟常甫宾甫渐甫俱能文章以友爱闻而孝甫多宦游不时聚首因名其斋前之池曰看云而乞余短歌纪之

有云不驻梁公马有池不洗右军墨有池但作谢家梦有云长歌杜陵忆君言三弟俱好文映日补天成五色纵令行雨少时会任是飘风散不得但使埭箬吹遏空何必要江东日暮寻李白

赠别李孝甫太仆用张大司马韵

兰台少年班仲升擲笔万里扬霓旌自言天廡须竒骏欲驱宛血长安行交游尽是青云彦簪笔曾陪栢梁殿一骨先夸台畔求（杜诗骠驩一骨）千金立向图中见日子罢钓沧江浔为君高奏四牡吟出门冠盖渺然去回首烟萝春正深

张子予赠余长歌感激用壮聊尔志答

张侯若乳虎少负食牛气生平所不平舍儿比国士懒为大将长揖人何况州司折腰吏腰间累累金符黄再悬再挂还君王桃叶渡头解兔鹑柳花店中脱鹑鹑宁容醉尉呵止宿甘与侏儒共一囊虽然落魄高阳里毕竟难呼纨袴子当怀明月将报恩入匣清霜少知己以兹宿草荒蒋径时复扁舟下娄水兴来赠我长歌行伯氏复与施丹青恍如辘川入我案又似易水溅溅鸣虹云缭绕气郁淳珠玑错落光纵横丈夫有才终有用为汝感慨神俱竦生欲槌周子南床死欲掘顾元公冢嗣宗见忌双眼色宣明可憎一面孔汝莫学灌将军我非窦家老秃翁偶然小醉漏消息前身自是汝南公但遇人间失意事相将跳入玉壶中

好游歌赠游子宗谦

游生哉子好游乎吾语子游子游慎莫游诸侯戟门叱咤风飏飏鸡鸣上坐所未论马食堂下能无羞慎莫游酒人酒杯徃徃成戈矛青眼无多白眼出片言扶汝埋糟丘慎莫游吴儿脱粟三斛压汝头日高无觅主人处饥肠欲饭空啾啾慎莫游侠邪诗成可买乡温柔东家少年袖金至顷刻双睛如秃鹫世间游客自暖肚那容诉尽穷途愁毋论解竿不解瑟解瑟者可使曲曲黄金酬游生哉子好游乎吾语子游子游何不游十洲所少八骏扶双辘试学陶靖节山海图经读再过沧溟一勺昆仑土一抔又何不游万古即无巫咸非汝忧案头数卷汝自抽谁为屈宋谁为列御及庄周游生对我诧武夷亦复栩栩夸罗浮纵令苍翠射眉睫安能倒写入汝喉劝汝酒为我且暂留丈夫足底有八埏笔底有千秋出何必流苏络幪之轻车车前何必开八驂处何必雕甍却月之层楼楼中何必扬清讴仰面看屋梁造物恣雕鏤老妇炊藜小儿汲人生得饱万事休游生意沾沾自言虚徃实归为得游弇州噫吁嘻戒汝勿复言弇州其人倦游亦已甚日跨黄犊行春畴岂有齿牙余羨足世求

金莲花卅之贱者也产钱翁悬磬室前遂获图之而余戏题焉我佛不肯跏趺坐玉儿不肯婀娜步有根难入卫军池有蒂难收少陵句作君悬磬室前花要使穷儿暴成富

顾节母封孺人挽章

顾家之妇由来美玉映清心澹于水笄年已重士衡诗闺日难轻道韞比忽移琴调是离鸾从此青灯夜影寒鬓似严霜绿螺祝胆如黄蘗为熊丸老不愿中郎荐轩服亦不

愿大官供梁肉唯将一片立孤心报取泉台万事足

陆汝陈兄七十作长句寿之

陆翁少年颇读书赤手那敢攀公交车曾妇炊梨不解熟陶儿觅栗安其愚自谓东吴一男子长贫不合为徂使酒肠欲斗灌将军心计宁论桑御史偶然策耒游燕京词组悬河坐上惊后阁初开王处仲青娥解赠韩君平此娥不独称国色又是西来马肝石一拂能令颜渥丹再拂能令鬓丝黑小槽压得真珠红金丝玉鲙玳瑁雄谁能放筋无言好若个行杯肯放空以兹陆翁殊意气箕踞掀髯少流辈谈锋让我秃麈毛眼色从它落牛背有时高诵人相经指点顾盼纷纵横但令一事作唐举何妨百客皆刚成陆翁陆翁今七十犊力驹心才十七从今烂醉一万场扞虱桑榆看斜日

寿嘉定唐道述六十

杏绣董氏林橘盖苏公井何如此君室花竹秀而整唐勒不爱兰台篇唐举不爱人相编唯爱龙宫秘藏三千首一一留将施练川练川十万家家家尽活唐君手酌君叵罗为君寿得意何必二千石但愿为医岁长久

竒石歌和穆少春宪副

女娲补天炼不尽错落五色堆人寰尧波九载滌磊块秀出神骨争嶮颜昆山太巧灵壁顽么么琐屑几案间不见洞庭高峯一百尺万古长含太虚碧谁令壮士掷天外添汝迟鸿台畔色萦云欲雾作变态障日撑空饶定力穆子振竒者拜之不肯遽草草磬折簪笏拖朝绅自言生平石交唯石君今复得此石丈成三人拜起呼石丈汝总峻角裂缺吾不嗔爱汝苍苍貌殊久何似生人老少成好丑爱汝冰雪长相守何似百卉春荣见霜朽爱汝不笑复不言何似当面输心背面诟爱汝不倾复不仄何似狂飈靡草波立走石丈不肯答王子为代之昔在长庆时牛家李家大参差我独称上客傀俄其间不见疑王生谓石丈当时楼护亦如是却怪平泉汝曹一小弟今年酒价亦太贵奈何醒我使我不得醉穆子戛拊歌乌乌汝能出声一和无毋论穆子癖且孤王生亦有愚公愚

愁雨叹

花径才干三尺地又闻雨师将雨至漫呼酒客醒后愁先滴农夫眼前泪两脰敲扑疮未平一锄蹒跚滑难致河身甫低水势高鉞粟垂空麦苗瘠中金转贵百物贱卖儿可

了公私事司农缓征征不止司空兴利利无几举头是天天漠然何况君门逾万里

郁母邓令人八十

母年八十枕儿股儿股当年啖儿母至今母子尚一身君王孝养慈宁春树坊赐帛
更何人

济川舟楫图歌赠陈侍御

万历天子坐明堂列公百辟何皇皇潞河伐鼓云千樯三吴粳稻色夺霜六师饱食
欢未央距跃曲踊唱拍张天子不复虞太仓前何后晏声相望谁者衣绣衡漕纲内台所
选陈侯良侯材卓犖不可量一苇可以凌扶桑七藩之长来效长舟师十万无跳踉如林
畚鍤纷河防词组挟纆回寒芒陈侯三载不过乡冯夷受职岁献祥无烦塞决歌宣房潘
公得侯意殊强谓侯作舟行相商爰图惟肖志不忘而我短歌重慨慷侯其旦夕登庙廊
莫疑欲渡河无梁野塘尽日横孤航

题望云卷

昔时望白云亲当在其处今日问而亲已乘白云去云去云来无古今丹青难写忆
亲心巫山不是为云所只向孤儿一寸寻

管将军懋光以诖误失官其少也尝手擒舶酋麻叶壮而赠之

虎躯七尺腰十围明光铁铠裊锦衣铎稍攢刺捷若飞手挟南蕃舶王归中军主帅
正歌舞玉带金鱼胙茅土十年功高心独苦犹自低眉趋幕府纵令东海不扬波其若睚
眦■〈才必〉挡何一言不合文吏诃无事抚髀思廉颇莫斩长矛作耕耒男儿可老新
都里区区小酋那挂齿须缚单于报天子薊台万驷求空羣尚书尺一论旧勲灞陵醉尉
闻不闻辕门大旗李将军

梅竹双清卷歌题所藏王冕元章吴镇仲画也

野夫策杖村南复村北处处东君恹消息瞥然缟素一枝横又见琳琅数竿碧一枝
春之先数竿冬之后俯仰天地间与尔成三友衡门掩卧不一旬淇园大庾无精神樵青
已侵翠鳳尾■〈风贝〉母吹散玉龙鳞赖得吴镇及王冕前与二友传其真虚堂展看

仅盈尺二友居然侍吾侧问之不言对以臆眉宇萧萧吐佳色吾不能学范詹事西遣關中使却寄江南春消芳悴粉何足论吾不能学家骑曹不可一日无所至植此君封篱护箨何纷纭二友寓我簾伊若洛下东西两头屋一头剪得潇湘云一头小贮罗浮玉镇也九咽吐吸天浆腴冕亦磊砢节目非凡夫扶輿清气合此图快矣乎快矣乎此图此友吾不孤

为喻邦相作容膝轩歌

喻郎一室苦竹里南浦流云润湘几图书以外无长物仅堪容膝而已矣此膝一屈不复伸无论其下无黄金坐处须穿幼安榻抱时但咏梁甫吟羨尔尚有腹便便坦之不肯作栝秦羨尔双肱力翹關曲之可诣羲皇前但令此肱此腹安此膝劝尔百年长一室不见净名居士方丈间千坐莲花千佛日

沈君五十时其子乡进士昌期与余善

沈君不作黄头郎行年五十鬓未苍有子器业如东阳贤书姓名标大桁归来拜进南山觴守令羔雁罗中堂里门大旗当风扬摐金伐鼓奏丝簧客称既醉主未央但令玉液盈银缸明年之乐不可方

寿濮翁七十以翁子部将张云翼请也

将军剑术世稀有出匣风霜吼晴昼十年不试成地僊有髯絕羣继其后智何必挂阴符口贵何必悬金印肘健何必搥狼头纛猛何必取虎牙首试登铃阁看浮云欲指沧溟变春酒我有一言聊戏翁更二十载鹰扬否

题王朋梅为朱泽民画水阁图

孤云夙世一画师丹青自结元君知行逢镇东两斗奇泚笔为写无声诗檐牙四绾天棘丝角影倒插寒涟漪空青排闥月满卮醉睡不记东君谁二僊僊去亭何之有图彷彿犹堪追即令此图垂亦隳是水可亭亭可居不朽况有诸贤辞

送陆茂才应贡入京

士衡初入洛蒯緌土花薄一见张司空拭作芙蓉锜匣中悲鸣安所施回头且忍铅

刀欺时来直傍飞黄背万里横行人始知

虎丘禅堂募缘歌

我家法护舍此山给孤长者无颜色骤看祇树遶精蓝中有青莲生火宅谁为构堂刹之右诸方禅那来驻锡龙王吐水供净饼鹿女衔花依法席只字能回野干道中时但受诸天食虽然劫火烧不坏其奈机缘有消息怖鸽垂栖复惊去饥鼯罢供聊窜匿分无阿育役鬼神可容檀越怪财力偶然呼作有漏因自是人天胜功德若疑此事无功德君其试问生公石

题赵文敏画两马行

后马斑黄前马黑两马八蹄如雪白前人衫绯后人碧后人上马如上壁前人回首顿其辔后马蹄骄欲前逝一跃双争日月轮齐驱竞吐风云气吴兴笔底蟠权奇前身伯乐真马师饮龀立卧皆天姿我闻南人使船若使马胡不画一小艇凌涟漪吁嗟嗟龙种骨立天西陲

寿林翁通州君云程父也

林侯但饮通江水一旦此江成玉醴会当持寿七十翁能使朱颜若桃李愿侯如江彻底清翁亦蒹葭江之盈即令配菽亦自嫩何况天露来金茎

崇明陆叟移居吴城以上元夕生儿友人索赠

君是东海人却爱吴阊土抱得照乘珠一朝归合浦此珠煜煜光欲然掌上谁能不见怜来从老蚌无双美把向明蟾一对圆银灯膏火千门动上元夫人亲抱送他年拂拭向秦廷十五连城玉争重

蔡苏黄米薛赵六家十二帖歌用少陵八仙韵

体君谟郢斲何太工宛若老将藏其锋即令草草无凡踪嵇生土木姿自龙非偶何必黄金蒙（书家谓蔡土偶蒙金）眉山命态娇且丰阿环玉肤双筋红酒酣斜卷霓裳风尔曹徃徃论纒浓莫云墨猪猪亦龙（书家讥眉山墨猪）豫章骨立儿作翁踉跄独上峨眉峯翘足下瞰蚕丛空不辞坠坼苍藤封险绝要夺艾艾功襄阳用壮趨趋风锦衫

危帽青■〈马聂〉骢跳荡百战无衡锋耳轮跃刃足蹶空纤紫佩玉惭雍容河东密迹未易穷片石定武私其胸大巧隐拙奇若庸挫名徃徃世耳聋晋鬼幸不悲途穷瓜分鼎立难为雄笔塚处处腾秋虹吴兴指端天与工如椽之笔回重瞳山阴隆準真乃公傍入北海将无同八法重轻贵折衷

题马远山月弹琴图

与君试弹三两弦中有流水仍高山与君试听山与水恍若泠泠合宫征试问此声当属谁道人指爪如金锥划然一鸣天地白初月何情为谁色丹青谱出无声琴却借青眼成知音声空色空人已矣彼图我歌皆幻耳

和东坡居士煎茶韵

洪都鹤岭太羸生北苑鳳团先一鸣虎丘晚出穀雨候百斗百品皆为轻慧水不肯甘第二拟借春芽冠春意陆郎为我手自煎松飈写出真珠泉君不见蒙顶空劳荐巴蜀定红输却宣瓷玉毡根麦粉填调饥碧纱捧出双蛾眉搗笋炙管且未要隐囊筠榻须相随最宜纖指就一吸半醉倦读离骚时

和东坡颖师弹琴韵

轻澍濯月秋江平劳师五指谱双清飞霜片片堕征角不辞身作爨下木朱弦讵可依朱门武陵博得安道嗔道人胷中净于水从此潮音难入耳

戏作反九友斋歌

郟中大羸摩北斗鼓吹金绯拥前后岂是论交无一人却从世外思九友自蒙恩谴许归田此曹拂拭皆我有新年欲来旧年去九友愈妍我愈丑偶然十日中恶酒十日壘尊不依口偶然半月拥被眠半月不踏青山颠雕金镌玉科蚪篆法墨名画珍珠船仓皇縁尽便长诀欲携不得悲湔漣生平所读百千卷著作亦逾十万言临岐一字用不着■〈医，口代酉〉嘘咄喑空茫然我恨九友轻相弃九友笑余不晓事一生一死到头难一富一贫翻手易对九友者为何人汝尚不晓留汝身畴能赤手金鳌顶空尽乾坤大六尘

弇州续稿卷九

●钦定四库全书

弇州续稿卷十

（明）王世贞 撰

○诗部

△七言古

挽彭稚修广文

当年汝醉长安陌双颊殷红鬓鬢黑才高白战贾余劲命薄青衫消不得访医就买
吴江船欲言不言魂黯然杯底无蛇影来妬坐隅有鹏心私怜张公吃酒李公醉珊瑚误
代王愷碎非關丰狱吐龙泉自是人间不平气豫章城西枫叶秋生将玉麈埋荒丘彭湖
只作东流水肯洗彭郎矶上愁

五歌

我所痛在蓟门青蝇蔽天白昼昏苍弘之碧灵均魂失不奉之偕九原嵎曦荧荧回
覆盆安能照枯使复温呜呼一歌兮乌鹊翻使我万事惭生存何况食肉复乘轩

其二

我所悲在泽州惨淡一纸青天愁乞身为母母不留几欲掷身黄河流升堂總帷啼
素秋别时音徽今在否呜呼二歌兮霜风遁色难志养未尽酬有颜敢从毛义游

其三

我所钦在绵竹偏髻明眸暎空谷峡涛栈云莽相属奋欲从之路诘曲倏忽万里难
踪逐飞书自天炯可读呜呼三歌兮戛哀玉鑿鏗七百叹局促朝闻大道夕死足

其四

我所思华不注美人读书未渠暮陨壁湛珠黯非故是时孤臣晋阳路青灯夜闻鬼
啼诉痛无寳钩挂君墓呜呼四歌兮逗秋雨君今一语成万古白头公卿纷可数

其五

我所惜在容城弱弧奋欲除欃枪词组触天天怒惊狴犴血肉纷纵横为君轻身破
不平君言汝身未可轻呜呼五歌兮昼吞声气塞万古长如生彼竖父子五鼎烹

赠管将军守备杨舍

将军自称三百斤跃马跳荡风前云曾探虎穴得其子未许麟阁像素勳千金买名
呼国士百战捐身报知己腰间若若未银黄麾下纷纷半朱紫玺书迭下明光宫别部戈
船始属公古人不怕鸡林险翻谓天将贵此翁

第二犹子士騷十八应试与余省捷岁同诗以壮之

世皇二十有二载弱冠留京忝材杰折花卷尽朱雀帘骑马醉踏长干月垂晚犹尘
六卿佐中年已谢三镇节吾家琅玕幸不乏汝今行年亦十八即看蒜髮乳尚腥试展霜
蹄汗如血故家毋但足箕裘往事吾将付衣钵汝生已是气凌云汝伯何妨髮如雪长安
卿相多少年此意虽卑聊为说

金坛王叟六十寿之

同是缙山裔况同花甲周唯偏金坛隱独领瑶池秋瑶池碧桃若鸡卵更有交梨大
于盃君如欲勒弇岭名共策踰轮追穆满

题画海棠双白头为王大叅旸德七十寿

召伯蔽芾余甘棠咏歌千载流芬芳今之王翁古召伯三吴有棠仅十霜其荫已足
笼丘冈上有一双白头鸟相与宛转啼春阳问谁者图吴周昉拟借诗史献寿昌此物虽
微感星气不与凡鸟同摧藏百舌能见谗要自非我匹鳳皇故自尊竹实非我食安期东
海枣已丹王母西池桃更碧白头鸟不足招召伯之棠不足栽王翁兮王翁且偕樊夫人
共登旸湖之上超然拍手呼鸾叩月窟是时金粟丛丛开桂浆吸罢不饥渴揽辔下仪娄

江隈娄江父老俱白头依依棠树傍跪称万年杯王翁不乐胡为哉

闫希言先生道成而游戏人间任真自适闻之久矣今年来访弇园谈笑无间忽语余欲返武当故馆一叩元帝先生有故人不二头陀范丫髻亦余旧识也因歌以赠先生并寄声焉

足下不履头不巾一衲寒暑长随身有酒时过犊鼻子得钱即散鹑衣人马藏阴相任儿戏熊经外道胡足论是口那曾挂臧否无心何处容贪嗔访余东海近旬日云往天柱朝元真左珰之柳夙好事为尔筑馆襄江滨夜斗低徊挂檐栋朝曦晃耀开金银虎岩不二范丫髻岁寒且共栖嶙峋道余鼯鼠技已尽薄有雕虫名亦沦闲披缁衲礼禅客或戴黄冠称道民三尸上天鲜可诉何苦役役防庚申蓬莱宁复闭贤路桃花亦自通迷津祇愁鹤背太清瘦可载笨伯凌青旻（先生体过肥故戏之）

偶成自戏

愚公自笑昔日愚日对黄卷声伊吾那知愚公今更愚问着胸中一字无贫子自笑昔日贫但有载籍无金银那知贫子今更贫一丝不挂悲田身贫子之贫犹未误更有愚公堪笑处蹒跚两足钝于鸭便欲高飞向天去

又

向来学痴儿痴儿只了公家事晚岁学愚公愚公日作移山计有官不作山不居自言可免愚与痴何当更有愚痴处说与聪明人不知

故将军曾侯子澄见访长歌赠之

曾侯意气高天云少小弯弓三百斤抗表那愁中执法入门长揖大将军尺书立扫无诸烬一箭能收下濂歙名大中山饶谤篋家贫太史絺深文脱骖始释越石父买丝肯绣平原君归来自种南山豆有饭仍夸菜三九春秋癖喜元凯先月旦评甘子将后亭午方餐法喜食六时不醉声闻酒林间豹蔚长迷雾匣里龙渊空犯斗偶闻时事忽抚膺及语功名但摇首扁舟过我娄江城紫气煜煜如拖旌主人病聋复病哑枉汝谈佛仍谈兵初疑藕孔修罗出稍觉莲花般若生天下总需公辈在人间岂数王郎名何如抖擞无明尽携手金鳌顶上行

谢吴断事惠茶笋歌一章

雨前茗芽细胜粟雨后笋萌碧于玉道人嗜茗以代酒且复为笋将断肉吴郎昔佐郟中阃拂袖高眠白驹谷生不恋山阴八月莼亦不夸江陵千头木为余雀舌损数筐更脯龙鳞逾百束初开鼻观已芬爽久苦肠肥荷汤沐新诗报汝汝不俗净洗荒伦酪奴辱但愿清渭溪头竹信安紫花濑口茶租熟慧山水递更一家道人湖田没尽饥亦足

屠田叔弃秋官幕归侍司马公公歿乞余志墓且求一歌为赠

屠郎读书破万卷不及区区三语掾以兹耻共侏儒粟归侍髯翁寿清宴菽水一勺轻千锺况有今古蟠其胷朝看明海欲日月夕爱赤堇攄烟虹天贻玉棺唤髯去肯向东园借官具娄江忽有孝廉船问我求题君子墓谀墓古来人所嗤髯翁遗爱吾何疑始知吴札千金剑奚若中郎七尺碑念余年来倦笔研欲焚弃之心更慙乞汝相携老文苑人间一官味诚短

张山人平叔五岳歌

人间再见张平叔能否长将悟真读四明狂客偶见许五岳山人生不辱三花近扑二室粉雪山远接峨眉玉所恨恒阳寓公石仅捧太华莲花足归来贫惫游兴孤卢敖之杖不可呼少文画壁毋乃迂胡不乞写真形图侑以廓落流金符自称紫阳游玉都君不见王郎手创团焦不盈丈跬武以还皆草莽偃佺安期却来徃何但区区五岳观千亿须弥托吾掌

昙阳子性命三十六体仙篆歌

地衣味嫩身无光欲凿不凿混沌忙结绳诸繁忽已忘河马洛龟亦披猖平林夜鬼愁羲苍鸟迹而下至岐阳彼籀之徒始滥觞斯高小豎澜遂狂吾师八法初未详冶炼至阴成干刚悟性立命寿无疆遂谒金母朝紫皇授以三元明光章悯余溷浊同秕糠示以性命俾不忘字字心画统天纲三十六炁枢雷罡七十二字拱素王星回汉流雨露香龙跳虎卧鸾鸿翔魄夺秦汉超黄唐十二小劫追赤明邺架夜色何煌煌检之白玉尺锦囊五色流苏束牙箱山卿俗书点良常王烈不识怜嵇康紫点未肯传杨郎我生何幸依大方此书此躯偕未央葢珠人鸟长徜徉

吴明卿雪山水井歌

饶州磁缸莹不瑕将乐块石霜■〈石舍〉研无烦世尊诵贝叶何必玉女擎莲花
左安雪山右冰井凉思习习穿帷纱殷红冽齿房陵李沈绿沁腑青门瓜中间别有清凉
宅在君四大君不识赤脚高凌一万层辘轳直下三千尺中池之外无它润太古以还唯
一色长安炙手殊可怜骄日欲夺天公权须臾火尽灰欲冷惟有寸心犹自燃与君共饱
冰雪意高枕鼓跌庄生眠

蕲州李先生见访之夕即僊师上升时也寻出所校定本草求叙戏赠之

李叟维稍直塘树便覩僊真跨龙去却出青囊肘后书似求元晏先生序华阳真逸
临欲僊误注本草迟十年何如但附贤郎舄羊角横抟上九天（君有子为蜀中名令故
云）

孙荣祖氏所降僊笔贻我金书阴符经跋尾云文阳真人得道时所说白玉蟾翁始
表见于世又以长歌四百九十字见赠颇及前生事勉以修持且劝檀施聊此奉酬并效
薄见于奉行仙童宜真子

坛烟袅空笼曙星翔阳鼓籟调流铃尔时班管正驰骤为我写就阴符经行间隱隱
金玉润势表郁郁蛟龙腾三仓以前鲜此迹八会之后不可征此经黄帝疲警蹕上感玄
女停輜駟天真皇人为解说一帚净扫乾坤兵鼎湖凋弓坠霄汉宛委丹检函精灵贞观
小隶付欧褚李荃而下训故兴蚕丝别缕转成赘貂尾媠渎那堪凭玉蟾散吏最晚出真
取捷要披榛荆三十六天不可问四千余年劳证明僊翁一一为指说敢以抵牾忘服膺
更诵长歌五百言如啖火枣通三生子瞻梦悟五祖戒次律赖遇真人邢惜哉二子不自
振晚途岭蜀长飘零即令来路未明晓忍恋浊世甘膻腥陶君已拜都水监胜力菩萨为
前盟白叟愿生兜率界海山丈室留居停乃知大道絕町畛两者同出而异名鰕生掉头
出苦海眷属聚散如漂萍把茅盖头足舒缩一瓢以外无经营晨吸清和入玄牝夕敛沆
瀣归黄庭檀施小果敢云倦人天有漏吾何矜更烦转示宜真子返照面目思前程任是
逍遥鲜罟碍未免流转趋沈冥权奇狡狴亦细事麻姑见晒王方平上真重關挂玉钥西
竺觉路悬金绳精心九渊骊颌易失足一墮鸿毛轻百年倏忽若流电我为后继谁先登
功成帝命有时下拍手呼鸾游太清

为胡进士孟弢作匡山读书处歌

大块下坠成匡山秀作中天五青莲十二万纪搏云烟元气小漏长庚颠秀作人间

一青莲绡霞酿露六十年两雄相得非偶然所以匡庐李白庐白也匡庐白念欲宫锦幄
屏风背拥九迭碧念欲宫锦袍瀑布高悬八千尺朝诵宛委编暮歌大洞经化为三籟透
紫冥下杂栖贤三峡之雷霆细则鸾凤啣麤乃虬龙鸣香炉袅篆五色明坐使万境神魂
清咄嗟匡山不负白白也顿负匡山色功名善愚人一旦调乃公采撷庵霭擘削巉嵒尽
收绣鞶囊卖之华清宫连城一出玉环妬天子欲偿价力士老奴从旁代喑嚅从此重瞳
意回互浔阳雨夜郎雾采石捉月月不顾不能携得匡山去后千余年好事者仍榜匡山
读书处咄嗟哉咄嗟哉李白居杜甫诗诗耶人耶与山并斗宇宙奇胡郎有奇急吐之君
不见六经万古长赫曦如悬九峻烛四垂不然草大还直借鹏背家须弥安能齷齪苦恋
五言七字长吾伊如此读书读奚为

寿南昌龙沙王孙七十

主人贤而好道其自号龙沙盖取旌阳石函讖也有子曰用晦能发枕中秘故以期
之

龙沙沙高压女墙石函字字生辉光龙沙主人七十强酡颜宣髮双瞳方主人自爱
衣萝薜不爱君王赐束帛主人健走仍健饷不爱君王赐鸠杖有书肯学淮南安朝宗捧
日心长丹有儿肯学刘中垒养得丹砂胜榴子东海狂生学面壁手种蟠桃仅三尺他年
结核萍实如要益千秋豫章色

答赠张大允文

允文者友人张将军子予也再以长篇投赠其一志不朽之业其一希不死之道
而余皆贸贸焉久而征其意乃欲得余赠言证明耳笔研芜废漫尔塞白竟不知作何语
也

老夫自解金陵棘不贷头颅镜中白五言长城拉攏壞千尺糟丘干欲坼卖身但拟
作佛奴拄口何曾问欢伯汝父差贪子云字世人任学廷尉客偃侧何偃侧蜗庐斗大聊
自适春风骀荡啼■〈票鸟〉鹞门前剥啄劳诗邮商声嘹亮动金石尺素错落蟠银钩
自云于世无所求但愿一识韩荆州闻之白香山何人得似张公子两首诗轻万户侯我
意或不然汝家故事须封留然后归从松子游我歌不再汝勿酬男儿墮地各努力出世
入世俱千秋

走笔题雪泉图赠彼上人者不知能酬对否

仲冬十一月三峨岭头百丈雪春风二月天三峨峡中百道泉山僧住山不论岁手
爇松枝令江沸未解泉能雪如白且夸雪与泉同味是雪为泉人尽知煮泉煮雪从汝为
第探此雪真面目记取高秋未结时

寿封君吴姊丈七十歌

阿翁七十鬓尚玄渥丹将酤染双颧金粟欲压乌纱偏呼卢卷白神翛然膝前众绮
何翩翩中有一绣去朝天鳳毛五色天书鲜何必身到鳳池边（翁先以侍御君满考封
中书舍人）海东绛桃日并圆海人捧致珊瑚筵一颗一饱三千年

重九日为庚辰岁昙阳僊师化辰敬成长歌一章志感

万厯之岁庚在辰我师拍手谢世尘西竺西池总西蜀阳月阳日归阳神晴霞两片
衬腮玉夕宿数点搏眉顰凝然金刚不壞身独立寶座凌秋旻是时弟子皆伏泣手剑忽
挺光鳞鳞老生舍身侍香火自甘佛奴或道民谈无说有世不一学士见挽传师真少将
灵迹托彤史敢以卮言夸素臣下士闻道只大笑何意众口成狺狺吾师可虞日月毀大
教岂逐云雷屯所怜内境有罗刹不妨外土来波旬银环再贖许消息金篋未引犹沈沦
朝披夕诵了何益如博日胜还日贫回头转盼已陈迹中天圆月十二新瓣香一缕断复
续风伯为我传峨岷玉京斟酌沆瀣酒浊世消渴支离人云君倘为下闾阖霞■〈干
〉倏见扶颺轮老生行脚粗已备芒屨布衲青纶巾不辞躡景渡彼岸眼底一众俱迷津
更祈僊伴有邹子大吹黍律回阳春

赵君自练川广文迁宰石埭石埭汉陵阳也窈先生子明以循吏仙去君素好道请
于乩而得僊篆金丹四百字故以拟之

陵阳山头黄鹤池夜半呼鹤僊人骑僊人拍手上天去丹台朱实时累累汝乡麟脯
那用擘吾家玉棺不得竒窈令不来赵令至古今亦是须臾事案头黄老五千言囊底素
书四百字双鳧肯似孤鹤孤劝君且赴尚书会

吾师宁斋先生南园牡丹之盛冠絕吴中而皆师之长郎君手植中有白牡丹一株
曰尺素者尤竒丽因作长歌纪之并赠长君

三月一出遊季园千竒万丽攢雕栏纷纷红紫尽辟易中有一株白牡丹初疑龙池

宴罢舞双成盘又似洗头盆暂卸天女冠姑射寒生雪肤粟郁仪风细霓裳单河宗攻玉乍成斗蛟室泪珠丛作团优钵昙名亦浪语璫花么么何足观太真霞脸大醉色靚此亦学江妃酸举觞酬季郎化工在手汝不难得非扬州观头逢七七又何必善和坊里延端端即使宋人琢此瓣百岁那得兹花看老夫久寂寞为尔暂为欢再进金叵罗属客莫留残日落不落天阑干欲去不去心盘桓皎然秀色转可餐他年倘许蕊珠会别跨长离胜紫鸾

任子倦游结庵以奉观世音大士而栖止焉署曰白云俾予赋四韵

虬髯虎颡任公子钓鳌不得万缘死舍身断拟作佛奴手结团焦白云里此云袅袅复辉辉有如菩萨拖白衣汝今已现居士相无心出岫无心归

傅令治吴有神君称而风流文采又复称是迹者解张将军子予厄折节顾山人山甫相与结词酒欢张之怀德顾之徇知欲以不穀一言蔽之难矣谊不可却聊成短歌一章以志区区

春风淡沲半吴城城西长官湖水清只知百里应列宿那晓傅令箕星精文章不独工制锦刀笔往往新发硎脱骖仍礼越石父停骑先过夷门羸二生亦是千金士一老明农一胥靡乍逢拂拭令心折自古贤豪为名使义声但拟归国相侠血何烦报公子老夫岂有隋侯珠聊为二生效区区愿君鸣玉趋天都惊人按劾如长虞吾不学吾宗痴骠骑一事不了笑人痴君其了却公家事然后征逐高阳儿

题關将军四画

辕门黑纛草头靡渔阳突骑俄已矣砉然一声如裂兕刀缨絰髮锋血洗白马城头鼓初起北人魄夺南人喜兖州冀州两国贼委质酬恩竟谁是有身终为豫州死

右馘颜良

鲸波涨天天为赤鼉鼓殷城城欲坼七军肉臭鱼不食于侯吞声龐侯咤尔龐七尺殉汉贼碧眼小儿黠于鮎麦城将星忽中墮高庙神灵扶不得有血还作西川碧

右破七军

金支翠旗掩霭中忽有赤骥腾秋空山都木客争趋工驼石白象鞭丰隆幻出七寶
须弥宫有为之迹无为功永宁同泰虚争雄可怜南北民力尽一炬赢得都城红

右创玉泉

鼎湖龙髯久上天妖魄再作修罗颠快意一扫漪池穿彼髯何为扼我咽元女再授
轩皇权七家铲削沈青烟宁惟晋人脂其口度支岁岁饶金钱一奠漠北三千年

右平蚩尤

为汀州王别驾大頤赠徐守一忠

长安苞苴色动地汀州太守无一字江东斋舫橐压舷汀州太守无一钱太守到郡
凡二年诸吏捧手日高眠期对何须更刻木催科不假施蒲鞭丁字溪头暎天碧笔架峯
峯如泼墨意适聊为始平咏兴来且着临川履吾宗别驾安丰俦为言太守饶风流君不
见嘉万之间两循吏老友亦号徐汀州

寿周山人妇七十

江东伯仁日日醉夜半犹传酒徒至中厨寂寂无语声堆案累累有佳味何人不诵
德曜贤愿姥百岁长开筵莫言贫老少生计黄花无数黄金钱

屠青浦朝天歌

少慕谪僊人好为谪僊语扼擎安期生杨眉闾风圃自从佝偻朝羣真使我结舌安
敢论读罢琅函无一字几曾丹灶有长春屠君自是神明宰滚滚词源注东海夙世冰壶
寸心旧肯逐红尘万縁改讼庭无事薰风吹劝耕课织春迟迟每逢藜饭欣然饱便是蒲
鞭肯浪施迺者阳侯肆其毒走决天潢翻地轴祇输青浦不为灾但覩苍生堪痛哭沙头
祖席花斓斑君今此去瞻龙颜我不道王乔飞舄叶县事君莫及许由弃瓢颍水间但可
嚶嚶民生艰它时阴德称帝意然后相从草大还

读了縁居士礼补陀记

普光道场在何处补陀落伽深且广沈生自捧圆通偈一叶飘然破泐漭天风不断

海潮音春山尽耸莲花掌夜分清呗犹未歇忽涌波间火齐盍归与冯郎诧奇胜便拟青钱买单舫大士端然鼻孔间可怜两面空相向

幼于欲渡钱塘取山阴道抵四明观日出归谒肖甫司马谓余作一歌壮其行拈笔得数语盖余入静来不复措意于工拙矣

张公一生江海客别余欲渡钱塘东镜湖湖头采春色山阴道上梅花风直从明海探出日别炼赤堇为长虹钱塘幕府高刺天其帅司马公宗工相留十日布衣饮知尔不哭回车穷此时定笑玉生癖土室僵卧如袁公有足却依兀者坐得句总让钉铰工大鹏九万鷁一尺若语逍遥无不同

书癸未二月十九日事

正月二十雷击人却脱岑牟汗如雨后先大地皆冻裂白日阴森一百五二月十九雷转急忽漫同云雪花吐似应黑帝宴白帝祝融击鼓玄冥舞辛五醉插琼瑶花滕六怒肩霹雳斧桃李抽萌不敢发龙蛇误出仍遭侮昨者七月十月风修罗两掌翻天宫千艘立没万室尽鱼腹饱人人腹空遗黎宛转荆棘底吟饥忍冻如酰虫催征不顾闾井赤鞭撻但诧公庭红吏民日望黄纸诏一字不济闾阎穷蔽亏星曜已往事调燮寒暑将来功中天一轮方炯照尔曹勿令尘再蒙呜呼尔曹勿令尘再蒙

自松江返孟孺印上人同载将登泖塔而为陆伯达所误迂道迫暝始抵泖口垂渡大风骤作维稍久之兴尽而去赋此解嘲书付寺僧

陆郎妬我游泖塔孤棹立作襄城辙虽然暝色欲尼人犹可穿波觅初月亭亭乍耸青莲花黯黯如探黑龙穴风轮鼓浪浪拍天地轴欲裂天无权雅无神足到彼岸可有凡身超四禅长年夜分报风止谢叟兴尽呼回船小孤亲擎玉笋白老足数踏金鳌颠归来但诵十六观耨池宰堵俱眼前曼殊室利为余语多寶塔傍覲龙女袖得摩尼无价珠他日湖心密相与

故令尹關中王翁修西方业而滇南王太学持即心之说胜之颇成齟齬寻太学入谒博士选将行余呼酒与息诤而别

關中王翁慕乐邦焚香礼诵朝暮忙两儿计偕从放落一媪牵衣任夜长滇南王生拍手笑翁岂欲产莲花房野人心净佛土净有口不复挂西方问余谁者得衣钵余亦左

祖滇南王忽然别我向京攀谒选且赴中书堂蹇驴席帽辞江乡此时關中意气强遠公
破例沽米汁留与彭泽同一觞天宫人世俱茫茫它年但坐青毡破不妨归去无津梁

康生时万将归云间出此纸求识别援笔数语不复能论工拙也

康郎白皙美少年卧病憔悴春花前生门灭户了然识纸帐筠床长独眠人间万事
尽灰冷惟有一死当胸悬有书不读产不问药垆茶鼎恒周旋老夫见之为然轳轳劫
尽天地壤学得长生翻可怜近闻衲子时留连东方阿閼西极乐举头慈氏兜率天我佛
诱汝生攀援莫作有为莫坐禅两粥一饭顺世縁无镜即已休磨砖

初传有麓阳陈山人道易非常者忽见访小饮且谈卜筑汝宁之乐歌此赠之

六年不覩陈季方数有消息传非常总未骑鲸吸江汉岂能乘月照屋梁天水尚书
数行至似云买田栖汝阳使余忧结顿已解毋那巷语仍蝸蟾今年六月大剧热支头白
石龛山堂松阴漏日时到地忽有剥啄惊羲皇长须孟浪挟刺入一老襴襪随踉跄宛然
河北病尙父渐看渐识喜欲狂中厨已办暖竹叶稚子尚欲施桃汤寒暄咄咄仅数语但
道身在百不妨啜嚙盘躄态如故嚙决卷波差更强阿奴生计夸较可低畴种秫陂鱼防
深秋枳道梨枣柿薄暮喧食鸡猪羊方朔怕饥汝怕饱何必掷揄燕市傍为汝屈指仍商
量无家莫问樊寿张（樊常侍为君买田宅故云）有社莫傍许子将（子将汝人多臧
否）尚书大树足荫汝岁寒秀色能青苍吴门处士多失职鷓首如蚁趋钱唐安能局踏
守一方壶中酒尽长揖去男儿得意即故乡呜呼男儿得意即故乡

弇州续稿卷十

●钦定四库全书

弇州续稿卷十一

（明）王士贞 撰

○诗部

△七言古

长歌送赵良弼太宰归汝

汝南夫子赵荆州赐金进秩何优优绣衣入领中执法符玺再帅东诸侯俄闻特拜
叅衡轴时与山公计除目雅操都无暮夜金清标总是丰年玉五十鬓边无一丝尚书八
座表留畿上章解绶苦欲去再屈温纶始放归谢客时称饵芝术别与天公乞私日子将
任作月旦评叔竇故少膏肓疾暎门榆柳遶秫田农耕社酒春绵绵僊行桥上好策蹇鸿
隙陂头宽放船蒲轮轧轧当公前欲断不断功名缘封侯拜相晚来事何足道哉黄颍川

白龙叹

白龙直上一千尺返照鲜云照如射九衢万口同一灌滕底禾头黯回色夜眠可闻
声打荷晓起未见江增波眼中无晴望汝出不能行雨可奈何呜呼不能行雨将奈何

后白龙叹

去年黑龙挟黑风万室中夜随波空今年白龙戏白云禾头不救赤日焚彼何暴蹇
此何慄有水不洗天公眼汝龙沾沾犹自多江东流殍将奈何呜呼江东流殍可奈何

题襄邸万花深处

片片红云拥朱毂宫花万树看不足笑杀淮南一丛桂肯输梁苑千茎竹当年设醴
雪宫西醉来欲作花下迷内园小儿金裹帻犹记山公白接■〈𠂔离〉

王上津季问生好佛以九日礼昙师化靖出沈嘉则长歌见示求赠言走笔应之

不覩孝廉面唯闻孝廉贤为母两弃官月俸不请钱中年厌家贫佛日听讲楞严终
十帙饭僧或下宾头卢礼诵未究波罗蜜九月渡江叩净居问我请示昙师期汝心在汝
觅不得天宫茫那可知毋听沈郎梦中语嵩少峯峯碧堪数但令面壁三两年自有懒融
来证汝

答赠云僊老人兼伸鄙况

君侯行年三万二千日頰如桃花髮如漆黄童口吐微妙音素女手授希夷术一岁
两枉漓江鱼问我容鬢今何如毋论平子盘玉报许授淮南鸿竇书荷君未面伸契阔少

小醜鸡瓮中活自入维摩不二门肯从贤圣求解脱

戏作

广陵道人秃其首叅同悟真无不有太史低眉袖金赠问我何为闕若口一言尚堪
海大鱼再语便作黔之驴从它注脚从它作（去声）祇是前贤枉著书

送沈纯甫尚寶北上

纯甫自捧金鸡赦归奉严亲五湖社闭户初怜此身得傍人再讶除书下毋论当路
急需贤我自凿坏犹劝驾繁霜臆作吴门冰劲节与之斗峻嶒畴当鼓枻如渔父谁不呼
舟并李膺此时绛灌须辟易此际屈贾仍冯陵承明玺郎初僦直万里天颜今咫尺臣直
转彰人主仁君肥却虑吾民瘠光禄艾卿赵宫赞握手生还玉门色赵子夙昔同襟期艾
卿亦忝文字知但令朝着有三益容我衡门歌四维君不见发弩健儿纵鼯鼠又不见埋
轮使者宁狐狸丈夫有才莫小用他日舜世肩皋夔

酒间歌赠益卿先生督蓟州诸军

虎头不以丹青闻亦不愿策词场勲飞而食肉万里相直与禹迹穷风云单书立偃
鲸鲵浪尺捶能穿虎豹羣扫瘴铜标伏波塞挥炎羽扇渡泸军舌端芝草九光色腹里龙
泉七曜文有酒时夸北海相无钱却爱信陵君辅吴将军张子布每推元叹叅幕府钱塘
健儿裂肝胆北平飞将归肺腑万户侯章许谁夺五单于颈唯吾组纵横巨笔抹燕然罩
歷长绳贯元兔天下英雄尽公等老夫楚服甘齟齬壮心几遣唾壶缺侠语终为蒲团阻
酒阑听汝歌都护乌鵲翻呼曙星吐似闻书记礼曹丘莫令但奏渔阳鼓（时子念在坐
君约与之渔阳）

送光禄卿顾行之之留都兼简袁司空陈银台

邵公清标冠人羣仲举抗志排天云龙江江水将洗眼日夜盼尔成三君翹材馆人
爰推穀吴会邻邻穀相续君不见淮南丛桂反招隱移植钟山满郁馥勿怜憔悴一枝兰
也要微香媚幽谷

送李使君旬宣金华部分赋得东海

绣幄霓旌映娄水父老揖余向东指此公自领符节来海不扬波三年矣金华僊嶂
迭芙渠叱石穿云兴有余回首扶桑日出处可能还记鲁连居

醉歌行赠别吴明卿记与明卿别二十五年矣舟行二千里而访我作十日平原饮
于其别也情见乎辞

君如吕安忆中散二千里外轻一面我如麴女待成季二十五年如过电无论心腑
利断金各讶头颅白于霰爱弟频倾澹圃尊三儿递设弇山宴河豚虽老乳尚新石首非
时玉初割鹅津水酿鸭头碧虎丘薜压龙芽贱为君鼓腹受杯笋为君破戒呼笔研更有
牛耳持赠君灰心不作城濮战栏边木药丛几团溪角桃花委千片即令醉死亦不辞人
间此人宁再见

赠王行父行父稚钦先生犹子也而师事吴明卿为文

王郎买舟千里来相诣开卷珠玑光照地不见竹林狂客阮嗣宗得见阿咸差足慰
武昌以东建词坛吴叟首敌汝捧盘齐安赤壁一时快郢里白雪千秋寒三闾沈湘九辨
作古人未解今人乐病向维摩乞赠言不二门中无此药

有感

转轮圣王招不起阎罗老子呼即去人言此去无柰何我道死处为生处苦县仅开
荣辱根竺干始究去来趣记取湛然一点圆莫遣枯藤束枯树

喻杭州邦相寄我长歌适李郡山人在坐倩作西湖图报之而系以一诗

明圣湖头月如璧写出两高三竺色词人水调学温韦醉守风流胜苏白夜深探得
骊龙珠破我禅榻江门孤莫言罔象浑无用也解从人倩作图

歌赠大宗伯袁公抑之七十

尚书自起东山卧三月三台袞衣过冶城独湛冰壶色大桁不受风尘浣烟花二月
明堂深是时君王在左个未悬大夫东郡车且隱常伯南宫坐忆昔金闺并通籍汝鸣朝
阳谁敢和龙颜乍为尺疏回鼠胆惊从一时破青衫举国望风彩绛帐诸生承咳唾不斋
偶成大常醉没齿已分首阳饿相君兢兢日虎视安能使汝终轘轳天上征书凡几下眼

前遗直唯一个岂惟公望重耆硕予亦婆娑成老大鹏扶鷄息夸各适蝇利蜗名爱偏挫
二十四考今甫始万八千岁谁独柰投分窃比松柏坚有诗肯随燕雀贺异时真有抑之
篇（公字抑之）为箴百岁武公情

太宰梦山杨公谓不佞为作桃花岭歌未有以应也今年春以书来云客至吴中册
有子二诗然而非子诗也能竟恁然乎哉适晨起行药小径落红狼籍忽有斐然之思因
遂成一歌寄公不知其能胜二贗诗否要之落句狂语彼固不肯道也公以为何如

寂莫探武陵原喧莫游玄都观武陵渔翁不再入玄都道士倏凋散谁能衷此喧寂
间大隱小隱居其半關西夫子卫水濱自言避宦非避秦亲从青帝借元气要与黔黎共
此春生憎薔薇好齧指肯学河阳斗侈靡开时高岭绣成幄落处清波剪为绮露井毋令
僵李疑渡江不用团扇辞无穀何劳神处守有露从寬么鳳栖落落条风散初燠主人卯
睡酣意足上树猱轻一百回流霞鲸吸三千斛君王束帛贲丘园葵藿倾阳奉至尊忍但
无言向蹊路宁容手植满私门方朔西来踵龟坼揖余分贈瑶池核欲识它年结子心功
成拂衣种即得

甲申冬十二月十三日

长安东风散木稼德星荧荧照江社五年南阳思卧龙一日中国相司马父老能追
弘治日斯人岂出三原下即看凡羽羨葳蕤坐使饥乌亦喑哑笑呼诸儿煨榾柮团栾且
说升平话

其二

未央玺书东南驰天下万手皆齐眉不将两字詈文仲直向千秋歌子皮乃知金陵
腴元气祇为冻水标明医圣王威庆与天合焉用区区梦卜为一蛇上天一蛇蝥即死不
爱春雷知

孟春三日志事

古人不逢范希文今人却覩天水君白简何能避綠盃一丝力欲回千钧自从圣主
賜环后海内洗足趋龙门争嘘舌津润月旦旋窃眼色为风云致君尧舜在早晚慎莫便
使巢由闻

其二

四皓不爱羽翼竒归欲商山茹紫芝青宫再叅亚辅选太学仍请诸生师鷓首欲北何迟迟十四字已君房规即披羊裘钓七泽女牛一星谁不知何如且学苦县叟小隱柱下窥希夷

渡知津桥眺小罨画溪尽处入弇山堂之左门

问津只问弇山路桥上双舂忽争露桃花欲尽不尽源烟雨如迷未迷渡维梢小艇亦可怜一棹便抵中峰前若教饱吃含桃去蜡屐登山也自便

循磬折沟而北转抵萃胜桥东为瑤瑶坞有红白桃之属

此沟湾环复清泚水木芙蓉相映美夕阳欲下不肯下为恋瑤瑶坞巾绮红者为琼白者瑤白梅红梅树树娇白消仍发九光李红悴还开千叶桃老夫久知空即色何必纷纷辨红白即令枯瘦一枝横隔水看山醉亦得

缥缈楼背沿涧与后山对度青虹桥登平台

老夫独眺缥缈楼以西站台月如霰虞山细吐一抹青姿水横拖千尺练兴阑欲就北窓眠无那羣竒故相荐大峯小峯玉齿齿桃花杏花霞片片已看戲猫出奋迅忽有
■〈虫帝〉螭垂蜿蜒洞庭西顶淹水宿天台石梁苦头旋枋榆亦自足逍遥何妨一日登一徧

平台小曲水流杯处西俯飞练峡

云根嶂前散乳玉渺渺流杯尾相逐瀑布飞湍仅寻丈莲花宛转宁九曲山阴兰亭千古稀匡庐开先天下竒会得逍遥此中意不须频与向禽期

为林子腾茂才题桃花图寿

闽中乔木俱成林林家主人饶隱心时篔竹叶千斛酒来坐桃花万树阴淡日轻烟酿芳暝翠羽黄鹂唤妆醒开处疑蒸紫帽霞浇时欲溷旃檀井祝君度索三千春有子仍为金母珍汉帝方征上林植可容长作武陵人

蔡文学去疾甫哀然小试首矣两岁冬袖所作贄余痛饮旬日而别意欲得余一言耳沃之酒歌以送之

吾怜蔡荣名不荣龊龊尘世名纵然茂才冠东越自有微尚依西京吾怜蔡去疾不去陶陶酒人疾小饮犹倾三百杯大醉须眠一千日两年两叩先生门沾沾所见愜所闻袖携天台石吐作弇山云先生舍身作道民南山黯没干将文瓮头颇足中山酒祇是无名可借君

赋得匡庐观瀑寿华存叔鸿胪

牛女之间漏银河欲洗庐岳诸青螺下飞瀑布九千尺三峡轰雷听最多华君自谢螭头直手制青鞋踏秋色开先寺前梦初破恍若钧天奏无射匡庐先生道偶逢貽君沆瀣酒一锺吟罢毫端双白鳳归时杖底一斑龙只今高卧梁溪上七十风神愈萧爽入观能令水月澄动操如闻山谷响作书好报匡先生东海近有王方平不须夸尽开先瀑行见蓬莱渐浅清

醉茶轩歌为詹翰林东图作

糟丘欲颓酒池涸嵇家小儿厌狂药自言欲絶欢伯交亦不愿受华胥乐陆郎手着茶七经却荐此物甘沈冥先焙顾渚之紫笋次及扬子之中泠徐闻蟹眼吐清响陡觉雀舌流芳馨定州红瓷玉堪妬酿作蒙山顶头露已令学士夸党家复遣娇娃字纨素一杯一杯殊未已狂来忽鞭玄鹤起七碗初移糟粕觞五弦更净琵琶耳吾宗旧事君记无此醉转觉知音孤朝贤处处骂水厄佗父时时呼酪奴酒耶茶耶俱我友醉更名茶醒名酒一身原是太和乡莫放真空落凡有

寿喻处州父太翁八十

此翁爱我能诗歌我爱此翁心不他儿骑五马不自贵日飧二簋犹云多太守放衙日卓午却着斑斓学莱舞石羊山头荐修脯琵琶洲上奏箫鼓人生八十古更稀有子福德增崔嵬生来鹤骨元偏瘦胜后冰肌转自肥余郎非亲应即故寿翁珊瑚未肯顾贱子为裁玉笥云丈人且进金盘露

题秦侍御像

豸其角鷺其目长安贵游不胜触隳厥弢衰老空谷趾其麟仪其鸿归与闾党偕春风如林长眠纵大空貌人貌君十得四我得君全君可契大都知希乃为贵

秀州李茂才元白访余娄江道中出近诗一卷甚佳留饮剧谈时及屠长卿徐茂吴遂成短歌赠之

少年好文仍好诗清扬藉甚瑶林姿枫江叶落过余舫一写十斛明珠玠书生有才莫教大神僊祇藉刀圭做君不见屠郎徐郎一人半造物小儿苦摧挫

郡伯嘉兴沈侯自署曰五湖钓叟吴人孙枝写图周天球篆首而世贞歌之

蟠溪老翁八十余此翁钓侯非钓鱼若言轩冕异丘壑虞圣亦曾雷泽渔胸中但贮小云梦焉用形迹分区区沈君家住莼鲈乡绿簑衣底天茫茫一朝鹏化击寥廓九万里翼云飞扬虽然得意挂朝籍忽忽旧游中不怪晨从大国问烹鲜夕向穷阎忧竭泽孙枝为写湖头色展着烟波流几席贺监秃酒徒病昏无所知始乞黄冠去鉴湖能几时桓家小孺子躁心在尘网何必解郡符始称五湖长而我故是王弘之钓亦不得神长怡藉令物色羊裘去终许菰芦明月知

游鳳皇台委垒不称不复和昔韵而戏作此歌

太白絕代才曾歌鳳皇台鳳皇虽逝台不改太白千秋句犹在高皇定鼎万■〈宀禹〉同此台附之益豪雄凌云铜雀皆下风及我游斯培塿土堆如一蚶蜆偃卧苍苔三山二水不到眼深谷高陵或有之我笑鳳台非昔时台亦笑余鳳德衰尔毁不可复余衰犹可追明年便逐孟亏去笼畜此鸟如家雌

报恩寺塔歌

壮哉宰堵波直上三百尺金轮撑高空欲鬪晓日赤浮云遏不度穿泉下无极钟山颡顽一片紫余岭参差万重碧高帝定鼎东南垂文孙■〈卜替〉启燕王师燕师百万斩闕入庙社不改天枢移六军大酺万姓悲欲向罔极酬恩私阿育王家佛舍利散入支那有深意中夜牟尼吐光怪清昼琉璃暎纖碎帝令摄之寘塔中寶瓶严供蜀锦蒙诸天悉凭龙象拥千佛趺坐莲花同匠师琢石细于缕白云得法切利宫亦知秋毫尽民力谬谓斤斧皆神工波旬气雄佛緣尽紺宇雕阑销一瞬乌刍额烂走不得韦■〈马犬〉心

折甘同烬海东贾客莫浪传此塔至今犹岿然老僧尚夸护法力永宁同泰能几年

重创瓦官寺阁过之有作

昔时瓦官阁高与天峥嵘业火一烧尽不能烧却万古名莲花比邱苦缘薄倾钵诛茅覆檐角不见如来减劫时丈六金身亦不恶

初秋同少宗伯棠轩李公饮大司马月溪阴公署中因赠李公専求和韵

玉井峯头结冰李小日移栽上林里蜀道高歌有谪仙汾阴一曲真才子鉴湖道士老且狂相逢但饮黄垆傍时名积渐耐龙尾酒德依稀犹鴈行今夜尚书署中设蜀管吴丝禁不发为君佳句似阴铿莫教孤负长干月

题马鲜梅鲜于枢长歌真迹后为詹侍御明甫赋

詹家琪树五百年色压万卉当春先根如铁龙蕊如玉能使石壁增清妍马儿丹青得父笔为梅传神神颇全当时主人大好事徧乞虞揭诸名篇伯机一书独遒发与图三絶嗣郑虔老梅枯死圃亦废此卷一分沈虞渊仍孙侍御出按部夜有光怪腾奎躔不知何人致此卷捧视絶倒几成颠延津剑合犹化去合浦珠返宁天然归陈祖庙集子姓天球大训不敢前金华山头紫郁浔鳌溪水脚青潺湲故家何必问乔木五尺绢素高摩天他时努力效鼎实与子别结千秋缘

蟠龙峯歌为大司空豫章李公追赋

蟠龙峯高高插天下有洞穴龙长眠有时行雨徧八埏横空万尺银蜿蜒忽然缩入一钵间永脱金翅牙關縁君不见南阳卧龙气太烈一片心为豢龙热定军山头呕成血何如此龙得天诀与云卷舒倦即歇

吴长君七十长歌君大叅明卿兄也

昔日杜甫成狂歌自言四兄巢许伦虽然齷齪家人语能使千载传其真吴卿今年六十五汝兄七十貌更古纵令湖海无拘束稍袭衣冠傍规矩揭来种秫兼种稭手抄鱼经复酒经有酒直寻长乐壩得鱼且泊沧浪亭闻道甌甌洞中石移来半是愚公力县官第不横索钱野老何妨且争席红颜宣髮青方瞳绿衫朱黻斑斓中庭前参差几玉树云

表偃蹇双冥鸿丈人得之必辞避愚者是兄贤者弟但呼尧世洗耳翁何必要第五之名
强骠骑

人日金陵忆亡弟

去年风雨正月七犹与病人同此日今年秣陵多光辉此日犹是人成非中庭紫荆
渐老丑一半犹青半枯朽纵青能得几时荣憔悴侵寻解怜否杜陵野老双鬓星蜀州人
日感凋零听歌黄鸟已垂泪何况枝头啼鹧鸪

寿柳州六山陈封君

六山矗作西南柱主人行吟读书处为文雅受罗池法（柳州碑）有子能工天马
步（六山之主山曰天马）只今行年六十七宣髮朱颜美无度更约它时大药成笑与
羣僊弄烟雾

双梅歌为方塘张封君赋

瑶台僊姝畏姚姒化作君庭双玉树大庾万条看更俗陇头一阙吹不堕张果鯢齿
如编银要与此树争丰神飞觞三雅媚残月摇笔词组开新春有子移根奉温室皎皎冰
姿射霜日莫言子作书生酸要与君王调鼎实

高皇御枪歌

臣自守太仆于午门之五凤楼恭覩文皇帝御用枪枪有号带退而作歌盖十有三
年矣而起家南司马复于故宫之五凤楼恭覩高皇帝御用枪凡二大者几盈握修可丈
六尺疑即用以步战者也小者修杀四之一围杀亦如之疑所谓马稍也滁和之间盖无
日不亲御焉武昌而后不复自将矣此枪树之御座右以示子孙毋忘王业艰难呜呼休
哉臣不敏复作一歌而年老才尽有愧于旧多矣

真龙鱼服事假王当时四海一滁阳椎锋跳荡无前敌驰射威神不可当猊铠淋漓
染战血蛇矛夭矫盘秋霜此矛大细凡二柄用之掣电舒神光横驱铁骑扫建业直拥舟
师下武昌登坛拜帅徐与常始握中权不自将按图一诏制万里挟捶两儿鞭八荒羽书
络绎报宣捷虎殿委蛇进讲章干戈倒载三十襍礼乐明备同轩皇玉几亲凭海孙子艰
难往事毋轻忘蟠螭小架二矛立伊置五鳳楼中央和弓垂矢俱辟易禹谟舜典同辉煌

马上得之马上治陋哉汉主胡弗详平城七日脱馁鬼犹向沛儿骄故乡呜呼何必猛士守四方

为王大宗伯题文笔峰

五指冠国琛一笔帜文苑矫矫中书君不产中山产琼管黑云堆墨醮峰端横写南天万行满东亭且莫梦如椽丹纸黄麻好细传更闻欲续司空志大费君王侧理笺

金陵遇中贵人结好甚深于余归追送栖霞浹日夕乃别感而赋此

十载供奉皇青春颦笑警效若一身御马骑从内殿出常饭饱饫天厨珍覆水翻知不收好回首同侪竟谁保不辞肝胆倾向人自拊头颅叹将老偶然意气怜秃翁杯酒翻澜萧寺中天与清闲莫轻掷且踏紫陌收残红

长歌赠别朱大夫

大夫朗博亮直君子也余幸有一日之知又幸宦留都有二载过从之雅庚寅春谢病南归携酒摄山送别因成此歌赠之弇中之约幸毋忘也

朱大夫颜亦朱碧瞳宣髮微髭须皎然玉立金陵衢少年意气龙可屠局躋且当辕下驹三为岩邑吏道舒小转亦握專城符台抨误及当下除立散五马归乡闾新诗一卷酒一壶杖头百钱从有无蜡屐踏遍春靡芜醉眼且拊双明珠大者光烛牛女墟秦庭好易十五都今汝不乐何为乎朱大夫我能写汝抑塞垒块之豪麤汝当振我鬪鬪委顿之衰途摄山酒尽未易沽挥手便别毋踟蹰朱大夫此后莫唤王尚书老夫新衔长五湖明年短棹游东吴弇州糟丘不汝孤

至京口承陈从训相送丹阳道中留赠

京口三山产三杰中有陈生擅三絶爱将肝胆输故人除却图书无长物老夫抖擞金陵尘劳生遠送情更真报汝弇中自天地明年共赏糟丘春

四歌

余同气第一人女第一人从兄弟四人其三从己前逝女弟之逝在三十年前独余

两弟耳乃以三载中夺之又夺我犹子驹何其酷也归计既成于私懷小暢念及逝者莹然一身更自凄楚因裁短歌四章志之悲咽之语不敢言文也

季方少我纔十齡事事我觉难为兄前年卧病辞清卿我更失足金陵城连枝一枯仅一荣悔不晚耦鹿门耕呜呼汝今已足垂千秋鸰原血泪何时收

其二

吾家羣从兄有四两者是兄两者弟少者奕奕负竒气更复温良得吾意一倾十斗不辞醉至竟此酒为身累呜呼衰年得归亦不恶谁与衔杯共欢谑

其三

妹年三十弃我去不能哭汝哭我父我今六十仍加五汝骨恐作虞山土柔徽令则可指数痛无形管为挥吐呜呼崦嵫之日不可留人生寿夭同一丘

其四

我有三雏弟加一汝更翩翩白眉侄孝友温文鲜伦匹鸡骨支床更竒疾三十沉沉弃白日下从龙舒万事毕呜呼归来庭玉俱峥嵘忽不见汝心魂惊

弇州续稿卷十一

●钦定四库全书

弇州续稿卷十二

（明）王世贞 撰

○诗部

△五言律

送康永锡游南雍

太学今贤藪金陵古帝畿何人堪绛帐有巷可乌衣徙箸防炊玉携家为断机江山
六代色斟酌锦囊归

用晦以三寸篋贮金字佛经呪二十余卷精工之甚感而赋谢

函端舍利发知尔不成空老眼粗能辨僧翻未易终真文玄奘熟梵字苑咸工大类
羣龙藏収来一钵中

寄汪生

十日平原饮星文动有无名高多借客侠倦始兼儒肝胆谁堪寄诗篇仲不孤莼鲈
地何限吾已号潜夫

审録范比部枉驾小园

刀笔惊行部干旄废掩关公才解雷雨吾象遯天山暗壑歌留响丛花酒破颜忽闻
栖鸟磔初见火城还

子循子威诸贤过幼于石湖别墅其高处为新郭城址范紫微遗宅也

湖爽杯从益天空镜对开亭依新郭垒岸隔旧郊台词笔夸吴会渔歌起越来越无妨
醉题壁君是紫微才（用周益公事）

再题幼于浮黛阁

黛色浮不尽为君染琴书欸乃一声发千山残照余星河挂檻静岚雾扑窓虚岂以
元龙简能令求仲踈

袁丈宪副马大叅冯少叅薛进士邀游石湖

群舫来争客相逢尽故人鯖寧五侯味酒是一家春湖色能寬醉乡情好任真呼童
扫盘石余兴欲垂纶

吊陆叔平墓

崩岗深山径斯人长夜居谁怜一抔土却掩五车书玄素名空在丹青代不如齿牙
吾自有从此倦吹嘘

又

一代风流远穷交雪涕倾老魂招不得名迹见犹生闻邃山阳恨畹白孺子情女牛
高自若第减少微明

宿王玄静石湖草堂

谈笑风生坐淹畹月满筵湖光来澹荡竹色进婵娟练雀穿帘美银鱼鬪筋鲜从呼
君且去吾意未迴船

看王子父雅宜先生舅六如居士像

风度吾前辈冰清汝外家虎头痴更绝龙爪劲谁加一代珠双襴千秋剑并华椒浆
欲有酌异世起长嗟

徐长孺投诗见赠且订山园之约以小律为答仍促使来

客喜登龙事吾宁隐豹身一丘安旧业万卷厚归人友谊深从澹时名缓更真芙蓉
池上月待汝共垂纶

畏客

年来微倦客客至转无期佳事少入耳新诗难解頔何如案头帙侑我手中卮一枕
松阴下从它夕照移

送陆楚生吊童子鸣

絮酒轻千里生刍托寸心一贫无挂剑百感为分金泪向吴江尽恩偏越峽深山阳
夜中笛肠断不堪寻

吊童子鸣

饭颗山头骨陵阳石畔心隱能逃小贾穷不废长吟妇泣黔娄被兄悲子敬琴（生与兄友爱甚）龙丘墓堪傍千古是知音寄

耿中丞时服将■〈衤覃〉矣

琴弹何必就太古有余音歷尽冰霜色悠然天地心一星堪审象九夏望为霖倘及衡门叟秋江烟水深

寄张羽王别驾

诗穷不肯送宦拙与谁论日月青衫老风霜白发新平津无上客楚泽有孤臣问我秋来计清尊夜夜亲

方众甫过我山园有赠

姓字非豪举文章是大方一尊凌岸■〈山上罅下〉并艇狎沧浪宛尔祇林日悠然得汝长久知名避我只合醉为乡

孟孺同方君见枉山园

汝挟方干至吾欣徐穉畹小谈迟日过晏坐白云幽进屐藤萝顶回舫杜若洲沾沾自喜色可为少年游

赠彭仪宾稚修父也

有骥今千里乘龙是昔年国香丛桂近庭玉一枝偏身是仓曹志人传山水弦洪崖莫冲举留作地行僊

范显先于馱先二茂才贄文请序仍以扇乞诗聊赠一律

二生饶感激百里觅知音却谓蓬累足将之瓠落心（其文曰大瓠编）大璞勿轻

剖良工能见寻问余何所作日抚无弦琴

罄室先生为月泉上人画一锡一钵聊成短赠

道人杖一锡一钵复随缘钵中贮秋月锡底飞寒泉警鹤有时响
龙都静眠但令无罣碍不爱辟支禅

送沈进士病起还朝时其父鸿胪君无恙有弟同榜而谒选当得邑职

羡尔趋庭后枫江引画桡归心缘爱日起色为观潮玉树名元并金茎渴自消
纵令甘手板不削沈郎腰

赠乡进士曾嘉袞乞其父志铭还楚

而祖仍而父先朝两静臣世夸龙颌旧家有凤毛新细雨为江色清尊别故人
龟山一片石聊与助嶙峋

和答陈太守师

白下多清咏朱方岂倦游为闲抛五马余兴买扁舟爱有银钩赠惭无玉案酬
武林门外色倘许故人求

寿曹茂才六十

有子华封祝无车下泽身杯盘邻舍事谈笑自家春白雪矜吾党青云让后人
胸中千古在知汝未全贫

赠俞老

君真俞跗后医术晚通神身作吴楚客从呼秦越人祇凭黄阁老容汝白纶巾
何限虞山色春风纵履新

李子华见过偶成

此身犹健在归计日萧疎尔挟轩皇问吾安汜胜书闲真爱罗雀懒至怯烹鱼（谓书也）垂死犹贪客徐卿未易如

戏赠陆兄

见汝佳公子俄然双鬓华有家不解问欲问已无家鞭巷一壶酒弇园千树花应门如不却老去足生涯

送张仲立游南雍

念尔芳兰秀能令一坐清毫端宁下驷眼底误兼城狱剑偶然鬱台金元不轻试探平子篋应已赋南京

汪禹又弃家业诗携其集就质赋此为赠

无家何必问诗卷但相随尔爱千秋业吾惭一字师才高轻自恕身老易成窺勿作虞翻恼名山尚可期

汪惟一前以五湖长印相授而衍一者字今夏再刻古铜章见贻喜而答赠

铜章仍再锡知我莫如君果署五湖长应须十赉文栖迟竟日月汗漫足风云尚有糟丘地苴茅倘许分

詹録从孙予告喜而寄之

相如归自使称病乞文园名为抽簪好官宁负弩尊鬪茶新胜客种竹旧生孙若欲亲花鸟来从老圃论

李国宾持服还吴寻返豫章邸诸君约诗为赠

鳳去洪都里乌啼茂苑枝琴弹不成调箫奏有余悲苟令香时歇何郎粉渐隳唯余八公在为返鬓邊丝

送汪惟一乞子与墓文

玉树看埋土谁能不叹嗟
剧怜唯宋玉能守是侯芭
气色开中古文章属大家
即今茗水上时吐赤城霞

寿封孟安人六十

齐眉初罢案丸胆义仍方
不待三迁后悬知二孺良
检衣饶旧葑行稼有新庄
况是宫壶酒能无一举觞

寿孙指挥五十

五十孙都尉长吟鬓欲苍
金鱼宽贳酒银鸭细焚香
祭酒推诗社将军和栢梁
还余双紫燕拂拭便如霜

读酷吏传

荐士如张史忠言有郅都
兼闻尚廉俭不肯学贪污
遗橐千金累同时五族诛
温舒今眼底能達汉廷无

读陈子昂传

未必射洪令能残陈拾遗
天寧私酷吏人乃厌清时
獬犬才偏嚙冥鸿徙觉迟
虽然班管在段简也名垂

读匈奴传

匈奴新得意入塞即横行
贱老长从俗趋贪不顾名
抗衡非上策避地且全生
和好终难恃那曾念舅甥

读魏其侯传

魏其虽失势侯印尚累然
立散千金赐寧慳数顷田
当时籍福解遠胜灌夫怜
尚识沾沾意田郎跪起年

黄玄甫国士也数困公交车以其业来质赋此期之

拥棘叨抡士惊心字字珠至今传晋问何自访吴趋九折心偏壮千秋事不诬春来
眉黛好莫讶入时无

汪山人过山园后见寄新诗有答且邀之

汪伦赠我歌罢柰伦何久客吴音惯穷愁楚调多雪花杯底玉云叶镜中波如此
园林色何妨唤棹过

初春杜门即事

风雨动经旬空斋锁病身篝灯续残昼煨火谢阳春（小斋寒暝为甚）忽有冲泥
者能言胜事新始知行乐地不着过时人

萧使君有惠政于吾州别十有六年矣今以请碑文见过为赋三章志别君宦薄然
五世同居近有义门之旌故末章及之

自闻抛五马强半在杭州古洞烟霞暖西湖菱芡秋乞碑寻大令买棹下长洲好是
家人语萧郎爱远游

其二

伊昔求羊径曾为半刺除只今罗雀巷重枉故人车舌在牙从少官贫气自舒旗亭
父老在杯酒莫教虚

其三

八叶台司重西京甲第尊萧家当日事不必至今存刺史开廉里君王表义门还闻
书百忍余庆逮儿孙

憇徐氏园内赠主人

爱汝辟疆地能为求仲开小鸟啄林萼幽蝉抱庭槐掩映竹间帙逍遥池上杯洒然

清风度乃是主人来

冬夜独步

冉冉孟冬尽熙熙如暮春光不恶夜月色故亲人栖鸟为三益空仓是四邻偶然成小步幽意欲谁论

空山者法门中狮子儿也俗腊半七十矣而犹童真安居羯磨精进般若前后受持经典何止十夹犹以未明心要徧拟叅方诣余言别叩其所之则云将泛嘉禾抵余杭奉楫惟于月庭之席敷法具于莲池之堂然后折芦渡淮飞锡登嵩放達摩之少林壁掠文殊之金刚窟束铜固腹始归故山余蚁处一穴不能偕也姑为四韵以壮之

匪嫌贫里累聊使俗情捐一钵初为日双趺不计年浮空杯渡事探险石头禅从此东林月无心处处圆

月来不能尽却酒而数有致黄鱼馐者拟斋月断之成此二律

首夏清和节江乡樱笋余时时呼白堕顿顿食黄鱼谬忝道人服虚回刺史车未论他日事扪腹定何如

其二

舍家成底事对案独何心未断柴桑酒翻愁绵竹音门人议糖蟹少妇却鲜禽从此清斋月饥肠任自吟

送吴甥侍御病起还朝

不妨神武署重见惠文冠起色清时易归心往事难暎珠吾愧舅完璧尔能官共道朝阳色和鸣有凤鸾

吴侍御过访草庵言别

柴门厌烦暑忽有一驄过非以清凉地将无霜色多汝为真御史吾久病维摩莫羨冥鸿远犹能罟网罗

徐泽夫有事外寄而膺试北上赋此送之

君行负竒尚不为急知音白雪巴人里朱门蓬户心风尘吾道在雨露世恩深别有凌云赋从它竞上林

慰殷无美哭女

殷生抱和璧悠然掩柴荆不咏颜逵句却鍾夷甫情夕枕断紈影朝飡稀佩声蒙莊亦难解唯有诵无生

题月槎赠张鍊师六袞

虚隱即大隱羽流岂凡流早佩玄都篆晚陪松子游步虚清籟夕燕坐绛河秋岁歲槎来去如依博望侯

寄广州陈司理因简黎惟敬少叅

闽乡大海邑日接岭南云（闽人君）蛟室应无泪羊城近有君兰金雅自慕萝薜怯相闻（君累致诚之诗）倘下延徐榻黎生可借分

题画再寿瞻美弟

五十非与是醉来都不关林余仲长宅壁有少文山小妇能调瑟慈亲好破颜时时嘲子晋何事薄人间（瞻美每不许余学仙所咏皆实事也）

陝有李叅政封三代

世家唐赵郡吏治汉扶风今日玺书下君王恩数崇纶音依八座艳色动羣公原氏阡头石将无五彩虹

潘景升少有文以书介仲淹乞余志母作此寄之

青鬢有潘郎结交多老苍我安居士病不入少年场金石千秋重松楸一字香雅知

荣施骨真胜孝支床

欧桢伯工部转正郎寄之

坐啸玄熊署行吟朱雀桁诗仍小工部官是正曹郎六代心逾远三山鬓共苍故园
黎老在单艇钓沧浪

其二

一枝真郅桂五岭复佗珠水部官仍好风流代不孤锦囊行处有彩笔梦宁无从此
钟山色俱应属大夫

送袁大夫迁鲁右相

岂不惜循吏其如佐宠王欲观周礼乐须待鲁灵光辙远春犹在裾宽日自长可增
藩相秩借尔卧淮阳

其二

揽衣从父老洒泪向河干名大游梁易时平借寇难祖筵晚日缓斋舫受风单自爱
东平美非关薄汉官

谷日同敬美携榼访家元驭因饮元驭园亭

朋好簪全盍园亭酒更宜赏能偏穀日归不待瓜期箕颖人从厌羲皇尔自私宁唯
嗣宗眼柳亦吐青枝

其二

耦耕吾爱弟骸乞尔从兄绿蚁先春色黄鹂不世情渐来银海眩忽有玉山倾醒则
夸醒好欢娱醉里生

肖甫司马贻书有归欤之思而受賑出督寄此识感

竹林名士七草野病身孤寂寞余丹灶凋零任酒垆
几人私日月吾计晚江湖頼有张司马旗常事不诬

其二

蜀道难仍否吴天去转长吾寧忘绵竹尔可念铜梁
鹏鷄飞同适沧桑事亦常此心真不住何必论行藏

孟達仲達二兄见过恬憺观谈玄因成二章为贈

碧云暮未合二妙偶相期深语费春茗清斋余露葵
千秋别有事一字乃吾师从此逍遥路翛然去不疑

其二

尺鷄虽无慕雕虫敢自矜对谐物外赏甘得区中憎
密坐探金钥清言转玉绳当时许长史曾藉华江乘

汪仲淹兄见枉致长公伯玉司马乞碑书有寄并贈

仲子过从日难兄涕泪余文章司马法生死孝廉书
一见一回老千秋千不如唯强乞骸弟早晚共樵渔

寄周小史

邹阳不仕汉王粲尚依刘滇海无归客襄江有寓侯
卖文寧活计设醴可寬愁薄业湖田在粗饶雀鼠谋

荅谢赫侍御存问时按关西

喜乘骢马去穷讶雁书来忆旧存萝薜将春施草莱
欲酬吴地縞翻借陇头梅闻有西征赋谁当句里才

顾山甫过饮道院作

春眠起剥啄檐鹊亦群喧草色上盘馔桐阴清酒尊君行不易迹我醉已忘言尚有
归途月依依恋筇门

赠西域无名苾刍

离车邊地种能不羨支那从客秦音惯无师梵字讹羸提游自穩檀越见偏多莫以
流沙隔犹堪只履过

送郑司训会试

教授尔家玄广文重见虔九经谈若注三絕品谁先闽海长虹吐吴天化雨悬诸生
侍绵蕞从奏未央前

过青浦屠明府长卿移舟见送

青浦桥邊水人稀明月多谁移木兰并知有鄂君过会意言从简忘名气自和翛然
两不厌奈此埃亭何

其二

为别亦已久相逢俱嗒然君离绮语障我爱辟支禅凉露纷纷下新蟾的的圆试观
流水意折莫在无弦

屠青浦以都布单衣见衣口占谢之

白越白于霜裁将换芰裳轻鲜傲西氎寬博谢吴装縞带吾乡重绋袍汝意长祇惊
居士服时有令君香

刘秀才弃官学佛书此赠之

翛然持一钵信足傍丛林却笑龐居士犹多处置心衔花境自小结草坐从深觅已
了不得可师何处针

杂言十章

垂老媿无明劳师为证盟间关离欲海抖擞破疑城祇树堪吾止阿兰息众争此生
元自恧何敢学长生

其二

误守楞严语晓晓品十僊那知鍾吕輩来自静居天无欲俱观妙顽空转碍禅差池
在毫末一透即成圆

其三

明珠吾自失颠倒问西邻识得我前我能生身外身转头离梦幻到手觉精神若勘
张平叔何曾误学人

其四

失计从人笑迂儒敢自夸低头向学地节腹慕贫家黑业根犹在玄关路转賒差强
在火宅觅地种莲花

其五

维摩默不语迦叶笑仍微此意谁能会悠然自道机百千万偈后四十九年非若有
云门棒能令狗子肥

其六

谩道随緣好緣多不自禁偶然情用事陡觉病拈心坐石苍藤蔓开门黄叶侵谁言
朝市隱终让入山深

其七

偶有邮筒至诗编刺眼新雕虫真自小画虎竟谁真咄咄緣贪世沾沾各误身浮名
与生尽零落北邙尘

其八

合眼从新事关心为古欢时清小草易道在曲钩难物论元相暖心盟可遽寒聊因
众毁力长得此身残

其九

七情聊试勘唯爱觉难论已自傍伦物兼之有我根抔沙一以结归路遂长昏是故
双林叟功成始报恩

其十

江南金粟地家谄郗洗枝世法聊成美天心或见私门秋驷马结龕夜一灯随空有
吾何敢宠惊聊所师

骐儿应试拟不捷后入山访道招之

古时称薄命今不尽红颜战即从三北丹须待九还吾犹滞方内汝可厌人间欲举
团栾话归来共掩关

送苏山人谒张司马

十载乍相见居然犹敝裘青谁嗣宗眼白有子卿头幕府如论旧辕门或见収便能
讥陞楯雨不善身谋

其二

蹭蹬霜毛益彷徨一刺陈自怜侯白口不救范丹贫老作钱唐梦寒思黍谷春晚侯
有前箸借尔辨如神

读马司空侍御父子集因赠其子从甫

死夺淮王胆生批汉帝鳞两朝推父子万古见君臣南浦丛祠旧东闽汗简新李繁

有家传今尔独何人

杨文学伯翼脩园

五亩蓬蒿地翛然都不营
有花自开谢无酒亦沈冥
永任周遭碧山从暝带青
故人劳问字杨子倦谈经

徐善长明府见贻二作奉答并赠

君是名家子俱称小令才
风流列城最保障古人哉
行复乘骢去聊因驯雉来
何当输翰藻为我贲蒿莱

辱襄王殿下有精镠轻箠之赐敬成五律为谢

襄王爱秋气命驾陟兰台
偶听巴童曲遥怜宋玉才
凉风纨扇发明月烛银开
莫谓恩波浅穷鱼正曝腮

曩余为胡元瑞序绿萝轩稿
仅寓燕还越数编耳序既成
而元瑞以新刻全集凡十种
至则众体毕备彬彬日新
富有矣五言古上下建安
十九首乐府等篇遂直闯
西京堂奥余手之弗能释也
辄重叙其意并寄答五言律二章

穆穆清风至泠泠白雪传
登坛牛耳定絶代鳳毛騫
崛起三曹后横行七子前
预知千载下重数建安年

其二

屈指中原业居然大国风
名方千古借才岂万人同
厯块孙阳骏摩霄北地雄
讓君称鼎立吾已问空同

再赠马从甫

宛尔一伧父而无操粤音
感时多异调折节是雄心
黯澹将垂橐次且欲匣琴
新丰一斗酒细与话浮沈

赠游生宗振

短褐不掩胛束书犹半囊但矜诗律细宁似汝兄狂末路乾坤狭浮生日月长却疑
枚马辈何技便游梁

寿灵壁侯母邓夫人

欲取长淮水来添上寿觞家声自高密妇节许共姜锦綉星辰烂宫壶雨露香试观
堂下客若个是张苍

送王将军元周总江北周家桥行营

二十四桥地周家第几桥甲光天堑日帆色海门潮鹅鸛雄难撼鲸鲵黯不骄雅歌
仍缓带知是右文朝

其二

一领分符寄昂藏便不羣指挥云鸟阵训练水犀军越甲千层组虔刀七曜文故乡
衣带地铙吹可相闻

永嘉张二汝纪谒选北上入访山中感旧有作

往事浮云变离懷日月长汝衫犹未绿吾鬓久先苍诗好能如父家贫不拜郎唯余
卫公笏尚可献君王

过普济废寺遇秋空上人作

寺古僧庐尽泥深旧径非偶然逢宿衲莞尔露禅机宿火拨犹冷残灯挑尚微炊烟
处处起日晏澹忘饥

除夕作

爱子公交车辟贤昆复拜官身中粗鬢铄眼底更团栾榭叶垆初暖椒浆盃不寒唯
怜万室尽詎忍一家完

其二

三百六十日岁朝俄至今法云趺坐老天籁呗歌深一饱无余事千秋有愧心明朝是明岁从此觅知音

程孟孺以善诗及书与余交十五年矣今春过余则书法益妙云将入燕应中秘之募索一言为赠余久厌笔研且畏绮语虚名落长安人耳不得已勉成二律塞白孟孺慎毋以示人也

程邈创今隶君称其家兒一入中郎冢频书幼妇碑苦心变钩磔元气走淋漓莫以家鸡贱犹堪集鳳池

其二

有句不能赠非关无故情如何帝城内复着老夫名细软青精饭香柔锦带羹可能畹少日为汝话无生

弇州续稿卷十二

●钦定四库全书

弇州续稿卷十三

（明）王世贞 撰

○诗部

△五言律

题灵椿图寿卓澄甫光禄五十

君不甘小草人能颂大椿年希知命域齿是噉名人迹与蓝舆旧才从彩笔新犹闻上苑色絶胜武林春

十五年前与宋国李子定交于尊君前渠先生席上冬月走二千里见访乞先生志铭夜谈不胜感慨赋此为别

虚拟龙门在诗书业已荒无名借北海有泪洒山阳烛为清言短杯从旧事长汝才终世用不碍鬓沧浪

封詹事王公葬词四章

尘世虽堪恋钧天已借留神孙化玉局令子覆金瓯帝日悬碑首卿云挂垄头此时华表上应有鹤来投

其二

送车倾海峤上塚尽公卿风遶苏耽哭天回子晋笙刍灵俱气象槐荫转峥嵘更是沙堤就如龙傍夜城

其三

舄奕纶褒下纵横节使来一时丛庆吊四海让荣哀树玉深俱栋阶兰隐渐菱人间事畧备谁与报泉台

其四

室纵滕公旧棺夸叶令良寧如天语锡更表国恩长斗汉垂丹旒风云护白杨似闻墀祭后俎豆已宫墙

藏经阁西偏俯小罨畫溪

紺宇藏经阁春云罨畫溪隔花催小艇落日在招提彼岸如相引真源自不迷老夫翻阅罢随意步东西

尔雅楼下俯墨池

小阁才踰丈千秋并在兹芸香邺侯架花雨右军池蠹与身同老鱼将砚独窥渐来
能所尽终日但支頤

赠丘文学

尔信丘迟子吾几失后生清水知外氏白雪是家声偶作依刘计因成御李名齐安
好三径秋菊未辞英

秋空上人练水讲席未竟归问之

初闻师子座高下天花飞何事榿椎响悠然托钵归道高魔事烧心淨世縁微却顾
生公石虽顽知是非

报刘玄子先辈

七百四十字一字一珠圆江左青萍色中原紫气传小迟叔夜驾忍断伯牙弦扑满
将充报平津射策年

其二

尚忆玄湖墅清流似浣花惊纶跃神鲤归炬散栖鸦报尔弇园胜犹怜剡棹賒奇人
复奇地今古恨天涯

练川篇四首赠朱嘉定入覲

练川虽鑿发寧比令君明不浅緇衣好偏深白屋情万人纷雨泣孤鳥受风轻我欲
攄银管谁同循吏名

其二

爱汝朝天艦飘飘凌紫氛都无压载石但有送穷文竹马能相候歌骊讵忍闻练川
虽彻底清定不如君

其三

练川九里润犹让令君仁去作千家泪来为万井春官安道州拙客诵莱芜贫眼底
诸黄绶畴无愧古人

其四

府主无何我朝贤一任踈此行仍上考圣帝必亲除具以春秋对毋烦城旦书练川
多诘曲直恐未君如

登金泽寺后小山

突兀数拳石兴来思振衣刹连波色动帆带夕阳归树老猿窥易僧贫鸟下稀毋劳
感衰替宗社已全非

生日于泖塔避客作

六十寻常有纷余旧念牵莫谈弧矢（阙）蓼莪篇白社堪投老青山不计年祇应
逢此月长唤泖湖船

诞辰次日解斋自嘲

纵减尘中累犹残物外名从人称下寿而我爱无生僧辍钟时饭船余网后羹陶觞
与何肉虽有不关情

寿伯融王孙五十时以除夕生

及君知命境况复覽揆辰王国生桢后明堂布魏新桑蓬送残腊汤饼向初春留得
添筹客同为守岁人

龙司理君善得量移之命自徽过访有赠得六首

为尉不凌守居官能近民烟霞行部足鸟雀讼庭驯赏自胶东厚谗仍即墨新明堂
大计吏圣主独劳神

其二

被幞何其易轅攀出且迟賜环它日在投抒片时疑我狎风波事君投山水辞朱弦
毋遽絕世故有鍾期

其三

长沙不吊屈絳灌乃徒劳小恨无封事何烦更反骚久应明长者穷好近吾曹所以
马新息终推龙伯高

其四

辙迹春泥少谁来恼薜萝不嫌诗社累仍傍酒人过一字官堪薄千秋仲孰多武陵
花正发归计莫蹉跎

其五

七尺丰碑在千人涕泪余差闻董狐笔能胜乐羊书（伯玉为作三碑）惠泽溪同
遠清心玉不如旌旄倘重过竹马也轩渠

其六

万事吾难解孤懷可易开即今毋贵少能不小怜才浊雾霾文苑雌风冷啸台新知
寻老别悲喜通相催

送丁先生试回再赴太湖县学广文

此日公交车对谁怜博士才三鱣伯起席一鶴令威来白水为供帳青山是讲台太
湖名偶尔莫逐釣船回

金山上人苦行头陀行若一切无涉者得刘子威贈言数百字而犹乞余诗未已为
子威所迫勉成一律老夫其尤罪魁也哉

刘郎才滚滚贈汝若干言是否西来意将非不二门细应探业识难是铲名根我更

沉沦者羣经空自翻

友人潘景升文成而屈于试慷慨将游北雍余以诗壮之且招之

自草西征就何人不问潘诸生争避席六艺许登坛邸近平津暖台空易水寒朱弦
虽可贵留向伯牙弹

其二

蘊结长沙涕追随邳下游举头皆绛灌何处着应刘虎观虽堪美鸿都莫浪投菰芦
天一曲虚却李膺舟

赠柳陈父

吾爱柳夷旷相逢输素襟紫髯侗父相白雪郢人音未办买山橐谁怜避地心世情
杯酒似处处可浮沉

赠王吏部之子太学元祯

先朝论吏部简要有王戎今日郎君长居然乃父风束书游太学起草擅江东似过
襄阳里时时口习公

邓孺孝雅士也出新诗数十章贄余饮之酒赠之诗

新诗不在广晚交难便轻一诺了倾盖五言足长城醉指鼻中色何烦世上名他日
良常顶与君听松声

览古感时偶成十古律

知己世不易知人吾亦然方共东山隱甚谓安石贤物议善翻覆时情多变迁何如
饮清泌高咏白驹篇

其二

右军本清贵暮年厌时私偶闻远游讯遂结良常期峥嵘破羌帖掩抑誓墓辞朝贤
未应悉惟许蓝田知

其三

阿游踞东阁赣君谈坐隅小生乃相吏苟出当非夫感慨事已往功名人自愚纵甘
嗟来食念此非穷途

其四

东京昔云季贤哲亦憧憧少犹慕党锢晚则趋中庸吾爱黄叔度世矜郭林宗揽辉
固威凤无闷乃潜龙

其五

何由贡禹冠寂寂向空弹薇蕨尽堪饱薜萝殊未寒将无弋腐鼠谓欲饵鹓鸾见侮
乃如此雄心胡不残

其六

元王濬大历矫矫独杨公所以白麻下舛然素丝风骑呵京兆削粉黛汾阳空虽怜
夺之早高名翻得终

其七

冬寒衣一称朝饥酒再巡老叨儿女惠粗足渔樵身幼安恬遯野子鱼惭要津苟无
青云望何必登故人

其八

少日不知佞老来宁贡谏念君当尔尔聊此布区区廊庙既已圣山林安自愚忘机
独鸥鸟或可与之俱

其九

朝事不入耳入恐滞眉端君子自为敌小人能即安牛李横角抵洛蜀竞崩湍未必
深山内闻歌行路难

其十

乡书不入眼入恐翳双眸间并有封豕衣冠多沐猴东家易新主西田非故畴欲借
空门宿阁黎讼比丘

为张幼于妇题墓碣

汝佩九光去谁征三秀辞为深潘咏感留表谢廷思埋玉眠牛地生金幼妇碑忘情
余久矣聊与一传奇

袁抑之大宗伯考最暂还里寄问之

闾门杨柳春负弩候征轮宁知休汝者居然卧雪人问菊无三径移床碍四邻犹言
故里好懒作帝乡臣

小轩新构枕白莲池即碧莲也一丘岿然池上三方皆竹闲居偶成四章

壁畫白莲社池种白莲花清楚既已毕浊醪徐当賒遠公故不禁陶令亦无他从此
西方路还应置酒家

其二

前林綠筱润后沼碧莲芳介尔一丘上翛然三伏凉偶凭扶老去聊唤索郎尝除却
香山叟谁能共我狂

其三

轩中何所有秋兰碧葳蕤钩帘落花入围棋清昼移何以荅韶景偶然咏新诗不涉
人间境人间那得知

其四

佛书置不读玄言谁与酬
惟将嗒然意来坐兹轩
幽红萼总飞尽黄莺犹滞留
不知春色好那得送春愁

题轩中灵璧石

有石高仅尺宛尔巫山同
许借从吾弟移来仗小童
雨垂青欲滴云过碧争雄
安得壶公引轻身住此中

栖贤别墅

一噉栖贤笋能令齿舌芬
箨龙留付雨梢凤尽干
云念欲同清隐谁能无此君
长饒白木柄自与鹿麕羣

渔山别业

此山非渔藪此渔偏在山
羊裘那肯着鰕菜或时慳
不得亦不卖长饥故长闲
谁逢海樵子高论白云间

赠医者张生

吾怜张仲景卖药不论钱
白屋人偏起青囊手自编
獭从针底失蛇向壁间悬
欲识仓公姓还凭太史篇

柳陈父再来出其诗尤胜
因得征其两馆平津事且有
悼亡之戚愀然一身而其尊
人为湖南小官方捐橐为饷感而赠之

重来诗更好稍稍露行藏
却问平津邸何如谷口庄
铗弹宁为腹弦断别萦肠
薄禄湖南地瞻云泪万行

陆大夫奏最推赠乃考武东翁及妣胡宜人寄以二律

汉代嘉循吏黄金尔赐偏
乃增颍川秩特起南阳阡
紫诰鸾双捧玄宫日对圆
好将

光显意一慰蓼莪篇

其二

奏最传东观旌书下建章平添华表丽转见帝恩长中散新移品修文旧拜郎人间
与天上同是一辉光

挽李近樗士牧为余畫三壁竒伟甚方欲要之别作而死矣惜之痛之遂成一律

西林三畫壁三吐胷中竒往往有生气时时留去思交游旦夕冷妻子岁时悲卖酒
泉台肆唯应李白知（君以酒病卒李白诗云夜台无李白沽酒与何人）

后芳素轩四首

夏阴无不可饰我轩中容枕簟渐相媚琴书时自慵萍间尺咫月竹隙两三峰更有
会心处招提来夕钟

其二

剥啄都不应饭余贪昼眠卿仍卿礼法我与我周旋偶适鱼鸟性渐谐花竹縁挥毫
得小语不解唤诗篇

其三

兴来呼蜡屐去踏雨余山恋此枪榆境仍健薜荔关浮云时一憇倦鸟复相还觴咏
信云美犹然妨我闲

其四

欲谋高枕路聊引一编书乍可为蝴蝶那能老蠹鱼竹阴侵径合蕉影入窗踈却笑
遑遑者何烦责宰予

为姚卞山题临云阁

知君是姚合小咏满菰城飞阁千山表流云四面生时时润几席往往卧檐楹莫学
通明恁相为贮一鎗

爱上人自天台还襄阳福严寺送之

尔傍天台宿能扬智顓风襄阳好名刹耆宿有安公楚越浮踪并人天慧眼空莫将
无住意容易问龐翁

俞比部拏舟迹予过浒墅同陟慧山投诗见赠辄尔倚答

第许同舟在何论倾盖迟久知饶节槩况尔吐心期水作弦中语山为畫里诗莫疑
深繾綣眼底待看谁

颜廷愉执弟子礼过余而不饮酒得一律送之

生无束修贄愧尔号门人卮酒不肯御形神安得亲衰输噉名客病爱乞骸身五彩
行当就扶摇转九旻

唐子两司锡学前后八年矣迁教授岳州以行锡诸生碑之以志去思

聊携杏坛席去上洞庭船碑洒阳城泪官深夏禹年名緣却贄重诗为解頤传一问
君山酒何如第二泉

送林司谕教授广信

藉甚林夫子移官与众同乍新青雀舫依旧素王宫才吐牛刀割文争斗剑雄时偕
柳常侍一咏白苹风（柳恽尝令其地）

太宰袁公抑之同访虎丘得二首

偶逢袁粲屨重访王珣庐并老偏余甚长贫不子如叨为启事客终愧絕交书搔首
斜阳下萧萧两鬓踈

其二

栩栩同仙舫遥遥指佛庐寻常一醉地三十五年余和靖台频圯生公石自如人生
几坚脆罢酒更踟蹰（与公剧醉此山三十五年矣）

再呈袁公二首

一时同被命两疏各祈归白髮寧论是青山可见非看君眠处稳愧我战余肥何物
酬知己倾筐有蕨薇

其二

长者先投客鰕生敢自禁拂衣吾輩事推轂古人心何胤辞偏巧樊英隱未深三山
名胜地或谓可浮沉

晓从北门舟发入弇园即事

小艇傍江城統統过五更朝光澹月色人语杂鸡声不寐神偏爽无营思转清松关
一启钥禅坐与经行

李本建乡进士以其兄本寧大叅之状来请铭其母匡得五言一律赠之

冲寒孝廉舫来问议郎碑密竹辉彤管新文愧色丝俱怜五鳳曲同作一乌悲絕胜
周侯母唯余义庆知

得何仁仲遠讯且以蜀笺索采芳洲新咏为作数语

芳洲生杜若楚畹滋幽兰采摘不辞早馨香虞渐阑美人侑缣素密意比琅玕若语
吴王径千秋蝶梦残

送僧游五台

见说中台北长飞六月霜诸天尽烦热此地独清凉处处金刚窟人人妙吉祥老夫
在方内高枕亦羲皇

题摄山舍利塔

昔我问阿育驱神作道场如何震旦国重见铁轮王
变幻从僧语依微尽佛光那堪事势尽千古但苍凉

千佛岩

仲璋感先志诸王贪夙因雕鏤惭伎俩刊削减嶙峋千佛本非佛
一身犹幻身云门拈出后黄面少精神

龙潭驿即事

欲寻龙起处正值雨来时天地陡然合江山相鬪奇兴高那畏湿心
遠任登危呼得宜城酒呻吟且咏诗

清明日谒孝陵步履而下稍就肩輿抵观音门即事作

不尽钟山紫能令步履便涛声栢树杪晓色桃花前娇女怯上冢
贫家轻禁烟后湖如练白第少橛头船

观音阁诸公饯别袁抑之太宰

万仞削不尽千秋留至今长江天地带清梵海潮生岂以皈依念
能销怅别心扁舟夕阳外巢许意何深

月夜小阁同陆公与绳宿奉呈一首

寂尔对孤月翛然余两翁乍惊天眼阔悦覩色身空不饮从醒好
无言与悟同由他暂时路也是一家风

侍御荆使君邀登北固作

京口借名镇兹游良壮哉六朝天北顾万古水西来潮压金鳌小
云低铁瓮开亦知饶感慨吾岂大夫才（北固旧名北顾）

其二

为挹三山紫聊陪一马骢峰竒向背日江阔往来风雨色将衣重霜威付酒融谁言
识荆晚不负白头翁

同诸公游高坐寺登雨花台

此地昔高坐诸天尽雨花我来当落日万壑竞蒸霞小供维摩饭时呼阳羨茶不须
频竖义睥睨有归鸦

与诸公过瓦官寺作食

一径新兰若干秋古佛场晨钟梵纲肃午饭茵陈香游兴偶然洽尘劳应暂偿翻嫌
二碑在能益老僧忙

曹子晋有狭邪之游以余一言而絶扁舟特造白下见谢壮其意留之十日乃去身
心家国之感别自有之不以子晋也

末路解绳迹少年多侠游生能学周处吾岂厌曹丘十日丹阳酒三江白版舟故园
无限泪黯淡不成收

奉送大司徒王公入贺万寿

嵩岳将传响明河可问津锦帆悬日月朱履蹶星辰陛下唐虞主司农社稷臣倘陈
金鉴録须及茧丝民

黄生季文论诗有赠

怜生初负笈业已厌儒冠莫谓成风易须知和雪难一吟头可白九转灶方丹但有
千秋在何烦世眼看

陆成叔出新诗雋丽甚然多平康巷中语走笔戏赠且以为风

烟月清溪里风流白苧辞玉台编后出银字管中吹
六代才难尽三山景尚奇
毋令小谢后寂寞使人悲

齐王孙仲望邀游清凉寺因成一律兼简陆生

淮桂偏招隐齐门不爱筓鹿裘行处是龙种
看来殊并蹶东山屐双倾
从事壶高斋足幽赏携得士衡无

友雅堂为省亭宗侯题

不以朱弦贵悠然山水期千秋余尚友二雅乃吾师
夙有文堪会都无俗可医
自怜非长者辙迹废追随

其二

大雅久不作知君夙尚深屏除阿堵物清得刹那心
有地非金埒无弦祇素琴
正平未牢落北海晚知音

哭从子一鸣茂才

竹林无小阮老泪独潸然贫与生相守愁从死暂捐
肆多除酒券囊少卖文钱
哭逝人皆有啼饥更可怜

王承父雨夜过我高斋贻诗颇致鸰原之感聊尔奉酬

一片钟山雨能令旅思惊边鸿方暎影谷鸟偶嚶鸣
已自乖兄弟能无藉友生
相留小时住叹我泪纵横

黄山人说仲故文毅公大宗伯石龙公后也投诗示余别去依此为赠

司空通德里宗伯右文朝自尔毛仍彩能令木转乔虹为
沧海钓霞是赤城标此日
黄金错投余愧报瑶

云间徐生故同年少司寇公之少子也挟其艺应试南都乞余诗赠之

孺子南州彦徐卿第几雏家声仍鴈塔国艺向鸿都西弄花堪摘长干酒可沽如过
爽鸠署能记履声无

寿陈医箕仲父也

家是朱陈里名同秦越人谈诗身外业颂酒性中真客种畚山杏僮收泖水莼有几
何必问孺子岂长贫

慰吴翁晋失利

春官日讨论本意欲还醇文苑翻成厄儒林未覩真家声三礼旧诗法五言新莫以
杨朱泪轻沾建业尘

马从甫别六年矣以诗投赠余诗转佳而复不第走笔慰之

别汝六年强居然荷芰裳虬髯生自赤鲸力句逾苍纳履乌衣巷呼舟朱雀桁（即
航）公孙无厌苦垂老始贤良

乞骸待命于长至不能行礼自嘲

漫劳宫监诘何病不朝天奉寝生来懒拈妆祇自怜妬应无可妬妍则几时妍任有
羊车梦那从到枕边

亡弟大事皆頼曹氏甥子念今来视我金陵无何告别垂泣送之

衰年无限泪握手便纵横玉折兄怜弟珠联舅愧甥欲教轻作别除是学无生一片
秦淮月还悬亚字城

其二

生怜石头水大似渭阳波谊以穷交重诗从外氏多酬恩唯有泪当泣且为歌亦解
金陵好如吾不住何

送故人汪禹义之子尧卿谒宁国尹使君

禹义以穷死寄惊风与骚诸儿尽舒伊孳子是枚皋小赋不堪饱薄游空自劳非君
赋金错那得剪蓬蒿

偶得桃花坞而竹逾胜遂成一律

不知何氏坞花竹事仍偏半岭绿于染千村红欲然任呼司马醉翻得长官怜咫尺
渔人地毋妨与世传

于江头送别少司寇李公时公合抚楚弼刑之绩凡六年矣

送君重报政为我尽离觞不竞薪从积无名草更芳豸冠三楚日鷄署九秋霜唯有
联班者沾衣惜鴈行

同大司马吴公少宗伯李公饮桃花坞分韵得花字

绮作王孙障金为帝里家何如韦曲地只种武陵花暝夺村村晓晴蒸树树霞明朝
写团扇桃叶未堪夸

再同二公登雨花台仍用花字

高坐同支许清言胜永嘉忽秣平野色犹似讲坛花岸帙和风狎移床返照斜将何
消酩酊乞得老僧茶

莆田林茂才遽哭太常亡弟访我金陵书行卷赠之

闽天万里棹来叩娄江浔封树门人泪生刍国士心汝能存墓剑吾自感人琴为语
酬知地春风在上林

送廷尉王公听调还济宁

吴公拜廷尉治行汉臣钦何自中山篋能移慈母心避言臣节苦休沐主恩深我亦
栖栖者聊为泽畔吟

同乡杨太宰吾宗少廷尉路户部沈比部袁叅军王司训会饮赵中贵园亭分韵得风字

楼倚仍吾土筵开傍帝宫莺花二月半虾菜一尊同获侍关西震叨为吴下蒙吾家阿咸輩大有竹林风

送路起部考绩北上

龙文舒郁淳鹤骨挺昂藏使节水霜劲留垣日月长仓曹人物志国计度支郎早晚山公启高名满建章

陈季迪先輩失第归遣信相问赋此慰之

夫君抱玉琴宛尔千秋心举世称复古何人真赏音从他和雪寡且莫还山深不见金陵子翩翩赋上林

送何司农静吾迁尚寶丞

廿载鹓鸾侣三朝骨鯁臣赐环寬雨露尚玺切星辰虎口憑谁脱羊肠肯自论莫将黄发意轻傍少年人

送陈博士擢贰汀府

可知丁字水能迓使君船案牘成风手功名半刺年庭饶书带草阁长广文毡识得弦歌意新蒲不作鞭

送喻少极叅军迁长北中军幕

而父龙为友今君鹤在羣箕裘汉司马礼乐晋中军卫府芙蓉幕吴钩菡萏文一尊相送罢惆怅隔江云

沈孺休感曹生仲行高谊乞余诗以报得五言二章与之

曹丘寧任俠其意乃憐才得士風塵里恍然雲霧開浮沉不改諾緩急豈論財所以
千秋墓猶傳羊角哀

其二

貧士易為德窮途難報恩將予片言贈擬作千金論逐客驚新詔歸人怯故園唯應
五噫客偃蹇伯通門

馬將軍海鹽之役以力戰殉節特詔進世官二階賜祠春秋飨祀弗絕其子總戎君
建勳持重廉惠有大將風可謂世美矣因并及之

一代馬新息英風颯至今能將裹革事了却據鞍心樂府歌都護孤兒備羽林清源
務持重不愛時間金

送張儀部僉蜀憲

未泊東吳棹先占益部星文章留白下斧鉞動青冥好踐刀州夢還期劍閣銘聊將
竹枝曲一與使君聽

侍御黃仁甫以厥考新溪公之贈與母熊太孺人之封也扁其堂曰皆恩而不佞系
之詩

北堂多媚日西塋有悲風忽覩青鸞誥雙飛下紫宮榮枯人理別生死帝恩同欲識
移忠意南床白簡中

風阻瓜步辱李季宣先輩破浪過訪與飲過揚州始別

雪送千尋浪風橫一葉舟我慚羊叔子君似郭遐周久不逢泥飲翻令愛石尤欲將
無賴意相與問揚州

舒司馬要飲天妃宮後橋亭水月佳甚暢而有作

淮水寬余浸丹橋抱古亭雙虹橫斷續一鷺立空高論時相藉輕觴不肯停從他明
月色難掩使君星

其二

地主能延客天妃亦让宫广陂偏受月积水自成风感旧深杯后忧时细语中黑头
勲业在慎莫问藏弓

送李无锡入为仪部郎教习驸马

傅粉何都尉含香汉省郎礼曹新日御戚里自风光花邑留驯雉笙楼引鳳皇唯余
邑父老选石慧山忙

郭太史美命先生贻诗见投奉和仅得二章

策士董江都骚人屈左徒名高自张楚才大欲吞吴一字心堪死千秋意未孤好将
疏越调结鲤向姑苏

其二

吾怜郭景纯新赋美无伦官阁紬青史师门得素臣去裁郢里雪归问武陵春莫结
王生袜虚名恐未真

正月八日即事

穀日距元日风雨正迷离日色何曾见天心未可窥骨销朋党论心折夏侯辞早晚
林深处啾啾有子规

澱阳公入佐天官兼领翰学赋此送之

且莫疑清世居然表直臣已烦司藻鉴还复赞丝纶起色江湖浊封章岁月新须公
一砥柱吾意已沉沦

寒食于官舍私荐感痛有述

晓知寒食节洒泪荐清酤岁岁悲新鬼时时恨大巫庭帟两世尽天地一身孤似有

君王诏青山着老夫（四疏乞休以闻见故）

送林茂才以材之澧州赴华阳王馆

调笑辞蛮语歌呼慕楚狂青箱从建业朱邸有华阳醴是贤王宠兰为大国香浮山
与绣水听汝贮奚囊

故人周士昌以宗伯董公书来视余值方倦奕乞一诗而归

机心老欲尽对客厌围碁汝挟孤山授唯容太傅知春堤几两屐秋省一篇诗便是
饶归计从人笑数奇

陈廷尉追送栖霞同叩達上人诗别陈公

江淹不怨别陶令欲披襟为接遠公话俱生无住心林枝却飞盖涧溜写鸣琴从此
猿鸟迹翛然不可寻

赠王学士碧水桥

太史藏书所西林古渡头桥通千嶂碧溪抱一村幽小径有时合落花随意流柳梢
维不住身是济川舟

寄龙君善博士

空自三才絶时违不得骄官仍广文冷地觉永嘉遥所至寬游目何妨且折腰黄柑
三百颗好趣越江潮

△六言律

赠海上人叅五台

比丘拟叅室利乞我一诗证明久矣毘邪杜口其柰菩萨求名清凉自心自造烦恼
不灭不生毕竟都无可赠别有繻传西行

弇州续稿卷十三

●钦定四库全书

弇州续稿卷十四

（明）王世贞 撰

○诗部

△七言律

初得南廷尉报偶成

戟门逃暑似蘧庐忽有分司洛下除世事从呼惯牛马乡心兼喜得熊鱼未论朱芾
堪除酒依旧青山好著书厚禄自惭无寸报主恩前后不曾虚

余将赴金陵陝帅董中丞追诗及贶走笔报谢

交游垂晚尽时名谁复醇深似董生得汝片言堪结袜赠余双案欲连城函关不锁
三秦色天堑长流六代声敢为相思愁道远建康今是汉西京

陈体干太仆邀饮醉翁亭

孤亭面面敛青葱坐语翛然万虑空樵径渐移残照外商歌忽入暗泉中岩头寂寞
诸名迹石上婆娑两醉翁也解板舆松影好披襟留试月明风

月夜偕体干太仆过饮丰乐亭

路穷平楚近还疑忽敞空亭碧四垂延尽绪风仍岸帙踏残凉月更飞卮催花别按
渔阳掺拂藓仍看幼妇碑莫讶深更未成别风流今古并吾师

夜过栢子潭恭读御碑是高皇三注矢得雨事

金书焱夙耸长空仿佛神谟大禹同涧底泉鸣疑去镗峰头月满似弯弓苍藤忽破虬龙影怪石频穿虎豹藂似觉普天多苦旱可无灵雨报祈丰

过饮陈体干少卿时石拱辰大卿迟一驿未到

驿骑关河新雨余逢君设醴更焚鱼孟公雅自能投辖内史何当不下车浮白寸心终自吐乍青双眼未全舒明朝定有新知会迢递南云日夜踈

黎惟敬内翰沈嘉则张幼于诸君过弇州园分韵

下马捋须无限情微言入坐有余清巉岩水落鼃鼃出峭蒨风过鸾鳳鸣宾主东南当代事庙廊丘壑暂时盟中朝若问王廷尉一曲沧浪寄此生

其二

青葱竹栢吐余姿不似长年摇落时已割溪云充野供还调涧溜作清丝客縁探隠难言结心到论文偶自知但许布衣欢十日未应惆怅问归期

赠名医盛老

盛老医甚精而有癖疾每携妓避客辄数月莫可踪踪故云

先朝奕叶尚医郎御史中丞蚤鴈行时复闭门如泄柳忽来施药是长桑胡姬惯识弦中语弟子能传肘后方见说刀圭如可借野夫那怕鬓苍浪

丁丑元旦试笔

今年节物媚吾庐儿女分行拜起居官兴尽来知骨肉主恩深处领樵渔屠苏到我春从晚爆竹由他岁惯除萧散虚窓聊捉笔可能成就右军书（右军五十二而书成故云）

初正答谢江右潘中丞

宦迹流年已并除词肠酒态未全虚山南东道初辞节江右中丞再寄书文锦细盘

衔草鹞紫琼新脍带冠鱼莫惊廷尉门犹暖自是交情古不如

石丈自滁穆丈自魏贻诗见慰罢官走笔呈谢并抒近况

闲门久矣雀堪罗忽有双珠拂暮过阴德总输于氏逺交情终比翟公多数拳地借
包山色一曲天留镜水波在昔相思须命驾可能携手问烟萝

其二

初从纳节号闲人踪迹空劳两地论居魏江湖懷北阙环滁山水惜孤臣听鸡起候
村梅曙泛蚁偷争野老春如此风光真自好可容长作半闲身

莫子良方伯以花朝自感诗见贻率尔奉答

短篷风色昼凄其诵尔花朝感叹词众卉只知为雨勒乔松元自得春迟纵今芳意
如平仲已有幽心付子规转眼繁华何足问祇应商略岁寒时

莫方伯子良与子云卿追饯松江道中留赠

小舫飞觞不厌频交情父子更谁真青云未晓弹冠意明月元多按剑人总是众知
龙卧稳也还身覩鳳毛新临岐一扇书双美此日难教谢傅论（子良数荐未起云卿又
不第故云）

太师存翁相公以元旦家燕诗见示次韵

山中宰相启初筵乍有修风綠野前北阙定书南极瑞老臣亲致太平年尊开四代
长宜栢烛忆三朝旧赐莲（公诗有午时觞咏到灯前语）见说新诗传欲徧江南草色
已油然

解任后得明卿罢官报寄赠二章

参差尺一谢朝班回首风尘梦寐间敢谓清时稀白简居然薄命损朱颜浮云久自
深吾輩春雪犹能近故山（家近郢）世态纷纷何足道与君偷得到头闲

其二

邮书一到不堪闻起剔残灯坐夜分塞马论来终是失冥鸿去后许谁羣无妨中散
来千里更喜延之咏五君与说近踪应稍慰买山全占洞庭云

荅于颯先

一春孤抱叹无当行卷初开喜欲狂今日君王应爱少古时童子解为郎羣珠拣尽
无鱼目六翻成来肯鴈行莫道李膺门第峻久容文举独升床

林近夫朝回时返岭外以诗见寄感而有答

杯酒沉沉且杜机新诗一读泪堪挥谁能汉省分鳧舄便向吴山问薜衣客许故情
销骨后自怜前事捧心非封书欲发还多感纵有梅花驿骑稀

偶写近况

三抛符印返江乡其奈差池五十强懒胜世情无一可醒多春夜亦成长文章薄晓
才难继儿女粗安事未偿甚欲掩关抽二藏天宫净土总茫茫

旧有诗赠月溪上人将十年今春至吾州讲经毕过我小祇园言别更成一章赠之

十年高坐许重登不向无机说小乘破尽六宗犹竖拂听来半偈是传灯谈时舍利
祥光显到处军持法雨兴若问中丞何似业居然退院一闲僧

李文琦自解银台力辞不出读书燕中赋此见懷

当年风采动朝端咫尺天衢行路难金马醒多犹碍隱银鱼卸却始成安聊从秘术
探鸿寶不为雄心注鷖冠见说郊居新赋就可能将寄阿筠看

姚匡叔以道术为用晦诸王上客携其书来访惓惓七子之盛有感而赠

握手相知柰晚何且将鱼素慰蹉跎淮南道术宾初盛邺下风流事已过见数八公
君第几空传七子世无多春来社酒能从否莫道闲门雀可罗

书懷

风为开扉旋掩扉春催花发又花飞客歌夫子哀时命天与先生杜德机从自青云
词伯少从他白简酒人非兴来烂漫挥毫罢且复婆娑里社归

况吉夫大叅以长笺长律见期读史记有感而答

鸿书忽自豫章天读罢捻须一莞然续汉中郎空见许过秦新论有谁传君怜竹素
将来日我在雌黄未定年何似扫除千古障争名空室坐逃禅

宗良国将以近作见示且致知己之感有答一章

行卷初开喜欲狂看来字字挟风霜那从帝子鸣銮玉且学书生看屋梁忆旧明珰
投汉渚怜才清梦遶吴闾知君岂少南州誉误信王生齿舌香

德甫居太夫人忧致诗见慰悲激用壮聊成一律为答

癖懒归来白髮侵故人清问一沾襟不知鸡骨支床日能作龙渊滞狱心变尽浮云
庐岳在涸残秋水大江深与君但解逍遥意何事区区梁父吟

（阙）父国尉以乃叔用晦书介绍投诗见褒有中兴大雅语率尔答赠

新诗藉甚美清扬汝叔书来许鴈行已是入林同小阮还应赌墅似中郎文高龙种
偏堪识禄薄牛车也不妨莫向中兴论大雅老夫名姓欲深藏

巍父佳父二国尉合书及诗见寄极有龙门之思因及于鳞怅然有懷奉荅时舍弟
方按部其地

并马翩翩过酒胡子侯腰玦有珊瑚青萍对结雌雄斗石笋双抽大小孤笛里悲风
追济上琴心流水到姑苏不须惆怅登龙远曾试吾家阿敬无

答用晦丈时有三诗极为余致不平之感且订后期

高枕懷人忽黯然而西江尺素自鸿边无言白璧偏堪点何处朱弦不可怜纵酒此生
终得计论文它代别为权与君商略嵇康驾紫气溢城在几年

初夏行园有懷敬美弟南康

清和时序雅相宜阿惠那能读我诗行徧池塘犹是梦听残丝竹未成簾香垆可作
斋中物石镜谁临畫后眉（时弟迎家未到）翻恨双鸿毛羽就北风吹断各天涯

余燕中别宋廷尉望之今十七年矣公秉钺吾邦余谢病归里虽讯问时及而竟睽
握手乃成一诗奉懷适太学张恒思以畫索寄漫题于首

差池握手愧初盟十七年来何限情念我和歌无宋意知君结袜少王生棠阴转傍
华阳馆柳色仍围幕府城华阳公别号也（留都有幕府城）不是逐臣多落魄可知吴
市易逃名

程京兆汝懋视余少长别燕中者三十年矣余自郢入留棘谓得相从而竟以言罢
方成一诗奉懷适太学张恒思携畫索寄漫题于首

何堪屈指看花时并有霜华上鬢丝宦迹乾坤垂欲尽世情离合本难期丹阳刘尹
多佳话京兆张郎不妩眉若问同袍辞节后酒垆茶榻解支持

和王百穀懷出妾

离懷黯■〈雨上黹下〉未分明祇忆郎君一句清妾与书生俱薄命花随春帝不
长情愁回樊素行时首枉却红儿死后名谁道两坊三百步阳关分作断腸声（伯穀曾
有句云书生薄命元同妾为袁少傅所重）

初遇子与方伯昆山旋尔言别赴任江右

马鞍山脚乍停船黄鸟嚶嚶到酒邊我自一翁安避地君还四岳近朝天初完赵璧
披云出忽折吴钩向斗悬蓄念千端那可尽不如相对坐陶然

汪惟一得古印摩之易其文曰五湖长见贈

籀迹秦章手自摩刻刊翻拟赠潜夫毋论此掾同三语且爱新衔长五湖到处酒旗成
鹵簿见来渔父是官徒如闻尚有风波事一榻禅房署苾刍

寄赠顾生

里门冠盖学天津南阮由来不厌贫从他废箸几曹事似汝淫书我輩人沼上墨花
堪染练阶前带草欲成茵肯为辟疆容径造那将蜡屐比朱轮

李文正吴文定诸学士于海月庵赏十月菊五七言律俱以前用骑字押和颇成险
窘余戏悉为步之

贪看晚节傲霜颺淡色幽香冷不辞入坐叵罗争自引归来欸段未须骑推敲月下
犹孤语竞病风流彼一时若使东篱主人在攢眉那肯和新诗

贺张太史

天上张星傍斗悬鳳池春色鳳毛偏久闻伊陟能光后共道周公许拜前从此玉堂
添气象几人金殿领勾传承家故有丝纶在续史何劳慕马迁

寄赠史金吾

看君真作韞川珠裘坐春风况不孤家世旧传南史氏禁廷新拜执金吾门无下客
歌弹铗诏为名儒掌唾壶最是将台寻礼乐未须终夜读阴符

题潘中丞芝林时昆山书院成芝满于林故以名焉

数尽潘园赋众芳何如神草被昆冈庭中玉露溥三秀木末丹霞散九光出共篔簹
蒲昭圣瑞归同天韭作仙粮野夫亦有黄公癖地肺何年许并藏

送子与方伯赴江右任兼懷德甫用晦二君

双旌宛宛向洪州斗色虽遥渐可求定有征君堪下榻那无帝子共登楼西山南浦
来尊外紫电清霜满案头屈指三朝词酒客几人方岳领诸侯

石湖遇朱在明小饮将别邀过虞山吴氏馆

南薰徐入芰荷裳小艇遥停喜欲狂
双眼忽分湖上碧五言能借岭头苍
从他兴尽难回棹念汝情深好对床
见说虞山多胜事相携且踏少年场

谢襄王存问一首

纳节归来万念荒祇残清感渚宫傍
能从蜀肆沽醪醪为有梁园赐鹧鸪
忽尔佩兰貽帝子可还乘雨报君王
襄江正是沾恩地流到中吴始见长

寿王太常有壬

乌衣江左数诸王谁似三朝老奉常
家有鱼须丞相笏囊余鸡舌侍臣香
看山偶尔施双屐避客犹能挂一床
屈指旧京鹓侣在可容时进百年觞

敬美弟有荅予寄懷之作适以奉贺归倚原韵为赠

十年岐路感商星见和新诗未忍听
幸自归家同社燕还将握手慰原鸰
南金价重留成镜云母恩深宴作屏
莫以微涓夸湛露高阳初酝若为醒

戏寄吴生

我爱髯公气谊深长因任侠贱黄金
裁成艳曲呼如意教就明童字称心
歌管时停星桧底酒船多在尚湖阴
东邻更有陈遵在失却鸾篦好易寻
（谓陈少卿也）

殷无美余故人也东归之后贄而强纳拜焉辄成以赠

一归初就已忘言三径虽荒好避喧
罗雀汝寧廷尉客登龙吾未李膺门
云披胜覽堪双出海踏狂探试共论
若语抗颜专席事至今犹愧古人尊

张见甫以腊月见访明岁之夏复走使讯问感而有寄

破腊轻舸问五湖冲炎信使走长途
谁能作伴门前雀汝自差怜屋上乌
洛下寺碑堪小语江南匣剑已全孤
何时更拟平原会紫气从他看有无

送成伯鸿胪还朝

斋舫纷纷秋色间
几人符传扣天关
仍参豹尾君王仗
亲缀蛾眉将相班
望里金茎仙作掌
墀端玉笋品为山
交游倘及归田叟
洗墨分甘未尽闲

赠汪生象先

父客吴趋一见寻
翩翩公子更词林
才清似得颜延笔
橐在全无陆贾金
偶自履霜宁入操
居然爱日有余心
衡门幸少孤臣泪
浊酒新凉取次斟

赠刘生（故大司马庄襄公孙也）

百战侯封表赐莹
庐山一一仿长平
清朝戢武（阁名）留颜色
白首降羌记姓名
敢谓文章归阿士
于今意气少刘生
燕然尚有将军石
倘许如椽再勒铭

郟襄之役与伯玉侍郎别恰三载矣闻出谪中至钱唐走信奉迎因成感旧之作

祖道春明三载强
宛如苏李赋河梁
君应食酒谈廷尉
我但登临忆侍郎
一棹不妨衣带水
九秋谁拂蒯缑霜
祇园处处堪题石
莫遣青山负举觞

题破榻斋为彭稚修作

萧然一榻在行窝
支足涂龟网薜萝
自为幼安穿处久
非关仲举下时多
堆来黄卷疑风落
掩罢青毡许客过
任是五经能腹笥
即妨高枕竟如何

为藩史颜君题竹山寄乐卷君有子为州别驾着声

念尔才名楚望殷
长裾曳罢不胜闲
曾陪梁苑题修竹
更与淮南赋小山
云卧暗滋荆玉色
雨余惊露箨龙斑
争夸别驾传家美
家训传来旧姓颜

方与客谈园池之乐而有索书戚大将军者因纵笔戏赠

碧涟朱舫幕青油
千骑何须拥上头
雨后旗鎗新茗合
风前剑戟嫩篁抽
编篱别按

屯惶垒对局争先捣魏谋君自不封如李广野夫时号醉乡侯

汪仲淹病后见过出其新诗有赠

念尔萧疎病骨轻居然彩笔尚纵横但骄吾党僧弥美未掩君家骠骑名分得一珠
犹照乘可应双璧不连城燕中纵酒论文地矫首浮云百感生

赠从孙伯和需次察幕

衿裾藉藉满长安羨尔君恩昼锦难已自辟书观察使何须不着惠文冠如邛豈为
货郎谒休汝从夸驷马看任是乌衣名稍次王家羣从总琅玕

明卿约以秋月枉驾寻有诗来改订春期赋此促之

虚传嵇驾入秋来实恐猷船兴尽回高枕转深今雨味故人元是客星才匣中霜色
寒孤剑床底春声怨旧醅见语花时能鼓楫教令日日探江梅

其二

百年岐路死生分垂白依然两广文郢雪更谁能和我吴山何处不宜君还因浩荡
期春水莫使虚无似楚云解道海鸥能见忌即今林鹿已成羣

李太史本寧督学关西以得与于鳞后先自喜责诗为赠

玺书今旦出承明仙掌莲花色自惊三辅豪贤俱北面一时词赋更西京黄河直泻
昆仑派白雪遥飞郢里声倘问受经诸弟子可能无让济南生（谓于鳞）

其二

被紫横金三十余清芬藉甚满衿裾欲知绛帐传来业尽是青藜读后书日出终南
无隱豹春回河曲有腾鱼他时倘遇登龙客为道膺门古不如

故相袁公管夫人寿篇（夫人无子而善持家）

栢梁甫罢丞相咏栢舟已咏夫人诗门前罗雀久非昔堂里丸熊将为谁节劲冰霜
鬣见表心长日月自成私侯家岂少衔恩客应是张苍入拜时

赠梦冈宗侯

南斗珠光接女虚一珠虽晚照双车不烦昭代通亲表曾拜先朝乐善书修竹夹池
宽笔札小山丛桂隐簪裾亦知篇就先王粲拟报中和愧未如

寄张文学长舆

一刺高名已自知况传冰柱雪车诗韩门乍喜过张籍王棹还应忆戴逵觅醉汝来
应有醉问奇吾老渐无奇宁劳报案仍青玉但许酬章似色丝

钱叔竇七十歲宴为文沽所役忽忽不暇存故人除夕把盞始悟叔竇七十诞辰遂
成一律烧烛书之亦不暇辨为何语也

今年今日汝七袞明日明正又一年海屋春偷寒意入骊珠月向晦时悬碧桃送实
符同至苍栢将图酒并传手理蠹鱼千万卷可能三度蚀神仙（叔竇藏书最多皆手治
故云）

迎春日对酒客有谈一岁两春及中秋再闰者漫成一律

故苑今年胜事频赏心端不负归人秋当好处仍留闰腊未穷时再见春但使黄杨
初厄过不妨青草两回新高门白玉行来美却忆雕盘倚桂轮

戊寅元日家宴试笔

两从沧海颂王正三解军符荷圣明盘里芳椒偏晚得庭前玉树有新萌由他凿落
鸣珂地不博团栾把盞情五十三年丝鬓白可因升斗负生平

纯甫沈丈将过岭南贻诗见赠率尔奉酬一律

万死投荒不自嗟片鸿惊我白鸥沙神交岂必从倾盖身在何须复顾家过岭清霜
披瘴色懷人古戍有梅花江山处处皆文苑莫遣穷愁负岁华

胡元瑞见赠之作推挹过甚聊此奉答兼识赏懷

屈指词场半有无时名虽浅未全诬疏来九派江偏壮掇尽羣星月转孤尔自新书
成越絕犹能促节和吴趋人间句在从拈看何事追论大小巫

其二

代兴天地有词坛国士谁能不让韩一字已知追古易千秋寧复叹才难天横削壁
闽山住溪带流云灑水寒此地由来饶八咏阳春可许和人看

与绳廷尉入朝邀会吴江道中作

习习吴江黄鸟风尊前天地故人同谁能结袜如张尉岂为弹冠学贡公仙舫暂分
卿月朗使旌偏借法星雄无冤自是诸贤事没齿吾安一壑中

戚都督以一壶双罍为寿走笔志谢

忽惊春色到茅茨为有东风塞鴈随宛尔并头双凿落居然大腹一鸱夷真珠出榨
初添兴老瓦为盆合退时把向竹林还屈指风流十载旧吾师

寄答曾司马以三

明时帷幄运筹多熟釜铭功字可摹闻道黑山仍歎塞见来沧海不扬波和偏郢里
阳春调賡是虞廷喜起歌总为懷人清兴发可将佳句施烟萝

贞吉宗侯遠致新诗古窑杯盞赋此志谢

不断文鱼下楚波一时春雪豫章多怪他牛斗居然色为有骊珠未尽过兰畹采来
新结佩桂丛招罢旧成歌酒鎗原是嵇生物把赠何家侈薜萝

送成伯詹錄頒两宫徽号诏于闽中

使者衔书下七闽马头能散万家春来紫殿椒花发到日雕盘荔子新盛际两宫

俱圣母清朝列国让王人欲知问寝龙楼事争访含香鹤禁臣

寿莫方伯先生子良七十时诞辰为四月七日也

抽簪已是十年余金紫依然山泽癯过海鸡林争购禁当朝鹓侣却无书康成表后
初称里贡禹征来不卖车正是清和好时候能容小友问郊居

其二

萧然海鹤出风尘谁识三朝旧省臣十八年前书已就五千言后事方新生当文佛
将临日老作羲皇以上人可道汉庭偏贵少只今明主下蒲轮

兰溪司谕彭稚修中谗移疾请告轻舟过我山园有赠

悠然便幙广文毡借我祇林片石眠立骨总看销不尽病心犹妬捧时妍一官空傍
成羊地万事今为失马年若过严滩应有合古来元自客星偏

王司训超拜和平令赋此送之

萧萧苜蓿广文多忽作潘家花满柯久矣上书新礼乐（君有疏定大乐）可能为
政倦弦歌丹砂不必寻勾漏桂酒还闻近博罗自是君身有仙骨双鳧非远问明河

陈玉叔大叅自淮以蜀中新诗见示有答

双鲤何妨识面迟沾沾同调复同时争传正字初年句近得夔州以后诗三峡风涛
从此壮九河云物待君奇祇园一壑差无恙未遣干旄使者知

寄赠武林施翁施名经故将军也

隱囊班几恣清游最讳人间说故侯菊胜东陵瓜五色家输荆楚橘千头降心只傍
禅僧语信足那妨醉尉留若问弇园何所似六桥西去藕花洲

题畫寄寿黄都督

一剑仍霜十四州 鹤鹅千队肃清秋 毋烦更借君王箸 见说新添海屋筹 飞去尺书为属国 颁来斗印是通侯 还闻幕府风流事 白袷单褙狎钓钩

自昆城还茂俭携尊同伯龙无美见送

秋山隱隱别归桡 頼尔诸贤破寂寥 未必林宗多似许 还应茂世兴偏饶 行厨浣露青丝润 小榼倾霞紫珀骄 不为野夫眠思发 乘潮还向玉龙桥

张助甫自陝西叅议迁按察开府于池久之不至乃闻仍移陝西按察赋此寄之

候吏江头黯尽还 依然真气向函关 自来河内无如寇 又道征西祇一班 露冕再行三辅雨 除书虚掇九华山 祇愁沙塞黄尘色 渐入麒麟畫里颜

看仲德与张子予轰饮作

小阮时时酒债多 况逢江左步兵过 相看只解呼红友 半醉犹能卷白波 百斛从倾银凿落 两山旋对玉傀俄 欲投客辖翻愁住 将耻吾壘柰若何

屠长卿使君见过弇园与曹子念同登缥缈楼分韵得云楼字

促膝相夸愜所闻 不须呼酒便能醺 高情已是倾中散 竒字那能敌子云 谈到湖山如得色 坐来天地尽成文 还怜解媾西京遠 牛耳于今渐属君

其二

倚酒仍登百尺楼 欲将风物供吟眸 未规虞岭披云出 如练娄江抱郭流 八咏汝应推沈约 一觴吾可废曹丘 莫疑三老催呼棹 恐有精光犯女牛（君子于诗甚推沈嘉则故云）

寿陈封君提学久升父也

鹤袍鹤发雅相当 况有黄鸡谱寿章 谢院芝兰时自好 鲤庭桃李更谁强 身偏四圣舒长日 地是三吴快乐乡 一盏一筹应莫厌 与君还醉十千场

故将李弃官学道垂九十矣而叅方不休赋此赠之

垂杨左肘莫生悲老树新萸也未迟塞外只知摧万骑身中可晓杀三尸五千文是君家祖八百名元李氏儿会得黄庭一句意不须天际觅锺期

弇州续稿卷十四

●钦定四库全书

弇州续稿卷十五

（明）王世贞 撰

○诗部

△七言律

读于泽州致于鳞所著诗选遗珠有感

歷下孤坟已黯然郢中高倡世争传犹疑紫气占难尽更得青箱手自编一梦可能忘李白诸生真见守杨玄空斋欲读先挥泪为忆论文倚树年

子厚宗侯贻书及诗见赠赋此奉答

结得双緘学鲤形商歌欲读更愁听龙当倦雨须名伏鸿不高空可字冥纵许平原求自试寧如中垒罢传经当年却悔无休汝谁似君家眼代青

李先生（阙）以诗集见委序草次奉答

征君亭馆傍嵩丘一字吟安傲五侯不向汝南夸月旦还从江左问阳秋骥能伏枥寧嗟老蚌始成珠可暗投莫倚阳春轻索和千年孤调使人愁

孙状元册封南阳便道还里索赠

金吾小队出天闾为拥文星指豫方桐栢水回龙是节毘陵花发锦为乡香同奉倩
余鸡舌赋似相如有鹪鹩试问词坛诸大将江东谁不怕孙郎

奉和大宗伯董公返棹之作

初疑兴尽子猷还咫尺清苔未可攀日暮碧云离合际江秋紫气有无间劳公郢里
歌中雪念我祇园梦里山莫笑野人虚拥簪至今犹自扫柴关

陈子吉应东阁之辟蜚声燕中久矣今年遇余娄水知尚困公交车出徐李二相公
林尚书诗见示因继其后

握手江湖意悄然辟书羔鴈记游燕宫花可自翹才馆袖草犹余应制篇丞相总知
还有命公交车虽晚不论年却怜吾似邹长倩扑满投君贮几钱

董徐二进士见访山园守公留晏而余以扫墓东归不复称主人赋此志愧且订后
期

攀栢秋原一恸回如闻车马破苍苔亦知凡鸟题犹湿翻为求羊径不开下榻仍惭
豫章守窥园谁更广川才相期尚在梅花发会谱双龙笛里催

初闻应天尹命述懷

纳得郟襄使节归忽闻新命领留畿纵令丘壑谁论是若语岩廊转更非一叟徘徊
吟竹径羣儿顛倒换萝衣莫言清切丹阳尹何似山人傍少微

乞休疏上闻见阻公交车志恨

麋性虽驯尚畏人苍浪衰鬓已如银陈情表上虚何益归去辞成恐未真造化岂应
私长物风尘元自妬闲身弇园何限相留态松竹依依更几旬

将赴留尹出门作

迭鼓鸣榔试晓风倦游心事寄冥鸿已拚车畔闻歌鳳何必幡头有畫熊游客似夸
轻薄尹居人应唤冶城公离筵欲向清洋尽依旧三弇醉梦中

抵丹阳闻南中有流言即返棹

幸不将身与念违
艤符转首便成归
紫衫频着难长是
白简虽烦未尽非
耳惯酒酣元不热
心安食少也能肥
江东尽有容人处
水石中间一钓矶

投劾南归抵家作

剥啄应令稚子疑
雀门风雨昼凄其
能如五日张京兆
又作当年柳士师
瓮底尚残斟别酒
尊前能咏解嘲诗
祇嫌三老来催直
不及山阴兴尽时

归后呈元驭宗伯

不为冰霜哭路穷
将从里社逐春风
一官鸡肋毋怜我
万事龙头尽属公
习静稍知前日短
避言那望故人同
采芳倘有褰裳兴
未少莲花浊水中

己卯元日雪中小饮试笔时以除夕立春

柴门爆竹不须催
病怯流年又一回
已遣黄鸡驱腊去
真成白雪和春来
盘中传菜犹疑栢
庭际封条总是梅
任使台官傅酒诰
可能兹日废衔杯

得在籍听用之命有感

才微不合咏乌乌
试看南床白简无
岂有涓埃裨海岳
仍劳约束到江湖
君恩浩荡留通籍
岁计萧条只饭蔬
览镜自然成一笑
可容衰鬓脱菰芦

东泉丈解太仆归从少春兄游有寄

肯为浮荣拟是非
岁寒高谊见来稀
空劳贡禹弹冠在
但好虞卿解绶归
疏草尚寒千古色
纒荷差胜五时衣
芝苓满地双堪斲
莫向东山咏采薇

寄少春丈时刻余所赠诗文于石置迟鸿台

台畔鸿冥成古今
台邊龙卧转沈深
无妨宦拙闲居赋
可怪时清梁甫吟
我自余生

安木石谁从众毁出兰金劳君不浅相怜意解向王筠句里寻（沈休文书王筠诗句于壁故云）

哭子与方伯五首

楼船迭鼓出吴关坐见萧萧短旆还化剑丰城余紫气藏书天目是名山官从几命
头先白语到千秋管自斑惟有寸心犹未了可能挥手厌人间

其二

豫章题字墨犹新南浦招魂事已真未老江东徐仆射仍为天上石麒麟
虚拟欲界无长日但是词林不利人四壁图书山百晦向来吾岂念君贫

其三

慈乌别宿旧林枝寡鹄啼霜听转悲论比伟长差有位年齐摩诘总无儿
吴云欲散青笏馆溟海虚传白雪辞从此箬溪西去路的应难似旧游时

其四

愁将舴艋入菰芦未到吴兴泪已枯矫首乾坤诸子尽断弦山水一身孤
书贻王粲能传否剑许延陵再挂无不少溪苔堪作供用君家法荐生刍

其五

当年西省业西京散入诸侯狎主盟握管仅残吴下叟修文今嗣济南生
里存鱼舍谁留食天拆龙门可借名但遇江湖羣潦倒岂应无泪向菰城

送莫廷韩应北都试

社酒虽漓离思浓鉴然匣底响霜锋华亭不是羊公鹤洛下还惊陆士龙
见说燕金贪驷■〈马上衣下〉冑教秋水怨芙蓉宾歌莫动思归念春晓须听长乐钟

寿大司寇钱公八十

三朝一纪遂闲居矍铄精神钓渭初
国老寿齐钱尚父耆英官是白尚书
瑶池醉色桃堪并玄圃仙姿鹤不如
闻道辟雍修盛事吴阊早晚见安车

于弇园饯冯使君之楚右辖

别墅留听黄鸟啼暂浮单舫当分携
泝沿须缓愁源尽歌舞频挥思日低
小坐可移醒酒石元戎合记浣花溪
笼纱未是山人事白板纵横信醉题
（时公有留题诗）

其二

毋论泉石殪夫君草木恩深惜离羣
但是甘棠称召伯还从大树识将军
峰如衡岳低多尺水比湘江让几分
了得逍遥鹏鷲意应登楚阁赋吴云

大司马刘公六十

八座归来鬓尚玄三朝名德许谁先
寧因水镜繁桃李不为风尘损蕙荃
白璧转看蝇后莹明珠初吐蚌中圆
莫疑少选安车下犹去悬时一十年

答和魏太学见慰之作

倦飞谁不爱林萝况有新诗慰藉多
身是王生寧结袜（君诗语云云）
门如翟尉任张罗蠹鱼渐老犹殄字
蛙龟何能且和歌奉帚主恩吾岂薄
西施其柰浣纱何（末语谓魏也）

寄王大叅阳德时公初归永嘉以黄柑见贻

但作归人事事堪永嘉名胜擅东南
吹笙雅称王乔岭着屐偏宜谢监岩
客至风前饶白苧书来霜后有黄柑
祇愁行乐燕京妬不怕中山谤一函

感懷寄王大叅阳德

六代三山妬客踪犹余五岳可扶筇
应来我马元非马悟得人龙有似龙
祭酒偶叨诗社长通侯仍傍醉乡封
烦君寄与何曾道到老还输阮嗣宗

刘司諫君同时举二丈夫子然二母也其父宪副公以吉兆命名遣乳媪先期而至
邑大夫士奇之为诗纪其事而命贞次焉

少府斋头柳更青蔼然佳气欲充庭昆冈乍吐双良璧（君治昆山而宪副命名从
昆其下字左从土）楚部先占二小星（君楚人也小星用荀文若事）共道龙门饶续
史雅闻麟笔有传经啼声不断皆英物试看还应讶宁馨

其二

见说仙游梦更奇县衙西北状元祠（君尝梦谒顾文康公祠既至治临祭宛然无
何而有兹庆）麒麟天上传双趾兰玉庭前长并枝读到父书应自易绳来祖武定非迟
二雏虚道徐卿好谁似君家在一时

送颜司理之任平乐

官好那愁度岭难年青不怕瘴烟干山逢仙吏夸丹灶涧向明时愧考盘绘阁风帘
排秀入讼庭霜笔到春寒从他筇竹衫蕉好只作浮云过眼看

自长兴还抵岷山遇李使君冒雨邀酌屈指郢中之会忽五载矣归成二章奉寄

小輦依微指白云老僧初见怯相闻当年知识羊开府今日翻陪柳使君蓼葭雨来
珠作供野苹风起穀成文不应呵殿松间别为恐青油扰鹭羣

其二

出雪溪山暂缓愁仍从地主见风流长劳郢里阳春忆少为吴兴夜雨留浮玉岛惊
新宰堵市金人指旧优姿明朝舴艋烟波去物色知君未可求

为吴侍御赠广西锺提学

中外台端见表仪不烦霜面瘴烟披分来秘阁藜千点校后诸生桂几枝门下陈钦
谈左氏（苍梧为公属郡）江东匡鼎受葩诗悬知独秀峰头坐五岭云霞更属谁（公
读中秘书为御史提学南畿故云）

喻工部邦相以前天台令谒选枉道见访出楚中诸集读之感而有赠

破浪冲炎舴艑孤偏劳物色到菰芦文惊贾傅浮湘好歌爱王郎斫地无休汝莲花
依白社游燕桃树满玄都欲知循吏从文苑乐府应添于葛于

凌大司马汝成成岭表功入叅留务奉送一章

春风十万偃貔貅谁似元戎晋锡优五岭舆图开一半百蛮冠带比神州银章首考
中书令畫阁肩齐博陆侯均佚莫言分洛好玺书连夜下长秋

寄太平龙同知身之时儿子以试事过谒

阴阴桃李遍吴关竹马胥江望转殷第入中兴循吏传何须北阙諫臣班名高不让
诸侯美才大长怜半刺闲欲识使君行乐处千秋今日是龙山

其二

杯酒吴闾惜离羣一时宾从雅能文快哉丘壑归田父美矣楼船属使君试泛锦帆
牛渚月能忘篮輦虎丘云如闻儿辈窥东阁倘有余光可借分

殷无美与沈君典状元有南宫之好今将访君典于宣城赋此送之并简沈

当时蹀■（跬 燮）竞空羣头腹俱龙尚未分器业三吴殷往嗣人伦一代沈休文
西山雾隱仍如昨南史风棱始独闻此去采芳携手处谁能不妬敬亭云

北僧行脚而携诸名士卷乞诗因赠之

叅方一钵信心行祇为诗编锡不轻时至世尊须乞食古来菩萨也求名新怜江左
多贫里旧诧燕中有化城千品莲花随事诵劝师须是断无明

袁黄岩寄鴈荡图及新诗见示颇懷壮游之感

高枕柴门掩綠苔素书惊为故人开如分鴈荡羣青过忽挟龙湫万玉来康乐恨长

乖试屐（昔人以谢康乐不识鴈荡为恨）河阳诗好任登台君家夏甫终难慕双足何曾限八垓

寿濮游击四十

千秋带砺中原旧三翼戈船海戍长缓带诸生谈碣石飞书一箭下扶桑心因捧日长悬赤鬓为筹边欲向苍四十拥旄真谢椽从今更拟郭汾阳

寿大宗伯吴兴董公七十

七袞三朝命世臣长从龙马鬪精神文章海外鸡林重宰相山中鳳诰新步武有园过梓泽比闾为日望蒲轮偏闻胜事开秋社逸老堂推第一人

贺大宗伯董公孙捷秋试

一时名著颍川君最喜元方复有羣旧梦金茎仍沐露新栽玉树已干云征歌尽道绳公武命字初看并手文自是天人三策在春来重向汉廷闻

再寄答胡元瑞且邀相过二章

飘然年少弃繻生每出新篇令我惊一字风云争吐气千秋日月破藏名无竒寂寞甘扬阁有好嵯峨必汉京五子见来今已尽那能白眼向时英

其二

不独文章冠盛时雅闻姑射并风姿酬君一案非青玉寄我诸篇并色丝清节异时隄乃父中庸今日亦吾师莫夸终古神交在所见俱应胜所知

送曹子念赴永嘉谒谢王使君阳德因游天台鴈荡诸山

江南十月未风沙髯客翩翩问永嘉报赠岂无青案玉归装定有赤城霞鸿飞絶巘书千里蜃拥蒸波锦万家最是府公为地主可能留赏及春华

承明辅方伯见讯且有秘示奉答一律

问我归田何所云浮名损尽任离羣畏听西竺三生语懒乞华阳十赀文有酒不妨长短日是身堪作卷舒云知公最得无师智莫遣人间俗耳闻

元驭宗伯留赏菊忽有紫牡丹一株异而赋之

学士银鱼焚不迟居然陶令傍东篱谁云晚节无三友忽许天香借一枝赐紫独应夸彩服配黄双可荐金卮知公大是春秋笔能遣风光并此时

李公自留都督学转北奉常有赠

教铎方传振旧京容台忽尔傍承明行时祖帐看犹绛到日长斋羨独清天地似新周礼乐星辰依旧汉公卿由来柱史偏谙典门下何烦致两生

穆考功敬甫以书及诗寄慰奉答志感并言近况

已劳燕鴈破萧疎更许唐风慰索居慈母尚投三至杼故人能辨一函书空华过瞬那堪捉病草逢吹偶暂舒欲识近来真懒态雅无余兴及樵渔

穆君以近诗刻石并刻余诗寄谢

隱豹斓斑不掩姿环台琬琰有新辞共传邺下韩陵石全压江东幼妇碑倚玉久应惭我稊漱珠时复露君竒怪来天际漳河色忽有双虹暎日垂

戚都督加太子太保奉贺短章

天朝列障大论功两绶新兼将相雄祇道元戎临紫塞还闻太保领青宫轻裘绣领初盘鹤软轂轺车旧露熊唯有貂蝉余事在可能无属锐头公

卓光禄过我弇园有作聊倚赠

念尔真成汗漫游烟波一艇傲深秋从探茂苑名山尽且为愚溪少日畹彩笔老憑添气象青鞋轻自吐风流题桥剩有王孙字时复摩娑缓别愁（余园有月波桥）

殷无美谈君典筑室水中谢客读书与鄙况合有述

殷生纚纚说行藏令我翛然思沈郎予告乞分天一曲移家俱住水中央浮生转爱
青云薄傲吏能私白日长料得书成应自署春秋繁露汉贤良

雪夜大作晨兴有报弇园之胜者病不能赴作

初听淅淅打帘栊睡起俄惊天地同老圃狂呼千树玉病夫贪守半垆红行吟故让
孟处士僵卧差强袁郡公却忆傲寒诸侠少臂苍穿过灞陵东

腊月十日夜雷电大雨有述

前年腊月雷电作今年雷电腊如之即开棠杏能几日欲出龙蛇何所为闭阳书成
弟子谄离毕语是门人疑襟披帙岸事未了已有雪霰纷相随

贺学士何公弟仲君入史馆

胎簪峰色转嵯峨桐栢双流逼绛河学士班中鸿序近舍人池上凤毛多追锋次第
穿花萼下直联翩响玉珂闻道相麻饶润笔弟裁兄草定如何

大中丞胡公入佐司徒贞以多病里居不获一从父老卧辙请留聊成二章以壮行
色盖公之功德人能诵之而公之苦心人不能尽知也故于结语中深致感云

关西清自古来传数到胡威更莹然新转地官饶建地近从天语见回天寻常八座
人犹羨四十三台尔更贤惟有苦心真絶处青灯疏草泪痕偏

其二

五云将送画熊车欲借先知寇不如主计十陪萧相府阜财能用范乡书穷檐尽属
吹嘘后多士争承咳唾余渐老杜陵怀旧切春风寂寂浣花居

庚辰元日即事

匡床午坐岸乌纱庭玉分行砌长芽邻父能搀婪尾酒相夸不数撞门茶垆空旋喜

煨枫叶坐暖从教舞雪花若语江城真胜事春来端合到谁家

雨中即事有述

衡门寂寂罢周旋暝色昏昏且晏眠有酒有诗无胜地听风听雨过流年累碁聊任
诸儿戏开卷粗窥六祖禅除却自身还自了不妨喧静但随缘

范子将有金陵之游赋此为赠且复招之

釜中生尘范史云忽往金陵答所闻朱雀桁头卖历日栖霞寺里读碑文齐瑟总工
何处鼓奚囊倘重若为分故园尽有鸡豚社一盏春醅且易醺

徐嘉定量移离邑无美索赠

计吏尚书有谯诃量移才子未蹉跎中牟岂少循良状即墨其如左右何烏影天疑
元会误琴声人许练川多殷生似向儿童约竹马无妨郡绶过

和陈玉叔大叅雪夜见懷之作

射堂飞霰点朱衣拥鼻微吟念采薇岂谓剡中游客尽端因郢曲和人稀渔蓑此夜
寒从剧鹤擎当年貌已非犹记醉呼儿輩语五陵豪侠臂鹰归

二月十三日作

苦海依稀见宿因长期抖擞出风尘从他斑管书文伯不博黄冠署道民举眼便非
干已事到头须认自家身似闻寒雨多僂僂二月梅花始露春

其二

海上青鸾杳未还至今消息有无间毋论神女曾捐佩不向君王乞赐环风急乱英
迷客路雨晴圆照满家山双轮任是催人紧见说难销物外颜

董茂才扬名以文见贄有赠

四明狂客代不尽今汝毫翰复纵横垆中赤堇精已就匣里青萍雄自鸣末路交游皮作相满堂文酒目偏成毋轻潦倒宽长服汉策还须待董生

傅公瑕携丽人梅花新居贻书自辨而诗有晚得新交萼绿华语盖指梅也且索和章赋此驳之并用志嘲

见说新居傍若耶时过莲女鬓如鸦纵令解赠金条脱未必真逢萼绿华为雨为云终属梦非空非色向谁夸道人也住梅花屋纸帐疎棂月影斜

闻家弟乞休不遂有感

草色池塘梦未真天涯难问惫和贫阿谁传得思归引令我长为诳语人竹箭自然江左贵桃花无恙武陵春柴门扫罢还堪掩不必坝箴聒老身

其二

神虎门头欲解簪名高天亦妬山林未应君相真司命自古行藏好信心龙性驯来生豢法鸢肩看后起知音但令五技如兄短不畏藤萝卧不深

子厚王孙再寄新文有答

一片春云五色翰开来字字吐琅玕亦知唐叔成圭易不放长沙舞袖宽宅近南阳龙好卧台偏江左凤难看君知此道千秋贵试把微言问子桓

伯承少卿自报国寺分手二十五年矣虽讯问不废而笑谈永隔今岁初夏复有一诗见遗聊尔奉答

招提杯酒散词盟华发苍颜铸此生各负一编湖海日不贪羣少斗山名升沉事事归陈迹耕凿年年饱太平见说白公禅观后紫绶菱角对弹箏（君诗问我祇树林而管弦之乐日甚故尾及之）

答舍弟敬美覲还复履江右臬任时偕余访道有遇

春风至自蓊门天念尔行藏并有缘谒帝云裾犹五色逢真灵药更千年章江竹马

迎维楫萎水茅龙引别筵笑杀丰城寻紫气于今双剑女牛邊

其二

抗疏归田计已虚惠文重戴莫踟蹰当空月朗从圆缺过巘云闲任卷舒翫世不妨
身内寶误人须辨枕中书茅家仲弟饶供张可道难兄去不如

伯起不就公交车杜门著书寄此致羨

旋邈公交车甘隱沦爱君初作自由身书成柿叶真如晋种得桃花不避秦湖海几
曾湮竹帛烟波随处吐丝纶倦夫尘梦从夸觉争似元无入梦人

寄寿宫保大司空潘公

淮海仙帆指日悬燕京优诏自天传那知岳降生申地已是河宗献瑞年帝賚玄熊
因拯世人夸白马不沉渊宣房信有如椽笔能写虞家禹贡篇

戏章仲玉写楞严经且用自解

要君日日写楞严■〈石襄〉村头损素缣夜望神光生口角朝疑舍利吐毫尖
行歌剑客缟将蒯调笑书生舌欲箝真个法门无一字五千函卷是谁添

云巢老人走使渡江以诗相问有作序定千皇甫謐语赋此报之仍寓懷仰

却扫深居万事空修鳞珍重下江东何哉一序烦玄晏久矣三都属太冲老去浮名
杯酒外悟来归计佛灯中亦知杖屨难征逐幸自鞍山两地同

少司马四明范公以诗见约相过和韵奉酬

燕市分携春复秋让公先已占沧洲长夸谢傅围棋乐不作虞卿解印愁一范高名
南斗在四明狂客古风流由来禹穴饶竒秘可放灵威少日留（公家古文秘籍甲江左
故云）

四月二日即事

方除忽展类西清隱隱莲花踏处生天语独传三字切玉衣真见五铢轻流霞欲动
灵旗色滴露如残警佩声闻道穆公夸飡帝吹箫元只为秦嬴

其二

小阁文窓影綠波葳蕤不启动轻罗竞承初日芙蓉媚忽转轻焱翡翠过巫雨髻鬢
看渐吐楚云环佩听来和欲寻别后羣真位只在黄庭内景多

其三

五云佳气藹充闾一綬如虹挂太虚忽展凌波无缝袜贪看争日研光裾金庭白鹿
愁驂驾玉局青羊惜授书洒壁天浆浑胜蜜人间大有渴相如

其四

琚声缥缈复徐徊拂栋香云裊未开北絶上妃应怅别南真司命好重来丹砂剩得
仍为米桃核藏来可是杯最幸导师还召对畧言尘世有仙才

唐明府元父母七十一

桃花无恙讼庭春鹤发交辉过七旬单父能谐琴底意莱芜不厌釜中尘棠云一供
神明宰菽水双为底豫人试欲添筹何所证唐生占相久如神

寿萧安人七袞（郎中某母也）

里中萧桧梁朝种门外萧郎汉节归桧厯千秋多气色郎驱六传有光辉飞来鳳五
盘花诰赐出鹄双颺彩衣况是海东仙迹异可无桃实令颜绯

屠青浦长卿以诗采真聊尔倚和

紫气那从令尹孤白云秋色满江湖骊珠采去人人看鸿寶探来字字无任是缙山
能跨鹤寧如叶县早飞鳧相逢莫问函中记但共长房酒一壺

寄处州喻太守邦相兄

括苍太守乐有余两衙无事但读书开笼自调青田鹤罢酒不啖好溪鱼昼长鸟雀
衙吏帻秋净烟霞生客裾却问钱塘旧官长玉台手板竟何如

徐大宗伯以佛语见讯倚韵和之

老来离欲正中偏差胜耆婆始上天累尽可余迦叶舞慈深宁爱辟支禅开槭罔象
欣珠得倚杖长庚配月悬悔不乞公祠部牒也堪将换沃州田

答荆府樊山王以文章求订

时自虹光倚少微那无物色到渔矶人从白马看如练诗向黄梅拟受衣袖里泽兰
愁信远懷中荆璞怨工稀亦知竹素千秋业敬礼人间有是非

辰玉道兄游南雍应都试赋此期之

桥门经术冠诸生艺苑风流更大名但使茅家容季伟不妨韦氏挺玄成芙蓉榜下
看云色桃叶渡头歌月明处处江山堪入画还同平子赋南京

林大廸者故同年尚书对山子也闰秋之月忽访我海上以其所著丛桂堂草来读
之大较鸿鬯典丽不操闽音而七言古近体尤自烺烺维林之先父子兄弟正八座者四
人其它乘朱轮组银艾者又十余人大较以高节伟行着天下盖业先其大者而于兹途
实未辟也夫岂独闽自待用先生与长沙诸公角善夫先生与北地信阳诸公角而草昧
尚屯时伤质胜君子犹有歉焉今者彬彬矣筦路蓝缕之徒大廸其超乘焉媿哉余甫有
笔砚戒不能为之叙而以一诗致赏

代有尚书能识履里多乔木总推林传来鳳羽寻常物别采龙唇大始音小语时时
霏屑玉新编字字比南金老夫且拭山阳泪报尔悠然千古心

弇州续稿卷十五

●钦定四库全书

弇州续稿卷十六

(明) 王世贞 撰

○诗部

△七言律

九月闭关谢笔砚而千里故人讯问不絕又多以诗及者遂成此二律志苦且代荅

小径衡门鸟雀余祇因才尽爱闲居诸縁暂息交犹在一病虽轻懒未除玉案有无
知莫较银钩早晚竟难虚于今却羨桓司马博得空函省报书

其二

不尽秋风至羽翰报书犹可报诗难半生失计甘鸡口此日冥心任鼠肝柿叶懒题
空自积梅花从折负它寒于今却笑陶都水才鬼谁能具眼看

斋室初成有劝多栽花竹者走笔示之

一室縁溪断俗尘翛然吾自爱吾真浇花怕结春时业种竹防惊梦里神梧叶到秋
无那病芭蕉过暑不堪贫何如且放空庭在月色风光好近人

夜听印师礼诵走笔偶成

街鼓初停香篆寒呷声那为雨声阑弥陀界遠疑城近慈氏宫深外院寬正念可争
无念好非心还较即心难道人别有安身处未必清晨叩懒残

送仲氏敬美视关中学政时皈心道门兹行染指而已

新裁绛帐拥朱轮沃野天开万象春它日扶风多弟子早时函谷辨真人梁丘代是
能传易贾谊年来不过秦莫讶文无将赠别祇今犹作自由身

其二

念尔长夸太华尊 褰帷秋色许重论 可犹无恙金天掌 应否居然玉女盆 紫逻春添
新句色青柯 云护旧题痕 漫道济南诗纪绝 至今犹自闕真源

其三

阅罢晴原蚁战酣 还凭彩笔恣游探 沿陂骑吹飏春涨 入岳星河挂晓骖 间有壮心
怜渭北 定无佳处胜终南 欲知西笑缘何意 来与维摩共一龕

其四

别酒双壶且细倾 中年兄弟不关情 何必诸生推北斗 那须故帟觅西京 云开白岳
峥嵘态 雪净黄河黯淡声 纵有奚囊都放却 逢人但可话无生

寄李本寧提学索其秦中文字

关西众说杨夫子（谓应寧也）供奉吾怜李翰林（谓本寧也）即使人才饶 械
朴可无词赋慰萧森 秦风雅有同仇好 郢雪其如寡和音 老去闭门无一字 许公方外别
论心

寄陝西右方伯徐公公近以吾郡兵宪迁

别筵霜色惠文冠 遗爱偏留泪眼看 今日棠阴归右伯 古时薇省在长安 传来素翮
随阳易 写就银钩度 远难珍重儿童一致语 时时竹马大河干

空山首座托钵叅方因调其师馆

缘师棒底少知音 一钵飘然辞故林 是处可登三昧地 何须忽起四摩心 离山梅子
从生熟 探水茱萸自浅深 归到浴时须遣却 佛堂牢闭不容针

辛巳元日试笔

一室归来类僦居 不欣添岁不愁除 庭空爆竹如相借 户小屠苏顿有余 少为含饴
淹孺子 依然抱影爱寒庐 新年处处交堪绝 祇许梅花未尽疎

华幼圜以古隶见贻赋此报谢仍乞书国风

鸟翻山头王次仲鸿都门下蔡中郎似分晋季鹅池墨流作梁清练水香柿叶过霜
红满地芭蕉含雨碧堆床二南须为纵横写老去风人有面墙

甫尔逍遥偶得陆司空与绳数行坐客因举吴门诗语一笑赋此

数弓瓿脱一蜗庐老去生涯自有余但饱何须香积饭得闲能厌惠施书师教忍辱
波罗蜜代有同生蔑戾车却是山僧多伎俩此身聋瞽不妨渠

题宗良王孙摩尼庵

君家斋头十九首一首一颗珠光流平陵颇梨吐五色欲与舍利俱千秋骊龙有颌
那可采罔象无心翻见投爝火自来难鬪日丰城双剑黯愁

题匡南王孙爽台

兰台高咏杳难攀滕阁鸣銮迥不还忽有露茎超象外能令天籁满人间披襟快自
君王腋酌斗清回帝子颜无那阿猷称尽兴谁拄笏看西山

同年彭比部辂贻游仙近体见懷漫成一律荅之

神武门头厌世尘挂冠天地许沈沦彭籛久矣君前代子晋那应我后身白石两堪
贫岁计碧云孤忆赏心人县知未贾扁舟兴小有桃花可问津

送宪副王公家驭督视河南学政先是长公以春秋魁天下而公继之

圣朝多士满东周况尔工师棫朴收万古图书更河洛八方文轨自中州洪都石佚
还堪访虎观经残可再雠倘向青囊探秘策第云南史有春秋

阆中陈子韶宪使以二诗及书附贾舶见寄聊尔次荅

万里桥东贾客航曾携明月到吴阊清猿响挟三巴俊赤鲤心纾九派长终古坝箴

还并协此生旗鼓不相当夫君自有夔州调刺史能无治草堂

其二

射洪零落有家声中散傀俄无世情书到絶交堪自老诗题感遇不须名逃禅别爱
声闻酒任侠能争竹素衡今日一编天外至老夫差不负生平

宗人汝康都运端阳举孙乞诗为赠

淮水汤汤无尽期琅玕又见吐孙枝石麒麟送在兹夕蜡凤凰成应几时眼中不置
阿堵物膝下所以宁馨儿蒲觞角黍最初会它日三千客是谁（孟尝君以端阳日生故
云）

感事

白简彷徨寻所之入山不深复何辞世人煮鹤宁一事而我雕虫亦少时多闻比邱
结未断求名菩萨缘当迟怨生转作善知识咀口讖却波罗夷

吴母六十寿言母长斋三十年有子富而好道筑净乐宫七真堂于齐云巘顶进士
李元泾索句寿之

瑶岛蟠桃熟太迟潘园诸种果无奇何如别创朱明馆取鬪新荣碧玉芝此日苏耽
唯母供它年盱眙有儿随豪家水陆应何限不贷西山景向移

与敬美弟初出郭宿故墅

岁晏冥鸿忆序归秋深老桧冒霜肥居然北郭双蓝鬢对是南山一布衣田父酒深
能见狎贵人交浅任相非柴门促膝藜羹好不为高阳旧侣稀

其二

稚子犹能指二王那知小令更清狂头颅不傍世人老骨肉无如昆弟长岂为池塘
生好句已胜风雨对匡床中宵错讶埙篪奏次第黄庭诵未央

荅贈皇甫子循先生

小徑鋤來秋草蒙新詩忽爾到柴荆誰能彩筆長無恙何處青雲不忌名失馬古猶
傳塞父行金那可問庄生（范少伯事）莫疑禪客幽栖意總為人間百不平

孝丰吳稼澄故中丞峻伯子也弱冠而才以詩見投云還憑文舉通家刺去問留侯
辟穀方生之從祖大叅君老于是中必有秘密相授仆何能為効因抒贈荅一章聊見情
耳

衡門忽啟為吳均詞組崢嶸意象新今日鳳毛真見汝向來龍腹定何人葛翁丹灶
存應否王氏青箱久漸淪出世心期經世業少年才子自由身

有上人閉關居作此贈之

愛爾高居息眾緣沿階忍草任半綿床頭卧虎難為客頂上巢烏不計年天鼓自鳴
朝梵後地肥爭發午齋前翻嫌慧遠生多事苦役僧維種白蓮

贈馮咸甫先輩咸甫能文章其祖侍御公父京兆君以忠孝著節云

汝向玄都禮赤文吾從彩筆覩青雲漁歌不惜齊南隄驄步終空冀北羣諫院世傳
真御史陪京人頌大馮君亦知忠孝而家事可但詞場第一勲

大中丞陳公自楚南服貽詩見懷賦此為謝

曾向陳家識季方參差玉樹凜冰霜行台對聳中丞栢賜履重依右伯堂（公繼伯
氏大司馬撫楚楚又公舊按部地也）萬里素書來燕外十年丹禁接鵷行虛勞姓字占
朝籍已賣殘軀事藥王

同元馭學士及家弟敬美會李惟楨使君冰玉堂出沈啟南先生畫見示命作

陳榻懸來總為誰忝成三益共追隨已夸冰玉壺中客更愛丹青筆底詩畫戟清香
吾郡事朱門蓬戶古心期興來指點虛無處便踏芒鞋去不疑

題贈安雅主人

安雅主人希长物道书数卷竹千竿不烦医俗方为雅无可征心始较安薛氏双轮
归计晚刘家三爵酒肠宽若逢恬淡斋头客犹作人间白眼看

家元驭提学甫校士河南投劾径归诗以志羨

纒渡漳河兴已阑北风吹岸惠文冠何人更许全三乐此地今看有二难忽忆淮南
青桂色从它梁苑绛帷寒莫言小弟茅衷晚鬓鬓双颧似渥丹

壬午元旦与敬美祝圣少饮即事

参差兰玉映阶新双引金绯祝紫宸少选便寻居士服尔时聊现宰官身三分栢酒
夸婪尾千树梅花鬪早春弟劝兄酬休惜醉眼前俱是太平人

张肖甫司马特膺简命督抚全浙赋此赠之得二首

亲捧兵符下九霄风旗猎猎马萧萧度辽大将仍持节横海诸军不得骄见有副车
回塞柳可烦强弩射江潮经行总是甘棠地早晚追锋趣入朝

其二

脱巾愁听自钱塘推毂欣闻出建章六传忽从周太尉举军争隶郭汾阳温言纒挟
三冬日肃令锋回九夏霜飞捷不妨清夜报宵衣天顾正南荒

留叶茂长小饮闻将有西南游歌以赠之

解道衡门絶世縁爱才犹获叶生顛青鞋信足从它破白眼看人转自怜诗好诧增
绂素价酒狂思益布衣权西南岳牧谁黄射鸚鵡虽题莫浪传

大中丞孙公贻书示按部期久不至聊尔奉讯

父老河干睇望频孙郎江左欲行春单车立破千妖胆一疏能舒万姓颿稍觉前茅
旌色动争传细柳甲光新野夫亦傍花溪立为雨为云忽未真

读穆敬甫所选明诗七言律有感盖时辈之作在焉又多猥及余云

十年龙卧大河湄磊块时时一吐奇共许使齐能论乐何言返鲁便删诗抔秋片羽
风斯下媚夜繁星月并垂白雪祇今多并驾不须惆怅不同时

以近况报敬甫亦小有所规也

久自沈冥遠世情虚劳琬琰表西京须弥顶上无文字林虑山中有姓名咫尺蒲团
天樣阔些微匣镜月同明未论真得三浆味染指能令万事轻

胡宪使归自滇中年六十

三朝循吏赞升平一疏归来万事轻隼旆尚沾滇焚泪渔舫先结■〈山昔〉湖盟
青山甲子从仍数丹穴鸕鷀有嗣名他日胡威蒙召对定知能让乃公清（时元瑞将上
春官）

贺大中丞晋台秩抚蜀

玺书今旦出燕京吴蜀恩波去住平牛女星移益部岷峨雪作大江声寧唯遗爱
如何武遮莫前身是孔明（用韦皋事）开府西川多拜相即看红烛引双旌

得骐儿领解南都报书此寄勉

斋房寂寂篆烟微忽有泥金叩竹扉一日看花倾白下千秋奕叶振乌衣弹将流水
方成是别后连城始悟稀最好鹿鸣歌宴罢莫教恬澹与心违

其二

镜里蛾眉叹不逢承恩今际易为容一毛吾自先惭鳳五彩而寧仅似龙阿阁纷惊
初日拥钟山瞥见庆云从莫矜家世青箱业剩有余忠报九重

送张侍御予告还蜀

南床白简一时传忽荷君恩赐沐偏建业秋霜无避马云安春雪有啼鹃归心已度

千盘栈起色重呼万里船负弩虽荣知不爱相如今是著书年

送傅吴县入覲以善治民闻而山甫子予輩谓其负仙骨精禅理因赋此为钱

吴门匹练贯三台为是朝天彩鷁开叶县仙人飞舄去东阳大士应身来君王别对
重云殿元会曾沾万岁杯莫笑深山诸老宿也骑竹马候江隈

送徐少卿册封鲁诸王便道归寿大父太师公八十还朝兼简其弟元普中翰

即从东兖下东杨羔鴈纷纷簇锦堂家庆百觴师尚父公余一赋鲁灵光孙枝玉树
堪谁并仙掌金茎待尔尝欲识先朝真肺腑阖门符玺侍君王

其二

云门乔木郁相望谁似徐卿庆泽长两世四为符节令三朝五锡太师章朱颜綠鬢
明郵传玉册金书出尚方寄与鳳池难弟道好裁新赋献长杨

送毛豹孙天池寺检藏寺为僧从据争之力而后得之

知君逸思倦周旋爱结天池寺里緣寺忆东亭初施日池夸康乐再开年呗声时出
归云外梵夹初收落月前即使顿翻三藏徧不如离欲近初禪

题春草驰情卷寄答孔炎宗侯

胎簪秀色满罍罍父子风流岂异时临得宛陵离后帖（张长史宛陵帖一曰春草
帖）裁将康乐梦回诗王孙不断靡芜恨天马长衔苜蓿悲若问吴台眠起处一羣麋鹿
眼迷离

子厚第三书孤愤之懷极矣男子要自有出世事毋论浮荣即不朽亦第二义也赋
此广之

双鸿不独问加餐笔底纵横意万端总为难呼中散驾可能无恨遠游冠枋榆社日
吾寧老桐栢春源尔自看记取缙山明月夜玉笙鸾背莫辞寒

其二

朱邸朱弦响竞新少年都美出风尘从夸郢里传孤调耻向南阳问贵人七子有文
身似叶八公无药鬓如银悬知出世男儿事笑杀难陀恋转轮

壬午初冬忽传明卿有非常耗者得书喜剧因成一律情见乎辞

矫首南云眼剧穿银钩乍展独欣然人惊罔象珠仍得我识随侯月故圆从自千秋
归大雅何妨七日宴钧天病夫粗了区中事进尔同皈第四禅

沈太史请告归嘉禾走笔问之

战胜归来定不矜可应腰带沈郎如金陵水鉴抡才后樵李湖舫起色余闻说尚方
多请剑近来南史着何书知公自有冷然馭倘逐春风过草庐

元日过敬美小酌试笔

献岁家园倚杖过剧欢儿辈奈衰何寒贫棣萼连枝暖病怯屠苏半户多白屋千家
同惨淡黄冠一老自婆娑长安日有维新诏不必春风到薜萝

送余教授归天台兼简应在明

拂袖高歌归去来春深采药卧天台即探仙洞桃花色可似公门绛帐开沧海烟波
宽钓艇赤城霞气近楼台还闻旧社刘郎在好共胡麻饭一杯

仲氏力辞浙学之命得请志喜

一疏陈情抗帝颜薜萝仍碧簪仍斑但知洛下东西屋终作何家大小山澹圃筑来
随愿老惊帆收得到头闲（弟有收帆之梦）诸生纵有春风思无那归云为掩关

其二

若为祛得古今愁金紫荣身脱便休世事清朝多稷契天容遯野有巢由从夸大隱
官犹恋倘遇东林酒亦留伯氏黄冠虽不恶总緣人弃觅沧洲

曾子澄谈禅转甚而自詔其诗工且时时露壮心赋此

投杼当年似爱公丝纶却卷向隆中生来燕颌夸飞将老去牛头事懒融百炼雄心
犹未死五言新句傍谁工莫嫌行径山人别仅晓人间色是空

周公瑕先生寿言

江左乌巾世所宗墨花飞洒胜游龙家家拂席延何点处处磨碑待李邕止酒不烦
壶作隱著书争羨笔为农晚菘新韭周郎味倘许山人作岁供

挽康山人裕卿

结客翩翩满二京雅闻然诺重康生归来乐志粗欲就老去潜夫犹未成幸自故人
收侠骨谁从遗草问诗名寡妻弱子能无恙知有当年范巨卿（谓王阳德大叅也）

寄赠大名魏侍御

主圣臣身迥自轻皤然霜色在台扨向时河北推三鳳今日朝阳让一鸣迁客几曾
仇绛灌相门谁不爱韦平毋怜枳棘羈栖晚劝尔聊收循吏名

赠刘长洲应召入諫垣

喜见尚书尺一眞惊闻父老拥征轮中吴处处推循吏全魏年年晋直臣驯雉甘棠
歌正起青蒲白马事仍新杜陵野老迂愚甚但道临危莫爱身

题大痴老人畫山大痴此畫甚佳而后有杨廉夫题一律险诨都不切事至末句云
海上呼龙须有约模耶笛子许君听尤可笑诸君毋不步其韵者余亦戏步之将使后人
而复笑后人也

大痴老人时一醒幻出迭迭芙蓉屏客惊咫尺万仞势天割东南千古青拟将卜筑
探地肺便足指点称山经铁龙未晓畫中理纵作龙吟不可听

寄题邹孚如舍人读书草堂

邹君新卜汉江居带草绿阶墨染渠雪满梁园堪就赋天回碣石易成书阳春里近
高谁和大酉山连胜有余衰病转怜奇字少不烦踪迹子云庐

钱塘陈师太守以二诗书扇寄题弇山园索和及手书笔甚古云欲梓之集中勉抒
近况以答

一卷残编遣岁华数拳奇石割烟霞那知西子湖头客翻忆东陵圃内瓜名倦抛珠
还罔象意长篝火伴毘邪怜君误损银钩寄博得姜芽未可夸

肖甫兄治浙师功成召拜御史大夫行左司马事道过吴门轻舟入访弇中赋此赠
别得二章

虚堂跋烛且从容十载吴门忆景从脱赠祥刀犹似电佩来华剑已成龙三台执法
新推长八座论兵旧折冲醉语似狂君不厌莫因台鼎便中庸

其二

君王不爱彻侯章大将仍分副相床攀卧万人阆樵李参差两地满甘棠家家尸祝
烦巫史字字讴谣上太常今日表公文士用顿令毫翰有辉光

汪仲嘉见访有赠

已自三星聚草堂桃花潭畔更汪郎时从禹迹探科斗（君好古迹故云）间拟秦
声引凤凰文笔好传司马法酒杯毋学次公狂相思莫畏江鳞阻水到钱塘便一乡君以
诗见投

陈太常谪官不赴十五年矣精修梵行与世尘绝圣主求旧一月三迁勉赴留省之
命聊成二章以抒鄙素

言公祠畔水曾流枫冷红飞建业舟一出不教猿鹤怨千秋重覩凤凰游清曹总是
阿兰若净行依然老比立见说护持功业就灵山佛会未曾收

其二

羡尔幡然了宿因秣陵秋色引征轮
赐环今日无同辈请剑当年有直臣
此去但修居士业何妨重现宰官身
病夫伎俩消除尽莫向明时及隐沦

沈纯甫丈归自岭南屡迁九列濡迟未上移舟访余彘中有赠

入门左顾藹生辉寧似佳期岭外归
自有諫书明竹素肯将诗句博牙绯
鰐因佛骨能前徙鮪为乡心且暂肥
一月三迁恩不薄可能犹恋薜萝衣

纯甫丈与元馭兄弟及仲氏敬美善见访投赠俱有四王之目既感且惭聊此答谢

江东阆阆仅相望二耦才名吾敢当
从向蜀州输五短祇如京兆数三王
何山自显人安在慧地初更姓亦忘
况拟岁朝焚笔砚可余新论报中郎

仆近有五子篇拟魏懋叔似不欲以文士名也用赠长兄韵答我因再成一章倚韵见志仆亦且谢笔砚矣

有重能令事事轻知君不爱汝南评鯤从六月称长息鸟向千秋始善鸣高岭逼天翻更遠衡波到海自然平道人并杜苏门口悔遣嵇康识姓名

唐人有畫葛稚川移居图者与妇各骑一犛角牛前后五白羊从之一赤脚担装又一少女从之手携束书且行且读妇所乘牛背大幙一婴儿在焉其用笔颇雅劲山谷老人书七言律于尾似不能悉稚川事故为补题一首

勾漏归来里舍亡山中丹井未全荒
骑将老子双青犢叱得初平五白羊
宅相婴儿似南海徒行少妇学东方
刀圭纵有难从乞祇要姑姑艾一囊

观一上人将往五台礼文殊出行卷索赠

一锡初开行脚縁五台高拥佛螺烟
闻师欲访金刚窟误却文殊鼻孔边
过耳便成狮子吼安心莫堕野狐禅
从遭寂老掷揄后不傍人间七百年

南昌龙沙辅国挽章

圣朝江介数亲贤屈指俄成剑化年不雨西山愁自暝陨星南斗气空悬淮王丹灶
宛犹在子政青藜寒更燃（予寿公尝以此二事为拟）眉寿似公何所恨祇应惆怅石
函篇（公好仙术取石函记中语以龙沙自号云）

题冯南江廷尉水西台

欲识先朝冯野王高台宛宛水中央为怜游凤金陵地犹带栖乌御史霜起傍北辰
瞻北阙望依南斗忆南荒请看乔木连云处不似蓬池多慨慷

再用廷尉之子京兆君韵西台又曰冯台

卜筑初成万象开高风不讓景夷台九峯云气时时合三泖波光面面来共道将军
人似树宛然仙尉市名梅澜狂柱屹当年事感旧懷贤首重回（梅字押最无味仅得此
一押耳）

闭关

虚自羣喧草大还不多青眼畏尘寰由他国士谁谋国若个山人肯往山长病医方
无胜懒渐贫生计莫如慳地垆榾柮煨生芋风雨萧萧且闭关

邢子愿侍御枉驾弇园二章

星郎南代大家巡海国东停使者轮绣斧寧为暴公子朱颜妬杀尹夫人篝灯疏草
三吴泪隱篋芸编万古身怪得弇园霜色薄尊前笑语尽阳春

其二

一隻沾沾喜自论浣花全胜百花邨停骢众讶桓君轡罗雀吾骄翟尉门树暝忽回
春雪照台孤迥见法星尊即能倾盖输肝胆无那初筵黯别魂

复陪子愿侍御过家弟敬美澹圃作

皎然冰玉见风姿况有新篇鬪色丝不尽弇园仍澹圃为探周鼎复秦碑谈温草树
寒从破坐久星河莽下垂唯有陇梅尤气色似闻先卜早春期

其二

三径衡门有荷蓑野情能不避双呵使君文逼东西汉处士山连大小何偷暖地棠
残紫在狎寒天竹乱红多莫疑车骑邢侯简为恐霜威恼薜萝

钱李惟桢使君迁浙江行省叅政领金华诸郡

仙官去领金华部迂叟频翻玉屈卮三载润叨时雨足五更愁覩德星稀飞帆隱隱
棠千树别曲依依麦两岐无那郑公迁镇后浣花花事与谁期

其二

离筵父老莫长嗟吴越春风共岁华久自幸叅元礼御畴能不挽细侯车开帘几道
铜沙水拥阁千寻菡萏花若遇初平须借问此君兄弟胜王家

余以己巳正月渡江访会家弟于天界寺雪阻五宿今年腊月寺僧访余昙阳庵留
宿雪复大作因成一律寄之

昔年五宿天界寺今日重逢天界僧傍看无发胜有发此事吾能汝不能听讲雨花
还更否闻钟乞食记谁曾雪鸿指爪何劳荅且共龐公坐一灯

弇州续稿卷十六

●钦定四库全书

弇州续稿卷十七

（明）王世贞 撰

○诗部

△七言律

荅魏大侍御时自谪迁南考功

一龕灯火傍残年
畫省劳君记忆偏
名去已无弥勒累
病余甘老辟支禅
争传諫草千秋业
未了曇花半偈緣
好去鳳皇台上望
揽辉争似昔人贤

贈李公子

冰玉堂中夜色酣
皎然琼树坐相叅
毛当彩处知为鳳
丝到青时雅胜蓝
幸自忝收文举刺
那能别共阿戎谈
朝来学士支床语
吾道于今忽已南

甲申元日试笔

暫施冠服候呼嵩
爆竹声残续晓钟
天上元正开白虎
山中初九爰潜龙
数枝椒栢和玄醴
一畝蓬蒿谢素封
五十八年犹未是
于今化日始从容

偶成

匡床眠坐尽优游
兴至三杯过即休
小出便支邛竹杖
轻寒旋进木棉裘
争春桃李差嫌富
滴雨空阶不起愁
较得近来诗句拙
肯容心力费雕搜

其二

城隅鹿共蓬蒿宅
春首鶉悬薜荔衣
鸡犬不妨名地肺
鸞鱼随处有天机
曾希玄岳祠官选
别署茅山道士归
出处浮云都散尽
可烦追较向来非

将断文字緣作此

竒人纵可敌扬雄
才鬼那能胜葛洪
仙字嚙完还作蠹
古文雕尽仅名虫
迂谋欲寄千秋后
夙业都收一寸中
最好祖龙真解事
谈天非马顿成空

其二

春来约畧保残身
第一先教笔砚尘
不出幸逃歌鳳句
空言羞博爰龙人
冰弦断尽琴心显
薜匣埋深劒气眞
会得维摩法门意
孤峰何处不嶙峋

寿行太仆卿徐明字七十

惠文冠挂白云深家傍仙源可易寻傲世松筠长借色及门桃李尽成阴笈藏玄女
三符字书阐羲皇万古心七十纵稀何足颂他年须献武侯箴

吴明卿大叅挟方山人仲美王太学行父以三月三日访我弇园与家弟敬美曹子
念骐儿小集分韵得林字

（阙）风流可重寻足音欢剧泪沾襟不教剡渚成归易为感南皮旧侠深度曲遏
云千树响回桡弄水百花阴兰亭故是吾家褰名数依稀更竹林

明卿与诸君过澹圃分韵得穷字

无辖何须畏孟公家园不腆有春风昼长榆影傀俄后溪静人声杳霭中奏我朱弦
吴楚合感君青眼弟兄同兴来俗物难轻败源隐桃花未怕穷

明卿诸君再过弇园分韵得园字

日日呼儿扫葺门即看春夜为谁繁论心自古平原酒有句重过何氏园移病故人
当不厌避贤词客暂称尊唯怜济胜无多具报尔空梁落月魂

明卿走酌先司马墓贞以病不克从仅家弟侍行志痛志感

垄首愁云结夜台墓田松柏恻余栽百年玄草侯芭在万里生刍孺子来羈病转深
乌鸟痛独栖谁和鹳鸪哀但悬吴劔宁论晚何事星文黯不开

赠邹黄州彦吉迂闽学宪彦吉之先为宋忠公浩其外大王父则魏恭简公尝视两
省学政者也

骊歌赤壁尚相闻绛帐闽天已似云不为圣朝偏贵少几人循吏复能文道乡遗脉
从看大宅相余光久借分处处江山俱动色一诗先报武夷君

方仲美博学有文而时时使酒依吴明卿居武昌从访弇中有赠

别我方千近十年武昌鱼美足留连书从七略能穷讨字向三仓有秘传倚醉漫夸
文举客长贫忍挟退之钱纵令相见无饶润去后那能不可怜

王家馭提学春夏之际连得二丈夫子以诗贺之再责开宴

紫气充闾瑞不孤为夸英物重呱呱天门累送麒麟石海国双辉老蚌珠同歲也堪
名達适及秋争指字之无但教汤饼频频会何必论功始见呼

与元馭宗伯家馭及吾弟敬美二学宪陪杨大宗伯月夜沿流泊西墅作

娄子城头生暮烟坐深争爱月娟娟兰桡信水知何处蜡屐穿林亦偶然但语襟期
俱有素即谈朝市不妨玄机忘已信眠鸥熟綬解那劳醉尉怜（州司不出候公故云）

送殷无美赴夷陵守

十年清问满公交车今覩方州建隼旗东下江平知禹凿西来土黑是秦余渚宫人
去烟俱冷巫峡才多雪不如俱道大夫饶赋咏莫因天遠废双鱼

大中丞马公昔建节渚宫余忝气分之雅兹抚有江右贻书慰存赋得一律志谢兼
简公部人邓太史

棠阴故傍渚宫多槐色新从南浦过此日五溪懷马援当年一疏忝常何鱼械遠结
纏綿意锦段难为报按歌宇下岂无徐孺子可能回驾访烟萝

送顾太史病起还朝

片帆无恙闾城起色江潮早暮平定有朝霞凌玉笋可因秋月傍金茎箕裘别振
传家业台阁无妨盖代名况是著书繁露就君王日俟广川生

挽尚玺丞李君

内史方欣省覲时那堪庆吊忽相随迢遥汉苑金茎露零落淮南桂树枝看毳鳳毛
能不惜并埋犀塵转成悲祇应长吉文成后遣捧霓旌召太师（君卒后半岁而太师亦

捐馆)

李本宁大叅自楚访我弇中纪别二章

舫■〈舟符〉忽转越来溪太史浮湘下会稽误拟真人栖海上久知夫子在關西
看它气色还金马顾我形神似木鸡稍喜蓟门游子到别筵能唱白铜鞮

其二

谁堪支策访柴荆一笑高天青眼明八月江涛为起色五弦春雪乍成声（君时服
除）雄飞岂复吾曹事狎主凭君异日盟却笑少陵都不解李侯那肯似阴铿

少玄瀑泉二将军母七袞袞封太夫人寿言

鱼轩容与夸王国鳳诏联翩出帝州太母别封加紫绶将军新第枕丹丘称觴珠履
三千客遶膝斑衣十九侯共晓含饴今日乐不知丸胆向时愁

少玄奉国蒙恩推摄国事诗以贺之

洪都朱邸郁摩天同姓诸侯未乏贤帝欲绍封齐孝后人传摄国鲁侯年长沙不少
回旋袖子建何烦自试篇最好豫游銮玉地可应歌舞但如前

为仲淹赠其犹子肇元

新都少年汪肇元结客不肯称平原沾沾执鞭御元礼宛宛解珎贻王孙累碁少深
伯父赏学诗晚得门人尊莫将词组为月旦水镜于今吾已昏

经师朱教谕先生八十寿言

仍栖故垒学庚桑书带沿阶薜荔墙老去朱颜犹自王少来青眼或能方西河旧忆
经生业北面谁当弟子行偶为敲针一垂钓不将余日向文王

有感

出处频年尚属人于今不出始由身留将顶相称居士洗却头衔字道民一锺随身
那讳死三泔度口不縁贫寄声无限同盟者苦海中间学问津

汪伯玉司马同淹佳二仲徐孟孺胡元瑞过我弇园而张司马肖甫亦至

清秋起色强登台不为高轩护绿苔星斗自催占象动风云羣拥卧龙来况逢开府
前茅地各逞追锋上驷才出处纵殊心事一狎人鸥鹭莫轻猜

送伯玉同二仲元瑞清洋将抵玉龙桥望玉山作

离筵太白肯留残欲尽豪贤且细看青雀又分孤旆色玉龙空并两峰寒骄从麈尾
争名晚（仲淹被酒与元瑞争名而鬪）老向刀头忍泪难（伯玉与予最老而最相知）
何事不留三鳳住王家兄弟少琅玕

乙酉元日试笔

黄鸡唱晓酉更眞老兴不逮儿曹新孤眠一千八百日尚作六尺寻常身坐头却占
最后盞厯尾数残无复人旋呼蓝举入山去别向梅花探早春

人日得毛侍御秋中贵竹书有感却寄

当时绣斧出姑苏壮思那随别思徂秋鴈始为人日信夜郎方表使星孤轮埋疋马
霜先后檄扫千盘瘴有无不为渔樵堪记忆祇应清梦入江湖

癸未十月成伯从孙詹録偕弟进士寅季侄孟嘉过敬美澹圃看菊花作

九月黄花十月肥畴能澹圃鬪寒菲移庖酒自江州好挈弟人夸小令稀二阮不须
论犊鼻诸王应是胜乌衣凭谁请得葳蕤钥夜半犹歌缓缓归

甲申中秋夕成伯寅叔孟嘉复携酒弇园楚人李惟禎来不疑辈在焉颇具歌吹之
乐得一首

弇园寂寂已经年忽有新颺弄管弦楚客自能鸚鵡舞呉侬偏爱鷓鴣篇携来羣从
兰心美折后双枝桂魄圆尘世明朝应诧说缙山此夜有羣仙

寄夏州张中丞

然明风绩许谁攀西断单于指掌间投笔欲干蒲类海如椽还湿贺兰山囊无赤白烽长偃绶有银黄肘不闲闻道秦天犹咫尺未须愁问玉门關

宪使西华王公七十乃弟旻谷公亦六十九矣子念乞言为寿

西华山头西母过喜君花萼媚烟萝从知噉蔗流光美况复分柑乐事多门有鉴湖堪贺季室无天女胜维摩（公居禅观傍无媵侍）坝簏别是千年曲不唱平原奈乐何

范侍御按越还枉驾草堂值予徙止弗获修款志感并谢

官中一范早知名况复邮筒来往情却为青郊深草屨虚劳紫气枉柴荆鸱夷去越从夸疾鱼舍还吴且自轻见说飞章摧五鹿那能岳岳傲诸生

寄彭钦之太学

看君经笥腹便便入洛何妨强仕年旧有华亭豪士赋新成兰史辟雍篇桥门细雨巾从角帝里高山瑟渐弦师傅安昌应不乏阿谁虚席待彭宣

赫侍御按蜀见讯以所作金紫桥诗刻及吕仙翁赠诗见示有答

白简丹心奉圣朝犹能清念及渔樵即看頰尾双鱼色至自驄蹄万里桥夔子暮云应独袅蓬婆春雪为谁骄吕翁虚有邯鄲赠叱驭王尊岂惮遥

送徐孟孺游北雍且应秋试

南州孺子雅翩翩坐榻时烦府主悬璞玉自佳三泣楚囊金行尽一游燕寧因狗监文方贵纔及龙门客便贤（君久客元馭閣老）衰病送君无可道依稀犹记鹿鸣年

利瓦伊楨使君自金华修讯且惠山资有谢

春来萝薜媚深幽猿饮鸿栖何所求但得音书贤十部宁将筐篚累诸侯山驱白石

堪修馈水酿清溪足破愁若使郑公重仗钺还从竹马候江头

观奕者周生与朱茂才奕偶成一律赠周

媚清馆前花事微客将棋局送斜晖聊成死处窥活趣不向生门发杀机敌手垒成
俱渭水监军马蹶有淮淝一枰未了兴先尽余响犹残吾已归

赵汝师宫洗领少司成以野服过我草堂言别作

当时双凤向朝阳此日三鳧集讲堂黄绮可缘宫傅重白衣时作野人装旋分僧供
茵蔕暖小出村沾栢子香非是木禅都不荐慈悲一愿未曾偿

汝师语次多及时事民瘼慨然有感复成一首

春风融融吹客床忽有霜色生干将感君方寸起鳞甲笑我七尺真皮囊燕中罗网
致足畏吴下茧丝胡可当藉令指日相司马何似得雨烹弘羊

弇山堂庭中玉兰及含桃二坞

玉兰万朵玉屈卮含桃亦自烟迷离祇愁红纷坠瑶砌忽喜靺■〈革曷〉黏青枝
朝霞碾圆摇妓鬓甘露结液和诗脾刘郎醉卧舍人横啗妃女唇甘如饴

弇山堂后石甃芙蓉池

弇山堂北四绮树落花尽落芙蓉池丙夜盈盈璧月照伏日习习香风吹卫军开府
夸上客秘监擘纸裁新诗野夫但解碧筒饮九窍凉生当语谁

竹径之右方小白莲池

懒病难畊绵上田不因中圣始逃禅行穿王舍城中竹小得东林社里莲月色细分
金琐碎露香偏施玉婵娟欲知双屐钟情处多在朝晖未吐前

少保戚公元敬解岭南将印还莱海访余娄上言别得二七言近体

将星初傍女牛乡与剔青灯秋夜长岭海归装无蕙苒蓊门遗爱有甘棠从他贝锦
时催织未必良弓便可藏别酒自温肤自粟篋中霜色起干将

其二

娄江西接五湖涛别鹞穿云望眼劳但使鸱夷心事足毋论麟阁姓名高安期自有
仙人枣冶子何烦大相桃若遇鲁连东海上为言余久爱蓬蒿

送常章二广文射策公交车

鸣鹿诸生向祖筵碧霄鸾凤剧联翩四诗谁不推匡鼎三绝俱堪嗣郑虔今去连城
双白璧竭来寒雨一青毡悬知博士多高第不是菑川即广川

送蹇子上兵宪进中丞抚顺天

猎猎朱旗鼓吹翻聊从父老一攀辕袞衣可更来南土锁钥今偏借北门日月自悬
三辅近风云长护七陵尊何当貌得髯公相把向麒麟阁上论

其二

初霰霏霏点旆旌钱君偏作蓊门行单于马掇前茅劲中尉旗开细柳晴但是运筹
推蹇叔宁因结袜礼王生摩娑倘认燕然石笑杀曾污汉将名

太仓周大夫入覲大夫以治行高数被旌荐而催科不及数未得奏考

江左方州礼数崇一时岩邑尽输公阳城任拙催科考尹铎终高保障功别去单车
装似叶朝回五马气如虹老夫数沃醇醪饮今日颜衰敢望红

送昆山刘令入覲

父老讴歌拥别筵谁能借冠不朝天清心白璧看同莹治行黄金赐独偏叶县仙人
鳧遠日中牟茂宰雉驯年翻嫌刘宠生多事不遣行囊长一钱

游金泽古寺

花宫一刹耸烟霏像教虽存法力微佛供可周饥鼠食僧维时傍倦鸦归尚书剩有棠阴榻丞相留将藻火衣却笑东亭痴舍宅如云甲第许谁非

伯玉建精舍于肇林犹子肇元百步外构室署曰东林赋而书之

精蓝法护创何年仍许东山傍谢玄屋拟鴈门呼作市身依莲社好逃禅斜阳易得西归境新月迟窥乍上弦从此只应宽酒戒莫教陶令废周旋

支简亭学宪谢病归问讯之

清秋五岭倦炎蒸一疏天回玉井冰合浦采还珠的歷郁林装借石峻嶒到时韩子能驱鳄归后支公不养鹰消渴已蠲饶起色可无新赋颂中兴

吾郡太守朱公治行为天下第一天官卿言之上超拜浙省大叅分理明越余老且病于其发也不获从父老攀挽之后仅以一诗为赠

明堂大计中兴年蚤有除书下颍川膏雨尚留呉地润德星初傍越江悬政成神雀飞还下课最金鱼赐独偏他日史臣循吏传可容谁在次公前

赠蔡生去疾

老觉朱弦倍可怜那能对尔不蝉连名从元礼门中得酒爱知章水底眠物色要搜瀛海外风流须问建安前莫夸仙骨天台易不浅丹房四十年

丙戌元旦试笔

条风吹腊媚初辰六十俄惊又一春总为书生心事足翻欣甲子厯头新荐来椒酒颜从頽浴得桃汤鬓已银不向青童觅如愿岂烦朱绂挂吾身

李照者故徐方伯子与与仆之笔砚交也膺贡北上一诗赠之

襄南纳节任居诸地下修文亦替除谁信青毡余旧宿于今白首向公交车垂钩渭叟长嫌直结网唐家故不疎主府似怜三语椽橐装无恙万言书

寿华湖西翁八十

一廛身事五湖南八袞淫书意更耽名向白衣无可妬诗如玄酒自言甘鞋轻不染
尘中迹麈秃綠深物外谈姓字可知西母刻见多清梦绕吾龔

武昌刘长卿先生见访与谈啖河鲀鮓残作

问余何事忽轩渠乐府刘生意气余垂老数行游侠传居平一纸絕交书时清不救
鮓生窘事往那论剑术踈偶为海王输俊味对君犹忆武昌鱼

送申比部还朝覲省侍

畫省仙即上帝畿春风桃李有光辉过庭转觉诗礼熟休汝翻矜冠盖稀署里白云
封隱几山中璧月媚初衣似闻麟阁诸名世容得桐江一钓矶

应城陈令自贵竹枉驾龔园小宴分韵得开字中字

衡门春色日相催况是新知万里来綠鬢向谁谈拙宦青云何处觅怜才航留锦里
先生泛花待河阳令尹开纵有唾壶那用击与君相对但衔杯

其二

春城忽尔下冥鸿把酒论心事未穷炙日暖将花共媚临波影与石争雄孤踪汝托
浮云外百感吾残返照中莫恨须臾便成别古来文苑几人同

寄顺天蹇中丞

清尘下马卷朱旗正是呼韩款塞时烽火不惊刁斗色饶歌偏写越裳诗雅闻茂苑
棠千树行见渔阳麦两岐任使胙茅酬大国不如调鼎赞无为

送林君自江南帅入领禁兵

白麻黄帟日相闻燕颌虬须故不羣父老争持都护绶君王借控羽林军轻舟敌浪

全须石大旆凌风半入云见说匈奴先歛塞可容麟合畫元勳

刘介征司农损书及新诗见示多哭仲氏国征语却寄一章慰之

闽海縹虹纵复横畴堪意气比刘生第惊蛟室传来泪多是鸪原痛后声老觉断金
差有味病逢埋玉不胜情交游岂乏鍾期耳莫向人琴恨未平

再寄介征司农时家弟已定交矣

漳江天尽尺书来茂苑人惊匹练开可是已经平子目谁能不惜孝标才冥鸿失序
犹堪矫黄鸟迁乔且莫哀他日单车追入洛迟君携手阖闾台

寿宜兴吴詹簿六十

玉珂犹记倦登瀛无忝尚书旧履声少日功名三语掾故人风味五侯鯖山余琼树
堪呼寿水入荆溪转更清遥想畫堂文酒宴鹤能传信鹿能迎

苏子瞻学士初通判杭州过秀州遇乡僧本觉庵文长老赋一诗留赠其后以学士
再莅杭过之则文已退院三过之圆寂矣皆有诗志其感慨后四百年太守龚君勉于庵
内别构丙舍祀苏公颜之曰三过而悉步其韵一时诸贤和之不佞继焉

五马■〈走参〉■〈走覃〉白髮中文殊已老尚呼童由来万劫俱成幻何必三
过始悟空此日使君真好事当时长者不言功若同圆泽论行径只在钱唐东复东

其二

树杪招提郭外村端明遗偈镇山门高僧夏腊何烦计前辈风流可重论谒罢只知
词客贵觉来真让法王尊尚疑此话多人我何似翛然两不言

其三

莲社老僧随幻去蓉城学士也难寻三毘尼地无生死一刹那间有古今不向空王
抛世法却从初地寄乡心法堂总自巍峩在还有茱萸探浅深

再赠金山上人

鳌山今日道初成
尤乞凡夫为证明
信我浮杯无剩语
耐他弥勒有求名
新书任作琉璃色
绮语如过黄鸟声
举付丹霞烧像火
倏然一钵信心行

渔阳塞中丞走使惠饷谢之

春深一叟倦婆娑
忽有材官鼓篋过
始信郑公移镇后
依然陶令酒钱多
人从北斗占干莫
天与南薰施薜萝
贫病愧无琼玖报
自呼如意按燕歌

徐茂吴司理解事之后三辱过存投赠新诗迥绝辈流泛澜众体逾自斐然庶几不孤黄梅授衣之托矣聊报四章以志区区

才脱青衫便自由
五湖烟雨足渔舟
居然只字归风雅
别与微权傲胜流
有酒可无桃叶妓
移家须傍藕花洲
长安达者应何限
不为悲吟也白头

其二

怜君落魄走词坛
白帽青鞵紫箬冠
探得骊珠谁比价
握将牛耳不论官
流言似与湖山会
失意翻骄天地宽
莫怪老夫儿态发
时时绮色到蒲团

其三

屈指归田事事真
可从时态怨沉沦
天留岁月私黄卷
我自春秋得素臣
若下但宽賒酒处
沃洲何待卖山人
逢君且说彘中好
莫遣梁间一榻尘

其四

江左诸徐不乏贤
菰城接武迥功先
还惊天上麒麟骨
载覩洲前鹦鹉篇
拙似君苗思毁砚
老逢锺子重留弦
莫安渔父无人妬
尽自能操物外权

助甫中丞解夏州节候次新蔡里中得二律寄之

夏州城北赫连台
东望燕云黯未开
总为中丞初解节
还因父老一传杯
金城郁作

千秋壮玉帐殊深万族哀最是君王空拊髀可能偏借异时才

其二

解组归来乐自余胎簪桐栢绕君庐依然上蔡东门猎不害中山满篋书万事总输
文苑在百年难共酒人踈老夫丘壑差无恙好为相思一命车

送杨司理被征

清白關西代不衰风猷吳下去还思生平自是无三惑暮夜何烦有四知明主自传
青琐钥举朝争诵皂囊辞莫谈江汉垂纶叟十载天容一壑私

张将军要余与沈令尹潘林曹三子骏儿同泛海时风日清美颇穷胜槩乐而赋之

天鸡唤白晓云和歷歷帆檣镜里过羽扇徐挥散鹅鸛石梁初解辨鼃鼃回风送鼓
浑疑近暎水横旌转觉多应有越裳来贡舶祇今犹自不扬波

其二

空青一片引牙檣不遣乾坤属混茫风伯挽波回碣石日君排雾上扶桑承平渐偃
千烽色转饒曾飞万庾霜任使兴公心境杂也应安坐听鸣榔

月夜与张将军及诸贤合饮海舶即事

暝色苍然迥自开舵楼殊胜妙高台灯如列宿黏空出乐似钧天飡帝来忽捧骊珠
霞激灑乍惊鳌足水滌洄老夫大有挥毫兴欲嗣玄虚愧不才

其二

万顷清光溢建牙孤城隱隱送悲笳眞人自稳凌风叶使者频窥贯月槎急下酒筹
縁舞柘繁敲羯鼓为催花不须指点蓬莱境回首人间便可夸

卓澄甫光禄邀汪司马及仲季诸社友大会西湖南屏选伎征声分韵赋诗伯玉以
高字韵见寄俾余同作得二首

一时江左擅风骚遂使湖山应接劳花坞乱扶卿月上笳门孤掩客星高纵呼陶令
愁难入不学苏生醉始逃若问弇园佳胜事翛然坐对一方袍

其二

秋半南屏景更饶六桥新水碧于醪社中名胜推三雅（谓司马仲季也）湖上诗
篇鬪两高客重王孙骄自得操成司马兴逾豪非縁彦辅书生语老去风流付尔曹

为王光禄赋白燕

不向残阳逐倦鸦暂依新月隱梨花玉關霜被将军颌银剪春裁浣女纱玄鸟色移
新毫社乌衣名改旧王家令人转忆昭灵合曾覩瑶钗压鬓斜

顾进士懋善令闽之瓯宁

别酒呉江更一卮与君聊说宦游竒七闽山翠偏夸胜十月林红正弄姿渡忆驂鸾
仙吏好山逢灵鷲宰官慈莫贪烟路鳧飞近且漫看云度武夷

丙戌仲冬五日为余悬弧之辰与敬美弟及子孙谓南北二峯小饮得一七言近体

今年今月有虞世此日此时生甫辰世间甲子粗已足厯尾支干仍换新诗书馥郁
见三代骨肉都卢完十人莫愁玄冥鼓朔气自许红友招青春

丁亥元日即事

今歲元正大阴晦儿童寂寂收笑喧已无云物媚清旦祇有雷电摇黄昏老慵不作
畫鸡帖病废何知白虎樽嗒然匡坐了吾事莫教剥啄惊柴门

题陈方伯玉叔天尺楼

高楼去天只一尺韦杜城南那许同倚檻星河翻下界卷帘闾阖吐刚风自怜王粲
登临懒不怕陈登意气雄尔道神仙好居此刘郎井干委秋蓬

寄宗良国尉

江水粼粼无限声接天风雨豫章城俱传子政为亲累不拟文休入弟评朱户蓬万
添傲色清斋橡栗助饥鸣蒲团欲掷人间世却为交游感慨生

二月三十日清明又唐初晦节

二月已破三月新清明节晦来争春阶前萸荚落不惜陌上桃花娇自亲分无久住
世间客何用悲他泉下人昏钱拭罢枯泪眼长有残酒呼西邻

沈同守过我山园要常广文陆太学共集颇极登泛之乐沈以四咏见贻仅酬其二

海上三山未敢云沧浪一曲若为分座头白恰狂司马船尾青毡醉广文惊网巨鳞
时自闪坐林幽羽数相闻莫疑桃李多生态总为春风属使君

其二

老夫仍葺浣花庄判得山僧半日忙太学诸生夸并舫江州刺史喜留觞（沈君携
所酝淳醪续饮）藤萝挟暝羣峰壮兰芷将风一水香谁为高楼题八咏只今犹是沈东
阳

临淮彻侯李君知六军事赋此寄贺

将星今旦耀中阶轧轧推轮出禁槐银管细书穿月崛金吾妮队拥天街异军偏号
苍头子别校多骑白鼻騊见说朔方新气色只今还是李临淮

周进士移居贺之

周郎江左旧名流况逐乌衣诸从游通籍已分金马地移家全傍玉峰头门前问字
开三径坐里看山傲五侯最是后庭琼树好一枝仍报郗家秋

弇州续稿卷十七

●钦定四库全书

弇州续稿卷十八

（明）王世贞 撰

○诗部

△七言律

寿邢封君

甲子重开十六龄祥鸾为德鹤为形诸方衲子俱称佛一邑婴儿半姓邢雅有金绀归视膳即看兰玉尽充庭试论南极称筹者也是江湖老客星

送袁子年守青州盖仆三十年宦游地也曾题诗刻石云门山侍御毛君近为亭覆之

曾忆东方千骑尊羨君仍拥五熊旛城西澗水能为酒榼外云山可作门避舍盖公应自好观风季子欲谁论如闻台使登临地洗石重拈旧墨痕

送石阡守陆

横金被紫拜新除官好何妨万里余犵狁■〈衤义〉衣仍讳鬼咨陬入饌解名鱼石田虽瘠堪供赋斋阁长闲好著书却笑郁林先太守虚将压载累舟车

送抚浙温司马入佐大农

太真名辈许谁如况是追锋有召车全越已收文种治大农能废计然书皂囊胆落传应久白屋神交意不踈欲买豚肩趋道左恐烦轩冕狎樵渔

张左虞都尉故与余善每过弇中风流谑浪飞白无算余犹以酒客卤莽遇之后稍出其诗余稍稍称善然不觉其异也及集成而丐余为叙因赋诸友篇左虞仅居四十人之一耳去年左虞死余不能往吊以香帛寓之而无主丧者孟秋之朔偶摊书出晒于散帙中探得他诗读之不甚快最后一卷极清新丽雅之致句字有力格韵不凡而忘其谁作以集考之则左虞制也不觉失声而泣吾愧锺子期多矣遂成一七言律而会其子授

官奔丧归并书诸友篇寄之俾焚于棺所逝者有知将从夜台沽酒三叫称快余亦可以无憾艺林矣

都尉频过白接■〈𠂔离〉酒酣时自觅锺期虽成玄晏先生序未表邯鄲幼妇碑
岂为兜鍪寬自狎还从凿落误深知今晨散帙初开眼大雅中兴定不疑

陈金宪文遂按节彭城故人子曹生上谒赋此寄之

八月漕河正稳流此时宾从在黄楼重扶十载乘驄色与续千年戏马游门为通家
收北海客因长揖礼曹丘酒阑倘及江南事留得微星傍女牛

有所闻作

药垆经卷日从容愧杀微名溷九重岂为禁林需左马偶然宗伯让夔龙霜秋不耐
芙蓉老云色依然薜荔封自是五更眠更熟可曾听到未央钟

其二

闻道弓旌及隱沦可緣真遇爰龙人虚云展氏曾三黜其那王尊仅一身苜蓿摠肥
沙塞晚桃花无恙武陵春欲知元亮籃輿意畏踏丹阳郭里尘

钱右伯对沧王公之浙藩于西泠剧思西湖之胜因成二章送之

娄子城西枫乍肥使君轩盖有光辉行从父老攀青雀坐引湖山入紫微两地摠深
吳会福一溪偏失杜陵依相思夜雪湏乘兴棹到钱塘未肯归

其二

长公公事了西湖能胜于今右伯无车怠实时乌幔榜疊干随处酒家胡人豪摠并
推昭代物色应湏问老夫好忆羣贤临祖日牙璋万队出姑苏

送陈郡丞履入为户部郎君凡两丞吾郡矣

上佐重辉泽国乡中朝新拜地官郎逾深竹马他年意不改银鱼旧日光奏计有人

贤尹铎采风何议难弘羊临岐更拭垂枯眼为有闾阎泪万行

顾尚玺名世八十寿言公有二子美而文

肯学冯郎老汉曹蚤知陶监挂宫袍篋中旖旎余鸡舌池上叅差长鳳毛竒石数拳
心并古清商一部兴弥高闲来却笑非熊叟即使垂竿也自劳

过喻使君邦相郡斋与其尊大夫八十翁四孙及通家余子小饮有述

十年刺敝长清狂悬榻传呼已下梁何忝朋车仍向吕别从文苑得龚黄筵中鳳有
将雏曲膝下龙传上客觞不为老夫踈笔札欲标高榜德星堂

喻太守邦相及陈丞李司理邀饮顾园作

初从窈窕转深幽忽敞中天与目谋杰构时时撑碧落回廊面面俯清流涵星浅藻
催浮动入雨踈筠佐唱酬不道使君容阿敬岂应单为辟强留

过大宗伯徐公作

旧标通德宛如斯屈指登堂十四期不为龙门孤转峻自縁狐性老多疑谈深忽出
忧天语病久方知荷帝私试捻霜髭两相问于今得似秣陵时

徐大宗伯归有园留宴作

曲檻回廊断复连踈花竒石巧相縁横穿屋里千迷道忽入壶中小有天映架青藜
寬自读开尊白堕许吾传丈人门径今粗晓时拟扁舟问草玄

潘方伯邀游豫园

豫园长日鎖岿堯为我聊慙鸟雀骄碧沼静能涵象纬朱薨高自割烟霄嵯峨玉耸
栖云岫宛转银题上汉桥却笑闲居先散骑枋榆三尺也逍遥

顾尚玺伯仲东西二园今并为一然主人老病芜不治矣信步一游志感

旧识何家山大小渐来并作一山深主人称病掩關卧园子偷闲无处寻
墮石将藤全失径窺阶迸笋别成林亦知陵谷须臾事徒倚能令百感侵

游潘顾诸园毕自题畀园

踏徧名园意未舒大都京洛贵人居穿钱作埽难调马鏤石铺池碍种鱼似比幼輿
输一壑转令元亮爱吾庐兴来呼得尖头艇喂蚁烹鳞信所如

广州朱提举以欧楨白虞部书及诗至却寄

客星三载出姑苏翹首南云思转孤忽尔羊城逢使者顿然蛟浦至明珠篇章意气
差强在齿髮神明可系无君道丹砂勾漏好倘能分貺及凡夫

过呉太学新园赏菊卜夜作

门外轩车若水流能虚要地结清幽连峯半隱嵯峨阁（阁高而山小故云）暗室
中穿窈窕沟银烛媚回黄菊暝綠窻骄借翠筠秋狂夫丙夜犹呼酒寄语陈遵辖慢投

虎丘西僧房晨访曹茂来居士山阁小饮

竹径通幽信短筇山楼忽敞得从容残霜墮木青仍在旭日披云紫渐浓香积总饶
居士饭东林翻厌遠师钟逢君更自寬拘束一盞双螯喜杀侬

慧山东园为王光禄家物余再过之矣复以与比部曹安二山人曹王二太学一游
即事有述

三过王园兴转新为贪幽景岂關人苍苔印鹿尤堪赏古树啼鸦也不嗔自有眞山
当北户任他流水入西邻翻骄履道林中竹总好还沾京洛尘

华太学邀过鸿胪卿王公慧山西园景物尤胜丽与俞比部曹山人同赋

履齿何妨细雨过主人綠客治岩阿朱楼有势争霄汉绮树无心长薜萝迭石巧当
山色阙分泉别取水声多编钱故是王家埽唤作畀中奈我何

迭前韵奉酬徐宗伯见和之作时公有书劝驾诗尾亦及之

三见咸阳哭李斯一归东海十成期毋论启事人堪笑忽得除书已亦疑野性云霄
终自浅主恩天地欲谁私纵令伏枥雄心在犹忆羊肠踠足时

迭前韵和徐宗伯归有园见和之作

青樽小语夜留连重结金门隱吏緣密竹似调弦上雨踈萍欲点镜中天功名兔苑
吾甘薄姓字鸡林尔任传无那谷神新有解从知不爱子云玄（公押玄字悬知归有非
真有直欲从君叩牡玄之句故云）

答汝宁张助甫中丞

歲晏崢嶸有鴈飞中原音信未全违青山快意无南北白首谈兵有是非休汝不妨
车骑简过淮殊觉友朋稀莫疑江左除书下依旧菰芦一布衣

三迭韵徐宗伯劝驾之作

老衰那敢信吾斯才拙宁须用可期萧飒蛾眉应少妬啜嚙鸡肋反堪疑命如侯白
聊称厚身学杨朱祇自私闻道汉廷新礼乐知公不忍负清时

三迭韵和徐宗伯大士斋韵

轻世那能似鲁连祇因贪结海山緣偶逢居士论初地却引私陀礼梵天白马东来
无法授青牛西去有经传但教心境长如水不碍真如不碍玄

戊子元日试笔

严城爆竹鼓紉紉屈指新晨六十三小为祝厘违野服将无改迹恋朝簪羣儿椒酒
虽全却小坞梅花或可探（时余以斋日戒饮）出处浮云无定所肯容时趣入终南

同年韩令君百谷齐之诸贤邀饯幼于馆分韵得云字

社中诸僮摠能文况复柴桑有隱君十载空林成独往一宵清晤又离羣拈来小草

谁偏愧赋得文无也爱闻稍喜吴门如练色不妨犹挂秣陵云

徐叅议邀游东园有述

君是当年徐湛之一时风尚在园池轻篮出没疑秦岭小艇回沿似武夷渐入深崖
青窈窕忽排连岫玉叅差不知处处梅花发羌管犹烦特地吹

咏徐园瀑布流觞处

得尔真成炼石才突从平地吐崔巍流觞恰自兰亭出瀑布如分鴈荡来片玉挂空
摇旭日千珠蹙水沸春雷醉能醒我醒仍醉一坐须倾一百杯

奉要太宰袁公抑之过天界寺上人房时大司寇陆公与绳后至谈燕梅花古松下
作

隱囊纱帽对传卮宛似袁公步履时屋后梅花堪尔供庭前柏子是吾师从知矫鳳
冥高汉偶为将雏遶故枝言向士衡询往事语来无那夕阳移

王太仆公汉上之别垂十五年矣读公全集见寄见怀之诗凡十余章而不尽達赋
此谢之贞之诞辰乃翁登第歲也

北海风流一代贤襄阳耆旧许谁先揆余初度悬弧日正尔公交车射策年敝刺姓
名劳齿忆空梁颜色借诗传旧交垂尽鰕生老唯有灵光独岿然

游灵谷寺

寶公灵骨未全隳寶地金书特护持塔徙摠输龙蛻处铎飞宁复鹤惊时（初寶公
与白鹤道人争志栖止处公以铎道人以鹤鹤至其地欲下闻铎惊而去公遂得之）琵琶
街畔疑天鼓舍利轮中表物仪却恨貂珣诸贵在不教披薜读残碑

夜与诸公饮大雄殿前庭银杏下得月有作

平楚苍然暝未开暂依高树共徘徊一珠陡自中天涌万象纷从下界来微■（谷
九）不妨呼米汁晚叅何幸傍经台诸贤不置支公坐寂默谁窥许掾才

陈先辈以佳章见投报赠一律

南州一刺许登堂白下于今是豫章古调自来归伯玉高名当复比元方家藏敝帚
惭难荐客有明珠喜欲狂岂为西台多列柏看君字字挟风霜

送太宰杨公考绩北上

尚书旧绩优三礼太宰新衔冠六卿此去物情推简要向来公望在寅清都人跼臂
迎车辙天子临轩识履声倘及鳳皇台上色只今犹自暮云横

同羣公宴徐氏东园二首

君王旧赐青溪曲太傅长留綠野堂歷乱峯峦挿云汉纵横卉木尽文章芳樽再展
怜春色畫舫频移媚夕阳不是羣公仙骨在蓬莱咫尺杳茫茫

其二

公子名园辟向东至今池馆尚称雄朱薨忽耸云端鷺银榜遥萦水面虹为许渔樵
开薜径且将丝管付松风信陵虚有夷门地指点蓬万说魏宫

过徐锦衣西园二首

主人如解子猷来三径春风许暂开百种花名鬪金谷半空松势压徂徕飞觞倒入
冰壺影访迹徐披石鼓苔行到溪山渐穷处隔垣云色隱高台（园之后别有园鳳皇台
在焉）

其二

丹崖软草藉金铺翠壁繁花带绮疏忽覩渔舟穿薜荔纔知魏阙有江湖枝头鸟语
听仍失竹里云生看却无谩道彘中应更好老夫随处且卢胡

饮魏公南园作

甲第芳园冠帝京上公高宴聚星卿球场地贵堪金埒幄榭花繁似锦城按舞别呈
回鹞队吹箫俱作鳳皇声莫将泉石轻为品曾覩先皇带砺盟

同乡诸君宴朱王孙同春园

朱邸王孙取次开鳳台西去有歌台池从汉苑天潢借岭载齐宫碣石来倦鸟似惊
茵上舞残花偏爱掌中杯不知欢极髡难醉翻恨城高暝易催

汤比部詹内翰邀同少司徒方公游徐公子万竹园时主人以疾不见

莫嫌张廌解辞宾有例何曾问主人客比七贤差恨少侯同千畝未言贫琮琤别写
风中韵峭蒨平添雨后神但醉逃禅浑亦得已公兰若是西邻

赵司成邀同王光禄赏王贡士园芍药前是已醉牡丹下矣芍药尤盛丽可爱赋此
与之

四月王园醉牡丹仍逢芍药拥朱栏毋论百种俱争媚为殿羣芳且细看谗浪古时
传洧水风流今日冠长干莫将倾国虚相让谁似霓裳舞玉盘

端阳后一日薛鸿胪邀宗伯二司寇司农游武氏园即事

偶值幽园字辟疆羣公多暇此传觞蒲香可是余端午竹色将无胜洛阳僧眼细分
红叶水（小池通御沟水）仙踪深掩白云乡（有楼奉仙像甚秘）莫愁归骑天街暝
新月纷纷已过墙

雨中过姚氏故园与周公瑕张幼于詹东图戚不磷分韵得春字时公瑕旧游之地
将五十年矣

但许清游不厌频姚园虽故客怀新雨声立散千家暑天意初回万井春别岛过云
浓泼墨平溪蹙水细生鳞沿堤大有金城树总是周郎暗怆神

魏府三锦衣北园同方司徒宴游作

青山遠自鳳台分（山石自鳳皇台园移致者） ■ 〈穴上叫下〉 窳透迤迤不羣

行处苍虬时一攫坐来黄鸟数相闻疏成曲沼因藏月别起高楼拟借云若问主人何所似魏家公子信陵君

武定侯故邸竹园

碧阴如带拥琅玕阁静潭澄五月寒淇澳雨余添峭蒨夹池云起助团栾前朝金穴恩犹在（谓翊公勋也）贵主敕楼迹已残（先朝都尉鎮尚永嘉大长公主）见说侯家千畝赋可因邮使报平安

诸公会赵中贵园

西华西去有园亭为客高楼日不扃檻外四收吳苑綠杯中一送蒋山青沟从太液寬分润席傍微垣好聚星莫笑贵人艰粉黛只今姚魏未全零

过故姚大名留饮有赠

十年襟尚一樽同剩有东山且付公兹日白门归傲吏尔时青鬓试扶风歌残伏枥心犹在语到真乘境始空（与君谈释门颇畅）翻恨夙生余习气并将词笔叩文通

大司马阴公出扇索书近作污茧之后复得一律博笑

尚书自是岷峨英四始究极八法精■〈口展〉然授以白团扇顾我要写金陵行分无名笔嗣子敬可有秀句酬阴铿尚有宠光置怀袖或使清风习习生

张幼于兄薄游金陵过从甚数忽尔告返聊成一章送之并寄长公伯起及韩令

爱汝名隱复名通片言能生四座风长干花月正眼底石湖云树来胸中鸟还久矣陶彭泽禽戏翛然张长公我自东山幸无恙不教猿鹤许相同

徐二公子邀与陆司寇吳司空游东园

六月冰壶生昼凉侯家池馆胜平阳楼头霁色开鵷鹄台上新云似凤皇客诧郇公厨味好人惊卫尉厕衣香不烦投辖深相挽小舫青油系綠杨

王丈太仆得余前寄诗輒步五章见报敬迭奉谢并怀贤从故侍御

冠盖章华光昔贤郢中春雪敢争先乌衣借我称宗老白首逢君作少年才大百篇
翻更健名高一字也堪传犹残小阮前朝事说着那能不黯然

詹东图内翰迁吏部郎移舍过题园亭

新佐天官领百司可如供奉玉堂时向来仙骨应俱羨此去冰心祇自知衙散图书
周四壁亭虚花竹隐三垂墙头一片钟山色好是长吟谢朓诗

送林户部敬夫出守雷州时敬夫以诗留别

花封上考旋浮沈粉署陪京更滞淫晚得郡符聊解摈可从文苑觅知音三刀不独
方州梦十里还成到海吟莫向雷门疑布鼓远臣今系圣皇心

其二

五马虽荣未足酬白门郎署少风流惭无启事同新沓薄有诗篇答播州（谓薛道
衡也）在宥摠偏雷电至不扬那为海波愁贪泉便饮难移念廉石将从压载留

寿内江邓大夫弟为中丞公子为麻城令

五马抛来步峡云一珠收得媚江瀆居依华萼知难弟（地有华萼山）宦有甘棠
识使君怀县彩衣遥似火邓林琼树尽干云还将御史台中柏酿得长春酒易醺

赵高邮来亨以诗寄怀并示新集有答

曼容甘薄犹存秩大阮虽归别有官似尔早抛牛斗郡（高邮为牛斗分）半生长
着鹿皮冠酒如彭泽时愁少家并匡庐好鬪寒所幸知音晚途在朱弦流水不空弹

约周公瑕隐君汤沈二比部袁右军陆山人齐王孙游清凉寺阻雨不克登台小饮
方丈作

冲雨无繇叩上方一尊聊溷远公房坐来薜荔时添润斋罢茵陈尚送香未借文殊

新色界从呼冠達古轮王（清凉为文殊道场又云是梁武故苑）诸贤蜡屐知无恙天
眼应为取次偿

哭弟后得李仲子能茂损书及古近体六章病甚勉酬一律

伤心万事一身孤名尽犹堪借子无任使暗投毋按剑那能逆旅便酬珠将苞日彩
终巢阁欲血霜啼好过都见说胡郎诗藪就龙门咫尺在菰芦（老瑞着诗藪成李与同
郡故云）

赠袁履善长史同年

霜髯此日围碁叟綠鬓当年同舍郎出仅一身何假锺行逾千里不赍粮未论缁素
皆亲属才得湖山即故乡似尔萧疎吾亦易檻猿笼鸟更茫茫

履善先生以二诗书扇见投报之

纨扇诗题字字新秋风一展一含顰少陵难字将轻过扬子方言未易论觅句祇应
天外得知音谁解曲中真芙蓉纵有天然色欲报宁无按剑人

送路大夫自司农部出守巩昌

为裘旧识名家子制锦俱推大国工十载簿书秦主计九秋旌节汉扶风裴公湖上
呼青雀诸葛营头度畫熊但使卧思清静理何烦问道礼崆峒

博罗张子孟竒通春秋以文名岭外久矣今年秋将偕计北上薄游南雍出所业贄
余俄尔言别挹注之情黯然而深时赵少宰有二律送之余亦次焉

白门喧鹊胜啼鸟客有张卿美且都早日罗浮占紫气尔时南海至明珠应徐欲尽
吾真老籍湜能来意未孤不独天人三策就春秋繁露似君无

其二

鸡鸣山翠郁嵯峨得一龙门便已多平子两都仍赋草曲江千载更贤科春风拂坐
堪余主秋水浮槎柰尔何若向翹材馆中问扫厅丞相待谁过

吳三皋倩应试金陵以通家子来谒得见新文赋慰赏之余走笔为赠

车门一入通家刺遂有芳飏满坐回骥子汗从千里见凤毛文自九霄来清标已足
夸庭玉大赋真成辨楚材而父向衰吾已老鄰枝须傍两家开

八月十六日携酒高坐寺同郭道人次父王山人承父孙山人齐之徐司理茂吳邹
学宪彦吉梅茂才禹金凡七人分韵余得南字

鸞宫高踞鳳城南半入杉松暝色酣杯底应徐无俗韵坐中殷许有清谈新蟾似尼
严譙漏倦鸟疑催俗客驂莲社故应饶野服竹林吾总愧朝簪

赠池州赵司理时君以棘事入都过访

入门相见便呼奇大觉风标胜昔时才读永州司马记又吟杨部法曹诗（君见寄
所撰池州郡园记已复示棘中倡和数十章）龙门目我能无愧牛耳期君定不疑忽忆
龔中何所似三春杨柳最青枝

丁休宁以棘事过金陵见枉有内子之戚思归慰留之

彻棘寒花久自黄留君小住亦无妨摠然叶县能飞舄其若河阳有悼亡得句且寬
身外事消忧为发酒中狂只今循吏兼文苑屈指何人与鴈行

送汤比部捧元正表入贺时青琐十年矣

锦吹牙旌捧传轩千官鹄立贺正元十年供奉铜龙署今旦传开白虎樽共羨使星
人是法母轻秋省室曾温知君蒿目多吁画为借椒香奉至尊

登卢龙山在观后云晋中宗所名

琳宫寂寂掩玄关列柏层层径可攀似闻司马江东日分得卢龙塞上山万雉低昂
朝旭后千林出没午阴间欲问阅江楼记处露台元自惜民艰

二刘宫庶宫洗主试南都并赠一章

恭承嘉命简时髦水国聯翩宫锦袍并系豢龙刘累氏同为相马九方皋三山剑色
双牛斗六代词华一羽毛识得挽回淳古意不妨疏越为君操

金陵署中乞骸杜门辱孚如吏部寄诗有答

寒乞金陵老病身忽传邹律转阳春句如古郢辞中雪名是西京赋里人世眼也知
尊白璧冰心知不染红尘奕碁故作长安地万事能令局局新

寿秀水陈君（君有子以侍御封君以九江守有传）

曾覩如纶施薜萝豸冠鹤鬓未蹉跎一驄聊为行春出五马新从戏彩过鉞岭近知
游屐易滌湖寬问酒船多太丘庭院无多广羔鴈纷纷柰尔何

陈先辈子卿大宗伯公子也美秀而文亡弟太常有拂拭之契访我白下论诗契合
寻上公交车饮而赠之

一展新诗过所闻尽倾家酿为留君由来闽士思常袞只合陈家有长文毛自鳳池
成五色汗从龙种失千羣他时太史占祥地可忆金陵日暮云

步魏公西园小酌时公已捐馆矣

魏国层台插绛霄西园飞盖引和飈披崖竞綴黄金粟傍水争抽白玉条春至管弦
先鸟味秋归红粉后花凋唯余一掬羊昙泪并入风光赋大招

倪驾部船政为十世利太宰纪录且有特命而仅守抚州于其行得二律勉之

戈船报政一时新上考书封迥絶伦仅将内史酬康乐（康乐为临川内史即抚州
也）谁为东吴借寇恂（吴守阙争欲借君不得）行部德星毋厌数劝农春雨不愁贫
若语进贤应上赏于今魏相许何人

其二

如云五马赴专城朱雀桁西多颂声宁论汉省为郎薄祇觉山公启事轻华盖峯头

寬露冕清风阁上好题名见说黄金赐循吏不须惆怅羨班生（君家若水钱班大理事）

弇州续稿卷十八

●钦定四库全书

弇州续稿卷十九

（明）王世贞 撰

○诗部

△七言律

己丑元日即事

嵩呼初毕卷朝班转入玄宫松柏间北忆青阳开左个南瞻紫气满钟山屠苏却借
宫官榼胃絮聊温野客颜卦数已周成底事不如酣卧掩柴关

御花园

危亭藻井鎖芙蓉鎮日烟云裊自封竒石翳藤疑伏虎古松撐汉欲成龙金盘有露
悬孤掌玉辇无时下九重拟向前朝询旧绩白头中贵好从容

三迭韵答太仆王翁（从肩輿中得之中一韵顛倒不能正也）

三楚骚坛独汝贤五朝流辈让君先名緣洗耳逢人说句自从心以后传荏苒可忘
辞印事依稀垂及杖朝年恠来百战难为敌才接前茅已索然

赠李太学

须鬢犹鬢眉目疎宛然名下果无虚挥毫处处供人赏闭户时时读父书白下阴何
看渐少松陵皮陆近何如老夫纵酒犹顽健只是无名可借渠

苏侍御汉杰还自按滇舟过龙江余与太宰杨公候之不得却寄一首

故人分手惜居诸幸是天南鴈不孤益部使星知久动江头仙艤未堪呼碧鸡金马
曾题否洱水昆明可泛无一自飞章通帝坐至今霜色满皇都

同乡杨太宰吾宗少廷尉路户部沈比部袁叅军王司训会饮赵中贵园亭分韵得
风字

贵人楼阁上摩空蹑屐携觞事未穷墙柳似分西禁绿庭花欲比上阳红客从吴苑
偏乡语诗自延陵辨国风莫笑老夫豪兴发依依新月凤城东

徐九公子园亭即事

粉黛斜通宛转廊壶中山水待长房轻云入坐笼朱阁小雨将歌逗画梁客重不虚
公子席花娇欲施令君香已教昼漏迟迟报犹自贪闻子夜长

游徐五公子金盘李故园

戟门垂塌径微荒犹诧中山异姓王（堂榜壁联俱录中山王诰语）地远禽鱼偏
得性年深桧栝不成行沉沉隔坞藏朱舫宛宛流杯出粉墙醉捻霜髭还自笑可堪阑入
少年场

坐徐四公子锦衣东园中楼即事

别起层楼踞露台诸峯环列似舆台窻中塔捧金轮出（报恩塔轮当窻）檻外神
驱碣石来（庭中一峯秀伟为诸峯冠）菡萏华灯疑夜日柘枝繁鼓似晴雷主人不作
元龙简下客惭非草赋才

游徐四公子宅东园山池

侯家楼馆胜神仙况尔烟峦四接连平临絶壑疑无地忽蹑危梯别有天虬洞转深
能暝昼鱼波竞皱欲頽渊支颐政尔耽幽赏无柰笙歌引画筵

送大宗伯姜翁考绩北上

津人伐鼓榜人讴为送仙槎犯女牛报政逺追师尚父赐车差次富民侯朱颜色夺
宫袍晓华髮神凌海鹤秋倘遇君王问绵蕞可能聊为汉廷留

寄荅邢子愿先生子愿有诗似快己之得归而尚有忧谗畏讥之意故云

河朔风流邢子才紫衫抛得似黄埃爱他陶令归能赋嗤我何公去复来试看海鸥
谁不下但逢秋隼任相猜欲寻后会知何日珍重清洋醉里杯

再游鳳台园

平台寂寂隱长堤羞听輿歌及鳳兮二水三山那在眼病梧衰竹不成栖芟藤诘曲
通新径洗石摩娑见旧题翻恨大言唐李白令人疑杀白门西

李临淮竹园

李侯高馆逼云孤翠竹弥空赤日无一自六师烦受賑不妨三径久从芜清商似逗
黄金缕上客曾夸碧玉壶唤作长矛三十万紫薇诗调似官麤

游徐氏莫愁湖故园

翠輦无际压明眸贏得湖名古莫愁过雨欲移花外径斜阳争漏竹西楼蟠松别主
无拘束语鸟骄人有唱酬长取断桥三两柱也堪将系采莲舟

赠南阳孔炎王孙

中垒高皇七叶孙一时文采冠诸昆时凭汉阁青藜杖不读淮王鸿寶言立壁图书
无长物传经父子有专门祇应竒字输扬叟凭仗双鸿海外论

戊子秋宣城梅禹金与其从叔季豹相过从颇数今年春禹金之从弟子马来出其
诗见示更自斐然于行得一七言律赠之

双颊微頰鬢尚鸦比它羣从更高华从夸荆地人人玉不及梅家树树花舷底歌声

牛渚月袖中诗草敬亭霞惟怜乐府新翻调强半春风傍狭邪

寄赠同守王公为族孙泰亨请也

为问吴中贤半刺牙绯新着主恩深春风总是长依憶暮夜都无可却金见赠虔刀
时出匣亲栽召树已成阴莫疑门下诸生颂强半酬知一片心

赠故将军刘忠父

刘生慷慨古来闻豹隱深冥鹤在羣乍见灞陵逢醉尉不甘南部弄叅军筹边欲借
青油幕倚醉狂书白练裙莫以盐车轻病骨膊间犹长五花文

考绩至淮闻有大司寇之命便道抵家即事有感

移官赐沐帝恩私展转翻成触绪悲万目畏传鸿鴈句棘心愁听鹳鸪诗空矜昼锦
东归日况值宵衣南顾时八座纵荣那足羨秋风不贷鬓边丝

其二

文犀为带鹤为衣共诧尚书天上归华髮镜中差自狎故人杯底驟成非贤昆玉树
枯来久病妇钗荆长亦微最悔靖庐三五步蒲团恰好让蚍蜉

明卿自楚驰信相问云秋后当访我金陵以一诗贺儿骐登第以六诗苦旱答之

楚波如黛泻潺湲美有双鱼尾更殷中散已申秋后驾巨卿从破别时颜乍悲云汉
黎民咏忽羨星辰父子班解道起然无物念人间忧乐也相關

送凌金吾护潞王之国便道归覲大司马公还朝

躬随朱芾之千乘手捧金符下九霄舞彩真娱大司马赐冠新插侍中貂由来礼乐
堪元帅别有韬铃卫圣朝倘问同时休汝客为言衰朽爱渔樵

过大宗伯徐公留饮山池出所欢明童佐酒

轻榕小舫受凉颺正及东山行乐时杨柳腰新宫傅宅芙蓉客满卫军池朱颜不待
滄云母白苧亲调付雪儿欢剧翻追少年事射阳帆底对弹棋

饮徐公归有园后旋过乃壻张伯隅园小坐有作

徐邈飞觞故不慳仍过玉润许舒颜穿池巧博回环水构宇能承向背山客至琴樽
欣得所坐深花鸟乐相關与君试问峯头石若个中丞压载还

送邹彦吉学宪移杭嘉兵备使者

离得东山三舍无高牙红旆拥前途津头候吏犹乡语腰下悬鱼是旧符尺檄可能
收大海奚囊恰好贮西湖中朝文武如公少莫讶麒麟着竖儒

奉赠盛原济国医

大似颜家少父狂箕裘籍籍有辉光青囊不博书生筐白哈能分御史床任是医和
通国脉可烦臣意对师方生平恠杀儿曹懒拥簪争先礼药王

承明卿大叅以诗见贺司寇之迁且订修真之约而所托似非其人聊以奉酬且示
微风

秋风忽下楚天翰似为浮荣动古欢任使白门竟吏傲却妨丹灶背人寒新春实买
鷓夷楫异日虚留司寇冠莫笑鰕生城旦对由来黄老近申韩

其二

才名飡尽复谈玄天下英雄让尔先老子也知离世网前身错解悟真篇马肝时见
文成死鸿寶难容子政传曾读汉时方技传北邙高塚葬神仙

秋日发黄浦朱氏三子与张长舆顾仲韩拏舟送别书此纪事

倾城冠盖拥沙洲儁少将无厌白头晴日好停黄歇浦秋风追并李膺舟雕盘欲选
俱名味玉麈难挥遇胜流不是西州有余恟此行何异五湖游（时吊潘长公归）

丹阳道中承宫保大宗伯姜翁出会因赠一律

宣髮方瞳冰雪颜才闻报政即投闲久叅白下夔龙席新冠青宫羽翼班荣似二疏
辞汉阙高如四皓返商山莫疑下客多尘思今日叨陪紫气间

徐大宗伯同唐张娄三子见钱至新洋江始别

新洋江口好停舟淡月笼烟破暝愁君卧可能忘象阙予行终拟问菟裘
双青眼别酒难禁两白头揔是秣陵多胜地却惭人唤凤凰游

过浒墅關李启鉴司农要张毛钱吴诸名士钱送分韵得连字

枫桥暝色隱楼船文彩风流尽此筵诸友但能河朔饮使君宁惜水衡钱
已将归思寻张翰若个逃名似鲁连乘兴偶然成别语相期不必众人传

九日家忌掩關同年兄袁相国履善以三诗见督尊酒聊尔倚答

萧条九日散宾俦裁及登高泪暗流揔为蓼莪捐令节敢将萸菊破牢愁
霜严故国无鸿鴈气肃高林有鷓鴣惭愧寓公袁相国却緣尊酒费诗邮

新乐大王明德懿亲肩美齐献被礼服义趾称河间耳顺已逾国储未立迩者熊梦
奕奕麟趾振振九在同声俱厪称庆敬成七言律以弁卷端

阿监传呼银钥开分明玉树主君栽渥洼马出眞龙种东海珠生老蚌胎
春暖雪宫添滃郁地尊青社吐崔巍即看同姓诸王表琬琰镌名上帝台

请告杜门大司成张公少宗伯赵公学士余公携觞见枉分韵得桑字

病起闲门日自长晚云珍树郁苍苍驹呵并枉乌衣巷簪盍聊呼白玉堂
此别孤踪各朝野只今何事不沧桑诸贤莫厌飞觞紧万拆声中满路霜

送黄季主先辈

一时三楚汝称雄拟学张衡赋故宫发篋秣陵余白仆称诗江夏有黄童
荷衣间过

长千里崩铗时弹幸舍中后夜便为天际别大江西望吐晴虹

送谢太常博士谢曾使琉球

金陵握手非初会曾读芙蓉谢监诗鳌背尚悬唐使节螭头重领汉官仪星辰午夜亲尝耐霜露商秋肃侍祠祖道劝君须尽醉祇今犹是不斋时

事白后再上疏乞骸承伯玉司马以二诗慰问有感问答

紫袖薦陈白髮稀逢人羞说宦情微羊腸过尽依然险马角生来可不归谷口行厨薇蕨饭江头初服芰荷衣东山司马如相问南北风尘有是非

其二

飞章万里叩天阍乞得闲身是主恩已荷圣朝寬毀骨可烦词客为招魂行逢车马心先折语到渔樵道便尊依约十年栖隱处软莎新竹护柴门

腊雪中承御史中丞石公纳言徐公廷尉张公京兆尹陈公鸿胪艾公过访陈公有作纪胜漫尔奉次

城北林深腊意浓诸贤尊酒且从容吳天忽覩黄云合鍾岭俄成白玉封欲问狐裘慚晏子（用晏子春秋对齐景公事）宁劳鹤■〈敝上毛下〉羨王恭知君郢里裁高倡无那登徒老更慵

陈京兆玉叔以喜雪诗见投奉和

腊雪千门喜共传耐它寒色为丰年谢家玉树诗偏好王氏乌衣屋乍妍僵卧可烦京兆尹促归何异剡溪船恠看儿稚争收扫曾习农书汜胜篇

赠谈叅军思重

清世何縁有避讎为贪山色秣陵游间从方外称司马懒向田间诧故侯王谢风流杯底出秦淮烟月畫中收官衙不少如澠酒君但来过缓客愁

用赠谈思重叅军韵再赠谢少连茂才

为厌青藜夜校讎幡然聊作石城游时裁小令调卢女仍草长编傍邺侯六季遗踪
斑管在三山秀色锦囊收劳君问我眉端事除却归来不解愁

庚寅元日立春祝圣毕始以红锦袍谒陵

腊意将归爆竹催争依仙仗集蓬莱尧樽荐柏条风入汉省呼嵩瑞霭回原庙渐传
银钥启祠官新覩锦袍来不知春至真多少明日东郊探早梅

灊阳公入佐天官兼领翰学赋此送之

分曹犹得坐春风忽领鹓鸾向碧空三入承明阶转峻两叅均统寄逾隆星辰不隔
瞻依表桃李争归启事中青省倘过张乐地莫惊江畔有冥鸿

赠少司徒采山方公得请时公徙止别馆未返新都

成风老手御风姿其那冰心圣主知不学贺公称道士殊轻白傅爱分司门前罗雀
从今日屋里看山祇旧时无论赐金多少在君今不饮欲呼谁

操江石中丞毋林太淑人寿言

三月十六设帨辰六十六回无限春青天共指犹圆魄紫诰仍辉见在身开府夹江
文武吏称觞八座太夫人剩道金陵好风物那能不遣鬓毛鬢

杜翁少时葬亲夜归大雪几殆若有神人送之得免文太史图之矣而又属蜀人毛
太史诗之久失复得诸贤异其事倚韵和赠成卷余亦嗣焉

死孝仍??攀栢身生还刚及启关辰雪深踪迹唯狐兔夜久扶携有鬼神万里璧完
诗不偶百年珠陨畫如真莫言弧矢男儿志惆怅谁为扫墓人

陈玉叔廷尉邀大宗伯王公过饮有作

总为襟期不待招坐深清醕缓春宵空庭月送三山色古树风为九曲潮我自越音

归转切君先郢调欲谁骄唯应醉里王恭去鹤■〈敝上毛下〉寬闲度七桥

为王学士题马鞍山

遥从駮駮出层峦揽辔还应得大观揭地秦鞭驱作障飞空穆馭且留鞍驼峯对拥
春云暖熊耳双悬海色寒见说史成蒙主锡装来七寶鳳池看

为王大宗伯题五指参天峯

东南欲尽觉天寬矗立高■〈山参〉障海澜掩日修罗云外掌摩空铜狄露中盘
削成华岳峯峯出写出郇公朵朵寒寄语地灵王学士九重今借指南看

顾太史北上

仙郎青雀度梁溪夹路春花醉不迷此去依然丹禁直濒年强半碧山栖南溟气鼓
宁容息北斗名成熟与齐寄语调羹三宰相可寬田父一扶犁

△五言排律

潘景升见访后即游南雍应试赋此赠之以壮行色

自读西征赋时推西晋才忽传中散驾云自馭中来文岂净而浅人仍美且■〈髟
上思下〉九方轻牝牡八尺是龙駮虚左成均席登歌京兆杯名高鵷鹊观气逸鳳凰台
六馆峥嵘重三都次第裁他时结驷过莫遣破苍苔

题凌氏盟鸥馆

自昔衣冠会都非江海情君今读书处披檻湖波平鸥鸟时时下条风个个轻一羣
飞的歷数点立分明忽破春山翠平添烟水清孤栖如有约一饱便无营愧杀鷓行地愁
听风沼名忘机但来往何必更寻盟

赋得柳条恒扑岸花气尽薰舟送沈子

春风浑似剪花柳一时齐不独藏鸦稳兼令去鷓迷三眠初作絮百和欲成泥旖旎

粘轻浪顛狂扑大堤青丝愁绾折红袖惜分携灞岸云初起薇垣日未西一枝从主赐全
树借卿栖倬直星为柳含香舌是鸡河阳救面好京兆黛眉低莫以为郎薄时时恋故溪

送汤给事元衡入朝补旧省

离筵一尊酒还试五时衣白简名逾重青蒲事渐非湛惊新露渥聚讶旧星稀莫以
天颜瘦应推海宇肥暮云人怨别乔木尔翻飞倘及弘之事无鱼老钓矶

答兴国判张羽王

转怜张别驾十载二毛侵黄口依人惯青衫恋旧深嫩隅朝暮饌谢豹短长吟泣玉
它年价衔珠此日心渐因穷刺骨翻作怨知音行止吾天袞文章尔陆沉数椽分孺子一
衲老藁林如此蹄涔辙双鱼亦浪寻

日长至为悬弧之辰夜半起坐偶成

子夜不成眠篝灯对黯然微阳欲动后老我未生前但喜初长日毋论向暮年悟来
仍悄悄收得渐绵绵线任儿曹益弧从耆宿悬无人识余意香火竞喧阗

少司徒胡公蒙恩予告诗以寄情

无辨存臣节扳留见帝仁从它贝锦客不是鬻丝臣北极丹心苦函关紫气真泪枯
缘国士心死作山人欲识加餐意他年致主身

感事得五言长律三十句时家弟敬美致关中书为归计因赋此寄之

大道本何诤凡情空见憎庙廊稀阙事泉石易为绳魔总百相烧佛还三不能岂予
真白璧劳彼任青蝇会得无身语依然有髮僧江湖元自阔风浪定来澄嘿嘿时弹指凉
凉对抚膺尺书传令弟三益喜良朋草赋推司马莼心托季鹰非關怨摇落业已削飞腾
缓蜡千山屐来依六祖灯天宁久锤会尔不愧孙登日月高难毁乾坤大可凭鸛鷀从吓
鼠羊角定扶鹏若说函中记宁同汉五陵

送徐汝旭游太学扶侍宗伯公并讯谢宗伯

南州士问媿北阙帝恩繁稍慰晨昏恋仍闻诗礼尊出从鱣席授归向鲤庭论荀令
香虽冷何郎粉尚温通家余濩落乔木尔飞飏获保野人业能忘真宰恩风飏倏以过桃
李竟何言唯有青山色依然傍萼门

尚进士请告扶侍者十五年渡江见访索诗为赠

世人欣捧檄而汝独陈情问寝春朝美披襟游思生客愁过夏缓诗句渡江清指点
娄侯国徘徊亚子城父为此州伯（君父仰山按吴有声）儿结五湖盟不作娶婚嫁君
家尚子平

前挥使王君化六十寿言

少年曾任侠未老便抽身抚剑思前事登坛属后人树同司马大瓜救故侯贫磊块
聊全酒逍遥且任真围棋闲访谢击缶或歌秦闻说称觞地琼花刺眼新（君之子分阍
维扬近迎君为寿故云）

寿余德甫七十

屈指燕中社俄然尔七旬五言欺大历只字逼先秦宦拙犹循吏名逃是逸民长揩
翫世眼谁证到头身珠玉堪娱老金绯不救贫甘从绛县食懒作豫章宾双蹶匡庐屐孤
垂彭蠡纶云鸿同意态海鹤斗精神彩笔天教健清尊道并醇无由寻缩地相与结朱陈

癸未除夜

忆昨逢除夜篝灯对苦吟纵无儿女态犹剧岁时心恬憺吾惭我蹉跎日至今衰颜
不解事狂态觅知音有鐵皆成错无弦始是琴明年是明旦百虑莫相侵

挽皇甫子循先生

威明频解绶玄晏少归田人识书淫疾天私党锢年浮名日者传乐事雪儿弦尚作
非熊梦俄成赋鵬篇遗文六季尽新语众人传罢理登山屐谁偿卖赋钱因君问班管不
朽立言偏

题故孟光禄怡老园

昔在先皇日吾犹识孟嘉清朝倦黄阁黄髮岸乌纱疏傅金虽少香山社可夸比邻
共鸡黍近水足鱼虾汝逐华胥梦人呼畏垒家霜余大令橘暑忆故侯瓜往事存乔木流
年问落花不须论代变得老便生涯

元馭阁老将北上要余于野次言别得二章

相印非时授天书特地临一鰲堪立极万象想为霖众讶商岩梦吾知颍水心恋从
乌鸟剧愁向鹤鹑深朝市安从美山林老亦侵莫教男子泪容易便沾襟

其二

拜命金瓯贵征车竹使专共迎丞相旆还是孝廉船应象三台外降心一叟前尧天
从汝阔佛日傍吾偏取适难为境贪闲亦碍禅报君从此后随分太平年

题尤生畫贈林总兵

白云幕松顶轻风扇茗垆此时羊太傅对客理阴符且捉玉如意暂疎金仆姑清言
宁误晋雅志在吞吴海静烽堪冷时平将自儒宁知日出处片檄尽輿图

由阴径而下至振衣渡又名却女津

夷犹竟韶景窈窕此山阿越女兴犹剧夕阴将奈何攀藤断織指蹶草漉轻罗石碍
莲双朶泥沾玉一窝翻然欲飞渡终是怯凌波

文漪堂之后凉风堂

凉风起苹末集我鳳凰条小夺琴中理时添酒外骄回光泛芍药遗响逗芭蕉偶尔
当三伏欣然至久要老夫凭仗汝散髮坐逍遥

薄暮练川朱侯过访小语别去寄贈一章

一雨吐新蛤千村生夏凉传呼邑侯至能使野人忙早麦鳩堪噎邻篳蚁借尝微言
露雄白小坐逼昏黄有懒酬高谊无求恕老狂今看孺子榻犹带令君香车马初疑梦间

阎未忍忘还同孝宣季朱邑在桐乡

王爱川先生归冯翊诗以送之

叶县君其后谈玄早弃官
逵公一开社陶令不眉攒
为识黄金界翻憎白玉棺
晨钟僧粥暖夜呗佛灯寒
狮子现毛孔莲花生舌端
归心鴈门市初服鹿皮冠
莫恋粉榆好西方行路难

宿泃塔佛院

莫言初地小但觉四天宽
面面芙蓉镜层层薜荔冠
一泓鹜眼碧九点鹜头丹
呗响波声合渔歌夜色残
经归龙藏易僧结蜃楼难
我醉声闻酒谁施法喜餐
倦分禅榻卧闲借佛书看
犹有微根在羞人唤宰官

再题泃塔因赠修塔住持自正

康会来江表由拳已陆沉
五湖三畝地千古一丛林
不坏金刚座长抽碧玉簪
火齐摇塔杪菡萏涌波心
汝有志公锡何劳长者金
聚沙缘自昔填海愿如今
一食分僧钵三衣借客衾
鱼谳放生乐鸟和讽经音
小缓庐山戒篮舁日日寻

寿顾翁七十

少习东鲁学诗书执礼身
晚膺西汉诏孝弟力田人
好语时依口穷愁不上颦
兰枝叶已茂蔗境事方新
莫惜如渑酒将分太液津

谢贞吉王孙雅饷

书是丰城剑僧为南浦鳞
直繇深气谊宁独慕沈沦
念君饶异物惭余非异人
三絶何能报四愁虚自论
古来无限意奚必在比邻

寿曹茂来进士七十以故人仲蔚子请也

尚忆公交车日君方冠弱辰
才真如太傅老不慕平津
第读養生主何论观国宾
鸥闲知易饱鹤瘦不關贫
间引诗娱性毋劳酒養醇
芝兰长自玉竹柏得其真
园种樊侯漆

溪收张翰莼犹余故交子来作扫门人

寄邓州刘广文

昔忝襄邓节于今十四年清才岂我下黄绶属城偏七畧元刘向诸生仰郑虔扶藜
过五垄探蠡酌甘泉井自心源出亭因览秀传祇愁花蜡烛不暖青寒毡

弇州续稿卷十九

●钦定四库全书

弇州续稿卷二十

（明）王世贞 撰

○诗部

△五言排律

侍御苏君按滇中赋得五言八韵送之

高帝何神武魁编悉内臣狎闻骢马使时祀碧鸡神自尔輶轩发能开象魏新坐令
骄帅掇行得悍王驯斧划昆明曙鞭回夔夔春片言摇地轴尺疏动星辰蛮府音从革奚
囊句尽珍清朝揆地好不必问埋轮

王怀中先生泉人也与余有通家分年七十有七矣貌壮丽健举止饮噉兼人既深
东越建昌之学又善语玄素之秘访余弇中颇倾向言事诸少而刺辇上君子寻飘然远
别得排律八韵赠之

不必通家刺衣裳为倒颠乍惊颜转少相对意俱玄贮腹有千卷问囊无一钱尽驱
妻子累翻结宰官缘泣路支离叟怀人党锢篇自因长住世那可不忧天甚矣吾衰矣其
然君岂然太湖无限好一曲养残年

慕椿林翁寿言

六十犹婴慕栖迟似鲁生家传和靖隐人识孝廉名必轶齐梁驾还追李杜盟有雒
俱五彩合璧并连城纶綵传西掖冠裳自上京峯如双髻黑身似九仙轻小饮收春树端
居咏太平瑶池万年实并益寿颜頰

白雀寺秀上人新诗时有开元以前调又能作本色语出行卷谒余求订且将北游
赋此送之

六朝富僧藻末宋始逃禅及尔操觚日逢余瘞砚年曹溪一偈后衣钵几人传琢叶
妨元气拈花合自然思超灵鹫表格逸景龙前莫以文通拙徒成怨别篇

咏江令

江令好为佞佞辞何太工拈来撮山草吹着后庭风佛日不相照君恩难望终犹输
孔范死虚慨鲁侯忠搏颊咸阳市伤心建业宫南冠无故墅应始悟三空（江令诗有三
空豁已悟语）

答赠张太学孺愿兼寄示沈嘉则屠长卿孺愿之先人为大司马公嘉则长卿俱其
客且与孺愿善序其诗而不能无白首之叹故云

明海张司马龙门一世师久钦鲸力大不尽凤毛竒业称元方弟名高蔡克儿有才
疑梦笔无意仅为箕天向金陵辟虹从赤董垂诸生俱避席祭酒亦低帷柳态犹长绪兰
心祇项斯寄声屠与沈须忆御膺时

齐王孙仲望邀同周公瑕陆成叔登清凉台分韵得风字

絕磴盘天界方台枕法宫白龙衡划堑丹鹞远排空寶树青冥底金茎紫气中曼殊
分化迹石跪逊人工岭似高低鷲城疑断续虹一依文佛日四起大王风目极神从爽心
清境自同诸贤今鲍谢能益帝都雄

慰梅禹金试金陵放落一首

昔时梅宛陵欧九并驰称万古一诗在青山白髮憎云孙更蹭蹬雪曲有飞腾桃叶
双头檝芙蓉半臂绫此时吳女队让汝独先登

送许京兆救故友李中丞左迁

岂浅冯唐对几同左伯冤一书存友道迁客是君恩
幞被辞京府倾都恻国门江云自舒卷山色任晴昏
剩得支离叟空为款曲言赐环须有待弟子莫招魂

故人卓澄甫光禄补官北上过金陵饮官舍赋此送之且订留署之约

顛倒欣相命翻飞不自胜词人武林社天子大官丞
醉态倾嵇叔高标愧李膺望迷金掌露坐莹玉壶冰
我自难燕市君应乞秣陵莫嫌留署冷官酒尚如渑

访明征君事读唐高御碑有感

征君不可迹萝薜望来深更藉空王力高明传至今
蒲轮三起诏螭首一纶青虽表旌贤嫩终非遯世心
欲伸莘苴荐念尔不余歆

朱定国失意后访我金陵赋此赠之

十年真畏友词组足儿师访我金陵夕犹衔璧别悲三山横
秀色六代吐雄词是处堪携酒何妨且咏诗绸缪追往事
飞动卜前期海错携来富犹堪住少时

朱虞葑先为贤令入郎考功冰蘖之操皎然人口出视江右学政于其行赋此志别

卓尔松筠操皎然冰玉姿已标循吏冠复作儒林师左蠡扬澜日丰城辨斗时
青衿归水鉴绛帐吐风仪鹭渚飞扬旆鸡山黯澹卮老夫贪一壑后会恐无期

观潮娄汧作

七月十八日潮头何壮哉平驱银海立忽卷雪山来
汹汹喷晴雪殷殷动远雷千艘催簸荡万弩屈喧豨
笑缓枚生发争先伍相才老人惊未覩尊酒喜重开
飞瀑庐山破奔流砥柱摧乾坤此三绝欲返重徘徊

过陆震卿大行读书处有赠

过君读书处破壁侵菰芦不厌饥时麦难挑旱后蔬沈沦诗更好飞动意能无莫以
鹖冠聚尤深鱼服虞时清宁任侠宦薄且为儒但使星文就君王自按图

顾仲韩携酒船相送倾倒尤深因赠仲韩并及张长舆朱氏三子

绿水摇晴旭沧洲动午烟谁携若下酒来唤子猷船屑玉玄谈嫩披沙丽句圆书探
龙爪秘畫得虎头传泥饮推三雅（朱氏三兄弟饮量最洪）风流数七贤（与坐者七
人）老夫从袜解不待长君前（谓长舆也）

赠陆成叔山人新居

薄俗人难傍穷居地自偏何妨号城市亦自饱云烟入坐青山满沿阶绿树圆饌饶
三九菜酒靳十千钱驻户桓生马裁诗薛氏笺仍夸有竒绩校得子虚篇

送方伯吴公入覲还金陵却赴浙省

何限朝天艤如公五两轻君王书上考宴饯下承明不爱东胶赏俱称召伯荣三提
长官印十稔临安城草木沾恩泽江山识姓名官如两高峻人比孤山清休汝冠裳会留
恂父老情畫熊犹缓发竹马已先迎久偃扶桑■〈风贝〉仍留下濼兵伫看新节钺隐
隐出西京（开府报缺新命旦夕下矣）

△七言排律

避暑园居得长律二十句

今年毒热异常年似为吾园稍见蠲谢客琴樽寬约束亲人鱼鸟恣留连已多苔色
侵衣上时有松声到枕边凿就双溪长贮月迭成三岛别藏天莺花得所朝偏丽鰕菜趋
时晚更鲜中散酒鎗盛沆瀣右军书笔走云烟弦中白雪非江左篋里青山是辋川大雅
诗歌篇十九古文金石卷三千乍谈飒尔凉飈至小坐翛然大火捐见说长安饶炙手可
容分借北窗眠

吾州有王三翁者沙人也年一百六常住明上人燕人也年一百四今秋眉州刘大
瓢来访自言歷三丁丑年百二十一度其状貌亦似百许歲人期以闰月之十二日会吾
山园喜而有赋

三老三百三十歲一农一道一山僧俱称献寿来南极直数生年到裕陵长就鹤形
骄婉婷炼成松骨鬪峻嶒囊余伏翼千秋饵手拄胡孙万歲藤迤邐降庭犹恨少依稀杖
国向来曾他年太学应亲割今日清尊暂作朋疏上壶關名是茂篇留陌上姓为应悬知
太史占星象厕我嘉弧恐未能

诗成之明日而王翁疾甚又明日就木矣感叹之余复得一章

一百六年难老身半刹那间隔世尘飞去独为华表鹤化来双剩禹门鳞空教休珉
歌三叟赢得商于仅二人海为桑田垂沮洳峯如华顶断嶙峋虎溪他日不成笑橘叟兹
秋聊对论彭祖较来差尚夭黔娄谥后未为贫客从逝水浮云去交许清风明月新更道
歲寒还有托老梅拳曲伴松筠

大宗伯吴兴董公枉棹海滨道返命进士长君代访且赠长律饰獎过情愧感之情
托之申和

元老三朝鬓未苍碧瀾天目供文章初将息念归祇树华岳三峯雅有高名在栢梁
冀北羣羣空騷裹淮南字字挟风霜书成旧锡黄银印梦醒犹疑白玉堂善海门墙多未
照怜才齿颊有余香齐纨忽展银钩赠越锦难轻玉案偿共道贤良惟一董可能京兆拟
三王（公以余补留京有三王之拟）芄芄兰桂秋逾茂藹藹桑榆日未央丹穴鳳毛开
气色清时狐笔借飞扬莫言兴尽山阴舫衣带居然一水乡

杜清甫丈九十矣而矍铄如少年曾忆白香山贈裴淄州云九十不衰真地仙因倚
起语寿之

九十不衰真地仙姓名无忝杜延年围棋纵负人人墅卖药能寬处处田春暖弦歌
秦女巷午晴诗畫米家船携来鳩杖那防噎贈得羊裘不肯穿自剔残灯书小令旋烹新
茗结清缘惟应蓊子摩铜狄见尔垂髻学数钱

再用香山居士起语寿骆广州先生

九十不衰真地仙五朝清晏即人天难逢拜老中兴日忆得悬弧孝庙年薄宦陆生
无粵橐归心贺监有湖田乡吟捉鼻从清浊社酒胶唇且圣贤大笑武公箴自苦长夸荣
启乐仍偏如传篮笋来莲社应许门人任一肩

寿封给事蠡湖顾翁八十

江左宗盟陆凯前中兴风雅贺循联生儿誉贵同元叹取妇篇多似彦先省覲主恩
深爱日赐租封事上回天俱夸小鳳銜书地（唐掖垣从官名小鳳）才是非熊入梦年
银瓮法传中禁美彩衣春夺五时鲜彭湖斗野分雄剑亚字城陂泛酒船间出膏车新郭
里有时耕耒太湖田浮名不爱真天隐乐事长寬即地仙

观察顾公六十寿言

三朝旧德剡方腾四姓高门代并称人向隱君夸晚节我于循吏表中兴无书新沓
交从在有子蓝田价转增赐覲宫花分露掌传家谏草挹风棱庭间鲤对诗能续海近筹
添事可凭兴到玉峯舒蜡屐思幽金泽傍渔灯征车断不惊元叹推穀虞曾忝茂弘更祝
朋尊须尽量莫教春酒但如澠

寄题吴明卿叅政北园

使君天许卧林丘背郭园成事事幽檻外星辰依北极坐中冰玉尽南州族云■〈
目奄〉藹三春变平楚苍茫一鉴收乞得邻花添烂漫偶来山鸟献钩辀恠他妨醉平泉
石使我寻芳杜若洲机事摠忘难抱瓮生涯虽小学垂钩邛山地贵夸编埽玄武陂寬好
竞舟争以侬家五畝墅白公池馆让风流

送吴晋陵赵常熟二太史赐环入朝俱取北意

词林矫矫并人伦抗疏那妨丞相嗔坼地黄河双砥柱回天白日一金轮片言色借
宸枫重万姓声传谏草新拟夺惠文冠太史却将巾幗赠何人耦耕沮溺身堪老三径求
羊迹共沦主圣亲题罪己诏时清须爱致君身银鱼法锦聯翩复白虎名经次第陈岂以
登仙夸去艦母从遯叟问知津折余虞仲祠前柳采自延陵宅畔苹两地由来有廉让可
应徒作引裾臣

金白屿先生寿九十矣其文彩风流比之前九十者杜翁骆师则尤翩翩焉不佞仍
用白香山起句例寿之得六韵

九十不衰真地仙长干乐事况年年生当五帝舒长日老结三山绮丽縁无意授书

天子问有时裁句雪儿传赐来鸠杖何妨噎停着柴车不待延稚子竞夸婪尾酒故人分
得卖文钱共云蔗境从容咀莫放沧溟便作田

阅史偶有所感

掩卷柴门数落晖古来俱羨圣之威那知天地长多事摠为英雄未息机衣赭讵容
人毙在簪银还见女黿归鲍鱼不救祖龙臭蝼蚁翻因齐霸肥黄屋事移输白屋袞衣縁
尽着青衣王孙子姓时时改寒食园陵个个饥尘世隙驹俄自了竖儒毫兔易成非江南
鹿豕同游处乔木连云尽百围

挽故赠太子少保潘恭定公时年八十有七

甲子前头对大廷耗磨同辈尽凋零官从密印加三少帝与祜符靳九龄谁并五朝
论出处时因八座枪仪刑生骄尚父犹宣髮炼得婴儿任解形丹灶乍闲龙虎卫赤霄疑
驾鳳凰駟耆英会里无春雪箕尾行边有歲星两字易名华胜袞千秋遗草汗长青即看
焨焨嫫姚冢况复芝兰谢傅庭

世贞迩来寿九十翁如骆司理杜金二处士皆由白香山起语今年为宗履湖先生
九十复引前例寿之先生之伯子故吏部子相余硕交也故中聯多及之

九十不衰真地仙白公社里冠羣贤强逾歷下书堪受隐傍淮南法易传渤海尚夸
销剑地蜀都犹忆梦刀年名山自满宗家璧北斗还高吏部编早阙梁松床下拜叨陪毕
卓瓮头眠欲将鳩杖为公寿缓步当车已绰然

三月三日屋后桃花下与儿子小酌红酒因忆昨歲从吳明卿诸楚人于弇园禊饮
遂成一排律

去歲三月复三日忽逢楚狂为楚歌即无草圣愧逸少雅有兰亭如永和故知故事
不可再避人避地将谁过家西一湾小曲水屋后半榻贫维摩偶然儿子致红友聊为桃
花飞白波盘餐第输狗杞美鼓吹其奈鸢笋多摯虞小儒不解事无可祓除如我何

緹帅左都督麻城刘公贻书慰存且有名香佳扇之贖七言排律二十四句志谢

春明祖道近黄昏怅别殷勤欸欸言十載鹿门余偃息九霄羊角尔腾蹇藉令东第

通侯贵谁似南衙太尉尊直有诗书绳祖武长将肝胆答君恩朝霞剪赐宫袍丽冬日聆传圣语温竟病句夸曹左卫衣冠祸解窳城门三台不隔江湖梦一壑翻劳霄汉论地远菰芦难物色天空鸿鴈有音存扇从巴蜀能蠲暑香自西戎解返魂稍觉枯鱼贪涸辙居然病鹤怕乘轩为珪为鼠同称璞如蚁如山摠字鲲公辈长年扶日月老夫余息任乾坤

贺族孙都运汝康八十

椹紫衫围腰带黄茜朱颜夺鬓毛苍庚桑垞置通三纪甲子轮周又甘霜四海宦游垂欲尽五湖襟度雅相当人夸渭水非熊卜家有缙山馭鹤方庭树似从峯玉徙节莫真共海筹长竹林醉阮年犹少对尔惭称大父行

昔白文公有诗赠裴淄州其起句云九十不衰真地仙余以此例赠九十翁者凡五人矣莆田林方渠公以名进士官至郡守累进阶正三品今年寿九十二而其子敬夫复以雷阳守便道彩侍毋论五人者仅一宗马湖鴈行即所谓裴淄州者当亦不及也喜羨之余敬步前韵授之俾歌以称觴

九十不衰真地仙阿谁诸福似君全生儿自授诗三百请禄同登石二千旧憇棠阴青蔽畝亲栽槐色翠摩天壶公山静堪斟酒延寿陂清好放船尚父少惭多偃蹇启期衰觉转顛连林家故是寬乔木行看双标纪大年（闽省有百歲坊亦太守亦林也）

余与竹溪王大中丞为郢中之别余十二年矣公抚闕右值旱魃为虐公竭力祛之民渐回菜色辱遣使问存恍然有怀遂成一律时闰六月之望也

十年郢里追陪后百二秦关保障中分陝古时惟召伯三城今旦有张公云霓疏自忧天切鸿鴈诗偏悯旱工岂为土龙方致雨将无铜雀解鸣风即丘东海俱名族建业长安总旧宫无那新秋圆月色一尊西笑向谁同

△五言絕句

题金陵景送康永锡一絕

莫催桃叶艇去泛秦淮色有兴展此图一挂高斋壁（文休承畫此景送客金陵题者十二人皆词翰名家也今輒以赠永锡仍为寫一诗右方）

半峯亭

不爱天上游不爱人间住爱此半峯间卧看云来去

清暉軒

微风卷帷起面面延清暉无生一话后日晏不成归

碧玉沼

一片荆山玉琢成秋月圆风波落叶尽下有蔚蓝天

观音岩

洗髻碧流润遶龕红叶深松风定中过不是海潮音

白龙洞

春雷地底发匹练空中飞毋劳久行雨解旱便应归

多景岩

千岩荐竒色使我劳清瞬其若老僧何不见亦无尽

寶云井

片片胜鬘云坠入功德井山僧解夏还和云煮新茗

偃盖松

青松作偃盖相与谈禅理折取松下枝与师充麈尾

鐵塔

当时鐵轮王建此七寶树风送黑云归岩栖不知处

妙高峯

金山妙高台飞到峯头住逢师卓锡声不敢复飞去

东斋

月出东林端不照东斋屋趺坐看西山千岩散金粟

西隐

一瓢挂一锡毋劳问姓名欲识西来意崖前栢子生

书于颯先扇一以自嘲一以自勉

姓字真如蜡堕君牙吻中从容一咀罢方识慕时空

其二

积草池头夜珊瑚红欲然只知惊寶色鐵网更何年

梁内史奉诏为谭司马治墓便道归省访余弇园得三絕贈之

罢辍螭头直行封马鬣阡君看大司马应否象祈连

其二

白髮间休倚红颜且下机里中争诧说内史锦衣归

其三

弇园五载内重见二难过不独金兰合还怜玉树多

题尊生斋赠张仲慧

古人既已无后人犹未有欲识生者尊古人落吾口

其二

试问张仲蔚蓬蒿空满园严霜一夜至方悟乔松尊

其三

羣动各相役而我独无言生当贮万古那得不为尊

其四

道言有身患佛说无生乐问生何以尊为汝解其缚

王汝止先生过访弇园有述

麈尾竖新义字字天机流其柰溪边石顽愚不点头

其二

春至百卉萌日出万象丽不应拈破时别自一天地

其三

日斜一局罢观者谓机深偶尔见敌手由来无胜心

其四

呼尊小酌罢坐爱松风吹忽尔农歌发欣然与点时

其五

藤石从云老苔阶过雨斑游人不解看应道是真山

其六

欲求无讖师为我讖绮语三界无处寻久堕泥犁土

陈翁六十于馵先请诗寿之得一绝句

宣髮貌如童藏书比素封何须二千石有子是元龙

题畫

商船一入淮便问淮阴社买酒新城中来醉旧城下

其二

甓社湖头暝维梢酒一杯不知初月上疑是蚌珠来

其三

二十四桥月醉踏未成半终夜歌吹喧谁传广陵散

其四

唤船扬子渡来往无一刻胜作天堑时乾坤限南北

其五

茅君挟二弟去骑三白鹄良常西南垂可能借人宿

其六

下为范公祠上为万笏林空瞻范公笏不晓范公心

其七

拔地一千尺割城三百畝中有万玉山此腹知不负

其八

载酒垂虹桥鼓吹乘暝发瞥见金波流七十二残月

其九

岳王坟畔松枝枝尽南向无那临皋亭国书偏北上

其十

栖云佛堂顶流水僧寮下为恋清梵音跳珠不成寫

南昌饶生善医余友王茂才有隱疾能起之索二絕句一韵以贈

探囊得秘药投杖已沈痾试语天帝栎论功应孰多

其二

博得羣珠贈王郎起卧痾如逢魏侯疾转见赐车多

嘉则长卿复以五言絕句二十首博和有如乐府者有如咏史者漫为倚答当更许
我事不许我情也仰山师云神道则不无佛法须还老夫在一笑

避雨陵

昔闻六龙驾蜿蜒二陵间至今风雨后清蹕满空山

穆天子

八骏长在驱生嫌八荒小百辟长在服生忧百年少

韩重答紫玉

主是天上人却为 人间死生不结同心空令木连理

细腰宫

楚舞虽自佳楚腰太无力君王幸一顾贱妾忘朝食

高渐离筑

纵令无目生不如 有心死惜哉高氏筑仍作荆卿匕

五大夫松

偶尔被秦官何荣亦何辱 万古徂徠云依然卫其足

鸿门玉斗

此时亚夫心分与玉俱碎 却恨入關初不为完璧计

江皋解佩

人去佩亦去佩空人自空情 知不嫵婉犹道有无中

九微灯

灑灑九微灯流光铄瑶席 忽报阿环来芙蓉别成色

李夫人

倏来仍倏往亦知事非的 其奈尔兄云佳人难再得

望乡台

少卿望乡台筑城乡不见頼是不见乡见来肠寸断

相如涤器

日醉临邛市不题临邛壁怯他卖酒人胸中五云色

青塚

明妃死时身一帝两单于不知塚头草为谁长不枯

爨下琴

自脱厨中爨残躯拟报恩如何山水调翻向董侯门

白门柳

仲冬白门柳维舟露梢影日暮乌不栖天空踏枝冷

郑樱桃

自尝郑樱桃百果不挂齿生憎寇觅儿眼中复有耳

习家池

从他金兜鍪不博白接■〈𠂇离〉季龙渡洛水夺汝习家池

玉镜台

老奴玉镜台安依七寶镜奴自当奴心依自怜依命

解语花

比妾解语花忍笑问东风即令花解语难道得如依

梁公赌裘

殿前集翠裘褫奴与奴着殿上武媚娘呼谁共谁博

戏赠朱生

小吏黄衣是雄谭白马非何如学方朔割肉诙谐归

其二

暑候平原侯跳丸方小说顷刻数千言斜阳尚林樾

访吴登不值承见寄三绝句赋此为答

从此步履过吴均莫相避试看白板扉的应无凤字

其二

蹈海惜珠沈归来偶溪涨忽见明月光居然开老蚌

其三

春来花鸟意父子各争新但启柴门看人间大有人

石丈拱辰抱西河之戚今闻后房有旦夕就馆者寄此祝之

忠义乡中晓充闾佳气新抱来应有志天上石麒麟

其二

多生父子缘一念恩情重为是顾非熊还应入熊梦

其三

庭前一枝玉庭表五色云莫轻襁中儿它年万石君

其四

去却掌中珠还从蚌中觅合浦作漳流精光夜如日

入秋无事案头偶有纸笔随意輒书如风扫华不佗不理故曰杂题

事在名教中理在名教外事理两无涉于中得自在

其二

上智与狂愚俱能夺造化唯有中根人随缘作荣谢

其三

东林咫尺地陶然四方乐却笑柴桑翁断酒有何恶

其四

阿难纵强记何如周利盘伽陀无一句调息入泥丸

其五

快如久系人忽遭独角赦不作谢临川矫首白莲社

其六

一把茅盖头两盂陈脱粟笑杀顶生王到了不知足

其七

使我自识我何能遽如此我为知己生古为知己死

其八

阿母偶一来罗刹长伴汝何意晚对人神仙皆妄语

其九

千金蓄稚鼎万金买良药未必悬鹑子翻恋人间乐

其十

剑客学神仙十年不敢试除却小有天能无不平事

其十一

西有华胥国北有拘卢州那堪此中住耐可少时游

其十二

十三八月清光濯毛髮真境苟不亏从人指圆缺

其十三

秋声不解愁偶叶愁人意任使将愁来无愁与相会

其十四

黄鹄毋爱饱那怕人间网不夸羽翼长但夸天地广

其十五

大毁弥天来今生夙生事差胜买虚名尸居长抱愧

其十六

人生贵六尺借汝成不朽炼得身外身此身亦刍狗

其十七

鐵色阎摩门乃入昙谟最所以阿兰那空生独三昧

其十八

百幻葛孝先犹云拙用身我但皮肤尽湛然唯一真

其十九

学士爱栽花花开笑老我何如郭四朝良常种五果

其二十

中黄恋世乐西域劳仙职快哉吕子华方台寄幽迹（吕公不居人间又不愿造位故云）

其二十一

天门无限好却莫忘人间度了众生后丹元才放闲

其二十二

火枣侑神梨金浆调玉醴但与许道士不与许长史

其二十三

昔有郭崇子誉讎愧讎死德报固寬身直斯可以已

其二十四

调達丈五身劫火烧不息一生无所为与佛作功德

其二十五

赵州栢树子强半嫌人死脱得葛藤纏走入龕瓮里

其二十六

宗门伎俩尽支离作曹洞何似无心人棒喝两不用

其二十七

達磨三遇毒夫岂流支意大道宁有町并行不相悖

其二十八

虽云却五辛段食犹自寬要和禅悦味不在欢喜丸

其二十九

纵无香积饭不爱重思稻天浆但入唇人生何用饱

其三十

出家夙世緣抛官丈夫事合眼四十年裁能识吾弟

弇州续稿卷二十

●钦定四库全书

弇州续稿卷二十一

（明）王世贞 撰

○诗部

△五言絕句

为胡元瑞题绿萝馆二十咏

石屏

一夜点苍山入君读书舍芋眠白云色而亲在其下

琴

谁言广陵散便逐嵇生逝小作三日思归鸿渺然至

剑

叶叶双芙蓉半蚀土花碧乍可千岁埋不借一夫力

书笥

一字少有余五车多不足七日暴君笥何如晒君腹

玉磬

濯濯泗滨玉泠泠时一拊门有荷蕢言汝心在千古

五岳图

自谒上元归不作向平想俨然病维摩阿闍在手掌

碁

欲知九枰胜来自孤山媪但赌宣城郡不赌谢公墅

胆铤

小小一军持时露春消息掷去色即空插来空即色

笛

截彼君山竹谱作潇湘思他年遇阿猷不得夸身贵

茶灶

蟹眼犹未发雀舌已芬敷自炊还自啜不爱文君垆

螺杯

君房鹦鹉杯堪汝醉千日那似壶公壶易入还易出

琴石

飒尔金飏过寥然冰弦响仿佛百尺桐仍栽峰山上

博山垆

匡床金博山上有鹧鸪斑轻飏约香雾袅袅上云鬟

麈尾

爱君两手色白于手中玉第深无诤义麈尾何必秃

羽扇

不愁秋气至弃置归篋中当时万里翻扶摇快秋风

芒屨

笑他阮宣子生平但蜡屐何似芒屨轻春原踏无迹

芙蓉帐

挑灯卷绡幕朵朵秋花明恍如挈仙侣踏月芙蓉城

湘竹簟

玉臂展清辉轻纹熨柔翠不道香汗流道是湘君泪

胡床

胡郎坐胡床却发庾公兴冉冉南楼月徐徐破残暝

石枕

枕此支机石欲挹天浆冷无奈泥丸翁时时唤令醒

十一月弇园红梅盛开偶成

仲冬垄梅发繁英簇红霰过意百花魁翻疑百花殿

其二

大小两黄鹂公然吃花住顷刻布同云迷却来时路

貽拱辰兄诗之来岁为辛巳秋有传举丈夫子者再得四绝句

念无凌风翻啖汝洗儿果莫笑侬无功一字珠一颗

其二

去家不百里幽兰生郑谷即看入梦后荣庭尽芳玉

其三

抱儿谒先公了此宗祧寄赢得七尺躯别创千秋事

其四

人言此石丈磊块无润色我见重再拜中孕连城璧

赠松隐上人

为爱松隐名去觅松隐迹只在此松间覩面不相识

其二

偶步九里松忽闻清呗响不见讽经人声逗青松上

赠张五鹿三绝句（其门人为请）

屠生似北海睥睨一世士自过康成门手标通德里（屠令制扁标其门曰贤者）

其二

授经何循循标行乃岳岳虽践五鹿称畴忍折其角

其三

若个是何汤老作受经生一当天子问推毂桓春卿

和肖甫司马题旻德大参东园五言绝句十首

最景园

归仗日月余细割湖山胜未论帝释园人间许谁并

团云径

白云滃作团回风吹不散截置一钵中与作山僧饭

苍雪坞

团云变晴色古木郁苍苍未酬郢里倡且奏梁园觞

丛兰馆

幽馆寻欲迷頼尔同心引任是当门生欲锄还不认

挹华轩

水木旦夕华兹轩巧相挹为怜眉宇清不惜琴樽湿

爽然堂

披襟纳雄风咽如吸清冷主人不喜醉醉亦易为醒

专旭楼

当头一镜悬出没两轮疾为借山色来不作寻常日

殄英馆

人见黄菊开几见黄菊落欲得诗脾清摘英和露嚼

右军池

水是右军池人是右军裔白麻昨夜干黄庭榻来未

通华径

峭蒨青葱间所得亦已足忽转天地开锦绣匡山谷

题春雷出蛰图

一夜春雷发羣蛰自相语神龙岂不劳人间要霖雨

枝上小雀

尺鷃栖一枝粒粟俄已饱却笑垂天鹏饥飞何时了

蓼根蟹

啜喋红蓼根双螯利于手横行能几何终当堕人口

余自庚辰来抱影晷靖不识城西水面者三载余矣癸未八月乃送张肖甫大司马九月送汪伯玉少司马十二月送陆与绳少宰甲申三月送吴明卿大参八月送李本宁大参贞吉与焉九月送欧桢伯虞部远或泊清洋近亦关外而明卿独相蝉援遂抵昆之玉龙桥泊焉见者当骇传以为且破木义而不知是六君子皆生平故人张范之好而命千里嵇吕之驾恨不能泛一叶舟裹百日粮相从于五湖之涘何论木义也今吾已徙处深林而所谓故人者亦且尽矣闲居无事恹叹之余人成一绝以纪其事

送肖甫司马于清洋江口

其奈清洋口嘘为南北风已无官可免那不送羊公

再送伯玉至清洋口

三年洗情字一夕为君新欲忍临岐泪人间无此人

三送与绳至■〈乔上明下〉子

人笑嵇生懒胡然送巨源归鸿君自看依旧入蘓门

四送明卿夜宿玉龙桥

为少柴桑客都令慧远骄那知今夜月已过虎溪桥

五送本寧观潮南浦

箫鼓下江门江潮弄午喧怕题南浦字楚客易消魂

六送楨仲于城西关

请得葳蕤钥踟蹰未忍还亦知樵鼓急词组万重山

用前例送家弟敬美视闽中学然至北水关而止盖余已徙居乡故也

祖席何妨遠依然北水门信知情至处一步也消魂

即事

出语脍一世不受儿辈悦总为般若河雅无文士筏

其二

圣如薄伽梵狂如阿闍世顺逆虽有殊从儿得初地

僧明智自吴明卿所来将谒海东补陀大士赠之得二首

汝从下雉来欲作补陀参风波了无际惟有天蔚蓝

其二

不知圆通老道场在汝耳一夜海潮音我闻亦如是

约圃杂咏

媚清轩

綠筱媚清涟清涟媚綠筱水竹两相媚于中寄吾傲

玉鱗馆

天矫五苍龙一夜化为玉欲乘向瑶池懒不代吾足

烟鬢亭

暝色团一丘炊烟四无际如入法华境面面青螺髻

欣托庐

竹为众鸟欣庐亦吾所爱不作物我观彼此两无碍

适我轩

于我既已适于彼寧参差惟当慕落际我适彼不知

送元驭阁老二十里桥同前例得一絕句

欲作男儿别将情强折磨更堪天上淚翻比世间多

弇园杂咏四十三首

清凉界

步履修竹林银桥佛庐淨洒然忽清凉是境还非境

惹香径

花气无不薰偏与红妝饶夜分乍解衣宛是收香鸟

此君轩

不可无此君种得百千个试与较风流此君可无我

会心处

下有在藻鱼上有啁花雀历历如镜中时时与心约

玉兰台

谢庭凡几树羯末与封胡何似琅琊邸亭亭玉十株

误游磴

纵呼误游磴胜事无不真惟嫌入山客唤作出山人

香雪径

李白媚杨白浪夸春雪香除却江家女谁花可得当

饱山亭

客但憇此亭饱看山色足若更入山深寧知真面目

萃胜桥

镜收遠近观穀馆往来路至此即命觞徘徊不忍度

簪云峰

峰势若簪云云根何太低记得文登路如绵衬马蹄

突星瀨

五夜钟欲残羣星堕如雨化为瀨中石欲飞不得去

小龙湫

澄澄一泓水那得吐光怪山人七寸钵尚有神龙在

千年菌

商山千年菌一朝化为石莫令鲍靓过截作中时食

白云障

茅山陶隐居自爱山云白莫言难赠君于今已成石

黑云堆

轮囷一片峯宛如黑云吐犹疑肤寸合解作人间雨

潜虬洞

阴森石欲搏曲跃津难渡欲留不敢留一去一回顾

青虹梁

青虹下饮水徘徊不能去为我作石梁遂得天台路

雌霓梁

青虬在其上雌霓甘为下游者虽异途阴晴不相舍

契此岩

契此不弥勒此像非契此许大须弥山收置一囊里

忘鱼矶

我非汉莊光钓矶满苍蘚虽有种鱼经生来不开卷

环玉亭

春寒不成出小出坐此屋不知天工巧树树雕成玉

悯湘石

宛宛欲沈波憔悴抑其首可怜望夫心却作秋胡妇

率然洞

一夜中奔雷率然穿作峡蜿蜒诘曲中时时露鳞甲

天骨峰

天公幻天骨自然吐奇秀宁如宋人叶三年雕始就

小云门

窈窕如不穷芋眠足余趣岂必有云归自是归云处

漱珠涧

止水清可掬居然媚其涧吾有万斛珠漱令夜光现

借芬阁

隔崦千叶桃清芬袭人鼻更许墙头醪不妨便成醉

含雪阁

直对缥缈楼迭玉映晶洁诵得少陵诗窻含西岭雪

梵音阁

夜半海潮音松风窍天籁我亦从中证非惟观自在

荣芝所

三龛此三夏三产三秀草吾亦有三儿宁馨似芝好

徙倚亭

壶公楼不开于此待呼钥长房少须臾终享尘外乐

分胜亭

亭前有两径俱取龛山右处处饶胜奇谁能双举肘

百衲峯

大似百衲僧却顾僧雏语其语了不闻低头似相许

云根嶂

偶然白云至辉辉两相向下有暗泉流呼作云根嶂

玢碧梁

西龛石渐顽此梁独玢碧近取修竹荫远借高天色

却女津

少女怯危津徘徊不敢度急唤阿■〈麻外女内〉来还寻旧时路

惜别门

醉客插花归一步一惜别不尽眼底奇归从细君说

碧莲池

世尊莲正青逵公莲自白尔向青白间别作天水碧

文漪堂

清漪感苹末悠然自成文得月稍绮丽含霞太缤纷

步履廊

百步响屨廊步步有山看临当出门去犹复凭阑干

来玉阁

浙浙万瓦敲沉沉一壶醉窻里玉山頽窻外玉山至

襴云窝

甲帐挂流蕙人道春云热梅花一纸寒襴云云不泄

墨池

书不如右军何烦使池墨唯用将洗心能令净业白

题杏花书屋图

十里杏花幄书声琅然出要踏曲江春还从此中觅

题山水

隔崦青峭峰扑作眉间色其奈春水深褰裳不可得

赠谭道人

为余三月住寄食赞公房却问香积饭何如太乙粮

其二

昂藏九秋鹤悦怵三春柳宛似谭景升华书可成否

其三

闻汝返金山何不焦山住焦光虽苦生郭第能供具

其四

汝携王孙诗为标国香集将过沅澧间秋兰见应泣

题奕碁图

松下两仙人碁声日敲击不愁清景移愁它杀机发

文殊洞

老大妙德躯于焉暂栖止犹胜运乖时棹入粥锅底

辟支塔

自参薄伽梵悔作辟支佛舍利何足言劫前一枯骨

又题清凉台

别借金刚窟微分室利场羞他石卫尉火宅号清凉（金谷有清凉台）

公瑕先生在白下两月许别去得四绝句送之皆实际语也

长干一万家半是君题壁欲赠草书歌惭余非李白

其二

同是金陵客君归我不归江头一延颈悔杀是朝衣

其三

尔卖梅花庄我冷芙蓉墅乐处不得归归即无乐处

其四

念汝西河戚身罹隔谷悲人生缺陷地同是白头时

追补姚元白市隐园十八咏

玉林

天坠白玉簪矗作君家林忽尔天籁发珊瑚环佩音

茶泉

先从陆羽品旋向君谟鬪蟹眼初泼时灵犀已潜透

中林堂

长林四周遭于中可避世何必学黄公商山寻地肺

思玄堂

栖君思玄室诵君思玄赋此意无可言莫为平子误

春雨畦

一夜春雨过千畦尽成绿不晓意所欣道是斋厨足

观生处

但欲观我生茫茫无可据断尽有漏缘悠然见生处

容与台

一琴复一觞咫尺足容与不作繁吹台歌管日聒汝

海月楼

明月将海色阑入君家楼凭栏一矫首满地金波流

鹅羣阁

周郎卧水阁日从墨卿御不敢写黄庭为恐笼鹅去

鸥波

数点白不定忽浮还忽沈非关乏去志缘尔少机心

洗砚矶

右军洗砚池池水犹未黑借问何以然为有鱼吞墨

柳浪堤

垂杨酿新柳荡漾如春波欲学三眠稳其如波响何

秋影亭

秋树影扶苏斜阳半亭挂似延李营丘写得寒林画

浮玉桥

水面蜿蜒虹乃是坚牢玉我欲访蓬莱鼇鼉不须属

芙蓉馆

水木两芙蓉为媚非一时客爱承露色我爱凌云姿

鹤径

藩竹别成径小欲观步鹤何似养翻成高秋纵天路

萃止居

客从何方来来复不肯去为贪主人佳尽作王猷趣

借暝庵

暝色何可爱为辞白日器非同倦飞鸟大小归其巢

伤俞四盲子伯安为其父仲蔚絶后也

汝生不成生汝死乃真死可怜桑苎翁今作若敖鬼

其二

莫以盲儿丑亡来亦可伤征君三尺土随意上牛羊

题沈启南画忘忧草

嫣然一株花媚此庭中幽翻觉此名赘人生何所忧

沈启南画溪亭散木图入元人题此不觉尘思洒然

古木蔽炎日新蕉延远颺大有会心处悠然当告谁

题张复画二十絶

山坳滃白云天外挂红日于中得少趣翻嫌去帆疾

其二

借彼容足地寓此无穷目别岫写远青微波皱新绿

其三

树树鸭头绿溪溪鱼鳞白欲觅酒家胡云深断行迹

其四

千岩去不尽一瀑断还连踟蹰不忍别且伴鹿麇眠

其五

科头长松下垂钓清波里借问渔者谁不语亦不起

其六

中天插怪石半壁界飞湍欲识溪桥路前林枫叶丹

其七

白云封不住碧树吐奇滋相看两无语各是会心时

其八

踈林带远色危石激清籁时有远钟声窅堵在云外

其九

参差佛头山迤邐蛟人室但许日高眠何妨气萧瑟

其十

犯汉峯嶮嶮溅流石齿齿中有一渔舟疑是玄真子

其十一

高梧翳长空骄阳安在哉绿蕉携石色复自墙头来

其十二

孤亭卓危岫下临千仞溪不识琴中理萧条空自悲

其十三

怪石露山骨乔松吸云根于焉聊一憩可以清心魂

其十四

着藓石逾丑欺霜树成颓写此无声诗摩娑亦不俗

其十五

列岫引船头千林冪墙角看着此中佳此中人不觉

其十六

一带孱颜岭苍黄晦霭间浮云忽中断界出米家山

其十七

高岩如被蓑纷纷挂藤薜下有青葱树直上鬪秋色

其十八

不受奚官秣嘶鸣恨自深念君非伯乐安知千里心

其十九

蹇卫不肯前千山尽成縞唯余数株栢不与山同老

其二十

插天两乔松下有两翁语异日坐松根还能具鸡黍

又题庚寅元旦

今岁庚寅旦真成白虎蹲君王且莫发乌鹊正争喧

余佐留枢诸曹椽中有南充刘璋者偶诸生试其文烂然已而竟从本格得官将归省叩余秋署乞一言之赠若有不释然者余闵其意走笔得二絶句付之时方乞休在告也

念汝得一官壮心犹若失却问汉功曹何烦晓经术

其二

汝返巴中路千山尽子规金陵啼不彻况乃日斜时

为縁督比丘题戚不磷画

山深断人迹云滃迷前路偶尔飞锡鸣知是僧归处

题画石榴

君自闽天来岂少陈家紫何似安石榴累累结佳子

谈思重为吴翁晋画枯木白头翁因题一绝

可怜白头翁振羽一枯木莫诉春风饥早晚樱桃熟

谢病闲行至摄山而司马故部刘将军驰送出一扇乞诗走笔得五言绝与之

呵殿都挥尽肩舆松柏风犹残故部曲一骑夕阳中

题倪元镇小画

懒瓚真懒瓚残楮复残墨不结丹青缘物外写秋色

为于生题周叔夜画扇

初见谓倪迂稍看乃周瘦留作千古心毋轻寘怀袖

△六言绝句

梦后戏成

习风消除未尽梦里青衫一官二十六年金紫此梦已觉犹残

其二

一生奔走红尘有梦暂作闲人今日身闲梦■〈谷瓦〉不知谁假谁真

为韩臣题书斋

月团小鬪茶品云液全依酒经博山裊罢沈水白麻搨得黄庭

漫兴四首

西风吹叶搅眠家家拆洗装绵唯有老夫不会一壶且暖目前

其二

负曝小坐冬烘兀兀腾腾梦中耳邊忽报饭熟一笑抛却周公

其三

残钟四点五点新月一棹半棹却笑当年此际酒去愁来到明

其四

无名野花争发自在清溪暗流听罢农歌■〈禾罢〉稭旋闻山鸟钩辮

口号十首

儒童本来菩萨大觉亦是金仙其奈儿孙合闹与说无始根縁

其二

维摩夜来病热千言万言不休偶然刹那闭口坐断天下舌头

其三

有子莫习抱朴无师难解参同觅得生前一物万古明月清风

其四

玄奘欲从西返道遇达摩东归我已尽黜义相百夹千像何为

其五

香积钵底分饭赵州垆头啜茶吃了依然不会问着只索瞒他

其六

赵州行脚亦得寒山散圣也奇五叶莫嫌零落五位已自支离

其七

讲座清凉疏钞禅宗临济评唱不论伎俩有无见了先吃十棒

其八

铜龙自锁幽阙白虎不借西邻斋库烂钱一索遣发上阳道人

其九

梦后唤醒良知静中养出端倪举似瞿昙李老曾止啼哭小儿

其十

易掷千金大海难抛万卷填胸未敢望他干慧且求暂落顽空

题小溪港

愚公剪分燕尾封姨熨皱縠文省可全贮初月有时半罨春云

得屠长卿慰辰玉悼亡六言六绝句和示辰玉

大黠不作奉倩小■〈殢上心下〉聊似安仁一枕槐根梦觉依旧人间散人

其二

洛阳千树花落争怨东风作恶记取花未开时眼底何曾寂寞

其三

莫倚青天长在（长卿句云云）四禅始免风轮不生自然不灭无患须解无身

其四

勿学君家夷甫驾言我辈钟情扫却世间情事脚底莲花自生

其五

与覩帝释天女始得难陀兴阑至今扬汤止沸宁如火尽汤寒

其六

牢记阿翁数语■〈口展〉然一笑撒开何事悲他冥路比汝先见如来

有感

人云举头八座我晓失足三途开笼故怜鸚鵡倚杖或听鷓鴣

其二

渐踈青州从事颇倦子墨客卿心事栽松道者门风泄柳先生

其三

孟嘉司马方外弘景宰相山中何似破除都尽止管山月松风

其四

出逢野人争席归覩山鸟衔花无妨净行居士是否禅那作家

弇园杂题八絶

西归津

佛日瞻依咫尺其奈波罗乏船藉令折芦北渡何似只履西还

磬玉峡

寻源渺渺无际击石泠泠异音病夫世念灰尽未许荷蕢知心

紫阳壁

紫阳一壁乍开千迭磊砢崔巍不是祖龙鞭就却疑灵鹫飞来

鳌背梁

小立中龛鳌背俯看■〈穴上叫下〉窾■〈山赞〉岷东涧藤缘西涧下盘花接
上盘

碧皱峯

一峯面孔糟食文以碧皱嘉名从此卢家老婢醉倒七碗先生

九龙岭

岭头顶立青松往往人呼九龙但作华阳好友不忘秦世崇封

广心池

莫欺方池一畹对尔胸中廓然平吞云梦八九别有世界三千

芙蓉渚

薰风广池佳丽白露一岸清华唤作玉儿俱得元家难比萧家

送杨宁叔归山

东杨烈宁叔者东莱之昌邑人也二十一以诸生高等应试归失母墓毕徒步二千里谒余请受诗于钱生研精制科业兼通古文奇书其纯孝高志苦节独行未易以更仆数今年学成别余而归省墓因就试山东予之邮繻辞贻之资斧亦辞曰非吾徒步意也记东莱有毛文简公者去生踰百年矣相业高一时得大臣进退之义其领解之龄即生岁也因赠之六言二絶句且以文简公为属云

不辞郑玄负笈欲从匡鼎解頤今日阿蒙吴下他年夫子關西

其二

百年汝乡人杰一代山斗毛公毋论鳌峯冠顶要并麟阁标雄

弇州续稿卷二十一

●钦定四库全书

弇州续稿卷二十二

（明）王世贞 撰

○诗部

△七言絶句

题宫人调鹦图

唐人诗云含情欲说宫中事鹦鹉前头不敢言误也政当托此禽达之

杏花枝上绿衣娘与诉宫中事不妨只恐匆匆记未尽且教三字忆君王（词有忆君王）

抵滁阳闻拱辰石太仆将至留赠

双旌宛转下滁州真气如闻在后头圣代豪贤多九列何人数马似恬侯

其二

琅琊山色四时妍最喜清流号酿泉前辈风流今又见使君刚及醉翁年

次严太保诗后送尤介夫入都

山人不爱青山住乞得山中宰相诗若遇邴家公子问住山须待买山贖

赠宪美弟移居

岳王市傍三亩宫曲曲清溪■〈禾罢〉稯风但使儿童如锦里不须名姓学墙东

徐长孺及郁子以制科业见访有答

宛转双龙血未干闲逢老马步阑残莫夸玉勒金鞵事见说人间行路难

其二

休将深浅问蛾眉欲答蛾眉泪已垂花樣三千宫女面何人不妬奉恩时

梅花下得刘伯真廷尉书却寄

万里清江万里鱼即看鱼尾定何如江南二月梅花后剖得夷陵八月书

其二

小苑红梅刺眼新一枝分作峡江春长安驿骑知何限天上于今少故人

清明日偶尔有感

宛宛东风扬酒旗轻寒轻暖禁烟时千条杨柳长垂地不晓人间有别离

其二

典衣沽酒莫辞贫野鸟山花无限情三尺一堆犹自湿去年人是上坟人

雨后山园

潺湲一雨到天明西圃小溪春涨平任使桃花禁不得也能波面皱红生

徐客部元春奉使还朝四绝句

锦里春深节暂停东风吹送上江舲不知汉省郎官宿分得荀家第几星

其二

还从建礼别分台知尔应多专对才属国倘逢西极马可应仍为太师来

其三

凤毛池上独翩翩知是虞廷老凤传任使罢巢阿阁后还鸣圣瑞一千年

其四

青袍柳色竞争春夹路珠帘看眼新共道德门无限好徐郎天上石麒麟

为人赠京口何医一绝句

君家肯让汉淳于能使人间癖疾蕪不知京口观涛日曾见黄龙浴水无

赠八十翁何中翰迁故世庙侍臣也

炼来僊骨五铢轻鹤背何年上太清知是玉皇香案吏可能还记步虚声

其二

武帝胡髯已上天肯留方朔世间年仙宫似起偷桃狱且向莲花峯际眠

在明遗我湘竹榻走笔言谢

百迭香云缀露斑梦回身似在湘山从今去后非无客且挂高斋一壁间

答王叔承

世所称布袋和尚者即弥勒也在前劫为求名菩萨当来人寿八万岁时成佛释迦佛所悬记也释迦以末劫救世故难难故多慈愍弥勒以起劫度人故易易故多饶乐今不探其实而加以譊语得无泥犁之虑乎

不为拈花也破颜史多天上尽宽闲隐囊一撮无劳问中有须弥七宝山

题文待诏玄墓四景

虎山桥畔月如银桃花梅花相代新不须指点增惆怅身是当年画里人（予旧遊处也）

其二

郁口坟前路欲迷桃花骄杀武陵溪楼头一种看山眼不见花残衬马蹄

其三

孤峯遠插白云间秀竹长松相对闲听得菱歌人欲近不知犹隔法华山

其四

古塔垂倾老树奇雾残云泄转多姿而今始悟寒林色大是丹青未竟时（右幅乃待诏未完笔故为拈破勿令添足也）

和韵题扇头梅花

铜坑万树玉横斜月洗烟笼领岁华棹过酒船无好句至今犹自负梅花

徐孟章索诗为赠走笔得三絕句

奚囊恰可诗千首拄杖时须酒一壶醉后能轻田太尉归时那怕李金吾

其二

从令处士题鹦鹉（生有鹦鹉诗）所少文君典鹓鷖（生近有悼亡之戚）指口
大堪容卷白转喉何必真雌黄

其三

自言身世两难容削髮从归南北宗（生自言欲削髮入空门）不见高僧名慧地
还縁旧业有雕龙

徐生号云樵而以叶子雪樵书为介走笔戏成一絕句

从夸范釜未生鱼其奈劳薪桂不如啖杀山人山计拙云樵将至雪樵书

顾母张孺人六十（文康公之侧室也）

曾参补袞扶红日尚忆移衾赋小星四十年来丞相栢一枝留向北堂青

送张子新之兰溪

棹过钱塘莫厌迟千峯倒翠插涟漪居人已晓弹琴事茂宰能歌解慍辞（君善歌
故云）

其二

桐君南部尽僊官叱石为羊也不难鳧鳥一双湏好在金华旧省是长安（给事旧
省曰金华）

陆无从茂才自扬州来乞文以赠歙人吴惟登得三絕句与之生高于诗与欧博士

楨伯为广陵社

金徽玉轸拂尘开流水高山信指裁忽讶新声移入散坐中人自广陵来

其二

维扬词客尽英髦得句争夸白雪高一自社中枚叟去何人八月赋观涛（谓欧老也）

其三

乞将新序向新安一字踌躇下笔难见说龙门饶史笔教人解作小巫看

郟襄徐中丞以春秋臆见贻有谢

军城秋日静堪贪幕府无人笔自谈见说麟经新传就千秋不数杜征南

胡元瑞读鄙集有寄走笔四韵答之

杀青初竟未堪论博得骊珠字字匀莫信古来才一石与君俱是斗量人

其二

文园多病日偏长赢得高斋看屋梁便是王充新论就可能相益蔡中郎

其三

处处松阴护药坛何人真晓大还丹知君自有灵僊骨叱石为羊也不难

其四

兰阴一水下兰溪水隐花香水满堤任使东流海门去清心还向浙江西

走笔寿表兄盛氏

竹林虽好未堪求嵇阮那能到白头七十古稀君自爱何曾一醉不风流

其二

遇酒须倾醉即眠自称臣是酒中僊僊家未必能胜此不起贪嗔七十年

送陆楚生入阳羨采茶

由来陆羽是茶神着得茶经字字真莫道青山无宿业耳孙仍作采山人

其二

阳羨春芽玉万株新焙得似虎丘无纵令王肃无情思不与诸侬唤酪奴

懷王大参阳德有寄

钟楼面面是横塘每见双旌度夕阳错唤小桃垂柳字那曾一树不甘棠

其二

弇山春事日争新辙迹从多不畏贫所恨子猷看竹后几曾真遇赏心人

其三

尝从别墅记新图今日暘湖即鉴湖自是君王多物色可能长作客星无

其四

雁荡奇峰天下闻永嘉真柑味絶羣啖君霜后三千颗削脯为龙穿白云

仲山先生归佳城得挽歌四絶送之

纵横马鬣徧空山上冢诸生暮未还玉树祇今埋地下银钩犹自在人间

其二

少日五长王散骑晚年三絕郑台州生来不作红尘梦到了青山伴白头

其三

宝界山头玉万枝人忘物在转成悲相逢莫叹风流尽留得王维画里诗

其四

春风一蜨自悠扬八十能过百岁长莫怪蓝田饶晚价有儿谁似北中郎

题黄定父瓜洲小阁

小阁方床睡思浓金山忽送五更钟披衣起坐浑无事唤起江南千万峯

题画

瘦石枯松写暮秋清溪一道带云流纶竿纵有无心得莫怪游鱼不上钩

朱翁年七十号味耕而又好菊有子为诸生故寿之

南宫徽号下恩纶共喜高年赐帛新更是一科堪应诏曾为孝弟力田人

其二

萧萧华髮倚斜杨也种黄花也种秧不是陶家五男拙有儿身在泮宫墙

戏题诗扇后贻徐生

蕺山老姥亦可怜遇我涂鸦不值钱篋笥恩情翻不薄好留懷袖向明年

长夏无事避暑山园景事所会即成微吟得二十絕句

小径平桥路欲分万条青玉一溪云不须更到幽奇处便合长康写此君

其二

剥啄从多且未膺小窻过雨篆烟凝偶然文债支梧了却是逍遥退院僧

其三

潺湲信宿稻苗齐涧水争趋罨画溪处处竹梧添染碧祇惊帘外数峯低

其四

丝竹由来非我心未论山水有清音空林宴坐幽深处难道无弦不是琴

其五

日长随意选渔竿小港轻舸唤不难千迭芙蓉攢碧玉此图留待月中看

其六

微凉淅淅上轻裾课竹调琴一小僮应是中丞霜意薄故人鸡黍日从容

其七

流水高峯尽日闲柴门风卷不成关主翁虽有无劳问原与游人共此山

其八

尔雅楼头日正长酒鎗茶盃博山香歌中九友容相逐那有闲情和栢梁（余在郟尝有懷九友斋歌）

其九

收雨青天挂紫虹科头晏坐小亭中闲谈未了农家事一阵前溪■〈禾罢〉稷风

其十

北风高枕便羲皇佳景无多畏景长争似侬家祇树苑六时何处不清凉

其十一

花好那能一月红绿肥还到九秋空何如浅淡峯头色长自悠然在眼中

其十二

拨刺银鳞跳绿波呦呦文鹿过林阿从教饕客频相劝不解祇园施网罗

其十三

宝阁莲花法像新垂杨拂水四无尘那知咫尺清冷外便有泥连火宅人

其十四

残杯移傍水边亭暑气熏人忽自醒最喜树头风定后半池零雨半池星

其十五

断尽人间书画缘非关学道与参禅从来到手浑无味且仗床头买酒钱

其十六

墙头紫翠两三峯月满觚棱风满松睡起支颐无一念偶然吹送五更钟

其十七

有人相过说无生须断人间利与名毕竟尚残名利字不如支枕听莺声

其十八

一阁中安两藏书当时有诤未同居若教勘破西来意紫气东行也不虚

其十九

万事全凭酒破除空劳千里故人书参军有颂吾能熟仆射从尊断不如

其二十

襜褕过从不厌频牛腰行卷墨方新生平祇被虚名累耐可残年乞与人

读王百穀吹箫赋因题画赠星槎子然此非古洞箫也以故称新声云

由来子野听偏精谱得咸阳箫史声把向吴山吹一曲何人不拟凤凰鸣

其二

轻蕉徐出玉龙精一窍能为三籁鸣任是子渊佳赋就可教明主听新声

赠蔡汝立乞志铭归

三尺孤坟五尺碑中郎题字色为丝莫愁名姓长埋没渐有人呼蔡克儿

蔡生以一纸得志铭而客有高生者亦以一纸来谒请从游且有所冀戏题一绝再
赠蔡

娄水含滋枫欲鲜啼鸟徧遶孝廉船从他门客刘义横未有昌黎谀墓钱

题半阁诗

地尽天空阁自孤浮云一半遶檐隅不知收入青山色小减徐家破镜无

张牧迁淮相国与诸君会钱山园感赠四绝

袖中諫草带霜华迁客风流莫浪嗟何必汉廷饶绛灌古来才子傅长沙

其二

愁遣玲珑唱别辞欲攀杨柳尚无枝习家池馆从如旧第少山公白接■〈𠂔离〉

其三

缥缈楼头玉万家使君曾此泛流霞莫言鸿爪须臾事幽谷犹残琪树花

其四

弇山堂北四株棠梦雨离云欲断肠却道异时无剪伐飞花曾藉使君觞

走笔赠张将军赴岭外

毋烦薏苡后车传自有清风扫瘴烟压载他年借廉石盟心今日试贪泉

即事

上元灯火不须奢自有幽情领物华踏徧东城清夜月安家园里探梅花

长兴哭子与归途即事有感

屈指流年醉里论清溪如旧泪痕新也知不乏追随客谁是当时共济人

其二

龙湾北岸骨堪栖漠漠愁云片片低一种印山寒食地白公坟畔酒成泥（新墓在龙湾之北）

其三

当年六子五沈沦一作人间舌底人暗数古来文苑传谁能白髮画麒麟

其四

碧练东来是雪川银鱼紫蟹不论钱从他风景长如画割却浮家一段縁

其五

太初收骨道场山与隔新坟定几湾六十年来无麦饭可能相对忆人间

其六

玉龙桥下水纵横酒眼摩娑醉语轻不道便成生死别至今犹自恨潮声

余所品顾家三白酒以甘败而近得其法者皆胜之因补三絶句而其一以贻胡家

品酒新诗亦浪传顾家三白大非前如何夺署青帘字把向胡生店里悬

沙头吕氏酒

扫地人间色味铨自将真趣媚丹田从教扬子中冷品不及沙头第一泉

五弟妇之兄曰章郎酒亦清美

压得檀槽瑟瑟珠泻时犹有看成无谁能闲步桃花涧不向章郎乞一壶

清明日偶题

秣李夭桃各鬪新伤心眼底上坟人生憎介子成寒食破损风光一日春

其二

典却寒襦挂纸钱又闻呼役向杨川三家两舍无薪米错认江南也禁烟

过瞻美弟饮题

傍水诛茅三五椽网鱼沽酒杏花前欲知何物堪难弟夜半酣歌不肯眠

过从子学贤饮

小阮才余犊鼻褌海棠花底奏清尊春光如此休教负明日催租任打门

乡居晏起

小楼烟雨乍霏霏支枕消教酒力微除却西邻呼酒外判无剥啄到荆扉

走笔再送冯使君之楚

三吴重地古来闻全楚雄藩更不羣江岸送迎饶竹马何人不颂大冯君

其二

卷雾凌风青雀开分明一坐玉山来悬知傲杀南楼月重见千秋庾亮才

赠张老

莫欺贫惫少生涯半畝沙田百种花笑杀东篱黄菊后春光全不到陶家

调姚山人匡叔

羽扇藤衫竹箠冠自言亲受九还丹无端却爱人间好不怕山房丹灶寒

馱先以书自通于屠青浦有国士之遇赋此赠之

于生书记似邹阳片纸能专上客床不信比来知己事试闻犹有令君香

朱定国解馆归明州赠之得三絶

风物清佳浣客愁不知何事忆明州轻舸泛尽东湖色应向娄江问旧游

其二

两儿头角渐嶙峋三载东风绛帐春白虎倘逢明主问可能忘得授经人

其三

惜别飞觞各鬪干吴江枫落未成寒惟怜十月山阴道不共王家子敬看

题摘阮图

绛纱微露玉尖纖搗得新声字阿咸门外平康佳姊妹即今偷谱不须嫌

赠照幻禅师一絕句

伏牛山下结精庐炼尽羣魔剩一如谁信近来能所尽贯休诗句梦英书

金泽寺僧为余生日诵经报以一絕

除却生辰荐亲外酒船何处不沈冥即今四大留何事劳得山僧为捧经

题溪山深隱画

古木寒流一两家柴门昼掩待归鸦何如只向人间住与客携壶踏落花

庄临甫力田种竹有长者风今六十矣其婿陈生懋谦中表侄也索诗寿之得一絕句

庭前种竹一千竿屋后收禾三百廩欲向而家漆园祖与君重注大椿年

寄题何鸿胪仁仲甘露园

名从铁瓮城邊得人向金茎梦后归荳蔻梢头浑欲醉芙蓉叶上未应晞（俱咏甘

露也)

其二

海内争传杜甫诗何将军第有园池金鱼银甲从他好第五名高心自知（君伯兄为阆帅故也）

其三

一点晨光霜欲开露华初润蕊珠台墙头蛺蝶冲眉过却道何郎傅粉来

其四

千株桃李怨春华九畹芳兰也自嗟水部向来心性别只拈霜管赋梅花

赠王山人良材二絕

返照轻烟晕碧纱翠禽翻罢玉横斜絕胜黄鹤楼中笛落尽还开六月花

其二

尔貌孤山雪里春能抛玉骨染缁尘悬知不作毛生手却悞江妃自写真

闻仲慧治制科业于尊生斋嘲之

新水高槐咽暮蝉尊生斋里好谈玄如何半夜篝灯读只是长杨校猎篇

晓上人自江右来谒敬美赠之诗云南海杨枝白社莲老僧无住总随缘不知逢着文章伯可有衣裳与大颠又行脚山僧不住山正逢居士掩玄关却嫌留偈多重障大海长空自往还盖谓余方杜门不易见倚韵立赠二絕

有社何须种白莲浇花插柳但随缘从他佛骨原无表那许残花乞大颠

其二

参尽丛林踏尽山未容轻叩净名關霜寒路滑知应否收取三条坐具还

晓上人白云能草书转法华千徧谒补陀落迦者再矣告余且复往走笔反前韵止之

鲸波千迭海门还劝尔清秋且闭关但使六尘緣境淨眼前长是补陀山

其二

草书时作素师颠一钵何如但信緣千徧法华从自转还能舌本吐青莲

家弟转官后寄一诗扇钱叔宝有与君何日共闲身语叔宝日作画不休而余苦文债刺促因戏题其后

王叟时时征白战钱翁日日卖青山多生未断贪名障博得闲身亦不闲

酬顾不疑

秋色衡门好晏眠忽闻流水两三弦似窥吴下机云意有句还酬顾彦先

詹东图进士以所刻石书见示为成二絕贈之

题罢江东幼妇碑公交车二月到京师十三经就如登石除却中郎更有谁

其二

不是君家詹舍人紫微房后写丝纶男儿自有如椽笔一扫燕然万古新

答叶茂长解嘲

翟尉归来客尚新柴门剥啄反嫌频不如箕踞松风下次第残编对古人

其二

南床白简任他骄赢得余年不早朝莫道山人无约束雅闻弹事到甘蕉

送李时养游金陵

李生买棹长干游楸局奚囊在两头欲觅羊郎剧碁地不知何处是金沟

仲春二十日后梅花始盛偶成四绝

二月行尽初日晴千枝万枝玉纵横常年花谢今年发始信春迟却有情

其二

色观空来定几旬东园初吐屐痕新莫嫌春勒梅花晚也胜无梅负此春

其三

西园几树玉横斜雨打风吹一任他纵使春光耗磨尽不甘三月伴桃花

其四

瘦骨嶮嶮老不羣怯他春雪爱春云自从参得罗浮梦消息依稀见几分

赵仁甫孝廉来乞其父墓文留山园少时赋此志别

几树孤山雨后香薄寒憔悴缟衣裳未论诗句清堪比情性都来似赵郎（君诗清绝而貌都雅故云）

其二

弇园春昼但高眠篋底都无谀墓钱挥草为君生别泪一江烟雨孝廉船

清明日偶成

小冢轻风舞纸钱斜阳漠漠草芊芊非關榆柳无新火总为人家不禁烟

其二

岁岁年年世事非朝朝暮暮故人稀唯因白骨无穷尽新鬼犹堪旧鬼饥

其三

杨柳梢头扬酒旗软輿凭着暖风吹未论天地藏身处不起儿孙异日悲

其四

叶县天贻白玉棺滕公石椁在长安争如谿母祠前树不受人间泪眼弹

山僮言游客放歌折花者戏答之

有例何曾问主君六么三雅任斜曛主人总在茅檐底唱遍龟兹也不闻

其二

携酒看花不碍频唯求酒后护残春不辞树树凭攀折孤却明朝花下人

衡阳曾生万里问奇实无奇可问也于其归口占赠之

落魄书生纵酒徒久抛符印着潜夫而今对汝机關别但语胸中一字无

其二

悟得从前字字非临岐无泪可沾衣碧天云尽都如洗不碍衡阳春雁飞

七夕病中

病骨萧然一叶秋踈帘不卷绛河幽茶瓜酒果从无分不起人天两地愁

其二

邻家乞巧候天孙月转参横不掩门拙癖病来逾自爱卧陪孤影度黄昏

其三

共君闲傍小溪行爱弟东庄看犊耕许与曼殊能许未虽游族姓不求名

其四

沈郎征事近何如旗鼓萧翁尚有余嗒尔相看无一句可能消尽腹中书

和孙中丞登马鞍山韵

千山如笏拱朱楼平楚将云势欲浮见说兴公新赋就坐令王粲亦销忧

其二

独立缥缈之飞楼词组能令紫气浮却是岳阳题壁后至今天下诵先忧

赠刘少府四膺台獎

四见旌书下郡墀道傍何限口成碑莫言清白无人赏今日真成有四知

其二

赞公庭馆真如洗吟岸乌纱据槁梧刘宠虽廉争得似橐中犹长一青蚨

其三

尚书两世大名垂乔木干云荫后枝处处遗碑应好在知君不是狄公儿

黄仲高先辈枉访有赠

兰芬秘■〈香弗〉 葛衿裾一片冲懷玉不如事事拟君家叔度祇输年少赴公交车

其二

四明才子气如虹何事低头王长公误道姓名登琬琰此身原只在墙东

题复甫墨牡丹

百种沈香亭畔枝锦嫣红醉午风迟那期虢国夫人到淡扫春山八字眉

其二

半幅生绡墨乍匀天然貌出玉精神朱栏下尽葳蕤鎖却是丹青解悞人

蘓山人自张司马归云辱倒屣之延而所谋未尽果戏赠一絕

博得侯门一笑新鬢霜犹自未回春人间不遇邢和璞谁向天门礼弄臣

题潇湘夜雨有感

扁舟十载问潇湘曾向天东指雁行今夜对床春梦穩不妨风雨过西堂

作张令书戏题后

贪闻方外有闲居笔砚垂抛乐有余谁信别生方外事为僧仍作使君书

仙师处见徐郎有赠

双瞳剪水玉为神皈礼神坛叩宿因自是徐家原有记此儿天上石麒麟

偶题

一间茅屋足沈沦无那虚名转趣身记得松风陶氏阁玉书先下扫除人

其二

十里香烟夹路岐少年争草步虚词不知天上原无用只礼身中一字师

余德甫见贻箬冠侑以一絕句倚韵和答

竹萌含露供朝餐余箬犹堪刘氏冠不道道人心死尽雨来犹作化龙看

弇州续稿卷二十二

●钦定四库全书

弇州续稿卷二十三

（明）王世贞 撰

○诗部

△七言絕句

七年前为在明赋此十絕句今春在明遇余吴闾复出卷索书之时余二人各挂冠久矣因题二七言絕于后

当年楚馆咏江篱忽戴宫花集凤池何限幽芳领秋意于今方是属君时

其二

才谈访旧便欣然更怯长江浪拍天十絕新题挂君壁似应翻胜子猷船

沈嘉则屠长卿相约为古乐府杂题二十絕句索和余以言激之谓长卿之高华嘉则之雄浑信是当家若情事或须让老夫一步两日内便能成此二君得无笑其语之不餽也

湘妃竹

几点苔痕上翠筠千秋长见泪痕新从他帝子夸江渚不是苍梧望里人

吴王试剑石

■ 〈火霍〉尔青天一电流山头白虎迥惊愁不辞顽质长剝剖相国功多也属镂

秦女卷衣

秦女吴妆玉不如卷衣犹在五更初休疑雨露无多点闕内离宫二百余

高帝斩蛇剑

大泽云腥碧血侵芙蓉犹在匣中吟天教武库穿云去负尽残年斩马心（穿云事见西京杂记汉有斩马剑谓司马氏也）

贾佩兰出为段儒妻

愁向人间说汉宫春歌字字咽春风空怜透指金彊美不及秦家照胆铜

探丸

月黑床头风雨鸣五陵西去漏三更贼曹休怪探丸事自是人间有不平

藏钩

花前彊戏巧争新无奈些娘道便真总为怯输浑不展依然钩弋赵夫人（其戏起自效赵夫人也）

蹴鞠

油场光软似凝脂结社分彊各露奇子政自夸新样好宫中原不爱弹碁（刘子政以蹴鞠劳神为弹碁之戏进帝得青羔裘紫丝履之赐）

秋千

柔荑弱柳竞风流荡漾颠狂不自由却似侬家新孔雀学飞横上树梢头

春日独当垆

纖玉徐量琥珀卮杏红衫子任风吹公然解赠金条脱頼是傍无犊鼻儿（谓相如也）

七宝避风台

七宝妆成百尺台怯风闾阖不曾开纵令吹着双飞去还解双含祸水来

薛夜来

空劳国色更针神雨露恩移别院新记取蒲生塘上曲九泉差胜姓甄人

清夜游西园

夜凉清吹夹车来菡萏秋兰水陆开何限风光何限月有谁能嗣建安才

爱妾换马

燕颌风云切大荒雕鞍新热冷红妆权奇到底应须尽其奈蛾眉也是霜

采莲曲

玉腕交加摘露房生憎孟姥妬檀郎榜来兰楫吹令远引去莲歌咽不扬

若耶溪

步履寻春傍若耶双环白足洗轻纱兴来莫踏云门寺处处青帘卖酒家

北风吹裙带

袅袅婷婷骄上春狂风摇荡不由身君王莫问吹多少可是吴郎画里人（明皇问太真任吹多少吴带当风谓道子画也）

宫蚕

摘来桑叶餽蚕肥纛得流黄夜上机愁说上方初进御君王别选越罗衣

燕姬堕马

堕马胡姬不动尘飞鞍一跃转如神莫轻乘自侯门过惹得梁家髻样新

春闺怨

何曾鹊印在龙荒止许双蛾鎖洞房秋夜纵长犹有梦无情无思对斜阳

送李德宣之萧山司训二絶

萧山竹箭美于玉湘湖莼菜绿胜丝任是广文官舍冷未应翻作季鹰思

其二

八月晴江响怒雷西陵渡口趁潮开船头赤鲤如人立知是龙湫带雨来

徐大光祿奉使江西淮邸见顾赠之再得四絶句

拥传初从尚食归天香细细染宫衣欲知明主兴居事可谓韩休疏不肥

其二

淮王上客总能文谁似风流徐少君彩笔写将芝岭色锦囊收尽蠡湖云

其三

豫章何限豫章材蔽日干云夹道开君去试看梁栋具阿谁非是相公栽

其四

高秋伏枕罢弦时一曲聊将赠子期若向洪都朱邸听有人能谱右丞诗

偶题

一缕沈烟袅碧虚五千言是读残书亦知终日无凡事祇恐凡情未破除

赠孙章甫

午坛烟暖日迟迟玉洞羣真礼法师最是黄庭湏早熟莫教符力不相随

其二

游戏人间事事工何人不爱葛仙翁那堪一片桃花水鎖住蓬莱未许通

初入道史氏妇病死诗以伤之

石湖桥畔土千堆送客魂消黯自回唯有师真曾授记寸心犹暖未成灰

其二

初将七魄试重泉同学羣姑尽惘然不信已生忉利界散花先到世尊前

过新第

压帘银蒜玉钩斜数缕沈烟袅绛纱曾向此中投一宿不知端的是谁家

过弇园

平泉花木四时春抛作朱崖万里身争似弇园三五步尽将春色付游人

仲冬望乍晴风横甚而窻月破梦有成

霁月踈窻分外明狂风无奈海潮声谁能忍冷孤峰宿坐看沈波洗太清

极寒拨垆中灰得小火遂成

楸灰残冷更新拨深微火似鱼鳞虽然拨得无些子少选能为满屋春

穆考功敬甫早岁乞休惟以读书苦吟为事今年拟少陵秋兴八首使其子光胤习右军书书之见寄走笔为谢得四絶句

迟鸿台畔擅三余良冶为箕也不踈欲识自相师友意少陵秋兴右军书

其二

谁道扶风近帝都绕台千匝尽江湖南荒岂少同游侣踏徧春风闻鹧鸪

其三

纵横彩笔写云霞其奈山人行径踪绮语讖来无一事偶然微雪警窻纱

其四

羊家小婢学夫人到底悲欢不属身争似姪娥妆洗尽自然冰玉离风尘

正月六日送舍弟河口即事偶成

青丝忽散木兰舟迭鼓扬舲可自由欲试离心无处觅一湾新月乍当头

其二

三千里外是西秦五步东头故里闾谁信一杯分手后便为函谷听鸡人

其三

过船仍戴紫阳巾鼓吹旌旗闹杀人了得去留无碍意不论居士宰官身

其四

道人巾裹比丘衣炊黍烹葵尽解肥无石可留初起牧有乘专待世亲归

其五

经年不踏水西门也似城居也似村拂面东风犹未识偶然微绿现篙根

其六

翻因爱弟有离筵羣从儿孙满目前总是现来阿闍国一灯还傍佛龕悬

梦后席上口占

偶然梦作朝官好醒后依然一道人却忆景阳钟底梦五湖佳处便垂纶

其二

春来大作纵横梦梦里头头记却无犹胜日长无外事时从故纸问葫芦

送里人金大从军兼简方记室景武

双鞬结束气如云亚子城西酒半醺欲向故人歌出塞近来王粲倦从军

其二

蓟门芳草殢雕鞍下马胡姬酒未阑金印不關明主惜春来质子徧长安

送曹子念文学游闽还访天台

晏阳观头夜香焚袅作轮囷三素云若到幔亭应少住为余持赠武夷君

其二

武夷九曲青不足还向天台访石梁为是橐轻难压载尽收山色付奚囊

其三

冰盘不肯荐杨梅五月闽天锦作堆日啖红香三百颗可应单为荔枝来

其四

虬髯铁面太峥嵘看尔菰芦意气生莫为外家夸宅相近来文苑已除名

郊行

满村浮绿数枝红也解愁依也殢依欲觅二端无处着翛然自在版舆中

折简要家馭提学同长公学士看地棠花

弇园千树锦横斜雨妬风欺一任他唯爱君家兄弟好就中留得地棠花

小病愆花期唯牡丹在耳次公将有豫州之行更成一绝句

飘尽棠梨见牡丹折花行酒莫留残洛阳春事知尤少无那明年两地看

元馭学士于新观种花挑野菜前后戏呈得十二首

白白红红几树斜清溪一曲水如霞不须牙版标名字看着应呼学士花

其二

一蕊须头一佛圆供时长在梵王前
遠公未晓西归意亲凿方池种白莲（元馭手种白莲）

其三

仲冬朔日僊蜕回丛桂凌霜特地开莫笑净名居士病前身金粟老如来（元驭时有微疾故云）

其四

墙阴马鬣秃于童眼看桃花树树红春色纵归犹未辨与君相对试霜风

其五

舞蝶双萦小玉团殿他春事耐他残道人香色元无住偶尔闻呼绿牡丹

其六

三月行尽春光微欲觅飞花无可飞高下川原诸草树也能将绿染人衣

其七

野菜经春百味新长镰一柄便周身首阳薇蕨元何限始鲜夷齐未尽贫

其八

一丛新竹迸龙鳞微雨仍惊玉菌新乞得维摩香积饭午斋先供两闲人

其九

五月五日坐东篱忽有黄花抽数枝呼杯恐失醒累意不饮生教醉令嗤

其十

昙阳庵东积水多僧来商畧种新荷鸡头菱角亦堪可奈此一碧玻璃何

其十一

六月十八阳侯狂老树草偃蛙窥床老夫拥被卧三夕竟有红日翔扶桑

其十二

灏灏湛露栢间垂色胜醞醐味胜饴见说华池元自有可烦天上借璫枝

为僧题云林卷

晓树苍苍径未分数声清梵隔林闻莫欺垆底旃檀烬也解蒸为宝焰云

为章仲玉题保竹卷

龙钟数挺不辞残把送奚囊耐岁寒絶胜洛阳西邸内劳人日日报平安

题畫

古树精篮杳霭间轻帆吹过碧湾环道人双屐何曾系犹自贪看画里山

喻兰溪邦相为四絶句贻我颇致青蝇之感且以名酒二甌见饷其落句云万事从
教醉里销次第和答

劳君五岳起双眉老病无能学麝提祗是怜他善星辈恶风吹送下泥犁

其二

金华洞洞有仙官叱石为羊也不难总为汉家罗网急双鳧莫遣问长安

其三

潘郎可是懒栽花一赋能当万树霞却笑尔时勾漏令不从身内觅丹砂

其四

兰溪新酒碧於泉一斗真堪价十千我醉声闻浑不要使君公暇好逃禅

送潘大宪副视关中学政

雍容冠旆入燕京经术江东旧著名不似公家潘散骑仅将行色赋西征

其二

三辅青衿拜下风就中三礼更推公似闻伯仲金华省曾奏先朝白虎通

偶阅楞严作

十年难弟未知音七处征心可见心何似卷堂聊散去任他鱼鸟各飞沉

其二

莲花采去觅淤泥靛面张拳转更迷了得本来无染意眼前何境不菩提

其三

毋劳九品忆莲台也莫栖栖代世哀一念不生真体净圆通大士应声来

其四

莫把尘心惹世尘阿私十格尚沉沦那知梵释诸天位原是灵山九地人

寿魏鸿胪七袞

诗酒弦歌寄此生风流重见顾家瑛（君居为阿瑛遗址）不湏屈指量贫富七十年中擅太平

其二

庭前木兰何太奇千朵万朵白迷离争似中堂双玉树对翻华萼吐孙枝（君庭玉兰之盛甲吴中）

其三

牙绯艾绿拥朋尊可爱君家好弟昆犹有雍容诗礼在令人长忆魏阳元（君之伯父也）

其四

宾筵弁侧半傀俄犹戴乌纱检白波不为一官能恋恋少年辛苦读书多

周三儁郎时诵道书辞其舅学士公游南太学得绝句二首

十里珠帘出晓妆长干春色待周郎从他误曲毋劳顾留得斋心奉紫皇

其二

袖里南华与舅论翻从玉润爱冰神晚菘早韭山中味慎莫夸他肉食人

戏为樱桃题二绝句

葡萄赐紫那同贵金橘堆黄剩是酸何似琢圆千鞞鞞深红透出水晶盘

其二

含桃一荐栢梁新偷入新诗郭舍人笑杀上林村令句李梅争似嚙妃唇

送张兰溪公除补选

迢迢单舫上天京单父当年政已成五月南薰无限意弹琴莫道不成声

其二

曾传八咏在东阳可借双鳧下未央溪邊小儿骑竹马洞口僊人呼石羊

襄国王飞教千里岁一慰存野人无以仰酬惟祝麟趾之庆而已敬成四絕情见乎
辞

老龙堤畔彩云开千乘旌旗射猎来蔽日鹏雏浑不管掌中贪捧一珠回

其二

渚宫春雪一登坛宋玉文成最耐看十二巫峯尽盘石莫容云雨梦中残

其三

六月金盘安石榴榴房忽绽玉浆流欲知太母尝新意亲遣高王问魏收

其四

老病蒙庄五畝阴年年孤负楚王金虽然曳尾泥涂乐未少衔珠一片心

陈道复写牡丹征仲题句以徐熙拟之戏步于后

谁将野逸拟徐熙一种妖红晕玉肌应是陈閔被宣召沈香亭畔写杨妃

答沈嘉则

风流翻入步虚词南国人称沈亚之不信缙山辛苦意只言笙鹤便相随

其二

才从苦海脱沈沦两鬓萧疎已似银君是谪仙宁不解玉京那有半残人

同州王先生赐绂依昙阳庵修西方业以俟师真盼鬻少子某迎之不可于其归也
代先生送之

阿翁非为遠公留为觅金篋净土游十万八千犹未是可应西向忆同州

其二

莫因离别泪阑干老子冰心彻底寒会得西归真意后不妨儿女话团圞

同州二先辈以书迎其父令公归不得作二絕慰之

雪山行道不辞辛车匿空归罗■〈日侯〉嗔以此深心奉尘刹古来方是报恩人

其二

朝闻丹诀暮西还不踏江南处处山但使郎君如尹喜可容真气误函關

题枫谷卷为杭州喻邦相

春至能青秋更丹山深不共荻花寒武林官道知多少总与行人醉面看（香山有枫叶荻花秋瑟瑟之句）

其二

庭葵向阳知故赤谷枫背日亦成丹总令心事各有寄谁解霜风领岁寒（少陵有背日丹枫万木凋之句）

赠钱效拙六袞寿言二絕句

钱翁长余星一周十年先着鹿皮裘如逢海上添筹客为我聊呼第二筹（君居海上而好着隱士巾服）

其二

鲁连乍觅东海住安期复从海东来饮君寿酒君试问为是僊才说客才（君有纵横才而二仙皆尝作说客故云）

赠黄鹄

道子麓豪故有神精微仍数李公麟何当扫尽铅华态貌得乾坤万古真

其二

誓墓归来老病身无心去逐世间尘与君轰饮君犹恨不写人间第一人

寄赠吴大倬倩

十载吴郎已大名青山依旧楚诸生似闻老蚌蹉跎意欲遣双珠入帝城

寄赠吴二皋倩

酒态傀俄兄不如弄船钓得武昌鱼青藜忽破高斋色醒后吾伊读父书

和张肖甫司马题王阳德使君阳湖别墅十咏

知乐轩

鲸口初分玉涧余金鳞点点跃青渠欲知鱼乐无如子曾向澄江梦作鱼（君尝令靖江故以令事戏之）

清凉界

从他赤日也清凉室利南来是道场不似石家金谷地热心偏向绿珠忙（五台有清凉界金谷亦有清凉台）

纡青阁

小阁踈帘面面开不知何处送青来佛螺欲傍斜阳敛那有珠丝系得回

红雨蹊

天花争坠不黏身下作东林红锦裯却恨酒醒眠起后悄然无计一留春

浮碧台

千寻碧皱倚空蒙湖眼山眉态不穷错讶楼台绿蜃气中天涌出化人宫

金粟岭

纷纷金粟万如来移自西方七宝台笑杀中秋灵隐夜总令收得不堪栽

穿云峡

有时峡坼流云逗有时云薄峯尖透主人蹑屐伛偻归剪得氤缊满双袖

超然台

眇湖千顷白云流百尺隗俄在上头欲语超然无可道不牵尘世一丝愁

筠阿馆

万条青玉逼云寒余箨犹堪剪作冠张廌莫跨居处好王家亦自有琅玕

暑香亭

才歌白苧水生凉脉脉柔风送暗香记取郑公三伏日碧筒徐吸紫霞浆

偶题

抛却功名事上真名根犹自惹凡尘怪来人鸟宫中客多是羲皇向上人

其二

平生不拟作裴休见有遗书好拨愁拨得一行黄蘖字何须更访赤松游

蔡文学曼倩求书其赠大父九十四翁及父孝廉诗因题一絶于

后九十四翁归道乡孝廉花萼日相望（时馆于吾弟所）看君三世催身老不是
夸君大父行

弇州续稿卷二十三

●钦定四库全书

弇州续稿卷二十四

（明）王世贞 撰

○诗部

△七言絶句

昨秋有传殿卿左史游道山者得一絶见慰不胜快心走笔奉贺

春来飞梦玉京山乞得交梨一颗还徧叩金台无长史祇应犹自在人间

有莲洲比丘者托康生寄一偈云法身有口能嚙饭大地无尘翳眼睛此事遥知己
相悉愿垂一语印愚情率尔奉答

嚙饭莫贪香积饭无尘翻惹六根尘通身是口通身眼口眼应须赚世人

又代僧答

嚙饭何妨香积饭无尘一任世间尘通身是口通身眼口眼何曾赚世人

书付印公转寄不知到否三月偶举似驢儿拈曰已是印了也又曰以后再莫举似
别人问余二诗若何曰后一偈此僧尚留目在前一偈瞎却此僧在己而曰虽然如此是
教典中话余出两步霍然云法身有口能嚙饭有口不嚙饭要口怎么大地无尘翳眼睛
谁翳汝然已无用矣

题李使君扇头小画

几重云树几重山小小茅檐三两间但许使君赆酒至不妨南陌荷锄还

袁绳之太常起家赴南少司空走笔为赠

汉家清议重南宫卧雪能怜袁邵公总为太常高第久玺书连旦拜司空

其二

单车轧轧度丹阳十载清名扬太常任是令公家宴好也应中夜减红妆

其三

颠倒衣裳白髮侵篋中腰带半无金当时谏草垂磨灭犹是区区请劔心

其四

依然蓝笋叩精兰剥啄声停稚子欢懒病科头当六月不因知己便弹冠

吴生得神符治余少子士骏症应手即愈走笔赠之

眼见儿曹病骨苏将言无鬼未全无少陵总有花卿句不及吴郎一字符

偶成

楚英晚节希转轮汉狱株连千万人清淨慈悲两安在西来谁为治贪嗔

其二

读书万卷葛勾漏饮酒千鍾郭景纯狂夫借此聊自暖第恐天宫无二人

其三

畴尊武媚作越古畴字阿■〈麻外女内〉为总持不怕舌尖难过鼻只谋衣钵且
寬眉

其四

古来持律让宣公何事贪它天食供身后拟归慈氏院眼前不见西来宗

其五

于阗比汉一小县纵令护法能几何懊恨谈禅裴相国不将黄蘗换青娥

其六

海山方丈不肯住要住第三兜率天只恐放教居外院小蛮樊素共年年

其七

白云先生高侍中自夸呼吸与天通斗大扬州贡赋絶祇緣真诰有曹公

其八

西昆艷体杨学士醉里禅那夸更深金面棋盘都拍碎却因丁寇便惊心

其九

莲经女子转山谷五戒禅师作东坡一升一降事未已更四百年将奈何

其十

少年谤法晚护法（阙）抨鲁公少温公僧雏两耳掩欲尽未必西天耳尽聋

其十一

纵横说法张无垢犹自低头妙喜公读尽传灯杲师业觉他心地未全空

其十二

长春占断维摩刹灵噩平增德士巾归覩玉皇称帝释始知元是一家人

楼道人一衲一笠一瓢遨遊海岳而所携诗卷多名士如王格太仆吴国伦参政张位侍读同王穉登太学张鳳翼先辈昆弟之作皆在焉仍虚首简以乞余题戏呈二絕归之

道人雅自毛仙伯元白韩刘诗卷多解道蕊珠宫里住尽应翻作步虚歌

其二

囊里牛腰诗卷麓他年鹤背重还无何如负局先生好只挟真形五岳图

百穀别余礼补陀出此扇索题走笔戏之

南海南头有落迦观音宝座拥云霞王郎内典应湏看此是支那小白花

伯玉肖甫见过后即作书遣候明卿而殊苦一介之难因成二絕并寄明卿

门外初停嵇吕车殷勤仍嘱武昌鱼从来一点相知念不为蒲轮便破除

其二

丹枫九月大江寒欲结双鱼千万难何似只凭秋枕梦泠然一夜度齐安

寄黄州邹使君迪光兼简周弘禴选部

黄州黄菊遍地黄太守飡英齿頰香若少醇醪助秋兴祇应悬榻待周郎

其二

苍头信去频叮嘱赤鼻矾头赋在无闻说使君开碣石不妨千载配双珠

黄州周二选部居忧作此寄之君故以星变言事忤贵人见谪

七月十五忆黄州中有豪贤重姓周任使纶巾为布帽也能雄辨压曹刘

其二

占星疏草胜君房匡鼎擲揄石显忙今日中天蒙气尽可能无意向明光

洞庭陆生医而能诗以三律见投聊成二绝答之

角头深处不知年忽破霜风入郡廛买药收书知己了祇应还趁太湖船

其二

壤色方袍垫角巾老夫身是佛家身劳君苦赠千秋句那有虚名可借人

谢云仙老人皆用古语起

我所思兮在桂林感君屡致瑶华音纵令一语不相荐终是悠悠千古心

其二

湘中老人读黄老手撷金光玉芝草他年谒帝何所征一点苍梧紫烟小

题双雀梅花扇

东厨残食竞饥鸦西舍饱蜂喧晚衙岂是中庭无滞穗皎然双雀坐梅花

寒夜懷元馭

无病无愁拥一毡怯寒犹自不成眠谁怜鸡骨支床者布帽冲风访墓田

陆少宰与绳北上迂道见访山中赠别

柴门寂寂掩苍苔小雨轻风香篆回鸟雀惯将篮笋狎无人知道宰官来

其二

女牛惊见一星高暖眼初回仲蔚蒿中散纵然饶懒癖可应容易绝山涛

其三

东风不作薜萝春物色劳君到隐沦圣代夔龙方接席可能容得弃瓢人

其四

浊酒离亭望眼孤明朝春色傍舫■〈舟符〉燕中啼鸟知无数莫遣空林闻鹧鸪
(次日立春)

戏赠于■先

七月十五夜何其正值扁舟访我时留卿且试盂兰供来岁依稀丛桂枝

庭有小方池延袤不盈丈种白莲花且植五垂柳环之

雪白莲花出水开陶家仙令好徘徊纵令无酒攒眉去且为薰风五柳来

意上人一梓髻婆罗门弃家入道通习三乘援苏学士赠乡僧文老例乞余一言走
笔应之

看君竿木向随身知是三乘老斲轮仗作忠师无缝塔须弥一半万由旬

其二

当日蜀僧过蜀客於今吴客咏吴僧如何尚有乡心在两两长松挂葛藤

看李张二子奕

疎帘落日小楸枰美作山人坐隱名一片杀机相对发不如青海去谈兵

十二絕句送敬美弟闽中学政

一傲除书两挂冠归云欲出洞门寒凝空易作千原雨承日还高五色翰

其二

莫言时雨未平匀西洒秦天东入闽惟是钱塘一水地至今犹有望霓人（中推浙学不赴）

其三

七闽文物有容辉吹律邹生事已非欲向春风问消息一时翹首问乌衣

其四

千迭名山千迭青五更风铎五更星莫言池草今无梦也要随君到幔亭

其五

幔亭溪畔密藏云曲曲清流皱縠文火枣向来湏已啖前身可是武夷君

其六

倚噫看云度武夷霜皮古栢隱丛祠诸生定有椒浆供为读羊公墮泪碑（先君遗爱祠）

其七

千林霞碎荔枝风火齐堆盘万颗同卢橘杨梅知不论可能收得状元红

其八

万安桥畔水曾波紫蛎红瑶处处多采得明珠堪把翫莫教鱼目笑蹉跎

其九

绛帷斜卷木兰舟夹岸蛮音入棹讴使者解书丁有尾不妨行部下汀州

其十

澹圃西连恬憺宫香煤欲冷树号风从他猿鹤相惊怨自是冰心出处同

其十一

破寒三盏瓮头春临到分离亦怆神我厌长生君用世可能终作耦耕人

其十二

右丞虽则恋清幽五短元应让蜀州记取玉矾书内句莫容堂印挂心头

送肖甫司马于清洋江口

清尊红烛暂为欢临到分携醉醒难纵有冰壶心一片伴君终是怯长安

再送伯玉至清洋口

君携胡建我曹丘各拥双株玉树秋两地客星分不得清洋中半是鸿沟（君舟有胡元瑞及淹嘉二仲我舟有曹子念及瞻敬二美）

三送与绳至■〈天上明下〉子

两岸朱衣送宰官中流衲子话团圞自怜不了能仁字归卧杉龕萝月寒

四送明卿夜宿玉龙桥

玉龙桥下水纵横迭鼓回飏断续声城头一片昆山月多少人疑子晋笙（时月卿携歌吹弄之）

五送本宁观潮南浦

平原十日未从容流水千重意万重欲对乡人夸共载仙舟自有郭林宗（时贞吉在本宁舟中）

六送桢伯于城西关

毋轻畫省老冯郎带鍤生花艾绶黄记取他年一奇事岭南还策汉贤良（冯唐九十复以贤良召）

用前例送家弟敬美视闽中学然至北水关而止盖余已徙居乡故也

眼枯无泪意茫然谢傅凭何遣暮年若使弹成白翎雀便应生断琵琶弦

乡进士邹道甫以严君之命借听于余余实无得也不忍逆其意以二絶酬之

子云有字何须问摩诘无言转更难请看佛堂方丈地从从忍草蔓栏干

又

髻里明珠当自知无端贫里叩贫儿北邙山下千堆土墓尽神仙不解悲

黎丘大王以手书及诗画见投寄谢并赠得六絶句

由来龙种尽权奇七步陈王已唤迟今日西园多应教可能偏少仲宣诗

其二

修竹梁园兴有余墨华长染马卿裾怪来徧被千金赐习得家王鳳尾书

其三

让帝虬髯三叶孙汝阳眉宇尚天人宫花不落研光帽羯鼓能催万树春

其四

芙蓉迭迭冠霓旌千乘贤王春豫情道是麻姑山色好便呼麟脯寄方平

其五

鹅溪百尺茧丝宽手写淇园万玉寒移赠王生悬四壁谁能触目不琅玕

其六

惭愧何郎通隐名长斋礼佛诵无生纵然博得诸王饷不乞嵇家旧酒鎗

赠医者马道人

谁似燕中马自然药囊箠笠但随肩生憎董奉多牵系不爱人间卖杏钱

送元驭阁老二十里桥同前例得一绝句

一叶轻舸破绿苹惊看蓬底两纶巾道人却有分携泪丞相何无祇候人

弇园杂咏

梵王桥

隐隐红桥拂地开徐徐蟾魄染青苔诸天幻出金银相色界天王尽下来

小祇林

佛日初开大地阴虚疑长者买祇林翛然一片浮云过欲问黄金何处寻

藏金阁

会得参同两渐和庄生昨夜访维摩若教更会真空意万卷函经一字多

小罨画溪

轻篙刺水澹忘归狼籍残红处处飞犹让当年雪中棹两山空翠扑人衣

磬折沟

湾环轻泚似金沟宛转洄沿客自留两岸芙蓉相对发即令无酒不悲秋

金粟岭

罢翻经卷旋呼杯为爱天香桂子开醉后飞花满巾帻真成金粟卧如来

省获亭

新■〈西乌〉瓮底嘈嘈鸣西邻稻垄黄云平老夫眼饱腹亦饱田家酒家虚得名

缥缈楼

独立缥缈之飞楼又看浮云天际头洞庭西峰九千尺尺鷃不碍逍遥游

大观台

日脚低垂雾半笼虞山一抹有无中划然长啸天风起扫尽浮云现碧空

超然台

巉岩百尺俯澄潭天水相和共蔚蓝小坐自然尘外境日斜无意下西龛

潜虬洞傍水窦

小小空明遠似无冷然一水自萦纒潜虬相喚不肯出为惜胡髯径寸珠

缩奇台

小台犹缩双龕奇试问台奇台不知遊人到此意忽忽半学杨朱悲路岐

月波桥

两龕中断有桥过水束微风也自波最好姮娥辉玉臂莫容游擢搅青螺

古廉石

戍削风棱无媚姿主人瞻拜具冠衣乍可郁林将压载那容汉女作支机

壶公楼

壶公饮酒酒初干谁道壶中天地寬幻出楼台成五色飞来日月是双丸

玉玲珑一名繚虹

压尽千峰耸碧空佳名谁并玉玲珑梵音阁下眠三日要看繚天吐白虹

青玉笋即锦川峰之佳者并蜀锦也

百尺排空玉笋青山人端不负山灵谁分望帝陵前锦自是当年役五丁

散花峡

长年鼓棹穿崖■〈山上罅下〉恰值春阑藤花落一花堕幘酒一杯懊恼东风不作恶

蟹螯峰

毕郎左手偶一失遗螯千秋化为石当空怕遣酒星知摄向微垣佐琼液

流杯石

云根障底暗泉流花瓣中莲叶舟直疑分出君山酒夺得头杯不肯休

飞练峡

游女拏舟向峡边惊呼白练界苍烟生来未识天台瀑湿着红衫不解怜

娱晖滩

滩头垂杨好系船杨枝戏水桃花颠枕流漱石从他误白眼卧看沧浪天

嘉树亭

嘉树周遭一水亭不妨呼酒共沈溟当头赤日不敢下拂面好风吹自醒

留鱼涧

夭桃落英长自留游鱼一入便堪愁梁宫亦有千迷道闽岭闻歌九曲流

敛霏亭

倦鸟初栖犹未还一生贪看夕阳山纵令收尽人间色几点峰尖紫翠间

小浮玉桥

一拳残石水中央醉艇纵横也不妨唤作吴兴一浮玉从教人笑夜郎王

先月亭

呼尊欲缓暮天愁忽有金波潋灩浮摠为西亭最先得清光一抹露山头

天镜潭

織鱗不起静无风倒写青天入镜中两岸青山带楼阁何人不道水晶宫

鳳条馆

一片春云綠正饶枝枝尽作鳳皇条他年傥得成焦尾不待琴心已就挑

寄屠长卿

神虎门头一挂冠镜湖东去海天寬人间有客都无耳自是相如胜井丹

其二

莫以怜才少相君提封尽跨五湖云请看六字镌官诏便是仙都十賚文

离蕢园杂咏

鷓适轩

大鹏九万苦不足尺鷃抢榆恒有余除却逍遥真际在便应方朔羨侏儒

碧浪室

百挺琅玕直复斜午熏摇入小窻纱偶然将作清漪看碧浪湖头一钓艖

晞髮亭

九月微霜未授衣桑榆向暖髮堪晞不知紫翠峰头敛愁见栖鸦闪闪归

壺隱亭小山

数拳培塿小亭前涧壑峰峦亦宛然不似壺公暂时幻主人留结著书緣

咏无住观中物

白鸚鵡

僊音隱隱似云和雪色衣裳推素娥生長白蓮花瓣內那能不遣誦彌陀

雙鶴

青田別種是胎仙午夜清音徹九天我誦黃庭換凡骨他時一點破蒼烟

馴鴿

日長行散步庭皋插羽佳人媚寂寥五色別成鋪地錦千鈴忽起半天嬌（插羽佳人半天嬌皆鴿名見清異錄）

朱魚

猩紅數點媚清冷暖藻香萍度此生莫向江湖貪廣闊近來魚網大縱橫

無錫陳生自樊山王邸來將梓其詩乞序姑與飯而以二絕句止之

詞客淮南氣若云莫疑山叟怯相聞自然鷄黍田家有只是無名可借君

其二

平台新賦許誰賢惟有相如賜獨偏若要上林天子問吮毫應更十餘年

題畫壽大叅旻谷先生七十

永嘉城外小緱山明月長容笙鶴閑總為旻湖泉石好未教王子厭人間（地有王子岩）

其二

千重綠嶂百重流仙籍垂登朝籍收長見歲星甌越部不勞明主訪羊裘

送林光宇文学同高吴二茂才还闽四絕句

韩子文章日月光当时闽海一欧阳不论观察如常袞分得三珠夜已光

其二

吴江霜冷落枫丹闽峤繁花正耐看识字儿曹师友意春风桃李不成寒

其三

经术从推绛帐师还惊博学与宏词诸林树树闽大色犹有温陵桂一枝

其四

高子波澜自老成吴郎神彩独纵横他年并出延津剑遥见星文动洛城

赠方士頼生

还是江东頼布衣芒屨竹杖欵荆扉于今参得茅家诀不向青山问所归

王阳德大参自诧地理师而极口为江右刘生游扬以为能得景纯三昧墓田丙舍一一听其更定刘子来謁乃有谓其非真者戏成小絕贈之

王叟青乌夸秘传逢君却耗买山钱老夫尽有容身地且傍春风住几年

其二

青鞋博得杖头装笑逐胡姬唤酒尝任使桃花开落尽总然还是旧刘郎

贈莆阳林致遠

曾携银管侍瑶除懶向王门曳敝裾遺恨先朝諸殿榜如何不遣仲将书

题文太史画别介征户部

淡霭徐分遠近山孤舟相对白鸥闲他年倘访弇州叟只在渔歌欸乃间

术士孔生种种变幻狡狴见而赠以四絕句

白波沈陆懒登台一醉逢君笑口开莫怪书生偏善幻何人不是幻中来

其二

鬪旗纔罢复藏钩曼衍鱼龙眩未休却恨茂陵龙去遠不教生拜乐通侯

其三

一念才萌意已通祇緣先堕识情中老夫心在阿惟越笑尔逡巡化业虫

其四

少年场里索相过不往如呼俗物何一任摩娑双眼看山神伎俩苦无多

余生为其父德甫丈乞志墓其别也得四絕句送之中间且悲且喜或规或嘲往往情见乎辞

七尺穹碑三尺坟五君垂尽到余君却怜身后谁知己此意凄凉不可闻

其二

阿翁不问生人产有子徒能读父书不为薛田荒欲尽可令弹铗叹无鱼

其三

一接余郎月旦评翛然四坐欲风生请看朱邸王孙贵杜口毘邪学净名（谓用晦也）

其四

双眼宁输郭景纯青鞋踏徧为严亲前山尽有牛眠地只要余郎自卖身

梁希鸿广陵人工古文辞贫不能诣吴门今有所因渡江见访得二絶赠之

梁生日赋广陵潮一水吴门天样遥二十四桥都踏徧可曾还见伯通桥

其二

扬州白盐雪满船扬州白苧白于绵莫将流水轻弹尽此调那容估客怜

赵凡夫游太学太学师为赵丈汝师其父少叅公凡夫之王父金宪公同年也

少年文采宋王孙二水三山绕帝阍携得通家名刺在不妨长揖叩龙门

其二

桥门霜色凛峥嵘朴教犹存圣世名何事书生纷负笈几人千载遇阳城

过西邻许子看菊时曹子家傍焉

篱边五色傲霜花白酒黄鸡不用賒乘兴即来酣即去许家的的胜陶家

其二

千钱不枉买西邻浊酒墙头无限春曹伯许男容入会老夫叨长号王人

其三

今年菊种家家少独自君篱细叶多差胜江州王刺史不湏携酒也相过

其四

醉眼摩娑不肯还任他醮鼓也如闲才穿丁卯桥头过便是吾家郭里山

题慧山泉

一勺清冷下九咽分明僊掌露珠圆空劳陆羽轻题品天下谁当第一泉

上人自峨眉来云欲涉海礼补陀北礼五台走笔二絶赠之

曾栖巴蜀峨眉顶遠见西天鹫岭无昨夜普贤乘白象向余先解髻中珠

其二

峨眉十载住不足南礼潮音北五台巴劫半生何处是眼前谁个不如来

畬宗汉令君谢全椒事归作汗漫游者二十载曩岁以四律寄我方在斋居不能为
和今岁复携七絶句见赠一谈而别輒依数报之

五柳柴桑比更青新诗字字敌山灵知君不爱郎官宿爱向江湖唤客星

其二

美人曾寄红珊瑚相见仍投明月珠十五秦城偿不得老夫无计且卢胡

其三

七子中原雅唱酬向余何事晚方求但教寻得河源路天柱昆仑在上头

其四

天许青山换布衣却防诗社畏金绯屠郎鼓吻徐郎笑满载五湖明月归

其五

愧君虚号谪仙人一点仙源觅未真可为出山呼小草山中久自有风尘

其六

十八娘红生荔枝蚝房舌嫩比西施更教何处夸三絶为有畚郎七字诗

其七

一炬丛祠逐楚瞳令君独有狄家风从他愤惋难为报与说咸阳三月红

弇州续稿卷二十四

●钦定四库全书

弇州续稿卷二十五

（明）王世贞 撰

○诗部

△七言絶句

王山人承父赴顾益卿中丞之约道经锡山诣陈穉登言别陈为叙出塞之艰涕泗不已承父愀然返棹作四絶句记之余属和焉

一曲阳關泪黯然而出门旋作剡溪船似怜思妇流黄泪难向辽阳梦里传

其二

白狼河北捷书闻猎火千山上属云幕府饶歌知自草祇无王粲和从军

其三

李广封侯数不竒欲翻辽海洗臙脂班生未上青油幕谁勒燕然第二碑

其四

纵然双足畏红尘那便菰芦老此身见说医无间顶色待君新句斗嶙峋

为俞子赠医朱寿甫

肘后青囊也自奇一膏肓起一刀圭竖儒那有隋珠报祇乞王郎七字诗

朱大夫见贻古鼎辞之而侑以一绝句

博山青袅篆烟孤未论酬君值有无从向匡庐蹑云气肯从人世觅香炉

戏题蕲尚祠

不知前后表何因袁盎名僧蕲尚神翻恨佛门开懺悔到来京洛有逸臣

白乳泉

沸泉迎日似明玃穿破云根乳自肥何似世尊将作供不教新犊雪山饥

品外泉

张陆真成足迹踈谱中泉味未应如园林百果登科尽荔子纔将首寄居

中贵人致牡丹一株颇丽雨中对之怅然停饮因寄仲氏敬美

金陵汝醉牡丹下余亦故园呼一尊今年花发原无异我向金陵汝故园

其二

绿跗红萼两乡同峭冷狂霖一概中留得洛阳培土法明年并蒂赏东风

其三

亦知春事易阑残思到鸰原泪不干却恨苍头供卯酒谁家白屋有晨餐

舍身台

般若何曾有此因如来偶醒恋身人黄金台上高千尺天下谁人不舍身

献花岩

自从偷破信师緘百卉虽繁鸟不衔无奈儿孙诤祖失至今犹号献花岩

懒融洞

雪里垂垂长白莲不言不起更悠然汝家初祖曾何道翻结神天有漏縁

宗人光禄华松鸿臚王继山邀余于王贡士园看牡丹后复同光禄看芍药戏成一絶

坐深那论主和宾总是乌衣巷里人差胜红丹与白药一般花蒂两番春（牡丹为芍药所接而前后花故云）

金陵人家门多种树树头巢鸟噪不止甚厌之戏为一絶

吴门旧曲厌乌栖又听长干乌夜啼丈人屋头有何好不如清晓汝南鸡

戊子初中夏金陵祈晴祈雨者各一而大宗伯姜公主之应因呈公一絶

禾田宜雨麦宜晴前后青泥叩玉清姜氏重瞻灌坛令秣陵初遇束长生

大宗伯姜公倡诸公祈雨澍应偶成一絶奉览蒙赐迭四章不揣鄙陋辄依韵补上忘其续貂恐蹈蛇足不知羣公能遂翕如成此胜事否

欲将祈雨续祈晴日日云璈礼上清自是天公在方寸占风莫问管先生

其二

拟攀真宰叩阴晴祇仗清卿彻底清一望秣陵黄土色不知新绿为谁生

其三

村村抱耒怨天晴无奈钟山气转清可为乖龙眠欲醒千江鳞甲片时生

余自三月朔抵留任于今百三十日矣中间所见所闻有可忧可悯可悲可恨者信笔便成二十绝句至于适意之作十不能一亦见区区一段心绪况味耳

仲春初旬辞故林鲜腆卢胡直至今一片真心终自见不从儿辈觅知音

其二

啼饥哭死徧长干唯有乌鸢意觉宽山色江声空自好不如聋瞽任春残

其三

残年故国已无秋颇解民忧与国忧今日忧来浑不减更添惭愧到心头

其四

老去心情百不宜未甘清影坐成移虽然书卷衰无味差胜敲碁卷白时

其五

散衙微缓日初西稚子能勤进肉糜西去街头三五步不知烟火几家齐

其六

学道频年懒未成偶将身世付流萍纵教自勘应难答出爱微官处爱名

其七

侯门犹自斗豪华一宴中人产一家马食鹑衣它日事银罍翠釜片时夸

其八

红女机裁供奉稀外家无复恃恩私江东父老聊须活此是尧汤水旱时

其九

麒麟蹙起带围頰琬琰连旌二相名莫恠君王重调燮近来暘雨较分明

其十

长夏辕门解甲时轻衫十万羽林儿不知一半耕农死饱饭城头日日嬉

其十一

总为天王德意真倾家多作赈饥人两都多少黄金穴不救区区白屋贫

其十二

残妻病弟三贫息刺促家音奈我何六十三年牙齿落此生垂尽亦从它

其十三

五湖小寇如饥禽一疏轻摇朝野心但使使君能信赏何愁竖子不成擒

其十四

五侯池馆只如常千骑传呵也不妨恬澹摠来才二字可教容易便相忘

其十五

书来病弟已加餐离绪千头且暂寛便是天恩赐休沐可能同觅少年欢

其十六

少年才气颇纵横来问衰翁与借名他日名成君自悔祇将牙颊送余生

其十七

数拳顽石点庭皋蔓草踈花遶四遭似与抢榆减归念瓮中终自有逍遥

其十八

超回直欲与丘齐才到功名识便迷祇为崔巍大成殿宰公东坐冉公西

其十九

六朝诸帝摠沈沦古垄寒芜社鬼邻何事彼都诸士女割羊争赛蒋侯神

其二十

鸡鸣山头祀功臣蝉冕虽薦天泽新颖公舌枯宋公馁纵有微劳何处论

嘲周公瑕馆钞库街

秦淮南岸小行窝八十微慳七十多与说周郎寃误曲任他商女乱嘲歌

游莫愁湖徐氏庄

青山如黛水如油垂柳千条拂地柔不须真见卢家妇才听湖名解莫愁

其二

坐中吴语觉清便三白新篘缩项鳊把向石湖相较看祇应输却木兰船

其三

断桥颓壁隐苍烟僵石枯藤夕照边将比莫愁应不似徐娘虽老尚堪怜

其四

一葫芦酒一沙鸥唤作卢姬与劝酬陌上少年知自悔青楼抛尽锦纏头

哭敬美弟二十四首

一口空齧两鬓星可能知己不凋零那堪此夜山阳笛吹到原头病鹁鸪

其二

偷得余生能几时不须肠断为分离唯愁业识难凭据枉向泉台无会期

其三

一讷惊传渐已真但来相慰各沾巾谁能洗却關情话祇道乾坤无此人

其四

当时奉讳十年强何夕何曾不对床但落人间成聚散更堪天地两茫茫

其五

久将情字付庄周有泪何曾汗漫流今日泪来禁不得始知真痛在心头

其六

端坐能抛火宅身共言前路不迷津惟怜忍位无无着那可翛然送世亲

其七

澹圃烟波似辋川蕘园花木小平泉而今总是销魂地断送余生蜡屐縁

其八

新诗十卷写初成滴泪和丹字字评唤作家鸡应不分风神多自济南生

其九

初从六季仿先秦晚节成风妙斲轮若使余年天假后老夫甘作卫夫人

其十

容易金门四挂冠不言田里起家难前头正是云霄路收拾雄心付盖棺

其十一

尚忆当年废蓼莪凄然吊影两湘累那知白日回光处已傍崦嵫奈尔何

其十二

子猷当日痛人琴刚是乾坤死别心若使弹成山水调更应肠断为知音

其十三

尚书阡栢紫云屯新奉君王表墓门莫较生前供养日九泉先得侍晨昏

其十四

谈玄未竟又谈禅似净身心未了缘何事又添名理障病中犹着望崖编

其十五

晨朝煮粥啖饥贫夕向寒林施鬼神岂是好生非帝意不教留却善缘人

其十六

支分身后析秋毫尔自从容见似劳惭愧老夫临去日一抔黄土听儿曹

其十七

晨晡一哭泪全枯泪到枯时气稍苏无奈陡然冲念发数声天际鴈行孤

其十八

一病经年百感侵到头方验道根深银台化佛空劳至不解无生忍处寻

其十九

长将勇退抑飞腾火色鸢肩未可凭别有数行家国泪宋文皇帝语王弘

其二十

欲将何物拟传真遗墨纵横妙绝伦不展如何便忘却展来一字一伤神

其二十一

当时得御李龙门爱尔长呼小陆云今日人间留不得可应相替一修文

其二十二

闽海诸生雅并奇山摧斗折为君悲那知匹练吴门马髮白颜公在此时

其二十三

遗书一字不關情相度须宏士气平纵美兹言谁为达阿兄无意问燕京

其二十四

四十金绯已叹迟腰章一纪未全移莫言卿少年仍老得老于今也不悲

上人将谒补陀过金陵谒诗为别

百日都无一日闲暂闲如在补陀山难将面目从师勘且向潮音洞里还

其二

寶地莲花不动尊如何移足向红尘请公但问金陵客若个能抛火宅身

赠闽人姚应诰林谐林故司寇汝雨公子也

姚生拥鼻无闽语林子裁篇有父风恠得延津饶紫气赠余双剑有雌雄

李宗伯以四絕句慰余请告赋此奉酬且伸后约

清狂贺监雪盈颅再乞君王旧镜湖最爱青莲李供奉掌中投赠四骊珠

其二

一书驰奏请林皋旅病经时骨自高十月霜浓流潦降怜君空赋广陵涛

其三

肯向朝贤叹积薪从他籍底日沈沦若教容易居薪上已作君厨爨下尘

其四

金陵市酒黑于油公肯来寻从事不莫道老夫归思恶比他陶令尚风流（公有玄亭还拟载郗筒语故及之）

赠詹常卿与其弟仲发两茂才

詹家玉树两分行文酒丹青事事强却有一言应莫笑不知谁得使君狂

其二

水到休阳分外清乔髦二子早知名争先出匣龙渊色容易交他乐令评
送潘溧阳征复应朝便道省覲御史大夫公

尚书尺一问潘郎可是河阳让溧阳河阳种花千万树溧阳祇晓课农桑
其二

河堤使者酒如泉仙令婆娑舞膝前但使双鳧似双鷁不愁元日误朝天
其三

殷勤致问张京兆亲引郎星上帝都懷县潘郎应更好不知明主赐金无
少宗伯李公引疾请告援前例讯之得四絕句

朝霞片片锦官城负弩诸侯待长卿见说君王爱词赋不教消渴怨金茎
其二

恒时杯底黑头公拟探梅花未许同可是长干春酒薄教人无赖忆郾筒
其三

空遡长江望故山知君终自不成还金陵正好文星烂玉垒那无紫气殷
其四

青春容物冠留都难向明时乞鉴湖白髮江东醉司马可能无念到莼鲈
辱宗伯李公赐和六章词丽意深不揣续貂四絕仰尘清览

天禄高从汉省开著书谁似子云才自言清静元无染第少陶家归去来

其二

六朝风调本无伦结绮临春俗杀人带得烟霞两三字看君新句已如神

其三

衫紫围金髮正玄如何称病倦朝天君家玉局翁应笑藏史埋名二百年

其四

漏泄春风六和章白门花柳尽施妆王弘自有江州榼莫向阳家典鸛鷖

永嘉方子谦能诗奕品在第二过武昌吴明卿特作长歌赠之既而薄游金陵无所遇将谒东诸侯于其行也得四絶句续明卿后

可为金陵住少时绿杨摇曳荫铜池城南别墅家家有祇是无人会赌碁

其二

武昌元自长骚坛那有楸枰似建安未作围碁大中正已容高品过方干

其三

一枰碁了一篇诗谒徧诸侯橐尚垂宣城若遇羊玄保为乞当年赌郡资

其四

颜鲍墓荒程李死人间祇合剩方郎（谓扬州方也）君行乞得孤山谱来向交游
诧二方

西宫御沟

清泚弯环白玉沟丛丛绿草衬澄流自从天北金轮远不染深宫粉黛愁

璋上人自新都还鹫峯汪司马伯玉尊之为大摠持而以文及诗侑之余亦得四絕句

新都司马病维摩说法虽多法不多若使见时无一字曼殊何处起风波

其二

师子林中大摠持何人不伏四威仪争如软草铺裯卧过尽诸天两不知

其三

说法归来卧鹫峰钵中收得一盲龙似闻魔事吴门盛休遣波旬定里逢

其四

绮语场中误立身一生涂抹费精神于今较得些儿子便觉无名可借人

戏赠高坐寺僧

高坐道人谈十地醉乡司马听三车但教胡饼传生菜何必诸天昼雨花（僧作饼为诸寺甲）

送乐天和尚叅五台和尚谓我忘言久矣兹欲叅五台而路警严甚借子一诗以御關吏呼可乎笑而许之

五台拔地五千丈犹起浮屠插汉孤我有一尊无缝塔烦师将寄老文殊

其二

弇山居士诗名久一字堪师作传縑其奈西方渺然路自家犹少护身符

谈思重写梅花赠李茂承为题一絕句

谈郎写梅今絶伦貌得罗浮月下神玉笛江城吹不落一枝留伴谪仙人

沈孺休乞送曹生诗得之即别索一絶句为赠

沈瘦能强它客肥风流三絶见应稀双珠博得酬知己了却尘縁无是非

黄白仲以二十絶句见投答之得六首

怜君藻思若悬河何自清时挂网罗西去汀洲鹦鹉緑古来名士患才多

其二

明海稽山两道民转从词笔弄精神老夫自是前车辙不二门中好立身

其三

共爱通侯下士名沈深甲馆隠倾城冰心自是俱无染偶为相如字长卿

其四

如闻抖擞学无生日饱僧厨不糝羹习气恐然消未得梦中犹记五侯鯖

其五

镜湖如黛染山螺莫似黄庭换白鹅三迭琴心留自赏从他门外有风波

其六

博得才名恨尚迟名高他日自应知五更家寶抛人去揩眼仓皇向墨池

周山人稚尊游豫章时已十余年矣今日忽访我金陵容鬓非昔而风范不衰复出
吴兴徐生一札徐别亦十年屡有言其无常者似一日得两故人喜成二絶以赠稚尊时
己丑之夏四月也

怜君双鬓已苍浪意气能如客豫章惟是长干顾新曲有人知是旧周郎

其二

十载南州徐孺子几回梁月梦魂新因君忽得双鱼信一日真逢两故人

汪山人沂者故伯玉司马宗人也年七十九矣而诗不衰貌又不衰其游又不衰将之赵魏间依穆考功而老焉乞余诗为赠得二绝句

三辅游成鬓已银蹇驴犹自踏红尘明年试斩淇园竹西入咸關把钓纶

其二

司马盟坛众所宗为愁年少不相容穆生学得王家酝三尺糟丘拟墓依

题画梅寄吴江赵令君季兆君广平人也宋广平尝赋之故云

空庭一树影横斜玉瘦香寒领岁华解道广平心似铁古来先已赋梅花

自瓜洲追大司马吴丈不及有懷

风流华省接鹓班一作冥鸿不易攀前路数峰青似染分明秀出是箕山

其二

依稀红旆影前途欲近仍遥问却无一片交情与乡思先随明月到姑苏

追大司马吴丈及之俄而告别有感

喜及前茅笑语新终成离别转伤神莫疑肝胆非男子祇为人间少此人

其二

亦知相别在相逢无那般勤意万重若过延津晓离合古来双剑是双龙

贈僧叅方一絕

落迦南浸勝蓬萊西有峨眉北五台寄語圓通三大士可能端為一僧來

大宗伯徐公携阿倩見餞委江命賦之得二絕

紅綃中單白玉肤問着恐是徐卿維不須劉尹評身價但道方回勝也無

其二

窄衫微卷按歌頻人道春卿桃李春若使青蓮听一曲悔將潭水比汪倫

其三

飛白傳亂坐不空乍回秋水剪雙瞳若教携得金陵去樂府應添明下童

吳江趙令君特訪我吳閩走筆得二絕句贈之

閩門祖道如干舫誰似君侯一片情此去吳江楓落候好題紅葉到留京

其二

姑蘇七邑摠騷然唯有吳江耐熟眠不向西疇較收獲神明茂宰是丰年

送張先輩公覲四絕句

少年文價重公交車大貝南金總不如見說安昌後堂坐可曾傳得戴崇書（君為張大司成所賞識時與談經術故云）

其二

武昌前度別吳郎又見張郎出武昌談笑才情宛相似不煩抵掌悟莊王（君姿調絕似明卿）

其三

风调吴侬敌楚狂岭南诗酒更披猖未论今夕乌衣巷天上三星并姓张（姑苏张子献翼岭东张子萱俱在席）

其四

临岐握手莫欷歔白酒黄鸡乐有余若使徒斟建业水可能赢得武昌鱼

送郑茂才梁辞梅锦衣宾馆还闽

贵主妆台半薜纹金吾新第蔼如云幕中名士从他数谁似青毡郑广文

其二

枫亭驿前荔子丹万安桥下蛎房宽从教山水金陵好摠是难禁苜蓿盘

题赵干烟霭秋涉图

澹霭徐分远近山一溪新涨碧湾环行人不道褰裳苦却似清沂出浴还

赠陈簿

楚臣衔愤出昭關五岳犹然方寸间说与傍人谁解惜不如欹枕看钟山

其二

由来避世有墙东祇合丹阳作寓公新社摠知无约束酒垆诗卷任春风

余以秋月履任有闽人孙司狱者廉慈着狴犴间不久迁广东幕僚憔悴不自得濒行搏颡乞言悯之为赋二絕句

微官遠道不须论过里先高驷马门非關狱吏生来贵为是于家有子孙

其二

青衫羸马帝城西祖道无人落日低犹有若卢方畝地頽衣能作数行啼

送吴翁晋游永嘉

三春看尽秣陵花乘兴扁舟下永嘉制得锦囊尘不染满中都贮赤城霞

谢宜兴令惠新茶

宜兴紫笋（阳羨茶名）未成枪团作冰芽一寸方白绢斜封亲拣送可知犹带令君香

其二

中泠新水拨冰丝（宋第一茶名）泻向宣州雪白瓷念尔欲浇诗思苦千山綠竹晓衙时

送王季中北上谒选

莫言相识冶城迟才到胸中便吐奇却语父时东海客只今王掾不为痴

其二

仍携何逊上皇州处处江山有倡酬自是宦成诗亦就永嘉今代出风流

其三

当君白下趋朝日是我青山独往时若向尊庭问猿鹤已应惭较十年迟

昔年归卧江左新安汪惟一惠我五湖长印不出者再稔岁矣庚寅春永嘉林逸民仍刻以惠我不五日许放归一絕志喜即题扇赠之

一竿当日钓菰芦蓑底名衔长五湖却被鸱夷生夺去劳君仍与旧鱼符

又答竺西子

春风病眼日摩娑衣底牟尼在浊波自是老夫明不得君今明得待如何

弇州续稿卷二十五

●钦定四库全书

弇州续稿卷二十六

（明）王世贞 撰

○文部

△序

送郡太守广平吴公入觐序

往吴公入觐时天子方坐明堂大计羣吏而公首以贤能应格为赐宴赐褱蹄织文之丝中外耸动以吴公当骤迁而公还治郡自若盖天子方采宰臣言守令用久任法毋得辄议改于是吴公之还治吾吴复三年矣比复当入觐而中外之积荐公至三十余疏计以为天子所以宴享贤能吏者不问当知为公其所优进九卿方岳之官以震动海内者不问亦当知为公即宰臣欲久任公亦不能舍公而他擢吾民欲久有公亦不能夺公于国门之内而固留之也其士大夫之贤公者则谓吾识不及古以所睹记二司隶十三行省之郡长吏有能差肩吴公者乎父老之贤公者则谓吾识不及旁郡以所睹记二百年之吾郡长吏有能差肩吴公者乎天子非用三公九卿之位不足以酬公公不去为三公九卿不足以塞吾吴人之愿而吴公固逡巡不居间一过不佞则自摧谢以无德于吴人而苟免简书是幸不佞尝读汉史知其时号称治平而收二千石之效莫过于文宣而文帝时独河南守吴公治平称天下第一入拜廷尉为汉循吏首吾不知今吴公之视昔吴公何若然屈指而计今之难于昔固不啻倍屣也夫汉之所为守者一而已今复置二监司三四抚台六七御史以据其上瓜分守之精神以应之而日不足以此宁无难也汉法三章耳即鄴侯之所增者十余条而已今走一州七邑之讼而受成诸三四督抚六七

御史二监司之所委谏穷甲乙之令而不能徧以此宁无难也汉田岁赋三十而一又时时赐蠲诸关梁山泽之禁多推以予民而今岁赋吴至十之五矣少府之金帛羽毛齿革日夜取足于吴若寄以此宁无难也汉守得便宜行事今治吏罪自鬼薪以上即取监司裁而吏之为奸私者百倍于昔以此宁无难也然为公上者倚公以自安而不复问为公吏者戴三尺而立顾能人保其业而不中法为公之民者以得及公治赋乐输而恐后盈庭之谏得公片言搏颡欢服解去以故迹公之门而不覩有贵踊入公之庭而不覩有劲胥登公之堂而不覩有舒吏叩公之案而不覩有遗牒以此又胡言难也廷尉于汉为九卿去丞君之鼎一阶耳其所以待前吴公亦良至而未闻有所称塞天子即以是官待今吴公亦能遂恣恣若黄丞相之功名而已耶余窃征今吴公宽厚博大若乔岳之重河海之宏而不振不泄毋论于难易远逾前吴公即异日之声施于朝宁者当不浅浅也于是郡司理赫君念无以解公装征余之言以为赠

赠中丞永丰宋公迁南大廷尉序

当宋公之来抚吾南畿也其所治江防则西南千里而遥海防则东千里而近海警以不时至而江寇狎发天子之督责相望大司马厉色而待赤囊之至宋公之所部郡十毋论其它而吾郡赋独当天下半有所请蠲则为大司徒大司空所持十上而五报罢天下之吏治独南畿重而又最繁太宰用考功法计吏惟两台使之是凭而所任耳目最不易宋公坐堂皇按九郡图一览而悉得其凡于是下诸道条上利便备兵观察王君副帅都督黄君以筹海报备兵观察冯君以筹江报公度其重者为条上而其它一切用便宜从事盖未几而江之大盗得悉覆倾其窟巢天子既已嘉重公而又逾岁倭来犯公发兵逆击破之斩首馘生殆尽于是乎有副台之擢褻蹄文绣之赐而是时岁屡告歉征求狷下于是督储大叅杨君至而与王君合以国计民瘼报公大则为上疏请命次则移书政府顛求宽恤细则亦以便宜调剂之百姓盖岁受公之赐而岁不知者公既负神明声诸吏自黄绶而下咸惴惴重足立乃务以含弘掩覆其短而露其长于是人人知自奋其文吏以不贪为宝为县官爱养小民而武吏以不惜死为宝以身任折冲御侮之寄江以南庶几就理而会世贞以不任南京大理卿议所以代者乃亟用公世贞方里居而王君偕诸君谓世贞之习公也过而曰吾辈能一日而舍公公有德于邦人甚大其可无一言之赠世贞既已谢不敏则相与叹公之习吴也公盖尝为吴贤令云其覩闾閻便苦真若烛照而数计其讲说国家大算建瓴而下注之所措置理解节辘以此为所繇习者不佞盖始然之既而曰否否以公贤令者知公者也以公繇令习者非知公者也夫公道出王文成而才近之在易干元用九乃见天则又曰不习无不利地道光也良知莹然天则自见夫何假于习也夫藩篱剖则无我无我则物不隔物不隔而吾民不与公一体哉其精爽血脉有不相流通者哉即举而措之天下奚难也大理式敬由狱六官之一职也公故丞

饶之何所藉余言即余有言余且以不能受代矣焉能为公重矣

又

往时中丞开府金陵已迁治吴郡吴郡濒海其去寧徽太遠江上之警非浹旬不达而又最当孔道以其身受役于南北之贵游即金陵号称要便然不胜诸达官大人之居间以为苦而华阳公至乃始迁治句容其地于诸属城无所不近若臂之运指而独山居非孔道无造请酒食之烦得专其精神于号令声教公虽不时至吴郡然以尝为吴令故于吴之赋讼风俗无所不悉岁一饬兵待海汛则为驻节太仓久之爱其土风之淳时时进其士大夫与饮稍谈说道理政事士大夫亦欣然相顾语谓得见幸华阳公而公迁为南京大理卿且受代诸君以余不佞之素习公也俾致一言之赠余无能为役独记举进士时与公以意气相豪许抵掌慷慨谈说天下事不倦又时时为诗歌于酒间奏之一夕公摄襟敛容而诵斗山之末章其节奏指点天真出于■〈医，口代酉〉嘘之际盖不待乱而汗涔淫浹余臆恍若有触而醒者自是公为御史则为名御史出治兵视学于臬则为名臬天下之贤士大夫日望公之登用而其忌者不胜公之直以为有妨其骖馵而不欲安公于朝虽数起数屈然竟不肯小贬其道以求伸而会今天子即大位明哲作辅乃始寤寐一世之英俊而公屡迁至今官然公于下不求合其一时之好以干下称其于上亦不求合其一念之是以希上许而孜孜焉务求吾之所合于道者行之以故其所设施始不必尽理众口而久之翕然若子产之见诵所建白亦不必尽报可而久之则若赵营平之画策人主与大臣无异色诸君子谓吾吴拜公之赐者三年矣乎不知公之政成而所以赐吾吴者固永永无替也当公慷慨谈说时人以为有孟氏之辩其明学术审取予杜絕佞幸人以为有孟氏之气象而余所信者公之学蓋自一命以至今大位无往而非夜气之用也余与公偃蹇不甚异后公而抚郟先公而拜大理之命郟简省易治数倍公而且以不能去矣诸君子即不鄙余言而再荐之公能不厌之乎公即不见厌而世以余言为足重公者乎昔人有食涧毛沼沚而美者拟以羞王公夫余亦犹是矣

送侍御郭公按吴满代还朝序

今天下名能为国家持纲纪佐人主聪明者宜莫如御史而御史出行部有视学清戎茶盐之类以十数其提衡文武大吏抑兼并锄梗拂信冤滞护养小民宜莫如巡按巡按御史所部郡国可二十余而最繁雄名不易治者又莫如吾吴中不佞自髫髻至于今垂五十年所历事巡按御史可四十余其寬严虽人人殊要亦多奉公丽情法而其大指丽法胜者不无使人有称述然往往遗憾于情其丽情胜者不无使人有去思然往往遗憾于法情与法不相蔽而寬与严之名出今夫展咤而霆回矚而电席卷而■〈风贝〉

棊击而霜见以御史为天子张神气也煦而和风渐而甘霖乳而保姆温而挟纩见以御史为天子滋元气也不用之则不得言御史偏用而不两剂之则不得言贤御史名两剂之而不各当其可亦不得言贤御史盖自吾髫髻而至于今得御史四十余能两剂而又能各当可者则毋如两郭公其前郭公之去吾吴中居官数踈数起凡十余政以至大司马而吾吴人之称郭御史若新最后为今郭公公不轻有所出入其三尺恒凜然而用意必依于忠厚即有所弹治上不欲轻弃人之才而下不欲轻尽人之情盖四雄郡一望州十七巘邑之大吏其贤者争自濯祓惟公之是效而不肖者若神明之在上不敢不强就绳墨以祈无污公笔至公所论建不务责一切目前小办使便益与国体相为用有味乎言之也谈者犹谓前郭公之举御史职甚易盖其时民不覩兵燹困徭赋富家子鲜衣怒马以恣其好而已上不为苛文猬责尺一不数下听其自课考功法而已又无所亲信耳目以伺挠之较若画一而已今公所程职十难于前郭公而效倍之公不为犹贤乎哉公已满且代而吾州之大夫士无所私德公然心以公为贤而命不佞纪其说以赠公行矣犹有殿最之简书在昔管敬仲之所称郭公者以其能善善恶恶然善而不能举恶而不能以为惜知公之必无是也前郭公名宗皋嘉靖之己丑进士莱人公则隆庆戊辰进士魏人

送大司寇余姚赵公入贺万寿兼考绩序

先是赵公以少司空正留台遂为大司寇合两政者三载于今矣而会丁丑八月为皇帝万寿节大宗伯太宰推公以捧贺行公亦遂得自上三载之绩留都之公卿大夫士中慕爱公而伟羨其事相与为文及歌诗以饯之而吴人王世贞尝获事公燕中其自郾入备棘寺又当从公后以言罢归里弗克与而族人都运汝康者亦以故二千石受知公又其子太学生仲极从事公于司寇部乃属世贞效一言之赠都运之受知公也公盖用御史清戎滇熨云是时权相纵其子为孽公不忍宗社之陆危上书力争之诏使逮捕万里而遥而公毅然不色索霆霓暴震于顷刻而公不色慑风雨收日月吐放公于大鹵之桎而公不色怛第敛精韬光以俟偶然之发修性养气以贞偶然之遇而已会隆庆初天子收召直臣公首应命屡进九列厯台省以至今官诸一时名为直臣者天下延颈而趣之以为景星祥麇而顾其中亦不能无沾沾意公故一切忘之毫髮不以滞留即不仅安直臣名而求太上所谓者其高至于究无始通无外公一切绌之而约其实于伦物之内是故狗迹者不敢疑公于虚超迹者不敢卑公于实天下盖两重公而公两剂之矣公之领留台领大司寇务于持大体不责一切苛办贤者兴不贤者格黜者庄之若神明而弱者就之若冬日即天子重体貌大臣不以最问公公又何疑于最也公行矣天子方下有司议大婚礼阴阳欣合蒸为太和而公以六卿之正率先方伯连帅进师保道义身体之训不贤于金鉴什百哉江汉之诗王命召虎用锡尔祉厘尔圭瓚秬鬯一亩告于文人锡

山川土田毋亦嘉虎之最足以膺上赏哉而虎拜稽首天子万年盖先拜赐而后称祝也今公先以万年之觴进矣天子为敬举之而后太宰按故事锡祉于公其视召虎有后先典则一也天子遂竟留公而公亦遂实为师保其所究于道义身体之训者不亦深哉明明天子令闻不已将于公乎是望矣

送州幕成君迁乌蒙郡幕序

嘉靖中余以比部郎决江北狱识御史海阳成公于淮阴其人明信廉厚君子也寻余以副臬治青州兵之三岁而公亦用其官治临清公至而余报罢久矣旋以家难道相值握手洑澜而别凡十年所余再起而公致其政归且捐馆舍久矣余自再纳郟阳节还里中而识成公之子某于州幕恠其貌恂恂若不扬然而好动者惭率矣与之语嘿嘿若不出口然而好诮者惭夸矣卒而试之宁迟而不失度繁以试之立办而能自韬意者其犹有故家宿儒之遗模欤将持循好修之风有所受而未竟吐也一日酒间语及家世始知其父为海阳公相与泫然慰劳良苦而成君之奉职无害吏民信而念之一旦报有代者盖铨曹之与考功牾妄传君有它君方以入计最闻铨曹意不欲移代者而势又不能安君乃稍迁乌蒙郡幕夫乌蒙越在西南万里外所谓窳旬牂牁之域其王虽渐夷而守然往往取羈縻奉行文书而已有一倅两幕大概不能至其地寄禄于省以希沿牒摄事之一役藉令铨曹为不知君耶则何以迁业知君耶又何以乌蒙为也君试吏未久所俸入不足以偿宿进而大司马方严邮道之禁无咫尺繻以为行资陆则援剑阁凌邛坂猿跂鸟息水则牵百丈穿三峡而上即成君号健幕安能徒且襁负也虽然吾闻之朝歌长虞诮云事不避难臣之职也乌蒙诚险远成君诚贫不任装然幸天下一家靡有剽抄蚤暮之警君第达蜀必有所处君者异日称循吏西南夷中无负名家子吾知其为成君也耶

送大叅杨公迁广西观察使序

万厯丁丑秋八月尚书吏部言岭右按察使缺请以吴督储叅政往诏曰可于是叅政为姚江完愚杨公而郡守李君及其僚念公甚不忍舍而又不能留公乃具书币而属余山中以导行之序请即余不文忝从父老后食公之大赐而又尝与其伯氏偕制科为燕中游不敢辞则谓今天下财赋首吾吴画江而擅膏腴凡四郡二十州邑之赋当天下半县官之所需自六宫以至百执事六军靡不仰给而以一叅政总之则甚重其赋自大司农常计外少府水衡将作之所筦山衡泽虞闕梁盐筴诸课以巨万计移牒旁午取给于一叅政而其职又得兼治狱讼纲纪文武大吏羯羴之俗所以理之大氏与赋埒则又甚难然其始未有置置之自嘉靖中大宗伯翁公孺叅始寻报罢久之乃复议置盖后先

不能五人而余所辱与者翁公与今河南按察使舒公汝德并杨公而三耳其皦然着于人耳目以为良而余所心慕服者亦唯此三公而已翁公精心强力夙夜自课责以兴利剔弊为务舒公体气高亮风棱肃然吏畏而民自懷之二公之用不同要之皆国器也杨公之继舒公孰不以为未易见长而公亦雅不欲以长见顾其贞心大度使贤士大夫有所亮以思効而沈密靓慎不肖者茫然而不知所窥时方核名实见当以为鹄击公虽不废激扬务思所以为长者时方重羸积见当以为猓取公虽不废催科务思所以重国本即葑屋莽鄙或不能一一悉公而君子窃得其调剂之苦心矣吾闻之王使君阳德言公前守抚治行第一第不肯骖髀事上官以苟觊颜色前后慰荐莫之及然卒不能胜夫远迹中外之望而天子为之特赐褒擢以至今官使貌公而近之固温然若可悦而悦之少不以道即拂然不受虽号为至贵倨若台使者不能以一语轻加公夫余所得之公以厚而得之王使君以介若此公所新莅为按察斤斤持风纪弹压百吏而又何疑于往哉且公以天下之所甚重且难若吾吴者而理之若游刃而况一岭右又其职止按察而已哉往者翁公去吾吴非久天子以吴吏民之习之为建中丞节来开府按察使法不久任而吴吏民之习公无异于翁公诗云是以有袞衣兮毋以我公归兮以为岭右人语则可夫吴不能一日忘公公其能遂忘袞衣吾吴哉是故敬从李公輩浮公以大白而祝之曰行矣请得偕诸父老约日而候公于吴江之浒矣

贺坡陀王司训膺獎序

坡陀先生为诸生不及资以材上春官既廷试而天子奇之擢为第一先生素好乐律精得夫元声元气之本乃进乐九章演为图说以上诏报闻盖燕中士大夫无不慕说先生者而先生仅得太仓州之训导先生来为训导益读书砥砺行谊暇则延见诸弟子讲说经术善相长过相规以为恒诸弟子人人悦服也而来为中丞御史者故尝于燕中慕说先生又益习闻其教事益大喜每当代辄下书旌先生盖三年而五被旌矣其旌语非一然不曰浙名士则曰吴贤师云所以称名士者先生居浙西为诸生考校辄优等然台使者不以文而以行旌先生诸生之有旌则自先生始也其称贤师岂不以先生能读书砥砺行谊暇则延见诸弟子讲说经术善相长过相规人人悦服乎哉若不佞则以先生之所论乐而知之盖唐虞之际舜以百揆寄禹以羣职分九官十二牧而教胄子之责所谓直而温寬而栗刚而无虐简而无敖独谆谆焉以命典乐之夔夫子语学而所谓兴于诗立于礼者必待乐而后成今国子祭酒太学师也于古为大司成又曰成均夫亦其遗意哉先生之所被旌为贤师者人人能知之先生之所以为贤师者独不佞以乐窥之人人未必知也先生其识余言异日入而直四门六馆与闻国子祭酒之政毋待言矣即屈为县邑令长记有之声音之道与政通子之武城闻弦歌而莞尔者固在也先生其不称贤令长哉于是先生之门人某某等次不佞言以为贺

赠州牧仰松张公导水平赋序

始公令常熟而治理流闻吾州州父老相率而谓其士大夫曰是安得一借公为吾州守哉其士大夫曰固也公行以高第入琐闼矣于格不当守守且屈公而亡何公果进比部郎改给事中垂为其长而会以伉直故出佐某邑已复进应山令仍用高第拜吾州守距其为常熟几十载而父老乃骄其士大夫曰谓张公不当守耶而吾州何幸以得公然窃意公自迁客阔畧民事而公至所干理益精于治邑时其大指乃在挫豪右施舞文创诸恶少年然毋使蠹吾治与害吾贫寡颁赤而已度小改则宽之亦不为一切苛索株连以故亡大小强弱畏者不废爱而爱者不敢忘畏中外数百千万人之命操纵于公掌握而公之精神心志流通贯彻于蔀屋荒鄙而亡所阒属大司农督逋之檄旁午于台使者下郡邑度以为得罪敲榜囊拳之下中人无完产而下人无完肤至有瘐于狱雉于家者公故徐徐时虚其赢以宽上心而于下则示之实限较区肥瘠为次第故讙呶之声猬起傍邑独吾州晏然而其输额顾反溢公以间行城之东门睥睨间而望曰大河汤汤安得不入震方而故迂之使西而争金虎道以进又亟退也盖复故水闕使东西交会于学宫以滋吾士气乎则又曰水环城而自隍嫩若壁也奈何里辄堰之以为诸弁帅橐俸壅而不宣其气遂通之公又念向者为民请一日命不惮以身塞然业苟给目前而已而不为之平其赋若何乃议简赋长前守有所行区即其催办户以岁长赋见谓其名美而数亩之家惧不胜策有弃而逃耳公谓产均以年年埽以产悉除去其贫窶者不浹日而赋长定欢呼载道即应长者亦心服且谓何如及我公而役庶几其保持我也公之为惠最先于小民而为礼笃于士大夫以逮博士弟子靡不心慕爱公公受三台旌则相率而请庆其悬弧旦则相率而请祝公笑曰不穀岂待旌而重耶且夫为守相者奈何以一生辰勤民也力谢不可众度无以报公则相率诣世贞言公治状未易更仆数然其最近而大者曰导水曰平赋大较如前所云意以世贞最习公而不为调言庶几其有当乎世贞窃闻公前为给事而工科则三疏言漕河大计迁户科则又言海运及东南根本至忤贵臣而不少挫夫公之所谓导水平赋者在天下今屈而仅为德一方抑何广狭不类也然公向者能言之而不必无扞格即无扞格而不必奉行若公虽屈为守其去民近矣为德虽一方其德于人深矣吾闻之汲长孺当守淮阳至泣辞以病力不能任郡事愿为中郎出入禁闼补过拾遗而人主不之许以徒得君重卧而治之假令张公若长孺能不薄吾州而拂意于去故所居官耶乃公无薄吾州而精心勤恤之岂不贤于长孺倍屣也虽然长孺后先凡十年以故虽卧而治之而号为政清今公资望崇积甚旦夕迁矣其悉吐其奇以终惠吾父老及士大夫世贞尚当操觚管而俟

赠魏昆冈先生授官光禄序

吾始读周礼而窃有疑也以周公之明圣而着为万世之典六官之所推首而佐王治邦国者其属士五十有六而膳夫庖人内外饗烹酒正浆人微而至于兽廩鳖腊筵醢醢盐之类合内外男女之职居其十之七八其所谓治者安在而于所谓大冢宰安与也第不警夫天下之至重而甚要莫过于君之身而其次则王后世子其粗可以养荣卫而精微之极至于育德而和性俱不能外故麦羊菽鸡稷牛麻犬黍彘之异食而疏达高粗圜闾廉深闾阍之异器食羹酱饮之异齐酸苦辛咸滑甘之异调往往与王气合而所谓夜鸣而■〈广外酋内〉之牛冷毛而毳臙之羊赤股而躁臊之犬曠色而沙鸣之鸟盲视而交睫腥之豕黑脊而般臂蝼之马诸有妨于膳饗者精致辨焉盖至于■〈执上目下〉御仆从罔非正人而其重可例推也以故虽晋德衰而平公不彻乐于大臣之计而一宰夫得以大白而浮之庖丁之所辨于理解斤斧者其治理何暂也国家于大官尚食之令进其阶三品列于九卿而美其名为光禄又四分其署之属而以士人领之此其重宁下于成周比年命大冢宰遴诸上舍之升秀次第授官而吾昆山之预者十有三人然其十二皆外僚而独吾叔丈昆冈先生得为光禄四署之佐盖吾少则侍故光禄典簿东溪翁游先生为翁最少子读书明道理恂恂退让长者昆之人方以父子列近侍奉人主御食为一时荣而不知其所系至重而甚要也先生之伯父故恭简公讲业东南为世师表尝授先生经于童子时闻所著有周礼沿革者虽未全而天官一书固铁槌三折矣吾虽未获尽见之窃意其于宰夫之职重且要当亦无以大异先生幸以需次未即受当益精其说而俟之异日天子坐明堂大亨以养圣贤先生抱遗书而进必有合也故因其从子大恪请而授简以序

臬州续稿卷二十六

●钦定四库全书

臬州续稿卷二十七

（明）王世贞 撰

○文部

△序

送大中丞荆门王公入内台序

今国家所赖以纲纪縉绅统均中外者其重则无如尚书吏部而御史台实与之颀颀而相表里其最重而号令宇内则无如京师而留京为之陪佐大江又为之襟带之以故督江防者次重凡中外之所重而后先属之一人者于治世其人则必贤其人贤则于官于地无所不益重仆不佞求之于一时之贤者而未有合也近独见吾荆门公公始以邑令高第入吏部于诸曹靡所不厯践而其最后长文选考功公之为曹长属时事有所鼎革而公独精心于贤不肖或直而遂或婉而剂务达其志而后已当是时翕然以公一曹长能使其部重而其迁为容台寻以银台理兵部黄颇号为闲局而公所持论凿凿破世窾中间尝一使云中上谷与其大帅摹画边备虽老将为之俯首而公自是受知人主简佐留台督江防事江上下数千里其西薺鄱阳而东薺大海盗发以不时而台所莅远又时时与抚臣按臣错即一令下而莫知所适从公至则首核文武吏之恬嬉者其它一切用柱后法治之吏士捧尺檄而严霜凜然若在背所谓数千里之远臂运指应而不敢顷刻违盗遂鲜起稍起亦随就捕而公又开朗坦洞不设城府獎进贤豪士与之均肺腑以故其畏之者虽盛夏之霜而亲附之者则沍冬之日蓋公至而江防遂大重于它台矣公今所佐御史台其重与尚书吏部颀颀者也即拜日而汾阳之声伎京兆之驺从能有所裁损哉第说者谓天子冲圣茂学问三公精白寅亮以师百僚宫府一体遽迹率职即台亦不过按故事奉行文书而已何所用风采为是不然凡使台不见风采者最治世也使台不得见风采者末世也使台得时见风采者中世也以尧舜之际四凶既以除比屋可封而咎繇尚不废为士然不闻其所举按何条而其可见者与禹稷诸大臣都俞吁咈于一堂之上而已末世固亡论至中世而马威卿薛贛君宋广平李易之之徒始以刚棱伉爽名鸣呼亦岂得已哉公行矣自今而后愿公为咎繇愿公以九德之昌言进而共化理天下俾神气融而为元气不亦伟欤藉令公重台于公常事耳无所庸赘矣于是公之属大叅王君宪副冯君善之而请为公赠

送大郡伯云溪刘君署昆山得代序

当唐宋之季中外縉绅大夫或坐公私谴而有所左降为州郡之倅若长史司马者往往以迁客视之而其人亦往往自废放毋问其职业而托适于游览觴咏之间高者虚无其官以为毋足溷我卑者厌薄其官而不胜其慙凄牢骚之念以庶几一日之量移即才如元白而皆有所不免观其倡和诸篇什来往尺牘与厅壁一记大要得之矣至我明而始不然然即其名能不虚无厌薄其官而为大臣器者亦不过喜吏事强力程课亡害而已畴有能以身抗上官为民请一旦之命如阳道州者耶用经术率先诸生彬彬向教化如文蜀郡者耶乃至我云溪刘君而又不然君之为诸生试于乡及上公交车所肄程序文重天下然仅于取一第其成进士拜大行奉使不辱命隱然当台阁选然仅迁一比

部郎郎而谏决江南以明慎称其报命不愆期误以为愆期而撻之君又不自明其寃得判吾郡判吾郡而垂三载不迁君又不自明其淹凡联署大邑若无锡若常熟者再而所至一切就理最后署吾昆山未几而台有长赋吏胥逮君力争之台曰夫较吏胥之赋殿而加笞责者有司职也不足以辱台即吏就系谁为督胥赋胥就系谁为督小屋赋者请一切小寃之而不肖倅请身任责台虽意不恠有所谓戒然自是竟寃逮矣而君于平赋讼之间则进诸博士弟子而课试之以至里社小学之秀亦附试焉所褒予次第必当时时谈说经术与制科之业不倦也会有新令至君且得代还佐郡事而诸博士弟子感恩德而愿受经者若而人而不佞从孙志伊亦以里社小学与焉谓不佞窃效一言之颂不佞不足以知君庶几文蜀郡阳道州之风哉天子方用考功法第诸道督学之臣且以吏治责二千石公异时皆其选也所谓大臣器固饶为之矣彼以游览觴咏称迁客若元白者虽不旋踵而显荣操内外制乌足拟君哉乌足拟君哉

送大叅永嘉旻谷王公改任叙

始永嘉公之为吾吴兵备使者也其御将则毋抑其体以冀伸其才其御察盗卒则务精其选而厚募格以冀得其死力其治吏则能钩巨参伍以见弊而时有所纵舍以冀其改其待单赤则无所不勤恤公在事二岁余而岛寇入犯公勒余皇载组练蹙之沙而大破之天子进公为叅政仍故职于是以叅政才可寄剧诸非使者任而为漕政为水利悉以畀之自公以功名起则不能无忌人因縁欲困公以事而公所治理益精然公于职益举则益不胜忌而会岁行尽漕舟数百千艘悉涸于润州道中诸当事者目相睨策之毋所出公第令堰舟前后诸支河口悉堰而分部吏人昼夜■〈奭斗〉河水以益之不一月舟悉出京口无留者一时鼓舞称颂谓为神而言路以稽故法论坐镌秩台谓公实不稽故复所镌公又策漕计幸悉达且将有河患而太仓储粟可支数岁陈粟皆红腐卫士不欲得粟价骤减从容为抚臣计以岁半收直而小寃之于兵民俱便抚臣计雅已定得公言矍然具以请言路复谓收直易转饷难坐公避难论抚臣复上言公实不畏难俱报闻而是时盗贼沈命法益严前有劫者获其人而非已报上矣当死而真劫出公为具实前抚臣以闻而台不之察论前劫死言路复谓公初误入之复坐镌秩前抚臣白公诬甚峻不报国家虽用沈命法治盗而其格凡监司坐劫起部中以轻重论即劫起而如期获者勿论且附功状始海寇数人要杀盐场官公移所司严缉不踰旬得寇而吴阖道中劫伤一郎次日即尽获之于格当附功而言路前后皆抑绌弗论而止论罪其前疏报仍镌秩而后疏则调简之命下矣公方谢一切事杜门取进止而余唁之且笑谓公使者所辖四郡一州十七邑之地皆负江海以与岛沙邻而中为南北孔道五民之猾藪之而又日示以可欲即使百使者堠而率熊罴之士蚤夜而寄干陬亦不能保不盗也公笑曰吾不能保不盗能保盗败且夫不必百使者即一使者而居要害之地专精其职而不掣其

肘何盜之足忧夫以一使者而缩十台四郡一州十七邑之职于其间上责授事而下责受事分岁力而道途者九之其谒叅七之拊循二之而已分日力而案牒者九之其上台六之下郡邑三之而已即竭吾足而不能无责于道途也竭吾目而不能无责于案牒也吾惫矣且归卧眈眈矣蓋命夕下而公朝出舍于舟其喜色溢大宅也而吾州衿绅之大夫有觴而泣于汧者乡之父老不及衣履而恸于郊者介胄之士恸于百里之外者而其颡若观察使季君行太仆卿徐君右谕德王君輩则谓不佞有以叙之不佞所见者迹耳夫恶能悉公第窃谓天子与公卿辅弼之臣非不悉公功状也又非不悉公竭力而国计民瘼之是厘然不能屈二三言者之论而竟至移公者其意缓以收公之用而百欲全之也诸台使之悉公也甚于内然而不能犯一二言者之论而留公者亦此意也诸襟绅介胄吏士父老之悉公也甚于诸台使然而不能以死请者亦欲善公之去而冀公之来也公其专精神辅饮食毋遽忘我吏民天子一日思公治效与公卿大夫熟计而俾公开府吴即二三言者且幡然而谓吴非王公不可何况其它哉公它善政多至不可指数有祠而记之者兹不叙

掌教金华胡君膺獎序

胡君故以文学应岁辟然其为吏部选人辄高等两补大郡倅而偶用干陬之警当调吏部惜之得掌吾太仓教事太仓既天下雄州其诸弟子彬彬艺文又为东南冠胡君之始至也温色而进之毋问束修贄为闲习礼容考校经义文成则又使之言志以观其低昂之向而财成之诸生蓋翕然称服矣而胡君顾以倦游奏纪诸台使乞归诸台使咸慰留之而最后鹺御史满则下书亟称胡君学行规条种种可嘉其令有司以礼币示褒于是州大夫会稽张君始新吾州之学舍颜其后堂之楣曰振德而它博士从诸弟子束带褰衣来诣余谓振德之楣甫揭而胡君之獎适至故君道尊而业明凡鼓舞劳来所以振德者非欲施之胡君欲胡君体而施之诸弟子也吾闻宋之初始设郡学宫以肄博士弟子而安定先生瑗自吴兴移授吾苏其所行规条为一时式而诸弟子去而为名卿大夫者比比胡君岂其苗裔耶何其教之似安定先生也今天下人才遽隳于庆历皇佑间而天子数下明诏更新约束吾州之豪杰又有不待文王而兴者胡君振德之绩报即馆阁监司且虚席待而奚一台獎之足贺也博士诸弟子曰固也请以语胡君与君交勉焉

送按察使修吾冯公之湖广右辖序

当万厯之甲戌而盜驟起江上剽芜湖库都下为震动一时节镇监司皆有所徙置而修吾公自晋臬入贺万寿执政者才之俾以故秩镇太平监督五郡公至则设方畧购募盜先后授首所创设军令旌旗壁垒一新材官剑客惴惴受约束恐后谈者以李临淮

之治朔方兵不是过也亡何而徽之属城用争赋闕公徐出片檄解之皆慑伏莫敢枝梧事遂定一切治理流传近远而吾郡与比壤馆穀江口其重倍于太平而盗藪则蕝之财赋讼狱则又蕝之诸议者咸以为必移冯公而后理而公合前后秩踰七岁乃特超公为提刑按察使俾寄禄楚而监督吾吴四郡会代公者以守边堠不至公兼督故所部自如当是时天下之寄重饬兵者莫吾冯公若其秩峻而望隆者亦莫吾冯公若吏民拭目涤念以待公公至之明日悉罢去无名供及一切不急之役爬搔兵殆尽大率将无匿卒卒无匿食至春汛公出一语而环海数百里翕然而听命储胥若增堞而余皇若增翼者其文吏廉平无害公则优假之俾各尽其材用属岁侵而公所居部为吾太仓尤甚公所以缓颊台使百方冀得一请命沾升斗惠虽格不尽行民之爱戴公固冬日也居无何而公擢右布政使遂真为湖广缙绅衿裾之士相率而诣不佞谓冯公之始来也凡再易镇而犹为治兵使者以重吴也其峻而秩按察使为吴重冯公也重吴则曷不少留冯公以惠吴为吴重冯公则曷不以中丞节畀冯公而使之袞衣南土也且夫楚虽号大藩犹闲地也右使虽称贵重于它官犹闲秩也似非所以重冯公也不佞谓冯公之来也以望而其迁而去也以资望重则不能无徇望资深则不能无徇资今庙廊之所拟要镇者若干其当是任者若干而冯公之指首屈焉子知冯公之以右使去也安知其不遂以中丞节来乎哉又安知不以中丞节开府楚乎哉于公行第浮大白而请曰公行矣武昌不佞所旧游地也踞黄鹤俯鸚鵡而蜀汉之二江合焉汪洋浩瀚浮天无畔则公之广心大度与谋也大别之山玉峙凝然欲云蒸霞则公之重器宏畧与谋也如公之遂开府楚楚人福也不然而有意于故吴哉不佞当从诸弟子竹马江之浒矣

送州牧仰松张公迁淮左史序

张公之守吾州也蓋自谏垣谪而厯丞令以迁云公之迁虽自通山令而其前为令高第则常熟常熟之距吾州不百里以故州之吏民习闻公之风猷约束争以其诚输公公甫下车而于闾左土田之腴瘠燥湿若其夙所践厯者也贾人子之干没与吏端之首鼠曙之乎若皎镜也吾吴赋最重故事守坐堂皇敲榜竟日夕至有毙杖下者而公第取一二大豪警之曰与而约以某期完不者吾立籍汝其大豪惴恐如约以次第及中小豪而姑缓单民之以亩畝计者故公之扶不过十而赋额登踰于旧诸讼人至庭中不数语立剖人人自谓若神明其衷者第略施之夏楚或付三老持去不责赎而至中豪以上重足庭下背若负霜雪矣即公有它出或谢病计所积案当十日而以一日决之不爽其治理一切流传它州邑往往藉公为重而公以间召故所知或轻輦过之辄命酒曰可以大斗劳我矣酒酣耳热谈说天下事若指掌虽不佞亦谓公一旦握诸边虎符可以飞尺一而厘定疆圉之地而乃传有迁公为淮左相者国相虽秩高于守而事寄则稍轻闻者咸怪之意公在谏垣扼腕而论朝事若不能无抵牾哉夫贾生之傅长沙则絳灌为之然汉

法诸侯王相秩中二千石傅亦二千石重于守而贾生独以一卑湿遠外故侘傺无聊至于吊屈赋鵬濒死而后已何其狭也乃张公殊不自恨曰吾得长有王门幸甚即絳灌诚难我我奈何重自侘傺以供彼之快夫以吾家子高之赏罚分明见恶辄取与夫越法纵舍有足大者赖诸公之力时时有之然子高用高第守山阳人主使之阴伺昌邑状其所报陈不免有讦察语而不佞当显信亲睦之朝拥铜墨曳长裾而为贤王辅我不能若子高袴褶从吏车数百两而守王宫穷窘踪迹然至饱饭眠鼾有不须臾适哉不佞乃前浮白公曰吾始而得公材今乃得公器也夫太阿之剑出匣而风霜距发割蛟龙割犀象及其入而佩君子之躬折旋周旋雍容如也吾故知公之为器大也淮之初封有王荣者为右相仁庙召而为左给事公今以左给事往为左相夫世事若循环然遠不见子高近不见周恂如哉诸大夫曰善其叙以为公别

赠别汪惟一序

新安汪惟一生毁家而业古文辞尝以师礼礼故人徐左使子与已北走济上礼李观察于鳞如子与已又东走吴礼余如于鳞余固谢不敢当而是时惟一所推贤者汪司马伯玉所慕说者余弟臬副敬美及吴大叅国伦已又久之而子与卒官江西惟一自家奔哭于江西弗及则又奔哭长兴之庐叹曰何以报夫子地下走谒余叩头以子与妇之命请曰愿得子一言以文丽牲之石余谢不敏谓惟一向者吾入霅哭子与业许之矣待其家以状来夫岂唯余言将七尺之昆虫与书力任之则又谓惟一如斯而已乎曰不佞归而以墓中之石请吾司马如斯而已乎曰不佞之俟司马有成诺也治舟而之江右谒臬副以传请溯江而上至楚谒大叅以谏请及不佞之未辱蝼蚁而有以复夫子也盖惟一之留余里者且两月而子与之初称子者自以子去而其子来称嗣孙者少孱畏其大母妬又无所谋状久不继问惟一内煎迫舌为焦卷谋复走长兴趣其家状且行矣一时诸友生义其为赋诗以赠余闻夫杨子云卒而葬安陵坂上所厚善独沛郡桓君山弟子独巨鹿侯芭君山为斂诸公赙起祠堂芭负土作坟而已亦未有以文之自杨太尉景谒者袁三老王封丘辈之歿诸门生故吏乃稍能于所谓丽牲之石为辞以纪而碑阴则皆识其门故名氏以昭示永永且以愧夫翟公之所谓交情者至崔子玉之传张河间蔡伯喈之传桥太尉陈文范郭有道则为之后者或其徒又能以天下之文文天下士其文与其人两相待而成不朽亦难矣哉千余年而得惟一也然子云之厚善独桓君山其门弟子独侯芭计其所受益于子云者不啻深而所报仅若此子与厚善满天下其束贄而称门弟子当亦不下数十百人而今乃仅一惟一何也顾其所受益不过诗酒谈笑之绪非有太玄法言之受而惟一者得墓碑不已而又欲并得夫志铭传谏以慰其师地下所称报又何如也王封丘之门人有杖而斩三年者其徒或以为过惟一寧为三年迹而已乎惟一行矣诸友生业赋诗以义之故毋乃曰市义哉则非余所望也

贺大宫保大司空印川公治河功成序

潘公之卧吴兴三载所而天子思公治河功俾以故节抚江右久之入为少司寇未上河复奏决诏超公为御史大夫领左司空以军兴法治河得便宜从事诸河堤使者自青墨而下至黄绶皆听约束公乃大集羣吏而询之曰今者与若治畴亟也夫漕河之有南北也淮实鬲之其北自徐而南抵淮则皆受黄河之水黄河溢而旁决则淮以北皆鱼而河之故道细而不能漕淮河得黄河而浸益巨其尾闾泄于海而旁入维扬之漕河其半受淮之水尾闾壅而不时泄则旁入者怒而溃淮以南皆鱼而河之故道与决田共而不能漕今者与若治畴亟也或对曰北河决而河涸不能漕也姑弃之其决可漕也则加导焉淮挟黄河而下莫捍也将为支河以杀之乎尾闾壅矣其泥百里谁能彘而畚鍤也将别为道乎公叹曰不然弃故河一弃不复也因决而漕易淤也开支河河不两行也别道海凿空不易也吾其先疏尾闾乎则又以彘而畚鍤难之公乃操轻舫循海口周览而叹曰吾得之矣夫河多溃而不入海者海以淤相逆也河性猛而不能决淤而入海者以多溃而力分也欲疏淤则莫若使河顺流而力专欲河力专则莫若高坚其堤埤欲防河之善溃则莫若于堤埤之外为遥堤以郭之使溃河有所遏而归于一议者塞公乃偕督漕少司徒江公具以其说上请天子览而是之与今相国张公谋下其疏大司空大司空熟计利便上报可公繇是大庀郡国材力尽淮南北而里分之谓郎中畚君汝率若属维是淮北桃源古城之南堤及遥堤增筑之决口塞之当为坝若闸者治之谓叅政龚君汝率若属维是徐邳之役视如畚谓叅政游君汝率若属维是灵睢象山徐州之役视如龚谓臬副张君汝率若属维是桃源之北岸至徐州南岸役视如游谓臬金朱君汝率若属维是睢宁之南岸役视如张又谓郎中张君汝率若属维是淮南高家堰而北出闸沿淮之堤增治之决口塞之当为坝若闸者筑之谓主事陈君汝率若属维是清江浦之役视如张复谓前臬副张君汝率若属维是淮安之新城北旧堤柳浦湾高家堰之役视如陈谓臬金史君汝率若属维是寶应之役视如张谓杨守虞君汝率若属导高庙至仪真浅谓淮守宋君汝率若属治汝郡之闸若坝既僦工公乃偕江公往来拊循之诸君亦自勉与吏士分功版筑间不浹岁而告成事大约省费计初额减十之五役夫数十万无饥寒死者河率由故道迫于堤而不得溃则专力以之海海若埤而辟者河得海则不移怒淮以南诸州邑之浸尽出而为南亩天子嘉河之复也与岁漕之登额也特进公大司空加太子少保予一子官赐白金二镒而杀文币四各有副江公迁如公故官而畚君游君辈亦以序受显擢诸吏卒褒赏过望于是二三君子相与称公之硕画而荷公休以不佞素习公走币数千里征言以为贺公后先凡三治河河功辄就而其再治而再报罢也不佞寔以前叅政冯君辈请而赠之言今者何能辞不佞盖三复公疏而叹曰纯臣哉潘公也公之最后命加重矣天子委河政公举大司农水衡赋而听之即公胡不捐数百万金钱

以因决而为新河张大其功伐树八尺碑而命之曰此潘公河也即又胡不捐数百万金钱以别凿尾闾之口而张大其功伐树八尺碑而命之曰此潘公通海道也顾厖厖焉即故河而惟左右堤之是飭卒之河海之壅辟而漕不病乃其告成事不过曰借水攻沙以水治水而已推公意宁不获以其身当上赏不欲使国被实费而河邴实利于戏岂不亦皦然纯臣哉不佞尝读河渠沟洫诸书终始西京二百年所治河不过能避河害而已自用守番系言而山东之饷罢未有能引之为利者夫以孝武之暴悍必罚而汲黯郑当时塞瓠子之决辄坏而罚不报其后使者王延世塞馆陶金堤之决功至微渺耳赐至秩中二千石爵关内侯黄金百斤甫二岁而河复决大将军凤言之而不以谪延世及再塞而复拜黄金之赐如昔彼其蠲罚崇赏视军兴令独天渊殊者岂有私故哉以河变无形而功不易也今公所告成事不唯去河害而长有河利且天子坐明堂享六服威无所不加而肺腑咽喉之地得潘公为之植公纵不自名功所褒赐毋论延世辈又何下陶唐之于妘氏哉不佞窃谓公之功一世功也其言借水攻沙以水治水则百世功也圣人复起不易矣诸君试以贺潘公且质之

送州学正胡小愚先生之淮藩教授序

胡先生之自邳倅而司吾州学也甫一月而台使之旌至诸博士弟子相率而诣余乞言以赠余是时未能悉先生而姑以先安定之所以教吴兴者期之又三月而诸御史之奖屡至无间牒诸博士弟子之颂无间口第其大要不能过二端谓先生工修学官废颁布束约栉比网密则追列其郡政而意其足以当百里寄谓先生粲然文用邦君大夫所藉手章札序记之类日益月新则推缘其经术而意其足以当六馆选居久之先生竟擢淮王教授诸博士弟子愕相顾曰诸御史欺余哉其所以旌先生何也而去为王国官夫岂一郡邑不足以当牛刀而蕞尔曳裾髀髀之是拟即斤斧曷施哉夫出先生绪藻餽三吴之黉宫尚有所不足而仅以一宗戚揖让之大之不能发广川之对次之不能授临邛之简而使先生嘿嘿以老何也或曰不然夫御史信先生者也铨曹者信御史旌者也今乃不信御史旌夫天下名为治平而好缘餽名为急人材而缓其要以故不能尽先生然岂亦以先生更宦久中有所不快故舍而佚之耶先生第往矣吾尝习空同氏书其父吏隐公名士也而教授王门十三年时时晦酒歌曰人欲为贪吏吏殃及子孙人欲为廉吏吏穷饿不得行我今既不为贪吏又何可称廉吏王门之下可以全身避世是故居卑者挫荣者也夷俗者清质者也夫此优孟之所述而东方生之所托寄者也盖未几而空同氏出竟用吏隐公闻天下今先生不食酒时以文自娱而诸子之业空同氏言者四矣其何能终晦先生先生第往哉吾又闻淮之诸侯王雅好士而以摄宗正条不轻为奇衮之向纵未能发对授简踰临邛而望广川其待先生宁至作左吴辈观哉先生谢曰可以往可以毋往吾道然也藉如子之所期先安定彼岂假穹爵崇位称哉毋问吾往问吾道

可也遂长揖而别

送按察使颺斋徐公迁陝西右方伯序

当嘉靖中不佞以一乘车游齐鲁而是时公释褐而守泰安泰安齐鲁大都会公斤剖理解其刃若新发于硎而光摄于十步之外盖泰安治声籍籍冠东诸侯遂晋丞吾吴郡而不佞已解事里居得以纵观公之为丞丞所任虽少简于守而吾郡繁当泰安十倍公所操舍不尽如其旧而斤剖理解其光摄于百步之外诸属郡而为一州七邑之吏民争言丞而不复言守至相谓曰丞奈何不遂守乎亡何公遂真为守庭之所受献两造大小毋下数百千人不崇朝而空之赋讼牒案汇为吏弊库藏出纳稽为盗藪丛若山积滌若冰涣盖公所措置在咫尺而照及于幽陬蔀屋之下其策在俄顷而惠成于数十百年之远即亡论吾吴其环吴而为郡者三诸吏民争言吴太守而不复言监司至相谓曰天子胡惜一玺书不令公遂有四郡乎而公拜山东按察副使徙镇彭城吏民乃相顾叹曰公资高矣吾四郡不能复有公矣然公竟用他故忤台得报调自是数蹶数起者十五年即吏民未尝一日不心在公而公以大叅行治边吏民相顾叹曰公资益高矣奈吾侪望者何而公一旦以观察使仍行吾四郡兵事吴之吏士以及父老红女踵相蹶而出逆迯者郭遠者境之外至褰车帷而视之曰果吾父耶是毛且二矣而颜甚壮相率加额謹呼乃去当公之甫下车而吴大水所至成巨浸濡首之民强者持白梃而睥睨积藏曰吾曹旦夕鬼唯力之是视而暇计其它公第以一帑谕之曰县官行賑若且有厉禁攘夺至斗粟以上立死民读之曰公不欺我即死何以见公遂一夕解散而吴闾大盗故宿南北奸猾探赤白丸者十夕而九公至而俱帖然其请賑恤蠲省发下之虽郡邑上之虽两台而公一人实干持之每得报闻省可辄喜动颜色以示人盖公慈仁发于而动于表若此不佞最后解镇得复谒见公公剖藩篱去城府而出其所谓青天白日者徐而察之则若含光承影之为刃其芒尽敛而几希乎不可覩矣公真变化达人也哉第吏民之奉公仅一载而公遽迁为陝西之右辖以去于是复错愕相顾曰天子幸惠我公而又夺之何也且陝与吴孰重则又自相解曰尚犹有开府在夫向者吾侪望公之为兵使者几十五年而竟得之今者公位益尊资益积望益重是寧不可以岁月得也于是横海濶将军晨朝诸大校而问曰公去若若安所怙乎哉诸大校曰固也前公而使者色借我我曹才者得少伸而不才者因而有所逞其继湿束我我曹之不才者戢而才者至今不得吐公衷之而后我曹始有怙也公今去我奈何则又曰尚犹有开府在濶将军乃请于余求所以贈公者余姑以吏民意答之而为赋袞衣之篇曰维兹竹马于江之浒将袞衣来毋或徂汝若陝伯固周召二公之所分理也公不暖席迁矣吾可毋贅矣

弇州续稿卷二十七

●钦定四库全书

弇州续稿卷二十八

（明）王世贞 撰

○文部

△序

送大中丞小溪孙公进台秩抚蜀序

孙公之抚吾吴也不三载而政成天子嘉之俾以中二千石秩移抚蜀前是公以吏部郎握铨铨称明则水镜矣佐廷尉廷尉称平若矩絜矣中以不工事言路邁齟而叅厯藩臬称名藩臬矣其超而抚吾吴盖旌之也公之至属大水遗地半瓯脱比屋流徙公时时饬郡邑拊循之稍宽催科之猾法而岁额亦不废久之公乃上章请悉蠲其旧使民得精意新赋报可于是三吴所蠲亡虑数十百万石欢然雷动而是时有妖僧起京口其所构结逖迤牙孽几若汉之所谓三十六方者公不假声色而剪刈之第取其首恶正法而已人或谓公钩累其党与则卤伙卤伙则功大而赏可重公叹曰夫此之谓伙而何以钩累为盖公疏上而诸公举手相贺于廊庙间而格于公之疏而不得大差次其功赏然益叹公为纯臣所以倚注益切公为政务持大体其驭吏若严不可犯而坦然推腹于贤者体貌士大夫蔼然周详若可狎而不能以毫髮非义奸庾廩与校卒共之亡所靳而至于法则不为一切纵舍至恤灾扞患与閭阎请命有味乎言之也以故饥馑屡作而赤子枵其腹以待哺而亡敢有怨声脱巾之变起钱塘与吾吴一衣带水而校卒俛首于交戟之下亡敢有骄色萑苻之傍地枹鼓朽于亭障而不闻击赤白之丸腐于恶少年之寝而不获探岛寇之余皇逆折于鲸波之外而不能为我尺寸损公之有功德于吾吴甚巨天子固能知公重公且右公秩然胡不以惠蜀之心终惠吴而遽夺之也夫蜀固重地也在唐则往往自中书出而为节度使或又入而为中书宋之初有执政出制置者制置入执政者绍兴而后有佩相印往者归佩相印者其说盖有之唐则长安为帝都而蜀则右辅宋之初甫革孟氏社其季则与江左掎角而图复中原蜀故不得不重也然天下犹称扬一益二而握扬节者多兼领度支望实故胜之今吾吴之视扬不啻倍屣而中丞所领储饷当天下十之八于国计尤重夫蜀安得拟也今乃以蜀重吴而夺吾孙公何也或曰天子非重蜀而轻吴以均劳佚也谓公久劳吴饷事欲小佚之也或曰不然天子非谓蜀佚谓

近例开府非边徼不得以故节进新秩公资望深且重矣其劳于吴甚矣故假蜀节而右公之秩非以重归蜀以佚归公也蜀幸自得公耳或又曰不然谓蜀幸得公者固也然蜀不得久有公即无论高仆射言西川宰相回翔之地且唐宋事远不可稽近不见胡端敏世宁与张士佩先生乎是皆不久而入佐铨部公又自铨部首曹出者也天子殆将藉公大拜地耳于是吴之属守丞倅朱君某辈若而人感公宇下庇持是说而质余余窃谓吴人之感思孙公切故所知仅一孙公天子视天下才皆其才天下地皆其地夫安得为区区吴蜀计轻重又安得为一吴留孙公第孙公且大拜不遠矣公大拜则请无忘吴为吴择贤守令为吴请大司农毋格沮上恩泽民岁岁得赐租吴又何尝终失孙公哉朱君曰善俾书以壮公行

贺太守斗山朱公考绩奏留序

万历十年壬午冬吴郡太守朱公考三岁之绩业治行而台使者交挽之将以最闻上而郡丞陈侯孙侯倅王侯辈艳美其事以属不佞世贞俾效一言之贺不佞犹忆庚辰春天子大计吏而吾吴以阙守报诏太宰熟计诸岳牧可任者久之始得朱公而公业自名御史出守兗兗为东藩最大郡所隶州邑二十九议者犹以不能当公才为恨徙而治吴吾吴隶州邑仅七延袤不能数百里而司农将作财赋寔割国家上腴之半百工技巧织作械器日夜转输京师不絕三宫百官六军兆姓之所仰哺即亡论它事守治赋且不暇给而公至则静观下询而得其要日五鼓坐堂皇朝诸吏部署上下公移就绪已乃延见儒生耆老问疾苦便益出谒台省大僚毕事造请邮传使客往返数十里即风雨亡间退而复治事句校庾藏出纳两造盈庭以次就献必得其情实咸扣颡谢谓府君不枉我公度守事与晷俱尽乃从容入与诸寮具饮食为欢不然即坐堂皇乙夜至丙弗告隙也自公之为精勤而掾功曹不得为稽故吏惴惴亡所容口伍伯植立如木偶人有长技而弗克施雉门之外往往草生食肆亡所规利或相率徙去一切治理流闻而会国有大婚礼皇子生两宫上徽号冠服帷幔绮绣供张百倍于昔中贵人旁午道路咸以责公公为调剂轻重缓急务使毋罗于简书而民不扰吴比岁又大水公任其衽席曰吾在不忧流徙也邻省有悍卒警势且剥肤公任其储胥曰吾在谁敢弄兵也台使大臣仓卒计无所复之则往往从公受画至行之傍郡着为甲令盖公之守吴郡垂三载而所上课最百倍于他郡所先后积台使尉荐剡牍复十于它守以迩者考功法格之它省幸而得公则为臬使者以提衡百城吏纲纪吾郡幸而不失公则增秩赐金还治以久惠元元夫公故当入覲天子临轩以待而大司农狗有司请独留公则公之增秩赐金还治固其所也不佞尝考之古自三代而后吏治莫盛于汉而汉莫盛于神雀五凤间以人主委重良二千石之说有以风之然其时太守之位尊比于三公九卿而亡为扞格之者其去人主一间耳即人主而下为太守为令长其去民不过三耳以故上下之势臂运指使而易为达今据

太守之上者曰监司监司不数人不止据监司之上者曰台台不数入不止人主之势与太守隔若霄壤即欲两达故未易也且也汉之大郡慄悍难治亡如颍川以视吾吴郡所不敢望其名守可数者则亡如赵韩然广汉之锐精能取办一时而卒以告讦漓其俗延寿能使俗回矣而身被奢僭名以拟吾朱公固不侔也公盖能为之而能不为者也藉令县官以一切便宜悉委公而毋为之牵制其程绩报计岂下黄次公哉少迟之是必中二千石而九卿高第御史拜相亡难者宁但次公即近时若金华徐公天水胡公及广平吴公或即超秩三品或以三品留治皆吾吴故事也所愿于朱公者异日功名毋损于治郡时耳盖公昔守东明令不佞辱周旋以东明为公家桐乡今者复辱公宇下称治民其德公知公固不在一时荐绅后故不辞诸郡侯之请而叙之

送吴令湄阳傅君入覲序

上即位之元二间诏太宰御史大夫差次入覲吏计方岳以下拔其尤卓异者躬宴之别殿侑以白金彩币一时宠艳光大其事争自奋砥砺以希非常之典而自是有司稍稍怠于奉行盖又十年而为癸未复当述职陛下方以两宫皇子大庆加霈海内数申飭吏治其于宴锡旌异之典将必有赫然加其旧者而吾吴之吏民以傅君其选也今天下之称繁雄郡者毋若吾吴郡而其称繁雄邑者亦莫若吴邑吴固东南大郡会也亡论财赋之所出与百技淫巧之所湊集狙佞涛张之所倚窟比年以来其民■〈谷九〉于田而诸负山者旱负湖者水靡有宽岁吏又佐之虐使义甯操挺而桑孔握筭其民不胜诛则姑为冥顽以应之而黠者乘其隙得肆其口吏与民交相厉而成俗即吏又不堪讟或思以柔道平之则民又狎而生易心岁课辄不登逮谏不就掇满岁而亡可上计者乃傅君则不然君之初至而其下犹以北人窃少之君已得其隐与弊所由孽每一顾问即素老猾舞文者情见胆破君虽和颜色而导之尽靡不惴惴负霜雪盈庭之讼不待两造备而词组立中窾咸倾吐折服以去然君仁心为质多所纵舍每谓吾邑无髡髀何所藉斤斧为其于岁赋受役往往先拊循而敲朴后之民亡不感悦思效以故课额娄登顾隰于它工催科者今年大水吴独不为灾均田之事起诸郡国不胜于■〈髟上思下〉之役而吴独不告扰君又以其间延礼耆逸登文士与谈说经术土风傍及辞艺盖优优彬彬焉诸父老子弟窃指目君以晨夕鼓严则傅君俨然在讼狱赋役传教听约束靡不夸得意其两台监司守倅一视事则傅君又在凡所建白靡不为破颜皇华之使接浙于邮传则傅君又在缙绅有所造请则傅君又在以至湖山文酒之社禅伯衲子之宫前令所不及问者则傅君又在君岂其神人耶何以能分身立应若此也予谓君恺悌君子民之父母则庶几卓密县鲁中牟哉乃其才识断割朱桐乡王洛阳之伦与德合而出之而曹父老子弟所见何浮浅也今兹君入必奏课最最必第一人陛下必修元二之典以宴锡方岳诸侯君必首与首与而秩未深当再屈治吴抑何多幸也予生不识君顾老且倦笔

硯然为歌诗以赠者再矣今复因朱太学葵臣之请而叙诸君之绩将无赘乎哉夫生不识君能以耳为目今且以心为面即老且倦笔砚为傅君一破例可也

送赵汝师太史还朝序

故相江陵公之有父丧也诏夺之仍视事或曰非上指也以非上指故众更惴惴履相蹶莫敢颂言其非而九卿言官至有具疏请留者时赵太史汝师江陵所造士也叹而曰此曹子即有胸无心噤弗发可耳而更变白为黑如国是何既而曰吾安忍遽负公小侯之冀公之尚能以归请也既而日朝江陵丧所察之无归色乃又叹曰吾不忍公乃遂忍负天下且夫李南阳相而拔罗彝正于公交车为第一人南阳之有父丧而夺也彝正攻之强辨之哲当是时彝正计以幸而听则南阳与天下之父子俱无恙不幸不听则天下之父子尚不与南阳俱亡盖百二十年而中外大僚匪金革无有夺者则彝正力也今夫江陵公师尹也天下之所借以口实者也藉不听江陵公归易耳而奈何使天下之父子复之百二十年而更失之我宁负公不敢负天下于是与所善吴太史各上章论其事忤旨赐杖阙下削籍为编氓赵先生既拜杖归数过余余问之不答第曰事往矣有没齿耳何以市所举成我名时为江陵修郟者犹数伺先生间先生夷然安之唯杜门读书为古文辞书无所不窥而古文词益高上者薄七雄迹先秦而昌羊乎西京之圃下亦能躡昌黎河东然未嫌于志数就余扬挖余不肖名久忍人齿舌间先生独汰而拔之盖尝信无涯之知妄欲寄其身为世后物先生不以为诞袭方外之迹虽犹强儒衣冠而墨其行先生不以为诡则衡门之版月得先生迹一焉先生不以为数也迹者江陵捐馆其它事尽觉露上乃采台谏言至为出御笔引误听奸邪小人之罪罪已而悉召用赵先生等于是天下晓然知向者留江陵与所以杖先生谪先生皆果非上指而先生意忽忽不欲出余乃言曰毋以为也主上不惮引误以伸先生高谊而先生傲焉应之则不恭且夫所以擿江陵者为不子耳先生不行彼且以为有父子而无君臣赵先生曰善请治行余复进曰先生所明者礼也非得已也慎无以有之先生亦知夫罗彝正乎其食贫难进之操具耳者趣其高及退而归隐于金牛之山乃欲以国轨饬其宗身歿而名不免何者彼犹有之也赵先生曰善请无以一端满余乃复进曰虽然先生亦无遂无之余不敢遽有证即嘉靖末而天下之攻分宜相者犹之乎蓍蔡也及其起百死服大僚比比少有尽竟其所学者也且夫江陵之始入銮坡其侃侃持正议亦先生流伍也忽不知其至此者何也贵而遂无之也赵先生曰善请毋舍而荡其岐余乃又进曰名者忌之帜也气者争之藁也好恶者窥之窠也先生固无之加戒焉可也忍者藏机之渊也寬者集事之府也缓者受策之的也诚知先生所饶加勉焉可也赵先生曰善请一切受教余退而语客曰夫赵先生者四问而四响应不穷是必大拜拜且不徒矣

赠周广文先生膺獎序

明法诸台察得举刺所属其资与望实称者举次则獎獎固举之渐也然上之人往往精于守令以上而略于其下下之人计以无所之则仅有循谨苟禄而已其黠者又往往略于治下而精于奉其上乃若师儒之职上不为苛法责之然亦不为异等待之或以年或以格或以要人有所推穀苟取而应此二端而已而居是职者亦不能有所振拔以当其选蓋余自舞象而游于校宫以至晚居里闾四十余年而师道日趣下中间诸博士禄薄且不继不足以养廉则往往问之诸生诸生贫不能具束修则相率而避匿不肯见櫬楚未及施而谤讟则已滋起绅襟之交蓋断断如也久矣举獎之不行于校宫也夫胡寧不行行而不中窾犹之乎弗行也今者乃得一周先生先生乡邑人也为人温温金玉长者而中实介晷晷取予其读书精经术而不示博属文得作者旨而不示工以此数困场屋然后进多师宗之日者台使合诸博士试而登之京兆独哀然翹楚顾不自崖异毋论徒手吾未尝无悔焉以是诸弟子归心先生故事诸弟子补试台者以博士偕则就诸弟子穀先生弗就诸弟子穀而诸弟子有病不良骑者先生骑而舍肩輿輿之又陆钟山尝以束帛贖既暴疾死先生归其币而侑之兼金以为輶车资诸弟子益归心先生每入而考德问业为讲说饗饗间以一卮酒一盂肉佐倦毋不陶陶然自谓从春风中游蓋入桥门而昔所谓断断者见其欣欣也曰盍归乎来哉而今而后庶有师也未几而台使者之獎再至矣格吾知其能弗论不知采之年乎采之推穀者乎将如后所云采之文乎采之诸弟子欣欣者乎昔子夏居西河而西河之弟子以见尊重于国君汉兴儒林叔孙通胡常匡衡翟方进欧阳歙戴圣郑玄之徒所教授弟子满郡国间誉成而上逮有朝脱皋比而暮侍黼宸者先生今獎未已且举举且大用矣虽然不佞窃有进焉夫学不厌教不倦天下以不厌不倦而归之智仁未有能探其所以学与教者彼所獎先生皆肤屑也先生能探其所以学与教而彼能采之然后成其所为獎即以是大用可也蓋先生之高第弟子（阙）与余善欲得一言为贺余窃快先生之获獎与它广文异故不辞而授简焉

贺御史大夫兼左司马岨岨张公平难峻迁序

往浙师之暴伉而辱其师也天子乃命铜梁张公督抚云张公业已为右司马自枢廷出外使宜稍优之不当复称右乃张公仍右而特许便宜从事便宜从事则其重有连数阍之贵臣所不能得之于上者而张公独得之公于是亟乘传往甫至境而市人亡赖子习于师暴伉之利而帅之软度无奈我何则相与啸聚竿旗挺刃为不义公闻而亟驱之榜约以法不聽则单车喻以利害则姑阳聽而其虔刘益急焚剽自甲夜达于旦时悍卒已前发有事海汛而余一军犹在公乃密致其豪杰赦之俾贾勇以掩诸亡赖凡数合而悉破擒其首恶五十余人诛之余一切纵舍郡中外皆帖服而悍卒犹人人自疑祸及

公雅大度豁然若弗问也者而第具所诛市民状以闻天子大悦赐公飞鱼服一袭白金一镒飞鱼最贵服八座大臣所不敢望者而独以赐公亡何岛夷来犯公励楼船将军逆击败之赐金如前文绮三而公前抚上谷所修边大司马列上功独最进秩录一子入胄监又以满三载最录一子如例始公下车时颇已诤得悍卒倡而惧其骤或因而生变则姑秘之饷赐加等至于扶后期怨不恪亦约畧如平时居数月公度其大众谧而肃感服无异心一旦掩捕七营之黠营各一人又捕其魁二人立梟之辕门而赦其一营之前効功者且抚其余众曰为此曹子几陷若等于族族耳犹为不义鬼若等今高枕矣众股栗不能答已而大悟且泣且拜抃颡指天曰毕身不敢负公盖郡中外再呼酒相庆也已而十一郡之吏士父老呼酒相庆也已环浙而郡邑之吏士父老呼酒相庆也是时天子以公久劳于军进左司马还公部而公奏适至益大悦超拜御史大夫左司马如故世贞不佞辱与公肺腑者三十年而久公之出治浙则数使使相闻不佞既急公而家邻浙有唇齿之忧以故数询问得其事独详盖夜恬然而枕晨跃然而笔之篇以为张司马平浙二乱志肩之笥而失之后知为浙之士人所梓集以备太史公之副至是公之属都运牧守而下若干人以天子之所宠灵公与公之所以报天子其遇合为甚难公不动声色而坐扫腹心之疾措全浙于衽席其功为甚巨非不佞不能悉公与当公意盛夏走使五百里布币授简起不佞于疾而强之言不佞即有言焉能果当公意也夫公之材与硕画虽更仆未易数然其大要在博大恢廓推腹不疑而其恻怛恳至仁心为质又有以感动鼓舞之夫是以其下之悍者蓄其气而甘为死黠者剖其私而乐为用杀不为残舍不为弛至于深谋勇断用速能审用缓能密如不佞志曩所称者毋论当公意与否庶或一二悉公乃不佞于是窃有感焉昔在唐季大历之孱絳州行营割刃都统腹以求帅而河东响应焉人主起郭汾阳于闲废授之符印足矣而遽爵以真王及汾阳之镇果结僂其首祸者而河东亦获伸三尺法当是时唐势几振而不闻于汾阳有所褒赏且以程鱼之譖而遽夺之河北之骄宥自是轻县官而易置节帅若婴儿之在股掌故幸而法行则为温造曹翔而伤人主恩其它为河北则皆王廷凑朱克融而伤人主法明之嘉靖殆一二駸駸焉今者天子熟知公才而寄之斧钺顾阴重其权而貌若轻之以为万乘之尊不欲与一夫较胜负者及公一伸法则一加赏再伸法则再加擢而它横海之馘级睥睨之创增有奏必录惟恐其不足偿天子之急公重公如此海内乃始知国威之必伸与用贤之勿贰其善将将岂不夔越大历万巨哉在易师九二繇曰在师中吉王三锡命孔子系之曰懷万邦也江汉之诗王于召公曰厘尔圭瓚秬鬯一卣告于文人锡山土田及虎拜稽首而曰天子万年夫以人臣师中之吉即归德于王之三锡及王之三锡推其心即以为懷万邦致其颂即以为享万年而人臣不与焉不佞以是颂张公而归之天子庶乎其有当否于是都运某牧守某乃复曰子言之善第张公于浙所奏请寬恤大小条以数十计所计处海隘绥靖士卒仁政复以数十计春生之泽大沛于秋杀之后浙自今食公德世世焉而子不之及何居不佞谢曰吾蠹而测公仅能得其测者且也昔以野人志公事泄之公犹

负惭色而使我徼诸君好颂公宁复能有加哉请姑以是为公贺

送兵备使者及泉李公迁浙江叅政序

李公之自吾吴而旬宣越也则以州大夫邑侯请而效言矣大帅张君俨然而造曰毋若子之工言何不穀固有请也日不穀之从长鬣者以操余皇于沆漭而不知所向也公实指南我不穀之从于■〈彭上思下〉者以备储胥时惴惴焉公实版筑我士饱而嬉不虞于祁寒公实衣食我譬之室庐公苦覆我则偃寝惟是东海之波不敢向不穀牙而鼓者三岁矣夫岂亦不穀之能逆扞其侮以毋干简书将毫发皆拜公之赐公今愬焉舍我而大布惠于越我则何敢留公抑闻之里语孺子失乳宁不号苦跛者失杖宁不呼相子幸一惠之言以少抒不穀思予乃曰善哉子请毋忘李公之德而以徼我我则非人能为子报抑子所称公为之任而子坐飨子逸于表公劳于里夫是以愩然而不忍泯泯余实窃公之庇于宇下而辱幸公唯是公之嚙笑获与闻也巷歌舂谣获与和也其覆露吾子厥亦有自请为子数往者郡邑之贰若长日操切武吏以为功能武吏戚施蒲伏莫敢舒气且犹不得善解制臣熟之固然而不胜矫枉则武吏睥焉而恣心成骄谤讟猖起卒与俱败李公实衷之俾文吏持体不持势武吏畏法不畏谤培者感输摧者省惕有之乎张君曰有之竟李公武吏亡扞罔者不穀所以安为之长也予复曰民不天岁大为虐惟是滨海之人相席流殍者不可指数矣公勤辞以请于上大司农为减岁赋发赈粟念以不时至则先粥粥之其弱者且死犹曰李公不负我强者睥睨戈戟而复弃之曰奈何不忍旦夕之馁以为公忧是故岁屡虐而赤白丸不一探也有之乎张君曰有之不穀偃然而不虞萑苻者则公惠也余又曰大奸起京口僭国之章以蛊■〈麻外骨内〉公潜运王略而平之犹誓众毋株累毋浮狱以希上恩而轻齐民之命有之乎张君曰有之微公不穀方戴鍪枕干而仆仆于江之壖也且不覩必济顾谓张君何以竟报公张君乃曰不腆宗器以逮寶玉齿革公实弁髦之其敢出诸口惟是吾子之一言以为公行余谢不敏乃从张君偕飨公甫洽余赋鸿鴈之次章公曰流徙将有归矣以吾子之安宅某也与有庆焉虽然其敢任德张君赋羔裘公曰毋吾故代者亦李公其猷实长我子姑壹志而聽之李公为张君赋板之三章张君竦然起再拜曰不穀服公诲以苟有今日敢忘即谋于后人公复觞余赋崧高之乱而曰我实惭申伯而幸徼子子言抑何孔硕肆好也余复谢不敏公既辞乃命车驱而入越

又

前是李公之守吴兴也甫踰岁而吾吴之荐绅先生以至里父老惊相聚而诧曰吴守移吴兴李公我得天矣其事闻之州邑大夫长曰审尔吾曹亦得天矣已而弗果曰误

耶妄耶将李公薄吴耶又二载则又惊相聚而诧曰吾吴治兵使者为李公矣向非公薄之抑县官重李公资不当屈之守也又弗果而久之李公真为治兵使者于是复相聚曰果得天矣诸州邑大夫长曰真得天矣李公之为治兵使者甫三载则又惊相聚而诧曰台请之上李公以叅知政事秩治兵如故矣问何繇曰有故事在然而台未及请也而李公乃以叅知政事治浙之上游三郡于是一州七邑之大夫长相与俨然而造王子谓我曹不获长奉李公为恨即子之乡缙绅父老亦以不获长奉李公为恨因相与论公往者所以屡惊状王子乃曰李公治吴兴而吴兴故号多大豪往往与贵游相交黠吏讼师持良弱之命以为恒公用赵广汉张子高之法破散之而显旌其良者而扶弱者以故治理流闻四壤吾吴熟而迫欲得之然至中豪以上犹不能不自疑而称不便者千或一二焉公至而尽得其状以吴民虽巧而不为（阙）而易折节大豪志武断而未能彻贵游矜名好修即卑者选慊而顾首尾喟然曰兹岂用重地耶于是一切以宽大镇静居之时执政者悍而好操切公独不操切取簿书期会为殿最公独不汲汲期会盗偶发所部司隶贼曹下捕格甚峻公曰吾必不假他盗以自解宁迟之得真盗乃已反寇起江滢公尽筴悉捕获之戒勿使株累曰使藉手反者以取功名吾弗忍也公日晏坐堂皇毋所藉耳目即私之亡敢以耳目进者然至鄙屋之下与数百里之外稍涉奸伏必悉之公虽已悉之第发摘一二以示神明而已而不使竟曰不悉之彼固敖然而易为恶竟之则彼无所容足矣且使庖丁之割剥皆众理解岂不大愿而愿轻试其斤斧哉夫是以称我得天诸州邑大夫长曰固也吾曹以职事受约束毕公进之便坐而礼之如客也有小善则诱掖之其未达而谆谆提命之如子弟也退未尝不沾沾喜以拜公益又未尝不愾然而警以卒负公无面可见公丞倅而下则尝若一李公在几上第公録小善护小失而不求备又未尝不欣然而乐为公用也日者岁数潦不登李公言之台以蠲恤请其辞甚苦吾曹私窃以如非执政指何及报闻得一二升斗之赐李公又为调停其缓急而先其甚者民不大殍死即死耳而不忍遑萑苻我曹用是下毋虞于叵测而上毋虞于简书以苟有今日故曰我曹亦得天虽然我曹之不获长奉李公与吾子辈之不获长奉公一也奈何使彼三郡得之王子曰天下一家耳吴兴去郡不四百里而近李公守吴兴时安知彼三郡之不惊而聚诧以公饬兵其地耶我曹幸得公者三载余矣又安知彼三郡之不时惊而聚诧以预逆公叅知其地耶吾吴视吴兴易三郡民朴而简于簿牒视吾吴差又易公材大固无所谓难易也人失之人得之将以公为造物者我曹亦何所营营诸大夫曰子言之善愿以此赠公俾公毋忘我曹我曹日夕奉公之大海以毋颠堕则长若不离公王子乃次其言而觞李公曰公行矣今而后有惊相聚而诧者曰李公当复东袞衣吾土斯言诘不终验哉

●钦定四库全书

弇州续稿卷二十九

（明）王世贞 撰

○文部

△送行序

送大中丞理庵蹇公抚三辅序

始吾吴之有治兵使者阙也而是时巴郡蹇公业以臬副视齐鲁学政转而旬宣矣则为之崇其秩曰观察使以莅之凡后先之以观察使莅者仅三人而蹇公之望独隆资亦独积于是中外显然晓上意谓吾吴为腹心地百辟六师之所寄命蹇公之自旬宣而转不为左其秩观察使不为右欲吾吴下之久有公且为仗钺张本也然仅一岁余而超拜御史中丞握三辅节以行于是为公之士民者惘然相顾而曰始破格而以公来者为有意耶无意耶今又夺公而北者何也岂吴昔者腹心地今乃不腹心地耶解之者曰不然而吴人也知吴之为天下重不知三辅之为天下重尤甚知上之急公于南不知上之急公于北尤甚何者公所莅外屏十一陵而内卫神京神京故公唾息相闻地也上方藉公高拱而治其东北二垂步武之迹皆与敌共今者虽称慕天子威德万里外纳赆奉琛其駸駸未尝一日而忘启疆之欲非公何以填抚之南卒之成军者与北戍相错而处皆仰给大农大农之资不能亡差次其志好亦远近不均非公何以整齐之千雉而外中贵人戚里之庐产日益如绣居间之刺踵相接于道非公何以调遏之幽蓟故多泻卤地其膏腴者悉归之中贵人戚里而民不能割其什一调发独先而又最繁非公何以衽席之此其视吾吴孰重而其欲得公孰急也且而之所知公者一岁余耳而不尽知公一岁中事公自弱冠治剧邑馱歷中外有神明声以故其始下车即威望风采预有以夺其奸狙贪侮之胆而生贤者色涣汗一布肃然若李临淮之入朔方军也千里之内文吏洗手奉职武士被霜于盛夏然其心志未尝不得通于公公馭而拊循之则又若郭汾阳之再治河中也公有所白诸台未尝不忻忻受诲然其大要必经久利便之策不为一切新奇可喜公虽行有能奉公之教守而勿失公固长在吴也且夫公之所代者为广平王公王公今进而悉督诸镇矣王公之所代者为铜梁张公公今入正大司马矣人主进贤如不及公之贤宁复有过者即三辅一节亦不能久借公而况吾吴哉于是诸士民皆服而公之属若周守若朱令如干人闻而叹曰吾曹之不忍释蹇公宁独后彼士民虽然兹语尽矣

毋能留公矣请书以上蹇公公幸毋忘我曹间一展视之则若某某之侍侧我曹夙夜凛然戴公而履事所负公者有如日蹇公曰善请交勗之

送常博士先生试南宫序

始常君之文奇而见挫公交车也然犹得乙榜之第一人来署吾州学事常君既工于文章通晓经术而又家秀州去吾乡一水而近便习其士风至则以月朔望之次日考课诸生为指摘疵垢引以周行束修之贄不入私室贫不能治业者为捐俸以给膏油之费又不给则家帑继之矣戒诸生毋得辄入州大吏庭他所苦践更马复或调发而非分者或冤不获白者则不惮娓娓以伸于州大吏州大吏唯君言是信以故诸生之行日益修而气日益壮常君为人长身秀眉目善音吐慷慨论天下事不休上官行部见君翘然目属之矣已试其业工也已又刺得其教诸生状则亡不心器君荐剡屡上且有超拜而会君以例复得偕计吏对公交车诸生之儁素受知于常君者若而人相率诣余请曰是行也吾师必上第当弃我曹庶几得先生之一言以志不忘夫余之善常君宁独在诸生后微诸生请余固将有言也汉法郡国以贤良文学应制天子亲策之天下翕然耸动然其大较多博士掌故如董仲舒輩尝教授弟子数百人明诸功令不恒古而独州邑博士得射策最古学而仕仕而学而又仕西河叟之所称若循环然其于汉法不一二可概见耶以常君之学诸生固知之其善教亦知之虽然即诸生之所知仅一斑耳其材大固未易尽也宋之庆厯治平最号为雍洽天下之言善教者南则胡翼之北则孙明复至受知宸宸拜显擢而其究不过一讲筵之良而已无它材限之也常君之经术不知于二君子何如其便哲国家大策娴吏治则大有径庭哉县官之得常君又奚啻得二君子于是业已报诸生而为祖于娄水之上以觴属常君曰君之先有讳袞者自宰相出观察七闽能教其人为文章闽既已知学而显者仅一欧阳詹而昌黎氏艳称之今君所教地不能闽百之一而士济济为欧阳生者何限异日相业成袞固有所不敢望也吾虽老尚能执笔以从昌黎氏之后

送督抚大中丞古林王公迁南少司马序

王公之始下车也前中丞郭公方以事坐调去而吏民讴思之不忘人或谓王公望甚重资甚高将大更约束以自显见乎哉公曰不然吾且为平阳侯夫平阳侯非不能为鄴侯盖得盖公无扰之诲欲以安三吴吏民志耳其在鄴侯犹参也而久之侍御邓君銜直指节来邓君精意扬挖所创革利弊不少人复谓王公位尊而寄重宜有以出其上公曰不然吾且为郑罕虎夫罕虎非不能为子产欲以观子产之材而寄之其在子产犹虎也于戏平阳之为代与子皮之为长粥粥乎若鲜技者然拱手而成汉郑之治而天下至

于今颂二公之德不衰乃王公实不尔公故不欲以所长见耳其旦暮拮据唯民隱之是恤与吏弊之是剔公交车令不恒得公疏间得一疏则必深长为吾吴人计者也尺一亦不恒下郡邑间下尺一则亦深长为吾吴人计者也岁且侵公度其有侵状则先期而请贷既得贷而与岁应人以问公公笑曰侵而后请晚矣吏有微谪公必为隱覆之往往得终誉至于奸墨之暴著者亦不能逃公辟曰吾即欲寬汝三尺不汝寬也以故为公属者凜乎若神明之昭临畏而不能为怨苞苴之来望公之四履而退却则吏亦不敢罗贿于车门之外公于鞭朴不屡施则吏不敢修乳虎之耽耽于赤子公无算器之饷以干邮传则吏亦不敢继之以殄璧居间之语絕于公耳而私书絕于目则吏亦不敢屈三尺而徇人意然则王公者固成郭中丞而用邓直指者也公在事且三载无几微速化意露之于政府久而得南兵部侍郎夫陪京固天子根本地然不过公所抚九郡之一兵部握天子管钥固重于他曹然侍郎特其佐耳以阶则中丞左而侍郎右以务则中丞繁而侍郎简以私便则故职劳而今迁逸天子于公岂有他不过执资券持望衡以相拟公亦岂有所取舍第精白一心以安不可逃之分而已而为公吏者若弟子之遠其师为公民者若乳哺之离于怙恃相率而詣其长观察王君某牛君某顾君某副帅卢君某谋所以留公不得四君子谓若曹误矣吾岂不欲留王公如天子成命何则曰若曹感王公切顾不能以一言颂公其往而质之工言者遂偃及不佞不佞非工言者也姑以向所闻报之且谓公所佐尚书为真定傅公余颇尝习其人世所称明达长者如前公而有所张设则公居其画一如平阳其偕治兵事谋自公则公为子产谋自傅公则公为子皮又何难哉四君子以为何如公浙之山阴人不佞有介弟懋师事之又同举嘉靖己未进士以故习微有素云

贈郡別駕慎齋王侯解篆還郡理序

万厯冬嘉平月州大夫入覲以篆請于台台檄郡別駕王侯領之別駕事如故王侯馳至州州司業已供帳儲侍矣王侯悉罷之曰吾自有秩祿不而州食也身與其從吏四人坐一公署日出所携數饌買熟食食至飽乃從容抵治所為一啜茗而已度事畢即還公署復理別駕所受公移訊牒其叅承送迎不廢造請賢士大夫延見諸生父老與談治理委曲甚悉也故事州大夫亡它領然以五鼓御堂皇至夜分猶刺促矣吏尚以侯初至欲嘗之故雜不急牒以進侯立麾去訟者見而有所行者第令致敵偕來兩造具矣不數語得情以輕重受謫不恒立文案當上賦為限俸次第納稍扶其逋黠者猶為好語諭之此自汝額苟可以塞我限者寧忍困汝也且使胥役一下鄉汝能無額外費乎于是爭勉自轉輸若流水矣蓋侯至之初自吏胥而下環睨待使令不見呼則稍稍失意引却其后遂絕不敢望諸吏亡繇為奸私侯亦時寬之不賜罰間得罰伏而尻益高然猶曰死無所恨侯教我耳侯問民所苦何先則對以我曹賦業上上矣兵有餉丁有訾未已而復為徭

户以待不时需每一议修斋舫则费直金自二百以至再倍一议修公署则费直金自百以至再倍而乡民椎为吏所徂困馭工又从侮之中人之产如涤矣侯谋之直指使请畝益赋钱之十使募役应之而一切罢徭户民欢声若雷既而侯复问其次则岁运上供米燕中其费不訾当之者家辄破百计居间以免部使者悯之颇益赋佐偿自是稍稍集而见谓其集之易则复议夺其直计唯有鸟兽散耳侯为议复故上之郡郡上之台报可而他役稍亚者亦且以次得直念可以无破家次第请受役毋后期矣王侯之视吾篆仅五月而州大夫归侯遂委去已而嘉定阙令台考校侯所治独称最遂更署嘉定篆且以便宜摠海防吾州之人荐绅衿裾聚于学宫曰侯礼我而又能尽我吾之进言十四而侯听之十六屠贾号于市曰是不以尺帛称肉累我者农谋于野曰吾赋出吾家而不自觉苦属者体幸有完肤而今且奈何即庶人在官者亦相夔语曰侯窘我我不得饶衣食然使我毋虞于爰书其大较毋如受役者计受役毋如运上供者曰侯以五月篆而还我百岁之利即子孙何敢忘也相率走而叩不佞舂中再拜以请愿得一言为王侯赠不佞故尝读史至汉宣帝所谓与我共理天下者其良二千石乎则为之废卷三叹以为人主所指向若此地节五风之间宜其循吏绳绳接踵也然所谓循吏者毋过颍川渤海亦尝以丞尉佐郡何独寥寥鲜述岂尽压于守不获骋其材用耶必至守而后显见者何也今天子精心吏治拔勤能刑黻墨不啻宣帝而未有卓然能应之者然王侯以一别驾署事不半载而能得民之意恳恻若是且也不唯无传舍其官而所兴革皆百岁之利其为颍川渤海又何难哉王侯故尝用金吾右秩更京兆五部之二戚里土豪皆敛手而听事今者两台以侯恤民之状上上且曰是夫也能鸷击而育小鲜者也唯吾所用之矣

送州太守宜宾周侯转佐抚郡序

自古亲民之官莫重于守令守固称贵于令然夕垣台谏之选不及守为上下者责之详而待之薄以故令居其易而守居其难天下之州与邑无剧于江左而江左州独太仓有监司之奉郡国受计者麇至不任酬两部军帅百余人部卒与民杂处而民俗又鬻而好非其上以故江左诸令尚不至甚难而太仓守独居其难之最自余束髮以来所覩习先后且二十余守而鲜以迁去者宜宾周侯之来为守也去诸生仅踰年耳所谙者经术所谈者艺文所与游者齐鲁宽裾博带之儒一旦舍而据黠吏猾民之上羣起而各以其智巧环向之侯故蕴精敛明于簿书期会之际一切待之以忠信而持之以廉平当是时岁屡不登积逋如山逋者不时纳而主计者不小贷人谓侯姑为惨怛不容己之辞以收物情侯曰不然我为德而贾怨于上非忠也仁言而市迹之非实也以故不能尽得催科声而识者以为人臣之道固当尔御史行部则郡大吏多从行故事诸供亿人人御史也侯虽造请不废然所馈不过算器食至有恚而郟弗御者部人初拜相逯迓贺客麇集侯不忍损官帑以为己德应之而已相心重侯惜侯然不能尽得相欢而识者以为士君

子之操固当尔两造具于庭侯平心以听之使各极其意而后决胜者曰我故当胜也负者亦曰我故当负也则又曰负而不以法外加我犹无负也盖四年所而侯未尝以一喜佐赏以一怒佐罚堂皇之内无巨测之情中户以上无不安之枕其声日益隆隆起荐剌屡上已而侯仅迁佐抚州金谓侯为良吏若是以此报侯似小不称夫府之体虽尊于州然佐不若守之专而抚又不若太仓之雄也则疑侯有不豫色然侯曰否吾甚安之吾日与尤毁俱而不自觉也而今而后上有守下有令以一身优游其间获弛担焉且夫佐抚者非吾而谁可夫执铨者知周侯之为守贤而御之以常调非周侯咎也以周侯之为守而不自伐贤其居常调若固有此周侯之所以为周侯也且夫古之能重二千石选良牧者无如汉宣帝当是时赵广汉张子高其威棱风采振动京辇受天子知龚渤海一孱叟耳七十而尚滞散僚顾渤海之效章章且久而班氏之传循吏不在彼而在此何也不宁唯是朱子元之勇鸷精悍所至着声岂若何君公之不为赫赫然至去后而见思则仅一何君公而子元之翰音贾祸故不免也周侯行矣去后之思吾当与州之士大夫父老共之更一转而收渤海效其在侯自勉哉

赠休宁丁令君元甫奏绩序

休宁故为徽最岩邑其人多富饶行贾徧天下于三吴尤盛以故今令丁元甫之贤数入吾耳夏之孟汪司马伯玉昆弟偕故徽司理龙元善过余则交口而诵元甫之政声而亡何元甫奏三载绩台使者按令甲当为请陟明之典而邑诸生黄正蒙衔德甚于它士民以吴子玉之习不佞也介而乞一言之贺且条元甫善状若干其畧曰以天之灵不弃敝邑而惠我侯侯之初至也故事有赋长之羨金数千悉还其人不以私橐台调巨豪豪更文奸移避为中夤缘吏人舞赃万计侯密发之悉丽于辟此二端者台是而行之它邑着为洁法侯于是悉除故约繁细荡扫积蠹与民更始禁胥吏毋得下乡狱讼税役靡不子来官所取供必市同贾苛皆自絶两造盈庭词组而决各极意去钩金束矢不污肺石宴取成礼币取将恭大庖不盈列肆不惊侯视事之替岁而大吏革心小吏洗手氓安未女安红商旅安廛岁屡告丰属有小旱精心祈之应叩立澍市遭暴灾随拜而灭民乐其生熙熙怡怡侯曰可以逮死者矣戒毋得衣薪瘞火悉复而土侯曰可以教矣赋长之羨归而不尽者得金九百尽置学田收其入以供膏餽暇日身自行诸生课诲淳笃咸自奋励盖一荐而得儒者八前是未有也侯之惠吾邑不知视卓密县鲁中牟若何其去朱桐乡当无几夫能使侯闻于天子者两台察也能使侯闻于天下后世者吾子也以侯世而失吾子不可以吾子世而失侯亦不可不佞盖听然而笑曰而侯者元甫也耶伯玉诸贤固称之抑不佞尝与楚棘获窥人文之盛而元甫露一斑以为文士雄耳不谓乃能如是吾闻之元甫之先人有横草之功积阙至军帅而元甫父失之元甫力复之以授伯氏伯氏遂用武显而元甫以文自奋其在公交车凡十岁所所交游尽天下豪杰又时时倦

行民间民之情伪与土俗之淳漓无所不习一旦试为令其便若承螭掇之而已夫文士无用以语不佞輩则可而何以难元甫为日者天子赫然思古循吏之效躬以考功法大计守令上考有金帛宴赏之褒旌而下考辄斥甚者至勤缙骑银铛付廷尉谪谪乃戍边次犹论鬼薪耳今覩元甫治状班班审如黄生言尚书尺一有不下元甫征者吾不复论事虽然所以望元甫詎一令最而已耶序以授黄生贻元甫元甫其更思之元甫楚之武昌人举万厯癸未进士

送督抚少司马温一斋公入领左司徒序

一斋公之自廷尉出督全浙师也天子实念其师人跳梁曩者小创取羈縻而已恐不能弭隐忧必藉威望大臣一填拊之而廷尉资已重乃晋公右司马兼御史中丞以行公乘车至浙凡二载浙大治于是复召公为右司徒仅旬日复移左既得代戒行侍御固安傅君以巡按京兆李君以治鹺于公有共事之雅移书世贞俾效一言以重行李世贞不及事公而再辱公讯问若以为可与语者公之西北履则余家壤也盖得公治行最详公之始至浙也其兵犹挟众而骄衣食县官金钱以十万余计倭警岁渐寃然每至当守汛加予人六饗稍减亦三饗公曰居有廩矣行有饷矣而此无名之溢予谓何罢弗予而第令以时给本额众喜其时而忘其省也已而有议遂减兵者公曰吾不可居其名也居其名骤见之则疑且怨先为易营榜曰忠义以愧其旧而感发之时时校阅汰其老弱者扶其黠不用命者有缺不即补补则选海戍之壮而虞于馁者食稍稍减而兵不悟其耗咸大服公乃益延浙父老问所疾苦为之奏减上供织造蠲宿逋请改折罢一切小税禁讥闕者毋得与黔首争利东南之困益苏乃复为之益筑江海塘堤以捍阳侯之难其卤浸不得阑入而侵我田禾又为之立义冢絶火葬以厚死者又为之禁溺女禁陆博游手又为之闡歌圣谕解孝经图八行颁之学宫里社毋论学士大夫即市儿田更咸彬彬向礼让矣盖余之所闻而二君之所述类如此公今入佐领司徒司徒天下赋藪也浙东西之民财力已尽赖公而苏之然仅如医者之治疾治其标而已疾虽去所以为长生久视深根固蒂之道未易究也浙西北而为吾吴吴帝畿也其风土如浙而赋加重其困更加重自淮以往燕赵齐鲁秦晋之民形尽鹄矣地且半瓿脱矣天子哀悯元元数加赈赐蠲而恐一旦大农少府之泉谷不继公之寮长宋公日夜探其本而求匪颁好用之式未尽亮也公之在青琐时抵掌论天下事若指掌宁失柄臣之意而不顾今兹于事则益练矣其言益有味矣公三原人也三原之先臣有太师王端毅公者其为庶寮不能如公之直言其抚滇与吾吴以威惠称度亦不能踰胜公之治浙而数上书廷诤至光辅二主皂囊之所传寫海内至今凜凜有生色焉公与宋公得无意乎哉二君子以世贞不腆之辞觞公公必返觞而曰不谷之获免戾于浙也实二君子成之吾安敢掩二君子而自为名且二君子在浙犹不谷在也二君子必复荐觞而曰公幸毋忘浙其在朝犹在浙也姑以王

又

少司马温公之自浙而入佐司徒也侍御史傅君李君以赠言属不佞矣甫脱稿而两部使之在浙者司农部为浦君考工部为马君马君余甥也复以书来言藉此而祖我温公于北關之浒余谢不敏不可则念两部使之所称公者不能加于两侍御而余欲有效于公者亦既竭矣无已则请畧公之美而以天下之大计告其幸赐财择焉屈指国家隆庆以往岁亡所不中盖自俺答氏之款关而诸部落相逐而通互市也秋防之省兵可以数万计兵不出可以无行饷而今度所省者几何所出者几何校之与夙昔畧相当此所不可解者一也敌互市上马十二金中马十金即所入无上马而我以中下币当之实亦不能十金然敌马虽踵至而边马亦不加益以赋卒辄称困币亦告乏此所不可解者二也东南之财力困矣公肆履之地所素悉也上时时加恩泽予宿逋勿追然而民日益困公私无盖藏之实此所不可解者三也往时天子采故给事言于边外内引水为稻田将悉田三辅开百世之利未几忽报罢利耶否耶此所不可解者四也公秦人也秦故称陆海又曰天府渭水郑渠利赖百祀今即无论穷边絶徼而鄂杜之傍价牟百金者苦旱且数岁多转徙矣此所不可解者五也万厯之初漕臣建早运之法以为甲令岁入米四百万无后时者太仓称陈陈相因矣然畿甸一无岁而价遂腾此所不可解者六也以不佞揆之边卒之饷三分其一以供债帅之橐又三分其一以私王庭之覲虜以积饥之乘来而我以不继之刍待将不恤士士不恤马蠲逋之恩徧于黠胥顽氓而不逮众赋外之额繁而无缓急稻田之利以喜事者而轻用之又以厉已者而轻尼之秦中有其地而无其资有其人而无其政所以积困也漕粟溢而价或踊贵以不时祟也犹未也今诸侯王之禄日减而指日众宗正之条日益严而上与下日俱困其故何说也毋亦难继之泽求广而转隘欤避居薄之名而更失所谓厚者欤亲者有所不悉而疎者有所避欤而犹未也上则严慈闈之奉下则广椒风之教虽不覩所滥予而司农之宣进岁时有之执而不得请小则报罢大且谴呵此则格心者之任也非公与其长之责也虽然公莅财赋之地一切治理流闻而上始特召公其在琐垣即慷慨指画海内大策声实在搢绅间久矣今之人孰不倾耳而唯公之嘉猷是询语云知无不为知无不言其在今日哉不佞老矣赖公等而为太平之民以保兹丘壑则大有望焉

送兰石张先生迁广通司谕序

滇故楚西南支地也当尼父之辙至楚而遗风被于陈良北学于中国而其徒叛之楚之经术稍以不振而最后楚将军庄躋畧定滇地自王繇汉以来羌笮昆明之道或闭

或不闭于魑结侏离之俗或仍或改当是时吾三吴之被季札言游之化彬彬如矣滇之经术不敢望楚何乃论吴盖二千年而我高皇帝遣傅将军沐将军以三十万众荡平之箠路剪棘以为州邑山越马人悉充编户乃至兴黄宫奏礼乐阡陌闾巷之子被绅衿而诵法孔氏自诡学士大夫然欲以拟吾吴则尚霄壤也又二百年而滇之人文且益振矣今其哀然者则鹤庆张君其人也君以经明行修久次而膺贡入京师谒选得吾太仓太仓于吴为望州士子相率而怪彼何氏者而坐皋比握麈竖义耶将不忧阿游折角既而见君温如其容礼恭而气纾言简而意尽乃恍然自失曰语所谓九州岛之外六经之表固自有人哉不腆雕虫一技耳吾何所用之君以视其寮则皆兄也视诸生则皆弟子也规条以身推腹以心盖春风拂而时雨施也人人游于太和矣然君既以家远不能将而所从一子自燕来又不能归授室属岁侵禄不时给而又不忍于束修之贄突无恒黔事稍稍闻上吾州之执政者太子少傅王公元馭悯而白之铨曹君得转广通教谕广通亦滇属邑也去鹤庆五百里而近符且下于是君乐得其家之近而戚于去其寮及诸生其寮及诸生亦乐君之得其所而戚于其去也相率而乞余之一言以为君赠余乃举白而属君曰古未有滇人来为吾吴地师者有之自张君始吾吴质不胜文君以其质而光吾吴使吴之士愧其文而剂君之质今君以吴之文归治滇矣滇文不胜质今且愧其质而剂君之文迟之自今而往有哀然荐于公交车者必广通诸生也耶而吴诸生中率素砥行以忠信惇笃称者亦必张君之及门深于其教者也寮之长常先生曰善请识而书之

弇州续稿卷二十九

●钦定四库全书

弇州续稿卷三十

（明）王世贞 撰

○文部

△送行序

送友人殷无美之夷陵守序

夷陵古重地以其西馆蜀下流之口而东据楚之上游也故崇之曰硤州而置邑仍夷陵之故名至明始进邑为州不复别置令而吾友人殷无美以进士由吏部选人得之

人或谓无美为诸生治经术兼工古文词名奕奕者二十余年而始应乡荐则于经术益精古文词益丽而名亦益重又十余年而始成进士当馆阁之储材亡不推让无美虽无美亦自谓亡难我者而竟弗与乃至一尚书郎仅甲科常调而又竟弗获使之执手版折腰于监司守俸之庭无台琐之后资足以张皇吾势而折其贵吾不知水鉴之谓何彼固不能识无美无美当有不豫色者乃无美不谓然也其人间以语余余不谓然既而举以告无美曰吾固知子之不小夷陵而薄州大夫吾姑语子以夷陵故事当宋之时欧阳永叔其始亦所谓治经术工古文词士加灼灼者也繇公交车第一人取甲第授留守推官迁直史馆者垂数年矣以一言之小迁而出为外官其地亦夷陵然秩仅令耳紆绿衫奉槐筒而受署于子所居之州大夫今子治即硤州其下且三令且甫释褐而有五品之禄位与牙绯之章彩子以为视永叔何如也永叔宜若有不豫色者然且名其邑之堂与州江津之亭皆曰至喜而皆为之记其堂之所谓至喜盖以水道自汴东门踰淮穷大江者五千六百里而后抵夷陵故为吏者多不欲来既至而知风俗朴野少盗争而令食有稻与鱼又有橘柚茶笋四时之味江山美秀而邑居缮完亡不可喜者亭之所谓至喜则以岷江之水合蜀众水出三峡倾折回直捍怒鬪激束之为湍触之为旋顺流之舟顷刻数百里不及顾视一失毫厘与崖石遇则糜溃漂没不见踪迹而夷陵为州当峡口江出峡始平流故舟人至者必沥洒再拜相贺更生以为行旅喜嗟乎永叔能以令自寬者也非能尽令理者也能知物情者也非能尽物情者也夫以贫书生罢铅槧之业一旦而骤领民社寄乡俗之黠悍与胥吏之诇张我且寢食之弗遑而何暇所谓喜蜀舟之得峡口而喜也必将有楚舟之得峡口而忧也今夫驱车者折旋于狭径而骋蹶于康莊又安知所谓喜也吾故曰永叔非能尽令理与物情者也虽然当永叔之在夷陵属令事简偶取旧牒阅之见其剖击之舛鰲匹夫之冤不白而舞文决网者比比为之懼然自是益精心吏道不敢快意天下事而所莅若尹开封叅政府屡典大郡皆有寬平声至于晚节对客必详政术而畧文章然则无美之于永叔不必穷其所谓至喜而于懼然者加之意乎勉之夷陵之人必且曰欧阳子其更生而福吾地耶余亦曰殷无美今之欧阳子也

送章司训先生之临朐令序

记余在嘉靖中以按察使者饬治青州兵当是时青人数不率叛书亟闻盖十年而三勤王师而它萑苻之警与侠少亡命探丸杀人椎埋剽攻者不可计数其号为稍驯者即山铸山即海煮海以自给足又驯而习耒耜之业者岁所收获皆入私廩不知公家为何曹余乃选健吏分部骁卒破离其党与穷其窟而剪之诸勇私怯公之鬪横利忿伎之狗鬻讼舞文之习一切受惩稍稍称治屈指已三十年而青人尚有能言之者顾余居平自恨阶稍重不能得一邑而治之为之画地课耕平赋息力以规十世之利为之化诲诱导诗书其俗以收一变之效而仅仅用柱后惠文弹压之虽其所就理者广而其所为德

不能深且久也余自解郾襄之节归颇时时为人语之而今年春青阳章君用吾州训导超拜临朐令以行临朐青望邑也去郡五十里而近其山多出中下今其民人虽不能无锥冶之竞而视都会稍朴而畏法以故差易理余尝按部再过之令亦时时诣府请约束大槩讼谍省可视它邑十之三赋虽稍稍不及期然亦不至辄之私室且闻迩者有天幸娄得贤令为之拊循而整齐之当益易矣章君以公交车之僑屈司吾州训故事自公交车出者不当司训司训则当有寮长而君夷然不恨也出入鴈序唯谨暇则延见诸弟子与谈经术于贄轻重毋所厝意为之长与为之弟子者甚安之居三岁余未尝饰行以干观风者之荐而荐自及未尝一通政府露其屈抑贫因为可怜状而除目亦自下于是其寮率其弟子而乞余一言之赠且谓余故青使者能悉青事余虽居恒自念欲官一令自效然余能悉青使者事不能悉令事也于古青使者而得一人曰曹相国叅延老子之徒盖公而师事之以清净毋扰狱市而青大治及其入相汉亦不过守萧鄴侯之画一者而已章君之夷坦任率宠辱不惊于资近相国矣虽主要主详之用殊其贵于清净毋扰一也章君勉乎行哉为我按求前数贤令之成事而以曹相国先后之意行之必有起而歌颂君者当知余言之不谬也

送太史王胤昌先生还朝序

信阳王胤昌先生之奉母太夫人忧也服除者久矣而顾时时称病不造朝走一介来弇中讯余余漫问之曰而主北首乎曰未北也出橐而得其文记所蓄奇石五则皆悍王宰相之遗物官所不籍而强有力所不之顾者寶而事之若天球赤刀之重及告返余乃遗先生书微以应世之无碍于大道风之顾于辞拙度不能几枚叔发不敢望先生之有起色久之先生复以一介来曰不佞以吾子之命强且起矣虽然必藉子之一言而后成行余适有它事复漫应之而曰必子之成行而后敢効一言自是絕不相闻而吾乡土大夫自燕京归者问见主先生否曰否也白虎观中咫尺地放而至铜驼东西陌不能得王先生迹予笑曰先生欺余哉又数月而先生又复以一介来曰行真有日矣虽然必藉子之一言而后敢发出其橐得所为后奇石记者其石益以奇而文益以丽然其寶事之益以甚予乃喟然曰先生好石哉请为先生言石今夫凝然而镇重者突然而耸立者巍然而角距棱峭者皆其德也挹之而润叩之而音者其材也或翔或舞或搏或饮或夷俟或傲睨鲜腆者其貌也第所以得当先生者此耳先生之所以爱而敬之者亦不过此耳信阳豫州部也豫州之石不有崧高二室轘辕熊耳之胜乎哉其峭萃郁律高者万余仞盘结延袤小者亦不下数百里中之魄■〈石垒〉峭蒨变幻千态亡论足以供先生之耳目者不可指计其积气之所滋润外发而为乔木内锺而为五金下穿而为流泉上蒸而为云雨所以利益千万世宁浅鲜也不佞学佛人也于泐仰体用之机亦畧得之先生而有意于出耶敢以崧高二室轘辕熊耳之说进不然而归抱此数奇石以老世人且谓

不佞以石禅导先生于乎不佞宁石禅哉

送饬兵观察使对沧王公迁浙江右布政使序

自吾吴在故京之左辅而厥赋又当天下半其三垂踞海与岛夷共一旦之命而饬兵独一按察使者使者之势日益重而格日益以高往者西蜀蹇公用真使来任之未几擢御史中丞抚顺天以去代之者东齐王公亦以真使来未几推中丞抚郟不果已复推抚山西复不果而竟得浙江之右伯蹇公为人磊落伉爽果敏便事有仓卒之用而王公尤周详笃慎远虑深识靡所不中肯綮始公之来而蹇公以中丞去法不得候代属虚位者近三月公无所因承事取独断若草创然诸文武吏故摄公之材望与别歴军事然跋履之地多在西北乘秋始候因高为险而东南则茫茫一大海无所不戍逻车骑之用骤改而余皇驰射之技悉易而浮沔尚意公之未尽睹也公故明法比晓章程大约吾吴地公移讯牒视燕晋省可倍屣多且十之其变幻出没不复可更仆数公于地形之要缓兵卒之强弱戍饷之给乏一按图而得之不待四履之所跋涉而收其筋络节辘于股掌之内片檄下而旆旌帆樯组练戟矜为之气振而色飞自大帅以至裨校莫不倾输其肝胆毋敢矫饰而希目前之宽借郡邑寮佐大小将数十百人公若人置一使于几案以检制其非念而稍贤而有才者则争自鼓舞笃策冀公之见知公置腹而抚之且诲之黠吏因缘舞文为奸虽一字之下上公必抉摘其伏使之缩舌摇手即盛夏若负霜雪而供事盖尝遘吾州之大夫韩子谓不谷幸得以职事旦夕谒公再谒必拜公之益也日者狱司之不戒盗逸者十人公时自行部归不动声色画筴悬购吏士用命不浹日而获其九不谷用是以得逭大戾稍间取公初至之教而读之不觉悚然沾汗也公固预精言之矣它邑大夫亦间谓余有吏笥藏而阑出财物者幸蚤露已取公初至之教而读之不觉悚然沾汗也公又精言之矣凡公之条教约束若著蔡然遵之则理拂之则败我曹何可旦夕舍公也盖日夕加额愿公之握节而来以覆露我以吾子之于公有素也其为我效輿人之颂而期公以来记世贞承乏青社时实为公今官公方少年荐公交车数接眄睐贞虽奉公之诲以无烦简书然踈节阔目师意自好其愧公今日多矣最后自楚宪亟入太仆又不得一践紫薇之堂以察泉谷出入之数故卒卤莽于抚绥用弗称去公今稍迁浙藩浙藩天下赋藪也又益公以所未足矣自是而肯惠绥我吴则岂唯诸君子之幸亦世贞与父老之幸哉

又

对沧公之以浙右使行也世贞则从州邑长令后为不腆之辞赠之矣一旦副大帅卢公偕叅将马侯游击将军张侯局门而请曰夫儒吏以搢绅贄而武吏以介冑荐今者

宪使公之行也宾筵固秩秩矣征其冠则且脱惠文而进贤矣而不谷二三子尚敢执介冑之故而辱我公唯执事素幸于公其不辞雅言之渎余谢不敏则谓三君子吾所以称公具州邑长令序中令兹无能为续敢问大宰之迁公于浙也为重之耶将不尔也以秩则右使右而观察使左以地则吴急而越缓以寄则饬兵使者难而藩贰易夫不待铢较而衡度之知其不为重也且吾见夫公之出也旌旄蔽前冠佩从后多力而骈胁者持矛操鬪戟翼輿而趋片檄所下环海戍者几二千里水陆之舟楫车骑肩胁惕息莫敢谁何吏民耳目以百万计殫候公之颦笑为欣戚而今者三商而起间一坐堂皇睨其长之鼻孔而不得拂息及其趣幕府受约束计无所复之唯唯而已所稍自偷佚者挟轻骏御笋輿而徜徉于湖山之社此与昔之请祠而寄禄之人何异然则三君子者毋亦窥公之所以得兹迁谓用事者以便宜均劳佚也耶是不然夫移公于浙者重浙也其以公移者重公也吴浙上游也地形相错如绣即吴之有风声张错固朝举而夕驰之浙矣今尽吴之地无不摄公之威而衔其德有如一且钱唐之悍校骄卒有公在孰敢逞其慥脱巾而噉呼也耶不宁唯是往者岛夷作而吾地之抚臣时更易而往往议其代者借材于远地是故缓急不得其力今公之望实着矣其莅吴而开府之启事劳山公者再矣有如一且中丞入揆地或天子有所更易舍公其谁公固可朝拜命而前茅达于枫江之浒矣吾固曰重浙也亦重公也三君子拜曰信如子之言不谷将饰余皇淬组练以俟矣余亦曰岂唯诸君子余亦从父老操玄黄之筐以俟矣于是赋黍苗之四章赠公而别

贺太宰袁公加宫保致仕序

南京大宗伯袁公抑之以奏三载绩入朝诏仍故职而无何南太宰阙公遂为南太宰甫拜命即上书言臣老不任事谨以骸骨请而谬荐及不佞世贞以尚可备驱使时不佞方在告里居也天子以公清望素着勉留之而俾不佞起家待署公归当履太宰任复上言臣不幸有狗马疾惫不良拜起即春秋奉高皇帝寝陵岁时祝厘不能无颠踣胡颜以对司仪者上幸哀怜之赐一壑而老天子下其事太宰太宰杨公叙公之德在国家若蓍蔡不可一日无而悯公之情非得已也知止易退公之道固然要必不忍以君父之托而为身及名计具其事以闻天子以公清望允孚特加太子少保俾致仕曰望者称之也犹在外也曰孚则信之矣在内矣不佞颇习掌故家言东宫三少虽与尚书偕二品而非六年满者弗辄加其以致仕优礼加则嘉靖之初以上邈弘正时有之今上之世独葛端肃公一人而已然歷四尚书而拜御史大夫垂奏六载绩乞休而后得之若分司留京者故自公始也夫核名实慎爵赏虽至一噀一笑亦不轻以示人则毋过今上者公何以得此也公为给事满岁即上书极论选部郎与柄相之幸客翰林检讨因紕及尚书世宗为之逮选郎逐检讨而亡何公遂出金闽臬矣自是浮沈外寮者且十余年竟不召然所谓柄相者絕不能以毫末加公而公亦不以浮沈故小有所挫寻入拜太仆进奉常步武八

座而不肯以其身充二相餌遂乞骸归其最后相益骄公之卧东山踰十五年积荐剡至数十公既了不知有荐者而骄相亦了不知有公会其败而公始起家南少司空超为御史大夫复超为大宗伯天下之望公若威凤祥麟而莫知其用公之用若广藪乔岳蒸为灵泽寫为神瀆而莫测其倪迩遠之荐绅与都会之逢掖穆然若清飈之被躬爽尔而苏谖尔而敛殆若以公为苹末而未尽悉也夫服箱驯皂之士一旦而以其颖试于县官为之程劳而爵禄之非不尊且厚也力■〈谷丸〉而不任则曰吾所以报之尽矣听其归亦足矣不称而白简先之丹书后之曰吾非而薄也而自致之也公之归岂以是望天子重天子亦岂以一归故重公又岂以一宫保为足公重夫亦各自致其分而已使天下而有纯一不贰之臣又有优贤将恬之典于公非有所重于君德国体乃重也公既得请过不佞而语曰子名为知己不可无一言夫天子之加恩不足公重而不佞之一言乃公重哉公业已辞禄且岁俭不能具饘粥不佞虽贫差犹有一月酿千里炙童冠称之为呼舡而相从于石湖之浒咏歌熙怡即上之所以重公与公之能重上者皆悉扫而付之忘言不亦快乎公莞尔曰有是哉我能尔若恐不能尔也姑志于笔

送大司马春陵王公入朝序

万厯之丁亥秋诏拜总督蓟辽真保御史大夫曲周王公为大司马公固辞天子若曰乘一障以守边陲使外地宁谧金汤屹然使予一人靡廛于北顾则唯卿之力予一人尚虞其三垂卿其作我心腑运臂指使以成统平毋更辞公拜手稽首对扬天子之休命既倣装而御史中丞蹇公时以巡抚有事于蓟貽书世贞谓不佞奉公下风方藉公之教以免于咎而公弃我虽然使不佞之私戴公也毋宁使百辟之合而戴公也唯吾子之习公而善不佞其毋靳一言以为公行李重蹇公之言曰公之始治蓟也盖有南军万人云其军甚精而熟于故戚将军教则又甚整然散处睥睨间多设裨校护之而不为置帅护者日以益而不才者日以筭滥所侵牟不可货算卒亡不垂橐者然庶几得少纵窳惰以两相市卒之两相蔽公曰毋庸也余不佞合筴请于上悉汰裨校之不才者仍节缩它费计减直四万余金益募卒二千二百人且令诸军分属诸帅以时约束之卒便于亡所侵牟而安于约束北军亦相顾自奋励蓟若益而雄者公又念修边无已时役繁而力■〈谷丸〉且不支诸寛客兵役十分之二主兵则姑愆其期不以春而以秋已又念卒饷不得本色则资之余余日贵而食日益匱请稍与之本色已又请通馈道免扣留诸所以衽席吏卒者纖悉详至前后俱得报可然公不纯任爱大帅以下有貌果象恭以巧藏贪以豫匿怯者袂其情而论谪之不少贷将自是选矣而是时汰校之下迁者伎而要其党孽偏将军之请减饷以为罪军几变公不为动第论捕执其魁斩之梟示于边士惴惴奉命矣诸属国挟大敌以恫喝我岁益骄诸将幸及身之无事谋所以媚之公私之币亦益增公为画一之法定约咸慑伏不敢为恫喝盖终公之任无一骑阑入边者诸将乃相谓我

曹子岂愿割肥而饱敌今赖公得自保又使我无忧于烽燧公仁人哉故不纯任威蹇公之言云尔世贞第语蹇公此公之所得王公于蓟而王公救宁之猷施于西若真保者绥辑之勋着于东若霸蓟者固未之及也公既以一班而举王公余又欲以一班而为王公赠毋乃非当乎哉虽然天下者亦一方之积也且王公自弱冠着朝籍敷歷中外所至有名大臣风兵事特其重者耳夫以绛侯勃之定燕代而入为太尉裴晋公之謚淮蔡而召领中书韩魏公之威西夏而还佐元枢以至拜相厥后绛侯浴日之隆勋与黄河泰山相带砺裴韩二公以其身系天下安危者各二十余年三巨公将相之业昭昭如是然高帝之识之与元和庆厯之间人主之所眷倚与中外之所注望者固不在揆地而在定燕代謚淮蔡威西夏之日也公何以异是虽然世贞窃有千虑之一以荐公夫忧在内者不在外忧在上者不在下搢绅大夫在公下者信公之廉而服其正固不能有所加矣自公而上肘掖之间貂珥之重私其所比以要公公能无狗之乎不狗则嗷嗷而议其后如前事可鉴也狗则失所以为公矣八紘之外奉琛委贶以奉正朔固当鞭捶而乳哺之然灾异洊仍民困已极小则萑苻大则潢池公何以待焉吾闻之峻已所以逆窥觐也絶昵所以杜交關也推诚所以孚异类也潜机所以擿幽伏也下贤所以广忠益也立节所以待非常也夫公社稷臣也与国家同戚休使世贞以蹇公之请而终之諛不亦失所以为世贞者哉

贈督抚大中丞乐吾畬公之南京大理寺卿序

乐吾公之以大中丞督抚三吴也故自浙藩伯迁云天下诸军镇独三吴重而诸抚臣亦唯三吴重盖高皇帝之所定鼎曰南京陵寝百司六军在焉而姑苏云间晋陵其财赋独几当天下半而其地又以三垂枕江海与岛舶海寇争利便其辑遏又甚艰故往往以它中丞徙镇不则卿尹之敷歷有声实者而公甫正浙藩之未几即以遴选拜特寄三吴吏民方拭目而望公之风采然公下车之三月余而诸郡国胥次以水灾告三吴地形若绣高故不能胜庠然尚有未鱼鳖者而公业上书为民请蠲賑辞已甚哀书初至北阙下大司农犹持之独二相国以桑梓之故而公与议合亡何霖淫不止其高原亦尽如扫公书再上益切台使者继之它使者复继之它諫臣亦争继之于是九重之听回而二相国得悉其心思岁征大槩蠲者十之三而其未蠲者亦从缓矣而独所谓賑者谋发之官则削贸之官帑帑如洗公乃督率守令以便宜劝贷庾有粟使为粥食饿者帑有镪官量益之使从它方余平价而糶即所活不能全大要得十之三四亦足以舒而公性素节俭至是益以身先之朝晡进肉菜不过二簋邮使过郡无张宴无用币无治廩无遣津护人过者亦不敢以望公故闾閻之私蓄虽竭而官不大侵其民困食而不困力公虽孜孜格民隐然务为长虑深顾以貽数岁利而吴中喜事新进见谓名美而不睹其实轻有所陈说公一切为条析不尽狗之曰使吾当其名谁任我实即以內意诤张撼摇公弗顾也当

是时属公之四履者吏自二千石以下至百石士自荐绅大夫以至青衿民自白叟以至红女黄童毋不恃公为命而邮书自北来则公进为廷尉卿治留都矣三吴之人狂走相顾谓我曹稍幸有生色图所以善后而未能公奈何舍我去也日者震泽之濱有十余里虔刘我居人虽摄公之威德匿迹遁巡然未就缚也天子赫然笃公曰亟用钺第迁命与师中之命相躐而下岂太宰与大司马不相關摄耶廷尉固天下平较之赖廷尉生视赖抚臣生者万不一当也公胡以有此迁也曰大司马定策者也太宰程资者也宜其不相關摄也虽然帝舜之时蛮夷猾夏寇贼奸宄则皋陶为士士即廷尉也方伯连率其势足以威蛮夷而弭寇贼乃不可以寄皋陶而俾为士者谓法平而乱自靖也杨雄识其意矣故廷尉之箴曰昔在蚩尤爰作淫刑延于苗民夏氏不宁然则廷尉之宁民也深于方伯连率之宁民也审矣兵使者李君求所以借公不得谓不佞故在公宇下当习公而又以职事从公后俾叙以佐行李

送司农路大夫（阙）守巩昌序

嘉靖中甲令诸八座之任子得除五都督府幕僚稍迁僚之长于格当为郡守而两京之幕僚少而八座之任子众以故不四三年辄得守吏以资簿持之弗尽应也资既弗尽应又不获于幕中先材故守而必之于五岭之西南贵州夜郎牂牁之境为郡者守亦往往自免去是以名伸任子而实抑之最后稍稍为调剂之法遴其俊贤散转郎署以观其能徐而识之往往得望郡比于中州于是任子之选重而迁益缓然不为任子格跬武监司而悬目卿佐当其选者亦重自爱而勇见才乃吾于路大夫窃征焉大夫故大司马公爱子也今上甲戌之秋余入领太仆而大夫繇都督幕来为丞是时年甚壮长身白皙美眉目与之处温恭而中理与之谈通明而不诤余固已心器之然无何出镇郾中而大夫丞太仆自如久之始迁南司农部三转以至今官而余以不能事言路还里中需次偃蹇朝命者亦至三而始强起至留都盖十又四年而复与大夫接则大夫益壮于昔而余一皤然翁矣司农部中亡不称大夫才而廉者籍籍满金陵亡何除目下大夫进为守而得巩昌守固常调独巩昌为关中最望郡领州三县十二西倾朱圉鸟鼠之山襟带前后嘉陵天水江湖之汇以资灌溉清渭浊漳分流而西注太守晨朝坐堂皇三州十二县黄墨之绶趋走而听命于庭噫嘻亦雄矣第吾闻之今天下遘百六之会而关中灾为最關中之灾秦陇尤最大夫郎司农部所以为衽席乳哺计者筹之孰矣今幸一当生举三州十二县而置股掌间于泽枯而肉骨何难焉大夫之先有温舒者当汉地节初博陆侯袭武帝之故以威棱摄齐宇内而温舒独疏请尚德缓刑其辞甚媿孝宣感之而其后颍川渤海之徒进而成循吏功温舒亦至临淮太守治有异迹而子及孙皆能用父祖之教至牧守大官大司马公故云间守也今距守时七十余年而云间人颂之若新非温舒所敢望也大夫称所以后大司马公者又岂下温舒子若孙哉余虽老犹能覩玺书西下旌巩

昌矣于是诸任子称大夫通家列曹署者若而人咸请而志之以为大夫行李重

弇州续稿卷三十

●钦定四库全书

弇州续稿卷三十一

（明）王世贞 撰

○文部

△送行序

贺州大夫对廷韩侯四膺旌荐序

余故不能自爱其文辞归田以来逾一纪所于邦君大夫或行而循搢绅之请以有序去而徇父老之思以有记然不尽馘馘屈曲以为饘粥之业谋至于寿而贺荐而贺奩而贺即宁使请言者失色杜口以去而不敢应盖风俗之薄久矣邦君大夫方在事而我以调辞施之彼且疑我以为将欲有所用彼即不疑我而万一彼后有所负则我且负我日者州大夫韩侯之被荐也凡四矣而余方以宦羁金陵羔鴈靡所布以充廷实别驾叶子李子书来曰子可无一言以为大夫颂乎余听然俯而思已跃然而起曰我不敢以例例大夫若大夫则吾州所创有之神君也我何敢以例例大夫始大夫之当选吾州也相国太原公元驭书谓余州真得守矣余始谒大夫于治见其礼恭而貌温神定而气舒与之语十叩而十应若邹成侯之对淳于者出而语人太原公不欺我既大夫晨朝三老里赋长胥役已延见博士弟子人人慰谕得其欢已徐察其所献纳者采而用之有所约束条教必中繁其于土风民瘼若先三月而以微服来者也又若家置大夫而为之师帅者也盖不待浹日而欢声腾于郊遂之外矣又三月而余以事至乡属有逸囚城门闭乡之田更市馭相率荷耰竿而奋曰当为大夫迹囚妇女携馐饷其夫若父而勉曰毋忧饥勉迹囚以报大夫于是吏士尽锐追讨尽获之当输赋争先而上庾曰不可以劳大夫盖大夫之忠诚恳恻有以感之而不弛不滥其民得先之利而咸恐后及岁大水大夫操轻舸或乘小驷日夜行灾地亟上两台白事以吾州上灾报于是吾州之灾小轻于昆山吴江而恩贷不因之以杀大夫每至较赋曰吾宁失官不忍失此凋劫心然大夫之所登赋亦不后诸邑也故事守考校诸生以报成而已大夫必精阅而拔其尤躬为课艺文谈经术

浆炙劳问相继又为之别其最而称赏之于是士争自奋励有声实矣今之荐大夫者名能知大夫有余所覩闻之恳切详至者乎曰知矣而未尽也然则为大夫上者之知大夫尚未如为大夫下者之尽大夫也今天下重司理重令而轻守守实重于司理及令而以见轻故多不克自振余迺者有所建白颇精言之不知主爵者之能见信与否虽然覲事迫矣天子方加意守令有玺书宴饗之典以旌其卓异者舍大夫何以哉为我告大夫夫子无它训曰无倦而已更以告叶李二子曰有神君在上益自励冰蘖以共成吾州之治大夫能悉若毋曰我从事独贤是谓交相勗者也交相成者也夫例安能尼我

赠喻太守邦相先生入覲序

喻太守邦相者松之贤二千石也与世贞善其恒言曰太守奉天子命来治郡为赤子计耳不为虎而冠者计也太守甫至郡即属有浚水之厄饿莩枕藉丘壑乃为文劝诱诸积镗粟家毋论贵势俾量出厥藏以赈于是大小响应得粟二万余石镗半之以分授三邑散施所全活可数万计而贵势中有不便者恣为流言以中太守太守微闻而笑曰吾向者固言之不为此曹计也虽然彼岂以余为重弃郡耶悉遣妻子归侍太公于里而独身卧斋阁移文乞骸骨然太守之车门若洗讼庭无留狱胥吏灌手而抱案牍待署靡敢以私进者士民欢呼载道其颂声日益闻而贵势之谤渐屈于是台使者易其疑而为信荐剡腾上矣太守夷然不屑曰吾岂其王尊耶将无即墨我耶乍贤乍愚忽毁忽誉谁为之耶乃者吾故我世贞颇与闻其事始而为太守惜亦且为白也既而为太守快亦且为祝也所以祝之者曹生子念请也子念之急太守也甚于世贞而世贞之急太守也甚于太守属者太守且入覲受计矣而张将军某来谋序张君者松之良大帅也亦与世贞善其恒言曰宁噉菽毋噉士肉宁不为帅不为债世贞高其人与游久矣一日以书来谓生幸托与喻使君同时又幸托使君之宇下而今者官又幸同地得一周旋而又俱幸游公之门敢以子念之例请夫余即欲辞张君安能辞太守虽然所以述太守者尽于子念祝矣无已第以语太守积资重当超为大藩之监司以飭治兵事则思所以御圉干城治学政则思所以振德登贤不然而天子方加意元元以太守云间之政赐金增秩曰吾股肱郡生为我再治之太守其犹故太守耶将改念而稍慰藉贵势耶吾固知太守之必不为彼也相国太原公好察吏治而急用贤其于太守之被谤若浼解谤若涤而亟才张将军尝拂拭而用之如以燕间见谓我请曰定何如二子之不辱门下士者则不佞与生色矣

送大鸿胪继山王公迁太仆卿致仕序

继山公之守南大鸿胪也盖无岁不请骸骨而至万厯之己丑春请益力天子嘉其

行高其志为之下吏部拟进太仆卿俾致其事以行嗟乎此典之不讲也久矣自人主之必欲尽人臣之力而为之臣者必欲尽人主之恩故不至于摧惫委顿则不已人臣懷尽恩之一念而又不能自慎其行则讥谤殆辱乘之于是人主之恩遂中变而为薄若夫君臣之际能两居厚以终者其道在人臣而其遘在人主吾以耳目之所睹记盖十载之中而得三人其它故千百不能一也前是吾同年沈公澄伯以南右通政乞终养母上为迁光禄卿久之同年袁公抑之以南太宰引疾乞休上特加太子少保俱听致仕今并继山公而三矣然是三公者皆扬子以南钱塘以北所谓吴人也吴人秀羸多能深于文而短于质稍异于北方之士大夫以故虽难进易退而无以为名亦毋繇见高于人口若三公则天下之所称重德长者沈公为按察僉事即移疾归卧西湖之上四壁萧然于官府无所造请监司守令间携酒访之欣然不辞明日卒不报谢及强起所居官中事咸举而不欲以治办名袁公宦游之日长青琐论谏指切权要不为沮自奉常归卧者十余年天下以公之出处为世道之升降起长台纲正邦礼建业之漓风几为之一变二公皆不家于官垂橐萧然几无以为归若继山公则自其先大夫仲山翁已负恬退之目未艾而归享有上寿公养志备物以身为■〈执上目下〉既成进士而不奏第者六年既奏第复以州牧卓异入为天官郎弃而归养者又数年年垂耳顺蒸蒸孝谨少工诗擅丹青已谢絶之盖不欲以其长掩先人名中岁失偶不复娶竟日俨然端坐左準右绳归于自然最后强起回翔于留京之散署诸少年鹄起据其上公不以几微见颜色公馆岌岌且欲倾螭蛸翳户凝尘满席湛如也其嗣二公而三盖有不偶然者公且行不佞贞间语太宰杨公大宗伯姜公昔人有云虞公散髮海隅而东都之送殊不藹藹此岂亦有所避耶于是二公合同省诸卿士祖道于西门之外姜公为祭酒而不佞贞与泛爵焉乃扬言曰昔者疏傅归有人主之赐金以赉贺监归有人主之赐诗以饯流艷史册以为朝家盛事今者公之行虽无金与诗然特进上大夫之秩归老于家如万石君则又二贤之所不能得者自今愿公强精神进匕箸不言躬行之化使比壤之后进士人皆有所矜式渐变而至于道何难哉夫疏傅之不私其赐置酒与父老共之达矣而不闻兰陵之俗美于其旧若贺监之托迹黄冠以放浪终者又何足为公道也今夫寶界漆湖固公家几案间物也今而后能使其山若益而高水若浚而长者非继山公之风也耶公欣然命爵而不佞贞次其语

贺大中丞志斋周公平巨寇奏捷序

大中丞抚吴之履周遭数千里而遥吾郡东薄海而安庆西接九江相距亦且千里询问非旬日不达中丞周公之开府也实在吾吴郡甫下车即集两监司四郡守二十一州邑之长吏日夜谋所以苏吾民者于赋税征役之伏弊靡所不搜剔闾井单赤之隱痼靡所不显见为平亭而上之朝岁省以数万计吴民相贺更生而安庆之属邑曰太湖者巨盗刘汝国起其间汝国故阮家黠奴亡命与其曹卢汝星輩流劫蕪黄诸乡落而归帑

于陈汉山时时出剽掠富民家金币服器实其帑而间发藏粟之羨以予贫者剽猾无赖之徒颇趣之有众垂二百而兵使者之卒轻而骤逼其巢遇伏败散失一指挥一千户贼乃四出抄畧焚驿舍放徒囚其事至闻朝廷公始得兵使者奏记即抽青村南卫金山之长矛劲弓墨阳合贖之办以从而京口圖山之锐亦与焉然不使过千曰兵贵精不以多也盖屢及于室皇剑及于寝门之外车及于姑胥之市不浹旬而驰至其所会贼复走安庆傍地行剽至暮不归我兵侦知之入焚烧其巢贼乃移据柴家山薪黄之兵徼之不利其将伤贼又突攻我黄家军有所破杀公至始更约束信诛赏择利趋便一意而进毋得相推诿于是果势壮往者鼓力而争先缩朒自完者畏法而不敢后盖一战而破其选锋于黄宫声营再战而徼其走南阳者大败之获其魁党男女辘重三战而尽殲厥丑汝国等以次就擒搜猕薙剪无复漏网公乃拊循其吏民从容饮至而返飞捷以报大司马公既返吾郡之二监司若叅政许君应逵按察副使李君涑暨副将军马君继武率其偏将军张榜以下贻书谓不佞贞宜有言以昭明公之峻功示永永不佞有事于南司马部窃与闻公之机宜进止乃敢复之三君谓公家先周公固神圣也东山之役以天下之全力三年而始平殷孽至于破斧缺斨而其劳费亦已极矣今公朝闻警而夕发提一旅之卒不十日而巨盗悉平发者若不知有行枚之劳居者不知有蚍威螭螭之恨萑苻弄兵之狙一扫而洗之它伏莽之戎胁息而不敢动比之先公其敌之坚瑕巨细固不可同日论至或缓或速神武之用要自有异世而一揆者虽然公之荡平大盗虽微见其用而所以弭盗之本则在于益推下车之精思兴除剔搔以长保吾更生之民而已能平盗不若能使民之无盗公其勗诸昔诗人之颂周公曰周公东征四国是王又曰不刚不柔布政优优之言也敢预以为公颂若乃畴庸班次增秩赐金而着之旗常鼎釜则大司马之所事守也非不佞所敢与也三君曰善遂录以上于公

大司马小江吴公予告还里序

大司马吴公叅赞机务之明年上书言留务六事天子故重公下枢臣复议采纳施行而公所深忧遠思隱然欲以其重壮国基而销反侧之伏萌者有所未尽公时感微恙不佞贞获从公后佐摄部事出必候问加揖公揖不佞而语曰吾必归矣不佞惊谓公公所弁髦者爵位耳天子甚明圣以肺腑寄公奈何亦弁髦之且公神清而气完即偶有霜露之戒何恙不已而遽乞归公笑曰吾自知之公不知也疏业上矣余亦不敢复问会疏上而天子下书褒公才望之重与委信之笃不听归是时公恙尚未损复上书言臣不幸狗马之病转深即一旦先朝露生死皆上恩无所恨第以戟然若巫尪拥衾呻吟而以虚名据百僚六军之上即卒然有不虞非死所赎又发书三政府一太宰其辞甚哀庙廊怜之委曲请于天子俾公暂还里且令抚按臣俟痊日即奏闻起用盖公发疏之五日而恙渐损无何大损以至平不佞贞窃覩公之有起色也大喜谓公可出视事矣天子必强留

公公愀然曰向者公不知吾病今乃不知吾心吾病非真损也俟归而后真损无何俞旨之信至公谓不佞贞吾生矣向者日高舂而起至下舂嗽粥不能尽一器今者日食可五器向者暮扰扰不成寝以至曙今者寝而甘吾生矣顾舍人趣治装客有语不佞贞者曰吴公殆非病公所谓知止知足老氏之训而疏广受父子奉之以保天年而风示后世者耶公闻之曰吾起孤生承乏至八坐不为卑食禄三十有四年又以岭南功月俸一品不为薄三丈夫子皆以吾功入胄学当拜京朝官不为单去悬车之期仅一岁不为少有代禄之田足以耕不为贫吾于止足之分非不知凡所以栖迟濡忍而不敢去者为上恩未报耳然吾实病病而不去将旷吾职将遂败军国大计败军国大计将转吾报而为负也吾是以去且吾以病请而归命于上者诚也上幸悉吾病赐之生而获休沐于故里者亦诚也吾于止足之分非不知知有诚而已吴公又言曰吾在岭南山海之寇蜂聚蚁杂铍矛毒鏃以抗王命吾仗上威力非不能穷獠而薙剪之然不欲伤天地之仁以快吾意为之荡其凶秽而安全其淑若当是时庙廊之顾方在南吾所规措朝上而夕报可故吾去岭而岭尚可以余三世之利今者谬称重于岭帅然迩所陈请欲以壮国基而销反侧之伏萌者未有讎也代吾者不知何公宁能偃然而已耶不佞贞曰吴公言诚者当诸公言止足者亦当公今强精神善匕筋有如天子知之而授公以心膂股肱之任玺书下闽中连江里公能称病不拜乎以止足之智则可吾故知公之不敢终离诚也书以叙公行

送崇明令浦南李侯特召入朝序

上既以大计考天下郡邑守令多所裁斥而居久之乃稍遴其卓异者司理邑令得六十余人下尚书尺一征之使备台垣法从之选三吴最号为循吏藪而屈指应征者仅得三人而崇明令南昌李侯其一也崇明故隶吴郡与一州六邑比肩而称岩重然其地越在海外畝瘠而赋薄民贫而俗犷其稍稍能自给者积困于长吏之腴渔中产而下计有弃而它徙耳侯一切徕之以子惠而馭之以正平不察渊鱼不事钩距其民之就苏也若稿壤之得天泽其就驯也若饥羸之归腴秣忽然而不自觉其相入且相安也属邑之旧城囿于海侯慨然欲移之长沙长沙差广平而去悍潮远去游击之营迩可以歷久而便援乃相度其地势财力请之台察监司官任其十之六而以四委侯侯为之节缩它费因民悦而先之不周岁而告成事于是台察诸公皆贤侯又廉得其它治状甚悉亟荐于朝前后凡十余上天子之所南顾而兴循吏之思铨地之所仰承德意而自附上臣之义者盖未尝一念而不在侯与二三君子也然则侯之所以特被征者非幸也侯亦思所以报上与铨地之知乎哉侯既以卓异征必且为台谏为台谏无所不当言于君德朝政士风吏治亦无所不可言然其所蒿目而剥肤者则莫切于三吴之民瘼今自丁亥大水鱼鳖之弃余为饿莩者十四不已而为疫鬼者又十三其存者今又付之旱魃矣计独侯所治不甚虞水旱而岁赋又不入漕纲又得侯以为之乳哺差足活自侯所治四履以外固

不能一二比也侯能无意及之乎闻井愁号怨讙之声九阍万里无由能达之其能达者独台谏耳台谏为吴人见以为桑梓私而不之信非吴人远而不之悉其能悉之而不以私疑者独侯与二三君子也侯能果无意乎世贞盖尝记侯之新城最能悉侯方休沐还里而吾州之韩大夫偕诸邑之长以与侯有寮窻之谊故令之叙其行要之世贞之所急者不在侯之得台谏而在三吴之民瘼也

嘉定熊侯考绩序

嘉定去吾州四十里而近其土风物产亦相类然壤宽而畝不甚治以往者之无岁徭赋日繁而贪残长吏屡鱼肉之其人逃徙接踵至墟落无人烟当是时嘉禾朱侯汝虞来为令首请于台上书易赋米而为银钱无转输之耗费吏胥不得乘而侵牟又为节缩它用以宽之诸逃徙渐复矣会朱侯以最得迁去而蜀熊侯子镇继之侯至未几而属大水邑虽名为高阜而洼凹相错如绣水至不得出而所谓花者又积败于风雨明年旱又明年大旱早至赤地千里熊侯所以抚摩而轸恤之者不啻赤子之在乳也其民亦依依不忍舍也曰吾父母孔迯即死不离徙也大司农较国课之赢缩以为殿最犹下书责宿逋公叹曰死亡之不暇而知宿逋乎请之司府至请之台语语泪俱谓令唯有解绶归而已属台司诸公之急民也甚于令为特许之缓故其民得先治其私而后及公以勉强朝夕属邑之故漕河淤其傍畝无所从桔槔禾益稿侯欲疏之而都水使者嚙啗其费侯咄咄无所出盖声未绝而畚鍤如云集矣不浹月而告成事嗟乎侯之民其两相爱也两相孚也如此乎殷矣余以去侯治近故益习之侯之始至也余闻其民曰安得如朱侯还定我家室乎既久之曰似复得一朱侯矣今者以奏绩迁过里其民来言曰朱侯殆不如也何以明其然也曰朱侯当贪残之后为德易侯当循吏之后为德难朱侯徠我于既徙也易侯苏我于垂死也难余额之寻余过郡与台集台使者蹙额曰一州守二邑令且皆满而又皆贤奈大司农以旧课难之何谓侯与吾州韩侯昆山吕侯也余笑曰旧额而难贤守令哉以不佞剂之则江南之守令艰于它方十百矣以今之守令艰于昔又十百矣以此居其繁而彼居其简也以今居其变而昔居其恒也然则今之满考当于昔可六载考也其当于它方可九载考也已而台果首许熊侯考而吾州韩侯以诸邑侯之指来请言诸邑侯皆侯同年又皆贤也余尝戏谓天之刍狗吴民极矣乃犹能容诸贤之恤之而不妬使去乎余间尝一过熊侯至邑门肃如也若无人登其堂寂如也若无事亦尝为具召我数簋而已若不知有重客者此其巨才清标宁独一惠政而已乎叙惠政志所急也

州大夫对廷韩公考绩序

人主以天下之命寄二千石以下最大为郡次为州又次乃邑州居郡邑之间于郡

有不隶于邑有临有不临官五品秩比二千石崇矣然而其入不过郎曹而所莅之奉不得通理以故人之视之狎于邑余尝佐大司马上书言请得昂其选必甲科而其课绩得以三载之最并入于郎署其课高第者或径得超为二千石铨部叅用余说以请而前是吾州之大夫韩公实以甲科高第来公始拜天子命咸谓太仓不易治也是赋烦而役重吏狡而民桀小不得意谤讟缘焉公曰毋畏也传不云乎心诚求之不中不遠公甫下车延见庠序诸生三老吏民问吏弊疾苦不数语而暂所以慰劳淳笃中紫出相顾加额曰公真神君也吾州自此完矣故吾州之责赋急而无序其上下出吏手胥昼夜下乡并奸黠之民匿其赋而以什一予胥又分其半以予吏辄匿之不听笞而所笞乃上赋者然胥下乡至数四奸黠之赋不在官而尽于吏胥手矣公为画一之式以来之胥不轻下笞不轻施其民咸大悦服而奸黠者亦乐其赋之不为吏胥有也第以天之不吊明年大水明年旱又明年大旱公履行墟落间悉得其状涕泣为台言请寬一切赋税凡三岁三上疏而再得请于大司农減三之一时各邑皆作糜以啖饿者公行之独得法而又躬自慰劳之吾州之孳差少两造具于庭此衷彼辟不待竟辄辨辟者扶至十而已不尽傅爰书也间得其情付三老听息以故狱鲜轻系曹鲜滞案肆鲜宿储羣吏洗手奉法四境之内藹然若赤子之奉严父慈母精神心意流通浹洽而无间间与缙绅先生还往必以礼其待博士弟子俱亶亶有恩岁时试之得其秀颖者与课经艺讨论政事咸充然若有得也公为政甫三载而诸台之荐剡积十余上至是乃始奏其绩台当复为之称最而以吏民旦夕之命强留之不成行铨部亦必为之按故事以请公之二尊人当封如官秩而阶有玺书之锡矣余尚以为此俱不足以报公即不能若黄颍川王胶东之增秩赐金独不可少留公而以郡绶佩之俾悉福吾一州七邑之赤子乎不然而用高第入清曹黼黻廊庙之上抗议礼乐之大此国家之利也非吾州有也属昆山令吕侯走使入金陵索余言以贺公而嘉定令熊侯已前满公前索余言贺之吕侯亦更前满矣二侯之与公皆迂固范晔所首纪也余尝谓人吾郡之守令名虽美于他州邑其艰苦十倍之固当以三载为六载今者比岁大水旱单赤藉以无流徙桴鼓不恒作所谓三载者不当六载论耶惜余方在遠地未能以此言进之主爵者而姑以赠公

赠渭阳吕侯考绩序

当万厯己丑之秋吾昆山吕侯与吾州韩大夫嘉定熊侯相继当考三载绩而吕侯最先熊侯之考则韩大夫为之请余言以赠韩大夫之考则吕侯又为之请余言以赠而吕侯顾阙焉计必属熊侯必以嘉定之贵而有文若大宗伯徐公輩乞其文以赠侯而邑之士民犹有不释然者谓侯之政在吾昆昆之士民被侯之泽为最深博而王先生亦吾邑人也其忍不以桑梓之故而惠一言于是太学许生椿龄椿芳缘士民意走金陵具以请噫微许生余故当有赠也侯以进士高第来治吾昆第其去书生仅五月余耳人故少

之且意其北人未必能悉东南事而羣以奸黠变幻之吏胥蠹睨猬集以盍侯侯从容待之不动声色而尽得其状抉其盗库之宿蠹而寘之理羣小胆为夺第于单赤之情状与閭阎之便苦无所隔阂于堂皇之上下一切皆发舒所接见士大夫必以礼报谒必以信若居间请托酌情而应之卒不以三尺狗也盖为侯之民与称士大夫者不忍欺而侯故若神君湛然自如也今东南之地初年大水明年旱又明年大旱其大水则鱼鳖其宫大旱则赤地千里侯之民非死而徙耳尚犹以依侯为念不忍舍而侯肫肫然为之请蠲于上贷赈于下即不敢谓其民之无死徙而生存于侯者不啻多也侯与民终始水旱者三阅岁而皆有以生存之然则侯之考三岁绩其不更艰且巨哉余尝与周中丞李直指言造物者之意始而与民以大水既而与之旱既又与之大旱若不欲使周余之民有子遗者尚能留此三贤为之守若令又有吴县吴江常熟与相错而治岂天地生物之仁不以肃杀俱尽耶二公■〈口展〉然而笑曰有是哉余姑据以复许子

弇州续稿卷三十一

●钦定四库全书

弇州续稿卷三十二

（明）王世贞 撰

○文部

△序

寿归德倅姜翁八十序

王世贞曰吾闻之元命苞孤矢南有一大星为老人星治平则见为保章氏说者曰星今见女牛分以故江左多寿考云自司马晋都江左而文士巨族往往跻显贵者然其人亦往往不敢望下寿大抵以为土轻水柔薄体而侈用之故及余束髮而事吾乡之老乃至有百岁者九十则时见八十七十则恒见而不以为异岂所谓保章氏之说果欤否耶然吾窃于八十七十有恒见而不恒见者则吾归德倅弋泉姜翁是也夫寿故不可绳準例也今夫乡之人蝇利罟欲动与宪触而获牖下者此非以德选也其为造化盗者也耳目不能别声辨色幸而置其身饱暖名不出閭左外而寿者此其为造化愚者也朝而虞夕舖秋而虞寒纒而恒不给而寿者此其为造化役者也鰥者独者瞽者聋者跛者天

阍者而寿此其为造化畸者也凡吾所恒见此耳即无论八十虽百岁又奚取焉而独姜翁自其为诸生试台使者稍以文学进即举德行者偕之恒相甲盖宗族称孝弟乡党称忠信以至荐应天歛国子谒吏部选生平无丝忽寄袞之累于人口国家重循吏则姜翁两为嵎衡山令一为归德倅所至吏民追思而讴谣之国家重明师则姜翁始司丽水训再司抚州训皆能以身为械朴国家重荐贤则姜翁之于晋于楚皆衡文柄而得士如王方伯道行者可指数国家重士节则姜翁为倅时方以政最闻而一旦致其事归两台为之移檄吾州以旌之姜翁归而杜门读书即州大夫自公上岁朔一再见外絕不以私请而门生故人时时屈干旄而伸委巷姜翁固如忘也今姜翁八十矣而神明之用不少衰健履却杖别声辨色甘匕箸便谈论有子为诸生其子复有孙称曾矣夫姜翁之寿也而以德选固也其寿也而又以福偕此其为造化私者也所谓不恒见者也夫世贞姜翁门人也自世贞为是言而诸为姜翁门人者咸欲得以为翁寿吾又闻之元命苞前所谓老人星者见则天子寿每于秋分至南郊以候之今天子之号曰万厯万厯者万寿永永无际也而其辰曰仲秋吾弟敬美以进贺行业从诸公卿大夫后效金鉴祝矣姜翁之悬弧则孟秋之十日也诗不云乎酌以大斗以祈黄耆不佞敢奉大斗而从诸门人之末而寿姜翁敬以二秋之分伺诸郊以窃窥我明君臣朝野之盛

寿侍御白岳何翁七十序

嘉靖之岁在重光单阍先大人获隼于应天而是时同举者何翁先大人之少长于翁一岁得通名籍称季昆而其后先大人由御史累官为其台长久之而何翁以六馆高第亦拜御史司南台糾察出按江防故事御史以嫌不得治其省人而独江防无害何翁之按江防盖绣衣而昼者乡人之艳羨之而当是时某兄弟罢其官戢然奉先讳不敢修世讲于严鼓交戟之内而翁所行部亦仅抵吴城而止第一时士民传说何翁秉宪修纪文武大小吏贤者若师保之有仿托而不肖者则疾讎影响之不暇何翁既用伉爽辨治体明章程当迁而有所不悅于用事者至斥外复以最屡擢长郎曹一旦谢其官归何翁之去御史垂二十年之久其适于恬澹寂寞之乡而壮不必耗小其用于泉石农圃樵渔之业而巧不必施其机日以杜而意日以寬齿日以宿而体日以壮人固若忘翁之老者而翁年已七十矣其里中戚程君某之昆季尝与某不佞还往谓辱翁通家子宜有文以寿不佞屈指翁甫去御史而人主于鼎铉有所置革一时言路大辟诸吏斤斤奉三尺中外洗心虑而聽治公不获及其时竟所吐与所措注于天下即天下亦不能尽公之用以为遗恨然而公之所欲吐与所欲措注者其贤士大夫俱以渐而代为之盖至于万厯而人主日益圣揆弼之臣日益喆举一世熏蒸于太和至顺所以滋翁于难老之地者何限而公之所以凝承之者又何限也在易干之九二仅在田之龙耳而天下文明渐之上九一渐陆之鸿耳而羽可用仪然则龙何必御霄而鸿何必丽空哉何翁盍亦思所以文明

羽仪斯世者不佞将益有所称述以佐觞岁岁是为序

寿观察宁斋季尊师七十序

世贞年十六而受易观察使宁斋公公是时甫三十有四游太学负重声而其为人恂恂长者即之和风拂而甘雨沐也至取予好恶则又巍然山立矣先司马心器之间谓世贞曰夫此公者宁独而经师哉居二载公举应天试世贞幸获从公后其明年公成进士出守滨州其又三年世贞复幸成进士为尚书刑部郎而公入为郎同舍久之分谏诸大辟至鬼薪白粲以下公得楚世贞得燕寻以竣事后先出为臬守世贞得青州以罢公得袁州遂为其省臬副叅知至今官天下称良二千石必首屈指公而偶以籍幸相贤意不欲株累无辜与使者指异见刺归公之归世贞获侍公杖屨者三岁所而复起治大名兵中间以艰归复侍公三岁而出出而叨抚襄郟以不任纳节今始获真侍公矣而公又年七十中间三十六年学而仕宦而归其实奉公以周旋者不能四之一而公之所以教益不佞者亦岂屑屑焉雕虫之末技而后谓之师其幸而侍公之杖屨则公之食息语动皆师也即不获侍公杖屨而公之风猷政术其所传闻亦师也公之初治滨惠利踰子产滨人至今诵之其治袁官事若家夷幸相于诸搢绅而弗能怨谏楚楚冤之获信者几百人臬江右江右之纲纪振然而未尝一闻公之有德色也使者之株累无辜将以苛办见才微公力持之江右几狷起矣使者以是迁公以是罢然而未尝一闻公之有恨色也公杜门日读书累数千万言而对客粥粥若无闻于公府绝不以居间进而造请报谢不废其既踰耆乡大夫人人推尊之而退然若辈行即长吏有所疑于政以叩公立决然而不使人知公之为重德长者固自天性其学力亦有以称之也公长于世贞十有八岁而齿编贝而颜渥丹五官之用俨若少壮而世贞髮且种种齿半堕矣夫松柏之凌霜与蒲柳之畏秋谁不知之然尝窃闻公生平与张夫人相莊无他媵至六十而悉谢絶一室萧然绝不喜饮酒晨起噉白饭少菹菜佐之牛肉不过数脔此其为啬精神谨茹纳葆真养荣以尽天人之分当如何也世贞虽视公无所不师而躁志悍气未能尽融释以步趋公之后然所得于公者亦不少矣于是八月之廿又七日为公悬弧旦而学之博士弟子俨然而见造曰唯吾子之尝受易于公也昔孟长卿受田王孙易而别用阴阳灾变书后举孝廉为丞相掾上以其改师法既不用丁恭之弟子锺兴者授上经且侯而固让曰臣师少府恭也请得侯恭而后及臣古人之重师报师若此今子名能不倍师说即不至作孟长卿而亦一尝用事不能有所推荐以附于锺兴之义公七十独无一言以为公重乎世贞敬谢曰此吾心也夫公宁藉不佞一言重不佞一言亦乌能重公姑志其所得于公者耳遂次以授之而大斗继焉

又

仰松公治吾州之明年惠鲜黔黎细大咸若间谓州纲纪曰得无替于老老之政耶乃以秋七月为别驾姜翁八袞寿诸礼文咸秩居无何而以今八月为观察使宁斋季翁七袞寿间者过世贞而属之曰季翁齿差少于姜翁顾其名位德业穹然茂隆也即筐篚之实不足以为翁礼日升川盈之颂不足以为翁祝以吾子之习翁也而又娴于辞敢祈子之一言而重乎世贞既谢不敏则谓仰松公今一时能重季翁者莫公若其能受公重者莫季翁若而能窃知季翁者则莫世贞若天下类以季翁昔之用喜而后之不用惜不知夫用之不为用而不用之为用也季翁起甲第两典州郡一糸省则号良二千石为比部郎则号平亭无害为按察使副则号强执法孰不以用为季翁喜而不知当重足胁息之世斤斤守其职名能贤于瘵旷者耳而于经邦之大畧司直之峻猷则时有所抑郁而不得吐及其持平议用轻典一旦忤忤臣指中单辞罢归俱见以为不竟用而公之至自江西也十五年于今矣不为阖门养重而靡私门不为絶迹公府而鲜僻迹从口之所发而皆味言衡身之所应而皆矩行其忠信笃厚之至使儂薄者思然而消其素耿介明哲之识使贤者有所依以树立而不肖者有所辟而自远盖邻吾州而邑者亡虑数十百万家其搢绅士大夫既雅慕好季翁之为人而市魁里胥以至田畯野父亦能举翁姓名以相赞述其于轨物范俗所裨益非浅渺也周之时老老之礼为之酒正共酒稿人共食罗氏共鸠外饗共割烹乐师共歌舞之事自天子之都降而郡国其尊于学者皆然夫岂唯欲尽其安之之分亦以轨物范俗大有攸赖耳是故非孔彰之嘉言无斲之令仪不与也其法至汉而小变然人主尚修袒割问道之敬于三老五更而郡国守相仿其意而行之陈仲弓以一太丘长老颍川而干旌溢巷羔鴈成羣郑康成以一布衣不应大司农召而孔北海为之表其乡曰郑公胡至于今独寥寥也然则季翁其真有当于古之老耶仰松公其犹行古之道耶在易渐之上九曰鸿渐于陆其羽可用为仪吉季翁以之毛诗云黄耇鲐背以冯以翼仰松公盖深于兹语者矣遂次之为季翁寿

金吾王君六十序

余中表兄陆汝陈氏好游大人以自益其于故太史曹先生交往尤数太史金坛人也乃汝陈则时时为余言金坛之土风方物其邑居贤士大夫甚详而于金吾王君所推许尤至谓君虽起赘郎颇能读书识道理不轻为然诺于治家画筭心开明顾好为长者不倍德其兄弟齿相及所以推事之礼极笃业析箸矣而以财通无间抚其姊复抚其子与己之子等汝陈称王君不容口然谓君用赘高其乡人忌之屡起大狱相窘当其近三十时滨殆矣而君夷然自如亡何事竟白繇太学为吏部选人以有今官迨纳禄里居又三十年矣而狱中之又滨殆矣而君复夷然自如亡何事复白当其滨殆时贤者以为风之薄而忧其不遂振其复白时贤者以为天之定而喜其不遂萎盖至六十而君冠裳俨

如室宇田畝益辟兰玉充于庭图书列于度虽其忌者亦无所容侧目而为之忧喜者相率而成诗歌既颂而后祝之汝陈乃称王君甚欲得余一言以为重而未之敢也夫余以汝陈识王君而又善太史先生又与君之弟鸿胪公为同年其何能辞窃怪夫王君甫六十而遘阨者再其所遘而不足者皆人之变而其所享而称福者仅亦人之常耳何足以为王君寿独不闻夫无懷葛天之民乎盖毕其身无讥谗挨枕之事与所谓困心衡虑者降至于姚姒之代而犹云帝力何有于我此其人即百年宁知所谓寿与寿之乐及其世革而征诛人易而札疴而后羨夫寿者与寿者之私自幸也又不见夫终南太乙之遁者乎木实草衣豕游蠖蝥耳目塞而无所交形容若槁木此其人即百年亦宁知所谓寿与寿而富之乐及其之乎通邑大都之中苦与甘之相禅枯与华之对形而后羨夫寿而富者与寿而富者之私自幸也假令王君遘不阨则所享者为无味阨不再则所以保享者尚未精君今精于保矣自此而百年其味于太古幽谷者深矣汝陈试以语之有不霍然而悟者几希

王母陆太孺人七袞序

太孺人之事吾伯父藩幕公也盖有龚夫人云龚夫人奇严其御诸媵若束湿而太孺人独以卑详隐约当之龚夫人独不能以其严加太孺人太孺人不以无严故怠龚夫人礼后虽稍就他舍自便其岁时伏腊起居甚恭已而甚相劳爱也太孺人有一子曰世望为吾弟自夫人与藩幕公后先捐馆舍而太孺人始称母自世望补州庠晋保御氏之佐以行谊文雅重诸搢绅间而太孺人始有闻于吾宗今年太孺人寿七十其九月十三日为设悦之旦而诸称世望中外亲及游好者数百人皆具牛酒上寿世望一无所纳顾独谓诸君怜而寿我母宁无一言之祝以为闺闼重乎时世贞解郟阳节迂留省便道归里最其所欲得言者乃偃而前贺顾谓世望曰子能以升斗之禄养太孺人乎谢曰不能也则又曰子能率孙子前拥太孺人膝为欢乎益踧踖谢曰不能也夫此二端者人之所易也而子难之然子不为官而能以■〈执上目下〉御之服共侍不为禄而能以甘旨滫瀡脆美之味共奉又所谓具牛酒数百人者多贵游豪贤之士世不能其一嘖笑而悉萃于子之堂夫此数端者人之所难也而子易之则太孺人之养于子也志也子之所为寿于太孺人也亦志也子诚以志而寿太孺人则愿子毋勤于名而务于实施不责报志不取快蔽不新成使其居若畏垒之里而葆其真若婴儿之至和以昌滋其后太孺人方斋心佛庐以希无生之妙暇则含饴弄孙举家庭而纳之逍遥熙怡之境不亦快哉吾不知所以寿太孺人者知寿子而已夫寿子乃所以寿太孺人也世望拜且谢曰敬佩兄之规以复吾母

寿许母张太孺人六十序

余故从里中一识许公旦而尝承乏浙省东受台约过萧山而公旦适为令所至台馆饬田野治诸吏民讴歌萧山令贤以为便爽果断一切办治不下王洛阳涣而恒依于长者则有古鲁中牟恭风公旦顾秀玉立进退谈说详雅诸监司大夫靡不目属之见以为公辅器而一旦用邮传故与悍客抗客故无頼子中公旦以飞语罢官人或为令不平者曰令雅负循吏声旦夕有台琐之拜而今胡遽罢也且用事者奈何锢士于少年公旦谢不敏曰有之吾覩夫噉嚙者自少年而白首未有遇也今吾幸遇而脱章缝制百里之命即不能齷齪忍噫于喉咽间而彼尚不能以墨污我我又何恨遂单车去邑归当是时公旦之父子行君先逝独母张太孺人在而公旦自念令无它恨第何以解于太孺人太孺人迎而谓公旦吾去令母归而为诸生母亦何损也吾闻夫令最善状征而为台琐如若所期者万一皂囊入西掖门三日不下即我何以进匕箸令鼻息自如异日若奉圣主威德有四方之事诗所谓胡转予于恤有母之尸饗我又奚赖焉今若归而长有我也我又得以长有若也盖母子相煦沫于五畝之宫熟水菽而进之其乐熙怡如也去公旦之辞令今又六年而太孺人六十矣诸与公旦友者某某辈若干人来乞余言以为寿余窃观夫昔之人有庐江之檄捧之而色喜者孝子哉君子以为犹养外也绵上之歌有依子而隐耕者贤母哉君子以为犹怨也今公但能养太孺人志太孺人能养于志无几微不平见于色而圣天子方恭已而成太和大顺之化即贤人君子于朝野奚择焉公旦敛未竟之才以共奉太夫人优未报之泽以贻子孙所为寿者固未涯也亦何俟余言而重聊次以授之

孙母缪太孺人寿序

孙君之去自吴兴也当得调它郡而以缪太孺人老不忍违膝下云盖侍养之四阅岁而太孺人八十矣诸寿太孺人者若而人诸所以寿太孺人者若而物而孙君未有以快也顾谓其友陆伯子安得王先生之一言为母重乎而是时余方开郟制阨道阻莫能致其又明年余罢南廷尉还里伯子始以孙君之意来肃请孙君所以迫得余言者谓余能悉孙君悉孙君而后能悉太孺人也余虽椎不文所以不复辞者亦自负为能悉孙君悉孙君而太孺人安于余言也余之守浙西部也所专治则吴兴而孙君为其郡司理凡余所讞狱欲稍轻奠者以属孙君靡不如意即余所欲重而情少不蔽者或情浅而阻它吏案者咸委曲调剂以导余于平而孙君复用干济数领它邑事君未至迎君惟恐后既得代挽君惟恐失之两署则争愿得以为主余素识君以文高重于乡其齿笔月旦人人传说之而不能无逊其锋颖今为吏而廉能固当胡以能长者乃尔得非用太孺人之诲以加损匕箸为惩劝也即夫汉之号贤明母母若隼氏严氏其二子俱以刻精持法称而二母俱以宽诲之不疑奉而终显延年拂而见法后世谓幸而隼母之言行不幸而严母

之言验太孺人以默成孙君德孙君以默体太孺人志夫岂特贤于严其隃胜隹母子固倍蓰也抑吾闻夫太孺人之称未亡人也盖二十五云太孺人矢志白日以勤苦振家政抚孙君成立于明格当旌而竟莫之举也岂有司者不能修故事耶抑太孺人过自抑不欲以逝者成生名也耶夫太孺人之未获旌与孙君之不徙官固与于司世道之责然为母者节而恬于晦为子者孝而恬于退其所托同也夫以介山之母子虽号称相携以隐然不能无露怼其视太孺人虞山之里充然太和者当何如哉予故不辞伯子之请而叙赠之

寿王母皇甫太孺人六十序

岁万厯之丁丑而皇甫孺人者六十矣孺人归王氏而称妇者四十载而遥称母而家事治者二十载而遥有丈夫子二俱为时闻人盖孺人于法得称太云而少子无逸游州庠谋于友陆楚生介而谒王氏之老世贞曰愿得长者之一言以为亲寿惟不佞亦闻之语云近朱者赤近墨者黑夫近朱而之赤之易也则知夫近墨而不染于黑者之不易也当孺人生郡都会诸父登甲第者四人诸姑姊艳而争为容以脂泽倩冶相高奇服丽笄相侈胜而孺人独恂恂其间质素自检及其归于王氏而王氏尤号称鼎盛夫以孺人之贵司直公为之父而兖州公为之舅而太学君为之夫承云之第薨鳞次于白荡中过者目掇口噤而不敢訾其势甚足以豪而孺人之恂恂犹故也盖不欲以父之贵闻于舅又不欲以舅之贵闻于乡而会太学君属疾疾且久多躁怒孺人婉曲调解之使太学君忘为疾也者家之臧若获忘其为太学君疾也者及孺人之为政而后可知也严篱落易畴畝蚤作夜起劳勤扶惰程入为出盖二十年而孺人嗃嗃之声不闻外然业已饶积矣为二子之诸妇舅弟指以数百计顾其为长者不侵牟闾左哀然二子耳纵不得一命以为孺人荣乃其就者家而家儒而儒于乡人有进媿而无退讟夫孰非用孺人之教耶而所以荣孺人者亦何限耶吾故举而叙之以风夫王氏之为妇为母者若乃颂寿祈福以从华封人之后则诸贤事也非为王氏老者事也

寿清卿雨亭陈公六十序

当雨亭公之六十也而邑诸生欲得一言以为寿乃其从弟某先焉盖某之父重庆公虽视公为诸父而以道义相规切文业相倡酬若师友唯不佞得后先其间窃托为知公何敢辞公为诸生有声东南既成进士令永丰与王文成公之徒善相与讲明良知之学甚皙而其所居官深得夫绥和匡翼之妙不专治刀笔以故名声卓然有密中牟风迨其用高第征拜垣慷慨论天下事即以多讳之朝不可犯之大臣而公侃侃自若所论建亦有俞而有拂其拂至于廷杖罢官而不为动公之初入谏垣也握白笔操皂囊而矢曰

身吾君有也非吾有也及罢而喜可知也曰身乃今而始吾亲有也亦吾有也入而短一褐精菽水之养出而短一褐放浪山水间融融如也隆庆之初天子下诏收召直言公自徒步还故官以至左右谏修所谓白笔皂囊者而矢曰身复吾君有也非吾有也然公所操持益切中兴之治取裨于公者良多而已不胜其直容台之副虽名为超拜而阴杜公之口柄臣之修郤者得以考功法而拟公后且坐谪矣公前已请休沐归里则又修其旧所短褐而喜曰身乃今而复吾亲有也亦复吾有也入而精菽水之养出而放浪山水间而又融融如也寻所谓修郤者既已败而天下之搢绅大夫士日望公之出而公则渐倦于人间事毋论公六十而封翁亦已八十有四矣即天下以不尽究公用为公惜然吾闻之世之获致其伦分于君臣父子之际者抑何艰鲜也公出则以其身为君有而称忠入则以其身为亲有而称孝凡世之所以推公抑公而成公之进退者其用意虽人人殊要之皆以伦分致公者也公可以寿矣程叔子云凡人老而不及亲者其诞日不当为酒食宴乐之事善哉叔子之规乎然执是以衡天下则鲜有能当其寿者而独于公见之虞山之阳尚湖之滨有考钟鼓兼彩绣千金寿而万年酬者去公而宁有二耶某其为我浮公大白而语之曰公身真而有矣公之子某且代公为君有矣

光禄丞吴惟登先生六袞序

称余友于海内者二人为故观察使李于鳞今司马汪伯玉而吴先生惟登皆与之善二君子皆并介少可然雅称吴先生后先为文赠之而伯玉至引其仲子继福入丰干社以先生有九丈夫子而皆文彩其贵为天子从臣者二人太学生者三人名其堂曰九苞而先生之堂在休宁南山中有台曰清啸亭曰倚云宇曰观莲斋曰露葵又有鹤林鹿柴醉乡芝巘之属暇则游息吟哦其间甚适也先生业已六十念与二君子善于天下士几尽而不得余一言为恨其叔子继茂又与欧博士祯伯陆茂才无从辈相砥切为诗号广陵社无从谓余之善之也贄文以寿先生余窃睹传志所称阆风员峤列仙之属在云气间以为必无其人即有之意其游于至恬委和之乡而入于无思无为之境依希乎长在而不灭者迹之终不可得也乃不出人间世而有先生先生世为徽鼎族通经补博士弟子稍困于试去而游京师以笔札事世庙拜官禁近迁令大官会当尚食不乐曰吾安能效孔侍中荣一唾壶耶去而归所谓南山者先生既内足于财九丈夫子争竭力而门户之是捍诸妇修其滃滃浆酒之役以故不问家而家治其精神游于恬和之乡而思为入于无有之境吾不知阆风员峤作何状庶几于先生得之哉且夫余所闻之化国之日舒以长今天子仁圣垂拱而受成喆辅四夷向风兵革不用即遐陬穷谷疇叟匹妇咸自乐乎有生之味而拟其日之舒而倍长者而况于先生之日何日也徽地四塞其间名岳大溪良禾美箭无所不包馆即不以通一鹿车路而徒周望其云气之怪幻而谓之阆风员峤无所不可藉令不以狎见先生而骤即之曙其貌讽其诗警其所居处共养与子姓

之盛媿而谓之列仙之人亦何所不可闻伯玉已为文寿先生其于文最高而于先生最习无从试以吾言质之何如

赠大叅张徽庵公寿七十三进阶通议大夫序

徽庵公之始致云南大叅事归盖阶大中大夫云居久之而上推二宫徽号恩得通议大夫而是时公之子藻积战功至大帅奉玺书总吾大江以南兵事其麾下诸楼船材官将军管懋光等来谒不佞祈一言之寿不佞谓管将军吾甚贤总帅君而信将军言微而请吾固欲寿张公昔者先王之世兵民之用不分其卿大夫虽不无世胄然往往以德代承而其委赉而奉王室者大则共坐论作行之职出则宣其猷力以经营四方故其诗曰方叔元老克壮其猷又曰文武吉甫万邦为宪所谓腹心千城者盖一之也随陆无武绛灌无文则其势不得不渐岐至于明而益遂泾渭矣彼夫魏黔成英之积阉其纨袴无论它未有名将之子一时公交车著名簪笔者然而亦未闻三事九列之后裔收勋于带砺者也此曷故夫亦以介胄汗马之余徂其快而鹵莽笔札文士沾沾自喜者利用弱而不屑言兵事也乃张公家阀当拜万户秩三品舍而去之而事诗书四十犹不第然不少挫以成公交车名其为户部郎则职云中上谷晋阳诸饷当天下最危剧为二千石则踞岭右十郡之要害以日与台使监司论质为旬宣则在西南万里外收夜郎滇僊之众衽席而乳哺之然所至辄成其循能吏名不为苟效一旦以筋力不任请天子高其谊纵之归及归而理家秉修伏膺祀造请酬应不废而又贾其劲为文酒泉石之适于筋力抑又何任也识者谓公始欲以其余之不尽者授总帅君吾闻之总帅君之当来江南也干旄在门剑履在楹泛酒崇肴跪而请受教公若曰而来前夫秦晋之大夫其贤而得老者毋如蹇叔范武子其有子为良将帅亦莫如蹇叔之子与武子之子燮蹇叔之子与穀师叔哭而送之曰余收尔骨焉然其策败在劳师竭远而已所谓刚而无礼为败本者叔何以不预训之不尔何不使早避之武子之将老也引如怒遄沮之诗以戒燮俾从容二三子唯敬无何而有鞏之胜师旋燮也后入武子曰毋为吾望尔也乎对曰师有功国人喜以逆之先入必属耳目焉是代帅受名也故不敢武子曰吾知免矣夫以武子之光辅五君为盟主其得老而授燮将必有制国衡世之术而大较不过逡巡不自伐以居功名而已吾老矣吾不敢望范武子窃望而之为燮也总帅君拜受教以别盖不佞窃从诸将军得君廉仁谋断它善状不可指数然其大指在樽节退让与燮之不自伐者一端而能安于讳武修虢之际则体公教为深公亦可以安于老矣管将军复前曰不谷固知公之欲寿张公也夫以范武子之德后百年而赵孟屈建交颂之若新奈何当公世而失之于是公年七十三矣余乃言曰夫七十者恒福耳不足为公寿即通议之拜一阶半级不足为公寿即更进之而总帅君开制府肘通侯印不足为公寿抑范武子者得老之大夫也而号为武燮良将帅也而号为文其父子之文武交相用也交相成也交相显也公家庶几近

之将世世毋替焉以是寿可乎哉管将军曰善请识以往

弇州续稿卷三十二

●钦定四库全书

弇州续稿卷三十三

（明）王世贞 撰

○文部

△序

寿大司成稚川王先生七十序

世贞束髮而为进士业而稚川先生实造之自是得通门人籍数以燕见谈说道术经济次乃泛滥子史百家以逮雕虫之技毋所不辨曙先生故产江右然长七尺余貌伟丽甚口而是时二相君皆江右人俱器先生争欲得之以重而先生中立无所偏向时时持正论进当其相为轧而独亡疑于先生及其后有所负胜先生独又自如业以先生且大用矣而恒逡巡引避去其同舍诸公既用文事显贵栢梁骤取卿相先生回翔散署间泊如也不佞之友杨仲芳坐论糾相君当见法念非先生无能救者而难发言先生慨然曰吾不识仲芳何状即不讳为朝廷累累且及相君走而见相君之子争之不应即入直所见相君益争之力相君为色动而会中它飞语不果先生虽秘弗泄然其语已稍稍闻荐绅中咸为先生危之而相君有所移患于不佞乃稍宽先生先生用资望崇积乃以太常领南成均事最后相君罢言者乃谓先生有所不利于仲芳而苛擿之使去位矣即回搏饭参杀人尚得以名与迹而拟之乃谓先生不利仲芳哉不佞世贞既雪其家冤强起就吏而言者追论之以救仲芳为猖狂议夫以狂议责不佞即先生者不佞所与闻仲芳事者也不当以先生不利仲芳以先生不利仲芳为不可即不当责不佞以狂议也夫言官者公是非之衡準也而若此者何也业以先生过抗直俯视一世且时时引古谊责其人以緘默而欲甘心焉即可奚至并其事而顛倒之先生虽畧置辨一二已即掩关读书著述明古圣贤之道絶口不复及往事而中外持衡大臣及海内之士大夫其名能器先生者谓先生慷慨负经世才可以当折冲握算之寄而实不能尽其黯習鲜识者或尚以为不利仲芳人毁誉时相半而先生愈益嘿嘿不为辨即台使监司有尉荐者一切力辞

之盖先生之用竟不显而今年七十矣道益明行益修所著述益富虽不能无宣髮而貌渥丹母异少壮先生既掩关不时出出则道路拥观以非仙则神而诸儒生挟册而问道者先生从容诲示之无不虚往而实归至里俗之所慕向一惟先生而先生亦恬然大和之境而忘世之不我用也吾闻之葛勾漏云周孔之道本与偃佺安期同体而异用周孔以道济天下故捐其身偃佺安期以道济身故捐天下捐身者其用大捐天下者其用久先生乃不复夢周孔哉其于偃佺安期之所谓久将庶几也勾漏字稚川与先生别号同不佞故敢以其说进若所云仲芳事晓晓焉以先生之不平鸣先生如弗闻也已

寿秦母殷太夫人八十序

当万厯之戊寅正月而方伯秦君子成以母殷太夫人之寿言请也前是甲戌之正月而秦君已六十不佞业赠之言以近拟公之从祖端敏公谓君入而奉太夫人万年之觴出而宴贺客以端敏公其年固夙夜在公矣力不任而始得请以归归而有遗忧于国人间之乐外集而中为之闷君于端敏何让哉则又远而拟之白文公以文公少而赋新井之诗及分洛之日仅聚其妇与其孤甥侄居君今上奉太夫人下抚诸弟其为子者非子而犹子者不待征于族而指以百数矣即毋论端敏公于白公何让哉秦君不以余言非当而觴之今又四岁而太夫人始称八袞矣问其貌则辅犹有丹色鬢鬢不尽白也问其起居则夜犹篝灯执一卷视细也问其服则瑱■〈王帝〉禪纚之饰也问秦君所戏彩则刺鹤而文犀大僚之极也问所戏状则加握丹而鬢犹之乎婴儿也问太夫人之少子与孙则若琅玕列而芝兰芬也其孙曾之稚者差已壮而襁者岁有益也则胡可以毋觴也夫太夫人之先自布政公至教谕公世世称贵族及其归于秦秦以端敏公故贵也事通叅公以子推封至大僚太夫人品亦如之又贵也晚而方伯君位通显太夫人则益贵也然不以一毫贵色加于人盖十七而归秦朝夕奉膳舅都事公夔夔斋栗矣都事公有寡妹以节称收而养之俾太夫人妇焉太夫人不以非妇故杀妇礼度其未易当意也则委曲而求以意当之五十年一日矣通叅公内刚而外方凡所赖于太夫人剂者非一或束湿以御下则务为持平其间或怒市而色室则务为寬大其指虽以方伯君与其二舅弟之德业未尝不肃于通叅公之范而成于太夫人之和也夫太夫人之所享于方伯君者方伯君为之太夫人之所以享于方伯君者固太夫人自为之则又胡可以毋觴也乃方伯君中怍然以不长有禄养少歉夫太夫人之养于禄者二十年方伯君歷中外称名卿大夫者十一政而始就家食躬致其素封之资以备无方之养不可谓之非禄也且不闻之所谓禄者隗母之匕箸而潘母之板輿乎哉彼其朝楚而暮齐跋履修阻虽差胜于靡盬之不遑而大者忧叵测小者虞官讥即一飮有余愴焉安用禄也孰与夫太夫人之饮于堂而恬于寢耶夫禄者不必志志者不必非禄以此寿太夫人又胡可以毋觴也方伯君曰善敬因王生言以觴太夫人

潘次公吴媪偕寿九十序

潘次公者歙人也而贤有妇吴媪亦贤次公生六岁而失母所以事后母共谨其母怜而子之已胜冠则从其诸父贾游蜀诸父少之第令受书计居数岁亡所益会其父亦至蜀次公乃前阴说曰蜀地陋薄不足以骋且夫数蚁而趣一腥所获几何请得分橐装为远游其父壮次公之为人乃予半橐恣所往次公于是纵游吴越荆楚间俯拾仰取它贯贷不急责息而以时收其赢所摹画辄效费用益饶间一归省其父会父病而兄伯有公交车辟次公乃谢贾精身医药间出应门户斩斩矣而吴媪勤一切佐治生又能明出纳飨祀浆酒■〈施，酉代方〉毳之事次公有二子壮察其能任游乃叹曰妇孺者吾役也而奈何以吾见役且形神吾自有之终不能为妇孺夺顾谓二子趣装往乃公休矣次公乃徐邀行宗姻间察其甚困者俾轻重受恤归而计入更日有所增置业稍稍倾邑矣徽俗既贵相高而又贤次公且老之郡乡饮推择宾位次公曰不肖乃以齿抗太守庭乎能亡愧诸父老哉益坚辞不行有司为归其俎于是潘翁年九十矣而吴媪以前一岁亦九十诸里于潘者艳其事争布币酌斗男子祝于庭妇子祝于室而其名好文者族若桓姻若洪凤至征言于不佞以为之颂不佞窃闻其说大都有三其一谓次公虽匿迹贾然有士行与吴媪俱好行德而天报之其二谓馱中人鲜僻好衰嗜陶朱公用老氏之术以忍垢嗇予甘澹服约卒之听子孙之息巨万而身亦仙去次公庶几近之其三稍推本其自以为吴媪生孝庙当御极而次公后之则建元圣德之所沛发为太和之会以笃次公夫妇而不佞衷之则谓次公之夫妇善而寿也其寿而善也盖两相值而不必两相期也忍垢嗇予甘澹服约可寿也不可必也生而孝庙也老而隆万也则亦幸矣然而非以为笃也吾不能悉次公第次公夫妇九十矣天子方孝养两宫数诏有司修仁政行且赐高年冠服及粟帛胶肉则潘氏之一门而两不亦盛哉二生持此以颂可也

又

自不佞与伯玉后先解省台而东南乞言之士不走吴则走馱中以相重潘翁之年暨其妇吴媪偕九十诚异矣有伯玉之一言足以将牢醴侈庐壁而为之戚属者又欲荐不佞言以俚伯玉毋乃非当乎而况又欲荐不佞之嗣言以自俚乎哉夫食肉不食马肝未为不知味而必使其属厌之且也潘翁之行与其夫妇所为寿几尽于伯玉而余之言亦倦尽矣夫安能呶呶娓娓以调辞继也然而诸君子之所以不能已于潘翁而又不容已于不佞言者则尝窃闻之盖夫子之称大德曰必得其寿矣然必先之以得名岂所谓寿者所以永其身而名者所以永其寿也耶寿之所以为永有限而名之所为永无穷诸君子毋亦欲永潘翁夫妇之寿乎而不惮亟亟焉蕲责名于余言而余嚅不敢许也箕子

洪范之五福盖首寿而攸好德媿之而名不与焉有名者不必有德德不立而名且泯矣然则德者又所以永其名者也人富而仁义附焉以世之所称潘翁夫妇好行其德即不能出里闾外要之老氏之所谓三寶曰慈曰俭曰不敢为天下先者以称翁家内外史亦庶几矣然则德安所藉名而名安所藉言哉无已则有一言以效余勉如潘翁之夫妇既以心画趣时其雍容之得愈于織嗇过当既成而身享其饶当生半矣行且聽子孙而息之抑孟献子有云畜马乘不察于鸡豚公仪休之母以子贵而能拔园葵去织妇其所为德虽小要之皆善居富者也卫武公九十五而与其卿大夫士相交傲于国翁与吴姥九十而交相傲于家可乎其最戚者子之壻曰吴整序而授之俾母但以名相重焉

李母张太夫人寿序

太守渔阳李公之莅吾吴也甫一载所而郡事大治属城之大夫相与奉公之德教而布之而独吾州张大夫为之长李公盖有母张太夫人云大夫一日布币而过余请曰某之辱从李公荐剡也又辱游公于郎署间则太夫人诸母矣今者之辱事也则太夫人大母行矣惟是太夫人且七十而以春孟为设帨之辰诸属邑之大夫毋敢以觞豆筐篚请也即某不敢以觞豆筐篚请而尝辱从公之荐又辱从公游郎署间宁无一日之私而执事者忍愬然而靡一言以徼宠于公乎余谢不敏则谓古之为人臣者业以倍亲而致其身于君然幸而值夫伦常之合则出而称人臣入而称人子而靡有憾春秋之世大夫苦于行役而阙共养之职感叹而形之诗曰王事靡盬不遑将母夫非独其子然也至于夙夜无寐尚慎旃哉而母之思殆甚于子矣又其甚也以诸侯之贵而母弗获偕河广之可杭托寄一何迫切也今以李公之贤当昌明宏熙之运甫什褐而太夫人已膺命服矣及其出为二千石而奉板輿以行诸孙之若兰玉者八以左右之吴又为天下首郡其山川之明秀风物之隽媿有非它郡国所敢望者公出而授政于堂皇以既臣职入而拥笏垂鱼奉百岁之觞以信子道其乐为何如哉吾闻之古之名良二千石而毋得亦名为良者毋如隽不疑与公家景让隽君之献狱劳其母之潜听而视其当否以损益匕箸景让之杖虞侯人心汹汹劳其母之扶责而后定夫母之得着其良则子所以为良者未尽也今合郡之士民讴谣载道以归李公良而若不知有太夫人者母亦太夫人之义方不在今而公所以承志不在迹也耶如冈如陵世以为善颂祝其大指因欲其上之久有吾民然实欲吾民之久有其上以为衽席地耳今为吾郡民计衽席以久而祝李公孰若以久而祝太夫人俾安我公于治哉大夫曰善乃次其言授简以上李公

寿封武部大夫新安陈公七十序

当陈君晋卿之以经术名诸生中而余未之识也既余起废天雄而晋卿为开守接

之而其温恭闾易使人爽然而自入已稍与之谈则又无所不解已又伺其为守状则又便督郡政其吏民畏而爱之若春雨膏而秋霜实也窃谓晋卿甫离诸生而老于天下事乃尔意者其有得于家学耶既归而后接其尊人新安公者其状若眇少乃周还晋卿也其颜差老乃秀眉绿晋卿也其语差恟怙乃便便中款晋卿也夫然后而知晋卿之贤之所自也而余寻待罪郟镇会晋卿以视学政按部过台所相与纵谈尘外事久之乃及姑布子卿术而谓乡前辈有郁老者尝善之晋卿作而言曰固也夫郁老之为相也是尝过其故人饭而值吾某之父在而郁老惊起谓曰吾闾里中人多矣亡踰公者是且为郎而卿大夫父谢曰业明经不售而久弃之何调我为某趋庭而过之是时犹未胜冠也郁老睨而谓吾父曰夫已氏者而何人得非若子乎曰然郁老乃起贺曰勿疑矣夫然后而知公之贵之所自也余笑谓晋卿始者不佞窃知吾子贤知其自新安公贤也夫郁老之知新安公贵知其自吾子贵也郁老得其外而余得其内然所以为相成者一也盖又三岁所而余还里则新安公之拜大夫爵者且六载而寿亦且七十矣诸与公善而贤之者若而人诸以晋卿贵而公贵者若而人其布币奉爵衿绅溢于堂车马骖从溢于里而余宗人比部君辈乃谓余之习之也请得一言以为寿即余言又何所加于相成者哉今夫木之宁然而乔者桥也其隤然而俯者梓也盖相待者也水发于昆仑之址滥觞耳汇而为大河润九州岛而膏万有乃稍稍有称河源者夫匪河何以称源也虽然匪源何以称河也此所谓两相成者也夫郁老之始以公贵而知其子予始以公之贤而知公自今而后愿以晋卿贵而益成公之贤俾公毋虞于室家而日为德于闾左右讴谣而颂祝者相继亦愿以公寿而益成晋卿之贵俾晋卿毋虞于温定而专精神一思虑以棫朴多士楨干王国则予言亦岂后郁老而验哉比部君曰善遂举以为公寿

奉赠詹事府詹事兼翰林院侍读学士王公暨元配吴淑人荣封序

万历之六年五月天子尊上两宫徽号下制京朝官得推荣所自而太子詹事兼翰林院侍读学士王公元驭之父爱荆公前以元驭封右春坊右谕德矣至是复进封如元驭官而厥配吴宜人亦进为淑人织文之诰颁自尚方天语谆谆所以褒嘉公者非一于是乡之搢绅衿裾相率而艳公之遇以示余余不佞第少尝习掌故家言以青宫之辅师保宾客皆为名美而已其元僚则无如詹事而学士最号为清切罄咳与帝聪通自孝武以前即入秘监握史笔三十年而不得一官毋论其能兼之也即兼之者其视卿佐不百人一二也即百有一二兼之者齿故当非壮亲亦益老而其官又以迫卿相故非日辄迁去未有能■〈施，贝代方〉封及其亲者也即以其官官其父足矣未有能生贵其母视父者也其更兼之者自明兴而尚未有一也今爱荆公当其子为谕德时谕德亦往往不待最而迁未有及亲者而天子初上两宫徽号乃首以及公公亦称谕德矣是时公与吴宜人未六十也既甫踰六十而复以再上徽号公遂称詹事而吴宜人称淑人矣凡天

子之所隆崇于两宫者再而公夫妇亦再得之然元馭犹以不获亲致觴称贺侈大天子之宠灵为歉上书乞归省天子以亲信臣离左右难之温旨不许既迁为少宗伯复乞归省复不许而会公之仲子家馭自客部乞南得司封大夫以便道归诸织文之诰孔翠金花之服章与吴淑人之所谓冠帔珈■〈王帝〉者咸选而奉之毋论公所受官即公所隆享以程古人亦百不能一也公时语客吾儿成进士甫十六年而父子内外俱被金紫九重之贲下施于九京未有所以报称之而辄上章露其私非计且吾质明而起冠栉读书理人事斗米秤肉不为废嚙决何虞旦夕也不佞为公毋论当官者不为私即公亦何尝不为公哉公仁心为质礼行逊出宗族大小几数千指未尝不濡公之泽而守其约姻党间右人百其面未尝不信公之心而食其惠不为操州邑大夫权而所微指默相往往得公而称良吏师不欲预里闾事而凡质成请解者往往頼公之调御而不至败今吾吴于天下称多贤士大夫而独太仓有布素风干旄之使夷犹于吾里而不忍去爪牙系搏之吏疾驱过之而不旁问者皆以公也元馭之所为政在洽神人和上下精启沃提衡万世是非之柄固大家馭之所为政于陪京以考功令饬吏治亦不为小矣语云是亦为政奚其为为政公贵而仁义附焉岂亦素封拥虚器者哉乃从诸搢绅衿裾之请而序以赠公

寿中宪大夫健斋冯太公八十序

不佞贞往者里居时吾郡司理盖有泰和龙身之云而余得称为治民龙君之徙丞太平则于臬副冯公称属吏而冯公以功行超臬长来治兵吾郡不佞贞则又得称公治民而公所兼署太平自若龙君盖尚犹称属吏而会公之太公封宪副健斋公者年八十龙君念无可以当公意移书谓不佞贞能无一辞以为太公寿龙君业为言冯公之守池也上最获封太公如其官被绯横金髮虽颁而有壮容于是冯公稍迁晋臬复移治太平谋所以迎太公养者太公意不欲曰吾方陶然从里社饮甚快安能日偶坐一铃阁使若冠而夔夔食我且我不出游是以官樊我也我出游而以我溃官又不可冯公计之亡所出移文两台乞休两台坚持之公乃尽遣其妇子与孙以共太公之养其妇代公职内而子代公职外然太公恒以为无所事之躬蚤起后宿饬臧获别勤惰井井家政而以其暇召客饮谈笑谐谑时卜夜至丙诸少年咸自以为不如也太公时时谓人吾二子长者治兵吴郡而少者佐成均教胄子今复叅冬官务矣假令二子俱欲侍吾养吾安能分吾身而两之俾一养吴一养燕中即吾齷齪为儿女子态吾安能日役吾念一之吴一之燕中哉今幸藉吾子禄以无虞口腹精意而诲诸孙庶几异日为二子张本亦愿吾二子毋内顾纯心以报天子夫吾子非吾有天子有也报天子即所以报吾老人也龙君之为言乃尔仆虽欲效一言安得致太公而从诸士大夫吏民之后而觴之虽然太公素健视履精神不衰间一策杖而来吾郡听吾原野之歌大冯君所谓聪明贤知惠吏民者已又察其

政行条教而嘉之劳苦其治状为进匕箸举觞勺从容东归更十年而若张黼太尉之父入省冯公于三公府司徒司空进牛酒上寿出而问小冯君之政有歌兄弟继踵相因循政如鲁卫德化均者其觞勺加举而匕箸益进岂不为尤大快哉龙君试以余辞进之太公且幡然起色矣

又

不闻之诗乎曰如山如阜如冈如陵夫以言乎高厚也曰如川之方至以莫不增夫以言乎盛长而不可涯也其亦工于颂矣而未已也又重之曰如南山之寿不蹇不崩说者谓其高厚而悠且久也其亦详于颂矣而余犹以为未已也他诗又有之曰天降时雨山川出云山之高厚而悠且久也川之盛长而不可涯也抑亦其体也盖至于出云而降时雨而山川之用宏矣其所谓用者与体故相为资者也余生束髮而游京国所覩记巨公长者非一人其云行雨施之泽往往膏被九有而未有能探其自者若修吾公之令于池覩其云雨一邑也其佐于某守于某覩其云雨一郡也其分臬于晋治兵于宣歙覩其云雨一道也今者举全吴腹心之地而宇庇之吴之吏民不胜大旱之望于油然沛然之下即一食息疇不愿公之强精神广志虑以长福我吴哉间者知冯公之有太公即一食息疇不愿太公之慎兴居进匕箸衍衍简简以长有我冯公于吴哉吾闻太公家慈溪其山则大隱句余九峯五磊拔地造天径庭碣磈其水则大海为之巨浸支流之所入汇而为姜杜花屿普济永明淳而为湍隱永昌金蛤太公之宏深博大实似之其日夜之所通气肤寸之合崇朝而霏人以云雨之施称冯公而实太公造始之也今者太公慎兴居进匕箸衍衍简简以长有我冯公于吴夫岂惟造始之太公盖成之矣夫人见出云之山川感而后颂之则所谓不蹇不崩以莫不增者固其宜哉冯公之泽鲜所不润而其最受润者曰许生某念无以报公而欲得一言以为太公之八十颂余不能尽识浙东之山川因云雨而窥山川之体况乎其若有覩也故不辞其请而次余语授之

按察僉事封中宪大夫重庆蹇公七十偕配王恭人寿序

嘉靖中余守尚书刑部郎而是时郎司马者为重庆蹇公当是时杨忠愍公继盛论劾宰相父子诸不法而其最大者以十五岁竖冒岭外功下司马而郎周公证之强先后为宰相所中以大小见法宰相谓公之与二公同署又周公乡人也疑其预之出金闕西臬已谓公实预之则复文以考功令谪貳蒲州遂进守清源所至有神明声久之复得广东臬而是时剧寇曾一本余皇截大海官军环睨莫敢发而仅欲袭其别部胁从千人以为功公当监其军叹曰诸君奉天子命诛寇一本不诛胁从众也请以它委坐是失军帅指见齧复调得金滇臬事公前后三徙不离金臬顾徙地益远居岁余入贺万寿便道过

其里徘徊桑梓间叹曰吾老矣安能与少年竞戢戢薪下积也投劾都御史为公请老公实壮未老也盖荐绅先生籍籍为公称不平以是不佞贞亦窃有闻焉而恨未能一识公比岁前公之子中丞汝上甫以观察使来饬吴郡兵世贞业在宇下乘间质公事中丞矍然曰微吾子之质固也请言之家大人三徙而不离金臬未尝见其有几微色曰拙宦何害未老而以老去未尝见其有几微色曰嘉遯何害所佐及莅皆雄州而庐产不小益也曰贫何害不然何以辞于汝王父夫王父者故所授郡守子经不以窶而有所濡染者也居复谓不佞吾无以贻若以不贪岭海千人俘贻若耳吾坐是不得金紫虽然金紫固而物也盖不佞歴官余十政未尝不禀家大人之教而行不佞之获有今日家大人赐也已语稍及深则又谓世尚有知吾家大人者第不知吾母母曰王恭人家世贵倾郡其归家大人也尽徙其千金之橐而出之以佐旦夕甘旨又佐诸姑叔婚嫁费橐如洗矣而佐家大人之施不休还吾里而室者亡虑百千数雅不闻啼饥号寒声以归孝弟子惠之称于家大人乃多王恭人力也则又谓世贞天幸不食报吾父母以不佞尝奏绩而家大人有金紫锡维吾母亦与锡焉今者寿差次七十不佞即又幸不以罪去而以量移道蜀不敢希长吏奉弩庶几椎牛酒布武堂下为百岁觞而先生可无一言之惠未几中丞被特简进今位抚治三辅玺书迫趣之官毋得稽故乃亟谓世贞业不能度邛崃之坂而西矣所请于先生之一言者尚可邮而致也世贞谢不敏乃扬言曰重庆故巴子国蜀之诸郡国巴最为雄蕃其水自涪岷嘉陵而合成巴字最深而秀其山有昆■〈山上娄下〉踰越卧龙来凤最厚而高山水之高厚深秀鍾而为男子则有瓌琦魁特者出其为女子有嫿顺明慈者出而应之且夫山水之高厚深秀而人应之于寿固当余间者复与中丞语及其郡之前喆蹇忠定公义蹇故鲜他姓以蕞尔一城而乃有二蹇乔木阊阖相望忠定公之生以癸卯而今中丞以壬寅相去垂三纪其成进士相隔仅一科忠定公之寛博慎重与中丞之爽亮端直有足相当者第我公之为中丞父与王恭人之为母仁于国良于家非忠定公之父母所敢望也然忠定公之为大冢宰凡三十有四载而其父母皆生受封如其秩崇朗显融与巴之山水相悠久吾闻之活千人者后必封则公之所滋树于前蹇奚讓哉中丞第思所以进于忠定公者而已于是世贞之乡先生闻而曰美哉典而核其称所以祝公与公夫人者请录之寄中丞俾为寿

弇州续稿卷三十三

●钦定四库全书

弇州续稿卷三十四

（明）王世贞 撰

○文部

△寿叙

寿节斋魏太公序

魏太公者大名之南乐人也有三子长君允贞次君允中季君允孚皆磊落天下名士而自隆庆之戊辰余起家大名治兵使者邹守哀次君文见余异之挟与俱之黄寺堡数以诗相赓和而长君允渊朗然不肯自标异仅从诸生旅谒而已当是时季君尚幼而余偶行部南乐过太公太公方谢巩昌事归其门窵而籓篠伛偻入一室壁立亡胡床可坐客久之荐茗茗不能熟而亦无茗色与之语恂恂如不能言者已徐伸其理简而隳其貌则望而征为巨人君子窃怪太公之为倅满九载当迁而翛然致其事归前后所莅青州及巩昌皆名郡即不大润屋何至不能具一茗意其人必清若絶俗有胡威羊续之风而徐询之乡人人果称太公为循吏齐秦间有声吾不能尽征其廉覩归时夫妇共一犊车橐不过三四而皆垂也余去大名之五年入领太仆季君已先成进士与会燕邸问太公健饭无恙长君伯仲犹滞诸生每试必甲乙而又二年得京畿荐录次君遂为第一人而长君亦在高等明年长君成进士又三年次君复成进士高第太公之健饭毋恙如故而季君则以济南司理屡被旌异征格于年入为尚书刑部郎未几次君授太常博士预闻人主礼乐之事而长君复以荆州司理旌异如季君征拜侍御史数上书言事最后言切直忤大臣如贾生得谪归里侍太公时季君以刑部郎请急而次君持节封诸王關中便道前后亦皆归里侍太公鼎足而养太公时年已七十而加七矣然尚健饭毋恙如故郡邑守令皆因三郎君具牛酒前为寿太公多谢不见里中舍儿亦以斗酒彘肩前寿太公始一再见之其后亦谢不见而日举三郎君觞甚欢也酒酣谓若曹岂以一进士能荣我我垂白岂复借若尚书郎章绂荣为若曹上受天子知而能不负之下不负我所以教若曹者乃荣耳居无何季君以满告北上而大臣亦心愧长君如贾生虽少而通达国体超拜南考功郎独次君犹依依膝前然亦且迫期不得不北盖长君之赴南考功不旬日而走使叩余山中乞言纪一时之盛因驰以慰太公余谓乃公固已言之矣何所复俟余赘虽然余闻之养志之说昉自孟氏顾子輿之贤于其子元仅一饮一食之微而已岂谓点也理春服与六七童冠浴沂咏归而其志仅一饮一食耶必也吾孔子所云立身行道扬名后世以显父母而后谓之孝何者以其为父母志也今天下所艳称有子三人皆能取高第得美官及亲在而称孝者独關西王氏与太公而已遠吾所不暇论迹不有宋之陈大夫洪忠宣乎二君皆犹在卿列而各三子陈之为尧佐尧咨皆进士第一而尧叟亦及第洪之为适为遇为迈者皆入制科三等厥后尧叟适拜相尧佐遇领元枢尧咨杖节

钺迈冠侍从国史有传而第考其实则六子者皆中庸人耳太公之视忠宣或少逊而持轨廉褻躬靖要亦有以肩次之若长君次君之为文章为气节而季君之为政术不啻六子埒也虽然气节一端士也文章小技于道未尊而政术亦其粗者进而太上所谓乎摠而业经世之业也发而言垂世之言也审尔毋论陈大夫即忠宣亦何可望我太公哉夫寿太公不以颂太公而归长君兄弟者何太公之所为寿不在太公而在长君兄弟也太公别号节斋其悬弧之辰为仲冬二十日而文成于明年之正月十日

奉寿广州司理容山骆翁尊师九十序

世贞十五而先司马公延山阴骆翁主宾塾俾受博士家言翁不甚帖帖于训故而操心匠解理刃恢乎有余地焉赏激咏言之下有不假丹铅而为鼓舞者即世贞亦不自知其所以进而翁犹少之时时取左氏司马昌黎河东遗书以开博其识趣而一日翁为人赋宝刀篇得漠字韵顾谓世贞试押一语世贞应声云少年醉舞洛阳街将军血战黄沙漠翁起而揖且叹曰子必以大雅名世哉吾且拜下风而是时世贞亦不知翁所以许而明年翁不偶于春官部谒选得广之司理又二年而世贞幸録有司偕计吏以北则耳翁籍籍廉吏声冠五岭而太宰大计吏乃以一蜚语斥翁又四岁所而世贞守尚书刑部郎与同舍郎沈丈谈而及翁问翁归囊装几何得无以去官邑否沈丈曰人谓五岭饶地即骆翁不然三载而不能具陆大夫橐之半而又推其半以予小弱弟其室庐田圃亡益也然日课其儿子诸孙辈读书暇则挟一孺奚丝其钓于若耶之渚得鱼以佐浊醪既酣而歌考盘之章已熙熙自得也世贞乃成一诗以寿翁自是数相闻而又二十年起废浙西部翁渡江东访世贞于钱塘稍一及省中利便已世贞有事山阴报访翁寻请告襄先公事翁又来访世贞墓所是时行且开八袞而面渥丹宣发儿齿饮啖不少衰盖一岁中凡三见翁而世贞以不能谢世网屡起屡蹶车马之迹几天下半始倦而获息盖亦且老而翁则已九十矣有丈夫子三而皆材其长者至有官职然皆不能待以背告而翁愈矍铄饮啖尚不衰乡搢绅先生侈其事合乐以飨之而具诗文前为寿世贞窃考之古有道长世则毋若汉唐而汉之言经术者则毋若伏生九十余而为文帝时使太常掌故晁错往济南受尚书唐之言文学者则毋若翁之乡人贺季真八十六而为明皇时秘监告老天子率公卿大臣祖饯于青门而宠以诗仍割鉴湖之半以赐侈伏生者班固氏载之儒林侈季真者宋祁氏志之隱逸盖至于今犹班班焉然伏生为秦博士中更山东诸侯之变其不从坑于骊山殉死于陈下者几一线耳季真少即宦游晚始乞身所谓儿童不相识问客何处来则桑梓之日亡几鉴湖一曲不能不虚天子之赐固也孰与夫翁蚤而蜚誉纵横青衿间中岁起家郡大吏归而祭酒一乡歷孝武世穆以及今上朝目不亲兵燹厉札稽山镜水之傍朝而日夕而月茂林修竹一觴一咏者九十年而无为约束稽故之者况去而今翁之日故未涯也其视二君子吾不知其名位何如其所得当不啻胜

且倍蓰也已世贞老自废不能如晁大夫一问书于门下然尚能绘图为文与诗而属苍头走之翁所翁试读之以视十五岁语得小进否

光禄署丞少荆王先生五十寿序

始赠詹事王翁别号曰友荆其冢子封詹事公曰爱荆而先生亦自称少荆爱荆公有二子曰宗伯元驭学宪家驭少荆先生为爱荆公异母弟顾少于元驭而长于家驭各一岁友荆公少之俾夷于元驭兄弟以就塾师治博士家言而自度材不能胜元驭兄弟则弗竟治也补太学上舍复有声太学已当就吏部选人輒投牒归而元驭官太史长南北成均青宫銓坡以至贰春官贵用事矣人或谓先生一之北京必当得所欲先生竟弗之北也久之以病不任请得光禄大官署丞署丞为天子从官于法得与监司而下讲均礼而诸监司以元驭兄弟故靡不欲交欢先生先生益自匿有所报谒于守倅间恂恂为共让寒暄之外傍不及私事出入短褐冯小苍头不知其为官人也当是时爱荆公尚无恙先生移事友荆公者事之不敢以弟礼荐也爱荆弟而接之子而抚之融融怡怡若一身也家居大桥里最为阒阒入门数武萧然无市器客至辄饮饮酣辄别不为固留不为餽让有质库三四听其出入不甚责息时时有所施舍当戚友之缓急然匿而不受其名大较以俭常裕以宽得损合而言之仅尔平平故先生之产其视初受如故也识者以爱荆公如高山大川云雨欲施其巨足覆矣先生如清溪茂林逶迤自然其静足承矣元驭用廉让直道称天下家驭亦差次焉吾以为先生于乡里间毋赢取阴有以成二君子之廉毋上人阴有以成二君子之让毋餽情阴有以成二君子之直试问二君子于天下无弗知者然不能一知先生先生今五十矣饮食衍衍容色鲜腴始者难举子今有诸生诏爵美而文又连举二雄若兰萌玉葩天之知先生而且厚之故无量哉余虽窃仕进名而里居之日多得托交于爱荆公而于先生过从尤数往往以酒德见长者晚而就元驭习掩闕不复能就先生饮人或谓先生家有真人乃不甚慕好之为异余谓陶靖节攢眉白莲社而遠公欲得之迫以其去佛理近故范蜀公不佞佛而眉山苏氏独称之为学佛作家今过先生之居若畏垒而接先生若无懷葛天之民其于道不亦默际膂契哉又何必黄冠緇衣旦暮焚诵而谓之慕好也客张子闻之曰善持以寿先生

寿左司马南明汪公六十序

当嘉靖末而今少保左都督戚公元敬为闽大帅今左司马汪公伯玉以御史中丞节监抚之两人相得欢甚左提右挈以成荡平之绩而余方困家难齷齪里居俄而汪公避流言卧诤中而戚公移镇蓟门当北上方舟而过我酤酪击鲜为三日布衣饮饮次相与纵谈皇王帝霸之略阴阳消息之妙探坟索穷六艺下至齐谐虞初之所不载者靡不

抵掌而尽之既别去而余私于余弟敬美曰余岂其梦耶是二夫者抑皆非人也而神也耶夫以汪公握七寸管而挥霍于文苑之场固甚雄然宁能无萧世诚韬而其治闽师也起痍伤而鼓其气以与猖狂之虜竞覆其全师于鲸没之滌戚公之材武百战百胜以有此貂蝉即能免绛侯椎而悅礼乐敦诗书居然将坛之雅古所称质有文武者吾目中殆无三焉及余亦强起备朝列而汪公再召入赞中樞垂大拜而以亲老请告归养者十余年而戚公积战守勋累加至三孤徒镇南海余亦以病不任后汪公而老于东海之上今年汪公寿六袞戚公走部将裹粮水陆行四千里而乞余一言以为汪公寿其辞大略谓汪公用二亲故屈其经纶之业以共养朝夕后先融怡竟其天年公又得用其间精心吐茹无兵革簿牘之事为之汨没其神盖充然王矣即不佞光虽凭借天子之宠灵从三孤后然渐老而益移屯非穷边即瘴岭自顾髮种种于犬马之谓何宁能无汪公羨哉夫余处东海戚公处南海惟是风马牛不相及也而不憚走其人以祈余一言为汪公寿即微戚公余敢靳于汪公虽然以余所称于汪公者则不独获究于人伦之懿与康济其身已也夫汪公以千古之业收之于所谓七寸之管整齐而廓大之上本羲姁下则姬孔傍猎于列国先秦之场而俯踞二京海内之人苟燥发而不废觚翰则必走汪公之庐以取质若方者之就矩圓者之就规而汪公又不憚叩两端而竭吾教夫北地古而疎济南古而棘毘陵晋江畅而今自汪公始折衷焉一代之人文遂跨千载而上皎然若日中天即微戚公辞吾宁以此而易戚公彼哉为戚公之绍者曰若是乎子言之媿也虽然子殆陟太华者阻于青柯坪以为华之胜尽是矣昔夫子六十而耳顺方且东西其辙以思効于齐楚若周召之夹辅其犹在平格之岁乎夫彼岂不足于立言者彼诚不忍于天下也子尽子之胜而下走乃亦欲尽下走之胜则将奚祝予无以应曰请为两觴觴焉以俟汪公之举

寿宗耆大中大夫少葵子八十叙

万歷之十三年乙酉吾宗之英曰大中大夫致仕河东都转运盐使少葵子寿八十而以秋九月为悬弧之期前是少葵子之从子詹事府録事定鼎以祝言请吾王故有东西族至是皆悉集马鞍山之阳塘北第东族齿卑而行尊诸少葵子之大父行者皆东族曰不佞少司寇世贞保御氏世望等若而人负屏南向立称诸父者则合东西族曰公乘一敬一纶大有乡进士士骥若而人西向立少葵子东向立稍下称弟而从者尚书刑部郎周绍诸生无逸等若而人皆东向立诸称少葵之子姓若孙者録事定鼎乡进士亮臣及太学某某等若而人前后北向立典客赞客集且坐祝史请致觴曰敢以元正例少者先举録事偃而前曰以仲父光州之阨于宦与吾父仪部之阨于年也则畴与覆露我天笃我叔父以名德显位重于乡使吾曹亡有公私追集之扰与俯仰累叔父谋口而言择武而履后矩前规从容进止使吾曹肃焉而避其肆衣不累绮肉不再簋夕无傍媵昼无

李子使吾曹恧焉而节其侈天属之尊虽在童龀恒恂恂然其它小大均礼无讐使吾曹
愧焉而检其肆若乃诗书之业粗有所绍以亡堕于纨袴则皆叔父赐也少葵子不敢当
以质于不佞目之曰信举若觴则举录事等觴刑部郎乃进曰某虽晚不能习吾兄之政
第闻之长者言兄始筮为长垣令善其官以不能曲事上人取誉得调而令某邑则益善
其官始入南仪部未几而出守广西之林州已调云南之澄江皆在荒徼万里外最后始
擢移大省迨利权而又阨白简矣兄之再为令再为守一领盐筴数屈而竟伸则以善其
官故其若伸而竟屈者则不能屈事上人之效也度兄之所为德于郡邑逵者垂五十年
近亦三纪余而至于今犹有口之而若新者兄之所得志于永年非幸也胡可以废觴也
少葵子不敢当以质于不佞不佞复目之曰信举若觴则举尚书郎等觴公乘趣而右稍
折而下扬言曰少葵子亦知天之所以厚若乎哉少葵子三十而成进士成进士者五十
载而有今日品第三号称上大夫行带金紫而吾侪意若未满足是五十载者服官四之
退处六之而不知少葵子之所谓退处也上以奉封仪部公下以鴈行光州而抚光禄诸
弟与群从按察鞏融融怡怡与之相终始子孙保之乡里仪之歴耄耄而五官之神明益
畅盖外极夫伦常之盛际而内无怫郁之累心天之所以厚若何如也少葵子益踧踖不
敢当而不佞复目之曰信举若觴则举公乘等觴不佞乃谓少葵子而来前扬觶而属之
曰不佞少于少葵子二十周而谬以属忝祭酒谓宜习王氏事王之先自汉大夫子阳骏
发于琅琊而云仍于江右栉比闾阅车载蝉冕者数百年而今旦复庶几焉独至于笃老
称世瑞者屈指一何寥寥也为少葵子数之计独有太保睢陵元公八十五开府仪同三
司文贞公八十九大中大夫司谏公八十七前国史检阅知昆山州学正公八十六今并
少葵子而五人耳然则贵富易也显闻易也至笃老而称世瑞者非真宰所注积与厚德
之所凝承故不易也少葵子既饮乃反觶不佞曰是酒也愿与公共之于是尽觴与坐者
皆觴长者乃歌曰皇之仁溥无垠饮子之醇偕子以长春少者起而和曰皇之泽霈无极
沃公之液从公于寿域录事谓祝史曰书之以归公俾永永其示

寿钱母计太夫人九十叙

当计太夫人年十八而归封侍郎公也侍郎公前已有子今大司寇时年十三云太
夫人之事封公毖而饬矣不以齿卑故废为母不以先后故废子大司寇大司寇亦不以
小长故废母太夫人闺第之际盖雍雍如也大司寇业成而举进士为吏部司勋郎则太
夫人称安人已进考功郎中则太夫人称宜人已进太常卿则称淑人进侍郎则又称淑
人盖俱偕侍郎公而最后大司寇以绩上于是独称太夫人后先拜勅者一拜诰者五皆
有辞辞皆有令媿而太夫人亦自有子某二孙后大司寇者曰某由胄子应乡荐少曰某
为太学生其季亦为诸生彬彬以文行世其家盖至万歷之甲申则太夫人寿九十而大
司寇亦八十而加五矣太夫人六珈瑱搥服七命之服而坐于上大司寇拥笏垂鱼服七

命之服而拜于下其华发而酩颜则均也杖朝杖国之鸠玉植于左右而却不御则均也匪坐与拜畴从而辨其母子也诸孙之与孙齿者进而觴太夫人退则觴大司寇曰为此春酒以介眉寿朋酒斯飨曰杀羔羊郡邑守令里卿大夫士银青铜墨缤纷步趋于堂之下酒正供酒槁人供食罗氏共鸠外饗共割烹乐师共歌僂盖秩如矣乐作豆陈而犹次且相让曰且不敢与大司寇讲宾主何论太夫人虽然吾闻之古有千金寿而万年酬者是不可以已也故进而觴太夫人退而觴大司寇大司寇不敢当而酌之庭曰虎拜稽首天子万年于是荐绅衿裾之士能操觚者皆为寓歌颂讴记赞说之类以侈之而属余叙其事余窃谓诸称觴而寿者太夫人耳而大司寇乃称天子万年者何归德于上也其归德于上者何凡太夫人与大司寇之寿皆上锡之也其称上锡之者何太夫人之妇于封公者五十载而遥母大司寇七十三载而遥自安人极而夫人凡六锡命矣诸贤即有称述讵能如制辞所谓俭能达礼敬严宗鬯贵而不骄美着珩璜者乎亦复能如成子令名佐夫康寿者乎有能如慈和静正明章淑慎鲍妻范母之风者乎太夫人之德闾德也而上知之而又锡之且也高祖扫八荒辟元始列圣复以至德滋培之元精太和磅礴于宇内无兵燹痍札蠹蛊之累太夫人与大司寇得以凝承于一家而各保其天年则孰非上锡也君子以是知大司寇之归德于上也夫天子万年无疆太夫人与大司寇亦无疆余且得而与诸君子乐观其盛哉太学某闻而属于墨以上太夫人

寿大叅昞谷王翁七十序

昞谷王翁以中二千石秩行臬事治吴四郡兵而余业解郟中节归卧弇园王翁每过之辄徙倚而叹曰不谷长于君九岁矣而犹刺促簿书不休指园之泉石谓此君将色诽我无何以不能事言路当量移遂拂衣还永嘉翁之得量移朝议勉以为言路体而甚贤翁寻从服中起叅南越大省而竟服除翁不肯出人谓翁无谗屈足太宰府诚一露起色且响应翁叹曰毋溷我向者有成言于弇之泉石矣于是大飭治昞湖之圃山水映带天造吞吾弇者八九而不芥蒂甘果卉木何啻蓰倍次第属余记之且赋之而会余以病不应南少司寇召若有当翁意者余以六十避客泖湖而翁贻我一长歌侑之黄甘三百曰一甘当君一岁祝也余念无以报翁岁寻除为万歷之丙戌翁寿七十矣去吾呉且八年而呉之军将士人其思翁如一日相率而诣余曰何以祝我翁已而士人之文而最受知者曹子子念来曰何以祝我翁已而翁之犹子陈将军曰何以祝我翁余谓陈将军所以祝翁者欲长藉翁也曹子所以祝翁者以狗知也吴之军将士人所以祝翁者犹覬翁之师帅我也余不佞与有二焉虽然以翁我藉则翁且块焉而不居其德以狗翁知则翁之知黜而无所用覬翁之师帅我翁方散发昞湖之岙征车却而不进者久矣而我何以祝为无已则姑即翁之乡其精英所笃为名山大泽足以当翁者而祝之曰郡之东不有称华盖者乎是帝之所宫第十八者也其洞曰容成真人之所繇真也辅之者不有称积

谷者乎其洞曰丹霞真人之所乘蹻也南不有称吹台者乎翁家子晋之所游憩者也其更南不有称大罗者乎则上拟帝都矣其又南不有称大若者乎则列福地矣转而西不有称金丹者乎是仙饵矣北不有称石门石室者乎是仙栖矣永宁之江透迤澄渟白龙所化迁也西湖之腴环洲玲珑谢监所纪咏也浣纱之潭虽旱不涸五行所注汇也诸所以称名山大泽者开辟以来未之有改也诗不云乎如冈如陵如川之盈以是拟翁将庶几哉曹子从傍曰先生得翁之似矣而犹未既也语云智者乐水仁者乐山又曰智者乐仁者寿王翁仁智人也跬武卿相脱然而弃之达生娱性惟意之师可不谓乐耶其仕再长望邑一为雄郡晋帅大镇所注措皆十世利也不食报而毋几微见颜色仁者泽也亦仁者心也今夫翁踞眺湖之岙仰而得乎山之静俯而得夫水之动云蒸雨润成功不居盖无所不肖似焉而又何疑寿哉余因以曹子语语陈将军曰为我报王翁洞庭苞不逮永嘉远又以非时不称祝吾文俛且九百言以一言当一岁王翁不亦隃胜籛铿氏哉陈将军大悦奉而去

颍庵张封公八十寿序

自古人臣之在国有年至者则人主为之赐杖异筮其极至于袒割问道而宴乐欢会所谓千金寿而万年酬则多出其子弟戚执华封人之祝偶一见之不闻其有颂赞叙记也毋论六季后先即昌黎河东庐陵眉山其文章徧天下不闻以寿言也余始学为文章守此说盖操觚管者垂二十年而不敢称及寿后稍稍悔之以为仁人孝子非藉此无以显扬其亲而畅亲之志且夫他文之可以为亲慰者则何必专寿言而亦何必自三代始然尽绝之乎于是间一二应之盖又垂三十年而余且倦笔墨矣乙酉之冬余以六十感情事非常逃之泖上一切谢客至春禁少解客潘景升自歙走千里而叩门景升故尝从汪伯玉司马游已又从余游其大父府倅翁八十时又尝乞余言以寿者也余意其有所报欲避之景升拜曰固也不佞窃窥先生慊不敢以尺缕浼先生坐定复起拜请曰不佞不敢以言报先生寿也乃不自量欲得先生之一言以寿缮部郎张君之父封公余愕不晓所自则复拜且请曰不佞恒于天下所贤自先生与汪先生外毋如张君而张君之覆露我甚于二先生然张君于文独慕称二先生封公者行年且八十矣所谓显扬其身而畅其志者必二先生言今幸而得之汪先生敢冒昧以请于是出汪先生言而读之其大指称封公少慕范少伯司马子长之事尝泝江流入蜀浮荆湘下金陵陆走雍豫二州览其山川土风人物之盛捐橐借交千里诵声归而折节悉读坟典丘索诸书有丈夫子三授诗三百而谓曰非吾夫子志哉于是缮部君最长则最先以诗显甫歌鹿鸣而封公七十则有司以冠带进公为一御之既成进士拜行人使于四方不辱君命矣行人最公亦称行人旋进今官榷杭之衡虞材木商旅德之讴謠载道者四达其最且上公不旦夕益封哉夫汪先生之言云尔质之景升曰信余乃笑谢曰夫寿张公者一汪先生足矣

余可无赘也虽然始以汪先生而知有景升今复以汪先生之言而知有张公父子子言
缮部慕称及余故不可知然而余实知缮部缮部今相国太原公高弟也太原公居时
缮部尝再过之辄与余道其气谊学术慷慨世务津津不已也夫以予知缮部吾子又言
缮部故知我如汪先生即不敢夸夜光之璧其非无因而至彼明矣为我语缮部今兹以
使事还新喻数百里内守令牛酒日至奉觞觞封公竟可趣入朝毋昵昵作态也赓为谢
封公强精神勤匕箸迟之十年天子修袒割问道之礼舍公奚适哉公名某学者尊之曰
颐庵先生

乡进士曹茂来先生七十序

吾戚执曹先生茂来为诸生仅踰年年二十一而举乡试高等其文传士林以为可
芥拾青紫而数困南宫又病时时夺之会其父宪副公方挂朝籍远宦万里以家秉累先
生先生不废家而其治经术益精宪副公不甚帑于官先生以其小息因时而密为之策
遂至累万金迨宪副之见背时先生有四弱弟乃悉推其庐产库藏分授之而身食其所
私蓄而已然有天幸益丰饶先生有子绳武复继举乡荐乃叹曰吾冀得一第为二亲解
頤耳今安冀且吾渐老矣焉能与儿辈竞仆仆公交车间割吾真以博吾虚耶遂罢去不
复应试盖十余年而今七十矣先生素清羸嗽粥不能尽一器酒不贰酌肉取知味而已
无美衣鲜缣之饴好治园圃疏池沼种竹木甫成而厌之复徙去凡数治数徙所居不能
过三岁而最后筑室于虎邱之岙乐之其居为最久从者苍头两三人素屏帟帷竹榻棊
几间呼其所善唐叟奏箫管先生倚歌而和之小畅即已毋复留连于客罕所延纳遇一
二知己匡坐玄言间卧应之凝尘满席湛如也性好为诗诗多冲澹清逸然以自娱性而
已既成则篋之或弃之不以示人人亦无能以诗称者其于出纳计算析秋毫而用义割
之所施予虽百金弗恡然不欲以市义称殆如诗也盖先生七十而友人潘君陆君辈过
余曰曹先生近有道者哉夫三代而后士之尚气谊修廉隅者毋若东京之汉然往往过
自溪刻苦节为贞修之岩穴业业孜孜老而用之则为杨震陈蕃以所是而弃其身不用
则为严光周党以所是而藏其身夫所弃者身也名不悉弃也所藏者身也名不悉藏也
然则其于道为近之将无远也先生少而就制科不汲汲于出晚而谢去不闷闷于处承
家而廓不显干誉割弟以腴不彰让迹俭不废施施不责报适不违性亦不使溢诗以自
娱不以文隐度世之知先生者不能出里闾然使先生有一二知己能不目之为近道哉
吾子里闾中人又先生戚也其可无一言之赠以任知先生余谢曰子言之美矣至矣何
所复藉余余故尝覩先生所业老子庄列其于铅槧之际往往挹其精咀其实宜先生之
内重而外轻也即不必服饵金石熊经鸟伸而隐然有松乔在虽然以先生之近道若此
内重而外轻若此吾与子言皆赘疣也何以赠先生绳武闻而曰是不可失也次而为寿
曹先生序

萧封公先生七十寿序

不佞故游武昌尝以间渡江叩汉阳与诸大夫登晴川之阁而憇焉其烟波灏漾黏天无畔则蜀江前枕汉江北带两水异源而合流其雄杰秀丽之气鍾而为人将必有浴日膏世之輩出焉而至仰眺大别凤栖诸山矗立云表屹然巍然沃厚而丰隆则当之者将为长者巨公仁寿而端凝永永不蹇以显荣于世既而考之文学掌故家言则自开辟以迄于今垂数千万年而未有称者此何说也盖又七年而得国史修撰萧以占先生先生之试礼部遂大魁天下而其射策金马门复见擢第二人及第先生有弟曰以孚亦以进士高第拜户部郎二先生之名一日而震于人耳咸以二江之胜归之而不佞独曰始基之矣然而未也于是以占先生进而以醇德嫩行斐然流声于簪笔殿陛间盖不欲贾其余以專一世名而以孚则非特用政行显其经术艺文进而与其兄媿盖自乙酉之秋出主關西试而關西之俊髦尽出其门矣明年以占分试南宫而南宫之俊髦十三出其门矣不佞乃曰兹上臣之道乎哉循此而不已其与二江并著称无难也盖又久之而始得先生之父曰某某公其人所谓长者巨公仁寿而端凝人也小出而为德于某州归而为德于里或遠或近或大或小皆足以鼓云雨而滋草木大别凤栖之胜非公其孰当之公以丁亥岁与其配戴安人俱拜命秩如以孚而以占先生奉天子诏持节封诸王便道归省明年戊子公寿七十先生出宫锦衣衣公大官捫酒注之百岁之觴而为公寿畏垒之里守相之干旄与搢绅之冠蓋鱼贯鳞次而进璧帛实于堂羔鴈实于庭公快然乐矣先生乃犹有未尽慊者以不得华封人之祝以佐醕而其门人吳司理唐君某昆令吕君某俨然造不佞之门而请曰以占先生吾师也敢徼惠下执事之一言以嗣封人而为先生之父祝夫不佞故不能悬悉公父子然大较尝以大别凤栖诸山拟公而以二江拟二先生今兹之祝也亦愿公之长若兹山与二先生之长若兹江而已静而与山同德其体也愈久而愈茂动而与江同波其用也寢遠而寢宏夫公之久而茂也乃所以为二先生之遠而宏地也唐君吕君曰执事诚善颂善祝吾闻之先生使事毕必且奉公而造朝夫唐有杨平章嗣复者知贡举后而其父尚书于陵入都嗣复以其门人迎而鲤庭之桃李新阴其诗着自杨汝士者脍炙人口迄于今不衰有如公入朝以占帅南宫之所举士以孚帅關西之所举士各若而人左右翼而侍公其视嗣复当何如词林之儁如林宁无立言胜汝士者执事亦宁能默然而已耶不佞頷之曰胥后命请姑以此先

弇州续稿卷三十四

●钦定四库全书

弇州续稿卷三十五

(明) 王世贞 撰

○文部

△寿序

许母张太孺人七十序

当万歷之丙子余自郟解节归里而为许母张太孺人六十奉帨之辰许令者故萧山令公旦也余为文寿之大要谓公旦不以失令戚而以得长有太孺人喜太孺人不喜得公旦之禄养而喜以得公旦之志养读者虽谬称说其文辞微谓不佞姑用是为太孺人母子慰耳迨于今十载所太孺人为七十貌不加老而公旦之室庐无所增然日益以葺南亩无所拓然日益以易文日益以成而行日益以立其奉太孺人也簋豆虽无所饴而滫瀡之腴日益以择太孺人之匕箸亦日益以健而后余之文始信乡大夫三老汝康诸君谓余能无一言之嗣以荐太孺人觞余谢不敏则曰向者业尽之且夫寿言非古也寿而及内德非当也夫一之为甚而我何以再焉计无以拒诸君请敢谓公旦自古能轻去其令于强仕之岁依隱为乐名高于天下者毋如陶征士元亮然行年二六慈妣见背镇军之幕复罹继戚竟不能于归去来辞一叙菽水之乐他毋论靡盬之不遑即所扬歷中外必奉以从若汉之隽不疑唐之李景让母得称慈子得称循然何至论献而貽垂白忧辍食请让浙西之政变且酿矣太夫人坐堂皇呼杖而后军情始定夫以仕宦之不己其究至于如此为之母者又安能高枕而食其养也乃余窃计太孺人日高春而起所遭非公旦率子妇奉饗醴谈说往事即诸孙曾以次见大者课书小者含饴太孺人何尝一昔不熙熙陶陶哉元亮有五儿而皆不好帑笔为公旦子者进于是矣然则太孺人之畸于人而赢于天也公旦之抑于朝而伸于家也其致一也不蘄贵则不虞贱不侈富则不忧贫此太夫人与公旦之所共知者之乐乃所以为仁者之寿也哉余居距公旦一舍而遥公旦无纤毫之累以干月旦而入余耳是故不终拒诸君之请而授简焉

王母陆太孺人八十序

世贞之自郟归而陆太夫人七十矣太夫人者吾从季太医吏目瞻美母也乞余一言以为寿卮侑余以媿德不外着不敢过有所称述第谓瞻美太夫人之甘若养者志也若诚以志而养太夫人则愿若毋勤于名而务于实施不责报意不取快蔽不新成使其

居若畏垒之里而葆其真若婴儿之至和以昌滋其后太孺人方斋心佛庐以希无生之妙暇则含饴弄孙举家庭而纳之逍遥熙怡之境不亦快哉瞻美奉余言以荐太夫人后退而佩之绅盖十年所而太夫人且八十貌固不返少然不加老匕箸虽不益亦不至甚损耳目之识虽渐懈然神明志虑不衰瞻美之庐产无所拓然益饬治为子至白首然共养益备具乡者吾所称含饴弄孙乃试言之耳非必实有也既而瞻美之媵举一子甫踰晬矣白皙秀眉目美倩始好轩渠笑悦以投太夫人怀无所不如意太夫人即不欲示恠色恶可得哉且自十年所余皆在里中日能得太夫人与瞻美状则吾瞻美之伯仲叔俱前逝而瞻美为之抚嫠恤孤乳哺其弱者而整齐其强者即无异己子矣妹归晋而贫于我乎居于我乎衣食诸母族之单与媵族之衰不啻若己单衰之也数及宗戚则五服以外论次交好则一面之识无不割腴以哺分纆而温束帛之贺不颛显者絮酒之奠匪为生者始世贞之归里覩瞻美誉毁半耳既而不胜誉矣今者乃绝无毁矣语曰富好行其德又曰人富而仁义附焉瞻美之去富远而仁义近者则何也其仁义缘性生者也非自势有也是故因瞻美之诸从昆弟子姓乞一觞以寿太夫人而侑之言太夫人有瞻美真无疆哉或曰子之寿寿太夫人也胡以称瞻美也夫瞻美之自力为仁义也乃所以有子也其有子也乃所以怡太夫人而益之寿也太夫人老而听瞻美息之故无述焉若七十以前太夫人之懿行雅操纚纚余彤管矣

寿李母张似吟？

今观察使李公维楨之饬兵吾州也州人王宗伯元驭以持正忤大相请急归而与余善颇治养生家言言路乘是以中宗伯并及余而两家之弟家驭敬美先后谢闕洛之学政归即余与宗伯幸不遂丽三尺而言路犹断断未已一时台察监司守令多自避匿去而余与宗伯窃亦私便其远我而独李公益相昵每入谒必治蔬糗浊醪嚙语不听出而时过我四人者人迭为具欢饮至不辨宾主宗伯间谓李公得无为公累乎公袒其左而曰我不能为吕氏右袒已而曰是言也吾受之吾母张太恭人李公尝寒夜饮至分欢甚忽悚然曰与母期而过之是必候我候我必且责数我明日谓余膝几踵责数我以一人欢而不念百十人寒使我无面自容当是时太恭人业六十余矣某继姑余亦七十余太恭人奉之恭谨甚诸御下肃而宽治家政谧而理李公乃从容称太恭人之奉吾大母恭谨非一日也其严诲吾亦非一日始王父达州公挟大母之官则先中宪公以太学奉蒸家居矣以内秉授太恭人已而中宪公歿达州公又歿太恭人念仅其姑在盖未尝食息而怠吾大母吾大母亦未尝食息而不甘太恭人之共奉也吾兄弟三人长者未束发而少者甫髻皆颖能读书太恭人爱之甚然不以爱故而废用威之教吾少好与邻儿角力太恭人怒朴之或曰孤儿何忍过湿束之太恭人谢曰使儿有父者吾居慈矣不肖乃悟而折节益治经术以至成进士授中书舍人它舍人皆贵介公子酒食相征逐太恭人

意不恠曰而父岂亦卿士耶进而学慎而与毋轻其官既擢御史当出清楚戎太恭人复曰而部大相乡也有以自树毋轻其身果以不能得大相意出守吴兴太恭人从则日夜戒吾曰平而赋详而谏毋轻其民既而迁镇若郡太恭人悔复如之不肖之离孺子于今三十年成进士者半之而幸获免于天子之简书无玷我中宪公则皆太恭人赐也盖李公之政成而部之人颂公者必归教于太恭人祝太恭人者必归贤于公而久之公迁叅浙省事分部金华其又三年金华之政成公拜楚臬长而太恭人亦且七十矣公以书来乞一言之寿以为太恭人觴且曰金华之署浅吾决罚至十以上太恭人必知之诘所由具析中窾乃色喜不则愀然曰得毋残民以逞耶以而之工于吏毋若养叔之射百中而以一不中败之不肖未尝不屏息若负芒刺也赖天之灵得恒侍太恭人不肖可以终免矣世贞乃言曰吾读史王孙贾隼不疑崔玄暉李景让诸公传以为能树大臣之节与才而不朽其名皆母之贤成之而所谓诸母者不必尽显其孝于其嫜亦不必尽着其节于其夫乃若东海周青之为妇鲁陶梁高之为寡陵母苞母之为母所遭会有不忍言者且夫太恭人之始亦艰矣以一葢然嫜而上奉厥姑亦嫜也而又称继又以一葢然嫜而支持向衰之门户又以一葢然嫜而抚二孺子其长者贤而逝于太恭人手也乃太恭人精志而御之妇而妇嫜而嫜母而母咸秩秩就理及见仲子之贵而身膺冠佩之锡颺鼎釜之飨天所以报太恭人亦不薄哉李公又为言太恭人之为张也其伯祖曰方伯公吉与高王父教授公皆及事胡居仁先生为理学大儒太恭人得于内外家之懿范居多虽然语所称清白守节一德不懈者乃其自性生矣姑志余言以复公而属之曰是必伺太恭人恠而后荐不然必且曰未亡人之所不忍闻也敬不举君之觴子且柰何

顾母单太夫人八十序

维扬顾益卿之以臬副饬兵渔阳也天子材之超为御史中丞抚辽左而益卿逡巡固辞不许益卿之辽左会敌人率诸部落十余万骑入塞益卿出奇计与大帅宁远伯合逆击之于镇边堡绕出敌西北大败之斩获首级以千计法当封而益卿悉推功宁远伯诏特擢三品复固辞不许益卿自是数有功数辞赏而是时益卿之友世贞卧舛中微闻其事然不能详而益卿贻一编书见示则前后所辞疏草具在乃至所以储胥辽左者见图说凡十余条其请赈恤前后二疏为辽人请命良恳天子念辽为国左臂悯其卒戍之阽危而又材益卿为之朝奏上而夕报可也大司马大司农之协议三相国之平章与益卿相为肺腑士益粟马益刍诸障吏田畷均得续食以回万死之命堞若增而高隍若浚而深者天子以金汤视益卿而益卿居邑邑念母单太夫人业八十不能为板輿之奉于絶徼之外欲上书归省不忍负天子恩欲留则恐一旦有遗憾以问于世贞世贞曰太夫人固无恙哉毋论太夫人之精强善匕着当无恙毋论为太夫人之子妇而代益卿子者时太夫人之寒暑饥饱而共奉之当无恙毋论太夫人之诸孙枝若玉而中有郗林之桂

以娱太夫人心当无恙吾直以天道论太夫人夫益卿之活辽左数十万人命也天必以益卿仁为太夫人寿也益卿之辞荣锡若浼者彼其中冲然未滿也天必以益卿让为太夫人寿也天子方日夜以辽左之固借益卿以数十万人之命借益卿太夫人安则益卿安益卿安则辽左安辽左安则天子之志安天必以太夫人寿为益卿地也夫太夫人之与益卿两相成如此益卿之所以慰太夫人又如此语所称虽有离忧其志乐者太夫人之谓哉宁复有纤芥之憾以为益卿虞前是益卿为郎长安中与故光州守陈贞甫故侍御胡原荆故吏部郎戚世秀布衣王承甫为刎颈交升堂拜母各出酒食为欢而今者独益卿与承甫在诸母独太夫人在于是承甫自为文以寿太夫人而光州之子尔耕来乞余嗣言焉余甥曹子念益卿晚合友也为从與甚力嗟乎微子念吾固当有言陈生偕诸君称觞太夫人前愿强饭自爱益卿为国柱石更十载而后上书陈情以寿九十老母庶几臣子之道备哉

寿王母何太孺人六十序

郡诸生王伯栩者今相国季父行也而与余善余三子皆从之游相切劘为文字交所以责备行谊有古人风伯栩少孤有母何太孺人今年六十矣吾三子偕其友曹生陆生輩凡十余曹来请曰伯栩材而数奇不能徼一命之荣以为太孺人重又愧囊装尽不能击鲜酿醇以谢客而娱太孺人惟是夫子之一言伯栩持以飨太孺人如五鼎也以衣被太夫人若翟纓也夫子其惠然许之乎一日伯栩过余余语及之伯栩矍然避席曰不肖以蕞尔书生而徼夫子之惠重太孺人所不敢太孺人莹然念以其不幸而拜夫子之惠所不忍虽然当先君子之见背时不肖兄弟甫离稚谓太孺人贫而虞饘粥之不继也不愿受儒愿得受数金以资什一息太孺人恚而啐曰唉孺子误甚即未亡人弃若贾何以见逝者地下若弃而贾亦何以见逝者地下强之就外傅躬机杼资其贏以饌先生酒食诸先生毋不称不肖母贤虽菜羹鲑炙甘之隃焉豢矣夜则自课不肖兄弟书书默识首尾语以志数或漫过辄觉呵詈继之不肖窃自疑太孺人目不知书何以精察乃尔既而不肖之弟天独不肖在窃私谓太孺人必加怜我寬我稍自偷佚则复耳太孺人呵詈声矣既而不肖公交车之业稍就太孺人为一舒眉谓可藉手而报吾君然不肖试于有司不售途道窃叹昔人盛年功名无不一日千里而我何为者甚难太孺人且太孺人以一偷佚故而呵詈继之今者当拜太孺人杖之不暇及归而太孺人色和而意愉曰吾责汝业不责汝命也自是连试辄不售而太孺人亦辄慰勉无几微见颜色昨从诸生颖脱具巾襩谒太孺人于堂太孺人顾色庄曰谓一博士弟子可竟汝耶勉之毋废公交车业嗟乎微太孺人是不有不肖也微太孺人之诲即不肖不有今日也微夫子之一言即不肖不有太孺人也余甚嘉其意乃叙以授伯栩使归而诵之太孺人前且与太孺人约异日伯栩取科第负名宦声太孺人为若隳母也者太孺人之勤施予厚宗戚所以示轨端

矣伯栩尊修其德而称贤人君子太孺人为若孟母也者吾尚能登其堂举七十之觞

寿杨母顾孺人七十序

余以三吴之土沃而当末俗则易渝以故好称说嫩节姱行冀以小挽其澜而于闺阃之内犹数数焉岁戊亥之交则为楚观察使李公頤寿其母张太恭人之七十而纪之矣太恭人始事中宪公而寡也上而有舅达州公与余孺人下而抚其三子皆成立而中子为观察使有锡典不三日而吾友杨茂才士选之母顾孺人亦以七十告则其所遘际与行事无不脗合者然其为道益难而味加苦余乃喟然叹曰嫩节姱行在吾闾井之间步武不数百如是垂四十年而未有志也乃斤斤修其辞于数千里之外是何远之详而迹之略也国家着甲令诸有子而拜封锡之典者即于格旌弗复旌也非以其贵而故嗇之谓为甲闾者易而闾井者难也夫顾孺人者少而归其夫太学淡泉君而舅前溪公与姑浦夫人皆无恙淡泉君好修诗书之业与荐绅衿裾还往孺人力穡给之淡泉君用是以无内顾忧而会天有孤子二甫脱襁褓而茂才犹在孺人腹当是时孺人痛不欲生者数矣既而曰从吾夫易耳谁与立吾二孤者且不忍陨腹中子既免身得茂才躬乳之而孺子牵衣左右索哺则又口哺之以至小长次第遣就外傅茂才尤颖敏遂至成立前是淡泉君所受业独瘠而遗橐以授其中表浦及龚营什一息皆不利中外徭役猬集坐是家大窘孺人拮据应之而朝夕供奉二尊人不替前溪公先逝所以扶侍浦夫人有加而会亦逝议治丧葬仲氏奉政君谓孺人莹然嫠也家挫矣强自力任之孺人不可顾其三孺子曰是非二尊人遗气耶安敢委嫠而废大事趣均之成礼而孺人自是益务为俭勤所服缟素不名一丝褻长斋断鱼肉晨昏礼诵不辍而业亦小宽及宽而息之曰可以少行意矣乃急急为散施亡论内外戚属即向之所败淡泉君息者浦与龚皆厚报之人谓得无伤惠乎哉孺人笑曰吾何知惠知为杨氏戚而已盖孺人业六十余遘疴危甚强食者月余而一昔寤神授之食立起以至于今益强逾于壮时呜呼孺人岂不巾幗而丈夫子者哉其少寡而奉舅终次奉姑与李同抚三孤与李同能自树立起家与李同茂才晚达差不如观察然方以文学上公交车未可量也而诸孙中外至二十余人则又盛矣余故次其事授茂才而为之歌曰北山之栢卷然鬱青苍兮劲节孤峙冒陨霜兮下有苓珀坚且良兮绵歷改鑽永无疆兮畴其配李惟余杨兮孺人既以举茂才之觞美俗使者当问而采之上太史以为彤管则余小子于乡土亦与有荣焉

贺上海令颜侯中起考绩封父仰庄公母范孺人序

故事中外臣满三载奏绩无害得封其父母如其秩恩甚鸿也而往者独司理及令尹不得满而迁间不获以封请十余年来久任之说行满易耳然必台刻之荐者再而后

与甲令合又多不获以封请当令尹之报台满也台有扼而不许者示殿者也许而不为之疏留者不示最者也所谓不获请者也上虞颜侯中起之令吾上海也甫满而剡之积者非一矣两台迭为之奏留又为之白其最太宰嘉之以故事请天子予之告身阶文林郎而官其父仰庄公如中起母范封孺人于是一邑之士庶欢忻鼓舞喜中起之犹借而仰庄公与范孺人之被恩也其翹然而隽于士者曰临川同守石君曰大理评事顾君曰石阡守陆君太学顾生邑学三朱生相率而叩余山中请一言之贺余谓诸贤诗不云乎岂弟君子民之父母而侯有父母之德于民民既父母之矣仰庄公之与范孺人则而大父母也毋论愚智其恒情未有不愿父母之贵者也亦未有不愿大父母之贵如父母者也第闻之云间于天下至雄吾呉郡亚也上海割云间之半以为邑又至雄邑也编户十余万岁赋金谷数十万有奇簿书期会狱讼繇役之繁即而侯分身而治之日且不暇给黠民与吏胥通穴而处互炊而食肩胁傍睨以环攻一人而侯甫释经生之业何所习城旦言以杜彼曹之恣睢閔條而奏令绩章章如是诸贤曰固也吾侯无所藉城旦言第以诚格之而已诚至而明自生诸受讯者万端取侯词组而决胥吏为蛊者亦万端取侯一盼而掇昧爽坐堂皇以次按问某当抵重某当丽轻某当罢去亭午空无人矣稍至下春车门迹亦稀矣卧阁之中壁立且如洗矣侯于单赤拊循之若慈母而至巨猾大憨不少借即强有力者持之亦不顾相戒避徙去曰侯即寬我三尺法不寬我侯计其邑事治母所复溷令为月旦进诸生与课艺文谈经术诸生人人自喜以为得贤明师已又念邑久废乘博延耆硕辑之而身任其笔削乘且成则读者迺然诵良史矣夫天子且念侯于上海功旌及其父母而吾上海之士若民敢一日忘父母之报于侯又安敢一日忘父母之欲报于仰庄公范孺人余乃谢曰而侯之二大人已得志于华袞矣毋亦以诗之有颂祝皆为其上者哉吾固以窥诸贤之德之厚而其辞必有取于北壤岩穴之稿无求于世者以避谏而征信也子姑持吾语以报侯仰庄公少有才行尝起家障尉不竟其用归而与范孺人为德于闾閻间侯之贤义方之力居多云

封侍御若虚甘先生六十序

余浙江按察事甘君以书数千言自通于余若以余为可与征者最后始露其指欲得余之一叙以寿其尊人若虚先生六十而君之寮李大叅维楨与余善为甘君绍而从也余不识甘君然素闻甘君倜傥尚气谊有节士风举进士改庶吉士周旋今吏部郎邹尔瞻于狷狂间脱其厄忤柄国之雄臣而不悔坐出为御史已出为按察僉事脱然致其官而迹者柄臣败始稍稍起固心仪之矣今乃因甘君而知有若虚先生又因甘君之言而知若虚先生之为人余又何辞甘君之言曰先生有父惠州公甫四十而谢郡事归念犹无子祷于神神凭覲而赠公诗有商瞿语解之者曰彼商瞿也四十六而得子岂其祥耶更六年果先生生先生受性神颖然体稍弱惠州公怜之不令就外傅至七龄始手

书周子太极图说通书张子西铭授之先生一览辄诵以渐通晓其义少长擅经术工博士家言亡何遂补邑弟子益多读古文奇书骤感呕血疾养痾山中兼习养生业三载病良已时学士邹文庄公颇称东越良知之学先生造而师之凡再试于督学使者王新甫皆高等然至省试辄不利于是惠州公老矣叔季子子黠而贪自诡有遗产未析讼于郡太守辨其券之伪而譙诃之先生顿首谢府君悉我父廉均且勤恤我窃不忍于王父之遗体愿分帑以偿太守高其谊而许之属圉者一人以不胜置狱雉经死或谓可乘此而快意于彼豎子先生叹曰圉者实自经使我借而挟它讎不可况彼豎子耶且吾尚欲损帑而偿之今何挟为当先生之见构也恶少年睥睨其傍欲以摔阖自利先生如弗闻谨视之而已及不谷举于乡诸恶少阳亲近欲以观先生先生谨视之自若于是交口颂先生以为长者邑中正察贤推为乡约长先生率先以礼义闾警巷诫以毋蹈不善使先生知日不谷之读中秘书也先生来就养京邸两月余即拂衣归语不谷晚菘早韭山中故不乏何至割汝大官供也既别谆谆戒不谷毋忘而王父惠州公及吾师文庄公之遗轨易谦九二比九五汝左右箴也拜不谷御史封不色喜既不谷罢金事归不色忤再以金事名亦不色得曰吾犹故吾若犹故若而已性至孝事嫡母黄安人不以损橐见几微备极志养及安人之属纆而愿生为妇若女可知也先生于文好言两司马于诗好言李杜然至所结撰必匠心缔而发性灵曰某虽不才何至于词林中作椎埋耶吾子视家先生以为何如人而弗惠之一言余既读而返之而之家先生胡慥慥笃行若此夫致孝于嫡母而不以损橐为意孝子之所恒推遗体一线之息而施惠于讎我者又能为之补其隙非德之至不能也上而惠州公下而侍御君先生材未尝有所逊而不获脱颖于一乡纾志于一命固其穷哉然独先生上而有惠州公下而有侍御君为之启其端衍其绪又为之彰其嫩则亦不可不谓之达也先生生母林硕人八十有三尚健匕箸比闻用事者修前意谪甘君先生必且迎谓君若仍故若吾仍故吾也而已相与举觞而奉万年之酬倡于一堂不亦蒸蒸太和至顺哉甘君节士也必不至餽亲李子信人也必不至餽友而余虽易发多可要于是无腆辞君以为何若

封工部郎素轩喻翁八十序

喻素轩翁年七十七时世贞以其子杭郡丞邦相请而为之传大概谓翁能不私其力以拮据共养母又能不私其蓄以资季及伯之子而身任其瘠稍有升斗之羨輒捐以予姻族闾比贫不唯无怨而已贵不唯无骄而已而并所谓贫与贵者忘之而游于恬憺和适之天翁盖尝以素名其轩而吾仲敬美及邓太史汝德皆极口褒赞以为无愧色至于吟咏摭寫能用柴桑之辙而趣元白界人不得以雕虫之技目之余所为传仅仅如是耳而翁絕倒称快以授邦相邦相复奉持珍裘时时悬壁以示知者未几而邦相迁为括苍太守翁往来括苍与洪都之故里者三年矣而翁已寿满八十诸佐邦相治括苍者丞

俞君倅钱君司理周君盖尝覩壁间之迹而谓余实得幸于翁父子翁父子实欲得余文于是布币奉书走使千余里而访余山中乞一言以为翁寿毋论余衰懒不称言即有言而向所传翁行事略尽岂能复构卮辞以希翁之一解颜客曹子念曰毋拒也吾欲有祝于翁吾今者乃悉邦相于括苍括苍之士民实尊爱邦相而称之曰太守我天也其愿长有邦相以宁宇我赤子则必愿长有翁以安邦相于政杭郡之士民耳括苍守之风叹曰使君固尝佐吾杭未获尽骋其用于官而能令人思之若新今者不复望移郡愿且息之而藩而臬而开府杭之大惠固在也然则其长有翁以安邦伯当逾久子念又谓翁家洪都洪都之蔽西山为第十二天柱竇极真天之宫曰梅岭则梅尉学道处也曰鸾冈则洪崖先生骖鸾处也曰鹤岭则王子乔御鹤处也至旌阳真人许君上宾于帝又为之授记于石函以千岁之后有地仙出焉喻翁岂非其人耶而翁又时往来括苍括苍之治缙云其蔽曰仙都山者黄帝之鼎湖在焉宁无遗丹委液以惠来者吾且以翁之仙不死不得于此必得于彼余谓子念子之初祝不太近情耶其后祝不太远情耶近情者浅远情者诞吾所不敢荐吾所知者昔之传喻翁者尔邓先生欲进翁于素之上而翁曰吾安知上吾长保吾素足矣此传语也夫求足于素之上者非真素也入色为素入味为澹入气为冲入声为微要之一素也物与吾接不吾涅也吾与物接不物汨也吾葆吾真不以葆形吾永吾龄不以永名胡者为寿胡以祝称翁当■〈口展〉尔而笑嗒然而止子念之荐美而见褫姑次卮辞以授三君子

詹事府录事晋所子七十寿叙

始詹事府录事晋所子之寿六十也余从弟瞻美乞言以觞之当是时余解郟节归卧舟中忽忽不自觉其岁之日益后再起佐留钥今年夏六月考绩至淮而拜新命因以其间归里晋所子道迎余而谓曰比大人之寿我屈指于今十年不谷定鼎亦七十矣大人岂有意乎余覩晋所子之发须白且尽矣而双颧尚頰有少容食粥竟三大瓯犹未饱噉肉炙称是谈笑亶亶竟日夕不倦余私心异之因泛问曰子之南畝视昔益乎曰小挫矣家之食指日益而岁屡不登然不至废粢盛问诸儿壮乎曰赖大人之庆四丈夫子骈游太学读书粗成立矣诸孙几曰是十年之内育者十一曹长者能属文矣凡中外诸子孙男女亡虑数十曹日讯问安否颌之而已每会食釜戛而称不饱南亩之所繇小挫也去青宫久世态不趣薄乎曰守令驹呵犹时时在门乡搢绅衿裾有事必求解有疑必见质吉凶之会以为醮首犬马之齿用祭酒推者数矣一弟捷于乡一从子捷于南宫世态当未及也歌者肆乎曰赖大人之庆时时有之然而不以累也向者征艺必征色其后独征艺而已最后艺有征而无角取适情而已余乃曰此子之所以寿也夫子之产小挫者黜机械也其子姓益者天之适也世态不薄者人之适也歌不必色而艺不必角者泯嗜好也然则子将进于道乎宁独寿也当是时余与晋所子相征问而称其弟若辅鼎鞶六

人称其从子若泰亨輩亦六人从傍听之及余之留京司寇部而合以寿言为请曰庶有以觴我伯兄伯父汉法年七十者授之以玉杖舖之以糜粥杖端餽鳩鳩不噎之鸟也礼大夫七十而悬车致事余去此尚六岁然衰过甚不能待计发里中自筑一精庐奔之西北隅有白莲菘筠古梅之属环之卒卒不暇文其辞姑叙所征问之略付辅鼎輩觴晋所子且告之曰余旦夕归矣晋所子凭鳩杖而过我我当熟糜粥以待能更为我进三大瓿否

宁翁季尊师八十寿叙

我宁翁季尊师之七袞也不佞世贞方纳襄汉节里居而诸称翁之弟子者潘子许子輩以不佞之辱在列也州牧张君以不佞之有通家契也后先命之言不佞不能娴于言独举翁之得于天而尽于人者以为翁守方州而良守名郡二千石而良藩臬而良其功德于民甚厚一宜寿虑楚狱所全活减释数百千人固人人尸祝也二宜寿居平无声酒蒲博之好无肥秣甘脆之奉生不二色至艾而絶之取于造物者廉而足于己者固三宜寿周旋规折旋矩而非有为之其神不劳而意长裕如四宜寿内而家庭外而闾閻小不获意者置之弗问其忧患不得乘而琢其真五宜寿不佞既以五宜寿称翁第与之约更十年而得尚从弟子列称觴致不腆之言翁不以为陋而纳之矣既又为翁记所谓澹然庵者乃稍能推见其指而颇精微其说因得翁之所以为寿之根且谓味取于澹未已也必至于无有所谓味者而后谓之澹澹必至于忘而后谓之道庵虽用澹名必至于无可名不佞虽窃为之说必至于无可说而后庶几哉翁又不以为陋书而扁于庵之楣蓋又十年而过翁则宣发如故时时见稚鬢齿嚙决有声两辅皙泽视听精玲持履趨健谈笑有味神气益王第其庐舍则少敝南亩微损子孙之少者壮而壮者则已老矣八月为悬弧之辰诸生潘子许子輩复谋征言于不佞以为翁寿翁前期谓其子姓倩属曰老久恋世累若曹供养且夫岁俭而独吾丰帑竭而强吾享恣碾金以足吾匕箸违吾心顺吾口皆非吾所快也夫戚执之间称鴈行者其与存几何而忍以寿为乐去而操一叶之刀隱迹于两高三竺之间弥月不返守令之羔鴈及门而中却台司之干旄望里而趨起从者曰可以归矣翁始逡巡归潘子輩复申前请不佞曰师言之谓何而吾敢干之虽然以币饩往非翁意也以調言往非不佞所有也向者翁之所得于澹者优然而恒有余不见夫终南之深东海劳山之僻其人自少至壮不覩盐酪醯酱何论肥脆美其食安其居老者至数百岁少亦不下百余岁也然终其身鹿豕螺蚌而已翁故能极神明之用而取其斂备芍药之和而餽其漓所谓天下之至味固充然长在也夫任其生而无所知者终南劳山之叟是也以其无涯之智而强有涯之生者服食之徒是也俱非所以拟翁也翁真能进于道者哉不佞少于翁十八岁名为学道今发之白者与齿墮强尽矣犹不能大杜其德机而谬见物色以充家庙牺其于道将无仅能言之而已耶夫子奚取焉夫因薄

而征厚者野人之芹也汰非而得是者罗什之莲也然则虽以不佞之言荐可也

弇州续稿卷三十五

●钦定四库全书

弇州续稿卷三十六

（明）王世贞 撰

○文部

△寿序

宪副定山袁公七十寿序

当嘉靖中公为礼部郎而余以通家子得侍公邸公抑行而与之为尔汝交戊申之正月十四日公诞辰也暝色敛矣公折简召余至邸舍时陈水部子兼以他事不至独余两人对饮簋豆落落数之不能至十街鼓动张尚宝有功闯而入以一炮置余坐下欲以见惊不能则拉余至有功赐第华灯满堂酒徒接席不能识其人调嘲歌呼卷白畅饮夜分不得醉余三人乘兴踏月至张祠部先生所祠部亦余丈人行也宴客甫散相与大噓呼酒几质明而后散自是或过公或过有功或过子兼而三君子者亦时时过余已而有功谪子兼分司通州寻视蜀学政而公以久次出守荆州遂星散矣公之入自越州司理司理时甫踰冠而出以荆州则仅踰立矣谏断治赋前后褒然为天下最而荆州之政于调悍王抚边民有深爱焉岛寇方绎骚温处沿海诸郡县公以才选饬兵其地至则益治戈船训组练曰不尽敌不止士气甫振而公以绳墨吏过严为所中归公之归犹未踰强仕天下之持议者皆为公不平而公固怡然意自若也治室于西山以奉二尊人颇有园池竹木之乐寻移止郡中室不取华苟完而已衣食不取丰足口体而已客至必留留则命博飞巨罗不复辨宾主绝口不谈故时吏治与所以见中之故郡邑岁时旅见无所居间盖三十年如一日也间谓余燕中故知无复存者独吾两人若长庚之配残月且谬长于若七岁余日之几何乃筑圻于某山之麓衣以松柏桐檟俾余为志若铭而刻之珉石其刻颇已行世而所谓松柏桐檟者离稚而苍至拱把矣而公尚无恙嘉平之月偶过公公曰上元夫人前一夕而抱送者七十年矣若岂有意乎哉余因举戊申前事公恍然曰不记也相与屈指为戊子凡历四戊乃前语公荆越之德政津津犹在人口今贵矣然而

不为极也安矣然而不为饶也有贤子孙矣然而不为显也公且恬然于寂寞之乡而无然歆羨无然畔援天之所以报之宁有涯哉公曰快乎子之言异哉吾所闻世乃有先志铭而后颂祝者余更前语曰未也圻之石且泐松柏桐楨之自拱把而合抱而公之朱颜绿瞳犹若故余之颂祝犹若新也繇是而八十而九十而百岁安能以地下之辞难我公忻然而笑曰请举子之觞

吴母林太孺人六十寿叙

余友潘文征王念之时时过余称吴母林太孺人之贤也太孺人者卫裨帅林侯女也笄而归光禄丞吴君当是时吴君有父曰布衣公富至倾里而性俭节不善事里贵人起大狱中之且论报而布衣公犹嘍喑不肯解橐中装也太孺人谓光禄君公少而见苦为生难故重弃财子不覩陶朱公之长子乎一不忍弃千金至立杀其弟夫弟犹小缓耳而子尚可缓而父乎妾请为子具橐于是悉出其橐藏至簪珥钏佩衫襦之类皆以充费光禄君藉而南北走京辇谒台司白见公冤状尚犹以公富难之俸赋缓二万金而后释于是布衣公得释则四壁立矣意郁郁不乐太孺人进曰毋以为也公第如初筵儿请任其详于是公稍稍振久之竟用宽乐终盖布衣公终而所遗媵侍不为少太孺人迹其少者问曰能守乎曰不能则为择配而嫁之其能守者则曰若奉我先公敢以薄继乎大宽其衣食油油然至白首无间也光禄君之俭节不异布衣公独其为人周慎而谦和跬武之外鲜违声拂色以故其业益饶资用不加广而无一朝患皆太孺人相之也太孺人恒谓吾侍夫子可以寡意外矣及光禄君之启手足而后以太孺人知言也太孺人茹荼而抚今太学孟起悲苦万状然不敢不忍息而终光禄君托既除服阴察太学之负荷也与妇季之精计算也举外政授之太学内政授之妇季而治一佛庐于寝舍之后时时屏处焉心精内观以求所谓净土者时海宁之佛殿圯与余有事于比邱明因太孺人首捐百金助之而顾太学毋以我为德也他道途桥梁之平治指可屈矣戚党族属不啻九里之润大逾胜布衣公光禄君时太学丰硕明慧工制科业兼能古文辞好客客恒满坐又性廓落喜施客之能言太学者必归太孺人以为义方之诲成之也然太孺人实温温令善旦夕太学率妇季与诸孙朝于太孺人时时出酒炙相慰劳太和之气相蒸煦于阃第间有余欢矣余之悉太孺人殆甚于二君子独于戊子满六袞而上元之前日为太孺人诞辰则未之知也二君子肃然而来请叙以寿太孺人余窃谓太孺人之智善因时者也布衣公约则约光禄君约则约至太学舒则亦舒然约而能悉橐以出布衣公于狱则孝之本矣舒而不事耳目口体之好以其羨作佛事广施舍而不住色则仁之用矣孝以为本仁以为用博厚高明悠久无疆宁可涯哉二君姑以余言致之太学为太孺人祝必且曰敬举二君之觞不佞愈有光矣

松江太守喻邦相先生五十序

喻邦相先生守括苍时其太公业八十而就养郡邸甚壮当是时郡丞俞君某司理周元孚驰书舛中乞言以寿而先生之客曹子念者尤迫欲得余言余故善先生而严太公不获已以文授二君子而以诗歌授子念先生前后贻书称谢辞甚修亡何先生用括苍守高第移治云间云间所隶属邑不能当括苍半而户口财赋讼狱之类什倍之会久阙守废案山积胥吏指以数千万计靡不蠹食其中相顾而窥先生先生坐堂皇吏以次奉牍上其急者立决缓者唾而下之曰是尝我也后必痛扶汝盖不三日而山积者若扫矣乃以其间延接乡荐绅大夫已而召诸生逢掖询问先后政术失得傍及经术艺文咸饱意去即有所陈说不能有加于先生而至于乡三老田更市魁之属以役见者先生无不揽纳其所疾苦便利不待絮立暂有所答往往出意表既罢出咸吐舌曰喻使君神人哉盖余卧舛中去云间百里而遥讴吟颂歌之声日接于耳盖尝以间过舛不佞从容谓曰民之就沟壑者俛半矣而吾郡邑之守长未有以慰藉也云间计安出先生慨然而起曰命之矣损有余补不足此之谓权归而手教下三邑曰太守敬问贤公卿大夫及富人良家子天降割于我民禾黍之地汇为巨浸者五月余矣天子幸加惠赐租其为诸君擅南亩者良厚然不能逮单赤太守问之庾庾无见粟问之库库无见钱欲捐禄甚薄不能活百人命诸君幸有余即量资力而捐之上县官以贍饥者太守力能得之上赐勇爵立棹楔唯意所愿欲不然而弱者骨壮者徙其又壮者揭竿而从萑苻之后诸君独能偃然长有资蓄乎即不然亦谁与为佣耕力作者于是咸鼓舞乐输恐后不弥月而得金钱二万余米数千石以次给散所全活万计先生夷然不自有其伐而会荐绅中有嗇而悔者或以他事不便者颇孽先生先生笑曰彼岂以余重去郡哉谓童子束一车装旦夕发矣然而先生廉竟不能孽也子念走之白下谓喻先生今五十矣吾向者乞君文以寿其尊太公为二君子所夺今者以寿先生二君子不能夺也故尝以谓喻先生先生逡巡谢不敢迹太公然似欲得君言而快者君将若何夫余之善喻先生宁后丁念哉先生好读诗若文意不可一世士顾独折节推念其欲得余言而快固当夫唐世之诗称巨丽者高常侍其一焉然至五十而诗始成中岁脱簿尉始辞榷楚及其刺蜀州则已晚矣故其诗曰龙钟还忝二千石愧尔东西南北人伤迟暮也汉有朱翁子者五十始一遇为会稽守故尝读书有文章然不闻其能与相如马迁下上虽一策勋东越然不能收循吏之迹如渤海颍川喻先生三十而诗成四十而文成五十而连典大郡全活黔首以万计彼二贤者不瞠乎后哉为我谢喻先生出而治吏民勿称倦入而侍太公觴勿称老毋若李孝贞之言宦情文思遒尽者彼殆赵孟偷也勉旃天子之玺书赐金缙币且屡下矣苟以语太公千秋之业当更有跃然者

佳山吴鸿胪七十寿序

吳先生者歙之賢士人也歙俗貴姓而吳最甲吳譜以十數溪南最甲溪南之吳其顯者以十數先生最甲諸稱甲者或以貴或以富先生之甲不盡以貴富而以賢先生之賢自其父處士公始也處士公繇徒步起家擅桑孔之算累帑埒素封先生修其業而息之積織從巨至殷殷陳陳不可費數然皆能以義衷其入出時時有所施舍故吳氏之甲不專富而先生尤善以文飾之既成進士業游太學射春秋經不售歸而棄去與其從父別駕若虛從兄近龍海陽陳山人達甫為文字游三君子皆博學砥行長者內嚴先生不敢以年行加之先生顧獨用年行遜挹三君子然以間荐其切劘三君子歡然受之無所不靡先生好習理性言自六經外于濂洛亡所不精詣而近代獨服膺薛氏河汾之學以是得明經術聲而故學使者黃安公下有司用帑焉俾聘入丙舍听讲先生第以一奏記詣御史門辭謝弗任而已中間嘗從吏部選人得大鴻臚之屬丞佩玉御綉以與台瑣接武于黼宸之間其俦相與艷稱之而先生夷然不屑也上書自免歸日侍處士公几杖暇則與二三子談道于大鄣之陽于是人乃知先生之以吳氏甲者果亦不在貴相率而推先生之賢而先生今年七十矣其子孝廉諸生某上書數千言自通于不佞俾其友梁生某介而請曰吾父業七十意不得兩司馬之一言不稱為七十不谷為子而不得兩司馬之一言不稱為人子不谷居恒念當漢武時汲鄭程卓之徒遇兩司馬而不知所以為其親及身者以為恨今茲幸而復得兩司馬且也左司馬同里（闕）之幸有成言矣敢藉手以干右司馬左司馬者汪伯玉也余笑謝曰左司馬言之余復何贅夫漢之兩司馬以氏也今茲以官也梁生曰古者官為氏余諾而未敢屬草也居一年而征之先生之里人信又會適當其期乃次以授梁生曰為我謝吳先生而先處士公九十而猶嚙決策蹠以雄于里先生尚少于公二十年所視處士公何若吾聞之斂而不散者以治家非誼也然于身則饒散而不斂者以治身非法也然于家則宜先生能兼采之乎遲之更二十年請以處士公之觴觴先生

壽郡牧林方渠翁九十三序

閩自明興二百余年休養生息其姓日以蕃而獨林為最着林之貴至祖父子孫昆弟鵲起科第而又多壽考若文安貞肅之類其貴以八座為恒調而壽以八袞為小年然所謂林者地不必出一郡望不必出一族而其最壽考者曰福之南安公享年百有四台使為之建百歲坊而其子少司徒應亮歸侍養亦八十餘父子華發相隱暎金紫冠蓋出入所目屬其次則興之衡州公衡州公者學士大夫所稱為方渠先生者也年九十三矣而步履視聽愈矍鑠七箸益進有子曰雷州守民止余故與雷州君善因以得悉衡州公公之成進士而令乐清也輕徭稅省刑罰一切為近民之政而方于事上御史行部至乐清頤指事竣且游雁蕩公歸驚曰御史乃游雁蕩耶不為治供帳而御史所詰問邑政亡

不井井者乃更谢而心奇之治行冠两浙以高第征顾仅得比部郎公大相张文忠公所取士也而又用邻壤故习识公公旅谒张公值选部郎刘在坐张公指谓曰林吾比封令甚材之奈何以常调相待选部郎面赤唯唯人或谓公一诣刘可得志也公竟不诣刘亦不谢张公而会上有所不悦于昭圣壬人乘间摘其弟建昌侯不法事当公曹公与曹长奏牍稍欲直其冤触上怒遂得杖而谪佐吾太仓州守时余童子时微闻父老言公之宜民也未几迁肇庆同守督抚时用兵五指山檄公监之兵骄甚方纵剽公至而不出迎乃缚其长送之台一军股栗已又监征八寨兵前后皆捷事闻预彩币之赏台荐屡上公始复入为比部员外郎未几而衡州之命下矣公守衡复有异政劝耕息讼修文教裁武斗一时翕然庶几文蜀郡龚渤海之风会有麻阳役公选厉精卒得二千人付郡尉将之跳荡冲斗所至无冲锋台具以公功闻上而会承王母忧归既服除遂不复出盖栖迟山泽者垂四十年所还往皆三老布衣交浆酒藿肉谈笑从容竟日然绝口不言县官事问所居官治行亦不荅盖公仕宦之日少未尝少挫折其志而屈其节震荡百变畏险万途而吾之天固自如至林居之日则长矣然未尝以世念世味汨之宜其视履考祥之元吉如是也吾闻公之里有弟与兄争产而辟者惧且得罪以百金夜为公寿公语之曰若所争者计百金耳胡不损之以与而兄而兄必喜讼可解也弟如公教讼立解兄弟欢然如初人谓公廉可几也能以廉化人为孝弟不可几也当雷州君之守南司徒郎时时过从语及公未尝不泫然深思也曰不谷有弟民止在北司徒属而老人独里处不谷姑请告以奉朝夕如何余告雷州君若归而有以慰老人则可老人不欲若归是以归失老人意也且老人虽大耋而五官之用甚壮匕箸日益是必且登南安公之年而进之君亦自司徒属而为少司徒始用司徒公例归养不亦快哉当司徒公之归养有子如楚为学宪而君之弟仕而资歷约略亦如君闽之林其寿考福泽宁有加于二牧者哉盖余与雷州君语之明年而君来乞文以寿公因次而授之如右

寿大叅从野彭先生序

余少则闻宪孝时大司寇彭惠安公之贤也其提身必端而后顺应其持论必大体而后责治办其所履官必先宗社生民而后及禄当弘治初仕至八座尊显矣一旦有所不合即乞身归而王端毅公为太宰力欲留之而不可得然其时县官亦不甚急公以故公得竟完其身名使天下后世无纖芥憾于公而不能无遗憾于世公去今余百年闽之人谈公凛凛犹若有生色第公之后人鲜能树功名自显见而从子忍庵公以文行为学使者忍庵公子定轩公以廉节长齷运差不隳其家声长运公之子从野公则公之从曾孙也从野公弱冠登贤书以母老司谕黔邑慨然慕惠安公之为人不緣小官沮既成进士出令广之揭阳公甫至而岛寇来围迫城谓公书生易下耳公先吏士挺身睥睨间与最下者分甘苦寇知不可犯乃遁去邑人有亡赖者涅其胷文曰天地神人主以此惑众

乘间且发公掩捕得而杖杀之余党股栗立解时它寇犯破公乡郡有嫡母八十余在围中公哭曰旦暮人耳安能免即解印绶归行求得母尸以葬匍匐委顿哀感行路五服之内中寇者凡二十余人皆收而衣食之当公之去揭阳卒卒不暇为名而其人感公至三载立祠生祀公矣自是公郎司农署出治潞河天津仓民感其泽脱鞮袍寘戟门入领署篆大司农倚之若左右臂出守广西之桂林厘其疲劫而衽席之折伏黠藩之豪气噤莫敢吐入覲治行冠其省遂进其省按察副使以至叅政时议大征八寨猺幕府问计公曰若借以铄其锐止弗剽易耳欲因以为功非所预闻也幕府矍然称善檄公纪功一切听进止而公故折伏诸藩豪而其王以葬其母妃擅役广西民且尽敛其竹木公勒停之王贾诸豪故謠诮公欲以为阅端公巍然不动乃已而微中公以它事竟得白简去矣公名位虽不如惠安公其去不以大臣体亦少亚公而名节之砥砺政治之卓犖仍孙之于鼻祖不啻箕裘尔也且公乞身于甫艾时山川之所抒发朝夕之所共养所以愉志而适体者与惠安公絜短论长宁至大径庭哉公与余弟故太常敬美同年而余少长于公二岁公有八子多廩学宫而其颖者在公交车在公交车者名某来乞余言为公寿余既举惠安公事语之且谓商之时贤大夫鏗者善营卫之术歷七百年而遁于流沙公岂其苗裔耶营卫吾所不敢知语云仁者寿仁固公所自有也亦何俟乎余之祝

太宰五台陆公七十叙

万歷十七年己丑腊月南太宰陆公上书致其事诏谓公老成端亮清望素着强留之不听归无何为十八年庚寅公寿七十矣二月朔为公悬弧之旦而公之乡卿士庶尹若而人以不佞之习公也与公之私不佞言也征辞以侑百岁之觴不佞于公通家兄弟也先人大司马从公之皇考赠少宰公第于辛丑不佞贞嗣从公第于丁未而仲氏太常敬美则与公仲学宪君偕己未第焉盖世讲通家礼其悉公无论虽然使我更仆而数之宁有如上之所称老成端亮清望素著者乎夫不佞之托交于公者四十四年矣而仅能得其事者何说也公之成进士也分宜相时当国匿其险而欲以虚名笼罩天下士公丑之而宗人大帅某其权亚分宜复借公为重公逡巡从选人格得邑令去既政成当征备台諫而复避遠之仅得南散曹去分宜之客尚书赵以兵事见幸上出南讨阳浮慕公辟之帷幄而公时时以正谊格之彼不能有所加于公公亦不为之下及大帅逝客赵斥分宜久之乃败公始徐徐出繇祠部郎迁考功以至选部时太师徐文贞公代当国尽革其故而虚心以听公公益得发舒郎祠部秉礼以抗中贵人郎考功文选壹志以塞诸幸窞其所登进岩穴及沈抑在下者必天下之所称贤长者也所抑拙必天下之所诋以陂陋不齿者也不然则其有隐德阴伎而偶未露者也公信心自是积久而文贞公不能无少齟齬见中忌者以归未几而文贞公亦罢政公往来云间里与文贞公下上议论毋少让及用事者与悍相比而修郗于文贞公起大狱窘之子姓就系余皆鸟兽散不能召门

下一客而公独竭心力百方居间毋少匿讳及事解文贞公乃叹曰吾愧与绳吾愧与绳当公之在郎署时与江陵公石交诸所以相磨砺有国士风拜相之初蔚然重矣而公尚忧其汰以书时时风之及入为少司空而江陵公之汰可知也公侃侃力争至面两赤而不已卒拂衣归及再起少宰而言者摺江陵之短至欲加反逆法赤其族下廷臣议公毅然曰江陵权臣也非逆臣也且使端揆之地而污此名何以示后当是时公卿之有远识者皆心服公而不能快甘心者之意公又拂衣归公自成进士以至于今凡四蹶起矣而松柏之操与姜桂之性如故公之急人也若已而其急人之冤也甚于冤己其所是即讎弗避也戚与大臣弗避也其所非即戚与大臣弗讳也公性廉无所取而又好施舍五服之内外取资若困廩而微信浮屠法岁之出往往与衲子僧庐共之以故恒不给而少宰公之产半挫公夷然不屑也嗟乎上何暇习公事顾其华袞之褒所云老成端亮清德此四者有一之不脗合乎否也闻公且复上书以年至请夫上之知公至矣而公之所以报上者当遽恣然已耶诗不云乎酌以大斗以祈黄耆又申之曰黄耆鲐背以引以翼然则上之所祈于黄耆者祈其引翼也公毋遽言去其强精神加匕箸上旦夕召公矣或谓不佞贞子少于公五岁且上书力以骸骨请胡不以己为公鹄而强留之不佞生平在毁誉间老而尚不免宜去公目炯炯然啮决如少壮而余舌枯而齿堕尽宜去公留一日为县官益一日余留且负恩宜去是故余不敢以我之去拟公亦不敢以公之留拟我而姑叙其所见如此

御史大夫印川潘公七十寿叙

当万历庚辰吴兴潘公以御史大夫治南北漕河告成而天子嘉之特进公大司空加太子少保当是时河工诸使者郎曹监司而下若干人走不佞舟中乞言以叙公之绩甚详而公时年六十矣公之姻吴詹簿者复乞余言以荐堂上之觞而公自是迁大司马叅赞留务入为大司寇谓且行相事而以持法失言路指归卧菰城里中岁己丑河以不时溃漕道数梗天子思公功即家复拜御史大夫仍故节治之公念以身备大臣受恩重不敢以筋力辞即日驰之官偕其僚属召见吏民摹画指撝数百千里上下若烛照鉴哲莫敢支吾不旬日而赴工不浹岁而报竣天子益大嘉之特诏再予三代诰优锡金币所以褒诩甚至而无何为己丑公盖七十矣于是河工诸使者郎曹监司而下黄君曰谨陈君瑛陈君文燧等相与谋曰盛矣潘公之遘也业当有寿言有叙绩而往者庚辰则俱以属之王先生夫公之绩伟矣第且未竟而吾曹故俨然而称百岁之觞以从幕府则请先生寿言于是复走金陵谒余礼如庚辰故事不佞何足以再当潘公第犹忆祝公六十时公方履百顺之境而造于宅平无为之域辞作行而进坐论乃一旦事中变几至不测以归公怡然若素无官者夫有事则急公事定则弃之及其有事而又急公使一念之未纯宁无以前辙为鉴而懷次且逡巡之念公不尔也朝闻命而夕就道夙夜胼胝期之尽瘁

业无问前辙而思绍前修夫文武之用虽不同公之心何异郭汾阳王裴晋公哉昔汉武作瓠子之歌二章拳拳以去河之害而未及导河之利也乃其乱曰宣房塞兮万福来岂不以河不横溃则夹河之民不至鱼鳖而岁收其赢以实太仓其福不在下则在上故曰万福者大之也公今四治河河不至横溃其害去矣漕岁岁无阻夹河告登其利广矣天子飨万福于上而首功如公宁不有沥漉之余以润公儿齿黄发哉语云仁者寿吾固知公之必寿也少需之天子行将以坐论召公矣

封户部右侍郎（阙）舒翁暨配某淑人偕寿七十贺叙

余少则好谈公卿世家阀阅之贵福履之隆与遭遇之巧有所见闻则录之累至八卷目之曰盛事述当万历之岁在丙戌上临轩策公交车士而舒子及第第三人特拜国史编修是时舒子年甫十九而厥父今司徒公时见以大中丞抚贵阳舒公年亦仅四十六也天下之荐绅先生皆艳称之以为一时鲜有能俪者谓且入余盛事述中然亦不知舒公之有父若母也已丑夏余以考绩至淮与公晤语久之乃知公之父曰封司徒某某翁母曰某淑人者犹健饭无恙退而益自叹诧希有述之于吾编益有光其明年庚寅飨兵观察使固安张君副使临川陈君俱使使走金陵布书币以请曰封翁之与某淑人偕七十矣而悬弧之庆则以七月设帨之庆则先期为五月然其日则皆二十时则皆辰亦良异哉吾子其辱之一言固公之所欲荐于二尊人者也余谢不敏窃谓公世家全州全为古零陵郡其山有书堂龙隐水则礲泉漱玉出洮而入湘万桂吐芬羣岩环秀宜若有福德文武博大之材以灵承之而自元以前未有称者明兴始有蒋文定张宫傅诸公然贵不奕世媿不骈集识者犹若缺焉盖至翁三代而始大畅嗟夫故也岂二祖列宗之深仁厚泽其磅礴渊淳与所胜者会久而后发之翁耶翁与某淑人之隐德余不能尽究意必有为之本者若舒公之甫弱冠而从政令海南邻邑之润九里入铨部冰蘖凜然黻歴闽楚汴越辙迹几徧天下最后镇贵竹而安氏惕息共命漕河万里飞粟不乏淮南半菽菜色徐返舒公之为德博厚光大若此封翁与某淑人胡能弗永飨也余不文仅属此语以报二君子为我致之公侑以广陵之酿使太史君舞宫彩而上二尊人二尊人若登春台而挹天浆其祉祺宁有涯哉

弇州续稿卷三十六

●钦定四库全书

弇州续稿卷三十七

（明）王世贞 撰

○文部

△寿序

寿邵武守越湖邵翁八十序

今天下称名族者以十数毋如余姚之邵其类者即未论三事自二千石朱轮而下毋虑十余人而又最贤所敷歷中外多卓犖有治声最贤而又最寿有提学讳蕃者九十余犹却杖而徒里中时时称乡饮祭酒其继之为白竹公讳德容其又继之则白竹公之弟越湖公也当越湖公之举乡荐有声而困公交车久人固已重其族而疑其不继然公繇选人得六安为雄州其入赞左军为上佐其以冬官郎治水为剧寄出守邵武为大府公后先报绩必最而见于台使者之推毂不易屈指数天下始信公以为终能重其族跬武卿佐矣而公一旦慨然上章乞骸骨归公之归以嘉靖辛酉而距于今为万歷戊寅十有七年而公春秋亦且已八十矣当公归时有八子咸朗秀玉立公岂不爱其跬武卿佐而敝屣之且所至积阴隲当食其享而必欲不尽其余以遗其后而是十七年之中而八子者咸卓然自树立以有声称于时其举乡魁而仕称名令者以贡主邑计者茂才待荐者凡六人而其最颖曰侍御君陞吾不识其它诸子顾独识侍御君又不能悉侍御君它治状顾独悉其按吳时所上章疏十余皆曙达国家大计与东南民瘼所獎进贤守令若而人所斥逐贪墨墨绶而下若而人所平反冤狱若而人一下车而煦煦然阳春之发于轮辙而被于广莫也侍御君按行海戍远斥堠核兵费适岛寇阑入勒吏士迎击之鹵斩过当然推其功于幕府而身不居曰吾台使体固然侍御之移按江北与吾吳邻其吏民来矜曰若固德邵使君能久有之乎吾吳吏民应曰吾不能久有使居虽然已先之矣抑若福胡晚也夫以越湖公之为循吏积阴隲以锺于侍御君天下固信其事且信侍御君之必有后然不知侍御君之为德其所滋益于越湖公者非浅尠也今夫水源深者流必广然流广而汪洋汗漫则其源必不易竭木根完则其条枚之发也必盛然条枚盛而霜霰不见侵其根益以胶结而不解此恒理也隆万之际太和之所郁积盖逆溯而上蟠自三事至八座未易屈指数即越湖公又奚疑焉侍御君之旧属龙身之者司理吾郡时辱君国士之知谓不佞为吳人必当为吳人致越湖公冈陵之祝不佞夫岂唯吳人盖尝藉二天焉又其知吾子骥也实不下身之敢以不文对虽然余虽少于越湖公几三十年然余之初解青臬也实前公二年而又强出数起数蹶以至今日车且生耳矣公其能无弁髦余言否也

又

岁万歷之戊寅为越湖公八十之期而其子侍御君之故吏曰龙身之者赞不佞之一言以为公寿不佞又侍御部人也以故特详于侍御君按吳事而其大指窃谓越湖公之为循吏为长者积阴隲以锺于侍御君天下固信其事且信侍御君之必有后而不知侍御君之为德其所滋益于越湖公者非浅渺也文成以授身之未几而侍御君奉天子命按江右道吾吳吾子骐及诸生张文柱邂逅于姑胥之溪侍御君盖不意身之之有藉于不佞言也出一编示曰此为家大人七十而大司马翁公寿之者也此为八十而水部郭君寿之者也夫翁公越湖公乡人也以故最习公而其大指则谓公世寿其九十而少一者王父司训翁九十而加二者父封水部翁九十而加四者兄比部翁又世胄则入明而举科第登仕版者二十有九人又世德则为父兄者不以齿爵加其后为子弟者不以才贤加其前入公里而闾然若畏垒也已融然若华胥又谓公有寿者相一虎头二燕颌三田面四河目五广颡六丰頤七盎背八垂耳而坦度厚德实将之郭君尝为闽理官而公闽之邵武守也以故习邵武守又尝将作淮南而公又淮南之六安守也以故又习六安守其称六安守则云公至而值岁祲为茹藜饭■〈食 臭〉辨色戴星以勤嗇先之而又减省无名供应损輿皂禁勾摄寬徭赋自是岁不为灾吏民戴之语具志中其称邵武守则能先倭警而增陴复隍授甲壮者寇至无所掠乃敞郡门以集下邑之避者所全活万计郡故有饶户供诸使客及守倅之公厨取给焉公悉革罢之至以是失僚吏意阴中公公不之报亦竟弗动也夫翁公习公于乡则称公乡郭君习公于官则称公官不佞习公于子则称公之子此三者俱非所以寿公也然而公所以寿者俛得之今夫惇龐亭毒未易漓也沃根渊源未易既也穹窿磅礴未易蹇也廓泽而沛之嗣德而衍之以交相致于永永者又未易艾也以此三者寿公可也盖南山之诗云乐只君子万寿无疆即继之以乐只君子民之父母棫朴之诗曰芄芃棫朴薪之樵之即继之以周王寿考遐不作人侍御君之治吾吳吾父母也骐与文柱固侍御君之所薪樵者也其所愿在无疆之寿与作人之遐于侍御固已厪而况于为之父母者乎又身为德于天下国家者哉或曰固也子何以重颂之曰不然南山之与棫朴章何以俱再也咏歌之不足故重之重之者忠爱无己之意也遂授其语于二子以往

贞吉篇为华母顾太安人寿

我先师大夫学古入官乃弗究赞案曰我不敢自怠自佚家于政惟共养考妣惟弟舅惟惇族惟省恤嫗党天不吊于室夺厥元妃次顾实用德接曰我何以当公齐夙夜栗栗汤液滫瀡以时进退衣纁以候必躬曰不腆一心專精于公所既受署家臣十千指男女有班耕织有序出纳有度筦钥有纪无嘻嘻无嗃嗃无乱行无诡伦公曰都良哉顾拜

稽首淑慎乃仪以相夫子毋敢昵进维吉月熊罴叶于梦乃笃生我春官叔阳是煦是乳若涉春冰毋或堕于襁褓先以身仪弗纳于邪以视伯仲惟均公曰都允若妇允若母惟阳若大夫之训夙惠且成哀然公交车予虞用除爰咎繇爰副秩宗爰积三最皇心孔愉安人翟蒹轩鱼佩环雍容以荐于公公曰都予耄期倦于勤汝其为政家用是康子孙其昌甲戌公宾于帝安人请从公曰咈哉汝弗揆于予衷三孺子不夭匪汝曷恃安人复拜稽首益毖益勤式廓其初阳帅象胥弗讐厥恒为时选臣既蹈兹百罹即公于宜安人控吁复请先弗克卵翼孤孙若置股掌天复剪我华秀而陨中弗实弗坚安人乃言曰未亡人之不恤奈何使阳斩焉我弗树后阳则弗歆我弗树我后何以覲我先公卜于伯介子吉阳食卜于中介子吉阳食阳无子有子其以绎我公既立后引养引恬师师怡怡闺愴忘亡家臣受职以次理生屋润于北亩拓于南于橐于囊乃积乃仓癸未宜人登于鼈诸子太学暨鸿胪执觴溜之左北向诸妇奉盘殮溜之右北向诸孙妇及女各从五服之内族姻以齿男执羔羊东序女执脯修纯丝西序臧获以班列于墀家之诸老将扬觶安人辞弗敢受曰苟不大弃先公之命其以一秬鬯卜庙祝史进曰信哉卜而得繇坤之六三含章可贞无成有终又其彖曰安贞之吉应地无疆吉且无疆祥孰大焉寔惟有终之贞门下故吏纪其言以颂

寿大司寇景山钱翁八十序

当大司寇景山翁七十时而不佞旬宣浙西部获效一言之寿以故太宰朱恭靖公为拟恭靖公之称乡先生盖三十年云而翁是时谢不任而里居仅三易岁也居又十年而翁已八十不佞之解三镇节且四年而其子进士君复乞一言以寿之不佞乃谓进士君子之家大人距前为寿者十年所有一易言惰行足断断人齿否耶曰否子之家大人所居重于郡国守相顾能得其居间一语否耶曰否吾吴俗偷未见子之家大人而矜少贵者有之然未有见而不自失其贵且少者也未见子之家大人而自谓才者有之未有见而不自失其才者也彼美衣甘食聯车骑听夕造请姬妾递进丝竹成列固不能一一尽格之然未有不畏其知者也盖十年所而吾吴俗赖子之家大人而返者三四矣即尽以恭靖林居之日畀之其不尽返而淳者几希不佞向者窃有比以易鸿渐于陆其羽可用为仪吉吾验之若左券也进士君曰然于是不佞乃言曰子知世之长欲有子之家大人也与子之家大人之寿之益于世也夫亦知子之家大人所以寿乎哉其颀然而玉立昂藏若鸛者貌寿也攸然而舒恬然而默者器寿也冲然而若虚藹然而若春阳者德寿也虽然犹未悉其所以寿也子之家大人寔产于孝庙之代当是时君臣休明中外静谧兵以不用为威财以不蓄为富太和之所薰蒸洋溢发而为巨公大贤所为寿者先天者也海内之治至于今极矣圣王垂拱而八荒宾服岁屡丰登嘉祥时奏而子之家大人方憩息乎高明之墟而优游于志物之享其所谓寿者后天者也且也今之八座而五湖者

其逾九裘一人曰大司寇应公逾八裘二人曰御史大夫潘公大司寇冯公其开八裘二人曰少师徐公少傅吕公夫岂独子之家大人是皆至治之所产而至治之所优养者也所以助太平之象岂浅浅哉进士君欣然而起拜曰异哉以吾翁而验子言以十年之前而若左券也今以子言而验吾翁于十年之后而又何疑哉请归持以为吾翁颂

寿宫保大司空印川潘公六十序

印川公之治河而报成事也三事大夫之颂公者乞余言以为赠未几而天子果嘉大公功伐下尚书定议闻峻加公太子少保领大司空子一子官赉白金文币仍虚端右之席以待公以三月拜命而后一月为览揆之辰距其生盖周甲子矣公之故人吴詹录君驭谒余山中而请曰唯是吾子之善颂善祝也虽然其颂公也以天下颂也其祝公也为天下祝也非以驭一人颂且祝也余谢不敏而后报吴君夫岂惟吴君之为吴君颂且祝夫岂惟吴君之为天下颂且祝即不敏奚以异焉盖余自弃于世而窃山中之日得一习养生家言诸言养生者人人殊然大要谓神太劳则竭形太劳则敝是故毋役神以完毋役形以坚而后可以长年及读大禹纪则自其娶涂山氏而拜司空辛壬癸甲有子弗子唯土功之荒度盖居外者十三年三过家而弗入车于陆船于水橇于泥■〈木辇〉于山手足胼胝步履跳若巫而弗恨导九河定九州岛则九赋式九贡其纤琐茧丝牛毛而弗已盖天下之称善劳神形者莫若禹其唯民之是利而损己之不恤亦莫若禹禹固谓之亡间然要必不能自致其天年以终而玄圭告锡之后平格之数迨百其替为说者虽甚神而亦甚疑之得孟氏一言而后决曰禹之行水也行其所无事也白圭谄功以愈禹而孟氏又辟之曰禹以四海为壑今吾子以邻国为壑水逆行谓之泆水是故逆则襄陵顺则归海其恒性也顺而行之行所无事也甚矣禹之示迹劳而收功逸也当公之三治河其事益艰其责益重且巨而天下之危治河者意非公所克任其易公者意弗终克任河其贤公者苦公之迹几于禹其自贤者人各操白圭之见以相角而公一切寘之曰成败利钝非吾所能料也吾能顺之而已自公之筮行而水即得其性以与海合海不挟河而横而维扬之土膏显播种时若河不沮海而怒而淮北之漕道通万艘直达于大都公亦行所无事也公虽迹劳始讷何尝不逸终且也禹所治九河公所治得九之三四其广狭小异禹似难也禹役民于溺公役民于饶其所因便小异禹似难也禹之佐有伯翳庚辰厉山氏而公少逊焉公似难也禹不取计漕而公取计漕公似难也禹之所难者与公之所难者各居二而又何疑于公之不禹年也公始成进士拜郡司理即为才司理进御史即为才御史出而按左广则以风裁称入而视畿甸学则以模楷称又超而佐廷尉则以明允称又抚江右则以博大精强称天下之所称公贤者更仆未易数然而不能称公之所以贤在行所无事夫焉能为称公哉先圣有言仁者寿又曰仁者静公而利社稷则仁利幽徐兖扬之民则仁天下方归公寿于仁而余乃推本公之静以为寿闻之公尝

因叩河源而尺苇之刀几遂灭迹于冯夷之口愁思发于背褻创而起从事此岂能为静者耶虽然余故有以得之余叨治吴兴部而谒公于里夷然若无官者一归而若浮云之舒屈其赏则若遗问其功则若忘公真能静者异时赞猷画秉衡枢而奠国家于九鼎皆行所无事之日也吴君试以荐之公其许我否

寿少司空五台陆公暨配陶夫人六十序

平湖之最着族曰陆陆之最良者曰太学诸生梦龙尧夔一旦而布其族之币来请曰惟是我陆之有司空也若露处者之有宇也婴孺之有媪保也盖司空世世受禄禄不足则受耕耕又不足则自裁其衣食之奉稍羨辄以旁拓南畝顾其所拓畝不以家而以族其田之用有三待而举火者取若困焉待而资诵者归若熟焉待而共力者呼若践更焉且微司空而吾侪何以偷食孰寝也微司空而吾侪何以忝衣冠即衣冠何以无行禽也司空业六十矣唯我陆之黄耆若襁负靡不加额愿长有司空念欲颂司空而所闻于善颂无如吾子者抑又有言遯司空而上曰刑部公又上而光禄公则靡不六十且七十者也然而未有偕俦者也有之自司空之配陶夫人始吾子以为奚若不佞乃返币而谓之曰坐吾语汝汝知司空之为德于陆乎不知其为德于天下也而犹未满足也吾向者举进士窃从司空后司空任不过一畿县令其父母师率之恩班班在吏民间而所引谊抗诤得请于其长吏者余波渍于十一州邑而不自显迨其郎南省有岛夷之讟司空受署为其帅画策大小辄效而不能竟厥用亡何避其宗之贵幸者逡巡以病免再起而郎祠部已再为仪部则正色以伸天子之礼徙考功再徙选部则直志以明上臣之用它赞猷密勿大有职之所不能限者一齟齬辄又谢去而久之强起徘徊九列间寻召拜大廷尉迁今官君相若虚己以听者司空慨然进其所欲吐而又齟齬则又谢去夫司空之为德于天下与天下之望德于司空者俱诚未满足也然三起官而三弃之若脱屣何也其智用也夫三起官而三弃之若脱屣于世疑漠然者顾犹惓惓乎不忍于世之未康也犹若有痼瘵者其仁用也盖司空少而习大雄氏学晚而益精进焉其仁故不能尽四生而度之然所为慈愍者广也其智故不能超三界而上之然所为明悟者深也汝能窥司空之满而不得司空之所未满得司空之所未满毋论为德于汝陆者无量其为德于天下者尤尚无量也且以司空之所自言必欲度四生超三界而汝乃拘拘焉即数千指之所被德而颂司空取汝之所见寿者相而祝司空又取其所偶聚之眷属而重司空毋乃非当乎哉二子矍然起复前请曰子之言大矣虽然吾所知于司空者德吾陆者也所知于司空之陶夫人者佐司空德吾陆者也所持于寿者相以为司空也亦以陆自为也他非吾所及也不佞曰然子姑请之姑书以应之归而质诸司空司空字与绳天下称之曰五台先生

寿封侍御平山董翁序

隆庆庚午八月余叨晋臬与察试事既撤棘而覩诸生中有朗然玉峙者心异之问而知其为今侍御董君也居半岁而有致题名于里者则君褒然在列居又三岁而余入领同牧则君已拜大行奉使率称指翕然有侨札称会琉球将受册君意不恠曰不谷幸以天子命乘长风破万里浪一纵观大海之外其如重吾大人虑何盖谓其父平山公也当是时君寝食为损而琉球使竟不至久之君别以使事过里上公寿欢甚道遇余于襄阳余戏谓董君起居若翁欢倍昔乎董君谢曰不佞诚有之乃大人则否曰吾向者业已弃若于国矣奈何复以我累而志且谓儿异日当县官寄夷险置度外而行余益异其言曰子之大人尝有官职乎曰有之是尝为诸生矣凡八试辄小利而大不利当其试时即无不谓大人利者虽大人亦自谓利也然而竟不利也以有司贡上得训导巩昌郡学尝署秦州学事而有丁祭羨金十往署学者橐之大人辞不可则易十金为百祭器以惠永永择诸生二十人亲授之义指有李松者连登第及迁西华教谕则其邑之虚举子科者二十矣公行视学宫坎其东北隅之地乃叹曰此所以虚其科也首捐俸募工筑土山而建文昌祠临之邑人争为助版筑五年邑诸生王敬民者亦连第然自是大人益倦游有所丐乃得教授为懷仁府府寄霍州尤以遠之移絳州为灵丘府有禄食而不佞亦叨第矣不佞之自诸生试也人无以为利者虽不佞亦不敢自谓利也然而再试辄再利事固不可知以大人之宜于官即一徙当脱颖然三徙而不能离博士名竟曳裾王门以老不佞之甫释褐而称天子使者何也余谓子无与若翁论难易凡若翁之所难以储子之所易也若翁材而仅施之教子得教而达之政理也翁不自食报而食子之报亦理也盖未几而董君以郎高第御史矣平山公以国庆封如董君矣君所按治淮鹺政理矣台故贤董君而重南省请以绣斧属之矣董君行而道出太原里以清和侯为平山公悬弧之旦郡国守相前具牛酒为寿董君肃拜上百岁之觞已跪而请益公所诲董君者宁独区区秦州西华一二事乎哉董君素称平无害然至南省而五郡百万家之命出入于三寸之管思所以益平山公寿者是有在矣余既负巨劾里居天下厌余之言而董君独走使万里而乞一言以寿平山公夫余言乌足为平山公重第闻之晋人晋多大鹺贾当董君之按鹺而或有间窥公者公正色谓曰是不闻吾先江都正谊明道之说乎哉此吾儿地也客逡巡愧遁去公之所为隱德如此即无论余言重公亦不以董君重也

寿丁封君七十序

今年冬督学使者校文于宜兴合四郡十七州县之秀才弟子而试之其父兄俱从可数百千艘鳞比于五里之郭而邑令丁侯元敬为约束居亭主人平市司价当入试而寒甚则多具汤饼糶薪储火以绥之诸弟子厄于格而不与试其微有尺寸长则为委曲

以奏使者不见聽不已诸父兄稍一通搢绅籍即用公暇造请毋避冰雪所饋不过一筭器食而诸父兄与其弟子若飧太牢而忘其窶于旅也盖驟欲有所効于丁侯而不敢进已而与其邑之父兄会则父兄之所以称丁侯者谓丁侯能礼其贤士大夫存恤长老时时修殷周上庠风而与邑之弟子会则弟子之所以称丁侯者谓丁侯劳来匡直鼓舞振德之意往往有加于古诸所会非父兄子弟而称其邑之吏民者其吏则摄侯之威而则其操其民则食侯之惠而循其法侯所理平赋寬徭善状种种非一而鬻狱之雪精诚格于梦寐诸邑之吏民以至父兄子弟谓吾侪之欲効于吾丁侯者宁倍蓰若而至于今尚不敢进也又宁渠若是时余方卧海上而儿子骐驎輦归而为道之诸后先骐驎归者亦为道之而詹簿吳君馭适以书币来请曰不佞不获从邑之吏民及父兄弟子以効于丁侯也然而有侯之父太公在夫太公者故浙东知名士也为经生业老不遇而以丁侯请来就养未入郭即扁舟泛二九探张公善权之胜摄衣登阳羨诸峰絕顶翩翩然有遗世志焉已而察輿人之颂聆游女之歌而后谓丁侯曰与乃公舍休矣居复谓侯曰吾不而若也吾白首受铅槩矻矻占毕以思欲効之民而不可得汝一下帷而得之胡易也虽然有可以益汝者曰无倦而已自是太公甘二簋之养多深居晏处而一邑之耳目所日新于丁侯之善状者窃意自太公所得之而莫可迹也会侯奏三载之绩上太宰以卓异请得封太公如侯官而太公业七十矣吾侪之所欲効于丁侯者久而莫敢进也以子之一言而效太公虽丁侯其能以太公却也耶余窃谓古之人感其主之贤者以其田猎钟鼓之乐欣欣然相告以庶几无疾病固出于爱主之诚而所以自为之地者固不浅也主安而后民得保其安今侯以太公悬弧之日合邦之大夫士而飧之鼓钟之声闻于外而民宁不有欣欣相告者夫岂唯吾侯之无疾病抑太公以如冈如川之寿安吾侯而吳民亦藉以安兹言也庶几其少有可进也耶吳君善之而属周先生公瑕书之以侑千秋之觴

封给事中周翁六十序

今夫士居平里巷间有所不可于吏治则奋然抚膺叹曰何渠一当生拥铜墨吏民上必不为若所为夫岂直不为若所为将以信吾所欲为者耳稍进之与论天下事而又有不可则又奋然抚膺叹曰吾安得一日以皂囊囊白简立枫陛下与天子宰相争是非夫岂欲与天子宰相争是非将以信吾所欲言者耳夫士操此二端者得之毋论已或不得或得而不尽酬而有子则必以属其子曰是且为我终之夫人孰不欲贵重其子然而士操此二端者不尽尔其大意谓我能得之于子子庶几禫我志而已虽然士操是二端而不得之恒也其不兼得之恒也兼得之不恒也不兼得而得之子不恒也周封公之父曰司训公当其训吳兴日进诸生盘辟修礼容呻吟章故出从竹垞子谒郡督郵归啖一盂粥白见底而长令拥驹呵而过之是必私指曰吾且俛得若而竟不得以穷约老耶而封公且嘖嘖学宫矣是必祝曰铜墨之与皂囊白简也儿异日勉旃庶有以一端慰我

而封公甫踰冠则已荐于乡其材嫩而气壮可芥视二端拾也顾数奇甚数上春官试亦数俛得之而又不得最后乃叹曰苟有以慰先君者即一端晚矣当公之就选人而得四会令度士所欲为者则为之所不欲为者不为也出则其吏民相谓曰公师帅我者父母我者我何以报公而二千石闻之不善也曰是且夺我声因子尼公公浩然弃其令归然公归之明年而伯子以衷举如公明年遂成进士拜官给事中盖公之所不能得之身者得之子矣毋何给事中以两宫覃恩封公遂如之公时未六十也藉令公不弃令而旌异屡上不为年格格公第太宰方修久任条公亦安能遽坐金华省哉今公委言责于以衷而飡其名且也天子方朝明堂恭己而端揆寅亮之言官有所发摅其直而无所当其危自今而后公所得固未已也不佞业少于公七岁其生地异而歌鹿鸣之时同虽幸蚤显有官禄而于士所操二端者则欲然矣是故于公寿不能辞以衷之请而致其羨

寿黄常侍序

余以隆庆庚午预晋试事而得太原黄子廷绶为第八人其文气宏放奇崛尤长持论决策有先秦西京风顾独好余言以为于今世无两无何因黄子而识其伯父常侍君竟然长者中实井井饶规条当是时诸侯王以数十计独秦晋为兄国最贵重而晋之简王为最贤常侍君与其侪陈老者对持内秉相推为谨厚造请名士大夫以文其质凡王之所繇显于天下是二人力居多而又垂十年所余解郢楚节里居黄子以数奇上公交车辄报罢然益自喜为古文辞而好余言愈益甚念无可以当之者走使数千里贄帛而以状请曰不佞伯父之岁六十而加六敢希一言之重余向者虽貌得之君然不能详其事今者乃幸得之黄子状班班乎言之也中贵人性不能饬事父独君饬事父碧泉翁者三十余年年八十而无倦色又性多奢不能饬训子弟君独折节为恭俭裁口腹而出其腆以延明师诲其诸从子经术相继登贤书君之侍简王也实司少府藏时国以多故枵然若不能岁月君悉其智筹出入而息之不以一钱归私橐盖无何而藏充矣毋论郢中出羨钱新铜鞮之宫数里而所营康简二园为金者二千助三殿为金者三千助兵费为金者四千而赢且又时时宽租赋赈饥埋鬻以成简王贤天子至下玺书见褒旌而君退然若无与者余既因黄子状益悉君则窃谓中贵人业已轻而又所事诸侯王无可自显见则又轻然其能重君而因以其名重者莫如晋而晋则前莫如勃鞞而后莫如张承业勃鞞之始以不负晋献而断文公之袪既最后乃以吕郟之谋告而成文公霸承业之始以不负晋克用托而夹辅亚子开富强之基最后竟借晋而唐讎雪是二子者毋论材可谓秉节自信者也然其时小者国大者天下云扰火革而出其长以有所显见今幸当穆清世委兵甲盟媾而不用即诸侯王亦不过奉藩食邑其贤者修诗书之业仁礼自娱而已夫以诸侯王即不能大有所显见而况为其左右者哉以君之幸而不为勃鞞然简王之弃国未几而敬王即继之以迨今王而国计无阑出者其治藏亦何必承业哉黄子能

持论决策者也夫既好余言则岂惟持余言以寿常侍君异日登之晋乘可也常侍君号西崖平定州人陈老度其年八十而九矣余故艳附之

弇州续稿卷三十七

●钦定四库全书

弇州续稿卷三十八

（明）王世贞 撰

○文部

△寿序

寿成伯詹录六十序

当是时余补州诸生而詹录前已为诸生挟儒声又长于余六岁然余忝居族大父行詹录业卑逊不敢以齿进而顾其操觚管属文辞往往有余所不敢望者未几余举进士遂获与詹录之父仪部君同年而詹录为诸生如故自是文日益高居诸生小试辄利大试辄挫以是入赀补太学其试小利大挫复如前盖自余解太仆出领郟中节而詹录始释褐鸿胪序班余复解郟节拜南廷尉甫避言里居而詹录复自序班进今官矣序班所职朝仪句傅引导之事最名喧卑而詹录居之无倦色及其进今官也青宫为之署珥簪握管法从英贤为之寮采三事而上待之不称属而称友后先凡三使其最后使奉天子所上两宫玺书守令而下负躡前导而詹录居之无德色甫竣事还里即上章请告人谓詹录相公不急公耶而奈何逆自远公即不治行羔鴈筐筐之及里门者望风返矣公府之色稍易和慊而为峻矣詹录谢曰相君以先大人故念不佞不佞何敢远第吾闻之昔人秘书郎有限有限即有竞吾幸而获居有限之地然亦不幸而不得为无竞之人夫予告者何限也吾姑舍而避之以全吾无竞之天足矣且也筐筐之及门吾厌之公府之色和慊吾畏之今吾幸而得谢其所厌畏者胡弗愉也章上果得请自是詹录益杜门萧然物情之外而年亦可六十矣吾从季曰瞻美者倭行而请于余谓族指众而吾王之西而邑居者丰嗇时时不中程自詹录之始为丰而嗇者趣之近晚节之小裁节为俭而丰者趋之以骈无败度也三老困质疑不能剖取詹录词组而析民幽隐以公庭为百里取詹录词组而达中表昆从之饥者廩之寒者杼之争弗解者居间之是胡可以一日令詹

录北也詹录之事父母孝抚弱弟慈待其妇吴孺人庄而和教诸子肃而序吴孺人佐而宜之其弟与诸子则而象之家庭之间雍容如也是不可以寿乎余谓瞻美若知詹录里中事当以里中语寿詹录有如相君念詹录趣尚书尺一召之河润九里所以阴寿吾乡国者尚有日吾拭目俟矣

赠王晴川六十序

语曰为善无近名余始疑而不得其说也得其说矣犹未得其人也乃今庶几于王君有年得之余不识君识君之弟百谷己而为百谷表君之父处士藏而知君之先自乌而王其姓也自江阴而吾郡居也今天下以名归百谷毋虑委输然征言者以日至问奇者以旬至守相之干旄以月至然而亡救于挫产也即百谷之为文词游思大古以求微言之合夜犹篝一灯啜嚅不休别肺腑黠唇吻而后获天下名然亡掇于其病也世即未有以一名名君者君年二十代父理家政则家日起一切米盐泉丝浆脯之类身理之咸得所而不覬以勤闻属父病而暑旦夕蠖伏床头侍汤药衣带生虬虱不解居丧毁瘠骨立三载不窥内寝其家人皆化之而不覬以孝闻抚百谷提抱中至有成立毕其身毋几微忤而不覬以友闻年四十无子始置媵有子矣而不替其妇敬也盖闺第之间煦如矣然而不覬以睦闻生平无变童艳女之好途遇招摇者趣拥篲自蔽矣顾其颡犹有泚也然而不覬以慎闻所任子钱人必以信其已在一阇中而赢在千里外廉者五之其货贿归也亦无虑委输然然而不覬以能闻是毋论世不能以一名名君即百谷亦云吾知德吾兄而已亦竟不能一名名吾兄也且吾兄所谓守柔日强者夫守柔而日强用其光复归其明正老氏所谓不近名之善也夫岂惟天下之实归之其静专翕啬毋滑其精而摇其真将天下之所谓寿者亦归之矣会君年六十而百谷谋乞余言以寿余姑以所闻于君者授之曰是为善而无近名者其避世墙东王君公也耶如以名名余文则将弁髦之不暇不然而稍味之乎异日将客君所于君之昆季论名实矣

石峰曾翁偕配严孺人寿序

衡之为州至唐犹未以人文显吾尝读昌黎氏言谓衡于中州最远南方之山以百数独衡为宗最远而独为宗其神必灵又稍南尽而郴其气蜿蜒扶舆磅礴而郁积气之所感其可证者仅白金水银丹砂石英锤乳橘柚之苞竹箭之美千寻之名材而已进而求之人所谓魁奇忠信材德者不可得而仅得一廖生则捐妻子为道士且又家郴而学于衡山者夫衡之荒落简陋若是而最后余滥竽楚试于诸生中得一卷最能抉圣贤之所以立言而藻又足以发之其急节缓步隐若闇合于昌黎氏之指即下而庐陵眉山毋论也用以冠诸生之言易者撤棘而进之问姓名则曾生凤仪也其产衡产也虽先世吉

之安成家于衡三世矣问其年仅踰冠也其貌温然而雅其器寬然而不拘迫也徐而稍窥其蘊则所谓魁竒忠信材德人也既诵习孔子有父母以孝养称不为廖生弃家而托于方之外吾窃以夸昌黎氏而久之余纳节里居曾生挟其长而进试南宫者三矣三辄不利不遠数千里而来谒吾方以世之不能知生为世惜以生之不见用惜生而生冲乎其若无也孜孜乎以不闻道为耻而以一见吾为幸旬而稍露其歎乃复有所谓耻者不能蚤推禄食食父母而有所谓幸者则谓其父石峰公业六十母严亦五十余且将借吾之一言以寿其父母庶为其父母重也夫吾言何足以重曾生之父母然而生之悫诚不可已也以生之举石峰君柔色而安受人之唾匿身而默解人之哄折节而不夸子之贵师以一艺传虽薄之而终其身以厚报子其兄之子如子母其外王母如王母乃生之所再举于母严者则又能事曾君如严君事曾君之外王母如曾君及他节啬以佐施勤共以佐客敦切以佐训子要亦足称长者令妇然亦闾井闺闕之恒行而今得曾生以闻于予又得予以有闻于天下意者昌黎氏时寧无一二长者令妇如生父母而靡魁竒忠信材德之子以显之厘厘一廖生又弃家而托于方之外宜其寥寥若此也子归姑以吾言觴而父母而告之若夫共醪肉衣斑斓左右奉养以极志物之敬进而修大人之学继道统使千百世之后尊其亲侑启圣而亡忝此毋论孝小大有生家之郕公在夫一第何足以重生夫生之一第何足以重生父母曾生再拜日谨佩教

寿史氏老姑八十序

蓋王父司马公凡三娶陈而其继为我前王母举伯父都事公与叶氏姑其又继而为我王母举姑史太夫人与先御史大夫公太夫人生十六而归史曰兰溪君当是时兰溪君之父河间公甫罢郡而司马公开蓟府入佐枢廷与河间公后前任南北台两家乔木甲第相望河间公负责伉声而兰溪君亲其爱子太夫人明艳娴礼教车服光彩映带中表间毋不啧啧羨媿而太夫人之归史其始事河间公及姑陈孺人用孝谨闻既而奉河间公以礼终则專养陈孺人者又四十年亦以礼终与兰溪君相庄事白首雍容无间也已无子则子媵所举者抚而教之以至成立踰于己子蓋太夫人之归史六十有五年前所称血属今无一存者而独太夫人岿然若鲁灵光晚而往来两姓家共养亡异两姓之族指众间有疑难不能决或阅墙猜帷者取太夫人词组立解太夫人一女子耳其志行磊落若丈夫生平不事佛茹素而自然具平等心作方便事其御臧获一以寬又耐问米盐钱帛出入数以故家益落太夫人意豁如也曰令吾两郎君在吾何忧饘粥两郎君者谓不佞兄弟也今年八十矣太夫人避觴而来就我于是史之族若诸从子孙有来谒者坐定太夫人左顾而曰我开府之女开府之姊而开府之姑不为不贵矣谓我挟此而妇于史有加色耶对曰否也则又右顾而曰吾少者食若王父已食若父今乃食若兄弟矣谓我缘此而有损色于若王不耶对曰不也于是世贞兄弟乃奉觴前为寿曰此太

夫人所以称丈夫也夫贵不人骄贫不人覬此女子之所难也而太夫人易之与贵忘贵与贫忘贫此丈夫之所难也而太夫人易之且夫心志不役易安也形神不琢易坚也恚忤不作易腴也不营酬德不责人酬易居世也此五者皆寿道也而太夫人裕如矣世贞不幸而中背先父母所谓血属者行尽而独太夫人在即共养宁有倦哉太夫人八十矣而有少容自今而后太夫人之日皆不佞兄弟日也请得岁避史之觴而觴我太夫人夷然若忘己有间曰若之日吾日也吾不若之觴将谁觴于是世懋偕其亲执为诗歌以寿太夫人而世贞叙之

寿太保故相严翁七十叙

当世贞之自楚而入领太仆以便道归里严翁甫六十三而世贞获从诸公后一称觴焉觴有辞辞人人殊其大较谓翁为德于天下虽不能甚久而能甚巨用是寓无疆之祝以俟盖迨于今七年矣而翁貌益进而童发益进而鬢天下之望益进而山斗世贞之受知翁益进而深然后乃愧向者称翁之德未尽夫翁之德固不惟巨而且甚久也试屈指而迹今之天下不亦蒸蒸治哉宫府之昔棼然丝今较若画一矣大司农水衡之昔惏然饥今饱而思溢矣九边吏士材官之昔累累然阉今勇夺有生气矣边塞之外鹜然而羣萃我以逞今纳琛委质称臣妾矣数千万里之远其居黔首上者不敢饰情以苟避县官三尺为之下者不敢小爱其财力日夜委输而惟县官之是供即不敢以痛且竭告此无他吏治澄故也夫吏治之所由澄则非一朝一夕致也当分宜之用事而中外之心固甘于海若聚溷之瓠而忘其臭其精神意气与苞苴并而注之幸门者知退而稍割其羨以自肥而已虽其人之骤败足以为龟鉴而世犹内疑而莫知所决从自华亭公代为相而严翁拜太宰如冰玉之相辉照以故杜襄阳荀青州之饷有望车门而却者有中道而却者有将发传而却者盖世贞时时晤今陆司空与绳司空故以郎事翁宗伯又事翁太宰间谓不佞严翁夷然坐堂室郎有所建白小中窳翁毋弗唯唯听也中涓贵游有所居间郎不可翁又毋弗唯唯听也即主上有所俞拂而法当持诤以告翁翁又毋弗唯唯听也事立而天下归重于严翁翁逡巡谢曰此非力所任郎某某议也间一二失主上意或中涓贵游有所指摘翁又逡巡谢曰老臣諄有之郎无与也盖未几而翁入相华亭公恃以左提右挈而翁念其二尊人老遂予告归矣翁虽去国十五年而太宰宗伯絜法有不奉翁画一者哉而况公交车之所抡荐启事之所嘘藉几徧海内羔羊素丝之三事大夫有不自翁出者哉余故曰吏治之所繇澄非一朝一夕盖指严翁也说者则谓翁今去国而乡十五年其所为德不能巨而能甚久夫久则信然其谓不能巨者非也夫严翁世庙之师臣也握统均佐调燮至贵倨也而挟齿德以祭酒于吾吴之邦诸邦君大夫非门生而故吏里舍中称觴者非孙曾则亦子姓行也然翁方恂恂然不以尊而踞邑令之庭自胜衣冠而上者靡不讲均礼也严翁虽不至虞餽粥然非有安昌鄠杜之产也而赋率先

其里豪五服之外至于稍半面称识者靡不衣食于严也故去严翁之归而十五年其鲜衣怒马盛气而加闾左者鲜矣出而家于官归而家于郡邑而傍操其权者鲜矣矫辞诈欺为佞驢行者鲜矣夫严翁者表也表正而景从之夫严翁一为德而缙绅以仁让成其俗于上父老子弟以谨厚成其俗于下何言非巨也于是严翁之所共为德天下者华亭公长于翁八年矣而家居在二百里内翁差少而又最壮有如天子修明堂辟雍之政以三老五更聘二公而亲袒割焉既乃左顾严翁谓公幸未老其强留以陪左右翁亦宁能曰老臣不能敢捐精神与乡之泉石而竟忽然辞哉是言也翁之二子乡进士治太学澄实征之虽然微二子世贞亦乌容以无言也

少岳华司谕先生七十序

江以南文献无虑数十百家毋如锡山之华其着于华者无虑数十百人毋如故秋官大夫补庵公余以通家子获从公游而是时少岳先生为秋官公伯子博学工制科业补诸生籍籍有声秋官公未悬车而谢南曹政老于家诸家秉悉以委先生伺其所出内操纵咸中窾大器之指而顾其臧获曰此真而主也秋官公性好书又时时受征逐有文役而皆苦爱力或以属先生草及雠校靡不当公意则又大器之日此吾益友也公好客先生则亦好客客若文待诏父子彭孔嘉陈复甫周公瑕袁鲁望辈其果脍脯充溢酒不罍耻而间汰其下者无敢以便佞进公好施先生则亦助之施素侯之产割以贍五服衣食所流羨踈戚尽洽而裁损其滥者毋敢以侥幸奸公又大器之曰此吾畏友也当是时以先生子故众归德公以公父故众归名先生而先生独坐数竒不获一策辟书目其学益博制科业益精旁及古文辞多瑰伟而试益不利最后应贡谒吏部选得应天训导人或谓先生贵家子奈何挟一苍头青衫瘦马蹇蹇长干里中先生甚乐之曰官长不吾谪吾得以其便泛澜三山大江之胜何幸也则又谓先生饱膏腴一旦而改舌以干半菽浆藿之味习乎何自苦为先生又甚乐之曰禄易塞使我摩腹而受竹素更以其暇教授诸生何幸也于是人人谓先生宦薄也而有味乎言之寻进上虞教谕未上而持母夫人服归既除先生循其髮叹曰我头颅之何谓而人且以我有味乎薄宦也遂絶口不复挂仕进盖未几而先生年七十矣其步履矍矍然其颊臑皙而丰肥见者以为五十且未六十人也顾先生少而能以施予奉客益秋官公德晚节时杜门门鲜候刺秋官公为宏厦奥房茂林曲池以居先生弗居居茅茨广袤不数武公遗阿锡麋丝之服先生弗服服十征布公所常蓄古金石图籍以观先生弗观观止诸生时书厨人荐公所食鬻菹膾芎之味先生弗食食仅取一鲑菜于是人人乃谓先生向者非有味乎薄宦也其天性然也先生闻之曰不然夫岂独天性哉老氏三寶吾师也余虽从秋官公游第游先生之日长而以爱女女先生少子其知先生最深先生丈夫子五皆美而材诸孙十余人兰玉茁茂当不下万石五桂君第闻先生居恒持家乘余不佞少于先生十五年而饘粥之遗尽捐以付

儿辈束身一亩宫与世事辽矣敢荐綦縞之贵昌菹之甘而为寿曰先生能从我游乎哉信尔百岁殊未足多也

寿观察使观海顾公六十序

始公之为孤童而依太夫人也其受伯氏经而夺于生且不继人谓两司諫弓冶不中芜乎两司諫者公伯父也公自奋下帷昼夜不辍而成进士其释褐继其父为行人人乃相诧是必亦司諫弓冶今不芜矣而公逡巡数引郗念太夫人老而轻其身于多讳之年则不忍且谓二父所终位也于是得稍转尚书郎郎都官部诸系囚当献者咸自以为不冤郎称平矣而又出而守饶州饶饶地也以数困重赋故■〈谷丸〉而公衽席之稍稍称其名亡论公洁廉自励冰蘖所兴革梳爬其弊殆尽惠利孳孳深单赤不知于黄颍川召杜二南阳孰为右然公居恒谓颍川何自数奉玺书赐金增秩召杜何自市父母称夫取名骤者实必不深洽识者以公殆胜之自公之饶高第而得副宪也人谓去九列步武耳而公一日复念其太夫人老而乞归养诸所以备物承志毋纤芥憾盖太夫人以显融终而公孝廉声籍籍朝野间公尤不欲自见其德而部使者数上书具其事天子异之即家补广右入贺万寿还道迁贵州右叅政而令子太史公首自公交车擢读中秘书公乃引疾乞骸俄复迁广西按察使而公不为动其请益力遂得予告归公虽归望日以重盖荐公者无虚岁而公始欲然不自安也久则夷然忘之今年壬午公寿六十诸欲公出者曰公必出是甚健耐饮食其出外之而联百城寄则当为县官拊循元元提纲挈纪飭武吏坚储胥以毋烦宵旰内而与君相筹于细旃城圯之上使墨者望而饬篋篋苛者望而恻痍痍躁竞者望而玄黄其马尚亦有利哉乃其中外之宗戚与所识穷乏则不然曰公幸毋出公出谁与困廩我谁与衣槽我即小自饬而干旄之下谁与扬我冤谁与白我公且强我为处可也人或以语予予叹之曰夫言公出者非当言公毋出者亦非当公方栖神于恬淡之境顺适于无何有之乡以与造物出王汝执以为出处而彼视以为浮云之卷舒而曹奚择焉然则为而计者愿世之长有公而已今夫敦璞不凋易完也澹泊寡嗜易足也顺事恕施易慊也固嗇不漏易永也此四者公之所富有而曹之所忽而吾老子以为寶以为深根固蒂长生久视之道而又何疑焉公顾氏盖江左之着姓曰顾梁氏以媿吾王氏而公父司諫公繇丁丑成进士公之成进士癸丑而太史公复为丁丑吾王父司马公繇辛卯举于乡吾父司马公亦繇辛卯举而不肖以癸卯王与顾世世为婚姻而余少于公三岁先后备朝列晚而归共一衣带水往来无间从子一纶于公为内戚尤迹故摭余说以侑公之觴

贺大司空阳白曾翁七袞荣封序

曾翁蓋家郢中云郢故獻皇帝王時國也昔周之興文王以緝熙令德假帝而鍾其休嘉碑隱之精于賢士大夫故其詩曰思皇多士生此王國王國克生惟周之楨言周之聖賢君臣交相用也而文王厚為之滋培之樵薪械朴其材芘芘然茂也故其詩曰文王孫子本支百世凡周之士不顯亦世言周之聖賢君臣之用衍而代相禪也以我獻皇帝之令德將何下文王而肅皇帝之丕承式廊抑于武有光以故人才之生寢明寢昌至于今凡三易世而愈盛坐論作行之烈冠千古而郢最為敦睦便章之地曾翁之生屬正德歲癸在酉蓋獻皇帝久道之化已成其和氣上蒸與貞元合而為翁翁甫有室則又篤翁以賢子大司空公又姑為之緩翁之達而速司空公之成欲以交觀其一時之用而翁遂後司空公而應公交車辟翁之為尚書刑部郎持平無害天下翕然稱為長者翁念且老而司空公公望日益重乃慨然曰夫善斂者識几者也勇退者暫分者也吾老倦游矣即仕不止而奈何異日以九卿下遷避三公兒也已又謂司空公太上所立與若交勉之言則吾何敢讓焉爾其駿發厥功以畢我之志于是翁甫遷叅議嶺南行省而司空公持中丞節填撫全蜀翁遂上書以不任告得請歸里翁故工古文辭其在郎時固已為操觚翰者所指慕而至是益縱放其志意以與古之作者下上自署其齋室曰陽白陽白者謂陽春白雪亦故郢語也翁自以即寡和而通國中有數人者于念已愉快而識者不謂然曰而郢非故郢也其被獻皇帝化若南國之所謂江沱汝漢興于文王者哉而于文辭不若屈平宋玉之牢騷而冶靡也溫厚和平庶几所謂國風之周召清廟之頌若雅哉即和者不一人胡累盛也于是曾翁之辭益修其體力益勝而司空公奏中丞績則進翁中丞奏左司馬績則進翁左司馬今而復以大司空績最天子褒嘉之復進翁如其官而翁之春秋屆七秩其懸弧之辰與錫命之日相差次公卿搢紳若而人相與艷歸之環郢而從翁父子後者若而人相與侈張之為頌賦之類如千萬言而謂不佞某亦郢人也其先世徙蜀蜀又司空公填撫地其知翁父子當最深強而屬之叙不佞何能知唯窺夫獻肅之際宛然文武之隆而遐不作人以效成康之用者大而姬公伯禽召奭次而太史司寇蕞公輩所謂不顯亦世者其氣象可搗想而人可指數也今而後願翁專精神加匕箸進而八十九以俾司空公毋內顧則翁之年皆司空公之年司空公務益精白一心以左右王室進而褒翁八命以至九命則司空公之績皆翁之績而又何間焉夫君臣父子之盛成周為烈史冊固詳之以視今未易軒輊也獨其時有降岳之吉甫則必有穆如之山甫為頌以揚詡其盛而不佞非其倫也姑即所聞紀其大都云爾翁毋曰之子也為能和郢者也

贈趙伯子（闕）五十叙

先御史大夫之成鄉荐南都而領荐者趙伯京先生當是時先生之文天下莫不知而及其成進士更歷中外者久之而以按察僉事需次歸里先生絕不肯復出日賦詩飲

酒终其天年天下以为屈而先生夷然更以为快先生之伯子曰（阙）甫十余岁即出应有司试其文烂若舒锦而貌则冠玉一时啧啧以为无让潘安仁而为诸生久之辄不利于省试伯子一日忽自叹曰舍吾好而逐时趣即得之不以适而况不必得也且夫日去我驰矣夸父之捷而逐之竟无及我又安能为邓林槁也于是悉谢去所习制科业而业古文辞彬彬可自显见矣复去之曰舍吾好之大而逐吾小非筮也且夫身后者吾所不及知也吾安能役吾之精神以供人目无己而又供人齿于是日啜坐一室室无它设一几一榻而已壁无它度六经外老庄圆觉维摩楞严而已伯子故从其父徙郡而有田在吾州可耕人谓区赋长亦易践奈何不一省视之伯子笑曰夫长五湖者何人也而乃一区长也卒弃之如瓿脱以故家益困而伯子亦不顾都布裕岁久敝则缉之不胜缉则累累下垂■（距 敝）薨草屨第毋令足趾出外而已脱粟不舂时摘园蔬摘拱啜之如享太牢闲出步中庭小卉草间如登春台唯意所畅寂寥篇什韵之喉咽錡錡如奏金石伯子既已挫锐匿声毋论天下即乡之人不能名其屈而伯子抑且陶陶然并其所谓快者而忘之迨伯子之忘其为快而人且以为木鸡乎过其里以为畏垒乎而余独闻之以为善屈者莫伯京先生若也善学先生者莫伯子若也今夫人必至于忘其快而后可以言快余既已持是说而遇伯子之子某乃戚戚语余以伯子文高而不被名有家而不肯治即窳可具中人衣食而不肯御有美男子四而失其二意者生而见畸于造物者哉乃日覩其泯泯嘿嘿即欲伺所好慕厌斲之一端不得也自所度诸经籍外息而手一编则维吾子之弇州集数读数俯首而乙之已寻乙复读将无稍有当乎则又谓余吾父今者五十当有贺牢醴羔帛之陈以渎吾父必不得请以乞诸公卿贵人彘大其辞必不得请子之言吾父所数读俯首而数乙复读之言也庶几其有合乎余谢不敏谓某而之父几于道矣而又何所事余言且而之戚戚而以造物畸者而父之陶陶而以造物羸者也而父闭关余亦闭关而父不问产余亦不问产而父敝衣蔬食余亦敝衣蔬食然余染之深厌而后离之不若而父之离于未染也今夫修有器而受有根其根器完者未染者也其根器损者染者也驷马高盖其祸甚大是余危而而父安也知我者希则我者贵是余贱而而父贵也余方求去余之所以危者贱者而犹惧其及之是乌足以当而父虽然必欲得余言则而父壁所度者足已得鱼而忘筌则而父之室一几一榻足已凡有言皆赘也于是某强伛偻书之归以告伯子

寿少保兼太子太保左都督南塘戚公六十序

往余与左司马汪公伯玉为石交而伯玉实进今少保兼太子太保左都督戚公元敬于余则竿尺时往反焉盖嘉靖之癸亥也去于今二十五年矣隆庆之戊辰元敬自闽帅御追锋而北偕伯玉访余弇中弇中故尚称小祗林盖三宿而后别与谈兵事亶亶时娄有边警天子倚元敬若左右臂元敬亦慨然有犁老上庭封狼居胥意寻佩大将军印

昇南兵三万人俾训之蓟门边塞间慑元敬威名风尘宁戢而元敬得以其间益治边备边备益饬天子嘉之累进秩至三孤而是时大相实器重元敬以是得展布无所顾忌最后邊警寂然天子之顾渐怠大相坐它事以身后忤旨而元敬屈矣忌元敬者方引绳批根之而元敬廉功名特盛亡可媒孽乃移之左广位寄亡所改而阴夺其权则又屈元敬之在左广嘿嘿不能有所发舒忌者犹挠之俾以故侯需次里中则又屈若伯玉之踵元敬而出出而佐治夏官也予告者十载所矣则亦屈余亦踵伯玉而出出而至抚郟御史中丞以不称归里无所言屈也伯玉年六十元敬自左广属余一文为称觞之侑天下方推伯玉不朽于立言伯玉尚厌薄之精心于太上所谓何敢澹辞以功名进其明年余次六十方抱蓼莪之隐谢客客无以祝来者而元敬还自左广乃走饬中乞伯玉着所谓沧州三会记奉而赠余其辞皆冥契玄着潇洒物外语也余喜甚要元敬宿吾舛复得三日与之谈亦多冥契玄着潇洒物外语而察其际不能无露壮心盖又二年而元敬亦已六十矣蓟门之人推元敬之训士若李临淮课屯田若赵营平筑垣垒若蒙内史雅歌投壶若祭征虏以为前后无两而有识之士则谓天下名为治平而中实鱼馁即缓急非元敬孰可当艰巨者故力荐之朝而卒无以勤天子之顾而塞忌者口元敬盖又屈矣噫将无触其所谓壮心而有不释然乎抑归于所谓冥契玄着潇洒物外者乎是道也蒙庄子能言之而独郭汾阳能知之夫判二君子者若泾渭若夷戎而为此说者何君臣义也无所逃于天地间此蒙庄子言也以汾阳之所知者仅是乎朝而弃之夕而用之即出朝而用之夕而弃之即归用而弃弃而用而我何与也投散地而无缺中委重寄而无德色出入万死而不慑魄穷极奢侈而无快志此其得于冥契玄着潇洒物外者当何如也卒之位上公爵真王享上寿多贤子婿保有令名垂之八极此数者蒙庄子托而等之于殇贱愚不肖而其中未必尔也吾从子公艺谓余于元敬谊当有所酬因序而寓之元敬业首肯则当更质之伯玉筮之易曰云上于天需君子以饮食宴乐夫饮食宴乐若非所以为训养其身以有待也是故曰需若余则所谓枯木朽株人也而谬见收以留省之兵事夫余能知汾阳不能为汾阳能为汾阳者元敬与伯玉也余且从吾蒙庄子曳尾耳

弇州续稿卷三十八

●钦定四库全书

弇州续稿卷三十九

（明）王世贞 撰

○文部

△寿序

奉贺致政少师元辅存翁徐公八十叙

万歷岁在壬午特进柱国少师元辅华亭徐公眉寿之八十而内阁诸大臣具其事以功令请天子方日与黄髮图政理为之跃然而兴思若曰是惟我皇祖有一体不二心之臣以嘉靖邦国则公其人哉我先皇帝之御宸极也云蒸龙变公实左右翼戴之惟忠惟勤惟亮惟端夙夜匪懈以终始二圣之治岂唯予一人所丕承将宗社世世永赖谓太傅少傅趣草诏之必当公母遗褒谓大宗伯必遣使谓大司马予之传谓玉府其出朱提精鏐五十上褚四石之有副象龙之袞在焉公览揆之辰在九月而以先二月行人至自都用币于华亭里第公拜稽首天子万年已出玺书捧读之凡数百千言诸所褒予非一而大者曰王佐曰儒宗曰达尊皆以归称公乃至所谓定国本宣上德于危疑于弥留者天下之人不尽能知之即知之不敢言而天子独言之公毕读复拜稽首至泣涕覆面而曰老臣无状何以当上析肺腑若是于是公之乡父老搢绅衿裾前屈指言我犹及事公进士及第时为癸在未而今度壬午而行覩癸未岁六十矣秩三师一品横玉者岁三十又三矣去登政岁之为十者三矣及去政府而优酉无方之养者岁十而加五矣有子三人孙一人皆列卿尚符玺其长者金紫次亦金绯矣孙所任卿繇进士举矣余诸孙十六人皆有官职可拜其任书者不遽拜而游于郡国学习进士业成矣即儿未任书兰芬而玉润可念矣盖举天下之所谓福者咸趣于公而三相臣自太傅少傅而下若文渊申公余公皆公秘阁公交车所储荐者也六卿自太宰王公大宗伯徐公大司徒张公大司马梁公而下百庶尹大夫士非公故吏则门弟子也开府建牙方岳廉察暨郡国守相皆公之所齿借翼暖者也公既已享使者礼成而诸侯之介出羔鴈璧帛重锦百两堂上接武堂下布武闾左而近君子懷德小人懷惠千里而遥似者颂实无似者颂声即毋论世贞愚且贱无所容足至无所容口诸君子故称■〈女间〉于辞然有能庶几天子之所归称曰王佐曰儒宗曰达尊者乎有能推公之所谓定国本宣上德于危疑于弥留者乎而何所藉不佞为独自念公曩者七十时不自量辄以不腆之辞效其大指谓嘉靖末天下之脉几絶于壬人手而公默延之蓋拜公仁寿之赐者三世矣第天下能知公之功而不知公之所以功则甚难公为次辅而軋于所谓首者则甚难为首辅而軋于其所谓次者则亦难欲有所明志于英主而居几望之后则甚难欲有所创革而泯其迹于君臣父子间则甚难当言路之首见推而欲宛曲伸之则甚难言路之尾大几不掉而柔剂之则亦难夫是六难者不佞不能尽窥公之妙用第始而怵于所谓难及得公而犁然节奏理解而遽为易且公有宗社大功二以为不再相当必有巨福盖不佞之言登于公之堂退而侧伏于公之乡者十年所矣公之寿加七而为八其色泽旋枯而为润其子孙加庶而益

贵且贤公虽后天下而乐若无意于政事堂一尺地者然天子久愈敦念之至屈命使下玺书尽出尚方之珍贿而毋所靳今夫明兴二百余年于典至修脩也其太和郁蒸磅礴至隆洽也然迨正德而始有故相刘文靖公以八十居洛当是时县官方右武不闻所以优异者及九十而为嘉靖而始有行自是少保毛文简贾文靖二公继之然不过抚臣一致羊酒束帛慰劳而已未有所谓屈命使下玺书尽出尚方之珍贿如公者刘公于公相业十差得三四焉其它吾不能保其毋径庭也夫不佞所为言固不能当诸君子而至于所自许知公亦不敢谓出诸君子后第窃复有所效于一得夫士大夫进而便便退而恂恂者常理也天子既以非常礼处公公安得以非常礼自处今夫阿衡之为训师尚父之为丹书其年不百岁当亦九十也三相臣虽佩公之教而成启沃卿大夫虽守公之法而成宁壹然广厦细旃之上宁无有扞格而未尽纯者乎蔀屋之下宁无有蒿目郁衷而毋繇达者乎奉行者得无缘狗而失初旨乎理解者得毋斤斧乎保障者得无不胜茧丝乎有之公宁独能已于言也且公不闻之玺书公孤在朝坐而论道老更在学宪而乞言询黄发慰苍生固以意示公矣公即爱筋骨不俨然而造于朝天子即未下太常论袒割鞞鬯仪其所神注契協亦何用此屑屑小礼为公第言之某将从荐绅先生及父老后拜公赐且以卜公之九十且百岁若七十时矣

味湖归处士七十寿叙

吾吴盖有沙湖归氏云归之重自今宪副先生始其能启先生以式廓其业自先生之父封公始故判太医院张承宗氏尝缕缕为余言之而封公之诸从子姓味湖君者最材而贤其起家由纤微积巨以肩素封而君故尝署其居曰味湖曰湖者表所自也何以味之味其澹而已于是乡之人归归君澹而君所操持奇赢必中窾春而耕秋而收晨而督夕而程什者出之一者息之固未尝漫为不訾省而特不假干没射覆之巧以揜人之有而就我及其小余羨则稍稍以义散之而不责报亦不靳狗知者于是亡论乡之人即荐绅先生亦徃徃归归君澹归君之得称澹于荐绅先生要不尽用宪副先生故君今年已七十健啖工步便视聴神明之用不少衰而三丈夫子颀然立皆进之儒为太学生归以益重夫君七十而业有家又有三丈夫子而又能使归重天之所以报君者綦隆矣而要其极以澹得之又以澹承之吾闻之犹龙公云道之出口澹乎其无味夫澹乎其无味何预用也而曰用之不可既夫澹乎入者嗇乎出此二端者交相为体用者也故又曰治人事天莫若嗇夫唯嗇是谓重积德重积德则莫知其极是谓深根固蒂长生久视之道嗇而至于长生久视者何也思不役则精神不溢则实吾是以知治生之能贯乎摄生也其本则自澹出之澹则为陶朱计倪久而仙不澹则为桑为孔久而赤身族恒也虽然嗇矣而曰重积德何居不嗇不积不积不能为德嗇者所以德也德者所以善全其嗇者也于是君之最少子隆佑与余中表史生善诸贺君七十者皆以酒而史生来乞言余姑酌

之以沙湖之水而推本其所以嗇与积德者而与之言澹

周公瑕先生七十寿叙

余少于周公瑕先生十三岁而先生辱引为友又时时言异日传我于身后者必子也余谢不敏则又曰传而使它人见之毋乃使我身见之乎余谢不敏乃请于先生得所自述起居据而润色焉先生聽然曰异哉我之知我似不若子之知我深也而恶用是起居为也卒弗与述起居今年春正月先生之寿跻七十而善先生者友人曹子念知其故偻行谒余请一言以为先生重属余颇已倦笔砚谓子念七十者古所称希也是且八十而九十而百岁必以颂乃先生之所欲得于余者传也传以藏往颂以知来其用不相属而体因之子念其若何则请酌于传与颂之间而名之曰叙于是乃叙先生先生少而负经术为诸生已攻古文辞善大小篆隶行草法当是时文征仲先生前辈卓犖名家最老寿其所取友祝希哲都玄敬唐伯虎辈为一曹钱孔周汤子重陈道复辈为一曹彭孔嘉王履吉辈为一曹王祿之陆子传辈为一曹先后凡十余曹皆尽而最后乃得先生而又甚爱异先生文先生以大耄归而先生继之既谢去诸生益自力为古文辞号大国之赋诸少年见推以渐主词坛而握牛耳顾其于书法尤能擅古所以作者意先生之文与书成即郡国守相之干旄与学士吏氓贾人之綦履糜至于委巷之馆而不可辨大者七尺之碑小至七寸之薄蹠计必获其词组只字被之而后为偷适往年大司空朱公潘公治河告玄圭锡则公请大将军戚公封蓟山之阳以拟崆峒则公请太傅朱忠僖公树其碑于兄定襄恭靖王之神道则公请已忠僖歿而其家修定襄故事则公请故太师张文忠公至要公于长安邸俾以布衣书金匱之首简将欲言于上官之禁近而先生逡巡避而不敢应竟归先生归其名益显重其造请日益博亡论东鸡林西月窟不声而闻不脛而驰盖少陵氏之所称李秘监若丰屋珊瑚钩麒麟织成罽紫骝随剑几义取无虚岁者将庶几焉然先生不别治生所养孤嫠兄姊戚属指以百计友朋所急徃徃共之而又好治精舍迭石树竹木斥买书画古翫以故所得随手辄散去里中儿艳先生之入而不悉其出悉其出者又欲以是徼先生惠而或不徧争齟齬先生先生夷然弗屑也先生内行甚周备而形骸土木不好饬边幅又易口口不甚藏人过以故其声称不尽如文先生而大指实归于忠厚久而天下信其为长者余尝屈指文先生之始得名在弘正间距先生今八十岁年矣文先生之所庄事者沈启南先生寿亦垂九十沈先生之得名在成化初而生以永乐其取友若史明古周原已邢丽文辈亦十余曹而卒归之文先生自沈先生而文先生以逮先生奉正朔而称盟主者仅三人耳而所歷踰二甲子几与明歷相埒休抑何悠遠博厚也夫江左之文献莫盛于元嘉以后若王谢江刘诸贤其月露之挾笔与墨池之流润足以黼藻一世然徃徃蚤发而蚤萎甚或以不惑为期頤如谢庄氏所云云良足憫矣说者以为天一之精有限上荣则下竭外渙则中馁此理固有之今亡论三先生

而吾吴之隽遠若杨循吉近若陆叔平皇甫子循辈其精思之矍铄又若以期頤为不惑者彼其人岂不文采上荣外涣也 说者则又谓寿星在牛女分夫天道遠非吾所悉独我列圣湛恩深德之所培植渐濺过元嘉诸君万万而吴之山川灵气积自大块者不发之宝玉金锡而发之人其征而悠遠博厚何疑哉子念试以此叙质先生先生如首肯之则不佞将亦其一人焉

寿忆萱李翁七十序

吴中之最旧姓曰范庄李李世以善积着闻然不好为本富曰农之利几何而徃徃与县官共之又不耐役使自李之工殖而至于今忆萱君则又精其积着则益厚而其为人则益寬然长者君所业机杼之制妙天下三宫九嫔六尚之绮锦文绣岁加新其日以试吾吴而独李君应之沛然有余中贵人不为苛礼绳君徃徃储美酝名饌相慰劳曰吾左右手也君晨起调治红作轧轧声者恒数百千指至暮而毕事酒炙饭羹皆得所毋一喧者君于它声色服翫无所好顾独好治室崇楼伟阁薨云栋雾便房曲廊九折百迷晨起而调治工作丁丁声者亦恒数百千指至暮毕事酒炙饭羹亦皆得所毋一喧者诸受君直恒倍以故争欲归君然不能私君寸丝片瓦之踏藉以入其橐又不能自私其手足肩膂之力君又善叅伍时值而低昂之入必贱积必良以故费省于它人而功大倍余尝一游居室至移晷不可徧然君之门颇庠而隘骤过之不知其为甲第观也君既不名一田以故无长赋践更之扰即有司巧渔猎者毋所迹之即迹得之有瞪目坐视而已君以故得自寬有余橐则尝浮屠一刹颇壮丽与桥梁之属有余晷则以延明师教授其二子经术彬彬质文矣居平不恒宴客即宴客必丰腆而其自奉有分剂然每遇花时风日酝酿未尝不以一壶一榼自随也曰天授我以隙日我不敢不领畧其诱我以共养我不敢徇吾力而为侈以故君今年七十矣家帑几埒素封而无刁间之奴隶以连结守相二千石富而不受其名无容成玄素之术而饮啖步履隄少壮五官之用自若寿而不慕其术时时行乐不废然所谓徇力为侈者絕不好之泰而不蹈其责或曰君殆隐于费者欤史迁氏不得而迹之庶几唐宋传奇之所载长安孟渔蜀山人流或曰君殆类有道者范少伯变姓名称陶朱公踰百年而尚无恙竟以仙去将庶几近之王子曰皆是也而皆未尽第不闻之君鼻祖犹龙公乎曰慈曰俭曰不敢为天下先此三宝也然一恒理也君俛得焉而加勉焉夫所谓深根固蒂长生久视之道绰有余矣舍是而故高其格曰隐又大其用而曰仙非君所遽解与余所以述君意也蓋君之从女弟室余有二子长骥应公交车未归次骏闻而请书之以侑君觴

张母钱太夫人寿序

天子以钱唐事而垂宵衣之矐于南也则今张端公实揽辔云前是饥卒脱巾而噪于中丞门者中丞避之则益张挟而令于军曰所不甘心者如日端公驰骑往缓急数言而解亡何市人复寻迹为乱乱且甚公与新中丞合策捕诛之因以戢摄饥卒饥卒恐恐帖服事闻天子大悦赐端公金币逾等公乃徐行观察十一郡之吏民而提衡之节奏理解骹髀斧断盛夏霜负冬则温日而其大指在别淑慝明扶抑诸如表伍行入褚仆射岳忠武于肃愍之间若墓皆在钱唐者曰使吾威而摄之毋若标节义而诲之余家在吴郡濱海去钱唐盖五百里而遥其称端公异政月以二三至间与王元驭学士及之学士曰是子也不谷之所从事中秘者也已而曰有太夫人之义方在太夫人之媿学正公以妇德婉媿闻学正公有八子咸玉立岳岳周士而五为太夫人出太夫人五子而四举科第两牧方州一令岩邑最少为端公吾向者固习之齿尚卑而挺颖精练若此孰谓芝醴无源根富媿发祥乃实鍾之吾故以窥端公之有贤母也余唯唯无何而端公以满闻且得代而太夫人年七十七矣叔君自邳州左为余干令迎养令邸端公将以便道省覲而钱唐守张子振之同守喻子均故善予祈一言以为太夫人寿夫端公行则必道出饶饶守负弩前驱以事御史礼宜然端公业至饶舍而趣余干则必望车门步而进之曰有叔氏在既入覲太夫人则必具冠帔滌滌之属以荐且请谢靡盬不遑之罪左顾揖而谢余干令曰某且以为有母之尸饗今者筐筥錡釜叔氏乃尸之耶坐定徐睨太夫人之鬢不改而颊色皙而肤膩则必前请曰太夫人乃幸健母故然不以离忧损匕箸耶太夫人当曰吾晨而起晡而听若兄之献剖未尝不称快进匕箸也虽然犹未若快于闻而之治浙也邑去而治五百里而遥诸称异政毋虑月二三至焉钱唐之变与捷俱布黠者慑以而为神君弱者畅以而为慈父也则老妇不更恃匕箸大宅之腴滋滋满矣何离忧为余干令闻之则必欣然益市牢醴与端公更迭而寿太夫人太夫人则必悉举二公之觞以母子兄弟融融怡怡无间也于戏以予所闻古之母贤而其子鼎贵者母如万石严姬与李景让母然延年之为伎其献犹能使母惊而去之卒以不道见法景让之为刻其治军能劳母之坐堂皇使景让拜杖而后定今观端公之按浙其所献治视二子贤不肖何如也则夫明识至诲其归本于太夫人又何如也因次其言以授二子使奏之端公

寿汀倅潘翁八十叙

潘翁甫冠而补博士弟子则与它弟子有名者鲍司徒行之方中丞定之辈角秋相甲乙自诧可芥取青紫顾不得志于秋试守弟子廩者二十五年而始贡入太学又十二年而获雋垂六十矣人或谓潘翁不作公孙丞相故事耶潘翁亦沾沾居恒拊腹而问我幸不为曲学即一日射金马何渠出平津侯下而咄咄公交车间复不得志者三上而病于贡庐几殆乃始就吏部选人得光泽令则垂七十矣人谓洛阳强项董君亦垂七十而能霁天子之怒而为快今光泽令何状翁复笑谓使我一佩赤县绶彼湖阳主家当相戒

首善为东第冠何至烦柱后惠文也而翁之治光泽务以岂弟子谅收吏民意有罪当赎
缓者度其家不给则罢弗赎乃至公赋度不可罢者则捐俸代之又不给则移书取诸家
橐光泽议城城翁不忍其民乃诡曰甃工良毋如吾歛则檄歛工往而复取家橐偿之费
可三百金翁所断谳既大指宽辅情而行而又精勤于职每御史行部问令狱系囚几何
令以狱空对又伺知令毁家以纾民困益贤之然竟难翁老荐剡不时上仅得迁倅汀郡
至则以阙守告翁遂摄守时有寇警众议戍上杭而摄守独请城河头坪以为上杭援且
使戍者无内摇坪城而上杭益固时郡寮多喜为长夜饮翁独不喜长夜饮往往先返曰
吾不耐入少年场也已遂投劾去郡当是时其乡人江子文帅南赣吴兴徐子与居观察
使使遮道留之不得也翁归而诸子之贾成埽素封矣于是争治酒精益市刍豢之腴分
日以奉翁冀得翁一解颜而翁亦甘匕筋数从故所善方文学诸君奕奕稍胜罢而投壶
雅谈甚快也人谓翁此何必减陆大夫千金授五子以十日高车过从极意欢饮耶翁年
八十乃从容语客始而拟我公孙丞相我何敢望丞相贵且能以侯印子子弟吾七十四
而罢郡其年丞相繇御史大拜方惴惴日候上颜色下媚张廷尉而惭汲主爵我时据突
决胜无所让避卧至日三商始一转侧其时丞相受朔方难犹股栗也且老不御脱粟韦
衾人畴能刺讥我既而拟我洛阳董君我不爱人主十万钱光泽之民有遗思矣何忍斥
我酷吏我之所受先人产策之计然而息之以贻诸子诸子以酒食我我不市天子恩博
南粤千金装也且我又不为诱辞诸子亦无竢诱辞而后酒食我我又生得汪伯玉传诵
之足愉快不若是三君子者委七尺而听后进弹射也夫是三君子者皆盛际人也而又
老寿然欲以彼而易我我有所不屑焉伯玉者司马公也其仲淹姻于潘翁于是伯玉
过弇而语余且征一言之寿余谓翁为名士而不尽于第为循吏而不尽于宦夫不尽者
所以滋余也天故报之以寿且夫食官者家于官者也食乡者官于家者也翁损橐以代
民输不家于官矣翛然泊然以新都为畏垒不官于家矣是三君子者不必皆然而又欲
尽之是以仅得寿而子孙无闻则岂直报翁寿且将有令裔焉伯玉曰子识潘翁之孙恒
乎是有隼才必显以当所谓报者庶几耳余乃谓伯玉我何以寿潘翁第为潘翁言天人
之际微矣人启之天必应之天与之人必凝承之今天所以报潘翁若庶几而犹未尽也
则潘翁之寿考与闻孙殆征常山符矣仲淹从旁曰善请受简归而佐潘翁觞

赠吴大叅明卿先生六十叙

余少也从李于鳞先生游而是时诸先生皆称诗而吴明卿先生最后入其所称诗
独工诸先生皆内足而气扬以其最工者为泄造化之秘当见嫉嫉必取困阨毋老寿虽
至短折不以为讳而间得一语疵则必指謫以为大耄以为大贵人其不欲受之至面颊
尽赭归必极凋镞之力而后已以故诸先生之称诗益工而用是得狂声士林间谪逐相
继毋一登八生者其于寿考仅一徐子与先生过六袞以左伯终而又茁其后识者以前

语若讖云顾所谓最工者吴先生时时在穷达间不可以一端执而竟能操其权于穷达之外以自致老寿诸谓吴先生达者曰先生二十六而举于乡即为第一人明年成进士不待次而授中书舍人预知制诰又不待次而拜给事中间两守郡一董学政一叅藩中州海内操觚翰从事者靡不知有吴先生先生达哉其谓先生穷者曰不然先生少而孤半菽不继晷短褐不掩胫甫一直金华之省未及有所吐而遽逐之浮沉下列甫一司理山郡而又逐之凡数载而始馆鱼绯以坐堂皇据吏民之上而又逐之其后名为董学政乃在贵竹鬼方之域耳中州之吏道成以捧金镜入贺间而谒相公公下堂握手授餐谓旦夕九列女未几而白简尾之矣相公楚人也环楚而仕者靡不扬眉张夸以临要津而先生故若三闾大夫踟躅而吟泽畔也达乎穷哉予独曰不然诸言先生达者不为知世道者也诸言先生穷者不为知先生者也虽然先生所谓操其权于穷达之外者也先生初遭谪以轻薄论嚣嚣然而语诸唁者曰舍我谁当轻薄者我将有所言言必死今幸而奉六尺以浮沉无竞之地固当于是得匡庐彭蠡之间其治匡庐彭蠡言絶胜无何复遭谪于鳞与子诗风之曰尚可以出乎先生复嚣然曰浅之乎二子彼展士师非人也耶其地复得河洛二室治河洛二室言复又胜已而治武夷汀江言则又胜已而治岭南山水言则又胜乃至治贵竹鬼方山水言则又益胜其所谓胜者能曲尽其土风云物人情世态之变幻而不为牢悻困怫其所谓尽者不为韵之言有子厚之工而削其怨为韵之言有沈宋之丽而绌其卑迨其谢中州政而归卧于楚泽也优游出王以食素封日高春而起三商而酌稍有吟咏皆纵其天袞而发于天机海内之矢言者踵相接于门曰吾不知叅政何官吾欲藉吴某以不朽耳楚之相公歿而环楚之据要津者惴惴匿避不暇而先生漠然自若也吹毛索瘢者徧楚境而不能以毫髮加先生然后先生翹然而独贵故曰操其权于穷达之外者先生也先生仅六十不为老寿视向者诸先生则径廷自今而后造物所不爱者年以予他人不为重以予先生则重先生其善用之哉大陆之内其工不为韵之言推新都汪伯玉伯玉少于先生一岁余又少于伯玉一岁今年寿先生明年寿伯玉又明年而余方戴笠而坐蓬除受维摩不二门戒自伯玉外无以旗鼓当先生者先生之神益王志气益发舒其寿当益无量也以此赠先生先生当柬笑而举我觞哉

寿广东藩幕秋涯朱先生七袞序

余始得朱茂才定国之名于张肖甫司马盖袞然重于有司者也已而得其貌则温然而玉润又得其文则铿然而金声乃勅二子驍骏束修而师之宾之家塾相与扬搯道艺甚欢也间与余言其父秋涯先生之贤曰父为制科业而不成然约略得其大指矣亦一再应宾里选未就然尝补吏百石以上业已脱皂衣矣宦游在南粤南粤大都会也其沃能使人忘土父日佐治藩牒无害然一遇家戚而归即不复出矣父不甚别治生母时讥之久宦减先产奈何亦不顾遇所欲施予辄倾橐以偿之或行贷所亲知得遂辄沾

沾喜弗忧息也阔达不为城府所至示赤诚人有欺之者或告之不信曰彼交我而忍欺我哉生平无毁人亦不辨毁曰所虞愧心而已其它吾所不知也凡父之所为德以自偷适即不必人好之即人好之亦不能名之而父固泊如也既淡陀无它嗜独嗜酒遇乡里为鸡豚社或相与眺赤堇诸山临大海览两湖之胜奋然蹶屣从一奚往返数十里无倦色居人诧之吾曹少且壮壮且老而彼先生者貌如故而步武益壮岂其仙耶余乃谓定国子之家先生春秋几何曰腊且尽则甲子而周复十年矣子有母乎曰差少于父而日尚羊于一堂也有兄弟乎曰伯氏少夺于病为制科业弗成壮而能家好文事四壁皆图籍庭蒔卉竹矣叔幸已通公交车籍矣季能持门户矣有诸孙乎曰有而及舞象者业属文矣间一呼不佞俾诵所属文乃喜复命叔诵之则大喜呼诸孙诵之益大喜曰丈夫何必身有之哉使汝曹任我劳我任汝曹逸何幸也呼诸妇促具酒炙毋使乃公不醉饱盖衍衍如矣余时甚羨定国言而会故人周二太学自四明归与朱先生还往颇能称其状大略如定国不爽盖未几而定国迫试事还且乞一言之寿以觞先生余谓审尔先生胡弗寿也语云博厚无疆又曰神大劳则敝先生之好为厚德如畏垒其当天意精矣不役役于人我恬然如华胥其养神裕矣日中则昃月盈则食先生之子若孙虽才而未至荐贵若半璞之璧其光不尽露矣造物之厚于人也必渐而益之人之凝造物厚也必冲而用之夫先生能冲而用矣何以弗寿也余纵欲有言称子之家先生先生业不问人毁何以问人称哉定国曰虽然请姑受而以告于家先生

弇州续稿卷三十九

●钦定四库全书

弇州续稿卷四十

（明）王世贞 撰

○文部

△序

世经堂集序

世经堂集者何今致政少师元辅华亭徐公着也堂者何公所憩止也其名世经者何公世世以经重名之志不忘也公所著有奏对有视草有奏疏有序有记有志有铭有

墓表有碑有论有策有说有辨有对有解有引有原有跋有赞有箴有规有祭文有书有赋有颂诗有古近体为卷凡二十六公之诸子太常君辈鳩而梓之家塾以世贞之辱公知也获卒業焉凡八阅月而始敢效一言于末简曰于戏盛哉盖自古之言文者莫吾夫子若而其大要曰辞达而已矣又曰文明以止文于天地间有二其达者为经世止者为垂世而雕虫之技不与焉可大之谓达可久之谓止其用虽二其原一而已矣当公为诸生而受经即以经明显试南宫遂魁其经射策金马即以其策魁天下天下艳于得公之辞而公于时亦不能遽无意于工拙以故其文足宏丽而皙体裁及其慨然有志斯道悉取濂洛闽粤之说融会于心神而躬验之既涉其津而舍其筏以为破支离则道与器融而无间破藩篱则物与我融而无间其所结撰若讲筵之沃君讲席之示弟子皆务摘其精实而竟吾所诣而已即天下后世不能尽舍公之华以为操觚者法而要之谈性命而约于公之止泥伦物而企于公之止者孰能外也公既思以其学济天下而其在史馆时用持先圣典得谪外公不卑厌小官诸郡邑士风吏治靡不以身试之而大者若国家典故名公政绩下上数百千年之史而与之叅会敛而融之方寸之际而亡碍阂苟有所触则功与言一发而俱就今亡论他文即肃庙之有顾问咸取诸仓卒度不能无喜怒而公或剖言以绳之正或婉言以诱之道化投石为转圜代言之草摘紫洞括使河西吏人以为明见万里之外山东父老愿少须臾无死以待德化人主之德日显而国体尊乃至部疏覆核根理据事有敬輿之精而不为佞诸报藩镇郡国书牒衡势审几有文饶之练而绌其倨其它志铭碑表之类提纲絜矩有孟坚之则而超其识公之文所谓达者其效至于奠社稷润生民而一旦让迹于堂序敛而归之无何有之乡天下徒知嘉隆之际取治于公公不明其所以而庶犹有可窥见者兹集在也窃闻之泰陵之季太和至顺磅礴郁蒸发之为献若文天子又时时吁天以求真才而公始生而应之积至于嘉隆而后人文之化成于戏盛哉其亦不易哉昔苏文忠有云言有大而非夸达者信之众人疑焉今夫昆崙之原湛如耳而日夜流浸于百川水而舟陆而耕食者炊饮者汲其用长足而其体不少损盖公集行而后之君子有能潜以求夫所谓经世垂世者固随分俱满也即不佞言虽大谁得而以夸疑之是为序

周易辩疑序

余尝为吴江孙汝化序其所著易说而窃有慨以为易之冠六经久矣秦存之以筮家而小汉衍之以训故而支晋出之以意解而遥明束之以时制而浅盖至于今愈盛而愈去其真矣当是时独汝化不帖帖时义而其为说独精详今年秋州司训王子某复以郡丞施君之易学辩疑见示及卒業而后知君之所得于易者深也易者易也随时变易以从道也君所为说非有绌乎筮家然微而入于理非不關於意解然显而周乎象非不根之训故然指要而删其蔓非不工于时制然得意而超乎筮君所为易非君之易義文

以至于今彻上下之易也吾闻之汉有沛人施雠长卿者乡童子时从田王孙受易事师数十年然谦让常称病废不教授及其友梁丘贺荐之始与诸儒杂论同异于石渠阁而所授张禹至丞相鲁伯至会稽太守禹所授彭宣至大司空戴崇至九卿天下称施家有张彭之学君岂其苗裔耶何其说之有根抵也然长卿斤斤守其师言不能有所损益而君独能通古今之变以其臆合于圣人之精而又不诡戾于时其儒而教授于浙官而教授于高邮咸抗颜坐皋比即后先诸生受易显者比比当又何让张禹鲁伯也迟之天下称今施氏学贤于长卿故多矣余不佞家亦世世受易前后踰二十人然仅以取科第而亡能名一家言施君数典大郡负贤声其治得干之用九泰之九二为多而汝化之裨身又若有资于谦之诸爻者皆余所深以为愧而逊焉者也故并志之

荔子编序

余所善松陵王承甫者皙而肥耐酒累数十觥船不醉醉即仰天叱叱自快其骤见人不喜具宾主礼及叙寒暄通间阔与之语即竟日不倦然不好避俗于书鲜所不窥而不恒读书为文儁朗多奇思尤长歌诗大抵类青莲居士而以不胜才情故间离之然识者开卷而知其非今人也承甫游河洛所著作辄为人梓行其游楚亦然而最后访其友顾益卿于闽闽既饶佳山水其海错珍苞之类又足以佐酒而益卿居恒推事承甫气益发舒歌诗益富前后得诗近三百首名之曰荔子编范宫允伯楨胡侍御原荆期传之而属序于予夫荔最先着蜀品最下次着岭品小胜闽最后着品最高遂以其味居天下冠承甫之所游闽者岂为荔子故耶其所为诗岂尽发之荔子耶今承甫之所咏荔子百不得一而其所游闽则以闽之山水足赏而益卿足依也顾名编而以荔子母亦承甫有所托谓其后出而能冠天下之味也耶余览承甫诗一再过真若所谓绉縠单玉肤冰液望而以为海山仙人者吾不知视三危之瑞露何若要在中山紫花西域蒲萄下矣虽然以之植上林宁能侧生杂沓于霜露摧剥之余而媚时口哉承甫休矣其即吾南中安矣

沈嘉则诗选序

嘉则渡江访予山中出一编见授曰吾后先歌诗为篇者七千矣而今仅四百吾不欲以武夫累玉也今夫非诗之难而知诗之难非知人诗之难而自知之难非自知之难而割爱之难吾不能割吾之爱于七千篇者而以属吾犹子九疇而删之知不必尽贤于我为其无爱也所谓四百者不必尽贤于六千六百而是六千六百者不必不尽贤于四百其大较异也且也吾前诗成而见子子读之瞿然赏矣然穷子以诣而子不答其故何也今亦可以答也夫子笑而应曰向者问我而吾不答也固尔夫格者才之御也调者气

之规也子之向者遇境而必触蓄意而必达夫是以格不能御才而气恒溢于调之外故其合者追建安武开元凌厉乎贞元长庆诸君而无愧色即小不合而不免于武库之利钝今子能抑才以就格完气以成调几于纯矣而子之犹子九疇复为羣子之玉而府之夫何虞于武夫之累也耶虽然亦有以子之试诸生事告者乎始而得其文以为鲜不可取者则多取之既而厌其同虞其溢额以为鲜可取者则少取之又既毕而衡其所弃者未必远所取者也始不胜爱而后不胜厌也然则子之所余六千六百篇者其遂已耶其将授我而更衡之耶嘉则曰吾固言之以大较异也嘉则名明臣别号勾章山人其于文益竒有秦汉风

魏懋权时义序

余治魏郡兵识魏子允中于诸生中魏子年尚少所为文义竒甚然不能俯就格而又善诗先后奏余诗数章徃徃有少陵氏风余异之赠以五言长韵致代兴意今在集中余既已去魏则数闻魏子小试辄居首而独不利于乡又有李化龙者晚出而与之角相甲乙至癸酉秋李子举乡之第二人又三年为丙子秋而余解郟节还晤吾郡兵使者永嘉王公王公实后余而守魏亦尝竒二子迎而顾余曰吾向者谓李当遂举举不能第一人也谓魏迟之是必第一人矣使急足当孔道得试目即魏子第二人毋以溷我而亡何试目至果如公所属余恠问之王公曰凡为文义而尚辞者华而远其实尚理者质而废其采洁则病藻短则病气此四者未有能剂者也今骤而求魏子长则备之苛而求魏子短无是也凡为时义者则未有能超魏子乘者也寻又有传魏子所试文及它试与居平之业若干篇至者余得而读之而后知王公之所得于魏子者深也余不暇他举以耳目所睹记吾省之王文恪储文懿钱与谦是三四君子一试而其所自期与试之者之期之若取诸寄不爽夫固一时之操觚者少而人自披靡然亦以试者有定诣而试之者有定识也盖近百年而寥寥无所闻今得王公与魏子相为知己乃尔庶几有定诣定识哉王公乃命梓人将以风吾吴之华而远实者而余为叙其所以云

函野诗集序

洛阳温公之按吴也一再屈干旄而过余问政之暇相与促膝论诗甚适盖四载所而余起家臬天雄则公以中丞节开府其地八月诣台受约束十月报解严亦一再进谒见兵事之外其相与促膝论诗如故然不获请公篇什而又七载所公自再抚陝还洛不佞时适填郟中问讯之间稍稍寓目一二而犹恨其不尽今年余罢南廷尉待次里居而大参王公阳德乃始以一编属余曰此温公诗也夫余然后乃始尽公尝闻之燕赵之音相率为悲歌慷慨秦音则皦劲扬厉吴音则柔靡清嘉意者土风居多而洛阳独称天地

中气最为完而音最为和平其建都会自西周以至后唐千七百年间冠带之所朝宗诗书藏于闾闾而至于今乃有不尽然者独公起而振之大约风得之士学得之家而其所专诣径悟则不必尽尔也释褐自行人授御史以至中丞轺轩之迹半天下而独于燕赵秦吴尤深且久其意象之所融适则治而为吴志气之所感触则壮而为秦若燕赵盖非有意于章甫逢掖之合而要亦有以相发者然至欲测公之端倪而遽定公之裁格固不易也公居官所至有风猷而吾吴以挫岛警拔盗源其感公尤切大参公亦自以国士之知谋梓公集而余为序之如此公奏议若干卷及他文行世甚多当自有传者故不赘

海岳灵秀集序

海岳灵秀集者何尽弘德以还山东之名善诗者而集之也其称海岳者何山东古齐鲁地也齐东表海而鲁东表岳夫是以有海岳称也其称灵秀者何嫩其诗及其人也盖唐有殷氏河岳英灵例云集者谁鲁同姓诸侯中立也吾闻之周公之造周而雅颂之盛音鲁尽得而闾闾之又加以夫子之所删正固亡论已齐音之敖辟乔志虽小见屈于夫子而札也为之叹曰美哉泱泱乎表东海者其太公乎乃至炎汉之初鲁以蕞尔板筑抗天下之兵以为项氏守而弦歌不絶齐之夸诈急功亦变而为舒缓养名而一时谈经之士独盛于诗而业诗者鲁则申培公齐则辕固生其人皆有寿考显名而传至于瑕丘免中之属累累不废王式以诗谏韦孟以诗风而孟之孙若贤及玄成赏贵极于取将相天下以经术归齐鲁而诗尤为之冠第其所著房中饶歌之章则以属之唐山夫人邹子乐辈而司马相如邹枚雄褒诸才士其赋颂卓然脍炙于西京者徃徃出遐僻而齐鲁不与焉岂其所谓诗厘厘训故守师说而不能通之于结撰耶明有天下百四十年以迨弘德当重熙右文之世所鼓舞渐渍亡异于周汉之盛时而齐鲁之荐绅逢掖未有能舍训故而为诗者有之自边司徒廷实始司徒之于诗当李何之力复古而司徒悉庀赋以从庶几鼎足哉又五十年而有李观察于鳞观察之于诗志在超乘其游吾侪间矫矫牛耳矣而诸与二君子游而稍后先者若殷近夫苏允吉靳子愚李伯承杨伯谦冯汝行兄弟或矫劲其骨或澹雅其旨彬彬然三百篇之绪而益齐鲁重者固不乏哉吾又闻之申培公时与楚元王韦孟俱受诗浮丘伯元王既有国则礼申韦而师友之以迨三世祿不絶然不闻其能表二君子之业于齐鲁何也人主以经术取天下士而诗其一中立乃能以今之所谓诗者表其藩之人而广夫经之用其视元王可谓犹贤也已

改黄太常墓序

当建文朝太常卿黄公子澄首用知囊故策以救宁宗社不遂而死以至叅夷五宗天下为之饮泣而不敢言然固有笔之稗官者矣天下痛公剔肾析骸而无所归然实有

墓地为志铭者矣天下痛公之无后而不知一子走楚者为田经其后有参议表者复公姓而仕宦矣一子走吴者为彦修其后有博士云者以文学显矣万历之初元上下诏褒录诸死事者公首合诏格当祠当录后而吴之后始出而应之其於后楚复当何如也公之墓发于雷善善者以为积诚之感而核者以为疑其铭后有若悬记若符讖通方者以为伎术之恒而执者以为讹乃余则姑两置之盖匹夫有必伸而万乘有不能屈者死是也当公之于壬午也知一死而已知死而死则不死也夫以人主之威能寸析公之躯而不能寸夺公之志能致辱于公之戚属而不能卒辱公之名然则能使公有后耶无后耶昔果无后耶今而始有后耶其有而竟无耶无而忽有耶俱不足辩矣公之墓出一时台臬诸大夫艳其事立祠以祀公而博士之诸孙彪熊者思所以光大之会熊与余识以叙见属而余不能辞聊为志其大都盖窃有喜于天之定而公之所藉以不泯者固不在此也

此文成既而考所谓墓铭者不能无所疑志内称琬之后十二世由贵于吴祖铎生端赘于袁州按公世为分宜人无闻祖之族苏而赘刘也既赘洞庭矣何缘生于袁州若言公至苏州与姚善托孤则可然不当言苏人也当是时公有子得匿田间必当讳其姓不应尚称黄也公既以壬辰生死于壬午当年五十一不当云五十三也其仕宦履歷甚略而独载其临没之言又皆掇拾方孝孺余语且既云洪熙元年御史刘璉着而又称采访使我朝前后俱无采访使銜按刘璉崑山人永乐十年进士虽尝为御史而洪熙元年以左叅政叅赞宣府军务当时刻志铭必不敢摹掇行世以完石纳土中仅百五十年而剥蚀几徧又剥蚀之文若追蠹而一字不侵泯何也铭后数语若讖皆隐今抚按道府县诸君姓名不遗一人未闻永洪间有此术士也以后黄应龙书及太常诰尤为画蛇之足吾所以不辞此文者喜节士之有祠与有后耳不必熊彪之有祖也

史记评林序

太史公史记成于天汉而重于宣元之间班固氏欲自伸其业故互见其瑜瑕而王充刘知几因之皆有所指驳而其错节衍语异音奥旨未易通解以故徐广韦昭裴驷邹诞生刘伯庄司马贞张守节之流咸为之训故考索学士大夫乃始彬彬成诵矣然自东京以前徃徃樵核其体裁而阔略于辞法至陆机刘勰辈乃稍颂称其文而后世因之第名为之小抵而实为之祖述者班固氏也六朝骛绮靡毋论非指向所在途轨殊矣其最称能尊史记者毋若唐宋人然知或小近而力不足其甚乃不过邯郸之步阳为慕之而阴与悖又何取也明兴皇猷之焕发与元精之郁淳倍蓰徃古而其能为太史公者迹不出英宪而上不登台阁学士大夫不无三致憾焉北地而后乃始彬彬盖至于今而闾閻其书操觚之士腹笥吻笔亡适而非太史公噫嘻亦盛矣哉第训诂之家所传闻异辞苦

于不能徧而习者不得于事则姑傅会以文之不得于旨则姑穿凿以逆之昧法于篇则姑掄其句昧法于句则姑剽其字肤立者持门户皮相者务影响栩栩然自谓入龙门之室而不知其辙望砥柱之杪而背驰矣世贞曰余读史记者三尝掩卷而叹其未逮也乃今凌际叔先之矣际叔之为史记也其言则自注释以至赞隲其人则自二汉以及嘉隆无所不附载而时时旁引它子史以己意撮其胜而为之宣明盖一发简而了然若指掌又林然若列瓌宝于肆而探之也自今而后有能绍明司马之统而称良史至文者舍际叔奚择哉或谓褚先生之续武纪与他传也胡以弗删也曰际叔任述者也非任删者也其既已知之毋嫌乎武夫之淆璧也然何以称评林也夫有训诂者在而独称评志评也其于际叔取志焉可也

刘侍御集序

夫言人心之声而诗文乃其精者韵而诗匪韵而文其用本不相远而其究乃不能相通以故攻之者不能兼造其奥而发其枢自西京以还至于今千余载体日益广而格则日以卑前者毋以尽其变而后者毋以返其始呜呼古之不得尽变宁古罪哉今之不能返始其又何辞也已明兴操觚而树门户者非一家而称能返古者北地之后毋如歷下生歷下之于变小有所未尽而北地之所谓尽则大有所未满足者独吾吴刘侍御子威自其成进士而入侍中秘歷内外台所至无不立办然其意不欲厯厯一世循吏声固已俯视千古而时自夺于晷未获竟一旦意有所不可遂拂衣归卧吴阊间子威材甚高于子史百家言无所不治独不喜习大歷以后语天假之日俾与才合负相如之慢世而毋色痼爱子云之沈深而鲜酒嗜等玄晏之书淫而不癖动以故其于骚赋五七言古近体序记志傳赞颂哀谏微而极至于俳戏引喻连珠之类无不研精其思以求与作者合子威既以文自娱毋所托于名而世之好简者疑其蔓尚率者苦其深彼不自媿其目之浅而一览辄推去谓此何物语或稍稍就读嗫嚅相耳曰吾固能成诵矣所谓骤即之难而警之易也问其所以难易不能对也自是子威之名益不副实子威始虽不欲托之终不能无动意乃至念得如虞仲翔后世有一人知我者死不恨夫桓君山故通士也知杨氏玄必传而其时神人则已语之毋自苦玄故难传自今而视玄其犹在传不传间也子威所推许独歷下次乃北地而剗削弹撻之甚苦此其托指故有在且业以今之天下无能一人知子威者即后之天下风益靡靡安所冀哉然子威幸而不甚为人知其文亦不受人役得自致其拟议外足于象而内足于意兴而言尽而止其贤于余远矣余固不如子威亦能知子威一二故不辞其请而叙之

通州志序

古益部有通州而幽扬部无通州自扬部之通州出与幽部之通南北对峙而两而益部之通废扬部之通其始仅一盐官地稍稍进为州复降为邑至元而始定属扬部以逮我明二百年来鹽盐之利衣食江南北而其设险置兵控扼吴楚屹然一重镇矣地灵启而人杰辈出冠带履舄之盛盖殷殷焉通故领邑二曰海门曰崇明越在海中央以故通失之而改隶吾苏之太仓而海门之隶通如故自宋孙昭先之为通志十卷明通守严敦大孙徽等后先凡六修其卷自一以至六其书或存或不存而海门之为志则前尹玺而后崔桐亦不能与通志合万歷之三年闽林君云程自南刑曹郎出守通凡三载政修人和乃以其间考古图籍作而叹曰志其可以已也夫谓顾君养谦陈君大科其州人可取证也得无有所避乎谓沈子明臣史材也而远无避也于是聘沈而属之以顾陈辅焉仅及岁而志成为卷八卷之为图者一表者二志者二十六传者十二遗事者一谓世贞曙于文以书介沈而请序焉览之灿如也乃又秩如也已窃谓今志犹古史也古者千乘之国与附庸之邦皆有史官以掌记时事第不过君卿大夫言动之一端而所谓山川土田民物风俗兵防之类意别有图籍以主之志则无所不备录矣是故古史之失在略而今志之得在详也然史之大纲在不虚嫩不隐恶以故世子之隆崇卿相之威灵而执简者侃然而拟其后今州邑之荐绅将举笔而其人非邦君即先故盖有所不得不避矣是故古史之得在直而今志之失在谀也沈子之为通志毋论其哲体裁挈纲目博采精辨文辞瑰丽而已乃至官邪风慝凛乎霜钺之加有余畏焉夫何下太史公传酷吏佞幸哉是志也岂惟在通以俟他郡国有余裁也以俟一代有余采也故因林君之请而为之叙

江右奏议序

今少司马常熟徐公自释褐而拜宜春令歷中外台更抚三方凡十五政其责在为则知无不为责在言则知不言以故其所莅上而奏请之达于朝下而移檄之布于郡国者靡不梓而行之匪以着一时之能欲令天下后世有所考见若医者之着方书云尔公既督抚浙而以抚江右之奏议六卷示世贞山中俾叙之凡所以称公者大略备宗伯林公兄弟宪副邵君叙中世贞既卒读而窃窥仁人之用心与其言之所济博也天下之名为利者莫如饶而其为害实莫如饶自饶蕘出而诸蕘尽废县官之共祀宴飧靡不取给宣宪之季其重至于倾寶玉用至于饮食海内外而当隆庆初下诏悉按故事上供苛责取办公念以猩红色不易继而器之巨者不能无苦窳率百不完一盖一纲而捐中人数百家产于是上书力言之天子为之勉浅其色而裁其数饶幸以无流徙公又以属郡邑水旱相继为之请賑請蠲天子亦不以大司农之告乏而复勉申公之志以至议漕儲议額派议逆人田产议獎能议斥污诸所请不一大指在于爱惜单赤以培国家元气恳恻孚尹忠诚发于内而见于辞以故迹若小有扞格而叩之辄响应易益之九四曰有孚中行告公用圭而夫子系之曰告公从以益志也其殆公之谓耶公念国家人文显融之

化过前代万万而从祀孔庙独一河汾公为未称上疏请以故新建伯王文成公配尚寝未报岂以公所填抚四履之地尝继文成仅以为尊先喆举祠祀之恒典耶而不知公之所明圣学维道统其系为甚大而余窃有窥于公政术之妙批郄中窾左右逢源无往而非良知之触见其所得于文成者尤深也世贞最辱公爱亦尝后公抚填一方而所上事不当縈乃至以浚恒被口其视公信諫能无愧哉公今治浙平赋捍灾尤灼灼矣疏当有叙而行之者故不复赘

袁鲁望集序

鲁望长于余三岁当其荐应天时甫踰冠能为古歌辞而又善书学士大夫争传誉之自是七上于春官皆不利然其为古文辞益习而吴郡素称为文物大都会益多学士大夫游即有赠饯宴赏酬酢及诸吉凶事以不得鲁望一言不为重其诗若文溢帙而最后取进士高第以自引得南仪部郎以选进郎考功再以选副山东宪天下之学士大夫争蹶履叩门而乞言其所为诗若文益传且广然鲁望之业成而病酒死矣其门人长洲令李君将梓之而以序属余余窃谓天下以文名家者未易屈指数然大要不过二三端高者探先秦摭西京挟建安俯大歴次乃沿六季华靡之好以短钉组绣相豪倾其下始托于理务于简俭以逃拙而鲁望稍不然谓文以纪事则贵详文以引志则贵达必不斥意以束法必不抑才以避格其体势虽若汪洋淡沓而不可穷其指固谆谆焉若耳提面命之也余数从鲁望酒间论文远尊昌黎而近实规宋金华氏诗贵钱刘而不欲舍吾吴弘正之步今试取而读之于是数家者摹象斟酌为何如也今天下之文莫盛于吾吴而汝南之袁为吴最鲁望之尊人胥台公者位寿小亚于其子而名过之胥台公尚裁以进古微不足鲁望尚满以俯今则有余兹集行不彬彬称吾吴文章世家哉即不登中寿奚憾焉

苍雪先生诗禅序

佛无禅自达摩氏西来其教行而后有禅也三乘之上者曰大乘自禅之说精而后有最上乘也最上乘者非超大乘而自为上也诗无乘即其徒觉范皎然所不及自严仪氏论诗而后有乘也诗禅无诗自苍雪翁而后有诗也夫以代定格以格定乘者严仪氏也诗自为格格自为乘者苍雪翁也苍雪翁之于诗采不能六代体不能五七言古姑即唐之律絶以近易晓学人而其所谓二三乘亦取其一间之未达者非若独觉初地之邈隔也大指意趣在养格调在审二语尽之而所谓神来者从容中道气来者触处而发情来者悠游而得则严仪氏未前发也当苍雪翁之论诗在仁宣间学士大夫尚浸淫于胜国之习而不自觉乃欲以数语抉造化之秘而振起之不亦伟杰丈夫哉令是书行而世

寧无兴者又何必寥寥至数代而始有北地生也今天下之不为诗禅者鲜矣而不能无二境入悟境则坐成莲花入魔境则立变荆棘然而不入魔者亦鲜矣安得起翁于九京而一语之翁故建业杨氏其大父行佐开国至都督者二人有战而死燕师者以故感家难不仕而隐于诗盖参方于汾山石头者三十年而后得之亦不易哉翁之曾孙一洲名士也与余善故为叙其所以而行之

弇州续稿卷四十

●钦定四库全书

弇州续稿卷四十一

（明）王世贞 撰

○文部

△序

重刻晋书序

始为晋书者何承天崔鸿臧荣绪之属凡十八家而至唐贞观中诏左仆射房玄龄与许敬宗褚遂良之徒删缉之凡为帝纪十志二十列传七十载记三十其事例属敬播天文律历属李淳风掌故属于志宁纪传属颜师古孔颖达辈而宣武二纪陆机王羲之传天子称制以叙论之最称彬彬详雅矣说者乃以为晋历仅百年不能当汉东京之半而文倍之诸载记僭王雄武凶悖妖祥之变徃徃过实而世说语林幽明录搜神记亦所不废循正者卑之以稗官责核者外之以诬史而是书稍屈矣自正统之说行而晋与秦隋皆抑而为闰青衿而应制科者至不得举其凡而学士大夫名为好古博涉之伦内畏其繁而外摘其瑕以不足诵读即自左史班氏而下若范曄陈寿之撰而有所不能对何论晋书乃至李延寿南北史哉不佞窃不敢以为然以为晋固亡所比数于汉唐氏其德政礼乐固不敢望赵宋然自舞阳持国秉四易世而为武帝剪者身不王王者不获已以为差异于陈桥之骤而自南渡后其君臣稍能自标明其统举聪曜之耻而洒之不至若建炎开禧之单宋史亡论已其最皦皦者莫若唐然纪主义近裁而失之略传主辞近精而失之涩以举其人与事不能使人跃然而如有覩是书之失固不能无杂采而轻信然读之使其事犹若新而其人犹有生气者以拟陈范则有间庸渠出唐史下耶今其梓独

存于南国子学宫又以久故多脱误而学士大夫苦其不易得益疎不治吾邑人周太学若年氏偶见宋秘阁本于其友欣然请而授剞劂首尾凡二载至垂橐而成者十八矣忽暴疾卒家人咄喏曰是爨材也而家狗之其以畀火丁进士（阙）者与太学善叹曰吾不可以剪吾友志而弃一代之业乃委产于其家以成梓归而僦工续之噫亦不易哉今而后熟有晋而又知晋之有书则自二子始矣如其有余力以及延寿南北史可也是故不辞其请而为之序

郢巫集序

始范君司理云间而有诸台委所至以廉平曙大体称及即之恂恂长者与谈古今事则又纚纚若贯珠也少选手一编而示余曰庶几藉子以母负余读之则有骚赋五七言古近体若干篇余窃谓自东京而后为永嘉而大江始画地而南北其北日侵寻于马上之业不暇调宫征理经纬而噫■〈医，口代酉〉之所发为悲歌慷慨其气完而骨劲南则以其泉石之余地舟楫之余晷负隐囊握斑管而课花鸟字组而句句组而篇然亦不胜其靡靡业肤立矣盖余二百年而为隋而始合其文之调亦如之而又垂五百年而为宋季而又分文之调亦如之虽未几而为元然地合而调不尽合也自明猷吉仲默以至于鳞乃能以其北之完气而修词而吾吴昌谷亦稍裁其南之藻辞而立骨庶几彬彬质文君子哉范君为河洛间人其成进士去诸生之结撰未几而所为骚若赋宛然楚蜀之遗轨也其诗固未论建安抑徐庾后而子安前也耶骤而披之若舒绣撷彩近于南之靡丽者徐味之而不失所谓沉深矣夫靡不病气丽不病骨用其南以程北而鲜不合也盖君名其编曰郢巫郢巫者俟郢人治也夫以君鼎盛之岁不为簿书夺而日从事于古若此其能融浹于分合之际以上媿二三君子又奚难哉第熟之无所事巫矣

瞿文懿公集序

自西京之气漓而为六季昌黎公出奋然一变之然时有所折衷而稍存其伟丽以见难至庐陵公而色泽为之尽洗学士大夫毋论有所趣背徃徃见以为易简明兴而庐陵之乡作者杨文贞公为之冠当文贞公在翰林尝事仁宗皇帝于青宫帝手一编而授公曰此欧阳氏书也其命有司梓之以式操觚者文贞公固于天性近欧阳氏且其乡前辈喜慕说之得帝语而益自信以故为庐陵学而比杨公于欧阳者不衰当宪宗朝吾吴郡以文献称顾其质渐移于藻而吴文定王文恪以制科业连得大魁苟其于文小加饰天下当为之景附而二公能笃守之以文定之详和文恪之精整虽不无小有损益然其不悖于则均也去二公之甲子而为其乡作者曰瞿文懿公当文懿公时吾吴之藻极矣而公复以制科业连得大魁天下之所愿为景附者宁下于文定文恪二公而公复能笃

守其说居安之所得宛若有左右逢原者于一时之藻固未必其尽祛而简易所御之功不浅矣毋论名为藻者即自负以西京而踞昌黎庐陵之上代不数人然往往不胜其剝镂而耳观之论隐然以为治世忧试取公之文而隲之其气舒徐而不迫辞洞达而无晦于造化之巧时有所含蓄而不尽露人情物理间引其常而不尽究其变其不以为治世之音者几希余辱与公同榜最少视公诸父行而公不鄙弃之间引与谈文事余方圉圉焉体裁之是狗而公宽然若亡所从仿今尽得其撰着读之而始稍窥其绪乃为论次之如右公佐留铨赞秩宗馆史局之柄为嘉隆间名臣尝用其子汝稷请而传之矣梓公集者汝稷而公之门人耿中丞定向留令震臣为一佐楔劂资汝稷博学而行修雅善名理不愧为公后云

卓光禄诗选序

始余仲氏敬美与卓光禄游亟称光禄侠而儒者意不欲寔赏郎腹中而今年三月光禄过我弇园美风神善谈笑予固以仲氏故异之与饮则又能为文字饮已进之论诗其论诗翩翩能解頤乃出其一编示余曰敢藉子之一言以为觚管规余谢不敏小间读之毋论其格所繇起其才情则斐如也光禄居塘栖去钱塘不百里而近其北通吴会仅一衣带水以故多长者游而黄淳父周公瑕辈又时与之倡和扬摧能自致于古而不为纨袴夺如此余尝恠胜朝之季江左若倪瓚顾瑛辈不独以豪举其才艺藻翰往往能蓄诸名士而撮其胜长诸名士亦争愿为之客而不自引避以国家右文之化二百年而江南富豪或冯家声得一官则以其官与赏强致客而奴狎之赏积而无所事不听其好以逃于声色狗马则阳浮藉慕古之名以从事图籍器玩而垄断其中问其所以古不知也光禄虽赏不能中豪而见若为豪者乃其所交游亡非诸名士所托亡非酒而所撰思亡非诗其诗又亡非古则岂豪所能强踪合哉余闻之瓚瑛时有杨廉夫老而为之长其社然嗜声色所游集必破橐二子者强而事之不告疲余诗不能当廉夫且老矣幸生平无他嗜异日杖屨而叩光禄之社能见推择为长否因书以弁其编

黄定父诗集序

黄定父者故江都诸生入太学当有官矣而谢不复应其少而为诗即以诗名郡故多中豪浮慕文者争延之入社不敢与讲钧礼前是欧祯伯教授江都而江都诸生陆无从后先以其艺见余称故人而亡能举定父者今年夏定父荷笠蹶躄肩一瓢而访余坐定出瓢中诗若干首曰奈何当子生而不获一言之许既余读而称善者久之则又进曰幸既以辱子许而奈何不借一言以为下走重夫余求所以复位父者而不得也虽然窃有请子之江都故扬州也扬之封奄江南北而有之自吴魏劲而扬裂为二其江之南

以家迁客佳子弟号为衿绅觚翰之所而北则争得而各委之以置烽而居戈胄盖至六季益甚矣唐兴画塹为一江都日以雄重而不胜其繁豪之习甫离乳而美醪梁肉乘之所以荡目引耳者万状何暇论诗书哉今吾江左以一郡例之其贲不能当若之十五而文士过于若百倍定父乃欲与一二操箎者偏师以从盟所何也业以贤江左则当采其靡丽者赋之而读定父之诗大不尔其乐府五七言古则务完其气而逆探古作者之所自来近体或澹或壮要多自胸臆出之而不染于色泽夫定父之所从盟所者偏师耳而巍然不屑当邾莒赋亦雄矣哉余故为序之而且期定父以异日之牛耳

钱东畬先生集序

当德靖间而海盐有钱东畬先生者其令盱眙则盱眙之吏民师保父母之尝练卒缮城以遏强寇齐刘之劲故人魏恭简公赠之诗期以张睢阳事先生入而郎南北曹属人主修八骏之役偕同舍郎力争之直声动天下而先生顾逡巡移病免及其再出而郎南祠部以至北比部所至有声实而其于临江守尤着先生之守临江不为小治办一切以惠爱行之而事亦举课最当迁会以不能馱馱事上官移僻得贵之思南遂乞归归而临江之吏民请祠先生先生之归几二十年其所为德于乡者非一以八十余卒卒而乡之父老诸博士弟子复请祠先生先生工属文尤好吟咏其习先生诗若文者见以为才士及诵南曹疏者见以为直臣及临江盱眙政者见以为循吏及与称乡后进者见以为善人君子然竟莫能以一端名先生而先生亦隤然不欲以一端见名盖去先生之没二十年而世贞以叅政旬宣其地不唯求先生之遗迹不可得而所谓贤子若永州守芹仪部郎萱者亦非人间人矣既又十年而先生之少子诸生钥率其子乡进士应晋以其遗集来请序少间获一二寓目焉乃作而叹曰知人诚不易哉夫以德靖间而操觚之士负气而先格自称为正宗而诸以藻丽而谋夺之者何限乃先生不求合其藩阨而直举天则之所自溢为之先生之所师师心耳彼两家者不得而有也顾其从容舒徐之调不至弦促而柱迫不作窘幅而舛纬其合者出入于少陵左司之间而下亦不流于元白之浮浅乃至他文章之为序记传说者毋论东西京要亦庐陵临川之遗轨哉文中子称古名世之人为振奇而惜其思苦而言艰至傲治诞碎急怨怪怒之讥不一人而足者彼诚有所不满也先生其可免已先生之诗余友彭君辂为评之而其文则薛君应旗为序之即余序何以加二君即有加而称为知先生奈之何竟以一端名先生也

重刻吕氏春秋序

吕氏春秋一日吕览故秦相国文信侯不韦与其客所著书也当书成而不韦悬之咸阳市肆曰畴有能损益一字者子千金而竟莫能一字损益也其书今颇行属传梓久

不能无讹误而云间徐太学益孙辈相与校订重梓之而问序于余余读之未尝不掩卷三叹也穆叔之次立言于品三而操觚之士若为之小屈然子桓以雄豪创起鼎革间顾欲然不自挟其有而以继世大业不朽盛事举而属之文章彼诚有以见之也不韦者一贾人子耳操子母之术以间行于秦而得志焉举秦之国于股掌间挟其劲东向而瓜剖天下位相国号仲父爵通侯十万户彼岂有所不足哉而顾孜孜焉思成一家言以与诸儒生角而割后世名此犹未也不韦固庄生所不道庄生之识至欲齐死生平物我举一切有为之迹而空之乃亦孜孜焉而务欲成一家言度其于辞不工不止故夫古之称立言者未有不为名使者也且以不韦之诡譎狙奸岂其果与闻于道而其客亦务相尚为权竒错厕于鸡鸣狗盗之雄虽间采圣贤之长辞以文之即中夜一静思验其言于所为之迹有不澆涩汗浹者耶惟其机心之发触而为机言核削之于申韩辨巧之于仪秦有不知其所以合者则固其恒也且也不韦之所为千金者再耳一用之而聋瞽秦王割其国柄再用之而聋瞽一世之士而割其名虽得之而俛失之虽失之而终微得之不韦固贾人子要亦其雄哉徐子与其侪二三子俱能文章嗜古若渴慕先圣不以人废言之义而梓行之所谓芙蓉发于淤泥采之而已置淤泥勿问可也

沈开子文稿小序

昆山之沈最为文献家自其先郎中公以至提学公子善世受经术取甲第而提学之子曰开子乃始以古文辞名开子为人气豪甚既芥视一第谓可俯而拾其为古文辞即欲超宋筏而上之三吴靡靡所不屑也然竟以数竒亡所成而稍移其好于狭邪卒以病死所著述亦随手散佚去余虽以故人子遇开子尝一再接而意殊鹵莽然退而过仲蔚未尝不津津好谈余也开子没且十年而其友陆楚生手其文十余篇属余序而欲梓之余尝读黄淳父集报开子书谓其五文序解似庄索又似禹贡图书似左序传似司马子长且以弘德间学士大夫洗百年之懦习而今未有主盟者将以属开子淳父自矜贵不轻为然诺而开子之见推赏若此今开子之与淳父书尚存而所谓五文者固不在读之而求所谓似者亦未得也第其于辞气雄劲骏发虽未尽洗其师门语要之有自得者庶几文豹之一斑耳呜呼士生而不遇时又不享年至并所恃以不朽者又散佚失之斯真穷矣哉楚生将以开子之一斑而令后世重开子抑假余之一言而为开子重计亦迂矣其所以为友称谊焉可也

游宗谦诗稿序

游子年四十余而谒余以弟子礼余力辞之曰余所不敢抗颜者有如日既坐定谓余曰不佞尝事林兆恩先生而未已也已又游于何维栢先生而又未已也乃今得事徐

中行先生与先生子固谢不敢当则又出其诗若干首曰何以教我稍读之则泠然有新声而不至諄于古则即其辞可以知其所遭之穷然往往能致其穷之变于语使人惻然而思悯宛然而有余味乃谓之曰子之所事林先生者其为人也谈性命人也吾不知其所深诣殆欲举一切而归之虚其所游于何先生者则以高行闻天下修辞斯猥矣今吾子舍而师之所谓虚而名是迹舍而所从游之高行而雕虫之技是孰且所为计一徐先生足矣而又何所藉余也游子曰非是之谓也不佞于所谓虚者日服膺焉而未有得也高行者景之而不相为用也自不佞之为诗触于兴述于赋寄于比乃充然若有得而吾之性与情又若相为用矣今夫咀藜藿裋麻枲而不为厌者其所孰有在也厄穷至于死死而不畏者以所托于名未亡也夫执其似而我贵者冥趋者也不得其境而轻相鄙者迷复者也子奈何以雕虫之技而易之余曰善游子旧有刻稿二俱名之曰辟支巘夫辟支者佛经训为独觉也游子其殆有所寄乎盖至是而谋尽取前后稿加删削而梓之曰岂敢以是售后世乎哉贫士不办行卷吾一梓而数百千卷立具以贄夫天下之能操觚者为先容而加斲削焉虽然非子无以先容也窈人手一璞而示人见者靡不以为石也陵阳君既封而后目之玉则玉矣余甚悲其意故卒辞其弟子礼而为序所以云

徙倚轩稿序

今年夏白屿金先生自建业寄余一编诗则皆五七言近体也曰吾老矣子其为我序之盖余少时则闻先生用乐府名德靖间一时喧然以致远实甫复出也而先生尝一过余里居余姑与先生谈乐府则谈乐府与稍及人间事则亦及人间事不色忤而久之乃得先生一二篇甚以为快盖于所草卮言再致意焉及今而后窃窥先生之造之十五也诗古体故未论当德靖间承北地信阳之创而秉觚者于近体畴不开元与少陵之是趣而其最后稍稍厌于剽拟之习靡而初唐又靡而梁陈月露其拙者又跳而理性于鳞起济南一振之即不佞亦获与盟焉公首尾与之偕六十余年不少染指于变迁之调而时守其所诣务使意足于象才剂于格纵之可歌而抑之可讽即遇之而豪者失其所为气华者失其所为泽而先生之诗固自如也昔僧齐己好韦苏州即为苏州语而见之见辄不许也已乃进其所自草而苏州乃大赏叹曰奈何舍子故而希我今天下之不为济南语者盖寡知必无以易先生故也先生有轩曰徙倚而小仅容膝遂以名其集余为序之而且与约曰后八年而和卫武之抑篇而示我请更得授简焉先生所为他诗及乐府当更有行者说具见前

云间二生文义小叙

云间二生范显先于馥先其长者仅弱冠各以其所梓四书文义就余而请正焉且

请一言之弁始馱先年十六而以长笺自通于余其词旨极卓诡不伦大要将舍一世而千古之是师顾独不能余舍余因切规之谓子能立稿巘石衣草茹木自愉快已哉盍稍就绳墨以应制科而范生则自其二父至伯兄皆用经术显贵而心顾厌勸之于书非先秦两汉家言弗读会其父兄后先歿意忽忽不自得乃与馱先游而又得余言则相率为时义遂能成卷读之范生殊精劲饶典则于生则能自致其语于人意表毋论其诣不尽合要皆不失其所繇来而又不諄于经传二生退而客有谓余立言者以不朽计此岂其能不朽哉夫训故之学雅已非圣人旨而况乎时义割裂而饰藻之子以为不然夫时义者上之而不能得圣人旨下之而异岐于古文辞以希有司一荐者此其义故时也乃圣人之精神含寓若引而未发者吾忽然而发之先秦二京之筋脉步骤能出入于吾手而不使人觉今夫以乳拟醍醐则遠矣从乳而酪而酥从酥取醍醐未有不醍醐者也以瑶琤盛醍醐则醍醐以陶甌盛醍醐则醍醐故夫善为时义者未有不译经而驱古者也客曰二生之遂梓之也何居曰子不覩夫陈正字乎哉寧捐百金之琴以警客而散之百篇盖一日而遂倾洛下凡唐之名士大夫若昌黎香山辈诸所谓行卷者盖昔之诗若文而今之时义也甚哉士之迫于人知己也夫二生梓成而为行卷者百千易矣即合而有知我者固幸其不尽合而能弹射之者以他山之石又何尝不幸哉乃余甚竒二生文而畏其蚤就窃覬其弹射之者逾于知己者焉因序以勉之

两都纪游小序

莫山人公遠好为诗其诗或忽焉而创意或突然而起调务于人所不经道语与山人善者谓其源出岑嘉州常县尉惟山人亦自谓近之山人少不别治生时时寒灶突矣少年辈得山人一语以资抚掌而所为诗辄有善而梓之者最后游两都士大夫倒屣与杜门略相当而山人之好为诗益甚自夫眺览酬赠以至羈栖牢骚之况靡不托之于韵而吾友宋廷尉望之意不可一世士顾独贤重山人与其诗而属冯观察序之当涂某令梓之夫以扬子云词赋之宏丽而所谓玄者仅一桓君山能笃好之而已虞仲翔骨目磊落人也叹举世无知已至欲以青蝇为吊客而今乃有之二三君子以知山人知亦不谓穷矣山人之集乃名曰两都游纪是诗也不可言纪岂亦以眺览酬赠羈栖牢骚之况托韵以悉之而附于少陵之所谓史耶

朱邦宪集序

邦宪家黄浦去余乡百里而遥其所游尽豪贤长者而与余交独晚交晚而文酒之好独最深亡何谒余传其事亡何邦宪卒亡何其子某等梓其遗诗文数百篇而属余序之盖余与邦宪交仅十年而终始若隔世然第所以为邦宪者亦略备矣邦宪之于诗虽

不专为高岑亦时时入钱刘然意清而调和远于拘苦粗豪之二端至其为文亡但东京
駸駸乎初元竟宁之季小语隋削亦不在柳河东下矣间者伺邦宪晨起盥櫛罢即户外
屣恒满又多所造请与报谢里社率釀辄居首三老有疑难一切居间解纷皆以属之邦
宪稍日下春沉沉杯勺间矣不知其于三余之晷若何而考隲经传精核若此也其所为
诗酒语慨慷多于舞衣歌扇得之大槩若是者气有充而辞或不能无累又何能清其意
而和其调至此也邦宪虽不得官为其名高而谒文者相踵邦宪又不忍谢絶必令得意
去计邦宪之事与酒十九矣又何能别琢工诣至此也古之于诗文类不能相通而其所
谓工者务逃之于穷谷荒野杜门腐毫而后得之天之赋邦宪抑何异哉邦宪所最善友
生曰沈明臣兹集多其校讎然明臣间为余言邦宪虽不能释事与酒其操觚染翰无异
于斋居时第篇成令人弹射之随语即窜易不工不止也虚已哉邦宪矣其所谓事与酒
者迭应而神不累者也兹所以成一家言哉或谓余实似邦宪毋论似不似邦宪之有余
亦足称知己矣

王叅政集序

此为永嘉王公阳德之诗若文也始公少壮而举乡试一再困公交车即谢不应而
读书眈岙中其书自经史外诸山经地志以至星历堪舆之学亡不渔猎大指而不欲以
雕虫一技名其家比为伯氏所强射策收上第两令剧县入郎尚书兵部出典三辅晋领
江南节所至赫然有循能声其在江南日而余罢郟镇间谒公与谈所及兵政漕饷国家
大策朝廷典章便哲若指掌也已谈前辈风猷节概则隳永芬馥齿颊间已又谈丘壑名
胜则令人鼻端拂拂出烟霞想稍及齐谐夷坚瑰怪事亦自傲浪忘倦而至推量文章诗
歌昔人以为不朽之业虽微指好之而间若为不能尽者然其所善于乡则康从理所识
赏于魏则魏懋权于吾州则曹子念所重于吴则俞仲蔚非精深其道不易鉴也及公去
而子念始手一编而授余得所谓诗若文者而卒業焉乃知公非不善文也又非于推量
不能尽也大指又不欲以雕虫一技名其官夫读公诗而必欲程之以六季初盛唐之格
乎哉顾类多调畅和适与吾之性情会间有籁发而精诣者其不以为嘉随二州之语鲜
也公文尤不规规于古然本之蓄而裁之识剖切详到悠然出于天则者固非镂肝效顰
之所敢望也于是子念以为然谓余序之公功既高忌者不能胜乃诬以为耽诗酒而忽
忘正事公笑谢诸公訖我固当第我不能诗又素不食酒夫簿牍之晷自鸡鸣而跨乙夜
而不休酒至口辄瑟缩欲遯竟日而不能毕一叵罗我固甘之然我何以诬诗酒余谓子
念公集行得无天下复以公洪于酒也耶第公且出不出而又不食酒其日皆公诗与文
之日也即雕虫之技亦不为负公矣

休阳史序

休阳者休宁也何以称休阳志始也何始始自汉也何以称史用史例也史例有二纪传志表详而编略凡志则纪传志表例也巢父之称休阳史也则编年例也编年例有二左氏之于编年也纪事者也春秋之于编年也明法者也史之于休阳也何居以纪事也则何以明法例也略于左详于春秋意者其用竹书例也休阳邑也其及郡何居其又旁及他邑何居意者用春秋之于盟主诸侯例也其不以明法例何居天下一家法在上矣是故不敢当春秋例也纪事矣又何以不左氏例也修辞也其修辞者何以裁胜也甚矣巢父之好用奇也盖尝以诗文谒不佞矣无已而又以休阳史来曰天下庶其有知己哉即不尔若何盖其自叙犹有后世也吾且藏之天鄣山

宋诗选序

自杨刘作而有西昆体永叔圣俞思以淡易裁之鲁直出而又有江西派眉山氏睥睨其间最号为雄豪而不能无利钝南渡而后务观万里辈亦遂彬彬矣去宋而为元稍以轻俊易之明兴而诸先大夫之作不能无兼采二季之业而自北地信阳显弘正间古体乐府非东京而下至三谢近体非显庆而下至大历俱亡论也二季繇是屈矣吴兴慎侍御子正顾独取宋诗选而梓之以序属余余故尝从二三君子后抑宋者也子正何以梓之余何以从子正之请而序之余所以抑宋者为惜格也然而代不能废人人不能废篇篇不能废句盖不止前数公而已此语于格之外者也今夫取食色之重者与礼之轻者比之奚啻食色重夫医师不以参苓而捐溲勃大官不以八珍而捐胡禄障泥为能善用之也虽然以彼为我则可以我为彼则不可子正非求为伸宋者也将善用宋者也然则何以不梓元子正将有待耶抑以其轻俊饶声泽不能当宋实故耶乃信阳之评的然矣曰宋人似苍老而实疎卤元人似秀峻而实浅俗之二语也其二季之定裁乎后之览者将以子正用宋抑元以信阳不为宋元入斯可耳

弇州续稿卷四十一

●钦定四库全书

弇州续稿卷四十二

（明）王世贞 撰

○文部

△序

台中奏议序

明兴言者之路颇屈于嘉靖末而是时侍御张公按山西独上疏请召故谏臣吴时来董传策等五人以为能发相嵩父子奸曲突徙薪之功大疏上忤旨逮繫诏狱廷杖六十谪编氓居无何为隆庆初天子用遗诏悉召复直谏者官言路始大发舒而张公再用为御史感激上恩且自以不世遇于是所条上国事其大者如复殿名勤圣学责相业重缙绅咸的的破窾寻出按三辅孜孜恤闾井瘠瘼再以蠲省请而其最难者疏请特召故谏臣石星时左右以公扞罔明诏譖之几复逮其最大者紕悍相之奸欺请置于理天子为绌恩私强去之海内翕然以为张公岂真汉御史纲后耶不然何其能触当道焰至此也公自是迁馆尚玺绶佐太仆犹逡巡以为骤避之请急还里而所谓悍相者复起遂以大计例逐公矣会公尝一论故陝西抚臣不行当亚相罢而抚臣继显贵用事公自是不获振即知公者以例格之徒有弹指叹咤而已夫所谓例者盖六岁大计京朝吏而斥谪之为恒例其以鼎革灾异出言官之建白而后计吏曰不恒例夫不恒例故例也识者犹疑其投间成报复而今所以察张公者无一焉一相握太宰柄曰请得一第言官而去留之一相领御史台曰不可毋乃使甘心于素所衔者御史台之说虽不行然天下归直台而不归直太宰此何以例为夫知大察之为例知大察之弃而不收为大察例不知夫非故而察者之不为例也今不持例以格报复者而持例以格被冤者何也元佑之贤擊元丰之党不胜而其人为绍圣所以甘心元佑者流窜之无所不至然不遽使之终身锢也即锢亦未有不解者也以张公之讲学明道理其视一官若敝屣虽不为大用然所建白裨益国计非浅其文辞亦庶几元佑之刘器之陈了翁足以永世矣计张公疏亡虑数十独其推轂不佞为过情然不佞不敢以私为张公惜不佞之所为惜者惜国家体与夫似公而俱不复用者也

念初堂集序

嘉靖中司外制者务以骈偶割裂绸缪其文辞嫌于人主而下谏执政乃推公与二三学士讨论之而公所草最为简要淳古推本经术彬彬然有两汉风当是时馆阁之士争以诗酒饰太平而公独不然务顛析国家典故以至边防财赋诸大计歴歴如指掌以故其见之文皆明切破窾隳厚有余味公凡一典文衡三领佐南北成均意必得真材以需世用故淳淳然所提耳而诲之者无匪近里敦行之学具载诸说部中可考已公既不屑为花鸟月露役而一时雕虫叶玉之技愧避若异趣然有所发于性而止于文明者故

内足于实而外足于藻也不佞自少时好读古文章家言窃以为西京而前谈理者推孟子工情者推屈氏筴事者推贾生此岂有意于修辞而辞何尝不工笃也一气孔神于中夜存恍若抉玄珠于夜气平旦之前而先几齐物之妙所发于吊屈喻鹏二章者亦畧可推矣后世始岐而二三之各立门以相高辞■〈谷卂〉而不能胜则归理理穷而亡所得则复趣辞舍事而谈理则空舍理而筴事则俗彼其岐而二三之也非真能诣于其所受者故也公之所诣真夫是以默通而不阂默通而不阂夫是以兼蓄而亡偏短公庶几大成者哉知公者犹以谓公不侍讲筵不得以其文资启沃不为内阁及六曹大臣不得以其文定国是黼皇猷于圣人之德政盖缺如焉以为憾不佞则不然夫孟子退而着七篇荀卿文中子俱有所撰述以为后世有王者作将于吾言乎取夫饮河者期满腹公集行而天下后世有不满腹者哉以一时显公者有限已以异时显公言者无限而又何憾焉公今年七十矍铄逾于壮时即有西河之戚不至为子夏而笃信圣学乃尔自是以后皆化径也不佞虽不敢谓守玄公所造岂玄等哉公字子难别号稚川先生其所名集曰念初堂

陈子吉诗选序

子吉以太学生应京畿试遂魁其经子吉固以经术进而工古文好为诗而是时故相兴化李公见而异之与讲钩礼称上客诸所为应制诗篇笺表其草多自子吉而子吉晚数竒姿上公交车輒报罢顾所为诗则益工李公既用元相归里时时称疾使掌故谢客客摄不敢旅见而独子吉出入幕中自如李公且为序其诗以行今年秋九月子吉过我鼻园出而示余余故尝识子吉于吴兴十年矣而犹以为经术士也不知其能诗又不知其诗之工若此微子吉来余几失之夫诗道辟于弘正而至隆万之际盛且极矣然其高者以气格声响相高而不根于情实骤而咏之若中宫商阙之若备经纬已徐而求之而无有也乃其卑者则犹之夫巴人下里而已子吉乃独能斟酌其间使格恒足以规情质恒足以御华所谓求之而有者往往出于声色之外其于五言古近体尤号长城然束修见余过自损挹以少年自喜为骚赋乐府而经术夺之已又夺于应制俚偶语不获大肆力于学是愧夫操觚之士甫脱青衿即诡以词达幅巾宽裾则冒山人之号而纵谈汉唐语彼岂能真有之聊以自娱快而已夫子吉材高而过自挹损何也夫子吉所谓慥慥长者非欤于是吾太守张君取而梓之曰子吉将以是受益耶则可今而吾知其不灾木矣

真逸集序

此吾吴人毛文蔚豹孙诗也豹孙之先曾大父起家至御史中丞诸孙皆拥豪资相

高以服食與马声色而豹孙内厌之敝緼咀藜而已然不问家人产产顾先旁落少工经生义久而亦厌之力为古文辞以自见冀俟之后世云吴最为天下大府饶豪贤长者豹孙虽不数数然间与其颖游亦多能称述之而蜀郡张中丞行部尝合诸名士而旌其室之楣以示标异豹孙得真逸之目因遂名其诗曰真逸集而属余序之余尝谓诗之所谓格者若噐之有格也又止也言物至此而止也今天下名能为诗无若吾吴而吴诗大约有三下者取捷短钉因墮成易毋论不及而止上者探月胁穿天心务于人所不经道将超格而上之而不知其所归至才敏之士鹜于声情以捷取胜转近而转墮于格之外乃豹孙稍异于是大约剂华实约事景其遇物触兴不取自于人而取自于己是以有恒调而无越格至五言古近体则尤彬彬隽永矣豹孙所以为诗凡数百千首其文亦称是念居贫不能尽授梓而梓其诗之尤异者骚一首七一首亦附着焉昔华阳陶隱居其得名集曰真逸与豹孙同其声称施后世而诗之存者不能百一豹孙诗固不为少也

茶陵颜氏族谱序

颜之先自春秋始也其可考者鲁郡公真卿所自着王友碑第云系出小邾子孔门达者七十二人而颜氏有八不称为何人后其在汉晋经术政事执文比比至齐而御史中丞见遠哭和帝殒絕遂以忠显至周而御正中大夫之仪不署隋文辅政诏寻守故玺弗予外斥遂复以忠显至唐而真卿与其从兄太子太保杲卿倡义师抗贼禄山河北杲卿至磔死家从死者十余人而真卿再抗贼希烈雉经死蓋又以忠显至宋而安抚判官雷欵从大帅芾守潭州折胡元之镌者累岁而城陷举家自焚死则又以忠显千余年间诸颜之经术政事执文固不乏而其最显者世世称忠臣嗟夫忠臣之为忠也业已不有其身矣尚能有子孙哉而杲卿雷欵之二公者一死而举家殉之则为其子孙而不絕者仅一线息耳然此一线之息续而启其后寢昌寢明颜之派遂布于天下嗟嗟何真宰之深笃宛至也今茶陵之颜为雷欵后而其居梅院者支攸县居南冲者支露水居盘陂者支墟塘大小数千百指皆能以俎豆为事出而宦歷中外皆负能吏声而元之隽文宗者又能为家规以齐之明之隽思孔者又式而廓之而其子州别驾志邦又能辑其先今之谱而问序于余世之序宗谱往往夸门阀纪勲犹余皆所不论独论其为忠之危将后之不恤而犹有存者后之人不危其为忠而善蹈之以至世世不絕语云世治则良臣世乱则忠臣今天下故极治矣诸名为颜氏者时羹墻先世之所为忠而为良可也颜故有黄门侍郎之推家训谱遗之又不列诸颜及杲卿传余家有善本悉以貽别驾使梓焉

金华府志序

自二畿外而为大藩者十有三而浙最重浙大郡十有一而踞上游者三而金华最

重金华之地所繇起也在秦则仅一邑然其后地稍斥而人民稍亦众伙已分割为支邑而郡领之乃名所繇起也则自梁武始矣其后或为郡或为州而州之最着曰婺夫婺星女之名精也女所统扬州之分名城数十百计而金华以蕞尔郡应之重不亦章章较着哉当宋之绍兴甲戌而洪文安公遵来为通守而志之至元之至正改元而瞻思者以金廉访事来分署而续之然其大要草创备采述而已而诸邑亦未尽属至胜国与明际而天地磅礴之所偏锤文明之所独启诸旁邑之来属者并郡城而入为乡若亭邑者数百余山若培而高川若浚而深原隰若辟而广而一时之髦俊才杰若黄文献宋文宪王忠文辈又四起而黼黻之遂以其郡名天下至成化庚子而周宗智者来为守而又续之盖垂百年而今太守王侯懋德来既政成而后续三志乃叹曰之周志而前者核矣吾惧其有遗采也之周志而后者日新矣吾惧其遂佚而无所纪也于是谋之其僚丞廷龙倅之梦司理键更以修志请于抚司马徐公按侍御王公分守徐公分巡胡公督学乔公咸报可下金华令名藩延左给事中陆君凤仪为局以授诸生章一阳辈凡十人大凡讨之陆君而王侯实衷之阅岁而帙成为卷三十自建置以至艺文为条三十有八王侯谓不佞故兰溪令新有连也介而问序焉不佞窃谓志志者详于地而畧于人志史者详于人而畧于地乃今所志分野灾祥山川土田官师人物彬彬乎三才之理备矣昔杞宋以夏殷之后天子之邦所降承而及其为礼也孔子能言之而阻于杞宋之不足征今以一蕞尔郡于越之所支采而垂至二千年而寔昌寔明者谁力耶君子谓金华之获以文献闻者自洪公始也其助之则瞻与周也金华之获以文献甲且世世勿替者则王侯与陆君及一时卿大夫力也故不辞而书之

南桥徐氏族谱序

徐之先用医显也厥始自公熙而秋夫而道度叔向叔向之后其处南者曰文伯曰嗣伯曰雄其处北者曰成伯曰之才曰之范虽历中外领二千石贵者据上台有声称而不欲舍其术甘以方技名一家雄之后几十百传而始为南桥徐氏有郡医学提领德者复以其术鸣于时自是子提领振宗提领子子旻子旻子可豫世世受医不废而可豫尤称为神奇一传而为院使公枢历事五圣赐金紫归老以上寿终诏予祭墓再传而为院判公彪以六品得任子任子季曰澄入供事中秘累迁至水部员外郎而其叔坝自史职弁武为锦衣千户而诸孙之隽曰鎡曰鋹曰鏊者曾孙之隽曰源者相继肆医院有官职曰济者取科试再令岩邑训大府自是南桥之徐益有声称州邑间而去医而儒者种种矣儒之隽曰益孙为太学生益孙尝览括其先世而叹曰炎帝治百药起民疾轩辕氏与岐伯所论难称经并羲易医之为功大矣哉吾徐氏之先熙公以其道贻子孙并显南北盖数传而絶絶而提领嗣之至院使公所被上宠灵卓萃有台辅所不敢望者今而后褒衣博带之业进而其道泯泯矣且吾徐氏世非乏文献也奈何使之佚而亡所纪于是手

创为谱其自熙公以至雄公为耳祖曰创始自德以至十二世曰世系提领公而后有闻者列其事状曰贻则院使公而后上所赐制勅御诗纪之曰恩纶诸名公大夫志述表传记序歌诗之类系之曰征信其它传而称后者曰世系别而传疑之文附焉盖谱成而徐氏之所谓文献者班班如矣昔而家之才有诸子少卿同卿起家为大官然之才犹谓其不学无术而叹曰终恐同广陵散矣盖伤家声之隳也自今而后徐氏之嗣人进而儒退而医苟存心于爱物以成其名而声施后世则皆有谱在毋使为之才所诮也益孙与余善有史氏才兹谱亦其一斑云

文起堂续集序

吾郡张幼于自十余岁时为诸生至于今凡三十余未尝一日而废铅槩之业有所结撰以至游戏篇什出则人爱而传之以故梓行之集可十数其最巨丽者曰文起集凡十余卷兹则其续集也幼于既慕周武姜公之风所著箴铭百十章最古雅而切于理事置之楚书汲冢中不可辨他赞颂及责躬戒子赠妇诸篇亦称是乃其报袁太常书少卿中散之规发以胷臆则复彬彬矣幼于藻颖絶世诸所率然酬应运斤成风春容寂寥徧于海内即鸡林之贾雅能慕爱之而兹集或未尽尔也何者曲弥高和弥寡文侯所以恐卧高帝所以卑之则世耳也乃不佞谓兹集成而他集当捧盘皿以从矣幼于有秣陵游稿尝谒不佞序之实兹集之一支云

梁伯龙古乐府序

凡有韵之言可以谐管弦者皆乐府也风雅熄而饶歌鼓吹兴其听者犹恐卧而燕魏齐梁之调作丝不尽谐肉而絶句所由宣絶句之宛转不能长而花间草堂之峭蒨着花间草堂不入耳而北声劲北声不驻耳而南音出自伯龙之为南音苟不至于不毛其儂竖游女皆能习而咏之而伯龙意不悻曰是焉足以名我今夫古乐府之与今词本末迥然别矣其音发于籟而辞縁于情古未有二也于是稍取建安六代之作而拟之得若干首伯龙之才恒有余故不能尽返其本始其质不能御文故时时出入今古然或正言以明志或婉语以引情一切归之和平尔雅庶几洋洋乎盈耳矣说者犹谓文园令之赋班兰台尚以其曲终而奏雅况伯龙哉愚不敢以为然不取其终之雅而罪其始之曲是法家刻深语也夫伯龙犹知有返古也柳屯田张秘监之才彼岂遽出伯龙下安于其偏至之好而不知节故狡狡之辈目之以三中讥之以三变彼盖欲自解而不能也黄豫章者贤于二子矣乃至托于佛而为讖以解夫豫章诚悔之则胡不如伯龙之以古乐府讖也吾故曰伯龙犹知有返古也

蘓长公外纪序

今天下以四姓目文章大家独蘓公之作最为便爽而其所譏论策之类于时为最近故操觚之士鲜不习蘓公文者而雌黄之颊于公不能无少挫然使天下而有能尽四氏集者万不得一也蘓公才甚高蓄甚博而出之甚达而又甚易凡三氏之奇尽于集而蘓公之奇不尽于集故夫天下而有能尽蘓公奇者亿且不得一也公之所不尽韵而词则温韦让壮舌而谐谑则侯白逊雅笔而简牋题署则黄豫章逊隼游戏而为法书则颜平原李北海之难弟为古木竹石则文洋州之畏友逃而之佛则裴相国杨学士之禅那以是律三君子有一乎否也当蘓公之生存虽荒州下邑儿童妇女莫不欲一识其面而其言之传盖北幽朔而东三韩西达羌戎南过鸡林马人之界而其禁絶之者乃在于广厦细旃之上角而与之左者谈说经术道理之士亟窜而亟欲杀之者亦一时材谓贵臣噫可怪也及公歿且久而广厦细旃之上其恶渐移而为好学士大夫至于今慕说之不衰虽然问其所以能尽公者则自论策之外无几也吾所以云亿不得一也当吾之少壮时与于鳞习为古文辞其于四家殊不能相入晚而稍安之毋论蘓公文即其诗最号为雅变杂揉者虽不能为吾式而亦足为吾用其感赴节义聪明之所溢散而为风调才技于余心时有当焉以故取公年谱及传志畧存之而复蘓公之小言兴诸家之评隲纪述琐屑亦一一附录约为十卷名之曰蘓长公外纪而置之山房之几暇日抽一卷佐一觞其不贤于山腴海错者几希

皇甫百泉庆历诗集序

百泉先生自弱冠而诗道成凡四十余年而皆尽于世庙之日则已有梓行者矣其自隆庆改元而为万历先生业已六十余其名愈益重海内之欲得先生言者愈益迫贖币之刺旦暮溢于门一伺其出游捧觚翰而拟其后者踵相接于道先生徐凭几或酒所应之皆各得意去凡先生之征事寄指虽蠡出不可胜穷然靡不精切而雅当诸困先生以题若韵者虽麇至不可指数然不能得其一瑕语所为体五七言古近不一而皆不堕于开元大历之后尘于是诸乞言之士复时时欲窥先生全而先生度无以应之始谋诸剗剗既成而授书于余俾为糠秕之导余尝谓古之刻精于言者当其少也强吾有涯之精神以求跻于未易造之地或借外遘之境而啗吾不受琢之天以故往往不尽其本寿幸而得老矣智穷而无从取思气耗而不能充吾志故其才又往往不待寿而尽自东西京而建安六季仅扬中散子云颜光禄延之得过七袞而已然子云逃而息于玄延之逃而息于酒彼不悟其智之穷而气之耗姑以雕虫之技壮夫之所不为而枝人亦晚矣若文通之才竭孝贞之思尽乃又其下者以先生视之独不然当先生之伯仲季氏四起而以文章名东南其前逝者且三十年近亦十余年而先生独岿然若鲁灵光则其精神固

專萃未涯也是六十年之中非有大故忧患未尝一日废书其入也若输其出也若倾又乌能穷先生之智而耗其气哉先生之所托于庆厯者谓二圣号也今万厯永永无疆而先生之诗方日升川盈而不已其卷裱当不可胜数余姑序而俟之

伐檀集序

余所善张将军居平呐呐若不出口而其勒悍卒挽强弓跃马顾盼有凭陵广武意至于命亲知浮大白鲸吸牛饮飞不及停居然高阳酒人也酒后耳热慷慨谈说天下事或意有所不可白眼骂坐皆稍稍避去其人当不能为诗即为诗而得一二易水语髮立骨飞以附于燕赵之后止矣顾其所读书必西京后而开元前其于格务跻于武德贞观而稍稍柔之以齐梁之月露其语务出于不经人道宁有瑕璧而无完珉玦此语之在天地人人能得之然亦人人耳相剽若太仓粟陈陈相因矣汰而使之精创而使之新非有沈深别刻之思未易致也今举其所谓精者新者不以归之人而归之张将军然乎否也嗟夫士固不可皮相也吾居恒怪夫脱胄珥貂者例不能为文语即有之而若沈始兴之授口曹竟陵之险步偶然之所发亦噏咤幸中耳前仅一孟德后仅一处道光彩琅琅戈戟间若盘龙之正始风流不旋踵而以文败矣今天下幸承平无事故张将军不治兵而得以其间治诗第仅能以一诗人名张将军而所谓勒悍挽强顾盼凭陵之态敛之乎伊吾噉喘之地而已矣然使张将军而以一诗人名于天下后世彼固甘之何者彼睥睨于其僚舍而数从余于东海上不以余之侘傺齷齪而有倦心意者其有真嗜也诗凡六卷名之曰伐檀集盖以其斋故而羈淮二卷附焉将军名元凯尝督运为千艘帅再掌卫篆其数起蹶亦以诗故云

史记纂序

以栋既梓其史记评林而行之不佞为叙之矣己又梓所谓史记纂者何也后之治太史公者有二家纪传志表纲提牖列籍而成一代言者此未易治也摹句摘字经纬错综籍而成一家言者世固不乏也评林行而自馆署以至郡邑学官毋不治太史公者矣意者其犹褻重而不逮遽欬费巨而不逮贫欬编繁而不逮目欬以栋有忧之是故叙而畧于辞辞而寡于法者弗敢纂也所褒赞而非其精神之焕发者弗敢纂也所提指而非其關節眼骨照应步骤者弗敢纂也斯纂也令衿裾之士稍能习占毕握铅槧者获一寓耳目焉不待顛探而法灿然备矣机跃然若有入矣是故史记纂行而治太史公者固不必皆贵近有力也或谓以栋毋乃割裂乎哉曰不然是昭明氏之滥觞而真文忠氏之所合流也神于金者液而采其精以馭凡铁皆鏐也精于酒者澄而取其母以馭明水皆醪也此为文之要则而以栋之所以惠天下士意也若夫籍而成一代言则有初梓之评林

在

杏山续集序

蓋余持郟节而所部内乡有李先生云其人卓诡不伦人也门者前通谒称乡贡士而见之金绀焕然霜发鹤骨稍与谈挖千古业纒纒若贯珠已出其杏山集者而读之五言古最道上居然有建安康乐风七言歌行出入少陵太白近体所谓武库兵甲森森刺眼然其气恒完而用事恒有余间发一独至语往往出意表余甚竒之未久谢去谒太岳玄帝宫书来谓余摄衣上天柱盼望其西则峨眉稍北若二华其东所居王使君皆人间巨观而先生为歌诗凡数章语益竒居久之余解郟节甫下均州而先生则已候于江岸矣酒所慷慨语不休寻病瞑痃且殆亟呼药药之醒犹谓病骥尚可以千里且吾老矣何能再见王使君语夜分始别其又垂三载而吾乡徐中丞入为司寇还里先生附余书其又三月余而先生复專使以书慰余困信信益感切用壮且尽篋其续稿而示余则见赠懷寄之作皆在顾其属辞益工使事益博驤然若庖丁之奏声又若骏马驰于康庄之野而亡蹙蹄也夫以余之亡当于世晚而益肮脏顾先生有深合者而托之以不朽之事夫先生虽微余乌能不朽之若先生之集行而少有异同者其居江左哉江左之气激而清是以有累篇少累字中原之气壮而朴是以有累字少累篇要之不以彼易此也先生尝有官封称大夫矣其犹曰乡贡士者何也公交车之用未竟而厌去之已又不能释然且其意不欲以官封重而又何以乡贡士重也故舍而题之曰杏山续集序

心赋序

心赋者何永明禅师寿老所著也梵语为质多耶又为波茶震丹语为心佛之所谓觉觉此而已真心之外皆妄心也天竺古先生说法四十九年至竟无一法可说未觉则万语不为多觉则一字不为少呜呼是何寿老之言之多也夫亦为学人地也当四十九年之说法一法而诸经异名诸学人者寻名而徇之则益遠矣寿老之为此赋欲使古先生之所说无法而非心学人能觉此心则无心而非法其采闻若博而为辞若详然以反说约耳文而以韵者何古先生之为教也多以梵音作哀慈响俾人从闻根而入道中国之为学也始托文字而传焉夫闻根之易于见根也寿老蓋知之矣故一切而摄之韵俾聽者精于入而诵者有味乎言之也夫此赋传而学人之指妄为真者吾知免矣其以识为觉者则不能无隱忧云天下求佛于佛而马祖示之曰即心即佛然又不免求佛于心而祖复破之曰非心非佛夫非心非佛之教大行而即心即佛者为真得也呜呼悟此而后可以读寿老赋哉苟悟此而何所读寿老赋哉昔宣律师注楞严使那咤入兜率印证之慈氏而后成书余无可印证者证之心而已

弇州续稿卷四十二

●钦定四库全书

弇州续稿卷四十三

（明）王世贞 撰

○文部

△序

少保张文毅公集序

张文毅公之举进士南宫也为第一人而其以选读中秘书亦第一人天下之操觚属文辞者争趣其下风而公顾自力为己学已稍稍顛析千古理乱之故已又旁及国家礼乐章程贤者所识之大于一切秋文意蔑如也度不得已而有所应则必内尽于理而外尽于事文成而无所益于世弗撰也其稍弗程于古亦弗撰也故公之文一出而自搢绅以至衿裾之士取饮者各获饱以去好雌黄者亦杜吻而亡以难为其能尽理事且程古也然而公未尝一日而动于人之好舍而雕虫之世贞犹记弱冠时为公所举士不能一再见亦未尝敢骤进所业而公偶顾之曰是文也盖有物有则矣非而曹少年逞才地也则又蹙额曰少年所欲为者畀之日不给而何用雕虫为盖公自念所居禁署领文史优游之职人主端拱穆清不获承顾问以发舒其志气彼其恨吏道之尚靡嗟武功之不竞忧天宪之旁寄悯民生之多艰盖不能以顷刻释者居未几大拜天下方拭目以观公之所为公亦奋然若有所为者又未几而公不禄矣且夫天子于公非独缓用也读中秘书移疾归未竟业而编修编修仅踰岁而赞善赞善未及考而谕德有疆场之使则超谕德而学士有水镜之思则超学士而少宰有心膺之寄则超南八坐而大拜度一时诸公未有能及之者然使而弗终命也其少宰与大拜而皆扼于持国秉者也其最后而所日夜见困者乃弗雕虫若也公竟以是邑邑终矣人耶天耶公固为为己学邃于理性而恶其名不欲有所撰述乃至经纬裁成之志皆有所扼困而不尽效卒之其久而传者其所不欲传者也公刚毅饶大节风采隐隐公卿间有藜藿不采势其用虽不尽而后先再主公交车试复再为分试复再主南畿试一主武试一海吉士其人大有能竟公之志者庶几哉古之所谓上臣亦何必及公身而尽之贞于公门下最少而又最不肖公集行于世

三十年其子礼部君某托其密戚颜倅某重梓之而以属叙于贞贞亦且老矣汨没无所见方有愧于公之言而敢复用其雕虫进耶虽然尚能缘公之意以识之公集诗二卷文四卷其应制及笺表之类可十四天下急于得公之言而若此寥寥者公既不轻为言而又性严冷多拒少可赆润之币望车门而逆却者数矣此又不佞贞所尤愧也

山泽吟啸集序

余守尚书刑部郎而同舍郎济南李于鳞吴兴吴峻伯天台王新甫辈相倡和为诗而上海孙君元之繇进士来肆事元之与余同乡荐亡何得新淦令以行而余当有一言之赠是时朝士业相戒毋治诗治诗即害吏治余亡以赠之而姑举豳风之能以政为诗者勉元之而君自是再更令大邑高第入亦郎刑部而余出佐山东臬且罢归元之之郎刑部未几亦挂冠里居自是不相闻者二纪余而余以事道上海过元之元之貌益丹谈说今古益熟然颇不及诗而间从一二友人所得元之篇章读之未尝不爽朗有致也今年初夏元之忽以书来持其五世祖节轩公山泽吟啸集凡六卷而请序于余而元之父如山公观国吟集附焉盖节轩公以诸生贡大廷为第一教授望州未几拂衣归生平好吟咏下笔辄竒而一时乡先生如徐武功钱文通稍视公为前辈张南安吴文定诸公则后之度其诗未有能胜公者然当公之世而未有一人能举公之名与其诗如诸公何也母亦公之于诗内足于实而亡所事名又内足于赏而亡所事人耳目欤乃至脱屣禄位得一官亡几而辄去之歷五世而若符契此其意可类想也虽然以元之之能薄其官与自秘其诗不蘄为名如其祖而不忍终秘其祖之诗与名余不敢望武功诸公然少而能为诗说以赠元之晚而能缘元之之意以序节轩公诗庶几犹贤乎哉若如山公者其前有节轩公以章美后而有元之以传盛虽微诗吾知其不泯泯也故不逆其请而聊序之如右

万姓类谱序

先王因生而赐姓胙土命氏然则姓也者其统乎氏也者贵而始为别乎乃杨用修之释书则引黄东发论以为五帝之世民无姓贵而为官者始有姓百姓之平章所以别于黎民之于变也而说者又谓姓从生从女姓者女之适而别者也故曰姚曰妘曰姁曰姬曰嬴曰■〈女畱〉曰姑其左皆女也自命氏之说行而周之王族与诸侯之公族卿大夫之别子往往自为姓而隋唐以先贤智者亦往往轻用其见而叛其源有义而改者有音而改者有字而改者有合音与字而改者有慕古而改者有虑难而改者有因一事而改者夫其率然而为改也即再易世非搢绅先生何知源其人之相戕贼也相为禽乱也亦孰从而遏之甚矣今之哲于姓也别姓为婚别源为宗别祖为族夫刘之望最伙为

二十五王次之为二十一张又次之为十四李又次之为十一然而不以异望而婚也其不相婚固也然而彭城不谱弘农琅琊不谱太原清河不谱南阳赵郡不谱陇西各以其望而宗也宗也而小遠非谱通其始不族也族则近而别婚则遠而严甚矣今之哲于姓也虽先王何加焉蓋自唐宋而来其谱姓毋虑数十家而吴兴凌大夫始合而为一其源别郡望条着牖列而诸能以姓显者咸附焉凌大夫之言曰我非以眩靡也将使夫探源者油然而毋胥戕贼也介然而毋至为禽乱也于世道将小补哉虽然执是以稽古今之能显者谓之姓史可也凌大夫名某壮而解郡绂归而著书成一家言兹亦其卓然者

周易韵考序

治周易者自伊川氏之传理紫阳氏之传数而他注疏尽废吾友张幼于独能于二传注疏之外援故发微而为三易说业已行矣幼于复谓古卜筮之书未尝不韵其为龟者如懿氏之卜妻楚丘之卜子晋献之卜姬秦徒父之卜战而为易者若晋史之筮成王东方朔管辂之射覆京房焦贛之系繇皆飒飒可诵何独至于文周为不然意者崇古而弗敢论欤将局方而弗能通欤或信札而不征之舌与齿欤于是订其韵之正者尽撙他史籍而援其韵之古者与可叶者则文周之卦繇辞且十九而吾夫子之彖象亦且得十之六名之曰周易韵考而属序于余余则谓古之通于诗者宁独易也唯书辞亦然夫以尧舜禹之相禅受少者数言多者数十言又与益稷皋陶之类相训戒皆有韵而竟以赧歌终之故乐记云歌者长言之也说之故言之言之不足故长言之夫乌足漆简与鸟兽虫鱼之篆既繁苦不遽辨而耳提面命繇音声入者易顺也彼蕞尔西竺犹谓梵呗之响其化导深于经典而况易以道阴阳阴阳之用通于五音十二律而圣人之系言有不可讽可咏者耶世人名治易居恒守训故为文辞取仕宦其最上者翫消息盈虚之理以自成其德凡二端尽之矣即所谓三易说有不能半韦编何暇韵考虽然余切悯幼于之意而稍着其用世毋以玄之例覆瓿可也

华孟达集序

无锡有华孟达者一日而以书数百千言自通且贄其诗若文三卷曰今天下称龙门者必以子夫龙门者其左右夹上造霄汉西来之流径万里而下束三级齿石成霜雪噫声成霆霹倍寻之鲤一过之则神灵起于鬣鬣间上帝飨之爵为应龙乃不佞之鲤则异是子幸而汰之乎吾将去而攻吾疾其又幸而姑志之乎吾将去而益炼吾质以俟乎他日余既异其言为之稍读其书而中有与其宗人往复者亦类是云宗人而好慕为古文辞则从舆为古文辞其欲梓行之则弗敢也曰吾且折衷于衡艺者遠而左马庄屈建安李杜吾师之近而北地济南吾仪之然毋若王子之当吾世也吾其从折衷矣余益异

之乃为竟其诗若文诗体出入中古躡长庆而揽永嘉清楚冲夷有悠然自赏之味文笔尤峻洁裁之则駉邕之小言也畅之则昌黎河东之盛轨也乃尺牋萧萧乎人意表矣夫此孟达境也孟达之为识踰是境而三舍矣毋乃犹有待者才也其才侷及境矣毋乃犹有待者学也夫学者充才者也才者趣识者也吾姑志之而孟达姑聽之虽然孟达以吾言而信可也是亦且梓而行矣其所以行者何也将授人以弹射也昔者文信侯为吕览布之咸阳市而榜其上曰有能增损一字者予千金而人莫敢增损也其识者窃笑之矣异代子云闻而咤曰惜不以我往将席卷其金以归则又笑之其所以笑者何也为文信侯之挟诈而子云之见事晚也今孟达居贫贱而名未即就不足以胁人之耳目而易其真天下而信之则真信也其犹有弹射者皆孟达不朽地也是何世之为孟达龙门者众也孟达亟称有郁人文者其鲤耶其龙门耶请质之而不以非则置弁焉

汪禹义诗集序

禹义之为儿时则家已稍称给矣徽俗贵素封相率而谓禹义是不善归富乎哉禹义笑曰吾不能饰冠剑连车骑以市游闲公子名夫士所以得行志者科第也于是下帷受书通经术为诸生廩学宫数试褻然有僑声而至大比輒挫其伯氏又以豪故减仲产禹义叹曰吾安能坐而白首希博士选也且丈夫不死耳何至局促老一方与吟等伍遂废箸游太学其试利否与诸生较禹义竟厌其业而为诗度其余装几何趣买先秦东西京建安六代开元大厯诸名家言读之即寝兴食息枕漱亡适而非诸名家者若与之师友相下上也其所为诗一切忧喜悲乐可怪可愕有所感慨于中輒发之自禹义之为诸生业而其俗已窃咲之已弃诸生已又弃太学生而被山人服而家益贫然时时手一编诗有所过从客车骑冠剑雍容甚都谄而问禹义曰胡以不谒吏部选人禹义叹曰吾山人也则又问禹义仲产久积着不倍蕝昔耶禹义举其编曰吾产尽是矣客亦笑去禹义之于诗既能程则古昔不倍格而庀材取宏征事取核其色声耦矣意象协矣其始质之陈六水先生不足而质之汪司马先生乃又质之王子王子谓禹义去而曹之贵素封者其它往往能言诗夫隆万之际王者之迹着而诗昌子之郡而有能言诗者则天下无不言诗者矣然天下之言诗者以位重而子之乡言诗者以家重今子弃家而为诗家日益轻诗日益重然则子非子之乡人也于是手其编为之序而赠曰勉之哉子之产尽是矣有千秋在

王世周诗集序

始余与世周之父沂州君游京师相善也世周甫踰髻而束经贄师以故复与余弟敬美游敬美少长四五岁每所撰经生业出人并称之为文考子安之流而后数岁世

周忽来自燕中颇厌其业所得燕中诸生亦且弃之而稍稍出其诗大抵爽儁不为凡语当是时沂州君老困簿牍间不肯归余固已内竒世周而不能亡惜之为诗一章以赠欲以呼沂州君而勉世周用其又数岁则沂州君久捐馆矣世周尽弃其经生业而诗益以进家日以挫削顾其意殊不屑屑间有所遇坐客不织之即不复讯名氏即识之而不能为寒暄语意色若不相关者遇酒食进杯匕立尽徐征之则喉吻间微噉嚙有声盖未尝顷刻而废湛精之思也世周固不欲示人以名人亦无从而名之而一日哀其诗若干卷以求请益且庶几一言之弃余读之盖彬彬乎具体矣小赋自梁苑邺中来润以月露亦自成家乐府尤长情事仿拟之什翩翩抵掌小语泠辞足沁肺腑古选既不落节时时独诣歌行尤自竒逸的然青莲隆准七言律絶潇洒超箸将无五字小隕长城然当其得意亦钱刘之造也盖莫廷韩张仲立之评畧备矣明兴弘正嘉隆之际作者林出而自北地济南据正始外蛇珠昆玉莫盛于吴中而人自为家语自为格正变云扰识者病之独徐迪功昌谷以偏师夺帜前无衡垒狎主之盟其在世周乎哉其在世周乎哉夫以汉人目亲见杨子云名位肖貌谓其玄之不传而况于世周人詎能余言信也虽然世周既不蘄为名余又不蘄为世周名重各志其所就而已敬美去世周成进士寢以通显而其诗亦早就得吾序当以质之

插柳全孤诗序

志金华者盖有胡廉一公云而廉一公者讳麒字德仁其先自汴徙家金华之兰溪父曰惟二公赘于刘遂家汤溪当是时惟二公客死外而廉一公年仅十三有二弟曰凤曰麟甫在龀廉一公少好读书循循矩步而能不废其俭勤以起产其奉母刘尤笃孝抚仲季以慈无何凤夭死廉一公之念麟愈切为娶妇仅期而病日夜戢身汤药间吁天以身代不获靖则又吁天曰先人有三子而仲夭无子已矣季复夭幸而其妇负遗腹且五月麒今幸有二子愿减一子以成遗腹男苟延季一线之息及期妇举果男三月妇病乳痛复死廉一公为大悲也已而怖曰得无为一线累乎谋之妻江媪曰吾次子虽在乳可他寄也季惟此一子奈何令寄乳江媪曰诺遂寄其次子邻母乳而江媪自乳季之子廉一公时时察江媪意不甚力乃诡语之曰若亦闻日者言乎是儿数当贵吾两子所凭以家者也度江媪意稍动则又谓曰若闻木倒树而生者乎曰不闻也廉一公曰吾欲以征是儿贵为择日取柳条一倒树之并傍地及春柳大茂乃笑夸江姬曰儿果不异日者言也江姬则益奉儿旦夕唯谨矣又久之而廉一公复举二男子其少者曰荣博学以文章行谊称盖又二百余年而胡氏之指可四万余其大宗为廉一公后而麟之子亦得四之一其厯中外为大僚者数人以名行见金华志者亦如之今上舍郡邑庠可七十余人虽天下之称文献族鼎贵富者其庶莫若胡氏矣故太保杨文襄公实为之诗及序而廉一公之耳孙前通守某复征吾吴之能诗者诗而属余叙之余窃闻夫古之舍其子而子兄

弟之子者晋莫若邓伯道而唐莫若元紫芝伯道之避兵也度其子不能与兄之子偕全系之树而去之夫不能两全弃之可也胡至系之树此去于人情之外者也紫芝之兄子襁褓而丧其父母贫不能具乳媪乃躬自乳之数日湏流能食夫男子何以湏也此去于人理之外者也廉一公之为遘虽稍易于二君子要之其能用仁术也盖犹在理与情之间乎哉紫芝以不及亲而罢妻伯道以误及戚而罢妾遂偕以斩其后焉于贤者不能无责备乃若天之所以报廉一公其视二君子何太悬迥哉是又不可理执也余尝为其金华志序而通守君数从游甚勤故不辞而记其语

何仁仲诗序

故少司寇何吉阳先生谈道重嘉靖中其称先生者以道而次曰政事才其又次曰诗而先生之子仁仲独能得先生诗而加工焉己卯秋仁仲乞余志先生神道碑明年夏四月仁仲陆走二千里报谒余草堂已坐定出所著前后诗若干卷读之卞之璧隋之珠庶几其泽也沅之芷澧之兰庶几其芬且洁也九疑之岭三湘之浸庶几其磊落淼汗也仁仲乃曰业已梓矣敢藉先人之宠灵以祈子一言弁则又曰非欲速成也将以求益也其梓也将以受弹射也余谓仁仲子之求益不必我而其受弹射必在燕中夫燕中天下之才士藪也曩执政课持考功法而湿束士大夫亡不以音律讳者今且毋讳矣曩余与二三子稍讲其业退而俗吏绳之若丽丹书条者今不以罪矣毋论操觚者生能谈汉唐台阁之隽俯而趣二李何徐矣布衣之豪举能薄太初茂秦不为矣虽然诸狭中謏闻少年骤得一致语则快而自骋其长目无古人不知合者古人所恒道而不合者古人所不屑道也识不足以究二始乃骤而以格卑作者学不足以穷三余乃骤而以事疑作者思不足以入九渊乃骤而以蹊径窥作者此其人飘溺沦坠之不暇何能弹射子夫为子策者如何精而求之有建安开元在虽然反之心而已子能修而父业乎进而求之有洙泗在虽然反之心而已后数年子道成以示吾吾更请为序之

编注王司马宫词序

诗三百往往出于妇人女子而莫备于宫掖将以善则为化始而恶则为乱枢耶固也彼其求而为闕雖思而为卷耳恒而为螽斯变而为栢舟以寓劝足矣副筭六珈而天而帝要不过容饰之盛极而至于有泚有茨上下禽聚此其视宋玉司马所称述何如也圣人乃采而编之曰风风者谓其可以风也又曰诗亡然后春秋作春秋者史也史能及事不能遽及情诗而及事谓之诗史杜少陵氏是也然少陵氏蚤疎贱晚而废弃寄食于西诸侯足迹不能抵京师所纪不过政令之窳衰与丧乱乖离之变而已独王司马建于贞元之后以宗人分偶有所稔习于宫掖而纪其事得辞百首夫穆敬之济淫毋论已

以元和之成得志于藩镇而有此以太和之锐不得志于宦竖而亦有此则大可叹也夫建其词格吾所不能辨然于赋兴差具二焉其语于宪文之间详矣使夫子降格而采之其可以嗣国风者岂鲜也无锡顾玄暉深于风人之旨者也少则侍其世父太保公宦京师跬武玉清警欬天语然是时叩温室之树而不敢对晚读建此诗而有会焉为之注故毋论建之情事了无纖悉遗憾而旁引曲譬尚有溢于其表者亦何异刘孝标之于义庆耶玄暉之子某以示余余谓合而行之合而行之其以为宫词也其且以为壶史也否欤然哉

白坪高先生诗集序

余为郎时则闻白坪高先生嘉靖间名臣也而先生甫踰冠成进士雅已好为诗先生之辙迹无所不扬歷其诗亦无所不偕然大要夺于官以故能穷其变不能使其变归而入于自然而最后谢豫方之左辖归天下方弹指咄咤以未能究先生之用为惜而先生内沾沾自喜以长有天地之日而竟其适于诗为幸先生之所治诗外触于境而内发于情不见题役不被格窘意至而舒意尽而止吾不知于变之穷否何如其能发而入于自然固饶也王子曰余蓋从先生之子桐乡令某受先生诗云先生蜀之内江人吾闻夫蜀玉垒包络岷峨重阻峻坂造天崇冈翳阳中划两江嵌崕礧礧之岩束之百折成险漏洑瀆瀑盘涡灑灑稍缓而为锦官简珠瑕英金沙银砾之彩出焉其秀而人其又秀而文章若长卿子云及近代用修蓋曲尽山水之态以成吊诡组绂之观极矣千八百年中陈正字以冲淡剂之次则眉山伯仲俨若平林之迤邐烟云之霏霽与平湖之汪洋淡沓舍险而就夷去雕饰而存质气以视相如子云吾不知所先后也今夫以先生而角明之用修疇不骇者然宁能以相如子云而遂废陈蕪哉先生时时能作少陵语然得之二家为多晚节又似白香山若谈儒理则言近而指遠寬然方之内谈老释则肤立而味隳悠然方之外自七十五而后吾所不知者年然知先生之诗未已也桐乡令曰善请授梓而弁先生集

大业堂尺牘序

玉叔既悉奉其家大人宪副公之著作而梓之矣既而复梓其尺牘而以序属不佞或谓不佞尺牘何以梓也既卒業而叹曰难言哉不佞蓋知之矣往嘉靖间国家多事南北用兵封疆之臣不足以当上意至辍大司马行边以左司马代署而公用材选自他曹郎调为职方左司马屏息而惟公之是聽诸边臣自督抚而下至监司有所谘禀徃徃与赤囊白羽偕而公事筹而人应之当是时为督抚者内掇公志而外称贵于公公或婉言而导之聽或正辞而授之束其深虑苦心有移檄之所不能尽者不出跬武而若面论于

万里之外乃受策而告成则又若响应然昔刘穆之朱龄石当军国寄至填委也日中即成报札穆之至百函龄石省可仅八十函而皆以为快吾不知公于穆之如何视龄石将雁行矣虽然是二子者其当于宋公肺腑何如也公以一职方郎而处权相父子交黜之见以其事机可而不可于父则危其父可而不可于子则危其父子可而不可于事机则危公所以委曲调剂者百端则又有尺牍之所不能尽者而往往筌绌而郗灵盖仅以职方免而甫量移齟齬随之矣公归絶口不复言故时事而天下故有惜之者莫方伯子良过而颜其堂曰大业志感也玉叔梓尺牍而堂系焉其亦以子良意也虽然天下之惜之谓不若不佞之知之也其它叙寒暄道风雅以比于晋人之所谓长者亡所俟余言矣

项伯子诗集序

嘉靖间余谈艺燕中而故人王揖元肃者亟称项伯子贤而又能诗余时心识之亡何余罢归而伯子始繇选人得上林一官輒罢去余再起守吴兴部颇能物色伯子行谊往往如揖称而伯子亦似知余者然輒自引匿去余解吴兴后伯子时寓声欲访余不果而竟死矣盖项伯子之为项于江南最着而其先有襄毅公者以器业功伐冠中外其子孙奋科甲门胄仕姿通显不可屈指数而项氏之为诗则自伯子始伯子业素饶有弟仲季伯子笃好书籍仲季亦好书籍仲成进士伯子独不得进士季善积着起家伯子独不善积着起家而又以好诗故大挫之然竟莫能问也废子钱则饮食其母且尽继以假贷废室则徙而居墓田之丙舍然客过輒应其能诗者诗不能诗者酒亦未尝问叠耻也当伯子之为诗二李之道未接以故亡泥格而独能以其材之所近就境而发之大抵山林之辞澹廊岩之辞丰縁情之辞婉征事之辞核吾不知于古何如去大历长庆之间不遠矣伯子歿而其子某哀其诗即所署部曰市隐曰游燕曰墓庐凡若干卷属余论之余因题曰项伯子诗集而叙以荅其意某亦好为诗功力不能如其父风气当日上王揖者仕沂州上佐以歿其人与好客亦畧相当诗不尽尔也有子曰伯稠而才余亦尝叙其诗

弇州续稿卷四十三

●钦定四库全书

弇州续稿卷四十四

（明）王世贞 撰

○文部

△序

汉书评林序

凌际叔于世无所嗜独嗜书而所嗜书其最为司马子长次则班孟坚二史盖不独嗜之而又能精治之际叔之治子长史记悉取古今诸丹铅之所训故扬摧以至进退其事者凡数十百家荟而成书目之曰评林自史记评林成而学士大夫好其书者麇集于际叔之门际叔益自喜以史记之例例班史盖又二年所而班史之评林亦成凡百十九卷谓世贞之亦习之也斋而以书请得一言标其旨余既卒读叹曰尽坚亡后世其无史哉非无史也夫人而无能为史也所以无能为史者何夫孟坚之为史也非尽孟坚史也后元而前太史公共之矣始元而后叔皮共之矣志有十大家共之矣夫志固无论其它若纪传或繁而损或畧而益或因而裁或朴而润微孟坚畴所折衷哉帝纪之雍容有度列传之整洁瞻显彬彬乎太史公雁行矣材不必太史公则或让驱而有争先识不必太史公则或岐趣而生诋诃势也凡为班史者后先若而人而其始则服虔应邵郑德明韦昭苏林如淳晋灼蔡谟之流至唐颜师古而后精且备凡治班史者有三端其书僻而不易识若古文奇字转借通用之类其事远而不易证或非出一家一人是二者则必旁搜载籍以故之其义奥而不易通则必精思以训之是故服应以至师古厥功首矣叙事有客主有本末有节族或伏或应或开或合有至法焉如杜当阳之于左氏则际叔専之为能窥见微隐其次矣又次而上者探其旨中者衡其篇下者攻其辞或出所疑信或出所非是揄扬之未已从而雌黄之此宋士之所创而明士之所长也取事属辞以发其意而求备一家言此宋士之所长而明士之所传也识者谓际叔必力芟之乃际叔弗力芟也将毋过而去之宁过而存之意也夫际叔其犹有厚道也谈者谓西京之业独班氏以东京嗣焉自是而还六季之搯拏舌操觚翰者其于史不能籍班氏之文文其史夫是故俚而衍乱而亡次其于文不能籍班氏之史史其文夫是故华而靡肤而不立盖七百余年而蒙气蔚如也昌黎河东为若心仪之于传毛颖叔段大尉见一二焉然以律顺宗纪龙城録抑何蕪沓不振哉宋士徒能托之言不能托之笔迨我明而彬彬有闻矣乃又有际叔者为左提右挈超东京乘而颀顽于司马班氏间可屈指觐也假令迹司马氏而志古史记则建武以后存者犹斑斑可考化臭腐为神奇夫孰能难之不然而感慨一代我高皇功德踰胜汉祖万万文献即小未称亦不下武宣叔季昔孟坚之所草创私史耳县官弗忍寘于理而更褒借之给笔札兰台进而为公史今世号称古文极治而金匱石室之副宁无一二流人间者有能整齐其业以上接班氏亦奚不可余发种种矣亡能为际叔其竣之勿令后世以明无人哉

合刻管子韩非子序

汝师之为诸子于道好庄周列御寇于术好管子韩非子谓其文辞亡论高妙而所结撰之大旨远者出人意表而迤者能发人之所欲发于所不能发顾独管子韩非子不甚行世即行而其传者多遗脱谬误读之使人不胜乙往往不尽卷而度之高阁于是悉其资力后先购善本凡数十穷丹铅之用而后授梓梓成谓世贞曰子其序之世贞曰唯夫敬仲欲存纠于齐不得改而缚于小白卒相之为天下万世荣非子欲存韩于秦不得改而走秦卒受僇为天下后世笑夫见荣之与见笑于人也奚啻隔霄渊虽然是二君子者其始宁不欲出奇捐生以殉所事哉然而奇有所不得不屈奇屈而生有所不得不爱爱生而欲有所自见则不得终避讎敌甘心焉而臣事之夫二君子者其所以爱生一也然而有相有僇者何也齐不成霸形而桓公之霸心发则机合机合仲不得不重秦并天下之形成亡所事非而非以并天下说之欲胜其素所任之臣而自擅功则机不合机不合非不得不轻夫岂唯轻而已秦之幸非之利秦以不若虞非之利韩远也今夫始皇者固暴伉嗜杀人也然其明智宁出齐桓下鲍子一荐仲而立相李斯一间非而立僇非二子之工于荐与间若是也势也夫势之所在则天也天不欲南泽楚北泽戎狄而蚕食周故委仲于齐以为周屏翰天不欲硕果韩芽五国弃而授之秦而转授汉故听非子之庾继仰药而不之恤夫鲍子者助天为福者也非能为福者也李斯者助天为虐者也非能为虐者也然则管子与非子材班乎曰恶乎班夫管子者太公亚也太公所毘父子皆圣辟其用国三分之二也而以当必涣之受管子之毘中人也其用国九分之一也而以当方劲之楚与戎狄然则太公伸而周王管子抑而齐霸周不太公不废王齐不管子不为霸固也不然而管子之书尚在其论四维辨心术亦宁无敬怠义欲之微旨一二乎哉孔子盖深知之故慨然而叹曰如其仁如其仁世固未有不仁其德而仁其功者非子之所为言虽凿凿辨悍衡名实推见至隐而其伎殫于富强而已秦不用非不害为并天下以秦之守守之必亡用非可以并天下并天下而以秦之守守之无救亡夫并天下之与亡俱等亦安所博非子是故非子之于霸若不足而管子之于霸盖有余也然则文殊乎曰不殊也管子齐巨卿也诸法语名迹门人家老能笔之稷下之学士大夫能饰之其于文也辨而核肆而典能为战国始者也韩非子韩之疎属公子也有所著述以发其蓄而鸣其不平其于文也峭而深奇而破的能以战国终者也毋论吾洙泗家言以较鲁儒之左准右绳差不类然何至推名法家苛察皦绕错若惠施公孙龙之汜滥诡諄哉其言各十余万而赢度不能无傅而小有益者要之非西京以后傅益也吾故曰不殊也盖管子之言后见汰于孟氏而极于宋韩子之言太史公若心喜之而列之老子传唐以尊老子故析之宋以绌老子故复合之其析其合要非以为韩非子也嗟夫儒至宋而衰矣彼其睥睨三代之后以末世无一可者而不能不心折于孔明乃孔明则自比于管子而劝后主读韩非子之书何以故宋儒之所得浅而孔明之所得深故也宋以名舍之是故小遇辽

小不振大遇金大不振孔明以实取之是故蕞尔之蜀与强魏角而恒踞其上嗟夫汝师之所为合刻也其悠然而抱膝也毋乃有世思哉汝师曰否吾嗜其文辞若荐三鬻者以味荐而已矣

琅琊法书摹迹集序

炎汉而后有世爵而不必世官以故宗阀之论小屈而江左差振焉然其盛无踰于王氏而王氏则无盛于吾琅琊琅琊之为王自太保睢陵公兄弟以名德显重且多令子而其势尚不能出太原上江左之社微丞相始兴公几不屋而羣从子姓鼎起夹辅之是故琅琊重而太原始不能抗凡终始五代三百余年台袞枢膺之寄鲜复它适社有改而私门之戟如故以至书法一技耳然亦以是冠今古而北则司徒浚冲太尉夷甫以逮少司空子渊江左故创自丞相而妙穷于右军大令所谓羣从子姓后先临池之儁不下四十人当是时太子詹事元礼有云崔氏雕龙不过父子两三世耳未有七叶之中名德相继人各有集如吾门者也信哉第所谓七叶者前自始兴而不及睢陵与睢陵之子后止身而不及少司空与司空之父文侯咸明故称七耳尽举之则为叶者盖十一而傍出之寓公若魏司空宣简公恭懿从子司空文宣公国章司徒文献公文舒而下不啻媿也千余年而不肖所躬履睹记者吾吴郡之王与姚江相望稍稍自致其寒素以成膏华即亡论名位于道术执文若有能式廓一二独临池之业竟靡隳而不振迹者仲氏及其嗣器微见箕裘笔札间不肖故慨然有感于前人因尽搽篋所秘宋榻定武淳化太清秘阁临江诸帖令善摹者章藻辈摹之凡十卷右军独得五卷又迹不甚惊絶而颇见驳通人者别一卷大令得二卷始兴至元礼合一卷隋僧智永云是右军裔人别一卷而右军之为真迹者一唐临者二宋临者一大令之为真迹者一亦摹以附焉记唐万岁通天中凤阁鸾台平章事石泉公尝以燕侍太后而论八法艳及家世石泉公乃尽哀丞相以至少司空手泽为代者九为人者二十八而上之太后更拓本留中禁而加饰其旧出法锦良玉以为罽轴且命中书舍人崔融叙宝章集而归之公当其时所以宠灵我琅琊而侈大墨池之盛若此今可考者仅九纸不肖不自量乃窃取宝章之意而续之夫岂敢以零落残败之余而唐突昭代之懿且使登石者必真迹受摹者必皆定武淳化太清之类摹者必名手吾犹以为三转而再非其故何况不渠尽然也然使后之人因优孟而思孙叔接颍士而追鄱阳则尚可于隆準征之哉盖周之子孙修祖庙而陈重器如大训河图之类皆与焉以表毋忘先世之手泽是书也不敢言手泽以存典刑可也

刻陈生注阴符道德经叙

阴符经旧传黄帝与蚩尤战不胜退而感九天玄女以太上道君所撰经赐之天下

遂大定者百年而后仙去其书不知所繇显而贞观永徽之际已有虞褚石本至开元而李荃者托骊山老姥之旨为之故而自是为故者凡数十余家若道德经则我犹龙公以周定王世将西度闕为令尹喜所挽而为之着五千言其徒列御寇庄生亦类能举之然往往于本辞无当而至汉文帝时河上公为之故而始大显或曰河上公故讹也然自是诸为故者几三倍于阴符而往往俱未能尽究二圣人所以立言之旨凡二圣人之旨其势若险而趋甚平辞若偏而蓄甚完诸所曰私曰欲曰翕曰夺曰盗曰贼曰杀曰机以授拘方守文之士而目之彼必以为大怪且欺我于是乎刺讥枇根之议兴而二圣人之旨积鬱而不宣幸而有能言者方内得之则多归之修齐治平虽至于谷神玄牝雄雌墨白窍妙子母之精微彼皆以为粗而莫之究其下者辱而富国强兵方外得之则尽归之立命安身虽至于慈俭不先以克敌取天下亦强以为精微其下者辱而采炼吐纳于是乎二圣人之旨虽若少示宣而竟鬱余自家徙入观之三日适自他返而守者以一编见示云有道服而魁其形者发且宣白矣曰为我贻王子彼读之必且物色我余读而果异之则所注阴符经也使人物色之得之隆福招提丙舍与语而酒食之已复出其所注道德经且曰吾姑以印吾心而已今请印之子余为一再读则其辞殊雅驯不离轨时亦发诸家之所未发或浅或深若能剂方之内而调之者即所定章句亦不必尽因河上公李荃之旧或离或合要独有犁然当心者余乃谓陈生子岂锤士季耶而畏我以四本论擲我而亟去之生笑曰不然以我■〈目菁〉子重者毋若以我之言■〈目菁〉子重也遂别去且数月而生复来尽得其为人则尝廩博士弟子员场屋声且贡而以口语失之既复避仇海上依染削以居出入二家之学者十年而后书成余乃复谓生曰子于大道姑未论以子材而当开元时用老氏试士比六经则子褻然其选不然而从郭汾阳以阴符取武试子亦褻然其选今奈何坐困子使老一黄冠耶生乃大笑曰不然吾以不用吾师教孽祸以用吾师教幸而免虽然此其应世者也所以印之子欲得其度世者子奈何犹以方之内期我余无以对退而书其语

朱在明诗选序

余以丁卯伏阙识靖江朱在明公交车间当是时在明少年俊傥负风检家蓄小二史酒次能为吴音以压之甚驩也自是余虽强起家然萎请告而在明亦萎以使事归访余东海上稍稍见其诗在明虽不恒为诗然得一诗輒脍炙人口而最后自大官丞出内史王国不得志拂衣归会余亦解山南节归在明过益数已尽见其诗授余曰子且隱矣其为我强序之在明材甚高气甚畅其发而为诗语甚秀调甚逸风之泠泠有余响焉大要以自当一时之适不尽程古人然试以协诸古亡弗协也靖江介大江而邑其北则淮南诸城戍莽苍丰厚其南夫京口毘陵吴郡秀润而丽妍西拒三峡九派之涯流东与大海潮汐相上下吐纳日月孕瑰产异在明居之为鼎贵族其资力足以雄田池弋钓之乐

足以忘老少而任侠顾中年而谢之以与四境之外贤豪长者游又能究千载之业着成一家言其亦可重也已或谓在明所酬倡篇什甚富胡以寂寥若是则不然今天下才士大夫结轨而谈执者必趋唐而唐之篇什最富者独少陵香山氏其次则李供奉元武昌而已彼极玄英灵之所载者人不过十余章初盛四杰悉其藂不能贵洛阳之纸而崔员外黄鹤咏标揭亡和杨东川兰亭语压倒时英孙主簿云精骑三千足敌嬴卒数万是宁以多重哉今令在明与元白较五车或有所不暇以优游员外东川间轩然霞举矣乃不佞谓在明既挂冠早优游无事宜益别思极变以抵于不可涯之境不然则一洗而尽空之相与证太上所谓可也余隱矣所以叙子者止此矣

叶雪樵诗集序

无锡天下岩邑其文物足以襟领一世素封之羨足以跨州郡辘轳而不乐为吟咏至嘉隆间而稍稍有染指者布衣则仅吾雪樵子雪樵子之于吟咏盖自天性然饥若借以食渴若借以酒寒若借以裘于天下之事举无以鬪其好者雪樵子故贫自其工为诗而贫益甚所居巷僻窳其邑子莫能问之而他郡之贤豪长者累足而迹得其处与定交穷日夜语乃别去始稍稍闻邑子他巨豪闻声慕之礼致雪樵子虚左席以待雪樵子则据左席浮之白则白竟醮遂抗论今古名胜与经国不朽之业豪猝不知所对愧而故狎之且用他语侵之雪樵子怒不受曰唉竖子以皮面笼乃公耶拂衣起不顾雪樵子用是益困而邑搢绅独方伯秦梁御史胡孝二先生雅能知诗稍稍客雪樵子相与备酬和秦先生至欲梓其诗以传而亡何二先生相继卒雪樵子仰天叹曰嗟乎吾岂其鸛鹤哉而不祥人若是秦先生之子太学某谓雪樵子父客也而故见严乃大出橐装如曩时约梓成而友人王穉登为之叙累数百千言所以推轂雪樵子甚殷辞甚修而甚蝉缓不可了雪樵子顾意不悻曰我何能而被王君之宠灵我若是即天下靡不趋王君七寸管所谓扬之则天上抑之则地下不我厚幸哉虽然即今如王君言青莲少陵何以加也已谓余子虽欲强我一言诎而无朽矣夫雪樵子生江左顾尽能脱其靡靡冶柔之习而能务完其气无锡故不乐为吟咏雪樵子亡师友剗切之力而能务谐于古调其气完是以句工而不累篇其调谐是以篇工而不累格鬯得沈而收华得质而御夫天下不难乎才难乎才而无以剂之雪樵子殆知有所剂哉夫王君言足重雪樵子而又重雪樵子乃尔余之言厘厘尺寸间又不足以为雪樵子重雪樵子胡取也将亦取其剂而已矣雪樵子叶氏名某字茂长它行又详媿余所及仅侠伉一端云

陈于韶先生卧雪楼摘稿序

明兴谈艺者毋论数十百家往往傅时为格而独盛于嘉靖之季余为郎燕京时颇

得游诸名隽间而诸名隽独盛于庚戌之对公交车者若吴兴徐子与武昌吴明卿广陵宗子相南海梁公实以气谊相激昂还往至穷昕夕亡间未几而豫章余德甫铜梁张肖甫郢上高伯宗吾郡徐子言亦阑入焉相与修觞酒觚翰之政是六七君子不以余之不佞而收其似独阒中陈于韶先生仅一见而旋失之忽忽亦不记何状其后于韶入为郎续诸君子盟锋力之所至几于狎主而余有使事东游宦海上不归于韶之出缘兵事武林之劲烽彭蠡之狂啸以一长檄埽之文士毋用之耻雪而余复遘家难蠖伏田野自余之谬见推备中外乏则于韶不胜其萋菲弃江右节久矣夫余之与于韶毋论不敢当乃其迹若巧相避者今年辛巳夏余以却埽庵居再岁而贾舶之来自蜀者出于韶之书与帀书穷而卧云阁之诗十卷见尽读之乃诧而叹曰咄嗟余之陋也生有陈于韶不能识危夫余今而后知余之幸也不然几失于韶哉几失于韶哉今天下之扼掣而谈艺者靡不以开元大历之后其要不能逾胜明明自弘正而还不能逾胜嘉靖之季即嘉靖之季数十百家盛矣然而的然名狎主者不指数也甚矣诗之难言也此何以故夫工事则徕塞而伤情工情则婉绰而伤气气畅则厉直而伤思思深则沈简而伤态态胜则冶靡而伤骨护格者虞藻护藻者虞格当心者倍耳谐耳者恧心信乎其难兼矣虽然非诗之难所以兼之者难其所以难盖难才也以于韶之为诗自古乐府至近体不下十余无所不极则生平游历感慨一寓之吟讽无所不达至其于前所云数端者亡所不兼媿天实纵之才益以岷峨川巴之秀少嗇其遇而丰以日此岂可以浅眇窥哉诸叙致于韶者往往取其家伯玉为拟其节识经纬差若畧相当然不过以閩党宗姓之故而比之伯玉居其清于韶居其雄伯玉善用小于韶善用大類乎非偶已亡已则有蜀之寓公少陵氏在余既用于韶请叙其诗窃谓余固得于韶晚然能尽读其诗不为不幸于韶得余晚然余方有绮语戒为于韶一破之三尺之侧理七尺之不律奋而作延津合亦宁非幸哉于韶之于余不知所由得余得于韶则前所谓张余二甫者亦时及之

水竹居诗集序

大鸿胥麻城周先生以一编诗寓余山中曰吾闻夫能治诗者莫若子子为我试言之请涤吾目而受削焉余方有笔研戒不获已而诵读而不能已则跃然叹曰媿乎懿哉诗三百篇其最盛者大抵衣被文王之化而江汉之间号为南国于所得为最深然野峻红女岂其能矻矻攻声实而冲口之所发天下之至规萃焉王者之迹熄而风斯下矣然详而骚畧而乐府靡而建安之五言犹未尽废其璞妖治既于月露俪偶严于四杰而后其璞雕璞雕而诗之为用益广而体益不立间一二治经术谈理性者视为弁髦不则藉词達之说以文其陋二者交相擊而不相下今夫周先生深于治经术谈性理者也时有所吟咏以寄其所不得已者耳固不假腐毫刻叶之为功与左准右绳之为范然而天才之溢出则居然大国之赋冥思之独造则突然偏师之劲忽骤而鞭风驭霆已敛而庆云

祥颺不专门不涉蹊古所谓质有其文彬彬君子者非耶岂南国文王之化二千五百年而犹在江汉也耶先生为名御史视学吾江左以直道忤时贵浮沉外服者久之而稍进用以至九列通显矣然犹署其编曰水竹居示不忘隱也他文及疏草若干卷别行世

胡元瑞绿萝馆诗集序

自余结髮而好言诗所与海内豪儁游亡不以诗进者犬马齿日益稍见所论著则诸豪儁自喜行其诗少不以序请者余之不能工为佞不能使人人极意以为艰而思谢去之几且焚笔研而最后乃为胡元瑞序绿萝馆诗元瑞之为言曰子所可必者一所大可恨者与我所不子负者各二子甚幸哉而我荐其敝帚以希一言之华袞则可必子许我而即宠施我即子一旦不可知大可恨我虽晚犹幸及子而不终子之惠使后世疑其异时不相当大可恨即子过许我而我竭蹶步武以求践子之许不子负有所弹射而我惕焉以子为鑿铉不子负子以为奚若余乃谓元瑞毋刺促请息焉而为若叙余之得元瑞于余仲者半岁所而元瑞进其诗余覩之未尝不三击节叹也天不靳人以材而人顾取其凡者气之流行亡所择而取其浊者与弱偃者古人不秘格于后人而取其下中者天又不秘其声色以供吾诗而声取其鼃哇者色取其黝■〈雨上黹下〉者象日吾接吾汰其精而英者情自吾发吾不衷其肺腑者以是而治诗以是而号于人曰吾善诗吾善诗者何也元瑞材高而气充象必意副情必法畅歌之而声中宫商而彻金石揽之而色薄星汉而摅云霞以比于开元大历之格亡弗合也余尝语余仲诸前我而作者涵洪并織与亭毒并吾故推猷吉然不能讳其滓絕尘行空卿云烂兮吾故推昌谷然不能讳其轻鸣鸾佩琼万象咳唾吾故推仲默然不能讳其孱刻羽雕叶舍陈而新吾故推子业然不能讳其促鞭风驭霆以险为絕吾故推子相然不能讳其疎融而超之于鳞庶几哉然犹时时见孤诣焉后我而作者其在此子矣夫其在此子矣夫以今证之抑何左契不爽也亡己而有子规者在昔鞠傅之称田光曰智深而勇沈不深不玄不沈不坚入之沈深出之自然完之粹然如大钧雕物而不见工如良玉夜辉而泯其痕斯三百篇西京建安之懿乎是集也其始基之矣而犹未也子之邦君有喻子者其问梓焉而以不佞言质之

徐鲁庵先生湖上集序

昔周之衰而文日盛其盛之极几乎揜质然非必有淫治荡性之词与奇衰颇坚不根之论老子犹思反之曰大丈夫处其实不居其华吾夫子亦持之曰文莫吾犹人也而逡巡焉異于躬行君子之后而媿其不可逮夫文者经世大业而不朽盛事岂曰以其小而弁髦之彼小夫世之所为文而文者不究其所繇来而又不底其终之用以苟就其一

切之造而已则岂唯老子之矫在过其正以吾夫子将有不能忍于耳目者今天下号为治平无事不衰周若其民废干戈之业而称诗书委蛇揖让于尊俎衿裾间隃二百年而文亦因之其文之盛稍舒而为色泽则必探六雄援先秦据东西京而衷其要领徐而调五音则又祖命骚祢扬马友于建安黄初之雋庶息颜谢又束而加偶然必放而归乎开元大历之藪其又佚而出之牵联沧胥月露之为响而任沈温邢之为组然且噤噤曰吾宁有蚀三寸毫而不就墨吾不为宋氏也计天下之所为盛者毋如嘉隆间嘉隆之所为盛毋如江左江左毋如吾吴郡而郡之岩邑曰吴江吴江之隲曰徐鲁庵公公成进士读中秘书出补夕拜司谏诤于嘉靖之季不二载輒谢去退而畊吴江之埜天下艳于公之名而窃意其所撰着必有当于其所谓盛者而公独不然公生而亡他嗜顾独嗜书于书嗜六经子史而尤邃于易及三礼诸圣贤精神心术之微公皆为能探隱破的而后笔之于书书成而近邑之衿裾少年或不能尽好之然必不以其一日之好而易吾守公为人恂恂长者其出处多避少进寬然置其身于不争之地而善藏之然间有所持论则必务于信其见而不谐俗如表让而贤朱均立统而屈赵宋辨王正而归周历标吴祀而绌范蠡即令汤禹之徒操尉牒自谓推见至隱读公辞而有不吐舌敛手者哉不然以公之避迹谓孤峭且忘世者乃其叙论邮道江左徭役抑何忠厚恳至而达国体也且夫公非不能华非恶夫华而力去之唯欲究夫文所繇而底其终之用而已蓋嘉隆之后曰万厯诸大臣用事者固忧其盛之极足以孽衰而数见于公交车之诏曰宁木毋藻吾所贵士大夫于明理适用而已然则公虽歿不获尽伸其言要必有合哉如苟以吾郡之所谓盛于嘉隆间则已矣无所事公与吾叙矣公讳师曾字（阙）其歿也郡之父老诸生举而祀之学宫

俞仲蔚先生集序

余以嘉靖癸丑有维扬讞而投俞先生诗与定交后三岁丙辰而有三辅讞为稍梓俞先生诗以行而叙之其又二十有四岁而为今上之庚辰俞先生老病死而余以■〈此上夕下〉哀之已又志其墓又明年而郡丞刘君某谋尽梓其诗文而授镪焉歛人程汝义者悉橐继之而属余叙夫余所扬隲俞先生虽后先殊其大致谓诗五言古能步趋建安以下迨齐梁错而不諄格七言歌辞翩翩自肆或深或浅不名一家独近体为小羸而絕句时自会心文主东京语间入晋宋旨不必隲而骨在纬不必丽而质胜其于泉石最谐本色毋亦布衣之赤帟乎哉自余之语出而俞先生论稍稍定独其于隱虽天下之人慕悅之而未有能名其格者夫上隱生而挫声茹勤攻苦自放于鹿麋之外樵父牧豎能狎而不能敬贤达之士可意想而不可踪迹乃俞先生故搢绅子少亦尝事博士经数竒而后弃之■〈竹勛〉力柔懒善头风病耕不能为鹿门德公佣不能为皋桥伯鸾游不能为禽息向子平而累累焉寄一廛于十室之邑居恒自谓吾不徇人亦不避人吾不

厌世亦不侮世吾不以名就名亦不以匿名钓名如是而已夫俞先生以善病故其足不能出百里外虽然纵不能游五岳不贤于游五侯乎哉且夫隱至俞先生亦足矣何至必欲并迹而灭之然后称上隱或谓俞先生集所酬赠多宦路显者此事独余识之蓋余以诗定俞先生交而所善吴兴徐子与来子与于游道广天下自是慕说俞先生争欲得俞先生言俞先生无所拒然亦无援纳既久而干旄之大夫有造俞先生者俞先生无所拒然亦无所报谢俞先生少贫所食恒半菽至或并日炊然一介无所取晚节声转重人或以谊饷者亦不为饰词然大不能至束帛小或算器食而已昔许玄度卧永兴南幽穴而致四方诸侯之遗人或以箕山人谓之顾谓筐篚苞苴轻于天下之宝为解传奇者亦毋用是而废其栖逸此何足轩轻俞先生哉蓋俞先生去诸生即为赞赞高士如干人以寓其微指而所操论独不喜郭林宗以舍己而就天下之好布衣而侵大司徒之秉亡当要之俞先生虽不竟自晦于隱遁庶几能持衡者故因程氏请及之以俟传文苑隱逸者折衷焉

弇州续稿卷四十四

●钦定四库全书

弇州续稿卷四十五

（明）王世贞 撰

○文部

△序

壬午江南武举序

齿录后叙万曆壬午秋御史偕兵使者合吾吴云间晋陵京口四郡勒射决策之士若而人三试之而吾州之褻然其魁者徐某氏谓当如诸生都试有录不获请则又合而以其齿并及爵里世系请于兵使者旋以兵使者指问序于不佞世贞不佞谓徐某氏尔来前御史偕兵使者谓尔曹实材将以荐之天子采尔谋贾尔武夫鏖膺鞞弓钺锋之矛唯敌是仇唯少年是求而何所论齿为呼吸之际被羽先登介而衡冲争者得之而又何所用让为徐某氏曰然欤否否子独不矚于晋文公乎文公名盟主也狐赵名谋士也其治兵而欲纳王也察于众而亡所不中奏焉而犹未用也及其少长有礼也而后用之夫

少长有礼此何与于一战而文公汲汲焉先之以风励逖迤是故刚而无礼之子玉锋乍接而尽靡迨其没也世世用其余教以主齐盟故饮至论功之际士燮让于书让于羣帅受赈之顷原季以谋主让而自居其七士句以中军之佐谓伯游长而让之虽以栾黶之汰而两不敢为伎迨夫子孙之衰而廉将军欲以其趨武而先藺大夫然藺大夫卒能以一言下之而交为让也宁与夫祖龙所称王将军老矣李将军果势壮往可用也竟之缚荆王者畴欤夫弃礼让尚首功贵少贱老此亡秦之续而邻于狄者也吾弗取也不佞亡以应曰尔言辨请拭目而俟尔曹异日缓急推轂则长者效谋小者效力矢游刃接则少者椎锋长者持重行赏登位则长者称老不任少者推未更事雍容齿让之风洋溢介冑貂蝉间宁独衿绅之儁已哉且夫宁独晋吾吴之先固文身魑结地也而泰伯实以让君之祭昧僚光之相禅百战为国而季子复逡巡以让处其间而莫之害也信哉若尔曹言齿让之不可已也盖徐某氏之父曰宁阳令君尝与先司马为诸生文社而某归田日不佞又数奉杯酒周还庶几世讲焉其録序齿也亦将以修世讲也故不能辞而为之叙于末简

报庆纪行小序

汉有两司马者皆尝官侍从奉文史之职其一游江淮会稽探禹穴浮沅湘涉汶泗讲业齐鲁之都最后而有蜀役其一即自蜀西南通夜郎定邛笮冉駹斯榆地而皆能以山川之胜助发其文章高名蔽天壤第当其时未闻有一言以纪其所谓胜者至钱唐之宋而范致能陆务观辈始有纪行之文而其辞又多猥杂不称余固恹叹其不相当今者乃得信阳王太史所著撰则诸经行览眺离合宴酬土风名胜若灿指掌幸而不为两司马所先不落第二义其视致能务观彼不亦瞠乎后哉抑当武帝时天下方疲于诛讨而司马所使蜀则皆以兵革行有寝食所不能甘者安暇涤研泚笔以从事著述若范陆之世其使北则界淮为华夏其适楚则画江为南北藉令涤研泚笔而从事著述气亦先笔研而索所云猥杂不称者宜也夫王太史离疏而侍王上备法从者十余年以皇子大庆辍经幄史笔而将命于二藩国藩国之贤王拥簪而迎筑宫以居舟车万里无毫发干陬之警以劳颜色又获便道梓里称觴太夫人前其为熙世伟际视昔人不踰胜万万也以故感慨牢慙之之旨绌而和平尔雅之音伸使天下后世诵之有跃然而思邁其时者在此纪哉太史既渡江访余弇中余时尚能笔羹雪桃为东道主今转徙而之荒野不能矣然而有一丸墨足濡潦倒数言以序太史纪过此亦不能矣太史毋更溷我

曾子清孙武子注疏序

三代而下能得兵理者莫过于孔老氏孔子之系易曰地中有水师君子以容民蓄

众又曰刚中而应行险而顺以此毒天下而民从之老子则曰兵者不祥之器不得已而用之恬憺为上又曰以正治国以奇用兵以无事取天下又曰行无行攘无臂仍无敌执无兵祸莫大于轻敌轻敌几丧吾宝盖亦精微之致哉其次则莫若孙武其言曰善用兵者屈人之兵而非战拔人之城而非攻又曰见胜不过众人之所知非善之善者也战胜而天下曰善非善之善者也善战者之胜也无智名无勇功若孙武者庶几能得兵理者也自是而后虽强如项籍勇如韩白以称知兵事可耳得兵理则未也诸为孙武而训故之者凡十余家言夫以强如项籍勇如韩白尚不敢以得兵理归之而是十余家者为能得兵之理乎哉夫是十余家者得兵之谈而不得其所以谈其所以谈则理也友人曾子清氏少游诸生读书商城山中业成且奏公交车而中厌之曰此齷齪文士用耳已跨铁襦裆驰生马驹左右发三石弧七尺之剑五步不留行复厌之曰一人敌耳丈夫当学万人敌于是悉习古兵法当是时天子方有事岛夷大将军幕府贤子清氏而辟之慷慨长揖释衿绅而袭韦跗注一见取金紫再见取偏将军印数困贼于肉裼之岙岙而徼取之有功当封者数矣而见中忌者罗文网数上书自明乃得解仍以偏将军待次自子清氏之待次而名用才者往往礼致之稍与深谈则大诧曰与共事必且踞吾上是必坐而使我亦安能手通侯之绶而授夫夫子清氏度终不见用复归商城山中益旁通内典前三岁余卧弇州园子清氏担簦来谒因相与剧谈西竺古先生之教与菩提达磨之心旨纵横蠡起不可穷以为真遗世者数日而后得其旨盖未尝一食不在兵也余乃起谢之曰余僧而发者耳无定水以息君火而扬尼连之尘佐之有所不能乃舍去今年余已徙恬憺观子清氏复来谒甚谈西竺益精而间出一编所谓孙武注疏者示余曰强为我读之读之则掩卷谓曰子奈何僂我夫我且暮人灰槁之不恤而奈何起我壮心而诱之僂也虽然吾向以为孙武得兵理者也吾不敢谓公得兵理将以为胜项籍韩白吾敢以公得孙武理者也世之有用子而执此以往以安天下可也不然而子之注疏行而有用以安天下后世亦可也子为子之事吾为吾之事而已矣坐有短子清氏者曰及闽之用偏将军而不一筭剪灭此寇而后朝食又不一筭以先文冈而离之岂其时用未熟耶将今者空言也余不应已而曰吾且为子言孙武孙武之书显于王阖闾未几而用之以覆郢功固班班史籍也然胡以再诘于秦救而不知师之老又不知挟奇以取胜何也樵李之役又胡以委王阖闾于越也夫郢之役王阖闾狃胜而骄子胥逞忿而黜樵李之役王阖闾轻越而自恃强其于孙武盖用之而不尽用者也夫以用之而不尽用则武且见屈而况子清氏或又曰孙武固言之无智名无勇功子清氏奈何有之也余复不应

冯佑山先生集序

余十八为州诸生事故府主冯公与公之子今叅政敏功生同岁公每试诸生经义时时甲乙因相得甚欢当是时公以名谏官举职出外数更大州邑有循吏声而姿貌伟

秀谈说慷慨即见者靡不以三事期公而公性特高朗不耐■〈骨委〉馘事上官仅以再转以去公之去归其乡平湖距余家不三百里而近闲偻行再见之醉公别墅山池而别最后余解郟节过公公得叅政封然已病强出而执余手谓曰后会之不能再将奈我何意若有属者而亡何公竟以寿考终既葬而始从叅政所得公所著集若干卷卒业焉乃叹曰世之不能知公若此哉毋论世不能知即余不佞知之然亦不能尽公而今而后乃为侷尽公也始余谢诸生学即喜为古文辞与一二友生信眉谈说西京建安业以为后世亡当者今操觚之士亦往往能举之大较有二端柔曼瑰靡之辞胜则见以为才情然其弊使人肤立而不振感慨扬厉之辞胜则见以为风骨然其弊使人气溢而多竞此二者骤而畧读之以为非治世音不可然所以为治世者不在也公之所撰着文若诗于格固亡论余得窃窥一二若触邪之简峭直深核何异刘子政蔡中郎筹事诸刘皙几中紫庶几陆敬輿蕪眉山叙记志传蕴藉舒畅得之庐陵为多诗古近体温厚尔雅飒飒钱左司刘随州遗响要而归之尼父之一言曰辞达而已矣令识者读而三复之而求其所谓非治世音不可得也日者大宗伯亟为上言欲大正文体而岭表策士至甚口而诋诃操觚之徒以为钩棘僻塞则胡为阳左而阴右之其身于钩棘僻塞抑甚焉曷不取公集尊显之布之功令其于回风而向治必有当也夫侷尽者几得之而犹小有未竟之称也公有计然策可以伯屈而仅康其家有容成术可以长世屈而仅以却疾吾故尝闻之人卒卒不能叩公所以称侷尽也公之卒其乡人祠而记于乡所莅州邑人祠而祀于州邑叅政又不胜其思而为之标本而光大之非一兹集行世周有尽知公者亡所事余矣

方鸿胪息机堂诗集序

余自甲戌识方先生于燕中而先生已有名文章会其郎考功棕核百揆名实余不敢以雕虫之技进己而内相慕也郟襄之役则再损书致殷勤焉而余寻罢归里先生转选部提衡公平不能得执政意既迁佐容台而言者一寻窾中之先生即谢去卧隆中者几十年所而强起拜大鸿胪分司建业始以其所著息机堂集使使授余请一言之弁谓毋悛雌黄庶得受而加削余不敏伏读先生所为诗若五七言古体虽不为繁富亦不孜孜求工于效颦抵掌之似大较气完而辞畅出之自才止之自格人不得以大厯而后名之至于近体铿然其响苍然其色不扬而高不抑而沈固中原之所锤灵而盛世之响也先生南阳人也其北曰洛东曰汝南盖皆虞牺公旦之所指以为天地中者而南阳馆其间山川之秀若丹霞大胡列仙之辙桐栢造天淮水其下以成四渎人才之盛则有若吴邓岑贾卓褒德之流以武畧政术佐英主成戡定抚镇之功而其后代以不乏若张睢阳之为节昭乎揭白日丽层霄焉顾独于文士不数数盖仅一张平子岑嘉州而已岂一时诸贤艳于功名之盛足不朽而无所事铅槩耶将天地之美灵未尽发而犹有待耶今天下名为极治平虽不尽推毂文士亦不至诗书禁矣以天地之中英灵锤之先生其有以

凝承之哉去先生邑而近者大梁李献吉高子业信阳何仲默铮铮矣先生毋但己也毋论他结撰诗于古必融而趣建安于近必汰而衷王杜繇是而上之舍筏而问风雅之津何难哉余老矣内愧所谓雕虫者且弃去矣必欲弃余言请质于先生之乡张助甫以为何如

徐天目先生集序

徐天目先生者故江西左使中行也家居天目山之阳因自号天目山人云先生卒豫章时其遗稿多散佚而吾弟敬美走治丧事鸠之仅得十之六以属其门人郭造卿盖三载而始致自造卿所张司马肖甫时镇浙为梓行之先生之从子咏辈谓知先生毋若不佞宜有序不佞故已倦笔研且闻之策诸生者云天下盖有文章之士呻吻而谈先秦栲韵而卑大历一操染则谓千古盛事一语稍合则谓灵均以来此秘未覩意味偶同则哢哢然而谓努力中原鞭弭当世始而倡之者一二人既而和者数十人又其后人人能矣其言人人能者妄然竟以是获时趣人以诮不佞若岂其一二人人耶不佞老忽忘前语于鳞或有之然此一二人自于鳞外不先生当亦不佞于鳞歿先生今又歿而不佞复序先生集亡论即不能为先生重世用是见訾诋即序之而畴信之咏辈曰不然微夫人而知家先生者不加益也微夫人而不知家先生者亦不加益也毋论家先生倡第吾子倡而家先生和谁曰不可且吾子之善家先生天下莫不知奈何以一时嫌而避弃其生乎不佞无以应乃谓咏辈何俟余言子之家先生推文辞而衷者无过何信阳碑其大畧曰鄙人之言何知文士往往鲜行遂以槩天下贤者谓不得与节义齿则投管叹之士之经纬两仪弥纶三极其次恢展鸿猷润色洪业又次闵时政得失主文谲谏劝戒所由昭焉节义其一支耳何言不得齿也则彼所称士之能文譬之衣服耜工之贸易其本业者抑何重轻县殊也夫先生虽要于重文事至乃高自矜诩党同伐异相持摭而不能相下如彼所称断断乎无之不佞与先生友三十年生平无移市色不作仰天眼卑巽自牧泛爱容众亲仁煦煦其所遭苟一能操染即倾心事之不必均行也得一当心语即激赏而进之不必尽同调也已有所结撰出而合乎古即歉然曰吾尚未敢当执鞭进而古人所未经道更自疑曰得无离乎亟绳之二子以故先生于文章有实胜而无名高今其集具在诸诗咸发情止性喻象比意或清而和或沈而雄缓态促节变化种种然以引于左準右绳无弗合也持论之文辨而不激叙事之文峭而能洁发意之文畅而归典不知于西京何如东京而下当无复有贤于先生者且夫灵均不为近体而先生与于鳞不为骚则终始不相覩已何言未也夫短钉古文奇字期駮目詞心而止以此苛责于鳞或有之先生集具在藉令坦腹而受弹射焉在中的嗟乎如此而又何难倡焉先生为文名家余三十年然天下信其人不以忌故而废其称长者歿之日不能调棺殮其乡人哭于乡所后先治吏民哭于其地客被一顾盼者趣而赴哭于丧咸若一则文士鲜行所三叹于信阳

氏者先生深旨哉语有之与媿为鬪孰知其故今夫骤贵者有所齟齬示舍而传絳灌之朴以自植趣好者增树牙颊肆言而挫相形之敌以示亲此故也夫安能不一辨虽然先生之兹集行天下后世要必有皎然者道并行而不相悖何为言哉余赘矣余乃赘矣

张伯起集序

张伯起者吴人也少于余一岁始余为郎奉使归吴里中而伯起名声籍甚吴人于古今文辞推王文恪公于诗推徐迪功于书推祝京兆文待诏一旦以属之伯起待诏时犹老寿无恙每伯起一造门輒倒屣出迓把臂促膝尽尔汝之分且复自叹以得尚伯起晚余所善彭年孔嘉每谓余不恨伯起不识公恨公不识伯起然余卒卒竟无由识之而又数年乃始定交已相得欢甚伯起才不能尽发而为乐府新声天下之爱伯起新声甚于古文辞伯起夷然不屑也其所应时制自诸生升太学上舍屡试輒甲然仅用以得京兆荐至公交车輒报罢则毋不称伯起之才而叹其屈伯起复夷然不屑也独于古文辞有所构结则益工诸岳牧令长上事徙罢不得伯起言无以荣父不得伯起言无以子兄不得伯起言无以弟吉凶庆吊不得伯起言无以参其事以是伯起之构结日益繁而其传亦日以广人或谓伯起材何所不际能骋其丽靡则可以蹈籍六季而鼓吹三都骋其辨可以走仪秦役犀首骋其吊诡则可以与庄列邹慎具宾主高者醉月露下者亦不失雄帅烟花而奈何拘拘此绳墨为伯起应曰吾不知也吾发于吾情而止于性发于意而止于调反之我而快质之古而合以为如是足耳且夫辞达者孔父之训也一经一纬宛然理矣而加组焉弗敢为也一宫一商悠然音矣而加繁焉弗敢为也此伯起说也识者谓伯起非才之难有才而不求尽之难非名之难不巧为弋以猎名之难余亦云云属者岁之庚辰伯起复当应公交车辟念太夫人老不肯行曰奈何以一第而易吾菽水自是却扫简去扶持之暇往往収视反听以求静中之端倪而于玄牝橐钥之旨亦若有通会者时余名为弃家亡所得闻而甚竒之乃一日尽哀其所撰若干卷谓余必靳片言以惠我身后余窃怪伯起何以有此嗟夫魏文帝雄主也威无所不加贵富无所不极而独慨然于文章之一端曰经世大业不朽盛事丰儒从而笑之此未可笑也必恃理而不朽安能续六经哉且夫出世之不得则思所以垂世亦恒也余姑书此以答伯起或曰子自解子嘲耳子不能如君苗焚笔研伯起且怪子矣

兵车心见序

嘉靖之季天下北骑战南舟师所游大人多好言兵而所见毋如戚少保俞都督者其人皆娄拜大将有楼船功而极言车战之利且恨不得一当敌余时亡以难也退而思之终不敢自信以为平沙大卤行则偏箱止则武刚以战以守其利则然然且有陈涛斜

卒不幸而邁包原险阻左箐右阮进迫井陘退籍阴陵我何以逞然二将军名将也而岂欺我今年春故人子王元周以一编书寄我曰此为扬郡丘大夫着其编名兵车心见始不佞妄意二将军卮语耳几唾弗视久之徐读而得其说乃骇曰此非车也盾也盾者诸战器之一器也何以得言车非车而擅车之利也车之体方而其用偏盾之体圆而其用广擅车之利去车之害强而被之名曰车车固所不能尽也今夫我以偏师而当大敌敌四向而攻我我骈植而应之前茅虑无中权后劲翼以强弩矢道同的我面面车也被羽先登超险陷坚枉弓之所闇加伏刃之所卒发不能以毫髮损我我人人车也腾飞黄而上之飙驰电突无事胄铁而免圉人之谏骑亦车也轻刀凌波深入敌艘焚积馘酋不藉楼櫓而扞矢石舟亦车也夫是以名兵车也虽然贵善用之不善用则终始一盾而已矣丘大夫之所精者体也其所神者用也百炼之鏐既轻且坚中为连环分合无际此体也机刃火礮无不透爇矛槊刀剑犀利肉好体之余也无极五行偃月龙蟠变化阖辟倏忽万态攻误敌守守误敌攻此用也丘大夫能工言之夫是以名心见也夫心见者独创之谓也丘大夫尝自诡神授矣何以称心心非他物也神之舍也神非自外至也心之精所凝注也是书成自之神授可也即独创可也或谓今主上神圣蕃部献琛委赆越裳肃慎重译而来朝即五兵可以卧武库丘大夫方有循吏声于淮南胡不委蛇庙廊以收颍川褒德封而焉用是刺刺喜事为则不然轩辕不以蚩尤之僂而焚虎铃太公不以殷紂之剪而废六韬天下虽安忘战必危丘大夫所以需衣袂戒不虞意也或又曰子之言美矣慎毋使我击唾壶唾壶缺少年且窥子以名为学道而犹有慳之志乎哉余乃曰吾学道吾故得之犹龙公轻敌丧宝者保也此盾为兵车说也亦养生说也元周録之而私于丘大夫

冯咸甫诗序

诗真无益于世哉上之不能奏清庙备疏越如唐山夫人邹子乐以数语当一代之盛下之公交车不以程士不能如钱起李肱褻然诸生间一入仕籍则絳灌眈眈焉振睚眦而伺其虢大者削小者斥不快不止然而学士大夫好之转甚其好之甚高者用以自愉快视天下之事亡足当而劣者至于树门户烦牙颊余幸得以生还里将焚弃笔研而金华胡元瑞贄其诗来谒余覩其风格高鬯鸿丽中实爱之而会彼乞一言之弃余乃粗究近代名世诸公所以失得者勉使剂之非敢有所扬抑也诸为元瑞者沾沾而不为元瑞者眈眈矣夫眈眈者之与沾沾皆过然不能不使余不愆其口而云间冯咸甫氏复以所业诗来贄则又覩其和平畅尔能酌于深浅浓淡之间高不至浮庠不至弱稍加以沈思则可揖让高岑而蹈藉钱刘矣念咸甫与元瑞俱犹滞公交车何渠为合左师以要晋楚之成而交畅其盛今年三月元瑞来自燕适余病甚隱几而问天下计吏与偕计者悉集苟不尽从事吏道与占毕时义有一言可以当若意者乎元瑞首屈一指曰汝南张观

察助甫余应曰向者余所畏也既复屈一指曰云间冯先辈咸甫余应曰迺者余所私也问元瑞更有之乎元瑞曰即有之未敢遽以闻也余不觉推几而起五月咸甫亦来自燕大出其新编以求一言弁如元瑞余谓咸甫吾欲使若沾沾毋乃使若重受睨睨乎子姑为我见元瑞使彼不惜格降而博求其变子程格而务深沈其思又何古人之不可作虽然吾老矣无所藉于世矣名将逐子而走若影之传体可畏哉子其托荫而息焉可也盖与咸甫偕来者诸生章子敬氏所为诗句意亦清雅可风颇以余言为然而志之

陶懋中镜心堂草序

善乎苏子瞻先生之自名其文如万斛之泉取之不竭唯行乎其所当行止乎其所不得止斯言也庄生司马子长故饶之于诗则李白氏庶几焉蘓先生盖俛得之而犹未尽者也凡人之文内境发而接于外之境者十恒二三外境来而接于内之境者十恒六七其接也以天而我无与焉行乎所当行者也意尽而止而不为之缀止乎所不得止者也吾自操觚时业已持衡是说而会所庄事而相切劘者一二君子咸极意于鼓铸别镂以求肖乎作者之模及夫真模出而不能无少索矣夫人巧之不获与天巧埒也夫人能知之亦能论辨之至读其所论辨之辞往往若堕于荆棘之壑而不获逞于天巧者何也人巧貌难而易天巧貌易而难也会稽陶懋中蘓先生之流亚也当其年十五六而侍先文僖公时所为制科义业已尽倾其侪伍而懋中心厌斲之于六经外益读诸子左国先秦二京之言以下至大历开元之为韵语者若■〈米某〉教之酝于腹既熟而出之放溢横溃而不可御芬旨袭于人口鼻而争侈其盛及其成进士官郎曹刻烛击钵之余勇足以走愈郊而灭没全异如周弘禴氏之所称者余虽已病废里居犹时时耳之又十年所而懋中来为常倅赞其所梓镜心堂草而过余凡若而首文亦称是夫以余之所闻如周氏者则载以五副车且不胜而厘厘若此或曰懋中汰之故或曰非也其接以天其止以天所谓行乎所当行止乎所不得止也懋中之于诗自乐府饶歌十九首而下亡所不比拟然离合操纵往往见其指于骊黄牝牡之外近体及它文尤朗畅有气夫万斛之泉稍一澄其源而不令为浊涇所侵溷其为蘓先生何啻哉又岂唯俛得之而已也陶之先世世不圻僚其以节槩政术文事显者踵相接也懋中甫踰冠为庶官欲抗章弹射贵臣而见中以出不薄其折腰所至着声实乃其于文事尤卓犖不隳家声矣第吾闻子之乡先生有王文成公其恒言云使吾尽废此三者而求太上所谓乎则于懋中更有望焉

国香集序

闽多兰赵时庚王贵学氏皆闽人故后先能谱兰诸所以为兰之事尽矣而吾老友

张应文氏顾又能为续兰谱其所以为兰之事又大出于二谱之外而又能为歌诗古近体几百篇以侈之若杲禅师悟后隼语百出而百不穷张君吾吴人也酈道元高阳而注江南水经欧阳永叔庐陵而谱洛中牡丹不是过也余不能从稽含晓南中花木意亦不大好之顾独好兰而不甚晓其事与所以滋培之理友人有见贻者至冬輒萎败亦任之而已今从张君谱稍得其事与理而園居力不能致今者似别得策第手靖节栗里谱与其诗各一编陆羽张又新水谱各一编蔡君谟茶録一编以佐张君之二谱而日与之徜徉于峭蒨青葱之下间歌陶诗渴则拈茶水谱随意读之觉此身如入阳羨吸中泠已徐翻张君所纂谱咏其得意句鼻观习习芬馥两腋风举作天际真人想又何必左拥陈良紫右侍鱼魷白而后快哉或曰兰之传自屈子骚始也子何以不骚而靖节之是援且不虞彼鞠忌哉曰不然兰君子也贵而大国贱而幽谷所为香不改也屈子才大于兰而志趣不一吾故取陶氏焉今之鞠丽矣非陶氏鞠也以故不能与兰偕兰亦不受妬不尔宁无东篱数枝以伴我九畹哉吾取兰而陶之取陶而兰之即屈子所不能妬而况鞠也张君善吾言识而弁于简端

弇州续稿卷四十五

●钦定四库全书

弇州续稿卷四十六

（明）王世贞 撰

○文部

△序

古今名园墅编序

余为郎长安中前后积数岁自官曹簿书外颇思寓目林泉园圃以一畅其惊而官贫薄不能治游具人亦易之无适为主者唯于韦园颇数韦园者故中贵人霏别墅也在崇文门外六七里许凿沟引西山水环之其中创招提右为墓左为居室甚壮屋后凿大池榆柳四周中蓄鱼鳖之类藻荇明洁鳧鹭翔泳亦一快地也其稍遠为甯园寺宇寬整有古松寿藤之属丰碑突兀便房叫窰而乏遠趣城西则有水头庄中贵数人居之其傍可以泛舟即于鳞欲墮水处又有崔都尉庄潭潭侯家邸而前为大溪溪种红芙蕖万柄

一亭枕之溪南皆水田庄之后修竹数千竿菜畦以畦计者可十万时都尉以病月余不起又三月过之则鼎然一新门设行马呵禁游者盖已为陆锦衣炳物矣锦衣没又他属余去国垂二十年而复领太仆仅半岁缙帅刘君守有邀余兄弟游一庄近前水头无他奇而中大池数亩四周皆修竹鬪笋网鱼以佐觞笋足畅也其右流水自西山下为闸以疏节之又尝出西直门访谢司徒所寓朱锦衣别墅或云已属之冯常侍其寺舍堂室之瑰壮严丽尚方所不逮延袤皆青石垣中所植桃李枣杏林檎之属以万计菜畦亦以十万计而无奇石清池足以澄悦心志者大抵京师彻侯中贵园墅如成英黄冯之家屈指不易周并日不徧游然余尝笑之曰此曹子有廊庙而无山林又朝秦暮楚不无少陵秋兴之感异时宦游所经历至济南谒德藩游真珠泉泉东西可十余丈南北三丈许东一亭枕之其下琴瑟羣起拍掌振履则益起纒纒而上空明莹彻与日月争彩金鲤百头小者亦可三尺其西泉窰宫墙而出为大池皆以白石甃甃中有水殿前后各五楹彩鹞容与箫鼓四奏王时劳赐醴往往丙夜又西为长沟曲折以达后圃芍药数百本高楼踞之泉出后宫墙为水碓水磨以达大明湖湖景尤自韶丽余所治青亦王国而亡可游者后分治吴兴袖徐献忠氏所草掌故以访芎林盘山二沈之遗迹而不可得盖其民皆业蚕得方丈地则桑之是以富而不胜俗独南浔董尚书第后一园可游然所见唯高堂杰阁雕甍朱榭沼傍垂杨数十树牡丹鞠千本建兰百本开时芬秀可爱而无一培塿之丘所移陈氏洞庭峰石三四为天下冠而皆卧之苔藓中此最不可晓者钱唐独洪襄惠之孙有二园其一在城前为堂五楹甚壮而山池台馆据其背一览都尽其一在西湖胜处而陆炳锦衣复夺之借以祠其所冒祖宣公贄而生塑己像于前阁寻事败毁弃钱唐人至今快之若吾郡城中外所游王文恪孙太常有壬与徐封园饶佳石而水竹不称徐叅议廷裸园因吴文定东庄之址而加完饬饶水竹而石不称徐鸿胪佳园因王侍御拙政之旧以己意增损而失其真松之上海潘方伯允端园廓落而未完顾尚玺露香园稍精而易竟度予所见表表者仅此要之皆以廊庙胜耳而李使君頤宦广西为予极言靖江王邸园圃之媿云笼独秀山有之山如玉簪矗然平地千丈蟠道而上为梵宇琳宫山前渺渺巨浸水田数百亩唤鱼子打鱼农人插秧饰优伶歌舞于万花中甚乐而金陵士大夫无不称徐氏东西园者东园以廊庙胜西园以山林胜见周公瑕所为志赋中或云公瑕多得润笔如子虚上林所云不必实也然亦足以雄矣而家弟从溧阳还津津口彭氏园不置以为穷旷朗深蓊之趣于山林偏得什之七余従舆令记之今皆具编中弇山人曰余栖止余园者数载日涉而得其槩以为市居不胜嚣而壑居不胜寂则莫若托于园可以畅目而怡性而会同年生何观察以游名山记见贻余颇爱其事以旧所藏本若干卷投之并为一集輒复用何君例糺集古今之为园者记志赋序几百首诗古体近体几百千首而别墅之依于山水者亦附焉编成而人或笑之曰何君纪名山而子纪仅名园墅枋榆刺促得无为九万里笑乎余輒应曰子不晓夫逍遥游一也且夫世谓高岸为谷者妄夫所云名山者千万年而不改观者也即何待文一牧竖樵子引之而能指点以追得

其自若夫园墅不转盼而能易姓不易世而能使其遗踪逸迹泯没于荒烟夕照间亡但綠野平泉而已所谓上林甘泉昆明太液者今安在也后之君子苟有谈园墅之胜使人目营然而若有覩足跃然而思欲陟者何自得之得之辞而已甚哉辞之不可已也虽然凡辞之在山水者多不能胜山水而在园墅者多不能胜辞亡他人巧易工而天巧难措也此又不可不辨也

任玄甫渌水编序

日余卧舂中而客有以刺入曰任子者暎门窃覩之魁然七尺丈夫也双頰如紫玉目棱棱以为河朔大侠而徐与语则甚和而操吳音已而出其贄则紫丹白药之属皆吳种已又出其诗则又操吳韵而甚清雅余乃稍自安与之酒酒德复甚温穆乃笑谓之曰士固不可皮相哉始吾以而若先公子钓鳌者也不然则亦伉浪拔刀斫断席不肯与骑奴同食若而家北军使者今子乃狎渔父下酒人以吟咏自娱乐也太史公伟留侯之事而覩其图状貌如妇人好女乃称孔子之言以貌取人失之子羽喟然三致叹焉然则其遇任子必把手而论天下事论且不讎则亦当愧若有失今吾方自厌于世一切多避少狗与太史公意异吾故当与任子交自是任子岁一来而余方称道民转徙入县公靖于任子或见或不见见亦不能留饮如舂时而任子好未已则尽取其诗而属之曰敢徼公之一言以为重读其诗则益佳探其旨则若不能忘情于所谓名者夫郭解翁伯至短小者也而以侠闻天下太史公论著之而叹之曰人貌荣名其可既乎夫以其所恠于留侯如彼所叹于翁伯复如此然则天下之所不能忘情于名者莫太史公若今子不幸而不遘太史公又不幸乃遘我我方挫名之不遘若避影响而又最不肖乌得为子重也虽然以余所闻东方曼倩长九尺人也赵元叔亦九尺人也曼倩之告武帝曰侏儒饱欲死方朔饥欲死元叔之歌曰文籍虽满腹不如一囊钱夫以二子之材足自不朽而生汲汲口腹乃尔则夫任子之不能忘情于名故贤也去矣吾不能为子名子名自兹起矣

华仲达诗选序

无锡华氏之儁有孟达仲达者孟达工为文与余善余业已序之仲达生而朗拔然尤孤介少依其大父居不肯习公交车言而独与诸生郁人文善郁生工檀弓左氏间一二仿尚书因相与琕鏖其造以互愉快而已他人莫能好也晚节始稍善吾吴顾武部弘任而韩侍读亦时时还往仲达好谈仙道自言呼吸与灵爽通他人亦莫信之而独孟达以为真客岁余始得而致之靖所貌矍而神甚清冷且鲜碧瞳炯炯与语连夕叩之得其咳唾皆玉晨蕊珠之遗无一方士杖头语已尽露其诗则又翩翩霞举其于五七言古有康乐长吉之致絕句彷彿青莲或思往而艰或神来而易或比于事或兴于情或并比兴

而忘之大槩不可为典要所构时险时坦忽沈忽扬譬之柏宗之攻璧虽复瑕瑜互见其瑜者竟自连城沙苑之骏有蹄嚙而不害千里也余试举以语仲達仲達曰唯不佞亦疑之当其至则顷刻千言既成而不知所自也其不至即累月不能措一辞吾以为我乎非我乎其合乎其不合乎惟是往者叩灵真以为得吾子足不朽其为我加汰焉而弁一言于简余戏仲達子不朽其身矣何至乃欲不朽其名也陶通明谓作才鬼胜顽仙吾始怪其言毛仙翁得元白诸贤诗而谒昌黎叙之吾复怪其事世今乃复有其人乎岂玉清帝都藉此尘中语而绍介乎吾不能距子聊为志其大都子姑闕之余旦夕且焚笔砚逃矣诗总若干首今存十之四乙其稍暇者以俟仲达自酌焉

华容刘氏族谱序

余自废居里将与笔砚絕而华容刘计部克和自留署以书请曰不穀之先自鲁而播于楚也凡十八世矣惟是靖康建炎间我先人统制公寶奉其父隆间闕而渡无宁宇而有杨么之变族且毀统制公挟七尺刀奋從岳忠武王讨平之功籍娄上大司马当封而会忠武王以谗见法统制公尽散其徒旅退而为持斩衰服当时义之莫问也而统制公自是不复仕宦且死瘞七尺刀于宅之阴曰所以识也而其后有用■〈术上...下〉者以义烈闻属蒙古兵剽华容得而欲将之骂不絕口而死自是诸刘潜伏闾巷不乐仕进至明兴而始修公交车之业蓋宪副公仁宅成进士歷中外台有声宪副之子忠宣公大夏遂显重孝庙朝受天子眷德泽被中外于明名臣无两而吾刘遂益大着夫岂唯华容将全楚推甲焉我统制公既得老有五子而它食指之籍免于兵者称是公即为之谱而叙之曰志华容刘者自我始用■〈术上...下〉公益之又数世而汉英益之十一世而天源益之子行简又益之居敬又益之至宪副公则甚备且哲而距于今又百五十年振振绳绳以千计矣其究乃旅见而不尽相识命名而不知相避则不穀实忧之以属于外家之戚能为史学者孙生斯亿俾续谱而不穀僭衷焉厥昉则断自统制公或谓刘不称豢龙氏耶且汉有同姓诸侯王表唐有宰相系表可逆而按也不穀不敢從以为刘于望最至二十五而天下无不援彭城者今吾据所知而已夫狄不以不梁公贱而郭不以汾阳王贵则吾所以承统制公志也余乃尽征其凡读之有余感焉嗟夫今海内士人即燥髮亡不知有忠宣公者其能举宪副公鲜矣其又举统制公与用■〈术上...下〉公则又鲜矣国不能尽私之家史不能尽详之谱谱成而潜德庶几不至泯泯哉抑自今而后为刘氏之裔人识统制公之行谊则慨然而思不薄识用■〈术上...下〉公之捐死则介然而思不辱识忠宣父子之名世则灼然而思为名臣识计部君之所以为谱其贤者将油然思追遠而覆露其余弱者思睦少者思让所系岂浅渺也蓋夫子之赞易而曰彰往而察来而微显阐幽以语刘氏族斯可矣克和名某他行亦不隳其家声

郭鯤溟先生诗集序

郭鯤溟先生始仕为袁司理即能出奇筴以破散大奸憝天下闻而壮之既擢吏部郎数上书言事如裁左道擊中贵人阻抑侥幸平亭迁拜至请身以考功法试郡皆凿凿出人意表毋不以为贾长沙陆敬輿复出而绛灌裴卢之徒不能无侧目出叅江西省政先生飘然请告归垂召用以病死天下无不高其行而惜其才之未尽究然未有能名先生诗者余与先生虽晚合倾盖以来踰十五年杯酒之暇捉尘尾擊唾壶慷慨谈说古今事遠至八垠之外近而闾井琐屑无所不及独不及诗以为先生岂厌薄之将以余非其人耶先生歿而其子某出先生橐中诗可千余首骇而读之则自五七言古近体无所不有而近体尤富独得十之八其辞旨咸调畅清丽句稳而字妥不露蹊径而近体尤飒飒可咏以编少陵诗例考之则穷而诗達而诗游息而诗感触而诗适而诗拂郁而诗为赋为兴为比不一而酬和赠祝饯送之篇十不能二凡皆以自抒吐愉快其情意而已然后知世之不能名先生诗以少所见故见之未有不能名者也嗟夫先生古遗直也遇不可必达其志故在事之言可以致人忤而不顾其志不在名故有韵之言虽足以致人许而不行出藉令果厌薄之则先生于居平时当焚笔砚狗锥刀胡以若是其伙也夫余与先生交既久雕虫之声颇墮人耳而不能以一语挑先生非某几遂失先生嗟乎余果非其人也于是某将梓行之而属余为序或曰行之将非先生意乎哉某曰不然三百篇非明堂清庙而雅颂者往往出于畸人游女之口太师采文圣人纪之以为风而不敢废春秋作嬴氏失其官而诗不在下当敬輿时重足无论矣以长沙之才其牢慄感慨岂仅赋鵬吊屈二章而竟寥寥乃尔要必有任其责者先大夫固不为名计其于名当亦不在诗第奈何弁髦其生平之寄而弃焉姑请梓之天下大矣当必有心赏如鍾期者予曰善子姑梓之吾以为中郎女犹贤于文园令妇也耶

湖西草堂诗集序

江表甲族推华氏华之衣履冠蓋徧天下然往往政术自喜不多及诗自吾座主华学士先生始工为五言古近体而诸徒中有善继善述者复以诗名其诗余故尝序之于是其从伯父湖西翁感自奋曰吾故受学士诗晚节收二善而与之倡和二善乃能得王先生序我何以不得王先生序于是手为书数百言介二善而通于余曰不佞生四百四十七甲子矣天縱怜而惠之日其于几何不得先生一评隲我何以身后计二善亦进曰是指也寔受之吳人王百谷序伯父诗而意未快也曰其必待王先生传王先生且弃笔砚矣惟伯父亦曰笔砚行且弃我矣汝曹不得请毋以见我余甚惜其意曰士之迫欲不朽如此哉闻之二善翁少尝治经术垂就而弃之曰安能伊忧作老博士也已课臧获耕少熟则已足曰奈何复求益役吾无涯以供有涯于是始治诗晚而愈好之顾其大要在

发乎兴止乎事触境而生意尽而止毋凿空无角险以求胜人而别损吾性灵以故翁之诗出不能暴取名而其存者和平爽畅有君子风即置之唐长庆宋元佑间庶几无愧色矣翁之不为凿空角险以求胜人而别损其性灵此于摄生家甚要故老而神明之用不衰余即不遽弃笔砚亦思用翁法今弃之矣其与翁偶而优游乎蔗境不亦大愉快哉翁家湖西有草堂踞之而顾名其集曰骋游夫翁游北不过金陵南不出吴会且长卿甫壮自梁苑归则已倦游翁老矣而犹托于游得无有骋之心哉为改署曰湖西草堂诗集而为序之

章子敬诗小引

章子敬诗宛宛有才情乐府拟选能于古调中作新语歌行放浪自赏近体尤更滔滔遇所合作真足神畅今年春以冯先辈咸甫为介出一编示余余首肯之且谓子敬玉已辞璞矣可望而识曰琬琰曰瑚璉矣所进者益追琢之使光彩耳居无何子敬遂梓而更谒余余曰得无速成乎哉子敬悚然曰非敢尔也将以吾子之言受追琢而贫不能如陈射洪书百行卷友人怜而付剗劂曰以此作百亿身可也嘘借之所不敢望追琢之则亡所不受攻余窃征其微旨谓子敬贤乎哉何所藉我我不能为皇甫玄晏贻子请为射洪琴以囿诸名士集而碎之则何如遂书其语于首

观世音大士六部经呪序

过是西方十万亿万土有佛名阿弥陀其佐阿弥陀而行化若国相又若储君者曰观世音大士观世音梵名阿那婆娑吉低输畧而曰婆娑吉低税又曰观自在梵名阿縛卢积多伊湿伐罗一曰观世自在梵名阿婆卢吉低舍婆罗一曰光世音梵名盧楼巨夫所以三名者蓋緣德标称以显无方之用耳义固一也我大士之得道也实始于无央数恒河沙劫前一时世尊亦号观世音者度而教之從闻思修入三摩地动静二相了然不生能所圆融有无兼畅所谓上合诸佛本妙觉心同一慈力下与十方众生同一悲仰自是而成三十二应入国土身自是而令众生获十四种无畏功德自是而善获四不思议无作妙德蓋道成而世尊为之印证俾同师号曰观世音若大悲经则云大士于千光王静住佛时受大悲陀罗尼而持之倏然而生所谓千烁迦罗首母陀罗臂清淨寶目者受纪经则云与大势至俱以童子从金光师子如来所说偈而证菩提寶积经则云已于无央劫前成佛曰正法明为度众生愿力深重故与曼殊室利俱不取涅槃之乐而受生人中复安处弥陀释迦二世尊之下而助之阐法行化蓋此阎浮提世界以视大士所应现不过恒河之一沙而支那震旦又不过阎浮提之一聚落耳第见悯于圣心独深而托于机缘独切以故拔幽拯难表表着见不一而足今四天之下蓋毋不知有大士者其神明

之若人臣之于大君怙恃之若赤子之于慈父母而独有奸僧蠹尼创为俚偈巷■〈口赞〉谓大士为妙庄王第三女大约聋瞽妇寺之耳目以庶几衣钵之余资而其说一行牢不可破夫妙莊何代王内所称高州等何古郡国苟识一丁皆能辨之而元之僧曰万松者乃從而附会其说曰此劫前事也夫万松者非劫前人也劫前之事我释迦婆伽婆能说之它不能说也以大士之愿力苟比丘尼优婆夷国夫人命妇童女应得度者即皆现身而为说法推此亦何足辨第相率而忘本来面目甚至巾幗其庙貌而姑妪其称谓大可笑也夫大士之为寶上童子而事金光师子如来也其国土曰无量德聚安乐示现彼佛国土尚无女名何况实有大士之现在极乐国土也亦云尚无女名何况实有且以愿生西方者即以女身刹那而化为男子岂以大士欲成道乃以男子而化为女身乎夫菩萨之面如满月蓋亦三十二种相之一低眉媚目为思忆慈愍众生故寶冠华曼为梵天之贵饰故而輒谓之曰女子何也迺者度我县阳师顾时时现女相则亦三十二应身之一也第恐学人不察因而转相疑谤窃不自量于大藏诸经中求我大士妙明之本体则得摩诃般若波罗蜜多心经圆通方广之用则得法华经普门品合体用而广大精微之且以证其始则得楞严经二十五行圆通章极乐之界相道得而因以证其终则得二菩萨受记经秘密虽不翻而种种心印可以奉持则得大悲陀罗尼姥陀罗尼二经蓋庶乎大士本纪焉云间善知识徐元普见而悦可谋梓行之属某为引夫赤日丽空燿火息辉应龙吟天蛙鼃噪是经行则向之病狂而呶奔者霍然已矣功德宁浅渺也夫使四天之下知大士之为此而不为彼为此者固了了为彼者亦知大士之为真大士而以彼为现身为应迹则亦无不可也故不辞其请而聊僭引之如右

貌工来序

貌工来者拟古乐府题也嘉靖中吾州之乡先生周子仪倅绍兴郡分署会稽有惠政于民又尝为其邑建三江堰闸瀦水以溉田田改瘠而腴周君政成数被旌荐当殊擢而以不能终事上官仅得滇中一守弃之归归且数年而绍兴守张明道因民之思欲建祠以祀君而不能识其貌使画工图以去一时与君友者陆伯子之箕仲子之裘各为乐府辞侈之名之曰貌工来而文待诏征明以古隶书卷首垂五十年而君之子祥麇属世贞叙其事世贞考汉时郡太守而下独一丞或一都尉其行事与守共之而班史之传循能吏往往有守而不逮丞尉守之属为邑令又往往详守而畧于令岂守之政独及民而丞尉压于守不获究耶夫苟曰及民孰有过于令者而胡以独畧也然则班氏亦不获精心博采如扬子云之操不律以从輶轩使者而第取显重之人而着之传宜其不能无畧且不逮也今周君之为倅不独压于守又且逊丞而能使人之称之其惠政在署邑而能使人思之至庙而貌之周君固贤也其人能不忘周君不以周君之废且久而追貌之其人亦贤也张守因民思迹周君于寂蔑之地而昭之以风在位者张守亦贤也昔朱司农

邑在桐乡有去后思且死属其后必葬我桐乡若曹岁时祀我不能如桐乡吏民后虽然而周君之捐馆亦且踰四十年矣祥麀兄弟孝而文其能烝尝君固无俟于绍兴之为祀者第其人之能庙貌君于废且久则岁时之伏腊可推也或谓貌工来于事无当不曰雁门太守行为洛阳令王涣乐府耶王以令周君以倅行令事皆得祀而后先载在乐府无愧哉太师且采之因以上太史公矣

临邑邢氏父子赠封省台诗叙

侍御邢先生子愿按吴过余山中而谈说文事甚洽也已稍稍叙次其先世属余志之复曰世父之为给事中以至左右奏绩也则王父赠公当封矣已进吏科都给事中遇太庙恩则又当封而王父始者由诸生贡不肯就曰丈夫不获以一名第干公交车令何以见岢岚公地下岢岚公者王父父也由公交车荐得官守方州故云而王父顾不获公交车荐仅拜博野司训以卒世父服除请于上竟得赠如其官而是时吾父封公属为季尚少通经术会以奇疾夺之弗竟疾良已遂兼治岐黄家言试礼部为第二人当供奉太医令以世父方居要不欲留京辇而就德府良医时太夫人老矣封公当侍养谢弗往而留治家因抚世父诸孤语见前志中久之不穀繇进士除南宮令满三载最以其官官公入授山西道监察御史皇子生覃恩复以其官官公盖世父之与不穀踵相接为都给事中而吾父之踵王父赠封亦如之一时中丞侍御握节符而行部吾临邑者相与侈美其事而表宅里曰临邑邢氏父子赠封省台按给事在唐宋隶门下省而御史故称台今仍其旧云诸缙绅先生之能诗者诗以纪之吾子其叙之余乃曰给事御史皆雄职而萃于邢之从父子一难也其责俱在言不得言而去者往往不及封今皆获封二难也又皆以国庆赠封三难也受赠封者父子而故自有官四难也宜中丞侍御之侈美其事而表之也夫赠公自名其官不及以给事封而以赠今封公封矣赠公自食其官不及以给事养今封公养矣则封公之遘差胜哉虽然立身行道扬名后世吾夫子谓为孝之终事何者以其能显也由赐之徒不称官阙然则其显可知已封公为德于一乡畎亩之赢缩于外帑而与乡人共之乡人人名之曰佛子夫佛子者十地萨埵位也得不重于封御史哉而子愿以文学政术显重于世其按吴也春风与秋霜并飘拂人往往以仁君目之将又不重于名御史哉又未已而子愿为君子为大贤封公进称为君子为大贤父彼夫七命九命皆余事也如是以为邢氏光则庶几耳子愿曰善请归而荐家大人相与勉焉

沈纯甫行戍稿序

纯甫举进士为县令即有良吏声入郎比部任职毋害其与同舍郎艾穆先生辈相倡和为诗文即有才子声而时相挟天子重父丧而谋夺之中外汹汹莫敢持而言路羣

献舆请留独纯甫与艾先生合而上疏诤之与纯甫合者吴赵二太史邹进士皆得廷杖纯甫杖至八十而谪戍在高之东南方为左领炎瘴地纯甫戍凡五年而时相死乃赦归寻召复故官纯甫有诗若干首文称是厘为二编其在戍者曰行戍稿而友人王世贞叙之曰自古行役之苦莫甚于征戍虽以周公在将而不能亡致念于斧斨之破至于将父将母之不遑而苍天之靡怙靡极抑何其悱惻深尤也彼皆以师行非遣行者而犹若是孔子犹谓其可以怨而许之夫贾生之去为长沙太傅太传二千石也特以卑湿远地故思其所已失之太中大夫而轻沮其身于死吊屈赋鹏之辞姑为旷达以文其陋薄而已后贾生而工为言者则毋若唐之沈佺期宋之问柳宗元是三君子皆以遣行者也其侘傺失志毋论前有不得死之忧而后有非分之觊战于胸中而不容已乃姑托之诗若文其于道路之艰危气候之羯羠物情之险薄皆巧诣其形容而至有过实者乃若山川之奇秀必毁而归之恶风俗之淳朴必毁而归之陋皆褊心躁意之所发君子宁有取也后宗元而工于言者宋则有苏轼氏而明则有杨慎氏是二君子虽皆以遣行也而非其罪苏氏老矣其学成矣故能取适于莊生陶征士矢口而发者亦似之杨氏少而学未成故得以穷其铅槩之业成一家言而不能不逃之声酒其所谓逃者固即苏氏之所取适意也而于莢稍误矣纯甫才吾不知当谁左固不若三君子之遣行又不但二君子之非罪扶人纲立国是天下之人能言之而不自满廷杖且死不死戍而瘴瘴至大痲复且死不死而不为阻奉意之大帅前后摧抑之而不为动赭衣而执戈视二千石不啻渊霄而不至吊屈赋鹏倍二亲而窜万里之外虽不能无思不至呼天而称靡怙靡极也三君子辞虽工毋论不足当吾纯甫即纯甫之泊然毋以声酒累庶几苏氏肩哉纯甫日贵用事居天子左右吾固知其泊然毋异行戍也夫子删诗于其怨者犹采之纯甫之不为怨将若之何而况不佞哉

弇州续稿卷四十六

●钦定四库全书

弇州续稿卷四十七

（明）王世贞 撰

○文部

△序

吴明卿先生集序

吴明卿二十六而经术成先御史大夫识之为其省之第一人二十七而登进士第始受古文辞与不佞二三兄弟善明年进于李于鳞于鳞亟称之入彛制掖为中书舍人居二年拜兵科给事中已而古文辞成已而中媚者得藩幕之下僚自是再补郡司理一同守郡再真为守一视学政为臬副一彛省政复再中媚者明卿楚人也而所歷宦燕及东楚闽粤贵竹大梁足迹当天下半五十二而归卧下雉之藪者垂十年而买舟下大江入呉哭先大夫之墓于东海还憩余弇园则貌益腴神益王且尽出其生平诗文合若干卷余得而尽读之乃叹曰文故有极哉极者则也扬之则高其响直上而不能沈抑之则卑其分小减而不能企纵之则傍溢而无所底敛之则鬱塞而不能畅等之于乐其轻重弗调弗成奏也于味其浓澹弗剂弗成饗也自吾束髮而窥此道者垂四十年而其人一二三邁也自夫有声之文与不韵之词岐径而能兼者则不一二邁也夫所邁一二人而明卿与焉当其始之为五七言近体也不扬而企不抑而沈纵不至溢敛不鬱塞见以为无大隄人值之而无不瞠乎后者则明卿之所诣则也别明卿之亡何而古体如之矣既而乐府如之矣结撰序记志传之类复如之矣则所谓能岐径而兼者也噫嘻明卿其弗可及也已侍明卿行者王行父氏从旁曰子以吾先生楚人也楚于德靖间最多才子若以吾伯父稚欽嚆矢之而颜廖童张孙氏父子翼焉子以为畴偶不佞恍然久之始应曰以子伯父庶几乎哉然欤否耶前二千年而楚有屈左徒宋大夫者其决筴辞命妙天下然佚弗载所载独骚赋固足以新一时之目而垂暎乎后世然其时朴未尽雕变未尽备以故不获自见于五七言古近体及诸序记志传之属而明卿诸结撰称之独于骚赋未有继也夫合三子者为一楚才以一楚才蔽全楚则已足而又何他拟焉虽然使屈左徒宋大夫而至今在其为明卿亡论明卿甫六十余貌腴而神王所不足者非年又安知其不遂奄有屈宋也行父氏曰善日新之谓盛德富有之谓大业请藉以弁简焉为吾先生日新劝而富有之大业助

龚子勤诗集序

唐以诗赋程士士之繇科第进者往往濡首于诗而其大究亦多任务于诗而拙于政至明而程士必经谊而课吏必政术盖弘德以前一受符试郡县则日夜碌碌奉刀笔未有能及吟咏之事者二三豪隽虽稍不为考功令所束然其大究尚工于政而拙于诗唐之诗人独韦左司白香山皆连典剧郡皆为吾苏州刺史而白公又为杭州皆有惠利之政其政不为诗所夺而至于诗故翹然于大历元和中韦公之冲雅白公之宏爽吾不能第其于李杜若何固非十才子所可肩并也今天下郡国繁雄冲剧毋过苏杭独嘉兴介其间与相角而守之者为无铉龚君子勤龚君自进士除即得其郡之傅城令已稍迁

戶部郎俱劇曹后先有賢能聲至于守嘉興精心為民祛弊興便搜伏洞隱暇則延學士大夫觀究經籍往來郵傳之客造請不廢蓋大江以南翕然有神君稱足掩蔽數十守相矣顧君少而好為詩其詩不為政所奪自其一為令三為郎又一為守積篇至數百千余近始得而習之泐泐乎其調也雋乎其味使人易知而難忘若古體之于左司近律之于香山當其所得意匪甲而乙不至相徑庭也史固稱左司性高簡所至多焚香燕坐翛然物慮之表香山數以直言謫外晚節與緇黃相還往通曉其理知足少欲不愧名字余嘗一再接糞君雖不能盡得其人于其詩見一斑矣操觚之士間有左袒左司者以左司澹而香山俗第其所謂澹者寓至濃于澹所謂俗者寓至雅于俗固未可以皮相盡也當與糞君共味之

周氏族譜序

吾州故自昆山而割天下之姓毋若周而周姓無若昆山昆山之周若大司寇若少司寇若完僉若郡牧若吾州之為大叅為郡牧者各以其族顯盛而不相通然未有若舂陵之周最古而最不廢其業周之在舂陵其留而在營道者則為元公惇頤輩以道學顯割而水明者則為金紫光祿大夫堯卿輩以政術顯至承直郎世德避亂南居晉陵再世有子曰邦彥又自晉陵徙吾郡其醫術益精博有四子皆以詞賦取名第第三子天驥又自郡徙昆之茅家橋自是墓地在太倉浦南北有二隴天驥生待補進士津津生教諭大任大任生教諭良能又徙太倉之八府橋今所稱大橋者也壽八十一良能子維新復大以醫顯壽亦如之維新生子禎是曰坦齋翁壽九十三禎子砥是曰容膝翁用荐歷郡幕凡四十余年數徙不移秩亦無官過而亦至八十二有子曰康蚤卒子頤頤子深深子奎奎子煒煒為人長者有子曰應元應元跛一足倜傥好客客至若歸工為詩讀書負儒聲應元子曰鏗自鏗之先世世為嫡長以故于行最卑而獨稱大宗頤之后至鏗皆單傳凡六世以故稱叔祖父兄弟者若而人而皆不在五服之內自砥而后世世雖受儒而不廢醫其儒以醫奪之故不能取官位而醫至應元益大顯應元所居猶良能置而其藥扁為趙承旨孟俯書余故與之善時時飲樓中應元間出其容膝翁所纂譜欲乞余序而余未之應也應元卒鏗乃使續成之嗚呼吳郡之華腴大半自中原徙往往蟬連取高位埒素封崇薨接棟艷人耳目然不易世而不能保其家又不易世而不能保其丘墓鏗之先徙自中原者四百年矣其來吾太倉者亦二百五十年矣而鏗之故居尚岿然而二塋尚鬱然又能纂容膝翁之譜以合其族族之至者雖不必擁車騎盛冕服而恂恂然有孝弟力田之風豈亦非幸也耶鏗為大宗子勉之惟恒可以醫維禮與信可以恒以禮信而恒矣可以醫亦可以儒且夫能使周世世不絕者身何必傾邑而族何必清潁也耶

澹游編序

来不疑者名相如不疑其字也或云非来不疑也而自豫章过我则尝泛彭蠡横大江攀钟山石城之胜偃息于金焦者久之而后归归而复出则西陟白岳黄山之颠下访汪伯玉兄弟于洪中道逢李本宁相与避暑西湖者两月余而始过弇园已尽出其橐中诗名之曰澹游编而谓余曰子知我之所以名澹游乎哉夫人步武而外即皆游也虽然游未有能澹者也圣贤之托欲以拯世疇物次而名者欲得其所谓名利者欲得其所谓利而已欲起于中而感于外是安能澹今夫澹者之为游也若萍浮于江湖而适相值也吾昔冠远游而笼翻于一室之内四体若束湿以为天下之苦无踰我者今幸而获被褐离疏以从钓叟耕父之后峙而山流而水静而卉木动而人物触目而供吾乐而吾无所与也吾今而后知游者之有澹而天下之能知澹无如我者余甚称之已而读其诗曰子之自诡澹则子之诗何以秣至有味也得无有名者在乎不疑曰否否诗出吾臆而吾亦无所与也子自以为秣至吾不知为其秣至也余乃益服曰澹哉澹哉指吾弇之南而有吾弟圃又南而有吾师之靖曰是皆前子而澹者也子可以终身矣

四游集序

京山李本宁氏弱冠而成进士读中秘书晋领太史者几十年间以出入燕赵地縱观西山八陵及禅林莲勺之胜则其集宴饯纪事标志之篇十而八览眺之篇十而二其编曰北游而竟以失絳灌意出叅闕中紫微省迁副其臬专督学事往来于三辅秦陇间得以穷终南二华昆明太液之迹蓋官中之篇与輶轩所采十各得五其编曰西游乃至移省中州以方伯公忧服除不仕买轻舫而东吊鸚鵡歌黄鹤陟匡庐泛彭蠡转入洪中晤汪伯玉遂宿黄山白岳下钱唐徜徉于三竺六桥者两月余翩然而访我东海则眺览之篇十而六期集赠别十而四而官中不与焉其编曰东游本宁之访我尽出其三编而曰别子且泛太湖登缥缈莫厘之颠而观日月出没因转之阳羨探张公善权玉女之幽奇退而受简以足东游之所未备然后归归则循洞庭升衡岭度大庾而谋宿罗浮且竟岭右之名山水着之篇什者当曰南游编合之为四游集是集也序当以属子而闻子行有笔札戒以子令序则恐不能四以待子异日则恐不及子奈何余竟得卒業焉见其北游之篇宏俊爽畅若子虚之新奏西游之编巨丽沈雄与上林争胜而至东游则神逸而志凝尽祛朝市之翳而纳以山川之灵几于化矣因作而叹曰昔严夫子有云州有九游其八斯本宁志哉然未闻其能铸辞摭蘊如本宁也子长之游庶几矣夫其所自述十岁而诵古文二十而南游上会稽探禹穴窥九疑浮于沅湘北涉汶泗讲业齐鲁之都观孔子之遗风乡射邹峰厄困蕃薛彭城过梁楚以归于是仕为郎中奉使西征巴蜀以南南畧邛笮昆明还报命当时不知其所记志者何许所咏歌者何许第史记之文成而儒林先生若以为得游助其后李白自翰林供奉出而浪迹于太行之东遂下金陵栖匡庐航

牛渚武昌之南夜郎之北无所不寄畅而其诗遂神于唐又焉知非得游助也本寧今之太史公也而又李姓自供奉出其迹亦相似吾不暇辩其诗若文视二君子何若意者殆兼之矣南游之不知然覩日胜思日益奇以此为二君子夫又何难哉本寧年未四十而至上大夫官贵于二君子甚吾欲以夸本寧本宁当不受也

岑少谷集序

岑君者岭南直臣也父曰方伯公万岑君之在嘉靖末以名司理入补南垣而属世庙晏驾穆宗初即位首上书论赞圣德陈时弊革故鼎新皆凿凿中窾而至于獎忠諫征耆逸表节谊蓋三致意焉朝上而夕无不报可若白简之所论擿必巨奸有贵势憑藉天下之所不敢言者君名日益以重而敌日益以树既用久次出守绍兴而君所糾擿大臣方贵用事与中贵人结而假上旨以非时考察得尽修其郤而君削秩外补去为闽海八品幕官墨墨不自得君死而大臣败诸外补人以次登进至于今有自田间破例而还故官而君竟以死不复振矣当君之在事日余兄弟屏匿田间不能知君而君疏及之至谓可备左右史之末乃稍得其诸奏读之以为哀然中兴諫官选而最后遇君乡人今虞部郎欧楨伯颇能道君亮志苦行欣然慕说文学节概之士而所撰着亦称之及君死之十余年而余友支某某氏督岭南学慨然慕君之风猷取其所上奏藁并旁搜其诗文尽梓而行之贻书世贞使为序然所谓诗若文仅百余篇而竿尺之牍半之虽皆清雅有矩矱而骤见之若以为寥寥无当者余故尝考陆敬輿奏疏其在翰林中书日所论建陈闭亡虑数百篇而它集之为诗若文者遂不能名一章岂敬輿尚有所短耶然十八而进士高第举博学宏词入翰林应制酬和敬輿岂复有所短者抑敬輿自草之而自削之以为雕虫之技壮夫有所不为耳不然或其家之不能守或中人所忌而故佚之也然至于今而诵其奏疏光景焕然若新而志士才臣引以为蓍蔡为指南愈久而愈不衰知敬輿之藉托故在此而不在彼也岑君敬輿流亚也其无所待于兹百篇之寥寥审矣乃其后族氏之兴贤采风尤有取焉聊为序之

喻邦相杭州诸藁小序

曹子念致喻杭州邦相所为诗文若干篇余读之不觉爽然叹曰咄咄逼人乃尔哉昔君苗见士衡文而輒欲烧笔砚余且欲烧笔砚矣而后见士衡文余故不能若君苗之畏之然而乐有所托也邦相之文气雄而调古驰骤开阖不法而法乃其持论往往出人意外表歌辞亦称是杭州东南大都会试牒讯牒百倍于它郡而使车之往米殆犹机织然置酒修饌夜而至丙犹未已且有三台九监司之伦皆南面而责期会即邦相分身应之犹有所不足而胡以能沛然于古文辞也古之快吏毋如刘穆之传称其朝发尺牒亭午

得百函耳听目视口断手批又间以宴会酬酢笑嚅谈议俱有旨会然不闻能为古文辞白乐天苏子瞻之刺杭州亦名能工吏事不废客于古文辞最为博丽矣然其位尊而其望隆无上官期会以斂其翰墨之晷则邦相其犹难能哉后之君子必将曰仆见邦相兹编而烧笔砚也亦甘之矣

郑猥庵先生集序

徽地险而沃其人行贾徧天下以财相倾高而成弘之际乃有程克勤先生者出而以古文辞名世程先生之于文宏肆辨博诗亦埒之然不肯为精思以求超乎一代之格当时和之者不知其乡几何人亦不复有与程先生并称者岁一甲子而为嘉隆之际汪司马伯玉氏始一大倡之其格非西京而上毋程其语非先秦而上毋述左橐鞬右鞭弭以长驱乎中原于是徽之俗尽绌其锥刀以从事楮墨彬彬洋洋几与昔之稷下西湖并雅盖自有汪司马氏而程先生之名几晦今年秋余且谢兹役一日自弇园偻行而归昱靖有伏谒道左者髮种种矣楚服而免其幘转颡不休恠问之曰余郑绮之再从弟叔夏也绮同年之最长者问何所求曰使我有求于口腹则吾歛之水可以乐饥而何必走千里而谒子出其足曰是皆胝矣已出其袖草曰是吾王父猥庵公之诗若文也非子恶能传余受而卒读焉则故程克勤先生客也其齿少于先生而先生爱之与相唱和颇伙度郑公之才不能如程先生高而根抵理道有矩矱善持论亦有足相当者余乃叹曰以子王父之业不显于程先生日而欲以兹日显则甚难当子王父日欲以其业显必易而子王父篋而秘之则甚长者子不病难必欲及而身以显子王父则甚孝且而兄世之所称循吏也而之先世待制胜国之殉节臣也某共为子职者也其寢远矣且吾欲忍子不能忍子千里之足虽然吾又安能为子王父显子其亟归质之汪司马氏曰程先生于其时足称大国之赋而无后辞则郑公之为邾莒何难焉

欧虞部桢伯归岭南诗卷序

南海欧桢伯守虞部郎中于留都之三年上书致其事归天子为之下太宰太宰惜其才嘒惜者久之而俾予告以行命既下而燕中之士大夫高桢伯之归者争为诗以赠之凡若而人留都之士大夫率醪以饯桢伯于龙江之浒而赠诗者若而人既由京口入晋陵遂抵吾吴郡操觚而和之者又若而人桢伯间道访余于东海尽出篋中所有则为诗几百篇文亦称是自此而南径钱唐入豫章泛彭蠡度岭而后叩五羊之城其操觚之士响应而为诗者当又不知其几也夫杨巨源者唐之诗人也年七十而谢国子司业丞相有爱而惜之者白以为其都少尹不絶其禄又为歌诗以劝之京师之长于诗者亦属而和之昌黎韩愈举以比汉之二疏而谓二疏之去有是事否夫当二疏时尚不知有

歌诗以侑行色固不能如巨源巨源之时天下久已盛言诗然其传者自昌黎一序而外何寥寥也毋论送巨源诗即巨源所自为诗不能超元和长庆之乘而上之且其传者又何寥寥也明兴一代之诗无盛于今日靡不称大历而祖黄初亦靡不知有楨伯者楨伯少即已工诗其在岭南与黎民表齐名岭之士得二君而兴起不可屈指数黎君前楨伯三载归归而物故今虽不能起之九原与楨伯唱和而其所兴起后进之士当不使楨伯落莫也楨伯之齿虽小与巨源埒而精饮嗽健步履神明之用不衰异时近而越台之云远而罗浮之雪大庾之梅唯杖履之所之又宁若巨源之迹仅一乡而所指顾某丘某水某树而已也度楨伯所挟持事事胜巨源若太宰之惜楨伯请予之告与丞相之惜巨源而请不絶其禄其优贤右文之指均而独世贞之叙诸君诗其辞不能如韩愈楨伯如不以为辱姑取弁焉可也

汤迪功诗草序

汤迪功者吾吴中前辈汤玠子重先生也先生小于文待诏征仲数岁而相友善其与待诏齿者翰林蔡孔目九逵少于先生数岁者王履吉禄之袁永之其又少者陆子传称门人者待诏之子寿承休承彭孔嘉辈皆后先自致其力于诗得列名家而先生颀颀其间亡所让诸倡和联属相切磨亶亶雅为少年所称慕先生在太学久次谒吏部选当得京朝官而无气力者为之奥援仅受邑丞以去余守尚书郎时先生奉檄至京青衫羸马以二尺绢掩面去之黧皴不可辨其须髮骤即之若鬢者而其本则戢戢作白蚁集先生于余大父行每见过輒逡巡却立不敢当敌礼与语官中事默不对稍次及诗则颰发波涌齿颊霏霏习习吐芬屑盖移夕而不倦故余赠先生诗有云逢人羞作吏竟日坐谈诗盖实录也未几而先生挂冠归又未几而捐馆屈指于今三十余岁矣而其孙少叅聘尹始刻其遗集属余为之序嗟乎自先生之壮时天下之言诗者已争趣北地信阳而最后济南继之非黄初而下开元而上无述也殆不知有待诏氏何论先生虽然声响而不调则不和格尊而亡情实则不称就天下之所争趋者亟读之若可言徐而核之未尽是也先生与文待诏氏之调和矣其情实谐矣又安可以浮响虚格轻为之加而遂废之抑不特诗余向者与先生接而所谓待诏诸君子亦半相及今是三十余年中待诏老寿死禄之子传寿承休承孔嘉相继死其它陆叔平俞仲蔚之流亦死而硕果不食仅一周公瑕耳后进之士宁不亦鼓颡吻张旗鼓以纵横于作者之场然辞日以华而器日以羸薄欲如先生与待诏诸君子肫肫笃厚长者胡可得也诗云虽无老成人尚有典型故余序先生诗而于所谓典型者致余慨焉今刻先生诗仅四百篇而阙七言歌行五言律散佚当不少其曰汤迪功集者先生秩第八品用徐昌穀例也一曰小隱堂集

诗纪序

嘉靖中故光禄卿北海冯惟讷氏集古诗诸三百篇之所逸而不载以至孔子没而逮秦者凡十卷汉十卷魏九卷吴一卷晋二十卷自是而南宋十一卷齐八卷梁三十四卷陈八卷北则魏一卷齐二卷周八卷复合而为隋十卷又外集四卷则仙真神鬼之什焉人各叙其畧与诗之所繇作矣已又采昔人之所统论及品藻杂解辨证而复志其遗凡十二卷合之而名之曰诗纪共得百五十一卷惟讷竭生平之精力为此书书成而御史甄敬刻之陕西行台其刻既不能精又无为之校订者豕鱼之误相属盖至万厯中而古鄯吴管氏与其乡人谢陞氏江都陆弼氏吴郡俞策氏相与雠校而复刻之金陵大约吴氏居其资而谢氏陆氏俞氏居其力其书遂完好无遗憾属不佞贞序之序曰昔者孔子删诗三百篇诸国之风皆在焉而乱以雅颂复戒门弟子何莫学夫诗而谓其可以兴可以观可以羣可以怨逡迕之事君父而至于多识鸟兽草木之名亦在所不废迨孟氏而亦叹曰王者之迹熄而诗亡于是孔子之门弟子遂尊之为经而不敢以他有韵之言并盖千余年而河汾王氏出而慨然以两汉魏宗庙之音及曹刘以下之所咏撰删而叙之以续三百篇之后天下后世羣起而攻之曰僭自王氏之为僭而天下后世卒不敢以其诗而望三百篇嗟乎雅颂固无敢论而诸国之风宁尽有出于情而必止于礼义者夫子故不尽废之今试取汉魏之合者而较国风之稍离者亦宁至大径庭且夫时代之污隆风俗之敦衰与政事之得失物情之变异可约畧而得之即孔子生河汾其所取舍与王氏不可知要之未必不为王氏删也然自三百篇之外遂无一完什而虞夏之际其时固太朴不斲然治而为明良喜起乱而为五子之歌世岂无一二兴者必至殷周而称始孔子既没而为七国其人固日寻于干戈无暇及篇什而亦岂无一二可传者必至于汉而称始且区区夷僭之楚侏■〈亻离〉鳩舌尚有屈宋之徒为之抒发其文藻而齐鲁之褰衣博带宾筵雅歌又岂无一二能赋者而乃竟寥寥也毋亦孔子之前故有之而不为太师之所采因而有未睹者乎三百篇之所舍与孔子之后其为诗者佚于兵烬于秦火而不存乎抑亦竹简漆书卷帙重大为之既难而守之又未易以致此寥寥也汉之兴竹更而缣鸟足更而笔篆更而隶若稍易矣而非有富势大力者不能为以故不获周藏于闾闕而极于舟车之所至自唐而逮五季始以五经子史之属书而登之木付之剞劂而后授墨焉母之体一而子之用数百千同文之化遂徧于四海今冯氏能尽鳩古诗之逸与汉魏以后至隋之诗千余年而悉合之吴谢陆俞四氏又能校甄敬之所行而重梓之即不必富势有力者损一月之食而可得不必通国大都自鸡林之西玉门之东以一襮载之而可致嗟乎毋论其皆可以兴可以观可以羣可以怨逡迕之事君父要之不无毛髮益而于鸟兽草木之名当亦不乏也吾甚爱夫冯氏之与四子者能得孔子之遗意以嘉惠后学故为序之虽然孔子而在吾尚欲其删者与余者之并存毋使若古之寥寥而无可述也

冯子西征集序

冯子之集所为西征者何其自武部迁而视贵竹学也则南戒之南而极于西矣故曰西征读其集武部之构撰皆在焉而何以独称西征也要其成也冯子之构撰其在武部者毋弗良而其成莫过于贵竹故以云冯子天才秀峻朗拔独得其至而又以专精之力求之目营营日若与千古接而不复置一世于其衷第武部之作不能不扰之以事而胶之以酬应之目故不获尽人而进之天迨至贵竹而其天全矣夫是以若庖丁之解牛而轮扁之斲轮也吾始读其纪行之三篇而怵焉古无是也欧阳氏之滥觞而范氏周氏陆氏之横流然其辞蔓而枝今者若镂矣若绘事矣其至者若化工之肖物矣凿凿乎古路史选也纪行之诗而酬赠附焉出于机入于渊五言其尤长城哉若八珍之为味至舌而甘愈咀而愈不忍已矣悠乎古诗选也彼夫记序之典而裁也志传之法而纵也表启之丽而则也竿牍之旨而俊也贵竹得其七武部得三矣其疏移之博辨也与筮事之哲也则武部之与贵竹也均矣吾以为冯子之才近柳子柳子之去礼部而游于岭也冯子亦似之然而无忧逸作劳恋故而慕新之念以为之梗是故冯子之天全而柳子之天琢今冯子深以为累拂衣而归卧于泰伯季札之墟曰向者吾学于武部为之而有以为者也学于贵竹为之而无以为者也今造物者惠我以日而不胶扰我我将无为而无不为而岂直一雕虫而已哉窃自谓今而后而天始全虽然余未之敢必也夫能使人不用者才全而德不形窥冯子之绪言与行事之暂亡但贵竹固已置四垂于股掌而蜚弄之夫德机露矣冯子能不为世用而不能使世之必不用世且妬而夺之则何如曰不得已而有功者与有言者剂也亦所谓无为而无不为者也

弇州续稿卷四十七

●钦定四库全书

弇州续稿卷四十八

（明）王世贞 撰

○文部

△表序

同姓诸王表序

旨哉班固之引诗曰介人惟藩大宗惟翰怀德惟宁宗子惟城夫岂直以昭展亲敦睦之谊盖首广树肺腑以夹辅王室有深长思焉然天子之号仅为王王畿不过千里诸侯之杀也十之故以至亲勋德无两周公而爵斩九命地裁百里卫郑以下可推已自秦始私天下孤立自雄诸公子无尺寸之地拱手以成關东诸侯之势汉祖大鉴其失故襄王王齐元王王楚王濞王吳如意王赵文帝王代皆跨州兼郡连城数十宫室百官并制京师识者讥其矫枉过正焉易世而后势不得不分其地降其官属苛责以法而削其权至东平宪王遂兼骠骑将军虽以王故位三公上而隱然臣庶之列矣魏晋而后入为常伯出领岳牧积资累望始迁鼎司当是时一字二字皆同国封无所轩轻隋唐之世始以一字为国王天子之亲子弟为之正一品二字为郡王属之稍疎者为之从一品以逮于宋大抵因之盖国邑不及两汉而事寄不及六代豢之以禄食崇之以虚器如是而已元起沙漠其自大祖以下咸分部西北或为行国以畜牧自娱乐或控西番赋城郭为食邑又竭府库之金帛绵钞以资之至世祖之昭穆始约畧如唐宋时而爵秩稍崇事寄亦稍重明兴高皇帝损益百代以成彝典而其大指在封建本支翼卫盘石即位之元年立皇太子三年封诸王秦王都西安晋王都晋阳燕王都燕周王都汴梁楚王都武昌齐王都青潭王都长沙鲁王都兗从孙靖江王都桂林皆据名藩控要害以分制海内至十一年复封蜀湘诸王国置相傅以下官属与京师亚护卫精兵万六千人牧马数千疋其冕服则九旒九章车旗服饰仅下天子一等靖江岁禄虽薄冕服亦次而设官置卫宗庙社稷俨若亲王天子之臣贵重至太师丞相公侯不得与讲分礼伏而拜谒可谓隆崇之极矣亲王之支子尚得为郡王郡王之支子始为镇国将军从一品镇国之子为辅国从二品辅国之子为奉国从三品皆将军奉国之子为镇国中尉从四品镇国之子为辅国中尉从五品辅国之子为奉国中尉从六品自是虽支庶皆得称中尉不为齐民而亲王之女称郡主尚之者曰仪宾从二品女自县主郡君县君乡君仪宾自三品至六品皆得袭冠带享禄奉推恩可谓广矣高皇帝既厌羣臣太孙御厯而二十三王者皆叔行以意行国中自如礼乐刑政几不自上裁之则伤恩縱之则伤法于是齐黄以鼂大夫之谋进而掩袭时下僂辱继之诸叔惴惴人不自保文皇因燕之成资奋戈南向仅三载而易大物虽神武絕伦猛将僂力盖亦有天助焉高煦狙前胜宸濠乘国瑕用其螳螂之斧蛙龟之鼓而当伏軾不旋踵而糜碎虽顺逆之理悬亦强弱异也所以云弱者护卫不设不得臣一切吏民进止机宜一切不预百口之命仰给于县官即小有淫佚越志者片纸旦下而夕繫于请室百世之社顷不屋矣然而麟趾振振螽斯日蕃殷之孙子其丽不亿虽尽大农之赋不足以养之而浮繫一城禄请不给仕宦永絕农商莫通于是裨王不知南面之愉支子更起齐民之慕虽大司马之九伐可以无施而司农宗伯技殫策困而无所措手乃有请减岁禄者有限宫媵者甚而有限支子者要之徒损天子亲亲之名而无益于大计愚窃以为海内大省十有五六其得封者独河南山东山西湖广陝西江西而已蜀仅有

一王不足累自两直隶及浙西三郡财赋之地不可以开朱邸其它若闽若广若滇若贵若蜀之重顺浙之东南诸望郡可以举周韩晋代郡王而下其困不给者分徙而居之官为量给道里居室之资所徙非大国则其民易支所徙皆困宗则其人不恋土奉国中尉而下止以筑室取妇官给资装而不通属籍不予冠带不奉岁禄不限城野材者听其补博士弟子取科第不材者习四民之业以自给年至六十始予本品服优之诸仪宾自镇国以上以品为冠服而亡奉廩辅国以下如齐民而不絶其仕路庶几可以展转而支百年夫疎不间亲下不议上此在天子独断而行之非可以人臣与也易曰穷则变变则通通则久此又不可舍置弗顛悉也作同姓诸王表

公侯伯表总序

封建古制也而莫详于周周之天子仅称王而其下为公侯伯子男不能子男者为附庸其命则自九而至五其别则有同姓有异姓而其封则以功德不以亲疎秦始皇并天下创尊为皇帝废封建公族无尺寸之土而犹存侯爵为三等以待有功者列侯则如武城通侯之类伦侯则如建城武信之类皆有邑名而不称国下者则關中侯有封食而无邑名然皆金印紫绶而列侯伦侯至位丞相上丞相之尊重者莫如李斯九卿之见幸有大功者莫如蒙恬兄弟而皆不得沾其慎贵可畧推已汉高豁達裂天下以王诸子弟及大功臣而其次则因秦之旧为彻侯亦有關内侯凡二等第功臣之为王雅非其意至白马之誓而独侯国存武帝狭海宇鞭诛四夷不爱通侯之印以待有功者即功虽渺细或见录天下之壤地不能侯而国用则益侈于是苛为之禁以伺其过即渺细亦见削而高帝身与共创业之臣所余无几封拜日下而侯国不日益汉地不小损自武帝而后封拜之与削亦渐寡而终西东二京其制畧相彷彿中间虽以吕氏之擅王与新莽之益为公未几輒罢自魏氏之末司马擅制始复为五等曰郡县公侯伯曰县子曰县男皆得称开国金印紫绶而關内侯有不开国者顾反居子男下晋氏以至齐梁陈皆因之若北魏之与北齐皆崇设王爵以待勲旧而其更有功者则别封郡公侯或一人而儋三四爵然同姓异姓皆不得为国王而郡县公侯益卑矣后周宇文泰辞安定王遂以安定公终其身而其子篡魏进封功臣晋赵等大国然皆称公而不王隋氏因之至唐而始定以子弟为亲王正一品其稍疎而有功者为郡王功臣之有功者为国公皆从一品郡公以至侯伯子男则递降焉如赵公无忌梁公玄龄之类皆得世袭而他以恩赐者或世与否自安禄山之东平王遂毁周例而隃之然中兴以后王公之格益轻至有佩囊鞬捧酒炙而趋走于节度之庭者而封亦不复世矣宋兴复唐初之制以宗室之懿叙封王爵而其疎者与文武大臣自国公以下至子男往往以郊恩递进徒以媿其名而已戸不得言禄爵不得言世然犹斤斤守其靳焉自蔡京之公两国而公制紊矣童贯之为王而王制隃矣南渡以后所谓王者遂冒于宰执如桧如侂胄如弥遠矣元承辽金之后王爵尤易即将相

非勲德可以一嚙笑而得之独汉人至国公而止明兴高皇帝之下建业草创未遑吴元年始拜功臣李善长徐达常遇春为国公而其它功臣之死勤事封疆者有国郡公侯伯子男之赠然往往一狗元旧洪武三年始大启封建皇帝之子为亲王亲王之从庶子为郡王而功臣则公侯伯三等有世袭有流爵罢子男不置公侯位正一品上伯位正二品上朝服进贤冠加笼巾貂蝉世袭者领铁券流爵则否当是时封伯者仅二人忠勤之禄仅当侯三之一诚意至不能当六之一而其轻可知矣十年以后封东莞徽先禄遂与侯等至永乐初而始定居侯之下正一品之上其阶勲皆与侯等而伯益重矣凡公侯伯之任入则掌叅五府总六军出则领将军印为大帅督留都管钥辖漕纲独不得预九卿事大抵视汉以下独隆崇云

高帝功臣公侯伯表序

余读高皇帝洪武之三年功令未尝不三复而叹也曰呜呼厚而裁则而可久矣当是时封公者六人而魏公功最大禄秩亦最重中山侯宿将也以一言之諄而不获公德庆侯巨勲也以一事之纒而不获公永城封而贬东胜封而夺训词盖凛乎斧钺焉夫孰敢有恣睢而隕于法者然至吉安江夏临川东平之类抑何其殲夷狼籍也三年而后续侯者独西番之役最盛平云南次之其它以旧勲相错封然至蓝氏之株累而几若埽矣夫以冯宋公傅颖公之雄而卒不免死嫌谓其不蔽法也而讳之即讳之犹不为置后呜呼可叹也太史公言幽厉之后见于春秋尚书有唐虞之侯伯歷三代千有余载自全以蕃卫天子岂非笃于仁义奉上法哉汉兴功臣受封者百有余人天下初定故大城名都散亡户口可得而数者十二三是以大侯不过万家小者五六百户后数世民咸归乡里户益息萧曹绛灌之属或至四万小侯自倍富厚如之子孙骄溢忘其先淫嬖至太初百年之间见侯五余皆坐法隕命亡国耗矣罔亦少密焉旨哉所以称罔少密者人主不覩其先得天下之所繇是以轻视其功臣而重利其土地人臣不覩其先得国之所繇是以易为慝而难为守明之国邑薄不过再倍一公卿而已天子亡所利之然而至嘉靖百余年之间初所封六公仅一公在二十八侯其二侯进为公者亦絶而余二十六侯亡里土乘驷之奉后封四公二十一侯二伯亦仅西平武定在耳其故何也当是时天子绍明先世之道慨然下明诏太宰大司马追考故实收录故鄂国公遇春曹国公文忠卫国公愈信国公和后俱为彻侯诚意伯基后仍为伯增其秩天下翕然归厚焉而一时奉行之臣不能推广德意至使宋颖二公遂不获一比肩曹卫而李韩公廖德庆吴江阴靖海之裔寥寥斲一命之泽将无望于后圣哉夫继絶世举废国天子所以怀诸侯也则自古记之矣夫岂欺我故特纪之而表其篇兴废云

永乐以后功臣公侯伯年表序

文皇帝以建文之四年七月下京师即大位用其年为洪武之三十五年又二月制诏吏兵部差次从靖难功臣遂封淇公等二公成阳等十三侯兴安等十一伯己又录降附公增曹公岁禄封永春一侯忠诚等三伯明年封驸马都尉袁容等二侯遂追旧功封丰城一侯宁阳等五伯三年复追旧功进封新城侯至是靖难封始究六年论平安南功进封新城西城二侯皆为公增丰城侯云阳伯禄各五百石己进封清远一侯安远建平二伯终文皇帝之世凡再大封至睿皇帝之元年论夺门迎驾功进封武清侯为忠国公封太平一侯兴济文安等四伯己又封武功一伯自是终诸帝世仅一大封而其它破军杀将戡乱僇工之特封者不与焉嗟乎靖难诸将臣从藩邸起以一旅之师弹丸之地出万死者三载而遂定宗社于太山之固此其绩诚巨然英主实在军攻坚履危断自神授又大战不过十余所定军府不过三四而已毋论中山开平其视曹卫宋颖而下抑何径庭也定兴之埽安南固自伟亦何能超颖川之下滇蜀且久复失之今高帝之盟白马指黄河而誓其功臣鲜有存者易世而后所当仅如线之敌与萑苻之盗鹵级数十以至百积封自伯而至侯遂有公者今胡以貂绵蝉联也以此况彼诚不可同年而语自孝宗而后执政者始知爱守名爵不轻畀而不能无畏于首尾未暇一一厘正之然至新建之取叛王不烦天子玺书不废太仓水衡金钱缚之于股掌寧遠之摧西蒙积级至万余其所邁敌固皆瑕然其绩岂与他彻侯等而搢绅大夫犹断断有后言者何也少所见多所怪恒也又陋而不习掌故余故表之以告夫司勲者

恩泽公侯伯表序

古恩泽侯凡有三曰外戚则如吕武之为王与王氏之五侯丁傅梁竇之类曰中官则如赵高孙程单超之类曰嬖幸则如董贤赵修之类是三者皆能干戮章典变动玄象使帷幄汗马之勲臣解体而不可收志节之士轻视貂冕而不乐于用明兴高皇帝毋外家三尺之胤以故王爵庙貌虽极隆于扬徐而朱邸自功臣外无两者他若李陇西繇尚主而儋爵然亦岐阳大勲所推本而成穆椒房之光宠其兄横贵不过叅省而又夺之独于晚年梁公之券施于充妃之从子显出相贵邸入陪禁籞至建文而削夺识以为非不幸云文皇入纂之顷中宫犹在邸而仲氏己前开国夫固悯其祸收其愆而执经者犹疑之然以中山之勲塞天地家百两公胙及百代不为幸也昭皇后母仪奕世几于文妣以故张氏得封二伯其后渐因之至有自侯而进公者自保傅而正太师者然会昌主兵符而不能易人主之喜怒寿宁建昌能易人主之喜怒而不能与外庭之进止其极不过富贵其乐不过宫室狗马声色其威怒不过行闾闾雉匹而已世庙愤寿宁建昌之积侈执而繫僇之一时肃然而又申明考功令下所司悉裁诸外戚之世封者独定公以中山故彭城惠安以昭皇后故且半援帷幄汗马焉他则拥护心乎孝烈而家一袭晋接穹乎荣

恭而不予世天下服其公快其断而不敢以少恩病之斯所以为肃也若夫中贵人之擅柄代有甚矣幸而未凿其窍不敢身冒封爵而正德之乱其昆从以迨厮养皆得滥竽焉嘉靖之戮方士之无赖者居一矣皆未几而绌削继之着为令甲万世晓然知其非当可无虑也作恩泽公侯伯表

追封王公侯伯表序

高皇帝之始定建业也于他官制皆草创而大捐其爵封以厉庇主殉义者故于死事之臣必有赠而胡大海廖永安至首开公国而是时帝尚称吴国公云盖不嫌肩并矣第其它郡公邑侯伯子男皆仍元之故不阶极品迨即大位洪武之三年始进公侯位一品上而罢子男仍与诸功臣约其歿也公则王之侯则公之自是而后诸功臣之显终者不及半而其它或以大愆丽辟或以微讐忤旨皆格不复举都督繇金事而下至指挥间取死事间追旧恩往往超登侯爵而都督同知以上未有沾被者至洪武二十年而后上春秋高有司怠于修举彝典遂寥寥矣永乐初大槩仍高帝之旧而丘淇公以北讨失律不得王而朱平阴以嗣公北讨失律独得王其它有开国邑非罪而弗获封者或嗣公侯伯非公而获封者都督有以恩而获伯者有以功而不伯者有舍爵邑而赠公孤者有六卿舍公孤而称爵者易世之后不必尽出独断政府与操割者上下惟以意焉语云后主所是则为令其然岂其然哉今考而表之追封王公侯伯表

公孤表序

三公古官也自周公制为一代经典而系之曰太师太傅太保曰三公少师少傅少保曰三孤又曰官不必备惟其人盖坐而论道者其体诚重而其选诚不易矣汉承秦制设丞相大夫以至九卿而罢三公不复设至安汉公莽窃政始自为太傅而以虚名崇故丞相孔光为太师东汉以后惟代置太傅一人踞三公上而隆其秩曰上公至董卓窃政自相国拜太师踞诸侯王上而几成鼎革矣晋以避讳故改太师为太宰然犹在丞相下大将军大司马太尉司徒司空上江左以后自王导谢安外非宗属尊贵者亦不及而北魏之季太师与大丞相并加以待执国之臣北齐因之太师与太宰并设至太师而序迁太宰乃叙迁左右丞相则又舛矣宇文泰之执国始仿周官自为太师大冢宰兼总五官之柄而宇文护因之其事虽美其心则慝矣乃欲与三代比隆得哉自隋迨唐大抵以太师太傅太保为三师曰上公而以太尉司徒司空为三公而宋氏亦因之然三公不时置而所谓三师者抑何寥寥也太师重矣乃有谓太尉次重宁与太傅而不与太尉者宋徽宗政和定官制始以太宰易左仆射少宰易右仆射为真宰相太师太傅太保为三上公以少师少傅少保易太尉司徒司空为三孤无职而有秩以隆宰执之资深绩崇者南渡

而后因之元人得中土公孤皆如故而复置太尉司徒司空环卫之微劳与言色之昵合朝拜暮加不可胜纪明兴高皇帝始厘正之罢太尉以下官而李韩公善长徐魏公达以旧德元勋为太师太傅然亦无职事不置掾属防阁洪武十三年罢中书省采御史言欲特置三公府竟不果而仅设四辅官位尚书上聘耆儒自布衣径为之赐坐倡和分四时以寄燮理之任而无何复罢师传之官自魏公薨韩公雉亦绝响矣将下视博采鲜所当意所谓无其人则缺者耶建文永乐代不置此官仁宗初即位谓羣臣皇祖考神圣无所藉毘师傅即眇末何敢于是拜张英公辅太师沐黔公晟太傅陈宁阳侯懋太保蹇吏部义自少保娄进少傅至少师杨殿学士奇自少保进少傅夏户部原吉进少保于是公孤之官备矣然以是寓美称耳非必有燮理之实也独宣德三年诏太师辅少师义少傅士奇少保原吉太子少傅荣俱辍所领从容谋议以不时召对凡所游幸必从庶几若真授矣而士奇荣理阁务如故自是而后三公仅公侯伯而文臣限三孤以为常嘉靖二年以大学士杨廷和一品满十二载且有定册功加太傅四辞而止万历九年大学士张居正一品满十二载遂拜太傅其后病甚以辽左功加太师不久卒缙绅聚而哗之以为非典故然而嘉靖中加大同帅左都督周尚文锦衣帅左都督陆炳武弁也其非典故尤甚而未有哗者何也夫燮理责之繄袴论道以施乳臭即公侯伯奚取焉然则文臣而加者非德媿则哗非绩崇则哗非齿宿而资重则哗以哗江陵可也夫四者备矣而哗不必也政和之制又有以太尉冠武阶者窃谓可采云

东宫三师表序

东宫三师古官也汉独置太子太傅二千石至东汉为中二千石少傅比二千石后亦为二千石魏晋以还虽并设三师而往往不备官大约太师太傅太保为一品下少师少傅少保二品上高帝初因胜国之制自太师至宾客皆无所闕掌而詹事以下至于坊局始实为宫臣然洪武元年丞相善长达平章遇春带少师少傅少保右都督冯胜带詹事平章廖永忠赵镛带副詹事都督康茂才等带左右率府使副御史大夫汤和邓愈带左右谕德中丞刘基章溢带赞善大夫善长基溢理省台凡事烦日不暇给而达遇春等诸大将帅征讨之不遑然则以虚名被之而已所日授经者宋濂辈耳洪武二十二年公冯胜传友德领太师公蓝玉李景隆领太傅公常升侯孙恪领太保而尚书詹徽兼少保尚书杨靖领宾客亦不闻有闕掌永乐初以公李景隆丘福领太师朱能领太傅尚书蹇义金忠侍郎墨麟领少詹事而学士解缙等七人皆兼坊学士庶子谕德中允等官顾独僧姚广孝专为太子少师会上狩北京广孝与义忠麟留辅太子学士杨士奇亦以谕德辍阁务辅太子而自是以后三师至宾客仍为虚衔以待文武大臣之资重或有功者然三师视三孤三少在尚书上宾客在侍郎上故为表之使有考焉

赠公孤宫臣表序

高皇帝下江左因胜国之旧为五等爵以赠勋臣及文武之死绥者其后有王公侯伯之典而罢子男至公孤绝不以为赠文皇帝复因之有赠爵而无赠官中间仅一惜朱长史复之相藩邸胡学士广之侍左右皆久而皆五品未及贵故追崇之然亦仅至尚书而止盖五十余年而寥寥如也仁宗即位复置公孤官以居英公辅尚书义等于是姚广孝胡广得少师马京得少傅墨麟得少保文臣之赠三孤自广孝等始也宣皇宠寄夏原吉其卒也欲爵之而不果故特崇以太师而蹇义因之文臣之赠三公自原吉始也嗣黔公斌之薨也欲王之则无功欲毋赠则不容已故特优以太师勋臣之赠三公自黔公斌始也周太保尚文之卒也岳都督懋之战歿也宜伯而靳之一崇以太傅一崇以少师武弁之赠公孤自尚文懋始也邹济少詹事也王汝玉赞善也于仁庙为旧宫臣故即位而赠之太子少保宾客文臣之得赠东宫大僚自智济汝玉始也王一宁侍郎也以阁臣而得太子太师三品之躡得三太自一宁始也凡国家之典始则若滥觞继则滔滔焉又继则汤汤焉今而犹若有所裁者则诸典司力也作赠公孤宫臣表

柱国表序

柱国古勳官也战国之世楚以处高勳有上柱国柱国以待相及令尹之选而后绝不闻北魏之初以太尉拓拔嵩位望尊重故特置柱国大将军崇宠之至尔朱荣亦因而遂进号为天柱西京之魏太师宇文泰而下八人皆用高勳拜柱国盖所以表阀阅叙门荫也宇文周之世为柱国者日益伙而亦渐轻故复设上柱国冠之然品止正二而柱国为从二炆帝之末复置光禄大夫左右金紫光禄为一二品阶罢上柱国柱国不用唐初复置然遂为三四品勳而自是以上则止称大夫大夫而上曰特进曰开府仪同三司而阶勳不甚别矣元始复以上柱国为正一品勋加中书丞相而它官之至一品者虽加至三公而不可得明兴因之以授左右丞相李善长徐达及中书平章军国重事常遇春后更定官制正一品曰初授特进荣禄大夫加授特进光禄大夫再加或赠曰特进光禄大夫上柱国从一品曰初授荣禄大夫加授光禄大夫再加曰光禄大夫柱国而亡所谓左右柱国者然洪武三年诸功臣国公独李善长徐达得为左柱国其郑曹宋卫四公皆为右柱国左柱国贴以光禄右柱国仅曰荣禄而列侯皆以荣禄冠柱国当是时伯爵仅二品勳亦仅为护军而至永乐初大封功臣伯爵至正一品而诸伯自茹忠诚瑞以下皆得为柱国然其授亦自诸功臣而止所谓加授之令甲为虚设而蹇义以少师满九载亦称荣禄而已正统四年大学士杨士奇杨荣俱以少师加柱国而文臣之有柱国始矣然亦内阁而已成化之二十年吏部尚书尹旻以太子太傅满考加而尚书之有柱国始矣然亦吏部已耳弘治九年兵部尚书马文升以太子太保满考加而诸部之有柱国始矣

弘治十八年天子即位推恩内阁而少师刘健以官重毋可加因特加特进左柱国而文臣之阶勲与上公等矣嘉靖十八年少师夏言以册上帝号加上柱国其后上复以加少师严嵩辞不敢当谓人臣无上盖欲以形言之僭恣上果大悦其后复以加少师徐阶阶亦不敢当万厯中加太傅张居正居正亦不敢当居正卒遂以为赠而言者不审谓其实为之也至形之论劾且谓无将之罪而不知上柱国在唐世不为重官而二品勲所谓正治上卿者故自若也文臣一品不时满柱国亦不易得故备志之

弇州续稿卷四十八

●钦定四库全书

弇州续稿卷四十九

（明）王世贞 撰

○文部

△表序

内阁辅臣年表序

内阁故翰林学士任也始高皇帝渡江剪荆棘日不暇给矣而稍稍从诸儒生受经而是时弘文学士基最贵幸当帷中寄丞相以下亡敢望之已益勅马上业进学士丞旨同及濂濂又最幸得偕上坐起其职大抵纪注言动备顾问云而上时时授以旨使为诏草濂独多所当久之上仿宋益置华盖谨身文华武英殿四文渊东阁二俱大学士秩正五品征诸明经长者以次代擢而会丞相惟庸败析中书六之尚书寄天下任而大学士称近臣不为置僚属亡所治天子方自操威福亦亡所寄裁至文皇帝继大位始即文渊阁召侍讲等七人日入直左右已益亲上上所与谋羣臣甚秘稍迁至大学士岁时赉予同尚书矣仁宣朝用太子经师恩累加至三孤益尊而宣皇帝右文遏杀内柄无大小悉下大学士士奇等取报行而吏部蹇义户部夏原吉以不时召得迭入省可六尚书事与士奇均而大学士陈山等或鲜所闕预岂非无颡职繇上轻重裁耶论道之体创尊仁宣迨景及宪大权始集今视之赫然真相矣夫阁臣于礼至贵倨也视百司乃无重相压何以相称焉其喜怒借上意故上不嫌逼也威福间已意故下屏息也创自由六曹故难不与也取以诏行故众无敢訾也贤者当之不见迹而治不肖者当之不及败而乱此在人

主择矣起永乐之壬午其姓氏岁月备考见云

翰林诸学士表序

学士非古官其职初散寓于中秘诸省至唐文皇开天策府而始有学士之目武后中复置北门学士间以亲昵充之如汉鸿都而加重其后至德宗朝始定设学士繫銜于翰林与中书舍人对掌内外制然无定品往往寄禄于他官其资重者至散骑谏议而浅者仅拾遗叅军尚不能与舍人埒独其长一人最贵曰承旨往往竟拜宰相其次亦不失三司观察卿监至宋一切因之而益加重然不为定品如故元丰制行自是稍稍有恒秩元之初兴定学士承旨正三品学士以下递降有差其后进承旨为从一品视中书平章政事学士视左右丞高帝初下江南庶事草创有所聘擢仅寓名以备顾问而已吴元年五月始置院学士正三品侍讲学士正四品直学士正五品修撰典簿正七品编修正八品洪武二年正月定学士承旨正三品学士从三品侍讲学士正四品侍读学士从四品直学士正五品典簿正七品待制从五品修撰正六品应奉正七品编修正八品典籍从八品九年闰九月诏承旨与六部尚书同然班在其上十四年而改为正五品罢承旨直学士待制应奉检阅典簿十二年二月始定学士一人正五品侍读学士侍讲学士各二人从五品孔目为首领一人未入流侍读侍讲各二人正六品五经博士五人正八品典籍二人从八品侍书二人正九品待诏六人从九品皆称属又修撰三人从六品编修四人正七品检讨四人从七品别为史官亦系属焉是岁侍读始列侍讲前建文初大有所更置然于职事无损益永乐初仍高帝旧寻擢史官解缙而下七人入内阁预机密典纶綍然自学士王景卒解缙胡广杨荣辈犹相继领院篆洪熙之岁大学士士奇等骤迁至三孤踞六曹上遂不复领院矣第文渊内署于诸曹异文移往复犹以翰林行之令虽稍稍变革而犹有一二存者如史成焚草中贵传旨犹传大学士为翰林学士翰林公署中左设大学士三座学士一座而讲读学士东西对列是也学士秩虽卑而职与内阁通故系其名氏于后

中书省表序

自周六官废而秦及列国皆设丞相其重者曰相国掌丞天子佐理万几汉设一丞相以御史大夫副之东汉曰司徒其职分于太尉司空而权移于尚书令仆自晋以至宋其省或尚书门下中书其掌或令或监或仆射其佐或叅知政事或左右丞或侍郎要皆为人主理庶务无所不统摄盖真为相而名避之三公为贵官以加其资望之重者而南渡以后至孝宗而正其名曰左右丞相其佐仍曰叅知政事元因之置中书省令一员正一品以皇太子为之左右丞相品同令平章政事从一品左右丞正二品叅知政事从二

品叅议正四品高帝定江左以至即大位仍置中书省罢令不设余俱如故洪武三年革平章政事食禄者不在革十三年以丞相胡惟庸专僭诛之因罢中书省散其柄于六尚书而系之甲令曰后有请立丞相者文武羣臣劾奏其人凌迟处死呜呼圣矣百余年来天子不独断必有所寄不能不归之内阁而至嘉靖中遂操丞相之柄而出其上万厯初遂并人主之尊而兼其详势重矣是不可不变而通也作中书省表

六部尚书表序

尚书非周官也自秦寄国事于丞相而内庭有尚书其为令丞不可考但其职仅以通章奏而已汉兴至武帝而始削丞相权躬自揽断而设中书令以叅尚书至临崩而始命大将军霍光领尚书事裁断万几可否保护万乘兼驭宫禁而九卿将军守相所谏白不之丞相而之大将军富平继之稍自抑绌至大将军王凤而复修光故事权至侔人主丞相取充位而已成帝始置尚书仆射一人尚书四人凡四曹曰常侍曹二千石曹民曹客曹后又益四直三公曹是为五曹然不过一大将军掾属而已后汉光武不以政委三公天下章疏皆尚书与人主叅决乃下三府而至孝明以后天子初即位輒置录尚书事以太傅居之或以太尉叅之然时置时罢而令仆射及尚书号八座其可否庶务即今之内阁而案考功法诘责公卿又有今所不敢望者然今秩不过千石仆射八百石尚书六百石铜印墨绶令以久次始得为郡守毋望九卿而尚书至有补大县令者以故委寄虽重而不敢萌肆心至魏晋时令仆不出为他官往往径为三公如山涛卫瓘或领开府如荀勗而居然端揆自命矣魏分尚书五曰吏部左民客曹五兵度支晋分为六曰吏部三公客曹驾部屯田度支而尚书始以其职入衙矣渡江后定为吏部祠部五兵左民度支凡五歷宋齐梁陈又加都官为太常是时六尚书虽分寄省事于令仆不称属而吏部尤重沿至北齐周隋有录公则录为真相而令仆为叅执无录公则令为再相而仆射为叅执无令则仆射真相矣而中书主奉行门下主封驳与尚书省次体而为叅执唐自太宗为尚书令遂罢令不复置而左右仆射遂为闲秩开元初改左右仆射而左右丞相姑美其名以为侍中中书令优老之阶而归重于文武二选其后遂以中书令为右相兼文部尚书而李林甫杨国忠居之左相兼武部尚书而李适之陈希烈居之尚书之重盖未有甚于此时者而左相武部其权寄不能右相文部之十二亦人主为之耳至德以后侍中中书令复以重故为勲臣加秩而二侍郎同平章事为真相资望之深重亦有至中令侍中者其左右仆射或以为加秩或以为优资大抵省事非闕系天下大计而六尚书亦因之矣宋初以至元丰政和淳熙宰执之更改不常而六尚书之系尚书省如故元制中书省令丞相平章左右丞叅政以厘天下之务而吏户礼兵刑工六尚书为曹官率属分职其尚书遇理财则以权幸臣为之往往夺中书柄然不数岁輒革而以尚书部隶中书省于职名颇不维矣明高皇帝下江南即置行中书省自领之即吳王位改置中书省而于

六尚书势不遑设洪武元年始备六尚书皆正三品而侍郎正四品郎中以下品秩有差而皆隶中书省一仍元旧独户部事烦设三四科尚书寻亦罢十三年丞相胡惟庸以专擅蒙蔽诛分其职于吏户礼刑工兵部分大都督府为五而掇其枢要于兵部升尚书正二品左右侍郎正三品虽并称政府而名位不极事权不专天子之威福无下移盖隐然周世六官之嫩而独冢宰不制国用司徒不掌邦教以此小异耳建文之主归重左班以故进尚书正一品增设侍中正二品侍郎品如故欲以据五都督之上而权轻位崇迁拜太骤识者以为未然至文皇即大位而悉更从洪武之旧矣是时改北平故燕国为北京设行部尚书以总布按二司事行都督府摠都司事永乐四年上狩北京幸滦河经畧定鼎之业虽备行九卿印以从然皇太子以元良监国大小庶务悉以委之唯封爵大辟及除拜三品文武职六科都给事中以闻而户部主粮饷兵部主军旅礼部主朝仪始以行在尚书夏原吉方宾吕震扈从而九卿印务往往令原吉兼掇是时六部政本犹在南十七年而皇太子归青宫以皇太孙留守南京六部政悉移而北十八年行在六部落行在字诸九卿大小省署之留者皆称南京洪熙元年天子留意丰镐诸九卿大小之在南者皆落南京字而六部复称行在宣德三年始定如永乐弘正以还内阁日益重而六尚书日益轻然老臣勲业稍重加三孤东宫三师若吏兵之长犹能与之抗而至分宜之得政则若外藏矣江陵之当国则若曹郎矣呜呼人主不可以太阿授人哉余因考六尚书姓名自永乐四年而后十七年而前其在南北者皆列之本部十七年而后在南者始列之南京盖以政本为重故也

都察院左右都御史表序

都察院古御史府也自周官御史掌赞善授法令秦人因之自汉益重置大夫以贰丞相银印青绶位上卿于万几无所不参掇每丞相阙则大夫以次选代成哀之际遂为大司空与丞相大司马俱封侯位三公金印紫绶后虽旋复旋改而建武以还遂定与太尉司徒仍三公故鼎足承君矣当御史大夫时有中丞二在内则掌兰台秘典受公卿奏事举劾案章外则督部刺史与丞相司直司隶校尉察举非法自大司空设而中丞废献帝时尊权将曹操并太尉司徒于丞相俾任之而郗虑以御史大夫为之副然不复置中丞至魏黄初建司空官仍罢大夫不置而历晋宋南北朝以至北齐后周别设中丞王台事而御史府自是称台矣后魏以至北齐改中丞为中尉最号雄峻若李彪崔暹之类糾按威贵威行朝省琅琊帝子之尊尚假赤棒之威以自张余可推也隋始复置大夫罢中丞唐初亦因之有以其官为大司宪者以台为肃政者而职任如故开元之际复为御史台而大夫与中丞不并设其职俱以振纲纪察奸弊中丞秩虽卑于大夫然雄峻过之至有径入相者宋初有中丞而无大夫其属有侍御史监察里行知杂之类大约三司使学士承旨以为班知谏院司谏正言以为表里叅知枢副丞郎佥院以阶进监司牧守以待

退至元而尤重其任设大夫从一品中丞正二品侍御史从二品治书侍御史正三品皆为长官当是时济雅图帝有恒言中书省枢密院吾左右手也御史台治吾左右手病者也旨矣明兴其初制一循元旧当是时左右大夫汤和邓愈数膺斧钺寄外出而中丞刘基章溢理台事其后汪广洋陈寧辈俱迁大夫洪武十三年胡氏之事发而御史台仅设左右中丞俱正二品侍御史正四品而已十四年始改为都察院然仅正七品其官有御史而无都御史十六年仍为正三品明年为正二品于是定设左右都御史正二品左右副都御史正三品左右佥都御史正四品职糾劾官邪申辨冤抑而所属御史分为十三道御史巡按以至他公委出则奏请还则考核然御史独不系都察院以示得相纠察之意建文初改为御史府设都御史一员左右副都御史各一员品如故十三道御史曰左右两院监察御史永乐鼎革悉复洪武之制其后移都察院于北京而留者曰南京都察院畧如六部矣其以左右都御史而下摠督提督叅赞巡抚各镇者初自本院出曰公差事完或得代则回理院事其后不胜多则往往自部佐卿寺藩臬迁转亦不复归院以为恒久表御史大夫中丞左右都御史及左右都御史之出镇者

大都督府左右都督同知佥事表序

大都督府因枢密院而改建之者也枢密院之职实古太尉大司马诸将军而其名则循唐宦官之旧五季托肺腑其权寄宰相上宋颺兵政稍与宰相次而号两府然皆搢绅大夫为之至元而用其国人与汉人之以武功显者第往往叅互一二搢绅以赞其摹画至明兴而截然武弁薺矣高皇之下集庆置中省即置行枢密院而自领之功臣宿将得序迁为同知佥院同佥判官其品秩皆仍元旧至四年辛丑之三月始改置大都督府拜皇侄文正为大都督节制中外诸军寻增置左右都督同知副使佥事官以中书叅议李善长兼司马宋思颜为叅军经厯都事皆极一时之选而同知佥院之在军行者尚仍其故不改呉元年甲辰正月即王位定大都督从一品左右都督正二品同知从二品副使正三品佥事从三品寻大都督坐罪废罢不设以左右都督为长官十月进阶俱正一品同知从一品副使从二品佥事从三品三年革副使升佥事正二品凡天下将士兵马大数荫授迁除与征讨进止机宜皆属之十三年分大都督为五军都督府见若以为品秩如其故者而兵部阴移之其权渐分矣至永乐而尽归之兵部所谓五都督者不过守空名与虚数而已其左右都督以下至同知皆以加边将之有功者其佥事以待序迁者而掌印佥书之类必以属公侯伯间有属老将之实为都督者不能什一也故断自十三年以前表之后不复赘焉

中官考序

余读范蔚宗所论撰寺人而叹其德之无极也夫竖人刁乱齐伊戾祸宋赵谈伯子延年之属既私而不及政弘恭石显及政而不及爵此犹其小者赵高挟始皇之余烈以祸储嫡僇将相置庸主于股掌而树之拉之位至丞相爵为彻侯而及其危也乃更欲市国于东方之兵以自王乃若东京之乱如蔚宗所称举动回山海呼吸变霜露阿旨则光宠三族忤意则叅夷五宗高冠长剑纒朱怀金者布满宫闱苴茅分虎南面臣人者盖以十数府署第馆棊列都鄙子弟支附过半州国金宝盈仞于私藏歌舞充备于内室狗马人食土木被绣皆剥割萌黎以济其欲构剪名贤以树其党吁亦以极矣白简所陈间一挑之则逮窜立至或假司隶之权或凭方岳之重几幸先发事取快心或不能无一二胜者胜未毕而败随之迹其荼毒迨有与炎烜同焰息矣三方鼎峙司马代篡以及六朝皆事由独断叅寄文武虽祚有变迁而祸絶阍竖北魏稍缓其防则宗爰矫太师刘腾拜司空皆恣惨屠僇深谋胁僭唐之阶重昉自杨高辅国幽圉太上躐血椒宫爵擅真王称为尚父重不可反矣而后复有程鱼仇田之僭擅季明复恭之諄逆虽强藩星列祸不逮远而九重惕息甘同赧献迹其终始去汉无异擊之不胜则贤者为陈寔不肖者为训注计穷愤极则何进崔胤皆假手外兵而董卓朱晃之衅成矣宋之宣政梁师成为内童贯为外酣歌高饮以成靖康之祸明兴高皇帝神断自天朋亡不昵虽制各监局以处中贵人而不兼文武衙不侵外庭政不御外臣冠服盖十年之间而宫府谧如也文皇之始不能不有所私寄是故俨保之譖几得行而抚监岌岌矣监军之势张而马骥以交址予敌矣天子幼冲母后不中制权必有所归而竖振遂滔天矣举全盛之四海挟至尊之万乘而授手于鹊起乌合之属恨其身死行阵不获正司败辟而磔剪昆季悉籍贖产足以纾泄臆愤■〈廿海〉开中兴斯则英主之效哉而丁丑一制为之湔洗何也吉祥之创变积骄成怨积怨成逆汪直之启衅縲继盈朝尸骨盈边则此制媒之哉夫以孝庙之仁圣尚不能无李广而况蒙不省务狎游是好八虎横三老绌瑾独■〈彳牛〉牙其间祖宗之法度德泽荡涸且尽幸而发自其偶以收全胜然一瑾死百瑾生叅伍狡弁表里作奸非高庙神灵鼎成期速明事殆有不可言者嘉靖之始不遽殷鉴悉诛斥其渠首而又采辅臣之密赞与言路之指擿次第收革诸镇监军朝野为之吐气边腹为之回色虽晚节不无所向徇然不至如累季之弊以迨于今即有隱忧而无显患斯何下景帝焉夫振瑾至狼戾也公卿台諫至狐鼠伏也亿兆至鱼烂也然而不为汉唐之季者高皇帝收天下之权以归一人即狼戾如振瑾者一嘖而忧再嘖而危片纸中夜下而晨就缚左右无不鸟散兽窜是以能为乱而不能为变也虽然不可恃也余故考着为上下二编其灼然称贤如怀恩覃昌云奇何文鼎者百不能一而振瑾吉祥汪直之类至不可胜数云

亲征考序

古者司马掌邦政以平夷寇乱虽其文曰张皇六师然岂必天子在行而后谓之武

哉戎衣一着于牧野之誓即倒载而包以虎皮示民勿用是故垂旒于柔扆而天下盖谧如也汉高灭秦蹙项芟薶羣雄而帝之竟不能自戢逞其余以与匪茹角七日不食不能穀弩平城之歌天下悲焉唐文以百胜之智拥亿丽之大众而不能得志于小丑安市之役几以身为饵噫嘻亦危矣哉我高皇帝固已深烛其故彭蠡之后不复亲驾大将拜筹于受脤之顷而九有茅靡于赐履之下王者无敌夫岂欺我文皇帝斩神鳌之足而立北极与敌牙角躬启六飞为吏士先夫岂遽慕雄畧而近遗庙算哉夫亦鉴弟子之輿尸且为万世深长计也然而被坚驰轻冒犯霜露以媒叵测北望而抱遗弓之痛至今犹若新矣宣宗神武将强士良而从事属国之虜敌若山压卵然使阉振狎之而轻以万乘委敌即令遠人宾服紫蓋还洛而蒙尘之辱毕世莫可洗矣三改代而狃不知戒轻从中贵恶少编虎须而幸脱于其吻胡可再恃也语云千金之子坐不垂堂夫人主之价寧直千金据九重之沉沉而尚不能忘戒心今率然而临广莫寄命锋刃其殆寧独垂堂哉故曰白龙鱼服豫且制之因畧纪其事自高逮武凡五世而出塞者六平内乱者三以存万世规云尔

科举考序

两汉之世文武之用非一途选举辟召署吏积闕往往杂进晋世始重门第而中正之设尚隐然三物之遗江左则王谢朱陈北方则崔卢李郑门第之势益专而不可反隋炀矫之设科取士白屋韦裳稍一气吐唐宋因沿虽登进尚广而途则日益重矣元兴自朔漠以马上得天下固不尽废宋旧而省台之正皆委臆于其族类科举之榜分为左右国族而左庶姓掾史纷进辟署惟意是以吏治若乱丝而不可整高帝之初或致礼网罗或收由杖槌皆朝起镰莱夕登旃席洪武三年取畿内诸贡士寻未及会试而官之明年始复试得进士吳伯宗等以为诸儒生多未脱占毕无益天下大计罢之又十三年而始更布条式载在甲令二百年来公卿大夫之业皆出于此易代之际灼然名臣至孤卿者当有杨士奇之担簦刘中敷杨善之版筑夏原吉郭进胡俨吳中吕震之应乡书而其后遂寥寥矣世久事殊法网微踈孽牙其间蓋至嘉靖而司水镜者往往门互市田更买奴亡不称關節而得扬扬与经生伍相门纨袴薄玺郎夕拜而不就乃至揆万乘之臂而夺其鼎甲谈之酢齿闻之扼腕蓋至今尚未艾云言路诸臣抉摘颇峻人主亦微觉之而当事者以弗便已弗竟也乃作科试考

谥法考序

余尝有谥法通纪三十卷列其凡而序之所以标先王制谥之本旨与歷代沿革轻重之变畧备矣至明亦有纪而未甚详于是徧考金匱国史之藏秘阁之籍叅以家乘而

后靡所不备凡有释义者皆阁籍也每故事大臣卒礼部以谥请报俞矣则内阁以两字者三请于上而自择之是以具释义也洪武之尚为呉也诸功臣死事有劳而夭者皆荣公侯之爵而傅之谥终高帝世文臣弗得也武臣即都督弗赠侯伯弗得也至建文而待制王祜得谥文节矣文臣之有谥自祜始也其谥小臣者亦自祜始永乐之制严矣终太宗世文臣之得者仅姚恭靖广孝胡文穆广而恭靖之爵则公也文臣之有谥仅文穆一也洪熙初始大合故臣凡劳于国谊于青宫三品而上易名者十余人而后文臣之谥广然宣英之代犹斤斤焉持其柄而弗轻予且夫鲁王爱子也秦王次嫡子也高帝命之曰荒曰愍而登之册曰不敢以子故而废天下公其于宗室诸子王尚有评也文臣之有荣愿也则瑕弗掩也文荣之以爵也丈愍之以事也庶几寓贬矣妇人之有谥也自后妃而外则死节也公主之有谥也自仁宗之悼爱女始也乳媪之有谥也自宣宗始也乳媪之夫之有谥也亦自宣宗始也方士之有谥也自世宗始也谥而四字淫矣而使方士得之则益淫也当世宗之季吾又得二事焉夏文愍之持秉则同列皆中谥及身以罪死易世而后牵复所得者中下谥也继而严氏之持秉则其子为市焉非上所甚注怀者必贿而后得不贿不得也即得之不腆不上谥也及身以罪窜削弗谥也夫谥者人主之春秋也尊则称天以命之不尊则与天下共隲之而奈何为大臣修怨贾利地也然则如之何其必畧采唐宋故事遇大臣以谥请有俞旨则翰林之司篆者为议而定二谥焉以授礼科科详之复议而上之阁臣复衷而取上裁凡文臣二品而上及勋亲臣公必谥侯伯之莅军府加保傅必谥谥兼美恶二品以下自卿佐以迨庶僚有德行政术者亦有谥谥则言官请之礼部裁之有美无恶可也自国初以至先代勋臣若傅友德若徐辉祖之类文臣若章溢若唐铎若胡俨若魏源之类武臣若刘玉马永王劾之类諫臣若杨瑄黄巩王思杨爵之类儒林若呉与弼陈献章胡居仁之类文苑若李梦阳何景明杨慎李攀龙之类追之以谥可也勋臣若李善长冯胜若廖永忠耿炳文若丘福之类文臣若陈循若徐有贞之类追之以谥谥而不尽蔽瑕可也又若于谦者易之以上谥可也万安刘吉汪鉉张瓚者易之以下谥可也凡此数者皆所谓与天下共隲之操法于赏罚之外而毋使人得而议其后者也

皇明盛事述序

不佞生晚当累洽之季而又家世从纓绂后窃有志慕说古公卿将相之盛屈指西京以还若功臣之族鲜通籍者计独有外戚王马梁窦之属虽鼎贵不足道而丞相彻侯父子相继仅绛条韦平两三氏而已东京尚行谊薄华腴玄纁羔雁施自黄耆辟书征轮偏于白屋而關西之杨汝南之袁乃亦有四世为三公者西京之习流为江左蔓而北魏门荫相藉爵封道望一夫秉轴则乘朱且垂百轮九命弁冕则戴貂詎止十辈而李唐之史犹有志宰相世系者宋之郊恩三事而下推荫必数十百指援荐亦不可胜数至于元

而真王彻侯三师三公以至三省之长非特穆之懿亲则亦集赛之华胄阙阅朱紫虽若蝉联而无足称述我明之世文武判隔浊泾清渭贵极冕弁者不叅政纪齿自缙绅者靡开茅土经术弛于纨绮崇显局于贤科以故视前代小逊焉爰若和气磅礴渊源流衍虽义取侧微材由自奋而门积膏华踪若凭倚至乃德祉互凝君臣交契或蚤附风云或恒依日月禄位名寿显融令终代不乏人人不乏遘要亦有可纪者夫覩庶彙之繁生则思坤舆之厚伟修鳞之孳育则羨海王之广以高帝之功德超驾尧舜文皇之疆宇远踰汉唐皇仁既宏圣寿复高维城裸将绳绳振振其为盛事岂前代可拟故畧叙一二冠之篇首庶几谈者知所本云

皇明异典述序

夫国之有典也则号令庆罚皆在焉其曰典者何志常也曰异典者何志非常也诸创国者皆不为常者也其业可大而法可久习之则为常是故曰典也自古有天下之盛者莫过唐虞三代唐有天下举畎畝之鰥民而委之政既得政则继天子之所任岳牧侯伯而僇之既僇之而复峻用其子其后輒举祖宗之人民社稷而付之商有天下举五就之遁臣而委之政既托孤而废其主废而旋复焉尊之曰阿衡而待之以不臣周借其国付渭川之钓叟使埽父称而师事之又以其幼子托之于介弟使据君位而朝诸侯其歿也又崇以天子之礼乐典而异者孰并哉及其衰也以定王却楚之晋文尚能守空名之隧而不肯予以九合诸侯之齐桓其国相尚能守陪臣之分而不敢渝非衰主之贤而创主之易也其势殊也明兴高帝定天下以损益礼乐势不得不有所更革天造草昧庶事裁意未及讨论至末年而始截如矣其始不能无异也虽然异而非异也易世而后或革或因乘时变通加以润色固无论己其它或不无一时之好而有所登进或不考于絜令之旧而有所抵违或饰喜出于燕昵而少所衷或疑功归之惟重而未为衡或假无方之立而不必公或取政府之徇而不必当或言路启于新进而无暇详或曹局迫于奉行而不暇执主之者快而旁覩者骇授之者以为常而受之者以为异也余故识而述之其有抑斥者亦附焉九十卷以从异日稗官之后

皇明奇事述序

余既有异典盛事二述矣异典者遘之自人主者也盛事者遘之自天者也盛事之遘无非媿已异典之遘媿居十九疵亦居一已乃复有遘之自天而不可言盛遘之自人而不可言典或人与事之巧相符者或絶相悖者为其稍奇而不忍遗之别录成卷以备虞初春明之一采故不敢称稗史也

弇州续稿卷四十九

●钦定四库全书

弇州续稿卷五十

（明）王世贞 撰

○文部

△序

左传属事序

昔者夫子春秋成而三氏翼之左氏尝及事夫子其好恶与之同而又身掌国史典故其事最详而辞甚丽公穀二氏私淑之子夏而以能创义例有所裨益于经学士大夫多习之其为左氏而显者汉丞相张苍诸王太傅贾谊京兆尹张敞大中大夫刘公子丞相翟方进之属贾谊至为之训故然终不得与二氏并重中垒校尉刘歆始笃好之至移书太常博士明其屈几用此获罪其后获并立于学官而晋征南大将军杜预深究哲其学复传之而称其或先经以始事或后经以终义或依经而辩理或错经以合义自杜预之传行而左氏彬乎粲然公穀反不得称并矣宋有胡安国者负其精识以为独能得夫子褒贬之微意衷三氏而去取之自胡氏之传行而三氏俱绌独为古文辞者尚好左氏不能尽废之而所谓好者好其语而已尔于是称左史者舍经而言史大抵史之体有二左氏则编年而司马氏乃纪传世家编年者贵有事而纪传世家贵在人贵有事则人或略而尚可征贵在人则事易详而于天下之大计不可以次第得然自司马氏之纪传行而后世之为史者亡所不沿袭当左氏时所谓晋之乘楚之梲杙以至魏之汲冢其简者若仿经而详者则为左其后夺于司马氏虽有荀悦袁宏之类然不甚为世称说而能法左氏之编年者司马氏之后人光也光所著史曰资治通鉴其文虽不敢望左氏之精凿要亦有以继之而上下千余年其事为年隔而不能整栗建安袁枢取而类分之名之曰纪事本末而左氏其祖禰也顾未有若袁枢者出而吾乡傅逊氏少为春秋以胡氏通显而心独仪左氏读之累岁而始与之融会乃用袁枢法而整齐之其大体先王室次盟主次列国次外夷取事之大者与国之大者比而小者附见焉不必如训家之所谓张本为伏为应一举始而终遂了然若指掌其它句为之故字为之考虽不能不资之杜氏舛僻者亦摛而正之必使无负乎左氏而后已故执杜氏以治左氏十而得八执傅氏以治左

氏十不失一旦也为杜而左者难为傅而左者易故夫傅氏者左氏之慈孙而杜氏之诤臣也汉之时左氏故不能大重如公穀而为之者如向所称三张贾生辈皆通达国体而公穀之学公孙弘用以绳下而张汤传为峻文决理又请用博士弟子治之者补廷尉史虽以董江都之贤而不能免于决事比之刻岂所谓属事者多达而析义者易深耶使傅氏及是时而成此书令三张贾生者见之其有裨于汉治当何如也傅氏今虽尚墨守学官部使者已从守令科论荐矣于循吏何难焉

胡子衡齐序

胡子之书曰衡齐既成而长洲令曾鳳仪氏刻之属不佞贞序焉夫胡子何以称衡齐也衡者平也所以平低昂而使之当也齐者和也所以和诸味而使之成也胡子所以为衡齐也其大指曰吾儒与它道角吾处吾胜而求彼负以为异端彼亦处其胜以求吾负而讥吾之未至不平而后有争争而不能和则害彼所谓佛也老也杨也墨也申韩也彼皆有以自持之吾衡而平之然后剂而和之则皆为我用也洙泗之后而有濂洛濂洛之后则吾儒与吾儒角彼此不求是而求相胜曰尊德性也道问学也主静也致良知也随处体认也体仁也源一而流渐异吾衡而平之然后剂而和之而其源湛如也故曰衡齐孔子之言纯者为鲁论而小杂者为家语有问答有自言皆门人纪之者也孟子之言有问答有自言皆身着之者也荀子杨子文中子亦身着之者也庄子列子身着之而间托之问答者也其后而为周子张子至明而为薛子皆身着之者也为二程子朱子至明而为阳明子皆门人纪之者也胡子之为衡齐也身着之而间托之问答者也身着之得无有意乎哉圣人立象以尽意意不尽则系辞焉以尽其言夫大者以道立言次者以言明道以道立言曰经以言明道曰传胡子之衡齐传也其所以衡齐之意则明道也其明道将以淑人而轨世也意在明道何害于意意不在明何益于道甚矣胡子之意之审也虽然其辞得无过修乎哉孔子之系易曰修辞立其诚诚立矣何修辞之足病且胡子之学心学也反之心而苟有协耶即葱岭苦县不讳同也其犹有扞耶即关洛闽越不惮异也如其羽翼乎即裨史巷议不辞采也可借而弹射乎即齐谐虞初不虞诡也是故辨若仪秦而非为强工若丘非而非为刻遑若蒙庄而非为纵博若侨向而非为淫故曰其指远其辞文其言曲而中其事肆而隱胡子其将庶几乎哉余与胡子先后仕于朝而不相值第闻胡子倡道于东南天下之有志者慕趋之若流水而胡子顾不立门户惟道之是明而已虽然吾终以胡子之辞修惧天下后世之以辞求之也然则治胡子者当如何反之心而协如胡子之于先喆可也是所谓衡齐之衡齐也

刻注药师琉璃光本愿经叙

此药师琉璃光如来也其称药师者何以药治众生疾为大医王也称琉璃光者何以其表里莹彻无所不映照也今夫耆婆之木上池之水持之饮之则能洞肺腑烛膏肓以至汾阴之鉴奉以照疾若水月之沁肌骨亡不立愈亦可称琉璃光乎是物也物与人相待则犹有局也唯药师之琉璃光无待者也无待则无所不徧彻也虽然天竺古先生据莲花座转大法轮一音声而响三大千一白毫而镜无央界诸聋者瞽者蹙废者寒者热者病臆肺者无不为之立起而何必药师也自愿成缘自缘生用自用证体故标而归之药师也诸佛皆药师也皆有此十二愿也诸佛界皆净琉璃也薄伽梵偶然而举之耳其说甚明浅而易晓而居士复为之注者引权而皈之实由显而导之微且以为庄义乎为郭义乎虽然吾闻之古四大非我有谁为受病者受病者心耳我无一切心安得一切病我无一切病安用一切药我即药师也我界即净琉璃界也此经亦筌蹄而已居士张姓其名应文于书鲜所不通晓尤精养生晚节始尽绌之而谈无生理

山园杂着小序

余治离菴园最先而又最小且不能遽器然以亡它适故时时托迹焉其后治弇山园乃始有山水观几徒家之半实之所与客咏酬十于离菴园已推离菴园于敬美弟已徙处昙阳观之丙舍已敬美治淡圃余间有所还往于淡圃弇园月不能一于离菴岁不能一乃各为之记它岩濼沼岫台馆亭榭之类亦各有标咏而弇独详最后为客所迹逐亡已转之村中故居而儿子骐筑培塿疏污邪而栖斗室其上强名之曰约圃而余亦姑为之记而咏之忆余在弇时客过必命酒酒半必策杖相与穷弇之胜而见质曰此某水此某丘余甚苦应接不暇今者业谢客客亦不时过即过无与为主无可质者故理此一篇分卷为上下以代余答而已余老矣能后余存者诸园也弇最大饶石而广水能后诸园存者弇也弇即后存当亦竟废今世人不厌薄余文辞而时味之然则能后弇存者是编也夫兰亭之为亭也赤壁之为壁也其胜不能如其名然数百千年而有胜色者则会稽之书而眉山之赋也是编也吾不敢窃比于二贤以不遂泯泯若金谷绿野者则庶几哉

大隱园集序

故樊山温懿王伸大义于弘治间以有大造于荆盖积德百余年而礼乐之效始见于今王升甫升甫夙稟灵异岐嶷成质舞象之日即多读经史百家自励为古文辞每抚几叹曰丈夫一当生不能珥簪橐笔佐明主上嘉下乐之治即惟有著书立言以显见于后世第令齷齪少年以仰面看屋梁见谄胡足恤也不然使我冠遠游蹶朱履而托于吏人之上日醉饱娥绿间以死死耳不亦虚捐哉于是悉谢诸王邸中之所谓乐者折节延

操觚士而地僻客鲜所当指则曰吾其求之古乎盖先秦而后大历前于书无所不窥亦无所不仿拟而不蘄尽合曰非吾心之是衷而谁与衷升甫今五十矣所结撰古文辞诸体悉备为卷若干凡再使使走三千里而授简不佞曰吾子一世龙门也以不穀之幸而获共此天以不穀之不幸而叨有宗祊寄不获从子于太湖之社虽然形用隔也神用通也向者窃衷之心矣而犹未安也非吾子之衷而谁与衷余读升甫书窃悲其气之拂郁而壮其志之果也已尽习其言而又微窥其诣也升甫之国曰荆今夫有荆璞于此甫就剖而工仅半之其器未遽成而光未尽发也然而不失为良玉及其就也而天下以连城享之珉夫之为器非不伟然观也天下能以器名而不能以玉名今夫世之不为珉夫者鲜也升甫之诣则璞也其器而已耶其玉而后器耶余因知升甫之志之不但为器也升甫之为古乐府光发矣工十而得五近体之工十而得八志传记序之工十而得六其琢磨易矣繇是而不已焉世不以连城享者吾弗敢信也余老且厌笔砚岂其能构三日火升甫之乡有陵阳君者试叩而质之盖升甫虽贵极人爵然意殊薄之居恒白帽单练步田里间谓客第字我以山人目我则有所不敢辞余故称升甫云其所治园曰大隱而集因之亦兹意也

刻如来密因修证了义万行首楞严经二十五圆通观世音菩萨证圣序

我释迦世尊之御泥洹舍登狮子坐也盖诸大菩萨弟子人天慧福障业之藪也问悟则七大十八界俱通简圣则二十四地俱屈匪惟表清净音之真体实欲阐施无畏之权用是以我阿那婆罗吉低输菩提萨埵能默际而仰契之始者同颜氏之如愚后则若点也之铿尔窃睹其叙致恒河沙劫前承观世音佛出世发菩提心从闻思修入三摩地间尘既亡内根旋尽繇三空智至灭谛理超越世间获二殊胜上合十方诸佛之觉心同一慈力下彻六道众生之异境同一悲仰慈悲既切胜解复圆是故入诸国土无刹不现所谓三十二应者自佛与独觉声闻而下繇摩呼罗伽紧那罗阿修罗而上愿就者就乐脱者脱方便说法刹那立应变化现身娑婆徧满所谓十四施者一切兵戈水火险盗狂鬼之害以至寿考贵富子女之求其粗而去三贪嗔痴精而获四不思议莫不罄我愿力俯顺兆情探之若困合之若契是以世尊嘿而许之为放五体寶光遠灌十方微尘如来及法王子诸菩萨顶诸如来亦放寶光来灌世尊及会中诸菩萨大弟子阿罗汉顶天雨莲花五色间错地成法界一等平正交光相罗如寶丝网梵呗咏歌胜钧天乐我世尊默许之不足又命曼殊室利曳法王子为偈以别之而我阿那婆罗吉低输巍巍乎皦皦乎鹫岭之标众峰望月之夺列宿矣夫弟子如憍陈耶优婆尼沙陀辈亡论也菩萨如香严月光童子辈亡论也自憍陈辈而进之若舍利弗大迦叶大目犍连辈之智行尚亡论也自香岩月光而进之若持地琉璃光虚空藏之心力圆明尚亡论也以普贤之功行宏深等阿耨海药王之志愿精坚踰金刚石大势至者弥陀之右拂慈氏尊者释迦之嗣王岂

伊异途可加轩轻况我世尊亲吐法音谓无优劣前后等别而法王子不少假借条析事挫独谓三摩提繇闻中入谓观世音得大自在彼二十四圣贤者夷然而退居其所旁睨无愧色返照无净心岂非用斥表留以劣显圣上顺世尊之密旨下开万劫之法门用是阶级不形町畦尽泯一会之中盖瞭如也又融融如矣嗟呼妙音观世音梵音海潮音倾耳而聆之亡闻也然而不敢以亡闻议也八万四千烁迦罗首八万四千母陀罗臂八万四千清净寶目抉睫而察之亡见也然而不敢以亡见议也无他承佛语也观不取色音不受听是故谓之观世音谓之观自在也菩提萨埵日现前而不知人人其之而不识者无他不得初所发之心也然则以佛语而证菩萨以菩萨而证观世音者抑末已今自欲界圆颅方趾靡不能称此菩萨而印行持诵乃仅法华所载普门之一品盖简质易习也恒语易解也福田易向也若夫合体用备仁智彻上根下器而曲成之则于是经乎终始哉窃不自量倩善书婆罗门书之集工梓之以广示夫含识同志者

宋太史诗集序

友人新安汪道贯手一编而谓不佞此金华之老书生某以见遗者曰吾郡之宋太史诗也余种种指泽末且鱼烂矣苟永之梓必以郡邑之贤大夫而叙必以王先生余悯其意许之宋太史者故翰林学士承旨文宪公濂也高皇帝既卜金陵鼎公首应辟当肺腑寄寻即大位诸典礼制作之事悉以寄之而天子又数称诏褒嘉风厉一代公亦自熹以不世遇不爱其所学尽出而应之上而明光温室之代草石渠木天之纂撰下而至于畸人红女之微节缁流黄冠之吊诡遠而雉裳鸡林之重译亡不以得公一言为重后先十余年间为文大小数千篇合之得三十余卷而独于诗若不能当其什一者即公之在胜朝山中之年凡再倍之矣而其文仅七卷余所为诗又不能当七卷之什一而又且就泯泯宜老书生之所以重叹而迫欲传也余不能识公诗亦不知公诗格所自第繇一斑而窃窥明之所以兴与公之所以大显于明者盖有在也今夫士一操觚翰而业诗即知有五七言近体业五七言近体即知有唐而不知唐之盛而衰孽之盖至于懿昭之际而极矣温韦韩罗诸君子不能有所救改而厘厘焉用其小给之才偏悟之识泛猎之学苟就之思以簧鼓聋虫之耳粗者快于事精者巧于情其萎蕤飒沓之气不待词毕而小夫为鼓掌大雅之士有掩耳而叹息矣以故黄齐白马之祸浅者不见用用者不见免而唐遂瓜剖而为六七歷数世而弗能一宁非其征也今骤而诵公之诗若无以易诸君子者顾其于辞尔雅而不诡寬大而不迫寥处不寒俭歷乱无倾危委蛇雍紆俨然盛世大人之象有余地焉是故英主扫除乱氛云蒸龙变以傅于功名之会而天下之文归之夫岂偶然已哉汪生谓不佞论诗不当尔不佞曰非也所谓彼一时也夫论公诗而公之文亦思过半矣公集成于元至正十三年而揭文安曼硕序之矣其曰太史元官也盖尝以国史编修召而公弗就也梓之者兰溪令喻均也

丘谦之粤中稿序

谦之次其守潮时所为五七言古近体百五十七章而书寓余曰先生幸为我序之是时谦之已去潮而徙蜀之燕中所寓人迂回者数月而后书至则谦之复从燕北下徙矣盖皆用潮事譬也忆余游燕中而谦之数相过从当是时谦之以诗名司农署中而至是已六阅岁谦之诗日益高其名与毁日益偕重而官日益拙吾不暇与谦之论他诗则且论潮诗夫潮自古为逐客地其吏所繇非公而罪即私而鄙其所遭非瘴即寇其异日非死则窜故以昌黎之伉直矫倔能弃其身攻天下之所必救而触人主之甚忌讳疑其于潮若亡所置于臆者然甫下车而牢悻忧悔之念乘之奏荐乐章侈国丰业以希人主之解卑辞大颠以讪讥佛之咎至其发之诗歌如恶水■〈风贝〉风涛泷之险人所狎者若不可以顷刻行蒲蚶蚝蛤马甲章举人所嗜者若不可以匕箸入口其萎蕤沓拖之状使见者虽或怜而亦卑之然未几而征拜相继今谦之所治潮亡以异于古而其风物号为淳美商贾之所辐辏地若缩而近者遂一雄望名而谦之后先所为诗和平丽雅高亮朗郁蔼然治世之音而通人之大观也其在郎署时属世治平无所表见然亦清白一节莅郡之政不至遽逊昌黎第未几而弹射相继嗟夫鳄鱼一犷顽物耳然犹识昌黎而甘下之今以右文不猜之朝其具耳目口舌者顾不能识一谦之何也虽然吾不能剧称谦之诗而仅以区区鸱食鸣谦之之不平亦浅之乎拟谦之矣谦之名某丘氏黄之麻城人

邵弁庄子标解序

今天下求工文章者无不闇习庄子而诵说孔子之徒见辄批根之以为涛张吊诡而皆不得其朕其名能崇庄子者谓其旨往往超宇宙外土苴一世之伦物非孔子之徒所能窥而阴为之者谓庄子历訾十二家之学而不敢及孔子所以尊孔子至矣之二端者皆又非也庄子达生者也而所以为生之理甚精盖至于天机嗜欲之深浅与真人众人之异息固渊渊如也其所别于君臣父子与六经之教则又皦如灿如矣夫庄子非不知孔子也而时时过之所以过之者才高而不胜其无涯之智故也孔子不云乎索隐行怪后世有述焉吾弗为之矣孟氏有言仲尼不为己甚者是故孔子非不易过也然而过之不足以为孔子今夫渔父盗跖胠箠诸篇岂必尽于孔子诋而后疑之其词趣之曼衍肤薄公孙龙邹衍之所不道也而以诬庄子何也吾友邵弁氏用经术困诸生久晚而读是书若有会焉有所标解而因以名之其文不尽载取其粹然者而已其语不尽析取吾之犁然者而已夫简珠者汰其瑟而珠良攻玉者琢其瑕而玉完于乎此所以为邵弁氏庄子也始邵弁氏为诸生诸生咸推之而靡壮色既试渐以不利诸生窃或凌之而靡辱

色其后复见推齿德丈人行充乡祭酒而靡长者色突烟不时暖而靡藜藿色入其里畏垒然入其室蓬蘖然即妇孺不闻勃磳声人以为邵弁氏深于庄子也其行高然不因而恣睢旷荡其文高然务于简约条理而不敢远于先喆之程若俱为庄子之所不契者夫为庄子不必为庄子于乎此所以深于庄子也

有明三吴楷法序

此有明三吴楷法也何以独称楷书之体九而楷居一焉曰大篆曰小篆曰八分曰古隶曰今隶曰正行曰行草曰章草曰大草楷即今隶也其称楷者何楷端木也夫篆分古隶楷之原也自行而行草楷之散也自章而大草楷之尤散者也书之有楷也犹室之有棟也其称明者何所载自洪武而至万历其人则明也独称吴者何吴人良于楷者也称三吴者何举吾郡而云间附焉故也其犹陋于古之吴也为吴郡者人五十有八焉曰郡丞宋克曰侍郎高启曰太子少师姚广孝曰太常卿夏■〈日上永下〉曰中书舍人卢儒曰尚书杨燾曰少詹事刘铉曰武功伯徐有贞曰太仆少卿李应祜曰大宗伯吴宽曰翰林孔目蔡羽曰应天通判祝允明曰翰林待诏文征明曰国子博士徐祜卿曰选部员外郎王穀祥曰右布政使陈鏐曰尚宝少卿陆师道曰国子博士文彭曰学正嘉曰太仆主簿许初曰少宗伯王锡爵曰按察副使杨仪袁尊尼余弟世懋曰指挥使张元凯曰乡进士张凤翼沈昌期曰太学生王宠陈道复王穉登文肇祉王衡曰诸生文从先顾祖辰陆士仁周恭先娄孟坚王应宾曰山人钱绅杜琼陈绍先黄姬水彭年俞允文周天球周光程大伦王逢年陈尔见毛文焕张元举钱允治尤道恒王慎修僧二曰大林曰明因女一曰金用元宾妇为云间者人十一曰郡寮陈璧曰学士沈度曰大理少卿粲曰太宰钱溥曰南安守张弼曰太子詹事陆深曰少宗伯张电曰奉化令徐献忠曰布政使莫如忠曰太学生云卿也其它曰邑尉周鼎樵李人也而郡寓公曰诸生华之方无锡人亦吴属也夫楷而小者合已楷而不尽小者克之阁帖跋溥之陈氏碣宽之吕翁表羽之辞命议允明之赤壁赋约斋序征明之乞休疏稿深之二尺牋姬水之上黄御史诗也小而不尽楷者文东之急就有贞之哀册鼎之东原传跋也不尽楷与小者则应祜之兰亭叙允明之着思序劝农图梅谷成趣园三记宠之琴操也不尽楷而录之者何为其未离楷也楷之寓于行也犹夫骚之寓于赋也其质故犹在也吾郡八之云间二之凡云间以书贵而吾郡以书着度也粲也电也皆以书供奉至大官故曰云间以书贵也天下之灼然名书家者毋能舍吾郡之允明若征明若宠次之而克而有贞而应祜又次之而初而彭而嘉诸君子而皆无下驷也故曰吴郡以书着也然而不尽尔也云间之有璧而度而深也其着也则克征明伍也吾郡之有儒而■〈日上永下〉而应祜也其贵也皆以书供奉者也虽然■〈日上永下〉也应祜也其犹怅怅乎书掩之也嗟乎余盖有深叹焉当德靖间而吾吴之临池者何寥寥也然而允明鼓之征明吹之宠舞之盖肩吴兴而越莆田

双井矣今试号于郡而曰临池者尔来不崇朝而廓之内可千人也其明日而廓之外千人也其又明日而七邑可千人也然而不能抵掌三君子也斛律氏之射获愈多而其大父愈悲也夫书一小道也于何而纪之曰大篆深而近于理当其有以无之体也楷浅而近于用当其无以有之用也结绳不返畴能舍楷曰小道乎哉我未之前闻也

周叔夜先生集序

叔夜为诸生即以文义见推部使者而余不佞与偕歌鹿鸣又四岁所而偕聘公交车曹闾相联接甚洽也当是时余壮好从客豪饮叔夜独不饮而性善病骨立所乘羸马亦骨立三日一趣省瘦影陵竞日中而与之语时时及节侠则毅然有三军不可夺之色间从褻出所作小词若诗以黄庭结法书之或弄笔散草咸妩媚萧疎令人自亲余尝戏之以贤者不可测如此哉而叔夜出守平度州人谓叔夜病不任守寻病良已益自励冰蘖东方诸侯翕然以龚渤海王胶东不啻过也当入覲诸令长为同年醪直例三饌而叔夜仅一饌又尝偕之座主相臣所度诸门生出贄帛已不能当十之二逡巡从后匿迹已而过余言状余戏谓守岁奉不小隃令长耶叔夜谢曰吾奉尚寄之民不忍赋也自是叔夜以治行为天下最迁工部员外郎督清源陶其署治素号沃饶易染而叔夜持之益洁顾其贫与病益甚会予以使事过之得稍稍读其所著书而自是别去终叔夜身不相值夫叔夜与余后先忧居仅衣带水地余尝投以不腆之札一而得叔夜报札亦一当是时余困■〈谷丸〉意不能无望叔夜自今观之叔夜方蝉蜕污浊独立霄表而余卷蛤蜊而食之谁能若士我即叔夜不我弃我何以得当且其时县官急叔夜材为田间起拜二官投之以文秉而叔夜犹豫不及应以死乃余之落魄自放晚而见收再强为大吏竟不効而老于人齿颊间叔夜不死其尚以余非夫哉叔夜死后十余年余识其子绍元绍节因获尽读其所著书凡诗四卷文四卷其文吾不知所衷大较有三变焉家食以还出入眉山父子气溢而材横飚驰电击使人不能正视东秦清源忽敛而抚左史叶玉缕虫与造物争巧楚及归田舒而孟坚又舒而昌黎固不必尽孟坚昌黎然悠乎其味也森乎其籟也诗不必尽盛唐以错得之飒飒乎岑李遗向哉二子又出其所别撰曰学道纪言读之则见其多识蓄德虚心从人庶几乎老氏之所谓贵其师爱其资者又时时出独至之见以参伍之岂唯一家言而已或谓人不可以无年藉令叔夜不果死其进而先秦邺中何间哉或又曰不然窥叔夜指其晚节将欲尽汰人间之有而归于太上所谓人且以为拙吾且以为超而何先秦邺中之足辱予乃谓之曰所不如子言而余跌宕于三寸管以比于刘勰鍾嶸者于叔夜尚有当也如子言而余所构撰卮语若投石于崇丘而欲益其高滴沥于秋潦之陂而欲益其广者子以为奚若或者退而绍元兄弟意未已也掇而弁其集之首学道纪言别有叙

弇州续稿卷五十

●钦定四库全书

弇州续稿卷五十一

（明）王世贞 撰

○文部

△序

邹黄州鷓鴣集序

邹黄州者吾中表彦吉氏也自尚书工部郎出守黄而其于郎时尝贄所撰诗数百篇示余曰请洗心以受弹射焉当是时余甚困于贄诗者如雷同而不可择几令余目逃而得彦吉诗骤若豁而朗者业以苦采薪不能为彦吉效雌黄而姑缀数卮语报虽往往出心赏污不至阿而实未有以中窾也不三载而黄之属令沈黄冈请彦吉诗而尽梓之彦吉乃故抑之名之曰鷓鴣集而示余曰先生而忘不穀向者之请受弹射乎哉余读而笑曰余之枯杨产余肘矣而何以能弹射为且夫所可得效者璞也今子玉也而何所效也余束发而游于秋园获窃寓目作者于今垂四十年矣大约无盛于隆庆万历年南戒而南稍一具眉目称男子从事觚管即仰面而视天诧以隋珠和璧之在我而其雄举者建牙树帜张茅劲表表成一家言苟其力足以矩矱往昔与近季北地歴下之遗则皆俨然若有当焉其不为捧心而为抵掌者多矣不佞故不之敢许以为此曹子方寸间先有它人而后有我是用于格者也非能用格者也彦吉之所为诗诸体不易指屈然大要皆和平粹夷悠深隽遠鉉然之音与渊然之色不可求之耳目之蹊而至味出于齿舌流羨之外盖有真我而后有真诗其习之者不以为达夫摩诘则亦钱刘然执是而欲以一家言目彦吉不可得也夫古之善治诗者莫若鍾嶸严仪谓某诗某格某代某人诗出某人法乃今而悟其不尽然以为治诗者毋如乐记云治世之音安以乐乱世之音怨以怒亡国之音哀以思如是三者以观世足矣亡已而又有文中子者出于魏晋六季之撰辨其深而典者君子激而治者小人碎者纖诞者夸淫者鄙繁者贪捷者残虚者诡急以怨者狷怪以怒者狂若饮上池而后脉之十不失一焉今试即彦吉集掩其名而号之识者其不以为君子鲜也毋论彦吉今黄州守以世叩之识者其不以为治世鲜也盖彦吉所与石友周（闕）氏为叙致甚悉而谬以善治诗推不佞虽然不佞言止此矣苟以千载

之业而归一人以一人捭闳而轩轻一代之作者广用其抑以示扬巧伸其爱以逞捭则非不佞所敢任也其名集以鷓鴣有吴明卿氏阐之故不别赘

吴峻伯先生集序

予始从事尚书刑部而同舍郎吴峻伯先生与河中王文学甫天台王新甫俱以精讫比经断主尚书章奏而峻伯新甫尤名能文章尚书以下有所撰者辄左右顾而非二子不以任诸公卿上事岳牧出镇以不得一言为耻会新甫与学甫相继迁去独峻伯留日益重而是时济南李于鳞性孤介少许可偶余幸而合相切磋为西京建安开元语它同舍郎弗善也而峻伯一见而内竒之因折节定交盖又数年峻伯始繇驾部郎拜臬佐视山东学政而余已忝佐臬于鳞亦自关中弃官归为其乡人而峻伯数使候于鳞辄谢病不复见余得交关其间以谓于鳞于鳞曰夫是膏肓者有一毘陵在而我之奈何为我谢吴君何渠能舍所学而从我峻伯不尽然曰必是古而非今谁肯为今者且我曹何赖焉我且衷之故峻伯卒而新都汪伯玉着状云济南以追古称作者先生即逡逡师古然犹以师心为能其持论宗毘陵其独造盖有足多者所谓毘陵则武进唐应德也盖实录云然峻伯自是参政江右省长楚臬以至开府贵竹其踪迹半天下所至必游名山大川以广其思游必有诗诗必协情实调声气盖庶几高蜀州钱左司之遗晚而稍务为严重称贵体至于才情之所发亦不能尽揜也其文尤善缘本经术中章程往往庀材班范而步武于庐陵南丰间嗟乎士得一当生号名家言足矣亡论毘陵即峻伯不亦彬彬哉且夫其欲衷二子固当峻伯为人清真恬简当其为郎而籍甚声誉业以旦夕异调时肉食者墨而以峻伯饶警故风之不应偃蹇二十年而始有金绯之命其后委迁且显矣而竟用不善事言路见阻归意泊如也峻伯每言令我以七寸管猎声誉市贵要外托以风雅而中躁狭即其言若沈宋若柳州终不以雕虫之技而升中正品固能践之哉峻伯集若干卷其所缺者骚赋古乐府所不多见者碑志盖晚而卧玉华之阳将以其余日极所未竟之意而补所未备而天遽夺之可惜也学甫余丈人行官最贵至少保大司马新甫至少司寇而峻伯少龠齧亦为御史中丞有四丈夫子皆才语云诗能穷人然乎否哉

二顾先生集序

二顾先生者九峻先生某兀然先生某王子曰余少而游公交车则闻九峻先生有声公车间已余窃一第久而九峻先生竟困公交车以死或曰先生于制科经义蹀躞千里步矣而中夺之古文辞故不能驯就羈箠以是屈至征其古文辞则又寥寥不指数也或曰先生不恒属笔古文辞一属笔而天下称之则所寥寥者夺之制科经义故或曰皆非也夺之酒王子又曰余所猖狂于笔砚之技者逾三纪矣知有九峻先生不能悉至

不知有兀然先生晚而始得之支硎深山中则九峻先生子也少而诸生寻即弃之一廛数亩衣食其力所与还往仅一陆舒枝而已亡论它显者不知好先生言即好之亦无所踪迹而先生时独坐微吟兀兀若醉者故自称兀然子先生之为诗以徜徉媚己而已顾无制科义及酒足夺故所著视九峻先生加多云余观九峻先生流易自放天真烂如华不至靡劲不示骨其启兀然先生毋亦少陵氏之必简乎哉至于颂诔则潘左伦也若兀然先生诗出之悠然扣之铿然味之冲然庶几乎天动而神游者已其人酌乎元亮子光之间语即孟襄阳储光羲也而时时入青莲材小不称耳有沈生者迫欲行二先生言遂识之夫兀然先生业挫名当不以色得其或用九峻先生而不余废耳沈生其谓何

孙中丞登马鞍山倡和诗小叙

礼称登高能赋为大夫事夫三百篇即田峻红女亦比比能之岂其释寛博负仕版而不能当七寸管任而必待于大夫夫亦以顺风而呼之不加长而响应者其人也耶彼夫播之而闾阎则为风采之而清庙则为雅若颂若吉甫诸大夫之穆如者以视吏民故易易也大中丞孙公按部昆山登马鞍之颠慨然得三韵二十八字以属刘尹俾其勤恤民隠而加之衽席盖戚然有余思焉刘尹既拜诲则请得公手书勒之石而合诸荐绅先生步而和之谓不佞识其后夫马鞍之为山以奇峭尔雅甲吴中自唐贤之咏之而和者代相踵不乏然大要不过搜剔怪胜流连韶景达者状其旷适穷者志其牢骚眺遠而怀旧者出其所寓触于耳目而已未有一吐辞而不忘加惠元元若孙公者不亦休哉昔吴季子聽十二国之歌至唐而独曰思深哉其有陶唐氏之遗民乎不然何忧之遠也孙公唐人也其示刘君而所谓极目关忧者飒飒乎前旨矣非令德之后谁能若是不佞不解称诗如吴季子乃孙公俨然临之亡埃西北其辙生而得窥唐风之遗幸矣幸矣遂姑以应刘尹

州幕刘君四膺旌獎诗序

刘君之佐吾州幕者二载所耳而四膺诸台獎诸台獎言人人殊则无不以廉首者余自束发为诸生忝朝籍积四十年而里居之日十之七所覩州邑自参佐而下其事上官多苛责办案牍逢迎间小不给则诟詈庾粹之不免而及其苞苴请托公攫于昼市则若不闻也者而过之甚或更用是得美言以沾沾骄于人夫上下之交相蔽欺若此以求吏道之理胡可得也今刘君寅而出酉而入一羸马青衫于兵使者之门间有所受事则务孜孜求当于单赤之情而不夺吾之操而已未尝脂一言工一步以希上之人颜色而上之人之信之不啻刘君之自信藉令诸州邑参佐尽得如刘君上之人尽得如为刘君上者吏道恶乎不秩然理也刘君之先有从靖难起而积文资至大司徒加太子宾客者

丈夫子自光禄卿出行太仆孙为太宰大司马加太子少保卓然三世名臣刘君不自言毋由知之知之而为刘君言之乃刘君蹶蹶不欲闻曰公卿之后而为趋走小吏甚愧不佞则不以为然以陈太丘之后有拜司空大鸿胪者乃世人之目之则曰公惭卿卿惭长今刘君宦未几何即负循吏声拜娄樊且也以所赐金置馈而羞之先公曰不敢从民间荐一盂粥也吾知刘君之无色惭也已于是欣然从学宫博士弟子请为诗而叙之

中泠馆集小叙

楚王孙镇国将军仲和博古多通嗜秋若渴尝治圃武昌城中为高楼俯瞰黄鹄矶其下有井与大江脉通仲和饮而甘之名之曰中泠其馆亦曰中泠馆夫中泠天下第一泉也在金山之麓修纒百尺引而出之或曰非也在郭璞墓之稍北中有旋涡蹙沸处余既从仲和得所称中泠馆与诸贤大夫士之篇且读且倦假枕而寐梦一道士霓裳蹁跹揖余言曰吾金山君也自吾泉之品贵于陆居士羽而见嗜于李太尉文饶以太尉之舌不啻易牙其上流若金陵之石头城下水相距不二百里而能辨之且夫更自此而上流可二千里而始为武昌乃能辱我中泠之名者误矣傍一人解之曰非也自李太尉之嗜此水而入秉中书轴镇海之节使者月为致此水邮置苦之有水递之目一日有异僧来谒曰公毋溷此邮置为也长安其坊井与中泠脉正通太尉乃取此井及中泠杂它水十余器荐之僧独取此二器曰皆中泠也太尉为尝之亡以辨也而水递停矣今者安知武昌之不为金山而仲和之井不为中泠也耶余应之曰皆非也夫水未有不自天一化者也其性殊其味殊然而其源未始殊也吾不以甘苦别之而以恬澹受之通之于玄膺而纳之于玉池泠然太虚之渊而盎然太和之府天下之水皆中泠也毋论仲和得称之即金山君不得而擅之而又何哓哓焉醒而志其语且为诗一章以贻仲和

净土羣书类选大成叙

自佛教东被而仅以福田利益之说为众生媒高明之士如法潜道林辈不能得其精而姑以庄老之绪言饰之其辞弥修而旨弥阔独逵公昆季能取如来之喻舍利弗者而创白莲社菩提流支又能取如来之喻韦提希者而授鸾法师净土之教遂大行于天下然如来大要欲以兼摄上中下智权实并显而下智者执其权而尽以为实则求佛于佛土而不求之心上智者悯之曰即心即佛而已如来盖尝曰随其心净则佛土净而为之徒者遂举（阙）而尽以为权曰无所谓净土也呜呼非无净土也自是二家之学更相诋排若聚讼而有能兼撮其标者永明寿之外盖寥寥焉当宋之障其文言训故毋论吾儒即奉西方之教者前后撰述亡虑数十万言往往枝蔓不根张皇过实其较欲以诋诃异见壮罔甚口噫嘻岂如来使之哉友人左冯王赐绂乃独能荟蕞诸说之精者而汰

其复杂者又为之创例牖绎使人一展卷而涣然解跃然慕吾不知王君之视遠公流支功德如何觉此报身栩栩莲花间矣虽然吾窃谓王君集此以利人则可以自利则不必也吾尝窃笑夫禅者之与奉净土者其流不能一而讥夫教典者之辞之漫则一也今禅之书为百千卷而净土之书亦百千卷然则何以谢教典者讥也君其反之心而已随其心净则佛土净此非禅者语也如来语也亦何以书为而况更百千卷哉君尝令二岩邑有声弃而学佛有三丈夫子其二子已应进士举不顾支一策编游五台少室东渡江访余于县阳之馆被衲经行者三年不肯归出处约略如刘遗民陶靖节而精进过之余甚嘉其志行之笃也故为之僭叙其简端

潘景升诗稿序

歎故未有诗有之则汪司马伯玉始自司马之为诗而仲氏箴之诸少俊相焉不可指数而潘景升其最衰然者自司马之为诗好言济南江左属济南已先厌人世则诸少俊之趣江左不可指数而景升又最其衰然者江左为谁不佞世贞也当景升之荐始其稿曰蒹葭馆已又荐其稿曰白榆社已又荐其稿曰东游不佞览之鞞鞞如也诵之复锵然中宫商乃掩卷谓曰子之诗质文剂矣情实谐矣抑扬顿挫足矣可以雄矣子年今何许曰三十矣然则子之所未备者体所小不竟者变而子之所不乏者年而又何不佞之问曹生从傍请曰固也景升业已游建康钱唐将北走都会揽声名轨物之嫩与诸贤豪执文之辘敢藉先生一言之弁以重不佞笑谓景升曰子以我重子乎将子重我乎坐吾语子夫子之诗不藉我而重抑我之言亦不能使子重何以明其然也昔者陈拾遗之造都下也以一寶琴而聚诸贤豪之目既聚而出其诗百卷即椎寶琴而碎之而价踊贵何者以琴之寶不若文之寶真也今子之诗拾遗也诗而我之言琴也何所藉我重也吾有友欧楨伯者一大老欲用之两制索其所构撰得浮淮集而袖之三日不复报已而谓所亲曰不必读其诗其为序乃一怪妄人耳谓不佞也然则楨伯之重以不佞轻也而何能子之重也景升不怪曰曹生之请误宜先生之詆詆拒也夫我以求益者也非为名高者也然则不佞已言之子之所不乏者年子发于机而中于则充实而光辉大而化之是在子而已矣毋论江左即济南而上而天寶而景龙而建安而西京皆筌蹄也我且为琴碎矣不然归以质诸汪司马

乙西南都序齿録序

万厯乙西南畿乡试事竣诸试而就荐者有鹿鸣之会毕则复为私会其次不以名而以齿乃复各出其家世祖父子弟之详録之以志同升敦世好也谓余有一日长相率而来请序余不获辞则进而语之曰多士而今而乃知有让乎哉始而之挟册而入也人

各自贾其勇以争先而求胜也若射者之争先而求破的也揖而升下而饮大较以让之礼矫其争故曰其争也君子今多士之为此会也则尽绌争之心而为让殆犹贤乎射也且夫礼之重齿也则孟先生志之以媿于朝廷之爵辅世长民之德而为三第曰乡党而已而不知君之世子甫十六而游太学以与齐民齿大祀之饩燕毛以第之而亦曰序齿则齿之为典伸于朝廷宗庙而莫敢废若是乎其重也夫岂直乡党而已虽然自此而进公交车则以射策之高下而为序齿弗与也服休服采以行能为大小齿弗与也十载九载以职业课殿最齿弗与也一堂之吁咈以公是公非为可否齿弗与也同道为朋退食自公济济雍雍而后齿之用显齿之用有礼而无饰有厚而无私出乎巽成乎睦如是而已若夫当仁之不让于师则然而况邂逅之适托称为兄弟者哉且夫而之所筮出则高皇帝故都也其产则又高皇帝乡也二百余年所滋培而登进者不啻数千万人乃有今三相国若夔龙伯夷之相让于旃履之表多士亦可以兴矣彼区区世好之谊故可略焉是为序

乙酉南畿岁贡録序

不佞读功令至国家所以待诸生之典未尝不废卷三叹也诸生诵法孔子业操觚从事经谊则登之学宫使其师长玉成之未已而特设宪臣以课试之拔其尤者俾饩于宫以无虞于膏晷而三岁一试之拔其更尤者列名于乡书明年复大试之复拔其更尤者置之鼎甲授京朝州邑大僚以至公卿辅相即不及者不害为郡贰州邑之长乃又未已而岁取其饩之最久者二人而得一焉饩最久则不能无日暮途远之色而其途抑而次之三则又不能不缩焉而小沮呜呼是未知其所以重也故事诸举子之僦于南宫者天子始为之临轩而试之今者诸生之贡天子亦未尝不临轩而试之也且委目于师保侍从之臣其出而为师长也则大宗伯大冢宰又三试之留而游太学则复受经于祭酒司业积成而后为选人其选小亚于前二途而已即不自薄而受试而京兆其得称尤者列乡书不异也然则国家之所以重诸生何如也自不佞之奉玺书董南畿学政至乙酉而有乡荐获预观人文之盛甫竣事而复举岁荐之例以有诸生诸生毋亦谓使者姑以资而见推不克自振耶即使者以资而推若天子故不以格而限若也盖嘉万之际两诏旨倦倦并隆于三途可推已诸生勉之远毋论公孙平津董广川不有擢巍科升甲第而步武木天者乎次之不有举令长博士高第入备台察郎署者乎虽然此但其遇焉耳途有三而尊主庇民之心一仕有显塞而志行政术无两此则不佞所以望诸生者若夫志同升讲世好诸生固自饶之非不佞意也

冯氏家乘序

冯故姬姓毕公高之后而其为晋卿者曰万万之别为魏其支裔食采于冯城遂别为冯春秋时有太叔者自是谖于齐亭于韩去疾劫于秦唐奉世野王异于汉伉于唐京于宋胜于明冯固鲜它姓其人又最显重且贤而今按察副使某某甫之着世谱也志其略而弗系曰吾以避饰也当冯之自中原徙而江左莫谂其所自自嘉禾之繇大匏徙濮市里则灼然矣故断自九世祖节一公始节一公之后冯遂林林殷殷矣一按之而可悉也世谱之外有凡例有行表有恩典有艺文有宗范合之凡六王子曰余读宗范而知宗法之通于治法易易也其亲则天矣其伦则人矣其情则洽而法则哲矣反之而敦睦之念有不油然而生者乎循之而画一之规有不肃然思守者乎传有之一家仁一国兴仁一家让一国兴让是谱行环冯而里者其兴仁让可推也环冯里而州邑者其兴仁让可推也吾故曰宗法之通于治法易易也诸为谱而传者曰苏明允氏法整矣而失之略曰康德涵氏曰李献吉氏辞古矣而失之讪若某某甫之为谱也即无论其文若何匪略匪讪吾于兹有取焉故不辞其请而为之序

止止堂集序

止止堂集者少保左都督戚公元敬之所著也集之部二曰诗文则横槊一编既之矣曰著述则愚愚一编既之矣不佞获卒業焉作而叹曰吾今而后乃知文武之道也当三代之盛时其公卿大夫若伊周太公望仲山吉甫辈皆通极于道德性命之奥究于太上之所谓立而后以其绪措之而为功宣之而为言其所谓功者不相则将而所谓言者诵而训诰咏而雅颂要非有二途也秦汉而下虽将相之任未判然而其学无所根柢以故其用不能相通贯然营平之议屯田与武乡之表出师此皆于矛盾之上得之何尝不浚泽通理哉彼其于道犹时间有所闇诣故也嗟乎绛灌无文随陆无武即绛灌之武吾未之敢议不知随陆之文其于文果何如也元敬自束发而从军者踰三十年南靖海北备边横草之功勒于五熟之釜遂至师保极人臣三十年之间未尝一日不被坚执锐与士卒共命于矢石之下何暇握管谈艺哉以今覩其所著存而彬彬者师旅之什发扬蹈厉燕闲之章清婉调畅纪事之辞委曲摹写誓师之语立发剔腑然此犹其副墨耳著述之编迹若以为巷史黄初者顾其大媿在于推物情穷时变洞阴阳之消长验人事之得失曲而中肆而隐往往于身心实际出之机有所不能秘念有所不能忍始稍露其一斑于兵法焉吾不敢遽以三代之合称之然何至作傅修期杨处道工一檄长一咏而已也元敬既得请解岭南帅符过余山中而出其书曰愿以此受一言摘余少长于元敬二岁弱冠汨没于铅槩今且老矣方有子云雕虫之悔而暇为元敬叙之虽然元敬不得余亦必传且谓元敬传余哉余传元敬哉

六经稽疑序

弇山人曰大梁盖有周宗正灌甫氏云灌甫少负异质以古文辞名中原顾意殊不屑之泛澜百氏且徧而后叹曰舍吾梁肉而蹙额而昌歎之嗜何也盖求之六经哉于是尽治六经夫以孔子删述之教昭明如日星而所从诸弟子不得尽得其精神心术之微而各以其习识为传训盖一二转而愈失之中间烬于秦蚀于壁亥豕鲁鱼于傅写则毋论其意义而已于文有不能尽通者于是汉儒之注疏起圣人之迹赖以存而圣人之心亦日以晦盖歷千余年而后二程氏出若能独发圣人之心而駸駸乎上接其统朱氏益加精焉以至胡蔡陈皓诸巨儒咸有所训故圣人之心固寄以不晦而于辞与事亦有所不能尽合者明兴文皇帝大集馆阁臣修五经四子业而一时浅儒因循乎旧不能有所折衷虽百余年来学士大夫资以进取而高明之儁直揭帜建牙以相胜博雅之伦间指摘一二异同以示别盖迨于今尚纷纷焉自灌甫之尽治之诸传疏训故无虑数十百家胪列于吾目而唯吾之汰苟其是则不以世之所忽遗者而废吾是苟其非则不以世之所趣沿者而废吾非其所治经文讹者正之衍者去之错者理之若礼经而非出于圣人之笔则亂之必不牵合傅会以覬人之知而无我罪今所行六卷彬彬焉虽不悉繇灌甫臆其于道亦足称尔雅矣昔者河间献王仅能不爱其财力以收经籍之遗实鲜所发挥刘中垒稍稍有所发挥矣然道术之岐错而不能雅驯尚灼然为汉贤宗室表灌甫视之当何如哉大梁虽一城周之孙子其丽不亿咸执经而受灌甫业尽洗信陵梁孝之好醇如也则灌甫之所嗃矢宏矣

王给事恒叔近稿序

王恒叔为给事中在申酉间所抗论国是天子为之敛容以聽举朝震动而一旦请告归卧天台中久之聚其所著诗文若干首而授世贞曰吾于前辈所推挹三四公未尝不高信阳之才与迪功之调而惜其短北地之莽莽歷下之矫矫其犹超乘乎哉恨生晚不获从事于橐鞬鞭弭之末也岂可以当吾世而失足下其不即惠一言之弁则请受丹铅焉以当绳削世贞谢不敏敬报给事古有曹子桓者其人豪士也挽当涂之卓以沃炎烬噉吴蜀不足饱而惓惓谓文章为不朽盛事与北海公干之流较短长于七寸之管少陵昌黎诗文雄耳生平之精力意气约略尽于辞藻间而至薄以为小技不尊稷契其任必欲自显见于救房相排佛骨之二章即毋论三君子后先所习与所志殊要之二者皆并重不相废也吾向读恒叔所上封事为之咋指称叹以为文莫有大于此者且夫大丈夫不胜感慨一念用其壮于半夕之思晨奉皂囊叩神虎门行则天下蒙福不行则万世归名岂不亦简易宏博哉恒叔既已得之于彼乃不自快而精意于旷日持久世所不一切好之业如此使其遇子桓当何如其契也恒叔于诗无所不精丽而歌行古风尤自出人意表其索之也若深而甚玄既成而读之则天然无蹊径痕迹矣文尤能近西京出

入史左叙事委致而以险绝为功至于谈名理探禅那往往有心解神悟者窃谓恒叔之进于道易也即不然而山中之业成更出而毕少陵昌黎所谓者亦岂难哉彼前辈三四公恨不值恒叔耳不恨恒叔不值也于是恒叔得而弁诸简

重刻幼幼新书序

上古圣人其视黔黎真若一体稍得其所以生者即思去其所以害生者以故炎帝甫制耒耜教民树秫而五穀之外百药性味之所宜与对治之法君臣佐使之用加继之黄帝之世其人甫息肩于兵革即忧其灾厉疹疾而岐素之道显彼其一日而不能忘卫民之生也如此然圣人之于民老老幼幼宁有二观且必自幼而壮而后老而至于幼幼之术抑何其简略不备哲也至秦越人之游秦以其地贵小儿始为颅■〈〈臄，去巾〉页〉医而张仲景之高弟卫泛衍其方而得一卷已尔若夫仓公华佗徐氏父子之术神矣而未有称及幼幼者何也岂圣人之仁其心思尚有所不及而三代之民不甚爱其子耶将无风气朴茂所得于先天者不薄而夭札之虑少故也然自余生长闾里间耳目所覩见人之生以日计而得全者十不能七也以月计而得全者十不能八也以岁计而得全者多矣然痘疹乘之则十又不能六也夫痘疹于幼为甚危而医之于方绝不及者何也或曰其症不起唐以前第不知所繇始考之前史备载人貌之妍丑正徧独不言疹廕其然哉夫幼者之为疾非若壮而老者之有七情五欲焦心劳形以为囿其感也不烦而治之若稍易然儿不能自名其所苦与所繇病状欲方寸之指而察其脉则甚难天下之为人父以律为人子者之情则老者差急而少者差缓然以事理论则老者所必至而少者尤摧阨而可悯用是而观凡唐宋之际有能究颅■〈〈臄，去巾〉页〉及痘疹诸方证而笔之书者其人不必圣人其所用心与操术则圣人也宋故有幼幼新书长沙刘帅托善为方者王厯王湜萃诸方而詮次之而李庚为之序者也凡三百余年而尽散佚不备吾郡之精于医者陈以端氏奉其父之遗意求之二十余年而始得其全念其传之弗广也订其误删其复而手书之以授梓人于戏若以端者不亦圣人之徒也哉窃闻之主上高拱渊穆日勤思元元恤灾赐租必欲使斯世登仁寿之域而后愉快然则是书行其所以阴翊王政不浅也是故感而为序之

吴曰南集序

观察使者雩都李公为余言故守寶应令时邑诸生有吴曰南者其年差长于公公不以弟子蓄之置之客席而曰南亦不敢自居客两人交折节而谈古文辞甚洽也俄而公出一编凡数种有观槿稿竹西集白云稿折麻集水影堂编月舫集曰南之诗若文皆在焉又出一牋名为上李公而中皆齿及余以丹铅之职见属余不佞获卒業焉则其诗

辞旨清丽神采流畅发端必工尾结必遒有色有声必露蹊径吾不知于大历贞元何如置之隆万之际灼然巨擘也文之取材尤更古雅虽降而就时趣左马翩翩之步自不能掩夫淮南水清而土沃最为文彩风流之地至明兴而称操觚之儁能追踪古之作者指不可多屈竇应瀟湖一小邑耳而有朱升之参政与其子九江守子价升之善何李其趣正而平子价善杨用修故其诣险而丽升之之长在风骨子价之长在才情升之有体子价饶态虽父子并振而文武异用其在曰南可谓能兼之矣夫岂唯能兼之抑且折衷矣李公言吾物色淮南诸名士少当意者独一吴曰南夫子胡尚未知也夫余于天下所操觚者靡不闻风而见趣其姓名与其辞皆能举之乃其知曰南何晚也非李公几失之虽然犹愈于终不知也公又言曰南以岁荐危得官弃而徜徉乎寂寞之野夫岂亦函牛之鼎不可以小烹要其中必有以自信而自乐者嗟嗟如既有以自信而自乐何所藉不佞为公曰彼非藉子而后信且乐其信且乐当藉子而坚且天下知之不为多一人知之不为少扬子云方对鸱夷而草太玄意若无所营者至天下皆以覆瓿而得桓君山之一诺谓子云不跃然起吾不信也遂次其语曰吴曰南集序

弇州续稿卷五十一

●钦定四库全书

弇州续稿卷五十二

（明）王世贞 撰

○文部

△序

王承父后吴越游编序

昆仑山人王承甫始所为诗曰吴越游其之闽曰荔子编之楚曰楚游编其最后曰后吴越游荔子编余业已序之矣其时不能尽承父而余序亦不能尽承父诗已而与承父交益坚其知承父益深乃为作昆仑山人传意以能尽承父矣既而承父出其所谓后吴越游者而属余以序余乃曰吾之不能尽承父于荔子编固也至昆仑山人传于承父生平得十之九矣而承父若有未尽者何说也得非以兹编哉于是取读之凡五日而后卒业大叹咤曰吾诚不能尽承父吾负承父吾负承父立为之叙叙曰余束发而谈诗自风雅而下至于近代亡虑数千年于条格升降无虑数十而所考镜若黄初建安六年以

至三唐两宋胜国其人无虑数百千而体亦因之至明兴中叶而北地信阳歷下之辈出乃能以一人之宏识而尽擷羣有之高举囊括包并若力政之于六雄可谓体具而功不易至承父独不然以为事与景者天地所自有之物偶遇而收之情与意者吾所本有之物偶触而发之耳彼吾役也吾不彼役也然独承父之材甚高工力甚至以故其句就而色自傅声自律篇就而用恒有余当其忽然而至沛然而出风驰电击纵横■〈足必〉跋于广莫之外使人心悸魄夺而不可禁而悠悠旆旌徒御不惊之气象自如也及乎别心为字琢字为句或陡削峭拔或宛曲绵丽骤读之而恍然若新既讽之而又恍然若故则人工之极叶玉而与真玉同求其雕镂之迹不可得也承父于诸体无所不精歌行尤其至者五七言絶五言律小次之七言又次之其编可十卷五卷而前犹不能尽去何嵇巧儻之累五卷而后则以茂功之不败而兼万彻之大胜无余憾矣谈者尚谓承父上之不能超景龙而下之不能汰咸通以后为恨嗟乎此所以为承父也以承父才使浮慕其名具体而必古之是徇以与三君子角彼所（阙）袭三而为四不难所以为承父者漓矣余老且厌吟咏其于序学士大夫诗亦不胜窘今独欣然而草承父诗序岂唯毋负承父亦且毋负我耳是编也梓而行之者吴江令徐君元其识承父最晚而最真今以高第拜御史

余德甫先生诗集序

当吴明卿之见过而以余德甫先生之讣来相与悲诧久之即有意掇拾其遗文辞以传又三载而先生之子棐以朱用晦之状来请文其地下之石许之业脱稿矣而棐意若有未已者袖一编出之曰此先府君诗也吾子其有意乎叙而传之余谓所为地下者称先生诗已详且吾于于鳞也传而不再叙棐再拜请曰昔者欧阳永叔之于梅圣俞也志而复序之其于苏舜欽也叙而复志之人固不以幸艳二子而以友谊归永叔吾子之以李先生辞固也独不曰有宗徐二先生之例乎哉此当自有故不然岂其于二先生厚而李先生薄且夫志者兼世系事行而纪之者也其称指博于法不单行序者序所撰着也其称指專且于法得单行是故愿及棐之未即沟壑而覬吾子也余因稍取读之则先生之诗一而先后几三变始先生入吾社时喜于麟甚其缓步张翥竖颞扼肾皆精得之然而其所自致者不能胜其所从入者是故词组出而重邯郸之价然犹未免蹊径之累归田以后于它念无所复之益搜别心腑冥通于性灵神诣独往之句为于麟所嘉赏然于麟遂不得而有先生其又稍晚运斤弄丸之势往往与自然合或于麟或不佞或大厯或贞元要不可以一端目之大要突然而自为德甫然置之古人中固居然亡愧色也江右之名岳大江扬澜左蠡以竒丽甲天下名相宏儒之业有非它藩所敢望者独于诗未有以称也诗之病起于半山而成于双井是二君子其源非不出自少陵特取其工与老之似而加蛇足焉半山之工工而穿凿者也双井之老老而僻涩者也又不幸而有吕居

仁之輩为之社而尸之其毒浹于肌髓而不可救明兴大绅子启狂奔亡论已弘正之间一二操觚者意若有所滥觞而识不称才筭路蓝缕虽勤而未辟呜呼先生死矣改社改木疇能舍先生尸哉先生于诗古近体亡所不致佳近体独超近体五七言亡所不超七言律尤妙吾得而叙其凡若欧阳子之所致叹于梅苏二子之穷不遇者先生固有之然非所以论先生也

朱宗良国香集序

朱宗良者豫章诸王孙名多■〈火贵〉者也当宗良时诸同姓子侯居闲鲜事而豫章无重王填拊之小不受宗正约束弃其日于鸡狗屣瑟之社宗良少亦时时中之已而折节自勉励为古文辞当余之罢青臬归数岁宗良诸从中有用晦者以其所业寓余因定交焉宗良年差长于用晦而通余独稍迟得其诗亦晚然自通余之后其诗之进如日升而川盈虽宗良亦不自知其所繇至也余既以病屏废然不能尽谢笔墨而少年噉名者犹日聊萧之顾剽袭蝇扰讥誉蛙沸几令人厌而思唾偶一念及宗良走书询之谓能以新诗悉贻我乎我当用唐人诗例而字之曰国秀时宗良方危忌者邑邑不自得尽哀其所著各体曰石兰馆藁者凡如干卷谓王先生幸赐一言之评以为异日不朽地余得而尽读之大要气清而调爽神完而体舒其用事切而雅入字峻而穩运思深而不刻结法迻而有余味即不能尽舍歷下信阳之筏而登彼岸要之其发于机而止于成器者自不可诬也嗟乎以献吉之在大梁大梁朱邸何啻数百千日枳金饌玉以客献吉而不闻能袭其馨咳小自显见者余乃于数千里之外而坐得宗良抑何幸也自古称天子懿戚若淮南陈思贵至戴逵游御朱绂然犹不胜其懣懣宗良之困极矣其巨丽固不敢遽望二子而有以自乐于不朽之地意固胜之藁初曰石兰宗良志也兰者国香也请更字曰国香而为序之

王司业先生文集序

王司业绳武先生之诗删于仲子逢年之手者余业已叙之大要谓先生能采建安六季之材而归开元大历之格其颀颀吴中前辈表表可指数而未有能名之者盖又大其材而惜其不终遇也亡何先生之次孙德安太守炳璇复刻先生之文于中郡而贻书属余则谓先王父不幸而不遇于时幸而遇于身后以有先生序先生序乃独诗耳先王父之所重者文而文之所重者在章奏为其可以靖所蓄而献人主以益于世乃悉受而读之大叹诧曰嗟乎吾几失先生哉明兴高皇帝以马上得天下业有文矣而是时金华乌伤以瞻博显杂以宋人之撰成一家言易世而庠陵出始颀为欧阳氏体虽不能尽得其步骤而以典雅闻台阁之业几成而不可变德靖之际北地信阳稍出而倡西京然不

能以其实胜于是两相持而不相下嘉靖之季则华州内江诸先生始改玉矣而其端则自先生发之先生之读中秘书其偶凡二十四而留者仅七人是七人者往往自庐陵而上追昌黎氏而先生为最又时庀西京之赋而阴益之以故祖西京者不能尽收先生而绍其统祢庐陵者又不获奄有先生以为羽翼其知先生者则鲜矣先生尚以为雕虫之技而小其用故其再起宫坊佐成均于宦路嗟畅则慨然以贾长沙刘中垒次而陆忠州自居属边境有未宁先生上疏请使使赍遗金帛于别部劲者俾为外援苟得间则以一军出鴈门一军出居庸左右犄角夹击以集大勲其语甚壮而台谏以非所宜言沮之先生意愤愤而会上久幸西苑辍不视朝且有赞御之变乃复上疏极论天子当深居法宫左右前后执戟传警以备非常岂可栖止单外以万乘之躯试不测地因请上还大内改元更新天下耳目以布励精之治时上心讳还内而名恶改元谓非故事罢先生官屈不复振矣先生前后具疏多国家大计而尤长于礼乐家言故尝请祀薛文清公于孔子庙庭又申明太学四事九庙灾疏谓春秋哭灾汉氏变服令诣陵题主宜皆中反虞之义不得以吉礼从事又谓宗庙石室藏主为宗祏公羊高曰主藏庙室西壁以备大汉仪藏主西墙堦中堦即石室也今建太庙宜于北壁凿石为堦纳主其中以备古礼前后有报许有仅报闻而识者咸黷之夫长沙中垒忠州或早弃或中蹶或晚蹶若不尽异先生然皆位九卿取宰相而其言为人主所信采未有屈而不振如先生者则命也是三君子皆以文章妙天下忠州用宏辞进而不闻有篇什中垒则尤寥寥矣长沙有赋十余篇今皆非其至者宜乎先生之重在是而太守之欲得余序于其文也顾余束髮从事铅槧独不能得其要且重者终其身汨没于耳目之好而尤见役其愧先生多矣故强颜而为之叙

张昭甫诗集序

大梁张（阙）甫司理晋陵过余而谈古文辞甚洽也已而出一编示余曰此吾弟昭甫之诗而不佞为次之昭甫之试于大梁也实先不佞鸣今者不佞忝再佐大郡而昭甫犹初服也昭甫素好吟既不得志于公交车则其好益甚兹集成不知可藉手以荐先生乎余读之曰可则又曰不知可藉先生而传乎余读之至再曰可以传矣则请受雌黄焉既而请序其称致友于之情良苦余迫司理高谊不能辞序曰河南于古为天地中周之都洛其文献皆从徙当冠被寓宇而识者乃以为诗亡非诗之亡其道亡也东汉而都则犹周矣其诗若小畅而卒不能媲西京五季而末其都则稍徙而南为大梁梁亦中州也然而未闻有以诗标举者盖数千余年而李献吉氏自北地来大梁一倡之何仲默氏自信阳应之嗣产大梁者高子业氏羽翼之已复寥寥其人矣昭甫岂有意乎哉吾不敢遽谓昭甫能虽然适燕者北其轨游越者南其艤勤而嗣之未有不达者也昭甫运思必新出语必雋偏诣之铎警拔动人苦心之致间成自然或边幅小不足四声小未和耳此二端者子业百一有之北地信阳不尔也夫攻诗者犹之乎攻璧者也昭甫之璧辞璞矣

其器完而理就小加以润泽则连城矣夫力追三君子而上之振宋之衰而文东汉之木毋使千古有诗亡之叹则有昭甫哉斯集也谓吾以是尽昭甫则不能谓昭甫而止是则不可相千里者取汗血可也

刘（阙）游山诸记序

刘（阙）松陵名家子以经术补诸生古文辞夺之既而复厌之悉弃书不习习西竺言已又兼习养生主言颇能抉其秘而家故贫至是贫益甚居恒叹曰向子平何人哉必婚嫁毕而后游吾立槁此蜗壳矣今年丁亥春云间宋生少而有物外致邀之与偕谒齐云攀黄山白岳之崔嵬还泛明圣纵游六桥三竺两高收飞来石屋烟霞之胜在股掌间俄而击汰钱唐溯桐庐挹严滩遂陟鴈宕跻其顶访天台石梁观瀑布抵永嘉而休焉恍若与谢监孙兴公相值游必有诗且有记归而出其橐得记以诧余而谓且序之余尝谓邃古之文章无如汉两司马而子长甫二十则已上会稽探禹穴窥九疑浮于沅湘北涉汶泗讲业齐鲁过梁楚以归至于略定邛笮冉駹斯榆之地西至沫若水南至牂牁为徼通灵山道桥孙水以之邛笮此则长卿之所徧歷而子长为郎中时所同者夫以跳荡万余里与日偕没其间名山大泽何限惜天之未启衷不知有记不能发其奇以与之争胜于宇宙而其后知有记者又多萎庸不称独一柳柳州稍有致而僻在荒服且以牢慄聊萧之旨当之宜其至今不相值也某某之为记不敢遽谓值所谓名山大泽者亦不藉某某而传乃欲托以不朽其志则甚大故人何憾盖尝叢古今之游名山而记者悉梓行之于世某某晚其犹在梓之外也所谓不朽者将在余序哉将在余序哉

春秋左传注评测义序

为春秋而著者凡四家左氏最先出而其大要在纪事与言时时有所发于经而不尽为经役公羊谷梁氏乃以其所得于夫子之门人者而各出其意以释之盖终其书为经役而不能尽得经之旨第公谷之为弟子者能世世守其说至于汉而益盛而左氏不复能然自胡毋生董仲舒始治之刘歆独超乎其父之见而尊明其学太常之移几糜躅于羣喙而不之顾嗣后寢有闻至杜预而益精详于训故参伍诸家之说而订正之然其意实先传而后经是故其合者或以传而证经而其不合者多饰经以从传精识之士犹有所未满足至宋胡安国氏之传出宋儒隆而尸之右文之代乃遽用以颁学官式多士而三氏皆绌矣左氏虽绌然以其事之详而言之妙且艳也纂史者用其凡摛文者擷其奥如日星之丽霄愈久而愈煜如顾杜预之治左氏不必悉当而诸家之翼之者又多散见错杂不可编究凌以栋少习春秋而于左氏尤称精诣中年以来乃尽采诸家之合者而荟叢之发杜预之所不合者而针砭之诸评隲左氏而嫩者皆胪列之左氏之所错出而

不易考者或名或子或谥或封号咸寘之緬首一开卷而得之不唯左氏之精神血脉不至阙索而吾夫子之意十亦得八九矣夫经以志史以记此自古两言之然而文中子犹曰史之失自迂固始也记繁而志寡其独不訾左氏者志与记不偏胜也左氏臣春秋而素杜预臣左氏而忠以栋之忠于左于杜其尤炳然哉盖以栋之于太史公班氏皆有书曰评林而兹独曰注评测义曰注曰测义则进于评矣余故得而序之异日左氏之乡有岿然而宫者以栋不在两庑而在堂坳之间矣

蒙溪先生集序

嘉靖中南昌张公为左司寇而余守尚书郎公故尝读中秘书操握文柄有冰鉴声而余自吏牒外不敢以雕虫之习进盖仅三月而留都数中倭赤白羽不时上天子心器公超拜大司马乘遽之任公至则搜卒乘励甲镞峻睥睨广间谍倭益避徙去无事而会卒之悍者愤少司农之饷不继噪而戕之公驰单车于白刃之林以片言缓其锋而徐出奇筴捕诛其凶黠而卒不能胜忌者喙解机务以归盖又十余年而令终于大臣之恤咸备公故廉不治生歿后家日以落独所著述甚富而不能无遗佚其最少子繁竭力搜辑仅十之二以走岭大帅连江吴公为序而梓之繁复走白下属余序余故获事公何敢辞窃观夫公之登第及仕宦中外俱嘉靖间当是时天下之文盛极矣自何李诸公之论定而诗于古无不汉魏晋宋者近体无不盛唐者文无不西京者汉魏晋宋之下乃有降而梁陈盛唐之上有晋而初唐亦有降而晚唐诗之变也西京而下有靡而六朝有敛而四家则文之变也语不云乎有物有则能极其则正可耳变亦无不可张公于古靡所取财于诸公间亦靡所傅丽而能用其所自发之机于偶触之境当于无意有意之间而得其或离或合之矩诗之出若自钱刘者文若自庐陵者然欲执钱刘庐陵以一端拟公固有所不尽也大抵温厚和平不失治世之音典则雅致无累君子之度使文中子而尚论一时之盛于公其能舍旃或犹以未得覩公之全为恨夫青凤吉光之裘毁而一羽至犹百金公裘尚未毁也连江公故大司马属也其为旧也非余不佞所敢望也李邕侯之后子亦有繁者能慕侯之业以为家传至于今脍炙人口繁庶几勉之哉

二酉园集序

陈左伯玉叔先生弱冠而侍其先大夫宦京师所著古文辞出必传赏士林既举进士官廷尉平得极意其业所交皆大父行天下长者咸折节而称先生诗于是名骤显著旋守淮安股肱郡视学西蜀漕于河臬藩于闽暨西楚它輶轩所经繇若周若燕若齐鲁其家居七泽又皆江山名胜地有至必游游必有赋记叙之类以发之而其地之贤豪大夫亦必以不泯之计请先生一一应之不倦念无以报先生德则必求先生之诗若文为

之叙而属门故寿梓于是先生之编甚伙而叙亦称是时汪司马伯玉暨不佞贞亦与焉先生犹以为未嫌于志因悉裒其前后所著书若文仍属不佞贞与伯玉曰二子更为我叙之向者志吾之进也今者将志吾之就乎不佞贞曰唯唯夫天地之精英独畀之人而人之精英渐溢而着之言为诗若文是皆因天地之自然而节奏之还以黼黻乎天地者唯此二端而已诗近方文近圆其为体稍殊而见之用则一也有自外境而内触者有自内境而外宣者其所繇亦稍殊其成于意一也意者诗与文之枢也动而发尽而止发乎其所当发止乎其所不得止古有是言要为尽之矣先生所遣内外境以百千计其言之就以数十百万计其接逾繁其应逾不穷盖深得夫发与止之枢而执之者是故简而裁直而纾淡而不厌悠然有治世之音焉人咸谓先生古诗出建安近体过钱刘文或左史或昌黎庐陵不可以蹊径见轨辙虽然所以为玉叔先生者故自如也伯玉宏丽工微辞当与先生赅传而成不朽若不佞则何所效哉先生之于不佞固无俟执手申契阔而竿尺之往返亦不啻称神交乃余弟敬美奉常尤得幸先生如杂编中所云双凤篇者可征已今甫草先生序而敬美忽弃余今窃与先生期异日奉常之集成先生能不靳一言以为琼瑶报哉则不佞之叙先生集无异所以叙余弟集也

魏仲子集序

魏仲子集者故司封郎魏懋权所著也其称仲子者何懋权兄弟凡三人其仲懋权也三人者次第仕于朝以文学气谊称懋权最有名两举皆高第而官又最显一旦以病夭故伯子悲之而为行其集也序之者谁吴郡王世贞也始世贞隆庆初起为大名兵使者而仲子参诸生间太守言其秀才召见之仅踰冠耳其人瓌茂朗洞人也叩所为经生业尚未曙于体然而奇思奕奕出人表矣已奏其诗多老苍不经人道语矣余方有事于邢州挟之与二三生俱间呼之饭坐定饮噉自若谈说慷慨无少顾其经生业渐就矩而诗亦以并进余乃以一五言排律授之于兹道三致意焉余既去大名而仲子姿试为诸生冠藉藉三辅间声然遇大试辄不利而又久之始以第一人荐顺天又三载以第三人登南宫榜以第一人传胪乙科海内无不名仲子者而是时大相势张甚仲子意不平之嘒嘒见辞色又于时事时才间有所诋谋大相躁欲收仲子不得后微觉之且拟逐仲子而死矣仲子不以时稍平而益其危言顾其行益峻道益尊天下之忌者卒不能胜其知者而乃有天部之擢仲子亦不以一擢而解其危言遇不可将大有所论白而病扼之嗟乎天之所以笃生仲子者为有意耶无意耶无意耶则不当有仲子有意耶而何遽夺之也仲子于诗无所不工五七言律尤其至者大较情真而语道意高而调协即其才何所不有而实不欲以江左之浮藻掩河朔之风骨盖得少陵氏之髓而略其肤者也文尤典雅简劲直写胷臆譬之赤骥盗骊以千里追风之势而就御勒毛嫱丽姬汰人间之粉泽而以其质显惜也酬应之请夺之不获悉发其蕴抱以追俚千古成不朽言而今所见者

仅一斑耳仲子于家与伯子叔子以三才子称其在朝与同年顾宪成氏刘庭兰氏亦以三才子称伯子名允贞今为光禄少卿叔子名允孚今为刑部郎中刘生盖先仲子天云嗟乎令皆不遽夭而与三君子并老于朝不为名臣于诗若文不为名家者无所用吾言矣

桂东令马君生祠记序

余通家子马君故尝与余游见其刻深经术博综艺文意甚念之而不知其傍晓吏治后君困公交车久谒选得郴之桂东令桂东远在数千里外而君满三载方奏最乃以他忤见台抨得调去夫以一邑令至三载而顾得调余殆无从识其奇及来白下过君所覩壁间刻石生祠记盖其邑之吏民追思君不已相与立祠祠之而属傍邑曾大理选纪其治行于石夫君之有德于桂东其细至不可指数而大者乃在廉节恤下居官之始即能布条教为之齐其鞫瘼而以次爬搔痼苦而事为之经理均徭薄税平刑理冤民既小康而后导之礼让进诸生与讲经谊彬彬可观迹君之所以致桂东吏民之思者不过古循吏之常然他人不能行而君行之此桂东之吏民所以思而不已也君之得台抨也不以楚而以赣赣中丞尝布乡约于诸州邑而君以公委出报独缓故衙而亟抨之然不能用他吏议加君故仅得调不知中丞之所谓乡约者君已前行之矣余故人李临淮侯言恭时统禁兵为故都留守见君碑而慕称之以穹碑之搨不易也别作小隶刻横珉且为题其后以身不得备民社之寄为恨具羨乃马君属余序之余尝谓天下之公论不在上则在下世之治也上与下俱显及其衰也多晦于上而显于下今天下名为治平人主方综核名实而在上犹有晦者何也汉之时桐乡中牟之颂声固暄赫人耳目然其令皆去为贵公卿是以能着而且久而君仅孱然一吏部选人耳然则桂东之吏民其犹贤于桐乡中牟也耶斯民也三代之所以直道而行也吾安敢尽谓末世哉君既为吏部选人当更得邑窃为告曰毋忘所以为桂东者而已

邹彦吉玄岳游稿序

余昔癸酉之夏由京口抵武昌臬以一青雀受江山之胜颇寓之诗且有纪行一序又二载而为乙亥春叨郟襄节用间涉玄岳礼北门贵神则有一赋四记它古近体若而篇余赋颇时时落人口余蔑称也窃意自有宇宙来操觚之士江行者当以亿计陟玄岳者以万计宁无有二三臭味之同收之奚囊以泄其奇而托不朽乃遽则独一宋陆太中务观有江行杂录则自武昌而上走江陵道入峡而后止其述视余更详而玄岳之游近则有汪司马伯玉徐宗伯子言然皆有记而无赋是三君子之诗余未能尽覩之当亦称是盖癸酉之去丙戌改岁者十有三矣而余之戚执邹学宪彦吉始继焉彦吉江行有记

玄岳有赋又俱有诗约略视余等而其宏丽轶荡备良史之规兼风雅之致非余所敢望也且彦吉之隄胜余者有四彦吉之游业三十余济胜之具充然而余其时犬马之齿长几三之一老矣才且尽矣一也彦吉一不中忌者意辄去不复顾葛巾野服作道人装而余不能不见束于纓弁二也彦吉过齐安往往为父老所物色臆慕而追趣之恐后其于余见而悚然去而漠然而已三也彦吉偕一道人行若支许之相邁诣往往发为意表语而余则无之四也夫岂独余务观之不能得玄岳游而子言伯玉之不能得江行彦吉固超余而兼三君子之长者有彦吉余及三君子故可废也余既欲自废余言彦吉何自而迫欲序之以余能彦吉知又能知江与玄岳故也

徐司理表异録序

表异録者松郡徐司理入为南度支郎郡人思之不忘相率肖其像而祠之且致祷焉而记之者大宗伯陆公山东按察使张君也称表异録者广西参政徐君也其称异者何以司理得之故异也当汉之东京碑记之类始盛行然往往以饰墓而着思于逝者未有感德惠而着思于存者也有之自武都守李翕成阳令唐扶藁长蔡湛始然皆以郡守邑令长而得之为其才可以悉而惠可以専也都尉治中别驾之属鲜矣而况于司理则又鲜矣徐君之所以能独得之司理者何司理近上而遠下者也近上则易以通上之喜恚而难于悉下之欲恶易通上而难悉下是故上有浮旌而下无真感司理不惮披襟舒欸以求情于下情得矣奉而与台察持即盛气以加之持殿最以胁之而司理弗顾也虽君家有功无过是矣而司理又数视华亭篆其所以皆令长事其缓输均役平亭冤滞于下益近而于上益遠以故荐剡虽萎不废在事六载而仅入为郎郎又仅南度支嗟乎斯民也三道之所以直道而行也尸而祝之又记之序之宜也友人徐孟孺陈仲醇谓余实知司理集而更托序焉司理常从直指按部吾郡余故耳其善政缕缕假令吾郡有思司理者余且不辞序兹复何辞也虽然令司理入而佐铨曹治台琐赫赫者余所不敢许矣司理名民式由万厯庚辰进士福建之蒲城人不称今官者何其思以司理故也

尹赵同声録序

万厯戊子年秋八月宁国尹同守立甫池州赵司理仁甫同有事于棘闈属所治经数足其职在帘之外二公素性深于诗居闲无事相与酬倡五七言诗歌凡百六十篇溧阳潘令征复得而梓之问序于余二君子素与余善既彻棘各以其诗来赞咏之飒飒然音也余偶与潘令谈忆在宋庆厯丁酉欧阳文忍公永州知贡举而梅圣俞都官分校二人故石交欢甚相与酬倡多亦至百余篇而一时名士如王禹玉范景仁诸贤亦有和者至今以为雅谈然当时诸贤在帘之内故人得议其后谓以吟咏而夺其校阅之力今者

二君子帘之外无害也诸诗歌才情多舒畅而俊丽不知于梅欧何如格似差胜之吾又闻欧阳公于其年锐欲变其轻靡之习而归之大雅故刘几黜而曾子固苏子瞻兄弟进又有程伯淳者为理学百世宗今岁大宗伯亟上书亦欲变奇诡而为雅驯不知所登斥视庆历何如其人士之称否何如吾不敢论论二君子之诗而已抑又闻之潘令之与休宁丁令元甫皆有诗诗皆佳不下禹玉景仁能用庆历例附于后否今之天下名治平逾于庆历而庙廊诸公能修韩范文富之业而振之其于文复又当返淳趣正之会而二君子又能以雍熙尔雅之音继美欧梅之后余恶可无述也序以归潘令

弇州续稿卷五十二

●钦定四库全书

弇州续稿卷五十三

（明）王世贞 撰

○文部

△序

华孟达诗选序

始余罢郟镇归而无锡华孟达以其文若诗来乞序余业已竒其志而逆其进之未已也始以扈语应之自是孟达数买舟过余则必以诗谒其诗亦必进如是者数年矣而得百八十余篇为体凡三大较五言古似韦苏州而时时上之七言古似高达夫五言律似常建郎士元七言律似李颀绝句在大历长庆中未易才也孟达之所构结以淡雅为体以和适为用其始非必皆自然淘洗之极归而若自然者也而至于才之所不能抑则间出而为竒警情之所不能御则一吐而为藻逸嗟乎诗如是足矣建安以来诗之为用少以故得自致其旨而阮公陶令之所由兴迨其季也用日以博而变日以不可穷于是乎青莲少陵之业就而天下以为正宗大家是乌可偏废哉当北地信阳时不废徐昌谷高子业今者有济南当亦不废孟达也孟达以余同调必欲使之衷而信于世则所不敢虽然余闻之韦苏州在事而僧灵澈者为韦体数十章以贄而求合韦殊不之顾也已得其生平所著诗而后大喜曰子奈何强所学而从我我且几失子然则余之所以许孟达者其能不为余也哉余故尝进顾山甫于孟达知其合也试以属之

战国策谭概序

战国策不知何人所述其地则自两周而终宋其人则自周安王而终秦始其事与文则杂出诸名卿游士之属太史公因其成资以编史记之十二而其书故隶汉秘阁刘向稍较定为三十三篇鲍彪合之为十卷彪复与高诱各为之训故而吴师道衷焉其用至于今而犹有未哲者仁和张子文氏治铅槧之业者三世矣于它书自谓鸡肋而独此策不减杜征南即必证之古而反之心有一字不安不已也盖书成而诸杨挖之精者皆傅之名之曰战国策谭概问序于不佞尝习诸儒先言天下之乱至于战国极矣王畿之大蚕食之使不能当一小郡而千八百之君并而为七其民日寻于干戈其俗有壮而无老有丧而无葬者十余世矣朝而六从暮而秦衡小则市官大乃市国力用于阳智用于阴巧之极至于易姓而人不知鸩毒之所发身灭而犹能快其恨即小有可称述者不过市魁盗侠之馥为仁义者耳今天下称极治至安敛手而承一帝者凡十余代闾闾诗书衿裾礼乐称唐虞服周孔盖不独齐鲁为然使老子居之尚犹以不获覩古为恨而安用此押阖揣摩之书为子文氏之治之繇皇考而上迨王父三世益精将无好其文辞而已夫文辞之益于时至浅渺也然而未可概论且诸儒先之所推谈理而雄者孰有过于孟子輿者哉其次则孙卿第令仪秦代厉犀首之徒鼓颊而谈天德王道苟其由衷发之其快口当心将必有甚焉者幸而利害之工深入于中主之耳以显于一时不幸而与中主合出其恣睢簧鼓之技而贻讥于天下后世则非其才之罪也且夫叙事者之有战国策其于太史公昆季也左氏则匹敌也是三君子者而产于殷周之际当左右史之职兴衰治乱之所以然与皇王心迹之微必能委曲貌拟使人跃然而兴感何至寥寥迨今嗟乎此非诸儒先所遇晚耶诸收谈概者左袒于兹策者也子文氏三世则又左袒于谈概者也是故不辞而序之知我罪我我安与哉

张孟孺诗稿序

余故友孟孺之王父张将军于嘉靖间其人工为诗于官显至领阃寄已而与孟孺父今将军左虞善则其于诗益工而官稍滞滯中间仅一都纲漕艘万夫将而已今者孟孺且当代为将其诗虽不能如左虞巨丽然气清而调雅异时当有偏至之目或曰诗之不利人久矣即搢绅子不能以此博一得意除目乃而偻行苦吟于白刃之林能从中取万户侯乎哉且而父之显不及而王父也以诗故而之诗不及而父也将焉用诗苟其胜之则立覩而之滞滯也孟孺不顾曰吾且之东海从王先生而质焉见王先生再拜而请曰不谷世守臣也岂敢以诗遂废将虽然不谷之爱诗甚宁能以将废之先生幸教我夫余方冥心于蝟甲虫臂之表而何暇为子谋虽然吾之获识子王父于今三世矣坐吾语

子子将而诗者也吾当语子将今夫谋者意也鱼丽鸛鹅弥缝率然者篇也前茅虑无中权后劲者格也龙渊湛卢溪子大黄粟马脂车组练余皇者材也萧萧马鸣悠悠旆旌者正也开阖变化莫可揣测者奇也如是而后成师成师而后可以言将之道也有不通于诗者也耶世不乏良将然少能以将为诗者若子之父良于诗矣似不能以诗为将也子如衷之则两显矣虽然子之所将者三千骑耳致力深入亦足以逞独不覩夫韩淮阴之多多益善者乎遇之则靡矣练卒搜乘厚集以待子归而质之若父孟孺复拜曰谨受教请奉以行且以弁不腆之篇

唐诗类苑序

诗而以类称者何昉乎昉自梁萧统氏统之类也大较则文据十之八而诗仅得一二普通以后弗之及已天监以前倦于采而勤于汰识者往往遗憾焉宋之文苑英华名为仿萧氏而弗徧弗择则又其下驷矣嘉靖间有宦于楚者徧取其诗梓之曰苑诗类选友人卓澄甫读而叹曰是可以已乎哉夫诗之体莫悉于唐而唐莫嫩于初盛自武德而景龙者初也自开元而至德者盛也大历之半割之矣初则由华而渐敛以态韵胜盛则由敛而大舒以风骨胜然其所遭之变渐多而用亦益以渐广今者获寓目焉萃而为书一有所需随叩而足灿若指掌譬之大将军将十万众部别垒置旌旄异色譬之贾人巨肆珠珞服■〈执上目下〉各安其所二者唯主之所用之固不必卷搜人阅而左右逢源不亦快哉且夫事同者工拙自露情一者深浅迥别时代之升降才伎之长短亦可以傍通而曲引固不必钟记室之品高廷礼之正而后辨也于是有张子象毛豹孙者皆博浹工文章与澄甫志合而任校焉古近体共得百卷曰唐诗类苑既成属世贞为序或谓澄甫苟欲以小便博世好夫诗取适情主淡泊为上乘足矣胡至齷齪征事如华林北堂与白仆等伍也是不然孔子删诗而分别雅颂国风之属有赋比兴之异故其语曰可以兴可以观可以羣可以怨而终之以多识鸟兽草木之名使孔子而废博也则可孔子而不废博何以难卓氏类苑为虽然请更以博进澄甫澄甫既以大历之半割之其余者若元和会昌为中中可録也会昌而降为晚晚可采也不然吾惧操觚者之有后言也澄甫曰善请受教姑先次子之言以弁

冯咸甫竹素园集序

余故慕称廷尉冯公之忠而生左不相值意甚恨之而又慕称廷尉公之子京兆君孝而又不相值已而京兆君之子乡进士咸甫来咸甫负才气朗爽玉立自意古人无不易及者而顾独折节余颇出其诗草见示以余之首肯也遂得余序已而益述廷尉公京兆君之政行甚详遂得余父子忠孝传已而京兆君来其为人笃行长者也然而亦稍出

其诗一二已而咸甫之季父学使君来出其南征集甚奇遂复得余序当余序咸甫诗属有所感慨于世路之末杀文雅而是时骤得咸甫而故私胡元瑞欲效合左师陆大夫之策俾之交相齟切以为异时狎主之地其于扬挖若有所未尽者盖又七年而咸甫之学益博工力益深至游日益壮既以其绪余修南宫之秩三上而三报罢其穷亦日益甚今年冬苦邁轴久之慨然尽取其前后诗彙为若干卷而它文十之一尺牋三之一傅焉以书请于余谓不孝有狗马之疾不获再拜门下以祈一言之定而久之病良已乃其辞则益苦友生章茂才子敬代之请则又苦噫嘻余知之矣以咸甫之富于春秋何恙不已而其于文辞方日升而川至又岂余一言之所能定毋亦以余耄老不能及咸甫之大成而效之言也耶今中原之音豪厉而江左之音柔靡咸甫则既能调之矣唐初之造弘丽而不及法末季之诣雕镂而不及气乃咸甫于二者复有所汰取矣即不敢以一日画咸甫而谓之定然欲寘咸甫于长庆后而会昌前其可得耶虽然余更有以告咸甫始余得美璞以示国工陆氏者而授之古樽彝圭瓚之法器成矣而欲用之工曰未也朞月而泽且有光矣复欲用之而工复曰未也更朞月而出所蓄古樽彝圭瓚之属而俾离朱视之莫能辨也然后工完然而色泽咸甫于文辞非不美璞也法非不古樽彝圭瓚也揽之非不泽且有光也其犹有朞月之需而已耶咸甫即不以为定其归而质之京兆学使二君

姜鳳阿先生集序

弘正而后士大夫高驰远骋祢檀左而冕先秦史迁以降无述矣彬彬者可指数也乃其弊流而为似龙出之无所自而施之无所当六季之习则柔靡矣肤立矣巧者猴棘端侈者绣土木不佞于其间粗亦晓所趣舍以才薄未尽合也求之天下而又鲜所真合也则不能不抑而宋氏之思宋氏之若庐陵洪州也虽不得畅于格而得畅于情与事虽然犹未畅于理也以子云之愈深愈晦而退之之或离或合也则又不能不进而濂洛紫阳之思非谓进于格也谓不以格囿也濂洛理而简紫阳理而详详则已易尽人易知吾夫子之训曰系辞焉以尽其言而所谓辞者达而已矣又曰易知则有亲旨哉盖余晚而始得其庶几者一人曰姜司寇先生先生少为诸生即慨然有志圣贤之学及其成进士入读中秘书晋史馆诸应制酬物之作斐然矣而是时毗陵公以其学鸣于野先生抠衣从之华亭公以其学鸣于朝先生又抠衣从之自华亭之称先生知己则见中权相出金蜀臬副八闽宪虽皆治学政而中间一参省汴洛天下始犹以不素习吏事难先生而先生出其绪应之从容吹谈束悍王之恣睢于股掌及华亭久在政先生入佐银台领成均益大发舒将欲有为于世而又见中后权相以萋菲罢先生了无所芥蒂惟益励志于学而时出其绪以成文章天下争模楷之然以先生为毗陵高弟子其学若有所根柢而不知先生之学深造而自得之者也今其书具存其舒雅似庐陵浓缛似洪州而说理之详往往有超于紫阳之乘者惟步骤开阖精神筋络不无出入毗陵尔眉山有云欧阳子

之文非韩愈之文而欧阳子之文也余亦曰先生之文非毗陵之文而先生之文也今上方侧席贤哲而二三相臣知先生不下于华亭公即家起留京之太常以至少司寇行且入坐论矣夫先生之不得已而有言者余固略悉之其不得已而有功者是在先生哉是在先生哉余与先生生同江左相去一衣带水而出处齟齬不相值先后归田之日垂二纪懒僻不能通百里交往者先生僂行通之盖彼此幸其遇而叹其晚也故不辞糠秕之引以当执鞭

太保铜梁张公奏议序

太子太保大司马铜梁张公肖甫其始以佾都御史抚三吴有奏议四卷再以副都御史抚三辅抚关中俱不拜已改抚上谷有奏议四卷三以少司马督抚全浙有奏议五卷四以大司马总督蓟辽三镇进太子太保有奏议十卷公既入领枢务而代公总督者御史大夫王公（阙）抚蓟镇者中丞蹇公子上合而梓之凡二十二卷而问序于世贞世贞不佞少尝从公游最名能习公第相与剡切为笔研文字之业而已已稍稍得其所以治滑者已又于杯酒慷慨谈说天下事而窥见一二以为经国大业当属之斯人非复吾曹所可及迨于数更大镇戡乱销变易若承螭押阖变化动与神会毋论吾曹即世之所推挹贤豪巨公皆瞠乎后矣然后自愧向者虽习公于知公为浅而今得其奏议悉读之乃恨近者之知公亦未为能尽深也公于三吴则首定安庆叛卒之变于上谷则预御边患之谋于全浙则两靖乱民骄兵之裊于蓟辽则三贾擒王之绩再收金城之固不亦伟然彰明哉然覩其所建请陈报千里之外了如指掌九重为之动色百僚为之倾听有吐必纳如响斯应是故取事易而征效速且夫不能得于内者未有能得于外者也明兴将相之业相为用者毋如靖远忠毅新建文成伯杨文襄王恭襄二少师其遗牍班班令甲矣学士大夫至今能举之然靖远新建之用不能无恨北二少师之用不能无恨南非其降才尔殊所以任之者异也天子之任张公南重则南北重则北张公之报天子奉南即南效奉北即北效殆兼四公而一之矣迨于两镇之议夹讨朶颜殆不胜其喜功一念争欲喋血王庭树功茅土公力遏之所谓属夷不可轻动以彻藩篱捣巢不可轻举以速衅端二邊不可轻举以貽后患蓟工不可缓图以失良时其它处兵将招流移隱然赵营平王清源之持重而文辞之鸿爽又足以宣明其意是以明主不待三赐问而即决于戏张公真易得哉藉令公稍不自坚不幸而不胜则神都百里之外树一敌国幸而胜之仓无宿储野有暴骨所以为身计得耳如天下何虽然向所拟公于诸边事而已至于论道揆纬文章唯新建为最而公埒之世固有目余知言者哉则二公当以弁诸首不然覆瓿可也

方侍御奏议序

当德靖间天下靡不知吾郡有二方先生者而是时伯为时举先生守留司吏部郎奉职谨亡害仲则时鸣先生前后歷南北台所上封事以十数皆天下大计最后天子欲追隆所生永嘉安仁二曹郎緣广其意以疏请时举闻而微许之时鸣时在台再疏辨其谬会二曹郎之说胜亟贵显用事内德时举至擢太子庶子晋太常卿而时鸣出为提学僉事移病不赴时举忽忽不自得曰我预彼是不预彼贵也彼岂田千秋我哉亦遂移病归兄弟相与读书于玉峰淀湖之间盖自相师友云而时鸣先生尤逸宕能穷人间世之所谓乐者当是时天下望以为景星庆云而独絳灌之徒挠之竟不复召以至老死死且四十年而世贞乃获从先生之少子太守范尽得其奏疏若干首读而叹曰呜呼良哉言者毛举细故以苟塞责亡论已即有所欲言而不敢尽不为称言者即尽所欲言而不尽中事理不为称言者即尽之而且命中第能中已然不能中则将然不为称言者若先生之不毛举细故以苟塞责则人人谓然乃余窃覩其议礼二疏彼此以重胜未暇较非是也然至欲夺人主之向而徇公论可谓能尽所欲言者矣其诸修德政正大法祛积弊论纠阉宦蠹臣不奉行整令七事皆凿凿中窾则所谓能尽言之而又中能中者也当王文成之滞散署与吕文庄魏恭简之病告世固目以空文之士而先生独推为正学又以济乱归文成其后三君子皆用羽翼圣道显而文成复戡江右之巨难胡端敏之发宁庶人罪而见反中也先生奋然救之以胡能伐谋而谓宁庶人必且行大事不三载而验隰于元龟此所谓能中则将然者也呜呼良哉余窃复有感焉以先生之论建在武庙时如不奉行整令七事疏其辞旨之戇有恒人之所不能受者而属人主寬大不甚省视又时时见压权幸其语虽不行而数避数起于宦犹自若肃皇帝之初躬览章奏号为励精先生之志亡所不舒快然何至一蹶而不复振夫以贾太傅陆宣公之略即不敢言先生之埒之其识度雅亦相当彼一傅宠王秩二千石一拜相而后贬千古犹为之扼腕弹指而悲其命先生仕不过第五品弃之于盛年以至老死含识之士悲其命者又当何如也虽然先生之与时举持论各守其是而已时举用而处先生舍而处共以一处成吾是兹非皆善衡命者哉然则天下所知二方先生真兄弟也耶

吴瑞穀文集序

新都吴瑞穀尝以书自通于余累数百千言余甚异之而恨未之识凡十余年矣一旦纳屨谒余东海上尽出其文若干卷余获卒业焉则又大异之瑞穀乃拜而请曰非以子先容于世也将受子规余则恶能规瑞穀记初操觚时所推先唯一于鳞徐吴二三子实左提而右挈之而最后乃得伯玉当于鳞之文成其疑者十可二三而姍侮者遂八九姍侮者之言曰吾詎知所谓使凡将氏辨之而吾未之识使古人诵之而吾未能句卒然而欲乙而无可乙也尽卷而犹茫然惟有颊赤嚔棘而已其疑者曰吾粗能习之虽然谈

六艺者必折衷于孔子自孔子有辞达之诲而其所传若易之什翼齐鲁之纪论抑何黄中通理也辨莫畅于孟氏修莫工于檀左气莫雄于短长变莫神于太史公何渠使人不可解而独奈何阴述盘庚彝鼎之遗尽组诸百家之晦癖聱棘者而经纬之甚或舍事而就辞或援有以实无将一代奚赖焉夫于鳞之不满世口何害即所撰述具存胡尝不彬彬大雅盖并于鳞起者伯玉雁行伯玉起者刘子威顾独推称于鳞以为振古之杰即吾兄弟亦不敢后二君子然尚谓于鳞之诗歌似犹在文上而瑞穀直以为文胜诗犯世之所疑及姍侮而不避今者尽得瑞穀文而读之则其于于鳞盖有袭魄当心而不可解者岂直优孟抵掌之似而已也然于鳞之所治不傍及庄列骚赋与东京之金石而瑞穀时时见一斑必且曰吾虽贵于鳞不必皆于鳞祗吾闭门而造车出门合辙则余未之敢许也藉令瑞穀以昆吾之割而润泽之了不见痕抑控纵送唯吾意之所使蹊径尽绝生机流衍即古人奚让焉而宁独一于鳞第瑞穀既精深于古文辞其应制科业亦时时阑入之至不能保一书生廩台察监司名好古者褒赏相继而卒莫之援瑞谷意且不悔也曰吾文行后世更有一瑞穀者必于鳞社而吴生配两庑济济不乏贤吾岂竟不遇哉瑞穀业以于鳞文胜诗诗当有叙之者故不赘

郭氏族谱序

郭于春秋有国封其后歷汉晋以至唐公卿将相名贤隱君之属不可胜纪及明而益着吴郡之郭凡四五六时时有显者独吾太仓之双鳳里不知所繇徙里故隶海虞既割属太仓遂为太仓人而其留邑者为海虞郭其坐徭累避樵李者为樵李郭双鳳里之郭始祖曰大秀曰进德凡三传而曰璜曰琚曰珍所称三郭者皆琚派也樵李之郭又三传而为今茂才太来太来少治经术工属文往来教授诸生吴中慨然叹曰吾大父称寓公于樵李今者乃着籍矣然不四世而忽忘其先至使五服之宗漠然若秦越之不相通余小子敢逃罪乃首展谒二族之塋以及族之长少得其人相与考拟系胄而谱之曰吾以逝者知存者以存者知逝者緣本识支緣支追本如是而已其凡六则谱式也姓原也宗图也行证也遗文也宗法也郭之为郭皎若指掌矣于是故少保严文靖公以海虞之戚序之故少司成李君以樵李之戚序之故宪使张君以双鳳里之戚序之而太来意未已谓王子必赖子而传夫谱莫法于眉山氏南丰氏及近代之北地祢氏然是四氏之谱不传于谱而传于序今夫问序于学士大夫业人人能举之问谱于学士大夫能举者鲜矣吾郭氏之为郭则谱也使天下后世知郭氏之为郭必子序也余谢不敏谓太来若于先世有显者而若断自明兴不作而家侍中拜汾阳之墓毋论海内即吴郡有显者而若断止于三族不作高干邕之通系渤海李蒲山之托根唐公以相夸重藉豪为奸则子之志可嘉已其必以予序重子谱以子谱重郭非余所敢任也

王太史诗选序

余从先司马宦游京师先司马每东过太学归未尝不称司业王绳武先生之贤也当是时先生质甚深而望高旦夕且大拜而以不胜北敌之侵扰为愤欲出奇策赂结它部落共攻之疏再上与当事者连邑邑不得因上书请天子还宫布法象魏与天下更始当事者益衔之惟天子亦以为阔踈罢先生不复用而先生亦竟困阨死矣先生之初举甲第读中秘书年犹在踰冠为人丰下而皙秀眉长目见亡不以为扶摇而上者而一中萋菲之似填绛灌口金马石渠之席不获暖而中废寔与渔父田叟侣者十五易岁而后见收亦既晚矣而卒又废寔以至死呜呼何先生之终始若遇而旋不遇也虽然此尤其小者耳先生束发读书即能为古文辞亡论西京建安以至六季大抵采其材而缓其格若开元大厯之英则缀而为韵昌黎庐陵之隲则组而成章其于作者之旨合矣而会其父封公故与文待诏俱为吴氏倩待诏以翰墨冠吴中先生之八法颇似之而世有并及先生之诗以拟待诏者乃至馆阁之论疑其高而中原之评疑其易自两疑而两失之盖又数十年诸扼腕而谈操觚之业者至不能举其姓名宁暇究其所诣哉然则先生之遇又当何如也今未暇论其文即其诗之存者往往朗秀玄着春容尔雅寔之开元大厯间不甚易轩轻其于后进曠带故有余矣先生有二子俱才而伯氏蚤逝仲氏之为古文辞竒丽甚海内称之殆过于先生而其不遇至不能取一第茹藜厌糗而犹不给间与余语及先生悲愤用壮毛发尽立出其诗而余稍为论次之如右夫以余之论次先生诗而仲氏能廓大其家声伯虽夭二子皆成进士有名位呜呼又乌可以不遇竟先生也

管比部奏疏序

当江陵相君之有父丧意不欲去位而天子诏留之是时管登之自南武选郎甫除服待次铨部与同年赵吴二太史善相约上书请用甲令罢相君位俾持服二太史之书而上而两比部一进士继之相次得罢去登之念以江陵之去就轻而宰臣之不服忧重即数君子之议格业已章章明着矣而又赘之是显为名高也者遂辍不复上至明年乃熟计天下大利弊凡九条可万言上之朝其最重者复议政之规务讲学之实辟进言之路大要欲使九卿巨寮得与阁臣面计可否凡阁臣缺必外寮与翰林参伍而用而至于所谓辟言路者则直指廷杖诸君子近事之过相君读之再三鼻息拂然曰是不欲使我总百揆耶彼庶僚也冀异日得为刚成君缓颊而据应侯位彼且逼我而登之它所言公铨擢之法厘巡察之弊又多诋诃用事者相率而造相君所以危语倾登之于是其所陈处繁宗定漕计杜边衅核科试咸凿凿可行者一切报闻而久之相君复微闻登之与诸君合谋勒居丧前事计登之所陈厘巡察条内欲修高皇帝甲令分巡与御史抗礼御史势重必不可反乃出登之按察僉事分巡岭东诸郡欲以是困登之果复申故甲令及诸公

移约束且请并毋属督抚先后疏再上皆不报登之至部欲稍稍申其志不遂而御史之白简上矣登之竟移疾归主计大臣遂以有疾去登之登之实无疾也寻相君物故诸奸大败露天子悉召用忤相君者豪举迹连不复可胜数而登之数竒尚犹在嘍哨中不佞读其疏草而叹曰是贾长沙陆忠州俦也其文压于时小不能修而决脉中的若秦越人楚庖尹亡论今不以为医经射诀者几希且夫贾长沙之召傅宠王也实供奉京中邸关通大计屈于年而止耳忠州旋拜相而后谪然长沙之筴十讎八九而忠州之议不能伸二三君子以为长沙显耶抑忠州显耶三岁来屈指登之九条独不能使分巡与御史抗礼其它亡所不推行业已见成绩即不竟庸登之何害虽然以主上仁圣与公卿大夫之明不爱旃厦之地以待岩穴吾固知登之之必终见庸也

黄汝亨作茅章丘传小叙

吴兴有茅鹿门先生其居官所至负才术顾厄于谗不获究归而以文学收远近声其伯子翁积能嗣茅先生为文而以不胜任侠天父子余俱识之独不识仲子今章丘令荐卿荐卿为文能嗣其父余从它所覩一斑而今者游白下所接东土士大夫藉藉章丘令贤虎林诸生黄贞父荐卿友也而故以文字得余知一日驰书抵余凡千余言其传章丘令亦千余言甚工而谓必先生一序以弁之余犹记嘉靖丁巳戊午间承乏青州兵使者往来道章丘甚能悉章丘事其户口土田几若大郡其民富而实亡不吹竽鼓瑟者然徭役亦遂專一省冠大吏往往不能亡橐于官而搢绅上豪又时侵牟其里闾三十年来业已非故章丘矣今读贞父所称茅令下车之日即减省一切浮费以万计平亭其徭役毋使羯羶既寬而后示之礼相率为节俭教授诸生经术秬文彬彬矣吾不知视三十年前章丘何似以贞父所述当踰胜之主上今者日坐便殿召三公九卿相与讲究小民之依而委责守令甚至以荐卿所著绩其最于考功令无疑也吾少者尝读两汉班范所传循吏灿灿有生色而叹晋以后吏治之不能继以为无其人既而思之非无其人乃传循吏者之无其人也然二子书要多采之刘歆荀悦袁宏谢承之徒贞父固不遂得为班范将不得为歆悦诸公哉为我语荐卿曰勉之毋使异日功名损于治邑时且以寿鹿门先生曰先生有子先生所未竟者荐卿竟之矣

弇州续稿卷五十三

●钦定四库全书

弇州续稿卷五十四

(明)王世贞 撰

○文部

△序

周是修先生集序

当建文初人主厌马上之业集诸郡国贤良文学登金华白虎之地于是解大绅起自谪杨文贞与泰和周是修先生起自荐而二荐者用王国官入史局与胡光大金幼孜胡若思梁用昭善诸公皆江右人又皆同官相切剂为古文辞是修先生齿稍尊其诗与文贞皆工为清隽温厚之语不专以其才逞当燕师之下金陵诸公皆相约死难然皆不果而独先生从容具冠服雉经于学宫之尊经阁文皇既绍大位追僂死难者甚惨至先生名忽曰彼食其禄自尽其心耳何问为于是先生独以其遗体完又能完其族而于先生之遗诗文其禁亦独宽然离窜艰难之余所存者无几矣文贞际风云登宰辅后先生死四十一年乃始能志先生之墓而微露其歉于是先生之集稍出有梓而行之者余故尝卒業焉万厯之纪元下诏追表故死建文难者祀于郡国存恤其后人金陵为先生死地得群祀而泰和其乡又有专祀先生之裔孙应鳌自以进士起家为丹阳令余过丹阳治令出先生之集而授余请序之夫先生诗所谓清隽温厚者与文贞皆得虞扬之逸响固无论即一时诸公或雄而博或畅而裁要皆雝雝治世之音不大诡于格骤举而读之未敢有甲乙者至一闻先生名而神气忽若王目若开而明舌若津而润诸贤之什非不工固有黯然沮索然离者要不知其所自也夫子不云乎诗可以兴迩之事父逵之事君又曰兴于诗夫岂直以其辞将亦其人哉先生之文不能当文贞伙而亦自斐然即诗可以例已余肤立人也乌能序先生集聊因令之请而抒其愿为执鞭者而已

邹彦吉麝提斋稿序

彦吉之守黄州也次黄以前之诗而名之曰鷓鴣稿属余序之客岁溯长江礼玄岳以其所著纪游编得赋与诗如干首而名之曰玄岳游稿又属余序之今者偶余于高座寺尽出其所著近诗为卷六为章不能二百而诸体约略备矣名之曰麝提斋稿又属余叙之至是凡三属客有谓余者曰语不已赘乎哉余谢曰不然向者之序鷓鴣也序其进也以有待也其季子之闻鹵而谓始基之者乎其序玄岳游也美其适也以有寓也其季子之闻鹵而曰荡乎乐而不淫周公之东者乎今者之序麝提也则成矣季子之闻颂而所谓五声和八风平节有度守有序将庶几矣余可以无余称也已夫赋特其一斑耳而

有子建安仁之遗响焉五言古则灵运明远之隽也七言歌行则青莲之放也近体则右丞嘉州之婉丽也总之元嘉后而大历前然其所自得要有出乎其表而不受绳束者夫定格而后俟感以御卑精思而后出辞以御易积学而后修藻以御陋触机而后成句以御凿四者不备非诗也彦吉为人孤洁自信慎许可寡游道其自闽解学政归而杜门尚徜徉于六秋之圃故获自致其诣于四者深造自得久而逢源乌能难彦吉哉余非不知之顾少而忽焉老而见役于人以笔研为徼繹其何足以当彦吉也集以斋斋以麝提梵语忍辱也于世法为利虽然吾惧世之丛起而役彦吉也

王孟起诗序

建康为古帝王都会自司马氏南渡以至元嘉大明之世人主得渐息御圉之役而从事执文士大夫因之以有三谢颜沈江鲍及唐而得李供奉王龙标诸贤于是钟山大江之雄天阙栖霞之丽尽收而入于子墨之府然其人多河朔之伧吴之侬蜀之賸隽而称寓公游士于土著百无一也岂所谓雄丽者不尽发于人也耶盖至明而高帝定鼎为天地枢九州岛八荒之精灵所辐辏于是乎山川之雄丽渐化为人杰而荐绅先生则大司寇顾华玉司仆王钦佩陈鲁南太常许仲贻金臬陈羽伯今大名守姚（阙）辈山林之儁乃复有金元玉徐子仁盛仲交辈大较不能与诸公当而今王孟起最后出其地在仕隐之间其文亦以时法参夺之不能遽脱其习以追角乎弘嘉之盛然少而为诗晚益笃好之今其合者置之钱刘之侧不至矍圃之见汰降而就景傅事香山之叟吾故知其把臂入林也今操觚之士扼掣而谈建安开元骤见余之序孟起诗必大骇以多可少否藉令苟狗少年之好而唯影响之趣余宁与此不与彼也孟起与余同姓其命名也盖合得余名与字之一非偶然者故因詹吏部东图之请而序之

阮生诗集序

余晚之金陵金陵故贤荐绅游客布衣之藪而至戊子属大比士诸能操觚为古文辞者亦集而以余之猥先之也车门辟则襴襞蚁附挥汗而出褒中诗卷至不能徧读而忽有少年子白皙丰下礼恭而宇温已见其刺则乡进士阮子自华也已叩其家世则嘉靖间函峰中丞子也已发其篋则为诗若干卷曰公幸一捋隲我使我受而考焉予时忽忽漫应之盖旬日而阮子已去之彭城累书数百千言申前请曰公不为我序我且谷于彭城不复之公交车矣亦会予事小间获展卷则若从伏日中雷电雨雹交下快其爽而摄其横又若游太卤而值十万之众车驰卒奔飏夺轰击悠悠旆旌之意虽不易寻亦足以雄矣然是十万之众其堪战者几不堪者几而所谓雷电雨雹其快者与摄者孰胜也子之语出于臆而发于机当于子之赏而不必尽程于古神有合而亦有离合则超乎人

之表而离则左乎人之辙子且姑俟之今夫宛之驹左膊有孔而汗血者必千里时其秣纵其骋及壮而后衔勒焉使其步骤协而抑控工谁曰不千里不然吾惧其蹶也玉之犹为璞也卞和氏故寘之矣鑿荡砂石之工未至而遽献之秦庭吾惧其犹故别也子且姑俟之阮子之友陆景成曰生非以子而重也欲以子而规得所以重也且公之所序人诗伙矣不必皆名士亦不必皆名语而子应之易何以难阮生也余咲曰子以为易者爱而真乎难者爱而真乎若以爱余规则可矣为我语阮子篋余序后十年而余不死必能式新息之铜而刻子名于荅华之璧

谈氏文献錄序

谈氏文献錄者何錄谈氏文献也其称文者何有天子之文冠之曰诰者十一曰敕命者七曰敕及敕諭者十一次祠堂考礼之文也次愚虑草易之文也次遗稿次摘稿次逍遥集次长啸集次存稿诗书之文也次试卷制科之文也次杂言方术之文也其称献者何有献而名于朝者有献而名于乡者有献而以子名者有献而名于乡先生社者皆谈之儁也其文则皆谈之华也畴叙之谈之后人思永也思永之言曰吾谈之先自郟子始出遥裔而以礼乐训鲁或曰古谭谈通谭子奔莒所以有谭谭即谈也夫吾何知谭吾知锡之有谈而已锡之谈则自宋五经博士公从南渡始其入明而显则自御史愿学公始迄于今绳绳奕奕者若而世矣又若而人矣然而北不得媿崔李而南不得次王谢者则余之罪也余不能如薛宗起以片言而起其宗姑为之志其文献者则庶乎以谈有闻矣不佞谓思永子言似也而胡以志子试文也曰此余敝帚也幸程于有司而用它嫌弃之余废不用矣夫左丘以盲废而有国语马迁以腐废而有史记此其材皆足以纪国天下古今之文献而余仅能施之于谈虽然此余之所以志也故不忍弃也不佞乃谓思永是编成而谈之里薨若益而高其墓之木若益而乔者非以此也耶即不然而更千万年有陵谷之变而谈之文献宛然在目者则皆子之功也已

吳江吳氏家乘序

诸序族谱者曰谱者史也余则曰史者谱也史之兴莫备于司马迁迁之纪皇帝三代以至春秋列国西京世家靡不具其所由来而至于自叙则益详矣其它同姓异姓之诸侯于绩无可纪者亦必昭明其世次而为之年表班固氏因之以至范氏而后不能推见世家年表之意而略之而至于自叙未尝不追本其所繇始迨大王父而后班班矣乃至修唐史而表宰相世系虽于事不甚雅而后之名家巨公欲为谱者更于是取资焉余故曰史即谱也明兴东第貂瑯之胄不复能征其先德而三事九列徃徃拔自寒畯吳越歙闽之间齿姓寔繁而其久者至彼此不能相通金匱石室之藏又仅采左氏编年之例

而识其大者于是史不能兼谱谱不能登史而修谱之家陋者安于挂漏侈者鹜于张饰而谱之用复寔微矣乃今而得吳江吳氏谱吳以国为姓其在北而著者若大司马公在南而著者若司空公不可悉知所知者宋有太尉某至端平间而千一公者始家吳江是为吳之十一世祖也千一公有子三人曰万一万二万三公固多孝弟力田然未有显者又四世而为孝子公璋璋子宫保公洪洪子宫保公山凡八坐二人藩岳郡二千石四人甲第六人乡进士贵郎上舍若干人百二十年来其纓弁绅衿之盛辉映吾三吳几可以称世家而当嘉靖之初年谱成于草莽而未备今其后人承光乃能慨然举而修之则吳之为吳赫然章矣其纪叙则秩然理矣大槩首之以玺书则为诰者二十六为敕命者二十二为敕及敕谕者十七为谕祭者五继之以谱传则为千一公昭者暨其后者若而人为万一公穆暨其后者若而人又继之以文献则为志铭碑传类若而篇诸所自构撰附焉又若而篇乃夫栾赵之思二武韦陶之述祖德虽微言小咏亦有所不遗者承光之着思亦厯矣余琅琊之重在晋宋齐梁间至于赵宋益有闻而明之重则自世大父工部公始寔与宫保公同第成化乙未进士两家乔木相望至于今吳中之甲姓鼎族莫能三焉余故因承光之请叙而归之若乃尊始别源敦睦率谊之道则诸为谱者类能言之可无事余余且治我谱矣

刻大藏緣起序

昔我薄伽梵之宰世阐化也以大慈力摄诸天龙鬼神人非人咸集而收之大法门佛子菩萨阿罗汉随緣参发赞叹显密圆通之妙蓋四十九年而所说何啻百千万言所度之人因声入悟者何啻百千万众薄伽梵迁化大迦叶阿难陀继起而绍明之尚虑登坛之述不能逮遠而没身之后微言泯而渐失其真相与结集成篇以梵音寄梵书以梵书寄贝多罗叶上至国王宫下至婆罗门家遠至娑竭龙藏靡不转写流布而大教之盛如日中天矣后千余年而震旦之文明日盛緣亦渐起所谓菩萨阿罗汉者多下降于此方而竺法兰摩騰遂以四十二章经来其后鳩摩罗什佛陀耶舍辈为姚秦主翻译蓋以汉儿习梵语作梵字则甚难而法不广以汉语度汉字传佛印则甚易而法亦流至唐而法师玄奘西游天竺诸方遂悉奉诸经及慈氏所撰惟识诸论来厘为三藏官置司翻译易世之后得房融所译楞严而教典备矣然法语既繁传写亦不易自通都大邑之外贫贱鲜事力之家有毕生不能见见而不能自致于是始知寿之梓而印行之流传亦复广矣顾诸经之流传见者顶礼供养焚香呗诵而像引隆崇简裘重大将携遠致则有所不能循环咀讽则有所不便丹铅注乙则有所不敢于是开士密藏始发心仿弘道比丘尼磧沙故事以儒书例募梓而尚书陆与绳太史冯开之相与赞助成大因緣而二公仍各叙之太史所云彼梵夹者以敬奉为法事今梓以流行为法事其辞甚暂而尽余复何赘独余向者疑观世音大士以一人之身而具八万四千烁迦罗首母陀罗臂清淨寶目以

三千大千之界而无所不应随应随足以为万万无此事今以梓经一端而验之固可推也夫百应者化身也不动者法身也梓者法身也流传者化身也昔梓圆也今梓圆而满也以目为耳是即观世音如如不动即曰观自在也或谓观世音之转而为菩提达磨教外别传不立文字而今乃以梓经拟之不亦左乎是不然当同泰永宁之际南北人主徇于有漏之果而泥于文言之粗其用益繁其浸益远故达磨出而救之五六传而后即心非心之教大行而吊竒者至焚像弃经书七佛名于袒服而流至于猖狂自恣并其迹而失之盖棒喝之教穷而教典与宗皆两屈矣若观世音之再转而为达磨也宁不思以更救之乎余不敢遽谓密藏为观世音转要亦能不失其意耳或又谓此末法时也薄伽梵尝授记矣念不久且归之娑竭龙藏而何以梓为即梓岂复有如迦叶阿难者能传佛印也则又不然后慈氏而成佛者非我瞿昙记耶一奋迅而立超三劫夫焉知末法之中无龙女者出彼龙女宁受记者哉密藏其勉之者为密藏缘者亦俱勉之

题姜氏家乘后序

姜氏家乘者何姜氏谱也诸吴之为姜者文献皆在焉姜之先着姓四岳至太公望称师尚父奄有海岱世世为东诸侯迨陈氏起而寢微然犹贵显于随唐间称名族若吾吴邑之姜则自宋枢密副使遵始其后时有显者十三世而为明汝州别驾信蚤举乡荐仕不甚达颇以政行称诸孙济不仕然亦有文两世所交游多吴之学士大夫有志传题像钱送说解及诗歌之属百余篇今其裔孙谧（阙）复纂而谱之余以例附见焉盖以朝籍按姜则姜无登者以文献求姜而姜之为姜昭昭矣当战国之交姜之为公侯者几三十世然微太史之世家年表以纪之几遂寥寥不复知有姜今以一副枢之后为世次者且二十而了然若指掌其文辞亦俱灿然嗟乎杞亦侯国也以大禹之后而夫子犹叹其礼之不足征然则今之姜岂直贤于昔之姜而已哉夫姜犹夫昔杞也散而整微而不泯则谱力矣

潘景升东游诗小序

潘景升从余游每见必出其所业余因得以窥其进而至岁之戊子秋谒余于金陵右司马邸是时景升方与其侪偶相逐而角鸿都门之业寻久不利亟去余时卒卒未暇叩景升今年二月复游金陵则益梓其近诗若干首曰东游篇盖景升家黄山白岳间而又好游若金陵胥台虎林山水固其比席间物至是遂渡钱塘栖四明四明襟海而孕山东湖其中古刹名迹处处皆是景升与二三君子穷舟车杖履之胜发而歌诗往往清透蕴藉如金闾釜江诸曲能以宋齐乐府之调而出入建安之门近体要亦不下大历虽山水之胜有以启景升而景升之深会独诣其灵承者自不浅浅也间与其乡衮方司徒及

之方公欣然意合独谓景升恂恂太学诸生步武尺寸不失而诗多燕姬越女谑浪挑寄之辞是不累异日缙绅间声耶余报公将以景升真有之乎古之才人墨士志有所不遂则必借以发舒其抑郁才有所不尽则复借以骋骛其藻丽此齐梁之所以辉暎一时而青莲少陵氏之所不能废也令景升而改玉甚易虽然何以称哉司徒无以难也因志于简端

华补庵先生诗集序

嘉靖间无锡有华从龙先生者弱冠而自邑诸生游太学可二纪而以尚书经魁顺天荐又十年而成进士业五十余矣为郎未六岁而自免盖■〈彳昌〉徜徉于湖山之社者又一纪余而以考终先生故好为古文辞不以经术废以故得晚达而古文辞有儒声无锡与吾郡比壤郡故饶名士大夫若文征仲父子祝希哲陈复甫许元复陆叔平彭孔嘉周公瑕袁鲁望之属有屈年而与先交者有屈先生年而与交者下上扬挖无时不过从先生父曰海月翁擅计然之策起家埽素封而先生能以义散之盖终先生身五服之内宗戚亡不濡润者环所居而称里人亡不困廩我者吾郡之名士大夫皆以先生故不虞阳家鹑鹑而先生之橐则已枵然垂矣先生之诗得之文氏诸君子为多故不欲别刻鉤索以崇其格而极其变然大要和平有蕴藉语必实际蔼然盛世之遗响也余之先人大司马公同先生举于辛丑余弱冠时侍先生坐见目以小友未几而窃从郎署后以使事归饮先生绿云窝眉宇襟度谈笑非复人间人也自是俯缔姻好余尝窃谓吾家右军五十余辞郡不出先生之蚤退与之近而无竞过之郑公业有田四百顷而食常不足先生之好客不问产与之近而不为名高过之至于洒落消摇不佛而禅庶几白香山诗亦称是乃若真休之圃菰川之别业吞彼履道里者三四所少仅蛮素耳目之奉耳然亦足以观先生矣先生所著诗文凡数十百卷多散佚而其存者曰句吴集曰近遊集曰北游集曰江州集曰改南集曰真休集其子司谕明伯鸿胪存叔辈能习先生之诗而不能梓至其孙太学之充始梓之而问序于不佞世贞呜呼先生已矣世之慕先生而不及见者求之兹集求之而又不能悉先生则有不佞序在

巨胜园集序

镇国中尉唐孔炎父者食邑于南阳与余竿尺还往者一纪余矣有子器封未冠而出其文甚奇余时见孔炎诗不甚多几欲用吾家故事舍浑而就戎孔炎不以为恠凡有所蓄古法书名画之类皆属余评题今年春三月忽梓其所著巨胜园诗集寄余余读之而甚愧向者之鹵莽于孔炎也自余与歷下生修北地之业慕好之者靡不鸿举豹蔚金石其声以自附于古而才情未裕景事寡剂骛于雄奇莽苍之观而畧于澹荡优柔之致

识者叹焉孔炎长淮以北人也其调甚和而致甚清使事必愜拈韵必穩高处可步武摩诘达夫下亦不失钱刘亡论余家东吴不能尽废其嗜即于鳞而在亦把臂入林矣集中诗凡四及余然一见而三不见宜乎余昔之鹵莽也朱邸中洪都用晦最蚤善余前年为其志先辅国墓次年序宗良诗今年复序孔炎诗且当复序孔炎之子器封文矣视丁敬礼之于陈王陶隐君之于刘侯差不为负哉或谓孔炎集独偏于近体以为未备夫古有以一五言为长城者有以一絕为宫辞者偏至之圣何必减于具体之微哉孔炎其肯余言否

张孟竒广陵懷古诗序

天下所艳称古迹名胜关之西长安稍东洛阳江之南金陵姑蘓钱唐北则广陵广陵固东南大都会也当大业时淫主轻弃星拱之辰而寄惊此邦竭海内之事力以张饰之至唐而建节为巨镇又以转运度支之饶益之于是广陵之富甲于诸藩镇词人骚客又多为歌咏以益之而古迹名胜灿然备矣一敝于五季之季再敝于南渡三敝于宋季四敝于元季遂荡为烽火戈鋌之场朝暮异主遗黎孑然始以十万家称既而仅十七家耳以我列圣之生息南北之喉吭其盛获稍稍差复然而一盐客藪耳其于大雅未复也南海张孟竒今之才子也试于南宫不利奉其大人命游学于吴楚间而时时托栖广陵尝慨其古迹之渐湮而名胜之不易屈指也博考之文献而得二十余事事各有诗诗各有序序则雅而裁诗则丽而婉有赋有兴有颂有风读之而芜城■〈干卩〉沟之巨丽喆士之义训淫主之侈心若在胸睫间矣孟竒过金陵书以示余余甚竒之已而走洪中贄以谒汪司马司马欣然为雅语弁其首且以属余曰幸而续我此孟竒志也嗟乎孟竒岂以吾二人真能重天下士若皇甫之于左生乎哉司马才高固当予则何所识知即玄晏之释讥未能贤于太冲之三都也且真以为吾二人重孟竒乎孟竒重广陵乎

傅氏世系序

傅姓故无它望其先为殷圣相说寥寥者千余年至汉而为阳陵景侯宽义阳侯介子昆阳侯俊壮节侯夔以武功显高武贞侯喜以节概显至晋而为清泉侯隶司隶校尉咸以雅谅显司徒祇以政业显至唐而为横海节度使吴郡公良弼以勲猷显至宋而中书侍郎献简公尧俞以清正显忠肃公察以死难显其它列服体采声施于时者不可屈指数第晋以前不称文而晋以后不称武岂时主之尚使之将无土风家习变使然也当元世隱居不仕至明兴而有太子太师颍国公友德者出以神勇从高皇帝取天下长驱刈燕都扫秦陇荡西羌寻佩大将军印定巴蜀下滇南高皇帝亲为之铭诗以褒扬之再启茅土位上公子尚翁主东第彻侯功臣亡敢与侑者晚节以功成见嫌而上春秋高不

遑究身后事于一切赠谥封锡之典皆阙焉傅自是颇傍落不振至不能名颍公而颍公有一兄曰友仁以公故授冠带总旗蚤卒亡子颍分之长子曰驸马都尉忠所谓尚翁主者也次子曰孝出后友仁孝传子汉又亡子于是族之人保安州守润以其次子宁为汉后得世其职凡四传而为昭信公某某传今昭信校尉锦衣百户时忠信接礼人也任职亡害当迁而念其母老不安燕中养请告扶侍还杭之忠清里以其暇颇修执文之业春秋行视先垄慨然而叹曰傅之指不为少矣乃贸贸焉不能名其先甚至命名不相避凶礼不相通使我华胄之遥遥几于伊川之被发而祭者是非余责哉于是始论次其先德而断其始曰吴邵公之少孙思进公支子宗也徙内黄内黄始也思进三传而珏徙郛之瀕城瀕城始也又两传而献简公徙孟之济源济源始也又五传而至孙高徙杭之仁和仁和始也其弟亮徙凤阳而颍公继之弟锦衣孝传子汉而绝仁和之族宁继之孝支子宗也时既已论次其畧而介友人蔡大节以书请曰不穀人下中何能光昭其先而整齐其世次以肃睦宗族惟是不忍于傅之泯泯等于僿阜耳唯是吾子之一言而天下以为惇史幸怜而弁之俾以傅有闻焉夫余安能重傅且古所以叙谱之意则宋之诸贤已畧尽之复安用赘余独悲夫颍公之功大而报微也隆庆初余以前观察召用应诏陈言请録高皇时功臣而首推颍公以为当封王爵继絶赐祭格不报又二十年而召佐留枢复极言之主爵者嘍喏以为颍公功诚大然事久远难明且其后凋落无可问者封王则疑重继絶则见欺请姑竣之诏可主爵者议嗟乎以傅子所称世系傅之为傅班班也又何虞欺虽然士风之漓甚矣使余稍知颍公之族绳绳若是余亦当扞舌嫌之避安敢萎陈之哉若为傅之后人不必不名颍公当世宗之元年上已采抚臣议祠公于滇血食世世勿絶矣

重刻古画苑选小序

余镇郟时尝欲荟蕞书画二家言各勒成一书苑已就多至八十余卷欲梓之而物力与时俱不继其画苑尚未成乃稍裒其古雅鲜行世者各十余种分刻之襄南二郡郡地僻不能传之上都又会闻襄本已荡于江适友人王光禄有志慕古余搜篋中仅得画苑授之俾翻梓以传光禄请余题首余尝谓书固小技然纪言纪事要必托之以传若画最为无所系者譬则天地间之佳木丽卉而已夫佳木丽卉了无益于天地然使大块之内尽刈而为甌脱鞠而为黄茅白草何所取观哉故夫画之用饶才情者以为无声之诗而爱纪述者以为无文之史良有意也若夫推原证品合文与献而纪之唐以前虽人殊要之皆不可及已是役也姚刺史某实司校讎焉法得附书

弇山堂别集小序

弇山堂别集者何王子所自纂也名之别集者何内之无当于经术政体即雕虫之技亦弗与焉故曰别集也王子弱冠登朝即好访问朝家典故与阅阅琬琰之详盖三十年一日矣晚而从故相徐公所得尽窥金匱石室之藏窃亦欲藉薜萝之日一从事于龙门兰台遗响庶几昭代之盛不至恣恣甫欲命管而病妬之既而自惟材力绵浅一不称也所覩章奏竿尺赋颂之类鲜足哀者二不称也是非小有不当流祸后世三不称也而是时倡道者谓王子毋受役于笔研以凿性灵自是絶意不复作其它有所闻见偶书之赫蹏以数甓贮藏寻得间出之编次成秩凡九十卷携来金陵署中梓人翁生见而异之固请付剞劂是书行异日有裨于国史者十不能二耆儒掌故取以考证十不能三宾幙酒次以资谈谑参之十或可得四其用如是而已而翁生者乃欲强以灾木何也惜乎吾见若之懵于什一息也

艾氏族谱序

艾无他族其先颍事齐为大夫食邑于艾因以邑氏派分而二曰秦曰蜀蜀之派别而六而其在滑石滩者复分而四宋世诸艾多仕为名卿大夫至明而益盛有给事中广御史大中丞璞少司马希淳侍御朴左伯可久然皆散处一方而楚平江之派亦多宦为州邑职至今大鸿胪公穆兄弟而大显鸿胪之兄曰万安令科居官有声实鸿胪公生而儒异博学工古文辞其在郎署属权相固恩宠不为其父服而大瑄为之内主视事如故公奋身与今太仆卿沈纯父抗疏极论之拜杖阙下肉尽见骨行戍万里与鬼分日顾其气益王节益固最后权相死大瑄逐天子旌召忠直敢言之士以不次待之而鸿胪公独逡巡未之应其难进易退之操为士林楷模而前是鸿胪公尝慨平江之艾齿日繁而未有谱也其先日益泯泯而其后日益林林也思有所以整齐之而会万安公尝以书自通于侍御朴尽得其先世之详鸿胪公乃始纂集成谱凡六则曰谱例者其纲也曰世系者始自孔大夫以至秦蜀之派咸备焉独详于平江者志核也曰大传者宋一人明二十五人传所知也曰家礼者示轨也曰族训者敦睦也曰撰述者鸿胪之疏与纪难皆在焉而竿尺附之识大也呜呼天下自是真有艾矣当鸿胪公之抗节犯难初不复知有身宁复知族然今无论绅衿之与闾井覩姓而称艾者必惶然曰得非鸿胪公耶是忠贤族也昔蜀人薛宗起以词组抗魏帝而得高其望帝谓之曰卿殆起宗耶非宗起也若鸿胪公者起艾宗者也当魏之时代北贵姓有去斤者特赐为艾然则艾亦有他望也耶公姑识之

弇州续稿卷五十四

●钦定四库全书

弇州续稿卷五十五

(明) 王世贞 撰

○文部

△集序

西陵董媛少玉诗序

周元孚氏以节概冠一世凡再上疏再得罪以谪而直犹未已其于星历弧矢剑术无所不通精而尤好为古文辞即世之作者无以喻胜之始妇得安人汪美而贤为元孚举五男子皆育汪寻卒元孚痛不欲置偶久之感异梦乃问继于董而得少玉者董女字也兄曰侍御叔玉既归元孚即能抚其五子如汪已出谒舅姑即又能奉事舅姑如汪已而相元孚御臧获大小理家秉无弗如汪者元孚心异之问能读书否曰仅识字耳然见元孚时时诵唐诗则亦诵唐诗所臆记可千首更问元孚诗止此乎元孚曰三百篇其祖也遂益诵三百篇以至汉魏六季诸名家亡弗诵者乃稍稍出其奇以与元孚酬复元孚益大异之谓若诗成吾当叙而梓之以传后世少玉莞然曰吾妇也而又君之妇妇何必以诗传即传而以君之妇天下孰不谓出君手何梓为元孚服其言而止元孚才高而气雄间不胜其用壮而少玉则清润婉秀徃徃发于情而止于义有不尽为闺■〈巾达〉所束者当其得意时即元孚恍然不觉其左次而亡何少玉以羸疾卒卒之年二十九耳元孚鸠其遗篇什多散佚所存仅若干首乃梓之而请序于余余读之曰元孚而不见夫三百篇乎二南而下多出于贞妇良媛之作删者盖录其语而不必尽征其人谓可以风可以志而已至于汉而始有能举其人者独司马之文君秦之淑能与其夫子相偶敌文君之不以礼合无论然淑亦寥寥乎不能数章何敢望少玉哉少玉调虽止于唐然不落宋元矣使天假以年有自唐而上者咄咄逼元孚世且以元孚诗或出少玉手元孚甘之乎少玉他妇行尤工具元孚序及冯开之太史所为传中

喻吴皋先生集选序

当嘉靖隆庆间有博大剡亮巨公若光州喻司马吴皋者其馥历南北御圉安攘所在着声实余尝有传传之以为真一时社稷臣云公故好为古文辞冥探隐索务出于人所不恒道然才高而气雄朝有所请夕靡不应故其所构撰为最繁操觚之士咸服其盛

而骇其奇公厌世者久之而冢子督府叅军少极悉其遗集见委以删定曰毋贵多贵在可传而已余卒卒鲜暇盖仅阅岁而始能致雌黄之力凡得十之三以还叅军而僭为之序序曰文之所从来远矣自孔子为辞达之说而释之者曰文者顺理而成章之谓于是钩棘晦僻者若在所汰斥而不载然孔子身删诗书而乔僻峭厉之齐秦诘曲聱牙之盘庚皆存之而弗去至风之别而称骚也则楚人之所以托风其君者务为纏绵迂晦之辞以自藏而少露其指则辞达之说有所不能尽用譬之于天日月清宁者恒也雷电霰雨晦冥转击者其变也譬之于山逶迤坦陀者恒也羊肠鸟道崭削斗拔者其变也要之其变也亦恒也诗之变至于任华马异极矣文之变至于樊宗师极矣此皆知变而不知变之为恒乃喻公独不然其险也必无蹶其深也必无弗达要以说诸心而畅诸理泽如也然则识公而未尽者骇其奇能尽公者谓公之实毋愧于达也必以柔曼靡丽望公若不足夫柔曼靡丽江左之音辞而中原之所不屑也嗟乎使立而肤也毋宁立而骨哉少极第行之有刘子威袁履善者可就质焉

彭户部说剑余草序

彭润玉先生者自诸生而贡礼部以选人分教宣城属其子梦祖成进士为户部郎弃官归受其封故人或称户部君亦或称博士君云先生而好为古文辞久而晚节益甚万厯之戊子余起官白下先生特自全椒渡江属故全椒令畚君介以见余出其所近着诗一卷文一卷曰说剑余草命之序余复从畚令所见先生前集十二卷曰无毡堂者得合读之然后知先生所诣之深而且博也其诗皆婉曲工至能发其情以与才合而不伤格至于七言律尤有斲轮中鹄之巧若序记书传之类古色与生气相射于西京大厯吾不知何如即非近代所易办也吾尝屈指明兴以至于今能为古文辞者亡虑数百千家其卓然名世者亦可数十百家要皆庙廊山林之杰乃欲举博士广文而称之则不过临川聂大年吾郡黄应龙戴章甫陆象孙三四君子而已大年象孙以诗胜应龙章甫以文胜然皆厪厪肤立而至用其子有名位优游素封者锤记室之品不能名一人此何以故凡为博士广文者势必久困诸生诸生之业不过剽窃儒先之绪而微短钉组织之欲分功于古文辞则其业疎以古文辞间之则其业杂加以岁月磨而耗之甫得一官有余晷始欲呻吟以从事古之作者而不知其精已销亡矣故夫山林之杰必其不为诸生者与为诸生而不终者也若乃有子而称封君者其得志当亦以晚是不握牙筹操利孔渔猎其乡闾以为子孙计则必恣鼎味拥姬姜呼卢飞白以极当年之乐而尚恐不足宁暇刺促笔研间哉先生之笃嗜在古文辞其始不以诸生之业夺其后又不以封君之飨夺宜其所著述富有而日新若此也语有之用志不分乃凝于神其然哉余近一见梦祖诗以更超先生乘而上之父子间自为知己若此先生之集更未可涯也名曰说剑余草夫庄周隐士耳其着说剑能使人攘袂而思奋陶潜之诗何其冲然澹宕也咏荆轲一篇慷

慨感激于剑术之疎深致意焉然则先生之壮心宁独栖栖于一文苑而已也

大中丞顾公抚辽奏草序

御史中丞通州顾（阙）卿之为户部郎即以才选而金福建臬计平邵武党斗乱民寻迁广东之叅议以至臬副从征山寇有功而中忌者归久之乃补金滇中臬解顺宁大候二州土酋之构诏还公叅议于浙江两年复还公臬副而饬霸州兵事会浙有骄卒之变属抚臣铜梁张司马密捕诛之司马恐不任于是奏留公浙江以自翼凡十日而骄卒之首恶悉授首诏加公三品俸以原官饬蓟州兵事霸蓟俱天子之东南北门而公皆以才选公至时方有稻田使者公与之合策兴水利募农耕奉行之臣凡十余道而独公所治已见利数倍会辽左之抚臣缺诏推贤能知邊务者公遂超为右金都御史以往公上疏力辞谓往岁于藩臬前后薄有成效皆因人成事身所建画又多不待竟而迁浙中之役甚愧同事者或以小嫌见累而已独得超拜甚不安诚愿以故秩为县官捍蓟邊且得究稻田之利优诏不许而以稻田事责代公者公既至属北兵大入与征北前将军太保宁遂伯李公合策讨之公任谋李公任勇大破创其众斩首以千计鹵驼马牛羊万余公叙所以胜状宛曲如画而力推功于宁遂请毋赏及臣赏及臣不足以劝战士天子为之首録宁遂而公与总督王公俱迁公自金而副赏亦差次之当公之在辽辽困大水千里为瓠脱公请开海禁议蠲恤得报可公益与总督王公大师李公条辽事之所以难大势有四谓邊长寇众兵寡饷薄画图贴说而上之其所思以济拯之策甚详天子得公疏下大司马大司农议之亡不朝上夕许公自是益发纾诸所建白与注措略相当自公之在辽士饱马腾辽遂以重冠九邊议者知以战功推宁遂不知所以作宁遂之气而砺其爪牙者固公力也吾观近世之善言邊事者于西北推杨文襄公应宁于东北推翁襄敏公仁夫于南推王文成公伯安文襄详而不甚文襄敏文而不甚畅文成兼畅与文矣而不甚核乃具体集成则惟公哉公与予交颇晚而最为相知癸未之冬余与今相国太原公俱杜门却扫有志游方之外公谓余毋事笔研谓太原公毋应世今太原公已拜相树平章之绩而余亦谬误一出不唯不能从公教而鄙笔研之累且为公犯绮语之戒矣公自蓟以前所兴立不能自达之于上而徃徃托之移牒丁亥而后其因驿上封事者又不知其几余所叙仅公一斑耳公于出世经世二端似能合之余且与太原公托自解焉当不以我为绮语也

休宁茗洲吳氏家记序

自太史公之为史记而别叙传于其后欲以明其所以作史之意而推本其世系而尤详于显贤者班氏之史亦因之自是若晔若约之类虽或文有详约辞有工拙要之惟

二史之步趣太史公之传其父谈也班氏之传其父彪也二史之所从草也若周之衰春秋战国而名世家汉之初两姓诸侯王而名表者则本始派系皆彬彬可考谱由是昉矣休宁之吴故姬姓其先自太伯凡数十传而国灭因以国为姓长沙忠武王而后代有显贤不絶其在徽郡至数万余指而休宁独擅其半休宁之南曰凤山以唐左台公始也其西曰龙江则吴媪始也凤山之指繁不能自衣食有吴媪者嫠而材携其孤处焉筭路篮缕以启山林西徙之吴乃有家矣凡四传择饶地转为茗山茗山之吴吴始有族矣当明之兴茗山之吴已草创成谱而东山赵子常占之以为吴之后必大盖百有七十年而尚泯泯如也最后乃有吴广文子玉父子广文之父曰隐君某博学工古文辞慨然有意于先世之业取旧谱而新之整齐其世次俛就绪而卒年仅三十九富是时广文犹在髫辄抱遗书而哭曰孤不执觚管而以终先人之遗志者有如日未冠读经史秋文诸篇凡数百千万言其所撰述凡十年而倾邑又十年而倾郡又十年而倾海内学士大夫咸曰吴子今之太史公班氏也广文蹶然不佞恶敢当之乃出隐君之遗书而加铅槩焉曰姑有以矩矱我庶几吴德之不堕盖既成而名之为家记所以不称谱者何以非谱所既也亦吴史也曰记者何谦辞也为记之目凡二十卷凡十二用太史公班氏法也其序例辞则左丘语也诸序吴氏家记者咸曰吴子今之太史公班氏也吴子辞而归德于隐君则曰隐君吴子之谈与彪也弇州生亦云吴子闻之请而弃诸序者

少师大冢宰赠特进太傅蒲坂杨襄毅公录序

万历元年十月少师吏部尚书杨公以末疾乞骸骨归里上不允若曰是唯皇祖考之所爱立以佐余一人将统均是毗温诏凡再下公请益力始予驰传归赐宝镪彩币以行且曰卿其强精神善医药庶几旦夕有瘳以终毗朕明年八月公疾益甚薨于蒲坂之里第事闻上为之震悼辍朝下所司援故事赐祭者九卜兆域以葬特赠太傅谥襄毅公既葬久之长子今少司马俊民以大理少卿遇覃恩得追赠公特进于是司马乃合公所得敕命二通诰命十八通敕谕（阙）十（阙）通谕祭文九通录成帙而故太师徐文贞公撰神道碑太保吕文懿公调阳撰表前太师张公居正撰志铭太师张文毅公四维撰行状与诸所司覆请之疏悉附焉于是乎荣哀之谊备矣吾吴中饬兵使者李君涑梓之郡而以司马之指来问序不佞守尚书郎时尝得望公于班行中风采如峙玉既迹其行事则昌黎氏所谓龙虎变化不测杰魁人也又既而以通家子命不佞则春风霁日靡所不煦朗盖是时南北争侵扰蚕食我喉咽要腹之地邊圉之职储胥者智力俱困而不能支天子方自管三尺日以雷霆殷殷其上而柄臣乃阴操其喜怒以为威福当是时中外之望独寄于公一人公不爱其身与其材力以应之四出而将数万之疲卒于西于东北于东士奋而腾卑城浅隍忽若易而金汤者敌皆逡巡遁逃而不敢犯间一接之斩首鹵生不以数百千计不止三入而领中枢北筹边东南制倭西南策苗獠明光之疏朝上

而夕报可无一不富上意片纸下于万里之外奉若神明而不敢贰虽柄臣睥睨其傍以伺公之隙而卒不可得自是歷佐三朝或长铨地或仍领中枢或再长铨地皆与大相相表里大相明则直以伸其志大相忤则宛以完其节所谓大相者其势之轧时负而时胜而公故皎然自若其官则自太子少保徧歷东宫三师以至人主之三少其禄则正一品而勲则柱国阶则特进子孙多贤贵若少司马及进士俊士都督府都事俊彦都督府同知俊卿胄子俊臣诸孙翰林检讨元祥而下凡十余人绳绳趾美弗絶论者多美公一时之际以为君与臣合嗟乎君臣之际蓋难言矣世宗皇帝得圣之威而大相中间之为之臣者十一得如公否也不然且以为人与天合然所谓人者凝之独在公公故纯心与才合也遠固未暇论公之乡人在唐有裴晋公者其禄位名德出入将相大较与公类第公之处敌难而裴公之处敌易然裴公之告成者竟一蔡州耳而竟不能得志于镇魏公之娄出而娄不挫抑何径庭也裴公据上相数为居其下者所扼如皇甫鏐李逢吉李宗闵辈时側目焉揆席摇而弗获暖乃据公上者岂尽贤顾安公而公疑裴公之后无显者彼郭汾阳李西平之后显矣而惟不文故不能悉纪三公之盛而着之琬琰自史传外寥寥焉以公今日之纪视三公其天之合何如也君子以公真能臣公之子若司马诸君真能后故不辞而授简焉以复于司马

大司马赵公燕石集序

嘉靖中余守尚书郎获接天台赵公于御史台时公以盛年据显位然多折节待后进未尝一露得色而同舍郎有应君明德者时时为余言赵公之为长者自天性非有所矫强也余出副青齐臬坐家难归而公歷左右司寇以至正位留都大司寇其清白之操持衡之守为天下平而是时公之父母年八十余尚健匕箸既以公考最封如公秩矣公乃恳乞骸骨归养凡再上疏乃得请而属先帝更新朝政于大僚庶尹有所登黜中外台省諫臣争称公贤不宜老之林壑诏特起守故官寻转南京大司马叅赞机务所以寄藉良至公既依依二尊人膝下不忍离复再上疏乞休温诏许之然公至明年忽遘疾不起而二尊人故无恙也縉绅先生毋不以国宝家楨一时摧折为主上与公之父母惜而又重公之始为忠而卒以孝终蓋两完矣公卒之年而贞复起叅浙行省又二十年而始迁今官趾公后道经毘陵晤公之介子某别驾君出公所撰名燕石集者凡四卷授而俾卒業焉乃叹曰公真长者公真长者余虽少于公十五岁然当公之见接时以操觚之末技猖狂都下都下诸公工其业者靡不悉出所长以相扬挖而公粥粥若无所知能询之人不知赵公工是业也应君故好古文辞然所以称公独长者耳亦不言公工是业也今读公诗则皆和平郎爽有朱弦疏越之音而五言古近体尤自长城至于典雅简劲太羹不和之味流羨于齿舌间彼横溢而自谓才钩棘而自谓调者故退然而下风矣公不以名其业使操觚之人无能名之及藁存而目之燕石公岂其石也要之竟不欲以其长鸣

始终不离长者乃尔公讳大佑字世彻登乙未进士别驾名成孚故尝司谕嘉定与余善温敏而文有父风

风士録序

风士録者何侍御李公按吾呉四郡輶轩所经以公交车之业试士而録其尤以风者也称风者何縁诗起也若列国之有风云吾呉风之在诗者故轻靡以华胜今而华实衷矣在公交车业者故纯雅有方幅今或用才而过以险语整调相角矣日者大宗伯有忧之为上言诸省与南宫大造士必取通明经术不诡于道者不然即才而竒弗録于是齷齪选悞之士亦时时杂进而轻俊少年之用屈诸轻俊少年咸相惊谓大宗伯之微指欲右中州而左吾呉若越不知其所推引而为后进模楷者故太傅王文恪公尚书瞿文懿公二公呉人也御史中丞唐公唐公晋陵人晋陵亦呉也大宗伯之所左在今呉而所右实在昔呉也侍御公复忧之岂其未易而今将强变而昔或两堕耶是故輶轩之所经首以试士为要及竟试士之业而后喜可知也曰甚矣风之易也天子之可大宗伯请仅岁余而翕然一变至此哉即无论三公之谓何彬彬乎质有其文矣呉守石君请梓之曰故事也李公曰梓之第省可三之一梓而多以为诸生好则可以风之则未也盖仅百余篇云世之小公交车业者谓经生之文多割饰而于圣人垂世之训无所发论策士之文多剽括而于圣人经世之用无所补夫士藉以应弓旌鹄耳安用是纷纷为是不然在上者患无以风之耳风之而能去其割饰则圣训也能去其剽括则圣用也语有之今之乐犹古之乐也夫不佞未究于此者聊以塞公与石君之请公按呉值大水旱上书为元元请命得报蠲賑以数十万计诸所摹画哺衽之筵万方石君能奉而行之于吾夫子富而教之之旨盖两至者公济宁人甲戌进士石君黄梅人庚辰进士

文起堂新集序

张幼于有堂曰文起而名其集则诗若文咸萃焉其续集则有文而无诗今者复携一编曰新集过余则有诗而无文谓余姑为我更序之余始识幼于甫二十白皙美姿容与文征仲王禄之诸先生游当是时其才横肆不可当读之若入武库虽五兵烂然不无利钝至卅余乃始稍稍就绳墨而以清圆流丽为宗畦径虽絶而精思微逊所谓文起堂集者也余读新集则情事剂矣意象合矣出之若自然而探之若益深博而去其杂竒而削其险别而洗其迹于是乎幼于之诗成矣幼于有所构撰余辄为之序之丁亥卜藏于（阙）山之（阙）而属余草生志今者去耳顺尚四载其大用固未可量而所构撰亦讫止是哉虽然余老矣所以为幼于不朽者伎亦殫矣夫玄晏故不能胜左思陈王卒何藉乎敬礼夫夫亦可以已矣

集虚斋书义序

异时大宗伯河南沈公言诸生少年之为公交车业者日习为恠诞以相高而不得圣贤立言之旨宜一切通行裁正以成弘间为鹄故王文恪公瞿文懿公为羿当是时天下之士有应有不应而吾吴为二公之乡以故其应为稍速嘉定则吴之下邑也前沈公而为大宗伯者其邑之徐公徐公博晓经术攻古文辞而间出其余以治制科业又少时尝与瞿公相下上以故嘉定之应之为尤速今进士李先芳乡进士金兆登胄子徐兆曦张其廉诸生娄孟坚等十一人皆其邑之良而游于徐公之门及为其子壻者也相与琢磨其业曰使吾矐然而遽欲绍明成弘之统则有所不敢拊膺阔视而自附于二公曰吾其文恪乎子其文懿乎则有所不能务于吊诡而自逃于新令之外则有所不可剽腐趣易以求合于用事者之目则有所不屑吾求得圣贤之所以立言者而已矣求圣贤之所以立言者求之心而已矣吾儿士骏奉其辞百四十篇以示余读之见而别而不刻肆而不骛驯而不凡步骤有节咀讽有味庶几乎求之心者哉嘉定故多材然于科目徃徃不能当诸邑自今而徃将习习霞举矣其为我谢徐公得非公之力也欤

王梦泽集序

楚有王梦泽先生廷陈者当正德中成进士高第读中秘书以伉直故卒废死余为郎时先生尚在念不获侍门墙独得其诗若文习之以为快归吴有秣苑卮言纪其僞语侠气颇称于人人而未能定其品晚节宦游金陵而先生之孙颍州太守追伊重梓其集于郡而俾余序之余故尝通楚棹机诸家言窃谓春秋之季其主筭路篮缕以启山林其民魍结左衽日寻于干戈岂复暇问觚管之业而时已有倚相伍举者出而综坟典娴辞命厥后屈左徒氏遂以骚辞开百世宗而宋玉唐勒景差之徒相与绍明之及秦汉而后小有显者亦不能与东西两京之彦埒至唐而仅有襄阳杜氏孟氏杜氏之业差为宏博与屈氏分途而偕不朽若文史论建可称述者抑又鲜矣明兴百五十年而始有先生先生甫弱冠天才横溢飞声秋林超宋乘而上之步武开元大厯以与六代接文则自西京而下之亦不失六代其尤雅隽者书牋大小数十言言子长少卿也诗无所不工丽而五言更长城矣先生既以直废死不得珥簪荷管为县官司述作之柄继先生者三太史俱以博大竒伟称雄馆阁间然有韵之辞视先生不啻径廷也后先生三十年而先生之乡人则吴明卿氏先生有专诣而明卿取兼能若今周元孚邹孚如诸君子交轡而驰康庄焉能舍先生赤帙哉嗟乎衡泰蓼二岳七泽三湘山若增而隆崧水若辟而灏滢者其为先生辈耶非耶余文荒不能当先生虽然颍州以为前茅而余且私其骥尾矣

梅季豹居诸集序

弇山人曰余少年时称诗盖以盛唐为鹄云已而不能无疑于五言古及李于鳞氏之论曰唐无古诗而有其古诗则洒然悟矣进而求之三谢之整丽渊明之闲雅以为无加焉及读何仲默氏之书曰诗盛于陶谢而亦亡于陶谢则窃恠其语之过盖又进之而上为三曹又进之而上为苏李枚蔡然后知何氏之语不为过也四言则国风而后絶矣骚则左徒神而赋则文园圣盖并轨于康庄而分镳于广莫本不异也厥后以铺张驰骋相竞所谓记繁而志寡者班张而下咸有之以故赋之用日广而骚遂屈斯义也徐昌谷之谈秣胡元瑞之诗藪能称之而献吉与仲默间能为之今天下之操觚者不少矣徃徃乐近体之易入耳而轻得名洋洋乎靡所不条贯至于歌行之类则艰习之何论五言古若骚赋风雅与之谈未有不思卧者矣戊子冬为有举宣城梅季豹者曰是夫也能不为近体人也已而季豹来谒今年冬则出一编所谓居诸集者见示则皆骚赋四五言古诗余乃以暇卒业焉大叹诧曰世故有人哉若季豹之为骚赋于左徒文园时时取财而别具悲慨婉冶之态五言于汉魏时离时合而其合者并其气度色泽得之惟四言不能窥风雅藩要之梁陈而后絶影矣使季豹袭古衣冠而不为金陵市客而访我于弇中吾且以为千载人焉敢以季豹目之故慨然为序其集集曰居诸者盖犹有待也季豹志也若其篇攻字琢为季豹忠臣者则有其宗人台祚在

弇州续稿卷五十五

●钦定四库全书

弇州续稿卷五十六

（明）王世贞 撰

○文部

△记

太仓州重修儒学记

太仓之学故寄卫自弘治丙辰始建州而卫学归于州者八十三年于今矣释菜之宫独岿然一鲁灵光而诸讲堂诵舍以至博士退食之所多摧圯剥落风雨割其隅霜露

降其席博士师弟子鞠于草莽而不能时授受谋所新之者欲请于御史诸台而不果会州守张君朔望朝夫子宫喟然而叹曰是乌足以烦诸御史台即不穀黍为其州大夫而忍于其子弟之学者乃首捐其赎醵之橐以畀诸能吏陶瓦斩木甃墼榱桷之资不浹日而办不移月而焕然一新于是博士师弟子胡先生辈相率而诣余请一言以侈大张君德意而申相儆俾示永永余不敏窃谓古之所以造士于学者莫盛于三代庠序校之为名人伦之为实典谟雅颂卦爻之为诵缙收端皞鞞绅綦偃琮璜琚瑀之为佩服而逶迤周旋咏歌击拊之为容声诸学士大夫类能举之而学之弊亦莫盛于后世师之所以诲与弟子之所以学者束缚于经生之制甚而至于训故之凡亦不能守而巧为俳调以苟徇之伸吟占毕以希异时之青紫目若望羊心摇摇若悬旌一得志而随弁髦之矣毋论其精神之所注寓即不知礼乐射御书数为何物将何取于学也学士大夫类亦能訾之而余顾窃有疑焉夫远不能举二代即周之盛时曰成康而其所造以貽昭穆之季者不闻修周召之业以协和万邦抚来四夷而周召暨吕毕诸圣人或贵自王室或贱自渔钓亦非有得之于青衿誉髦之选者何也犹未也以吾夫子之圣而七十子皆负异资而为之依宜其处者皆圣嗣出者皆王佐而性与天道自颜曾之外寥寥不数闻大则国相小则家臣业已见其能于公私之朝而所就不过足兵裕民之微绪而已西河济南之徒厪厪守一经之疑似而不能息处士之横议赖孟氏而始振之至学校之设不肖者若原氏之乡士欲毁之以纾议而贤者则东京之雋以名相使激而貽忧于社稷数千年之后忽起而濂洛关闽再起而左广东越或以超旷之识抉千圣之真传或以精微之力祈千古之疑翳此其人徃徃家庭父师之所讲求而其大要乃自得之心而已夫岂一学宫之力虽然即境以探真由器以悟道虽洒扫应对可通礼乐而穷神化况于本经术而训故之世之人苟有能缘此而自得者即成周之所以造亦未也盖学成而张君署其堂之后楹曰振德而余推其指于自得如此君名博字子约山阴人举乙丑进士自户科左给事中谪累迁吾州守其于民能富而教之胡先生名大雅诸博士某某于法得附书

休宁县重修文庙儒学记

自三代以降天下有学而无祀所谓庠序校以至泮宫辟雍之类诸博士弟子以岁时讲修诗书礼乐射御之文极而至于邦国大夫于此听政受馘而吾夫子肇明六经之道如日丽天天下则而仪之为天下君者追而显之然至读鲁相晨庙碑则吾夫子之乡其祀器典守尚有所未备何况其它哉自是而后吾夫子之祀事日益举而古之所谓学者乃不尽丽于其宫是故天下多有祀而无学至宋而稍稍合之休宁僻在万山中其始蓁蓁然安其为朴至宋而稍通于俎豆之事人材乘之以出霞蒸焱奋为世黼黻然而宋之所建与元及我明之所修其学宫俱隘陋弗称又属岁月久亡所不倾圮于是邑之贤士大夫侍御胡君辈居恒窃叹以休宁于东南最称岩邑其户口之繁庶居室之宏敞不

在三吳下行賈偏于郡國而廩筭之藏悉以靡之梵苑叢林而亡所靳顧于吾夫子之宮與儒學乃若任其廢而弗為之所且吾儕幸而得與聞斯道以備世用乏而本之弗思人其謂我何屬郡太守徐君司理舒君以行部至其邦顧瞻之際慨然興忼時邑令陳侯仰承而身任之捐月奉若干緡以倡諸吏民漸有應者于是謀之胡君總其凡而博士弟子凡三金為世澤為有聲為人龍及汪廷誥佐之胡君謂不穀之治蒲也有成模矣侍御何君鄉進士程君輩聞而先之邑士民汪大光輩繼之其鏹自家帑以至於公相屬也其土石甃木自郊關以至丙舍相屬也木取其偉長者石取其貞潤者甃取其堅致者于是有重建曰大成殿曰啟聖祠曰尊經閣曰敬一箴碑亭曰二程祠曰三博士齋曰諸弟子讀書舍取更新也有改建曰明倫堂曰儒學門曰文會堂曰朱子祠曰名宦鄉賢祠取徙地也有創建曰成潔門曰省牲所曰神廚曰報功祠曰遺教祠曰魯源亭曰壽云門曰文昌閣曰居業門故所無也其地辟五之一宮室拓三之一創亦如之自是休寧之廟學蔚然稱巨麗觀甲于郡國而胡君乃與諸君具其事介幣于余友鄉進士詹君而以記請余竊意之廟學成而邑大夫師弟子與其吏民舍菜而登廟宮之陛有不儼然而若吾夫子臨之在上者乎退而講于明倫之堂有不悚然而若君臣父子長幼夫婦朋友之接于目而警于志者乎又退而登尊經之閣集文會之堂肆乎讀書之舍有不油然而與詩書易春秋禮樂之教相融浹而無間者乎及其出義路辭禮門行稍遠則稍怠甚或錐刀之息屬乎手而求念生睚眦之忿交于目而忤心作問其向之所謂儼然悚然油然者忽然而失之矣其所以忽然而失者則其儼然悚然油然者暫然而得之非真際也且夫是廟宮與學之廢久矣其新之也木資之人也土石資之人也甃資之人也然一念之欲新而同志者來不浹月而材具不浹歲而廟宮與學成夫人心偶翳之耳非盡廢也五倫足之心六經足之心而吾夫子足之心苟欲新之不再念而來不浹時而具成矣而程子而邑之所稱以為其后者也朱子其所自稱以為而邑產者也今其學具在即簡煩小異其大指有不本之心者哉廟宮與學之新以迹教而德之新不以迹教余故稍次其語以紀成事而示夫同志者徐君名成位楚竟陵人舒君名邦儒芝城人陳侯名正謨閩南平人胡君名宥何君名其賢程君名廷策詹君名景鳳皆邑人

太平府修城記

太平古金陵支邑也後稍進為郡與金陵俱倚天塹而固自金陵之為帝者都而太平之人民田土兵衛不能當其十之一然寔據其上游為之儲胥御圍而制其命如古所謂左馮翊者當天之割而且合北不得太平不可以窺金陵南不得太平金陵不可以守夫以太平之重若此而自明興二百餘年以來守土者安于平治之形而不暇省其城低庳使弱者憑二尋之衿不必羽而登也所甃儀表而毋及里陋不容軌土惡善潰不必淫霖而隳也萬曆辛壬間莆田林侯來為守恤民隱搜吏弊興士風諸所以稱塞守狀良

悉顾以时周行睥睨间而忧之谓卒有不虞如桺榑何即不谷狃前人苟简及瓜以俟后之君子彼复狃我将县官何所赖焉而会治兵使者程公按部来与林侯筴合乃上侯议督抚中丞孙公江防中丞吕公巡按侍御陈公得报可为具疏闻之上下大司马大司徒议报可下中丞侍御已复下程公程公下侯所与倅陈某当涂令杨某规度所增筑为堞者三千七百六十而赢其崇二丈三赤而赢里坦之崇一丈六赤而赢厚一丈七赤而赢周遭为丈一千六百六十而赢所改饰为丽谯者五为津关者三为戍庐者三百而赢计直为中金一万七千七百九十而缩谋之帑不足则请诸郡减卒直八千四百四十余金为之干不足则陈公以千金益之程公再以千金益之孙公以五百金益之又不足林侯与杨令复率赎醵千金益之又不足则为勇爵赐级以劝郡人某某凡三千余金益之林侯乃率厉其属与士卒分功于版筑间盖不阅岁而城成以书属余俾纪其事余故尝臆史所称请城洛阳与大梁者或以天子之守守在四夷诸侯之守守在四邻为说而讥其示人弱窃以为不然夫地利不如人和虽贤者记之然至夫子之系易未尝不曰王公设险以守其国未已而又曰重门击柝以待暴客盖取诸豫夫以大圣人而当取卦尚象时夫岂有暴客之足虞而制为重门击柝彼所以待衰预变之计周且远也故曰需有衣袽终日戒又曰其亡其亡系于苞桑若世宗朝宁不亦重熙累洽哉一旦岛寇卒起而大江以南佳丽之地其无城者城而庳且薄者悉其子女玉帛以餽寇三里之垣苟不至隳老弱荷担而立乘高下瞰贼目饱气尽而走耳城之不可以已也如是今幸台察监司诸大夫与林侯合筴而固太平不至大损县官帑虽曰齐民之力而善用之说以先民民忘其劳咸相率赴事不岁而成百世之伟功且因以为金陵上游卫其事岂浅小哉虽然所谓有形险也无形之险在黔首心林侯固已饶得之矣请以是风倅令及后之君子毋忽诸则永永有赖哉

兰溪县治厅壁记

吾里中张侯新之治兰溪未改火而剪除其民之败羣者乃均田赋清狴獫以与之更始而治事之舍日就圯上雨旁风靡所盖护诸吏惴惴负庑壁而从事案牒拮据鸟鼠共之何以讥诃阑入张侯叹曰是犹可旦夕支及其拉然割然而鼎创之费则巨量吾奈何避其名而貽巨量之费于后君子请诸郡得赎醵之羨与口缗百金而节缩其腹推赢禄佐之民献其力工师毋敢匿寸阴以戊寅之冬仲立趾明年之仲夏而告成事厅广六丈四赤深不及广者二丈四赤高之为丈者三而加丈之为赤者五左尉幕右醵库总之若干楹吏庑以次益采易栋其規制大约不甚浮于昔而增完壮焉未几张侯以外艰归而豫章喻侯均用故尚书郎出佐藩幕再移而代为政居而甚安之乃捐书币请于王子曰令今苟免于僂人盖有余警云而敢即安于此虽然令骤居焉而不虞夫拉然割然也夫不虞夫拉然割然者日而夕饭而兴以颛精其思于吏治夫不虞夫拉然割然者而不

至勤用父老之力于土木则皆张侯赐也吾子其宠灵之一言以毋忘侯不佞曰善夫居者之安而追作者之劳甚厚道哉虽然喻侯今实居之夫兰溪浙东最岩邑也其延袤四百里而奇其户口十六万七千而奇是居也四百里之所取风而十六万人之所籍而孳育者也侯晨而坐堂皇少选而听政夕而憩覩其巍乎崇高者得无有远于百里之叹乎夏共其税赋于兹廛野之橐得无忧于尽乎两造实繁强者囂囂器器弱者得无忧于不尽乎单赤得无尚失职乎学校之气得无犹有微阻乎一言善而应一言沃而违侯其慎之哉若夫洞岩峙东兰阴峙西南住为南白石为北争出其朗爽秀拔之资以助侯燕喜稍与邑之二三君子鼓琴歌薰修宓氏之政而大之此则侯之终事也于是不佞之王父司马公去令垂一百年而吏民讴思之若新喻侯曰子之一言寔徼王父大惠不佞亦曰二君子也继王父而三夫谁曰不宜是为记

移建京圖营公署记

京圖总者故京口要害地也其先以一副帅临之所部卫十五水陆师余万久之革而会岛寇起义置将秩自副帅杀而为把总置兵募士二千舟百七寻又裁为募士三百余益以邑卒百五十其稍益以募士三百六十通为兵八百最后始定京圖总以八百人画地上高资下安港所任汛警百五十里而遥而割镇江卫属之京圖总始稍稍成军矣顾其名驻圖山而署实在京口故都指挥朱君以荐来治总事未几叹曰圖山踞江汛以不时至而我高枕而安重城之内即缓急何以达即达矣何渠能应之且将不控要害而士卒不丽将其何以军于是上书兵备使者王公请移京口署于圖山兵丽之而他所上数事其要者在汰老弱革冒食练行阵明赏罚兵备使者下郡守令议谓朱君所请良是使者以闻督抚中丞宋公江防中丞王公诸台御史郭公陈公王公房公俱报可而独王公慨然谓是总也其移署筴甚长而訾短遂捐军饷金五百以授丹徒尉杨泮俾卜地于圖山之左大港不给而代王公者胡公及诸台御史郡守令复捐金二百以益之其又不给而朱君倡其三哨之将吏士卒捐廩奉金若干以益之盖不踰季而将有署署有门有庀有堂有寝□卒有营室而所辟练地以辟民舍丘垄稍移之江口其费复朱君与吏士任之既成朱君来谒余请纪其事于石余窃谓倭事暴起人出其筴以为备列戍置垒相望于江海之滙而大农少府之钱粟昼夜犖而委输于军一旦事定诸少年握筹算而较之饷日以减卒日以耗戍垒日以颓废其将日渐省而其存者知有移于内地以自便而已上下交相狎以幸而岁汛之不警几得以迁或代去今朱君独能毋传舍其官又不即安于内地而愿以其身当余皇出没冲王公又不忘危于安而宽其出纳使朱君获信志焉其贤矣哉朱君虽所部八百人与一卫之畸卒拊循而振之钲鼓啸呼江波立起势若万人斥逻相应于百五十里间游徼之所旁及鹽盐亡命椎埋之徒鼠窜而不敢发则是署效也且为毋负王公矣鷓鴣之诗户牖绸繆六四之需衣袵终日古人之

深虑远顾若此后而居是署者览斯记者时时念之则又为毋负朱君哉王公名篆今为左副都御史楚之夷陵人朱君名先今以游击将军行总事吴郡人

纯节祠记

晏阳子之女于学士公也盖尝字徐生矣十七而遭上真稍稍启道要徐生之父叅议公且委禽焉而生骤病物故晏阳子知之蓬跣三日哭出其橐则有成制缟服草履御之以见学士曰儿托体大人不获为徐生死当为生称未亡人学士亡以难而晏阳子故不食至是益不食者六岁所晏阳子业为徐生守然当学道而上真故试之以徐生之状与辞加媿腆焉而晏阳子确不移意者再而道遂成晏阳子之道成则请于学士曰愿得一酹徐生墓既酹乃曰吾止此不归矣家大小强之不可得则以一毡坐丙舍之中庭左暑雨不徙足毋论昼夜其又三月晏阳子乃辞众立化化之前一夕复请于学士酹生墓既酹谓学士曰吾受上真命遗魄有所用之不获已从徐生蓐蝼蚁奈何盖晏阳子犹两髻云至是刃其髻之右授学士为我属徐公祔生窆可也其明日为庚辰之秋九月九日其又四月而叅议公发徐生之窆改葬于墓之震方去故地数十武而遥以晏阳子之髻祔焉堂凡五楹中肖像为晏阳子示有尊也左室之偏为徐生主而晏阳子配焉示有亲也祠成而叅议公署之曰纯节而属世贞记之夫晏阳子之为德备矣于生死离矣顾斤斤焉取人道之一端而标之者何居徐志也夫何以称徐志也为徐氏始终故徐以家人礼祠之也曰纯节者何居节者竹之德也纯者丝之德也今夫竹自寸萌而纵之而寻丈以至于凌霄汉得节而裁然后劲丝自寸缕而衡之以至遶幅色不杂而后得称为纯其在于人亦然故节者所以御滋也纯者所以澄节也甚矣节之不易言纯也天下之成为妇而殉其夫者二其恒以生殉而不恒以死殉此其志烈冰霜而贯金石夫孰得而议其后然以百一较之恒者容或深于情而不恒者容或激于变情故有所不能已而变故有所不可已以是言纯纯得无间哉晏阳子未成妇者也生不识徐生状何所牵于情学士为之父何所虞于变第谓人道当如是耳而矢不食之誓以附于祝宗之祈死而竟不死当其道之成能使徐生出幽途受天趣将何有于身之殉然其意若曰吾知所以为徐氏者而已吾用是始必用是终而然后庶几亡愧哉今夫上真者得他心通者也夫岂待试而后知晏阳子欲以见晏阳子纯也生殉而不以情死殉而不以变至哉晏阳子之纯于节也始晏阳子尝筑室于郭之内以奉上真而署曰恬澹学士公司之今祠郭之外叅议公司之君子谓维世之教斯纯节甚盛蔑以加矣出世之旨则有恬澹在晏阳子他事详大传中徐生讳景韶有文行十八而夭叅议公名廷裸以需调归学士公王氏名锡爵佐大宗伯无几以省覲归夫二君子者景晏阳子之道而趣之将毕身者也

开太仓州朝阳关记

王公以燕见诸生而问所宜兴者诸生刘大伦等对曰州故有娄江云自西而南而东达于海据三方而抱吾州以为形势海潮之至者日夜各得一焉其东入东关而西其西入西关而东以胥会于黄宫之左而后退诸刍粟货币之寓于舟者亦从而入以共吾州吏民其东关尤号称利便而先年有警于海者谓其近之故累甃而塞之水折而南而西争门以进其气盛于金虎之方是以荐绅绌而介胄时胜其刍粟货币束于一窞而不得达是以物直踊而担夫重其门于东者毋所受生气是以其民萧索而不舒所进不过襁负是以生理薄而坐困窃以为复东水关便王公瞿然而听曰固也吾且行相地焉谓自故东关而稍南之踰一里许可穴也谓其方曰巽方从生气也关东西丈有二尺高加寻之三以通舟而已其关之外则自濠而东芦福泾以达半泾而始得大河为丈者亦六百余关之内则自濠而西转樊村合致河塘而始得故河为丈者杀其四十直因之畝力因之直皆从民便也仅十五日而工毕王公警度势尤以为东少庠不能与西敌乃崇钟楼以俯瞰之钟声发则百雉而内外无不闻者于是东郊之氓转输无迂道左闾之氓化居无负戴而紆衿拖绅之士见若以为拾芥青紫已讙称讴谣之不足则从诸博士某等介而请记于某以示永永某窃以春秋之义凡工役而义所不当举者书重者书非时者书今王公所通一关耳乘民隙而用力不能一旅时不过岁三十之一而何以书也为其从民愿也百年之利在是矣盖工甫毕而天子以公四履之地水当有所宣泄下玺书趣浚治之夫公不难四郡一州十七邑而难此一衣带水也虽然兹非其小试也耶公诸兴革功德于国家斯民甚大其为钟楼意甚远皆不书书其所请者曰开朝阳关记公名叔杲字阳德永嘉人以大叅行兵事

复周玉崖公赐墓田记

嘉靖辛卯南京刑部右侍郎玉崖周公卒于位时公秩三品未及考而天子念其贤特赐祭有司为治墓公之二十六年为隆庆丁卯而给事御史以故名臣当旌者具公事状上天子复为之超赠左都御史而其年巡抚林公润下邑司礼公墓邑司言公墓田为畝者四十而赢秋赋为石者十六而赢官今不优蠲之而孳孳焉责半菽滞穗于松楸丙舍之地非所以妥贤者魄而标士大夫观也因具故少宰叶文庄公太常魏文简公例以请林公是之许以他羨赋补着为令于是公之孙邦柱者感天子后先德意林公之能奉行于公之所遇愈远而愈隆也谒不佞为文树之石以垂永永不佞窃谓古先圣王之政莫大于礼贤而厚终以故式闾表墓首施之于胜国之臣而不为骤及德之衰于厚终且鲜矣何乃能追远也周公在正德中批鳞抗颜以与权幸搏中县官所甚讳迁谪万里而不悔于时称为直臣更化之后雍容历藩臬进台省抚字与扬激相剂于时称为良臣公之所谓良臣者虽夺于年未究而计其为直臣时缙绅尾之悍侯扼之其不委骨于

瘴烟丛箐之间者几希即所望能过一首丘而竟自迁人起通显其歿也人主为治窀窆而不以烦其家其既葬而久也悉蠲其墓之赋而不以累其后人夫以一枯骨而荣施之若此其追远当又何如也吾闻夫古之治冢莹者汉莫重于长平烈侯青冠军景桓侯去病博陆宣成侯光唐莫重于英国忠武公绩陪位象武温明之制几与乘輿埒然未几而失其族即不尽赭而鞠为茂草若敖之馁因之周公非藉汗马劳官犹在亚列而所赐墓地赖天子德意林公及诸有司之奉行易世而子孙能保之呜呼休哉君子谓邦柱可嘉也其能守也毋愧于周之冢孙矣

陆氏放生湖悠然亭记

悠然亭者其址据湖之最胜处湖故陆大夫公有也当陆大夫公日与其子司空与绳学宪与培辈舍而弗渔而时时以所遇之鳞介毋论巨细即赎而放之故其湖曰当湖一曰放生亭之北为沙盆渚其上有塔峙焉傍为塔院翼之陆大夫公所营也渚东北为放鱼矶夷于水贵易也余尝以通家子一再侍陆大夫公及公歿而游于与绳最后登兹亭而寓目焉其隅湖莫南而全湖枕于北粘天无岸日月得之澄鲜■〈火旬〉烂宰堵遏云时吐光恠万堞止坤丹谯若霞圜桥西南蜿蜒垂虹憑栏放歌天籁和之意甚怪也既而叩与绳所以名亭之故则取子产之校人语夫校人不能得鱼事而能得鱼理其始舍之而圉圉焉纵之洋洋焉悠然而逝即古今善状鱼者莫兹语若也然而鱼之所谓悠然者与人异方其失水而困于网罟也束缚之急鳞鬣尽挫第能觉其苦而不知有砧盎之虞及其获水而圉圉而洋洋而悠然者形也非心也盖至于悠然而俄顷之所谓苦者失之矣人之就网罟也庾继攻其外而愁忧攻其内及其甫就解而前念后念交戟之贤者内追咎而思改不贤者追咎人而思报欲求所谓食息之悠然者竟不可得也故曰鱼相忘于江湖易而人相忘于道术难也与绳曰不然吾之所以名在放生夫放生之名池久矣唐宋之世州郡在在有之以祈人主福而责额数期日其十五死馁而四饫于渔子之腹能生致者十之一耳环而堤之一旦人主之法废而耐水者徒手而取盈是以生理发杀机也夫不取不放梁武之所以见屈于北使也今吾则不然遇而赎赎而放唯不聽戕贼之耳而不为之限量我悠然而忘鱼放也鱼之悠然而忘为我放也是相忘也且我何知福余乃曰有是哉吾子之近道也虽然吾子能为竺軋先生言独不见夫娑竭之鱼长四十余万里两目若日月游戏于无央之海天下之言快者莫加焉而古先生曰此夙世业也欲脱解之其道无繇耳然则为子之湖而鱼者其业耶其非业耶业而生者悠然耶将灭者悠然耶与绳听然而咲曰我非鱼不知鱼之悠然子非我安知我之不知鱼之悠然请志之楣以俟河伯过而诘之

梦游记

五月九日夜四鼓梦有僧过访语次曰去观而西则华严庵也能闲一游乎问所以名庵曰普贤经行道场也后有岭石若青羊岭故又曰青羊观玉局老公像在焉俄而御一小篮輿挟两奚童西若沿长堤者其南皆麦田黄云被垄隐隐见城堞行可二里折而北得一桥其高下瞰人屋而以砖砌之傍皆大榆柳桥下流水■〈车𠃉〉■〈车𠃉〉余意已乐之又数十武则若街市颇坦陀而行人甚稀山门翼然前所过僧出迓曰公来矣入门左方有若严道场者梵呗磬铎声振耳拾级而上至前殿已又拾级而上至后殿殿不甚高大亦稍敞而皆扁鐫不可开庭际古槐寿藤虬龙屈蟠苍翠映罨右庑得一窠而入僧曰此禅房也室宇高下鳞接然不甚整次乃复循阶伛偻而上最后呀然门忽开目境若辟而新者盖殿据山而趾其后壁数丈外临绝壑壁之后中一洞庭石二斧劈二锦川翼之庑者亦可三丈许色皆甚紫文理密致皮骨皴■〈疒豕〉可恠壑之南为岭中断左右嶷然青石望之羊也逼而视之则不类以顾他石诡瑰千状有若据狮者若斗虎者若牛下饮者若猿猱者其上皆髯松文栢其高造天岭之北则平湖万顷一碧阴云解驳日脚下漏为金银琉璃者不可胜计鳧鸥鸛鹤鸳鸯鷗鷺之类散布砂碛烂若舒锦余顾僧曰此为何兰若何墜耶吾所知于里者海宁隆福淮云三刹若衙院耳夫吾生五十有七年矣而不知有此何也僧咲曰公自有之公自不知耳虽然姑为我作一记送余至山门而别乃醒余生平所游太和之南岩五龙诸宫洞庭之资庆包山长圻钱塘之昭庆藕花洲诸寺其胜埒者当时歴歴真境第不转首而失之追数若一梦然则夜之所梦其果真耶其非真耶今梦而真昔真而梦异耶不异耶既以称庵又称观老子之于普贤有诤耶无诤耶吾皆不能为之辨而又何记为虽然吾既已许是僧矣姑以梦语了梦事

弇州续稿卷五十六

●钦定四库全书

弇州续稿卷五十七

（明）王世贞 撰

○文部

△记

相国养斋严公读书堂记

太子太保吏部尚书武英殿大学士常熟严公尝读书于虞山之北麓云而会公去诸生久其书屋渐以废独遗址存而公之执戚萧君者感公恩而葺之为堂五楹以度公之所读书而竣公之子孙来游者其进而三楹祠故言子游其又进而三楹祠故虞仲雍盖吾夫子之所后先推许以当逸民文学选而公之平生服膺而愿学者也堂既据山之胜恠石攢岷而贄目清泉■〈彳 虢〉■〈彳 虢〉而荐耳修竹茂树中外暎带其苍然之色与石会而鉴然之音与泉会即公杖屦一再过亦为之欣然忘返而萧君谓不可无述乃属余记之以示永永余不佞窃谓公之服膺而愿学者既无如二子然虞仲之时当未有所谓书而其所佩习不过太王肇基之训而长我勾吴至奕世而尚未能革断发文身之俗仅以一恻怛之让而使天下后世晓然而推通于君臣父子兄弟之际有余味焉子游北学中国得夫子以为之依归而置其科于文学顾其推而用之于武城者其迹仅在于弦歌武城而精微则归之道以为君子小人之所俱不能外然则二子之为书大约可知也严公于书虽无所不读顾其好既尝在二子及其业成而用词科入中秘以寅恭佐人主格天下之化者十余年而宰铨柄叅化机其獎进士类必捐遗金之被裘公行不由径非公事不造庭之澹台子羽而一时之格心真若化阳鱎而神龟削虎翼而麟趾者然天下甫能窥公书之用而公内不胜其让归其职于天子而奉二尊人以安于乡过者若以为华胥为畏垒而不知其太和至顺之俗去言子之前而虞仲之后无几也吾闻之世宗朝诸以礼乐遇人主至辅相者自爱其稽古之力而必侈其微时之所占毕之地而以书院请天子亦为之嘉异而章表之然徃徃不及身而遂泯后之人至欲迹其地而不可得者有矣严公之读书堂公不自名而一书生名之上不以藉人主之宠灵下不以烦县官之版筑与闾左肩臂之力徒以未剪之茨非刻之桷而嵬然与虞仲言子鼎峙而称三不朽焉于戏盛哉是举也夫岂惟公之名与堂俱永永即不佞与萧君亦藉之永永矣公字敏卿尝署其居曰养斋天下不敢以字称而称之曰养斋先生

怀德堂记

怀德祠者何祠故谏议平湖冯公者也公举进士拜行人奉使便便有侨盼风寻入谏省论亂中贵大臣直声动天下出而一领望州再宰岩邑所至号为神君而中厄于忌者竟挂冠归公享寿七十（阙）自成进士迨捐馆垂四十六年然为德于州邑以岁数之不过十之一二而为德于其乡则十且八九以故甫公歿之踰月而诸生沈维镜等若而人请于令愿祠公于乡贤三老徐燮等若而人约正方桂等若而人里赋长潘钿等若而人塘长陆卿等若而人市人周栗等若而人乡人孙昊等若而人邻邑人朱寅等若而人复相率请于令愿特为祠以报公令刘君异之为再核其事咸信乃下教特祠祠公三

老等则又相率请于令谓自黄发而至髻儿齿而至齟者畴不食公德而以烦有司之帑愿得一切共财力从事而会公之子大叅敏功太学生敏效闻之谓以先君子德而食报则可以先君子德而使诸父老昆季勤财力而从事则不可于是议祠地地取之家别业之趾议祠祠为堂三楹楼三楹其门室左施药而右施茶咸取之家帑议春秋祠与茶药费咸取之冯氏之肆税而官民不与焉于是三老等则又大悲喜谓名为报公而我曹不获一供财力何冯公之善用德而二子之善用报也则又相率请于令刘君命其祠曰怀德而属不佞记其事不佞公门下士也不敢以椎不文辞窃读三老等所上事大略云公居恒谓家居不计倪不可以饶不饶不可以伸志夫人富而仁义附焉故自其罢官而具少奉羨即以收弃田而治之皆成上腴又以其田入益斥置傍畝已又以其法教邑中畊者已又以其为州邑时赋三则及助徭法语守令行之亡何邑田皆骤贵于是公喜曰吾可以为德矣其首施则伯仲子姓有四时衣帛廩饩之供诸习儒者教之农者田之贾者譬之稍次施则五服之族属其更次施则五服之亲属其衣帛廩饩之供通杀而吉凶缓急靡不于我取之其最后施则邑之老者疾者无子者不能棺者叩之即响应而又推其余饶筑城当睥睨者数十雉城成而岛寇絶不复窥修通都之土石堰十五石桥三十二浚陈塘为里二十七筑义塚以藁讨贼之殍骨而封之又以其暇旌节义瞻孝友假典礼佐有司之权盖环公居者可十万户其大半食公惠其自罢官至捐馆三十四年如一日矣吾闻之昔贤美前王之不忘而推其实第不过亲贤乐利之被于君子小人而已今谏议公所为德仅仅一乡邑然为之人者尽于前所云之二端而亲贤乐利其被泽者迄今未已也夫安能遂忘公夫以樊君云之工治生与赈贍不责报解讼焚券得公之近似而天之报之通侯者累世然未闻其仕宦善状朱仲卿之歿思托祠于桐乡而不敢望其乡以乡之所被德浅也公守吾太仓不再阅岁去今可三纪而士民今且议祠公公殆兼君云仲卿而有之矣于乎贤哉公讳汝弼累官至扬州郡丞又以敏功贵封臬副而其大节着于谏议故特称冯谏议云今刘君名士璵安福人有政声

吳邑令宋阳山遗爱祠记

当宋公之自吳令入为御史也而吳人为之碑以表去思其辞为故吏部郎谷祥其又十五年而公以抗直忤世数起数蹶而吳人益思之为之祠以春秋祀其记为故少叅廷裸二公皆彬彬质文君子不轻为然可者也其又五载所而吳人益思之谋饰其词而问记于世贞会公有新命以中丞节来抚江南而吳则其宇下邑乃逡巡弗果曰是于格戾且未可以辱我公闻而久之公迁为南廷尉以去于是其父老相率而请于搢绅先生曰吾侪小人即一食息而无非公赐乃能竟忘公惟是诸君子笃亲贤之思何所藉以不朽顾谓世贞盍伸前诺世贞窃臆公为令在嘉靖中其时国家未有宫室之事与南北备倭夷费乡民坐仰南畝而修公家之岁额以为恒然至一撮长赋则立瘠贫者破庐产徙

箬鬻子而犹不给窜跳相属即稍饶而孱者讎视其田田益贱畝不能售数锱直公黜析其故久乃得之曰吾能为若主于是计赋区区率百畝抽其五畝以助长赋者邑区凡三十六得公田万三千畝而公又为之正疆界择主佃谨出纳诸赋以重轻差次受助自吴邑行之久益称便而旁大邑亦稍稍规抚公成法江南之不为公田者无几以故公去令而县官有三殿役南备倭北备狄一切以军兴从事大农少府水衡将作之使猬集而有司尚能以下中之农支梧其间吾民亦重去其土间者一少苏之畝日以贵数倍其旧矣公为吏务宽平襁褓小民而治而至有所掎击非胥魁即上豪弊罔山积一阅立扫度后先令吴者困公私冗亡暇寝溲而公间则为诸生讲说经术治道慷慨节概贤豪之风征召文士为词酒游雍容甚都吴山之间焕如其色矣士民之所以交思而不忘有以也吾闻之朱仲卿为北海太守治行第一入领大农称贤九卿然居平自谓异日子孙奉尝我不如桐乡民问其官则一嗇夫佐令平赋讼者耳岂非亲民之惠爱深于公卿大夫之名迹故耶吴士民业已及公而生祠之久而益思新之公亦安能不有意吾吴若仲卿也夫以世贞之辞岂能踰前二公即以不轻为然可足嗣耶于是公之旧属兵使者王君异其言而请勒诸石公名仪望字望之永丰人尝举进士为御史再长佐大理出治学政兵事最后抚江南有古名臣风

整饬兵备右叅政旻谷王公生祠记

王公既用给事言得调去而诸属城之搢绅大夫追思讴謠之总若千万言亡何而幕府之佐吏将校与士民合而肖公之像于州钟阁之室其将校复以私钱祀公于二卫之共壤又久之而戍主鲁君等复各以其私钱为祀以肖公像而春秋祀之又念事久远更代易亡佚相率而谒余文以昭公之惠于永永余谓诸君诚长者不倍德顾王公所为德于若何状试言之而试聽之诸君曰唯唯否否夫王公非以为吾曹德吾曹非以王公之德德吾曹而后报之凡吾所以德王公为三吴储胥德也当公之至而倭警稍稀则见以为无剥肤其民狎敌而畏兵费三事大夫噤然谓省兵则省食节缩之说与懈废相表里而公独忧之后先请于台凡十五事俱报可夫王公非能不为省也乃不欲徒省其大要组练省而益精可以师余皇省而益坚可以涛烽堠亭障之类省而要害益脊可以如率然饷省而益速时可以如果然夫能使士饱如果然者何也军储之有仓豪右黔猾每借以匿赋兵不时给给不半蔽而自公之得台请一一从漕计告完士且不枵腹矣故曰如果然也何以要害脊而如率然也公所部自金山而北至圖山袤八百里缓急不相及公摄柘林青村之戍与金山合而军川沙南汇宝山之戍与吴淞合而军刘河之戍与大兵合而军孟河江阴之戍与杨舍合而军公又移杨舍将于江阴移苏松将于金山移金山将于刘河移刘河将于崇明无警则分有警则合击首尾应击尾首应故曰如率然也何以余皇省而可以涛也夫福苍船者为名美也薄而不能遠公所治沙船必厚郭坚柁

崇檣重櫓而别制三翼之轻舸以左右之其哨至于千里而不虞溃故曰可以涛也何以组练省而可以师也公卒虽不多溪子少府射二百步之外淬药机火之锐又在三百步之外类皆括蔽革抉剑盾之士踔踔科头贯颐■〈口发〉芮者始收之又时而鼓舞之盖甲戌之役一战而倭悉授首矣故曰可以师也余复谓诸君王公德尽是乎曰乌可尽也公诘盗而盗发辄露其捷若神至相率避徙它地去督漕而为机发以致水三百里之涸立浸而漕艘以五日济堡宝山则不阅岁而城成屹然东南巨障读孟河则不踰月而河广隐然则别漕孔道公所为德于文武吏民非一吾曹被者若夏畦之偏泽而所窥者若巨岳之隅胜耳夫焉敢以为公尽也余乃曰善哉言也虽然以诸君不私德于王公则可以王公无德于诸君则不可余里居获时侍公公恒言今一切以居平法待诸校虽州邑之佐能以气凌之而出其上白简之所弹射公移之所刺按日夜鬼伺鸷击而不休即诸校苟负材气者安能洪涩抑首甘为下也其洪涩抑首甘为下者安能一见材也千里而奔蹏者安能逃于寸目之纲也夫居平而一切裁之缓急而欲收其死力难哉以故王公强力而欲信诸君之长而掩覆其短它文吏之公为陵而私为中者公力绌之至阶谤讟而不恤夫王公固不以为诸君德宁为无德而已耶诸君乃瞿然曰有是哉虽然吾曹之祀公终始为三吴储胥德而已余乃又曰善哉言也夫不背德厚也不私德公也祀以报之像以征之文以永之详哉诸君之为王公也公名叔杲字阳德温之永嘉人鲁君名邦（阙）君名（阙）俱行都指挥事为戍主

金山建叅政陈公去思祠记

始陈公之去淮安守而视益部学也其士民相率尸而祝之曰公庶几有以终惠我而公自益部（阙）省叅政督漕事所治广于郡十之九而分省淮安如故其士民大喜过望而公所以衽席之者非一第用漕故徙治瓜州其日复得十之九瓜州之（阙）也亡守令受束约与邮传共亿前使者不胜其寂寂岁一再省视而已公独徙治之即鲑菜不以烦市人岁省费约千金而别勒商舶毋繇它江道必取镇镇遂称岩饶冠南北而公暇则延诸生秀才谈说经术课文义彬彬异于畴曩瓜州俯大江咫而近金山踞其中公时时泛轻刀摄齐陟山顶之昆卢阁南望而覩千艘首舳舻上咤曰雄哉已而曰是黔首脂也得无朘乎北顾而千艘尾相衔而上咤曰雄哉已而曰是天子所以资羣辟六师者也得无后时以贻简书谪乎顾诸所以佐大僚筮国储给而民不告痛乃西矫首盼连山郁郁云气中巴蜀三楚之颿檣自万里挟落照而来东则海门滉漾黏天无际日月之所吐浴意甚乐之顾谓诸生黄明昌曰此何必减岷首吾不拟巨平怵将如吾何盖未几而公以父臬副公忧归瓜州之父老孺子不胜公之思谋所以祠之而明昌曰廛也湫而器是不以辱公貌夫瓜州之观江江之观金山金山之观昆卢阁阁故公所憇而兴诧者也其稍上为悬崖方丈之地为室而貌公宁独吾镇之父老孺子时时寓香火即客之善吏

者善词笔者善为名者游而一瞻依焉将毋盼蠻公乎哉蓋祠成而謁余记其事余素辱公知又尝一再登昆卢阁窃谓公德于淮北甚深且巨今仅以蕞尔瓜州续而称之以蕞尔祠而报之公雨露一勺而已诸士民毋亦斗酒一豚蹄而谢满车之瓿窳也虽然若士民既日思公天子方重公急公异日服除必开府开府必在江南北而肺腑咽喉之寄以岁时行部陟兹阁而覩公像恍乎不知谁我将以为瞿曇先生之自切利而下覩旃檀也耶公名文燭字玉叔沔阳人明昌少能脱诸生颖自幸于公公间语吾识若不下王中丞之于魏懋权若能作懋权国士讎耶以故感而倡祠公王中丞者不佞世贞也

青浦屠侯去思记

屠长卿既成进士而所草骚赋诗歌之类驰骋搢绅间亡抗衡者或谓汉有长卿司马氏与长卿不为两耶长卿曰我故不啻两当司马吮豪时我则且脱藁矣众乃复称长卿敏而欲难以所不习繇选人得颖上今颖上边邑也其民贫而吏拙长卿一摇笔而理解再见颜色而掇吏若神明民之慕爱之若赤子之恋乳哺而不忍失也长卿所为文章益富刺史上计（阙）而松乃有青浦者名为岩而新其田乃割华亭上海之会多下中错又多交关匿赋而其民又益以嘉定昆山之二垂有徭讼相率而互为逋藪前令仅三人两以不振去而其贤者亦仅孳孳奉公牒而已不能有所振刷长卿既以才调其邑豪相戒匿而窥长卿之张置长卿故为一切长者甫至大霖雨诸堤且就溃长卿朝夕蔬食袒跣祷晴而间行民间使益土石于堤以捍之手裹缙鞵劳其勤者而囊粟以资匱者又为文责数神且愿以身当岁读者为酸鼻是夕霆震雨亦为霁而民间诸堤皆坚好比秋诸比邑灾独青浦不受灾而台使者大兴水利当农时悉偃赴河长卿持之曰治河以利农也而先夺其时何以称利召三老率而子弟就锄耰有我在毋患也蓋农毕而河事亦就绪复议大均田长卿谓青浦苦赋重而田瘠诸赋浮田者三之二称者仅一而田浮赋者无几我将为民减赋耶将为县官益赋也自是青浦赋不复益使者亦不能以格绳之邑故有田非不毛而农不任畊相率徙避他所田几类瓠脱长卿捐俸以倡诸豪使各贷勺贫农稍稍归复矣又树营室各城门之虢而居诸鰥独者其又老疾不能自爨始归养济院而以时食之质库有敝衣不售长卿为鹺薄贾而收之亦归养济院而又有余衣则给狱囚之裸露者曰藉令彼当死法死耳我不忍其生冻馁也广文王老者廉以病卒黄舍长卿哭之割半岁俸以贖他寮佐罢官不能归无不资长卿橐而长卿又折节文士徃徃有所馈赠如某子甲辈踞上坐而责美酒梁肉供我彼临叩令何若长卿唯唯谨然不以毫发累邑人故长卿之居令垂四载而俸十九入公家与待客用相半居所以奉太夫人一簋肉一簋鱼羹退与其妇对厌藜藿而已最后当上计吏以故事进悉却弗视所赍持不能数十金而客及吏民送者至苏而长卿不忍其诚悉分子之别从他郡侠借贷乃得发部使者累以卓异闻始擢礼部仪制主事于是青浦之父老在野者曰得屠侯我且

得饱而不闻胥侩之号呼以恐我在邑者曰得屠侯我不日耳椎朴声即闻耳之而无称冤不平者吏及三伯曰事屠侯无他苦苦贫然至今不遘核按而荐绅先生则谓屠侯仁心为质备有礼乐廉惠特其小者乃谋为之树碑以志去思太学潘载甫出应曰善我任碑而侯所最重客曰徐孟孺彭钦之曹重甫其所最才而冤为出奇以拔之者曰诸生郁孟野相率状侯绩而谒余请记余谓诸君子之隲长卿若何曰吾故重屠侯才乃者知其有才而不尽用之为难夫使屠侯尽用之将必有钩巨出没之算耳聽目视口辨手挥之敏以耸动羣聽使可称说吾今乃司之十固不发二三耳此所以为难也余曰子知长卿之不尽用其才难不知其不尽用于今之时更难也且夫子不闻汉武宣之际霍子孟用事以持法刻深为能魏丞相继之而加察故赵张尹盖之徒勇于取循吏迹而失其意而所谓中牟密县之効未展见今者长卿之令青浦时宁直子孟时也天下靡不窥测政府方寸赋敛之取盈刑罚之取重簿书期会之取速鸷击毛举之政成而循吏接踵不知其于国家元气何如也长卿之所为尽在闾阎单赤而已苟可以得上知而不必为可以得上怒而不必不为有所中忌而不必沮有所中讥而不必避此长卿之所以为长卿也当长卿之治颍上而以书自通余累数千言遂定交既来青浦复从王元驭先生游人或谓长卿毋近名乎长卿曰吾知吾好而已何知名己而有快王先生及余于政府者语且及长卿人又谓名得无损乎长卿曰吾知吾好如故耳何知损于是乃益称长卿贤谓以密中牟祠而祠司马文园不亦洋洋哉长卿闻之复夷然曰吾得事元驭之家晁阳子以一切皆赘吾何知三君长卿名隆别号赤水所著书成曰由拳集余记草于甲申之春而诺于癸未腊月时犹未谢笔砚也

朝列大夫前怀遠令信阳何公生祠记

蓋何公之去怀遠令而丞德安郡也实嘉靖末云公去无何而邑士民讴思之不已则立碑以纪其绩久之而其思又不已则相率构祠以祀之方是时何公里居无恙也既构祠而其士民从学官博士弟子请于台使者邵公胡公曰在职而立祠若碑者有禁何令故里居非在职者也征其所讴思则后令教之为记也邑人泰安守枪乡进士良之为叙也乡进士猷生之为问对也尚书郎秉阳之为诗十也金吾擢别驾夔纶太学桂等之为诗百也田父里妇之为谣三也蓋彬彬然兼质文矣于是士民复言曰不腆怀遠下邑赋也往者四鄙不胜求相率而徙去空其地若瓿脱然何令至始招徠之稍稍还集为精心恤其隐而补其不足岁时劝课农桑劳劳扶惰吁两两澍扑蝗蝗灭民帑复稍稍实矣以秋报犂输庭为裁其缓急而先后之输毕当受役复裁其缓急而先后之诸粟米力役之征以次办治而不告困乃新学宫而优其弟子曰是选于民者也则又优其搢绅而礼之曰是选于士者也俗故偷乃为礼教严规条相戒饬曰所望于大夫士以先吾民而风之者也萑苻犹不时警乎耳令威则销兵为耒耨矣籛金居闲者哗乎耳令廉不待望车

门而却矣何令之为怀遠也且五载部使以卓异旌累上而累报闻最后得承德安亡不以令高第当入备谏察不则亦郎署丞于格少次不当乃何令怡然自如也丞未几飘然致其事归絕口不名功夫何令不名怀遠功怀遠之士民胡可以不名何令功也于是邵公胡公曰然则捐赎缓小资之毋尽劳吾人蓋邵公满而崔公为代会报祠成崔公布书币使使渡江谓得不佞言以文丽牲之石昭何公永永余不识何公然尝识公之父大复公文大复公以行谊风概称弘德间其文遂能振六代之凡而成正始何公故少孤当尽读父书否耶何清惠尔雅之用章章如此也窃谓三代以上立德与功言为一而五臣十乱各以其业显非有父兄师友之素其合而为一固先天之盛萃之乃孔子之诸弟子虽产周末日得至圣以为之依当亦无下三代而由求不能通文学游夏不能通政术者何也说者以为非不尽通也谓各据其所重而言之也令大复公不蚤天亦何下颜闵其关中之政庶几见一斑矣何公之以政术显也据所重也吾惧世之以文苑循吏狭何公父子也故论著于此若何公之所繇祠见前矣何公有子曰学士洛文大史洛书方修其大父业重朝廷夫大复公不尽食德而以貽何公何公又不尽食德而以貽二子然当其所自致声则自享之以此示怀遠之士民于伏腊之日读之庶有以慰哉何公名立别号小坡汝之信阳人以乡进士来邵公名某胡公名某崔公名某俱以进士来

重建言公祠记

弇州生曰吾郡蓋有言公祠云言公者郡下邑虞人也讳偃字子游昔在宋世绍隆先圣之统而公以高弟子得进爵吳而至明世宗朝罢吳封称先贤言子其祠故在虞载之祀典而在郡者前守令因民之懿好而别为宫顾杂市器而处且湫隘不称今少师申公汝默尝读书其中而陋之既贵谋所以称公者问地而得一巷故名学道爱人喜曰兹地也非公之所尝从事类居肆者耶抑何默脂标着若此也乃大出赐金斥买故社学及傍地庀良材为堂五楹两庑翼之戟门屏之傍饬丙舍以塾受经者郡邑守令相顾局踏自责师帅之不称何以辱我公愿一切任费少师公不可既成而貽书世贞山中曰子为我记之世贞伏覩乘志吳之先太伯固以至德三让天下第筭路而来因循故俗不能遽有所移易其国至寿梦而始大然与其三子相禅以武德则不竞而日寻于干戈季子札始复以让成之因北使中国以观十二风之盛着为咏嗟蓋彬彬矣不三纪而公始复游吾夫子之门获闻性与天道之概而记鲁论者列之文学之科自是二千余年而吾吳之文学遂以巨丽闳爽甲天下其黼黻章施足以表盛世之象而有余识者谓季子仅嚆矢焉而公实廓大章明之其功有不可掩者虽然公之所谓文学也将今所谓文学而已乎哉穆叔有云太上立德最次立言吾夫子之门固未尝岐德与言而二之公之视颜闵若少逊其文学不必不通于德行也记者即所重目公耳不然而武城之郭弦歌之声藹然而学道之对卒不屈于夫子之莞尔子夏之门人于樽节退逊亦既雍雍矣犹倨然而命

之曰抑末也本之则无如之何呜呼是本也岂今之所谓缀声偶韵属事俚辞以苟就世之耳目而已乎哉盖不特孙卿子之所讥称即以语公公亦贱儒之矣少师公世所推以文学衡世者也然不自足反而归之德行以其所蕴藉佐圣主斟酌元化与民更始夫礼乐积德百年而后兴高皇帝之扫除奠定视太伯何啻万万德之积为百年者两矣以圣主之敬承而少师公与二三喆辅毗赞之其视当时何如也亡论季子论乐归而不获伸于其父兄即以公之贤得夫子为之依归而所谓弦歌者仅施之蕞尔之小邑圣主方垂裳而听少师公与二三喆辅郊庙之典尊尊亲亲诗歌乐律金声而玉振之又何待哉世贞老自废辱少师公推毂而不能应又不能通一介之书以谢而少师公命之记公祠岂谓于公之道少能窥见一二毋亦以其拘方自好庶几澹台之末节而或有当于公者故畧述公文学之所重且推公未竟之志以属少师公不知少师公以为何如也

弇州续稿卷五十七

●钦定四库全书

弇州续稿卷五十八

（明）王世贞 撰

○文部

△记

王文静先生祠堂记

锡以文献冠履天下而其邑王子裕金事先生尤较然褒然者先生以上寿卒而门下客郑坤陆祥旭夏曰校盛璠等百余人相与追述遗德而请谥之曰文静夫亦以先生之为德不易屈指数乃若威鳳騰苞章施末俗鸿冥高蹈释躁夷竞吉祥止止斯其大都哉即使太常标议诸吏文学核之何以异旃而先生故游慧之西麓为方伯秦子成地盖尝抚孤松而乐之彷徨其下不忍去因手貌其峭蒨偃蹇之状于图而目之曰高逸老人明非秦五大夫埒也客既以谥先生则谋所以祠者曰安所得地乎于是秦君闻而致地曰先生志也客庀訾力而荐之先生之子孝廉君曰未可以繁我里父兄将为其后者何而客益效其訾与力孝廉固谢不可则为衷之曰毋过侈盖不日而堂岿然无藉丹堊洁泽靚深翼以两庑缭以周垣因深为池平桥跨之因高为台雕楯戟之祀之日客相孝廉

羞以阳羨之莽若蕙沃以慧之第二泉灵飏肃然况覩出入光景徘徊疑吟疑饗而所谓高逸老人始俨恪如侑公久之风谖谖来左右披拂又如侍祠而奉扫除者客乃谓孝廉美乎先生之志将少慰我于是走谒不佞俾记之不佞少则习先生事先生笃学砥行为闾里师壮而登朝娴吏治一旦以供奉家太公故弃其节绶于未艾之年服勤养志孺慕不怠晚益自适轻舳短屐放浪于寰界湖山间朝有吟讽夕贵临川之昏手墨犹润羣褫吴兴之练尤精画德肩美文沈散骑五长台州三絶曠带胜流芬芳异域从心之后沉冥高引往往称病谢客客益慕说之以故望其庐则若以为祠宇思其人则若以为异代而迨先生之弃客客故不能遂置先生蓋覩先生之祠宇又若以为其庐瞻先生之肖貌又若以为犹在不死也先生之生死重于世如此哉吾闻夫去先生里而西有延陵季子祠者自其歿于今二千余年矣而播于人口若新彼其哲国风陈先德纚纚洋洋固一时人文之极而让王于诸子姓进不涉鄢郢之郟退不蹈胥圣之僂优游大壘其为静孰加焉然而未有以是易名者今用延陵祀祀先生有如以先生称称延陵永永并着于锡则岂唯锡之光实江右奕世之休先生诤问子裕其字孝廉君名鉴仕为吏部郎其大槩操行如先生

工部郎蒲坂王公靖变记

万历壬午之三月钱唐悍卒以饷之削额也拥督军中丞于军而环噪之且将甘心焉时冬官郎蒲坂王君子牧以榷税寄治南关闻而赴之从者曰请毋驱是未易测也王君曰驱之以戎往则不可以好往何害且彼不吾讎也遂入军呼其魁前而数曰若识我乎我榷税郎王某也家大司马公尝秉邦政矣以片纸解北单于之惑而惕息请命不暇何有于若曹若曹怏怏为削饷额耳中丞朝奏闻而夕报可复而额不啻转圜即饷不及额所虞馁馁不至死也今以一不快意故而甘心于中丞公有如天子赫然怒发十万之师南渡江若曹族立赤矣族赤且被恶名众有识王君者曰果榷税郎也是廉而有惠政时时从商旅讴谣得之矣其又有称王君者曰使君尝为我曹请复饷额于中丞中丞自不许耳蓋王君先时探得悍卒籍籍以意风中丞其人尝闻之故云自是围稍稍解而台两使继至遂以中丞免其又二月而中丞出候代领吴兴市人子犷乱卒谓县官必不能正法相聚为剽劫火光烛于天王君复轻輿出入竿旗矛矜间反复开谕其人虽不能尽听亦不敢有加于君而会新中丞张公至君入谒颇为言其情状因从舆张公发兵捕诛之事以大定张公既用平乱闻上获殊赏而心义王君功乃复特具疏请旌君部以非君专职格不行俄王君得代去则钱唐之大夫吏民相率而请太宰仁和公纪其事于石矣张公之友王某病废居吴中虽谢客然颇以比壤虞祸及数数问南来人称张公之功十而九尝为志之称王君之功十而六而未有志也今年冬钱唐之乡进士某等若而人诸生某等若而人相率造余居列王君所以平乱状甚悉余谓微诸贤宁不知王君余故尝

以通家子事大司马公往者北单于失其孙左大都尉扫诸部压边境大司马置大都尉股掌间俾为雉媒以笼北单于遂尽削其威暴委身奉琛称臣者再世矣此其功视魏卿絳之和戎郭尚父子仪之辑回纥宁啻埒夫魏卿之子为舒惑于栾盈之诱车成列矣赖范鞅之言而后定汾阳之子为晞几纵其卒而肆于邠矣赖段秀实之言而后定不然则魏郭之勋其与存者几何今王君不重爱其七尺以片言而再定钱唐之变夫岂惟无隳其家声已哉于大司马盖有光矣今夫不治卒而使卒信之如蕃蔡其樞政乎也非其责而任之于白刃之林而不避其为国专也一言而杜羣黠之口使唯唯其辨勇大也其不贤于魏之舒郭之晞万万哉即诗书所称干城腹心及世济其美又何多让也王君名谦万厯下丑进士自榷税郎未几以贤擢吏部为忌者所构边寻事白入兵部今为武库郎中

遂初堂记

遂初堂者何臬副王公育德与其弟大叅阳德之所重建也堂何以名遂初志初也甚矣其不易遂也王之初自台而徙温之濒海曰永嘉场场故多豪其甲第栋相接者数十里而独王氏为最盛王氏之为世者十二为见指者以千数而独二公之王父溪桥公为最盛溪桥公卜居于横塘之右有二子起家佐名藩师太学彬彬一时名臣而佐藩者东厓公是为二公之先大人治第于郡治之墨池坊徙家家焉其处者自若当是时王氏之宗有祠而二公之故第犹有堂歲烝尝则以时至聚其族祭而后成享修先大人之束约而规之肃如也其避郡器则以不时至伯仲相与考德论业怡怡如也即二公名虽徙为能无废其初者而会嘉靖间倭暴起海上势且迫诸里中豪相率避去而独王之老与其壮者不忍其桑梓而起徒兵攻之其前茅数利见以为可完保而阳德独忧之自郡驰谓曰战危事也不可狃狃而得败焉亡噍遗矣盍筑城以为收聚乎其壮者不聽而亡何果大败前茅殲焉贼束刍而焚之庐舍半毁既退乃相率哭于祠谢阳德曰苟用子之言庶不及此也阳德奋然曰虽晚矣犹可及我而存其余乃请于育德据溪以为险捐藏金者万躬畚鍤之役以城城成而势不能奄横塘之故居会其中有隙地众以为二公德曰微伯仲吾等不获有此今寘吾等于安而弃伯仲于危可乎日从舆育德俾与阳德筑第于其隙堂之成其壮丽有加于旧而阳德方游宦不及落育德乃贻书曰自城成而倭至仰望之若崇山也叩之若立铁今倭且平矣堂成而吾幸以获乞身先之悉徙郡之实与图籍其间犹夫溪桥公初也吾之父兄子姓晨有疑而质吾于堂夕有缓急而籍吾于堂而亡弗应也盖不必俟烝尝而始见之其又犹夫溪桥公初也藉令城不时成而族且散而之四方矣吾兄弟苟即安于郡而堂之在横塘右者且委之贼吾东望而徒丘首之悲而不敢复其何有于吾初敢名堂曰遂初而俾弇州山人记之余谢不获请则谓阳德公亦知夫先王之制乎哉自同里为井其极至于死徙无出乡而出入相友守望相助盖

五畝之宅未有轻弃其初者以周德之盛宅是镐京而卒乱之曰丰水有芑至七月之诗于豳风三致意焉夫以人主之力与周之盛未尝顷刻忘乎其初而竟莫之遂也东迁之后依晋郑以希一日安于宗国邈矣而眉山氏策其必不振然至其自为计则有取于延陵季子之赢博旦宅常而夕墓汝杳然无复蜀土之思何耶然则育德之名此堂其上而获遂于周下而有初于眉山氏遠矣故叙其所以而勒于石俾为王之子孙者世世守焉

怡怡堂记

向者吾取友于中原仅二人焉而皆新蔡而又皆张氏其伯氏助父弱冠取甲第名震海内独于官数起数蹶露拙宦效仲氏见父为诸生有官弃去弗顾顾独喜为诗诗名与助父鴈行而皆不耐为骖骹舍世好而择其类己者首得余而善之见父至置余于师友之间一日造谓曰不穀受箸于先君子而始有此堂也微伯氏孰与授成哉不穀即不获奉先君子于兹堂然亦幸而获称为仲以从吾伯氏而又有叔氏在敢一日而忘我兄弟请额之曰怡怡而属子记之余窃谓见父之所取义于怡怡者寔出吾夫子而余初尝疑其说以为朋友之切切偲偲岂其不当施之兄弟哉是将不欲以义掩恩耳夫父母而有失亦宁废其为几谏者而至兄弟独能曰怡怡也要之父母之分尊尊则不能以意通朋友之分疎疎则不能以几示居兄弟而日夕相与为怡怡是谓太和和之极也即内有僻念何所取萌外有僻诱孰从取投哉且又可以意通而几示贤者无行而不与不及者无适而非师是则怡怡之效也见父既以善余说而谓余昔者竒章公有兄而无弟永兴公有弟而无兄杨太保氏谨而长者亢阳道州氏洽而少者流此皆未既于吾所谓怡怡也吾今得子之一言请与叔氏奉而修之以俟吾伯氏叔氏者字（阙）父今尚为诸生有声

澹然庵记

我师观察使季翁七十而署其燕居之室曰宁斋又四年而别筑室于里第之后圃圃不为藩编棘而已步武无异卉木苍髯绿筠而已室无翼三楹而已屋不施垩彩素椽而已中无它设一屏一几一榻而已案头无杂裘周易中庸金刚圆觉黄庭道德诸经而已室成而更署之曰澹然庵人或谓季翁宁以致遠澹以明志将毋武侯之遗训乎哉而胡以役役世间味至从心始悟也世贞曰不然是澹也季翁固恒有之夫翁少而为诸生而自奉诸生也及成进士宦中外至二千石而自奉诸生也仕不必竞员耕不必廛地寝不傍媵食不再肉饮不再笋终其身以为天下之味无以加者季翁恒言曰世之所谓醇醲沃腴足于五官之用而快于心志者是唯未得之则若嫩然一得之而犹嚼蜡矣及其稍过而损我稍■〈殢上心下〉而障我则犹之乎酖毒矣虺螫矣吾方以为祸本而敢

快之是徇且吾闻之澹而不厌者其德也澹而无味用之不既者其言也以此而交于人则若水也以此而交于天则玄酒不齐大羹不和也以此而为天人粮则琅膏玉霜也盖天下之至味举无以加于澹者是故经云五味外美邪魔腥臭乱神明胎气零迨其以澹而得之也则曰五味皆去正气还正气还而吾志湛然明矣根尘之引不接而太宇定吾宅又胡弗宁也夫季翁之为澹久矣晚而始以是名庵而世贞始以澹之说进可乎否哉今夫味至澹极矣别味至于药王极矣曼殊室利犹得而拟其后曰因味生觉了味亡了无有云何获圆通然则味必至于无有而后谓之澹澹必至于忘而后谓之道庵虽用澹名必至于无可名世贞虽窃为之说必至之无可说而后庶几乎名庵与记也季翁莞尔曰有是哉

幻景庵记

去吴五十由旬而遥为豫章国中有长者曰朱宗良客逆路底迦过居士曰长者盖有羯磨室云其址入黄泉而杪造天七重宝树以为栏楯前嵒后庑音相闻而不相覩左右周廊步武所不能计中有百俱胝像摩尼颇梨以饰幡旌紫磨直金以为军迟键■〈金咨〉贝叶梵文吾不知其几千亿夹而最后路迦耶茈葛曰不然吾以分卫而造长者长者延之其室不过容膝而已中设一几一榻而已主人嗒然而坐徐啖我以脱粟已而咀之恍若芬旨之自香积也已四瞩之又若阿僧祇狮子座牖次而不相碍也已不知主人之为我而我之为主人也出而详之犹夫一容膝室而已然则向者逆路底迦所传幻也居士听然而笑曰子所见陋真耶幻耶其侈而以为广丽幻耶真耶昔之所传其果幻耶子之所得其果真耶吾请以质之长者长者报曰不然其侈我者幻而陋我者亦幻其别真幻间者亦幻吾固以山河大地依幻立者也而况一室依幻成幻者也室中之身其我也耶则幻我也凡我所现六尘缘影皆幻影也且吾生而龢龢而童以至于壮且老所历之景若泡梦焉露电石火焉吾不知景之去我者幻耶未来者幻耶其刹那之属我者幻与非幻耶景之幻我耶我之幻景耶孰从而辨之且夫后先二人语子者皆幻人也虽然子姑为我幻言之而我姑幻听之居士乃复听然而笑曰子既以为幻而我复以幻进可乎抑吾闻之师知幻即离不作方便离幻即觉亦无渐次子其觉而离耶抑离而觉耶居士复报曰始吾迷而真吾幻也既吾迷而幻吾真也子以佛世尊之言而觉我乎觉则何所事言乎哉然则子之传于佛世尊者亦幻语也子亦一幻人也夫岂时向语子者也虽然姑志之以俟后觉者

乔峰亭记

乔峰者信阳王太史公所名亭也何以亭公之西圃有玉门晖章之二树树焉其下

干相距武十而近其上枝庇亩十而遥其下若比邻而上若互有室退者若交让而进者若交驩美荫磅礴烈炎不侵公憩而乐之垒石为台台不取矩縁趾而已构材为亭亭不取向縁台而已亭成而昉名之曰乔峰美其树也何以峰盖太史公之言曰不佞尝使關中登华岳絶顶下宿青柯平夜半起望三峰为三巨人自肩以上蒸云封之亭亭车蓋隙月微射如破万叶悲风因之飏飏砰磅洪涛翻空疑雨疑霆倏忽莫踪盖余爽然而快已凜乎其忡忡者归而凝思未俪其境也乃者得之吾亭吾高春而仰望不能得日夕不能得月伺其出没东西乃得烟霏暖暎与顶交翳爽籁横度逗而成声飏飏砰磅几希乎青柯平昔之三峰宁非树耶今我二树焉知非峰耶曰亭之树而峰也旨哉虽然夫峰也何以乔太史公之言曰吾以志吾树耳兹树也吾高王考之所手植也盖二百年于今矣与食邑相终始不衰夫峰言象乔言义也于是余乃进曰公知三峰之所以乔乎兹峰也巨灵氏之所手跣也盖亿万年于今矣其陟削而上六千仞是天地之乔也兹二树也其植不过二百年而自顶放踵不能过百尺是家之乔也夫九万里扶摇之大鹏而方以仅尺之鷄为逍遥游一也虽然太上立德溢为立言超华而尊与岳等坚是为太史公之乔树耶峰耶何足以肩

白业堂记

白业堂者故讲师朗公所立也朗公之同母兄曰祇园俱少而离俗负大智慧三藏经论总持若橐复相与叅五台伏牛诸耆宿为秀法师上足寻驻锡于杭之碧峰山当是时祇园振法席而朗公佐之埧箴倡和不为异宗方之世亲之始殆有间矣祇园示寂法席愈盛诸衲施云集朗公不以充衣食供而买地碧峰之址大约亩三十而微剪棘夷块中为堂五楹左右净室翼之后为斋厨浴漚四周高墉旷洁靚深竹树匝列阴森蔽亏结夏解夏毋非安地时郡守新都吴君诣公室而乐之颜其楣曰白业志净土也夫业不过二端净秽而已诸净行种种深浅不一而皆归之净诸秽行种种深浅不一而皆归之秽净而至于白所谓纯洁无疵净之至者也然犹得以白而拟之以业而证之即令不思善不思恶了悟妙明本性无法可修无佛可作何白可拟何业可证哉朗公未五十而示病现化其门徒真相如莲性印奉遗体瘞于堂之前而塔焉因介王征士百穀来请记余旧尝识公颀皙而长面若满月每升堂说法巍巍金山海潮之音听之惊悚密意殷勤惟余是属余今安敢辞第朗公之业余不能深窥其趣而为之弟子者羯磨精进毋替朗公之志以无业为白业可也夫堂则一幻地而已矣

无住馆记

余观处者垂五载而不能尽废客与家遠者诱耳迩者诱目不得已而谋徙之深野

儿骐于故居宅之西偏诛茅辑荆而处之屋凡三楹不斲不饰皆仍其故后设靖室奉大士圣祖仙师方广不盈大以资焚诵而已中楹洞虚笼白鸚鵡一头右楹空之间憩剪头雏左庑蓄驯鸽十余头赋之余粒以下鸟雀翫其饮啄庭中凿方沼延袤各五尺许蓄金鱼十余头亦玩其涵泳而已傍凿二井以救池之渴双梧荫之其阳二玉树翼之池之南五垂柳依之其又南与左右则侧柏列直以资服饵而已左楹稍宽鬲其中一几一柜贮易老中庸金刚楞严维摩数卷又左为耳室二仅可容膝其一置一瓢一笠一衲其一置一寝榻又左转为龕室小又不能当半三时跌坐而已寢室之名曰慧观慧观者吾师昙阳子所示偈语也于兹寢矣觉之使不昏也龕室之名曰来一来一者亦师偈语也一者何即重阳子所云五行不到处万物未生前是也来者何吾一之所自来也于此而思所谓来一者而后吾之空不顽也总而目之曰无住馆儿骐请曰始者以夫子之筑沉沉矣舍而去之而栖于弇山之北庶几以为欲界甲焉又舍而去之而栖于恬澹之观夫恬澹者其名美也而又为人所迹逐伤其实之不称舍而去之以寻遂初而得广莫之野今且复有畏耶将无住之谓何余曰尔乌知无住耶偃吾语女夫五亩之宫以寓吾七尺之躯者是境也万境之一境也境日来于吾所吾敌应而已不与焉彼不吾住也吾与其来而不与往吾不彼住也而后生吾心故曰良其背止其所也是无住之住也非住之住也向者数徙而所不安居以有住耳今者无住而无不住也而汝疑之者汝犹住住也真宰从傍笑曰辨矣子数徙而子之居穷矣而师不而将也虽欲无住乌可得耶固然子老矣而不能藉而师之一刀圭吾见子之蝸甲也朝菌也虽无住又乌可得也余无以应也述其理而不能不收其言并以记无住馆

来玉阁记

由弇山园之背窵而入复转而东得一长廊其下俯水而面东弇会积两廊溃稍改其中为小阁凡三楹启扉而眺则东弇之古树丛花峰滩亭树之胜一览而尽其西可以得中弇背又西可以割西弇之顶毋论文漪倒景直盆盎中物汪司马伯玉过我凡五宿乐之甚乃曰我兹去歲必复来来则宿我阁是时山记成而阁独未有名伯玉谓吾故家新都新都据吴郡之西垂曰西来阁可也余笑谓游者覩其署不以为什公且初祖达磨耶而会伯玉方醉隕唐若玉山因请名之来玉谓伯玉字也伯玉大笑拊掌曰善亡何周天球公瑕过我因乞以大篆署之而李郡士牧画阁之三壁有岷峨雪山一堵颇雄丽伯玉即不来此壁亦庶几焉同云之顷弥漫散坠檻外诸峰峦俯仰凸凹与屋中将照耀如玄圃积玉又不然而园之西三十六里为马鞍山亦曰玉峰秋杪木脱西弇之顶可掩而有之暇则浮大白延焉以代伯玉亦何所不佳虽然伯玉闻之将以我为善移好也作来玉阁记

开先寺寶墨亭记

大江以西山之最胜者曰匡庐匡庐之最胜者曰瀑布泉而开先寺独据山之要以当泉之大观是故寺之最胜者曰开先开先之傍刹最胜而高者曰鸣鹤寺由鸣鹤而稍西遂得瀑布诸双剑香垆文殊峯之胜拱之又最胜而高者曰太子读书台故南唐中主暉貳相时寄迹地也有石砥平而立高丈余衡三之中刻宋黄文节公庭坚手书七佛偈其左为明新建伯王文成公守仁破宁藩而归勒以纪功者也文成公于八法不能敌黄公而此出其上驷以当黄公之下驷遂稍称鴈行观者亦并伟之而文成之勒在正德之庚辰末云嘉靖我邦国其明年辛己世庙即大位改元嘉靖于是观者益神异其事而又六十载余弟敬美分守南康居恒自命曰匡庐长而会今少保潘公时良以中丞节行部挾敬美偕至其所四望而乐之左顾曰是不可以亭乎哉其以庇厥刻而憩游者趾得从容寓目焉敬美曰唯归而发其橐得故事钱赠之润笔镗以庀材斲而亭之亭不能觞客则于傍隙地楼之楼不能尽得瀑布则又傍出而西为阁翼之润笔之镗涸而不足稍稍捐奉廩继之其又不足则南康卢守整伊令尧夫亦捐奉益之蓋敬美移佐臬而后报成事于是名其阁以张曲江语曰紫氛名其楼以李供奉语曰云锦谓亭之庇二公刻也名之曰寶墨而皆手书以署又谓兹亭也其始事且又潘公之所顾属也归以告余俾为记始末余故尝读所谓七佛偈者虽后先人人殊大指以人受生无相中幻而成诸形象又即所见幻而成山河大地舍宇食服之类一切埽去而归之空黄公既误以为实而书之其书之石又误而欲久之吾子与潘公又误而亭以庇之今又误而以黄公与文成公之墨而寶之是幻也且文成公之称嘉靖我邦国也亦偶然而举之举而偶有契而观者乃以为神奇是又幻也敬美曰不然子之所以破吾寶墨者以七佛偈旨也是偈也其前者凡七坏劫矣孰从而传之曰释迦传之也曰若能知释迦之前而受之七佛耶七佛者今犹在而授之释迦耶吾之所谓幻者犹执实也今子乃欲以幻而破吾幻何也予不能荅第谓敬美子姑以子意名之而以吾意记之俾后之具法眼者以实而破子实毋论诸称墨者不必寶即兹偈亦不必墨子之亭亦可无作而亦可以无墨宝名予亦何所用吾记哉虽然黄公能奉佛者王公能印佛者果有知而不予言谬也以是记可也

苏松游击将军范君去思记

文武之道若阴阳然相藉为用而其势恒相低昂高皇帝以诸功臣力定天下事右武而会承平久渐以不竞而东南为尤甚至嘉靖壬癸间岛夷之祸起庙廊之席争抵掌谈介胄而武士亦乘间以重至有离疏而夺将印援戈而获蝉冕者顾其人不必尽廉洁也事至则折节而听之惟其所欲为事定则持三尺而撻之甚或深文以中之不令其得善去迨久而成故事小阔节者则饰以为污严馭者则饰以为酷不能委靡者即饰以为

跋扈守令李官之牒晨入戟门而台使者白简夕上矣白简晨上之尚书而夕报听矣吾自始解青州节以至今若干年所覩见大将偏裨而下几数十百人不善去者十恒居七八于不善去而真为不善者十不能二三吾未尝不为之扼腕叹息也虽然未有如范将军之冤者也当范将军之始至而帅刘河也儒服缓带以一刺谒余坐而谈天下务余时病不能尽酬对然稍觉其异姑谓之曰子会稽人也范少伯非子之先人乎哉其所受计倪而南极越之祕言亦胠篋诵之否将军唯唯复谓曰子今治吾吴吴又子之先希文乡也彼臆间有甲兵所以北御夏人者亦心受之否将军曰唯唯既别去无几而有称将军善为军政者非一然其大较所得士必选勤习战射申明约束司农馆金至必呼卒而面受之絶甘分苦劳逸与共病为医药死有棺槨度汛暇辄课其能耕者择海傍瓿脱地耕之军储亦稍稍充不尽仰县官而居人杂吏卒而处耰锄矛盾之用相驯狎而不觉凡有所建白皆坚久利便台使者心服将军材荐疏奏上且迁而将军犹微守其重施施自若曰使吾折节而媚文吏则有所不能使吾驰赂而北以求速化则吾有所不可夫是二者皆必取办吾部曲则吾有所不忍盖未几而稍稍露几微迁一黠校规欲得将军兵构飞语中之吾向所谓白简上而将军不可留矣旧将军之中白简诸将士争驰以诉故中丞挽留将军风雨之夕覆舟而死者四人且不顾其见中丞而语甚铄中丞不获已姑为好辞慰之而哭声且震野矣退而羣谒余于靖庐则又哭曰吾曹力不能留将军则何以道吾思且伐石而树之戟门而祈公之一言为重余辞不得乃曰向者尝与而将军言以范少伯希文为勉夫少伯托鸱夷子皮以游于江海而卒起为齐相希文见齧吕夷简而夷简竟悔焉乃有西帅之拜今之齧范将军者皆世所谓贤者也是必悔悔则且更称将军将军果有意乎吴越之南帅垒碁布何地不可容一范将军吾所为文亦不必令范将军知令后将军毋以成败论国士取范之成事而润色之以为而曹天亦欲知而曹名其存者不必能为冯谖逝者不必能为魏礼乃高谊何让焉将军名朝恩起家世胄举进士高第有邊功自漕粟都尉迁而拜游击将军官为都指挥

弇州续稿卷五十八

●钦定四库全书

弇州续稿卷五十九

（明）王世贞 撰

○文部

△记

弇山园记

一自大桥稍南皆闾闾可半里而杀其西忽得径曰铁猫弄颇猥鄙循而西三百步许弄穷稍折而南复西不及弄之半为隆福寺其前有方池延袤二十亩左右旧圃夹之池渺渺受烟月令人有苔雪间想寺之右即吾弇山园也亦名弇州园前横清溪甚狭而夹岸皆植垂柳荫枝樛互如一本溪南张氏腴田数亩至麦寒禾暖之日黄云铺野时时作饼饵香令人有炊宜城饭想园之西为宗氏墓古松柏十余株其又西则汉寿亭侯庙碧瓦雕甍嵒岿云表此皆辅吾园之胜者也园之中为山者三为岭者一为佛阁者二为楼者五为堂者三为书室者四为轩者一为亭者十为修廊者一为桥之石者二木者六为石梁者五为洞者为滩若濑者各四为流杯者二诸岩磴涧壑不可以指计竹木卉草香药之类不可以勾股计此吾园之有也园亩七十而赢土石得十之四水三之室庐二之竹树一之此吾园之槩也宜花花高下点缀如错绣游者过焉芬色殚眼鼻而不忍去宜月可泛可陟月所被石若益而古水若益而秀恍然若憩广寒清虚府宜雪登高而望万堞千甍与园之峰树高下凹凸皆瑶玉目境为醒宜雨蒙蒙霏霏浓澹深浅各极其致穀波自文儵鱼飞跃宜风碧篁白杨琮琤成韵使人忘倦宜暑灌木崇轩不见畏日轻凉四袭逗弗肯去此吾园之胜也吾自纳郟节即栖托于此晨起承初阳听醒鸟晚宿弄夕照听倦鸟或蹑短屐或呼小舸相知过从不迓不送清酒时进钓溪腴以佐之黄粱欲熟摘野鲜以导之平头小奴枕簟后随我醉欲眠客可且去此吾居园之乐也守相达官干旄过从势不可郟摄衣冠而从之呵殿之声风景为杀性畏烹宰盘筵短钉竟夕不休此吾居园之苦也园所以名弇山又曰弇州者何始余诵南华而至所谓大荒之西弇州之北意慕之而了不知其处及考山海西经有云弇州之山五彩之鸟仰天名曰鸣鸟爰有百乐歌舞之风有轩辕之国南栖为吉不寿者乃八百岁不觉爽然而神飞仙仙傴傴旋起旋止曰吾何敢望是始以名吾园名吾所撰集以寄其思而已乃不意从上真游屏家室栖于一茅宇之下偶展穆天子传得其事曰天子觴西王母于瑶池之上天子遂驱升于弇山乃纪其迹于弇山之石而树之槐眉曰西王母之山则是弇山者帝姬之乐邦而羣真之琬琰也景纯先生乃仅以为弇兹日入地夫奄兹在鸟鼠西南三百六十里其中多砥砺固可刻而去陇首不远二传皆先生笔遂忘之耶则不佞所名园与名所撰集者虽瞿然愧亦窃幸其于古文闇合矣自余园之以巨丽闻诸与园邻者游以日数他友生以旬数而今计余迹岁不能五六过则余且去而为客乃犹窃弇山之号而又重之以记得无尚有所系耶夫志大乘者不贪帝释宫苑藉令从穆满后以登弇山之巔吾且一寓目而过之而况区区数十亩宫也且吾向者有百乐不能胜一苦而今者幸而并所谓苦与乐而尽付之乌有之乡我又何系也夫山河大地皆幻也吾姑以幻语志吾幻而已

记二

自隆福寺而西小溪渺渺垂柳交荫而吾园实枕之扁其门曰弇州语具前记中入门则皆织竹为高垣傍蔓红白蔷薇荼■〈廿縻〉月季丁香之属花时雕缛满眼左右丛发不颺而馥取岑嘉州语名之曰惹香径径至西而既得平桥曰知津取弇山堂道也高垣之左方以步武计杂植榆柳枇杷数株藩之以栖鹤始有馈余兹禽者后先六头每交吭羣唳声彻云表以鲜食裁之留其二名之曰清音栅静夜所时得也右方除地为小圃以圃计皆种柑橘土不能如洞庭名之曰楚颂取苏子瞻语也径之阳有墙隔之中通一门颜之曰小祇林始之辟是地也中建一阁以奉佛经耳小祇林所由名也既益之以道经又辅之以岛榭台馆之属余志曰侈胜日益廓而去兹名远矣颜之志始也入门而有亭翼然前列美竹左右及后三方悉环之数其名将十种亭之饰皆碧以承竹暎而名之曰此君取吾家子猷语也其左竹中辟为路客游至此倦少憩所谓夏不见畏日轻凉四袭逗不肯去者此亦其一也转而为竹之背一乔峰独立而俯其首若有听者以与经阁相望也名之曰点头石取生公传语也去峰之十武得石桥广而平可布十席向者往往于此候月今以他胜处夺之不能恒矣名之曰梵生取释迦于忉利天说法还王舍语也盖至此而目境忽若辟者高榆古松与阁争丽美荫不减竹中而不为叫窳深黝友人文寿承过此而乐之古隶大书曰清凉界甚怪伟勒石立于桥之阳右方循桥直上可数丈得阁其左右室藏佛道经扁其左曰法寶右曰玄珠畏客之余辄闯入其中以息■〈跂叅〉汰浊而已不能徧幡阅也启北窓则中岛及西山峦色峰势森然竞出飞舞攫攫远者穷目径迳者扑眉睫阁之下亦宽厂四壁令尤老以水墨貌佛境宗风列榻其间随意偃息轩后植数碧梧自此而北水隔之路遂穷阁之左有隙地与中岛对踞水为华屋三楹以俟游客过者歴歴若镜中花木禽鱼自来亲人名之曰会心处前植梨栗来禽数十本右则鹿室以栖三鹿与园丁共之此吾园景之一也

记三

知津桥者跨小罨画溪北亘数十百丈溪尽而两山之趾出步之则皆在望以其类吴兴之罨画而小也故以名其西临水五楹中为门张中丞肖甫榜曰城市山林前有垣障之稍折而南复西则廓然一广除欲截五洞庭树之作五老峰力未能也姑藩而种含桃含桃成岁得一解馋花亦足饱目其左方种如之俱曰含桃坞堂五楹翼然名之曰弇山语具前记其阳旷朗为平台可以收全月左右各植玉兰五株花时交暎如雪山琼岛采而入煎噉之芳脆激齿堂之北海棠棠梨各二株大可两拱余繁卉妖艳种种献媚又北枕莲池东西可七丈许南北半之每春时坐二种棠树下不酒而醉长夏醉而临池不

茗而醒游客每徙倚其地辄诧谓余此何必减王卫军芙蓉池也余谢不敢当而会吾乡有从废圃下得一石刻曰芙蓉渚是开元古隶或云范石湖家物因树之池右池从南得小沟宛转以与后溪合傍皆红白木芙蓉环之盖亦不偶云循堂左而东沿小罨画溪一石坊限之扁曰始有其右坊扁曰虽设称虽设者以阻水故度始有门则左溪而右池循池而南其阴皆竹藩之曰琼瑶坞坞内皆种红白缥梅四色桃百本李仅二十之一琼言红瑶言白也更西得小平桥名之曰小有取别入山道也自是复折而北沟十步一曲黄石为砌清流湾环可鉴名之曰磬折沟缘沟皆木芙蓉即芙蓉渚立石处也道左既梅坞而竹所不能藩者傍出侵道其稍厂梅益繁名之曰香雪径又厂则为一亭前阻溪水溪即磬折沟所入也隔岸始得西弇山怪石奇树高下起伏若坐若立若舞若蹇日饱于兹亭之中而游人往往过而忽之故名其亭曰饱山复折而东数十武则径之事穷得萃胜桥

记四

萃胜桥者踞诸山之口吾欲于其阳立一绰楔扁之曰海上三山而力未能也桥以石颇壮丽其下则诸溪之水皆会焉其上可以北尽西弇山东北尽中岛东南取佛阁花竹之半又以其虬得文漪堂之胜所不能及者东山耳故名之曰萃胜度桥始入山路一石卧道如虎南北皆岭南卑而北雄北岭之东南向者一峰独尊突兀云表名之曰簪云其首类狮微俯又曰伏狮右一峰稍亚若从者曰侍儿又右一峰更壮而颌中穿若的曰射的南岭诸峰皆前向此仅得其背耳由饱山亭望之可指数一类古碑文曰禹篆余不载路折而北得一滩羣石怒起最雄怪为狮为虬为眠牛为踣躅羊者不可胜数总而名之曰突星濼濼之右皆岭其据岭而俯径者曰崖■〈山上号下〉峰曰楚腰峰皆以状也一石屏色若玉而坦■〈施，土代方〉可爱曰白云屏濼之源为蜿蜒涧宛转数十折入天镜潭其一支穿缥缈楼下以入潜虬洞与潭会中多奇石可纪大抵前抱缥缈而后枕诸山回伏皆因之所以名蜿蜒也去白云屏之亡何径忽断两石所不接者尺许其下涧水湛湛通小龙湫小龙湫者顶螺旋如覆敦三方皆奇石■〈山上君下〉嶙而下积水深窈游客过之骇谓若有物其中故以名湫之西南一线道伛偻而上可以闯小雪岭余尝游西洞庭石公之风弄颇似之名之曰石公弄更十武许得一岩坐盘石其中倦可息也曰息岩自是俯径之峰其拙者曰似傲巧者曰残萼曰碎衲拙而大者曰大朴屏石之似白云而稍苍者曰苍玉几尽而得一磴可十级上余戏名之曰误游磴所以称误游者其脉自芙蓉池之西北度小有桥崇■若马脊皆植桂凡数十百树曰金粟岭自此复夷缘磬折沟沟尽而得石磴十级以上有亭一可以观田中获名之曰省获其又坦上十步许一茅亭踞之故文博士寿承尝为余古隶乾坤一草亭结法甚佳因扁之抵此则西原之野色尽矣亭阴即小龙湫顶度而稍西北折有白石数峰因名之曰小雪岭循而

至误游磴所谓似傲太朴诸峰皆道傍物也客沿涧得磴便陟迤邐以出忽不知其至小有桥为故道始悟向者陟之误也由误游磴复西俯涧之石有曰黑云堆者有曰千年菌者以奇甚故名他可名峰石殊众倦不能署笔矣寻得一洞入夷而出险洞中石倾崎嶇隤如相角者名之曰陬牙取高唐赋语也东南攀蹶而上得平台即洞顶傍植灵楸玉兰胡桃之属一峰南向曰翫客稍东南数武一峰曰指迷自是大青石梁横亘之最雄丽名之曰青虹循青虹复西而下入洞屋其上则缥缈楼也南壁皆巧石堆拥绝类飞来峰下有小悬嵯适得旧刻石米元章所题画布袋和尚像岩其中名之曰契此岩契此和尚名也北则设连床半出檐外可以尽承南岭之胜余每春尽坐此北风吹落花满巾帻依依不忍去右折梯木而上忽眼境豁然盖缥缈楼之前广除向入山所得簪云三峰皆在焉左锦川一峰森秀真蜀锦也名之曰浣花自此遂陟缥缈楼取少陵城尖径仄独立飞楼语又以洞庭西山岭名名之曰尺鷃逍遥不自知其非九万也此楼是三弇最高处毋论收一园镜中启东户则万井鳞次碧瓦雕甍纤悉莫遁启西户更上三级得台下木上石环以朱栏西望娄水如练马鞍山三十里而遥木落白露北望虞山百里而近天日晴美一抹弄碧名之曰大观台又曰眦虞榭眦不及马鞍者志远也他美略矣楼之下左降得方台砥平悬嵯而下距天镜潭数十尺收西山之胜最切而摄月最先坐此令人意自远名之曰超然台一峰多嵌空而不能透曰逗云一峰俨若垂绅者曰端士一石若面首而椎者曰巫髻皆台饰也楼南稍东得石磴十级而下白云门又东北十级而下有门曰隔凡则吾三弇之第一洞天也空中靚洁或明或晦乳窦涔涔欲滴巉巖嶙峋若嚙若搏其水左与天镜潭合然上皆怪石覆之北取蜿蜒涧渺渺而入俯窥之若一星以其窈窕不易测也故名之曰潜虬而亦会我先师昙阳子笼灵蛇于是不二时而失之旬日而见于徐墓其义盖亦脗云洞中石磴凡再断游者过之必鱼贯以手乃其足犹蹉蹕也出洞则复旷朗稍南为枕流滩以其址污时侵水也傍多美石曰鹰喙曰小玲珑者更北过小石梁正值青虹之下与相映带因名之曰雌霓复入陬牙洞转登故台少西得一亭桂树环之曰丛桂寻返抵台则取中弇道矣台虽庳以其缩三弇之轂也名之曰缩奇由缩奇而下数级后诸峰汇之稍有石傍出于水可以钓名之曰忘鱼矶取王弘之语意也矶傍有一石盆出骧首欲奋曰鳌头已复折而上四周皆峰石石龛杂植红白梅白者十八一亭亭焉曰环玉傍有锦劈二峰劈峰独擘云而上曰独秀小转抵月波桥而西弇之事穷

记五

西弇之事穷而得水与中弇隔颇远为桥以导其水两山相夹故小得风辄波乘月过之溶漾琐碎可玩适有遗蔡君谟万安桥记者中月波二字甚伟因摹以颜桥楔之楣度桥一峰骨立当之宛然陆叔平所貌也名之曰古廉前为壶公楼西壁右则饶峰石之属转西南皆踞水鬱律瑰■〈石鬼〉嵌空虚中各出其态以媚游舫稍出水则甚奇有

若双举肘者曰拥袖若昂首而饮者曰渴猊有若尾渴猊而小者曰猊儿有若飘举者曰凌波若憔悴将溺者曰悯相余故不办枚举也不数武为率然洞其上下平而左右饶石骨以其修且豁■〈口闭〉也类若为率然所中穿者故名洞且尽两石夹之俨然两阁人左高而瘦右卑而古总名之曰司阁石其西南折而下有盘石卧水亦钓矶也以其距藏经阁小迳为唤渡处名之曰西归津复循洞口东转度清波梁其下穿漱珠涧口自此踞水之峰有类白玉者有类苍璧者皆古而多穿漏其苍者尤奇名之曰天骨白者曰楚琢小转而南两壁上陞一石卧之曰小云门自此转入峡矣峡两傍有怪石叫窾阴互仰不见日缘涧而转委曲泝沿两相翼为胜尝谓峡高不能三寻许而有蜀夔府岷峨势涧傍穿不过数尺而乍使灵威丈人探之当必有缩足不前者此中第一境也峡将穷得一石扣之其声泠泠然若搏磬家弟过而乐之名其峡曰磬玉余名其涧曰漱珠要以不能尽发其美为恨由磬玉峡再转可十五级而得石栏翼然启左扉而入抵中楼凡三楹其前则为石壁壁色苍黑最古似英又似灵璧■〈石含〉研搏攫饶种种变态而不露堆栈迹钱塘紫阳庵一二处彷彿近之曰紫阳壁客谓余世之目真山巧者曰似假目假之浑成者曰似真此壁不知作何目也壁之顶皆栽括子松高不过六尺而大可把翠色殷红殊丽启北窗呀然忽一人间世矣涟漪泱泱与天下上朱棋鳞比文窗绮楼极目无际东奔西崦以朝夕斗胜颜之曰壶公谓所入陞而得境广也左正值东奔之小岭皆绯桃中一白者尤佳适与敬美春尽过之尚烂漫刺眼因名之曰借芬右室于冬时遥睇缥缈雪色甚快名之曰含雪楼之下前后所获境与楼埒稍东承檐溜处产芝已三阅岁矣每产时其址不雨而润上有紫气受日晶荧因名之曰荣芝所自含雪之前廊可三级转而南一室世尊坐莲花俨然名之曰梵音阁借紫阳壁顶松风名也出阁右盘而上三级则为绝顶曰红繖峰又曰玉玲珑亭亭雾表是洞庭第一佳者其左稍次曰漏月峰更次曰盘陀峰右次锦石一曰衲霞峰复左盘而下时时得佳石独锦峰一尤精丽是蜀品第一佳者名之曰青玉笋自此穿一石梁其下即磬玉峡名之曰鳌背度鳌背有亭亘焉入亭无他奇而涧峡之卉时时入户与壶公楼步武客候楼鏊不时启于此小憩名之曰徙倚自徙倚亭而南折下数级得东冷桥而中奔之事穷始余失策为愚公其治山独兹奔最先就绪而所徙乃吾麋涇故业最饶美石皆数百年物即山足可峰也所徙即非石而树山矾矮松一尺九节虬屈拥肿他桃梅棠栝之属若慕之而争为奇者峡仄涧迫枝叶樛翳游人过之坠帽钩袂相踵接而益称快然吾意未已复有东西奔故曰愚公也

记六

度东冷桥一峰当之曰窈窕峰自此而南有二峰一高梧数桃树甚茂又南为舫屋然皆非取东冷道也折而北一斧劈峰曰青峭又一峰曰拙叟东转皆曲径逶迤而上数十武一峰斜睨若贫姥颊曰碧皱遂得亭北向其左茂树深涧幽閤可人盖至亭而东奔

之胜始显自此分二道以出故名之曰分胜亭阳道由正北穿小石门微辟右方一高峰文理皴皴若裂名之曰百衲其次而庠者亦如之曰小百衲类僧与其雏偶语者稍西一峰最崇而两尖相向山师名之曰蟹螯或以其俗请易之余谓此晋毕吏部语也使我得君山酒满地似此佐饮何快如是遂不易东北斜上三级得广台是流杯处其台凿石为芙蓉屏石西面修可五尺余广倍之曰云根嶂得水则杯泛泛由嶂下窵穿芙蓉度客争取之至湿衣屨不顾也石芙蓉之水东注一峰下泻于池怒激狂舞俨然小栖贤也名之曰飞练峡徐凝诗故恶二字却殊不恶耳然飞练蟹螯二胜皆以泛舟始出之余不能尔繇流觞所十余级而下始为大滩回顾一峰北向若首肯滩景状曰挹清峰滩势直下往往不能收足第最宽广狠石四列垂柳绯梅蜀棠交荫憇之则池与南荣画栋两崦岚壑昏旦晦明之趣尽入阿堵读康乐清晖娱人语真足忘归也因目之曰娱晖滩左望一石甚丽曰锦云屏已从东南探径窵侧足而上为云根障之背双井肩并有轳轳盖汲水以流杯处俯瞰沉沉若虎丘剑池复东数级而下得老朴大且合抱垂荫周遭几半亩傍有桃梅之属辅之始僧售地欲并伐此树以要余余谓山水台榭皆人力易为之树不可易使古也益之价至二十千而后许为亭以承之曰嘉树朴恶木也而冒嘉名亦遇矣亭北枕池而南临涧又藉树荫虽小致足恋耳傍亭一峰遥望之若莲花近不尽然故名之曰似莲自嘉树亭折而东一石梁正碧色曰玢碧梁东上三级复西北转迤邐而上得一岭若案稍北一岭若驰脊前后九括子松环之最茂每日出如膏沐青荧玲珑往往扑人眉睫松实香美可咀曰九龙岭亡何抵三步梁其修不能过三步也而险自此折而下已宛转复上穿得美筱为径抵振屨廊而止此所谓阳道也阴道皆幽径俯涧折而北蹶磴下稍东复折而南凡数折始为山神祠祠傍一树斜穿垣而南以荫僧沼复转而荫我其右一树大亦如之皆出重价购之僧者其材不中直五之一也祠西傍出一道由玢碧梁下度可以俯窥留鱼涧之胜留鱼涧者首分胜亭而尾达于广心池最修而纡几贯东龛之十七两傍皆峭壁数丈宛转将百曲即游鱼入者迷不得出故名留鱼花时落英堕者亦积不能出故一名留英大抵客游白阳道则池与涧之胜各半得之其自阴径所擅涧而已径不为迭磴上下甚峻而滑忽起忽伏其上则袂相挽小断则蹠下则履相踵小近则嚙以故游者或苦之而振竒之士更栩栩夸快涧尽其阴径出而得池然再断断之中为平坡其再断之中复再断而中迭石以度度者必振衣而跃乃先济曰振衣渡游女至此往往怯而返又曰却女津过此则绕敛霏亭之后转入亭敛霏亭者遥与先月亭对盖西崦之落照归焉故名亦取康乐语也自是与阳道之出山者会而为振屨廊大抵中龛以石胜而东龛以目境胜东龛之石不能当中龛十二而目境乃蕝之中龛尽人巧而东龛时见天趣人巧皆中蹶而天趣多外拓时有二山师者张生任中西龛吴生任东龛余戏谓二龛之优劣即二生之优劣然各以其胜角莫能辨也

由西弇山而东至环玉亭而西山之事穷北折得石门榜之曰惜别峰所不能尽者间值三四焉自是皆土山蛇纡而上杂植美筱垒石为藩其右大有余地拟荫美木未徧复纡而下其左傍广心池一草亭当其址夜月从东岭起金波溶溶万颖注射此得之最先名之曰先月循亭而北复为石磴大小数十峰参差磊块以祖出山道耳溪水隔之桥其上曰知还取陶彭泽语也已复桥稍东为文漪堂堂俯清流湘帘朱栏倒景相媚微颺徐来穀文熨皱正值中岛之壶公楼夜分灯火相暎带小语犹闻何但丝竹吾不知于西湖景何如彼或以远胜耳堂有三壁间取文选诗句稍畅丽者乞周公瑕擘窠书是生平得意笔左壁平湖右壁雪岭则皆钱叔寶为之而雪岭尤壮出文漪堂左折而入得一门曰息文忽呀然哮豁盖广除也堂三楹踞之殊轩爽四壁皆洞开无所不受风间植碧梧数株以障夏日耳名之曰凉风堂俟梧成当取崔济南语名之曰凤条馆繇堂西数武曰尔雅楼一曰九友所以称九友者余宿好读书及古帖名迹之类已而傍及画又傍及古器垆鼎酒鎗凡所蓄书皆宋梓以班史冠之所蓄名迹以褚河南哀册虞永兴汝南志钟太傅季直表冠之所蓄名画以周昉听阮王晋卿烟江迭障冠之所蓄酒鎗以柴氏窑杯托冠之所蓄古刻以定武兰亭太清楼冠之凡五友僭而上攀二氏之藏以及山水并不腆所著集合为九郎中思归时郁郁为歌以志寄盖未几而遂纳节之请九友居吾楼始获听且矣阁前俯方沼下蓄金鱼数百头饵之则羣起适得米元章所书墨池二大字勒石嵌于沼之阳盖稚子时常用涤砚亦实录也楼西通一窦稍迂之复得三楹中室以奉三教像名之曰叅同左室多藏宋梓书名之曰少宛委右则暖室也蕴火以御寒名之曰襦云窝中庭数拳石隐小穴■〈奭斗〉垣外水逸阶为流杯西穿暗室出猊口注墨池■〈彳 虢〉■〈彳 虢〉盈耳吾以穷腊栖襦云以深夏息凉风其它则朝夕坐尔雅随意抽一编读之或展卷册取适笔墨天所以纵我者滚滚不竭酒天所以酬笔墨者数飞白不醒亦足以老矣一旦悉舍之而事空王一瓢一褐一团焦束身向所谓尔雅楼今仅四立壁耳九友之去为何人主不复问也出息交门而为庖■〈广外畱内〉食廩酒庖又西有楼五楹藏书三万卷榜之曰小酉今亦为儿子辈分去存空名耳楼之前高垣其下修廊数十丈枕广心池即由文漪堂出别墅后道也自弇山园而入者至此眷眷不忍别出别墅者豁然若得天地人人思振屨焉名之曰振屨廊始乞尤子求画壁作武陵源而俞仲蔚以行草书记及诗足三絶一夕大风雨倾坠无余余乃杀其左右之太高者而中为楼三楹其下不废廊而楼可以眺卷帘则几得园景十之七罨霏渺弥皆在目眦间遂为一胜地游者快之不复追忆前画壁也廊穷为门曰与众折而北复为门枕通流榜曰琅琊别墅稍东度一桥又东则余今所作菟裘以居三子者也

记八

山以水袭大奇也水得山复大奇吾园之始一兰若傍畊地耳垒石筑舍势无所资土必凿凿而注则为池山日以益崇池日以注且广水之胜遂能与山抗其源自知津桥南有斗门外与潮合而时闭之稍北则为藏经阁阁地若矩四方皆水环若珪左方稍前跨为石屋三间以藏吾舟其一舟具栏楯翳以青油可坐十客其一狭不容席呼酒网鲜而已舟行阁前平桥不可度两岸皆松竹桃梅棠桂下多香草袭鼻直北可数丈则为中舛之东冷桥桥下两岸皆峭壁■〈犛牛〉牙盆出寿藤掩翳不恒见日紫薇迎香含笑之类时时与篙擘是曰散花峡循而东首覩所谓蟹螯峰者决流杯水观瀑布之胜溅人面稍循而东傍娱晖滩是泊之最胜处更东抵嘉树亭折而北至敛霏亭沿振屨廊泊文漪堂于此唤酒炙乃环小浮玉岛小浮玉者其高不盈尺广十之以水长落为大小为其类吴兴碧浪之浮玉也故名岛之南则可循壶公楼摘红梅碧桃花西傍先月亭沿土山而南出月波桥迥然别一天地矣澄潭皎洁如镜西中两舛夹之峰势或近或远近者如媚远者如盼其中舛则梵音阁之辅峰皆出西舛则潜虬洞西冷滩之景在股掌间折而南稍东则为中舛之面山稍西穿萃胜桥则为西舛之面山是皆舛之最胜处一转楫则得之名之曰天镜潭取青莲月下飞天镜语也其直南入罨画溪抵知津桥而水之事穷吾尝以春日泛舟处处皆奇花卉色芬殢目鼻当欲谢时寄命微颺每过酒杯衣裾皆满花事稍阑浓绿继美往往停桡柳阴筱藁以取凉适黄鸟弄声啾啾可爱薄暝峰树皆作紫翠观少选月出忽尽变而玉玲珑嵌空掩映千态倒影插波下上竞色所不受影者如金在镕万颖射目回桨弄篙迸逸琐碎惊鳞拨刺时跃入舟间一奏声伎棹歌发于水则山为之荅鼓吹传于崦则水为之沸圆魄之夕鸣鸡自狎毋论达丙而亡倦色即署光隐约浮动客犹不忍言去也曰吾不惮东曦安能使东曦之为西魄也盖舛之奇果在水水之奇在月故吾最后记水以月之事终焉

舛州续稿卷五十九

●钦定四库全书

舛州续稿卷六十

（明）王世贞 撰

○文部记

越溪庄图

△记

自胥门之江西南数里而至横塘所谓越来溪也其水则益清两岸饶净绿与柔蓝映带不三里而抵石湖湖口长桥馆之所谓行春桥也其右则为普陀岩有石梁之胜自此而取道至楞伽山桥之左迂回可数百步有乔木榆柳之属沟水湾环清泚桑圃数亩蔽其阴而王子玄静之庄据其阳一衡门自西入稍东折而南为舍三楹客至可以茶又进之舍亦三楹而稍宽洁可以酒其又进而小东偏则为亭可以憩折而西傍为书屋可以宿亭与书屋皆修竹数千竿环之亡论寒暑雨月往往助其胜而最后因地势成小圃杂树三之杂花果二之大堤樊其背高二十尺而时时长莫知纪极不石而岩不甃而垣记云隋越公素所筑新郭睥睨也其树木大皆数拱余竹益茂萝薜灌莽郁然深山家矣今年五月初余偶过之主人戴华阳巾轻纱裕出肃客焚香瀹新茗已大为酒酒我果取之树笋取之竹蔬取之畦菱蒲取之渚而细鳞长须之腴取之湖醉于亭金波煜然而苦碎梦于室玉声铿然而时警晨起而浴浴竟而饭相与要之后圃散步竹木间雒雒粥粥如唤二练雀雪洁鲜俊可念往来透人眉睫稍上大堤凝眺久之则平湖之为镜诸溪之为练近而宝积茶磨以及楞伽俨在吾几案苍翠可仰掇远而穹窿岑萼■〈廿奴〉茹邓尉之属亦时与云气相出没矣觞十余行乃出步行春桥四顾若有会者盖垂别而不忍舍而客有张子茂贤妙丹青余因指而谓之曰与玄静居而隔坨者非吴王夫差之所谓郊台也耶其稍左而邻者非紫微舍人之所谓精舍也耶夫夫也而今安在哉且以吾吴之胜地非不足而其迹者迫于市器之属耳而市人子之接迹其胜而远者车马怠而供张易竭能离而又能兼之者独有兹湖而已玄静幸得焉而吾与子幸寓目焉乌可使泯泯如前所谓也夫山水之与人交相待者也人不得山水亡以畅山水不得人无以着而广于是张子欣然为貌之而余纪其事玄静之父履吉先生者以文章名德靖间其草堂手所创而玄静为葺治之垂五十年矣树日益古而花竹日益新三径日益辟其待山水者耶能为山水待者耶

安氏西林记

余与仲俱嗜名山水而家东海泻卤地亡当者家有园颇见称说游客亦以近廛市且不能得自然岩壑以为恨而念数年前孝丰吴枢季尝为余言无锡安氏园之胜盖即今西林云安氏为锡最甲族其居东离邑二十里而羸邸里之雄沈与晦井饶沃亡论埒国封然不以豪故废林野之趣北之胶山二里而羸即山址得园二其上割山而半笼之今太学懋卿盖时栖处其右方自懋卿之时栖处而园益胜破石根则神瀆涌疏磴道则幽穴显斩恶木则嘉楠出列棘以为藩藩严而中靛深分流以自环环多而相映络其台榭可以巧承态其户牖可以竒取睨其泉可以酿果茹蓀蔬可以羹鱼鳖虾蟹可以饫客

而懋卿故有客癖客之以文事名者又雅慕懋卿以故争麋集焉山人叶茂长甫客之雄也今年自钱唐倦游还访懋卿倒屣揖之入载酒崇肴或凭鹿车或鼓渔刀相与穷昼夜为娱乐时秋气鲜霁云初解驳山若迫而迳水若媚而密禽鱼若傲而尔汝我懋卿之爱托于酒而犹未已则谋与茂长谋所以宠灵之盖厘而为景者三十又二景各有诗茂长之为体九而懋卿之为体仅一顾其风调旨象大约有足当者懋卿具其事贻书友人王世贞俾为记世贞乃复约其所谓三十二景而得其尤胜者诸台馆亭榭之类凡丽于山事者五丽于水事者十四兼所丽者三曰兰岩者礪之衡纵岩也大国之香滋焉曰风弦障者高坪直上接于礪下瞰诸水长松冠之风至则调调刁刁鸣故曰风弦也曰遁谷者降礪而凹却入水深佳处也曰晨光坞者礪之透迤而左右抱林者也以左小缺得嵎夷候独早故曰晨光也曰纤纤泉者穴于礪最冽而分甘所谓可以酿者也然于茗尤发香而益色是山事也曰镜潭者诸流之所汇也其受纤纤且既皎而澄可以烛须眉故曰镜也曰鳧屿者水中最大洲也羣鳧鹭属玉而族焉曰上岛者屿之右别岛也曰中洲者屿之辅洲也曰萧阁者于屿长松匝之曰空香阁者于岛竹木丛之曰景榭者缘潭而立得月则水中之楼阁皆可俯而有曰一苇渡者以渡鳧屿名曰夕霁亭者以晞发于颓阳名曰素波亭者渡口馆也曰息矶者可憩而息者也曰醉石者可藉而醉者也是皆得之水故曰水事也曰虚籟堂以迟宾者也中空于绪■〈风贝〉叵所不纳故名曰椒庭者广除也可以眺山椒曰爽台者踞椒庭而耸梧竹承之是不尽丽山水者也然而山水之致袭焉故曰兼所丽也其曰西林则以大士阁在焉懋卿之所寓皈以其异日与逵公埒者也凡山居者恒恨于水水居者恒恨于山山水居者或陋且瘠而不可以园适于目者不得志于足适于足者不得志于四体适于四体者不得志于口是四者具矣而多不得志于人与文懋卿之西林俛得之哉嗟乎豪而为袁广汉石季伦司马文孝王末矣以洛阳之履道里与李文叔纪类极清旷适尔雅鷄适之观彼其于李文叔之洛阳名园前所云五者亡论第不再易世而辱于屠酤市贩之手又久之求其迹而不可得岂非以其近麤故豪者好之狎而易为有俗者嫉之接而轻相躡耶懋卿乃能酌远迹剂喧僻而加力兹林不侈不陋人无所用其欲恶而伸其狂吾因知兹林之长为安氏物哉吾于文剧喜柳州愚溪愚谷钴鉞潭潭西小丘诸记于诗喜吾家右丞辋川诸絶梦寐之所注像其胜郁淳犹宿眉宇间弟仲近归自秦叩所谓辋川者云彷彿有之不甚可指辨而李颀使君前按柳颇毁柳之溪谷潭丘以为不能当其文然则懋卿与茂长之诗行后世其不以西林为辋川愚溪者几希游西林而得其实其不以二子贤于右丞柳州者几希余窃欣有托焉

石亭山居记

环阳羨而四郭之外无非山水其山之冠则皆青峭郁丽其中则宛转深窈而其下

则多嵌空玲珑其水之为湖若溪若■〈洑父〉者皆泓渟清泚可濯纓而鉴髮山水之所交荫则皆沃埜有稻禾菴茗美箭柿栗之属而又为寓公骚人之所咨赏若苏长公辈咏歌而志识之不一以故环阳羨而四郭之外亦无非甲墅名圃嘉靖中邑之贤大夫吴先生强弃其印绶归而邑邑于郭居之不快行求地至城南之五里得一故墅而乐之问其田与赋则皆中下错也曰吾且以为孙氏之寝丘乎傍有一小山曰石亭其高与延袤皆不能里计质之人某已氏之所弃可损缙笼而有也乃益置厅宇治丙舍为凉榭暖合庖■〈广外畱内〉浴室之属杂蒔名卉翼以松柏篁竹相土之宜以滋果蓏旁亩益拓粳秫参之潴流以为鱼防辟场以为鸡豚栖曰吾宫于是饮食于是其羨犹可以沃宾客也暇则扶藜杖蹑蜡屐而登所谓石亭者则铜官离墨荆汉二九上下之胜一望而既之曰是不必皆吾有也庶几哉不皆吾目有乎当大夫之乐之甚至捐馆舍而即其阴卜兆以归焉时二孺子方襁褓其家之不遑恤而独所谓石城之居贤者以为甘棠而黠者果以为寝丘盖久之而二子渐成立补太学上舍録乡书则其居益饬日丽而家老之任农圃者日益勤即毋论其田赋视公时亦改而上中矣伯子与余仲氏善谒余而属记之伯子之言曰是居也吾先大夫之所手树筑者也吾方惴惴焉惧五亩之不能保以贻地下羞而今故无恙吾偕吾仲时息焉游焉且获取其羨以供先塋之粢盛而傍及宾客则大幸虽然薛公有言玄孙之孙为何人不能知也夫以不能不圯之庐不能不凋之卉木而责之所不可知之人吾又安能保其终为谁有也其泯然而渐尽者无可恃所恃独岿然石亭之山而已叩之而顽然不能自名然则所恃以久而使后世之人询所谓石亭山者曰其傍固先喆吴大夫之墅也以等于兰亭午桥足矣唯子一言记之耳余听然而笑曰孝哉子之言虽然恃余记而不朽亦迂矣固不若子之石亭山顽然者足恃矣吴大夫讳仕以文行显尝三拜学使者而三弃之学士称为颺山先生

太仓诸园小记

吾州城睥睨得十八里视他邑颇巨闾阗之外三垂皆饶隙地而自吾伯仲之为三园余复有八园郭外二之废者二之其可游者仅四园而已今世贵富家往往藏镪至巨万而匿其名不肯问居第有居第者不复能问园而间有一问园者亦多以润屋之久溢而及之独余癖迂计必先园而后居第以为居第足以适吾体而不能适吾耳目其便私之一身及子孙而不及人又园之胜在乔木而木未易乔非若栋宇之材可以朝募而夕具也于是余弇园最先成最名为胜而天下之癖迂亦无不归之余者余记余园因次第记之田氏园者盖镇海卫千户田某所筑也去居第卫左穿一弄而东百步有隙地而垒石为丘高不过寻丈余广袤什之太湖石仅数峰亦非佳者亭馆桥洞之属具体而已顾独有大树十余章美荫婆娑而池水亦渺弥垂柳环之可泛然不晓为舟始某以嘉靖癸未山成而其子叅将生故名之曰应山后积战功至大官其橐累数千金归而好陆博侠

游又以訾谋复用败因游贵竹成都之帅幕皆不遇狼狽归其园今鬻之大司马凌公所谓匿其名者也故不复修治所谓大树者亦几尽安氏园者在州之震方最僻而雅前阻小溪水溪外为廛市其右与其阴皆稻田农欢歴歴在耳目左通一门而入除竹为径数十武得一室下踞桥之折而南北宛宛复为修径藩其右以圃皆种梅桃杏李林檎之属中有亭一茅舍一其北径尽稍西为莲花池水亭据之中为门以入则前堂后合东荣之书室及庖□皆在焉园之主人曰邦者罢江右之司训归则日夜课园丁种植溉壅不休以故花之事独先其果蔬足自给而竹亦独蔚茂甲于他园主人年八十矣犹时时杖屨摄客然好面折人人畏之而嗣子仁能具家酿盘飧最名丰腆客之黠者给主人入卧因盘薄竟日夕

王氏园者元馭宗伯所治也始其大人封詹事公辟地于宅之后东西可三百余尺南北三之其阳为菜畦盖皆潘河阳赋中所秣也畦尽限以修垣窦而入十余武则横隔大池一桥蜿蜒其上循桥而得径其右方为亭亭之上为榭明瓦覆之朱栏四周亭前垒石成小岛盎沼灑灑其下有襄阳人者能于石虢引机作水戏亦足供嘔噓左方池稍广前堂五楹后廊楹如之种牡丹多至三百本菊之倍者再盖詹事公父子他无所好顾独好花于花独好菊牡丹花时驰价募购亡论近遠而姻党家有奇本往往輒以赠公大合乐高宴酬之时积岁累殆不可指屈公捐馆后元馭痛不忍料理当非复旧观矣二花外多名种佳果而其最奇者曰苹婆曰麝香红李寿星桃

杨氏日涉园故都督尚英所筑也详具余弇山稿盖园成之四载而都督卒其子指挥之庆不能守遂以峰石售之人地今悉归崇明郁氏有竹木蔬果转盛而亡游者

吴氏园者在州南之稍东最为闒阓而园屏居第后地不能五亩屈曲呼门由左方而入一楼当之前为方沼沟于楼之下以通后池水楼不甚高广而颇敞丽启西窦而出则可以步武岩岭曲折上下有亭有台皆具体而微山之阴华堂面之山之右层楼俯之堂之左平池浸之中为曲桥以度东泝亦有亭冠其阜后始稍稍见蓁竹竹尽而园之事穷矣大抵楼高于山墙高于楼不令内外有所骋目而又严其鐻无敢闯而入者至于榱栋之华焕供张之都美酒食之腆洁非士大夫与所亲狎莫能与也主人为太学云翀其祖父以贄倾州邑然不晓有客至云翀始稍知客又好酒而文其园最晚成而最整丽虽于山林之致微然亦差不俗矣

季氏园吾师观察公所有也在南门外度津桥稍东枕濠水有轩一楼一皆絶庳小惟中汇大池若方镜亭于中央桥通之轩四隅皆艺牡丹其右方一台四隅亦皆艺牡丹有红于猩血者白于于阗玉者紫于萁而香者其大若盆盎高至尺许而玉楼春一株特

出墙表数之可得二百朵观察公惟不食酒然花时召客以大白泛之必令醉而后已盖观察之子颖好种花于牡丹为独精故能致其盛如此詹事欲悉力雄胜之不能也园中侧柏一株奇秀甚尤诸圃所无世父麋场泾园雄丽始为吴地冠捐馆后为吾伯氏所狼籍几不可游吾季氏尝乞余言记之以志不忘而已后余治中龛石从而徙然仅十七耳今之土冈溪池竹柏犹有存者以余记考之或得其髣髴也

曹氏杜家桥园者乡进士茂来所治也去城北五里得之杜氏故尚袭之其地多乔木森然而古长夏之际虬龙舞空赤日不下修竹千挺苍翠交映一池澄泓水亭踞其上中迭石若三山者今皆去之层阁丙舍可居可游可以读书其城市非远非近沽酒买鱼不至淹客茂来性好治园墅在吾州城者一故居沙头者二甫成得少时息则厌而它徙晚节筑舍于玄墓不胜其寂徙筑虎丘与所知一二人读书吹笛缮性而已杜家桥园子孙时肄业其中春时亦有载酒游者余三园多芜而沙头一园大池数亩种鱼鱼巨而肥玉兰木樨株可数围高出堂表余欲游之不果今以为恨

余治郟时所部近洛阳颇加询访今郡城仅得四分之一所见惟公署廛舍而已城外亦有土圃十数种牡丹芍药二水既改徙而远亦仅涓涓于李文叔所记夹池修竹之胜无一存者然赖兹记而至今吐生色人读之尚犹有欲振屐而从者吾州诸园培塿耳视吾郡故不能十一三岁不垦则牧地矣然则兹记其可以已哉

离蕢园记

出鸚■〈哥鸟〉桥东第之左门不五步而渠其水仅踰寻然宛宛通官河桥踞之临桥而门榜曰离蕢园园故里人朱氏之菜壤也东西不能十余丈南北三之入门为蟠松二方竹十余茎最南有亭曰壶隐其三方皆梅可二十树前迭石为山俯盎沼蓄朱鱼其中山之延袤仅可以丈计而中有涧有洞有岭有梁皆具体而微碧梧数株骀骀欲干云其右方为书室二楹其左方种竹千余竿露翠风簧时时琴酒适竹间有亭曰晞发以憩客步壶隐之后得小圃二皆有栏竹藩之桃杏木药海棠山矾之属寓焉圃尽而径见为广除孤峰出为洞庭石嵌空玲珑色青黑而右有锦川斧劈辅之复有老梅玉蝶绿萼各一植左右大可荫台临台而屋凡五楹中榜曰鸚适轩状其卑小也亦以志自得也左室可读书以得竹故署曰碧浪右室可栖客曰小憩轩之后为重轩临后池拟种白莲百本榜曰芙蓉沼沼后距墙咫而近亦有夭桃紫薇垂柳以覆之度小憩室折而西北为侧楼三楹临渠而傍阶其前庖扈浴室也始余待罪青州以家难归窜处故井公除之后数虞盗窥徙而入城不胜鬬鬬之器烦乃请于太夫人以创兹圃问寝之暇辄携吾仲氏徙倚其间三四友生叅之浊酒一壶束书数卷佐以脯炙间以谐谑不自知其晷之易昃

也园土狭而瘠獠奴颇率职溉壅三之芟薙五之以故嘉木名卉出而不能容恶卅因读屈氏骚得离蓺二语取以名之夫蓺蓼菴所谓草之恶者也屈氏离而弗服乃女嬃呻呻而詈之何哉谓其有所别择也夫余方柱下漆园之是师而敢有所藉于屈氏哉第诸名大夫士人不以余鄙而时过从又不以兹园鄙而辱之诗歌若李于鳞徐子与彭孔嘉皇甫子循辈为人者三十而羸为古近体者四十而竒凡两卷皆满钱叔寶尤子求各为之图而王祿之周公瑕又各以小篆题额噫嘻为兹园者亦幸矣余再解郟节息弇州山池与兹园若避者月不能再至偶曝书得此卷因追为一记以志余之非有恶于蓺而无所托于离也不然即诸名大夫士人怜而诗歌之女嬃而在复呻呻詈余矣或者曰不然子之园固未有蓺也子何以蓺之而复离之而又复名之子不亦赘哉而又何女嬃之恠余亡以应

澹圃记

澹圃者吾弟敬美之所手创也敬美自秦臬予告归若蹙额于闾阖者而不能遽余而放于麋鹿鱼虾之地念欲栖离蓺则太湫而狎器栖弇山则大丽而贾客皆厌之行募地得城隅之坤维其南望恬愴观三百武而近北去弇山半里而遥三方皆远市右方虽小迹而特荒落亡贸易歌哭声傍多沃埜稍远为乡人墅饶嘉木美箭之属敬美大乐之曰是可居也复以属苍头政母若而治弇治如弇弗继也且弗汝功政颌之盖不易岁而圃翼然矣亩杀于弇六之一方广实隃之前门凿池半规衡可二百赤纵不及衡者过半藩以石栏其赤视衡木故而乔新植叅之清荫森然其右浚长沟可四百赤抵圃之北不尽者五十赤高榆外植佐以丛筱自然储胥入门则莽苍若广莫不荣不阶筑之冯冯以为收获场耳轩三楹踞焉仅脱茨而已扁之曰学稼敬美每至耕时则先其家众行课耕坐池上课妇子挈壶榼而饷作劳者已取其余酒食与余暨儿子辈噉之听吴歌甚乐也当获时坐学稼轩其饷作劳与余辈噉余酒食听吴歌如饷耕而加乐曰亦足以酬老农矣左庑启双扃而入精庐凡四重重各五楹抵楼而止辅以丙舍及仓庾庖■〈广外畱内〉之属高庳广狭与人意适养鸡牧豕酤酪不乏间携妇以止曰异日为儿曹作一蜗殼者也右庑如其左启扃呀然而寥廓平台之前为小池垒石因之以滋牡丹纤徊下上其萼毕见中为堂虽仅三楹而极轩敞宜暑无所不受凉中设石屏几榻琴书觴奕之类整静就理名之曰明志取诸葛武侯语也盖亦名圃意也后枕大池与学稼轩共之而稍限以一堤堤植杂果树鳧鹭■〈勅鸟〉时时所托址亦一观也堂之右折而南为书室三楹以居儿辈牡丹之所不尽者亦托植焉其北渡小平桥入一门武康石高四尺余絶类中山雪浪差黑耳中为靖以奉观自在及朱真君香火循左廊折而北为小轩中除迭数峰皆灵璧英石竒峭百状鬣而泽可鉴也又折而东穿水阁尤丽三方皆池菡萏千柄媚色幽芬逗人眼鼻间繇水阁而北稍西复得一轩寻复过县阳靖折而西得暖室者

二雪洞者一浴屋者一皆小而精中多贮三代彝鼎孤桐浮玉大令名墨中散酒鎗之类敬美恒以暇日焚香萧散其间卧起师意殊适也盖至中平桥剥琢絶矣繇东后小轩傍启短垣而出是为复道修篁夹之蜿蜒而北高者出屋杪下者如涧壑风日献伎琮琤青葱大抵皆傍池池半而横桥出以通东果园桥长可七十赤广五之一每至落照时暝色浮动碧芦红蓼自有渐无人语鸡声断续于烟景间徙倚以待东镜之吐潜颡入波镕金四注惊鳞时响纖玉腾跃夜分愈閤寂四顾泱泱无际呼酒数行领之却忆吴兴于碧浪湖子夜烧鱼捣苕荠风物不异觉彼犹为一二钓艇所窥不若此桥之更适也果园尤旷所种皆柑橘椈桃李来禽樱胡椒名品又以其隙分畦栽艺紫茄白芥甘瓜樱粟之属余尝戏谓阿敬汝生计大佳不若汝兄憨翁园皆骨山不堪食耳花品繁至不可计而于鞠尤盛其种以数十计花时移盍明志堂皆满本以数百计牡丹虽小简亦埒之自桥返竹径复折而北更渡一桥稍东则崇台岿然雕甍朱楯辅以紫薇之篱红药之圃盖一陟而圃之事无余又可以旁得丽譙琳宇大抵据圃之胜者池能尽池之胜者桥能尽圃之胜者台敬美以为老于是三者足矣第总而名之曰澹圃元美乃悠然而叹曰吾师乎吾师乎大雄氏得之而为禅悦道家者流得之而为天人粮儒者得之而为玄酒大羹今夫五色之有玄也五音之有雅也皆是澹也然而独归之味者舌之所入根深且也与身之所飡际一也天下之称为秣者必与澹对吾美其秣而受之既受而思焉未有不厌者知其所以不厌而后有真得则是澹也始基之矣或曰不然也吾尝游是圃矣秋水涸天根露百草辞青万叶谢条所覩惟一黯霏萧瑟之区而已以此思澹澹或归之时至而羣匠舒杂英献木药丛鞠之淫巧争组于吾目醇醲鲜脆与客共之便房曲廊宛转深靓邃古之物遥裔之珍不移而具澹安从至哉元美曰不然子之言俟境而后澹者也夫俟境而后澹者非真澹也敬美甫出而未尝一日不与余偕余故勉自割尚于世味时时染指焉敬美则知足少欲自天性矣再出而小离我归而复就我扣之而所谓知足少欲如故也故其宦两都歴名藩握兰建礼尚玺承明褰帷江右秉铎關中未尝一日不以身受循吏规然而若固有者银黄之组一辞而去之再辞而不就然而若固无者皆澹也是故敬美之署澹圃也以澹圃者也非以圃澹者也或又曰美哉子之言虽然不俟境而澹乎则何以不离齎之湫弇山之丽而必是圃择哉吾闻之道之出口澹乎其无味子诚知澹者其叙致胡藻而抗辨一胡详也于是元美乃不言而第以澹与敬美共之终身

约圃记

无住馆之西北偏得一窠穿而出可十余武轩三楹翼然前为中庭庭有台悉蒔木芍药其左右隅皆种竹数百个枕轩之后者池东西横亘渺渺扁其轩曰媚清取康乐绿筱媚清涟语也遂东穿竹径垂二十武而庭有老梅数树轩承之凡三楹中楹正受梅当花时目境与鼻观竞新扁之曰玉鳞取李羣玉玉鳞寂寂飞斜月语也然羣玉之目以花

落若败龙之鳞而余所取梅既已老如铁虬拏攫而花缀之为若鳞又若玉者左楹逼于径右楹则稍宽而复为三小楹中度之为几骥读书所向背就池为明晦宽者支榻陋者容膝亦各自有名复循而东转小岭皆种竹及梅桃度平桥复西则梅桃益盛海棠杏间之复有轩三楹不扉不窗其前亦临池扁之曰适我取靖节适我无非亲语也后赘一楹辟周除其背杂蒔花廿夏木阴阴时禽弄声骥坐其中甚怪也扁之曰欣托亦取靖节众鸟欣有托语也更穿而西得一丘正与媚清轩对登丘而望则三隅之烟树矗矗如青螺者不可指数扁之曰烟鬢取昌黎擢玉纤烟鬢语也丘之后皆植竹东西之为赤者垂二百南北四之一而圃事穷始余故居自燕寝之后为家人舍为■〈广外畱内〉厠为积薪聚为养鸡牧豕之场而以久故芜废不治家人亦不堪其圯它徙而甌脱之几骥乃稍稍除去瓦砾剪荆棘树卉木因汇以为池余土以为丘余材以为轩若室而总名之曰约圃骥之言曰始吾父之治圃而称弇山以泉石奇丽甲郡国不胜涉而厌之仲父之治澹圃名为澹耳而实宏垲饶名材卉今吾圃之广袤不能当其十一足不待疲而竟目不待瞬而息执役不二丁葺费不倾橐以此名约盖真约也而吾意常优然而有余语有之为学日益为道日损益者之谓博损者之为约也约也而失之者鲜矣吾且奉以终身余听然而笑曰有是哉虽然犹有待也以汝仲父之澹而澹吾弇山不为艳也以汝之约而约汝仲父圃不为广也夫有待者境也无待者天也夫芥子也而纳须弥所谓无待者也此其为约也大矣吾将示汝以境乎抑示汝以天乎汝其识之

弇州续稿卷六十

●钦定四库全书

弇州续稿卷六十一

（明）王世贞 撰

○文部

△记

暘湖别墅图记

甌之山自西来沿江而下其一枝入于江断而复起若珠连者曰九斗山郡城据之其一枝自朱浦分亦西行可数里为二小枝折而南凡东西奥二总名曰暘奥奥之水自

西南来者曰雄溪瞿溪郭溪为里四十而遥南山折之汇而平为湖曰旸湖当旸湖之前突起两峰其高逼汉峰顶有台曰吹台或云其先子晋吹笙地也亦名吹笙台旸奥之东麓则吾大叅王公阳德别墅在焉其三垂皆山吹台前耸俯临湖湖之中宛然而洲者曰浮碧墅之后清泉悬崖下■〈彳 虢〉■〈彳 虢〉入溪环堂而流坐其中若斋舫焉曰湛然堂堂之后迂径而东有轩焉丛瓠之异卉木于庭曰众芳轩又东有楼焉以当山色初旸承之松竹如沐曰青旭楼轩之后修竹将万挺循竹而西北有径四曰四时其卉木如其时公为诸生未几而荐于乡一再屈南宫即不出隐而读书其间甚适峰上碧千仞而湖下碧千亩朝暮之异态晴晦之异状寒暑之异姿皆悠然与公会而公亦悠然会之得其流峙之旨以成吾德得其潜植之用以成吾材得其风行露润之华以成吾文章盖业益就而公不得久为湖山有矣公为备兵使者以功晋今官犹治兵事经略之暇时时过余山园辄停盼久之曰慨谓余曰以吾墅之壮不能望子园然吾墅无待而子园有待者也虽然昔子有园而无主吾时时能代若主今子园有主矣而吾墅未有主也吾将归矣其主吾墅矣余笑曰公欲归天子其即归公耶以余之为时厌也与公之不能厌时也皆理也抑昔贤有言居廊庙而不忘江湖彼岂谓其遽能江湖耶姑寓其所以不忘者毋使廊庙胜之而已矣公听然悟曰善乃命黄生为之图而属余记于首

旸湖别墅后记

诸称名山者得水则雄诸称名园墅者得山水则亦雄而园墅之雄尤不可兼得都会之地王侯贵人足以号集财力而苦于山水之不能兼山而颠水而涯肥遯幽贞之士乐栖焉而苦于财力之不易兼以是有两相羨而已余之治三畝其地虽非大都会然差亦易办而其不能兼山水则如之余不爱其财力以凿深而垒危初若以为小兼者而终不能得其真永嘉王阳德先生昔者驻节于吾州每过余畝辄徙倚竟暮不忍去一日忽慨焉而叹曰仁知之乐则子庶几哉虽然犹有待者也以不穀而幸生永嘉清华之所会又幸而有无待者在问其地则曰旸湖之别墅既而曰惜哉不穀之未究吾思也今者见子之畝而有遗憾焉谓黄彪貌其大都以属余曰子姑为我记之余乃粗述二奥之胜所自来与奥之分水而为雄瞿郭三溪南山折之合而为旸湖因东奥之衍据湖之胜而为墅墅之中环清流而为堂者一丛羣卉而为轩者一承初阳沐松柏而为楼者一其大较如是而已而复设隐报先生曰先生试观乎兹无待者以此而当吾畝可也我有待者然无适而非公所貌也先生唯唯寻用量移去吾州天子下玺书归大镇先生而先生不肯出乃者介曹生子念而书谓余赖子之庇天赐不穀以日不穀有完力而从事兹墅以不穀墅而求子记语不得也以子记而求不穀墅不得也请重为子言之旸湖之中有洲焉故有台而无桥台亦草创而已甃之加崇饰之名之浮碧志适也左跨石桥若渴猊而达吾墅名之曰联璧志吾兄弟也吾墅面南湖向吹台峰其高刺天树石坊焉榜之曰湖山

会秀志大观也坊前后外松柏槐柳皆合抱中门三楹翼然署之曰旻湖别墅志吾居也入门循龙尾道而上得堂取康乐语曰清晖堂左有阁登之而四山之色若绀带曰纁青皆志吾外境也阁稍东数十武而得静室曰潜光志吾内境也折而东短垣窈之启扇而呀然得荷池四亩而羸夏秋时红白万柄清香袭人亭半侵之曰暑香清晖之右址得方沼亩而羸锦鳞百头相狎且适轩据之曰知乐循轩而北得圃五亩而羸名花百千种与岚紫翠相夺曰聚秀水涓涓流花间可以浮觞沿圃为渠沿渠多树桃李曰桃李溪筱千挺半之得亭曰涟漪盖清泉自屋杪下无所不受其汇而池而沼流而渠若珪若璧若磬玦者皆是也至园而墅以内之事始既既出墅翼墅而门其左者曰迎晞右者曰含景其阳为堤千赤以限湖波甃石固之桃李芙蓉相错曰锦浪堤尽堤而东得佛庐负小山而面湖曰寶界庵折而北得一岭丛桂覆之曰金粟岭自岭冒诘曲而上数百步曰穿云峡出峡转而南最高处得乔松数百株揽其杪台之而重湖连阜之秀一目而尽曰超览自台降稍北得修竹数千竿芟其中馆之曰筠阿出筠数十武转深而古木寿藤曲翳之曰绿沈■〈土幻〉转而西流泉之所注得方池曰停玉沼沼水自石濑溅溅而下小涧以环清晖堂之右蜿蜒若虹曰卧虹涧度卧虹之西小桥得石台踞水而竹复翳之西日不下湖风时来于暑益快曰清凉界稍折而北复得一坞多种古苔梅台其最受香处曰香雪坞至坞而墅以外之事始既其它山田数十亩当墅后青乌法按之可以菟裘其东复为岭高峰特秀两山拱揖复按之可以玄宫不穀且次第僦工矣子以为有待耶无待耶子为我重记之以为奚弇若余读而色飞左顾曹生曹生起而曰其然惟某获侍先生杖屨一寓目焉臆余曩所记以先生尝读书兹墅得所谓流峙者以成其德所谓潜植者以成其材所谓风行露润者以成其文章而后为世用今兹先生之用未尽究归而出其完力以朝夕于兹墅宜其兼也夫不知者以为昔无待而今不免有待矣智者以为有待而竟无待也愿先生时时坐潜光湛然之地一芥子亦无着间舒之而方寸者吞八九云梦而曾不罣碍夫岂直此拳山勺水而已耶曹生曰始子为记时谓当长有弇而以先生之不得遽有旻湖为异乃今先生有旻湖矣子厌弇而捐以付游者而束身于一团焦仅斗大事固难料如此请持此言而质之先生相与北向而大粲则子何如

天宁寺塔放光记

庚戌之春三月二十八日大人还自按楚以述楚事未即朝憩于城西郭天宁寺之方丈世贞时承乏秋官署得出侍焉其明日午饭于比丘间有谈寺塔光者云间岁或见之或数岁见之见必以夕夕必以晦大人顾世贞而哂亦不能复问至街鼓动甫粥毕微雨簌簌犹雾一沙弥入而諄曰光现矣世贞乃奉大人出至塔所塔可高三十寻四周缀铎以万计其声恒■〈金平〉■〈金平〉鍠鍠亡论昼夜阴霁而至是忽尽敛乃它声作于下籽籽然又类蛩鼓翼者仰睇相轮表青白光晶潏大于五■〈豆斗〉瓮上下闪

歛不定间一射人衣亦作青白色可炊黍熟许时乃息则铎声发它籽籽声亦息矣比丘乃前贺曰公父子善智识哉是光也毋论诸寓公即吾侪见之不数数也其大不能斗细以为萤若燭者而又不获久也今大矣而又且久公父子善智识哉大人复笑不应而又明日世贞乃稍笔之侧理不知作何语后复与僧无心有谈及之因追记其事按寺碑谓此窳堵波隋开皇中所建以藏舍利者也其寺曰天宁寺而志輿地者不复征所繇起第云故名天王寺至我明正统七年而加营之乃锡以天宁名而已隋帝肇威晚乘国难倒提三尺之孺子而窃其宝顾托育于尼智仙受舍利于阿罗汉而所谓舍利者初建塔于开皇之始载而其存者复腾瑞于仁寿之改元天下之福地宝林无不先后安置凡一百一十一州其最班班者并之开义汴之福广蒲之西岩秦之静念懷之仁寿华之思觉蒲之栖岩相之大慈岐之鳳泉絳之觉成益之法聚蒋之栖霞邓之宁国许之辨行慈之石窟江之东林苏之虎丘赵之无际隋之智门冀之觉观兗之普乐徐之流沟郑之定觉济之法吼京辇同荆之大兴国与五岳之以岳名者当时庆云甘雨灵芝瑰树异禽驯兽灵虵巨蜂之瑞在在有之而青赤五色光景浮动固悬合若契也其最盛者曰曹陝虽隋帝亦疑之以叩天竺摩竭提之使而云陝乃地藏道场曹为光华虚空藏故余往往私怪其事以为隋帝者何修而臻此毋乃附响贡谀一国若狂独孤頤指之诸髡倡之守臣和之奸劭从而粉飾之哉乃今覩兹灵异抑何遠而章核而不诬也且夫舍利者此云骨身又灵骨也是骨髮肉之英而戒定慧之所熏修也佛之所谓舍利者则非见劫积也是故三昧之烜得八斛四斗而不为多其三之一留人间者阿育王分之八万四千塔役鬼神一夕成之而不为速震旦得十九塔而不为少康僧会息之则自无而忽为有昙荣息之则自三粒而至三百粒今夫隋帝者非谓其德足感召也非谓能荷担如来之玄理宏教也緣也道不緣不显緣不时不契夫岂直隋帝緣至则姚兴昏而诸译兴阿育杀而舍利出则天淫而华严着緣未至则唐虞之为圣汉文光武之为贤而杳如也银有烛璧有辉蛤有珠蜃有市蜥有冰自无情而含识一物之微尚能敛天地之精以为光怪而况舍利乎哉或曰京师古幽州也隋帝之所建塔而藏舍利者幽之弘业也非天宁也是不然幽至于今无弘业也夫天宁之先不为弘业也意者志軼之志軼之安知弘业之不为天宁也耶

重修南翔寺记

去嘉定县之南二十里而遥盖有南翔寺云寺所以称南翔者当梁天监间有异僧德齐止锡其地规为阿兰若甫决筮而双鹤依之晨起放鹤鹤往之方必有客至至则为檀越布金其地委输若神鬼不日而成上刹以雄丽冠东南德公化之亡几鹤亦望南而翔不复返或云鹤之逝也留诗于刹之楣郡乘载焉以其俚或传会寘弗録垂五百年而为后唐之开成寺且圯矣复有异僧行齐者止锡如德公双鹤复依之行公感其事为一

众说法而有莫少卿者尽捐其橐缿而拓饰之雄丽隩于旧观行公戏谓鹤吾事毕矣恣汝所往鹤应声盘舞遂亦望南而翔不复返行公寻亦化当是时震旦之士毋论缙白咸以二齐公为一身而后双鹤之为前双鹤其语留珠林中甚着至宋绍定中天子知之遂赐寺额曰南翔至元而讲有堂禅有庐会食有所盖以时次第新之及明正統中而大圮司空周忱氏过而慨之以邑赋之羨粟倡而诸善知识和焉其观遂复故至嘉靖中小圮则小饰而至万厯初则益大圮上雨傍风飘摇其外蠹蚁丛蚀其里势且及像像亦多损剥寺僧且重悲之悯之计无所出彷徨四顾而叹曰乘轩者源源且不乏而不一及鹤耶我则不德不能若二齐公何以使鹤今其地犹曰南翔而歛之公乘里士行贾不可指数能一慨然为莫少卿哉于是稍有应者若某某辈然不能十之一而诸歛中独有一善知识为任良佑氏其赀金五千尝泛大河而遇风以舟免归德于河金龙之神而捐千金之橐新其庙矣既而叹曰是神也尚不能不頼如来之力以脱大鸟喙而我敢忘所自挺身而出任其费若木石即甃堊若涂墍若脂泽之类计可中金二千曰去吾橐之半不至冻馁妻子也逾月而以其货贿器用来又逾月而以匠石工师及诸役作来日运指计身分功于其最下者盖不及岁而大雄氏之宇焕然一新余力以及门庑方丈而佛及菩萨阿罗汉天王诸像皆奕奕神采生动瞻者肃然僧自重等不胜感稽首来谒余请为序次其事或谓寺创自梁天监天监之主不有所谓武帝者哉其初浮罗经像不可胜计普通大同之名震耀于异域而我初祖达摩直斥之为入天小果有漏之因彼二齐公者独不之闻耶而今任氏复效之吾子固不自爱其笔札毋乃譎语以辱我初祖余窃不然夫童子聚沙之因至受铁轮王位而及其既登阼也以摩诃力役鬼神一夜而成八万四千塔徧于阎浮提而尚未证五地何者以难易之势殊也武帝挟半天下之訾而作此小有为事固易易耳且其难不在有为而在无为无为之地不过识本来面目武帝不之悟而沾沾焉挟以为功德宜初祖之一斥而欲醒之也若必以初祖而律二齐公则徧阎浮提何所著大雄迹且令我大雄无一盖头茅而何以标像教于后世作人天眼也今夫任氏者徽贾人子耳徽俗以訾为命而独弃髦之悉竭其精力从事于兹刹而不之恤即无论其为齐公化将无为莫少卿者化哉且夫乐界之有鹤非罪报所生又焉知二鹤之一不为任氏而任氏之异日不为鹤勒那尊者也耶夫任氏者苟不住色而行布施则固初祖之所许而我大雄之深叹以为贫穷之难者也或人屈而退余故笔之以授自重使勒石以诏来者

泖塔院常住田记

泖故由拳国至秦废而为长水县俄忽陆沈而为湖曰泖泖之言谷水也盖当秋霁时其水隐隐见睥睨坊市迹云而水之所不尽者仅周数百步唐时有比丘如海过而异之以此金刚不坏之座诸天龙之所拥护者为窳堵波凡七层高可百赤以镇之塔成而

登则近而九峰远而娜如崖■〈山上冢下〉马鞍之杪俯而阳城淀山诸湖之浸亡不入目眦其胜遂甲郡邑又八百年而比丘智明始益构大雄氏殿中塑佛菩萨罗汉圣僧像傍翼以净室庖■〈广外畝内〉之属智明既化去弟子自正乃悉捐其衣钵与游族姓所得者置大藏经五千四百余卷为杰阁以度之阁成而塔院之事始全其地虽宛宛在水中央然独为诸流之所汇于道里甚便以故叅方之隳亡论大德具寿或阅藏者或事羯磨者或倦而借以安居者咸望表而憩楫焉自正二食屏除四事供养所至若归毋烦分卫然而至者源源恒见其余供者汲汲恒若不足大善知识陆宗伯公树声悯之与其仲氏今中丞公树德谋割腴产五十余亩充院长住且言之邑司俾免其它徭役大约一岁之入少节缩之可以供入众自正感二公之为德而虑周也其檀而波罗蜜也属居士记之以垂永永居士窃臆我薄伽梵之息竹林也身率其弟子以游食国城聚落而名之曰乞士又制令精舍毋得蓄釜鬻事火之物而名之曰律然一易世而迦叶阿难陀结集大众成大藏五百六通迭察迭书无余晷足以行乞势不得不资阿闍世王之送供而其后三明五行之贤或却怨敌或摧外道人王至割邑户以资之多有至千户者少亦不下百户盖户割而田亦偕焉遂为寺长住而我震旦如南岳青原沕仰诸山亦因而不改譬则井降而陌绳降而契世之所趣便虽我薄伽梵亦不得不保也今天下伽蓝兰若亡虑数十万计独所谓长住田徃徃属之豪有力家夫古今不相遠古之所施今之所夺而闽浙之间其犹有存者郡邑苛责之殆甚于齐民而其僧亦不自爱一从践更归施施而趣摩登广额之家以苟快目前而已嗟夫大教之凌夷夫岂可尽归之一阐提要亦有交任其责者今以宗伯公伯季之所捐尚不敢望吾家东亭右丞何论给孤独长者然于末世则甚希有故不辞而记之窃有进于二公曰不住相曰那烂陀又有进于诸受供者曰天台观心法又有进于自正曰时念如来白毫相中一分居士亦借以小懺无明焉

前将军汉寿亭侯關公庙记

故前将军汉寿亭侯關公之祠庙徧天下几与学宫浮屠埒而其在吾州太仓者亡虑十数而城西之巽隅最着其祀不知所繇始自癸丑甲寅间岛寇内讧擗髡我郭郭而睥睨之间若有摄其魄而祛之者诸将吏士人归德于公之神稍稍饰庙貌而病眚羸且前逼狭径不称万厯之庚辰饬兵观察使临汾徐公来谒而心动谋所以更新之而会御史中丞絳州孙公按部至与徐公咨考政弊吏民疾苦而徐公以间请新公祠孙公慨然许之已而曰时得无屈乎是未可以烦我父老子弟搜幕府訾得羨廩之中金百以倡察使者番禺曾公公喜亦出其羨廩金杀其三之二徐公所捐帑金视孙公而倍以工属袁守伯睿俾司其总而幕僚刘琚寔专之卫幕僚葛某佐之亡何徐公迁为秦右辖而观察副使饶州李公来代有以不继告者李公遂大捐其奉与廩以中金四百五十益之已郡守朱君益之得十之一而羸袁守益之得十之八而杀万户曹邦献其地亩五诸僚佐文

武吏士以暨州之冠衿耆硕効材力者糜至盖踰歲而庙成前有门门有绰楔入复为门门之内为广除宏愷朗洞左右两庑翼然绘公之存歿履歷甚详中堂巍然穹窿靚深公之神与裨将之像在焉最后为寝制稍杀于堂两庑称之凡费中金千二百有奇工若干前是徐公以迁去而州之荐绅先生出为祖徐公觞而属余曰夕者梦公戟手谢谓托子以宁宇畴欤为我纪之则称先生名以报意欣然别有是哉公之神也非先生之言丽之石而谁属余谢不敏庙既成袁守则率司祀者道正费有光以李公命来请既李公复申徐公遗指以请余不获重谢乃拜手扬言曰公自黔首起应募扫黄巾若败叶馘良梟德若承蝟縛禁若系鼠覆七军若淹蚁其跳荡摧拉之雄武夫人而能状之闕万死迹故主于一锥莫立之地抗汉贼扶汉烬于一线未尽之息其孤忠亮节夫人而能言之公之歿威灵着于遠迩恤大灾捍大患与祀典膾合夫人而能颂之仰之独公之神所以久且大者弗尽知也今夫吴相胥城阳景王至侠烈也吴兴愤王至伉猛也伏腊割酺之所趣覲巫之所扬羽世史之所载记何班班赫赫也然不数百年而渐以销沦无遗响者激生于一念之发而气用于一时之不尽也非精诚为之也传不云乎至诚无息不息则久久则征征则悠遠悠远则博厚而高明以麦城之役公穆然而就冥若无闻者垂五百年而始为开皇一显于玉泉之刹而尚泯泯也又垂五百年而为崇宁再显于蚩尤之战而后着自是而又垂五百年公若以一身化亿兆身而应天下天下以亿兆心为一心而趣公其恤捍之灵与供奉之虔略相当盖上帝而后王君公下而红女婴孺近而都掖遠而魑魅结侏■（亻 离）之乡亡能不心仪公者公之所以久而大则诚也亡论其雄武即所谓孤忠亮节皆诚为之也诚可以贯金石后三光终始万物而又何疑焉孙公徐公则皆公乡人其知公宁在余下姑以余所臆识其大都云世称公有曰义勇武安王者元所封也有曰西台朗陵馘魔上将者道家符篆所传也今定之曰汉前将军汉寿亭侯庙曰将军侯者何昭烈所命也我高皇帝所著令甲也系之汉何公志也李公闻而曰善趣登石

性命仙篆七十二字记

元驭以我师昙阳子所授仙篆名三十六见示曰鹄头曰大书曰小书曰地方曰蚪斗曰龙书曰麟书曰飞白曰刻符曰玉筋曰倒薤曰穗书曰坟书曰柳叶曰竹叶曰松书曰钟鼎曰碧落曰垂露曰鸟迹曰金错曰殳书曰龙爪曰垂云曰芝英曰鸟书曰玄玄曰龟书曰鸾书曰采阳曰璎珞曰剪刀曰悬针曰雕虫曰转宿曰含珠世贞不自量妄以为生人大原毋过性命度世之学亦毋过性命儼借此二字窃窥我师笔端化工之妙师果不鄙而许之烂然满纸捧持循览不觉絶倒第以为怵心眩目之观而已徐察之而其离合等配错综彛伍有不可形容其妙者真若乾坤清寧日月悬象星宿胪列而鼓以雷霆润以风雨也师又为世贞作金字心经神采更自焯然而中有天園采阳二书尤出诸体之上密以叩元驭谓师尽得集道宫崔姑仙篆凡七十二家颇秘之不尽泄也世贞因徧

考卫恒王融韦续王庾庾元龠韦仲谢善勋所著诸篆名稍合者志之鹤头一曰鹤头皆汉诏版所用称尚书尺一者是也大小篆即大小书斯以前石鼓比干盘延陵墓之类也蝌斗即蝌斗之形而饰之或云颛顼高阳氏所制是也龙书太昊庖牺氏因景龙之瑞而作者也麟书鲁西狩获麟仲尼反袂拭面而泣弟子申以为素王之瑞也飞白蔡邕书石经鸿都门见小吏以帚垂壁感而作也刻符斯高用之以题印玺鸟头而云脚者也玉筋斯所作正体也倒薤亦名薤叶仙人务光所作也八穗神农氏因上党嘉禾八穗而作也又曰嘉禾坟书用以书三坟者也柳叶诸志所不载今用以刻边帅阁臣印其文尚存钟鼎自禹而后凋戈钩带夏敦齐鏹之所存者也碧落乃绛州龙兴宫碧落天尊像书也其字独奇古为陈惟玉书一曰黄公譔书一曰二道士闭户三日书成而化为白鸽飞去也垂露汉章帝时曹喜所著也鸟迹黄帝时苍颉感鸟迹而着曰金错古用以铭钱周之象府汉之刀布文是也殳书伯氏所执文记笏武记殳其文也龙爪右军偶然而作类龙爪也右军疑行此则篆也垂云或即云书黄帝因卿云而作也芝英六国创体以为符信者也鸟书周文感赤雀衔书以纪瑞也或曰武王赤鸟入室作也龟书他不载所始载惜志鸾书少昊金天氏纪官而作以章衣服也悬针亦曹喜所造以题五经篇目者也雕虫一曰虫书鲁秋胡妇浣蚕而作者也转宿宋司马以荧惑退舍而作也其不可考者天圆地方采阳玄玄含珠竹叶松书而已岂天造草昧人文乍开上帝故遣颛禹诸真以书法救结绳之困耶抑颛禹辈皆仙真书成而以报上帝耶将赤明龙汉之后司仙史者俯而采人间之笔耶人非天不因天非人不成盖自古记之矣独念世贞以一么废丁未造不搜断碑蠹简坐而得覩欧赵所未覩之迹其幸一也以杨司命之秀挺警欬高玄而不能得天篆之一笔紫微王夫人所谓灵笔真手不敢下交于肉人世贞肉人也何自而得之其幸二也真诰七卷多杨许手迹二君名位虽重而其时道尚未成所垂世者不过真行二种而已世贞乃获收我师道成之笔其幸三也紫微夫人又谓五色初萌文章画地之时则有三元羣方飞天之书又有八龙篆明光之章其后逮之皇世而演八会之文为龙凤之章拘省云篆之迹以为顺形梵书分破二道壤真从易配别本支乃为六十四种之书也夫曰演曰拘省则八会从简而云篆从繁或有出于我师七十二家之上者世贞异日倘获沾刀圭之贶请次第授简焉敬记此以俟

昙阳先师授道印上人手迹记

余以庚辰二月造元馭宗伯报谢我仙师昙阳子已饭宗伯园邂逅今道印上人阅华严藏上人秀隸丰下舒重如象王不轻言笑余乃稍以藏中语挑之辄响应而又辄破的当是时余窃自快以得上人而恨其晚上人亦欣然徙馆弇山园元馭为传致饗余三人相欢无间也始余异上人貌以为河北伧父与语而后知其为吴中人然不谓余里人也久之上人乃自言钱姓钱故海濱名族尝有室且家矣已而悉弃之而披剃师故伴松

师时时习禅观伴松余友也已游金陵听讲华严经钞于僧守愚已又游径山听讲话华楞严诸经于僧东涵已又西北游止五台少林二丛林者各若干夏请益于古灯二虎大方大千诸耆宿盖宗教之学明而后归余虽以好上人窃又疑上人事佛者也不当得仙师度亦不当受度仙师而元驭手一编而授上人则为维摩经之下卷有仙师故及丹铅之迹在焉复以传灯录一公案谓上人子姑若支公之绎庄氏以意作数十百语请得质之仙师余不揆亦作数十语附上人后仙师略余之阁而迫于启上人也出一札大约谓如来三十二相皆从无相得无相庄严皆自无心作心静神凝然后可以当空迸火红如血次闻师子吼三声纔得如来珠照破万象森然无法不过余始惕如也既而复茫如也不能与上人相征复上人故名隆魁别号印实而先师为易名曰无心有易号曰道印名之篆玉筋则金填之号之篆蝌斗则绿填之仙师既羽化而所报札业已留余所上人乃乞元驭补书而后先所赐凡三札联为卷以示余而俾记之札语伙不可悉其大要曰断思想以养神遣妄念以保性曰死心全道绝学无为善恶平等不二法门曰近火先焦者是先天真火子阳盛阴衰泥里有刺者是物从有情中生曰无则太虚天堂有则火宅地狱曰泥水生莲向上莲蕊一一倒下莫不返本还乡嗟乎是道体也是道机也是道用也余得三复焉而后知吾仙师之所以度上人与上人之所以得度不偶也教外别传斯之谓已即上人钵锡徧天下所叅礼龙象非一一匹之蝼蚁啜铁牛得一血饱耶夫卫元崇愤其教之不振顾甘心而徇道人因以倒戈北攻像教涂炭无论已若紫贤道光者自谓已入曹济三昧一旦舍而从杏林以寻紫阳之脉何渠至改服受廛依贵势采有情即长生之业就而无生不亦远哉今我仙师以晁鸾仁者转而荟二氏之精神以鼓铸天下而上人超末法乘风缘若萍泛江湖而忽值之金篦指而甘露沐盖不必髮若髡黄若缁不必榘椎摈而出世度世之妙于一蒲团得之不亦至幸至幸哉虽然余不佞尝以竇仙师墨而见呵谓不尊心师而尊世师不究字理而究字迹之言也敢与上人交勗焉重谓曰上人而知印实之所以去实而道印乎而复知隆魁之所以无心有乎则思过半矣

游白云观记

记佛光之明日大人有同伦之约于它刹者余以间信屨消摇于门顾童子六七连袂而过曰曷不一往礼锺丫髻乎余顾小隶而问锺丫髻何人也曰是道人也而年百有十四矣问何寓曰白云观观去寺若干里曰里可五而遥于是小隶前向道余与二友人步随之折而西已更折而北蛇行墟垄间下上故隍堞址乌帽出没麦浪浮映少顷抵观观之中闔闭则从左窬而入为后殿有全真东华纯阳诸像坐像稍剥蚀而傍室为锺寝其人短而鬣髮强半白问其年曰不记也固叩之则曰吾生十三岁而有土木难依稀从长老说之也则百十四者信矣问何以寿则曰天可怜活尔许年吾无术也惟不娶不多饮不怒不识数耳余心服其语简切匪妄第迹之所受蔬果薪米之类甚具皆大官供也

盖中贵人言之上而征之耳已出启前殿廓落中惟供长春丘真人像像白皙然肤理皴皱无须寡眉若阉宦然考故志丘公最为重阳王真人小弟子道成而青吉思帝聘至西城行在优之与讲钧礼呼丘神仙而不名仍诏天下之为全真教者皆隶焉即故太极宫宫之而加饰曰长春宫即兹观也仍尽捐胜国上林太液之遗予丘丘老矣晨起治道家事毕呼果下骝从其徒数十尚羊山水间日映乃返盖又三年而后卒卒之明年始以尸入龕葬于今像之下其徒云貌若生芬芳可数里不审其信否当是时全真之教徧天下割张氏所谓正一之半而观之瑰丽深靓危媿宫掖盖与元相终始明兴而其道始小屈以刘渊然之见崇焦奉真之为幻不能尽复其盛今县官虽名慕称之然雅旨乃在内外二家锤恂恂一老耳语云臭狸何足污吾绞者非耶或曰锤仅九十余其言百十四者诸贵人饰益之也

弇州续稿卷六十一

●钦定四库全书

弇州续稿卷六十二

（明）王世贞 撰

○文部

△记

吴郡北寺重修九级浮屠记

原夫宰堵波之昉肇也如来示寂双树之间阁维不烬皆成舍利上而帝释梵天下至拘尸摩竭咸构层刹以示瞻依爰及弟子鹞子庆喜之伦虽等级小殊而供养庐次汉明之季则摩腾标帜于洛阳孙氏之初则康会着祥于江左古语所述经来白马教盛赤乌殆非虚也当是时孙之乳母陈有宅于吴郡城之良隅拟舍为寺而仲谋信心方炽大捐国帑以成厥功郁作雄刹后有僧正慧者别创宰堵波十一层于殿之右方迨千余载而不戒于火宋元丰中善信比丘及诸大檀越合谋新之且曰后分经载如来十三层辟支减二而因縁经则谓如来八辟支七夫数穷于九九之可也盖绪成而感舍利之瑞学士蘓轼以所藏古铜龟奉之而为之志自是称壮观者数十年未几而遭金源之难复委之火绍兴末头陀大圆复一新之垂四百年而复不戒于火其上三层与中之干柱荡为

煨烬搢绅大夫故严太保恪顾太仆存仁今钱司寇邦彦郭光禄仁辈感形家言发希有念将鼎新之而訾用不继善信稀简有山僧性月者清净少欲精勤自励六时皈命一钵不私闻而慨然请任其役延礼坐主朗公为一大众开首楞严衬施虽微渐有至者甫谋树架而工师骄焉故昂其直以相要苦有游僧曰南山如金者自伏牛来遶塔顶礼而叹性月故识之謹曰事济矣请一切受署如金初无所难易架构之工十未二三即挺身木杪指挥羣役小间即为广说因果辨辞泉涌或戟双肘或翹一足猿跂鸟挂踔厉若飞尝一倾滑而坠众谓立糜碎矣去地丈许蹙腾而上寻理旧谈面不改色乃共咋指以为神人檀施云集如金复手自料理分功役作徃徃兼数人九九阅歳而始成为工三万余为木石甃墜之费直金万余高三十七丈延袤二十八丈八尺虽九级之尊毋改旧观而壮丽参巨俨然若揽化人之袂而造天中矣如金又能贾其余力化造能仁丈六金像及圆通妙相慈氏应身种种悉备自是不能以其名隐而漕使者符摄俾主寶应湖堤縁如金意难之业已不可止遂示微疾而逝其徒之住持兹刹者追感无已俾居士记其略于坚珉居士少尝读史至齐梁魏隋间见天下波靡于西竺之教尽发齐民之蓋藏而糜烂之金碧宇舍文绣土木疑其荡而亡所节得达磨有漏小果之一语以为快然至梁武之未契折芦渡江面壁嵩少魏之女主亦尝再使问存当时永宁之刹上彻霄汉下穷黄泉吞若同泰者八九而未闻有所风止者何也盖以实引冠达而以权听胡媚也此所以待中智下根之异也破相尽于大鉴即心标自寂公夙慧之士一时为之颖脱而百丈继之别树法堂不立佛殿丹霞烧木像以御寒玉泉书祖名于犢鼻乃至有尽撒诸佛投之水火而即师子坐设皋此者曰佛菩萨假名也西方假地也天堂地狱假设也今夫律者人之所不乐受也财者人之所不乐捐也非有甚畏于彼者未有能去而就此者也今天下之号为丛林者众矣然往往创自六季及唐至宋若元而复者有之矣创者何寡也其在于今则毋论创而复也因而饰之者非宫掖之重则大珰齷贾耳于齐民何寡也非古财力之独易而今之独艰也其权屈于实实之不足而权亦因以泯故也嗟乎冠达而前尊佛之迹而迷其心百丈而后得佛之心而绌其迹迹绌而心存此其重奚啻倍蓰然而能使佛之教日凌夷而不振者亦一滥觞也夫以吾郡之一宰堵波于佛事至猥小耳以如金之为幻而使人趣之苟有所就其功德亦至渺浅耳然使阐提之众因而有所提策振怠而为警破悵而为施闾左之金钱粟帛不去而之狭斜改陵博游冶斗讼之业而皈善地者非亦末法之一助也耶诸公又为言郡以雄闻天下其势盘纒若龙而兹宰堵波实为之尾前者灾民为之谣曰龙无尾雨不起今兹大有利哉则非居士所与知也

小祇林藏经阁记

藏经阁在小祇林门之第三重其前俯梵生桥曰清凉界有高榆美箭之属左右引植嘉树硕果后揭中龛傍瞰西岭下带天镜潭上组名卉和熏凉蟾媚景百态最为吾园

胜处详第二记中不复赘始余得佛氏经一藏于华明伯所阙百之二乞善书者补之为兹阁以奉扁之曰藏经可十载而得道经一藏于沈氏子所亦阙百之一其补书亦如之附奉阁之右室（阙）藏经一而已佛是也而何以称道藏焉今夫道经之为圣言者独道德黄庭阴符诸篇而已余皆伪也或曰佛经之小乘诸品西僧为之也亦伪也或曰释教之与道角其断断而贞胜者非一日矣汉之永平元魏之真君高齐之天保宇文周之天和唐之会昌宋之宣和元之至元凡七角而释三胜道亦三胜一两败盖至于今未有合也而子乃今合之何也解之者曰释日也道月也不可偏废也虽然俱未曙余之所以合也曰虚曰空曰无曰寂其体同也曰知足少欲其初乘同也曰以定生慧以恬养智其功同也曰慈为大士德为三寶首而悲而哀其念同也如来说法四十九年曰无法可说而犹龙公则曰多言数穷不如守中其法门同也维摩之左掌擎阿闍界而南华之鹏抔九万里而风斯在下其倣傚之寓同也故道林开士精言罄于逍遥通明玄宗深尚托之胜力彼岂不知其水火然而不以夺其所真见者其见同也小不尽同者深浅大小之际而已彼其树党立帜而相搏击所搏击最肤迹也其所标着最肤言也皆其师之所不荐者也然则二藏之不相悖有之其亦可无删乎曰吾于佛经而拟所存者十不能一也于道经而拟所存者百不能一也删则吾恶乎敢志之而已矣

重修虞山白雀寺

记去常熟之二十里有寺曰白雀其地东枕虞山西沼大海襟江带湖盖羯磨之胜境也寺所以名白雀者长老云梁天监二年有游僧志圆善堪輿家言得其地而悦之倡诸善智识以有兹刹刹甫构而白雀二巢焉自是数圯数振以迄于亡元之季委之兵燹之手歷我明八熙朝而弗克复其存者草莽之址与僧雏之丙舍而已久之为正德丁卯比丘明慧以四众力悉新而拓之又久之为隆庆丁卯再圯优婆塞明净再新之寻复圯而比丘智海乃叹曰向者六十年而圯今者不二十年而圯岂末教之转促耶将无所以致力于土木者未固也谓其徒慧秀曰吾饶縁为汝职募若饶思力为吾职締自海公之募而檀施云集秀公获匠意焉斲取其厚材取其良涂墍取其精坚于是三身之座四天之阍与十六应真之位屹然若金刚不坏矣壮丽亦称是寺成秀公来乞余记余之乡先生王宠履吉尝养痾兹寺余得其诗二卷词翰皆惊絶因窃迹其瑰竒崇垲宛委叫禱之胜思一游目而未能向者似闻客言胜且泯泯矣询之秀公寺今如故胜亦当如故秀公曰然嗟乎当天监之世冠达氏以人王之尊酷入人天之小果而吾吴郡又其左冯右扶缙黄之所皈向货贿之所蕴隆盖有非佛理不谈非佛事不之者宜浮图之盛至此也然而同泰之讲座未彻而火轮即逐之其它台城之内今所按图而得列于伽蓝记者十复有几而濒海一兰若遇圯转振魔所不能妬而社所不同改岂护法诸天厚小而薄于大哉夫圯者数也振者人也或者曰人亦数也夫山河大地惟心识所造而可尽倭之数

也耶且而师之有感乎圮之缓促也以为致力之固与不固也此非独一刹言盖哲于说净业者矣二比丘勉乎哉以此功德而不住相则无漏以此深心而奉尘刹则大报恩不然而欲以余言而为寺重以寺之复而为若重非所知也

高公桥记

海阳之旧治曰古城故越国公所筑至唐始徙而西十里五流之所汇曰渐江襟邑而东古城之山寔馆穀其口则车马之所繇道也编苇木而渡卒然遇水潦则荡无迹士女淹日磧坐遥相唤而已徽太守济阳高公时用郎高第来治郡朞年政和而歲登乃以间案行属邑疾苦而得其状叹曰民病涉矣即太守有不腆之犖一安能如公孙大夫仆仆晨夕且所济之几何属其令曾侯干亨曰为我谋于邑荐绅三老文学卒吏咸报曰公为邑行李计意甚善虽然是必石而后梁度其费为金者万有奇曾令内忧曰藉之官官帑之寸镵尺币皆版大农矣且未可以一方之役而勤我民意者藉之豪乎有去古城而下流十里者豪一曰黄廷侃其人质直可义使也乃召而属之曰是费且万金生能为我损十之二以倡诸吏民乎廷侃慨然曰小人积歲月之贏以有此橐而衣食之亡几念有以散之贵得所耳一切请独任毋以烦我父兄令大喜以报高公则亦大喜廷侃乃徙家其所僱工采石伐木经始于壬午之季秋至某年月而告成厥修八百武广四轨崇九仞其坚若砺矢矫若崇虹穹窿若三成之岭度者足相踵目相■〈目夨〉而欢呼相属也后令丁侯某至盖时时为鼓舞焉既成以报高公复大喜援诏例予廷侃爵一级得公乘而会少司马汪伯玉氏来游其地而壮之名之曰古城石梁而纪廷侃义举甚详廷侃踟蹰不安曰奈何以一贾人子而擅贤士大夫名且是梁也守高公之指也邑曾侯之所许而丁侯之所时悔也余敢奸之走其从弟诸生廷直留京谒大宗伯袁抑之氏而叩之袁公曰若所不敢者善为大书勒于石曰高公桥已复走其友诸生吴子玉于吴谒余而请记余夙善吴子文而义廷侃不获辞按司马所记称石梁今言桥者何考考尔雅梁莫大于溴梁郭景纯注梁即桥也又曰梁石桥也石杠谓之倚亦曰桥也其独言高公者何示尊也亦志所自也昔汉有崔雍州者治渭水而获巨木数百章取而桥之百姓以为便遂目之曰崔公桥而他若召伯之埭郑国之渠白公苏公之堤皆因其人而不之改盖所著于去后之思毋忘其乐利也然李冰之桥于蜀蔡襄之桥于闽其巧夺造化而功蔽全镇仅被之以七星万安之名而二公若不与者非百姓之忘而二公之让也虽然其血食于彼地者今犹未已高公以一念之仁能发长者谊不爱万金之橐以成千百世之业然至廷侃之为谊功成而不有其名以归之高公则又难也毋亦高公之德政居平有沦浹于肤髓者能使人跃然而子来也耶吾甚嘉之故记以示后之为人上者必好仁如高公为人下者必好义而终事如廷侃而后高公济阳人曾令吉水人丁令武昌人先后成进士有声

重建瓦官寺祝厘圣寿记

瓦官寺者初自晋兴宁中地在金陵秦淮之阳右所称铜官盐官之类是也寺故有三宝一为师子国所贡玉如来像一为顾长康所绘维摩诘天女一为戴颙所损臂胛塑像至宋孝武时复以三十二金像益之遂褻然为四百八十之冠而是时有杰阁踞其后壮丽无偶以久故欹其西南角至唐开元九年七月大风起龙江荡秦淮而上欹者复正寺僧神之龕其事于壁南唐升元中以纪年为阁名而至宋开寶八年十一月金陵下兵燹凌之阁遂为烬而神之者犹曰海舶自东来夕见空中有光拥一阁而去隐隐闻梵呗钟磬音若所称同泰浮图者距其初为歲五百八十余盖自是一毁而不复绍兴中一论师于阁址旁百武复建阁曰卢舍耶高可七丈逾于瓦官之旧久之复中兵燹盖并其所谓寺者始而称崇胜坛继而荡为兔葵燕麦之场而渐不可识徒令人增愧于法汰道林智顓之书刘丹阳王长史何次道阮思旷之绪论与李供奉之诗歌想象暮烟秋色于冶城大桁之间而已至明而入魏国上公之圃为鳳凰台西隙地正德中有神僧过而膜拜焉谓为佛土授记居民以去自是时时夜见光怪久之山西比丘觉恒者得法于净土寺法师成亮已受记伏牛印空师繇少林转歷南海至金陵魏之先公礼之为筑精兰以舍直其地父老稍稍为言光恠状且云故瓦官寺址也废井在焉迹而掘之有石刻天王像精甚识其阴曰升元于是魏公益慨然自称檀越颇发其藏镪以成殿堂门庑庖湍客寮筦库之属华靓窈窕深中宏外经像整丽咸得其所而它所未备者恒公尽以三衣中食之羨足之其后得金陵悟迎为弟子授之衣钵而脱身走伏牛立而化迎公代之以精勤为法事以慈悯摄众心大德具寿纷纶而萃羯磨讲诵各安其职今魏公复用三天竺故事割其余禄以供常住迎公既谋所以永永兹刹者祈之宰官汪先生伯玉俾为文纪之详且核矣居复念魏公世世为天子肺腑其履端履长万寿之祝歲不过三且与百辟共事亡以专听且而诸苾芻托国主之护持亡兵革灾沴它厉以碍熏修盖未尝食息而忘祝厘走其徒二人谒世贞申为之记世贞故尝读遠法师前后论辨沙门不敬王者又百丈初立道场不立佛像以为卓识及见宋元之季宗师上讲堂必先拈香而诵佛祝圣心窃以为疑其后复考我世尊所行化之国非一王其王严事之不啻大梵帝释而世尊之所以獎翊而庇佑之者亦不一二已也当此之时重在法王则人王赖法王以有其国世尊灭大迦叶阿难陀继之人王与法王交重则两相事迨其既也大法流而震旦重在人王则法王赖人王以衍其教是故遠法师之论有所绌而百丈之见不能以偏用若是乎颂佛祝圣之不可已也诸比丘可谓能得其意者已若魏公世臣与宗社共休其听且加额愿天子万寿无疆又何庸赘哉故不辞与伯玉齿而为之记

小昆山读书处记

昆山为吴属邑中有山岿然以是得号故老云此马鞍山也去华亭之西南十八里乃真为昆山今以昆山之为邑故辱之曰小昆山是故娄侯陆逊之孙机云所读书处也然其大实不能当马鞍之半而又以地偏而水迂不为使辔游桨之所便习今年丙戌春友生徐孟孺陈仲醇游焉其址蚀民居逶迤而上至半岭而有佳木美箭之属其胜始露更上数十武为石塔而郡之所夸九峰三泖者悉归焉二子乐之挟塔僧而下与偕东过一庄墅楚楚僧曰是乡老陈姓之室也业且售之无为主者问其直止可三十金二子适有某甲馈欲返其橐而不可曰士衡不云乎髣髴谷水阳婉■〈女恋〉昆山阴即此地也夫诵其诗不知其人可乎请售其地而祠之置丙舍以岁时赧读书其中太原王辰玉闻而欣然为助其不给乃稍稍更饬之其居前俯清流左右垒黄石为短垣其阳独阙树槿藩之曰槿垣中有堂三楹颇整靓斑竹千竿拥之苍翠袭几席曰湘玉堂侧室蕉数本辅之以长夏弄碧可念曰蕉室中奉二陆主又曰二陆香火处有石刻晏阳子古篆心经梓龕居士集度焉祠之后左偏石岩高可数十丈空阔瑰竒石楠十余树覆之石皆作紫绀色曰赭石壑竹后小池蜿蜒至屋角而尽苹藻空明儵鱼出没曰蝌斗湾出槿藩门则所谓清流者其浅可以菱菱熟则红如夕霞曰红菱渡渡之东板桥横焉左右多垂杨曰杨柳桥稍折而东堰水一区方广三亩驯鹤浴之没不能蹙曰洗鹤溪斑竹之余势上延山椒芟其繁者得地而亭曰花麓亭湘玉堂之阳与祠之左为广场且六亩二子念欲杂蒔诸花卉实之而橐装耻矣乃自草疏请诸戚执曰为我涂泽此石者花为我映带此水者花为我挽客趾者花为我娱二陆先生之灵者花即捐花而惠之百不为多一不为少称意而已俟花成当目之曰乞花场场之右方有井冽而甘亦前目之曰浇花井而属山人为记夫以二子之所偶游而得真昆山以昆山而得二陆之遗踪于千载之后起哀魄腐骨而声施之久絶之血胤一嘘而荧然复覩香火兹非文士厚幸哉虽然以二陆才不能保首阳之操而失身于讎国又不能沈几辨势而失身于伉王晋阳之甲士衡戎首卒不胜而以谗死士龙狡狡差称循吏然于大节竟胡当也二子勉乎哉即执文一技耳能使千载之后若新而况不但为执文者又当何如也于是呼笔纪之而致花十种于场

东海游记

歲丙戌之孟夏汪司马伯玉挟其二仲与客龙徐两司理栖我舫中舫中之胜穷思有以广之者将东游于海而海滢之新城其帅曰张君君适有信相讯间语之则欣然具人舟迎而二仲之一某病懒而骄不欲往遂以司马司理走吴门余意殊邑邑谓张使语而主吾自与高阳之客来不烦彼司马也期之十日暮而泊新城九日大风雨时客当往者龙溪令沈君太学生曹子诸子潘子林子及从子公艺少儿士骏侍焉相顾而疑如风雨何余语之曰夫与一虞人期不风雨改也而奈何使我食言于张帅也夜梦祀东海若

者拜之则为起已而避从右庑入追拜之则答而加恭晨起雨犹涔淫不止贾勇治二舟而发太学徐子适过我要与偕既发雨稍间已复时作风调调刁刁艤首与潮斗甚艰行可六十里而暝色见矣然以客之勇于酒也飞白卷波网鲜佐之杂以谐谑殊不恨缓张帅轻舟来迓以醉卧辞夜息蓬底不闻滴沥则已幸矣质明张帅复来访已偕沈君报访时云阴渐解驳俄而尽卷轻颺柔调若有而无张帅乃尽要客登福之余皇盖海舶之最大者而徐子为其友所妬给以它事唤舫艇驰而去之诸君饭毕易沙之蒙臃取其轻而便操也鼓舵从退潮出翔阳在天金波溶溶下上一色戈舩杂沓旌旗摇曳鼓吹四奏炮礮陵厉其东为崇明百里而近始望之仅一髮耳渐近则烟树渐可辨唯南北杳渺出目眦外不可究诘俄而有若飞藿十余颺浪来者顷之辨其为颺也戏谓张帅得非越裳舶乎以不扬波故来问圣人耶既则候汛之归艘耳张帅乃部分之为鱼丽以益我军容左右翼而从进潮入时日犹未崦嵫也而纈阿密乘之矣徙倚良久崦嵫之照尽而素光显张帅仍布席于余皇之背前后大小相望俛百艘艘树二檣檣悬一灯若巨宿然与成象者争耀街鼓初动清光莹然凝碧万顷黎园之长鬣者歌大江东去之迭羣兴暴发不可遏则使童子■〈才 霩〉渔阳掺于余皇首而摘红蕊使逦传蕊至手而鼓歇巨罗在口矣客避花则怯竞饮则勇循环无端与月终始既醉散去晨甫栉张帅复来挽欲续未竟之欢而风蓬蓬然掠耳矣余亦兴尽固辞张帅以为胜事不可无纪请得一言之为宠光余窃惟海之为壮在于泱漭浩漭黏霄无畔嘘虹磷日齐没汨出而其胜必自风涛贾之激天汉摇地轴长鲸毒蛟天吴紫鳳之恠倏忽闪尸变幻万状若玄虚思光之赋所称者然后可以极其势今之游也一苇不惊瓠尊晏如童子嘻笑长年鼾息此何异吾家一池沼亡论吾不文即文何以称之虽然能极其势者谁也即不幸而遠使贪商邁之将嘯噉祈死之不暇而暇与论文哉且余之观于海者五此其最小者耳然而东南一大缩穀口也今吾与君从北而数其去而若云之檣若霜雪之粳稻者胜国之所转漕以给都会者也从南而数其来而若云之檣若霜雪之戈鋌者先朝之所中倭而残我邊徼者也其利与害悬殊然不能为无事一也今吾与君幸藉天子之威德而君又以两伏波之略承之其危躬死士不以斗忧而以饱嬉而吾草莽之臣亦获一寓目焉至狎之以为池若沼恶可不相庆幸知所自哉张帅曰固也余日临海而得昨之游者歲不一二数将子之嘉梦是践而余敢奸之请受以登石沈君名昌期曹子名益学潘子名燾皆吾太仓人林子名庭云闽之晋江人徐子名益孙华亭人张帅名榜越之临海人廉而恤士有文武才其再莅戎也执政实贤之

先司马祭赠圣纶碑阴记

嘉靖歲在庚申臣世贞之先臣某以直忤权相严用边隅小警絳吏议臣不孝不获叩阊请代又不能从死地下覆盆饮血者久之为隆庆丁卯属在鼎革始敢白见冤状下

太宰议太宰移大司马大司寇复移左辅之台使监司三报牒而后得昭雪还御史大夫官明年吴中之抚按督学宪臣合辞以旌恤请而河（阙）之悍相有与吾地之故相阅者谓故相为市恩而宗伯信之遂报寝又入海贾谤其为朱中丞罔请者亦寝当是时臣方强起守浙藩懋懋乞休不许自是迁晋臬补楚臬以至入长太仆抚郢襄娄乞休又不许然以报寝未几而贵相汰甚自诡以综核名实次且未敢更请而臣忽避言里居每一念至五内寸裂第有弹指叹息而已诚不敢萌它望久之臣以少司寇征不幸被狗马疾不克赴而弟懋起副闽臬私心欲属以兹事而会其自臬而藩以贺万寿道得南容台佐乃勉具疏草千余言俾至都下上之卒卒不果未几吴中之按臣炼偕抚臣元敬合疏陈言便宜八事其一事则复剧称先臣之功巨而创深于格当旌恤而朱中丞亦与焉事复下宗伯为请于上俱报可而先臣二品未满考以甲冑劳独得两祭全葬恩至渥也臣母郁后先臣十年而捐馆舍久待窆窆臣乃敢以例请并祭而友人太子少传锡爵见臣疏草而悯之稍为润色以上事下宗伯既许臣母并祭复为移太宰具先臣横草之勋得赠大司马臣诚不知所从来惊忭逾望既拜祭及焚大司马告黄窃录谕辞二章告一章勒之贞珉以昭显圣恩垂永永呜呼先臣事世宗朝繇小官不十岁而拜中执法然自是南捍倭北守蓟委命锋刃之林以身御圉者又十年而中谗不免夫罪与赏并轻而功与罚偕重莹然之孤有胸无口者又九年而始一获伸复中谗不与沾旌恤盖又十八年而始有祭有葬有赠不特先臣墓木已拱而臣之发缟齿堕去鬼无几何矣其以谗中沮先臣者亡论丽辟与否然已烬尽澌灭不足置齿顾今上恩德隆天厚地靡可报塞而一时乡衮台臣明识高谊亦岂遂宜泯泯故略纪其事及姓名于碑阴以志先臣之冤苦劳勩其抑之易而伸之难若此臣不孝不能为先臣请一旦之命而赖公卿大夫公议之力又若此为臣之后人者用岁时扫祭先塋俯仰龟螭捧诵纶綍洗涤肝胆砥砺士行以少酬君亲执友之分谊于万一臣旦夕从先臣以身蓐蝼蚁庶几无憾哉

蛻龙亭记

当万厯之某年吴兴潘公时良以御史大夫督治河漕淮北之功就而昉有事于淮之南筑堤以捍河与湖水争胜河不外溢则民不竟鱼湖不内荡则漕舟有所道而毋陆溺其工至艰巨而利甚博公之始下令鸠僝畚鍤云集而高堰之下流为黄浦者最其冲也而最不受塞居恒舟楫过其地必出惊涛迅飙以败之至是则东郡之薪与淇园之榘随下随漂而不可挽公乃先筑高堰及为两壩以断其上游水不至则黄浦之根见而窟藪者皆不安一夕大风雨雷电摧拉若崩城池忽穴深丈余方广二十八丈中有首骨一具若马者舐之黏舌已而从居民所复得齿角胫骨若干余为商船所分取都水使者上事于公以为神公曰龙所蛻也我何与焉虽然堤之害去矣上于朝留其骨玉府盖不日而堤果就公至是凡三治水矣功成而加太子少保入留都大司马又入为大司寇以持

法抗新贵人为所中罢归田庶尹百司尝为公属者与宦游其地者咨嗟咏歌不啻河洛之思因即蛻骨之地亭焉而会河复决漕道不利天子思公功即家仍故秩御史大夫治之余寻用考绩抵淮而遇及都水使者某等目其事甚详且属余记之曰龙迹偶耳例之以陵谷事固不恒有而潘公之功不可朽得子之一言吾曹与子亦偕不朽予心诺之而未敢应也今年春乃始偕藩臬诸君子布币而伸前请不佞窃闻之鳞介之中龙最为长而至神灵其潜见飞跃大而横天小而藏芥变化叵测兹何以有蛻也夫惟蛻而后能神拾遗记有云方丈之东地方千里龙皮骨如山阜布散百余顷述异记亦云晋宁有龙葬洲大约亦如之盖龙之始多蛟蜃鼉鱼之类气久而变则移质质久而蛻则成神然后受上帝之命宰百灵润九有其蛻则释氏所云灵骨之类耳第吾闻之传志龙性淫而善怒多嗜当其怒之时则虽排山襄陵而有所必快当其淫与嗜之时则虽改服殊形而有所不顾岂其未蛻耶抑宿习然耶善乎潘公之言吾知水害之除而已不知其神也公今四奉天子命矣前后二十年南北数千里即昌黎氏所称南海之功固不能与公较细巨也考汉武帝时穿洛引水以至商颜其下得龙首骨人主媿之特锡名曰龙首渠而祠祀之今天子不名瑞潘公不名功而吾与诸贤略纪其事以备裨史当差更胜也诸贤姓字官秩里系具左

弇州续稿卷六十二

●钦定四库全书

弇州续稿卷六十三

（明）王世贞 撰

○文部

△记

靖江县新改谭公渡记

靖江治在江中央其北达通泰以至淮扬为运河南达江阴走晋陵姑苏道靖江之士吏农贾南渡江阴者十之七八其自江阴而北渡者十三四当靖江之渡所为渡七十二而其最巨者曰澜港前接江阴之港曰黄田其始亦最为近易嘉靖以来两岸摧圯其浸转阔且倍蓰而中忽横一沙间之东西延袤可三十里渡者必循暗沙自苏家港逆流

而上取江阴之黄山港转入黄田始泊中歷大小石湾鹅鼻觜鹅鼻之山益岸■〈山上
罅下〉而水益迢迅深者几四十余丈江阴之渔连巨舰而障其上流稍过之多为旋涡
所迫触石而葬鱼腹者岁无虚月近者远易者艰两邑之人皆苦之而靖江其尤剧者也
前是为守者秦越其属邑而为令者过于尊畏其守而狎其民亡肯以所苦告今太守谭
公来下车之后除弊举废百猷鼎新乃以其间按行诸属询问父老具得其状慨然叹曰
吾安忍日视吾赤子之陆溺而莫之挽也顾谓长年三老靖江之渡孰与澜港便曰苏家
港便已复谓江阴之津人渡孰与黄田港便曰黄山港便顾黄山之旧道多淤浅公具其
事请于台自港口疏之直抵江阴郭为丈一千五百费直金九百二十皆取之肺石之羨
而民力不与焉又严网鱼之禁毋使伏险而所谓大小石湾鹅鼻之峭厉泗伏皆怵然而
若失远者复而近艰者复而易轻舳峭帆乱流啸风不移晷而两彻于黄山苏家之口矣
盖自是卒岁而无一报溺者公又请改石头之巡司于黄田口设闸于港内以资蓄泄台
两报可于是邑民感公之德共谋即其地立祠以祀公亡何子来而趣二公闻之曰毋庸
也民曰未可以溷我公知姑建一亭以安憩者曰美哉洋洋禹功乎名之曰美哉复名其
门曰济川名其堂曰永泽亦以寓公惠也总而名之曰谭家渡而问记于世贞惟邑之令
廖有恒亦然以为异日尸而祝公者此地也世贞不佞闻之古单襄公过陈而得其桥道
陂津之不飭以占其将败公孙侨之相郑所务实长于此而孟氏以其济人溱洧之一端
而测其徒杠舆梁之不葺为惠而不知为政夫以深厉浅揭于民之损何几而君子切切
焉以效其规今公一转徙之间而岁脱数十百人于鱼腹而遗之安积其僦舟之直省可
亦不下百余缗自是而推之十世以至千万世其利益当何限也昔有名堰名堤名坡而
曰召伯曰白公曰父曰母者几与天壤相敞然以视谭公何啻径庭哉是宜邑人之思公
与公之见思于邑人也是役也相之者倅王君梁君冯君司理张君奉而行之者即廖令
执役者簿孙化来请记者光禄署丞朱正初某之于法得附书公名桂新建人王君名鹤
龄鄱陵人梁君名鹤鸣南海人冯君名字慈溪人张君名有德祥符人

游练川云间松陵诸园记

万厯丁亥孟冬二日余以报谢诸君之礼先垄者至嘉定而大宗伯徐公学谟为具
要余宴归有园园故当第后隔一街入门稍东为长廊九楹而折者七遂通阳春堂堂五
楹中可布十几而已庭有槐杏各一株差古其后为知胜轩轩之北迭石成小岛峰峦洞
壑之类具体而微右穿入曲房寻有大士斋三楹供像颇怪伟复穿而入为池广可二十
赤修五之平桥翼然实朱其栏度桥则有书室数楹枕之亦朱其栏折而东则楼三楹政
与轩北小岛对楼不甚高广而颇华整为文木度者以十计光色可鉴东西序列当藏法
书名刻之类扁鏹严甚不及发也楼之后竹千余竿傍当复有耳楼为卧所时雨声淙淙
然酒十余行谈笑颇适已而雨益甚暝色入眦不及徧游而出矣计它亦无奇者以考公

故所作园记不甚合盖记成于楚臬时而后十余年自宗伯归有所补饰则为室之事十六而为卉木之事仅十四矣其丽胜于温公之独乐园而广似不及然温公后入行其道于鼎革时竟不获老于洛而公之谢邦礼以归专兹园者四载矣然则独乐之虚更不若归有之实也（阙）孟冬之十四日云间守喻邦相将宴余于顾太学（阙）之西郭园余曾见家弟说之亦愿游焉是日午阴邦相要饭于郡斋与其父素庵翁会使四子侍酒而余德甫之子世辅亦与焉饭毕坐竹垞子出过孙汉阳克弘小语宛转将六七里至其地日下春矣邦相偕其寮陈丞李司理出肃为门者二而得石山则峰峦涧壑之类略具时犹在畚鍤间未可登有堂承之堂亦未受几邦相乃导而穿别室凡再转忽呀然中辟汇为大池周遭可百丈许华堂北向左循而为正南之西廊廊广可二丈许修八之十步一楼五步一阁皆枕水垂尽则大石桥跨之精巧宏丽殆不类人工折而南一楼供大士迤迤而东其修广皆如西廊后枕长堤堤外皆平垄无复致矣南廊之左筑土山其长与西廊对方辇洞庭花山武康之石奇木名卉实之虽气势轩豁雄壮要之一览而尽大槩慕古图画家所谓仙山楼阁者然不中为太液昆明作奴也与邦相饮许时风横烛灭乃移而入一精舍修竹当庭雨声琤琮谈诗飞白不辨客主夜分乃成别则舆人告痛矣蹶而颠余且笑曰吾贪与邦相饮不贪顾园游也闻太学兄园近而稍雅以暮不及游志之以俟异日余故尝阅朱邦宪集见所为上海顾尚宝露香园者而艳之又闻尚宝之兄道州守有水竹清居与露香并而加胜益思一游焉而不果望后一日过其里问主人年八十矣两僮掖而出涕交覆于面语不可了了似诉其邑司之见窘也问其园则曰芜矣病不能往者六年所然余意犹未已会有报访之便穿委巷历荒陌至城之西北隅而得之前为大道夹高榆两行榆外皆菜畦露香据其左清居当其右外二门而中通盖道州死无子皆属之尚宝然果芜不复治中堂犹无恙丙舍颓圮与鸟雀共卧石相踵藤萝转骄竹树多不依次而蒙翳有真理至邦宪所纪亭馆台榭虽尚存然徃徃不相应要亦文人张大之故习也已过所谓水竹清居者其池沼稍自然野趣差胜而颓圮过之徙倚小时不胜荣悴之感赋一诗而出（阙）潘氏豫园者方伯允端所补也成仅可五年其东为广场十余亩中杂积潦一门翼然傍据之榜曰豫园入门折而西南有坊楔孤耸榜曰

（阙）度坊为石桥过桥稍西曰玉华堂前列峰石曰五老峰一峰曰玉玲珑移自乌泥泾朱尚书园秀润透漏天巧宛然狭于昆山之龙头石而高过之皆隋唐时物也不知何以得免宣和纲其西十余武得一门呀然辟为崇堂五楹曰乐寿堂其高造云朱薨画栋金碧照耀左右两楹为方伯书室尤自胜丽岿然鲁灵光也前为广除临大池可十亩左有岑楼门牡甚严方伯与其嬖寔居之右折为楼楼不甚精好而中庭一小山皆迭武康石为之方伯指示意沾沾自喜出循池右方路不甚饬已入山蛇行而上正枕大池与乐寿堂对中亦有峯峦涧壑亭馆之属而不甚奇竹细而疎木庸而童石亦称是盖方伯志大而力不副廊庙多而泉石寡宜其尔也时月色致佳而方伯偕伯氏学宪俱不饮诸从与门下客能饮而非予所荐促巨觞十余行而别

游慧山东西二王园记

慧山第二泉名天下官河转入三里至山门而穷山之泉为汲者割其清余浸渺渺如建瓴而下东入秦王诸园而王氏为最胜主人故光禄署丞某业八十余构之可四十年矣入门物色皆莽苍可怜百武许复得旁窔穿之则广除豁然一堂不甚高而颇宏敞堂后枕方池败荷衰落旧尝蓄金鱼百数十头大者至尺许今皆称乌有先生矣池后一楼亦稍敞不作故时丽壮而启北窗倚西户则西山之故观无恙时客之从游者俞比部显卿曹山人昌先安布衣仁周布衣铿王太学绳祖周太学秉文曹太学益学余出榼酒橐肉而劳之时华太学露治具于西王氏园以待西北风厉不能竟山色乃呼饭而下由右廊得一扉则古木数十章修竹弥漫有亭有榭流水穿石芙蓉渺渺履履间听之不厌以其木之古而奇也啼鸦争其杪亦成妩媚复为华所强恋恋而别余过之至是三矣其室愈敞木愈奇而山色以四时异态愈壮故不问主人然主人计且老惫而金鱼者亦乌有矣将无无情者寿而有情者否耶室无情也不然则不恃人者寿而恃人者否耶当此名山中作葛藤语不免受杀风景之目可笑哉出王光禄之东园则微雨霏霏矣华子以舟渡余辈抵岸而门翼然稍入十余武则有立石一状颇磊砢色亦古已复得一门稍转而东危楼据之前为广庭颇亦有卉树峯石之类楼后枕大池池之阴堂五楹当之宏敞高爽左折而上为山有亭树峯岭洞壑之类宛转曲折游者必伛偻然犹虑触险侧足详顾犹不能无颠越独下有一泉出龙口灌池中砰訇礧■〈石左〉昼夜不絶声其声不以旱潦为大小鱼得之乐而倍肥其右方则从楼址拾级而上取堂道也中构高台政与东山对上有层屋亦壮丽台半露雕栏画楣三周卫之盖一小立而山与池之胜皆在目矣堂左启窔而入为庵修可数十武衡半之皆垒赤石为小涧凡十余曲折流水潺湲自北而泻深仅可尺余浅不过三寸其水或玄或白皆用石色声亦随而巨细可悲可乐使人忘返盖取泉之自慧者引而转灌大池者也又别构一精舍分泉引之穿舍而北出文石一承其穴水激上飞如瑟瑟尤可爱华子布席于堂行酒酒殊不能佳而好为不根语俞曹诸君嘿嘿而已赖泉声间之不甚厌也及暝乃别此园故属谈叅军志伊今大鸿胪王鉴先生之次子乡进士轻直得之然拓饬之费几三千金故其雄丽在东园上然雅趣殊不敌也独登楼而眺西园于山色得其三垂而东园仅当一面又所引慧山泉西园遇巧工而宛转三迭中注大池东园则无之耳嗟乎使吾侪中有真山一拳泉一勺所谓新妇得配叅军寧讷若是而已哉两园堂阁名不甚雅不志志其大都云

增校南京兵部题名续记

高皇帝既定鼎建业即大位因元之故置六尚部于中书省尚书秩三品侍郎四品

当是时兵部统平之职悉归之大都督府而所领仅兵籍雍容奉丞相教令而已其后欲损胡丞相权使尚书侍郎得别奏事取旨未几而为洪武十三年罢中书省不置季政于六尚书部进尚书秩正二品侍郎正三品移治于洪武门之东析大都督府五之而归其权兵部兵部遂以重闻天下文皇帝之七年上幸北京六部之职如故而置行部于北以分领庶务亡何改行部为六部仍归政于南而兵部独上亲御六师讨北及下南交徠西域权渐移而北亡何六部之政亦渐北矣洪宣之际北部俱称行在而在南者犹仍故称大抵有其名而无其实有其署而非其政未几在北者落行在而在南者加南京以别之于是名与实俱北矣独南京之兵部稍称重则以总统诸卫故而尚书奉玺书佐留守勲贵臣而制其柄故班五部上然其始亦不专属之兵部也成化而后始一矣六部于尚书侍郎俱有题名伐石而树之后堂而兵部自少保大司马乔公宇始有记万历初大司马凌公云翼重刻之第当时金匱之藏不甚出而琬琰之编犹未广故于高皇帝时所纪不能十之一而后则有以他官而误入者岁戊子世贞承乏为右司马而大司马内江阴公以其事见属相与订定详核重刻石而仍属世贞记之以附于乔公之后世贞窃谓隋唐而下两都并建则有之然未有百司并置均重如我明者也兵部以居守之故则尤重重而贤者得尽效其才用则益重今毋论考镜其行事功伐即一拂拭而循览焉若王端毅之弼违锄奸乔庄简之镇重伐谋王肃敏之裁横摄下李襄敏之戢叛弭变烺烺人目毋论其它则马端肃倪文毅韩忠定林文安熊恭肃诸公虽以未久輒移或寻遂初服然而其风猷节槩亦有不可泯者覩之有不悚然而动容且慨然思齐者哉今益者尚书二十一人左侍郎二十八人右侍郎二十矣削者尚书六人当其削以不与部政则虽以黄忠宣公福王忠毅侯驥之勲猷而削非敢削也于法不得収故也是举也世贞所获抒其愚则以大司马公之指云尔

崇明县迁新城记

崇明故沙邑也介在大海中始隶扬既而隶吾苏既又隶苏之太仓州所领仅四五沙大者邑之小则为村无有岛石以为堤防长波大涛嚙及邑址则谋徙之盖自有崇明以来凡四徙矣而城皆土故于徙差易嘉靖之甲寅徙平洋沙警于倭始议用甃凡费公帑金五万余去海四十里而遥今仅三纪耳而嚙复及址前令何侯相地得长沙差广平而土脉方西长潮益徙而远可以宅中议中三台监司第所规拟于延袤颇阔计工费当从巨则难为上当城城之田皆腴阜舍而赋县官则难为下以是中格而何君用迂去今令李侯至之未几召三老而谋之曰址半嚙矣不徙即一夕而拉然与汝曹皆鱼鳖矣亟往仍故所相地而约之费亦小缩以请于备兵使者蹇公蹇公上于台中丞王公侍御宋公具疏下尚书户部许留台赎缓万金其余值七千六百三十余金以属李侯使自为策李侯乃议以民故应偿灶产军需及岁捕黄鱼之赋以足之而缓诸月城之当城者其它

土因之隍甃石因之故堞官司学校材瓦因之故署兵民室宇因之故居公以公徙私以私致画地而筑分功而廩勤者劳之惰者扶之以万历之十四年八月筑土城至十二月而毕再以万历之十五年七月甃土城之表即以其月立官司学校至十六年二月而毕兵民之室宇靡所不奠居而诸侵故土人之田别以腴阜者补之欣然服矣大约城延袤杀于故五之二费杀五之三费杀则乐兴城杀则易守盖新邑之疆去吾州之游擊营仅隔一水烽火相望即缓急有警援师以晨发而午可至矣李侯以兹役之不易也既告成事而属不佞记之不佞窃覩中原之壤为鬪国之所必争虽高坚之堞有所不能捍而江南最名饶乐不恒被兵其网利趣便之所又不利于障隔承平之季鲜有计及城者一旦岛寇起而不城之邑靡所不残躪于是版筑之役鼎兴而民骤困崇明之先一土城耳岿然于余皇四战之地歷三百余年而不中寇彼岂以其瘠而置之夫亦以其四战之民乘险而易为守也日者改土而甃则益坚今者避水而遠则益固就援迩则益强兹邑之繇庠而之岩也繇下而称望也固宜李侯成其详而王公宋公蹇公握其要矣王公名元敬浙之山阴人宋公名仕齐之平原人蹇公名达蜀之重庆人何侯名懋官浙之永嘉人李侯名大经江右之南昌人代王公者为余公立代宋公者邓公炼荆公州土代蹇公者王公基李公涑时鼓舞焉于法得列书

溧阳令王侯去思记

余从南司马官中获接前缙骑大帅溧阳史元秉氏云元秉一日从溧阳吏士若而人来请曰邑前令王侯去吾邑六年矣令去时民有谣以纪之荐绅先生有诗歌赋颂之类以饬之而又合而成书俾若赵太宰邬中丞者序之庶可以慰吾思矣而至于今犹未已也意必得夫文章之士不妄许可者记其事如太史公班范之循吏传勒石而亭之于五父之衢俾夫出者入者游而憩者一举目而若覩王侯而后吾侪之思始慰也余读其书诸出荐绅先生笔者固未论独所谓十谣其辞甚俚而其事甚核而详夫详则可以考核则可以信而俚则出于田更市儿之口而无可疑则余记之所由昉哉乃为采而裁润之溧阳当高帝时最为畿辅近地于恩泽最深而时有一二犯法者没入田田之亩至赋米五斗而以次差减其为则凡四十有八而其蟹螺者若瓿脱者赋米仅一升甚或草一束然渐以不能无淆混而至嘉靖末嗇夫之长以其繁而厌之删为官民二则于是吏益得窃其权而贿賂飞诡那移之弊滋矣侯故已悉其状属有诏丈量于是悉取旧则为规而躬率愿吏精胥行田亩察知其实着为絜令于是宿弊出而奸诡无所容蟹螺瓿脱之产渐识主而有余粒贫者稍一甘衣食矣侯又曰赋颇衷矣而敛不以法又不以时夫太急则困太缓则偷重则损农轻则损官非策也立平限为四以季受输取盈而不取耗胥足若继吏手若洗侯乃曰可以施约束矣酌王文成公乡约之法而行之令三老诲民孝弟力田禁游手粘履者毋得六博倡饮市魁毋得低昂物值以愚乡人毋得借师而文其

讼以祈必胜诸有犯罪无赦于是其良者欣然而戴高帝八条黠豪则惴惴奉三尺侯始曰可以施吾教矣朔望学宫延见诸博士弟子讲说经术课文秋给膏油之费以资之衿裾雍容过齐鲁矣盖走侯之四郭而其人忻忻如也之侯之雉门而其人肃如也入侯之讼庭而寂如也即侯之室而湛如也又以间游侯之泽宫而彬彬如也美哉王侯固循吏选哉日者天子加意元元欲以汉法陟斥二千石以下至黄绶今又且大计矣余窃以谓陟之之不若风之也斥之之不若愧之也以王侯之为循而树之七尺碑以旌其政可以风矣其不与者知有愧矣余不敢与衡地权不无一二小助焉盖去元秉之二月余而今令潘君来余以质之潘君曰然潘君亦循吏也其语当不诬王侯名应麟闽之龙溪人其去邑也仅以资得贰南雄郡嗟夫以侯之为循而仅贰远郡也是公论不在上而在下也溧阳之人厚矣虽然使侯以高第入任京朝显官余安敢记之哉

重创青莲阁记

青莲阁者故瓦官寺阁也六朝事迹以为晋时有二青莲得之瓦棺中以兹因縁而建兹寺庆元志亦云金陵新志曰非也晋哀帝时诏移陶官于淮水北遂以南岸陶地施僧庆力成之其宏丽甲诸刹青莲居士李白尝登瓦官寺阁极眺有诗纪之其句云杳出霄汉上仰攀日月行高可知已至江南李主时寺俱付兵燹独阁存盖已改而为吴兴复改而为升元升元者李主僭元也或云自趾至顶可二百四十尺延袤称之盖至明嘉隆之季而荡然无复遗矣开士觉恒应真阐化后比丘乘縁询趾遂构兰若冒以故名而于转轮藏后得小隙地益借檀募别为层宇虽高广不能什一而涂泽庄严于像教毋替余所谓不见如来减劫时丈六金身亦不恶匪用解嘲盖实际也僧雏骈来谒余请阁名曰其瓦官乎曰寺额故命之矣将无吴兴乎曰无取义也抑取诸升元乎曰偏国之僭元也余乃更之以青莲曰青莲者居士白所署也非白而何以知瓦官之有阁也抑寺之所昉起乎虽不必征寓教可也莲以表洁青以表祥薄伽梵之所趺而安者乎拈而微笑者乎书以付僧使龕之壁

灵洞山房记

余性喜林栖而受数左海人而郭居无可游目者仅能垒石疏池以依稀山水之似颇为游客之所麇集不胜烦而中悔之且以其自人力目境陋而杖屦易穷益厌其无当而今年强起官白下得走摄山牛首挹栖霞献花之胜然不一宿而去之至卢龙清凉天界高座释老之宫与魏邨东西南北之圃其高可以眺其奇丽可以憩者意稍足一畅第不移晷而與人告御矣何者以俱非吾有也间从天官赵侍郎汝迈谈其所卜灵洞山房之幽絶娓娓久之为神飞而色扬已出其一编示余曰此吾所自纪纪之不足而咏歌之

诸贤之过我也而续纪之且和之者也吾虽匏系兹地未尝一梦寐而不在山房子其为我记以写吾思吾得朝夕焉且为刻之石以酬山灵余谢不敏不许盖公之言曰灵洞山者去兰溪东西十五里而遥其来自金华之颠若率然蜿蜒而下三十里而近山一而六洞环之以故宋文宪公濂云洞六也而著名者三所谓白云紫霞涌雪者也白云者最险而高时时有云气还往也紫霞者色紫而丽几如天台赤城霞也涌雪者玉乳散漫若雪之飞舞也吾故获游焉则兹山孤耸俯诸岭悬绝数千尺张左右翼而下中为石田广袤数十亩前列三峯若三大宾山之趺有泉曰天池自地涌出莹可鉴发其甘若饴盛夏冰齿泉之右山半有石高可数百尺若孤云飞来欲堕不堕曰飞云更右一山多异石藤木樛葛望之苍然宋初有异僧栖焉筑兰若曰栖真故多修竹乔松胜冠一邑为高贤之所托足及吾往而寺废久矣山亦已童且为野人所据怅然久之及吾有岭左之役过里其主知吾之有山水好也纳券而请直矣吾欣然为昂其直割大官之积镪以偿而后自岭左以不任谪归始谋保此山且以它地易兰若址去天池二十武构楼三楹携所载图籍归之颜之曰秘书傍翼二小阁一以宿客一以储糗楼之前斋曰三山可据而望三峯也斋前有堂曰六虚取易语以表洞也郭子章氏得其义矣楼之后有轩曰太液面山而临所谓天池者其始方广仅三尺许僧以供粥茗而已吾拓而浚之至径丈余于是尽受诸泉泉盛而池溢吾东西疏两沟磬折环吾墙而会汇于大池池可半亩亦吾所凿也自是委曲纵流深壑琮琤不绝音与风松相应可一里许有半山亭废而吾复之樵歌牧笑得于所憩去亭有盘石高亦数百尺崖■〈山上罅下〉如莲花吾为创莲花庵以奉观世音大士更半里降而达溪桥诸山之水皆合且余十里夹植桃李春时烂熳游者作武陵源观云昔之所望而不可即游而不获信宿者长为吾几席间物吾亦可以快矣即洞六而得其三于未显者亦可以已矣而犹时时往来于怀一日有樵者来言公果欲尽得之乎有一洞去白云稍近其胜殆逾之吾乃欣然摄衣而往披荆棘履巉岩至洞口则幽深不可际列炬鱼贯而下四壁皆石锤乳莹白如玉滴沥有声霏霏若露屑吾乃名之曰玉露其奇丽非三洞所敢望也顾壁石若有题字不尽湮灭以为始发之耶则胡以有题字故尝显耶则胡泯泯不获以其名寄宋公笔也殆不偶矣樵者沾沾谓吾当为公更得二洞姑识之赵公又为余言自吾有天池以煮茗泉清而茗香以酿酒泉甘而酒醪其流以溉田涂松竹灌百卉流长而土加沃蔬笋可以茹芋栗可以饱此吾居山之饶也日扫一室净几明窗焚香燕坐或诵古书或咏古诗或临古帖兴到则消摇泉石间鹤舞莺歌不减孔稚圭戴仲若家乐倦扫一榻展簟而卧山光满几云容拂裾夜分篝灯寂然万缘都息唯闻泉声泠泠度耳此吾居山之所独飡者也故人过从不冠而喷酒茗资之泉蔬笋芋栗资之圃留则栖于阁去则送于亭此吾居山之与客共者也今者日未春而起瞰太仓粟笱豆之实取之官禄对案呼笔手削吏牒束缚冠带腰领不属问之吾山有一于是乎子趣记之吾且归矣余曰不然公天之所命以佐人主理者也其以兹山奉公非欲公长有之也欲兹山之借公以名于天下后世者也不然何六洞之显者至公而始有文章

隱者至公而始出也凡专为圃者不能山居山者不办为圃圃而山者不能尽得山之胜山而圃不能文章者不能使其圃之长新而公独兼之且夫袁广汉之北印石季伦之金谷皆因圃于山竭其财力而饬之其壮丽几与上林埒然不及身而没之县官其山之饰亦不保而荡为樵人牧豎之场季伦差有文章矣要之天下后世不以为山荣而以为山辱也其与公可同年语哉今兹与公约公第无归而余请先之公为余傍山而扫一室余且按公纪与诗次第而问矣

游摄山栖霞寺记

余将以三月朔赴留筦而二月之廿六日抵京口其明日荆侍御邀登北固山又明日从京口陆行且百里俛及龙潭驿大雨肩輿出没于危峯峭壁之址与江相縈带而行如是者凡二十里雨益甚江山之胜顾益竒秀色在眉睫间应接不暇欣然忘其衫屨之淋漓也抵驿与儿子骥及张生元春小饮呼驿宰问以摄山道甚难之谓径险而受雨则泞可无往也余兴发不可遏质明起遂取所问道时晓色熹微与霁色接溪流暴涨不絕声然所过诸岭多童至中凹处忽得苍松古柏之属是为摄山趣驰道数百武得寺曰栖霞右方有穹碑唐高宗所撰以传明隱君僧绍者隱君故栖此山已舍宅为寺人主贤而志之碑阴栖霞二大字雄丽飞动疑即唐人笔也稍东摄级而上曰山门江总持一碑卧于地拂而读之复前为门四天王所托字焉摄级复上杰殿新构工可十之八而前庭颇偃侧僧曰未已也是将广之移四天王字于山门而加伟殿后摄级复上为方丈僧供起面饼茵藨菌而甘噉之至饱饭已与元春儿骥由殿后启左窔而出探所谓千佛岩者其阳为石塔塔不甚高而壁金刚力士像于四周颇巧致此塔隋文皇所建以藏舍利者也文皇遇异尼得舍利数百颗分树塔以藏之凡八十三州所遣僧及守臣争侈言光怪灵异以媚上而蒋州其一也盖其时建业以蒋子文故降从蒋云塔左圆池一泉泓然满其中石莲花蹙沸而起僧维咸资汲焉曰品外泉兹泉陆羽所未品也千佛岩独隱君子仲璋所镌无量寿佛像可耳观音大势至已不逮其它若文惠太子豫章竟陵王千像皆刑损天趣以就人巧使斗拔竒峭之态泯没不复可迹且所谓佛者一而已何千之有循千佛岩沿涧而进迤邐不可穷时旭日渐融草树被之葱茏罨霭有光泽涧水受雨争道下迸势如散珠声若戛玉僧维以酒茗从兴至輒酒足疲輒茗已繇中峯涧至白乳泉探蠡酌之尽一器乃蹉蹕过岭其直如截者曰天开岩中仅通一线径虽不甚高而孤险嚙足可畏将自此问絕顶而力不胜矣其西则层迭浪岭直下乱石错之若海波万沸汹涌灑蒸熟视之审其名之称也可二里许一兰若承之曰观音庵方有事于土木其壮丽几与寺埒主僧某者福德人也言简而精与之小酬酢而别还复饭方丈儿子兴未已复呼元春登絕顶返则日下春矣欲骄余以所不及见余谓若所见非大江耶业已自北固龙潭饱之矣二子不能对乃就寝今天下名山大刹处处有之然不能两相得而其最着而最

古者独兹寺与济南之灵岩天台之国清荆州之玉泉而已灵岩于三十年前一游之忽忽若梦境耳今者垂暮而复与观栖霞之胜独老且衰不能守三尺蒲团地而龟勉一出远愧僧绍然犹能自为计庶几异日不至作总持哉

二酉山房记

余友人胡元瑞性嗜古书籍少从其父宪使君京师君故宦薄而元瑞以嗜书故有所购访时时乞月俸不给则脱妇簪珥而酬之又不给则解衣以继之元瑞之橐无所不罄而独其载书陆则惠子水则宋生盖十余岁而尽毁其家以为书录其余费以治屋而藏焉屋凡三楹上固而下隆其址使避湿而四敞之可就日为度二十又四高皆丽栋尺度若一所藏之书为部四其四部之一曰经为类十三为家三百七十为卷三千六百六十二曰史为类十为家八百二十为卷万一千二百四十四三曰子为类二十二为家一千四百五十为卷一万二千四百四曰集为类十四为家一千三百四十六为卷一万五千八十合之四万二千三百八十四卷元瑞自言于他无所嗜所嗜独书饥以当食渴以当饮诵之可以当韶護览之可以当夷施忧藉以醒忿藉以平病藉以起色而是三楹者无他贮所贮亦独书书之外一榻一几一博山一蒲团一笔一研一丹铅之缶而已性既畏客客亦见畏门屏之间剥啄都尽亭午深夜坐榻隐几焚香展卷就笔于研取丹铅而雒之倦则鼓琴以抒其思如是而已故人黎惟敬以古隶扁其楣曰二酉藏书山房而属余为之记按古所称小酉山上石穴中有书千卷相传秦人于此学因留之故梁湘东王文有云访酉阳之逸兴见荆州记甚详一曰藏

书之所有大酉小酉二山在楚蜀间今宣抚之所由名而段成式之著书谓之酉阳杂俎者也惟敬之所标当亦云是余因以慨夫七雄之前盖不惟周之藏史为老聃之所掌者而名山奥窟如宛委石蕙禹穴洞庭之类其灵文秘检徃徃有之第既为造物之所悛惜而人间之迹困于漆书竹简而未易广盖自七雄而后一烬于秦火再溃于莽三燹于卓催四毁于湘东五佚于巢六窜于宣和虽随散随聚而周之藏史其所余能几何况闾閻之浅而责之守疋夫之力而望之致也夫以刘向之七畧仅三万六千卷任昉又减其三分之一隋之嘉则殿名为三十七万余卷而正本亦仅三万七千而止耳开元之际最为极盛至八万卷然亦多一时之所著而宋崇文之目又减其大半后之益者积数十年而增募不过万卷今元瑞以匹夫之致而闾閻之守仅十余年而至四万二千三百八十四卷不亦难哉虽然世有勤于聚而倦于读者即所聚穷天下书犹亡聚也有侈于读而俭于辞者即所读穷天下书犹亡读也元瑞既负高世之才竭三余之晷穷四部之籍以勒成乎一家之言上而皇帝王霸之猷贤喆圣神之蕴下及乎九流百氏亡所不讨核以藏之乎名山大川间以余力游刃发之乎诗若文又以纸贵乎通邑大都不胥而驰乎四裔之内其为力之难故不啻百倍于前代之藏书者盖必如元瑞而后可谓之聚如元瑞而后

可谓之读也噫元瑞于书聚而读之几尽矣屠龙之伎殫而世亦无所用于矣盍亦舍而从我游乎玉京人鸟须弥之顶有祖龙之火不能燔而仲尼之博姑存之勿论者吾将发其一二以窥子焉即二酉之藏与子读于二酉之所得皆糟粕已作二酉山房记

弇州续稿卷六十三

●钦定四库全书

弇州续稿卷六十四

（明）王世贞 撰

○文部

△记

游金陵诸园记

李文叔记洛阳名园十有九洛阳虽称故都然当五季兵燹之后生聚未尽复而所置官司自留守一二要势外徃徃为倦宦之所寄秩其居第亦多寓公之所托息顾能以其完力致之于所谓园池者皆极瑰丽宏博之观而至金陵为我高皇帝定鼎之地二圣之号令万宇者将六十年内外城之延袤盖自古所创有所置官司皆与神京埒吏卒亦危割其半若江山之雄秀与人物之妍雅岂弱宋之故都可同日语而独园池不尽称于通人若李方叔者何也岂亦累洽全盛之代士大夫重去其乡于是金陵无寓公且自步武而外皆有天造之奇宝刹琳宫在在而足即有余力不必致之园池以相高胜故耶余自束发挂朝版余四十年中间里居之日倍于宦路蓬蒿一亩蒲焦数赤足以藏此幻躯而晚复见迫时趣召陪留枢过时之人举步愧影唯是职务稀简得侍羣公燕游于栖霞献花燕矶灵谷之胜约略尽之既而获染指名园若中山王诸邸所见大小凡十若最大而雄爽者有六锦衣之东园清邃者有四锦衣之西园次大而奇瑰者则四锦衣之丽宅东园华整者魏公之丽宅西园次小而靓美者魏公之南园与三锦衣之北园度必远胜洛中盖洛中有水有竹有花有桧柏而无石文叔记中不称有垒石为峯岭者可推已洛中之园久已消灭无可踪迹独幸有文叔之记以永人目而金陵诸园尚未有记者今幸而遇余余亦幸而得一游又安可以无记也自中山王邸之外独同春园可称附庸而武定侯之园竹在万竹园上因并所游志之东园者一曰太傅园高皇帝所赐也地近聚

寶門故魏國庄靖公輔愛其少子錦衣指揮天賜悉橐而授之時庄靖之孫鵬舉甫襲爵而弱天賜從假茲園盛為之料理其壯麗遂為諸園甲錦衣自署號曰東園志不歸也竟以授其子指揮纘勛初入門雜植榆柳余皆麥莖芫不治踰二百武復入一門轉而右華堂三楹頗軒敞而不甚高榜曰心遠前為站台數峰古樹冠之堂后枕小池與小蓬山對山址澌澌沒于池中有峯峦洞壑亭榭之屬具體而微兩栢異干合杪下可出入曰柏門竹樹峭蒨于蔭宜余無竒者已從左方窺朱板垣而進堂五楹榜曰一鑿前枕大池中三楹可布十席余兩楹以憩從者出左楹則丹橋迤邐凡五六折上皆正平于小飲宜橋盡有亭翼然甚整潔宛宛水中央正與一鑿堂面其背一水之外皆平疇老樹樹盡而萬雉層出右水盡得石砌危樓縹緲翬飛云霄蓋纘勛所新構也畫船載酒繇左為溪達于橫塘則窮園之衡袤几半里時時得佳木長輩云武廟狩金陵嘗于此設釣樂之移日不返即此亭也或云釣地正在心遠堂后心遠堂以水嚙其趾不可坐危樓以扁鐻故不可登若乃席于一鑿改于亭泛于溪則前后兩游同之前游以花事勝后游以月勝其清襟雅謔飛白卷波于輕烟淡景中復前后同也前游余與大司寇平湖陸公主之客則大司徒寧鄉王公少司寇武安李公鴻胥卿無錫王公通政叅議烏程沈公后游余與大司馬內江陰公前大司徒王公少司徒歙方公主之客則太宰吾郡楊公少宗伯富順李公也西園者一曰鳳台園蓋隔弄有鳳皇台故以名亦徐錦衣天賜所葺今以分授二子析而為二當別稱西園矣園在郡城南稍西去聚寶門二里而近余時携兒子騏宗人少卿執礼陸太學端御游焉入園為折徑以入凡三门始為鳳游堂堂差小于東之心遠堂廣庭倍之前為站台有竒峯古樹之屬右方括子松高可三丈徑十之一相傳宋仁宗手植以賜陶道士者且四百年矣婆娑掩暎可愛下覆二古石曰紫烟最高垂三仞色蒼白喬太宰識為平泉甲品曰鸡冠宋梅摯與諸賢刻詩當其時已賞貴之曰銘石有建康留守馬光祖銘二石瘁于紫烟色理亦不稱堂之背修竹數千挺來鶴亭踞之從鳳游堂而左有歷數屏為天桃丛桂海棠李杏數十百株又左曰擊秀閣特為整麗閣前一古榆其大合抱不甚高而垂枝下飲芙蓉沼有潜虬渴猊之狀沼广袤十許丈水清莹可鑒毛发沼之阳壘洞庭宣州錦川武康雜石為山峯峦洞穴亭館之屬小于東園而高過之其右則小沧浪大可十餘亩匝以垂楊衣以藻苹儵魚跳波天鸡弄風皆佳境也南岸為台可望遠高樹羅植畏景不來北岸皆修竹蜿蜿起伏小沧浪垂盡復得平坡一四周水環之華屋三楹大抵竒卉名果如頻婆楊梅桃李異种白蒲桃尚繁茂足餽釘其蘭菊可盆而植者則無几矣考周公瑕所撰旧志堂閣亭館池沼以百十計呼園父問之十不能存二三名亦屢更易豈為錦衣之后人不能岁时增葺就頽廢耶抑詞人多夸大若子虛亡是公之例云尔余一游西園遇花時所得會心倍于東園盖尤耿耿云

鳳凰台者旧建初寺之后一曰保寧寺在聚寶石頭之間稍隆處也宋元嘉十六年有异鳥三五彩集焉寺僧正顛哀土為台識之或云秣陵王顛未审孰是唐李白侈其观

有三山二水之句学士大夫想象其雄峻瑰丽之胜而愿游焉乃其踪迹漫漶不可复识徐锦衣天赐以其地之近又与所营菟裘邻也崇其土则曰凤凰台疏井而甘则曰凤凰泉而傍阜之高者曰凤麓台为堂以冠之后轩临渟碧池凤凰台之后阜更高者丛石为碁饰以佛宇曰丛桂庵其它有古树修竹之类余时与骥儿侯客未至相与纵步则以积潦故鞞舍摧圯兔葵旅生台亦痹隘举目无所覩见意甚倦之啜主人茶一盃而出园丁强作解事语指墙外一墩曰此真凤凰台已视之乃块土峻上可二仞许土色正赤儿子疑之余笑曰非也台故衰土以人力成耳今此殆息壤哉后遇朱彬州衣云凤皇台本金宪阮丈里居后有凤皇泉水甚冽而甘余当谒阮质之虽然夺徐以归阮将无两虞芮也

魏公南园者当赐第之对街稍西南其纵颇薄而衡甚长入门朱其栏楯以杂卉实之右循得二门而堂凡五楹颇壮前为坐站台有峯石杂卉之属复右循得一门更数十武而堂凡三楹四周皆廊廊后一楼更薄而皆高靚瑰丽朱薨画栋绮疏雕题相接堂之阳为广除前汇一池池三方皆垒石中蓄朱鱼百许头有长至二尺者拊栏而食之悉聚若缟锦又若炬火烁目魏公方合六卿之长佐时余与先至者四五人从右方十余折而上得亭楼一小饮其中八九行而客俱至乃从左逶迤而下甲馆修亭复阁累榭与奇石怪树绣错牙互非枳履则棘冠其左折而下覩匠氏方西向而治轩三楹不暇入主人肃客大合三部乐轰饮至一鼓乃罢去大司马阴公谓余公之第西圃其巨丽倍是然不恒延客客与者唯留守中贵人大司马及京兆尹丞耳居三月所大司马吴公复延余于兹园时阴公魏公俱物故矣酒数行不胜西州之感乃起访所新治轩者而憩焉其丽殊甚而枕水西南二方皆有峯峦百迭如虬攫猊饮得新月助之顷刻变幻势态殊绝时客为大司寇陆公少司寇张公不甚宜酒余宜酒而意忽忽不乐飞数大白乃别

余始饮魏公仅月余而有大阅之役间以阴公言风公公曰固也俟西圃之菊繁而后与二公会非久公病矣阴公卒公亦继卒会公之世子继志等以志铭见属而余往酹椒浆焉世子以其仲父锦衣与崇信伯费公治具于西圃而请曰先公尝言之不忍食也余乃强往盖出中门之外西穿二门复得南向一门而入有堂翼然又复为堂堂后复为门而圃见右折而上逶迤曲折迭磴危峦古木奇卉使人足无余力而目恒有余观下亦有曲池幽沼微以艰水故不能胜石耳锦衣云当中山王赐第时仅为织室马廐之属日久不治转为瓦砾场太保公始除去之征石于洞庭武康玉山征材于蜀征卉木于吴会而后有此观至后一堂极宏丽前迭石为山高可以俯羣岭顶有亭尤丽曰此则今嗣公之所创也公居平日必一游游必以声酒自随取欢适而后罢去即寒暑雨雪无间也又指其木曰此为海棠为古梅为碧桃皆拱矣春时烂熳若百丈宫锦幄公能一来乎余頷之姑与崇信小饮而出

尽大功坊之东为东园公之第三子继勋宅今所称四锦衣者也尝第武进士领南锦衣篆自免归里主人为东园公爱子所授西园为诸邸冠顾以远不时往益治其宅左隙地为园尽损其帑凡十年而成顾以病足多谢客客亦无从迹之己丑春四月七日忽要余与大司寇陆公游焉入门折而东南向有堂甚丽前为月榭堂后一室垂朱帘左右小庭耳室翼之后加鏞焉计奉其九十老母以居者也主人为具甚丰大合乐以飨酒二十余行散馔以餽从者乃起折而西得一门则广庭廓落前亦有月榭以安数峯中一峯高可比到公石而不作彊嵌空玲珑莫可名状问之主人曰余此故公郡中物也往年公郡中人艰食而吾幸有余米故亟得之然道路之费已不貲矣北有危楼其址已可三尺凡二十余级而登前眺则报恩寺塔当窗而耸相轮复踞其上二丈许得日而金光漾目陆公绝叫以为奇启北则峯峦环列若巫女鬢青翠百态相与咏赏佐以酒炙久之乃下稍进则有华轩三楹北向以承诸山余乃蹑右级而上登顿委伏纤余窈窕上若蹑空而下若沈渊者不知其几亭轩以十数皆整丽明洁向背得所桥梁称之朱栏画楯在在不乏而所尤惊绝者石洞凡三转窈冥沈深不可窥揣虽盛昼亦张两角灯导之乃成武罅处煌煌仅若明星数点吾游真山洞多矣亦未有大隍胜之者水洞则清流泠泠傍穿遶一亭莹澈见底朱鳞数十百头以饼饵投之骈聚跃唼波光溶溶若冶金之露铍颖兹山周幅不过五十丈而举足殆里许乃知维摩丈室容千世界不妄也所至皆有酒脯以佐其胜寻暝色起弦管发主人布几于楼之下再张宴于堂酬酢久之街鼓动矣回首恍惚若梦境命笔记之

万竹园与瓦官寺邻故人汤吏部元衡詹翰林东园邀游焉时少司徒方公与余俱为客而余属瓦官之主僧烧笋蕨合酉菜羹佐起面饼四人者食之而甘次第礼佛像登重建所谓瓦官阁者徙倚久之乃出不百武抵园亦魏公家物主者为邦宁公嬖子也辞疾不出使人具茗焉园有堂三楹前为台台亦树数峯墙可万数仅朱楼扁鏞甚固启之亦殊壮盖其所栖宿处也堂左厢三楹亦可布席自此以外则碧玉数万挺纵横将二三顷许偃蹇自得幽深无际赤日避而不下凉飈徐发惜颇为积潦所败主人有余力置之罗衿香泽中不能为此君作缘又不能凿池引水以益鱼鸟之致令人有余憾耳使付吾家子猷当爽然作淇渭间观汤詹皆能饮詹酒后耳热谈天便是重覩邹衍二青衣老而能作洛生咏呜呜动人皆浮白之一助也酩酊始别

徐三锦衣者东园君之仲子而凤凰台主人也余游凤凰台去主人第小遽煮茗相问讯既而诣余则以一刺报之仲夏之廿四日雨晴霁阁者复得主人刺次日质明偶过方司徒司徒迎谓三锦衣相访乎余曰访而不及见也司徒曰见我见而请于我曰幸公与司马公之报访也晨使苍头闯我阁询之则盛其供张扫门以候矣余颌之入部毕还过方公公遂拉以同行及门主人严服肃客荐茗已而穿中堂贯复阁两重始达后门门

启折而东五楹翼然广除称是为月榭以承花石置酒堂中十余行三饭皆有侑乃复折而东启垣则别一神仙界矣始由山之右蹶级而上宛转数十武其最高处得一楼而憩东北钟山紫翠在眼复泛大白十余行自是东其窈下上迤邐皆有亭馆之属伏流窈窕穿中石桥二丽而整曲洞二蜿蜒而幽深益东则山致尽而水亭三楹出矣亭枕池南而北向启扉则三垂之胜可一揽而既池水清冷鉴毛发萍藻时虺朱鱼有径尺者鼓鬣自恣竒峯峻岭参差崖■〈山上罅下〉怪木寿藤樛互暎带朱楼画阁上割云而下啮波真使人应接不暇大约其丽埒魏邸之南园而广胜之园之广不能如东西二园而山之壮丽胜之余兹游出意外甚适小缺陷者主人执礼谦甚不能去襜褕方公啻于饮无为酬酢家又夙邀客如公瑕幼于之类已在馆矣力辞乃得先别

徐氏两西园之外复有称西园者一曰金盘李园魏五公子邦庆之别业也去石城门可一里而近门俯大街有堂三楹颇卑浅后为台循台而东北转可三十武榔榆夹之高杨错植绿阴可爱更东蔬圃麦垄弥望又三十武有堂三楹堂之阳为广除其南为台列湖石四五下植牡丹以纓络栢参之堂之阴迭石为山高不寻丈具体而已其址皆凿小沟宛曲环遶可以流觴而不知水所从出处山之麓为亭亭下为洞洞不能五六尺倚墙而窈竹扉蔽之或云墙后复有山山之中有池当是流觴之水之委也重堂复阁可以眺而数然不可即矣左右老栝八株大者合抱偃蹇婆娑生意遒尽自此而西南径屡折篱落间亦有木香茶■〈卅糜〉之属尚余少花傍植梅杏乌桕皆可实根既为藤蔓所制计得少实付之鸟雀而已又西南有屋数十楹甃甃之前树粉墙其西为垣垣之外竹万个杂高榆数十与落照相鲜新归路稍东北始得水颇渺弥疑即所过屋后池也亭西高阜亭其上曰碧云深处可以东眺朝天宫北望清凉瓦官浮图乌龙之灵应观亦有佳处也大较魏氏诸园此最宽广而不为伦列得洛中遗意然以芜不治故遂不能与他园抗使用五百金授丘壑胷中人治之当使嵇阮抱臂相寻不复它诣矣金盘李者得之故李将军金盘事诞妄不足信

徐九为魏公叔第与公府相对而居今年三月之十二日邀余与太宰杨公少宰赵公大司寇陆公为牡丹之会入门厅事颇壮然北向从右门折稍西南则厅事转而南向益壮前有台峯石皆锦川武康牡丹十余种衣焉时五日之内为会者三而花事皆向残独此犹嫣然主人小设酒茗而已俄复肃客右启一门则厅事更壮而加丽前为广庭庭南朱栏暎带俯一池池三隅皆竒石中亦有峯峦松栝桃梅之属亭馆洞壑萦错皆加丹堊左右画楼相对而右独崇据石台为三层时久旱甫得雨意甚畅登楼而饮则烟雾冪歷忽近忽远皆有姿态主人具席于堂甚丰余谓赵公得无难子复古编乎赵公无以应曰是侯家非吾编所能约束也至街鼓动乃别主人之右方园尤丽即鬻于魏公所谓南园者也莫愁湖园者亦徐九别业也出三山门不数百步而近其园左有楼台水阁花榭

之属而以泮水故多摧塌主人疲于力不暇飭然其景为最胜盖其阴即莫愁湖衡不能半里而纵十之隔岸坡陀隱隱然不甚高而迤邐有致赵司成王光禄沈比曹袁左军置酒于中楼四壁皆壞意甚危之然得以纵目无所碍时夕日将堕山水暎幕宛若李将军金碧图呼酒甚畅第归而闻吾仲氏讣盖一转盼间哀乐相禅极矣自是不敢复及莫愁湖不然吾安能一月不一诣也

同春园者故齐藩之孽孙某所创也余向者从家弟敬美所得许太常园记而艳之宗人光禄汤徐二比部邀余游焉其地在城西南隅去某之居第武可数也入门可方驾转而右辟广除豁然站台宏飭峯树掩暎嘉瑞堂承之堂额故邢叅政一鳳古篆自是复得一门有堂曰荫綠文博士彭隶其额二书皆名笔太常所谓垂柳高梧长松秀栢綠阴交加覆于栏檻者是也堂北向其背枕水而阁曰藻鉴却南向傍为漱玉亭太常所谓亭下有泉泉外植竹千挺泉流有声琅玕成韵余再过之不闻所谓泉声也垒土石为山逶迤下山有亭台馆榭之属多牡丹芍药当花时烂熳百状大足娱目主人今逝矣故不恒扃闭羣公时时过从以故声称与东西二园埒实不如也

仲夏廿五日亭午散衙报谒诸公过许中贵饭我于凉堂不丰而旨为一饱自陆司寇所还有土垣横亘且里许其中皆竹而北其窔闾而入叩之乃武定侯之故园也面东一轩稍入复得一堂亦面东又十余武水亭三楹临池南向又数十武复得一池其外皆菖竹大者如盃去西可三十丈而杀南北总五十丈而羸东则汗漫无际矣鸾稍翔空畏日不下轻飈徐来戛玉敲金三伏之际不待遇阮公然后把臂入林也侯家燕中岁使人收其羨可百金第不知是威襄公故墅将永嘉大长公主所创否其左为故寧国大长公主府文皇之同母女弟也下适梅都尉殷都尉为建文君将重兵镇淮安京师平第彻备而不入谒奉朝请之三年以嫌为怨家都督赵曦谭深夜扼之水死上虽快而怜之捕诛曦深所以慰藉公主良至官其三子皆孝陵卫指挥使今有视锦衣篆者公主府堂前后皆毁圯仅大门在其园亦皆竹广袤与武定园埒竹之巨丽不逮也亦为之一步而出

市隱园者故鸿胪姚元白园也姚君盖尝刻周公瑕所撰记与故顾尚书璘许太常谷邢侍讲一鳳张察幕之象彭征君年今余洗马孟麟诸贤之诗其称翊园之胜不容口余读而艳之今年五月且尽吾乡张幼于与公瑕俱至都幼于与薛鸿胪者邀余游焉时姚君物故久矣过其子诸生某居相与要入堂后一轩虽小颇整洁庭背竒树古木称是复转而东一轩中颇敞出古画墨迹之类亦间有佳者评隲少时苦茗佐胜出门穿委巷百余武始得园叩北扉而入有茅亭南向伛偻犹妨幘其左小山以竹藩之不可登则姚生之仲弟所受也前为大池纵横可七八亩其右有平桥狭仅容足蜿蜒而前桥尽得平屋五楹中三楹所谓中林堂者也堂后一轩枕池曰鹅羣阁半敞矣以考公瑕记所称某

亭某桥某馆某台者今皆不可复迹岂鸿胪之缔饰不能保之身后耶将公瑕文士夸诞难信耶时久旱得雨甚快坐阁中雨复琅琅已而平波尽鳞蹙风欲立遥望所谓小山者黑云幕之殆若泼墨意颇洒然而主人酒炙乃不时至盖幼于实悞之会余与薛各有所携壶榼且酌且谈移时而主人之具至则颇腆相与尽适而别得诗一章

武氏园者宪副武君之弟太学某所构也始鸿胪江阴薛生为具要大宗伯姜公大司寇陆公少司徒方公少司寇李公与余游方山余以远不可乃谋之万竹园从瓦官寺乞斋供毕而姜公于园之主人有所避乃西南行里许得武氏园而休焉园有轩四敞然无所避日其阳为方池平桥度之可布十席桥尽数丈许为台有古树崇峯之属蓁竹外护池延袤不能数十尺水碧不受尘时闻■〈彳 虢〉■〈彳 虢〉声盖青溪所借流也其右方有精舍启鐻而入堂序翼然又西一楼雕梁画桷陈张颇丽而中供吴伟所画仙像殊不称薛生云武静敛不涉外事而奉佛亦好长生之道时捐橐为施审尔一佳士也姜公陆公谈余与李公饮方公湛然其间两不违性近暝而散吾至白下凡三过王贡士杞园园在聚宝门之西可半里度委巷转至其处门对大河河之北为帝城入门得一堂三楹更南向庭中牡丹盛开凡数十百本五色灿烂若云锦时宴余者继山鸿胪华松光禄也与余皆王姓主亦王姓大奇绣球花一本可千朵后二旬许复游焉主之者赵司成也从牡丹之西窰而得芍药圃其花盖三倍于牡丹大者如盘白于玉赤于鸡冠裊露迎颺娇艳百态菜■〈廿 梨〉复数百本建兰十余本生色蔚淳可爱傍一池云有金边白莲花甚奇时叶犹未钱也明日复游焉主之者宗伯姜公少司寇李公也则兴已阑矣于洛中拟天王院花园子盖具体而微

游吴城徐少叅园记

郡城之坎隅有水木冈阜之胜甲于一城友人徐少叅廷裸治之十年矣或曰故吴文定公东庄也后人芜而它属焉万厯之戊子仲春十六日余赴留枢过郡徐君与蒋少叅梦龙釀而见要至则日亭午矣启西门而入复过一门有小轩以憩客更西一门呀然而辟崇堂五楹雄丽若王侯前为大庭庭阳广池三隅皆山卉树罨霭冈岭迢峻徐君乃呼小舫御之载酒舫尾前一舫艚为鼓吹导遶出山后逶迤长溪至西阁而休阁东枕溪而西为台台广平可以望月饭已迤邐而下则有三篮舆■〈彳 侯〉丛竹间余谓竹茂密或舆妨既而不告妨也已得石径逶迤上下或峻或夷余谓当益舆妨既而复不妨也乃徐君已先试舆竹中妨则芟之其始治岩岭亦然余今而后知余之拙于山也前歴深洞登絶顶主峯最雄壮复下穿至一岩前凭朱栏磬折依水玉蝶梅数株丽之为举数大白复前陟降几百许武则瀑布岩出矣岩陡削可三丈许仰而望之势若十余丈者迭乱石为峭壁隃天成已岩鼓瀑瀑自山顶穿石虢而下若一疋练中忽为燕尾进入小圆池

千珠逆喷复繇池窵而遶余前浮觴渺渺争先取捷久之瀑水益雄布屬于地卧而观之面发沾洒诵暎地为天色飞空作雨声句大叫称快酒至数十叵罗不能醉盖徐君预蓄水十余柜以次发之故不竭吾不知于龙湫开先若何慧山两王园故真泉业弗如也日下春为它主人所挽悒悒而别得诗二首

游牛首诸山记

余耳建业牛首之胜者久矣至谓不陟牛首不为宦建业而甫上事之月有八日大宗伯姜公少司寇李公邀予与大司寇陆公少司徒方公游焉余闻之色飞呼粥不能尽一甌既出候诸公于聚寶门之报恩寺皆不至时寺之二山门前后殿周庀久委劫火独一塔在塔故文皇下京师纂大寶倾天下之财力为高帝及后营福者也其雄丽冠千浮图金轮耸出云表与日竞丽余剧欲一登之而僧颇尼以不任余乃易便服行滕凭小吏肩而上甫三级则已下视万雉矣级益高阶益峻两股蹉踖者久之强自奋尽九级宫殿樛郁万栋栉歷与平畴相暎长江如白龙蜿蜒而来惟钟山紫气与天阙方山不相伏余无所不靡塔四周镌四天王金刚护法神中镌如来像俱用白石精细巧致若鬼工余摩娑久之听然而笑谓足且沮吾眼矣下不尽一级而姜公方公至相与聯輿行十余里抵魏公庄水亭小憩时日已过暎姜公见余之有饥色也出橐得粉丸四啖之复行十余里为李贤妃园一小挡出肃强余三人步入可里许始抵其室出咸蔬清酒为荐余为之举六七觴赏其率素也挡指谓此为唐王母贞顺丽妃余记唐定王者高帝之第二十三子也母即李贤妃所称三字谥妄也姜公后考曹志以余言良是出门而陆公李公始来自是古树流泉迤邐不断仰望兹山苍翠迥絕诸岭独所谓牛首者转近转不似虽双岭依稀相望然一耸一瘳殊不堪天阙吾家始兴虑创大役姑用以塞众喙耳陆倕别铭双阙之石与何征君前后驳之驳之是也抵山门日已下春矣緣坡而上至金刚殿殿后有石阶数之正得百级曰白云梯梯尽则为四天王殿殿后级如前而杀其半梯尽为大雄殿殿后复为毘卢殿毘卢者释迦千丈报身也大雄之左方室曰观音右曰轮藏中为平除下俯天王殿除之左文杏树高可数十仞围称是百年前劫火不能烬非僧腊可拟已宗伯公具饭于方丈余以饥故噉之甘改席文杏之傍时月初上葱茏晦霭大有致出余所携白酒与李公相酬酢陆公剧谈姜公与余间应之方公时出雅语然于四祖点懒融一大际未有相叩会者已与陆公稍西过一楼宿焉其前三楹楼也而后则踞岩为净室映前荣而坐皎月当牖其东南连嶂紫翠百状西南为下方梅垄菜畦平楚细流一碧千顷与陆公对坐嗒然忘此身之犹在尘世也以■〈谷九〉故寝亦甘凌晨起姜公李公要余饭方丈余与谈兹楼之胜携榼就焉僧蔬杂陈出余壶中沥数行乃出循东廊度峻嶒而上得文殊洞自然石龕文殊像极猥小而外为重屋幕之不足当金刚窟万之一又东为辟支岩有塔附焉曰藏辟支佛舍利处也颇现光怪余读盛仲交记为一晒辟支独觉

也劫前迦叶佛有之安得留舍利于支那殆是菩萨或高僧舍利耳又东为舍身台余以足疲不得上笑谓今者眼当沮吾足矣然寔无他竒寻李园之小瑯复以酒来布席别阁亡何姜李二公复置席方丈饭毕循松林而下观所谓昭明太子饮马池者一坎窞耳水赤而浊僧云亦时涸三吴诸迹多附之昭明亦妄也出三门欲取道献花岩肩舆出没松影与皦日相照丰草绿縟黄花错出如绮绣可五里许得一岭下舆却望牛首丹宫碧宇列嵌岩际下者若坠上者若缀帝释天化城恐不是过也循岭而右稍降为祖堂盖融之后尊融为祖以嗣信大师者前后殿阁颇整丽啜僧供而出复憩故岭徘徊不忍下乃循岭而左稍降可里许得献花岩故寺道傍一深洞延袤将二丈塑融像其中僧盖云此融未见信大师坐处也刘禹锡所称皓雪莲生巨蛇摧伏羣鹿驯听正其时耶迨得法信师之后则不尔不落阶级自不为鬼神所窥道宣之所以不敢望三车也然融初不作有漏因后乃日于丹阳负米一石八斗为众法成此大刹能无与达磨初祖示训相倍耶要之融自得法之后猿鸟献花亦可不献亦可作有为迹亦可不作亦可如未得法却无一是一处僧导登山门前殿陟险坐芙蓉阁亦可以眺牛首俯下方然迫仄殊不逮所闻复小饮方丈还至报恩更衣别诸公时日犹未下春云嗟夫牛首献花与摄山栖霞之胜余蓄之四纪矣而晚始得之得之晚过从当益数第浮屠法宿嘉桑下不得过三日去爱恋也余自此不复作二山游矣且故乡一团瓢地不减维摩丈室能容阿閼世界而又何恋恋兹胜耶余且归矣

弇州续稿卷六十四

●钦定四库全书

弇州续稿卷六十五

（明）王世贞 撰

○文部

△记

六合县陈侯去思记

应天之六合虽名为赤县而濱江最僻小土瘠而民贫又时有邮繻传符之累以是益困不堪陈侯之始来六合也召见吏民尽得其恫苦状慨然曰我必苏之庶人在官者

裁为二百七十人人各予定直毋得为低昂以九则授役役称其家毋有訾窳属核田之诏下侯精心履行句稽得其伏匿之亩且半既而曰上意非益赋也欲平之而已盖新亩出而故亩之赋减半又因以宽芦洲之税补开河损田之直若干赎镞金不入它籍而易谷于庾岁侵出之民不告饥圩堰陂塘以时筑浚灌溉不乏侯乃曰困已苏矣可以施教矣遴其耆硕以为三老嗇夫明飭高皇大训使里颁而人习之旌其淑若而扶其荡佚侯自以时之学宫集博士弟子而诲之经术傍及秋文靡不翕然趣风侯食不再簋衣必三澣每出按行郊野不多从驺呵一榼后随不资于民入计之日余俸自给拜征之顷垂橐萧然荐绅衿裾以至都鄙士女田叟旅人毋不垂泣遮挽胥吏敝缁而曰我曹日洗手而从事然未有一败者始实苦之今而后知侯赐也盖侯拜尚书户部郎于宦不为鼎贵去且久而其人益思之不忘相率诣不佞以请公实敦史幸为一言纪侯德将伐石而勒之以示永永不佞质以侯所用致思之状而得前十余事要亦皆循吏之所恒称者耳非有蹕絶可喜可愕之事而不知蹕絶可喜可愕之事固少年轻锐之所乐闻而实非所以得民之真者也夫循吏之所恒称正恒吏之所不能蹈也今天子方加意元元岁大计吏黜其无良者而为锡玺书宴赉以旌其贤者郡邑之人又能追旌其贤守令若此龚召朱卓之辈当接踵而起矣侯名载春济南之歷下人万曆之庚辰进士前庚辰而成进士为潞城令者侯之父繕部公也古于父子称循吏时有之然未有并起一时相望为世所脍炙者也歷下之才贤若边廷实李于鳞以文苑名海内其名政术则自侯父子益有闻故不佞乐而应之如右今令黄侯名梦鸿能继侯贤声者实预闻其事

国华堂记

徽居万山中地陜而人众居室栉比其羸缩所较仅寻丈而休寧为尤甚去休寧之南郭可三十里曰兗山乃稍宽而腴汪氏世居之其居延袤以亩计者俺得十中有堂宏丽不减侯家堂后有楼轩窗四辟兗山之苍翠与溪流之夭矫若玦者时时在目楼后复有楼积书万卷则汪氏之儁体干者与其父德化所日讽读者也德化贤而文仁义附焉至体干益彬彬矣既落成而邑之名辈长者过之署堂名曰国华而体干来留京介其妇翁詹吏部东图来请记詹君余石交也既不获辞则谓詹君世所称国华者以其人能华国也其仕显重章施廊庙无论即僻而子真耕谷名动京师而婿父子有之乎曰未也谢康乐归卧始兴之墅朝所吟咏暮传建康昏为之贵而婿父子有之乎曰未也然则兹堂何以名焉夫亦取其志而已今夫韞而辉山者玉之华也懷而川媚者珠之华也彼其称辉山媚川亦仅得其彷彿其未离蚌者蠢然焉耳矣其未离璞者顽然焉耳矣安在其为华也及其入乎随侯之手剖乎陵阳之足而光彩乎鄢郢邯鄲之廷在楚楚华在赵赵华寧不重哉夫此犹其小者有莘之鄙夫与南阳之畸士噐噐然而自乐踽踽然抱膝而讴吟彼固有以自信其珠玉然世之人未必能咀其实而得其所以华也及其遭圣主际哲

辟三聘而殷汉之业成而用尊然后有以称于天下彼谷口独行之操康乐骋艳之辞何足为体干语易曰见龙在田天下文明此吾孔圣事也凡此非谓体干能行之欲体干知华之所以大者耳詹君曰善请刻之堂东壁

重建栖霞灵应圣殿记

西方之圣有圆通大士者其名曰观世音又曰观自在其眷属则父事阿弥陀而弟蓄得大势其烁迦罗首母陀罗臂清静宝目则皆八万四千其化身则百千万亿其应度则无央无边恒河沙界而独于最下五浊恶世所谓阎浮提者为至切或曰缘也或曰不然最下五浊恶世固大士之所最悲悯而迫欲援拯之者也西方之教自我薄伽梵为人天说之今自学语儿以至笃老残癯无不知诵阿弥陀而大士之像并尊则为寺单供则为庵于名山大川处处靡所不有而金陵为六朝建都地自冠达帝之所隆崇而我高皇之所剏廓崇塔精蓝甲于宇内而摄山之栖霞独称冠盖割地于明僧绍立碑于江总持所称金池无底玉树生风者宛然故也法堂之西北岭大有隙地而无能承其胜者襄阳比丘真节自京师卓锡兹山以福德为一众所皈依凡聚徒三千余指讲经三十余度皆力任其供檀施郁积不以资三衣一钵慨然发希有想曰我圆通大士其无意此地乎哉会故殷少宗伯迈自琅琊致吴道子所图真仪而今陆太宰光祖铸赤金像俱以命节师乃悉出所贮檀施庀材为精舍以供之有殿有堂有阁有门有庀有斋厨筦库之属又尝开讲至法华多宝佛塔品则宝塔光相俨然见空中于是复凭一众力建多宝塔而慈圣皇太后诏中贵人张本等周行名山至此得未尝有出尚方金缕袈裟以壮其事塔不虞资矣其塔与精舍成皆乞左司马汪公道昆为之记铭而复构三楹于后以拟汪公之结夏汪公者故尝建襄阳节者也亡何大士所寓之殿不戒于火而像与真仪俱独无恙节公乃叹曰兹非大士之灵佑也耶方谋复之而巨商某某俱感异梦载其材甃与自来与节公之所规画合不弥岁而殿成缁素之徒来过者唯举手加额讶其宏丽逾于昔而已而不能究所自节公乃乞言于居士欲以志其灵感以镇山门居士则谓如如之体如紫金山毫发不动常寂而应常应而寂此不惟大士为然导摄两圣俱如之灵耶不灵耶为不灵而无不灵耶吾不得而测也节公亦不能测也若圆通之旨左司马已详之居士可无赘已

太仓州浚七浦杨林二塘记

大江以南皆号为泽国五湖之所汇浸而太仓之州与嘉定之邑最为其门户水则泻湖以之海旱则资海以通润然其地颇高阜其水不虞溢而虞涸而其害亦不在水而在旱太仓之干河三刘家港其最大者自海口而抵昆山可百里浸阔而流迅不受■〈

汙闕)无所事浚其次曰七浦广杀其十之八修得十之六又其次曰杨林广得七浦之半修如之所灌溉田为顷以数千计然其浸稍陞而流缓潮所往返■〈汙闕〉泥从之仅十年而一浚后之浚者以苟且报成事而已而工直之资大吏多侵渔其间农不得食计不暇为久远掘土三尺不至岸而委之其傍岸日侵水益陞潮挟■〈汙闕〉泥以来两涯之土即苏苏落盖不三年而辄当浚一线之水不能入支河以供桔槔何论舟楫日者天子采台臣言发留都帑大兴水利而以故太仆河堤使者许公持按察节来董之许公乃首治嘉定之吴淞江甫竣而即驰吾州谓州大夫韩侯才而悉属以七浦杨林之役侯乃大集三老吏民颯求夙之所以失身亲行河浹旬不归示之以恩信曰食不汝枵扶不汝假以人计工以日计人夙而兴晦而息入锸必深迁土必远犯者虽贵势亡贷以复于许公是之公时驻节吾州为时时行役所分别勤惰鼓以赏罚盖功起二月之朔至四月之朔仅六十日而二河皆告成侯又采三老吏民议从埧于海口于潮汐宽然无害以复许公复报可盖河成而傍亩而农者咸欣然自幸其耕耔之得所楫而往来者则快然释其步担之劳而又恍然若骤得其所未覩之二河也三老之祭酒有钱天福者倡于众谓韩侯之覆露吾民甚博其为吾民乳哺甚久吾侪食其德不能有所咏述今幸覩一斑于治水之绩而不求宇下之士能文章者伐之石以示永永吾侪小人哉不食其余于是趣而赴留都者数十辈咸具状以请余曰不可子不覩甲令乎且韩侯有礼而谨让人也其必不若之狗天福曰吾安知甲令即不敢记谏侯它德第欲使十载之后浚河者籍是以知侯功之所以能永与夙之所以失上可省县官帑而下可苏民数岁之力则维子之言是赖余乃曰可请为重浚七浦杨林二塘记侯名策字献之真定之南宫人万厯之丙戌进士许公名应逵其荒度徧江南当必有纪之者

太仓州学正常先生去思碑记

万厯癸未春常先生以乙榜之第一人领吾太仓州之学事居三载为丙戌先生入应公交车征诸生谒余叙以送先生试而不利例再还所居官其又明年先生以聘司贵阳试得士若干人往返万四千里复当应公交车征而岁且除矣诸生乃复走使数辈谒余叙以送曰先生第矣即不第当亦迁是必终有以宠灵我先生余谢曰以叙先生贤则曩者俺得十之八以祝先生第及迁曩序故及之兹复何赘而会先生用贵阳万里劳委顿逆旅中不及试于是先生满考者再积荐剡至九吏部贤重之不敢烦以郡邑之职而迁国子博士博士清华据六馆首亚于丞而至台谏之选丞不得而博士能得之诸生大欢悦曰先生果迁幸甚虽然我曹则不天遂远先生何以复奉大雅之诲乃相率伐石树碑于学宫而复走使谒余曰幸有以慰吾曹去后之思余乃许之纪使书丹于石而刻之先生修干长颯目炯炯如曙星气爽而神畅始叩余舁中固已心异之及与谈析经术扬挖执文纵辨经济世务若悬河而中井然不紊也则欣然定交矣属博士弟子有六人

者以酒食过得闾里谤甚重或谓且无闻之台台当坐师长先生曰吾师长也而将焉避之或曰毋为弟子解解亦坐师长先生曰吾为弟子讳则非严不为弟子辨则非慈且吾辨也不为解也于是实其首祸者二而辨其四台果以先生能早发见嘉其所辨者虽不遽释然犹白见其冤端而先生之牍独号持平至今诸博士弟子执贽而谒先生者先生不问贽而问所业其贤则进之津津不啻口出未善则诲之亦若自口出而欲掩之也膏油之费贫不能给者为代给之即不幸病丧及妻子之累费不能具者亦为代具之禄不足则佐以家帑帑又不足则鬻私田以继盖六年之中而先生之产大挫置弗问也有冤抑者困繁役者及它调发而非衿裾分者勒毋令之州而为之代理州大夫前后尊重先生亡弗听于是州之庭几无诸弟子迹矣先生于经术外徃徃重名节敦行谊所推毂贤长者有味乎其言即非弟子而荐绅之士大夫三老祭酒亡不纳刺愿交先生有所报谢或具酒炙以俟者先生必为之引满尽欢浹日无间人人自喜为得先生意先生亦无所町畦然而欲以非义钓先生不能进也自古师之道得胡瑗孙明复而尊得阳司业城而亲先生稍为具体所少逊者胡孙之经术与阳公之独行耳而材气寔过之宜乎诸弟子之思慕称翊公而不能忘也弟子凡数百人而潘燿某某为称首余既纪而告之曰博士之去思有碑自常先生始先生名文烜字某某别号曰仰坡浙之秀水人

万玉山房记

司先生颜其读书之舍曰万玉山房而属世贞为之记夫万玉者万竹也竹何以称玉也曰君子比德于玉已而比玉于竹今夫玉中实竹中虚竹磊砢而多节玉浑沦而已胡以比也然玉温润而泽缜密以栗竹之质同也玉有礼地之珪曰琅玕之青碧竹之色同也叩之清越以长竹之音同也音之在乐有八而各居其一又同也玉称君子竹亦称君子又同也胡弗比也始司先生之问舍于江陵也谋所树客或进曰公不闻之腐史江陵千树橘乎哉苞可噉也市之入与千户侯等先生咲曰不尔吾且树竹客曰渭滨之千亩入与江陵等欤先生曰非是之谓也吾生平慕君子之佩玉而居贫不可致则有竹在令斥傍舍之隙悉移竹而加培溉焉既成临风而听之琮琤琤琤与天合籁悠然若韶濩之停耳过雨而抚之青葱峭蒨与天并色濯濯若璆琳之寓目暑而就之骄阳翔舞而不敢下枕流而翫之蔚蓝之光下上相接吾安知夫竹乎玉乎吾适吾宇而神吾境畅吾五官濯吾心腑而已且去吾舍数百千武则悍王之宫也其横行若埽矣又去之则大相之府也其热可炙手矣又去之故郢都西通巫巴东有云梦之饶其市器若蝸蟪矣然竟不能越吾所谓万玉者而阑入吾之山房交于吾之视听而荡吾志吾岂以渭滨千亩为千户侯计哉不然吾何不因池之宜而树之橘也然司先生居无民以见推择天官数迁选部郎至容台卿于是不得长有兹舍而命工貌其凡恒挟以自随诸通人名士皆为诗歌咏之而今宗伯徐公子言序之司先生意犹未已以书属世贞俾为记世贞治彘中有竹

万个然不能守舍而去之金陵安能为先生记虽然使余能如司先生貌之而又咏歌之序之其亦可以无系于舍己或曰子之言甚得司先生意其比竹于玉甚辨不然楚之玉也不且以为周之璞也耶余笑不答

寶笏堂记

李故名系若太白所谓枝条布中州者至宋思陵时而有李编修公扈驾南渡居吾吴郡之葑溪作楼曰望乡以寓其黍离之感有所持象笏子孙能世守之葑溪之李支别于昆山之真义始冒魏姓而故少宗伯恭简公以道谊政术显重于朝至其嗣人复为李而编修公之笏偶失之流落于一道士馆恭简公之从弟光禄公有子曰乡进士温甫振奇人也购而得之寶藏于家时天子有特祠以祀恭简公春秋肸鬯则出笏而列之若周家之赤刀天球以示后人温甫歿而授其介子太学大昌乃曰是先世之所以对越人主者焉敢褻也匣而奉之堂之楣且名其堂曰寶笏而属世贞为之记按笏者忽也人臣有所奏扬书之于板以备忽忘者也东晋之后别名曰手板手板间施之上官稍轻而笏则益重唐之季世天子欲求文皇之手迹于李卫公之后人乃上所赐玺书并上其古象笏天子为之赐金帛而归其笏魏文贞公之后人曰謇者为补阙时上文贞公所持象笏宰相郑覃曰在德不在笏天子曰不然此亦甘棠之谊也摩娑久之嗟乎以贤臣之一笏隳二百年而天子犹然知重何况亲为其子孙者又当何如也则温甫之寶之而太学之加崇之宜也虽然窃以为风唐帝甘棠之旨则宜寶崇之而勿失味郑相在德之戒则宜思所以奉是笏者端己正色而立于朝不以倒执而以徂击固不特一器物之微而已太学勗之哉记成有难者曰宋翰林不设编修密院乃有编修编修八品官耳法不当象简故槐简也夫编修公之所藏焉知其非先人之笏耶又焉知卫公之笏不尚在而编修公非其后人也耶温甫为余妇再从父太学能文辞有世谊故不辞而记之

陈户部浔阳榷税去思记

戚党中有张西铭者官南康幕而佐榷税于浔阳以贾客长年之羣感叙司农郎陈君之德政而问记于王子王子曰关征非右也其七雄之贪心乎讥而不征古之道也七雄之世关梁咫尺而外皆敌垒而贾客阑入其间势不得不严其讥既讥而得其贿物之状而欲心生以国家之日寻于干戈也农入且不给何为乎独商之恤至汉而用益侈农益以不给而商益以富于是益峻征之而商之入几与农埒若关征其一也高皇帝以恭俭享天下稍衷其平故于关不能无征而能无苛征二百年间贾客长年安其出以为固然而司征者顾不能画一其法大较宽则利商而病国刻则利国而病商而稍以己与之则国与商俱病而私橐巍然矣于是谤讥集而简书随之卒以俱败即不以己与之而鲜

有衷其平者亦不获无偏胜以张生所称陈君其下车不问利而问弊弊之所急则先荡除之首戢其下毋得挟使者威而轻为呵喝摇撼吏胥无所染指贾客长年之来谒谆谆命之毋匿舟寻尺以希减税夫求减而得全没非若利也若无所匿而吏胥故聊萧之吾必以罪归吏胥君所示期无论雨雪寒暑皆躬为之启闭关之上下无滞宿者猝有风涛之警君所散布侯人已慰安之矣夫君岂直不以己与之不与其赢而与其困苦以故贾客长年依之若父母而吏胥畏之若神明善乎张生之言始而不能欺既而不敢欺又既而不忍欺盖实录也君少年以春秋魁其乡联第进士甫离诗书之业而于钱谷琐屑出纳有老吏所不能如者其就何可量耶今夫守令以牧民称者也一失其民之心则报之若仇雠关征一事耳孟氏之所谓矢人也一得其心则讴谣咏歌之不忘然则可不自思所勉哉余既嘉陈君之廉能与张生之意而记之且以风夫嗣为关者君名鸣华字孟起福建晋江人

扬州文峯塔记

有介胄之士曰杨天祥者尝游江南北大帅军中其拳勇超出辈流远甚而恂恂若不能言者至于负节槩信然诺则儒生所不及也余以唐叔逵故知之既乃得其本末则少尝为僧少林寺从师披剃命名曰镇存托钵维扬至南关之外福国庵结夏有感于阿育王事发希有想拟剏竇塔今大中丞邵公时以御史按其地闻而嘉之给帖化募维扬故多商估客覩天祥曲跃距跃伎击剑舞之状若猿猱鬼神而骇焉争出其訾以佐木石砖甃之费可三万金不三载而塔成御史榜之曰文峯塔盖取于堪舆家言为一方科甲助也天祥后忽蓄发仍故姓名有妻子然犹不能忘情于兹塔而再拜乞余记之余居恒慨诸郡县吾夫子十亩之宫徃徃剥落旁风上雨有司相顾束手而策无所出计其费不过千金或半之耳然不能从四民募一锱石粟其人过之漫然而不小置念岂因果之说胜而名教之用屈耶天祥既用其说以一念而成此胜果不宜旋舍而从俗既已从俗必其心之悔之不宜复以此塔求余记也苟以余记成其名则所谓不住色而行布施者又何说耶天祥于是乎两堕矣夫是塔之费三万金可以三十吾学宫然而未有能损一锱石粟及塔成而借堪舆家言以为科甲助然则为吾儒者亦两堕也余不能辨第以语天祥异日懺宿愆而礼诵于兹塔之下其去西方尚当不遠也哉塔既成其檐角竇瓶朱铃则今住持僧任之僧名亦镇存固不偶也

疏白莲沼筑芳素轩记

余弇园第七记所谓出惜别门土山蛇纒而壮其右大有隙地者北垣为参同室之外屏凿方沼种白莲然延袤不能二丈许于游境无所当又时苦旱涸丙戌冬乃募工更

疏之至四丈许又深之取其土为土山于沼之南高与东山埒多种玉螺绿萼深浅红梅
绯桃木芙蓉之属杂以垂柳东西称是山之后隙地亩许皆令种竹竹径设石榻一二沼
左为曲沟通天镜潭资其水以为沼浸沼之北筑精舍三楹因叅同室之垣以壁垚而素
之中三堵乞张复元春图白莲社傍壁则陶征士归去来辞白少傅池上篇前不设牖下
缘高槛湘帘依之榜其楣曰芳素轩芳言气素言色皆白白莲取也轩之右一室小而洁
可以坐卧榜之曰曲肱左为短廊窈而入衡屋二楹枕天镜潭水一曲昔盖为溷聚之所
今亦荣矣上楹贮素案二度二吾前后所成文章及纂述诸书在焉案头笔砚纸墨各受
职有周易毛诗语孟老子庄列黄庭太玄维摩圆觉楞严诸经檀弓左氏司马二史古诗
纪数书秩秩得所下楹则虚白湛然一榻而已总为榜之曰归藏取易语也余自谢郢楚
节归即居弇中然徃徃为游客所窘入昙阳观奉香火者六载余其室居湫浅冬寒而夏
炎晨则狎贵客之迹而暮则狎童稚之喧渐老渐不可耐于是避之乡居颇闾寂而稍旷
环堵百穿有户无牡时时为盗憎三月而后客复随迫家饷鲜继于是复治弇然小出则
触客小避则面墙竟不得喧寂宜而今而后息交之门可杜矣可以无出矣余尝以夜止
宿尔雅楼之耳室终夕无犬吠警晨起礼叅同捧经咒毕则启东户入归藏或卧或起或
寘心阿唯越或弄笔大小言少厌则启西窈出兹轩倚栏而坐山水花木皆目睫间物莲
之叶始而钱终而盖其藹之自绿而碧而纯白香之忽清忽酳度匝岁中吾得其四之一
亦不为廉矣剥啄之响敛而杖履之踪遨游不触客处不面墙非斯沼斯轩之适而谁适
或曰予沼而植白莲壁而得遠公社何以不西方之思而仅以芳素榜子轩也予笑而不
荅嗟乎予偶以寄余适耳西方白莲耶白莲西方耶遠公既误予安可再误乃记之附于
八篇之后

振始堂记

阳羨之甲族毋逾吴者吴之先有味菜公以经术显名尝筑室东溪之上读书而乐
之署曰沧浜味菜公以贡至都下会其从子文肃公在翰林公咲曰吾老矣安能与儿子
辈衡进遂归而公有子武城令是曰沧溪公因沧浜之旧而稍饬之沧溪公卒沧浜之业
属其仲子驾而仲子■（距斤）弛不问产遂落他人手驾之兄詹簿君每过之辄扼腕
叹曰余王父及余考之履迹不浅矣而据之者乃某子甲苟不复异日何以见地下悉橐
而赎之因故址崇堂其上宏丽踰于曩时周山人公瑕大书扁之曰振始傍亩益拓治圃
其左有堂仿振始而小扁之曰葆真堂后凿池种红白茄累石为山竹树杂暎与鱼鸟共
之别构一楼曰揽秀以承铜官山之胜烟峦出没百态楼之前砌石台台之下有池与东
溪通凭栏而坐则风帆沙鸟歴歴在目詹簿君间从客觞咏其中甚乐也已而叹曰公瑕
之所以名堂固有指也具其事属世贞俾專为堂记世贞昔宦游燕中燕中之公卿戚畹
甲第名国崇薨累栋金碧璀璨借空夺目者不可以指数然不转盼而它属所谓朝长平

而暮冠军者欲追踪其故主而不可得嗟乎其始岂不艰缔构也而为之子若孙者多委
■〈疒尔〉昏■〈执上皿下〉当其未衰已梦醉于绮靡之场而不觉及其既衰则摧
飒于徙废之箸而靡悟毋论即其地求其主而不可得即得其主问其地而亦不能辄捐
目也此其人何可论振今夫沧浜者吴下一别业耳其丘壑之胜味菜公父子擅之几五
十年已非有长安奕棋之叹而詹簿君慨然能复之于既失又能大新其故以光昭先王
父与厥考之业以慰其思于九原公瑕之所以名振始者岂诬也哉余故不辞而记之使
刻之石以示君之子孙曰堂之中乙帐其左右丙舍池岛卉树曰某某先味菜公之所手
创也某某詹簿君之所手拓也取铜官之山以为表世世称吴氏物不亦快哉君名馭别
号少溪尝以才为肃皇帝侍从臣乞身于壮年归而为德于乡者非一云

萧氏寶纶楼记

周虽以文胜而天王之所以褒嘉其臣者其辞命自晋仇齐环之外无闻焉汉东京
而后迄于魏晋乃始有诏册之属然亦王公将相已尔唐宋以还其册拜臣下大而麻小
而告身以至一命之士靡所不沾被然一切施之拜官则太滥而不行之考最则无劝明
兴易世而后始能折衷之于典备而核矣嘉靖中宰相有侈大华袞之锡者为楼以奉藏
之请于上得赐名曰寶纶曰寶翰曰寶泽曰珍谟曰寶谟盖不一而足于是人主之恩益
尊而人臣之愿广若迺者尚书刑部郎萧子元冈之以东安令最考也其敕命七品而已
尔其所得父母及身与妻二通而已尔顾卜居于岭北有楼五楹甫落成而天子之玺书
下遂奉而藏之署其额曰寶纶学士大夫争为咏歌以称之萧子乃谒世贞于缙云氏问
记焉世贞语之曰是额也世庙之所以徇请于永嘉相者也曰不知也夫天子之欲报其
臣其轻重殊为纶一也人臣而欲荣天子之施以示其后其大小殊为寶一也且夫自九
列以上苟能积至三载未有不拜赐者也天下之为邑令者千二百余其能积至三载者
十不能一也三载而能以最拜赐者二十不能一也某今乃幸得之夫岂敢蔑忘天子之
赐而自弃于小抑某之始未有居也尝感异梦而得兹地固先世之所遗而后人之所未
暇经画者诛茅而沃土见斩棘而佳木列一登兹楼而四顾襟严岩带淇塘背武姥夹澄
江凡金华玉华武溪鹿溪之胜皆争出以媚吾楼某何敢当之将有天子之赐在唯公之
一言是贲世贞乃复谓之曰吾闻子之先有宫师公者其所拜玺书当不啻他相岂其奉
藏之不知将无乃不胜其朴而未之有记也子可谓能尊君者矣能继志者矣记而且歌
之曰旦而霞兮夕而虹昭回兮子之宫龙函启兮光烂烂中有宸章兮贯霄汉夕复夕兮
旦复旦缙云氏者移领邦禁矣而且归今称白云氏云

重修法华庵记

出太仓城东北为冈身路古捍海塘址也自冈身而北三十余里为涂松冈居民数百家聚焉为涂松镇镇之中有法华庵唐之龙朔二年开士所创建也毋论莲华法界弥纶大千即多寶塔亦可上割半空四掩由旬而以一兰若承之盖亦芥子之纳须弥丈室之容方广云尔是以法力所摄歷千余年虽栋宇间新而寶额如故属明嘉靖之辛卯有诏毀天下淫祠株及庵院之私剏者涂松异见婆罗门陆姓居邻其傍窃谋据之谓可以别置廛室置网利源而顾姓婆罗门亦与之同欲而生妬构讼于台寺僧文英乃走京师疏白其状下之台台下常熟以邑志证之兹庵得不毀而陆顾俱抵罪六十年之间庵之丙舍为楹者尚七而二姓之庐湮矣其踪迹问之田叟牧豎而不能荅庵之僧天寧奋然有志兴复与其徒绍元法隆福庆性禅辈尽缩三衣中食之资以庀木石甃聖而乡进士曹君巽学大损橐以佐之为经堂五楹翼以两厢而州判官杨某者以治水憇焉悯其弗廓给帖付天寧辈化募杨某去而天寧辈之募益专遂有佛殿五楹中塑大雄氏像晨钟夕灯香火严飭兹庵遂巍然称丛林矣天寧乃走金陵谒侍御苏君以居士邵弁之状来请记余尝谓古之士大夫若王东亭周颺明僧绍之属未尝有福田利益之覬而慨然舍其所居以公之释氏之宫彼盖深见夫幻迹之易沦而佛力之宏遠也彼其牟侵而无已所得几何而展转墮落其苦亦当无已且也纵文英不能抗而归之二氏将并二氏之庐而尽废之一旦有任其兴复者法华之址尚可寻而二氏之迹安在也若曹氏可谓闻王周之风而兴者已故不憚为详书之以告涂松之人

州大夫南宮韓侯去思碑記

大夫南宮韓侯之去吾州也蓋以母喪云荐紳先生及衿裾之士相與泣而送于郊吏民城居者暨鄉之賦長胥役相與哭而送于河之泚老稚婦女有追而及者有弗及者則又相與咨嗟嘆息以侯之不可復得為恨而中間感侯之深服侯之真者其送或抵郡或抵泚墅或抵梁溪晉陵咸望侯舟之檣與飛鳥并泯而後踟躕以返耆老陳光裕錢天福吳珍等凡四十曹復相與追述侯之德政曰吾失吾父母矣誰與生養拊循我乃釀金伐石謀勒記以伸去後之思而請于兵使者雩都李公署州事郡同守嘉興沈君俱報可乃北走金陵謁世貞而問記當是時州之荐紳若觀察使季公德甫尚書凌公云翼鄉進士太學博士弟子合二百餘曹聞之咸曰韓侯之澤深矣寧以吾黨之與聞詩書幸習事君子而彼嗤嗤之不若于是爭以謂世貞侯宇下人也而知侯最先當侯之自選人而得吾州也羣為侯憂之以賦重而訟繁矛戟之鋒與鋤耰錯處耳輕听喙輕發前守丞以下無得脫者侯意獨不然曰傳不云乎心誠求之不中不遠下車延接官師吏民虚心諮問吐無不茹响無不應謁者出舉手賀曰吾有君矣侯乃首飭曹吏牒有緩急諸應急而誤者扶毋宥以緩先嘗我者扶毋宥次飭胥隸曰吾不輕以若下鄉下鄉非奉命者扶毋宥即奉命而恫喝人緡錢者雖至少扶毋宥乃定催征之限以寬之曰及限而輸者數小不

足亦汝宥乃饬司柜者曰受输必衡及衡而加重者罪弗宥乃饬讼者

曰吾为汝析之以付三老更详之衷辟等者息衷辟异而小者辟则扶之扶不过十不汝狱也乃饬主文者曰若毋专城旦家言吾不从深文也舞则罪不汝宥乃饬诸应役者曰役等以田田等以费轻者辅重者必不竭若力于是赋役平矣讼衰息矣而会天之不吊明年大水侯昼夜行视水所抚慰宛切白之台察监司以蠲赈为请涕泣而絮得报可中产以上稍稍苏然亦自感侯之恤不忍流徙而至明年旱诸州邑皆议赈及粥诸饿者独侯精心为之民得以宽殍死又明年大旱侯上书请蠲赈如前于是一切罢催科之令人或谓侯不虞大司农较赋政殿最耶侯曰吾安忍以一身最而易我赤子盖侯在事三岁余与水旱相首尾其精神流通于薮屋之内心力悉竭而无所爱小暇则躬至学宫为诸生教授择其稍隲异者都肄其文躬与评隲出酒炙以劳之月至再不倦谓诸生有不得已事以白若师长白之不谷毋使公廷溷若迹也士大夫以居间至者和色而纳之不逆不徇徇者无所恩逆者无所怨故自吾一州之人亡虑数十万计或有小不满于侯者吏胥耳然小反之而知所以不絀三尺者孰非侯之教也嗟乎诗之所称咏歌先王之德不过亲贤乐利而已而能使其君子小人历世而不能忘夫余之所述乎韩侯者至浅琐也其清节嫩行贞心大度未能一数也然而所谓亲贤乐利以成不可忘之思实在是我则何敢蔽之诸君子曰善于是耆老复进曰日侯之初至偶有逸狱者十辈故事满十辈者守当它调盖吏民旦暮惶恐散骑士追捕田父亦操耒而从之老稚则累累诅于神不浹日而十辈尽获久之侯父太公感热疾须梨柿以不时得则争走数百里购得之以荐老稚复累累诅于神祠不浹日而太公之热解夫是以得安侯于三载今者太夫人之疾我曹未尝懈于祠药也而不应者何也岂太夫人之数尽而不可挽耶抑我曹之福亦尽而不以侯畀我也屈指立州以来九十有七年矣凡更四十余守而始得侯今者又夺之公其谓何世贞谓耆老母忧侯之不来今天子数下诏以考功法大计吏治侯之声称于考功法着矣异日服除为吾吴守为吾吴饬兵使者即不佞且有宇下之覬而况诸耆老吾姑记之且姑相与强饭以俟侯名策万历十四年以进士高第除

弇州续稿卷六十五

●钦定四库全书

弇州续稿卷六十六

(明)王世贞 撰

○文部

△纪

金母纪

我师昙阳子之谒金母而归也谓不佞贞与元馭盍治一室而奉我观世音大士以母配乎请母号则手书一赫蹏曰西池元始玄真女真教主太阴金母于是不佞贞退而徧考道藏及他稗官黄衣所志删其复而窃纪之母一曰九灵太妙龟山金母又曰太虚九光龟台金母总其凡曰金母又曰西王母在昔一气浮黎混沌未剖而有元始天王其治玉清圣境已而有灵寳太上大道君治上清真境已而有我母锺太阴之精居西华至尊位凡三界之繇女德造仙真者皆隶焉或云有木公者宰苍灵之墟以发阳和气理震方盖与母称东西帝云世之仙者凡九品一九天真王二三天真皇三太上真人四飞天真五人五灵仙六真人七灵人八飞仙九仙人当其成也所谒先木公而后金母受事讫乃得朝元始灵寳与玉帝玉帝者释家所称天帝释也故汉初有四五小儿戏于路歌曰着青裙入天门揖金母拜木公唯留侯听而识之乃前拜曰此东王之使玉童也或曰母毓于神洲之伊川姓纵氏受元始天尊教为弟子一曰灵寳君弟子其事渺忽不易言也母所都龟山有昆仑玄圃阆风三苑下皆积水环之与云气映莹若积瑶故曰瑶池洪波万寻弱不任毛故又曰弱水非飀駟云驹不可馭而到也金城千里玉楼造空璫华之阙光碧之堂青琳之宇朱紫之房连琳彩帐明月四朗下俯轩砌白环为枝丹刚成林天籟自音与八会谐和鸣铿锵母年算无始章亥茫然而貌恒若三十许天姿掩霭光彩絶世左右侍从皆玉女灵真不可胜记大抵其都视中夏为极西在昆仑则东南故尔雅曰西王母日下又山海经云王母鬢发戴胜虎齿善啸盖母之使金方白虎神也公孙氏其始曰黄帝命风后力牧征师之讨乱者蚩尤蚩尤为五里雾又多纵虎豹焉帝不胜退而清斋于王屋山之天坛以请命母乃将元始命髣髴见之使者被玄狐裘授帝符曰太乙在前得之者战必克符广三寸长尺咫青玉为廓丹血填之帝拜稽首佩符则复有人首鸟身者曰吾九天玄女也阿母受汝以三宫五意阴阳之畧太乙遁甲六壬步斗之术灵寳五符五胜之文帝复拜稽首受习之以剪祛蚩尤于涿鹿天下大定久之母复使西方之神乘白虎而授帝輿地图若曰与女期以孤竹之野而见我帝即斋戒如期往仰盼天表千乘万骑闪倏而至其扈者多御龙虎乘鸾鹤从七寳幢绮盖骊珠之节傅以流苏坐斑龙车憑如意九曲几既下谓帝曰天下定矣久即戎事无■〈谷九〉苦乎帝再拜谢乃为帝设酒诸花果樽彝大小异状不可辨啖帝紫芝数头九咽为爽已命仙女宋妙英歌万年长生曲竟则冲天去后三岁仲秋朔白虎之神复集曰其以月之望嗣见我于大隗帝复斋戒幸洛师自白坡涉如期而上王屋之坛青鸟来语曰阿母降矣俄而母降其服御

具如孤竹语小歎乃谓帝若曰饮啄不止身不轻思虑不止神不清声色不止心不寧湛然方寸无所营营乃可长生帝欲为母从者设食母笑曰吾众岂待若而后免饥渴也顾左右锡帝碧霞浆赤精果而别黄帝自是日夜修其业鼎成而驭黄龙以升天为悬圃真人后代享之据五帝之中尊位则母教也去黄帝之后四百五十余年舜有虞氏化成母使授以白玉环复授之地图俾分九州岛为十二州已又授白玉管俾吹之以来凤皇舜南巡陟于苍梧之野而为上帝司徒主九疑山则又母教也其又千有一百五十余年而周穆王驾八骏以西至于茂苑之山右执白圭玄璧以见王母好献锦组百纯丝组三百纯母受之明日宴于瑶池之上母为穆王谣曰白云在天山■自出道里悠遠山川间之将子无死尚能复来穆王和曰予归东土和洽诸夏万民平均吾顾见汝比及三年将复而野王毕饮遂驱升于弇山乃纪行迹于弇山之石而树之槐眉曰西王母之山既别舍于旷原东归而歌黄竹曰余一人则淫不皇万民用是享国百年乃陟登于仙籍则又母教也其又八百二十余年而为汉元封元年武帝既好神仙之事祀嵩山筑宫而返夏四月戊辰夜见一青衣美女子怪而诘之女曰我墉宫玉女王子登也为阿母使从昆仑来母将以七月七日宾汝俄忽不见帝以质侍臣东方朔对曰是西王母之紫兰室玉女也母必以其日来矣帝乃期斋祓断中外章奏诸宫掖扫除荒秽设灵真之席于中殿衣地以锦燔百和香然九光灯屏息以俟乙夜所白云轮困起西南挟箫鼓声而近云绡虹旌繚戾纷绕灵官羽流充斥墀陛母戴太真晨纓冠履玄璫鳳文舄衣黄锦袷■〈衤属〉文采射目腰灵飞大绶寶剑双头头上作大华结挟二真而（阙）上帝拜跪起居毕母命帝曰坐坐母侧母为设天厨饌芬旨菱蕤芬若填櫛浆酒殊絕帝所张设异域诸味不敢以荐也顾侍者索七桃大若鸡卵形色青以四食帝帝艳其味甘食辄録核母问何也帝曰拟种之上林后曰此桃三千年仅一实耳中夏地薄种之不生如何帝乃止后复顾侍者召诸真入于是王子登弹八琅璈董双成吹云和笙石公子击昆庭钟许飞琼鼓震灵簧阮灵华拊五灵石范成君击洞庭磬段安香振九天钧安法婴歌玄灵曲和之其词曰大象虽寥廓我把天地户披云沈灵輿儵忽适下土空洞成玄音至灵不容冶太真嘘中唱始知风尘苦頤神三田中纳精六阙下遂成万龙椿驰骋盼九野又曰玄圃遏北台五城焕峩峩启彼无涯津泛此织女河仰上升绛庭下游月窟阿顾眄八落外指招九云遐忽已不觉劳岂悟少与多抚璈命众女咏发感中和妙畅自然乐为此玄云歌韶尽至韵存真音辞无邪少间帝乃前叩头引讐摧谢祈请至道母闵而抚之曰闻之元始天王求长生者取诸身但坚守三一保尔旅族金镞夹草广山黄木昌城玉葢夜山火玉鳳林鸣酢西瑶琼酒中华紫蜜北陵綠阜太上之筑风实云子玉津金浆月精万寿碧海琅菜蓬萊文丑浊河七荣动山高柳玄都绮华云山朱蜜夜河天骨昆吾漆脉空洞灵瓜四劫一实宜陵麟胆炎山夜日扶桑丹榘长河文藻素虬童子九色鳳脑太真虹芝天汉巨草南宫火碧西乡扶老有得食之后天而老太上所服非中仙保其次药有八光太和斑龙黑胎文虎白沫出于西丘七玄飞节九孔连珠云浆玉酒玄圃琼腴钟山白胶王屋青敷

阆风石髓黑河珊瑚蒙山鳳肺灵丘鸾血东英朱菜九节交结太微嘉禾琼华脑实流渊
鲸眼赤河绛璧太玄之酪握二仪脉云渎藜艾昆丘神雀广夜芝草流渊青狄真陵雷精
玄都平盖左食神元右饮玄瀨兰圃金精圆丘紫柰白水灵蛤八咳赤薤万载一生流光
九队有得食之后天而逝天帝之服下仙所逮其次药有九丹金液紫华红英太清九转
五云之浆玄霜绛雪腾跃三黄东嬴白香炎洲飞生八石十芝威僖九光西流石胆东沧
青钱高丘余粮精石琼田太虚还丹盛次金兰长光緑草云童飞干子得服之白日升天
飞仙所服地仙所见其下药有松柏之膏山姜沈精白草泽泻枸杞茯苓菖蒲门冬巨胜
■〈廿黄〉菁云飞赤版桃胶朱英椒麻续断萎蕤黄连草类繁多名有数千子得服之
可以延年身生光泽还发童颜役使羣鬼得为地仙要且録此有阶渐寻遠胜也是以天
官遠妙灵药别灵无竒挺真仙有域今不可谓呼吸六炁安在一身灌溉三宫近出阿庭
浅薄其术弃而不为也夫呼吸御精保明神炁是以精不脱则永久炁长存则不死既得
其和其寿不已又复不用药物之烦费营索之劬劳者也百姓日用故上品谓之自然者
但不得游乎十天飞我八外自得纵身于四域之内亦驻策众灵焉夫始欲修之先营其
炁太上真经所谓行益易之道益者益精易者易形能益能易名上仙籍不益不易不离
死厄行益易者常谓思灵寶也灵者神也寶者精也子但爱精握固闭炁吞液炁化血血
化精精化液液化骨行之不倦精神充溢为之一年易炁二年易血三年易精四年易脉
五年易髓六年易筋七年易骨八年易发九年易形易形则变化变化则道成道成则位
为仙人吐纳六炁口中甘香欲食灵芝存得其味微息挹吞从心所适炁者水也无所不
成至柔之物通致精神矣此元始天王丹房之中微言所说今敕侍笈玉女李庆孙书出
以相付子善録而循焉母敕严车欲去帝固恳留之乃遣侍女郭密香与上元夫人相闻
曰王九光母敬谢不相见者四千余年天事劳我致以愆面汉主好道适见之似了了然
形慢神秽脑血淫漏五藏不淳关胃彭勃骨无津液脉浮反升肉多精少瞳子不夷三尸
狡乱玄白失时殆非仙才不易语至道吾在人间实为臭浊然时复可游望以写细念庸
主对坐悒悒不乐夫人肯暂来否若能屈驾当停相须也俄而郭蜜香以夫人侍者偕至
报云阿环再拜上问起居遠隔绛河扰以官事遂替颜色蜜香至奉信承降尊于汉帝处
登当倾倒先被大帝敕诣玄洲校定天元正尔暂往如是当还还便束带须臾少留帝问
上元夫人何人也母曰此真元之母统十万玉女名篆尊贵神也俄而夫人至向母拜母
止之呼与同坐帝伏谒如礼夫人曰五浊之人耽湎荣利嗜味淫色常耳若以天子贵当
倍之而能舍而愿乐无为者何也母曰有心哉此子夫人复顾曰女好道勤乎女胎性暴
胎性奢胎性淫胎性酷胎性贼暴则气奔而神攻淫则精漏而魂疲奢则真离而灵秽酷
则丧仁而服乱贼则心鬪而外絶女能舍女五愿反诸柔善察下矜怨惠穷施劳存孤济
厄孜孜行之于是闭尔淫养尔神祛至奢归至嗇勤斋戒薄滋味涤鼻腥鸣天鼓饮玉浆
荡华池叩金梁按而行之当有异耳今阿母迁天尊之重而降螭蛄窟妙唱玄发子励之
哉帝再拜谢母抚其背曰女希长生则夫人真女师耳帝睨母巾笈中小卷子盛以紫锦

囊因问何灵真玉文也不审可容肉眸与覩否母出而示之曰此五岳真形图也三天太上所出秘禁极重岂得徇女秽质耶女所可希者灵光生经耳帝叩头勤请不已母乃曰昔上皇之纪太上道君下观六合立天柱条地维安水神乎极阴之源栖大帝于搏桑之墟方丈为理命之室沧浪养九老之堂中植五岳以拟镇辅因山源之规矩盘曲回转周旋委蛇形似书字是故因象制名出为灵真之信佩如传章经行山川百神羣灵尊奉亲迎以女有心今辄相与慎之哉上元夫人嗣戒帝曰阿母发紫台琼笈八会之文以赐女女虽得之而无五帝六甲左右灵飞之符太阴六丁通真遁虚玉女之篆太阳六戊招神天光策精之书左乙混沌东蒙之文右庚素收撮杀之律壬癸六遁隐地八术丙丁八火九赤班文之符六辛入金致黄水月华之法六已石精金光藏影化形之方子午卯酉八禀十决六灵威仪丑辰未戌地真曲素之诀长生紫书三五顺行寅申巳亥紫度炎光内视中方凡阙此十二事者何以朝地祇集山灵摄万鬼榘使蛟龙虎豹乎帝遂请之上元夫人不得叩头流血母复为帝请之复不得至作色曰夫人何意泄之而复秘之耶当别敕三官司直推夫人夫人意殊不怪已而命侍女纪离容至扶广山敕青真小童出六甲左右灵飞致神之方十二事来授帝也寻纪离容至致青真小童讯云弟子阿昌欲受教承阿母相邀诣刘彻家不意天灵至精乃复下降于臭浊中也离容所云尊欲得金书秘文十二事辄封一通付上彻虽有心者实非仙才詎宜以此传泄于行尸乎阿昌近在帝处见言彻者甚众云山鬼哭于丛林孤魂号于绝域兴师旅族有功峻法箕敛纵横白骨骀搔黔首淫泆自恣器言互闻怨气上腾必不得度世也真尊见敕不敢违耳母咲曰言此子者诚多帝亦不必推也此子念道累年斋祷名山校计功过殆以相掩但自今以去勤奉夫人言涤前累耳夫人乃立而致辞以授帝辞多不载帝既受十二事如前语母复戒曰此皆太灵羣文三天太上或天皇三真或九天父母真人赤童所撰着藏于紫陵之台约以北罗之素印以太常之玺警其人而后授之学道者四十年而授得道者四百年而授得仙者四千年而授得真者四万年而授升太上者四十万年而授授非其人是谓泄天道可授不授是谓闭天寶授不以限是谓轻天老受而不敬是谓慢天藻斯四者皆罪也复命侍女宋灵宾更作一图与帝盛以云锦囊具如向巾器中者立以付帝祝曰天高地卑五岳镇形元津激炁沧泽玄精天回九道六和长平太上八会飞天之成真仙节信由兹通灵泄坠灭腐寶归长生帝拜稽首母复曰受符者宜别祭五岳诸仙真灵洁斋而佩之今亦以六甲杂事须用节度相与可明案之也若汝遂克明正身反恶修善后三年七月更来告汝要道也寻有窥于窻者帝惊问何人也母曰女侍郎东方朔吾邻家小儿也性滑稽三偷我桃矣此儿尝以太上教助三天司命録羣仙以放酒惰务谪近金华九疑仙君为陈请原之矣乃复命酒上元夫人自弹云林之璈歌步玄之曲以觞母其辞曰昔涉玄真道腾步登太霞负笈造天关借问太上家忽过紫薇垣真人列如麻淥景清飙起云盖暎朱葩兰宫敞琳阙碧空启琉璃沙丹台结空构暉暉生光华飞鳳蹀躞峙烛龙倚委蛇玉胎来绛芝九色纷相挈挹景练仙骸万劫方童牙谁言寿有终扶桑不为杳母

命侍女田四飞苔歌曰晨登太霞空挹此八玉兰夕入玄元阙采药掇琅玕濯足匏瓜河织女立津盘吐纳挹景云味之当一餐紫微河济济璠轮复朱丹朝发汗漫府暮宿句陈垣去去道不同且各体所安二仪设犹存奚疑亿万春莫与世人说行尸言此难寻与上元夫人聯轳而逝帝恻怛久之乃自撰次其事其所授经符箓以黄金函以白玉轴以珊瑚裘以紫锦贮之柏梁殿斋而后启之以为恒然不能惩于兵革及土木女谒之累母不复降柏梁灾图及十二事俱飞去存者仅墨副焉然帝竟以老寿崩崩而能见形御女伎鬻隧中藏物玉箱玉杖于市按仙法亦尸解之中者则犹用母教也当帝时而咸阳之南关有茅君盈者字叔申以景帝之中五年生十八入恒山学道六年见王君于西城又二十年而王君携之至龟台朝谒母搏颊而拜陈所得于王君者请正焉母曰女心至矣吾所受于吾师元始天王及皇天扶桑大帝君有玉佩金珰之道与太极玄真经女欲得之耶金珰者上清之华盖阴景之内真玉佩者太上之隱玄洞飞之寶章元始搏桑所授太霄二景隱书即玉佩金珰文也又有阴阳二景内真文与本文相随太上法唯令授诸司命女玉札玄挺錄字刊金黄暎内曜素书上清勉之异日上卿司命任也第不闻明堂玄真道亦无由得太清隱书耳于是茅君退而益精思至元帝初元四年而道成赴句曲任又（阙）年而度其弟西河太守衷执金吾固哀帝元寿二年母率王君及方诸青童君降于茅君之靖所绣衣使者冷广子期以天皇火帝之神玺玉册来三天左官御史管修条以太微帝君之八锦輿紫羽华衣来協晨大夫石叔门以太上大道君之金虎真符流金铃来正一上玄玉郎王忠鲍丘以金阙后圣君之四节燕胎流明神芝来拜茅君为东岳上卿司命真君太元真人母与王君设天厨食宴茅君仍授固衷以太霄隱书丹景道精等四部经而别其后若清虚小有天王王褒子登正一三天法师张道陵辅汉以泊九圣七真得受书者皆朝母于昆陵之关而后领事晋咸和末紫虚元君南岳夫人魏华存道成而斋于阳洛隱元之台母偕九微元君金阙后圣君降焉乘八景云輿与偕之清虚上宫出玉清隱书四卷以授之大合乐飡魏夫人时在坐者上元夫人与紫阳左仙宫石路成太极高仙伯延盖公子西城真人王方平太虚真人南岳赤松子桐栢真人王子乔凡三十余真母击节而歌曰驾我八景輿歛然入王清龙旌拂霄上虎旗摄朱兵逍遥玄津际万流无暂停哀此去留会劫尽天地倾当寻无中景不死亦不生体彼自然道寂观合太冥南岳挺真干玉暎辉颖精在任靡其事虚心自受灵嘉会绛河曲相与乐未央上元夫人倚云璈而和歌竟母及上元夫人清虚王君复偕魏夫人与东南行诣天台霍山道句曲金坛茅君宴二日一夕复转而西税于霍山俾夫人即事乃别母有女二十余其著者曰云华上宫夫人长女也讳瑶姬领童真主治玉暎台当帝尧时召禹而诲之命陵容华出上清寶文授诸神人狂章虞千黄麾大翳庚辰童律俾佐擒无支祈辈以奠水土南极夫人第四女也讳林字容真一号紫元夫人或曰南极元君主治大丹宫为金阙后圣君上保司命右英夫人者第十三女也讳媚兰字中林主治苍浪山复为云林夫人紫微夫人者第二十女也讳清娥字愈音主治羽野二夫人俱以晋兴寧中授东华杨司命

道要太真夫人者最小女也有子为三天太上都官司直降主东岳曹事夫人依之以间度马明生入道王世贞曰自南真出而我金母示迹至于县阳子盖千三百年矣不亦寥寥希阔哉始县阳子道成而谒苏元君朱真君偶师霰■〈弥上女下〉辈于集道宫也寔庚辰之夏五月廿又八日真君抚而命之曰金母而主也谒其时矣为具启事一通县阳子具启事则以六月朔飞使上之以次日早得报命曰弟从朱真朱真所犹吾所也县阳子意忽忽不自得会日甫昃而有后命约以次日晡时见县阳子即发食顷而抵集道宫与真人之仙使偕黎明候命阙下四周皆积水白云弥滃五彩间发不辨天地雕甍碧瓦时出时没县阳子恍然自失曰此瑶池也而近乃尔或曰行宫也典谒者入而不得命彷徨久之更一日真君至乃始报许宫殿大小若人间帝者其地无甃砌色正白坚润可鉴栋柱似竹木亦似玉而殷殷红紫螺文糺错可爱县阳子伏谒如礼母令前县阳子前乃降色慰劳曰子良若何修而遂证此道耶县阳起立羣真后覩母所御若一横案纵可五六尺衡丈许而上又设一小坐绣彩与云飞相错莫可辨左右列女真数百人其傍操幡麾羽扇唾壶翳拂者复数百人中或交相贺曰益一佳侣矣亦有举手贺县阳子者左班之首曰毛夫人少美然色庄甚其三曰南真魏夫人发鹤矣而温若元君与真君故同列也金母忽驾起云报谒真君于集道宫羣真从其下体氛彩拥翳之不复见身动而倏忽已達宫所坐定县阳子复前谒金母乃顾左右启箱出黄色天衣一袭赐之衣如绫锦而不见针线迹服之则紧束可体曰而以御寒暑也又赐紫磨金镯二环镂梵书十余如印文故称印镯云县阳子拜赐归以语父学士锡爵甚详且云质之列仙传而不合者三母貌固端美然亦似中岁人而传称之过丽一也魏夫人老而传谓成道时返少若处女子者二也竟日一再饮仅天浆而传谓具行厨百味者三也又云母尝造观世音大士礼恭甚大士为起延坐膝语谈笑良欸欸母即十地菩萨化也或以为文殊县阳子之语云尔或谓母自开辟与元始玉晨并毓而胡文殊之化夫文殊者古佛也开辟之先称之矣或谓母天中天也岂其以欲界故而有女夫女者气所化也四王天之有天男女盖倏然而现膝前以绿表父母耳佛书固言之矣或又谓男真隶木公今胡以不称木公金母司女籍其不女籍者若轩辕周穆而下棼如也嗟嗟是胡可思议哉世贞又曰始余读汉武魏夫人诸传见其文章歌诗徃徃类晋六朝语而疑之及读真诰而稍有会以灵真之旨或当尔尔五言古体肇自苏李河阳上元四飞之咏固为之前茅哉乃今聆我师县阳子所遘会抑何昭灼不爽也语云少所见多所怪世尊丈六紫金身阎浮提覩之云尔十地菩萨见其四十亿万里六道下者以为五尺童且炭色呜呼奈何以一阐提见而论大道也虽然其文与歌诗或不能无傅饰吾故备着而两存其疑信者

县鸾大师纪

县阳仙师之示化也顾女史分谕众若曰而曹今者知我去乎而不知我来我县鸾

菩萨也所以来者为度而曹尔盖化之一月而余始读宣律公所撰高僧传悉其事节采之师传中已又于莲宗乐邦诸集及它传加悉之乃草鸾公纪鸾公者一曰峦公不详其姓字阙系雁门人也家去五台百里而遥文殊之道场在焉诸灵怪种种然不恒现现必以縁縁必以深浅为巨细而公年未志学郗侣穷探备覩宏胜遽皈心释门决筴削染精陶内典傍及二乘属五凉奠平大集经至自天竺翻译虽备窅奥难解公慨然思为注故以启初地湛精腐毫毕锐继晷铅槩甫毕膏肓示隙乃暂尔辍功行访医药至汾州泰陵故墟入城东门忽覩天裂竇气郁淳交光相罗六欲阶位炯列森峙俄而复合灵腑若濯沈痾顿愈将返精兰追绎故绪忽自疑曰是身危脆迁改刹那年不待人道将安傅吾姑缉吾身以为道橐乎而是时梁有陶隱居者宪章农岐兼综籙素方之内外翕然推养生主公将谒而受术焉以梁之大通中渡江叩台城通刺称北国僧某请见典客意其为间武帝览刺咲曰此岂为间者引入重云殿改复道曰千迷试之殿中设高坐上安几拂而身被袈裟冒纳帽傍憩小绳床以待公直上殿左右顾无人遂登坐执拂竖性义而三命帝曰大檀越安在今畧已标叙能相质不帝乃却纳帽数关徃复旌辙甫交思蓄余勇顾谓公曰葳蕤至矣暂还以需诘旦公遂孑然孤出所经诘曲二十余门了无误者帝骇曰此千迷道从官犹难之如何不假典客而自无误及明即诏公入对太极殿降阶握手优以师宾示瑕攻坚迭备敌主既各畅本懷徐问公所繇集公曰本师西竺而忧东岱欲从陶隱居问方术延此色身以受布萨耳帝曰隱居坐啸朱明非可屈者为传致公书即得报曰去月耳闻音声今晨眼受文字将由顶礼深积故使真应来仪正尔整拂藤蒲具陈花水端襟倾思伫聆警锡也公遂至隱居所欣然叹晚尽以仙方十卷将赠返渡浙江值阳侯之警贾浪七日行旅都断公信屨江浒有鲍郎子庙者入而致情且许为新宇貌神即示相如少年子拱揖听命斯须颺息公安行抵岸报命梁帝帝许如约鼎饰即晨拜表北首既抵魏境拟卜名麓依止修餌行届洛中以所受方请于三藏流支唾地曰胡轻相儼也而所不死得少时不死耳死即轮回三有矣出十六观经授之曰是真不死方也夫不生者长生非不死者不死以修此而超生死故也公曰善遂颺西方观且以授迪学人流布郡邑多所开济魏帝闻而嘉重之号曰神鸾下敕令住并州大刹晚节四摩汾之壁谷玄中时时徃介山阴别构阿练千众羯磨咸取则焉所称鸾公岩是也时有僧达者亦以大通中南游志公覩而识之以见梁武至是法席骈盛芳讯肆驰武帝时时北面和南且谓鸾达二公肉身菩萨悔不昔留三事供养庶几铭石之赞达磨矣公神宇高遠识情宏达机锋所触前无衡抗调心炼气对病识縁尝着调气论隋著作郎王邵注之又撰淨土十二偈续龙树偈及安乐集十二卷魏兴和四年即梁武之大同八年也于汾之平遥山寺持诵次忽有梵比丘轩然而入曰吾龙树也以汝坚淨土心聊相证耳言已倏灭公乃示微恙久之大期将至悉集弟子广示罪福勉之精进训励繁苦令齐声唱阿弥陀佛公敛视竚听俄尔奄然俗腊六十有七寻有音声人部自西振空而来幡花幢盖缤纷云表■〈施，冉代也〉檀艾蒨勃郁庭院守令具状上闻特勅塋于泰陵文谷立碑纪行

焉后八十七年而有僧道绰事道绰者并之汾水人也少便服膺道教安居玄中摩娑遗碑讲授净业既得蕴空以真观二年四月八日浴佛毕会众告逝忽覩五色云气中公乘七宝船俯命绰曰汝净土堂成但余业未尽少迟岁年耳诸化佛菩萨后先翼公者不可胜计绰后开九帙而终语见绰公传嗟乎净土者不退转地也公化之八十七年而先诸佛菩萨命绰公其阶级不浅矣更九百五十四年而却为昙阳子用童女托体宰官得灵真之度而始证欲界果者何也菩萨行化众生不辞舍尊就卑以示出入之无间观自在之所以达磨僧伽文殊普贤之所以寒山拾得弥勒之所以传大士也顺逆方便不辞出入三氏以明大道之无二儒童光净之所以洙济迦叶之所以苦县也学者奈何显岐而交相嫉也宣公传谓公得流支语则取陶先生方而烬之此亦偏门语耳夫既取陶先生方而烬之后胡以着调气论也且夫宣之所谓对病识缘者何能亡相矛盾也陶先生之礼鄮县阿育塔而表胜力菩萨缘然不废蓬莱都水鸾公之谢陶先生方而受十六观然不废朱真君弟子昙阳子表女身仅二十三而化然不废三教师呜呼真大叅同哉

纪丘长春及僧

余少尝阅陆文量所著菽园杂记谓元太祖以宫嫔赐丘长春逼使污之长春乃自刃其势以誓得不污京师人至秋九月合道俗为素馔以祀白庵九会此宪庙时语也余游京师绝不闻举此会徧考七真谱传甘源录及风云庆会磻溪集诸书皆无之又长春应元祖聘年已七十有六不应有此事而于白云观所塑像王太史所惠图验之独长春俨然一老中涓积余疑者十余年而不可解近阅丘公弟子尹清和诸君语录乃始叅考得其详而记之尹谓公自苦志炼磨后遇二死魔一自净身几死一为飞石扑折三肋肢几死又谓公自揣福慧命相俱不能如丹阳长真诸公以十年炼心而犹未得净每夜辄束草履行山巅往返者几二十徧以祛睡魔五十日而后心死觉真性常明莹然如水晶塔一日凡念忽起痛哭自誓久之赴长安统军斋一夕而三漏复痛哭自誓坚固逾于昔寻道经天魔为飞石所中折肋肢以是叅伍公净身事诚有之当在赴统军斋夕后也公又谓重阳真人诸弟子独马丹阳最长最先得凡二岁加半而得谭长春五岁加半而得刘长生七岁而半而得己最少最为重阳所属意而最晚得踰二十年而得之寻复夺之又久而始复得之所谓夺者当亦谓统军斋夕事也僧中亦有一人曰光仪光仪者故宗室琅琊王子也天后朝王以从越王贞起义法至族光仪仅八岁逃遇圣僧为披削导之至一伽蓝遂为僧十八而琅琊之冤白有诏推求得光仪传诣扶风李使君女甫笄见而悦其美乘李出多将侍婢逼淫之光仪度不可已诡谓女曰久秽请就浴而后寝处既浴闭关操削发刀顾持其势曰为尔此根而受欲逼除之何难即刃而投诸地闷绝乃苏既入都力辞王爵为僧于终南山法兴寺大展道价提奖劝诱道俗弟子恒百千人至开元末枕肱右肋而寂将葬状貌若生异香芬馥彩云覆輶车不散白鹤数百嘹唳空中或谓

世尊勒束黄门不男者不得入道又玄教亦云阳根一绝人理总废从何处修验彼二君子者何以哉不知心境既彻性真常湛固自有离形而超悟者况莲花宝台悉现化男之机（阙）王弟生获转根之报神化感应固自照灼不可思议也故曰纯觉遗身斯为第一旨哉

纪王孝子世民事

王世民者金华之武义诸生也父曰某业南亩自给愿而弱与族子之悍者醉狎而口语相失也族子倚之墙筑其肋伤困卧且死抚世民曰死柰何时世民犹在稚也泣曰直之官不则死之父曰不然直之官必检检则骨析我是重僂我也且若彼钱神何汝孱有汝母胡以死哉父死而诸宗人之长者以好会请捐族子之腴五十亩偿世民曰以为若死生资不则吾曹力能屈若也世民饮泣而见母以父之遗命告母曰秘之其姑受田而葬汝父世民既受田复白母曰家幸给饘粥毋食讎遗也田之入以共赋役外手籍其数市金而封之扃固之岁以为常世民自是口不及父时事而昼夜读书入试有司补博士弟子以至婚娶举一孺子教弱弟使亦有成立而其于族子以兄礼礼之亡间每有召宴则亦往饮食谈咲如恒时然归必识其数曰脯菜若干浆粥醯酱若干为镗几何族子意世民且忘之即母亦意且忘之冀共养没齿而已然世民每岁旦即谒家祠之父主前而以两筵簞卜之不吉则掩泣而退至辛巳卜得吉乃走冶工所铸一利刃已厌其薄不任弃之复为刚斧镌姓名于背而匣焉日伺族子所之一日族子之它山之姻家饮大醉童子掖而归至无人所世民前揖曰兄何自醉若此族子曰吾饮已氏甚乐也弟何之世民指其傍山僻凹曰母老矣先陇陬不受归而兹山有当于青乌子书者兄试为我铨之族子盖素挟称其术者也世民谓童子而迟我山之址而吾掖兄上既上袖斧而挥之中项踣族子呼晷曰杀我耶世民哭曰畴令若死吾父吾腐心者十年矣而今得反之若姑往吾亦随若矣族子不能对再斧其肋立死囊其首而下俄童子寻声至世民叱曰吾所以不偕汝上者恐邂逅伤汝报而家吾身赴狱矣归致首于家祠之父主前曰幸不辱也拜辞其母曰弟今壮可养有孙不鬼馁矣疾趋至县令所出袖中牒诵而授之且出其藏金如干曰此讎亩所出也又出其它镗如干曰此饮讎费也愿并亩悉以还之令诘曰死者不汝兄耶世民恚曰彼讎也杀父安得兄之且囚所以来偿死耳非蕲脱死也于是世民之母来请代曰妾所使也其弟亦来代曰某实为之兄不与也世民曰手刃讎者世民也能抚世民孤者母也代世民养母者弟也何代为令义之俾浮系于丽谯之上饮食之具其事以请监司檄它邑令某与令会勘它邑令谓世民所杀族子殴世民父死者也法殴从父死者斩世民杀应斩之人当减徒然法必检父尸而后狱可成检有日矣世民闻之自谯投而下败面折肢久之乃苏叹曰吾为父复讎事已毕偿死法也且吾往者独不能闻之官惧暴我父骨以牵率至今今乃为我而暴我父骨也吾杜吾口矣自是绝食

令使其所厚力强之不应积十日倏然而逝它邑令愧逃去御史闻而嗟赏久之下邑令为祠世民令请以世民所归田金为材费御史曰讎金也而资之以祠孝子安乎乃议发他赎缓嗟乎报讎快心事耳即使烈男子能之然未有纯恒不息因时处中从容之死如世民者其在伦常不亦中行之圣乎哉即尧孔所称奚让焉友人曹昌先自金华归谈其事时漏下三刻微灯忽明毛骨为悚退而绎其事欲为作一传而质之曹不能举其父与讎二令及弟名母何氏聊纪其畧以待异日

书鸡鹤事

余恒以未明起礼诵而虞不获时童子买一鸡犹稚久之始能啼然不为置敌偶不辨其能鬪与否也园丁以一驯鹤至步中庭饮食自如鸡始自匿不敢近已就食焉而稍亲已又若有竞者鸡倏起搏鹤鹤啄其冠而举之数掷乃下冠血涔涔流矣鸡复奋翼起高与鹤齐然不能突其喙而入鹤复啄鸡翼而举之又数掷不下童子为解之鸡尚竦身自淬砺也已复前则为鹤所蹈而数啄其翅羽离披散坠童子惧其遂毙也抱而去息之它所浹晨鹤复食庭中鸡匿身松柏间忽从后奄至趣其后距鹤惊不暇反顾而走则追逐之走愈急逐愈劲匿跳入水中乃已又明日园丁复以鹤之雄至谓其戾足以刺五尺童子者鸡复持击前鹤法击之则败遁愈甚自是鹤匿林左右探伺计惟有走而已嗟夫鹤之形高五倍于鸡其大三倍之其力四倍之鸡不以不相当故逆自沮鬪而不以伤故退却从容以完其气多方以图其间掩其所不备攻其所不能顾破其胆使不复振夫岂真悍勇趨敢哉厥亦有胆智焉季路之所以饰而冠也彼二鹤者但植立毋缩一喙足以逆十距无难也计不出此而不羞走者何也汝独不忧夫摩空之鷗俯而尽汝技汝不血肉乎哉为我语山司徒曰嵇延祖孱且败矣

纪汉昭烈关张诸葛画壁神趣事

故汉昭烈皇帝与前将军行荆州事汉寿亭关忠义侯云长车骑将军领司隶校尉阆州牧西乡张桓侯翼德同起义范阳破黄巾累战勋至领豫州而义师败投刘景升始礼故丞相益州牧武乡诸葛忠武侯孔明于南阳之庐鼎足而赞成霸业所谓谊等昆季情则肺腑寄者以心报者以身盖自古迄今君臣之谊未有若是其殷且笃者考之真诰昭烈见为酆都之北河侯属仙官籍而孔明翼德皆血食于蜀者累世其威神极为赫奕迨元之至治辛酉孔明追封威烈忠武显宁仁济王天历戊辰云长封显灵义勇武安英济王后至元庚辰翼德封武义忠显英烈灵惠助顺王夫生为明人没为明神则自古记之矣第孔明不免再出而为韦南康以功食于蜀翼德不免再出而为岳少保以忠殉于宋而云长独超然自脱于轮回之外其威神行天下万世愈久而愈大岂非我天台智者

之力掇之使入三摩钵提耶今世人知云长之神而不知昭烈孔明翼德之神又不知云长之所以久且大故乞尤生绘像于庙后之寝宫壁而志其大畧如左

纪胡金事二义仆事

胡金事者讳某字某徽之某邑人也尝举进士为尚书郎其金事而得贵州则以道远故不携家而所从苍头曰胡文训文学者为书室掌故最近能得其意金事所按部曰毕节尝以早暮■行瘴雾中遂感脾疾久益羸削且殆文训忧之甚曰吾故闻之老长者言寝瘵非人肉不得起乃斋沐割股肉血杂粥药进之金事病为小损居月余益笃且易箠而是时文训方以股创卧疾文学痛不忍见金事死曰死而尚可代也吾此六尺直鸿毛耳即不获代而主君卒不讳孤魂在万里外谁与从者有先死以俟而已遂自刳其咽喉所不合者仅指许然竟不死而金事死矣嗟乎人子之于亲有割股而药者人妇之于夫有以死殉者此皆缘于深爱至契发于不得已之痛而始捐其所不易捐是二苍头事金事非久宁复有以固系其心又岂有诗书礼教为之摩浹于胸腑而一旦慨然争先而赴义若此人心固不与末俗而俱死也金事之治毕节即安氏酋地安氏之先君长不知其几然代有篡逆矫攘之祸金事所治多惠利拊循之政既浹而始以樽节退让诱之其人且入笠矣今又能感其仆以义其仆又能奋然以义殉其主谁谓夷非人覩此而不奋发兴起哉吾乡侍御毛君按贵州而得其状书谓余先生好称节义事故所纪任韩二馆人人称之矣其为我纪二苍头亡何行部至毕节毕节人筑祠宫请祀金事侍御善而许之复书谓余幸终此诺且为刻石而壁之祠以风夷嗟夫孰谓夷非人哉自是而有亲上死长者二苍头故与有力也虽然微侍御君阐之夷且以二苍头用他故死即死而不见述何所贵死也

弇州续稿卷六十六

●钦定四库全书

弇州续稿卷六十七

(明) 王世贞 撰

○文部

△传

五鹿子传

五鹿子名仲山字仁卿居自号五鹿不知其所以而康太学时万尝乞余诗戏之五鹿岳岳云自是颇有知者五鹿子之先陈虎林人也而徙家华亭其王父某与中表张翁友善张翁亡子欲得王父子子之而王父指其季曰以乞汝季遂冒张氏稍长能自树立起家娶妇有丈夫子四而五鹿子复其季也少惇敏通经术补博士弟子而诸舅奉化令徐献忠者以才高倾一时鲜所许可顾独善五鹿子每入谒必缓带接膝为竟日谈时语人是子何必减殷家韩康伯也父季念以诸子长其人羯羠而屋舍陋不能容始议析箸而材五鹿子小欲有斫私而五鹿子让弗取取最下瘠者顾独与其父母偕五鹿子之治经术精试颇褒然得既廩于官以其业教授诸生诸生日益进所奉修帛足以资共养父白屋中不至绝甘毳也而五鹿子益夔夔孝谨一兄仲友一弟仲甫贫不能具饘粥各有子不能室五鹿子为之食其父而室其子一兄仲孝瘦岁赋被系为之悉橐以偿而出之女弟适郡文学胡生五鹿子重其行悯其贫为抚诸甥若子妇父朱贞悔蚤世五鹿子既已治葬而曰吾不忍其嫠与孤也别僦舍迎而衣食焉及孤之长而授偶子之妇父赵完素亦蚤世其嫠与孤如贞悔也五鹿子顾其子曰非而所能办吾且资若诸所以待之亦如贞悔五鹿子之父母居恒谓吾唯一子盖终其身不复就他子养歿而调棺殓卜窆窆亦唯一五鹿子也五鹿子性又好施予人或相谓夫已氏者以窆书生而终始奉父母推及兄弟子姓外家无弗共者岂其有所受丹术耶而司其橐则弟子后先所奉修帛如洗矣于是督学御史褚君郭君李君巡按御史邵君田君每行部辄以行谊旌五鹿子青浦令屠长卿罗（阙）至表其庐以比于郑康成五鹿子恂恂如弗克胜也诸美五鹿子者赠之诗歌累百余篇有称经明行修者盛世醇儒者弇州外史曰五鹿子以授经闻东南而其弟子如进士田炯乡进士宋资太学康时万诸生张邦莹仅数曹然亦不尽显顾其被服儒素雍容樽节有西河之风识者推本所自而得五鹿子虽然余竟不能定五鹿子为何如人也

长梧封人传

长梧封人者顾其姓汝玉其名栗如其字吴其里其称长梧封人者何顾君以子贵凡再受封封皆五品故自称封人曰长梧则引庄生据梧语以自况也顾之先为越支庶自句践起而其后在孙吴以至六季皆最为甲族自王谢繇北来顾始稍乙明之初以豪徙京师有支子赘于张得不徙然遂从张几失姓久之始复己而其孙显复赘于吴亦几失姓子钺笃行君子人也入赘当得官不肯仕以终有丈夫子二君其仲也嗟乎顾之为顾难矣君以甲申五月十三日生而其父难之曰五月兒不祥法不举举且妨父大父

呵之曰孟尝君不云乎即以长齐户妨父者高其户使不得齐何害遂举君而俗故称竹不易徙至五月十三日而醉徙之茂君异日叹曰竹醉而徙乃茂者全其天也吾之生以天全哉遂自号曰竹醉生老更称竹醉翁云君质颖甚读书一目三行下为文有奇气且肆博士矣而父坐鼓铸株累当戍狱甚急君上书谏者辞甚哀恳得不瘐死然业少挫君益发愤读书二十七补诸生试于学使者得第一人遂廩于庠君既少罹家难已而为盗憎橐如洗并去人所典衣物称贷而偿之曰盗非憎诸彼也家贫徙箸入城顾必得今博士王敬臣巷而邻之曰吾以观德也博士亦能知君君以母韦太夫人渐老而有子其志工制科业即委之书曰吾有余力藉供养母不能从少年伊吾当是时君所与社中习制科业者今袁宗伯抑之发解南省擢进士友婿申少师士章虽蚤逝然有子汝默状元及第君既以奇其志尝抚而笑曰吾不敢望抑之若能汝默乎哉未几而其志膺选贡韦太夫人喜君曰未也其志遂连第进士由长兴司理进同知南昌府考最于是君亦且贡矣舍而就封或谓顾君岳岳俛得官奈何舍而从儿子章服君笑曰吾不以一日佚易升斗也君故好为诗以不获意于名场则益工诗诸所经变态憔悴愉适之境与游览酬酢缱绻乖睽之际一于诗乎发之居谓愁欲以当饮饥欲以当食倦欲以当偃息天下之快多矣度非诗不足当也其深思之极见若为雕刳者然要归之自然即率尔而为之若不经意然求其不合于古者鲜也所善皇甫子循司勳刘子威侍御张幼于周懋修二太学倡和无间其志入为工部郎君间一之京邸视之少师为开东阁行酒修甥礼甚备归而以诗赠君且怅然曰竟不能停阿游驾耶君念欲徙居行求得故朱中丞先生紈祠傍舍曰吾去孝子而得忠臣故快舍傍隙地结庐读书其中杂蒔卉药第使独多竹谓孺子毋忘醉时吾得长如竹足矣君甚好行德而自以寡故伤其德之不能徧一日叹曰使吾独行德孰若晓天下使人人自行德哉于是采古经传格言及子史稗官之纪凡善福而淫祸者会而梓之为树德录二卷其言天人征应之理核矣曰无为而为善者固鲜也诱而善去诱而恶奚啻千里今年丁亥君年六十四治圻于虎丘之东塘游而乐之为诗见志且语其志曰吾甚严琅琊王先生幸及吾之见之为我乞一言弇州生曰吾吴最为天下雄郡金阊之中崇薨腴圃相望封人舍而之乎硤确之区求所谓贤者祠宇而邻之此其意宁与伯鸾之依皋氏异哉世所共荣不必有之世所共讳不必无之以诗自适优游天年抑亦達矣乃所谓树德录者指近而警深守约而施博甚哉封人之工为仁术也

大理卿宋公传

宋公者讳仪望字望之其先丹阳太守哲徙吉水为吉水人已又徙永丰定为永丰人公之曾大父邦铉尝输粟助边拜彩币羊酒之赐里人荣之大父七品散官魁昂父闻义以公贵赠吴县令再赠御史公之为诸生也数试于有司辄冠然省试而屈亦如之既荐即第进士为吴县令未几即擢河南道御史移疾归复为御史御史之未几即超为大

理右寺丞已落职补知夷陵州未上即拜霸州兵备僉事亡何超为大名兵备副使移监福建军寻削二秩需次久之补四川按察僉事即复为其按察之副使移视福建学政以妇卒自免归道迁其省叅政即入为太仆少卿甫上迁大理左少卿遂进都察院右僉都御史巡抚南直隶提督军务粮储久之以功迁右副都御史改南京大理寺卿已转大理卿有所齟齬乞归需次里中而公卒矣公之成进士自丁未以至戊寅踰三十载一居忧一移疾一自免再坐谪再需次而其起家与迁移之峻且速大畧亦相当公之不出天下以为非公无可与任者而及其既出则蹶而肘之必不使其有以自遂其在下位苟遇一名缺亦必念及公以为非公不足当而既迁之后复喻喻訾訾互见指目以躡致累公盖公之才识果敏精神焕发足以鼓舞人之视听而时亦一中其忌至于遒骨劲挺高论横溢必不肯舍己而徇人之好其忌者与知者错而为公屈伸最后知公者方柄国举东南腹心之地以委公公亦竭其力以大有显见天下方延颈冀公之大用而卒不胜其忌者公亦老且不起矣呜呼人耶天耶始公令吴而其邑人犹少之公不动声色发摘奸弊如神胥吏洗手而治念诸区所苦者长赋而长赋所苦者长运往往破家公倡诸区各出公田以贍之所出田亩计本受田为差次即贵势无得免者民以不困敌大入寇饷不给大司农计专官并责吴旧赋人汹汹且甯公白郡榜慰之而条处其缓急甯者复矣乃与比邑合而置义塚于六门之郭禁毋得水火葬吴俗几变言公偃故吴人公创文学书院以祠之与诸生讲道肄业其中后皆出为名公卿如今魏郡太原二相国其表表者公既精于法比时时丽情两造数百人不踰时解去而他所经画擗节皆出人意表故既征而人为尸事之为御史时上书论大将军仇鸾拥劲兵居肘腋间挟寇自重无人臣礼时鸾恃宠骄甚闻者为缩舌上虽内私鸾而无以易公寝不下未几鸾暴死事露僂尸及妻子公意益发舒陈时务十二策为识者所重出按河东鹺持法亡所徇许鹺赋简少事公创河东书院申东越之学以与诸生讲习多兴起者移疾归省母病痊复为御史司大计时公之乡人幸相有所昵子横而贪公欲糺之不果因论边事遂及东南而以督臣胡之淫侈抚臣阮之婪荒请摄治之二臣昵子之心膂也以是不悦公而会公督视三殿大朝门又中贵人议工直日一饗公不可又欲悉易殿址石公又不可第易其毁弗堪者而昵子私贾人五千金属工部欧阳尚书者辟与工事公又持不可于是众怨丛矣公之迁大理丞昵子自以为公功公无所报谢而逡巡引避以请急归适风霾变宰相欲有所废树及大计吏而尚书迁吏部与昵子比而谋谪公公之兵备霸州也前是有西宁侯者道其地盗夜迫之仓皇溺死尽剽其资财诏捕之格甚峻公钩得其渠党悉置于理霸人慑公威神竟公任无窃发者涿为畿南辅公请城之最为坚完又疏豁洪武以来养马逋税民大悦其自大名移闽监军名为材公而实远之且困以兵事后太宰于公按鹺时有所不悦故也公至闽与大帅戚继光合策破倭酋斩无筭入与棘事所撰程序义冠一时籍籍称公有文武材而计吏之谪复下矣太宰修前指必欲斥公以快而考功郎一儒力持之曰宋某材且法不至斥必斥宋某请先斥郎乃止议谪而公方从容游武夷赋诗归而灌园读

书意甚适也属边事棘廷荐公者前后十八疏于是公补四川按察佥事以至复为副使视福建学政一以高皇帝卧碑训诸生而时刻东越理性诸书翼之所以鼓舞振德尤备自是叅其省政佐太仆大理皆不久迁无可见者其抚南直隶九郡则自江陵张相国居正所谓知公者也公故令吴深晓民间疾苦与吏弊风俗至则一切务为宽大而于云间金坛溧阳豪贵人之匿赋而以重累单赤者亡所纵贷诸郡邑中水公上书请减岁租发储粟以赈水不大灾是时海警稍解吏士讳言兵而公独与兵使者王叔杲计益修余皇炼卒伍饬戎器申严赏罚亡几倭果狎至公遣舟师三覆之于外洋俘斩虜口夺仗器甚众公于清浊靡所不扬激而所敦励尤在忠节会有诏雪靖难死事诸臣公谓金陵其死事所也建表忠祠聚而祀之公之乡人宋扬邦又以不屈女真死江宁其祠与墓在焉而墓且湮矣公行求得之为置封树因故祠址宫而岁飨荐焉太常卿袁公洪愈国子祭酒姜公宝皆里居非相国所急而姜尤甚公力荐之意与左使琐臣绳公公不顾人以是知公虽以材见器相国要之不苟为附离者坐与御史论塩盗事相异同公廷辨不少屈虽入为廷尉犹用前隙指訾公公所部一郎病狂易尝阑入交戟肆侮公置弗较也而郎犹时时毁公偶有中之者遂继及之相国绌其说然犹小停公任以解公遂决意不复出以至卒海内咸惜之得年六十有五耳公生而磊落感慨有大人志一日读宋史至秦桧陷岳武穆事掩卷而叹赠公恠之对曰令兒生其时不饮血而碎桧首者有如日又读唐史裴度传所谓贼灭则朝天有期贼在则归阙无日大嗟泣曰壮哉男子当如此耳赠公谓公当以名义见媿且必能为县官致死力公工于举子业负重名然好习史汉书及少陵氏诗善其言矣偶从乡先生聂贞襄公豹所得闻东越良知之旨而服膺焉东越者故王文成公守仁也公遂游贞襄公门已又游欧阳文庄公德邹文庄公守益门贞襄及两文庄公皆重公以为能负荷大事最后印证于故罗文恭公洪先其诣益醇深时方议以文成公从祀孔庙而拘儒或难之公曰是未易以口舌争也乃着或问一篇反复数千言大较谓尧舜开道心精一之传未尝求理于物特心于外孔门大学首言明明德明德即道心之灵觉不昧者然则明明德之功要在致知而训故之士乃谓致知者推极其知识是求之物而特之外也文成公指而示人曰致吾心之良知而已是知也孟子之所谓孩提之知爱敬颜子之有不善未尝不知也然则得大学之本旨而上溯尧舜精一之传者无如文成公公之或问出见者无不爽然后十余年卒以王文成公论祀公于学能识其大其为人气豪不帖帖细琐然内行特纯笃赠公有五子公最晚举能得其心歿而公哭之毁悉其妇橐装以营丧葬母太夫人九十矣大会客称觞为乐比毕会入而视省者四五公时已踰艾犹烝烝然孺子慕也所受产室悉以让诸兄兼为行履得好田圃辄买益之推而至于三族之亲以逮疎者又推而至于交知及闾左亡不沾公之德以为恒卒然有凶吉取之若寄公亦自忘其德于人少喜其邑之阳山以自号有诗曰阳山稿晚抚吴又喜句曲之华阳尽哀其诗文目之曰华阳馆集始难子子仲兄之次子瑜已而自有子曰翊曰玘曰珽有女婚嫁皆名族详胡观察直行状中

弇州生曰胡观察曾中丞之称公古文辞也谓世之师述迁史汉者刻意剝心雕镂模拟其极至于盗哭为悲借笑为欢公每叹以为中古影子一切扫去之咏歌必性情论议自道法因其固然本其诚然嗟乎文不在兹乎哉乃胡公又谓不佞齐名公夫不佞恶能齐名公记在燕中与公还往然不数论文叩其学亦不甚酬返独酒间为歌孟氏牛山之木章击节咏叹低昂宕佚不假长字而余心豁然若有会又若有创警者夫公之益我深也若公所遭际在通塞之间蹶则必起起则必蹶以为人乎人所不宜有天乎天所不可解虽然公所自立于天人之外者微矣

徐节妇汤氏传

国家于嫠妇未三十而守志者及其踰五十也而旌表其门闾所以风励女德至隆重也然往往多蹈常而食腴无甚危甚艰之事以拂挠之仅守其一节以终其身而已君子犹谓之贤要未有婴百罹出万死而卒以其孤济若徐节妇者也徐节妇者汤女也汤在宋以睦见旌为义门凡二十传而为津津无子仅有一女曰节妇生五岁而津死母吴抱季之最少子而子之节妇待之甚雍容无间父所遗橐悉推以与之不吝也十七归徐君（阙）甫四岁而失母七岁而失父父故豪负气谊与里中雠家相阅夜见构以不良死节妇之事徐君固柔嫵相爱然不欲以狎进间与道两家变难荼苦未尝不嗟咨涕洟也乃徐君及其父死时状则齿断断髮上指冠矣而会徐君读书属文露其颖已又露其憾于雠者则益惧且妬之节妇年十九生子明德仅弥月而徐君中寒疾颇■〈谷丸〉雠者赂医故左其药遂得死节妇痛极絶而复苏者数矣已屏汤粥弗进时徐氏独世大父子先夫妇在妇沈孺人指明德而抚之曰若夫所为血胤者此呱呱耳若从而夫死谁与乳此兒且也何以见若夫地下节妇乃勉强食而断发毁容不栉沐鏹户垂幌亲族罕识其面当是时沈孺人倦家政而才节妇悉以委之节妇为谨橐钥治■〈施，酉代方〉醴御臧获秩秩有度子先有三女晚始举一子后明德节妇之字之犹明德也三女之视节妇非嫂也而姊矣而亡何沈孺人卒节妇乃独处自治炊废丘之鹵百亩人或谓所受王父遗不均以动节妇者节妇指明德而谢曰是兒苟有立宁遗产足埒哉于是夜海明德受书篝灯荧然机杼声与占毕先后矣明德小懈即跪之庭责数甚苦曰佚汝而成汝懈是吾负而先人也涕泣数行下明德益自感奋补博士弟子有声然屡试辄不利最后以倭难匿身幕府上绩簿天官授宝源局为大使迎节妇京邸具冠服伏谒节妇愀然曰吾不望汝仅仅至此虽然亦足酬而父矣吾闻之孝弟忠信礼义廉耻此八者古人之所恒言而今人之所希备者也勉之毋以禄薄而怠事毋以官冗而挫节明德顿首拜受教以故居官有廉能声当穆庙时国家有干清永陵诸工役明德皆与劳沾赐金币者凡二十余次以寿节妇节妇未尝色喜曰小臣辱上恩何以报塞盖节妇业四十六而有司

以状闻御史年不应格唯岁给粟帛而已又十年而明德具疏上请下御史验实大宗伯奏如例敕旌其门于是粟帛有恒给而会明德满考赐赠徐母如其官而节妇之旌典适下焚香望阙谢上恩已睨明德泛澜久之曰若所以为父母足矣吾不枉抚若明德用节妇教数却商人饷罢之日其橐萧然跪谢不能供养节妇笑曰吾已长斋事佛何所烦汝簋且清白吏养故甘也乃率明德妇课督女红而身从三孙授经夜就灯一室曰老者与少者孰勤也及两孙经明补博士弟子已复举曾孙乃悬徐君像指以告明德曰吾不自意全又全汝今实见汝三子一孙吾且下报而父矣明德贫然好客客多长者节妇至脱簪珥为酒费毋使叠耻明德又间购古文奇籍名画以空其橐妇亦弗问也用是得贤雅声而节妇年七十五矣忽中寒疾且殆明德露祷于天中夜忽闻空中有声若掷石迹之得异香惊喜甚液汤而饮之病苏食饮如恒时居半月忽语明德曰明日午时良乎吾欲见汝弟弘德弘德者即节妇所依沈孺人时少叔氏之子也叔氏卒节妇居恒鞠之如叔氏而加诲训成立为诸生日午弘德来悲喜骈集慰语者许时俄一笑而逝既殓颜如生踰年明德葬节妇而来谒余曰先生惇史也其为吾母传以示后世

弇州生曰是所谓婴百罹出万死而卒以其孤济者也夫死事易成事难则自古记之矣吾所悲者节妇六岁而称孤女十九而称嫠妇以其身为两宗殉者七十年以比于丈夫子则文信公夫信公之所为艰虞者十年耳然节妇之晚而成则胜之呜呼贤哉虽诗所称柏舟何加焉

周文恪公传

周文恪公者讳子义字以方世为常之无锡人业儒而至高皇帝时有志善者以滇中役改隶军籍顾其人倜傥负气更用是起家有五子仲为昌言昌言子鉴鉴子浚浚俱以公贵赠如公今官赠公浚工诗善书里中缙绅慕称之然以好行德不事家人产产渐挫而又难子年四十七始举一子又三年而举公公生而端颖异凡儿五岁受书辄诵十二能属文十五见其业于乡进士殷君殷大奇之劝其出就试公谢学未成弗果十八试于督学御史冯公褒然首列遂以诸生应试不利归而益勤苦自力为举子业既而叹曰大丈夫乃以一第市耶谓日所啞啞占毕者于身心有丝发益否也乃悉取五经熟涵泳之既而取程朱诸大儒章句释之已取汉人注疏参之融融如矣乃复取濂洛关闽与薛文清王文成蔡祭酒之遗言而体验之稍笔之书其翼经传者曰穀语凡二十卷其发抒所独得者曰日录见闻凡十卷于是公之学成矣里中弟子负笈请受者屢恒满至藉其束修之赢以供赠公及母吴淑人甘毳而公躬啖蔬素衣韦蹻屨自若然至当省试辄以不应令报罢人或谓公益少贬就时趣耶公谢曰毋以为也我固当有合而赠公及吴淑人相继捐馆公毁瘠逾礼既服除为嘉靖辛酉遂荐于乡明年复绌南宫又三载乙丑

会试高等对策复上第选改翰林庶吉士读中秘书所试词赋皆甲而公意乃不笃好曰此与举子业何异益治经术明习国家典故章程诸以笔墨事请者弗尽酬也复用试高等留拜编修明年为隆庆戊辰分校礼部试得今光禄卿余懋学等二十人皆名士与修世庙实录奉册封周之泰宁王王国津送直可百金公悉返之分理制造充经筵展书官公于实录所任纂自嘉靖丙戌以后八年事于议礼制度最名为繁巨公考据剪削亦最名简要有法未及就而迁南京国子监司业公至日坐堂厢与上舍诸生讲说经义务为精深推本圣人所以立言之指而其课业皆手自甲乙最为割当诸生人人自喜以为不虚值即阳城韩愈而下无论也当是时万文恭公余文敏公相继为祭酒其人介通不同同于推服公至取司业所定规条为祭酒絜法而是时公所举士余卿治南垣尝极论朝政得失于相臣操切有所刺讥相臣既已逐余卿矣而疑疏草自公手衔之而公昉之官至考三载绩亡一尺蹠以通相臣车门嗷嗷露辞色会留都大计吏吏部尚书尝交关公公一切御以理亡所徇尚书窥得相臣指欲谪公以逢之而伸其悲赖诸公持之力得亡他公始中蜚语即掩关卧曰是不难我幞被耶诸生日伺公门环泣请留久之稍出视事后以资次改北前后通六载始转司经局洗马兼翰林院修撰祭酒今少傅许公贻书公曰忠信蛮貊尚行之哉意盖有所指也万厯己卯主顺天试提检无小訾亦号得人兼清兵部黄吏无敢以率畧进者庚辰再分校礼部试公故治书而改阅诗如夙治得名士视戊辰寻迁国子祭酒其教授诸生约畧如司业时至厘革奸蠹节啬浮费积金钱数千缗拓饬公廨一新不以烦县官则非司业所任也当是时相臣虽不专为忤而待公犹落落公殊安之会其卒始迁礼部右侍郎兼侍读学士寻迁左侍郎知贡举充会典副总裁已解部事颛训庶吉士俄进吏部左侍郎掌詹事府其兼学士总裁会典训庶吉士如故公喜曰吾知所以报国矣庶吉士晨朝公未尝不谆谆以为己之实学训之也间与论天下事及祖宗彝训而后傍及艺文曰此若所繇贵也虽然非若所急也会典总齐百司庶务公故长于其学而至是益加精眇目披手校听夕不倦台谏有请以明先儒从祀文庙者公首以王文成守仁陈检讨献章应而蔡祭酒清胡布衣居仁章文懿懋吕文庄柟亚之下礼部会羣臣议祀王陈而布衣与焉公既为侍从长而礼部以尚书缺请廷推首侍郎沈公公仅居次既内阁以辅臣缺请时居忧者礼侍太仓王公及吏侍山西王公得之前后皆越公序公泊然如弗闻也或谓公不当去乎公笑曰以我不任去固当以我不为内阁礼部去非臣节也书不云乎伯拜稽首让于夔龙满三载赐钞缗羊酒同尚书赠封如令甲尝以病痔告赐体荐醪米酱菜同阁臣寻偕太仓公主会试所得多恢奇博朗之才程文为天下式而公大意乃在崇雅敦实于叙辞谆谆以万石君不言躬行为勉有某御史者希指谓公两见抑为不能其官而妄诋诃之然不敢及公行履公上疏乞骸骨优诏不许会典成公功最多而以校讎故耗精力比且上而公病一昔卒矣上闻讣震悼而会阁臣用书成得叙迁乃并上公功特赠礼部尚书赐祭者二行人治葬一切用尚书恩申谥文恪公为人孝谨天性奉赠公吴淑人独能得其心皆以老寿终然居恒自恨晚

达不逮禄养语及辄愀然改容岁时烝尝未尝不涕泣洒地也事其兄恭甚时捐橐以成其义名衣食孀姊毕身无倦色又为之字遗孤如子燕居独处恒钦钦若对大宾疾言遽色不以加于僇获其御子姓直万石君试序所为谆谆盖身有之也于物无所嗜好所嗜好独书禄赐购积余万卷咸手自校讎前后典试与成均所造士仕宦几徧海内绝不以毫髮私干之亦无敢以私请者大商林姓者故昵而交公公既贵请以五百金置邸公谢绝之曰吾不复与而交矣边之抚臣致贺金满百公大惊曰以一抚臣而贺金百其为百金当不訾何以饱战士哉却不受公时自谓杨氏父子四知三不惑庶几有之志伊学颜则服膺而未之逮也公既以明习掌故闻公卿间有疑难事辄问周先生云何公事为条荅无爽然未尝露德色所著书自穀语日録见闻外有中书直阁记评列后先宰辅贤否甚暂秘不以示人国朝故实几二百卷有四子俱才而长为炳文以公荫太学生创公行实者

弇州生曰周公繇孤生起田间终始不离石渠成均之地操觚管者二十年而至通显可不谓遭际哉虽然春秋仅五十八不能开下寿秩仅第三品不能登八座于职仅侍从不能参预大政天于周公何丰始而终啬之也呜呼当隆万之间天下之文极矣公独欲挽之以质而尽归于实用令公不死而其所操掇雕虫之士屈而经术行谊伸僂力而致成康文景之治景光当何如哉

弇州续稿卷六十七

●钦定四库全书

弇州续稿卷六十八

（明）王世贞 撰

○文部

△传

太仆寺卿罗公传

罗公者讳良字虞臣仕而至太仆卿嘉隆间名臣也系出豫章之西山唐宣宗时有吏部侍郎焘者与宰相抗而得谪吉别驾以死遂为吉之射洲人史部之后多显者几三

十传而至公王父云滨父彦宏俱以公官赠为太仆卿彦宏则已先封吏部员外郎矣公生而颖秀异常兒十岁能属文治礼经十三出应试有司少师徐文贞公阶时方视学政以诸生黜习礼者令诸习礼者悉令补博士弟子员郡试于省而以繁纓命之属辞俱错愕不能忆公独能忆而于辞又独工文贞公大奇之捉其髻曰勉旃吾候若于长安公交车间也盖文贞公时方有宫洗召云公自是为诸生僑声藉藉矣弱冠举于乡为第十人又六载应南宫试而文贞公以次相出主文得公为第五人大喜曰故髻而受余记者耶及对公交车策又奇文贞公欲拔之上第不果时方议馆选尹学士台谓诸少年有朗俊出君上者乎选可十全取也公逡巡弗肯应曰吾不长制科业然公实长制科业仅从选人资得大名府推官甫至而属邑有得遗马者令疑之曰此必盗也考究使株引盗侣六七人皆坐法业已有成案矣公持不可曰奈何以意陷人盗遂得释自是数从直指使出按部公能精心于比详之学而大指宽辅法而行又少年美姿敏口前后直指非一公入白事无所不当意即有疑恚见公辄解公以是益得发纾时燕齐之境不困赋而困养马故事养马而免赋者为牧地赋金而免马者为余地后并赋金地悉通融养马矣久之赋复如故公曰余地何罪而重困之乃更为调停蠲减自是得苏大司农以东南倭警三辅兵不时调欲提编次年徭额输金于库以俟军兴需诸郡邑守长咸唯唯公独曰三辅正额苦旱灾不供者以十万计而更从额外征且不过勺水耳此溢则彼涸非计也白之开府卒缓之郡有黄河小滩者河南转饷会也故近郡而无城戍往往为盗憎公曰何不徙饷于郡郡当无警其言不尽讎至今患之公以司理绩冠三辅荐牍娄上入为礼部主事改吏部司勳郎数更诸曹至司封郎中驰父太仆公丧归服阙即家起考功郎中以次补文选公既入吏部益自矢为廉慎孜孜人材多所登进而独不能徇乡里宗戚私人有以唐李绛语讽者公笑曰绛耿介他有所不可独于此可余多通不能如绛他有所可独此不可吾非慕为鲁男子也信所见而已及其秉选事则文贞公当国而杨襄毅公博领部二公负天下望虚已而委公思所以报之益谢絶一切干请虽公望翕然归公而见絶者不能甚嫌其意属当考六载绩于御史台故事以一六日廷谒唱名而后过前公考者台有所假借矣至是复欲勒公如约以示强公谓御史考绩吏部不必一六日不唱名也何故难我吏部郎且郎于选务繁安能辍日而徇彼上疏争之台不胜于是诸御史内愧及公转太常少卿则喉给事并论劾公复不胜则喉给事御史之在南者继之而公屈矣公归阖门养重不妄过从郡邑而太宰公意怜公无罪上疏推毂良至得旨以太常秩外迁为山东按察副使明年叅山西政提调试事程序文有出公手者甚精所得亦多名士又明年为太仆少卿旬月间转大理寺右少卿寻转左又明年为南太仆寺卿又明年改太仆卿而适奉两宫诏恩予三代诰公便道之里焚黄于墓感且泣曰吾何以报国顷之属疾遂不起得年四十有九事闻特赐祭葬如制公故善古文辞尤好读秦汉诸家言与建安大厯韵语其在大名时济南李于鳞守顺德出所业就琢磨于鳞器异之会余以谿狱至而阳曲王明辅为同守余谓二子毋以职事见余且得而客焉时布衣谢榛卢柟亦与

席为一时盛事公入吏部汝南张助甫业同舍郎其相倡和可知也然吏部繁不能悉其日力而最后官山东适于麟迁汴泉过里官山西与余共试事俱握手叙平生欢颇见其业一二朱兵部可大序公集所谓与济南太仓为莫逆交者可大故太保朱公衡子朱公公舅也公学盖亡忝宅相矣阳曲尝以事见郟于公颇深公在铨部久一无所修复及余至山西一日公语余欲过阳曲饮余大喜曰是所望于虞臣时京山李师孟实偕之阳曲

■ 〈食甘〉 饮遂交驩如初阳曲余畏友余窃以为不如公宽然长者

赞曰人不可以无年信哉令罗公无死而至今日其亮弼作行之绩炳烺当何如也文辞固余事第公意笃嗜之令无死而至今日其进隆古宁有涯哉余至白下公之子从益愿而文手公事为状以其集来请传从益少不能悉公官中事故寥寥若此虽然信罗公之为巨公大人矣

应天尹方公传

方公讳良曙字子宾别号旸谷其先故河南人汉有长史紘者避地江左至宋而始自桐江转徙歙遂定为歙人方于歙为着姓然世隐约不仕至公而以经术起田家鼎贵至赠王父泰为中奉大夫云南左布政使封父祥庆为工部员外郎再赠如王父而王母母俱夫人公生而惇敏兒时即雅步端视不与羣兒狎稍长从故王冬官献芝受春秋业成矣而献芝宦去其乡乃从其弟某游某关西吕文庄公桷弟子也能守其师说饬躬砥行有关闽诸儒先风一见公而器之尽以其学授公益守不变然至于属文辞则自发其藻不尽繇师指以故补博士弟子试辄冠曹偶久之举乡荐当是时今少司徒弘静视公为族子行少于公二岁并以文学行谊籍籍公交车间司徒公顾先公成进士又三年公始继之始翰林有翹材选人或风公袁州寔当国可谒而得也公谢弗往谒选亦弗及而母姚夫人病矣念之乞归省弗得南京刑部主事将以便养道闻讣奔归自恨其不及也忧毁有加恒病且殆服阕之吏部选人袁州当国如故公亦仍弗往凡一载所补工部主事当摧荆州木税公持操弗失时方构三殿采木蜀中贾人恐见稽故咸自匿比公任木无至者税吏思弗充额献筴请摧舟公曰吾来摧木非摧舟也木不至罪自吾分奈何移灾于舟蜀贾闻公廉翕然咸就摧居一岁而课完其羨余二月公悉免之讴诵之声填道辽故王横甚所狎责监司守令不可计独不以加公期满归以故事用币袁州子仅以二丝谒子怒以语袁州袁州笑曰此郎陋涩故悉之毋强溷也寻进员外郎于是封公亦卒公毁瘠有加服阕改补刑部或以素不习三尺难公者公精心亭治之若老吏更是得尚书心进郎中出谳畿辅狱公所平反以数十百计尚书无为异者后先俱报可东明三冤狱久不释公立剖之时久旱雨澍应一举人忘其名为盗藪当死始公未朝辞用事者颐指令出之公弗应而其人复行千金以一刺入公怒叱之曰死狗欲污我耶三尺

不贷汝至部立治之死穆宗初迁河南按察副使职治河河积堤防钱粟巨万以十数然不尽用之堤苟取节缩名逼河而堤堤土为址而取其羨供边至有私于橐者河以故善渍公上书台使者谓必远河而堤远堤而取土虽劳费而久也台使者贤之工成屹然若山而计其不恒渍费更省于旧公又时摄篆事清军伍名声藉借故相新郑公不以望公擢江西左叅政未几迁湖广按察使寻进右布政使复为河南公之叅政江西也属左使阙公行使事于财赋出入择人而授之絜法毫发无所奸藏吏洗手而治迨右使河南左使亦阙吏大出奇羨佐行装公悉却之曰天子不责诸侯琛我何以装为竟事无所谒贄于是右使廉声隆隆起矣法当得大藩而新郑去而江陵公代之两相不相能颇修郟于故相所知者至公而曰是故廉安所得新郑心而委踞善地耶盖公之始推荆州税也江陵以史官省覲归其里司公状而仪之为文以赠谓尝过公署堵栖如比丘比满图书三篋无楚中一物其操行如此即古传记所称何加焉公久无所谢至是乃以望公谓方使岂忘我耶公又弗谢其语前后流闻铨曹窥而以云南畀公盖远之也公孜孜奉法惟谨滇新姚寇困于军食公调给无乏浚昆明池之■〈冫〉阌者所灌溉皆上田价骤贵大出积金帑以佐晋宁安宁二州城工民不知役公故晓积箸初至库不能三万金中则三之季则十之盖首尾凡六岁遂以富实冠诸藩矣而公念且老思归移文两台乞骸骨前是两台于公积荐书数上皆不报至是为移主爵者亟鸣公屈乃迁应天尹甫两月所厘正井井而有傅给事林御史者相客也儉而贪谓公来自沃私之公弗应乃取微指以老劾公令致仕公闻之曰吾意也滇远则归应天迩则不归耶即日巾单车返中戒门者毋妄纳客刺吾欲偿我万里劳顾时时取师所授绎之身心为实践学诸可以自娱佚者弗用也间一出徒步山水间与田叟论暘雨较丰歉若公府之迹可数已公内行修尤笃于孝友少时尝手自舂粲以供堂上饭客过而笑之公曰吾不至乏一力欲以手舂志劬耳诸君笑者何也子舍无私储得少束修輒以付家督伯兄卞难事公所以曲事之者百方尝从姻家行贷得十金将以充博士贄遇兄有子母责即遗之曰母问所从来也及在宦日所余禄时时共之矣兄以故降心而欢公晚节无间程氏姊丧而有三稚子皆駮为授室且立之宗党姻戚无不赖以润者归六年而卒得寿七十有一有五子存者一贯一乐一敬一敬举乙酉顺天试第五人报至而公卒一乐为太学生乞余传

弇州生曰方公所值三相君其一不知而聊容之其一能用之其一知之而故抑之彼三相君者其智识器量不大相径庭也公斤斤一节故自如耳嗟乎士真有命哉公卒而萧太史良有称之曰明兴以理学名家者践履笃实薛河东而下独吕泾野先生一人方公崛起江表私淑而远宗之谓之砥砺君子非耶余远不能识公所诣迹者宦白下与司徒公游以质之谓族父实长者不愧萧太史称云

刘平湖者万历初循吏也尝举进士为平湖令而贤已入郎比部移南武选矣犹称平湖者志绩也传之者何平湖士民意也侯讳士瑗字符玉江西安福人父朝杰仕为郡别驾母曾安人生母曰镗孺人其来令平湖也尚少而貌颇清羸人颇易之侯赋性既颖绝而又能以勤励自警策平湖最为秀剧邑税牒讼牒日以百数所上台察监司大府移不可指屈其受诸移亦如之侯一览辄不忘至于博采土风民俗与闾井困弊耳听心计不测其所从入也尤能持见自信即上官有所驳难不为动必得请而后已上官始虽难侯请久而竟心服焉以故侯益得发舒邑田灾于水侯请蠲赋额若干明年蝥害稼侯复请改折以纾之已复发储谷食饥氓皆得报可他邑有■〈距兰〉巨室庾而剽其谷者独侯所莅晏然又明年旱侯蔬素降服徒行赤日中以祷雨立澍应时委俭而骤得岁稻米颇羸然无所征值侯谓漕可亟米也俾入于舟而缓责其折人谓侯米贵先折贱则先米以是赋额足而民不困侯亦自谓我非能为民减赋也能以时节缩之而已时赋长最名为剧而苦收解侯酌取田亩之奇以补之必使不病而后已仍着为絜令已平市司值黠猾不得低昂其价度民稍给矣乃以时按行邑庠进诸生与谈说经术亲为校阅文艺高下而激赏焉时文庙与学宫俱隳圯侯慨然一新之所费金逾二千一不以累民亦不大损公帑时报政者专下天下有司均田赋俾搽其伏匿吏相戒惴惴计无所出谓必溢额而后当其意又惧贵势有力之人见扼而不得伸且曰我姑以告成事而已侯独不然曰上德意之谓何而忍负之且我何知执政盖平湖自海盐割额田可六十一万余实田仅四十八万而当六十一万田之赋其大豪狙奸又阴匿其田而飞赋于孱弱者孱弱者再出赋不足以是益重困而破家至流亡比比侯矢于神召集三老正平帅区役之能者为分界植标窵石弓步鳞圩栉号听民自实上之三老三老上之侯躬自稽之乃尽得实田之数使均其赋额赋无所减损而孱弱者皆安大豪狙奸亦心服不敢复有所干没矣当是时均田独平湖以最称于是侯前后邑六载始得迁邑士大夫吏民皆涕雨泣追送有至数百里外者归相与立祠而记之且咏歌之序之及侯卒而祠之宇益新岁时伏腊烝祀勿绝而士之贤者曰冯伯禔故太仆卿敏功犹子也奋然谓必求天下之文可以不朽侯者传而上之太史得世贞布币请焉世贞义而许之侯他事行当必有葬之志铭在弗能详

赞曰余卧闾里时当大相之下均田书天下无不恨之者至其败而目为罪状何平湖之人更以是德刘侯也然则大相之罪云乎哉昔者朱仲卿在桐乡一嗇夫耳其后宦重为九卿至且死曰死葬我桐乡桐乡之人爱我后果世世祀弗绝刘侯所任令德于平湖深而困无子吾不知嗣侯者之葬何如假令在平湖平湖之人又奚不桐乡若也若伯禔者无为而为庶几尤贤乎已

王赠君兆祯传

王君兆祯者粤之奇男子也而生不偶君故南海人而其先世往来楚之阳山嘉其土风为买田一成山一区屋一廛附籍而受赋者且百年矣而君之父廷举早卒君奉母李以居时犹未舞象也而■〈立乞〉■〈立乞〉有巨人志其为制科文儒朗有声实前是楚学使者校肄阳山诸生诸生椎不能当其意而君之诸父羣从试必冠诸生已不胜愤愧而君当试又能得学使者意且复冠诸生乃谋亂其党噪君而击之君不得已罢归则之南海试南海试辄数千人君与之角时胜时负然竟不胜而大叹诧曰天乎不我右也虽然夫岂尽天益发愤自课责悉敛先达之文有成效者加丹铅焉口嚅而心轨之然终不得补博士弟子业三十余矣而其子今侍御学曾早颖君乃延师海之而身自相琢磨时语侍御吾而师也既侍御之业成喜而呼曰而吾友也侍御试辄利补博士弟子诸弟子逊之先生谓侍御可寬我矣傍舍起别馆收族人子妾而知学者置其中与侍御及仲子学韶季子学义游而诲之更筑亭榭凿池垒石杂蒔花果驯禽鸟俯仰甚适也客谓君家幸饶胡不捐一岁帑北游京师取他途显乎君笑谢客欲显我吾尝笑司马长卿以如是才而甘心訾郎藉令不藉人主知以三赋而称天下后世即■〈奭斗〉锦江水庸詎能洗之休矣客不敢复言而君恒谓侍御吾家故王姓也今而冒黄姓而不能改者以吾贱不能倡其族也蓋王之为黄自永乐中负版者误之故君虽负才器不获畅间一露其颖而赋性谦抑仁恕乐施而不责偿急人先于己子母之券焚者可指数矣南海里人困于役度输可二百金君倾橐而代偿之父有所育族人子未尝以为子数及公长而割产以贍曰此吾父意也阳山大豪以君尝挫诸生谓为赘籍乘而齧其产若干公奋与之讼不已侍御间请大人所焚券不啻产值若干君泫然曰此吾所受大王父业也自吾而废之不孝不然者若敝屣耳然豪巧能得吏胥力君不时直竟病■〈谷丸〉卒于道得年仅三十八君卒之十又三年而侍御成进士以崇阳令最封君如其官制词有云孝友谦恭有济物而无絕俗蓋实录也侍御上疏叙姓所以记请复之得报可五服之内外诸黄皆复为王而阳山之产为豪者亦复为王人曰凡君所不得志于生者皆得之矣其快于地下当何如也虽然令君不死而亲见之又当何如也

弇州生曰君笃学宜贵直先产宜白有子而才宜覩飧而皆不偶及君卒而一一酬验若取左券者天定也人谓君得生见之快当甚余谓此足以快君不足以吐君奇独不见侍御三疏乎其修德除奸遵祖制重王言饬近御杜谄谀不贵异物语语皆忠义之发即触龙鳞旁犯蜂目而不小顾此皆君生平之奇而不获吐者也君得生见之乃为真快耳夫去君之二十年所而有王言有志有状有序侍御之所以奉君足矣而又征余传余亡奇何足以发君奇在侍御而已侍御既用疏谪再迁为比部郎其它子姓详志中

胡元瑞传

胡元瑞者名应麟其字符瑞尝自号少室山人已而慕其乡人黄初平叱石成羊事更号曰石羊生人亦曰元瑞殆非人间人也仙而谪者也遂呼之石羊生元瑞父曰按察公僖母宋宜人按察公为行絶类万石君而文采过之所至好行阴德名位不甚称以云南按察副使归今尚壮无恙元瑞为儿时肌体玉雪眉目朗秀五岁按察公口授之书辄成诵见客客使属对必工九龄从里社师日占毕习经生业而心厌之已悉祛按察公篋得古文尚书周易国风雅颂檀弓左氏庄列屈原两司马杜甫诸家言读之按察公竒其意弗禁也稍长遂能为歌诗籍籍传里中而于经生业亦不废十五补博士弟子员非其好也会按察公拜尚书礼部郎挟与俱度钱唐过吴阊泛扬子北歴齐鲁赵魏之墟至燕市而止所经繇吊古即事往往于诗歌发之而是时南海黎惟敬欧桢伯梁思伯吴郡周公瑕吴兴徐子与嘉禾戚希仲沈纯甫永嘉康裕卿先后抵燕发元瑞藏诗览之咸啧啧叹赏折行请交至于琳宫梵宇高会雅集元瑞以齿坐末坐词组一出无不怵然披靡自失也曰使用昔贤隶事夺席例吾曹无坐所矣临淮小侯李惟寅慕元瑞甚使客篡而致之为上宾旬日不听出惟寅用是亦以诗名而周宗正灌甫者雅自负风雅有人伦之鉴贻元瑞三十韵首以北地信阳相属元瑞益自信寻以按察公外除元瑞归从母里中母患头风甚剧元瑞委身医药间日夜扶侍不休母头风良愈而身过劳得清羸疾矣因跳匿金华山中而会大司空万安朱公衡还过兰溪朱公故从燕见元瑞诗而惊赏者至是从山中踪迹得元瑞以书要之而泊舟待三日元瑞感其意为长歌七百言以赠朱公朱公袖示督学使者滕君伯轮曰勿失之天下竒材也滕君辄破格为檄受饩学宫且趣入试两御史御史再试之再为诸生千人冠已荐乡书上公交车报罢元瑞意殊不在一第其所游从皆天下贤豪长者然所当心独余兄弟与李观察于鳞汪司马伯玉吴叅政明卿会于鳞死余皆散处不相及久之意邑邑不自得而会弟敬美与观察公同年过兰溪谓观察吾欲就阿戎谈当胜卿遂即元瑞剧语二日夕临别握手不忍释曰吾于诗独畏于鳞耳已矣今庶几得足下又曰幸与家中丞同世胡不一及门即卒然抱于鳞恨若何时余方禅居县阳观称病谢客闻元瑞来喜不自胜与语久之出其所著少室山房诗余得而序焉所以属元瑞甚重而用是颇有断断者余二人俱不顾元瑞乃高卧山中不复就公交车而兰溪令喻邦相豪于诗与元瑞意合忘形尔汝尝与偕过赵学士灵洞山房倡和连日夕元瑞之卧山中凡六载而始就公交车至都下遇张观察助甫助甫余兄弟友也竒元瑞诗击节曰二十年亡此调矣元瑞亦竒助甫诗晤赏亡间且各自恨相遇晚试复报罢时大司马张公肖甫靖浙难按部过元瑞里元瑞避弗见张公谓按察公公兒佳甚故知之今者难我得非以使者惠文岳岳耶为我致之钱唐请得具宾主礼元瑞乃强为钱唐谒而张公果以上客客之会伯玉来湖上大将军戚元敬系至伯玉数与元瑞相闻问把臂剧驩出元敬所赠七絶句诧之曰大将军健兒也乃能作文语不下沈太尉

曹竟陵生亦能赋赠我乎元瑞援笔千余言立就奇思滚滚既大将军集相向叹赏不置伯玉因曰我欲东过王元美兄弟生复能从我乎元瑞曰吾心也遂偕来弇州园伯玉道为少室山房诗序其重不下余时与元瑞偕来者伯玉与弟仲淹从弟仲嘉而张大司马亦以内召迹伯玉而来寻先别去余与伯玉元瑞诸君子积日游弇中澹圃甚乐也元瑞性孤介时时苦吟沉思不甚与客相当而当其挥麈尾品时藻不能无置雌黄唇吻有莫生者躁而贪以品不登上中恨元瑞切骨属伯玉元敬游西湖故遍詈坐客欲以为閏端元瑞夷然弗屑也及在弇仲淹倚酒侮元瑞元瑞拒弗受客谓元瑞彼莫生詈者胡以受之元瑞徐曰莫生者庸渠足校也仲淹司马公介弟而又挟贤吾侪当爱之以德独奈何成人过耶客乃服元瑞筑室山中后先购书四万余卷分别部类仿佛刘氏七畧而加详密黎惟敬为大书曰二酉山房而属余记之旦夕坐卧其间意翛如也居恒笑蠹鱼去人意不遠又谓我故识古人恨古人乃不识我其托尚如此好称说前辈风节尝恠其郡若梁刘孝标之介唐骆宾王之忠而世仅仅以文士目之当由作史者盲于心故且史第知有狄梁公宋广平贤皆俯首而从周裸将以视宾王何径庭也上之采风使者苏君禹君禹雅敬信元瑞亟下其事宾王得祀祠乡贤而孝标亦暴显元瑞所著诗有寓燕还越计偕岩栖卧游长啸三洞两都兰阴畸园等集二十余卷诗藪内编外编杂编二十卷胡氏笔丛四十卷他论著未行世者有六经疑义二卷诸子折衷四卷史藪十卷史评十二卷皇明诗统三十卷皇明律范十二卷拟古乐府二卷古韵考一卷二酉山堂书目六卷交游纪畧二卷堯玄国志十卷酉阳续俎十卷隆万新闻四卷隆万杂闻六卷骆侍御忠孝辩一卷补刘氏山栖志十六卷搜辑诸书有羣祖心印十卷方外遐音十卷澄怀录一卷抱膝编十卷真赏编十卷会心语四卷他书未成者又数百卷元瑞壮未有子迺始举二子戊子冬复应公交车至瓜州而病病积久不愈慨然曰吾其殆乎谓余知应麟者惟子幸及吾之身而传我使我有后世后世有我也

王子曰元瑞年三十有八耳神清而意甚舒即偶犯霜露何恙不已而虑至此也夫以元瑞之生仅三十年而著作充斥乃尔过此以往所就当又何如耶元瑞于他文亡所不工积学称是乃不以自多而所沾沾独诗彼固有所深造也元瑞诗才高而气雄鸿鬯郎儁横绝无前稍假以年将与日而化矣至勒成一家之言若所谓诗藪者则不啻迁史之上下千古而周密无漏胜之其刻精则董狐氏韩非子也吾长于元瑞二纪余姑为传以慰之且谓元瑞子后当竟传我

弇州续稿卷六十八

●钦定四库全书

弇州续稿卷六十九

(明) 王世贞 撰

○文部

△传

魏国第一世嗣太子太传

徐公表忠传公徐氏讳辉祖初名允恭凤阳人也父曰中山武宁王达首佐高皇帝定天下出入将相勋德为诸功臣冠配飨庙廷始娶张夫人以不宜室卒上为特继谢夫人首举公公生而白皙秀眉丰下及长长八尺五寸顾盼有神举止俨雅中山王数填北平留公宿卫御家家众肃然上故心器之命理左军都督府月廩禄二十石未几而中山王自北平还疽发于背有间上命公奉手诏道迎劳俄而王薨又三年而为洪武己巳始命公袭爵魏国公赐诰称扬中山王之烈而勉公忠以立志礼以守身恪尽继承之道寻以皇太孙允炆嫌名改今讳明年赐公与诸公各黄金三百两白金二千两钞三千锭文绮三十疋绫十疋俾还凤阳赐第以岁时入覲寻给兵百二十人为卫复赐钞四百锭明年出陝西防边自是岁出练山东河南卒诏公仍于太仓支岁所受禄五千石而还公田于官时故元降将阿鲁特穆尔鼐尔布哈与其部众隶燕王军中有异志为告者所发上密诏王调实而命公以诏往公之姊王妃也于是悉得其实与王合筴并其党与悉捕送阙下戮之二十九年国子学正吴启言国子师生日伙不为甄别高下无以惩劝上命公帅礼部翰林院臣诣监试其文艺分别送吏部铨用公勋臣也上知公有文故特寄之人以为荣高皇帝崩皇太孙即位时诸宿将且尽公与李曹公俱以肺腑领朝班曹公加太子太师公加太子太傅文皇帝为燕王时入临称疾不拜王属尊而功高有武畧拥强兵朝议惮之会王归而留次子高阳王待命于邸欲藉公为耳目公谢絶之高阳王微闻诸大臣谋有所不利于燕王即夜窃公善马归燕公大惊晨白之于上亡何燕师起以诛君侧为名诸彻侯兵往攻之相继败始议置大将公与曹公皆当往时曹公有公卿间声而公终以燕戚属故见左然公一意扞圉时曹公与歷城侯相继败燕师日迫矣其世子高阳王皆阴饵公为内应公确然不挠乃改饵公叔弟及师攻金川门公犹与常开公升等分道出大战皆不利京师悉为燕公独守先王祠不从劝进于是锢之私第寻逮下狱久之公竟不屈以死时仅四十余王姊为仁孝皇后竟晏驾不敢为公请久之上追思后不已且念中山王功大召公子钦予故公封还其旧所削禄及庐产盖百八十年而今上皇帝诏悉録为建文君死事者各以官称庙祀之金陵而公居首

外史氏曰当文皇之起兵而徐公其妃弟也毋论成败之犹匿而公矢志故主即革命之际小一移志为曹公所为业以元舅居上公备心肺疇能易之公舍而恬然趣死一何决也于建文为纯臣于中山王为令子矣文皇以死全公之志而弗夺其爵以报中山王今天子又能光大显融之先圣后圣其一揆哉虽然亦可以覩天道焉

郑杞山先生传

先生姓郑氏讳文茂字宝夫别号杞山尝仕为提学按察副使有官称矣学者尊之不以官而曰杞山先生先生生而神颖四五岁即缓步正视如成人御衣履有敝而无垢六岁固请于王父修就外传又二岁改从茂才周师师好以小礼约束诸生诸生不堪将去之先生独曰患不熟耳熟之当更佚也盖人人诧先生早慧云天性孝友其事王父及世父郡倅教父赠承德公叙母李安人皆周详宛至能得其欢十二而李恭人见背擗踊哀恸踰于成人夜栖于棺所哭恒至丙夜不已王父使之塾馆先生为之馆矣朝晡上食至甲夜篝灯莹莹棺侧其诵与啼声相续也王父益怜之谋徙他馆以远先生伏泣曰生不能扶侍死又不获从地下而奈何使远吾母俄左目眦血出王父乃已明年有芝生于馆已而有继母朱安人先生婉曲承意朱安人爱之不啻己出也及举乡荐连擢上第开榜之辰不以喜而以悲曰天乎何独我母不见也赠公视先生邸中虽卮酒算器食必洁修而进之忻忻如矣俄赠公念其父七十当归寿先生不敢留至中道而暴疾卒先生闻之痛绝者数矣辮髮徒跣昼夜驰之丧所奋身自掷且哭且数已遂冥然呕血数升稍苏毁瘠骨立王父泣抚曰吾老中天谪失一子矣乃复使我失一佳孙谁与慰我者先生乃强起啜粥谋葬事怜仲氏少一不以烦之既葬携仲庐于墓所第晨一展省王父询安否王父曰惫矣且休寝矣先生固辞竟三载不入内服除徘徊于丙舍久之不欲赴选人王父曰吾固尚甘匕箸不覩若拜一命何以甘我先生乃复强出授刑部云南司主事当先生之为诸生仅弱冠而与其侪衙郡委诣松阳松阳令独器公欲致之衙斋不可乃就先生所谈说经术艺文甚洽民间窃言是少年令重客有以百金寿先生求居间者先生颊尽赤拒之令复问先生欲有言否先生谢无有遂别去令自愧曰吾不如也识者谓先生能励操隐约时若此既居官则益自矢冰蘖斤斤守三尺时尚书为郑端简公晓尤以持法抗势闻朝廷故督治漕道覩先生奔丧时委顿状而异之至是益知先生而会有宛平令周者干没帑金五千余委罪于藏吏当坐死戍者九人先生鞫得其情欲坐令令迫则赂分宜相父子俾缇骑陆帅阴胁先生先生拒之曰臂可断狱不可更也竟论令如法而出此九人者又数辨缇帅所诬大盗以上案凡数事以是陆帅与分宜父子比而衔之然卒不能有所蔑端简大贤重先生谓何自得郑郎故当以孝廉举乃姻衡廷尉絜法且皆郑也而又皆浙人于是时称秋官有大小郑考最得赠父母及封李安人而属有审狱之

命先生官主事也得使审録又得大江南剧郡蓋端简公力持之先生既至江南所平反殊死及戍者若干人莫敢以居间进者于是目之为郑铁面寻迁江西司员外郎还为河南司郎中拜承天知府时承天奉睿皇帝陵寝朝集之使麋至其民不胜困先生一切为裁节而沔阳州独当供郡守丞以下费最为繁巨尤加意从减郡邑所省以万计汉水数侵郢故有堤捍之岁久渐圯且大为郢害先生毅然修复之时荆当其下流士大夫不欲独受侵相率纵流言以阻而江陵相时在翰林侍讲皇帝邸讲读三胎书先生语尤危先生怒斥之曰吾非以彼为壑也且我能堤彼亦能堤何间为堤卒成费简而功速且坚先生之治郡未几一切政声流闻既入覲举全楚之卓异者三而先生冠时相国华亭公常熟公俱欲得先生为其郡守皆力辞之还郡而有显陵大瑯事瑯横鱼肉其人而阉帅者挟其嬖翁故相与瑯匿而相钩结先生廉得其状数轧之乃羣嗾其悍卒以乏粮闕于庭先生縛其魁十余人与杖曰谁诱汝以蕞尔卒而傲天子之命吏蓋先生之民来赴难者以万计噪于门将捕卒卒愕眙不敢动二憾之计穷则为危辞以撼台使者共疏其事闻上察知之真不问属岁侵先生大发仓储以赈生者而瘞其死者民大悦乃以时獎海诸博士弟子拔其尤得今李太史维楨辈十余曹其后皆掇巍科称名士大夫学使者为广弟子员及试额以旌之荆门守汰而景陵令尤墨皆以阴结大瑯故骄先生廷训守而版令不法状逐之归应昌尉熊廷美廉吏也偶失监司指欲斥之先生独为明之吏部得无恙其去恶不避贵掖善不遗微皆类此寻擢四川按察副使专饬夔府兵巡夔故蜀喉咽也时以施夷乱后长吏披荆棘而处狃僻偷恣先生首按行诸险遠尽得其状与民所疾苦简徭役惩贪墨饬武备崇文教风纪大振云阳何令者善媚不得其民而独能得上官心先生独注下考竟得罪去黄绶以下用便宜遣逐有望风解印绶者汉中大盗何勉之党侯胡子等来寇夔先生督兵败之获其渠遂进与秦兵夹攻勉勉败乃就抚先生方欲移牙要道减盐课裁冗员议成且上而朱安人之讎至矣即日直杖就途行李萧然夔人咏歌之以比赵清猷之去蜀不啻过也先生之丧朱安人其毁不下丧赠公不得已而与二弟析产庐取其敝者畝取其瘠者曰吾犹可自衣食也既服除年仅四十五耳徜徉山水间无起色而是时江陵相已秉国先生笑曰吾向者知郢堤而已不知有今相国也易曰君子几不如舍奈何以倦游躯共人睚眦哉自是杜门垂十五年足迹不入公府干旄至里闾望尘而避台使劝驾相踵至有登荐剡者俱谢弗应相知在公卿间以其辞苦亦弗之强也郑之先聚族而居至先生若蚝房庖陋无所展膝先生殊安之或有劝别徙宅者先生曰吾忍以贵而独广吾居吾故宁可长使子孙有哉时有诏斥卖越中寺田或谓先生可以贱直领也先生固辞居恒敝衣粝食而宗族亲党有缓急无不应其资世父以下至叔季父弟必先而已顾后间有疑先生贫而谓可以货取者或曰是少时尚不贪松阳赇而晚乃货取乎蓋终先生之耳而毋以污声入者其操信于人之深而且久也先生未冠工属文所业虽举子义而能深推圣贤所以立言之指必祖洙泗而祢濂洛以故其试而学使者雷礼薛应旗首拔而加藻赏曰此国器也此理学正脉也迨其晚则益深造

醇如矣业以讲学鸣环郡邑而执贲者户屦恒满然不立门户不为名高固肫肫实行君子哉先生之始去郢也郢之吏民伐石立碑以纪思先生闻而寄声曰趣毁之我犹在事也而碑我是中我以法也既归十余年则碑巍然矣其文核而详过者瞻诵不忘歿而郡邑守令采士民议祠之学宫

弇州生曰郑先生仕不登三品寿不过六袞学不俎豆两庑于天人之际若有未尽满者使得夫子为之依归何下曾闵不然而获展其用于显信之代即未论皋伊于涑水茱阳亦奚难哉虽然世之人出而徒贵处而徒隐学而徒名以此语先生何径庭也当嘉靖之季陟讲坛执牛耳者众矣然往往逃之二氏之境而阳为不然吊诡呼风以涂蔽人耳目先生独御之以实理绳之以实行无问其深浅何似要亦狂流之砥哉其子子寿所纪先生事甚备余不志志其大者

闫道人希言传

闫道人者不知何许人也名希言别号亦希言其投刺人称希言人与之书亦称希言顶一髻不巾栉粗布夹衫有褰襦而无裱服履而不袜为人疎眉目丰辅重颌色正紫肌肉充腩腰腹十围叩之如铁彭彭然得如来之一相曰马藏秤之重可三百斤行步健迅虽少壮不啻也盛暑辄裸而暴日中不汗穷冬间凿冰而浴又令人积溺缶中浴之出使自干嗅之殊不觉膻臊以故所至皆异之目为道人以其不巾栉也又目之闫蓬头讹为闫头陀而诸慕道者咸以■〈父上者下〉呼矣道人亦不辞或坐不起拜之亦不起然未尝以傲色加贵游而求伸于不知已用是辱自遂喜饮酒量不过三四升酣畅自适则歌道情曲以娱坐者食能兼人不择荤素第嗜蔬而安粥人奉之愤则愤奉之衣则衣予之金钱则亦寘袖中转盼即付之何人手不顾也出则童子噪而从之往往手甘果为饷故从者益众其诸相与夸诩道人不知也问道人百岁乎曰亦百岁耳问且二百岁乎曰亦且二百岁耳问元时尝为某路总管乎曰亦某路总管耳或曰道人不过六十耳何诳我为曰是诳尔也言六十者当又曰道人岂六十岁人也曰即非六十岁人竟无以测也然道人绝不为人道其所繇得叩之以延年冲举之术亦不应惟劝人行阴隲广施予勿淫勿杀勿忧勿患勿多思而已然颇好作有为功德于太和之均江建真武宫弘丽甚又欲于句曲东郭治驰道五十里抵故干元观左右皆植桃杏春时若锦绣谋于其徒益斥旁亩引山泉溉之成稻田岁入米可三四十石而观独有门及丙舍耳道人乃薄游金陵诸公若李司寇王中丞王鸿胪及余又间过一二中贵人欲成观中诸殿阁然不轻发言惟谓余且以大檀越相拟余恠问之曰欲得公一记而已余谓名观不名道人可乎道人曰安可不名道人吾固赖子传耳且子已悉我自是积数日辄来来一夕辄去惟责具蔬食毋以鲑肉困乃公然于饮噉俱减损于昔而乐逾甚间谓余文成否余曰未也戟手

谓子殆不欲为为之何论日又使其徒相征迫余恠之不知所以至十月二十三日日下春过一毛百户家饭毕谓其徒我欲得汤浴汤至凡三浴而后爽然命移枕蓐地坐曰道人不当卧床也已觉气息微始惊问道人得无欲去乎道人曰既知之何问又问有所言否曰我何言穷理尽性以至于命齐家治国平天下而已遂瞑跌坐不僵浃旬犹暖气色休休然汗沾须有若玃者三日而入龕七日而移至干元观时时启龕视之盖百日犹若生也道人游人间者五十余年灼然着声者垂四十年出无恒向诣无恒主宿无恒夕忽然而来忽然而去无住为主无恋为本无相为宗其真有道者耶

弇山人曰道人以甲申之冬过我弇中酒间忽谓余吾家山西二十七八时行贩燕市足自给有妻室矣而淫往往房室过度成瘵且死而遇我师海之坐功得亡恙且谓汝欲不死亟去家毋问当是时有一女而置之今者都不忆吾血属惟忆吾姓闫度其时盖在嘉靖乙未丙申间也余谓道人漫应人多矣安知不复漫谓我我姑漫应之因相与失笑而别嗟夫洪崖先生之嗜古器物毛仙翁之嗜名文字吾意窃尝疑之以闫道人之于人间世若无足撻念者而犹不能忘一身后名固贤于洪崖先生其不能超毛仙翁之乘而上也犹龙公之畏名甚于畏祸虽然犹知有名者而后畏之是不能忘名也何疑于道人

节孝汪吴传

外史氏曰称汪吴者何女吴而妇于汪也称节孝者何节于夫孝于舅姑也归夫而夫瘵矣犹夫也舅孱矣犹舅也姑不慈姿欲夺之矣不成姑也然而吴所以徇之奉之一也是故称节孝也夫之始瘵也其舅某匿而利吴之橐吴之父觉之欲弗许吴间语其侍者曰吾不敢预闻也得无有所不可乎即弗往弗他往也父悯而嫁之尽徙其橐从焉及归汪而夫病不可为矣昼夜不解衣侍汤药其道妇也身女也夫死而吴大恟谋以死殉左右万方解救乃已自出其橐以治葬具不以烦夫家而姑素嚚而贪夫之巨嫂佐之谋以吴艾而艳计聘者之利之则亦利聘者因延妯于他室将受币而胁吴使嫁吴大嗟泣曰彼谓我难死哉遂不食而使人走父所谓曰姑欲嫁女女必死请以旦夕诀父亦嗟泣曰吾向所以不欲弃若汪者此也诉之郡假守胡君请以父之粟养而完吴节胡君义而许之致约束于汪前是姑既不得志则益与巨嫂合日修隙横捶捩矣吴噤弗发也而渐日益务为恭谨旦夕共馈有加姑内愧之又惧郡符不复为啗喝而舅连岁贾于外帑大挫徽人视贾羸缩为隆杀即姑薄之不以当夫数也诸妇亦争趣姑而置舅舅自惭挫亡所寘喙而吴所上食独加醲鲜岁衣前寒暄而荐诸妇始知有舅夷于姑矣夫之弟复早死有妇徐矢志而迫于贫吴时时慰勉曰甘苦与若共之母患也徐资吴橐乃益坚人谓吴不独身为节又能成徐节不独身为孝又能成诸妇孝且也舅安于舅姑安于姑庶几

允若哉其父闻之曰吾向者悲吾女嫠今者不悲吾女嫠非嫠何以见吾女也吴既持节至俺老气益发舒归而侍父疾以谨闻父遂起吴手而少弟修七岁而失恃吴抚之至成立内外家共推之以为宗女师赞曰吾闻之徽俗奇妬至不可闻自汪司马伯玉之传七烈妇于是妬之风小敛而转为节若烈者此何故也夫静而专者女德也以从一之道责其夫则为妬以从一之道自责则为节若烈也患未有以风之耳夫汪吴之行至为难能然一女子耳能使其家尽化之司马真风人哉

洪氏双节传

安亭朱炳之王父曰恩为博士弟子试不利弃去与其兄钦俱老田里间钦挟术为名医长五七言近体有诗集曰天逸稿而恩卒无所就有子女各一子曰龙女曰淑适嘉定人洪臣淑性婉■〈女恋〉通诗书居家工事其父母适洪工事其舅姑乃至抚接上下理丝枲供馈饷无弗工者为媵可十年未有子以是差有媵婢淑寃然不妬也而洪臣益敬爱之盖未几而臣夭淑且欲以死殉矣兄龙力为解释得不死久之乃躬率其媵婢勤女红自给而外持门户理出纳诸婢不堪其苦多谢去而独阿素者愈依依朝夕淑怜之谓曰吾妇也故为主君守若方少何忍羈勒汝当择良而归之素泪交于頤不能荅退而曰主母以我非人哉且主母之所殉者主君耳吾死有主君而生有主母及使我两负之盖一宿而成蛊疾腹彭彭然几死兄龙闻而驰谓淑曰奈何独为贞也俾抚素甘苦共之必不嫁汝素乃稍稍起共奉淑朝夕益无间兄龙去淑居半舍余未尝三日不过慰淑也俄而亦死淑乃大叹咤曰天乎穷矣顾龙有遗孤所谓炳者仅岁余以龙属而抱之经纪其遗产课僮奴深耕易耨展转成上腴炳稍长淑自计必赘于洪而后可安也居久之洪更掩炳产而有之会岁饥淑大出其藏以应贷者洪之族不悦聚而剽掠其货财以去淑自是邑邑不乐念以义得祸而不能白遂遘疾卒年仅五十七凡嫠居三十年素乃益自励影相属者又二十年而死炳欲上其事于朝力弗逮也俾其友刘天民纂其事行而谒余传之

弇州生曰淑之志与素俱皦然者也其材足称其遘乃可悯矣虽然淑犹知有诗书焉素何知素殆以淑为诗书者也炳感二节妇之行欲为之请于朝而不能以余传之噫吁炳可谓能伸其感者矣炳既不得志于媵家益贫然四壁皆图书其为诗能继其大王父云

文林郎王君传

文林君者王氏讳涌字予文有别号曰道川矣其称文林者何其子一言为吴江令

以政绩着得封君如令官而阶文林郎故也君既封一言以天子之命命之以命服衣之君君弗色喜曰此吾选人格也得之自汝小快耳一言迁为南刑部主事而以岁赋不登额留摄令督之俾登额而后去令乃叹曰令不才天子以岩邑寄我抚慰其元元奈何揭疮痍而鞭撻之博此一官也上书自劾忤柄臣指勒归里一言内自快独念恐失君意而君迎谓曰若真吾子也不屈志以完身与欢饮竟宿无词组及官中事且悉为理其六载私贲至数百金不倦盖君世为南域名族至其父廉材而天是时君甫十龄耳哀毁如成人君之母黄卓萃有丈夫志行理家秉斩斩而尤能以义方之训课责君君能奉循之性颖敏强记其为举子业日诵经史千余言甲夜诵时义至丙得七章皆不忘其于善书则天性也十五娶妇张孺人有女德君自是遭痼疾弥岁母黄怜之曰是不可困以博士弟子仆仆学宫乃出橐中装俾以例游太学时金坛王给事煜吾州曹工部逵骨鲠士也与君交为莫逆君之游也颇挟重人意且狭邪少年而顾悉斥以市卖古图籍会其仲季且长矣而乡之人有罗汝芳先生者以经术名东南又纵谈理性之学君率其二弟受业焉亦请得事罗先生于师友间有所究哲而反之身心者不浅矣君既充吏部选人而以念母老不就罗先生时宦都下贻书促君来谓有例可得京朝官吾且为北道主君报书曰不佞少而依母母今老矣安能以升斗禄易菽水养也敬谢罗先生门墙之迹冷矣呜呼君之所负挟与识度若此宜其旷然于一言之得失也一言之成进士君固不为意独其能请座主翰林于公慎行表母黄之孀节奉之母前诵而荐之母欣然举觞君乃大快曰母鞠我诲我赖我子以伸万一之报既而歔歔者久之伤父之不及见也母年八十一以令终君犹号踊几绝灌以汤药始稍稍苏先其二弟治丧葬罔不恣也其友爱仲季尤笃怡怡至老无间始教之终不得志于科目乃教一言及一元一元亦游太学有声矣会柄事臣死一言再起为令擢丞泉州府入为南职方员外郎武选郎中君戒之曰蹶不足沮起不足多勉旃慎守不变塞而已己官金陵则谓金陵饶佳山水足畅蔬豉米酝时继汝不乏毋为朝夕谋也君性宽然长者独勇义若不给而又好施予间从父老游或语某津无渡舟某里未井某桥梁圯某道不治某宗戚有不克葬者言未绝而訾力继之矣所勾贷缙钱不任子并其母与券俱捐不问其治家自赋耕桑外不与人共锥刀之利嗟夫传有之畜马乘而始不察鸡豚哉君殆犹贤乎也已郡邑大夫严重君每乡饮辄延之大宾曰即非令君父何可屈之僕介行尝倡其宗人修族谱饰世祠合飨以推择为祭酒进退雍容甚都闾里视以矜式晚年罗先生道益高君奉事益笃谓一言吾为先生治讲堂今成矣死可无憾君素强无疾疾未何时竟不起得寿六十有八张孺人之称孺人也亦以一言最故封

弇州生曰余吊武选郎郎恸欲绝既而踵门泣血以请曰父已矣所以为父计者独得公一传以为惇史余不能悉君独念郎尝令吴江与余家仅百里而遥吴江士民称其令清惠之政不绝口至于宁去官而不忍浚民之膏血以薪苟免其事尤伟后承佐司马

部与郎益亲其挺节持操所覩不二三也嗟乎柄事者以催科殿最令先意而求庸者比比以至辱吾国为聚敛之世能无慨也王君能深此意故不以子失官为恨而亦不以复官为快其犹贤哉余所叙述甚多然取征者此尔

弇州续稿卷六十九

●钦定四库全书

弇州续稿卷七十

(明)王世贞 撰

○文部

△传

霍先生传

霍先生讳羨资字汝学真定之井陘人也霍之先于春秋为侯国至汉而有去病光者大着将相之业其后寢微散处燕晋间而居井陘者歷英及朝用至岱而始以高年赐爵一级高年公之子为先生先生生有异质始习章句通朱氏易遂纵览诸子史百家言为文有奇气又多发其所自得总角补博士弟子试辄高等廩于学宫诸生从游者恒以十数然数奇至省试辄不利而久之先生之子鹏甫踰冠则袞然荐矣乃叹曰老骥厄于盐车而汗血者先之岂尽材角也然自是意稍舒间从二三知己选胜命觞酒酣为燕歌羽声慷慨长啸见者异之又三载而鹏成进士矣其授潞城令以任繁调长子所至必迎先生先生戒毋遽闻令阴伺物情之向令也而后入趣举三大白曰吾不忧汝矣然至令奏三载绩当封先生以请先生固不肯受谓吾泚笔而纵之若下瞿塘三峡岂其以强弩之末而畏鲁缟一日忽谓长子令曰者言吾阨在壬吾去令归矣归无何猝中风不言三日卒得年五十有二时万厯之壬午二月也先生性孝友其事高年公及母张媪甚谨张先卒先生昼夜咷号水浆不入口者三日蔬素竟禫服弗改事继母某如事张也念高年公老日置酒呼所善与之酣畅盖高年公毕生无皱眉时诸仲季有不能谋身者先生悉出其橐藏饷贖资之使营什一自给而从子鹤能胜读则教授之诸膏油楮墨衿裾修脯之费皆取资先生弗愆也里有诈为人立后而攘其产者以情告先生求居闲先生奋袂大言曰去吾必不翼汝虎邻少年苏孝娶妇不给而贷先生金以为装过期不能偿将鬻

妇焉先生就谓曰毋尔也出券对而焚之其耿介隱惻质有其仁若此丈夫子二鹏今为刑部郎中以循吏文苑起家鹏少桀黠先生严绳之始折节读书负诸生间声

弇州生曰霍先生行成而文高矣乃其着则以子贵故不然而閤井之节章缝之学何限焉能一一声施于后哉虽然始先生豪不肯就长子令封以布衣终令今为比部郎满考俛赠矣乃且缓而汲汲焉薪不佞传者华袞之荣时而朝时而野不偏废也郎真孝子哉

赠文林郎陈次公传

世有厚德而才不副计不获自致通贵者或为之贤其子孙以显融光大之曰天所报也天不能违才不得志于其身而能得志于其子孙亦巧矣虽然乃有德厚而才又足以配之大者可以致君而泽民小亦卓犖树立而或苦于不能治经术以趣时好即经术治矣于时好靡不協矣而或沮于病或格于他故而卒不获以其身通贵天之扼之几无复毫髮培栽之意于其间而度其究也乃亦复有贤子孙以显融光大之俾之伸于后将无扼者其定数而伸者以报德耶斯事也吾于陈珍明先生见之先生筠之荷山人也其得姓自虞帝后之能树德者为颍川之太丘能睦族者为江州之义门宋景定中有游于荷山之下而乐其土风者因遂家焉曰一龙自是代有闻人通显不絕至公之王父教授公用以经术举于乡两为大府师弟子多知名士教授公之伯子曰御史中丞公祥中丞敷歷中外所至有威惠而独于三吴尤着余燥发时公来抚吾吴今余六十余年矣而吴人尚能道之则先生之世父也先生父曰莲庄公裘尤有隱德举仲子曰先生讳琥珍明其字别号曰念斋生而明颖秀发儿时已嶷然不与羣稚子伍中丞公爱之摩其顶曰受吾书者必此儿也十三能属辞藻思郁发学使者得其文揭于壁而读之遂补博士弟子既微知先生发尚角也益异之无何饬于学宫而是时学使者为蜀人胡汝霖越人王宗沐御史为宣城人徐绅见赏异至刻其辞以式博士家言而江以西亡不知有先生者然至大试于乡往往不得所欲士子试出诵其文以语人人亡不下先生即先生亦自谓可芥取也已而梦火焚其所坐席乃主司之卧室火所取卷百余皆毀而先生之文在毀中又六岁为戊午提调康方伯得先生文而异之曰天下才也拟以为第一人而御史他有所主康争之不能得喞然袖其卷出曰吾不忍此生牛后出呼先生语之故久之莲庄公病剧先生不释衣而侍者竟月目眦为烂既公不起而先生之痛可知也近小祥犹中夜起伏棺而恸以故目疾日弥甚渐不能睹物而谢诸生矣先生乃仰天叹曰天乎岂亦火厄我与御史沮我哉会有子今侍御君俊卿少而材后先生之谢诸生二年而即补诸生已试多冠其曹复如先生先生乃喜曰不食吾世父祝者是儿也亦何必我于是益笃为善始莲庄公有兄曰绂曰袞绂夭无子中丞公检其橐得数百金以予先生谓资若膏油

费先生弗取也而籍其数篋之会袞之室毁于讼先生悉以反袞不毛发私也已中丞公卒亦亡子夫人抱他妣之子为子已而弗爱也欲征后先生先生谢曰吾父老而吾兄复痼不任子我安得他子人或以中丞帑艳之先生曰此吾所以益不敢当也嫡母黄母刘嫠而共居者十五年先生共奉之若一子姓十余人皆出自刘黄不自知其亡所出刘亦不知子姓之非黄出也友爱兄弟分甘割荣终其身无间言其待妇徐孺人若宾友诲育诸子则严君明师门以内蒸蒸如也口不挂人过失稍遇一善事辄津津齿牙间且以勗其子周人之乏急人之困甚于己既以为诸生有声纳履盈户修脯之羨裁而息之稍饶即以应贷者遇不能应悯默而遣之其仁慈发于天性非偶然也里黠有狎先生之寃者故为不能偿先生不问亦不以沮其意他日遇贷者复应之如恒人以是益服先生尤好为义举陈故名族然各为宗祠飨祀不相通先生曰果尔胡以报始而敦睦也乃议建一祠而公祀之且合俊焉约族之有科第者饶而遭家庆者以差次捐贖而俊卿连举进士先生首捐百金为倡喜曰吾事济矣于是从子邦瞻弟汝锡相继以科贡显而他助亦如之祠成而诸族始一俊卿之成进士时先生贻书勉之曰昔眉山子瞻谓文潞公俛九十而敏壮如少年不知其成进士时年甚少而老成如六七十人也若以潞公之少之老成而为老之敏壮张本则善矣先生虽夙以文辞着然不专为占毕之学而沈深于理性时有各奉朱陆之教以相倾者先生笑之曰之燕者有水陆而皆北首何相倾也后读释老二氏之书以为与吾道有相证者因更号曰三一居士先生善养生素鲜疾而一旦冒寒遂至困时俊卿已就选得桐乡令至真州忽心动亟归而北风佐之抵家公疾益亟见俊卿辈泣正色谓之曰吾哭先人而至盲几死不死又尝遘疴几死不死今见汝贵有诸孙而乃恨死耶且吾更一岁即辞天矣或谓善人不死者公曰子渊氏宁有未尽善耶胡以死也又曰善事若曹母母在犹吾在也遂瞑年仅四十有九有三子而敏卿其仲详具状志中

弇州生曰陈先生以盲废自是好习静间作语类讖者久而应之如响夫以陈先生之才而身不遇若变以陈先生之德而遇之子孙则又恒其变与恒皆吾侪小人之识而以窥造化之粗寻先生所称三一之旨则又洒然失矣

张隐君传

张隐君者讳弼字汝能其先楚之麻城人避兵徙蜀得蜀之内江家焉定为内江之榨木里人世隐约不仕至数世而有自守者以明经举起家耒阳丞为人公廉不帑于官所察见幽隐毋能欺者然不纯任之以惠利为吏民所敬爱数入台使刺天子异之为特迁常宁令甫命下而卒贫不能殓与归耒阳之人又相与出贖治后事以丧归内江而奉其主祀之名宦祠内江之人亦曰此吾乡之笃行君子没而可社者也亦祀之乡贤祠常

宁公有一子洪化洪化有五子长即隐君儿时以敏颖得大父意从之官塾师为偶语使隐君属对皆警隐君更出警语难师使属不能也逡巡引避谓常宁公儿必能绳祖武常宁公笑曰祖武不难绳也寻奉公丧归而家渐薄父洪化不任治生会隐君稍长即委之家秉隐君不敢辞学为之夺遂不仕然其聪明无所发以心计行之于治生甚工中岁尝一出行贾贾大振以至有家抚诸弟皆成立始而严隐君若父既而感又既而相煦沫如一身也天性朴俭帻衣恒至三泔食不重簋与臧获同甘苦然至急人之困甚于已即有以缓急告者亡弗应也尝赍赋金抵邑将渡江拯一溺者好女子也苏而叩之曰夫为小贾汉州而有传死于水者巨室之资与焉遂欲强室妾妾谊不忍故溺公何自起之隐君阳谓曰吾而夫友也而夫故有赢金在吾所可持归以俟而夫耗此女子归夫未水死也及还而妻以实告日夜物色隐君不得隐君亦绝不以语人至病革而与子孙偶及之夫妇始知为隐君相与持齐衰服诵佛为祈福终其身里中儿多逋赋邑令欲遴富人长之因责以赔偿咸自匿避且百方求解隐君独挺身见邑令曰兹役民请先任之富人者虚得名耳计无能踰胜民令大喜谓隐君毋以名应隐君之帑半耗以完中下人产而义声隆隆丛集矣隐君为人坦易无他肠其学固夺于治生然其所闻见即老博士弗及也嗜酒酒深辄慷慨抵掌谈说里闾中不平事诸少年有过举辄自匿曰吾畏张公酒中掌也得隐君一褒许欣然谓可终身矣隐君直而和既老益更事尝手书忍字数百于壁时时翫之又书壁戒其子孙曰男务耕女务织儿不习书犬彘食已而谓吾已矣若曹勉之异日得一官毋愧大王父清白当是时郡邑以隐君躬行谊予冠带隐君弗屑也生平鲜疾一日与配刘同日而逝人咸异之隐君寿七十五刘七十八葬邑南之飞凤山葬日始发圻有金鱼数十头跃而飞遂速入窆而闭之隐君故尝畜一白羸甚鲜洁其出则跪而受乘返则跪而受下若愿仆然邑人大异之曰公得非梓潼神耶何以张姓而恒御白羸也隐君有男子三曰琼瓚俱从事贵藩以隐君老俱不仕瑶为诸生有文行十上皆屈归而以诗自娱所谓方塘钓叟者也琼有子一而瑶子六曰应登者举进士为彰德司理封瑶如其官今为吏科给事中所上封事称天下尤以文事善余

弇州生曰蜀故多隐君子若严君平折象涪江老人之流皆有高行奇识挫名匿影不与世涉若张翁者孝弟力田人耳何以当隐君焉乃其拯溺而不名恩往役而不名义庶几能自挫而匿者虽然易世之后有文采自显见贵且及张翁矣安能终称隐君哉

林节妇陈氏传

林节妇者泉人陈某女也十八而归同邑林知言六年而举今乡进士乔木又二年而知言夭节妇恸哭不食且死之其舅敬轩公姑黄孺人强之食曰汝一死之为快计欲以报汝夫耳汝死谁为存汝孤者汝孤死何以报汝夫节妇乃稍稍食然才使余气息耳

时知言兄弟五人而长者业前天节妇次当治舅姑饗精心力而为之不继则资之■〈糸辟〉纒受机又不继簪珥时时寓质库矣诸叔咸有家室内愧节妇而怜之谋逋迎养孺人不恠曰伯氏天吾夫代之长固分吾夫复天未亡人代之子亦分且治饗非外政也辞不可盖十余年而舅姑恬然于匕箸者如一日然节妇以乔木长故资之就傅塾产益挫而会有岛寇警展转徙箸舅姑伺其隐则半菽至数粒矣乃复强之逋养节妇不恒得鲜毳间一得之不忍独御也苍头仆仆走之二尊人所未尝不欣欣为竟至于悬弧设帨之辰若岁时伏腊又可知矣黄孺人有女弟在节妇居恒迎之与姑处处必踰月冀以得姑欢敬轩公女弟适陈而嫠老矣节妇与诸叔亦逋迎之所以奉侍几如舅姑久之舅姑病先后剧节妇忧皇甚夜分抆颡礼斗祈以身代所遗污中褰踰厕手自浣濯妯娌间微风之曰幸有婢子足任何自苦乃尔节妇泫然曰吾非乏任者念吾所可自致仅此耳盖舅姑物而节妇之慎终非他妇所敢望也已而姑之女弟病节妇奉之如姑知言之庶祖母病其奉之亦如姑其物也咸叩颡于床乌鸟语无以报节妇愿生世为节妇媳奉朝晡耳节妇甚慈于乔木而能训乔木为诸生廩学宫教授弟子得束修以供节妇节妇不归橐而急中外族属之困者以是贤孝声籍籍里中至年六十法当得旌有司以非所急不即上乔木乃行求天下之有文行者于其邑得今少司马王公用汲为之传曰征矣又三年乔木举于乡又四年走金陵绍少司马公而谒余曰必得公一言而后王公之传信即余有言胡能加于王公也

外史氏曰陈之奉舅姑笃而恒抚孤慈而明禋身慎而经理家肃而成于诸德备矣其独称节者何举所重也嗟乎陈之去当旌者十有七年矣吾不能问有司之终举与否然以乔木之骏骏向显庸矣而犹难之若此即下而里闾远而岩穴其湮没偕草木无闻者可胜数也独何恨于蔽贤者哉

博士高先生传

高先生者名举字伯鹏别号淞阳学者称之曰淞阳先生先生为松之上海人去吾州百里而遥长于余一纪而故同时为诸生同试于学使者杨公宜而先生所试下安南策见赏独为第一亡何余成进士而先生尚以诸生试后使者胡公植复以论封建见赏试复第一当是时先生名称籍籍与其邑之僑少角非甲亦乙而至就留都试亦不利而分试者为进士李某得先生卷而竒之数以荐于主司卒见格先生乃仰天叹曰命也吾如之何始就吏部选人得分教京兆庠转谕皖城久之而余以纳郟镇节归且五载矣属岁在壬午余子士骐领应天解而先生之子洪谟以拔贡至礼部亦领顺天解会先生转天津卫教授遂以年至乞归余既杜门缮性寻老氏谷神不死之旨然阔疎无所得而先生自髫时即好披叅同悟真云笈宝篆诸书往往有冥契独会者其为诸生膺贡再更儒

官还往数千里间不以须臾易其功力晚岁有道流常山人者以秘诀授先生已复有萧渔隐者以所得与先生相证多合先生遂敕洪谟断公私事毋更溷乃公为当其杜关久可一载少亦百余日收视却听宛然若有覩于致虚极守静笃之真倪绵绵若存用之不勤其在陈希夷晁文元之间乎哉先生之先居东海世世力耆田亩而大父竹窻翁独好文念其里俗椎朴厌之谓丈夫安能齷齪饱死顾其子乐琴君能任家而晚岁乐琴君举先生生而颖爽异凡儿竹窻翁抚而喜曰是儿非东海里可老者因委家乐琴君而身与嬾胡媪携先生之邑俾从师读书先生之学日益进而竹窻翁大出其橐中装日酿醲击鲜与邑之贤豪长者高会争愿交驩翁而有王翁者女以若淑闻翁谋之胡媪委禽焉有婚期矣而翁忽■〈歹盍〉然逝乐琴君方坐东海大猾讼系于狱丧皆先生主之或谓俗有乘凶而暂为吉者可婚也先生左顾而唾曰奈何以俗窘我会乐琴君系得白持服至朞或又谓先生服除可婚也先生辞于乐琴君谁为主婚者必君禫服而先生始有室当竹窻翁之橐以好客损而乐琴君虽善为家然数困徭役又困讼不自振属先生之籍籍名诸生守令折节而礼之乐琴君得自寛东海上鱼陂十亩竹木千个鸡豚孳育时竹窻翁死而胡媪尚无恙就乐琴君之鲜脆甚甘然时时之邑从先生辄不忍去欲以舒其爱也如是者十五年而后用高寿终又久之岛寇起乐琴君不安故里先生亟迎之邑养是时先生之母倪业先逝矣先生悴于哭母而修颜于乐琴君忘亡而君久之亦逝先生戚易衷礼于生死靡憾其分教京兆也衙舍苦耳而壁四顾怡然寄声洪谟曰若无以苜蓿盘而念我浊酒可已渴菊可饱目也尝从禫祀昭陵纵观久之叹曰蕞尔广文而与此巨丽观大官片觜亦何异三鬻九菹也其善自寛如此为皖城谕以材见识上官尝署望江令篆者半岁许吏人称之前后课肄诸生有恩礼去而流思满学宫先生为人伉直无他肠遇不可义形于色若不知有人间僂巧者而性恒依于仁当（阙）季弱不任治生割腴以资之（阙）弟之夫死为之治棺殮抚其孤至成立而后已待外家中表亡不任其厚者然非自有余而后推之也其为文章汪洋宏放于诗亦能達其所欲言教授诸生多显者方伯潘君仲履其最也乡后进既严重先生争欲一覩见为快既闕不出望其居若道山蓬莱云

弇州生曰太史公尊道家以为使人精神专一动合无形瞻足万物而抑拙儒者谓博而寡要劳而少功当是时儒者亦抑拙之若胡越不并立者此皆误也夫治世之与度世虽小间其造则精诚之极同符于眇忽间而去欲去伎去扰即粗迹亦何以异哉高先生儒者也而不挟其重以抑拙道家得之深矣而亦不至废儒知其所以同也余故幸与先生同好然阔疎而无所待今且不能坚而出縻世网即旦夕归何以不先生弃哉洪谟以通家子乞余传先生余至今不识先生然而不敢辞者欲以见先生之贤而志余愧

来节妇金氏生传

来节妇者金姓萧山人其父俊故农家子也而有隐德节妇生十九年而归里中来仲康仲康亦农家子也恂恂以器业称瑟琴鼓矣凡十年而有一子甫襁褓而仲康骤中寒疾死节妇方妊身始而日夜吁天求代不得则大恸投体于地欲自裁姑倪止之曰吾老无论若不为若夫计耶若死是死若襁褓儿也且又死若腹中儿若一死而死夫之二子胡以见地下节妇乃强食息既及期腹中儿举矣亦丈夫子于是请于倪名襁褓儿曰五经而遗腹者曰五伦节妇故精女红因日夜勤力作以辅农之阙而共孀姑哺二孺时节妇方盛年丽姿族属之黠亡赖者利其它适以为己橐强之不可乃使邻姬诱之阳为入视工作者曰夫人好手胡不袖之锦绣家而刺促自苦乃尔节妇怒骂曰未亡人役此手以养吾姑而留此心以畀逝者若何得妄言嚙指指破含血以喂姬面皇恐退去黠亡赖者恚甚谓节妇所恃以坚两雏耳两雏死安能独守夜因风纵火焚其舍节妇仓皇掖姑倪起跪而祝天立熄黠亡赖者益恚曰是孤雏不可死耶适溪水涨乃以晨候舍傍曰儿必相携出观涨得间即溺之水节妇夜梦神语曰勿令儿出观涨也节妇心知所谓中夜抱儿而泣声达于外久之黠亡赖者谋泄避徙去而节妇始获贍养姑及抚二孺矣五经长颖敏而文节妇遣之从塾师受经以至补博士弟子而以五伦善心计委之家家粗立矣节妇即谓五经幸以儒起毋忘其本建家祠具祭器伏膺烝尝之典秩然而姑倪安节妇以老节妇亦且老矣而恭事之不少衰用宽乐终及其终也节妇之哭之犹哭夫也五伦壮未有子市妾入门而有涕容节妇恠问之曰妾夫贫不能食妾故见鬻适与所生子别故耳节妇谓五伦亟返之而欲有子而孤人之子也返之不复问直后五经虽不第而三子长行志荐于公交车次行学继补博士弟子皆通经术工古文辞次行政十余岁已能属文有奇气五伦后亦自有子曰行德弱冠亦补博士弟子郡邑守令上节妇事御史御史上尚书得旌表门闾赐束帛薪粢如甲令而节妇年八十四尚强匕箸诸子孙偕其妇起居侍左右节妇含饴嗽炙欣欣如也已忽泫然指二子曰微神之力而曹已委水火安得有今日且吾苟生为吾姑与而曹耳今可以报而父矣夫不奉而父者五十五年而犹弗克往甚矣吾之恋恋而曹也

弇州生曰吾徒有周元孚武选者业已论著节妇行矣元孚为人慷慨有气槩上书再论天下大计百挫而不悔乃于妇德独谓死殉之易不若生守之难彼盖有深感而能辨之于实际者也夫以节妇之所为守者襁褓一孺子耳其一犹未卜而能毅然持之亦百挫而不悔兹其所以合哉嗟乎节妇之节成而天子旌之二子有上寿子孙绳绳既蕃且贤天人之用媿矣彼朝梁而暮齐名与身俱失者视此宁不颡泚也

玉洲子传

玉洲子者栗其姓旺其名希颜其字河间之任丘人也尝自号玉洲诸公卿与游者咸称玉洲子云玉洲子有弟七人而皆渊着饶识行其仲叔游太学而季遂举乡荐第四弟以武功起官锦衣百户第五弟补博士弟子余尚幼然皆习通经术而诸从子凡十五人半亦补弟子员盖俱用玉洲子教而受室授餐无论矣当世宗朝之癸丑玉洲子甫十八而以选入内廷事故太监梁公某为嫡长而梁则故司礼太监黄公之嫡长也黄公得玉洲子而奇之每出入殿陛延见僚属皆挟以从玉洲子既朗俊而又善为容唯诺之余澹辞琅琅见者咸目属之矣俄复以选入内书堂师事故翰林某公益以博洽称累迁至某监太监戊辰今上为皇太子当受册玉洲子将命用币周府诸王廉靖不扰壬申赐蟒衣再赐玉带今上初即位玉洲子复将命用币于楚府诸王不扰如前玉洲子之再奉使皆司礼所选推也戊寅奉敕谕提督孝陵兼领神宫监事益自毖飭晨昏飨祀孔严启闭唯谨顾负气矻矻时守备某者恃其权勒玉洲子避道玉洲子弗肯避曰吾非而属也用是积不相能遂疏讦玉洲子应之辞甚哀然竟为某所中置狱狱甚急顾玉洲子实洁廉无他可搃指遂流寓金陵矣玉洲子乃仰天而笑曰吾岂非夫哉上之不能矫矫出其忠力以自结于上有帷帐之筹策下之不能媵阿求媚宫掖以巧取富贵语不云乎君行命臣行志吾知行志而已优游杜门自适足迹不及阍外中庭立数竒石杂蒔花木客过之者三事以下多旧游与吴楚竒士相酣畅竟夕玉洲子能诗歌尤善行草兴至辄挥洒醉墨淋漓客辄持去以为快人或谓玉洲子上念之行召补禁闼不则且北归玉洲子摇首弗顾曰吾何北即以南寄也北亦寄也以北归也南亦归也今年玉洲子五十五矣而谓不佞吾俛得七十不佞恠问之曰吾嗜酒而好月月之魄以至垂晦未有不呼酒与相终始者也且吾如是者三十五年矣取夕之赢以补日不可更得十五年乎子谓我七十可也

弇州生曰以玉洲子之材其为吕强张承业固易然有不为彼者彼能进而不能退也夫生长富贵之中且耳目日与之接而一旦失之脱然无复系此其胸次不亦廓落潇洒哉不佞长于玉洲子十年卧弇中且一纪矣而晚出就吏有茂先拘迫之叹即旦夕归愧玉洲子多矣故为之传而论著之

弇州续稿卷七十

●钦定四库全书

弇州续稿卷七十一

(明)王世贞 撰

○文部

△传

太傅吕文安公传

太傅吕文安公者讳本字汝立吕之先自四岳而至太公望为周师尚父其氏或吕或姜而氏吕者至唐浙东节度使延之而始显至宋丞相赠太师端谏议大夫御史中丞海以宏业直气重天下乃益显海之孙亿从南渡居绍兴之新昌又八传而为贵义始徙余姚当其子德玉时高皇帝下绍兴悉更定其版籍而籍吕者讹为李遂仍之不复德玉生原实原实生友直友直生琼琼无子以弟珍之子懋嗣生醉梦公改公之父也自改上遯懋至琼皆以公贵赠少保太子太傅礼部尚书武英殿大学士又得推恩赠珍亦如之其配皆一品夫人而公之母杨独称太夫人则及公之养也公生而端颖异凡儿稍长颀而白皙眉目秀朗醉梦公尝携以谒故太傅谢文正公迁谢公一见奇之抚而叹曰异日名位差胜我属其子学士丕善诲之毋失此儿当是时有邹绚诸燮者皆名士公与之下上其文遂灼然有声学士摄公至京师俸贽所业于故太保费文宪公宏费公复奇之如谢公俾与其子游寻归就试于浙不利补博士弟子而醉梦公尚客学士所以疾卒丧归公踊而哭几绝者数矣竟除服不能兴已荐于乡明年游北雍祭酒魏恭简公校慎许可独称公为贤遂上公交车擢同进士出身改翰林庶吉士时故相李文康公时司其事凡再试而始得公久之益重公以为宰辅器世宗猝问李公诸吉士谁可大用者李公独以公对公遂授检讨寻分校礼部士得十六人持节册封汝宁颍川二王以善为礼称还充经筵展书官校对列圣文集再充廷试受卷官南京国子司业缺时翰林以南国子为外僚多不欲行乃间公于文康公谓公欲得之文康公恠而问公公谢曰非敢欲之唯上命耳何择遂迁而南公所佐祭酒马公汝骥邹公守益黄公佐程公文德四五公天下所称贤者然缓急异用公剂而衷之皆得其平至公之所自立条教皆凿凿中窾其得士心逾于前四五公矣公守南司业可七载澹然无几微留滞色始迁右春坊右中允掌南翰林院已迁左中允领左春坊事主顺天试时上心不欲权下移而公试题用礼乐征伐自天子出而其文又最精剖大得上意手以丹铅标之中外籍籍传公且大用而明年复迁南国子祭酒甫至召领国子祭酒公素以宽平得士心其任两都国子士争颂称之时分宜独相久上谋置贰令廷臣羣推太宰闻公渊南太宰张公治少宰徐公阶南大司马韩公邦奇少宗伯欧阳公德并公而六公以资序居末上得公名意若曰是故能尊君者耶持之十日而密采国子诸生称公若一口于是特简公与张公并命而公为少詹事兼翰林学士疏辞不允当公之少时谢文正公引自拟而文正公之大拜其廷推与李公东阳同

日亦以少詹事入而年亦相埒人始归知人于文正公时上居西苑斋宫独分宜直侍机政咸趣之公日入文渊阁默默无所为则手录国史之有关于馆阁者凡十余帙居久之上始召公与张公偕入直赐金帛酒馔甚备于是机政稍稍与矣寻续修明伦大典充总裁明年廷试当赐宴礼部分宜拟公坐三品上特命次尚书盖异数也万寿节进吏部左侍郎兼东阁大学士俄北兵阑入至都门内外戒严时徐公为大宗伯而公与之偕分宜召对于永寿宫上顾公与徐公曰二卿久失相见礼徐公顿首谢因颇陈战守之策而分宜请视朝公皆推言之上称善故退公上章请收瘞三辅暴骨而赈其生者严饬营兵以图善后悉下所司行之上颇急边事问公公言日风霾不已此兵象不可不预防而咸宁侯鸾方握兵柄挟上宠横甚欲并都御史商大节兵大节疑其不轨不可上怒逮下狱欲坐以领兵官已承调遣不依期策应失误军机律斩公谓大节事方在议非有所调遣也且无失误不当坐之不纳鸾又言敌入寇请发糒饷从军又不给则民禾固敌食也听卒自食之便公言业设督饷大臣所至有伏食而复载糒于军过费且古之善将者卒拉取人一物即斩而故纵之食田禾非所敢闻也鸾又议开市与敌和公又持不可鸾以是衔公切骨数上密疏诋欺公上不为动而鸾竟败公前后所草疏或自上或偕其僚长咸伉直无所依徇而其于裕邸事尤切始上以巳酉春立庄敬皇太子冠出阁亡何皇太子薨上疑之而二王生同岁次长在裕大宗伯请册东宫上以问公对曰自古帝王莫不蚤建元良以正国本甲令皇太子年十五则选婚东宫与诸王礼异今二王皆已长选婚读书其期也宜亟正名如礼臣请旨谓不鉴巳酉春事耶公又对巳酉春事何足虑天所授之必不以册累也亡何大宗伯复上请婚期迫矣以东宫未定不敢议出府乞暂于宫中举之旨谓诸王婚于其府例也何宫中为公又言先年五王婚于府故名位等又当各之国今册立礼特未行耳于婚府未便且礼不可不别上竟不肯别礼听以明年三月冠八月出阁讲读九月议选婚公又言婚必当在大内先朝有太后有中宫有东宫故天子尊而羽翼壮上骨肉唯二王耳而骤遽之顾上蹙然处空宫臣等不胜寒心上又不听二王既就邸隔一垣而居岁时不复召见宿卫单薄人心汹汹谓上有所适莫各欲自为地者中允郭希颜久已废奏书请出景王之国以安裕王而他辞谬有建帝立储语上怒甚促寘之大辟公从容为上言希颜狂悖死固当第所云出景王以安储意似可采果尔则东宫可无册而物情自定覬觐亦息上大感悟卒如公言时创边筹筑外城而燕之士庶财贿南关独当其大半上欲尽城其四垂公请并力以城南关俟竣事有余力而更三之报可光禄岁费至三十万金上疑其有干没以问公等具陈光禄岁额二十四万先年费省可十三四万余以资匪颁好用之需而今倍之而更不足者岂尽上所用也乃条上四弊曰傅取钱粮之费曰关支酒食之费曰门禁之费曰磁器之费上乃责寺臣陈状而令给事御史岁籍以闻公又与同官疏谓入直诸臣有常禄有大官餐钱而又日三饭于费尤甚上为停二饭时分宜久贵为上所亲礼雠视其僚而子蕃挟之横甚所颐指诸司无不披靡者巨珰勋臣缙骑大帅靡不托姻娅相结纳顾以徐公地逼百方批根之徐公惴惴不

自保公起东海孤生无丝毫瓜葛其间不亲不疎坦坦行意自若分宜亦无以难也上多祠厘甘泉竹宫应制之作咸以称旨自喜公独不为意听客裁上而已有所奏对因心而发即不能尽合亦不至忤人以为公遭每得天盛德所假盖亦有之自为东阁大学士以来进兼礼部尚书再加太子太保兼文渊阁大学士上有所怒于故太宰见法而命公出署之俸差次六卿以下堂上官有所登斥事竣称旨进少保兼武英殿大学士加太子太傅再加少傅阶为光禄大夫勲为柱国其荫则一子入胄监两子拜中书舍人主会试考者一读卷者四所得皆天下知名士其赐若麒麟飞鱼蟒衣他金银钱帛不可胜数赐俘奴如功臣而他若遣永明殿释奠先师皆儒臣所稀覩者公以为恒公丰采如峙玉既以盛年居大位出入朝行咸目属之谓轩轩朝霞举如会稽王抚接士大夫有情礼而性又至孝其居官太夫人未尝一日不在养昆从子姓俱以公故为京朝官聚室私邸公每下直休沐辄帅而进谒太夫人择甘毳而荐之退则呼酒觞酌谈笑融融如也太夫人以寿考终公已踰艾矣哀毁如丧醉梦公若不胜上欲慰留公而不得则为之遣行人护行给邮繻驰急传以归上书摧谢既服除念受上恩遇深不敢自同于去国者遇大庆则贺大工则助而上亦时时念之谓旧人唯某在辅职阙辄意属公而误闻公病乃寝公家余姚余姚之故城小在姚江北而江南之人十倍之其人多逼江而居公念岛寇方讧卒有警无噍类矣请之督臣胡宗宪谋城江南公聚材数十以倡而其民惮兴且逼江之人之虑有侵室也晬而夜焚公材公叹曰我斥帑以卫彼民而彼乃讎我复令其子元与邑之士大夫疏请于朝下胡公所官为给直城成其伟亦数倍于北城寇至亡所掠徒睥睨去其民乃大德公为生祠祀之公归以牢醴上寿与祀祠者踵相半矣公端居自维姚故饶邑也以赋役两困其赋额轻于三吴而苦奸胥黠豪之飞诡田与赋恒相失田去而赋留不得不取偿于里甲白于邑丈而清之伏田出矣又力主均其赋则吏不得以下上其手而役之困则重于十年两徭虽名为逸四而劳一然当其劳则加派猾出力疲而不可支吾又邑多贵官科第优免过当于中产益束湿白于邑尽徭其民岁出钱以予县官官为召佣又请以身先之不得名一亩徭士大夫信公亡敢违者赋与徭俱不困民益德公而御史推行之全浙及他省皆称便公家新城中迭石穿池颇有亭馆花竹之胜而诸子皆能事公悉其鲜毳以从客至则留留必尽兴公頽然其间竟夕不示倦色人以为裴晋公白香山之在洛不是过也公居相位仍李姓而即其所居水自号曰南渠天下熟其为李南渠先生者而至是始疏复姓吕而更其号曰期斋谓吾虽耄敢忘以圣贤自期天下乃亦更称曰吕期斋先生当是时王文成公倡良知之学于海内而乡人乃有不能悉者公构书院与文成之高弟王君畿今宫保赵君锦相与讲明其学邑人人向风矣乃曰公所自谓期也公年八十而抚按臣以故事请上命彩币饩酒即家称贺且命有司月给米四石岁给夫六人公顿首曰上不忘老臣老臣乃以丘壑之腹累县官帑因上书谢优诏报闻且録一子中书舍人公出岁米具醪糒日召其从弟舍人某饮曰吾与汝共之又斥以召戚执故人曰不尔吾且愧疏太傅公素强少疾饮食不衰又四年而卒天子闻之为咨

嗟叹息赐祭自闻丧以至葬凡九坛行人王阶治葬赠太傅谥文安仍予一子中书舍人其官与恩礼于谢公无所不埒而公加二龄焉其在政与林下之年亦畧相等人益相诧谢公真神人也哉公所著有期斋先生集奏谢稿为文典畅平直如其人所娶夏夫人有女德结髮至老而始前卒前后所置贰皆有子子六人曰祠部主事元中书舍人允石阡知府充膳部主事允太学生觉光禄署丞魁女三一适兴都正留守管海一字举人谢用模即文正公孙也十五死于公交车字者以死殉之一适陈鏞而夭诸孙二十二人多为博士弟子有文名而胤昌成进士时少于公以司理最拜吏部主事孙女十人曾孙男四女一婚字皆搢绅大家

弇州生曰公之谥曰文安文者其官也安之谊则好和不争云公在政府日余守尚书郎见严徐二公若水火严之焰日炽而为忤日益甚徐公日自危所以防之者百端即大僚往来两家亦惴惴而公坦然其间信心而行冲口而决人人自谓得公欢也所谓好和不争者非耶然公于上有所论执不曲意阿徇上亦有听有不听然卒无所疑至于出景以安裕不惮逆鳞之后虽严之亲重十倍公不敢言而公言之卒以见信宗社又安公既不自明人亦无能明之者至盖棺而事始着公胡长者乃尔大耄令终显融昭明固隐功之报哉安之谊似不足以尽公矣

沈母孝节传

余以嘉靖癸卯荐于应天而闻同年有沈颐贞者质文君子也沈君卒于公交车竟不之识而至万厯戊子盖四十有五年矣而识君之子鳳翔每谒余而谈及其父事辄洑澜者久之既而曰父已矣小人有母夙夜拮据代吾父终而抚不肖始盖四十余年如一日也为乡进士妇也者恭己为乡进士母也者慈而俱不获沾一命之荣且今犹未辞菽水也则不肖之衷盖怒如调饥焉母廖姓金陵世家女也十七而父失元配闻母之贤而纳之父虽已领乡荐有声实然食贫自守母竭心力而精事之王母丧偕吾父以戚易着己而举不肖父再上公交车试未毕以病捐馆母闻之痛欲絶者数矣独王父在强之食曰若不忍于夫欲从之地下而忍于若夫之上有父而下有孤乎母久之始一就食母时春秋二十有四矣晨而治饗羞以供舅恒至夕夕而抚不肖泣而乳哺之恒至晨不肖稍长能识字督就外傅曰而父之所未竟乎哉盖不久王父卒母自是始操内外政矣然迹未尝出中庭有邻媪者见母少美而怜其羸然也母揣其意頽颜视之遂絶不复相接其葬王父也不以不肖孺子而贫废礼内外吊送者亦不知不肖之孺子且贫也则在母一身矣孤自外塾归母必坐跣澣而听读尝读至论语注父在子不得自专母谓曰兕误矣不得专者势也不敢专者礼也取注示之乃已虽然自是心服母当矣不肖始补博士弟子母快然自适曰而父业庶几不坠矣然所以课励之不少竟又数年不肖荐于乡私

念母当益快及拜乃愀然曰吾不意而之遽及此也虽然未练事吾尝耳若读而得夫子制锦之说吾窃忧之不肖再拜受教然自是娄上公交车辄不利归而有惭色母辄迎慰之穷达故有时毋戚戚也是穰是蓁必有丰年忧在苦倦耳不肖时自恨以寡故不能有加簋母觉之辄曰而父亡而尚幼我日一食或并日食今者不告阙老人所得逾矣不然若进食未尝有覆盂也盖又一载所而凤翔来再拜请曰母今六十矣既不获徼天子之一命则唯伯氏华袞在夫叙而张之璧非母意也母乃赐之传以示久大乎因出何大夫之纪诵之曰信又征之姚大夫朱大夫亦曰信

弇州生曰三大夫者皆笃论君子也其口与凤翔若一夫金陵故高皇帝建都地也五方之俗错焉得无有沃土之思乎哉沈母矢志以报夫竭瘁以奉舅秉义以诲子于妇德备矣传之志风也又曰余尝过沈生家不益父时一椽养母以志不以物亦可称孝廉矣

张司直先生传

张先生者讳寅字仲明其先世曰鸣珂里张后徙荆州之江陵至高皇帝时而有福安者从起兵因隶籍太仓其子道旺能拓其业以令终寿九十有九道旺子洪洪子赠文选郎中玉世世不废为长者至玉而业益饶雅尚善吟咏有二丈夫子伯曰辰乡贡进士蚤卒先生其仲也生而警敏有大人志稍长父使受伯氏经属文辄工然试于有司辄不利至二十四而补博士弟子俄丁母燕宜人忧服除荐于乡与伯氏偕试公交车伯氏读其文吐舌曰吾不能争骥子先也果屈而先生独褻然前列属天子有事于留都明年晏驾新天子即位而先生始射策甲第就吏部选人得江西高安令归省覲里中将奉赠公之任而忽病卒服除起补宜春令先生因俗为政去其烦细而爬搔其弊属大水不辨畎畹先生躬行灾所移文两台请蠲岁租尤虑期会不待乃自具疏以请果得许自是宜春之水不见灾以治理闻巡抚武陵公荐先生材堪任剧调吉安之泰和泰和地广而俗鬻赋讼十倍于宜春先生悉心力而应之精彩亦自倍其它兴学校清滞狱撻黠吏抑豪右毁淫祠惩左道治状不可指数又以邑最所苦者徭役先生广询而得其平着为絜令上下宜之太宰罗文庄公论笃君子也为先生作平政叙勒之石两台荐剡腾上既入考绩见推择为南京河南道监察御史时上方下礼官议欲分祀南北郊社先生独抗章谓郊社之礼不当分祖宗之制不可易且周正建子则以十一月为岁首故冬至之郊先于夏至之社今以建寅为岁首则社先于郊矣夫先社而后郊是尊地而卑天也是故从旧便上虽不用先生议然识者韪之时有礼部侍郎黄者以请尊崇献皇深得上意纵横九卿间颇蚕食士民先生时督视南城列其十罪奏之侍郎辨之强上虽为两解而意恒右先生明年以院札巡视留都仓场又明年奉敕按核凤阳诸处仓粮所至申明职守绳贪墨

吏风裁大着时元辅张者先生同年也亦以议尊崇献皇骤贵宠冠百僚御史大夫汪附丽之举朝倾此两人者无所不披靡张虽以横甚暂失上指勒归而阴示且复用昼夜南驰十七日而抵钱唐役夫颠踣相踵先生露章劾之谓其悻悻无人臣礼且訾及其生平而于汪不才之迹尤详上恚下吏部谪先生判高唐州先生意恬如也州守心仪之请于台别构宇以居先生引诸弟子茂才相与讲艺订学时高唐为南北孔道其民困于逢迎且弗支而监司顾檄益邮夫五百人咸汹汹巷闾先生言之守守孱弗敢应乃自言之监司得毋益御史遂宜学使者钺修山东通志开局聘先生与二三才有司董之十月而成书以精洽名量移知安州自是始为政安虽三辅地而当下流为九河汇故独多水患先生探其源自易水而下至容城逮新安以为牙家港请于台浚之仍厚其堤以御漫溢身杂行版锺间与役卒分功而治既毕事父老争叩头言微使君吾曹其鱼鳖矣问护田几何曰东西可一千四百顷岁入粟余三万石皆使君赐也相与立碑纪其事先生之治安种种皆善状时与祁州比壤而祁守为孔天胤先生亦以善谏断闻台司大狱凡事必以属两守时人为之语曰有所疑问安祁莫忧悚有张孔时先生浮沈外僚可四五载会张汪已物故乃始入为南京文选司郎中当治行安人号泣追送釀金以赈先生力辞之其人曰刘宠不受一钱乎先生曰我何敢希前贤且以不受为受耳其人乃立祠生祀先生先生至选部部尚书为湛文简公他曹郎则邹文庄公周简肃公皆天下所称以师道士行表表者先生皆与之下上其议论以故学益精而益以有闻湛公尝有疏请复部规以肃羣同凡十余款皆属先生草满三载入考绩吏部当是时册立皇太子上博选青宫僚属辅臣夏公等有所登进往往多其私人见擿于台省上乃改属吏部而许文简公为尚书雅知先生遂举故霍文敏毛太保吕文恪邹文庄徐文贞等十二人皆一时选而先生与焉遂改右春坊右司直郎兼翰林院检讨仍以五品服俸供职夏公以非其意颇不恚而翰林中故事六品而下以科第叙坐次先生成进士十九年矣同列多后进执谓序坐者非科第岁也乃授官翰林岁也岸然不肯坐先生下先生不自得上书执政极论之未定而给事御史入诸翰林言摭摭他事论先生罢归自是中外有荐先生者皆不报凡岩居十九年而卒寿六十四嗟乎以先生其才用直道谪而积资簿至深且久即不登青宫选而不为卿寺佐当亦佐藩臬以至六卿大僚无难者彼所云青宫选名为伸之而其究乃抑之也且所争持者坐次一小节耳岂亦有点于考功令而肮脏终其身天耶吾所不能知人耶当必有任其责者然先生绝不以介意方课督家众力耕自给衣食稍奇羨则辟舍后地累石而山依竹而屋甫成而有飞鹤来下驯扰不肯去遂名其园曰来鹤结亭山椒曰九皋其左有台曰问月浚渠而西曰九曲溪又西筑室曰岁寒居暇日合交游之工咏能饮者时■〈彳昌〉徻其间相与倡和甚适所著诸集中有称来鹤园岁寒居七赏编者是也人或谓先生有园有诗何必减白香山先生逡巡辞谢曰吾园不能当履道里诗何敢望长庆集所不甚愧者方寸耳然先生入仕之岁与居台日论谏侃侃其左降收用俱与白公同先生一斥不复召而白公数出数入优游八坐先生寿止易卦而白公

加一纪先生之没在围城中拮据兵戎之事而白公优游令终乃有逾于先生者然先生有佳子孙而白公阙焉先生故当胜之先生有至性先后二尊人歿哀毁过礼出入必以像偕语及必泫然伤其不逮禄养也伯子逝哭而为之经纪其丧葬不以累其孤幼力为之抚教以至成立不以累其家虽其歷官久顾垂橐萧然至于强自力为调恤于族党戚执之间寬如也所著有晓川诗文集奏议若干卷山东通志安州太仓二志行于世先生有子五人孙九人而和州学正用中与其子元征锡征最能受先生书其请传先生也亦学正与二子偕云

弇州生曰吾犹及从张先生游先生质而不俚泰而不骄居然有前辈长者风今不可复得矣所歷州邑俱有惠政着去后思论建侃侃为时所称述青宫之选庶几晚际矣所坐至微小奈何弃之而不为复也夫一弃而不复余故归责于世之人虽然亦可以观先生矣

弇州续稿卷七十一

●钦定四库全书

弇州续稿卷七十二

（明）王世贞 撰

○文部

△传

陈司寇传

陈司寇公者讳尧字敬甫世为扬之通州人公幼而颖异就外塾日诵千余言即他儿所受书耳之亦成诵甫髫工属文通州守高君鹏者得其经生业异之已偕诸生试文益竒为饭斋中高君间谓媪有宁馨儿可念也苍头出蔓语是且入见夫人见必一叩首公怒叱之曰唉吾岂汝曹抑项人耶高君问而得其故愈益异之抚曰生自爱必为国器公自是补博士弟子数试高等廩上庠蓋弱冠而举于乡名声骤起谓一第毋足溷者然数困公交车久而顾其于文益工寻从故侍郎吕文庄公枬游反而求之身心之间纯如也遂成进士隶事工部时议为献皇帝立庙于大内世世勿迁部尚书以试公公乃上议

谓礼縁情者也而制于法夫所谓勿迁者德祖也太祖成祖而三也献皇帝之世次则孝宗也其庙宜以孝宗祧则亦祧而藏诸夹室俟大袷则并出之当尚书弗能用然心韪公议而以其岁授都水主事当治清江厂选部郎林君春内贤公欲引以自近而不得公既之任有廉勤声好读书思以著述自见其所论白改凿黄河之上游避灌口以达清江而阻于都御史不果后都御史检故牒行之世世受河利满三岁为虞衡员外郎再以才转营缮郎中时上方勇于宫室之事无虚岁而将作诸大僚且縁以博功赏公独务为节省建沙河行宫公与一主事监之主事欲征商公争之不可乃曰事畏相挠请得分半而任之可乎公所任独不征商主事亦不敢征也事视公迄工毕而所省金钱以数十万计已复建大高玄殿公入视工籍曰何多也汰其十之三已又视工直籍曰又何多也汰如之所汰率多中贵人之私人与虚直度无如公何则更目公陈古人陈古人云而公所省义以数十万计工完当上功籍公独避之他室尚书意甚憾之比奏上独不迁仅得赐镒金而已久之擢知台州府公至埽去一切供亿所献决以情衷三尺而行吏抱案堂皇受成事伍伯持挺两庑惴惴至日晏不得一饱然率以善满去竟公任无訾陋者公暇则延见诸儒生讲说经义所识指如王司寇宗沐呉中丞时来辈后先为隆万间名臣遇旱祷雨辄澍岁比稔士民争颂之治状为浙第一而以不能事一乡贵臣中飞语调知南安府公之治南安无异治台其称公于南安者亦无异台而所最着郡当岭南孔道香药象犀之类故守之市之若讥税者公并不复市前后公所领郡多佳山水数从其贤士大夫游以公不好饮相与称公为醒翁作醒翁亭配公于欧阳永叔公亦因自号以寓意云踰岁转长芦转运盐使时盐课岁不登公白其御史曰私盐禁不厉则亡鬻官盐者不为官盐利便则驱而入私盐其要莫若严私而寛公所谓严者若而条寛者若而条御史是之课骤增至万余而商不病公之为长芦复五载人意公不能无望公笑曰我何望为即薄我而以中大夫佐人主急哉然太宰万公鏜微公之曹事饬公署整庀而器之遂迁广西右叅政公所治粮储务在于撙伏田革滥费吏不得侵牟其间民不病岁踰二载为贵州按察使时三殿灾所采木倚贵州兵民不胜力公为更番之议以纾其劫布政使用苛法采丹砂贡都御史议开永宁银池公皆力持之三载以入覲行道迁云南右布政使未上移广西为左公之再至广西也其吏民鼓舞相庆时靖江宗人无虑千计率童而禄于官公曰天禄也非朝命不可他郡兵岁五百戍会城寢溢而倍者三公悉勒令如原数诸降卤徙粤者世廩已别子则以报効世半廩已又其别子则又以报効世半廩公第令廩及身而已公所裁省帑赋复以万计而公之在贵也以持宣慰安万铨事与巡按御史左在广西复以持知县康建勋狱与巡按御史左两御史同乡人銜公刻骨谋中公以阴事竟不能为地而公用积劳拜右副都御史抚四川分宜相以非其意谓客曰彼何人也而亦蜀帅公闻之曰吾有归而已既而分宜相以论罢公乃叹曰銜人者何为哉夫人三銜我而吾三如故也于是益自信六番招讨杨氏死二子争立势且用兵公曰毋庸也移檄授其长嫡符遂定野人妄相习为白莲教至聚千人有欲借以为功者公第捕其首恶抵罪众皆

解散滇大酋凤继祖跳之建昌滇抚臣檄公擒之公曰建昌去滇一水而兵不渡将嫁祸蜀也急之则穷兽且挺缓之一夫力耳继祖觐知公亡他意束身归公抚蜀号为不贪功名先大体类如此迁南京户部右侍郎未上改工部兼右佥都御史总理河道尝议修高邮湖堤当用石公曰石所从远而湖力薄不至嚙多树木隔以板而芟土实之费率省半又蠲淮徐之河负三万金召为刑部右侍郎未代而景恭王自楚返葬辎重千艘而漕艘复入之黄河徙道者百二十里公忧之甚选一大校探刁阳湖得故漕道舟自溃口入转而达胡陵无所亡失公既已得代即移疾归再请不允转左侍郎而公请益力许即家調理公少而失父恒依其母邵太淑人而自其转徙岭外度不可偕则留其妇朱淑人共养至是念太淑人益老矣以故坚不起而当事大臣如徐公阶李公春芳郭公朴辈挽留之甚切即剡荐无虚岁公夷然不屑也日侍太淑人为婴孺慕者七年而始背公公痛毁如少年服除当隆万之际天下日望公之出而公以疾不起矣公孝友故天性尝以余俸置两舍负郭数顷既而念其仲冠叔完孺悉畀之冠有子大壮成进士得封员外郎完亦举乡贡成立矣居恒谓微伯氏吾安能家公又给其从弟元母钱数百缗俸岁収其子息以给公于一切亡所好顾独好书虽老持一卷不废乡人间以私谒公居间如弗闻者也而度其枉或有急则立应之矣治河副使梁巡盐御史张者皆公门故谓公得无有所托乎公谢无有则为梁言通夫役苦第寛之可活数十百人命为张言通有盐舍而领真州盐不便任之可岁减民数百千缗二君唯唯故公歿而其乡人非宗戚而为之恻涕咨嗟也公之后先持宪以嫉恶闻然尝奏记徐公阶曰天之生大贤大不肖厖厖耳即中人伙而中人者有志而未练则见欺有才而暴施则见忌此两者器使之近贤苛责之近不肖姑置而观其后可也徐公善之以故天下称公廉能以指数而不废为长者公之歿有司闻于朝赐祭葬如故事诸生相率状公行请提学使者祀学官公有子大科亦成进士为河南郡司理文学政事有世风余见碑志中

赞曰当嘉靖中政府方急私而陈公不以私请竟能完其用以显迨其末而政府方急才陈公以才进而竟能完其志以归何也贤者固非人所可测也国家用陈公所至常为县官节财用牧养小民兴吉士节即古所称贤能臣何间焉然至典郡不进秩滞盐官五载其不中考功法者几希盖余传陈公事而慨然若有警秉衡者其毋事名而责实于耳目哉

陈布政公传

布政公姓陈氏讳鏐字子兼其先世为吴人有按察佥事祚者数上书言事忤人主下诏狱至老而不衰天下以直归之佥事公子长曰唐府教授宁宁次子封工部公冕冕始娶于沈蚤歿再娶莫安人实生公公幼而岐嶷有成人度尝遇巨蛇起坐侧不为动一

夕盗踰墙窃公衾无所惧亦不以语人读书自若家长者诘公失衾故公徐曰夜半落盗手矣工部公闻而喜曰此儿国器也公为诸生以明经工属文称而复能为古歌辞时人慕说之寻举于乡第二人明年罢礼部试又三年而成进士授工部营缮司主事公以工部公老有移留省意而尚书雅成之令榷荆州木公固辞弗得乃自誓曰吾岂以贪泉而易吾味也公所理凡一年所税课比不登额而商旅怀之讴謡载道其去荆幙被束书而已尚书廉知公状亡能以故事难也公还部一月而满三月而封父母即乞归养中道闻工部公丧踰年莫安人卒公率真为戚备孺子之慕而易亦称之服除补虞衡司迁员外郎再迁都水司郎中治通惠河河事治寻以按察僉事奉玺书督四川学政公雅好经术砥士行而不务为操切诡激于文取朗洞尔雅然亦惟陈言之务去蜀俗为变当公之试诸生也第持其文甲乙之毕即付郡邑庠不复问为某子甲有无知名士以故居闲遂绝而所识拔若张中丞肖甫辈皆时名臣既贵而造公庐或以书赘谢者公戏答曰向者吾知君实不知为君今者君知我我又不识为何君也后先己酉壬子得士皆公造而其于録公文居多相国徐公闻而贤之转湖广左叅议分守湖南有刘守某以意而文大辟者四人公白于御史出之为冤民裁武冈诸王之乱政者民称为神明久之迁河南按察副使御史孙昭贵倨甚公见之行不能疾而又中褻系解昭内衙公为恶言以风公不应趣监兵入卫驻白羊堡有通判吕某馈公蜜食一罍公受之寻启视则中金也呼吕诘之曰与乃公馈食胡金也通判跽谢曰死罪有之军食羨也公不受即奈前使何某不上羨即奈后使何公厉色挥之出中外方推公且大用而御史昭之疏上矣吏部业重公而难御史为量移以解遂拂衣归公既归余奉赐不能资伏腊间日一肉食中堂广袤仅丈许扁之曰已寛意豁如也公阖门谢世事其托寓在翰墨而踪迹在吴中山水最不喜发贵人函问而部使时时尉荐政府既慕公名始亦怪其落落而终予之凡数年起家云南仍故官公所理屯政以积堕废乃为榜欺隐之罪使得自首及私辟草莱任土地者厚予价而籍之自是有竒羨矣俄有诏云南一郡上黄金万两供少府公第令上半而以半俸全省均之民不告病而金亦足时王师讨叛酋凤继祖台使三司俱在行独公留署诸篆军事旁午沛然无齟齬人始异公文吏有开济才而会酋凤平公察其部人非党逆者以胁从法论释之所全活不胜计遂迁四川右叅政寻为按察使以至右布政使咸不离蜀而蜀诸生吏民素善公条教有迎公于数百里外者公三任不以资歴而所莅辄有声最后署藩篆钩余羨万金悉以归库筦库者以例请公怒曰若知取羨例耶不知不取羨吾例也蜀人日望公开府而公年仅六十三恳疏乞致仕归人以比之范蜀公镇云且谓其干力才术足倚荐者益伙而公竟不肯应又七年而公以病捐馆矣公恒自言性虽刚无忤忌即有所憾而遇事更为之委曲以明无他生平澹泊鲜它好嗜此为二长而不能无四短惮烦一也健忘二也力竭则止三也不为人谄佞而时有驳难四也余谓公四短时近之而实远二长则未能遽尽公公孝友天性其归自河南而兄哀所受台馈踰二百金以授公悉让弗受念从弟贫捐余奉百五十金使谋十一居无何费其金尽公复贷粟食之歿

而为调棺殓毋憾也诸中外从母姊妹咸于公乎衣食公非有羨橐也不忍以四子先其宗人不尤难乎哉公为人坦易不设城府而中实耿介遇事迫则益舒缓而竟不废往来余父子间最久余在西曹时尝一过公公留饮已顾问中厨鲑菜几何答以无之复问甌中酒几何则耻久矣相与大笑过邻舍郎饮而其两解绶归里里中豪椎牛飧公或谢病不赴间过所从故旧或僧寮道人舍浊醪粗■〈备，食代仁〉谐笑亡已色其于酒户仅上中奕不登品而命之觞则觞奕则奕不辞也公又自言诗不入格而无俗韵文不成家而能达意然以置之长庆庆历间无愧色工小楷出入锺欧自行草擘窠以迨榜署书尤丰媚遒逸有天然趣海内既习公名高有文章而又最嗜公书造请户屢恒满公不忍逆拒之人人饱意去公亦欣然自谓贫而晚节不落莫以此公之将易箠也顾谓其子尔闻曰迫祭日即宜墓谒毋以我故废礼又自考大敛制授之曰毋使我情见先人因从容赋数诗而后絶公有四子某某多能嗣其业者

王子曰呉俗剽捷而陈公独以缓自后然亦不废官以公之内行严而外寛然长者是为名相左也实相成也夫使朴士见文文士见政实不病华名不损质斯所以为难能乎诗有之如可赎兮人百其身嗟乎安能以百呉人赎一陈公也

曹子贞传

曹君贄其所著玉芝楼集者而介沈嘉则书以请曰不谷老矣请及子身以不朽唯嘉则亦云余获一二寓目焉而后叹曰不知其人者知其友而今乃幸知其文也则何所介嘉则为虽然非嘉则不可以详乃为曹子贞传子贞者其字大同其名先世为武惠王彬其第三子武穆王玮凡七传而至建炎避狄自汴徙常熟转徙于通州家焉世受儒起家郡邑长吏者数人遂为通甲族而君故宁海令博少子也出后其季父贺令瓛君生而颖异读书日数千言踰卯能文辞尝得古诗一编多断简以意属之辄诵及其补博士弟子业已厌薄时义为先秦二京建安家言而其于时义虽不恒习有构亦辄竒以故小试恒冠其侪偶而困数竒至其试于乡辄不利者凡八而始膺贡入太学上舍君所谓构而竒者易四书各有敷义数卷故礼部侍郎崔公桐为序而梓行之其赠君诗至有四俊之目当君贡而有居君次者老且贫君悯之即自居次其自太学为吏部选人且什褐矣居恒念士非用科第不足以展即一命何溷我为因罢不就辟而会有传台疏高贡士格与科第等用者乃抵京当是时乡人李公春芳为大宗伯贵用事君乃上书李公凡数百言大略谓始而以辞求士辞不足究士实既而以格用士格不足竟士才李公为击节叹赏约以晨趣直舍语太宰而上有急召弗果居数日君意李公岂其忘之耶即破格不过假一资半级夫士才安能终竟也趣投牒吏部称不愿得官李公为嚙指者踰时而吏部疏如君请授光禄寺某署丞以归亦异数也君故有遗产而性不别治生产以益薄又好

奇书急义施时时叹诧何以副我愿而尚能倾庾谷助族人之十丧不葬者诸赈药构桥掩骼骸数畧而为之里中齷齪子目摄曰夫已氏也而家用名粉矣君又能辟舍东偏为斋室间有所购金石古文诸书名画之类以充之李公至拜上相尚不能亡愧公之题署有曰贤隐者曰抗志游云者君亦无所报谢自君之为文章传海内海内士大夫虽不为尽知君而要当者其在太学吾故人刘中丞景韶最慎许可然赞君文寿其父后先州守游氏翟氏喻氏三聘君以志事请君谢弗敢当州举乡饮以宾礼礼君君又谢不往而数从其乡人为诗社倡酬则故尚书马公坤侍郎陈公尧咸折行而友之君于书无所不窥即释道堪舆医卜三仓二藏世不能得其目者而精为训故所著有桃林笔烛百六十卷藏于家而其诗则徃徃为世采择入明雅书法亦遒婉可爱君壮无子踰五十而有丈夫子三咸彬彬成立人以为长者报云

赞曰以子贞之才八试而八见屈者业非子贞罪也及其季也俛得官而弃之若敝屣夫以子贞之弃其官若敝屣然而八见屈而犹试者何也此其意诚不欲以微见庸今夫浅蓄者易昭也小就者易名也乃子贞弗屑之矣元亮高蹈自适犹一试为令玄晏病废长徃屡来朝辟其壮气雄志不能自释于咏史释劝而天下卒推之为逸民之冠即子贞不获庸而言为脍炙动见楷模语有之鸿飞冥冥弋者何慕及其渐陆仪可用羽于戏休哉乃长淮以南有嗣元亮玄晏而称者必子贞也夫

程母传

程母汪之事程汝义也则不及姑矣有舅在而汝义多贾游所为子者取足焉诸羹滷甘毳不废舅安之计以傍拓丙舍征诸役而亡为操者程母数日夜晷仅以三时息而躬井臼釜锺之任汝义既游薄所息什一不以秋毫私其内程母能忍诟节嗜以佐之亦稍稍充舅既死有继室曰汪而汪握家乘以姍易御诸妇独程母庄事之晨昏上食愈益为共谨汪内愧曰彼乃能姑我而不能姑何也自是尽室无嘻嘻矣汝义之为义种种多程母力会客死嘉定有二子善定善夫犹在提抱间程母痛哭绝食亦且死或谓之曰若为死者死则死之为生者死则何以死也程母乃悟曰吾何以一身见地下乃稍稍食而所以教养二子益慎其治家能力嗇强于汝义时二子既长更行贾他郡而会善夫复客死已善定之妇又死孺人悲思岁余遂病咽鲜食善定为废贾而隐于汤药者十六年会善定之继妇陈割股肉杂粥糜而进之良愈善定乃稍敢脱身贾行抵吴而程母病复发遂不起善定之痛其母不及见也以十六年之疾而遽愈而后成行行而复告疾是以愈故不见也念无可以伸其情者谓汝义之葬王子尝为志而铭之绍俞仲蔚之书以请传

王子曰以程母之为妇为母而足称贤然亦贤者之常耳胡至汲汲焉而求传之甚哉人子之不欲死其亲也不得其所以无死则求传之夫传成而程母不益贤也则何如孟氏不云乎虽加一日愈于己若善定者庶几能用其思者矣

童子鸣传

童子鸣者名佩世为龙游人龙游地皆薄无积聚不能无贾游然亦善以书贾而子鸣之父曰彦清者最称为儒雅不寝然诺子鸣少贫不能从师塾遂依其父游得书辄问其父字乙之已稍遂能旁识已遂啜嚅诵之属已遂能臆解之已遂业五七言古诗有清韵而其为他文亦工尤善考证诸书畫名迹古碑彝敦之属其游多梁溪梁溪诸公子心慕之争欲得子鸣一顾以重子鸣不为逆时时有过从至欲擅子鸣不能也而最后太保朱忠僖公与其兄恭靖王闻子鸣名而使其交相善者挟之至都子鸣为一再过焚香啜茗评隲古书畫而已不复及外事二公既重子鸣谋客之一夕竟遯去不顾子鸣面峻削骨立骤见人语呐呐不出口尤笃于交谊有所期虽千里不爽其所营織嗇周身之外赢不能百一而仓卒以缓急请亡弗应者至为德而人负之若已负德于人唯恐语及也为人孝友自天性其侍父舟车间虽寝溲必躬视养母尤谨兄珊尝举于邑为诸生以长者闻子鸣游多浮期顾归必就兄书舍买升酒相劳苦共枕达旦至再夕不强之入不入也即贯镢尺缕悉以推其兄而至子鸣出而幙被不复问妻子亦以兄珊抚之逾于己矣子鸣既以文行重交游间而高淳韩邦宪尝一识于逆旅器之又数从交游习子鸣名会出守衢首行部过其家龙丘山坞中人不识太守鹵簿皆拥门矚观尉史游徼旁午顾见案上一样蕨菜羹脱粟太守与子鸣共而乌乌吟至夕始去咸莫测何谓子鸣久之始一入郡报谢诸丞倅司知为太守重客礼之子鸣逡巡谢弗敢当太守急欲捐俸资为子鸣寿难发言而子鸣恒自谓田父甘田中食不忧馁也台使者以太守故请见子鸣不得大索其所著书子鸣谢亡有退而上其所辑唐故邑令杨炯邑人徐安贞集太守为钁梓行之太守遂下教邑纲纪南州杜门文举首驂北海为政康成标里龙丘逸民之藪前苕后佩千载两贤苕犹托迹功曹一试綦组而童君毕志云萝声迹俱挫可谓嶮然不淄瞻之在前矣间者一造其庐谈讨松桂寥廓之士邈焉寡俦太守不佞白驹用慨其树楔左闾以风在野子鸣固辞之邑不得乃谓其令曰夫不佞佩者而敢当我龙丘先生也夫龙丘先生以一握耒启不毛之山而使山至今而借其姓以显奈何惜勺浆之享以报之龙丘先生者太守所谓苕也令涂君乃为祠祀龙丘苕而记其事子鸣生平布素无长物仅一复陶而从客所有呼寒者即解衣衣之不复征薄田数十畝忍口腹得少羨辄付义施族指众而俗三男一女子鸣捐羨粟以给举女者又以贫不能延稚子师则又岁割租若干俾延师其所施行类非贫士也迹所自共养盖贫士蹙额所不忍俄而太守韩君卒子鸣徒步送其丧踰岭惫而病梦太守邀并驾子鸣以婚嫁未毕辞不可觉而自疑久之病寢

剧卒年仅五十四一子尚幼子鸣有藏书万卷皆其手所自雠校者生平冒雪游九华山登南岳祝融坐云气间泰山日观峯候夜半出日以为竒遂有九华游记南岳东岱诗及他文集龙游县志若干卷

赞曰吾闻之太史公季次原宪怀独行之德义不苟合当世世亦笑之盖蓬户疏褐不厌死而已四百年而弟子志之不倦游侠之言信行果已诺必诚赴士阨困而羞伐其德盖亦有足多者焉以为其两不相得也今观子鸣子次宪之行而时有朱家田仲风岂不亦兼之哉其恂恂退让惨怛孚尹业遁名矣而名逐之有以也韩太守者余同年子也蚤死不然其折节下士庶几成其声者哉

秦母葛太恭人传

葛太恭人者故永昌守秦文桥公妇而太学生炳礼科左给事中耀母也太恭人之父曰石崖公恒为广西叅政有妇曰施夫人先后举四女而最竒其少者是为太恭人曰儿当贵不易耦也盖久之始得永昌公而是时秦施两姓乔木相望为甲族既婚太恭人之事舅姑若习为妇者其躬勤碎细治滹滹爨浣又若习为穷约家女者姑周最艰难事顾独安太恭人养即少疾苦太恭人未尝不废寝忘食而奉汤药也秦故族贵而舅封主事公好清静不别治生永昌公不能无束修诲即诲所入訾毋论斗粟尺帛太恭人辄以供养即不给而簪珥随之矣初举一子殇遂从舆永昌公置贰许且孕则旦夕吁于天曰幸早免身得雄以慰堂上无何许果举男子即太学君炳也既举炳而子之如已出又四载而太恭人举给事君耀其子耀也毋逾于子炳也永昌公少歌鹿鸣寻偃蹇公交车不自得欲遂为吏部选人太恭人从容言曰以子才而终老公车耶且今用格上士今选人欲行志得乎永昌公感其言罢不复选而益锐于学读书至夜分其足冬则沃以水警困夏避蚊罨中太恭人手女红而相之不课满不止也永昌公成进士而封公寓所书官箴以清白相励太恭人虽不知书时时从永昌公耳之公出令武康岁俸稍给矣太恭人调衣食一切程诸生官舍有余桑辄课僮修蚕事身■〈立乞〉■〈立乞〉筐篚间指示二女曰是衣所从出也孰与夫珠玉之不能暖而永昌公以令高第入为南户部郎当推税维扬内畏其污不欲往太恭人曰不忆若翁训耶官岂能污人人乃自污耳永昌公矍然曰善遂往而诸所理税焯焯有廉声又能捐余俸治公使杯酒筯器食以故人争慕说之至为碑纪去思而永昌公之始守金华也以避亲嫌当移郡乃得永昌永昌在万里外念封公故难其行封公谓永昌公非以谴移不行是怗地也且而妇任为子永昌公行而以病卒官太恭人之濒死者数矣以有封公在不敢死也掩戚而上食封公封公之不欲食者数矣感太恭人孝诚为勉进匕箸已而谓人曰吾忽忽此为吾妇耶将吾子在耶封公竟甘太恭人养以竟终而太恭人所以教二子虽极爱不失严始就外傅即举永昌公

故事为训稍攻苦果脯慰赐相继一涉偷惰即色庄谗让之矣臧获大小近千指悚息而太恭人之是听然不为操切苛治第母爽其勤惰而已永昌公性喜施太恭人佐之施而尤笃于族党姻戚尝僦屋以居贫者与废箸者而衣食之歿又为之治丧葬给事君之成进士也以选读中秘书拜今官迎太恭人就养邸中尝有所建白太恭人辄规之曰士贵识大体为县官利益若齷人以自快好犯以自标非所望也给事曰谨受教故其所上疏多见采纳时议翕然推之而太恭人居恒邑邑念其乡亦会给事有册使命奉太恭人还里帔冠瑱珠子姓奉觞为寿甚适矣乃更遭末疾以卒卒且葬而给事君来拜且哭曰微吾母孤何以有今日也上舍君亦拜而哭曰微吾母孤何以得称兄于给事也余感其意而传之永昌公讳禾其生卒女妇孙息详志中

赞曰给事君之自状云尔余数游无锡里里中长辈德秦母无异辞夫舅姑藉而怡于老夫藉而良于官子藉而名于谏即妇仪母道曷不取征哉虽彤管所称何加焉

弇州续稿卷七十二

●钦定四库全书

弇州续稿卷七十三

（明）王世贞 撰

○文部

△传

陶文僖公传

陶文僖公大临者绍兴之会稽人也与山阴诸公大绶同里閤相善而其射策时上以文僖公为第一人诸公次之而亡何有所更置文僖公遂得第二人自是益相善其官史局侍讲閤与銮坡鹤禁之长佐对秉更莅若左右手然诸公遂以其女女文僖公之子允宜而最后诸公繇吏部右侍郎兼侍读学士捐馆文僖公即日继之亡何亦遂卒始文僖公之侍讲閤也天子器重之数称先生而不名众以为且大拜而及其病遣中贵人问痊否赐羊豕酒粢瓜蔬等物歿而复遣中贵人临护丧赙白金米布寶钞香烛俱视执政恩数其谕祭治葬赠大宗伯大略同诸公而易名之典则诸公所不敢望者天下之惜二

公以庶几有所展布佐成万厯之治俛及而失之以为憾而于文僖公尤切公字虞臣其先世为彭泽人徙于台己复徙会稽遂为会稽甲族曾祖曰慥举四丈夫子皆有科第而其叔子曰庄敏公谐选入翰林迁给事中以直谏谪徙累官至兵部左侍郎卒赠尚书为德靖间名臣庄敏公之子曰鸿胪序班师贤以公贵赠通议大夫詹事府詹事兼翰林侍读学士举丈夫子三长湖广叅政大顺次为公又次大恒公少而端嶷不妄笑言三四岁时母淑人授之书即成诵已就外傅而有朱先生者好为礼使童子习洒扫拂几展席夷其贵于贱者夏不得挥扇公独乐之曰童子分固当且夫习则不劳静则无暑朱先生以语庄敏公而奇之公尝间至庄敏公书阁见名臣奏议辄手为哀録得数卷庄敏公益奇之曰是儿其中人也十二工属文十五补博士弟子明年廩学官又明年应省试夜女奔公者却之三已遂徙居归而与其伯氏相师友为学每谓圣狂自一念起署其室曰念斋公凡三试而举于乡又三试而举礼部以至射策及第盖年三十矣授翰林院编修故相严耳公名欲致之门下数遣其子世蕃候公公戒门者以他出应之第一刺报而已卒不见而是时僊居吴给事时来慷慨慕直言公独善之数与扬挖世务吴君谓世务莫先于击相严公曰然吴君出其草公读之曰是为名计耶为胜之则毋触县官讳泚笔汰其甚者已吴君论上不胜下诏狱诘责所共谋五毒苛备或传且诬伏者公闻之泰然曰遣饷药物醪糗为伺耗息吴君谢毋重累故人公笑曰固也奈何使君独为善吴君得不死以戍去而公尝迎韩淑人养于邸得疾卒公以丧归毁瘠踰礼三载絶酒肉不御内既除服念通议公且老而时事亡当心不欲出通议公强之乃出仍故官校録永乐大典寻授诸孺瑯书公每为言古寺人清公奉法以令终者其贪暴负国叅夷五宗者委曲辨析不已诸孺瑯咸拱手曰此公异日谓我也当是时元相华亭公心器公数引与议国事而会世宗晏驾遗诏及他笈表徃徃公有力焉寻以通议公丧归会大典成道进翰林侍读公所居丧无异于韩淑人时甫公除召充世庙实録俄校应天试务绌浮薄所得多老成士还进侍读学士掌留院岁余拜南京国子祭酒至则进诸生与讲说道理经济不为高遠奇僻之行士则之亡何以少詹事兼侍读学士召侍上讲读于春宫寻进詹事仍兼学士如故上践阼迁礼部右侍郎兼学士复如故前后凡三视院篆异数也俄解院事佐部其在经筵为日讲修穆宗实録为副总裁上虽在冲幼圣质不世出公思所以启翼之者首讲大学谓明明德如磨鉴不虞昏新民如澣衣不虞污止至善如赴家不虞遠是在于性真未凿时扩充善端而已公所陈说每至谨天戒法祖孝亲恤民隐慎用舍广咨访缓工役饬边政谆谆乎有味言之也公每进讲左右皆目相指而上益自重之其亟称先生以此赐服视一品他精鏤宝楮金符绣币彩扇貂裘之赐无虚月改吏部仍日讲修史岁首大计吏公去藩臬之巧附势者二留运司之苦节迹迂者州幕之非疾而诬以疾者各一众多称服其迫欲得公大拜亦以此盖未几而公卒矣得年仅四十八公孝友天至既与伯氏相师友伯氏数奇姿食贫然公庄事之不敢以雁行进叔氏得奇疾公不忍其躁也身与之寝外而俾嬪章夫人与其妇居内尝手疏吁之神愿减筭以代抚恤寡妹尤至伯

氏之子尚宝丞允淳其成进士无异师皆公教也公为人宽然长者然闷默不泄尤奢取舍绝嗜好其以乡进士里居有凌而夺之田于令者公弗白也令后知之惊以问公公竟弗白里豪有御史逮当令治疑其狱公徐谓曰书不云乎疑惟轻令悟趣宽之豪后知其自夜挟百金为寿公谢曰悞矣我何德于公公无厌此金■〈山上畚下〉耶胡不易粟帛而贍族姻之饥若寒者其奉韩淑人讳也故陆都督柄方重伺公窘于棺遗之美材可百金公返其直不得后抵京而都督死矣公设薄酌呼其子绎授直曰吾以不欺志也胡少保宗宪时拥节东南欲交欢公捐数百金为树坊公叹曰东南困矣以饷军不足而我何用坊为则逊谢曰不佞业已有之不可强裁之至百金公又谢曰无已有外王父之韩大夫未树者附一名足矣公居官二十年一切赞谢俱绝门故计亡之则购名书画犀器以馈公笑却之曰吾唯无好耳好则何论金帛与书画犀器异耶公家世二千石产可中上而其自奉极简约食不过箸器衣无重彩门不纳优人迹顾其好施予独异是友人朱泰家贫事亲孝死无子其妻复以节死公先后为治丧葬养其父母又为之上状于有司而推坊直祠之曰节孝置祀田若干畝有钱生者挟旧而徒步访公于京至则病发狂逆旅人走避之公为徙置精舍躬粥药死则调棺殓归之乡公所衣食父之党若而人母之党若而人诸戚友以至闾左右若而人取之若困廩也公恒言学有根而室有基不实则欹又曰为善罔极恶亦罔极譬之岐乎南则益南北则益北又曰善犹水也为之先者源为之后者理始而滥一觞终而润九里每读孟子至收放心未尝不再三叹也且曰忧勤惕厉其古帝王之心玺乎又谓允宜才不可强守可强也财有所用之则重无所用之则轻惟俭养廉惟俭养惠公之所以能绝取广予俭故也公疾得之晨趋讲而（阙）更衣风入之遂剧上所遣慰使犹强自力拜（阙）乃顾谓伯氏曰书生诚不意得此父子兄弟举甲科官近列如国恩何唯生者勉之遂瞑允宜之举乡会皆魁其经进士第授刑部主事又能为古文辞

赞曰吾闻之吴君时来元相江陵公之上帝鉴图说也实公发之乃世庙冯几之诏公所进于华亭公者深矣养正圣功也萃涣大几也其二端皆自公公用矣人乃以不竟用为公惜者何也夫进善不自讳居功不自名公所以称大人长者哉陶氏之声实衣被天下未央者有以也

为民御史传

万历初一御史上书言事忤旨夺职归而曰吾编氓也即自称吴氓云既病剧而谓其友人曰死幸呼我为民御史友人者王叔承也于是叔承草为民御史状而属余传之为民御史者胡濬字原荆世为常之无锡人其先有儒行而隐耕独其王父良佩与父赠御史君观隐酒赠君之与伯兄暨兄之子皆夭于是胡有三节妇而君之母封孺人阍独

以明淑称甚爱君而诲束之君少颖秀所授书辄诵弱冠补邑诸生娶于浦后封如阍浦有母而嫠亦来依君君虽为诸生负儒声然家以食四嫠故贫即阍夫妇拮据理生不能给而嫠之长者赵数责甘毳于阍君乃行馆夫已氏束修之羨得少缗钱时时佐赵共又不给君泣呼天曰奈何阍室长者共又独劳母心耶然君亦不废学遂举乡荐成进士矣会有诏选庶吉士读中秘书人以谓君君笑曰庶吉士文弗及程出而给事御史令课吏高等则入而给事御史吾文而出乎将以吏入乎等耳令能德于民胜于是通州进士顾某意与君合曰且以试笔札费沽酒共醉耳君之谒选得永丰令初莅令而史白靡舍敝当治君笑谓治费云何立召工而授之筭率减十九有构讼者君按情重轻丽法而小宽之顾购得其主文者谓曰汝筭讼之利而不筭讼之害也以三木囊其颈匝月曰尽此曹庭稍空矣邑多荐绅大夫君抑之不使食齐民而造请酬酢必以礼当受赋君必投谒谢谓令不敢以法加贤者顾诸公之谓何诸公人人悦输恐后也客过邑故为怪衣冠抵掌甚口君阳过从与语得其状立抉其妄出诸境有谓君胡草草者君笑弗答也客寻用宿狙盗事发他邑君乃曰盗而衣冠吾不失之彼衣冠而盗将奈我何君为令七月而丁母阍忧去官士民遮拥不得去立生祠祀之时有成御史荐诸朝且曰七月荐非例也能取诸三载以加七月者谁乎服除补安福令满岁入覲仅数舍而装竭贷故人得二十金乃成行所报谢诸公取成礼而已人亦无敢望之君之治安福其操舍大率仿治永丰而加以文采安福荐绅大夫不啻倍蓰至燕中成巷其交口誉君若一而君闻不恠曰吾得之安福荐绅大夫声甚不若向者永丰得之耆老女孺声也尚书以尺一召君试监察御史君试御史治东城戚畹缙骑家惴惴相戒毋犯君琅玕而君所上书有所侵中贵人语报闻君每朝中贵人辄目摄之曰是悍御史耶小迟去我曹当见鱼肉而红星犯禁垣君时已得按辽左乃上书言事事颇及宫壶君大约谓今天子方幼冲慈宁能摄之欲以彤史见忠而中贵人指摘有所讥切几丽大辟辅臣宛曲解救乃削籍罢为民君从户部给繻出跨一驴都门客争劳之曰御史也而民虽然真御史哉一中贵人沃之酒以好罽衫强被君背曰毋谓我曹无人即从君死不难也君之为诸生固已任侠赴人之急甚于己而自御史罢归其自喜为侠益甚诸微时有德于君者君弗忘也君所为德于人及以事见君鄙者君如弗有已监司守令严重君干旄溢委巷间君不能一一报谢而所覩弗当意或面责之又数数为戚故驛冤滞宽徭役听者外夺君勉为解去然其中不无少望诸受君恩愕意外且无可复偿姑秘之而傍伺窥覬者有所请而君不能尽应则持君迹以修毁君夷然弗屑也君故宦薄而又喜侠不能无挫产顾其于伦常愈笃母阍歿而存嫠者姆赵丘嫂钱所以事之如阍会浦孺人有怠色君不获已乃若示废箸者而岁入额米五十石以共二嫠即亡岁亡废也妹适李生而夭有一女毋女者君谓嫂钱姑女之及长嫁女如己女李生娶君时时调之稍不给则以詈报君君好谓即詈我我必以调报君既用宗戚故见嫠而至于客则心好苟一技名当君者亦折节兄事之舍馆传餐侍酒竟夕不倦其所尤善即叔承舍中儿每谓人吾见主君犹嘻嘻见王郎自色栗也君素趨轻饶膺

力尝道晋陵醉后舟出观白龙横堕水且濡矣忽矫起蹈空上观者数百人咸异之君为御史而顾生以覲入与君饮适掉臂曰吾臂任御史君跃而立顾生臂曰御史足定何如令臂尝与客游匡庐秦余诸山客方饮山趾睥睨间君已独身取间道陵巉巖而登箭阙握冻雪下劳客矣君归而于吴越诸名胜靡所不究梅时玄墓菊时娄江桃花时蟠螭芙蓉时西湖术时菁山葛仙井杨梅时光福樱桃时北固山以至太湖月钱塘潮虞山拂水吴淞海探华阳善权张公诸洞吊泰伯延陵春申伍胥范蠡要离伯鸾遗迹陟龙池巉观虎鬪金山呼鼃食及网鲋鱼作鲙间手采菠薐芥甲石耳茈羹俎佐饮若惠山梁溪园则几席之矣君所适毋问主其主耳君名逢迎恐后即毋论主其舍人子圃丁煮茗焚香前拥曰我公来耶君亦袖缙钱见輒劳之以至城门候即丙夜悬筦待曰稍迟立我公则俗矣君以好客故益窘益贷债债家不忍迫之而君亦不忍负乃别从姻故起债债端无穷而产遂大挫计无所复之则姑托酒与肉以至竟死君死时仅四十有六也其罢御史以民称者八年天下既高君之节而始疑君者徐察君之秉介不食私而终信之日夜冀公复召用而御史李学颜以疏荐君俛得罪用是荐者沮止然君绝不以为意君读书好涉猎大义弗肯竟其为文辞隽朗饶意趣书法亦遒逸所著有采真集若干卷

王子曰叔承之状君垂万言其什八在侠十二在政行夫侠者季剧之流闾里雄耳乌足以名胡君叔承又言君喜佛事当歿之前数日与陈氏子度胡桥遇鹑衣僧胸前垂绣八卦囊以梵字一赫蹠授君曰视之君笑弗视曰吾事去矣视何为僧亦笑竟去曰不视亦得歿之未一月而有胡僧持枇杷石一鸚鵡螺一寘柩前讽呗移时去竟莫可踪迹也客游惠山泉亭者遥见君幅巾行咏入黄公磻怪之曰吾闻胡君病今乃已耶则君之前歿一日也唉亦异矣吾闻夫夫子不语怪然征之君乡人而信故记之夫以君之慷慨论天下大体得意外以终死天下能惜之而不能举其语尤可叹也然以君之遘奇证或幽或显浅智又乌能倪也

许本中传

许本中者名和歙人也其先四岳以功世世有国封至汉晋而修业僊道显名者数十百辈而转徙于歙之东郭者最盛其指几以万计而大司成国最贤有声本中其从子行也而齿尊始本中之尚少而其父纯斋翁内贤之俾肄举子业则善举子业试小挫移之诗则善诗已弃之贾则又善贾凡贾四十年而后成其产大饶积逾于旧十倍旦日慷慨谓西郭之许曰吾何忍若独食贫夫陶朱公何人也十九年之中而三致千金再分散与贫交疏昆弟而谓我不能请得而勉焉虽然若何所自出也今吾许之先庙夷于社偶而市器迹之瑚簋亡所托不腆牲牲以共簿正而不恒继其何有于若乃损其橐得千八百金尽收庙傍舍而新之已复损二百金置祀田俾许氏之当为宗子而谨者司之伏膺

无阙烝矣始庙成而神道狭其傍本中室也许氏之老谋且拓而难之曰吾歛稠居鳞栉尺地尺金是不可以复溷本中本中觉而毁室之楹可二十以除道而坊其口曰高阳里高阳者许望也本中乃喜曰可逮下矣遂损千五百金置义田畝七十而奇置义舍楹七十而奇以居许之贫老孤独靡恃者而食之月受米五斗孟冬以量受衣絮年五十加薪炭已又推其邸舍六计岁入缙钱可三十千以五千资不能婚者二千资不能葬者治义塾邸之右待不能束修者义阡郭之东待不能窀穸者自是歛人兴而为施予徃徃以义声归本中而本中亦自愉快曰我何人也而敢加陶朱公公不为制故再散千金而再尽之我一散而割资不能半而许之指迄今无食贫者为制故也本中恂恂朴茂人也孝友自天性其诸义事多称父遗指行之父有子本中而穀而（阙）三矣且死而复有子曰穉欲勿举本中踧固请曰大人岂以和不任孤耶父乃已本中抚穉而教之为郡诸生有名本中年七十四尚壮然无子以穀之子景星复用货郎格得光禄署丞

赞曰吾闻之叶生云尔夫太史公之传游侠货殖津津乎言之曰人富而仁义附焉又曰何知仁义已向其利者为有德盖内伤其贫欲行仁义不偶而成腐也然其叙致猗顿乌倮程卓刁任之徒挟策握筭以笼天下利而鲁朱家之乘不过鞣牛剧孟不能余十金财郭解訾不中徙顾所全活贤杰少亦以百数其衣食徧天下毋缺望夫游侠不传取而货殖不传予乃知其性诚各好之彼仁义者何尝舍贫附富也虽然若本中者可谓仁义附者也夫许故侯裔也千甌之酱千钧之鲍其人称素封本中富而许之指鲜食贫者夫岂唯素封以比公族采食可也大司成国者今太史公传成而试以请裁焉

范母王太孺人传

王子曰余读功令至旌推节谊事未尝不再三叹也夫始寡而过三十者弗及格谓易也终寡而未五十者弗及格谓难保也有子而推一命荣者弗及格谓贵有力也乃及格矣而守令不为请部使者不为陈则非明主所以章闡阴教意也盖余与松江司理范君介儒善而得其所称母王太孺人事者而愈有慨焉太孺人笄而适赠司理公时赠公之父功曹公蚤丧独母李与生母孟存抗节相砥砺而太孺人夔夔事之均得其欢心当是时赠公以诺闻里中户屨恒满酒食以不时问而太孺人立应之毋爽二母间相语是妇也将不特称为顺吾儿孝所繇树矣而母孟病卒赠公以毁瘁故亦卒太孺人有二孤其长者仅垂髻寻亦卒而独司理在甫踰朞太孺人乃仰天恸曰吾夫子蚤不禄幸立于吾姑而吾子又不禄吾何藉以生且吾为死者死则死之于是姑李强削悲而慰曰而不见而姑乎而姑之称未亡人生二十二年耳而夫之在襁则四月也而姑不即以殉沟渚而备尝百艰以有兹日若今长六岁仲之视而夫亦差长且其产也有绶蛇出而应移灶占天其或者更吾门乎夫为死者死则死之为生者生则不可以死太孺人乃起谢久之

代李治家秉李素严至是益过为督谪欲以观太孺人而太孺人益过为恭敬其治脯修饭羹朝脯荐如婢子闾左有睥睨家人产者假邑更徭倍需其缙钱太孺人辄予之不校或谓弗予便太孺人曰儿犹未立也彼力不能蚕食我南畝耶吾寧能禁彼之睥睨自是家渐旁落而司理之就外傅进为诸生其膏油束修费咸自太孺人机杼中出矣李后竟以节得考寿终太孺人易戚兼焉迨司理成进士叅佐雄郡以文学政事称既满考赠赠公如其官太孺人封为太孺人

王子曰余闻之天子予太孺人命所以称扬隐德至矣是将昭天地垂百世奚所藉旌为虽然大母李则何寥寥也夫岂独司土者之责发潜闾幽是在司理矣是在司理矣

邓太史传

邓仲子一試而魁其乡再試而魁天下三試而賜及第領金華石室事再入朝而過余山中欷然若不與也徐叩之而淵淵肫肫無能窺天袞者已而嘆曰先德之不劭非小子敢聞也先德劭矣而不着天乎如不肖罪何仲子之嘆嘆其父太史公也稱太史公者何以仲子封也蓋郎喻均盛言之矣于是仲子有朝事間而損書帀以其姊夫左叅議熊惟學之狀來請傳不佞野人也何足以傳太史公雖然其賢也蓋三征之夫匪征匪信也太史公者諱儼字時望中川其別號也父曰朗為諸生倜儻負奇寧王濠之反下書欲以指揮使授之朗棄家逃之山中乃得免亡何卒娶于李有丈夫子四而公居仲公之哭其父雖尚少而能毀成癘疾乃與其兄弟竭力共奉母李當李病且殆公倡兄弟而晝夜吁天且哭曰有子四人使母食貧而又惫也生何用子為請各減筭以益母壽公又進曰如窳言者請亟死以當母罰因倦伏而長公忽醒呼曰頃余聞空中語削黑籍回祿馬此為何而李亦暴呼公速予我粥適夢有緋衣者以一丸藥藥我齒間至今習習芬也我飢思粥矣亟進之盡數匕質明而起若亡苦者蓋又四年而李以老終公號痛曰今者之愿減筭以益母猶昔也而不驗者何也于是葬而復倡其兄弟廬墓攀栢之恟天地慘晦旦夕黑虎三匝繞而前伏若家畜然靈鵲來巢廬中虞祀輟而枯竹挂幡帟者復榮蓋人人稱孝感云而公固孫其兄弟弗敢居公為諸生曉經術工屬文嘗試而司試者竒之以第一人荐于長長擬稍次其人狼取而毀之曰寧失荐毋為第二人且也若安能終抑渠然公自是屈竟弗荐也而伯子以誥荐矣公遂謝去經生業弗復治而仲子復登第始公有所假貸于人毋論子徃徃并逸其母而至伯子荐則盡焚其券嘗治書學宮舍持金釵為膏油資而同舍生有盜者舍人子以告公公曰彼豈為盜釵來欤有間舍人子復言其狀甚悉公乃笑曰而誤也夫釵者已得之某所矣里儒甚口而誑顧獨不誑公曰夫誑我者我乃誑之公不誑我何以誑也當二子之赴計偕別有熊子亦與公謂曰而來前夫而曹之為蹢蹢涼涼者胡指也其出也思以其道易世也夫易世者變人者也麻之翼蓬也处世

者同乎人者也莲之在淤泥也夫有以处之而后有以易之齐桓公会葵丘而叛者九国公羊子曰矜之也若曰莫如我也禹周公去是矣盖三人者拜且汗下也而仲子第而念公欲归公书止之曰老人幸健饭毋念我夫天子以名予汝而不获实汝博天子名而不思报胡以归也且夫芬华薄而寂胜之胜可也偏不可也内不见己外不见人不见而已非尽人已而无之是归也夫岂唯无人乃独有己非也仲子不敢复言归而以上御极恩得封公如其官有司造公庐而贺焉公为一报谢而已以乡饮宾请亦不赴人或谓邑司幸倾耳公胡不少居闲为自娱地乎公谢曰吾不知居闲何状且吾往者不居闲而今乃居闲是吾以儿子居闲也夫以儿子重非吾意而何居闲为公性孝友当其尽失怙恃则捐其室与兄弟处即一食弗共案弗甘也仲子既不获谢病而公又封乃谋以公仕养者公又书止之曰吾不甘兄弟之食而甘若食乎亡何其兄弟后先卒公日夜悲思曰人四体而失其二何能身仲子闻之悲竟以请急归而熊子亦有使命时伯子方在侍公意稍发舒日置酒为乐而以元旦倦于客明日午刻更中衣及酉呼水净齿颊匡坐翛然而逝年六十有九熊子盖称公居恒好静坐不识枕席者二十年内境湛如也事至毋意必事往毋固我尝受诬于人置逮甚迫竟而待之若忘时时指心而语人曰是惟无所系也配道义藐大人易耳奈何令外物小之与公接朗月霁而春风和也叩其底则青天白日矣喜为诗谓其能发性灵开志意而不求工于色象雕绘君子以为知言

弇州生曰明兴谈理学者创发自江右矣吳聘君鼓之若胡而罗而张舞之迨文成之铎振而遗响为聂为邹为欧阳复为罗而今树赤帜者三矣夫其分门户张颞颊云蒸风从岂不伟然巨观哉十仞之垣三仞之（阙）而狐鼠托焉亡他其中虚也余不自量偶一及之于楚棘而首几碎于狙狎之齿尚何言哉尚何言哉乃今督邓公抑何慥慥理行君子也然而未尝有称说之者何也此所以为真也不知其人知其子余观于仲而知渊源之在公也仲者谁今太史以赞也

王武库公传

王武库公者讳周字宗文世为嘉兴之嘉善人尝自称质斋矣而晚节以子俸奏武库郎最封如其官又尝习博士家言有声人或谓之博士师学者间亦称质斋先生而皆不着其著者曰武库公公少而明颖负材美秀水徐翁见而异之曰吾女可女也馆而授之粲公自是益肆力学问即邕夕伊吾至分丙矣而父瑜偕母吳尚在伯氏养公食于徐而甘则废匕箸曰我何忍独甘也盖东望咄嗟茹泣矣自公之为博士弟子久有奇羨乃稍以奉二尊人然八试而八不利最后以俸业成挟之偕试又不利而俸褻然举矣乃叹曰竖子之谓何而遽先我夫不龟手者谁授哉命矣夫于是罢不复应试而俸遂成进士有司推隆所自奉公冠带公为之一御之已而指其腹曰嘻以是酬女俸之始授兵部也

迎公与徐安人养甚欢公徐谓郎燕中玉不易熟吾去郎归耳而会徐安人卒郎将以丧返公即前发曰吾为若治丘中之室以待比返则宰然墓矣公既归绝不肯偕俸补官与养而艺圃雁湖之北庄竹木成列馆榭粗备故尝推父遗业悉以让伯氏乃时时呼软輿奉以游而从里中十老人为真率会能诗者相与诗酒者酒之毋使负佳日夕而郎用材举叅御史大夫刘公军事讨岭南寇便道过里中击牛酺酒寿公不忍言行役公怒曰若恋恋者以身耶若身非若有以我耶则我幸健胜若且若亦非我有为诗五章壮其行而别授书数百言言多秘策郎藉以平岭寇还甫起居毕促舍人子治装郎入朝毋踰期郎入长武选以议边互市抗不相中出守永州复过里公度永州守以地远而公老亡他子必不行即迎谓曰上负守耶而守唯地之择促浮大白祖道而身啮决示壮守前后竟不得有所请也王子曰余故识永州守奇男子而从武昌试事益熟当是时守治状冠楚十五守会且入计意课最当超拜而守上书告归养竟解郡去异哉武库公后守归三年而老寿死其葬也王学士锡爵实志之志曰永州守上书乞归养人谓守父一人之是厘顾不一厘永为永父者数十百万人将覆露之不暇而暇其私善守者则谓武库公素难守归归且不乐乃以间叩守守谢曰固也吾向者数往来里而不获以养请虽然吾父外庄之而察其隐乃若有缁绁者其去不佞唯恐不速去而后有余思也且也父少赘吾母氏然未尝不怅望咄嗟茹涕也食于徐而甘则废匕箸以不忍独甘而能不佞之忍俾独甘乎哉书上果得报可归而公果见而相煦沫融融也已夷然安之公尝置其室曰敝庐庇风雨无求则余薄田供饘粥知足不尽此所以安也公所为笃亲恤友赴急信然诺宛然大人风而自其贵则绝迹公府有以居闲风之者公大惊曰若以儿子故知我固宜而乃使我以儿子故博守令知哉邑以乡饮宾请固谢曰野人不任宾也里有闾于货者必宛曲剂解之度得解则属三老谓生不欲侵父老权若任德可耳学士之叙述公终始长者如此公卒年七十五王子又曰永州守贵而首推武库公贵而获终之以养生送死亡憾哉学士志之不朽矣而又属余以传者何也人子之于亲固无己也始公之赘也而徐女实称孝女云徐翁老而病且笃国医皆束手女痛之计亡所出割股肉杂汤粥以荐徐翁已事公父瑜如徐翁已又事公母如父瑜公时时语人吾赘也而幸不使我为嘉赘者谁力也人谓永州守孝固天性木有本水有源其自自母孝哉夫王公则何如守而臣成之臣守而子成之子亦足称慈父也矣

弇州续稿卷七十三

●钦定四库全书

弇州续稿卷七十四

（明）王世贞 撰

○文部

△传

卓澄甫传

卓澄甫者明卿其名月波其别号也以世所称于澄甫者故云父曰卓翁澄甫少而肥皙美姿容眉目如畫居恒自谓丈夫当跨铁裆磨墨盾鼻以取功名耳安能效老博士占占受役笔札于是从少年击劔骑射习短长纵横家言卓翁怒而捩之曰呼役夫而不欲我饱牖下耶澄甫乃感奋折节读书竟不帖帖举子业也不甚称关闽而好王文成公学曰以此而接濂洛上窥洙泗毕吾愿矣为文喜檀弓庄列左穀司马于诗谈建安开元而材高廓落小试有司亡所就以例入成均成均祭酒马文简公最号为威严晨朝诸生数百千人顾独目属澄甫曰何物姬生此宁馨儿试以文不尽取式而奇问能诗否试以诗又奇则与谈古今事所占对益奇叹曰是儿异日国器也澄甫既见赏马公诸生人人心仪之矣既肄事他曹满还里而卓翁所为课耕牧权子母出入息获赢过当家以有饶裕名澄甫乘间跪说曰饶裕名不易当也即不若散以市义使义名归我不然而先王孙有僮奴者八千指田池射猎埽人君而一临叩令得难之毋乃有所不足耶卓翁曰善乃为画策大启莹兆以葬其王大父王父毕已割腴而资其后之为庶息者已凋其戚党之寡者已衣食其闾左之馁饥者又以其余力治桥道创餼观刹一时翕然归义卓翁而会卓翁之庶长子曰文卿以明经举于乡卓翁日益重至有司奉冠带推择乡饮宾而澄父气益发舒所还往皆知名士多纵游吴郡武林佳山水轻舫小饗肉倡丝和呼卢卷白卜夕移昼每一分阉命咏俊语阑出诸名士既欲傲澄甫以所不能而不得岁时伏腊更有所资勺以是卓澄甫着贤豪声冠其侪伍俄而文卿夭澄甫虞卓翁伤之百方婉解卓翁为一加餐已而曰吾失嘉宾使人轻我若何澄甫乃谋之都下就选人列羣公争拂席以待曰江东卓生在吾耳久且頼生不寂寂太宰曰吾欲屈署生吏而资未及小缓之为奏以光禄署丞俾需次于是澄甫名满长安中亡何请急归奉觞卓翁被服绮绣雍容甚都客皆具牛酒因澄甫交欢翁至倾郡卓翁乃喟然叹曰嘉宾故不亡也澄甫前自责养未及禄卓翁曰吾安知禄吾所不乏者匕箸使吾安意健举子之孝深矣于是卓翁尽委澄甫家政使抚其三弱弟且教之隃于翁自抚而其为施日广交道日益进客有资澄甫金者故倚酒慢骂欲以尝澄甫为负端澄甫改容谢过即焚券客乃愧遁去其客京师而有李奉者困徭赋急将鬻子女于市得十金直可办澄甫闻其夫妇哭也而怜之捐十金以偿卒以其子女免又尝买媵任城得一女美而类其母母故澄甫中表亲也即还之不复

问直澄甫所为德非一大率类此自澄甫之代为家家稍削而卓翁愈益重人或戏翁嘉
宾散缙钱不令郗司空咄咄耶翁笑曰嘉宾一日而散之尽今犹未也且彼自以为名则
不如吾儿远卓翁以老寿终澄甫痛哭立呕血将葬尽征其交游中能文者如陈（阙）
汪伯玉王元驭范（阙）辈使撰志传记表之属以推扬卓翁而余兄弟亦与焉服除
久之乃叹曰已矣困费郎格亡所复展矣第闻天子圣明贤公卿秩然而修明礼乐政教
之事今者尚得从从官后一寓目焉于是且北上而谓世贞曰子姑为我传之世贞曰吾
为子之父葬而表子之母葬而志所以为子足矣吾且倦笔砚澄甫复曰唯子倦之所以
请也即不以时请而一旦弃笔砚我何所藉为且子名能操史外权而吾贱分不能自致
之史非子何以使后世知有卓生也余故知澄甫贤而悯其意为传之澄甫甫五十而所
著有藻林若干卷文集若干卷中林寓言天机列锦总若干卷其藻林文集已行世

赞曰语云人貌荣名其有既乎太史公之所以致叹于郭翁伯哉卓澄甫为人美丽
善食酒谈笑亡所不谐见而使人挹之其文学行谊抑何蕴藉宏至也称矣迹其所游处
若类侠者然好行隐德不自伐其有所以葆身遗后者周哉母论翁伯朴藪乏文彩即令
隃澄甫奚取焉

张仲慧传

张仲慧者定安其讳五世而自崇明徙而为嘉定人大父情与弟意俱举进士为按
察副使有声父曰应武初以制科名数试不利弃去隐于邑之北乡葛隆镇善谈名理及
古今兴衰大略仲慧生五月而能言五岁而习书十二岁而属文秀髻眉清羸有姿态一
出补博士弟子人皆目属之而性禀孤洁不可以狎干尤不可以少年奇衰戏至于所交
接谈笑茹纳温如也为文独好为深沉思当其所构结不破的不止以故当试而遇赏识
者必不以第二义相期他不能尽尔凡再应天辟皆屈而益自刻厉于文踰冠而所娶
妇朱氏举一女而卒仲慧念以病弱故不肯娶父爱之与同卧起尝扁其斋曰尊生谒余
作小语题之而时时赞所业诗亦雅隽有味当庚辰之八月吾师县阳子将羽化仲慧
偕其从兄厚德托余为介绍而请从弟子列苦要而后许手书一赫蹏授之曰太上无生
次达生次贵生次伐生仲慧宝之若头目居恒谓其所善唐时升娄孟坚曰吾始者欲及
吾身少毕所以酬吾父母者而后游乎方之外含光葆真庶以引年今者内顾吾神爽若
浮烟之将灭其能久乎因叹息曰闻之石函当有僊者去此尚三十年即死而犹可及度
也县阳子之父曰宗伯元驭奇仲慧之为人而馆之与元驭之子衡琢劘甚洽也衡材高
鲜所当意独折节仲慧经术之暇相与谈出世业大较仲慧之语衡如语二生者而其父
前者已为聘吾友人王指挥化女又至是当娶仲慧意不欲曰如伐生何父曰固也若师
不废伦若且不欲为我烝尝计仲慧不得已乃娶而益不废学又数以门户枝梧往来城

邑间于是病羸日益甚而风寒乘之遂剧当其剧时恒持吾师旨凜凜若有见闻者卒之夕神气乃更发舒家人拥而泣之弗顾数问唐生唐生至乃持其手曰吾向者语若云何不遂验耶已而谢其父不终効为子但坚志向道者隔世犹宿昔耳蹶然起坐小时遂奄然逝春秋仅三十仲慧逝之二月而王女举一女自誓以节终其身所以抚育前女甚至盖仲慧歿而其父乃大恸哭曰吾穹吾子不使究其天年唐生曰不然仲慧而知死何死也稍稍次其事授余俾传而论赞之

弇州生曰世之浅观乎仲慧夭者太上无生兹其旨非耶不然则且谓仲慧未得师而贵生后何乃伐生也是皆非知仲慧者旨乎其于二子言隔世犹宿昔也无生之或未能几于达矣唐生以叔度拟仲慧过当迹其孝友至性虚和精进抑刘歆刘吁之伦欤年亦近之于呼悲夫

靖孝先生传

乡进士张基先生卒而吴之衿绅思之不置曰天乎胡遽夺我张基也既而不忍以名呼曰请考行而易之谥称靖孝先生又既而其子尚友草事行而属余请传之余故善尚友而习先生之为人甚详乃为靖孝先生传先生字承祚更字德载其先自大梁徙而居吴之石里村再徙越溪歷宋季逮元世有闻人入明而为工部郎瑾荆州守理处士璠兄弟皆以文学行谊闻而坐蓝凉公败株累一时见法子孙相戒不仕然皆读书闲礼让六传而至莼江公铨起家知胶州进南安同守卒于覲所莅皆以廉能着人祠而祀之先生生而肌理香膩稍长嶷然端重甫踰髫能读书属文其试有司则皆谓南安公是夫有子矣初补博士弟子以易而会部使者募补孤经遂从赵汴先生习春秋即以春秋名部使者冯公天驭邑令张公明道喻公时奇先生材而优之廩学宫寻举应天荐当会试而有显者故善南安公而为校卷官密戚风公吾力能得之公以语先生先生曰奈何筮仕而以私请乎公笑曰吾心也谢弗应已而下第归属疾久困医药间恍然若有愆者遂究心为已之学病亦自愈属当试而闻南安公讣痛絶而苏者再三啜粥面深墨起息苦块其舍而旦夕候其大母及母迹可数也服除复当试而善相者谓先生于骨法得上第而色有阻者何也先生念大母耄虽善饭不可以狃遂不肯就道甫踰年而大母用老寿终先生所以侍汤药躬含敛靡不周谨凡五年而再举大丧挫产以庀礼与毁称先生元配赵继配刘有妇德会侍先生疾过劳劬卒先生感其意不复娶已而叹曰母老矣谁与朝夕者自是步武不忍离而会有岛寇警奉之入郡得苏舜钦沧浪故址之一方而栖焉凿池沼花竹环之闲与所知善谈说古今间以觞咏慷慨击唾壶为节已而陶然自快也复当试踟蹰不欲发母数趣之乃起拜母曰幸而捷母当饱儿禄不捷母当饱儿力此行决矣复不第归遂屏去冠服为野人装治一室甚洁扁之曰爱日以居母手泽果实浣蔬茹

尝而进之汤粥滫瀡不待呼而具母时时自谓吾失妇复得妇人言禄养饶者妄故给事陆子余材高慎许可每谓先生曾闵吾所不能知度李令伯徐仲车当不是过也先生于书无所不窥而尤邃于经术自养母饶暇晷多所笺纂晚而验之身心融融如矣顾其持敬日益甚其自检日益微细冬不炉夏不扇坐不倚寝不胁席曰上帝临汝毋贰尔心至哉言乎然因是而傍晓度世之学着独鉴五曰象髓曰静榻曰调息曰存仁曰翫易又着广颺五曰洗心曰理性曰安形曰保摄曰滋补每谓寄道者身吾身之未宁道于何乎寄而奈何讳养生而是时乡贡士杜伟与先生善而游罗文恭公达夫之门以先生学贄罗公罗公异之使其弟子周某游先生先生与之两相好也则以书往复罗公罗公益心折而故唐刑部枢复邀先生入茗上社先生虽谢弗及往而性命之要眇徃徃露竿尺间二公皆海内大儒先生益自信以圣学可力诣尝手条百戒悬之座右其要者有曰勿展无益身心之书勿缀无益身心之文勿吐无益身心之语勿与无益身心之事勿近无益身心之人勿用无益身心之物勿涉无益身心之境勿好无益身心之游识者取之以为颜氏四勿翼云又曰欲心起当以惧心制之又曰敬则自见得静中喜怒哀乐未发气象不必于敬外别求中有求之心便非主一又曰常要认得他人本无忤我意思恕心自生又曰静坐观湛然虚明气象此余自得公案也先生性慈爱尤喜施予如荐而例有坊金百一日散之亲族畧尽同年沈敷德卒为经纪丧事出恒日所贷贄券焚之岁大侵有储米数百石悉以散赈饥者属军兴而张之族皆役独先生以例免先生叹曰吾何忍独免而烦族之老弱不逮我者请于官毁家以纾之自是诸宗戚有吉凶会费取之先生若外帑久之不倦而家亦寢以削晚节至于饭僧维饰招提缙桥道布医药皆勇为之欣然自快顾廓然不住色而施也先生足不入公府而名行成着郡邑守令采月旦心慕之太守王君道行蔡君国熙至损呵从诣先生不及避以野服见坐语移晷蔡君戏谓先生奈何使客虚腹返仓卒进脱粟鲑菜一饱而去李令迂梧居恒叹曰邑得张先生数人可使俗为葛天畏垒矣隆庆初至欲举陈公甫例以先生应诏先生曰吾以母老不敢当公交车辟非为名隐也必见挠者且负吾母而入深山矣以是止弗辟先生少多病自其罢公交车养母而体气益充壮髯髮朱辅尝以母八十入奉觞为寿出报客觞便辟褻裘客目之而叹曰是母也而又是子毋论冲举即百岁不难也先生意亦殊得过岁余忽恍然语及母涕交下于颺又尝顾母侍婢而泣属之善事太夫人有以报汝尚友间入省先生顾叹曰吾欲翼六经而未就已矣若曹勉之尚友不敢对又得所以属婢子语状而疑之而一夕先生入而问母安者七次尚友愈益疑则携■〈巾业〉就榻前假寐至中夜候先生鼻息若促又若微而不属者乃大恐亟屏人刲臂肉片投米作糜以进先生方跌坐张目诧曰奈何有乳气为勉进一匕箸遂却不食频诵一念不生味爽目微上指瞑矣案有薄蹠数行皆奉养事绝不及他得年五十有九所著独鉴广颺各一卷寅■〈宀吾〉考十卷读书疑二卷杂诗文二卷张氏家乘二卷所纂辑近思录补正若干卷孝经大义一卷定性书感兴诗注养生彙道要各一卷其注金刚经明儒粹语人物题评俱未成

赞曰尚友为余言靖孝先生卒时五日而殍色泽欣腴手足屈伸如生时异哉先生试公交车不第即不出如陈公甫而名齿俱逊之公甫稍自然其自主静入一也或谓以先生之志圣学而何佛老杂也夫佛老胡杂哉惜也其未化也化则一以贯之矣

回阳道人传

回阳道人者姓邹氏不知其所繇得自号曰回阳而时时戴方外装而游里中也里中人亦称之为回阳道人而故尝号矢斋以自励矣已又念其亲蚤背更曰终慕其名初曰字已亦更曰子而其字子正则如故邹之先自句曲徙而为崇明人道人父源复自崇明徙籍太仓娶于陆道人甫七龄而源没即奉母陆以居就里师诵诗书三载通大义能属文甫任负戴则仆仆治生且以其羨共滫瀡之奉于陆矣竟以是夺儒业不就然为人雅不妄举止而好施予重节槩行谊有古侠士风客宋生者与伯氏善而共为鱼负二百金以去贫弗能偿后闻行至州伯氏墓得之加束缚将甘心焉道人怜之问其橐则罄矣而会鱼计成赢金百一十阴以授宋生使谢伯氏而为伯氏说曰二百金已掷之海今幸而归我十六可已也即宋生一夕盆死更捐二百金可解耶伯氏悦乃纵之去竟与道人絶道人亦弗问也有桥枕刘河而朽岁溺三四人道人慨然损橐理之又为修栏傍翼之自是不复溺岁大疫益市棺以收不成敛者瘞马氏之女暴骨三且为文祭之夜闻有三女鬼哭已复曼声长啸而没中岁习医辄奇于术尝起乡先生某与陈帅之妇病却弗受谢曰岂所谓不住色而行施者耶会二子九龄九德已成长其一任家而一补郡诸生道人乃叹曰身幸称长矣向子平何人耶乃以春游钱塘余杭秋则游阳羨穷诸山水之胜徃徃寄之诗亦间出其术以起病人最后归则体充然意豁然若有得者而是时陆司谕之裘与瞽王老比而习紫姑神附于乩以传所托多上真名氏顾其语绝凡鄙而道人独信好之与相酬和或讪之或止之皆不顾已而示微恙辄却药食弗御九龄兄弟忧之甚卜于祠所报皆仙去语神亦附乩言道人当得仙有漏泄小谴弗获上升耳而道人虽却食骨立然神爽弗衰凡五日而为诗七日复为诗九日复为诗皆超尘悟真句又三日为长歌以谢子妇孝养已又谓二子曰吾归矣归必于仲夏之九日午时至期脱然而逝逝之又八日而托于乩言我从吕师之上帝所覩其仪卫倍于人间已为雷师所窘者五日而吕师以我免今之洞府甚适也明年我且受师属行药楚服矣

弇山生曰或谓道人真有道者或曰道人权奇歴落人也诸为幻者误之余晚而始验所谓乩者非幻也凡上智不堕趣下智不及趣有悟而未彻有炼而未就者然后乃依焉遇师则化易也不遇则沈沦之与逍遥共乘也不然以道人之居平仗谊敦行临化坦然无怖散者岂易言哉幻不幻何计焉

昆仑山人传

昆仑山人者王姓初名光胤字叔承以字行遂更字承甫尝慕昆仑山在西大荒称天柱因自号昆仑山人既而曰我何以智巧为更名曰憨憨人且以我憨幻也更字曰子幻而号梦虚道人然所谓憨憨不恒施刺谒叩之人且不知亦无以梦虚目者山人之父某倜傥负才气涉猎执文尝客吴越中推长为豪数以谊耗其橐装不顾仅余书万卷而已乃自昆山徙吴江之严陵村西并五湖东滨烂溪意甚乐之已有子光裔矣曰廛廛读父书何以快我而最后父尝梦朝日堕前荣以语妇夏亡何免身举山人有道士严一清者善筮筮而得干之坤用九见羣龙无首其占曰吉将无閤而光乎以是山人生而父絶怜爱之年十二父且死抚其顶曰我废家为书憾不能纳而腹而即不以筮茫昧将余梦是践山人泣应曰诺既除服从伯氏受博士家言为时业斐然矣而心厌薄之窃踞处治古文辞伯氏见而骂曰县官开古文辞科者乌头白矣山人短不能六尺方颇秀眉目肥白如瓠性资絶颖异过目辄成诵而终不能帖帖于博士家言其试有司亦拙而好酒复好游遨挟弹鸣瑟过从侠邪少年母夏怒而笞之至百始稍稍折节为孝谨而属贫甚不能婚赘钱翁女又以不能馊馊事钱翁若媪携其妇出钱翁怒之不予一钱山人仰天笑曰彼岂以我秦赘耶乃益治古文辞山人之于古文辞亦不帖帖模仿先则含茹淳湫溢而后决之大或千言小者数语奇隽迭出前茅所指亡不魄夺草靡山人名渐籍籍而贫益甚又以家中倭他徙客有商生少年善游与山人谋曰吾闻赵王贤而好客诸王子仪之三台之傍朱邸鳞栉皆幸舍也我曹可以弹铗乎乃治装偕与之邺而邺时有客谢榛郑若庸皆以文重于王郑叟于山人有乡曲好为稍稍揄扬之诸王子间以牢醴先山人而山人司知二君虽重客然见必蒲伏称主臣叹曰屈吾膝而奉吾口腹何策会商生病死葬之铜雀下因东之齐鲁登泰山观出日北入燕中时天子方坐竹宫祠厘诸贵臣应制譔笈表歌联之属山人为兴化相君所物色授以格君谢弗能第为草游仙数章天子览而异之相君大重山人延之直所得纵观上林太液宫阙池岛花木禁蘩之胜为汉宫数十曲稍稍闻中贵人相惊谓何物客能丽语若此争遗之尚方法酒而山人间行谒王太史元驭太史性耿介不食酒顾独与山人善往往倾家酝盛饌以羞山人不醉饱不已相君迫应制使使四出纵迹山人不得至则以醉踉跄前喻吃不辨相君乃使其所善风之曰生幸减纵游使我不虞缓急即一官千金胡难山人摇首曰相君駮欲以富贵縻国士相君乃谢山人曰负上思不能遽归从山人游请俟异日于是山人益为落魄游而范太史伯桢胡侍御原荆顾宪副益卿皆宦燕中陈光州贞甫时尚游太学与诸君善慕山人而致之邸相与痛饮歌呼擊缶谈推千古元驭徐规之曰咄咄正平大雅不受少年窥耶山人乃嘿嘿不自得而会读庄子逍遥游至秋水意豁然悟曰归乎枋榆蹄涔吾固有之一日买款段还谢母夏以阙供养夏抚之遂依依膝下而夏嫠居久精心奉佛山人则

亦奉佛与藜藿甘而独不能忍酒诡说母夏曰非酒也佛所谓米汁也亦嗜之母说为进一觞醕而胡侍御以强谏罢里居则挟山人泛轻舸御软輿以游扬子之南钱塘之北诸名胜亡弗探也作吴越游编顾益卿宦闽则游闽穷七台九鲤九曲之胜饱荔子而归作荔子编陈贞甫宦楚则游楚潇湘洞庭九疑衡岳为几案物矣作楚游编家居自原荆而外范太史三之王太史一之所造即主不在而儿子辈出侍呼阿父家人迎拜我公浆酒肉炙若流山人所游诸君官中则不问官中事于家不问家事间一二涉伦常勇施息竟则取裁山人指不悛矣客遗之酒则乐遗之金钱束帛则不乐自谓于文喜孟子庄周屈平左丘明两司马于诗喜曹植左思郭璞阮籍陶潜谢灵运谢眺鲍照李白杜甫王维于酒喜刘伶稽康于游喜梁鸿梅福壶丘宗炳于侠喜季札鲁仲连于隐喜东方朔王君公郭太徐穉黄宪管宁严遵孙登于禅喜龐居士蘊于仙喜吕真人崑其所自操行撰结亦不必尽似也原荆贞甫皆前死山人皆匍匐哭其丧而以原荆贫而喜为侠所以经纪之者尤切至须髮为变白母夏以老寿终其奉佛也有征于（阙）山人微用佛自寬然偕其伯氏躬负土筑坟亲故贖贈皆却之矣盖山人晚而感吾师晏阳子事谓益卿有云佛玄虚无上天也道卑敛蓄以久地也儒矩立狗伦人也西方气金至清至刚佛其圣之圣乎又云泯泯昏昏大道之根返我混沌絕名去身且瓢且衲何物匪神时而混世时而出世奚之而非性真也耶山人今年五十余小善病不能如壮时

弇州生曰盖山人所恒称昆仑人亦称昆仑山人云太史公曰恶覩所谓昆仑哉夫士大言无当广引而鲜据滥之而黜宿此其常也彼乎以昆仑云者谓天中之柱然至于冥志西竺矫矫出三界外何詎天柱哉始余以貌接山人谓山人酒人也既而得其文以为文人也今乃识其志矣或谓山人不山而时时尘间何以称山人又不然迹尘间而不累以贵交为海鸥鸟者奚愧山也终南沉沉不快捷方式耶请以是例之一切可也

沈太史传

沈太史者讳杜字名卿别号栢溪其先世崑山人国初戍大梁徙归德已复为商丘人王父忠以子瀚贵贈礼部主事瀚有文学志行自礼部出守建宁不能事中贵人瑾挂冠归天下称之卒而有司祀之学宫有丈夫子四人公其季也生而广额丰下盍背隆腹建宁公尤钟爱之居恒曰吾老矣不能及若成立何公九岁而失建宁公宗党中外姻豪黠者欲有加于公之诸兄不得则谓公少而侮之公不为应语家督谨自保而已已而无他则相率谓沈氏儿有天幸而公既长乃以原慝称一切无所粉饰中亦不为城府善饮酒时时诵古诗词以自娱适能草书书得之怀素又能畫竹竹得之杨补之而亦不必尽似也他绘小山水徃徃有天趣属岁侵釜不时夏姑以吟咏消之或弄笔墨客谓公曷不师计然而坐困涸辙公笑曰吾不知所谓计然吾知待岁耳而部使者廉公质而有文不

隕其家声给衿绅俾服以奉建宁公祀而公之子今少宰君长而警颖公乃口授之经为剖析疑义仍手书举子业之佳者数百篇而课之读曰而父为少孤夺而可无虑也及少宰君之学成与其从兄偕试河南省而独得雋夜分报者拒于城不获入而城中喧言沈氏之子二人其一捷而公遂呼酒与家人相庆方引满家人私嗫嚅岂其必郎君耶公曰毋问也即吾兄之子捷何啻吾子捷识者谓第五司空邓伯道之矫性当不如公之自然也少宰君在公交车十六年公不以为滞及其取高第读中秘书检讨国史以其官官公公不以为快当昔少公而见侮者至是多局蹐不自容公待之若忘其所为德视戚疎而等不以恩怨也所为施舍称力而行不必矫也有欲藉公居间者公谓人孰无缓急况我力能得之何忍拒而至以非理强或议酬谢者即掩耳走不欲闻之久而人亦不敢以闻也过从朋旧辄酣饮饮辄醉隗俄而归居恒谓吾目中无可憾人亦无可憾事即子女不幸有殇故一哭而已终不以易其乐少宰君方日侍讲幄天子所以礼遇之者非恒而公忽贻书趣之归而少宰君亦心动上书予告赐驰驿省覲亡几公忽感末疾其左体骻骻不良行然夕辄引诸子入俾奉觞为寿夜分而后寝以是愈剧至易箠而召少宰君与其三弟抚而诲之谆谆甚至已而顾其室周孺人曰老姊寡而贫辄资者资之可也少宰君哭曰天乎胡遽止此耶时公已瞑开目笑曰苟不止竟何为乃复瞑少宰君以公讣闻天子为特赐祭称公孝友惇朴而以教忠之功归之又命所司营葬盖异数也公寿六十有八子四人曰鲤鳞貉鲁鲤即少宰君兼侍读学士以正学重朝廷

弇州生曰庄周氏有言为善无近名夫岂畏名而逃之知名名者之未至也观沈公之绌机事杜健羨以游于无竞无营之乡庶几所称上德不德者欤始予覩史记无怀葛天之民与鬱单华胥二家类疑皆寓言乃今于沈公见之彼于末世尤难能哉嗟嗟浅之乎窥沈公者谓頼酒而全其天以比于稽阮流也

顾母传

顾母者徐之良也十（阙）而归顾之处士某即以容德称里中人为语曰清心玉曠闺房之秀其再见顾家妇乎处士少而任侠喜施不问家母为之共养其父母约束臧获耕织之外即米盐丝枲出纳鑄钥之任皆精心为之毋误矣而处士故多大人游不以隐约失职性尤好客客常满坐中厨釵釵不闻嚙啻声而靡不腆洁即客最后至亦获丰饱以是益欲试母材夜中而叩门酒炙立办乃谓处士毋以难若中馈矣处士竟蚤卒母銜辛茹菑以抚其二孤曰杵臼有云死易耳立孤难有如二竖子不覩立我何以报地下于是其长者养鲁年十三矣少者养豫尚在襁褓母一切衷严寬而教之曰我不难母汝也难父汝师汝家中外斩斩隃于处士无恙时南畝益斥屋以时润而二子亦斋栗祗若卓然成其名母今年六十矣与二子善者诸生某某谓处士之王母亦徐姓至百岁而吴

之名士大夫如文待诏征仲王吏部祿之輩为文若诗以寿之渡江謁王先生乞一言而嚙矢为母百岁祝母闻之不恠曰未亡人安敢爱余岁且夫妇而嫠母而子弱人之所至不幸也今乃以至不幸者而称我我何以举二子觴

王先生曰吾不忍于二子而寿若母寿非所爱也颂非所欲当也其辞正不宜强而顾氏之宗老亦曰益卿者谓余吾丘嫂无他长所不违妇则而已何敢辱长者余曰为母辞则可为顾而辞则不可此而顾氏光也且母方居嫠时年小过格不应旌夫在上为公法在下为公论公论者所以补法之所不及也故为传而论著之若此

弇州续稿卷七十四

●钦定四库全书

弇州续稿卷七十五

(明) 王世贞 撰

○文部

△传

陈大夫传

陈大夫者讳以忠字贞甫其自署曰云浦居士盖尝宦游秦楚周梁间再令邑再守雄州有声而最后以光州守终遂从守秩称大夫大夫之先为吾郡之嘉定人而有景佑者当姚少师广孝之僧时而风之隐广孝以佐燕重恐见迹稍匿耕锡之梁溪子曰广安州倅昱广安之为同安令与倅俱有声有子曰大叅公周卓然德靖间名臣子赠宁乡令公鳳博学能文章以病废是为大夫父令公之所以轻自废实用竒大夫故大夫生倜傥颖挺自其儿时令公置之膝而试之所占对必雅十岁工属文恒以意自为竒而不帖帖受经生束令公每谓人病何与人事有是儿在者高枕矣而果以趺弛见憎里豪讼之台下郡征逮殊迫大夫挺身出见郡倅自豪构状倅竒而纵之出当豪诬大夫时年十八耳寻补博士弟子娄试高第有声然以应乡荐辄不利而大夫亦中鄙薄之居慷慨自命男子当从六郡良家儿跨铁褊裆坐生马驹以右手挟单于左手磨墨盾鼻书露布安能啜嚙伊吾作老经生乎盖大夫多力能挽强至二石余工骑便擊刺又多读孙吴家言而令

公闻而非之曰而忘先世乎哉夫将死官也即而七尺之不恤而忍令我鬻大夫乃折节为经生业以质武进薛应旗先生薛先生读之大惊曰王济之复出耶济之者世所衷经生业师也于是大夫时时构篇章出而窜之济之他文卒莫辨矣大夫力益饶则多为古文辞始靡丽如六季而中厌之乃为昌黎河东庐陵眉山诸大家其于明则好方希直而尤好王伯安曰是夫也如海吾所不得不没令公竟善病死而所积公私逋可二千金悉以归大夫大夫行假勾闾井无应者既勉葬倭复来闾毁其庐大夫乃仰天叹曰困不极不发即以独身起更易耳于是偕其配王力嗇间用计然息其赢而出之遂能尽竟其逋而拓溪东丙舍又以费入太学即复有声太学故相袁文荣公尝见大夫文而奇之罗致馆与讲钩礼袁公贵倨负其文嫚骂客独不敢有加于大夫日相与痛饮谈谑无间当时大夫日益重诸公卿荐绅争推毂之而大夫意踽踽不自怪其所心折以为长者独王太史元驭所与尔汝交以文酒交荐其嗜者独山人王承甫而大夫遂举乡荐诸善大夫者籍籍谓大夫文高且困之久必大摅而其于公交车又辄不讎大夫乃归治别业溪东引泉累石手种桃千树竹万个泉纵横其间声琤琤琮琮然署其门曰鸣玉乃益纵读圆觉维摩楞严道德南华诸经意甚乐也人或谓大夫且终老是耶大夫指其腹曰未也且必一小展而竟又不讎慷慨束书就选人得湖广之宁乡令时坐主今少傅蒲州公恠而尼之大夫谢曰齷齪一第足报公耶请得以循吏传无辱为公报大夫至宁乡则首履诸滕以寻丈校之而又核其肥瘠以程上下赋毋使黠者得伏税于孱者一邑欢称平而邑四垂皆山最大者曰汾山吐水注玉潭江春时尤暴悍不可涉大夫曰是且为舆梁乎即亡奈帑若洗何捐岁俸为之倡民争出以继大夫遴善心计者司之不踰月而告成富人欧贤夔者为赋长趣其从弟贤时赋计无所之乃火其庐手办妻以诬贤夔吏遂坐贤夔死不决者四十年矣大夫探得其状立出之而徙坐贤时贤时伏死不能支吾监司有所使徼卒以饰盗属大夫而大夫闻之不得逞为肤受以贾监司憾因子用期会绳大夫之从吏大夫愤移文台使者乞骸骨吏民从而挽之强台使为致徼卒于理而勒监司谢过大夫乃肯起视事台使者楚秋试檄大夫入以益知大夫诸校讎悉委之凡膺会荐者一特荐者一见以当高第征而仅进知江西之宁州大夫之为宁州其操舍约畧如宁乡时州故无城而户盗环其外议城者积四十年矣而不果大夫至谓其下曰守故侥幸万一得夜眠可保熟耶请于上发夙帑身与吏士分功版筑间甫五月而城成因设策诱致盗魁卢尚贵等而縛其伉悍者尚孙尚讷以兵捕其尤悍者尚崇格当迁御史有所疑于大夫未上而会他盗自万载阑入境而与我游徼鬪有所杀伤御史辄以闻大夫得贬秩行当是时抚臣杨公与分守卢君心知大夫冤不敢为异卢君仅为二诗以送大夫归行按故所树竹栢曰汝峭蒍犹不改耶已循其髮是稍改矣而节犹故也乃与邑之老秦方伯梁胡御史淳王司封鉴辈相与为社饮欢甚而宁州状旋明蒲州公乃使人谓曰向者长儒所不愿弃之郡而一出入琐闼吾力能得之大夫乃慨然复就选人所仅补宝鸡令蒲州公为慰语曰迟之竟而物也大夫亦竟弗谢行而道华山因摄衣自青珂坪而上登三

峰絕頂为文纪之甚丽大夫既视篆于核精吐锋颖人相戒毋敢以迁客易之时丞邵鸣凤与东河驿摄宰杨春芳皆廉倨以法见枉大夫力为白之又绳蜀中涓之驰传者逃去乃已一时台使监司咸壮大夫之清强且将有所论荐而遽得光州擢光故梁之最雄郡也前守孱至与其幕掾共一堂而治属令来朝受事传呵声相属也大夫至首彻掾坐掾夕以长跽谒矣而令亦逆自屏呵驺修属礼然大夫以掾才数延之传舍与酒食慰劳之掾更感激愿効死力而诸令以大夫能推腹不为修属礼故废其感大夫间问赋何不登额乡三老言畏羨金重耳大夫乃谕乡三老输钱投扑满毋所容羨顷之额遂登而令所为大夫耳目者发鸷胥杨朝相之父子奸恶状収而真诸理郡人翕然称神又推见邻邑牛应魁谋杀人隐自是台使监司啧啧赵颖川张胶东复出也而荐之大夫又尝受檄偕确山王令治崇邸狱而崇之中贵人悍卒把持长短大夫面唾之曰畴导而王干三尺至此而祸魁也敢以私饶我中贵人窜伏称死罪罢去当是时大夫治声甲三河又以饶精力与其贤豪长者酬饮无间而乡进士刘黄裳最才而最能得大夫心会大夫感微疴药之稍间已复大发遂弃其官归台使监司交挽不可已乃大夫病寢■〈谷丸〉乘卧輿发士女哭而送者百里不絶刘生自以身为卫又六百里遇大夫之子尔耕曰而公病■〈谷丸〉奈何然吾伺其神爽而悠又时安人乳可起也吾又闻之而公宁乡杨氏崇于火而公与神约火立息宝鸡张氏崇于女鬼而公与神约鬼立逃徙而公祷雨雨澍祈僊僊降此岂忧不起者哉夫岂唯无忧不起后且大庸显而大夫则自谓不然曰生死恒也既归尔耕捐家而请听于医大夫笑曰秦越人不能起死人人自不死耳且此曹何为者病既革赋二诗以授尔耕皆超世蜕化语又戒妇女勿令近傍然而暝大夫卒之岁仅六十又一所著有客牋八卷吏牋二卷诗文若干卷大夫性孝友敦然诺急人之难甚于已其为德毋论毋责报既成而自忘之尔耕既叙致大夫事又谓大夫任侠如孟公豪气如元龙下士如豫章博德如太丘噫太丘吾所不敢言若余子则优乎有之又胡不曰洁廉如之无文雅如伯玉乎哉大夫举五子其壮者皆立而独尔耕孝廉能文章世其家赞曰

陈大夫束修自励学成而名不仇政成而摧继之其稍振辄蹶若九折之辙然则非人也其所至必有以自见不为苟焉而已者则非天也夫以陈大夫之材未竟死者宁毋怵懣不平也乃至恬然而祛大怖托于蒙庄之旨以与造物者狎盟而彼岂能遽为大夫侮嗟乎古称贤者龙蠖卷舒其不可测固如此哉

沈理先生传

沈先生者讳理字体道尝自号铁山里中人事先生谨尊称为铁山先生先生之先自河南徙为吴之长洲人后有吴江赘遂为吴江人其业在农儒间至中宪公■〈启

，山代口）而贵娶郭安人有三子而先生为仲中宪公有弟曰太学生岱天娶于孙无子中宪公推当为子者以先生往太学君未究产所遗确鹵二百畝耳先生与其配黄安人强自力以共孙甘旨亡匱病而医歿而殮以至葬亡弗恚者人咸谓先生能子先生虽他子然所后皆见背而会中宪公之冢嗣乡进士察前卒先生以是得精专其思奉中宪公及郭安人公为郎建业病痢先生晨跨一骡驰百八十里而达及守绍兴复病痢先生操轻刀以三日夜驰七百里而达后先不脱冠带事汤药者四十余日疾良已乃归当中宪公病一切条戒报刺门禁出入悉属之先生先生不废共养而行之斩斩皆有绪然益恚慎亡生得失公以是益爱信先生时公在宦而郭安人病留家久先生率其妇黄安人屏息共滫瀡益出橐装为医寿医至若归寻郭安人小间先生当游太学期甚迫属黄安人曰身不能两奈何已拜且雨泣曰若之身我身也黄安人与左右皆泣莫敢仰视居两月所而郭安人疾复小发先生闻之息其长倍道归视复良久久之郭安人竟不起当郭安人之不起而先生所为控吁扶侍及擗踊附棺易戚之状即邑里人人能言之且怜之以为真孝廉矣中宪公谢楚观察事归虽老而神明不衰多游名山水先生辄具几杖壶榼以从其摄客徃徃刻烛分韵卷白行纠至夜分黄安人矻矻治浆炙无罍耻先生则时公之劳佚而息之客有得公意者先生不待教而岁时伏膺具庭实以往客喜谓公厚我不知其自先生公之歿且开八袞先生犹痛毁几灭性既葬皇皇为孺子慕者三载盖不为所后夺也先生少于察二岁从受经友爱甚笃察以卒公交车闻先生一恸为絶久之始苏即抚其二孺子一息女爱隃于所生俄病疹且■〈谷丸〉先生祷于庙祠曰即不讳请以子孚闻代黄安人从旁听之曰得无非情乎先生曰不然吾犹可子也亡兄子即亡吾兄已伏地恸不能起寻病疹者皆愈稍长课之读甚勤然不忍加扶而时抗孚闻法以警黄安人指而笑曰儿独非而子也亡所不代先生之季曰问有五子而贫中宪公老一日谓先生吾弃若仲氏今仲氏遗不能当我三十之一而若还为子勤诚倍他子吾欲瓜剖吾产均授之先生谢曰仲父遗产薄分也幸得以一日供养而乃效佣者直乎因弗受公歿亦竟弗受而躬率黄安人蚤夜从事耕织旁畝益拓而间推橐以益问五子俾之有室家曰吾向所以辞均产为而曹也先生业饶即以好施闻属岁大侵有困谷千石悉捐以予贫民不责券而他自中表亲戚以至故旧即缓急亡弗应者亦会黄安人卒以故所赢业随手尽先生噤噤然顾诸子曰毋以此庐产而少之视所受不既多耶即若曹异日幸而禄养我不愿以禄之外养也于是诸子孚闻季文成进士高第矣郡邑干旄造请相属人或谓居间可以得千金橐营菟裘自娱快先生唾之曰若不知我固当不知我先人清白耶而忍污之有讼直而息先生地道者先生谓若当自直吾安忍假邑大夫惠以诳若亡何果直即先生有一言必利病兴革与冤苦亡所控欣者言出而若蓍蔡然先生白皙秀眉目肌理肤膩即不事玄素术而望之以为神僊中人少工制科义游太学而故祭酒程文简公异之曰千里驹也然五试于省五不利稍厌之去而为古文辞生平无他嗜独嗜书自经史诸子外天官地理乐律刑法稗官黄衣之说无所不精习其侍中宪公

公左顾而谕公所疑难立响应不穷公每听然解頤先生后以谓诸子一语不能酬而王父者无地容面矣论诗圣陶谢而贤元白前后吟咏可得千余首于元白庶几似之好临摹古书帖喜草圣得意处翩翩不减王履吉尤工治纸自谓合古张永蠲法人乞先生诗并纸与书得之以黠自幸而先生亦偷其意数中不厌也郡名士黄淳父王百穀顾山甫皆与先生善淳父死先生助梓其文山甫之父卒久弗克葬先生捐地与之晚节信浮屠法居恒谓假我数年熏修者西方不难至矣人亦以其健饮啖步履且通令无他机心即无论西方当不死然甫七十而死先生有六子皆文而孚闻季文其前显者

弇山人曰夔圃之射汰而得为人后者岂非以其生倍亲不获致力所自耶乃沈先生抑何斤斤交至也夫精诚之极天假之分以为心不谓之孝哉抚伯季孤隰于已咸俾成树不谓之弟哉力任其繁者产任其杀者居间之赂目若草芥不谓之廉哉亲族闾左恃以无饥寒匱而弗嗇渎而弗厌不谓之惠哉夫是孝弟廉惠者士之大纲也即文之以礼乐宣父犹指屈焉而况此漓浇末季也乃其晚节优游福履天人报施之际详矣

林宗伯传

林宗伯者讳嫌字贞恒其先自光州之固始避五季乱入闽遂为闽人十余传而至为抚州守元美以子贵赠南京吏部尚书再用孙贵赠太子太保工部尚书有子曰文安公瀚起家翰林至南京兵部尚书叅赞机务以耆德重海内卒赠太子太保文安公有二子曰康懿公庭?仕如抚州公所赠官卒赠少保其季则宗伯父曰庭机亦起家翰林至南京礼部尚书致仕累进阶荣禄大夫有四子宗伯其长也宗伯生十四年即以春秋补邑诸生二十四举进士改翰林院庶吉士授检讨久之选侍景恭王讲读以检讨满九载擢修撰进司经局洗马兼官若故与校録永乐大典明年与纂承天大志寻志成赐金帛四十余为国子祭酒大典成进太常寺卿治祭酒如故迁礼部右侍郎兼翰林院学士经筵开充日讲官仍充世庙实録副总裁改吏部右侍郎亡何改南京吏部久之始进工部尚书以至今官凡再迁皆仍南京而以母李夫人丧归除服属疾卒年方五十七宗伯幼而朗秀读书日恒得数千言康懿公竒爱之谓荣禄公曰此儿千里驹也提学江汝达意不可一世士试宗伯文于稚惊曰所见皆凡才毋逾若者必以文显重每试诸生辄挟与俱恒为冠而其读中秘书时受业故相徐文贞公而严分宜方当揆分宜虽意忌多人我然好文沾沾每谓宗伯当有海内名而文贞公之器之则直以抚世宰物寄与张江陵甲乙江陵不能毋中望矣故事诸王当就邸必选进士中明经老儒侍讲读之国则为国僚佐时裕王当为储未定而景恭王宠王也上偕为妙选翰林臣辍史职以往而宗伯与焉宗伯既素饶经术雍容进止不爽尺寸王恒目属之分宜故知宗伯然以荣禄公不善事之故渐左而其子世蕃与宗伯邻谓其宅可并也属王且之国风宗伯使纳宅宗伯谢曰宅

受之大人不敢弃也已而谓人吾不惜宅惜所与耳世蕃恚使吏部以之国故事请分宜意犹豫曰史官侍王邸岂亦故事耶文贞公时副揆力为怂恿得毋从之国分宜念宗伯且造谢宗伯阳为弗悟也者不谢也分宜败宦稍稍达而其佐礼部吏部则高文端公仪杨襄毅公博为之长二公皆海内夙望长者虚心待宗伯亦侃侃亡隐多所裨益在讲筵文贞公居首揆方倚公自副而以进讲语直有所不当忽中旨调宗伯南或谓中贵人间之故或以在宗伯次者有奥援挤而代之其事秘莫能明也文贞公每叹曰谁谓天下事由我尚不能为国家留一林贞恒自是亦不获竟相席矣宗伯虽少贵能抑损为恭与人温温言笑至于大节则皦然嘉隆之际士大夫有所傅抗颜谈性命学以养交猎名宗伯深非之曰此市贵耳叩其中当无有闻者为掩耳国子诸生例必资满而后得歷事九卿曹属其后渐以居闲紊宗伯一时谢絶其佐礼部则诸陵贵人以大水请修治冀得遂所欲宗伯周视还奏唯长陵小毁当葺余俱已之所省费以万计其视南礼部篆而魏国公之诸孽子邦瑞长而第三子邦宁其母嬖而欲贵之也朦朧为称继得封矣遂改送邦宁入太学云当袭宗伯却其移文曰谁谓邦宁嫡耶咄嗟而母嬖也长幼之序畴敢违之当是时为邦宁左袒者众宗伯与其属王世懋持益力毋何以言官论建夺邦宁母封邦瑞遂得袭中外魁之宗伯之佐南铨凡六年再当大察其长冯而黜陟焉以公明称入贺万寿时江陵柄国张甚冀宗伯以旧好徃相与除前意宗伯自公见外辞目疾弗徃为曲宴折简以要宗伯亦弗徃用是遂絶时文贞公罢相居华亭里中陆先生树声为宗伯坐主而贤宗伯岁时修饗两家不絶所使苍头人司之且北耶则子子一卫南耳而其饗亦不过筭器食宗伯居恒抚膺已矣非徐公毋能用我者陆先生尤耿介每谓得宗伯当益强宗伯亦曰使我小选悞者何以面陆先生宗伯性尤笃孝其侍荣禄公于馆局烝烝色养既荣禄公官南部数以公事如都下宗伯迎送必数十里外长跽而泣抱膝不忍起上酒炙时手择而荐之其为宗伯踰艾矣闻李夫人讣号恸几絶即日徒步出龙江望庐而恸复几絶曰王事靡盬不遑将母斯岂谓我哉奈何以一官而废我慎终节以故迄服除至卒不复用缙绅虽惜之宗伯殊自快以得长供奉荣禄公也友爱诸弟痾痒如其身宪副君稍长养而训之以至卓然有声称者宗伯力居多荣禄公饶多子孙不能容推旧庐宗伯遇火图书器什俱尽至假康懿公废宅以栖性尤好客客至辄令具酒炙度岁租入几何奉荣禄公甘旨外悉以供客或不继则笑曰姑罢酒继而后语我萧然四壁无长物也部使者欲为宗伯治第有疑狱可出者使宗伯所亲善谕意宗伯正色曰女少而嫠晚乃改适耶卒不敢复言宗伯常再考会闈一典顺天试及掌成均学其门生故吏徧天下无一字居间即岁时伏腊问饷无丝泉之纳其却真定鳳阳二守赂尤表表者嗜书手不时释为文能复古然根柢理道不好为浮靡以猎名台辟纂福州府志缙绅以私请者积篋不发曰岂欲陈寿我耶且是寄与考功令孰重志成读者服其典刑又删辑八闽通志垂就则病矣侍经邸进讲有四书直解诵四诗有诗说并所为诗文甚伙厄于火今其存者犹若干卷宗伯少尝读书大中寺寺多崇至则屏匿祈雨留京礼城隍庙而归假寐若一

青衣神踞而曰日坛封矣起视日正午俄黑云翳之澍雨沾足以是心自负其病也亦坐祈雨而应为湿所中云有三子世吉以荫为太学生世勤邑诸生世升幼而从予请传者则世勤

王子曰明兴缙绅无世臣则三世而八座者独林氏而又加一焉不亦振振盛哉然而天下艳其盛而中惜其不尽究用者其故可推也文安公优游盛世经纶之略与诸贤共之晚而厄宦竖危得大柄不果荣禄公终始当悍相嘿嘿守操以老宗伯在通塞间其际犹之乎二公虽然宗伯自死蚤耳不死固未可量哉抑毋但八座盖三世而史局而太学师佐铨典礼天下尤艳之文安与荣禄公皆富寿久为人父宗伯仅为人子弗及终以故尤惜之也余皆不论著独论著其直道能自完于出处则三世一辙乃可贵耳世懋者予弟其持魏公事尤力于宗伯称益僚故附存之

王将军传

弇州生曰信阳盖有王太史祖嫡云余以隆庆之初元伏阙上书为先御史大夫白冤状而是时太史辟公交车亦白其父故将军冤相与谈推文事甚洽也而无何皆得雪散去明年余强起一官而又三年太史成进士入读中秘书晋国典史以文行名天下盖又十余年而始草事状见属曰奈何厘以一金緋还先将军为能瞑先将军地下哉余乃叹曰嗟乎古固有之汉文诚才李广而惜其不遇时也谓子当高皇帝时万户侯岂足道哉虽然广自肮脏不侯耳彼其再至九卿十为二千石四绶将印大小七十战而尚不侯夫岂尽不用者任之若王将军则真所谓不遇者也于是作王将军传王将军讳诏字子宣其先山东之德州人明兴有汝锡者从徐魏公北征积战功授大宁中卫百户复从燕王靖内难战死夹河子悦得为正千户改隶河南之信阳卫有子端袭而从王大司马恕平荆襄寇获其酋拜明威将军仍故卫署指挥佥事明威公有三子独一子瑀存尝与其所善僧慧昭语因果慨然曰虞司隶以杀降不益丁吾结髮行间即以为戒徃荆襄之战蹈于阱而下伏三男子从者请馘之充级赏吾弗许曰彼宁真盗耶即真盗非接办而抗者吾何忍以为利也资而遣之今吾老矣仅一子弱而未有孙岂有所憾哉彼虞司隶之谓何慧公拜曰公行得孙毋苦也已而瑀之妇娠将蓐而明威公昼若覩慧公入者报将军产矣慧公亦以是晨灭将军生之数岁而父瑀前卒育于明威公少而从塾师习制科业则工制科业已习诗五七言絶则又工五七言絶然明威公弗善也曰我惟汝一线息忍以老博士而弃百世汗马劳乃教之擊剑骑射则又工擊剑骑射然不废书而明威公以寿终将军年十五居王父官及长白皙踈眉目须下垂腹上官见而异之俾理卫屯政为搜伏蠹清干没拊循其步曲杂戈耒而从事居十岁所田有滞穗庾有浮廩台使者所旌牒约畧如岁数而会他屯将陈弘道当以法笞其雕卒陈上憾讦其所侵屯饷以数千

计列之御史御史下郡刘司理逮弘道弘道实不侵也迫而谋之老吏老吏曰御史兢兢若曹司理唯御史指安敢为若辨然其人墨而与黄博士有连为画策行五十金博士俾居间以百金投司理果曰吾能轻屯将罪不能反也老吏乃复画策令援将军与他屯将叶本高共侵饷司理为牒召将军对将军时从客饮漫不知所坐以诘牒者牒者怒走之司理所谓王将军踞而詈我公理大怒发卒百人使别将将而围捕将军时将军方之村舍有告者曰捕至矣司理将甘心于汝将军恐甫上马而追至将军彀弓注别将而曰吾罪不至死所以逃者避司理暴怒耳俟其解即归法若失我不过笞笞而全故人谊若何不者污吾镞别将犹豫未果而从卒争前挽曰王将军冤而抚我曹厚公得笞吾曹请肉袒将军乃得脱匿迹他郡俟御史离部而出就狱则司理已当将军侵饷千二百石叶本高称是而弘道所坐顾仅八百石竟如老吏指遂坐将军永戍追所侵饷将军家素贫独有城西庄一区竹万竿书万卷尽鬻以偿不足狱吏又亟侵之母夫人忧之甚悉脱簪珥衣服以偿又不足器用且尽而遇大赦除余饷还故爵将军愤句校仓饷故在乃诉之后御史后御史心知将军冤而虑反前狱不便谓曰幸不失乃公爵何憾直不疑偿同舍金非长者耶予之三十金曰以佐圉圉费而俾赞军政又十余岁为庚戌大敌薄都城檄天下兵入卫而兵备使者黄君某当发汝南三千人大都非老弱即游手屠沽儿黄君忧之以属将军将军请悉汰去不堪者募壮勇教以司马法不逾月而军成如舞如组又若风雨黄君俾将军率千人前驱至邳而以敌退罢归往返所经邸肆不知有兵过黄君益竒之而会徐御史南金以清戎按汝大阅而怪其军整暇非目所睹问黄君黄君以将军进立语移晷则大喜俾尽护汝卒制大纛高牙以宠异之尽夺卫篆及屯操捕巡诸事予将军御史威严甚他将吏见者蒲伏唯唯得一嘖则汗沾背无人色而将军独洋洋自如又尽失其事銜将军刺骨会乡人一御史按浙道归里乃争谗将军而黜者至饰二姬以进御史至浙乃上疏言文吏坐戍赦还不署事而武吏坐戍独署事是使武吏轻犯法也请一切罢署盖冀以中将军报可而是时代黄君者为关西宋君怒将军不橐鞬而謁刺求阴私无可指至是乃广御史议谓犯而非永戍者身歿之日其子孙昉得袭盖以将军昔所坐条当永戍也第不知将军狱未竟不及戍而赦然用是仅以冠带里居尽失其卫事于是屏居黄岭余故瘠田数十畝从僮奴十指犊两角躬垦之秧竹灌蔬与信阳诸名士结社为诗至成帖名之曰耐辱子又有谈录二十卷所著多竒闻自诧以虞初诺皋之类而不诡正道将军既负竒不尽究思欲一自奋而贼师尚诏暴起破宋州傍掠睢陈间两河震动涿鹿焦君某以兵备当率所部与贼角而卒疲无足任者忧之以问故时校咸谓当王将军为帅士选而饱今何可复望焦君乃币致将军将军辞疾不肯往人或谓即不以肘印易耐辱子独不为先明威计耶将军见焦君为言贼名起乌合然中多燕赵青徐流剽骑一当十者驱疲卒应之徒有披靡走耳幕府不以其老不肖请见署以便宜从事勿徇文法乃敢闻命焦君曰善唯君之所之将军乃树标而程士其中者仅十二三授以参伍偏缝之法捐直授善走者使覘贼所向而厚覆待之他将莫能用也盖连战遂大

破贼而他将或小胜或否更以是忌将军而间之既报功将军仅得旌从有司赏将军自是归卧黄岭而叹曰已矣终废不用矣谓太史千户公百战而身膏草野以有此世爵明威公讨寇三月不脱■〈务上金下〉■〈抛，金代儿〉髮秃尽得小署级耳至我以一单辞而亡之我何以见二先公地下于是强自力投所知求辨洗不得而门下客渐散去诵曹颜远诗戏歆曰吾始谓孟尝君浅中丈夫耳今乃知其不易堪也于是日课责太史兄弟为文益笃而久之太史举乡荐归奉觞称寿将军犹慨然谓我无憾于汝则我先公能无憾于我逾鬱鬱不乐将军故善食酒至石许不乱晚节尤好之酒酣辄长啸嘯已曼声为楚歌泣数行下太史所以娱悦之者万方乃稍稍释而其后感末疾寝处不肯服药曰我命在天卢扁何益知言哉太夫人在堂我获前蓐地下以待何憾所憾者竟无以见二先公耳手太史兄弟而嘱曰毋祔我先莹毋求贵人铭我第藁葬官道傍题曰前明威将军王某之柩足矣已而卒将军事太夫人孝终身无间言即大醉修容而后进之恂恂如也视财贿如粪土而重古节侠事赴人之急甚于已能书至径尺者尤遒劲其射十发必命中自少至老不释卷

弇州生曰古所称国士无双王将军近之哉太史之雪王将军冤复其官而有子延世继之仅踰冠而隶大司马都试第一叅襄平军事批亢捣虚进署级为实受已复奋勇斩杀过当超二级为指挥使予世袭太史谓儿子未称才即才宁敢望我将军也嗟乎我将军之难而儿子之易也余又闻之太史将军尝奉监司指捕冯氏之为妖术聚众者将尽僇之以反闻将军独不肯曰愚民相聚徼福利耳非有反状足僇也胜之亦伤天地和不胜而如黄巾之衅何以解于是集父老喻之立散去而槌治冯氏之为妖术者冯氏妖亦遂绝予谓王将军不滥杀类明威公而其所完大李广视王将军诚材武然何至斩灞陵尉坑陇西降寇哉至孙陵而陷敌隳其家声非不幸也王将军者固隐约坎坷以终所以貽子孙宏远矣

弇州续稿卷七十五

●钦定四库全书

弇州续稿卷七十六

（明）王世贞 撰

○文部

△传

冯廷尉京兆父子忠孝传

王子曰余入朝所睹接诸老先生能言冯御史父子忠孝事盖未尝不津津致执鞭之慕也既而曰吾闻之老子士岂愿欲有忠孝名哉至治之世天子穆穆羣僚师师亡毛髮之过举隐忧以来言者諫鼓谤木日悬而不用仕优游于朝四民优游于都野亡忿鬪讼争之日椎剽丸桴之夜凶侵痲札之岁以相保终其天年即用劳承志之外亦何所效之故士至于忠孝名要非有得已也然而使士得全其名而以身免者则君也实天也冯御史之始成进士也以行人出劳两广大帅王文成公守仁文成公进公而语之道公不觉屈席已荐束修为弟子文成公亦器之每语人任重道远其在冯生哉公以行人高第得御史分司留台故事御史有所执讯甫具以移刑部曹郎俾为狱不复更相关也公下所司必从曹録狱牒以报诸曹郎噪其尚书谓御史属吏我尚书以语公不为动曰御史非欲属吏公诸曹也欲因以知事首尾孰为缓孰为速孰为可否体当如是耳尚书屈遂着为甲令寻疏论留守魏公不当越江役诸卫卒语侵大司马夺一月奉魏公慑不敢越江役卫卒矣已奉命巡上江故事逻卒获盗多寡为殿最公叹曰是必有孽盗以免殿者下令卒画地而程之以不被盗为上功获多而核者次之民自是不虞盗诬指挥张绅挟汪御史大夫鉉而杀人公立讯寘之法汪大夫以上宠之故势张甚请大计覲吏时南諫台毋得先论摘俟既毕事而始论摘其尤者部院更衷之公谓南諫台论摘在先北在后皆所以详核官邪司察漏网大夫欲自収寄而夺耳目之任不可上疏力争得如故事汪大夫愎而险能窥伺上指沮折其属又阿臾时相数更职守以自固公复上疏极论之时上方喜新贵人议分建南北郊又欲令皇后出蚕北郊而擿其不合者着论以邪徒辟之中外惴惴莫敢抗公独上疏谓陛下必不忍以敢言之士为邪徒此殆左右奸佞欲售其说者阴诋之耳今天下士风日敝以緘默为老成以顺臾为平易以特立为矫激有所建白咸指为沽名言及左右辄寘之遠譴不惟父母妻子怨其不能持禄保身而朋友故旧絶迹往来以避权臣之怒陛下尚犹以邪徒目之则唯有甘心立仗之马喑口朝阳之鳳而已古者天子躬耕籍田以供粢盛后亲桑蚕室以资黼黻文章未闻出郊而蚕也今士庶之家少习礼教者必以男不言内女不言外为美俗堂堂天朝四方取则焉可舍九重而遠出郊宿乎是礼行后世有特书者曰后亲蚕于郊讥外也视陛下当为何如主也南北郊高皇帝未定制也分十年而合合百余年而列圣继之未有改也今陛下一旦改之行夏之时而顾复周之祭先地后天则尊卑之义不明分天分地则神明之志不通夫百年而成一旦而毁中人之家守先业者尚知其不可而况陛下为天地子为宗庙社稷主哉陛下服歷大位九年于今矣以为治耶乱耶安耶危耶太仓水衡供亿不足那贷尽矣三辅近畿关陝河洛赤地千里人且相食矣两淮旱蝗草茎木叶亡子遗矣江南大水岁

课不登争流窜矣闽海叛卒至杀两省长官矣延绥一军素称忠厚为殍者二万余矣地震星孛产妖作异草木变怪禽兽为孽置邮不絶书灵台不絶奏陛下不恤而沾沾焉自以为治安今日颁手诏明日降勅谕欲以配追前王轶驾后世臣故知其不可也因劝上速停二议开言路且以尧舜之用元凯为勉而唐宋之狗林甫安石为戒俱报闻当公具草时分且得逮而上宽之弗竟也公益感奋思报会彗星见遂极论汪大夫为腹心彗并及二相臣以为召用者宜亟罢罢者宜弃勿用遂仿范希文百官图例悉品诸大臣以某贤当简用某不肖当斥其辞旨峭厉上恚甚驰缇骑逮之至京下诏狱苛究所主名榜掠濒死者数四公执语不移遂移秋官狱论比附上言大臣德政律斩而疑之或得从轻比上夺尚书王时中丞侍郎闻渊岁俸郎以下遽谪有差公遂真论斩矣时汪大夫得骤迁太宰而王肃敏公廷相代为大议以公所坐特毁誉失当与三尺不尽合疏请之不听寻当论报以例会审南阙门汪太宰时执笔故令校卒持公转膝面之公即起立不跪太宰怒谓汝上书欲死我既下狱复欲为厉鬼以死我死今不在我手耶公叱曰若能死我即重我不过磔若又安能磔我太宰益怒谓囚何敢叱大臣公曰大臣而无君人人得诛之何但叱为太宰乃摭公狱中事谓以受人饷公笑曰如若言不过以义橐籥耳不至如若以选人市又受某某金而荐之开府太宰怒甚推案下欲拳公公应之声益厉王大夫好谓冯御史何絮为祖宗不杀諫臣百七十年矣岂以而快心破祖宗法又为太宰有法在以法论御史则可以怒论御史不可夏宗伯言亦曰此岂宰公私家耶太宰乃止然犹署公情真公挺身而出不顾观者皆啧啧称叹曰是御史始者以其膝铁也其辩口则亦铁今者觉其胆与骨皆铁矣因目公为四铁御史且录其语传之远外而上所使诋事者密以闻颇为动容是冬得不论当汹汹时有遗公药者曰毋再辱公推之地曰不闻王新甫语我岂儿女子耶御史陈事不当伏欧刀都市以申明主法何言辱公在狱而有孝子京兆君事公讳恩字子仁娶于金而举京兆君京兆君名行可有兄弟十人而君为之长当御史公下狱时君甫十三岁即伏阙上书白冤状括髮短后衣弊弊长安街中见一要官輦过即攀跪泣请其辞絶酸楚不忍闻皆掩耳促鼻者疾过之其又二载而君年十五矣会冬事迫乃刺血书疏叩公交车大略言臣父恩幼而失怙祖母吴含饴哺之以长成有今日不幸私忧过计欲为陛下作一吠奸之犬而顿忘逆鳞之戒遽陷大辟涂炭都市窃念祖母吴已八十余忧伤之深仅余气息臣父今日死祖母当以今日死臣父明日死祖母以明日死臣父死臣祖母复死臣莹然一孤宁得不死惟冀陛下哀怜之縛臣置辟而赦臣父得以苟延母子二人之命陛下僇臣不伤臣心臣被僇不伤陛下法谨延颈以俟白刃纳言陈经见而怜之为封上有旨法司更审时王大夫犹在事与聂司寇贤仍以公前律不尽合请报减死戍雷州公戍而汪太宰亦用奸事露罢矣于时海内翕然谓冯公死忠孝子君死孝然卒皆不死王子读之盖至今犹廩廩焉已而叹曰嗟乎夫孰非天哉今夫高文二祖至神圣也从法语如转圜然胡至斩王权磔萧仪而腐曾秉正也始约法而天下有触罗者皆以子请代得免既而不胜请乃许之如陆安邦士利辈不可

指屈蓋人子之志伸而于太和不无漓哉夫冯公伸为臣而其子伸为子然而卒以全者天也蓋冯公之后十八年而杨忠愍继盛不免矣其妇諱天而请代而若弗闻矣故曰天也冯公既得雷州戍雷之荐绅衿裾迎而师事之颁白倪孺相牵藉指目公以为非复世间人公后先凡六载所惊寄在吟咏甚适也独不能忘母吳太夫人而会赦归雷人祠之十贤堂以配宋之迁客寇準李光輩公始获精心养母吳始公少时食贫不能恒治甘旨一日彷徨无所出之中野遇一雉飞入怀以佐午具至是叹曰吾今幸不至窶吾敢以俭吾亲哉于是日征水陆之腴以荐每行村落间辄奉板輿偕采田歌欢悦之蓋太夫人九十五而后终公亦逾六十矣犹烝烝孺子慕也公材大既蚤废亡所施居恒慷慨谓犹可以为德于一乡已而曰是不易以不费惠也出橐中装颇买陂田之瘠者募贫人佃之教以计然之策而亦会有天幸傍畝益拓所入渐广乃首推母吳意以贍其族季曰干曰坤者又贍其女兄弟之归张震王梦葵者又贍其弟之婿奚继之者已又贍其兄子际可为之娶妇嫁二女而谷之已又贍它弟族子敦可立可仕可还可又贍诸姊妹之适庄华陆府鍾鳳者已又贍其布衣之交曰郭济沈兰钱谷者经生交曰张思者患难交曰李启祥者通家之后人曰载九甄曰苏允厚者或授之室或资之学或恤其死柳御史与周主事之坊其裔孙贫售之公公与之直而后归之又赎钱修撰之坊以授其裔孙曰毋更失守也倭入寇监司募僧兵御之公所赆廩犒独当公家半士女避倭而徙者皆为授庐传餐以济之大饥疫煮粥南禅寺哺饥者剂药以治疫者所全活甚众又割其膏畝数百俾代区赋长资曰奈何吾安坐而视汝剝产也始公之急治生而人疑之既伺其所岁出乃曰冯公殆为它人治生耳孝子君既出公于狱遂益习经术甫冠举乡试高等归而佐公为义会公元配金孺人以老寿卒君吁祷而请延不得则恸絕久之乃苏蔬食不入内者三载而念公老不欲伤其意时和色而后见不使觉也蓋乡人人益称君孝矣会穆庙初御极旌诸言事者冯公业七十余铨曹欲用公而难其老乃疏进大理寺左寺丞再以庙恩加朝列大夫而部使者方列上君前事下大宗伯覆核无异特旌君为孝子表其庐于是冯公父子忠孝事大着而君以数竒久困公交车冯公督之谒选曰吾不任报国矣若不以时需一命以攄汝蓄如吾志何君谒吏部选得光禄署正光禄中贵人陆海故以鱼肉其大僚至四署则益狎君夙戒其属务饬于上供之物而中贵人至欲有所恐喝而君阳为不知者縛夙猾之役而数之曰某事为某奸某事为某盗不而贷也蓋皆中贵人交关阴私状中贵人欲假上供物以难之则皆饬乃更扼咽为诸役请命而出问知为冯御史儿相戒竟君任亡敢干而君当以预赞大典论劳有大红绣绮衣之锡蓋用四品例云会以公病乞归公强无疾老而稍善忘比疾革谓诸子曰负国家再生恩已矣属之而曹耳谓长子见者以行古道其犹有古心乎诸季可取师也遂瞑明年郡邑大夫师生祠公乡贤祠君之奉公丧毁瘠而抑于礼如其奉金孺人丧服除迁通判应天府君直臣子又自以孝廉重公卿间毋敢吏畜之而君益自励为精勤每有所委署恒单骑往曰奈何以口体烦人当论市役一瞥而卜者诉曰何以任帛供君曰若诚卜且瞥若父不某所兄某所

为千金市耶里人推槽坊供者皆妾人子公怒曰去之东偏某家不以千金张槽坊而委之妾子杖而更之当监掣盐务推抑大贾而宽中贾以下咸称平其监烙驹亦仿其意先豪牧之饶秣者监清屯田先豪伍之兼并者以故所至辄办理然君屹屹持絜法亡所阿狗御史台有胥史见诉下君治而心庇之比狱上欲曲罪诉者君持不可而止尝奉委逮魏公从子及其家奴稽故不发君使谕之曰若不熟铁榜耶而敢抗王法即八议在魏公不在尔辈从子蒲伏请罪君痛扶其奴悉抵法数从子而宥之司内枢之贵人用督捕责君受牒君使一役受牒贵人恚乃为名以抄案胁君吏往吏咸惴无人色君谓而贵人不解事京兆不受弹压我以吏往而贵人不以小瑯来耶贵人恚虽甚问知君为冯御史子逆自折然君于职不专为伉其治民大指先教化而后刑罚有兄饶产而弟窘者诬其兄君不直其弟使具狱而徐动以天性兄为哭欲宽其弟而给之弟哭请毕死不敢负兄遂相为敦睦君又辩故宦家争嗣微暖与富人之孽子冤死者翕然称君神明君尝属议高淳事高淳据诸郡上游而颇受诸山水故有堰障之其水傍溢顷田数十皆浸或请决堰以露田君曰为田几何吾宁无邑子情安忍邻国为壑则又请省赋以苏常郡赋补之君曰苏常赋重极矣能径省高淳赋则可以苏常补则不可乃议调停虚粮以改折代高淳之困亦苏其后复岁饥桴鼓不时起而君已去邑尹谓非君行赈且立稿君即日命驾趣之邑哀号者道阗隘也君褰帷而示之曰我在毋忧稿君故已悉得其田饶瘠主名毋敢下上者散赈日所至俾贫人鱼贯受粟悉以实往咸驩呼祝君有后台使者上君治状卓异先后十一疏而是时少宰王夷陵尝以公分识君贻书君谓相国与太宰逅而贤君吾从旁臾之非久迁矣君不答人以谄君君曰彼贤我则不责我答责我答我故不受彼贤何与我为君坐是竟不迁以考最不欲北谢病归修其父行谊甚适也冯之先谨以侠亭以守刦毋择以战咸显名秦齐韩赵间至汉而奉世野王以威重廉靖称其后道拯贵寿京稍蹇愕然未有忠孝表表如廷尉京兆父子者虽然亦各所自重举之耳以迹廷尉终始则何尝不笃孝焉京兆故不尽究材其材何尝不宜世也抑其奉公守法足称矣又皆博学工属文而传其业者廷尉之子学宪时可京兆之子乡进士大受尤有声大受与王子善故为论著之如此或谓廷尉有恒言行阴德而使人知非阴德也读京兆之辞孝子旌恳恳繇衷悃矣今奈何使人名之又忍以君亲使人名之也

王子曰然欤否否使人不得名者盛世事也不欲使人得名者忠臣孝子心也名忠臣孝子以风天下者民秉彝也且夫名教者圣人之所不废也而又何疑焉曰冯廷尉京兆父子忠孝传

陆子傅先生传

陆先生者讳师道字子傅其先苏之长洲人生而颖儁七岁能裁小语诗稍长受王

选部谷祥易以易补博士弟子郡守聂贞襄公豹试而奇之令改受春秋即以善春秋闻时年甫二十余而会其偶曹宜人卒昆山吴中英先生者名儒少所当意见先生而奇之以女女焉是为吴安人遂与吴先生同荐应天先生秀眉美姿玉立颀然其再屈公交车而词赋声隆隆起凡六载始成进士所射策入故相夏文愍公言手大奇先生为言于故相李文康公时曰是子也其文贾董而书则锺王以第一人闻是时上不吝寄相臣柄移之二甲第五选而得工部都水司主事任职洁廉无害夏公内自恨奏改先生礼部仪制司供事制勅先生雅不欲近相臣而念越人勇之说进所取应制酬代渐诡因母陈宜人病请急归侍久之陈宜人病寢剧先生谢客隐汤药问蚤莫亡间时时抆颡吁天请代又尝剖股羹而进之病良已又病目先生三舐之亦已会所予告过期遂不肯出益肆力于学其学自九流七畧稗官黄衣之属亡所不窥手抄典籍后先积数百千卷丹铅俨然益工歌诗及古文辞又益习书小楷以至古隶皆精絶又傍晚绘事简淡咄咄逼倪元镇时文待诏先生征明者里居而亦善诗及书及绘事先生造门用师礼礼之人谓先生业已贵胡折节乃尔且不闻世以秋目文先生耶先生曰子言之误夫文先生以秋藏道者也自吾见文先生无适而非师也者奉之益笃文先生亦笃好先生即胶漆莫喻也诸台使慰荐先生者无虑数十疏自世宗朝执政者好拔其党据津要以相翼毗而轻于弃名士大夫而士大夫亦丑之莫肯为用而吾吴最盛前先生者有王叅议庭陆给事粲袁金事裘皆里居与先生善而先生所取友如王太学宠彭征士年张先辈鳳翼兄弟多往来文先生家与文先生之子博士彭司谕嘉日相从评隲文事考校金石三仓鸿都之学与丹青理茗盃炉香翛然竟日间从诸贤出游泛石湖取越来道放舟胥口寻览虎丘上方支硎天池玄墓灵巖邓尉万笏大石之胜吴中好事人操酒船迹之于山水间先生亦无所拒取酣适而别兴到弄笔得薄蹠阿锡一点染若重宝盖是时海内悬格以购文先生迹次及先生先生不为意寻而陈宜人以老寿终先生哭毁几灭性而素所友爱弟安道亦卒以是日邑鬱忽中风蹶愤愤呕沫久之渐愈而性理亦少错矣先生林下踰二十年而受易师王选部亦以久废俱负公望朝之执政者新以名起先生与王君先生就王君而筴行止王君曰吾老矣即并命而并不出将以我曹敖然而忽忘君父先生乃起就补南仪部召为膳部郎中甫上擢尚宝少卿寻奉使祭秦先王公殊自快以生平所慕者关中形胜今幸一寓目焉乃纵游二华观龙门砥柱浴骊山温泉吊汉唐诸陵所至皆有诗而秦之嗣王习闻先生名厚币以飨先生谢弗纳归署尚寶篆会以穆宗登极推恩赠先生父母妻而先生阶奉直大夫勲協正庶尹亡何故痾复作乃再上疏予告归归六年卒王君既筴先生出即谢病卧复起居两岁果病病久之而死其于先生虽为授经师而行能姿槩略相甲乙王君风度整洁而先生襟宇冲夷有足当者其月旦亦埒之先生初号元洲寻更曰五湖以表寓也卒之年六十四所著文集左史子汉镌若干卷二子士谦士仁皆有名士风

弇州生曰以陆先生之初尚羊山泽诗酒自藏即渊明奚啻焉晚乃聊出栖迟金马庶几东方曼倩之所称者浮云在霄舒卷自如亦胡弗适也嗟夫令典午不易社羔鴈娄下人亦胡能以一隐逸测渊明而何乃迹陆先生为

喻太公传

余始与杭假守喻均邦相善因而得其父太公燮之为人又得其诗万厯之癸未冬而邦相以书自杭来曰日奉吾父之郡邸养而忽忽不悵谓孺子吾不敢望故丰鸡犬奈何坐肥我则一奉之西湖上亦不肯再曰梦境耳且吾不欲使西湖之识假守父顾案头有弇州山人集读而心善之令日进二三编居四十日而尽乃曰吾日登弇州之山而与山人游不亦大快且吞所谓西湖八九不芥蒂乎我归以山人老矣弇州山人者世贞也居一月所而邦相手草太公之事状而来请曰吾父不获面先生而先生之言在吾父胷臆其可以当先生世而失吾父敢以不朽请余曰微而请余故尝得而太公又得太公诗矣世所称相知者宁面也属有文字戒则以太公故缓而为传之太公者字廷理父曰朴斋公粟生太公九龄而见背有母刘在兄弟凡三人而太公居仲伯氏煌秉家政才足树而不能无别帑计岁少赢积刘夫人怪何以弗赢也而语太公太公诡对曰自吾考之见背中外若狷逼焉得弗隳足矣何敢望赢刘夫人意乃解而久之伯氏亦卒有三男二女未婚嫁太公代署政则益精勤课童奴事耕织计岁得厘厘当出以时消息之故为季也室已为伯氏三子室而字二女岁计之若小赢者刘夫人复怪之若材乃逾伯氏耶以伺其私橐亡有也当拆箸则盛推其园田以授季与伯之子而取其余不合亲友不立盟契交让而后饮极欢而退自是刘夫人独就太公养而季以火毁已而延太公所亦毁独伯之遗舍存太公仰天谢曰幸怜我不困我胼胝以日夜覆露三孺子足矣谓季来合而奉太夫人馥比舍居无忧色然自是家日益削与其妇夏安人节腹以资太夫人甘不使知有约也太夫人卒不能具窀穸奔走勺贷以襄事而毁瘠胜之人人归孝矣太公自是不甚力治生而会邦相长则力课之明经属文邦相有材气然自负■〈跣齿〉■〈跣齿〉不肯就经生规太公必挫之使就经生规而后已性又嗜读书至丙夜声琅然不辍夏安人戏谓得无更作博士弟子耶少而不读今何读为太公笑曰少不读故今读之且书宁为博士弟子设也太公之所精治独史学上下数百年间事指画舌涌如覩邦相既业成而语人吾不治史从傍耳吾父谈喻于目习多矣太公故尘土财帛喜施予而夺于力弗继自邦相之通仕籍若少可以行德者即宗戚中壮有室歿有归孤寡有衣食其半皆于太公乎足客至毋问蚤莫輒呼酒炙弹棋斗梟竟夕不示倦色甚至比邻贫不能留连客太公为延致曰奈何吾里而有枵客也以故太公之称封君者十余年而不名一轩南畝无傍拓更自喜以为快邦相郎营缮当治仓与仓曹郎有连而失其意仓曹相客也逸于相谓邦相尝有所雌黄激之怒以摄督仓侍郎因事刺讥邦相一辱给事中从而

实之寘狱讯邦相祸且不测太公闻而晏然曰儿非不自爱者命也已而得白薄谪楚察幕归而请罪太公复欣然曰咎不自尔掇命也何害至邦相宦楚幕奔夏安人之丧归相劳苦久之邦相按庐产犹故喻也太公伺邦相橐犹故邦相也父子泣相慰曰可以终身矣太公之所最乐者就邦相营缮封与燕之贤豪长者游然不久弃之去其次就邦相兰溪令所风令以寛平无伎令能奉行之亦乐也而亦不久去大约如在杭指太公生平洁修巍坐袖手虽盛夏冠裳殊楚楚年七十有七矣神形犹峭爽目闪闪如岩下电飘髭拂衿领白而光可鉴也太公不喜属文以其去情性远而嗜诗老而吟咏不衰邦相私评之以高处鴈行岑嘉州下亦不减元白其为五季乐府慷慨激昂则辛幼安刘改之也人以为知言初邦相之封太公如官也饬冠带组绣以荐太公为一再御然不恒御也里居冯一仓头卒遇之不知为贵人郡邑礼请乡饮亦不肯应而自号曰素轩邓太史以赞尝因其七十而为之说谓有天籟而五声于是乎生也有淡而五味于是乎生也有素而五色于是乎生也籟不离声淡不离味素不离色且日斗接而守之卒未免不胜之患焉故道期乎齐知之不能知而言体乎常名之不能名予将进公于素之上乎太公曰吾安知上吾长保吾素足矣

弇山人曰如邓氏云太公将不得为有道者耶訾不责羸德不近名以素为纬复取为经外若皦皦而中冥冥其子师之拙宦乃成其见若不足而终有余者耶庄周所谓人之君子而天之小人者耶所谓诗发乎情止乎性用自偷适而已若终始不离素者邦相目以如岑如元白如辛刘庶几闇然而章不能竟掩之矣

余征君传

余与晋陵余司理善司理时时为称其先桐林君之贤也曰百余某何敢望吾先君而先君困诸生久其应乡辟书数俛得而失之而不穀乃先先君鸣嗟乎士固有命哉已而以司理语质之其乡人王祖嫡曾清辈则皆曰余征君贤者问何以称征君曰君诸生也隆庆初天子下有司辟怀材抱德咸推逊君将以君应而君卒学者不敢以诸生目而称之曰征君会因司理请乃作余为诸生祭酒束贖请益者众而其于家尤能消息之以故小自给顾性好施予里人秦生被诬杖且死犹坐系不得出征君脱驂马贖之出而医药之得不死它日之别墅遇有夫妇哭甚哀问知其有巨室逋且鬻妇以偿也趣诣巨室缓颊百方至自为券以代而解故人龙某子贫甚馆之门下衣食之族女孤收养俸差次已女择壻而资嫁之征君所行德甚众然不自以名其受人德则缕缕热中不亟报不止也性笃孝事橘泉公无违色既以考终柴毁骨立服禫矣每念不能终养公又不能以禄养也语及之泪交下于頤遇食亦废匕箸少能诗晚而渐入唐格能文文闯东西京能书法遒劲剂永兴渤海间尤精二氏学旁晓星历服饵之技所著障风集八卷一得集四

卷蓋郡邑既欲以公应辟书不果则以应岁荐甫治装而病卒矣年仅五十七

赞曰余所覩博士师弟子荐征君牍抑何其详至委曲也汝南故善月旦评今犹有古所遗也夫以其文俳故不志志大都云司理之治晋陵其贤可屈指数至称征君则自贬损以为无可比子道固然语云不知其父知其子余以是传之无恧辞抑橘泉公医而征君儒以不逮禄养自憾终其身则余氏代推其先德矣

弇州续稿卷七十六

●钦定四库全书

弇州续稿卷七十七

（明）王世贞 撰

○文部

△传

徐尚书传

徐尚书者讳棫字世寅苏之常熟人其先嬴氏封于徐而子孙散居偃师其迁新郑者为着族至宋而南渡居常熟者后为着族及明而有官至侍郎为名臣者其徙于李墓曰东徐复为着族凡数传而至鯤鯤子天民是为尚书祖父皆以尚书贵赠副都御史再赠兵部右侍郎天民家素饶好施予仁义附之有丈夫子四而尚书其最少三岁丧母吴继母张母之十四丧父哀毁如成人其伯氏谓仲与叔曰堪輿者言吾家必大贵而吾与若已弃之农即贵必是子乎吾曹盍僇力为家而纵使学尚书乃奋自砥励昼夜读书通经术以诸生游太学久之连举进士出知宜春县拜南京湖广道监察御史谪浙江布政司都事迁建宁司理同知饶州府进浙江按察僉事遂为其省右叅议以张淑人忧归服除补故官河南以按察副使视楚学事迁云南右叅政寻转其省按察使再转右布政使移山东为左寻擢顺天尹未上拜都察院右副都御史抚江西入为南京工部右侍郎久之以工部右侍郎兼右僉都御史治山东胶河未竟改兵部右侍郎仍兼右僉都御史提督军务兼巡抚浙江召为刑部左侍郎方候代而拜南京工部尚书未上以言者归待用于里居二岁而卒尚书之始为宜春也其邑人曰相嵩相嵩以贵势倾天下而其子侍郎

世蕃持父秉益张舍中子横行州郡莫敢谁何嵩乃以好饮尚书至半而觞之曰去家远不能不以付令君尚书返觞嵩曰去公远无所从质愿以一二家老名示事质之何如世蕃意不恠谓大小数千指孰所取家老已而肘嵩曰令君言之当授笔嵩书其老二人名以授尚书尚书至邑过嵩家召其二人出见而熟视之曰而公命也有所语以告我亡何舍人子横行者前后十数辈尚书悉縛而笞之奴迫且絮泣曰公所言舍人子云何而赐笞尚书曰舍人子何不以名而仅名彼二人嵩父子闻而弗说也业已属之故不能难而尚书之为令益谨时时召问三老所疾苦诸所治平徭赋省刑罚更定约束皆卓然为他邑冠台荐上乃以尺一召而嵩父子欲修衔而刺之亡所得列考皆上上阳谓选部郎曰此令本无长而姑以吾桑梓故借之于是仅得南御史尚书为南御史则益谔谔持正论尝因元日日食上修省疏时上已讳之而疏所论殊剴直报闻倭警海上久益急江南民委中兵而水旱继之尚书复疏请宽恤及备倭五事他论兵计七事多凿凿可行部覆亦时持之有着为洁令者嵩父子更以为辞曰一御史不数月而纷纷乃尔如百御史何即荅旨不令县官腕痛耶盖尚书行而同年楚人王宗茂者亦为南御史嵩父子置酒并召之盘飧具水陆宗茂多不能名恠而问尚书尚书微笑曰海外物也若何由名宗茂之抵南京未几而极论嵩父子具疏草成以属尚书尚书为更定数字时有所善郎在坐夕别而晨驰一介走报嵩嵩以是得为备而谪宗茂嵩故以疑尚书是郎者复泄之而疏辞有设宴而水陆毕具皆海外物语乃益恨尚书属为南太宰者曰必为我一快志于徐某不然我食且不咽太宰伺求疵不得因大计京朝官示薄谪而已都事于藩僚最散冗而尚书以谴往可坐待迁顾孜孜守法无害赵文华将大军南征倭至浙而其督察时尚书所论兵事疏中颇言其失计甚切文华恨之而为故嵩党尚书入参谒文华佯怒数他吏以威胁尚书尚书不动乃檄使入贼巢欲餽之贼尚书至而贼已解散乃得免时议者皆稱其屈而嵩亦颇自悔以私抑其乡邑令而自树威尚书用是连得司理及郡丞而益精勤于职为丞时尝摄郡祷雨雨澍应拜火火灭郡士人异之谱之诗曰双异集自是擢僉事而胡庄肃公松为藩长与尚书语而器异之寻江右大盗起且用兵而胡已迁为其大帅请于浙之大帅宗宪募义乌兵使裨将戚继光将而讨之以尚书监其军遂大破贼有白金文绮锡时嵩父子败而徐文贞公阶当国选部郎陆光祖与尚书善而推毂焉乃得稍视楚学楚地方三千里自乔世宁而外按部无徧者尚书昼夜不停瞬寒暑无宁趾替月而徧十五郡课试毕輒进诸生而诲之行谊经术人人感畏又表先贤之祠墓如黄叔度周茂叔诸公皆自为之记至云南而黔公朝弼者悍而骄不肯循故事归谒留都而悉倾其嫂橐且錙之又凌侮台使者台使者恚甚不知所出尚书时以按察具草上台请论削黔公爵而亟贵其子代署事彼失权无能为而幸其子之得署事当隐忍不敢为变台使者据以闻诏可黔中遂安同年张天复故尝参其辖坐赃当即讯尚书悯天复冤委曲为调停以解其它所行举乡约辨疑狱革抽税省宴会滇人戴之若神明都御史以非所便且谓滇一徐君足而何所用我为因子使人司尚书事尚书即引疾而左使陈善以书说

都御史曰徐君奉明公威灵以摄滇吏民吏民称徐君贤即归德明公而明公乃疑其侵
权者何也今徐君闻明公之有意督过之且去去则善不能独留矣都御史愧而止尚书
之在滇垂六年而不得移近地时徐文贞在位久讲学倡士大夫诸以讲学名者皆骤显
贵而尚书故讲学而独不得移或曰尚书学不尽为新建而为闽洛以非徐公指也或曰
不然尚书不能事徐公客客无为游扬者徐公去而为高新郑拱幸用事其两人若水火
谓尚书徐皆南人也而独留滞滇当亡所附丽遂连擢尚书以塞南人意而尚书欲以义
报高时给事中笮东光素有狂易病上疏请僇徐并时之所谓贤而与拱忤者尽逐之以
媚高会上御朝东光噪于陛法当逮高公为之以病请得罢不究甫归里而属尚书荐起
之御史以书来约尚书不听曰吾闻笮病尚未愈何可荐也东光驰而见尚书尚书谬谓
曰君病尚在医药而乃轻出耶高闻之怒曰徐某叛我使我惭见吾客必逐之会败乃得
免花园峒贼之在江右者久而剽掠益甚尚书发兵讨平之俘斩以千计捷闻赐白金文
绮饶故困于麓而麓于真红尤不易自宣德嘉靖间再为之其费本巨而数不成民以数
倍偿破家比比至是中贵人用侈导上复行所司为之尚书力言其不可辞甚苦人以危
尚书上独心动为易浅者饶得以不大破尚书乃一切为宽恤而他所请若复临德仓储
东南饷表革除死事臣崇祀罗李诸所规画在国计风教不规规一方多报可既转南而
薄其职亡所事事居恒自叹天子不以时见任使即一旦狗马之力罢而使从少年后难
矣会江陵相方贵重思立奇功自固而山东漕河■〈汭〉闕羣臣扼腕而谈海运尚书
为工部侍郎而其长刘公应节同年也故山东之莱人从容言海运必由淮而踰青莱多
山能壞舟避之则益迂有内地经胶莱河二百余里差近三之二而亡覆溺有故址可复
也尚书与意合各上疏具言其利便尚书遂兼宪职徃莅之用军兴法不能亡所募发其
人乍见以为扰争言之两台臣刘公既理戎政诏往勘处乡人狎刘公噪而从之江陵亦
不能决于是尚书乃叹曰天乎以一时害而废百世利固难与虑始哉遂罢役而抚浙之
命下矣江陵尚服尚书果势壮徃而是时海塩之堤坏浙之东西亡所不瀆海而海塩拒
之不能半里许当宋时累石为堤厚十余丈每丈费五百金堤一决则卤潮入而数百里
稻田亡弗腐者至是以属尚书与监司合莢修筑之凡二十余里大率费减省于旧十之
七而坚壮胜之复浚内濠广六七丈袤与堤等论功赐白金一镒文绮二有副而倭奴复
来犯宁台间尚书督舟师逆击之卤级百赐如海堤上将举大婚司礼中贵人来责御服
袞绣裓翟诸女红费十倍于昔尚书为委曲调处不足则议加敛尚书曰民力竭矣柰何
疏请于上俾司农将作损帑以纾之浙人少安尚书于浙治状非一然其大要在裁冗食
汰冗兵他供亿减节以一身先之邮传達官还徃虽造请不废然宴不过五簋馈食不过
筭器而已又为三办法以定租调奸吏不得指为奸窟于是浙人益大安而终以纖嗇少
纵舍不能尽合贵势心虽再迁至八座甫离事而言者有所齟齬初江陵之遘丧而夺情
也天子为之杖谪诸沮止者而尚书为书草大指谓即夺情不可以无奔丧即沮止者之
不当不可以重致罪与廷尉陆公光祖约以上江陵而尚书先之江陵弗悦也是以有里

居命亡何而事大白台使者亟荐之遂预推南司寇而尚书以齿风不数日卒矣春秋六十有三尚书性孝友事诸兄若父诸从子若子其里居亟为郡邑言利弊娓娓亡非为闾里福者而于姻族惇深矣朴素自喜居平食不再肉一布衣至三澣而未尝不整冠服左準右绳动止有礼然其自治严而待客则藹然谈咲若春风尤重友谊尚风节御史宗茂已物故而行部至其邑见遗孤而抚之沈少卿懋孝持夺情事戍岭外道过浙尚书出视无所避为之治薪粲而贻书岭外之大帅人或以撼尚书弗顾也虽不尽为新建学至所推贤惟新建尝上书请从事孔庙廷议有抗沮者辨之颊尽赤于物无所不慈而尤恶杀居恒谓太牢最巨而最有益于世天子无故不杀之而人以为砧盎之恒物者何也以故所莅官必禁止而又梓之书以示人为文章瞻而達有奏议若干卷集若干卷外史氏曰尚书首尾四相国毋论其人不能尽贤而皆欲得尚书或不尽得或甫得而竟离之人将以尚书不能用相国哉夫亦自信其是而已尚书于国称八座亦至贵重矣然而所欲抒发十不得一二也以故竟邑邑死而至暮年扼腕论天下事不小衰彼岂与沈鷺岩穴槁死黄壤者究日计耶若乃不忍一牛而施由亲始则孟子之所谓亲亲仁民爱物者庶几不失序哉

少司马赵公传

当岛寇江而为世宗之季先后两贵臣其一以视师往曰赵司空文华而一以督戎往曰胡司马宗宪大江以南不患寇而患是两贵臣者时则有两侍御亦先后以柱后惠文力折之两贵臣之焰卒不获大张而越民恃以小挺旦夕之命然卒不能为两侍御害两侍御者赵公孔昭王公本固也而又皆同年进士又皆为顺德之邢台人赵公之所值即赵司空最贪鄙无耻恃上宠而挟权相之卵翼之则又最横公时自福建巡按还以风裁举再按浙江司空其部人也而持监军节以吾吴之曹中丞邦辅有战功而不相推逊欲劾其调度失策公业为救曹公草露以示司空而语之曰年来遘贼至惟有鸟兽窜耳所见惟一曹中丞强人意而公摧折之何以励天下司空语塞第曰任公救之上于吾两人者孰重公曰恶是何言也俱为臣子伸所见何以能逆探人主意且公虽重安能越理而重于我司空度不可已又终以桑梓故惧公难之追寝其疏以解而是时公入司棘而司空有一子应试乃谬■〈目匿〉公而要之曰老■〈牛孛〉舐犊柰何公阳为不悟者入棘约束诸僚案曰司空谓我矣毋得与寒士争进罢其卷弗録司空恚甚然莫能报也而属且入朝因尽笼诸公功而归诸己公当会稟草尽削其张大诬罔语其疏遂有异同司空力能得之大相然竟不能夺公所守而公乃得加奉及赐鎰金束帛司空自以告讦迁其后卒败而胡司马者继其后而与王公值其人颇豪健有气于贼多所诱致而其张大诬罔尤甚且恣为干没王公持之力已副臬外地然其后司马者亦败王公得委迁至南太宰而赵公敷歷中外所至策方面勲而其官仅为左司马坐宿疾故也公讳孔昭

字子潜别号玉泉世为邢甲族而大父仿以惇朴父用以刚直皆着声皆用公贵赠如其官父娶张淑人有子光禄署丞孔阳德平丞孔仪矣三举而后得公公生数岁动止卓犖不凡父抚而异之曰官人儿也十六试诸生第一已屡试皆高等十九举乡荐遂驰声公交车二十六而成进士除河南开封之鄢陵令鄢陵吏人窃少之而公素精习法比便案牘大事斧断小事理解盈庭之讼不移晷而散其兴利若饥渴去大奸宿蠹若蝮螫腕字单赤若哺乳婴每一左顾吏胥虽素舞文长者皆若负霜雪而大指宽时时情辅法而行手程赋书以晓草莽夏秋及期疾于委输四封之外争来质成邻邑师之如大府而公间诣学宫悯其倾圯曰非吾责耶为造饰一新拔诸生梁策童髻中又妻其无妻之尚某者皆育而诲之后先取科第去增修邑城百雉必取穹坚诸所厝置不以烦民盖前公六十年而故少保王康毅公宪为令有善政其人思之至是为语曰前王后赵鄢陵京兆公入台其始按辽左也则已风棱肃然矣大帅李筠者故与咸宁侯仇鸾比而贵贪虐任情公按核之褫其职他债帅以次论夺亡得免者再按福建所操持约畧如辽左而吏治加密时其地已中倭公策战守核功罪每奏牒上尚书无不啧啧赏服故满而有浙之命闽浙连壤讴谣交于道其声实亦畧相当而浙所抗贵臣事尤着寻进丞南大理寺亡害未三载进南之都察院右佥都御史督操江防垂上而以赠公忧归服除召抚宣府宣府故敌冲频年土鞞瘡且尽公抚循其疮痍寻敌深入精骑突至红山京师大震公与总督江襄敏公东掎而尾之走论功赐金币以不能事言者见苛摘解所任需命于家将发而吏以故事进赎缓直数千金公却之不顾寻丁太淑人忧归服除而诬尽白言路更交口誉公以公所在着绩而浙为最遂巡抚浙东西提督军务浙人讙呼曰是能折贵臣角者公至而岛警属已缓则为汰冗兵节缩一切横赐溢廩尚方织作岁日益民不胜机杼公请宽减之得报可而又条奏地方便宜分款十而其要者如定属郡之兼辖禁岛土之开垦搜矿盗之窝蓄裁三司之繁礼又若议赈免停勾戌补蠲贷上之朝着为甲令新建伯功高而爵久不复言者奏下公与御史覆核当复遂儋珪世世召为户部右侍郎甫四月而以左侍郎兼右佥都御史总督漕运兼抚大江以北时淮徐娄中水飘溢庐舍民采芣苢网鲑虾而供朝夕犹不给公于常请蠲赈外复移帑金招盐商平糶值所全活不可胜计而竟以粮运小阻归里今皇帝初言官复荐公改兵部左侍郎兼官若故抚山西兼督雁门诸塞兵事公行相邊徼要害乘高为峻因卑就深皆屹然天险敌遁巡不敢入赐白金二十两币二有副无何大臣阅边者以公绩上赐如初而白金加三之一公于属吏贤者加膝而至破侵饷搜伏赎若神一切以三尺绳之不敢用其术支吾晋几理而有協理京营之召公寻病矣公自释褐即宰剧邑三按巨省四控雄鎮而军旅居十之九再丁大丧哀思焦劳神用耗竭竟不能之官既归疾小间旋发遂戢身医药间时遯草野与田更野老较量雨晴而荐公者无虚岁时王公亦谢尚书偕公里居俱负天下望公卒而王公继之公得寿仅六十五公为人皙而秀眉目朗洞夷坦不为岸谷孝友天性贵至有封诰及二代父母安公养生饰金紫二兄緣以起家且得官盛矣而独习为俭衣浣不至三緝不至

三不易也出入■〈彳 兂〉素徒从稀简见者不知其为贵人所买产多废丘瘠垄曰以此遗子孙足矣好吟咏尤邃经术遗集若干卷七巡疏稿若干卷藏于家公有三子一心维谦维谨皆为诸生一心早卒余皆通经术而维谨与余善弇州生曰当天下无事时士大夫易为守而难见才及其有事天下易见才而难为守嘉隆之交世岂其有事耶何士大夫之见才易而为守难也乃赵公之慷慨挺贵幸卒以完守终岂不亦烈烈丈夫哉虽然守之难是以数起而数蹶才之易则数蹶而起亦乘之有由然矣王公之守彷彿赵公而优游显融缓步而居功名则遭之厚也彼两贤者若二室之相望于步武间宁非地灵人杰哉

陶氏五隐传

陶淡字处静其先自鄱阳徙而为庐江之浔阳人至晋太尉侃以勋绩着方面封长沙郡公累赏巨万万珍货逾于天府中子夏以无行被徙然能世其业不废以授淡淡生而冲静逸迈十五六即好读易善卜筮时时行导养之术谓冲举可立致也服饮丹液辟谷不嫁娶庠廩所遗积金钱不可指数僮奴数百皆故不为訾省于长沙临湘山中筑竹室以处惟携一白鹿自随亲故有候之者即匿徙深涧不令可踪迹州以淡名家子举秀才淡闻而耻之跳罗县埤山谷终身不返

淡犹子潜字渊明一字符亮生而冲素任真有高尚博学能文章为乡里之所贵初以亲老家贫求仕得州祭酒不任吏少焉自解归州召补主簿不就躬耕自资遂抱羸疾复召为镇军建威参军骏用矣顾谓其亲知曰聊欲习弦歌以为三径资可乎执事者闻之俾出令彭泽彭泽故有公田三顷潜悉令树秫田妻子请树秔潜曰令吾时得酒醉足矣安用秔固请之乃听树秔半顷余悉以树秫而亡何郡遣督邮行县吏白应束带见之潜叹曰吾安能为五斗折腰乡里小儿遂弃官归着归去来文以见志其辞曰归去来兮田园将芜胡不归既自以心为形役奚惆怅而独悲悟已往之不谏知来者之可追实迷途其未远觉今是而昨非舟遥遥以轻扬风飘飘而吹衣问征夫以前路恨晨光之希微乃瞻衡宇载欣载奔僮仆来迎稚子候门三径就荒松菊犹存携幼入室有酒盈樽引壶觞以自酌眄庭柯以怡颜倚南窗以寄傲审容膝之易安园日涉而成趣门虽设而常关策扶老而流憩时矫首而遐观云无心而出岫鸟倦飞而知还景翳翳其将入抚孤松而盘桓归去来兮请息交以绝游世与我而相遗复驾言兮焉求悦亲戚之情话乐琴书以消忧农人告余以春暮将有事乎西畴或命巾车或棹孤舟既窈窕以寻壑亦崎岖而经丘木欣欣以向荣泉涓涓而始流善万物之得时感吾生之行休已矣乎寓形宇内复几时曷不委心任去留胡为乎遑遑欲何之富贵非吾愿帝乡不可期懷良辰以孤往或植杖而芸耔登东皋以舒啸临清流而赋诗聊乘化而归尽乐夫天命复奚疑潜既归得

山田而耕之然时不给葆真养恬无所求伎园着五柳树因以为号焉闲静少言不慕荣利好读书不求甚解每有会意欣然忘食性嗜酒而家贫不能恒得亲旧知其如此或置酒招之造饮必尽饮已必醉而退曾不吝情环堵萧然不蔽风日布衣穿结箠瓢屡空晏如也常着文章自娱颇示己志忘懷得失以此自终潜之自叙云尔寻征为著作郎不就当义熙中车骑将军刘裕虽以义帅剪大憝光复宗社娄移敌国威望崇着而志存剪商九鼎跪趾潜心知之自以先世为股肱不忍覩其事肥遯弥贞放迹事外迨晋命既革益务沈冥唯所标咏不着新统以见志而已潜既自遠城市他亦无所诣报独乡戚张野及周旋人羊松龄等或赍酒相诣或要之过饮遇不识人亦便共醉亡所忤间之田舍及游庐山五老峰履迹可数时释慧遠结诸苾芻白衣为西方之社康乐公谢灵运少年丽藻损费为营精舍凿池种白莲求预社中席遠以其心猥■〈足 叅〉不许而独钦迟潜故邀之入遠与其徒断饮独潜入听饮如故而潜犹难之每将至寺闻钟声輒攢眉而返元熙中王弘为江州刺史慕潜甚使使请之不得乃躬造之复匿不见既而语人曰性不狎世因疾成懒岂敢不以王公纓轡为荣弘乃蚤伺潜知当往庐山使其故人参军龐通之为酒于中道相要潜见酒便与对引欣然忘往弘遽出掩之遂酣畅穷曰欲要与还州问潜有所乘否荅曰素有脚疾向藉蓝輦亦粗足支顾询乃一门生二儿共舁之耳弘载以副乘与至州咏言咲赏都不间也自是欲见潜輒于山泽间中道置酒以为恒性好秬菊尝于菊时欲有所契领而酒不具适弘使白衣送酒且饷钱二万潜大喜即便酣畅以钱付酒家取尽乃已常云夏月虚闲北窓之下清风飒至自谓羲皇上人性不解音而蓄素琴一不具弦徽时抚而歌曰但识琴中趣何劳弦上声客送酒浊不堪醕顾无漉者即取头上葛巾漉毕还复戴之既久病羸困为挽歌二章已复为文自吊其辞旷朗无所羈恋取酒独酌少时翛然而迹年六十三有五子俱不仕潜生平好为诗诗自东京十九首以还建安三曹浑浑有气潘陆因之渐成雕靡至潜而始自然出之大巧若拙至秬若澹令人擊节有淳古想后潜之百余年而有弘景弘景字通明丹阳人也汉兴为功臣桃侯舍传子青翟为丞相十三传而至吴交州牧璜璜弟浚以鎮南将军降晋仕终尚书六传而为孝昌相贞寶是生弘景弘景仪度秀朗目踈眉细瘦长额耸耳右膝有数十黑子皆成七星文四五岁即好书九岁识六经十岁能属文时即有出世志尝得葛洪神仙传昼夜读之已而叹曰仰青云覩白日不为遠矣遂不娶时时服青饥饭葷血絶口踰冠与丹阳尹刘秉之子司徒祭酒侯善俱有文学声遂从秉之石头城与司徒袁粲建节弗克而秉死侯亦盆死狱中弘景得脱收侯尸而葬之转入太傅萧道成府出为巴陵王侍郎不拜父忧归即家以振武将军起复侍宜都王读遂总知国掌故以材敏称服除拜左卫殿中将军职如故上清溪宫颂称旨遣中书舍人刘某宣旨褒赞将有显擢而复以母忧归再起前职复上武进宫颂寻除奉朝请怏怏不乐与从兄书云意应以四十左右作尚书郎出为浙东一名县粗得山水便投簪高迈今年三十六矣方除奉朝请头颅可知不如早去无自劳辱明年上疏归禄告隐诏赐帛十疋烛二十挺仍别勅有司月给茯苓五斤白

蜜二升以资服饵弘景行卜地得句容之句曲山曰此华阳洞天也有三茅司命府在焉遂于其中立馆自称曰华阳隐居于人间书疏以此代名人亦因而称之弘景善稽古备解七经大义博通五行阴阳风角气候太乙遁甲星历筭数山川地里土产国俗分剂方药考校草木虫鸟无所不洞精善隶书行草创新体有骨气以至骑射琴奕亦皆能品尤好道家符箓秘法既慕扬许与九真安妃之事而悦之寻得其手书真迹益倾信遂上疏请于浙之东西访求灵异至会稽大洪山谒娄慧明已至余姚太平山谒杜灵产已又至始宁兆山谒锺义山又至始丰天台山谒朱僧标皆法门耆宿两有所证发并复得扬许真迹十余卷遂游东阳之长山吴兴之天目于潜临海安固诸名胜且徧弘景既所夙好济胜轻捷每经涧谷必坐卧其间吟啸盘桓不能已已谓门人曰朱门广厦非不覩华乐而都无欲往之心望高临危瞰大泽知难矣然恒欲就之当非虚也既返驾筑危楼三层其上层自居之弟子处中宾客止下百应遂絶间一听吹笙而已庭院皆植松每一聆风响欣然而乐尝有絶句诗荅客山中何所有岭上多白云只可自怡悦不堪持赠君其标寄类此梁武帝与弘景有布衣之素垂当革命使使扣问国号择郊墀曰弘景所推测皆合指即位后恩礼弥笃书问不絶冠盖相望后手诏召之欲使入辅弘景畫两牛一散放水草一着金络头绉而策之帝咲曰此何必减庄生龟曳尾耶乃罢不复征而朝家大事多取决进止帝每得弘景书必焚香盥读尚书令沈约以下皆屏师资之敬时人谓之山中宰相后复移止积金东涧时时行辟谷导引法独以大药易就而苦无资帝所事给足竟不能成即成亦不能具黄金色未敢服而以八十五卒尸积日不变香气鬱淳既殓而棺之甚轻若所称尸解者诏赠中散大夫谥贞白先生当武帝时上下好谈名理而轻政术弘景有诗曰夷甫任散诞平叔坐谈空岂悟昭阳殿化作单于宫后纳叛虏侯景帝失位景僭伪号于昭阳殿人以其语类讖云潜之后至唐而有峴者少负材气好吟咏不肯出求宦橐中有余则为二舟极坚丽一以自载一以载宾客侍女酒食遊遨江湖间惟意所适不复问津番禺帅与有连邀之至而馆宴之弥月所遗贖物甚厚因市得古宝剑一玉环一皆直百金复得一黑昆仑奴善没水峴抚之而戏曰此吾三寶也遇险深輒投环剑使奴没而取之以为乐偶泛洞庭最深处复投环剑如故奴没未久即出勃如曰不可取也是二物者墮一寐龙前金色而利爪吾且以身为饵峴曰二宝失矣汝生之何益必于汝乎取奴泣曰一入穷泉永不复矣投身而下忽跃出水面者三尺余一金爪攫之没不复可迹峴悒悒回棹赋七言律遂终身不复出

九成字宗仪天台人少贫以经术教授乡里而博学工文章喜纂述贫不能市书间从友人借贷得则録其要语名之曰说郭凡百余卷又籍古之善书畫者而纪之曰书史会要曰图绘宝鉴所志胜国之文献曰草莽私乘而有手録朝典世系土俗民讴襪祥物恠若虞初齐谐之类曰辍耕録合之又且百余卷属兵乱则碎置之瓮甕藏深山土中事定而后出之其后寓居秀州转徙云间洪武初杨维禎宋濂辈皆为之序其书再辟修元

史不就人或强之则摇其首曰吾何知史吾野人也竟以高寿终善楷隶八分书文亦雅
贍有味

赞曰陶氏固称唐帝后然未有显者独汉有彻侯舍侯于丞相青翟品皆在中下至
汉末而有交州牧璜至晋有太尉侃皆着方面勲侃尤矫矫然非一族而侃之后为淡为
潜璜之后为弘景始皜然隐德焉淡也人而几天者也若乃出不失身退不忘君文不蔽
质质不灭文潜其人隐之最乎弘景庶几通极于天者哉不然吾斯之未能信也岷故不
晓媒仕进然客游诸侯以资其适九成之身一乱一治而不与其荣辱卒保全归斯为优
矣

弇州续稿卷七十七

●钦定四库全书

弇州续稿卷七十八

（明）王世贞 撰

○文部

△传

昙阳大师传

至道之精无形无名竺干澜之震丹堤之流遥派踈世名三之与媾为鬪孰知其非
超一函三惟我大师作昙阳大师传

昙阳大师者姓王氏讳焘贞昙阳其号也盖皆圣师朱真君所命云父曰礼部侍郎
翰林学士锡爵是为荆石先生母曰朱淑人始朱淑人梦月轮坠于床而孕故难产前者
几坼副意忧之而一日侍姑吴淑人语而立生甚易且无血也宗党乃贺学士而学士甫
捷应天解以师当桂祥遂名之曰桂时嘉靖戊午十一月之二十一日也师产既弥月所
致乳母病绝乳凡三易辄三病绝乳而又苦痲疥昼夜啼肤色黄黧学士及淑人不甚怜
爱之有请字者辄不许曰是尚未卜吾女敢卜妇而最后始许今叅议徐君廷裸之子景
韶师五岁为儿戏辄剪纸作小幅写若观世音大士像者辟而设膜拜焉旦醒从被中拈

豆数诵阿弥陀百余声而后起遂为常又时时拜天地嗷嗷喉吻间耳之则为父母祝厘者乃始稍竒之令就内傅所受孝经小学未终篇輒罢去学士既宦遊燕中以师从一日忽橐其所授经曰此岂女子所繇功业耶于是稍就女红然亦不肯竟学朱淑人讽之竟卒弗竟也而时时闭门隐几独坐若有思者时万厯之甲戌师年十七矣徐君所使使自浙来谋置币学士业已趣具装嫁且办而师乃洒扫净室奉所携观世音像稽顙自称名愿得长斋受戒充弟子朱淑人大惊曰咄咄何物女作何态且安所欲师曰欲了生死耳朱淑人益惊曰吾不晓若语第晓岁月间为徐郎妇将遂负之耶师默不应已而叹曰嗟乎岂彼负哉彼固无我縁也朱淑人亦不敢诘而介弟衡少于师三岁一夕从之嬉而师偶以石击地铿有声恠而蹶之声鉉鉉与履应益劲久之有光若萤隐见柱础间自是光连夜輒见而輒加巨或轮困若轻云或歛闪若电或散喷若坠宿或腾起若炬或晶白若凝霰或青紫若鞮鞞惟衡与一二龀女亦覩之以白学士曰姊所居恒尔得非珠宝气耶学士戒勿泄而阴伺之具如衡语又旬余师忽戒左右毋进饭饭吾吾不饥也学士悯而强之饭则吐乃别进诸果饵则又吐唯进少许鲜枣桃杏取汁液耳学士念不食久以为疾而召医脉之师咲曰儿故无疾儿所以不饭者夜梦一上眞美丽非恒冠七梁冠蹻绣履扶五色云下凭几坐抚白玉琴而无弦左侍一女冠緑衣垂髻者状略如之年可三十而少右侍一媪衣褐色冒絮年可七十而老少者指中坐者曰此而所奉大士也指老者曰此而导师偶霰■〈弥上女下〉也余则朱眞君大士熟视儿而晒顾偶师焚香香袅裊缕烟成篆书善字眞君谓儿速吸之可却食证圣矣自是醒而所繇以不饭也儿何疾学士乃与朱淑人稍稍听师意而自是眞君与偶师一再夕輒至大士亦数夕至皆于危坐时见之以为梦则境甚眞以为眞小不类大士始色庄已而庄稍解间有所指授而眞君则摩顶慰引欸■〈目匿〉娓娓时出机语相闻得一捷会即啧啧叹赏而稍涉拟议未出口已譙让随之曰道在汝卜度耶一夕梦眞君口授一编曰法照悟圓灵寶眞经觉而能臆之且书之以语学士曰是道经也而禅语居三月徐景韶病死其家以讞来朱淑人匿而谓师曰若言徐郎无縁者何也师不应手书一囚字示之朱淑人为解曰人也而四周之得无幽且死乎师乃愀然曰死久矣朱淑人为发讞师蓬跣而哭三日出其橐则有成制縞服草屨御之以见学士夫妇曰儿故徐郎身也念父母不获死且当为徐郎称未亡人学士谬难之曰若岂已妇于徐而未亡人为师曰父谓不食禄者不王臣耶则曰者大行之诏下而吏民何以哭临成服也学士不能答而师苦节愈甚诸眞又以不时至朱淑人意不恠阴洒猪狗血床荐间冀以禳却之师乃谓学士眞君有言吾曹非可禳却者且以节义成女名宁吊诡也乃止俄而有芝产所居室前荣数百武豆麦黍稷之属殆徧学士试谓师是固吉祥如燕中不能稻何一夕而稻生即芄然颖俄而并实师乃手授之以施鸟雀会有诏议祀故新建伯王守仁学宫学士当属议乃具草曰夫夫霸儒也阴事禅而外攻之不宜祀草成而师见之曰父以王氏学非耶则可而以朱氏辟王氏则不可夫百步五十步者皆走也学士为削草而阴恠师何所得二氏学既迁国子祭酒师乃

请别筑一土室居之适廊傍一古槐滴如血师过而祝焉即止寻长至大雪师洁扫若有待者俄红光二道从西南来羣真从之其上体极明了而下皆为白云拥羣不可辨朱真君手拂师髻杪雪取金刚经为订句读解释疑义移晷乃去学士闻而掩之无有也其余红犹施庭雪若染者盖自是多昼见矣又一日学士晨起若警欬者覘其室门有光大于钲殷赤闪闪似初日又似紫金在镞芒颖百千道灿烂注射不可正视声絶光亦隐其夕师梦谒大士毕集于诸真所凡坐而冠帔者十人首坐则苏元君也貌仅可二十许玉莹絶世见即呼师为小弟子真君坐第四偶师最老而坐最居末自是元君亦微有所指授然默而寡咲容不若真君优详家人母子也一日学士率然语师道果不食而已耶柰何诡迹以忧若父母师曰吾父言之善命进白饭粥亦时噉齏菜第毋令杂盐酰耳居月余而学士之父母封詹事公与吴淑人来封公谓曰闻若久不食今乃食耶如初志何师曰大父言之亦善遂复却食而所进桃杏汁液亦加少夜则真君袖仙果啖之果圆长可二寸青黄色亦具小核无皮滓轻滑如夕露而特甘不可名质也师自是每入定即见真君与大士元君及诸真来一切敛容正念不为起以告学士学士尤之曰彼不责我慢乎曰不我责也夫何知非试我我一起而魔娆之矣于是诸真来益数而稍稍以魔事试师尝梦之旷野则有妇妆而偶坐手簿书其标曰相思师念此非邪也耶叱使去忽复一狡童见凌辅且属师极力挤之坎俄而介者来露刃諱曰柰何伤吾儿从吾婚则生不者立断汝颈师即引颈受刃欲下而真君至大咲遂苏一夕少年衣冠者前通刺曰余徐生也念夫人以我故过自苦特来相慰响师正色对曰吾自守吾志耳宁为情守喙而它鬼耶则速灭果徐子耶归而待我异日之魄于墓少年乃愧谢去最后一羽衣星冠者叹息谓师曰痴女子天下宁有仙人若前后所覩皆狐魅耳久之能令人死师嘿不应则又曰吾哀若命等菌露而欲救若今为若复故食嫩肤偷鬢以穷世法娱何似师复不应道士忽不见而真君与偶师皆在傍抚掌曰姿试子姿过矣挟其神谒大士而覩所谓西天七寶莲花座者问师佳否曰佳亦爱之否曰弗爱也曰审佳者胡弗爱师谢曰闻之师所授经语若以色求我不能见如来今此界者色也是以弗爱也大士称善相属真君为之喜动眉宇出而遇大神关将军趋拜之将军止拜称王贞姑曰贤哉幸自爱某请得効力师每谓将军故髯而美姿观白皙色微酡其乘马亦白世所圖不尽尔也寻学士自国子长宫家而封公偕吴淑人复来视念邸中隘因而外生得失遂携师归属徐生已葬念欲往视恐不得请属些辞百余言使保媪酹而焚之墓师故寡言自其归而与诸姑姊辈处益务为韬默亦不便习苛礼乃创一龕置之楼而键之时时讽诵金刚楞严诸经有所得輒书其隙若注者且周岁忽谓其弟衡曰心可调矣我相人相俱忘之矣即出与姑姊辈狎委曲周详时杂以谐浪诸姑姊人人相欢甚然内不无少疑其怠即吴淑人亦疑之谓曰汝习静久今逐种种相得无乱性乎师曰习事以鍊性不闻乱性也夫静自女习之亦女识之心摄境则真空也为境摄则顽空也吴淑人异其荅然卒莫晓所谓久之师忽大悟觉脑中仙音缥缈自空而来先天气融融周五臟遂成丹初仅若黍米已渐长若弹丸外类轻

纱縠色正赤黄居恒置下丹田时有所升降间出之掌煜然吐光彩自是水火絕不复进诸果矣而学士业予告偕朱淑人归师骤得父母喜甚旦夕修问安刺经绣织勤于他姊妹逢迎约畧如常时仅不食而已朱淑人抚且诮之曰若向者谓了生死此为了不耶师咲曰徐之以了日还母明年正月为已卯间日燕居深坐若有忧者学士恠问之师曰儿神乍一出而惝恍夢境数惊数喜岂其阴神耶夫阴神者鬼趣也余希上乘而性命之不俱彻如负吾师何是时不佞世贞屏迹小祇园窃闻师之槩而心慕之适学士见访语次不佞叹曰此天人关也虽然神欲出而尼之离舍不易也神已出而惊之返舍不易也其机在吾子学士归而师果属之父幸母它出姑守儿儿目光下垂面发赤口鼻息俱敛此神出也慎母令家人子窥我亭午神果出学士乃屏息拥护以俟及酉而空中泠然若磬声师已醒矣咲谓学士儿幸无它顷刻殆数百千里山川草木龙蛇鸟兽之寓目者种种矣而皆吾身中神也今者内观则万象固森然也夫度此关而五阴之浊障荡然解道舍我奚属哉会学士病痢寢剧师手一杯水而饮之良已乃谓学士闭关期至矣别而登楼学士急与朱淑人尾之不及若有重闰者叩不复应乃痛哭返自是警欬絕矣凡三月忽下一赫蹏示学士曰儿今所出者乃阳神也问何以验之曰无难也明日学士晨之所居书室启鐳而案头有米面柑橘枣栗诸果饵几二十种墨书其傍曰煮贞子神出东南方至此学士乃益心伏而会所从女奴闻中庭履声以白学士急抉门隙师衣黄衣从楼上下倏忽若飞鸟遥问师何奇乃尔师答曰儿鍊形久且轻矣鸞斯决不过寻丈不为奇也学士喜乃固请启关欲一见师报札云儿非不忆父母以鍊形故稍改异恐见而惊耳无已请俟于门遂下楼启拒不复从窻腾入学士迫之犹露衣裾尺许顾咲曰见矣何欲速为已而尽露其面作黄金色芒彩掩暎丹唇如烂椹首挽双髻稍稍谈所得已拈一栢枝掷学士曰以此汲井饮之其井故师所选地暑以已学士痢者也学士时复苦脾疾而天大寒口瑟缩不能受师曰姑尽之遂尽之缶可受五升许腹温然暖也已而气休休然乃悉汲以饮大父母及母而属岁且除师以一札白学士曰儿神欲少出出将以有为毋令外人及鸡犬近我楼计数日当返返则以铃声为验居数日铃声起空际则神返矣时庚辰朔之又二日也学士问所以出曰圣师真君指也更穷之则曰非久当自见其又二日间语学士曰可之王某所而诘之前三日门戟有所获否蓋是时犹称世贞别号云学士以语世贞亡获也归而告师师乃叹曰此子縁小阂未遂际耶虽然不而遗也又一日而西关之候人以片纸来其题迹云昙阳子列仙到验知为师迹也又四日学士遊于圃而获小黄纸启封则有琥珀数珠一署其纸曰孤峰奇遇古月重逢以问师师曰吾所贻比丘隆魁者也隆魁蓋多习内典精戒律时为学士阅华严藏而又四日为上元有优婆夷叩阁言元旦起礼佛而瞥见一女子投之小黄纸中不知何物学士为启封则亦琥珀数珠也其纸署云二十年来一梦元宵得遇主人遂宿之楼之下媪老矣夕恒坐胁不沾席坐至丙夜而覩赤光如初日学士大奇之谓此优婆夷者殆得真空观以诿师师咲曰不然是姬坐深而儿以宗戒二字朱书题领又以花果纳之袖而了不觉所谓顽空非真空

也吾力仅使之死不流堕耳明日世贞甫蓐食一姬赍瓿水丝绦踵门请谒曰五鼓之庙所而若有皂衣人手二物谓与我貽王中丞必面之不者且祸汝语毕忽不见余心知所谓即饮水醮而篋绦供净室其次日质明以告学士望师所居阁再拜谢其又五日漏尽一更孺子来致黄冠下有髮紒承之曰昏时之飞云桥憇而有褐色衣媪以属我曰若可西叩王中丞第而授之我不识中丞第而识侍郎之从者与偕来不佞再拜视冠之梁有细字云霰姆追环其下云昙阳子乃知授冠孺子者偶师也质明复视其里缀黄绢方数寸裹黄纸一银环一纸作小楷七十字中亦有古月孤峰语而银环之约邃矣舍人子外居者见之而惊曰一真兵于门戟得黄冠授我我恶弗收也呼兵则立至得冠与环具如之而字稍羸四五微亦有改易者义则无易也于是知所谓追环者追所失环也师乃谓学士曰我言不而遗果然今乃并得二环故有指哉世贞复之学士所裁启以谢而亡何师有报言满一纸汲引慰借出之苦海迷途而婉导之自是往复皆繇学士不假神力矣学士之倾注师甚师首言于朱真君度之而家人中外不能无少疑且以学士旦夕当大拜柰何忽忘此而攻淼茫之教日亭午忽有黄衣蹁跹舞楼之脊者俄小踊而上去脊二丈许复下家人覩之已而其闾左右覩之知为师也乃稍伏而学士徐风师曷不少湛晦师曰儿固知之夫岂不欲匿光景以夷希进大道也顾家世富贵又女身不得不以迹海浅知者且吾所苦心为二大人白业地也不然去吾色身旦夕耳学士曰审尔胡弗少待以合形神妙而齷齪狗窦异世事乎师曰儿亦念之顾闾闾非圆满所虽然吾姑示解耳不作狗窦出入也学士曰吾闻之阴神能见人阳神乃能使人见若所出者阳神也即不靳使我暨大父母母见之乎师曰可学士乃埽二室其一居封公而身以子衡从其一居吴淑人及子衡妇从夜扃之仍锢其隙少时风肃然则师至榻旁夔语曰大父在耶回头是路已徘徊几案间久之乃去而吴淑人所居室其语亦如封公比发烛视几上各有玉笏篆书真言三纸以犀象盒镇之语秘不传然多劝行善积庆意也学士复谓师此但声闻耳能一形见我乎请具烛师曰何必烛也具戒学士朱淑人宿如前至夜半师复来口吐光若电俄成青金色照耀满室而中拥人影不甚辨学士不觉失声师遂去翌日谓学士识此光乎法身中真火人人有之不自能现耳父雅向道何不一反求苟有求儿得先容于圣师学士大喜曰幸甚师又曰若欲一接圣师及列真乎学士则又大喜曰幸甚师乃期以三月之望召学士于楼之外门掩门隙屏息以俟良久闻楼中佩环声璆然师瞥下楼埽室焚香布坐寻羣真入咸轻扬雀跃而独有缓步相次入者则苏元君朱真君也师叩首阶下已微语语不可得闻而诸真衣有紫者绿者碧者青者古色者白者独元君真君施锦文带高过领缘两肩而下盘要至足其文非绮非绣灿烂五色不可名状元君真君每出入故缓若使学士识之而领以上则拥于袖不获面以为恨将行呼法水洒四壁壁黑者独受水不下如点漆光艳可鉴俄而羣真去其水留壁者学士舐之甘于饴清冷于露以指承之则纯白乃诧谓师此不可使我分一杯而忍弃之壁乎师咲曰未易也后固不乏父供而是时师要世贞上誓帛则上誓帛其文在师所真君见而语师曰新弟

子可怜也为日使之一见可乎乃以孟夏之二日呼世贞偕学士见见状及洒法水具如前独真君右郟迤门隙作洪语曰不要悔不要悔盖羣真别而门启世贞入叩首庭中师启一扉曰王君尔闻真君之诲乎哉世贞复再拜乃少与谈化事及以龕见托语毕出盖世贞始获谒师其唇朱独貌黄金色稍澹不尽如学士纪又月余余弟世懋归自覲以启白愿共洒埽役师报许亡何谒辞师适曹仙真与周仙姊至而示衣裾焉自后扉数启闭当启时学士輒从门隙窥往往见彩服或微露手指白于玉凡列真至则必有金铛声独元君真君二圣至则玉佩声珰声急而高鍤鍤然佩声和而清泠泠萧萧然又时杂咲语或作■〈口风〉呗或歌步虚天袅出空际而下然骤听之则絶细不易辨也吴淑人偶过与学士偕闻天乐叩首乞一言忽有片纸飘下得二行字云造化本无工众生自造化吴淑人跪藏之髻中乐器有留于楼者学士得隔棂扞揣之或为螺或似箏为洞箫而皆坚滑如玉石一日谓学士闻王子佛道两藏经可以十之一二来欲阅之经至度之楼上下而羣真来则与师皆散阅有所解则取吴笺以丹砂石青金粉标其畧自二字至八字散置帙中学士间从一寓目诧以为惊竒而衡遂戢身窃读之会有家宴诸姑姊入畧取视亦不晓所谓甫出而经之有标者数百卷皆失之学士忧叵测世贞亦皇恐请罪师报曰而何罪彼有所以致者虽然亦终为而物耳时世贞与学士谋买地城之西南隅少僻而野有水竹之属筑数椽以奉上真而茅斋翼之冀它日得谢喧以老而师许之曰吾蜕而龕归于是因署其榜曰昙阳恬憺观恬憺者师所繇成道指也署书表里作龙蛇二篆古雅整丽势欲飞动遂为天下冠其祠南面中二位曰观世音教主也曰金母司仙籍者也稍次而南者左即苏元君上师也右即朱真君本师也西向而首者即偶霰■〈弥上女下〉导师也东向而首者纯阳吕公次西向者许郑谢三公常与师谈道者也次东向者崔周邹三仙姊师所旦夕丽泽者也其名号位次皆裁自师手仲夏之十三日学士尚卧未起师忽盛服冠玉佩剑挥麈侍于床时所歷门距楼凡七扃鏐犹故学士惊叩之师咲不答第云导我至大父母所当有言至则先拜大父母已拜父母已拜家庙行告祝礼封公恠诘曰何谓也师曰幸而道有成聊以谢天地宗祠祖父母诸尊耳于是姑姊妹与家亲众悉集乃复请于封公曰向者未敢言今愿得一至徐郎墓而酌焉封公嚙啗未许师跪移时不肯起学士从傍舆之乃许因密问师曰时至乎曰未也俟毕谒上真而后行耳是月末朱真君以信约谒观世音大士大士召至榻前谕之曰汝冥心契道不负吾解脱良哉毋久恋尘世也盖是时诸真毕集矣已而谒元君真君于集道宫集道宫者即十真所恒会崔仙妃司钥焉而了不知何地四周皆云气环之上不覩日月而恒有光如昼其地无甃砌色正白洁润不容唾栋柱亦不类竹木而螺文斜上糾错可爱师既谒谢欵语移日惟时时呼天酒进之天酒亦曰天浆甘芬清滑不可名状疑即前所用洒壁者也是日以灵蛇见灵蛇者师前是神返而识之携以归置楼之下室空书柜中家人乍见恠之蛇驯伏不动而傍有片纸朱篆乃弗敢煞以告师师曰毋庸也是虽业虫而识不昧至是携之谒集道宫叩首阶下真君锡之名曰护龙而谓师可善度之异日法门力不浅师

归蛇复从而归驯伏如故家人大小前狎蛇蛇亦伏师乃谓学士其伏者自为我耳性颇厉且嫉恶毋若狎者何于是谋置之新观时观犹未讫功中道蛇忽跃去不可即三夕复伏师前师咲曰孰谓此蠢然而急于道乃不人若耶观隘繁役者吾虑不及此乃笼而致之弇州园时世贞已浴罢裹帻出见谓曰若既受师戒当皈正道护大法吾与交相励可也蛇啧啧应者再复笼而致之水洞五鼓迹之不可矣六月朔真君之使来师以启白金母请见次日早使来致金母命俟异日师忽忽不乐日下春复有后命许以三日见而世贞亦微闻师非久祭徐氏墓祭必以便道过谒观而后发观甫成拟以月之四日奉大士金母元君真君主祀而师已发不及闻师之集道宫所谒真君毕乃以三日谒金母之一处四周皆积水白云弥滃五彩间发不辨天地中有宫阙宏丽光显大约如集道宫而过之以为瑶池则似近岂其行宫也耶师待命久不得报傍徨于阙门外者越宿踰日而真君至乃与羣真入师亦遂入真君前为师叙致始末师伏谒如礼金母降色慰劳曰子良苦何修而遂证此道也师起立羣真后覩金母状貌非常端美然齿颊亦不卑而左右列女真数百人其傍侍女真亦数百人交相贺曰益一仙侣矣亦有举手贺师者真君之前谒金母金母为起语师听之闻若有及学士与世贞名而弗甚悉他亦多秘弗传左班之首曰毛夫人貌棱棱可畏其三曰南真魏夫人师故所崇奉者乃前礼夫人问何以见礼曰慕天真道久矣夫人莞然曰道固有胜我者其接师温甚寻金母驾起云报谒真君于集道宫羣真从其下体皆五色云拥之亦不见身动而倏忽已達宫所坐定师复前谒金母乃顾左右启箱出黄色天衣一袭赐师衣如绫锦而不见针线迹服之则紧束称体且曰以御寒暑也又赐金镯二色紫磨环镂梵书十余如印文故称印镯师拜赐归以语学士极详且曰今日早主入观乎学士曰然师咲曰可矣而有未尽也儿以晡谒金母而仙姊从后来谓曰吾覩主之入观而二弟子不手捧也学士大惊曰主臣有之为工先入之而不及捧也然则顷刻万里矣师又言见金母谒大士甚恭大士为起延坐接膝语咲欵欵真君与元君班皆首其谒金母坐大士不坐云金母亦十地菩萨化也或以为文殊又云尝见一大比丘金色而天真僧道妆者数百千皆俯首不敢仰视或以为释迦世尊皆学士闻之师而不能悉何时与何地也至十日师谓学士可戒舟矣寻具服服如前其拜大父母父母亦如前封公复恠问曰向者以道成谢今胡谢也苟以谒徐墓辞徐墓往返不再舍胡辞也学士曰女子不轻出出或繁礼示郑重耳十一日四鼓具缟素服御冠剑毕而真君与诸真来送曰吾不复能就野次候若远者可三月别师再拜呜咽而学士与子衡宿楼傍室觉异香及履声发俯伏候之师传真君命名学士父子且致慰勉忽传呼曰看光未毕语而楼中通明如昼衡不觉失声曰大奇死（阙）矣光遂灭佩环音亦渐高师乃乘竹舆子抵观于诸真前行礼其自郑崔而下礼如兄弟礼关将军像如客而世贞与僧无心有始面谒以弟子接警欵无心有者即隆魁也师为易今名以示诲遂与学士导至舟中他舟焚香问讯者不絶日旰抵直塘谒徐墓具蔬饌为祭出袖中朱符焚于炉前后行八拜礼已命弟衡诵祝文凡上下篇皆古篆不可读遂焚之立而四睇者食

顷谓学士为我屏观者观者且百千人不可屏则又谓墓可宿乎曰榛莽未除剔也其傍有享室可憩乎则导之墓左享室入指庭之东北隅曰是佳地吾不归矣遂以一毡据地而坐当是时吴淑人与朱淑人诸姊妹咸在或环之泣或挽之使归皆不动第云吾向者欲死而不得死今者欲宿墓而又不可宿即勉不死而宿此非志矣而柰何令我归也则召世贞曰为我辞于家大人学士乃又前谬屈师指而曰嗟乎吾女之为徐郎亦足矣今既已成道而犹区区守匹妇谅为大过行是不名障即爱縁耳何所称道哉师太息曰父亦为是言乎儿稚不学问徒以此一念为上真所悯録幸而偶有成而遽弃髦之则自食也且父所云大过者不则中庸乎哉夫诡迹迁就而诧以为圆通者父所夙恶也今乃举以教儿何也学士乃谓世贞曰其言直夺之不祥师自是止宿一毡不复移足亦不令有所盖覆时暑方酷师暴烈日中夜则当风露蚊蚋羣嘬之抚而咲曰吾不受若嘬者五载矣骤雨庭中潦几尺许请徙席不可衣淋漓透肌肉或谓师力不可使不受嘬与暑雨侵乎师曰使我不受嘬与暑雨侵者何名苦愿也学士意不忍持之泣曰柰何而神尚不离色身而摧剥之若是不虞病乎曰儿愧不能死死可也而暇病之虞师少不暂于貌既辟食则渐皙而中以鍊形稍示瘠而黄其久暴风日中玉色益明莹眉目益森秀而颊微丰肌体若凝脂学士每谓师体恒有异香虽栴檀沈脑不过也而其气乃微类松栢者时男妇狂走来请谒师一切谢絶之久而不能已于中表女戚则稍见其重者寻叹曰此非平等法也乃又稍见其贫嫠者诚者然不能得师语间得一二语则中其宿癖愧心往往自誓请洗改而他祈福利蝇集龟噪示之微咲而已其善根以大小受予或香银牌或麈拂以至栢枝业有病而乞栢枝叶煮水饮者辄愈则谓师能愈病师曰吾岂巫尪医跖耶时学士犹苦痼师指谓吾有术而不先起吾父何也师以久次外家属有不便者且谓学士名高人或藉以蔑之为不利官相率毁师谓渐复食而谬忧其不能化去冀以摇封公意而学士闻之恚甚师为譬解曰仲尼圣人公伯寮犹毁之大人恚毁者徒自苦不能使毁者苦而何刺促校计也八月望之前五夕忽以朱篆数字属学士过我弇园而呼前蛇曰护龙护龙汝师且化矣可速来则复以笼寘水洞次日探之无少踪也相与惘然曰是奚在且彼宁何渠能识古篆更二日而世贞造徐墓学士迎谓师有言蛇许我十五日早来三鼓大风雨异香发隐隐闻螺梵声蛇至矣其始仅五尺余至是可八尺围亦倍于初师握之出蜿蜒庭中殊自愉快也第目睛蓝白无黑珠封公骤见曰蛇乃瞽者何也次日忽易白而青珠了然矣日驯伏如禅定者且不饮食亡何师以诸真之所标注经笈来盖师之发家未三日而诸经之失者忽复在几学士以报我矣至是云复得之上真世贞不胜喜躬视装成册韬以古锦师闻而取视曰吾且以自随终而物也一日戏谓弟衡若欲我禅者化乎将道人化乎衡不能对则又曰而知二氏之化而不知而儒者化夫乘理而来乘理而去则三化一也衡以语学士知有日矣九月之二日审问学士龕成否重九吾期也世贞乃促载龕而少叅君治栅享室外为席屋以待风雨其又三日即毡所为高坐召世贞等之称弟子者若而人女弟子亦若而人以后先见各有诲励语质明发八戒以授

世贞使张之璧张厚德即摹梓之首爱敬君亲次戒止淫杀三怜恤孤寡四和光忍辱五慈俭惜福六敬慎言语不谈人过七不蓄讖纬禁书八不信师巫外道及黄白男女之事读者谓其核而端朴而要悉而弗苛浅而有深旨盖生人之大纪备矣即老氏三宝佛氏五戒胡能逾也其日乃见诸荐绅先生四民缙黄以下至媪孺可万余人明日复倍之其最后谒者出进学士及弟衡语甚详唯世贞亦与焉睨学士久之忽泪交于睫世贞乃进曰非所望于吾师也遂止泪逆收上穆然而已其又明日具香案遥拜宗祖毕乃悉拜其大父母父母已北向拜曰吾叔父在金陵也已复拜其族属之尊者与诸姑姊已拜其母属之尊者已拜叅议君夫妇已与中外族属之敌者交拜乃复进学士再拜之曰吾道頼吾父而就不敢忘也学士与朱淑人哭失声夜三鼓谋与学士偕之墓祭徐生而田中诵佛号者若蝸蟪万炬晃朗又时相惊大仙出乃帕首由间道抵墓设祭毕忽袖刀割右髻于几曰吾以上真见度不获死遗蜕未即朽不获葬此髻所以志也为我谢叅议君幸启徐郎之窆而祔之君子谓师之为夫妇纲也盖三示节而后成终归憇享室西耳舍命笔墨作书凡十余纸日高犹未竟学士与朱淑人掩门而泣曰期以午且过而犹刺促人间事若何师闻之曰迟之俟午而后告我既告午师具浴竟易新衣衣之冠剑麈履如恒时出复与大父母以下揖而别时已预设几案三南向拜者四曰以酬天地西向拜者四曰酬吾师朱真君北向拜者四曰酬吾主却入龕料理所投衣物多者出之亦有以授大母母者复出龕握剑禹步三周呼瓠水杨枝洒之顾左右取灵蛇则以鐵笼盛蛇寘龕门左亦以杨枝水洒之抚顶刺刺语若授戒者蛇亦呀其口以待已闭龕尽解其黄冠八卦衣授封公以其副授叅议君独挽左髻披故衣复西向拜者再盖是时绵竹邹仙姊来迓故也已西南向揖大母母及诸女弟子谓大父胡不自愉快谓诸弟子毋退悔又曰吾左髻曩阳风小仙吾行甚逍遥诸观者亦羨之耶则胡不早回首复属学士与世贞慎启闭栅口吾化后毋使男妇得近之遂入龕出所书遗教及辞世歌偈赞凡四纸以授封公及学士一纸以授世贞复命女僮传语吾曩鸾菩萨化身也以欲有所度引故转世耳左手结印执剑右手握麈尾端立而瞑闻栅外哭复张目曰毋哀也遂复瞑瞑半时许两頰气蒸蒸微作红润色而亦少丰下而方以故貌师者其居平与化时少异师所自题有三山眉影殊目虎齿方唇影珠目者每入定时两睫以上各有光隐起若珠其所可彷彿貌者仅眉耳时午晷垂欲昃二白虹长亘天额帟触杨枝水闪闪皆金沙又类列星剑头火大于升遠近皆见之又见二黄蝶自龕所盘旋久之始去师歌有一双蝴蝶空栩栩语咸以为兹应也又踰时且闭龕世贞乃从诸弟子谒辞且泣且自矢而师手剑忽挺然起目微张肩以上隐隐动则亡不人人股栗悚感也退而启槭纸所以训敕勉厉者二百许言洋洋乎陟降左右矣顷之移龕就视笼中蛇无有也笼口闭如故时栅以外三方可十万人拜者跪者哭而呼师者称佛号者不可胜记龕止享室中逶迤进香膜拜日夜累累不歇师化之旬有六日而见梦于学士曰呼王子来我欲有所言世贞乃驰而诣学士与抵足寝则皆梦师来凡再皆梦师来状貌不可复覩而音声琅然训敕敦切其所以语世贞者微

少于学士然亦骨肉父子不啻也惟云吾道无他竒澹然而已向语若固灵根去嗜好薄滋味寡言语久而行之即不得毋厌倦稍有得毋遽沾沾喜自以为得则终弗得也吾今长去若矣虽然吾实不去若若与吾父左提右挈以从事大道毋负我吾誓不舍吾父与若独成也问昙鸾菩萨何人师默不应已而曰邹姊迎我而以真君之命命我言久当自知之又问蛇何适曰邹姊袖而归靖庐矣非若曹肉眼所覩也前是学士以师甲戌遇道至道成而拜金母赐日有纪且褒矣以示师师目而鐫之一日忽焚之学士乃不敢复言至是请曰而固不蕲名然柰何竟泯泯不一为学人地耶且今人间世务钩隐吊恠不乏矣彼其逞臆于七寸之管者何限也师颌曰然奚为而可学士曰吾欲自传之则避亲欲王子传之则避疎亲则比疎则寡征毋乃使王子传之而吾具草可乎师复颌曰然学士泣世贞拜亦泣寻醒而与学士交相质无爽也又踰月而奉龕归观龕归观之明日世贞与诸弟子过学士谒师成道处徘徊于庭而得师所凿井叹曰惟学士与世贞得饮之世懋亦与沾焉而师今何在也甌下汲弟子十余人人尽一蠶甚甘冽也家人从者就甌口之则余水浊矣以视井井亦浊于是俱悚息再拜出学士为封井而又旬日偶阅佛藏经得所谓昙鸾大师传者大师未详何氏雁门人十四遊五台金刚窟有灵异感遂祝髮事浮屠注大集经未就属羸疾乃叹曰欲求道而以危脆之躯承之计不亦左哉于是习养生而闻江南陶隐居先生有仙药方渡江谒梁武帝于重云殿机锋骏发立倾万乘为传之陶先生所尽与其方十卷后见三藏菩提流支悟而舍旃遂修四方十六观精诚之极感异香满室天乐从西来隐几而化魏宣武异之目之曰神鸾而为立碑纪德净土文亦纪之夫鸾师化屈指至于师千十七年矣或往或来真不思議界也师生而专凝静谧外若示不慧者而中实了了其始受书不尽二卷识人间字十不能一二而既得度上真一切洞彻六经子史趋走笔舌间无能窥所自他注故两藏奥义往往超然有独得者即耆宿总持弗逮也其持论恒依伦物尤能察人情识常变学士虽冲虚负大人器而刚肠疾恶每自恨不能藏汗垢如食在口必吐之师委曲而剂其偏不调不止以故学士每谓世贞毋论大道即事事吾良师友也师之从国子舍而见衡读论语亦取读之曰异哉此何书将毋圣人言乎哉衡曰论语也师曰我固知圣人言他人不办也又举中庸语学士天命之谓性一语而冒天下之道矣试为我草一论毋作朱氏解也学士沮不敢下笔亦不敢重质之至今以为恨又曰毋意毋必毋固毋我有味哉兹所以为孔子乎勿正勿忘勿助孟氏庶几荷担矣又曰道自和光入者乃真门也自无欲速修者乃真路也自不妄语始者乃真芽也贡高以求异名躐分以示异证沈五欲海而托菩萨行彼哉彼哉学士尝从容求道师曰但于十二时检点身心中过而已学士漫应曰觉未有过在师咲曰此一念即过也学士大愧服而无心有之读宗镜録学士过而拈南泉论六祖衣钵公案令作数百许言以报师咲曰近矣而未也手一札示之大畧谓如来三十二相皆从无相得无相庄严皆由无心作心静神凝自然之理然后可以当空迸火红如血次闻狮子吼三声纔得如意珠照破万象森然所论衣钵虽即心见道尚未见性成真无心有得之为汗下

泆体三日不能寝食里有萧媪者故上虞丞与成妇年八十矣日杜门诵佛书虽家人辈不知其异一日过师见餐栢枝而咲曰是不食耶何必栢枝食耶何必不栢枝师遽弃之而呼媪与深语亡何媪以一封囊使遗师师不发曰此别我也寻媪示微疾卒其体柔如兜罗绵而师始发封果别语也后师神遊归语学士近见萧媪是犹在修地也而初果证矣师之栖徐墓时荐绅先生慕从者投启于学士以希一言之规学士为从舆师度不容已则察其人可与言者而授之言其精若狮乳之散酪要若乌号之破的毋不心折意饱而去其示管窆金志道云上才学道心欲澹欲死欲愚夫道者知学絶学善用无为以诚而入以默而守示赵检讨用贤云行人所难行是男子事忍人所难忍是圣贤事道人曾记父母未生前遗下玄珠即今霜降水落时任君自觅示瞿太学汝稷云心死欲生心生欲死既死既生欲不死不生古人千篇文章今人证在何处示屠青浦云大美无美至言无言君直道多闻道之所不弃亦道之所不载智者不自知知之不言言之不文此道机也示沈修撰懋学云人道修身圣道修神神在身中以有情为运用以无情不用为修持凡好名好事交际往来分别是非一切种种总持善趣亦属尘縁示张贡士厚德云欲了生死先了此心无欲无为即心即道示张茂才定安云太上无生次達生次贵生次伐生而最后貽书家弟宪副世懋最详其大要谓道包天地离有无不出澹之一字存其实则务匿其名自信笃不论人未信既承道门印可便当专志凝虑以待机縁之至向人且勿言色且勿动若愚若昏和光混俗而内念凛凛常如帝师对面乃真学道者也又云吾行之后为官求道俱不可着一分浓艳气呜呼知言哉是数君子者世所称贤贵知名长者也其齿即最少亦视师倍皆北面顺风而称天师千里之内有及弟子籍有不及者至于今踵叩未既也师初不为书既书而八法俨然超洒自得时时在山阴永兴堂室间至于古篆则仓颉以至碧落阳冰近七十体而天圆采阳之类出自三元八会者不与焉每谓学士儿篆法受之崔姊然仅一习独飞白至再习为崔姊所咲世贞故嗜法书尝见师篆而悦之颇出篋中佳昏墨求书师既许而谓学士彼柰何不好字义好字迹不敬心师敬经师以故世贞不敢数数请而所书金字心经性命三十二体以貽世贞及如来七十二字阴符诸经留学士者吾不知三目老翁如何于籀斯大径庭矣学士间谓师何所受书与文义所由解师曰此皆妙明中物唯静而无欲者能一以贯之师所教人习金刚心经黄庭内景道德阴符以为身心要谓叅同悟真不言黄白男女而诸解者流而为黄白男女以悞世人故于八戒末志之而不亟亟令人受以此

王世贞曰余尝读真诰覩南岳紫微诸真所周还司命杨君者庶几与师遘埒然彼不昼日见见不令它人迹之而其语仅口受至杨君乞一真文之书而不可得乃又厘厘身中事而已于竺干圣谛了无涉也禅者言性而不及命玄者言命而不及性儒者言有而不及无至于末季若讎矣琐琐者借世法而符録之窃世赢而服食之欲以是超世而垂不朽抑何蠹管测也净明依忠孝悟真趣禅那祖庭及中庸见以为鯖五侯焉虽然犹

不能无芥■〈廿懣〉阂也若乃警欬帝真踏籍尘滓光显博大精微要眇悟性至命并行不悖如洪河饮如甘露濯方外得之以凋三光方内得之以维九则有舍我师奚适哉夫鸾师之在因地亦辽邈矣忽往忽来屈伸臂顷以是知古先生之语毋诳也不然而我阿那婆罗吉低输胡以降至尊而喋喋浊世哉学士谓世之操觚翰以求从事师者非鲜吾纪之十不能一臆也畧矣然而不敢诬也世贞则曰奉师诲无务文其言今传之陋矣然而不敢饰也夫不敢饰不敢诬以偶有传而后之志道者缩缩如有循度可以报师一颔也已

弇州续稿卷七十八

●钦定四库全书

弇州续稿卷七十九

（明）王世贞 撰

○文部

△传

胡观察传

观察胡公僖者字伯安一字子祥胡之先为宋国子直讲瑗所谓安定先生者始家湖州其后避元季乱徙兰溪遂为兰溪人五传而至公父赠仪部郎中富赠公以忠信治贾业旁落计无所之欲委公于医以纾家困时甫卯已悉读素问灵枢和扁诸家言矣一日忽自奋曰医毋论不如秦越人即所治必自吾手能几何孰与夫大丈夫大则宰天下小亦一方少徊虑而起数百千人死哉亟改治儒赠公竒其意而许之治儒之未几即以属文冠其侪补博士弟子故太宰唐文襄公龙养母里居闻而召见公公时短褐蹑屣以进然神彩秀澈英英照四坐坐客尽倾文襄公顾谓客曰何物宁馨儿国器也有弱息必以归之文襄母诎文襄择壻而得贾人子乃又娶耶文襄意夺然岁时问遗公无虚日当是时学使者少傅雷公礼试公文居首而闽学使者太子太保朱公衡道过之雷公杂公文于它卷以尝朱公朱公独拔公文曰鸡羣鹤也何必仰吭鼓翼而辨雷公大咲语公姓名以相矜赏唐公与雷朱二公世所称人士模楷者也是岁公遂举乡荐在公交车者十载所而后成进士公故贫进士禄薄而迎赠公及母郑邸舍中日治二缶一缶市白粲鲑

炙以荐而一缶所与妇共脱粟苦菜而已俄郑病笃公昼宿泣而吁天寻不起毁瘠骨立奉丧与赠公归服除补礼部仪制主事提调会试爬搔其弊得便宜十事将上而报赠公讣公痛不及视含毁逾于丧母郑时公先后治丧贫甚勉自力而已不以毫髮烦有司再补精膳主事迁祠祭员外郎遂为主客郎中值谳达请款塞众难之不欲许公独是许款者于是诸颁赏典册俱以属主客事悉办竟谳达世无害政府乃大才公调仪制郎中亡何上崩庄皇帝登极时朝仪久旷絶事取公裁与诸覃恩赐赦山陵经筵几务旁午公应之沛然且当有九列除而庆王袭封之事起庆王者薨无后诸郡王于支逮不当袭而近者乃中尉贱例不封中尉故富行万金中常侍恫喝公公固持不可则以谓尚书急乃借口公于是取中旨特予中尉王而公出为湖广右叅议治税粮时大水独荆襄灾甚公旦夕行部精心区画其赋得减省十之四民以大悦而其地故悍相籍也父及诸弟在焉公平视之每行部无加礼有子试武昌公如弗闻也以是失悍相心颺指漕使论公督漕纲不称职公视他道独先期亡可警者顾镌秩得云南按察僉事其治兼督澜沧金齿腾冲兵巡与缅甸邻缅甸强而贪念大理饶欲割之而宣抚刁某父死兄弟争立兄自度庶子不得立则媮缅甸人将举兵合而窥大理公请于台为文檄之其畧谓而自恃强不过明一荒郡耳且不闻而之先以三十万众殲西平侯手无噍类耶即不量送死螳螂之斧见我车辙立靡矣缅甸人得之气慑不复吐乃以单车驰刁氏所中分其地咸解散如约台使大悦上书称公仁勇有安民畧遂复故官再迁按察副使凡三政皆不离淇中拊循其吏民若赤子所经歴虽深山穷谷能识公曰胡佛子盖以其慈悲善度人故也然公务持大体不为一切迎合台往往目摄之不顾而同列之文深意忌者见以为桷凿不相容属大计台疏以不及论然尚谓公满腔皆赤子公咲曰彼以其鹰鹯易我鸾凤耶吾用赤子归矣遂致仕百城吏与其老弱牵衣填道曰公毋弃我则又泣曰公果弃我矣公归而悉出其余俸置酒宴亲戚闾里不为差杀然后以次周恤之衣者食者鰥弗室者死弗敛葬者亡不满欲而去然益自卑卑人所为德唯恐其忘之所为德于人惟恐其不忘也性尤恶杀生当省试时谋徙僻地得潘氏圃蚁羣聚于室以数十万计童子构火欲焚之公蹙额曰以我一夕安而轻数十万命吾谨避之耳亟返故居暨入试窘三书义至乙夜矣甫就而蚁戢戢笔端不可逐久之始别构四经义思忽坌溢如泉涌蚁亦絶不见既高荐司试者迎谓公四经义殆神助耶公心知为蚁报益谨于物命所全活龟鳖螺蚌不可訾数尝有遗公鸳鸯者公意放之水滨则复落罟师手棹而至湖心遇风舟几覆客咲之公亦不悔遇早朝即盥漱熟水亦必躬蘊火手盥自给恒谓朝我职也而劳人不可馭三尺童必从礼信絶不施鞭朴间一罟数小过輒自悔何以使彼胜也其视所部若家视部众若家人人亦不忍欺公以故所莅官事治公虽温然长者然遇不可必激而遂其志以故公易于下而难于上论者拟公孝谨类石建平恕类刘寛直节类汲黯雅量类陆象先止杀类白居易其乡人则曰吾不识所拟诸贤第公乃里中章尚书耳尚书者文懿公懋也公少羸自念以身貽二大人忧甫强仕即絶房室今六十有几矣貌颊赋白而髮鬢视听饮食步

履不衰倦如四十许公为诗文宏壮滚滚数千言若建瓴然不自名诸人取自适而已至子应麟而始以诗负海内称

弇州生曰士有不爱其身以成其是者次亦砥节饬行能自树见不泯泯其下乃掉三寸舌操七寸管雌黄月旦标顯而羣趋之即不佞还愿为之执鞭孔子曰文莫吾犹人也躬行君子则吾未之有得夫躬行君子舍胡先生奚属哉仁心为质礼行巽成事不趣名语不徼识虽非宦所由显然于国家之元气深矣

赵烈妇尤氏传

赵烈妇者尤氏昆之名家女也王父宜春令敷父曰某烈妇生而淑美善女红通晓大义少字诸生赵一凤一凤父曰乡进士鏞读书嗜酒不别生产以至卒而一凤其第四子贫不能授室脱身赘于尤时烈妇甫十六耳即日夜机杼间以佐一凤读遂补博士弟子有儒声然三试而三不利竟邑邑病死烈妇将殉之既而强食曰弃君之二孺子而以从君君宁与我亡何二孺子殇烈妇益大悲痛曰可以从吾君矣既而复曰君犹未葬也吾忍暴吾君骨则徙之墓所视治土方中日夜拊棺恸哭行者闻之为咨嗟陨涕而诸中乃有利烈妇之嫁以其聘橐者谓人曰彼姝少且艾谁能容彼久也则又訾其目曰彼盼美而流乌能久也烈妇闻之大叹咤曰吾何知色人乃以色疑我而又目我夜就工所取石灰合许手授久之血出渍灰立枯矣利烈妇嫁者大愧悔无地而烈妇目楚痛益剧度必死寘一棺自随可岁许视一凤葬毕即自缢有抱而解之者复触石额裂且死乃仰卧棺中喉喀喀已而死矣当烈妇之目枯时呻吟小息輒自谓吾楚痛剧矣而中甚安然则烈妇之死也其中当更甚安耶烈妇死数年御史使祀五贞祠而为上书天子旌其门曰烈妇

弇州生曰始刘子政传列女而范氏因之然于媿行嘉言无所不谈若列传之例云而后世乃有妇而称节者若烈者女而称烈者不知所由始亦不知节烈所从辨揆之周公谥法本文未尽当也大要节则终一烈乃能殉一者恒也殉者变也恒则以殉为一变则以一为殉若赵妇者无所不兼诣者也说者又谓吴于土为天下沃而昆居冠焉以故不能尽被周南纯白之化今得一赵妇足以洗及采风者之疏上而天子之诏下呜呼沃自是不为累哉

沈赠公传

沈赠公者讳武字某其先自汝南徙而吴为吴人者千余年而子孙散处其豪曰渔

隐公属元季以军兴责富人贲渔隐公逃之洞庭两山间高皇帝定三吴始隶籍嘉禾为嘉禾人凡五传而至赠公赠公之父曰茂才公某者娶太守姜公某女未有子置媵周以弘治庚申正月举伯子而庶姜以二月举赠公太守怜爱赠公抚而延师教之伯子乃縁以朝夕侍茂才公得公欢公尽捐其橐于伯子而委赠公使贲吴吴南湖之着族也其僮曰寿官公某无子晚有女其母尝梦青鸾集于帟而生寿官公钟爱之谓赠公淳敏有度请于茂才公曰而子吾子也然吴孺人不以家挟赠公赠公不以贲故小折节闺门之间肃如誰如也久之茂才公卒赠公奔哭如礼不问产人谓汝非沈嫡耶谁敢居羸赠公曰吾人贲也且恐伤逝者心卒弗问产而寿官公亦老死公请于族得所当后者而徙箸于白苕乡曰吴自有后吾壻也且吾耻言贲人乃称赠公讓伯氏产则名贲讓外家产则不名贲以是益服赠公然业益薄赠公虽不获用儒顛而好读诗礼二经及郡国志史兵漕钱谷诸书精心计纵横握筭不爽邑有均田役推择赠公赋曹事立办入从事大寮得冠带需选赠公叹曰髮种种矣安能持资簿受役升斗而会有子今郡大夫尧中少颖工属文赠公延明师塾而诲之因并诲其从子常熟令某时吴孺人以俭勤佐赠公为束修费尚不给稍稍鬻庐产以供客谓姑废塾赠公曰吾急塾甚于息庐产而大夫之学成已举乡荐赠公乃喜谢客庐产幸当无恙居恒戒大夫吾德于人则忘之人德于我勿忘也又曰吾不能治城旦家言若于公以高门俟汝虽然吾不敢愧冥冥蓋赠公慈于物毋论蠕喙即一枝卉不忍折所市禽鱼可活者则活之前后不可胜纪竟以老寿终吴孺人不以毫废毁也泣而语大夫从汝父地下易耳顾老人无殉者会服除设奠闻大夫哭声亦哭气遂絶孺人之卒后赠公三年得寿俱七十有五大夫竟孺人服上春官高第授南陵令政声为一时冠天子推本赠公与孺人之教而锡之玺书其辞称赠公曰孝友禔躬诗书迪子孺人曰相夫以正玉子于成皆实録也于是赠公秩如南陵令而孺人有今称云南陵令今为吾郡同守故曰沈大夫

弇州生曰沈大夫谈赠公之为德不可更仆数矣而大要蔽之曰讓曰慈慈不必情讓不必名斯所以为至乎哉乃吴孺人之为相而沈大夫之为继至厘人主褒蓋孝友柔嘉之声隆隆焉是故我观于沈而后君臣夫妇父子之道备也

沈淑媛陈传

余既已为沈大夫传其赠公若吴孺人矣大夫稽顛蒲伏泣且谢既谢而泣犹涔涔未已也曰始也不谷不敢以吾私先吾尊既也不忍以吾尊竟废吾私也曰不谷之奏南陵令最也天子以考功法核之信锡赠公及先孺人玺书矣已而锡吾亡室陈其称亦如吾先孺人而秩视不穀其辞所谓敬顺承尊俭勤治内莒筐裹馈丝枲佐读諄诤乎其言之也夫亡室陈以匹妇之微厘天子褒獎洞见纖悉不穀宁复有它覬抑不谷闻之纶綍

之辞贵岩穴之辞征敢以征累吾子余唯唯大夫又曰亡室陈者故训导寰女也生而丧母育于外王父吕水部穆家少即以柔婉称矣其装橐亦不薄既归不谷而吾赠公中挫产已渐老陈乃悉橐而共二尊人之养行且尽则昼夜勤女红佐之不谷中岁以经术行教授归得少修脯资以授陈陈不为私置盖吾夫妇相对藜藿也而司堂上之甘毳充豆矣衣恒一布襦裙不曳地尝试问之不有嫁时服耶则曰为诸生妇当如是即二尊人被轻暖不逾于适吾体哉然以举孺子不育强不谷蓄媵妾虽脱簪珥不恠也而竟先不谷病死矣不谷之令南陵也差有禄而不及飧其被锡也不以封而以赠今之嗣者贤间与之语若虽俭不二簋然有肉矣不重珥然时时御冠佩矣虽勤不至鸡鸣而治羞馈矣为臧获称贵人矣为子称母矣陈有一乎哉嗟嗟弇州生曰余尝读河阳令悼亡章而叹夫妇之笃也然犹为情役耳读北地氏结肠篇而得妇功焉得夫道焉今覩沈大夫所称何以异哉为作沈淑媛陈传不言孺人者贵德也

山东左叅政赠中大夫太仆寺卿冯公传

冯公者其官山东布政使司左叅政也而治漕事卒而赠太仆寺卿予诰封寻以公满叅政考赠祖父大中太夫亦予大夫诰叅政法不当赠赠法不当得诰而今得赠及予诰者漕河甫告成天子大推恩任事臣独公最久而前后功又最高以卒故惜之甚其被恩泽有大臣所不敢望者呜呼冯公可谓遇矣公讳敏功字符卿其先居海塩之大易里改隶平湖已而徙郭中遂为平湖人王父遂平令俊父汝弼举进士授行人擢工科给事中直諫谪委更大邑令晋守吾太仓再管扬州同守中单辞罢以公考最封按察副使得赠如公阶者也公生而明颖通古今文集十六补邑诸生十八从其父太仓与诸生雋异若凌尚书云翼徐太仆爨宪副敦张宪副大韶相切劘为制科业而不佞贞忝公同齿叅其末公是时秀眉美姿驰笔而长鹭毋能当者还为诸生试輒冠其曹偶廩学宫然大试輒不利时扬州公已谢事归而治生又以其羨贍宗党公一切佐之三十始举其乡第三人上公交车报罢亡何岛寇来迫平湖前是平湖城矣往往多公资力而至是复佐其令憑城为备御计甚详寇去而有援兵乘间为虔刘者令以为倭也惧甚公授甲家众夜坐立睥睨间质明而办兵乃愧退乡人避乱争入城城人虞不给时臬使方按部众谬传且逐之羣咻使所公闻而往以片言折之解当是时微公几叵测凡三上公交车乃见收射策高第明年授礼部祠祭主事诏选良家子充后宫公在行独不扰座主拜相者所亲道士以公役骚扰道路公伺其归而责笞之相怒甚召公诟曰若不知我门下客而笞者何也公正色曰笞横道士耳不笞师门下客也即笞师门下客而为师少愆横者以为弟子罪未敢闻命相颊尽赤然竟未有以中也寻进主客员外郎奉庄皇帝即位诏而南道迁其司郎中还迁江西布政司右叅议分守南康九江部公行部至南丰而浙兵调者以饷不足将大掠公召其长好谓曰而与我乡人也故为而言一反手间名为贼天子檄大

军至糞粉矣饷不足吾为若治饷其长悦公乃料仓粟库镗次第属于舟而使一郡僚导之选精勇尾之咸摄不敢动属方议均田而公所部多山高下饶瘠异状公使善计筭者周行阡陌间计畝受税毋得伏匿又为之平亭其役留籍南康未三岁以才举拜山东按察副使饬徐州兵备兼治漕河甫至而河决睢宁由白浪浅而入青阳决者六皆巨新安左右决者七差小其水不制睢宁之陆汇为湖曹口而上故河百余里以南尽为陆淤泥半之漕艘之阻者数千计漂庐舍人畜无筭公甫至受计大吏调士民昼夜并作与其下分功任难无何决塞各就绪漕舟渐通而大风雨弥旬水瀑涨诸塞尽溃湖与河一来攻邳公时按部邳下令土其门水势重不能御公即解衣帮襦囊沙而塞之诸从官吏卒市人争效公闢沙皆满水逡巡解公乃行视诸决口皆就塞仅月余而水复涨败阎家口以西半戈山左右堤百余丈公又筑之自是堤土渐坚实不受侵矣会徐州灵璧诸州邑旧堤溃公又受计大吏所独治者南自曲头抵青田八十里北自陆湾至吕梁四十里所与监司曹郎合治者直河以下南岸凡九千丈又自茶城踰华戚山曹筑单堤一百六十里以遥卫漕河之闸者诸经画版筑榘木薪土之费与护视斥埃约束唯公行之最精监司曹郎咸取则焉公素庄盛当其治河时往来寒暑无间黧瘠胼胝见者莫可辨识始迁河南左叅政公于职不专治河而其地与事亦故相关抚按臣闻而喜曰吾可高枕矣而少年喜事者欲从泃口穿葛墟微赤良城等山抵南北大湖中界两长堤为运道以示竒征公与议且属之公念诸山道约二百余里多盘石礧砂不易凿大湖相连十四不易堤民力之几何而虐用之持不可乃寝而喜事者意未已别欲繇海通胶河其视漕稍极而中皆高岭巨石东土瘠人疲不胜役甫举事而惊溃者再矣乃移公山东公议以胶功不易兴且不易竟即竟亦终塞县官故不乏金钱柰何悉捐以填无用而勤此数十万人力也抚按臣采公议以闻时柄相独擅国前后授指于喜事者怒而下书切责人或为公危曰内意坚且实才公以治河显而弗以治河终之裨且及公公叹曰吾岂不念祸为国家计重耳度必不可已始就役寻具如公言费至十三万金而无尺寸利柄相稍恧沮用廷议罢之然犹谓人冯参沮泃今又沮胶者何也岂惩昔鞅掌故倦耶公寻归职职所治税粮时久已困不给为平亭其额募垦荒土流民占籍者万计已而念扬州公老病乞休归朝夕侍汤药扬州公得公而喜为加飧无何竟卒始公失其母屠淑人戚不废易已失继母徐淑人易不废戚然皆在壮时体犹为之柴瘦而扬州公用老寿被服金紫极园池亭榭之乐其卒也公亲视含敛虞祭当葬日送舟千艘人以为无憾而公业五十余矣孺慕益笃鸡骨支床几不起服除久之荐者相属乃从田间起仍故官改佐漕运公时苦宿痼未平人或难之公奋曰頼上恩得治私今不以为不肖而属之大寄吾何忍负且向者亲身也亲已背矣身当为朝廷有遂冒暑抵淮淮之南故有邵伯寶应高邮三湖相连为巨浸漕舟过者往往多漂溺因议浚内河通之御史大夫王公廷疏上得请而公至即任其艰巨者与北部罗君共治公于河事故心通而役者皆习公能工以大集公益不爱其精力水陆奔走且旁治赋讼览讯牒至丙夜不休五鼓即起以为恒寻驰督漕舟自徐而济凡

七昼夜遂昏瞶不复省已而稍苏还进医药微效复出勉治事病寝剧见其妇曹与子相对泣犹呵曰人孰无死吾幸获以勤事死何恨叩之家事张目不荅而趣罗君至曰内河成于国计甚利第太逼湖湖善溃而堤薄万一如瓠子数百里鱼鳖矣幸为别创堤卫之已而顾其子曰吾死死必有贖汝却而归诸官罗君色惨沮谓公堤吾职也毋足多虑若子幼盍以语我我为任之公徐曰有家弟在罗君别而公以季夏望日之午整衣冠端坐而逝春秋甫六十子一即伯礼补邑诸生以秋文着公性孝友扬州公尝卒遭盗公已脱冒锋刃而出之爱其弟敏劾尤笃事相师产相讓也与扬州公俱善治生而至饶乃能以义散施不吝平湖之人至今感称公父子

弇州生曰冯公所谓能捍大灾御大患者非耶准之人相率而祠祀之也公于居官他功绩甚多不志志其治河者于国不为利则抗悍相弃其官而不之惜利则鞠躬尽瘁至死而不为己真纯臣哉玄冥之勤官而水死何以异也乃国家之报劳臣厚于汲昌而薄于王延世盖衷之矣

陆赠君传

陆赠君者讳鋒字子器苏之长洲人也祖父家长洲里中而父敏饶隐德当其歿时赠君甫弱冠而两弟鏗鉉业在襁褓母沈痛不能生赠君之治丧以哀毁称而旦夕敛色为母曲慰解务得其意相之抚育二孺子皆成立而鏗天无子赠君心念鉉且长不能自博一官悉帑而资之游太学后仕为常山丞赠君家居以养母为乐虽小滫瀡亦必微探所嗜而进之岁时行园草木之实新不荐不敢尝也病则时时为洗袒服踰厕然迄不使（阙）赠君负母出之邻家或谓不虞橐耶赠君谢曰（阙）论橐而母沈竟以宽乐终赠君髮且种种矣其哀毁亡异失父时均其产于常山丞曰吾不敢薄先人体訾稍羸则时损以贷施乡戚之乏者生养死归往往见藉曰吾不敢私先人有丈夫子二曰濱曰汴赠君度其质可进延名师诲之课之经术曰吾不获显而王父矣而曹勉之于是二子咸感奋力学然公竟不能待而卒卒之年六十有五赠君既以孝友好施予闻乃其忠信笃敬又有独至者人不能举其详长洲文学掌故俞先生独知赠君为载之邑乘后濱汴俱补博士弟子而会赠君之媿马以明婉勤约佐起赠公家又能代父职寻亦卒汴服除举于乡谋葬赠君夫妇走之学士申公汝默所乞言以铭其幽几十余年而汴成进士拜南京刑部主事奏三载最制诏赠君如主事官其辞谓赠君行谊端良性资朴茂马从赠君品为安人盖亦有淑德慈仪之训云或曰赠君固贤然閭閻之行耳夫安人者迹不能阃以外也何自使天子知之或曰铭赠君夫妇者申公也当是时申公实以首揆视草夫天子以申公铭故褒赠君夫妇申公以俞先生邑乘故铭赠君夫妇即不获生有其殮歿而遇称之伟哉汴今以吏部司勳外郎予告归志铭邑乘之后有表有记有序

弇州生曰贈君以一閭閻見知聖主賢明相足死矣司勳之復益以諸君若表若記若序何居也豈亦以廟廊之華袞與岩穴相藉而重耶抑閭閻之迹不易竒而托之文言則有任其不朽者耶是不必盡然乃司勳之所以為其親者篤矣

汪山人傳

當萬曆之七年予里居數稱病謝客而客有躋門者自稱新都男子汪某願一見有所言見之宣髮矣而具裝為山人服征之則故太學上舍生久次俺得官者也曰我不知太學生徽俗故重賈問亦賈乎曰我不習為賈俗故又重族問汪故甲族乎曰我不習稱族已而出一編曰賈與族在是矣雖然吾非以名也願得子之一言而折衷余竒其志美其才而許之文成顧不能無傍刺于俗所重者山人歸以詫社中人則社中人呶訾我因及山人山人夷然弗屑也然絕不復相聞而又八年矣一日有衰服而來謁者累累然孤也蓋山人之孽子元勳來言山人死矣出其集則叙之者又有汪司馬伯玉劉侍御子威與其鄉人吳瑞谷子威多澹辭以匿其所未滿母論伯玉謂山人于九歌二雅六義五音无所不窺于屈宋蘇李韋枚曹劉王謝盛唐諸家无所不入于音节景向意象風神倡和轉移擗闔飛動无所不得于樂府古風長句近體无所不工泐泐矣泐泐矣然而不守一隅不由一徑或得之心或寓之目或動之情調調刁刁眾竅畢作猶之大塊噫氣吹萬不同瑞谷之稱稍約謂山人五言得之王孟芳姿在掬七言春和婉鬯春色依樹多以趣勝弇州生曰余衷于二君子而知余向者之叙之無當也夫既已叙之而二君子又申稱之余又何贅哉元勳拜而泣數行下欲得余傳夫余何以能傳山人也與之坐問所以不肯稱太學生故曰山人少治經術有聲補博士弟子及再試得第一廩學宮久之邑司行鄉飲禮有以子貴躡賓席先其賢長者山人預執事前曰所以稱鄉飲尚齒貴德耳不聞以子貴稱祭酒抑使下其人恚謀以事中山人山人乃去之入太學鬱鬱有僞聲而姿試不利最后錯血于試所嘆曰吾以吾身而博身外物何悖謬也遂焚繻遨遊名山水山人故好詩至是益治詩詩成矣而念其邑居前輩名能詩而泯泯者嘆曰吾不可以先諸前輩傳悉載其詩為家者一百六十四而梓之然後去謁王先生當是時王先生呼之山人應太學生則不應問何以不習為賈曰山人之先將軍某其始小賈也轉販瓜李轉息鹽鹽起家至傾邑貴為昭勇將軍嘗脫冤死者數十曹又構大石梁以濟涉者死贏金巨萬計山人悉以推伯氏脫身闖闕間受鄒魯之業以詩自娛終其身是故不習為賈也其不習稱族何居徽以族相豪而山人之先越國忠顯公華擁六州而儲胥之子孫之麗不億至官太宰司馬中丞者肩比而宋有大儒四友公凡十餘傳而至山人諸豪族屈指至汪則首為俯而山人獨自謂族以人重未聞人以族重也即崔盧李鄭何與焉是故不習稱族元勳又云山人性慈悌負廉節既已推贊伯氏一子疹發甚厲時山人有二子矣日夜肉

祖告于先祠愿以次子代俄而次子果夭而兄之子获全邑筑城御倭多发民间冢鬻尽露山人白邑禁止之且瘞其露者客有寓金山人所而盗夜入尽掠其资装客之金幸亡恙人谓匿之便山人骂曰客以不贪托我尔乃以贪饵我悉归客又尝直僮奴之诬其主者于郡大夫不听则褫帻投地以去悟而卒直之部使者应诏辟山林材行士有司以山人应羔币交于门谢弗纳也而山人竟老病尝自为铭其辞甚怆与其友金上父者时时坐一室校讎所为诗又有金彩芳者为之梓甫成而上父死无后山人为视含敛立后已而大恸曰知己已矣谁与我生趣病益甚且易箒为诗十余语则甚達至月朔与子弟期之三日果卒山人名淮字禹又别号罗山子

赞曰元勳之叙述山人云尔余征之徽人信徽人又谓山人娶于程举懋孝已置貳某举功复举学功德最后嬖外妇方得元勳山人遂与方独处而元勳长能诗又善事山人山人爱之以见诸乡先生乡先生亦多爱元勳者其配程遂偕处无间也山人卒而诸兄进元勳不以为子数苦块无所容足盖茕茕然者久之念无以效于山人扶服而来请传也于乎枚皋非孽子也耶即继枚叔而父子翱翔于艺墨之林者宁以嫡哉元勳力自勉以而父有闻于后是不在传则在若而已

吴宜人传

宜人姓屠氏讳睦樵李大司寇康僖公之女孙也康僖公有子曰谕德公应垓娶于项实生宜人项则大司马襄毅公子叅知公经女也嘉靖戊子冢宰吴公与谕德公同宦长安而冢宰生寻甸太守小泉君谕德生宜人都人士以牛酒贺两家遂缔盟焉十七而归太守再封为宜人宜人内外门地甲于江以南而端方慈俭若出素族至于天性至孝使具须眉则古曾闵之流亚乎冢宰之廉于官也督学滇南不能治万里装以妃戴夫人留而太守方治诸生业宜人勤女红充饗殮费不给则脱簪珥佐之迨太守之叅军于燕也宜人舆其移南为置貳以行遂终事戴夫人戴夫人安之忘其老而失明也而宜人因得晨夕起居母项矣冢宰薨夫人继之哀感骨立十指甲尽脱辅太守居丧士族以观礼焉宜人素有心悸疾以貳俞产难所致至是益甚年六十而母项病值大寒冰雪日夜拥之不受代惫剧忽顛仆榻际兄弟泣辞曰幸不乏子若孙及使令者奈何令姊氏至此宜人亦泣不忍归凡再仆再苏始就輿返第竟先项三日卒实死孝也宜人虽处富贵乎而身谢纨绮手亲营蒯居常不具二簋待姻党未尝有矜色冢宰方鼎贵而相成以清白也里居而竞业于意外之变也未尝一日而宴安也有子太学生惟贞婴时抱危疾蔬果食饮必手衡而授之然香计时不令先后十年许始愈督令就外傅内设重衾外设重关以一老苍头与居泊有室生孙稍自慰曰今而后吾可称人母矣其抚庶易学不异于太学惟贞忘其所自出太守亦忘易学所自出也读书通大义兼明佛理独不喜巫媪比丘尼

出入房闼日诵心经一卷间书佛偈随命侍婢火之曰不宜以手迹示人也作家織嗇不厌琐屑辨色而出手葳蕤之钥指摛臧获咸尽其才力而间有重负者则归之宿因以自解惟里中贫乏死丧周之倾橐不复恡以故生有懿闻卒之日疏戚贵贱亡不为賈涕者

弇山人曰士有百行孝实始之载藉所称五十而慕者有虞氏之后无闻焉至妇人女子遇人之艰难则念及父母未有富而贵而寿犹以劬劳报所生继之以死者也彼缙縻曹娥皆慷慨一时而流誉千载视宜人何如哉宜人内行纯備余独重其孝昔蔡中郎云生平作碑文惟于郭有道无愧色余于宜人亦云尔矣

弇州续稿卷七十九

●钦定四库全书

弇州续稿卷八十

（明）王世贞 撰

○文部

△史传

中山王世家

中山王徐達者凤阳人世业农至達而少有大志好武事達为人长身高顴赤色沈毅刚决其侪伍咸庄惮之时郭子兴据濠梁称滁阳王而高帝为其部帅用事達杖剑往从之一见语合收置麾下尝从畧定远张家堡得其兵三千人已又从袭横涧山寨得兵二万人时達年二十二矣所委使必効而又时时以王霸之畧进高帝大悦曰此国器也授镇抚俾位诸宿将上寻从破元兵于滁州涧再从取和阳拒殲其援师皆有功而贼帅孙德崖来与子兴合已复有隙军且鬪高帝乃驰单骑往抚之为所执而子兴前已诱执德崖于是達请以身之德崖军代曰归我朱公子我亦归而孙帅高帝始得脱而子兴业饮德崖酒纵之返達亦得脱会滁阳王死高帝为大帅達益重从下俞通海等水寨与曼济哈雅相距達别率精兵数千取溧阳溧水二城断其肘诸军前薄曼济哈雅军大破之从渡江拔采石捣太平与常遇春皆为军锋冠而達独叅预密谋进止寻从破擒元将陈额森复大破曼济哈雅乘胜下集庆路高帝称吴国公欲将達而少之乃会诸将阳责達

等以不能戢下召军正使定罪逵等顿首请死乃赦之而命逵率诸将攻镇江一鼓而下走苗帅旺扎勒僂平章鼎鼎号令明肃城中偃然不知兵逵自是专为将矣置淮兴翼元帅府于镇江逵领之时张士诚王平江诱我降将陈保二以叛遂发舟师自常州来逼逵御之败其军于龙潭追奔至常州请益师于高帝曰贼窘矣可破而有也上以兵三万益逵逵乃分其军为三薄常州而垒士诚之弟平章士德以卒数万来援逵与诸将计曰士德勇冠军且狡未易力胜也去城十八里为三覆以待而别选铁骑属总管王均用将之乃前徼士德兵既交均用铁骑横其中坚阵乱士德走遇覆马蹶获之遂大破其军杀卤以万计进围常州不下高帝乃故夺元帅逵以下一官而赐书逵曰虐降失陈保二老师孤城吾所以重过将军也将军勉思补前过大善不者三尺不贷汝因复益以精兵二万而新附长兴卒七千人从其帅叛降士诚逵乃杀围合四营兵为二以相救佯示弱士诚兵直攻逵逵纵兵大战而外营常遇春来应夹攻大破之凡五月而常州下逵别将轻兵取马馱沙以为靖江县进攻宁国府破走其将谢国玺宁国守臣杨仲英等坚守不下高帝以大兵继之仲英降得士卒十余万人马二千疋复以轻兵徇宜兴县别道下常熟距平江不百里而军平江大震已复与平章邵荣围宜兴分兵塞太湖口援道绝宜兴下时高帝以重兵定婺处将畧有浙东诸郡而陈友谅之大将赵普胜以兵陷池州复进据攢阳水寨数往来窥伺高帝念不及援而逵遣其将选精卒袭败之普胜弃舟走复追擒其部将获艨艟数百遂复池州捷闻高帝大悦谓微逵何以纾我内顾超拜奉国上将军同知枢密院事亡何高帝取无为州逵以兵自无为夜掩浮山寨破赵普胜之别将胡总管于青山穷追至潜山复破斩陈友谅之郭叅政下潜山分兵守之逵还镇池州而高帝谍知陈友谅且犯池命金枢密院常遇春以兵来助使使语逵友谅旦夕至则重复于九华山之下而掩其后可尽取也逵乃与遇春筭选卒万人伏九华友谅至尽锐攻城城中伐鼓大噪伏尽发而城中兵应之遂大破其众斩首万余级生获三千人遇春曰此劲敌也不杀为后害逵不可以状闻高帝报使者天下战方始毋多杀多杀是逆距之也而遇春则以夜坑其十之九上不怪命悉纵其三百人归友谅而曰此吾不壹将之故也逵自是专为大将矣陈友谅既陷我太平遂盛兵压建康高帝设奇大破之逵时将南门外兵功最多遂与冯国胜等追之及于慈湖纵火焚其舟至采石复躡其黑旗军复太平遂取安庆寻从高帝取江州陈友谅走追破之别将兵屯汉江之沌口遏沔阳战舰进中书省右丞洪都降将祝宗康泰反大帅邓愈走逵以沌口军还讨定之宗走死槛泰送建康逵移兵围庐州而亡何友谅失洪都而愤悉其众来争楼船高数丈围之数百重高帝亦悉师溯流逆之趣召逵自庐来会与友谅遇于鄱阳湖逵先诸将荡其前茅杀千五百人获一巨舟而还军威振既而逵舟深入中敌火扑之更进战复破敌而退时友谅兵尚盛帆樯后先不见际高帝忧之谓左右即不利柰彼乘胜何既而曰得之矣吾以逵留守缓急可百全也夜以兵符授逵飞舸还建康逵至申约束严斥堠示以镇静若不知有外兵者而高帝已破诛友谅矣师还即吴王位置中书左右相国正一品时犹仍元故尚右而逵

为左相国拜日上召而谕以元政之所以失且用怠终为戒逵等顿首谢复从平武昌还复谕逵等以更涉世故则智明久历患难则虑周今者纪纲法度粗若有绪顾其间或未尽善诸公宜执正论为更张毋使有既往之悔于是逵与右相国李善长相与孜孜推明之称画一焉亡何率兵讨庐州左君弼君弼走安丰遂取庐州获其骁将张焕以君弼妻子送建康进兵下安丰君弼走汴梁亡何率兵徇友谅属城之在荆湘湖南北者兵至荆州友谅守将姜瑀降遣叅政传友德徇夷陵归州守将杨以德杨兴先后降徇潭州土酋易华降徇辰州守将周文贲不降破之文贲走徇寶庆守将唐隆如文贲破之隆走湖湘平召还大会师建康计所讨率常遇春等以水陆兵徇张士诚淮东郡邑首克泰州得其将九十兵五千遂徇兴化降其败将李清会张士诚犯宜兴以都督冯国胜攻围高邮常遇春攻淮安别将守泰州而逵率中军精卒渡江走宜兴破擒士诚兵三千余宜兴围解国胜中高邮守将诡约降使使入受之皆见杀上怒挾国胜而趣逵移兵会攻克之俘其将帅千余人卒称是复移师会常遇春攻淮安破其左丞徐义兵于马骡港获卒三千舟百艘遂进薄其城守将梅思祖降获兵万余马千五百足粮四万石元将枢密同知陆聚举徐宿二州以归时安丰复为元守逵进师取之获其右丞锡都走左君弼元将珠展来援大破之获其兵四千马千疋大相库特穆尔窥我徐州逵复大破之所俘斩万计淮南北悉平高帝与诸将相谋讨张士诚右相国善长以士诚兵尚强饶蓄积请缓之逵持不可曰张氏汰而苛诸大将李伯升輩积子女玉帛旦夕人耳用事者黄蔡叶三叅军白面书生易与也臣奉上威德以大兵蹙之当自溃上大悦曰子吾身也以左相国逵为大将军平章军国重事遇春为副将军率师二十万讨士诚禡于龙江进逵等谕以毋虏掠毋杀僇毋发丘垄毋毁庐舍又戒之曰士诚能以吴归命者必全之吾闻其母葬阇阖之外墟毋据而刍牧也时副将军遇春欲径捣平江上曰不然贼分其众驻吴兴钱塘以自辅我顿兵坚城不克而招二辅之援非计也先攻吴兴便乃悉舟师自太湖趋薄吴兴士诚之右丞张天骐叅政黄寶院判陶子实分道出战逵亦分兵应之而遣骁将王国寶以长枪军扼其归路黄寶败走遇春扼之而获其从卒多死天骐等馁遂退其司徒李伯升潜兵以入逵复败之遂围其城五太子及其平章朱暹金枢密吕珍以兵六万来援屯城东之旧馆逵遣遇春等为十垒隔之复败右丞潘元绍兵士诚自以兵来援逵逆战大破之获其戴元帅及甲首三千士诚走复破其同佥徐志坚获之卤甲卒二千复破潘元绍之赤龙船于平望卤其军资甲伏皆尽复大破旧馆之援兵五太子及朱暹吕珍降尽得其全师六万以徇左丞张天麒等降李伯珍亦降吴兴下遂下吴江州从太湖西出平江城南七里破鮎鱼口山栅复败其兵于尹山桥遂悉水陆兵薄平江逵营葑门分兵营娄胥闾盘诸门筑长围木塔与城中浮屠等为别筑台三成曰敌楼下瞰城中纖悉皆见寻使使之建康请事高帝赐玺书劳之曰将军自昔相从忠义天性沈毅有谋端重且武用能遏絶乱畧消弭羣雄今克期来请事事取禀命将军之忠吾甚嘉之然将在外君不御乃古道也自后军中缓急将军便宜行之勿以闻松江降寻为其豪钱鹤皋乘间杀摄守

以叛众至三万人逵遣兵讨平之诛鹤皋平江城坚难卒拔而莫天佑时为士诚守无锡相唇齿其将杨茂善泅数从水中消息逵徼得释而厚赏之以为心膂使往来为间因尽得其虚实士诚迫乃自出兵战复大败之士诚马惊堕水几不救肩輿入城而其弟丞相士信张幕城上踞银椅进秋桃未及尝而飞礮碎其首士诚气益夺久之逵谍知城中困乃励士鼓而破葑门遇春亦破闾门新寨其枢密唐杰等皆降遂大溃士诚收其余兵二二万巷战复溃驰归拒门自缢久之苏楷送建康卒以缢死逵之将破城也与遇春约曰师入吾营而左公营而右将士人予一牌曰掠民财者死毁民居者死离营二十里者死师入而民不知有兵食寝互市如故窃相咎曰奈何久抗王师逵乃遣轻兵渡江下通州归献俘于戟门进封信国公赐绮帛改官仪尚左逵为右相国寻改相国为丞相逵为右丞相亡何议北伐平章遇春请直捣元都执孱主以临天下高帝曰壮哉而昔所画下平江策也吾欲先取山东撤其屏蔽旋掩河南断羽翼拔潼关而守之天下形势入我掌握不待麀牧野而元都下矣鼓行而西云中九原以逮关陇可席卷下也逵曰上策之善高帝顾曰兵法以庙筭胜者得筭多也卿其识之于是信国公逵为征北大将军鄂国公遇春副之馮于北门七里山大会诸将谓诸将军非不健鬪然能持重师有纪律战胜攻取得为将之体者毋如大将军逵又谓逵阃外之寄汝实任之兹行进取必自山东始大将军至淮谕沂州帅王宣与其子信请降既而叛袭走我使臣徐唐臣等逵怒急攻下沂州僂宣与其叛党十余人王信走高帝劳大将军逵赐书曰将军今何向向益都则必以兵扼黄河断其援即不向益都西取济南济宁二郡便兵难踰度其在将军吾不从中制也金火二星会于丑分后火逐金踰齐鲁以时进取毋失逵遂率兵攻围益都降其平章拉必遂狗潍胶寿光临淄等诸州邑因兵威谕降乐安淄川守将前后得将卒万二千粮二十余万石移兵下东平籍其兵民五万进次安山获右丞杜天佑等粮艘百五十余逼济南走其大帅托音特穆尔获将卒二千八百进逼济宁走其大帅陈平章以都督张兴祖守之遂与副将军遇春兵合取东昌所属州邑皆下败元少保伊苏兵追奔八十余里擒其大将藉山东城邑俘获军实之数上之高帝即大位立皇太子逵兼领太子少傅授银青荣禄大夫上柱国録军国重事丞相公少傅如故予告所以推杨勲畧甚至至比之太公邓禹云逵以大兵渡陈桥取汴梁时左君弼竹昌皆走之守将国公李克彝所克彝谓君弼公在庐数与南师角若何我悉麾下授公能与之战否君弼曰是未易当也有徐相国者善用兵我见之輒胆落何能战克彝乃驱兵民夜开门北走而君弼与竹贞率所部迎降大军入其城遂由中滦进畧洛阳遂抵塔儿湾元将詹同托音特穆尔以兵五万来拒副将军遇春突斩其前锋逵麾兵乘之南风骤发尘起呼声动天地元兵溃追奔五十余里俘斩无筭洛阳大帅梁王阿鲁威以其金印从吏民出降河南平阿鲁威者故颍川王察罕特穆尔父也逵乃遣副将军遇春狗嵩州都督冯宗异康茂才狗陝州福昌陈许诸守帅皆请降遂西克潼关而守之遣使之太原谕降元丞相库特穆尔遂狗号州毛葫芦诸寨致其兵自益库库来报聘以白金文马为馈受马反金送其使建康高帝闻逵

等平河南为幸汴梁以待之居十日達自军谒行在上置酒劳之曰将军哉忠尔忘身国尔忘家斯之谓欤河朔士民忍倒悬以待将军将军宜以时进兵建勋立业此其日矣達与诸将顿首谢既退复召達问计達对曰大兵平齐鲁扫河洛库库自保之不暇而敢离其壁我西据潼关李思齐张思道魄夺远窜元都卒旅且骇逸耳谁与为臂指者臣不佞仗天威取之如拉朽因复奏曰师进而彼北奔不穷迹之将为异日忧上曰元世祖乘气运而王我中国今衰矣彼且自渐尽何烦我穷兵出塞之后固守疆圉防其侵轶可也達遂拜命次河阴副将军遇春来会仍移顿陈桥高帝画陈图以赐调益都徐州济宁诸裨将悉集達复入汴梁辞已分兵徇河北右丞薛显叅政傅友德兵至卫辉攻之平章龙二走彰德追之至彰德龙二复走遂并取彰德寻取广平大将军達驻临清分遣傅友德开陆道通步骑都督顾时浚河通舟师遂前下德州常遇春张兴祖兵悉会取长芦沧州捣直沽据之作浮桥以济师丞相伊苏不战走元都大震抵河西务败其平章阿尔格等获士马无数遂进抵通州与遇春夹河而军達军东岸遇春军西岸遇春败其西岸兵擒国公巴延特穆尔等诸军入通州夜三鼓元君及其后妃太子开建德门以其车服重寶逃踰五日達进师填濠入陈兵登齐化门执其监国淮王特穆尔布哈居守太尉左丞相强通平章德勒必实保赛音布哈右丞张康伯御史中丞玛尔通等数以奉职无状且不先纳款僇之封府库籍其图书金玉楮币以兵千人守宫殿门使宦寺监护其宫人妃主给饩廩无缺吏士一切安堵市不易肆已遣指挥华云龙经理故都城垣右丞显叅政友德平章曹良臣都督顾时率骁骑侦逻隘口杨镇抚以舟师守直沽捷闻诏達与遇春定山西遇春以兵先下保定寻下河间下真定而右副将军宗异已定懷庆度太行取泽潞大将军帅大兵继之使右丞显叅政友德以铁骑为前锋畧平定州而比时库库特穆尔兵方自保安谋踰居庸关撼故都達闻之谓诸将曰库库兵遠出太原必虚北平孙都督拥六卫之师足以抗御我直抵太原覆其巢所谓批亢捣虚也太原下扩廓不战溃矣诸将皆曰善遂以轻骑前抵太原而营库库还军来救锋锐甚副将军与達计以步兵未集而轻与劲此危道也敌不解远斥堠固营垒可掩而取也達善之而会库库部将呼必玛勒者来约降且请为内应乃选精骑衔枚夜袭之库库方然烛使二童子挟书以待卒闻警仓皇不知所为跣一足乘驛马以十八人走大同呼必玛勒降達次日建大将旗鼓按其营得甲卒四万马四万疋兵乘胜之大同库库遂走甘肃复遣显友德以步骑徼破贺宗哲于石州而身率兵自霍下平阳河州府山西悉平遂渡河鄜城守将迎降克同州留兵戍之趣鹿台时奉元为都省而平章李思齐据凤翔张思道与孔兴图鲁卜据鹿台各有重兵以卫奉元而思道等闻達兵至三日遁達遂进渡泾渭至三陵坡父老千余人出迎達抚慰之遣左丞周凯入申约束明日师进奉元其约束如下故都时秦民大悦以奉元为西安府副将军兵逼凤翔李思齐走临洮凤翔下達与诸将议所攻皆以张思道才不如李思齐庆阳易于临洮请先由豳州取庆阳后度陇攻李思齐于临洮達曰不然思道深壁固垒城险而兵精卒未易拔也临洮北界河湟西控井络地富而人众以大兵蹙之

思齐不走絕徼则有束手降耳思齐降全陝皆我有矣遂决筴度陇克秦州走其将吕德张义至巩昌总帅汪凌沁布平章梁子中商鬻等降遂遣冯将军以天策羽林诸卫骁骑逼临洮李思齐降得其众十余万乃以兵攻靖宁走知院杜拜布哈度六盘山袭走豫王尽获其部落■〈马笛〉重使使喻庆阳张思道惧而留其弟良臣以兵守而从轻骑跳之宁夏遇库库特穆尔为所执良臣闻之使使纳款達遣右丞显率骑士五千步卒六千往受降良臣自疑以兵来者岂其捕诛我乃佯为蒲伏道左献牛酒而夜袭之显被伤走達怒甚即以大军围庆阳而分布精骑使平章俞通源畧其西都督顾时畧其北叅政友德畧其东都督陈德畧其南庆阳援路絕達进逼西门矢石雨下不为动良臣出兵荡麾壮士摧败之悉捕斩其伏听及请援者已复徼其兵出采汲者悉获之良臣惧登城请降不听复遣兵击破库库之救者哈札尔围益急其平章姚暉等开门纳师良臣父子投于井出而斩之并诛其党二百余人陝西悉平诏達还京师第功宴诸功臣以達为首称其攻取山东河南燕冀秦晋等处州郡克敌致胜振扬国威抚绥军民得大将体賜白金五百两文币五十表里且大论封而会库库特穆尔觐達还遂悉兵袭我兰州不克寻败我援师杀指挥使于光时左副将军遇春卒上乃还達大将军印而以平章政事李文忠代遇春分兵为二大将军自潼关出西道搗定西以取库库左副将军自居庸出东道从大漠取元嗣主達受命即日行遂至定西库库退屯车道岷達进师逼之驻沈儿峪隔深沟而垒日数交库库发精兵千人由间道从东山下潜劫东南垒举军皆惊扰左丞胡德济仓卒不知所措達自率帐前卒击之敌始退德济故功臣越公大海子也達械之送京师而斩其部下赵指挥数人以徇余众皆股栗明日達乃整兵夺沟而战以身先诸将士诸将士毋不奋前角者呼声动天地遂大破之川北乱豕获其郟王济王阎国公平章哈扎尔和尔齐等文武僚属千八百六十余人士卒八万四千五百余人马万五千三百疋橐駝骡驴牛羊以巨万计库库脱身与妻子以十余骑遁沮黄河得浮木以渡遂由宁夏奔和林德济械至京高帝释之而以书諭達谓将军自效卫青不斩苏建耳独不见穰苴之待庄贾乎将军诛之则已不诛吾且念其信州诸暨功不得不曲赦以伸吾不忍自今而后将军毋事姑息達既已破平库库乃使邓将军因兵威胁降西蕃而自攻兴元复取之会左副将军亦以兵袭应昌尽得元嗣主之嫡孙后妃将相寶玉士马车服无筭先后露布闻诏振旅还京既至高帝为幸龙江劳之所以慰賜有加授开国辅运推诚宣力武臣特进光禄大夫左柱国太傅中书右丞相叅军国事进封魏国公岁食禄五千石予告及铁券免三死子免二死仍世世勿絕賚文绮帛百疋是岁辞判省事右丞汪广洋代之明年复佩大将军印镇北平以便宜徙山后顺宁等处军民戶三万五千八百口一十九万七千余籍为军者给月廩为民者给田以耕凡置屯二百五十四定垦田一千三百四十三顷北平军府之用皆赖之十二月受诏还京师十余日高帝召達与曹国公李文忠宋国公冯胜宴射而賜之交址弓五十彤弓百因諭之曰古者诸侯有四夷功賜之弓矢達等谢上若注意者再归而相谓天下甫息肩得无又有大兴乎甫旬日而高帝御武楼

与计边事曰库库游魂尚出没奈何達乃请曰亟发兵坑竖子耳度兵几何曰十万足矣上曰吾予尔十五万骑大将军出中路文忠以左副将军出东路胜以征西将军出西路将各五万骑转饷私役者不与焉達抵山西境都督蓝玉为前锋败其游骑于野马川复败库库于图喇河库库遁与贺宗哲合而拒我师于岭北时师数发■〈谷丸〉而心易敌骤与之战不利死者万余人達固垒而收之故彻侯功臣无死者敌亦不敢入塞而偏将军汤和遇它敌于断头山亦败左副将军出塞至口温虽少利而道远乏水其后军亦为敌所掩失彻侯曹良臣大校数人然得其士马辎重畧相当独征西将军与副将军友德至西凉屡破敌尽收其妻子以私匿马駝故赏不行而上以達功大弗问也自是達连岁出镇北平岁行尽即召还上将印赐休沐以时宴见欢饮有兄弟称而達愈恂恂恭谨尝从容谓徐兄功大未有宁止欲以吾吴时旧邸居若達固谢不敢一日与之邸强沃以酒醉而覆之被舁卧正寝醒而惊輒俯伏阶下呼死罪上益悦命有司治甲第表其坊大功曰令天下后世毋忘尔達长女得尚燕王王高帝爱子也国于北平故達归将印之不踰月輒复之镇时北敌渐衰弱而亦畏達威名稀敢复犯边達亦戒守边者唯缮城戍简士马谨烽堠而已毋得轻徼外功启衅故终達之镇北平十余岁兵民熙熙有太平色燕王有三子皆達女出亲为王舅与天子夷輩而见必执臣礼不少间王以是心念之又得其用兵法所练士皆选后从王起靖难立大勋绩要非偶然者胡惟庸为左丞相憊而贪以達元勲贵重欲因以内好達恶之不答则赂達阉者福寿使为间以图達福寿发之達亦不问惟时时为上言惟庸不可过委过委必败后惟庸反高帝以是益重達而其后自北平疽发背小愈上使達子允恭视之赐玺书谓今九夷八蛮大者畏力小者懷德非将军何以臻此且召之归疾益甚高帝忧之为延致天下名医复禱于山川社稷城隍之神愿假大将军息数载以宁万姓吾他日与之同往竟不起年五十四高帝袒跣奔達寢抚尸而恸寻辍朝怆然谓羣臣大将军为朕股肱心膂力阵东征西讨削平羣丑克济大勲迺者太阴娄犯上将万里长城一旦夺之悲夫尽心国家为社稷重者宁复有大将军吾何以报之但着其勲烈宣于金石永垂不朽耳贈達中山王谥武宁追封其三代皆中山王而手书其混一区夏奠安神人之功于墓道且曰妇女毋所爱财寶毋所取忠志无疵昭明乎日月惟大将军一人而已自達薨高帝所授大将印独宋国公胜凉国公蓝玉而颍川侯友德以功进封公其受賑亦数然上待之不能如達诸所饬厉唯称中山王或中山开平二王而燕王即帝位为太宗举中山王以励诸将军者不一達虑精而言简令出不二诸将奉之若神明而善拊循其下同甘苦士不饱不就食不营止不就幄伤病者躬慰问给医药死者哭而棺槨之得壮士与谍輒不杀以恩结其意皆为我用所平二大都三会省望郡膴邑以百数无敢有扰民者归朝上符印单车垂橐以还邸舍生平无声酒伎媵之好亲礼儒生与谈经术古事雍容如也始高帝郊祀后即建功臣庙于鸡笼山图達战功与太庙配享位皆第一達有子女各四人曰辉祖曰添福曰增寿曰膺绪添福早卒膺绪初为尚宝卿迁大同中卫指挥僉事再迁中军都督僉事奉朝请太宗朝辉

祖增寿皆前卒而膺绪以元舅见尊宠仁宗初拜膺绪子景珩中军都督金事景璇金吾前卫指挥金事诸孙为指挥勿絶其二女皆为王妃辉祖初名允恭长八尺五寸有材气起家勲卫署理左军都督府事月给禄二十石達薨之踰岁而赐今名袭公数遣往北平山东河南练兵治饷还领中军都督府建文帝即位之未几而燕王以属尊见疑辉祖其亲妇弟也王之次子高阳王高煦时留京师邸窃辉祖善马逃辉祖遽以闻建文帝以是益亲信之辉祖亦秉节无二进兼太子太傅燕兵渡京口辉祖犹与开国公常升等分道出战独力王下京师独弗迎以是文武羣臣论劾辉祖削爵勒归私第寻下缙骑狱者五年而卒盆死仁孝皇后亦弗敢请嗣至十八年而上念達功大且以故后恩俾其子釵袭爵尽还其诰券岁禄赐田明年来朝不待命辞上犹恨之复削爵徙凤阳仁宗即位釵复来朝诏复故爵寻卒子显宗嗣嗣二十三年而卒无子弟承宗嗣娄领军府提督南京守备加太子太傅矜严有威练達政体嗣十六年而卒子甫嗣凡再督南京守备持重善为容南中士民熟称之加太子太傅嗣五十二年而卒赠太傅孙鹏举嗣鹏举之生也甫梦宋岳鄂王飞入其室故以字名为人温厚长者凡三领军府督守备加太子太保晚节嬖其妾奏立为夫人欲以其子邦宁称嫡会有所格不得立立其庶长子邦瑞鹏举嗣公凡五十二年卒邦瑞嗣督守备寻以病辞自显宗嗣而高帝孝陵在留京者以懿戚世世奉祀文皇初即位以一中牢告中山王其后因之增寿以父任三迁至左军左都督侍宿卫建文帝业以持燕王事从容谓增寿王得无反乎增寿顿首曰燕王先帝同气且富贵已极何故反燕师起则时时从增寿■〈言向〉虚实增寿亦时时从王所输欵建文帝渐觉之未及问而燕师从金川门入召增寿诘之不对手剑断增寿腰燕王入抚尸而哭既即位封增寿为武阳侯再追封定国公俸子景昌嗣岁禄二千五百石久之领军府嗣凡三十五年而卒子显忠嗣十二年卒子永宁幼又七年而嗣疾失心予半禄罢朝请病二十六年卒子光祚嗣久之领军府以东宫旧恩超进太傅旋以监修武睿二朝实录成累加太师兼太子太师凡四十五年卒子延德嗣领军府四十余年卒子文璧嗣领军府加太保太子太傅嘉靖中诏裁恩泽世封而魏定二公皆自以功弗夺有言定公功不称者卒弗夺也天下仅五公達子孙居二焉

弇州外史曰高帝之取天下计初下建康再与陈友谅角实在行而其它十七皆大将军力也大将军之廉靖仁武沈几筴胜即古名世之佐曷过焉劳而不伐夙夜匪懈与功名终蓋所以处君臣之际微矣元女侑配英主整其成师于十五年后而资靖难两都二公光表后裔宠冠羣辟夫岂幸哉儒生之第武者輒先太公望夫太公因累世之圣奉以伐至不仁牧野一战倒戈攻北无所藉于鷹扬而殷社栗矣土一胙而疾驱于安丘之逆旅举贤尚功汲汲以为齐百世计孰与夫大将军受賑而忘其家誓众而忘其身论爵第赏而忘其子孙哉吾故持标而昂之以为古今勲臣第一云

弇州续稿卷八十

●钦定四库全书

弇州续稿卷八十一

（明）王世贞 撰

○文部

△史传

开平岐阳宁河三王世家

开平王常遇春者濠之定远人其先世为农家遇春长身白皙有胆力猿臂善射元末羣盗起躡江淮间而盗魁刘聚者得遇春而识之使为什夫长有所攻剽遇春敢力深入必克获而归以是为聚所爱重而遇春察其急鹵掠毋远志属高帝驻兵和州乃偕其私卒数十来归居两月未有所见自请为先锋上曰尔饥故来归耳且有故主在吾安得夺之遇春顿首泣曰刘聚盗耳无能为也倘得効犬马之力于知者虽死犹生上犹弗许曰能相从渡江乎取太平而后臣我未晚也既渡江抵采石矶元兵置阵于矶上舟相去者三丈余矢刃猬集莫敢登遇春飞舸至上麾之应声挺戈跃而上敌皆披靡帅师乘之大败其众遂乘胜取太平始授总管府先锋无何进为总管上既已渡江而诸将士家属輜重皆在北滁和之守备单而元中丞曼济哈雅拥舟师数万袭据采石界其中间音问絶上率大众攻之使遇春多张疑兵以分其应而自帅正兵捣之既合而遇春别操轻舸以精兵横冲哈雅之舟分为二左右纵击大破之悉俘其精锐自是元师扼江之势衰而南北通矣遂从取集庆路再从徐达取镇江复为领军先锋徐达攻常州而降卒叛与张士诚合而围达命遇春以师援表里击士诚大破之擒其梟将张将军复为总管遂进统军大元帅克常州迁中翼大元帅寻从徐达下宁国分兵取马馱沙遂取池州战功最进行中书省都督马步水军大元帅从上取婺州复有功进镇国上将军同金枢密院事守婺州遂以其兵攻衢州衢州下其院判张斌以卒万人降克衢州进金枢密院事移兵攻杭州久之张士诚兵来援累战战不大利召还京师寻从徐达守池州大破陈友谅之众语具达传陈友谅入寇薄我于都城之龙湾上设伏大破之遇春功复最上追友谅于江州遇春留守用法严军民肃敛进行省参知政事复从上追友谅于安庆遂取江州还督龙湾寨之师张士诚之大将李伯升围我长兴援兵遇之败长兴围急上乃遣遇春

以大军援之兵至伯升拔营遁俘斩其后军五千余人城安庆破池州之叛卒罗友贤斩之余党悉平上所任将帅其最著者三人曰平章邵荣右丞徐达与遇春荣最为宿旧且善战既贵而骄有所不得志輒谋伏兵置酒要上饮而劫之事发就縛上犹语诸将吾欲宥荣死以慰劳臣众唯唯遇春直前曰人臣而以反名寧可宥臣諠不与之共生上乃饮荣酒流涕而僇之以是心益爱重遇春张士诚别将吕珍围刘福通于安丰上救之师至而珍已破城杀刘福通矣其兵势盛而连营水陆为战守备甚严时汪元帅为前锋拔其中垒而据之会左右军败汪元帅兵欲出走阻于堑则殊死鬪卒不可败而遇春以精骑横突其胁凡三合三胜大军乘之遂大胜俘获士马无筭进围安丰元将左君弼自庐州来救徐达与遇春逆击大破之遂移薄庐州且下而陈友谅倾其国兵号五十万来争南昌围之数重凡三月余而上趣达遇春庐州之师归遂从上往救遇于鄱阳湖之康郎山达首败其前锋纵火焚敌舟二十艘杀获以千计而敌不退友谅太尉张定边奋前犯上舟适胶浅事且迫遇春从傍射定边中之始稍稍引退上舟脱而遇春舟复胶力战以脱明日复大战乘风纵火焚其舟数十里湖水尽赤友谅弟友仁友贵等皆焚死连战三日友谅之卒死者过半而我兵所亡失亦畧相当既出湖口诸将佐气稍稍夺欲纵之去遇春独不言上悟乃移舟扼上流而别出奇兵絶饷道凡旬五日而友谅军食乏其左右金吾将军皆降友谅迫以百艘突围湖口而上蹴之自辰至酉友谅中流矢死俘其卒五万人斩及溺者三倍之乃班师饮至策勲以遇春及廖永忠俞通海为首赐土田金帛过当复从上讨友谅之子理于武昌围甫合而其丞相张必先自岳来援遇春以五千骑逆击破擒之必先友谅骁将也陈理魄夺出降进遇春中书平章政事寻从徐达取庐州始别将兵畧定临江之沙坑麻岭十洞牛皮等寨遂定赣州下南安南雄韶州诸路师还取安陆襄阳复从徐达克泰州已克高邮淮安徐宿安丰悉下之大发兵讨张士诚命遇春仍副大将军达而行舟师出太湖擒其万户尹义等直趣湖州之昆山与士诚兵水陆劲鬪敌大溃遂薄其城飞车战舰高皆与睥睨埒其丞相士信扫境内兵来援筑垒旧馆压我师之背遇春率奇兵由大港入营于东阡却压其背士信急抽精兵搏战遇春鼓将士立破之复破其援兵赤龙船于乌镇士信跳旧馆之卒降得六万人湖州亦下遂进围平江路数破其城中兵凡八月始克之缚士诚以归籍其兵得二十五万时上犹称吴王召见戟门所以慰劳备至进银青荣禄大夫上柱国録军国重事封鄂国公上念遇春功大欲尊贵之而李善长徐达已为左右相国不能复置相乃以遇春为平章军国重事制禄秩与相国等复议讨中原遇春有所献策语具徐达世家遇春之前议讨张士诚策亦如是大较欲轻兵直捣其心腹肢节当自瓦解上持重不之用也而心伏其勇至是命遇春为征北副将军与大将军达率步骑二十五万以北上亲褫旗于龙江谕诸将当百万之众摧锋陷阵所向披靡无如副将军遇春第吾不虞其不能战虞其轻战耳夫遇春大将也而好与一小校争能甚非吾所望也遇春顿首拜诏既行吴王即皇帝位册立皇太子以遇春领其少保遇春师与大将军合畧定山东诸郡遂破汴梁走其帅李景昌进

攻河南元兵五万阵洛水北将合遇春单骑突其阵敌以二十骑攢槊刺遇春遇春发一矢殪当先者大呼而入麾下壮士从之遂尽杀其二十骑敌遂大溃河南下诸郡邑悉平上为幸汴梁至之二日而遇春驰入谒上劳之曰将军与大将军北征不踰岁而下中原之半功亦大矣劳且倍矣遇春顿首曰亡元之民服上威德耳臣等祇奉成筭以效驱驰固大幸也上悦三日辞复往河南遂与大将军畧定河北进逼其大都元主北走遂取之移兵徇太原元太傅河南王库库特穆尔自保安还师来援其锋锐甚遇春与达谋曰我骑兵虽集而步卒未至骤与之战必多杀伤且未易决也夜劫之彼必有走而溃耳达曰善夜劫之库库果溃而走太原下改遇春为左副将军居右副将军冯宗异上出寨取大同转徇河东西渡关下奉元路遂与宗异合而西逼凤翔其平章李思齐率所部十余万众奔临洮凤翔下会元丞相伊苏以兵寇通州至白河而遁上乃遣遇春以所部驰至故元都部署将士而浙江行省平章李文忠副之遇春谍元主在开平乃选步卒八万骑一万取道三河经鹿儿岭抵惠州败其将江文清于锦州获士马千计次全宁遂与伊苏遇复败之进次大兴州遇春使分千骑为八伏徼其归大兴之守兵走伏发大败之擒其丞相托和济遂薄开平元主已前走追北数百里俘其宗王庆生平章鼎珠等斩之凡得将士万人车万辆马三千匹牛五万头子女货宝称是师还次柳河川暴得疾卒年仅四十一上为震动丧车至龙江亲出奠为文哭之叙其功甚详已而大恸始命有司制闻大臣讞用宋太宗为韩王赵普举哀礼择葬地钟山之阴明器与灵凡九十一切皆官给不以烦其家仍驿书报大将军达使归而会葬特赠翊运推诚宣德靖远功臣开府仪同三司上柱国太保中书右丞相追封开平王谥忠武复推恩王其三代皆赐谥时犹袭元故明年论功赐金币一与大将军等而封子茂郑国公岁禄二千石予诰券配飨高帝庙庭与祠鸡笼山功臣庙皆次大将军为第二遇春为人沈鸷果毅抚士卒与同甘苦皆乐为之用出则摧锋退则殿后未尝败北虽不习书史而用兵决胜与古人合年差长于大将军二岁数从征伐奉节制进止赴期不敢爽毫髮大将军雅亦推爱之终始无小间惟性稍好杀而淫以此不能比大将军而一时称名将者犹曰徐常徐常云而上亦均重之晚节每举以励诸将帅必曰中山开平二王不偏废也郑国公茂者弱冠而封其妇父复为宋国公冯胜以是益骄贵不练事上亦知之故不复使将封十七年而隶宋国公胜比北征纳克楚茂念诸彻侯位其下皆得有偏裨任而已独不得偏裨任邑邑不乐多不奉宋国公约束而宋国公儿子畜之数加责谯茂故慢辞以应宋国公恚而会纳克楚请降诣右副将军蓝玉营饗酒与衣相忤纳克楚悔欲出而茂直前搏之纳克楚走茂复斫之伤而部卒颇有惊溃者宋国公得修恚上书增饰其状以为茂激变诏即军械系至京而茂亦列上宋国公贪淫不法事上乃收宋国公大将军印而削茂爵安置广西之某所然犹念遇春功别封次子升为开国公茂至流所而龙州守某土夷也慕茂家世以爱女事之而与他土夷争为所发茂闻之伏毒死或云龙州守隐之他所实不死上为穷索茂且发大兵继之而卒不得茂踪迹或云定死矣乃小解而升嗣公之明年加太子太保建文末以抗

靖难师得罪安置云南之临安以忧死子继祖继祖子寧寧子复弘治中錄六王后得拜南京锦衣卫指挥使子绍袭绍卒子经袭经卒子凤袭凤卒子玄振袭嘉靖中继絕世封懷遠侯号为开国辅运推诚宣力武臣阶特进荣禄大夫勲柱国岁禄千石卒子文济嗣文济卒子胤绪嗣

弇州外史曰高帝以神武定天下其臣皆莫及然至于中山开平二王则心仪焉开平之甫定大业而不与其荣宜帝之悲思之也世谈开平之勇而诚意之谋皆怪而陋夫嗜乌跳荡百夫雄耳彼岂知有所谓大将者夫封鄂而谥忠武唐之尉迟氏宋之岳氏并开平而三大将之材岳氏则吾开平伯仲哉

岐阳王李文忠字思本泗之盱眙人父曰陇西恭献王贞母曹国公主上之长姊也贞农家子无他长独有醇谨而公主归之生文忠甫十二而公主薨时淮南北盗起父贞携之东西走锋镝间几不能活闻上已起兵滁阳间关往投之至则相抱而哭皇子幼上多蓄童稚之材勇者子之时文忠尚名保儿使冒国姓而从皇侄文正列延师诲之读书史傍习兵法上尝携所业传示幕僚曰平世一卿士也虽然要当于马上习之俾以舍人从军策应池州奋击破陈友谅之卒骁勇为诸军冠时年仅十九无何以舍人率所部取青阳石埭旌德皆下之败元枢密院判鄂尔和于万年街遂败苗军于于潜昌化获其妇女辎重甚伙文忠念士饱饮且骄夜潜杀所获而焚其辎重以激之曰患不力战耳何患不富贵乎遂前袭破洪元帅营降其众千余寻会邓愈胡大海之师取严州超为帐前总制亲兵左副都指挥使兼领元帅府事镇之时严新下城垒未固而张士诚来争挟苗獠之众水陆数万人奄至文忠以轻兵从陆逆击大破之馘其首标之槎而放之中流水兵见之亦夜遁遂克诸暨进浙江行中书省左丞苗将蒋英贼杀其帅参政胡大海以叛文忠急击破之蒋英走诸暨守将谢再兴亦叛挟张士诚寇我东阳文忠驰救复破之再兴走文忠以反侧郡处两叛间又与强敌接壤而练兵缮甲屹不可屈始文忠所筑逼诸暨而城者曰新城士诚之司徒李伯升悉兵号二十万来围新城文忠救之令去城十里而军新城之将来告谓贼势盛不敌盍小避其锋俟大军至而后合击之文忠曰俟大军至城为彼有矣将在谋不在众寡遂誓师而鼓之曰彼众而器我寡而整何彼之虞且闻彼之辎重山积矣是天以富赐若曹也勉之众咸奋战既合文忠横槊引鐵骑数十乘高驰下直出贼阵断其中坚贼列骑迎战文忠手格杀数人纵横搏击所向草靡贼骇而乱相蹂躪大军乘之城中守兵亦鼓噪而出呼声动天地无不一当百贼遂大溃斩首数万级擒将校七百人委弃铠仗刳粟弥亘数十里伯升仅以身免自是气索不能军矣上召文忠归宴劳弥日赐名马金币甚厚进右丞使统全浙兵攻张士诚之杭州取桐庐新城富阳进攻余杭一夕而下之叛将谢再兴之五子降杭帅潘平章原明使其员外方彝纳款文忠诘之曰兵未交而遽纳款得无姑为缓师计乎彝谢曰王师所过秋毫亡犯杭之吏

民鼓舞而庆有主何敢缓文忠见其诚引之卧内与饮而授之约束明日原明如师师遂入文忠营于丽谯下令曰敢有擅入民居者殊死一卒下借民釜立礫以徇自是中外皆安堵如故就加荣禄大夫行省平章政事还李姓上即位封文忠父贞恩亲侯食禄奉朝请上念姊已久死独贞在而又醇谨宴见不以时每有征行輒令守宫省文忠既父子当腹心寄亲重无与比寻讨平闽之叛寇还为偏将军从开平王遇春北讨由遵化度鹿儿岭进薄上都克之走元君获其士马万计语具开平王世家俄而开平王卒于军文忠代将诏移兵陝西与大将军合而攻庆阳行次太原庆阳则已平而元东攻大同甚急文忠曰兵可无西也援大同便军吏以为疑文忠按剑叱曰阃外之事吾得專之敢言不援大同者斩遂出雁门次马邑败其逻骑数千擒刘平章进次白阳门擒四大王前军已去敌五十里而营文忠遽移之五里前阻水自固敌果夜率众来劫我不可动质明文忠望见敌益大至乃以二营委敌俾死战久之度其饥疲乃选精兵为左右翼奋击大破之乘胜逐北擒其骁将图鲁卜俘斩及降者万余人穷追至孟克桑而还论功赐金币当大将军之半明年进征北左副将军与大将军分道北讨文忠以十万人出野狐岭进师既擒其平章都沁谍知元顺帝殂太子阿裕尔宝哩达喇即位其众离文忠喜兼程而进大破其候骑遂围应昌明日破之太子走获皇孙密迪哩巴拉后妃宫人暨诸王省院达官将吏等驼马牛羊无筭并获宋元玉玺金寶十五玉册二镇圭大圭玉带玉斧各一选精骑穷追至北庆州不及而还道兴州降其兵民三万七千人至红罗山又降其兵民万六千余人捷闻上大悦为御奉天门受羣臣朝贺大封功臣文忠为开国辅运推诚宣力武臣特进荣禄大夫右柱国大都督府左都督曹国公同知军国事食禄三千石赐诰券世袭寻领都督府事西蜀平命文忠因兵威拊循其地还复以左副将军北讨出东路师至哈喇莽赉元人遁文忠乃留輜重庐胸河人赍二十日粮兼程进至图拉河元太师哈喇章曼济悉众渡河留其妻子北向而严骑以待文忠力战却之逐北至骋海敌来益众文忠乃据险自固而多张疑兵以劫敌敌疑稍稍引去文忠亦解而归迷失道乏水渴死者甚众文忠患之忽所乘马跑土泉随涌出土马赖以俱济文忠军虽名为全而所失多得不足偿而大将军之出中路者竟败绩矣寻复与大将军行边尝出朔州擒其太尉巴延布哈又尝驻代县分遣兵出至伞巴喇者俘其平章陈安礼至顺寧阳门者斩其知院戡矩嚕至白登者俘其国公邓博啰特穆尔又破大寧■〈彡 島〉州斩其宗王托多锡哩皆卤子女人畜归敌益避遠边竟无事矣文忠与大将军皆折节延诸儒生讲说经义彬彬而文忠尤号有文采上益雅重之始命与李善长通知中书省大都督府事御史台事又命大事皆取二公处分中书省革命文忠特参军国大计几如大将军又兼领国子监事而文忠劝上少所诛僇微忤旨寻得疾二月增剧上幸其第抚摩久之挥涕而别文忠卒年四十六赠岐阳王谥武靖父贞初亦封曹国公别食公禄前文忠卒亦赠陇西王谥恭献有二子景隆增枝景隆生而长身伟姿踈眉目顾盼炜如既少奉文忠教齿诸生间与天台方孝儒善多习典故善谈论每朝会进止雍容甚都上亦目属之既袭爵与魏国公辉

祖等分镇中原要害地所使多称进掌左军都督府加太子太傅上崩皇太孙立景隆益以肺腑见亲任而增枝亦委迁至左都督进加景隆太子太师时兵部尚书齐泰太常卿黄子澄得幸上谋削弱诸王至燕而露燕兵起长兴侯耿炳文武定侯郭英等攻之前后皆败于是齐泰黄子澄皆才景隆而荐之乃命景隆为征虏大将军北伐用裴度故事赐通天犀带人主为推轮亲送之江浒且令得以一切便宜诛赏时诸宿将多物故鲜存者而存者亦已老又皆景隆诸父行怏怏不肯为之下而景隆暴得意自尊大每升帐踞高坐毋敢与抗礼者皆唯唯不能吐词组而退景隆会兵五十万于德州乘燕王之攻大宁遂进薄北平筑垒九门为长围以困之王还师自救景隆逆战大败死者十余万明日九门之师复溃死者复数万乃退走王复攻大同景隆引兵出紫荆关时寒甚士卒堕指者什二三乃移书燕王请罢兵辞骄蹇王亦贻书来报而心恨之甚遂战于白沟河北凡三日而景隆复大败杀溺及被俘者几三十余万景隆乃奔济南燕王来追复大败死者二万余济南遂见围以叅政鐵铉坚守不下始人主未知败问与泰子澄谋以景隆权尚轻特赐黄钺金钲朱弓矢使者渡江而风失之复制以赐而景隆败问至矣召还既陛见黄子澄惭愤极执景隆于朝班恸哭请诛以谢天下人主莫能问也又二载师屡覆燕兵悉渡江驻龙潭人主惧乃使景隆同尚书茹瑺都督王佐来谒燕王以割地讲和请王笑曰事至此何地可割吾但欲得奸臣耳于是景隆等蒲伏密输款归佐谷王守金川门燕王至景隆等开门逆之王即位以景隆等默相事机改号曰奉天靖难阶曰光禄大夫勲曰左柱国增禄岁一千石其太子太师如故赏埒淇成二公改修高庙实录为监修总裁诸裁定功赏大兴革景隆犹以班首主义天子虽外示崇重而心恨之益甚诸功臣咸扼腕谓彼白刃割我而今以降虏而据我上其又明年刑部都察院大理寺臣论劾曹国公景隆包藏祸心蓄养亡命与其弟左都督增枝谋为不轨已文武大臣太子太傅成国公朱能等吏部尚书蹇义等复言之已六科都给事中张信等复言之乃下诏尽削景隆勲阶官号绝朝请勒归私第犹以长公主故不夺其爵亡何文臣羣臣复言诋事者至其家景隆犹坐受阁人伏谒如君臣礼大不道复株及左都督增枝因诏并夺增枝荆州帅符逮之与景隆同系私第尽没其庄田宝货图籍臧获入之官而所系者皆亲属矣尝绝其食旬日不死始稍稍给食至永乐末而景隆竟以冻馁卒正统中增枝犹在以恩例听自便又数传而其玄孙璇为南京锦衣卫指挥使卒子濂袭卒子性袭嘉靖中继六王后封临淮侯勲号阶禄同懷遠侯卒无子叔父沂嗣卒子庭竹嗣数领营府为漕事卒子言恭嗣好文学有岐阳王风委寄大约如庭竹

弇州外史曰岐阳王不数为大将将輒有功敦诗说礼有儒者风斯所以肺腑哉高帝起民间屡更燹谨兄之子独大都督文正姊之子独岐阳王而大都督不善居勲父子以废徙而高帝念之不絶其国盖二百年而南面犹故也临淮之绍侯其亦高帝遗意哉

宁河王邓愈者泗州虹人父曰顺兴有三子长曰友隆仲即愈愈生而有大志及长貌魁岸勇力絶人元末羣盗起江淮间顺兴从乡里少年自保遂据临濠与元兵拒战友隆代之复病死愈复代之是时年仅十六众颇少愈既出战则先登陷阵无所不摧破众乃喜曰使仲君早将何至以首予敌而会高帝驻师滁阳愈自盱眙率所部来附授管军总管遂从渡江而南克采石取太平元将陈额森合曼济哈雅之兵凡数万来见侵上御之战甫合而愈与徐达率奇兵绕出其后大破之获额森曼济哈雅走遂从下建康畧定溧水破镇江愈功最多擢广兴翼元帅克广德州长鎗军谢元帅来攻愈出轻兵背城战走之俘其总管武世荣馘甲首千移镇宣州别将兵取休宁绩溪与胡大海合而攻徽州下之走其将元之苗军杨元帅以十万众来争愈与大海励将卒分道逆战大破之虏其大校百五十八人杨元帅走婺源之裨帅汪同来降愈遣骁将王弼孙虎等因之进逼其城破杀其守将特穆尔布哈获级三千余婺源下得兵三千余寻遣万户朱国寶狗高河垒下之遂由昱岭关进攻建德破其长鎗元帅余子贞获马百匹追奔至淳安复大破之获战舰三十卒三千遂克建德以为严州进同佥行枢密院事破元将且扬之兵于乌龙岭进佥书行枢密院事饶州下愈入守之数与陈友谅角有功进中书省叅政佥院如故兼总各翼军马愈乃广布上威德抚纳降附左丞吴宏等皆自拔归以兵取浮梁走其叅政侯邦佐转战乐平败萧总管之众获万户彭寿等诸属邑皆下遂进图洪都驻师临川之平塘时吴宏既已归上因其兵使取抚州抚州帅邓克明欲与宏拒而畏愈强乃遣人诈献地愈将以缓我愈诟得之即率劲兵间道夜驰二百里黎明下其三门克明出不意单骑走之傍邑自度不免乃以分省印及所掠抚州等四路南丰等十八县印诣愈降愈遂定抚州上进兵取洪都降其丞相胡廷瑞平章祝宗同佥康泰等召愈以步兵来会改江西行省叅政镇之而命祝宗康泰仍故官以所部从宗泰初不欲降迫胡廷瑞意怏怏不自得又以愈秩卑不欲为之下而廷瑞既从上还建康从容为言降故非宗泰意恐有变时右丞徐达方进攻楚乃发使使以所部从行舟次女儿港遂谋叛掠商舟布为旗帜夜趣新城门举炮破之而入愈时居故廉访司闻变仓卒以数十骑走数与贼遇且战且走从骑被杀且尽愈窘甚连跨三马马輒蹶几不免最后得养子马乘之乃得脱夺抚州门而出奔还建康以情归于上上弗罪也而抚之右丞达兵复洪都走祝宗执康泰于是大都督文正开府洪都愈次焉明年陈友谅恣国师围洪都号五十万治战舰高与城等文正约束将士乘城守而愈得抚州门最为要冲愈昼夜不解甲者三月余而上来援大破其兵射友谅杀之围始解论功与克敌等寻破平邓青等二万人于永丰从开平王遇春荡临江之沙坑麻岭十洞诸山寨围赣州下之南安南雄韶州诸路悉降进行省右丞寻进湖广行省平章政事平章位次丞相而愈时年二十八兵兴诸大将蚤贵无有如愈与李文忠者出镇襄阳襄阳西接巴蜀南控楚北襟河洛烽火旌垒相望愈披荆棘立军府营屯练卒威惠甚着初建御史台首拜右御史大夫时左大夫汤和讨方谷珍愈领台事上书言便宜上慰而诲之于是大将军经畧中原而愈以征戍将军畧定江淮未附州

郡进兵取唐州又取南阳生获守将蔡国公史克新等遂取随州守将左丞王诚隆覆洪山之老马刘寨斩获以万计均房金商地悉平高帝即位立东宫愈兼太子右谕德以征虜左副将军从大将军出陇右大破王保保于定西悉覆其众别将招谕河州土番大酋何索诺木布哈鄂尔济等请降其西乌斯藏等亦降皆入贡请受天子封师旋大论功封开国辅运推诚宣力武臣特进荣禄大夫右柱国卫国公岁禄三千石予鐵券子孙世袭又明年以征南将军讨澧州等处溪洞蛮獠悉平之又四年吐蕃诸部为梗劫剽乌斯藏贡使輜重愈以征西将军率都督同知沐英等往讨之愈分兵为三道深入覆其巢穷追至昆仑山斩首捕虜以万计卤马牛羊十余万捷闻上悦使使召还中道得疾卒上闻讣哭之恸辍朝三日丧车至三山门亲临奠行营视葬地以故莹隘改卜于城南西山之原葬事皆官给追封宁河王谥武顺是役也都督英得封西平侯愈为人沈毅详敏其事上最恭慎有所委不惮危苦功成不矜敬礼贤士大夫上心重之前后托寄亲旧莫敢望焉有五子而镇袭改国申亦数将兵从大将军卒年二十三无子弟铭为锦衣卫指挥僉事有子源当后镇而天永乐中子挺停袭挺子炳弘治初复为南京锦衣卫指挥使卒子继坤袭嘉靖初继絶世封定遠侯勋号阶禄视懷遠侯卒子祖錫嗣卒世栋嗣

弇州外史曰愈之初以敢战深入名亡几而建方面勲最多而不甚伟然汗马者无宁岁矣儻爵上公带砺六王而以天死不获终飨其奉或谓高帝末功臣鲜自保者得天为幸是不然以愈之忠顺勤劳虽为毕万可也外史曰余游襄阳阳人至今称卫国公云

弇州续稿卷八十一

●钦定四库全书

弇州续稿卷八十二

（明）王世贞 撰

○文部

△史传

东瓯黔宁东平三王世家

汤和字鼎臣濠人与上同里闰少孤卓越有奇志尝从羣儿嬉輒勒习部伍见者异

之及长身长七尺余多力善射滁阳王之据濠也和从恶少年十余人仗剑从之遂隶麾下每出跳荡必当锋还则殿后自百夫长从取九湾再从攻定远覆其师进千户而是时高皇帝以王壻寄肺腑请于王与和共事遂从取洪山寨得其兵八百再进长万夫复从下滁州为管军总管复从取和州当是时诸将皆高帝等夷莫肯为下而和长帝三岁顾请执部曲礼上甚悦之元将陈额森来寇和败却其众从上渡江下采石定太平所部获马三百卒千人陈额森复来寇和击其水军流矢中左臂不为挠寻与中山寧河二王自东门出甲转战至城北大破之遂擒额森以献别将下溧水从平建业复与中山王取镇江进统军大元帅守之畧定金坛覆窠莊戍转同金枢密院事从取常州为其守帅与张士诚境接时和颇好饮有酒过尝请事于上不获允醉而有怨言谓其下曰吾镇常州如据坐舍脊左顾则左右顾则右谁能难也有言于上者上隱之不发和亦大愧悔悉力拒士诚凡再破其军获战舰及马以百十计遂从中山王大破士诚于锡山僇其梟将获甲首五百又逐其将莫元帅走之虜其妻还拜中书左丞与中山王分省而治复同开平王解长兴围大破士诚之伪丞相士信军超拜平章政事讨平江西巨盗姚大胆遂西取永新州僇其左丞周安等籍其士马归于京师出守常州寻拔常州之戍于师从中山王讨士诚进畧太湖降其旧馆师转战湖州降守帅张右丞复降其吴江州将遂薄姑苏围之凡九阅月而下上召见戟门论功赐帛九有副上即大位始建御史台为左御史大夫立东宫为太子左谏德时方国珍犹据温台庆元三郡反复未果下和以兵讨而蹙之走海岛进逼之悉得其众以降遂移兵取福州时陈友定犹为元守建寧城险兵劲和以征南将军率诸将攻下之虜友定以归扈上幸汴梁遂同宋国公取懷庆泽潞晋絳诸郡寻从中山王拔河中渡河入潼关趋凤翔越六盘山秦陇皆荡平明年复从中山王大破元丞相库特穆尔于定西遂定寧夏追敌于察罕诺尔擒其猛将虎陈凯从之九月大封赏功臣与卫公邓愈俱为御史大夫而和居左且年位久在其上以功不如仅封中山侯为开国辅运推诚宣力武臣荣禄大夫柱国岁禄千五百石始露其守常州时语和惟顿首谢过而已明年为征西将军与副将军廖永忠等以舟师自夷陵入峡攻夏夏发兵扼险不得进永忠趣之复不决而征北副将军颍川侯友德自秦陇深入取汉中永忠乃决计先入破其扼险之师长驱抵重庆和始继之夏主明升以重庆降而友德亦定成都蜀平天子推功友德永忠受上赏责数和逗挠而姑予之彩帛八和复顿首谢罪又明年和以偏将军从中山王北讨分道击贼战于断头山败绩失彻侯一人久之进濠州为中都凤阳府命和与太师李善长于其地建宫阙分置曹署以久劳于外数赐玺书慰劳寻薨通州之外郭徙镇彰德薨其城上以和用兵数失利不任将而坚忍多智数又能与太师善长抗故时委以综理之任輒效且念其为里闾长者竟封为特进光禄大夫左柱国信国公议军国重事岁食禄三千石与诰券与曹国公李文忠练卒于中都西巡至河州繕完其城郭营舍明年从中山王北伐覆灰山营获其平章拉哩噶尔枢密副使嘉勒通又明年巡四川永寧之壩濠训练其士马久之五开山獠乱和以兵讨之夷其穴鹵斩四万余

时中山岐阳二王皆已物故上念天下承平无事不欲诸大将数典兵而和识其意从容为上言臣老矣不敢称昼绣愿得归故乡为容棺之墟以待骸骨上大悦立赐宝钞伍万锭治第于中都寻悉为诸功臣魏鄂曹宋颖凉诸国公彻侯治第皆极宏壮既而谓和日本蕞尔夷而数为侵盗我不欲与之争固我封戍而已卿虽老强为朕一行于是使和行视山东登莱淮扬吴越闽岭滨海要害筑城凡数十民取一丁为兵戍之和竣事而新第成和率妻子陛辞赉黄金三百两白金二千两钞三千锭彩币四十有副又赉其夫人黄金二百两白金一千两钞五百锭彩币三十有副夫妇皆赐玺书褒谕其又明年魏曹等六公还乡赐皆如信公而夫人不与焉自是和与诸公侯岁一朝京师朝必有宴赏及道里费而诸公侯犹不时遣镇各边及将兵讨伐独和以老不在行而上愈爱之且安之其后入朝忽病中风不能言上闻即日幸其第抚视惋叹良久遣还里疾小间上使其子前军都督金事鼎迎至都俾以安车入内殿与酣宴而出赉金帛御膳法酒相属最后复大朝疾寢剧不能兴上复令以安车入内手摩抚其体与叙里闾旧及艰难劳勩和不能对稽首而已上为之雪涕出藏镵付有司为营葬地明年卒年七十追封东瓯王谥襄武和有五子长即鼎前卒追封信世子余三子亦前卒而少子醴积伐至同知左军都督府征五开道卒于军有孙十一人而弗及嗣六世孙绍宗孝宗朝录功臣后为南京锦衣卫指挥使嘉靖中继绝世封灵璧侯凡三岁而卒佑贤嗣卒子世隆嗣领漕事者十余年以劳加少保太子太保

弇州外史曰以汤信公之战伐其绩何寥寥也一逗挠一不利毗陵酒语至烦廷训而其后乃爵上公赠真王便蕃之锡诸勋旧不敢望焉岂亦以綰寂布衣之契故重耶显融令终美哉乞骸一语基之矣夫以绛侯勃之定策有社稷勲而烦人主诏乃怏怏之国彼其君臣俱失之也诗云既明且哲以保其身斯信公谓矣外史又曰余尝按行登莱海上及宦游吴越间其父老歴歴指烽戍云汤信公功不剿灭哉微信公吾其鲸鲵食矣嗟乎高皇帝之善器使也

沐英者凤阳之定远人父早亡育于母母复亡上起兵收而子之既长温爽有姿槩机颖过人初与李岐阳等俱冒国姓赐名文英差次皇从子文正数从上征伐入侍帷幄昼夜勤励目无迕视上心器之十八用为帐前都尉从守镇江居四岁擢广武卫亲军指挥使军政修饬加授昭勇大将军以所部从下福建擒平章陈友定有功归其姓沐而单名之曰英出镇抚建宁三郡亡何擢镇国将军金大都督府事明年进荣禄大夫同知大都督府事时都督不为阶官而英特受上心膂托佐李岐阳为政益精明中宫尤爱重英恒语上曰此儿吾子孙屏翰也久之命乘传繇陝西巡行诸路布上恩惠事有不便者辄更置而后闻且使练诸部兵以待明年遂副宁河王征西番西渡黄河略乌思藏耀兵至于昆仑转战数千里俘虏士卒以万计马驼牛羊十倍之师还而宁河王道卒英代将其

众还京师封西平侯进号开国辅运推诚宣力武臣勲柱国食禄二千五百石赐鐵券又明年拜征西将军穷追西番降元万户且实勒戡枢密副使舒多尔济道温都尔卒二万余杂畜二十余万平朶甘鼐尔七站地数千里复率所部荡和林转畧额齐讷渡黄河登贺兰擒伏听者得穹庐所止涉流沙分兵四翼薄其营自率精骑冲中坚大破之获大帅国公托和齐知院藹足覆其全部明年以所部从大将军出古北口袭公主山寨掩四部卒渡胪胸河获知院李宣亡何以征南右副将军同颖川侯傅友德永昌侯蓝玉下云南繇辰沅出罗鬼遂躡普安至白石江梁王巴咱尔斡尔密遣其司徒达尔玛选甲十万来拒颖川侯欲济师英以诸军严阵若渡者而奇兵潜从上游遶出敌后敌阵动大军乘而击之劲战自旦至晡蹀血震荡英与颖川永昌二侯多纵鐵骑横贯而蹙之生缚达尔玛敌大溃僵尸百里相属直抵云南悉收其金寶子女分徇诸郡皆下独大理犹为元守英与永昌侯攻之其帅段世据龙尾关为固英分一军夜从间道登点苍山袭其背质明英麾骑乱流至关壮士被羽先登关破伏兵从后夹击擒段世拔大理移兵取车里平缅不浹月云南郡邑悉平分省列卫戍简置守令劝课农桑复与颖川侯分道平东川乌蛮寇而夷兵叛者合围云南守帅冯诚等告急英简万骑驰救之贼夜遁乘胜急击遂悉复曲靖永昌之失守者诏英留镇云南而召颖川永昌二侯还颖川侯进封公英自如英镇之三岁而破平摩沙勒斩首千余级亡何麓川宣慰思伦发聚其众来寇号三十万英选卒三万拒之甫对垒使都督冯诚以轻骑三百压而挑之贼以万众乘二十象来战诚一战杀数百人获一象而返英喜曰贼不足平也明日贼悉众拥百象来鬪象皆被甲负战楼四周若栏楯挟大竹为筒于两傍筒置短鎗十余以慄我英分卒为三队命都督诚为前锋都督甯正将左都指挥汤昭将右各以火炮神机枪弩奋前击贼矢石齐发呼声震天地象皆却走英督大军乘之贼遂大溃斩首三万余级俘万人生获四十七象余皆被矢如刺猬以死贼帅刁斯郎等皆伏殪象背羣蛮震讙稽顙奉贡不敢复为梗明年复平东川破走叛首阿资入朝锡宴于奉天殿赉黄金二百两白金五千两彩币百袭钞五千錠陞辞上抚之曰使我高枕而无南顾之忧者尔也英归镇复大破阿资众走之使使以兵威折胁八百国并诸番有重译贡者时懿文皇太子薨英故尝侍东宫有恩谊闻之哭呕血一日方坐堂皇理事忽中风卒讣闻上恸哭辍朝命以丧归赐墓都门外追封黔寧王谥昭靖蓋异数也有五子其一子早卒而三子遞镇云南而少子昕尚太宗公主为驸马都尉屡掌南京都督府以寿考终惠襄侯春者英长子也年少有才武嗣英侯继镇云南尝破擒叛人阿咱尔卒年二十六无子弟晟嗣晟字景茂少凝重端恣寡言笑愠喜不形于色而质颖敏读书强记高皇帝甚重之甫冠即授后军都督僉事亡何进左都督以勤慎称既嗣侯即代为云南大帅时岷王之国云南尝与晟交恶上贻书王谓晟少孤不练事毋深责之吾当别饬晟然卒以王他故徙国楚独晟自如建文帝之自焚也文皇帝意其由地道以出或言匿晟所者使使谕察无状乃获免麓川之宣慰使不能制其下诸蛮逐之而擅其地晟以大兵讨平之分其地为孟养木邦孟密三府镇沅威遠二州平涯潞江

清甸大侯者乐五长官司而岁征其贡赋又于潞江之西置腾冲千户所以控之夷遂帖息八百国之长使其犷帅以蛮众来犯晟发兵使别将令逆击之而自犄其后至蒙自蛮退走追之获其帅赐玺书侑以金币文皇帝之四年安南之逆臣黎胡■〈大上互下〉弑其君而戕我使者天子讨之晟为征夷左副将军率云南诸卫所土汉兵由蒙自径野蒲斩木通道以入前鋒夺猛烈棚华关隘贼散走造舟以济师分遣所部据澳沕寺沙昇舟夜出洮水步骑夹之遂渡富良江与征夷将军新城侯辅兵合破多邦城栅继捣其东西二都及盘滩困収槽江仙侣等贼悉荡平之胡■〈大上互下〉及其父伪上皇季■〈牦，去厂〉狼狽弃其众独携家属及左右心腹逋遁晟等穷追至日南州奇罗海口擒获无遗得郡四十八县百八十六凯从入朝论功赐号显忠辅运推诚宣力武臣阶特进荣禄大夫勲右柱国封黔国公岁禄三千石子孙世世勿絶赐浩券玉带金币寶钞既大宴上御制诗褒美之再宴于便殿还镇云南无何胡■〈大上互下〉之余孽伪上皇简定作乱命晟兼征夷将军讨之不利于是英国公辅以征虏副将军率兵合而破之获定等檻送京师伏诛召英国还伪王陈季犷等尚未平晟连战不能下辅复捕季犷等送京师晟亦受赏白金三十斤寶鏐三万錠彩币三十有副寻抚富州叛酋降之仁宗即大位召还宴劳赐金币加太傅还镇自是宣英二帝嗣位赏亦如之麓川思任发反侵畧腾冲南甸诏谕之降不从晟使都督方政等为前鋒而大军继其后破平景罕等寨斩首三千余级获象二十余政恃勇以轻骑前搏贼败绩死晟退师至金齿诏还镇内惭惧得疾至楚雄而卒或云惧伏毒也诏官为治墓赐祭追封定遠王谥忠敬晟应变非所长其战数不利而天子以絶遠且世将藉而隱焉滇人摄服晟父子威信庄事之无异人主每片帑下土酋所具威仪出郭迎迓盟而后启之曰此令旨也岁时奉献不絶晟父子前后置圃墾田业三百六十区日食其一可以周岁珍寶金贝充牣库藏几敌天府后庭曳罗绮者恒数百人役使阉奴亦可数十百而善事中贵多通遗执政不絶亦能检制其下晟有子斌斌尚幼嗣公不能将其军于是晟弟昂以都督同知佩印代镇复讨麓川不利定西伯蒋贵等兵与合始平之昂得迁为左都督赐金币加等卒贈定边伯谥武襄斌嗣公之十一年薨贈太傅谥荣康子琮幼不克嗣于是从兄璘以才举为右都督代镇卒弟瓚为都督同知复代镇前后凡十五年而琮始嗣公又明年始佩征南将军印为镇守尝捕获叛酋寻甸守安倘广西守昂前后平马隆丽江剑川顺寧罗雄等蛮临安之昌明缺箐赤石崕罗罗大发兵讨获贼帅师五等累賜敕褒獎加太子太傅嗣公凡三十二年而卒无子以都督同知瓚之孙都指挥诚之子昆嗣朝议以昆为西平侯之裔孙当从侯爵而守臣争之谓南人知黔国公不知有西平侯也侯之恐为所轻昆十四岁而拜公爵寻以征南将军镇守发兵平龟山竹箐蛮谕定孟养孟密之争寨者又合川贵二镇兵平米鲁乱再擒师宗州贼张长受南安乱酋那代三賜玺书褒谕再益岁禄百石加太子太傅嗣公二十四年卒贈太师谥庄襄子绍勲嗣公十六年而卒子朝辅嗣十一年而薨父子皆加太子太傅贈太傅二子融巩皆甫袭而殁朝辅之弟朝弼当嗣虐其嫂且錮之不使还

南京于是上疏相讦久之始得袭佩印镇守其淫恶益甚且屡拒王命诏削其爵以子昌祚嗣且代镇而朝弼复欲杀其子逮至京镗于南京之故第以幽死

弇州外史曰人言黔寧王为高帝外妇子非也帝长于英十五年当英之生帝方嫠孤安从取外遇哉英以慎静饶兵畧为天子筭路篮缕以开滇土晟武则不竞而德继之世保赤社为明藩屏夫岂一朝一夕之所致哉朝弼镗死昌祚嗣兴法与恩不相蔽明德衷且遠矣

朱能字士弘凤阳之怀遠人父亮从高皇帝起兵积战功至燕山中护卫副千户早卒能生而魁竒怪伟勇力异恒辈既代父官为燕王所爱重尝从王北伐取元太尉多尔济布哈覆其军建文初王以强大见猜天子使三司诸大吏谋逮之势且迫王犹隱其事能与张玉丘福直入倡言曰大王高皇帝亲嫡子最长而贤武朝廷不察乃以吴濞见拟今诸宄谋定矣即无论大王我曹亦安能坐待菹醢也王乃决而与能及张玉丘福谋因三司入谢宴伏兵执之遂分率虎骑八百夺九门绥抚城中外三日大定从王攻薊州先登拔其城虜其将都指挥马宣等乘胜取遵化永平密云诸邑东畧地抵滦河还从击雄县复先登入东门破长兴侯耿炳文之前锋九千人追之至月漾桥虜其副帅都督杨松潘忠等遂追殲余众于郑州乘胜长驱至真定与长兴侯之大军遇能挺丈八矛围二拱余从敢死士二十余骑突入其阵瞋目大呼所向皆辟易王麾众乘之遂破其阵斩获数万追奔至滹沱河敌余众尚数万人能复大呼驰而躡之遂溃生俘三千余尽死王大悦赐书褒獎寻从援永平解其围追败江阴侯吴高之卒二十余万复从定大寧僂其扞命者挟壮士还而曹国公李景隆以五十万众攻北平昼夜不息能从王入援遇于郑村坝力战大败之进攻其营又败之急击景隆兵之营九门者城中亦出兵夹击敌遂溃去所遗军资甲仗以巨万计从畧定广昌蔚州大同败其师而景隆悉鳩其亡散并未傅者号百万来攻王亲拒之以能为前锋晨发而驰午至白沟河摧其都指挥平安军及申复大败其军明日以左哨当敌前锋复大败之尽拔其寨栅穷追至济南复大败之得其降卒万人闻于王悉纵使归复从下沧州先登由东门入卤首六万获其总帅徐凯进攻东昌与盛庸兵鏖胜负畧相当王以数千骑突出敌后敌知其为王骑也悉众围之短兵接几不能出能奋力翼王溃围而出我大军遂进战夹河能以竒兵为军锋冠遂大败盛庸兵又败平安兵于藁城追奔至真定战东门斩首万余乘胜畧彰德及定州掩水西寨已而败敌将李文于德州遂克东河进克东平捣汶上诸寨设伏败平安之众十余万转战至小河王兵不利与诸将议咸气誓请班师能独进曰汉高帝与项王百战百不利而竟夺项王之天下今仅一不利耳而遽旋旆者何也且旆一旋可复至此耶王乃奋曰从余马首而南言北者斩遂纵兵深入至灵璧敌悉众来战能与丘福复先登陷阵大破之虜平安及陈晖马溥徐真等三十余将僵尸蔽原野降者数十万人获马二万匹进克泗州渡

淮败盛庸兵遂取扬州渡江斩金川门阙而入遂定京师王即大位而能已前积功迁至都督僉事矣第封能为第二人遂授奉天靖难推诚宣力武臣特进荣禄大夫右柱国封成国公为左军都督府左都督岁禄二千五百石赐诰命鐵券貂蝉冠朝服玉带兼金彩币寶鈔皆与淇国公丘福同而币杀其二又明年立皇太子能遂为其太傅再加岁禄一千石又明年而安南黎氏弑其主且拒皇命诏拜能征夷将军统左右副将军左右参将及神机横海骠骑游击五将军兵八十余万往讨之上亲禡旗于龙江宴饯能等既抵广西而能病痲以兵属副将军新城侯辅而卒上时已覩星象而怪之谓侍臣曰西师其有忧乎朱能智足办也意者北人不习暑耳俄而讷闻上震悼辍朝五日诸公侯宿将入慰上为洒泣曰辅吾成大业者能也且其心行当遠到胡以止此言已益酸楚左右皆泣莫能仰视亲为文祭之辞甚哀官为治葬追封东平王谥武烈能卒时年仅三十有七又四年而有淇国公福膺胸河之败淇国公福者丘氏亦凤阳人高帝时积战功为燕王护卫百户有膂力戇朴勇鸷不甚晓文义而善抚士卒得其心燕师之初起与千户朱能俱为王所憑倚其摹画志计不能如张玉而敢力战深入过之每胜敌诸将争前效卤获而福后王每叹曰丘将军功我自知之京师平福已累擢至中军都督僉事矣大封赏功臣第福为首赐号奉天靖难推诚宣力武臣阶特进荣禄大夫勲为右柱国爵为淇国公职为中军左都督岁禄二千五百石当是时曹国公李景隆以降臣位福上福意弗悦也景隆寻坐嫌长系福益快而是时世子当立为东宫汉王高煦数将兵从上征伐有功以为类我而最被宠者独赵王高燧意未决福武人与高煦善而欲立之中贵人黄俨江保与驸马都尉李讓等窥上指阴主高燧世子忧之甚赖仁孝皇后内主而上念世嫡皇孙材谋之学士解缙始得立而福首为太子太师明年加岁禄一千石时北敌布尼雅锡哩杀我使臣给事中郭骥上大怒发精骑十万拜福征北大将军率左右副将军武城侯王聪同安侯和真参将靖安侯王忠安平侯李遠等讨之福先驱至大漠遇敌前锋以轻骑千余摧败之遂前进武城安平二侯諫曰敌非真败也伏以诱我且后兵尚未集如何福怒而按剑曰竖子沮众耶唯余马首违者斩前薄膺胸河敌骑益众福顾势不敌乃使同安侯前为质同安侯者故胡骑帅也既行而福率帐下士从后将袭敌敌觉遂张左右翼而围福等皆杀之因急击其后军亡脱者所失亡数万上闻之大怒以福悞諫失策籍其家发海南而倾天下兵北伐凡三驾而卒莫能克敌后每言及福輒切齿至洪熙改元福当从死事例牵复而以善高煦故郟不复録其子孙遂为海南人福长于能二十六岁死时年六十七能卒之明年而子勇嗣上怜能之为靖难首功天且死事幸及其壮而将之勇长身頰面虬须戟张见者皆目属而中实恇怯亡他技顾颇折节礼士大夫以是负儒将声歷掌都督府上北征使佐仁宗监国颇见礼重久之始从北征将右掖兵宣德初从平汉庶人复从征沙漠所部颇有斩获第功加太子太保时上以太师英国公张辅位望尊重不欲使掌六师而命勇代之勇亦初自强振刷有生彩其后则渐怠且不免有所腴削望实俱损而以善事中贵人故得久其位握兵符者凡二十余年尝与诸将军分道出击朶

颜诸卫勇由喜峰口袭败之富裕川又追及于热水鹵其人畜数百千而还言者犹谓非计得不偿失而中贵人王振隱之进太保敌额森大举犯宣府上亲讨之以勇为大帅时中贵人振擅权上春秋幼冲进止悉委焉每呼勇受事长跪惴惴惟谨六师驻土木而敌来转逼诏勇与西寧侯宋瑛驸马都尉井源等骑卒四万逆击之俱败死车驾遂蒙尘时兵部尚书于谦等参论勇罪夺其封久之始予子仪嗣岁禄仅千石至上由南城返正曲赦诸失事者王振复官赐祠而赐勇祭如例以衣冠葬复追封平阴王谥武愍仪字廷垣器宇凝重英宗既返正见而器之谓曰平阴王有子矣自是有所任使皆称久之命提督南京守备掌中军都督府者凡三十四年加太子太傅以老成静謐称卒年七十赠特进右柱国太师谥庄襄子辅嗣尝屡掌都督府加太子太傅守备南京召还以平北将军率师扞敌敌退还京师卒赠太傅谥恭僖子骐嗣使承天卒于道无子介弟凤嗣提督南京守备兼掌中军都督府以疾卒子希忠甫二十一而嗣公美姿容善举止沉静不苟为世宗所器重数更委任掌右军都督府再掌后军提督十二团营及五军营兵马一为都护将军屡充皇天后土及皇后贵妃皇太子亲王册礼使入直无逸殿应制撰草再加经筵及监修国史代郊天者三十有九方泽者二十有九其官自太子太傅以至太傅再加兼太子太师最后进太师其録荫子弟为锦衣指挥千戶三人其加禄奉至七百余石赐肩輿入内府乘马玉带蟒绣麟袍其赉予金币杂彩■（鷩，羽代鸟）翻寶器甲仗之类不可胜纪卒年五十八追封定襄王谥恭靖其弟希孝以兄荫得官积官亦至太保兼太子太傅卒赠太傅谥忠僖其嗣希忠公者时泰不半岁而卒子应祜嗣后以例夺王

弇州外史曰靖难之初起称首功者独淇公福成公能而已然天子亲为大将每战必在行而二公者虽计划血战之绩多然曷能一仗旄节出号行罚哉受賑南北为大将帅能薨于师天宠莅被福败而殒坐违节制寧唯弗旌罚乃及嗣平阴失律乘輿震蹶宠以真王毋废世祀覆败同轨赏罚殊执嗟乎君犹天也天之未定谁能议之曷不曰何以章轨后世

弇州续稿卷八十二

●钦定四库全书

弇州续稿卷八十三

（明）王世贞 撰

○文部

△史传

定兴宣平二王世家

张辅字文弼其先河南之祥符人父曰玉骁勇善战多智筴其仕而当元之末季积讨贼功迁至知枢密院元帝亡与其主遁于沙漠洪武乙丑始自拔来归高帝异其材气俾以裨校从征卜渔海子喀尔喀之寇以功授济南卫副千户又从破元将布昆特穆尔畧地抵延川而还迁安庆卫指挥僉事明年从楚王征永顺散毛诸洞又明年逐蒙古之侵边者至鸦寒山而还调燕山左护卫癸酉败敌于黑松甲戌从征野人诸夷卤获多进都指挥同知遂为霸府元僚燕王寄之若左右手靖难师起玉首佐谋画夺北平九门三日议师所出咸欲南玉曰为我肘腋患者蓟也必灭蓟而后可以安意南遂轻兵围蓟蓟守马宣出战执而杀之并擒其将毛某送北平移兵取遵化夜从敢死士坎墉而登守将拒战复破斩之遂畧密云至永平皆致其精甲以益师还率所部从王南下进覆其众获二将长兴侯耿秉文以二十万军真定王请单骑觐之还谓秉文不能训其众且有败气急击勿失诸将犹以兵力不相当难之玉曰彼众而器我锐而整胡不相当也王顾玉而笑谓必从若吾倚若一人足办遂前薄真定大败其军诸彻侯名将皆就缚斩首虏三万级获马二万匹复从王败安陆侯吴杰军轻骑驰救永平走江阴侯吴高辰抵大宁鼓之午凌其堞斩大帅朱鉴复致其精甲益师还救北平突骑往返若风雨遂大破李景隆之众北平围解复从攻广昌蔚州进围大同皆下之时谍报曹国公收散卒及后军未传者号百万且至矣王与诸将谋之玉复进计曰兵贵神速请急往白沟河以逸待之可胜也王悦悉师而往至白沟之三日而景隆来战玉以麾下驰之挫其锋大军乘而大破之杀僇数十万追击至济南围其城不下还取沧州获其将徐凯进攻东昌与歷城侯之师遇而麇王率数千骑绕出敌后敌聚而围之数十迎王死战得解玉不知王所在突入其阵大战手杀数十百人玉亦中创而没王收兵不见玉哭之恸谓诸将胜负兵家常事不足计所恨艰难之际失我良股肱耳复哽咽不已诸将皆泣不能仰视遂以其兵属辅辅时从玉军中器宇伟壮顾盼有威容既居辅丧墨衰饮泣从事进攻东平捣汶上转战灵璧入泗州取扬州渡江定京师论功封奉天靖难推诚宣力武臣荣禄大夫柱国信安伯食禄一千石予诰券世袭而追封玉为特进右柱国荣国公谥忠显居二岁上谓功臣淇公福成公能等曰吾于功臣次第封矣亦复有所恨乎二公顿首言臣等皆以微劳冒上赏亡所复恨独张玉不死臣等安敢独封公而玉之子辅颇自积战功今者尚称伯位诸彻侯下语未既而上曰吾固恨之因进封辅新城侯岁禄千五百石世袭改给诰券又明年而安南叛臣黎季■〈牝，去厂〉诡姓名胡一元而名其子曰■〈大上互下〉挟诈弑其主且叛命上怒拜成国公为征夷将军统大兵八十万征之上察知辅沈雄有胆力

诸老将皆不如遂拔为右副将军与左副将军西平侯晟佐成公而率丰城侯李彬等十八将军兵部尚书刘儁赞军事刑部尚书黄福大理卿陈洽等给馈饷凡两月而次龙州成国公病辅代总其师亡何成公薨辅遂进师发凭祥度坡垒关馮燾前驱至隘留关走其众三万遂度关檄季■〈牦，去厂〉父子二十罪深入抵鸡陵关谍傍有伏卒发兵搜之悉遁进次富良江北嘉林县别将由芹站西道至北江府新福县谍知左副将军以云南兵至白鹤遂遣骠骑将军朱荣往会之辅用法严所至皆整湓秋毫无犯交人感悦其三带州守帅邓原等来降以贼情实告谓贼有东西都及三辅郡皆籍富良江而固其北岸为土城城与栅连凡数十余所南岸悉国中舟舰列于江外设捍木护之其伪东都守备颇严密列象陈栅内两江士民悉发号七百万胜兵者不能十一欲以老我师辅遂移军三带州招市江口伐木造舟以进师上知成国公薨即命辅为征夷将军而谕之曰昔者开平王遇春北讨卒于军而岐阳王文忠代之遂鼓诸将建勋雁门将军努力毋使岐阳独專美前代也辅乃遣骠骑朱荣击贼于嘉陵江北大破之辅等行视诸城独多邦最大可驻军而特高峻下设重濠濠外复为坎坎外皆■〈竹疾〉藜而士马甚盛辅乃悬重赏募死士为云梯夜蠓附而上贼于城中列象阵以鬪辅夙具绘狮蒙马而冲之象皆股栗退走矢石齐发呼声动天地贼大溃遂进兵捣西都季■〈牦，牙代未〉急焚其宫室仓卒遁入海分兵破生厥潭舍二江之援卒于是三江路宣江酒江诸州邑皆望风皈命辅自注江渚进兵悉薄其诸寨获首虏三万七千三百九十余贼别将胡杜聚舟中盘滩口辅使降人陈封袭败之追奔至闷海口尽获其舟遂畧定谅江东潮等大破季■〈牦，去厂〉兵于鲁江获大舰百余斩其虏首万级溺水死者以万计还兵救咸子关大破之于富良江斩其大将以下数万人江水为赤乘胜长驱至黄江抵闷海口季■〈牦，牙代未〉父子夜遁辅自率步骑至茶龙舟师乘涨亦集季■〈牦，牙代未〉父子走义安遣都督柳升以舟师追之辅与西平侯循举厥江进至自南州奇罗海口获季■〈牦，牙代未〉及次子卫国王澄于海口山复获伪主苍及梁国王芮等将相大臣檻送京师尽平其地府州四十八县一百八十户三百十二万象马牛羊舟粮器物无筭行求故王陈氏之后不得遂以其地为交址布政司设卫十一府十七治之辅振旅还京师论功进封称英国公岁禄三千石子孙世世承袭赐诰券冠服玉带上宴之奉天殿制诗歌以赐之褒称甚至明年季■〈牦，牙代未〉之党简定复叛僭号大越改元兴庆黔国公晟讨之败绩上乃复命辅帅师会晟致讨时有陈季犷者起兵以应简定而自号陈王后与旋相推复位称上皇季犷称大越皇改号曰重光势强甚辅首破其喝门江栅进平广威州走其将军黄臣钊等大兵出咸子关破贼于江鹵斩以万计穷追之抵太平海口大破其酋帅邓景异鹵斩甚众走景异而季犷使使来告系故陈王后兴灭继絶唯上国图之辅怒曰向者广求陈王后不应而今乃称陈王后者诈也且若已反矣即真陈王亦僂不赦梟使者首以狗麾兵由福城江转入神投海穷追之于美良县山中获简定及伪将相陈希葛等檻送京师伏诛复破贼支党伪王阮师桧等二万余尽覆其众

上召辅旋师时季犛邓景异等窜海岛犹未获也乘辅之归即啸众复反使使乞降上授以布政使叅政伪若款者而蚕食邻境自广且不已于是季犛与景异称皇号大虞上乃复命辅讨之大破贼于常月江俘斩数万复破贼党黎等俘斩亦如之再破之于神投海生获大将陈磊等千余人遂进逼土黄县贼少保潘季佑以其众窜可雷山遣子僚请降辅承制赦之俾以按察副使领义安府事于是贼诸将帅守令皆请降寻与黔国公合兵于顺州与贼阮帅者大战于爱子江岸辅策马先进薄其左军破之都督朱广等复破其右军遂尽获其战象并列将五十六人邓景异以其腹心路暹蛮昆栅辅追之罗蒙江身越险扞萝而上抵其栅景异复遁至叱蒲■〈才柰〉破其南岸栅飞矢连中其胁遂擒之尽获其余党景异创甚不欲行磔之函首京师季犛以其家属走依南灵土守阮茶彙辅师追之则以前走老挝遂斩茶彙以徇遣都指挥师佑以兵追之老挝惧请缚季犛以献既而匿之遂克其三关纵兵大搜于蒙册南么之地生絜季犛及其妻妾子女复遂得其身伪相国驩王季搢及姊伪公主诸大将阮帅等无一遗者悉槛送京师磔于市辅与黔国公改建滨夷之地曰升华思义四州悉官其降将增置卫所振旅朝京师赐白金三十斤寶钞二万錠文绮五十袭寻以征夷将军镇交址辅用兵持重有逵畧于赏罚必信贵将黄中恃功违节度诘之不逊即手刃之梟于辕门诸将股栗莫敢仰视复有叛寇陈同湖与清化磊江蛮合而作乱辅皆捕诛自是终辅任惕息莫敢窃发矣上率六军北讨召辅前后领左掖兵而进止机宜皆密取辅决最后穷追絶大漠无寇上与诸将计所向辅奋请曰愿假臣万骑骑给一月粮必为陛下殲此寇上壮之曰休矣吾不欲久劳师师旋至榆木川而不豫遂崩召辅受遗命诸军悉受节度时辅有女弟为皇贵妃而女复侍东宫仁宗即位册为敬妃进辅太师掌中军都督府两赐辅羊二百羴酒五百甌白粲千斛时大行丧服未满礼部尚书吕震请释从吉而朝杨士奇止之不获蹇义具二议以请朝上素冠麻衣出见羣臣独英公辅与士奇等三学士如上服上召士奇等慰谕之曰吾始见震疏心疑之士奇沮而后决张辅武臣而礼依之何六卿之不若辅也以辅知经筵事监修文庙实録亡何仁宗崩章皇帝即位知经筵监修昭庙实録亦如之颁赏金币为羣臣冠汉王高煦将反乐安心惮辅而使所亲信人枚青入约为内应事成裂数郡而王之辅即执以献上鞠之得其实而会乐安之乡人李御史亦来告变上谋讨之谓辅曰机事一以付卿辅对曰高煦外武而内怯无能为也愿假臣轻骑二万星驰为陛下縛之来上曰倚卿一人足办第朕初即位少欲以威服天下耳及汉平赐予优渥刑部奏决重囚命辅同五都督府九卿审于朝以枉者五十六人上诏献而释之囚之有审自辅始也辅威名转盛而久握兵上乃解其柄使朝夕与蹇义夏原吉杨士奇杨荣朝夕叅论治理赐玺书褒谕以古三公之职望之进阶特进光禄大夫勲左柱国赉白金百两绣麟衣一袭银鞍马一匹无何免常朝俾以朔望入侍岁时宠锡有加宴会腆洽正统初仍知经筵监修实録凡三被赉如宣德时加号翊运佐理而久之中贵人王振握内秉张甚于羣臣无所不凌侮独礼重辅辅亦折节待之正统己巳振挟天子亲北征额森强辅行然不使

预军政辅老矣嘿嘿不敢言从至土默特死于难时年七十五追封定兴王谥忠烈辅有二子其仲子懋九岁而袭辅爵久之宪庙阅骑射于西苑懋三发连中赐宴赉金带白金五十两寶鈔万缗遂掌中军都督府提督五军营加太子太傅再加太傅孝宗初知经筵事监修宪宗实录成进太师兼太子太师赐如前改掌后军都督府提督十二团营再加特进光禄大夫左柱国武宗初复知经筵事监修孝宗实录成赐如初以老乞解兵柄赐玺书褒美白金文绮寶鈔朝朔望懋为公者六十六年为太师者二十五年握兵柄者四十年再知经筵监修国史十主恩荣宴郊祀宗庙多遣代行富侈为东第冠后庭数百人皆曳罗绮以老病终寿七十五赠宁阳王谥恭靖而生平无他艺能以敦重善为仪而已万历中例夺王爵子钦嗣未几卒子仑嗣仑卒子溶嗣溶长八尺而恇弱治军府多所干没数被论夺嘉靖中以与奉册礼加太子太保万历初知经筵监修世穆二庙实录穆庙录先成加少保太子太傅久之世庙录成加少傅卒年七十余子元功嗣

弇州外史曰玉始事故元位掌武自拔归明积伐而冠霸僚复识龙潜之运佐之谊虽不足其畧可称也辅之雄武宏筭信威荒徼儋爵九命冠秩三台赫赫具瞻者三十余年而不能抗握宪之竖身膏草野夫岂耄昏使然抑亦居不赏之地筴固宜尔嗟乎数也谁能违之不然懋遵何德而贵富寿考令终显融至此也

宣平王朱永者字景昌河南之夏邑人其先日明以戍卒隶北平至子真而从文皇帝起义积功至中都留守司指挥僉事父谦调边戍与敌接角鬪战者三十余年自守备至参将副总兵遂为镇朔将军总兵于宣府其官自都指挥至左都督再以战功封奉天翊卫推诚宣力武臣特进荣禄大夫柱国抚宁伯岁禄千石予鐵券是时定襄伯郭登帅大同而谦帅宣府功名畧相埒然谦勇畧文采皆不及登而获老牖下以功名终赠抚宁侯谥武襄永伟躯貌举止顾盼有威容敌之挟上皇而过宣府也谦出竭睥睨下有所献金帛器物酒炙之类使永进之上皇数日属焉景泰中永得嗣谦爵奉朝请上皇自南城复覩永而识之曰是子侯也非宣府食我于门者耶永谢不敢即日召侍左右有所询问輒率意以对不为浮饰往往称旨上虽贵重中贵人吉祥大将亨而内疑厌之以心腹寄永永亦慎重不泄分领大营禁兵凡车驾游幸必挟永从所赐蟒绣玉带廐马寶刀玉笋上尊金币铠甲弓矢不可胜计上崩以属皇太子曰诸侯伯中独永习兵可任大事俾率兵治裕陵方中总神机营兼领三千营兵马掌右军都督府事诏修景泰时制改神机营曰十二团营益以诸道操卒永复总之而领三千营如故时定襄伯登久镇甘肃永上疏请召之归与共事或曰定襄宿将也然子已久在事能为之下乎永曰吾知治天子军需材耳吾安知下于是物情渐归永以为有古范燮父子风荆湘大盗刘千斤石和尚等作乱永以靖虏将军总两京湖广江西四川诸路兵讨之尚书白圭监其军至则永病寒不任战而石和尚已降尚书圭破其众永病已始纵兵搜巢穴斩首卤簿九百余俘千斤等

又败之于古路山捕执千斤子聪等百余曹籍其符印赏仗万计余寇以不时发分兵剿之获级至万余遂进封抚宁侯增禄岁百二十石未几竒木嘉色棱寇掠大同永复以平北将军大出兵拒之敌退走进号如父谦而加佐理字并阶勲追封及三代当阿罗寇延绥永以平寇将军与左都御史王越击之擒斩以万数获驼马牛羊甲械以万计降敕即军中予世侯留镇三边他寇复屯柳榆庄诸处出没为患永复与战败之克获多赐金币良厚永疏欲尽论诸将士功于是兵部言永等二年之间所获贼十一人斩首二百五十七而我军之战没者六百六十四其胜负雅不相当顾以功迁者一千六百三十人赏者一万六千七百人矣而今又欲益迁三千一百二十人于格太逾滥诏乃弗予寻入侍经筵再録塞上功加太子太保官一子锦衣卫百户岁益禄六十石时永与王越厚相结而出入中贵人汪直门辽东巡抚陈钺适报北兵结三卫入塞为边患请击之王越知敌弱易胜也计必永出讨而直监其军已得叅帅焉而直新入巡抚钺赂重谋之永改越命以授钺遂大发兵破其营五百余所焚庐舍二千余区斩首捕获以千计马牛羊十三永进封号保国公直钺皆大有迁赏越以是大恨永与汪直然不敢与直异而更媚之会敌攻延绥永遂为平寇大将军与越直合兵出塞越侦知敌营在威寧海子乃复与直谋使永将大兵从中道发而身从汪直将轻骑皆选人各二马从他径掩威寧敌破之尽俘其众而永道迂遠所费军食巨万马死者以千计而其至延绥敌已悉余众遁去一无所获于是越以文臣得封伯直荫锡踰等而永无功自如始大愧悔事直逾谨而与越合不敢持异矣寻积前后功赐阶特进光禄大夫右柱国加太子太傅岁益禄三百石予鐵券追封及三代复以大将军出征敌伊苏穆尔於大同海东山等处大破之擒斩首级百有二十获駝马牛羊数二千甲仗三之赐世公爵再予诰券复为镇朔大将军总大同宣府兵北御敌还加太子太师永前后凡八佩大将印入统六军尽护彻侯将最名用法严持重有威望而制敌设竒要不能如王越中贵人直少年慄銳喜功名既挟上宠开边衅然所至多不负败大要直恃永永恃王越耳而兵部尚书陈钺既以北兵之役中直心直亦怙之有阉而优者阿丑尝于上曲宴为中贵武状者挟双斧狼踰而前人问之曰我汪太监也已左右顾其手曰吾惟仗此两钺耳而永时有所役兵治私第阿丑复装为楚歌者曰吾张子房能一歌而散楚兵六千人曰吾闻之楚兵八千人何以六千曰其二千在保国公府作役耳上为之一笑永惧而罢役出其兵会直与司礼诸大阉交恶而其所援东厂太监尚铭背之发其奸私并发与王越交通状俱贬窜而是时适各与永小阅见颜色永亦自有内主弗与败上崩弘治初复被命典治茂陵方中工完进太师改领后军都督府其督诸营兵如故自是边徼稀警急师不复出矣永与其妇弟英国公张懋俱为太师懋领经筵监修国史所典司多文事而永总六师于勋臣肺腑无三朝有大礼岁时迭为班首时人荣之以久疾卒追封宣平王初谥武襄以同父谦谥辞改武毅子暉当嗣公而当事者难之曰永功固不当公也而暉颇有奥援诏特予袭一辈暉长身美髯器宇凝重寡言笑以其类父永也而才之又多从出塞外受方畧其拜爵则已垂五十矣凡三岁而领神

机营卒又二载兼领三千营掌右军都督府事敌犯延绥平江伯陈銳出御之坐挠征抵罪晖遂为征北大将军与太监苗逵右都御史琳讨之大将军印最重不易当而晖继永而佩尽护诸将人以为荣兵出塞捣敌会大雪敌前已惊走不相格而是时苗逵以幸故要晖上疏以捷闻赐报捷人钞千贯优诏奖励班师遣中官贵人赍羊酒迎劳于路上特御奉天门见之且下兵部第封赏给事御史言所得敌首三级故敕三道马四百二十牛六十羊八十器械二千五百而已而报功乃一万有余晖等相率为诬罔请罪之上难苗逵弗听然自是赏亦薄又二岁进领十二团营兵马其三千营务如故监治孝肃太皇太后山陵别建飧庙明年复出拒敌于宣府大同复有斩获班师中贵人迎劳如初加太保侍经筵武宗即阼充皇后纳征正使后先赐蟒衣玉带绣春刀及他器物甚厚以疾请解营府久之卒年六十四赠太傅子骐不得嗣公仍为抚寧侯数领军府以征蛮将军出镇两广与总督右都御史姚镆破平田州僂叛酋岑猛加太子太保增岁禄猛之党众叛以不时宣敕归奉朝诸久之复起掌军府卒子岳嗣亦掌军府以平蛮将军镇湖广召还卒

弇州外史曰永为将能持重其驭军亦严整有法然未尝有揭社横草之绩而遭世承平为国虎臣者垂四十年位台爵上公所共事者败而擿诛不及歿而赠王子孙彻侯世世勿絕是遵何德哉嗟乎开国之视靖难其巨小尚不可同年而语以视宣平何霄壤也士大夫不能覩久遠往往骇新建寧遠而忽宣平輩良可唾矣

故帅滁阳王传

滁阳王郭子兴者其先曹州人也父曰郭公善日者言以其术游濠之定遠多奇中定遠人信之业稍饶矣而尚未娶里中富翁某有女而瞽郭公为推其支干曰是命当贵翁笑曰以瞽故未有归何贵为郭公乃请曰不鄙庸陋能见婿否翁许之遂委禽焉自瞽女之归郭公而术益售橐日益盈遂大买田宅为定遠富人有三子一女而子兴其仲也郭公死而三子俱精积箸踰于郭公时至倾邑而属元季政昏弛其人思乱讹言大兴子兴忽心动遂大出其橐椎牛酒散钱帛结纳豪勇至正之壬辰羣盗猬起淮南北子兴从里中少年数千人袭濠州据之异军苍头毕会而高帝自皇觉寺不能安其业独身仗剑趋濠为门者所止以为间谍将闻之子兴而害之子兴适行巡骤见大惊异其貌解缚与语更奇之置帐下俾长十夫且引与谋事时元兵数来讨子兴骁勇善战每出则高帝从傍翼卫跳荡无前斩首捕生过当于是高帝日益重而宿州人马公者尝避讎定遠与子兴为刎颈交从之濠而病将死唯一女以托子兴曰为我择所归子兴拊之如己女一日谓其妻张夫人曰吾部曲不为少而所见无如朱某者必且贵马氏女亦当贵遂女之是为孝慈高皇后时同据濠者孙德崖等四人与子兴而五俱自称元帅不相下四人者黷而粗日事卤畧无遠志子兴意轻之直欲凌其上咸恨而合谋挫子兴每公会輒以味爽

往子兴后至与语多不酬子兴怒拂衣归德崖等乃共决之自是多称疾不与会高帝乘间说曰彼日益合矣而我益孤不已权将他往于是子兴乃勉强出会未几而徐之败将彭大赵均用各以其余众来德崖等纳焉以其故盗魁有名也而争推之更出其下彭大颇有权畧子兴畧心伏之与相善而薄均用德崖等乃得间之均用曰郭某目中有彭将军耳不复有将军也均用曰唯所处之于是德崖谋乘子兴出篡而缚之置于德崖寨高帝适行剽他部归或谓事叵测宜匿近郊以观其变曰郭公吾生父也其可缓乎亟驰至家问知其为德崖縛曰唯彭公力能得之率子兴之二子驰以语彭大大乃怒曰我在谁敢鱼肉而公介而与偕至德崖寨破械出之则肤挠矣已而元兵大至围濠急乃解讎合力拒守凡五阅月始解去彭大称鲁淮王均用称永义王而子兴等为元帅如故乃使高帝行收兵得七百余人自益复使高帝以三百人往诱劫定远张家堡得壮士三千人遂以三千人袭元张知院横涧山寨走之收其兵二万高帝以其兵攻下滁州遂守之彭赵使使邀高帝移兵守盱泗谢弗往亡何二人争权而鬪其部曲乘而鬪多创死彭亦中流矢死独赵均用存因併彭故部曲而衙子兴子兴势危甚高帝乃行金赂均用所亲信使说之曰背德不祥公昔困于彭城南趋濠使郭公闭壁不相纳肉敌手矣得濠而据其上更欲害之不祥孰大焉且郭公易图耳其别部之在滁者兵势重可虑也均用悟乃纵子兴率其兵万人入滁而高帝所部已三万余士壮而整子兴大悦悉收其兵已有谗高帝者谓且欲自王子兴遂绌高帝权夺其左右用事者使夷于他将诸捉生游徼危任乃委之高帝益自力每战輒有功然不好剽掠无所献子兴益不怪高后知之乃悉其资装赂张夫人张夫人悦谓子兴曰公知所以得至此乎赵王股掌公畏朱某而舍之今舍朱某奚托也子兴悟乃稍信用高帝子兴以名号微欲都滁自王高帝曰滁固未易都亦未易王也夫滁山城也不可以进取亟称王元且萃而攻我子兴为之寝会滁饥子兴与诸将谋所向高帝曰独和阳可图耳然当以计取之为子兴画策使其将张天佑选精兵三千为元服装以四橐駝载物伪若行赏者将而前以袭和阳而耿再成以绛衣兵万人继之明日天佑兵从别道蓐食稍后而再成兵先至薄城元平章额森特穆尔闭门为飞桥缒卒出战绛衣兵大败走元师追之暮还而卒遇天佑精兵战不利天佑麾其众夺门入遂取和阳元师溃高帝复收绛衣兵得三千余人前与天佑等合大败元援师于北门已复败其太子托卜坚兵十万人和阳之守遂固亡何濠故帅孙德崖饥以其众就食于和阳高帝纳之子兴以德崖之见纳也怒而来视师德崖谓高帝曰若翁来吾且他往帝乃使密报子兴使为备而身往见德崖曰何去之速德崖曰若翁恨我深矣难与共事高帝曰不敢强也虽然愿公毋先而留部署不然后军必争德崖乃如高帝指而高帝方出饯德崖军中故人二十里而报军乱遂为其众所留则德崖亦已见执于子兴鎖其项而与之饮酒矣子兴闻高帝被留大惊如失左右手别遣所亲信为质使赎高帝归与德崖盟而纵之子兴性刚急实欲甘心德崖以高帝故强纵之既失之悒悒不乐遂发病死子兴死时兵不能当高帝十之三而其存者皆已归心高帝孙德崖闻而欲来有其众时帝别将

与元确战不能救子兴之子某惧而使张天佑请降于伪宋主韩林儿天佑还致林儿命以郭某为都元帅天佑为右副元帅高帝为左副元帅时犹尚右故也高帝怒不受而畧巢湖兵破曼济哈雅渡江取太平拥众数十万三子顾累然北面焉其长者与天佑从攻集庆路战死次子陷于贼死少者以失职谋为不利死或曰皆高帝意也子兴遂絶有一女为帝贵妃生蜀豫谷诸王高帝既有天下居恒念非子兴何以有今日且彼之不克遂王号以我故阻即位之元年追封滁阳王有司建祠滁州以中牢祀岁岁不絶十六年诏太常丞张来仪为之碑

弇州外史曰来仪于辞多避少遂不得称信史云故因国史而叙次之如右豪杰之兴必有所憑藉然未有如滁阳王者识真龙于豫且之网而活之且假以云雨焉非子而子非女而女高帝之有天下则谁力也物无两大中道而殂顾胤斩圣代虽血食世世不絶焉足当报哉焉足当报哉

弇州续稿卷八十三

●钦定四库全书

弇州续稿卷八十四

（明）王世贞 撰

○文部

△史传

韩宋颖三国公传

李善长者濠之定远人少有志计读书粗持文墨而以筭事称里中事推为祭酒元末剧盗起汝颖间淮南北俱大震善长欲从雄未果而会高帝为濠帅子兴大校以计得元横涧山兵二万余畧滁阳善长被书生服道谒上问其为里中长者礼之与语取天下大计合遂収以为掌书记而从容谓之曰若知羣雄之所以败乎曰不知也上曰大帅与诸校不能相肺腑而中藉持牍者为关通顾往往市权而行怨使下不得上心上不得下力以至败皮之不存毛又安傅哉且夫今持牍之得存者谁也善长顿首曰命之矣寻迁为叅谋自是益専精朝夕为上谋筭诸将有来归者善长与语察其材言之上复为上布

欵诚皆使得自安而中有以事力相角抵者委曲为调护俾不至齟齬善长声称闻子兴时子兴中流言内疑上稍稍夺其兵又欲夺善长善长谢弗肯往上曰主帅吾父也而安得辞善长固谢弗肯往子兴亦不复强也寻子兴死上代总其兵镇和阳而元众犹盛王子托卜坚枢密班珠尔等分营相侵轶上屡破之时出复鸡笼山寨留少兵佐善长曰敌至谨自保而已上悉俘取其寨归而元谍知和阳守兵少亟来袭善长设伏大败之捷闻上大悦曰谁谓而厘厘握算令执戈者屈矣因欲谋渡江善长曰我兵众而食少舟楫不备不足以争江左利姑小蒞之而巢湖将俞通海廖永安等以舟师万余粮数万石请降善长乃说上曰天赞我也渡江此其时矣既破曼济哈雅兵长驱泛牛渚拔采石遂乘胜取太平上之发采石也与善长谋置榜谕士卒有虏畧者必斩太平下即悬之五父逵肃然无敢犯上称太平兴国翼大元帅以善长为元帅府都事亡何从克建康东取镇江先日上祥怒诸当行者以不能戢下欲悉置之法善长力救乃解镇江下民不知有兵善长乃与诸将谋奉上为吴国公置江南行中书省上以右丞相领省事而善长拜叅议与宋思颜李梦庚郭景祥陶安等俱为省僚而军机进止章程赏罚十九取善长处分上益礼任之凡师行善长必留守转调兵饷无乏陈友谅既克我江州约张士诚夹攻我上与善长谋使持友谅所知康茂才书诱之来许内应而伏兵欲取之善长曰方患之何为更诱之上曰友谅躁而果虽与张士诚约不能待也小缓则士诚合而我两受敌矣友谅果至遂大败其众殲焉改枢密院为大都督府善长兼领其府司马进中书省叅知政事时平章左右丞皆有兵行善长以叅政寔长省事高帝之克江州两平洪都援安丰讨庐州下武昌善长皆居守将吏帖服居民安堵寻奉上为吴王超拜善长右相国时犹仍元制尚右故伪汉平善长等称贺列上彭蠡死事将臣丁普郎等三十五人祀于康郎山复祀平章赵德胜等十四人于洪都始善长请推两淮盐立茶法既复制钱法于洪都设三局湖广开鐵冶定鱼税诸利孔虽若烦悉而裁取有衷民不以为困而国用益饶上与诸将计讨张士诚善长请缓之上不听语见徐达传善长乃力请上即帝位曰殿下三尺剑不阶尺土而成大业比肩之孽剗削且尽不以兹时正位号何以慰海内心上曰吾居恒笑陈友谅甫得一隅而黄屋左纛卒以畀我若弃屣我安能复效之令后人笑也天命果在我自有时毋庸汲汲大将军达已破平士诚上犹以善长有转饷劳召见戟门封宣国公赉赐如大将军更百官制始尚左上从容谓羣臣吾以布衣起兵时李相国里居最密迩徐相国及他大将远不过百里宁自望贵今者赖诸公力一旦而举天下大半虽然中原未平焦劳之日岂能坐守一方而忘远虑乎于是善长与大将军谋北伐及徇东南诸州郡上之初渡江颇用重典一日谓善长法有连坐三条不已甚乎善长因请除之既而命与御史中丞刘基等悉裁定律令成赏赉有差善长乃复率羣臣劝进凡三表乃许以即位仪上之上御新宫告于上帝皇祇称帝赐英贤为臣之辅盖归德善长达等既即位礼毕奉四代考妣为帝躬上册寶于太庙寻立妃马氏为皇后封皇太子诸王善长皆充大礼始改中书左丞相善长请緣元旧以皇太子领中书令上不许曰非典礼也毋狃于近

戾于古且令吾子尊师傅习经传通古今识达事宜他日军国机务皆令启闻何中书令也于是议置东宫官属以善长兼太子少师授银青荣禄大夫上柱国録军国重事余如故已率礼官进议郊社宗庙礼上幸汴梁善长居守者三月一切听便宜行事寻奏定六部尚书以下官制议官民丧服三师朝贺东宫仪朝臣大小服色俸赐天下岳渎神祇名号封建藩国功臣爵赏事无巨细悉委善长俾谋之中丞基右丞杨宪而行之命监纂元史史成赏赉有差时大将军方与副将军遇春等将兵大者定中原小者亦取闽越州郡善长居中雍容无所见绩然上自知之三年大封赏谓善长虽鲜汗马劳然事朕年久给足军食其功甚大因进封韩国公授开国辅运推诚守正文臣特进光禄大夫左柱国太师叅军国事岁禄四千石子孙世世勿絶赐鐵券仍免二死子免一死告辞谓东征西伐日不暇给尔独守国转运粮储供给器仗未尝缺乏剽繁治剧和辑军民各靡怨謠昔汉有萧何比之于尔未必过也赉文绮帛百匹时大将军达为元功位犹在善长下善长虽寬博有器畧然意忌不能專平叅议李饮冰杨希圣恣而稍侵善长权善长按其罪奏黜之又与中丞基争法而詢基不自安请告归上所宠任者张■〈日上永下〉杨宪汪广洋胡惟庸■〈日上永下〉宪以事诛广洋亦数谴而善长事寄如故既贵富极意稍溢而勅上始微厌之明年引疾乞解任赐临濠地若干顷佃户称是复为置守冢百五十守仗士二十家与魏公等踰年病良已命督吏士建临濠宫殿既数月上念善长行役久以牢醴茗粢赐之复谓善长临濠吾丰沛地数苦流移芜莱不治今徙江南富民十有四万田其地公为我经畧毋使失所自是留临濠者数年上推恩擢善长弟存义为太仆丞二子伸佑皆为羣牧所官寻以长女临安公主归其子祺拜驸马都尉初定婚礼公主修妇道甚脩光宠赫奕时人艳称之居一月而御史大夫汪广洋陈寧疏糾太师善长自子祺尚主狎宠自恣陛下病不视朝几及旬而不知问候驸马都尉祺六日不朝宣至前殿又不施礼大不敬请付所司论法善长父子免冠请罪上赦之又踰月而特勅追数善长过削其禄岁一千八百石善长自是意忽忽不自得寻起与曹国公文忠议军国凡中书省大都督府御史台有大事悉听裁审而后奏行督南郊圜丘工洪武十三年御史中丞涂节告左丞相胡惟庸等反状上亲临鞫狱具谓惟庸尝以女兄妻善长弟存义子佑相表里为威福其定遠故里第水中忽生石笋水溢数尺三世冢皆夜有光怪烛天而数以事见督上遂起邪谋诱吉安侯陆仲亨平凉侯费聚使出招士马为外应间与存义谋始图之善长善长大惊曰尔言何为者寧欲尽灭九族耶存义惧不敢应居旬日惟庸复谓存义苟事成尽捐淮西地王太师以语善长善长心动乃叹息起曰吾老矣惟尔等所为又旬日惟庸谓善长延之东西向坐屏左右欵语良久人不得闻但遥见颌首而已惟庸自是与倭通俾以精兵寓贡舶挟诈害上而掠库兵入海上乃赐惟庸与御史大夫陈寧死时费聚已前死羣臣请并诛善长与吉安侯上谓吾年二十七而识善长于兵间善长年四十一所言多合遂命掌簿书赞计划为功臣爵以上公女女其子陆仲亨年十七父母兄弟俱亡以一升麦藏草间朕见而呼之曰来遂从朕长育以功封侯此吾微时股肱腹

心其勿问遂止诛存义并赦佑时左大夫陈寧伏法死右大夫安然罢归复命善长理台事其岁天寿节善长率羣臣请朝贺不许再请乃许遣征南将军下滇南议自善长已贺平滇南又预议文臣赠封荫叙例复请老而祺亦自以能有所任使洪武二十一年肃清逆党榜列勲臣犹前善长又二年所善长年七十七矣毫不能检饬其下尝欲营第宅从信国公和假卫卒三百人役和探得上旨攘臂曰太师敢擅发兵耶密以闻而复有谓坐惟庸株累当徙边者皆豪而善长私之数以给其亲上恶之会有言星变其占当移大臣于是御史上书论劾善长上复为捕存义之子佑伸置狱具谓惟庸初为宁国令善长荐之超为太常少卿以黄金三百两谢及惟庸反谋定善长遣家奴耿子忠等四十人从皆厚得其金帛而惟庸复以西域古剑白玉壶玉刻交龙蟠桃杯酬善长羣臣奏请诛善长不许仍手诏慰谕之召诣奉天门与语开创艰难为流涕至右顺门谓羣臣太师老矣吾欲曲宥佑伸死以慰太师心羣臣固言善长反状明甚三尺法非陛下所得私上曰法如是奈何善长大恸曰臣诚负陛下恩无面目见羣臣归而自经死佑伸及吉安侯皆坐弃市特赦诸子弗诛以礼葬善长恤其家都尉祺后数年卒有二子以公主推恩芳为留守中卫指挥次茂旗手卫镇抚后罢世袭善长死之明年而御史解缙代虞部郎中王国用为称冤言善长与陛下同心出万死以取天下勲臣第一生封公死封王男尚公主亲戚拜官人臣之分极矣富贵无复加矣藉令欲自图不轨未可知而今谓其欲佐胡惟庸者则大谬不然夫人情爱其子必甚于兄弟之子安享万全之富贵者必不侥幸万一之富贵善长于胡惟庸则犹子耳于陛下则亲子女也使善长佐胡惟庸成不过勲臣第一而已矣太师国公封王而已矣尚主纳妃而已矣寧复有加于今日且善长岂不知天下之不可幸取取天下之百危当元之季欲为此者何限莫不身为齏粉覆宗絕祀能保首领者几何人哉善长胡乃身见之而以衰倦之年身蹈之也凡为此者必有深讎激变大不得已父子之间或至相挟以求脱祸今善长之子祺备陛下骨肉之亲无纖芥之嫌何苦而忽为此若谓天象大臣当灾则尤不可天下闻之孰不解体臣亦知善长已死言之无益所愿陛下作戒将来耳上虽不能用亦不罪也

赞曰高帝神武所断决皆自臆而善长奉行之即善长功胡能比萧鄴侯哉爵为上公位至太师赠王之约同于带砺其班先徐武寧恩数百刘文成而中不惡人亦不异议者帝固有以心知之也人臣无将将必诛身从逆而再屈法以寬之必不得已而听其自尽以礼葬恤帝之恩德不亦深厚加诸公万万哉虽然其初狱抑何曖昧少证也隱之十年而后发发之后一狱辞视初十年而加详者寧能使善长瞑也嗟乎王国用之疏可味也已

冯胜者初名国胜更名宗异最后名胜其先世繇泗徙光州再徙濠之定遠遂为定遠人父文质有三子长曰国用季曰胜皆骁勇饶智畧国用貌都雅动止举举而胜长躯

伟面磊落慷慨生时黑气满舍若烟雾经日不散里中异之淮南兵大起国用与胜从恶少年数百人立砦以自固属高帝以兵畧地至妙山国用舍众来谒上顾国用儒服谓曰若书生耶试为我计安出国用曰建康龙蟠虎踞帝王都会自古记之幸而近我其帅懦弱不任兵宜急击下其城踞以号召四方事仿仁义勿贪子女玉帛若羣竖子者天下不难定也上大悦曰此吾心也遂召致左右俾预进止机宜当李善长亚而有所攻战輒擐甲直前奋击时国用已进胜上尤爱异之兄弟俱备宿卫从克滁州三汊河之战国用手获其帅与胜偕攻和之板门寨先登又败鸡笼山寇上谋渡江国用与李善长请待舟楫而后济会得巢湖水寨兵遂赞上拔采石取太平上大破陈额森兵尽覆其众获之赦额森与盟插血而呕国用曰其人必叛叛形见矣额森果叛而为其下所杀子兆苏复拥大众据方山与中丞曼济哈雅分水陆而军以相救众各数十万国用等从攻破哈雅已大破降兆苏尽得其众上选降卒之骁勇者五百人为宿卫独国用与胜擐甲侍帐中上寢息自如五百人皆感服上即以属国用胜将而攻金陵先登复从取镇江俱授万户复从取寧国定泰兴宜兴俱进大元帅国用寻擢帐前亲兵都指挥使專侍谋议从征金华进平绍兴功最多属疾卒上亲临奠哭之恻赐葬江寧贈郢国公明年胜代为都指挥使陈友谅陷太平进逼我龙湾上御之大战于石灰山未决胜率宿卫士直搗其中坚遂大破之溺死者数万俘七千人穷追至采石复败之遂复太平师旋再从上讨友谅掩其安庆水兵长驱至江州友谅仓皇走武昌江州平进亲军都护张士诚以兵围安丰丞相刘福通求救上帅师援之福通已败见杀安丰且下胜从解其围第功多迁同知枢密院事从下武昌克庐州走元将左君弼移兵取江西诸郡复同相国达平章常遇春合兵下淮东寻以胜围高邮下之语见达世家寻取淮安安丰从讨张士诚下吴兴破执其将吕珍遂进围苏州踰八月始破之论功次平章遇春进银青荣禄大夫都督府右都督寻从大将军北讨下徐宿青兗济南凡得郡国十余立皇太子以功臣备宫寮胜领詹事俄坐小法夺一官为都督同知总诸卫兵取乐安守将俞胜遁获其将右丞别部兵溯黄河会取汴梁河南二郡西趣潼关其将张德钦等来逆战大败之遂夺潼关守焉复西下华州旋顾汴梁谒上于行在上慰劳之拜征西右副将军命守汴梁还从大将军达下山西从武涉取懷庆踰太行克碗子城取泽州遂取潞州转战平阳败其左丞田保保徐伯昌于絳州获之平阳絳州平制诏右副将军胜居遇春下偏将军汤和居胜下偏将军杨璟居和下渡河发陝西取凤翔李思齐走临洮获其大将薛平章等遂度陇克巩昌降其总帅汪凌沁布进兵逼临洮还从大将军攻围庆阳执叛将张良臣全陝平前是上谕达大军已下庆阳右副将军权镇之节制诸路兵马而大将军与偏将军和先还京议功赏达遂还达还之五十余日而胜亦至上责之曰将军不奉诏耶吾欲将军外遏敌内镇抚关内所寄岂浅鲜而一旦弁髦之何也胜顿首请死上以其功高弗忍下吏至定赏颇列其事金币不能当大将军半俄复为右都督再以征西右副将军同大将军出西安搗定西大破王巴拜之师卤其士马数万王巴拜即库库特穆尔也分兵自秦州南一百八渡狗畧阳禽

元平章蔡琳遂入沔州又遣别将由凤翔入连云栈合攻兴元克之蜀地大震移兵平西薄征哨极于西北凯还论功授开国辅运推诚宣力武臣特进荣禄大夫右柱国同叅军国事封宋国公食禄三千石赐券予告以胜兄弟亲同骨肉痛切肢体又谓胜十余年间内则除肘腋之患外则建爪牙之功平定中原佐成混一所以称扬甚至赐文绮帛八十疋明年宋公胜按陝西修城隍简士马又明年大发兵出塞胜以征西将军率五万骑由西路出金兰取甘肃以疑敌且分其势胜至兰州遣右副将军傅友德以骁骑五千为前锋连战败敌遂定甘肃进至伊济鼐路降其守将巴延特穆尔次别笃山口岐王多尔济巴勒走获其平章昌嘉努等及马駝牛羊十余万时大将军达兵不利左副将军文忠所失得相当独胜以捷闻而有言其匿所获橐駝马者赏不行自是连以将军印练兵临清北平继往大同复自大同讨元诸将伞巴喇等还镇陝西改河南册其女为周王櫛妃夫人何氏卒于京上赐玺书慰藉加餐夫人身后吾已任之即欲南从容委事于偏将而后行与议葬毕复之镇董建周王宫府成民不告劳大将军北讨伊尔布哈胜以征西将军练兵河南待发数赐书慰勉时大将军达左副将军文忠皆前卒而元丞相纳克楚拥大众由金山数窥伺为边患上乃拜宋公胜征西大将军颖国公友德永昌侯蓝玉左右副将军率叅将南庸侯赵庸等以步骑二十万乘之郑国公常茂曹国公李景隆申国公邓镇并子侯等皆从军上复遣故所获纳克楚部将鼐喇固奉玺书谕之降胜等至通州谍敌有屯庆州者遣永昌侯玉以轻骑乘大雪掩之杀其平章多喇大获士马而还胜出松亭分筑大寧寬河等四城遂驻大寧踰两月留兵五万守大寧以全师压金山纳克楚见鼐喇固而惊曰尔尚在乎鼐喇固颇为述上恩德且示以富贵纳克楚喜即遣其左丞特默齐等至胜军献马且窥虚实胜已踰金山至女直奎腾降纳克楚之将庆国公袞通初纳克楚分其众为四一曰榆林一曰养鹅庄一曰龙安一曰秃河其人畜辘重富于元主不肯预朝会召之亦不往胜大军直前逼纳克楚度不敌乃因鼐喇固请降胜使蓝玉以轻兵往受之纳克楚觇知明兵盛乃指天啧啧曰不复与我有此众矣遂率数百骑诣玉约降玉大喜出酒与饮甚洽纳克楚别酌所携酌酬玉玉讓之先纳克楚即先饮复酌酬玉玉解衣衣之曰请衣此而后饮纳克楚讓弗肯衣玉亦持弗饮久之纳克楚取酒浇地顾其下咄咄语郑国公茂者胜子壻也时在坐勇而疎胜故欲儿子畜之茂不受且迫欲自见而其部将赵指挥解方言谓茂此且欲遁也茂遽前搏之纳克楚惊起欲就马茂拔佩刀砍之伤臂不得去都督耿忠遂以兵拥纳克楚驰而见胜其将士妻子凡十余万在松花河者闻而惊溃胜遣降将袞通往谕之亦降凡四万骑并得其各爱马所部凡二十余万羊马驴駝车服至百余里胜以礼宴待纳克楚令耿忠与同寝食遣使奏捷罪状郑国公班师次亦迷河获遗车四万五千辆马数千匹伤痍及老弱二万四千余上闻大悦使使谕胜等所以劳赐纳克楚玉带龙衣及其部曲金币无算械郑公茂至京会有言胜娶于元及受良马无算者又失其殿都督濮英三千骑而茂亦自陈所以搏纳克楚故且讪胜过上乃命收大将军印胜还京命归凤阳里第奉朝请而诸将士亦无封赏者茂削

爵安置岭右胜自是不复将大兵有所任使如调东昌等处番兵下云南按行永宁戍金山西平阳诸郡邑兵大同屯牧还即上事仍奉朝请久之加太子太师时列勲臣望重者八人胜仍居第三赏赐黄金至三百两白金二千两钞万锭上春秋高多所猜忌而胜号为雄勇又时时失上意洪武二十八年暴卒诸子皆不得封而国用之子诚积战功云南累官至中军都督府左都督

赞曰冯国用不死其在韩公岐阳伯仲乎胜有大将材积战功久而其中不能无欲且又时时见鹜桀焉能免乎金山之役玺书凡三下以中山开平二王为喻始而勉之中而戒之终而愧焉虽然胜功大罪不能相掩谪废可也嫌死不可也不王可也不侯不可也今世知六王不知六王之为韩宋二公而后不王者作李善长冯胜传

傅友德者宿州人也少骁勇多力击刺骑射冠绝一时元季避乱颍川碭山中为大盗李喜喜所得从破山东焚烧上都宫阙■〈足兰〉关陇转剽入蜀常为军锋冠李喜喜败归明玉珍玉珍疑之不能用走武昌从陈友谅为别将忽忽无所展闻高帝舟师伐江州而叹曰此吾主也以所部谒见于小孤山上奇之俾为别将属常遇春从援安丰掠庐州还从逆击陈友谅于鄱阳湖友德操轻舟荡其锋身被数创战益力手杀数百人复与诸将徼之泾江口友谅死师旋第功最复从上亲征围武昌城东南有高冠山下瞰城中上顾诸将谁能夺此山者赏友德即率万人先登一鼓而夺之流矢中颊镞出脑后复洞胁不为沮武昌平超授雄武卫指挥使复从徐达下庐州西取夷陵畧衡州襄阳安陆俱取之与元守兵战身被九创破擒其将任亮还师淮东克秦州进逼淮安破张士诚援兵于马驴港获战艘千复大破元将珠展于安丰所过焚其积聚上即吴王之元年而友德守彭城而王保保之大将李二来寇势张甚友德度兵寡不敌诃其众方肆掠率步骑二千自吕梁渡直趣击之李二有骁将曰韩乙者出战友德单骑奋槊刺之坠马师乘而进遂败之友德度贼且复至开城门阵于野使皆卧枪以待闻鼓即起李二果盛兵至轻我师寡竟而器友德鼓之士腾跃搏贼遂败之缚李二以献上大悦召友德还建康进江淮行省叅政命以麾盖鼓吹送归第翌日复命中书叅议李饮水杨希圣携音声伎人一部就友德饮饮水等裸而酣上怒皆黥之而喻友德曰若擐甲胄出百死一欢之固当而彼士人何为者吾不而咎也明年大将北征上所褒勉不四五人而独谓叅政友德与右丞薛显勇畧冠诸军可授之选锋当一面复召喻友德曰汉高帝角项羽而彭越别从山东始汝其努力友德遂从大将军破沂州斩其将王宣下青州元丞相伊苏率数万骑来争大将军设伏友德以轻骑五百为诱师敌追至伏而回师击之伏尽发伊苏败走遂取莱阳明年从取东昌棣州乐安复从克汴梁河南及収诸山寨复从渡河取卫辉彰德遂东取广东临清沧德进克元都以精骑侦逻古北诸隘掩其残卒获马千六百疋牛羊八千头车二百五十辆畧大同而还从狗保定中山真定皆下畧平定州遂克太原王保保

自保安以大众来援兵未交万骑突至友德帅死士五百拒却之因与大将军谋夜伏兵掩其营王保保乘驷马以十八骑走友德追至土门关弗及尽获其士马四万余复败贺宗哲于石州击四大王逐珠展至宣府败图鲁卜友德功最多复从大将军西入关走张思道于鹿台逼临洮降其大帅李思齐大将军围庆阳友德以骁骑扼其走路庆阳下关陝悉平预赐白金文绮从上典又明年复从大将军捣定西大破王保保收其士马辎重移兵伐蜀友德领前锋出秦州夺畧阳关虜其平章蔡琳遂入沔分兵由凤翔入连云栈合攻汉中克之以馈运不继还军西安蜀将吴友仁谋复汉中兵大至守臣告急友德以精骑三千攻斗山寨夜令人持十炬列山上蜀兵惊遁凯还大封功臣授开国辅运推诚宣力武臣荣禄大夫柱国颍川侯食禄千五百石寻进同知大都督府事是岁冬议伐蜀征西将军汤和副将军廖永忠由瞿塘以舟师趣重庆友德为征西副将军由秦陇以步骑趣成都既受命上复密谕友德谓蜀人闻我西伐必悉其精锐东守瞿塘北阻金牛以抗我师若出其意外直捣阶文门户既隳腹心自溃兵贵神速不在巧迟勉之友德疾驰之陝集诸军扬声出金牛而潜使人觐阶文守御果单弱因引兵出陈仓攀援岩谷昼夜兼行抵阶州守将丁世珍仓皇拒战击走之阶州下遂趋文州蜀人断白龙江桥自固友德督兵修桥以渡拔五里关遂拔文州渡白水江所至皆不战而溃进拔绵州汉水涨乃伐山造百舰而以木牌数千书克阶文绵州日月投汉水顺流而下郡邑见之皆解体舰成遂渡围汉州其丞相戴寿太尉吴友仁等撤瞿塘之守兵以援汉州至则友德已大破其守将向大亨兵谓将士曰援师至不忧也破大亨夺其胆矣亲督劲兵迎击大破戴寿寿走遂拔汉州进围成都寿等出战以巨象载甲士前列友德勒强弩挟火器冲之象皆却走寿兵躡籍死者亡数而会副将军永忠得木牌书率所部直前破扼江渚进逼重庆其伪主明升降寿等闻之乃籍府库仓廩反缚诣军门得士马三万分兵徇州邑之未下者克保寧执吴友仁送京师上大悦曰颍川侯友德冒越险阻首克阶文破绵汉成都保寧诸郡功最大赐白金二百五十两文绮二十表里人犹以为薄未厌云是时故诚意伯刘基上平蜀颂上不自居推劳诸将臣别为文首褒扬友德而永忠次之征西将军不与焉明年副征西将军冯胜由西路出金兰友德先率骁勇五千骑驰趣西京遇元将实勒们突战败之至永昌又败其将多尔济巴勒获其马牛羊十余万进畧甘肃手射杀平章布哈降太尉索诺尔等获马万匹至瓜沙州破其守将获金印三马牛羊二万是时师出三道独友德获全胜而以主将胜坐小法不被赏踰年大军复出鴈门西北巡长城外友德为前锋敌闻之絶漠徙去追获其平章邓博啰特穆尔等还军镇平北上疏言便宜五事其一谓漕粟须转般至长芦则河间之卒运而抵通州北平之卒运之入省永平之民自雅洪桥陆而运北平者道颇远为通清河涑水故道便其二流民越境为边患不浅宜招抚安辑给以种具复三年使其三古北等隘旧以民守一夫应役二夫给之费伙而不收实效宜发兵千人代之戍使其四关外新附丁口贫宜给衣粮厚恤之使其五北平郡岁供亿大军久宜有以纾之便上报曰将军言是其下所司悉从将军寻召还扈皇太

子诸王讲武荆山下与诸彻侯俱增岁禄千石同中山侯和发兵驻延安以备巴延特穆尔伪请和上乃阳召和还而留友德以诱之巴延特穆尔果入寇友德设伏纵击大破之获其士马辎重无算其众缚以降上将下云南命友德巡行川蜀永宁雅播等处修城郭缮关梁因兵威抚纳金筑普定等诸土夷皆纳款还献马五百匹上别选内廐良马十五匹赐之当济勒布哈寇边复以征夷右副将军从大将军达出塞抵北黄河夜覆其灰山寨获士马以千计洪武之十四年命友德为征南将军率左副将军蓝玉右副将军沐英诸彻侯大将步骑三十万讨云南军行上亲饯之龙江而命之曰朕不能亲至其地然尝览舆图询彼地豪杰而得其阨塞取之之计当自永宁先遣骁将别将一军向乌撒大军继自辰沅入普定分据要害乃进兵曲靖彼所必守地下曲靖三将军以一军趣乌撒应永宁之师大军直捣云南彼此牵制破之必矣下云南大理必次下余郡邑部落可抚而有也友德并急传二十日而至湖广分遣都督胡海洋等选精卒五万由永宁趣乌撒而自率大军由辰沅取贵州道进攻普定克罗鬼犵狁诸苗望风降至普安复攻下之遂进兵曲靖梁王把咱尔斡尔密遣其司徒达尔玛来拒战友德用右副将军英策勒兵至白石江与相拒扬声欲渡而别遣将以精卒数千潜从下流掩其背众乱友德乃麾众毕渡悉师薄之右副将军驰鐵骑捣其中坚下流之师表里合击遂大破擒达尔玛俘其众以万计友德縱之归农讙声闻远迩友德遂自率众数万捣乌撒而遣两将军趣云南梁王走死云南平两将军遣彻侯曹震等分道徇云南友德兵已抵乌撒欲通胡海洋兵循格孤山而南诸蛮皆遁遂城乌撒工甫集蛮复大至友德故持重不战以老之士踊跃思奋乃前为阵蛮麋集友德鼓士腾赴遂大破其众斩首三千余级蛮遁遂城乌撒得七星关以通毕节又克可渡河于是东川乌蒙芒部俱请降威楚曲靖中庆澄江武定及诸路亦降左副将军蓝玉等复进兵下大理虏其帅段世分兵取鹤庆畧丽江荡金齿俄而乌撒诸蛮复叛友德讨之斩首三万余获马牛羊十余万纵兵搜山谷亡脱者其强首霫翠亦降云南悉平时上前后下玺书友德等凡数十悬断万里外委曲中窳友德等所以奉行不敢爽诸因土俗定租赋兴学校瘞战骨广屯田远迩畏悦以是遂大定乃诏友德玉等还京而右副将军英以数万众留镇之友德入见所以宴劳有加进封颍国公食禄岁三千石予告及鐵券子孙世袭锡锦绮帛二十表里鈔百錠再賜米千五百石以皇女归其子忠寻以征西左副将军同大将军胜北袭元将纳噶楚于金山尽降其众大将军以遣召归留友德抚降众寻亦召还率辰沅贵州诸卫兵讨平广西之部落反者东川蛮复叛据乌蛮山道路友德复以征南将军率诸军往讨之且讨越州之叛酋阿咱尔道筑平夷千户所进击阿咱尔破之斩首千余级阿咱尔请降遂平平越诸叛苗诏还军驻沅州寻召还京为征夷前将军率副将军赵庸曹兴王弼孙恪等赴北平练卒从燕王出古北口袭元太尉鼐尔布哈丞相耀珠等降之悉収其部落驼马辎重诏友德以诸降将还朝寻命援信国公和例还乡賜黄金三百两白金二千两鈔三千錠文绮三十匹綾十疋加賜鈔五百錠給兵百二十人为卫再以征夷将军率定遠侯王弼武定侯郭英等于淮北山

东北平诸属卫选练精卒备边赐白金二百两钞二百锭寻从燕王捕诸蕃将阿实哩等复命同宋公胜凉公玉往陝西练将士未久召还尝请懷遠田千亩上曰尔不闻公仪休事耶禄赐不薄矣而复侵民利何居友德惭而退复出理山西诸卫兵已副宋国公总山西河南兵马屯田公侯在事者悉听节制还进兼太子太师寻复与宋公胜往北平山西备边听宋燕二王节制自蓝玉败友德与宋公相继暴卒子孙不得袭封云

赞曰友德之显以敢力战也然十余次失身冒百死而无一足称及其遇真主虎变龙从亦不虚下策不虚画以至列通侯进上公呜呼天哉当时持重善将将无如中山王至暗鸣跳荡独开平王而友德差次之称二虎将开平死大封之后友德始益展而有方面勲取巴蜀定滇笮其显显蓋庶几中山矣后友德公者为凉公蓝玉其战功亚友德至上宠任之友德弗如也然卒以谋反死

蓝玉者凤阳定遠人开平王之妇弟也长身頰面有勇畧从开平王之麾下每战先登陷阵所当无前开平王数称于高帝帝亦以王故宠异之初授管军镇抚进武德卫千户改亲军千户累转武德卫指挥使皆自积战功超为都督僉事十一年同西平侯沐英讨西蕃擒其酋癭脖子鹵斩以千计获马二万余匹牛羊十余万还封永昌侯久之以征南左副将军同颍川侯讨云南转战平之事见颍川侯传增禄五百石再以征夷右副将军同宋国公袭金山纳噶楚降之并降其众十余万遂即军中拜征夷大将军代宋国公踰年谍元主特古斯穆特尔在捕儿海率劲骑十余万自庆州间道袭之用定遠侯王弼谋戒诸军皆穴地而爨毋使见烟火距其营八十里遂直前薄之敌方整众北行不虞我军至大惊其太尉曼济轻来逆破而僇之众遂溃皆请降元帝与其太子天保努丞相实勒们知院纳恰等数十骑遁去玉遣精骑追之不及获其次子地保努后妃宫主百三十余人吴王多尔济等将相官校三千人男女七万七千余口马四万七千匹驼四千八百头牛羊十余万车二千余辆并得其传国玺寶玉金印聚其铠仗而焚之复破降其太师哈喇章获将士万五千八百人马駝四万八千余匹捷闻上大悦使使赍敕諭玉比之卫青李靖玉傲而淫私元主后事露后自缢死凯旋上特赐玉白金二千两钞一千锭文绮五十匹然犹面责数之拟封梁国公嘆惜且久乃改封凉国公而镌其过于鐵券寻讨平散毛峒擒土酋刺惹等万余人置大水田千户所进平施南忠建二宣抚司叛蛮还增岁禄五百石赐钞千锭寻诏还乡锡金帛给兵如颍国公寻与魏曹二公措置陝西边事至兰州坠马微伤上手诏慰劳之比于中山开平二王寻召还赐米千五百石复出理兰州庄浪等七卫兵玉追捕逃寇祁者孙遂畧西蕃罕东之地玉兵入罕东欲大掠蕃众皆遠遁而会蜀故降将伊埒特穆尔反使玉移师讨之至则裨将瞿能等已大破其众伊埒特穆尔走栢兴玉以计诱缚其父子送京师斩之而尽降其余党便宜请增设诸卫且请籍民人为兵上报设诸卫而不许籍民遂班师定东宫官属玉兼太子太傅意不乐居宋颖

二公下詔曰我乃不堪太师耶玉故恃上宠多蓄庄奴假子数千人常占东昌民田民讼之御史为置狱玉执御史笞而逐之度喜峯关关吏以夜不时纳玉大怒纵兵毁关入上闻之不善也玉间有奏请不尽听退而谓所亲上疑我矣遂谋反为锦衣指挥蒋瓛所告狱具磔于市夷三族榜其状示天下玉之诛彻侯功臣文武大吏以至偏裨将卒坐党谋死者可二万人胜友德用材武且名位极虽不入蜚语亦皆不良死又四年而上崩燕师称靖难宿将皆尽无与抗者

弇州续稿卷八十四

●钦定四库全书

弇州续稿卷八十五

（明）王世贞 撰

○文部

△史传

浙三大功臣传

刘基字伯温处之青田人少颖敏絶羣读书过目輒诵善经学工属文傍通天官阴符家言元末举进士尝从肆得星历书留之一日而返之即闇记如流其人惊而归基书基笑曰安所事书书不在吾腹耶授瑞州之高安丞故秘书监揭曼硕有人伦鉴见而谓之曰子魏玄成流也而英特殆过之基为丞以廉节着发擿奸伏数与强御挺小民爱若慈父而贵豪多不便者尝反故狱检案尽得其阴私前检官以罪去嗛而谋中基行中书省乃移基入幕府以全之寻与其长抗议不合投劾归再补江浙儒学副提举复论御史失职受台抨再投劾归基益任诞不持循循尝游西湖有异云起西北光射湖水客以为庆云将赋诗基大言曰天子气也在金陵十年后英主出其下非我谁名世者众掩耳稍遁去基独与门人沈与原携饮湖亭沈醉乃别时无能识基者西蜀赵天泽独竒之谓曰公乃受魏玄成目耶非诸葛孔明莫能当也为文以王佐期基而方谷珍反海上省宪乃辟基元帅府都事与元帅筑庆元诸城以逼谷珍时左丞脱里特穆尔议招抚基持不可曰谷珍首乱赦之无以惩后所赦计独其余党耳左丞曰善以便宜进基行省都事与谋谷珍惧使阴贿基基却不受持前议益坚左丞乃闻之朝而谷珍悉其贿使人浮海至京

交關用事者许谷珍官听之降而坐基擅持威福伤人主好生德夺职羈管绍兴并罢左丞基感愤恸哭呕血欲自杀门人穆尔萨曰先生自负何若而与匹妇共沟渎耶且太夫人在堂奚赖固持之得不死自是放浪绍兴诸山水游必有记又多为歌诗自适而谷珍益肆横不可制山寇蜂起行省乃复以都事辟基授以兵基且抚且讨寇悉平而是时舒穆鲁宜孙为枢密院判负义干基与之相掎角军声大振自枢密經歷迁行省郎中经畧使上基功而用事者右方氏仅以基故儒学副提举资迁总管府判基既左转又失兵乃纳告身庭中拜曰臣不敢负世祖皇帝无所措足矣遂逃归青田山中着郁离子以见志众避谷珍者多依基自保客或说基以公才从恶少年数万据括苍并金华明越可传檄而下也方氏计有杭海走耳画江而守之此句践业也基笑曰生平恶方氏张氏刺促狐鼠今乃效之耶会高帝以下金华定括苍基置酒延客指干象示之曰此乃岂人力也耶客亡去基遂决策从高帝而会上使使以金帛来聘乃付其众弟升曰善保境毋为方氏窥也遂与章溢叶琛间道走金陵且谓溢琛吾西湖言验矣既见上陈时务十八策上大说语基先生有至计勿惮陈吾能行之俄伪汉陈友谅倾国入寇压金陵而军势张甚上欲发兵御之而众恇扰不决有请背城借一者有以钟山王气请奔据之者至有劝纳款者基后至独张目不言上为起入内趣召基屏人语曰先生可以有言乎基曰先斩主纳款及奔钟山者然后言上固问计安出乃曰贼骄矣诱之深入而伏兵徼取之故易易耳夫取威定霸在此举也而言纳款及奔者何也上于是决策诱破友谅尽覆其众以克敌赏酬基基弗受时上虽已定江东称吴国公而奉明韩林儿座于中书省基怒骂曰彼牧豎耳奉之何为遂不拜上怪而问基基陈天命所在上感悟始定征讨大计师攻友谅之皖城不下基谓弹丸地何足久劳我友谅胆破矣急进薄江州彼必遁江州下皖城焉往友谅果遁如基料都督冯胜攻某城上使基授之方畧基以一赫蹏封曰夜半出兵至某所见某方青云起即设伏顷有黑云起者贼伏也勿轻动日中昃而黑云渐薄回与青云接者贼归也衔枚蹶其后击之可尽擒也胜启读之初亦莫敢信已而青黑云起具如基言始以为神遂奉而破贼取其城友谅之丞相胡廷瑞使其子请以洪都降有所要质上难之基从后掎所坐胡床上悟而许之洪都下前是基以母丧告归上固留不得行至是复伸前请始许而以礼官馆伴贖祭踰等基归至衢而苗军叛杀金华括苍守将胡大海耿再成等衢人汹汹其将夏毅忧之甚迎基入众即帖伏基为移书诸属邑俾固守以俟邵平章之兵至而悉诛诸叛将基治葬毕辄为人言上神武必有天下蕞尔方氏不为窦融当且为田横而方氏亦素畏基卑辞以币来唁基白之上上使受而答之因腾书宣上威德方氏遂请降上于军国有所谋輒驰使以书叩基基事事条答皆悬中俄驿召还道建德而张士诚来寇李右丞文忠时为帅奋欲击之基使勿击曰三日后必走走而尾之可尽擒也三日基登城望曰贼走矣众见其壁垒旗帜如故且闻严鼓声莫敢发公复趣之至其所则空壁耳所留皆老弱俘追而薄之东阳悉获其众基既还京入谢上从容问曰吾欲取陈友谅张士诚而隄生谓士诚密迹且富而弱宜先若为我策之基对曰士诚

自守虜耳陳氏據上游稱帝此不宜久蘊崇之取陳氏士誠則囊中物耳而會友諒復攻圍洪都上遂率師逆擊之大戰于彭蠡湖雖小利而尚未決基請移軍湖口以金木相犯日決勝陳氏遂平而是時張中亦在師中所謂鐵冠道人者臨川人其于破友諒筭尤神絕他占驗亦稱是愈于基國事謀斷弗如也置太史令秩正三品基領之日中有黑子基奏東南當失一大將俄而叅軍胡琛伐陳友定敗沒上方欲刑人而基入見亟語之夢以頭有血而土傅之故欲應之基曰頭上血眾也而傅以土得眾且得土也应在三日上為停三日囚待之而海寧降上大悅悉以所停囚付基縱歸里熒惑守心羣下皆惴惴以上且有誅僂基密奏宜下書罪己以回天意上許之眾乃安大旱上特命基諗滯獄甫決雨隨澍時基最為上所信向所言无不听而中書叅政張■〈日上永下〉寵相軋猶時時念故元君欲為元弱明使人上書頌上功德請及時娛樂侈大宮闕以明德意上出以示基基曰是欲為趙高也■〈日上永下〉色動心怨基乃使其腹心齊翼岩伺基陰事欲以中基而■〈日上永下〉先坐事誅司天台災翼岩遂飛章告基專擅顧所評皆取上密旨行或有請而報可者上怒面詰翼岩等悉得其受■〈日上永下〉指狀磔于市上即位擢御史中丞領太史令如故諸大典制封賞冊拜皆基與左丞相李善長學士宋濂計定時處州七縣糧當加于宋歲額五升而上獨令青田僅以五升為額曰令鄉里世世子孫頌劉伯溫也時左丞相善長貴盛基獨事與抗議不相下善長不能平也而適以事見譴宥使凌說因彈之基為上言李旧勲且能輯和諸將上曰是數欲害汝汝乃為之地耶且汝忠力足任此基叩頭曰為巨室者棟必大即輕易棟而得小者寧無為室忧上乃解一日上欲相中書左丞楊宥以問基基素與宥善對曰宥有相才無相器夫宰相者任理為衡而不以己與乃稱宥寧能無己也問右丞汪廣洋何如曰此褊淺殆甚于宥叅政胡惟庸何如曰用之債轅破犁犢也上曰吾固難之吾之相毋逾先生基曰臣非不自知第臣疾惡太甚又耐繁劇恐孤陛下恩其后宥以怙寵廣洋以巽慝惟庸以大逆皆不良死而會上幸鳳陽基與左丞相居守請于上謂宋元以寬縱失國且今刑亂用重必使紀綱肅而后惠政可施乃飭諸道御史一切按劾權幸无所避而中書省都事李彬坐貪縱見法丞相以彬省寮且素■〈目匿〉之請于基得緩獄基不听獄具馳奏報可基即斬之丞相大恚恨俟上歸而訴基盛夏方祈雨僂人于坛壝之下非所以奉承天意上惜基持其章不下而風基以病請告就醫青田時上再幸鳳陽不能無昼綉意建為中都而銳欲出塞滅王保保基瀕行謂上中都曼衍非天子居王保保不可輕也其后皆如基言明年大封功臣手詔叙基勲伐召赴京師命兼弘文館學士已封其祖父皆永嘉郡公乃封基開國輔運守正文臣資善大夫上護軍誠意伯勲級猶二品而祿二百四十石僅得忠誠伯之半非所望也又明年復予告歸里基既歸上章問起居撰賀平蜀頌上亦優詔答之時及天象與時務所宜嘗為上陳甌閩事蓋甌括之間有隙地曰淡洋其南抵閩界曰三魁為鹺盜藪方氏所由亂基奏于其地立巡檢司以控扼之其奸民弗便也相率挾逃戍之卒以叛而大豪復陰持其■〈穴上奧下〉基時使子璉上書奏之而不先

白中书省胡惟庸左丞摄相事衔基旧语使刑部劾基欲购淡洋地为基不得则创立司之说以窘其人致激变疏上弗问复请逮其子璉又不问而第令移文使基知基乃驰入朝见上不敢辨唯引咎自责而已亦不敢言归惟庸俄代广洋为右丞相寻进左基乃大戚曰吾安敢希言验即验如苍生何遂邑邑不乐以至属疾惟庸觐上之念基怠乃阳为好者以正月朔挟医来视疾基饮之再觉有物积胸中如拳石间以白上上亦不信也又三月寢剧使使问之知不能起乃为文以赠给驿舟护归青田亡何竟卒基且卒以生平所习天文秘书封授子璉曰服阕亟上之毋令后人习也又为一书大畧劝上以修德省刑祈天永命且寛猛若循环然毋持一端诸形势要害之地宜宿重与京师形势相络授其次子仲璟曰惟庸方在事上之无益是不久必败败则上思我其时可密闻也基为人刚毅有大节慷慨敢言遇天下利害果势壮不复反顾而揣摩事计多中其于天文尤悬断不爽若鬼神初上礼重之呼老先生不名又时时谓人伯温吾子房也然卒不以为相封拜亦轻最后恩礼亦渐薄人以为中惟庸间云洪武十三年上诛左丞相惟庸等果复思基言召其子璉拜考功监丞迁江西右叅政蚤卒二十四年召璉子廌复故封诚意伯岁禄五百石予世袭二十五年卒子法幼而璉弟仲璟奏基遗疏拜阁门使迁谷王右长史靖难师起谷王开金川门降而仲璟独不屈下狱法亦停袭法子枢孙县曾孙禄至景泰中思基功授翰林五经博士子宪前卒孙瑜至弘治中晋授处州卫指挥使正德中追赠基太师谥文成嘉靖中复封瑜伯爵岁禄七百石卒子世延嗣

弇州外史曰世以诚意伯多帷幄契又善天官家言相率为神鬼之说传之往往过实天官家言诚巧合命中矣然不明其所繇授死而上之中秘虽其家亦无习者世所传皆谬以故余尽绌之不録大较诚意伯之为人磊落慷慨不爱其竒以佐英主男子哉至明哲保身之微视少伯子房小让矣百余年而人主思之三推德而复故封抑何笃厚也同诚意伯荐者章溢亦至御史中丞着绩方面叶琛守洪都死事宋濂为学士承旨掌故侍从有声基之文与濂埒而材过之

于谦字廷益其先河南人七世祖某仕于金为汾州节度使子孙世世为大官至高祖夔而仕元为河南江北行中书省叅知政事追封河南郡公曾大父九思仕至湖广宣慰使都元帅最后迁杭州路总管卒老于杭遂为杭人大父文始仕明为兵部主事改工部父彦昭有隐君子行受谦封兵部右侍郎再与其曾大父父俱赠少保兵部尚书谦生而顾皙美容止七岁僧兰古春善相见而大竒之曰所相人毋若此儿者异日救时宰相也十六补邑诸生时按察僉事行学督责诸生过峻争噪而掎之方诤攘间僉事堕泮宫池诸生皆惊走出谦独前掖之起僉事瞽乃欲以罪归谦谦徐对曰噪公者走不噪公者留此易晓事也今不罪噪公者而罪不噪公者犹可而因以罪援公者其谓何僉事意悟乃止而谦由此显名二十三举进士拜江西道监察御史谦风骨秀峻音吐鸿鬯每奏对

宣庙前上必为倾听而是时顾端肃公佐长台事其御寮属甚严而独才谦以为己弗如也按江西辩一诬狱出数百人之冤死者藩国挟和买为市廛害谦复按惩之一方若涤颂声满道归复偕锦衣官校搆捕官河之匿私鹺者谦所按核于权幸不小避扈跽下乐安州汉王高煦既面縛降上卒命谦数其罪谦肆口而成其言皆正大剴切高煦俯首战栗称万死而已上大悦还师第赏钞币与大臣同久之议增补各部右侍郎治诸镇粮税兼练卒抚民上手书谦姓名授吏部遂超拜兵部右侍郎兼治河南山西奉玺书以往时年仅三十三时人荣之谦感上知遇夙夜拊循郡邑延访父老以便益病苦岁饶则多出官糴余民粟归庾俭则吐庾粟减直以糴公私得相贍而于下尤利齐秦民饥徙入河南者谦令邑各给田初与之牛种而以次责其税毋令与土著淆河势将溃谦厚筑堤障之多植榆柳其上五里有亭亭有长暨卒责以修补乃至所过经由官道俱责种树间凿井以荫行者而饮渴者其在山西则以大同在塞外巡按御史不能至其地往往翫狎请别设御史并上谷治之而又尽夺大同镇将之役卒垦私田者为官屯边用充溢谦于吏术民事亡所不精剴而尤以足兵食明举措振纲纪为急当是时居政本者三杨皆重谦所奏请朝上毋不夕报可以足行其志他措置多遂着为甲令满九岁迁左侍郎食二品俸得封其父母谦既在官久威惠流闻尝轻骑自河内歷太行而盗有窥者谦厉声叱之皆大惊散走曰不知为我公死罪幸赦我谦异数当入朝议事人谓即不橐金往宁无一二土物如合芎干菌裹头之类足以充内交际耶谦笑而两举其袖曰吾惟有清风而已且交际物之几何而闾阎短长可畏也因赋诗见志入朝举叅政孙原贞王来自代是时三杨前后卒而中贵人王振持秉势张甚以谦无私谒嫌之勒给事中廷劾谦以久不迁怨望擅举人自代亡人臣礼下法司论斩系三月署谏上振怒适解乃谓大臣吾尝见一故御史名若于谦者恣甚欲治之今乃非此于谦耶赦之以为大理寺左少卿而所荐孙原贞王来俱显名景泰中至尚书与谦畧相埒谦甫出狱而山西河南吏民伏阙上书请借留谦者以千数周晋诸王亦言之乃俾以少卿复抚二镇又明年始以兵部右侍郎召距其初至镇十九年矣是时南北娄用兵大盗时起尚书邝埜以清干着而谦佐之以弘断部事虽稍稍饬然尚扼于中贵人振不能大展而亡何为正统己巳额森引兵既破畧独石马营诸镇至秋益猖獗振遂挟上下诏亲征谦与邝埜上言额森一竖子耳诸边将士足制之陛下为宗庙社稷主奈何不自重奉以与竖子角乎请毋烦六师上不聽埜乃从治兵而留谦治部事车驾至土木蒙尘报至京师大震皇太子幼不能监国太后乃命郕王摄政以辅之王御左顺门时中贵人振虽死兵间中外恨而欲食其肉于是九卿台谏廷劾振罪请用反法于其家奏未竟而锦衣指挥马顺者振党也妄传王旨叱众退给事中王竑起直前擒顺曰此正所谓翼虎者今日犹敢尔众争捶之立死又捶二阉之尝私振者死时卫卒声汹汹王惧欲退诸大臣皆披靡有趋匿者公独直前掖王且启王下令曰捶顺与二阉死者义激无罪少选俟得请皇太后即族振且籍顺等家众姑退于是王乃起谦徐徐步出掖门吏部尚书王直者最为笃老臣执谦手而叹曰朝廷正藉公耳

今日虽百王直何能为寻进兵部尚书谦谢弗允乃上言扈驾文武臣有预军事进止当以失机论即死亦不宜滥恤报许郕王既即大位益贤谦虞已委焉入对慷慨泣奏曰敌得志挟我大驾势必长驱而南今六军实力武库兵器尽矣司马宜急分道募兵及留漕卒自益司空宜并日而搜乘缮械九门要地宜令都督孙镗卫颖雷通张軫等分守之都御史杨善给事中王竑等叅焉凡兵皆出营郭外毋令避而示弱郭外之民皆徙入内安插毋令失所而器通州仓欲守之或不能委以与敌则可惜宜令官军皆给一岁禄奉听其自运仍以赢米为之直敌所急者草诸厂宜亦听军称力取之不尽则焚之毋以饱敌马而是时石亨方坐系杨洪亦以逗遛当谴谦惜其材勇请赦之与安远侯柳溥为大帅而身摠其机宜进止不効则治臣之罪以谢天下上皆嘉纳之边报益急而侍讲徐理者以晓畅军事闻且好言天象上使中贵人召而询之则力谓紫微中宫皆有变必反故都而后吉诸中贵人之鼠窜者恋土者相轧未定而搢绅士人多遣其私重归谦乃恸哭廷诤曰京师天下本宗庙社稷山陵宁此百官万姓帑藏庾廩萃此此而不守去欲安之今日足一动明日大事去矣且敌乘胜骄实不足畏也上闻之曰善其一听谦处分十月额森挟太上皇帝破紫荆遂直窥京师石亨议毋出兵第坚壁以老之谦曰不可贼张甚矣而我又先之弱是佐彼张也亟擐甲统大营营于德胜门外诸门皆有兵摠二十二万敌见我兵盛而严不敢轻犯以数骑来尝我谦乃设伏于空屋使数骑诱敌敌遂以万骑来薄我伏发败之孙镗毛福寿复败之西直门谦使谍谍上皇輦驾远夜令人以火炮击其营死者千计贼遂退有诏褒于谦进加少保总督军务谦固辞言臣以猥薄致位六卿任重才疎已出望外今大寇未靖边事未宁当圣主忧勤之时人臣効死之日岂以犬马微劳遽膺保傅重任所有恩命未敢祇承不许谦退而语人曰四郊多垒卿大夫耻之今谦不能死而以微功赏能无重耻哉复上疏固辞不许大同叅将许贵奏请遣使腆其币以款敌而徐为讨伐计谦谓前者故非不遣使都指挥季铎指挥岳谦遣而敌随入寇通政王复少卿赵荣遣而不获征太上一信其狡焉侮我而齧我何似而可言和况敌不共戴天雠也理固不可和万一和而敌遂肆无厌之求从之则坐弊不从则生变势亦不可和因劾贵介胄之臣而委靡退怯法当诛于是边将人人言战守敌不能挟重相恫喝抱空名不义之贄始欲归太上而谦之伏祸肇矣谦以涿易真保诸州郡为京师拱卫（阙）事力单甚乃皆宿兵使都指挥陈旺等分将之而右都督杨俊帅焉久之皆屹然重镇俄谍报敌逼摠兵朱谦于關子口明日复报追石亨于鴈门關烽火连属众皆恐请大发兵援之谦筭额森尚遠塞必张疑兵以胁我乃上方畧授亨等使皆坚壁而令各营秣马厉士使若将大举者已而敌果不至中贵人喜宁者故俘卒也下蚕室得近而后复没敌为敌用诸所要挟皆宁谋谦密授计杨俊捕而磔之复授计侍郎王伟诱诛为敌间者小田儿敌自是益计屈时复议遣使与额森和且迎太上羣臣王直等请之力上意不悖曰我非贪此位而卿等强树焉而今复此纷纭何众不知所对谦从容曰天位已定宁复有他言和者觐以解目前而得为脩耳上顾而改容曰从汝从汝于是左都御史杨善以泛

使往而上皇返驾先朝处降人近畿额森入寇多从之而北会西南方用兵谦与上谋每征行輒挟其精骑以往厚与之资有功则官之已而更遣其妻子自是肘腋少他患杨洪既自独石入卫而所留老弱凡入城悉归额森然彼亦不之守谦谓此宣府垣屏也不可弃乃复授都督孙安计使以精兵由龙门關出据之而募民屯田且战且守八城遂复贵州苗寇久未平侍郎何文渊请罢二司專设都司而以大将镇之谦曰不设二司是夷之也夷之何以通滇楚道且无故而弃祖宗所设地不祥遂寝当是时浙闽则有邓茂七叶宗留广则有黄省养又有獍狺而三楚之贵竹苗獠处处蜂起前后命将兵皆出谦独运号令明审动合机宜虽宿旧勲臣小不中程律即请旨切责究治不贷片纸行万里外电耀霆击靡不惴惴效力毋敢飾虚辞以抵者以故天下咸服谦而归景帝能用人太上既归上奉之南城又欲易皇太子谦以非所职不敢争而皇太子立内阁九卿俱加师傅等官谦得太子太傅且命兼支二俸羣公皆一辞谦独再辞其文婉约以示风上弗许时己巳城下之役石亨功不如谦而得世侯爵心愧之乃推谦功诏予一子府军前卫副千户谦辞至再三有云纵臣欲为子求官自当乞恩于君父何必假手于石亨于是亨益愧且恨谦矣上复赐谦阙西甲第谦辞曰边患未戢何以家为去病竖子尚知此意臣独何人而敢饗此又不许乃置上前所赐玺书袍铠冠带弓箭之属于堂而加封识岁时一谨视而已谦多寓直房以便朝谒一日病痰壅上使中贵人兴安太医院将董宿视之云治痰必需竹沥上为亲幸万岁山伐竹以赐且命计谦日用所需悉出自尚方谦皇恐谢且乞归诏免朝谒寻赐玺书褒予备至太宗以北伐故宿兵燕中甚盛而会承平久不能无老弱公侯中贵人往往役占土木之难半以委敌其额虽有五军神机三千诸营将不相属相支调为恒谦议选精兵十五万分十营营以一都督领之五千人为一小营营以一都指挥领之余兵散归五军等营以备次调虽有杨洪石亨柳溥为大帅而进止赏罚一由谦相顾俯首而已洪亨皆老将宿猾而亨尤贪纵侈自快谦事裁之洪死而子俊恃勇骜桀不可驯尝疏请悉发京营与诸镇兵大举逐寇而耗其王庭可以得志谦持不可曰大举未必能值敌值敌未必胜而彼率其别部异道而捣我虚宁万全策也俊语塞后竟以不法为谦亂论削亨有从子彪以骁勇着亨恃而强谦出之为大同游击将军以是益恨谦切骨而中贵人曹吉祥刘永诚者与谦共兵事亦衔谦气陵之景皇帝不豫石亨谋与吉祥等发南城錮迎太上复辟甫御殿而执谦与大学士王文下狱谓谦文与中贵人舒良王诚张永等谋迎襄王为帝坐以谋反律凌迟处死然实无显迹可据而廷鞫曰亨等加钴鑕鍛炼文不胜愤辨之苦谦笑曰亨等意欲死我何益既奏上上犹豫曰于谦实有功若何时徐理者改名有贞而与亨比前曰不僂谦此举为无名谦遂论斩弃市籍其家自上赐外无长物谦死之日阴霾翳天行路嗟叹吉祥麾下有达官指挥多尔者以一觴酹其地而恸吉祥恚朴之明日复酹恸如故先是杭之西湖涸龟底孙原贞时镇其地语人曰哲人其萎乎吾甚虞于公谦死而陈汝言者亦亨党也代为尚书不一载而败籍其貲列内庑上召大臣入视已愀然曰于谦终始景泰朝被遇若一身而死无余貲汝

言抑何多耶俄西北边报甚亟上忧之时恭顺侯吴瑾侍进曰于谦在不令寇至此上为默然是岁有贞以内阁首辅与亨吉祥争权下狱流金齿又三年亨下狱庾死家籍彪弃市又二年吉祥与其从子昭（阙）反族谦有一子冕自府军前卫千户赦归宪宗初上疏白冤状上怜而复其官赐祭有云当国家之多难保社稷以无虞惟公道而自持为权奸之所害在先帝已知其枉而朕心实怜其忠天下诵而称之孝宗初加赠特进光禄大夫柱国太傅谥肃愍赐特祠于其墓曰旌功冕改文资累迁至应天尹有干用声无子其族继者数世而至嵩嵩今以都督佥事镇福建谦为文肆笔立就诗亦爽儻然少裁割独其于奏疏尤明切尝口授两吏传写指腕为痛所存奏牍若干卷集若干卷

弇州外史曰北地盖有李梦阳云其为于谦祠记而曰谦死一时痛之云鹭鹚冰上走何处寻鱼赚而当敌之拥太上而南至宣府宣府人登陴曰赖天地社稷之灵国有君矣至大同而大同人登陴曰赖天地社稷之灵国有君矣而谦独扬言曰社稷为重君为轻斯言也功以之成祸以之生然欤否耶谦以介胄分不言和而言战守当太上之迎复谦不为梗小梗者王文杨俊耳景帝之信谦谓其能御圉非有布衣腹心素一不合则睽再不合则去夫人主以私爱欲易太子虽留侯不能得之汉高而谦能得之景帝乎哉天命所皈大寶中夺小人贪功伏机焱发元勳甫就膺此祸烈智不及避勇不及决悲哉天乎不十载而旋定旌与雪偕媿矣纯皇帝之为纯也令后世思君臣矣

弇州续稿卷八十五

●钦定四库全书

弇州续稿卷八十六

（明）王世贞 撰

○文部

△史传

王守仁字伯安绍兴之余姚人父华举进士第一侍日讲修国史会典累官南京吏部尚书有长者称母曰郑夫人当娠而王母岑媪梦神人袞冕乘五色云下抱一儿授之惊寤闻啼声则已生守仁岑媪以语王父天叙名之曰云五岁尚不能言一日出从羣儿戏有僧见而抚之曰是非凡儿柰何名泄之耶王父悟因为更今名即能言而读书复即

过目诵十一岁尝从父华北上过金山试之诗得二絶句皆奕奕神令华以是奇之然为儿戏犹故一日之市所与鬻雀者争游客熟视之出篋钱市雀而送守仁归塾曰少年贵当极人爵立非常功名且徧阅他弟子语其寿夭贫贱后皆验而守仁自是稍受经术工属文一日谓其师曰读书欲何为师曰取甲第耳守仁曰读书乃仅取甲第耶如圣贤何父华闻而叹曰异哉乃欲令我愧见之然已负其材气十五访客于居庸山海關时阑出塞与诸属国相角射因纵观山川形胜慨然有勒碑燕然志踰冠举乡试其经术艺文益大进而益好为兵凡三举而为会试第二人遂登甲榜使治前威宁伯王越葬守仁少则梦威宁伯贻之寶剑既葬而其子出以威宁伯所佩剑为谢则宛然若覩矣益沾沾自喜还而朝议方急西北边守仁为策得八事上之其言皆警剴报闻寻授刑部云南司主事当直狱岁行尽而故尚书侍郎家畜猪饲以囚食甚臍守仁悉杀以享狱卒及囚莫能诘也出决江北囚事竣游九华诸山有所遇遂好神仙之术明年引疾请告前是守仁与诸所善太原乔宇广信汪俊太州储巘河南李梦阳何景明山东边贡相切劘为古文辞名藉藉已而厌之曰滑我精耗我神我且为之役耶因筑室于阳明洞中颇习导引习之久而有若先知者众哗且以为仙而无所得遂游南屏虎跑诸刹与诸禅衲偕往往有所发明久之乃北上道山东而巡按御史陆儼聘之主试程序文皆出其手遂为诸省冠而所得亦多显名士补兵部武选司主事明年中贵人刘瑾等导上为狎游南省台臣戴铣等争之力瑾矫旨捕置诏狱守仁上疏谓君仁则臣直铣等以言为责如其善自宜嘉纳即不善亦宜包容以开忠谏之路乃今赫然下令缇骑旁午拘挛载道即陛下非有意怒絶之而下民无知妄生猜惧自今而后虽有上闕宗社危疑不制之事孰从而闻之幸寝前旨俾各供职如故适足以广大公无我之仁明改过不吝之勇瑾衔其言切下之诏狱廷杖四十死而复苏谪贵州龙场驿丞守仁至钱塘欲缓行而瑾使人尾之急守仁惧不免乃托投江而轻舟自海至闽入武夷山中归又逾年始之驿诸苗夷相率伐木为室以居守仁守仁乃益讲学所治经往往取心得不必与前训诂比矣提学副使席书与守仁谈而伏创书院命诸生师事之又明年瑾伏诛擢知庐陵县至则选里正三老委之词讼而摠其几囹圄空虚他若立保甲清驿供杜巫赛定水次兪絶镇守横敛至今守之为甲令云入覲迁南京刑部主事覲事成留为吏部验封司主事已同考会试始讲知行合一之学与增城湛原明友而朝贤有师事之者矣遂超为文选员外郎明年进考功司郎中是时杨一清为吏部器守仁而骤用之其年进南京太仆寺少卿分署滁州从游者日众始教人静坐以存天理去人欲为实功搢绅之士非笃信其说则怪之以为迂僻不堪用而是时王琼为兵部尚书用事独奇守仁才以为不世出会南赣汀漳等处俱有山贼凭险阻为乱郡邑苦之乃擢守仁都察院右佥都御史巡抚其地守仁至则先行十家甲法务使奸无所容又以高皇帝训勅其父老子弟贼闻而易之弗为虑也而守仁左右及麾下将校至郡邑輿儻之类又多为之耳目守仁微得老隶最黠者致密室而胁之曰汝自知当死不肯为极言贼情实吾贯汝隶迫则尽吐贼情实守仁笑而贯之乃故为不可测意

在此则示以彼或更在彼则示以此每令形家者择吉日出师则复止之或将发复不果以多方误贼而阴勒诸兵备道募选郡邑材官力士以三之一赴军门使与旧兵叅而身教之击射明赏罚以励之时初战破贼于长富村追之至象湖山会闽广兵至且合贼迫溃围而出指挥覃桓县丞纪鏞战死诸将惧请俟狼兵至而后大举守仁怒责之曰战小挫何损且兵岂不足耶而需狼兵乃亲率所选士进屯上抗佯谕诸道姑以牛酒犒师使小息俟秋而再举谍贼懈即分兵为三路约以同夕銜枚进中军夺象湖之隘方大战而奇兵乘间发遂大破之闽广兵亦尽破其巢四十三所斩获大酋詹师富等七千有奇贼属牛马辎重无算捷上因请立崇义县治尽得贼之要害地而耕之报可加岁俸一秩赐银币而前是守仁谓巡抚权轻不足以控压诸道因上奏云古者赏不踰时罚不后事过时而赏与无赏同后事而罚与不罚同况过时而不赏后事而不罚其何以整齐众心鼓舞士气诚得以大军诛赏之法责而行之于平时假臣等令旗令牌便宜行事如是而兵不精贼不平臣无所逃死王琼读而叹曰不与此人权将谁与也覆奉改提督军务兵马粮饷悉听便宜区画用兵进止不必奏闻文武官逗留不用命者听以军法从事于是守仁得益展材用立兵符申约束且为文抚诸贼词旨悱恻恳至而贼酋黄金巢卢珂郑志高等相率皈命矣已遂运兵破横水贼擒其大酋谢志珊等五十六酋斩从贼二千一百余级俘贼属二千三百余人因使使谕桶降贼方狐疑未决乘其懈袭击复破之擒大酋蓝天凤等三十四酋斩从贼千一百级俘贼属数如横水时浚头贼尚强而其酋池大鬣等尤黠桀故与降贼卢珂等讎守仁使使以牛酒谕降之乃报曰大鬣等欲归死而卢珂等将乘虢而掩我家室今者不解甲以自保耳守仁乃阳移文责珂志高等而珂志高等急上变谓大鬣等实挟诈以老我王师且列其寇乱状守仁复阳怒杖责卢珂等下之狱而谕之情复以新厯给大鬣等且谕使来见大鬣乃语其腹心曰欲得伸必先屈赣州伎俩我亦欲先勘之遂以其馘勇九十二人裹甲来见守仁为慰谕宴犒之馆于祥符宫使更新衣习礼供张储饔甚设大鬣等喜过望至正元之次日守仁张乐大宴伏士以待引大鬣等鱼贯入即僂之庭无一脱者遂出卢珂等于狱使之归发兵为乡导夜半守仁出师与之会遂破浚头石门覆其巢三十余擒大贼五十八酋斩从贼二千余奔九连山守仁以九连深险不易攻乃使精卒七百衣贼衣佯若奔溃者贼从崖上招呼与相应久而贼觉之则师已度险贼狼狈失据大军蹙之皆就縛守仁既已尽得贼地相险要增设和平县治如初捷上进右副都御史予世官锦衣卫百户再进副千户守仁念非王琼精心任之毋与成功名者每疏捷輒归本琼不容口而内阁首臣与琼交恶因而訾及守仁矣守仁虽旦夕军旅而不废与诸儒生讲学最后乃为致良知之说直指本心自然最简易痛切乃至欲尽废学问思辨之功以行谊一切皆粗迹其始颇推鹅湖谓其能绍孟子所重周程而所诋在朱氏自致良知之说行天下高明之士乐于顿而恶检束者喜其便直推以上接孔子而拘方者不能无呢訾矣时宁王宸濠谋不轨素浮慕守仁而畏其拥强兵上游使腹心刘养正往探之养正故善守仁好讲学吊诡而守仁亦使其门人冀元

亨应宸濠聘欲以窥其为人语两不合而罢时福建军人进贵杀官吏以叛闻诏遣守仁往勘处寻事已平于是守仁取道南昌图归省抵丰城而宸濠反杀都御史孙燧按察副使许逵劫府库署置将相刘养正李士实等守仁闻变即返而宸濠已遣兵千人逆之守仁入于渔舟得免是夕抵临江又三日抵吉安吉安知府伍文定邀守仁起兵讨宸濠守仁然之乃与文定计上疏告变而移檄列郡暴宸濠罪俾各率吏士勤王时巡按御史谢源伍希儒自岭外复命道吉安守仁留之纪功守仁兵未集而忧宸濠之兵速出曰南京空城耳而实无备宸濠至则下矣南京下事未可知也乃为檄檄诸郡邑使备饷云准兵部咨题请都督许泰却永以边兵四万由陆取凤阳道都督刘晖桂勇以京兵四万由水取淮扬道督臣王守仁以兵二万自南赣发杨旦以兵八万自广西发秦金以兵六万自湖广发皆会趋南昌所经由阙供者以军兴法从事又为蜡书贻李士实刘养正云得密示具为国至意第从臾使早出足一离省大事济矣而故系宸濠之谍示将斩而令黠校监者伪若与宸濠款泄而纵之宸濠微得书檄彷徨未决而与士实养正谋则皆劝之疾趋南京即大位宸濠益内疑十余日而探知中外兵不至乃悟守仁给之留少兵守城而劫其众六万人号十万袭九江南康皆下之进围安庆不下守仁兵已集又谍知宸濠离南昌乃大喜慙众至樟树镇使精卒四百袭破其伏兵之在新旧厂者蹶之至暮士蚁附而上遂破擒其宜春王拱櫛中涓万锐等千余人宫人多焚死守仁犹在后军质明而始知之建大将旗鼓入城申约束拊循其胁从吏士然已不能无所伤杀矣守仁留二日即发兵蹶宸濠宸濠时为安庆所抗气稍沮而骤闻南昌失守解围自救守仁使伍文定等以四郡精卒三千分道逆击之都指挥余恩以游兵四百往来为疑兵而陈槐等复以兵二千分为十余军张疑设伏与文定等密相应与其前锋遇于黄家渡文定等佯北以致之贼争利竞进而乱邢珣以所部衝擊断其中坚文定恩等乘之伏羣起贼遂大败退保八字脑宸濠惧尽发南康九江之城守者以自益守仁乃分兵袭取之明日复大战我兵小却守仁急命取先却者头益争奋贼大败擒斩二千余溺水死者以万计宸濠益大惧乃睺舟为方阵尽出其金银以赏士而诘责败者将斩之未决而我兵四面至炮火碎其副舟遂奔溃妃嫔皆与宸濠泣别沈水死遂擒宸濠与其世子眷属李士实刘养正等数十人斩首三千级溺水者二万余浮尸衣甲器物亘十余里寻分道搜捕其余党殆尽捷闻寝不下前是守仁上宸濠伪檄未谓陛下在位一十四年屡经变难民情驿骚尚尔巡幸不已以致宗室黠者谋动干戈冀窃大寶且今天下之覬觐何特一宁王天下之奸雄岂直在宗室兴言及此悚骨寒心昔汉武帝有轮台之悔而晚节莫安唐德宗下奉天之诏而士民感泣皇上宜痛自克责易辙改弦罢黜奸谀以回天下豪杰之心絕迹巡游以杜天下奸雄之望则太平尚有可图臣民不胜幸甚左右多弗悦以守仁方起义师不能难也而上则自称威武大将军镇国公总督军务率京边骁卒数万南下使太监张忠安边伯许泰都督刘晖为提督以数千人由江而上抵南昌守仁乃俘宸濠取内道以献忠泰等使人要之于广信守仁弗听抵钱塘而遇太监张永永时称提督赞画机密军务在

忠泰辈上而故与杨一清善除刘瑾天下称之守仁夜见永颂其贤永悦守仁乃极言江西遭祸乱民困已极不堪六师之扰永深然之乃曰吾出为羣小在君侧欲左右调护圣躬耳非为功来也第事不可直致耳先生功吾自知之守仁乃悉以宸濠等付永而身至京口欲谒驾不果会有巡抚江西命乃还南昌而忠泰等前已驻师南昌衙守仁不待故纵其卒傲守仁欲以为争端守仁厚加恩礼抚慰卒皆悦乃不能有所加于守仁而归复譖之上谓守仁且反独张永保持之于是守仁请赈恤其士民且以大水自劾语极恳切皆报闻世宗初召守仁入受封而中有沮者谓国甫大丧不宜举宴赏中道止之特拜南京兵部尚书叅赞机务遂归省父华于越寻论封奉天翊卫推诚宣力守正文臣特进光禄大夫柱国新建伯父华亦得封如之时人以为荣华寻卒守仁忧居而从游者益众相与推隆之又以功高文臣预五等爵忌者蜂起有目为伪学者有以下南昌纵士卤掠及得宁邸之金寶子女者至有谓初通宸濠谋策其不胜而背之者言絶丑不可闻而所封独守仁与吉安守文定至大官当上赏其它皆名示迁而阴抑绌之守仁不胜愤乃上疏再辞爵且极论白诸有功者温旨慰谕不听会守仁之所善席书与门人方献夫黄绾皆以议礼得幸上力称守仁贤而复为言之张璁霍韬等皆有所推轂然江西辅臣故衙守仁不能特荐犹持前论而其乡人之忌者至诬之史以故推兵部若三边若团营皆弗果用而最后田州土守岑猛骄不用命纵兵■〈距兰〉其邻郡右都御史姚镛讨而诛之其二子逃别将卢苏王受各拥众以叛兵骤进不利时谋易帅乃召守仁起家以故官兼都察院左都御史总督二广及江西湖广四镇军务讨之守仁且至而征兵已大集卢苏等亦素慑守仁威名窘甚守仁意不欲多杀既抵南宁即上疏请一切抚绥而以便宜悉散其众而仅留楚兵数千自卫使使招谕卢苏王受皆大悦率众扫境叩南宁为四营而各挟其心膂数百人入见守仁为谕谕杖之一百然听其人为伍伯取完事而已因改田州为田宁赦岑猛之后与卢苏王受皆弗诛因苏受兵以攻断藤峡寇断藤峡者即大藤峡其中诸徭上连八寨下通仙台花相诸峒连络数十余巢盘亘三百里数出流劫郡邑自韩雍大征之后无能平者守仁使卢苏等为乡导挟永顺保靖二宣慰土兵分道深入大破之斩敌者三千余级卤其男女牛马资械以万计守仁方欲移府治建卫所增兵设官次第上疏而病矣始报平卢苏等诏赐金币遣行人奉玺书奖谕而及是平断藤捷上则上以手诏问内阁臣杨一清等谓守仁自夸大且及其平生学术一清等不知何所对守仁之起由张聪桂萼荐萼故不能善守仁以聪强之而后萼长吏部聪入内阁积不相下萼暴贵喜功名风守仁以取安南守仁辞不应杨一清者雅知守仁而会黄绾尝上疏称守仁贤谓当入辅而又有他疏阴指一清辞甚厉一清亦不能无移憾也守仁既病益甚上疏乞骸骨因北归度大庾而革卒于南安舟中年五十八桂萼觐上意不悦守仁因奏叅其擅离职并处置田州事宜失当下公卿议仅不夺其爵而已停世袭且尽停其它恤典守仁有一子曰正亿久之上怒解始得袭锦衣卫副千户隆庆初用谏官言赠守仁新建侯谥文成赐葬予祭及赠告词推明为元勳圣学正亿得嗣爵正亿卒子承勳嗣守

仁天资颖敏絶世少而好古文辞爽朗多竒晚取词达不能工也既以气节名世又建不世勲迨有志圣学一切尽扫去之而识者不谓尽然又其慕好之者亦挟以两相重其御乌合笼豪儁待宵人蹈险出危俶傥权譎种种变幻孔子有云作易者其有忧患乎抑中古以后不能不尔守仁之语门人云无善无恶者心之体有善有恶者心之用知善知恶者良知为善去恶者格物以此为一切宗旨云

弇州外史曰见长者言与守仁辨不能不心折也即不心折亦不能有胜退而读其书则平平耳今天下之好称守仁十七八也间有疑之者以其学故若乃起义旅擒叛王不使九重之尊轻与匹夫角而大事定其功孰能难之

弇州续稿卷八十六

●钦定四库全书

弇州续稿卷八十七

(明)王世贞 撰

○文部

△史传

王骥杨善徐有贞王越传

王骥字尚德其先太原家大同之宣宁寻徙束鹿为束鹿人世世务农至骥而始读书三十余成进士骥为人长身伟干多力便骑射刚毅有胆既入仕通法律尤晓畅戎畧以选授兵科给事中永乐间上神圣羣臣奉职不贍而给事中职不専封驳论建骥尝奉命镇山西兼饬边备奏蠲盐池逋课二十余万缗其人德之寻迁其省按察副使益以持宪有声超为顺天府事治迁兵部右侍郎前后满九载进尚书当是时南北多边警羽檄旁午兵部最为要重张本材而廉稍以刻称许廓仅仅循职而骥代之始振刷有风望时西寇阿尔台多尔济巴勒数侵盗甘凉诸边戍杀掠吏人左右副总兵都督任礼蒋贵等势敌不相下狐疑莫发于是骥辍部务行边制诏一切便宜行事是时都指挥使安敬为偏将黷而怯都督蒋贵都御史曹翼追敌至鱼海子将及之而敬谓前途无水草不可进引还曹翼言状上密勅骥责贵死状而僇敬军中以殉骥故秘之而大会诸将方就坐忽

揖敬下曰汝奈何逗挠误大计命斩敬而谓贵曰公亦当死且责状以报于是诸将士股栗莫敢仰视骥乃请分兵画地自庄浪西南抵黄河东北抵宁夏属都督李安自凉州北抵镇番南抵古浪东北抵板井属都督赵安自甘州东过山丹抵永昌北抵臙脂堡西抵深沟垒属任礼自肃州东接深沟稍东北抵镇夷西抵嘉峪北抵天仓属蒋贵约以贼小至则各自战守大至则并力拒敌军势遂大振寻下诏任礼为平羌将军蒋贵赵安副之而骥特为监督讨阿尔台多尔济巴勒诸进止悉取骥骥谍敌营狼山等处乃选精骑授蒋贵使为前锋而自与任礼等以大军继之且与贵约曰勉旃不能成功毋相见也贵感奋直前搏敌败之渡黄河遁去贵等追败之于石城敌食尽窜乌拉纳地北依阿尔台贵复以精骑二千五百出镇夷间道兼行三日夜及而大败之得其左丞托啰及裨校百人斩首三百余获金银玺印各一驼马兵甲以千计多尔济巴勒与阿尔台以数骑遁寻喝死而任礼兵亦至梧桐林得枢密同知金院十五人明日至伊济鼐地得伪万户二人以为乡导穷追五百余里至黑泉而还招其平章阿达平并部落数十帐降右军赵安等出昌宁至刁力沟得右丞达噜噶齐三十人驼马兵甲称是捷闻贵礼皆进封伯爵而骥兼大理寺卿兼食其奉寻诏还理部事久之麓川宣慰司任发叛云南摠兵沐晟与弟昂讨之数不利晟至以忧死而刑部右侍郎何文渊援舜舞干羽格有苗事请使使抚谕之骥与太师英国公辅等议以天下全盛而示弱于旧属小夷非策时中贵人王振方柄国喜功名遂绌文渊说而命定西伯蒋贵为平蛮将军骥摠督军务率副将军李安刘聚等大发两都诸镇汉土兵合十五万讨之濒行赐骥贵黄金兜牟细铠蟒绣绯衣朱弓矢骥驰传至云南而贵等兵集会贼酋刁令道等以众三万象八十抵大墩州欲畧景东诸处叅军兵部郎中侯璉等徼破之骥乃奏上方畧请遣叅将冉保等由东路直取孟定会木邦车里夷兵而大军由中路至腾冲与保会俾贼腹背受敌从之冬十月骥等抵金齿其别酋陶孟刀门捧以镇康降遣冉保等率轻兵五千受之因其众破昔刺寨进攻孟通而骥等以兵二万水陆攻上江败其伏兵遂进围上江寨副摠兵刘聚叅将宫聚兵亦至因风焚其排栅遂大破之杀其将刁放戛刁招汉父子虜刁门项斩■〈酋或〉五万余级上江平遂由夹象石渡小江通高黎贡山道移驻腾冲留兵守之取道南甸至罗下思庄遣指挥江洪等八千人为哨抵木笼山而思任发令陶孟靠者军心等以二万余众乘高据险为七营相救骥贵遣刘聚宫聚分左右翼縁岭攻之不下自率中军进夹击之遂破杀靠者军心等乘胜进戛赖陇把至马安山麓川大震寻败其象阵于泥沟箐复败其象阵于永毛摩泥寨遂拔之而别将冉保合木邦兵降其夷众十二寨车里兵亦降其孟连长官司破乌木弄木邦等寨斩首虜二千余级骥等遂进围麓川纵火焚其门并库藏庐舍皆尽俘斩及溺者数万人思任发夜携其二子走孟养以大捷闻仍请留所部兵畀都指挥胡志九人分守金齿蒙化等处而是时维摩州贼韦郎罗称广新王以叛诏骥旋师讨之骥曰此不足血吾刃也乃遣偏师压其境曰王尚书大兵至矣贼皆溃韦郎罗走安南传檄捕之安南王惧斩其首并妻子来献广南富州上守交恶十余年不解骥谕之立释

构讲命师旋上遣户部右侍郎王质赍羊酒迎劳数百里外既入见慰劳有加特封骥推诚宣力武臣特进荣禄大夫柱国靖远伯岁食禄千二百石追封及三代子孙世世承袭赐诰券貂蝉冠朝服玉带白金百两彩币十表里钞万贯而贵进封定远侯赏亦如之刘聚等升赏皆过望士卒赐予加等府库为竭而骥以侯伯奉朝请不预兵部政矣蒋贵果勇善战虽至大将犹摧锋陷坚骥前后皆赖之成大功而是时思任发尚在窜其子思机发复率其余众往来窥伺乃复命骥摠督云南军务率都督同知冉保都督僉事毛福寿以兵往图之赐金牌信符便宜行事骥至思任发复走缅甸索之不获而思机发众渐盛不能制乃奏请益兵诏复遣定西侯贵以兵五万会讨之然缅甸卒不肯送思任发以思机发致雠为解骥等无如之何乃纵兵捣思机发寨获其妻子家属及从贼百余战象十一骥等还京师加禄定西侯岁五百石骥三百石其白金钞币如初而冉保毛福寿等升赏亦次之人颇以骥老师亡见绩而中贵人振内主弗恤也而定西侯亦病死亡何西巡陝西宁夏甘凉等处所至申饬边隘练士卒虏不敢犯久之召还会思机发窜之孟养孟养与相比匿不肯捕送于是骥复摠督军务偕平蛮将军宫聚讨之师抵金沙江贼立栅西岸骥作浮梁以渡一鼓破之复连拔其三栅斩获万计然竟不能获孟养酋与思机发骥威名故甚盛至是九三率师南矣而稍稍损于前一卫训导詹英者官其地上言骥等犖重至役夫六百人多散彩币于其属使责重报鹵蛮竖輒阅之以为已役大军十五万一日起行因而相蹂践有至死者又每军使负米六斗跋涉山谷有自缢死者师抵金沙江彷徨不敢渡既渡缩胸不敢攻攻而失都指挥等俟贼解散多捕渔户以为贼俘此何异李宓之败而杨国忠以捷闻也上为之下兵部会法司议请遣御史一员直抵其境会巡按御史勘报上不许然业已獎劳骥聚召还京矣至是停獎劳勅勒聚还而改骥领平蛮将军讨贵州苗获其称划平王虫富者檻送京师僇之加岁禄百石土木之难羣臣廷劾中贵人振不道株及骥景帝初召为摠督南京机务位宁远伯任礼上南京素习偷戎阵废弛骥至一切以所御军法教之为一新而大司马谦弗重也因事解其任奉朝请上虽以罢骥而内犹严之时禁私役阉人俱令籍入宫惟黔国公宁阳侯得留四人骥独留六人骥老且八十食肉跃马多从女伎供张奉御如王公而会武清侯石亨等奉太上皇于南宫而骥与焉复领兵部事加号奉天翊卫推诚宣力守正文臣阶为光禄余如故数月复请老又三岁乃卒年八十三赠靖远侯谥忠毅子瑞嗣至今不絶一孙添尚长公主拜驸马都尉骥奉太上皇之岁而文臣杨善徐有贞亦封伯

杨善字思敬其先自太原徙而北平后北平进称顺天而善为顺天大兴人少补北平诸生不甚通经术而性沈敏能为人筮事时年甫十七而文皇帝起义兵则已知善名署典仪所引礼舍人从事睥睨间文皇帝即位之明年召补鸿胪寺序班二年改鸣赞又四年进司宾署丞选侍昭皇帝于青宫又八年进右寺丞又六年进为卿善伟风仪工举止音吐如洪钟每朝谒引进奏时上目属之而又重文翰与学士杨士奇杨荣善既家都

城以积着起费治居第郭外有园亭花木之属诸公休沐有所宴赏则善家若归又时时馈遗名果饵不絶以是大得公卿间声而中贵人亦多好之者卿之十二年满考迁礼部左侍郎明年从北征至土木师溃间行达京师时已六十五矣足胠不为倦敌犯京师以善晓畅军事改都察院左副都御史使佐于谦营九门外郭以与敌角数有功进右都御史自侍郎至右都御史皆领鸿胪寺事而是时太上皇帝在漠北元旦故事自朝正出即相率于朝房投谒称贺善独流涕曰此何时也太上皇帝何所而我曹称贺耶众愧为之止而朝所遣使漠北若王复王荣李实皆以庶僚假卿佐以往皆不得要领而李实得一见太上颇倨而其辞戇然敌始挟太上请我赂不甚讎欲奉之还而朝意更缓为北敌额森责王复等非大臣故遣善然绝不为奉迎计亦不予善一钱而善乃悉其訾不足则贷之中贵人悉益市绮绣师比阿锡女红线扣之类以往既至而额森所使馆伴者来与饮帐中而诿善曰土木之役为何六师抑何弱也善曰当是时六师之劲悉南征而中贵人振欲邀太上幸故里一不为战备故轻以卒予敌而今者南征之士悉归可二十万而又募中外材官技击得三十万悉教以神鎗炮火弩射命中百步之外洞人马腹透七札又用言者计沿边要害皆隐金椎三尺所值蹄立穿刺客林立夜度营幕若猿猱而皆已矣置之无用矣问何以言无用曰和议成方且欢饮若兄弟而又何用也因赂之其人悉以语额森次日善入谒乃大赂之额森喜坐定善乃前责之曰太上皇帝朝太师所使使必三千人岁必再即稚子亡弗賚者金帛器服络绎载道而太师乃背盟好而见攻何也额森曰然则奈何削我马价又予我帛时有剪裂幅不足者我是以攻汝善曰非敢削马价也太师之马岁益增价亦不继而不忍拒是以微损之太师自度价所得比前孰多额森曰者其称者犹云是也善复曰帛有一二剪裂幅不足者诸通事为之也事露而诛矣即太师所使进马有劣弱而貂皮敝岂太师意耶额森又曰者善因复进曰太师之攻我两矣所磔杀剝剔以数十万计而太师之部曲宁无有血吾刃者上天好生太师独好杀夫是以数有雷警今者能奉太上归我和好不絶器币溢于穹庐而黎庶彼此俱逸不亦快乎额森益喜曰者者因谓善归而太上皇帝有重宝来购乎善曰太师得重宝而归我太上皇天下后世谓太师贪重宝也归我太上皇而不索重宝天下后世以太师贵信义而贱贪黷令名奕奕何况我之德太师无已而重宝以渐继耶额森大悦曰者者遂以善见太上皇善再拜进醪糒问万寿侍立不敢坐额森数目太上皇太上皇谓善太师与汝坐则坐善顿首辞曰君臣之礼虽草野宁敢废哉额森啮指顾其下曰咄咄汝曹中国礼乃若此遂以轻骑奉太上皇与善归归而上以非初遣旨薄其赏仅迁左都御史仍令寺事而大司马谦心许之其从行子弟有得官者易东宫加太子太保时太上皇在南宫元旦朝正出复且修投谒善复泫然曰太上皇不受贺何我曹乃相贺也识者益称之善始事中贵人振后更事中贵人吉祥等而与石亨比会景帝病善伺知亨吉祥有迎太上皇谋遂与之合而发南宫锢太上皇即位论善功封奉天翊卫推诚宣力武臣特进光禄大夫柱国兴济伯寻加号守正改文臣岁禄一千二百石予诰券世世承袭改领左军都督府

寻加礼部尚书兼领部事有四子一为勲卫一为指挥僉事一为千户一为镇抚而从子及养子官锦衣者复四人旬日之间恩赐赫奕所陈请无不允几与石亨张軏埒又尝阴荐李贤入内阁而定襄伯郭登故有几微于上亟疏善使边功请位之三公获以身免于亨吉祥忌之稍稍间于上渐踈绌而明年善亦卒矣年七十五赠兴济侯谥忠敏子宗自勲卫袭四岁例夺爵为金吾卫指挥使孙增尚公主授驸马都尉善虽负才辨以巧取功名而儉伎多岸谷其为序班坐事下狱庶吉士章朴亦坐事下狱与相狎言家有方孝孺集时方穷治孝孺党善从借观而密奏之上遂诛朴而复善官最后于谦王文之僇而陈循等之窜皆有力焉善死或云见谦文为崇而李实者时以右都御史抚湖广中旨夺职为民

弇州续稿卷八十七

●钦定四库全书

弇州续稿卷八十八

（明）王世贞 撰

○文部

△史传

徐有贞初名理字符玉后改今名苏之吴县人生而短小精悍目光炯炯注射颖敏絶世十二三即能为古文辞以其业贲都御史吴讷太子宾客胡俨皆赏异之宣德中举进士高第是岁以三月选进士尹昌等为庶吉士仅六人至十月而复选庶吉士得十三人有贞居首命学士王直教之上甚属意焉居二载特为御文华殿试之有贞仍居首即授翰林院编修预修实录玉牒进侍讲有贞于书无所不读而好习兵法及刑名水利诸家言于天文风角占验尤精究不倦人或谓有贞此岂公职耶有贞笑曰待职而后习则已晚矣是时天下承平久执秉者新方从事西南夷而不虞北有贞忧之上封事千余言皆闕系国家大计而于备北方事尤切下所司议行久之额森犯宣府大同诸陵中贵人振挟上北伐且启行而有贞指天象谓所亲曰兹行也必败上不归矣已而败问至大驾果蒙尘中外籍籍谓有贞知兵郕王时监国召有贞入使大珰兴安等问计有贞为言紫微垣俱已动急乘患之未深而还故都为便兴安等不以为然而尚书于谦廷请斩倡南迁者刑部侍郎江渊亦自称知兵次入对以固守之说进得直文渊阁而有贞屈矣然犹

以才举行监察御史俾镇河南以备缓急援有贞请于执政者必便宜行事易玺书而后发时有治彰德而郡民骤闻变争亡匿山谷间有贞择倅丞之属素见信者使拊之皆归业有贞乃建牙募兵入卫且万人然多太行羣盗有贞厚其饷教以坐作进退击刺之法然使自相团结而不籍其贯址以故其人虽难制皆踊跃愿为官用会敌败退有贞罢镇征还京师充经筵讲官进右春坊右谕德仍兼侍讲有贞既负材谓急欲大显用邑邑不自得乃以玉带献内阁陈循而进日者之术曰先生带且玉矣居无何循加少保心喜有贞数为言之上不答国子祭酒阙循以为言上曰是徐理耶南迁之谬也而可长成均也有贞久不迁不能无望循循见之第云君无仍旧名而已有贞悟始改今名无何河决山东之沙湾凡七岁随筑随决鑿道沮而役卒疲甚乃议进有贞为都察院右佥都御史治之河以决故涸而有贞至方冬月而水暴涨公私之艘毕达而治河卒踰数万人悉与之期而遣之乃乘轻航究河源遂踰济汶至卫沚循大河道濮范还鸠工而前所遣卒亦依期至乃为渠以疏之中制闸以节宣之渠起金堤张秋之首凡百余里而至于大泽之潭踰范暨濮又上数百里经澶渊以接河沚用平水势水势平凡河流之傍出而不顺者则堰之堰有九长各万丈楗以木门缭以虹堤堰之崇三十余尺其厚什之长百之门之广三十有六丈厚倍之堤之厚如门崇如堰长倍之用平水性水性平浚漕渠至数百里复建闸于东昌之龙湾魏湾者八积水过丈则开而泄之皆道古河以入于海盖三年而告成有贞尝欲筑一决口下木石则若无者而怪之一僧居山中有道术有贞往叩焉僧无所答第云圣人无欲有贞沈思竟日而始悟曰僧盖言龙有欲也此其下有龙穴吾闻之龙惜珠吾有以制之矣铁能融珠乃溶铁数万斤沸而下之龙一夕徙而决口塞夫有贞知制龙欲而不知龙之以欲见制人也功成而景帝召对而褒勉之进左副都御史骏骏用矣不能稍自制而比于石亨从迎太上皇于南宫始亨与许彬善以谋语之彬曰善应天顺人功莫大焉虽然彬老矣无能为也必徐元玉而后可亨乃谋之有贞乃复指天象曰岂其复爽耶遂与谋决南宫锢而太上皇复辟捕于谦等下之狱有贞之衔治河命则阁臣商辂有力焉至是并陈循等皆弗能救而从之下石即日进兵部尚书兼翰林院学士直文渊阁于谦等之祸中外咸侧目有贞而有贞意殊自得请于石亨曰愿得冠侧注而从兄后石亨为言之上上曰为我语有贞但僂力不患不封也居旬日亨复言上乃下诏封有贞奉天翊卫推成宣力守正文臣特进光禄大夫柱国武功伯岁禄一千一百石子孙世为锦衣卫指挥使遂进兼文华殿大学士领文渊阁事赐貂蝉冠玉带公服旬月之间恩赐赫奕与石亨张軹等埒时上既以虚已委有贞而石亨与中贵人吉祥数干预大政有贞积不能平而私矚上于亨吉祥不能无灰色乃稍稍裁衡之且为上微言其贪横状上亦为之动而御史杨瑄遂糾亨吉祥侵占民田不法上复以问有贞及李贤有贞等对与瑄合乃獎瑄敢言俾覆核所侵田于是御史张鹏等遂具草悉糾亨他罪状将上之而兵科都给事中王铉密以告亨亨驰诉于上谓鹏乃已僂凶监永犹子结诸御史为永报讎上遂御文华殿悉収诸御史面诘之诸御史具亨事俱有验上怒曰亨即实汝曹

何不早言之下锦衣狱究主使词连右都御史耿九畴副都御史罗绮皆下狱亨复诉于上谓有贞贤实使之于是并下狱狱具有贞谪广东右叅政李贤谪福建右叅政诸御史独杨瑄张鹏戍而九畴绮等从轻比谪矣寻以李贤素谨重不预情留之有贞既行而有以飞章谤国是者其语复多侵亨吉祥于是复诉之上谓有贞实又使之逮归置狱考穷极锻炼无所得而摘其诰词纒禹神功语谓为所自草坐大逆不道当死以雷震奉天门宥为黔首发云南金齿安置有贞谪金齿之四年而复指天象语人曰曹石祸作矣是惨于我我且归而石亨盆死狱家籍有贞以赦还里而又二年吉祥之族灭有贞时尚壮负其材谓上思我必且召而上竟弗召也天下亦颇惜有贞才而惜于谦才甚于有贞其冤有贞又不如冤于谦以故里居者十余年无推毂之者晚乃放浪山水间颇以词翰着声竟鬱郁不得志而死

弇州外史曰是三伯者而皆材人也靖遠材而欲武畧则优兴济材而巧武功材而躁其隱忮忍割偕有阴慝然而靖遠差寬之矣不然以麓川之三役涂炭几天下半而卒以长世也武功之占候竒矣其事再驗一不驗几遂悞国世之所谓不祥人也耶

王越字世昌大名之浚人少补诸生长躯七尺余风骨竒迈博涉书史为诗歌文章援笔立就而藻思溢发为人多力善骑射好谈说经济大略睥睨顾盼有天下志二十六举进士方对策大廷忽有旋风起摄其策云表已而不见皆怪异之及秋而朝鲜贡使附越策来而曰其王方视朝有旋风卷一物下者则进士卷也敢以闻景帝阅而得姓名谓吏部曰识之此当任风宪于是繇进士选人得监察御史英宗复辟日视朝覩越进止与奏对数目属之时寇深长都察院束湿僚吏亡可当者而越于台事精所建画必出深意表以故爱异之留馆诸道章奏久之擢山东按察使名声愈籍籍寻大同有边警当置巡抚以某荐上嫌其貌寝罢不用而喟然曰安得如韩雍者而任之时雍已抚宣府吏部乃请征越召见便殿越故伟服而短其袂上熟视良久曰非故快御史耶可使弁而将也遂擢右副都御史以行会敌稍徙去越乃饬兵政缮器甲简士伍修堡寨为经久计寻以病告召还京病良已明年协理院事久之以总督视师延绥轻骑袭破敌于崖窑川俘四十余人鹵首加百迁左副都御史又破之于黄草梁俘五人鹵首百二十进右都御史前是文臣视师者多从大军后出号令行赏罚而已至越而始多选骁勇跳荡武骑为腹心将而与敌搏始有战矣然尚不敢与敌军锋角惟以间谍探敌累重所聚而劫之或剪其零骑用是得数成功名越再设伏徼敌破之俘斩百余获马牛羊器仗称是诏武靖侯赵辅为平北将军统大军与越相继逐北辅行则已病而越复谍知寇满达勒博啰奇木嘉色棱三帅自河套渡而分寇西路而其妻子营于红盐池乃率总兵许宁等以精骑五千袭之两昼夜行三百三十里至其地分兵千余为十伏以相救而身与宁等分两哨薄其营遂破之擒斩三百五十五级获其女稚驼马牛羊器械不可胜计焚其庐帐而还时满达

勒等行剽至韦州颇有所获欲归而遇诸镇兵邀而败之斩首级一百四十九夺所卤男妇二千马骡牛羊十三万甲仗千六百余贼既以失利归则庐帐妻子畜产皆荡尽相顾恸哭逋徙不敢居河套故地捷闻再赐玺书褒谕俄召还京论功加太子少保食从一品俸同李宾掌都察院事兼提督十二营兵马又一歲而兵部尚书缺越意必见属而余子俊自外镇得之忽忽不乐乞归不允乃上疏陈红盐池之战谋皆自己出为故尚书白圭所抑沮録功在诸将后而部曲亦有未升赏者下兵部余子俊为请进兼兵部尚书以饵之乃已明年复加太子太保时上所宠信中贵人汪直方领西厂得调察中外事威福倾一时而年少好言兵越乃乘间与之纳好甚密而直方欲诛建州夷以为功而辽东都御史陈钺贿之重且始谋也以故直用抚宁侯朱永总兵东讨而身监其军俾陈钺参焉而不及越寻破建州兵永至封保国公升赏优渥越益艳之乃谋于直以敌兵西犯边诏保国公永为平寇将军率师西讨越为总督直仍监其军越念直之诛建州永与征行而不先露使陈钺擅其功恨之乃为直谋令永将大兵由南路身与直将轻骑由宣府大同俱会于榆林既至大同谍敌帐在威宁海则选二镇之劲骑二万余分道乘风雪薄之敌狼狽出战遂破之斩首卤四百三十七级卤男妇百七十马驼牛羊以数千计旗纛甲仗万余捷闻诏班师越遂进封奉天翊卫推诚宣力守正文臣特进光禄大夫柱国威宁伯岁禄千二百石予诰券子孙世承袭越既封不当复领都察院而御史许进等上章称越功德引王骥扬善例请仍领院事而越亦不肯就西班牙欲仍例大学士万安吏部尚书尹旻下俱许之自是益精心事汪直而陈钺得为兵部尚书上尝曲宴而内伶为戏者以贵人装两手各操金钺恣睢前问为何人曰汪太监所持何物曰两钺耳不仗此不能一步上笑而弗罪也当是时保国公永师至榆林甫三日召还毋论有司供亿百费而战马万七千足死者已五千亡功自如于是亦惧而与越比事汪直矣寻复命越等出师至大同适敌从东山等墩入境剽掠越纵兵击之擒十人斩首百十三级获马七百余足诏进越太子太傅增岁禄四百石复録一子官是役也斩级少于法仅下赏而封拜横溢则上以直在事欲贵重之故而越改掌前军都督府总督五军十二营兵马盖越以文臣爵不得侯改右班或可得侯不复有荐绅念而万安刘吉等稍侧目越矣汪直亦为其侪所忌恶遂复命越为平胡将军直仍监其军驻宣府调度击敌敌已退越等请班师不许遂巡延绥而敌入寇河西清水营等处越等使游击将军刘宁败之于塔儿山叅将支玉败之于大窟梁延绥总兵许宁败之于三里塔擒十二人斩首虏三百七十七人功最多敌亦创惧不敢近边而捷闻仅加禄五十石汪直赏亦薄寻改越征西将军镇大同不获称大师而犹与直共一镇大学士万安等乃请移越帅延绥以离之而命延绥帅许宁镇大同言者以宁直不相能遂改直于南京御马监既行则奸事大露上方命给事御史论糺直八罪因并糺越诏削越官爵追诰券徙置安陆州而尽夺其诸子锦衣都指挥使时等官越之败由汪直然直尚得为奉御一时朝士大夫虽快越之去而有谓其罚太重弗平者越最名能知人其在台所旌拔御史屠濬侣鍾等皆为大官以至同列而故吏将佐多鼎贵时

时称越才弘治初赦还乡寻上书自列冤状会有为左右之者得复左都御史致仕越居恒喜奢华自奉若诸侯王而其御军能恤下财往来若流水不之问笼罩颠倒豪杰不知所从入皆愿为之死机事百端闪烁变幻出没神鬼故不复持名检军行过陕西秦王宴之奏伎越语王下官之为王吠犬久宁有以相酬否因尽乞其伎女归一日大雪方坐地垆使四伎抱琵琶捧觞侍而一千户调敌还即召入与谈敌事甚暂大喜曰寒矣手金卮饮之复谈则益喜命弦琵琶而侑酒即并金卮予之已又谈则又喜指其中最姝丽者曰欲之乎以乞汝自是千户所至为效死力积功至指挥而其夜袭敌帐也将至而风暴起尘翳目众惑欲归一老卒前曰天赞我也去而风使敌不觉归而卒遇敌入掠者还而我据上游皆是风也越不觉下马拜功成推卒功以为千户越之在安陆与还浚田池射猎帐饮声乐如故而其于功名志不小衰会家近京得通于中贵人李广为上言之中旨召掌都察院事为台谏所论阻时西寇犯边急兵部言宜得一重臣控制之庶于进止便凡再荐弗称旨时屠滹为吏部德越而中贵人广舆之以越名上遂许之陛见上慰谕有加进太子太保仍兼左都御史总制甘肃宁夏延绥军务诸镇守巡抚而下悉听节制仍许以便宜行事越至即捣贺兰山之别部行剽者覆之斩首捕生过当捷闻加少保太子太傅请复哈密封以兵援其王还国疏上不报而中贵人广败自杀言者皆首攻越上虽雅重之不为报而越坐忧悴病剧遂卒年七十四赠太傅谥襄敏祭葬如礼越之再起欲还伯爵竟不得而诸子多官环列者

弇州外史曰当越时天下咸贵其才而矜其行夫以越之阿私中人启边衅耗国本即有功细不掩罪何贵哉然至于今西北边称良将毋如越者杨一清王琼方之蔑如也使居明世亦可以鞭捶使哉

弘治三臣传

王恕字宗贯陝之三原人少治易旁通他经子史三十余成进士改翰林院庶吉士翰林业治古文辞而恕不喜为古文辞其学务以明体适用本之经术博极经济而已以是不得留出为大理寺左评事迁左寺副所谏决必丽情法尝条刑罚之不中者六事上之朝而议行之擢知扬州府扬淮南大都会也恕以直道精心为之吏民皆爱服岁再饥上疏再请赈度事已迫不待报而发仓庾且别市药以施病者其人不至后时而殍立书院羣少年诸生于其间而延文学行谊之士为之师太守以间按行召诸生褒衣讲说恂恂礼让文事亦大振以考最超拜江西右布政使扬人挽留之不得相率伐石勒德政其在江西而岭寇有犯贛州者恕奉檄帅师讨平之转河南为左以公廉称赋税出纳吏无所容舞进都察院右副都御史抚治南阳襄荆诸府时以襄南地多山险秦楚之流民萃焉日剽攻杀畧而矿贼亦不时发特开府抚治而恕首得之军府取草创恕事事经画有

成筭首捕获南阳之争矿而称兵者已会兵捣襄盗巢平之殲其魁释胁从之众累累又平湖广刘千斤石和尚之乱既捷而大将欲搜山尽取其首以徼功赏恕持不可久之乃听念所从将卒必有乘间为馘者乃下令曰擅杀一人即抵死众肃然亡敢犯因榜谕流民各使复业后流民聚货立生祠祀恕仍家绘一像母忧归即家起复巡抚河南以襄南功迁左副都御史境内霖旱不相当而又苦蝗大风昼晦乃上疏乞罢以谢豫人因极言止营建崇俭约以回天意诏不听罢而他所疏荒政甚详上为之蠲赋有差例入朝议事因复上六事疏转南京刑部左侍郎父忧归服除以刑部左侍郎治漕河请禁抑马快船賚携商货而纵横邮道间妨粮运且及弭灾数事惓惓民力上为之下蠲租诏改南京户部复大有所损益部事理复改左副都御史巡抚云南恕于迁若左然朝议以云南在万里外西控诸夷南接交人而镇守中贵横甚欲借恕弹压之恕心知所谓单车携二童子以往而中贵人钱能果使其麾下指挥郭景等以玉带龙衣吴装玩好驰驿谒安南王黎灏王报以异宝生金通犀象牙等物往返数四景等复与其国互市捆载还恕廉得之遣骑道执景景迫投井死因悉银铛其从者下之狱而没入其贿飞章露劾能私通外夷罪当死报闻当是时灏别为私邮以通滇省会实欲乘间掩取我至是其谋始杜而钱能复使使乘驿以黄鸚鵡进恕复上章极言明王不贵异物今万里劳人而进一羽族微物恐天下有以窥见上意因尽发能贪黷暴肆诸状上不得已召能归安置南京而黔公诸大帅以及土酋皆惴惴奉三尺矣三品满九载进右都御史寻召掌南京都察院事往返衣书各一橐无纖毫增掌院之未几叅赞南京守备迁南京兵部尚书叅赞如故尽摄营将之占役者一卒不得走私门番使过龙江驿严禁织作工贾非奉旨毋得自为互市考选军政即同事者无敢干颇不便恕而适有奥力取中旨改兵部尚书兼左副都御史巡抚南畿兼总督粮饷恕益日夜孜孜于职下车必首延耆硕降色与谈民间利病因而刺及属城吏贤否诸属城吏故已耳恕名其墨不可洗者望风解印绶去留者相刮濯争欲献其长以自效以故恕不劳力而治乃责以天下一切纳贡赋者苦收取过重至破家乞严禁革光禄寺岁供白粳槩及庖人贱工请稍裁别派市物料织造繒彩及贡献花木禽鸟请赐蠲省皆报可常州时有羨米请以六万石补常州之夏税又以补诸府户口盐钞六百万贯以官田赋太重减耗米十余万明年水灾奏免秋粮数十万草半之而周行赈贷其贫者至二百余万口三吴之人颂之以为自设巡抚来几一甲子独恕与周忱以十八年恕不二年其久与暂不相当然忱彷彿姚元之恕则贤于宋璟矣中贵人杜福以中旨下常州取截江网及刻丝观音罗汉古迹恕疏言帝王之学贵要典谟训诰及无逸旅獒皆帝王修身治国平天下之道上不之取而取截江网者何琐琐也佛像外道亦不足污清览而中贵人王敬挟其千户王臣以妖术取中旨賚御帑金收市图籍珍翫因而张皇声势搜括富人财宝殆尽而官府供亿亦不费人情汹汹恕乃尽列其罪状三劾奏之王敬亦诬奏恕因而株及常州守孙仁方未决而东厂中贵人尚铭亦发其状上始下敬锦衣狱谪戍之并戍其党十八人而梟王臣首于江南远近称快以是益归心恕寻复为

南京兵部尚书叅赞机务时钱能复夤緣得同守备南京与恕共事然益心服恕语人曰王公天人也吾惟有敬事而已恕谗其少自抑损坦待之卒无害而恕以年至乞休不许满九载加太子少保以秦晋饥言便宜十事刑部员外郎林俊疏论中贵人梁方与妖僧继晓比而蓋大镇国永昌寺其言直忤旨下诏狱都督經歷张黼救之亦下狱谪外恕言京师祀天地仅一坛祖宗暨先圣仅一庙而佛乃至千余寺者舛也一寺立而移民居者且百家费内帑者数十万金俊言当不宜罪宜特复其官因并复黼官上虽报闻而中不能无嫌以星变还俊黼南京恕因是益自信凡应诏者二十一建白者三十九多报可天下益服恕之直至朝事有所不可必曰王公胡不言也则又曰公疏且至矣而恕疏果至至为谣曰两京十二部独有一王恕公卿大臣皆侧目而天子亦渐心厌之而最后所言政令失信尤中上讳会南京兵部右侍郎马显以病告忽附批落恕太子少保以尚书致仕恕既归名益高台谏推荐无虚月上崩孝庙即位于是荐恕者无虚日即家特召之命驰驿以来中途引疾乞休不许而改吏部尚书入见即加太子太保言官犹谓恕且老而贤不当劳以繁剧宜用之内阁备顾问上报曰朕用蹇义王直故事官恕吏部谋议无所不听从何必内阁也上时释奠文庙恕请加礼于是孔子前独用币改太牢而是时恕侍经筵时酷暑簪上方汗而盛服疲不堪请暂辍讲于宫中进学报许始恕以直谏重天下后进慕说之而上方开言路各欲有所自见其望恕重以责之深至是御史汤鼐进士董杰都给事中韩重等各疏论经筵讲不宜以暑辍恕非所宜言而杰尤激恕不悻待罪私第上疏乞休上曰君臣之间恩犹父子各陈所见以尽乃职何嫌何疑其亟出勿避恕乃复疏露其意谓人见朝廷待臣太重责臣太深欲臣尽取朝事更张之如宋司马光毋论臣不敢望司马光今岂亦熙丰时也上复优诏留之乃止时上于春宫内臣多所登进又赠服色庄田恕争之上巽辞以报恕益自奋南京守备太监蒋琮与御史姜绂等讦而各失实绂等谪而琮独留恕谓独留琮何以示天下公不听御史汤鼐故尝以经筵讥恕者他亦谩谩有所论建寿州守刘槩以书称之引所梦为证事发而大学士刘吉恶之下诏狱欲坐槩妖言律论斩而鼐亦与同罪恕力辨其不然上命姑缓之迨法司讞上槩鼐皆减从戍陝西巡按御史李兴有风裁而微过刻为同事者所中以多杖人死当大辟恕谓非故勘于法不当大辟亦减从戍修理河桥工竣太监李兴乞升工匠官四人冠带者五人恕再执之不可乃上言臣力竭矣惟陛下慎之将来耳上温旨报闻总督两广都御史秦紘紘总兵安遠柳景不法而为景所诬与俱罢恕复言紘不当罢卒奏起为户部尚书满三载考最授光禄大夫柱国赠及三代上念恕老大风雨雪免朝又免午朝以疾告輒遣中贵人存问御医视脉牲酒米蔬相继而岁时珍鲜金绮之赐与内阁辅臣埒御医王玉自陈春宫劬劳乞升职下吏部恕请逮问之有旨免问而增俸二秩恕固执不可乃己时丘浚掌詹事府亦加太子太保而以礼部尚书故班恕下既入直文渊阁兼大学士恕尚持其吏部衔且先贵犹据其上浚意弗善也会考察天下应覲官奏黜而中旨留者九十余员而言官有拾遗疏复指其留而当黜者下吏部恕乃详据各原考语及所察知者

以闻有旨未必实令再访详具奏恕自拟有沮之者必浚也前是无岁不求去乃求去益力至再而上特慰留之居无何太医院院判刘文泰奏恕矫诈强悍妄行选补御医吏目非故事及里居日托人作传而镂行之曰大司马三原王公传其疏辞不见行者皆曰不报以彰先帝拒谏之失自比伊周无人臣礼有旨令恕看详回奏恕不恚意文泰受之丘浚且疏辨谓臣传作于成化二十年而致仕乃在二十二年此非有怨于先帝者即臣传内所言皆足以昭先帝纳谏之盛何名彰恶且文泰无赖小人其逞此机巧深刻之辞非老于文学阴谋诡计者不能乞于午门面究文泰及主使之人以正法纪遂下文泰锦衣狱狱具谓文泰尝谒丘浚语及恕传浚谓此沽直谤君也传若行有豪杰闻之上罪当不小文泰自是心动具奏欲论恕以语故为民都御史吴祜祜亦为之奋詈且润色文泰草而授之以上因请逮恕及浚祜面质上为左文泰秩而责恕卖直沽名宥之俾焚其传草而罢浚祜不究恕意不能平复上疏辨复不听而恕自此屈矣于是恳疏引疾乞休至再三乃许之听驰驿有司月给廩二石岁给夫二人不赐勅而文泰心怏怏谓浚不能为之地又二岁浚卒文泰往吊其夫人叱之出曰为若而使我相公齟王公负不义名天下何吊为时人快之恕家居健无恙日翫大学诸书草石渠意见能发前贤所未发而荐绅大夫过三原里者必屏呵从之谒再拜叩质疑难恕亦应之不少倦如是者十余年而为正德改元之岁恕九十矣天子遣行人赍手勅牢醴彩币存问益月廩岁夫而谕之言恕乃复疏言数事又三年卒恕噉食兼数人至其日而小减已闭户独坐忽有声若雷白气弥漫入视之瞑矣讷闻上为辍朝予祭葬特超六官赠特进左柱国太师恕有五子十三孙多贤显而少子承裕遂为南京户部尚书有学行不隳其声

弇州续稿卷八十八

●钦定四库全书

弇州续稿卷八十九

（明）王世贞 撰

○文部

△史传

马文升字负图河南钧州人生而有异兆貌瓌竒多膂力尝与羣儿戏角之靡不仆者七岁读书知大义踰冠举乡试二十六登进士吏部尚书王直异其材选授监察御史

勤力自课所论建靡不依傅大体时领台事者王文王翱皆严重鲜可而独寄腹文升以为国器出按山西再按湖广所至发奸摘伏有神君称墨吏相率望风解印绶去还领全台章奏以母忧归服除超拜福建按察使镇守中贵人虐而肆独文升能制之小敛戢人为谚语以美焉进南京大理寺卿丁父忧归成化之初固原土夷满四与其党劫其从子指挥璫据石城以叛陝西巡抚与中贵人将讨之大败事闻合宁夏延绥兵讨之复大败诏逮巡抚诸臣俱下狱而即家超文升为都察院右副都御史代之巡抚俾佐总督都御史项忠率京边诸军五万人往讨文升驰急传十日而至陝时兵已发则简练其留后者申约束通转饷五日而严驰至军偕项忠屯中路贼来敌与战杀伤相当居日复战少利而伏羌伯毛忠意轻敌先登贼徼其归路战死众惧欲退而文升乃率麾下为后继且令斩先退者众始不得败文升复言于项忠尽焚城傍草及断汲路贼始稍稍困诈请降项忠与总兵刘玉以轻骑往未得要领而文升复继之满璫乃乘间出降而满四等复鼓噪坚守会得降人杨虎力故与满四腹心使为间而诱之出伏兵执之石城寻溃先后俘斩首虏七千六百有奇获其男女老弱二千六百文升请于项忠释使归里而命右布政余子俊平夷其险敛战骸悉瘞之以少牢祭其人悦捷闻进文升左副都御史仍赐金帛汉中流民李胡子倡妖言挟其众以叛潼關军余火蝎儿蒲城民王彪负山铸山因肆为劫掠文升悉捕灭之灭西固番族之不即命者三十余曹敌牧河套将窥伺我文升多筑城堡募土民数千授之兵使相聚保敌乃徙去临洮巩昌饥延绥旱文升前后设法转刍粟给之所全活以万计时茶法已久弛文升饬之以易番马八千余匹军中骑皆给遂疏言时事十五条及御戎三策上皆嘉纳进提督甘凉宁夏三镇军务敌犯临巩文升遣兵逐之至黑水口破擒其平章达喇苏敌复寇韦州深入至好水川文升复纵兵破之于汤羊岭斩首积级至二百余获其马牛羊辎重不可胜计名其岭曰得胜坡勒石纪之遂进兵平岷州叛番获其酋首文升有所奏捷不为夸张中亦无主之者以是报赏薄久之始入为兵部右侍郎三品满九载仅予二品禄奉出饬蓟门以东至辽左边备文升严汰其弱弗堪者而制五花营八阵图教之使习皆为精兵还进左侍郎时陈钺等后文升而为巡抚多诃伺将吏小罪輒逮逮輒罚马而释之将吏既怨且狎法而马价亦踊贵文升上边事十五条因及之钺以是衔文升时海西卫都指挥萨齐哈移文讦验夷管指挥受其真珠豹皮官为究管指挥惧赂其都督彻辰使系笞萨齐哈恨之乃率所部十余骑称入贡欲以面闻钺而守将以非所入贡道却弗纳萨齐哈益恨而道经东北诸部落所亦以朝廷昔诛董山詵不平因留萨齐哈聚兵得数千骑大掠凤集诸堡钺集兵拒之则已去矣独近塞者僧格等十八族皆已有使贡恐误中兵而留其使走之抚顺所白其状钺方欲自解与副帅韩斌谋置之狱而夜掩屠其族殆尽更奏捣巢捷且请大兵议剿抚太监汪直方锐功名欲自往为言于上遣太监懷恩覃昌等诣内阁召六部议万安等相顾莫发而兵部尚书余子俊言北使入贡而掩屠其家何以为中国恩曰然则抚之乎抚之以一大臣偕大通事往可也其意欲以沮汪直而文升疾应曰善懷恩入白之上即传旨命

文升偕大通事詹升往而直闻亦有所憾于文升矣文升至乃尽赦其被屠家余众数百人抚以好语且给之布粟而海西与三卫亦来听抚文升察其意不尽实乃具言其状而行诸路伏兵以待俄复入寇伏兵发斩首二百余级生擒数十人鹵驼马称是因兵威以谕都督彻辰惧悉请归命而汪直意不能已欲自出以为功至辽左而事定矣文升与议戒勿用兵直亦阳听纳然銜其敌礼且无所馈而陈钺则饬厨传盛为供张见直叩头便辟左右僂从皆有贿相与谋而倾文升矣文升竣事归赐彩币羊酒理部事而直则已密疏言文升实激之变于是复偕刑部尚书林聪等往勘如直言而文升得戍四川之重庆卫天下闻而冤之汪直既倾文升则偕陈钺大发兵破诸属国钺拜赏赐倾府库未久皆败而文升复起以左副都御史抚辽东士卒皆鼓舞而当陈钺厚者不能无自疑文升坦懷待之而日孜孜理军政且禁戢中贵人洪义总兵缙縑之为媵人益称之亡何进右都御史总督漕运兼巡抚凤阳等处文升至而其地旱文升策之岁且侵乃预江南粮二十万石舟费十万两免一切采办以待之岁果侵文升出以赈贷且平糴藉而毋流孳召拜兵部尚书文升念天下方困用兵思所以休息之而贵州都匀之叛苗不即命守臣请合三镇兵追讨文升议不可惟遣官勘处而已卒无他时上幸方士李孜省欲有所荐引代文升而间之中旨调南京兵部尚书叅赞机务留政为一新孝宗皇帝立召改都察院左都御史入见于文华殿赐彩织绯衣一袭从幸太学坐听讲于彝伦堂侍经筵赐白金文币寶钞上躬耕籍田与行九推礼既宴而教坊以杂伎陈且出褻语文升正色曰汝曹第陈农家作苦使新天子知稼穡艰而褻语何为咸逡巡却避公卿愧之时太监陈喜以方士邓常恩言诱先帝于岳镇海渚俱立碑为隱语下真寶物厌镇文升请悉仆碑发函入寶物于官从之乃复条上十五事如简风宪重刑狱禁摭拾严考核申命令广储畜驱术士清僧道节财用皆凿凿中窾上皆为嘉纳时上山陵未毕而中官郭鏞请益选二妃以广储嗣文升独持不可而少詹事谢迁亦言之乃寢四川山西浙江建昌灾异■〈彳 荐〉作文升上书言之语甚危且请行賑施蠲采办银课与额外征税特命文升提督十二团营兵马掌院事如故二品满初考时子总以乡贡士待选文升使请外曰必大臣子而京秩谁当外者寻复为兵部尚书京师大水上疏陈时事十余条于贵幸多所侵而严核六军诸校斥其贪黷选愞者三十余人以是有怨家夜持弓矢警文升门又飞书证其过射入东长安门内事闻上严令锦衣官校缉访而给金吾骑士十二出入为文升卫文升因乞休优诏不许属文升有小疾而敌小王子以数万骑驻大同边外势汹汹上使中贵人挟医视文升疾赐上尊脯糒因问计文升谓此敌方败于他部势已绌无能为也请密为之备而扬声逼之敌果徙去安南侵夺占城之五州地诏勒还之数支吾不服文升言万里踰度固难且不足厘九重顾而会二国各入贡贡使至乃请面折诸廷安南词服因谕以恩威利害且厚赐之归而果还侵地广西土守岑鉞与侄溥相讎杀巡抚欲因以为功请讨之文升不许第令腾书戒饬已皆悔悟纳款请死时南畿浙江大水河南山东陝西山西旱文升请亟勅抚臣发庾以賑遣使崇祀羣神为民祈请马政弊甚苦孳生寄养

者复请覆核减定其额着为令上以文升在任久特加太子少保久之又加太子太保皇太子出阁讲学再进少保太子太傅阶光禄大夫勳柱国而文升上章请择正人辅导以端圣功得谕德王鏊等十余人有旨传升画工张璠等二十七员为锦衣千户文升力诤谓此先朝弊孔赖上初窒之今复启之耶且无功而冒武职使边将解体而江南岁侵有司请募民入粟授以指挥等官文升复诤以为授以散官可也授之指挥亦能使边将解体上皆为停弗行贵州苗叛文升奏遣镇远侯顾溥讨之克其寨数十斩馘数千级苗遂平西番数入寇甘凉文升请使游击将军鲁麟击之而调延绥洮河兵为后继斩其剽掠者百五十骑敌乃退哈密忠顺王者故元遗孽也文皇帝宠其王予金印使率其民城哈密居之以通西域贡道其位高而兵最弱忠顺王死王母当国为图噜番酋苏勒坦阿里所擒鹵人畜并夺其金印以去苏勒坦阿里死子阿哈玛特立以金印归我文升请以王母之甥善巴为忠顺王镇之阿哈玛特怨明赏薄善巴贱种也何得王哈密复轻兵入哈密掳善巴及金印以去而使其骁将雅穆拉以三百骑守之文升奏请执阿哈玛特之贡使舍音华珊莽苏尔等四十余人流闽广而荐都御史许进抚甘肃使率副将彭清等选番汉兵倍道而至夜坎城登破之斩级六十降自保者八百人雅穆拉以千里马走谒阿哈玛特而阿哈玛特方与齐勤蒙古卫相讎攻不能大发兵使别将轻骑五百图复哈密复为齐勤卫兵所徼杀殆尽乃遣使上书谢罪请归善巴及金印于是文升亦奏还其贡使酬以少金帛而哈密复矣皇清宁宫灾太皇太后皇太后同居仁寿宫上命文升与工部亟议修建文升上言团营军■〈谷丸〉于役甚矣不可复相苦楚蜀灾亦不胜采伐而三厂有储木尚可材太仆马惜薪薪其价可以资工匠木石费也不足则幸发内帑数万金以继之报可盖落成而公私不告匱皇太后徙居之欢甚予文升一子锦衣百户赐锦币亦优等而北番和硕大入边杀掠吏民上忧之甚召对便殿赐酒馔给笔札询以战守之策文升乃荐保国公朱暉等十余人使选练营卒待报启行责沿边诸将坚壁清野谨烽火急収聚敌虽江不能深入而会吏部缺尚书已首推文升矣给事中言非文升不可于是用倪岳而特加文升少傅以慰赏之陝西诸郡地震裂水涌多壞庐舍文升乃复条上十余事而其切陝利弊者取回织造绒毼中官停止不急征敛上即行之又尝铸玄帝像二使中官送之武当山文升争之切上谢谓卿言是业已行矣其戒中官自飭敛倪岳卒文升竟为吏部尚书明年当大计天下吏上召文升至暖阁而谕之曰天下覲吏毕集卿其用心采访毋纵毋枉以彰黜陟之典文升顿首曰陛下图治若此宗社福也敢不仰承乃令中贵人掖之下阶自是所汰不职者二千余人皆当至考察京僚而给事中呉彝王蓋自以躁妄当斥因先事诬论文升及都御史戴珊欲两持以解文升等白其繇至议察文升曰吾安可市名而废天子法悉署去之人亦无间言云南夷猛密叛木邦不肯下有毛叅政者躁喜事因孟养兵以攻猛密设伏邀击大破之杀获且尽孟养之帅思禄怒大发兵破猛密取蛮莫等十七寨抚臣谕使还猛密寨不听则请讨孟养下廷臣议文升曰孟养所云报讎者名为我也且蛮夷自相杀而我乃为不令之臣役何也请毋发

兵而以诏旨切责孟养谕之利害孟养大惧上书谢罪因尽归猛密十七寨猛密亦上书陈谢上悦满九载加少师兼太子太师时风雨壤南京凤阳诸陵庙文升因悉考天下灾异上之而条修省十余事已又条汰冗员育人才惜民瘼清屯田重盐法广储积抚流移革吏弊修武备慎刑狱十事皆优诏嘉纳始文升之为都察院兵部与吏部王恕皆知无不言恕直而割文升练而详每一疏出天下争传诵之而所树立亦坚定中贵人李广败时王恕久已去公卿无不见染者弹疏猬上独不能及文升以是名声益着天子亦严而冯之迨任兵部久邊警充斥不能尽得诸少年心而在吏部且八十材力亦微示倦天子方向信大臣刘大夏戴珊等文升与内阁刘健等皆不能不少让矣上崩梓宫当出德胜门文升以君臣分深徒步号哭二十余里不称疾武宗立诸大礼皆预与刘健首而慰赐亦加于弘治初时承运库臣言上即大位吉凶之费计黄金五千两白金百八十万两户部计无所之则欲裁诸王赐并借公侯勋亲庄田租课者文升言人主即位例推恩恩未下而先夺之非礼也时已预籍诸藩司及大郡帑积数请使进之可得数十百万果足而弘治中上最慎名器然传升者犹七百六十三人文升悉革之又请籍宁晋河间静海皇庄地悉以予民而收其赋为太后两宫用固革中贵人之主庄者御马监太监王瑞谓造大婚礼器物应用儒士李鼎等七人楷篆西天西番字已得请矣文升力持之曰此曹皆昔考察无行且不良于书者而复用之何以杜幸门乃别选八人以进而给事中安奎因刺得王瑞纳贿状劾之瑞慚恚诬文升抗旨更下内阁府部大臣会议如文升请文升因乞归不许当是时几已内移而文升居位久其左侍郎焦芳乡人也而觊之会楚人熊绣为兵部左侍郎文升推之总制两广怏怏不欲行流言闻于乡人御史何天衢因劾文升衰老不任文升再疏乞归报许而御史王时中谓兵部尚书刘大夏刑部尚书闵珪谋代文升为文升劾大夏珪二公皆贤者相继亦恳归而焦芳坐得文升位矣文升之归人主尚优礼之赐勅予寶鞶锦彩驰驿以行月给禄米六石岁给夫八名供帐倾都啧啧以为留侯疏傅不能过也归之又三年而焦芳犹修郅构于中贵人瑾用小怏削其官秩寻卒年八十五明年瑾诛芳斥赠文升太傅谥端肃予祭葬嘉靖初加赠特进左柱国太师文升之卒无几而大盗赵鏐乱河南行剽至钧州以文升家在焉舍弗攻破泌阳前大学士焦芳已跳匿毁其家发芳篋取其衣冠縛苇若人者而屠裂之曰恨不为天下杀此贼人谓盗亦有公是非云

刘大夏字时雍其先世为东平人自宋而有都统制寶者从南徙着籍华容十二传而为按察副使仁宅以循吏名仁宅有子是为大夏举乡试第一明年中会试又明年廷试高等改翰林院庶吉士居二载解馆当留而大夏自请试吏授兵部职方司主事迁员外郎进车驾司郎中还职方司郎中大夏之郎中职方也明练于天下事所奏覆多当上意大司马倚之若左右手而是时中贵人汪直与保国公威宁伯比而创边衅大夏欲抑绌之不能时时扼腕安南黎灏破侵占城地西畧诸土夷败于老挝中贵人汪直欲乘

间讨之使索英公下安南牒大夏匿弗予尚书为榜吏至再大夏密告曰衅一开西南立糜烂矣尚书悟乃已朝鲜贡道由鸭鹑關迂回数十程奏请由鸭绿江便尚书欲许之大夏谓由鸭绿江谁不知便顾迂之而待今日殆有微意在乃弗许寻大同师失律仓卒告警大夏规调兵食有余太宰才之欲以为少司马不则太仆卿而大夏亟请外得福建叅政已迁广东右布政使再为左布政使大夏之三任藩宣日夜讲求民瘼吏弊所创革必经久不为目前计一切以身当之而旌尚风谊举隐逸试士经术不小倦陈献章者以道学名一世少许可顾独与大夏善而称之曰刘公爱民如子守身如女毋论于今人中即古人亦未易当也时河决张秋诏进大夏右副都御史往治之祀河神而所焚帛灰结若人形物意汹汹大夏不为动乃自上流孙家渡疏其壅可三十里复疏四府营之壅可十里聯长堤以分大名山东水势而别河张秋之南以通运艘河就驯运艘无滞功重而费轻逾于徐有贞甚玺书褒赏入为户部右侍郎迁左侍郎治边饷时宣大之余皆为贵家利大夏禁止之别募商使上粟而不抑其价庾丰士饱亡何移疾乞致仕大夏素倦功名既归筑草堂而居之仅数楹天下因称之曰东山先生而会广东西督抚缺即家起大夏以右都御史任之其吏人思大夏遗爱鼓舞称庆大夏亦精心无倦裁省供亿禁斥贪残一时肃然盗贼亦为之衰止大夏之在广东西一岁所再求去皆不许亡何召为兵部尚书力辞复不许既廷谢上御幄殿召问之曰朕数用若而数辞疾前复力辞者何也大夏对曰臣老且病今天下民穷财尽万一不虞责在兵部臣自度力不足办此故辞耳上默然居数日复召问曰征敛俱有常何至今而独言民穷财尽也大夏曰正谓其不尽有常耳他固未暇论即臣在广而广西取铎木广东市香药费固以万计上曰若向者言之固已停止矣其它征敛可一一议而革也于是上益察知大夏廉且练事时左都御史戴珊亦以材见知上当常朝坐金台有宣必大夏再宣必珊而御文华有所召对亦必大夏与珊偕时敌数犯边而太监苗逵者在延绥尝捣敌营妻子小有克获乃以捷闻上器之密谋令帅师御敌而问大夏曰若在广知苗逵之御敌乎延绥至今少息肩大夏对曰臣在广不知然问之从征将士知之所俘获妇稚十数耳幸而大敌方深入不相值值之则无噍类矣上曰即尔太宗何以屡得志于元大夏曰陛下神武故不后太宗而将领土马不能什二三拟也且其时淇国公一小违节制而举十万众悉委之沙漠奈何易言之度今上策唯有守耳而戴珊亦从傍赞其语上遽曰微二人吾几为人误盖前是上以问大学士刘健等亦力言其不可上犹未信也刑部尚书闵珪持法忤旨上与大夏语及之而怒大夏曰法司持法任其怨而上任其恩似未足深怒也上曰古亦有之乎对曰孟子云舜为天子皋陶为士师执之而已上默然已而曰若固为闵珪解也大夏皇恐顿首谢上徐曰珪第执之过耳亦老成人何可轻弃竟允珪请一日问诸卫所卒强可用否大夏曰向者臣但言民穷而卒殆甚焉何以作其锐上曰在卫有月粮征戍有行粮何乃穷也对曰江南困转漕江北困京操他困又不止此且所谓月粮行粮者半与其帅共之能无穷也上叹息曰朕在位久不能知何称为人主居数日令九卿大臣各以其职言军民弊政而

择行之庄浪土帅鲁麟为甘肃副将求大将而不得恃其部落强径归庄浪以子幼请告有欲予之大将印者有欲召还京处之散地者上以问大夏对曰彼虐不善用其众无能为也然未有罪今予之印非法召之而不至损威乃为疏奖其先世之忠顺而听其就闲麟卒怏怏病死上复谓大夏京辅左右肘而弱欲各宿兵于其地大夏乃因御史议请以保定操卒万人还之镇以为西卫而东兵纳之密云蓟州以为东卫报可而中贵人监京营者患失兵为役造飞语揭之宫门上以示大夏而谕曰禁地岂外人所能及不过此曹子不利失兵耳又问大夏兵饷何以常乏大夏意欲削镇守中贵人对曰臣无暇及他镇即在广而广之会城抚按总兵三司供亿不能敌一中贵人饷何以不乏上曰然第祖宗来设置此辈已久安能遽削之今必令廉如邓原麦秀者而后补不然姑阙焉可也司礼监太监陈寔选坐营中贵人上面命大夏偕大夏对曰故事独太监专之非外臣所与闻上曰岂忧此曹恶汝耶我在何忧恶卒命大夏与英国公懋偕寔往而中贵人苗璋恃夙贵耻不肯与选上业许之矣既而谓大夏不至即叅奏大夏曰如前旨何上曰吾虽意许之未发也何谓旨既而璋果不来大夏与陈寔等叅上上切责璋示若逮系者而姑宥之上复语大夏诸司言弊政详矣而不及御马监光禄寺者何夫弊莫甚于此二曹大夏曰上悉之幸甚在独断而力行之耳无何特勅兵部侍郎同给事御史清理岁省费十余万金自是中贵人闻而有侧目大夏者矣上尝语大夏一侍郎才足任艰大大夏不对再言之又不对上悟曰吾所言者才不暇及大节卿不对者是也既而大夏亦称一侍郎才上曰刘健亦称之其人负虚名而寡实用且擅作威福上又言健复称其乡人某甚不合朕意后知之乃都御史刘宇也宇竟以媚逆瑾败而两侍郎者亦皆不称上自是益信大夏与戴珊赏赉金币肴醴无虚月至以玉带麒麟服赐大夏上一日召对良久曰述职者集矣诸用事大臣皆杜门若二卿门何必杜也因各手白金一錠授之曰小佐而廉且属毋廷谢恐他人或觖望一日欲有召大夏在班而上不之见次日谕大夏吾欲召汝汝不在班恐不免御史糺故已之且汝同列有忌者盖是时刘健为内阁首臣马文升以师臣长吏部皆笃老而大夏珊独屡召不能无少望而偏听之说进然上益重之珊以老病乞骸骨属大夏一从臾上谓卿珊何以亟求去珊不敢对大夏为言珊实病且用身率先御史而病弗胜御史当见弹射不便上曰主人留客坚客且为强留珊独不能为朕留耶且天下尚未平何忍舍朕已泫然者久之珊与大夏皆叩首泣出而相谓曰死此官矣俄而上崩武宗立大夏所条奏十余事皆剴切有诏行而上少而从左右为狎游几已露时戴珊已卒大夏与马文升相继乞骸骨诏进大夏光禄大夫太子太保赐玺书乘遽续廩给扶濒行又赐白金彩币宝镪而郎中李梦阳为东山草堂歌语跌宕悲壮天下传之大夏归未几而逆瑾乱政与中贵人修大夏郟刘宇又微闻造膝事銜之与焦芳比而譖诸瑾曰籍大夏家可当边费十二于是以广西土帅岑浚事波及大夏而讯之欲坐以激变死中外识不识咸惜大夏先帝朝遗老浚不反何名变事与大夏不相涉何名激而无敢以语瑾者属三法司议左都御史屠滂言检律刘尚书无死罪瑾慢骂曰即不死可无戍耶李

东阳时居内阁首不能直抗瑾而婉解之又瑾所使使诤大夏家实贫始永戍甘肃卫大夏怡然就道所至人聚观相指识争捐金以资道路费大夏谢不受居甘肃久之瑾诛始赦归寻悉复其官爵于是言官交荐大夏谓当并复其廩秩而中贵人在事者尚不平大夏不许大夏杜门教子弟为敦睦耕稍赢即以贷予姻族天下犹以其存亡为重轻居数岁卒寿八十一言官复推大夏诏予祭葬特赠太保谥忠宣

弇州外史曰弘治最多名臣内阁则刘健李东阳谢迁六曹则耿裕倪岳余子俊周经张悦戴珊闵珪韩文侍从则杨守陈呉寛王鏊方镇则秦紘王越要未有如三君子之灼灼者也恕直谏重天下然不难于孝宗而难于宪宗孝宗仁君也然而颇以齟齬终岂非所谓事君数斯辱也耶文升数更中外历权寄不屈不脛盖以才力胜者大夏仁心为质道揆法守晚际鱼水密勿都俞庶几有三代风哉造膝之语小有传者觉主圣而臣微不及也人谓恕似魏玄成韩稚圭文升合姚宋而小逊之大夏似李沆司马光又曰恕强差近名大夏弱差近实文升练差用术其然岂其然哉

弇州续稿卷八十九

●钦定四库全书

弇州续稿卷九十

（明）王世贞 撰

○文部

△墓志铭

通奉大夫贵州布政使司左布政使致仕浙江江公墓志铭

盖嘉万间歙有名臣江公云而江公所与曹者中丞方公少司马汪公也汪公余友也江公务於敦修自足不蕲赫赫声然生而汪公为之传卒而方公为之状矣而其葬也介子某不遠千里俨然衰经以志铭请曰治命也夫江公不蕲赫赫声而二君子为之传且状者则若知之矣夫余尝一再事公郎署间不能尽知公而公乃能知我者何也则岂其以汪公故状有之江故萧姓至唐而丞相邁者以不能事中人不能死子楨避地江左遂为江姓家篁墩歿而墓溪南子郑守之为溪南里人元末有弘宗者仕为州倅以击贼

显自是世受耕而封驾部公才乃始推其羨为小豪里中驾部有六子俾其叔季子受博士诗公其季也七岁即日诵数百言十六补邑诸生寻廩於官公之为诗骏叔上矣而数奇凡五试始与计偕报罢再试始成进士令高安高安剧数能败其令而公至则以廉俭简易将之所赈恤务单赤捐不急傲无良岁侵不为灾尝悯役夫之窘於祗候者遣之归曰安而室即缓急呼汝已无不立应诸生朱诰居恒与郡结纳而有所睚眦以病死佣中之狱久不决公立得其情坐诰徂使律郡为请不得也自是高安令课取甲诸邑其征补台垣选亦甲诸邑而至则授礼部主客司主事人或怪之意公不乐居台垣者公逡巡谢曰令固不知当何曹也无何奔驾部丧服除仍故官寻又奔继母张丧谒选久不调公曰有限故有竞吾其居不竞乎哉上章请南得驾部少宰安阳公怪谓郎何自南公复逡巡谢曰郎自便南风土耳其安公叹曰是安得长者言吾愧吾官矣公之为驾部主给邮符属新令不得滥给邮符而有挟重请者尚书业许之公固执不可尚书无以难也曹当审役船乃先期具疏草尚书上之得减船百而一切差次藉自公手请托不行遂定为审船格其自为主事以至员外郎郎中皆不离驾部所封父亦如之而母郑及继母张亦得封用久次迁知广信府下车檄诸属城毋自污即守宽汝三尺不宽汝矣首蠲无名之费金若干者风之富人纪崇者实不杀人而怨家置僵尸於舍傍以中崇前守避蜚语不为理御史按崇欲实之公力为辨御史强谢公退而语监司曰守不畏累富耶公闻而叹曰是何言也守受诬墨即不愈於累受诬死崇竟得白而是时金吾校奉诏治真人张氏墓自负彻侯子当封不能无骚扰公贻诗以无隳家风为讽校恚劾郡从事不奉诏辞连公其大帅朱公约得上事乃已顷之张氏夺爵罢治墓金吾校乃大愧屈时段御史挟袁州相而横方按饶而有叛卒自闽归者道且出袁州啖之左乃取道趋豫章■〈豸羊〉言欲投浙依故帅胡公公筴其抵广信必反谒御史曰卒且反反而吾信诸属邑俱无城必下幸发兵讨之御史愕曰此抚臣任也揖公出公急归选壮士甲而登陴贼觉之乃径薄玉山玉山令仓皇负印走贼遂大掠公移檄责数之募能得一贼级者赏若干贼自疑欲溃而抚臣所遣兵亦渐集乃复走之闽以壞散御史既素衔公强项而内愧之所论劾疆事不能及公乃劾公以计吏疏而格铨部不听寻复挟袁州相得监军再论劾公以疆事下兵部议调公如御史言人复恠问公所繇调公复不荅方治农圃野中意豁如也而抚臣胡中丞为荐之朝善中丞者谓不难御史乎哉中丞曰吾知守不知御史也然御史与袁州相继败而公即家除郟阳守郟阳素闻公名不言而治未几擢江西按察副使寻移浙江为右叅政矿人负西安铜山鼓铸者以千数数行剽新都公条上所以弭之者四策未及行而贼已破婺源转薄休寧及歙公请于台发兵要其归燹之遂乘胜锢诸铜山以次第受四策论功赐白金彩币若干进江西按察使再进云南右布政使甫之任以肺病投劾竟归时铨部已拟贵州为左布政使公复投劾乞休寝其奏趣之官公病良已甫复任而铨部之为政者新谓公尚未起乃举前奏报致仕矣传则云公始读礼倡其宗治宗祠再归而祠成乃始治居室老乃就溪上治草堂其所为古文辞虽工然益自逊曰不佞

安敢贄作者藏名山幸堂成篋其中以示为江氏后者耳季年罢肱篋独有庄氏屈氏司马氏书谢杂宾宾独殷司徒程汉阳及中丞与不佞道昆墙东拓地五畝辟华黍堂堂下墻者树瓜蔬衍者树林树黍客至率取办羹食酒浆始其配吴夫人贤而佐之已目眚废委家秉四丈夫子更月视膳羞稍溢则佐以公糲有上客则合诸子鯖乡大夫居家无如公适矣公长不满七尺屹若泰山敢寡言出若括中黄而中命居尝择地而履及其坦坦自率则委蛇若遊龙望之凜然就而视之若承景含光不见其迹呜呼知言哉乃余所窃窥江公之为循吏也矜守令深矣再抑之又再已之而无几微见颜色其去名也遠矣二君子之不忍泯泯公也古史氏意也余安敢不操管而随其后公讳珍字民璞家居时岁月一至浙江徘徊不忍舍学者称之曰浙江先生卒以万厯戊寅距其生正德戊辰春秋七十有一可学娶方可章娶邵可登娶曹可均娶程为太学生所谓四丈夫子也女二适郡诸生方廷济太学生汪居贞孙男四人在某所铭曰

俛得三事而畴抑之俛得上寿而畴夺之天兮人兮隕然顺则而不知猗与夫君隱者以为苾臣而显者以为逸民耶

奉训大夫福建都转运盐使司副使梅岩郭公暨配吴夫人合墓志铭

里居而有苴杖来謁者其貌墨而瘁若不识也已而征其为故人郭君子直郭君之为祠部郎而余弟世懋称同舍郎以是与余善而其去祠部而谪遠邑去遠邑而郡去郡而南武部也则尝知之然何以遽墨而瘁若不识也惊问曰病愈乎曰愈矣愈得之痛吾母之不逮汤药也吾父之可以大耋而不大耋也虽然犹覬有释者是將葬矣必子之一言而荣施之地下乎余故不文然窃悲郭君之意而志之按状公之先世为华州人有太保公礼者自华徙汴又三世而昭干者自汴徙杭遇异人授以牡丹竒方遂业医又三世而仲敬者以方疗宋高宗疾验得賜国姓自是称赵或仍郭云而郭之籍海宁则又七世之为洗者始也明兴又六世而为封推官某能修其业甚着其居迹崇德遂占籍为崇德人尝娶故邵康僖公之从女而举公公生而端重不妄瞻视封公意才其兄某使儒而夺公于医俾习轩岐家言康僖公召试之曰仲可儒也公遂复弃医而儒以易补博士弟子寻入太学升上舍祭酒陆先生深试而贤之数為延誉公卿间而会其配沈卒乃归謀继而是时里中吳翁者挟高贖长女为安人其生有祥且淑公闻而委禽焉或曰继也将难之安人之母沈感异梦曰必归郭无貳安人甫十六而離容备妇道矣公既以连试不利乃就选人格高等得云南临安府推官公既用盛年练事持法法自豪狷始夷胆为裂两台及监司恃公重已解十八寨诅杀已清蒙自矿场已监水西宣慰兵平都匀苗竟事无哗者会讨安南而滇师扼其背安南請降帥以公偕閩帥往受之公行箚中陈黄幄厉声扬天子威德陪捧首待命閩帥噤不能嗣一语人以是益称公御史檄公入棘所得多

知名士至奇公文而梓之公满考两台交荐剡上封公官如公母邵为孺人吴安人封如邵而公之当备端杂者数矣竟以格迁福建都转运盐使司副使有巨商缘旧引为奸私者公至悉发之凡十余辈当坐遣乃求贵人缓颊弗听赍千金重亡所入则以移贿监司改牒而曲贷之公即日解官去台为下檄强留乃已时先后御史徐宗鲁高崱皆能知公司与提举司闽县三篆俱缺徐公至悉以委公而公据牒而理之立解盖三绶若若也闽有水口者为同知署最壅利柄高公举以委公公代署十八月其国课踰于后先且倍高公每举公以励百吏曰是安得尽若郭副者即御史可安枕矣公恒谓刑犹火也不戢则焚人利犹水也不遏则溺已以故在滇平反无害而于闽尤斤斤持风节顾数以材起有当官声而亦用是见嫉且归矣公归而封公与邵安人年俱八十无恙乃叹曰吾向者汨汨扰扰遠宦中几忘其所为人今始得之谓安人父何好曰好眺则为筑延揽楼居之又何好曰好客即安人坐庖次浆酒羞膳不警欬而应矣邵安人老不任政安人代为政所以共奉邵安人旨丰过於旧也久之封公与邵安人相继终公毁於外而安人毁於内顾於敛含丧葬之仪秩如也盖皆以孝闻矣公虽以儒故弃医而其於轩岐家言素习至推以疗人疾无不立起晚节户外屨恒满损橐中善药应之不倦尤善农事时时行课赤日中子直跪而请曰大人幸贵何自作苦公曰农恒业也贵非吾恒有也安人则亦善蚕昼夜缉缉子直亦请曰母得毋劳乎安人曰女职也且吾而不劳谁当独劳者凡公之居官治外不问内急于公不能及子其扃闭束约与所以诲成子直皆安人任之矣沈孺人之母钱老而迎养之均礼於邵安人无间也及死均其葬於吴翁沈媪无间也姑及中表之戚惠施若困取矣子直既成进士为行人奉使归再拜称觴公与安人欢甚然未尝不以砺节奉公为戒及坐公累谪而意安之子直之再迁南武库也急公与安人欲归而公止之曰毋再罹简书也吾行视若於此偕安人过子直之官邸乃谒孝陵已陟雨花台歷牛首据燕矶酒间慷慨叙致六代兴废数百言听者悚然目为异人子直私自幸得以其官养而安人病念家公与之偕归矣安人性不妒忌而公晚益壮舖馔御内如少年以故有所置媵若而人其产子女若而人安人疾既亟出橐中金珠组帛面首衣舄而等分之或谓安人有他子耶且子直长安人徐曰畴非吾子也子直寻扶服归而痛欲絶会上以册后恩安人当得封命公好语子直若胡过毁为以一女子厘王言不死矣然公内邑邑不乐岁之初忽召其子女偕而属子直曰若母少於我十年而不能待我安所恃久手产籍析而二之曰某以属若某某以属二竖子以大事悉在若也诸子女若传之而家室之乃公倦且休矣亡何病病在两股间若刺药之愈旋病脾不任药遂卒卒时语子直勿苦如念乃公者读书强为善而已公雅嗜吟咏无裘马声伎之好治三径杏溪之西渚其所往还独其伯氏某及沈吕三四君子邑大夫以鄉饮宾之为为一赴即谢不往公所著有征南錄八景集过庭私錄藏於家寿七十有八安人寿六十有八其子姓婚嫁具如左嗟乎公起三舍超赞大郡佐运纲迹其所树立不伟然男子哉识者犹谓格不能尽材以为恨藉令公未遽罢当不令嘉靖间寥寥循吏也安人之以女德终始无间可媿也已铭曰

鲍村之墟厥土穹窿树檟已材辅之梓松有鸟来栖而呼郭公孳尾翩翩偕即尔宫
佑尔子孙俾炽而丰

文林郎南京道监察御史山泉慎君墓志铭

隆庆初余守吴兴部而始识慎君之为人君中形胡髯髯半侵面其行步蹇蹇如也而稍与语天下事慷慨激烈若无足当其意者至谈艺文扬挖千古巽乎其入之也悠悠乎有余思矣自是余别去以至得请归里君岁必一来来必移日其它问讯之使以春秋计则必出所疑於古载籍者乙而就质以余之不学幸不及败而久之稍不闻问则君之子报君死矣余病不能走哭君独未尽废笔札以故因君将卜墓采君事於其子为之志铭而返厥币君姓慎氏讳蒙字子正其先自慎清以汰避法繇鲁昌平乡徙而之赵家太原再传而为到显名诸侯间至宋有镛者自秘阁校理出知湖州悦其土风因家焉遂为湖之兴安人又十余传而至君君生而资颖敏好读书弱冠通经术工属文闻越人诸爨先生善易徒步从之游时故廷尉汪公文盛今少师徐公阶先后督学政名能知人读君文而奇之曰是子利如锥安得久处囊哉无何果举乡试高等自是声称愈籍籍然久困公交车间不复收垂念载始成进士谒选得漳浦令漳浦故多豪善持长令长短君至则一以柱后惠文绳之又明察强断晨朝诸吏有所顾问吏惴恐无人色所弹击不问贵显居间路絶一切治理流传傍邑环取则若师帅然有盗负山海而窟者诸奸黠亡命多归之尝出攻剽聚落掠金帛子女司阨者慑莫敢谁何君乃择邑下豪胆武阴重不泄者十余曹俾伪与盗通佐之攻剽若向导然密报君部劲卒攻之所遣豪从中应急击縛其巨酋三十六人余无得脱者威行邑中道无拾遗尚书以为能下尺一征君拜南京某道御史他御史多脂韦词伺帷幄风旨君独不尔固已一切不便之而尚书胡某方视师两浙挟权相分宜重时浙寇甫靖而胡犹用军兴法腴十五郡民脂血以其半入分宜庭半私为橐中物而又鬻酒醉则营蒯人命君念胡蠹残我桑梓无已时而身在台力或能得之数移书沮止胡竟不省乃上疏极论其事大略谓治天下如治病病有缓急则药有标本日者兴兵命将付以东南兵饷假以便宜不为稽制诸所治皆标也其药皆雄附也幸而其标稍就绪而不知根本已销亡矣而当事之臣顾益巧立名色渔猎不已夫病去而雄附复施病必益标治而攻击如故本必拨当是时疏已上权相内自惭而尚书且惧且恚百计谋中君以台事不得则中君令时事属大述职计吏遂逐君御史既以最超拜不当预计计吏故不及御史而会君所别抗疏论科场懷挟弊诸谏察方略严甚士子有犯而削籍者争哗君权相以是得阴喝台省行意焉时宗伯孙公升国子祭酒潘公晟闻而不平曰以覲去御史又去真御史法安在将白之朝君力止之曰夫去某者非误而故诸君度力能胜之耶奈何以一官重不肖累君归而胡意犹未慊谋所以陷君沈思久之

人參胡军事为画策曰公故尝平白包巾反者而此子曾书诤之强坐以钩党可也乃察伺君亡他状而会君巡视江防时有兵杖十余掩得之以为君反形逮下狱罗织其家人子俾为证狱且急按浙周御史及君乡人吏科都给事中沈君为营救得小挺而胡以言官论逮事乃大释君虽得释然家已毁而又不肯别治生以是益困第日取古文书辞诵之如所谓商丘歌声中金石者居恒谓其子懋赏建文故贤君中挽於事几不获终吾以向者在台时拟白之未果而罢然吾每饭未尝忘建文也于是草封事数千言大要以逊国委命归建文以应天顺人归文皇以继志述事归今主授懋赏俾上之懋赏以谒君同年马相国马公读而吐舌曰是不难上即叵测毋若乃公何懋赏归以报君君叹曰固也若爱我奈何不使我有身后名于是益读书多所纂辑谓明兴风雅于唐盛矣作明诗选文体垂三变而鲜折衷焉作明文则学士大夫于诗尊唐而斥宋宋且废是恶可尽废乎作宋诗选进而諫争欵欵有余诚矣作忠恳录退而徐观乎俗断断有余感矣作警世编慎之先邈而其裔则益滋我将为整齐焉作家乘录读何氏记游山而赅之谓胡以仅记游也作名山记其它若所谓陈将军集斋山志王荆公摘粹南台奏稿者往往甫脱草而人传之君乃喟然曰述而不作信而好古孔子何人也而称窃比不佞乃获老死是间足矣足矣以故且读且著书终其身不倦至年七十二病腰痛剧神气不少挫谓二子必得王元美志吾幽二子泣受教目乃瞑时辛巳之四月二十七日也余既志而论之曰分宜盗乘而世趣臃焉当其时固难言哉即仕者夫岂唯言孙也虽危行亦鲜矣而君故取其所甚嬖而击之其所甚讳而暴之吴兴之狱岌岌乎仅身免耳君不以危故废其直不以身退故废言天下事不以老故废学男子哉乃其所称窃比者得年而亦比之可以瞑矣懋赏又亟为余言君没之月余而里人贾林者暴死三日苏自云至一大官府有盛服据案者君也谓林姑贷而罪杖之数十既循其股则有青赤痕若受杖者夫神者聪明正直而一之而又何疑焉君讳蒙字子正别号山泉娶于潘二子长诸生懋官次即懋赏皆有才行世其家诸子女婚娶详左方铭曰

语所称笃信好学守死善道者于士庶几哉君其人非耶噫其用恒厄而气恒伸其形有尽而名不泯生为直臣歿为明神噫

奉政大夫同知泉州府事三泉陆公暨配陈宜人墓志铭

陆于江左偕朱张顾为四着姓至宋而有光禄卿景山者显江阴数传而为元海北道肃政廉访使吴兴庄简侯屋又再传而为布衣治以避兵徙常熟又四传而为赠太仆寺丞侃侃子温州守润润子福建都转运盐使隆恩隆恩子诸生朝介世世受经术笃学砥行而其仕者有循能吏称朝介曰笔峰翁实生公公讳一鳳字子韶生而丰颐伟躯秀美髯望之若神人弱寇以三礼试诸生郎褒然首补上庠受饩尝读书於虞山有三泉繚

之因自号三泉公名日益高然七试而七不利最后有司异其文而录之举第四人自是益有名公交车间又八试而八不利主试者至为错愕叹曰今年复失陆生耶乃谒吏部选尚书张公瀚侍郎刘公光济得公文传赏曰嗟乎彼三百人者何人也虽然吾不负子以第一人辟拜福建泉州府同知泉滨海岁屡中倭而公所治海防当其劲公始行地谓料罗澳贼冲也而当上游可以重泉简劲卒为水寨戍之而艨艟翼其外人谓艨艟费不支宁小减以趣时指乎公曰不然小减者大费贼也既他海舸皆以■〈风贝〉散而公所御独无恙寻受台檄偕诸将夹讨海大酋林凤于广之惠潮大破之覆其巢凤仅以五舟遁诸将椎牛酒相贺公独曰祸本犹在也是且走海南诸国而伺我解谍之果走吕宋国于是以重兵蹙之且谕之而吕宋果迫逐凤有所俘获上献因请得入贡比于暹腊诸夷台下议公执曰不闻职方氏有吕宋也奈何以小夷効小顺而秽我大鸿胪典台难公当如何曰疆场之利専之可也以台劳取羈縻而已诸与议者咸服公而公以功薄当上格诏赐白金一镒时安平侠李戴美以使气借躯名尝私大奸而橐之陈明陈贵者盗魁也而逋于狱公授贼曹以秘计后先皆生致於法巡抚龐公尚鹏巡按商君为正奇公材而荐之谓当不次超拔复狗吏民请留公公乃不果迁而台寄益重凡三署府篆再署晋江南安二岩邑以至清戎籍理屯政课鹺法晨起推案簿牍山积随晷而尽盖终公任无宿留者吏不得因缘为奸惴惴戴三尺而办始泉多山田为伏税相胜公悉搽出之以宽瘠者又宽监盐禁曰吾责课於彼而不使之出息耶自是盐岁鲜逋额而时有诈台繻乘传者自岭左右抵闽已数十驿遭公诘之立败台为交下旌曰使闽得三四陆丞者吾侪可卧而理也公益自奋以狗知故不甚爱其力而当盛夏下摄永春已又摄德化往来山谷中侵于瘴遂苦痢大作犹治事不休俄而疾革守丘公问公以身后公不荅唯举一二郡政当厘正者而已既卒无以为敛门生叶庭凤庄望力经纪之丧始克发公佐泉满六年其德于泉士民甚深既发巷哭路祭百里累累不絶群鸦随而绕之者三日呜呼可以无愧其先称循能吏者矣始公之治三礼也诸能为三礼言者甚寡而公治之精故其束修受业者累累而知名士为方比部策徐进士太时莫太学是龙其莅泉而再当行省比诸生公輒膺辟棘以内所举复多知名士若陈绍功黎时中陈鸣熙何乔迁兄弟皆服公之精为刻其所著于泉而名之曰三礼奥义云公娶於陈为抚州守言女是曰陈宜人宜人之自陈归也以其橐从甚侈改而从率素笔峰翁喜客为滋味公悉修贖而资之不给则宜人簪珥佐之矣公之母曰汤孺人与笔峰翁先后病皆裕医药老终裕附棺丧从易葬从厚也礼与毁称乡党啧啧曰孝哉陆公也已而曰非特陆公孝也抑亦有内助焉而公自是所为德非一笔峯翁没则奉翁之弟朝献养之如翁已抚翁之少子一虞而资其室已奉丘嫂周而养之如朝献已诲其孤侄严暨光重诲其族弟一驥为诸生然公时时语人微吾妇谁与吾为德也盖称陈宜人云而陈宜人念公壮而未有子选於里而得淑曰吴孺人以荐公期而有子会公捷留省报至宜人大喜曰二者所得孰多请于公名之重科毋使顷刻违保抱也重科今亦为诸生有名矣然陈宜人竟先公卒得年仅四十九

而公至六十三嗟乎以公之材起徒步五品佐大郡天子方破恒格而登用贤义腾取屡上即三事奚靳而竟止此惜哉然公年六十三不为夭三十五而成乡试不为晚踟躅公交车者踰二十年而始就吏部选人非用公者晚也公固自疑于格也甚矣格之能困天下材也重科娶於张为光禄监事希九女举男子三崇礼聘王氏问礼聘周氏皆宦族学礼未聘女一许字谭文焕其葬也以万历辛巳之十一月某日啓陈宜人兆而合之墓在某所状出比部君策所谓受公业者也重科之妇张吾甥女也故不辞而志之而铭之铭曰

是良于邦而宜于室其用不究德则一子孙保之永终吉

故光州知州进四品阶警斋子暨元配吴孺人合葬志铭

弇州生曰余读泰亨之草其王父警斋子状而感之盖余感于国功令也夫唐八司马材人也而坐奸党谪彼其窜荒服御魑魅盖仅待之以不死而以不削仕籍故至拜相若异列常伯若禹锡即吕温柳宗元虽早夭而不失为良二千石警斋子之治光州也数以严能课取当迁非有簠簋之累以干简书一中蜚语輒罢去不复收竟终其身夫警斋子之去守仅二十九而其卒也七十矣以发硎之锐匣之积四十一年而不获吐中间虽三奉明诏易银而金易青而绯天子之恩无所不覃警斋子若少贵而其不获伸如故则宁非功令使之哉吾所以感盖感警斋子之不得为八司马也警斋子之先为即丘贞公至孙文献公而渡江几二十余世而司谏公徙分水又数世而古川公来为昆山州学正蒙家焉古川公有三子中一子夭其长者留昆山为警斋子之始祖少者徙东乡遂割隶太仓为余之始祖以故余虽少於警斋子二十余岁而忝大父行警斋子之祖曰承事公恢有二子长曰时雨以子任用贵赠仪制主事次曰时暘以警斋子之仲氏汝康贵封南京祠祭主事其部皆曰礼而分列南北人荣之祠祭公娶安人有五子警斋子其长也生而颖秀絶伦过目輒成诵祠祭公异之使受顾方伯先生梦圭易先生每有所草博士言輒口占使警斋子书警斋子既已书则臆而録之别帋且盈甌一日顾先生发其甌大警曰安所尽得吾言乎警斋子谢曰当书时臆之耳顾先生曰去矣吾不能长为而师也警斋子自是文思溢发所为博士业必根底理道其气沛然而辞灿然十八补州诸生受知於提学御史罗君二十四举于乡明年中南宫选寻廷对所射策高桂文襄公拟之首甲而阻其长寘次甲明年补河南之光州守光州东南界鳳阳而西抵楚之麻城其俗雕悍不惮犯法急则走三垂以自匿蔽强宗豪家时寘耳目于守左右为把持计守亦姑屈三尺以徇之苟得相安而已警斋子至则一切尽扫除其弊无所纵舍发擿奸隠有神明声而大指实在寛欲以所不忍者施之葺屋单细信阳民有罪不至死而坐死者请于台愿得改谪王光州台谓光州岳岳惠文不难汝耶民叩首言死光州手无悔警斋子果为之

辨而未减之警斋子好以其间至学宫延见诸儒生讲说经义而择其名携亲为之师而资养之若刘给事绘取爱幸而次则喻司徒时李选部时春鞏皆旦夕无间有吴道南者繇他邑来充椽史警斋子目而异之曰若故何业曰儒不成乃试吏即命以二题其文奇警斋子曰异哉而之自弃也延为诸弟子师业成后竟第进士而河南岁当大比御史檄警斋子入棘俾司弥封与故葛端肃公守礼偕而属之曰试事一取二大夫处分刘绘果得第一人喻为第三人李亦前列而光州之名儒无遗者时称为龙虎榜而警斋子前已两被台荐入覲计课取还而益务为精明吏及大豪惴惴盛夏若负霜雪外户不闭道不拾遗而有郑坤御史者以请告归多从冠虎纵暴闾里间警斋子悉捕置之理而还所侵民田十余顷郑衔之甚不敢报乃阳为输款以心腹事警斋子而御史王君仪当行部王君故尝委警斋子以棘中事者也而有所察访托一司理司理复有所托则一亡赖子恣行胁人财事露郑乃入说警斋子曰械其人而白之王君必大喜以子为能刺奸也警斋子如其言当是时王君亦不以为恠而郑素善王君入说曰君乃能容光州守甚善虽然守恶少年欲借君以立声亡所不露矣王君始心动谋之郑公益饰警斋子他事论罢其官方警斋子之得罢而其配吴孺人亦卒吴孺人者故水部公某孙女也家世素贵盛而性驯谨自然规节又习于女红烹飪之事二十而归警斋子时祠祭公織嗇起家戒恒食毋得进鱼肉岁时伏膺孺人必选甘毳而奉之公喜以语顾安人曰赖新妇口为肥矣且幸不自吾家橐也警斋子夜读书恒至丙孺人未尝不泝澣而佐之他辛苦必故尝甫贵而病卒卒而警斋子解州事不能以丧归诸生刘绘鞏率三十金贖始得归朝祠祭公意弗恠谓吾所望于若者何而止此已自指曰吾尚儒生巾衣也警斋子不敢明所繇局踏谢过而已亡何仲氏成进士乃稍寬警斋子而至受封则益寬然警斋子居恒自谓不获一命为亲显嗛然若无容而当其身论出处则夷然不屑也王君来守吾苏又饬吾地兵备不自安曰奈何以一蜚语錮才守使所亲风之伏阙辨辨可复也且以百金贖警斋子谢郟之曰劳苦使君向者雅知非使君指即辨而复奚足贵也警斋子性耿介一毫不取予其始归而橐不能百金乃计口节腹辅以计然之策计岁可累数千金而祠祭君没时遗帑与产甚厚悉以让诸舅弟曰以慰吾亲地下人相目谓警斋子生平不妄舍一钱此为钱讎止百缗贤者不可测乃尔警斋子性不喜食酒中岁忽喜酒而量亦骤进时时要所厚饮必尽欢畅尝指鸱夷而咲曰此君实知己有子四人彬彬不替家教而少子荣鼎尤朗拔为诸生能得其父心家仆与邑贵豪之子閔连日一仆死摄令者为吴江苏丞由给事中谪修杯酒怨于警斋子而坐荣鼎故杀谋诬人死罪踰四载垂得白而荣鼎夭于是警斋子之橐若洗矣始甚痛荣鼎之非辜既而叹曰陶朱公何人哉命也而最后直指明其事捕逐豪子不获家亦破人以语警斋子叹曰彼亦命也光州之郑横益甚后守马晋白发其状诸冠虎皆败郑自恨死人以报警斋子曰吾向者命也今彼亦命也盖刘喻诸君子与其民久而益思警斋子为生祠于城北十五里久之警斋子病卒时万厯甲戌之五月也警斋子讳三锡字汝懷为人坦直遂性不设城府不汲汲修郷曲誉久而人

信其长者始为诗有元白风文亦得眉山遗意而不甚好之五十遂弃去曰天惠我以逸而我承之劳以此责名笔研间不亦左耶知者以为达而余独未谓然曰甫康衢而蹠之我其奈何夫我尚守而诬之肆我尚能而诋之拙我其奈人何天幸惠我以媵质重之以修晷我於此之恤大而立德次亦立言人其奈我何恨生晚不及警斋子之壮而进之后举以示似警斋子者皆不能用也警斋子始娶即吴孺人继娶唐孺人丈夫子四为吴出者曰按察司知事重鼎娶丘氏太学生峿女太学生鼎娶毛氏思州太守希原女按察经历贵惠娶张氏广平令擢秀女次即荣鼎娶顾氏太学生允默女荣鼎夭而妇哭之亦夭重鼎贵惠皆后警斋子卒女一适诸生叶恭烱而夭孙男六泰亨邑诸生即草警斋子状者娶秦复亨娶杨继娶钱临亨邑诸生娶张恒亨娶梁咸亨聘顾震亨聘周孙女四其壻沈应德孙日昌徐自得马天馭也适孙者以哭夫死适徐沈者俱夭死曾孙男五志夔志皋志益志元志稷曾孙女二墓在邑东二保食圩之新阡盖泰亨之言曰伤哉吾王父之不获早即土也则以岁屡俭故夫岂惟王父吾父按察君亦弗获瞑矣于是强自力与其诸弟谋以乙酉之某月某日即其地葬而吴孺人祔焉礼也于法得附书铭曰

孰谓而且贵甫为能吏而不见庸卒以屏弃孰谓而吝施千金之遗弃而弗睨以全吾悌孰不爱其子子以冤死委而归诸理孰不爱其名其州人之伺也澹乎若无可称呜呼兹其所以为乡先生

弇州续稿卷九十

●钦定四库全书

弇州续稿卷九十一

（明）王世贞 撰

○文部

△墓志铭

耆德拙斋詹翁墓志铭

詹翁之为侍御君父也而贤其卒也盖加耆之七年矣卒又可十年而葬葬而必侍御余君之状来请志铭某不佞辱侍御君之知于少日其敢以不文辞按状翁讳文禧字

得庆别号拙斋詹之先南阳凡三徙而为遂安之古明人父曰廷彬母余有丈夫子四翁其叔也方翁之有室则已相率而备志养于二尊人会其父没哀毁踰当自伯氏之强力起家而翁得寬其身扶侍寻亦没仲氏孱不能支翁始自励持门户■〈立乞〉■〈立乞〉有能声出则里中人相目曰夫已氏者而非可以仲狎也会家当析箸翁第取其畝瘠者而以善因时故居积亦稍稍裕尝客游钱唐梦母汪谓曰儿归矣儿归矣寤而惊驰六百里抵家则母已前三日逝度翁所梦夕也号顿几絕久之始一进饘粥盖三载一日矣翁之起由俭勤积第尚义好施乃天性其产不能中下而迹其所施恒蕝什之岁旱饥里有饶粟而闭粜者翁倾廩以食饥人不足则出藏器服以贵直质闭粜者粟而以贱直粟余者已僦工多为桔槔穿塹以引水其下田与人偕济岁大疫尸枕相望公行视戚执调棺殮而他窆殍则躬先僮干收而瘞之其舍东山岭斩絕公父所置梁通道者也久且圯翁为复之亭其上舍北去王村七里径二道废于涨翁为凿山架石以便涉者自翁之子理成进士至御史益得饶于力然益好行其德不衰所为怨者毋论睚眦而上皆忘之所为德即一饭不忘也翁既念倍父母诸兄弟独仲在得卮酒未尝不共之相与慰劳怡怡然至一及父兄艰苦事輒涕洟淫下不止也始翁察诸子皆任家顾独御史君内文任经术俾受春秋于进士语溪徐楚举乡荐一試于春官不第归翁曰岂其有所不足耶俾质之钱塘江圻圻故世受春秋学者也读其义而叹曰行矣吾所有毋出此者矣御史君果遂第御史且满当封翁而以星变中谗罢不及封有司贤翁而以例给冠带翁为一袭而笥之曰吾故褐寬博且轻也自是足迹絕城府强之宾饮亦不再赴翁之卒以隆庆戊辰四月十六日其生则弘治壬子十月初二日也娶鲍孺人少于翁二岁而先十岁卒有妇行语见赵太史志中子六长珙次理即御史君次珙次玠次瑄俱鲍出次璋侧室汪出孙男十八滢渊泮涵凉沐淑洛浚润汶澄津涉澌澜澎（阙）俱太学生泮王府奉祀渊邑诸生孙女四适诸生余穆俞应宣卢汝沛陆宫曾孙七可贤可尚可道可贵余幼葬地在里中茅平庙坂寔启鲍孺人之兆而合焉铭曰

天道无亲常与善人是耶而胡以靳一命之荣于厥身非耶而胡以寿考令终而绳绳其子孙夫取福不欲尽而为德不少衰其所不欲尽者乃其所以遗者耶其泽流于詹而魄止于斯耶噫

俞仲蔚先生墓志铭

玉峰之东踞娄水阳者为俞仲蔚先生墓而先生之葬也距其捐馆舍二月余矣庐以内无停哭也庐以外无停泣也邑内外无停叹息也既大归视其紼有凝温者盖送客皆雪涕云而先生之友按察使顾君谓不佞章志最习先生宜为状子取知先生宜志而铭其窆封之石不佞唯唯顾君之状畧曰先生讳允文仲蔚其字先世昆山人屡业儒而

其父评事公某始顯重由进士连任大郡司理以清干闻入佐散署邑邑不得志病卒公是时甫十三也而哀瘠踰礼又能上奉祖母黄与母陆养庄事兄某而抚弟某咸得其志时人以是称之先生虽从师受经生业顾好为古文辞多读六季以前书至十五而为马鞍山赋搜剔山事靡挂漏而辞雅驯絕不作时人语其名固籍籍矣又二载补郡诸生是时邑之耆俊若张纳言寰吴贡士中英咸推先生为忘年友而归太仆有光行稍近名能经术先生以古文辞与之角颇为甲乙社云然先生用调古试輒少利而又中更二太夫人变仕念益衰减遂移书学使者胡植请以诸生老田里固留之不得也先生家世窳薄又性嗜书不别治生日以产挫其配梁至泮澣統而助之犹不给也先生独夷然问曰不能三食乎则姑二食乃至不二食乎则又姑一食得麦饭少藜菜羹佐之若梁肉矣先生益刻精于学所造五言古进薄建安退亦不失陶谢而其于歌行絕句俱宏丽有景龙开元风骚赋誦宛然昭明所遴次晚节不尽尔也少工临池久而益擅之其小隶駉駉欧柳而上登吴兴堂行笔出入褚河南而稍纵之则米襄阳八分自谓得西岳碑体以方韩蔡蔑如矣先生白皙美风神秀眉目膩颊飘须时时称病病多头风暑月恒御毡衿稍及冬加以貂帽客至隱几而对之焚香啜茗竟日谈咲无凡语所酬应赤札顷刻数函无凡笔客去亦无所报谒其取后秋益高名益重称神交者徧天下诸以文请者不虛月以诗请者不虛日以草隶请者不虛刻往往得意去而里中子狎习先生者谓先生虚和寡他嗜顾嗜竒不食酒颇耐食甘间於岛渚间淘一拳石市甘果袖而荐之亦輒获数行以相矜重而是时诸行部使者若吾故人徐君中行首造庐定交于是郡守王君道行中丞张君佳胤继之而学使者吴君遵与中丞君遂旌其庐曰高士曰真逸御史邵君王君俱称诏賚束帛醪米邵君移书欲得先生文以为式而先生意澹如也楚王以志楚聘守李君以志吴聘羔雁踵相接而皆力辞之独参政王君叔杲以三吴水利造质为成一编书而已昆令之贤者曰王侯用章与今程侯达右文而高先生行每过輒谈笑移刻然欲伺先生色以间不得也程侯叹曰古所谓征君真先生其人哉以故先生没为礼祭复賻之至议举而祀于学宫先生生以正德壬申六月十七日卒以万厯己卯八月初四日配即梁孺人太学生某女子一伯安以瞽废然有志行娶周氏女四壻为邑诸生朱懋敬徐世承顾绍皋懋敬早卒孙一尚幼孙女一许字王宣鼎所著集若干卷藏于家王子乃言曰始予与左司马汪伯玉遇燕中伯玉驟谓曰畴为布衣冠哉而余未有应也伯玉恍然有间曰是在仲蔚矣谓名傳也者非傳名者也嗟乎士苟束发不能通一艺而剽其似以糊口于四方固毋论已即其著者采觚翰摭藻丽下上今古而割荣自树然得毋遊大人乎哉当士之始为业也实者九之名者一之及其就也而惫矣名者九之实者一之夫以仲蔚之空室蓬戶褐衣蔬食不厌以托于著述也夫岂为刺促以希一旦名名就而实不衰志行不稍削乃真仲蔚哉夫安得不布衣冠也子与之与仲蔚通也以不佞乃其相善殆甚矣仲蔚于今诗不甚推于鳞而其于古也行不满郭有道书不满懷素识者疑之虽然是不为傲倪吊诡者哉故宜铭铭曰

葬而卜得繇吉曰遯之贲是为雾豹文明以止于戏其文苑而逸民者耶玄晏靖节其人者耶

赵处士东衢墓志铭

有赵仁甫者以乡进士司嘉善训其所为诗曰楚遊稿余读而异之已而知其为吴明卿所举士也夫明卿以一公交车业识仁甫乃能并其诗得之然是时仁甫业弱冠耳将无亦能以诗报明卿乎哉不然何其似明卿之甚也仁甫既应御史聘司蜀试得贤豪士如明卿且偕计吏赴南宫试至维扬而其父处士君死矣一日杖而衰墨其容谒请余曰惟是不腆先君之状为严给事从简草敢徼吾师明卿之惠以祈不朽于志若铭余故善明卿而又尝异仁甫诗能无许按状处士君讳卿字国贤其先为宋秦悼王廷美悼王之叔子曰颖川安简王德彝六传而为昌国公俊避狄难自安丘徙闽之候官遂为候官人有二子曰彦忠彦裕皆歴官通显其后歴官与宋相终始至明而有官合浦令者传子纓以逮君君既不仕故人人称赵处士亦或曰赵王孙君生而母吴见背父纓博学长者然颇不能问家而君少则膺治生任奔走什一养父及继母陈以故不遑儒而其自喜任侠不寝然诺又善谋策为人策事輒中十不失一诸丈人行皆心折之矣当其养父母调声色柔而荐之而其馭家众以严肃辨昧爽起盥栉履行杼肆间差次勤惰毋敢饰情报者君所莅即米盐琐细靡不得任以故所受产薄而不失养居恒衣布素食靡重味然至饮客供张夙具待旦时时入厨舍视醪羞毋令客耻匕箸君又能豪饮饮輒举数十觥船不醉酒后耳热刺刺是非人人以其无他肠弗较也仁甫仅十余岁已工诗属文眉目如画君抚之輒喜曰必将大吾门乎及举乡荐君问孰当而司者为明卿而后喜可知也曰儿度不受凡目赏矣仁甫文业日益进所遊知名士益广君时搜其篋中得还往诗札輒又大喜曰是吾夙耳之以为非人间人今幸为人间人儿又辱与善耶仁甫以久射策不第君谓儿姑及吾壮而升斗食我既司谕嘉善君来省视官舍念仁甫仅一子而幼谓仁甫若毋以西走蜀北走燕而颡内顾忧吾代若父会岁朔君起自筮忽曰吾其归乎冠帻谒孔庙已又谒城隍神类诀者归而病痰壅弗肯进药又三日啜茗气憊然久之乃卒距其生正德丁丑春秋六十有四娶邵氏有男子一即仁甫其名世显女一适高而夭孙一曰以忠女三尚幼葬卜于闽之遂胜里莲池墩附故昌国公莹旁严子又言君盖时时勉仁甫以忠清显云为大书俾颜于其室其举以忠而名之也曰俟举仲而次名之清而后毕吾志也是宜铭铭曰

君所得志于文士者仁甫为之子子而吴生以之葬而不佞纪之君可以死矣惟忠与清所未究而深有属者此耶逝者所矢存者所履噫

周处士惟岳墓志铭

周处士讳梦山字思仁更字维岳昆山人也其先自吴兴徙而有高年公寿谊者至百十六岁高皇帝为之燕便殿诏天下行乡饮酒礼盖以高年公故五传而为赠御史公■〈火巨〉上火下〉又一传而为参议公震参议公娶于高无子卜贰乃得朱梦有山移于舍而举君遂以名焉君少即吐颖锷为文有健思从参议公宦浙稍下笔则屈其同舍子之长者归而试补诸生輒高等君负材既又以生感异梦芥视一第试高等当廩让其次当廩而老者久之遂不能廩而益好读古文辞其举子业亦稍稍移而古当是时里人吴中英先生有声公交车其门曰月旦闕而君以掌大刺投吴生及入则抗行分左席所据论落落出其上吴生益贤之为游扬大人间君夷然弗屑也君既渐老所试渐不利而有三子中子之稼亦次补诸生君遂尽去其业移而诗已又移而酒所从酒人慷慨浮大斗奋髯白眼仰天乌乌毋问壘大小不耻不止君于书无所不窥而晚节尤好浮屠老子言手抄华严经成帙曰西归道险远吾以繻也再从子曰金华守后叔以君洪饮不治生欲风之君更呼与饮竟醉不得言金华君欲以尝君益饫君酒而徐叩里舍子长短君亦闭目不荅也金华君乃伏曰信乎翁之为长者矣君差长于俞仲蔚而每兄事之谓五言长城吾所不如仲蔚亦时时推君云与惟岳饮殆欲倾家酿与谈名理使人中夜忘鼾息君又竒王舜华文而善之以故当君卒而仲蔚传之舜华状之且曰葬而湏贤者以毋朽也然君卒之十年竟未有志铭之稼乃来请曰迟而得子言庶几不孝少追矣余一再晤仲蔚颇能道君善如传语余时卒卒不复问君何人亦不能审君在否而今得传与舜华状读之始若寓耳者君性孝友其产挫日尚能抚诸弟妹而养之娶于诸所谓三子自之稼外之程之穆其伯季也之穆侧出女一适余从子王一艺孙男五女五墓在某乡铭曰

魂无所不之其西土兮而有华严之言以指迷魄吾能审所归其下土兮而有不腆之言以永无隳之者不可追往者宁有知噫虽而之不知姑以慰而子之思

章箕谷墓志铭

章叟讳文字简甫后以字行其先自闽徙而为吾吴之长洲人赵宋时已负善书名兼工镌刻而叟之大父■〈日上永下〉父浩尤着至叟则益着叟生而美须眉善谈咲动止标举有儒者风宁庶人国豫章慕叟能而罗致邸中与故知名士唐伯虎谢思忠偕伯虎觉其意阳清狂不慧以免而庶人卒谋反挟叟与思忠从行谋脱身不得至中道乃尽出所赐金帛予守者弛之夜分偕跳宵行乱军中几死者数矣裸袒二千里而归谒其

父相抱哭时叟年仅三十自是其秬益高髻亦小裕盖又十年而复遊豫章时朱邸诸王孙故无恙素闻叟名延至为上客叟饮醉间遊庶人故宫徙倚叹息歌黍离之章作羊昙恸而后返吾郡文待诏征仲名书家也而所书石非叟刻石不快待诏每曰吾不能如锺成侯戴居士手自登石章生非吾茅绍之耶绍之者赵文敏客也而是时祝京兆希哲王太学履吉陈太学复甫彭征士孔嘉有所书亦必属之叟叟他所摹刻华氏真赏斋帖陆氏怀素自叙孙氏太清楼右军十七帖其能夺古人精魄如生动即榻者曷古得善价而其人莫辨也郡岁中倭亡修塚墓好者叟日以困而故分宜相欲登肃帝所赐制书札谕于石而聘叟往留相邸所四岁而后归分宜败邸客毋得免者于叟略不濡人谓叟善为客往客宁庶人不死今客分宜相复不濡叟咲曰吾向者以智免今者以廉免虽然吾去吾待诏与孔嘉遠矣待诏故辞宁庶人聘者也孔嘉则辞分宜相聘者也叟性好客虽一室亦必洁治度置图籍彝鼎之属客至相与摩娑盘礴叹赏小时则呼茗茗已呼酒酒至命炙诸贤士大夫如待诏輩磬折而入委巷不避也叟好客且时时从博徒遊所得贖随手散尽至卒而不能具丧礼其明年仲子藻为人佣书强自力以倡其伯季葬叟于武丘鄉采字圩祖莹盖万曆甲戌之三月也翁以弘治辛亥生得寿八十又二娶刘氏侧室周氏子三人草娶朱氏藻娶周氏芝娶沈氏女三人嫁吴铨高某孙枝孙男女共若干人叟不欲自名其书而楷法絶类待诏尝为待诏书三乞休草家弟以为待诏也示藻而后知之三子皆能习叟业藻于书尤精客吾家久盖葬之十年而始谒余志且铭之状草自钱处士元治铭曰

迹乎艺心乎士食乎征仲氏何以不朽惟藻意元美为之铭且志

詹处士墓志铭

詹仲子之弃其官而奔处士翁丧也念弗克视含殓仰天而号曰何以道我诛于是天下之工为史者汪伯玉前以传寿之矣仲子曰不可复也走千余里谒余请文其隧中之石乎事状几三千言而避其溢曰某行某善得之父兄若媼党者也某行某善得之间左某子甲以至技作臧获者也庶几戚疏遠迹无间矣余故善仲子而素严伯玉曰请以伯玉之史而信且夫不知詹翁知詹翁之子乃为之志曰詹之先以卜事楚曰詹尹其后有黄公者避晋乱徙居休宁至宋而为寒松先生初学大儒朱子尝慕称之其子曰宣教郎阳是为桐川先生又十余传而为翁父里士公有起以寬博能治生称至九十余乃卒里士公虽寿富然长不能过五尺至翁乃长七尺目光如曙星声若洪钟多旅力轻蹻爽警工手搏挽强与他围棋六博投壶蹴鞠之技皆不习而解尝与羣少年猎较南山下获鲜必剖之均既而尽谢羣少年曰吾不能从若曹慢遊也十八客漳州而里士公有仇家构悍令持之狱就几抵死翁驰令庭请代语迫侵令令怒择大挺挺之至五十翁不移语

令稍悟乃寬里士公里士公既以翁出则鄉党籍籍称翁翁益折节为孝谨母病甚尝羹而后药之又素恶雷既葬而雷震其墓翁乃藉苫以守阅岁始已里士公没而伯氏亦耄不任葬则翁独任之有形家子夜造翁谓葬甚利少者翁警曰利少者得无于长者不利耶吾兄弟一体此言胡为至我顾趣更兆必两吉而后从事既葬三月始归即冰雪不宇处又尝主高祖之汜祭岁贏金而息之凡二十年而得百金以属其三从子助曰吾老矣若佐我新高祖祠俾后之人毋忘始也助故孤贫鬻身为他里佣翁赎而养之诲之至有家以故感奋毕力佐祠翁又捐帑而葬外父母土又为之树孤两壻甫女而家中落皆赖翁至成立几复其故金有光輩博士弟子十余人有声他里舍多趣之不能无望翁翁自若及老而失业岁所以存问岁时有加乃相顾叹曰长者故自不可意中测也翁之好施予急人之困盖自天性然閭左间岁侵则粟浮出丰不朽入以为恒其所授技若医汪生之为方灯人之为机发皆精自翁至成名而翁不以德也翁既行之久仁义附焉毋论他姓即詹之老多九十岁人人咸逊推以为祭酒翁有二男子伯景舜从治生翁弗问也而独详仲子以其敏故仲子尝私习汉家言间治一室颇斥置古书画其中翁廉得之仲力且骂曰若薄制科业不为若能舍而自取通贵乎今国家方重科第以笼豪杰殆尽而吾詹独寥寥焉使我愧称詹且吾所以不弃若贾者何意也仲子乃始俯首制科业为诸生者二十年数试数甲其济至大试輒北翁犹抚之曰命也吾故健匕箸能待汝及大试捷而后喜可知也然至应公交车輒复报罢翁所以抚之如前最后复应公交车翁乃谓仲子屈吾指与岁俱危尽矣恐不能及汝吾闻之县官方辟格而为三途以待贤者胡不以时自显见而使我不收一效於骂汝也仲子于是就选人得司江西之南丰谕仲子雅负文学名又以■〈女间〉敏吏事得台察监司指旌獎屡下翁闻而喜曰吾固筮之知其必自显见也翁素强无疾少能食酒一举至竟斗不醉晚犹啮肺跃马年八十二矣而始属末疾然强自力以起晨有黄冠叩门者曰吾欲遊白岳闻而公贤愿一见之翁出见之则曰吾有药可以益子七龄而子未能服也命取盂水置案出瓢中药末少许内之水忽涌热凡百余沸而药自团为二如梧子颗抎之坚如石复置之盂曰扃之家庙满七日而后发则啓之问至白岳乎否曰吾不复问岳矣赂以一缗钱二袭衣不受出中门俄而不见满七日启扃则异香袭鼻水半耗矣翁且服忽自疑曰非常之事未之达也未达而尝得无违夫子戒乎复扃之后十余日疾大发庚启扃失药矣翁且死呼谓其二孙万善万英曰不能待而父奈何已而曰老人分则已满戒勿哭挠我我欲静而还大化俄遂瞑翁有所恒饲犬在别舍当翁之病革趣而伏床侧泪涔涔下也三日翁卒复前伏棺所泪复涔涔下已而趣出田所投之肉不食以为恒月余竟死家人恠其事以语仲子仲子乃益大恟曰天乎以一青毡殢我使此黄犬有憾於不孝又使不孝愧此犬哉於是亦不食家人前强解曰即不食死不足以快郎志而奈此地下何仲子乃强食故至于状翁事独详而有深痛也翁讳杰字存邦别号松山元配吴孺人眇小而贤能佐翁以礼前二十二年卒二子长即景舜娶汪氏继赵氏次即仲子名景凤娶张氏仲子于文章师二京时出入

庄左于书师右军父子其宦始仕而国君宾礼之台察监司异之于乎翁可谓显融令终且有后矣奚必俟余言而后不朽虽然余所称黄冠与义犬事当必有以为吊诡者铭曰

余时而奉儒者以不语怪神晚而稍得其情以为人故有至而物亦有真嗟嗟以此异征邁此异人夫岂随世而俱泯泯

龙洲顾君暨配徐孺人合葬志铭

顾君讳聚字大成其先楚道之石纽乡人也至宋而有将仕郎百七君者始迁无锡之上舍里家焉遂为无锡人二十余传而为处士君坚娶於华有二子君其次也生而秀儻踈眉目善举止处士君心喜之谓人曰是儿殆胜我为遴配得尤塘之徐女甫胜冠室焉徐复宜妇处士益心喜而家故饶其析箸乃独少与君欲以观君夫妇之为人而君素强力耐辛苦与时俯仰获其赢息以致财贿徐复用勤織佐之虽於数不甚偶间起间蹠而恒操其本以不墮处士君既城居乃推乡旧庐居君而君日遣人候讯安否虽风雨无间处士君乃谓母华是儿不负我属无锡令欲城城中人分版筑而起工而君伯氏不能应则捕置之狱君自乡趣谒令曰伯氏家督也置之狱谁与操版筑者请以身受系而寬伯氏令义而许之城成乃免君归而处士君既老欲均所析箸而卒病风不果以卒客或挑君故所受不能当伯氏十三闻之官我力能佐若而胜君谓父死未谋葬而谋及伯氏产将陷我以不孝不弟人也骂之絕弗与通族人渐归谊君而其老有耄而子弱者乃捐其别业并券而授君佯为已得直曰我死子幸收我骨君尽为偿其直故浮之其老曰已矣不能复望子矣君指心而誓曰吾所不为任叔终者有如日盖其老歿而君所调棺斂至塋一不以烦其子今其塚鬱如也尝贸米漂阳市有同舍商遗百金楛而去君检楛得之故若以他事留者居数日商复过君所犹未觉君出以授之商感叹欲割其半以报君君咲曰使利若金者不全有之耶嗟乎而未知吾乡有被裘翁也他日尝泛义兴西汎风暴起他舟多荡没而君啸歌自若顷之独前济知君还金事者相语以阴德报云君虽好施与晚而仁义附之顾其壮时气出羣少年上羣少年多纵博使酒为鸡狗侠横行闾里处士君患之以语君君曰易耳为盛供具延请少年饮甚欢乃徐风以礼让众皆起曰诺而一二无赖语稍不顺君褻鐵椎叱之曰竖子不能碎汝骨耶且汝曹不即改而一日事败污三尺吾何忍见汝於是叩首谢去质明而无赖他徙其晚者袭长裾揖逊矣时方行覆田税法所属君必精税不侵田田不伏税称两便而他所核或视君为衡準徐既前君逝君伤之为拓宅西壤地竭土石力树松檟盖十四年而墓成且葬而君业六十有五丈夫子其长者曰原会补博士弟子廩学宫有声以元夕率诸弟张灯召客捧觴饮君大欢乐之酒行无筭起视客目光射人黔鬓而朱颜客毋不祝君上寿者夜半病忽发遂剧原会迫延医禱祠无所不致君咲曰吾病岂医禱而愈谓原会休矣诸孺子不及就以累

若遂卒时癸未之正月二十二日也徐之前君卒十有四年五丈夫子者长即原会娶于朱次原道亦娶朱而夭继娶孔则徐出也次原性原良原教皆未聘侧出也女一适华思齐孙男子七閤如纯如玉如原会出也侃如淳如肃如俨如原道出也女二则各举其一原会将以甲申之正月起母徐殡而祔君于新阡前期手事状而介友人王稚登书来伏谒泣请曰微子言孰知有孤父母者余悯其意而志之且为铭曰

无所因而家以起此其材必有过人者而仅止此君其偕安焉以所不止此者属而子噫

弇州续稿卷九十一

●钦定四库全书

弇州续稿卷九十二

（明）王世贞 撰

○文部

△墓志铭

方元素处士墓志铭

新都汪仲淹挟其友方生尧治而过余靖庐与谈艺小洽则出一编示余为其王父方处士所论撰已又出一编而仲淹之伯氏司马所著处士传在处士故尝善孙山人太初司马以太初拟处士而自附于李献吉之传太初沾沾焉余陋于世知有太初不知有处士既读处士所论撰乃谓仲淹而伯氏所拟附非偶矣夫处士之与太初偶声合耳太初为歌诗矫健自肆非而处士所及处士之谈性命辨王霸下上千古发为文章诡崛傲倪以示太初不能读也且而伯氏即亦以歌诗逊献吉其于文乃不为献吉也者盖仲淹首肯之未既而尧治则已拜伏不肯起曰不肖之谒足下固有请也王父虽已即士未有志铭海内之能不朽吾王父者无如两先生司马为之明而足下为之幽不亦快乎不肖异日得藉手以从地下余左顾而谓仲淹乃欲使我复附而伯子虽然伯子吾所严也且业已知处士深何敢辞于是尧治复进徐中丞之状俾与状参伍焉处士之先为轩辕相方蠹氏唐有元英先生隐新定之白云源十余传至宋奉议大夫宗雅始徙兰溪为兰溪

人又数十传而至处士父赐能治儒家言娶朱而孕梦一儿从金华山乘云起右趾伤于石已处士生右趾黝如梦少颖爽便属文十二而分水赵守者试之咏鹤立就其语甚丽明年治毛氏诗又明年走从其乡章懋先生受易章先生故与新会陈献章先生倡道东南雅相重而又与三山林瀚先生同年俱善经术章先生雅已器处士处士又因以知慕二先生十八走闽从林先生受春秋春秋成而再试博士弟子员不就则复走岭南谒陈先生一见语合解衣衣处士乃废其经生业而叹曰夫士业操觚翰不能深沉为邃古之思顾仅日取韩欧诸家语习之以资抵掌又不能竟其业而跳之濂洛之涘欲以一日之见而踞童习白首之上我则何敢我知有左穀檀弓庄列史迁而已杜门修其向盖垂成而后出游复之闽林贞肃公俊客之南穷苍梧吊陈先生墓泛彭蠡陟三天子障憩白岳黄山纵游金陵栖迟於吴门者久之而后先所善若杨君谦沈啓南都元敬徐昌穀文征仲黄勉之相挽为诗酒社所谓孙太初者遘而心相折也已归奉其父母山中母卒卜葬之祖兆族豪陵而发之处士号痛墨衰直之官抵豪罪归地于处士而不忍复也会处士父亦卒既服除遂缟素终其身当正德初寺人瑾用事张甚公叹曰沧海横流一苇将何之去而学仙得玄英先生之白云源而居之犹不能遽忘用世时乘輿且南狩諫而得杖者百七十人而其友陆兵部震死焉处士悲歌慷慨谓惜哉逢干何以不为盛世讳宁庶人因而反豫章以南驿骚甚中流且风矣何以不知壶我作一壶生传既读肃宗即位诏而曰夫既或治之余何言哉转徙金华之解石山故有青霞馆丹井灶遗迹构玄真楼其傍以栖者十年所而迹者踵至复转徙益深得茆山之金笥庵又十年所而迹者复不絕其门人子弟乃奉之归溪上故里使谢客毋劳迹我我老不任扫径也而乡人程太史文德每访处士必屏驹从偻行修刺学使者孔天胤当行部吕柟先生遗之书公交车不辟召久矣非方处士胡以应之孔君至部覩处士知不可屈乃已而处士年已高郡邑行鄉饮宾礼礼处士辞独徐中丞为令与曹守强请为一赴而已处士生平足所至靡不友其贤豪长者而不好软语狗合其所师章先生晚而谋邑居所友唐太宰母夫人老矣而迫朝命欲出处士皆以诗风止之不能用居一载而太宰不良去后五十年而章先生之遗维以邑居习徂败所严事林贞肃公直言正德时既而自危日惴惴处士曰惴惴何为哉危及朝不及野林公悟而请告王文成公少于处士一岁而以闻道早处士亦严之其过钱塘也处士出脱粟蔬簞享文成为饱明日报如处士处士正色曰野人为野具固当公彻侯也而野具得无非情耶文成强笑谢微先生言我几复作阴卫尉先生故井丹也处士讳太古字元素始谓众人尽智我尚蒙曰天蒙子钓于溪而寒曰寒溪子居白云源则曰白云僊又曰一壶子曰六有先生俱有记传其生以成化辛卯而卒以嘉靖丁未得寿七十有七有丈夫子二人曰选曰遗而诸孙中独尧治能嗣处士言志曰处士志大而才不尽继其文力欲追邃古即不能超乘而上之不至受宋役矣思以身康济天下不见庸其遗书若方药可足按矣欲冲举而不能创大还然亦老寿毕其赋矣彼所游多大人世且以为为名高也者而实不然是宜铭铭曰

有贤者弘嘉际太古名方其氏奇其迹邃其致宏其声泯其际传者谁汪伯子志者谁王元美脍人口自今始

处士春山翁君暨配吴姥合墓志铭

余以万历癸酉秋九月挟吾弟敬美游西洞庭有蒋太学能为主而蔡翁者九十余而赠余诗及藜杖因相与登缥缈峰探林屋洞天盖穷湖山之胜五日而后过东洞庭无适为主者宿长坼寺一夕返望莫厘峰若天上归久之以他事泛由拳遇中表弟陈生偶及之陈生顿足曰惜哉有翁处士而不能待公也及处士在可以诗可以杖而同登莫厘因颇言其慷慨好侠游倾腑以事贤者而不寝然诺问其名曰参问其字曰良济问其居曰莫厘之址问其年曰八十则以前一年卒矣其卒亦九月翁卒之九年辛巳而其配吴媪始卒寿至八十九明年秋复泛由拳饮陈生舟中忽起而谓余处士有冢子笏材且谋归其姥从返马家坞之故兆而日夜泣也曰是必琅琊公文而后不朽异日毋靳一言乎余时漫诺之今年五月而陈生复为介绍以笏及少子篋手诸生严果之状而拜且请曰敢邀子之惠毋使己余诺也视笏瑰磊而谨能世其家者也视篋楚楚不难为弟者也已读严子状与陈生向言多符合喟曰始吾殊恨诺乃今者不恨诺为之志志曰翁之先世为大梁人宋中叶有讳承事者以千夫长从扈跸南渡既倦遊闻东洞庭之僻且有伏腴曰是可托而树也聚其族近百人居焉遂称其乡甲族凡十七传而至处士父皆长者处士生而风骨隆隆起出就外塾读书了大义然不乐受博士觚翰曰与而曹一握筭子能縱横哉夫子贡去我何几父异之大出橐中装俸客游因挟其从季赞南浮湘汉止江广二陵北狗燕赵所至获輒倍为高贖而息于清源曰缩货咽也源清多巨贾其豪好游大人以自成其重所狎侮不如为恒而顾独折节事处士处士亦乐与之处益市牛酒作釀鸣琴屣履呼卢浮白穷昼夜不示倦色又善音吐时时於广坐中评驳世故援证古昔纏纏如也处士故号春山客闻翁春山至一坐为倾而又能时时饬以义岁大疫买地郭外为丛塚以葬死者而标藁之民欲为东岳行祠力弗逮处士独身任其剧既成而壮丽冠一方已又即其宫为高坐坐耆宿其上以朔望训诲闾左少年相率礼让彬彬矣当是时处士义声振齐鲁间业亦上贾而子姓之晓经术者得占清源籍补博士弟子矣甫六十叹曰客不止车生耳且不腆先人之丘垄在我何敢顿忘之於是幡然归时郡邑课贖以役处士遂得最剧役然以勤力筹筭更用是中上官指蔡守国熙曹令自守时有所咨访吴狱湫不胜系而宿囚黠陵其新入者处士请广铺室别处鬼薪以下而身任其费凡三百金时倭已躡西洞庭处士捐橐募恶少年卫其里里得无犯岁大疫复捐橐施药于要祠而以名医主之所全活甚众守令益贤之风诸生上事台使者旌其庐且饬以章服处士拜而篋之亦不时时御也处士雅好客客之至洞庭者絕少而所配吴姥复善中饋

以故得精專其思於延納復為里中冠大較如陳生言吳姥者武山名族也生潔齊有才操而不為妒以故處士獲自寬媵婢成列而至于共養姑必身任其烹飪歲時享祀必腆曰吾職也處士久客垂四十年其安於室者不能百一姥代之政斬斬矣其大指以柔仁善下人至輟食食飢者輟槽以予貧死者嘗獲刈林之盜而命縱之曰吾不忍成汝盜名今縱汝汝后勿復爾也蓋處士卒而家益起人不知有凶喪則咸歸姥力云處士之丈夫子五筮豆壘簞篋而姥舉其三筮娶萬氏壘娶嚴氏簞娶葉氏子豆次室王出娶金氏先卒篋次室梁出娶金氏繼娶葉氏女二適席璧席漂孫男十四啟端啟明啟潛啟宏啟陽余未名曾孫男六正學正名正誼正道正卿余未名葬期在癸未之九月四日嗟乎處士以末富於旅以本富於鄉世固謂其善朱白之術然所至必成其義名非苟焉而已者吳姥之代為子為母豈不烈烈女丈夫哉是宜志且銘銘曰

封而土被而樹過者式疇之故嗟嗟余不遇汝而汝余遇能使汝永終譽

金逸齋處士暨配潘孺人合葬志銘

金處士之卒也以隆慶癸酉蓋嘗才其子鄉進士伯謙伯謙既除服自矢必得一命以報君而后歸君于地下無何伯謙亦卒凡九年而為萬曆壬午處士之配潘孺人又卒時伯謙之子兆登亦已舉於鄉罷公交車對而歸治喪事期癸未之十一月謀啟君殯與孺人合而葬界溪之新阡屬邑子唐時升狀其行事而復屬余俾志且銘之曰使孤之王父母歿而有聞於人者唯吾子已而曰使孤之先人歿而今獲瞑者亦唯吾子余憫而許之按狀君諱翊字廷贊逸齋其別號也世為嘉定人居羅溪旁父棣以孝弟力田聞娶於陳生君君少讀書不成稍長受家乘孺人十七而歸君君時甫十五也然相與精勤治生稱父母指矣君居恒依膝前即之邑請賦一二日則忽忽如失而其最后乃更以賦事如京師而報父卒君痛欲絕久之始蘇每長號邸中邸舍兒掩耳徙之他所曰我曹何以寢食迨歸面深墨不可辨矣比服除以至白首時咄咄自數曰病不預湯藥死不預含殮以比人子數得乎少弟贅于婦家去舍之東十里許每遇東來人輒問與吾弟識否今何狀一日人謾謂君季子某事急得錢如干緡而解未辦也君即欣然出錢授之其人心愧更語吾乃戲君耳君真長者君同產女弟二人又伯叔女兄弟二人嫁而俱寡且貧君悉迎寘之家而衣食之其始猶難孺人孺人曰豈獨君為義也長者吾姊少者吾妹蓋所以拊循于君有加矣君雖業廢書然折節禮重儒士遇有所論說傾耳聽之唯恐其畢行闕闕中聞小兒諷誦聲亦津津喜而孺人家世習詩禮其弟士英者博學而文能治五經九流家言最號為通儒君時謂孺人吾老矣日入之光其與幾何趣伯謙束修以往毋失之伯謙遂能竟潘氏學即兆登始離此其得于潘者不淺少也伯謙既獲荐賀客滿座君忽愀然曰吾猶記吾父坐此兒膝取棗脯啖兒而口授之誦今欲報吾父得乎已而涕涔涔下

不禁也君尤好施予急人之难甚于己里姻有逋赋逮者方狱急君悉橐装偿之不足则从孺人脱簪珥以补之其人出乃大惊谢君不复寘齿尝以春时过所知见其亩不治而恠之对曰非惰也力不任治也君遗以一具犁快犊后旁畝益拓至富闾左周某王某者贫且鰥独君食之死而葬之且岁时荐以盂饭曰毋使鬼馁也君之好施予固天性然亦潘孺人有以成之孺人之从田间居恒以鸡鸣具数十人食食毕男子出攻穡妇女纺绩补襤老稚治春刈薪萧无一遊手者其岁时问遗宗戚恒恐不徧有贫而欲勾假者阻缩不能自达孺人征其色而叩之使满意去君卒其治生益勤迨伯谦卒乃抚兆登哭曰天乎胡至此极也吾朝哭而祖暮哭而父所以余食息者以而在也兆登感奋为诸生隳有声孺人乃筑一室供佛晨夕礼诵曰吾问西归装于人间装无与矣时僊真昙阳子且化孺人以间谒获柏叶赐曰僊真知我哉自是益精进以至病且属纊戒家人勿哭使诵弥陀而和之声絶乃瞑君之寿六十有三孺人后之得七十四子一即伯谦名大有娶于传孙一即兆登娶李为故刑部郎汝节女孙女三长字高壮次适陈尚珣次适太学生王衡皆前天铭曰

夫妇竞为德而高其门安汝魄者汝孙以汝有闻者吾之言

凌元旻墓志铭

凌元旻者讳湛初元旻其字也其先世为湖甲族治中公贤有子曰中丞公宴如宴如子处士公敷敷子司训公震震子比部公约言约言子工部君迪知工部君有三丈夫子元旻其长由诸生进太学娶于张为同舍生天相女而左都御史庄僖公之孙也元旻生二十而病病五年而死仅二十四无子一女许聘陆大武呜呼伤哉无天也元旻生而敏识絶伦甫舞象即工属文不帖帖时制而下笔累数千言不竭与其弟润初相雄长乃其意则恒寤寐左氏司马建安家言矣当其为古文辞务出于人所不能道陵险诣絶以为功而其于尺牍小语则益精霏霏若吐玉屑又若坐晋人而与之清言也为人孝友自天性既内恨工部公之宦薄而用不尽讎不能显托之言而又才其弟润初自以谓不及之当润初病忧之甚至欲以身代而不得乃为文十余章章数百千言以痛之覽者靡不为酸鼻也元旻虽少年乎雅已多长者游即无论他郡吾吴中如文氏伯仲皇甫子循陈子兼黄淳父俞仲蔚周公瑕王百穀钱叔寶輩凡他稍以文事著者靡不筐絶茗奉尺牍而贄交诸公亦多异其文以为贤于贵绍介虽号大父行者亦折而尔汝矣居自念生不及李于鳞与余书辄三致意焉元旻雅好古人图籍碑板而工部君以宦垂橐意不能副之至脱内子簪珥以购中丞公有书名仁宣间元旻得一帋輒津津喜不成寐也凡工部君之为德于鄉多元旻与其母包宜人元旻既以哭弟困汤药间念无已时而包宜人亦用哭子故病意不忍伤之乃脱身依其妇父读书稍自寬益斥买书史而不能无移于

酒尝泛太湖遇惊意忽忽病寢剧遂不起盖元旻歿而包宜人亦继之矣元旻凡有集十余卷而最爱所谓薄褌书者以序属曰不幸有霜露之恙即一旦不讳谁为定予言者予谓元旻之年甫二十有四舍而就医药何恙不已而戚戚焉身后之是虞以余之倍年而长者何覬哉然余至今犹幸存而元旻之就木三周矣余以工部君获交于比部公无何而元旻称小友然不十年而表比部公之墓今又为工部君包宜人志若铭已又为元旻志若铭余于文不能如韩退之其视凌氏之于北平王三世者何异也而况于为比部君者当又何如也铭曰

雖而五章汗而流■〈亡上皿下〉着为文辞磊砢而慷慨人以为不祥虽则不祥其人不亡

毕处士暨配吴孺人合葬志铭

毕之先自公高以至万散见中土为名族而唐自汴而宦歙者家焉宋长汀令景镇始徙海阳之闵川数传而有士信者其赀倾里中顾以儒术显又再传而至拱则处士父也娶于胡有四子其仲为处士生而奇颖读书好涉猎大旨而父拱数客游挫产不欲竟处士学俾习治生时鉴潭吴毅亦名族中废有少女而贤父拱闻之为委禽焉甫归而父拱歿处士年十八矣伯兄之代父客而二季髻髻未有知家属将百指坐而倚处士食又竭力营丧葬以是益困处士既服除叹曰丈夫安能坐槁乎废箸得余镵因属其大母程母胡于吴孺人而坐行贾所歴青徐荆扬且徧会其伯兄亦善居积相与裒南北利权而操之叔季既已壮任什一息而处士居其间尤为精心果任动必中机键无何成大贾处士既已大贾则能优寛诸小贾使得效其智力所贷母钱于人亦务薄其子收而久之卒得厚报然有天幸所遇岛寇凡再其它舟非焚而剽而处士独无恙卒以完资归盖三十年而积镵累巨万伯兄与叔季亦埒之当是时毕氏财雄郡邑间孺人之代处士子则夔夔斋栗二母咸允若矣当孺人治室所摹画丰取嗇出不下处士其居与行警略相当然雅能佐处士施以成闾里间声处士既壮无子孺人为从臾置貳赵俾侍行举二孺矣孺人抚而子之如己出也已而又为置貳阎复有子孺人复子之如二子也已而处士之叔弟濠与妇俱夭遗孤曰坚者尚幼处士哭之恻孺人谓曰毋过哀所以不死叔氏者孤请为子之自孺人之子坚而三子者弗敢望也坚既已成立近三十而夭亡子处士乃益大恻曰今而后叔氏始成死矣谋置后人或谓处士实子之又家所繇起宜以处士之诸孙后处士曰吾何以私坚家也择次后者后之然自是日鬱郁不乐以至死处士虽不恒读书人有能为书语者听之恒恐倦为三子延名师自行迎除舍尊事之如神明而孺人内治旨修醪糒相继以是三子俱笃学善属文有声学士大夫间处士虽饶蓄其所治宅第务坚朴不欲以华侈相豪一切狗马钟鼓饮博翫好若无睹者而孺人之佐之荆韦无异

居约时服也处士讳济字天霖其生以正德己巳正月二十六日卒以万历丙子九月二十三日得寿六十有八孺人以哭处士毁后六月而卒以丁丑之三月二十五日距其生甲戌之五月二十四日得寿六十有四三子所谓赵出者太学生竟可竟成閤出者竟孝皆娶于程而赵复一女亦适义川程天叙竟可子一自强聘汪竟成子二自立自正竟孝子一自高聘程女孙六其长许黄氏聘余俱幼竟成游於吾友莫廷韩负才气又后孺人六月卒而竟孝将以戊寅之二月殁于某原而介廷韩之传与吴瑞穀之状来请志若铭余读之窃有感焉徽俗纖嗇精于入计其俭在施予而侈在侠邪处士一切反之妇女妒弗能媵又弗能子媵之子孺人又一切反之竟孝以经术着而工诗辞便笔札其谒余也虽斩焉在衰经不胜瘁而秀外惠中可念也是宜为之志而复铭之曰

太史公称南阳贾而法孔氏之雍容邹鲁去文学而趋利处士利成而去之而教三子以文学通孺人变其俗而穆乎小星之风贤哉女管何必彤而士何必尽出乎章缝

处士南野顾翁墓志铭

盖无锡有顾翁云而自顾翁之笃行直亮者四十余年而未有闻也晚而其诸子宪成领顺天解人乃稍稍称顾翁会翁卒而宪成以状来请志铭读之作而叹曰有子哉夫文之不可以已也如此而今而后知顾翁也乃为顾翁志按状顾之先为樊道之石纽乡人至宋而将仕郎百七者迁邑之上舍里十余传而为处士公夔娶于王实生翁翁少负气倜傥不喜习博士家言而独手庄子一编不置曰能前得我意者是书耳至稗官史家若传水浒者以猥褻闻而翁间喜之曰亦可以快浊世愤也不犹愈于城旦书乎间与客谈天下事輒抗手掀髯长太息里中人稍异之推为亭长所部决号廉平顷之佐其里税入京师游于市廛曰是可以豪也已念家不果归邑邑不问生产所勾贷家多义之轻其讎而顾翁顾用自愧恨悉废箸输之独身跳泾水上日一糜居不蔽风雨已试为酒人豆人染人輒售渐能自衣食而其间左家子以翁非土著而售忌之为宵警顾翁惧转徙石村居三年益贫复还泾上顾翁乃不求售筭器食而寄廛口衡价不貳久之渐信于其乡鲜所不取质而资用亦渐以饶富人争推金以贷顾翁唯恐其不诺而贫者缓急有所欲贷不以之富人而以之顾翁顾翁亦慨任之曰必赢而后我乎取母乃非丈夫哉有遗金于肆之西偏者标而购其姓名得吴跛人以归之尝为贸易当三十金而其人误羨其半亦召而归之棗粟于陆五日而价骤衰愀然曰吾不忍其耗谓陆来分而金业贬价矣又尝宽张氏儿逋属其构而以居间请为曲解之而还其所鬻产直曰毋而惭也盖张氏儿语及顾翁涕涔涔下矣顾翁有四子其长者力穡共养而叔氏即宪成与其季允成游於邑庠有声守令贤重之谓顾翁素长者能父将致而袭之冠带顾翁谓宪成曰吾贾人子何所损益於世以而曹故而使我名姓堕长官耳乃又分孺子余艷加里间乎趣谢病休

矣泾西之老谓宪成輩之见贤重也间行以事谒顾翁曰请以百金为翁寿翁怒曰若贾我又贾孺子哉我诚不羞垄断何至从有司市而以孔孟书货三尺法也即守令以伏腊资二子者亦趣令辞弗受曰诸生者数百千人官乌得人人资也而曹柰何先之且士食贫固当守令问知为顾翁指遂亦贤重翁而宪成既领解顾翁有忧色宪成跪问曰儿向者两斥而不忧今乃忧者何也顾翁曰向者若忧矣忧则励励则学日进今者若喜喜而惰因之吾所以代若忧也然居谓二子不畏若骄畏若习象恭耳夫象恭之败人德也甚于骄盖顾翁之为人也广额丰眉巨目隆準美须髯声音如钟对客竟日不能创一佞辞遇不善无所不规正恒自谓意有所蓄如噎物必吐之而后已以故其敕宪成輩以并介慎取而戒其习象恭甚于骄然顾翁孝友内至其少弟六岁而寄食邑朱氏属朱氏覆失之顾翁归自京师大惊怛行求遇于邑南郭相抱持而恻解衣衣之与偕至家为提携至成立顾翁之病也弟率其四子夷于子以奉汤药翁分产而授之亦差与子夷顾翁平生不喜佛老晚得其书而善之以为去儒者无几第所为功德醮禳之术与其徒谬妄耳里有烝尝而不血食者顾翁谓之曰柰何死其亲耶若不能不草木食是宁无生理者而于禽兽奚择焉邑有厉凭人语灾祥叩者趾错道也顾翁试往自晨至夕厉不敢下乃谓人媚神以求福者误夫神而可媚奚神哉迨其病也医者络绎而弗进药卜者门而弗令入也祝者巷而弗许知也顾谓诸子孝弟力田多行仁义而已起坐栲髮手洮颡未竟谈咲而逝于乎达哉顾翁生于正德丙子正月初九日卒于万历丙子十月十二日享年六十有一其配钱孺人有妇德四子性成娶陆自成娶曹宪成娶朱允成娶华孙男六新孺聘黄惺孺聘华性成出閤孺朗孺自成出彬孺宪成出贞孺允成出俱未聘孙女一禧征许字王幼文性成等择期某月某日厝顾翁于上舍里之祖莹余既以宪成状而志之矣窃谓季次原宪空室蓬户之行而太史慕悦之不衰彼其取观于公卿大夫之间而无所不得故约而求之闾里以顾翁之为生微至于洒削胃脯而其节不过取予德不能出数十里之外然以视夫显贵隆重而琐琐其行者抑何径庭也即顾翁所自树立微宪成亦当必有传者虽然微宪成吾几失顾翁乃更为铭曰

有隱德而弗显有儒才而弗获展以笃其子夫谁曰不善

弇州续稿卷九十二

●钦定四库全书

弇州续稿卷九十三

(明)王世贞 撰

○文部

△墓志铭

郑少尹累封光禄寺丞周鲁山先生墓志铭

周之先自汉丞相绛武侯勃数徙而至宋为饶之鄱阳人复以丞相益国文忠公必大着至元末而有受七公者避饶寇徙于黄遂为黄之麻城人受七公有三子季曰希孟希孟之次子仲馗以子河南道监察御史鉴贵封如其官鉴之为御史雪闾左冤抗论辅臣之首循直声振天下仕至山东按察使有子洙为宁令以子福建道监察御史廷征贵封亦如其官廷征为御史与中贵人永辨宁夏功疆出为江西按察副使廷征有三子都转运盐使载西安同守戴季则今鲁山公也鲁山公之谢郑事归无何而以今大鸿胪卿宏祖官广东道监察御史最封如其官周氏六世相禅而称六御史其实三为御史皆能以其最满考而三皆生受封天下之搢绅世家艳名之以为无两而鲁山公之自太学补吏部选人而得郑也鸿胪则已成进士司理吉安矣呼而谓曰咄嗟余所慕称者于古得范文正迹乃得刘忠宣所愿为执鞭而今困一丞弗振矣勉之汝尚可以为吾所欲为鸿胪顿首受教既而复拊心曰志伊尹者何人也吾奈何遽自弃遂之郑甫月余而巨盗百人昼劫王兵马埽其帑报至令胆夺不能语公前请曰令君守藏当第以兵授丞丞任获之遂疾驰行劫所而中道悉其精锐百人畀一裨校曰贼必从某道出走某道是皆负重可徒手缚也遇而选懦不击罪在汝贼从他道逸罪在我既发而身从老弱张旗鼓尾而胁之贼果负重走某道伏发皆就擒可七十余人兵巡金事林腾蛟闻而激赏之曰孰谓丞一书生而不堪大将印亡何令病死遂檄公摄令令事秩秩新矣而分宜相之私人鄢中丞者不解台务而理天下盐法以挟重故恫喝诸御史诸御史尽茅靡郡邑无不籛金奏小者犹数百金当道郑吏以所见闻请公叹曰丞惟一身有妇耳何所得数百金第令饬张顿务腆洁而无帷幔筐篚之饰鄢至大失望乃出二故篋付尉缉之公曰此欲借以为名耳阴备二新篋以俟尉入而所缉二故篋见鄢大怒蹴而破之使呼公入盛气谓曰丞无耳耶不知我当亦知御史御史吾奔走吏也而敢传客遇我即二敝篋之不能新而使委台牍於草莽公阳谢曰向者不以属丞丞饬新篋二不敢遽献逡巡二篋入鄢顾视篋则新也而中犹枵然愈失望然亡以难之笞尉二十而去于是林公闻益激赏之曰吾属州邑长三十也而仅一周丞男子何寡也当是时不籛金者公与林君二人耳林君以名御史失分宜意出补持风采益峻即青绶而下不敢一望颜色而其礼遇公若真令爱公甚于昆弟卧病且死后事悉以属公曰吾不欲死齷齪吏手也公自是贤声愈籍籍会令至遂改摄宜阳令已摄卢氏已又摄巩公治卢氏之旬日行狱得一老吏当戍者洗沐

饮食之曰以邑一大事报我我能寬若老吏叩头曰左藏贏金三千无知者请为公寿公乃召三博士同入藏阅之得金具以白诸司治巩复得左藏中羨金五百盖大豪与吏谋将入橐者亦以白诸司后先充县官用时张庄僖公景明抚汴具其事獎公且谓公实心实政云其最后摄宜阳而郑令复阙郑父老泣请于监司曰周丞故吾丞也奈何不以惠郑而惠宜阳宜阳父老持不可曰今幸宜阳有之奈何复夺而郑监司谓郑父老直还公郑郑赋繁而故有荒额三千石当蠲第悉以遗荐绅大夫及博士弟子司府掾史之豪有力者民代完额困公廉得其状至是乃密以白后兵巡赵君请悉归之寝丘赵君大喜还语郑父老益大喜而诸荐绅大夫及豪有力者争啐赵君迫则曰周丞寔为之我不与也议自是格公乃浩然叹曰天乎令林公在直反掌耳遂投劾归郑父老哭拥车至不得前曰公以一弗获志而遽弃我何忍也即我曹勤力作犹可以饱诸荐绅豪有力者腹而齧我公谁为我甘心焉公之归麻城而郑父老可知也岁候公诞以车装枣柿酒面造公里而寿焉公戏谓予故不负丞丞今者乃亦不负余寻鸿胪君之吉安政成矣入有台拜公复戏谓试与我程劳我之于郑十女而课不女逮则格也吾向所以付女范文正刘忠宣者深哉乎味也始公生二岁而江西公捐馆寻二母相继没公起孤童自树立繇诸生陟太学上舍有经术声试顺天不利而后弃之居恒谓痛不获识江西公其见都运及西安二兄犹公也所以事之约略如事公终其身毋违色所与宗戚丈人行者事之小者弟之更小者子之材者拔之急间左之难甚于己尤重然诺敦气谊一结断金即生死无易其孤嫠若归矣善决策成败嘉靖中郭翊公勋得幸上贵甚里人欲借而得官者公时尚少为度之曰翊公固材而骄上欲自操大柯柄奈何狎而弄之夫以骄臣事英主未有能久者也其人至国门而翊公败公好称说直节士尝得杨忠愍公继盛论分宜相疏手録置褰中时时取读之经岁其文悉磨灭至老犹能击节朗诵一字不遗鸿胪君之为御史视南畿学其转副使视福建学而得谪也寔以御史时论新郑相见中故归而请罪膝下公咲曰若曾太王父持首辅循王父抗中贵人永吾恨不得身覩之今幸覩女且女非坐私谴谪何罪也第吾所用望女以文正忠宣二公者殊未既也勉之其后仲子宏禴以进士为起部郎文学论议有曹署间声以欲论诤江陵相失具草将上而为忌者窥亦当谪归而亦请罪门下公复咲曰若能如若祖如若兄何憾几事不密则害成慎旃哉女从女兄而趣文正忠宣者犹有地也今姑就我旦夕耳盖起部侍公之三月而公属疾卒公之卒距其得谢郑事余二十年絶迹不入城市于俗仪酬酢多所简略唯吊丧问疾则不废卑幼春秋祭扫家垄则不避风雨故工为诗其警句有云晨林弄秋色微雨落新寒识者以为何必减柳常侍晚好习养生诵岐黄之书而悦之遂废诗曰奈何别吾方寸共笔研也谓鸿胪起部此事亦以付女曹矣公讳钺字女成娶于汪屡封太安人有妇德先公卒丈夫子四宏祖宏禴宏裕皆汪出宏裕太学生宏珍贰王出孙八某某孙女三婚嫁皆名族公以正德己巳生以万歷壬午卒寿七十有三葬地在某所鸿胪君于吾弟懋同年又尝董吾畿学政而为先司马靖恤也则时时称神交矣起部之以文字知尤久鸿胪君乃衔

恤具事状授书走起部三千里而乞志铭嗟乎余安敢辞独念公有子而贵称封公以老寿死可无恨矣所少可恨者县官以格持公露公之颖而不尽出之也虽然公之丞邦其人不令而言丞归麻城里其人不他之而之麻城里亦安能限公哉铭曰

直臣之子直臣之父公于其间不愧仰俯出为循吏归为乡先生尸而祝之谁云不应嘻嘻不泯者名名女名者铭

冠带医士渔洋王君暨配山孺人合葬志铭

余守尚书刑部郎中而病寒且殆矣故通政使张銓与其弟判太医院承宗皆国医环视莫敢进所见幸而自活然咽喉间气塞不续通州老医陈生投药饵之小解已热复壮发人谓是寒复必不治而吾郡王昌年希舜者来脉之曰非寒复也虽然向者大热去而余痰痰去而热复壮发者何也取陈老所余剂辨之曰嘻是正治也而峻子之真元耗矣正治而峻承之宜其壮热也乃别为剂以和补者八之其治痰二之仅十余服而病洒然若失者于是王君名籍籍公卿间争具车马迎治病而君所奏药辄验其病益奇则又奇验而性简脱不乐为威仪所治即善故而处方调汤液毕主人出酒浮之白辄不辞去之他所亦尔竟暮陶陶然归矣归而楮币随至至则受之不为饰让不至亦不问而间出所羨镗以义行之密戚故人君既朗坦无他肠而又善酒及雅语多欢少伎以故燕中交游多爱慕之即不病而时致君以为适而久之先御史大夫公开府檀州有以君名荐者檄使调治官军君始通籍太医院得冠带如例幕府尊重而君其最下僚然竟寃然不废谈谑间出休沐诸大校迎而饮之君亦饮问府主有所指向或可以居间地道否则阳为不闻者出他语岐之以故自月请外不受一装钱先公益乐称之而亡何先公坐失相严指逮时逻骑旁午势叵测而君独依依马首不忍去间入一慰视先公出则视吾母与吾妹女弟疾即大寒暑无间也明年先公竟不免余与敬美扶衬归女弟疾益甚时寒沍且冰矣念欲君护行而难发言君慨然曰士为知己死况不必死耶独身偕之维扬始别前是君貌悦怿跨马蹀躞忘倦态而匕箸日益减微伺其酒往往不尽醕以为恠而明年忽感寒疾卒京邸疾既亟犹手书属余兄弟其书半不成字而语悲惋甚会君之妇山孺人携其三子以丧归吴余兄弟迎置里中代舍山孺人者故良家女也以勤俭佐王君生者三十余年至是悉出橐中装得六十金余兄弟稍益之为百金以半置田供薪粢半授其子寅业小贾贾久之败寅死其妇徐亦死二季少而不甚别治生孺人邑邑不乐成疾盖后君十六年而卒得年五十九君之年仅四十有六耳君世家吴阊门里父浥母许生而敏慧尝受经老儒郁黎阳业成矣已舍去为医故其医本经术时出心造不專泥古方二季者宸娶于陆宣嫠于周女三归伍常张焕文京兆诸生周俎俎有文学矜节负气不寝然诺自孺人之卒又七年而俎来言曰二骨行暴矣请瘞之某所公幸惠之一言以毋使

遽朽既而以状请曰俎幼未及悉也嗟乎微而请余忍忘微而状余宁弗悉抑及我先君大故则有隐痛焉毋若余之衷烈而弗能文也何虽然余胡敢遂死死者乃薄资之窀穸而为志若铭曰

医者意敦者义铭者友墓者壻逝者不愧生生者不愧逝穴于是其偕即安于是

屠丹溪公墓志铭

余所知名州盖有屠氏云屠之先自大梁徙避狄而居鄞之北方数里皆为屠而至太宰公瀟贵及其先三世下而得太保公侨司马公大山贵亦三世而独于其属最尊而齿甚卑者曰子良子良之子璞璞子丹溪公浚少于太宰公一甲子而称弟公字朝文其别号曰丹溪以比于太宰公所谓丹山者也丹溪公三世俱布衣然以隐德重始公之壮时强有力多持弓弩挟弹走马遨遊自肆已折节读书通大谊家故中下与所善海人谋治巨舰绝海而渔遇■〈风贝〉起破舰得一木漂浮小岛逾七日拥败絮而嚙之昼则猕猴分余菓夜则玄熊卧护■竟不死寻他贾舟过岛号之乃下人皆以为神公既雅自负且以狎之益治舰渔渔则■〈风贝〉辄破舰虽不至殆如前时而所赍操略尽公因倦于渔而会伯氏坐逋赋逮日夜以望公公叹曰是知我渔不知我渔而橐若洗也虽然我何忍爱先人庐而坐视伯氏逮即鬻其宅得数百千镗以出伯氏而偻行至江上葺茅舍数椽以栖甫绪而■〈风贝〉复败之公咲曰■〈风贝〉乃迹我岂欲使我露宿耶与其妇某姓孺人节力而加苦焉自公之无家而意豁如类有悟者曰吾不复海矣即馁死不至令鱼饱手理药草数畦啖其苗晨起未饭徐睨突无烟舍而步江上观涨家人挽之曰观涨可得食乎公笑曰不观涨亦何可得食卒观涨而有二贾以巨楮求寄载至公居步所而舟人发之皆珊瑚犀象玳瑁香药也曰是禁物当入官又当死贾阴造公蒲伏请以半为公寿冀得无发公曰去之而以六尺博而财我安忍藉为利哉令舟人姑得厚餽足矣又有私贩鱼盐者亦至步诸子请货之公叱曰而岂津吏也当是时太宰诸公贵盛甲浙东西诸借名姓而家者比比公乃其亲舅弟季父妾自如终不假小煦沫而闾左之受莢者质成者争严事公亦自忠信不侵然诺得之不以屠故重也公属虽尊不以加于诸孙曾行与杯酒谈咲温洽有兄弟迫于产而闯墙者质于公甚辨公不荅第顾指圃中某花某花而其人忽悟曰公意不在我我何辨为遂解公有六丈夫子而长子失里豪意见中御史趣捕不得縛公以应明日当入见而夕卧大鼾家人撼之醒曰此何时而并寢也公徐曰我不为恶何恨我且我终不以明日夺今日寢俄而长子至入就理公亦自若其最少者曰隆少而警颖公甚爱之俾从里塾师受书归而盱犹未饭也指其腹曰甚虚奈何公第从容与语经史及君子无求饱大指隆遂不问饭而去隆之长为诸生声实殷殷而又能治古文辞心念屠故冠带族前后用政术谊槩显而无治古文辞者治之自

隆始微一见长色公故屈之曰儿曷不视吾腹中有戟矜耶口有雌黄耶即悬鹑不至骫何愧而若奈何以雕虫奸世好也且毋乃凿混沌何隆自是虽不废其业而能归之长者公为人大音声如钟自他所归未至里许而谈笑声先之家人以是候公归为常腹不能藏人语又不喜蔓语居恒谓无使人口属吾耳吾耳属吾口天下且无事矣生平无长物唯艺翰数百本时时为客盗去夜起行陬篱落以是触霜露得疾卒当是时隆补博士弟子拮据姑篾间姑篾人易之困而归抵富春江渚夜梦公骑而衣冠呵殿先后冉冉云际去惊驰抵舍公已没七日矣歿之后日一道士来云梦公去状具如隆隆又谓公自言直者当为神盖至今疑公神不堕死趣云公以嘉靖丙寅卒距其生弘治丁巳得年七十有六子者佶侯球俛仍隆唯隆成进士女二人孙男十五人女六人隆之令颍上再繇察能改青浦皆有声而与余善故追状公事而余志且铭之铭曰

溺而不死猴熊来饵死而见梦于人于子人皆神之其果神耶太朴不断乃全道真夫是以尔子文而尔若不闻尔若不闻何有于予文其何以铭尔之坟

乡进士玄津周公墓志铭

吴江之周其先自元人俊德始徙烂溪七传而至恭肃公用起孤生数更省台长至大冢宰海内推贤之以为名臣而周遂重于吴江恭肃公有丈夫子几而其最贤而长者曰寻甸守国南寻甸君有丈夫子几而其最贤而长者曰玄津君君讳京字世臣玄津其别号也生敦重寡言笑动止自矩恭肃公业已心器之而长其亲长其孙当得官更推以予弟而读书工属文由诸生迁上舍君于制科义无所不泛澜而独好瞿文懿公景淳以其尔雅可讽当是时瞿公甫登第及以侍读主南畿试得君文而异之曰有心哉斯文乎抑何其尔雅可讽也遂登君式君所登义行而见者莫不推称以君之文之似瞿公也然公自是竟蹭蹬公交车间凡七试而七不利以至老死语云通塞因天美丑因心岂不信然哉始君之事寻甸君与母顾也夔夔焉烝烝焉其抚诸弟怡怡焉以孝友称于乡母顾疾一不食则君亦不食医祷必诚信而其歿泣血不见齿者三年既登式而贺者踵相接君独涕涔涔下曰奈何使母得一见之其又四年当赴公交车以寻甸公病念之不欲行寻甸公为强进食加簋曰视乃公健否且若不思博一第以快我志而刺促吾膝前何欲欲乳耶君自是不得辞甫毕试而寻甸君之讣至君大号泣曰天乎梏我作罪人也生不及荣歿不及躬已矣无所事余生矣乃所以致哀毁加于丧母顾时而竟禫除鬻鬻不解遘末疾坐以是终其身君虽疾不至困能强力行坐读书构制科义食酒不废即至公交车期不辍往间自叹曰先恭肃公之世隳矣柰疾何君貌肥白如瓠美须眉治家程丰俭必以礼一室萧然图书外无长物尤好程朱老儒先生言间诵白氏长庆诗擊节叹赏诸父行皆显顾事每逊君以为虽少年而行履筭画则周氏老而他昆弟子姓即少年豪必

饬而见君不敢以豪进也君又严事邦君大夫无所请托而其治岁课率先其里中又倡其诸父捐腴田合三百畝以资长赋者故君家虽世饶埒素封而里门无皂衣剥琢他不能尽然矣君既已不得志公交车且病乃尽取其业毁之默坐澄心见若以为深于禅观玄解者而无何竟卒矣君之卒以万歷辛巳距其生嘉靖丙戌得年五十有六配某举子二之轼太学生娶吴次之辙侧出后君卒之半岁殇女七长适嘉禾太学生卜文学次适湖州诸生闵世宠次适嘉禾诸生屠泰次适屠大壮次适邑太学生龐秉性次字湖州张某次字邑吴某塋某地之轼手事状而介余友王百穀来请志铭曰先子意也余犹忆侍大人京师时恭肃公领台事而大人为其御史休沐輒谓余曰末世而犹覩古道若周翁真所谓巨公长者哉与闻司寇而两不复三矣司寇者庄简公渊也无何恭肃公卒而余得从寻甸君朝行因以窃追恭肃公之典刑而又一识君公交车又从君之弟宗正君游盖皆彬彬质有其文焉故国世家浅之乎乔木哉嗟嗟乃今俱已矣昌黎氏之识北平王者三世而复铭其孙殿中少监暢塋而致慨于俯仰也然考之史少监故小贵以侈败其家君虽犹在选人饬文行家方隆隆起以是塋也可无愧恭肃公地下矣是宜铭铭曰

太宰之孙二千石子策名于乡步武帝里夫岂不能侯服怒马被服雍容造次儒者式吟而白式诵而朱名教为乐先民是模厥材既成干霄可期孰为培之又孰摧之匪穷匪显匪夭匪寿夷然委顺不与构鬪山墟之阴蜿蜒伏龙奉不辱身以从先公烂溪之阳乔木森然留不尽余以贻后贤

金君夫妇合塋志铭

吾郡有金朗者才人也而甚贫盖数见而数进其文其文日益奇而贫日益甚已不见者两载所忽倮行前谒余犹夫故贫也而杖且苴其冠履叩之哭不成声手一编相示曰孤有父能侍而不能养有母能养而不能侍而今且俱已矣所以稍逭孤之罪戾者唯吾子余悯而受其编曰父故讳璋字国荣其先不知所自至王父某而耕于浒陂依大姓以居遂冒屠姓父久之复屠而为金已更璋为璲王父之始从浒陂人鬻席自给也什不能息一父年十六矣一日忽尽持席去家人大惊而无何以其价归盖倍赢于恒操时里人谓王父若有子材曷不使之贾而旦暮齷齪升斗乎于是代王父小贾父之为小贾顾日鲜衣与其市豪少年遊又好新声貌美丽自喜其更长则负气上谊不寝然诺豪少年益壮之而母者朱氏令女也能佐父以俭共举不肖踰龕能诵书占对而王父指之曰儿姣不复代若贾乎父不欲曰吾安忍复弃儿贾也乃使从师肄经术自不肖之经术垂就而父贾亦稍饶乃里中儿妒之父意不怿曰麋有六足走便入海丈夫安能卧领人妒耶徙而耕光福山中故不善耕事岁得凌之乃更徙为贾数转益薄而不肖自游学归父伺其橐枵然垂也恚索杖曰若所游大人者何而不以一钱资我且若不枵然不归矣不肖

俯伏泣拜杖而母去之曰乃公才胡以数转数薄且儿即不以一钱子归也故不以一钱母出公如命何哉于是起不肖摩抚相慰曰姑即若业修之而父渐以心计闻诸贾人推择假市令权得不乏母又时时用俭共补其畸父益发舒雍容文酒会矣不幸属疾卒母哉然而二少子依焉食且尽不肖筮无所复之而会谢都尉者业转饷知而穀我从之燕中主董礼部自是稍得寓修精遗母居岁余忽心动亟归而母复不待矣天乎不肖之所不能养与不能侍者此也即所谓养何养也天乎伤哉贫也所以为吾父母者已矣夫乡之人不能知不肖姓名何论父母然而靡不知有子也幸而惠之一言庶几因子以知吾父母余受编读之既乃叹曰吾不知若父母吾知若吾知若不为荅铭谁为铭者金君以庚寅生庚辰卒得年五十一朱生先一年卒后之三年为五十四朗娶吕而鰥子二贞娶王氏良未聘葬地在凤凰山的新阡吕柎焉铭曰

半亩之封其茅第离七尺之宫上有樛枝有乌骚屑谁则知之以予知兮毋若以而子知兮而子何以知而其大昌厥辞

太学生史幼咨暨妇陆合墓志铭

幼咨生而韶警故太常陆粲先生与幼咨之父兰溪公■〈彬上金下〉同里闰且善也抱之膝果饵之而曰能壻我乎幼咨起谢遂以其爱女字焉兰溪公业中人产念不能当陆先生而世受宦又娶于吾姑以司马公父而御史大夫公弟雍雍负才美而幼咨以媵之子见子逾于己出陆先生殊自快也归抚女而谓曰若有归矣兰溪公亦与吾姑相贺曰幸儿有室又得尚陆粲先生女当是时陆粲先生名重天下而无何卒幼咨十六为诸生明年陆女乃归幼咨长于幼咨二岁而明秀婉孌吾姑尤钟爱之幼咨与兰溪公俱短小然兰溪公为人恂恂长者不欲以口穷人而幼咨善言咲佻自喜既为诸生未几以例入太学试而有声寻改复南太学三试皆不利而兰溪公卒官幼咨既免丧忽忽不自得又微闻其生母张夭而弗及识也意伤之乃悉谢去其所习制科业纵酒自放又不别治生吾姑赐督责甚苦曰汝父无所遗吾倾橐而教养汝以冀汝一日显而乃若是且吾日三饗饗于从子吾汝欲割以为酒费耶幼咨行意故自若也岁时从所狎酒人轻刀短屨纵浪佳山水间竟忘返而故庄事顾丈人汝玉间规之则曰富贵土苴也人生一隙驹酒之日吾日耳更晚顾君毋溷我能从我游乎顾为匿咲引去于是陆之私装罄矣泣谓幼咨向者罄吾装而佐君君以为酒犹书半之今乃尽为酒何所复得装耶幼咨时大醉蹴且詈之曰汝何自得大人言吾不若夫矣陆畏幼咨锐不获已归依其母居而日夕緝■〈糸辟〉刺绣以其羨市珍菓贻吾姑间过抱首哭也幼咨始其饶时为具不问客客至则饮既浙涩而有所过亦不问主又好使酒骂坐坐客应之强则亦已而及醒而复诘之则且忘以故与幼咨往还者不甚责酒食过而更用以相狎幼咨既久之得陆共

事吾姑状乃愧悔迎之归谋更读所谢去书而病矣陆之治汤药覲卜良谨幼咨既■〈谷丸〉执手而谢之曰甚负夫人已而叹曰男子穷至此不克终奉老母何以见兰溪公陆丈人地下又戒其子载道顾丈人爱我死必传我而以幽宫之石累元美先生陆故得吾姑欢幼咨歿则益精心为共养服除从之太仓谒晏阳女真师偕事者凡三曹所而独以一荔枝投陆归啓之则有手书悯其志行而许度之陆斋沐复谒愿备弟子末师业已许乃复叹曰晚矣固异世缘哉未几陆忽病痢死死时念师言歴歴不乱幼咨名访史氏别号为逸庵惩其卜也史之先世自吴兴徙而为长洲甲族王父河间公任职名台諫二千石兰溪公宦虽不竟达以廉着声幼咨卒以万歴戊寅距其生乙未得年四十有四陆之卒以庚辰距其生癸巳得年四十有八一子曰载道娶刘氏貳沈出也女一适太学生归隆陆出也墓在灵岩乡世地铭曰

汝以酒而全其天乃使汝妇斩焉而丧其天其然也不然耶汝妇虽死拳拳皈其师而汝魂气无所不之其犹相依耶非耶噫

清溪蒋次公墓志铭

太史公言之人富而仁义附焉此言是耶则阳虎何以云为仁不富也今夫取者所以资予也予者所以保取也故曰知予之为取则智知取之为予则义此二者仁之术也今夫小贾之为贾也铖铖而敛之业业而持之不达因时不知所操舍稍过而卒然无所衷败若扑满焉彼阳虎者乌知富者也汪子仲淹为予言蒋次公蒋次公者其妇翁也名克恕字行之又以小字延保行世居歙之黄山黄山无他姓独蒋与谢而蒋尤着其指几数万而其后有泰仁公起家贾于纈羸无所不暂中岁倦而思息乃命其伯氏继焉而駈次公使为儒次公既已受经术属文有声已谓其父里中无可与语者吾闻之良璞谷处谁与剜琢因去而游星源里师故游俭先生屨而短褐从其俗日再蔬粥濡笔黔吻所出入不晓为富家子而会大水尽漂其书去仅以身免父闻之叹曰岂非天乎以书报次公天欲夺汝儒而还之贾违之不祥且吾老矣毋使两堕次公归而相与筹曰不有居者谁与资行者于是身居武林聚百货而橐之以输伯氏为转鬻山东之清源次公以时策其入而伯氏策其出相与消息为循环居数年瞥大起于是次公徙之清源而伯氏复转瞥为出入复数年瞥至累万复相与筹曰行贾固利过当而毋若逐逐道路何且以身百试卒一不讳悔已晚今幸贖足盐盐夫坐操其母而役其子若尾闾之受水毋便于此者于是徙广陵益瞥至累巨万大抵武林俗薄轻为徂清源俗鸷悍多贾易忌广陵俗桃好奢次公能尽得其情与百物之轻重不受欺而以不欺行之故终其身无债事久之父卒伯氏亦卒有子希文弱善病次公日抚视其食息小长授之经且大出橐装资游太学曰吾竟不能以儒称而祖意而勉之使吾有以报地下也丘嫂断断多齿牙次公率其妇共养

严事事必腆备亡腹讥乃已寻希文病死次公伤之为抚其三稚子如己子使同寝处仲淹微风曰处得无隘乎次公曰吾欲使其悉我均也有二姊长适罗良瓚贫而瞽有一子又蚤死次公治其子丧而养良瓚终身次归汪鹤佐次公贾私其羨自殖积产至万人谓是不可返帑乎次公曰返若帑是割吾肢以益体也卒弗返其后鹤与姊谋更讼次公负其千金以求解次公亦不辨广陵贾子多訾即连结守相以车马裘服相豪而次公衣大布冠竹皮往来其间意自如也然遇交知缓急有所援勾则诸豪咸匿迹而次公独出身为之至倾橐始更相愧以为不如归黄山故居丰乐里里大溪数涨则病涉捐千金为大石梁数十丈以通之自石梁至容溪治驰道数十里茂林深樾可憇者必亭之以息行旅故通政张寰为大书标之里人指相谄曰蒋次公始不得志于儒中自恨以不能承父属而大吾里令吾里乃岿然甚壮贾故自足耳何儒为次公后病痔之京口就医转侵削还至武林而卒以辛巳之八月距其生庚辰寿六十有二娶罗有丈夫子三长希参娶亦罗次希任俱罗出也又次希禹娶李贰吕出也女二长适即仲淹名道贯太学生其女有贤行蚤卒次女夭孙男七国卿娶潘朝卿娶谢元卿聘许友卿聘汪耆卿懋卿其一未名俱未聘孙女一许聘徐学书志曰仲淹有云儒者峩冠博带谈说道理若指掌即不能不以一刀锥而弁髦其人伦次公之于人伦厚矣何必儒仲淹从其兄司马氏为文章有根底其言当不妄故志而铭之铭曰

汝贾而儒其子孙必以儒起家汝其即安于黄山之墟

弇州续稿卷九十三

●钦定四库全书

弇州续稿卷九十四

（明）王世贞 撰

○文部

△墓志铭

资德大夫南京兵部尚书叅赞机务东沙张公墓志铭

大司马公之卒也以万厯丁丑九月而其生以弘治庚申生之夕王父赠司马公梦

龙瑞最后公梦游岱岳而病病踰月卒公寿七十有八年成进士负大人名者五十有五年盖终始感异梦云而公生好持文章柄进退今古而间与其伯子邦仁指屈今人而古其文者某某则不佞与一焉属先大夫之墓也而公谏之至是邦仁辈卜仲冬举公魄大归于某地而贄帛以沈太史一贯之状辅公所自述与余宗伯有丁沈山人明臣王太学穉登余贡士寅之传四而请志若铭曰公之遗意也夫公知己也且有先大夫之谏在即公大归而贞不肖惧不成劳于窀穸何敢以椎弗称辞按状公张姓讳时彻字惟静别号东沙子其先为宋魏国忠献公浚传子明公栻又四传而为原徙于鄞原生绅绅生儒儒生惠惠生迎迎生叔谊叔谊生公曦是为赠司马公赠司马有三子其季曰绪是为封膳部公其赠亦司马娶沈太淑人而生公亦有三子公其长也公之先世世受农至赠司马公绪始受儒当公生而族子文定公邦奇长于公十六岁既蚤读中秘书以经术行谊称天下而识公于踰髫时曰叔父而其代兴哉当是时公虽内敏而状嘿嘿赠司马初弗省也以就外傅日授书数百言辄诵益之辄又诵又强以十日所当授书益之辄又诵然尚弗省也自文定公之异之而稍试以制举业则愈大奇公乃进以天人鸿略经传微指与两京诸名家言甫十四试于郡郡守林公富私少之既试而后喜曰勉之不为少也自是试辄利遂抗颜塾师席弟子有倍年者矣二十举于乡明年绌礼部游吴中吴中弟子益进又三年登进士授南京膳部主事久之进武库员外郎还复为仪制郎中公之在南京八年所所当皆天下豪杰若吕仲木邹谦之王子崇顾武祥辈争折节下公公以词赋名籍甚南北而自其与诸公游则稍欲进之为德功矣己乃升秩按察副使督江西学政公才高有所抡荐于诸生中去皆取大科为时显臣而不能无汰斥大指欲以裁冒士服而农贾实者江西为贵臣藪诸造请一切报罢以是不能无嫌意会九庙灾喉言官论调公公笑曰一博士长应天道耶然所坐益白乃补山东以故官饬治临清兵备人或风公益少徇者公不荅至则益持风裁罢去使客额外供重锦文罽自遽日坐堂皇诸奸累猬集为剖决立尽而加扶其匿实者曰若罪当某某律以匿实故扶也自是累不待献吐矣公时时申束约境上诸干掇者无得容尺刃寸镞入境不则立死汝以故竟公任毋剽攻警所部称治转福建右参政道务素称简诸好以卧养高公谓吏弊什百衷我我何卧为乃自勤力为政闽徭故无準公衡之因着徭书以式来者胡氏子孤而富且出母子也宗人交质为非子因赂吏摘赤籍以戍困之狱公立为辩其枉闽人称之积四岁不迁时文定公方掌铨乃以嫌故既稍迁按察司又为云南州邑累故之省论决免者归时赅夷道剽之去公白御史留寘臬狱官为粥食之毋聽自炊累自是毋他警沾益夷保贄淫于女守杀人如麻虽就逮以行万金间莫决公令受辞竟即扑杀之指挥范俊老而举婢子弟杰诱其子以嬉刺而瞽之讼于官谓是瞽也而非俊子俊老不能子官莫辩公谓杰若利俊指挥耶而忍肉一孺子集邻戚证之杰偃伏即寘于理而归瞽俊李令者继妻之女与匠通而令毫弗禁也诸兄恚而殴匠死其长子出承殴矣御史欲坐谋杀悉下有司捕之家尽毁公谓是殴也耻淫之谓勇承死之谓义而弗能救而残数生者以偿一淫死者固请

改论殴尽复其诸子沐黔公酿而怒酿者之抗利也囊三木以狗公道问之曰禳旱不当酿耳公曰酿无预旱也破而纵之比公迁山东右布政使黔公以恚故不觴公郊贾人子争拥觴公郊且请觴从者曰公不持滇一物行愿以此卮酒为公寿也公之山东而左使以疾请告代视篆夙案如洗吏自逋复署者五十余人入提调乡试录成文多出公手俄以赠司马公丧归毁瘠如礼服除补湖广时有楚之变诸司出入陈兵卫公悉罢去之曰谁敢干天子法也诸冗散当满不得去鹑衣而俟命公悯之谓孰非臣子乎趣吏治移一月而得满去者百余人又尝脱屣吏戍并释连坐六百人台臣无以难也遂迁河南为左布政使诸内赋者以金至即验而入之曰毋使居亭鍛工窟尔也已征其道理费而官输之塞曰毋使道路虞尔也诸王将军当请禄即籍而封之人自为授受曰毋使国臣得侵渔尔也即有损吾自任之于是公迁右副都御史巡抚四川当发诸王将军盛张乐祖道络绎数十里觴且祝曰妻子赖公而饱能继公画一者幸矣公行未至四川而白草番攻陷堡塞残裨将人或谓抚之便公奋曰蜀犷僻不以此时一伸法将柰命吏何察诸将独何卿练而武乃密与计发劲兵捣之克番塞五十有奇斩甲首千有奇俘获五百有奇与降者约稍出赋视内地捷闻进兵部右侍郎治如故己又平马猱番赐金绮己又议平叙泸蛮寻策救荒诸省策独蜀为最而中蜚语归里矣公所中以馭吏莊而待其国臣峻久之起抚江西其治大约操仿如蜀而加密诸猾黠盗魁渔狱市者诃得辄杖煞之阖郡为肃罢客供张具所周还不过升茗算器食寻入为南京刑部右侍郎未上以北警召入改注兵部当是时大将军鸾挟重肘腋间而藉宠势张甚既已夺商侍郎大节兵又勒使听约束商公上疏劾之不胜下狱论死未决而公时时与鸾议左鸾恶之当出邊挟公从治兵欲遂中公而鸾病疽死反谋发妻子僇于市于是公念商公冤且当用而会商公所部兵上书请得复商公为帅公时署部事覆如请阁臣拟亦如之上大怒谓帅生死繇其部卒耶且责公无君公席藁待罪阁臣惶恐自劾当同死上乃解仅镌公二秩而公以太淑人丧归上竟念公贤弗深责也予之祭为营墓且并墓赠司马云倭寇起东南为躡而南兵部缺尚书太宰李公默疏起公公服犹未除以国难故墨绶而从事所论经畧事宜章十上俱报可倭有逸而劲者仅六十人转鬪千里所抵皆奔溃至南京郭外公与大帅谋发兵出御之不利事闻当是时权相之子贪既以中望公不满而又恶李公遂特勒公致仕公既归自壮有余日得以益肆力于文章所著述不休而文定之为南大司马也公继之仅一纪人以为代兴语信哉遂称两大司马云而后先贾其余着秬苑声乃沈君则谓其学同而归稍殊文定密而醇公鸿而槩又谓文定长经公长诸子其然乎哉公间一治农农即倍获因自署曰上农夫而所获即以润其族党乃至中外戚毋不被者以田请予田不能田又问公给作以庐请予庐庐败又问公苴葺至再三靡倦色孝友敦睦其共奉家庭间雍容如也其自居及御子姓臧获肃如也公成进士而同年生王祭酒子杨者齿倍于公而来问交曰而吾兄也子杨死为刻鹤山集善丰考功人翁以贫死为刻考功摘集善陈提学约之以夭死为勒墓门石刻后冈集凡为公传者若明臣若穉登寅皆后进

齿卑公为之逊行驩然交也客能操一觚管口唇嗫嚅作吟态者叩之无不立见且与行弋钓山水张宴授简又为之治橐而后别人谓公且近名夫公去国二十四年而少有尉荐者此其于名岂乏特以不能由台使监司阼阶故然公竟不以二十四年少尉荐而折大臣节此陈仲举之所以先李元礼也人以名拟公者何浅也然至今上闻公讣下有司谕祭营奏如故事虽不为竟用公所以待大臣礼至矣公娶于陈生子邦仁官邵武令妇为戴陈卒乃继毛侧室任生邦伊官顺天治中妇为许邦伊都事满公进资德阶而陈与毛俱赠封夫人任亦得封孺人其次吴生邦侗郡诸生妇为黄其次王生邦岱聘陈孙男四子庠妇为艾子序聘袁子雍子朋尚幼孙女三少莊适屠本元兆奎许杨某顺则许沈太噩曾孙男一应崧曾孙女一伯英公所撰芝园集外集别集若干卷寧波府志定海县志若干卷所辑皇明文范若干卷文苑若干卷俱行世

铭曰东南无垠穷大荒欬月吐日成天章赤堇之金精而良笃锤两公俾张张公神肃然凝且莊其容抑抑材则扬煜若太阿喷星芒迅如赤麓腾康莊经营五服膂力刚冬则日之夏或霜再蹶再起帝所详批鳞抗辞惊九闾策大司马提留纲察卒搜乘唯公长一彼一此为疆场公携经纶还故乡余愤尚足摧扶桑谁私以晷者彼苍仰辟千古成周行右文惜秬齿舌香不辞以手成津梁羣才赴流趋谷王忽偃赤帜奎欲光公神行天魄兹藏宜尔子孙炽以昌微言之存寿无疆

通议大夫兵部右侍郎兼都察院右佥都御史竹墟屠公墓志铭

国家自成弘以至德靖鄞之屠为大人者三而太保襄惠公瀟其从子曰少保简肃公侨其又从子曰少司马公大山襄惠公之博大简肃公之正直少司马公之廉靖盖天下之人称焉司马公虽名位小亚而寿考独过之而其为长者尤着屠之得称甲自无锡徙而季始之数传而为襄惠公弟渭则公祖也渭之子偁则公父也其赠皆如公官偁娶王生公赠淑人继娶陈封如王而加太公少敏慧谒襄惠公抚公而叹曰志之吾族所繇不隳者此儿也盖公十二而母王卒其明年陈归我又明年则父封公亦卒陈甫为妇而能母公以义方勗之公自是读书工属文矣公为人秀伟长髯而丰下二十三举乡书明年登进士甲第又明年除知蜀之合州既平诸父老持酒炙入奉公公人为举白嚼大齋曰劳苦诸父老休舍矣诸父老人人喜自谓得屠使君心次日请间公辄与叩便宜及吏豪奸猾事亡所不倾吐参伍而行之民大惊以为神州当瞿塘口春涨来嚙州公损奉倡吏民筑长堤捍其齿州人便之名屠公堤时有妖道士李为蛊公掠治之且数百亡损公曰彼能得我念辄备我以无念行之第趣杖如故道士遂諱晷死杖下公未及考而以最闻迁南刑部员外郎进署郎中出为吉安知府时吉之属邑王尚书学夔者由选部陟大僚有子横里中公悉剪其翼子畏而折节为儒生尚书每语人辄曰使君去我一鬮子而

益一贤子仁乎使君哉人盖两贤之擢山东按察副使饬徐州兵备徐时新中寇所至墟莽公绥抚安缉练卒选将遂屹然重南北而会有甘尚书者与公同年暴贵幸以里中儿为邑曹司属公公不能蔽其贪尚书恨之适徐有剽上供盗因疏着甲令不获真盗兵使者毋得迁公以是留滞且八年而政理益着转其省左参政亡何进广东按察使寻为山东右布政使又移福建左公不好为可喜事其治以务实胜而已而所至有去后思名亦自稍起遂迁都察院右副都御史巡抚湖广会蜀贵兵平酉阳叛苗吴黑等已又获苗帅捷闻赐金币当是时分宜相贵用事而其子世蕃以公连得重地不能毋望报公竟不敢应而太宰李公默故为南司成有憾于将乐令以属公公廉将乐令贤而不无伉矫为保全之令更以荐起工部右侍郎阙李公顾推公而分宜相更难之会贵州复有苗警以为公谴诏停禄仍故官自劾河北大盗李邦珍与其妖妻马三儿等行剽入公地获之御史胡宗宪谓公侈其事可赎也公谢弗肯侈而久之朝议合湖广川贵为一镇设大帅公以兵部右侍郎兼佥都御史居之公乃选将吏搜卒乘申约束使参将贤以一军军苗腋而诱其党谭细奴啖之曰以尔酋龙阿仔来者吾官若不然尽爇若族细奴乃为酒要阿仔醉而縛之立灭龙氏而龙他众亦来报谭族亦殲仅细奴以身免公纵悉平之奏官细奴百户土帅冉世蕃十六从军勇而贪欲遽篡其父位以黄金百斤及他珠寶抵公家公之妇章淑人力拒之公闻乃录世蕃辕门杖之百曰汝奸汝父位而污我金何也且寄汝颈刃矣诸土帅皆恐悚请命公留滞久太宰李公时再召心怜之念欲擢公而扼分宜相乃推公南京兵部右侍郎未上倭难作分宜相乃议以公仍故官提督大江以南诸军公为总督时已贰司马其迁不当南总督而迁得南已又得提督凡再迁辄再下又束公死地公时已病叹曰吾身之不恤如国事何公至则倭势益张念内有分宜相而外有倭兵食俱尽病痰壅不能起南给事中御史论劾公逮系诏狱且坐死时简肃公方总台事痛公计毋所出而分宜相亦微惮之不能遽下石上偶以语真人陶仲文曰屠某者是非若楚抚臣耶曰然是不为我修潜邸及太和宫者耶曰然曰趣赦之遂下书勒公归里公归日与里中父老为会满引曰老臣无状当死赖天子恩不令死贼手又不死用事者意何以报称自是申申怡怡者二十五年而后卒得年八十公居官久所更州郡大镇不胜计而问其橐橐如也田宅亡所增益尝火毁其庐且尽公笑曰是幸亡可以饱火者独之先祠三日哭而已居三载诸公故人醵金与材赠之而始有堂公善诗歌时时酒间呼笔辄就己竟则弃之不存稿尝从太和遇异人得养生术老而不衰忽遘疾呕逆且革谓其子本峻曰吾今乃获终吾闻之古者正终上大恩不见僂而又两以诏复我官眷毋乞祭葬吾亡德于乡毋祀我乡贤吾生不能敦交际毋内贖奠生不晓佞佛毋作佛事本峻泣受命乃葬公于甬江之北原又踰岁而介进士余君寅之状来乞志铭王子曰倭事起而吾吴数更帅未始不以材来者乃未始能以材去何也夫毋论其下中人即屠公亦不无二后言焉于乎难哉夫倭事起而其帅得専精神于倭而后责之可也倭未角而财力先困矣主客反矣上分其畏于大臣下分其虞于大夫士人之口即屠公之再迁辄再下其志夺

而策无所用之虽良平奚展焉事迫而后大臣不得不割情以拊来其帅帅割资以内奉大臣其策内十七策外十三是故从容于文法之外而功自立不然以公之剔历方面威声隐然荒徼者岂虚成也公介不近名贞不违俗荣不色喜诟不色辱终始一节内外无间盖不佞所称大人哉嗟乎分宜相之为伎也李公默王公学夔之为长者也抑何径庭也天子之仁明而乃使仲文者借之以行厚也其亦可慨也已公子女孙息生卒月日如左铭曰

屠有三大人最后乃为公惠鲜而洁持以此御家邦居政不近名岁计有余充盗宰挟天权恫喝震擊撞公耳如不闻奔命惟正从出入白刃间竟获牖下终匪直完其身志行靡不同屠以政术闻文学乃有隆以逮子本峻蔚蔚斐其宗皆公所械櫟于前人有光甬江之北原回环若蟠龙我铭与蜕俱嘘气双长虹

中宪大夫都察院右佥都御史白川刘公墓志铭

刘公者讳景韶字子成崇阳人也盖刘公之墓其父封员外郎公縉而世贞寔为之志铭颇详其先世云公之始受经也员外公有所感槩督趣之甚迫而贫无书可受往往从人所借钞又不给则间行之市肆阅之归而闇诵且绎其义至终夜不寝其所属举子文亦以臆摹时式然辄工始试为诸生辄利诸生哗谓公鲜所师授崇阳令沈顾曰非而曹所知也居无何公遂荐于乡时沈犹在令诧曰吾尚以抑之后且是子所谓神授毋事师也明年绌于南宫其又三年成进士谒选得潮阳令潮阳故遠而名为饶俗以鬻胜公至首寘其大猾于理乃次第问俗所利苦而平亭之其大者为除虚赋搜伏税禁逸鹪导河利筑海堤醴滞狱策邮訾凡十余事以次第就理讴謡载道逾四载入为刑部广东司主事公前后凡七被荐书当上考而繇郎格人以为屈顾夷然弗屑也偕其同舍郎济南李攀龙乡人高岱魏裳辈切劘为诗有声然公间益习洁法所请谏以精明称李子戏曰是日噉嚙者何安所得司空城旦言乎久之虜入犯都城公以选守安定门时时有密画佐其长虜退遂进公署职方员外郎会扩外城公得稍见长睥睨间以功予实授而忌者用喜事孽公遂以按察佥事兵备贵州属峒苗之界贵与蜀者鬩议殲与抚孰便公为策曰抚未易也殲吾所不忍书不云乎分北三苗姑晓以祸福而分北之使贵者贵蜀者蜀诸苗帖然所全活万五千人而公为四议以上总督冯公岳甚曙遂为抚苗参议苗之拥囿箐而自以种名者三十六为寨八十三其魁跳梁错发公乃与冯公合策捕诛其尤黠者既奏功公独得大酋王黻任宸所上首虜二百余诏赐白金十岁俸级一会江南北娄中倭羽檄不时上遂进公按察副使治兵备江北而李襄敏公遂以中丞节临之公念所治与李公皆创府而民久不习兵即贼至而亡所问弓矢弓矢具矣度不能出一镞乃请于李公以间行视要害外地自瓜仪内而如皋北抵掘港皆列水陆戍其天长寶应则城

之繕冲选锋务为不可胜以待其明年倭果大上前锋犯如皋公单骑赴之敕吏士开门以待不敢逼援兵亦稍稍至公呼诸将歃血而盟书其名袒服曰是战也不利我必死之诸将人人奋而会贼据白浦意欲西公计给之东而遣诸将据丁堰为三覆躬率兵掩之公又筑庙湾重地请于李公以大军军焉而身尾贼殲其殿于潘莊贼骤西与遇于余莊复败之遂败贼于马逻复尾贼于燕莊贼且犯泰兴公追之泰兴民争挽公谓急入保赤子赖公而枕公笑曰城而外非赤子耶且吾在何虞城麾兵前捣贼张家莊走之以李公檄会兵于庙湾合战凡四日大败贼所卤获功与李公当诸将欲置酒高会公曰未也夫三沙之贼不惩南而惩南之■〈风贝〉也势且趣我彼覩夫不利北必惩我而我徂之非胜算也未几三沙倭果北渡径趋如皋公率诸将分道进掩之于仲家园蕪其众贼走锅团与参将丘升追及之升突前中伏死公并将其兵力战败之已战于小海滩已战于刘家桥已战于白驹海沙各有斩获贼窘悉众趋刘莊食其粟当是时三沙之裨将刘显以失律罚自效公器其才力悉中权之劲畀之曰请以贼为若德显奋而前公鼓之贼巢溃追殲之于白驹场殆尽是役也公前后不解甲者三月余生获百斩首三千焚溺称之卤夷器輜重以万计捷闻上大悦进岁奉级二赐白金镡一文绮帛各二迁浙江按察使治兵如故再论功进岁奉级一白金镡如之绮帛杀其一亡何遂进都察院右佥都御史提督军务巡抚鳳阳诸郡李公之去督抚仅一得代而公即为政诸所颁勒约束精采有加于旧当景王之国道淮扬中贵人责供张驿骚甚公一言中其窾立解去郡邑颂公功德者麇至至为六祠祠公而公以母汪安人忧解任方日夜哭泣自恨匿军旅不获共事汤药而御史弹章下矣天子念其功而难御史言予闲住公既服除杜口不言冤与破倭时事而日夜治酒食为员外公寿后先事继毋务得其欢而饬其羨召所知乐饮时时谓吴子楚材吾向者去比部而职方已又去职方而贵竹也遂不获从二三子以终不朽之业二三子且以我燕颌也而从舆我不知其美疾之也即二三子所不能斲予以一名家言而吾亦不能不自信然至于今未有成者何也天幸假我以余日而竟弃髦之我何以异日见二三子也莊皇帝即位用诏恩复公官致仕而按楚者李君棊荐公才堪大用李君故襄敏公子也公叹曰岂其犹能举过庭语耶吾固耻名之虽然何敢食德于逝者乃哀襄敏往返军中札百余名之曰感知录以寄之而竟弗谢也楚材又亟言公之纯孝长者也员外公疾弗食即公亦弗食其吁天未尝不叩颡至血也丧而骨立汲汲乎思所以不朽之也干旄及门即一言未尝不为闾井益也所刲修桥道寺舍所调棺槽徧境内然而不自称福也贷子钱久则折券而焚之然而视其人若未有德也所不忍无报者一饭恩哉乃睚眦若洗矣楚材者公所厚善士也始世贞之为员外公志铭也公寔以楚材状来谓其文似世贞故今而公之子日孚复以楚材状来其文辞益奇顾所述公于世贞语太过亡当故不能无削而为叙其大都耳志曰天于刘公不无意哉一舒而令再舒而城都城其又舒而贵竹其又大舒而江以北矣舒未几而旋夺之意者其人胜也虽然亦天也倭之强未有能角于野者夫转弱而为劲聯散以为一收败卒之将以为智收败将之

卒以为勇非刘公孰能之夫刘公之好文甚竟其造何所不破的天与之日人不能为之胜而味其言若犹有憾者何也其所著有秋蛩燕台战余漫稿太白原稿若干卷楚材云竟至成一家言呜呼亦足以名矣公别号白川其后为白原世犹称之曰白川先生春秋六十有二其卒也以胃痛痛发即若攢刃病始得之确斗贼伤力当破贼时梦建康蒋神授之丈八矛盘舞空际至病而复梦蒋神以天乐迎之次日乃逝有雷电风雨之感亦楚材云公娶于张初封安人以子日孚奉覃庆进恭人丈夫子三长即日孚积功为武昌卫指挥娶于戴封亦恭人次日益日跻俱夭女五其三适千户陈邦本太学生江朝海邑诸生龚衍材孙男三炳衡邑诸生娶恩生汪庭女余俱幼孙女七墓在史家渡之阳铭曰

大海西泝长鲸立波化为虎豺血人于牙疇其剪之公挥天戈勒我乌合而为鸛鹅陆沈水焚或馘或累濯袂磷烽爰植桑麻公功于扬偕石不磨三锡甫伸三褫随加归而奉亲舞彩傴傴立言是厘遑恤其它其功一方其言一家我铭于幽不随骨化公安我铭张楚实多

中顺大夫四川提刑按察司按察副使二泉张公墓志铭

呜呼张公世所谓靖恭长者也而不及下寿以歿公之歿余酌而哭之曰公胡以死也尚有子曰建麟又三岁而建麟以下场歿余又哭之曰胡以斩公后也语云天道无亲长与善人是耶非耶呜呼张公世所谓靖恭长者也而天之报之若此其酷何也余盖悲公甚故其墓也以公门人苏庐陵之状而志且铭之公讳大韶字鸣德别号曰二泉张之先自常熟直塘里也后割隶太仓州遂为州人王大父赠南京刑部郎中铄王父光化教谕璧考太学生累赠处州守印处州公字唐恭人而生公公在孩抱间即秀颖朗彻教谕公爱之恒抱置膝偶以俚语属之对公不荅而第指壁间书语应之真绝对也教谕公大惊诧曰此圣童矣公年十四补州庠诸生亡何遂有声而督学使者涑水杨公南昌胡公咸激赏寘之首遂举于乡又三年而成进士授南京工部主事缮治鳳阳陵寝费节而办又能赞其守先事为御倭策寻分司芜湖积蠹为扫商旅便之去公任数年而为祠祝公且文其丽牲之石丁外艰归服除迁刑部员外郎进郎中狱吏念公非素习难之而公勤聽精讞一切丽以情法遂负明允称擢浙江处州府知府处属邑多创倭而矿民坐习兵故调发亡已益用凋边公至则缮城堞申甲保寛徭薄赋以廉勤率先诸属郡事大治踰三岁迁四川按察副使整饬建昌兵备建昌得蜀之西南一垂以与滇贵接诸蛮夷犬牙其间负气竞利公以道柔之亡不感服者而其在处时有所不悦于当涂中以浮语然不能竟污公法当调公念母唐恭人老叹曰王阳何人耶吾向者几捐吾亲枝于箐障间于是筑室里中治场圃岁时行禾莖秩秩旁畝益辟唐恭人性严甚公委曲侍奉间有所不悛即惴惴长跪俟解乃起其莊事唐恭人之左右也亡减于唐恭人公无子晚始有子念

之甚以聘余女久之得末疾寢剧乃太息曰吾死之不恤如我母何则又曰如吾子何卒年五十有一配凌氏封恭人子一而殇者即建麟侧室秦出也女一适太学生金元祥建麟死而以从弟大英子天麟为嗣又尝子一襁褓孤曰兆麟补太学生娶于曹公既归絶口不复言居官事亦不言人所以萋菲故无能为名之者第时时得之所莅人口曰循吏循吏而已人以公治于室而疑其官然公亡他蓄有官橐必寘唐恭人所既没而发之仅饮器十余绢数十而已呜呼麟抑趾鳳铄羽璧毁兰刈以末俗实为之公之不终遇人也其不寿与无后寧亦人也耶余盖未尝不三叹焉吾州之工属文精深经术者必推公而公所指授诸生多取科第若庐陵者其尤也塋盐铁塘先茔之穆位以建麟从铭曰

逝者有知场子依之始而若忻既悟而悲余毋以报君之遗而姑不朽其辞噫

弇州续稿卷九十四

●钦定四库全书

弇州续稿卷九十五

（明）王世贞 撰

○文部

△墓志铭

中奉大夫江西承宣布政使司右布政使虹洲秦公墓志铭

秦之先自嬴氏至宋而高邮人学士观以谪死塋无锡灿山下其子郡倅湛遂占籍为其邑人十七传而为贞静公夔累官江西右布政使贞静则其乡人私谥也贞静公之仲子曰孝廉公永孚以高行旌孝廉公之子曰都事公镗举乡贡不第竟谢公交车业以终有子曰通参公瀚公父也其称通参者从公爵也母曰殷宜人公讳梁字某某生而美姿容眉目如画稍长所习书辄诵遂工属文补博士弟子姿试冠其考儒声隆隆起执经请贖者踵相接矣当是时公所居有山曰金匱因自号匱山而会尝出而五色气蒙之若雾望者覩其地有虹起上属天而恠之公因更署号曰虹洲盖以雅自负云而未几果中乡试高等明年试礼部司试者奇公文荐以为第一人而所射策与主试江学士意异争之强公见绌然自是名益起其又三年而试得第八人录其文以式当是时公名籍甚馆

选垂及而失之亦以媚者故出补南昌府推官南昌民囂而好气胜公起书生骤得李官人窃或少之乃所擊断亭剖即老吏不若郡多宗室子侯又豪贵人子弟往往交借故相严势鱼肉其单赤公一切用柱后惠文弹治之不少假则相戒毋膺此强项司理而巨盜平十二者窟险时时从其党行剽监司苦之为下公逮公廉得尉某与盜有连不出意诘之曰若自知死不何自通盜尉股栗抁顙请命公曰吾寄若刃颈姑为说离其党而以酋来为若泯迹尉卒如教縛平十二至论报磔于市公既以材显诸台委所部行属邑至他傍郡车迹殆徧每治牒丙夜不小止子爨蹠而请曰大人得无惫耶且休矣公指其牒曰儿稚何知此曹子生死吾指掌间吾乌能休也故公所受声严而不残为闔省冠征拜吏科给事中居无何朝议筑都南郭最为巨兴所使中贵人大臣彻侯考工将作以数十计而公与御史苟君监之公遂止舍郊昼夜不归邸所部分尺寸皆有程尝劾罢中贵人家于工者以故咸惴惴不敢饰非自便城成第功上等超为通政司参议其明年大水颇圯城公仍兼给事中监之赐金币如前当是时相严贵益甚而其子世蕃黷以侍郎与董工事心器公时时结杯酒欢且啖以九列公丑之用亲老辞得南京太仆少卿太仆署于滁有故王文成公讲舍公与诸生读书谈道其间甚适也久之迁鸿胪卿再迁右通政俱仍南京世蕃乃使其客示德色于公曰公一岁而再迁皆清局者谁自也公谬诎其语曰吾不知自也将无以久次竽滥之食乎哉竟不谢未几太庙灾公请罢镌秩为浙江布政司左参议俄相严得罪公稍迁山东按察司副使协理堂事时堂务简而所兼署提学及德州兵备事亦办寻改浙江專督学政是时秋已逼期公星夜行抵任三日而出行部五阅月而以十一郡诸生黜陟告成既毕试浙士九十五人公试而首者五十六人余亦优等遂相叹以为神明而公务寬大多所优进每谓士疇不欲乘时取功名者辄人圣世吾不忍袭之他操切少年不善也寻进布政司左参政亡何迁湖广按察使甫下车振頽提纲大欲有所为而江西右布政使之命下矣公时方急通参公疾将疏乞终养不果因倍道归侍汤药者二月而通参公卒得以穷易戚亡憾生死而岁大计吏竟用浙中事罢公夷然不屑也戏语客五阅月而浙隳无遗疑此为误人闇多矣吾而不罪谁当罢者公素孝所奉通参公斋栗志养既除服乃以所事通参公者事殷宜人朝夕上饗博滋味征声伎而荐之殷宜人为加匕且属公觞曰姑为我一寓目而公亦自好游适所居邑多佳山水选要创墅曲承其胜有所谓惠山园及春申別墅者画船箫鼓中载诗酒人如叶茂长姚舜咨顾世叔辈相与翱游歌呼毋论昼夜唯不佞获三四过公辄留留辄大饮饮辄醉醉辄捉予耳朗诵所为诗若文弗竟弗已且曰吾太夫人善饭吾善酒吾妇善为饗弟与子皆善逢迎而又皆才吾以应人间世亡蹙额者然间一涉时事及长吏可否未尝不慷慨色动也不佞乃以是窃窥公非但为乐者公于友爱天性黎明率诸弟谒家庙退坐中堂笑语移晷乃别每宴而有虚席辄顾问某郎何状竟酒邑邑不乐岁赋践更则曰寧吾代之不以累若也以故诸弟能自致力润屋而书亦不废从弟本贫不能谒选则资之选从父滂判剑州遠不能赴则资之赴又尝为王氏姑及女弟之夫朱连调斂葬他亲族缓

急叩之即应亡问橐耻公既以得浙士心而其显者道里近又数来长郡国以是不落莫有邵某按部而邹某为邑咸首造公有所叩而公不荅第一言邑赋利便而已邑以乡饮大宾请公为一赴之亦不再也盖江以南亡不称公慎重长者而公于纂邑志直笔亡缓借人或谓公不为指唾计耶公谢曰向者不审误许之今无及矣虽然吾不以指唾易鬼责也盖志成而识者目之良史公偶食于已氏而逆寻寒中之少已而大会客觞殷宜人八十复中劳疾大发凡五阅月而革顾谓子燿等曰吾粗自全归何恨恨不获终事老母耳遂瞑得年六十有四娶陈宜人温令能操内秉而恭事公如公语丈夫子四燹郡诸生娶谭为右都御史愷女先公卒次燿太学生娶顾为塩课提举某女继娶徐为魏公鹏举孙焯亦太学生娶吴为左谕德情女俱陈出燿聘唐太学生某女侧出女三适之立梁化行胡汝节俱太学生孙男四尔达聘徐为乡进士某女尔佳聘贾为绍兴守某女尔载聘施为吏部主事某女尔基未聘孙女三适太学生顾櫟李玘粹黄懋颖葬在军将山之新阡盖燿之来乞志铭也实以公治命云而状则征之光州守陈君以忠陈君公妇弟也其视公师友间能为悉公余既善公而核陈君语故不辞铭曰

土有莖而培则崇木有萌而滋则丰秦甲于常曰端敏公暨今给事中公显其间迨嘉及隆培之滋之夫是以窿窿芄芄乃公不尽食之以还化工罍如其丘窈如其宫吾以卜其后之弘

骠骑将军中军都督府佥事镇守浙直地方总兵官玉江杨公及配吕淑人合葬墓志铭

隆庆五年十二月十一日故都督佥事杨公卒于里前三日其配吕淑人卒而公业寝疾以哀痛亦卒于是其友人王世贞往哭之而又八年其子之庆始能举而葬黄泥涇之先兆而乞曹山人昌先状以请志铭按状尚英公讳也时俊公字也九江之德化公始地也玉江公别号也以德化昉也有高者从高皇帝起义兵累功至明州卫千户坐累谪云南平夷卫百户调泗州卫复从文皇帝渡江徙镇海卫仍为千户自是而和而春而富而鯤俱世世受千户富鯤复縁公贵赠昭勇将军都指挥佥事都指挥富公王父也鯤公父也封太淑人武公母也所受自千户以至署指挥佥事实为指挥使署都指挥佥事又实为都指挥同知署中军都督佥事公爵也自所篆而巡江而巡海而协守刘家河自把总而以都指挥体行已佥湖广都司已迁通泰叅将已左转江南游兵都司已迁塩城叅将已复为苏松叅将已协守浙直为副总兵已进镇守为总兵公职也公生而壮大多权畧七岁就外王父武氏塾于同馆无所不狎侮尝遇一业姑布者孰视之曰是非凡儿也出三十当大贵故昭信尉吕某亡子有一女而贤公乃入赘焉补州学诸生始折节为礼让步趋循循矣二十三为千户捷武举都试不第归而署所事不索卒一钱曰五行尽矣

寧堪再迫且丈夫豈終一千夫長而忍為此公長七尺余虬須虎頤猿臂善射台使者行部望而异之及试射辄命中以故劳赏恒冠诸军而其巡海也以三翼舸冲闽贼余皇败之获其酋林成事闻赐白金十两再捷武举有司梓其文都试复不第归仍故統猝遇倭数百艘众寡不敌公令聯舫为方阵戒士持满毋轻发贼出叵测引去乃徐还师时倭寇已傳州肉薄而登中丞蔡公急召公射之俱应弦倒最后射一衣红者额贼惊解散会蔡公坐不称改去赏遂格而公最后三应都试复不利而倭寇复大举入寇势张甚巡抚彭公叅政翁公才公而意其避倭难故系其家属欲以激公而公果日夜驰谒二公乃大喜曰吾不虞一面矣遂以舟师授公俾便宜行事公慷慨擊楫誓不与贼俱生乃身练士习射搏力勾卒之法选黠勇者为前茅而募长年教之使捩风羊角而据上游自四月至五月锋贼于南沙再囁之刘家港再掩之七了港与吴淞江前后俘斩百八十余级溺死者无算而其把总也所廕贼自教场洪三丈浦马迹山吴家沙寶山吴淞江清水洼凡七捷俘虏尤众至推级以予故太仓守熊公及两卫使俱获论赎且迁而公之转盐城也其帅李中丞迫欲得之而江南帅强留公以重不获发李公遂用逗遛法劾公赖大司马知之薄其罪得领江南游兵无何大军扼贼艘于三沙凡四十忽尽匿帅谓公贼遁乎公曰我师亘百里刁斗相望一零箚不能越而四十艘乎沙多芦其内有栖麦此必伏芦中就麦伺我惰而后溃围走也帅曰善为我迹之公迹之果伏芦中乃扬金鼓状若焚芦者贼果整舟出公举帜大呼矢石齐奋贼遂大败无得脱者公战功于江南叅俞大猷刘显间而未尝一败北倭既累挫其选锋少不能军而公之迁副将至大将羽檄日益希幕府鲜上首虏矣公善抚部曲问疾赙丧若子女所得卤获必中分之即有犯军伍间政不少贷也其小酒食过若不闻尤熟海道舟尝以夜发公卧舱底耳水声即辨为何洋不爽也每

■ 〈风贝〉作舟子 ■ 〈皋虎〉 ■ 〈危虎〉且呕而公手梁肉大酒饮啖愈壮吏士赖以无恐吴淞江之役公方与贼确鬪所驾闽舫高于屋以凌贼贼不支公忽谓曰是速备吾下贼果蒙盾穴水间钩其髮致之大斧夹断其首以殉遂大破贼其为副总兵当治吴淞前帅遗狼兵千余皆狼戾不可驭故欲以难公公日夜以好酒食慰劳而多募舍儿土人子阳若师事之者俾悉其技度亡所藉之乃谓曰久客不念家耶若父母妻子何众泣请归公为不忍舍状而椎以牛酒予钱帛使海舰送之曰内地淹岁月毋苦橐中装为实虞其扰也自是吴淞无伏祸而其在定海尝行城城庠薄遇警施木栅睥睨上公笑曰是不可以一炬烬耶首捐俸倡吏卒斃而益之公威名日益振尝预推平蛮将军填楚而会所部黠卒失伍者漫游燕中冒公家人名与给事所亲争席于狭斜给事遂劾公行赇覬移官章上即罢公郡大夫士父老拥车前称不平公谢曰劳苦诸君请视仆车生耳矣仆自列校起何功而滥斧钺之寄以天子宠灵获老死牖下分得无侈乎第谓仆行赂者何人求者何官以此塞白简耶遂归公始筑第于太仓卫之左称巨丽矣归而构园于其右数百武许颇穷水石竹木之致名之曰日涉而又性好客客以不时叩供具张饮累日夕亡倦色而诸镇戍之长干旄过从者多公故部曲至则大合乐飧燕之所从驺士皆醉

饱行赏赀金钱过望公以是家大困鬻郭外田亡已尽废其息母钱以至带金剑装皆尽而客日益进不衰公虽雅倦游然富春秋不能无壮心而故所部士大夫吏卒交口称之当隆庆初南中给事御史上书谓公堪大将寄久之乃预推大同帅报闻而公则以病矣公之病得之肥而善食酒一日饮于余忽痰涌发喉间咯咯有声竟夕始苏自是病两岁虽数强起数惫以至卒公终始事也公虽用武起雅好文其在镇博带褒衣与少傅吕公大司马张公辈酬咏往返彬彬有声称性孝友尝痛昭勇公之不逮禄养也所以共奉武太淑人备至歿为筑高冢以移昭勇公兆而太淑人祔之吊客倾数郡念其弟尚才孱不问产为置产立而无子为置妾生子中表故旧赖以无窘缓急者可指数也公行也歿以辛未距其生辛巳为春秋者五十一公寿也吕淑人者公元配也淑人性严重然不敢以公赘故骄公方公贫时泔泔絀以资衣食间有所负博进潜脱簪珥偿之不使闻父母公既贵每饌客至丙夜淑人躬临视之竟罢酒乃已公寝疾二年所非淑人手调食不食也可谓媿德并终者矣之庆公伯子也公有二子之望之胜而殇独之庆在娶马氏卫使图女之庆领镇海卫篆更督漕务有廉名御史数荐之当迁之庆之二子祖烈祖勳祖烈聘张氏叅将某女公孙也公官二品于法得予祭墓赠谥之庆抑而弗敢请者公遗命也昌先又曰微公江南其墟哉即不得比于开国诸彻侯何渠出刘广宁下哉乃竟以萋菲见妬坎■〈土稟〉抑鬱甫下寿而死上之不获如营平新息老竟其才下又不获为青门故侯偃蹇长世何也乃其重然诺好施喜客居然国士风矣君子谓之知言昌先者公友也铭曰

杨之先人起千户侯世邈以单危若赘旒谁其振哉有髯而虬腹围十之尺七乃浮见敌惟轻左弓右矛岛夷为讟肆其虔刘公奋而前五步不留执丑获讯穴胷累头战靡遗敌捷无虚月遂锡玺书开府于粤天子所冯如济获筏海波不扬长鯢立骨文吏始舒来攻我阙公勳既完徐步则蹶公身虽废而名不歿温温淑人婉孌醴醑偕以终始于室于穴公姑即安其后必发我书坚珉用表厥伐

正议大夫资治尹南京工部右侍郎双江方公墓志铭

嘉靖中倭事起江南而吾吴及云间最为上股肱郡而又最当寇冲当是时潞安任公环自吴郡丞鳩乌合与之力角以至迁治兵使者新城方公继为云间守悉筑完孤城而衽席其民以忘寇其后任公蚤卒而方公委迁至开府遂尽有吴云间地而大布德惠一时任公以战方公以守人主倚之若左右臂而任公之功名不能居方公半则以年也方公者讳廉字以清别号双江方之先干以文显严陵其后人习医遂以医显至宋建炎而徙居杭之新城有质者尝应高皇帝征试明经词赋皆第一复以文显子若孙复习医至公王父源由诸生员训武学为建宁司谕而其季父铨母弟溥皆成乡荐又复以文

显至公乃大显父曰菊泉公模用公贵累赠都察院左副都御史母钱淑人有三子而公最长公生而沈严寡言笑动止异常儿父母慈■〈目匿〉之不令学而公自励于学耐勤苦念邑僻诸生中无可与语者乃负笈之郡贄业听讲昼夜不辍岁时一归邑定省辄步而精思家人请以一卫代不许也行二十里文一篇成及门而藁草三易矣学使者试公辄高等且以励他博士弟子曰何不学方生文是有根柢非而曹剽掇伦也它博士弟子以公年少邑僻心不肯之未几公连取进士其程试文出乃相率慕服公由选得南康推官南康山郡少事而御史才公每行部辄挟公与俱亡何它郡牒尽以属公多多益办公大指不欲以深文小廉见名事衷情法久而愈信于上下荐剡娄腾赠公名医也就公养官舍每得所治牒阅之叹曰秦越人不能生死者而子乃徃徃能生死者何奇也我复何憾亡何赠公卒贫不克治丧上官闻而赙之乃克治丧而吏部以卓异召服除始之部谓少需之可得给事御史公力辞曰官非吾择也且愚不任言路授礼部祠祭主事厯主客员外精膳郎中曹事简读书当官无害而数倡其僚绵蕞藁草为朝议或谓之曰上坐竹宫已数年宁复问朝耶公曰不然即上一日朝何所取质安用礼官为而会有庚戌边事上忽出御殿公袖藁草以上大宗伯按行之大宗伯云间人也以是心异公遂言之吏部公出守公至则按行睥睨增崇浚深郭外皆置敌台宿甲士以相犄角寇数万人猝至围城公调兵食悬中不爽时时缓带缙绅家雅语以示暇曰吾在毋恐也而所宿甲间出有所俘斩寇食尽竟壞散去属邑上海故无城中寇者再矣公请于大帅筑之帑不继则身之大姓家劝募曰贼阑入若身与室非若有而况室中物且也皆身外以是人感悟委输若流水公早暮行版筑间与吏民分工力朝告成而寇夕集城下踣躅不得上严旌戟而耀之遂遁乃博访民间疾苦奏计两台请宽岁赋停不切需皆如指始郡牒不胜繁则一切为吏弊窟自公至毋所容净若刷洗公虽不好赫赫声而报绩为诸郡冠有白金文绮之赐迁江西按察副使饬九江兵备是时倭警尚未已游徼徧江上下而县官有建章役取材楚蜀间皆导公理所公以身为御不惮跋履复报绩冠晋左广叅政训卒调饷抚剿三巢盗如豕蝮而大宗伯时在政思公云间功遂以廷推擢右佾都御史提督诸军巡抚应天诸郡兼理粮储大军之后凶年嗣之民不胜殍公恳疏以请其辞酸楚所减赋百余万而吴及云间得十之八时稍议汰兵及饷公必先其非要者复请革常镇兵备仍归之苏而專设文臣治水皆凿凿可久寻进右副都御史抚湖广公素秉介不通贵人苞苴其最后迫故事稍一通然而不能当恒时百一而言路新欲借公自标树白发其事公解节归中外冤之公夷然自若隆庆改元言者交荐公起为南京大理寺卿■上迁都察院左副都御史总督漕运兼督抚淮扬诸郡公至首画漕计列上之得报可以是岁纲如期毋后者已次第有所损益徐州吕梁二洪夫岁取之徐公谓余黎几何而使偏累乃省漕司米聽司洪者易价而募之又请徐之商税以备河费旧有屯兵坐食于如皋公亦革之所减省先后以万计中贵人守皇陵者旧得预民事公持不可乃已寻转南京工部右侍郎会元配罗淑人以病卒哭之伤亦病凡三疏乞骸骨乃得请公归病良已始为政于其

家及乡公洁廉毋羨奉入以俭而息之乃小羨立家庙葺先莹斥置墓田以岁享聯族之大小而海以德让邑多匿田复乘间飞赋公疏于朝而清理之岁大侵公谋诸令发仓粟赈贫者而又虑其远不任负荷出私粟作糜辅之民不饥死松菊二溪受浸广堤梁数圯公倡里人厚其堤又为石桥数十丈道涉者名之曰青云桥乡前哲许公遠祠且就毁捐橐而新之创宗谱成已复创邑志读者谓其有良史才二季邑丞炬典仪秋皆公所拊翼成立者相与侍左右怡怡如也其训子姓身范先之不责而循公秉三不惑老益强胜既七十大为酒食以飨贺者甚欢至别必曰不复再矣秋且尽感微痼盥栉如恒时忽谓子城取历来以十九日吉至日命以香屑磨体肤且徧乃就枕城恠问之曰毋多言使我神挠已恬然若寐者遂卒公既丧罗淑人不复娶晏寝一室左图右书而已以是终其身有子男二长即城以公荫为太学生娶凌氏次应耆聘鍾氏女四适国子鍾应星南京右军都督府都事俞希范诸生徐正蒙周吉士台使者以公讞闻上诏赐祭葬如例于是城等将以癸未之十二月葬公于天柱山之赐莹而属志铭于世贞曰公于先公通家子也而又比舍为郎必不忍泯泯于先公其状则致自周子公瑕公瑕公故人也而不能悉公江西左广事第云尝侍食于公有投牒者公色动置筯而叹问之则曰有越之君子六千人北戍而过淮柰此民艘何既三日复问公则曰渡淮尽矣轻舫之候浅者千皆在泚舫以六人载不乏也脯糗薪菜官给之毋敢哗者某出而迹淮人人不知有南卒也叹以公为神云呜呼此岂可尽公哉世贞又闻之公将去云间云间人不能舍则相率为祠而祀公吾吴之祀任公者请于朝得赐额盖二地春秋血食至今不絶即微城请吾安能不为公志若铭铭曰

沛然而出以泽九土江之北南厥泽最膴曰帝咽喉曰帝肺腑幡然而归以德于乡人之好我示彼周行如鸿渐逵如麟在场悠然而暝以还造化飞廉为御格泽可驾抟沙眷属一丝不罣天柱之阳公魄宅焉云间之宫公神宛然子孙黎民公其保旒

中宪大夫陝西按察司副使致仕进阶嘉议大夫万崖黄公墓志铭

诗云虽无老成人尚有典刑余盖读黄公状而叹之黄公楚人也楚自嘉隆以至今万厯盖有三贵臣其所繇贵不同然其力皆足以登显天下景从之士而于其乡人所援植尤切而黄公最其乡贤者贤者而又为乡人不难使之知而难于不使之知其究不难使之忤而难于不名所繇忤公真贤者哉真贤者哉黄之先世家麻城里元末而有武孟者倜傥负材略率子弟万人据险以遏寇乱时名其寨曰万人崖高帝下武昌乃夷险籍众而上之帝悦予以官弗受请得隶宿卫遂补锦衣缇骑校建文中从北伐以战死子提领代而从上都北平宿卫世世不乏三傳而为子华推其籍予从子而还麻城有三子长曰琦举楚乡魁叔曰璫是为封公奋身请于父荷一戈之缇幕起贖为侠伯乃治甲第多

游大人以成豪英声晚节家稍落而所媿胡宜人孕公时封公梦贵人袭金紫入其室小间以一琴鹤去寤生公公生而颖异强记稍长工属文封公以谒廖学士道南学士大奇之曰吾辈人也三年尽得其学遂补顺天诸生应乡试娶武宜人时甫冠云又三年应试则视学林御史者其为吏刻核谓缙骑不当补顺天学悉系治之公与焉林御史迁去经后御史始得释而竟以是阻试又三年而举乡荐明年会试中式所对策割而文故相张文忠公奇之拟甲第荐而惧失上旨寘首次欲缘以收公公谢弗往乃仅得刑部选为云南司主事任职无害亡何张昌公鹤龄与蒋都督相齟齬张为蒋所持僭拟状下刑部当公谏时以蒋所主章圣而昌公则昭圣势已阴拙恐不能无上下公毅然不可具狱上尚书为请之昌公乃得解盖又久之而始扼其它敌以败败日犹亟叹安得如黄公者雪我而林御史时已迁中丞抚顺天坐误鬻宫人下狱复当公谏始林公心知公故郟忧之甚公第弗见而阴戒吏勿侵轶之仅以误论狱上得免辟既出狱公修诸生刺以谒林公且愧且感曰我目故无珠公殆长者公持狱既平洁廉自律声稍稍着西曹而会中贵人有所调杀人者少年以诏送部理就廷尉评而逸之中贵人挟以恐喝曹诸郎咸缩首弗应公曰吾诣中贵人白状彼且柰何公以一刺入中贵人倒屣出执公手曰吾幸识先生先生所谓不受一钱刘宠耶当为先生任之亟为捕得囚归之部事竟寢公用考最封父母而迁浙江司员外郎以胡宜人丧归服除补河南司迁山西按察僉事所治太原为王国诸宗室子侯争民田而讼者王右之纵无赖子尾前僉事赵而咻君至一切付三尺亡所依阿王更愧谢约束不谨聽公所理晋人大悦尝以秋行鴈门等塞修城堡简骑士严斥堠又多募死间优以金钱俾探敌所向而待之制府倚公若金墉而会复以封公丧归服除补山东甫至而有传敌会殪林当大入入必窥临清者临清为南北孔道而漕艘商橐悉萃外郭中丞曾襄愍公铤与公同年素才公属之城公与一二大僚分版筑而昼夜趣事如期成而大两水溢城辄隕葺之随复隕公筴曰下必有伏淤也即隕处发土丈余而淤见乃去之多募民间敝缶实之灰而基之城始不隕曾公以公功上增俸秩一级属岁侵民苦饥公请于台发庾粟出赎醵以賑不给则劝劳其饶者贷以偿而多布二麦种躬自程督毋废秋民得以无殍死明年麦大熟其半皆双歧而七穗吏以归公公曰天也吾何敢叨则请闻之朝公曰昔不闻灾而今闻祥岂吾任哉盖他藩有以嘉禾麦上而得赏者比比矣单大豪李渊玉丑其妻故使其饲鹰者臂鹰而饲之卧内一日忽并杀之以双首献于官官谓其格合亡以罪也凡三岁而邑大旱公行部刺得其状立论豪死两应时澍而长清令赵故贪而挟奥援又以馱馱得上官心公廉其实逮治之狱具狱凡三上而台三驳弗为阻左使故善令乃置酒与其寮要公且醉而从容为令缓颊公即拂衣去会有迁命乃得解时学使者阙公摄之所识拔如许左史邦才谷司马中虚辈皆知名士而属大试藩臬之在棘者皆被逮独公总摄二司与诸道篆以更日往吏环案聽署者趾相嚙弗前庭受谏束约肩踵亡所容公应之沛然画晷而散咸咋指称神明而公之迁也为陝西右叅议分治商州亡几而制府议城花马池以公材且于临清着特檄使偕一人大

僚往大较操画如临清其严倍之城成而公还理一切以清净简约因俗为化时三原马理先生避地居商与议经学政术相推重商故鲜科第公进诸生授以程序又助之膏墨费是岁有荐于陝者寻累累不絕以旱祷雨雨随降以虎暴诅虎虎亦就擒樵者得白鹿献公扰之圃驯若家畜然或谓当进之朝公曰是又且以瑞麦尝我毋如我駮何秩满进按察副使饬甘肃兵而河套之议起盖曾公自山东来开府好邊事以倚公而公持重与议不合无几曾公竟得罪而公时邑邑不乐上书引疾乞骸骨太宰闻莊靖公中惜之知公意决乃特请为予告痊日有司具状取进止盖异数也公为人果毅任事有气力居恒谓业已致身为县官不复能顾私志取必達然至于体究幽鄙所便否恒恐其拂之士大夫居闲从谢絕顾其酬酢详恳宛致不敢以失意望公所莅必有去后思而其治齐鲁及汉中最久既迁去送者哭填道不得发相率尸祀之其于洁廉则天性当登第而犹子之壻冯累贖巨万请以千金为官费公谢曰下士费不百金幸自足办冯固请乃受一羔裘服之至老不更易两居丧屏迹田里于公府无所干请而其最后归子子单车垂橐乃脱身寻故田庐课僮奴种蒔自给一室仅蔽风雨而性好遊佳山水笋輿敞以草蓐束之乡人见敞輿而束草者争出指诧曰此吾黄公耶而公不时具輿则策蹇蹇不时具则杖而步遇所会心处连日夕不归或要公者以恶草具进甘之若太牢即盛水陆穷珍异征声选色以荐推去弗御也监司下教守守下教令令布帛贖羔冀公一垂顾而公有城市戒不可或屏干旄以轻骑从公田间匏壶载酒芋叶载肉清言竟日亡倦色给事王三宅故为令时造公问政公亦虚心应之一时以神君颂王令不知其得之公居多公家贫不任施而好之不已族人迫催科急则悉其橐装代偿之而徐聽复曰毋使而曹有匿税名毋使官有鱼肉而曹名岁侵则贷母钱贫民而不责子逾期察其不克偿者召而焚其券以为恒乡父老戒子弟汝曹好为之毋使黄公知也公尝寓橐于他富人而盗据之得公封识不敢动曰我何以貽黄公忧公之拂衣年方四十五气壮盛故以絕意进取而三十三年中所谓三贵人者少师恭诚伯之弗论然与公近里闻其所欲得御公何限彼太保忠诚伯鸞而市名人也使公不惜一薄蹠立响应矣太师江陵公柄国时公尚未笃老而楚人无不以公为兰陵祭酒寧不欲名致公哉公视之均弁髦也予故曰真贤者或曰公故忘世士也乃予则不然谓隆庆之初元大有所登进而吴尚书岳刘尚书采尝荐天下材臣四而公两与焉前是太宰胡公松而后太宰杨公博御史大夫葛公守礼皆公同年休休臣也相顾而称柰何先黄景文公作景文者公字也业旦夕启事上矣公闻之曰用吾身必先吾言乃草封事数千言上之大者筴漕河开互市均赋役节上供御将相遠奸佞与久任守令调停藩宗复新建伯封而先以抵杨太宰葛大夫相与计曰上悉之且叵测即上弗悉而当涂之谓何因沮弗上而用公意亦缓公叹曰已矣吾固知非二子所能吏也始絕口不复言世事而课其子若孙习经术俾起家由此观之忘世非耶公于将相大臣喜称郭汾阳于隱逸喜称陶元亮邵尧夫于文喜韩退之而所自构撰文若诗则间有类东方曼倩李太白者于后进推耿中丞定向中丞后公二十年而按部汉中闻其士民

讴思公若新归而造公里谈必移日归必叹曰公岂三代以下人耶公以万历己卯八月卒隃旬而孙图举于省为第一人又四年而手具公事状累万言益以耿中丞所论者而谒余俾志墓道之石公讳卷尝感其先武孟保障勋而署其号曰万崖所以志也得寿七十有七年与配武相莊至老无他婢媵有七子长士征补太学生云云内外孙曾八十余人所著某书某书若干卷葬地在某山阳余以万历初观察楚监试事三月迁去亡何持节抚楚之西北邊去公乡遠第能一识公之姓名为贤者而不尽究又弗获推轂公今者得之中丞之论著核而图状详为志而铭之

铭曰生世七十有七年用十而三归胜之焉舍我者我终舍者天天欲完之人曷能权鸿既冥空龙或在田逸民良臣莫公敢詮总而归之曰贤

弇州续稿卷九十五

●钦定四库全书

弇州续稿卷九十六

（明）王世贞 撰

○文部

△墓志铭

亚中大夫浙江等处都转运盐使司运使诚源葛公墓志铭

弇州生曰余于葛公之罢盐政归也盖感其时与其人俱有古之道云夫时不以葛公蒙垢故废察恶之鉴葛公不以时见白故废难进之操则皆信其是也古道也然而葛公之不竟用也若有数焉余故同葛公举于乡者于其卒则又伤之伤典刑之不复见也故为之志其墓志曰葛公者讳纶字理卿世为苏之昆山人世世习农书不仕父某以公贵累赠刑部郎中母曰沈太宜人公生甫四岁而王父置之膝而授以孝经小学辄成诵叹曰儿必贵顾饘粥之不瞻谁与资修脯者沈宜人乃携以就外家塾十岁遂通经书传注十三知属文从其师肄于僧庐手自力薪水不给则半菽而为日顾能沈思于作者之微旨发而为辞咸凿凿根理道而其藻又足以文之以是补博士弟子高等饫于庠者数岁而用易举于乡为学士华先生所知又一纪而举于南宫为宗伯董先生所知前后复

皆高等董先生至称其易与第一人相甲乙梓式之已廷试赐进士出身观政刑部遂为其部之广西司主事司有疑狱与大臣子连久不决当属公公精心谗得其实乃奸人故藉大臣子以自蔽立破其奸狱乃竟尚书始以公书生难之至是大惊郎何自老成且言乃尔寻以赠公艰归垂满复丁沈宜人艰服除调补江西司偕其长按竟权相子狱久之进山西司员外郎谏断益精明寻奉玺书虑江西狱所全活数百十人释系赃万余即其地晋郎中以恩实授且得赠父母事竣未至阙迎拜福之漳州守甫上而有势人挟家贵榜笞里民于衢且殆公见而撻之则遁矣乃行邑司购捕且戒门者毋得纳缙绅刺必得之使当法而后延见如常于是郡豪势惴惴相戒莫敢犯而公一切更务为恳至敦劝礼让两造之庭不移晷而闾如其僂辱必施于暴抗者民大悦之涂中丞泽民讨海寇曾一本大军聚于漳所责军湏百出至臃肿弓弩兵装寄生之属无不取办于守公悉策应之一本授首寇悉平公当受上赏而会妇凌宜人卒于家凌宜人者有妇德所与公共贫贱者也公痛之甚而是时踰艾矣而尚未有子乃移书台乞归台与诸监司挽之不得则公已封府库解印绶曰必强我当索我于笠泽之汇而蒙御史诏乃具公欲归状以请诏许公归归之亡何而尚书尺一趣除矣公袖手谒吏部出则蹙蹙一弩马还从邸中寝用是毋援者得云南之广南守广南故土帅地而又远且瘴甚其郡事皆帅擅之而以一车数舛卒畀守抱印而寄食会省人谓公且勿往公曰陛下幸容我得治私今者饶则往瘠则勿往是我以私报陛下非臣节也乃单骑往至省而邹司马应龙故公同年生怜之每视他郡守缺则以公摄守厯摄云南永昌姚安鹤庆诸名郡所至必治办惠威流传马御史为特荐始转两浙都转运盐使司运使公念以天子不终弃我而盐筴臣利藪易涅也巾巾出纳唯慎亡敢以丝髮干者其馭下严而待商恕贵人邮行钱塘若流水公多谢病不见见亦徒手以是不能无小望之而大滑舞利为干没累赃至巨万事发公系治之急走数千金贵人委曲居间不得则走公之乡戚无赖者谋以金赂公不得乃共分其金以污公而故泄其事两台交章论公诏下御史杂治各以轻重就法而公独皦然乃疏白公复官于是尺一复蒞下矣公辞弗应客或谓公向者倭行而宦不毛之地不辞今者五盐筴皆善地一移足可得而齷齪守此蓬蒿何盖公故居之在乡者毁于寇三畝之宫移郭中而茅弗剪客因以风之笑曰向者受之陛下今者受之我且夫贫固士常也客乃愧谢非所及公故有污莱田乃稍修治之以其羨资其弱弟妹与仲妇之孀者咸有树矣为人质直无他肠初见若落落者而久则洞彻底里喜食酒所召无不赴客至即留然觞豆取属厌而已不蕲为腆靡性俭素一复陶十年不易白蛤轻裾轻刀敝鬻尚羊于湖山间遇者不知其为官人也守令干旌及门间一报谢不则毋敢望公迹公既无意用世而世亦渐以故事待公凡两左者十余年而以微疾卒时万厯之十一年癸未也得寿六十有七公初无子而其后侧室某举三子皆韶秀能读父书长应列聘光禄监事魏希平女次应聘聘孙太学生士珣女次应某聘乡进士周诗女女一许李某嗟夫世之轻弃葛公者吾所以为古道则夫不竟用葛公者何也是不得不归之数矣铭曰

士急进而公独安退士贵少而公居然前辈处不违俗出不媚世嗟嗟我不悲公之逝而悲典刑之沦弃

中顺大夫提督山东学校按察副使吴门袁君墓志铭

袁之先汝南于东汉为最着姓而转徙江左至明而有福实者四傅为承德公鼎始以行谊高雅游大人人生四子曰表曰褰曰褒其最少者曰胥台公褰与其伯父之子袞袞皆用文事显名吴中时人目之曰汝南六俊胥台公举乡试第一人廷试射策复二甲第一人读中秘书仕数起蹶为广西提学僉事仅四十而挂冠天下称之娶马宜人寔生君君生而警颖异常儿五岁胥台公口授之书輒诵十岁而经术悉通晓为举子业又辄工胥台公爱之曰是儿也毋但箕裘即诸父不任鞭弭矣而君念以举子业不足竟丈夫事乃益读子史家言胥台公悯其劳而禁之则以膏油续明而室其旁孔啜嚙竟丙夜唇吟舌计胥台公不能知也已又时时为古文辞胥台公间得之益爱之然不面有所奨借十六而举茂才异等二十一而荐应天试是时余少于君三岁亦同荐其读书不能当君之半而相慕好明年君与余俱不第又三年君独不第而会胥台公自岭外归不能无忧馁颇拓南畝夺君书而俾以岁时行按场媵核租税及公私费君不废书而于农事亦精顾其大要多所贷纵以为德用是颇失胥台公指见督责则唯唯谢过而已亡何胥台公卒独君一子而有三女继母文太夫人在君尽出遗橐割其重以治莹域广封树具礼而墓之乞诸名公为志铭传表已梓其遗文已又梓所著书而余橐自奉文太宜人外悉分贍诸女弟毛髮不入已既除服则益尽读古文诸书国史掌故以至稗官巷语夷坚虞初之志无所不该览对客抵掌谈说世务得失地理险易兵戎利弊娓娓不休若忠孝谊侠击节而赏叹泣数行下时吴中名能执文者文待诏先生最为前辈名家而王禄之陆叔平彭孔嘉黄淳父周公瑕及待诏之子寿承休承其最少者亦视君十年以长而君以名家子游其间咸折行而请友君执礼自抑恂恂不敢讲钩敌顾于禊社祖道分管授觚独最先成不少让君于文喜详明于诗喜畅丽而好宋景濂高季迪二子其着撰颇得其紫不徒慕说而已也性善书书亦在能品他方慕名之士造请麋至征逐宴赏无虚日君亦富精力能斟酌应之以故虽久困公交车间不为落莫其后文先生卒而余兄弟罢官归又益以张伯起兄弟君去余家百里而遥然岁必三四还往还往必隃旬日相与泛石湖登支硎上方灵岩天池邓尉诸山必穷日夜而后别觴笋谿浪七之倡和三之自以为天下所快意毋胜于此者余既废忘世事窃意君亦厌之而以其间治经术益精当其屡试不利时尝有识而欲置之首者为主司所抑绌君不为阻自嘉靖之癸卯至乙丑二十二年矣而君复应试其业精甚得之者复欲置之首而主司时为少宰新郑高公读而微疑之与陈赞善栋卷相叅曰且少让彼而又以同经故得第六人高公者故受知胥台公主河

南试拔之于童儒而置魁选高公既彻封而知为君大自恨曰我何以见先师地下哉客风君且私往必有以报君者竟弗往也已射策高第肄事都察院当选庶吉士院之长材君而俾应之君弗肯匿年谢弗应曰吾敢为一官而欺吾君选得刑部某司主事时高公已叅大政乃修通家之刺于君君报之为忘形好且寄以文事而是时鼎席意相左交接为胜君不乐其事乃疏请南得南之礼部仪制俄调考功君再得闲曹且清贵而予弟敬美寔代之相与修吴中故事为燕矾雨花之遊觴咏风流脍炙人口第君不以闲曹视其官虽胥史出入请假满役一切斤斤守功令而郎中为楚人李君自久废起好讲学大槩欲多所纵舍以见恩而君持不可李君前辈欲有加于君又不得而会大察吏君复多所可否李衔之甚至为浮言中君于尚书吴公所几信之然时论方重君莫能点也李君迁而君代为郎中夷然无所修怨通考满三载胥台公与二母皆予告身又二载迁山东按察副使提督学校君历奉仅五岁不当得副使得副使而提学又山东资与望皆美前是高公以君乞南谓遠之不能平而君中以世庙晏驾奉香仅前从朝堂望颜色不交一语高公之再起兼握铨柄势张甚君益畏自匿不敢望之而高公忽擢君以报胥台公识者谓君正而高公厚且皆近古始胥台公名君以尊尼而字之曰鲁望君至首谒阙里孔庙徘徊于庭庑松栢之间若有所覩见者慨然欲修明正学以诲迪后进崇雅黜浮敦尚行检凡所识拔后皆知名君既持宪体不能折节事台使者性尤公廉不发私书而一大僚欲庇其邑庠生无行而被絀者十年而薪复之君不荅大恚君为流言中之印马梁御史于是梁御史以大察论君而巡抚傅公亦应之然不能有所污蔑君即束装待报境上而是时诸举子出君门下者哗于朝谓柰何夺我师而葛端肃公守礼方在事言之诸公曰数十年而仅见此袁提学胡言之易也于是君独得供职如故然君去意动不可留上书请告归归即病瘁亡何卒时万厯甲戌之四月晦也当易箦时谓其壻张尚友曰无恐怖亦无鬼神独不免肺腑间痛耳遂瞑君以嘉靖癸未生春秋仅五十有二君为人朗洞无城府当其酒酣跌宕隕唐时若无不可驯狎者而志节耿介不苟取在公交车最久而居恒絶官府迹尤笃伦理善友谊称力而施所周恤甚众乡里有疑事取君一言而决其理家政最为详明出纳琐屑无漏而不喜置田所遗产悉鬻之而买郭外市租岁入不能田之半人或疑之君曰吾非不知其薄取易办而已余兄弟与君善最服其寬平而自其得转山东归沐里居顾邑邑不自恠且多躁忿小改其度余甚忧之盖不再岁而死问至矣嗟乎以胥台公之才名满天下而寿不及下秩不踰五君皆有以隄之然至所谓立功一时而垂言万世天下之所期君父子与君父子之所自期者皆未尽效也语云长算不如短造岂不信哉所著有诗文集十卷礼记集说正讹百篇藏于家君娶故乡进士劳君堪女封安人明达有内助功君卒时亦仅一子曼容尚幼而乃有八女其女之归邑庠生张尚友毛文炳汤之臣华之雍太学生徐殷锡及吾从子王士驷者为劳安人出归陆士谦屠某者为侧室某出余怜曼容孤许字以少女盖又十余年而曼容长谋葬君于南横山寶坞大池之上祔胥台公之兆而以公瑕状来请志铭台公瑕余寧为不悉君者铭曰

明兴父子相继而视学政不能十数而独汝南为盛其古文辞亦自足称父裁而奇子畅以正南横之址虽偕长夜而不即瞑何以故其骨虽朽其言彪炳

征仕郎吏科右给事中云峯许君墓志铭

嘉靖中余守尚书郎而许君成进士故同乡举相善也一日君就吏部选人当得令而分宜为大相里邑尝谓其故令之在事者曰为我择一快令何若而其人亦与许君同乡举仓卒对曰择快令毋若许君许君许君他所不知贤于故令十倍大相悦曰善请得事许君而许君始闻之蹙额而语予藉令一大都会困我请悉铅刀之锐又不然而箠箠胼胝以从事不毛亦甘之吾不能馱靡受舍人儿约束也予笑曰固也如子言分宜当遂无令许君乃悟曰吾知令而已吾何知相国既得分宜之亡何而大相来寻使其子侍郎来输款诚必不以私累下吏君报谢则合乐大飨奉觞为寿君乃稍自宽又以久困徭习吏事至则钩校宿弊驱奸猾若洗乃稍稍用宽平剂岁比数不登君尽发赎醵以赈不继则益搜库庾之伏糶粟量口为给而其中产之当赋者请于台易以轻资邑大称便诸流徙亦稍稍复君念赋不时上吏因而有所干没为总规破之吏惟有手束旁睨而已邑故多山易藪盗君严保甲法盗无所容迹屏逸之他邑曰人人令君耳目不去悉为鹵矣邑事既就理君乃以其间饬学宫创社庠时进诸儒生讲说经术彬彬可观大相父子以汰闻天下顾独贤重君亟戒舍人儿毋蹈三尺使我愧见许君又为游扬之公卿间以治行高第征拜户科给事中君甫至大相子为治舍馆刍水咸饬又时时赍豚酒前为寿君自叹彼不抑意拊我我何以展使我舍而成伉直名则市道不祥以故小见洽而是时漕河为县官脉岁所不能致者至百余万石君条十事上之大者如蚤会计理纲艘疏壅阂杜常例革冗役清收纳皆凿凿可施行其时不能尽用君语然漕计稍稍振至万厯初推行之利至今辽阳大饥势汹汹叵测而饷远且阻险君请发东齐三郡粟募民舟予直浮海饷之所全活不少是时君姿言事辄报听公卿间争目属以为任大臣器而忌者固已睨且摄之矣会丁其父同州公丧归甫庐墓而江以南岁亦大侵抚臣欲上疏请蠲虑触大相讳不决公慨然曰民旦夕殍而吾敢以服辞夫范希文寧非人也因具述其阽危转徙状为书数千言投大相所抚臣继之疏乃得行服除补吏科进右给事中而大相败诸有连者多从坐之君给事中前后虽五岁居忧得三之二其所与还徃自酒食外无几微迹亦不免矣君归颇拓傍畝大起第宅治园圃益蒔花木召故人宾客日酣饮啸歌其中肴酒胪次芴泽狼藉穷昼夜无间居恒谓吾不能如柳柳州以文章振蹶阨然何至尽取其牢骚侘傺无聊之状而寓之文自雕琢其天又示人以可怜之态以冀收复吾有所不屑也因名其园曰养余园之堂曰遂初而属余为养余记余间风之读佛书则时亦读佛书以为快而不能持久其对客绝不挂口出处间及天下大计或古之豪贤不耳热须奋不

止也识者盖悲其志云君讳从龙字伯云号云峰其先自嘉定徙而赘昆山以诗书起贵遂为昆甲族三世祖承事郎翊傅南京驯象所吏目襄襄子同州判官封文林郎志学则君之父也君少而颖警驯象公内奇之及长而俾受吾族人光州守汝懷易且成而同州公久宦游驯象公又老不任徭君时甫冠即挺身出曰人少我而老我公其若我何日从羣胥杂沓庭中意气自若至于钩校精密指屈心计不爽铢寸昆山故剧邑也君得以尽其状以故其治分宜为户科言事若发硎刃讎然而破紫当是时人意君必废勸故业故以其间精心习之至取科第而始叹服君之材与志也其治家亦緣积习为操舍虽至饶而不橐于官闾无后声性至孝其奉驯象公而同州公遠宦则一切如同州公同州公得老君奉之复如驯象公最后事母钱夫人犹斤斤笃至衣必取柔细者食必取甘脆者夜被酒至深归必拊床而叩安否即盛怒欲有所按责闻钱夫人履声辄扶拱使去钱夫人之八十而君亦已六十汝愚制彩服衣君傴傴舞中堂奉觴为寿贺者至倾郡邑尽废其橐弗顾也更二年君卒钱夫人尚健无恙云顾太史绍芳者君同年少司马公子也善乎其状君谓君天性刚直不可下然不为城府徃徃能屈而受善言以是遗君之外而信其衷不能腹藏人过语刺刺使人腔赤然务以情相许有难则排解之若一身以是忘君之忤而归其厚待诸父恩礼备笃即姻党缓急叩君无弗应故人子以田售君倍直矣念其母老割其半予之买婢而知其士族嫁之如子女嗟乎士固当论居平行谊即有能抗白简擊权势者不胜盈而轻弃之亦安能以一节据君上哉君之始所蹙额意固不可谅也藉令大相父子鱼肉其邑人若雠天下君必持之持之而因以得名亦反复手耳夫孰非数也君娶于俞封孺人子男一即汝愚太学生娶梁氏女三一适陶子传其二侧出字叶某周某孙男二椿龄县学生娶王氏椿芳聘顾氏孙女二长适顾留余次字郑某曾孙男一孙女三汝愚与椿龄皆以文行能世君业盖公歿而汝愚将卜地已而伤之曰柰何使吾父泯泯地下迟之十余岁而始谋葬以太史状来请予志铭予既许之亡何而汝愚病以至不起椿龄兄弟乃更卜得吉壤遂为力伸前请以葬之铭曰所不尽究者用所不尽伸者志所不可论者迹所不可没者气噫嘻吾老于倚伏而后知必然而因者理适然而成者事君其归于是即安于是

前翰林编修文林郎含斋曹公墓志铭

曹公以万曆乙亥正月卒而是时有二子而夭其幼子犹未及龀也而家旁落于是公之俚王孺人拮据而持之得以无废而又八载辛巳乃始克谋葬公于南州之旧阡而遗孤弱不任襄乃俾其壻于生斗聯以云南守张君祥鸞之状而用币于不佞焉以墓之志铭请不佞故善公甲戌冬仲有郟襄役道仪真而公凌大江犯阳侯怒而舟访我且酒我忽泫然曰会得无尽此乎是时公已病善嗽痰皆作五色而酒至辄醺又能细语邸分夜不倦盖别之未几而君讣至矣不佞与于生言及之而以有文戒辞生固请曰治命也

子与我公善而遽朽今如大江何乃为志曰曹公讳大章其字一呈而别署其斋曰含皆取章义云曹之先自晋徙而居金坛者数十祀遂为金坛甲族王父将仕公起赘以豪称里中父即户部公有材畧工治生既息将仕业至埽素封而仍用经术取乡试以显其官户部仅司务业已着能声妇曰秦孺人寔生公少而奇颖骏发户部公试之文数千言立就而不尽受经生束十五补邑博士弟子它弟子则束管避之矣户部公既得官爱公不能舍为携之京而入赘补太学上舍十九应试已中程而主者误阑入它卷乃罢公始好朱文公先生全书而越人周生士佐方罢公交车公数从之游尽得其所受王文成先生学而叹曰世眼自龊龊岐径耳道固亡两也取以剂其文文益工而最后游南太学当试论君子贞而不谅公为说曰君子之道易道也易之干曰利贞至坤而曰利牝马之贞以此知贞者易也随时变易以从道也公于辞既奇而所创说不恒有祭酒程先生文德始读而骇之三复则心赏曰孰谓此子所受非易也而精易理若是举以冠试者亡何遂荐乡试寻丁户部公忧庐于墓墓近故王樗庵先生煜里居暇则羸服过从益相与谈理性之学醇如也户部公之起家或不能其乡有乘公丧而侮之者以讼构守价守价鹜吏欲以缙绅立名而持公甚急它小猾猾起公殊泰然曰若曹非有讎讎我度吾力所及以饱若欲何似则遂解甫事解而计吏期迫与车驰至燕中人或谓曰外閩嗣内忧而起不媯女乎今所余几何公指其腹曰不病媯也念无可以藉吾笔者行之市肆购眉山氏全集而悉读之曰吾知藉矣既试而其文沛然司试者得之惊曰岂为眉山氏复出耶遂擢居第一始公与周子游而周子之会试得第三人第一者为吾郡瞿文懿公而廷试复第二人公心实艳之故为壮语曰彼不难代也周子见公文而心折曰毋若汝之易周郎何代瞿公诚不难公之廷试而亦复以第二人及第授翰林编修如瞿公公妙年美风姿而又以名高天下争欲读其文而识其人然竟以秦孺人忧归矣公之荐于乡甫宴歌鹿鸣而有惨沮色人谓公得无小憾名第耶公谢无之第怦怦然心动耳俄而户部公之讣来至是而惨沮色如故谓人且讥我忧乐我实心动隳于昔柰何会秦孺人讣复来人以公为孝感公归而守价犹在郡大悔请得洗心交欢公诸讼公者惴惴谒门下亲厚愿返所胁赘以解公笑曰去之吾不记而何人与何事也服除补故官入授中贵人书寻分考会试所得多知名士而是时天子方修竹宫祠厘之事三相国所上表颂例以属其寮独公具草佳甚而分宜相时当揆异之谓其藁蕃曰是才子不可失也蕃乃谬折节与交杯勺间过洽不无生棘矜而又以公富有所望少能满会公故居苦时积病湿而蹇予告满三月蹇益甚请归就医药江南公归而蜚语入蕃遂坐考功令勒致仕矣公念已废不复收而家有户部公乐天园益规侈之为楼阁堂序亭榭之属旁购奇石列名卉嘉树水竹映带有若天造又于城南营别墅包络原垄瞰山临湖极东南之美少别音晚而益好之所蓄百金子以十数时时度新声使合丝肉风日清美画船载酒遨遊穷尽日夜不倦逗响遗泽于柳烟竹月间望之者以为神仙或若五侯四公子而公为人豁达无城府其急客甚于己客亡论名能文章即被一伎者得因所厚鱼贯以进其黠者至或遂掺公乘而颠倒

之卒用是累公故尝中盗盗持公金去寻败而株及扬之富贾窘行千金公客以间事闻御史名捕客客跳以是劾公坐削官矣公夷然不屑曰中盗不已中文罔宁非天耶我何忤为而公既失其二子后有所举而美以是益自快即家旁落亡问也公不恒视书间有所视辄诵亦不恒操笔而语即出人意表又令左右时奏伎或诵俳优小说蒲博諠笑闾杂而于语思益竒既病别予之月余为嘉平臆而家人问之则屈指曰吾不死吾于孟春之二十四日有它出耳至明年上元夕寢然剧犹冯几顾灯火而乐之谓家人曰吾安能不死犹未也至二十四日定死耳及是前一夕呼盥栉衣新衣危坐浹晨翛然而瞑呜呼世自以世法少公耳公宁可少耶盖前公之一甲子而江左有钱太史福者两冠其南宫大廷试制科业脍炙于衿裾之口迄今而其偃蹇仕路人或以公拟之钱固佳士然以公拟实非伍在古若徐君旧武平一李白之流而明则武功康太史海庶几焉若乃藻而不绩乐而不淆播弃而不怨非达者能之乎呜乎出不必有为生独无所自哉公之生以正德辛巳寿五十有五前有子二诸生祖见娶史氏祖闻聘安氏即所谓材而夭者也女一其适即斗璘为太学生皆王孺人出晚举子曰祖鹤聘故御史胡濬女公诗文多佚而存者若干卷斗璘以属吾弟提学懋序而行之铭曰

骤贵公而忽挫之予公名而中流之夺公之二子而偿之一子以为造物者叵可测或怒而或喜虽然坦而俟之胡弗容浊其迹清其中以顺受以治终不知者谓公如造物何知者谓造物如公何

弇州续稿卷九十六

●钦定四库全书

弇州续稿卷九十七

（明）王世贞 撰

○文部

△墓志铭

中奉大夫广西等处承宣布政使司右布政使致仕五华李公墓志铭

呜呼是为致仕右布政使李公之所藏魄而世贞志之李公者讳淑字师孟以家五

华山之傍自号五山人其先为西平忠武王晟裔不知所自徙徙江西之吉水数十传而转徙楚之景陵曰公高祖洞渊公九渊传朋玉公珏有子曰南台公景瑞得公封河南左叅议公以诸生荐乡试者十年成进士拜工部虞衡主事稍迁营缮员外郎都水郎中出佥浙江按察司事调除山东甫上以母杨恭人丧归久之始复除山东遂叅议河南迁山西按察副使浙江左叅政晋山东按察使转今官以南台公老上书乞解所居职侍养者垂八年而南台公卒公不胜哀属疾久之亦卒时万厯之辛巳正月二十九日也得寿六十有五公所受室曰王夫人其继曰陈夫人盖尝以公叅议秩封恭人矣复以子维桢考史官最封而从公布政秩称夫人维桢者公长子也而举于贰匡乳于梁弱冠成进士高第累官国史修撰提学副使以至河南右叅政娶王氏为嘉靖直臣宗茂女次维极举己外娶徐氏太学廉女次维柱次维标俱举丙子其娶吴氏陶氏为儒官希元袁郡丞之肖女又次维楫邑诸生娶夏氏为贡士宗女女一归诸生魏实秀孙女二未字维桢之状云尔世贞读而叹曰于戏盛哉士自致其分于君臣父子间未有能不纒憾遗者也其在我者十而五其在天者十而五是故有顺以际有拂以成要之不两兼也兼之自李公始公之奏南宫捷也江西重相严曰闻楚有才士李某者吾乡人也能一见我乎公逡巡谢弗肯往以故当射策夏太宰邦谟竒而荐之鼎甲相严固下之然于选犹得虞衡而榷杭州税则日坐堂皇别出纳庭无候人外尺刺不入内三尺童子屦不践闕外大要以破窥伺而为缓急重轻者比公满商旅拥车阨道不得发士大夫之觞相属也故事郎自榷还谒相严则谒其子蕃谒必辇重而后得志公第以两吴嫌往曰小别于徒手者耳蕃左顾唾而却之以是公为郎前后积且六岁而仅得佥事然竟不能以考功令中公公之佥事时倭寇方躡浙靡所不垒而公以一书生当其冲顾■自奋曰此非丈夫毕命时耶台告急公以督府檄提轻兵蹙之吊崩山生获酋渠薛柴门三不郎等数十百人余溺死者亡算而会有言矿盗聚徽处山中阴为倭内主督府檄公移兵取之公持不可曰饥氓弄竹筮自救死耳寧能越重岭作鲸海■〈门外田内〉耶且此可抚而兵行籍开化十余大姓能得盗命者责而贯之俾食盗而官稍继其匱更为约曰居恒不得颂共系若即缓急为县官奔命其犯约不如约者皆死贼尽降散后颇收其用而幸臣赵文华者故亡頼家慈溪里里人藉之挟相严重而来视师既以谗■〈石宅〉死两大帅张甚藩臬长吏郊迎惴惴恐后而公独谢病弗与而文华乃间行归慈溪慈溪故公部公至而曰彼吾部人也文华则曰彼吾属也居三日邑令相交关始一还往当是时公城慈溪甫半而郭居者贿文华请广之不可乃置酒于城外之某山使人射矢及城睥睨曰城易及矢乃尔柰何公则令人以矢从它山射而至酒所曰益城至此不能使矢无及也文华色变罢酒已又迫其邑令使徙類宫公复不可会公所获吊崩山酋渠当上功幙府文华遂攘之公仅得赐金帛而嘉善令犯奸赃公庭笞之束以诣吏御史令里姻也欲缓令不得愧之则以蜚语劾公当调公归而文华入■重用事而公故为郎时御史宗茂尝上疏极论相严罪状坐贬御史之父方伯公入贺居停公邸舍饮食卧起如家人亡间相严与子蕃闻之弗善

也乃趣通文华间谍削公籍而公既已归无可以媒孽者而文华自以它罪仰药死得解公顾为维楨委侍御女禽或谓不难时忌耶公笑曰夫侍御者而岂名在丹书人也人亦卒莫能害而公之始补山东以不及奉杨恭人终自恨服除久之不肯出南台公亦以老乃日趣公曰乃公噉肉跃马逾少年若不以时仕宦庶几俺得金紫被我而膝下作啜哺儿女子态我何用余生为公不获已勉出自是始复成宦矣公之再补山东治兖东部中贵人护景恭王丧还所至撈笞邮传吏胥货至公部相戒毋敢犯郡国举衍圣公孝而顾与族丈人闕公曰己之孝而犯上乎即抗三尺弹治其舍人子纵暴者曰而祖吾师也非敢以薄报欲以全而令闻也衍圣公为服居顷之乃拜河南命公愈自励有声天子覃东宫恩得推荣所自而公以姿被旌应格南台公封如其官趣命荐金绯而顾左右曰强儿出当笑我今定何若公署司篆而御史以国赆故括藏金欲尽得司藏金公持之曰诚不惮泽竭即一旦军兴尺一下谁任责者而无何有寇警汴兵当入戍赖公所持赢金以济南陵王薨御史录其家财且百万公复固持之曰王何罪见藉且柰何以目前利夺人主亲亲恩御史恚甚具草欲论公沮挠而公有山西命复竟解公之治山西而时所尚裁省业已尽削邮供而驰传者不止邮人困则相率逃徙公请无尽削而止诸滥驰者得毋逃徙更以其羨供邊不乏公又言戍蓟于天下征兵不便征晋兵尤不便凡十余条着于书晋人称之寻监试事所得多知名人其叅政治为浙西公至是三游浙悉获其吏民情实咸以为神明比迁山东而送车数倍于榷税时也当是时诏复浚山东之泲口河而公时在议独身先藩僚行橦■〈控，毛代工〉中得其窾力以不可复报获寝甫半岁有广西命便道归省南台公迎门谓曰视吾貌与曩何似公念南台公虽健然已八十今幸而尚为吾有卒一旦不可讳柰何则数请于南台公会有失媵之戚亡赖于食寝而后许比上章天子犹难之至再乃报可礼数视大臣公自是始复称子三时视滫瀡必腆暮则布席于榻傍中夜候喘息稍失度则彷徨走医药既病口含饭舖之南台公曰向者见若之奉若母及我吾以若壮安之今老矣去我何几而自劳苦乃尔公谢曰吾不能毕效于老母今犹耿耿也儿在安敢一息懈盖南台公歿而噉跳犹婴孺其歿也病寔自庐墓云呜呼公不爱其身以勤君父数蹶数起卒用忠孝终天子之急公与南台公之欲急公用甚于公然公进而不夺其才退而不夺其志其卒底公于忠孝者天也夫岂唯兼之盖亦两相成哉公性不好名高顾于为德不一所居必先存问高年旌异孝子贞妇侠烈士急之若失它中表戚族有窘而不能存者割俸以贷至再三不倦同年高伯宗卒于景相亡子而里中见侮者强公遏之力曰吾知于伯宗何益意不欲遽死之耳慈溪冯御史者公所繇乡荐者也按河南而以行宫火速至郢被杖公夜橐餽委身血肉间歿而调棺殓行服如子弟闽人林叅政倾盖而成莫逆其疾与其死也资力皆于公乎取林且死曰畴谓吾终鲜晚而有兄董侍郎元汉为主事以论亂相严戍过公治公不逃诸寮睨自出尉抚之觴行酒橐行金元汉为忘戍也公时时屈指言吾德于人毋论度德我者谁何我能报之者何若必满意乃已公性既好施而尤不苟取其自山西入贺万寿台司为治装皆弗聽

所受性耿介不独于重相幸臣见之即天下所指最贵而贤者于公乡人且通家也公亦自爱其一姓名札弗肯通生平端谨重修容虽盛暑不裸袒隃三十始得维楨诸子而才甚爱之然未尝示以少狎色诸子亦亡敢以狎色若华服见者里中固善公严事公有冠虎计欲公廛室麇集恶少数百人来蹋公第门椽瓦立尽亲族不能平倍其众谋为公报公止之曰诸君幸怜我乃欲为彼所为耶中丞赵公汝贤高公行扁其门曰孝廉公谢弗敢当度置之室而已公少即以艺文着其应诸生试亡弗衰然首者门生执经请质屡恒满或贵而叛之不欲名公经公弗与校也家藏书万卷手校讎若新居不恒作诗文有所作必清腴合度得集如干卷而秘之以对客若不尝御觚墨者呜呼公之严内行务为长者若此天报之以令名若令男子其所两相成宁独忠孝已哉世贞既已志则又曰余与李公于郎署时以文字通云监晋试而幸偕公公又代余浙西事相慕也最后访公里与觴空山女岩洞间北眺汉江南挹三湘而乐之酒酣指顾韩山道今公实葬其下夫岂偶然哉今夫江山之所环汇其炳灵秣深不发于人不止也而公父子实当之呜呼公已矣其即安于兹矣所以继公志者诸子耳是故为之铭曰

惟楚有材璞则良厥肤温如内坚刚以陨自矢弗改光三刑乃荐登荆堂或刑烧之完弗伤割而瑟瓊黄流中以飨岳伯暨河宗用之未竟楛乃藏厥产瑶琨璜琳琅一一十五连城偿帝锡女棺韩山阳孚尹上烛辉天闾嘘为虹霓喻汉江万岁千秋夜未央我裁铭诗与俱长

奉议大夫河南按察司僉事省庵黄公暨配毛安人合葬志铭

嘉靖中相臣严用事欲以重摧天下之士大夫气而不尽折其触之最显而祸最烈者一人焉故兵部员外郎杨公继盛其以隱故不及发亦不及祸者一人焉则故按察僉事黄公元恭皆余所与丁未成进士者黄公名为不及祸其中谪以武库仗忤御史最后罢以计兵事忤都御史有白简然皆自相臣发之而天下未全能悉公余独能悉公而愚弗获阐至公歿而始以其子静存之请而志之元恭者黄公讳也其字为资礼黄之先由闽着当宋而殿中侍御史龟年即以论劾其相臣桧得罪贬播于鄞遂为鄞人七传而为邑博士传提领琇以下多仕宦然不能通显至姑苏驿丞驥用仲子礼部侍郎宗明最赠光禄寺卿赠公之长子曰睢寧令宗钦则公父也娶于周安人而生公公少工属文弱冠遊郡庠前后见重于守举乡试明年绌春官又三年始登第授工部营缮司主事公为人伉爽便事有遠识然不肯屈下人必欲达所不可而司所当乃内官监其最贵幸者曰高忠多从其侪伏匿工匠虚数万计第以一纸来需直若既廩公谓必得其名代与人而后给之忠不可公遂上疏具言状且发其它奸私诏聽工部核寻会诸中贵人以皇贵妃丧从之陵寢故事人为席庐裹楣柱以帛公曰此一日事耳而耗县官帑至此杀之俾数人

共一庐斩茅覆苫而已中贵人恚甚羣约俟公入临甘心焉尚书知而它使公以免然由是心敬公而虞公及一日司礼大瑄以诸曹之疏下公当入领故事领疏郎既受疏北面揖大瑄以南面报揖公谓疏在若手犹可既授我而南面报揖何也且在顺门上所恒御岂而南面地竟出弗顾大瑄恚至贾其党以恶语侵尚书曲为交關始得解当是时天子虚已委相严而相严私其子蕃垄断天下赂而故给事中沈束以色忤取所疏语激上而辄之缇骑狱公时时为橐籥司其出就漱而酒食之与饮泣慷慨论天下计遂草疏言皇子长不早建立毋以系人心杜窥伺今令人主孤立而股肱之臣日阿谀为禎瑞祠厘乘间鬻陛下威以实私橐不蚤窜僂之天下不治疏已从公交车上而公出就舍谓其妇毛安人曰意小浹可庭饮我月中既饮而徐语古直臣烈妇事娓娓已进白酣起舞曰吾为直臣易耳若能烈妇乎毛安人者邑之着姓也微而贤其佐公读书微时甚力卒不知所谓第唯唯而次日微闻之乃大惊尚书亦左右顾问强项郎安在或曰日挟疏往之公交车矣尚书曰喟嗟此必有所为也亟呼公而诘得其实乃曰胡不以關白我公对曰關白公例尔而疏当不得上也尚书气咽垂泣曰事故无济理若不有父母且老哉而一旦以死忧累之孝子不当如是也公语塞尚书乃使同舍郎与司礼善者追而毁之然其事则已寔闻相严矣尚书者文公明故廉臣居无何而卒公以满考授承德郎封睢寧公如之毛与母周偕为安人寻迁屯田员外郎大敌忽阑入塞薄京师议大修守具它曹郎往往以不及事见谴而独取公仓卒办公尝需絢于内官监而诸中涓皆难之高忠问知为公曰亟与之彼强项郎也往者疏绳我使我至今廩廩当是时尚书倚公重而故相徐公时以大宗伯用事时议帅帅且属徐公徐公曰使我一日帅者安能舍黄生上佐也而公受命行视南郭址又筑卢沟桥皆立以成事告然皆亡能名其功者又以同舍郎为相严客而恶之一日酒语曰若何蒸食哀家梨客夫已氏门将不与冰山并铄耶相严益恨之会曹御史按视武库仗使劾公与同事三强项郎张侍郎任顾布政言张副使元谕俱谪公得判漳州府而不佞以断决江北狄方舟而下尝为诗壮公论中贵人忠事它郎谓不佞不知公之有相严草也公笑曰为直不竟何问为于是漳多偷公职干擻而隶人老而黠尝纵其三子偷而身为之耳目者公廉得状屏左右诘之曰不与我偷名及舍址立碎汝首隶乃蒲伏吐实公戒勿泄而月港之偷尤甚而皆匿迹耕公乃伪为约曰倅以若区多伏赋来聽析诸偷来聽析按籍悉获之亡漏者三月而获偷一百曹它巨盗亦次第禽如课寻以睢寧公丧归始公归自诵念睢寧公老不欲往故强之往而至不及斂以为恨毁几死然至服垂阼忿倭夷之讐我乃着蠡测海警车步骑三陈法屯田议盐筴驭将诸书故赵司马孔昭谭司马纶时治越得公书而异之与计兵事大称服曰公儒将也服除至京而有举公给事御史选者以非例报闻徐公时为亚相欲得公兵备其乡扞倭而幸臣赵文华以尚书出视师为公乡人请与俱至军而谓相严之子蕃曰此郎狠而习倭事冀百一得其益不者司马三尺治之易耳蕃乃许公以故倅从军公行遏贼于丘家洋败之然不肯数赴赵期会赵乃檄公解通州围而夺其兵公曰此欲法困我耳会背疽发狂归

卧湖藕花居赵奏凯从诸行者封拜过望而公仅加俸一级迁南兵部武选主事进武库郎中亡何以按察僉事饬颍州诸郡兵备公之颍甫三日而倭围扬州急都御史李公遂檄公来援公谓凤阳仁祖陵诸宗室罪人子皆寄郡郡大而无城郭可恃贼万一谍知状以轻兵走薄我祸不可言于是恃便宜不以时发而修治凤阳战守完乃始提兵趣扬贼已退而公用周安人丧归矣李公大恨公劾公逗挠而相严从中下罢所任公叹曰天乎吾以长算益李公而乃恨我身退不复收矣既除服日取唐人诗与晋书迹存者摹讽之以故词翰翩翩得其致而壮气时一溢不自禁慨然作盾鼻磨墨檄匈奴语荐绅先生有识者亦雅望公用而公属末疾以至不起矣公归之十四年而病病五年而卒毛安人之事公以俭勤深谋闻所至耐宽公忧而公既病则以一身尽寄之而安人忽痛发于乳公深以为念俄公先卒而安人不胜悲思痛寢■〈谷丸〉后五十日而卒时皆万厯之庚辰也公春秋六十有五毛安人损其一有丈夫子三人静存娶全氏操存娶杨氏俱太学生安人出仁存娶蒋氏侧出孙男女十人婚嫁多名族余所谓悉公者此耳而静存之状又称公性至孝能事其兄光禄君抚其弟少府君有恩礼割帑以恤女兄之子所馆穀及殮葬师友族姻若而人而皆毛安人翼成之于法得附书铭曰

明有直臣而弗究直疇者抑之以私见德明有材臣俛用而厄疇者厄之以公快臆归为完士于汝则得斯人斯疾天亦罔极赤堇之精闕而弗液后千百年有虹其色

朝列大夫福建承宣布政司左参议笔山曾公墓志铭

始余入为刑部郎而同舍郎吴峻伯者间与余屈指天下士而曰有曾公日宣者其人哉问所以知曾公则公尝识峻伯公交车者也盖又垂二十年而与公之子孟麟遇燕郭招提中公歿已五载而孟麟时语余曰敢以先子之不朽属余谢曰无己有峻伯在是而公所知也亦能知而公者也其明年而峻伯歿其又十年而孟麟具书状以介弟嘉袞走二千里而拜余山中曰为先子卜壤而弗兆以偃蹇至岁之辛未而始兆也乃又不及志铭不幸失峻伯矣幸吾子在而以十载之成言请其大颺之不朽余又谢不获辞乃据状而志之公讳烜日宣其字尝自号曰笔山故亚圣郕国公裔有自武城避新莽而迁庐陵者为庐陵人明兴有仕黄守而家者其名文遂为黄之麻城人四传而启以春秋魁其乡得犍为教谕用子大有贵赠邑令卒而祀乡先生社仲子凤陂公大显由进士拜给事中尝廷劾中贵人瑾拜杖谪遠郡幕以直声闻天下厯四川布政司参议以卒祀如犍为公凤陂公娶于李举公甫六岁母李卒公出就外傅日记数千言少长工属文从凤陂公宦游慈溪姑苏已又游南都三邦号经术藪而公遂能荟蕞其胜归试于学使者四而四居首张文定公奇之曰是子也材可栋也公以壬午举乡荐明年遂成进士授河间之献令公所为献善状最伙而其大者轻重论罚以穀赎民不病罚而库穀盈县信格募擒巨

盗以次就理里豪有躡其民民愤跳踞树骂豪中之石坠而陨监司欲宽之谓陨坠耳公曰陨坠固当谁石之而使之坠耶卒抵豪死公既着能吏声自负以不轻折节而又念其父鳳陂公疾会御史某行部数目掇之公笑曰彼谓其难去令耶即拂衣归而待鳳陂公融融如也御史意不自得而邑民迫得公争噪于台于是都御史钱公如京与御史合而檄致公鳳陂公乃促公行至则益自励斤斤三尺御史更媿尉荐之矣公满六载始召得南京刑科给事中有言持鳳陂公服归服除补兵科给事中寻复持继母张服归再除补故官迁户科右给事中会当大计京朝官而以公强正特调改吏科公自是益发舒言事无所避霍文敏韬为南礼部尚书疏欲责六科避輦公持故事绳之不以霍公贤重假又尝上书讥切贵臣用事者翊国公勋而其以户科左给事中视京营则直劾懷寧侯瑛罢之矣公所言营务四事若抡官僚实行伍严操练饬赏罚军中至今称之寻转为其科都给事中上将南幸楚展謁显陵二三大僚暨台臣争之弗得而诸给事嘿嘿推礼科礼科之署事者孱莫敢发公奋然曰天子轻万乘出巡幸此寧独礼科责哉乃率其僚抗章谓陛下孝思与大舜媿诸所经画行留亦曲尽矣第太子监国尚属襁褓六飞在途还往疲顿南土卑湿疫疠时起又闻汉沔之间比者无岁编氓流亡突烟时断今清蹕所临法从虎贲供张糗藁何所于措林栖草伏士馁马瘠隱忧诚万万不浅也陛下毋牵一人之孝而忘忽宗社万世书上不报遂以扈行属岁侵而河南馁死者枕道上公复再疏请賑之下有司匿其状上顾左右谓请賑者又熒耶唉殍为谁今复安在会礼科给事中戴君嘉猷归自使慚其职驰疏请上速回蹕上怒甚俾下诏狱以待大驾还并公与同疏者李君逢周君统谢君廷■〈彳 苒〉皆下狱杖谪一时翕然称青琐五諫云而公得广西灵川尉未几迁江西进贤令灵川遠外非人所居地而尉最卑散进贤故岩邑然令剧易困公以贵臣挟重声居之中无所厌薄其治办畧如为献时而公肄暇则缓带褒衣延诸儒生谈推今古不倦俄迁温州府同知中道擢四川按察僉事其政專屯盐方欲有所爬刷而以入贺万寿行既至而贵州抚苗之议起当设一参议驻铜仁控之羣公顾谓曾公治营务亡害非公莫可任者遂擢以行而是时抚蜀都御史不欲言其名以吏科都给事中尹君相谕劾罢去尹君故与公同乡且同署而名为最相善都御史甚望公曰畴入而不为我地耶必是子也齧我者既得代即论劾公以僉事聽调归公归絕不复有仕进意凡七岁而时相张文毅治故善公而又直公以书劝驾公造朝而张公已卒仅得广东僉事公所辖廉州有珠池凡官采珠所役使蜃人死伤不可胜计而珠直不当费十之二大约以利奸人橐而已属期且采公奏记督抚周公延为疏止之廉因以苏公又条上广兵力益战棹禁海舶留守臣诸事于台皆报行而岭右獠有剽库金者公又上防守方畧左方伯刘公采见而心服之曰天下才也而公乡人韶守郑重威者以公事与两监司持不胜遂弃官去御史萧止之不得监司亦媿止之不得而俱属公以解公乃为婉辞解郑始留然其持初议益坚而萧与两监司谓公实右之以语后御史郭郭故抚蜀都御史乡人也忽愤咤曰是夫也后先以乡人重我独无乡人哉会公迁福建左参议行遂媒藁诸影响

事疏罢之公既罢絶口不复及所以唯辟园池召故所善为文酒欢务为德于宗戚邻里而已汉阳一司理来署邑篆榜荐绅交际礼于门屏公叹曰以吾从大夫后哉谢病不复通而司理满三月当代客或有贽公文以饒者公曰司理日约束我曹而文谏之得乎且三月政成胡易也司理闻而衔公构于上官熟察公居乡状不得而止公性不食酒无奇衺好自奉若儒生所旁通星卜堪輿家语而尤喜治博士书至老愈笃其为给事而与会试事典史而与乡试事所得多知名者公年七十三一夕以无疾卒元配喻赠孺人继配梅封孺人丈夫子三长即孟麟初名嘉裔太学生娶于刘故刑部郎中灿女次即嘉衺庚午乡进士娶于汪金华守文渊女又次嘉懷邑诸生娶于周琼州守思久女女四其适太学生万一唯邑诸生刘守巽锦衣卫都指挥使刘守有太学生李承祚俱梅出也孙男三汝鲁邑诸生娶于万汝弘汝确孟麟出也女一嘉懷出也葬在萧园之祖莹状则吾郡王百穀嗟夫父子更代起甲第为諫臣以諫获罪而名俱趣之不亦甚奇哉夫鳳陂公之諫犯所必不可犯之人而公之諫挽所必不可挽之事此未有不立陨者也然天威甫震而霁继焉犹获以一官効遠外及其既也天子不修怒而修怒者都御史御史也柰何使公父子而以一参议终夫举直怜才者大臣职也是何天子之广而大臣之陋也且夫以蕞尔令而摄衣归台犹知挽之及其崑然名宪臣而两推之使去也又何昔之难退而后之易退也然孟麟輩之为公不朽计固失之峻伯而得之百穀公亦可以瞑矣因铭之曰

是唯南楚之珍世称直臣龟山嶙峋麻溪齋沦我勒坚珉以风子若孙毋忝其人

弇州续稿卷九十七

●钦定四库全书

弇州续稿卷九十八

（明）王世贞 撰

○文部

△墓志铭

程于行墓志铭

吾友俞仲蔚以文行重天下顾其所居窳约甚客阳阳过其庐不顾间过之以一甌

酒算器食辄博其诗若文不则亦索书大小十余纸以去亡有能损橐而投金与粟者有之自■〈彳义〉川程于行始于行之朝夕事仲蔚谨欲缘以得余一言为其先人重仲蔚顾匿之不使见而为乞余文甚苦余以仲蔚故强应之意其人必轻侠侯服而脂车者其后卒见余则一恂恂退让韦布也问其业亦不能当上豪而顾笃好词翰与古文佳石三代鼎彝之器焚香而啜茗有吴名士大夫风久之仲蔚卒遗藁千余篇亦亡有能梓之者其子瞽而日抱之哭以一旦遂泯泯不传当使死骨立朽于行感其事遂倾一岁入授良梓以刻刻成而乞余为之序序成予方高于行义欲有所称说于人而于行亦病死矣有子起家能读书挟其姻进士吴子尧臣状使瞽子绍而请志铭予乃叹曰此义士也夫徽俗纖嗇以訾相雄长至嘉隆间而始晓有文事即慨然有剗剔之役不以事搢绅大人则粉餽其所自撰述而籍以市姓字于达官长者孰有能轻身以归岩穴之士及死而又为之成其名如于行者乎向者吾尚应其先人文今虽老胡可辞为归其币于瞽子而间读吴子之状则谓于行颖敏辨口父母甚爱之十龄而即废书从客遊贾善握算摘隱知豫惊其老輩又二岁而父汝义病卒于邸于行不以稚废戚号哭徒跣挟棺归既成丧不以戚废家密袖金五百以贻其母汪曰宜少操毋毋使尽属之人自是益工为贾而内抚其幼弟善夫甚笃寻以疾殤母哭之恸于行所以慰解万方而久之妇吴卒毋复哭之恸于行所以慰解之如前且抱其遗孤进曰死者后先不可作抚此犹足以寬且余日之几何而爱此无益伤也于是母病瘳为之小愈而后复作则于行日夜不解带侍汤药间走祈于东岳叩首首为之燠坼而继妇陈割股肉而和糜进之母有瘳谓于行毋寒而父业于行乃复贾吾吴数月而忽心动亟驰归则母已不起矣于行哭几灭性行求壤地迎父棺而合葬之念无可以报死者乃始谒仲蔚及一二文士以为不朽计而它所为德如贾稍羨则辍以散族戚各有等次与诸父谋治■〈彳义〉川古道独当其最冲与工力巨者行而见殪尸辄具藁裡掩之其施饥则食寒则衣渴则茗雨则笠屣盖终其身亡倦色于行素无疾偶得疾遂剧妇陈复割股肉而和糜进之则不支矣且死谓起家曰吾夺于贾不获以儒起而心慕之甚汝其毕吾愿更问之曰二媵亡子速嫁之已而曰毋溷乃公以夜分归矣至夜分果絕吴子又谓于行精于其术出诸贾上而不肯尽竟之曰我不欲赢于人而畸于天以故卒不能当大豪与余所欲称说者同也嗟乎毋论天下后世令仲蔚之集行而徽之人以区区一程于行能不泯仲蔚为可贵余志铭作而徽之人以一俞仲蔚能成于行之义名于不朽其相率而破其慳以趣可欲之善当何如也于行名善定年仅四十有三子一即起家娶黄氏女四长适吴升潮次适诸生黄惟兆次字毕某皆吴出也次字吴尚勤陈出也程之先有都使濡者以拒黄巢显而归老于■〈彳义〉川以故■〈彳义〉川无它程程之族最着

铭曰有结客徧天下而亡所成其名以终始得一士而名遂成于嗟乎程生

蔡北崖处士暨配陈孺人合墓志铭

诸生蔡大节者裹粮直履走数十舍扶桐竹而顿颡鸟乌泣且曰孤所以为二先人筭且穷而后思有吾子以不朽是藉已乃出手创事状曰此所以志也已又出陈中丞书曰将以绍介也悯而强食之弗饱也乃又弗荤劳之酒弗酒也二尊人者何北崖君称父而陈孺人母也吾不习北崖君以大节故推知之是宜志志曰君讳双字邦鳳北崖其别号也先世自鹿城徙临海遂为其邑人数传而有御史鸣玉者以风猷显高帝朝又五传而为君娶于郑有女矣寻卒闻孺人之贤委禽焉而后有诸生大忠及大节始君少孤废经生业已乃涉猎史传不肯尽其学去而习阴符豹铃诸书与捋刺剑射之术叹曰是不可以组五单于梟三越王耶念欲结客以警弗继恒邑邑而益不问家人产孺人务躬为織嗇以羨治滫脯浆酒之类荐之稍足给客乃不敢以几微怠色见也壬子岛寇暴躡傍邑君乃韦帕抹首跣注■〈鷓，羽代鸟〉翻从里中子弟扞之寇寻徙攻郡君间行谒郡守今大司马谭公公方夜按行睥睨间拥盖炬火武士操鬪戟呵导君骤谓曰贼垒近矣能不以矢石迹炬火处耶谭公改容谢之邀入幕府时时问筹筭君寻引避去寇亦渐以定君窃计曰民去警久而菜色不改者困伏赋也夫使中豪以上日伏赋之齧而单赤日见削吾弗忍也白见其端于台使者今中丞龐公下郡守丞撝稽籍得隱畝五万余赋称是盖君尝野行有憇逆旅舍而窥户者髯叟曰君非蔡某也耶愿得以一杯酒为寿问之则始苏于赋者也自是君遂负善计会声而邑令周君甫下车礼君而问政君尽出其囊中书所谓均里甲复额赋清丁口融盈缩裁冗费者上之周君用君筭得称为循吏以故邑中益贤重君客有蓄疑难请者君无不立剖然侠而隱其伐孺人之用織嗇起顾推君志嬰粟瓠菜居恒与邻贫弱共之君有从子幼而孤孺人子之亡以异二子也值岛警避亡道中稚而号者携归为洗沐饮食周悉后且归其父母哭不忍去曰舍此吾何父母耶君以正德辛未八月五日生以万厯乙亥十一月十八日暴得风疾卒年六十有五其又三年而为戊寅正月十九日孺人亦以病寒卒距其生嘉靖壬午五月十二日得年五十有七君前所有女适王埧大忠娶于陈举孙二希贤希圣大节尚未聘始君歿而孺人痛甚不欲生已而曰孤未立也脱簪珥以敛弗能给幸而有称贷者居恒谓二子吾食不能咽曰其若母钱家何二子所授经束修之贄以归其家孺人喜曰吾始安匕箸矣呜呼以蔡君之材小试而未能越乡井意者其属之二子乎陈孺人之为德虽不越闺阃足称妇矣二子今犹未千里然汗且血矣足称为君之子矣是宜铭

铭曰汝二人其即安于是异日有穹表而广隧者余请为之识

仰虚王先生墓志铭

王先生讳懋良字汝存其先故家真州而有思保者从高皇帝义师遂隶籍太仓卫五世而为封武选主事公成武选公尝得人遗金佯病卧邸中俟遗金者至而还之有子曰积为南京兵部右侍郎天下称其为长者娶陈安人举二丈夫子先生其季也少而警颖工读书顾恂恂纯谨不好为儿戏侍郎公爱之宦辙所至必携以从以故先生得周览山川形胜名迹慨然慕古贤逵风为侍郎之号虚斋也自称仰虚见志云弱冠补州博士弟子为文下笔数千言不休颇负才僞声而不能得志于都试一日念侍郎公与安人俱老乃叹曰使我逐逐升斗禄而远膝下即一旦不可讳如终天何遂屏博士业不事而精意定省陈安人属末疾久困床第间先生躬调衣食时卧起于医禱靡所弗延晨朝侍郎公而夕以陈安人夕也安人恬然歿先生手先生痛毁几绝三载不御酒肉不入内甫公除而侍郎公亦病日寝不覩物加曠与暗转侧须人先生以一藁秸息床下小闻声欬或弹指即起立调浆糜脯■〈施，酉代方〉而进之至手奉虎子浣中裙厕踰三载如一日也诸所需即不待颐指而具当是时微先生侍郎公几不晓生趣乃竟用竟然终而先生之痛毁视丧陈安人时有加盖公除而无复世念矣先生既以孝着里中而畏人称之其事伯子尤庄早暮不敢以褻见然至于谈笑讯问怡怡如也始娶嬪张天则独处一环堵篝灯莹然继娶朱而后复称有室迹之生平亡他遇也侍郎公洁廉鲜遗橐而先生继之不恒问产产挫而其性好施姻党以缓急告毋弗应者然先生不自为德其与客从容竖难无鄙语客有一善孜孜见颜色有不善则置之绝不以挂口其所为长者不能如侍郎公广而识者知其独至于书少所不窥晚节尤好二氏家言缙衣黄冠踵相接于门相与剖析奥旨征诘同异竟日夕忘倦而不忍逆其狙曰吾宁信而见弄毋宁核而见弃即有所勾倾困不恡也元驭宗伯宦燕中而吾县阳师时犹称女稍稍露仙迹人未有信者先生独心折其草以请质盥沐而后书之甫就械若欲溲于庭者倚壁立逝既就殓颜色如生其友人曰先生能立亡其有真得矣或曰不然即先生有真得如吾曹失先生何中外之戚泣相吊曰天胡不佑善也里中儿若妇子亦相唁曰天胡不佑善也盖先生歿之六年而嗣子绳祖始以先生之馆甥吴按察之彦状来请文其墓中之石王子曰呜呼俗浇江河下趋吴尾闾哉其膏腴寔滥觞之毋论怒马鸣驄鱼肉其乡人即伯遊为汰谁不慕也而余所覩王先生与伯子恂恂一缝掖矣乃先生质有其仁义行巽成地矩天绳善不近名斯尤难能哉以此仪俗吾侪资也何敢辞志铭先生以正德甲戌生卒于万厯丙子得寿六十有三嗣子一即绳祖太学生娶季氏廉访先生女女二长适即吴君次适诸生金履通皆前卒孙男二应寿聘许氏应桂未聘葬地在某所张寔合焉能以勤慎佐先生为德者

铭曰子合二氏而儒非舍而逃二氏也二氏见子之二氏而儒见子之儒不异也世不必尽知知子为善士也子不能无死死而灼然不昧也

章少槐君暨配孙孺人合葬志铭

德清章子嘉祜之仕而出令蒲圻也则其大人少槐君忧之曰去而博士弟子者几何安所受城旦家言乎乃与偕之蒲圻三月所而迹章子所善令状非一欣然谓蒲圻不难令安用乃公刺促为而君有母陈太夫人年八十余矣念之甚以八月朔发将及望之后二日为设帨之旦而寿也章子固留之不可道遇风阻小泊至芜湖而感异梦忧太夫人病不待而遇乡吏胥之候德清令者征之曰太夫人健饭独念君君益心动与舍人谋从此取内道浹旬而遥以轻帆凌太湖得三日遂尽谢遣蒲圻役以书授令而独身与二苍头别舟入湖大风发覆焉则太夫人之诞前一日也君之家以君安蒲圻养不归而蒲圻令以得君书又从而归役悉行止谓依依太夫人膝前矣居月余而令驰一介候君至家恠君不归君之诸仲季子乃始疾驰至湖步曰香山觜而遇一村叟顾圯者曰以八月望之后数日而浮尸五六丛焉中顾而长须者衣皆丝帛以为非恒人也而亡何则衣褌矣仅一扇存吾聚沙覆之而稍覆及它尸出其扇则萧太史良有所赠君者也于是乃发君尸亦历历可辨识会已具嘉材遂棺君而尽棺余尸以归时蒲圻令得君不归状即日弃官奔之家谋所以迹君者而君之丧亦至乃大号恸踊几绝已叹叱曰天乎何以使我至此极也即不肖稔恶不赦而殲我止耳何以上延吾父且酷也于是君之配孙孺人者先六岁病死矣章子益痛之亡可为解既而悟曰附骥尾名乃彰此言非耶孤不能受月支香返吾父母闻之太仓有王先生者能使人不亡于是百拜抃颡而请于孺人之兄按察副使铨纪其事而来太仓复百拜抃颡以请曰葬有日矣敢希先生言以贲墓中之石按察公余友也信而文且余何能忍于章子君讳沐字养心其先为会稽人有征士公某者善堪舆家言宣皇帝治陵方中验其术独奇予之官不受赐征士号以归行游至德清家焉凡四传而为君父西林公鸾是娶陈太夫人而生君甫十二即从游学工博士语十七补邑诸生手抄五经诸子先秦古文皆成诵而又代父徭其于治生亦工孙孺人既以德容闻归君而佐之治生又相与供奉西林公陈夫人也遇小拂意即夫嬪百方慰陈夫人尤色莊方嗃嗃时闻孙孺人呼阿家柔声为之霁色而后荅西林公有三子而君居长每降意拊之即小连弗报也曰张公艺吾师哉孙孺人之事君十余年三娠而三女质之谈命者曰必置媵乎媵则俱子君谓孺人女独非子哉孺人曰女必赘赘若姓也即卜嗣非君血胤也媵而俱子固善即独媵子亦善乃陬之外家得施氏好女而荐之亡何孺人举男子即嘉祜一岁所施氏举男子孺人喜育之曰吉祜又数岁而孺人复举男子曰台祜施氏亦复举男子曰禧祜君谓孺人不更虞多乎孺人曰固也逾于寡孺人性故巧手所刺经纬绣工作为妇氏最至于昼夜拮婚嫁资不以烦君身任之矣君既数奇省试多不利而夺于供奉故为博士语亦稍勸嘉祜代之业则蹕发而最后台祜补弟子试亦俱利君意益发舒然其治生亦以夺供奉一治西园公丧妾治婚嫁厘厘给朝夕然于好施予自天性岁大侵邻有病疴且死者妻子掖而前求市舍傍地以殓客谓君宁有余馥

足市且彼顷刻人耳病可畏也君不顾为粥啖之以药继之俾愈而归卒不问地君之师宦豫章而臆意君谒之可以橐君谢弗往曰彼宦宁为我也吾知食吾力而已盖乡人人归君笃行长者君之为长者繇孙孺人佐之故孺人死而靡不扼腕咨嗟曰儿贵矣乃不能以一日享也且也以溺报长者君寿六十有一孺人仅五十有一孙公之状云尔余乃曰溺人不吊何说也夫岂以其轻身而殉愤不则亦重利而狎危虽然务光之溺渊也以节也灵均之溺湘也以忠也舩子泥凡之溺溪也以示解也非天也王子安之海溺也君之湖溺也非自为之天也然子安迫省父君迫省母要亦见人子道焉大均茫茫与物无亲以遘为就孰能辨之释氏归之定业其然哉夫余乌能使人不亡庶几能有以慰亡者既志而铭曰

以为无天耶章君之与孺人皆有子以为有天耶君不良死孺人不老死不以死而终则有子噫嘻我知之矣跼脰羣黎而黄耆牖下回夭由醢莫可殫纪若信若之数而吾信吾之理

户科左给事中赠光禄少卿抑斋杨公元配黄孺人墓志铭

余读史至赵氏客事未尝不废卷叹也夫死孤易成孤难古既已言之及余所亲睹记黄孺人之成杨氏孤也盖贤于能死者倍百矣孺人之夫子曰少卿公其再起为户科左给事中数上章争事触权相孺人时时几諫曰得无为恒初九乎谓浚恒也少卿公默不聽其最后论大官丞奸蠹见中蜚语下缙骑狱且论死是时孺人与其子应祈质一空室委巷中日夜擘絝而絮衣橐饘少卿公五年如一日矣应祈当有室不肯室以待少卿公之白也时上方事祠厘久不竟犹孺人泣谓应祈曰若父业长系而若且茕茕然不为一线地耶于是强之室室于袁甫孕而应祈竟以奔走涂炭且不胜忧得疾死将死诀孺人曰不孝子竟不能白吾父耶应祈死乃举子是为忠裕又踰月而少卿公竟就论孺人之誓死者数矣既而叹曰吾不惮沟渎以从公地下甚易如孤孙何即此儿不举公乃真死矣于是强力携其妇袁及儿扶二榱归旦夕上食悲恻感邻艘稍间未尝不慰勉其妇袁影相吊也已而周视忠裕乳哺未尝不陨涕又杜声慰惊之也至遘风浪御宵警指麾舟人神色不小慑及家而家坐公久系危废矣孺人料理之治于少卿公时苍头有欲叛者孺人服以计不敢发门户启闭出纳井井既稍给三年治公墓事自孺人经画毋阙已乃稍推其饶以贍宗姓贫者诸婚嫁缓急即不幸而疾病死丧亡不立济忠裕稍稍长则为延明师课之业且成而会先帝即位下诏录愆冤表遗直追拜少卿公今官赐祭录忠裕入太学孺人悲咽久之乃戒忠裕曰而祖死忠而父死孝矣吾所以不死者以而在也且以而祖死博而一官苟不自廓大而隳废先业我何以见汝祖于是忠裕感奋益力于学孺人既积俭勤起货小拓遂委家秉妇袁屏居服饵唯为忠裕娶妇一出视而已孺

人晚得末疾寢剧从容理后事已顾忠裕曰吾今复得侍而祖且母而父矣好为之我可以藉手见矣遂不起得年盖六十有九忠裕之拟祔少卿公以葬也手事状属余志铭之夫微忠裕状余不为不悉也少卿公之仗义也其获昭雪也盖与先御史大夫俱同日云呜呼先太夫人之与孺人同称未亡也则前孺人八载逝矣不肖贞之与应祈同称终天也固愧复而生哉余虽悉孺人家三世然何渠执笔即笔再执而再掷肠几为寸断矣虽然微余孰为之志铭盖状言杨氏有玉峯公玮者与西陂黄公明俱宦副臬志业相善玉峯公之子晴川公乘道妻于戴而生少卿公讳允绳字某某别号抑斋西陂公之子宪幕公籍妻于陆而女为孺人孺人于女为仲顾陆夫人爱之得專阃中托孺人雅能先其指籍籍胜妇矣既归少卿公而戴夫人已捐馆不及事事晴川公晴川公老而多疾性癖动孺人躬治汤饼洁修脯旦夕上食夔夔又尝迎其丘嫂之嫠张者事以姑礼抚其长女之夭于褚而遗之者子之没齿不倦玉峯晴川二公咸有遗媵在室孺人调衣食而推逊之咸忘亡也其助少卿公治家以寬公于读而举进士成嘉靖间名諫臣诸余所未悉者即成孤可推已夫岂惟一孤少卿公之为忠应祈之为孝而妇袁之为节乃孺人以一嫠女成之彼赵客者故丈夫子也兹不尤难能哉孺人子即应祈妇袁为封刑部郎某女女一适光禄署丞宋邦父忠裕娶太学生龚大任女葬在某所铭曰

其畴塋之易乎而室庐之栉比乎而有孙之颀嫩乎而以报夫若子乎而千秋万岁魄长倚乎而

光禄少卿剑泉郭君元配邹宜人墓志铭

郭宜人之归自邹也盖母钱意云而邹故锡甲族世富盛而邹翁朴有四女宜人最少美而淑母钱内竒之口授孝经列女传诸编辄诵是时少卿君之父曰赠驾部公者以气谊挫其产乃自吴徙着于锡而少卿君稚从里中师受经有俊声母钱闻而言之邹翁许之字且使媒氏覘之曰是瘠而长若鸛雀者然伊吾声至丙夜弗辍也母钱曰徐之彼必不终困及宜人年二十而归之少卿则赠公之母范尚在与嬪陈太宜人谋所以继甘旨者弗得也少卿君又数应馆师辟在外者日十九而宜人稍稍捐橐中装又以泔澣紈佐之赠公乃大喜谓陈太宜人曰微新妇力吾不任子矣而少卿君病痢久几殆宜人昼夜事汤药浣踰厕以手亲蕞污者二月所而后起少卿君生数竒至二十六犹求试诸生不得宜人悉脱簪珥为别策居间邑司始获见其竒郡守守为推毂成诸生居二岁荐于乡会坐主试累悉罢公交车对孺人说少卿君曰士重去其乡锡岂而土耶乃归吴与谋计然策益进悉还赠公挫矣而会赠公之母范卒赠公用毁故亦卒宜人相少君以礼附棺椁以诚信资取之俭力取之勤既庀事旁产益拓乃复说少卿君曰哀可纾矣忘所谓移孝乎少卿君感励益习制科业遂得进士授中书舍人时少卿君年已强仕而宜人举

仅一女当从京师乃卜宜子者曰陈女饰而荐之少卿君怪之曰则向者君病余心若芒刺即食息敢忘君之为孤注乎越二岁果得一子曰端明而少卿君拜御史亡何大司农筴邊费亡所出请益三吴赋少卿君上疏争之强忤旨出为永安令宜人举酒贺曰君为吴民请旦夕命即少忤赋卒不益今虽左不为左永安令廉其入郎比部而垂橐也闽人交称之少卿君则蹶然曰成吾廉者吾媪也自是少卿君以材显移郎驾部参赵司空军事破岛寇出没矢石间以功晋今官宜人得封如其品寻为奸相挖之故出判黄州再夺职又坐之干没检货簿数岁间而起蹶荣瘁万状宜人皆共之其出也则曰微吾孰与代君守其入也则曰微吾孰与参君画忧则分费则资见陵则为慰盖至于陈太宜人丧而左右少卿君不以戚妨易者宜人也少卿君之初得子端明而宜人爱之逾于己出俄复得子玄明爱之复如端明人或谓宜人不自有女耶宜人笑不荅而至二子少长延塾师治聘与娶靡所不笃厚其费不取少卿君口而给少卿君性好客宜人则为储肴醴果茹饵糗之类以咄嗟呼亡不精者然徃徃称客程簋豆少卿君意有所俭饶弗异也少卿君之弟儒女弟某俱不别治生而儒有长安徻繫若卢狱少卿君倾訾而出之又时时所以貽儒及谋者不絶以谋于宜人宜人弗恡也宜人女归太学诸生吴汝励者始抑之令毋与子等晚节乃颇爱之徙帑而实之人亦谓少卿君少卿君曰彼殆以二子成故耶不为我置貳我帑将它属而寧独女宜人以万厯丁丑九月病卒距其生正德癸酉得年六十有五端明太学生玄明邑诸生皆通敏工文字而玄明寻亦夭端明妇顾为尚寶卿谦亨女有子二维藩聘王为刑部郎炳璇女复亨尚幼玄明妇华为鸿胪序班某女有一子维寧聘汤为太学生一鳳女女一见前孙女一字乡进士徐熙载子少卿君始悼宜人而不欲葬也曰吾安忍使之蓐蝼蚁先吾且与俱归乎又四年而有玄明戚始大诧叹曰吾其弃人间从向子平游哉已而顾端明吾将使存者依存者而逝者依逝者于是卜葬宜人于吴山之西磧麓而手具状来请志铭嗟乎余举进士从少卿君游今少卿君老而余亦非壮矣居恒屈指以天下材无当君即县官能终尽君用以缚五单于少府水衡金钱日夜委输无难者而竟俾之肮脏以老邹宜人能竟其用于君夫是以无家而有家无子而有子是可纪也

铭曰胡以相夫子家毋曰余拮据而日永图胡以相夫子子毋曰余饰体而荐彼淑妣尔渠渠夏屋尔振振麟趾于嗟乎夫子国之良弗究厥长宜人之家之良郭以代昌兹女德而亨者耶吾用是纪其藏赠

奉政大夫近溪项公配陈宜人墓志铭

陈宜人者故封给事中公某女也笄而配赠大夫项公某宜人少习女红多读孝经内则诸书既归大夫公事其舅长葛公及姑金共谨得其欢相大夫自食贫以至积着埽

素封与有力焉宜人举上林录事元淇而其贰颜宜人举参议笃寿太学元汴俱卓朗有艺苑声宜人故婉变性禀特孤介曰吾不复问衽席事矣于是上林君奉以朝夕宜人前已谢内秉则治一室礼佛大士不恒御鲜脆间语上林君曰吾闻之文士鲜行今汝文而间党归行老妇志饱矣安在问鲜脆也复谓上林有可以适公者庶几塞老妇责矣盖大夫晚而念宜人同起家甚笃而宜人以疾前卒得寿七十有六弗克葬于是上林君废箸而庐于墓其又九年大夫卒葬而宜人弗克偕也上林君内悲曰伤哉何以见吾母地下也后病且死属其子曰暴吾骨必吾毋合而后从入土其又某年参议君以郎中赠大夫而宜人亦得赠如大夫秩其又某年参议乃与承上林君服者德基輩而宜人祔于大夫之兆而德基輩哭于上林君之殡曰次第从王母地下有辞矣于是行求而得习上林君者王某俾为之志若铭曰

歿而封表汝以令终乎而葬而从安汝于幽宫乎而隧之中其乐融融乎而俾尔后人炽且丰毋忘肃雍乎而（阙）子孙男女婚嫁如左

御史吴君元配王孺人墓志铭

吴君之自进士予告也抵家而王孺人卒月余矣泣而语余曰空同氏云妻亡而后知有妻也悲夫伤哉即一旦获归土当以不朽之托请于是谋葬孺人且不娶以谢而会有铨檄征不果葬亡何以中书舍人使归而舍人未有子也其父封公曰若不念我老而忽忘冢宗之大计于是舍人强娶而北既满考赠孺人如今称又二年自舍人拜侍御史又二年而复予告归则继俪及所置贰有五子二女矣侍御业及之其涕犹浸淫下也谋而得吉壤乃卜葬以状来曰舅氏而忘向者之有成言乎余悯其意而许之孺人王氏故少司马公积孙女父曰仰虚君懋良司马公名臣而仰虚君为乡长者娶于张其首举女为孺人而封公之所娶王为余从姊寔与张中表兄弟两家时见其子女曰以此俪可乎自是遂委禽焉而亡何张病卒孺人仅年十三祖母陈夫人怜而鞠之会从司马公远宦不能携孺人乃以委继母朱而陈夫人未尝顷刻忘也十八归侍御孺人少而敏慧婉嫕精女红虽不恒读书而能识其大指归侍御而其王父思诚公犹在思诚公性严重治家秉于诸妇中鲜当意者顾独贤孺人曰是贵种也而材孺人益惴惴为卑巽事诸妇若亡所容公益贤之曰夫贵种也材而能自抑已而抚侍御曰真而偶也明年吾姊病孺人之佐侍御共汤药也歿而佐侍御之毁也已佐侍御之抚孤冢妹也盖孝弟之声藹如矣又三年而侍御之王父病亦歿孺人之佐侍御如事姑也其奉舅封公暨继姑某得益專即封公亦叹曰吾今而始知为人父之乐也其又五年而所举一子美而慧仅六岁而殒孺人内痛之自是病矣未几其祖母陈夫人亦歿孺人乃大痛曰微祖母吾何以有今日也则又悲思曰微吾母之见背蚤吾何以知祖母恩也天乎天吾母也自是愈病而又数年

所再举之女五岁而又殇孺人念病无已时势不能三举子愈邑邑不自得病益甚久之手足肿已浸淫及腹而秋试迫侍御不欲行孺人强起曰病行愈矣君丈夫何乃作儿女子恋侍御乃行果以捷闻孺人喜自力若无恙者为侍御当中厨酒脯■（施，食代才）以酬酢贺客币饩报称不爽寻迫偕吏计孺人复强侍御曰毋念我我能待也侍御乃以孺人属仰虚君三月侍御复以捷闻而孺人益病且深矣然益自力持秉至为侍御治邸中宿储且曰憊憊不能待何虽然死可以瞑矣所不瞑者吾姑之有子而弗逮养也因泫然者久之侍御甫隶事礼曹有公卿间声所以急予告者念犹及孺人也而已矣侍御乃言曰吾之获偶孺人者十九年矣处约九之哀疾五之病五之亨不能一也夫是一者仅能使吾妻知而已妻在而以其一人之志虑竭而共吾一人而弗及亨也今妻亡而吾以一人之志虑竭而共吾之为嬪者大小四为子女者大小七而弗知约也抑何径庭也吾何忍死吾妻抑吾妻之有素癖而不辞余馈也吾有过而未尝不争争而未尝废婉也吾是以不难听向者吾性褊赖吾妻以亡失色吾性促赖吾妻以亡债事今者卒有过而谁吾规也有疑而谁取谋也疴痒而谁与分也夜读至乙夜而谁以杯茗劳我也吾何忍死吾妻余谓侍御毋过悲子姑治墓孺人卒之年仅三十六诸子女聘字多荐绅名家铭曰

生而相厥夫端敏静慎共卒以隐约终歿而后有子歿而后有封有铭铭幽宫天道巧为端吉乃伏于凶存者复奚恫

弇州续稿卷九十八

●钦定四库全书

弇州续稿卷九十九

（明）王世贞 撰

○文部

△墓志铭

封征仕郎戸科给事中见山李公墓志铭

古之称循吏直臣者要不独其身致之父在事则子以志相而为几諫三代之孝也

子在事则又以志启而为义方三代以下之慈也盖余读见山李公状而有慨焉李公者今兵备副使涑父也副使君之始令寶应也最久而又最劳最以膾德悦民而余家居与其邑夹江而近故得之详窃恠以为古循吏而令去为给事中故相有父丧夺情而充册皇后使者给事上书谓此国家大吉礼礼吉而事缓非有兵戎借谋筴也令墨绶而徙之则不祥冕而奉册则不情是亦不可以已乎故相恚甚迫不暇逮给事为诏俾戴讐领职而给事复上书言水浸状中谓尚方将作钩盾诸臣毋竞淫巧希恩赏以糜玉府訾亏上俭德上不悦故相且治之它相为解曰书生齷齪掉书囊治之示不能容而故相亦中愧前疏遂解而出佥山东之按察事当是时天下艳称佥事直臣固不但余而佥事之治山东武定则又良武定而故相意未已示迁以广西叅议徙治浔浔瘴乡也叅议则又良浔而故相死矣状所称乃云公闻寶应令■〈谷丸〉而驰之治所覩令昼夜平亭凋税拊流移不得甘食息邮传造请风雨无避又以间出捍稻堤疏壅抵决面黧黑手足皴胝心痛之而阳为慰曰继不肖者易为声惠凋劫者易见德子勉之公既少孤以赋役挫家故益晓民事以佐令筹筴朞岁而寶应之政成乃谓令吾去若归矣无虑矣令悉橐而得十金为公道里费因跪谢不继公笑曰吾生不晓饶子何念为给事之始疏言册礼事也云且有后命诸与给事戚者无不为惴惴而公独夷然且贻书广其意曰迺言相君事十不一全而子独全上恩德厚甚子何以报勉之吾愿若之得职而不终不愿若失职而以贵终也佥事之出山东以期迫不获定省公复贻之书业已称令称諫官矣夫治兵之与治民间也以不能过用恩也任事之与言事间也以不能尽徇志也衷而行之委曲以济之可也佥事迁而得浔还省公念瘴乡不欲往公正色谓曰向者吾故寬子子实与祸偕夫祸不能子侵瘴乃子侵乎俾以妻子徙之官居亡何妻死自叅议之为浔垂二载而政成转今官饬吾吴四郡兵事抵家奉觞寿公而有司用诏例以金绯进公御之稍市牛酒与亲故欢而副使徙傍察公两辅哲而腴数黑子煜煜且健饮噉以百岁毋限也既副使官期迫公谓曰若失嬪而以两稚孙女往即以时按部谁与治内者顾副使之母刘曰夫人强为我一行可乎副使因请偕公笑曰太公以天下养乃犹恋恋故丰鸡狗之社而子奈何欲束我于桎梏中乎吾幸健若无念我副使乃奉母夫人之治方夙夜孳孳谋所以大惠吾民者而公讫至矣余入吊已而唁副使则伏哭不能起俄声微属曰天乎何以至此极也凡不肖所以有今日者皆吾父也而已矣行而抵京口以书来与状偕而请志隧中之石盖未及家而三发书诵之未有不咨嗟涕洟者也不知其父知其子而又何辞君讳某字某赣之雩都人其先有为御史者曰应寿传子孝廉公升升子散官公廷佩廷佩子高年公穗以行见推择宾乡饮有子曰悦为邑功曹谒选甫冠带而卒是为公父母曰易夫人功曹公卒时公仅九岁也而已哀毁执丧如成人易夫人之丧则釵釵进于礼矣当是时高年公惟公一孙而御之严授书少懈则夏楚继之曰犊汝不难后且自悔以故公肆力学问虽数奇不获以身显然一时推之为博洽老儒其事高年公烝烝夔夔矣公既困徭役挫家然至于为德则不以窘故废里中之馁亡弗食者其殍亡弗葬者与人然诺

不小寢既贵益自匿日闭门手一卷而已有司延之乡饮第一往其它所不敢望公足迹盖复推之为乡善士云而副使君之少也所授经史与宋诸大儒遗书皆自公口公又闻王文成公之学而悦之谓吾老矣日入之光所与几何趣副使往习毋缓也然则副使之卒为大儒亦公启之宁独循吏直臣已哉公之生以正德丙子凡再受封一被四品服至万历癸未十二月念四日而病病得之嗽寒食胀而喘又二日稍间晨起隱几坐至暮倏然逝丈夫子二长即副使娶易封孺人次浚邑诸生娶黄再娶刘女二适丘某王某孙男四应春涑出开春秀春茂春皆浚出女三葬在某所余既志而复铭之铭曰

子臣而直若或式之子吏而良若或匡之惟父之教皇芾斯耀食子之报弗竟斯悼子兮父心父兮子身彼苍者天殲此喆人惟生有极惟令闻无极何以征之视此乐石

封奉政大夫刑部湖广司郎中怡莲马公墓志铭

余领按察事于湖广而今左叅政马君顾泽来为其僚相与欢然无间君与余皆善食酒酒次每称其父奉政公之贤长者而其食酒尤善又有酒德也于是余以迂去明年忝持襄中节复得与马君相闻至征其治状而言之上马君更三地皆有声中间以不能事台使者小屈而复叅山东政余解节罢归里中不能從奉政公游而数闻其有酒德为长者如故今年秋九月马君忽以苴杖来惊而问之则奉政公捐舍矣问其年七十有九已出其袖中草曰是都给事中顾君所具状也将葬矣敢徼子之志铭以不朽顾之状畧曰公讳寅字汝威尝遊于莲句而乐之谓周茂叔吾师也因自号曰怡莲家世吴县之大定里为蕃族其曾大父德成大父升皆以贵倾里至父文毓娶于郑而生公则中落已与郑俱夭公少孤遂育于外家以长而郑之父母亦偕逝公自是几无归里中少年争欲狎公而侮之见公岳岳露锋距不敢遽有所加而里有顾翁某者一与公值奇其貌而欲使爱女尚马公亦闻其贤遂委禽矣已而为顾氏赘已而生叅政君顾翁察公材任起家遂悉委家以授之公与顾宜人僇力而攻出入之息内馭力作外应庸调一切不以烦顾翁寻叅政君长顾翁谓公赖若力百不烦我我为任若子乃就叅政君于外傅而躬诲之叅政君奉顾翁朝于诗书而夕于礼也公喜曰吾有子矣吾马氏之不絕如线而今乃始绳绳然顾翁亦顾公而喜曰吾始无子而有子今乃有孙而是时公以积着家渐起三吴旱饥有司募富民为官余备賑公费不中程而以里胥孽之故名在籍公欣然应募既毕余悉以賑饥者其邑张令后察公费之不中程也而优称之富而施不为德若可以言德矣叅政君举乡荐而顾宜人逝顾翁与宜人毋夏亦逝又六年而成进士自工部主事迁署刑部员外郎满三载最封公承德郎而顾得贈安人其进乃郎中以天子登极恩公进今封而顾亦以有今贈当叅政君之未成进士也与诸仲季皆冒顾姓而至为郎日始请复为马公犹语叅政君毋忘顾公之诲育汝使不去顾而以马姓冠之诸仲李亦然而公意

犹不满曰如若敖之馁何叅政君乃创为顾翁祠以夏配飧而顾宜人祔焉又为之立后予祭田俾岁时烝尝不废公乃曰吾可以酌我先人矣叅政君既贵每之官輒迎公养而弗肯曰吾安能就斗大官舍如笼中鸟举翮触四隅且吾欲为诸仲季巢窟于是叅政君岁时分禄以养公公必以书戒勉其任都水所职多内供则戒以敬事惜财用去奸胥蠹任畿辅恤狱使者则戒以精心谏审广人主好生意任楚屯政盐法使者则戒以衷严宽兴利除害任滇之饬兵使者则戒以时时宣恩毋失裔夷心最后任山东之藩政而所隶事如楚则戒之如楚中间既叅闽藩而用楚事调公问知其非罪且橐垂垂也而更喜之曰真不负吾戒矣公于宗姻咸有恩或丧不能举者婚嫁不能时者老幼不能自衣食者咸称橐而济之不小愆虽已贵而闾井旧遊相亲狎无间有酒则召而与饮有所召亦欣然而赴必頽然而后别吾郡故多佳山水凡环而称胜者无弗游花之日夕之月无弗赏歌舞之伎无弗与观聽别声辨味健登降至七十八年而不衰叅政君既迁山东以便道归省依依膝下不忍别公为之浮白酌且大噉梁肉示以健而强遣之叅政君亦狃公于健谓且亡恙也至明年甲申之正月而告疾遂卒矣公姿伟岸丰下心事坦洞不设城府见人小善即为之扬擢亦不能藏人过而退无后言人以故多好公郡邑守令亦仪之遇乡饮屡请为大宾而其卒也吊而哭者甚众顾宜人事具前先公四十三年卒继配易亦先二十年卒有子三长即大叅君顾泽娶朱累封宜人次顾洲娶顾能修公业又次顾渊亦娶顾敏而文女一适刘珪孙男四孙女墓在邑之灵岩山塋以卒之年十一月三十日而与顾宜人合铭曰

少无家而能奋为家以光大一线之遗以外家家置之祠与后而始归不使其鬼之饥谁与公贵子实贵之谁与子贵公实诲之噫此所以善人伦之终而不为秦赘也欤

封奉直大夫兵部武库司员外郎新安陈公墓志铭

封奉直大夫兵部武库司员外郎陈公以万厯冬十月廿又三日卒当塋其子提学僉事允升以公遗言而选于地既得地矣曰邑西之列字圩吉则选岁久之乃得岁曰某月某吉且塋曰塋必有志铭其将以属王先生而谓前进士萧山令许子承周子状之于是许子状之而以僉事之言先曰他人之父父也而不谷之父父而母也且师也不谷二岁而母周宜人见背父实襁褓之至少长贫不能为经父授之经十六而始负笈以從师属文去为诸生而后免父于师也然何尝一日不吾父师于是僉事复以许子之言告余故辱交于公父子深乃以韜笔之日复泚而志之志曰陈公者讳王政字纯甫世家苏之昆山人其先有文正者以耆德见推择为乡饮大宾曾大父庆贻倾里为大宾如文正九十二而终于寿官大父彝举乡荐终于太平之司谕父曰介轩公嘉谋为邑博士弟子妻于王有四子而公其仲也少而赘于周曰秀水令某公既婚矣见其内兄弟相习为冶遊

然曰彼纨绔者当而如我家故青毡何屏居一室读书不辍其属文谈说经义有足称者秀水君器之俾就有司试輒中程而至学使所或病或浣卷或误书题竟不得入黉舍公叹曰人也而敢与天左于是罢不复试而自其为赘得一味之甘亦必以遗父母候时之寒爨制新衣进之而身自衣浣缙者旦夕讯问不絶会父病则驰归昼夜不缓袂而治汤药察便液既不起号恸既灭性时伯氏病而叔季氏幼诸附棺椁之役一切身任之人谓不难周乎公曰吾以周故不能精事吾父今尚何周也且吾一切取之力不自周而亡何其媿周宜人亦卒既除服续妇而得长洲之华遂奉母王徙处长洲而华右族也其长者相谓陈倩儒家子可仪也致之为弟子师而良则争致之以是公业小纾得以甘旨奉母王而不废金事之诲于是公之伯氏及叔季感而欲次第迎母母不时往往亦不能久曰吾故甘仲餐其最后得末疾三载卧起公手卒而公所以号恸几灭性如父卒时其附身附棺之役有加矣始公之在周而伯氏尝有急投公公尽脱周宜人簪珥畀之直数十金周亦不少恹既老而与同起处饮食伯故性刚难事独安公至死无间言叔为人醇谨公爱之甚其出赘于费也毁橐具资装而后遣遇季亦有恩佐之立中人产而身翼蔽之秀水君死其子果破产尝负税受县官杖公泣贷米八十斛为之偿而以岁时修秀水祀曰吾不忍其馁也尝适市有所贸而所得物浮于直归而后知其浮也亟还之曰非以为若德不欲自负耳金事举乡试以至南宫及大廷对皆高第授知开州公往省之伺其操持谨于割断批窾导郟而不尽废斤斧谓曰汝读太史公传不尝恶郅甯辈耶而忍迹焉及督楚中学复省之而见其有所斥免复谓曰士贫老可念汝故其中人也金事咸拜受教以故后先有廉能声而不为刻君以金事贵益得发舒为善始买宅而闻其家有将就蓐者戒勿迁曰须其乳可也乳一月矣曰妇人新免身与儿新免者皆不可风再阅而后使迁所度莹旁有钱氏者墓久矣一旦举以求售公曰吾必辟吾莹而尸人之亲耶若诚贫也吾与若直而完若墓且封树之金事之友方生死同年高生亦死其亲皆老无所归公买空宅一区授馆焉而月饷之粟至今金事修公之施不废也乡先生谢政里居者其奴醉而詈公公避入门尾之投甕中公肩复避入室乃举石撞屏破之见者皆不平公曰奴虽横其主终长者勿较也明日县大夫来见屏破惊问状公第曰风偶仆吾屏耳狂生醉徙后园阑入家庙懷其主出弃之野公怒甚曰是吾先与辱我不类必白之官而生之母闻之大震恐使家姬谢过且请设享公乃好谓姬曰子诚不肖而母贤母也吾不能甘心于贤母之子卒寢之而辞其享初公之赘于周也秀水君老而委其政媪媪独怜其长女之适张生者公甫结褵而长女自楼中掷故衣数事于公妇曰以殉尔而张者鹜而恣不以僚壻视公而数侵之既周宜人夭而公时抱金事泣曰若母贤而素壮胡以夭得非其姊崇之耶已而曰吾德之不竞则有勉而新命之不竞则安之而已因自号曰新安里人亦称之曰新安故不晓其指也最后张生鰥而贫老无倚数过公公輒饮食之又衣之而至其死为调殓葬卒不以往事纖芥公之为长者类如此公为人癯而秀爽晚节益健无疾性喜种树旧居之丙舍傍地仅数弓而杂蒔梅杏桃李含桃来禽之类略备又治其隙

而蓄鱼百头曰欲窥其乐也间笼小鸟听鸣声则喜而蹙唇以和盖不知鱼鸟之不为我最
最后徙第邑之东门园池备矣久之其继华宜人卒又三年而公亦卒得寿七十子一即
金事娶亦华而亦封宜人金事再起视蜀学政不肯赴时望归之孙三如屏国子生华出
娶鸿胪署丞周大伦女如京贰顾出娶太学生李延芳女如是又贰出聘太学生周之甫
女孙女三长适县学生周昌胤次许聘乡贡生严治子某次未字曾孙三衷瑾聘乡贡士
顾允杰女次衷脉聘府学生周汝化女次衷孝曾孙女一许聘太学生徐询子某皆如屏
出余既已志公墓则记金事言邑有郁翁某者善相人尝偶公坐而语曰子五品京朝官
也公曰业已谢制科矣郁翁曰何居我未之误也俄而金事轩轩过于庭时犹未冠也郁
翁呼之来而谓公曰庭中少年非而子耶曰我子也郁翁起而曰子所以贵者此少年也
遂与金事遊郁翁他相人多奇中金事今颇得其梗槩云铭曰

宋有赠而明始有封其恩乃隆崇矣父为德而子报之以贵而及其躬子为报而父
益培之以德而令其终吁嗟乎陈公

蜀府典宝正盥泉卜君墓志铭

卜之先自西河子夏显而后散入中土而沦于江左为嘉兴人寻析箸于秀水曰
观三公自观三公以至南隱公凡六世皆不仕而有长者声南隱公有子曰长醉公是为
赠奉直大夫刑部员外郎长醉公始读书然善食酒不竟其业而益务为长者有四子伯
宪副君大同仲太守君大有季吏部君大顺而叔则盥泉君大观也当是时四君咸以秀
才受经术彬彬有文彩而长醉公益不问生业其嬖贺宜人忧之曰日醉不一虞家乎公
笑曰有四子必皆贵何虞家贺宜人复曰审尔疇当膝前扶醉而且独不可以一子管钥
之乎公乃强指君谓曰是儿稍愿勤或可夺使家也于是稍稍以米盐薪酰间君不复能
專精其业矣而亡何长醉公竟捐馆贺宜人推其意悉授君以中外政君善程饶嗇衷之
礼所侮使臧获必以器悉得其材力用是能积纖累微起家埒素封而诸伯仲及季相次
宦遊中外然皆廉洁不能无资家帑君千里应之毋倦色太宜人既老寡所以娱悦之者
百端俾忘亡又忘离忧也病而奔医祷哀吁靡所不敦歿元丧具躬含殮以至窆兆靡所
不饬易当是时四子均为毀劳则于君乎任矣君娶于史有嬖德举二子二女而病且属
纒曰君尚壮吾安忍鰥君第慎而得一若淑者拊循儿曹足矣君泣曰即若淑疇能踰汝
且吾安忍令儿曹倍其母而他毋自是毕身不复娶盖晚而与二子语及之犹涕涔涔下
也君始以例得蜀府典寶正当之官以失史孺人故独身养太宜人与抚子女又诸兄弟
政皆寄之乃叹曰终始如长醉公言君之为家政者三十年诸子姓繁不能容乃析箸而
产俱隆隆起独宪副君前卒极力抚其孤而中子蒙者尤能得君意至损所受产二百五
十畝授之曰以助尔膏油费也蒙辞不获已食其入若干年而后还君君尤好施予获羨

訾輒为长衣食棺衾以待戚属之饥寒者死毋收者拓傍产必优其直曰使彼毋憾于周原也又割田以供里中赋凡若干诸假贷不为琐屑子钱计实时时宿券弗恤也于交际施报尤眷居恒谓生平受歛人一盖闽人一绢会其去弗及酬以此耿耿此外胞腹中无复事矣课二子为经生业严甚时励之曰学成而后可言命弗学弗汝贷也至其应省试弗利则又慰劳之赐以一卮酒曰吾向者策汝学故不言命汝曹安能自为命乎虽然命可谿也学可进也诗云是荐是蓂必有丰年此之谓也又曰若幸而寄一命毋先我于君毋先身于民毋家于官毋官于乡党戒之哉俭德之共也施俭之推也倍入而出迹之倍出而败亡因之矣予筭路篮缕以起兹业即若一甘食媿衣毋忽忘其所自可也二子顿首受教以自苦自励为儒而君亦益好学尝手录经史子集格言有关世教者以授二子使记之曰续观感录曰格言彙集行于世时吏部君又前没念独太守君在晨朝上食非他大故莫夺一味之甘剖而致之春秋佳时相与集亲故泛青雀穷湖山之致毕兴而后返间徙田父屈指米价较晴量雨瓠壶贮酒芋叶崇肉于绿萝轻舸间甚适也晚节忽嗜浮屠教尝游于吾里见昙阳子化事而异之归埽一室深居禅观勅左右曰进一粥笋脯菜羹而已会太守君有事于湖口召君君趣以舫舡往遇浪而溺时寒甚强自力至浅俄而绝太守君与其二子痛之甚逾二载乃始能营兆于某丘之新阡谋以辛巳某月某日而乞志铭于余余与太守君别垂二纪余病矣入而纳拜焉伏地雨泣不能语顾二子亦伏地雨泣呜咽也已稍稍苏曰毋以溺而不吊也吾弟实长者幸而惠之一言死者不朽即后死者亦不朽出其状读之则二子具草而太守君润色之盖字字足酸鼻也余乃谓太守君澹台灭明不已薄乎又三月所而遇君之壻周太学甥孙沈吏部其称君行过于状所云君字某某盩泉其别号也以万历庚辰十二月十七日卒距其生正德丙子三月十七日得年六十五所举即二子贞娶于黄大兴丞饬女继娶陶诸生九畴女时娶于黄宪副隸女二女适太学生周之琦即所称君行者也次适诸生屠履祥侧室计氏举一女适诸生张世南诸孙男子二姬历天历女七所聘许俱名族铭曰

于嗟乎君乃水死靡不悲焉大雄氏以为宿因而儒者谓之适然有璧而碎有瓦而全碎不瓦璧不全何愆怨

江西布政都事守默华翁墓志铭

无锡之华为天下名族而其隗有善继善述者咸爽朗有文学二子之世王父曰瑞州公与先司马同举进士以故称通家子而余之辱二子交则自以文学故瑞州公歿而有仲兄曰守默翁后二十余年而捐馆始有一子梦旭为邑诸生天时善继生甫三岁耳善述犹母腹也翁实子之以俾成立故捐馆而二子哭几灭性也手状一通来蒲伏抃颡以希言于墓中之石曰治命也目且瞑矣强开而顾二孤曰必王先生也不朽我者余悲

其意而志之按状翁讳尧钦字仲安其先自宋戴公族至晋孝子显于无锡数十传而至宋讳荣者宦大梁因家焉三传至承事公避金复还无锡又五传而为监税公友闻自锡之隆亭徙垓阳又三传而为栖碧公幼武栖碧公子贞固公宗鞞徙鹅湖定居矣其又四传而为封户部公恩娶邹安人有丈夫子四人翁其仲也生颖敏读书工属文补博士弟子每试与瑞州公相甲乙有声然皆不利大试最后瑞州公有名第顾独遗公凡七试七不利而食于学宫者几二十年乃叹曰男子匏系五斗米耶因北遊太学徙上舍庚子试于顺天见録名次七十一矣而锡之士有中蜚语者俱报罢翁得司试者所批卷郁郁成疾已而复叹曰命也吾故不如老农遂退耕于鹅湖之滨絶口不言试事矣公至性过人负耿介尤眷取予其孜孜好为德盖始终一节也少食贫得少珍味輒以共封公及邹安人封公有邑中逮公时甫弱冠挺身出理之于笞捶之下以免傅里人邹氏塾以束修进为画策曰子幸不至急旦暮请为子岁息之可十三如是展转百金不难也翁谢曰甚劳子不腆句读辱为师而以贾道终乎邹氏心仪之竟十三年无倦色其入太学宿燕中逆旅主人嬾美而荡夜灭烛而趣就翁急披衣起烛而号之愧遁去即以诘朝发亦不为人语其事族兄政和丞沂寓羨禄五百金于翁而曰子不更事恐其费之未几沂死翁召问其子曰知尔父橐乎曰不知也翁出而归之如故封识于是有族弟赏者病且死翁候之泣而曰吾忍死以待兄有橐金五百儿子稚弗任也今以寓兄翁谢不可则曰兄尚不忍负沂忍负我翁领焉及其子长而归之亦如故封识且诲以树艺生息计甚详翁又收族子嬾之嫠而子幼者养之俾以节显族有困役而谋鬻其墓丙舍者中二殡宫在翁捐十金助之葬又勺十金为代役曰毋遽失守也外姻杨老而鰥独翁迎与偕诸父养死而复诸土翁既贫丝积颗累以有家而义割其吝不恤诸所拯援非一然不一语之人也太学久次当得官卒不肯赴吏部选人至八十而善继为之请于朝得授江西布政司都事具衣冠而进之翁为一御即置诸篋曰我不称也居恒布素蔬食间进肉不至再簋瑞州公贵矣其子副使君又贵人或以居间事舆翁谓可润屋者翁掩耳曰毋论我不为此乃令我籍弟子势操守令喜怒乎自其倦太学日即足迹无城府矣好读书晚而益好之手不释卷栖碧公有文曰黄杨集贞固公集曰愚得皆梓之家塾以故善继为制科业且成而复与善述力为古文辞翁皆弗禁也二子皆有子翁抚之喜已歔歔顾二子曰自而父夭吾日忧斩焉不谓一线之息而有此吾及曾矣庶几且及玄乎盖善述之子胤殷娶于施者方娠翁卒月余而始举玄也以故善述尤媿媿难之云翁之生以弘治丙辰卒以万厯癸未十月得寿八十有八配过孺人有女德前翁卒者垂四十年是时翁甫五十八劝之娶卒弗娶也子一即梦旭娶于胡其节成矣女五适邑诸生钱璠诸生钱应征过体元钱应琛归学程学程故常熟鸿胪谟子也谟为人长者故与翁太学同舍翁病而身营护之以愈感其德令少女女焉孙二即善继娶于孙善述娶于钱女孙二适张启颜曾孙男七嗣殷娶于归象殷聘邹宪殷聘浦善继出也俨殷娶某迪殷聘浦祖殷聘王服殷未聘善述出也曾孙女六适邹弘基字范某王某者善继出也字曹氏吴氏者善述出也墓在康

安山之祖莹墓以嘉平月之廿二日士礼也亦翁治命也是宜铭铭曰

将古所谓敏事慎言者耶于格孝弟力田者耶翁绝不以自名朴茂自全以终其天年虽然不自名而人名之曰贤有二孙在夫何朽焉

弇州续稿卷九十九

●钦定四库全书

弇州续稿卷一百

（明）王世贞 撰

○文部

△墓志铭

将仕佐郎太医院吏目春溪张君墓志铭

张翁没而余识其叔子濂恂恂长者也已进其师黄定父游已又介定父而以职方郎郑君一麟之状请曰微执事亡所以不朽先人者余悲而许之按状张翁讳旻字必仁其先世开化人至唐季而荣公者徙休宁之岭南耳孙清叟再徙渔滩久之遂为其乡着族入明而尚周者传原善原善传竹癯竹癯传云楹曰耕云公娶于黄凡五乳而举张翁张翁为人眇小貌古而癯既幼失耕云公十六徙其伯氏贾游主计于计书有所不能达伯氏谩骂曰咄嗟而不学桑大夫少若三岁善心计耶张翁媿愤取六书义强解之遂能通已又习古文诗歌诸家言为之亦遂彬彬矣伯氏谓张翁可任鬪智也者俾以橐装千金游淮扬为鹽盐能窥予缓收以俭勤佐之转徙游燕齐间累訾至巨万归而叹曰夫徙着而归着于宗不为废着乃让其家诸兄而别起大第数百楹堂阁重复相属因丙舍为义塾教子姓傍畝益辟桑麻竹树之类郁如矣张翁訾起至倾郡城而顾有家约其子弟非恒衣食弗衣食也稍具味滋饶即覆筭器其纨绮而加饰者呼火火之曰是何所得破产物耶即子弟一逸蹶輒袒令受杖且为四戒以约束之是时有兵警当城休宁令欲资张翁橐而以其身起家故重发言张翁推千金城城曰是扞我橐者而我橐之靳耶令欲以冠带劳张翁张翁笑弗受也其最后奉例谒铨部乃得太医院吏目令以下皆奉牛酒交欢张翁属乡饮推择为祭酒矣张翁性笃孝居恒念蚤背耕云公不逮养輒泪簌簌下

所以事母黄百端冀得其欢母没毁瘠逾礼有盗张翁金而自愧死者召其子慰之益以金尝误才一乡人谓可贾也予之数百金尽费不讎张翁亦不问而乡有凌张翁者客行说曰奈何挟重而坐受人鱼肉吾力能复之请讼之官张翁曰吾不好复亦不任讼复故邑里艳张翁之富而安之以万厯之丁丑八月八日卒距其生弘治之乙丑六月二日寿七十有三始配程孺人继管孺人管孺人生三子长浚娶于黄为天朝女仲洙娶于吴为万善女叔濂光禄寺署丞娶于黄为豹女再娶于袁女二一适太学生吴某一适黄策宪副某子皆管孺人出也季曰洛为按察司從事娶于黄为秀才拟女侧室胡出也孙男女云云葬于某所吾闻之吴俗讳富以避官侵牟然亦不善居富独徽人不讳富其所致富与居亦类有道者今读张翁状其趣时近智其寬报近仁其让着近礼其赴役近义岂所谓好行其德者耶晚而以考终四丈夫子三能拓其业而叔氏用儒显是宜铭铭曰

以惠行蓄则无诟以礼御侈则善后以文饰终则不朽

乡进士玉山张先生暨配全孺人合墓志铭

当嘉靖中而昆山之隽有声公交车间者毋如吴先生中英归先生有光与张先生廷臣然张先生与吴先生竟不第邑邑以死而归先生老仅得一第亦竟以拙宦邑邑死噫胡造物者予才而竟抑之也盖先生娶于全有一子曰士瀹其才如先生而不遇过之当其葬先生尝手草事状以请贤士大夫之志铭而不果既全孺人没而士瀹亦以痛发病死矣为士瀹之二子曰进士栋曰诸生文柱既以全孺人纳先生窆且十年而名成乃又奉士瀹所草先生状而益以全孺人状而问志铭于余余故与栋文柱善而夙知先生故不辞按状先生之先为汴人建炎中以避难南徙至明而有诸生旭者生新城令能生博士注后先以善政教闻注生刑部公銓教授诸生有隱德是生金事公寬金事公尝一为刑部郎奏最而封銓如其官故銓得称刑部公云金事公娶于周而生先生为人鸢肩广颡修眉长準準上黑子隆起五岁从金事公令钱唐署骤灾舍人子惊求先生不得乃自寝抱印出金事公异之俾见客拜起如成人已俾就外傅握管受字即能辨点画波拂尝有沿司檄而覬以下上者先生骤见之曰非真檄也问何所得之曰于前檄篆得之金事公既验而益大异先生曰儿任官矣尝有塾客要先生西湖而主具乃一吏者先生拂衣起曰是将有居间设耶归以语金事公而顷之其吏以侵牟藏缙见讪矣是时先生甫八岁既归自钱唐受易于梁九万氏属文蔚然时全孺人之父曰全翁以财雄里中尝覩先生过门而奇之曰是岳岳者谁氏子也问其父为金事公乃使人喻以指遂归孺人于先生寻按察公罢归欲使先生改授诗于浙东郑氏未浹旬而当御史试遂以诗报既射义始意逆之时御史为萧鸣凤者最严少可顾独善先生遂补博士弟子其又明年且试而后御史以争鹺利有所望于金事公金事公忧曰得无以儿子饵郗耶乃援例入太

学而訾不能中程全孺人悉簪珥以佐訾自是日夜戢身机杼间矣先生游太学而所为时业当祭酒湛原明张常甫意凡三试悉冠其侪至戊子乡试遂中式学士张公潮激赏其文曰是当一日千里矣然至会试輒不利而以文高同舍生有剽而取上第者人或为不平先生笑曰命亦可剽取耶彼且出吾大人日而贻吾于是日侍金事公于里社诗酒间金事公既才先生先生益自砥砺以父子知己而金事公有文责輒属先生先生具一草出輒成金事公声久之金事公病亟先生昏夜走求医躬尝汤药既卒哀毁骨立将葬行求吉壤地斂于弟不行因痛自责复别求得吉地先诸役负土石成坟墓而庐于墓者三月而弟会有他厄念不敢徼先生力乃力为解救得免自是为感动又尝迎贼产之伯父使返着于吴淞筑室居之歿治墓邻金事公曰魂魄庶相倚也先生既少而多疾其试应天亦以病疽几殆而困公交车久不能无中郁竟复病疽前是忽呼士瀹谓曰夜梦偕而祖会官舍语不可了而多悲咽是何祥耶既寢病剧犹能为七言诗二章感激用壮无儿女子态亡何竟不起是时士瀹甫十八而全孺人痛先生甚不即偕死然稍稍代为政矣士瀹好读书不能问家而宗人有利其产者创赋讼以倾之时时赖孺人筴以免最后转徙金陵孺人且老尚能馭浆酒脯■〈施，食代方〉丝缕之费以寬士瀹于书而是时栋及文柱稍有识矣孺人口授书成诵又为课其笔札而诲之曰毋替而祖武也而有祖不能葬有家不能归是在而辈责哉已又歷数其乡戚宗党曰是犹及而祖还往者也是下石而父者也已又曰夫下石者吾非欲报之欲使汝知衡困也盖士瀹念欲携二子于邑试而难孺人不欲行孺人固强之乃行行而孺人疾亟归不及殮矣士瀹所以悲而病且死也嗟夫张先生挟文行称至不得一第而又不获下寿士瀹又过之矣然而栋甫踰立而擢高魁所为程序文传于世文柱少于栋而补诸生十试皆冠其取一第可芥拾也是何前者之难而后者之易也王子曰余读张生状盖泫然焉语云公侯之后必复其始张氏今乃有始矣夫以张先生父子之才而不遇且至欲令人诘造物然以例夫吴先生归先生之后而寥寥者又当何如也先生字符忠家玉山山下因号玉山子又以其拙于世也别号六拙居士生之日癸亥二月之五卒而为乙巳十二月十九日得年四十三有文集十六卷文待诏征明序之全孺人生以癸亥四月十一日卒以丙寅十二月廿一日得年六十有三有丈夫子一即士瀹补太学生娶柴氏女一适吴询孙男二长即栋娶于归文柱娶于朱女二适王庚周肇恒墓在昆邑九保藏字圩之原铭曰

墓有梓而弗竟材以逮孙枝夫然后培栽其负蝨而虚其颜以俟乎将来猗欤休哉

明封文林郎长乐县知县慕节蒋翁墓志铭

盖蒋翁之始置其居也曰顺节其最后曰慕节云蒋翁之所不忘节则以母季孺人故而其父曰思静公思静公之举蒋翁仅三岁而弃之季孺人抱遗孤而泣告伯氏曰所

不即從地下者以此儿耳其幸全之则伯氏之賜也伯氏惻然顾其嬪譚曰善视媪母子自是孺人依譚以居然素贫绩纒所不及或日一炊冬一薄絮抚蒋翁而问曰儿得无饥寒乎蒋翁强应曰否中夜影莹莹相顾而泣被为渍也蒋翁甫六岁就外傅日记可数百言又工偶对自是夜分篝灯书声与杼相终始矣蒋翁之小长受经属文渐有声而故眉州学正朱公晚而举一女甚爱之难其偶见蒋翁而器曰是孤乃壮可倚也俾入赘女是为朱孺人甫赘而朱公死于是朱孺人奉季孺人以养蒋翁稍发舒得專意学问补邑弟子员每试輒高等邑令冯君汝弼贤季孺人之节礼其庐旌异之而蒋翁之试南畿则拙无何季孺人遘痢蒋翁废寝食而日夜兢兢医药间躬浣中裙踰厕者一月竟不起蒋翁恻几至灭性尽毁其橐敦葬事走故师陈中丞察而乞志铭曰伤哉所以为吾母者仅此耳以故更其顺节之署曰慕节而蒋翁所为文义益工然其再试于南畿复以疾不终事归会朱孺人复卒蒋翁大叹咤曰命矣时朱孺人举丈夫子三咸玉立乃指架上编谓之曰吾起孤童不能治家人产以貽若曹勉之是中可家也于是邑大姓耳蒋翁名相率延为塾师其长者二子后先從蒋翁独严课之俾抗法而季亦渐长俱业成伯与仲遂同举乡荐其明年伯复成进士蒋翁乃快然曰吾蒋自汝州公起家良二千石且百年而复其始吾可以谢博士弟子冠矣然蒋翁既内伤不及事思静公每伏臆悬遗像而饮泣已又痛季孺人之节不及旌也居恒邑邑不怿曰伤哉吾所以为吾母者生顺而没慕之已耳于是伯方肆事铨部上书陈季孺人节下有司复核当旌诏许之蒋翁闻而后喜可知也伯令长乐以卓异考封蒋翁如其官具冠带上之蒋翁曰吾无官业藉尔有官虽然尚不如旌吾母孺人之快也一再御冠带即篋之谓此何物苦约束我自是出行必徒步遇故所识即田叟市贩肃揖问劳苦微时有所窘侮輒忘之叩缓急不忍以难报也其事伯父母不啻若父母曰微二尊人我何以今日待其子益共恣而抚其孤孙成长捐先业畝二十畀之俾食其入而代之赋季孺人之二侄有田不售委蒋翁蒋翁度其窘且甚还之焚其券盖其少时尝馆江乡有少妇目成者蒋翁默念身何所自出而轻弃之即密徙去又尝守醉客之遗金而还之其冥行笃至如此郡国干旄候蒋翁多使人谢疾不恒见见不一语及私然性独喜客客至輒呼饮饮竟輒卧任真推分廓如也又尝习二苍头吴声使佐酒暇则选地于虞山昆湖间徜徉竟日犹以为数出劳人筑半畝园于舍傍攀山之胜而亭之杂植卉竹手抱瓮汲灌不以风雨废也蒋翁既数喜为宴会而其好施又天性然又不问家人产絕居间馈谢路时时笑彼守财虏何为安得数千斛粟盈困惟吾意所欲予哉伯繇令高第当召顾入留都为刑部郎意蒋翁有所嫌乃得好语云食味忌甘驰坂忌峻郎乃而久地也蒋翁为人修眉耸肩状若立鹄两目炯炯彻遠步履便捷望之恒以为且百岁蒋翁雅亦自负百岁也而偶以劳■〈谷丸〉伤积血腰肾间隱隱作痛药之且愈矣它医杂投补剂两月遂中满不能食是时伯方留省而仲以试事大都未及侍当疾革家人环拥泣蒋翁笑挥之曰去毋溷乃公苟死者有知吾以诸儿成立报吾父母矣因诵论语数章曰聊以摄散乱耳又谓毋作佛事世岂有净土吾前后念不接即净土也

屈指某日为吾生岁冲且逝矣趣治木木美津津喜见眉宇至期整衿危坐而逝始伯闻蒋翁病哭请于其长以病告轻归抵家则不及殓者仅一日耳蒋翁讳世卿字嗣息其生以正德壬申闰五月二十八日卒于万历丁丑正月二十三日享年六十有六有丈夫子六曰以忠者即伯自刑部稍迁为郎中娶于周封孺人曰以化者即仲娶于徐次以行邑诸生娶于严故赠孺人朱出也又次以载邑诸生娶于归又次以仁娶于施又次以逊娶于程诸孙十人孙女五人其婚嫁具行状中墓所在虞山南湖桥陈家涧之原惟蒋之先有讳亢秀者在晋以下吴功食采邑常熟遂世为常熟人至元忠用判官九一而始徙城南居又二世而为岳以乡举仕有声实所谓汝南公者也亡何忽傍落又二世而蒋翁始以力学孝行开先刑部君兄弟益廓大之蒋自是有闻哉夫刑部君之所具状雅而详于季孺人之节而蒋翁之孝盖精乎其言之也余悯其志意而许之志且为之铭铭曰终始不能忘母孺人者其蒋翁也耶能显母于旌而荣蒋翁以封者为郎中也耶蒋翁归而报母暨思静公相与融融于大隧之中以相蒋氏于无穷

乡进士张叔貽墓志铭

予弟敬美过淮而遇吴司马者谓曰前有二王后有三张吴人哉嘻敬美归而语予而张之季则以前一岁逝矣所谓三张者伯起幼于叔貽也叔貽无子子幼于之子幼于乃自为传而以幼来请曰是将葬矣敢藉手吾子以不朽夫予往来于三张者最久而又最善其何忍辞叔貽讳燕翼其先世为长洲人有昶者尝着人物志再传而为云槎公冲虽以末起家顾喜蓄图籍古器有隼声贰许太君生三子伯仲皆玉立美秀叔貽生而貌微寝然特颖敏甚七岁听歌者按节而句之殊曠又能为渔阳挝縱辩折客客无敢抗十三工属文寻受易于蒋大夫梦龙已又游其伯仲间十七为郡诸生二十一遂偕伯氏领乡荐一时才名籍倾吴中矣凡三试于春官三不利而其最后司试者得其文而善之且见録用小不及格罢遂以其明年春感末疾寝剧至冬十一月卒得岁仅三十三叔貽始游伯仲间习博士家言伯仲皆善诗则亦善诗伯氏善书则亦善书而叔貽时时作猗兰藁筱恠石出其表也其为人酝藉开敏善谈笑多艺能所治装服器用人慕而仿之又能自度曲为新声去家十余武樊圃疏池杂艺花竹筑精舍读书其中佳客相过徙竟日夕不厌居恒慕说长卿之慢世季长之达生以阮公口不挂臧否为善所恨多白眼耳与客周旋毋论贱贫有所勾请立应而所简脱多達官富家子自其儿时故文待诏征仲业已器爱之而一时诸名胜若徐绍卿文寿承休承彭孔嘉黄淳父周公瑕何元朗钱叔寶咸屈年行而与友叔貽相与下上甚快其家世既多藏图籍古器而叔貽又慕好之又雅负鉴辨名画法书敦彝鼎印章酒鎗茶具之类一一能指所从来当其嗜即废着脱衣不顾也叔貽外庄其伯仲而肤爱靡间其事许太君则务以色养闺■〈巾达〉之际熙熙如矣前卒之岁属除而梦贾长沙以鵬赋示之明日谓人曰殆哉吾今者乃长沙筭也

既疾革许太君劝之居内谢曰奈何令儿死妇人手则又谢曰儿不能复共养母矣有二兄在母自苦目遂瞑叔貽所为古丈辞若干其著者疾世多市交作掩关铭疾世多市毁作行己箴他托指类是叔貽娶于徐生二女长适庠生汤一凤次聘庠生徐笃孺其墓也在伏龙山之新阡铭曰

葬者季耶忌汝者世耶夺汝者帝耶痛汝者伯仲氏耶不朽汝者志耶嘻其存者张与王俱二耶

封征仕郎吏科给事中凤冈汤公墓志铭

始余为郎时故双梧汤先生用邑丞沿檄至都先生不以余少而进之论文甚适也凡二十六年而余领太仆先生之孙给事君用邑令高第入琐闼不以余惫复进之论文且旁及时政又甚适也已而知为先生之孙又得其父凤冈公之为人其博雅似先生而易谅开济世所举而归给事者则又公启之盖踰岁而公抱微病给事念之笃乞归省亡何病良已于是公日夜促给事还署毋恋恋老人方健甘匕箸然给事之还署不三月而公病复作且逝矣给事衔哀手事状而匍匐以葬告曰唯执事者以不肖之知而推其前人而辱之志铭死且不朽以王父之知而惠其后人而辱之志铭死且不朽夫余幸而获称友于公父子也安能辞按状汤之先世为练川人凡徙于郡城之碧凤里者三世而为双梧先生讳珍以行谊文学与文太史征仲王太学履吉后先齐名娶于某是生公公幼警敏甫就外傅即能读其父书而工属文尝感雷震作迅雷赋履吉读而异之谓先生曰是儿尾乃公胡迫也先生虽才公然念其多病不欲过程督之而公益自励于学诸子史百家言靡不成诵至所谓汉文选则舖糟醖醢矣弱冠而补诸生小试辄能甲大司马永丰聂公御史大夫南充王公尤器之而少司马衡水杨公时为学使者以公冠诸生俾受粲弟子执易而请难者比比然公数奇其试于南都辄不利而所受弟子多通显者公乃叹曰吾家世易而不一遇能不愧吾弟子顾谓给事诗亡而后春秋作若庶几籍此以进哉公自是杜门不复应试而给事之业成迨其举进士而公膺贡当上春官自顾笑曰夫欲用我者而不及吾壮哉孺子也才可任也天其佚我老矣公虽意给事才可任而犹窃少之其令进贤而迎养瞿然往曰吾欲以观进贤令作何状及郊而郭而聆民声入邑而警吏色而喜可知也不踰月归曰无所为乃公虞矣进贤令高第入给事首省公又将其嬖若孙往曰吾欲以观给事何状给事迎拜公谓曰骨鯁若自有之第为县官持衡大体夫揣摩利便以就功窃望风旨以希纳一切毛举鸷击以自显见非天子所以用若意也给事拜受教公覩其所请白封事而喜可知也不踰月复归曰无所为乃公虞矣给事既留公不得复念母沈夫人无已而公所抱微病有征以故乞归省归而病良已乃大合间党为赆郡邑守令上牛酒相继当是时公疾非尽已欲以壮给事之行而俾无内顾之忧以

故与沈夫人俱自强力匕箸给事信之为小寃而亡几公逝而沈夫人继之矣虽然给事业已弃身为国家有赖天子仁圣得遂其私及公与沈夫人之别声辨味而一相与娱乐今又奚憾也公孝友敦朴自天性双梧先生尝遭疴危甚公剪爪发而祈于神请得以身代先生竟愈季公贫不能家公剖家而事之曰吾敢靳吾先人之敝庐也季父稍废箸则为赎以至歿而尽分给其诸子少与方伯陈公子兼同师雅相慕陈公窆至不能饗公舍而饗之已又饗少叅张君某某念其鰥也而以弟之子妻之居恒谓二君非庸人也公居平嘿嘿不喜言人过失至得一言人倚以为重若管幼安王彦方者好田居不喜入公府既以给事贵封如其官而不时御章服幅巾白帽澹如也公讳修字彝省所居碧凤里有冈曰高士故署其斋居曰凤冈学者因而称之其歿以万历丁丑八月十三日距其生正德丁卯九月二十三日沈夫人之后公歿也盖月之四日其内则淑行语具皇甫先生子循志中有丈夫子三长即给事君聘尹三迁而至户科左两娶皆蒋最后龚其先蒋赠孺人龚封如之次学尹娶余俱沈夫人出也次任尹娶于张贰吴出也孙男六其长一元娶顾学尹子也一龙娶诸生陆再闰女一凤娶乡贡士张燕翼女一骥娶刑部郎钱顺德女俱邑诸生聘尹子也一松一栢未娶任尹子也孙女四一字张某一字李时春余未字曾孙男一尚幼曾孙女二一未字一字赵检讨用贤孙卜台山祖莹之次余既为志之而又铭之铭曰

以丞公父而给事君子七十一年充然若无忧者耶竟其身绩学励行而不一讎耶其栖僻若投其避喧若仇其迹无忧而中无伎求者耶于戏其长即安于兹丘

东墅王翁墓志铭

王翁讳廉字文义尝卜墅于东山因自号东墅云其先世为凤阳人讳复者以安阳总管归太祖积功至某卫千户有子义从文皇起兵北平进指挥使传子斌斌子政调金乡卫以捕寇功迁守两浙遂家焉子泽为浙江都指挥僉事则翁之祖也泽生埜为支子不得袭而称萃田处士有三子翁为仲生而颖敏读书晓属文已谢去曰书安能一一甲第酬也顾所以用之耳乃稍涉猎子史家得益语即揭之座右及为亲执称说不休翁誓本下中强力展转流息以共奉处士公及母沈处士公好客仓卒而问翁毋耻疊者母沈病翁蚤夜粥药间不暇巾栉且卒而易戚咸至处士公老以无疾终翁犹恨其不及药也伏腊祭则俯伏涕涔淫沾地矣伯兄自楚归而不具橐曰愧久宦减仲产翁曰仲虽窆独不能赢尺布斗粟乎奉之终其身以至凋棺殓甫踰强而有子俸成进士为丰城令翁数移书勉之曰令为天子爱养小民足矣毋念吾吾必不食而官也既令有循吏声顾以不能事上官罢翁微知其垂橐欣然安之翁始有子贵而诸贵人父为社湖山间翁时齿最卑而角巾末坐稍与谈诸老人人人自失也席非翁无欢以至为社中祭酒三纪如一日

矣翁伉直不能藏善恶齿舌间而实无它肠即受者不为怨而益严重翁诸所为德非一其最著者尝置婢而知其适人呼其夫并券还之曰吾不忍折而媵也居数载携其三子来叩首堂下以拜赐翁既用寿考遇例有冠带仅一御之而已寻藏诸笥曰非吾志也即郡大夫再致为乡饮宾亦不赴翁生以弘治戊午三月二十四日卒以万历丁丑六月二十五日春秋八十配徐继配李丈夫子四长即俸娶于陈次化凡再娶曰陈沈次伸邑诸生待贡娶于邵皆徐出也佩举乡贡署太仓州学正娶于沈李出也女二适诸生钱恒心德府引礼楼梦贤皆沈出也诸孙十四嘉谟嘉猷俱邑诸生嘉令嘉征嘉宾嘉议嘉瑞嘉筵嘉禾嘉祥嘉遇嘉造嘉佑嘉闻孙女四曾孙六绍登绍科绍元绍亨绍宜绍贞曾孙女三佩之应礼部试也凡四而最后见贤于司衡者且首荐而弗果吏部闻而善之令署吾州学特铨试礼部翁之卒也丰城君将以十一月葬翁于南天竺之原而以通政叅议梁公子琦状来请志铭而佩与伸墨而泣致辞唯先司马之第进士也盖偕丰城君云世贞甫舞象而道遇君及叅省浙西而君相款甚欢也几若世矣又八年而从佩游而翁始捐馆舍余发且种种而始称小子以志其墓石不亦希阔异闻哉是宜铭铭曰

隱其迹儒其言有子而贤是犹显与晦之间孙枝绵绵奉天年南天竺之原松柏之卷然者翁之所归全也耶

故文学企斋郁君墓志铭

君姓郁氏初名灏卿更为灏已复为灏卿字邃叔更字景仲别号金斋其先自汴徙钱塘寻徙华亭几二百年而有讳敏者以善着里中称之曰佛子生封主事公桂桂五子长曰温州守山季曰青城君岷尝举北畿试有声竟坎■〈土稟〉场屋中青城君娶于黄无子置貳陆生君与某君生甫髫而丧母黄哭踊若成人矣寻就师塾受尚书及诸子史皆成诵十五补邑诸生当是时青城君方以显属君几得息已游而其又明年君生母陆卒明年青城君继卒君既连遭二丧日痛毁几殆而又素弱不习生事里中子业少君而挡■〈才必〉之君务为温恭鲜件而其持门户御臧获斩斩有条业不旁落君之嬖张又能佐以俭勤岁致息营葬已推其羨衣食其弟若女弟为毕嫁娶弟既娶即析箸君度不可已则司其缓急而济之弟感悟益庄事君而所嫁女弟于孙者寡有一子一女久之病卒视不可含君抚而哭曰岂其有遗憾于孤女子耶非我孰任之乃瞑君为旦夕矚视其孤悉成立有室家而君既痛其二母后先背不及养所以待母黄之兄旬及其二子厚甚伏腊问遗不絕母陆之父壁与其媪居贫不给君除舍迎养至歿而葬之又恤其子某某君于族兄弟行卑然至于订是非筴利害得君一言以为决若蓍龟或恠曰此岂其郁氏老耶已而察君之笃行谊急人先已不寝为然诺乃益见推重君遂自喜负侠声而其黠者阳露困以干君君无不响应甚或不能迹其子钱处以是产渐挫而其试有司亦

数不利会有子承彬亦十五补诸生数获隩君乃叹曰吾去诸生归耳且吾安能与儿子辈屑屑竞嗷嚅也乃上书得诸生服以免久之承彬应乡试甫试而君卧病卒距其生之月日时悉相脗合年仅四十有一耳有丈夫子二长即承彬为文有奇气娶于杨生子炳祖次承楸聘于曹女二长适陆之麒次许聘顾伯麟君之歿不能具棺殮其友沈生推已棺而其弟为调殮具始给于是承彬辍试奔而大恸殒绝者数乃曰孤所欲自力而偿吾父志者已矣疾无所视汤药而歿无所视含也如终天何则又曰庶几夫藉长者一言以不朽于是手君之行而谒陆京兆先生次之乞余铭其墓余之举于乡与青城君俱以癸卯有南北分谊第不识青城君与君而夙与承彬善一当铭闻之乡人君不好游俗客若词人酒徒黄冠羽衣日夜过从毋间每一浮大白数日不醉醉即曼声长歌清啸或谈说经史纒纒若悬河贯珠噫此天下所以讥余者而余不能悔顾独欲得斯人而与之而亦已矣二宜铭铭曰

若业将有成而卒无成以死其无成者类若父而有成者庶几待君之子其即安于此显于此

弇州续稿卷一百

●钦定四库全书

弇州续稿卷一百一

（明）王世贞 撰

○文部

△墓志铭

承事郎温州府推官王明得墓志铭

万厯之丁丑冬十二月而吾徒孙绶等乃始克举其父温州司理明得之墓也距其没八阅岁矣而犹浅土也呜呼伤哉贫也绶等乃又以其从兄刑部郎周绍状来请铭余亟读而涕亟下而弗能收也呜呼伤哉其不遇也状之畧曰明得之讳一诚初字学程最后更今字先世即丘贞子覽传始兴文献公导为江左始至宋而节度衙推仁镐徙分水而孙司諫公缙乃大之为浙始又数传而古川公梦声为昆山学正为吴始已割昆山之

支地为太仓州遂为太仓人 世世以儒业显而先大王父封司马公讳轺有二子其长曰工部郎中讳侨有五子其仲曰乡进士讳悌有一子曰广东提学副使讳世芳则明得考也娶故少保毛文简公澄女副使居官以廉介伉直闻天下有所不合即投劾归既老而其守不衰学者尊之曰颺斋先生有七子而明得其仲也生敏慧受书辄诵既长为邑诸生娶于魏氏故太常卿恭简公校女先生之庭训严诸子毋敢以燕惰见而恭简公方讲道东南为学士模楷明得所得于内外父深而其为人温恭退然长者自其称诸生以至入太学其侪偶狎之即不令以属文进也明得亦务自晦骤即之不知其为能属文人也然所撰拟于试目亡不备而伊吾声至丙夜弗休矣当是时魏孺人以惇谨闲阃则毋贵色加于妯娌间而其橐亦少足以资明得读既先生弃诸子而魏孺人亦歿明得乃稍稍有家任家亦旁落困内外共而曹偶益狎之沃以酒则酒与陆博樗蒲则亦陆博樗蒲而读书益不废至嘉靖戊午始举应天试年四十五矣试卷出而人传诵之即素狎者亦为吐舌曰夫夫也而可皮相哉然至试礼部复不利乙丑始中式属当入对策而心怦怦然疾忽作竟告归归亡何而继母丘夫人捐馆明得获治丧葬人谓为孝感云隆庆之戊辰始克廷对隶政吏部复移疾归稍自放山水间凡二岁而谒选得温州府推官抵家疾大作遂卒距其生甲戌盖五十有七岁也明得性温良乐易自其显而益务为恭谨靡所不掩覆不留过牙颊间即故激之而不得恶声所与虽卑贱稚齿而无敖色既稍贵于州邑不能谢绝一切居间然其大指务以脱人厄游扬才能不屑屑责讎也族属多大父行虽齿卑于明得者徐行唯应惟恐其不恠里人荡其宗子明得少救之即前突明得几殆州闻而执之困以三木明得促驾为解曰非意也使释去而后已尤笃于族有槌臧获至毙者行刃为侠者皆宛转脱其死所好唯书籍卒有倭警毕力赍以自随而弃其它装弗顾所居间既不尽讎而又喜客有少讎随手付酒家以故歿而不能棺殓调也当毛孺人之配明得有子一太学生绶娶于金为（阙）丞（阙）君女女二适太学生凌玄佑乡进士曹绳武毛孺人盖不及明得之举于乡也继娶马氏其所以相夫治生畧相仿有子二郡诸生紈娶于俞绩娶于毛女一适太学生朱某而卒盖不及明得之举于礼部也最后娶刘氏无出余因稍稳括郎周绍之语而序之既而叹曰天乎所不遇者宁独明得哉自吾工部公为循吏后先二十七年而不能脱郎署贡士公仅成名而天副使公所操树岂肤立者伍一自免而不再收也乃刑部坐蜚语谪亡问识不识知其枉矣以我工部公之有隐泽而为其后者若晦若显几五世而不遂大振何也明得之为长者甚矣而不获一登下寿彼其短褐一太学隃二十年而始荐于乡又六年而始荐礼部又三年而成进士为选人者二年甫得官而夺之夫既终夺之而又稍予之何也呜呼是不可测者而非天乎哉明得尝游于（阙）而善之顾其田曰即不讳以葬我于是其田主为金丞而以绶故割其旁畝而树之栢州大夫张君故与同进士举乃谋于绳武而资其甓塋始永明得于居而魏马二孺人之兆祔焉所云八年而犹浅土伤其贫者以此铭曰

以而二嬪宁兮相而存者俾绳绳兮

从兄翰林院四夷馆译字冠带官玉泉先生墓志铭

吾王父司马公有二子其长曰布政司都事静庵公妻龚孺人亦有二子司马公满三载最当予一子官而都事之长子詹簿君应之矣龚孺人既念其少子不获沾稍稍捐橐以子兄而都事公复为择配而得故太保顾文康公女孙以是用髻补国子上舍己又用谳夷书入翰林四夷馆是时文康公为相而馆生选格高可步武两制而兄顾倾橐中装徒诸少年游故事诸生当习夷书兄独不喜习夷书其补两制法以隶兄又不喜习今隶而习行草习行草又自喜眉山体而不能工以故卒无所成而数请休沐还里既文康公歿而功名益偃蹇都事公与龚孺人后先见背产益旁落而兄益跣■（跣也）不复问家人生事其为馆诸生久次得食廩亦有冠服而以休沐过期不见收兄亦啮部符而弃之兄于奕入能品诸象戏双陆之技亦精而以徒诸少年游辄为所黜日胜日负至尽废箸而贱买陂田其种稻养鱼略法陶朱家言而又数不登邑责逋急用是大困兄于诸伯季间最为坦易不事边幅即毋论所取予必中节而不居薄其接见毋论贤否退而未尝不称兄为长者晚节恒邑邑不得意间有所假贷或责宿券得少羨辄付酒家不则诸少年复迹之矣竟以万厯之丁丑閏八月（阙）日病噎卒距其生正德己卯得年五十有九始娶顾所谓文康公女孙者亡何卒生子一龙娶周氏孙二人某某女适某某继娶伍生子一瑞一（阙）女某某顾之卒也兄以状乞先御史大夫志铭盖是时有兵事属世贞草而授之矣而竟未葬也卒三十有三年而兄卒兄卒之三月而一龙等始举其柩而附兄葬于杨林塘之南顾之不获蚤葬者兄志也兄之获与顾蚤葬者季世望与余兄弟志也顾有嬪德生卒具先志铭中葬与兄合而不废先志铭者其草自世贞而先大夫命而授之兄故也兄名世业字居美别号玉泉一龙请而为志若铭铭曰

有官而弃之有家而废之戢身而二尊人之魄是依（去声）犹曰遗子孙以安而还未尽之巧于天地

征仕郎都司都事平湖陈君暨配韩孺人合葬志铭

志曰陈之先着于长洲之大姚至中丞公璠而贵称名臣成弘间封其祖子富父孟善俱大官先生兄弟凡三人而叔曰福宁州同知鉞鉞生太学生洹洹有五子君其四也生而秀颖既长伟姿貌胡髯便腹望而知其为巨人长者居平恂恂恭谨即骤得非意凌而益自敕为恭谨不废所居里尚纷丽君独不少染指杜门读书量腹取给以故其书成而自邑庠诸生进补上舍至用髻得都指挥使司都事待次以歿而其家始甚俭亦以累

积致訾高有官秩君虽用节啬起家顾其于宗戚吉凶礼不废以故其歿也人咸惜之娶韩孺人而贤余同年乡贡进士诗女弟也既嫁亡何而斥装以佐君曰生相薄不堪重珥何请得为田宅费君恃以益宽孺人虽自力操家秉而肃然无厉声其既饶而居妯娌家无盈色人谓君固工治生然亦有内助焉一子曰文默君歿而不胜痛后十八日暴得疾卒其又二年而韩孺人以痛君及文默积疾亦卒文默之子曰允坊者拟于万历之戊寅二月廿四日合葬君与孺人于（阙）之原而文默徙焉礼也君讳扶字子茂别号平湖生于正德癸酉卒于万历乙亥得寿六十三孺人与君生同年而寿加二文默娶于史为兰溪丞■〈斌上金下〉女生仅四十六年耳允坊娶于王为宪副公天爵女女孙二适诸生徐士廉王尔恒曾孙男元镇聘行人王养醇女一未聘盖妇史之母为吾姑而尔恒则吾从孙刑部郎周绍子也故不辞允坊请而为之志文默亦补国子工舍恭谨有父风其死孝也于法得附书铭曰

嗟哉陈君逝而子继之其伉又继之孝耶义耶生者何以堪而逝者能无慊志耶噫

奉直大夫高邮州守松字刘君墓志铭

刘之先自汴着也当宋建炎而太医令琰扈隆佑太后渡江遂家吉之万安世世受儒而其医亦不废十余传而中宪公曦者起进士至同知都转运盐使司事传子硕祖景临以至奉政公一春俱不仕奉政公固有隐德然不能无少概于中近四十始举君君生而风神清茂警颖异常儿稍长日诵书数百千言奉政公恒自诧吾今不虞畊哉指谓君此吾廩产也君自是益感奋与其仲氏桂林君岷相切劘坐卧一小楼不复下为邑诸生可六岁而李太仆舜臣来视学政试公以为第一而廩之其又三岁而徐少师阶来试如李公二公皆以藻镜重者于是君名骤起每小试与邑之刘司空恣进士汝鎰相甲乙遂同举于乡所谓三刘者也然君自是赴礼部试辄北而仲氏与叔氏今同守君昆复偕举于乡君自是不专为公交车业益讲求理性与经世之术遣其二弟入南雍依故祭酒程先生文德游而身往来邹先生守益欧阳先生德所二先生咸器之谓口耳不足尽君君学成而试竟龃齟凡五上乃谒吏部选人谓君尚壮不待耶君叹曰二尊人老矣奈何尚以耕虞之且夫有志者不问格庶几将及吾壮而用也遂得泗州守泗故御史驻节地艰冗猬集君孳孳求民隐精出纳吏不得夤缘为奸岁时周行陵寝唯谨御史选两有所委鹺务而才之以其状闻君念泗民苦莫重于孳乳马议欲有所裁省甫具疏而奉政公讫至矣州人遮道哭挽力喻之乃得发君之持奉政公丧以孝闻服除补磁州磁孔道也其冲■〈谷丸〉数倍于泗君务程已为约其供张饷遗率十减六七而造请送迎毋废寒暑客与民交贤之台史监司有疑谏辄以属君立剖君度有羨庾首饬学宫新讲堂费一不割之民暇则延礼诸生论经校艺褒衣甚都以逮二属邑其名士亡不经指授者磁大

治当是时治河曾中丞钧巡按霍御史冀疏荐于朝满考上最予告阶奉直大夫加恩父母如之业且迁而母胡宜人讎复至矣州人复遮道哭留君不得则相率立祠小像春秋飨燕不絕仍勒石纪之服除补高邮高邮雅负沃名而中军兴久且困君一切用所以治磁者其民之爱之亦如磁而渐鲜宾客声景王适之国所從中贵人官属过州意不能无望君而竟发不能吐一语君为民约束调租赋事從寬顾恒先期办巡抚何中丞迁业荐之矣而有御史论劾文选郎者谓君以乡故私之由初选得沃州君实非初选也闻之叹曰是尚可留乎会有巡江何御史檄取其赎鍰千金君掷其牒于地御史恚以飞语中君罢归君归州人所以哭留如磁泗时尝有所寬狱而其人出者夜驰百金舟次曰亡以报我父君艷然却之曰比者夺吾官非能夺吾志也今子乃狙视我何也君后先典三州咸着士民思而磁于去后尤甚其最后谒吏部选磁之讯问者踵相属也或戏谓君郑当时千里不赍粮得无类是耶君正色曰不谷终不敢以一筐累磁人叔氏之赴计偕道磁也父老麇集问我公无恙相率而道君之政与别状涕犹涔涔下也君乃絕口不言治磁事强问之则曰吾知不扰而已里居以读书课子孙为日朔望冠带拱立家庙庠俟子姓集礼毕而进之诲以生人大伦稍及闾里前辈行实可劝惩者遇祀事必戒肃如也卒事而餽之怡怡如也君子于亲友自庆吊外少所过从虽郡邑守令一报谒而已刘君某者名令也数有效于君不得举鄉饮以大宾请亦不得恡然曰岂其俗吏我乎顾心敬之而郡守周君某素重君强而后一见叹曰刘大夫贤者不易测也又有袁守株者君尝识之而家又邻高邮以高邮人吏故修刺谒君君以他往辞人或谓是不尝与守面耶公曰见袁公可见守则不可吾惧以他守生厚薄也袁公颇亦以望君君不为动君三为州牧且久人或疑其橐及歿而发之若洗顾其好施予周人之急先于己宗戚闾右时有所濡润尤其俗所难者君晚而益好学与所厚同志月开讲于云兴馆既得疾犹亶亶以不得终事斯道为恨疾且革手署丧仪饬中外诸殮墓务從约毋令少有加于先奉政公太宜人令我愧见地下君讳峻字仰伯初号仰庵后更曰松字其卒以万曆甲戌距其生正德己巳春秋六十有六娶王氏封宜人郴州判官鲁伯女举子一发邑诸生娶郭氏少司寇持平女女二一适太学生罗衣侧室萧举子一登邑学增广生娶于郭继廖女一适王之诰孙男三季宿季宰季竹孙女一未字君子于书无所不窥皆自抄錄累千卷诗歌雄伟爽朗能疾书书复逸劲所著有日格子泗志备遗续家谱高邮未成志俱藏于家王子曰余盖与叔氏善云其丞而绩于吾郡也尤耳之也其权吾州守而绩也所亲睹矣吏民讴謠之则曰吾伯氏大夫教也已而悚然曰微伯氏吾安能及此也已又手一编谒余而泣曰此所草伯氏状也今将敢涂日几卜矣子幸为我志而铭之幽夫余乌能已于志也夫刘君自田间起以一书生更三绶所至有赫赫声去而人思之若一日也不贤而能之乎三为守三荐而不报中一飞语而归澹然无几微见颜色不可谓不贤也君兄弟三人鼎立嘉万间以循吏称而瑞自君发之是宜铭铭曰

仕不达而三州之绶何累累报不极而二亲之纶何猗猗名不称而磁有祠志不究而为之门者仲兮叔兮幽宫之郁芊其归于斯而永于斯

明故承事郎山东承宣布政使司都事静庵王公墓志铭

呜呼吾安忍志吾伯父墓也始伯父之弃诸孤而其孤以墓告吾先君子泣而许为之志铭它日泫然谓世贞曰诸笔研之役以勤汝此独不勤汝汝伯父非我莫悉也盖未几而有蓟门之祸不成诺矣而诸孤之中伯氏隘意不欲藉手他人文以重逝者仲与叔酒人耳盖伯父之即土者二十有七年而隧中之石未有述也会伯仲叔皆病卒独少子世望在而世贞业已倦谢笔研间语及之而叹望乃大悟哭曰今不及兄世而使我父小有闻于后又安望它人哉谋与曹甥昌先属状草以请世贞则又叹曰吾先汝而事伯父者五年而先君子忧其未悉也子岂能加我而况曹氏子也虽然姑相与交质焉王之称琅琊自汉而迨晋为太仆卿元公祥贞子览贞子之嫡孙曰丞相始兴文献公导始渡江而宋初有军事衙推仁鎬者仕钱氏居浙之分水至司諫公縉而以族着数传为古川公梦声尝为制置机宜文字薄元德不肯出而行省强辟之署昆山儒学正事曰吾以升斗隱也盖享上寿而后卒于是分水为昆山古川公有三子其中子絕而少子某最能世其家五传而为封赠少司马公輅赠公三子而少者为司马公讳倬则公之皇考也昆山割而太仓最后为太仓人而司马公始娶陈淑人而天继娶复陈以司马公御史最赠孺人实生公公性内辨了而貌示椎廓落有大志读书好涉猎独不肯齷齪经生业司马公故任之曰亦自足生活也公年十五六时陈孺人已捐馆既服除娶龚孺人而质庵公始续于陈来称母是曰陈淑人仅长于公一岁公率龚孺人旦夕修子嬪礼甚恭陈淑人后举一子一女子即吾先君子公抚而爱之不啻如其子以故吾先君子庄事公如從父虽贵不小倦也司马公既遠宦不复能问家悉以家委公公课率苍头多假贷陂田值巧获能以时消息之节缩为盈傍畝益拓司马公有二兄曰郎中公处士公素友爱而念亦以宦故不获侍昕夕公体其意所以奉侍之务得其欢郎中公晚节性益躁卞小违色则立所携叩诟咎不已而嗜鸡炙公未尝不储以待之每修词宛曲甚和犹不能无抵牾已鸡炙进则叩投于地矣处士公纘畜治生其资公缓急不敢以不继告时巴蜀方困大盗势张甚天子命大帅发诸道兵讨之而司马公以佐使当规调转饷公念司马公老单骑驰省因留佐擘画甚能得其意久谓公交车欲耳矣为我治菟裘公归乃筑甲第海上之故里壮丽甚司马公初见而骇之既而曰吾忘勗之故虽然渠材故不任小司马公之以老请也念族指众欲割田千畝以贍而难其为公橐也公向应不少悵司马公为先君子别起第公從傍请曰弟贵当不减大人异日毋使有所加也司马公既以寿考终公哀毁如礼已驰之京上疏得请祭墓已复乞状于毛文简公碑于王文恪公志于乔庄简公而后曰庶几有以慰地下其以例入太学无几而有司马公三岁绩当改胄子公推以与伯氏世

德既满岁当为吏部选人少保顾文康公其姻也迎谓公曰公乃肯幸来即吾力薄尚能分燕中一席之地以侔公谢曰此儿子事耳爰居不足当钟鼓飨遂受山东之布政司都事以归公故豪有园林声色之奉至是益发舒于居第后种竹万余竿长松半之它奇卉异木复半之筑山凿池列峙洞庭锦川斧劈诸峯间以亭榭桥道宛转向背恍若有神■〈穴上叫下〉窈深靚非复人境春时游者舄屨相嚙衫珥狼籍公盛帷张张乐合宴临观之则咋指叹咤以公非仙则神不然者岂十万户侯裔耶而先君子自御史超为中丞至御史大夫世贞复成进士诸来宦吾地者以一得见公为幸公第使人谢老病不任酬酢间迫之见茗饮寒暄道故小及民瘼而已一切不以私荐直指使者邓君下州牧欲罗致公公卒谢不可邓君叹服遗书先君子谓公家长公何必减骠骑也先君子后先杖钺皆有兵事公至月朔则必具衣冠以筮筮卜而得吉繇则喜曰是且大捷大捷当进封趣客出巨觞觞之俾醉而后已公长身挺劲骨■〈亻 崑〉■〈亻 崑〉立噉鱼肉糗饵甘果兼数人而性绝不食酒至其宴客奏伎为新声按节促拍即丙夜弗告疲尝以夏日风芙蓉池弦管间笑谓世贞曰和栢梁者方袭绮玉而挥汗具草得如老夫否耶又曰人生寄耳何乃溪刻自苦为公自少至老无一日不乐最后家中倭毁于火者十之五公仅以身免既寇退方履行煨烬间人意公且不堪公指其腹谓人曰乃公无恙乎又曰山石无恙乎俱应曰如公语曰然则我胡为弗乐也促具酒奏伎如初盖公卒而事渐变矣公为人宽然长者不为慷慨侠烈可喜状而乐施予赴人之急客或以假匄告即橐中无一金亦宛转应之既以推田贍贫族而身仍司其出纳垂五十年尝有别业昆之七保为出奇居间得下徭则所费不可訾数人谓公业不过十之一何役役为它人劳苦公曰恶何言也彼皆与吾子孙比畛而居吾欲独宽更易耳吾乃不忍独宽其人至今颂之公所为德非一其御臧获尤有恩不得已行撻罚往往从衣上过伯氏负才气不恒尝上书论倭事弃其官公心惜之且恨曰皇考辛勤四十年以博一官与汝何弃髦之也仲氏尤耽弛多狎游败其产叔龊龊下中公未尝不知之也见輒煦煦问寒暖劳赐酒炙意不欲以义夺恩独世望时依止膝前有所慰奉为得其意至析产伯仲舍十之八而叔与季不能当其二伯仲者龚孺人出也其析在龚捐馆后人尤以为难而今能拓公业者仅世望耳公居恒舌吟若不可了而至谈论司马公宦游事傍及天文地理兵法人相一切形家言袞袞若悬河立语过宵分不移足晚岁犹御内上下山坂若飞以为不百岁不止而竟病噎且易箠唯谓吾不及见吾弟之解节钺而逍遥台省以为恨公之卒以嘉靖己未某月某某日距其生成化壬寅某月某某日享寿七十有八元配即龚孺人前公五年卒卒而先君子铭之所谓勤汝者世贞草也子世德仕止南京詹事府主簿娶于虞生子尧佐太学生世业授四夷馆译字生有冠带娶于顾生子一龙继娶某伍生一（阙）一（阙）一（阙）世闻贰朱出也州博士弟子娶于刘生子士（阙）士良士方世望贰陆出也授太医院吏目娶于陶迩始举一子未名诸曾孙若干尧佐无子以一龙之子谷为子女三适太学生周允元布政司都事金允治鸿胪寺序班李三纲晋驥吴议墓地在麋场泾之右方

其期则卒之明年某月某日也吾王氏昔之盛于江左其冠带衣履徧海内今乃复庶几焉然世世为长者不替其长者尤推公而其后不能大显以为未甚售第尚绳绳未艾也虽然迹公之所奉享覲际亦可征德矣公讳悛字民服初号西庵未几更静庵世贞敬志而铭之而季观察君者父行也俾之填公与世讳铭曰

贵何必儋珪爵以九卿父而九卿弟差为踰于己富何必倾都邑以饶乐始而饶乐终庶几踰于素封名何必着青史以州里耳而州里口亦足以称不朽七十八载备际伦常歿而愈光不腆之辞更百千年琅琊西阡

夔州府经历赠承德郎工部都水司主事梦泽马君暨配王安人合墓志铭

马君之自太学为吏部选人也其年盖尚壮而故事选人之以次得官者其官不胜人众非三十年不可即徙募万里外乃前得而它选人业畏远少应者君独奋曰不及吾壮而效此犬马异日筋力且尽而仆仆道路视人眉眼哉且夫人死即步武死耳岂必尽万里外于是得云南之永昌府照磨君乃携其妇王安人臧获各十指破箐险披瘴雾车耳裘鹑而无倦色至则涤掌奉事上官怜之且侦其才数有所委使君益恂恂共其职土酋岑万者杀人檄君就讯万窘甚使人行百金居间君却之曰吾知有三尺而已百金何物足溷我竟论抵万死时上方急西南诸井寶石郡以君司采人为之津咽曰是奚难陆大夫橐君益自励后先所采直数万金橐中不名一寶以故佐永昌幕垂九年积旌牒至十余亡不以洁廉称者始迁蜀之夔州府经历君所以佐夔益精夔濒江故多盗而会岁侵益狎之太守张君欲一切用重以属君君辞曰此曹皆府君赤子以不胜衣食计谬误至此唯怜而寬之张守改容曰吾不知而之为长者乃尔会巫山县阙令遂下君掇以清静为政其人爱而讴祝之寻徙张守上计京师守署君治状第一而坐故永昌时有罢倅者疑其端出君中以蜚语遂夺职君叹曰格故为之且天也而宁此罢倅也居恒谓人吾宦故不达然足迹几天下半所经覩毋过楚梦者汨日齐月黏天无壁令人不作齷齪想因自署其室曰梦泽以见志云君为人倜傥负气谊尝舍舍沈铉而铉卒死城外尸亡入城或谓法不得入城且舍而舍尸不利君曰铉吾故人也为匿而殡之少不能当父意所析箸半于其弟产而絶口不之及髫时为文輒奇己而奇益甚试輒不利其不憚卑官远道者故自负才欲一见之非苟而已也父曰邵武公准与君宦资等而亦不达嗟乎格之不足以尽君父子也君固言之且叹之矣王安人者予从姊也父曰慎斋翁家故饶任侠有声伎禽鸟之好而安人独以悦素称其事尊章孝御下详诸所储浆炙■〈施，西代方〉糈以食客之贤者不待君咄嗟客或不称则不尽尔君晚颇好诗酒及斥置书画古尊彝之属又不能守而时废之以故橐益空安人与异尚能自强为俭勤箸不遂废君有三子仲则今工部郎玉麟媿而文蚤举应天试君以故愈自寬及玉麟成进士三月而君

捐馆矣服除玉麟补今官奉王安人养济上官舍中安人犹蚤起手■〈糸辟〉纁玉麟
请曰大人罢休矣儿幸不至乏升斗胡自苦为安人曰吾固自安之且尔不闻公父文伯
母训耶亡何属疾卒君讳龙光字某以正德乙亥生卒以万历丁丑享年六十有三安人
生以正德丁丑卒以万历壬午享年六十有六三子曰玉珂娶于赵次即玉麟娶于顾封
安人次玉纁娶于沈女一适朱鉞孙男四天馭郡诸生娶王天驷聘朱天骥聘吴皆玉麟
出而长天宠聘赵玉珂出女七人葬在某所其状则自玉麟草而前进士许先生承周润
色之者也世贞以戚故谊不容辞为铨其世次而铭之曰

马之先为司马氏至球而显于吴越以中丞行镇遏使家于昆山遥遥华裔迨宋而
友直乃着孝义去司而马将无章蔡避徙于长洲洪永之际勛起三老抗颜大帅挟以自
从是匡是毘歷望臬绶邵武始仕君复继之清白不坠滇海峡江霜皖冰厉太和所汇锡
以喆媿毓而曰琛乃为国瑞譬之梓漆是栽是培者三世而后成邓林可材且庇嗟嗟为
马之后者毋忘厥自

弇州续稿卷一百一

●钦定四库全书

弇州续稿卷一百二

（明）王世贞 撰

○文部

△墓志铭

承事郎灵璧县令吴君暨元配屠孺人继配陈孺人合葬志铭

往余领吴兴部而吴君以乡进士待次公交车而有株累逮得白然余不知吴君而
间从诸进士中覩有白皙美髯能为容者意其吴君而异之君于举子业有名然竟不第
谒选得凤阳之灵璧令而余解郟节归里君以书近千言自通偶过余弟懋说之君盖与
懋同举应天试者也于是君之同举者复得今阁老王先生元馭相与称君之行谊政术
甚详而君复以泗濱之浮玉来贽而请曰不腆王父之业以累长者余时心诺之恠其不
以状来而亡何报君死矣君死以万历壬午至甲申而其子世皞等始能葬君而持叔父

兵部郎中仕途之状求志其墓曰即先君子所以不朽王父意也余怜而许之而君之先丧其元配屠孺人继丧陈孺人至是皆祔而各以其状来于法得附志君之为吴家吴兴之射村世世称着姓有高贵而至君之大王父曰璋者以好行义闻郡中有两子皆贵得赠至光禄寺丞其一子则零陵令龙君之王父所欲请余计不朽者也零陵公有二子长曰太学生期次曰赠驾部员外郎前布政司理问征太学公无子而驾部公壮而亦未有子其妇顾宜人为置贰干而遂举君于是顾宜人连举郎中兄弟凡三人久之太学卒而君以零陵公之命出为后时甫束发而哀易相剂如成人零陵公奇之稍稍试以家政甚明了已乃悉僮奴千余指畀之君正色授约东而扶其肆者遂斩斩矣君少而颖异为文立就十四偕郎中兄弟补郡诸生明年以例游太学归始室屠孺人孺人名家子其父胄子君材君而女之且为具装橐甚厚君得藉以为侠里中而美姿容出入车服甚都屠孺人时时讽君曰士当如是已耶而会君盛襟裾而谒郡县守令守令弗为礼乃自恨叹曰使吾汨没警郎者有如日归而闭户读书自课以程序业不夜分不止而屠孺人卒择继而得陈司理君应奎女是时甫十六也太学虽歿故未与驾部公析箸而上有零陵公亡何驾部公自理问卒而君于法不得顾其私而持丧乃仰天哭曰奈何使我无父也袒括致毁于殡所而微修其色以朝所后母施孺人寻托疾不入试毕三年而后除丧施孺人性严忌君所以解之百方陈孺人复能为委曲以祗若嫡母顾生母二凡君所事三母陈孺人所事三姑皆能得其欢心而不见迹于是零陵公老矣郎中君之与仲氏数数试有司异等得公心而君浮沈太学中亡所见当秋试君独褻然应天捷至零陵公大愉快曰此非意所及果尔诸孙当复有鼎起者君入南宫试不第而零陵公寿考终君当承重竭力而治丧事以孝闻既除服乃大为古文辞与诸仲季相倡和扁其园曰春草族有不肖子盗祖莹地事发众白之官迫则雉经死家以君之倡言之也兴大狱几叵测所谓吴兴逮者也君既工古文辞渐薄程序业以为不足当我而时时杂古调出之故数见诎最后郎中君姿得第君谓桂林一枝足以重我乎欲罢不复试而三母皆强之忽道病不可以陆乃叹曰天以一第难吴生乎而误予我然安能竟难我也吾知所处矣于是有灵壁除君至而邑骤中水居民流徙十不一完室也君为请蠲岁租移文诸乡落吾为若储胥毋恐于是流徙稍稍归矣邑俗悍喜鬪鬪则有讼君庭剖之不待数语而决手自具狱大小不以属吏胥腕间取一二狙使舞文者榜杀之曰为善苗而刈稂莠宁酷乎诸大吏益服君至他郡邑狱事一切相属皆立辨明年复中水诏稍损司农粟贍饥者君请于大吏曰粟尽饥如故也水所以得为灾由渠不疏渠疏而不能捍水由不堤令请身任之因渠堤于民因民于贍粟可两济大吏许之君乃悉贍粟不给则继之以赎缓而以昕夕按地形胜规河脉分水势使不得横行而借其润以资灌溉粟不虚糜而民亦饱君治声流传两岁间登荐剡者四台檄褒獎者十六而以劳■〈谷丸〉病矣君故好养生家言遇客得秘术而试之验间裸其腹示人曰中不有物乎至是呕血有若婴儿形者犹视事如故晨起却案色陡变已目瞑时盖年四十九也陈孺人之事君独久而为抚屠之子曰世皞有

加于己子君既为侠多义施而又喜客客尝满坐孺人资之未尝告壘耻其所徙治居舍甲乙大家域辟阡陌多蓄古文奇器供帐什物事取孺人因时为盈缩亦未尝告橐洗君之上公交车也孺人谓曰三母皆老而不以时禄养奈何则为治选人装为百金者数矣而君罢自燕中以其訾置幸姬归孺人不以失策咎君劳问相属入门而盛衣饰且无别君犹手发孺人妆益之他姬亦妬而恚而徐睨孺人色无改更愧之矣然孺人仅四十二而卒不及见君之有官职以为憾君讳仕让字允恭性磊落感慨言论霏霏若芬屑风流曠带为一时冠而恒不欲上人署其室曰逊斋志抑也所治古文辞虽多未能成书而独其令灵壁时撰邑志有良史风既病而贻书郎中君即不死得一郎署为归老秩次第构先人祠纂谱系稍割腴产佐二弟读以岁时伏腊上二尊人寿毕发藏书与仲差次之因以成千古之业不亦快哉郎中君所以状之而痛其志之不遂也君虽为世父后然能止不就试以成其生父丧有所后母然能不废二母养娶两妇皆不终然后先以材德成君名不获登进士然亦贵有官职不及竟令绩入备京朝官然歿而人以循吏思之不获伸余诺以不朽其王父而其子乃能终之以致君于不朽呜呼亦可以死矣丈夫子三长世皞即屠孺人出娶同邑沈叅军子模女次世熙郡诸生娶乌程凌太学稚隆女次世美郡诸生娶同邑陆太学三德女俱陈孺人出女二其一侧室曾氏出其一女郎中君女俱未字孙男五时嘉时吉世熙出时中时庸时道世美出墓在乌程佛登山之麓铭曰

呜呼是惟吴君与二妇之幽城家而孝友吏而廉平妇而勤慈以佐夫子于成诸所取者造物之赢十不能半而遽敛之以还冥冥子孙不食报者有如此铭

承直郎贵州程番府通判爱溪陆先生墓志铭

先生之先为陆氏世世有儒行而食于农至父慥与世父栗始以经术补博士弟子而先生亦继为弟子有声余家与先生近鸡犬之声接而先御史大夫小于先生一岁顾与先生父子狎而为尔汝交余甫十龄而延先生为塾师始受易然不晓易为何语竟一岁罢去后二年先生领乡荐又四年先大夫成进士先生数困公交车不得志久之谒吏部选得江西之东乡令调巨鹿再调云南之黑盐井提举迁贵州之程番府通判稍显矣而竟以计吏罢归先生之为东乡也邑素称险棘难治顾独良其官有为盗而多株引平民以薪缓死者立致之辟余悉解縱去又尝决十年未竟狱后贼寇陷宜黄乐安二城东乡最小弱先生鼓士登埤城独完上官方才之而至入覲乃以不及调调而得巨鹿则古三辅名邑也民淳亦小简省先生为之且三岁尝筑堤捍水水迂徙西北入淀不为灾又能剂役法称力与訾民不偏苦多选材伎属之耳目盗发輒得萑蒲几靖而复以不能事上官当再入覲中之有疾太宰严公讷故先生同年也目之曰是壮可敌数夫也而疾耶考功郎抱案争曰大吏考为去之以疾善其名耳太宰不得已徙冗散格然以滇虽远而

差有盐足自给故以畀先生先生顾益持冰蘖无所濡染先是井坐溢霖有所损后复故而其民黠狎视提举额颇不登时土舍者其邻壤豪帅也谓先生使吾得兼隶之登易易耳先生密谕其民曰土舍欲有尔井也尔非倍失赋不止于是人人自投提举登额矣未几而有程番之命程番虽名为郡而多荒侨通判几长员时方议于偏桥普定诸卫铜仁石阡二府要害地立行署控辖之先生首膺是选方披荆棘设纲纪有所振刷而用积抑故不能自拔于流议以巽慝去先生先生垂橐而还里岁朔一入城谒监司守佐亟返足迹可数也过徙亲友虽数里恒徒步携一苍头不时御冠服间有所御亦苍头手之或谓先生不难半刺体耶先生笑曰我不知半刺何体所受父田三百畝茅屋十余楹其始娶闻安人敏而勤躬操女红以先其下能佐先生供父母甘脆有子女不甚多而先生廩学官又教授里中束帛脯修不乏闻安人卒而继配为张氏家小贵不习治生所从宦遊得余俸輒橐之又别产子女先生之舍与田不增益而食指日众以是益困先生噉肉兼数人至是累旬日不及肉内子曰鲑鰕乎则曰鲑鰕耳而又不继曰干蔬乎则曰干蔬耳每语所知吾不能若曾子輿商歌中金石庶几原思所谓非惫者故人间为具召先生围棋浊醪欢然竟日也二子鉉鎡皆补博士弟子然不能救先生贫病不能救医药以卒先生为人朴讷忠信乏辞令造次之美然与人交久而无斲形骸土木不胜修饰而自俨然不为饰让亦不为苟取即卒然犯之不较也先生既卒鉉鎡以贫故不获竟弟子业诸为农者至不获列下次啼饥号寒之不暇以是先生卒十五年而尚在浅土余谢城居复为先生里人闻而悲之为买地封树域周于椁周于棺而已鉉以乙酉四月之某日先生而闻安人祔焉以宗人解元大成之状来乞志铭先生有男子七长即鉉娶顾次即鎡娶王録娶毛曰鉉娶周闻出也曰鑰娶王而天曰巨娶吴鏞未娶张出也二女亦闻出适顾存性金履巽孙男六文嗣娶顾次文扬未娶鉉出也録鉉各二子未娶孙女三长适叶某鎡出也次适顾鉉出也余未字铭曰

歷仕且四政而归不能具中人养有丈夫子七而不能莖莖以他人其妻已陈噫伤哉贫

布衣王全美暨配郁节妇合葬志铭

从伯父曰高年公怡者娶于凌有五子而其最少者为吾再从兄全美全美讳世完生而孝友温粹读书为文章不甚工而傍晓治生业以故试不能见收有司而高年公甚爱之为择配而得郁典膳公遵女典膳公之女三其长适先御史大夫公即吾母而其季赘故陆茂才吉孺节妇其仲也吾母爽朗刚毅识大体季则敏慧多所通习又皆读书于文义了了而节妇独不然然不喜言笑而沈静專一其为女能事不见内其为妇履声不出外全美修伉俪分甚笃而素羸竟寢瘵以卒节妇哭不食曰吾其偕而归乎其尊章强

劝之百方又为立叔之子曰一纶者为之而后稍稍食也典膳公与妇刘孺人怜节妇孤茆时时致之家然节妇不肯竟往侍尊章者恒相半而久之典膳公卒又久之高年公夫妇亦卒独母刘在而捐箸以与诸庶孽矣一纶贫复从其妇翁顾南安游孺人乃叹曰天乎我何依将依母乎既而曰母何依当是时吾母尚贵盛城处而节妇奉母刘栖于丙舍时陆吉孺卒季亦无子亦来侍刘盖三人者一身矣吾母岁时所以供养不缺而母刘笃老委顿床蓐间独善嗽昼夜凡数进匕箸节妇与季更代而时其饱饥又时听声察色抚摩痲痒盖吾母卒而母刘犹无恙年九十终于节妇及季手节妇及季毕力而葬母刘其费则世贞兄弟任之节妇乃潜然念全美在浅土而会一纶反自顾谓之曰若贫不任襄事奈何吾为费若为力以归吾君而虚其偏以待于是节妇老矣能自力为俭勤率先其下买田聚贖至中产而会季尝抱其庶弟之女女之节妇爱之亦假女焉择婿而得诸生王应宾俾从季处而为助其资装十之五六一纶治室与节妇迹旦日讯问不过劳赐浆肉而已会王氏之女卒有二孤女节妇益爱之节妇性质直亡他肠中表从勾者诱以廉贾之利不一二岁輒并挟其母去亦不能问以是橐少挫而又以伤王氏女邑邑成疾数更医不效卒节妇孀居五十年季亦余四十年皤然无丝发浼有司上其事于朝旌其门曰贞节季亦次当旌矣而未尝一解颜居恒语此岂人所愿有耶即以一匹妇劳天子问然何忍藉吾夫而名我及其卒也季为之大恻曰吾夫弃我则有母而母弃我也则有姊而姊又弃我也吾仅有影偕耳属世贞毋忘姊墓中之石世贞弟于全美而甥于节妇又习节妇甚详其何敢辞全美以正德己巳生嘉靖甲午卒年仅得二十四节妇以正德庚午生卒于万历甲申得七十有五嗣子即一纶娶即顾南安守允扬女孙男一嘉楫亦娶顾孙女一适州学生顾汝夔而天曾孙男一未名其墓也祔全美而地在麋场泾西之西阡铭曰

合四年而离离五十有二年而合是谓短于室永于穴噫嘻女而孝妇而贞人主所褒称则夫子与有荣名焉曰天曰嫠皆用其畸以成其羸纵而之不怪余用以为铭

承直郎通判归德府事弋泉姜公暨元配王安人墓志铭

吾师姜归德公生五十五岁而失其配王安人又二十有九岁而以寿考终年八十四矣盖又五年而未克葬也其门人王某怜之谓其子诸生与祥曰是尚可以浅土乎与祥泫然曰微夫子之言方寸固日夜腐也于是世贞乃倡诸同门者辅畚鍤之役既毕而举公以与王安人合而葬之应冈门之新阡门人最长者庄逊学以习公故具状而世贞志且铭之其辞曰姜之先以四岳佐唐虞治而其后微太公望之起自钓叟为西伯师号曰尚父以殷为周大启东海者二十余祀而后复渐微然至末季曰肱曰诗以孝友显公辅以直节名世若爽及皎不为幸贵播于弋阳厥指以万计为廉访馆尚玺清振其声弗

坠孽仲源始用小贾跳于吴赘有子昱再传为瑶是娶周氏修王父业于杭卒于旅次二丈夫呱呱而泣公最居长感母抚之而以其姓名佐周则字署其居之泉曰弋识所自也少而淳龐不好從羣儿遨遊戏小长能属文通经术大义廩于学宫褻然其第以易教授诸生下帷恒数十人资其束修归我大母于叔而蚤暮致甘脆与母为两匕箸之余弗及妇稚登歌鹿鸣齿已强仕凡三上春官而卒弗利请于太宰得司谕浙之丽水左绳右规与其徒相砥砺前后可五载惟楚晋大藩惟丙午己酉公皆膺首聘主厥试所登荐若王方伯道行冯中丞舜虞李侍御绍先麟角凤喙以为国瑞擢令于嵯峨曰四山瘠瘠而劫最不易就理而公用仁心柔之我哺我衽不以属鞭撻勤恤其父兄而诲其子弟有邻邑曰上虞中彼蠹奸伏税于我而盗我田且数十岁公力请于台我税我田彼田彼税壹俾公衷之卒奉田归立石为界居八月丁母氏忧归深山之人以其耄倪来挽衣袂谓公胡不终我惠家肖公像仍祠于社以祀哀哀寡母养亦八月民惜公去公痛母逝孝廉之声重于吴会既踰公除乃复补吏而得楚之衡山衡山址岳而邑公矢于岳以冰蘖自励不專用恩尝剪大豪之淫已氏者其人称快官多岳游以故传舍■〈谷丸〉于嵯倍然鲜所督过之而独以不能修台馈小见挫撻复改教授瑞州未几事白超为河南之归德倅归德之赋繁公良其计兼领贼曹课数独最其属州邑三曰睢商丘永城皆号为雄丽公三绾厥绶民懷吏畏诸有醵赎悉帑于公贪吏环睨流羨溢舌而莫敢染其指公偶有所不恠病不甘食乃曰食肉不食马肝不为不知味岂以二千石啖我使我中■〈疒带〉耶遂移书乞骸骨两台及监司皆大惊挽之不可乃为壮语以见公志而公自是里居阖门不复交关一切公庭之迹岁不过三四皆可指数而王冯二君故尝饬吾郡兵备闾公邸通弟子刺公为一报谢而已所受不过修脯束币不得公小口语以间乃曰为长者一至是耶公念父之蚤见背也与母氏之祿不终逮也语及之未尝不泫然霑涕矣春秋伏臆修家烝必及其舅曰吾非虞舅馁也以吾母之不忍独饫也抚其弟用与身不异矣呜呼公孝友故天至哉始世贞童时受公句读其后里中师凡三曹公与司谕朱观察使季及姓公讳者公之门人泉州刺逋五年減而禰骀背公年八十而观察七十也故州张牧合乐飨之俾不佞侑以言而曰子其修东山之社以春秋待盖三年而泉刺卒公寻继之自是不克会而不佞之师在越者骆司理先生又益公之三年五今九十三而犹未艾则于公尚有遗喟也王安人者公元配也镇海卫指挥某女夙闲阃则若淑而懿奉啗啗姑俾允若于烝又资公以勤安公于嫕公数足而履目无衰眦以有一子一女二孙四孙女曾孙孙女各一不幸而前公以往其续者为虞尚能视公食息含敛鬢而相公之龔也公生无他嗜顾独嗜书至笃老而手未尝一日废所亲笔者曰南窓杂録性理古文摘要余生稿合之卷凡二十有二成輒读之曰吾以当咀藜而已敢望世脍哉呜呼寿至公而犹有喟者何也盖惜夫长者之不复作而典刑之坠地为铭其藏曰明通判归德府弋泉先生之蜕

中顺大夫知泉州府事云川周公暨继配陶硕人合墓志铭

故致仕泉州守周公以万历之丁丑卒又七年而继配陶硕人亦卒其二孤秉文秉忠始议治墓而谓公之门人王某能悉公者莫子若能以言不朽公者亦莫子若某谢不敏而秉文则手草公事状若干言而硕人之行附焉使择而为之志若铭某五六七岁时稍识别人事而先御史大夫时举乡贡待次公交车一日喜动颜色曰菰芦中故有人问之则指公公时甫冠而家窶甚父遁庵翁教授里中弟子不能给而公于属文独开敏先大夫乃谢脯修之费而诲之且饮食之时族有伯氏民朴者颇温饱有一女笄而陋不良行谓公曰强起与我婚请具子铅槩资公既婿民朴而受先大夫经得补博士诸生试有司輒褒然廩于官渐宽而某亦稍长当公之受经时窃相尔汝狎挡靡所不及先大夫一日顾余为儿得一良师能折节事之否俾修弟子礼以见公抗席正色指撻文字谬误亡所避某偶小怠即摄齐请去皇恐谢罪乃已以是徙公仅一岁所而其为举子业渐中程亡何公失王氏陶硕人遂继之以勤俭赞公渐有家明年为嘉靖庚子遂登应天乡试第七人录其文以传又明年不利于南宫自是凡三上三如之至癸丑而始成进士谒选得知福之福宁州未上以某硕人忧里居亡何倭大至行剽村落公时叩头请遁庵翁徙而之城翁老重徙且谓远贼狎之俄而贼奄至遁庵翁陷贼手陶硕人曰事急矣悉出其簪珥衣装可百金授公公迹贼所泣请赎遁庵翁即不许愿得以身代贼悯而许之卒奉翁以归亡何翁亦卒公不以二尊人上寿故废戚不以窶故废礼服除补大名之开州开故冠带辅郡然见以其名美而实凋劫且岁数不登公精心拊摩之不專为皦皦以薪循吏声而其士民更德之荐剡数上故陆武惠公炳使其校诂事至开得公治状属之选部欲以为京朝官而选部愞事取质大相子大相子曰吾不识其人何状于是仅同守福之泉州时倭众且数万环泉而垒四郭若髡公谓陶硕人曰业以身付县官矣勉之擲三子汝乃单车挟二苍头往至则倭警日益甚公足迹时时在睥睨间鼓励其人缮墮垣补阙乘盖贼数至而数阨公城恃以益高坚不可下而亡何守以阙告公掇其事规调兵食亡爽守至则一少年子不能尽得肯綮而郡卒以功渐骄尝请饷于守不时给啧啧恚怨守恚而欲撻之则羣起噪逐守守狼狈走于是益大噪百十为偶矛刃戛札郭内外监司迫使人好抚之不肯聽以属公公曰彼庶几无憾我前呵至犹嘯傲自若公时坐幔輿使褰而示之且叱之曰若曹何为者众前视曰是故尝调我食者同守公也即如公奈何以有今日公曰郡赖汝曹储胥而不时给粮者宁能使汝曹无啧啧也虽然太守非不终给也且汝曹以忠义始而乱终之一旦扞三尺罔毋乃非计乎众感悟咸搏颡请罪公曰從我而仓给若粮有不解甲者以反论于是众遂戢郡搢绅吏民谓非公泉且不保于是守以不任调而公代之公既用完郡得其人心又熟于守至是益发舒诸所擘画条教必为经久计郡中倭之未几又中疫公请于台大发庾以食饥者药疾者而棺死者而至庠序诸弟子则时损月奉为膏油费复报最当迁矣而会入省有事棘以外触脾疾不即愈乃数露

归志于台台縁之小见譬当得调公既归而三子者逆于道则突而弁矣又皆颀秀有文彩抵舍厅事翬起寝阁丙舍皆飭以间按行园圃则益拓知其为陶硕人治也大喜趣置酒相慰劳曰吾出百死完郡不若而之完家易也吾老此菟裘足矣止不欲就吏部补久之以哭其长子意愈倦而部符趣之急强就选得云南之永昌公益不欲往而前守者无锡秦君以物故闻公补其缺还道无锡秦之二子过访曰公补某父阙父故当得迁第不知何地公蹙额不忍对而归谓逆者毋溷乃公行休矣人或谓永昌饶乐鲜事贤于泉数倍公岂其少之耶公笑曰吾不忍死而误儿子问也遂谢弗往公时犹未六十矫矫饶胜具花之日月之夕一觴一奕惟意是师为人尤温良乐易好谐谑然不能使人絶倒曰吾以快吾耳而已间有所吟咏亦不取名高曰触兴而发发即忘之矣所周恤宗党亡不穉愿去亦不以为德念故妇父恩为其诸子助居室启南畝陶硕人亦能挫俭成之家庭之际煦煦怡怡如也公以正德癸丑生卒以万厯丁丑寿六十五硕人卒万厯甲申距其生嘉靖癸未寿六十二三子曰秉礼即先逝者娶于王无子次秉文娶于顾次秉忠娶于王为今相国元馭女秉文秉忠俱太学生女二适京卫经歴张西铭邑诸生顾绍芳孤男二孟醇胤醇女七长字曹次字吴余尚幼公之不复赴永昌而某亦纳襄南节里居后先覩泉之民吏食公德相率祠公而祀之以其记来其所识拔及衣食诸生通显者伏臆问存不废公亦絶不以挂口惟时时谓某乱卒之役即一语不相受天子之命吏辱而泉且流血向者吾亦忘德之宁非天幸哉公固长厚不自居功要亦自愉快又谓某泉所游豪贤其一某子甲自诡以有气节擅文学而每见必居闲居闲必挟一二政府为重殆非端士也某其时不敢以为然自今观之然软否耶铭曰

仕贵何必极以片言而定剧乱毋忝厥职妇族何必华以一勤而相夫子亦足以家公归兹丘孺人从焉其子孙永食其休

弇州续稿卷一百二

●钦定四库全书

弇州续稿卷一百三

（明）王世贞 撰

○文部

△墓志铭

故醴陵令古愚胡君暨配江孺人合墓志铭

余里居数从州学正胡子大雅遊一日而胡子敝服束带以谒也恠诘之悴其色久而始对曰唯先令君之弃诸孤也不肖弱未有立而族之子刑部郎公廉为传之比者郡乘复传之即缙绅先生以二传故辱齿先令君而墓之石顾未有志若铭也盖四十七年于今矣即不肖异日何以藉手地下唯公惠之一言逝者且不朽唯不肖之子孙亦且不朽余盖悲其意云夫家乘详也郡乘公也为哀其事以志胡之先自汴避难徙兰溪明兴徙汤溪之青阳遂定为汤溪人而其后有处士德仁者能以义让起其家自是世受经术通显而君父孟都公独不仕君生而颖敏絶世九岁能绩文学使者试而奇之以属博士为弟子时章文懿公懋倡理学东南下帷教授恒数百人孟都公率君纳束脯焉甫试而与其从子大司空拯相甲乙诸生莫敢望君自是业益进号通明儒文懿公老矣其皋比将授君君弟子亦益进遂举于乡试礼部不利归而闻有传王文成公学者君担簦往谒以所得文懿公之学证之王公莫能难也为备宾主礼而别然君退未尝不推王公以笃信其师说故不欲他受而引翼嘘借所为圣道意深矣为举子之十二年而谒吏部选得醴陵令醴陵居棘道民罢徭役吏因而橐君至剔之且令民得更代资力相剂岁当输绢千匹其羨十二悉省罢之持楚政者故别为科以上供称君集父老谕之曰吾有去耳奈何以汝曹媚人竟拒弗应民藉是稍稍蕪而君遂用其间饬学宫崇丽譙诸雉堞坊宇桥道无不赫然一新其明年旱君沮于神以幽明相质责且请代民死遂澍雨岁稔其又明年蝗大饥君请庾穀賑之不待报即发民不厉岁君于邑政一切以辨治闻而所重尤在节义若孝妇之曰丁张者旌其门复之民有母讼子者君感以天性相悔泣归而以慈孝终君令醴陵之六岁荐牒屡上当迁而一日忽移书台使者乞骸骨归士民惊莫知所谓相与攀遮于郭门之外而君竟去不顾迹其橐枵然空也君为人孝诚自天事父母极志物之养歿而柴毁又能为礼乡人化之尝念其先墓遭播迁有湮弗知处者筭路剪棘穷日力以访得一石而洗其文则八世祖季七窆也自是不为若敖馁矣貌温嫩于交游中最为和坦所至藹然春风而稍涉非谊则侃然见色人亦竟莫敢以狎进也因自号曰古愚以见志云君归之仅逾岁而卒为嘉靖辛卯七月一日距其生成化已亥十一月廿六日春秋五十有三配江氏兰溪之垂冈令族也以笃孝恣共着阃内声君卒而称母诲诸子总齐家枢者又四十二年而以隆庆壬申终距其生成化辛丑寿最高为九十四岁子四长大临娶张氏次大顺繇贡补太学生次即大雅亦以贡选人高等得襄阳通判母丧服除补彰德坐公累谪今官学行政术蔚然有声称娶董氏次大醇今为清浦丞娶龚氏女二适诸生金华徐清兰溪郭尧用孙男十四文明文熙大临出也诸生文辉诸生文耀文冕大顺出也诸生文忠太学生文恕诸生文愈诸生文懋太学生文志文宪大雅出也文谟文学诸生文兆大醇出也墓在青阳之何家桥阴余既已志之而三复叹曰胡君贤者也乃官不二命齿不下寿则何以瞑哉虽然君歿而玉立者丈夫子四君所知也又

四十余年而江孺人以大归见而语曰幸不辱夫子之托是四子也成而三在仕籍矣君所不知者四子之子十有四而将齿籍者又什八也君可瞑矣胡孺人君齐也而又代君终谷而穴是以附书之铭曰

为儒而醇为吏而循循不近荣醇不近名称之曰古愚先生

永城知县张君暨配赵孺人合墓志铭

永城令张君之墓于某也而御史大夫潘公志且铭之矣居十有五年而赵孺人卒其孤汝明将启君之兆而合焉泣谓其子所敬曰母女也而贤是不可泯泯也夫女德亡專也是又不可以遗我先君惟汝幸得事王先生夫以王先生之言天下莫不知今以若之故而徼惠于一辞以毋泯泯母而起十五年之枯而荣施之即孤死且不朽于是力疾强起属事状并以潘公之志铭而所敬来伏谒固请余故已悲其意而读之则惊叹曰夫永城令也而何人吾先大夫之所同举于乡者也令曰张君大鲁字子守父教授公武母朱有丈夫子五君其仲也生而敏悟能受诸博士家言已遂属为文醇鬯有典则当是时家黄浦西而浦东大姓赵翁节者妇曰马媪举仅一女是为赵孺人婉嫕有志操翁内贤之且不欲遠嫁骤见君曰是子材可依也请于教授公馆之然君业为博士弟子又不忍离父母晨以浦西而夕浦东者二载而诸所共束贖膏油之费孺人手裁之矣一旦复谓君何自苦日试两险为吾能得之父母请偕子归教授公素薄而又困儒不能问家人产君治于外而孺人治于内家稍稍起会教授公已致仕其客日进君与孺人务饬酒浆脯■〈施，食代方〉之类以待之教授公居恒谄吾取頤指而已不复问酒所自来已而曰微仲氏谁予适也然君不以养故废读孺人亦不以养故废资君读君用是试輒高等至辛卯遂成乡荐然计偕上南宮輒报罢中持教授公与母朱丧易戚偕至时人称之君既以儒起家诸昆季所倚不忍析而孺人力佐之以是且数年会有所不能已乃竟析而君第取其瘠者孺人得稍移居近赵翁马媪而赵翁且老无子孺人谋为置貳马媪意难之孺人徐说曰女幸奉二大人遗体然不知女之子何姓女既不获称大人后所为后者异父母孰与夫一父者即异母可饱飧也媪稍悟其貳果举一子赵翁谓孺人曰是儿女所举也吾老矣复为我父之于是夷其第于汝明名之曰汝修而冒张姓孺人之抚爱之过汝明也君既七试七不利乃仰天叹曰命矣夫吾姑借以酬吾志谒选归德之永城甫二月而寇师尚诏反所攻剽城邑逆奔潢汙宋大震尚诏拥众而南扬言曰吾得凤阳一宗人佐之以定天下既逼永城而宗人以逮錙凤阳者事急叩城请入众窃难曰是不延敌耶君曰使贼得之忧且大趣内之而编吏士授兵立睥睨间使弱者供饷为立束约申赏罚贼环城而攻者十余匝三昼夜不休矢石猬集君褒衣行巡示以整暇贼知不可拔乃解去君散骁悍尾之颇有斩获而贼以逗遛故为大兵所迹立破论功诏赐帑金君乃

察夷伤召流散课耕均役民忘其劳亡何有治河中丞之使者至而横恚君简之中以飞语君不辩移疾归永城父老泣留君君笑曰志宁能尽酬耶已矣孺人迎劳君谓坐南荣择虱何如夜行围城时也君有所进客中馈之事益饬乃自喜谓几希先教授公矣自君之卒而孺人益勤操内秉汝明已长则颀励汝修于学而汝明之子所敬亦胜学则又齿于汝修俾互师友焉孺人篝灯而课之不夜分不寝也汝修以是取乡荐所敬亦彬彬邑诸生云孺人性絶工巧诸裁剪刺绣奇丽一过目即能之温慈俭勤自少至老如一日君得寿六十有一孺人七十而又五子一即汝明入太学为鸿胪序班娶于陶孙男三长即所敬娶于唐次所蕴娶于潘次所效尚幼孙女三适太学生王润刘光祚赵一辛曾孙男女各一尚幼志状之畧云尔余乃言曰师氏反余时守尚书郎闻之其破归德盖甲者出堂隍中立杀一署郡僚而诸属城皆胆裂矣张君以一书生甫下车鼓不教之民而与之角贼不获进用是遂破败君之功岂浅小哉藉令君不遽罢异时开府西北间何患强敌也张孺人不私其外家有以婉启赵后以慈保赵孤抑何久至也哉故为志而又铭之其辞曰

君子谓张也郎而大臣谓赵也妇而丈夫非以其才戡难而智立孤耶其合也生气犹凛凛而不为冢中之枯于戏

承德郎礼部主客司主事浮山梁公暨配杨安人合墓志铭

主客公以万历癸酉卒卒之明年而墓墓而中丞龐公尚鵬志且铭之矣又二年所而子绍绩上书乞录故大王父文康公荫不报滞留京师久之为万历已卯公之配张安人复卒其明年二月不佞里居以病谢客而绍绩苴杖来谒请曰是将合我先安人之兆于主客公也敢以不朽请夫主客公之事则龐中丞已详之虽然公余友也向者尝一会于江都与吴舍人国伦浮白论心者数日而后别当是时公内薄任子不肯就而南憩吴阊出其秋贄故翰林待诏文征仲文君大奇之谓诗书画三絶非子也耶行且无我因尽出其门下知名士与游而公用是名籍籍矣后数年竟以任子得中书舍人一时任子得中书舍人借家声饰驄怒马用安成临汝之胜相高而公王父文康公以少师居端揆者一纪余皇考驃骑公次摠握阃政公负文武勲闕顾独折节为雅驯而又性好客客至则谈谈久则酒酒半则诗诗成则书书所不尽则画公画出董北苑吴仲主杂得文氏三之一书法会稽若吴兴文氏中上错诗取达意合者人以为有唐风而酒德尤温洽即丙夜靡倦色谈及国家典故前辈文献纒纒若按谱时画地而筴世务蹙额诉民间瘼疾靡所不深味也乃至行酒筹顾误曲风流藹如矣以故益得士大夫声三事以下咸敬爱之而公繇是稍发舒乃葺故文康公祠墓從三馆得其遗疏并诗文梓之以传公虽居间曹无所表见而其任职强力逾于前后数公诸请诰勅轴虽冗散贫悴者公以次给之毋令胥

吏得上下缓急而其再奉使留都若云间所至以文彩照映一方中间入司会试帘以外事有敏办声再用考最及登极恩封母卜自太孺人而赠为太安人张安人亦再封如卜最后满考进礼部主事仍行中书舍人事寻使山东复道吴阊迂百里而过余弇州园握手执澜久之盖是时别而仅以声闻者二十年矣因相与卜夜弄舟分韵酬唱欢然甚乐也已而又泫然如初公甚肥而勇于进匕箸然察其舌本涩有若痰闷者归未几果属末疾稍间会所携牡丹数种盛花喜召客饮疾复发遂卒岭南故无牡丹即有所移植亦不花花而不利其主者数矣公弗信也暨公卒而凡再属主其主輒死异哉盖绍绩与公之客张复云公卒之年六十有五张安人少于公一岁故丞相曲江公后也公以读书干家蛊几殆安人兢兢治汤药旦夕吁天请代曰宁无我无夫是无梁氏也公竟起而奉其嫡母郑太夫人生母卜太安人皆以孝闻事葬如礼则安人相之客过公为具咄嗟而办毋论不时盖毋令壘耻则安人司之公每置贰安人輒为酒贺毋使虞于抱衾举一子女安人輒子女之以故公有丈夫子六为贰举者五有女六为贰举者一婚嫁皆名族诸倩中有官御史者盖公之多子女则安人成之安人后公六年卒得寿六十公别号罗浮山人人称之为浮山其先世名代子女孙曾之详具隴中丞志中铭曰

太师赫赫佐昌隆谁其后之主客公主客岳岳司丝纶谁为之内张安人大罗之冈郁累累公率其偶朝太师而室而穴穀则宜

承德郎广西太平府通判王君墓志铭

当甲戌之冬仲余以家返仪真别而西治郟与故曹太史大章饮王氏圃王之长而僑者曰太平通判君汝奇不及会而圃傍居人颇能称其好行德有乡政盖六年而为庚辰之夏仲而王君之三子来谒则君以丙子四月死矣是且葬而介同年苑马卿韩公子允之书与状请曰向者卒卒亡一面然未尝湏臾不自悔不得事公也而已矣其幸以志铭慰地下而坐有曾将军清者曰吾故尝识王君王君叅闽阃甚贤而才幕府尝嘉之欲荐以郡丞摄治军而会君自得太平去故不果余善韩公与曾将军而臆圃傍居人语乃许之王君之为王自琅琊实与余共始而其别为宋学士禹偁至元为御史中丞关后谪丰城令老焉而遂为丰城之槎溪里人其别复为二而皆称甲至君之大父威商仪真以信义着其地而迪功郎仕继而益廓大之遂复称仪真甲迪功者君父也君少颖敏工属文归省墓丰城补其郡博士弟子已还仪真例进太学上舍时南海伦公以训为祭酒试君而异之置高等自是每试輒高等而其应天试则北中间尝与名矣会应天尹有所进太学之数屈而君放罢仰天叹曰丈夫乃为三尺棘地困哉且身在何虞官盖七试而就吏部选人复以高等得闽之都司断事断事不恒隶都司诸曹长皆得委署而君以才故受署独剧尝辨镇东卫将与长乐丞诬狱台使诸曹长益才君时属邑娄阙令而鳧寇

充斥君遂出署懷安己署连江君所至增陴浚湟简募士什伍弥缝多设覆鄉落间以待寇闻之逡巡遁去而连江之魁曰山菩老释■〈口唐〉■〈口兵〉者虽已遁然不能亡出没君迹其所遣谍诱而缚之幕府下书旌君遂移填和平戍和平故近潮其民易为盗钞君多设条教诱示之使为良而缚其黠前后三十七人咸置之理盖曾将军云幕府所欲荐君者以此而君至太平则假守事太平地絕遠诸属州都结万承全茗他陵思同皆土夷鸷而鬻利狡焉思启封疆相寻于戈盾君谓毋恣臆三尺阁女颈不贷女有所部按情实立剖诸酋吏惴惴赴府受约束曰是假守也而真即真守将奈我何君乃以间修功令创马贡议折赋清编册郡人歌之曰天畀使君以苏我人胡不即真然君竟念其父母年且老再移疾乞归幕府台司固留之不得君归而迪功公与母况孺人尚无恙当时诸弟汝章拜民爵汝彦倅岳汝立监事光禄君偕与跋跋北面上食酒浆诸孙皆相率为共谨鄉人谓君家于万石君亡异当繇秩少孙耳诏举异材有司欲以君名上不果而会况孺人卒君痛毁骨立当墓天大雨君号哭扶服行泥中感疾五日而絕距其生正德丁丑春秋六十君背迪功公之踰年而迪功公亦卒初娶于敖无子继饶孺人举四子朝宠娶刘举孙曰道淳朝宣娶胡举孙曰道润道渊俱太学生朝宣娶饶朝棠娶裴俱邑诸生而俱朗秀有声实朝宠朝宣朝棠来乞余文者也君字荐甫别号劔溪汝奇其讳邑之西四十里岳家山其墓铭曰县官不女格而夭女容何必減黄次公虽然循吏岭右柳州风六十死孝郎中建同椿兮護兮高朗令终棣萼丛丛芝兰芄芄畴俪女丰其即安而宫

文林郎宁陵知县秦君墓志铭

王子曰余盖读宁陵令状三太息焉夫士居平占毕家塾中目不有身外事而一旦廷诤逆乳虎怒以冀脱其亲于死彼固知有亲而已垂死而脱之乃垂脱而竟不免于死何也则天也明格非得进士不成宦宁陵令之在公交车也其气豪视进士将取诸橐而竟尼之至俯首而就选人格彼岂以一令沾沾诚有所感慨于法吏思欲矫而用焉甫为令而即称良甫为良而即夺之以死何也则又天也天之欲笃人材易易耳顾独于宁陵令若甚难者又何也宁陵令者秦君沾也秦之为秦自学士观墓于锡山下其处者望于锡而其别望于华亭于上海于昆山上海之秦世业农居九团镇遠祖曰知微而宗人裕伯以才畧闻高皇帝手书征之为翰林待制自是在上海者盖重知微之子曰大成又五传而为君父闲云公奎娶于王卒亡子再娶复为王而举二子君其仲也生而顾皙疎眉目少长颖敏端重儒步详视有大人度故詹事陆公深骤见异之谓闲云公是子也必亢而宗君年十二而闲云公负侠躁为义念多忤且及祸俾君依昆山之族兄东城氏以居遂大肆力问学属文矫劲有气力居恒谓文不根理胡以文学不能治心胡以学而其隃舞勺补博士弟子试輒嶷然前列矣闲云公亦来称昆山人而昆之宗狡阴中以法展转

成大狱狱益急君投谍诉御史御史已有所入怒君趣杖格之十五君挺立侃侃缕辨不少挫御史不能君何摈之出而召郡狱吏移闲云公深狱且为日置之死君度事已急则伺吏且入府探袵衣得病状而闲云公姓名在焉君拳之蹴之与俱入哭白太守曰父中讎非法也而今又不死法而死吏意将快讎何太守问而怜之入为君谢御史稍露其冤得移轻狱久之君复白于决狱使者已解而闲云公病困死矣君痛甚欲从死不得骨立而治丧满三载复补博士弟子君自父狱起逮丧首尾七载家与书俱且废而其试有司益利名日益高下帷讲诵诸生束修足以养母王矣寻举乡试明年下第归君之萎下第则以文太奇故而是时相国华亭公故与君有连叹曰奈何猥以三百人前此子也使人谓君毋恋此占毕幸为我就一官吾能任之君谢不敢盖华亭公致其事之数年而君始逡巡选人其令为闽之德化时民久中倭多流徙君至则首核户册均徭税毋使势奸得籍窟而其治秋赋一以诚号之民输赋恐后且谓不及君受力后谁为宽我者而君子积谷训士缮障不为一切苟简以徼口誉学宫僻且毁久矣师生无所于肄止意君必且新之而疑其吝于兴难发言君乃慨然召邑豪长者谕之故为捐奉先之豪长者争自奋仅踰岁而学徒于吉壤巨丽倍昔君宦声方隆隆起而母王以疾闻君忧之甚即日解印绶移文两台乞休两台意惜之不即许而讣至矣君归毁痛几灭性丧葬以礼服除复就选人得今宁陵宁陵故汴宋间饶邑也以媚事令得一假色为幸君乃前立束曰非公务而入邑门者以非时请面者毋论尺缕升粟三木囊女自是竟令任毋私谒而邑有大盗剽攻掘冢得富人尸以要其家弗遂则磔而暴之野更两令不能得公授方畧立捕僂之一时翕然称神明君既以材谄获上下心而独屯田金事某者阴风君为公敛馈君谓人曰令不识敛亦不识馈竟不应而睢阳卫来欲侵邑民地君恚曰蕞尔邑而令卫共之且吾民詎堪受老兵役把耒耶移书辨于上咸直君而独金事某以銜故两持之君邑邑不乐俄得疾犹理事如平时后先所遇他务理剖立断独至狱而重持之不己曰向者吾父之狱起吾仰视堂上人以为人耶而狼虎国家奈何以民命付狼虎为今吾坐堂上庸詎知堂下之不狼虎我也且我一枝萌而其家已哭矣以故君所至负严明声而不残君病之踰月而卒不起始君之去德化也蹙蹙徒步郭门德化士大夫吏民哭而送之填道归与其长者谋尸君而祝之及其去宁陵戢一棺广柳车其士大夫吏民哭填道有加归而与其长者谋则屋已栋矣且合而祠诸台矣王子曰吾见夫令而拜尺一召者以京朝官行者则道哭生祀有之未闻以施丧归者也即丧归有之未闻以施逝者也有之自秦君始可以观秦君矣且夫君不能得之天乃能得之二邑人夫状君者君子伯寅也伯寅又言君倜傥急人难逾于己其在公交车时所排解重于当路而不责报闲云公卒推其业悉以让其伯子筠峰君又尝念食于东城氏而亡后也捐橐葬之且祔诸家庙云君子学好象山阳明二先生于文好庄周左氏司马迁于政术好陆贽夫士有此三好而未覩厥诣也惜哉君字光甫改字起仁最后字君甫别号曰恒山最后号观恒道人娶于张为兴业令诏女子男三伯洪娶龚冲女继娶郇之章女伯寅娶詹事府录事王定鼎女俱博士

弟子仲默娶诸生顾允焘女女二适诸生王泰亨太学生潘允升孙男一德茂为伯洪出君卒以万历戊寅六月十二日距其生正德己卯得年六十葬以戊辰某月邑三十保宇字之新阡铭曰再为令而称良能使其人尸而颂诸以为达则不足以为不达则有余

从兄詹事府主簿振庵府君暨配虞孺人合葬志铭

余兄詹簿君之卒也盖后虞孺人九岁云而孺人未克葬也其孤一夔直杖而拜且哭曰向者谋葬母而不得之先君子之命兹者得之先君子之治命曰其改卜壤于是改卜壤兆而治外柩且有日矣敢以二逝者之不朽请呜呼余兄有大人志而弗及逞余嫂有妇德而弗及阐则余小子隐怛焉昔余王父之献司马绩也法当得任子以属君父父固辞曰癖佚不能事君长君以嫡孙受之九岁入太学自君之少时则用强有力闻能馭恶嚙马驰回中陜道骨腾肉飞观者辟易未几折节读书为文日数纸居恒谓丈夫当自致青云奈何藉父兄得官即冠而沐■〈彳 侯〉宁不愧耶而竟以文过奇故十上秋试輒不利最后始强就选人拜南京詹事府主簿詹簿居假而资清贵亡公谪可以坐取金紫公顾不乐也会倭大入江以东所至糜烂公乃再上书极诋诸用事者养寇状请得改戎弁分大司马一余皇任必手馘酋首鲸波间诸公阳壮君而迂之行留部试君颇不讎君念且见废与礼部郎沈君相约构大药黄金可立就而又不讎遂弃其官归当是时君父静庵先生与龚孺人方东西走避倭不暇问产而君计所受产为腴田二千畝悉以上之官佐军兴费两台交旌之而君父意大窘会予之先君子方在事乃走谋以解居恒谓君有官而故失之吾老矣忍死以待一命之褒而乃尔寂寂虽不尽露于君君亦微觉之益怏怏不乐会君父母相继老寿死君既葬乃叹曰丈夫身自有耳吾欲以七寸管博一公交车名不得及欲以重吾父母不得受大父所予官欲自见以少报大父不得属盗鼎沸吹箫子往往万户侯而老我所读书欲觅少武功爵不得沈郎诡吾且冲举而垆间一刀匕不得竟安用此身为于是益薄先业田宅苑沼花木声伎之属皆漫为不訾省而性伉直轻树矛戟笔札间黠族重起狱相窘以是益大困君不喜衣绮丽其食或起面饼麦饭冷淘至斗许要以取足而已为古文辞捉笔輒就矻矻有气骨然不甚好之其好独围碁相马以是终其身君讳世德字求美始署其室曰绍堂凡数更而最后复曰振庵盖深寓意焉呜呼君所谓有大人志而弗及逞者也孺人虞姓讳某字顺卿虞与王族抗甲而王父少叅公与余王父同年相善因以字君孺人婉嫕修内行其于经史子说诸家靡不晓尤闲女红中馈之事君既刚矫自好孺人善调之能因事为功尤能得舅姑意和声色而荐之所接遇妯娌姊姒及所不悦于君见孺人则解曰吾不难齧此子独奈贤妇何其弱者曰吾幸而遭孺人安敢复修君怨也臧获大小即为君所劳苦得孺人一言曰吾再愿为孺人死而何劳苦计为盖终孺人身君寡内外郤已孺人用豕妇承家秉岁时义庄墓祭合飧牲膾浆旨性好施予即橐恒枵然而王之族所勾亡弗遂者虞之族亡弗润者

以至尺帛斗粟三尺之童取之若寄帑或不给则脱簪珥质库继之矣日者君尝叹咤语余妻亡而后知有妻也天乎天乎此所谓有妇德而弗及闻者也盖君之亡以万历戊寅寿七十孺人亡以隆庆己巳寿六十一而生皆以正德己巳子一曰一夔太学生娶张氏广平令擢秀女孙男一纓孙女二长适顾大庆余尚幼一夔有才性自具状草累数千言且读且酸鼻弗忍竟乃稍衷其溢而志之仍铭之铭曰

抱德以潜女则宜含志以歿男之悲夔状余铭毋朽之以慰九幽则汝夔

例授指挥僉事一川于君墓志铭

盖金坛多贵族于为甲而于有郡丞公本者死国事世世祀禱李遂复以义称弟处士闰凡三传而为契玄公鎰由乡荐释褐令万载以卒善谈名理着中说成一家言契玄公有丈夫子七皆材而独器其第五子一川君曰是儿类我当尽以篋中书授之而君果用明经补博士弟子工制科业有声称进补太学上舍然数试輒不利诸子中伯为御史中丞能赠契玄公及公父如其官仲有子拜侍御史封亦如之余皆仕州邑要职而君独困公交车久不得意然能授奇策干获傍拓舍畝与千户侯埒会大司马以军兴法勒所部入粟补官君粟满千石得指挥僉事服金紫出入张盖骑从甚都人或以为中丞也者而辟之既乃谓曰第五何必减骠骑竟骠骑耶君尚意緣此杖一策南埽倭北守边陲而寻知其名假之因稍稍厌勸不复好而顾愈好客客过即呼酒酒必令醉飞筹益筮烛跋斗阑而壘不聽耻纓烏交道与粉黛错君周还其间秩如也当君倾意食客时客亦自意极以为必报君而语鲜讎乃至中有叛而他客者君若不闻也顾又好施予尝积责券金至千度不能偿则焚之邻人丁济者老而贫君贍遗至数四亡倦其人亦视君以为困廩不啻也属岁侵君大出藏镪粟衣食其里棺死者邑上之台台为树表曰尚义又当城邑而君所任板筑十之五君虽用奇策起家操母权然阔畧不把筭而又以急义故中落意豁如也踰艾尚未有子则顾影自语曰如乃公伟而独者耶已举今太学生秉有文试不利则又自语曰如乃公之子才而终不利者耶盖君长身阔膺方颔丰背人望之以为福德人即所树负亦尔其生也弘治庚申至万历己卯而卒得八十娶于范亡子举一女适太学生虞立道贰蔡举一子二女子即秉娶王氏推官纳言女女二长适诸生王维坦次适户科给事中史继辰张云南祥鸞之状云尔吾闻之君故泛食客然其所推贤必天下长者白下则邹祭酒守益蔡侍郎汝楠里居则王给事煜马司业一龙皆与君善以故君跌宕膏腴间无染态所谓徒子侍御者名业与余同年友固不辞秉之请而为之志若铭其辞曰

朱其门歪其室儒其腹武其饰游侠其节长者其德八十考终以即真宅将无蝉蜕

纨袴而蚁观货殖者耶

弇州续稿卷一百三

●钦定四库全书

弇州续稿卷一百四

（明）王世贞 撰

○文部

△墓志铭

迪功郎嘉兴丞竹淇顾君暨元配钱孺人合葬志铭

通之顾自孟城徙曰福二者五传而至菊泉公某任侠起赀雄里中有三子而少最良曰滋阳公譔以文行廩学官芥视一第竟不获晚而膺贡入太学得饶之余干簿以歿娶于保有子而良曰嘉兴君讳希颜字学儒小时龉阨不妄嬉笑余干公口授之书輒诵稍长工属文补博士弟子余干君为择配而得良于钱委禽焉是为钱孺人君之治博士家言有声然不能趣绳尺而以受家乘余干公时病读乃叹曰使我俛首持一经待鞭撻我有所不能且与天下之豪贤长者游以间道取科第乎遂入赀补上舍复有声第其试应天輒不利而又久之余干公用好客喜施予不能问家故至为余干而累贷进千余金余干公忧之甚谓君曰籍责进者廩而集簿室簿不能以蕞尔吏民馁之将柰何君曰无忧也归与钱孺人谋悉篋中装簪珥衫珩之属鬻之不继则转贷其亲知故人以偿进所急几大半余干公既用自宽而复恠之曰几何渠能却券已得其状曰吾弗如也今而后免吏诛矣君虽已宽余干公忧而橐日益匮又当偿其亲知故人钱孺人曰无忧也吾与君姑相长为俭勤家亦竟起钱孺人为君举数子皆不育而最后乃举今邑诸生良馭意犹少之曰歌螽斯者何人哉于是谋为君博选媵既媵而抚之其长者若弟而幼者若女寻余干君用老且劬瘁卒官君号泣昼夜驰而奔讣至则以丧归所繇大江■〈风贝〉暴起舟俛覆君抱棺哭曰天乎请得以不孝躯代而施鱼鳖则可柰何忍于吾亲之蜕且哭且抆颡俄■〈风贝〉止舟济当是时舟中人皆股掉不能支则相率归君孝感而君归治丧毁瘠骨立钱孺人复佐之相长而为礼盖又二岁而钱孺人寝瘵剧时君犹在苫不室也良馭甫七龄娟秀而颖孺人为稽颡保孺人而属曰以此儿累姑又谓君强为善

福不君诳遂卒当是时君自上舍升吏部选人而念保孺人已老寻有所续亦称钱孺人弱不任负忽忽不欲出保孺人从容谓曰丈夫宜以时建树耳每念而父晚不能竟一官令人郁郁奈何复效之君强就吏部铨得宁阳丞宁阳故近家而君之丞未几忽心动乃以间归凡保孺人果病剧母子相持泣甚悲已甚欢也君虽委身听医覲竟不能起保孺人以至大故一恸几绝遂得疾者三岁而后痊乡人怜之为赋孝廉之篇而君服除补嘉兴嘉兴东南沃邑赋额繁其民勇私赋而怯公输君至则争以其私帑谒曰例也君叱曰去之谁为若例屈指岁三之日以次第输曰此县官例也违者輒扶之虽贵豪无所贷其民廩廩相戒如君约而君以近家故即米絮醢滷之类亡不自家取者邑人见江北赆舫至輒惊曰昔者橐而去今乃橐而来耶邑赋登逾于傍邑娄获旌且迁而会苦吏■〈谷丸〉故属疾使使呼良驭未至疾既革谓其继钱孺人曰良驭也才若可依而老也指诸媵与他子女曰微吾故妇力谁与有此吾问故妇所往偕矣歔歔者久之而逝君逝以万厯戊寅距其生嘉靖丁亥得年五十有二尝治斋所竹环之清流袭其外因自号曰竹淇钱孺人先君十五年卒得年仅三十五有男子七人良骥夭良驭娶四川左布政使袁公随女良骊娶太学生龚维干女良駮聘番禺丞冯立女媵陈出也良金聘贡士葛址女继钱孺人出也良知聘太学生钱崇孝子余遗腹子一尚幼媵时出也女二长适马承烈次许字太学任子陈遇孙男三长承瑞聘诸生马承勲女次瑞鳳瑞芝皆幼孙女一许字王从谨君卒之又三年而始葬袁公既状其事乃叹曰贤哉顾君夫岂唯顾君盖世世好行德焉然其始不获以一命显余干君稍显而弗获终簿君又稍显而弗获终丞譬之千斛之庾其舒积不过升斗何以遽已耶乃钱孺人则又修妇仪克妇怨而夭更甚也天道所由晦矣谓良驭必请志铭王先生以慰之王先生者其友也良驭既致请余故竒其材而以袁公谊不克辞则谓良驭而不欲终显顾耶且令吾子材诸仲叔复繁起孰非而父与而母貽也天道遠以为晦然哉铭曰

汝勤于外而以瘁死汝妇勤于内而以瘵死爱者怜其弗究报而知者归其报于多男子噫江之北土厚而风淳汝偕汝俪以栖汝真谁与铭之江南之人兮

文林郎知何南汝寧府光州商城县事芷阳沈君墓志铭

万厯十年壬午秋七月而沈君之父封工部公卒明年癸未小祥之又三月而始成葬之一日而君忽暴中风仆于莹盖戚毁之极而重以劳遂灭性也于是君有四弟五丈夫子其处者号之嘘之其任行者狂走而问医药不及则又狂走于梓人得美材焉以治君后事而君之最少季工部君仰天哭曰天乎遂夺我伯氏哉则又曰吾曹不肖忝为先公子而伯氏遂得趣侍公地下蓐蝼蚁也夫我乃不能且夫伯氏之死死孝也明年与其孤某葬君于某所而又仰天哭曰伯氏二十一年而荐于乡四十三而始成进士仅一

为令四十八而以先公讣归四十九而弃我于乎是何成之晚而夺之速也于是手草君事状以属余而俾余为之志其墓君初讳令闻后改孚闻字贞孺尝自号翼亭后亦更号芷阳其先为吴江之名族至王父■（启，山代口）仕为湖广按察副使以材守着声仲子讳理出后于仲大父岱取黄安人而生君后以工部君贵封如其官有文学风槩善谈论而不废为长者君甫三岁而封公授之书俾默志之则已得五百余字稍长强记工属文下笔輒就尝受易于张某先生能抉其秘以故遂用易魁诸生为第三人而其于礼部试輒报罢然君之修治经术与制举业益勤当按察公之卒而里中无赖子构君子有司数起狱相窘君能不废业而因以习城旦家言且哲于公府情事既成进士刻登科录当以生齿闻而君具实数或谓减不过三岁而可以预馆选即毋选而更五岁以当给事御史选毋害也且今诸进士谁为不讳齿者君曰甫仕而遽欺吾君可乎于是君之齿在百人后而列第四人不顾也其为令得光州之商城商城虽山邑而独当淮蔡江黄之会奸民相聚而藪以椎剽相雄高君痛以法裁之下令曰盗集而十里之内不合围者皆抵罪里中恶少年为非而不觉察者罪如之有犯亡所纵舍咸惴惴相戒而邑大豪多入货司农少府假衣冠文其贱令之官輒相率投谒通姓名而重其币岁时割羊豕射虎豹麋鹿雉兔之类以献稍熟则为具张乐薪令过而觴焉其又熟则狎令而借其威福以役使弱小令中悔之则已尽得令长短有所挟持度不聽不己君至预约束典谒一刺之外有以他物入者榜至百客入见伏谒威施唯唯而退（阙）外不敢再致辞君又能察伺豪过失即燕处恐（阙）若置一令小民鼓腹而遊豪门亡所逊邑既遠（阙）鲜约束隶卒之藉名于官者一而私籍者十有（阙）撮则麀聚而徃蚕食徧于邻里君一日而汰者六百人下令曰被汰而入令庭者必戍其入丞尉庭者如之且谓羣吏彼隶一而十之民十其害使若为所欲为即十令也必戍不贷汝于是吏洗手而奉三尺令庭鸟雀下矣赋额故九等而其最上上者徃徃数姓为一户人自户者虽富而亦下中之君悉令人自户而后第其家为赋等以故无弗均征输者例先易而后难君于难者急之易者缓之必如限而后已民悦服亡所规上下其赋遂起为河南诸郡邑冠司计大吏取而式之当事者希权相意行丈田令于天下州邑檄至君独持不可曰令为民不胜赋使我多取饶而寡取瘠瘠者多赋额必减减乃德意也今不能寡瘠者而但多饶者以取盈而奉好利之孔且夫令不能废百务而寸寸度之贵势之为强而奸猾之为巧胥吏于中市焉弊且饶寡而瘠多何丈田为不得已俱勒从旧贯稍平其太■（谷丸）者以故商城之田与赋独不溢令别以他治状旌独不得旌丈田而君行意自若无所悔始君之在公交车而习城旦言傍及吏弊其为令若承螭掇之而已生而善治生则凡所稽考庠廩出纳便益教民蓄水灌田种菓芋其洼者植菱芡莲藕之属一如其为农事暇则考课博士诸生经术文谊不倦一如其诲子弟事而其民亦戴之如父母诸生奉之若明师至两大试娄中选如岩邑君亦两奉檄分校所得皆知名士前后治商城可四岁余荐剡娄腾上尚书尺一旦下而已忧归矣君性孝友赠公虽甚爱君而御之严有过犹赐譴责恂恂受之其待诸

弟抚其存者而恤其死者最少季则为工部君君之举于乡工部君犹未生而后同赐第盖所师友于君不浅云慷慨好行义食酒至斗余酒后耳热意气豪举无前而晚节温然自克使人欲倾家酿予与君托姻娅久即所闻始而乡人之善之者十五然不能尽得志于月旦既而善之者十九又既而亡弗善之矣迨君卒而咨嗟涕洟以为君不死其为万石太丘无难也嗟乎以君之才而屈于年其可纪者仅一令而已虽然王涣不亦一洛阳令耶而乐府至于今歌之不衰安知商城之不祠君而其能言者不被之乐府也又安知百世之后其不以予志铭而称君若洛阳令也君始娶闵继娶黄皆先卒又继娶顾子五长同寅侧室李出娶钱次同生侧室翁出聘周次同己侧室吴出聘顾次同壬侧室王出聘周次同阳亦翁出聘陶女三长闵出归举人王士骥予子也次侧室李出适诸生顾谦服次侧室平出未字诸嫁娶及字者皆名族其所著周易日杪十一卷行于世其铭曰

士有百屈而仅一伸其伸之几何乃能使诵者宛然其若新岂所谓死而不亡者寿没而不能忘者君子之仁也耶

枣强丞赠文林郎元城令东丘万君墓志铭

万之先世以武显也自其始祖杰繇大同归中山王显名太原下为壮士然不获有官称子锺从文皇北征以获级功进总旗子宁再以获级进百户子瑛徙籍偏头再以获级进副千户子祜再以获级进正千户子亿用千户为郭都督司中军奋击破敌遂进指挥僉事守备应州自总旗至守备公凡五辈五积功而始世世为指挥守备公有四子长曰山仲即公也公讳岩字民瞻母曰刘恭人少而沈默于诸兄弟中独不为声酒六博之好每之塾师所见授经者輒徘徊不忍舍守备公贤其意遣之塾公遂之塾日读书伊吾至乙夜不能得数行然益自刻励亡间听夕寒暑矣尝读幽风而思之至夜分叹曰王业之所由兴其在勤民哉意若有豁然者遂纵笔为文辞滚滚不休而其所受书輒诵竟以精洽名弱冠试学使者为诸生第一廩于庠乡试不利归而读书西山佛庐始得开元诸名家诗独于少陵氏有深契曰此吾师也乃复为诗有佳语书壁壁为满明年以选贡入太学太学诸生窃少之而马文简公汝骥顾独奇其文试輒首列以是有声称诸生间其识诣亦益进公既负其奇谓科第可芥取而独困于乡试至再三乃太息曰吾亦自疑之然吾小试利者何也得非命耶于是谒吏部选为枣强丞枣强故雄县然其民顽悍大豪任武断而中豪以下好修睚眦博徒讼师纵横衢野吏急之则构飞语相中伤亡不自危者公颇用钩巨术得其隐已而时有所纵舍曰勉之三尺不贷若矣以故咸摄公相戒莫敢犯项御史者欲有所逮豪跳弗得以属公公诃知其处窘夜归公公阳惊曰毋所事若也豪意益宽居数日复呼之乃以昼见公縛而送御史大奇之会有坐法当死者狱具而毙郡王丞妄意公有所主摄其家属簿公置对公据法辨王丞恚遂欲阑入公罪公立而

振衣曰累当死而死耳并死执法者何也且死不必污公挺办请触阶死王丞掩耳起走
诉项御史御史谓万廉吏必不至枉杀人何相煎为王丞愧谢乃已而公姿拜诸台獎掇
邑篆可二载所一切治办暇则延礼诸儒生讲说经义彬彬矣以继母任恭人忧归始获
侍守备公养其疾病丧葬忧毁踰礼人人称之公既除服或谓且复仕公笑曰仕贵行志
耳今已束于格矣何行志为而会其伯兄山袭人复谓公将种也不为丞将为指挥乎公
又笑曰吾生困铅槩久矣安能复把三寻矛与诸弁伍也诛茅构一亭于东山扁曰栖云
又慕陶彭泽之为人种菊东篱下浊酒自放间为诗语曰今古皆吾有谁云处士穷又曰
虽当尧舜世巢许亦硜然其寄寓潇洒视人间世泊如也第家北边匈奴白羽蠡午监司
守臣急延公问计公至则画地形望敌气谈说要害中窾诸老将莫及又尝驰骑峻坂下
深谷若飞挽强命中少壮莫敢角而公时时读史传至忠孝节义事与兴衰得失之际未
尝不感激用壮泣涕数行下人始知公有文武才虽以时消息其志固卓诡不易测也公
有子曰文明以易成进士隶事刑部念公且老欲归养公力止之授南阳令谋欲奉公与
偕公不可曰禄薄毋溷汝朝夕汝食廉吾立稿东山不憾也亡何公骤中风一夕卒得年
六十九始娶于杨为千户培女先卒继娶陈则千户璧女后公四年卒丈夫子二长即文
明陈出也补元城令考最赠公如其官陈为太孺人娶杨氏封孺人次世明聘张继先女
侧室薄出也女二长适千户黄云龙次适诸生常守中陈出也孙男二时孚以指挥优给
聘守备苏来后邦孚尚幼始余按察山西与场事得一卷异之以示御史今中丞饶公饶
公曰是国器也其取进士若反掌既启而知其为文明也文明将以明年（阙）月（阙）
日葬公于祖莹既手辑公之遗诗词三卷而藏之复銜哀次事状凡数千言走二苍头
■〈足 敝〉 ■〈足 敝〉 冰雪四千里而以志铭请呜呼余不识公以公之子而识公可
也铭曰

惟万之先繇武功竞诗书业就与介胄并父老而丞子少而令丞生有涯令贵未竟
姑安若宫有责来命

赠奉政大夫春山乔公暨配封太宜人储氏墓志铭

王子曰余后先读乔公与储太宜人状而慨之曷慨乎慨夫侠节者之不易见也侠
者之为行也振施而不责报先人后已然徃徃背公树私之谊成即县官有缓急未能得
其丝毫之力以至女子之为节有捐脛毁质以殉逝者然未有能毕逝者之志也夫此二
端者皆自成其名者也独乔公之为侠与太宜人之为节则不然始乔公之少而就外塾
能读书属文奕奕有隼气识者以为能得文士之用而已所严事父竹溪公委曲谐指为
凿沼哀石藩卉竹以左右耳目之娱又尝北出至清源而心动疾驰归归而竹溪翁病病
得之忆公骤见公愈以为笃孝长者而已其治生裕于竹溪翁又能延明师诲其子以为

善理家秉闲父规人而已及其游太学以材器见奇大司成马先生汝骥又能慷慨赴急不寝然诺车辙迹相踵于席门至相指倾曰若名士何以不识乔君耶而君还里又尝捐腴田二顷余佐里中役建义塾以收不能束修者树义塚以归不能保骨者乃稍稍用侠闻然公犹秘之寻倭寇暴入杀掠所调募若处之筦齐之矛北地之弓百越之鏢遇伏輒披靡解散公乃为议曰是夫也技岂尽出寇下哉以不习土险故夫习土险则必藉土人而是时蔡中丞克廉日夜忧念亡所出闻公议而异之以属翁叅政大立方守廉召公覆策咸合乃稍试公以海塘外濠公与其役夫最下者分功畚鍤间濠立就于是牒下公募土人团练公大出其私橐得骁勇且千犄角破贼斩卤过当又为奇兵断注口以危之贼遂遁幕府上功簿大司马为论奏予冠带俾越选人格受官且再赐金帛而忌者起矣公自以一介为万乘知感慨益治兵自如而后守黎遵训檄公城川沙诸任版筑多中下豪公扶其失职者不少借自是谤讟日甚至闻于御史起狱窘公公忿恨不肯置对病三日而卒当公卒时凡五子独其伯木学已成而诸叔季尚幼是时竹溪公已老太宜人不忍于公死欲从死念死而上负竹溪公下负诸子何乃不死太宜人之姓储储亦邑着族也其父筠母金父筠之归太宜人于公也实自择之太宜人少婉静其始事竹溪公与姑丘也属性严毋可当意者顾独当太宜人公好学已又好宾游诸浆酒脯脍饼果之类太宜人咸任之不露声而办为公置侧室二抚之均于己曰公接也已举子二女一字之均于己子曰公体也以故公歿而竹溪公怡然而若有子也诸为子者肃然而若有父也久之木成进士守安吉州太宜人来就养岁余輒思归安吉守泣请留不可曰若祖乃父勤思种德以有汝乃不汝享我何心独汝享且我归为汝治家以安汝官盖又久之而安吉守迁潞安同守考最赠公为大夫而太宜人如其阶且加太焉亲捧诰堂下太宜人始色喜口凡若父所未竟者若竟之吾死可以报地下矣于是同守泣复请留太宜人正色曰汝骤猎天子恩而骤负之可乎同守乃还治又二岁许而擢金河南宪星夜驰归覲而太宜人感疾卒矣嗟夫乔公不惮弃其身从里中少年犯首焰之寇而挫之此其志虽欲以自见然离去室家友朋之好而精欲致之于天子夫岂俯仰资功名者太宜人外行不尽见然其敬事慈育恩施先族亲慰抚深臧获乡之人类言之且公乍没而金宪未成进士时乔氏之门第不改色产不少挫可想已吾故曰乔公之为侠而太宜人之为节非世所皮相侠节者也公讳镗字子声别号春山其先为宋枢密执中者居新安元季而子才课鹺上海遂为上海人六传而为晟即公父竹溪公也其卒以嘉靖丁巳距其生正德戊辰寿五十太宜人卒以万厯丁丑距其生正德丁未寿六十七丈夫子五长即木娶周蚤卒赠宜人次术先宜人卒娶潘太学元孝女次本太学生娶沈故广信守阳女俱太宜人出也次楠娶王次桢娶周俱邑诸生侧室周出也女三长适徐待次适倪邦化亦宜人出也次适唐继宗侧室薛出也孙男十一长拱辰太学生娶潘（阙）女继林都諫景昞女次拱宿娶陈乡进士寿荣女次拱玄娶王次拱璧聘陆都察院都事郟女次拱奎聘唐次拱斗次拱翼聘金余尚幼孙女二长适邑诸生王时行次适陈治年盖乔公葬而处士诸侨状

之故奉化令徐君猷忠志之矣其以太宜人合则都谏公复状之而王子复志之从金宪公之请也乃又为铭曰气所欲摅郁为虹光志所欲酌冽为冰霜兹惟乔公与储宜人之藏

故封征仕郎户科右给事中居素尤公暨配陆孺人墓志铭

万历己卯之十一月二十日太学生尤茂先祔其母陆孺人于封给事公之兆而先期以状请志铭曰将窆石也惟吾子之言是丽问孺人已乎曰将以宠及先公也唯先公之葬也业有之然而再藉子以母扬也余乃曰礼乎哉观过可以知孝矣余故尝为九龙山人歌而山人者即茂先也不知其父母知其子是宜志志曰始封给事公之有陆孺人也盖其元配周孺人夭而父雪蓬翁焕母卢老矣遗孤鲁仅九岁讷六岁耳封公为诸生朗儒于文事着声然不能问家人产而孺人理内政谧如也其奉雪蓬翁与卢栗如也抚二孤藹如也其佐封公之治父母丧葬秩如也盖封公称孝子矣封公之为诸生三十年而始当贡中蜚语夺廩又七年而获以贡士名终其身然鲁举乡荐矣又七年而鲁成进士矣已遂繇行人拜给事中积左右资至都给事中为顺天丞矣其为左给事而以九庙恩封公获如其官孺人亦获今封然而封公不色喜为顺天丞而以九庙灾谢事归朝封公封公不色悴顾日杜门焚香煮茗赋诗暇则蹑履洞虚观招羽客谈玄对奕觴咏移日弗倦邑以乡饮大宾请则辞之秦端敏诸公招致诗社为一再赴而已当是时邑之封公重而给事御史封犹贵倨即伺公居闲豪取迹不可得邦君大夫以是益贤之年七十三以卒自是孺人始独称母而府丞鲁与弟诸生讷亦相继卒孺人自有子曰茂先自孺人之事赠公以居约始而后小裕又用鲁贵显久之复与茂先以约终盖其为妇而母者七十年而不废勤俭如一日也晚节谢女红及授茂先妇政所好礼佛诵内典日一菜羹一饭暮畧近杯勺三四行麋佐之而已茂先为诸生久孺人意不怍曰得无作若父遘耶且吾安能而子之为鲁也于是为策之俾入太学而茂先亦自以游大人籍甚两都公卿大夫若申学士汝默文博士寿承黎秘书惟敬辈皆有诗以为孺人祝而孺人之开七袞至八袞不落矣茂先念孺人老不忍离竟用寿死得年八十九呜呼谁谓孺人以约终耶尤之先自闽而徙为锡甲族宋有文简公袞者大儒名公也陆氏自福智用将作贵而其子景贤为尚书工部景祥遂至侍郎而侍郎之孙寛者以工篆书得官再迁临江幕归寿至九十七赠公讳基字惟德别号居素有诗文行世曰居素集鲁侃侃持诤知大体娶通判张贤女封亦孺人讷娶周氏茂先魁然长者博学能修父业其娶钱氏女四孙男八人孙女七人曾孙男十一人曾孙女七人所联姻皆仕族余既已知赠公及孺人而志之矣是宜铭铭曰

于嗟尤君而以子尊于嗟孺人而以子有闻岂以子尊行媿而文岂以子有闻志洁

而温藏之表之庶以荣往而慰存

封奉训大夫知滁州事右石唐公配陈太宜人合葬志铭

万历八年余里居而滁州守唐君汝礼以书币介进士张子新而来请曰我大夫右石公之背不肖孤也以嘉嘉靖壬寅盖于今三十有八年矣居十（阙）年而为（阙）而葬葬而得乡进士徐公用检之状将以乞志铭于贤长者而未偶也其又十（阙）年而为隆庆元年癸酉而孤由南太学正地封公登仕郎已出守兴国州奉吾母陈以官养竟寿终将奉而祔公之兆念墓之石璞然未有文而是时业已心向先生愿且托不朽将徼惠状于兴国之人吴叅政国伦而以阔疎故弗得则又谋状于太常兄汝楫而汝楫忽病死弗得卒卒迫葬已葬而除服而滁之移命下矣乃不肖孤合二守最而登仕郎进称大夫母陈亦获进称太宜人以伉荣我皇考夫向者痛大夫之养不及禄太宜人之称不及生而墓之石璞然且犹故也不肖孤何所逃罪輒冒昧以不腆之状请而徐公亦进而为叅政其所撰故状亦稍稍有所裒益余既读而悲其意乃许之按状公讳熊字虞弼世为金华之兰溪人大王父曰某王父曰思州府推官贤父曰篁屿公某俱以伯氏文襄公龙贵赠太子太保兵部尚书母曰郑太夫人篁屿公有五子而公次文襄公为仲公少茂朴寬然大人度篁屿公念欲成诸子儒而不自任家以次推公然窆亡可以家者太宜人十五而归公即操井臼视匕箸以上奉舅姑而安文襄公伯季于读小不继即簪珥时时母钱家矣文襄公既成进士补郟城令而篁屿公歿文襄公奔自令毁瘠几殆公旦暮吁于天请得受兄病而文襄公果愈服除拜御史而公属末疾自是展转床第者周七年而又属析箸坐是益困太宜人自励勤苦逾于妇时盖日分一时调浆粥药饵二时治女红为鲑菜资即夜分不甘寐为恒而邻火暴侵室危甚有壮夫阑入曰唐公长者为负而出之而太宜人犹在焔客遂欲并出之太宜人曰死耳不可以身试人手自投舍后池得浅以免公与太宜人虽免顾益贫且惫甚第其意豁如也橐得文襄公藏书而读之遂能文所著人鉴录徃徃有文襄家法而又好吟吟多出李杜遂以似李杜称一夕梦游仁山而遇皇初平兄弟谓曰熊来汝能食三黄则起就视之盖黄连黄栢黄芩也醒而弟豹来视公时已舌本强不能言姑取方书指视豹豹曰兄病久瘵而乃受此寒剂耶必不敢公恚甚欲自投地豹不获已乃合以进公始进即愤愤欲絶寻若有闻者曰是药与病斗也亡害乃趣更进之夜半暴下黑血者数斗而苏遂复言进饮食如常而会元旦公复梦谒城隍神神授之杖出而视庭两除皆菖蒲艾也公乃自解曰吾起必以五月五日乎夫菖蒲艾者五日需也及期果起而是时文襄公业益贵用事诸子弟从而起家者踵相接公独就里社为童子师以资旦夕日亭午不能具饭姑以一握干米粉呼水佐之人或谓公腸无不充乎公笑曰易耳吾已约裙带腸从细矣邑令丞数请问公自匿避曰奈何以吾兄识邑大夫乎寺有迫于贵势且毁者其寺僧欲赂公解公摇手曰毋污吾吾不

晓解也公念母郑太夫人老失明而文襄公方在事思重老人思所以共奉百端间取委巷新事时时说之太夫人为忘倦文襄公每贻书公曰弟寛我忧成我名我毋以报若必且有后而公寻得疾卒年六十一盖仅有子汝礼耳而太宜人始为政太宜人之急汝礼甚顾爱而能教之所以切劘责厉如严师汝礼既树立而太宜人于族属最长诸族指千计毋不取一言决筴而汝礼所之官皆便地輒奉太宜人以行恒谓即菜羹生鱼不敢使太宜人食廉而太宜人耄时时思其中外孙子汝礼及使其婢子诈袭其衣冠而教之应对太宜人乃悦曰谁谓官舍遥吾犹步武也汝礼以退食问安否暇则亦举委巷俚语说之太宜人曰吾彷彿忆而父之语吾姑若是也虽然吾糜而簋多矣既病且革犹谓汝礼老人足死第食于国者七年而毋忘报也盖太宜人八十有九矣当公卒而仅一汝礼及二女子长适徐让少适蒋弼弼夭以节称而太宜人卒时汝礼所娶妇某封亦如之丈夫孙五廷忠廷化俱邑诸生廷珍廷寶为太学生廷试亦邑诸生女一适太学生邵时习曾孙二应绍应荐曾孙女亦二人公之葬也垂四十年而太宜人始合冢再得赠阶阶五品又得祀邑之乡贤祠孙曾之称男女十人公可以慰地下矣独恠唐君之于志铭难其人与其辞垂四十年而及不佞何也不佞故尝悲君意窃复以王父司马公之托文襄公世讲也勉而勒之石铭曰

子不语神神实起公而昌公之子若孙公实为之神道无亲五福备臻报不泯泯归以告公于嗟乎宜人

弇州续稿卷一百四

●钦定四库全书

弇州续稿卷一百五

（明）王世贞 撰

○文部

△墓志铭

周府崇善王教授秋岩萧公墓志

萧君之解度支部而佐吾州也盖嘉靖末云而会守不时阙萧君数行守事余方自

废里居君不予鄙时时过从焚香推扬执文甚适也而君之父秋岩公来视君因畹养邸中萧君为人峭直强敏以干济见长而公间用博大宽平剂之以故萧君所得上下声逾于前而公益自晦不意见客属萧君与守后先上事幕府火暴起丙舍翁挺身出督吏卒扑之火垂及堂皇而息翁又别饬干吏移牋避火诸猾黠不得有所侵舞州之士大夫翕然称之而公一日谓萧君吾向者虞女以迁客故倦吏耶今者乃不倦吏也吾去女归矣毋所事乃公矣公归而萧君进蕲州守再入为度支员外郎萧君之守蕲属天子新即位应诏上书条十事事多剴切公闻之惊曰封事固不限远臣即远臣遂封事耶儿伉犹昔也何以免而亡何君竟坐蕲守计罢公乃迎谓曰吾固已言之虽然吾念而之不得老也庶几从我老而又五年公以寿终萧君故尝令浮梁而最则浮梁之士大夫以帛徃已吾州以帛徃已蕲以帛徃具如浮梁而又十年萧君来介观察使郑公茂之状以请曰不孝之不得志于地下也十年矣以公之未宁宇而不敢请今者公诚归矣而竟不请是不孝之死吾先子也余欲谢毋诺而吾州之尝受经者侍御吴君进士杨君毛君佐之州之称荐绅者复从舆之盖郑公状畧云公讳桂字芳卿其先自兰陵徙安成又自安成徙兴化遂为兴化人宋宣和中有抡及发者相继成进士遂号甲族至明而世世受耕与儒其后有公璇者合羣从子弟共居戒毋得徙着有子曰公俨以博雅称所著书甚伙而皆邃于理性传子公仁甫出授经旁郡尝郟奔女归遗金于主时人称之三世事皆具郡志中公仁甫妻林而举公五岁不能言既言即敏异受书輒诵十七补卫诸生亡何以优等得廩食当是时公为诸生声籍甚故侍郎邹公太仆丞郑公与公同起诸生其试相乙甲而内庄事公数操经质疑难然公天性孝谨居丧毁瘠骨立三载不入内客有给公入酒肆者甫坐伎以酒来公大惊絶道走归舍竟夕自责数郡有吴丞者礼公诲其子公自讲诵经术外不旁及他事吴丞亟谓其守周识吾萧生否后进中叔度也公友爱其仲季槐樟甚会皆蚤卒抚槐之子奇熊而教之夷于萧君而又有从弟标者亦从公指授举子业皆后先取科第而公始膺贡除广之泷水训导泷水自得公师而诸生梁棠举于乡二百年所未有台使者材公连摄封川及泷水事二方之人皆爱之会泷水令来公解令事无几而落徭以尉之扰之也叛而攻城令登陴譬解不得公徐鞶而启闔郡徭前罗拜曰是萧公耶尝摄令真长者取一言解公尝远出迓御史为蛮所窘且及矣乃默祷曰天以某有隱愿则殛之毋使王吏见污贼刃忽大雷电风雨蛮解去又尝部诸生宿于江夜有龙起邻舟尽壞而公舟独吹徙陆以免擢浙之太顺教谕亡何倭来薄城令当出战谓公曰将毋内顾何公曰毋虑也愿一切假令权吾请闰狱帑而后从事于睥睨凡旬日竟无他公又尝捐岁奉修学宫博士弟子感之像公以春秋祀而公迁教授得周之崇善时公尚在浙颇宦簿而浮梁令入南度支部请以禄养公公遂移牒乞致仕御史监司交异而礼之观察使茂其一也公之就度支维扬关养谓曰关讥而不征非古耶即不能无征如竭泽何萧君唯唯以故其榷漕恒务依宽平而故大司寇毛公愷慎许可人也一见公而貽之诗有古貌古心语其来吾州州人今大司马凌公云翼亦以公长者而器萧君公之先既聚

其族不别食而食指日益众至公代为政且不给公与萧君谋务节缩其出入而均共之其返自吾州尽出其帑纾家困且以恤故师后及亲友之忧衣食者公之歿卒之十年而萧君用公教不衰部使者以义门格上当旌公之卒以隆庆庚午距其生弘治己未春秋七十有三唯公之先世世有寿考凡四预乡饮而公独为宾祭酒娶蔡孺人再娶陈孺人俱有贤行而俱先卒丈夫子三曰奇勲即萧君癸丑进士娶于吴其次曰奇烈又次曰奇照俱郡诸生而亦俱先卒俱娶于林倭之变又俱以节死载郡志女二适柳珣陈龙光孙男二维堪娶于陈维增邑诸生娶于郑女三适俞腾蛟陈维学其一许林廷选曾孙男三大抚大振大拔女二其一许黄垣奇勲尚未有子子弟之子某墓在金鸡山之原王子乃言曰吾故知公而贤萧君然以吾州人之故益贤萧君以萧君故益知公是宜铭铭曰

公归而介二姥以安而土不知公者知公之子奇勲甫奇勲之为奇也未竟吐是必有子噫公且终为祖

赠文林郎南京江西道监察御史蒙河张公暨配伍孺人继配王合葬志铭

公始娶于伍而举三丈夫子也伍以嘉靖甲辰卒而中子伯大尚少云居二十年而公始卒而伯大成乡进士矣人或谓伯大子哉痛而曰未也其又二年而公之继俚王卒其又三年而合葬于翼龙山之阳人谓曰魄以安矣子哉伯大曰未也逝者犹尚泯泯其明年伯大成进士又六年以邑令高第征拜御史又三年以两宫恩赠公如御史官伍得赠为孺人如公品人乃曰是不泯泯矣子哉伯大曰犹未也吾今而后始图所以不泯泯者乃手为状走使与币而请曰向者窆而虚幽宫之阳以俟石也唯先生辱之言夫久矣不佞之与伯大知也夫不知其人知其子今以伯大知而志其父母则何辞状之畧曰公讳引字升之世为蜀之定远人父曰乐潜公福公生而明颖宽和所受书輒诵又善三仓家学当是时大学伍公臣有六女顾爱其第（阙）女曰是女也淑必有以偶盖数偃蹇而后得公而奇之曰女可依而显也公书成当补诸生而病目每益读病輒益甚乃叹曰奈何以书夺吾目哉目废矣有书安所用之遂罢去不复留意而所诵臆经史輒能通其旨奉二尊人夔夔斋栗伍孺人尤能洁烹飪调齐鬻菹以相之公岁时课农省耕敛修闾左之社酒茗修脯不问而继则于孺人乎资矣嘉陵江自天汉肇果阆至邑而迂回互曲若不欲去者公结庐受其胜曰王子方所谓长河已萦者哉因榜其斋蒙河而今大司空曾公省吾题诗纪之人以为实录云乐潜公始授公家家故给而毁于火渐困乐潜公晚而娶小妇举二子割公成腴以与之公以是大困人或谓公公曰令吾父业而未至此将何所取偿也维伍孺人意同公公用以益舒而诸子自任步趣则伊吾里塾中矣乐潜公与公母（阙）夫人俱老寿然俱病咳逆不成寝则公与伍孺人俱不寝盖三年一日也其卒而俱毁痛丧葬易戚人盖两称之公初不喜饮影响避酒人若讎晚而更乐之谓醉

乡吾真宅也遇酒輒饮饮輒醉醉輒长歌古诗篇以是终其身王亦名族也性慎慈其继伍而俚且老矣公曰以分吾家秉忧代伍母遗子女而已王能如公教公寿六十有八伍寿五十四王则七十四盖长于公四岁焉所谓三丈夫子者一鸚为散官娶于宋次一鯤即伯大今方按行留仓文学政纪重台端娶于席封如伍又次一鹤以特贡入太学女一适嘉定教谕章尚忠诸孙男三肇淳肇隆肇熙女五婚嫁皆士族伯大又言公易箠而手不肖曰吾死复何恨所不覩若易青衿不覩若母易浅土少介介耳今不肖幸易青衿而绣吾三尊人易浅土而乐而竟不能使公覩之已矣非先生文又奚慰哉不佞不能辞伯大请顾所慰伯大者则非文也铭曰

生而家于江以观夫波流之击撞风烟目而日月胸歿而归于翼龙以避江之啗冲其土丰而气靡郁芊葱茏■〈立乞〉然其标曰有明张端公偕二室人之藏

封文林郎句容令懷梅丁翁墓志铭

余里居而嘉善人丁君宾为句容令其治所与家俱距余四百里而近诸自句容来者无不啧啧称令以为在古桐乡中牟之间而嘉善人则又亟道丁君贤不置已而曰非独丁君贤也乃其父尤长者余故已自废物外然不能尽忘所谓贤长者而丁君繇令高第入拜御史今年正月忽舍御史冠而冠麓麻持竹而来谒介其友人管大夫志道之状以请曰父已矣所藉以不朽者惟先生大夫亦曰是状也御史之兄寅草也而不佞润色之不佞以御史知丁翁以御史兄草悉丁翁是故状而无愧色也余乃曰吾故闻丁君贤而其父尤长者何敢辞志曰丁翁者讳袞字龙卿父曰梅隱公干母计夫人其先五三公自宋理宗季而显数传为黄州府判长如又四传为梅隱公公之生儿时已颖拔有气槩尝与羣儿戏泽中相者过而目属之曰是儿也不贵则大富且能以名见重公亦雅自负曰富贵易耳不以名见者非夫也于是梅隱公阴器爱之授之书与贖不问而亡何梅隱公卒时公甫弱冠而诸弟庖表褒咸稚不任乃衔毀庖丧事小绪即拮据理家秉奉寡母抚诸稚中外溢如也然坐是不竟治博士家言而其闾左豪故难梅隱公而少公者谋起狱窘公所讼牒后先且三十六纸公挺身出而直之诸少公者咸服而一族子独嚚以公故腴田九百畝为贖券浅直投余姚之贵人某贵人来行田公长揖曰贵人故贵耳不能加桑梓即某欲事贵人不敢以先人之饘粥为贖贵人无以应曰与之邑庭质之公请掇诸佃户与族子对呼曰某某其族子不能识也取券而验其迹族子迹也乃以其田归悉分授诸弟曰善有之毋以饱他人腹也公所治家其操放大率如梅隱公而加精又出之以恕诸勤苦必先其臧获所分而并必取后以是咸感奋不爱力南畝益拓公世世长赋至公而益■〈谷丸〉然不一切避曰吾而逸谁当其■〈谷丸〉者令治城备倭计工分任公独得水门或谓寇来独为若耶公曰夫孰非我宗党闾里且徃役义也卒以先期

就里中贵人闻而有所询属令好语素勇役是不能一相代乎公曰役吾役为义代他人役不为义且某非贵人家马牛也令亦无如之何于是里贵人相戒毋敢加公而公益折节为恭谨某子甲鬻踵门而詈公公敛众入避之居三日其人忽暴卒人以贺公公愀然曰非意所及也公既以赢闻诸缓急告贷者輒得所欲去狎而姿至应之无倦色且曰钱者泉也又通寶也是安能虜守我公恒谓少孤夺治生不能终博士家言以为恨吾有三子安忍弃之农若贾乎于是长子宦最颖工属文蚤夭寅与宾之所就外塾经师斥置书籍其直不复为訾省矣寅既补邑诸生次当宾而学使者家比壤故有连居间者相属公闻而笑曰吾解授子经不解授子谋进独谢弗往而宾已褻然登选久之例俱升太学上舍明年秋当应试二子文皆在高等而寅以小迕格见斥宾报至公不色喜曰小儿子乃遂敢先兄耶既寅归而得所以见斥状邑邑成疾公慰之曰儿幸有身在何虞也一第外物耳自是宾之举进士及为令公皆有所训勅而于令尤切曰吾向者旁视令不职噤不敢吐今可以吐矣宁拙毋巧宁缓毋骤唯勤与廉可以补孱勉?哉令以是淬厉有声其满考而封公如其官御章服与诸荐绅齿委蛇若素习者郤而从田父野老游又快然适也守相数以乡饮大宾请谢弗应居恒谓富贵而过自损故善犹为富贵动也然迹其舍堊乃更闾閭减敝矣公生平喜赴义一饭之恩不敢置之然亦不能忘睚眦晚而与俱化性朗爽不设城府与客语必肺腑一然诺若执左契而不责于人盖环公里而衣食凶吉之费多于公乎取公未疾垂四载为祷请仁祠踵相属也歿而哭之亡弗恻者语云富好行其德即公所行德寧借富哉公时时念梅隱公蚤逝不逮养榜其斋懷梅曰所以志也毋论伏膺烝祀即一语及其先艰难状涕涔淫下不止矣奉计夫人以色养属诸弟立而计夫人欲次第就食公力止之曰儿幸长得供奉大快且奈何以一食故而仆仆吾母耶计夫人乐之为加匕箸竟老寿死宾为御史无几念公病遂请急归归六阅月备志物之诚公卒不起当公之病时人或谓公不以时析箸耶公笑曰析以止争不争奚析且易箴神采扬扬不乱公之卒以万曆壬午七月十八日距其生正德庚午二月二十九日得年七十三娶吕孺人有内行先十五年卒事具唐先生枢志中所谓三子皆其出也陆氏来继之寅娶于浦举一子太学生铉娶倪有子一宾娶于吴封孺人女二亦吕出也长适太学生朱可宗先卒次适诸生盛洪项鳳梧寅一女适陆启颢宾二女尚幼葬（阙）之（阙）嗟乎公虽称御史父其封乃令耳以一令不足荣公为贤令父足荣公虽然成令贤者公也是宜铭铭曰

手起家而授之子又为之师业成而后身食其推父以子贵识者曰非若树阴德而务滋贵自致之有冢累累过者必式请征余辞

太医院冠带医士竹逸吕翁暨配鍾孺人合葬志铭

吕翁者讳麒字希文有妇曰鍾孺人吕翁之先吴邑之乌鹊桥人也至明兴而有敬明者避兵常熟之沙头已割沙头隶太仓州遂为州人而又六传为乐隱公益乐隱公饶兄弟而以材见奇于里人曾老尚其孤甥女遂为曾氏赘举丈夫子四其长曰贈中书舍人彪而季曰吕翁王先生曰余甫髫而从外王父沙头则识贈君盖是时犹称曾氏云贈君长身飘须其丙舍子钱徧闾里膏腴之业相望而沙头俗故以貲相高酒食征逐所谈说无非游大人者而贈君性倜傥能以义舒敛其财不甚从俗诸季以贈君故皆有家余颇识其人顾独不识吕翁而里中乃多称吕翁恂恂长者语云何知仁义已向其利者为有德曾未何时而贈君之子廷评道熾别驾道辉诸生道光乡进士道炯吕翁之子兵马指挥道煜公乘道灿太学道炳辈皆鸞起为京朝官文学行谊衿带郡国间而吕氏得复为吕夫本厚者末繁且夫不有居者谁与行者吕翁之从贈君起而其后席之以其资诵法而取显廩故曰邹鲁之雍容与周郑之纘嗇其相待而成一也吕翁之始游于清源也尚中贾而独不好挟持伍中伎以无貳价称顾独有天幸輒倍息久之遂进为大贾而輒弃去之曰吾奈何以末富耶归而课家人耕其耕而息则使代垦里之荒者语其主曰县官不而假也属长赋则又以余谷为贫户输曰吾不忍若相牵就敲朴也尤好以德偿怨里姓之苏尝构公于官官治得苏侵赋状当戍吕翁顾匿而免之曰以尔恶我恶尔我宁异尔也徐老为吕翁行贩归而空橐以见斗酒劳之更出毋钱贷之至再不倦顾氏贫鬻吕翁田而并其先圻地既得直谋徙圻吕翁固止之曰汝毋徙圻吾代而税代而守盖四十年封树犹鬱鬱也有恶少某者鬻而詈吕翁市欲以尝吕翁而如弗闻也者竟自愧去吕翁之为长者非有所緣饰盖自天性然以贈君之覆露之旦夕上食如子姓礼仲兄鳳夭而遗嫂曰曹吕翁供养甚备时会人曰儿辈用有家故使我得还吕虽然微曾谁与我吕也每家祀未尝不先曾而后吕而是时道焯治北金吾部有声惧吕翁之不逮封也例上公乘冠服为一御即谢去曰田舍公何知冠服毋苦溷我当是时鍾孺人旁睨而笑曰固知翁之不恒御公乘冠服也曩者佐翁最纘嗇时未尝有损色也及稍进而饶至大饶未尝有益色也吾故曰公乘冠服之不能吕翁当也吕翁虽能用计然起家而鍾孺人寔共之事取规画吕翁或能得八九鍾孺人乃十不失一矣而又慈而好施予里中儿颂称鍾孺人毋下吕翁鍾孺人先吕翁十三年以嘉靖甲子卒寿七十吕翁以万厯丁丑卒寿八十三状其事者从子即道煜云道煜又谓吕翁中岁疾疴且委顿而邁异人黄授之以吐纳之术立起他受黄吐纳术者即弗起也鍾孺人老得蛊胀且殆如吕翁而梦神人授之丹一丸而茹之亦立起此其事近诞然鍾孺人生平好佛氏言吕翁即不好佛氏言而能行慈悯与其言不倍其歿也皆无疾而鍾孺人至欣然谓儿辈吾行良快口诵弥陀号而逝嗟乎拘儒斤斤守方内言宁足与语此吕翁有子五长道灼其妇项甫就室而夭貳陆出也次即道煜妇王继妇朱又次即道灿妇苏又次即道炳妇凌继妇顾孺人出也又次道焯侧卢出也夫孺人所共计然起家者也而又居约乃为吕翁置二而首尾二丈夫子亡间者此不为尤难哉五子之有子女者各五长者亦补太学生曾孙之为子女各三

诸嫁娶皆名族墓在某所铭曰

始末业终末俗与天游无顽璞佳者藏润者屋畴者穴室且谷曾而吕鼎厥族

故听泉张翁暨配洪孺人合葬志铭

吾州之称恂恂笃行长者盖南郭张翁云翁之配曰洪举三子而长者材曰兰溪令新洪之卒也在嘉靖末而新尚困为诸生窳行营窳张翁固止之曰俟我而后入土盖又二十一年张翁始以寿终新时用兰溪最移剧淦父老请留毕均邑亩赋事未发而奔自兰溪故犹称兰溪令而殷子都之状则称新淦令云其略曰翁讳准字伯东别号听泉其先归德之夏邑人也挺者高皇帝时从起兵隶冯宋公有战功不尽录仅长其侣为纛帅徙镇海卫又数传而至翁父全娶于陈乃生翁少读书且就病咯血而弃之为小贾寻进中贾矣而是时洪孺人之父某以贵雄上海里中孺人颇挟家橐而来公全任侠喜客以是益发舒客日益进而又不能其伍中人数起狱相窘翁与孺人悉内外而佐之应而会令甲诸纛长入都校枪不胜降入伍公全以翁壮任之俾傍肆他武事贾为废又以孝奉公全终附身附棺其费不费数寻有岛夷江余皇传翁并翁与洪孺人挺身而出庐橐委之矣始翁少而感疴不食饮尸卧者旬余而孺人谢膏沐不御以身共浣被几并殆至是孺人颇以挫产故意邑邑翁解之曰向若出百死以为我今我幸故在而身外胡恤乃相与欢然僇力什一余息稍稍不虞岁矣而新用博士弟子高第廩州学宫少子仕明亦补嘉定诸生翁故善吴音季弟湖继之愈精而诸子间亦有能和者于四候得佳适輒相聚谈说山林间事兴至歌发激羽流商贯石行云翁父子兄弟饮量不能合一升而相对啖少菓饵蔬粥日夕忘倦人谓翁何所见乐翁曰必汝所见乐而乐者则无日矣新之成进士而得岩邑也翁乃时嘿然若有深思隐忧者人恠之曰翁岂有所不足耶而更不恒若翁曰否吾念诸师帅黔首者不能得黔首心以与吾子语輒扼腕谓己力不能得之今者力能得之矣而未保也且吾所以乐者谓不尝窃造化赢矣吾甚畏之及新之为令乳哺其贫赤而徂击大猾去虎冠剪厥爪牙党之者阴喝翁冀以书沮令翁闻而乐复故时呼弟湖谓曰可贺我我又何所虞然翁竟以不戒风露病矣翁古貌骨坚硕飘须垂臆间孝友敦厚与人接煦煦惟恐其伤之也诸少年多妄语翁则亦日与语然欲伺翁一妄语不可得而其亡负然诺出入不异价盖环翁而居者数舍大小信之矣里社有疑事翁推为三老有赛会翁推为祭酒以至州举乡饮礼翁推为上宾然恭谨益不废翁素强鲜疾至开八袞健啖幸内视听步履如壮夫既病寝剧犹强起不废盥漱属兰溪有移命翁手书勅之曰宜以便道急之任母念我我故亡恙也寻谓新之子介儒治丧如其家可耳且吾不忍独侈于吾俚遂卒春秋七十有八前卒者洪孺人甫五十有三而已新之归治丧也世贞实吊之罢哭而犹咽已语微属曰伤哉不肖之晚于成也盖不获以一命逮我父矣

乃吾母又见背不肖蚤而至不获升斗沾也胡以称人子既而曰不肖之始习凡将以至制科也今犹耿耿焉若机杼声中出矣盖母授之也伤哉何以报我母也世贞故兰溪令友也是时心以不朽许之矣无几而墓成无几而新以志铭请无几而殷子之状来殷子亦兰溪令友也其文核而婉世贞弗如也翁有文夫子五而所谓洪之出三者长即新其配桂举孙一介儒娶封御史吴文炳女次忻两配皆黄举孙二鲁儒娶王继朱鸿儒娶李又次即仕明其配陈继顾举孙三绍儒聘陆启儒睿儒幼未聘侧室周出者二曰皙曰旗亦幼未聘女二归陈时政者洪出也先卒次许字朱某者周出也孙女三长适通其志曾孙女四俱幼墓地在彭家浜以八月某日葬铭曰

造化遗我赢而不承之则迂多取之则愚翁以乐承赢而归其余有妇曰菜实惟拮据同厥劬不同厥愉相率而安宰如之墟于戏后之人有不勃然而兴也乎

云南路南州知州进阶奉政大夫六柱曾君墓志铭

衡阳去京师六千里而遥故路南守曾君之子绰偕计吏北未几而君以寿考终其讣不能之绰所至罢公交车应归道金陵而后闻之恸哭驰抵家则已附木者四月余矣大痛谔曰奈何毋可以致一念逝者乃具事状授币于同宗之契长洲令凤仪俾介而以隧道之石请属不佞已倦笔研谢絶一切而长洲令为言之急且不忍于绰之孝思也返币决例而志之按状君讳乔字子木其先不知所自徙居衡阳者六世而为槐谷翁琦以行谊称里中娶于余无子继娶卢有四子而君其季也槐谷翁多隐德垂六十而举君每抚曰善不必不报则是儿也实当之君果少警颖有大度仲氏行贾而舟败尽没父橐后析产法当稍赔以补其兄弟而君甫十岁余独让不受曰所与铕镂析者何人也父益大奇之而君稍长精经术属文烂烂有声华十七而补郡诸生弱冠试高等食廩粟自是每试輒高等郡太守吴兴蔡子木余姚胡（阙）前辈慎许可不敢以诸生待君而君亦用古文辞自标显不尽用经术然自是遇省试輒北而益有声束贄北面称弟子者屡屡矣久之始以贡升南雍垂十年所总之后先十屈于大试乃数曰天乎必我所有逞于志者不能得之彼彼亦安能尽格我志谒吏部选而吾郡太保严公讷为尚书试而异之擢第一人得广西浔州府推官至则署贵县事时贵方以凋劫闻君为之节浮冗寛力征修赈贷绥流移甫效而移署平乐府之贺县治复如贵浔阙守还视守篆守至复以调行君复视篆如故中间三奉台核南太诸郡赋狱俱以明恕称而其于郡政尤办治台使数下书慰问司理上摄守下摄令中沿檄考核他郡邑井井司理起诸生胡考于吏也间且有尺一上尚书矣满三载得迁云南之路安守时卢太夫人且近百岁公以道远不欲往人或谓太守佩银绯垂若若绶不快耶公曰吾安敢薄路安守吾奉百岁母而跋涉贵竹箬间固所不能即东吾母里又安能出聽事吏民毕而亡所间食寝也吾归矣盖人人称君

孝廉云已太夫人遂安君养以终而君能毁瘠备礼不以烦诸兄诸兄每自叹曰固也吾于十岁儿已愧之而况今长者然君之事诸兄则益谨性不喜问家人产娶于甯而贤悉以委之节缩之羨尽斥买图籍晚节度一室随手得之即吾啣反复早暮寒暑亡间也尤不喜自奉食不重肉衣不累纟取无饥寒而已室不别供张取具而已既里居以两宫推恩赐爵一级君当拜大夫逡巡久之曰奉职无状安敢以辱明主恩而会绰荐乡试第六人君复谓曰小子得吾所不能得虽然益吾畏也绰念公居约久制一绮幔一裯以进君骇不视曰此非我所安若念我乃欲我为子孙侈师耶绰谢不及乃已君之卒以万厯壬午十二月距其生正德壬申春秋七十有一妇即甯夫人举丈夫子二长即绰娶罗氏先卒次绚郡诸生娶陈氏女一适太学生朱公芾孙男三文翰郡诸生聘吴太学谐女文典聘廖太学汝功女一尚幼绚出女三适太学生陈孔管次字祝元芳次尚幼葬地在政义乡弥陀桥之原绰既叙君行而复称之曰君于书无所不读至为史则指掌千古贤于倚相矣书学则三仓矣文则匠西京矣诗则滥觞六季归闾于开元矣大小今隶山阴父子矣行草分篆则次仲子玉以逮虞永矣余不能尽信以质之长洲令曰然吾见路南君之门乞书与言者踵相嚙也其古之不知于今则鲜俪矣长洲令故能名理不調语者也铭曰

以为遇靳一第以为不遇试循吏不夺于仕维乃志不累于道维乃艺是曰孝廉曾大夫之隧

弇州续稿卷一百五

●钦定四库全书

弇州续稿卷一百六

（明）王世贞 撰

○文部

△墓志铭

故喻安人夏氏墓志铭

太史公之为喻安人状曰安人夏其姓父曰处士公新建人母万媪处士公以智计

侠里中有子女不甚爱独爱安人抚而戏万媪曰何物姬乃能举此息而安人之为女时则以婉孌负志操称矣而又善女红敏妙少比处士公益爱之难其偶顾乃归素轩公某为喻妇安人之为妇时姑刘孺人与姑之姑熊孺人咸在而熊孺人者年九十矣有知人鉴顾亦抚安人曰何物女子也而来为我家福安人亦罄志力以事二母从外家得少珍鲜辄分以共奉度小羨则傍及诸妯不一私入口久之熊孺人以寿终所奉者独刘孺人且老命诸儿妇各析箸而比舍火延素轩公室为烬自是产旁落素轩公儒者计无所复之旦夕把书卷吟啸自宽尽以家秉责安人安人身经绩为勤俭素轩公虽不能问出入然其意时以甘脆急刘孺人而不欲约及客安人勉体之度不给即簪珥时时属酒家盖终刘孺人身无几微口体间而素轩公与客交为驩即仓卒不叠耻也安人为素轩公举五子所以抚海之甚笃公性严有所不当意辄赐朴安人啼且谓曰教儿固当第不念我心痛耶素轩公为小解而仲子邦相遂成进士高第授工部营缮主事奉职亡害久之用庙恩封素轩公如邦相官而安人亦得今称顾其为勤俭益甚中表或谓曰夫人幸已贵胡自苦乃尔安人曰儿子几不坠家戒奈何以吾故剡其廉安人之有今称也邦相实篋而致冠帔安人既已愀然曰吾恨夫熊孺人之弗及见也与刘孺人之弗逮也于是素轩公亦愀然曰吾恨吾父若母之弗逮也邦相素为其尚书所重会尚书罢言者批根之以他事逮论司寇刑安人闻之坦然曰命也儿子固不坠家戒邦相谪楚幕职归而安人属末疾为谢却一切早暮汤药中安人谓素轩公趣治儿装云何邦相私于公曰母病未敢也安人闻之怒曰尔一蹶之是沮而不思效且令人讥若必膺宦乃赴乎邦相又固谢曰母病未敢也一日安人忽起■〈卜节〉髮命进匕箸曰有间矣又一日强行立益匕箸曰有瘳矣邦相乃辞之楚幕岁余量移得天台令命下而安人竟用前疾捐馆以是邦相匍匐归毁几至陨安人虽自力起家然其性良慈晚而益甚偶一色庄其子妇寻悔曰得无使彼湿束乎即庭扃间不闻其叱叱音也宗党有长年者则敬之贤智者则推之不肖者开海之贫者衣食之盖安人卒而帋哭自闾左右而达于巷若一也安人以正德甲戌生其卒以万历丙子男五长起娶夏某女有隐德次均即邦相娶散官邓德女继千户贺应祥女赠封亦安人次壤娶邻某女次坝娶方某女次裁娶仪宾杨奏女孙男十三人应诰娶仪宾陈锐女某聘金某女某俱起出之道聘某女之德聘举人邓以诰女之仁聘叅政刘经纬女之礼聘举人杨一麟女俱均出某聘奉新廖某女某聘罗某女某某俱壤出某坝出某裁出孙女六人一适兵部侍郎阮文中子湘一许聘邻某子一许聘胡某子一许聘生员吴某子一许聘毛某子一尚幼太史公之状云尔邦相既成丧服除而叹曰天乎吾何以生诀吾母哉读其状曰母庶几若生也则又曰吾竟何以死吾母若生且慰母也谋于友而得余拜且泣曰是必为我铭幽宫之石石在某所余悲其意而许之太史公又亟称邦相文学慷慨有志行政术以非安人事故略焉太史公者邓以赞也铭曰

夫而寿子而贵尔之际唯尔致何以幽铭若志何以明太史氏

黄母吴太孺人墓志铭

鸿胪君极之将葬其母吴太孺人也偕其弟中书君榜走使踰千里以司马汪公伯玉之书若状介而请志铭于世贞中书君之获称友世贞也其繇自司马夫司马业已状之而又何世贞辱也二子之为辞曰以状请而先孺人如有闻于先生也志铭石而纳诸幽矣先生之言行而先孺人如有闻于世也夫不忍于先孺人之没者孤子也能以先孺人不没者二先生也余悲其意而许之按状太孺人吴氏故歙溪南甲族与竦塘之黄世世通婚姻太孺人父曰道泽母汪太孺人少而婉孌闲静能习礼书及郑氏孝经矣已又精女红笄而归于黄是为茶山公某茶山公既弃儒而贾游淮扬间倾其豪贤长者公虽轻訾为节侠顾有天幸其赢得过当愈于織嗇太孺人多代公治家秉折节为勤变化有概家用是益起遂甲郡国所谓以末致财用本守之者非耶太孺人之先诸子妇俭也食母重簋衣母重采而其旦夕共养舅姑惴惴焉恐温脆之不尽适也曰何敢以俭我夫子之尊人而公所岁蒸尝必致其丰腴曰何敢以俭我夫子之先乃至为具延亲执亦必腆曰吾何敢以俭我夫子之客于宗党邻里之贫者大小有所贍曰何敢以俭我夫子之乡人歙俗不恤媵姬太孺人独加恤曰何敢以伤夫子意也又不子庶孽乃孺人则均子曰何敢以薄夫子遗也乃其里中妇阴相訾非之或诱之皆不顾茶山公卒夫人日戒其四子妇曰吾佐而翁治生而翁操其入吾操其出锺釜入之圭撮出之今黄析而四矣汝曹得无圭撮入而锺釜出乎哉已戒其舍中子曰夫富怨府也不曰能以其富下人乎以故终太孺人世訾更起不大诘而鲜讼敌之累者太孺人教也极榜俱读书明经术不第以文艺荐极为鸿胪署丞榜为中书舍人舍人满三载茶山公得赠如之而太孺人有制词矣舍人治冠帔而荐太孺人凄然弗肯御也谓生不及当而父身我何以冠帔为然太孺人之后茶山公而享诸子共者踰二十载而始遘末疾既革谓诸子曰而父之弃我久今始得相从毋恨矣且而父死而曹能毋隳其家声而父不死吾死汝曹能敦孝为友吾亦不死挥手别乃瞑实万厯之丙子五月某日也距其生弘治辛酉九月五日得年七十有七子女云云墓在金监山之麓世贞曰余遠不习于黄汪司马实习之曰太孺人歿而非出而为叔季者均毀也其臧获哭于室者均叔季也宗戚之哭于堂者又均也閭井之氓妇弛担织而泣相唁者又均也其亦可思也余又闻之古孝有三生以事死以葬祭而为名谋者不与焉其用思于亲乃不若今何哉夫二子无所致报于其母而托之言以图不朽则又可嘉也已宜铭铭曰

始而相夫既而代夫以玉四孺子于成有台冯冯字曰怀清标尔佳城家以永宁

凌大夫元配包宜人墓志铭

余盖与凌大夫善云大夫之丧其配包宜人而将葬也手事状属余以志铭曰吾母潘太宜人哭而恸曰畴夺我孝妇也诸臧获亦恸曰畴夺我慈君也已而其中表亲戚至闾左俱为之哭泣曰畴与恤我也而况为之夫也者为之子若妇也者痛可知也余窃高大夫之文而悲其意因为之裁括成志云尔宜人之为包自孝肃公着而其后从高宗而渡者世世为吴兴望族至兵马指挥公大夏娶范安人而生宜人少婉■〈女恋〉有志操诸女红咸戒习兵马公内贤之为数偃蹇其配大夫虽幼朗而其父比部公尚家食兵马公见而诧曰是子也才非我女孰当俪者遂以归大夫大夫之捷于南都而宜人夜梦神告曰有柴涑者与汝夫偕荐既成进士则今柴方伯涑偕大夫宛然相次也大夫为尚书工部郎所任三台琉璃等四厂修治正阳德安二门工日累息不获宁夕出酉入有子璘奇呱呱而泣弗视也而孺人之起寝恒先后大夫手汤粥浆酒荐之大夫视天寿陵工宜人方产女而难戒左右曰毋令而主知徒乱其意耳时复有十坛繇为瓦若砖者三百余万而大夫独为核三殿之余以应之中贵人不得侵牟其利恨大夫甚所以媒孽者百方大夫内忧之宜人解曰夫是中贵人者能生齧人耶有天子法在何忧然大夫出江陵税而竟中中贵人譖以考功法谪矣自是繇定州佐徙倅大名进常州同守宜人后先从闈政肃如也大夫藉以无内顾专精为循吏然竟中僚友飞语罢大夫初闻罢意不能无动疏请廷辨之宜人复解曰君休矣奈何与儉壬争短长姑为德于乡可也大夫归而宜人益务为节啬衣絶重绮食絶重味夙夜先其臧获耕蚕以时家稍稍起矣此部公病脾宜人从太宜人问疾出而未尝不潜然也太宜人哭比部公毁宜人躬旨滫而荐之即不饱亦不敢饱以为恒凌之内外戚岁时伏膺过从者輜輶溢巷宜人为慰藉问所阙以次共给而大夫有仲妹寡而贫为具絮米醯酱错道诸凌之贫者贷于大夫有所负不敢复言贷宜人以风大夫曰粟幸有余奈何忍其族指馁哉大夫乃谋以仲夏人给米一石凶吉加隆族为润者十二年矣大夫初聘于费而殤宜人之厚诸费亡异于包里中媪见者温颜色而问之麦可饭麻可绩蚕可操乎无也手粗粃而内之里乃出则大喜相谓宜人不鄙我而其御臧获虽以勤率先之顾其均劳佚时饥饱捶楚不妄施咸忻忻如矣宜人凡举子女九而其成者独湛初润初及璘奇已润初天湛初次天宜人痛润初疾已在育之上矣最后病且甚家人秘湛初讣久而微得之痛益甚遂不起得年仅四十五湛初娶于张为太学生天相女故御史大夫庄僖公孙举一女许聘陆大武璘奇娶于闵为官生道孚女故大宗伯午塘公孙大夫云吾向者不为家而家治吾不知所繇也今内外一切不问不举矣器用委者不收矣醯酱委垣者败矣客至不呼茗不出矣稚子日高春卧矣时牢骚不平亡为解者矣北地生有言妻亡而后知吾妻也信哉大夫名迪知以政术学行闻于时湛初为太学生润初为诸生皆负才气使不天必有以自见者墓在某所铭曰

以宜人之大归而二爱子其依存为大夫而依之者为少儿得非归者乐而存者悲耶噫嘻

黄孺人墓志铭

黄孺人之卒也盖以丙子十一月云而其夫中书君哭之恸已而曰北地生有言妻亡而后知余妻也若不穀妻则何待亡而知于是将以明年之二月葬而谋所以志幽者谓王子言庶几不朽哉乃束币加璧绍汪司马之书而来请余不能以不文辞其状则出汪司马汪司马之言曰歙閩右族则黄氏望竦塘吴氏望溪南其重贖敌而又世世相婚姻孺人之父吴某尝倅临江故称临江公孺人十六而归中书君中书君业已有文着僞声临江公指谓曰息女良贞而配也中书君之父曰赠公其偶某夫人孺人兢兢事之无疏节相夫子婉婉无违言至所以居先后尤自损抑不敢以豪服见其居室唾声不出闕其临闕履声不出庭及一视家政而诸臧获凛凛受约束无敢慢然孺人居恒好为德所衣舖靡不饜人心见而肃如也退而欢如中书君既通籍殿中孺人从而京师岁大侵道多殍孺人分遣外竖以朝夕伺贸来者辄予一杯粥裸者受一襦不幸死则受一棺以为恒诸自孺人起者道相望也尝有子立朝谋乳之获一嫠察其辅有泣色诘而对曰夫李病瘠且死自匿而以嫠见嫠故易售耳孺人曰柰何鰥人夫而以奉吾子乎立焚券遣归不责偿孺人故以鲜子而为中书君蓄二姬歙族妬相怪谓胡渠尔孺人笑不答然立朝者孺人产也九年而又产立范愈益奇中书君谢事归有余橐置义田宅以居食宗族斥莹域以待葬辟桥道以便行旅时发秉庾出泉布以慰予贫民其端皆孺人发之然至治屋舍稍华广孺人则曰此非所以示子孙俭也中书君咲为止孺人虽用施予得良声然于他出纳尤慎治浆酒醯酱脯醢按食经治易圃蔬果按汜氏书种种有法中书君喜客客至不戒内所出丰杀具如中书君指孺人质明理家政共内馈灯而课女工乙夜弗休也曰吾岂其能益之无废先人云耳立朝既业就而游太学中书君少之与偕往孺人忽贻书趣使归咸相恠莫敢问归仅越宿而孺人暴得疾捐馆既敛中书君按行寢室悬者悬笥者笥书契衣篚器币各归所亡轶异哉其殆能前知者矣司马又言孺人之既卒也毋论中书君哀之毁即举宗而五服内外者戚而中表者无不毁矣毋论其家众大小若失怙閩左右无不若失怙矣夫司马今良史也以一女子行而津津不容口者何也以为歙俗励也夫孺人不爱其勤以成中书君家又不爱其规以成中书君名而为二子师中书君竭力而谋所以不朽孺人者有司马不足而须王子言以铭呜呼是可以铭矣孺人盖其封称云中书君名榜在世宗朝为侍从以最封孺人制词所谓温柔谨慎孝睦俭勤者是已孺人得年仅四十三所举二子立朝聘即司马女立范幼未聘五女其三及最少者出所蓄张长适太学生呉士弘次适郡诸生方以巽中丞公弘静子次太学生殷光立大司徒公正茂子余未议婚墓在塘之东南隅

铭曰是为黄之内则余征事于彤史而辞诸石以永永无斲

华母陈太宜人墓志铭

华母者故江西右布政使陈公策女也二十归奉政公某当是时布政公鼎贵而华族甲于邑两家望实略相当奉政公少而修诗书之业不遂有子曰宪副君成进士以奏最再封赠公而华母始偕公而称安人已独从宪副君封而称太宜人母之卒寿八十二而宪副君哭而有余悲焉则以不及视母终也已乃悚然曰吾得所以慰地下矣苴杖走二百里以币与母之状而请志铭宪副君之成进士与吾弟同己未尝与之游而熟其为长者故不敢辞始母之归奉政公也公父（阙）已前歿独王父在而性严束湿子孙妇公母进而谒王父则忧不得色母相之雍容进止荐汤粥柔声和颜王父融融如也退而抚两女一孺子而有隐念母前进曰有妇在大人何念为则谓公曰姑所日戚戚者非以而女弟暨弟耶是即吾女弟暨弟也为视食为调衣为计内外传经生女工婚嫁之资公母乃自宽曰吾不难母矣公亦曰吾不难兄矣公母有母而获以节寿终其病而治汤药浣腠厕没而含殓葬送加礼公有母而后获成孝会且析着人或谓公当家兼且二孺子之所自立而敢敌产公第令敌产而稍取其俭者以语母母乃喜曰吾志也公以病废儒而习古文辞好吟咏毋修饷而从之时已举宪副君少能制科业既补博士弟子奉政公欲遣之读书禅悦院人谓母公策迂即一子奈何远之母咲曰儿幼湏乳耶禅悦多巨儒游公殆欲以肆其耳目耳自是宪副君所征逐文会楮墨肴醴费皆母谋任之不以烦奉政而宪副君为弟子试而小不利三屈于乡再罢公交车召母不以责而以慰及其歌鹿鸣第金马母不以喜而以勉当是时奉政公始受封而冠衣伟如也母亦瑱珠曳帔乃相谓曰定何如策今不迂矣公寻寢疾母昼夜共侍不懈其歿也誓与之偕往自是得胸腹癖疾而其后宪副君以郎久次得迁今官治浙之温处兵备道家省覲里有不逞讎于家者众谓必假郡司三尺治之母曰家幸未躡若快志于一报而去羣不逞唯之与阿何宪副君可以铭矣铭曰

是惟陈之令而华之仪宜尔王姑暨姑宜尔夫暨而子而孙枝寿考且荣子寔报之土丰而滋厥阡羊祁偕尔大夫安于斯

刘大夫配顾孺人墓志铭

刘子威大夫丧其妇顾孺人而哭之悲已手草事行千余言而属其子某扶服来请曰不谷鰥何以毋亡吾妇也日者卜从先人之壤兆子其不吝一言以文吾泉下之石余

谓子威言语妙天下不可以为孺人重乎子威固请曰惧昵也必子而后不朽余与子威同年善再辞弗获而为之志盖大都出子威草云顾孺人者故丞相元叹之裔其后为崇明人至比部公谧徙郡城盖六传而为孺人父曰春顾姓显而孺人所归刘姓尤显其得尚子威也尊章严尤欲试孺人以艰苦事至继烛而无倦色每视二大人膳毕则视子威膳以逮臧获辄釜无漏者子威悯之令休谢弗休曰吾职也既子威被推择公交车入补西掖而孺人举一子仅弥月而太夫人挟之入视子威邸中孺人共养弥笃亡何子威移南床孺人复从而南谓子威君不可以劳内顾请任之扁鵲惟谨而时事以稍异子威念大人老未敢以身许白简然持议慷慨绛灌间时时露棘矜孺人风之谢病即谢病弗得请而果罗谤口当谪子威自恨不欲就选人孺人曰人以私中君而法行之子法谪也如之何讎法于是子威强起就选人得一官奔波岭海孺人必从时时出酒炙洗其劳苦而慰勉之曰君一意为县官奉节守职良璞不琢必有相明者已而得徙丞近郡孺人则已病进金臬豫州孺人从之豫州则复大病台有所按核子威以孺人故欲谢弗往孺人撻之此岂君床蓐地耶子威忍涕徃然数以念孺人请急而又坐矻矻持三尺不能当台意以是颇齟子威复得调子威谓孺人不堪再辱矣念无可共养父母者颇鬻所遗田渐以至壁立孺人素读汉书谓贡禹老且自强买田为应召装今子方强仕顾不出而卖田余岁之谓何妾知之矣夫孟德曜者何人也于是身先其作役酤醲酖酱一切以織嗇争饶时时操其母不求过当僮仆桀黠自利者言之子威而斥之勤廉输力者赏于是咸自厉不敢为饰情家事大治再更三年丧其戚视子威而劳过之盖百不以烦子威而时微子威寢起则惧其不任毁也及子威微孺人毁自匿避肤侵寻消矣以故子威益贤孺人而逮服除孺人益自力治生子威益得宽淫于坟典海内之贄币乞言者踵相啗又以其间结客纵放山泽舟车使令餽稻羹鱼咄咄取办无问所从来孺人亦下使叠耻闻也子威材高于世毋所当念欲游于其表因颇称佛道家言而孺人尤慕好佛奉西方与子威意合然孺人独精心为之子威不能也孺人有二子三女皆婚嫁而二女前卒仅季在孺人故念女然不欲以是伤子威心语及辄以佛法譬晓而已孺人性矜严不妄言咲里姻之跣■〈施，足代方〉无行者絶之以故不能尽获乡党声然至于良谨者虽踈必示亲厚讯问周恤倾橐不小悛尤阴嗇所难能志曰子威之具草盖尤多情语彼所自不足以昵哉余故不尽称称其大者夫晋有潘氏子其文不能若子威妇死而伤之以悼亡篇名后世然欲质厥妇何姓氏何行黯然而未有述也若子威之所以为顾孺人者足矣生卒岁月子女葬地列于左铭曰

夫子藉尔而无虞于内顾尔寔相夫子以千秋之日而身乃晞日之露噫嘻是宁不为夫子之所深慕

汪淑人墓志铭

盖弘治之甲子而汪淑人产于胡也父处士珙蚤天母汪寡又十六年为正德庚辰归封司马公某其又五年为嘉靖乙酉举伯子道昆其又二十二年丁未伯子成进士其又十年伯子以襄阳守最司马公封如其官淑人为恭人其又十年为隆庆辛未襄阳守以佾都御史最司马公复封如其官以品均故淑人为恭人自如然前后皆有诰天子所以褒予良至其又明年壬申都御史进为司马天子覃两宫恩司马公与淑人始各有今称阶各第三品诰词所褒予视昔有加又谓淑人寿富于赵太君而燕喜何啻鲁也继自今其并杖于朝以观尔子功淑人既拜上命而会司马公安里居淑人事之不成行伯子日怏怏思归养其又三年乙亥乃以左司马予告省覲遂固请解司马旦夕帅其仲道贯奉司马公及淑人欢蔼如也其又三年戊寅秋八月乙亥淑人以久疾不受治终越三日戊申成服伯子而下为子孙者若妇者诸为司马公及公之舅弟若宗姓者若中表者为淑人之中外戚者他男女仆百余曹各以次就帷中外位相吊哭伯子之擗踊绝而苏者数矣司马公强起正色而名伯子曰来孰与汝灭性也孺人业盖棺论定于斯且藉汝而侥幸甲令之泽且又藉汝而得名士大夫之一言以母逝逝者汝奈何缓重也伯子跪自数以与仲竞善病屏居前不能微淑人恙侍汤药无状死罪死罪既哽咽不终语居三月沐当时祭诸吊哭者位如前司马公复强起正色曰尔昆能竟泯淑人之懿德乎哉伯子跪曰唯唯于是淑人之从季者宇前进曰惟淑人姊之犹在襁而丧吾伯父也其事伯母称令女矣既字司马公当归宁不忍以膏沐见吾伯母也伯母以节终淑人姊为之寘后即吾季宥矣而躬持三年服曰吾寡兄弟而弗忍也往伯父拊王父而葬伯母异丘弗获合也岁时省封树奏牢醴仆仆二墓者五十年一日矣司马公曰信于是淑人之姑吴孺人其从子潜进曰潜有姑而媵赠司马公淑人之事之婉婉如也其事赠司马公夔夔如也姑季年病肺■〈谷丸〉淑人佐司马公侍卧起不少衰乃今就奥阼岁时为吾姑奉烝尝三十年一日也司马公惨然曰信于是淑人之姒吴氏其从子桥进曰桥有姑而媵司马公弟也其始不安庶不能下淑人而淑人顾先下之因相与为孝让居十年姑亡而杜继也视如姑又三十年杜亡而庄继也淑人且大母行矣视又如姑其视诸子女犹夫淑人子也其诸子女视淑人母也司马公左顾其弟曰有诸弟懼然曰信于是帷之右诸母起曰固也往吾曹二十有一人则皆门内亲也淑人弟其次长者而子其幼者迺淑人春秋高不问钱谷诸子妇即告缓急甚则彻月奉贷之又甚出橐中装以佐不充吾党雅言淑人之组紉丝枲夫人能也祭祀燕飧夫人能也即读书好礼夫人能也至其慈惠长厚禀于肫肫盖摠内无两矣惟是二三嫠旦夕将淑人之頼而遽夺之谓吾党何司马公首应之于是诸子期功以下籍诸生者立帷东宣言曰里中文武起家则伯氏嚆矢倣在外传而我伯父方事周游也惟兹岁币月修咸淑人之是共盖淑人四十乳仲氏爱尤右焉其食之教之视伯氏等也不以爱移夺我伯父之督仲氏严谓若何渠出而兄左也淑人谓家先世之泽泄于而兄而小子即强健不废支祀足矣恶用为是措措殫余力以希

僮来及会伯氏以司马上程书则移任子授仲学亦竟立人言伯仲竟爽淑人树之信乎司马公曰信于是诸妇立帷右泣曰伯不幸而三纳妇淑人三宜之其首呉仅七月瘵死继呉死于京有女仅踰月淑人躬女之其后蒋淑人来归念其女欲女之淑人弗许曰若自有子毋溷也且吾欲以慰死者为择鲍氏子而字故大司徒道明后廉无遗訾而婿蚤丧母淑人益怜之既昏犹相依丙舍时有所贍给会介妇来淑人之字爱介若冢均子也乃至为诸孙纳妇字爱之均父也仲孙病迷而其妇独持室岁有常糈淑人闵焉代其忧嗟乎里中所不足者非财也顾安得如淑人慈司马公应之如向者已有何姬匍匐伏几下痛哭曰以里俗之御貳如束湿妾戴百死于淑人而淑人怜之若翼馘即不善便辟以得见寃是幸而胡乃厘割内秉俾效尺寸即又不自慎犯霜露之恙者三而三耗淑人之橐以资药饵胡又乃厘淑人之涔涔泪也淑人已矣曷不令妾蓐蝼蚁而独生也已又大恸司马公气塞久之曰信于是诸男女仆抆颊曰淑人蒿目而忧人之忧岂惟宗戚闾党即诸男女仆有疾苦必以告有患难必以告贫乏必以告庾粟篋布惟所取之不为累公廩也盖又数十年一日矣司马公乃顾伯子曰嗟乎淑人自女而归而妯而母而姑而王母而主母惟内外征之靡间言可不谓贤乎哉孺子志之伯子雨泣叩头曰唯唯退而属状以疏闻上谓旦夕左司马朝而乃有母戚其下宗伯司空予淑人祭墓如例祭有辞墓有便房题湊明器羊马之属其明年己卯八月以状与币来属不佞曰幽宫之石子其志而铭之夫王言之絳发将天地为昭焉夫王言贲于上而子辞于下其亦有以安家司马公意也不佞于淑人犹子也不获从帷以外人哭而敢忘颂德其志如左其铭如右铭曰

隆万之初帝恤劳臣源本必先爰褒淑人俾媿司马翟莠鱼轩惟兹淑人孝慈惠温俭共罔愆匪夫之爵而以子贵者垂三十年拮据所被莫德非阴而大命弗延帝曰汪母子嘉汝终司空治藏仍锡以祭少牢上尊有飶有芻淑人归墟伯仲在庐司马在堂巷哭帷啼其聚若雷卒哭而言乃详标此懿行伯子敬受之以识不忘时为伯子为时股膂夹辅王室着为微言中和且平垂秋林式仲亦序兴吹篴协埙声我南国淑人之懿母母妇妇生荣歿戚我操彤管勒之嘉珉俾内范永永无斁

弇州续稿卷一百六

●钦定四库全书

弇州续稿卷一百七

(明)王世贞 撰

○文部

△墓志铭

勅封钱孺人褚氏墓志铭

自中古之不忍暴露于其逝者而仁人孝子益思所以致其爱与恇而财力又足以办之于是厚葬之所由兴而所谓革阖三操大鞅万领璧玉戈劔鼎钟鼓壶舆马女乐之为殉其丧必捶涂通垄而墨翟杨贵之徒得以议其后曰柰何加功于无用而损财于无谓于是仁人孝子之意穷而其稍有识者思所以显扬而不朽之则碑表铭志之所由兴盖其说起于延陵季子之墓而渐备于东京俗之流而下也则务修其币于公卿宰执之门借其名衔以侈耀生者而至百世之后其骨与其文并朽而不知恤今侍御钱君汝瞻独不然丧其母而请于其父封公曰母之弃孺子也孺子实在楚不幸而汤药之日夺于县官而亡所及已矣今且葬矣犹幸而天下之贤有文者皆在乡欲请赵汝师先生状而王元馭先生志且铭之谓何封公曰吾与若母俱藉若而拜天子之命以显今若复欲终显若母我何制哉于是赵先生之状成而王先生以父丧辞曰何以使孤操笔于讳也乃更介赵先生而问志铭于不佞不佞固以疾辞而赵先生固请之曰侍御不得志于公则痛且死不佞曰我何以厕贤有文后也且夫侍御之一按齐再按楚其程序之文名天下宁不能不朽于逝者赵先生三请之曰惧私也必以公为命者余始不获辞而据赵先生之状志之志曰孺人褚姓世居邑之釜山里而大父某亦为侍御有名是为雪楼公父曰慕雪父某邑诸生娶于孙生孺人以其明婉有志操也而钟爱之择壻而得封公某舅曰西湖公某自钱氏盛而西湖公以豪显所连皆右室诸妯娌始习为华侈而孺人家故儒以一荆素夷然其间自若也则相顾而曰使吾曹愧见絜穀矣西湖公性严难称既向衰捐家授封公岁更大徭悉心力以御圉外而孺人代之内诸所较课耕织贸迁米盐繁细男女不易职昼夜不弃晷封公得以无却顾而他所规擘亦亡不称西湖公意者西湖公性好客封公佐之日擊鲜酺酒以客为政孺人夙戒庖事供咄嗟需无少抵牾西湖公有封公孺人之为养而小弱弟曰庶者以进士官大行志益发舒矣而大行忽物故西湖公痛之得疾亦遂不起顾有母徐夫人笃老困床褥间而大行之生母侯亦戢然无所依封公之侍大母徐也退而省侯也孺人娓娓相之而会封公之弟三人皆蚤世其二无子使其子岛岙者子之而孺人属之曰善事若母母更复母我也而其有子者抚之不异侍御矣自大母与西湖公暨仲季之歿四丧皆于封公乎举而不至匱则以孺人为橐孺人又能以智经理其出入而操其赢至佐封公施予穷乏岁时问遗戚里必周又推而为桥道渠井佛庐道院之助源源者亡已又尝迎其父母养者十余年振业其子女而竟不害赢赵先生之称孺人才如此而尤致叹于世衰伦废兄弟之恩徃徃败于室中之构以姜肱

繆彤之笃行长者而犹不能无枳于其肘何古人之难而封公之易也则所藉于孺人者深也孺人性尤俭朴其为刺绣女红甚巧丽然不以一缕施体治食味甚鲜臙然不以匕勺入口其待中外温而有礼然至巫师牙媪俳优女伎亡敢迹其闕者虽不多读书而居恒训子女悉经典格言时御史业已工博士家语孺人问问为我诵之聊说其义即解曰此训故之稍文者耳侍御之为司理广州入台连接部大藩孺人时时饬勉毋以己才而易事毋以己重而轻民命侍御能精心奉行之以故所至有声实而至以语人微吾大人与吾母胡遽能臻此而天子之玺书所以显孺人及封公亦然是以孺人卒而侍御哀思之不已益谋所以终显者而封公不之制也孺人之卒在万历壬午九月一日距其生嘉靖癸未閏四月四日得寿六十有子男三长即侍御名岱娶陈氏封孺人次即岛邑诸生娶龐次岱娶徐所谓出后叔季者女三一适王命益一适陈某一许嫁孙某孙男四而为侍御者娶于赵即赵先生之弟之女也葬以某年月日在许家桥之新阡呼余所以志孺人者如是已耳而何以塞侍御意铭曰

封公贤而畴与妇侍御贤而畴与母母有仪而妇有功以母知始以妇代终噫吁是惟孺人之良于钱而吾以铭其官

刘母瞿孺人墓志铭

上海有刘茂才天民者笃论君子也少尝事归熙甫先生为古文辞已补博士弟子试不能尽利乃介陆远而游我颇能受琢磨顾征其色居恒有不足者已惨服来谒拜且泣曰吾先孺人之弃二孤也盖十有四年于今矣孤不肖不能选大人言以志不朽而姑诿之曰庶几一命之贲今试又輒不利而不及公身以徼幸于所谓不朽者即蚤暮死何以见孺人地下已又泣且伏不起也余悲其意而许之志曰孺人瞿氏父曰瞿翁以渭川簿终母曰唐媪孺人生而婉嫕及笄归司理公是时司理公之父汀州公晚而始举公有五妾各治其私念不在汀州公而孺人以一孀女子承家秉即能佐治汀州公丧而资司理公读司理公即不能亡扞外侮得以无废读而成乡荐者多孺人力也司理公之成乡荐业好蓄古图籍已好客已又好酒不问家而又两厄于火嫁一妹二女孺人勉而佐之又念司理公亡子为置貳曰杨氏张氏遂举天民及献民盖孺人抚而爱之若自腹也司理公之任懷庆也孺人能先志以成公廉而会公病■〈谷丸〉乃谢事归抵淮阴卒孺人欲从死不得强起治丧归归而旦夕哭曰吾何以使二孤无殇也既免殇矣犹旦夕哭曰吾何以使二孤室也为授室天民顾而献民唐矣犹岁时哭曰吾何以成二孤名见地下也自是天民每夜读书孺人潜听之为经史言则喜曰不为奇衰虞矣人或谓柰何从归先生游是不当阑入右与时趣左耶卑之无甚高论以取功名鱼轩翟茀宁不为媪荣孺人谢曰有之孺子得从归先生足矣当孺人之为母而其母唐尚在里居岁时之饷踵

接也属倭夷乱匿身峰泖间必奉与俱时避寇而同行者舳舻相望孺人曰是寇招也趣移之他港亡何倭迹诸同行者而燔之亡得免孺人善料事命中尤能抚家人子饮食劳苦之以故颇取缓急力家亦不废孺人既已寝疾天民自其馆闻之惊奔候孺人强起谓曰我何病汝毋以我故废业也数数问妇顾已衽身得雄否而会天民有三从子邦宁者挟其二兄诸生与兄之壻贵势嫁役于天民而难其名即以天民家人子名报欲以挫天民产而自为天民过邦宁所以大义责之邦宁复挟其母偕二兄捶天民大困孺人闻而欲往救之不能也疾遂剧竟卒盖天民曰天乎吾乃不能为母报邦宁哉自吾母卒而力不能敌遂代之役邦宁得以休力而累数千金产疽发背且死谓其子曰吾贻汝数千金不能捐百一以美材戢我乎子退而曰数十金不易措也且腐肉何知材盖邦宁敛而泚外见也意者天之闵吾孺人以嘉靖丙寅十二月初九日卒得寿六十有六子妇事见前女三适鸿胪寺序班顾从德太学生张时雍张秉模孙男四亮工娶陆氏亮载即所问姪身者也聘朱氏亮猷聘潘氏亮志聘孙氏女三其二适王绍霖余凤喈余幼未字嗟乎天民之状着云尔亦可悲已虽然有子如天民可以毋悲矣志而加之铭铭曰夫仕而不竟试子学而未及仕其以慰而夫姑偕安于是是子也材必能继而夫之志

郁西桥君配颜孺人墓志铭

颜孺人之捐馆也以万历丁丑而其为嫠也则正德辛巳盖相距五十六年矣其所事舅姑而夫所字自子而妇而孙妇而曾孙及妇而玄孙男女也凡六世矣所事字存有养歿有葬而以孺人始终之也则三世矣呜呼可不谓粹节嫩范哉凡女德之有闻则家不幸也王子盖读顾先生状而叹曰危哉郁氏之为郁也凡二世单而又皆天不絶之线寄之一孤嫠手而是嫠也不负托而提携之卒致蕃衍有闻以征女史盖鲜俚焉是宜志状谓孺人之得姓自鲁郡公其后多显者有叅政泽户部郎瑄瑄之子琼州经历吉娶于朱实生孺人孺人少则读孝经列女传诸书其于女红不闲而晓琼州公爱之为择世家长者得郁为择壻得西桥君体干是时甫十七而其舅稼隐公始亦少孺人而孺人顾独任为妇质明问安否退而浆粥脯■〈施，酉代方〉之类相属未尝不自其手调也稼隐公好客客取不时至孺人戒具亡缺稼隐公则大喜稼隐公虽不恒治产而恶惰孺人之治纺绩视他客作必晨先而夕后以故相勉亡偷惰者稼隐公益大喜谓妇孔孺人可以无虞老哉居六年而西桥君卒有子顺湖君四岁矣孺人痛绝复苏抚尸而哭曰吾上有二老人而下有孤孀是且代而子且代而父也于是剪爪髮纳之棺曰以是殉也其奉稼隐公孔孺人益共谨问晨夕矣稼隐公孔孺人相继获以竟终丧葬经画一切出孺人毋违礼而闾左尚谓孺人可欺也孺人持内网而应之斩然乃相戒舍去孺人谓顺湖君长宜学学于外傅成矣宜室室徐有二女矣而忧之亡何举子文周乃喜曰未亡人乃有孙虽然犹累碁也为置贰举二子文忠文质而后嫌于志久之顺湖君与徐又相继卒孺人

大嗟泣曰天乎岂余所以偿郁氏逋未足而三孙子二女之是厘为日夜课文周学而抚其少者于是文周有丈夫子三矣子复有子女四矣文周之试应天成荐矣孺人咸及见之文周之荐应天明年而孺人病病且属纆谓文周曰勉自立吾不忧见地下也孺人以弘治己未生得年七十有九文周娶于夏文忠聘李文质聘徐二女者长适冯志忠次适赵崇禧文周之三子曰庭芝邑诸生娶于张廷葵娶于袁庭荪娶于曹所谓子之子女四者麟孙凤孙俱未聘其二女许字华字徐皆望族呜呼盖孺人歿而一线之息绳绳矣台使者郡邑守令礼其庐而上之朝旦夕且旌文周以己卯十一月葬孺人某阡附西桥君之兆不佞既志之而又铭之铭曰生百罹萃一躯畴剪尔舅夫子畴衍旃孙曾玄尽者人定者天归消摇以长

年朱孺人墓志铭

朱孺人者讳顺秀字葆贞其先徽国文公之仲子迪功郎埜也父曰恒母张孺人生而俨雅不轻言动有周媪者善媒恒谓孺人非贫家所得有也其父居亦贤其女而卓君某者美皙如冠玉朱卓皆栖溪甲族里中乔木相望而属卓产稍旁落有胡僧相卓君异之曰是当起家富而寿朱父微闻之遂许以孺人字卓君当是时卓君之父某商齐鲁间数岁不返而母病家用益困孺人躬纺绩以治甘脆不给则脱簪珥以继之至躬为洗腠厕中裙二十年一日也于是卓君代父政家益拓如故矣而未有子偶指谓孺人曰若胡僧与周媪言不验哉孺人谢曰未也乃阴为置贰有贰邵矣则又风卓君曰弗洽弗娠也邵得专夕矣遂举子文卿寻孺人亦举子明卿夷其爱于文卿弗使隰也文卿之偕明卿受小学孺人篝灯手茶饼劳之即丙夜母使纺绩前书声止矣孺人精于握筭米盐薪油之类至琐琐也皆自其手裁又耐御僮婢以宽承卓君严而委曲掩护以故时得其心力即卓君之善拓家用计然息法而大槩孺人成之也孺人固饶心计然一切从厚道邻有窃货物者家人司得缚之孺人阳惊曰吾托以致外家尚未发耶遂解缚使去当卓君之母歿而执孺人手曰吾毋以报若愿若得佳儿妇共养吾瞑地下矣然孺人竟不成为姑以卒春秋仅四十五当是时明卿仅十有四岁也其后业成有官为光禄诸署丞矣文卿举于乡矣卓君之所置贰复举四子曰立卿达卿显卿顺卿矣诸孙之举者四矣与女及女孙所婚嫁皆名族矣卓君尝置酒合内外亲忽泫然而左顾文卿曰微而母孰有尔哉已右顾明卿曰孰与我共家若而母哉已又顾达卿辈曰是有弗及者而母有遗慈也已又顾女弟之适丁者曰吾恤而贫不能若而嫂之恤而详也文卿等皆感泣已复顾明卿曰若毋泣亦思所以不朽而母哉至是乃谋以己卯之某月日葬孺人于武康杨坟山之新阡而明卿采孺人事具草曰吾受之家大人而质之吾兄者然痛弗文也周公瑕先生润色之而以请志铭王子曰妇人之为恭俭易耳为不妬难夫岂惟不妬委曲以谋之而又推专夕之御以毋怨于抱裯卓始绳绳哉能释盗易能不忍被盗以盗名难孰谓孺人

女而不丈夫也其子姓详具铭曰

是宜夫者是宜子者奈何舍而夫与子而安地下

郁母杨孺人墓志铭

余里中盖有杨处士云处士始娶于郁而夭也意怜之再娶得龚举一女为孺人曰是女长必以归郁之颖使我得母寒骨于郁而其颖有讳绦者生而隽朗不凡处士举孺人归之孺人敏慧婉淑善女红其始至而事舅姑也则宜舅姑舅疾病当大暑孺人不解衣而侍汤药者三月舅憫之曰少休矣胡自苦乃尔为孺人跪谢曰职也新妇安敢自爱力舅卒而所以事其姑周者有加当是时君绦佚不复问生产诸内外政孺人任之八年而君绦疾且革孺人请曰所不敢殉子者上有姑所不敢不殉子者下未有后奈何君绦薨语曰逵也■〈榘，亠代木〉也而俱有余子则■〈榘，亠代木〉也之子嗣君绦卒之六月而君■〈榘，亠代木〉妇娠子是曰巨孺人即抱之曰吾可报吾夫矣或谓姑周曰妇少不任嫠盍嫁诸姑周意颇动孺人泣请曰即不肖而舍吾始与吾子而他事也不则有殉地下矣其傍立而髻者姑周之小女也则又曰请不以小姑累大人而并抚之姑周乃默许孺人之爱巨逾已出也其爱小姑埒巨也姑周既有子逵■〈榘，亠代木〉谋徙箸分月而养孺人乃曰姑老矣日食一升米不尽岂以妇勑井臼而烦我二叔氏姑周感之为弗徙也乃姑周中褰袒服褌亦自孺人手合矣杨处士既以前妇故有郁盟及孺人妇郁而嫠也益怜之而孺人间归宁夔夔共奉用是小移处士庾而姑周之丧葬也小姑之嫁也巨之有室也与成立也皆孺人一嫠任之君绦之从伯兄右泉翁者不佞外王父也居恒夜分耳孺人机杼声辄叹曰何必减茅寡妇哉茅寡妇者州之善嫠者也守熊君以孺人格当旌属有兵事未及疏而署其节颜之庐久之以老疾终得年七十有七孺人之始为节也仅二十九云巨哭而曰伤哉贫也使孤有籛金束帛可以结交游缓颊公府者孺人不泯泯矣不佞曰不然孺人之所为节以许地下也非为世名也孺人不媿郁州邑自媿孺人是故因杨大夫士元之状而为之铭曰

将无杨之淑而芬于郁其瘞也是为不磷不淄之玉

呉母陈太淑人墓志铭

万历之六年七月新除戸部侍郎臣文华言臣待罪岭右式遏无异状天子不遗远臣以犬马劳入佐邦计臣有母垂大耄不良于行向者军事棘未敢以私请唯陛下念之俾得舍惠文受帨缓鞵以从事汤药不胜大幸报曰可文华者今孝廉呉公也于是孝廉

得岭右代驰而归覲太淑人则病矣见孝廉喜良已因为酒尽见其子姓羣从中表而又二载为八年庚辰乃示微痾以终享寿九十孝廉乃复上疏归诚以太淑人之祭若葬请大宗伯言侍郎文华为国劳臣为太淑人令子所请宜予报曰可大司空发金钱庀竈具而启故按察副使赠右副都御史鳌江公之兆而加饰之以太淑人合而并祭焉搢绅先生争侈艳其事谓太淑人与孝廉遘于近代无两者所造诔赞纪传之属如千言而孝廉意不恠念无以文太淑人之幽宫慰永永乃手状授其甥某走三千里而乞不佞言不佞故以言辱知孝廉其何敢辞按状太淑人陈氏父曰提举公元宪母黄孺人太淑人女而懿嫩且材也提举公当之滇任而道遠不能将其二尊人而忧所以共养者太淑人则代之子矣提举公以是益爱之甫十七而归鳌江公当是时公之父赠公严而所内事则继姑陈太淑人朝夕夔夔修色而见之退而治脯滷浆粥必腆不给则脱簪珥而继之母使见匱于鳌江公也鳌江公举于乡属遘疴甚笃而赠公捐馆诸所治丧事及附棺太淑人皆任之鳌江公仅一恸而已稍苏乃谢曰微若孰与代我子也自是鳌江公成进士除令庐陵入郎南仪部改司封出刺严州太淑人皆从所至务以谨封钥谁何臧获出入曰毋使公有内顾之忧也严之水骤发薄城南而城之子女栖于睥睨者踵相啗也太淑人闻之语公曰睥睨固上亢不及水独不忧下溃乎公懼然敕吏为亟徙他高阜地俄而下溃所活以千计鳌江公每语人内子智不下吾吾得无官谤于郡国者盖有力焉既迁副岭右宪则以道远躅行计太淑人俾二媵侍曰吾上有姑而下有子公行矣请为公任之盖继姑陈已前歿而又继者宗少于太淑人而嫠太淑人业已贵其事之犹陈也修妇礼甚备而孝廉弱冠补诸生有儒声太淑人资之游名士闻其进业小懈呵曰不念而翁忆耶过勤则慰抑之曰儿惫矣且休矣孝廉繇是得致其声而鳌江公归自岭右仅五岁而卒太淑人为家政则抚孝廉泣曰吾以若故不获从乃公地下虽然若不嗣起者即地下何以见乃公孝廉益感奋后十二年连举进士高第为选人首当北曹念太淑人不便北风土白之太宰得南京驾部郎太淑人闻而喜曰此而父旧游地也吾所为谨封■〈金 钥〉谁何臧获出入犹耿耿耳自是孝廉以金宪视湖广学右辖江右可以舟者即奉太淑人舟公暇选簋豆进匕箸拥笏垂鱼以左右起居于于如也诸剖讞兴革徃徃取决太淑人俨然隳青州母矣其叅蜀藩视岭右学以至督抚中间臬于齐左辖于汴诸不可以舟者太淑人必贾壮而示之使孝廉安于行然讯问之使以季遣羞果交错于道无宁晷也太淑人予书必勉之儿既以舍身畀县官母易念老人健啖不弱汝孝廉稍稍得自安于官其以课最以庙恩进太淑人故封繇孺人而太恭人至今称则必饬冠帔佩琚以奉太淑人服而庙见既喜且掩涕曰儿成立幸至此未亡人柰何不与乃公共之也其在蜀在岭右以武功后先拜金帛之赐四在汴而以大计拜金帛之赐一皆选而奉太淑人太淑人益大喜辄分其余以贍亲族曰吾不敢隐吾君赐也毋使儿德仅仅饱我始鳌江公有女弟嫁于黄而寡齿与太淑人均也太淑人要以归于共甘苦者终身无间一弟少而失母太淑人曰毋以为后姑累躬抚之至受室犹不废抚诸为德非一具孝廉所自草状中太

淑人少喜读书通孝经大义老而弥笃至篝灯展稗官野语达丙夜亡倦于女红亦差次之既疾革语孝廉吾妇于若家者七十四年与乃公别三十六年而合合而以若勲业报乃公幽明两无负矣太淑人举仅一子即孝廉隆万间名臣一女适陈瀚孙男三承照娶于游为东州女承熙娶于陈为宪副复升女皆以孝廉任中丞勲绩补胄子上舍工文章承烈幼未聘女二长适陈一是次幼未字曾孙女一所祔鳌江公之兆曰龙卧山志曰余于状见女德焉见臣道焉见子道焉见君泽焉太淑人之共赠公与继姑也其佐鳌江公也与成孝廉也女德备矣孝廉不爱其才为县官兴文教理赋狱激扬清浊最后岭右之役兴筰路蓝缕以淨不毛然所馁填功多于俘馘不以威力伤圣主仁不亦称臣道乎禄养太淑人者二纪余而卒能奉持于股掌间以高朗终生荣死哀不亦称子道乎孝廉束修行成文以文庸武以武畀織芥必録施报必厚宠荣光大上及三世然竟不以惜材之故而夺其志也敬肃而还和气磅礴寰宇以竟吳氏之盛而豫太淑人于老者夫孰非君泽也是宜铭铭曰

焄焄之穹窿兮纶綉煌煌屈蟠虬龙兮宰如其封兮窈如其宫兮是人伦之盛际而太和之所嬗鍾也乎

潘配吳伯姬墓志铭

新都潘次君召南娶于吳（阙）文事游大人而吳卒之恒痛吳之弗获离天也修女德而弗及显也手事草以授方中丞弘靖俾状之再授汪司马道昆俾传之卜葬葬有日矣三授不佞请一言以文幽宫之石不佞故善司马伯仲而材之恒不克辞乃为吳伯姬志曰吳世世邑豪族有司马宁御史瀚者再传而太学思诚举一女是为伯姬心贵之偃蹇其夫而是时有所善郡诸生潘公侃者其家世敌又訾俱倾邑也部使者委试潘公皆甲而次君其爱子美而艺敌也年又敌也乃许潘公禽而太学故任侠操万金受江壩田募民芟牧其间子其息而中讎尽失所受田邑邑成疾度不可起乃归伯姬次君时潘公晚成甫举乡荐而性严重嗃嗃诸儿妇少可当意者伯姬能尽洗其家豪隐约共婉精志内政不逾月而中外称之即潘公为霁嗃嗃矣而太学病甚且革手二孺子坡增而属伯姬曰以累若吾有子不幸晚若真吾子也复顾二子吾不父若矣若姊代吾父若矣伯姬伏哭唯唯为飭治身后良备而增坡弱业已有非意侮伯姬出笈闰之他所共给至毀橐以纾毋靳而伯姬竣事趣还養潘公夫妇逾謹时潘公已谢汀倅约三子吾不能如陆大夫数数溷若食我递以月伯姬仲妇当得仲月至期广募方品选肥脆而手调其飪候潘公每举筋必既既而笑曰小损之毋令老人口爽也而客过潘公者更戏公请过公必以仲月潘公凡五醮女而衿鞶于伯姬乎取咸内亲倚伯姬目之姊不以嫂姑钧礼也久之遘寇警当从次君辟地真州而坡增稍立有妇矣伯姬之继母程属末疾乃谓坡妇黄

若留養謂增婦王若偕我而侍所生譚与之邸王故侍御獻芝女故嘗與伯姬受詩書公宮而會伯姬舉子之恒十年而就外傅矣已其傅辭去伯姬口授之恒毛詩至樛木谷風泫然顧王曰谷風怨而不怒命也如之何樛木順矣王起謝受教母譚時時語伯姬二豎子壯任賈矣母亦藉若力而糊其口于四方奈何令母子傳食而家乎伯姬乃請于次君損訾當中賈以與坡增曰第如芑湖芑湖東南一都會也而近于是譚獲以坡增行甚適也而伯姬亦從次君還里中侍舅姑會姑病且劇以迨于死伯姬相其夫備戚易而亡何譚亦死伯姬哭譚如其姑已而微知坡增之挫賈也絕口不復問母錢所以資共如恒時既乃嘆曰我家于潘而橐于吳人且謂我何我以不忍亡者易箒語而至此于是益精志為儉勤以佐次君政旁產丙舍益拓次君多內嬖伯姬咸女蓄之有驕不受蓄者伯姬如弗聞也徽俗婦工妬以伯姬不工姑則尤之且教以姑伯姬行意故自若次君又多外嬖而好客客至呼酒用咄嗟具小緩厲聲隨之伯姬不答第益督視厨人筮相屬也竟酒次君始改容以謝伯姬亦如弗聞也而之恒長其客進于次君伯姬矚之曰客非而父居平客也是多長者雅步而從容于辭不然吾里族晨得一餅三分之以待旰夕而漿酒藿食以事若然之恒為古文辭工甚顧不利有司次君錮之室而課其業頗厲伯姬好謂曰而父悔棄身賈欲以而廓而王父志也而無薄公交车業吾欲使而兩舉其肘以左顯今右顯后耳復嘆曰謬矣而母旦暮人也焉能竣而顯也蓋是時伯姬已有血疾力自強如恒時亡何竟死矣去其生甲午僅四十又八之恒娶吳為太學一庄女次之怡聘吳為公選女孫男二佛大佛可孫女一伯姬所稱德具司馬吳伯姬傳中司馬之弟仲淹請謚伯姬以懿而曰之恒志也余曰古有之于仲淹婦亦有之雖然不可以已乎是當從司馬銘曰

母以子貴世所矚兮其以子賢抑亦鮮兮婦德則潛疇為闡兮有斐君子汪若方兮傳之狀之俾不亡兮我銘其幽潛以益光兮

弇州續稿卷一百七

●欽定四庫全書

弇州續稿卷一百八

（明）王世貞 撰

○文部

△墓志銘

沈母潘孺人墓志铭

沈母者诸生启南母也父曰峦母蔡归故湖广叅议公谥为贰室叅议公举进士拜给諫数上书究哲国是与佞宰抗而得外两金山东江西臬风裁矫矫中以太夫人病乞归养有忠孝大节晚而受王文成先生言与其徒钱德洪王汝止相绍明为理学名臣叅议公始娶盛孺人而夭既复娶盛恭人者十年矣而始举今宪副君启原又十年不复妊也叅议公竟危之忽忽不恻而母年十三而父峦死母蔡病癘其叔父弱不任事即代之治室与馈斩斩矣既长益端婉有志操叅议公闻而委禽焉母之事叅议公字而敬其事盛恭人犹公也而加谨盛恭人安之忘有贰也母勤至丙夜犹执女红然藉褥焉恐其媵尊者寝已举启南复举二女最后侍公与盛恭人于江西明年盛恭人以嫁女还归母留汤沐筦钥愈饬久之叅议公属疾以考最归疾甚乃叹曰吾不知若材任妇乃尔必任母我何憾焉盖公卒而母哀毁且死念以启南故不死则委身盛恭人盛恭人愈益怜爱之既殡复以启南属宪副君曰吾弗能子也请为子子于是宪副君力抚教之成而后析箸母始操家秉然其大者犹兢兢以请命盛恭人示弗敢専也岁时伏腊讯问弗敢废也时宪副公犹在公交车而倭事暴起以军兴法加岁赋或谓可以居间免母曰幸蒙上恩不至舟车算今额所当出而复欲推嫁闾里如天何谓不尔且毁家母曰老妇在何虞毁家手机杼羨以继东作之乏者公与私不两匮寻岁大水决堤埠而入他农以薪御之不止母使盛竹撻御之曰惜小费不将媒大费哉诸得竹撻者水独他徙畝皆收一锺凡数万畝以是咸归德沈母之为母务以俭共有遠畧不务苛取而家用日饶裕二女长择婿而归之得太学生项国亨诸生盛若愚将嫁各为出千金装而陈之堂下语启南汝藏也第不以溷汝久之盛生天有二孤子母抚而使启南延师诲之谆谆期有成乃已其叔父既弱而又蚤死有从弟方六龄则收其母子使其母蔡养蔡卒殮葬皆从腆弟也长为之授室以至有子女皆母乎取资适病疫弟死已而其妇死已而其子女皆死母悉命启南葬之而哭曰天乎乃遂斩我潘使我不终惠于外家乎意惘惘不乐以至属疾母故事佛至五十即语所亲吾旦暮人耳安能以身受锥刀役自是不复问家有以佛事诱之者不惜损橐已得其干没状顾合掌曰如彼堕落何我则何与盖其语西方指证因果目恍恍若有覩也尤皈诚观世音大士间语启南有异香若闻之乎又云数梦舟若莲花者四此大士祥也期以三岁岁一谒大士像于西湖之天竺上方至再登业中寒小苏强自力以上复中寒几殆而愈遂尪弱不能起渐剧启南跪而问母苦乎曰无苦也侧身而暝唯呼登舟登舟者再盖若叩西方津者母以万厯癸未终距其生嘉靖癸未得年六十又一当其晚岁而叅议君复有子曰自邠为国史检讨启南以文学补太学上舍有声仁义附之矣母益敕其折节为谨有巨商藉丙舍而居者启南数脱其厄会赴省试以皿饰从质百金商故靳弗应迫则以情恳焉又弗应恚而语叅议君亦恚曰必复之吾乃甘心焉母闻

之曰嘻儿误矣靳故商态且而不能鼎贵如父兄以召彼侮彼且以而挟父兄贵鱼肉之也休矣启南逊谢弗及启南娶于王故刑部主事爱女先卒二女事见前孙男二自郅邑诸生娶于卜自郅聘潘孙女四长适太学生周应偁次许郑京材次许项德明次幼启南卜地于思贤卿良字圩之新阡谋之宪副君将奉叅议公之衣冠合而葬焉谓余能悉沈手具母事行介检讨君而以志铭请余读而叹曰嗟乎母故笄而男子者哉以时屈伸俭共中礼施必自亲寃必逮怨今夫西方之说佛不异语要以教人诚耳诚则形形则着而又何疑焉为志而铭之

铭曰良字之阡厥土丰美孺人宁焉公神时止曰余嘉尔提余女树余子尔节余心余言尔耳何以酬之曰传尔于彤史

顾母张恭人墓志铭

张恭人者故宿松教谕鸾女而中奉大夫贵州左布政使公言配也生而淑静有令姿能通孝经内则小学诸书教谕君奇爱之为偃蹇其偶而最后游里人胡生馆接顾公公虽齿卑然风骨颖秀教谕君已心喜既而搆公橐得所属文则益大喜曰有息女可以奉箕帚时公父封中宪公闻而委禽焉封公犹在椽食窶念且不得当也而恭人之归顾益自励为俭共晨兴问寝膳安否退而视浆粥脯羞之属课女红以次第就理居恒谓顾公所与褰衣而来告壘耻者即为负公膏油之夕我机杼声前公吾伊而息者亦为负公以故顾公得精专其业连举进士授工部郎督河事所理宁阳时中宪公方簿诸城而王父沧江翁犹在乃以翁就宁阳养至则尤甘恭人馈荐曰吾今而后知禄食之臚也顾公之为郎失柄臣指调倅太平意不怿恭人徐解之曰仕宦贵不愧心何害于是从之太平迁貳临江则从之临江擢南比部郎中属中宪公已解簿与其妇杨恭人偕而就官舍养恭人谓顾公郎奉薄吾力能勉之以毋失二人欢杨恭人性严少可顾甚宜恭人时时语中宪公视而簿时一青衫候上官忍枵以责我草具也今何如郎奉亦几何则新妇之贤若媪多矣顾公之守惠州以迁越臬而始忧归则恭人相以成二丧礼闾党归顾公孝寻补蜀臬晋叅闽藩總滇宪最后领贵阳辖恭人无所不从日伺寒燠饱饥之候以安公钤下苍头斤斤听部署毋毫末阑入盖顾公宦中外者三十年而不受私谴居恒以夸于人恭人者吾益友也微恭人谁与成吾廉顾公晚乃始置二媵侍夫人幸之甚于公举子女各一复抚之如已子女以故益得顾公心相宾礼白首无违色也公得解贵阳归亡何卒恭人哭之恸遂病瘖时长子女学已荐于乡恭人呼与其仲季而训之曰若父不以宦而有私橐今其余者屋一廛饘粥之产二顷而已吾不以若父宦而有余橐即簪珥周于首衣周于身何以贻汝贻汝廉而已汝学汝为家督毋忘先志仲季汝勗之毋违汝兄既服除汝学念恭人恋恋不能偕计吏恭人正色戒之曰吾所患不在瘖今恃汝而慰地下奈

何儿女子态汝学既行以成进士报而恭人喜可知也然疾日益不良医药以至大故且属纆执仲季手曰吾果有以报地下矣语而兄言犹在若耳遂瞑时万厯之癸未五月也距其生正德庚辰春秋六十有四男子四长即汝学以学行着声娶于田偏将军某女汝问娶于梁某女汝某娶于林某女皆邑诸生为恭人出汝考未聘媵出也女三长天次适凌登第次适田学■〈未员〉适田者亦媵出孙男六曰彦霖娶于包刑部司狱某女彦哲聘于于副总兵某女彦贞彦熙彦宜彦烈皆幼孙女三长字林聘世余亦幼汝学既闻讣驰归以问窆行谒余曰敢徼先君子同年之好而以不朽惠母与之语哽咽不能竟袖事草出之且泣且稽首也久之乃复以凌兴化登瀛之状来请曰葬有日矣是将启布政公之兆于积庆山之阳而合焉谨砉石以待余乃叹曰嗟嗟吾故熟布政公贤乃不知成之自恭人贤为志而铭之铭曰

生也谷是偕而歿也穴是依胡以后期曰欲以观孺子成而报之噫其永即安于斯

汪共蒋墓志铭

汪共蒋者何蒋氏之妇于汪者也其名曰洽舍曰洽舍而易之以共何德举也共蒋之归汪也其夫曰道贯道贯之字曰仲淹为汪仲子共蒋歿而仲子悲可知也曰不谷冀以身蓐蝼蚁而司马公在未敢也虽然不谷将何以生也伯子悯之曰毋悲吾二氏之内指数万矣请任彤管以章蒋之则而诏之于是伯子受仲子妻传仲子乃言曰庶几以慰生者而将若是者何死而有知也尚将以我泯泯彼也遂请于伯子吾所庄事王伯子如伯子既卜葬而身介币来请且拜手曰不穀之老伯子有成言矣吾子其毋辞以为不信视伯子传王伯子亦悯之曰毋悲姑返币吾敢以不腆言而废隧中之石遂志曰共蒋之始归汪也其父以念之故徙其橐从而仲淹母某太夫人爱少儿妇煦沫之犹恐重共蒋益折节为谨畏仲子既用材美当父母意而伯子悌爱之尤毋间伯子之妇贵甚而独内严仲子伯子顾藉以宽仲子气益发舒而又嗜酒且嗜客即夜分骤有所需征共蒋亡不立应客交口誉共蒋而久之仲淹稍稍负佚癖自是醉呼酒或不继罢以诘共蒋对曰妾独不避壘耻耶奈何市中馈名以成君酒食过仲淹为稍稍谢客而共蒋朝晡治具益精即仲淹读书勸请息或所游处而贤其咄喏应犹故矣仲淹之奉司马公指而析箸也因悉委之秉共蒋自矢勤有饶力丰岁息二平岁息一俭岁财之无使亏母太夫人贤而拊其背曰即令而姑往者佐而舅奚若伯子重用事客有以百金为仲淹寿者共蒋闻而诤曰若书生何自致百金寿即若籍伯子重而以百金役若者是若代伯子为百金役也征之果居间者也仲子乃拒弗受而夸他客曰微狂夫贯何以有此妇已伯子请急归里弗召而仲子居圉圉将他游共蒋挽之曰若能为郑当时千里出而不赍粮耶则嗚人不以前面孔向若矣仲子乃不果行仲子谋置媵共蒋则为之置媵而与之埒衣食诸妇于汪

者女于蒋者公私饶共蒋谓吾徽俗无是共蒋弗顾曰善则从俗不者从我而前是共蒋之父有所私而娠乳母毁之母而将败之共蒋介仲子说母遇雌伏卵不忍殪以冀有生而忍殪大人之遗体乎母以为然乃弗敢举一雄中表相谓曰夫氏非直弗妬也乃能化其母妬鸣鳩之德宁给我哉岁已卯之正月共蒋忽病心痛气上冲鬲若鯁者大医万方不能救遂革人或谓孺自强毋恐共蒋笑曰若犹生覬我耳我第以生死大旦暮胡恐也俄而逝共蒋母子有三女皆出自其媵者病得之侍太夫人疾而劳已侍伯子之妇疾而劳已又急其长女疹而劳已又哭伯子之冢孙已又庀太夫人丧葬资为金千五百而仲子当五之一为仲子虞损橐故仲子哭之恸曰妇疾非自有也乃其半繇我而伯子之妇哭尤恸也曰叔姒病非尽为叔也其半实繇我且后壮遂我弃我何忍独称先于是其下皆痛即宗戚帷以内无弗恸者帷以外无弗次嗟论叹者闾左右无不弹指惜者呜呼此可以称共矣仲子奇有气工古今文词虽用兄任上舍不但已至是乃大诧曰吾不难一第难我妇见之王伯子之惘惘其意也是故志而复为铭铭曰

有壤五色相协吉筮尔其安于是毋戚戚地下坎其左实其瘞俾而犬长世宜而继宜而嗣斯无忝而之谥

明故奉政大夫光禄寺少卿直文渊阁制勅兼翰林院典籍事赐四品服色小川顾公墓志铭

嘉靖中上方与二三大臣议典礼润色鸿业而傍及柏梁鸿都之好多自书生起暴贵而未有如顾氏父子兄弟之盛者而又尽贤顾之始自孙呉其后歴六季而称名族不衰国初有友寔者居上海之松泽贲倾里任侠好义坐小法逮死都下其子仲睦年十一上书白父冤得解奉尸归乡党称之仲睦生文敏始徙而邑居生广南太守英英生赠光禄署丞澄澄有二子长曰东川先生定芳仲曰世芳其赠则以世芳故而东川先生所谓贤者公之父也当是时陆詹事深最博识大雅而先生为中表与相上下尤精于轩岐之学公时尚少然已能从詹事论八法时时模楷大令北海呉兴矣先生既北游燕携公从公遂补太学上舍而故相夏文愍公言以议典礼重用事与詹事有连见先生而器之乃遂益器公谓先生材惜老矣孺子庙朝器也遂以先生长荐之上得御医供奉圣济殿会上幸承天多收召善书者使应制而夏公首举公诏给笔札给事行在所还赐冠带禄食寓直诰勅房授试中书舍人已实为中书舍人兼领翰林院典籍上尝召对御书十三庙号顾其进止详华目之曰此真儒生也为何名对曰从礼又问崇礼乎将从礼也公对如初乃趣赐金帛居舍人之十四载而始改直制勅为益亲亡何擢鸿臚寺右寺丞居职如故史馆开以公督僦纂修仍与书玉牒国史永乐大典承天大志庄皇帝之为裕王也王子蓝田王薨公当题主王敬谢劳苦先生先生休矣锡以兼金文币王即大位而公以史

成进光禄少卿加四品服居职如故寻命之永陵书世宗皇帝主再书御容号谥赐金币逾等上初御经筵以公侍及拜金币赐及肴酒果茹之属驰传之江南采先朝故实上太史公垂竣而以目眚乞骸骨报可公前后直两制三十余年中间扈从行幸奉使命者各二陪祀郊庙者九供奉廷试者三预恩荣庆成宴者四拜诰勅褒旌者三先后赉赏不可指数天子之所眷宠优遇中外皆艳称之以为布衣之极致而公益恂恂为共谨未尝有丝毫公谪太师徐文贞公居政府最久而公其儿女密戚也有欲绍公而谒之者公谢不能问相君所指向嘖笑何若公谢不知日以职事从左右旅进旅退若不相识者而至庄皇帝初朝典久旷废独公赞文贞公微计行之然绝不以语人其宥密如此夏文愍以分宜相论辟客鸟兽散亡敢名夏公者而公雪涕为经纪其丧分宜闻而不善也公行意自若久之夏公以诏恩复其官还所没赀产多公力故上海令喻显科以诖误谪而流落不偶修馈于公公露其抑屈得内迁既而返其馈曰吾以邑人故直令非以令市也张泽者公之诸弟经师也按察僉事于云南从讨蛮寇不利死之大帅计委责于张事上公奋曰赏生僇死法乎且何以劝来者争之于大司马强张得从死事例赠光禄少卿祭墓且任子公有所知卫辉同守某卒于邸具美材殒而归之且为识其橐邑子唐某谒选死于火亦买棺藏骨而归之公所为德不自名人亦无知者每曰谊可贾而有乎其内行尤惇至孝友成性每侍东川先生竟日立不敢跛倚小不得先生意辄长跪谢过命之起乃起先生疾率诸弟环视汤药寝食为废尝奔母李宜人丧归而有岛寇之变间闕营丧事不已或谓不虞叵测乎公谢曰使吾母入土而我即叵测固甘之及墓亡他有弟五人而以东川先生命析产公默不一言人或谓嫡长可稍割封也公复谢曰夫孰非大人遗体且吾以久宦减仲产方议让焉诸弟感之益相习为让而公自是益困矣然犹能抚孤侄为买田置室所衣食徧宗戚故旧无失职者又强自力拓治先庙伏膺烝祀诸子姓以班从济济矣公虽用书受知上然所典多国家大制册诰训雍容雅重得代言体而至杨忠愍继盛给事允绳及前张泽赠官告尤感发蹈厉为人所称诵他文亦多称是公既得请日危坐一室展卷恒至宵分有所得则笔之往往多格言暇则合诸弟若今鸿胪从德内翰从义辈扬榷风雅评隲法书名画焚香啜茗竟夕不衰倦客过上海里以为汝南宣城得一维稍纳履幸甚天下盖熟于公父子兄弟之贤而不能忌其盛中问一鹜监司移徐文贞之孽而加齟公公夷然不屑也尝寓籍青浦晚节望益高两邑令以春秋分聘乡饮为上宾然不能数得公迹寻病瘳久之病革呼子孙以指画所拥衾作积善二字而暝时万厯之癸未正月初五日也距其生正德庚午得寿七十有四所著有直庐日记蓬阁藁藏于家配乔氏累赠安人子男二长九畴太学生娶光禄戴监事女次九锡娶即徐文贞公女女二长适诸生刘国柱次适乡进士张云门孙男三时升太学生娶陆继娶杜次晋娶潘渐尚幼孙女五长适武英殿中书房冠带生潘云龙次受赵隆培陆堉聘余未字曾孙女二尚幼盖公之子若孙女世与潘为媾而潘公允端者尝为四川右布政使状其事而称之且曰典故类曹褒辞翰类张超孝谨类石建廉节类朱晖而以能轻身排难归之以灌

夫郭亮之行若任侠者然王稚登之传公也则曰公所为大要厚施而不责报急人而不自以为德修之冥冥而不喜为名高然则公所存长者也非侠也余辱识公父子兄弟而尤于内翰善故为之志而铭之

铭曰畴起布衣而为上近臣畴以艺显而奄有其文畴为亲而不有身畴后已而先人见其一端以为侠而知者以为德之醇吁嗟乎顾君

光禄寺监事京庵宋君墓志铭

余宦遊燕中故华亭宋公为名御史旋各以病废不相识而余病已稍复出然里居之日为多而公之子光禄君称名士里中絕不相闻然与余故人徐太学孟孺善太学数为言君孝友忠信重然诺不靳施予余殊心器之既而复谓君呕血死矣其死实病而能自强泚笔先后为偈若干言往往出意表最后君之子启明以状来请志铭称其病剧时亲故对之而泣君笑叹曰我自归我耳而曹留则留何碍或曰得无有不了乎君复大笑曰今日吾了日也遂书偈曰千身万劫此灵根今日灵根何处去无来无去真灵根彻得灵根自常住既而孟孺偕其友陈仲醇来访君抗手谓曰吾与二足下生死交乃者大事迫矣何以教我孟孺曰惟有西方耳君颌之已而复曰病一刻不可忍奈何仲醇曰一刻安在君乃恍然曰吾十年亦犹是耳更两日手定凶具遗嘱寄启明海之为君子而已不及他私语已复书偈曰人人不识西方路我道西方是我家横出信心须顷刻不须路上半杯茶时所养子启祚侍顾而曰吾行甚乐特不能待汝母汝弟耳索熟水三漱之起坐亡几何翛然而逝盖启明之言与孟孺合嗟乎儒者居恒谈说大道若真得之其排斥西竺之教以为异端快耳畅目无能难者于生死之际不胜去就一念乘之而恐怖夺之而散乱居平所谈说安在更不如受西竺之教者之爽然无罣也而余所交衲子尊宿多矣要之亦不必尽然君所操儒术也其治家人产也其日酬接妻子昆弟戚执闾里人也其于生死之际则衲子尊宿所不易如者何也启明曰而师昙阳子之立化也君虽不及躬侍然日夜冥心焉梦而得师授以三印其文皆曰处真子而篆体别且曰后五载度汝然则君之所以不怖不散者恃有昙阳子在耶有恃非道也孟孺曰不尔宋君故尝读华严经而悟夫悟华严者不墮境君偈犹境也以为贤于近世之儒者则可许而志之曰君讳邦又字民倩别号京庵其先自汴避兵而南遂着籍华亭几数传而始业儒至御史公某始大显君八岁受论语十岁受易属文有声十七补博士弟子故杨给事允绳见而异之曰吾负吾女贤偃蹇其配今得壻子足矣给事女遂为君妇君自博士弟子进太学而御史公病失明君日夜奔波延请医药卒不效每一拊公目辄痛心哽咽不已已而其母某夫人卒君号踊不欲生饘粥亦絕公觉之曰汝为死者死则快然何自不为生者生君乃强一餽及其私居苦土皆血泪渍也部使者修睚眦怨于公株及君然君实无可指摘者

而其季颇蹶■（跽也）蚤夭累亦及君君以一身扞之往来居间几十年而后解家以不毁公时谓客吾不能无恨于人以是累吾儿谓季之子曰非而伯父而不覩此室庐也君更局蹐不自安曰不肖不能生贵显为大人销外侮甚愧大人久之御史公慨然语君壮且才宜及时有所树效士贵行志耳安能役役为笔研误即老死谁知若者君念公朝暮恃我为目不忍发公故遣之既谒选得光禄寺监事三月请告归与诸子弟称觞奉御史公寿时公七十矣大欢乐之然居恒语君乡俗薄而嚚我尚不易支非汝土也金陵故都贤豪长者之匿迹汝其志之于是公以后六年捐馆君哀毁有加服除犹杜门谢人事者百余日乃叹曰可以奉吾亲悔矣遂徙居金陵金陵多佳山水君甚乐之然不好游大人久之归里上冢会得疾即前所称从容书偈万历乙酉十一月事也距其生嘉靖丙申春秋仅五十有二痛兄邦交蚤卒抚其孤如子经纪其室逾于己室当倭乱而乡人中兵者跳入城君辟丙舍数十楹处之资其饘粥又割居傍地以益郡狱郡守义君旌其门有钱家港阔御史公首捐百金辟之君岁指困中粟赋民功始僦自君之为施而里居观寺桥道亡弗飭者宗戚闾左亡虞衣食者诸所为德不可訾数然杨夫人寔有以相之君有丈夫子二启明太学生娶庄氏启郊聘朱氏所养子启祚姊子也郡诸生娶苏氏女一适鍾允善孙男一京伯尚幼

铭曰恒人之情愍生怖死乐死苦生蒙庄之蒙儒者斥焉以数归理西方圣人万劫不毁其词繆悠其道宏矣君之坦然毋乃出此清净圆明与佛同体归魄亲垄永存世轨谁其铭者无生老子

沔阳州学正象斋朱翁墓志铭

余病告靖居而嘉定令朱君廷益每以公事过辄来叩靖有所质始一再见之其后谢不任而乡人称令贤者耳为沸乃稍复见之一日偻行而叩我色墨且瘁再拜已出其父封令君建侯之书与币及手所草先学正象斋翁之状复再拜而请曰敢以地下之石劳长者余辞不获则谓姑以贤令君之故而受役既卒读状又叹曰吾不恨受役今且以翁之故而益知令君返币而志之志曰翁讳贤字汝贤象斋其别号也先世自婺源徙而嘉善遂为其邑之思贤乡人大父某以学行为诸生其治家政必步趣先文公礼其它事多廉取而宽施尝扁其堂清白曰使后世毋忘也盖里中籍籍饶守相辙矣有子三人仲曰邵武教授公某少以才游太学试不利三十为邑校官几数转皆不离校事历大郡而后卒所至诸生楷模之前后有丈夫子九人其七为翁生而秀慧不羣稍长从内兄胡给谏工文辞通经术张太仆某者见而大奇之置甥馆弱冠补博士弟子即以试最得廩食学使者万潮两试翁皆第一诧谓诸生此子字字出意表非而曹偶也然至大试辄不售尝售而坐溢额复不得收御史惜之俾受经省院中其再售则业已冠其经矣一臬司尝

有所憾于翁摘其论以为诋诽胁御史去之翁亦自伤奇数稍倦于业更十年当贡矣而以念其侪老贫而格小阻避之俾自为计翁齟齬者四年年且五十而始成贡授太平之训导转教谕清河再转沔阳州学正其见模楷约畧如邵武公有悔而已束修不行官舍一鹤一鹿余廩共之既倦游以年至自引归归日盛供张与戚执驩饮者三而谢去之谓其子建侯曰藩吾门吾自兹与世絶矣不能从治服少年子倾凿落也自是毋论城郭即十室之市迹可数矣有刑部郎萧君者尝从翁受经以谏狱行部嘉善先期驰吏介书币于翁书辞娓娓将欲有所为翁笑而置之郡大姓坐法论死未报布尔目于翁所得其状乃行数百金求末减翁怒曰不佞虽仅辱一命风化系焉而子乃轻黠我指其楣此吾王父所以志也自是萧君行部再谒翁虽与之饮色益庄竟不能有所问而别翁居职二十年所积俸为金二百宗人谬市所业田持金去既使苍头问租则报曰租何在租出之田田何在则报曰田何在翁笑而焚其券曰得我金易耳而劳此狡狴且偿我何必券也翁孝友自天性于子行第七而邵武公之谒天官选也翁司其橐栲出妇装珥而阴进之得治行寻卒于邵武翁日夜祖跳奔哭悉以遗訾产予其兄弟故与仲兄共丙舍而居念其贫悉归之独身出治生己又念其异母弟幼割所余资之弗恤也母汤太孺人均养于九子独甘翁翁不惟共事太孺人即婢子以下毋失意者太孺人每谓是一儿足以了吾事矣生不喜养生家言而强无疾晚节不为产唯召一二老友与围棋角饮饮酣则呼童子歌邵康节王文成诗而和之陶然洽也顾其御子姓则甚庄虽燕处必修容而后进谈说经典及前辈行谊纒纒可听卒之年九十矣且属纆口授书寄嘉定令好为之且曰介不受变何有于三公乃暝时万厯乙酉三月二十三也始娶张即太仆女夭继娶胡孺人材足相家有二子长即建侯亦以诸生高等膺贡再迁教谕用廷益令漳浦最封如其官娶张封亦孺人次建寅娶贺女三适贺得孺陆卿皆胡出适马如爵者二王出孙男六长廷皋娶周次即廷益寻以嘉定课最迁南仪部主事娶施封孺人继汝次廷龙娶盛皆建侯出次廷夔娶沈廷传聘胡廷召幼未聘建寅出也孙女四有适胡偕卜世者曾孙二衷纯聘马氏曾孙女几有许字潘某巩某者余俱幼嗟乎朱翁之什褐称有宦年五十矣以其官为诸生师者二十年而后谢之食子孙奉者又二十年而后高朗令终人固不可无寿哉抑朱翁之孝友克让好施秉介固其性然非以为媿而强趣之其天盖不凿矣其不喜养生家言是能为不凿生者也寿道也故又为之铭曰

父子三世以师为宦其德若微而收功缓譬彼植木既培且灌爰笃闻孙如瑟如瓊两宰剧邑全活千万滥觞之流汇为江汉翁魄于斯永永无算我铭其幽为存者劝

弇州续稿卷一百八

●钦定四库全书

弇州续稿卷一百九

(明) 王世贞 撰

○文部

△墓志铭

吾山王次公墓志铭

余友王太学百谷自晋陵徙吾吴而无锡实介二郡之间百谷往来多与其邑之豪长者游所最善者夹山王次公夹山之王姓故匡其先有殿前七司扈者事宋艺祖而避其讳故去匡之三垂而为王其徙则自洛而南邑之匡洋桥以至武进之王巷最后复为夹山凡三徙而愈盛夹山之始彦文凡六世而为次公公之父覲娶于潘有丈夫子四伯曰赵奉祀正学叔工部郎觉季太学生誉皆磊落自致经术显重公于中尤轩举谔谔自好十四补诸生数以文陵其偶二十进补国子上舍益有声祭酒称之然至大试辄不利而会其季誉不胜令之苛役也而避之令意其匿次公所而次公尝以酒事忤其里大豪乘间中之令谓次公实匿誉持之急杭方伯淮者力能得令轻重欲以为次公公念实不匿誉弗请也令持益急时工部君以诸生试幸于台使者使者以次公诉行郡郡守某知次公富有所要次公谢不可则阳为令操大体竟夺次公国子而使者恚用他事论击守去矣次公复抗疏辩解不得人或谓不可以他途进耶次公谢曰我之无罪道路能悉之此命也且利我者乃以二千石而博我我其归治生矣遂率妻子耕夹山之阳居数载傍畝益拓而时赋其稍入付家人子虽转息江淮间次公名能知人既得之则悉以相寄不为钩较予夺以故所入益赢而有余力则益多诵读古文载籍时时集子姓之资可进者诲之居恒谓能使我废科第不能使我废书性惠慈属岁俭则尽出其藏粟平糶以贍闾里而贷其贫者不问息义声渐隆隆起次公为人长身而颀广颡丰下目光灿灿注射人议论慷慨时时出意表里中少年多轻薄为小冠短后衣次公弗善也出则裘冠宽袍长袖襞积曳地以自表异众目属之而用伯仲皆宦達郡邑见推择以为三老宾之学宫盖八十而卒以老病终次公至孝念父母蚤逝不逮养虽至笃老语及之未尝不陨涕也所以奉大母管备志物之飨奉祀君前歿次公子其子而成立之三十年如一日门馆无杂客客有文行者不惮屈节延礼之即欲挟重加次公公弗受也其筑室治圃种种多遠计庶几樊寿张者故蚤失太学生而不衰家与名次公讳举字子庸始号二懷后更号吾山娶张继杨皆无出有二子而少者殇长曰鸿胪序班晓侧室杨出也娶亦杨女

一适云南按察照磨龚济世孙男逢善娶于湏女三适诸生贵济美太学生李茂文字丘汝材次公之歿也晓将卜葬某地而以治命请状于百谷已又绍百谷请志铭于余工部君先司马之同举于辛丑者也返币而应之其辞曰

福有五曰富曰寿曰考终命而不言贵其次公之谓耶或夺或予造物之奇予匪幸得夺岂致之次公其即安于斯

慈溪邑文学鳳溪袁君墓志铭

始余栖恬澹靖时实与太原公同舍而太原公故尝师事少傅袁文荣公文荣公有族子曰宗泗茂才异等有声太原公居之姬戚之馆以不时入见辄相对饮食谈辨余得一二寓目焉无何宗泗出其所为文甚奇已又出其两子茂育茂英文则益奇既别去忽衰经而过太原公即以太原公来介曰不肖得事公将藉公宠灵之一言以为先君子寿亡禄先君子不待将使不肖负终天恨敢藉之地下乎太原公从臾之则成诺矣而茂英应省试魁其经宗泗挟以偕来而袖屠仪部长卿状曰请据而损益之登之石长卿予知友也其辞艳而不诬按状君讳瓌字汝修尝自号鳳溪其先居明之郡郭有宋宝谟阁学士燮者死而崇祀四贤祠三传而灵卒官余姚令丧过慈溪之鳳皇山麓得地而葬之遂依以家焉又十传而为赠刑部郎照照生广东按察副使载则君之父也有三子伯与叔皆以警得官叔稍显为布政司理问而君独业儒十六补邑诸生试辄高等宪副公爱之所之官挟与俱君益得奉庭训辨哲圣门义利之学与礼乐刑政之大者不独工嫻于文辞已也最后宪副公乞身归而君母章宜人捐馆犹在殡倭暴起躡慈溪邑故无城宪副公仓皇跳山中别业兄弟鸟兽散君卧苫而哭曰父幸已脱奈何忍于死者即不幸有俱毁耳而倭竟不入也盖比闾无完室矣倭事定宪副公愆于警尽遣其家属而曰吾老此山中不归也君复独身侍宪副公且养且读书久之公暴得疾剧谓君曰谁谓而翁宦達者几数政而装若洗指一篋此主上嘉我劳于显陵役者金若干币若干以畀汝昆弟毋与也已而曰所以继我志者惟汝君雨泣唯唯宪副公既絕而伯季至君出篋曰即先君子有命而主上所以旌劳臣者孤敢私之让弗受伯季亦交相让乃尽以为二尊人营葬费即不给君之私币继之矣寻当析产君阳为不省者稍取下中而归其腴伯季伯先君二十年死更十年季亦死君皆为料理身后抚诲其孤遗尝有贾客许生与君以钱通负二百金不能偿君召而酒之面折其券君故贵家子卑行闾里间人莫能迹其重也文荣公贫夙倚君父子晚节骤显取相位君对客不一名之而会长子宗洙前卒独宗泗在而茂育茂英及他孙茂名茂益皆补诸生君抚而叹曰所以不食大人托者我何有焉汝曹其勉旃君子于书无所不阅老而益好之卷不去手客或风之岂尚为公交车计耶乐事不可方何独在书君谢谓客吾以天下乐亡逾于书者且书故非公交车所得專也君貌清

羸顾神气殊自王与人语不能蔽其过而有所请则不平立直以故畏而更亲之年七十而癸未之嘉平其悬弧月也宗泗大合客高宴为君寿君与客酬酢不废礼至明年上元之前一日晨起盥栉嗽粥美端坐集子姓谆谆诲励若诀者顷而嗒然怪就之则已息絶矣闻者咸谓君得道蜕去不死也嗟乎君一书生耳岂其习于玄素缮命之术而真不死耶见其瀕危不去母以为孝逊父遗于伯季以为弟折二百金之券以为侠不引重贵族以为节而要自其天性纯至发之非有贵于孝弟侠节也其称君得道蜕去不死得无类是哉履顺而去逍遥自然以不凝滞于物之效也当予具草日则茂英已进士高第君二子六孙其六已前见而有茂功及未名者曾孙男一元哲所娶多名族

铭曰丰于后先而嗇于躬其躬之不逮丰然亦已占之其即安于宫

仙居簿累赠兵科都给事中子心张公暨配周太孺人合墓志铭

张公者讳元卿字伯揆其先自唐右丞相始兴文献公九龄有弟曰九皋以子洛阳令抃故家东都八传而为宋晋陵尉直徙常州又八传而为端明殿学士异宋且易社矣其子孙薄元德不仕明兴而有道谦者复徙吾郡之长洲生子景辉辉生灏灏生敞敞生珏盖世世隐于贾至珏而始慕为儒娶于仰举丈夫子八公其长也生而秀颖就外傅未几即善属文父爱而樵之曰勉哉吾贾莱尔而脱为择配得邑之着姓周君女是为太孺人婉■〈女恋〉有才操既归公遂受笄钥寄朝夕羞馈必躬舅姑甘之每以诒所亲曰吾子妇若而人而吾食于长者未尝不饫也少不自其手吾舌能辨之已矣而公以文高补博士弟子试必先诸弟子父益怜之不欲令仆仆郡邑为入赘进补太学生试复先太学诸生公益自励于学而太孺人日佐以勤而贾其锐曰妾未尝后夫子兴而先夫子宿也愿毋忽其三余而弃之公虽小倦为之作气以起太孺人恒自言吾宁忍束湿公也所要名胜为文酒会即不爱簪珥广市醇鲜公不知所繇置矣自公之在太学久有声遘大试辄困而犹欲奋一决太孺人止之曰命也且吾闻舅渐衰公心动亟归归而获奉父汤药以终其又久之为吏部选人得浙之西安簿时仰孺人已见衰状公弗察也太孺人复止公曰装未办可小缓行乎而诸弟子姓中表固强公抵治甫两月而仰孺人之讣至矣公恻几绝驰归治丧小间谢太孺人曰天乎卒不能用若言使先公无憾于我则惟若使吾母有憾于我则惟我盖公之先后举二丧易戚备尽以孝称里中亦太孺人有以相之也公服除补僊居时僊居甫中倭其民皆锋刃余而新旧赋累积司府责之急公条上其困苦状请得尽宽其旧而新是图报可于是咸感公意转输若流水更以最闻矣顷之倭警狎至公身自擐甲登睥睨昼夜察圯隳与士卒分功版筑间贼未至郭三十里谍知守御完整稍稍引去始公方议守而内不能安太孺人以间归视太孺人曰毋顾我存亡与子共之公益感慨自奋卒以完邑声称流闻上官上官德公而亡以报且悯其廉也俾摄

郡之中津桥榷公念且有濡染又此丞别驾职也不欲侵之奏记力辞上官赧恚谓何物小吏乃敢为名高必不以名借若然以公之居职无害也不能有所加而公忽忽倦游矣始公之力辞榷也太孺人实劝之至是复谓公咀藜可以代梁肉缓步可以代车胡刺促视人鼻目为公归而橐枵然垂也不以僊居一物名唯荐绅衿裾所赠文若讴谣之类而已公既归与太孺人相率为俭勤以具中人产伏膺不虞困然公每思父珏之不逮养也毋仰之不及终也居恒惨然内伤矣故署其斋室曰子心而称于人谓吾心一息而不忘乎子也当父之亡遗粟十而去七归自西安而母橐若洗矣知各有所属弗问也季弟歿而亡子遗帑侷千金公有五子当推为后而以让他弟之子自是皆化之肫肫为惇谨而会太孺人之父周君毁于火公曰于我乎养周君与其媪老死公曰于我乎葬遗孤未娶者公曰于我乎室然使公之不媿然诺者太孺人也公有五子而其四为诸生皆手授之书与教属文太孺人从旁解析出意表久之第四子睿甫举于乡父乃喜诧曰吾父谓我能脱家世贾当发之儒而不能竟儒用庶几是儿哉居三载公竟以老寿卒而太孺人始益为政益宽仁喜施意豁如也性颇喜西竺言第谓瞿昙氏之所繇称以能仁寂默耳而奈何穷土木之雕饰羨衣珍食以资游手乎哉睿甫成进士改庶吉士读中秘书迎太孺人养闻之幡然曰吾尝从僊居公游南都预观高帝王业之盛今者乃获尽观之一何幸也既至睿甫奉觞而进太孺人泫然曰吾惜而父之不及享也既解馆为给事中于吏科以两宫徽号恩赠僊居公如其官太孺人封秩亦如之以翟芾进太孺人复泫然曰吾惜而父之不为封而赠也睿甫之解馆也有为之不平者太孺人曰留而史官出而谏官皆为人主司国是别贤不肖者也吾闻之史官之劾缓而谏官速若奈何爱其缓者鼎思乃大悟寻复以皇子生公赠至都给事中而太孺人亦载给勅命所以奖称备至久之太孺人思故里睿甫乃以使事奉归里既返命复以念太孺人乞归亡何太孺人有微恙强自饰促睿甫发曰而岂吾有耶不以时报国而齷齪儿女子何居睿甫徘徊不忍发而太孺人病剧矣嗟乎睿甫位谏官论究人主得失与宗社安危大计即鲜有能遂其私者乃获以太夫人将而日食大官之饩满五岁而扶侍之归又极汤药之致其视仰孺人之所得于僊居公者不大愉意哉虽然僊居公以蕞尔一尉完坚城谢腆畀奉志与其身为进退而卒不辱于其宦穷显悬殊所为轨一也公之卒以隆庆壬申九月十一日距其生弘治甲子得寿六十又九太孺人卒以万历甲申十一月初八日距其生正德丁卯得寿七十又八五子长汝化娶刘少司马公畿女次汝新娶夏吉府审理建寅女皆补长洲县学生次汝熙苏州府学生以太孺人病祷于神请代俄卒时人伤之又次则睿甫名鼎思以娶王氏为处士钱女文学行谊称名臣又次汝春侧室曹出先卒二女长适福安令袁曾次适王用宾孙男七士良娶顾士光娶周汝化出也士奎聘徐汝新出也士弘娶宋长洲县学生士毅娶归士正聘万士直聘吴鼎思出也孙女六长适吴文献顾应璧吕遵义查坤汝化出字汤某汝新出适蒋一鳌鼎思出曾孙二幼士良出盖公卒之十四年而始与太孺人议葬卜地于邑之陈公乡子字圩新阡公之行检讨顾先生状之太孺人之行按

察副使冯先生状之而睿甫具草焉二先生世所谓良史才也而以幽宫之石属之不佞则大不类然不能忍于生者为志而铭之

铭曰谁恧子职而谁翼之谁以邑障而谁壮之谁完志故垄而谁恧之谁诲迪厥后而谁右之匪惟俚于德亦偕有遐识魄偶于斯过者式之日是谏议君之所树而二老人之遗

张幼于生志

嘉靖中以制科之业称公交车者无若吾吴郡三张曰伯起曰幼于曰叔貽幼于始字仲举一曰敕叔貽寻夭而是二人皆厌去其业为古文辞益壮丽其名亦益着幼于交遊徧海内咸欲荐不朽之幼于幼于弗顾也一日东访余弇中而请曰有乐丘之石以干子余愕弗敢应已而曰不佞少长于君八岁奈何任君身后幼于曰固也世有不可知者我先子则犹可得之子子先我则无若子何兹乃有二幸夫及子之身而得不朽我也与我及之身而得覩子之所不朽我也子以为何若然则何以不君传而志为幼于又曰传者传也志者志也我藉子而传之乎则无若藉子而志我之志也于是为张幼于生志幼于初名鹏翼已更名献翼其先自凤阳徙而金陵已又徙而吴为望族王父準能积着起家有四子以伯氏叔氏材任治生弃之贾而仲季恂恂守经术仲卒繇乡举至台郡司理季游太学得金吾幕职而叔氏遂大廓其产以谊侠闻至倾郡邑叔即幼于之父所谓云槎处士冲者也当是时处士以才能振其姓家所蓄三代敦鼎尊彝古图画书籍器翫即代称膏华者莫敢抗居恒自叹谁与我守者世得无以蔡中郎目我乎已而伯起生又七年幼于生皆生而白皙娟好秀丽每出市人连袂矚盼属之曰谁家璧儿当非复尘世间物父怜爱之为置师塾日诵数千言稍受笔即能破累帛而所造语竒往往出意表年十七即以诗贄故翰林待诏文翁文翁世所推伏前辈无两辍食而读谓其客陆礼部师道曰吾与若俱不及也趣延入酒之而是时伯起业已名文翁客居数岁遂客及叔貽陆君亦折行而与幼于称诗故皇甫按察沔彭处士年黄处士姬水今刘按察凤尤相得唱酬无虚夕当是时操觚者以不得幼于一语为歉幼于寻游南太学两司成至不敢抗师礼引以为上客然至每大试辍不获僦伯起虽一获僦其试南宫亦畧如幼于故借悲叔貽之夭而相率为厌去然幼于之所谓厌去独举子业耳故治易至是益深湛其思自比于絶韦折挝而不已盖十年之中而成三易曰羲经约说曰羲经杂说曰羲经臆说已有读易纪闻读易韵考学易标闻后先将数十卷时人往往以博核归之而未有能颺习者幼于意不悻乃尽谢其故冠裳幅巾短褐置轻舫呼笋輿縱游吴越诸名胜建牙握节之使邦君大夫与搢绅逢掖之贤豪长者多幼于所故识即非故识而耳幼于名者亡不延颈愿结欢张先生先生乃肯顾我幸甚坐未定辄命酒酒至则赋赋罢则谈谈剧则卜夜稍

不迹方以内黛粉蛾■〈日录〉肩随之矣盖咸以何点拟幼于惟幼于亦自谓通隐也筑室石湖坞中貌点兄弟像而祠之始幼于之及处士公也虽甚见怜爱而义方斩然小弗称则赐朴而嫡母叶太君斂而磨煦之若创其股生母许少君以有子故代家秉其诲幼于不颀为慈幼于精專其思以奉父及二母于三子中最为得二母心父及叶太君相继歿幼于刻像私室以朝夕起居至伏臆荐馈哭声殷殷不絕少君为之感动曰我幸无恙是儿修辞色而奉养我他日卒不讳奈儿目枯何其事伯起庄甚然伯起介少可而幼于多许晚节虽小异趣然未尝一息而忘推兄也吹埙和箎洋洋盈耳矣痛叔貽蚤逝亡以为地下者则谒志铭于余诸传谏哀挽多属之巨公名人云吾所不欲得不敢以加吾兄吾所欲得不敢不力于吾弟人以为实录幼于念处士公先仲季父物其奉侍二父益谨所进毳甘以日计非产之珍以月计衣履翫好以岁计五服之内宗戚中表有恃而室家者急朋友之难逾于己若故诸生刘乔祖姚懋言兄弟韩昆徐玄素许高朱三重医士马应龙游客张昂王人佐辈或馆饩或治丧葬或受孤寄或解纷难其始分谊不甚深往往竭财力为之弗计也若素所敦重及贵人长者弗暇计矣幼于既以显重性又好客击鲜饮醇之欢亡虚日以故环所居顾家桥里巷车骑冠盖委积前后不絕守令倾耳而待幼于亦时有闕说然不颀为所偏私人不能以是病幼于其兄弟所居重于二千石然善自挹损舍人子有外鬪即被伤委顿犹好谢其敌而自引过至盗财物而露者犹掩覆之不使竟也事详家儿私语中家儿私语者幼于所自着也幼于念以任侠姿挫产仅图籍存而许少君益笃老不能舍之而北所蕴藉不得摠游迹渐近不敢过数百里外娶妇朱为吾女甥贤亡子中岁为幼于置貳举三子而妇物三子曰里曰仞曰顷以仞嗣叔貽意尤念之为仿颜氏家训九十八条垂四万言以示轨物他所著诗文又数十万言其行世者十之六弇山人曰余读幼于私语遠本天道迩证人事上标先德下述己构喆昆懿交織善毕罗即毋论三子荅问为何所以立扬资事之道备矣所著诗文最伙不名一家言其旨亦以先后为至末大要才周而溢学积而宏今不必离古不必合匠心成法遇境辄会斯所以为秬苑之雄乎哉古者亲在不称老今许少君八十七箸无害而幼于虬须猬磔双权若玉饮噉御内如少年乃遽斂其雄心而谋束身之地以身托得无为吊诡乎哉吾敢以其志志之且为约曰自此而吾与子所乏者非日俟而续焉可也

赠奉政大夫南京兵部武选司郎中靖斋周公暨配谭宜人合葬志铭

周之先为晋将军开林其籍江阴不知所自至元而有寿一者由江阴徙常熟之双凤里双凤割属太仓遂为太仓人自寿一八传而为棠负隐德有子二曰樗庵公焯榆庵公燧二公皆博达遠识兄弟友爱亡间几举丈夫子十更子之益斥买书籍俾受而以其经荐最显者睢州学博士塾浙江叅政在工部主事土宁波知府坤广南知府墨工部司务埜皆能以其官荣二父而公所自出者榆庵公也少而最敏慧然眇一目父寢之以为

不称宦迨年十三所应对摹画多了了当意始顾公而叹曰羣儿鼎贵易耳谁与代吾家秉者我知之矣稍长遂辍以属公而公善计数于米盐琐屑亡所勑厌訾用亦渐饶公故夺其家不获治经术意自伤曰吾闻良医之活人也殆不减良二千石何者其制命自我也于是尽取羲农轩岐俞跗卢扁仓公张李诸经传读之而精得其大指至切脉候证汤液胶醴鑱石躄引能以意变化行之不尽按古方往往竒效然而不责酬以故尤得贫人心尝道遇一暴死者怜而诊之曰可无死也手剂药抉齿而进之渐苏再进之起矣他日复遇之魁然健夫也拜而曰吾市书人敢以经籍为诸郎君大用地公笑而受之公于书所不尽究者经术耳其它亡所不窥而又善偶对能为歌诗诸昆季聚饮好以诗相高公辄先成则羣困以酒曰某语瑕某语弗瑜且不当先长者公酒至辄酺不色忤最后以高秋登凤冈监者曰请授简当击案为节罚后成者公成最先而又最壮丽乃相顾吐舌曰吾等不复能困若酒矣各就罚而后罢会公长于诗若此然不欲名于人人亦无能名者始娶凌宜人有二子銓鏗矣凡五年而死再娶谭宜人谭故虞之着姓幼婉嫕甫十九归公时公产未立銓鏗皆在裸人窃以少难宜人宜人能自强为勤俭操机杼篝灯而续日力恒至夜分右抱鏗而左抚銓毋使有饥寒色既而自乳子铎与鑱其爱必先銓鏗而后铎鑱也銓少敏甚公出所起市书人经籍以授之试为博士弟子往往称诸弟子冠属羸疾夭谭宜人哭之哀几亦不起宜人事尊章尤■〈廿马〉慎与公争先为养王太恭人时时谓榆庵公吾今始有妇不虞中馈矣宜人精力専于二老人以次治客供张而其自奉不二簋幽菽脱粟而已簪荆縵布委蛇于妯娌锦绣间意豁如也榆庵公与王太恭人相继物则公与谭宜人皆以孝闻而久之铎鑱相继补博士弟子铎尤颖脱公谓宜人幸而兄所受经籍犹在自恨老矣若庶几及之然未几何而公卒已谭宜人亦卒公得年六十七谭宜人六十一耳盖又十七年而铎成进士授南京兵部主事明年以上登极赠公如其官谭为安人明年为武选郎中遇建储恩赠公复如之安人进为太宜人又十年郎中以漳州太守移病归里盖选地者久之而始得吉壤于某处谋以岁丙戌合葬乞行太仆卿徐先生爨之状而属志铭于世贞则鏗以太学生鑱以州学生皆前后夭仅漳州守在銓娶郁亦夭鏗娶陆继朱漳州守即铎娶张封亦宜人鑱娶朱继陈孙男六人法娶梁澍娶谭继沈鏗出汀太学生娶唐汾聘项铎出伊州学生娶顾淦亦州学生娶郑鑱出孙女五太学生郑一阳昆山县学生朱景星张敏求龚某郡学生凌学诗其壻也曾孙男四孙女七婚嫁皆名族公讳室字安卿别号靖斋世贞曰长者哉靖斋公也医不责酬诗不市名诸所为德冥冥耳然以一布衣偶俱于诸金紫中而无愧色至所谓金紫者以次代尽而公之后人始大显振振绳绳而公与谭宜人俱拜天子之爵位纶綍于其身后其视伯仲得孰多哉则又曰妇哉宜人也俭不嗇养慈不偏惠可以风矣是用志而铭之

铭曰隱其德缓其获不于其身于其后人其蜕已陈其藏则新盖久而二老人始获返于真

黄母王太孺人墓志铭

余仲氏宦江右时于试棘中得诸生黄章庆云既撤棘见之美少年人也而又能为古文辞仲氏器之为其父后渠君志幽宫之石居四年而章庆之母王太孺人复卒又三年楼行至余里居以仲氏书介而请曰无禄先君子即世不孝怵怵者十年所而未有以慰地下也赖天之灵席仲君不朽亡几而毋氏继之惟是卧苦于庐不敢越步武今者服除矣而乃获计葬葬而以母氏不朽请也则惟仲君之惠是徼余固谢不佞不获辞则读其友驾部郎胡君所著状曰其言媿而核可征也为志之太孺人者其先自琅琊与余同系后徙抚之金溪王父教授公序有子三仲曰东石公莫与其兄银台公萱相继成进士为礼部郎尝上疏抗论大计于武宗朝再予告里居读书山中着明金溪之学召补学政使者于浙不应天下益贤之东石公艰于子逾壮而始举太孺人梦有以鼓吹拥一儿至者曾文曰恭人已太孺人生东石公名之恭且曰恭女德也生而端庄静凝不妄言动东石公爱之口授内则女训诸篇皆诵则进之经术经术成东石公每诧语人是儿男子者当褻然吾上虽然亦何必减曹大家偃蹇于配者久而得后渠君某当是时后渠君伟哲为文音有雋声而其父太仆公某策名贤书与东石公俱以金溪之学显两家乔木相望里人艳之太仆公游南廊师事湛文庄公若水后渠君从预闻文庄学且益壮意不可一世士东石公闻而召勗之始束书称门下生盖晨而就正东石公也夕而太孺人佐之诵且诵且讲说后渠君欣欣谓一时得良师友矣太孺人归后渠君久亡子为后渠君买数媵躬衣食之俟浣濯期而后荐太孺人寻举一子章庆久之媵亦举一子太孺人爱之踰于章庆也曰吾非矫而踰之顾吾所不急则且益缓寻病殇太孺人哭之恸后语及泪辄簌簌下不禁也盖后渠君卒之岁而媵复举一子仅三月太孺人惨焉而任二子母且父之矣始后渠君慷慨重气谊不寝然诺邑亡赖子匿其锐阳出下及其卒也则多布爪牙借权市势公私为陵舞太孺人所以应之有余度无我何则为弃弃章庆太孺人以昼隐章庆而夕授之书时凄然泣曰即汝才而不自振拔独不念隳两宗脉耶章庆亦泣益奋于学既得隳而后安亡赖子亦避去太孺人严重寡言笑隐约成性终其身无美衣偷食之奉然好施予周人之急甚于己章庆又为余言太孺人非直德学自东石公也乃其貌亦类东石公夫东石公所称是儿男子者当褻然吾上固尔太孺人女而男子者也即不男子何遽不东石公若也且夫太孺人之所繇名则休梦是践德亦称之然此于令甲为四品阶今犹未验也将毋章庆之所能自力为太孺人身后荣者非耶太孺人万厯庚辰十二月卒距其生正德戊寅寿有六十三章庆之娶为刘少子彦庆亦聘刘女二长曰诰归质生何永元次曰诏归诸生王国岱孙男一履恩聘则胡君女女二曰履详许太学陈守身曰履宜未受聘后渠君家世行履详仲氏志中余乃复为之铭

铭曰有祠部为之父父亦曰有令女有太仆为之舅舅亦曰有令妇夫才而妻则曰齐子才而母则曰倪妻良于常母良于变二子志之后十年将休梦是践

弇州续稿卷一百九

●钦定四库全书

弇州续稿卷一百十

（明）王世贞 撰

○文部

△墓志铭

泰兴令雅山吕君墓志铭

吕君十七而为诸生进补国子上舍三十七而乡试为第七人困公交车者久之五十九而得泰兴令甫三月移疾归吕君之归未尝一日而忘过我客亦时时称吕君顾余方掩闕不能从事酬酢而又八年则吕君病矣谓其从子元学壻李衷纯曰幸及我之未死而得琅琊君志铭我欲生见之于是属其姻郭大夫纪其行甫就而吕君不起矣临绝犹手二子而曰必琅琊君志铭而后我瞑夫冯太史者良史也谒琅琊君必以太史状于是太史为吕君状且绍二子先而申君之治命太史与大夫皆余友也不敢以不文辞按状吕之先为岳牧着姓后居大梁至宋建康中而有维祖者得官杭之崇德尉大梁为金尉以妻子老崇德遂称其邑人九十二传而君之父相官至沔阳州判官沔阳公有子三长曰山西行太仆寺丞焕季曰淮国仪宾燠君其仲也讳炯字心文地有雅山署以见志生而明颖至性过人于书无所不窥习然以文过奇故多不录而其遊太学则为祭酒吕先生柟司业童先生承叙所赏识迨策名褻然前列缙绅好称说之矣始吕世世什一累息而沔阳公稍用本富其盛至倾邑然性严重不能折节官府邑中倭仓卒仅以身免倭既去议城城则沔阳公当版筑十六而他侮麇至非君之策名则立糜矣然君能忍詢练事豪有浸沔阳公橐而弗应者君宛曲譬解卒弗应乃割私橐阴遗之又有里贵人居间赂亦出自私橐前后积数千金皆以解沔阳公之祸沔阳公之祸解而不知其所繇也久始稍得之至疾革就书家老俾伯氏叔氏各以千金偿君家老尚恠谓此不足当半偿而君竟弃弗顾曰舍人子瞶瞶妄闻我何所捐橐太仆君长于君十余岁君父事之家政壹

听焉至于把门户扞外侮则一切自任不以烦太仆君太仆君老且死顾其耄妪襁儿曰吾生赖吾弟死复累吾弟奈何君雨泣而对曰必不兄负也自是旦夕朝其丘嫂益共谨拊循襁儿踰于已里有欺儿弱而构之者君极力屏卫得免儿后名元启居恒谓人微吾仲父何以能至此仪宾君以尚翁主故留滞楚之子元学先归犹在稚君喜而诲养之以至成长今廩于博士庠有声所以语人如元启仪宾君一得予长告还君迎谓之吾失一兄得一弟差不至戟然杯酒盘飧朝夕融融靡间也沔阳君夫妇之弃君时尚未举孙君忧之甚奔走相地偃蹇十余莹始得吉葬而元学生已元启生最后元学之同父弟元肇又生君大乐之曰先公之系振振矣即有子何必我而其丧二亲以过毁且用相地劳成癖疾凡五试公交车或中道返或弗克入始慨然曰去死无几矣终不忍以儒冠见先人地下其为泰兴泰兴渔盐邑也民以舟楫故易为盗君至则首捕治一两大猾刑简而政精其民悦服之守以上有难狱辄问吕令云何喜事者欲徙运道自常之孟渚过江径泰兴取杨子桥而出所费以巨万计君执不可曰运故道在也亡故而废之而更置焉如大农金钱何议乃止当是时淮以南方倚吕君重而君素宦薄且有妇沈孺人变上书移疾归两台监司公移数十止君不得士民强留君以数万计君从问道驱得免令署供张直百金君悉籍以属吏曰为我谢后令毋更烦民也邑父老讴思君不置岁时走六百里问遗以为恒人或谓泰兴令岂有所不足耶材不任耶不称上官意耶君笑曰否否人故自有志且我偶倦遊耳因赋诗五章识者以拟元亮归去来辞云去舍不数武有园曰友芳志兄弟也亭池卉木嘉筱映带之楼曰瞻云志思父也中置法书名画敦鼎之属日宴坐焚香诵老易离骚羣从戚执过之或四远文士纳履请谒则延之花下割鲜酿醇佐以清言间发酬唱竟日夕不倦时一呼刀诣西郭外所谓五柳庄者擷露蔬剥笋蕨网遊鲤射浴鳧酒酣岸帻高歌起舞顾影而笑曰吾不敢望五柳主人小饶酒资耳君风神潇洒美须眉秀目少时颇任侠裘马■〈执上目下〉从有遊闲公子之富与名晚节尽洗去之独其好施予益甚尤急诸子姓兄弟间有一时歿燕中者悉为棺殮传致其丧归又厚恤其孤有谒选而得镇远仓使者以文凭质金脱他罪不能之任君为赎而遣之满考贫不能返君使人囊金而返之仲娣负官赋积百金以一稚系狱其得出亦君所偿也自君之为施不已而宗■〈尚阝〉姻戚执友以至闾左人人饱濡润无失职者顾君帑则益空或迫有所应不能亡假贷于富人诸负君券以千计君负亦如之恒自计我不忍负人又不忍责人负当奈何会妇沈卒沈故沈敏仁厚顾君善施沈善积其遗赀颇裕君悉以解负其所存券即弗尽折亦弗问也以故君卒而邑之人亡不罢市痛哭者要不特门以内然耳君既名高为人所慕悦大吏至越者又多生平亲交君自匿不相闻徐司马拭抚浙不能得君一帑逾重之且代去旌君门曰孝友敦义邑令陈某者欲寬一氓罪曰为我赍百金博吕先生数行君曰数行易耳如關说名无可洗令有死者郡下邑丞调棺君得美材应之郡俾丞以公赎五十金酬君直丞匿未予寻罢官去人谓君不可取偿乎君曰殮死令资生丞等耳杭守方某骤卒以廉故不克葬君倡诸缙绅哀金走其家经纪之义声

隆隆官中然至长赋践更诸役不欲小异齐民尝损田百余畝以贍当赋者至有调发必身任其重曰吾居其轻重将谁属邑门堰隳堪輿家以不利学官弟子议复之君率百金以倡堰复而科第相望矣君尝泛宝应湖■〈风贝〉作羣舟多没君尽出其装募小舟分援之所全活甚众而不以姓名语人一士人宦留都欲私其妾子密使所亲仆寓五百金于君亡何士人死仆来报君幸无知者请中分之君怒不听召士人诸子均授焉有仓使负官储若干将鬻其女君为讎其负女得不鬻小胥张相以孝闻病困燕中君呼医活之与俱归衣食之终身君与沔阳俞通判通家通判死长子亦死君捐金养其寡妻又为其季子还虚税脱身狴犴中素名能知人日者方大立以其术干君异其貌稍与之语知其能文勉之使归兰溪今补诸生有声君年仅六十有七亡子其终为君子者即元肇也君之大乐之乃若讖云女四适太学生许天锡邑诸生徐国贤太乐生徐元明季即诸生衷纯余所见者也少年负奇才高行君能诗善书诗出入王岑诸家书得赵吴兴遗意所著有道德经解山林漫言秋苑琐言友芳园杂咏素心居集藏于家志曰吕君所自言人各有志信然哉以吕君之轻去泰兴令其锐果殆隳于彭泽彭泽贫而乐吕君富而好礼则志以遇殊也彭泽之为乐乃自躬耕食力之外一饮一衣亦所资于人而吕君之所谓好礼则虽一饮一衣亦与世人共之夫吕君之所不逮彭泽者贫耳其行阴德多矣乃寿不至中泽不衍后天之所报之者抑何薄哉太史公而在固当为之歔歔慨叹无已也虽然士为善以自快而已

铭曰近侠而儒薄吏而循为施不已以终其身不薪报天不责名人饮酒赋诗达生任真身缀下士名齐逸民古亦有之而君岂其伦也耶

鹤洲黄处士配王孺人墓志铭

嘉靖丙戌钱塘黄处士某之妇王氏卒明年其子诸生汝亨杖苴秉谒入拜而泣曰母死矣而汝亨不肖无可以为母者策独有得公之一言以不朽地下耳余谢不敏且无故则不敢言以生者之无故则不肖诵公之书十载所矣公幸而惠之言母死可瞑也即不惠之言不肖且死与母俱不瞑也其绍胡君廷试复为之从輿甚力余亦心悯之汝亨乃出一编谓余此所以志也既尽读其辞曰丽而割可受志矣志曰孺人亦钱塘人也父曰古塘君某博学能古文词亡子而孺人其最少女处士之父曰逸山君某贾而儒以赀倾里中而有六子亦独处士少又俱才各能得两家父母心而孺人又能佐其父纾家难父器爱之难其配逸山君闻而为处士委禽焉既入门则逸山君之贾日挫诸子长者皆徙箸去独孺人与处士奉逸山君夫妇而会古塘君捐馆妇李嫠处他女家无问供者孺人迎与俱处士念父贾已矣当以儒术显而力不足既补邑诸生则教授傍邑子藉其资孺人独身治饘粥晨兴以奉尊嫜退而共母李靡不自愉快也属岁侵度所储粟不给则

貳其饗而身当其半菽逸山君窃恠之以间伺孺人食试为食不下咽乃叹曰吾几失吾孝妇处士所赍遗弟子资继之稍稍不乏矣而会嫜性病热羸甚孺人私性以人肉可疗羸密封右股而杂糜进之弗觉也已处士覩其衽衣血察知状大叹咤曰奈何先我使我不尽心于母已而某竟不起处士恸哭不欲生孺人之哀可知也然惧处士之遂不欲生也起而抚之曰知君不忍死者第独能忍于生者耶于是俱起勉治姑丧而益精心奉逸山君有子女高仅七岁使之侍寝处务以宽逸山君意既老病寢剧孺人与处士昼夜裘服而侍汤药处士间迎医禱孺人即代之掖卧起逸山君意难之孺人跪谢曰大人惫至此而暇嫌之论哉已而逸山君复不起孺人与处士毁瘠如失姑时所以治祭葬皆获如礼寻倭事起焚烧里居三徙而孺人以强力自支其养母李不怠久之李复以老寿死孺人奉而合之古塘君兆始逸山君病而谓人赖吾妇吾忘老嫠母李病亦谓人吾赖吾女吾忘老寡人亦谓君若无他子及妇耶何以独子少子与妇谓母李无他女耶何以独女少女与婿孺人如弗闻也泣与处士曰不幸姑逝吾舅亦逝吾母又逝然吾夫妇得一效全力于所生者足矣何至与诸伯子及诸姊程功处士曰善微夫人之言吾敢有德色始孺人以劳毁故得目疾迫暝则眊眊焉不察物已而忽明识者以为诚感也处士数试不利遂弃诸生孺人辄严课其子读而亟宽处士曰妇少读书贤圣人如孔孟尚不遇以老且今天下宁屈若一人也而汝高为诸生负儒声自诡芥拾科第矣而得弱疾呕血以死其妇范亦前死孺人乃大悲泣曰吾所不获志于夫子者以望若而若乃尔耶天乎于是汝亨弱有文矣少所授孝经论语大小学孟氏诸书皆依孺人点读孺人恒谓汝亨父兄之所未竟者悉属儿亦不易哉汝亨自奋励补博士弟子每试辄冠其侪冀一为惊人之鸣而孺人病矣当其易箒时执处士手召诸子妇女孙膝前人人为好语慰诀且戒勿恸哭恸哭徒乱人意已而命所善比丘尼跌坐作偈示之则葱岭中不落草句也寻合掌诵如来号使尼皆诵经右胁安详而逝盖茹斋素禅观者二十年以故尽洗散乱恐怖而超入忍地如此汝亨又称孺人笃厚伦理处士之叔兄死其父亦死取其孤抚之以至成立有家室不知其非处士子也女字沈九龄九龄亦孤稚也抚之壮而后归女且曰吾不忍名而赘也他族戚里妇女非子而母孺人者可屈指数呜呼藉令处士君富几得及汝亨之贵而行其德可胜纪哉是故汝亨悲而有余痛也是宜铭

铭曰以一孱妇身而遭尊卑之变者若而曹然皆毋失其为亲何逝者之幸而生者之不辰启手告尽邴然返真然后知其所以御变者有定力而所遭者皆徃因呜呼妇其名而丈夫其人者耶

处士铜山张翁墓志铭

张翁之葬龙溪邑北青山也盖时犹称处士云而其后七年翁之季子惟方以进士

教授吾郡间谒余慨然而叹谓其先人之行不能出闾里然坚直自遂有古烈侠风而其要实归于长者以故数履蹈艰险卒坦然而开九裘以终且有诸兄及不肖为之后然不肖竟未有以为先人不朽地也余悯而许之乃具事状以墓中之辞请君之状畧曰翁讳治字荣平铜山其别号也张之先世为龙溪人大王父曰均仁均仁之第五子宜茂宜茂之第三子秉华是为履垣公娶于阮有五子而仲为翁自均仁公来贖产以渐拓而子姓亦益繁然好为长者至履垣公渐旁落公生而磊砢英迈读孝经大学即能通晓大义多涉猎典籍手録其贤不肖者以自警勉稍长念其家食贫而伯氏弱不能操家秉慨然曰已矣谁与资吾学者且如我父母朝夕何强自力佐伯氏而抚诸弟俾成立然自是不竟学会履垣公与阮先后以怵养终翁素精堪輿家言竭贖力归公于同古杉仔岭而阮则冠顶蜈蚣穴谗曰吾卜而再得吉壤后必有兴者复创二第其一同古社与伯氏共之其一立家庙诸弟之所同处也翁负气■〈立乞〉■〈立乞〉不肯为里豪下诸生有贷翁百金而负势不欲偿者意翁孱不敌也翁讼于邑不胜讼于郡不胜众或撼翁何自苦乃尔翁不顾走之监司讼而胜矣顾割所偿以为诸生路资曰吾岂有憾于若哉吾自取吾平耳尝市巨室隙地而良有欲得之者翁故欢也冒巨室之姓以赎翁怒曰若亦舞我耶以若市则可以巨室赎则不可凡再讼于官卒弗与既而置酒好与之不悛也当创第时诸生某某有构其违式者寻白翁与酒会酣好无间或谓翁是不尝齟齬汝耶翁笑曰彼齟齬我固妄我而效彼则亦彼也翁以有中外构故奔走听理者五年不责佃租者三年归集其佃人语曰乘吾之危而匿吾税若不得称良寛若于三载而迫之一旦吾亦不得称仁今贷若若去我他佃矣翁性阔達多智权子母因时为息徒手致千金而能以义散之居恒賑贫苦繕桥道焚贫人责券所为德非一而不自矜伐性勤甚即寸晷不容逸以为此羸惰渐也晚节遘倭警出入锋刃者五六岁卒以其身与家免后至七十八乃得应诏为寿官有冠服而惟方应选贡遂荐顺天里有黠者援三十年废产以其家众据桥堦地而逼翁翁摄子弟姑避之曰吾少孱故不受舞今足以逞矣受舞不孱矣于是乡月旦益归翁郡举乡饮以翁为上僎翁生于弘治癸丑卒于万厯丁亥享年八十又七元配阮前卒有子二惟正娶李惟修仕为常山尉娶黄女四适黄元科黄大佑蔡一俊蔡贤继配曹有子四惟毅邑诸生娶洪惟方自教授入为国子博士娶曾惟藻娶韩惟浑娶卢女三适潘荣贵李惠袭谢朝宾孙男九一统娶黄一纯娶林一綱邑诸生一缤娶萧一韩一夔一致一叙一熊孙女三曾孙男十二女十婚嫁多名族志曰世所美言寿考令终多贤孙子至张翁备矣彼鲁朱家郭翁伯之流其谦退不争务行其德视翁若过之然要以为名使耳所谓阴贼发于心而征于睚眦如故也是故身挫家析而声施不克终若张翁者有一于是乎孔子不云乎枵也欲焉得刚翁唯不欲故其刚长获伸而人不怨夫岂惟不怨天且益之矣是宜铭

铭曰刚而无虐直而温张翁所以永存而博士用之以教胄子者亦其遗轨耶

奉政大夫同知南宁府事莲峯陈公暨配赵宜人墓志铭

故致仕南宁同守陈公以嘉靖己酉卒于家前是丁未其偶赵宜人卒而至其年合葬于小捷山之原故少詹事黄文裕公佐采进士王凤翎之状而表其事于墓矣而窆石未有志若铭盖三十八年于今而公之冢孙德基再为吾郡同守一日过余弇中而请曰事固不可知以王父之为长者而其葬也仅有表而不得志若铭以慰其幽然迟之三十八年而幸得遇足下足下能有意乎则王父死且不朽余故信黄文裕公言之核而贤德基据而志之志曰公讳志敬字一之莲峯其别号也其先自赣徙南雄之保昌宋有朝奉郎常者宦于广州遂即属邑之东莞家焉累传而至公之大父珪尝输粟助县官赐勇爵父缙少为邑诸生弗克仕凡有子五人公其季也幼而惇敏不肯从羣儿嬉稍长通经术补博士弟子令有陈宁者试公文而奇之真宾馆使二子从公抗颜不少假于令事毋所与久之领其省荐两上公交车皆报罢卒业太学连丧其父母持丧哀毁骨立时人称之最后复上公交车抵清河闸而同试者里人林载阳中漕卒狙击以死公曰林君去家万里卒死于外非我谁为白冤状治后事者谢诸同试生行矣吾独留为上书监司守令抵漕卒法调林君棺殓使舁首南而后发至则不及试矣公亦倦于其业乃就铨选得倅浔州以行一时义声籍籍故少保方公献夫为吏部郎赠公诗见意焉公于职专治赋乃创为规条白于上官行之不扰而办遂以材举连摄平南修城贵县三令事所至有声实见旌礼时议汰冗员公当在汰格而铨部才之改倅南宁所专治亦赋公理之如浔也而田州之役起始田土帅岑猛警而虐数钞畧邻郡总督姚公模奏讨之大众聚南宁者数十万咸责饷公公从容为经理无乏兴师进猛走死而其党卢苏王受者分紮其余众以叛势张甚时武缘为兵冲督府议守者曰所见惟王倅材他皆弗如也遂檄公与参将张经都指挥施震守之公至治战守具甫毕而王受果悉其众距城三十里而军鼓噪声动地经震惧不敌相顾曰姑摄戍而避焉可也公拔剑指天曰不谓公等惫至此张睢阳何人哉谓武缘吾死地也或计且以牛酒犒受缓辞止之便公复怒曰牛酒不以犒师而以犒贼何也于私计便于天朝辱授甲立睥睨间指顾方畧士争自奋于是经震稍恃以强贼谍得状逡遁去矣公自以劳进同守而新建伯王公守仁来代模意以二小丑可不烦兵而下召公幕府受计俾往谕之贼见公往惧曰是故守武缘使我望若金汤者也遂请降新建伯大悦寻移师掩入寨公以武缘之一旅从所部获级独八十余新建伯疏拟公为按察僉事兵备左江会病解任且卒遂格不行而林司马来代新建伯会讨忠江二州叛酋公复以思恩兵从破擒之州人犹汹汹公为经畧请迁卫周安以控其要筑城垦田次第抚循稍稍定矣然公绝不自言功赏亦不及而竟以老自解去林司马曲留公不得则极意揄扬公美给符传以行公之在南宁也有太平司理藺宗遠者以瘴死而柩过之已而其孤死其家人亦死独二孀在流落者数年而公倡其僚悉橐而资使还归關中關中

人刘正郎仕以谏戍南宁泣曰吾不忧死矣为文纪其事甚详公归不复及公家事觴咏自适而已而至笃老乃念其乡盐课之重困民援甲令言于朝被格具草且复上而以病不起矣得寿七十有二赵宜人者宋宗室后也温嫕闲妇规尤勤女红其治生劫劫達乙夜犹未休以故能佐公廉公得寡内顾忧其卒之年则六十七也有子三廷对娶于邓继蔡廷颂出继于从弟先卒廷封娶林继彭女六人孙男四履复益都履即德基隆庆辛未进士也孙女七曾孙男七燕毛燕喜燕赋燕式燕谋燕规燕臣孙女五公卒久之而学使者鍾继英采士民议祀于南宁之名宦祠嗟乎公以一孱书生晚际而当末位乃能出其绪而建屏翰之绩此必有大过人者而竟不获越五品使之返初服以老死格之不足以得天下士如此哉然公竟不名功倏然而去之抑何恬旷自快也夫其先友而从试事谊也损橐而济数丧仁也损身以完危城忠也虽古特立独行之士有不能及者宜黄文裕之津津乎其称之也德基娄治郡邑大较用公遗意而声过之然不以政繁而废忘王父之不朽于三十八年后可不谓孝哉是宜铭

铭曰是惟公与其室之蛻土厚而良鬱鬱生气以与德媿用克昌厥嗣

月潭和尚塔铭

万历丙戌冬十月廿又六日月潭和尚示寂于吾州观音庵之右室越四日为十一月朔茶毗于州之北郭归骨于室前方丈地为砖塔以藏之从其教也和尚姓杨氏以成化甲午生弘治己酉从师圆省祝发五台山嘉靖戊寅始受具足戒周行天下殆半于蜀邛樊山中最久隆庆辛未杖锡吾州吾与弟懋筑室居之九七十年而后厌世緣俗寿百一十三僧腊九十八和尚以不欺为本以无住为宗以弥陀为父以释迦为师以净土为皈地以无为为法事不谈禅不竖义不沾讲席无寒而已不备三衣无饥而已不强中食既得疾水饮者五日絶水者二日至夜分乃呼浴浴毕使僧维诵无量寿佛经倾听既终奄然而化晨大雾顷之开霁朔之晨复大雾顷之复开霁缙素会送及观者盈万人咸合掌咨叹以为得未曾有世贞乃即塔刊石为铭

铭曰以緣而成以緣而住百十三年始以緣去同受生者得忉利天备享天乐亦踰百年虽则百年彼称一夕或天或人其等过隙乃知寿者于我无涉无苦无乐非福非业以铭师塔师了不知我义坐隳铭亦何为

弇州续稿卷一百十

●钦定四库全书

弇州续稿卷一百十一

(明) 王世贞 撰

○文部

△墓志铭

瑞昌王府三辅国将军龙沙公暨元配张夫人合葬志铭

辅国将军龙沙公讳拱树者余友人奉国将军多燿父也元配张夫人公之父曰镇国将军宸渥为瑞昌荣安王覲錫第七子荣安王父为恭僖王奠墀恭僖王父为宁惠王盘斌惠王父曰献王权献王高皇帝之第十七子也寔开国于大宁已徙南昌仍故号公于高皇帝五代矣始镇国娶于李封夫人卒亡子而其媵乃举二子已娶于戴亦封夫人始举公已又举公之弟拱柠俱封将军如公号公行虽叔也然居嫡而是时王母鲍夫人犹无恙爱而育之宫公少岐嶷有智量鲍夫人故能读孝经论语诸书公学语即口授之俱成诵五岁就外傅日臆毛诗千言其明年进贤舒芬过公父以公■〈峻，女代山〉好属之对立应舒恠不测后状元及第每每致书镇国谓而家第三郎天上麒麟也好为我致声会宁王宸濠反尽胁诸同姓子侯从军而镇国抗义不肯从王怒而幽之金坟厂是时公九岁矣独与王母鲍及母戴俱二母日夜啼泣曰王一旦有天下奈而父何公笑曰反者徒自苦耳何法得天下且吾父患不与之异耳不患异也俄而镇国交關守者得脱独身跳投妇家挟一力走建昌而会王宸濠困兵安庆城下王文成公守仁乘间袭南昌下之市井汹汹一姬持公而哭欲与俱投井公拂袖入视二母则梁且纒矣公亟止之曰来破城者义师耶当诛反者不诛不反者且吾虽幼庸讎不如外黄儿已而兵至其别将曰王司理伟公出迎摄之曰公来诛反者吾父以不从反囚吾望义师若云霓耳司理竒其言而质之城人信署其门曰良且发一旅卫之公徐入而慰二母时坊市多中燹其焰距公门数步辄熄念独不得镇国耗而镇国所之建昌曰方宰铎者素善镇国镇国欲诣京上变铎曰毋庸也吾闻王公师已下南昌谍知实身卫之还邸镇国既闻公前后语大诧曰不谓九岁儿能办此吾殆弗如也亡何鲍夫人薨公哀毁称情至十五以例请天子为加封岁禄八百石仪卫二十八给朝服公服常服各一袭冠履革带称是有司治第择婚明年始冠行三加礼冠礼之不讲久矣独公與镇国行之人谓公故嫡也何以不居镇国邸即镇国亦留公公固让曰令甲自诸王而上始异封吾知有吾兄而已不知谁嫡竟市东门瓠脱剪棘庐焉而会镇国与戴夫人俱以悍王变幽苦先后得疾公偕其伯仲

昼夜东西奉汤药吁天请代疾寢剧公念以西剧状闻东则益镇国忧以东剧状闻西则益戴夫人忧每见必修容问瘳未则曰行瘳矣而戴夫人竟先薨镇国时时闻哭声又覩公状墨而甚瘳强起过丧所凶具饬执事井井知为公调度也收泪叹曰若尔吾复何忧亡何镇国亦薨公乃大发丧擗踊号哭毁瘳骨立既葬服除张夫人已被封诰矣而来归我夫人故名族也婉孌有志操既归公与偕之东门庐将军拱柠甫九岁有姊会稽郡君亦从公与张夫人抚爱之如子女为郡君择壻得仪宾王晓已又为拱柠择配已又请封册诸冠昏皆于公乎取公素好典籍积至三万余卷尚以不得东观秘书为恨上章请之世宗悦出御制敬一箴五经四书性理大全为赐公拜赐动色崇阁而严之公他亡所好唯好读书吟咏延贤士大夫折节为欢及好施予而已赖张夫人勤俭工治生累积纖微以寬之公弗问所从也甲辰乙巳间江右岁连侵公悉出蔵粟治粥于邸以啖饿者所全活众是时张夫人已举二子而多燿长有异质公敕与余德甫锺仲谟兄弟游为诸生业人或恠公官岂亦仿赵宋时开朱邸甲乙榜耶公笑曰此一代典制也使儿曹习之岂必藉是而贵亡何多燿拜封册而张夫人捐馆当疾革时执公手谢曰妾幸得尚主君有二子庶几见头角为主君室一弟嫁一女弟所以相为亦足矣实不敢私尺布寸珥之橐以负主君所歎者始不获奉舅姑终不竟侍主君耳言絕而暝公痛之甚为文以奠其辞甚酸楚既而叹曰古称文生于情信哉当葬张夫人请于天子以多燿幼不任窀窆欲挟与俱特赐许故事诸宗室送葬仅许一长者往而公之葬镇国也行第三不克从又居平不得出城闔恒心痛之至是治张夫人葬毕西驰以一中牢祀镇国及戴夫人于新建之石壑山伏地哭且絕而苏手益封树复西驰谒恭僖荣安二王园复西驰谒献王惠王二陵追感先德与叛者之倾宗社爰叹悲咤久之俱有诗以纪还治家庙修烝尝益饬曰吾嫡也不可以他委公故多读书而尤邃于天文遁甲奇门演禽太乙六壬诸家言当是时天下北被寇南中倭士大夫释绅衿而谈战陈大吏之宦于公地者太宰胡庄肃公松大司马凌公云翼御史中丞康公朗涂公泽民所得于公尤多而余德甫时已登第为尚书比部郎郎有李攀龙徐中行梁有誉吴国伦宗臣及余世贞者与德甫相切劘为古文辞有誉死而得张佳胤名籍籍一时或以比邨中七子多燿时尚少闻而叹曰铜山西倾洛锺不东应哉彼且以我非夫也强自力以诗及书绍德甫而先后通诸公咸赏异之其后德甫罢闽臬归公治芙蓉园以居多燿而时召德甫德甫兄事公而弟蓄多燿惟公亦时时解頤曰毋论德甫即吾与儿师友也公尤爱余若攀龙诗每诵则咀吟不絕口顾谓儿何李于弘正间擅大雅而我江右一熊士选不能当邾莒然且犹沾沾今二子主盟坛以若与德甫齐秦赋也顾吾偕若王父未尝一日而忘斯道乃章章于汝不亦快哉于是乃梓镇国诗曰玉降遗稿多燿请梓公诗笑弗许也公失张夫人请于朝得内助曰余余故贤然少不能省出入而公以义侠散之产尽挫厘厘禄入自守有傅宗正条者减削益甚至不能名其半子侯以下啐不平公徐谓诸君易不云乎穷则变变则通通则久我朱徧天下且百万指悉仰给县官更二十年大农之藪蹄涔罄矣胡可以无变通且若不见汉同

姓诸侯王表乎王之诸子一辈侯耳他孙则齐民也戒诸儿家别有宗正条毋三簋毋重丧毋多臧获毋辟丙舍而已诸子侯以下多佩公训而守之公少善经术既善诗至五十而益习养生然不事服饵御内烹炼之术超然有谐于叅同悟真之微指者一日受丹方姑试而验遽毁之曰异事果有之非吾分也至六十诵金刚经忽若有得者为偈赞之梓以施善信人筑精舍居高僧其中岁事八關斋月事十斋间召客饮取诸市沽而已四子皆已冠婚封册有庐产分月供养公戒四子吾不如陆大夫出橐中千金装富汝亦不以肥肉大酒溷汝共养厘厘足小得余羨飭沙门而已七十于精舍傍别筑深室鐫而寘之所时时晤赏者僧及余德甫锺仲谟二三子及德甫之子棐而已又二岁忽属疾四子皇恐召医且祷公挥手止之至稍剧悉屏谢内助余及诸姬侍独四子二孙在侧顾谓吾生辰近矣汝曹慎之多燿问所欲言则曰汝在吾何言诸子复问之则曰汝兄在吾又何言季冬之三日忽起具衣冠南向拜手默祝已西向跌坐举偈曰六根元是幻三昧本无声圆融起觉海无灭亦无生复举偈曰痛觉贪生顶法王三生无住即金刚刹那了却人间事直至威音大道场已而谓多燿为我延高僧助我西去僧自海上来者召之入俾对跌坐夜初更中庭白光如昼异香郁然踰时始息而公目闭唇若微动手数珠若诵弥陀者至明而绝其日即公生月及日也公长几八尺丰颐修髯玉立山坐抗声若洪钟斋庄盛服俨若神明其燕处布素而已与人语煦煦和易尤不喜置城府生而孝谨得父母心事二兄甚恭二兄见之恍然自失曰此国琛非吾所得而弟也友爱季尤笃季之服张夫人丧降而子曰谁鞠我育我者业蚤夭公拊棺大恸以其所佩带并出藏币敛而曰恨不汝偕也抚其三孤与伯仲之子无异己子矩度详雅为朱邸所矜式既为德于其里久每出入人延颈而祝之所著龙沙集九六卷藏家塾于乎以公之材行使得入佐明天子当坐论作行之任即不敢论周召去东平齐献当何异又不然而受鲁卫之寄亦可以仁用其民而仅奉一祠官禄泽不过九里名不出一方虽穹爵高称胡益哉陈思之所以厌逺遊而请戎弁有以也虽然公始而好经术既而好诗又好玄学晚乃大扫之决无明网归大光明藏即帝释轮王不足以殪公目睫而况区区纖芥宰官哉临化之际厥有光景拘方者以为幻呜呼公之所坦然而自得者亦宁幻也内助余能祇若公以公薨故哭泣哀思歲余亦卒公自树德有子四长即多燿攀龙诸子集中所谓用晦者也配车氏多爨配廖氏继配程氏张夫人出也多颀配金氏多颀配王氏内助余出也皆拜奉国将军配皆封淑人女四长高郭县君适胡山次钦江县君适黄识次南懷县君适闻一诚次怡亭县君适熊良遂皆仪宾孙男九谋齧配郑氏谋佳配王氏俱拜镇国中尉配皆恭人谋墩谋壘谋童谋垓谋■〈土量〉未封余未名女广惠乡君适龚燮阮溪乡君适熊宜高新浦乡君适程一豹俱仪宾余未封曾孙男二女二多燿既以合公与张夫人窆于新建之桃花乡王公冈而内助余祔焉天子赐之祭三而谋志铭于余德甫德甫卒乃手事状累万言以属世贞节而志之且铭曰

是墓也藏上高皇帝五世之仍孙贵不敌德以裕后昆既硕而蕃虽则蕃硕贵逾不
敌何以讎之曰令闻世世无斁

广东高州府知府致仕进阶中宪大夫东山徐公墓志铭

世贞少尝读两汉书慨想其世材之盛而最后颇考镜大明公卿将相之业以为无
愧色而至于循吏则未有能如朱桐乡卓密县者嘉靖中守尚书郎数闻同舍郎称句容
令徐公前后治邑九载其纯白之行惠利之政当为天下第一然所为第一者以实不以
声当是时心沾沾自喜以异日不即死而有事乎兰台东观之所撰述苟用句容令应亦
何下桐乡密而忽忽为事夺己而老且怠笔研矣里居时有惨服而币见者前给事中贞
明则徐公之子也谓墓公若干年而未有志铭于隧中之石则以慎之故今日乃藉惇史
足下足下其毋辞世贞因悚然以许而问状于给事则曰得句容之政而不能悉也其它
则悉之矣给事去补兵部郎迁尚玺丞遂进为少卿兼监察御史督兴河北三辅稻田事
而余间以过句容从其父老询徐公令时状缕缕不可指屈数大要云老人燥发来所见
未有若公者公天人也明年少卿所督治方报成而阻于中贵人移疾妇始具状来请曰
悉之矣得之句容人矣余亦喜曰征矣得之句容人矣公之始至句容也羸服坐一筭輿
延见诸侯人恂恂无所诘难诸侯人出相语輿中人诚长者第吾邑得无共黠豪而治乎
居三日公察一吏出空牒而用印内囊中搽得之诘其状羣吏皆叩首曰为一某亲故某
事补牒耳非有贿也公曰吾不治贿治窃印者卒坐之法已晓戒寮佐毋得擅揽讼及需
赋民钱而捕按其用事胥吏于是人人惴恐于法不敢有所舞公每受讼牒必命其与
亲识偕往从和处其不即和处者面谕使之心服间一扶之数不过十毋烦置狱然至于
武断力兼之辈不尽法不止也诸所催科受役预为之期过期而不至者俾里三老逮而
笞责之终不遣一隶卒下乡落隶卒列庭下如木偶亡所资衣食其黠者多自引去公既
益习民富贫与道里近远诸雇役之轻重必以资其受雇而役者必以便即田更村稚得
用身应毋使宿猾夺之诸赋长收赋于各区故未有定额司算者得上下其手公核之着
画一于册以示各赋区虽至稚鲁不受惑也邑故有赔赋米四百石公核其欺隐者应之
赋得所归不为累他运解费有轻重官故量资之黠豪趣轻而资重不相当久矣公已密
得其槩要诸豪诅之神而俾剂之既定为闾使拈各以分去毋恨色公恒谓即天子布大
惠安能人人赐租蠲役第在我曹酌缓急而已缓而急忧在民急而缓忧在国以故终公
任无失所者公之悉革一切浮浪费里正絰藉邑耳足迹不使至邑门亦不使至民户门
以为恒邑故称最孔道轮蹄辐辏取资于民不可计而公减旧额夫三之二马三之一然
无弗给者士大夫过从所馈不过筭器食不以贵重故加簋士大夫安公之质俭弗过望
也有废圃广轮数十畝公躬率隶卒辟治芜秽秋蔬果凿池种鱼闲养牧鸡豕客过宴饮
不必他资取诸宫中而用之客便欣然为醉饱去邑西距二十里东距白土五十里为冲

衢车马所践尘土坳积可三尺许遇雨雪泥泞及没股颠仆相尾公积雇役之羨甃石以道之行旅无所苦讴谣籍籍岁江南大侵民至屑榆而食而上方祠厘竹宫多遣中贵人方士醮神三茅山三茅公所治也叹诧曰吾民困至此而忍更驱之役或谓应天属邑八是不可分任乎哉公曰救灾恤邻古道也邻民即吾民吾何忍纾此而困彼搜故牒商引之金宿于府者请之中丞直指以供费公躬为经画诸使者摄公清严竟竣事不复有所干民忘其役然岁侵益甚穀价踊贵丁中丞发庾米数百石使平价而糴取其直于官公曰今流莩载道数百石之几何而徒以资余者彼余者皆豪也于是从时价糴其半还直于官而取余米煮粥召三老受而分食其饿者居三日报饿者起矣公按仓穀余尚多使称力分负以去其山谷间稍远者则就傍富人穀而取偿于仓公居平持法宽而至是独改峻有十七人御货而逞穀者公捕得立置之法曰是非饥民乃夙盗以饥文其恶者咸惴惴相戒道更名不拾遗公于单赤无所不极意而馭豪乃特严然不敢修怨于公视诸博士弟子犹子弟也岁时课经术论说文义饘粥膏油之费不乏而其鄙无耻者惩之又方于事上几用此得罪时应天尹汰邑庾故当有席富人谋之尹欲以席市公谢曰赋长已储之矣尹有所任直时胥下邑索吏贿不得醢而诟诸庭公缚而笞之尹怒曰是不有我也他日又以永康侯之币征教读吕某公报谓吕某者盖贾人子不习书不足以辱侯聘尹逾怒而会丁中丞又他有所下治荒者阔畧不甚称公以意格之且不平价余也而诸生见惩公者中以蜚语中丞恚公甚见辞色三日父老数千人拥而廷见称公贤泣涕数行下曰微徐令吾曹有填沟壑而已中丞意稍动下映阶曰令不宜若等故且为移之胡谬称也众遂大哭曰必移令请死于此因极叙公救荒诸奇策与居恒善状且诋无耻诸生谓彼不自知罪以小惩而中民父母民誓不与俱生中丞意解入都以语尹尹曰此强项吏好以抗上自为名移之便会中丞入内台有所举刺而公在刺中訾及公操直指使亦报命中丞要之同刺刺仅中考而已事下吏部尚书熊公浹怫然曰吾故闻句容令贤不减古人今不以举而刺耶考功郎邦彦具公前后荐刺语报尚书书论谪中丞于外而特留公时谓中丞力不能胜一县令可恠也然公绝不以望中丞中丞亦内媿不复及公公既以廉俭着声其下化之民有华冠而侈服者出必遇责曰何以见令君为具稍过侈必相戒令君知之得无不可乎积九载始迁工部营缮司主事将治行而民强留之弥月不得发争延请过舍治觞炙儿稚挽衣而泣曰公毋去我度不可留其长者曰公幸惠训我使我奉之如奉公公亦挥泪曰毋以训而曹唯俭与勤及忍耳俭则不费勤则不隳忍则不争保身与家之道也公生平不嗜肉食唯噉菜佐脱粟又尝图一青菜于堂曰古不云乎民不可有此色士不可无此味至是父老刻公所画菜而书勤俭忍于上曰徐公三字经也家肖公像而尸之朝夕必祝焉已又立祠祀公四五所而其最大者曰茅山谓公息民于荒独茅山之役巨故也公之在缮部议当筑外城而城址有犯陆都督炳圃者都督挟上宠横甚人谓避之便公曰外患未已何以家为孰谓陆将军不如霍将军乎陆噤不敢发圃分为二公出榷荆州商税举旧额裁三之一诸听推者猬集倍溢于故公属

其余于藏曰吾裁而得溢毋使后人增而取溢也事竣复与外城役所分坂最坚而又最速役夫不告痛迁署员外郎以功实授为员外郎督清源砖厂舟北者毋论势人達官必使附砖之将作大司空吴公多乡戚属以司空意请皆不免曰此法也法且自司空出迁都水司郎中治张秋诸漕河道故通漕者与通盐者近而不相接以故漕水溢则泛滥为田患公议筑减水桥于沙湾使相接漕水溢则有所通而不侵田少则有所限而不至涸工成至于今赖焉时司空进而冢宰幸臣文华代之寻督大军平东南倭所过张甚河渠郎迓送恒出境外币饷充溢犹不得一欸色而公第遣一介赍牒谒之云郎有事于沙湾不敢离也文华嫚骂投牒于地而亡何公以资重得知高州府或谓高虽远雄郡也公称名令久独不能名二千石乎公曰吾老矣安能役吾身以徼身外物陈牒于冢宰谢不之任冢宰已为高州更新守矣居一载大察吏冢宰司空比而欲绌公考功郎持不可乃坐公老令致仕公笑曰老自吾分何至烦考功令卧贵溪山中二十有二年非礼会不入官府迹可数也守令以时问政公言之无所讳于吏胥弊尤切听者为缩舌族贫矣立义田以周之足矣立义学以诲之又扩田于学以给俯仰同年之妇何嫠不能自衣食公力资之又推以资邑嫠之贫而励节者公于自奉俭不以老益簋衣絶泉帛然用施予故窘行视废丘之瘠得杜家山斥地招流亡授以牛种教之树枳相土宜通水利而率臧获与之分功而耕皆成沃壤时给事长矣公慨然谓吾昔用之邑不尽而以施诸家若既已习矣异日毋忘用世给事拜受教是故其居官首请屯田三辅兴水利虽不尽究然识者犹日望之公既有年德贵至大夫郡邑举乡饮争欲得公祭酒公为一之郡而已公生平无声色好晚节会闾里集子姓童子歌风雅濂洛数章谈说义理典故雍容竟日居家久提学御史耿君定向按部句容习公政而仰之时误传公物故者耿君叹诧檄祠名宦再檄贵溪祠乡贤然公强无恙也句容之民伺公诞日设醮迎厘于三茅祠下岁时讯问以为恒公至年八十五稍示微恙即却医药不御曰有正命在寢■〈谷丸〉拱手曰茅山来迎我家人驰之茅山祠告于山之神而公已瞑矣守祠道士夜梦公朱衣从数骑启扉而入呜呼神所凭依将在人矣岂公以彼士民之專思而精意有所流注耶公孝友天性重节义不寢然诺强直自遂信躬而行四岁失母刘安人未冠失父俭庵公侃侃自树立其奉大母周孺人继母艾安人尤孝谨属疫痢大作相传染众二母病■〈谷丸〉几不起家人皆避徙去公独身周旋其间卒以俱安为诸生工属文博通诸经尤精戴氏礼读书樟槎庄农有耕而乞火者公时占毕犹未已也尝莅一贵少年家塾遇骄佚子弟朴治之不小贷贵少年狎变童丽甚故出而留之塾俾恣其侧媚欲以试尝公公厉色无所连视以告贵少年曰是夫也铁心石肠人也一老儒生捧所习经有饥色艳是少年盛而叹曰经独为彼不为我公笑曰经非贵富人物也而所覬误矣公与少师夏公言同里自举乡荐以至谒选未尝轻造其门及夏公之再相罢而道被逮也公独使一老苍头侍行唯谨夏公从槛车中问而得之为感泣故御史杨公爵工部郎刘公魁给事周公怡沈公束先后以直諫下缇骑狱公损月奉橐饘而致之故善包御史节节坐与中人竞遂戍公范白金

为叵罗而铭之曰不愧明时无负此心以遗节然公有所为以自達其志而已不务为名高故少能举其事者公娶周恭人能助公为清白而不宜子后公二年卒置貳王孺人举给事后又置貳李举贞易殇给事即贞明娶于汪生子之洪置貳生之沛之洪娶于江孙女二巽德豫德许字汪学孔费元祥才而殇给事之状公行凡数万言余故叹盛世之才难伤贤哲之不可再而悲给事之致无已于亲也故采其事十之一以志而继之铭辞曰

徐出栢翳敦厥孙嗣以仁名世弃其玉几于会稽水族于太末之里乃自金溪迁于贵溪世不必显耒耜书诗公起孤童以行谊闻卓尔不羣褻然其文释褐公交车令以畿邑天降割于氓灾疹旋集匪公之乳哺谁适慈母匪公之诲治谁适严师匪公之储蓄谁适家督公令九载一切就理从稚得壮壮不流徙从壮得老老以乐死瘠改而沃雕返而鄙其民思公尸之丛祠燔豚炮羔岁时不衰公神其间而魄于百原之山百原之藏其碣高州守而不为其政三茅之祀其主句容令而官则三命是当曰明故二千石循吏徐公与汉朱大农卓太傅而并者耶

弇州续稿卷一百十一

●钦定四库全书

弇州续稿卷一百十二

（明）王世贞 撰

○文部

△墓志铭

明故中宪大夫福建按察副使午渠余公墓志铭

呜呼此明故福建按察副使余公之墓而世贞为志且铭之公故名应举用以成进士为其不雅而更之曰曰德遂字德甫公之先豫章士族祖泰父叙俱以尚书教授里中亦负隱德叙用公贵封尚书刑部郎是曰刑部公公之生其母万安人及刑部公先后感异梦遂大器爱公公少而慧敏总角受举子业即超然神解稍长从父授经于武昌朱御史廷立馆朱公尝督畿学政目中无全士见公文而惛然曰是子国器也砥砺之且数岁归就试适郡试甫毕守叹无可以当首者续试公大奇之遂以公应学使者奇公几如郡

遂补博士弟子屡试輒冠居万安人丧以孝闻服除应其省乡试中式名稍后朱公入为御史中丞道遇试目阅首简不得公名抵之地曰余生数奇乃尔耶夫人从地拾之起简穷而公名见朱公为张宴相贺公偕计至南宫不第朱公初弗使归曰生强为我游太学太学贤士藪也遂游太学屡试复冠时王襄敏公以旗为兵部尚书谋子师于朱公以公应遂躬造辟焉王公一见礼异公所扬挖自文事外诸国家大策亡弗筹者曾襄愍公铕为陕西三邊帅请大举搽河套有旨褒赏下部议王公亦以为便密咨公公对曰吾闻兹事实夏相主之夏相骄严相险而中为敌曾公且不自保何暇成功名乎哉亡何上果罢夏相寻逮曾公而猝命王公代之王公大服公欲以公偕往公念离刑部公久迫欲归王公留之不得乃谓明日当饯于郊至则公卿大臣毕集王公掇衣而门迎公且徧以赞诸大臣曰微余生教之吾殆不知死所且谓余生异日公辈人也于是诸大臣争造请公公竟不顾返其又明年乃成进士使于豫章邸却其馈一丝不以入橐乡先生故太宰熊公浹闻之曰乡后进不乏人明年还朝至冬始授刑部贵州司主事公精比详于法亡所刻纵尚书称之时歷下李于鳞与世贞相劇琢为古文辞而吴兴徐子与南海梁公实寔同舍郎赵人谢茂秦自布衣扬人宗子相自吏部楚人吴明卿自两制入与朋焉亡何梁生死谢生解而公与司农郎蜀人张肖甫继入公最名晚合然年最长而其事于鳞最恭于于鳞诗所涵济最深至公长身踈瘦眉目清朗不多食酒雅谈笑然简遠有準时明卿好狎侮以加子相辄不肯受加子与则受公憮然其间亡所加即加之公亦夷然不屑也杨忠愍公继盛以直言相严罪下狱论死严之乡人皆掩耳不欲闻杨公名公时讯问亡所避迁河南司员外郎寻迁四川司郎中亡何出谪浙江诸郡刑狱浙俗犷巧善丽辟然深文吏往往恶其情法时不蔽公平亭之其得出者咸自庆慰恨见余公晚大司寇亦无所驳异还理其司未几擢福建按察副使公至闽值子相理学政而子与守汀喜甚诗筒还往不絕俄而子相病且死矣无子公哀伤之躬为视含敛使其子棐经而受吊以其丧归入贺万寿还任时倭警虽少寬而羣盜乘时猖起延平徐子坚者剧盜也聚其党踰千人欲南连张璉以自固台属公捕之公选守令而下敢力深入者分兵为四路据险以待而多纵反间携其众为一鼓而薄之即阵斩酋首五十余级贼遂大奔溃悉为四路兵所缚凡四十余人斩及溺死者三百余人听抚者五百余人前是张璉起大捕杀掠江右闽郡县然不至延平而延平公所治也天子方震怒下大司马俾夺三司守巡俸误及公公不自明而至是公以功大当赎念不欲张侈其事力辞之台人尤以为难尝按部抵建宁台檄还署司篆已发矣会山贼反攻属邑之政和寿宁郡守一鄂间行报公公曰亟返郡当与守共之安敢以司篆解既而与守谋二邑无城必不守彼且乘胜而见凌我与守约兵弗精当坐我饷不足当坐汝贼果入二邑覘公师整而暇相守四十余日援兵至合而殲之台按功簿且上而会兴化溃于倭而止闽大比士公入棘监之所取知名士如赵秉忠田一儁黄凤翔杨束辈后田君会试第一人黄君廷试第二人余多显者公复入贺万寿大司马见公而知公所莅延平非失守地也已又能自匿功弗列贤之为疏请还其俸有

白金彩币之赐公道豫章里省侍刑部公甚适也而闽御史某之白简上矣始公为故严相里人然心薄之絶迹不造门及审谏浙偕诸曹郎辞谒入严出揖公曰余郎余郎乡人耶非今日吾几不识郎故郑端简公知而纪其事于文公以谏大藩劳得迁资不过蚤半岁耳而相严败人以公其闾左间批根语及之识者不谓然闽御史某公同年进士也疎不谙法公微规之御史阳谢公中颇不恚而邵武之司理与守构公意直守御史乃复入司理间遂指擿公冀以快忌者中丞谭公纶为解救不及而例且会疏因稍异其辞业当得勘铨部中亦有欲为公地道者而旨报罢矣公虽终不能无小慨然以得长奉刑部公甚快公出入中外十余年未尝一日废诗而至是乃益刻励自于鳞而上以至于古之作者亡所不究极于鳞慎许可其真公于七子中恒犹愤愤至是贻书世贞曰大江以西余生一人而已而豫章里中人鲜治诗亦不闲古调公墨墨不自得独国将用晦能为古调公折行与证尔汝交相倡酬亡倦久之名益盛海内操觚之士多纳履请益者公居官廉无余橐又以淫书故不暇治家人产市文之羨得少甘毳以奉刑部公及继母蒋孺人而其后刑部公卒公时已逾耳顺哀毁踰礼其丧蒋哀亦称之先后中丞直指干旌过从问政谈艺俱以公为指南而语及公出处则深惜其才而扼腕于例低回久之独中丞凌公云翼满而荐公一时翕然以凌公能知人不俗而太宰张公瀚者公故交也人谓且用公其与公善者至为画策愿得一书致张公必有以报公谢曰客休矣张公不知我故不用我知我亦不用我且我一山泽人亡世意久矣何至劳君方寸客愧去盗有窥公者亡所得发愤于公所藏书爇之并其庐俱烬公啸傲自若于是公之子棐谋筑室于负郭之隙地居直东湖北枕澹台南望徐稚西接苏云卿三高士祠公意乐之时时指谓棐曰是不异人意用晦以其与芙蓉园邻也数召公吟哦其间不别宾主诗成俾世贞叙之曰芙蓉社吟稿当公之壮时仅一子棐李夫人忧之为置媵送之闽公闻其衣冠子也却而不责其直汪司马伯玉为作却姬传晚节稍有所置多子然贫益甚人风公不为是曹羹粥计耶公曰棐在吾何忧即冻馁不至死既老倦客客至不办为具徙居武阳里课农自给城府之迹可数也吾弟敬美屏驹从过公鸡黍浹夕盖用于鳞留余白雪楼故事癸未春公年七十饮客而语忽涩步蹇饰巾待期至臈月四日犹与客论文不倦罢客后端坐闷瓮不言棐惊而问之亦不答气微微从口鼻出又四日而逝时万厯之癸未也娶即李夫人有五子长即棐太学生李夫人出娶于罗次盘聘于甘檠聘于魏果聘于何集聘于胡俱庶出女二一适诸生万戩卿李夫人出一字太学生锤允升亦庶出孙男二长钦耀聘杨钦■（火艮）幼未聘孙女一适喻应皋公卒之明年而棐始属状于用晦又三年而状成其文踰万言最为详媿棐携以来且请曰犹未归土也其卜在武阳南瞭芳湾之观音山敢蘄子之一言以慰于幽余不忍辞嗟乎当吾曹之相率为诗颇跌宕自放若不可一世人而世亦无有能见容者独公斤斤制行不苟与人必以诚信文彩无所露泄见而知其长者吾曹每屈指卿相必首公已公佐大省臬无害而予与于鳞早拂衣子相补外子与明卿肖甫谪若小验然未久而归者出外补及谪者迁肖甫遂进保傅为国柱石而

公以一瞥之故终其身丘壑不复振岂非天哉虽然公诗成矣其又有进于诗者天乎人也固不得而以世法轩轻也

铭曰大江以西有派其诗作者实繁背风雅驰余公一人起而振之力去陈言而古是轨遂超羊肠以陟熊耳俯视尘世辙乱旗靡位不蔽德文士之恒繁后而贤补之以羸呜呼余公即安而宅我辞苟行过者必式

承德郎温州府通判淞涯潘公墓志铭

当隆庆万厯间故御史大夫上海潘恭定公偕其仲氏温倅公叔氏比部公季氏光禄公咸以笃老致其官归恭定公筑堂于别圃名之曰四老约以佳时相过从而诸子今学宪方伯都事汀倅监事诸君咸盛衣冠治醪糗执子弟之业四老人隗俄其间雅歌投壶谈笑甚适也海内艳称之以为唐宋二洛社不必出一姓魏之杨氏虽号为雍睦然刺促官守不敢以愉乐显明之毘陵近之矣而不必贵兼之者独潘哉盖十余岁而恭定公卒已而比部亦卒温倅公惘惘凉凉悲思牢骚四老堂之迹遂绝而又五载公亦卒矣公之初不豫也时汀倅君方之郡便道省侍而学宪方伯皆里居公忽顾而泫然曰我潘之先累世为德而锤我兄以有若二子而德不衰今者乃闻诸子姓有舛惰彥肆日将隳其先而噤不一聶之非所望于贤者也因泛澜久之明日语益惨且加絮泣数行下学宪恠语方伯此何祥也属元正公当从之公庭祝厘以病辞越二日为公诞辰举家庆者亦以病辞盖七日而竟不起时万厯丙戌之正月十日也公寿八十有五小于恭定公二岁耳德亦鴈行唯是少不得志于科第屈为小官然亦有以自树显不苟徒焉已也公之先为邑名族其详见恭定公状志中公生而警颖端重异常儿稍长通经术能文章会其父赠公罢项城尉归倦于家且宦薄而公独颀其绌以共赠公夫妇朝夕而宽恭定公及比部于学既恭定公成进士久之比部亦举乡荐公乃补博士弟子以例升太学上舍谒选吏部得为光禄寺大官署署丞大官虽名为一署于他署剧且总其凡公精心为之持以廉节时卿黄公养蒙少卿龔公鍊事取公而决岁所省上供费以万计中贵人请脩一夕之需为欢公知其欲见尝也逊谢之自是不敢有所干于公时恭定公自大司寇领台事公杜门谢绝记吏还往有台狱白而推恭定公感者以百金酬公公大惊麾出之咄咄榷门牡寻奉命颁殿工于江南诸郡自常廩外馈遗亡所受务隐约折节恭谨若不知有恭定公者还朝考三载绩阶征仕郎寻奉本署正明年请急还里已复除故官当庄皇帝之初即位诸郊祀时享宴赏大典所取办不费且事久旷废公沛然应之有余执事殿陛中荐爵奉胙进止雍容是都上亦目属之故事官散廩粟往往用新而置陈陈者至腐不可食公请于卿自陈而新以岁差次着为甲令自是廩粟无留腐者公所更定甚多诸宿弊若扫官吏洗手而治迁温州倅温名郡也近而饶公念恭定公已得请便道还里依依不欲

往恭定公强之乃往甫踰月而竟投劾归台使监司羣挽之不听曰吾奈何以一倅易吾兄弟哉公归所以奉事恭定公笃爱肫肫其字叔季如之四老堂所繇筑也公读书通晓大义然于孝弟忠信自其性得之不以名闻年行矜人虽单莛后进来谒未尝不自抑与讲敌礼也尤仁慈讳称残刻事与人语煦煦惟恐其忤之然至海戒子义方斩斩矣居恒谓天道福谦人情忌满俭嗇保家慈让养德知言哉公归后以次子汀倅满光禄考进阶承德郎勅辞褒予甚至而元配王亦自孺人进安人王有贤行先公卒公感而不复娶恭定公尝为铭其葬丈夫子四允修太学生亦先公卒娶赵继宋允征光禄寺掌盐署监事娶赵继何复继赵允達所谓封公者也汀州府通判娶顾封孺人俱王出允光太学生娶倪侧室张出女二长适太学生张所毅侧室朱出次适瞿弘词而天亦张出孙男六士彦太学生娶杨云杰邑诸生娶顾云棐太学生娶张云章娶俞继芳邑诸生娶张云皋聘陆孙女一字石长芬曾孙男五明屏聘釵明翰聘支明锡明昉明藩尚幼曾孙女六一字张氏子一字徐氏子余幼末字允征闻讣还偕允達等卜葬公于肇溪之原启王安人之兆而合焉以学宪君状而请志铭于余学宪君名允哲与余为儿女姻而余故庄恭定公不敢辞

铭曰乐有三而公得其二福有五而独公之备乃犹羸其一曰有繁喆嗣夫不知公者以公之兄不知公详者以公从子之状而余之志与铭余言若新公亦若生

曹母陆孺人墓志铭

曹母陆孺人者其先吾州之双凤里人也父某工为医母曰龐孺人婉嫕有志行善女红未笄而归故宪副曹公達公时为御史以直道谪名声重一时其所偲顾夫人有子曰巽学成乡荐矣公犹自念其嗣单故复娶孺人其后更有所置曰某顾夫人严不易事孺人宛曲供奉之遂得其欢心而抚某若姊姒然以故公益重之其守岭南移守滇己副滇宪孺人俱从生二子官舍长曰晋学次曰益学公宦先后皆饶地孺人斤斤职浆■〈施，酉代方〉慎门牡而已他无所染指公性素俭既归愈拮据生理孺人一切承之以勤约奉顾夫人益恭及其卒而所以侍汤药含敛亡弗诚信也公老而康强无疾开八袞以终孺人犹大恻欲死殉之不获乃抚二子曰吾所以不遂从公地下者为而辈未成长耳遂长斋断葷味二子泣请曰畴昔之事公为政母几不得再肉而今者颇有余橐以共母胡自苦乃尔孺人竟不许当二子之在髫髻时孺人督课之读书甚苦至是乃益苦曰而不任负荷使我何以见而父地下于是二子立矣游太学补上舍矣晋学娶封少宗伯王梦祥女益学娶太学生王懋学女而俱良矣孺人乃叹曰自吾事公以逮为母逾五十年未尝见日而起不丙夜而宿也亦未尝先诸佣饱后诸佣休也吾今者有托矣衰且不任矣始分就二子养月一过从掩闕诵经敕毋得以家溷若媪始孺人之事公得一钱辄

授扑满不轻出至是稍稍以瞻窳戚缮桥梁施榑掩骼有假贷者至并其母钱负之亦不甚较曰吾夙世逋也陆翁与龐皆老孺人手以寬乐终而礼葬之恤其二孤至今今年丁亥正月孺人年六十九矣忽感末疾不良行二子侍汤药渐有瘳忽谓晋学曰吾欲及我之目而若冠带也且若妇之母王太夫人在燕中念若甚可一往见之谓益学汝姑在我侧晋学勉行谒吏部选得鸿胪寺序班俄心动辞王太夫人以归则孺人以六月十五日寢剧不起矣晋学道闻丧匍匐哭甚哀已谋之益学将以九月之三日拊公兆而请状于龙溪令沈君俾世贞效志铭于墓中之石余故尝有所效于公且从二子遊而尤与益学善其何能辞孺人女一适太学生归道传孙男五接武聘南太宰袁公洪愈之子某女云武聘诸生王应宾女賡武聘太学生周秉文女英武步武皆幼女二一许字周进士玄暉子公績一尚幼皆晋学出余详公志铭中铭曰公所谓俭师之毕身稍散以施则取吾仁教二子成用以报公是曰地道无成有终

中大夫山西等处行太仆寺卿岩泉徐公暨元配吴孺人合葬志铭

当万厯丙戌之九月而徐公以吴孺人地下之辞来请曰是妇也而贤且有德于不穀故敢以溷子然徐公病矣墨而柴瘠蔓语不相属余私恠公独不为己地下计乎居无何公病寢剧俄而卒时十一月之十五日也明年七月其孤之长者曰遵礼手公事状率其弟来拜且泣曰葬有日矣以下执事之不忍于吾母也将必不忍于吾父也其均惠之一言以慰死者余与公同年契厚无可辞按状公讳爨字明宇家世受耕读至父溪轩公奎举公而公少儁朗多异征季父东林公盘时未有子抱而育之以至长则风骨遒劲能读书属文有奇气烨烨东林公生如公者四矣而爱公甚不忍归溪轩公遂为之择配得吴孺人年十九而适公公时年十八明年公试于台为第一遂补博士弟子员公于文益有声姿试辄冠教授弟子多显者凡十年举乡试又十年成进士释褐湖广长沙府推官公故贫知小人依而又在公交车久暂于事故任不能数月而辄负察廉声寻丁东林公忧归念不能以禄养报痛至毁服除补武昌府推官武昌一大都会也其剧倍于长沙时而又属大侵萑苇之盗猖起公精心为之察冤理滞而又能佐其长以机权购募盗多就法其署兴国州州有子杀父者以巧匿之有非盗而见诬者拘成案弗获理公皆钩得其状所操纵若神民大快服暇则延见诸生与谈经术课文艺彬彬矣以卓异征为四川道御史亡何溪轩公亦卒或疑其服公曰吾所后父在也则压而弗敢举吾向者已尽之矣今乃行吾哀耳遂奔归其毁如丧东林公满三载改补山东道督视两淮漕政前是有大相之嬖曰中丞鄢懋卿取其指横增漕课至数十万缗商困甚以次破产至有雉经死者公得其状上书万余言请悉蠲之报可公为诸生时所治经取当心己不帖帖章句学而会得王文成公守仁传习錄读而服膺之曰道在是矣是为善言程朱者而公所称即文成亦不一一步趣其说识者曰是善言文成者公乃出故着四书初问大集诸生亲为部

解俾转相诵习而今少司寇耿公定向方督视学政与公往复下上声籍籍流闻京师后相徐文贞公阶方以讲学鼓舞一世故用蠲黜疏器公而益竒之公遂改督北直隶学政公外严而内宽取士不拘泥成说亦不采宿誉而能得之骊黄牝牡之外以故所识拔数多取科第为时闻人京兆诸生击滥籍者事闻上以属公公念古不禁游学即非负私自匿请一切宽之使得还故里校报可以三载最赠东林公如公官而封母杨太孺人寻迁按察副使督江西学政公所张说约畧如直隶时而法加详其得士尤盛公之督鹺两淮也漕中丞故尝守吾苏而公预荐及是欲责公弟子礼公以方共事不之应中丞内衔之后三迁为大夫总台事而又入他流言数贖公迁为山西行太仆寺卿实左之也公之官未几大夫复司察遂孽公归公以盛年雅望一旦中单辞见罢亲故亡不扼腕不平者而公坦然不为动唯转徙乡落与吴孺人僇力课耕织稍得岁即以其羨益拓南畝而已非公事未尝辄入城府其足迹可数而计也吴孺人者性沈毅有识虑其始佐公于困一廛之室逼市器而处夜则机杼声与器声杂而夺公书声公恒笑谓此一部鼓吹也簪珥之余时时辄以共东林公夫妇甘脆不后他妯娌矣为公生二子鸣国鸣阳皆未冠应诸生试有声以一时天公时有淮役痛之极不肯行孺人敛泣而宽公曰数也且上恩未报二尊人未沾一命奈何以小孺子故弃髦之公为强治行则曰商■〈谷丸〉矣商■〈谷丸〉国亦■〈谷丸〉如何及其两视学政也则复戒之曰贤才国之桢也善护持之勿轻挫也公皆纳其言而会有给事中者以蜚语论劾公恚甚应之方具草孺人曰毋以甚也上当自悉公且夫人臣以辨为名而效尤焉毋乃不可公为削草之半及疏上果以给事轻率而公忿戾俱镌禄二月公始改容谢孺人吾三用若言而验一不尽用若言而悔若吾益友也孺人为公寘侧曰张凡四载生遵礼孺人喜剧抱而谓之曰而来何迟也其乳哺加于鸣国三载遵道生视如遵礼又三载遵德生视如遵道孺人念张之三举男子也又甚恭而练事也渐以家秉委之公是以益贤重孺人既歿而哀之深也公天才警拔其为诗及古文皆匠心而言纵横■〈足必〉跋电击风驱使人不敢正目而矚两视学名地贤士大夫干旌造请饷遗慰存无虚月贖币而乞言者时时有之以故晚节不大落莫独吾东南儒生以藻丽相煦沫毋讲学者公默默不自得亦毋繇一吐其蕴蓄然至所著书亦足以自见矣公秩不过三品敷歷仅五政不能尽其用于国然淮鹺一疏为县官经久计岁完数百千家又能械朴两名地之瓌材以资天下器孺人为公举两子而失之亦不能尽其用于家然能躬操俭勤以植公产长顾纾思以良公官二父二母均养有终以成公孝而所树媵貳培之沃之以昌公后公与孺人用于外内不同其合于上臣以人事君之义一也呜呼休哉公既丧吴孺人忽忽鲜生趣以至病病剧且死乃呼童子口占五歌使书之皆言去逆旅而归故乡又乐其得所而中间叙致逍遥倘徉之状潇洒自得有蝉蜕污浊驹隙千古之意其辞多不録録其大较云公以正德乙亥生以万厯丙戌卒寿七十二孺人以正德甲戌生万厯癸未卒寿七十所著即四书初问及太极测定性释徐氏残编南还日纪琢玉新声若干卷子五鸣国娶项鸣阳娶时遵礼太学生娶魏遵道

娶吕遵德娶赵其详见前女二适太医吏目王三纲浙江布政司经历朱世昌皆前卒独堉存墓在盐铁塘之某字圩铭曰骤予公而夺之者臚仕耶骤夺公而予之者今子耶将无夺者数而予者理耶则夫公之学或彰而或晦者要亦若此尔公止矣俟之而已

处士双溪颜翁墓志铭

复圣颜子之后裔有一人曰祜字廷用其人生长闾閻不能诵臆其先之遗训而天赋龐茂于义质信成有闾合而不至背驰者然生业颇温厚年九十一多贤贵子孙以乐寿终视簞瓢之天盖三倍其年矣造物者为有意耶为无意耶末季之天日以漓有能完而不尽琢者固其所独私也复圣之寿在万世而颜翁之寿仅在一时虽然亦不愧其为后裔矣当复圣之后多有以文学忠节显者至宋而为尚书左丞岐扈高宗渡江居樵李之石门镇能间關抱其五世主不失常其所居村曰陋巷以志不忘本其后族益蕃居石门者有东西颜而最后遘蒙古之难转徙上虞为衙后颜慈溪为颜家葑颜而陋巷村之颜自如曰瑫者翁之王父也曰嵩者翁之父也王父娶于金而天金能矢志至老被旌抚育子姓以耕桑起家及翁而益饶少夺于父母不获竟经生业然慷慨有大志居恒谓其子大化曰家自复圣公五十世世受儒何自中絕哉吾居则惭吾姓祀则惭吾先孺子勉之自是大化负笈而受诸经宾于学宫矣翁天性孝友其积财能以义散之仲氏祥赘于沈受沈橐不贖矣或谓法不当复割颜产翁弗较也而身居其瘠及仲之歿而二子孱寢削则又为之经纪之从子楠窳突无烟翁曰吾为燠若突也仁至欲溺其女翁曰吾为女若女也以次衣食其宗党姻戚他待翁而室家者指不可屈计而翁忘之不以为德尝出钱百千缗于肆里中儿善祛篋者数憎焉以资饮博家人司其状语翁翁曰谨避之耳吾何忍轻被里中儿盗名以是咸服翁长者而黠客缘而挟诈贷翁钱翁许之或曰是不可许必并失母翁曰侠士许人以身尚殉之母钱之几何而市吾信卒授之弗归弗较也当明之世樵李为桐乡属有岛警议城焉翁首捐帑金三百助工费且分功畚鍤间以倡诸役者城成之十年而岛寇至不可破大化举于乡矣翁用是得发舒邑令礼翁为大宾岁岁不废然翁为之一二赴不数数也又以例推翁寿官予冠带公亦不时御至大化萎不利于公交车谒选得楚之黄冈令调蜀开县后先五年问有所遗翁若絀帛者翁犹诘之曰月俸来耶毋令脂污吾目开令良于官偶有所不悻移疾归意翁必见谄翁殊喜谓开令曰劳苦三峡怒湍天殆更赐我一儿翁素强无疾大耋之辰举白进炙无筭明年忽奄然而逝将属纆执化手曰毋厚葬毋以车为椁伤我先复圣风得贤者一言如曾氏之称先友足矣翁娶沈继贾子一即开令娶亦沈继项女二适王九思丘应兆孙男四长学诗光禄寺良酝署丞娶顾次学易如兄官娶沈次学文邑诸生娶沈次学礼邑诸生娶沈孙女二适诸生钱梦衡张世卿盖翁卒而开令亦已老且用毀■〈谷丸〉不任行乃手具事状以书属其子学道介文学蔡某拜而请志铭以终翁之治命蔡某余故所知也学道

美而才余所赏也夫是以不辞

铭曰猗我圣亚庶乎屡空不幸短命命乃无疆有后于斯朴茂且龐富寿而康子孙
载昌唯德之良俎豆其傍弗忝厥祊

弇州续稿卷一百十二

●钦定四库全书

弇州续稿卷一百十三

（明）王世贞 撰

○文部

△墓志铭

明诗人莫公遠墓志铭

莫公遠者名叔明公遠其字一名更生字延年尝读短长之书而觀所云寒泉子者慕之自号亦寒泉子今年七十有六矣一日踵门而语余曰吾病已甚以语医医不知也吾数行尽以语日者日者不知也及冬吾必死及其未死也而有请于子吾始自长洲徙而武林也善张九华周兴叔二先生为我卜筑得武林之湖墅下關门前有古树清流其傍丙舍可以栖妻子吾欲即其地坎焉为木椁周于棺棺周于身预寘坎中死即埋我石碣二一曰明诗人莫公遠之墓一树子之所撰志铭令后世知有我足矣余悯而许之公遠生僻好为诗年十七八即已能为老苍语久之愈益苦其思务于人所不经道险诣卓絕以为功以故鲜有赏识之者而其自喜于诗则益甚遇广坐受牛饮蝸谿丝驰肉飞红粉杂沓而公遠呕呕苦吟自若也若了不相涉者家事大细不复问一切失得忧喜懣快悉委之诗又高自标置时谓人近出语忽忽不適人且以岑嘉州我乎则柰何于是数见讥困少年贫亦益甚其在长洲时郡守济南金城材之辟为博士弟子所以扬诩问存备至晚节抚吴中丞宋望之爱公遠诗与备宾主且曰世人皆欲杀吾意独怜才少陵氏殆为吾子设耶下书溧水令校刻公遠诗公遠尝应吴令莫抑聘教其子与齐与齐后显贵为具武林訾良厚公遠生平食息居处皆自故人而其感独金君宋君尝走济南哭金君墓寫其遗像归奉之其谈宋君未尝不歔歔慷慨也曰天下不乏贤谁知已者又谓余吾

年七十四而诗始成余日亡几诗更当无几何若而可余笑曰比于朝闻寃矣公遠亦笑而已公遠有集数十卷先后刻行世始妇钱继妇孙孙举一子颖一女满皆婚嫁先世墓在吴齐门外之金鹅乡

铭曰长洲生武林死中游燕齐逮楚尾独诗与穷相终始

思恩府同守致仕累封通议大夫兵部右侍郎兼都察院右佥都御史双溪陈公墓志铭

昔孔子赞易于干而以刚为天德之首退而求之斯世喟然而诧其不可见及得一人焉而竟以欲病之夫欲之必足以累刚而后刚之义益显若乃生今之世其居然称先辈而终始以刚就者吾真得一人焉曰闽之长乐陈公夫刚者可抑而不可使之屈陈公束发登朝厯州邑者垂二十年而秩竟不能过五品其见抑甚矣然卒能奉其志以终其身累崇封飨上寿子孙绳绳大者国桢天之所以伸其德者固在也第终公之身而未尝有暮夜之知兼日之奉庐取庇形食取充口而曾氏之商歌铿然动金石盖公之刚不完于有所胜而完于无所欲也余十余年前备乏楚臬从公之从子右伯今大司马瑞游颇能言公事而入领太仆复从公之子中丞今少司马省游因复益知公归田以来时从少司马候公杖履尚无恙而至岁丙戌少司马以书来则公用癸未十二月捐馆矣明年少司马复以大宗伯林公士章之状万余言请铭其墓中之石余既游两司马而慕称公则何敢辞公讳大濩字则殷双溪其别号也陈之先世为长乐之江田人八世祖文海迁古县至公而复居邑东门自文海凡六传而至盗尝冒死上书脱其家世遠戍归而食贫然能强行善教授六子皆不废学术而显者大伦以子瑞贵赠兵部尚书大用为监察御史后知常州府盗赠如御史其少则公也公生而母高夫人梦鹤栖于膝已诞生公顶砂宛然少挺异渊庭山角声如洪钟读书过目辄诵九岁通经义十三补博士弟子十九应乡试不利明年赠公卒公哀毀逾礼服除与常州公并僦于乡公念赠公之不及见也痛几絕遂捷南宫明年始第进士授知上虞县上虞饶巨室俗习为机利其始少公而易之公曰而公所与偕者三尺耳于豪右无所纵舍然其大指在单赤务察其所欲恶而行不取上官指又不肯脂韦贵有力者暇日诣学宫延见诸生谈说经术执文傍及闾閻疾苦津津乎言之也以是父老人加额以为百年所创见而黠奸吏日夜幸公去贵有力毋为挽者坐蜚语调湖广之永兴未上以高夫人忧归公痛已之不及视高夫人歿也毀加于失赠公时服除补河南之光山公于吏事益精习其所以裁豪右席单赤者如初指邑苦饥公便宜设法賑之所全活甚众时方塞汴河决台檄公以光山民就役公持不可曰夫强鹄形民徒步千里势不半达即达不享役当享归道耳数请乃别以僦直往始报许邑人大悅诸台荐剡交上诏征令长最者入补给事御史公故从调补法不当征而相国张文

忠公一切更法公得征而张公公同年也时时为人言公循吏有文然不一通我岂薄我耶公知之益杜门弗肯往而上虞之故贵有力者得伸其沮公所试论见赏铨曹中至传诵而卒报罢仅通判广西之高州府公以才数见属署邑篆至则申明高帝六谕约勒闾右什五为保甲择高行者长之奸私无所容迁知湖广之道州公至谒周元公先生祠而矢言曰所不奉先生周旋者有如日公于政无所不宜其行意益如故或风公姑少宽公曰我未尝严特小不彻廉隅耳彼业溃之而顾严目我何也盖公之佐与抚臣有连恣为鱼肉公持之急故托风公至是度不可解则构公于抚臣论调补山西之隰州隰故有四门榷皆守帑中缙也公至之日悉罢之民方颂服公而嗾使者汰按部邻郡或谓公当趋谒公以非所守弗谒也怒而诬劾公铨曹格弗动然竟以难使者迁公思恩同守思恩故外地十岁九反前后游宦无任行者公单车往至则摄郡事城故无井公乃辟水關引溪流入之民以无忧汲又筑庵庐六十楹于睥睨间以栖直者公故深王文成公学其在上虞时尝以教授诸生大有所阐发而至是谓文成公尝填抚其地思人信之而卢苏王受者故以夷归命文成者也二人死而余党出没山谷间假沮欲窥郡公按文成故法抚之咸自缚请降誓不复叛于是属城绅衿彬彬称文成学矣复摄横州横亦治而公以倦遊思归会省辟试场从事甫辍棘投劾遽归公一佐郡五长州邑足迹几天下半其行能不尽录数憎白简然未尝几微见颜色独其事上官岳岳自信不一改而露脂韦馥馥之态所莅精心为县官牧小民视土豪巨猾若雠去官之日幙被萧然而已归家几无以具饘粥有田二百畝顾瘠甚不能与岁敌日教授里中儿自给时时摘山蔬佐脱粟甘之若太牢大布之衣大帛之冠亦必再澣即子姓诸妇亡敢以轻丽见者屏居爱影足迹不复坠城府朱中丞紈按部至闽亦公同年也清峻少许独慕公欲见之不得叹曰吾故不能屈陈仲举耶方伯萧某邑令吴遵詹菜亦之然公故遘俭岁官责赋不能偿家有酒鎗坏而应之然至稍宿禾廩靡不共之宗党戚执也貌严冷凿凿论议不面假然未尝称人恶以故里中公为三老事取片言而决小不若淑者畏公知甚于官府公居恒念其父母养不逮禄语及必泫然晚节诸兄皆前逝独最少弟则纯在公爱之甚每一周还辄数日不舍而其诲诸子羣从极严大司马间受书失指公索杖欲捶之赵淑人抱而泣曰伯氏所寄唯此儿不任汝捶公为弃杖而泣乃已甚爱少司马而所以御之乃甚严诮责时过当既而曰吾非不悔吾甚迫欲成之不得不尔少司马释褐司理金华公犹疑之为一至金华曰吾欲以观司理何状闻金华之人颂称之若一而后已至其入拜御史按决荆狱董畿学佐理中台两抚秦楚公必以书及诗戒勗之凜凜乎霜雪也又昭昭乎著蔡毋但少司马素慑义方必不至头触屏风矣忌少司马者以才而更齷齪之识者曰此亦刚之效也公所以授也公既絕迹不复与公家事属岛寇大起且逼长乐有议欲移家徙郡者公张目谓曰若不被一上衣冠耶而忍兽窜以为民先悉出家所有醪糲粟炙身乘城而鼓之诸士大夫咸自奋与卒伍分功而立睥睨间凡三日贼败去移攻福清顷刻就屠邑人自是益归德公公素强无疾老矣食酒噉肉不衰会少司马自武夷还公呼饮剧醉至夜

分顾睨曰孰与若丈夫自是饮辄剧一日忽谓少司马吾体中气憊憊得汝乃王自是少司马侍寝榻下者五十日所夕促命粥尽一堦已命酒凡数行欣然谓少司马吾归矣生无益县官慎母烦将作治方中若姬时也又谓生不妄过人饮及名人一钱毋受祭及贖已而握少司马手曰好为之以未竟付汝矣遂坐而逝喉间声若雷吼者竟夕始敛呜呼公之刚于易筮之际犹见之所谓浩然之气塞乎天地者非耶公于书无所不读谈说道理博识今古若指掌为文章雄浑明白要取达意所著有毛诗四书口义春秋集传读易管见双溪拙稿和陶杜二集多传世尤自谓于春秋有所发挥其持论是夷齐而非汤武以追项籍取刘璋为张文成诸葛忠武罪人莫能难且曰是亦刚之伸于识者也公生于弘治戊午二月三十日卒于万厯癸未十二月十六日寿八十有六葬古县之九屏山配及子女婚嫁具如左

铭曰才不以刚才或繇径以刚用才才苦未竟陈公刚德乃自天性九折不回百炼愈劲秩不登四仕已六政归而著书其室县罄千载殷周独任廷诤首阳之墟大义彪炳晚以子贵娄被国庆既崇章绂复考终命人亦有言斯乃天定匪天始定吾理常胜

处士观省张君墓志铭

余读赵武部之状张君而知其贤也其称子也能不替父也其称父也能不■〈目匿〉子也夫张君虽贤一里人也死而有武部状之足不死矣而其冢嗣修德未已也益以手草事行数千言而顿首余庭曰天乎不肖孤所以未遽已于吾先子者盖不容已也其不替吾王父也独丁其艰今之死也将以成报之其不■〈目匿〉孤兄弟也以玉我于成也今兹甑有成矣而忽弃孤兄弟以死何以报先子也唯公幸而惠之一言以贞诸石先子死而生即不惠之一言不肖孤生而死余怜而许之君之先自留文成侯其转徙者籍楚州至逵而从宦于常遂家常之江阴七传而为景六又四传而为赠兵马公旦世世拥高贲旦生省几公滕益拓之至倾邑由太学授兵马指挥以干用着声有封典归而好行其德郡邑中推为长者凡三娶至封孺人陈而举君兵马公有五子君其季也生而儁颖父絶爱之稍长通经术工属文故宪副薛先生甲有人伦鉴见而器焉以女字君十四从游燕中其文益藻发所当无前复从父还里方日贾其技以与诸士子角而父倦家矣析箸五之曰吾欲以观谁渠能君当其最繁者属岛寇起里中徭赋俱用军兴法需进傍午寇愈益近播迁不恒君坐是大困学亦渐夺而会母陈病不起君哀毁甚丧葬力任之不以累诸兄父大喜过望曰儿实能吾老死无憾于是中外一切属之君而君有子即修德髫时崭然头角君授之书且以自课十得其五六庶几一日澠池之翼而父复以老病终君侍汤药至损形擗踊佹灭性强自力丧葬虽不尽已出大较倍之及毕礼雍雍无间也有构其一于君者曰是且阴中若急先发毋为所制君叹曰彼必不忍此即忍之吾

安敢以先人遗自鱼肉哉构者惭而退君提身以严持门户以整处久要以信待闾左以恩而家故豪久多忌者数乘隙困君邑邑不自得唯课子而已会修德举乡荐明年仲子补博士弟子诸叔季以下俱立矣君推家以与之时杜门手一编吟哦自得遇风日清美与内外戚执善者尽壶觞之致人或谓君不及时益置田宅自封如先兵马故事耶君曰吾安敢望先兵马第不隳先兵马授足矣计吾拮据三十年夕寝未尝恬一枕今且老乃与子孙作奴哉于是人人服君之达而廉意君晚舒闲当得上寿而忽感中鬲不善食诸子以非意所望忧之甚君咲谓吾年五十二不为夭且吾王父年止于是吾母及母之弟亦止于是吾何容过之多忧奚为病小间强修德赴计偕亡何遂亟以至卒君长髯丰下善举止性不好弄亡美衣鲜食之奉薛先生以讲学为东南倡亡敢抗者君与之下上薛先生时时有会曰吾愧乐彦辅多矣修德又为余言记少时循王父膝而行王父指谓父愿而子得似而庶以慰我夫王父从容逝吾父手而不肖孤以身外之计易之竟不及躬医敛孤何以毋食斯言也念技已穷唯公言是寬耳嗟乎此修德所以不遽已而余所以为之志且铭也君卒万厯乙酉妇即薛先生女淑而才白首相庄无间子八修德修吉修巳修和修政修身修典修某女四孙男四女五名及婚嫁别系左方墓在横塘铭曰

何子之材而中郁紆若稍吐矣而不竟舒夫是以委形者虹其光而委蜕者窳其角若元凯兮并奋乎天衢噫不复为子歆歔矣

同知郁林州事封文林郎大理寺右评事九华顾公墓志铭

顾之先自越王勾践封支子于顾始至晋而有尚书君叔者令无锡家焉遂为无锡人家世受高贲明兴其儒曰福五尝以家众拒俞寘乱而使其子寿诣阙告变坐系得白寘卒就法然父子相继以劳死家亦破独遗一子信甫幼孤育于友钱氏用什一起家与其子松轩公某某子芹轩公懋章俱以公世父荣僖公可学贵赠俱太子太保礼部尚书芹轩公有二子长即荣僖公次曰鸿胪公公之所生父也芹轩公有仲弟封刑部郎中盛章盛章子曰承事郎可贤承事公中年病痼不能子请于芹轩公乃子公则公之所后父也公生而韶秀警颖总角时即为通人邵文庄公所赏识曰此儿也异日国器者时鸿胪之长子曰起经荣僖公壮未有子亦子之与公俱貌而才以故荣僖公爱公与起经亡少异受尚书讲业里中与王编修立道尤参议瑛齐名遂补博士弟子试辄高等引例入太学复与南昌万懋卿溧阳马应图寶应朱子价华亭何叔皮倡和为古文辞有声荣僖公起自里中入待诏上林挟公与偕天子宠荣僖公甚多所赐问及竹宫祠厘栢梁酬和之作非公属草不称天子后司得之特赉以鞶币太宰唐文襄公雅器公欲超格授以官少宰张文毅公不可曰腰■〈马上衣下〉蹶景而驰毋轻就繫也公感之乃就试试而又不利谒吏部选人得滇之某卫经歷人以遠难公公曰丈夫墮地千里我而

近谁当非近者且縁是而探金马碧鸡之胜以追踪长卿子渊不亦可乎既之任以才试署昆明篆昆明滇都会邑也公所剖决立解有黠阉挟数缇骑以鲍司礼指求黔公金所过势张甚至手批杀驿子黔公忧之计亡所出公乃盛驲从往谒与谈司礼事不能答钩致其微实阉也而非司礼所幸亦不受求金指阉惭思遁去黔公而下恃以强已为其邑兴学校肄兵甲属岁旱徒跣而祷辄澍上官闻而贤之旌异交属寻以职贡行公悉辞其费近千金道还无锡里倭骤来攻城势且溃公佐令王其勤授兵登陴出奇而劫之贼逆溃去幕府第功受上赏乃始致贡还迁贰鬱林守行守事公益明习于政尝条五便上之州黑眚起公矢于神已竟寂然陆川寇来侵公勒习射士驰徼之殲其酋渠二十余余皆散走督府奉大司农檄征丹砂于鬱林公为言鬱林故不产丹砂得非繇葛洪求勾漏令误耶洪从鲍靓隠罗浮未尝至勾漏得勾漏砂也窃闻辰实产砂请市之辰便督府不聽役徒三万徧采砂鬱林不得久之竟市之辰以解而公遂复奉贡砂役既竣事谢病归公年仅四十余白皙美须眉丰下善吟大冠高幘衣纱縠单衣曲裾后垂交输雍容是都出入闾党目属之好读书工古文辞非西京大厯不厝舌也书得晋人遗意其在滇与故杨太史慎皇甫司勳沆相倡酬谓公文似太史公诗在鲍叅军孟襄阳间尝采明诸公先后诗帙之曰国雅又采六季三唐诗语曰秀句要不必规规衡石而会心之致多矣别墅依惠山址与戚执黄光禄圃邻皆极泉石之媿邈代主之双鬟四弦咸絶其艺丝扬肉驰飞白卷波丙夜忘疲每谓不恨不见嵇阮恨嵇阮不见我性既嗜吟而又苦思尝触雪堕深池中家人拯之乃得苏公故名起纶字玄言至是更名更生字仲长最后行垄益深得若九龙蜿蜒者当驢岭之白石坞中为黄公涧汇水傍泻有丘若覆敦公大乐之暮而梦老人乘白鹿相劳苦质明客有贻公一玉玦其文则巍冠而挟鹿者遂名其壤玉鹿仙丘曰吾蜕于是矣时铜梁张肖甫云杜李本宁过公公乞肖甫志其圻本宁碑其丘时以公为达公孝友天性既后于承事公念鸿胪公渐老无壮子乃以身任两家养承事公既卒多内外侮公悉其材力以扞之业以不堕奉所后母繆太孺人甚恭甘脆必备而鸿胪公故豪有园池声酒游闲之好两子皆出后于人时不给公拮据佐之不使有虞色及其居二父母忧其毁戚毋以服间也然至鸿胪公晚节举庶弟悉遗产畀之不私矣岁时家奠必恣创合享祠于南林祀晋尚书公而下凡十二室宗人荐醮以序藹然追逮敦睦之风自为文记之年七十一而病寢剧登楼顾盼久之命笔书遗嘱甚详将属纊斥妇女毋得近强起浴沐更衣端坐而瞑时万厯丁亥之三月四日也所著有应制玄言训藻感知昆明句漏译秀旧林解頤赤城山园倡和集若干卷知非厯十卷辑竒觚若干卷并国雅唐秀句行世者十之九娶于杨封孺人丈夫子三长祖源以文行举入直史馆仕大理评事封赠公如其官今为礼部精膳司员外郎娶吕封如杨次祖河武学生雅好古娶孙次祖汉郡诸生娶华女六适蒋仲仁太学生黄邦裕诸生恇应龙钱宪南华永曾字何（阙）之孙男十三人孙女七人曾孙女四人男之胜冠者多为太学郡邑诸生婚嫁皆名族祖源罢自直扶服奔归将以某月日葬公而手草事状来请予志铭曰先人且藉子而不朽余

曰而之先人自致不朽矣且也有肖甫本宁之言在祖源固请不已曰吾先人尝辱子友矣谓子有加于二子则不敢谓值子而不得快则不忍予乃读其状叹曰顾公真人豪哉为铭之

铭曰为人后而能致其私不见屈于夔圃贲郎也而以政事文学名与次公长卿伍探乎方之内而不啻性遊乎方之外而不踰矩于戏仕犹不能在通塞间其饶子孙而贤者乃所以自胜于天者耶

累封中宪大夫直隶庐州知府望山张公墓志铭

余劫劫末俗中慨长者之不易而间从所知谈平湖有张封公者其人天下长者也思欲一见之而病废里中不成往今年秋公之子藩伯大忠衰服而来称孤则公歿不待矣已出大叅王君俸之状而请文公墓中之石读之公真天下长者也始公甫十九年而补邑博士弟子寻上太学试有场屋声而白皙丰下顾盼俊伟又负气谊所非是啻啻不小假见若以为不长者其父东畚公讎家伺其有苍头之衅起大狱中公公几不免业亦为挫然竟以无他状得白久之讎家坐法逮人谓公盖乘而甘心焉公如弗闻也者东畚公既倦家政以委公而匪式之徭徭集公应之不倦时创倭警复城平湖版筑之役公独当其什二又当水门甃既成费俛数千缗官给闲田以偿公独不受偿曰往役分也岂饵偿而饱东畚公之歿也所责负券属公者累巨千金属岁饥公悉焚之曰以先人遗而快吾欲乎宁损吾橐而彰先人之德以成其志公既不得意于公交车而藩伯少则已颖敏能属文公乃尽出其父遗书授之且徧延经明宿儒与讲习学成而就试有日矣里中猾构族属之无頼者挟诈以间扼之公乃市牛酒交欢以巽辞解门下客怒曰公孱人也彼渠能奈郎君何吾请为公狙击之公笑而曰彼幸聽吾解大善即不尔吾亦不藉汝夫隋珠者而忍鹄抵也后二人皆窶困公益厚遇之益愧而感公尝视其季父燕中而邑人马氏子以负大农赋系若卢公不忍其困为贷二百金上之官得脱归而贷者踵至马氏子跳之他邑公不忍迹也又为之偿其息家骤中倭警而有金鉴者其先故大父时交方城居乃笥金帛数百千寓之倭退返橐则枵然空矣或谓法当闻之官公曰闻之官则成彼盗矣吾不忍辱吾大父交也李太学者亦公内戚也与盗格而误中平人令怒欲寘之理公居间百方始解李生感公阴操三百金为寿公惊避席曰吾自为吾戚耳非为金也亟去毋汗我李愧谢乃已藩伯之成进士用考最及推恩封公刑部主事郎中以至知庐州府凡三被锡有金紫矣然策之不时御恒角巾褐衣■〈足 敝〉躡田野间间语人吾所不足者非车也且吾何以儿曹故自尊异郡守徐必进庐人也以藩伯守庐欲见公得修通家礼而公固称疾不往曰往必有以居间溷我者秀水朱令藩伯故人也慕公名德甚然亦不能再致公居恒叹曰吾岂有所不足于邑耶张公故难我郡邑举乡饮俸延公大

宾公一再应之辄使人谢病不任居恒与子弟戚执宴会取真率戒毋侈费酒数行后杂以谐谑或丝竹佐之陶然畅适凡受封几二十五年御冠带者岁不过元正伏腊祠飧而已于城市迹可数也藩伯历官凡九政迎公养即近善地亦不肯应曰若为县官任事禄之固当而我齐民也自食吾田家食即不作太庙牺宁忍爰居愁飧耶于是藩伯贵矣又有公卿间声而其迁滇时念公与母沈恭人渐老必不能致之官道省覲欲毋往公固遣之乃阳为治装者而使舍人子上书乞终养得许而后跪请罪公笑曰吾欲若往若欲毋往各行志耳吾从汝藩伯乃盛修圃南湖以居公日视公与沈恭人膳甚乐也久之沈恭人卒又四岁公亦卒公素强七箸视履若壮人忽感疾遂剧然神气殊鲜朗谓藩伯曰为乃公数有一可憾否更托贤有文者传之吾瞑矣遂卒善乎王君之言以德报怨摧刚为柔富贵不盈海子必谊岂可与世之謏謏浮薄者道耶余既志公窃谓公善状非一要之终始不离长者彼非浮慕其名而习之所熟为长者了亦不自觉也虽然属纊之一言犹有所未尽忘者盖孔子曰君子疾没世而名不称焉颜渊伯夷附骥益显公岂其意耶顾所谓贤有文者予非其人也公讳以道字文甫别号望山张之先出盐官其后籍隶平阳世隐约南畝至王大父涛王父樵而渐以本富负气谊里中又至东畬公而用儒显尝遊太学家遂至倾邑娶冯孺人举丈夫子三仲为公公生以正德庚午卒万厯丙戌得寿七十有七妇即沈恭人从公秩封也孝而淑亦以寿终事详姚少宰志中子二长即藩伯大忠娶姚累封恭人继沉沉恭人出次大孝太学生娶陆而夭侧室孙出女三长适屠恒次适马士达俱孙出次适曹国光侧室朱出孙男二长恒吉太学生娶冯同志郡诸生娶项女四长许王尧焕蚤夭余适屠观安廷谔许陆某皆大忠出大孝有女一而无子子大忠之子同吉女许沈某曾孙男旦绍祖女二长许赵某余尚幼墓在广陈堂之新阡铭曰

畴其之子富好行德绰然寬身谁欤怨敌岂以获耕耕故当获乃笃喆嗣为时巨卿尔贵尔裕寿考康寧得之若惊善胡近名而名逐旃国人曰贤纶綍之褒若自九天余铭汝幽以永万年

诸母魏太孺人墓志铭

太孺人之未归诸也则光禄公庠祖之太学君希明父之光禄务为长者而太学折节下士以高谊闻东南太孺人虽穉然素婉嫕有志识而渐染其家海光禄之世兄少宗伯恭简公世所称大儒君子也太孺人甫十四而恭简公异之抚其首曰是儿也女不然者毋隤吾绪矣太孺人所适曰诸生诸有彦字俊卿故刑部郎贞伯之第三子也甫八月而仲父宁津令贞叔鞠之会寧津令壮无子遂嗣焉已而自有子而刑部公已前卒太孺人佐俊卿事寧津令及其姑金孺人极孝谨得其欢其事俊卿所生母秦安人尤备最后二姑与寧津令相继卒俊卿之遭三丧或以制或以心咸极意无憾者多太孺人成之也

然太孺人不独奉一舅二姑孝与庀其丧又能迎其母龚孺人数共养俾忘其始之丰而终约脱簪珥以相俊卿俾葬其伯仲二兄无衣薪之憾人尤以为难太孺人之始归诸也席其父家橐珠襦锦褙光彩委地而俊卿故儒素属刑部蚤逝而宁津令宦薄意难太孺人太孺人觉之曰是谓我不办为德曜也亟改荆素作田姬装而其所进宁津令及两姑甘脆橐亦随手罄矣秦安人喜施而力不继又劳苦太孺人供养时愀然曰汝王舅名士不及官汝舅宦矣而天汝从舅宦而廉毋以貽子孙奈何王舅者故贡士左白先生也太孺人谢曰子孙而获窃祖父清白名何幸也新妇力自策不以累尊者秦安人改容而止俊卿跣■〈屣也〉不问产性好客客至辄呼具亦不问中馈太孺人逆为谋之未尝以仓卒壘耻也又慷慨尚义重然诺而稍孤介负气多忤太孺人宛曲调剂之务以成其义而毋暴其气俊卿用是得宽于贫盖三十年未尝见违色云俊卿之弃太孺人也太孺人哭之恸既绝苏者数矣乃自叹有二孤在于是日夕课伯子兄弟读书之声至丙夜乃机杼则益厉而心知伯子才而异之间谓若父不死矣即一旦有所树毋忘而王父之未竟与吾世王父之业伯子诸生志嚶嚶与俗情不相摄或语太孺人而儿痴太孺人谢曰儿幸未痴也毋用世巧凿之伯子益感奋学成举于乡归上太孺人寿太孺人为欣然已而泫然曰吾可以见而父矣如而父之不及见何明年伯子下第归又三载当复偕计吏而太孺人病脾新愈伯子恋恋不忍舍太孺人正色曰儿尚湏乳耶奈何以不讳名我伯子强行至中道而太孺人疾复发寢■〈谷丸〉以至卒得年五十有六伯子匍匐归哭几灭性曰伤哉贫也吾无以一日养也既而曰伤哉贫也吾无以葬也服除就南宫试得隼以进士隶事工部有御史用私孽大臣而着直声者伯子抗疏击之忤旨夺官归始行贷亲知谋葬太孺人祔于俊卿之兆而又哭曰伤哉竟不能以一命荣吾母也谓其父之执友世贞幸为我志而铭之庶几若古之所称桓少君乐羊妇郑夫人者以不朽吾母而少道孤不孝之罪世贞稚不文即有言宁能不朽而太孺人虽然使太孺人称贵人毋宁称贤者母乎伯子唯唯太孺人举二男子长即伯子名寿贤娶徐而天继严次同贤娶沈孙男四伯士达娶范仲士遇季士莲寿贤出也叔士迥同贤出也孙女三寿贤出者字王第同贤出者一字许一未字太孺人之先姓为李后为魏所适故为朱后为诸朱今迄不复而魏姓复称李太孺人尚独称魏有不偶者铭曰

妇人之遭不幸者室而丰家而约以终其又不幸者归而两奉所生与所后中年而夫背之与子相守然独不足以难太孺人恒则顺为正变则义衡命卒悔喆嗣为国司诤呜呼其幸耶其不幸耶

弇州续稿卷一百十三

●钦定四库全书

弇州续稿卷一百十四

(明) 王世贞 撰

○文部

△墓志铭

广西布政使司右叅议致仕进阶朝议大夫苾斋许公墓志铭

苾斋公者许姓讳彦忠其字曰汝敬而署其斋曰苾盖终始不忘其名以见义云故句容人也曾大父曰海一公大父曰镇二公父曰东山公某以公贵赠承德郎户部山东司主事娶太安人朱生公公生而■〈立乞〉■〈立乞〉有大人志十五从受易于乡人司马侍御即以易著称明年补博士弟子久之为嘉靖辛卯公始与先大司马公同荐于应天寻报罢公交车乃偕其同年故广陵阎公集故太师李文定公春芳游南太学时欧阳文庄公德为司业方以东越良知之旨教授诸生而公与二公皆与闻焉然公不轻以立门户为名高凡又再上至彭城而报赠公逝公大恸曰始者以吾父壮念不之及今奈何使我抱终天恨绝而复苏自是骨立者三载服除乃稍稍腴复再上而为甲辰成进士授荆州府推官缘情丽法以公平明恕称理官故受台委核诸郡邑牒因以察举官邪然所苛责多黄绶以下于墨绶不敢烦目何论二千石公核当得武昌武昌大奸藪也而据都会为台司肘腋故事有抱成案毛举细摛而已公廉得郡守某那移干没状欲发而念以大体不欲遽暴之而坐其左右之共为奸者而守已衙公切骨矣公以治行高第荐牒屡上微顾仅擢户部江西司主事督稽草场摧河西务咸廉平无害遂连督临通二州仓储诸军之转饷者于常耗外多责有司羨粟而郡邑稽故之因而积不相能往往后期且值河涨多漂溺者公请宽逋赋定直耗衷军民之权不使偏胜务两得其便乃以缓达罪漕而以缓发罪郡邑大司农善之着为令于是公闻隆隆着矣吏部欲用公为其属不果而河南有师尚诏之难甫平睢陈间犹汹汹乃用公自某司负外郎为按察金事饬兵其地公至宽约束简刑书曰乱民如乱丝也奈何复斲之其民既安公而盗亦自懈公微得其主名一夕悉掩捕殪之咸诧公天威也不敢复称兵矣时公着功名于外而所见衙武昌守犹在郡乃以蜚语中公大察得谪为浙江布政司理问公之任念太安人老不欲困之幕僚舍谋请急台使者雅重许公之归而侍太安人无何太安人以令终人谓公得伸大事为孝感而公犹痛毁几如失赠公时服除补江西事大白即擢同知湖州府公不以迁人自优佚日佐其长清徭赋理谏牒湖人颂之御史为上绩而江西方用兵岑冈邻

郡邑若湖东者其冲也朝议以公习兵业见之睢陈矣遂复金事于江西饬兵湖东公至则有议发建昌兵讨贼者公谓贼已深入据险而发建昌兵裹粮趣利于数百里外非便宜兵发建昌虚矣而有沃名王国大小亡虑数十万一贼以形闻我而轻兵走间道袭建昌可虞也建昌兵得不发贼亦渐平其郡人德之家绘像以祀而始议者亦服长筭甫二载迁广西布政司右叅议时徐文贞公阶当国而李文定公佐之文定故公所与同师者也文贞公亦雅欲用公公念不欲遽宦乃叹曰知止不殆吾其可以休矣或谓不难二相国耶公曰七尺吾自制之不在二相国也遂上疏投劾得致仕归公归阖门养重以经术教授子孙意泊如也里中诸主受侮者诲之咸济济愿出门下性不喜宴游户以内无杂宾户以外无辙迹如是者踰二十年如一日即邑令举乡饮以大宾请亦不赴尝遇覃恩奉诏再进阶有司饰扁表其闾公面赤逊谢不得而受之万历丁亥十月望无疾而终距其生丙寅春秋八十有三配乔安人卒而孙安人继之子二伯懋为校官娶夏次懋邑诸生始娶王继顾皆先公卒孙男二尧臣邑诸生娶经尧咨乡贡进士娶王皆懋出也女二适王世熙武尚凯俱太学生尧臣生女一字杨念祖尧咨生男三自新自强俱聘武自勉聘李女一尚幼盖公卒之明年十月邑父老师生慕公之贤无已相率请于郡邑以学使者指祀公于乡贤祠又二月而尧臣等葬公于某地而前期奉闾比部士选状来请志铭比部故广陵公从孙也而又同尧咨荐于乡不佞贞亦称通家子窃谓公师事欧阳文庄公受心学而不轻以示人与李文定公善而不借其气力宦不达不为伎甫达而弃之若敝屣又不为人说官中治状胡长者乃尔嗟嗟俗浇而多饰非公孰风之哉其祀而称乡贤宜也

铭曰名不必全有用不必尽究福不必多取来以为偶去以为偶噫斯公之所长守而以貽厥后者耶

程师文墓志铭

余性不喜闻鬼神事以左氏太史公之诬而涑水新安氏诘之为正晚而稍睹闻其事而征其理盖天地大矣变化之不穷当亦有之且福善祸淫于礼乐名教之助不浅鲜也吾同年程司徒嗣功者忠信不妄语人也迺论著其宗人师文之事曰师文尝治质肆金陵市中司城以师文奇货可有也使盗引而逮之狱且对簿盗忽跃起坐于梁叱曰吾狱神也师文长者柰何嗾盗证之司城惧而亟谢遣不敢问不逞少年数贷师文钱而归其半久之不能应也恚而以昧爽将要师文于途不利焉空中飞石中其腰膂大悔惧匍匐谢师文曰君谊能使鬼神受役吾侪小人安敢犯又一少年窥师文橐中装夜觴师文寘堇于中忽骤风起灭烛烛至而少年误进堇觴立死都市火将及师文肆僮奴仓卒自救师文曰无以为也天以灾惩邦政邦政将焉迺再拜而火卒灭载米舟至孟河触石裂

有声已抵肆发米米尽而裂见可五尺许顷之舟遂沈师文寻起家至富夫师文一妻人子耳劫劫趣什一息何自与神明通及读司农之文毕而后知师文也师文生十月而母许卒父心弛为娶继母王乳之王又卒王母范哺之又卒乃哺于继母汪伶俜百状而父又寡不获専志于学然当其舞象时能自力为色养十九补郡掾习文法时以寛辅之举动详雅能得府主意同舍掾汪秋尝误具一伪符者牒而当之鬼薪府主怒甚曰是不当抵死耶掾受金而故轻之当考竟师文徐曰掾坐不习律耳某尝覩其牒多讹笔府主悟弗竟考里民吴荣以采木不中格论戍以属师文师文曰民椎何知格得从减荣鬻女得十金行谢师文曰去之母汗我已而得其鬻女状亟割帑金益之俾赎女归客有籛金六十寓师文求居间同舍掾而其人死者师文呼死者之子归之子初不知也郡司理尝有所论戍而邻保坐株累十余家师文泣叩首曰使君神明论戍者固当奈此十余家何司理为之少霁师文既以文无害进肄九卿事褒然首次予冠带非久当得官念其父母且老寡如故叹曰吾安能奔走数千里外噉五斗米且幸异日资甘毳而二尊人老不待何于是舍而为贾吴越间以至金陵市中其精心计会盈缩郎素号老贾弗如也然雅慕气谊不夙诺义声隆隆市廛当质肆金陵而有误偿金二百者已复有以珍寶留质金百未及授金而其人夜暴死者皆追还之其主则定遠侯王大司马舍人也侯与大司马之子高其义而纳交焉少鬻糴得数升主客之傍有人笑曰焉有客而糴数升者耶异日遇械縲道傍视之则故傍笑师文者也其游崇德主人女夜来奔弗纳以他故辞去仍匿其主名自师文之渐饶而其父母日得甘毳以寛乐终然尤痛其母许不逮养每伏腊飧祀伏地涕淫淫沾席也小时所请婚巨室少之弗许贱者师文亦不屑以故数偃蹇水南张老有女念欲归之未果夜梦神语之曰程郎岂庸人哉遂以女女师文后尝以百金附师文贾楚属其地大饥悉橐而备賑归以别帑偿张老乃叹曰神固言程郎非庸人也其能感鬼神蓋兆之矣师文晚年好佛不肯复治生产聽其子息之而筑精舍北溪日味禅悅所谈说皆物表语邑令丁元甫延致宾饮不赴元甫高其行扁其舍曰北溪禅隱乡人称焉素强无疾今年戊子四月感微疾呼二子属之遂卒年七十有三张女贤能相师文于家事具周仪部汝砺志中先八年卒已卜葬巫山之阳今以某年某月某日奉师文之柩营其左而合葬焉子男二廷金娶孙继娶汪能世其业廷镇有文为太学生娶汪女四适胡宗尧黄应诏字黄宗序黄时来孙男三文润文瀚文津孙女三程之先为梁陈时忠壮公灵洗后有澧公者以兵马使拒黄巢为师文祖居紫云溪汾公者为司徒祖居槐里其系遠而明廷镇以友全椒令畬宗汉绍介乞余铭余既竒师文事且高其行而畬子从與甚力余乃归币于畬而为之志又为之铭铭曰

少所见多所异不覩鬼神乃作师文隶师文躬之福后裔

李母颜孺人墓志铭

李母者故乡贡进士昆山李君希直之贰而今太学生大昌之所自出也颜姓故与君同邑而家素饶已忽中落母生而失恃秀羸不任疾十一疾甚死矣一日夜复苏能厯厯道死时事云行且入深山而迷得碧涧始辨已大呕五藏悉出就涧涤之有黄冠而羽衣者袖一丸药饵母甫下喉有声若雷遂惊而寤香气拂拂鼻端疾脱然失自是强无病神采日茂异性亦骤聪颖絶伦诸女红字学不习而晓既归李君所以事君之妇方孺人不失礼而他所操持规画尤能得君意君爱而严之后方卒遂以孺人代■〈怠〉内秉勅家众事母如事方然母不以李君之重故小自佚君任侠能致千里外客客至无论星相风角剑客九九弄丸之伎坐恒数十人仓卒问饌母无不咄嗟办也君性■〈距斤〉弛不复辨家人产及岁入几何顾好施予见义必达母阴勾稽其出入无爽然有取辄应未尝以庾耻告也君好为山水遊或过友生夜分归必温酒割炙具汤粥而俟之以为恒又性多怒其御臧获小发而大忘母伺其发必调辞色而剂解之不使横受捶楚迨其忘也则所以饬训备至曰毋触主君异日怒发吾不若救矣以故其下人心德母而不敢少肆君前所举乡进士尚贤业已自树立乃推真义故第居之而身别创室于邑中以居母与大昌而身恒依母尚贤强欲奉君与母往君弗聽母泣谓大昌曰以私我耶将独我累耳时君之产半割而费愈甚母委曲应之君犹偕计上公交车及为大昌娶妇母出織细之累以佐不给然不令君知也母时时谓大昌汝父知我不藉汝而重然汝能使我重于李乎则胡不益治经术取甲第乎哉大昌以是益感奋淬砺于学有声母素奉佛读金刚圆觉诸经辄自能以意解吾州昙阳女真师且立化母见之谈话移晷甚浹曰自爱毋轻墮也母归请于君洒扫别室寝处时时绎黄庭阴符叅同犁然若有当心者岁时奉香火于师蛻靖唯谨而其奉佛亦不废尝瞑目竟日语君曰吾殆死矣吾适梦血汗衣而恚前所梦黄冠羽衣者曰此汝幻形也何恋为午月午时解脱矣然李君竟病羸前卒而母恸哭至絶而复苏或慰之曰此岂佛与师教然耶母曰大谊也吾安敢忽自是竟鬱邑侘傺至徙处深山旦夕与影相吊而身亦病矣母所举唯大昌其于大昌爱之甚然不以慈胜严每夜课之诵至丙必使诵声后机杼声而息易箒时所与训诲皆丈夫业其卒也实以万厯戊子之午月午时年仅四十三始李君有赋粮千斛寓于邑仓而仓忽大火时君适他出母即碎簪珥解衣以次悉典库金钱募市人使行水于仓蓋诸毀者至数万计而李寓粟独完李君之精意母非以色也大昌不忍母之泯泯手次其行累数千言而为之裁节以志墓中之石蓋吾家内子与妇皆事昙阳师于母若兄弟然且大昌吾中表弟故也母尝养君之从女为女而适诸生许献吉大昌娶于周有三子元武乐武庄武孙女四葬在三保之新阡

铭曰昙阳子道成而羽化然犹露坐于徐墓割发殉其所字之子而后就玉京之驾母犹人也以诚归师以义从夫要皆殉其天而不失其真噫嘻可使泯泯耶

史大母王孺人墓志铭

呜呼吾王母陈淑人之归我王父少司马公也盖最晚而前是王父之再娶皆陈而举我伯父都事公及女之归叶归盛者凡三人最后王母举一子一女子为先大司马公而女为吾姑史孺人孺人长于大司马公六岁生而敏慧朱唇玉辅眉目如画十六而归故兰溪丞史公■〈斌上金下〉史公者故河间守鉴之少子而爱者也当是时王父为弘治正德间名臣以长厚闻天下而王母佐之尤得闺阃间声孺人为其少爱女光彩芳泽动闾里而兰溪公之母曰陈孺人亦河间公后妇也孺人既幼习母训雍容狗仪则旦夕上馈甚恭河间公大喜过望谓陈孺人曰吾老矣佳儿佳妇以付若及河间公没而陈之甘于孺人养也盖逾于公生存矣孺人性阔达有大度兰溪公以其家世贵盛又美而贤曲意卑下之孺人亦不好妬念无子置媵张以待兰溪公而举一子曰访孺人爱之如己出姑陈以笃老终而兰溪公诸兄皆前妇子其丧葬孺人一力任之以成兰溪公于礼然孺人不甚别治生兰溪公游太学以至作吏部选人产日挫大司马公岁饷米且三十石辅之而访所娶即给事中赠太常少卿陆公燦女也陆公爱其女甚颇有所资访亦得游太学然不能不分孺人装以故益困而兰溪公为鸿胪序班其仆马邸舍皆自大司马公大司马时在蓟门亡何坐忤分宜相逮而兰溪公移病归孺人日夜祷于神为大司马公福而竟不免丧归孺人抚棺而恸已辍哭慷慨曰吾必见分宜相之败而吾弟之昭雪而后死也世贞兄弟自是奉事孺人益谨其分饷岁米世贞垂倍于昔弟懋次焉孺人每归宁吾里必累月其过世贞者七之余弟懋三之孺人好读书于史传稗官多所通浹夜分南向匡坐诸子孙环侍而谈论前哲及王父母时事娓娓忘倦大抵依传节义表正直归仁厚间有所谗浪能令人解颐其在两姓属俱尊而又笃老众有疑难不能决争阅不易解者咸取孺人一言孺人间语世贞吾开府女开府姊开府姑于史不为不重矣第史之重吾不以门阀故又语太常懋兰溪公之歿于邸而得寃终无遗憾者若力也吾何以报若当嘉隆之际分宜败大司马公始雪复故官孺人谓世贞兄弟吾可以死矣第闻吾弟功臣国家当有所以隆恤之者而今不称何也吾故未可死也盖又二十年而孺人以寿考终终之五阅月而天子赠大司马公今官又予二祭全葬而孺人不及见矣呜呼伤哉孺人之所抚子访任侠好酒而妇陆故贤而善承颜色与访不能无佻离恨孺人甚怜之而颇以责过访及访卒陆亦卒而孺人之所抚侧室某出者载道过于昔所抚访也孺人少多火疾晚而颇病脾滑然匕着益进岁且暮觉若有不豫者一昔而逝余闻而驰往哭之犹及殓颜色如生孺人生以弘治辛酉卒以万历丙戌寿八十有六尝女伯氏之女适某官陈文默载道娶于某氏有一子子某女嫁吾宗人允升葬祔兰溪公之穴铭曰

谁谓女而为吾王史二宗之老谁谓耄而其言殊了了男子耶则岂唯家之寶

周母薛太孺人塔铭

周太孺人薛氏父曰孟仕为兵部郎中母沈安人笄而归故太学君某太学为故太宰恭肃公最少子太孺人归未几恭肃公卒于位姑姜夫人留家居且老矣而独爱太学夫妇与徙箸而处太孺人能以勤嗇慎礼佐姜夫人意治家而所以共养之尤笃其于身寝必居后食必居薄姜夫人困邁轴则靡不起自太孺人手也太学任侠喜客为文字饮太孺人精志而给之恒取咄嗟办至卜夜不疊耻其归太学仅十二年为产五子皆举而太学得疾以卒太孺人哭而欲从地下者数矣既而曰吾不惧死如吾姑何如吾诸髻及襁褓者何乃强起而奉姜夫人益笃姜夫人每哭太学辄曰吾故忆吾子第若有子者何也其诲五子以义方咸崭然成立不自知其失父也御臧获详而惠姜夫人察太孺人材悉家以授之家隆隆起不自知其无主也稍得竒羨辄推以济贫乏者寺宇桥道无弗飭宗党姻戚无不沾润素好佛家言厌离尘网求生西方瞻养弥陀而迫于姜夫人未获遂久之乃飭一室供观音大士室忽有异香鬱勃不散太孺人爇沈檀以继之烟积而脂忽成一莲花枝叶如画若可摘也姜夫人故不信佛至是亦信佛而太孺人得渐專其志矣又久之姜夫人病疽太孺人旦暮侍汤药以间吁天请代弗效其哭之也絕而复苏水浆不入口者三日明年子祜之琦补邑博士弟子居数岁为幼子某某谋娶妇忽梦一天女相者呼而曰时不待汝无久混俗緣既觉而语诸子曰此大士命我也自今日长斋断鱼肉从吾好耳而会子祝祖补郡博士弟子某亦有妇太孺人喜曰外事授诸儿内事授妇何庸我为自是课诵诸经典悉习已禁足百日习天台止观门故以哭姜夫人感痞结至是遂消进而阅法华华严二大部晚于圆觉有深契焉独处精庐内影不出戶外声不入席诸子以时日叅闻及摩诃衍絕不作世谛语诸妇叅頷之而已癸酉之二月奉律精严居三月而示微疾日嗽四盃糜医谓湏牛羊乳而补又有以药酒进者却之曰假合之身复何所恋而忍以酒乳败吾律也又二月疾益甚诸子忧之计易医太孺人笑曰医之易者四矣而不我痊我岂湏舆活耶且我发愿生净土者十五年而今获俶路不闻汝曹一符繻贈我而强挽留我何也遂并粥糜不复进诸子跪而强之太孺人覆盃曰退而曹所谓孝此耳此情识根也夫以情识根牵我而入诸趣者悖也吾所谓符繻者何阿弥陀佛而已吾非有所攀援欲扫情识勿堕趣耳归各语而妇勿为我悲晓此径者异日共之诸子洒然若有省唯讚太孺人称佛号太孺人虽不食久然神气精爽不乱所诵佛号或和或悲或弘厉各以其念发之絕不操吴语及妇人音声勅诸子为我延精行人作五日水陆懺谢除无始以来障业及生平一切离垢罪小有寸缕福善迴向阿耨多罗三藐三佛馱诸佛如是迴向我亦是回向既竣事而喜曰不行何待复勅诸子我欲沐浴更衣礼佛于是太孺人之却粒者日二十有竒矣转侧不自持诸子心难之质明忽謾然起御优婆夷服步至弥陀像所拈香呗颂三拜而起寻谓佛号者百有八呼坐结跏趺复诵佛号

至千诸子皆和之初结金刚拳复结弥陀印若入定者俄鼻双坠尺余徧体冷触谗迂化矣而顶独温俄而更热至晚乃已面微汗颜色正明俨然丈夫相也室中皆莲花香殆表初证欤太孺人之欲絕世緣非一日然至示疾时犹取家籍籍之以笔乙之而后谓了也其疾革也不令诸妇女见见即麾去曰彼曹何知徒乱人意耳太孺人能以诸子为善友诸子能以真心为报恩嗟乎自世尊以淨土开舍利弗而以十六观示韦提希夫韦提希由死趣迫也值世尊而后得解脱夫世尊之所雅言世犹意其权教摄也遠公警其惰故教行而攀援乘之鉴祖惩攀援故执破而疑惰复乘之自今而言权即实耶太孺人一妇人耳去韦提希之无几生不值世尊而去何易也然以其所积习專坐如是又必賴诸子而后无墮亦不可谓易也世之修淨土者于此得师哉太孺人化之三日而入龕诸子将为窆堵波奉其全身而属铭于世贞其叙居平善行与提警之辞甚备不能悉志志其大者铭曰

孝尔姑笃尔夫慈惠尔诸孤世法既世教备而卒以出世于戏娑婆之人罕是淨土之人亦罕是知而不能行使铭者愧

麓亭和尚塔铭

世尊雪山成道四十九年踞狮子坐为人说法最后自称无法可说而拈花微笑独迦叶默契教外单传之旨然权实互宣酥乳偕味派别流分师至六部至十二虽大统不絕而僭润自如圣教东渐心印未启若道林高坐辈或傍演庄易或务谐音润毫厘千里罗什之译名义慧遠之修淨土最为铮铮者顾欲障尚牵攀援未絕至菩提达磨而一洗之直指心源不立文字第当时义解如顛贤首道宣澄观辈或创止观或守律仪法门森然并行不悖五传而为之大鉴又二传而为大寂讲坐彻矣北宗屈矣然而微言虽妙显之则粗至理固深有解则浅于是鉴寂之善诱渐穷而志亦晦赵州临济诸宿始变而通之以实语为落草寓生机于死地扬眉竖指捧喝交驰稍涉思惟即罗屏斥临济之传寢久浸昌至大慧杲中峰本则昌极而衰孽之杨无为王龙舒淨土一论时时能摄中下趣而高明未有向者中间宗教并拈仍形著述密迹苦行不废贍养者仅一永明寿而已以余所闻今麓亭和尚亦稍庶几哉和尚故丹徒杨氏子也嘉靖甲申母朱梦梵比丘入室而诞和尚和尚少沈密不贪世緣喜作佛事十三舍身蟠龙山朝阳师受法华华严诸大部经皆成诵十七从薙染十九受具足戒通晓诸经大义尚谓觉识所依非關真际担簦走少室依大章师五载已复走伏牛山依高安师九十二夏和尚奉律精严制行勤苦肋不沾席食仅绩气后先所得属二师印证无爽行游至都下谒松秀二师亦如之淮安胡给事应嘉遇而顶礼延住钵池山演万松评唱造三藏经一俱胝阅竟作水陆无遮会济拔沦滯久之至南京有无极师者方演华严钞拟屈和尚一职而以耆宿难之和尚不复

辞捷搥之暇即入作务昼夜不休既竣事乃往来吴下及江都诸名刹演楞伽诸经寻演华严钞于京口万寿寺缙白聽者日以千数大德二十八人无极率其徒与焉既而谓众曰吾殆不如也虽然有不如我者一吾向者彼上人为我西堂今西堂有彼上人者否和尚自是道价鬱跂丛林倾挹以为一时龙象有妙峯丞印二禅者竖拂久矣舍而执弟子礼和尚智崇礼卑如常不轻提獎唱诱孜孜不倦前后登法坐者以十指数所至立成寶坊然而三衣之外一衲周身羹粥仅延犹存五观其诸衲施不以挂眼岁万厯之甲申和尚暂归憇吾郡之莲花峯下善信徐官施地张承祖建刹居之又使其子道翔为徒给侍丁亥复于承天寺构讲堂会和尚自淮南说法还奉以栖止和尚许之有终焉意九月忽示疾语其徒道林曰二十二日不作离散便可再展华严但老衲不得曲徇人情至日晨起浴结跏坐而说偈曰虚空无面目无位强安排话头不话头处处是如来又曰今年六十六不知做甚么咦诸人着眼者个消息佛祖到也用他不着寻安详而逝异香积时不散三日奉全身入龕颜色自若道林等用其法荼毗于虎丘敛灵骨北塔于莲花峯亦徐官施也呜呼佛教之敝也久矣自宗门之不振而讲席乘起然不过口耳之长辞稍能俯仰其容抑扬其音者即推以为法师贡高自恣附权割腴以为衣钵轻俊之徒偶因文义而见一斑用为话资自诡辨才瞪目云汉贬剥古贤视和尚能无愧哉来请铭者道林辈状之者茂才季应征也状又云和尚当行脚时夜恒有寶光烛之其演华严至入法界品地震天雨甘露及寶花花如松纹演四十八愿时有异人顶白冠冠有蛇四足来聽经人恠之谓若冠有蛇对曰吾乃法观而乃境观倏不见其徒亦云然噫此非和尚意也亦非所以称重和尚也和尚法讳祖住字幻依麓亭其别号也僧臆五十四铭曰

铭曰住公不住世以应无住故遗蜕从荼毗以扫幻依故是塔不为塔以絕名相故胡哉有此铭为诸学人故曰铭亦非铭不立文字故

弇州续稿卷一百十四

●钦定四库全书

弇州续稿卷一百十五

（明）王世贞 撰

○文部

△墓志铭

贵州按察司佥事进阶朝列大夫南冈龙公墓志铭

明兴言路之辟莫盛于孝宗朝当是时大臣多贤者而犹不能胜其苛擿上亦为之稍斥其一二不称之臣以塞其意其擿而不当者亦两不间于是大臣与言路之体并伸而言路稍重世庙初亦微用其意而是时大臣之贤不肖杂于是言路为之祛除其不肖者而登进其贤者故言路之体独重而大臣为之稍屈其后上有所用当意之臣骤贵显而言路不能容或肆其掎击故天聪不复恒而甚或死或戍或编氓于是大臣之体独重而言路为之屈然天下晓然知其为直臣易世之后死者旌生者用时而一伸于其屈而大臣之中黜而忤者阳宽之以外迁或薄之以微谪而阴风柄事之臣以考功令黜之虽遘鼎革不得昭洗盖至是而言路大屈若龙公良卿其一也当公之成进士为行人奉使淮府已能尽却其馈着廉声既授刑科给事中侃侃发纾其直会上甫以灾异下诏求讷言而西苑仁寿宫役骤起公谓皇穹宇之敬天七陵之重祖寿宫之豫后有司方竭蹶黔首之财力而从事不敢缓然内府与闾井并涸矣西役之工是亦不可以已乎哉请停止便上虽不为之停止然极是公言公又陈治体三要曰慎简补曰复久任曰严举刺其论边事若重要害增援兵免摘遊骑上又先后极是之俾部院议行时大司马沧州公与御史大夫仪封公以微言相诋谋俱乞骸骨上皆慰留之然仪封之望视沧州优公具论大臣不和非所以表庶僚而微左沧州上又极是之宣大之总督樊与抚镇臣比而纵敌剽掠尾之出塞而馘僵尸首以大捷闻有旨褒嘉且第功封赏矣公条奏其欺罔请加僇疏下兵部持之不覆公复伸论益切上又极是之樊褫职余谪罚有差翊国公勋以宠利得罪公奉旨籍其家与诸子姓仆隶之为奸者既竣而追论加切上又是之公入谏垣仅岁余疏几十余上皆天下大计其所弹劾不避贵幸頼上明圣无所不曲从直声震天下而独偕其省僚论故大宗伯分宜氏疏留中不下分宜贪而险顾以小才当上心而与首揆夏文愍公交恶夏公故尝以行人为给事中于言路多所假借分宜见公等疏意其端自夏公会夏公用忤旨罢分宜乘而密请上考第言路凡有见指擿者皆目为夏公党皆不免而公得福建布政司都事前是南京吏科给事中王煜与公同年进士称石交尝疏论分宜而意以在远未能根株分宜罪状已具疏械寄公润色之详于原草矣而分宜既拜相时时念王远臣岂其能置耳目于我侧后微知自公益恚恨谓龙生吾乡人不一念桑梓耶当公入计时风太宰欲去公时御史大夫熊恭肃公浹少宰张文毅公治相顾而愕曰此諫臣甫谪外何名去之太宰不获已俾从不及例调然幕僚于例无调者公归不拟赴选人以母李太孺人故强之至部而太宰为熊公一见公执手叹曰骨鯁给事耶使若沦落至此甚愧之虽然吾且岌岌矣盖熊公亦以提衡数抗分宜故也张公公座主也公见张感慨语公微熊公而不得至此矣于是公补广西幕稍迁兴化司理同知漳州府公自是再亲事皆不鄙其官与民絜情法而衷之两郡悉称之曰龙青天龙青天于是分

宜示若寬公者而李公默最后为太宰擢公贵州按察僉事饬兵思南思南之人闻公直臣畏之公以德绥怀其若淑者而虔其悍者得苗酋吴黑致之理事闻赐金币会御史董君大校士以试士属公多得才儁而程序文为诸省冠思南守璋者儉傲人也与后御史宿有连数与公抗公尝廷斥之时时撻发其吏弊璋乃构公于御史因檄公从按毕节公以思南警辞迨病告公独不候去亦无所罅于是御史恚甚而思南守之构入矣然犹谓公自省垣出有諫诤名难之既而悟曰是非相君所欲甘心也耶因极意诬公疏上勒归里俟勘公归十余年间以分宜之在政也絶口不敢辨迨分宜败穆庙改元始以公之疏行贵州台为洗雪然不能复用公而公亦老矣笑谓人安所用我我得不落彼御史度内已足又复奚望哉然自是再遇两宫覃恩进阶有金绯服前后居林下垂三十载于吏弊民瘼未尝不精心为台司郡邑诸公白之也诸公亦心服谓故给事论辨万里外若指掌宁鹵莽目睫下公每叹使我更得十载立丹陛前计议天下事当不止此已矣公讳遂良卿其字别号南冈其先为汉零陵太守伯高新恩侯所称说者也十余传而为暹家道州又数传而为吉水丞庚避乱徙永新其后有况者官大理评事有钦者中三史科官四门博士冠带世世不絶至公之父赠给事中必合益有闻矣公性颖敏工属文总角而补诸生踰冠荐于乡无何成进士俱为通人所赏识当赠公之捐馆时公尚少毁瘠不踰礼奉母以孝闻抚弟妹以友爱闻待亲族以惠施闻他行谊章章甚着其仲子希夔能述之余不悉録録其大者以志公藏令后世知有龙给事公而已公以丁卯阳月生以癸未蜡月卒得寿七十七娶汤孺人有丈夫子七人某某公故勤学问然喜力行不务为名高邹司封者笃论士也于称公甚至而犹恨其不喜聚讲以故激昂凌厉之气时轶而之于刚然欤否哉嗟嗟使公日聚讲者百炼化而绕指矣

铭曰天德之刚不以物萎谁为伸之谁能屈之吾所谓屈伸者不悲其人而悲其时

赠太子少保南京兵部尚书僦庵潘公墓志铭

潘之先自荥阳侯食采于潘因氏潘而望荥阳为最古晋时中书令安昌公尼者与其从父散骑侍郎岳齐名以避乱死坞壁间而子攻渡江徙吴兴之乌程遂家焉七世而为孝子综又二十六世而为万一公始迁乌程之汇沮又六世而为南葵公孝有四子公其季也父子俱以少子季驯贵赠累资政大夫太子少保南京兵部尚书南葵公所居汇沮既极吴兴山水之胜又因沃腴为产遂彬彬诗礼名族然不能得志于科目公生而颖秀异凡儿髫时南葵公抚而弄之膝前有鸣金过者公驰视之南葵公曰毋往也能属对吾噉尔饬乃曰铜锣打动小儿心公应声曰木铎振扬夫子教南葵公大笑曰使我形秽既谓吾潘有人矣九岁受经术属文多儁辞少保闵庄懿公珪致仕归为其仲子某择壻而得公见已心器之复使属对语逾工有唐人意中句庄懿公喜谓某曰趣归女必贵是

为闵夫人公甫成童游郡庠弱冠以高等受饩俊声藉藉而会南葵公不禄公以少年支持门户不能无公私挫损乃奋曰岂可以当吾世而隳先人业于是大有所树廓然不屑屑计也既而叹曰是且妨吾书于是脱身游太学多交其豪贤长者意犹不怵乃徙居蜀山别业益治经术垂就而家不戒于火尽丧其橐公复舍而治生居久之大逾胜于旧盖公之产再蹶再起其于学亦再芜再殖然卒不获以科第显而所举丈夫子四皆朗秀玉立公悉延明师诲之而身提衡其间寻仲季皆举进士官太史台谏计公当益发舒然不肯作官人态或谓何以不就二子禄养公谓吾食于二子不若食于家甘也且不欲以口腹故伤其廉每贻书戒二子母家于官苟尔吾不子若公素不习医偶阅岐黄家言而悦之遂以医名其切脉处方多出人意表属大疫公亲为■（口父）咀里人恃公而起者十九邻有赵某尝讼公于官而病且剧谓其子曰能生我者潘君也其子谓方与潘君讼柰何从之乞药赵某曰不然彼负气而中甚慈必不忍于我公果为之悉心处剂以起讼遂不克终公年未六十而中外孙可二十人环绕膝前教之句读竟日欣欣忘暮然不久竟以病捐馆时嘉靖之甲寅四月廿有三日也距其生弘治壬子春秋六十三娶即闵夫人有妇德四子者伯骧官桂阳令娶严镇远守凤女仲骞翰林院编修后为安庆守娶邵山东按察副使南女叔骏官龙江闕提举娶吴季驯累官太子少保刑部尚书今以右都御史召理河道公自御史少司寇御史大夫四赠而得大司马皆以季最故娶施光禄署丞仑女五壻为张夏冯时雨李学皆卫经历沈子禾邑诸生沈蕙太学生孙男十四人景生冠生弁阳太学生茗阳太学生朝阳岳阳桂阳伯子出也京阳瑞阳俱太学生锤阳生员文阳太学生仲出也震阳邑诸生宜阳太学生华阳忻喜皆叔出也大复进士为溧阳令龙翰恩生玄授玄孺俱邑诸生季出也曾孙男二十八人婚嫁皆名族御史大夫之言曰先公之倍诸孤也其墓有封树而无志铭孤虽少不任责然中心怍营焉未尝一日而忘不朽于地下今者托吾子姻娅虽然俱老矣其幸而辱之一言毋使有后时叹余既已许大夫窃谓潘故世号鼎族顾未有显者公复不得志于诗书然四举子而四皆贵诸孙复继之绳绳振振无非麟趾息之数世丽且不亿矣是曷故哉医以活人为功一念之仁不以鹺废其大可推矣是宜志而铭之公讳某字某墓在某地

铭曰乌程之山若徊若翔土沃而丰水清以长是惟潘公之宫与其藏子孙弥昌利用宾于王

资善大夫叅赞机务南京兵部尚书赠太子少保月溪阴公墓志铭

万厯戊子秋八月叅赞机务南京兵部尚书阴公卒于位侍郎王世贞偕寮属为公治丧得美材焉以藏公遗而久之闽中吴公代公位偕世贞上疏称故尚书阴某奉事主上三十余年小心敦谨无纖毫公私之谴扬厯中外所莅有声实以至八坐俺及三载不

幸病歿垂橐萧然归棹万里臣愚不胜敝帷之感惟陛下裁悯天子为之震悼下所司赐祭二俸择壤以葬仍赠太子少保唯太常之谥尚阙焉以待议者公丧且发而其嫡胄子镛手次其事行谒余请铭其墓中之石曰呜呼先公已矣所恃以不磨灭者唯子文已而复以大司空何公起鸣之状来曰葬有日矣敢终累吾子余与公虽晚合宛然金石契也其何敢辞按状公之先籍楚崇阳八世祖天与为元万户避兵徙蜀之内江遂称内江人有子汉州司训广广子秩秩子秉纲累官同知黄州府数被荐书一见祠名宦秉纲子柰柰子玺玺子汝夏俱博学有隐德为里闾所述而玺汝夏竟俱以公贵赠通议大夫都察院右副都御史通议公娶洪淑人而举公公讳武卿字达夫别号月溪伟皙端重自其儿时已嶷然有巨人表七岁能属文日诵千余言稍长通尚书傍及经史百氏之学太史杨公慎少保赵文肃公贞吉为乡先达见公文而器之会于圣水寺赋诗以台辅期公十五补博士弟子试多冠其曹偶久之通议公以事至贵之思南病卒公驰哭奉丧归哀感行路既服除举于省为第一人明年丙辰第进士复冠其经见赏侍讲邢先生一凤授南京户部主事寻以洪淑人忧归其毁如初服除补刑部得四川司寻进署江西司员外郎公于职文法无害尤能推见深隐以情丽之官余杜门自守俨然若冰玉为文详雅有度人益称焉遂得陝西提学僉事陝故多才自杨文襄公之为使者以水鉴称绝而公差为近省试榜出所拔第一人强半若今温司徒李尚玺尤其表表者公于学政慎其它能衷宽严未三岁迁布政叅议分守江西之九江鄱湖盗藪一空以暇延接儒生讲说积术几如陝时明年转其省按察副使入贺万寿主爵者谓公文有余改督广西学政广西不能当陝之半而公益精熟益尊重无事诸生文受公阅若妍嗤之过镜无能遁者公又时摄臬篆辨某儒生宿冤咸以为神帅府有讨于猺公叅其谋逡巡辞报功不获赐金纪叙遂进福建左叅政甫至而倭大来寇都督俞大猷讨破之公又叅其谋比入棘所得多名士迁江西按察使风纪肃然偕御史献审有所平反转陝西右布政使遂为其省左属岁大侵公竭策蠲赈首损岁奉以风劝其僚属民用全活又因星变上十事于两台一曰给户田二曰定本折三曰谨支收四曰议储蓄五曰处虚粮六曰核屯课七曰请驿传八曰备边饷九曰辨贤否十曰严吏卒两台是而行之多着为甲令部有以白莲教叛者台发兵讨平之公又叅其谋是时公居陝久赫然治声流闻前后三推开府京牧皆不果最后余以故中丞起田间补应天尹避言不出而公得之至未几即提调留畿试劳勋为最改太常寺卿上方举籍田礼至郊祀天地恭谒诸陵飨太庙颇用纖苛责容台鲜当意者公独善为仪进止甚都而貌又明皙上时目属之辄有赏赉寻拜都察院右副都御史巡抚真保六郡提督紫荆關军务公始得发舒其材用选将练卒信赏必罚前后清丈田粮议处赈恤通河道湮塞饬三關墩堡皆精意行之不为虚言有剧寇横劫剽州邑杀僇吏民公讨捕悉就平考绩予诰命及三代入为都察院左副都御史佐理院事亡何转兵部右侍郎再转左前公治真保时行边给事以公修塞劳上闻赐白金一镒文绮二其后复有以旧劳上闻者赐绮如之白金杀三之一其后以慈宁宫告成宣辽左捷赏俱如初以督视寿

宫劳宣平緬捷赏差次大司马满六载进阶勲正议大夫资治尹遂进南京工部尚书取道还内江行焚黄礼守令牛酒上冢益出赐金与五服宗党戚属共之父老饮而悅相顾指曰吾乡人瑞也公既竣事驰之南京思大有以振厘宿弊会有诏征言遂条为八议一减免织造一寬造器物一查覆椽荐一停解花梨等木一改折皮张一蠲免拖欠一暂免物料一停取杉楠寻复因僨运粮储条五议一清關防以肃漕政一查班匠以济工作一催底船以杜推诿一慎金选以便责成一清船号以便僨运其后议俱报可而前议事取裁节岁可减县官十万之费而中官近幸多不便以故或许或格然其许者至今利賴之而见格者往往为通人扼腕孰计以为当必有踵行不终寢也公用大计吏自陈乞骸温诏慰留不许俄转今官公故有威望至是饬纪振頹斩然一新仍疏条请补丁壮实营伍征折色置操马增火器重游巡严捕盜稽职守皆报可前是少司马顾公章志以车驾郎中倪冻议上书请新船政即下郎中冻计处岁所裁省冗费以数万计疲卒得大苏垂报功而所未尽者公复与郎中冻谋分款十一曰分大小黄船差二曰减太常寺官差三曰减驾船军额四曰处原驾正军五曰会计行粮六曰酌量募直七曰议接船银八曰议修理费九曰派编俱如快船十曰拨差应并兵部于是纖悉无所遗恨称尽美矣而会岁大饥流莩塞道米价踊贵至三倍公虑诸军困而有脱巾之变也疏请先给二月粮军恃以饱且有羨米鬻之市价亦稍损有为狂语举之通衢者公捕得杖之百且以三木囊之咸悚戢时世贞已久废田里强起从公后公欢然恨相见晚事必咨询恂恂怡怡如也公少于余一岁髮鬢而颜渥丹腰腹博硕如壮人而间谓余病不时汗心腑间恒怦营非得热酒沃之不止七月行尽偕余试诸生而微不豫余劝之少休然犹健食饮为人作报书如恒时晨起忽眩暈不食顷暝矣留都士人相顾悲咤痛失公而叹人世之无常时岷峨之中有两巨公若公及少保铜梁张公者皆生同丁亥前后相次为两京大司马张公得弛檐而公犹在事不一月而俱失之人之云亡邦国殄瘁岂不惜哉公为人详整严密动止有尺寸所居官内语不轻出外语不阑入至于遇大事决大机取裁一心不少凝滞既以文学政事致显重然絕不以所长形人以故毕身鲜忌者即有一二亦不能苛诛其迹嘉万之际柄臣凡三易而三为伎公无所亲踈以其身与官俱完昭朗令终宁偶然而已公春秋六十有二娶于某封淑人子镕鋹钊云云葬在某地铭曰

阴先侯兴别曰长生世为公侯亦炳仙灵自楚而徙如蜀卓程卜祀无疆至八而亨吐汶斂峨乃公挺然望之如山探之如渊西障大荒东润三埏胡渊而涸胡山而蹇匪人摧之乃天为之朝着失望戚里纏悲我志其幽系以铭诗太史采之太常仪之

太中大夫河东都转运盐使司运使少葵公暨元配归安人合葬志铭

吾王之先出晋丞相始兴文献公五季时徙严州之分水有司諫公縉者显重于宋

为名臣以上寿终又数传而至古川先生讳梦升薄元德不仕仅从行省辟为昆山州学正踰三十年老不能归遂为昆山州人后割昆山之东垂为太仓州故王之裔或称昆山或称太仓其居亦相错如绣古川先生有三子其中子天絕而长者则吾少葵君始曰西族少者则余始曰东族积数世而后少者分日益以尊故吾齿亚于君二十年成进士亦后一纪而忝大父行君不以长先达故废孙枝礼侧行隅坐唯阿唯谨即遇他东族羣从少年辈谨亦如之而其于西族祭酒自若君于古文辞少而好其妇弟归太仆先生熙甫既而好俞征君仲蔚晚而好余诸子孙探君意遇其七十或八十年必征余文及诗奉觞为寿君欣然领之迨其晚年则熙甫仲蔚已前逝久矣易箒之际属其子仲极曰志吾墓者必吾司马公而后吾安于瞑已又曰悉我而文者许萧山也属之状故公没垂二载而仲极将葬公于邑西二保之莫字圩奉母归安人枢合焉而征萧山君之状来请志若铭君讳三接字汝康号少葵则縁父乐葵公故王父承事郎恢赘于昆山之时遂定居昆山生子封祠部郎时旻即乐葵公也读书工举子业入太学不仕而以君贵封母徐亦安人封公善治生能用积織起有子凡五人而皆敏君及其伯氏光州守汝怀则其尤卓犖者封公既不得志于科目则益课督君兄弟读是时尚居约于膏油蠶盐之类仅取给而已日噉粥无兼味而君不少倦十七补州博士弟子试辄异等有声居久之伯氏已连举进士矣而君尚滞诸生间当就乡试首试于御史不录已御史合十四郡九州岛之遗者而更试之得君文赏异曰吾向者何以生若咄咄恠事君遂以第一人入试荐于乡明年复成进士光州君则谢州事归矣又明年授大名之长垣令长垣三辅岩邑君治之最有声尝雪重辟之冤者不为宿案所束一县戴以为神明有御史大夫所居邑邻其舍人子贷金于长垣之市倍其息君持不可曰倍之其业行尽俾讎其十之三寻大夫之夫人之京他邑令望尘跪伏道左君独长揖而已夫人怒曰何强项令若是与其舍人子合而譖于大夫大夫信之及大计吏遂欲斥君太宰许文简公讚持之曰考令状先后皆良语何自斥之乃得调浙江之景寧君为景宁则益练尝以其山邑多溪水时暴溢而土椎不知学君勒其吏民筑土石为堤而躬之学宫与诸生谈说积文不休积以有声邑诸山故多矿然矿脉已絕而中贵人缙帅奉上命履得其地必欲开矿君从父老力持之不可既开亡所得中慚忿益恣其■〈氏鸟〉张以搏噉其民君匿之而独身与抵抗会御史以兵使者至调剂其间始得解当是时君几危然声亦益着太宰欲大用之然以大夫犹在台为稍迁南京礼部祠祭主事满三载考最得封其父如君官母秩如之制冠服以进封公公御而大悅乐谓吾为伯氏宦不达视一命若天上今幸得之矣留君畅饮月余而后返部进郎中君于曹事简无所发抒然已雅为尚书南郡张公所赏事必取筹划间从郎同年许仲贻薛仲常纵游山水间倡和成帙盖未几而柳州之命下矣柳州故唐迁人地至明而小重然方有兵事知者不以拟君而得之君意气故自如甫至柳而张襄惠公岳已总大兵平马平寇行相地得千壤村为要害议创堡堑调狼兵杂他獠守之以控御遠迩公抗议谓巨憝顷已悉伏诛其胁从解散者良赤子也坟墓庐舍妻子皆在今夺以予戍卒

则亡所归使杂居必不安且狼兵非能久戍人也是不溃归必四出行剽耳顷守使人微风诸獠其父老携其稚弱踵至叩颊愿得长奉使君宇下岁岁共县官赋役自诅于天不敢倍德守请毋以狼兵杂他獠戍之即以土著之獠戍之张公曰善吾见之晚罢不复别置戍时又有周王谏者其父子皆黠黠而据上犹尚行剽柳融四邑君设方畧捕擒之不烦兵立平柳故环江而城阻水为固惟北则平野无山溪之险有寇警则豕突而前不及乘障公请于张公辟北郭而城之其长为丈者五百七十有奇高为尺者十有四因工于饷因力于兵城坚若砺而民不知役岁当入覲上计两台疏留君毕役请毋行而修郟者复乘君不在以间调君君念台荐萎上法不当得调今有调此必有深中者柰何复出委身齿颊间而封公强之力乃就吏部除而得云南之澄江澄江虽远而土风清淑民饶乐无事君以治柳者治之效乃大着台所慰荐如柳时适有元江之师君于幕府多所裨画黔国公卒有弟朝弼当袭陈夫人妬之别拥他人子以为公遗胤欲以倾朝弼事闻于朝遣给事会台勘而君在委中陈夫人行金居间而君固辞之曰黔故勲国柰何欲以私恠斩其后朝弼卒得袭滇人称之迂河东都转运盐使河东额盐四十万引岁益之为余盐二十万引而久之遂欲并入额为六十万引君固持不可曰余盐也而入额是将复生余盐也商人感其意皆子来课乃大溢而君以其羨拓书院召补诸生讲习经术彬彬如邹鲁寻沿檄入棘闱所得多知名士其撰程序文皆雅驯为世所传复以计当迁而以不能事言路罢君怡然曰吾三覲而三被抑念非有所致者又非受台察也已矣归而谒其二尊人尚健匕箸喜曰天以二尊人赐我也公及徐安人亦喜曰天以吾子还吾二人也君少于光州君一岁而皆未及艾其叔季亦有官职入则青紫逶迤奉醪膳加珍腴出则冠盖杂沓为闾里所指羨然君于兄弟间最寿考赠公徐安人之捐馆也君自南中得美材二奉以归之土椁周于棺楸栢周于隧垣周于楸栢多公之任而久之光州君与叔季相继歿君皆哭之恻次第抚其孤皆成立其得官与遊太学者过半时从兄故仪部汝鉞之子詹録定鼎乡进士亮臣率其诸子皆从衣冠满堂序甚盛余所称西族祭酒者此也君生平忠信详整无轻诺然诺亦不至宿雅不欲以施予名而至五服之戚属亡不称心而应其自奉俭所进鲑肉不再簋而飨祀必丰腆宴宾亦如之然宾故无杂所还往莫逆自仲蔚外惟龚子良徐道潜称文字交生而致■〈叔上米下〉没而助丧与恤其后不倦至笃老益恭虽后进韦素者谒之无不报谢郡邑守令岁时伏腊不废礼然未尝为人關節有所利于橐也赋役以时趋赴毋爽县长吏亦尊敬君乡饮必以大宾请君为一再赴而已君之老也尝再奉诏累进阶至太中大夫一奉诏褒礼耆德有司以大司寇钱公观察季公与君应君素强无疾寻病脾鲜食以至革既革犹盥嗽袭衣冠谒家庙顾召仲极前嚶嚶善诲且命以其仲子为兄伯极后既毕恬然而寐若脱时万厯丁亥之八月朔也距其生正德丙寅寿八十二归安人之卒则前公已三年安人者故赠长兴令某女即太仆熙甫室时以事父及后母孝称十九归君恂恂有妇德语声不出户其奉舅姑谨而性尤俭赠公喜曰吾夫妇俭吾儿又俭称为妇矣其理家政则井井以故君遠宦常在万里

外而无内顾忧其后为德于宗党翳安人是頼安人多病不宜子君有所置貳寬然抚之不妬也其生以弘治乙丑寿八十有一丈夫子二伯极太学生蚤卒娶于沈无子子仲极之次子尔■〈王笛〉貳马出也女一嫁徐胤锡亦马出孙女五俱仲极出呜呼数年之中而吾王之成进士而显者尚四人丙戌从孙刑部郎中周绍卒明年君卒又明年吾弟太常敬美卒独吾一人在耳老而乞骸骨不获形影相吊茕茕无所依不自意吾子士骐与光州君之孙临亨俱成进士吾虽老尚能为君勒兹文于地下之石惜乎君之不及见也铭曰

畴奇君于宦途而尚以二千石秩归而称上大夫又羸以二尊人使得致其孝羸以喆昆使得致其友羸以淑俚使得优游以偕老羸以子姓孙枝使得暖其桑榆而毋戚戚于抱羸以余辞使君不朽呜呼竒乎羸乎竒宁竒乎君与淑俚偕大归乎不偕怡怡乎

弇州续稿卷一百十五

●钦定四库全书

弇州续稿卷一百十六

（明）王世贞 撰

○文部

△墓志铭

叶肖愚先生墓志铭

叶之先家吴江之分湖为令族然自福四公生子仲宾仲宾子蕙蕙子贈公芳俱不获以科第显贈公之子少卿公绅始用进士入諫垣尚符玺遂能贵贈公而叶之族乃慕称科第公有子三人其仲为一愚公旦奋欲绍公业而数竒竟不能得志于一战犹时时艳之一愚公举丈夫子三长曰虞部君某次曰某君其季也一愚公甚爱少子而心异之属虞部君复成进士与其仲俱以心计致产埽素封一愚公自顾其橐累然不能为君产忽忽计无所出君性明颖能记诵乃教之属文则工属文一愚公喜曰儿不后伯氏也稍长补博士弟子每试辄冠其侪偶诸侪偶每读君文自愧其不如而至大角试辄北君又善事一愚公孝谨无为比于是公老矣益怜爱君而虞部君之子重光复举于乡里人赆

羊酒贺一愚公公愀然曰伯子幸贵何故益之不以与吾子而与吾孙乎即客贺请俟异日里人掩口而去一愚公更邑邑不自得以至死君大恟绝而复苏者至再三曰天乎无以慰吾父矣既公除益研精经术恒至丙夜不休时语人吾合眼不睹若圣贤者辄睹吾亲然其于业益精而于试大小瘼如故会君有二子俱少敏君躬自课督之小不率扶而鞭之已相抱而哭曰扶我不若扶汝易也二子感淬励于文其长者试诸生第一而幼者亦在高等君始稍自宽无何幼者举于乡君喜曰即见吾亲地下有辞矣吾贵故无日且不欲与儿子辈争衡于是数过从闾党畅饮赋诗益适而又久之幼者成进士前是君以哭虞部君又哭其殇孙得疾不受食进士闻之大惧欲上疏请急君怒止之曰谁为言乃公疾者乃公日进肉糜如恒时且汝甫仕而即先亲而后君不可于是进士强就吏部选人得山阴令驰归君病不可为矣拜君床下涕泗如绋縻君止之曰汝伯父筮仕令山阴今汝复令山阴能济美矣病既革曰向者不云乎吾庶几有辞以见吾父地下复奚憾君卒之年以万历乙酉距其生嘉靖丙申春秋五十有一君性直不能藏人过里中恶少年畏君自避匿不敢见然君仁心为质引义慷慨戚党有贫于君者以假贷告君内顾橐空矣脱新衣予之而身衣故衣复有继告者君笑曰衣尽矣检室中得银器数具尽予之母汝夫人之族有夭而贫者收其遗孤食之君故计口而食者也君讳可畏字懋时自署号曰肖愚志一愚公遗也二子长曰重科次曰重第亦一愚公意也配吴孺人重科娶毛今山阴令寿南女重第始聘刑部员外郎马贯女而夭今娶冯故太仆卿敏功女孙三绍鼎聘沈绍鼐未聘女一俱重科出绍某重第出二子将葬君于吴县凤凰山之原以书数千言介刑部郎沈子瓚而奉虞部郎沈君季文之状来请志铭其叙君父子极意于科第而不尽遂者独详嗟乎君父子所习羨科第耳然自少卿公以及重第四世矣再不得意而三得之乃其称君子长者固奕世无替也是可人人得也铭曰

凤凰山之原秀而沃丰君姑即而藏有气如虹其繇曰元吉是必有天子之龙光以贲尔玄宫其罔时恫

南京前军都督府经历绍阳马君墓志铭

用昭之卒于留都也留都士大夫无不为之弹指叹息其从弟宜甫搜其橐不能直二金于是宗伯姜公司马吴公司寇陆公御史中丞王公十余曹捐月奉资之而后成棺殓余既已吊用昭老苍头累然伏而哭曰家公将属纆犹蔓语必得王少司马之一言而入土居月余丧归又两月而其子郡诸生升手草用昭之事行属其姻执左方伯郑公云葢以状来请曰公其能已诺于逝者余故贤用昭而怜之甚何敢辞用昭之先马氏世为闽之怀安人用昭其字荧其名绍阳其别号则曰吾皇考锺阳公意也皇考厯佐世穆二庙为户部尚书博大精敏一介不苟取有大臣风歿而天子赐之祭葬赠太子少保谥恭敏

蓋三以用昭請合公議而身後之典始備恭敏公有丈夫子三用昭其伯也而又愛始用昭生時秀穎異凡兒及長恂恂恭謹事恭敏公能得其心入奉溫清出應賓客有条理晝夜治經術又工屬文弱冠補博士弟子員姜公時為學使者試而竒之曰國器也然君竟不得志于科目既以恭敏公蔭入太學即有聲太學而至大試復不利恭敏公強之仕曰吾精力棄于官者十八而始有此蔭錄若柰何弁髦之且吾老矣不以時見若御官入服而拜我我何以暝用昭始為吏部選人得左軍都督府都事朞月而以恭敏公憂歸用昭自恨不及見恸哭嘔血斗余毀瘠骨立行求得余于里中俾志神道之石曰庶几有以報吾父及服除補中軍都督府久之忽忽不慍曰升斗祿不足自給柰何日從長安貴少年子相逐擊鮮飲釀哉請于吏部得遷南京前軍都督府經歷居閑無事日取古書讀之稍出則擊三山大江之勝意小暢而病矣其卒也春秋僅五十有一用昭能為古文辭所交游必天下之賢豪長者而其于文士尤急為人溫良樂易若可親而中實耿介不可得而狎其為都事而經歷以幕中之羨百金請中分之用昭固辭曰此羨殆為君非我也通家子馮虞部方課收大工木而商有私木欲上者以中貴人援來虞部却之曰得馬叅軍片帑立聽汝商賚五百金為用昭壽用昭大驚曰此馮郎污我咄咄入內不復出余友徐子與宦閩中素嚴恭敏公而悅用昭才以不時見慰藉良厚用昭唯唯無所說私恠之異日屏人與深語亦唯唯無所說乃嘆曰吾故知用昭淺也用昭之過吳門出入羸服徒步從一小奚奴見之不知為貴公子也他公子服御駟從十倍于用昭而貴不如吳門王穉登竒士也一見用昭心死與定交為莫逆恭敏公產故薄用昭居長嫡悉均之諸弟無所私而身任其大事所交游既廣即筭器尺縷累費日甚故為家督者三十年入宦又七八歿而不能具棺殮用昭之年事官位俱不稱為恭敏公後其志行之皜然與令聲之脍人口固無異于恭敏公也昔韓退之表馬少監之墓而致慨于北平王三世之祖謝余文故不能如退之然不一紀而志恭敏公之神道今又志用昭之窆其感視退之又何如也用昭有婦王孺人子一即升娶鄭為方伯公女女二適太學生林世勤次字袁敬訓孫男二鳴鸞鳴鑣塋地在羣麓山梅台之間恭敏公所預卜也王祖父母詳恭靖公碑有遺集若干卷

承直郎南京工部都水司主事見石陸君墓志銘

陸君諱大成字集甫吾州之東鄉里人也陸與王故皆江左著姓其徙皆久廬舍田塋相錯如綉而又皆負高賈習儒術諸姓莫敢望之然吾王最多取科第為京朝官融顯而陸往往困諸生自君之世王父虞部公愚始舉于鄉仕有聲迹然晚出未久輒卒而君之生也即以穎敏為其父庠生明佑所竒顧益嚴督之自雞鳴起誦聲琅琅至丙夜不休以故能盡熟博士家言其為文清利有氣先司馬公識君文于少時曰是兒也殆為陸氏破天荒者耶十六補諸生而父則已捐館君哭踊踰禮既祥推其積于母曰大人幸主之

儿知有读书以一第慰地下耳他非所任也君为诸生与其族子一德名相甲乙每试辄褒然无敢挟秋与角者然至大试辄北君不以自沮其于文亦不至铲削其锋铓特以习之久得转丸成风之妙四十六始荐于应天为第一人主司高中允罗侍读得其文而异之既知为君益自喜且以钦君之诣而惜其遇之晚也寻下第于南宫弟子受经者益进明年吾儿士骥复继君荐第一故于君中表兄弟也两家羔鴈接踵相望人谓王氏得之若邓林木陆氏得君若郗家桂一云陆为凶年穀王为丰年玉及试南宫又俱下第君抚书而叹曰书误我令我老是间不获一脱颖然于书竟不废至丙戌君所登卷为大学士王公所识赏几魁其经及对策占高第吏部选得南京工部都水司主事部札委修孝陵垣缮都城京仓君素强无疾食噉能兼人既以晚除思悉心于职业以自显见故触暑凌险昼夜登顿不肯休既感痢犹强自力食糲与隶卒共之竟以是寢剧卒年仅五十四橐中无余装时吾弟太常已病犹强从其乡荐绅经纪之归而不克葬州之韩大夫倡七邑之同年令捐俸资之始成墓嗟嗟可悲也已君为人质木坦易不设城府机辩与之语洞见底里然絶不可以非义干事母能先其意当与二弟析产时居瘠推腴以成母爱弟亦感之相好无间言女弟之适王氏者贫所得束修之余时时遗之领解后粗足自给即割其橐以予族党之不能朝夕者既成进士首贻书属其子墓外王父母以下凡六丧故君歿而陆之族鲜不弹指出血曰天乎何一昌集甫而遽夺之非夺集甫夺我曹生命耳譬之大旱赤地千里得霖雨不一昔而不继何如无雨君尝读左氏国语战国策而摘其尤粹者曰三史纂已摘诸子之言曰百家纂已集先秦以来之文而诸评隲附焉曰文章抄又以易道广大而精深习之者未易得门而入乃叢程朱之蕴而断以己意曰易演义诸所撰当不异人旨而易为深矣君貌厚而坚强故可致中寿困诸生三十年困公交车又六年仅一第遽死君不死所就宁可量哉君取妇凌有子二弘泰娶金弘锡娶龚各举一子未名墓在茅长泾之西状君行者君之从叔明嘉陆之儁而穷者也大学士王公者与君生同庚居同里而为君坐主明年公之子衡荐顺天亦第一人又明年吾子骥踵成进士而君俱不及见矣铭曰胡显之促而厄之长胡位之卑而名之昌造物者或偶然人疑其不常而吾以为常

处士汪次公继妇许孺人合墓志铭

汪次公者讳良标字文正歙人也父曰玄侔善心计顾不为伎求以鹽盐起自致高赀而行其德与从兄赠司马公齐名有丈夫子三伯季皆以开敏工治生父独谓次公伉直类我于是俾就常山市主化居而二子递贾他郡邑若转毂次公性卜有所不当意辄嫚骂市人初走避之既而习知次公无他腸质信而亮意豁如也乃益亲附次公而会所娶妇即许孺人性明慧善事舅姑于妯娌间有恩谊又能把持家秉次公计入而许孺人计出以其羨置私田若干矣孺人之来归则与赠公之子封司马公良彬妇胡淑人同日

封公以兄事次公而孺人能推先淑人相得无间两家通橐不私其烟火会公父亦自材公其老而当授也析为三令三子覆射之而次公稍得良者里有云智不如福其次公之谓哉然次公不專为积着遇义能施市人负其侣罗滋宗盐直次公出百缗偿之两得解前后治棺以敛僵尸凡数十于是仁义附矣次公壮未有子许孺人为置媵侍徽俗妬里媪羣咻孺人弗顾也然诸媵卒无出而孺人屡举三子次公乃故庄事孺人诸媵咸廩廩矣而孺人亦抚爱之待其出逾于己里媪咸媿服孺人次公能食酒与所善豪对饮尽一石伯季皆前死邑东归而封司马公有子伯玉已贵于是益心附封公如亲兄弟次公与许孺人先后捐馆伯玉咸为状其行积二十年而墓问志铭于余噫可以死矣次公寿六十八许孺人寿六十五子男三长道简受次公贾道遠道齐皆以易补郡诸生云云

铭曰以次公之亮直无城府也其良于贾矣以孺人之离俗而不为妬也其良于妇矣虽然此亦阎井之恒行而余两人志之不亦大幸哉其起以商其显以儒于戏

处士程有功暨配吴孺人合墓志铭

程处士者讳廷全字有功徽之休宁人也程之先自周伯休父至梁忠壮公而始显其后枝别益繁且千载而谱系秩然徽地四塞多山土陋而民众耕不能给食故多转贾四方而其俗亦不讳贾贾之中有执礼行谊者然多隱约不着而至其后人始往往修诗书之业以谋不朽其亲若有功之仲子太学生暹既为有功求汪司马伯玉传之而意若未已故人子汪元勳间过暹室见有悬像者香火甚谨问之曰此吾父母像也墓且十七年矣而未有志铭心摇摇怲怲焉意必得天下之有文若琅琊司马者当之而道无繇也元勳奋然曰吾游琅琊门甚重力能得之乃为草其事行累数百言仍介暹币而请曰幸以元勳故及暹以元勳之父例处士也蓋尝为其父立传云寻征之处士乡人信乃返币于元勳而志之处士生而恂恂朴温人也事父母孝谨于伯季间独能致甘脆之奉而迨其终又能致其哀毁丧墓必以礼所娶妇吴善计划用俭勤佐处士因得自寬行贾江北几十年而贾就悅六安之土风筑室焉夜有斩闕而盗处士五百金以去者微之则里中孤儿也人谓捕而送之官公曰入狱必考死柰何以五百金故斩人后遂寘弗竟六安大水民涉而溺者数十辈处士为采石构輿梁民遂不病涉六安守偕其荐绅先生具牛酒为寿请遂得交欢处士于是益自励倭警则为版筑先岁侵则损穀粟以賑义声隆隆起矣吴孺人竟以劳瘁早死处士临与诀曰若好去吾必不更立室吴孺人指其二孤曰君长者必以二子显处士自是鰥处一萧斋絕奔女妾童之遇蓋二十年一日也既业益饶叹曰为义而后其亲者可乎伯季贾不得意割帑以资之伯之子旷扼于贵人者中以法为阴出百金以解不使知也则程之族多润矣而处士以万曆癸酉卒得年六十有八二子长晨受其业不替次即暹治经术有声孙男八宗丽宗猷宗周宗信晨出也宗铎宗鎰

宗鈇宗鈇暹出也孙女二诸婚嫁多名族葬在■〈汜义〉山之阳盖启吴孺人之窀而合焉

铭曰贾其行士其谊德不显曰处士失厥偶不再偶卒同穴曰良夫妇生隱约没而称以为不信视余铭

程处士汝宜暨配金孺人合葬志铭

太学生程利往之丧其母金也少而有父处士汝宜在已而汝宜亦卒利往仅拮据以从事于葬而弗备礼皇皇如有所失及来南都多游贤士大夫间始知所以母死其亲者有悼史之文在行求其人于世不得而顾得之闻左曰吴司训瑞穀俾状其父之行已又行求其人至广陵而得之曰诸生陆无从俾草其母传而喜曰吾闻夫二子者古文辞人也是必不朽已而微知二子皆王先生友也则益大喜介瑞穀而来请曰唯先生怜之庐井闾■〈巾达〉之微得附青云而声施于后岂唯存者即歿者亦衔戢地下瑞谷为请之坚憫而许之汝宜徽之休宁人徽俗朴而独休宁之俗能备礼然独盛于都市南而西则渐以朴其地颇有稼穡之业工贾而好游尚纖俭至汝宜独不然被服儒素造次必以矩进止雍容是都人望而窃目之汝宜曰吾惧辱吾先蓋程之先忠壮公灵洗以勋贤佐陈有爵土子孙冠带衣履不絕而汝宜为西川之程其一支也汝宜之父曰世翊公寬然长者首举汝宜生而伟丽异凡儿稍长习博士家言已而益读古文辞书史之类世翊公贾而拙嘗困逆旅中汝宜闻而叹曰大人暴露单外其子之不能体而日从事占毕非孝也乃奋身从其季父世端公行贾荆襄是时金孺人已归汝宜矣孺人富室齐保择壻而得汝宜甫离女即为人冢妇能削饶为嗇励逸以銳恒推布操作饭脱粟而取其赢羨以甘脆奉舅姑舅姑安之汝宜贾荆襄不得志乃复与从父决筴徙淮杨孺人悉捐其帑诸妆首金寶玕服悉以佐行曰新妇无所事此也奈何死之棣中汝宜得緣以鹽盐起货至倾邑然好行礼而孺人好俭俱如初孺人不能多生子有一子即利往然汝宜亦不緣以广置媵利往六七岁时颇孱孺人驱使之就外傅暮则置之膝使覆所受书少不诵则推下之目摄焉或曰儿孱奈何恐之孺人谢曰非不知儿孤注也骄之则败辕犊耳及利往当冠汝宜则集鄉之善为仪者为之三加而训之识者见而叹曰三代不难也或曰恶用是盘擗非急事为汝宜亦不顾汝宜虽鰥游然不留一侠邪迹有置高会而进乐妓以娱汝宜者正色而遣之生能饮酒数斗不辞然未尝有酒食过有谓金孺人撮之严者金歿而汝宜卒不娶蓋天性然也父母先后以令终居服舍戚易必以礼待异母弟如同生怡怡无间言蓋皆有足多者汝宜讳尚义别号西源卒之年仅四十九孺人尤少年年十（阙）利往娶亦金姓读书有奇节岁饥大出穀以賑饥者而归功于汝宜之积而巡抚畬中丞追给冠带旌其门

铭曰夫富而好行其德曰礼以坊溢妇富而益恭其职曰俭不变塞交相成也交相式也维德之庆以莫不昌有胤也良胡以弗亡我铭其藏

赵室袁孺人墓志铭

赵孺人者袁女也袁若补之永之兄弟与永之子鲁望世世有文而孺人之祖父某某其间不忝十八而归太学生龙伯龙伯之父某上暨王父伯京大夫亦世世有文孺人通孝经内则诸书称其家声归龙伯十四年而卒年仅三十一而已龙伯为之大恸几毁既除丧邑邑不忍释曰妇既夭柰何复使泯泯也手次其事行累千六百言而授予曰为小子志且铭之予之先人大司马实同大夫乡举而予从甥女又适大夫于龙伯有世契不能辞孺人之归龙伯也事其舅姑谨而与夫子处甚睦而不为狎始犹少之意吴俗靡而女子多沾沾自好不易劳也乃始之所身先其下纺织者孺人即从婢子翼之晨而先夕而后姑怜之曰若羸且休矣孺人曰妇甚慕大人勤安忍独逸橐装有袷服即鏹之日所御白越轻裕而已顾龙伯不能絶鲜华之好间一责孺人絺孺人指谓若大人何服若胡不师其俭而责我饰也然至龙伯出受书与其友会肆秬文酒炙果■〈施，酉代方〉之类未尝不加精腆也客即卒然过之未尝以耻告也龙伯三就试而三北其试也亡所虞治装其归也亡所虞忤色间一怒于市而室覩孺人辄解即弗解以语孺人孺人婉辞导之毋弗解也盖终其身无几微迁客或戏龙伯当畏妇耶曰不彼畏也然则畏若耶曰不吾畏也此所谓敬而若所谓畏也惟姑亦甚爱之顾亦戏龙伯而妇乃能若是吾弗如也虽然谚有之好物不坚吾为而惧龙伯以语孺人孺人曰试与子祥怒厌之何似龙伯曰毋害不闻冀缺梁鸿之有鰥寡也孺人为龙伯产四子一女其长子甫胜外傅即课之甚严闺■〈巾达〉之间斩斩如矣然素弱而以多产故益损削既病痛甫溃而龙伯业游太学孺人弗止也已而龙伯谒告归孺人迎谓曰吾再得梦不祥吾病之起梦日月并悬而月荧荧堕地灭今者又梦素车白马导我而行市中吾其殆乎试有日矣孺人强之出曰柰何以吾梦而易子真子有父母能受妇命龙伯试而又不利也则病且亟睇视龙伯谓妇不能益子家乃以殮葬相累上有二尊人不能终奉事下有四子一女不及见婚嫁母之在袁者老不能致薪粢以此抱恨者四耳修短命也呼四子一女前所以勗励甚切复顾龙伯幸念我为此子女择良俚抚之龙伯哭而誓曰所负子而继者有如日孺人摇首曰毋尔有父母在遂瞑时万历乙酉之九月十八日也龙伯名云蒸以文行称子即弘基聘吕道基文孙福孙俱幼女字太学生徐遵德墓地下在某所龙伯又为别纪其言行与客哀挽之辞曰泡影集

铭曰是赵之良而弗克长焉能使其夫之弗伤胡妖梦之是凭而姑之谗乃征呜呼

其泡影耶其非泡影耶将以予辞而坚且永耶

大宁都指挥使司都事九霞顾君暨配盛孺人合葬志铭

余故与顾氏子冶善一日具苴杖而谒余彘中曰先君子罗浮外史之大归于锡也二十年矣惟是仲叔季氏俱不待年而夭今其存者独伯氏庶而痼孤亦善病诸遗产尽削以勤我太夫人今亦不禄且谋合先君子之兆而窆焉惟是先君子之行谊卓犖可以毋朽而志若铭未有以称也不揣忍死追臆其遗行与太夫人之内则以请先生幸辱之言岂惟歿者不泯存者亦不泯余读其文曰美矣征矣吾何所复加虽然父亦品官也有天子之命在法不当称罗浮外史而母之贵从夫者也法不当称夫人为更而从志之志曰君讳起经字长济更字玄纬别号九霞山人晋时有悦者官晋陵家其属邑之无锡而子通直散骑常侍恺之因之遂定为无锡人至明历数传而为赠太保公懋赠公有二子长为故荣僖公可学次鸿胪公可文荣僖公仕已贵过壮未有子而鸿胪首举君弥月而荣僖公以赠公命抱子之谓鸿胪曰若壮不虞子吾可念也君生而秀颖赠公父子爱之既就傅塾犹恣其游嬉不复问君一日忽自感奋曰男儿足下千里柰何挟祖父爱自弃折节读五经诸子曰诵千余言不拘拘训故而所结撰时出人意表君既长白皙丰下美须髯眉鬓如画目闪闪岩下电荣僖公益竒爱之后自有子子君弗舍也君始治书改治春秋已复治书繇邑诸生进补国子上舍为祭酒伦先生以训所知赏凡七试于乡皆不偶归而益湛淫于坟典以博雅擅声暇则放游山水间有终焉之志时荣僖公自田间起供奉翰林已骤显重至八座人或谓君可乘而家也君唾斥之尝郟千金之赂不肯为县官居间久之荣僖公以书趣君曰天靳汝一第矣时不再来勉之君乃就都肆而大相嵩与荣僖公善而才君要致之直庐出应制诸目使属草君逡巡谢不能退而语人曰吾故不及佞也明年试吏部选人尚书吴公鹏竒其文寘之第一语荣僖公欲署以内右职君谓公柰何挟公卿子而骛选人例亟请外得广东盐课副提举君之任旅谒上官■〈亻 嵩〉■〈亻 嵩〉若鸡羣鹤咸目属之然君自匿秘不欲名荣僖公子相嵩壻袁生者非分躐叅议行省奴视其属见君不为礼君揖竟拂衣出曰而借妇翁重耶我尚不为而妇翁客乃为而奴遂不复往岛寇与山獠媾而寇潮势且及惠而惠之属邑曰博罗最首为兵冲会阙令台檄君往行令事君至寇益急而援兵至者往往附近郊而营颇肆剽虔物情尤汹汹君至首令缦稻禾彻茭牧戒■〈目 辟〉睨备藿石布渠答身自行围饬戒之有宵而乘障者捕得立令伍伯将下槌杀榜众咸惕息邑以亡他君又料民伍而得其羸弱状因悉汰去之而补壮勇者仍为籍籍之博罗兵遂以精闻君于政多先教而后罚尝诲父之溺嬖而仇其子者咸感悔父子如初尤鼓倡文事肆诸生躬自校阅所旌拔后皆为知名士值省试沿檄入棘御史才君悉以葺理巨细委之君无所不精密棘中故有妖遇者多死君襁而辟之迄试俱无恙羣谢君谓遗我安者顾君也君又以材兼署舶务

能悉涤其交通接济之弊有琉球国舶遇■〈风贝〉而漂者九百余曹君馆而食之皆得所君一切以廉平举职亡伎恶而其僚长居巢人崔姓者贪而苛好以小利破散牢盆法盐遂翔贵君数面折之崔阴以蜚语中君上官察君廉弗入会崔以覲事行而君代之乃益务为宽便其始盐斛百钱既仅五十钱时淮商入重货相嵩子下广督府立讯以遏广盐之行江右者使淮盐擅之督府以问君君条对便宜状甚晰督府叹曰提举议是无柰苦■〈足炎〉盍何议竟格是时藩伯吴公欲坐耗镕金者一戍二徒以属君请悉从徒曰法如是足也抱案力争不得愤然出曰吾不能以三尺为媚囿广东西故有通志而佚弗备督府聘少詹事黄公佐■〈才怠〉其凡而檄君与知名士黎惟敬欧楨伯辈副之君所任表传独得十九卷黄公门户高峻喜标置鲜所许可而独重君至则下榻谈说移日曰吾有顾伯子曰闻所未闻时君以岭表地卑热急急思归上书幕府乞骸骨不许再上书请益力乃假以使事归省甫抵家而鸿臚公卒矣君不以荣僖公故夺人子礼齐而三载寻以迁为大宁都司都事亦谢弗往而竟用广事中忌者罢矣亡何荣僖公以假归里亦病溲卒天子闻之方为赐祭营葬君匍匐称丧主而里中故讎豪以公之卒也治众亟来剽攻势若大寇君以二孤弟孱不任墨衰而白之台台为捕豪甚急而里之显者阴挟豪以拟君曰两造胜负唯余口能赂我乎吾能使若胜君怒不应而客多从中交关于于是君之橐罄矣而后两解豪既解辄复中君以他事君不怪跳之吴越诸山水君居恒鲜他好益好书出必五车自随而范钦司马姚咨逸人秦柱太学故多藏书悉出所有以贻君校讎编识不倦一切身外悉置之矣君故盛气自好不易屈节而内行甚纯备其葬鸿臚公也忽火骤腾穿中君奔赴呼救者不应门闭君手断门牡呕血数升药之愈数岁扶母夫人丧归以过劳毁咽不食者月余血疾复发感异梦复愈至是以哭荣僖公且为公事而赓中豪擿也意多愤愤一日骤感风淫右手不能举然犹蹒跚行饮嗽歌啸自若恒谓吾书淫不下玄晏而病过之所不如者为一命污耳岁余偶有所感触遂不起万历之三年七月六日也距其生正德辛巳春秋仅五十有五孺人盛姓太学上舍武臣女也婉孌有至性十五而归君时姑马夫人严难事顾独称新妇贤孺人故宽然长者然深虑识大体君时少年颇卞易为恚孺人徐解之立释荣僖公好治邸舍辟园庐一切以委君君力任之孺人所赞决非浅然不私公橐一钱鸿臚公有二子皆出后而为公逮宦及其终也他子姓乘而席卷之夫人语君曰君不急而翁乃急翁之橐人将议君且此曹子抟而乌散矣胡足追也君曰善遂弗问当君之多内嬖而孺人弗妬也时征声选色而荐之有佳客必出以燕至卜夜质明而丝管不絶酒炙亦以时进君于治古诗无所不工尤工于王右丞诗手所校订笺释诸家皆莫及既授梓而得良工孺人日饌一鹅及他珍食之曰吾夫子所恃以不朽者此役也书成即宋梓不过也君亡而孺人理家秉矣然颇以柔道行之后诸子俱析箸散处奴意狎孺人伺其出穴垣而盗其橐几五六百金孺人不忍穷诘曰宁负我毋我负人他妾因是以益狎孺人复乘其出公掩之至器什都尽研研然见孺人之色微动曰若窘我何甚也妾顾厉声曰柰何持我粟金髻去孺人检而还之曰

吾不織毫歉若也待之如初众以是归良孺人然益困既老尤治女红不废晨夕礼佛诵经以其间覽稗官小史为乐晚恒依其少子所谓冶者夫妇能节腹以供孺人食孺人甘之老而犹健匕箸一夕忽得疾顷之卒孺人之寿加于君十九年矣有丈夫子六某某所著述行世者曰夏小正补解大学衍义补要广东通志表传小十三经王右丞诗集类笺王司马宫词补注曰省余录会真集记诗文七十一卷未成者尚书左纪史公纪传评两汉字通山海族辨句吴佚典罗浮续考辨囿阳秋编注述异记列仙传注赤水玄珠彙录俳谈相字编省题集广嘒舞谱元白菁英孟襄阳诗注李丞相固实韦诗猎精肉言隼永词锋武库八阵图考庄亿尚一百三十三卷至其亡轶者曰易■语诗解頤灶觚余谈素臣翼三传鳧乙集续汲都师春檀弓别疏书仓撮残水经纪乘屈宗谈夔言仙葩集仙火编彪史世说刘疏录缺通语淹城集广小名录璫花图经胃索坊谱厯朝埴品江左名画记唐絶故粹白狐演连珠集大厯才子诗选唐四大家集缺尚齿录南华原诂文露沉词场鼃律五管谏闻丘里鳩异记汝刻注释千里面目麒麟函又一百八十三卷呜呼以君其才使得志于格大之可以黼黻朝着次之可以经营四方即不然而备太史兰台一职其于左氏迂固之业必有能绍明其统者小试而辄摧之又夺之年天之不欲尽人才如是然君有不因格而能自成其不朽者又何如其壮也孺人为妇而才显为母而才屈亦天为之耶德则不爽冶之文笔矫矫犹贤已为铭之曰

有才如此若或启之又若妬之弗究其施有妇而贤媿德则宜丰始悴终又畴所为五丈夫子畴克称箕惟冶也文厥数又竒虽则数竒大昌其辞锡山之墟土黝而滋将以我诗永永毋隳

弇州续稿卷一百十六

●钦定四库全书

弇州续稿卷一百十七

（明）王世贞 撰

○文部

△墓志铭

守愚时君暨配沈孺人合墓志铭

今之人勇于称士大夫之为德而怯于论著廛井农贾之致乃至阨阨之崇痹所轩轻尤有甚者而余独不然以为士大夫之德无过忠信廉洁弟让好施予此毋论其耳目渐摩之所便习与为力之易要之其驯此而天下之名与位逐之而廛井农贾之致以至阨阨之痹日夜所聚谋者不过什一之息以宽其卒岁而已如是而利如是而不利此其显然甚明今欲使之舍而就所谓德者宁易易也鄙人有言何知仁义已向其利为有德吾读时君夫妇状而叹之时世为嘉定之娄塘里人其王大父道胜王父鈇并隐约匿身农贾间然不废为长者至父处士本而渐有闻事详宗伯徐公所撰志中君少以材敏见奇于父尝从师受经术矣父夺之使从贾君故饶智畧能操时奇羸然重信谊不寝然诺以故诸小贾辐辏归之业用是渐裕属有倭警不能无中挫而君之弟惠父谓其壮可任也中分其货使自贾曰吾欲各观其能公辞弗得乃共贷富家母钱出谋息弟贾未几则不能无耗亡君辄阴为补之不使父知也一岁中什九在外足迹徧闽越齐楚梁宋之地得土物稍瑰异者辄市贻父母君适以岁杪归而里中索租庸调者坌集父忽忽计亡出君发橐装斯须而办曰毋萦老人抱也父为之一破颜君为人仁慈然性豪爽不设城府所过邸中纵畅饮高会鸣瑟粘履歌呼食酒甚快也有以缓急请无弗应者尝呼巨舟装杂粮干石淮泗间风浪大作君从一奴策骑改陆至其地而舟子遂恣游伎家饮博且罄迫则请以其舟偿君愀然曰吾犹不至罄汝尽此舟矣付之阳侯等耳遂纵使去最后贾彭城属岁侵君悉以其货分丐之而博一篋券归明年复往大水漂庐舍人畜殆尽亡所迹券主自是困不复能出贾矣而与嬪沈孺人専力诲其子偕行沈孺人者里耆硕宗和女也性端静少通曲礼及稗官家言十八归君君以贾不获宁其室而所奉处士及姑王孺人王孺人复有姑曰陈孺人处士少失父赘于里人王顺顺之妇曰蔡会处士脱身归事陈孺人而顺死蔡亦来依止然性奇严多所谯诃王孺人之事二母以孝闻实孺人主其详朝夕恭谨无害盖陈至九十余蔡亦老寿而处士与王孺人亦皆望八以宽乐终君之不失孝子孙称孺人力也偕行性颖敏甚其所受经术虽得之外傅及自办解然出而闻于君入而闻于孺人者皆古格言也弱冠领乡荐不色喜三上公交车不利不色弗有司应诏以冠服进君君不时御也及其成进士归而以轻丽衣奏孺人孺人亦却之曰非命服也迟之盖入而闻于孺人出而闻于君者又皆古循吏规也于是君渐重有气力矣然益务为恭谨里中无贵贱皆下之不妄蓄僮奴以俗覩刁氏之利而不頼其害小与人作过辄捶楚之而过自摧谢以不能教诲乡人警君犹故时君也间召微时贾杯酒谑浪与谈白圭计然之策甚哲曰我能为之而能不为耳作廉贾毋作贪贾贪贾多败孺人生既居澹薄晚节奉佛尤谨每强之肉辄呕以故渐削弱偕行之得确山令也恋恋不欲赴孺人正色而遣之曰若岂尚吾有耶不以时报县官何为偕行乃独身之令甫四月而孺人促君急以室往母使有内顾君至令邸可十日而孺人疾作逝矣一女之归浦士及者治孺人含敛而偕行奔走归悲痛几灭性君内悔之忽忽不自得遂属疾弥岁且不起谓

偕行曰吾之死数矣少时欲雪而祖耻賡为黠佣所中几瘐死行贾淮卒中倭腰数百金以逃伤几死遇大风浪几鱼腹死然卒不死而今死牖下耶复何憾然君病亦遂稍稍起矣偕行之复就选人得长兴令长兴去家一水耳谋奉君往君甚适乃取异道遊虞山会若下至官邸甫三日而疾作又三日而■〈谷丸〉遂卒偕行大悲诧谓君与孺人之为德累积纖细以有不孝其报亦无爽矣然确山之禄养君仅十日长兴之禄仅三日而皆不竟至孺人遂不获以一日染指而又夺之不获躬含敛不肖惭负天地何以解于是前后手草事行谒唐处士时升状之以属余使志铭其墓余不佞何以重君夫妇而慰偕行虽然以余所好论著廛井农贾之致与阡陌之瘠宁无一二为德如君夫妇者而多不能食报今骤而有偕行取进士显融于朝不佞又志而铭之何论鼎釜哉君讳恩字文瑞别号守愚寿六十有一孺人寿五十有七子一即偕行娶唐继朱女一即适浦士及者也铭曰下士日画中士岁画谁能及世而君夫妇僂力为德以收燕翼厥报食亦不尽食将天子之宠灵是植石弗泐余铭无极

封承德郎南京兵部车驾清吏司主事蓉泉史公墓志铭

史之先为吾苏之长洲人自兴二公凡三传而有荣者以侠闻尝遊江阴之顾山而乐之徙家焉又二传而为祥公之父也复徙邑之长泾定为长泾人祥操行斤斤长者娶于邹举伯子锱再举乃为公讳某某字汝器别号曰蓉泉公生而儁美父抚爱之稍长就外傅日诵数百言属对冲口多奇语其又长则自力为公交车业念里中儿无与共学者因负笈遠外从师累年且就而父病死矣仓皇从伯子治丧葬其于业易戚夺之乃叹曰吾且从吾好耳安能啜嚙博士家言于是好古文辞尤好为诗而会有倭乱独身跳灌莽间犹囊诗卷自随前是伯子拟析箸公曰它析箸者俗以富厚耳今吾家空无有仅有二兄弟而析之何忍伯子意乃已公益强自力佐治生然豁落有大度不事纖嗇而伯子稍巧以时息其赢时督公俸奔走廛市中与佣贩伍顾公魁然长者举止倜傥识者见而异之公时时手一编吟讽不辍曰柰何以所役妨所好哉而家稍稍饶然公不别立帑一日伯子持筹喜曰赖而力苟完矣公遽曰伯兄而仅陶朱已耶财者所贵行德也伯子改容谢曰非吾及也公时有二子而长者郎中君属文有器业公日命师诲之曰汝父负若祖汝当不负若父而是时有妄意伯子室中藏者使大盗株引之而掠其室公迫则诉于邑诸猾恨之移狱孽公郎中君时犹未冠也挺身出白之不得则抱公而号公振衣曰毋谓讼无天当不令我独死此曹子独生及对令辨而衷令释伯子及公而置诸猾凡八九人皆不罪公归而行伯子室悬罄矣愤怒髮上指走留台具其事下郡是八九人者懇请赂伯子以免将许之公谕曰人方鱼肉我即不报亦可而乃以赂解乎八九人者戍其首鬼薪其位而公始退安寝也已而母邹卒公独任其易毁加于父见背时亡何伯子亦卒以狱故多所称贷遗产仅百畝诸携券来责者坌集公叹曰兄弟四十年甘苦日共之而今

乃使独窘也次第为理券直且治其丧抚其孤贍其家众而后及私于是公之室亦悬罄矣然意气殊矻矻不肯下人有豪不获逞困以赋长役至益挫产不顾而时时割衣食以资兄之子为之授室且让居焉公乃大困而至年五十郎中君率子姓前奉觞公顾四壁立靡长物也举爵而吟有鹅湖旧识如相问尚有屠龙志未灰语人或谓公尚能屠龙乎哉公不答目郎中君而哂已而郎中君果成乡荐复捷南宫当乡荐时公役犹未满也有谓公不当复执役者郎中君从傍请曰必我解当有代者公瞿然起曰此吾志也遂竟役郎中君得南驾部迎公与乔安人养公意不欲往曰儿新宦贫不欲重为乃公费强之乃徐徐往会有皇储诞恩公得封驾部郎始顾乔安人而喜曰去吾长役之岁仅三改耳不自意覩儿子成进士又覩为京朝官且又及我两人之身而被章服也郎中君为具篮舁载酒以穷诸名胜天界雨花灵谷燕矶牛首摄山名刹无所不眺览则益大喜而是时太常许先生穀八十矣文采风流冠都下见公诗折而请交公归里未几买舟泛西湖徘徊于两高三竺间登天台问石梁还礼齐云攀黄山白岳之槩每叹曰王逸少云卒当以乐死不虚矣竟以微痼渐积几瘵郎中君忧之叅问相继且谋请急归省公力止之曰谁谓乃公惫者汝未奏绩而官我乃遽以私请何也久之公竟不起春秋六十耳娶即乔安人能以恭勤相公起家二子长即邦载娶杨封安人次邦纪娶方女一适王至德孙男六人女二人公虽不拘琐小行然于孝友独至其所敦恤非独伯氏及其后而已也有二姊归王与张者天皆为之收其孤才者任之弱者食之其后欲分授二子产而郎中君以厚推其仲公曰毋庸也以十之二分吾之伯子子及而女兄弟所谓伯子子者二人皆三败而三树之矣夫公以孤童起与伯氏僂力锥刀之微仅至埒中人业晚得郎中君际会日月以饶乐显融终世人所能得者亿万人而一耳乃郎中君犹以禄养不能久含殮不及躬号痛毁迫若无所比数于人者手草事行数千言欲得不佞之志铭而为公身后谋不佞非其人也虽然孝子仁人无己之意可悯矣郎中君又称公喜饮饮不甚醉喜鼓琴琴取成声不甚调喜奕奕不甚鬪子喜客客至具盘簋而已不甚责丰喜脱人厄不喜报喜与客谈不喜俗尤不喜进阴计吾未识公无由征之窃美郎中君之善名状也取以为志若铭曰

人所推长约畧得之其于世福亦或取奇见以为还之造物而不知其为子孙遗公所即安其以斯耶

王处士有年暨冯令人合墓志铭

余故与王子百谷善为之追铭其先君轩之墓则知百谷有兄有年为郡里中长者而及是百谷复以兄之状来其辞酸楚甚盖卒而就窆窆矣余知百谷之先君则以百谷状其知有年则不尽由百谷盖得之里中能言有年者有年之讳稚丰其字曰有年故常

之江阴人也乌姓有金安公者从中贵人郑和使西海归而溺失符遂跳之吾郡其子真赘王而冒之已复归于常之梁溪又四传而为君轩娶于蒯而举有年有年生而愿恚多心计故能诵博士家言时父迫治生竒而夺之俾主筦钥握算计出入娶妇而得良曰冯令人有年性孝谨令人性亦孝谨又皆敏而才其治家内外又皆能出其长以相补益家益以饶裕父大快乐之甫五十即举橐授有年弗问也谓日毋阙乃翁媪醲脆而已东方用师急诸将卒过梁溪者恣为厉有司以军兴法符摄吏民供饷傍午富人尽室窜去有年谋之父独不去曰即不幸尽家以饱官军固当奈何委而饱贼也旦夕持糒醪遗其长劳苦设汤沐咸大喜过望戒其下毋侵王君毫发而有年帑已阴挫矣有年不妄言笑冯令人亦不妄言笑然端丽而泽以故外相庄内相爱也有年垂三十未有子冯令人忧之祥为之母家者而饬一少姝使守舍欲以为有年计有年拱手曰何自盍我趣往侍主母仍令嫁之二尊人晚而皆善病有年与冯令人不脱衣而侍左右令人手治糜炊火灶孔灰盆于面女奴从傍请代令人叹曰大家老矣即不讳而斫手治瓿糜进之得乎然令人更以过劳神形先病卒仅年三十一有年痛甚不欲娶父恚曰是不欲使我见孙也盖踰年而后娶于丁丁尚少母蒯恒泣曰谁夺我儿妇令儿独劳也郁郁成疾凡三月余有年之问医祷荐汤药无间昼夜蚊虻虬虱狎食之袒服半赤然蒯竟不起有年号擗委顿却食父复恚而强之食乃食然犹三载寝于苦不入内父以帑之挫也与嫜媪之继倍也忽忽谋复徙吾郡有年则奉之郡权子母而息其赢所积着过当逾故时父乃一启颜时百谷齿已长治公交车业又工为古文辞北遊太学袁相公客之声称籍甚父心不善也曰此非吾所知吾知有家而已于是有年得尽操家秉人或谓父不作新丰老人惭于较仲季获耶父亦不顾而当其疾亟以至大故百谷方入肆事史馆一切医药含敛之类有年得以极其诚信百谷归有年与之谋择壤获吉于越来溪而治之曰梅湾阡以遗命奉母蒯之柩自梁溪徙而合焉人乃谓有年父不能见当然能见未然有年之所续丁又不宜子乃始置媵张得一子自是遂屏处书室布衾苇枕萧然若比丘道人也有年生平无声色狗马之好出徒步凭一苍头而已然亦简出鲜所知交交必以忠信不为枝辞媚色口不易言利然出入锱铢不爽乃至从兄巧老而贫刘氏何氏姊老而寡岁衣食之无倦色又室其从子伯才仲才它宗戚闾左恃而不虞嫠者固比比也人以其不妄费目之俭嗟乎俭矣然终不能縁而废其长者百谷以文名一时当亦多忌之然终不能縁而废其名孰谓吴俗浇固三代之所以直道而行者哉有年既寡欲忍诟薄滋味充然壮容覩者无不以为百岁人也一日顾其子吾自能知我恐不能过王父王父盖寿六十九云丁亥之岁有年六十九矣九月哭何氏姊过哀还送丧舟几覆大恐已而登吴山楞伽泛石湖而归意乐之夕忽痰壅于喉比晓而逝识者以为知命子一承谟即媵张出者也太学生娶金氏女二人冯出也适举人黄学思陈心和孙二百谷之悼有年也甚故多详余不能悉志志其大者铭曰

王之先乌姓也乌氏保以贲起至比列侯奉朝请君岂其苗裔耶何其于治生炳也君诚贤顾其贵不易服而名不出闾井虽然不闻保之为忠信长者君固当胜之也耶冯美而姝以才侍君德亦与俱先君而终法得附书

李母匡孺人墓志铭

母匡姓京山人也其上世萧有壻于匡者而子冒之父曰镛娶鲁感异梦而生母母少端静不作儿女态稍长善女红织纴组紃之事兼治浆炙菹醢以能佐家秉父母怜爱之而同邑故布政使李公淑为乡进士时有妇曰王夫人善病不宜子其父封公忧之闻母贤因委禽焉父念不置曰女故才然不习为妇而又乃小妇如何及母归李而良可知也姑奇严难事有所不可目左右摄侍者皆气夺而舅豁达大度有所施舍不复问困庾母以勤力恬苦奉之姑喜曰妇得佳佐也母之事王夫人毋敢以耦见事必咨之曰有女君在身惟布偕女佣杂作先其难者王恭人亦喜曰吾得佳佐也使我毋虞于舅姑而会布政公游南太学久之王夫人妊而竟以不宜子夭母哀之如丧所天也为之治丧内周于体外周于宾无有憾也布政公归而叹曰不啻我在于是姑益怜爱母益得展其用于家出入小大曲尽时布政公以经明行修弟子挟贲请益者户屦恒满它客亦大进母所以共奉亡阙布政公忘王夫人亡也而母以间请于姑曰妾妇所职者细耳有宗祧之馈在布政公因以有陈夫人布政公成进士为尚书工部郎则母已举大叅君重于李矣而大叅君生而眇弱不易抱布政公乃复置貳梁共抚之母齿长于梁且先进不小挟而加慰藉焉交臂折节以事陈夫人母异其事王夫人也布政公之金臬于浙独留母侍其姑姑所鍾念者王夫人之息女母上以奉其姑而下以字靡所不竭心力会女殇姑哭而毁母所以慰解之者百方而布政公忤柄臣意需次于里得孝事其父母则母之助居多柄臣败布政公迫于二尊人强出而姑竟以哭王夫人之息女病矣母手荐粥药栲发去垢姑病嗽茹淡则为戒盐酪病不安谷则为损饭久之竟不起自姑之歿于母手而如忘布政公即母之哀之视哀王夫人有加矣大叅君弱冠成进士入读中秘书再迁史官显重天下布政公恒以母往曰儿幼不习公家事微若吾安能寝帖席也及叅议关西进视其学政复令母往曰儿多出按部微若何以壮门牡杜關節也母既举大叅君已复举今乡进士维极维柱矣梁亦举今进士维标太学生维楫矣母与梁皆益重然其奉陈夫人益谨毋论布政公独其御诸子及妇严至不废夏楚曰美疢之毒不如恶石之生也吾从其生者以是大叅君工于官而诸子皆次第用文学有一时名最后方伯公偃蹇岭南命归侍封公备志物之奉大要亦母助也封公八十余以寬乐终其壻也客执紼而从者数百千人会大雨雪母即墓所治酒食飧客客无弗沾饫者手指皴瘃弗顾矣布政公庐于封公墓暴得疾至卒而母以城居不及诀与梁驰视含敛絕而苏者至再三迄壻哭不絕声独以诸子长任丧不至■〈谷丸〉而隱痛深恻所欲从地下者非复三丧时矣以故素

强匕箸裁损过半血暴注頼药力以起而胸若结轳者前是大叅君以服除恋恋不欲从
选人而母意亦如之既疾革诸子泣问曰得无有怖乎厉声曰否已复问曰无有所欲言
乎曰否遂恬然而瞑得寿六十五故与布政公同也母之与梁相亲昵若同气梁尝病头
风岑岑作楚状母时为抑搔之手裹冒絮食让而受恶席让而坐下其翁媪偕八十迎之
来旦夕上媪食如家人礼而召翁之故人子俾佐酒必使酣畅梁感母为之一加飧惟翁
媪亦喜而语梁吾今益一女汝益汝姊母之父蚤歿则养其兄兄歿亡子择女而嫁之俾
大叅君为别室以祀其父母及兄曰吾不忍若敖氏之馁也其庄王夫人即王夫人之族
无不庄其长者继庄陈夫人则夫人之族无不庄其长者其非长者推而恤之甚周也母
不产女独梁产一女而归魏者母爱之踰于诸子第曰吾于诸子有所不能慈于女有
所不能不慈非二之也性好施晚而大叅君兄弟稍裕得竟其施诸宗戚闾左亡不沾润者
故母歿而子于梁者执子服女于梁者执女服其毀亡间也宗戚闾左亡贵贱其惜亡间
也大叅君凡再以覃庆当封而格于例不得请痛母甚泣血次行事几万言以属世贞曰
不孝之幸于公素矣唯是先君子赖而不朽今者母不足辱公窃恃不孝之幸以不朽世
贞乃稍节而志之且为之铭曰

主妇之殂主君在都有襁呱呱谁相其凶代子与夫主君在官后妇偕止太姑之死
谁相其凶代妇与子不副不圻于嗣实宜主君宜之有维三焉九苞厥宜为子也者母为
他子也者母夔夔我舅翼翼主君恂恂主妇无母职其艰嗟此贤媛胡不百年

布衣李时养墓碣铭

李子者釜其讳时养其字野泉其别号也李子故隶籍锦衣生而敏颖有异姿于象
戲博塞诸技无所不工习而突为最超絶当是时天下之名突南则鲍某北则颜伦而识
者差为颜左袒李子始犹出其下逮已而渐与之敌至争先颜虞其不胜也为罢突李子
既以突名燕中贵人争延致之而诸常侍尤数李子坐而突且饮食也锦衣之校长入白
事立庭下顾见而愧之出则呼李子突使立庭下李子亦愧之遂翩然下金陵已走吾吴
及钱塘诸郡县所抵无不宾重李子者其寓太仓尤久李子有妇留燕中以病死二子一
胥事曹郎一入神乐观为道士于是吾兄弟为之授室后举二子一女矣今年九月薄游
嘉兴主于李茂才所忽感疮于脑趣归仅七日而卒吾兄弟约李子所厚善者某某葬之
北郭毛氏之墓傍李子壮而善噉用可兼三人年虽六十一不异少壮也为人质直无它
腸事不避难闻义勇为而性尤慎默得人之过不以挂口其所主虽累岁月于其家事如
不涉也人亦不以嫌避李子以故于其卒咸怪其疾之异而惜其不可再铭曰

前李子突而敌者鲍与颜后李子突而敌者程岑与方国手六人耳独颜与李子仅

六十鲍俛及之今其存者方而已所谓程岑者三十余夭死矣将无心神之过役而天真之剽毁耶抑若用兵之发杀机造物者之所不喜耶重田生于燕都死于吴而墓于吴墓者谁尔之友有雒者二疇为守我铭尔藏不尔朽

弇州续稿卷一百十七

●钦定四库全书

弇州续稿卷一百十八

（明）王世贞 撰

○文部

△墓志铭

南京守备掌中军都督府事魏国公徐少轩公墓志铭

高皇帝涤宇宙之尘氛而日月之其功掩干帝王而故太傅魏国公中山武宁王为佐命元臣能以盛德终保其功名而完其身有三子其显者嗣公辉祖殉节以明志而次子定公增寿沈几以启祚盖对秉戎政于两都为东第诸侯冠者二百余年而不替噫嘻盛矣识者谓武宁王之烈非鄴绛平阳诸彻侯比也而两嗣公之后所以滋大树惇毋隳其家声者亦岂诸子侯所可同日语哉余今者复于魏国少轩公见之公武宁王之七世孙而太保公鹏举之冢子也讳邦瑞字廷祥其自称少轩则以太保公号笃轩故公生而醇茂隆準盎背肌体莹皙踈眉目悦书惇礼太保公享国踰五十年其御闾严诸儿过庭廩廩如也而公尤沈默削锋距至于应对趋走则肤敏便捷太保公有所幸意几移公处其间泊如也久之始齿太学胄子公进退揖让与矩度合而貌又娴雅诸生目相摄此大将种也而胡以若冕而佩玉状又胡以不挟贵也太保公薨公业四十余恻而毁治丧葬皆以礼入朝嗣先爵属国家有鼎革之事公以元臣率百官祇迎今上御大寶有红绮锦绣之锡时人歎其遇宿卫甫一载上疏请归养其母童太夫人太夫人者公生母也尝梦月入懷而公生公既已得请则改治官舍盛供张女奴操弦管以共太夫人所以娱悦之者万方明年特命主孝陵祀祀孝陵非肺腑戚臣不得与而仁孝文皇后武宁王女也故委以属公父祖至是复属公寻命书南京中军都督府事公贵甚法不当复佐府而意安之每当祀则先期熏浴更衣坐斋室却御女罢酒四鼓抵陵所候门启而入稽首肃拜秩

如也蓋三載而領其府事奉敕守備留京兵民大小以魏公為家宇自太保公卒而忽忽若靡所依公拜命之日爭加額相賀公亦自砥礪欲有所為居二載而病脾且嗽矣且疏懇謝得俞旨而主祀如故久之病良已公于第西因故圃益以奇石異花日尚羊其間飲醇擊鮮甚適也天子微知公健飯狀即家復起守備領中都督府事公遜辭有旨留都守備重任宜用心供職再辭再有旨留都重任卿宜遵近旨用心供職公猶未露起色三辭三有旨留都守備重任卿以世爵首臣新荷簡命宜盡心供職公始奮曰邦瑞一介武夫耳上徒以先世故寵靈之我何敢避衰而偃蹇國恩遂強起視事比歲數困水旱而丁亥水益為厲以至戊子遂大侵米斛將萬錢民亡所得食相率假神語為妖以賈眾亂公與大司馬陰公謀請預給六軍兩月糧以時糶粟價為減而推得首妖者囊之三木眾心稍稍定時殲孳道相藉而凤台安德兩鄉暴尸原野間乘暑蒸郁為疔公割其私帑市隙地瘞之復核故漏澤園之侵于豪者還之官俾續其瘞自是野無遺骸矣公念太保公留守之日長數更夷險卒以無它及身之日未几而罹此侵万一有卒然變其身之不恤如世聲何邑邑不樂家宴聲伎十省八九自是故疾復發而會七月朔強自力陵祀事竣疾益甚公素習方書好服餌而至是盡屏弗御既革召三子訓之曰不谷所以有今日者高皇帝之賜而先中山王之遺也蓋旦夕兢兢焉今而后可以見先王地下矣若曹勉之強為善而已又曰即葬我必大司寇陸公為狀而少司馬王公志銘之陸公久能悉我遂薨時戊子之九月朔也距其生戊子之四月得年六十一啓元配魏國夫人沐氏之窶合焉夫人黔國公沐紹勳女也先卒有丈夫子五長維志錦衣勳衛當襲娶故彰武伯楊炳女次維新娶戚里張守矩女早卒次維叙亦早卒次維學娶錦衣指揮使高凤女次維明娶清浪叅將梁高女女一適武定侯郭大誠孫男三弘基聘臨淮侯李言恭女弘謨俱維志出弘業聘新建伯王承勳女維學出孫女二尚幼嗟乎公享國雖僅十八年然已逾下壽再領股肱寄無公私纖髮遺卒保元吉以終雖武寧王之澤大且永而公敬承之其道可泯泯哉詩云抑抑威儀維德之隅公三子有焉其保家之主也麟之趾振振公子則諸孫當之矣竊復有聞嗣公輝祖殉節六世而未敢白今天子始下詔褒顯之特祠金陵為建文忠臣冠而實當公有國時以此下見九京不亦大快哉公為人寡言笑而內和不與物忤即下寮寒畯必與講故禮服御無所紛華歲入常祿及賜田租取家祀及共給而已不復較贏積性不喜談人過有犯者寬然容之然至檢飭其下則精明族眾數千指不聞有魚肉于民若灌氏者家眾數千指不覩鮮衣怒馬若刁氏者余嘗過大功坊公之門若水也公薨蓋惋而稱無天者傾里矣維志等奉陸公狀來請志銘余辭不佞謂大司寇狀之我何敢加三子曰治命也余衰老深于公及大司馬陰公然兩月之間而哭陰公與公又皆為之志銘噫余又安能久處此也葬在武寧王賜墓之陰天子為之下大宗伯發少府金錢治兆域賜祭十六坛一如太保公銘曰

赫赫聖祖辟滌万方疇為元勳唯武寧王嗣公承之首植臣綱保世滋大至公益光

左准右绳如圭如璋夙夜敬恭大祀是襄袞服煌煌八鸾锵锵虎旅十万从公于行颐指以麾畴敢跳梁粥汝瘞汝毋憾于荒黄屋加崇东第从昌公族八百雍容裸将家众万指如骥服箱螭首蛾眉吹笙鼓簧不染不离尚羊颓唐树玉于庭丛兰在堂胡所弗怪正直平康坦然天期乘云以翔归魂何所钟山之旁少府金钱东园黄肠侍我先君永扈高皇天阙峩峩大江汤汤史苏占之奕世以长

中顺大夫广东提刑按察副使西华王公墓志铭

永嘉故多贤士大夫然无有如王氏若忠丞之为惠而给事之为节故自足烺烺而王氏之贤而著者则无如西华公父子兄弟西华公之父东涯公澈有帷幄密勿勲馘歷中外晚而好行其德于乡且备享人间之乐以终公于成进士不为晚为郎縉云叅名藩不为拙甫染指而去之超然物表眈谷公叔杲始从容出应世以继公之志于仕宦之日久其归亦稍后然皆能自操其出处之衡不为世法所绳束而世之望二公若太少二室之对峙摄其巍巍而犹冀其蒸云雨二公者讫乎莫之应也今年三月公以寿考终其子乡进士光蕴等卜以明年葬于石坛山之原而戒书币以状请曰唯先生素知吾父敢以志铭请眈谷公亦寓书曰唯先生之知吾兄以不穀故敢申请眈谷公故尝以大叅飭治吳中军事余得朝夕焉而用以悉公者也公讳叔果字育德其先世琅琊与余同始至晋而徙山阴唐有大理少卿从德者转徙黄岩及宋有惠者复徙永嘉遂定为永嘉人凡十余传而为贈通政公鉦即公王父也有二子东涯公仕至福建布政使司右叅议而仲子澈至国子祭酒其通政贈则以祭酒贵云东涯公娶潘恭人年四十余未举子得异梦始举即公公生而英异甫七岁工俚语十三工属文既长恂恂如也美须眉季晷体若不胜衣补博士弟子学使者合五郡诸弟子试之擢公第一遂赫然有声荐乡书复高等明年罢会试归读书山中其学益邃时东涯公方树先祠辑世谱飭宗法公佐其成而详为之说世所传王氏约者也寻与眈谷公同游南太学时程文恭公文德为祭酒而欧阳文庄公德为太常卿皆以讲学名一时致公兄弟为都肆长而称扬之公以益有声凡十载始成进士高等时所谓中丞者族父同榜同邸舍日从事时政比详之业以使事归覲东涯公称觴上寿里人艳之亡何东涯公卒哀毀逾礼既服除栖迟冢舍者又四载而始謁选授兵部职方主事明年与视西内工有金币之賜复以使事归省墓而倭事起族父所谓给事德者从义兵与角不胜死之族鸟兽窜公与眈谷公谋曰不早为储胥将无族矣亟还朝上书愿以家橐为城堡以捍贼而完其族报可时眈谷公犹在公交车不复诣请与公捐橐而躬畚鍤之役堡成贼有■〈环，目代王〉睨而已至今頼之寻迁其司员外郎聘同考会试所得多名士而大司空王廷瞻少司寇张岳李江其最著者遂迁郎中出阅视蓟镇兵时诸镇既有帅而昌平复设一总帅临之名位相颡颡不能有所控御而烦费伙且不支公疏请从革所省以万计有请修戎政志者例以史官充之大司马杨襄毅

公请以属公书成进之曰京营纪改武选郎中武选最为猥杂号吏藪公至当注选与诸寮精核而次第之吏不得有所侮宿弊若洗满六载旅谒分宜相相前揖之曰故人子耶盖为东涯公有故僚谊也公卒不私往以是仅迁湖广布政司右叅议过里上疏乞骸骨不许公所治荆西为承天德安二郡承天上故邸也有先皇之陵在而德安为景恭王初封国两地中贵戚畹争挟重鱼肉赤子为业公一切引之以礼不听则裁之以法竟公任相戒无敢犯者诏修兴都志俾公具草上太史公既上而曰此献皇帝纪也如志何属同年高长史岱以志体别创而资其楮笔缮写之费书成郡始有文献矣地故有郢梁岐三绝王坟中贵之守者岁私其媿修费以千计公悉清裁之应山灾公授煮粥法以啖饿者又为缮丰乐驿前后割私帑以贍不烦县官公念谒陵者■〈鹿外木内〉至其夫饩皆责之锺祥叹曰锺祥之民尽矣为请于抚臣俾疏酌道里远近如两京中都以为谒陵节数多所减邮驿少息肩而会分宜相败吏部以公旧资重甫一载余擢广东按察副使时广数中倭劫劫兵计大帅呉司马以公羸弱恐不任军旅而重其文疏请以内地学政处之吏部知其指覆公归里听用公喜曰司马知我唯太宰亦知我遂杜门不复出部移亟下监司守令劝驾傍午公悉谢绝之家世奉东里公遗素饶而公雅不问产听子弟息之至倾郡公了不知也日食不能时二簋实以蔬笋间一咀■〈月肃〉鱼干脯衣仅布素或三澣破则褻之姬妾粉黛一不以入目过亦如无曰生不晓名俭宁论奢公府乡里之燕不恒设设亦取成礼而已性介慎不妄取予然至义施亦不废如飭先祠置外塾广墓田以教养宗姓之类公有创而旸谷公成之旸谷公有创公颌而属其子光蕴成之公居故所城堡而旸谷公家于郡公之郡则郡岁征蜡宾而已旸谷公时时过从公相与谈笑寝处无间十余年来友于之风蔼如也公一切无所嗜顾独嗜书无一日不开卷于子史百家下及稗官黄衣之说靡所不浹第其所专精者六经理性之学居恒谓儒者类以陆子静先生言为近禅不知其非禅也颇取朱元晦先生晚年之说而合之其创故自程学士敏政然其所评括加精深而又以王伯安先生心之良知是为圣欲学者惺惺不昧以通乎昼夜之道而知若朱陆之称性善求放心其作用虽少殊而出于孟氏者则一性善故知良求放心故自惺惺不昧三君子之单提直入本非有二端也当是时泰和胡观察直大名申考功■〈方遂〉黄安耿御史大夫定向皆论笃君子颇推公以为得实际云然公海光蕴必诚意尽伦砥行毋徒区区口耳为也旸谷公治别墅于阳湖穷极山水之胜其伟丽为江东冠而公亦于山半故读书处颇增饬庭宇剔洞壑开陂塘间从子姓游一觴一咏陶然自适而已旸谷公不饮而邀客游必甲夜征声奏伎客亦艳称之两人意各自得也东涯公开大耄至歿而公犹作孺子慕伏膺享奠悲不自胜既谢朝事称不任然至闻一贤者用未尝不津津见眉宇也一贤者退不贤者进蹙然有忧色矣故少羸然以断欲久神转王谈论夙昔不示倦既感脾疾犹强起具衣冠及■〈谷丸〉始就枕谓光蕴兄弟曰夫人生而胶胶扰者梦也吾梦且醒矣复何言问体中得胜否不答已而曰愿天生贤者自是戒内子毋得挟妇女入谒已呼粥粥至犹能尽一瓿已复就枕若寐熟

者撼之逝矣公生以正德丙子得年七十有三始公病时宗党数百人祷于宗祠及卒奔哭于殡里人哭于门皆尽哀娶林安人以德偕老有丈夫子三长即光蕴乡贡进士次光荐仕为光禄寺署丞次光普国子生孙男八至元至充邑庠生至齐至章至亮至褒至充孙女五所著有永嘉县志（阙）卷半山藏稿二十卷光蕴之状公行累数千言余不能尽志志其大者铭曰

不点染于欲不琢雕其璞应世之迹若风而连过即湛然敛其后天以还先天几不尽秘乃有文言谈道者以为混沌之胁而谈艺者以为大年之权叩之公公俱舍旃

朝列大夫贵州承宣布政使司左叅议云岳汪公墓志铭

万厯丁亥故贵州布政使司左叅议汪公卒于家其子鏹以病在苦俾其子诸生淑训将命而托吾同年友故唐相国袁君履善介绍而来请曰先叅议之有事于闽也先大司马公实临之举而登诸刻盖先人之林卧三十年间念大司马如一日也而其论文则亟称歷下江东以为毕生不可及盖所称江东者公也是先人用大司马为知己而以知己效公公能无报之一言乎已出履善之状曰是所藉以志墓中之石者也履善亦汪公同年也刻深于辞当不妄据而志之公讳埒字仲弘故越国公华之后也至宋而有志高者迁休宁之旌城至元而有德璞者复迁其邑之双溪双溪去白岳三十里而近公尝读书其址观云而乐之因号云岳山人明兴郡守庭辉始起家甲第而其季志宝生武贵武贵生百岁翁齐天子异之赐爵公乘有司立坊于其里百岁翁子曰昱起明经司训饶州后封户部主事封公有三子仲为公继配戴安人出也始封公梦侍其父游木瓜山获兽若豸者而生公公少生而美秀瞳子炯然目四岁能以智术得盗食者人异之属偶对立应十三善属文既娶补博士弟子多以目疾不恒视书而冥坐默解间出独行溪山间意豁如也居恒叹曰六经注我宁我注六经封公闻而恠之以为何所自与陈公甫之语契又见公文奇进诘之曰若得无所袭耶公对曰宇宙判而代相袭久矣欲无袭者其在泰始前乎封公不能难已从之饶与饶之名士汪栢欧阳杲辈游归试辄高等久之荐于应天又七载成进士饷边归省时百岁翁犹健无恙也彩而服者三世里党荣之还朝授户部主事无何当督昌平诸军饷时敌报傍午诸边兵悉集以数万计饷且不给公至夜漏下矣方且赴抚臣宴而召州三老问车牛可得若干乘曰千五百喜曰吾计足矣草两檄使募民车移饷以就军而迺者移军以就饷既发而后赴宴抚臣谓计安出公对曰頼公之诲不乏兴也盖以次悉给矣抚臣大叹咤谓古所称飞挽其以是耶时议以陵卒卫诸陵者用他屯例请行粮公谓陵卒不徙屯也且岁饩之谓何而又益之持之至上疏竟弗许公还以晓畅为大司农所悉属修会典而十三曹所隶悉以委公纂送史局寻迁员外郎出为福建按察僉事倭卒起议置军咸请驻于大州邑以便食公独谓大州邑去海远

使寇得登陆而后攻之是彼为主我为客也不若移戍沿海要害便议遂定时寇且犯同安甚迫公料见卒粗备而无当锋者有死罪囚陈嘉任等七人在狱黠勇可将也召赐洗沐与饮食谕以讨贼赎死咸感泣思奋郡守童君争之谓必且走公曰吾保七人不走即纵七人死而为千万人生计非盪也于是大出兵徼贼而七人为军锋遂大破之斩首三十擒七十二人事闻七人者咸贷死相率立祠祠公公以严制囂以明御剧一切治理流闻久之乃始有先大司马荐而御史沈君之荐语尤异寻擢今官公念封公老而道阻远不便养上疏乞休报闻公之官所操舍约畧如闽时而闽人有起家当大柄者家居时以公斤斤三尺弗善也至是中公考功法罢公公不知所繇坐归而奉亲训子削去一切尤怨几十余年而戴安人卒又五年而封公始卒顾谓公若以章服贵我以音声人娱我竟我日无不适者又何言然公不以二尊人之令终而裁其戚盖哀慕若孺子也家居三十年时时以目眚谢客郡邑之迹可数林御史润尝疏荐公郡守移文尊称甚至咸无所报谢其治家务遵礼法妇子岁时上寿具衣履毋得絶帛食毋重味宴毋累席室人衣毋曳地公故有心计其较财货出入能析秋毫每语客使我得长国计者当不徒矣而又能以节俭自裁至课田产无所增加于旧盖不欲与齐民争刀锥絶不通居间赇谢诸子姓食指日众岁时伏膺取毋乏而已读书未终卷辄罢去不欲穷目力故然于子史靡所不淹通尤好读易居恒谓文王我师也夫子岂欺我哉尝遇异人受大还时时语子孙吾不幸染世法今往往阳神不胜识神元气不胜习气于冲举邈矣虽然吾自有究竟非而曹所知也虽不恒作文间一命笔滚滚数千言不竭时自谓取师意而已焉能不忧乐而效人顰笑六十时有以文寿者悉郟之唯领汪司马伯玉一叙七十则并谢絶唯草自徽文一首谓封公七十而侍百岁翁伤己之不逮养也可念矣素强无病至七十七而病病方仲春甚剧忽复苏神色加王逾于前至孟秋复委顿不复语而喉间时啞嚅不可辨徐察之易与叅同契语也寢逾日而卒为万歷之丁亥十四日始娶王继娶张赠封皆安人三子长鏘仕为宾州判官王出也次钦太学生录邑诸生张出也女二适太学生戴传芳张应元孙男十四汤诰先公卒淑训皆邑诸生来请余文者也淳诞清议传谕杭孺武孺宪孺悉鏘出泗论汝询沂咏汝革淮生悉钦出腊孺录出女八曾孙男九肖老宾老三老观老重老六老彭老八老九老女王任嫁娶者皆名族铭曰

祖百岁而祚及躬皆开八袞以令逝有子三而孙十四曾孙九女亦称是仕而金紫不为不贵生而祭酒于学歿而乡先生于祀噫畴能媿之

明中顺大夫辰州府知府石峯程公墓志铭

当嘉万间士大夫多轻就而难于去夫轻就难去此亦人情之恒然使柄事者得窥见之而操其去就之权以为笼络以故士气日茅靡而不振有一人焉其材足以用而未

究其格可以复出而不之顾终其身隐约寂寞而其气常浩然在易渐之上九曰鸿渐于陆其羽可用为仪吉非其人也耶其人为谁辰州守休宁程公策也公于兄弟间为仲厥考封主事公益兴母曰孙安人尝感异梦而生公公少颖俊异凡儿四岁欲从兄入里社学父禁之则大哭泣乃异而口授之孝经古诗辄诵五岁习书又习数法父戏之曰儿长欲据握算从市魁作鄙耶公对曰大司农钱谷岂亦鄙也父不能难稍长受师礼经改受易其于礼习如故属文有奇声至年十四用易应郡试时学士廖公道南谪判徽见其少而难之以时义四篇公不属草顷刻而就廖公大惊赏曰咄咄程生非而家克勤侍郎复生耶以奇童荐于提学御史闻人铨铨曰儿固奇毋使早泄不为伟器自是公屡试于郡邑往往高第独不得志于提学所且冠肤色若凝脂目若点漆秀眉而鬢鬢出入映带数人人咸目属之而公傍习声韵之学又善天文数好博奕蹴鞠吹箫调弦度曲为新声所过狎邪诸侠少亡不推挹者而一旦自悔折节益读书为深沈之思然其材亡所发抒父爱而任之遂能出其橐施棺槽于死者山寇发公以兵法约束里中少年御却之修其先忠壮公庙次及宗祠又次及道路桥亭属大水漂尸蔽溪而下公从家苍头悉收瘞之为文以奠其辞哀壮恳恻识者以为胜古祭奠漠君文远甚公又着读易纂言经世大畧二书其学益邃用世之具益周遂中乡试高等连举进士肄业工部以使归省覲当夜分有陨星之异公感其事遂着星官笔记一编往往有洛下閼郭守敬所未发者还朝遇联舟汪进士暴死悉帑而赙之又以药起其里人吴益程守坚病且为助其资费二人皆得官拜公而泣曰此官公所遗也寻授户部山西司主事先后奉使职咸称出督饷大同至瓮城驿而敌大入势且迫时无险峻可乘公约束吏卒掘堑而守之痛扶一指挥之欲窜者谓其家人此地吾死所凡三日而敌不至徐致饷归人咸服其胆勇还佐司事因议用商税给民兵公颇言养兵之费而谋所以练兵而足食者其策大详然不见录而其偕中贵人监库藏也一以身先之于出纳大有所裁节中贵人不以怨而曰使我縁而得廉中人名亦程君赐也已出督江西漕事毕会丁母夫人忧归而父封公亦卒以孝称小间輒为义已作中星图视笔记加精服阙谒选于吏部未即补着三才萃见凡十二卷合十余万言其言天人之理备矣补陝西司主事监大通槁运已监大仓库皆有廉能称进广东司员外郎遂进陝西司郎中尚书雅重公凡所建白悉以委之兼署广西司复署山东司已署广东司遂并署三司诸用兵之地需饷而济者公为料理皆给公所覆章疏前后数十上而其大者革耗银亭關中官吏禄奉搜监收粮解宿弊持长献景三陵子粒旧规议稽边储请出内库黄蜡油漆朱靛付外而蠲民门之供勒有司积谷约束秦韩庆肃四藩之竞禄者行之皆有味独其止山东营田见若以为畏事而其后营田卒不成而大为民扰公又上边务五事若预催征以增岁课严开纳以通盐法清耗蠹以足军实核屯戍以省输费广积储以防调发识者曰此晁贾遗意也公既以才重尚书而仅用久次迁知辰州府至则下教诸邑凡十条又析高皇帝圣谕约束之毋论山峒苗咸踰躅趋事矣已复申明乡约平市侷法繕库藏劝农桑处邮传禁妖巫请停调永保苗兵罢造河梁蠲免香稻

米台使监司皆欣然行之乃以间饬学宫按阅诸生与讲经术又勒兵徼取叛酋黄中平土夷争地俱谓公彬彬质有文武辰故两隶楚贵阳贵阳偏近悉公治状以故荐剡亟腾而楚稍阔远抚臣以丧去有所望于公遂劾公多文饰而少实用宜调简僻报可公叹曰天下郡固有简于辰者僻则鲁卫耳何改调为且使我仍故武而事为之上者又当调使我遽改武而媚为之上者我有所不能已矣丈夫安能再辱遂即日单车归公归杜门课子读书不恒出出则倾都聚而相率迎谄以为非人间人其褻然者则羣聚而尊师之谈论经术扬挖今古毋不饱往而公亦不徒出一切好行其德所表章先谊尤着如定世祠置圭田其傍已记始祖东密公遗迹已复考临溪祖墓而树之石遂为临溪社又为其显者御史中丞都知兵马使澧国子祭酒都知兵马使淘显佑侯旭等若干人立勲贤种德二坊最后乃始诛茅成志乐园广袤不能当司马公独乐之半曰吾取容膝而已人亦以独乐拟之公既久卧不起尚书尺一下趣之行监司守令劝驾者迹相踵公悉谢絶不应人意公遂忘世矣然至移台议贡赋议民兵议治安皆凿凿可见之行要之竟莫能窥其际也公好著述自天性而尤长于国家大典策议论高竒而不诡道其在郎署中则已谓献皇帝不当祔太庙祀建文纪年不可废壬午死事诸臣不可不録景帝不可不称宗为一编欲上之不果盖后二十年而继公以请者至再三或报闻或报可然天下莫不以为的然之论而不知公固先之也郎时所撰三才萃见日益之晚年始成合百余卷又撰六都黔考用六壬数以占无弗验者盖终其身著述不休以至卒仅年五十有七耳公字子扬学者称之为石峯先生公有四子曰潞曰澳曰涓曰淳澳早夭淳出后于公弟潞涓为诸生而涓以文章世其业欲求所以慰公于地下者难其人乃约程之子姓习公者谱为年表以俟凡十有一年而游太学乃走谒余于白下而出其表请据而志且铭之余故尝耳公一二至是咨于公之郡人方司徒弘静里人詹吏部景凤皆曰公之才未尽究于用其学宏邃不能测所诣至脱屣轩冕蝉蜕污浊者所见一人而已乃志其行而系以铭其辞曰

赢于天而畸于人不悲其畸不尽其赢翛然返真识者谓之不以为身而为子孙世系子姓婚娶具左方

弇州续稿卷一百十八

●钦定四库全书

弇州续稿卷一百十九

(明)王世贞 撰

○文部

△墓志铭

中宪大夫浙江提刑按察司按察副使起潜张公墓志铭

当隆万间三相君各用其意持太阿之柄公卿大夫靡然以操切苛办承之无精心为黔首者以故良二千石之用不甚显其最显者则吾州起潜张公振之然其用亦已时抑时伸而不恒达其抑者以直道之仅在公而伸者直道之尚未泯于人心也公最后之遇甫若恒而天遽夺之则又不可晓者惜哉弇州生曰张公非直良二千石已也于家则彷彿闵冉之遗于乡则庶几陈仲弓王彦方之风其所亲事必天下之贤长者虽尝从讲学而不薪传世耳以为名高所步趋必闽洛夫使紫阳而在公且入室故曰张公非直良二千石已也殆慥慥笃行君子矣公字仲起起潜其别号也张之先避金乱南渡后居常熟之双凤里蔡涇最后割双凤隶太仓遂为太仓人世世有隐德不仕至公父东林公鏗而始以淳直明信着一方尝受公封处州司理后赠南京职方员外郎母曰郁宜人有二丈夫子公其仲也公生而明秀端谨甫四岁从东林公之先墓丙舍圯矣木童矣而傍亩饬问之人曰它属故饬也公泫然泣曰先业而他属可乎东林公亦大泣而内竒公闻者啧啧以为非常儿寻徙城居覩第宅车马之盛与羣儿戏抆土而为之甚工髫时从里塾师有搏虎死而归之官者羣趋视之公读书弗顾曰吾方奉圣人舍而为暴兽观乎且胡不观画中虎自是读书益务究大义反复辩论凿凿出人意表其属文必自肺腑不为蹈袭塾师朱生者器之以其女弟字焉然而夺于贫又时时困父里赋其试又不尽利公虽不以废其业而里中不逞少年羣侮之公夷然弗屑也闽人周凤岐以迁客来佐州事少年目中无当者试得公文大惊异喜置之高等问有父否曰老而贫有兄否曰兄抚之坐它事逮周立出抚之而发库餒纳公褰曰以养而父且为膏油资公自是益得专精于学遂补博士弟子益有声而母郁宜人卒哀毁逾礼服除久之嬪朱宜人亦卒公鰥处而邻女有来奔者以谊谕遣之然毕身不名其女封公垂七十而感异症躁不能就席公以身席之乃小安凡七昼夜而愈公遂举乡荐以至成进士成进士之日矢心而誓曰苟一念为私计者天僇汝乃键门杜习律例絶干谒慎交际毋以狎昵进者穷巷湫洳环堵萧然意殊得也久之授处州推官甫至而守入覲丞倅俱阙公遂行守事孳孳问民瘼吏弊而参伍法比公庭肃然大猾戴三尺而治条鞭之法最为便单弱郡邑相顾莫敢先公毅然行之有卢尚书者贵甚族子憑藉为奸私莫敢呵问公捕而立致于理其它繕浮桥广庠舍平市价皆井井始少公者咸吐舌相戒以为老吏弗如也御史张者躁人也顾独虚心任公诸所寄核宁温嘉湖诸郡公必酌情法而行如造堡清戍征饷惩恶种种治办然不

求为苛切取目前快而张亦借以起长者声他非所寄者则不尔公既满数膺卓异荐当征而分宜父子窃国柄诸征者多其客也人或风公是不可用币乎公谢曰吾知有天子法耳次者知有身不欲糜之权门未几而严氏败公就征拜监察御史巡城首论罢一兵马指挥之墨者清铺役于中贵人无所徇诸饷遗算器食亦不纳寻按视通州储定国公横纵其下鱼肉通人公摭实论夺其任豪右屏息公又刺得大司徒奸利事论之大司徒方得上意又与左右嬖近交关得不治公之按通州也廩肉不以烦县官即孔道鲜所交际积之得千金以助城通诸所定约束如存给羨余更番运官裁损漕厨着为令甲至今称之故海忠介公为郎时以直谏触上怒下狱论死公具草欲救之而海公得长系乃不果上或有索视其草者公曰已焚矣夫人臣而敢市名于上然竟以郁邑不得志谢病归公归侍太公膳毕手一卷自适里中不知有张御史而其在台日当过锦衣缙帅所相囚公欲修弘治间故事繇中门入缙帅格不听因相与诘难甚苦至是以他事中公而定国公大司徒之党复孽之用大察外调得临清州判官公不以迁客自居浚濠治狱事先僚吏而办甫四月通判广信府属守缺公复行守事请讞益精明诸曹弊薮括剔殆尽吏民畏懷若一口尝迎太公之任养而病痢颇■〈谷丸〉郡之人相与禱于祠曰即不幸太公去公公去我矣旦夕呼走若狂太公愈乃已久之公竟迁同知抚州府郡人复呼走曰公秩当同守胡不同守我郡拥公輿枳不得发抚多盗剽杀无虚夕而公职干掇属猷岁守以下有台谒而留公司后公乃悉籍诸豪之捕盗者名召而喻之曰与若曹约日一人直我有盗警立杖杀汝矣豪叩头曰民安能禁盗能致盗魁或得小宁耳公颌而遣之无何果缚一魁曰汤青者公考得其状驰至其居发所藏警财以巨万计牦牛尾冒首至三百余它物称是悉没入官而毙之狱盗为衰止出领崇仁县事崇仁地险而瘠其俗易县官而难公赋公至惩其不率者亡所纵舍度民已知畏乃以宽辅之立柜使民得自投赋金吏无所轻重赋者与之期不轻属里胥民不受里胥扰里胥亦不代受民杖以是称两便无逋赋矣公又善形家言开邑门以便出入通黉宫使无絶科第诸生朝朔望课讲详至崇仁民爱之深于令寻以大公丧归寿八十七矣而公孺子之慕不衰道拜南京兵部职方员外郎公既归苦块一室自为启闭不宿侍人亦绝不入内服除补南驾部甫一月而迁南选部郎中选部无事独考拔官吏而已公持法严于徇请无所纳间与其僚约为会务守故尚书吳公岳法而行之一切费为省得司之羨若干缗以繕官舍曰吾不忍后至者之露处也寻出知吉安府公故长治吏而连宦信抚皆与吉邻壤习其土风民俗又能精心行之而以清白为主食不再簋一肉而已又时间之以蔬尽室而食日费不能百钱而皆取之俸居恒谓极寒不资官中一垆炭极渴不资官中一杯水执库役者共手而已不能有所干没九邑之长吏进见凜然若奉神君公和颜以安之与谈官中事宜民间乐苦所当创革者如课农桑核丁赋之类皆使悉其见授指而后行之盖邑真一张使君也于法比尤精两造庭质不词组立决然于大辟尤审慎不苟曰人生死藉此而判何可以骋吾敏邑有拟八人戍者公为辨释其半曰法如是足也狱上台谓守当欲尽释之难

邑体耳更为释二人人谓公之半辨者当属邑疫大作公选医授方而治之全活甚众每以朔望行学宫召对诸生课菽之后与谈说身心性命近里着己之学肫肫如也时东越致良知之旨遍天下于吉尤甚而乡先达罗文庄公钦顺独守紫阳之传以与之角公乃取紫阳先生年谱文庄困知记梓之学宫亡论所得深浅其欲导士于实学正行毋为过高之意切矣它如移永丰学建永新忠节祠可以振励士风者皆公倡其官帅为之而至修城复隍增饬楼堞祠宇之类非公所规画弗称也吉故多贤士大夫公于其尤著者以盖公之礼礼之次亦过从请益不倦贤士大夫亦争翕然归公公于嫉恶斤斤不可解吉水令得罪于其民深公欲去之而令他有所憑藉不能胜于是公凡九荐矣令亦尝三荐台使者为之两削剡以解公益愤恚乞休不待报事闻以例夺官始公之欲归父老率其民遮雉门以留泣且絮公好谓之我安忍舍父老即归我且待命耳及公发而后知之奔波驰至江浒諄而哭曰公食言公乃舍我既而曰天乎何怙我者去而鱼肉我者留也令亦坐谪而公归絶口不言官中事角巾野服徒步阡陌间与野父校晴雨话桑麻微时老书生过从壶浆蔬食相与共之后进以经术请者善诱无倦郡邑守令干旄叩庐公亦不恒拒见必以创革大计披肝腑语之它不及也念太公已矣独兄抚之在为入赘得官籍太医所以事之几如太公寒暄饥渴勤抚若婴儿而庄不衰久之柄地易公以诏恩复冠带台省慰荐籍籍而杭州之命下矣杭故要省会其民杂五方而居争务为淫侈而又新中兵变警气勃勃公以信义结之以礼整齐之而又不率乃稍用威毋不帖服者早且久公斋心请于神神告之期至期果澍应乃新其祠而为文以纪公故在吉尝祷雨立澍应邑人为建时雨楼于学宫于是人咸疑公生而神若李蜀郡水彼束皙而下勿论也公以日三春诣台谒客见士民甲夜谏讼丙夜阅读不告疲而其精已内销矣寻进其省按察副使饬温处兵备处公司理所治也公既喜得故地其地之人复大喜得公方有所设施而公病矣公行部道不受供张水行不设傍警舟尝以六月过省喝甚饮田间污邪水而舟过一旋涡几覆无傍舟可援遂病痢寢剧盖抵家而属纊余弟敬美与王学士元驭视之以手属太医君而瞑时甲申之九月二十也距其生戊子得寿五十七而已公凡一为监司二典郡一丞一倅一司理皆在江浙间所至有惠利之政其人皆能言之而于吉尤久尝之吉道经信抚二郡郡之人送迎至倾郭望而讙曰公壮无恙乎至有泣者吉之人既不能留公相率为七尺碑谒朱干司空衡文而勒之其卒也奉主于名宦祠又为特祠而又三岁吾州亦奉公乡贤祠虽古所称召信臣元结鲜于侁何以加焉呜呼公不为不寿矣公性类宽缓而勇义若不及吉丞张大猷卒其妇妬晚而妾举一子甫三岁妾死子遂流落民家公司知之为置媵保以归张长宁令沈尽室死沈之台受计亦死仅所从一孙在公悉为治棺而归之且以孤孙托有司使护持焉杭有天台令死于官不能归其家流寓杭一女孙甫髻而落侏手为伎家女公闻泫然流涕赎以归之俾择良而嫁其家居也同年杞令龚起凤以廉死不成殓公倡吾弟懋与元驭哀金而殓且葬之买墓田以供岁时祀有桂老者蒙时师也一子飘泊不能家公物色得之割帑以为衣食居恒念向者

非周倅何以有兹日岁时寓书币问遗不絕外家墓出入道一豪所豪故耕而絕之公初第时以厚价请赎豪不许且语侵公未几其人死家废公乃倍价以授其妻而后许偶以事抵州其妻方以责逋赋累累望公愧避匿公知之曰而幸遇我何自避匿问逋几何悉为偿而释之人谓公贫岁入不足供粢盛其为义视官中当益难也公规矩天就恂恂方之内而余时游于其外又多官谤迹亦若落落者然至与余语輒恍然自失其守杭与其僚喻君邦相相语谓王君天下士也柰何偃蹇朝恩而殍丘壑邦相为余恒说之嗟夫以邦相状而志铭公之墓何能辞于公之子公始娶朱宜人无子继娶刘宜人始举二子长际阳娶曹继娶许补州博士弟子次赧阳出后于太医君娶吕女一适唐谦孙一际阳出也聘高葬在盐铁塘东祖莹西之新阡铭曰不雕其方不漓其天不以霜雪胜其阳暄其于儒也得宋之半而于循吏也几汉之全然所谓半者尚能出乡先生之社而窥孔氏之两庑荐其醇真以从闽洛武者耶噫微张公吾其畴与

中顺大夫杭州守初庵方先生墓志铭

方先生者讳扬字思善其先河南人也徙而丹阳又徙而鉴湖又徙而白云源最后徙歙定为歙之罗田人有居贞先生社昌者学行渊茂尝以义折程学士敏政学士改容逊谢之人两称焉先生之大王父也有二子仲曰景英公以礼让称景英子曰从本是为封大夫公先生之父也质有其仁矣娶黄宜人邻母梦有龙祥而举先生先生生端嶷异几子其少从塾师即以庄见惮不敢儿子蓄之塾中儿见先生輒恍然自失歙故朱文公元晦产地也先生入其祠俯仰久之则隐然有俎豆其间意矣九岁丧王父哭之毁十四试于有司或风其以它道进者先生怫然曰胡为乎始进而遽弃我又明年娶于洪是为洪宜人其年丧王母呉毁加于王父又三年黄宜人卒先生躄踊痛哭不欲生也念益大夫公悲强啜粥修容而进之又念大夫公鰥处既离苦即以一束草卧公床下伺寝息夜分泪涔淫渍束草湿矣封大夫不恠强之还室先生固谢不敢至服除犹未已大夫公乃为置媵以絕之而后室处也先生工属文必匠心而证之理一洗剽袭之陋而尤邃经术虽俯受举子制然不求筭合既出入诸子百家泛澜久之始一归之圣学作座右铭以自警人谓订顽所未论贤于崔子玉远矣于乡则多舍黄山于金陵则舍灵谷时独往山水间曰吾欲以占吾趣之合也既不利于试人以摇先生先生不顾寻再试而再冠诸弟子遂连举高第谓可以塞摇者口先生亦不顾既除官得知陝州陝以三面奉客其民皆窳不任征独有余力于讼先生至则首绳大猾一人以警之与僚佐约常禄外以一钱入者公议不相假次约胥吏以一钱入者公法不汝贷咸肃然奉行履亩均赋剔其隐蔽积谷以常平法行之岁不虞俭矣饬邮传毋困客亦毋使客困其主诸以农时讼者法毋赦置保甲毋匿奸毋纵窃树枳于途沟其表以御骑而剽者诸所厝设皆故循吏规独先生能精意行之不倦陝用是大治故有召伯祠先生以月朔躬谒出憩庭树下州人耳相语召

伯遠矣吾不悉何狀此方公棠也前是博士諸生之不獲與計偕者七矣先生試其文朴而野不中程乃示之結撰時時行學宮于講析詳至而又習形家言以州苦乏水有故道不易復之度非數萬緡不可先生乃按行險易出藏粟以食飢民使共畚鍤而倡其饒者俾以私鑿助費可數千緡而渠復水迤邐環學宮是歲有預計偕者創書院名之曰復初祠周張二程朱陸以往九先生及明薛文清公聚書萬卷使諸生讀之曰而曹毋厘科第自此而上大有事也甫三歲而九騰荐書以最上大夫公始封而又久之始遷為南京戶部廣東司員外郎進貴州司郎中遇詔恩實為郎中而大夫公亦從進階先生自喜曹事簡得益肆力于學傍及左國庄屈兩司馬先秦西京建安大歷之書汰取其精華而涵咀之以故發而為詩文咸奕奕有聲實與閩方沆子及并稱矣而先生意小之不欲名其家言以斯道為己任其學以求放心為要立靜立極觀變時行其大指也屬同舍郎王者挾故相之鄉人險而貪當大察考功郎微得其奸私狀欲發之以先生一言而解其人不知也嘗丐其郡沒入田若干頃度且敗陽為義役而請先生文以蓋之先生謝不閑恨甚遂上疏誣先生闌出庫金而以它口語故波及子及故相猶難之曰得無謂黃門淫哉而王郎者以其私人從與不已于是三人并示譴而先生得知隨州了無恨色第謝子及曰微揚之無良何以累吾子子及笑曰脫不相累沆為不如子也且沆亦自失王郎意始先生以陝守入覲當元旦而朝士有朱其履者三為典儀所糾因及先生下詔獄先生實不朱履也坐奪俸而典儀者故家陝而橫先生嘗持法裁之以是中先生先生了不辨亦不復言其人其長厚類若此治隨猶陝也屬有城城之役先生顛畫一而身與吏士分功不日而畢甫六月當入覲貸于親知得錢二百緡始成行明年誣大白遂同知嘉興府故有蔣伯良者大盜主也而主諸貴豪急之則鳥窺緩之則緩頰以解先生廉得其實陽以它事召立杖殺之郡人歡呼至傾里曰吾曹始帖席寢矣丞職詰盜有所捕獲則以贓引子錢家先生乃藉子錢家月更一人直與捕者偕往自是子錢家不受引又嘗奉部使者札監稽兌卒糧艘先生嚴其格令卒銜扳魚貫以進受粟于肩比至舟无一嘩者糧戶皆取衡先生不至為卒侵牟矣卒以無所利乃故損艘粟之實而益之秕誣先生于戶部謂私其民而以秕苦我羣噪于肺石部為下使者核咸直先生而坐卒以誣先生佐郡如故嘗一視嘉善篆益作堤堤水不為田害會省悍卒劫辱其大帥嘉禾之戍將應之公得其主謀者論曰苟不平于若官當為之平彼死道也而若以為媿乎且彼主謀不蚤露故披猖至此今若露矣奈何相率從死卒叩首謝不敢乃已嘗以事夜行傍郡有尾先生舟者可十餘曹先生據案叱曰盜乎我嘉興方使君也盜羅拜曰吾曹固耳使君名安忍犯之第前警多矣請以一艘驅五鼓復羅拜舍去曰慎之請使君毋夜行先生曰若慎之毋復為盜也我夜遇汝汝能不犯我汝遇邏卒能舍汝乎先生以故資高一切治理流聞超拜杭州守然而先生病矣病故得之勤學勤仕咯咯嘔血至是益甚然而益治事不言■〈谷丸〉時悍卒事甫戢而黠者猶橫自若塵野亦汹汹先生拊循其瘵苦而稍諭以利害已漸約以禮杭且易觀會獻歲獄吏稍懈于飲食囚逸者二十四先生不動色而設方畧

捕之干掇者惧其不利也曰太守寬或曰太守病不暇理先生一以自归曰病诚有之寬则吾心也太守当坐之一无所及俄而囚悉获太守以赎论乃相率心服先生曰太守真长者张司马肖甫念杭事繁为天下第一而先生之疾无已时请以支郡之僻者卧而治之太宰严公素知公曰移僻病无已将竟去之乎俾予告归里以痊可赴部更补外臣之得归里治疾自先生始也先生在嘉兴时尝着正大和平四箴语语精切多不载又按行海盐进诸生语颜苦孔之卓喟然曰仰钻且瞻者妄念也故无得欲从未由者真境也故与几道固未始涉对待而功固未始涉覩闻也诸生勉之邹鲁岂更驾哉由斯而已归一月悴甚命衣冠召其子时化曰化而来前过化存神者吾所以安身立命之道也过而不化神将焉存神之不存同流安有勛之宿尘习尘事尘理尘一不化难与几矣我所谓用力于仁而不足者也虽然我可以见夫子矣又微语曰毋使大夫公伤于志既大夫公抚之而哭则张目端拱而瞑时万厯之癸未三月哉生明也得年仅四十有四而已先生孝友洁廉再从兄忠卒有二孺子先生驰自秣陵奔而且及殓也拊棺大恸曰吾不母而寡子而孤者有如此棺尸若盱目而属者已乃瞑先生所以抚之不食言而后忠子时敏夭乃大恸曰天乎吾无所仲吾誓矣厚葬之如忠而益抚其仲如时敏其事大夫公已见前独其宦南京而大夫公来行舍覩其壁立曰吾闻夫善宦者家于宦问而官大夫也而胡以贫也先生拱而对曰天厚吾门五世而不堕儒业何藉宦也且扬之忧在不德不在贫语未毕而大夫公曰如而言我不难故我生平鲜所悦于南京悦焦弱侯于浙悦宋以德袁仪卿其它与乡人处望望然若将浼已者以故所还往甚寡然不能以月旦下先生先生卒之明年冬而时化来吾州奉先生之族孙侍御君万山草行状所自着年谱来求志铭其墓时余方徙处东海之濱树棘而环之以笔砚为戒时化怏怏返遂请汪司马伯玉为传而仍虚其志铭今年秋九月余游白下而时化来言曰非公不足以当吾父非吾父不足当公敢徼伯玉之惠以请余辞曰余雕虫之技也焉能为贤者重时化固请曰龙门之传老子孟氏也兰台之传扬雄也子何让焉且不孝之劓石于窀穸者五阅寒暑矣不尔何以见先子地下余悲而许之谱之文逾万言甚尔雅余不能悉采采其大者

铭曰立德兮美善之中噫修辞兮扬马之风噫功名兮以治郡终噫孝养兮不克厥终噫赋之资兮忌其丰噫予之志兮不竟其克噫欲以余传兮仅雕虫噫

累封奉直大夫礼部精膳员外郎思吾支公暨配李宜人合葬志铭

当思吾公之犹在诸生也与其子今学宪君试俱有名然公七战而七不利学宪六战于泽宫于南宫而再利遂以其官再封思吾公当是时学宪数更礼部诸曹郎及视岭左学俱着声实而思吾公贵于乡引谊行德朝之士与乡人交称公父子为贤人长者其习思吾公者曰非公何以有学宪习学宪者曰非学宪何以成公盖学宪自岭右移疾归

奉思吾公思吾公甚健甘匕箸亡何学宪之疾愈而公病矣公之病学宪侍汤药唯谨其卒也学宪治含殓逾谨而前是二十有五年公之配李宜人卒而方居约尚藁葬公伤之为废不置配而室徐女学宪以膳部郎始具礼归李宜人于祖茔之次而其宦岭右日梦宜人颿蹙而称不宁字自是凡三梦学宪心为折及归与善堪輿家言者偕诣而试之其语与梦合学宪益大悲骇故及公之卒复偕其人择地去葬所仅数武而得吉壤乃卜以季冬葬思吾公而启孺人之兆合焉而属志铭于世贞世贞故识公而善学宪且谓公之逝于学宪手也与李宜人得今徙也其孝诚皆天感故不辞而志之按状支之先自后稷汉有郃阳侯者以战功显始有支姓至三国时有三支俱散处多显而在吴者郡从事琮起家贡士有至行人称为支孝子有三男其少者曰祥始定居昆山之大虞浦所谓支巷者也世世受经术然不能大融显至东湖公栢者娶于某亦有三男公其长也讳良知字日新后署其号曰思吾于良知之指深矣公生而颖敏当髫髻时已高视雅步不与常儿伍稍长即能属文父抚而异之曰谁当为配者贞义里人李处士佑与父善又最奇公遂以爱女字之是为李宜人宜人长于公四岁处士不谓非偶当其女时则以贤明闻公年十六而父卒有二孤稚在宜人来归时已二十矣属家委中役至挫而又遭大丧孺人与公竭力襄事犹不给则相与转徙依外家以活于是公之所受业尽矣而性又嗜读书不复能究精风土齐民之术家秉一以付孺人孺人用始显公尝念其仲良能当授室矣而不能备恙鴈凄然而叹孺人意觉之曰君有弟而鰥之安用妾为阴辍中篝之装以从良能始有室而以贤归宜人宜人又能先众佣工作恒至夜纺绩不休或劳之曰■〈谷丸〉矣宜人曰吾而避■〈谷丸〉谁不佚者至积纆累微以资公于学不使公有内顾之忧皆宜人力也公既学成试为博士弟子恒冠诸生每属笔滚滚千余言不竭然皆有理趣不为谰辞以是受业者众户屨恒满诸生得公指授多去为闻人或至贵而君故布素自如也然用是得少资宜人于家公举学宪甚蚤然自是不复举学宪资甚敏而公教之严甚至不废檉楚曰吾终不以一子之故而蔽吾明宜人爱学宪可知也亦终不以爱克严以故学宪之事二尊人若神君左绳右矩洁修其志行而后敢称子公既以子贵意稍发舒欲赎其先所弃产多假贷以偿以故橐空空然至于为守令居间及豪夺巧攘之计绝不为也公以外氏恩未酬又宜人早逝不及逮学宪贵内伤之为抚李孤而扞其内外侮以有成立乃曰吾今始可以见处士公地下公貌温劲赋性澹宕无城府解人之纷取片言断赴人之急甚于己故贵而望实益重无丝髮之讥以累月旦其卒也搢绅哭于市士女嗟于巷非独用学宪重也公有所以致之矣公得年六十有六宜人仅四十有七耳学宪名可大始娶周氏亦早卒赠宜人继朱封宜人女二长适姚时献李宜人出也次适王甘节徐出也孙男一一本娶王氏孙女四适太学生刘儒宋之伟冯嘉会朱出一字陈某曾孙二长茂春次长曾孙女二字周本正一未字

铭曰有子于此母食其名而父食其荣生之日有涯而死无涯如其食名曷有既耶

是为支大夫李宜人归而余铭与依

弇州续稿卷一百十九

●钦定四库全书

弇州续稿卷一百二十

（明）王世贞 撰

○文部

△墓志铭

故处士小鲁许公墓志铭

余宦浙而得萧山许令承周令白皙美姿容善举止其政术为浙东守令冠而无何邻邑子之无赖者陈以使事枉道过萧山纵暴邮传间令捕剪其爪翼弗听去遂至互为讦坐俱免当是时缙绅先生无不快陈而惜令之俱免令独怡然奉太夫人归里盖二十年矣太夫人之养日益备而令之名不挫其意日亦自恠顾时有所慨而叹且泣曰天厚我使我得长共养太夫人第如我先府君何盖令之父小鲁君蚤弃君不及以禄养而令又蚤罢官不获以一命之服为君荣且也始谋葬而贫离贫矣卜吉壤不兆宜许君之叹而且泣也万厯之戊子秋君以书币使其子某来恳曰今者得吉壤在绰山阳城湖之间卜而兆有日矣思所以为亲计者穷矣意必藉吾子之一言而后不朽哉予故习令而又悯其诚乃按君之状而志之曰君之先四岳后徙东南为昆山名族而中微牒毁于火至君之大王父朴王父■〈日上永下〉皆以力田致饶尝构堂可坐百客而旁有枣树高数丈远近望而异之所谓大枣许家者也已而复挫产父鹏以少子出赘于周生君君遂从周姓讳道东字子行生而沉敏强记十二能为举子业寻以父亡夺之依其外家以长补邑从事非其好也去之耕于野君故明汜胜王氏书而又有天幸恒得岁斥买傍产渐裕矣然居恒邑邑不自得曰世困农不克以儒显吾几得之而夺之天乎而会承周少颖乃课之读书仅弱冠三试于郡邑及学使者皆第一然君已病矣谓其母张夫人曰成吾志者此儿也何渠能使我见之张夫人与承周泣数行下不能仰视已而君竟卒得年四十有四君为人孝友笃诚明理畅事尤敦谊信不寝然诺当其父之死于赘也念外王父无它子而鞠育君于稚时曰微外氏我何以有今日且吾王父母幸有诸父在善其终矣故竭甘髓之奉于外王父及歿而为之冢莹岁时享祀不辍至终身冒周姓而谓令君

曰若不可不复也虽然毋遽剪吾外氏名之曰承周以志不忘及其晚节始备伏腊烝祀之礼于家三世称质文矣事寡母尤以孝闻伯兄仁厄于徭君谓不易支也促令君白之邑而免之已谓其老无子捐少子之在襁者为之子而借以周恤之良备又尝计脱其舅氏于鹽盐逮然推德不任也中表有乡贡士任生者苦贫不能具鲜衣君得一衣未御辄以服之少尝过赵丈人留君饭而忘戒饬内馈君不恠辞归丈人产晚落窆行过君君为数具美食且资其妻子曰推吾所以不恠意也盛生避讎之他邑而寓橐于君直可千金久之不闻问咸谓死矣忽以夜间归过君不敢言橐事君饭而返之封识宛然有与君友而蚕食官庾者君力劝沮之反复甚苦其人怒去后事败论戎家尽破叹曰吾负许君吾负许君其行事类如此善尺牍尤工署书岁暮来求门署者屢常满君应之不厌故君虽隱閭閻若委琐也而名藉藉娶张夫人精勤有大节其居整训方得古贤母风子二长即令君不获展于用乃文行蔚然矣次承喆即出后于弟者不及壮以死孙男四旋吉娶闻猷吉娶李为郡邑诸生观吉聘孙太学生令君出也慕吉承喆之嬪遗腹孤也曾孙女若干人令君则又谓柳柳州尝表其父墓而言身不谨先君教以陷大祸不克成先君之宠贈以为罪恶世无所容不肖不敢望柳州其不幸奚啻过之伤哉语也虽然当柳州之生时有昌黎在而不寄以不朽仅以身后属昌黎视令君不如遠

铭曰报不必身于其子孙显不必位乃以微言君之所谓奇者泯而其赢者长存噫其又何怨叶

乐田高翁暨配李太孺人合墓志铭

乐田公卒以万曆己卯也是时令君犹在公交车云蓋卜墓于获嘉之郭南而未有志也又七年而为丙戌而令君始成进士释褐除之萧县而公之嫠李太孺人实从养其以任剧调上海则复从仅两月而令君仁声隆隆起乃太孺人属疾卒太孺人之疾也邑人靡不狂走问医禱曰天乎毋以太母故夺吾父既而闻孺人卒则又狂走唁令君曰天乎竟夺吾父矣虽然何以慰吾父也令君谢曰孤不天不获以身为太孺人代又不获竭方寸而拯若曹于沟壑孤恨不即蓐蝼蚁何所溷父老为也则固请曰必有以慰吾父令君乃泣稽顙曰伤哉贫也我先公之窆也蓋有石而无志今者归必启先公之兆而合焉意且徼惠长者之一言以不朽地下乎哉则又问何之曰吳郡王司马者其人也而未有素也邑之贤贵人学宪潘先生允端曰吾女女司马子司马今在金陵于是学宪公任乐田公与太孺人之状以书介绍不佞贞令君布币而踵言其后曰国有禁不敢以不祥之服点都门唯足下怜之余不能辞潘先生且以先生习知令君以令君知公与太孺人故按状而志曰公姓高氏讳魁字某乐田其别号也高之先故庐江人洪武初讳大者戍宁田卫移屯于获嘉遂家焉王父玺玄父玺娶于刘而生公公生而朴茂不事雕饰为文采

忠信愿恪与物毋违顾其中井井如也世居约有瘠田亩可二百而耕恒不及岁役故侵之乃废箸转徙贷富人田强自力稍稍得岁而父玺母刘皆已老徒手仰公食赖授室而得太孺人以俭勤佐公意毋论时时羞甘毳即褐博粥蔬暄饱无后时二尊人安之若登春台也既皆以寿考终后先皆以毁瘠胜然至含葬皆成礼伏膺祀享悲声动闾左人人称高氏孝子孝妇矣公既以至行得里中声而黠豪心妬之故蹋公门而詈甚口欲挑为鬪端公逊弗应异日犹身诣谢之豪故张具欲以尝公公竟酒食食无异居恒豪乃内愧折节请交矣卫帅鹜而贪所部无免者独迹公过不得公恒言七尺吾受之父母奈何轻掷之公庭也故终其身无郡邑逮太孺人与公俱难子过壮始举令君而又少颖爱之甚既而心异之曰家世隐约亡显者是子也奇殆不类常儿安忍弃之农乎而会村居无博士师有王生者馆于中表刘氏去家三十里而遥俾令君负笈从公时徒步往往质王生曰儿子业进乎进矣归与太孺人相对语而喜可知也久之令君补博士弟子寻饩学宫间与诸社友为文字会公必课酒炙以供簪珥之属太孺人首无几时也令君奉诏推择升太学得疾燕中邸公驰而挟之归悉帑以事医药既起而犹有忧色曰儿吾身也亡何令君举于乡矣郡以例优予公冠带公乃大喜曰吾居恒覩冠带者以为非人间人而遽及我耶第一御之不时御也获嘉令以公德而耆宾之乡饮公逡巡谢弗就曰一田父奈何用儿子故遂与邑大夫周旋其退让如此于是令君再上公交车不利意邑邑不乐公笑曰田家得博士弟子固幸何况饩而升太学又何况策名乡书且若不见获嘉令荣业且得之第惧不称耳既而属疾且革令君哭而请遗言公曰我何恨所不尽释然者而未育子女勉之为善而已公素好二氏言晚而益笃长斋断鱼肉与人语及残杀輒掩耳不欲闻若报应因果孜孜乎其味之也太孺人之识与公敌偶其奉佛尤专精乃其急姻族宽施予有所勾乞未尝以帑耻辞阨以内外合辙也太孺人后公八年而始捐馆则覩令君成进士輿从京师之萧之上海养皆以禄视公大径庭矣而太孺人所以训戒勗励廩廪有古贤母风病眚以令君疗之明病卞见令君輒解最后病甚不可为与令君诀大约如公语而加详且曰吾幸有儿谁为儿儿者今而后勿急躁下勿轻任怒勉之语绝而瞑嗟乎公与太孺人临绝之叹可悲也已虽然吾闻活千人者必有后夫令最亲人者也令君令萧萧治令上海仅二月耳而又治又俱俭岁所全活何啻千人也且也其令当未己所全活尤未己也何虞于无后令君名进孝公之生以正德癸酉得年六十七太孺人生以丙子得年七十三

铭曰二老人其即安于斯逝者穴而存者谷树谷务滋穰穰孙枝乎而胡憾之遗乎而

太学生五斋徐公配陆孺人合葬志铭

徐之先以医着也盖晋有濮阳太守熙者得神镜经能立起人死屡传宋齐时益着且贵而至后宋之绍兴中复以医着始自汴徙嘉兴已转徙华亭遂为华亭人宣德中有院使公枢贵至侍从赐金紫然终宦不离医于是益大着而其后稍稍易医而儒迨公之父南阳公济始举乡荐再教授大府又迨公而儒道益着南阳公有丈夫子三公其季也生而颖异稍能属文有儒声上海陆翁者起家岁荐以贵雄里而仅有一女是曰陆孺人孺人生而有女德父母绝怜爱之曰非名胄而才者吾不之婿也既得公大喜曰女有归矣已而曰吾夫妇有子矣公遂赘于陆鲜衣甘食游行倾里中儿甚适也已补诸生遂又以文高诸生久之陆翁夫妇相继死公与陆孺人哭之哀丧葬咸庀而陆之族有利其产者谋以讼摇公公笑曰吾视吾赘直赘耳男子七尺岂藉妇而立者委之返华亭以久试诸生不利悉橐而游太学西京马文庄公汝驥为祭酒试公文而赏异之公以是气益发舒悉与其豪长者虎林方九叙新安汪文锡维扬史起蛰兄弟游公故善酒又善诗而又善擘窠大书乞书者户屦长满公与之饮醇击鲜亡间昕夕用是名日加益而帑日损休沐里居避倭乱之吴兴郁郁不得志时有子益孙少敏抚而叹曰若知皇考之所以名若者乎努力毋以吾为望尝咏一绝句悲怆婉切听者私怪之一日戒益孙毋之外傅趣客与谈若诀者客去面壁西向而逝当是时太夫人尚在堂益孙仅十岁耳陆孺人之欲为公死数矣而不忍于存者勉强扶携其老稚与丧还里中既葬归女于彭太学汝让公既无所遗孺人竭心力而终始大计上以共太夫人而下以诲益孙若忘亡者益孙固敏第不能无少年弄孺人欲笞之惧太夫人闻而伤其心乃跪数之曰吾所以忍死为若耳今乃尔我何以生为当从汝父地下一恸而绝久之始苏益孙自是皇恐折节砥砺经术十七试诸生异等诸生习其文皆儒而益孙顾不得一第至以例游太学又工古文辞今许少傅张宗伯为祭酒司业大赏异之益孙所教授弟子东修及贄文有余润悉以供肥毳而间不给则藜藿参焉孺人甘之如肥毳也乃其从女贞昙阳师所闻西方教则一意奉佛茹素愈易共矣晚而善忘若婴儿独向信西方凡六载如一日俄病■〈谷丸〉卒益孙既小祥乃痛哭曰不孝所以刺促场屋者冀得升斗之禄以奉吾母而已且吾安能独向禄嚙太学符纁弃之示不复出或怪之曰是夫也不思以一命荣地下乎哉或曰彼殆有所慕于昙阳子之道也而太仓有王元驭元美二先生者先后称疾有隐名故愿一从之而今者元驭拜相元美亦出副留钥矣得无悔乎哉嗟夫是非能得益孙之所为益孙者彼其痛哭而嚙纁也天真之至也而何所用拟议也且今三吴之贤士大夫少不知有益孙有司至欲采其行以请者因而知有徐公陆孺人足矣公之年仅四十五而孺人年乃七十六有子一即益孙女即适汝让者孙男二一士晋聘袁一士观聘朱女二一嫁彭维昕一嫁方春荣状其事者唐状元文献志而铭之者则世贞也

铭曰父食母之力而母食子之志又皆以子之名贵然则釜养而鼎祀为可废耶曰恶为子者各顺其际而行其是而已

申玉田先生墓志铭

吴江有申先生者名德君子也。为诸生籍籍名场而竟以韦布终。终之明岁戊子。而其中表甥提学宪使顾君大典私谥之。学宫曰贞靖。而手次其行谊。至七月。而其子诸生五常奉以谒。余曰。敢藉手子之一言。以为地下光。余谢不敏。因读顾君之状。称先生孝而征者五。弟慈而征者四。它乐施而不名。急人而不责。偿征者亦可数。然于谥法。清白守节。宽乐令终。无当也。且夫私谥。非古也。列国而汉始有之。若黔娄之康。太丘之文。范是也。然而张子厚卒。门人以私谥请于程正叔。弗许也。其言核而信。敢以辞诸五常。而题其志铭之石。曰。申先生之墓。申之先自四岳也。唐开元中有进士泰芝者。凡数十传。而为吴江州判官。顺遂家。吴江为其邑人。又数传。而为明锦衣经历。广生按察僉事。惠惠生贡士。诚娶顾别驾望女生先生。而天继娶袁比部。鼐女母先生。顾之天也。先生仅三周月。乳媪指襁中户而示之。即啼哭。以为惊也。暮携之。殓所复啼。他日携之。殓所又复啼。视其泪盈盈溢于眶矣。贡士公乃大异之。名之曰孝。及长。而字之曰子纯。先生少负才颖。以经生业。着又工尺一。按察公。凡有疏记。酬往必以属先生。逾于自构。叹曰。儿凤毛也。十六补邑诸生。试辄高等。明年僉事公卒。先生从贡士公。墨而啜粥者三年。又代治煤里村墓。毒暑分版筑。赤日中无倦色。贡士公之于丧。葬得成。于其易戚者。皆先生相之也。贡士公性严重。嗃嗃于家。而先生独婉容屏气。先其意而逆之。最得公欢。公尝病疽背。■〈谷丸〉医。祷殫矣。计惟有吮其毒。尽或可生。先生饮泣而吮之。其毒出于背而入于腹。遂昏死。家人哭相悔。死者未必生。生者死矣。先生梦若帝语之曰。以而故。赐而父生。饮之青冰。矍然苏。呕秽血。败肉数升。遂与贡士公俱起矣。贡士公抚之曰。而不负。而名吾。不负名。而也。公起之。又二十二年者。而病呕血。先生不释衣。侍者周岁。其医。祷精。专有加。每承血于盆。即茹之。不忍弃也。然卒不起。而王大母。吴宜人。九十矣。尚无恙。先生旦夕恻于。殓几绝。而以间。强盥栉。修容而入。慰吴宜人。周视其匕箸。乃出。出则毁如故。盖三年一日也。吴宜人叹而呼曰。孝来。果不负。而名。于是吴宜人亦卒矣。先生不以寿考。杀哀。欲举两丧。葬以贫。故弗克。乃痛自抑。损。簷布单衣。蔬食为恒。曰。余敢忘。余诛。毕。葬而后。稍稍复也。移所以养大母者。养后母。袁袁。每见先生。辄忻然。忘其非己出也。先生所以娱悦之者。百方。既晚岁。畏喧。而避薄。轻身。徙梨花堰。而留其子五常等。共奉袁。然旬日必一朝。饮食甘果。迭进。犹依依孺子慕也。盖邑之人。皆称先生。不负其名。先生名。所谓孝者也。里有诬先生之。仲父杀人者。仲父脱身跳官。系其妇。吴宜人忧之甚。食为损。先生挺身出。白之。讎环睨。莫能难也。既白。而仲父出。就讯。竟以其妇俱免。吴宜人始加餐。先生又为之资其装橐。之京。谒选。得倅名。州仲氏茂才。小于先生十五年。先生抚而教之。若子然。恐失母袁。意不敢自处。以父也。怡怡白首无间矣。先生故受母遗奩。具后有女。不以授之。而以授袁女。之当嫁者。曰。吾女何敢先。先君女。再从兄学。物遗其寡嫂孤女。先生力。矧其寡。择壻。得沈汝贞。于贫。而以女嫁之。沈

君后成进士女亦从贵所谓弟而慈者也先生之妇父曹守合州而猝中寇当坐军正法狱甚急时蜀藩臬皆郡人而不能得其要领走之故知陈侍御所乞书为居间立解曹君尚不知出自先生先生亦不自明也顾曾瑜者先生馆带交也坐诬杀人逮损家为辨乃得已呉城迫水而门每涨輒病涉先生与李令迂梧策必輿梁輿梁必藉石而后永李令曰策之善第费可千金何所得之先生念溧阳史少卿际富而好行德当过邑袖书缓颊而说之史公为心动发帑如先生指輿梁成邑人人谓先生勇于义能先人而后已又多缓急之畧有贫者病者丧而不能治者急难者咸走趣先生所先生必悉资力而应之未尝示难色所谓乐施而不名急人而不责偿者也弇州生曰顾君之论述云尔盖迟之五月所而征诸邑人信顾君又谓先生风神洁峻辨说挥霍满坐风生客至必酒酒行必醉晚居梨花堰东与鸞脰湖接轻刀短屐唯意是师于古文必左国于诗必杜于书必晋流誉江左其声蔚然五常具哀而梓之当亦不诬于乎俗末而漓矣有孝谊笃行如先生者即癯然一田叟余忍遗之而况顾君所称彬彬质文者哉先生卒以丁亥距其生甲申春秋六十有四始娶即曹继徐皆先先生卒丈夫子三长即五常娶沈次五经娶陈继徐次维岳娶黄皆能世其业而五常维岳后先廩于庠女一适呉之莱孙男四曰璟锡五常出聘叶曰瑗锡维岳出曰琦锡曰珍锡五经出孙女六俱幼墓在某所

铭曰呉江之域有水秀而土丰者是为申先生之幽宫不爵而崇其裔必隆

呉山陆君暨配高孺人合墓志铭

乡进士陆化淳之魁于壬午也与儿骥盖甲乙云又六年而化淳之父呉山君卒苴杖而来谒余白下再拜稽顙而泣曰父已矣且墓矣昔者吾母氏之弃孤也盖二十有四年墓也未及为请志铭也兹将启窆而合焉敢徼惠于令子以二尊人之不朽托既而曰天乎伤哉母氏之贤而天也于其歿知有化淳而已父之才而身弗庸也则知化淳一公交车士而已夫以区区一公交车士而何以慰之地下念今之世能不朽死者唯先生而不忍于生者亦唯先生是故敢以志铭请以出其手撰事状余四千言盖一字一泪也核而详丽而衷余何以辞按状陆之先为汉郁林太守绩其可知者元末有荣三公从其兄运使荣一公避乱相失窜于常熟之李墓已徙五渠遂为常熟之五渠人四传而为庭璋能大拓其产有子曰一舟君文落魄不问生计产以日挫至其子西江君龙则益挫然皆受儒儒不能自致通显而西江君复能诗以诗自愉适与杨仪先生相唱和杨先生世所称作者君于西江君为适长生而明颖五岁受书过目成诵又能知楷法稍长日记数千言尤好先秦诸子家语十四试于邑冯令所援笔立就冯令奇之且少之曰而姑归进学以俟君大恚恨令实弃我而以好言诞我耶久之学使者下属邑有能通春秋三礼者得径就试君故治诗乃兼治礼不朞岁而以治礼称里中高公甚贤其女而才君遂以女字

焉是曰高孺人其后归君孺人小于君六岁其才识性行不啻君配也君之学成而御史以事去君不获试追之尽境而弗及复大恚恨曰弃我者殆天也而宁诘人也遂束书纵游吴闾为市里侠击球较射倡饮不归者累年间一归非久即去父母故骄之莫能难也最后见孺人孺人痛哭曰而自负之谓何而今若此且不念二尊人子子晚暮乎嚙一指示之曰而不改行者吾视此身犹指矣君感悟折节下帷习故业以情告西江君西江君曰儿能为张克乎未晚也携以见故瞿文懿公景淳文懿犹在诸生读君文曰可进也君请进贄文懿曰若犹治诗乎曰治礼矣文懿笑曰君礼而我故治诗何以称子师谢去之君拂然曰吾复治诗易耳虽然吾自有师肱篋出所束书习之而仍故业于诗穷昼夜力无间呕血不减止竟以诗补博士弟子西江君喜为加餐君曰未也试必高等然至应天试輒不利而会倭寇大作所过焚剽至君里君奉父母尽室跳之湖上寇势小缓君间行视丘垄而还则无所踪迹矣君念父母忧思久之疲极假寐梦黄衣者指而曰去几里某浦非而父母舟耶行求果得之人以为孝感事定问故居则已属之燹矣君与高孺人谋买傍丙舍数椽以居父母而身从馆师聘稍有赢金以资甘脆而一日龙忽起卷其丙舍与民居若扫西江君故属疾以惊故益甚殆不起高孺人驰之君馆与俱归道与谋曰殓殮直若干棺直若干君出囊金曰差足矣高孺人曰吾覩舅■〈谷丸〉矣而睨仲氏若有属者何也得非谓仲氏尚未娶耶君曰奈之何孺人曰君第行贷妾当助之装迎妇及门行礼西江公顾而恬然瞑矣君哀毁几绝既与高孺人勉共力丧事而后哭谢曰微子几使我先君目不瞑乃留高孺人侍母而复偻行至馆教授诸生日益进资日益宽而独一母徐孺人之供日益饬甘旨备矣顾化淳业已渐长谋为置塾师时家指渐众孺人谋躬督之勤绩纒课耕作以其羨稍置傍亩微润屋矣岁时问遗中表姻戚无失礼间有以缓急叩者不爱簪珥以应之于是孺人籍籍得闻左声而以劳故病矣前是君念母不置自馆还省覲徐恒谓汝第毕汝职有妇在何忧至是君挟医归视孺人已不可起母时亦困老病每哭孺人輒呼天曰孝妇死我何用独生后十余日亦不起君昼以哭母于堂而夜涔淫涕交頤以泣孺人于草土也盖三载一日矣既葬除服忽忽不自得曰我所以竭精力而占毕者冀得一伸之于吾父母而更何冀哉会化淳已学成补博士弟子高等乃自顾曰奈何与儿子辈争少年技也却埽一室穿池其东悉蒔莲华环之以竹客至命酒不取丰而取办竟日不以壘耻告也当孺人歿君意不忍复置妇顾米盐浆炙一切纖细皆属之身乃始娶妇陈而少于君不能遽有所宽时喟然曰李献吉有言妻亡而后知余妻也岂不悲哉始君之致妇于仲也寔自孺人孺人当仲童时所以抚教之者百方盖尝母事孺人矣及孺人念其有童心也而时时进规则已不受规孺人犹隐之乃以徐指割其居之半授仲器物储侍与均而君自馆起居母徐毕必过仲与饮食而后入寝仲有外费輒市其居君为赎之以归仲不使母徐知也后仲竟废箸出它徙輒迎之归为授粢凡再赎再授粢至晚节竟仲卒不忍离也君既已绝意进取顾其课督化淳益勤及饬于学宫乃微启齿曰敏于我矣及化淳获僦周视其歌鹿鸣咏骊驹始快然曰先君生而不得

之我者我生得之若矣虽然犹大有事在于是纵游金陵诸山水已游吴中已游钱塘山水且徧曰吾岂以明得意哉山水吾所夙尚不能出之口今者以厌吾心耳君强少疾最后饮于郊中寒疾五日而卒卒时殊了了四子环侍之而仲化熙时试于学使者补博士弟子君犹颔之化淳问得无有所痛苦否曰无已而顾化淳曰汝在吾何言君性雄爽负气屹屹不可下然中实宽厚急人而不责报又严取予有豪贵人利君故居者使苍头数辈故蹋门詈欲以为讼端时君它出而高孺人如弗闻也君归乃以实告曰彼以强来君以好往彼尚可正折也君投刺豪贵人坐上坐逆折之豪贵人面赤谢过不敢复利君居矣顾某者君及门士也为讎所困辱讎度顾慙亡能为而独惮君夜簞金求解君叱之去卒以顾白郡丞受中丞指督邑赋妄捶格诸生诸生噪而逐之中丞盛怒廷诘诸生甚厉咸披靡不敢前公挺身出言丞暴横状中丞度无可奈何则移色邑博士使扶之君伏而曰博士威何如中丞中丞不能以非义诘诸生博士乃能以非义禁诸生乎中丞为屈而止少时游吴市中道有遗金俟其主而归之其主泣谢愿以半酬君竟去弗顾尝馆于富人所而骤灾主人从焰中仓皇携金宝授君君颐指两童子置之书篋事定俾主人自取曰毋污吾手也其所行多类此君子曰陆君奇男子也使以一第假之居安则拮据而称事遭难则慷慨以明节不亦磊磊落落哉高孺人明睿女子也有乐羊梁鸿二妇风惜皆不遇耳虽然有化淳为之子而予为之志铭不可谓不遇矣君以嘉靖甲申生寿六十四孺人仅三十六四子者长即化淳娶周孺人出也次即化熙娶夏化冲娶瞿化光幼未聘陈出也女一适高明时亦孺人出也孙男二泰征嘉征俱化淳出孙女二尚幼葬在陆家湾祖莹之次盖君志也谓化淳毋以我离西江君

铭曰谷于室而归于穴合二十年而离离二十四年而复合合以兹辰其偕侍若先人以利若之子孙

弇州续稿卷一百二十

●钦定四库全书

弇州续稿卷一百二十一

（明）王世贞 撰

○文部

△墓志铭

嘉议大夫刑部左侍郎赠都察院右都御史雨亭陈公墓志铭

公讳瓚字廷裸雨亭其别号也陈之先居邑之东门里曰凤皇泾世称名族凡再徙而复故居则公之大王父甘拙翁也有子曰韶州公复尝举乡荐两令长兴大庾以韶州府倅归韶州公有两子曰封太常少卿策重庆太守谏谏为刑部郎中时赠韶州公如其官太常公娶吕恭人而生公公秀颖絶伦七岁过其外大父丽水公指月而属之俚语公应声曰大象悬中天清光照下土丽水公竒赏之谓置建安中猝何能辨十岁能属文韶州公归自郡公以其所业呈輒大喜一日方呈所业而有报廛屋圯者公如弗闻也韶州公抚公首曰廛圯而吾堂不圯也儿乃栋梁矣及韶州公疾革诸孙皆有遗物独不遗公曰无可以当汝者所遗一念而已公既长疎矐目风神秀爽骼骨遒劲十七为邑诸生继其仲父太守公起俊声是时少保严文靖公尚书瞿文懿公前公为诸生皆折年而与公游每读公文輒叹曰后出之彦也公读书湖莊与故陈中丞先生察邻陈先生以乙夜出过公庄闻书声而异之使人具食遗公公以其长者也对使者噉之尽陈公所食故恶草具益异公曰是宦家儿乃能甘我食耶为诸生可十载而荐应天又十载而成进士出为永丰令永丰故岩邑也而素繁不易理且谓公不久离书生意少之羣吏争抱滞案来请决公不停手而办叱之曰归尔曹以序来毋数数溷乃公吏吐舌下邑故有五乡皆百里而遥有讼者公第令其里之长呼与偕来愿息则听之以故胥吏不下乡两造既具词组立折狱无宿囚肆鲜接饗邑门之内供事者有菜色相率引病辞去公晓之曰而曹毋衣食我能令而曹吏保一簿尉胥不终论戍及鬼薪也咸具晓所谓叩首请留五乡岁入邑供应金钱不訾公为裁十之九曰欲供令令不受供以供上官令不敢用供损上官名部民刘某者富而吝公亦知之其市舍居停人杀人缘以羣指喉刘公立辩释之曰吾知汝吝亦知汝不杀人广闽流贼害兵使汪公一中势张甚业且犯永丰公檄五乡兵分徼之而伏壮士数里外以待贼酋称二大王者恃勇介而先驰遇伏发授首余众溃掠五乡复为乡兵所破遂絶界遁走峒豪梁汝元伪讲学聚徒众将作乱公授筴捕之汝元思而逃为峡江逻所获余党俱就擒乡人咸举手加额曰微陈公谁脱吾虎口也一日公入谒兵使方诘盗不服见公而喜即属之曰得陈永丰盗不冤矣公出呼其证盗者凡数曹后先试之辞不尽一最后得一人稍讷口公出不意威之曰谁令汝曹诬盗急为我言不者折而脛矣讷者叩头曰中盗者衔之以贿属故也公立出盗而当中盗与证盗者于理兵使避席起揖公曰使我不作冬烘监司者吾子力也段御史墨而猥责邑令月输赎缓且曰以多寡为上下考公不令输赎曰令已安下考矣御史无如之何吉安黄守良二千石也而不能当台意尝密问公守不称状公从容言守之贤渤海颍川不过也礼节小阔畧耳遂解守竟得荐后知之谢公曰吾闻守庇令不闻令乃庇守尝入覲而分宜相之子方苛责守令赂公袖手而已公不粟于永丰太常公岁载数十斛为日廩尝以土瓜奉太常

太常谓瓜得无苦耶既而曰瓜殊甘也盖阴以况公云以治行第一征拜刑科给事中用永丰令最封太常如其官复论令时剿寇功赐白金文绮公念海内方虚耗而供亿日烦士习茅靡后先所上疏如杜奔竞计吏治劝良牧溥蠲恤禁苛政结保伍益城戍往往报可再迁为左给事中察视京营给事御史体至贵重每按行诸营即营帅侍立噤不敢吐一语公独曰帅吏士所瞻听也奈何故轻折之且彼噤我何以悉其能否为设坐从容询访军事咸自喜愿为给事用例察视京营者以三年代始行举刺往往不得代去举刺几废公疏请岁一代举刺时上将领知所感畏矣公疏又有选正兵以备战守增余兵以实行伍及他议草料清月粮别桩册明查参皆着为令甲公又论乱翰林二巨僚为故权相严党去之瞿文懿公戏谓公吾词林故不落人喙奈何轻相齟齬公曰重词林是以去其相点者瞿公惛然曰善上性严多忤有所去中外臣往往不蔽法而权相又以其私佐之凡三十年多老岩穴而死者御史凌儒请收录之上恚杖凌君于朝堂褫为民公时时扼腕谓时非唐虞诘可称野无遗贤而会京察公以文选郎墨而幸免以一司封郎代之谪大不平即上疏请黜遗奸以重铨司则追论文选郎也采遗贤以充器使荐故臣某某等上恚甚谓当复生一凌御史亦杖之六十褫为民公几绝而苏然神色安闲若未受杖者校卒咸咋指称鐵汉鐵汉云重庆公于公虽季父顾互为知己若肺腑然时以里居闻公被杖惊而呕血数升死公归与太常公相对而以生还慰退而哭重庆公至毁曰吾不意季父之成死别也杜门久之乃奉太常公轻舫笋舆纵游虞山尚湖间已稍游至虎丘上方楞伽天池玄墓诸山已又游武林泛西湖穷三竺两高灵隐石屋之胜弥月不倦闲披史籍至会心者手录之唐以后则置弗录曰时非乏丘壑顾游者弗畅其趣耳庄皇帝即位首起公吏科公至疏上六事其一曰通上下之交二曰纳匡救之忠三曰黜近习之诱四曰正敷奏之仪五曰申劝戒之典六曰核循良之绩语语剴切上悉嘉纳之而所谓申劝戒者欲赐故杨兵部继盛罗中允洪先谥而正督抚按臣杨顺路楷杀沈炼以媚相嵩罪天下传诵称快上将视太学公谓祭酒当坐讲于儒者至荣而其人不能去之而别用耆硕得学士赵文肃公贞吉以代大相徐文贞公阶有重望亚相高公拱与相恶而恃上东宫旧喉御史齐康甚口诋徐公以自快公恚曰是不有天也极论高公宜罢御史宜远谪而台省翕然继公后皆得如公指亡何迁大常少卿属卿缺公遂署寺事每当御前奉祀事进止雍容甚都上目属之公又能裁量诸祀之费使奸吏无所从侵牟改商人之输课属之博士博士独科甲选也黄羽不得恣苛索至今便之时高公因縁中涓起兼掌吏部故为柔语以缓诸尝论劾者或信之公曰是鸷鸟将搏而戢羽也遂移病归高公既得志挟诏贄以察台琐诸寮无一能免于鄙而公时从在告中左降为洛川丞不赴高公既以罪免而江陵公继之江陵故悉诸公冤然欲挟以威众称例不肯为洗而公又坐故尝议大阅事相忤乃笑曰此岂用我时耶因绝口不复挂时事而奉太常公修旧游甚适葛巾野服澹如也会太常公以考寿终公业踰耳顺犹蒸蒸孺慕无异丧吕恭人时太常公暮年三举子三育皆以贻公公竭赀力而为之授室与产已又丧其配缪恭人公自是

别筑舍于墟墓之间名之曰莲花庵朝暮净食徃徃暝坐移晷萧然独诣世味无所干至江陵公物故国是始见伸而公首补会稽丞寻改漳郡司理再迁南京仪部郎中公始为之一出亡何超为南通政叅议俄兼署光禄寺篆光禄在内廷比舍中贵人侵其地而墻之公示以法立返地诸所入物为之画一吏胥毋得干没复召为太常少卿未至转为通政司右通政遂转左通政主敷奏其叅议缺于庶僚中选大音声人补之以次递迁公疏谢不能请改他职自效铨部谓公以望迁非由选进也听勿敷奏自是着为令甲故事所奏即御前取一二充数而已公持议谓若此文具何纳言天子之喉舌也必军国大务及四方灾异乃以闻识者韪之转南京太常寺卿之任仅一月召为都察院左副都御史甫入而属大计羣吏公在南京故与太宰丘公樾隲核监司守令之贤否书之册而隐之至是佐其长行简斥靡所不啻明年转刑部右侍郎以年至乞休不允寻转左公前后所与其寮长舒公化李公世逵耿公定向皆天下所谓长者羹和无间为一时盛五载大讞狱多所平反有羊酒赐明年病噎久之乃卒公故坚强无疾生平饶济胜之具探幽角竒足不告疲不多食酒而与亲知谈燕恒至丙夜不倦人谓公不百岁不止也而止七十有一盖举朝无不惋惜讷闻于乡乡之人无不咨嗟涕洟者亦可以观公矣公少读书虞山之维摩寺寺閭寂多鬼物公尝夜步中庭有大声发于树然若有所怵者公徐曰去之吾不汝窘也声遂絶公亦不他徙其令永丰时尝访故罗文庄公洪先于石莲夜返林莽中光灼烁迫而视之三虎也其光自目从者皆魄夺公夷然任之虎踉跄避去为给事而得廷杖创甚夜梦神金人也而玄其服相对久之悸而醒犹彷彿在目创自是愈识者占公必为当世名臣且寿终然公为诸生则梦一神人语之曰君之功名始于西又梦一神人语之曰君之功名终于西又梦一吏导公至大堂皇而呼曰与咎繇并既病革乃自解曰始于西者永丰则江西管也终于西者司寇则西省也与咎繇并者咎繇士师吾为之僚也止矣吾其逝矣传有之清明在躬志气如神其公之谓乎哉公性伉直貌棱棱严冷若不易亲与语稍间温温如也小欲狎以非义又勃然见乎色矣少则有志于圣贤之道及其在永丰与故聂贞襄公豹及罗文恭公游二公皆爱重公相与讲明良久之学而公之所自得深矣晚节颇好葱岭之教即辨才耆宿与公谈者咸披靡称服然公第用以摄心曰福田利益非吾事也公所娶即繆恭人有妇德先十年卒再迁葬于邵家湾祖莹之傍今赵宗伯用贤志之子一禹谟太学生贤而有文娶秦继娶刘女二长适沈文璧次适孙延嘉孙女一适蒋国珮公之卒也上采礼官言赐祭及葬赠都察院右都御史尊名之典盖有待云禹谟将启繆恭人之兆而以公合手次其事行累万言而问志铭于世贞曰当肃皇帝末天下之贤才废阨而不为县官用者不可胜数矣公之欲亟収之盖悯之也而首蹈其祸凡再蹶再起中外大小十九官或出或隐或拜或不拜要之在朝之日不能十三及今上之大用之而公老不待矣不然以公之材其名位树立宁仅仅若是哉则公之所悯于废阨者盖自悯也公虽宦不甚久然再据言路司风纪叅大政建白施行有当于人国不浅浅也其佐司寇日云暮矣有嬖戚之丧吊者麇至而独不徃岂必较失得权轻

重而后拒之其耿介发于天性坚于迟暮固然也余素辱公友然不敢以友故私公铭曰

水有百折而必趋东金有百炼其光烛空正气所锺乃产陈公邁则蹶起道无污隆惟孝与廉不懈以终奉此完身归于幽宫弥弥封云矫矫繚虹铭公之藏以偕无穷

中宪大夫陝西按察司提督学校按察副使蘅斋潘公墓志铭

公潘姓讳允哲字伯明别号蘅渚已而更曰蘅斋其先自毘陵徙而上海为上海人大王父庆王父奎俱以皇考都察院左都御史恩贵赠如其官都御史归而进阶荣禄大夫卒而赠太子少保谥恭定文学政行为嘉隆间名臣享有上寿天下称之公以冢嫡繇诸生荫国子寻以三礼登乡荐第五明年成进士授河南新蔡知县调繁得浙之义乌征入为南京浙江道监察御史出知黄州府擢山东按察副使丁母曹夫人艰归服除改陝西提调学校以恭定公疾乞致仕道闻丧归服除久之以疾卒公之生也恭定公时为祁州守曹夫人夜梦神人掖二童子手丹桂如之而以语夫人曰大夫有功德于祁民甚深帝嘉之用锡二贤子以昌大其门寤而产公又二年而右方伯允端生公少则严重不轻笑言所从羣儿无敢以狎进者稍长益恭谨动自为矩而中磊落抱巨人志其治三礼髣髴高堂后苍属文以典则着声诸生执贄请益者相踵而久试辄不利恭定公宦游于外以家秉付公公从容持之出纳井井宗戚乡党靡间言然公不以是妨素业其业益精遂连第既负高科名又公卿子谓必得中秘选而公杜门自守泊如也令新蔡时属淮汝骤溢漂没居人庐舍公为之缓赋宽刑申饬保甲之禁请谷于上官以食其饿者流徙尽复萑苻偃然蔡以大治铨府谓此小邑何足烦牛刀而义乌为浙雄邑又多矿警遂移公至以廉遏其欲以简息其烦以诚化其囂毋不率者而矿警亦逆自戢罔敢恣睢公虽宽然长者然于持法不少挠上海之故知时为簿有所犯公不之假以故寮佐皆廩廩奉三尺吏胥不寒而栗窃指相目曰异日鐵面御史也及其去为御史邑民填道追哭相与畫像祠之御史持法侃侃其鄉里戚执毋敢以私见者被命按上江风采大振黄绶以下多解绶自遁去斧绣所抵巨猾敛足江波不兴秩垂满始得守黄黄江表最剧郡也地冲而俗囂公一切以简静持之过舟旁午于逢迎未尝废然所馈不过算器食而已缙绅有居间者不尽应然必以诚语之退而服公长者居恒不设卫从单赤之情俄顷必达讼庭肃然属邑当城城公亲为之经理费减而工速诸长吏自励为清白以承公德意盗贼衰止政化大行凡再入棘所得多士其持山东宪则恭定公蹇帷地也而方伯君亦尝莅止焉公至士民争指谓曰此大冯君也耶公于职专邮传平亭有法上下称之已而太夫人之讣闻公即日被髮徒步号哭奔丧中道殒絕者数四寮属追趋及之咸咨叹曰真孝廉也台首有荐剡首以是称焉公归而念太夫人不及诀痛不欲生然以惧伤恭定公意强自力庀丧事既服除曰我公老矣吾岂可再误耶恭定公闻而恚曰若乃死我我日甘而仲氏

养匕箸益进而不以时树功名而恋恋儿女态耶公乃强行至部得视关中学公饰其朴而汰其浮提衡树表士习几变至于按部校秩无间险阻昕暮劳悴成疾犹强自力顾时时念恭定公不置而会其手书字画时谬惊曰顿衰乃尔哉吾尚可以仕乎移文两台弃其官归中道闻讣公驰归拊棺而恸曰已矣乃复背公如背太夫人何以生为遂闭口不纳勺水过三日方伯君手糜饮而泣进之曰有先公之大事在公为之勉纳匙匕自是墨而啜泣者三年于是恭定公之典备矣而公犹邑邑不解颜若有失者既服除阖门养重非公事不入官府间以经籍自宽所过从唯二父及方伯君而已而台之积荐公之五六铨部方悬阙以拟公而公竟不待以卒呜呼惜哉余以姻娅故托从恭定公还往又辱与公游见公貌温温然言呐呐不出口进止尺寸无失退而未尝不自咎其易也妄谓恭定公若万石君奋公若郎中令建方伯君若牧丘侯庆而政术文彩皆过之公之名位小逊于恭定公者以晚达而中逝不克尽展故耳不然而其器业显施胡以异也方伯君之所具状又述公尝割腴畝以广青浦之黉舍通家子市田于他姓者为之赎而归之其它郭恤姻族推食贖丧不可屈指数以故比闾之内无饥色而产日挫公卒后余往吊之见其乡之绅衿毋不嗟泣曰何以典刑我也里中人毋不顿足曰何以衣食我也征其丧丧事或不给然则方伯君之状惇史也公卒以万历己丑距其生嘉靖甲申春秋六十有六元配王光州倅相尧女有妇德累赠恭人继项光禄卿锡女累封亦恭人子四云枢袭公荫为官生娶杨宪副道亨女次云柯太学生出后季父都事君娶顾光禄监事从周女皆侧室张出次云楚聘姚叅政体信女项恭人出次云英侍媵陆出甫睟而方伯君养之女一适余子官生士驊亦项恭人出孙女一尚幼所著述诗文若干卷义乌县志十卷黄州郡志七卷驿传规则一卷

铭曰潘之先自荣阳至晋而以文苑称德则弗扬及明海东寢繁寢昌恭定辟之元气洋洋中宪衍之春日载阳用则未究根乃弗戕尔安尔藏以佑尔后于无疆

赠文林郎云南临安府推官丰溪甘君墓志铭

甘于蜀内江为着姓至少保大司空公如霖而鼎贵以一品秩赠三代而少保有仲氏曰嵩令公化霖嵩令公有二子伯曰茹士为山东按察副使当守刑部尚书郎时复以其官赠嵩令公仲曰丰溪君半为诸生不第以卒按察公虽贵然竟无子而丰溪君有六子三女诸孙男女中外十余人后以子今户部郎士元奏临安司理最丰溪君赠如其官而第五子舜元出后于按察公以诸生廩学宫今甘之在内江者独丰溪君后最蕃大较为德之庆有及身者有不于身而于子孙者固难一一论也丰溪君生三岁而母刘安人见背嵩令公自抚之与同卧起六七岁时闻人歌古诗辄诵积成帙稍长通经术能属文而尤工为俚语若笺表启札见者以为不减长庆西昆十四补博士弟子员按察公长

于君六岁前为博士家言有名君骤起而与之齐为人丰下炯目神采奕奕映带人间出雁行按察公咸指目曰此甘氏双璧也耶未几按察公荐于乡遂荐于公交车射策高第君默默不得志而嵩令公弃其官归王母赵太夫人尚无他诸子以次第共食亡论少保公诸仲季咸有官禄饶储蓄争进鲜腴而嵩令公每当上食忽忽计无所出君为百方致之即损私橐弗恤也既修而进太孺人即嵩令公亦甘匕箸矣而君自裁量过当菲衣恶食非特欲宽嵩令公之养亦其天性然也久之嵩令公属疾革而按察公远宦燕中独君待会当应省试嵩令公促之行君跪而请曰即试得之儿不忍以一日易也已而公疾转甚君蓬垢而奉医药药必先尝至针灸亦必身试之祈吁转颡请代乃嵩令公稍稍起色矣而君病惫卧公抚而叹曰儿真孝子也以身代我矣久之嵩令公竟病卒君哀痛几灭性棺殓必敦以待按察公归朝夕擗踊三载如一日也君移所以事嵩令公者事按察公按察公亦绝友爱之君以多子故不能无徙箸然按察公有赢禄必以付君君有所拓南畝必先按察公而后已君于书少所不读然独深于太史公而其于制科义亦时时有古风以故不能中时趣最后乃为学使者今大宗伯姜先生寶所赏识大司空曾公省吾宦其地试而奇之咸谓君国士也及入棘有关中人得其卷不能读曰是何物语姜先生为之咨嗟累日自是君邑邑不乐成疾而益自励读不辍士元弱冠矣君与之先后廩学宫而士元以拔擢得礼部贡君喜谓曰而翁隄四十而髮苍苍而齿摇摇夫人寿几何而欲俟河之清若勉之然竟以前疾寢剧至不起春秋仅四十有四始甘以少保公贵甚而子姓日繁其汰者不能无鲜衣怒马之累君亲为少保犹子按察弟独敝衣

■ 〈跣敝〉 徒步衢市也未尝以得意加于人所接见无饰貌谄谀恭上慈下温温如也咸目之曰此孝友甘生云既闻讣巷聚嗟曰孝友甘生死矣比葬拊棺而恸者若干人临穴而泣者若干人按察公志其碣而少宗伯李公长春表其墓称实录矣然未若天子之玺书所谓敦伦树义绩学娴文六籍搴芳一经训后之美而信也呜呼君可以瞑矣君字丽甫丰溪其别号也娶郭氏有内德亦以士元贵封太孺人六子者长即户部郎士元娶周封孺人允元娶黄调元娶赵赞元娶钱舜元即所后按察公者也娶范宗元娶余三女者亨适吴九秋和适叶廷椿俱诸生诏适李属春孙男五星卿邑诸生次懋卿鼎卿青年圆寿孙女七人墓在邑西之海棠庄是志也征之户部郎状状又云君书法得之急就章为歌诗有大厯风当不谬

铭曰生而蹇歿而显子孙绳绳德乃征以为不信视吾铭

明处士闻爱亭君暨配姚合葬志铭

吾州之人有好行其德者曰闻君闻之自署曰爱亭縁其父南亭君溱也于是乡人人称闻爱亭君其当推择乡饮祭酒者亦必曰闻爱亭君而最后有张守者居恒以贫低

昂其士民而独雅知君为榜其门曰一乡善士又为上书台赐之冠带至乡饮延之宾席君虽逡巡弗就而众皆曰此非特闻君当也不自意守乃能若是守是举亦当也闻君家太仓新安之六尺里去吾旧居数里而近吾以是习知之新安故昆山割而君之产半犹在昆山南亭君谓吾一移足昆山产立废矣乃身与其贰留治昆山而俾君居新安母顾依之君少尝读书学问为文章试诸生间矣而夺于家不就颇用计然之策而宽然行之南畝益拓君日构修隳以共二尊人身往来其间盖朔以南亭君而望以母顾也各欣然忘睽矣南亭君年七十而病颇剧君仓皇驰候之奉归新安中道卒或曰君之居创居也而以尸入不利主者君哭而唾曰吾不能下从吾父何论不利卒以尸入殡于堂戚易殉礼及母顾以令终而毁有加也孝声隆隆然起矣仲父毅斋君无子而富有弟某出后之南亭君当授产君而不能无昵某也或谓君法云何既以出后人安得复称子而受父产君不听曰法限取者不限予者吾知有弟与吾父母心而已遂中分其产以予弟弟愧辞君乃稍裁其羨畝五百为义庄以贍族之贫者而至南亭君夫妇物丧葬之费不费君一力任之不以溷弟曰若自有父母吾不而累也有女弟适龚志重而寡亡何亦死独遗孤在君取而子之使其子大伦下之所以教养备至为授室分橐如大伦其孤既登第即复龚姓而名曰闻道以存君之旧而已或谓君彼何以不请命君怡然曰固吾命也盖君两受役于昆山太仓皆繁重家为窘有畫策于君者谓縁闻道当得蠲君乃毅然曰吾不从闻道蠲也吾而蠲谁当代者役如故及闻道卒于东阳令亡子君复哀之如子抚其嫠有加君又于五服之内外亲族皆有所厚施无不濡润者于比閭疇畝之夫皆有所纪施无不沾及者义声复隆隆起矣君美须髯性宽和无疾遽之色尝与客饮甚欢而卒有讼事其偶大豪也家人耳语之如弗闻竟饮质明从容步入城与偕两造豪大屈髡铃伏谒请罪君延之坐饮更厚贍之豪退自责数曰吾乃轻犯大人吾死矣君之自力为长者久而人益信之其业虽以好施予及中岛寇中挫然大伦已任家君听而息之稍稍复振君乃曰可以休矣毋复以事溷我益蒔花竹种秫具醇酿又善谈论读书能为诗歌及傍猎方术堪輿家言客至必谈谈久饮必取畅而会其配姚孺人卒君多忽忽不乐久之会得东阳令讷益不乐遂感痰疾复久之竟不起姚孺人者昆山着姓也父曰嵩孺人生而端重闲礼范十七归君舅南亭君既留昆山而姑竟依孺人多疾病孺人旦夕扶侍温羹汤药之类必谨必愍性俭勤善御下而能不靳施予其待姚之族姓尤有恩凡闻君之得成其孝义长者声半孺人力也君以万历己酉卒寿六十八孺人前二岁为癸未卒寿六十三丈夫子一即大伦自州庠以例晋太学娶顾氏王府典膳某女女三适顾应元周维师龚道中孙女一许聘马存仁合葬大龙泾之阳闻之先自江阴始也有添八公者从宋高宗南渡家焉七传而思悟公觉徙昆山之新安今所称六尺里者也曰闻故文姓元初讳信公之祸更为文大伦之状云尔

铭曰孝义长者归之隐君在邦必闻在家必闻厥配佐之克俭克勤大伦云云余亦

云云

弇州续稿卷一百二十一

●钦定四库全书

弇州续稿卷一百二十二

（明）王世贞 撰

○文部

△墓志铭

静逸高君墓志铭

无锡有高子云从者以万历壬午与吾儿士骥偕荐于乡自是吾仲儿驥季儿骏咸挟经与高子游而至今年巳丑复与儿骥偕荐公交车六月高子念其所后父静逸君老请急归省甫报许即发而君竟以其月中臂疽三日而革不待矣云从伤其归之不能及君也痛哭至委顿曰天乎何夺吾父之亟也往者吾父之抚不孝孤也即小有树立辄自喜吾无子而有子矣不孝孤幸以一第酬吾父然未及效升斗之养而吾父竟不待也是吾父有子而无子也已矣吾父有隐德而弗昭将与闾巷之子同施于腐草而念能不腐之者独执事之文在嗟夫余安能不腐君然以陈子之笃孝与通家之世契深也悯而许之志铭按状君讳校字国明静逸其别号也先世为无锡人居青城乡有孟永者为福州太守张翁赘徙于城东南隅传子如圭如圭传子翼至雪楼公适以然诺重里中娶于浦举黄岩令君某又十八年而始举君左师之爱可知也君少而以警颖称受令君读书能属文矣而会令君举应天荐雪楼公睨而曰若非吾所得有也吾老矣不能当家秉顾谓君不有处者谁与共出者君始夺而受治生无禄雪楼公即世君相令君治丧礼戚与易称自是令君复上公交车矣独留君侍浦媪媪治内君治外斩斩有成绪矣而令君得安意宦游其令黄岩也即塩米琐悉皆资之家君从容应之不乏会令君以倭破剽黄岩令君乃弃其官归凡二载浦媪即世君复佐令君治丧礼毁有加媪之垂属纊也执令君手而泣曰若故而弟师也必子蓄之复语君父事而兄咸顿首受命令君于君有师道若父矣然不以尊故胜亲亲君故弟也而若子不以亲故胜尊尊家庭之间秩如也复忻忻如也盖未尝顷刻而离左右矣令君之安之甚于安其子也时令君有一子二孙而君年四

十七而无子令君谓弟奈何未有子吾虽一子今幸举二孙其少者仅弥月可抱而抚也君曰幸甚所抱即云从与配某孺人旦夕更鞠之备至及小长英颖见头角寔之家塾延明师诲之居恒谓吾不敢望儿富贵得不堕吾兄书脉足矣云从夜读书恒自甲至丙君闻之辄呼小竖温茗携果饵以往或身起慰劳之曰毋过疲且休矣云从既能属文文成辄以上令君令君喜则亦喜曰儿果可望也令君既寿考亡恙晚始膺疾至革君于祷祈医药无所不至治丧齐而疑于斩则哀之过也于是云从文成复上君君曰去之有而师在吾舍吾兄何衷矣云从试诸生不偶难于见君君趣入呼酒为慰曰数也且患儿不读不患儿不偶云从为诸生非久荐于乡君顾愀然不怡云从跪问曰大人胡弗怡也君曰吾忧尔之从缙绅速也尔所知者博士言耳于世故未数数也勉之间呼衫帽入公府君辄惊曰得无从诸先辈往居间乎毋以一时羸而弃若平生云从谢不敢乃已尝衣新衣而见君君曰吾未办汝何自得之盖君故恒布素而已弗三泔弗易食不再肉故用恒饶而益自力为俭客或讥君家幸饶胡自苦乃尔君谢曰此吾分也吾不敢妄出是以不烦妄入盖君治生虽不能尽废什一然于非义避之恒若染有密戚病且死橐千金授君君骇曰生平所见不十金何千金也力辞之有贾人以他物质子钱者既去而遗美珠数百颗君囊而封贮之明年贾来赎他物君徐曰当质物时亦有所失乎贾蹙额曰所失珠耳然不记何所君即举还之贾媿谢即选尤美者百颗以酬固谢弗纳其耿介类如此家有一堂三世矣瘠而陋云从请新之君泫然曰此而祖所安也而祖自黄岩归凡二十四载志不在一椽唯课子孙灌花木以一卷偃息其间而已吾安敢加而祖矧大王父行云从唯唯谢不及其御臧获弗责小过顾独严检饬尝闻巷中鬨声即惊问曰舍儿得无与人鬨耶恒谓云从忍故是佳事吾而忍彼当自愧悔即不愧悔不深吾忤也君足迹不入县门居恒鲜出后或一携云从之佳山水里人争前目之指相语曰幸得识高君高君善人也君卒以己丑距其生丙子得寿七十四配即朱孺人家女也柔婉明皙能先君之意而成之君所以孝事其二尊人敬共兄嫂接姻族理家秉无不与孺人共既无子则饰媵侍而荐君君既抚云从谓孺人吾不他谋子矣故多羸疾幸宽我孺人即为置外榻其媵侍亦多却远以故君老而健胜无恙与孺人备饷糈之礼者五十余年孺人前君六年卒子即云从名攀龙娶王氏女一适杨友孙男三世儒世学世经世学聘太学张某女余未聘孙女一许字浦胤麟葬在南山黄家湾祖莹之次启朱孺人之兆而合焉礼也孺人贤妇人也于法得附书

铭曰子而孝弟而悌慈于厥嗣厥嗣亦克济美翠如者贤喆之藏而藹如者太和至顺之理夫人子自有美子重余铭之是曰不死

新安程君墓志铭

余友嘉定唐子时升工古文辞不妄许可顾独与书生新安程嘉燧善因而知其父布衣君布衣君贾于嘉定垂三十年日闭户读书未尝饰冠剑奉筐筥以游大人而成其名顾独嗜余文章时时语唐子身居约安得一日从弇州先生游即死不恨然未几死矣嘉燧奉其父意乞事状于唐子而介唐子谒余于金陵来请志铭曰必公文而后父可安地下也唐子复为之请甚笃余读其文信许之按状程之先曰伯休父至呉而将军普居建康及晋而将军元谭徙新安后十三世而为总管忠壮公灵洗五十二世而为处士泰兴泰兴生元淑生溶则君之父也娶于闵生君甫三岁而失母父自哺之以衍寿为君小名甫八岁而父挟其季转货江淮间溺死豫章季不能求其父尸而脱身归时君之大王父老矣王父复以病废季遂不复护视君而外王母尚在心怜君君乃依之时诸舅皆博学能文词君从之受诗复受易因转浹诸史诸舅谓衍寿而小名也为易一嘉名君泫然曰先人所命也礼孤子不更名敢辞诸舅悲其意弗易又为君营地以葬少孤之母然君既不能自衣食而舅家贫复不给外王父之友信州郑公病免家居郑公大官有气力舅乃携君以从郑公郑公一见君而奇之时君又能直外王父之先墓田诸舅皆服郑公又为之游扬声称季父闻而内愧召还君以三十金付之俾小贾于外贩钱易贵展转数年积子钱三倍于母归而奉之季父季父颔之而已亡一语相劳苦时君以妻江氏矣徒手入室相对邑邑不敢言子钱事而君少恒饥从姑之归方者哀而时时食之君自淮归道遇姑之子属君曰妇在家即缓急从弟取偿也君归而方妇偶有急从君征三百钱不能应请之季父乃大恚曰吾安所得钱君之他客所自贷以应方妇因涕泣自伤吾数年而为季父拮据营子钱若三百者不啻千矣岂不能以半自匿而徒手归舍乃不使我以三百钱竟然诺哉谊不可留矣念姑之归李比部君者在嘉定走往谒之比部名能知人与君一见语合即挥数千金与君听其所为君故游四方能观万货之情其所转毂若流水李君之入滋倍乃歳以一镒金奉君得以为资盖数年而化居焉君之配江既前卒李君有从姑归于张其女称淑美李君使续君室君虽以心计居市廛然雅质相当伉直敦气谊重然诺待人融融如也顾岸然不为非礼屈家既以饶裕于自用能节约日费不过百钱而岁所义散恒至三百金既怀外王父家恩欲报之而诸舅前已物故遗子孙零落殆尽乃行求得仲之子为授室买田共家祀而伯舅久在浅土为之营垄而归其柩曰聊以报其葬吾母也念父尸湮摇无所于葬终其身戚戚若有深忧者然不敢以讎其季父当居贫时于出纳犹自力为精辨不苟取尝得遗金而亡其主故宣之人俟其主至而归之不问报客有贷君百金者不能偿乃囊其珠宝以示君冀小得昂直不取并券付之曰吾向者欲以济若急不谓更成若急也他黠客闻之亦阳为贷君金者君察其有负色不许乡人人谓程君非独仁也而亦且智君固时时之故里扫治先垄循行母家旧迹荡为兔葵燕麦之地凄然不乐因贻书戒二子以孝友俭勤毋喻于利且曰明年吾更游江淮南入剡纵观山水之胜王逸少云我卒当以乐死吾且死矣时君方健饭亡恙闻者窃恠之明年为万厯戊子忽啞痛不能饭就医于金山旬日不效遽归曰我何须饭也与所善

客登高眺远不倦以至革犹裹帻坐与客诀客雪涕不能仰视君笑谈自如曰诸君为我雪涕良厚虽然亦恒事也何足烦君悲恹然而逝得寿五十有九君始配江前卒既配张亦前卒张举子即嘉燧博学能文辞娶于闵最后配孙举一子嘉然聘朱女一适闵自立君之不忘闵若此诸孙男女各一人嗟乎以唐子所称程君行谊卓荦若此吾求之缙绅衿裾中未尽见也吾安敢以轻目市廛

铭曰诸苦之备历而甘始回玉女于小成哉贾而文是好以余铭之厥好乃效

程处士惟清墓志铭

歙俗以姓相甲乙而程与汪最为甲程之后无匪自忠壮公灵洗者忠壮公居邑之黄墩至宋宣议公居休徙栗口凡十余传而为为节为节生敬音敬音生忠烈则处士之父也处士讳洁惟清其字率口之水流而汇其里居因自号曰练潭父有四子处士居叔其伯仲皆以贾起家矣而处士少敏尝从其族博士先生受易垂就父欲夺之贾曰吾非不爱儒第食指众胡不佐而兄谋什一之息以宽我乎季长或可儒也于是始从其兄鹽盐淮扬间已转子母钱于句曲中山往返南北甫十年而贾成其奇羨过于初数次处士故善心计能因俗为变与时消息不强力纖俭橐无未名之物皆与兄共之以归于父甘脆时进共养不倦及父母之见背与兄弟之无禄则哀毁垂灭附身附棺必极恻诚抚字诸孤从受师授室为其子先宽仁喜施意豁如也内外五族少不沾润者所解纷判疑如响立应族故有世祠以不及祠支祖供义公特建祠祠之又大缮治宋乡贡士一德公墓咸割其橐弗吝族人义之请立碑纪处士名不许曰吾故不为名也尝扁其居堂修齐谓庶人之职知修身齐家而已时三子皆读书有声顾而谓曰未竟之志则而曹勉之时岁荐饥大出困廩以赡窶者家人数斃鲜辄挥去弗御曰吾不忍以匕箸余而当数窶人命处士素强无疾中年所经悼亡抚存非一以是寢削损得疾至革行视绞紛衾冒之具过饬正色而语三子汰哉尔不闻曾子之训乎尔之大王父不能得之于尔王父王父不能得之于我兄弟而我乃独安之也客有进曰礼不云乎有其时有其财此君之子责也处士微颌之而已三子哭请遗言处士曰孝友勤俭铭诸心可也语毕而绝时万厯之戊子十二月也距其生嘉靖辛卯春秋五十有八配项有妇德三子皆太学生元正妇黄继吴元衡妇戴元仁聘吴孙男三人女一人其状自京兆司谕吴瑞穀瑞穀信而文与余善而来乞辞者元正又彬彬质文人也故为志而铭之

铭曰称处士者何行士也士而隐于贾胡贾例也太史公云身有处士之谊而取给焉噫嘻宁末富之为累

冠带儒士盛少和先生墓志铭

君氏盛讳应宗字斯因别号曰少和吴越之人疾起于君者咸知有盛少和先生而不能举其名与字余故为之志而称盛少和先生盛之先世有闻人至宋叅知政事度而大显贵自后十七世皆得官爵虽起于儒而间习医至十八世而有御医启东者遂以医擅名历侍太宗仁宣三朝直御药房署领南太医院终始不能踰八品而赐诗赐金帛有九列所不敢望者启东讳寅读书能诗负节槩其卒也诸碑铭表传哀挽之类倾馆阁举丈夫子十一人中有成进士者第四子某传子某某传子某传子某即公之父也盖代以医名而不废儒至君而诸从中有御史大夫应期郡太守应阳遂益称甲族冠吴中矣君之父举大夫子五而君居其仲伯曰应陵多通医家言不下君而不能自振其声然前于君十四年生而后君一年卒得寿九十一父之歿也伯治丧葬大事徙外箸而君奉其母姜与其叔仲辈仍故居家益贫羣庶不能亡间言君乃损故居授之而脱身与其母妻依御史大夫之别馆胥篋得轩岐鹊意之书尽读之术犹未大行凡三徙而始依其妻之父杜山先生杜先生国医也君与之下上徃复尽得其秘而又能时以其意错竒正而用之遂所至立效名遂出杜先生上时文待诏征仲感竒疾几不可起君从杜先生治为处方出其意表待诏乃起谢君曰吾頼君再生御医翁者其有后乎王叅议庭陆少卿斯道先后感湿痹甚剧羣医争治其标君持不可曰此虚寒也以温补剂投之而愈吴叅议子孝之妇猝得疾剧将问木君诊之曰此痰滞中焦气不得升降耳毋忧也治以倡导之剂一服而苏以至愈查方伯应兆与子尚书郎懋光前后患痰火而危君咸为治之无恙感君而友之君游其父子间如骨肉盘门之贫士沈者其孙尚幼得疾羣医争药之不效君偶过见之谓沈曰公孙几误死为处方服之愈沈乃属君且为我诊脉君退而密语其子曰而父六脉俱无根明岁入夏不治矣至期死徽富商无子置一妾爱之甚冀其生子而感呕血脾泄二症礼君至其家为从容调摄将半岁而愈君谓商曰吾非独令若宠起也又能令若宠有子明年其期也至明年果得子余谢郟镇归间一过吴闾君以五鼓访余舟而诊脉语余曰公六脉甚平而调此寿征也或不能御内耳余曰时时有之曰然则我为公壮之乎余谢曰不愿也明年从晁阳子于直塘而痞甚危久之良已即病秘结强之而通右腹忽剧痛冲上至胷亟延君而君有他故迟迟来君来则以他医药痛半已矣而每夜眠耳若闻春杵者如隔墙君以药悉已余痛而出五红丸如粒使将寝以一杯酒吞之其夕则声稍远而微次夕吞之则又远而微丸与声俱尽余乃始竒君关中李中丞自浙请告归过郡延君谓曰病中满恶食水火俱不利吾其殆乎羣医不知所措君既诊公脉归而谓其子之楫曰脉洪大于冬令不宜若其感自夏则一暑症耳治之何难询其病果得暑而大吐且泻君以六一散加少辰砂丸二服而水火利继以六和汤配香薷饮不数服病尽除吴江令徐君得竒症且革君药之而已以诗币鹤鹿酬君李公今为大司寇而徐君为御史李宪使饬兵于吾州而妇病君药之而已再作再药良已时君已久见旌于

两台予冠带而每入谒则民其中服李公后知之每谓余盛老非独其术良也其人亦长者余少女归袁曼容踰年而病壮热昼夜不解面赤嗽痰又苦脾弱有邵某者亦名医也谓大虚宜用参芪若子河车补君诊之曰是不受补补辄死以意剂药数十服而疾大损君又诊之曰虽病当得子女妊身举一男其又明年复病而君不在矣乃死吾弟之爱女归杨继英继英症后病大发毒热不解饮食俱废有周医者亦名医也曰此伤寒法难治君诊之曰非伤寒也余症发甚重然以药误耳躬为之节度■〈口父〉咀再服而病已徐母者王相国之姑也垂八十病不能粥与起坐君药之一服而进粥再服而■〈足敝〉■〈足敝〉行室中矣尝舟过昆山而一河津之妇暴死稚子犹啖其乳其夫抆颡而哭求君诊之曰不死也为汤液抉齿而灌之至一更苏复来请药君应之而密寘金三环于中后君自吾州远复过之其妇与夫来叩头曰匪唯起吾死而又资吾生公殆神人耶吾何幸遇之友人曹昌先曰吾见盛君如是者众矣君于贫士单族有疾召之不待再而往虽委巷痹屋亦为之伛偻而进治剂必精谨又更窳者出橐装分遗而至贵富有力人盛车马迎之多杜门引疾或时匿身荒野中不复可踪迹如是者至竟歳性好音律喜妇人人取适意不求国乐而又轻施予以故随所得金帛辄徒手散尽不复问生计君白皙美须髯踈眉目葛巾单帽行山水间望之如神仙中人性温茂恭谨亡与比然当其作癖时不可控揣既不恒过人有所过人奉之若大官府已而忽去不能留也盖大江之南北其知君者敬而爱君者得十之八而其不满于君者亦不能无一二乃至所尸祝而愿为君之子孙者亦时时有之君性不食酒而善饭强自力年七十余而幸内不衰其最后过余幸内犹故也而余察其有衰态私谓家子弟曰是夫起人疾易其自起殆难矣居无何以沔寒行荆溪山中归而病亟问诸子之楫胡不归之楫归治汤药而进之君叹曰使我可药何待汝归我所以待汝归者欲有告也汝伯氏长者然不任丧汝任丧第使我棺周于身椁周于棺足矣仲氏之柩与孤嗣在念之属岁除族戚交游来馈问相踵君使悉为酒属善讴者讴歌枕而听之甚畅元旦命移之之楫居曰吾安若己而示起色汤饮徐荐熟寝至五鼓忽醒戒子妇以水荐毋以汤且属勿离左右既复奄然若寝者顷之卒矣得寿七十有六君孝友天笃以独身奉母姜极志物之养姜病亟窃割股杂糝羹而饮之遂愈以寿考令终君犹毁瘠逾礼严其伯氏如父也四方之珎腴有至者不独甘矣配即杜先生女以才明贤淑闻君委家而听之于内外综核不废君虽好内然多寄情狭邪闺阃之间肃如也先君十五年卒君自是絶不娶有五子长之恒邑诸生娶呉继娶李次之楫郡诸生出赘于朱次之楫娶戴续娶汤次之植以郡诸生夭又次之校亦夭君歿之半岁而之恒猝病死其余皆前夭独之楫在能绍明君之业益以有声诸孙男五人女三人婚嫁皆名族之楫谋葬君于（阙）之兆而具状来请铭嗟乎君挟轩岐之术以起人于陆危者五十余年其奇验何可指数而故自挹损不欲为人谈亦不欲烦笔札之楫自以其术见延请无虚日不获从君君又不喜从弟子故无有能纪之者即余之所见闻合之之楫之所纪百故不能一也昔太仓令淳于意以天子垂问具悉而对故太史公得传之如

近者汪司马之传吴桥皆桥所自著称者也君固无论吴桥即生有所著述以待天子异日问令余得之岂为下太仓令哉虽然君亦可以不朽矣

铭曰盛之先德自启东厥裔绳绳至君父子而益显融吾闻之活千人者其后当封噫嘻吴郡之有封其盛宗耶

亡弟太医院吏目瞻美配陶孺人合葬志铭

吾王父南京兵部侍郎质庵府君有二子伯则山东布政司都事静庵公仲则都事公有四子伯詹事府主簿求美仲四夷馆译书官居美叔州学生升美季则太医院吏目瞻美而尚书公有二子则南京刑部尚书元美为余与故太常少卿敬美也侍郎公以厚德闻天下而都事公继之修其厚于乡子孙盖绳绳矣而自壬癸间三兄弟俱踵逝仅瞻美在少于余五岁业以身后寄之至明年丁亥之五月而忽病噎已而寢剧至十月之

（阙）日而卒当是时有一子甫三周而乡居不能无夜警且有利之者不得已徙之城而为瞻美卜葬地于某壤其墓中之石则以属敬美而是时敬美亦病病亦噎明年夏閏之季亦卒于是吾兄弟尽矣呜乎以歳时之无良而孺子弱且年姿俭甚葬尚未有日而吾过老即一旦不讳谁与铭瞻美者故为次其事行以授儿辈俟其窆勒石而纳之其亦可悯也已瞻美名世望别号临峯母曰龚夫人而举于都事公之貳陆生而警敏踈眉目轻颯自喜都事公虽延师诲之然不颯督课而家故饶声妓以是耳目之日夺不能专志于诗书而多少年狭邪游有鸣瑟吹竿拈屣六博蹴鞠擣菹之好顾能时致鲜肥甘毳之味以适都事公公小有疾痛痾痒辄为抚摩爬搔之都事公顾问诸子无一在者盖瞻美最能得其意第公素严重龚夫人以同起家故瞻美与叔不能当伯仲三之一及都事公卒而独瞻美哀毁逾于礼先尚书中权奸构系都官狱瞻美冬月驰一骡往视旦夕橐饘及其侍余苦块相对悲泣齐而心斩矣其共奉吾母如母也瞻美虽不恒事举子业间为之亦工盖未弱冠而补博士弟子亦尝应天试而久之倦其事予告游太学以费不给不获补上舍然其从余久颇晓诗句涉猎史传彬彬举止称儒者矣性颇任侠急人之忧甚于己其赴义若渴即仓卒以窘告倾橐弗吝甚或勺贷应之故瞻美之授客券与受客券恒相当是时母陆老尚噉食无恙瞻美与妇陶孺人精心而奉之陶孺人者故千墩名族陶令君之女孙也性宽和能治内饗瞻美有三妾曰董曰黄曰赵各执脯鹽酝茗之属以时相佐瞻美性好客客饮恒至夜分或达旦所呼无不立应者间从富贵家尝竒果珍错辄袖归以遗母偶鲜客客或不至夜分候母寝而甘则呼酒与陶对饮三妾侍而各出所储一室之内融融如也陶年五十四猝中风卒董故郡名姬也瞻美念其静淑纳之当未婚羣饮而伯语之曰季多内胡自困樊檻中耶不然第善为滄即得出矣既归瞻美数拥之弗就曰毋为伯氏口实也自是有月事始一接久乃得男堕地而董死瞻美剧伤

之尝泣谓余宗祐所寄也幸为我一言纪之余不敢许而前是吾守太仆卿有余俸趣呼瞻美来京师而敬美时为尚书祠部郎左右之得上太医院吏目今相国申公王公时在馆阁以诗宠其行瞻美气稍发舒其居乡乡之族党姻戚推以为祭酒三老所疑难事取片言而决瞻美又善农家书课僮仆耕辄获然尚不能给客酿余出入多与偕每至戌夜而呼笑不絕者必瞻美也时年已过五袞矣每规之本以适生而至伐生何耶幸少裁之瞻美虽口谢而不能改以至病病可半岁意殊了了大拓中堂及傍水楼阁不休先尚书蒙上恩赐祭营葬赠官使者至瞻美病且亟矣强自力冠带先日而酹于墓泣告余三十年所耿耿于心者今始满矣已抱儿膝前曰敢以累大兄余哽塞不能答瞻美固轻财又笃陆母有一女归晋氏者昵之甚倾所蓄以私之橐为竭瞻美了不以介意至是忽嗝嗝人恠之余曰此病也非其恒伯子故齟瞻美而叔亦慢其母陆意不能无望伯子死植其子尧佐尧佐死无后为立后恤其寡叔死其长子亦死而二孤弱无所归瞻美召致来家庭延师以诲之长者又死为少者绎授室给腴产百亩故瞻美歿而绎哭之若哭王父也仲故与瞻美狎然善挫产其四子俱幼然瞻美之恤之可知己表兄之育于都事公者盖一岁中九食于瞻美不替且伏膺之费俱任之瞻美有友前后十余人其所敬爱独曹子昌先曹子虽称甥而自以髻髻交时时进规切语又为画筭图事瞻美念其有三女力不能嫁为女其少者抚爱之不啻若已出他行谊类若此瞻美以辛卯生寿仅五十七其孤六岁矣名之曰士■〈马上衣下〉系曰陶孺人志矣而不详以从夫也董叙而不志不志礼也叙之伤其功而天也

铭曰羣从之中唯瞻美白眉而先我以隳我之死也齐而哭者其谁呜呼噫嘻

奉议大夫福建按察僉事少泉李君墓志铭

李君讳植字良材别号少泉其先世浙之归安人转徙入黄冈遂隶籍焉大王父俊王父瑛俱有长者称至父赠公阳明能廓其家而好行德于乡困廩与宗戚共之识者谓老子所称居善地心善渊仁善施其赠公之谓矣娶熊不宜子置貳钱而生君君少明颖稍长工属文弱冠补郡诸生有奇声无何荐于乡郡且举宾兴宴而赠公属疾君精心医药间不之应赠公徐风之曰奈何不问公交车耶君竦然曰儿敢以大人易一第也自是赠公疾日益甚君吁天而祷靡所不极然赠公竟不起居擗踊号哭几至灭性既而曰使我北上者终天之恨又何已也乃强食分守舒君春芳闻之曰是可风人子矣标其门曰孝廉以示旌君前后五上公交车辄不利游太学诸生毋敢比肩竟以选人补蜀之万县令万固山县然于唐故称州为孔道公至裁节其费官司迎送第令毋阙供而已不得过侈求悦两造取词组而决咸心服去时人为语曰毋岐舌见必屈杜若唇冤必伸有亡頼子杀一家七人而匿大索久之不获君祷于神神示以杀人者貌醒而迹之俄就縛有僧

支解人隱其尸展转二十日矣君从容以果报喻之僧大感泣具言尸所卒伏其辜邻邑皆呼李令神君也君谒文庙庙貌严矣而前无泮池君为捐月奉募工凿之甫三尺而有甘泉涓涓已暴蹙沸加凿之汇为大池司理前御史任某异而以文纪之君任前后踰五载得荐剡十一满考赠父如其官嫡母熊为孺人征拜广西道监察御史时方有事寿陵费且巨万万君疏请裁省之上嘉其意下所司加料理而又有荐举人才一疏为时所称然以伉直不能久居台出佾闽臬数月爬搔宿垢几尽风采一新而以微痼乞休两台惜之为疏请得移病归公归而奉母钱其乐融融如也病就愈且将北上一夕而感异梦若与亡弟太常敬美同就征者敬美视闽学政旋佐其藩与君交莫逆时病死矣而君不知然意疑之晨起遂病脾不久亦卒异哉君生以戊戌而卒以戊子春秋五十有一娶陈氏有妇德封亦孺人丈夫子七胜任娶贾胜用娶魏胜载娶陈胜宠娶孟俱博士弟子胜举聘江胜荐聘胡胜重聘周女三适熊迪初王一治俱博士弟子一字丘一鸿孙男一女一状自同邑袁文伯胜任将以某月葬君于某所而来乞铭曰唯是徼灵于次公之一日而有请也余安忍辞嗟嗟李君之才器伟矣其列中外台皆未久不尽究其用所可见者循吏之绩于万而已天又夺之年不然其所张设可胜道哉铭曰

是惟良材之幽宫鬱其栋隆以貽后之人不必竟于其躬

弇州续稿卷一百二十二

●钦定四库全书

弇州续稿卷一百二十三

（明）王世贞 撰

○文部

△志铭

光禄大夫太子太保兵部尚书居来张公墓志铭

太子太保兵部尚书铜梁公之乞归也实在万历丁亥云盖三上而天子犹难之最后不得已乃许驰驿以行而一时公卿大臣咸谓公甚壮武即县官有缓急必召公既归犹日征公起居食饮状以为国轻重而至明年戊子公卒得风疾不起天子为之震悼辍

朝下宗伯太宰司空议赠公少保予祭九坛俾工部郎马鲁卿治墓于是公卿大臣西向咨嗟叹息曰国栋摧矣公既易箒谓其子曰葬我必以王元美志铭元美友兄弟也而刘玄子为儿时交其必玄子状之于是其子锦衣君叔琦等卜以庚寅夏四月葬公于凤凰山之赐莹而先期奉玄子之状以请予从金陵得公讣即为位而哭以■〈此上夕下〉辞寓夏官之役于公里即不能下从公而又何敢辞公张姓楚之孝感人其先有天性者避元季兵乱窜于蜀深入于泸之铜梁系籍焉再传而为迥配汪又传为巽配刘又传为文锦是曰南澧公配沈自南澧公而上迥迥皆以公贵赠如公而配皆一品夫人公讳佳胤字肖甫初自号泸山以其家在居来两山间更之曰居来山人沈夫人感异梦而生公公少颖敏秀俊异凡儿七岁侍南澧公举古书传语即能谈质如素习者日诵书千余言十七为诸生义试辄冠诸生时重庆太守光州刘公出行部得公文而大奇之使与其子游即玄子也刘公固以古文辞名又好谈兵多奇文籍尽以属公公间与玄子谈英雄而叹曰夫英雄者其吾家子房乎当其动以无之用当其静以有之用卒遇之而若素忽敛之而叵测若赵文子之谈笑于衷甲周条侯之安卧于攻垒斯其亚矣玄子异其志而公又益习先秦西京言下上于黄初大历之间多所履咀矣二十三举于蜀明年遂成进士出补大名之滑令滑故三辅岩邑也公至按宿牍灑决若神而恒以情衷法而行之两造甫毕各得意而去吏民之严爱公若父母矣时缙帅挟上宠张甚其所遣诃事官校与（阙）诣并重公一日晏坐有弁而急装者一髯辅之至邑门门者戟之叱曰我官校也遂入公下与语径前曰县官欲捕若邑耿氏豪亦与若有连胥吏以下皆辟易遂挟公入别室出匕首交置于项公心知所谓曰若何欲曰予我万金公阳惊曰我何所得万金髯者曰某库有万金公复阳惊曰库金诚有之第上皆邑赋长名氏若出十里外必败且今日予公库金法必死不予亦死死等耳宁死国引其项曰匕首胡不下髯者曰我何忍下第欲得金耳公徐谓曰邑郭中多富人我出一纸授之即不得万金可半致也呼一小吏前命笔书纸应赋金者二十曹曰缙帅责金甚急可人赋致二百金来子之时丞簿局踏仪门外尚谓果官校捕公既得公所赋金主名乃皆贼曹游徼骁武者也始知为劫贼亟集此二十人者人奉二十金而袖铁推前谒公谓民贫所赋金止此矣公阳怒曰赋汝人二百金胡二十也何以解二公橐复令一人前忽跃而就之髯者出不意即自刎死羣縛弁者讯之名任敬髯者高章也使游徼四迹郊外有三四轻骑皆逸去考问皆得其人磔于市公之初见劫时从容若无事者劫既解解卧達旦人以是知公可大受矣公居邑多暇乃益为歌诗而李于鳞守德为比壤于鳞郎刑部时与余及同舍郎徐子与梁公实宗子相及吴舍人明卿歌诗酬倡颇传于人人公意艳之乃谒于鳞出其诗为贄于鳞大善之与折节讲钧礼然公益心仪于鳞矣时歲大饥而富民有故壅余者公请于台平价纳诸仓为粥以食饥者所全活数万计事闻特赐金币公治理流闻法当首垣省以年未及格擢户部主事命下于鳞以书寄余盟坛中有一当齐秦赋者张肖甫也公实不死矣公既入遂与余比部德甫同造我而是时诸君子执文翩翩自肆相砥砺为高人之行且飞

觴染翰卜夜无已而公独温然其间若巨源浚冲而年又最少宗吴颇踰籍公卿而恒呼公张少保云其后公加至宫保而汪司马伯玉书戏余少保今验矣足下得无亦沾沾乎亡何出榷闽广金帛公洗手出入毫髮无所私道改兵部职方主事盖太宰建宁李公知之也俄以南澧公丧归一切裁之古礼而哀独至服除至京师时蜀当有吏部阙而太宰嘉禾吴公难其人闻公且至曰此佳吏部郎也至则补故官而少日以司勳郎请时权相分宜子前已知之风公赂而不得乃睨谓吴公是子故太宰私人今太宰亦私之耶吴公持之不得乃迁公膳部郎以自解而公故社中友皆徙谪无在者第与南海黎惟敬汝南张助甫濮阳李伯承庐陵胡正甫多所倡和侧目者谗之分宜子曰故王李社中白眼而讥执政者此子尚无他于是假风霾变察诸官僚而公得谪矣谪而同知陈州是时子与守汝宁而明卿由谪迁归德司理三人相会自愉快然公独不自处迁客勤修其干陬盗奸惕息中丞吴兴蔡公尝宴是三人者备客主礼时人称之迁知蒲州蒲于晋最雄其强王贵家■〈木節〉比而亟遭地震之变庐舍畜牧无所赋不时供公委曲拊循之而威亦不废若他所操摄则游刃解也铨部雅知公之屈而得其政理超河南按察僉事饬颍上兵公益得发舒颍亳之间谧如矣寻改云南为提调学政以经术文雅振诸生昆明点苍之胜皆以古文辞収之自是公望益重迁叅议广西入饬大名兵备为副使分守甘州为右叅政按察山西为使所至有声实吏民所颂称山西之未几而复超拜都察院右僉都御史提督应天等处军务兼巡抚公乘传至九江而安庆以兵变闻道路汹汹为梗公夜趣潜山属九江兵使者使邮报安庆军门旦夕至矣会叛卒前已就擒余党谋外应者胁息不敢动而公自桐城走金陵任调得其实则安庆之卫体宿重与郡守抗而守志隆以故南兵部出稍裁之而又严核其占役指挥马负图张志学张承祖忿使其舍人桃悍卒故尝为盗江洋者吴锡等张旗帜犯守守跳遂行剽人财帛守已与守备设策平之矣公乃具疏上其事请一切正法而留守中贵人意惑之谓守实激之变以摇公公不为动诏逮指挥等论死而以锡付公行法焉守卒得白公出履行诸郡县务持大体不屑屑期会务以民瘼吏弊为急时余强起大名迁山西皆得公代不相及余奉慈讳归而公来按部相持而泣欢甚比余服甫除公与郭御史之荐劾上矣余起湖广入为太仆卿公犹在事念太夫人老欲奉之还蜀上疏乞休而太宰杨襄毅公故蒲人熟公贤而固留之所以褒扬甚至然公间尝语余必归矣吾之承乏兹土也故相新郑公实才我而次相江陵公从臾之吾以为大臣一意为国用才而已两无所报谢二公乃两疑我以为必偏有所厚新郑去矣而江陵公方柄国是且甘心我而安庆倅王应桂者故为指挥孽守志隆者也公极论其状应戍而南台与之有连曲庇之得未减因入其蜚语中公江陵果信之俾听调用公欣然奉太夫人归蜀公归而诸谓公冤不蔽白简者谓公吴可大用者籍籍江陵公不自安又察知公实无他厚乃大悔曰吾几失此人时江陵公虽伎而尚能为县官急才寻补南京鸿胪寺卿公始独身之任未几迁南光禄卿擢右副都御史巡抚真保诸郡甫发江口而太夫人之讣至矣公噉号不欲生活髮粥饮昼夜驰归哀毁如失南澧公强

自力治墓既襄事推先人之产直千金者以予兄服甫除而召抚陝西未上改宣府之未几而敌别部长满五拥铁骑六百阑入独石口剽掠时久已通互市矣公檄大帅麻锦伏兵邀之生获其副巴拉满五使求之辞甚哀公计以纵之则见狎僂之则见讎乃以属大帅锦俾建旗鼓縛巴拉将斩而驰赦之巴拉叩头流血曰微太师身首异处矣公谕以威德给之银符巴拉自誓不敢复阑入边然巴拉扰而满五骄明年挟益赏公下令有浮取一饼一肉者斩满五乃媾都讷台吉伊勒敦塔布朗数千骑阑入边有所杀掠公移文顺义王罚都讷台吉马驼牛羊以偿然满五伊勒敦塔布朗强谳达不能制于是廷议有稍益之赏以羈縻者公上疏谓今日之势与曩异曩者权在彼不得不中彼之欲以全吾之体今者权在我顾乃屈我之体以伸彼之欲乎哉即欲有伸渐不可长彼苟叛而更大入臣自悉一镇之力制之不效则治臣之罪慎毋使彼轻我上曰善敌既闻公治兵互相恐乃更还所掠人畜献马百六十疋牛羊橐駝称之求勿解互市上谓公处分能慑敌劳赐金帛过当是歲公所减省缙钱以万计城七堡一城二仅又城独石半壁猫儿■〈山苔〉三城修南山边墙万六千九百四十尺功倍而费省复娄赐金帛入为兵部右侍郎未几而浙江有骄卒之警督抚浙者吴中丞善言故良吏也而不习兵尝取中旨减卒月饷卒诉之不听遂噪而縛吴公交车中冠履俱破至演武场羣詈吴公而数之且甘心焉会工部郎谦与二御史徃解譬百端然犹责吴公状使复饷而以二千金谢过乃已吴公遂出逊于吴兴当此之时吴楚闽越之卒皆骄而督抚臣悸至有穴垣以防不测者事闻江陵公曰孰能制之既而谓吾得人矣遂命公兼右佾都御史出镇浙许以便宜行事公驰至京口约余出会余方称道民谢不能出公谓若何而可予谓不僂则废法多僂则生变惟以时缓急得其魁而已公颌之时陆与绳以少司寇方里居公过之谋与余合然公甫与吴公代而市民之乱复起始杭城中诸栅俱有役夫司干陬诸土著者募游手充之其后必取身役其人惰多借贵势以免夫数益以狭役益迫而游手无所得食侨客丁佐卿假利便言之监司弗听意忿忿曰谓我曹无爪距耶宁营卒之不若谋之市猾相构诅为乱而会佐卿坐他法郡囊三木以徇市猾相与篡夺之诸亡赖子益麀集行焚贵势家谓庇其应役者遂破两台使门掠其衣装以出使者跳与三司俱匿迹佛庐以免事闻公谓其人曰营兵哨海者发乎曰发矣而二营留问留者不与市民合耶曰未也公喜曰吾知所以处矣速驱之从吏惴惴无人色公食饮谈笑自若既抵镇而民行剽愈甚尽毁诸栅以快意千余人且抵台门公以轻輿出谕之而从者材官剑客数十人皆彀弓挟鸟铳以从公直前临桥而喻曰汝曹毋反反则以天下兵孥僂汝矣且汝必有所苦曰苦夜役耳夫强有力之家倚贵势之家以免而监司守令若弗闻也者公曰易耳奈何以汝一愤易汝族即下令除役众姑叩首退既退而行剽巨室竟夜火光亘天公夜草檄质明使一校驰谕之众裂其檄公大怒曰上命我诛乱卒今乃见乱民而靡耶召游击将军徐景星使呼二营之长入而慰勉之曰乱民之恶极矣虽然非尔曹比易剪也何不自以为功贖曩罪乎咸踊跃听命公又呼黠卒之首倡乱者马文英刘廷用曰闻汝二人前自縛请死壮

士也汝死法胡不死义且必不死二人亦踊跃听命公乃约束二营壮士使景星帅而讨乱民凡四战大败之生获百五十人至辕门而丁佐卿与焉公择其豪得五十人皆斩首梟辕门余悉下狱其从乱者咸惕伏或鸟兽散去杭人若更生公具疏以闻且谓迹来有司奉行太过裁削太甚徒务虚名不究实祸以至远近离心乘机窃发始而兵变既而民变诚见人心不固戎首易生若非仰藉明威申饬法度其接踵挟持不知所终盖阴以风喻江陵公也江陵虽伎而为之少寃言于上优诏褒答以公奋身犯难定变俄顷纪纲大振忠绩卓异赐飞鱼服金二镡文绮四表里是歲以追錄宣府功又以考三載绩后先录一子补胄子公私念兵且戢矣寃之则废法急之则生变乃阳好谓二倡乱者马文英刘廷用曰罪可赎矣予之冠带二人意自得洋洋羣卒间且有所侵侮羣卒大怨恨谓若倡我以乱自为功得官而使我曹尚惴惴也公度是二渠者与众心左无能为矣乃与兵使者顾君养谦谋俾发诸营之卒哨于海而密以名属徐将军下令縛之至军门并文英廷用数而斩之余皆赦弗治仍呼平乱者二营卒语之曰吾非不得若主名以昔有微勩耳且吾不欲食言羣卒咸股弁唯唯既而曰吾曹始能食寝矣公复具疏闻时江陵前死而代执政者以公功请上大悦拜都察院右佥都御史兼兵部左侍郎俾还部理左侍郎事当是时余里居颇悉其事为志之且谓诛乱民利用速诛乱卒利用缓不佞窃或知之速而能当缓而能密则非所与知也刘玄子闻之亦曰子房之筹与赵文子条侯之胆少年时所自许何若左券也公既得代道拜兵部尚书协理京营戎政寻又改兼右副都御史总督蓟辽三镇兼理粮饷公之在浙也盖不独两定大变而已所规画十议革保甲间架差税不便者皆奏而行之浙人至今奉以为絜令而相与讴思公不忘有生祀者公既至蓟门申约束搜卒乘信赏必罚大将偏裨以下凜若负霜雪又似得春阳而向之也时辽左与大敌土蛮近而开原故属徼外其土蛮之黠者与敌通数导之入边辽左之大帅李成梁者素负勇略麾下有强兵公虚心寄之以备土蛮为急成梁率精骑捣其营斩其魁及偏裨四十五级甲首一千五百六十三级卤马一千七十三疋驼羊弓甲称是捷闻告郊庙献俘称贺加公太子少保录一子锦衣百户世袭予诰命金币土蛮三万骑入寇宁远伯拒之大有斩获赐蟒锦衣金三镡文绮四百户之应袭者为副千户公戒宁远伯敌不得志出必更入善防之宁远伯设伏以待而身自捣其营获帅长十三级余众八百三十七级优诏进太子太保百户之进为千户者得世袭当是时山海关外之部落曰董狐狸部曲颇众而桀黠多诈贪功者以辽兵之强也谓蓟兵夹而攻之若振稿耳公独谓边衅不可开藩篱不可彻得无行而他所陈备边诸筴俱报可公当敌出入要害督工筑之为墩者百七十七为墙者六万五千七百尺营舍千八百楹■〈立乞〉然金汤矣兵部尚书缺廷推公上迟徊久之乃决入理部事当廷试充读卷官歲决重辟当廷审秉笔者为吏部而上忽以属公盖重公也公为人坦心大度而性又爱客有以私文至者无不延纳客气益发舒忽自诡能得公意有所关说公虽不之许亦不问而中贵人骄故以兵部为外藏公多执不之应以是怨公台諫乘而有齟公者頼上知之然公以盛满自抑恒曰

功成名遂身退天之道也吾家子房非师哉三上书乞骸骨辞益恳始得俞旨归而买田巴岳玄天宫为靖庐延道士与共居又谒潼川州云台观玄帝像曰先太夫人意也为文纪其胜飘飘然有遗世志云将尽刻其诗文集走书金陵谓王子为我悉序之前是已叙公诗及奏议矣书至金陵之日而公卒于乎明兴以来称文武才者独王文成杨文襄王肃敏而已肃敏小孙于武而文襄疎于文非公比也公之就大矣不当以一雕虫之技与不佞还往之私溷公志然公之精神实注焉寻曹子桓所云云可以已哉公集若干卷行于世配一品夫人向氏有妇德佐公至贵老丈夫子五锦衣指挥佾事叔琦娶冷恭人乡贡士叔佩娶舒中军都督府都事叔玺娶高女一曰蒲适高元之向夫人出也国子生叔珂娶高恩生叔环娶杨侧室赵氏出也女一曰浚火氏出也适高任之诸孙男八人女七人元孙宜孙保同孙女曰蕙曰寿曰芳及未名者叔琦出也女曰变者叔佩出也貽孙振孙明孙女曰云曰葵叔玺出也兰孙女曰叔叔珂出也所婚字多名家

铭曰惟滑其邑三辅西偏公时为令哲而少年劫盗之雄篡挟金钱公色不动授策外援卒以身免刳首遂骈其帅上谷网徼猾寇彼不自意有所纵舍绥之以德振之以武譬若骄稚系我掌股或朴或乳无敢齟齬其最艰者莫若钱唐乱卒虎伏民乃■〈氏鸟〉张公曰驱之从吏仆僵乃乘轻輿示以周行彼阳伏从而更披猖大勇赫然呼此戎兵留者二营尔罪实轻歼彼狡徒雪尔版名戎兵欢呼公赐更生受律贾铨薄彼■〈氏鸟〉狐若扫败叶累累就俘斩头穴胷流血为渠余党遁巡弭耳以逋悍卒犯帅胡可弗诛司之弥歳乃获首渠彼实不知益纵以骄縛之辕门慑不敢器曲赦二营以全夙要迅廷一収白日昭昭公之心仪乃在子房及其作行实等汾阳单骑走敌我武孔张収僂绛人天威忽扬归从赤松始得敛藏猗公之武不取攻斗猗公之勲不在甲冑仁心为勇毅以弘就造物私尔胡不竟究文士无用敢籍公穀

资政大夫南京兵部尚书叅赞机务致仕应谷刘公墓志铭

余以嘉靖癸卯与刘公宪谦同举于乡公长于余六歳明年公独成进士又三年余亦继之补刑部郎时公郎户部久矣自是比庐而处觴奕倡和无间朝夕而久之公出守卫辉又久之各以职事胥会于济南予坐家难去国不相闻者十五年而公为左少宰代署太宰篆予起家观察湖广迁右辖于粤西入卿太仆皆公所上启事也余不才不能步武公一抚郟而报不称罢归里需次而公连正八座未老乞身以归荐绅先生日望公之复出而公不之应顾时时惜余之偃蹇余亦不之应也公面紫而眉目疎秀风骨棱棱饮噉如壮时对客谈笑达旦不倦台使廉公贤尉荐娄上而会所后胄子某为恶少年构系狱甚急公颇往来吴中居间渐鰥瘦若腊愀然谓予即吾子固听之吾兄弟共此子也如何公别之未几而讣至矣公卒之日犹能对客奕如恒时居月余其配某夫人又卒亲

友为之调棺敛而所后子犹在系念公已死狱无解时脱身亡去公之姻谕德吴公中行辈代襄之天子后闻其事命有司治葬赐祭而公就窆久矣居三载乡进士吴君撝谦鸿胪薛君迎感公之夙知奉考功郎汤君聘尹之传来请铭呜呼公名臣也所莅垂二十政皆树声绩其居乡推以为厚德长者而天之报之若此且其卒时值家难而故人多在高位有气力顾不能出身为公于赠官易名之典咸缺焉所藉以不泯泯身后者死后责也余又安能辞公讳光济宪谦其字世为常之江阴人祖某父某皆以公贵赠如某官公生而卓颖善诵十五年工属文辞气沛发川盈鹄翔无所不畅二十四举于乡明年成进士与同年瞿丈懿公景淳相游处瞿公推公公辅器也座主华学士先生亦云二生所不能甲乙用刘生广矣寻谒选得户部某司主事出理临清仓以公平见咏思入理漕务出纳精审诸曹郎心服之迁某司员外郎庚戌八月大敌阑入塞薄都城时援兵至者独云中最先议遣郎一人蓐食饷之而云中军为敌隔声问不时通伤死棘道他曹郎闻当遣面灰死无人色公奋曰生不食县官耶即帕首靺鞨褊袷挟疲卒数十骑以饷往卒从者咸惴恐欲毋前而公拔剑诘督之竟达命云中军咸抆颊呼万岁而公既辞军复迫于敌间驰至通州先大司马公方按通昼夜睥睨间识公縋之上相贺更生先公慷慨谓公不幸城破吾必死之死固吾事也公归报命时抵家家人大惊喜出望外盖公之出不以语家既出而传报杂沓业且以齏粉矣公间谓余尊君信忠臣也视死若归自是朝论多才公迁山西司郎中益精于职已而有卫辉之命卫辉剧而冲属岁侵流亡相属公首请赈请蠲于台得报可而犹不给乃贬损禄奉节缩他费以益之宽刑省讼禁吏胥毋得下乡豪右杜门自守于是单赤苏矣流亡亦渐归郡以大治而公丁母忧归服除补山东之济南济南省会前守日枝梧不堪其细公从容应之吏民畏怀寻复丁太父忧公即日徒步出关城送者俱不及仅一舍而报擢升为按察副使服除补浙江时岛寇虽小敛而一切犹用军兴法独公为之事济而民不扰久之进江西右叅政分守南贛时大旱民有种蓝者二千余壅水流自溉下流之农亦千余人羣争之不胜而伤抚臣谕令止不听遂上草具其状诏发兵掩捕兵发有日矣公恻然曰民自竞水利耳吾不忍其屠僇也乃先期亲往喻之其人初犹露刃自卫见公轻行乃来谒公曰大兵至若泰山压卵立糜矣吾欲生汝曹故来抚耳咸抆颡哭请命公尽释之挟其二渠魁谒台杖之数十兵得无发是二千人者俱祝于天谓刘公吾父也实再生我公以治理流闻迁按察使于山东右伯于浙江飭肃清恬各当于理寻为左伯于福建以严以毖郡邑当上赋者库藏官吏毋所干预仍戒不得时刻稽故一切洗手奉牒以大计入朝道迁太仆卿未抵都门进都察院右副都御史抚江西驰传之任至则延见吏民问所便苦与藩臬守令计而行之江西山谷之民不便邑徭公第使与赋并征官收其直而听其应募者贵贱咸计亩出直不至羯羴着为絜令又督有司置常平仓以备出纳属岁侵公戒郡邑设法大赈之而躬按行其后有所惩獎吏不敢为虚文而民食其实暇则分部考校诸生艺文彬彬向风矣召为南京户部右侍郎吏民遮道泣送不絕肖公像祠于青云公署而祝之未及上改北明年遂改吏部右

侍郎寻迁左侍郎时杨襄毅公博为尚书虚心寄公公亦不惮倾吐杨公大倾服语所知刘公外和而内介识精而度远冲夷坦平万斛之舟新淬之镜吾所不及也会杨公以疾归而代者张公瀚未至公署部事慨然以登进贤哲为己任典选公平考核精审他诸干请一切谢绝诸曹郎皆得伸所守然不自峻崖岸退食之暇往往召诸戚执饮谑如居平独不及私亦无敢以私进者一日忽慨然曰可以止矣三上章乞骸骨江陵公居正时当国使人语公得无有所不足耶非老非疾何以名去公谢曰疾自知之且人各有志耳竟不得请第迁公南京工部尚书公治装不六日即行于江陵公朝堂一再见而已江陵公意衔之然以朝议藉藉谓公迁为左不自得乃稍转公吏部仍南京百僚肃然六卿中有私燕而守备中贵人为上客不至迟之再三乃至主人迎谓明公不来诸生无敢即席公怒曰天子六卿而贬称诸生于中贵人前可乎即拂衣出无何公改兵部叅赞机务中贵人逆相谓曰此偏偏不易犯者公平心其间久之咸叹服乃以次飨江防修雉堞搜卒补乘缮甲除器军容为之一新僚属吏士靡不安公而公以去家近且故都风物足游目意亦安之而江陵公以父丧风天子为夺情北部院大臣已上疏请留矣南中援其事拟继上公当首署名不可曰诸公以夺情是耶否耶天子留相国以恩我曹当持之以礼于是太宰欣然握笔曰我故当首金都御史王篆密闻之江陵公太宰入为大宗伯而公中曾御史白简矣公既归绝口不复絀时事緝堂居之曰大雅好客客恒满坐公既能诗而又善正行诸体得一薄蹠及葵箒书以为荣扬挖今古酒德温然人咸以王会稽白香山目之盖未几而嗣子之祸作矣公生于正德庚辰卒以万历甲申春秋六十有四某即嗣子也娶于某生子某息女一归吴某即谕德公子也余故知公详于汤考功既论次其行而叹曰呜呼临事不避难卒以报成可不谓忠乎军兴不贪功卒以众免可不谓仁乎秉铨惟一不以势挠可不谓公乎权相败纪持论毋殉可不谓正乎凡此皆名之所由立也寿与有后之征也夫寿既不甚永而又剪其后亦酷矣微余文又何以不朽此名也

铭曰为德则丰位差偶寿稍不盈剪厥后请铭者某铭者某不于嗣人于公友天乎天乎曷可究

罗山汪次公■〈既上皿下〉继配杜孺人合葬志铭

汪次公之捐馆也以己卯之十月朔有丈夫子三而中子道会继配杜孺人出也前是杜之先次公地下也则庚申之八月而是时犹子伯玉守襄阳为辞以哭杜其纪述淑行甚悉若状然而至次公则伯玉以左司马忧居衔恤而状之矣然犹未成葬也道会之言曰吾舅弟以壤地之不宁宇而牵率至今日何论志铭虽然孤非敢一日忘之难之也难之者必得吉壤迺于世父封司马公而始敢问葬必文足以当伯氏状者而始敢问志铭既久之得壤矣在阳坞近封公矣已而曰吾得志铭矣其吴之琅琊王长公乃斋而谒

我布币具司马之状若辞而附以所缀遗事余却币而受状与辞及所缀汪之先世越国公才千年族指以数十百万计至次公之王父曰赠司马公某始以开美重于乡其配吴淑人颇难子四十乃置貳黄已祠高祿而验以甲子之正月吴举封公而二月黄举次公于是卧同乳负同襁出入同襟裾受业同席髻而赠公名之曰良植既冠而字之曰文林最后乃自署曰罗山人亦称汪罗山或汪次公云赠公之鹽盐武林也实挟次公以从次公夔夔斋栗且有心赠公晚而息贾听封公及次公也次公稍得发舒然不能忘少年游为黏履挟瑟蹴鞠之戏雅倾其少年进从酒人豪饮遂倾诸酒人久之修其业见推为盐筴祭酒而是时榷盐御史得盐引之失实者置之法戍矣因尽欲搜捕诸失实人咸大惴恐欲鸟兽散次公笑曰毋以为也独身走京师遨游诸公卿间毋不折节愿交次公次公徐露其事俾宛转居间以解得弗竟次公归而羣贾置酒率百金为寿次公笑曰吾自为我耳而自而幸何谢为却之次公智而有胆勇尝操百金装江中流而遇盗舟人皆亡匿有投水者次公曰盗亦人耳何至自先死袖装金授之且亶亶陈义微有所风劝羣盗有欲击次公者其魁止之此人长者勿击既去而复来出一金仆姑相授曰遇他警以此示之凡再免舟人乃服次公次公伉直不能面藏人过而嗜义若渴其急人甚于己里有竞者得次公片言立解尝欲平两怨家斗其人各恃其物力既许而中悔之次公语两家徒众曰怨不可遂也遂怨不祥不祥将及尔曹众颇悟有避去者卒之两怨之祸成各以家败于是人人益归心次公当次公与封公之诞歲而从弟某亦生封公以贵某以富而次公絮冒褐寬博傲睨其间纵饮抗论亡所孙三人者髮宣而魁形出入鴈行靡敢有轩轻间司次公之门其辙迹颇多于二公矣次公初娶曰吴早卒无子继娶即杜孺人而滕陆次公与杜孺人燕婉之好甚笃而陆已先举一子曰道坦矣而杜孺人始举道会陆后举一子曰道贞杜孺人最婉嫕多才艺工书笔女红他握算会计纤啬内外不习而解每出多留后用是次公得自寬于游最后以念次公又以道会多病忧之得疾次公归乃太息曰始吾论事于外而失吾内助吾非人哉乃不复游而视杜孺人汤药然竟鲜起色已次公亦大病杜孺人从病中忧之甚遂增剧竟卒而次公愈矣次公哭杜而哀然不能无中饋虞始复娶庄后亦有子曰道耆次公之重于乡不以位意亦弁髦之及左司马之显贵不能无动乃使道坦从学无成继使道会从学成而补诸生试于应天不利为补太学上舍怏怏不悛曰此非天耶其以杜孺人病而废贾也籍而授舍家儿耗之十二转属洪氏壻耗如之他属里人耗十之三谓本富易保也始谋拓南亩若干然亩贵歲入不能当出而又与酒客共之矣少子道耆十五而为其妇方归而待年未面也道耆死雉经以殉次公伤之为置后有司其其事得旌长女之归吴者俱前死仲女之归洪者少而嫠荼苦终其身以故次公虽寬襟豁落与伯季及左司马觴而快然不能不时慨然曰吾殇子女多矣独不忍于洪之嫠方之殉柰何凡以女德显者非其家福也次公寿七十有六而杜孺人仅五十四其子孙男女婚嫁之详具于左王子曰古所称磊落大丈夫者其汪次公哉必富而后仁义附则次公当泯泯不振矣百里诵义千里诵声居然封公颉颃也道会即

未达其文辞著称与从兄仲淹埒而承左司马下风家之内外二女矢志为闺阃师美哉汪次公者太史氏之货殖可无传也

铭曰连翩而来差池而逝是维公之为弟其晚也合其蚤也离是维孺人之为妃鬻而乔者两相望也穀而穴者偕厥藏也

弇州续稿卷一百二十三

●钦定四库全书

弇州续稿卷一百二十四

（明）王世贞 撰

○文部

△墓志铭

汪处士希胤墓志铭

余于故人昆山俞仲蔚谊最深而仲蔚独与休宁程善定善仲蔚死善定为之恤其孤梓行其遗集余甚高之会善定死以乃子起家请铭其墓当是时善定所父事者里人汪希胤故偕善定之父汝义贾昆山而工为歌诗亦缘以交仲蔚而及吴之周公瑕诸吴人能诗者多与之游所饯赠满卷己丑冬起家谒余于金陵邸为希胤之子一山介绍而请铭其墓则希胤以甲申冬死矣盖一山久已挟吴进士尧臣之状欲得世之能言者以不朽其父而始知有余顾余所知者仲蔚次善定而已乃又缘以及希胤耶希胤讳振芳汪故越国公之裔有徙居汉川里者大父孝子某至希胤而益有闻希胤居之左有泉冽而旨饮而甘之因自号左泉少时受毛诗里傅能属文试有司辄占高等至台试而辄报罢以是弃去挟其赀贾湖海间纵观名山之胜入游都下曰吾观以宫阙陵园为归以贤士大夫为鹄闻驸马都尉京山崔侯好客而文躋门曰江南布衣汪某请见崔侯延之入与语合置上坐已稍露其诗侯大叹服曰君非恒人也凡栢梁倡和竹宫祠厘应制之作皆以属希胤既得意忽念其父母长揖别去省侍者久之始来昆山贾既成乃返汉川里复奉其父母为构服彩楼颇极轻暖肥甘之奉乃其自御大布蔬茹而已父母歿丧葬之类皆以礼辅情而行墓地在岐山建树德堂崇焕甲于居第曰吾不忍有俭于逝者晚节

业益饶乃买山二瀛间筑室以栖种松可数里栗亦数千树曰此吾素封也与其从兄仲嘉弟希成文酒优游甚适客以诗进者无所不延纳既用是自宽于老且有名吉水曾子建江夏丁元父前后为令礼致之乡饮希胤谢不往因援诏例予之冠带旌其门曰清时逸老希胤竟以乐死得寿七十四凡云娶而皆程然无子侧室羊乃举一山为太学生有孙男四大聘大节大贵大吕孙女三希胤为人温恭爽朗善筹筭有先事之识程汝义死而其恤之也不下善定之恤仲蔚也

铭曰不颀治生而间治诗谊亦称之生不时显死而见知其又何悲

蔡孝廉琳泉墓志铭

余以万历壬申九月偕太常弟游太湖之西洞庭至销夏湾而主于蒋太学所邻人蔡翁者年九十三矣而尚能食酒噉肉步履不衰其子孝廉伯玉从傍捧扶老侍立唯谨必蔡翁命而后敢坐蔡翁时时诧余老人甚乐无我隍者徐过其家则数椽萧然丙舍一榻仅蔡翁之衾褥而已征其所以乐状则孝廉授里中诸生经稍遇鲜腴必乞归以奉蔡翁故孝廉之羹有不糝而蔡翁口无枯向夕必以醇酒奉翁而身侍枕席榻前稍有痾痒则孝廉之指已属体矣是故蔡翁忘其贫而诧所飨即素封家不过也余兄弟登缥缈峰蔡翁命孝廉从指示七十二峯谈说往迹如指掌归而言之张中丞予蔡翁冠带榜其门以旌之至明年而蔡翁无疾卒孝廉时已逾耳顺矣号踊无度至毁瘠骨立尽出其修脯资躬负土杂佣作而始成葬久之太常弟以叅议守南康为其第三儿士駮择师不得而余益知孝廉博学有行谊其教授称明师损束帛聘之为传致南康官舍太常书来谓儿师不足当蔡先生先生吾益友也第四儿驥业亦受劝学篇矣后还里余继聘之塾中为孙瑞廷师大较孝廉于孺子不废鞭挞然其察饥饱时寒燠即乳媪不过也与上下今古挖扬风雅有味乎言之至所雌黄短长不涩齿舌间与之处未浹日而信其为长者孝廉长身白皙秀眉目美须飘然步履轻趋食饮甚甘当戊子之元日孝廉过余余指谓儿子辈是夫骨耸而神王寿当远过若翁然不十日而报病又三日而报卒矣吊之其子祖芬累然苦次也征其橐枵然不能治官襚余与太常倡两家子弟之受书者赙而敛之俾归葬于洞庭之先茔逾年而祖芬手治状累千言来请铭孝廉者伯玉其讳孟坚其字琳泉其别号河南之陈留其先世至宋而有秘书丞源者扈高宗而南死葬临安涌金门外长子维翰卜地而得吴之西洞庭徙家焉果数百年不被兵其齿益繁聚而居之曰西蔡里至翰林公羽而以文章显与文待诏齐名孝廉之父即所谓蔡翁者讳某其从父弟也少亦尝学问能诗贾游襄阳乐于大堤之上颇挫其橐归而教授里中厘厘自给不能资孝廉学母徐意怜孝廉能课之读书既稍长闭一室中俾尽读诗易书春秋礼经畧晓大义十六七始出从故徐麟先生游徐先生贤豪人也意不可一世士顾独奇孝廉以为能绍

明其业孝廉亦尝从有司诸生试不利弃去之因博综羣书既名成而云间张玄超氏聘之校阅古今秋文甚相洽也其宦钱塘而以御史檄编唐诗分类亦孝廉佐之他若顾汝修兄弟之印藪何元朗之语林冯汝言之诗纪俱孝廉与有力焉而逡巡辞避不欲厕名其间故无能知者若其所受书弟子则几满洞庭矣于吴善彭孔嘉黄淳父刘子威张幼于当余之晤孝廉父子时前郡太守蔡君邑令魏君以书币聘焉且旌其门曰孝子而御史温君亦尝下书旌励之孝廉絶不言而余亦无由知其事第以臆得之尔君终始不离退让如此状复言其耿介质直务修敦睦之行贫而择取于男女弟有所周恤敦气谊重然诺而余据其所重者称之不能尽纪也始娶于汤有妇德能佐其家秉以宽孝廉仅三十五而死自是有所置皆不能当意而所任仰俯事育皆身任之竟刺促至死语有之伤哉贫也孝廉有一子即祖芬能读孝廉书其博过之而不善治生娶妇某有三子二女

铭曰三世以经术师于人其学世益博而世益以贫孝廉死而独有闻噫岂直以余文

张元配王孺人墓志铭

王孺人者吾族兄东昌倅罗溪先生之仲女也母曰刘氏王于江左为甲族有家范而孺人又能禀承之以婉孌端详称十七而归张君应文张君者故福建按察副使公情之伯子也按察公兄弟起家进士俱为大官然无改于素而张君为郡诸生不能问家人产按察公见孺人而喜曰儿得助矣孺人果能朝夕强自力以敬恭事舅姑以慎接夫子以严御臧获张氏之政故嘻嘻自孺人以严整齐之而始知有法然亦不纯任法问体得其情有所操纵徃徃移畏而感业亦稍裕按察公之宦金陵孺人实偕夫子以从进而夔夔共妇职也退未尝不治于室女红秩然矣张君姿试不利厌去为古文辞又好谈葱岭苦县之学而最后秬兰鞠斥置书籍孺人皆有以成之又能相其夫备二尊人丧葬之礼咸可纪也孺人有二子长曰厚德未冠举乡荐今尚滞公交车而能不废记胜之书以裕孺人然孺人终始緝■〈糸辟〉洸也厚德跪请曰得非有所不给耶胡自苦乃尔孺人笑曰若未遽文伯我何敢慕敬姜为之不辍已而感脾疾卒年仅五十有六始孺人之为严也即张君意亦微难之既孺人歿而君意其严之不再也曰微吾妻谁与济吾宽诸臧获亦相向嗟泣曰已矣畴与我别勤惰也厚德与诸弟衔戚而俟余归乃奉张君之状来稽顙请曰敢徼外王父之灵以薪不朽母余悯而许之孺人之侍张君有二丈夫子长即厚德娶于章次重德娶沈复为张君置贰有二子谦德聘郭慎德聘徐女三一字文从简余未字诸孙男八人二为厚德出六为重德出女十人为厚德重德者各五葬在邑五保姑邈字玕先塋之昭位

铭曰女子于王而归于张其唯二氏之良

李配施孺人墓志铭

余以万历元年宦游楚与左方伯青阳施公尧臣善公时时及家人言称有贤女能得老人意而无何各以迂别去余解郟镇中丞节里居而施公后为京兆尹得请致其事归旷然不闻问然心恒念之今年九月有苴杖而谒余司寇署中者诸生李本固奉其父贡士■（苴）之状而为其母孺人请志铭余怪其无从也姑读之则施公女所谓贤而能得其意者也孺人小字漪兰母曰某夫人施为邑令族多显者而李族尤贵有硕儒曰简斋公某从王湛二先生游以理学称东南公之子曰同守公某自为诸生时雅已善施公闻公有长女贤为其子即贡士君委禽焉时贡士君少而补博士弟子有俊声故施公乐归之孺人之归李也其姑故江司徒女弟端严有阃则一见孺人輒心喜谓贡士君吾得妇矣必亨而家孺人果能自力共谨调辞色丰甘竈而荐之而尤以婉顺先贡士指贡士君不好靡则身衣大布褫纒骨笄不好问纖琐则米盐酱醢出入之类皆力任之不以烦其顾独颇好客则中厨饬酒馔不待声而应时时好读则以勤宽之不以妨其读其它又能长虑深算于白圭计然之策彷彿閤合业日以裕诸妯娌退相羨曰姑言故验贡君连困剧疾孺人曲局其髮垢容而侍汤药率以君起君有所嬖媵侍必阴厚之其所怒必委曲谕解之盖三十年之间阃以内欣欣如也而里俗妬至毁贡士君为好少而孺人以少进若蛊者其语不可闻君不能无色动孺人自如也于是京兆公贵矣孺人不见贵色于夫家其待他姻戚尤能折节下之施报从厚贡士君之先若户部君显而不遑治室与先祠孺人又佐君拮据以第完美会孺人属疾且卒谓其子女曰吾今而后脱苦海矣盖自伤为善之劳也已而曰死者何所恨恨不得终养吾老姑及吾父母耳贡士君之痛之而为之状累千余言里之忌者转而惜之故宜也孺人卒以万历己丑距其生嘉靖丙申得年五十有四举二子长即本固娶某次本立娶某女五适施天杰太学生施鸣庭姜惟德章守藩余尚待字孙男二长向荣次向高孙女一在襁褓墓在某地弇山人曰甚哉余之易于文也虽然以京兆公之善而及其女以京兆公之一言而信其女之贤于厚道不为悖也

铭曰妇德备而不专名所履顺而母终荣噫嘻乃其恒耶胡以不亡有余此铭

王母顾太安人墓志铭

余以考三品绩道转司寇而宗人子敬为廷尉丞对秉大狱爰书居第又相对甚洽也寻廷尉亦以考绩别余而怅然已而泫然曰不孝之背我太安人也在戊寅之十月今

且十一年矣以岁时之无良至今犹滞浅土迺始得吉将启先君之兆而合葬焉吾子幸赐之一言以志其幽死且不朽余故习太安人之贤于阡闾少双也廷尉与其弟郡丞之孝廉也则安敢辞太安人顾氏曾祖故赠少保太子太传礼部尚书武英殿太学士恂祖故封山西道监察御史宜之父故马湖知府潜马湖公尝读中秘书视畿甸学失权臣指自免去郡天下高之娶龚恭人而首举太安人恭人时仅一女爱之所以教戒甚切至择婿得故太学生王君可大归焉王君故云南右方伯公秩子也少有异才当方伯公之被谗且叵测君上书露冤状会事前白乃已李献吉吴献臣读其文称快曰非凡儿也太安人既归君而事姑沈孺人蒸蒸孝谨御下不示喜愠沈孺人每谓吾儿诚嘉如性小卜何得吾妇而调矣因谢太安人安得有子妇若汝为我代酬汝劳太学君尝感疫甚属太安人方妊身不顾躬为掖持卧起侍汤药以起君而身感羸病委顿者十余年然不以病故而废体君好客客即深夜至呼酒炙急应之不使耻也太安人既病而梦人以白■〈影上告下〉授之曰戴此则病愈亦不知所谓太学君方应顺天试骤得疾卒时廷尉甫十岁而郡丞犹在娠太安人闻之而痛可知也一子三女皆恃太安人而衣食太安人日夜泣抚诸孤衔戚治丧事盖成服而病果愈举郡丞亦无他太安人念廷尉稍长督课之读少倦从羣儿戏即扶之曰汝当含茶而读何乐乃从羣儿嬉乎于是马湖公老矣太安人家事事从取质又使廷尉以所业旦夕请益不五年而公亦捐馆太安人乃哭曰真穷矣公有二子伯故右方伯梦圭出仕而仲贡士梦川以经术显名学中太安人复督廷尉俾从之游学渐以成太安人顾宽之不使预家秉时郡丞亦渐长廷尉请曰弟胜外塾矣已又曰弟胜属文矣母胡弗急也太安人曰向者汝初长独吾在今次儿长有汝在胡以溷我为于是廷尉始抗颜课责郡丞丞悚然师之而太安人阴使人微其出入母离廷尉其学亦渐成相次补博士弟子久之为嘉靖己酉廷尉举乡荐太安人迎相劳曰胡晚乎恨若父不及耳虽然吾可以藉手地下矣又十二载郡丞亦乡荐而至乙丑廷尉登进士太安人贻书诲之大约如乡荐时语既除建宁司理欲奉太安人往不许曰吾不任舆虽然日健匕箸毋苦也若姑精心三尺以养吾志比廷尉以司理最入为南京刑部主事太安人复不许偕往曰若三尺之益厘而吾健匕箸犹故也比移北曹廷尉恋恋不忍舍然念且考六品满当得赠太学君而封太安人即北之无何日赴吏部考而传太安人病齿妨食时郡丞虽在侍而出后其伯父廷尉以是得请终养俞旨与封典并下驰归候太安人疾已平矣迎谓廷尉汝以我故归然官贫何以养我即我寿考亡恙不坐益汝老耶廷尉顿首曰儿自分贫且老愿以身长奉母盖朝夕依依膝下者又七年而后考终得寿八十有九太安人居恒端详敬谨其家始泰而中否未复稍泰然始终一节亡所改长女之适周镒者殉夫死太安人始哭之恸或谓死者得其所矣何恸为太安人曰善吾弗之及遂辍哭其慷慨有丈夫气如此二子廷尉名执礼尝历仪部郎尚玺光禄卿丞至今官郡丞名执法即出后者用顺德倅高第还丞建宁郡不肯上执礼娶盛封安人执法娶周赠安人二妇皆先卒女三长即适周镒者见旌曰贞烈次适朱应会陈第侧室女适张杰孙男

六协庚选贡生娶张氏继马氏协康太学生娶俞氏协嘉县学生娶魏氏某某俱幼孙女三人长适周始然郡学生次适许椿龄太学生次适严君聘次幼协康协嘉执礼出余子女皆执法出曾孙男九人景尊聘张景旦聘顾景阳聘张景祥聘孙景览聘周景益聘朱余未聘曾孙女九人许聘陈世芳朱公作顾藹李先畴诸元均余幼盖廷尉之状云尔余节而志之而又铭之

铭曰妇而以节终也以启女之烈也天所合也母而以慈始也以启子之孝也天所报也辞夫子者垂五十年而后成会其貌悴矣心不异也歿十有一年而始安冥非故形矣气犹生也

李君元配张孺人墓志铭

歲在戊子鄉進士儀真李子祝以書數千言自通且出其詩詩工甚云欲訪余金陵以母喪未能也明年余歸真吊焉而李子追送踰廣陵而別余尋歸故里李子來出其所草行狀再稽顙而請曰念無能釋余痛將以母氏之地下累公既而復再拜曰家嚴君尚無恙也不勝伉儷之思亦藉公文以釋余憫而許之孺人張姓為城南舊族父縞娶于郁而艰子顧首舉得孺人生而娟秀貞靜父母絕愛異之擇婿而得李子之父曰鵠者少穎有文遂許字焉兩家相去不百武孺人居恒深閉奉女紅中庭絕履綦迹父戲之得非以郎家近故自閉耶孺人敬對曰女道然耳兒安知外事父益異之既歸李李之先世自沛用武功顯有官至閩帥者鎮真而卒遂家焉至李君而補博士弟子然其父與諸弟俱治賈來往市聲甚囂李君以其妨于讀也厭之孺人曰市而囂恒也大人貧安能廢賈為謀別築室于蕭寺傍謂李君第毋廢讀妾請竭朝夕之力以代君子職而是時李君之王母與父母俱無恙王母老而多患難事孺人精心奉之鮭炙鮮脆不取備而取嗜王母安焉君父雅好施時時責孺人施而不問所自孺人傾橐以應之或謂曷不以匱告孺人謝曰吾不忍以机杼之余而傷慈舅意姑故善病孺人躬調湯藥而進之旦夕吁天請代于是李君之學垂成而王母與父母相繼捐館舍孺人俱相君喪于禮然君必欲擇吉壤而歸之故弗克孺人居恒從與君殆為子孫計耶夫以逝者而求庇生者非智以生者故而不即安逝者非仁乃從近壤之便者而兆域焉子姓漸繁碩矣李君以病目謝諸生而父與伯兄有遺責可千金俱從君償孺人曰不可負也君雖未嘗得而其人實嘗失之乃鬻產以償而所負于君父及伯兄者將八百金多匱不能應或謂當訟之官孺人曰彼非欲負我也坐匱故語有之毋我負人寧人負我李君慨然為之焚券義聲隆隆起矣而家益貧孺人晨操夕息絕甘分苦以佐君治生乃稍自給會舉三子而長札與季即祝為諸生祝尋舉鄉荐君與孺人得寬然于家者垂二十年而為丁亥孺人已七十二矣屬疾久之革召二子而命之諄諄皆義方也時仲杞已前死屬其二孤孫于祝且曰吾不自意壽至此

夫复何憾若等善事若父且慰之无伤老人心遂瞑祝盖称孺人足不及堂庑而内外之秉悉其综理目不知书而裁事决策徃徃中礼法冥与古合大小臧获指以百数咸廩廩受束约而庭絶叱詈声盐米琐细皆操其盈缩而不尚刻核不喜诸子宴游而门有长者车乃更愉快乡之人曰信也三子即札杞祝有二女十三孙男四人女九人葬在某地铭曰李之先自武功今二世而始显于儒孺人为之妇为之母而相其子与夫噫岂不喆欤

但元配封孺人李墓志铭

余以万厯戊子由田间起佐南兵部而郎有但子贵元者奇士也其署曰车驾亟阙长则但子为之长于大体曙而又能文章时时谒余谓贵元次公太常门下士也当是时大司马阴公尤爱异之戏谓余次公安能擅但子故吾门下士也亡何吾家太常卒已阴公亦卒但子徃来两家亡间朝暮语及輒泪涔涔满眶盖余以报政至淮有命驰归始能哭吾家太常至秋中复还金陵诸旧曹偶皆来问讯独不见但子乃知其以母李孺人丧归矣未几但子捐书与状来其辞恳曰惟是所以报吾母者已矣敢藉公一言以为地下重又曰唯不孝之从事公门也则不孝之父母实命之而母尤切切且絮曰吾闻二王先生天下士也既已获幸太常则不宜失少司马阴公故汝师表也推阴公则大司寇陆公亦不宜失凡不孝所以不自弃于大人君子者吾母命也今已矣余悲其意乃为之许志铭李孺人者邑之石符里女子也王父荣经令椿父某母某生而静慧精女红荣经公时抚之曰女必贵谁当为婿者时但子之王父东泉公某为诸生祭酒荣经公尝过之饮欢甚见今封文林公友儒矫矫羣儿中归诧曰是儿真吾婿也东泉公亦曰吾闻之乡人李女淑而美亟委禽焉孺人年十五而归封公封公少一歲已补博士弟子有儒声为通人所赏识矣家不能无少孺人顾于妇事多晓畅晨夕候问舅姑安否退而理中庖治甘毳滫瀡身先诸臧轧轧机杼间以至井臼粗織无不秩然得所时时谓封公毋内顾以荒而学新妇业代子矣已而姑彭歿封公毁瘠骨立孺人相之哀复相之礼封公之弟某善堪輿家言既得地而卜之曰吉申阴寅阳奕世其昌嫂必有喆嗣乎孺人夕梦神媪以三龟为寿曰此元龟也纳之怀光彩陆离芴泽芬馥既醒而尚在目鼻也秘弗言唯益治方中东泉公既失彭而继万或语孺人万媪者不后入但门而乃称姑乎孺人曰我安知后我知有姑耳所以奉事之如彭不少杀东泉公有前母兄某母弟即某其庄兄犹父也爱弟犹子也则孺人之助多矣明年诞但子又明年东泉公卒封公之毁瘠犹居彭丧也孺人复一切相之亡何万亦卒诸妯娌有哭弗哀者孺人勉之曰舅以为父夫以为母而吾曹奈何异之治丧葬俱如礼但子在髫时已颖异有文章而封公困诸生久意郁郁不乐孺人乃语以夙梦而寬之曰神告我矣公之子必显重何郁郁为封公乃名但子曰贵元贵元之生十四年而始举仲子名之曰启元又三年而举叔子名之曰调元与封公交相慰曰梦有征矣于是益诲督三子后先以才着庠序间而但子遂连举进士谒选得蜀之

长寿令踰年以任剧调富顺二邑去荣经二百里而近使使迎封公孺人养孺人喜谓吾得一游其地问王父遗绩足矣竟以蜀险远不成行其后但子奏三载最封公与孺人皆沾天子命最后迁今官乃一就金陵养寻复归时仲子游太学而叔子与但子之子宗皋皆以诸生试高等仲子遂膺应天荐而叔子及孙不利孺人犹贻书但子俾召叔子责数之曰若不愧而伯仲也耶仲子不得志于公交车归谒封公及孺人不久孺人病卒矣但子故尝割股肉已孺人危疾至是大恸呕血曰使不孝得侍左右者股肉可继也而今何益矣闻者益悲伤之始封公读书不问家家悉付孺人手孺人能以共俭给封公而竟其志然于施予独不吝宗戚姻戚五服之内以逮闾左贫无宿舂者病不能医药者死不能殓葬者倾困以应之不给则脱簪珥以继之咸合掌以颂曰孺人固女中佛也然孺人独不信佛时时语但子既有孔氏安得更有佛人乃知孺人之慈隐毋吝盖天性然非有所慕习也孺人以嘉靖丙戌生卒以万历己丑春秋六十有四封公故壮无他但子既显重为京朝官而启元在公交车调元在学宫皆翹楚诸孙四人而宗皋者将与二父趾美神姬之梦故有征哉不然何以为孺人盛德报也子女婚嫁别纪于左墓在某所

铭曰共于舅姑共于夫宜其家人亦宜其宗姻母而慈复严而师其即安于斯佑尔夫子寿考维祺

弇州续稿卷一百二十四

●钦定四库全书

弇州续稿卷一百二十五

（明）王世贞 撰

○文部

△墓表

中宪大夫都察院右佥都御史竹岩王公墓表

盖钱塘有陈善方伯先生云则世贞丈人行也日而以书奉故御史中丞王公铨之志铭若传而投世贞曰王公于嘉隆间历宦中外为名臣而其按滇也则尝采吏民议举不佞于既废之后而扬之尝以有今日不佞且老而王公死矣念无以报公手志状而纳

之竊宮而侯次卿者为之传而不佞犹有歉然古者墓有表夫表标也标其行而着之石以使夫过者式焉其在吾子之一言甚矣陈先生之厚也夫王公以公举陈先生陈先生不忍于其身后而嚶嚶若此而王公世所称贤者也陈先生盖亦以公报王公而属之謏劣之世贞毋乃非所以用其报乎哉虽然以世贞之奉陈先生托而从事于贤者之身后则甚幸夫王公者浙之永嘉人也字子孝国初自台之黄岩徙不十传而有丁数千指显贵为京朝官比比而公之父炼仅起诸生为竹山教谕迁南雄教授以归教授公之宦竹山也公时从犹未娶间过处士蓝傥傥梦冕而过者众指曰御史中丞也质明司客无所得独得公见其状颀皙而益奇之遂以其所爱女女焉后封所谓蓝恭人者也而公遂隶其邑籍补博士弟子数试有声实久之膺选贡入南太学六载举于应天又十载成进士授莆田令未上而以教授公及母邹忧归服除补溧阳令入为山东监察御史按河东盐筴还复按云南寻刷应天卷满考赠教授公如其官母邹孺人久之超为大理寺右丞迁左丞进右少卿遂为左少卿推恩赠御史公复如其官孺人曰恭人寻以都察院右佥都御史出抚贵州而蓝处士之梦验盖垂五十载矣罢归里听调竟不调而以寿终始王公之令溧阳其土豪肉视单细而猾吏舞文为食公一切以严明破之虽贵势有力亡敢谤张者而时时慰问田野疾苦毋使困徭役上官往返供张草具毋所纷华巡抚都御史以是不悦公亦有所指撻而坐事被逮公得免又尝用持法平忤巡按御史几见中而察公廉亦中止公竟以令高第征矣按河东而其长鄢自台总核盐筴挟幸相重为威福所至倾帑公从容说之曰吏不奉行明公德意而以侈名归明公非计请小抑损之鄢语屈公手谢公乃勅其下鄢公不为汰取办具而已已其地旱公徒走而祷雨随澍所勾检宿蠹殆尽云南之世帅沐朝弼者自诡以宠王多纵客为奸侠虐使其下所难独巡按御史利箠之不得则孽之而公甫奉命便道过里则朝弼使使奉书以黄金数百它寶物亦值数百金贄公语之曰使而主以一束帛来敢不拜赐今非所以交际执法臣也既至而尽得其恶万状则稍取其客寘之理弗改则惩其家属又弗改乃具疏列上其状天子震怒为褫朝弼歲祿而陈先生者前以视学至数馆按察章与之抗陈先生之得归亦取朝弼中凡八年而公白其贤天子亦为之屈甲令而复官陈先生公按云南久旌廉吏惩贪墨踏豪侠恤孤茆扬主威德于万里外为诸方冠他善事不可胜纪而此其大者既满而朝弼饯之郊饮前行十余舍竟觉有物簌簌动喉下问左右噤莫敢言公乃自以意呼烧酒调砂仁而恣进之觉物下至膈复进之至腹则大痛洞泻生血垂为鳖形者数百千而愈左右乃敢言曰公天人也中此法不解公之刷卷手自稽核吏不得緣而纵舍然不为濫入曰吾非储赎缓吏也其为大理则平剂三尺所谓卖休买休曰贫民弃其妇惩之可而奈何傅之奸而辱之于司寇廷辨上是公着为令最后贵之水西宣慰安国宁戕杀诸父与王师抗廷议以公才而帅之公至而总兵安大朝已从诸道兵深入公继之不即平乃上疏自劾得请公一为令两按滇晋所至皆有赫赫名去而又皆肖祀之其调以非罪气力尚壮而自归后絕不通朝贵人问知公者不当要即当要亡肯为公力者竟不用公虽不

竟用然亦足以暴白而完其天于正寝之牖亦不为不幸也公性至孝为诸生时尝以夜游忧其父遂絶不夜游当父母见背业皆八十余矣哀毁几灭性老而及之未尝不涕沾膺也家遗产悉以让诸兄弗取布衣藿食不为贵改逍遥尚羊循物无竞与其从子副使叔杲大叅阳德年德差次祭酒于邑里有丈夫子五人诸孙十一人彬彬称其家公之贵而从少卿公南也盖时时念竹山云吾起家于是故署其斋居曰竹岩所著有滇南奏疏详刑议大学衍义通畧若干卷世贞故与阳德善而阳德之从季曰赠太仆少卿汝修者以直节死难显余故尝表其墓今复表公而陈先生之义附焉曰永嘉之王有二君子前后表之无愧辞

中宪大夫福建提刑副使少峯张公墓表

呜呼此有名君子张公之墓公讳情字约之学者称为少峯先生其墓也有志铭以幽且十一年矣而复表之公举进士历中外垂十政秩第四品矣而不称官皆德举也其所为德者何循于官长者于乡是故合而谥之君子也公之始释褐也得推官曰处州至而郡阙守即摄守即能遏其囂讼者量蠲诸矿盗用以无叛温多侵赋监司檄公往核公则囊爰书示之曰若皆此中物旦夕边障老革矣今而尚可为也众股栗上赋以食时报竟乃一切纵舍示县官德于是巡按御史王君绅唐君某劾荐公理行皆第一而御史有齟政高君葑者及最后巡按舒君汀俱以刻精深文自喜公名为见推重而不能得其意金乡盘石二卫相构株累数十百牒不解至连子孙狃以委蠹不成理而公探得其根第取轻刑奠之余徃徃从革舒君览而阳喜曰司理真理解耶然其齿断断亡所泄之而公应尚书特征且发舒君故稽之俾后期仅得刑部福建司主事二御史当察吏以苛细谪公事称之不介也其治曹见器故大司寇闻公时得闻公一言重輒移而公以母杜安人老乞便养改南京兵部职方司主事迁车驾员外郎再迁武库郎中公之为职方复以勾稽匿卒见器其长而所奉杜安人宽公养甚乐也寻以寿终公治丧塋脩礼既服除忽忽不欲出又二岁乃就部选复得南车驾公所职上供舟与营驿骑其累丛而官与民两敝公令毋广舟数滋民派而稽其实庀材务坚良毋使舟易败三老稍稍获完家营骑以时给刍足而马羸死罪在军不即征民马驿骑疲不给以它羨金偿之母独困其骑长而徐徐剂自岁以次第征补羨毋迫困民公行之久而留都士民能识公出则相指目曰此郎一何善为德哉而仅迁九江守公之为守也务以清静俭约为事讼庭草生没阶隶役织屨自给六曹吏鱼羹菽粥犹不继公时燕坐叹曰民不胜逞矣吾姑以拙相保耳三峒兵调征倭者所过郡邑多强市民物因而纵剽率杜闕遣犒而已公犹郊劳酋帅酒食其从卒俭而均北返有兵死者以文祭之咸感悦以相约束往来九江若不知有兵者公以寇警筑六门月城费取之渔陂之直而不以烦民客坐傍送迎例不过甌酒斗粟两算器食客稔其直弗恨也凡五载而始迁为福建兵备副使当是时倭寇岁躡闽亡完地

公提乌合一旅批之解连江围前后卤斩倭数百人兵气甫振而公以病瘁不支归矣其宦而循若此然公归絕不以所树绩语人故事南曹郎丧除当北公独仍南郎而回翔南北且十年又前以司理高第征不当守公仍为守守两入计吏与上考不当闽战地公独闽战地识者能得其自以公不濡迹政府无束帛钧金之馈以叩公公不答两台使者周公如斗温公如璋交荐之或谓可縁以起者公亦不答其读书自六经外精于闽洛家言然不树讲学门作诗繇性情发能为唐人调然不好从少年倡和孝友忠信出天性然不欲以事见得久而人始追言之其最所不能掩者廉吏声然邸易箠而橐枵然而后遽迹靡片言间也公真长者哉始公为缮部公楨次子出后驾部公祥缮部公有季子曰意先公举进士封公父如之更十余年而封公驾部公亦如之以是两无憾意之副山东臬与巡按御史争曲直手批之用是罢而公始成进士天下以直归意意亦能诗及别声然不善藏人臧否自公之为长者而名稍轩轻不佞贞少于公近三十年其转副臬与得请偶先公迨复出而公已捐馆矣中间公再以考绩至都下得相过从欢然无间公三子应文应武应忠皆玉立而诸孙中郷进士厚德博士弟子定安媿而有文时时从余游余是以能悉公表公墓而无愧辞

亚中大夫山西提刑按察副使苏山陈公墓表

当世宗朝北敌劲而南倭蔓中外之所注倚一兵部而兵部仅一职方是时苏山陈公由武库郎以明畧调长其曹上怵愤国威弱思所以张之而不得数下书督责而相严最用事其父子更因而导胁为奸利尚书博出行屯宣大而左侍郎者不欲言其名懦甚间从郎谒相严得小恶语輒股栗不能对诤而左顾郎云何陈公貌温甚口从旁徐解之退而叅伍其事体可否亦不一一徇也浙直大帅胡公宗宪有罪诏给事御史往勘之悉发其阴私事而相严意右胡公以诘左侍郎谢唯唯复顾公谓郎见给事御史疏不彼亦比肩而臣者胡断断牙吻乃尔公从容曰给事御史疏郎不知郎所疏乃正得臣之体而好掩败饰胜师所繇老此国人之所以皆不服也明日下廷臣议以临敌忌易将解始再诏兵部复议公即具草其畧曰掩瑕录瑜以冀后效者圣明使过之仁也据事论摘以惩不恪者人臣奉法之义也相严虽借以薄胡公罪不诛而不能有所加于给事御史会王直叶完既就禽相严子饱其赂微风公谓杀降市信公正对曰帅臣阴为媾耳非有天子诏许之谁任市信且自王直辈之首祸东南数十郡皆鱼烂大司农金钱埽之不足以奉战士今不诛毋以谢天下于是直等竟伏法而相严父子稍稍不便公秋警解委受金帛赏当迁为九卿而副相徐公以公文亡害荐视福建学政相严俱尼之仅以按察副使饬井陘兵备公至镇则敌拥众掠山后朔应忻崞诸州羽警旁午公整骑卒戍曲阳分部浮图峪紫金关蜚狐诸隘过宋杨延昭庙念其能训单旅虎踞河朔间为文纪之数徘徊祠下不能去所镇获鹿旱蝗亟发廩以赈露祷

于墮雨澍蝗尽死徙会持母吴太安人丧归吏民哭于道道几絕服除当补官而公之在职方而左侍郎者固已心愧公能又尝怒笞其司吏病创死公为谢曰郎不能教吏吏坐郎死罪且在郎左侍郎不能答以是益愧且恨公而当属大察吏左侍郎时骤贵以宫保镇宣大为流言中公于省台竟坐外调公闻之叹曰昔闻之三闾大夫世溷浊而不分兮好蔽美而嫉妬不量凿而正枘兮固前修以菹醢岂其谓我耶语家老亟营菟裘吾没齿矣始公十二治博士家言应试而学使者张常甫沔阳守李川甫奇之至携之署夫人加盥沐焉而劳之酒食曰才固不乏州得童士畴乃又得陈生何易也又十年所而举乡荐游太学益肆其力于古其交游亦日进如张少保治傅司徒颐尹宗伯台朱司空衡唐中丞顺之辈天下所推以为贤豪长者皆折节愿交公公于文章已追琢有声实而意不自恠顾时时取孟子王先生性善良知之说而心体之以证于邹文庄公守益程文简公文德相然可乃益自信圣人不欺我公之困公交车者二十有二年而始成进士其所射策尤见奇张少保以质诸相嵩曰此甲第褻然语也相嵩故拙拙之张公退而愤愤曰谁谓乃公强不能伸一陈生以故公每不获意于职方輒叹曰夫夫也难我非一日矣公成进士肄事工部故适大入传城而军公佐守城闉与少宰王公邦瑞值而叩故事公对甚哲王公叹曰经世才也公之繇选人格得兵部兵部一再徙而輒长职方盖守城闉始之也夫士生世以文事勲犹二端耳公翱翔其间大有人知之第知之不能用即用之不能尽显与晦相乘是若有物予而复靳之者最后公厌一世法而始极意于金石竹素之业世亦麴趣而悦之长歌短吟若顺风以呼碑板卷轴不蹉而驰四裔自湖以南亡不知有苏山先生者复谁能靳之夫此犹公自力云尔公之子文烛其辟公交车治廷尉正出为良二千石视学政董漕计皆蚤于公而显过之駸駸未艾也公以故气益发舒寬然不为家人生产而享素封之乐二十年而后终其终也犹折简召客为赏花会皆怡然悠然云天于公竟何如也公所著有见江南阁来青轩诗文选借山亭前集续集退乐轩诗选职方奏稿大业堂尺牋沔阳人物考数十百卷行于世其家行乡政珞珞饶懿矣与它感慨赴急气谊事非一详吴叅政国伦志生卒歲月世系内配子女孙详文烛状公之墓也其墓在某所文烛衔哀寓书币而乞余一言以表之余故辱公知而以文事善文烛故不辞而撮公出处之大寓之七尺之石而俾树隧焉曰是陈氏良也某以而张楚

翰林院修撰承务郎沈君典先生墓表

万曆之五年丁丑上临轩策天下士赐宣城沈君典先生为第一人授翰林院修撰而其第二人则故相国江陵公之子嗣修也沈先生既负国士材器相国得之喜以异日有通家子可凭而先生嘿嘿其间嗣修亦不可得而亲疎居六月而相国有父丧内意款留之而外廷以为不可然莫敢倡言而先生奋然贻书其客李侍郎劝之奔丧复遗书责言路诸贵人以不能匡正而李侍郎故尝与相国计夺情者发书强嘻笑而已言路诸贵

人愕然不能答而先生意未已复贻书嗣修谓相国为天子师表奈何弃髦纲常而弃之饱人以口实嗣修亦不能答先生乃与其友翰林编修吴君检讨赵君汝师谋各上疏请止夺情且属草而曰上即幸听二君子疏已足不幸不听则必且祸二君子我得以疏解之或有济乎不然是我曹自为名而使二君子无继也寻二君子疏上相国果恚而取中旨欲下之理先生知事迫复具疏大畧谓上以仁孝治天下必不忍夺宰辅情即不获已而夺宰辅情必不忍更以是罪言者袖而入长安门道遇坐主徐吏部诘先生所往得其故即请疏观之已纳之袖曰中有谬误可再商也吏部知先生疏上必重祸故以难先生不获请出而呼书疏者书甫讫则二君子与他言者拜杖阙下矣先生自恨甚亲为傅膏药啖以汤粥度其出国门即移疾在告满三月上书称狗马不任史职乞骸骨生还故里相国业已闻沈先生诸前事大恨曰我何负于天下而动鱼肉我若是纵沈先生归于是诸得相国心者颇以其所忌畏扬于人冀有以报而江南诸大吏则争钓奇欲以沈先生身为饵相国先生卧陵阳敬亭之傍筑一室溪水中两头贮书籍坐起唯意长啸自舒适有胡中丞者伺先生过亡所得得一不羁客罗致之欲使自诬共先生为妖言客至死不能染而相国意亦小缓先生乃稍稍憩息九华寻西游猗中陟白岳黄山泝严滩下罗刹江泛西湖六桥尽攀两高之胜已出语儿口挈冯太史开之访屠令长卿于由拳遂循娄水谒王宗伯元驭即不佞贞亦获从焉时元驭之女昙阳子道成矣属先生去而谓元驭曰向客来者何人不可失也元驭曰毋若彼之任侠何昙阳子曰侠者果锐而不顾滞此可以激进也于是元驭露之先生以昙阳子之化期来昙阳子且化嘱之曰人道修身圣道修神神在身中以有情为运用用情不用为修持凡好名好事分别是非一切种种总持善趣亦属尘缘先生寘奉之若头目且少负大志多奇梦梦再之上帝所有所遇至是益自信以神仙可立致而天下之事亡足难者然弗能遽绝耳目之好欲兼得之而客以异端进谓循此亦可袭而得道如悟真之谬注先生信之方自以为快而病乘间起矣会相国之子书报先生谓相国殊自悔不能以金马三尺地留先生使天下笑我且人生若隙驹不以时树勲业而坐槁岩穴为策得耶否欤先生心动且束装客闻之则争趣先生门周旋报谒亡寝食暇而病益剧已梦昙阳子趋之去又梦所奉关帅者亦趣之曰不能为斯世挽先生奈何先生醒而曰已矣不复有所为矣顾其子有则趣嫁诸姬之无子者而卒嗟乎先生前后所梦真耶幻耶岂幻者真而真者幻耶抑真与幻皆梦耶先生讳懋学字君典号少陵一号白云山樵其父少叅公宠为名台察敷历中外皆着声实而又好称余姚之学先生顾不肯帖帖一家言工属文亦不纯治经谊而旁通诸子史尤精于天文地理黄石阴符短长姑布方朔之术为人短小精悍秀眉媚眼便捷饶力善射步走山礮若飞以至跳丸弄钩戏马击球鼓琴握槊诸技亡所不习晓宽仁喜施意豁如也尝上春官不第则走之塞上长揖大将军与谈纵横畧行游猎出飞狐穿塞抵花马池而后归悉揽形势要害营壁堡垒目眺手画慨然有封狼居胥意暇则与六郡良家子射生取热血作生洛河倒服匿注捫马酒使胡姬剪头雏歌出塞吹觱篥而和之塞外客见者

谓是何吴儿貌而气凌我出佗父上数倍也先生家故饶以义散之挥霍千金不挂齿既为侠不已则渐窳而亟从他豪借贷以继或风之輒笑曰裴叔则何人哉损有余补不足岂所不解而从汝曹斤斤升斗如十三贾人子亦裨中死虱耳以故其赐及第日而贤豪搢绅甲冑下至剑客酒徒亡不扼腕言国家必有异祲乃得先生而及其归亡一鸟散者出则益麇集而至于死相率悲惋而呕谏之州里远近不问识不识咸咨嗟叹恨其不可作而族戚之受恩偏者为之恸哭欧血独其家窳益甚诸受责者以券来不可已而欲从受责者偿之抱空券而不尽可迹矣先生之诗与文不名一家而纵横捭阖徃徃出人意表人亦喜称之而不自留藁草与先生交最厚者屠长卿已为之传甚详而汪司马伯玉使来言谓先生近游馱有金石诺我当任其幽而子任其明可也于是有则以长卿传来请表墓忆与先生游微征庚辰事先生不尽答而赵汝师尝从容言之与先生初同志者管登之复言之余因以益信先生之为长者而尤惜其死之早也老子云死而不亡者寿自寿也夫岂其叔孙氏之所谓三立而已盖必有真不亡者惟晏阳子知之沈先生之不亡吾虽畧得之而不敢以表先生墓姑取其应迹之似以志余惜而已虽然先生岂以余惜为信然哉

赠资政大夫南京吏部尚书南图赵公墓表

余宦游楚而及事今太宰赵公于中丞幕府也盖尝为其王父赠公歌董村小隐云夫胡以歌董村也公故世为济宁之南图里人属歲侵拮拾亡所得乃奉其母刘携息弟而转徙汝阳行游至董村爱其土稍沃而民风龐茂因家焉其始颇受税隙地躬先为力作稍贏十一而息之以是家渐起而所以荐母刘甘旨日亦进息弟之依公及长挟母而为敖公所以柔爱者有加久之愧悔能助公为家母刘病公于医祷毋所不致及卒不顛为戚塋以礼于是人人益推公以孝弟长者而公之始耕董村也有二姓者故豪而侨视公加侵侮焉公如弗闻也见必恂恂恭谨人或谓公何故下之夫侨者弗自振弗树也公谢曰吾不知吾侨与其人顾吾自牧当尔寻二姓者亦愧悔折而与公交至通姻好不絶公虽已起家董村然犹念其故南图里不已因以署其斋乡人亦称之曰南图翁南图翁公之卒寿七十有六举丈夫子五人诸孙十余人有贵为崇之中常侍者能得崇秉业益拓而少子某以信谊称子即太宰贤太宰之子进士寿祖王子曰当余之歌董村也中丞虽显重格不及赠公犹称处士云十年所而处士者称副都御史矣已亦称太宰矣天子为颁五采之纶所以褒扬公隐德不一而太宰公犹以为谦于志因即公葬所饰棹楔弘隧剪棘而置丽牲之石且属余表之嗟乎公之先卿士夙佐晋而伐霍启耿以有成季宣孟世世光辅乃其自周而徙者叔带为晋始今公自济徙实为汝始也当晋时叔带之有名位显异不可知今太宰暴起诸生贵重至追赠其先二世俱上卿毋论太宰材视夙孰隃公于叔带不亦显融有光哉夫予言则何足以重君子公讳某字某配某有隐德赠夫

人

上林苑监嘉蔬署署丞守西沈公墓表

当嘉靖初而故左给事中沈水西翁数上封事以伉直通国体闻最后言益直至触上怒下诏狱榜讯濒死者数矣于是翁之子署丞公嘉谋诡楚服入侍翁于血肉狼籍间旦夕浣濯传膏药共汤饵凡二十有七日而出狱得不死乃顾谓署丞公曰而吾身也公盖甫踰冠耳于是水西翁既罢归不自怪稍稍放意山水而又好客客至輒留亡问供具所自署丞公殫费力而从事水陆之珍与耳目之玩集不必时产不必地盖竟水西翁身无一日弗适者而是时公为太学上舍属文有声再试不利輒弃去曰吾翁不获奉吾君而归我何忍倍翁出即出谁与适翁者因署其斋曰守西以见志焉乡人人称守西公真能守则又曰水西翁有子矣水西翁以老寿终公哀毁备极既侍其继母俞太孺人依依不忍违者十余年而始谒吏部为选人三事诸公有知公从水西翁狱事者慕而愿交公公又善冰鉴诸达官贵人来叩得失踵相嚙公人人称为称别悬契无爽故太宰杨襄毅公父子与后太宰阳城王公尤善公至目公曰令唐叟而吾子必不失刚成君而公退而自守泊如也杨公时领大司马有将家子微知之橐千金求公为地道边任公恚却之曰奈何以市人品我公之谒选得上林嘉蔬署丞笑曰是将使我不茹蔬益自约为毋染而馭其下则简易尝行署于它室中得露椽十余具亡主名为设薄酬而葬之已满考念俞太孺人七十因引疾予告归奉觞为寿尽欢亡何俞病卒公少于俞仅十歲所而持服易戚如礼诸丧葬费一切不以累弟侄独身任之服除意且倦而会先帝初御极下书褒扬言事者而水西公超七秩而进太常少卿又赐祭公叩首谢上恩已复哭于墓而曰吾今乃知臣子之愿毕也遂不复出而公有子封君侃能读书治生约畧如公之奉水西公二孙吏部郎璟乡进士瓚少美而文公奇之以为必贵每试则躬挟之曰毋使轻墮少年窺也盖及瓚之登上第濯濯郎曹矣公性严静晨起必告天以日所欲为朔望具衣冠拜家庙私忌不预宴会听声乐以为恒其于财能礼积而义散之尤厚舅弟孤侄为损橐树家室矣公尝舟行至湖而遇龙起摄公舟空中耳若有闻者曰夫夫常阴行善帝享之矣必护之俄而徐堕水无它公归因悉取细民积券直二千金焚弃之谓一介琐尾何以当上帝知割贪而为惠庶几报哉郡邑巨寮闻而益重公业乡饮则争延公大宾公谢惫不任既而曰小善也何足齿且行而使人知之非阴行也公既谢计然筴不为至生平所好奕亦厌弃晏居深坐焚香展黄庭经而已既病弥月且革精爽不乱呼藏具阅之而瞑得年七十有二娶于金少公四歲先五年卒子孙婚嫁皆名族语具志中呜呼古有变服为狱卒以脱被考者独行之士于其府主能之焚券而不责偿徒手以报者谊侠之俦于其因主能之而况公之于其父于其身至亲切哉则亦岂甚高难能哉乃至上感冥冥而下啧啧人口者何也盖末世所希覩尔藉令让耕畔郟遗金于西伯岐丰之间者奚取择也神之

相之不辱鳞虫逾施逾赢既穀且丰孙枝虬腾蔚为时宗天子公何如哉余始与公遇巡台幕公谓余可八座差不酬而又以余有道气足教至于今心营营然窃因吏部请特表其墓以劝夫勉为善者

恩例冠带卓见斋翁墓表

余与光禄署丞卓明卿游而明卿实托余志其母氏三十三年之墓而曰吾不忍竟死吾母也亡何其父见斋翁以寿考终而明卿始谓余志之已而泣曰孤欲使七尺石翹然而标于松楸之间而过者人习之不犹愈泯泯万歳夜哉余乃曰吾不知而母以而知而母也今者乃以而暨而母知而父其友叶之芳曰不然当以卓翁贤知澄甫可也于是读明卿所次行卓氏之先显自侍郎敬有复初公敦者其从父弟以侍郎抗节故跳而为塘栖赘塘栖之赘盖自瑞安而奉化而山阴三徙矣遂为仁和人卓翁之儿时其父行贾齐鲁间不归则已能事母某把持门户矣稍长从师受书以颖悟强记称垂就而父竟夺之贾其能计母钱出入子息析秋毫迹若累纖微起家者而实廓落不喜为钩距干没嘉隆间歳大侵卓翁悉出其储粟而贱棗之又煮糜啖饥者而棺死者人或谓若储粟之谓何卓翁曰吾所以储非自封也东家闭出饱欲死西家闭入饥欲死吾衷其间足矣于是邑有大徭役与非时军兴调輒推卓翁卓翁为立应而它所散以气谊为百金者不訾数又别规皋亭之麓以墓其王父母父母身所树庾田宅割而推诸息弟咸极所欲诸息弟旦夕朝犹家君也卓翁有所置媵举子文卿其后夫人某举明卿美而材卓翁时时抚之曰儿曹知卓所以徙乎即不能如先侍郎毁宗以殉志异日操觚管时公交车拊循郡邑吏民而修太传褒德侯之业隆隆振家声即不及而吾挟素封以老而人笑此饱蹲■〈氏鸟〉公沙为者我何以瞑目于是二子咸感奋读书文卿举于乡早卒而明卿益博通古文辞繇太学上舍补大官丞待次郡国守令为明卿名高故市牛酒请行明卿得交欢卓翁又推台格奉冠带已又春秋礼致之乡饮宾卓翁为一应之即谢弗肯再曰宁吾任哉卓翁既用高年着名义画策善断居傍邑无遠近咸取裁卓翁得一言即有所不可亦强为解而卓翁度其且解輒去之曰郭解一侠魁耳尚不欲操邑贤士大夫权今乃以污我卓翁姿癯而清善步履食酒温克好为诗明卿之为诗以风格着而卓翁顾取适情兴近道理时时取宋儒先生遗训笔而列之座右然间从衲子方外游大出警建大善禅寺葺永清庵两佑圣院造里人桥者二人或谓卓翁故为福耶将市义耶笑不答自是人能贤卓翁不能得所以贤盖年七十八而卒有丈夫子六人诸子女婚嫁皆名族嗟乎自余之不别治生数宦削产今覩卓翁于财义聚而义散之其散浮聚者数矣而卒不削是遵何术哉余既不获问卓翁姑以明卿请表其墓愧世之齷齪溢钱愚者

●钦定四库全书

弇州续稿卷一百二十六

（明）王世贞 撰

○文部

△墓表

怀石李翁墓表

李氏之先为昆山人而业儒高帝时昆山之占儒籍者首卢氏而李为第六家时以比故中原卢李二姓云有光禄丞某者生七子长易州守其次道州司训某又次为兰石公某饶阴德应乡饮宾有二子而公其季也讳棠字某少治经术有声而夺于病弗竟就因傍晓轩岐家言不复称仕进矣而郡邑之习经术者争延而致之塾翁素贫食窶于家而自师道成则徃徃致美以养兰石公寻歿恸哭且灭性筑庐墓所者久之乃自号怀石曰棠也尔忘而父之为兰石乎是时独母潘在因推父遗田庐器物以归伯氏而奉潘居外箸益精匕筯以荐潘甘之曰几使亡有伯也亡何潘亦歿翁鬻外箸以葬亦不以烦伯氏邑里人咸称李氏子孝廉孝廉当是时翁弟子虽日益进然其馈不过修脯束帛以其訾画什一小具家而遽好仁义急施予既习医则多储药以活贫者岁饥道遇殍未及殊扶而返之舍食之肥而听其去不复问如是至再三曰吾自行吾不忍耳不以为彼德也一日自吴门归而舟之旅窃其橐金去或曰是可迹也翁谓人固未易迹籍令迹得之彼何以具面目天地哉卒弗迹也翁虽夺于病不获用经术显然中不能无望之而有子同芳其治经精甚又工属文教授诸弟子所荐十倍于翁时翁乃徙居城南筑精舍杂蒔卉竹环之稍稍斥买古图籍酿清醑不复别择客至则留与乐饮欢笑穷旦夕以为恒而会族有争墓壙者中翁父子以危法寻白会其人暴疾得死子亦死翁遗其孙金俾葬壙地傍而筑室以居曰如是而死者可瞑也故居为邻恶少年所睥睨每雨輒更版筑而侵焉翁弗之校其后伺翁避岛寇入城尽掠其藏而火之事发翁亦弗肯穷治已而同芳拔萃高等入太学举乡荐最后荐于南宫为第二人廷试唱名复高第报至翁始大喜语所亲吾愿毕矣已而涕洟淫交于颐曰先君以属我不能得之我我乃能得之子何以毋膺地下也亡何同芳拜尚书刑部主事使使迎翁至邸中养翁欣然曰野人生不识长安何状当一行至邸比部手选酒炙而盛服进之甚乐也一日忽讴吟思归曰吾生平游不能过

数百里而今者渡大江眺金焦歷徐沛邹鲁之墟得纵观天子宫阙壮丽车旗冠服之盛吾愿饱矣不归者且寒我鸡豚社比部长跪泣留乃曰先塋迫水而堤善溃西关堤亦善溃溃则侵里今歲月离毕多雨吾弗归弗治也于是径归鳩工石益二堤堤成而翁疾矣翁之少时屡病行百余武輒喘既自为药则渐强中歲益强半日徒步五十里不告疲也晚而病湿胫弱几复如少时尤畏接豪贵人多谢不任邑礼之乡饮亦不赴而于其吊丧问病唯谨乃至故人酒社强自力赴之如赴尚书期也病脾至革憊然顾比部之弟联芳曰强为善而已毋累而兄遂卒得寿七十有八翁生平倜傥敦信谊不寢然诺治家肃而不苛雅善吟咏时时集古方有刑家百咏原病治效诸书藏于家元配高天继王安人其出为名族淑而材相翁于窶以俭勤先之上奉母潘而下训比部兄弟靡顷刻懈翁得以安于他塾毋内顾忧乃其为德也则时时怱患焉方族人之争墓壙也安人病心痛卜者谓崇由墓必直之官翁将从之安人曰以我故而与族閔我生不如死乃已盖前翁卒之十八年而捐馆毋论比部痛安人翁老而与比部及之未尝不泫然也嗟夫俗之敝久矣强者以贵力相高饶者以财自娱然犹未用为足鸡鸣而起孳孳焉日修其睚眦之虢夫其炽然于中而焰于外宁复计子孙哉李翁之贫不惜施施不责报念不及仇善不近名此其为长者故天性然身寿考而贤子继之抑何县契不爽也语云树德务滋譬之卉木李翁植之王母溉之其不芘芘茂且乔者鲜也翁固行圃而叹翁之叹盖叹树德也余固表其墓俾过者式焉夫岂直以训李之后人

处士乐耕侯翁暨配丘孺人墓表

今按察副使侯子尧封将之楚而谓贞曰不佞尝以御史奉节西南行万里外即郡邑守令以民间孝谊节烈当旌请者而非所專任未尝不心仪而獎许之及再迁佐全楚藩臬周行咨諏得田里一善事未尝不津津笔舌也天下之为德而显者则有显者任之今夫隐德犹之乎谷芬也虽顺风而加扬未易传也不佞是用以沾沾乃今幸复以使事还从邑大夫具牛酒上塚而我先奉政公之焘履隆然崇矣归而奉觴觴我百歲母太宜人是二尊人者皆有天子之制词所以褒美宠灵之不一而足而独王父母之塚伏草莽也恣恣垂四十年矣在幽宫者不佞之辞且与土相蚀也不佞是用以慄然若有负而君子将病之曰舍其田而耘人之田以吾子文而中自废不任显则非子之托而谁托于是侯子乃言曰王父乐耕公者讳璞其先世为嘉定之蟠龙江人父曰守常公有四子而公居仲凡三子皆蚤世其遗孤一二弱而守常公之养子曰徐端者壮而得守常公心既冒侯姓且擅其产时守常公父子皆前逝独公在居扼腕不自恠曰吾父宁食于徐而归之产且我何以见先祖地下于是公之妇丘长于公六歲矣而贤与谋之而丘曰彼固少尔易尔毋如我衷何虽然盍请之乡三老乡三老则已入徐端润曰吾不能从汝庆恤也公恚甚奋身直之邑令而徐端者微知之赂邑博士为居间曰产于端受差当既两造公争

之强令怒囊以三木公伺令出入即号呼曰不腆先人产使子任赋他人子任享如天何令不得已为核而归公自是公稍稍立矣其于徐端所以问遗伏腊吉凶慰藉如兄弟无间曰为大计不获已吾安敢遽死吾先人公既能自强里中人稍稍归称之而顾以温易佐其直生平无失色酬酢有一子廷用即奉政公以公称乐耕也亦乐之不及治制科业晚举不佞而材之亟谓奉政公曰必教儿吾向者悔弃汝耕今可再耶诸所以佐不佞膏晷费不得则王母丘之机杼若洗矣不佞试而小利公喜见眉宇其不利为柔声以慰勉曰汝学未成乎夫士学成而后可言命乃语奉政公儿必贵吾老不能待耳既疾病呼酒与宗戚间左别谈笑衍衍而逝公之卒得寿七十六而王母丘以伤公故属疾然又久之始卒寿八十六盖奉政公时时抚不佞而叹曰而卑此数椽乎微而祖谁与有此室也微而祖母谁与安而祖此室也夫岂惟弗有室即侯不斩焉且他邑矣非侯者侯此土矣盖不佞至今犹在耳也乃不获比与所按节地心仪而獎予之者何也世贞乃起揖侯子子之王父无它异能然不失乡长者而功于侯甚大子之王母功于王父甚大请笔子言而勒之墓隧之石

陈烈妇林莱墓表

林莱者故大叅公舜道女也其称陈妇者何死而妇于陈也其称烈者何以义死也名莱者何大叅公有三女长曰瑾季曰仁而仲独产于莱之文学官舍故以名也莱生而婉■〈女恋〉共女职而性尤孝友母病目晨兴輒以舌舐之及除而后已林公尝夜读书至孟子死徙无出乡章莱傍听之请曰此为何书也而若有意者林公为训所以则曰彼犹疎也而戚今夫家室之内若姑妇姊弟妯娌戚而疎者何也林公曰疎而戚者古人独然耳女曰必古人而后为人也耶林公亡以对则谓莱母识之是必能以伦节显彤史亡何长乐之御史中丞陈公省司金华理而林公时令仁和同年复同好壤相接也有子曰长源与莱庚相次才貌相当也遽委禽焉最后六礼毕莱行去林而为陈而长源以读书过瘁卒长源美而材林公伤之恻莱闻乃叹曰陈生不起哉业蓬首削脂泽称疾卧床第间其哭不声而神伤且曰吾其死矣人或谓之汝林而陈耶不陈不成妇汝何自死莱怒曰谁谓不陈而以余之名氏歲月饰而楛之以归陈则余既与闻之而忍自昧固请林公得礼赴于陈执妇丧而后死之复寄声陈公治而仲塋者容棺之墟必两其廓乃可林公日使女瑾与仁百方慰解之咸报曰夫莱犹石耳是可碎不可柔而转也林公为贻书示陈公时陈公有母之丧而林公亦有母丧则相与谋曰以凶归所不忍以好归畴与主之姑俟丧除乎俄及替莱大悲咤曰得无缓我而觊夺吾向乎遂不食积七日呕血死陈公怜而以书请林公为合塋于岭西祔其姑庄孺人之兆而志之于是闽之荐绅士人俱哀而诔之叙之或曰莱女也而妇其行者何居或曰林之淑也非陈淑也有父母在不成为陈也吴郡王世贞曰善乎吾师昙阳子之夫徐生而拟殉之也谓其父以不食禄者非

王臣乎哉夷齐不禄于殷而为殷死李业王皓王嘉不禄汉而为汉死王裒不禄晋而为晋死周朴不禄唐而为唐死虽然彼犹计以为无所复之耳陈之币在林而林之名氏生歳在陈则几委质焉然以殉父母则孝也以殉夫则烈也孰得而持其后嗟乎烈士死君烈妇死夫死而守其是者恒也然而犹知有所谓是也死而以名死者死死而以情死者死十固不无一也莱一女子耳非有讲习闻见之素是二端者不一与之其黯然而天真其惺然者良知哉则乌可以无表是表也以不佞之污而陈公乃有取焉虽然非莱志也

上林苑蕃牧署丞见岩王君墓表

王君者故南京礼部尚书郎九岩公表之子而国史编修尧衢先生立道之舅弟也君讳望道字懋及其自称见岩者则以九岩公故始余年十七而侍先恭人北上与尧衢先生遇于工部郎中张公官舍先生甫三十余清贵凝远有名士风居无何而卒及余年五十五而君偕其夫人胡氏来谒昙阳仙师羽化之旦以间过余则一寃然长者也与之语靖而温与之酒直而不乱久乃始知为先生舅弟屈指三十九年矣相与感慨泛滥不已自是君歳必一来凡为歳者四而忽不来怪之则君物故矣当君之盛时不独有贵父兄而仲父兵部公业仲兄鸿胪君重道皆蚤贵君又以少年补邑诸生升太学上舍经术之外能为古文辞又从故唐中丞应德薛学宪仲常游二君世所指目以为冰镜者其试太学则为大司成咸安王公所赏识世固不敢以一第尽君君自视亦以为不足芥拾及其再试而再不利忧患乘之则国史先生卒而九岩公痛之亦卒独君与鸿胪君在当析产君泫然曰孰与吾兄之夭而遗孤藐焉也则又曰孰与仲居之拮据也于是产独取其瘠僻者寻议役则独当其繁者其所谓繁值倭至而城其邑则又难城成而君顾居郭外大盗又入其庐掠财物去已复倭大至君仓皇奉其母入城而身与鸿胪君攒九岩公墓倭又焚鸿胪君之墅君悉以故第让之而别筑舍久而鸿胪君亦卒君之少弟亦卒其在者唯母朱太夫人与君耳太夫人八十余然尚健匕箸君于荼苦中能破颜色以慰之务得其意而薄俗见君家势去尽以为奇货可居君侃侃自立而待之以忠信所娶顾夫人早夭而胡夫人继之女而男子公恃以益纾家亦益振属资积选部朱太夫人强之北曰若纵不能望先公时使及我而齿朝籍令我一覩冠带儿不亦快乎君依违久之乃北属太宰杨公博抡选及公而识之叹曰是同年生客部子耶见延祖令我思叔夜授鸿胪寺序班尝奉部符赍金淮漕院以清白不扰受漕使知归而谒吏部为太宰张公瀚国史先生所善同年也尤器君时语人司马家小弟故当胜伯达擢上林监牧署丞署沃而所进饶吏縁为奸私君痛厘之皆洗手而治民有以歳例入赂者君笑曰岂以我资郎而溷我不畏貽先世清白羞耶叱使去一旦念太夫人老病上疏乞休而为上林令所尼寻太夫人讣至号踊几絶其治丧一如丧九岩公而加慎焉服除遂不肯复出君生好读书其于制科业尤邃居谆谆诲二子毋以我不第而易我与人交不为鳞甲客至輒饮饮輒醉

醉酣耳热无所不肺腑客过君所人人自谓坐春风中也胡太夫人端靓善玄理与君相庄爱至老其子化传蚤卒而存者诸生化醇上舍德醇议墓公而请于胡夫人乞大学士王公元驭志其幽而谓不佞表其隧嗟乎君寿六十有七以此六十七年之中而荣悴百变若云霓造物者之侮君甚矣而君以坦承之以慎守之变有尽而真我见以仁义附焉高朗令终呜呼难哉是宜表

封征仕郎礼科给事中懷节陈公墓表

陈氏之为陈也其大自故太保僖敏公鎰始僖敏公昆弟凡五人而最少者封御史公铸铸有子御史公僕僕子浙浙子桐是为仰节公凡二世稍屈而医亦不废儒居恒邑邑谓我不废儒而医夺之卒不获用儒显盖晚而举公小时颖敏甚甫数岁母周见背柴毁骨立如成人仰节公授之书輒诵授之文立属抚而诧曰庶几祖武哉而公益以孝谨得父心离外傅而趋左右侍时寝熟至夜分醒而顾公瘦形兀兀床侧矣恠曰若尚未去耶乃去以为常仰节公歿公时甫踰冠莹然支床孤也而宗戚之侮乘之公私百罹忧及废廖竟以是废孺人或风之安能坐槁将什一是息公叹曰使我握锥而从市人子以是生何颜奉伏腊之酬与其家约男服外女服内毋浮食而已会有子给事煜自髫龄时业已见头角公日课之书习已属文则益奇始一破颜曰吾负吾父赖有此儿以解耳所以教督之益力即倾橐而资束修弗恤也已而给事连擢进士上第授行人使衡藩便道称觴为寿公愀然曰使者里锦荣乎吾闻之不辱君命之谓荣给事奉教唯谨寻以课最得貤封公阶修职郎亦行人已给事拜今官遇两宫徽号恩封征仕郎职复如之公顾贻书戒给事曰公侯之后必复其始信哉虽然贵易骄也近易濡也慎毋蕙直毋讦和毋同有先太保之台纪在会给事复使代藩归守令具牛酒日为寿客亦益进咸谓公可极意而究当年之欢亡何病中满而卒得寿七十有一公性素恭谨动止淹雅有度尤不喜上人恶少年故突门入恣詈甚口冀公应之以为讼端公戒左右毋輒应而躬揖之上坐温言自克责竟不能有所答出而语人吾愧见长者遂亡去家人有所市物必令小浮其价曰彼不得息何以食也其微时出入凭一苍头委蛇迹可数贵而亡所变益浮沈里社门亡少长贵贱与讲钧礼于是人人益称公长者仰节公捐馆公时已过六袞而公自谓少不恒供奉因自号怀节其悲母周尤甚每语及未尝不泫然涕下也歲时家祀必腆洁如事生祠舍洒埽恒手任之谓此何事而可使力代哉其治坟塋滋拱木修丙舍亦不以烦宗党晚节好浮屠老子言所赈贷缓急肉枯死生不告橐耻然不以之施土木及斋醮曰吾与其慈悯清淨而已不为罪福计也既病渐革然犹自力冠栉危坐如恒时给事跪尝药而进之却弗御曰药能生死者耶则汝王父母至今存耳许夫人问何言曰有儿在吾何言倏然枕给事臂而逝王子曰吾观夫陈而知夫复始者之不易也盖斤斤者三世矣以经术播种而益树德以滋之语云是穠是褻必有丰年其视任宣之窖粟樊寿张之植漆

不亦大径庭哉陈公之为长者毋以通塞变至临大故而不慑不殫要其中有以胜之矣故因给事之请而为之表其墓公讳某字致甫其详具志传中

赠承德郎礼部署员外郎事主事鱼山郭公■〈既上皿下〉配黄太安人墓表

鱼山公之弃宪使君也盖嘉靖之甲寅歲春秋仅四十九云而是时君以闻喜令高第入郎户部转祠部痛公之未及封请于亢太史思谦志而铭之已进员外郎公始赠赠如君官其又二十二年而君母黄太安人始捐馆生得封矣且寿考矣于耕禄养无憾矣而君之痛之如痛公也李中丞邦珍志而铭之而君意犹未已又十年而思所以光昭公与太安人之令德遶海内之士能言者得其同年王世贞而具书币走使二千里访之山中曰不孝有七尺之石树之隧旁以丽牲而藉子以不朽余谢不敏则闻公少时儁朗负奇质读书日诵千余言受易乡先生娄东而不得其旨一日奋自励曰将受之人耶受之心也闭门精思者踰年而霍然大悟出试于有司輒为诸生冠廩学宫其父某翁喜谓公母某夫人曰吾世世勤力共县官粟今县官乃粟我矣公居家以孝友称亡何母夫人痛疽危甚欲决不得公为吮之至再三毒且既痛止而夜有羣盗厉刃而瞰公室者公觉之走业已脱矣念某翁醉不能起复入撼之醒而负之触户限僵刃几及背矣强自力起竟以某翁免初某翁之器公甚为择配于邻邑得嘉祥黄贤之息女而委禽焉是曰黄太安人母李方姪太安人时梦所事佛啮一指授之曰与汝孝子母李喜谓必男子也既养而女以为不验然太安人少即烝烝孝喜读佛书矣既归公公时淫于学不复能顾家秉太安人代之其御臧获数十百指肃如也奉舅姑修礼容而后荐饗殮甘毳之味不絶口迨举宪使君而海之谓严父慈母何常之有公海之甚则太安人以慈抚太安人海之甚则公以慈抚盖踰冠而宪使君之学成公携试省业先公获儁公以君所飧馐蒸果实之类奉某翁大哈乐抚公而曰吾儿得之不若而儿得之也既连举进士某翁益发舒公亦益自喜谓可以道子责矣而独念某夫人不逮见时时陨涕渍枕席间前是某夫人卒久之某翁亦卒公与太安人后先專精医祷调棺敛治窀穸咸备以孝笃称里中其外家征母李梦始验宪使君之官闻喜公忧其少不习吏强与俱教之均徭役息讼沮禁奢侈三月而一切治理流闻公谓君吾不虞汝矣归而庐某翁之墓傍谢絶交际郡邑守令有造庐者公无词组及私去亦无所报谢以为恒太安人之哭公也几絶矣已强食息曰有二孤在于是宪使君委家而听太安人太夫人屏去珈■〈王帝〉翟褙之饰攻苦茹淡以勤俭率先其下数从宪使君宦游管钥出纳斩斩有绪裕而喜施宗戚五服以至闾党无不食其惠者乳母杂佣至死不忍去郭氏门中丞有云漆室缙紫令女也而无闻于妇伯鸾淑妇也而无闻于母公父孟母喆母也而无闻于妇若女备之者独太安人哉人以为知言公讳囊字隐之鱼山其别号也所谓二孤者即宪使君名东藩其仲名东升孙男子十人曾孙二人呜呼以鱼山公之才而不获伸于子又不获久见之太安人久见之且

有其享矣而不获偕公以享造物者之不全予人以丰若此虽然视世之才而泯泯无闻且无后者又何霄壤也余故推宪使君之志而表之且使过者式之曰明赠公郭鱼山之墓黄太安人女而妇而母之皆贤也于法得附书

孝廉何次公墓表

余前后所为碑志于海内几遍而徃徃多卿大夫之业即岩穴隄半然不能超文苑而上之故不至匿肭色于笔墨间而孝友忠信之士如古所称述者盖亦渺矣钱唐陈丈人善笃论君子也其状何次公事行使人跃然而思执鞭之效故为之表其墓曰何次公者名论字士明丈人之同邑丰宁里人也家世世树悖至其父景华益不替娶于龐生三丈夫子次公其仲也生而有至性方四五歲时得所分鲑炙不食而藏之至夕以荐父母奇其意为一举箸稍长读书至古人忠孝大节未尝不掩卷深思也甘毳之奉不欲均之伯季曰是当户是治爰书业浣濯扶掖不以借仆役曰吾力能任覆〔唤庖露虺并呶龔噴轮玃u其壘不恤也迨于调棺敛理丧事浸淫至于妇簪珥矣或谓古不称家有无哉次公曰吾安敢望古吾所以报吾父仅此耳负土治塋与佣伍杂作不休既塋攀栢而号哀感行路以母氏病弗克庐晨往暮归蹙蹙途道间尝冲雪而僵遇所知掖之返又尝警于虎不为动晨起必吁天为母请寿考所以娱适之者百方歲大侵与妻子杂采湖中菱芡共半菽而饭朝夕上食列簋如故母不知其为侵歲也盖甘次公之养者三十年开八袞乃终次公亦白首矣哀毀如其丧父时不少杀次公之治生非有他术而以俭勤率先之家大小无坐食者以是南亩小拓伯氏困于疫陆死次公躬护而起之不以染却余田庐輒推让伯氏俾称心居之伯氏死无子而次公与其季仅一子乃命其子兼称世父勿絶事丘嫂曲有恩礼季补郡吏待次铨部为经纪其家且时时致橐曰毋内顾也或风之润屋者次公愀然曰吾祖考之未妥灵而敢为身计乃创家祠伏腊享献如礼买二地而封树之以归父母族之贫死者邻舍圯次公捐橐以葺吾庐乎且为义而利収之人不食吾余矣为地道它售俾得善价以去家故有井辟汲道以资来者义声隆隆然起矣少未娶有诱而狎邪者次公正色曰男女一也吾失身于女而责女之不失身乎哉盖自是终身无二御矣次公虽夺于养不获究经术然徃徃能涉猎大槩有所得发为声诗直寫性真不颯为藻如咏牛山木求放心观书诸什学士称焉怀思其亲赋乌夜啼成而自歌之泣数行下邻里为之凄惻邑人娄讎其令去官次公叹曰是不可长也夫亲虽不慈子不可以不孝乃上修礼乐正天道六字于监司郡邑其辞极剴切陈丈人载之郡乘中盖次公老而益笃于学有家规心训二书其言生人之则详矣三老诸生上次公行于二台藩臬下所司旌其庐赐爵公乘次公慚不出曰小善而使人迹得之何以善为生素强寡疾感微疾即为辞世诗十章寻愈又四歲而疾竟不起呼子守愚教之行谊已诵所为诗倏然而瞑得寿六十又五子一即守愚为郡诸生守愚子四人而养蒙亦为诸生有声曾孙男

女振振未已嗟乎以何次公之行谊问学使遘东京时三府之羔鴈纁帛当麋集于里庭而乃厘厘一爵自连帅所哉上之待次公诚鹵莽然而亦足以兴也夫钱唐东南一大都会也其俗杂五民而居父子槿藩而处兄弟炊烟不相通儂巧狙使之习极而何次公力挽之陈丈人为之状而表自不佞始其人有不认然返厚者鲜矣故曰亦足以兴也

吴贤配雷胥二孺人墓表

吴国贤曰歲已在己而妇雷卒暨甲在戌而继妇胥又卒盖六年之中而哭两俚且贤也今又十五年矣忽忽时在不穀胸臆间寐则彷彿眈眈矣不穀自从事觚翰即服膺厯下李先生次则武昌吴先生与吴郡王先生三人耳不幸不能及李先生犹得及两先生向者乡社祭酒故刘先生景韶间与不穀谈二妇贤必击节叹曰惜也女德易湮耳是必徼惠于两先生不穀乃懼然若有警者退而次二妇之行为状藏之篋中其文且磨灭而日者自会宁令奉太夫人丧归既葬事小间以属吴先生哀怜之为志其窆中之石启而纳之矣不穀窃犹未已也更治一石于墓道而藉先生之一言以为重死者且不朽余恍然曰妇而表墓非古也虽然吾子之后妇谈几十五年矣以谈之谐俚而不废胥思以胥之思而益重思雷何吾子之思深而二妇之贤可推也夫礼以义起何古之尼乃为表曰雷孺人者讳闰邑之良家女也父曰星笄而适国贤时国贤之王父母尚无恙而父止亭公久困诸生妇姿夫人不宜子置貳黄乃始举国贤雷之适吴则俨然而称尊当朝夕者五人矣雷降心事之咸得其意既国贤读书能文章止亭公念止一子惜之虽课使读然弗欲苦也国贤深于左氏司马先秦诸家言夜则篝灯读弗已雷身辟纁而佐之仍戒毋扬声恐而父闻之以为苦不甘寝也国贤试诸生间且有称而止亭公卒方歲俭自力丧葬雷课农耕佐之不给至脱簪珥而益之乃克歲大事久之国贤之王母卒雷出橐中装佐为丧已而有亡赖僧讼复出橐中装佐为讼家得不破国贤困诸生久当秋试雷梦国贤折云中桂其大如掌既觉香气犹不絕尝夜起有红光烛于壁乃密谓国贤往试不而负矣兹固其祥也及国贤试得儁归而拜二母堂下雷与相对歔歔伤王父母之不逮覩也明年自公交车归别筑室读书意难雷雷故语国贤君第往不腆鱼菽以奉二姑向有所不辞今岂厌其将弃藜藿而易之君靡所承欢无何国贤始襄王母以雷以妊身意不悻曰夫子以家之不给与歲月之无良而迟宁我王母至今我身重焉能从襄事阴属医以药去之遂得疾寢剧至革执国贤手曰不及从夫子襄大事命也何辞以见地下愿言执手知子念我永世矣虽然夫子有先人之托在姑老子少亟续若叔以靖之毋苦念我盖雷歿而国贤之襄大事其劳倍恒也悟而益悲曰吾乃知向者之有妇而今者之无妇也于是胥孺人归矣胥亦里中良家女也讳冬父曰南赋性尤婉顺归国贤之未几而国贤以悲劳过伤中疴甚剧胥不饰妆而以其身充寒热温清之剂者七阅月汤药浆粥非亲调不进也国贤既有瘳乃改容谢胥不谓夫人始试妇乃能如是始国贤之嫡母

严难事既毫而寬以胥之善事之恒詫新妇孝妇也生母黄则时时见不平色胥泣为国贤言何以移姑心百方购制珍腴调颜上之黄色亦为和盖二姑若一人矣国贤歲时伏腊怆然或涕泣数行下胥不敢问退而曰是殆为雷夫人耶行求雷之父母及中表亲戚皆拊而馈遗之其雷产而来称子女者胥不居母尊而居母慈国贤业嗜书又好客客恒满胥不待问而阴具酒食必洁腆有所购奇典籍輒倾橐以偿弗吝也国贤居别舍读书胥忽感寒疾左右欲驰报国贤胥止之曰毋溷郎君读吾行自愈俄而疾亟国贤亟归视之不可药矣犹拳拳怜其夫苦学不称志身稚弱不称妇儿孤不称子以故国贤益痛惜之雷以嘉靖甲午生卒年三十六为国贤生二子曰征为邑诸生有孙男二其昌其冕徽亦诸生有孙男二其晟其升胥以嘉靖庚戌生卒年二十五为国贤亦生二子曰彻曰效嗟乎是二人者先后不相及然而其和敬婉嫕德同也其事国贤雷得十七年胥得六年不相当然而为国贤各举男子其功同也国贤之失雷二十有二年其失胥十有五年诸子皆以成长至有孙矣而其思犹若新噫此余之所以不能不表也国贤名楚才其令会宁以政术闻所撰述奇古有厯下李先生风

弇州续稿卷一百二十六

●钦定四库全书

弇州续稿卷一百二十七

（明）王世贞 撰

○文部

△墓表

前进士刘君国征暨配林硕人墓表

户部郎刘君介征与其弟进士国征治父封公之丧毕当谒天官选而介征过吴轻身入余里第纵谈久之曰国征以家事少后更二月必过吴过吴必谒君而国征故以闽人发解第一取进士与同年魏允中顾宪成者皆发解第一人以才气冠其侪余故识顾君面与魏君善意且得国征而国征不至也无何乃闻国征不成发死矣又无何介征复以王母丧承重过吴而走苍头以手撰国征之事状来乞言且曰国征之妇林亦以国征故死矣明年复以林之状来余读之不觉掩卷抑塞恹叹也嗟乎隆万之际文明之盛极

矣列圣之所薰蒸涵育将必得天下才以任天下事而今上奋然思嘉乐三五以天下事付天下才而国征与二子天下才也夫既以生之而用之矣既用而旋夺之盖国征死亡几而魏君复死此何意也今其存者独顾君耳抑不特国征也若林硕人者观察公某之孙而大行君某之女也家世礼法雍容少而婉孌清令来为君妇将以祜吾刘氏而亦偕夭者又何也虽然国征负大志不欲龌龊文士之集乃竟用其文不朽身后硕人之不爱一死以全其志而卒能使国征益有闻盖天人之际微矣有顺而遂者有逆而成者固非恒情所易测也国征少失母沈安人封公贫不能办傅塾王父居易公素治经术携之山中而躬授书国征颖敏竒儁三岁能属对八岁属文所噉饘粥之外盐醎而已敝常不掩肘按察见而器之曰家有女孙淑美敢荐之君子或谓刘生佳士如贫何按察曰生岂长贫者卒与女亡何补博士弟子为今司寇姜公寶所识赏寘之第一御史房君寰时为令复试君第一最后学使者胡君试得国征卷复寘之第一而房令入谒胡骤问第一者为谁令对曰将无刘某乎启封果国征也大哈乐以为竒而及其冠乡荐南游成均祭酒许公国司业张公位收之门下使其子弟从受经当君之弱冠以经义称即已心薄之祛其王父篋悉得五经及左国史汉诸大家书皆成诵为古文雄峭辨博以有声又心薄之谓此润身业耳胡渠能济世安民而所交二君又皆负气谊感慨节侠相推伏以大相汰不可与劝诲谋上书于次相指画国家大计驳击时趣甚壮且暂而君书稍后不及上乃以封公讣归矣国征所友自二君子外有泰和郭子章晋江苏浚吉水邹元标嘉善朱（阙）同邑林纘振其人皆一世选魏君之兄允贞为御史上疏忤旨责判陈州国征方在苦尚能以书请于许公许公时初相善国征意而召复魏君当是时海内扼腕而谈文章气节者咸知有国征而国征于内行尤笃王父死时贫不能成礼国征悉出妇林装治丧不以烦诸父曰成我者王父也余橐垂三百金皆妇家物代封公偿子钱及给诸弟且尽而会林纘振死遗孤孑然国征以爱女女之且分橐橐洗矣林硕人不少恹语国征君行义吾行顺而已吾安知贫当国征之病也林硕人业已前病不可起寻小间得国征耗疑之已而覩诸孤之累然也乃哭呼曰若父果先我逝耶我则安敢后诸孤哭挽硕人独不念存者硕人不顾曰吾从若父以若曹付若伯父也遂不食积数日诸孤强之食乃噉粥少许抵暮宿如恒时及明发帟则已絶吭死矣始介征之奔王母丧与硕人之父大行君遇京口问曰令女死信耶曰信以殉死耶曰殉也吾惜壻之夭而悲女之殉也然又未尝不为女喜介征复曰吾失弟吾又失吾良友盖介征之与国征以文学行谊相切劘如师友故云国征为人白皙修干骨耸而神清棱棱谡谡不可以一毫非义干中实寬然长者林硕人生贵不以贵色行妯娌闲为德甚着以故里中人艳称之死尤悼之于是余弟懋为闽学使者祠国征于乡先生社而余重为之表墓曰刘失国征而轻失硕人而重国征字也其名庭兰漳浦人春秋仅四十硕人少于君

中顺大夫江西承宣布政使司左布政使二谷侯公墓表

余为郎时与故尚玺郎张有功游而侯公者其姓名不离有功口余因以心识之然出处竟参迕不复遇而侯公久谢事归里余亦栖弇中盖三纪余而公以书自通累数百言公前辈长者修礼谨而辞饬余皇恐不自意久之始一报书而读公所著撰数十万言于是始尽得公而公不久逝矣有功前死近三十年俯仰人间世独余在而公之叔子保邦以其从父麟之状来请言表其郭溪后堂山之墓石余掩抑三叹有间乃始能命笔公姓侯氏讳一元字舜举温之乐清人也世居乐清之缙山下至公稍徙邑郭己又徙郡侯之先有通判畱者以义死海州得赐祀谥节毅事具宋史十余传而至学谕公尚震生处士公仁仁生寿州公敬敬生宪金公廷训公之皇考也居官负节槩政术位不掩德天下惜之有子四人皆工属文而公居第三少尤神儁十一从宪金公宦留都时北海冯公为同舍郎有子惟讷年差次公亦名工文章然每私试尚不能当公乙又二岁宪金公以议大礼逮系诏狱时母陈宜人与仲兄皆暴得疾卒仲兄护丧而南公独骑周旋宪金公于途道如老成人宪金公既拜杖公橐饘奉药饵出则伏阙上书陈情羣公悯异之狱稍缓镌三秩为判官得泗州公复从之泗州学使者闻公名召使偕诸生试独大赏识公比之天马步云宪金公既以言礼失新贵人指而御史借以见裁宪金公狱不为下遂复诬下狱公奋身上书都御史唐公龙白见冤状其言至痛切唐公竒之谓御史毋论乃父有子如此何以轻齟齬也于是宪金公得白而公归补博士弟子应乡试二十试于学使者为第一人明年乡试高等九三上成进士而冯君者亦遂成进士又俱名工诗相倡和始稍能甲乙公补南京刑部广东司主事遂精爱书所谏决必据律然时时参伍以情即有所纵舍廷尉莫能难也尚书顾公璘周公用当大审必挟公从曰郎不悞我公所与游诸曹郎若王君问皇甫君沆蔡君汝楠王君廷干张君谦许君应亨皆海内知名土工为诗每燕会饌送一诗出争传写纸为贵而公尤脍人口以久次迁员外郎进郎中再疏乞归养不报而会宪金公病卒公自恨不逮侍汤药驰归昼夜号恸至委顿毁瘠骨立或谓病而肉食非礼也耶公饮泣弗应竟除服栖迟墓田者累年抚公朱中丞紈父行也握公手相勉曰亲逝不复矣而更偃蹇明主于义两堕乃强起至省复移疾归又三年始谒吏部选乞南复得刑部郎中进广东布政司右叅议分守北道署故在省而海北相距千里而遥公诸所条教按核如覩人以为神省试入棘提调程序文多出公手迁河南按察副使■兵大名至则勒习骑射信赏必罚所部皆悉成精卒己兼署真定秋防倒马关乘月登楼赋诗居然有越石长啸风亡何迁广西左叅政公之在大名以不能得其地要人指当大计吏其人族言官摘公御史大夫周公延独持之曰昨计吏无不誉侯生者而毁遽及之何当也于是公得用叅政秩调云南亡何进广西按察使靖江王之宗属指众而骄尝阑出城外又时时溷台司白事请禄公一切以礼禁之故事诸小宗各有长有非分而覬覦为长者公执不许三江口阳朔要地也腴而险徭寇廖金牙谋据之公急驰书兵使者伐其谋寇遂平自是连徙内地为河南右布政使转江西左布政使布政司利薮公以廉

持之出纳必时轻重取準即库官吏毋敢染指诬謡载道故相严当籍贯不登数颇株累它亲曲公从容调停得以母大累寻提调其省试得士居多不以自名入覲归上疏乞休用年迫力衰为请时相止之勿上而它给事縁指亟抨公其辞公数语也报致仕邸吏驰归白公公方同三司入见御史从容言官中事既毕乃起白奉旨致仕不得复事左右矣再拜而出御史与诸寮皆愕眙出不意次日公遂行饯车填溢父老争挽攀不得发公谈笑自如无几微见颜色提学徐君爨赠公文以为得定性之学时谓之知言公归迎谓羣从曰身今吾有矣若曹以解绶念我不知我弛担之乐也上堂奉其继母夔夔然抚舅弟怡怡然御子姓秩秩然间屏居浮沚创环璧书院伊湖澹荡在目辟西圃有楼榭台池之属花事踵接折简命客登高临流雅歌咏诗尽东南之胜者余二十年人谓永嘉山水自谢监发之最后乃得公然谢监躁而犷公雅而恬不相当也虽语不絀宦途事然闻朝政得失边警民瘼未尝不惻然移时也公性好施予急人之难踰于己而尤笃亲族厚朋友以故五服之内外亡不濡润公者而公帑不时竭每谓薄田仅十顷不能如郑公业多此心庶几不愧也公素善坟籍一目数行俱下老而愈笃嗜之未尝顷刻释手所著诗文集为卷九二十举子业为卷二皆时所珍惜公既卧家久时望益重今上初南垣以公应荐诏许待补吴中丞时来复力荐公而江陵相当国颇左抑文士不复用江陵没复有荐者而公老矣属疾少时遂卒年七十五公孝友忠笃孚于远迹直不能藏人过然亦不宿留以故善者皆好之即不善者亦不深忌也斋庄俨然不堕冥冥中夜偶起必御巾幘虽甚盛暑稀覩袒露古所称天下长者公真其人哉若乃称诗必建安天寶文必匠西京昌黎要之余事耳有子兴邦化邦保邦任邦皆才而化邦举于乡先公卒公甚伤之余具状中古于表墓不取详而余独详以余当侯公必传以侯公当余必传故也亦保邦志也张有功之死余盖铭其幽云

处士吴介石翁墓表

蓋吳翁之墓也左司马汪伯玉既志铭其幽矣而右司马王世贞又为之表其墓伯玉与世贞天下所推以不寢诺可人也表何以得之世贞曰吾窃闻之儒者轻为德而贵者易为名也今夫处士一贾人子耳非有儒者师友讲习之素以其天质发而为者义强而习诗书其可谓孝义者又必刻肤骨劳筋力勉人之所不能勉而后就非若贵者之取决于颺指顺风而扬其声也夫重为德吾是以贤处士也难为名吾是以表其墓也处士之吴于溪南最称着姓而独受贫薄父行贾襄阳纳鍾氏姬有一女不归己而卒处士生八年矣奉其母程处溪南有田不能五畝而大父母老日责供官岁责赋族之成者间一责衣装母悉力以从事不给则处士从樵青拾山毛以供爨然时时问父死何所而哭哭而得死襄阳状则又哭至年十四奋身请于母曰儿欲独身往以父丧归母少之曰儿孱任往乎处士复哭曰不往儿请就沟渎母怜而许之乃鬻田一畝以为行计抵鄱湖所附

舟覆縁一木免至襄阳谒钟姬得父棺抚而恸哭者三昼夜不絶声谋以棺归则力竭矣献斛黍舍主人与之弃地而藁葬焉时从钟所得父故时券会券客饮而折之约以为父守冢咸许诺其有偿者为孔氏转授之俸资钟旦夕处士乃复独身归始授室陈益相与僇力耕以给王父母及母养宗老有商云间者察处士谨挟与偕处士目不知书仅画字而已间从里塾师啜嚅章句稍习每出遇儒生则揖而问所业书久之渐通孝经小学论语遂能读司马氏通鉴最后读濂洛诸儒生言而爱之宗老未悉也一日覩处士所书调擘资息状大惊问知其繇而叹曰若乃能如是乎有心哉尽付以货为掌计展转累数千且万金愧谢处士曰微子吾不及此请以百金为寿处士乃始自成贾小饶则请于母程复之襄阳迁其父棺归葬并欲迁钟姬而钟女已嫁孔氏子不欲离女家处士乃大出橐金奉钟而治新莹以葬父于是悉葬高曾父母封树斩斩矣已而次第葬宗戚之无主者九十四丧闾左咸恠是夫窆而胡以办此处士故勤有心计然亦多天幸赙数岁益饶谓歛隘而俗奢不易久也徙之临溪谓临溪俗犹歛也行相地至桐庐卜焦山之壤吉曰此吾之■〈山昏〉山下哉焦故多薪木居人惜不剪刈度十岁而市之自然利也虎多窟焉处士乃身为薙其芜代以茶栗居人翕然效之虎无所窟避徙去而岁获茶栗利嵒倍己又视南畝课耕艺可圃者益树佳木美箭郁然矣凡二十年处士自致货巨万而它小贾受母钱者岁以其子来至不可訾数而焦山之傍居人亦用以饶裕处士之治焦也寔帅妻子奉母程以往颇极共奉之娱及母程卒年九十四矣而处士亦以老哀毁无异婴儿时既毕葬陈孺人前请曰游子悲故乡公忍竟忘之耶且有先人之塋在处士乃与偕返溪南拓置庐产复大出橐中装立祠祠本宗以田翼之供粢盛诸当祠而为其后者九十一日悉授以事而既廩焉又为之制衿裾以月朔望申家训彬彬序听然处士意犹不忘焦时时往岁几得十八亦为之立义塾义仓津有梁道有甃而焦人之爱之亦甚于溪南处士每出蹑草履素冠布衣父老喜赍持壶浆脯炙踵道相劳处士不忍逆其意少领之而返其腴曰吾不肉食也人人益大喜乃至少豪举者望影走避曰此古老甚畏之处士子正己成己皆以货显正己为京邑丞成己为鸿胪署丞诸孙若干人皆太学生处士所以督海甚至时曝之赤日中曰此吾所习也而曹生骄不遘此矣处士好施然独不好为浮屠施每食不兼味郡致之冠带弗御也年八十六竟卒于焦处士素强无疾当卒日犹对客饔饔晚食如常夜半趋呼独整衣帻而瞑陈孺人先处士二年卒年八十一处士讳荣让字子隱别号介石余详左司马志中始处士未知书时见里中师述宋范仲淹先生行谊大声曰吾能为之则无不笑处士者及其富而约畧其乡居所行事与范先生不合者鲜也虽然范先生儒而轻为德贵而易为名处士于德微然而居重且难矣吾故为名之且以示处士之后人曰若曹毋忘处士今若曹故不能自致如范先生然视处士贵矣儒有文矣吾惧实之日不胜也呜呼能为处士者虽以百世可也

中宪大夫广东按察副使同野刘公墓表

- 1191 -

呜呼是为广东按察副使孝廉刘公之墓公非以孝廉举也以易名则无重于二者公之举自公交车为嘉靖丁未而丁未之得士最盛若杨容城王京山之节烈李兴化之长者袁长洲之耿介汪歙县之文学杨海丰之寛洁张江陵之威断然皆以名位显重有闻夫位不必重而必循吏名不必显而必君子则南昌刘与和华亭周叔夜也叔夜洁修自好所历官能砥砺其声实刘公则尤肫肫实胜大较叔夜为德于显而公为德于隐故晚成而寿考过之公踰四十而始廩学宫踰五十而始成进士踰六十而始赐金绯七十而后悬车七十八而捐馆内不愧家外不愧国行不愧影宿不愧衾斯晚成之效哉乃叔夜不能不少逊矣公之少也犹惰学尝出游而父赠中宪公封迹而捩之公长跪曰儿以姝故伤大人罪甚大请自此改趋遂折节强学悉读习经子百家言于属文渐工而赠公出教授诸生于江都尝以书督公学公悬之楣读小倦仰视楣间即占毕声益厉矣无何赠公卒于馆讣闻公恸哭呕血死复苏水浆不入于口时王父母犹无恙王父樗叟公强谓公竖子为父必死而快然不念而父之父母旦夕人乎且而母寡而弟弱而何以死也公始强一粥徒之江都以小艇载棺归涉江风大作且覆公抱棺而恸呼天请与俱溺寻济既抵家刘氏之老谓家无入外棺入外棺不祥公抃颡哭曰父以贫为二亲资养而客死死而又不归是客尸也孤请任不祥既而复议棺故主家治以松松易腐且蓐蚁请易以油杉其老曰吾难其暴尸也暴尸不祥公又抃颡哭曰改殡古有之安忍蚁之蓐吾父也孤请任不祥于是得易棺母萧恭人谓公若妇之委禽于胡者可从俗娶也公谢不敢则曰吾为而父毁惛惛不能奉二尊人谁与代吾馈者即吾馈亦谁治胡翁闻而悯之归女焉是为胡恭人公谢弗成娶也公孤而执丧胡恭人女而共养王舅姑及姑矣既免丧公益贫有荐于芜湖之土豪某者公徒跣行百余里饥甚遇一姬怜而授餐始得达而豪佣蓄之大失望已而王父母俱以老病终公累累垂橐归哭请于萧恭人曰天其遂死不肖耶将困之极而玉于成也计穷矣有饘粥之产敢废以归三丧于土虽称无为约然不废礼公用过毁故善病病且益窳然病愈而于属文若有神助下笔累数千言每试有司輒首第而尚不利于乡书公亦弗肯补学官弟子最后学使者苏公佑复首公而廩之谓公长矣而经谊行术俱选时方创同仁书院檄公主之弟子盖三百人始公以赠公捩而折节读书知有范文正公者即慕之曰先忧后乐斯人我师哉既长而得王文成公良知之旨益大悦心服膺曰以此而为文正公不难也有仲一人曰廷楫公束修之饶上以奉萧恭人甘毳而下资仲学然萧恭人不甚爱公独爱仲其明年公与仲俱试公独荐乃益称仲于萧恭人而厚资之冀以解萧恭人颜后三年仲复当就试而病作性又好襍祥难事公乃以身为卫与偕行万山中公徒步而募二夫俾輿仲俄一夫店作踣公匿迹从輿后肩仲仲不觉也道遇识者咸目公而笑公不顾及仲入试荐而萧恭人喜可知也然竟以疾不堪北公登第后念仲病无起时而虞萧恭人之忧伤亟假使事便道归省亡何仲死矣萧恭人果痛不欲生公所以慰论之者百方乃解而公之自临弟痛几若萧恭人

然迄不令知也诸附身必诚信曰今者视先公丰故易丰耳虽然益重吾感矣己就选人得歛令奉萧恭人往歛人盛供帐侈酒食以俟公亟挥之出曰是尝我也自今即束菜溢米不得阑入偶与同年戏邑无鱼亦絶无大者冯舍人可以弹铗矣同年颺之至明日得一大鱼以馈公欲辞不可剖而五之以其一供萧恭人余四以付市司使鬻之稍取其畸至弥月不尽盖自萧恭人外居恒未尝噉鱼肉也尝步行而一穗自鞞出以为误也引之愈长公笑曰藁也吾以代绵罽同年笑之公亦笑曰吾昔读书时尝坐一木罽而积藁其中自腰以下皆暖今仅藁吾足侈矣同年者即汪伯玉前余所称新都者也歛故喜讼者至相牵钩累百牍不解公人人引见推赤子慰示之且谕以理势曰若曹得一金惜之若头目柰何不以养妻子而以益讼师富也且讼师之待汝何如我于是人人感泣叩头解去比二载讼庭虚无人矣竟期以征削烦而后三载邑门之外虚无人矣郡隶八邑歛之当供郡者八之一而以羨供邑者曰郡以八供而百不足若以一供而绰然者何也供邑者曰我不知有供何论一公以高第征矣以犊车载母敝衣羸马从之父老遮道而奉壶浆百里不絶也法当得给事御史公固辞曰犬马之齿长矣且母笃老不敢以身殉言路始得南车驾主事萧恭人用令终公僻踊如少壮时强自力居丧无违礼除服仍补南武库还为车驾员外郎进营缮郎中属汉阳守缺而汉阳人王君斛者在选曹故尝令婺源与公比壤识之举以为其郡守公至属大饥以便宜发仓粟賑之而收其暴鬻归之士设方畧诱缚盗魁之渔于柳洲者境内称治楚故有赐田在汉川而景王方贵甚其用事者新国田与犬牙错而欲并得之楚人不受且誓众鬪有日矣公为之正经畧树标而分属焉遂以无竞三载满当上最郡父老醵钱裂金绋奉鞞以进脱旧鞞置郡门公固辞强纳輿中公抵黄冈檄归之其人民咸啧啧称虽公家刘宠不能过也公既以最获赠封如式而擢广东按察副使佐司事尝摄提学事兼管四道兵符时寇大发修战具而徼卒捕舶盗七十且以其赃仗实之公覆之则皆贾人也误以兵为盗相拒格兵遂以格者为盗公悉与辨理得释其署盐策吏上其岁羨千金公悉归之库充军饷穆庙登极公当入贺既竣事上疏引年乞归不见许再上疏始许之公归笥其衣冠杜门逍遥间出则布帽练帽草履居然一田父也问以时政则掩耳称草莽臣不敢与及官中治状则曰老諄忘之矣唯悉帑倡其乡人建豫章书院以居四方之贤者及聚讲同仁不称倦公之学虽自致良知入然其功则克己毋自欺不欲骛于玄虚高遠居平尤厚人伦仲之二息子天推诸从之子当为后者后之而割己产与均女弟璧而归齐某公悯齐之畸于配也阴厚之及女弟没厚齐益甚齐感公而事之犹嫡兄也妇翁胡富无子欲得公子之而徙橐实焉公不可及其歿也为治丧葬如子礼又尝归宗人之丧于瘴海外公所为德非一第不自名亦无能名之者而伯玉亲为歛治人故知之确而为之志若铭己又谓公居母丧病不知人者五日夜时以无子故羣睨而欲瓜分其橐公忽梦黄冠羽衣人以帝命子之药遂寤而起睨者立解公近六十无子胡恭人故不宜子而为之寘貳张张貌寝而恭善侍太恭人能得其意公以故不恒御几二十年一御之举男子曰仕敬公卒时仕敬甫弱冠秀而

文类若有天意然嗟乎此余所谓为德而隱之报也余既目公为孝廉伯玉前已目公孝廉是二名者非所以尽公虽然九公之弟而慈皆孝推也敦行不苟不蕲取名皆廉推也嗟乎以此从夫子即曾冉可也公名廷梅别号同野其世系子女婚嫁详志中

弇州续稿卷一百二十七

●钦定四库全书

弇州续稿卷一百二十八

（明）王世贞 撰

○文部

△墓表

封礼部员外郎穆太公墓表

当隆庆改元而余饬兵赵魏则雅已闻东明穆君文熙弃官而全其友拱辰于榜槿血肉中义而请纳贖焉其又七年而拱辰为廷尉丞则文熙用吏部郎出奇策以间捍幸臣不胜外迁去矣拱辰间过余酒酣辄垂涕曰吾何以报穆生吾拜杖而创以前活我者穆生也吾创以后道活我者生之父太公也始穆生之药我醪肉我蓋尽捐其卖宅之金而屈指舟车费且不给已而太公至抚不佞曰男子哉不爱死以存志又谓文熙吾儿哉不爱帑以存友因悉出其余錕冶拱辰装文熙已决策归而传有东宫恩当封太公者小难之太公觉而怒曰若以一官足荣我不念给事父犹布素也趣以给事归吾三人共此五畝耳当是时不佞两股且立骨矣太公起而加之肉以有兹日不佞何敢忘不佞感其意乃稍次第其语授拱辰为太公寿繇是海内颇以不佞一言知太公而深知太公者亦遂以太公故知及不佞又十四年而拱辰贵至大司空文熙卧里中自如台諫有荐文熙者仅报闻而太公登八十矣世贞强起金陵得拱辰一函书中为哭太公文始而大骇既读之酸鼻不忍竟拱辰之言曰穆太公业不幸第幸而以公文有闻于海内公如终惠之乎使太公有闻于世世则岂唯文熙某之感亦世也而刘侍御君者以文熙所草太公之状来请曰文熙所忍死而待公者以公之能终惠太公也语与拱辰合世贞乃为之表其墓蓋太公少尝业儒为文有奇藻十五六时试有司辄居首十七而父卒以治丧葬于家盍夺之然公亦厌薄博士家言而意乃笃好左氏太史公及两汉以后诸史益习发而

为雄奇之谈奋髯抵几若决九河而下客莫能抗也是时拱辰仅弱冠公引与谈喜谓文熙是少年足当吾一劲敌也而亦命文熙谈文熙不敢难公公笑曰是书不足耳悉胠篋中藏授之读自是谈遂进文熙言公谈出诸书生意表者多不能记独记其谓晋人逆公子于秦赵盾不当背而击之韩起求玉环于郑子产竟弗予为两是蔡泽徒步入夺应侯相印大有功于应侯公子郢辞灵公之命退而耕于野为有季札风四皓避高祖而就太子聘不得为四皓韩信不反齐而反一奉朝请侯不得为韩信总之冤信而疑皓事非实文熙每自谓不及也即诸生闻者亦人人谓不及也公又谓留侯义烈于始而与范少伯俱以智终尤推称少伯以不爱上卿而爱富欲以保身而行德故中年强自厉课农耕归其获于十一之息僮奴百余人作使行贾皆称其才力而性又好客及施予客时时满席施予倾困而产不挫文熙既中谗归念公且不怪公迎谓之曰固也吾知若必不容文熙之一用最再用国恩封公如其官为二命命服进之公笑曰吾向者以拱辰归汝急我以我不能待也御之无得意色万厯之丁亥公年七十九而属岁饥公谓文熙吾所蓄云何而不以兹时义散倾橐而数之得千金亟以上有司计口而给活可万人事闻诏特赐棹襖旌其门公素强无疾健匕着至是渐惫矣明年饥益甚公疾益亟复谓文熙吾所活者安在得无填沟壑乎吾德不终甚耻之顾橐中装余几屈指得千金复上之有司文熙以毕事告公欣然动眉色曰吾愿足矣盖终始不失范少伯意如此且属纊命布席于榻前东北向加额谢天次谢君父次与友朋诀从容而絶语不及私公又有人伦鉴故尝识赵叅政国璧俾与文熙同笔研又拔崔渭南某于贫时俾拱辰传之夷于孙光胤二子贵而感公不已公为人美姿容大音声尝出次于郊登台而呼文熙自城中审其无它也轻捷便骑周行田野寒暑六十年如一日有一马常乘前岁余忽毙公怅然曰得非欲从我乎亡何而公卒人以为知命云不佞尝读古传记于侠节独行之士心慕说之然怪其举生平而徇一念之好以委其身虽用此有闻然陋矣而任史笔者乃悉其力以发抒其一念而尽废其它盖不能无嫌志焉假非不佞深文熙与得太公于易箒之后天下囚不佞序而求太公于偏至者不几于陋乎公之仁心为质博识超见广度奇畧游戏生死非余竟表之而谁也过公墓者可以式矣公讳陈实字某余详状志中

登仕郎鸿胪寺序班百泉归君暨配郁孺人墓表

归君壻于吾外家郁视余为大父行而齿不甚远又余谬先点宦籍以故时相过从而君最贤而有文闾党所推重以为真长者而郁孺人辅为德于是其重并及孺人而久之君卒又十年孺人亦卒君之卒故大司空徐公拭志其墓而卜之不兆不葬也至孺人卒且四载卜始兆而其叔子道传始以其弟学周所撰孺人之状来云幸表我先君之行敢徼惠于郁得附孺人而勒之七尺之石以示为归后者归之先自唐宣公父子皆显贵至尚书而宣公封昆山男遂家昆山至宋有湖州判官仁者授其支子荣四产于常熟徙

为常熟人几十传而为君父素琴公某后徙常熟之白茆能廓大其家远近称之君为诸生以赀游太学为司业王绳武所知赏谒选得鸿胪序班用勤慎称尝扈天子幸太学当迁矣遽予告归始素琴公家于县东鄙居恒邑邑谓君曰里多豪未易拓也行相地至白茆得九澗不治之产而市之河流涓涓一衣带水而已不受溉君请于父大出镵募贫人授以畚鍤俾广诸渠多为陂池引渠而潴之水以备旱凡三岁未有秋君意不小沮最后乃大稔自是连稔傍畝益斥而它力田慕从者相栉比九澗之间遂改色称腴区烟火相望矣君喜曰废丘之瘠也今乃成鄠杜乎君不好与商贾争什一诸积着趣时之技昏昏若无辨者至于耕独心通曰本富上也吾非独捷给于此属有倭警常熟令议城城君当其最重者其高坚为他壙冠未几倭来薄城君又以家众当其最冲者贼不获逞以去邑令旌君谓两为吾民御圉矣君又谋于父谓白茆之民多聚而依我曷不从北地法筑堡以卫之乎会有诏许所在得保聚亟捐帑筑城其制卑于邑而坚胜之上树楼櫓列旗帜甲兵甚盛倭望而自解去邑令自是益贤君有大兴必致与谋君所以阴益不浅然不自任德以故无能名君功而亦鲜有怨者性素孝谨佐其父应中外井井而事必禀命踧踖如不容父歿则听命于母诸所以养生丧死亡不饬至也然不欲市孝名性好客客恒满坐君周旋其间亡所不得意然不欲市侠名性又好施予五服之内外环君而庐者责廩如岁赋以缓急请无不应当不欲市惠名善尺牍小诗尤善绘事花鸟种种生色然不欲市艺名以故荐绅先生亦不能以一端名君而益信其为长者郁孺人者故常熟人其族析而为太仓最称诗礼着姓君之父闻孺人之贤而委禽焉孺人之事舅姑与君俱以恭慎着节又能以慈明御下盖君父之辟草莱起家素封成之自君而君之所以得成其父繇孺人也当君之饮客必致欢孺人取指咄嗟立办而至于延师诲诸子嫁女娶妇塾帑之共亡所不隆备毋俟君矣君于岁稍入必取廉孺人不敢加于施予必取厚孺人不敢削君欲推父母之帑以丰姊妹之出嫁者未及言而孺人先之曰所受大人产足矣幸以周同气云何君意遂决及君卒而孺人専为政诸子听之家日以益起孺人于君行事靡所不合辙独孺人好佛君不好佛君不好之其澹泊檀施有默契者而孺人之好之亦独好其理而已于文绣土木饭僧膜拜祝厘之教亦不数数君寿仅六十有四孺人乃得七十三子伯太医院吏目学（阙）仲太学生学程叔即道传亦太学生而季则邑庠生学周也它子女婚嫁具志中嗟乎俗漓而衰即不及贵仕而能守齐民之业者不挟权竒冯势力以蚕食其侪即靡靡视肉若猬之仰而受鹄啄焉能振也君时操其赢而与几合不露其巧不雕其朴务悖于行而以文饬之卒用宽裕终殆所谓人之君子而不为天之人者耶是宜表郁孺人宜附书

楚君子邹赠君墓表

邹赠君之墓也则今少传许公为志而铭之矣其冢子吏部郎孚如既服除而犹邑

邑曰奈何以名世之文昭我先君之潜德而閼之地下乎盖八年一日矣孤闻之古墓有表夫表者标也标而勒诸七尺之珉使过者见之许公而外尚犹有王先生乎欲走吴门以请病不果既余佐夏官白下乃具书千余言以状来曰先生幸怜而赐之表逝者且不朽孤亦不朽嗟乎孝子之永其慕一至此哉君之先故麻城人明兴以徙完改实云梦遂为云梦人凡数传而至处士公鹏以行谊重于乡七宾乡饮用老寿终有二子赠君其仲也处士公贫而好施予尝脱衣以活饥者而贫益甚既赠君明颖工属文十九而补博士诸生人乃指相目此为处士报乎赠君好读书其书五车乃至稗官野语壁藏豕瘞之简亡不淹通而尤粹于经术若邵氏经世蔡氏启蒙谈数而归理者君自谓能抉其妙而致之用其名稍稍着前后邑大夫郭君黄君闻而宾之师塾君能抗颜上坐讲授琅琅所雌黄弟子业亡少讳避黄君者心贤之然欲以观其微偶大雪两墀下积至尺不可行独中道差不沮洳乃先去而使吏风赠君可繇也君固辞徒行墀下蹉蹉雪至膝矣黄君乃抚掌叹曰笃慎者一至此哉君与人语必依忠孝出入造次必以礼常念云梦之俗野其祭以寝而又不备节君始筑祠堂具四代主岁时烝尝皆按礼经遗而行之每当忌辍素冠服雨泣伏地它于婚冠庆吊之类俱不苟理俗至举以为笑曰邹生贫士也何自苦乃尔然而识者已相率仪之矣居展史传忠臣谊夫则击节而诵之至为之赞若颂以信其执鞭之慕若壬人儉士切齿唾詈为之歌若论曰吾以是当鈇钺也间有所非是于乡里士人亦不能废其实而为迂傅往往使当之者面赤然君于善善长人知其无它不怨也曰邹君之与我曹酬酢譬观史耳常闻古有以黑白圈志其善恶念者慕而效之始犹半错也久而黑不胜白又久之不覩所谓黑矣乎如少慧十一补博士诸生十九以礼经魁其省皆得之自君教君有恒言称儿时者必曰有大人度及称大人者必曰不失赤子之心夫赤子而大人易大人而赤子难今儿且贵矣其赤子在乎不然反之而已及三上而孚如成进士君复贻书相勗曰贺者言吾云梦自程御史成进士后百八年而始有若山川为之生色汝谓一进士能生山川色也大者致君泽民次亦好修洁行令天下后世因汝而知其所自产曰某山某川则庶几尔不然为不肖而以进士行之势必遂恐重为山川辱乎如拜受教既授中书舍人君益矫健与客游履名胜痛饮殊畅且谋与其嬖某孺人行视孚如京邸而病病无何竟卒前一夕梦儒衣冠而武者自通曰仲由赠君诗独记其二语至将属纊乃捉笔书邵雍程颢二诗毕遂瞑人以君刚毅类仲氏潇洒超诣得之二先生多也君病之日其乡人相与狂走聚于祠卒之日则相与狂走哭于门而其贤者次其行聚谋于学宫而附之乡先生社盖君虽贫而好施不倦有冻将死者解裘而衣之且以要其友友意不欲阳谄谓是人天所罚也奈何违之君不顾又有伪苴杖而哭过君者曰远方书生父客死不能归为贖之又敛所知贖之已而其伪露人亦以诮君君曰宁售彼伪无沮吾不忍兄梦鱼病于外舍不能归君朝夕不解带而视医药及卒悉其橐为治敛而恤其孤其哭母如其父事继母如其母尝欲置义仓以贍其乡而力不足叹曰力苟足吾终不以家故而后其乡君貌伟丽意气轩朗望而知其为巨公长者为诗文有气不

事雕琢而往往合古既久困场屋豁如也人莫能窥其际然所谓牢骚不平者间一发之于诗初名梦龙字叔见别号春渊既而更名字曰勿用别号潜论噫指亦可识矣所著书集数万言大学中庸说易解家礼图族谱俱藏于家有四子长即孚如名观光以行高推择吏部郎姿更三曹小有所不合称疾卧于里其为西京大厯之业畧就而以非其至欲求太上至于思致其不朽于赠君而伸其无己之思则谓莫若文章而又谓文章莫若世贞者何也世贞既高先生之节而嘉孚如孝为采其状之所载大者叙而表之石曰楚君子邹赠君之墓

广东南雄府照磨封登仕佐郎刑部司务旌表孝子何公墓表

余于万厯戊子始识户部郎中何君以尚于金陵当何君之在嘉靖末其同舍郎故海忠介公瑞尝上书指斥世宗皇帝触天怒系狱论死何君明其愚直无它意请宽之亦得系杖至百其创甚于海公而海公缘以不即死穆庙初海公出为尚宝丞以至御史大夫何君为光禄丞复疏论新郑相后见中以考功法谪郡司理卧家垂二十年而始起迁今官天下之荐绅先生亡问逖迹咸知何君为忠臣而余与何君善乃得覩君所草孝子公状而始知君之先人为孝子公也人有恒言求忠臣必于孝子之门余始闻之今见其人孝子公者讳世锦字伯綱世为广西兴业人父曰高年公以行谊学术称应宾饮遇诏例充寿官几八十而终母梁孺人有贤行年九十三理家秉如少年公其仲也在提抱即曙受敬四岁侍王母食得甘果即选其大者以进而自取小者稍长侍高年公行农圃荷锄执经竟日无慢色已受其从兄乡进士公经而得其所传湛原明先生学即慨然慕为圣贤不专举子义矣十九补博士弟子数试高等然不能得志于场屋属高年公疮痍久不愈公日侍汤药会小间而学使者按部邻邑公当往试恋恋不欲行高年公自饰而强之曰我故无恙毋弃髦巾裾而伤我心及公行而高年公疾骤发不起矣闻讣惊絶久之乃苏跣而驰百二十里抱尸大恸复几绝三载伏草土内不至室外不至户裁余息而已学使者微而优异之语甚媿公自是共养母益笃寻膺岁贡游太学为吏部选人然念母益老不忍行母强之或过三舍所辄返语所知曰吾向者为高年公所强试然仅比壤耳而不获躬侍瞑至今恨之今太夫人加耄而令我远游五千里外宁能得一安寝母闻而怒曰若不覩我蹉跎胜若妇耶而何以不祥待我且不见汝作官人我何以生为遂不食公乃强之选得南雄府照磨之任甫三日即移文督府乞归养不许乃得请以解军饷便归里具冠服拜母堂下母喜迎谓曰老妇愿满矣虽然尚不获飧汝斗釜禄也居数月复强公行公勉强还任而会始兴阙令檄公摄之邑人以公自郡幕往颇见易公摄以威信积狱立判省役宽徭民大悦服甫两月真令至公解事还幕吏民遮送有泣下者公自是移文力请乞终养三台念其恳诚许之赐金为道里费公归出金以寿母欣欣如也而以尚为建昌司谕主蜀试次子以执举乡荐以式以德俱廩学宫矣公前是尝戒其四子曰

若曹异日拜一命但为天子官勿为私家官但为庶民官勿为子孙官盖名语也公侍母之三阅月而母竟以病不起公号噉动闾里居丧三岁犹依依孺子慕一切据朱先生礼不为吊客设酒他宴尽废自后服除遇亲忌素冠服伏泣家祠所至明日始设奠率子孙馥胙而已诞辰亦如之诸子欲置觞豆者公呜咽止之曰但知有而父耶不知而父父母也我何忍乐忧于是有朱御史者疏公孝行于朝且旌而以尚抗疏下狱得杖之耗闻阖门汹汹叵测公独夷然曰天佑忠义我儿必不死即死故不死何以戚为因赋诗志喜感其辞壮而不激天下传之庄皇帝初即位出以尚于狱复刑部司务遇例赐封公如其官及以尚之以光禄丞奉使归省以公所被玺书其语有承家节操澡行诗书宏猷末试终养归休教子以孝而作之忠公大喜曰若固忠矣我何敢当孝已而泛澜久之谓以尚我不能效若之荣吾亲也我何心独荣方议欲立睦族赈饥二仓蓄穀以待施而病矣病而以尚兄弟皇迫延医治之公笑曰若不闻乎命乃在天虽和扁何益既而曰姑为汝一医医至请进药弗许既而又曰姑为汝一进药弗效辄覆之念以尚等忧甚强慰曰我未死也死而得侍高年公地下甚快整襟危坐而逝寿六十有四有子四人诸孙十七人始公为诸生时有盗耕牛数头而去者公廉得其状呼诘之盗色变吐实曰牛幸在请以还幸毋闻官也公颔之使去俗尚鬼数赛社为酒食醪男女无所别敛贿不訾民有丧当墓前一夕宗戚羣聚其家剧饮歌呼至大醉而后发中户以下多焚尸而收骨于甒者公先后以礼义诲止之其俗遂变最后以念郁林贡细葛值贵端至二十余金公力请于当道裁其直十之八九而民不至破产又尝演高皇帝教民六事为乡约断义上之御史湏行之于是讼博之黠减矣倡其乡人筑石为溪路者十余里行旅不困雨盖公仕宦之日少而宦又薄卑故于德不能大有所显见若其德于乡者十之六德于家者十之四则皆公孝行之余润也以尚忠自公启之公之孝则自以尚发之盖公卒之二岁所而天子始下诏旌其门曰孝义又一岁有司举祀学宫嗟乎闾阎之节何限而见旌者乃寥寥也惟其发之也是故曰以尚亦孝子也当以尚之抗天怒夫岂不以髮肤为虞而公欣然赋诗者然则何公亦忠臣也姑用以其大者表公之墓余详姜宗伯志中

郢君子孙赠公墓

孙赠公讳赳字志文别号琴山其先有兴宗者自江西徙而为楚之京山人代治儒业四传而始显为万安令衡五传而为蒙城令良弼有丈夫子六皆贤伯越以子鸣世贵封兵部主事季武义丞■〈走翼〉最少者国典仪赳余皆邑诸生而公则其叔也有丈夫子二曰鸣治鸣教以鸣治考惠州府推官最赠如其官阶文林郎鸣治今为监察御史鸣教亦继起为某府推官而今为曲安守公不及见矣公生而明敏有异质于蒙城公最爱其游南太学携公而教之十五出应试有司着声矣已而蒙城公忽夺之俾理家秉即敏练工治生有权贵人齟齬蒙城公而颂系者公委身其间以计得白蒙城公益才公挟

与俱之蒙城取筹策官中官事不废蒙城公既宦薄授产于公无加橐而公当月具供馈甚丰蒙城公止之弗得也每谓人使我惭于陆大夫蒙城公老死而公治丧以戚易闻又能共奉父妾终身不衰孙之先莹在羊亭村者密树青杨以藩水在七竇村者高坚其墉毋得阑入松楸日蕃翳公之力独居多事伯仲谨抚二弟厚诸子姓宪使鸣世南和令鸣时峨眉簿鸣环彭泽簿鸣昉光禄监事鸣和太学诸生鸣谦鸣珂等十余曹或资或海咸赖公成立羣从中有翅者荡其产而鬻女于市人公捐橐金赎之为归一士子安福刘应霖其父故公友也薄游京山以文贄公公怜之前后资数十金为泮宫计虽以异籍不果然获免于垂橐其赴急去恠类若此公故室于胡天亡子继室周则中岁矣而尚未有兆意忧之人谓公饶阴德未遽斩也已而举侍御及司理周卒则有后室殷貳曰黄举诸生鸣埭曰王举诸生鸣虞于是诸孙枝绳绳振振矣公尝以贄郎补与王国膳谢弗往以晚举侍御司理爱之甚然课责不废既先后荐于乡意稍发舒乃树栢亭于池傍时呼僮驾小刀网鱼佐酒陶陶如也又构一亭于松山之阴颇丽荐绅先生扁之曰来鹤而公别为扁曰乐志志适也又曰栖鳳窝志诸子所栖也邑大夫以公年德渐高郡肃书请乡饮为大宾辞甚修然公亦不恒应素习养生家言一日忽危坐而顾诸子曰吾死矣诸子惊泣问故公第曰吾屈于生而可伸于死何泣为遂逝鼻垂液交于膝乃悟公所谓伸于死者殆仙去不死耶公葬若干年而侍御君乞大宗伯姜公铭其幽又撮其行之著者而属世贞表之京山故郢地也公为德不显而昌厥后未论仙去不死能全其真以还造化可谓贤矣敬表其墓道之石曰郢君子孙赠公之墓

新野恭简王继妃太邢墓表

太邢者故新野恭简王之继配而今镇国中尉硕勲之高王母也父曰南阳护卫指挥邢山母曰常恭人年十六而恭简王之元妃李薨奉诏以太邢为继太邢长大白皙端重伟然丈夫子也才亦称丈夫子而性更柔婉和淑曙于刘中垒曹大家内传诸书是时李元妃以贤闻妃一遵奉其遗则肃然阃以内也恭简王之母曰悼僖王妃是为太庄蚤寡能律恭简王以礼而成其令名然颇严不易事太邢晨暮朝夔夔斋栗也太庄喜谓左右吾不觉失李氏妇新妇殆又胜之当是时恭简王之邸圯未复而它治羊山寝园工弗贍太邢筹岁禄之八千石而嬴曰此天子所以食王者舍而奉先王之寝园可也奉邑厨役若干其直岁八千缗而嬴曰以充治邸费可也其它浆脯衣屨烝尝宾宴之费妾请节缩它入资之凡太邢之所御获无游足臧无袖指以昼夜勤共其职不四年而二巨功鼎新帑亦渐充矣恭简王既蚤孤其于家虽继而若创诸岁时烝尝祠宇牲器之属多弗备太邢请于太庄下僚属之知礼者议而衷之王用是以善为仪闻国中太邢之始归也元妃之遗胤曰宣懿王弥镐时甫脱襁褓太邢爱而抚之有加己自有子曰镇国将军弥钅太邢御之严不使其抗宣懿也宣懿生而多病恭简王意弗恠欲传位于镇国曰均嫡也

太邢固辞吾子安得与先元妃子比乃寝恭简王广置媵媵多举子太邢抚之均于己也有王姬者美而妒最能当王意颇虐诸姬子太邢阴为保护之王姬恚时时侵太邢太邢寬然弗与校也俄而恭简王薨太邢之哭欲絕者数矣誓以死殉唐宪王闻而惊止之曰毋遽也若而地下谁与安地上者谓王姬若当殉姬窘自投太邢太邢曰我不死而乃使若死耶无畏王姬卒免国人咸谓太邢长者而以王姬幸生为不平宣懿王既嗣位时时称疾不任朝会而镇国美风仪举止楚楚宪王谓而兄不任执圭而可代理府事归以白太邢太邢曰彼与汝俱嫡也而彼长乃使之拥虚器而汝越俎耶镇国具以辞宪王乃复寢太邢既在位久所奉太庄复前薨国连有大丧而宣懿王镇国夫妇亦偕不禄太邢上致礼而下致哀所以抚宣懿王之子荣僖王宇沪及辅国将军宇浹如二子也宇浹瞽而材荣僖称冢孙矣而所以奉太邢不能备尝执挾其侍人唐成王闻而欲持以宗正法太邢阳惊曰嫠不知也殆瞽儿误传之耶王乃止益心仪太邢闻迎入宫与王妃用家人上寿语语称伯母别敕女奴数十人檐輶行别苑吹乐娱游且授纪善白震以彤管传其懿行梓之朱邸为式太邢辞谢谓未亡人安敢以不幸幸也自恭简而宣懿而荣僖凡三王矣太邢相之母之增廓其业而镇国辅国亲其子孙太邢俾以其恒禄自给不损王家尺帛斗粟曰吾知有世嗣而已年七十六以疾薨成王率国文武临其长治葬祔于恭简王之窆而躬为志其圻辅国能文章口授其子奉国将军宙松别状之而奉国之子镇国中尉硕勲孙宗正器封咸以文显重不忍太邢之泯泯为祖德诗述而走使二千里乞余表寝园之石呜呼克顺克恭太庄忘亡可不谓孝乎相其夫王王业以昌可不谓才乎诸子均育而先嫡长可不谓慈乎茹其妬姬而庚覆露之可不谓寬乎后其所出不蓄私帑可不谓义乎为妇者二世而母五世矣国主仪之国人师之可不谓贤乎即太邢所习刘中垒曹大家言能有如其纯白全备者是宜表

文林郎宛平县丞古愚吴君墓表

故宛平丞歙人吴君卒于万厯戊寅所不足七十者一年耳其葬也左司马汪公伯玉铭之为之嗣若太学生勉学者可以称孝矣而犹未已也盖又十二年而谒余金陵以谢茂才少廉介绍而请曰先人之墓木拱矣而石未树也是十二年之耿耿如一日而今始得先生敢以其表累记室余故善少廉而严左司马之辞许之已而肱篋发■〈合攵〉藁则尝君之父故处士公荣让墓处士公之葬也亦左司马铭之处士公有二子伯为君而仲则鸿胪仁仲君之生处士犹在约其少长俾厌藜藿而受博士家言处士迎故父之柩于襄阳最后乃得之君年十六而从父徒跣行二千里复从归葬踵为鞮屨时人称焉已而业成从博士补弟子处士公业益饶始以君进补国子上舍是时马文简公汝驥为祭酒而李太仆舜臣为司业二公斤斤许可顾材君以为利器也然试辄不利以久次吏部选人得宛平丞丞于格虽卑而宛平为赤县其秩第七品顾最为劳剧所供亿县官

非时之责百萃君一切用敏慎承之上时为粥以食饿者事在君君辄未明往人风之曰不过早乎君谢曰吾腹实而往彼腹枵而待我且以为晚也民负税而系者且数十人其负可三百缗君搽橐而偿之数足皆释去人又风之曰橐可恒继乎君又谢曰非所及也吾姑行吾所不忍而已宛平二丞君职税其一丞职马马丞桀而鹜数侵君任君逊谢弗与较马丞久而愧之按使者咸多君治状娄下旌獎三载当迁君以念处士公老上章乞归亡何仁仲亦谢鸿臚丞归处士果以家秉委之而身犹总其纲处士所以擘画出入务当于父之意而外拓其德处士公好为义举若建先祠置祀田创义塾治津梁甃道路皆君与仁仲成之恒衣大布进恶草具不恒置馘而所以奉二尊人柔脆浓鲜不关处士公与其妇偕八十以令终君犹毁瘠不废孺子慕也既益为政其综理大较如处士公而为义亦不衰居平举处士公训以示子姓曰大人有言勤而不俭犹之乎漏卮也俭而不勤犹之乎石田也歛人附之计然之书君无子以仁仲之第三子即勉学为子或又风君以君长者必有后且幸未耄衰益广媵哉君笑曰吾弟之子非子也乎且智者不为子而轻其子之父其它明识多类此君讳正己字身之尝自号古愚其言曰吾故甘吾愚所以系之古者非敢自居直也特以去吾诈而已矣是故题其石曰宛平丞古愚吴君之墓君始娶于汪汪亦名族也淑而孝能以俭勤佐君起家而以义成君子德先君卒法得附书

弇州续稿卷一百二十八

●钦定四库全书

弇州续稿卷一百二十九

（明）王世贞 撰

○文部

△神道碑

光禄大夫太子太保吏部尚书武英殿大学士赠少保谥文靖严公神道碑

太子太保吏部尚书武英殿大学士常熟严公卒于里第天子闻而震悼为辍朝下谕大宗伯是惟我皇祖弼亮之臣其亟遣使治葬及祭祭为坛视一品例而加三凡十二进制少保予一子中书舍人于是太常以谥请天子若曰惟晋则有太傅安宋则有太尉沆明则有太师溥太师健皆以弘德作辅令终若始厥谥曰文靖少保实不愧之其以文

靖易名诸子治等拜稽首谋所以侈大国恩而标公之行业以昭示永久谓不佞通家子故习公祈一言以文隧道之石而奉太子洗马赵先生用贤之状来不佞读之曰信史也按状公姓严氏父曰封太保公母曰封一品太夫人公讳讷字敏卿颀而秀眉目性警颖读书即诵封公心异之其受邑署有所不得意輒归抚公曰有儿在吾不虑终贱也然所以课督之益庄公为制科业精有声又能为古文辞举乡荐嘉靖丁酉主试者以隐刺得罪罢弗试南宮更三载为辛丑试南宮遂成上第以选入翰林为庶吉士读中秘书其长校所业公时时冠其侪久之授编修再同考会试所得多名士垂九载当迁而同年中一检讨其资与公埒得幸大相大相欲偕迁之俾并主都畿试公不欲与共事因上疏请告省侍封公太夫人大相觉而逆谓之曰守史官寂寂隄十年旦夕侍从乃薄之耶且吾闻二尊人健匕箸公谢曰宦废温清心摇摇若悬旌胡能抑也念奉职亡状幸不即书殿得事相公有日非晚大相色变然亡以难公遂获请而一给事论劾检讨罢之矣公归而覲封公太夫人融融如也凡三载乃北补故官俄进侍读遂主乙卯留畿试其得名士逾于前所构程序文亦以贍丽脍人口时江南中倭后岁复俭其遗黎不胜诛求公为具疏请下大司农有所贷减吴人至今称焉上日坐行宫为祠厘自大相以下皆应制有所撰述不给上乃悉以翰林诸臣名覆之金瓯而探之得公与太师李文定公遂下制当撰述公惶恐念以非所素习欲辞则不敢第旦夕恪恭其事而已赓以是得上心赏赉下俄为学士视院篆进太宰少卿主己未会试考其得名士屣于乙卯程序文如之遂进礼部左侍郎改吏部公事其长恭有所裨赞皆绝不以语人寻复进礼部尚书礼部所治多藩国封继丧葬之事一切为吏贿藪公委其属精核之事取典故不轻为难易以是肃然亡敢挟贿进者知壬戌贡举寻吏部以尚书阙请上即诏用公公自学士以至天官凡六转皆不由廷推念以一书生际上知誓洗涤凡虑以报而大相故为分宜公用墨败公居恒痛恨之仰屋咄咄窃叹而已至是当国者为徐文贞公亟为上推毂公公乃进九卿百执事于待漏院而语之曰诸公以国是悔不穀者以不穀譬见悔者以贤贤而訾不肖悔者止此此不穀拜悔地也即私第不足以辱诸公迹归而勅中厨置肴酒十余几若宴客者然亡所召典客窃恠之既而悉呼家人大小前即觞觞焉咸错愕不知所以公徐曰吾以一书生受上知至此分不当负国若曹一书生苍头从我至此分亦不当见负吾所以觞若曹且与若曹约朝夕共浆炙扫除而已此外皆若曹食息地也苟负我必不汝贷家人叩首感谢而公顾推择谨厚吏使司门牡曰外迹毋入内内迹毋出外盖门之雀可罗矣一郡守不悉公束约苍头踵门投刺公执而系治之以课殿下移其守亡他请属也曰吾宁冤此守不能自废束约行除复之于是中外之苞苴绝矣后先诸重臣以分宜故多自引屏迹田里而分宜亦庶几得进其所私客分宜败客亦随废然上雅不欲自田里起故臣以尝倍我而公谋于徐公从容为开谕上意解乃属选部郎陆君光祖以次召用诸贤殆尽天下翕然称公与陆君知人公逡巡谢弗居曰郎助我陆君亦谓人太宰知我乎不尔我安得无齟齬时仕宦所贵惟甲科而自国子为吏部选人举于乡者辟于岁者皆不得

比肩以故二途日益轻得材日亦少公疏请夷之遇课最輒有所峻擢以示风劝俄与李公并召直西苑寻特加太子太保时徐公独相久不自安数请于上得一二人自助上手书公与李公名谓材足翼汝徐公以二公皆乡曲避弗敢应上遂下特勅公与李公俱进并武英殿大学士时代公者为安阳郭公以服未禫命公仍视吏部事久之始得代自是与徐公鼎足而承君欢然相与靡间也始公为学士时官五品上特赐鹤袍谓此一品服之重祠厘于是六尚书咸逡巡不敢服而其后遂益赐公麒麟飞鱼服以至绣蟒他尚方什器珍饌兼金楮币之属无虚月然公素小心及其居大位过自抑逾于庶僚时每拜赐辄踏不安曰何以称塞也居恒念封公太夫人皆老开八袞而不获侍膝下即一日不逮汤药以为终天恨而所赐直舍稍庳而近湿遂成中满疾畏上严不敢亟请告徐公为上言公病状上乃听公俾驰驿归公归之浹岁强自飭而奉二大人欢退则调汤药病良已亡何上宴驾公感恻为絶浆饮者三日公虽贵至极人臣然以迁之骤不获书考封公犹在九列至是以预提调永乐大典进封公如公官太夫人亦偕一品公举手加额曰天子曲念草莽臣乃尔即衔结不足报久之二大人先后以老寿终公逾耳顺矣戚易亡所不备至既予告久客意公不能无起色以间进曰公遂能忘宗社大计乎窃欲为公画赐环公谢曰如客言甚善虽然我故老犹处子也而忍身自媒妁乎客愧以非所及辞去公间语治兄弟吾才小弱而过慈且多蕙不称大任所不愧者吏部一职能使长安中金贱而士贵其缙绅不四顾而有憾于岩穴然惟徐先生为容我岂惟容我且覆露我夫以徐先生与先帝若一身使小有叅连而诘责之命三下我何能自强立治等退相谓我公真长者向固言陆君夫上誉之则推下下誉之则推上而公益伛偻为恭敬即田夫孺子与相接顛均礼呕呕慰谢惟恐其拂之也岁时伏腊劳赐里社衣絮酒肉必丰有以缓急告者靡不饱所欲而去第东有隙地为楼以居塾宾既成而落之纵酒大宴客极欢公四顾已惘然若有不豫色者客征之乃曰吾不察乃上栋直东邻是邻代我受祸也亟更之使东向而南北其栋直已岁大侵公为书数千言请三吴命于三相国且曰吾书不走长安中更十年矣此岂得已哉公病已释然则体益强性不甚饮而喜音声多纵游湖山间飭治台榭极生人之趣乡老稚每伺公出辄夹道纵观相指目曰岂其天人哉固未央也然公性俭慈间取脯醢果蓏以实豆笲而已颇信襍祥小出或见客必择日尤不欲闻屠宰声道遇虻蚋亦移足避之至老而恭敬不衰晚遭疾即忽忽而又多以意行医药疾益甚久之竟不起时万历甲申秋八月之乙卯也配吴夫人贤而能佐公内政相庄以老先七岁卒公与吴夫人之卒倾邑逯迹而恻者不啻数万人其弹指咄嗟者又当不啻数十百万也公之在翰林以词翰名一时然不复挂口独其为诸生则以心折王文成公学而喜其文每诵一卷辄起一稽顙至其试南宫而策射者指在刺讥文成公公当射则盛推之颇忤而以他文见赏得不弃及为文成公学者以致良知为宗旨他不复厝意意公谓文成公之集且在其于博学慎思明辨笃行宁浅渺也即诸君子信眉阔步仰面云汉欲以致良知之三语而盖天下天下耳目可尽涂乎其有果能若此复谓治等先民有言立志

以明道希文自期待夫不为明道希文者宁无人也以二君子迹且射鹄也尔曹勉之不中不逮矣治等又言公当就公交车试五鼓谒辞虞山之麓神庙甫至门而甲者鱼贯入若传报声已而寂然以编修使自楚还陟燕子矶雷作乃解维而江水忽立瀆珠蔽空龙曳尾而下去公若咫尺帆檣箕荡舟中人皆股弁公纵观而语客真奇观也颜色不少变龙徐徐去王世贞曰以公之谨畏多避彼其视龙犹蝮蜓者又何人也古之所称见小敌勇亦犹是夫夫子不语怪神虽然神亦岂异人意以公之贤且大贵有开必先者故常也乃稍稳括其事志而事行若世系子姓而志之曰公之先世为吾吴之吴县人五世祖赠刑部员外郎威高祖璠曾祖种杏公昌王父实始徙常熟遂为常熟人皇考心萱公恪以行谊表于乡自种杏至心萱公皆以公贵赠封光禄大夫太子太保吏部尚书武英殿大学士公以正德辛未冬十月己丑生飡寿七十有四娶吴氏有令仪累封一品夫人丈夫子五人乡贡进士治太学生澄澍泽济孙男十二人为治出者九为澄出者二为澍出者一曾孙男一人孙女六人曾孙女二人婚嫁皆名族铭曰

汉有客星以隱道尊胤锡于吴爰开闻孙曰续可求以相道蕃公寔兼之为帝所敦东海孤生起自明经褒然公交车入黼大廷帝方祠厘極驱万灵应制之章唯公典刑或合或离肺附若一学士清标南宮峻秩有不畀公帝情如失遂司统均入备承弼公之秉铨大衡冰壶一日千里逆斂苞苴拂言斯并谏言斯荼扫彼岩穴以填天衢臣职粗举臣貌已槁大官梁肉惴弗敢饱尚方之袞乃衣束楚天听恻然几丧国寶四牡逶迤安车以归谢彼朝荣慰我春晖六十而慕烝烝依依凡此伦物无憾几微公既宁止乃莫不适取彼朱芾为泉石饰兰桡笋輿师意成迹或山而栖或水而宅盛服以嬉俨若神人或巾华阳则以为僊衍衍优优踰二十年昊不憖遗夺我师臣天子曰吁皇祖之良宗伯将奠司空治藏密印黄肠易名以葬在晋曰安在宋曰沆惟我先朝师健若溥虞山之阴得即而所有旒若云有涕若雨我诗其碑光于千古

资政大夫户部尚书鍾阳马公神道碑

马公者讳森字孔养其先豫之固始人以唐季从王潮下闽遂居懷安之卬峯坑家焉马之为懷安人而有贵至光禄大夫曰浙者今墓及庙在十余传而惟觉之季子珽保子于裴昌其姓三传而为乡进士俊蚤卒妇蔡以节旌抚孤驄补博士弟子娶于李晚举子而从奴误殒之家老怒将并心焉公驄曰此误也资之鏹以跳里中咸推公驄长者自其为长者踰年而貳何遂举公贵至贈公俊公骏俱户部尚书李贈夫人何至封太夫人公登省试以公驄命上书复故马姓居钟山阳天下遂称鍾阳马先生公生而庄嶷稍长读书工属文公驄内竒之曰是不欲以一科第小若俾从故王文成公高弟林致之游公既深于其学而叹曰夫为王者左袒陆而抑朱氏久矣夫尊德性道问学胡可偏废也于

是集朱说而衷之陆即为王者亦心折而公又从故漳州黄司理某游黄亦文成高弟也时方坐与上官抗讼系公不惮累以身当之黄亦心伏公识而公尝旅宿拒其奔女所止山馆多崇公至而崇匿弗出自是众皆心仪公有巨人目矣公登省试上公交车报罢请肄业太学时祭酒魏恭简公校试而奇之最后与文成公之高弟子欧阳文庄公德邹文庄公守益罗文恭公洪先游出所论著与印质皆合公益用以自信而其成进士至二载余犹在选人以聘分校顺天试所得多名士时信州相公之壻吴生与焉愿自效于公介绍谒信州公笑曰吾自偶识子耳以子贄相公不可且吾不愿见相公又逾年始授户部主事治草厂却商人赂治怀来饷飞刍粟亡乏治九江榷贾船舶人怀之而岁奇羨至万余金入为员外郎郎中尚书梁端肃公材以廉闻天下慎许可顾独贤重公指其座曰异日而座也久之用郎高第迁知太平府公至不偲偲露牙距而要归于礼让惇信有兄弟终讼者皆老矣公示之镜曰更许日作兄弟而忍相詢耶咸感泣罢解繆文卿杀人而贿吏移之繆满公疑其状适吏以满病请公怒曰若为谁甘心满耶即满旦死旦坐汝夕死夕坐汝亡何而御史果直满当文卿辟他御史衔公者阑入郡狱以试公则仅十余囚论报者耳狱几空他御史乃愧谢公中贵人横索夫至数百公阴使夫与之噪而阳剂之屈而去衷芜湖侨户徭与土著绣处亡哗者邻郡狱讼皆来质成讴謡相属入覲太宰闻庄简公渊以考功令差次吏计公为天下第一亡何迁江西按察副使饬九江诸郡兵九江故接太平壤其民望风而治有虎患公禱而走之遂参其省政进按察使稍迁山东右布政使寻复迁江西左使已又擢右副都御史所抚复江西而公之为叅政左使时两入棘司提调所得多知名士而最后御史欲拔其所私士公持不可御史竟以私败为按察有奸于外而杀妇者御史以其出自甲科欲寬之公曰吾知治杀妇者耳不知其甲科也其奉三尺不阿狗类若此当是时公最为名藩臬而至于巡抚尤心开所调剂必公私称便益时创三殿而江西当出材价九万金公请以南粮改折而收其羨米贸价偿之民不知也弋阳山中盜以险遠故篡郡倖公画策掩并盜魁取之而即其地增设县治又他邑亡頼有谋翻城应盜者公度临川令才用他事檄之往而俾捕诛之盜立解散真人陶仲文所使嬖人横甚公诤得其伪印牒寘于理仲文莫能难也自是入为刑部右侍郎寻改户部右侍郎甫上而以前荐藩臣累徙大理卿贵势家毆杀匠者刑官当以佣坐赎论公驳曰此浅佣也与恒人同俾抵偿死又罗指挥贫而赘其妇卒病死吏当之杀妇公复驳曰指挥无杀妇状此妇翁以隙中之耳盖一时翕然称公与司寇郑庄简公晓御史大夫周简肃公延为贯城三平云公遂复为户部右侍郎总督太仓兼领西苑农事公行视诸仓叹曰吾为郎时创白故在谓诸郎好为之吾不汝挠也亡何谢病归归之仅余年而起补南工部三为户部右侍郎寻转左进都察院右都御史总督漕运兼抚鳳阳诸郡公之始为太平也属信州与袁州共政交恶袁州孽信州而逐之谓公尝荐其壻吴司之公实亡所附丽所居官复尝调而其为太平更以善状闻心器公更以是得连擢官其桑梓地至厯卿佐公行意落落自若中间一下徙一移疾即袁州亦不可得而亲疎会其败所私人

距脱而华亭公当国秉即家起公以至漕寄公益感奋悉心区画飞粟岁课登于旧一切居间尽絕其地中大水公发庾而賑之不为灾又平史家庄鹺寇晋南京户部尚书遂改北户部时穆庙初登极额赏不可数公钩剔伏藏补之毋乏有诏采滇寶公抗疏力諫沮凡再上必得请乃已一时翕然以为庶几复见梁端肃公而华亭公尤器爱公会有新郑构华亭公亦不自安以去公恒邑邑三上疏称何太夫人老得归请驰驿还里朝议谓度支奈何可一日舍公公谢曰巧妇能为糜不能为无粟糜已矣谁能毕我力者公行而举朝饒青门啧啧以二疏复出也蓋侍养之又五年而何太夫人卒公年六十八矣哭踊踰礼烝烝犹若嬰孺慕念父养不逮禄于食簋減損置光祿祭田祠祖以下春秋合族而飨之公素恭謹至老益恂恂不衰每出入无他僦从所乘竹兜子戒勿去檐帷曰如何令我倨见乡井当其侍郎子告时而悍卒有挟帅而闕者委曲解说得不乱且曰得马公一言隃于赦公尝有所荐引而其人贵至大帅行金为谢公笑却之曰我误识子子负我有门下士官御史者湖口人也请得權湖口税以自便公持不行识者谓公和而介達而諒信已不挠有古大臣风然哉公既家食久望益重两台推穀相属意泊如也居恒著书有四书口义书传敷言易说义春秋伸义辨疑皆以诸宗儒大旨为经而纬之不专主王氏说最后草诗礼解微垂就而卒他所著奏议诗文集棘署驳稿九边经畧考七闽税斂考志悟余言多行世者公之卒以万曆庚辰九月十九日距其生正德丁卯春秋七十有五配任夫人有淑行详郑司寇世威志中丈夫子四人左府都事熒孝而才及太学生燮任夫人出也郡诸生焱貳陈出也歙黄出也孙男三人陞城世女六人孙女五人婚嫁皆名族蓋公在而故太平九江为祠祠之歿而闽之人谓公能已乱请于台为祠祠之俱世世勿絕讎闻上辍朝一日下所司予祭墓如礼而天下犹以未显贈易名为歎公故卜兆于西郊之怡山前卒一夕有巨星陨焉即今所賜飭莹舍地也丽牲之石熒寔请于不佞志之复为铭曰

计臣之良维孔与桑立析秋芒亦有吏干曰敞广汉如刃刈蔓岂不尔宜快于一时元气则漓公为材臣于牧于甸质有其仁西楚之屏司天下平毋蕲近名不佞国储焉使神输食寡用舒谋夫靡壹臣保贞吉宁俟终日归而著书其言满车帅心自偷嘉隆之间完人寔艰公■〈立乞〉如山天命不造夺我国老帝心用悼乃命司空卜尔玄宫西郊怡中星陨于是公与俱瘞亿百千禩

通议大夫南京刑部右侍郎何公神道碑

盖嘉靖间天下有博大肤敏之臣曰吉阳公公自小官以至陪贰八座毋问识不识望而称其为巨公大人及其末也求迹者不能无一二疑而贤者并信之公亦愈自信以王佐必可为圣人之学必可致大约其用未尽究其学亦未易窥而去公所自信者非遠

矣公歿之二年而葬葬而当有天子之命有司未及请而公职三品例得树神道之石其仲子宇度以太仆少卿刘公穩之状来丐言不佞通家子也虽尝一再侍公然不能尽悉公而窃以公之所自信者志之公何氏何之先自唐叔虞十一世而为韩又为何至侯武都乡侯充以辅相显名汉晋间而求点用经术高尚称其后世世为之甲族而万户得成与弟指挥僉事贵从高帝起义兵渡江功最大得成之后絕而指挥移戍江阴以死有子澄澄子铭复移戍德安遂定为德安人铭后絕而弟英代之英子洪洪子泰以指挥僉事授子勲能拓而大之用武功进指挥同知是为公父公生而邻有梦绯衣神人乘云下公舍者生之数月同知公从征思恩归梦祖泰书其掌曰迁觉而异之遂名公曰迁后字益之以尝读书吉阳山中故自号吉阳而学者遂称之曰吉阳先生公五岁受孝经小学居别室塑圣贤像其中宪伯杨公某见而曰谁谓当乃翁弁者真吾壻也其女是为杨淑人而公甫十五即用工文秬显张文定公邦奇奇之曰孺子且名世顾公为易及大学中庸务根极羲文孔曾之微旨而不蕲中时趣踰冠举于乡寻试礼部不利游南太学祭酒湛文庄公若水初以制举义知公而公进其业遂真为弟子公凡七上礼部试皆不利然所交游皆大父行天下知名士四十始对策大廷读卷当第三而时相有相轧者抑寘末人谓小隱年可馆选也公谢曰隱年而馆能无内愧心乎竟从事吏部三岁除户部福建司主事居户部之踰年而改吏部稽勲稽勲未几以言者累谪判九江亡何入为南文选主事进考功郎中大察察吏毕进南光禄少卿入光禄仍为少卿进太仆少卿遂为光禄卿亡何以僉都御史抚江西久之以右副都御史总督漕运兼抚淮扬寻以南刑部侍郎罢归归之十有二年而病病踰岁卒寿七十四始公之自吏部谪也所中蜚语以讲学故谪而得九江有周朱二先生白鹿故址公语人吾安能舍学不讲且幸以实蜚语亡弗可者已乃开白鹿教授诸生亶亶不勸公之为南考功且司大察故事考功郎不与他曹郎接即投谒亡所报报或仅一刺不入又不与他曹郎会日呼曹吏胥抚郎阴事以故郎往往见劫吏胥亡能馭者公时出从他曹郎游亡间又不呼吏胥撫郎阴事而奏牒下亡不称明者即被谪人亦帖帖心颂矣当是时太宰御史大夫皆以公故重南光禄号为闲曹而是时南有倭北有河南寇势张甚公往往说其帅多以虚声逆遏之恫疑不敢近人自是材公而其再入为光禄光禄素号弊藪其出纳皆以大阉口量自马少卿从谦得罪后日有闭目束手冀得以资序迁改而已公叹曰罪等耳坐靡县官财毋宁坐靳县官财乎虽然事至而后争必败乃条其状四上之得报着为甲令颁之属署自是物直平供有定额奸黠吏不得为侵牟即大阉无所用口顾其意亦甘之曰何公遗我安矣自公之法行而光禄岁羨可八万余金于是人益材公江西之大吏宦京者相率以公请得巡抚而仅为僉都御史公至则首谒故抚臣王文成公祠慨然请嗣志焉于是创条例以矩赋严乡约以止讼立保甲以诘奸练土兵以备武年余而闽寇之止竟者逡巡去莫敢阑入又捕广之大盗刘鳳尸诸市公请止逡调兵创兴安邑治增益鄱阳戒备咸报可遂悉城进贤浮梁金溪瑞州南城丰城之未城者咸策公帑之羨充之一不以烦民而所矩赋岁减四万

三千金又命有司堤新建乌土溪水水不为害灌溉四万顷民为勒石曰何公溪公之治漕漕课独为前后最景王当之国道经淮公衷供亿以万计从王者恶之而莫能难也是时言官以天变击公等八人皆留而公所中语复以讲学其为南刑部侃侃持法不少贷忌者竟用前语中公遂罢公笑曰以讲学中我固当我向者不能毋讲而今乃毋讲也自是益开席授经谊负笈来从游者恒数十百人俱稟而勗之孙中丞应鳌舒侍御鳌以公当用疏上报闻当是时余所谓求迹者不能无一二疑而贤者益信之以此其最贤而最信者毋若刘公以故刘公之言谓公生平表里洞达如青天白日帷榻之语可质鬼神又云万物一体公实身之若矫世避人洁已明迹皆所不为也公之学以知止为入门以默识为关键以不覩闻无声臭为本体以功夫合本体为妙诣知言哉刘公又称公事其父同知公及母张淑人继母朱淑人孝丧而毁瘠逾礼好施予所全济姻族指百千计至捐宅为学宫以期郡士之取名第者于书一过目辄诵鲜所不览而耻以博名其遘诗文章所点窜凡六七易始就以质昉草无一字同者然迫之则顷刻万言川涌云变而不见率其诗出杜少陵于文出两汉而颇推王临川近则王晋江慎中他蔑如也公又尝于南曹善故杨忠愍继盛杨公当赴法而公救之权相严所以是与相严左其抚江西而仅金都御史为左抚之三年始治漕为晚转而得南刑部为常谓以皆相严主之其后两见抨皆严客所为也盖刘公云然公有丈夫子二长字功袭指挥进守备凡三娶皆名族而与字功皆先卒仲即字度今为光禄监事以文行世其家孙二人所著诗文集百卷全楚志若干卷友问集若干卷江台政畧若干卷学指测言若干卷墓在郡东十八里紫石村铭曰成嘉之间两人龙惟陈与王擅帝聪从门入者非其宗何云捷取归心胸默而成之言乃雍时惟中叶相不共翅虽匪録未受笼义取掇世无污隆绌坚僻吏裁滥供凋疲抚宁漕计工少吐厥绪开屯蒙天衢甫夷忽告穷是谁违之俾弗通陈鸣于野王则洪公式廓之千秋功我辞匪腆碑乃丰以为不信问刘公

弇州续稿卷一百二十九

●钦定四库全书

弇州续稿卷一百三十

（明）王世贞 撰

○文部

△神道碑

通奉大夫都察院右副都御史赠兵部左侍郎张公神道碑铭

当万厯之六年天子威无所不加乃修岭外政而是时太仓凌公云翼议用众以二十万埽填诸蛮而岭之右大藤峡八寨蛮连龙哈布咳二土司尤犷黠而恃其唇齿弗肯宾于是计新岭右督抚臣而嘉定张公任时领山西辖有循吏声会相国江陵公自楚返大秉晤今大宗伯徐公于襄台而论人才徐公亟称张公江陵公恍然曰吾固知其循吏第儒不习兵今乃习兵耶以属太宰王公王公晋人也曰徐公称之当张公乃擢右副都御史拊循岭之右兵民咸隶焉而继凌公者楚刘公与张公计分道进师张公业以为我必先飭士而后可致之用为简行伍申约束蠲逋赋发公庾斥贪墨吏士蒸蒸乐从矣乃抽锐而伺贼瑕刈其东岫尤黠者捷闻有金币之赏始大誓师明年遂数捣其穴不三月悉荡平斩级垂万卤男女如之牛畜器械万万计公以偏师破城所斩卤与大师刘公功畧相当上大悦为具太牢告郊庙中外伟之以大藤峡为吾郡韩襄殷公雍畧定地余百年王文成公所不能得志者公与凌公后先削平之而皆吾郡人尤甚竒公又图所以善后者凡七策一曰设三镇二曰戍要害三曰分信地四曰迁卫所五曰广屯田六曰开道路七曰议粮饷疏上下有司次第行之方议广武功令以旌赏公而公病殒卒矣公之病得之体素弱而规调贍兵食太劳又内慈仁不忍于锋镝时忽忽减饮食既卒而御史为治丧仍具其事闻诏即以所应迁官赠得兵部左侍郎录一子入太学大宗伯治祭大司空治墓其祭之辞曰扫十寨之妖氛用劳定国收万全之胜筭毕命在公盖实录也公年仅五十七云其讳任其字希尹世为嘉定人其先有讳清者传子玘玘传钱唐尉子爱凡三世皆以公贵赠山西右布政使配皆赠夫人而钱唐公得及公而封工部郎又封严州守母徐夫人公少而颖异强记工属文十八补弟子员二十举应天二十四举南宫皆褻然在显列所为文诸学官大夫传诵之以进士高第擢工部都水主事出督淮浦漕艘故财贿出没地公少年人谓即不病所染要不能脱吏手而精强于职吏不敢夤缘为奸私有竒羨悉以归长府比三岁而得八万金满考无害晋署员外郎当治武库伏而同舍郎黄元恭辈与公皆好为割言言颇侵分宜相闻之不善也而会幸帅鸾白上请句稽武库仗得借以中公等悉外补公得大名府通判居半岁量移嘉兴府同知公不鄙薄其官以廉靖惠利为政吏民爱之摄守入陪大计课最出国门而迁知袁州府袁故分宜相地也公大骇曰此何以浼我盖分宜从容谓次相华亭公为我择一良守华亭公谢曰以赵颖川钩距所不知欲衽席之则亡隃张某者而分宜故久忘之遂擢公公至官乃日取其暴横舍人子加三木焉曰此固而主惠而小民意也小民业已得守指遂与其舍人子均开不相让袁以少安而公丁后母天人忧以去服除当补官时有壮公守袁事者将畀以大郡公固让得严州严山郡也俗朴而简公一切用柔道理之日啖菜羹脱粟饭一盂曰曹平阳武吏治强齐尚不欲扰狱市而我何藉吾巧为久之其民即尸居不敢为小恶谓无

奈我公知之何而有鄢中丞者挟分宜重不解台绂而治鹺政所至假检摄为恫喝公私帑如埽独难公无所问曰去之此曹子强项不易语盖时淳安有海令云既分宜罢公始擢山东按察副使久之有漕河役公以才见选佐大司空朱公昼夜荒度亡告倦工甫就而官署不戒于火元配杨夫人与子女四俱燔焉公病悸上章乞骸不报进叅贵州藩事公归而侍布政公作膝下恋且以痛杨夫人不欲行布政公强之曰不念若祖布衣地下耶万一得三品考从大夫命吾可俟而见若祖公为强出至贵所治与其吏民之见信畧如严公又佐御史司试事程序文多出其手以雅纯称公沿台檄至长沙而忽心动上章乞归不待报即发太宰惜之为转陝西臬使以便公省而布政公讫至矣公絶痛水浆不入口者三日虽强食以迨服除犹支床鸡骨也自是公颇息意世路别构数椽水竹间翛然燕坐若无官者居三年所而太宰檄诸待次官过期即罢不叙公不得已强出补云南已调河南俱未及上擢浙江右布政使藩之长有褊心者数与其寮竞公一以恬夷剂之咸自媿解久始移山西其治为边饷出纳视淮浦尤易染而公清白亡改于素而钩校加精诸上输者独见为宽省而边计更溢羨以故太宰得之详而公不喜通时贵人书问一有所通其人始色动既启而亡所侑书中语乃倦游归计耳其人笑曰即归自决之何问我为而公以久次满封三代乃大喜曰谁谓我宦拙外臣能三代封者何几故公之得岭右台天下以宗伯徐公为能荐江陵公为能用而其捷也复以公为能报公为人中形质清而弱羸然若不胜衣或竟坐不能■〈目舌〉公语语则欸欸中规必自其底里出之其事布政公虽极志养然不为矫厉故庐颇敞而据要悉以推其兄衣数浣竟不易食无重味其孝友质俭自天性然要非所以为名高也既痛杨夫人之凶终止弗娶终其身所御臧获能守布政公戒即重用事者不得御币帛履相踵于门弗敢出盖邑里之推重厚长者必首公父子云当公成进士时世好言公文公独谢弗挂口竟用是鲜怨妒以功名终其身余尝谓公之友殷子都吾与若张公交垂四十年而彼不我悉也然吾试名其人且老矣不失赤子心贵至列卿不改布素节歴夷险百端不夺处女行富可埒邑封不增白屋餽殷子唯唯故公卒而状之大畧如余指公有一子曰其廉为诸生敦而文即所当入太学者也娶于徐即宗伯公女女一側室朱出嫁诸生丘璋莹在沙浦原为天子所赐其葬也宗伯公铭其幽而其廉属余以文丽牲之石铭曰

国有大讨于岭之南王师启行妖祲横天川芷林菁被其臙腥王师之出如燿如虹如彼霹霆凋戈大黄脯厥后夫以饱我兵京观峩峩铜柱辅之上标青冥站鸢不推毒瘴横披日月朗清猗欵肤功谁哉运筹乃一书生捷书之腾天颜为开二郊告成而我张公尽瘁鞠躬庶几孔明帝悯劳臣大牲醇醪皆出尚方晋佐元枢三命之服荣施九京沙浦崇原爰封马鬣俾象大藤陋彼新息而陨五溪薏苡隳声我初识公呐呐恂恂如衣弗胜信哉有周张仲孝友光于南征吉甫作铭勒之乐石永垂亿龄

中大夫太仆寺卿东白顾公神道碑

盖嘉隆间有难进易退之君子曰东白顾公公举进士为循吏为直臣其再起也为名卿居家而为孝子为乡先生以寿考终不可谓非君子也已公之始令而得余姚也最号壮县绅衿叅民三之一而居豪吏黠胥以智计乘其间公始至若粥粥者已尽得其出没状一日坐堂皇召诸吏胥责数之曰某弊由某某某某舞某法立改之不者非死而戍矣诸吏胥咸战栗若负霜背宿蠹为扫每均役辄先计邑岁所需有成则而始按丁盈缩之卒无有浮入者县故有三老周知邑赋甚熟而属之不能无高下其手公故知其状若弗属也朔旦大会庭中猝召三老前谓我第赋长上下三老出不意咸叩首吐实即令赋长前受牒去亡少哗者暇则召诸儒生与谈经术析文义所奖进若翁大司马大立赵太宰锦二三公其尤也入预试外帘所校文得知名士为多时台使交荐公而一时之令浙者必推公循吏循吏云公入为礼科给事中亡几而蜀王与都指挥刘永昌相奏讦永昌故辨口尝以言事得上意而武定侯勋复庇之诏公偕刑部郎即其地置狱公谓蜀王王也第避嫌不当朝其讦狱以二司不能无嫌王而枢永昌请以他司讦俱报可公乃与郎杨本仁驰之郾会陝蜀诸藩臬钩考案证尽得其实时蜀以疑王恐甚而永昌盛欲有所辨说公不顾抵永昌罪奏报可中外快之公归而秋享明堂礼成乃上疏条治道五事皆的的中窾而中为广旷恩则请赦大礼大狱诸臣抑邪佞则请屏斥诸方药不经之士公甫草疏若鬼啸梁者出而鸦当户鸣公不顾既启皂囊授中贵人中贵人曰上方怒言者若休矣公正色曰言官言事分也乃伺上喜怒行止哉疏上上果大怒廷杖公六十编管保安州公之被杖也且死者数矣已又冒冰雪舁行絶塞也天下靡不归公直臣而公絶口不复举疏事惟时时加额上恩德孤臣万死不恨台聘公公主宣府教授诸生所造就后多显者公居保安之三年茹草■〈食 臭〉糲甚甘之独不能忘其亲海隐翁钱恭人而一日闻钱恭人病乃上书执政辞甚苦执政闵之俾沿檄归拜钱恭人床下钱恭人病为起至明年竟卒公万里间关得视钱恭人含敛人且以为幸而毁瘠骨立里骤火且侵舍公叩头呼天血渍地俄而风返竟以棺免既葬戢身而事海隐翁者十年海隐翁老而好施予诸所衣食五宗给槽车治桥道公倾橐承之不敢以不继告也公之治海隐翁丧业始衰而毁瘠视丧钱恭人有加诸来吊者不忍于公戚掩目而叹曰孝哉顾公也公居久之始奉世庙遗诏録諫臣予公故官待次之明年而超拜南京通政叅议甫之官条上十二事中所谓贵农官立营田置义仓禁浮靡盖倦倦王业之本而破格以收贤隼广恤以作忠义于人才三致意焉上嘉纳之三月迁顺天府丞遂拜大理寺左少卿亡何进太仆寺卿故事卿优游需次而已丞至自匿避不敢与少卿均礼公独抗疏请平少卿丞体一丞督库藏而少卿理京营者监之东西路少卿丞各一相继行部验烙马上可之着为令公又申明六条优恤种马责成寄牧隆重铨选严督解运议派改折慎贮卷籍俱报可公又延顺德倅归有光为太仆志志成而公序之人以为良史归君用是得入直秘阁

而公倦游且归矣元相兴化李公谓公属者天子大阅而覩云锦之盛以兼金大币劳公且公跬武执政奈何轻擲之公笑曰老臣始望不及生何乃今日也章再上得请且以其子鸿胪可立侍归祖道供张塞青门谓庶几二疏云公之归也念可以为德于乡乃大挫产以六百畝置义庄贍族指以百畝资里役以三百畝给郡邑社三学诸贫士以二百畝共介石书院祀介石书院者祠故言吴公子游而以宋著作郎王公莘大父五世祖原鲁先生配者也著作与原鲁后先讲道东南公素所服膺者归自保安而创祠之在大石山中公始以经术显名所造就多鼎贵人益慕从之户外履恒满公所值即后进齿卑不得当一涉秭文事津津乎言之不啻口出也见谈说长者听之恐倦有所诋毁即掩耳矣公虽竟然不好为厓异而实中介其谏蜀狱还也蜀王内德之以珍寶值万缗谢公巽却之不赍一蜀物装谪保安其寮之釀金粳者台使之以赎陂治室者一切弗受公虽起家通叅至大理所佐多闲曹而又輒迁去亡所见及其一为太仆章章如是所建白着令甲至于今赖之呜呼公不称名卿与乡先生哉当公之繇邑令而给事中也立朝不二载谪谪三十年而始起其起也不四载而归若公者真可谓难进易退者矣公讳存仁字伯刚别号东白其先系出司空和吾太仓之七浦故有三顾村有徙塘北者最后徙郡齐门五世祖愚胜所谓原鲁先生者也凡四传而为海隱翁启明娶钱恭人寔生公公历官不及考而两以诏恩封海隱翁给事中钱为孺人再贈翁顺天府丞恭人所繇称焉縉绅先生艳之为歌诗表其事公卒于万厯乙亥距其生弘治壬戌春秋七十有四子男四长即可立娶刘氏次可大俱先卒次可兴娶毛氏与可立俱鸿胪序班可言娶朱氏侧室刘出州学生女二适陈嘉绩周籍继配谢恭人出也孙男四人慎余留余郡邑诸生余尚幼公之去余姚垂四纪而余姚人至今口其政不衰来往必造公里问安否其所定役法周令鸣埭者推行之其民为謠曰前有顾祖后周父活我孙子十万户故闻公卒而与吾郡之士民相率而请于台各祠之学宫公所著有东白集若干卷不佞序之其所为德于乡非一邹司成守益杨太史慎瞿宗伯景淳宋中丞仪望张中丞佳胤舒太仆化记之其卒也顾观察章志为之状而翁大司马铭其幽可以传矣墓在大石山三品例得祭葬而公又全节臣也台使者业已请矣是故不佞为文于丽牲之石而俟焉铭曰

舍而卷用而舒何所不直循于官惠于乡何所不德以直行德所繇称大人作斯世式以德行直所繇称长者貽后世泽大石之阳郁郁葱葱为司仆阡我勒信辞纪之丰碑后千百年过而式者曰于嗟公兮吾无间然

正议大夫顺天府尹画溪姚公神道碑

盖嘉隆间有号称端亮之臣曰顺天尹姚公公于宦在通塞间后人虽不能尽知公然望而称其为巨人其乡之称则以为长者故于其没也乡父老诸生举而闻之有司请

祀之学宫台使者以闻于上请予祭葬则下大宗伯议当予祭葬而其孤绍科等念重隃大夫期卜日而归诸唐兴山阳阡以河南左方伯陈公应知状来问言于世贞勒之丽牲之石公姓姚氏讳一元字维贞姚之先为唐丞相梁国文献公崇凡九世而为宋延唐殿学士文僖公佑传子梧州守侯世之显名又数传而为元司训文宦长兴有画溪赘有子国用从高皇帝起义积战功拜万户其子孙息而蕃之遂为长兴甲族更四传而为宿松令岳卒官以循吏祠宿松寻祠长兴有子良辅繇经术着声贡入太学蚤卒赠监察御史则公父也公十三岁而孤与其兄一夔依母游太孺人居灶突时时冷矣以是益感奋淬砺于学二十游诸生又三年试最有岁廩束修受经者彖彖始授室得共奉游太孺人母乏又九年举于乡明年罢公交车辟又三年成进士肄事礼部尚书集诸进士而试之论为第一明年授行人尝使楚藩祭其王■〈女间〉于仪度亡责币还满考选山东监察御史视司隶比部治徭更亡间贵戚小民便之出按山海等关论劾债帅不职者还奏事毋害遂按陝西陝地辽而民瘠困于供公一切治以严简分守故避平凉宗人而与分巡并治鳳以所辖遠不相及则又增设泾邠道公谓守避平凉不避牵泾请移鳳守守泾以平凉为支部而革增设者台议欲益马政都御史灵州兵备副使下公公皆持不可曰蕞尔吏民能奉两大吏耶奏上俱报可而是时中贵人治上供絨罽为陝累诏罢之以属公公与藩之长计约节岁省可四万金而絨复精好既奏少府上大悦增公奉一级曰为我留按陝更后岁而瓜公益感励而边帅吉象窥公得上意橐币若居间者公论罢之又论抚臣之不职者镐亦罢诸郡饥而独故京兆小有岁诸流徙悉集公曰是不为葶且生叵测以便宜发仓粟万斛佐以赎醵赈之及麦秋而解属大试偕计士公毖飭其曹偶以夕继日即病瘁亡小间是岁陝得士多公既久治陝所赍衣屨穿有司具新衣荐公怒弗御曰御史身宁挂陝寸帛也还理道事如故补课三载绩赠公及游太孺人予告身诏察视京营戎政有甯食于虚伍者公严核悉出之大帅圭与相臣比而轧公弗止也时緹骑督炳张甚与大司马争班军事公偕给事中今大司徒殷公正茂衷之俱忻服寻课六载绩御史大夫屠公侨慎许可顾当公上考曰子真御史也然竟以大帅轧之故弗获留迁福建按察司副使公之宦闽以佐司事兼行海防至则庀练于余皇浚城深沟约束井井倭不获志于境闽人称之明年进江西右叅政寻丁游太孺人忧服除补陝西其职粮税以岁时行部薪菜外亡他供民犹识之曰是故敝衣而驄者耶寻佐御史试偕计士得材埒于初转江西按察使遂为右布政使已又为左公度财所出入由库官吏侵悉削其权以听不时委而又时衡挖之以是宿蕝尽祛洗顾恒守章程动引故事而台使者皆新进务以更为名姿相格公乃叹曰吾不能舍吾守而折腰少年子上书移疾归卧数岁中外皆惜之遂以省台会荐起除山东公所以财节出纳大约操仿江西而加精密其声亦转起隃于旧时议者谓东土田羯羴欲以门準赋公持不可曰赋自田出今乃不可信而欲以影响準之门籍令吏隱没豪富而委上错于蟹螺之地何自诘得其实乎卒从公议寻佐御史试得士具如陝入为太仆卿未上转顺天尹时新郑公行太宰其起公自田家岁中

再迁至九卿意不能无少望而公第从朝堂一再见而已久之竟弗谢乃咤曰此当老詩忘我嗾言者如其指刺公公亦病请得致仕既归而荐者剡相接然公絕口不复言宦时事与同郡诸老先生结社湖山间尚羊自快时抚台后先蒲圻谢公鹏举西安李公世达故与公有连移书求会公谢曰身隱矣安敢以野服见达官卒不应而间过所谓画溪者召其宗人饮食之问所愿必使蒲公徘徊桑梓间而叹曰此吾家所由起也盖自号画溪居士云而邑故有鄞南若下塋岁久不封树公割帑中装为之一新公仕宦垂四十年宗之室亡弗润者而晚始构一堂人或以隘请公指诸子语之毋问帑不继我尚不能貽此曹太祝奉礼而何隘为公至孝友居恒以不及事侍御公为恨其事游太孺人备志物四十年一日也属病■〈谷丸〉抆颡吁天请代不得则骨毀以殉之其恭二季父如其父其恭伯兄如二季父家事亡大小以次禀命行宦游即数千里外致甘毳不絕歿而调棺殓治葬事抚孤遗亡不极意尝馆于顾中丞应祥而中丞时以候勘家居戏谓公世鲜我必待子而起色乎公入台有谓顾公材当用者或尼以歿闻公疏辨之竟起娄迁至大司寇其叅陝政与察之贤豪靳少年学颜王少保崇古游甚笃王公中飞语台琐交齟之陝中两使者意为动公力救得免然竟不使王公知也其察京营才故裨将李光启而荐之得边帅印而公已外迁李君哀金帛为谢公笑曰君不知故人耶欲报我胡不以而身为国家殉而使我有荣李君愧谢去其年卒死于节公之德为多然大要在持厚覆人过不倍恩归于长者而居宦洁廉尤天性既病而陝人马少保自强时佐吏部谓其长欲安我凋劫非姚公不可公几以中丞节起而病■〈谷丸〉且卒矣卒之年距其生正德己巳寿七十娶于钱饶令德佐公积織以至有家公与之相欢白首无间又相庄也封如游后公一岁卒举三丈夫子绍科绍儒绍宪皆太学生朗爽而文女一人诸孙十人女十二人婚嫁皆名族所著有古今忠孝人物赞奏议若干卷藏于家铭曰

天目蜿蜒象龙罨画下汇飞淙水秀土沃且丰笃生长者敦龐曰京兆尹姚公起自明经孤童爰备帝门四聪乃睠西采秦风行行且止避驄饬闽组练余皇岛夷莫我敢让儿女贄竹嶠潼公其惠我故邦而臬而藩西江吏蠹民蠹埽空束修抗志直躬死不受少年容若下有田可农天子曰都汝庸其以袞衣来东齐鲁颂讴喁喁京兆帝心所冯公材三王比踪枘凿相门难工有身可完曷恫归而为德五宗其取衣哺若供毋以疊耻黼穷尚书尺一旦降菰城之木雾淞德星下陨■〈石宫〉■〈隆上石下〉畴如高朗令终唐兴之巔龕嵒其址一掩一重掩霭佳气若封有美硕人颯颯衔恤蓐蚁以从是为京兆幽宫与曹氏阡比隆

封通议大夫兵部右侍郎汪公神道碑

汪之先自越公华筭路蓝缕以开不毛有功德于民遂世世食歛为歛甲族至明而

蔓指数十万阊阊栉比而今左司马道昆尤贤重赠封其王父父皆如其官赠公之赠也司马谓世贞寔尾公交车以文事见幸委之追志神道之石至是封公卒天子命宗伯修祭司空治窀穸司马乃侈大其莹以明上德意复谓世贞志石如赠公例惟是封公之元配吴淑人葬则窃已志其幽不腆之辞凡三见采于司马而以六寸管当执鞭则甚幸第状草自司马而介子道贯讨论焉其何以加乃即状畧曰公讳良彬字某赠公娶亦曰吴淑人难子中岁而后举公则爱护公甚公生而磊落无凡骨为儒甫成而薄之曰吾安能日俯首占■〈亻毕〉乎赠公挟之贾贾且成又薄之曰吾安能没身锥刀间乃日习击技骑射得阴符祛篋家言读而揣摩之谓侯印可肘也母患之谓曰汝七尺与母共而奈何轻使与矛显博我何以食寝公乃归从事于家赠公嗃嗃操下公材最能当其意然犹不废杖公蒲伏拜杖廷下徐修色而请间毋忤也既居嫡且长当得秉乃益推肥以与诸庶由由然竟其身无间言赠公健善酒则公日精为酒吴淑人多病善药则公日精为药咸天年乐终非困苦而公不以倦孺子慕也盖乡人人归孝矣公素好形家言卜兆树茅冀福及其后少而举司马晚课之习三礼及制科业胜室辄成进士以郎最封公守最再封公中丞最三封公至司马封四矣中岁举道贯课之学复就公时从容语司马吾于世所欲得者三事其一吾时恨寥寥越公裔今汝贵至列卿无忝吾先而又推胄子予道贯道贯材侷自得之其二挟圭测以求堪輿间一坏土冀及来者而验之汝独所未得志者刀圭苟入口躄白云去汝曹不难耳盖公日从事丹灶数损橐亡黻色而最后考诸方士多不讎乃谢絶之公始以太淑人病多为医方而善故吴处士洋洋国医也因得其禁方一二以治人病亡弗验者处士死而其子桥贫公举以归之曰毋堕而父业复以授中表弟潜两人行之遂擅名郡中公犹时时为言毋易视药善则膏梁不善酖毒耳藉令十全不能敌一死盖公恶其名不欲居又不欲妨故人子计然恃公而起者指不胜屈也公晚节益为俭勤其筑室务完固而已不耐丹楹刻桷司马当在事荐以文绣则笥之异日为贵客寿或以资置产弗御也司马乃具成服以荐固请御之公艷然曰而翁得道于老氏庶几敝不新成且石太中有二千石子者四而勤之使浣濯何独我鲜衣也竟弗御公故饶精力米盐布帛出纳琐屑少所厌弃者更精意好之治事至乙夜不止太淑人念欲有以风公会亭午蹙蹙自圃归乃迎谓曰翁所不足者宁蔬食菜羹耶而忍曝背赤曰而复果翁腹也翁春秋高且休矣公谢曰吾智殊出姥下于是絶口不问家而孳孳力为德所衣食及排解于人不少矣乃至春社必市生螺若干石放污渚中鞞弋网罟之获其可生者不之市而之公所以之公必得浮价公果浮其价入手则纵之高深且祝曰尽尔命毋更为人获也有牛且及刃脱继而奔公双屈其膝公感而市之饭之藜林踰五年得良死瘞其鬻里人叹曰兽智非能识公乃公仁有以感之于是有慕而止杀生者以司马故章服而公乘三十五年于家庭无期功之惨老始哭吴淑人踰年哭曾孙又踰月哭道贯妇八月哭少子十月哭弟十二月哭从弟明年哭内弟皆所锤友八月哭其幸姬人九月又哭其次曾孙神积伤矣司马百方慰解之公故善食酒能竟斗最后仅举三升所而薄然

未尝不为司马加笋也所进食间失饪然左顾司马则加匕右顾道贯则加箸未尝不甘也故司马兄弟稍自宽而竟感末疾已大作司马兄弟吁天而恳愿悉余年以偿公祠之家祠则五服之内外宗戚若而人愿损月以偿公他神祠则闾左之老少被德者若而人愿损三日以偿公而公竟不起其哭者视禱者则又履之其咨嗟叹咤者视哭者则又履之呜呼公真所谓生荣死哀者矣其遘之顺逆邈至则恒也世贞乃言曰公所叹不得志于仙者误夫仙即有之可遇不可求也吾独惜公材而困于格使公得将数万众于嘉靖间何渠南不组岛酋颈北不勒燕然石又不然而理司农筴又何渠出孔仅刘晏下今乃使之坐而食素侯之飧以老也夫少博好兵法独贵奇晚而屈于戚将军正以江陵公之言而进司马于道术者吐一班矣公用弘治甲子生以万历庚辰卒得寿七十有七吴淑人之有妇德详世贞志中司马始娶某继某赠封俱如吴道贯娶某先卒女一归郡诸生罗良珙而夭孙四人其三曰无择曰无强曰无竞司马出曰无央道贯出曾孙男二曰当户曰当时孙女八曾孙女二赐莹今在某所铭曰

■ 〈谷工〉中之藏累累相望唯汪公之藏也良俾尔即康俾尔无强俾尔嗣人炽而昌有碑造霄龙章煌煌过者式之莫敢瞠有石副焉其辞洋洋诵者绎之莫或忘于乎惟汪公之生也臧

弇州续稿卷一百三十

●钦定四库全书

弇州续稿卷一百三十一

（明）王世贞 撰

○文部

△神道碑

明正议大夫资治尹南京兵部右侍郎进阶中奉大夫南溪丁公神道碑

丁公之葬也少司寇万公虞恺状之而大司空李公迁志且铭之矣公于职三品以恩再进至二品例当树神道之石系之辞而缺焉至于今其介孙太仆丞此吕始以请曰先王父志也王父尝抚此吕发而曰孺子长必识王君识王君必以我身后之不朽请此

吕少弱而君出入朝野靡宁宇无所从迹之既成进士有官守又弗获叩君于里今幸佐回牧滁去君里六百而近敢顿首授简君其悯怜之有以慰王父地下世贞懼然起曰而不知不佞之欲有效于公也昔者尝吏齐鲁辱为公寮已又改事公国士之知莛莛方寸间非一日矣即微子之请何敢辞即尽弃谢笔札之役何敢辞乃又泫然而志之曰丁之先自太公望易世而后有以谥为姓者至汉则若大司马明司徒鸿代以贵显唐之后而有暎者自济南避地洪州之新建又后五世而有质者徙邑之五溪定为其里人质有三子燄钺銳皆好称二程氏学而燄最着时目之为瓮天先生十七传而至赠侍郎仪有子赠侍郎大章则公之大父父也赠公娶程是生公赠淑人皆以公贵故公讳以忠字崇义生十七而赠公捐馆公偕其伯氏崇德竭筭而治葬且养母氏而不废读书为文章有气力倜傥尚谊一出应有司试不利即拂衣曰丈夫安能齷齪一区视里胥鼻息耶吾且游四方以庶几成其名遂独身东西走吴楚北渡淮泗纵观山川土风与人文之盛者数年亡所遇然识日益进归而发愤下帷其思藻发补邑诸生居母忧以哀毁闻久之徐文贞公阶试诸生而得公为第一遂举乡荐擢进士高等授刑部广东司主事司所隶锦衣缇骑最为桀雄不易衡君佐其长以挈法持之有劫盗四而赃仅一油帑者众难之君奋曰一油帑足蔽四死命耶钩得物主审所繇而释之缇骑亦服出佐漕纲于淮赋民与纲卒鬪而相株累数十百人经岁不决公以轻重立决之督臣周襄敏公金叹曰非丁君谁能辨此一指挥当坐死行千金所知为公居间公怒曰若无耳耶而谓有市狱丁某即论指挥死漕纲肃然蒲三岁入补某司员外郎进某司郎中尚书闻庄简公渊倚之若右手而吏部才之举知河间府河间大府而又孔道公所以处之沛然不见声色而理属岁饥盗大起抚臣下有司使民相聚筑堡自固公持不可曰民所以盗坐饥耳今幸有未饥者而苦役之力尽则亦有盗而已因悉发庾积及公帑之贖以賑所全活伙盗亦渐解散冢宰熊恭肃公浹以直谏忤上旨谪为编氓缇骑长校手银铛就道所过不敢问公独郊候如礼骑长不悦语侵公公前谓曰熊公大臣所坐非三尺偶失上意耳一旦上意解赐环若反掌且公老矣卒不幸而颠隕道路使上有杀大臣名而足下擅天下指目如何缇长悟曰然唯君所为公乃尽去其银铛具輿幔驺从而后发久之一切治理流闻称三辅冠拜山东按察副使饬临清兵备临清尤名为冲飶使者轮楫旁午公衷厚薄而行之所造请送迎不废而其民以不扰北敌比岁入塞云且搗临清公阴饬卒伍缮器储■〈食寺〉而外以无事镇之人情大安始公之治河间也缙绅之无赖王联者坐杀人及不孝论死而台司恶之复系其子且从论诸穷治钩累不休公独曰法如是足矣且书所称罪人不孥者何谓哉最后聯事迫则上书诬前后诸公以谪讪钧天子怒坐株逮者数十人几至大辟而独置公不与人以谓公先见公谢曰非意所及也其任福建右参政理粮储以精核称提调省试所得多知名人俄而省篆阙法当右使馆之而御史不悦于右使欲以公馆而入覲公曰御史力能亂右使不能勒停右使篆能荐我不能使我越次而侵右使篆甲令固如是耳右使乃成覲寻迁广东按察使以至右布政使为按察平亭冤死者众

为右使持论抗中贵人横索中贵人为之屈已移山东左布政使公素习山东省事至则厘革其弊殆尽胥吏洗手奉职时有诏开矿矿脉且竭矣而开未已民不胜困独公与世贞意合而请之抚臣刘端简公采上疏止之倭舟以风胶莱海而继刘公者张大其事为数条若设提督叅游留民兵请赃罚数事公筴倭且去与世贞意复合止之不可后果如公言公遂以都察院右副都御史代其人巡抚属岁萎侵民有萑苻聚人或谓公亟发兵坑竖子可因而奏课公叹曰吾何忍吾用故河间法销之耳因下令革冗兵取其食佐以赎缓之羨大賑诸乡落盗多解散归命而徐捕诛其桀黠者东土宁谧辽左与登莱隔海而壤会大饥颇以私舶通登莱粟一给事遂上疏令山东具粟舟千艘以贍辽左下公议公独下世贞议谓登莱黑子地粟小输则竭且素乏材木不晓造舟何所何所问千艘哉第令官时时察奸民毋闭余毋昂价以听辽左之来请粟而已公大悦据以闻登莱得无扰公每谓吾籍王某可高枕而会世贞以家难乞骸素所不悦于时相者也而公尚惜之谓青海最难治赖王某而办不幸病矣代者必叅议李一瀚僉事王遴而可一瀚遴亦时相所不悦者也公为其乡人竟不顾而二君后相次为名臣亡何公迁南京兵部右侍郎佐其长李襄敏公遂约束骄卒帖帖然入奏三载绩时相尚以乡人故使所亲示意公欲留之北公叹曰留贤上臣道也虽然奈何使所留者知之谢弗应公出国门而相逐矣门下客亦尽逐独于公亡所点污未几代相者即徐文贞公而公复以贺万寿入谒徐公喜下榻而延公公乃请曰弟子亡所希希一归骨地耳徐公愕出不意尚欲止公公谢曰不腆一官以吾师始以吾师终不亦善乎遂得请致仕公归而公府之迹可数也阖门教授诸孙读书轻篮小刀间一出山水间与所善客象戏必竟日颇亦留意丹灶曰心知其无成庶几百一耳为人阔達无城府矢口心见臆不藏伎过即释然以故生平无死交然接而称其为长者性孝友家秉悉以推伯氏不别为私帑居恒念仕不及亲归不及兄未尝不于邑咨叹也当时相之得国最专且久苟才有名者非溺即忤耳而公为其乡人从容徊翔不可得而亲疎荣路在前弃之若遗进则循吏退则完人呜呼此岂易言哉公素强无疾老而手足时痺竟以考终得寿七十五讣闻上为下有司赐祭及葬如故事配余氏累封淑人子二曰诸生运先卒诸生逊孙六此周以公荫补太学胄子此吕由进士为御史言事忤大臣意当谪全台白之补今官此召邑诸生此仲此伸此谋孙女一人曾孙男十三人多为诸生者曾孙女九人玄孙男二人女三人婚嫁皆名族公既不欲自名其官以故志状多所遗漏即世贞所知山东一二事皆以职业相涉而后能言之其不能言者固未易尽也所谓有效于公者不饰美而已铭曰

千霄之材不以春荣璞埋于深剖乃连城公起田间久困明经既壮而强始谢诸生角艺南宫扬标紫庭爽鸠之寄若刃发硎遂赞喉咽遂守股肱藩臬三镇弹控百城晋陪八座筦钥留京冲飙试翼顺流扬舲鼎揆易足国狂若醒百羽趋梁一鸿独冥归卧南溪露种云耕启手启足含怡就瞑天子曰噫夺我老成是惟劳臣先朝所冯祭自秩（阙

）葬取水衡大归之期孙曾绳绳丰碑广阡以光我丁过者式之则或斯铭

通议大夫都察院右副都御史陈公神道碑

当世宗之二十载而临安陈次公与其兄观察公俱以工制科业驰声公交车间而亡何俱成进士对大廷俱皙而胡髯被膺也班行中争目属之曰彼髯者伯仲耶而偕国器寻以次当谒选为曹主事观察公得工部改兵部而次公得刑部其主事以广西司而员外郎则云南司郎中则广东司刑部最号为才士大夫藪其隽者往往相习古文辞杯酒倡和次公乃亦长古文辞而不屑以是显益精为法比当是时同舍郎故中丞吴公维岳司空杜公拯方伯卢公梦阳今少保王公崇古大司马翁公大立司寇王公宗沐皆善刑名家顾独推次公精而公之在主事尝谏决江北殊死以下毋枉在员外郎数掇其长篆狱无滞系在郎中所隶锦衣缇骑系治亡命巨盗大侠日三四至为巽心衡之必以实不轻操舍而当者多内服不冤于缇帅亦亡见形连盖满六载而尚书署郎中考有曰冰蘖者曰衡鉴者故倚公左右手也公遂擢知河南彰德府人意公自法曹出必斤斤三尺而公不然谓梁国纵大都难治我何以柱后惠文狗张子高即不获己一施之宗室子侯耳于是诸子侯人人惴相约毋犯此髯使君也有谨避之耳而公务隐恤闾左疾苦小民戴哺衽而治公所干饬田野辟桥梁固传舍栉刷以是大得远近声荐剡娄上而郡所奉郑王老儒慕危言以四箴上触天子怒时有废侯诃伺指即疏诬王罪恶至大辟以上天子为置狱使中贵人偕司寇缇帅往治之以属公公不肯为巧鍛亡所得中贵人怖曰如非县官指何公曰吾知法如是耳狱上王仅坐长系国无夺其后复爵如故公入覲上计天下郡守第一迁江西按察副使饬九江兵备至则除戎器搜卒补艘完城堞诸盗起必穷迹其窟而洗之长江偃然矣而以母丧归服除仍得故九江治而益以楚之蕲黄其吏民鼓舞迎公入不待拮据而理公又尝直二囚之抵殊死者人以为神无何进山西左叅政时伊王治河南以骄恣不道闻天子使少司寇赵公大佑偕中贵人缇帅往按如郑故事赵公左右顾无可任者既而曰吾得之矣故治郑狱者陈守今在晋移以往可也上疏请之即报许而公之治伊狱捕逮其国臣翼虎者考讯不小借王坐长系加等国除伊故宠王非郑比公不以指故小屈法天下闻而快之公还晋所部获北人谍及大盗之持白莲教者以功论赐帑金又尝设法输庾数万石救邻道饥久之擢湖广按察使有二令坐法当公谏公斥其墨者而宽其中微文者暨迁四川右布政使甫离境而见宽令赢金为寿公大怒骂曰吾向者误宽之何所自得金耶亟去毋污我公之任蜀逾年而自其省为左布政使时方建大朝宫材木俱取办蜀困且不支而公从容调訾费公私俱赖以济盖公前后无虑十余政而蜀与彰德号沃藩望郡使守所莅独泉谷重而公尤慎出纳稽章程亡论亡所染指即左右奸黠逆自敛以故公循吏状非一而廉尤其表表者前后凡两遇试入棘所取皆知名士上计复为天下第一遂拜都察院右副都御史巡抚贵州兼督

川东辰沅诸军当是时施州蛮黄中叛跳川东支罗牛栏坪囤剽掠傍郡邑诏公偕楚蜀二镇合兵讨之公自川东率大军入深箐多张疑兵诱其毒矢石殆尽而间道募死士绕出其后急击大破杀虏千五百余级焚洞砦百余而蜀兵亦从西北躡之黄中迫乃挺身跳入楚叩军门请死当是时贵与蜀两镇有战功而楚坐得酋首蜀自以馱之故与楚争功不能决公第谓楚蜀势异不有剿者谁与抚地不有抚者谁与剿窟且皆天威也三省安得徼之疏上大司马倚以决更推公能让而公又与石都督邦宪合策破叛酋杨珂之六洞十二寨悉俘其父子兄弟余党归农者以万计前是公之自讬返也闻长公讬驰归哭尽哀乃叹曰奈何遂不获以余年奉兄顾我何忍独食大官廩既抵镇忧思日夕不忘以至属疾遂上疏请骸骨天子高其谊而许之当候代传镇远邛水巴恨苗普面等叛公率石都督兵舆疾而划平之曰即病不以贼遗后人也公归而御史三上公前后战勋被赐白金文绮加等久之病良已人谓公五十而悬车视薛大夫不太蚤耶夫欲树清庙而榱梓之舍如匠石何于是南台之荐公者屡屡至已登太宰启事矣公夷然弗屑曰吾六月孤也幸至此足矣公所以称六月孤者盖其先人中宪公偶于黄太恭人以春正月举长公冬十一月举公举公之六月而中宪公卒黄太恭人莹然抚二孤呱呱也其自舞象而后则与长公相切劘师友矣公之生梦宋苏文忠公冕而入至是有欲夺公业使习吏者公不肯曰奈何独弃我吏而会太恭人亦自悟梦故得无夺公之始属文不能如长公敏十五忽病病而梦与故新建伯王文成公视师大捷已荷鉏田间蓬蓬适也既觉病洒然若脱者自是文思淳发每试辄与长公相甲乙以至成其名既视师贵阳过文成故谪所俨乎羹墙之思得老荷鉏夫岂偶然已哉公性孝友其事太恭人备志养居丧柴瘠踰礼居自恨不及中宪公之养也墓田构丙舍貌像而时时瞻礼焉事寡姊如其母抚孤侄如其子晚节好施予于桥道必葺宗戚恃以衣食者若而人性伉直不能腹藏过然亦不复留以是人虽外庄公而中无怨者公尤不好侈靡间挟二奚轻刀信步湖山间卒值之不知为贵人也子禹谟也材壮而成进士公虽心自愉快未尝不饬以轨物也为诗文援笔立就务期以达其所欲言者而已曰使我为名高者去我不已远哉其著书有五经辑畧性理纂要诸子粹言葩经讲义督抚奏疏台鴈咏稿藏于家公素强少疾既用禹谟拜中书舍人时徽号恩予诰为通议大夫忽病症数更药不效竟卒其卒万厯辛巳十月距其生壬申得年七十公讳洪蒙字符卿少则精世法始而亭继而庵皆署之曰抑以见志盖至老贵而不欲人以踰礼称曰呼我抑庵足矣娶于韩累封淑人丈夫子三长即禹谟先后娶李氏张氏赠封孺人次夔谟邑诸生娶施契谟娶倪俱贰程出女七人孙男二女二婚嫁皆名族公之卒禹谟上书请于天子得赐祭墓如故事禹谟与诸子治窀穸于荆山之原赐地归有日矣具状以授不佞贞曰为我志丽牲之石不佞之先御史大夫公实同公举进士不佞又从公西曹后如向所述六七君子相与同切劘者何敢辞敬为铭曰

皇虞而后降为陈宋最闻者三修鳞从龙渡江遘此屯厥后播迁乃沈沦代有晦显德则均公起孤童少恂恂矫如双鹄抟太昊法曹斤斤爱一嘏馘历中外称能臣鬼方之伐毋浹旬万血伏死不为磷力披瘴毒成阳春上书返鹁问归津西湖水清明角巾白云不救中丞贫嘉靖以降少完人公于其时气独振有子汗血趾则麟公未竟吐皆经纶付之溘然返于真荆山之原郁嶙峋帝令司空来治窀万亿百年永无磷

嘉议大夫南京兵部右侍郎赠都察院右都御史观海顾公神道碑

顾之先于江左自吴丞相雍贵始遂世世为甲族其后徙滁阳又徙崇明已又徙昆山之东海其徙者为伯善伯善生荣二荣二生元市舶司正观观五传而为珩时置太仓州而东海隶之遂为太仓人珩生赠刑科给事中鉴鉴生刑科给事中赠中宪大夫济当给事时与其族兄溱并位南北垣咸以白简弹事显重天下而中宪公尤笃士行有长者风仅四十余不禄朝野惜之则公之皇考也娶于陆累封太恭人太恭人与皇考之赠封皆以公考饶守最故公讳章志字行之别号观海十九补博士弟子二十四荐于南畿七载成进士授行人司行人迁副其司已为其司正转刑部湖广司郎中移病归病已补故官出守饶州府踰三岁进湖广按察副使乞归养太恭人太恭人考终服除以荐者补广西按察副使入贺万寿进贵州右叅政俄又进广西按察使以叅政致仕复用荐者起为山东按察使召拜南京光禄寺卿迁应天府尹遂进南京兵部右侍郎卒于官得寿六十有四则公之跋履也公生三岁而中宪公见背宛转太恭人怀抱间小长则伯氏纵抚而诲之矣公故颖敏而能自奋励于学以故通经术有声用癸丑之三月登第而六月即授行人奉使南越归省太恭人里第行人中宪公初所授官也里中啧啧谓中宪有子矣而其使南越被服举止质素如儒生谢絶一切馈遗台使监司咸重之还朝闭户读书泊如也时分宜相重而其子窃其柄以美官饵士士争趣之公独弗往以是仅得司副以至正家人时扼腕谓先中宪公自行人为给事公独不给事岂有所不足耶公笑谓我何安敢望先给事第欲作要人将不得称端人矣给事谏官也藉令以谏死职下如我太夫人何公之在行人前后四载余居闲无事经术之暇则日取城旦家言阅之往往成诵且能解说大义而及其为刑部郎治讯牒则若承螭掇之而已吴文端公山者时为大宗伯名能知人尝见公古文辞而器之叹曰是子非文法吏也欲调为其属曹郎又欲荐分试南宫士皆以不当分宜意不果公叹曰吾何乃恋食虎口耶故归而迨其再补故曹则分宜败矣公谏比则益精然大指宽辅法而行平反为西省最太宰郭公朴于诸公间知公深欲优调之公力以便养乞外得饶守饶名郡然其人囂讼吏深文为奸积弊猬集公精心理之以次若扫一日忽召诸吏胥列庭下摘其尤贪黠者扶而出之而责数其小次者曰姑贯汝不悛者扶至汝矣自是咸惴惴若负霜雪诸下邑有讼者或以爰书就鞠者公出词组剖立决遣之即论负亦叩头谢使君不冤我每造府不赍宿日粮邑讼自是不之邑而

之府至他府亦然公时时与诸令长约吾不使人溷若庭若幸毋弃髦吾教府事吾自办之不以累若也上官相谓毋轻为讥驳令饶守笑我即御史严鹜者至公辄解曰有贤守代我我又何难景德镇陶器为天下冠而又据要津奸人依之与安仁豪竞利而鬩揭竿啸呼者以千数司冶之大僚噤莫敢措手公适以行视上供器至则从舆中口占榜谕以祸福曰毋得动动者即乱民太守立捕僂汝矣其人故熟公威德慑伏鸟散去公徐捕其首事者置诸理阖境遂完淮故宠王国于饶而骄顾独严公甚于直指公悉其情而体之诸子侯翁主家无失所者争相语曰畴谓顾使君岳岳乃吾天也士大夫有所居间以实请公必实应之自是亦不任怨久旱而雩吏以禁民间屠请公曰吾比舍僚宁无甘酒脯者乎安能责之民第躬自斋沐蔬食卜日露祷雨立澍民大悦他所剖讞若复郑氏之流窜返戴氏之山场皆累政所未决者咸以为神明至当大计吏治平为天下最公既谢湖广不赴及其补广西也地僻无所显见独以其职与清军李御史持衡御史即不能无抵牾然退而未尝不推公之贤也公于御史所裨益不浅然未尝小自伐也靖江王汰所遣府中人以驰驿抵公公叱之曰天子法得赐驰驿而王称驰驿者何也追坐所由王惭沮民田有与府屯地错者王欲并得之公持不可王又沮其在山东盖再起家矣台使者意其老厌事而公于请讞益精明所以调剂僚案间不令见牙距乃大服欲亟荐而公已转南光禄矣其在应天节省诸邑徭与一切冗费所当裁者不以贵强沮钱穀出入搜剔其隐吏不得因縁为奸诸曹有私会同馆马者马日以疲耗公悉勒还之属大试士当聘诸省校官考校公计毋使预知主名其弊遂祛着为絜令既治理流闻吏民鼓舞相庆以数十年鲜遘此尹而公喟然曰吾犹不如治饶之快也盖饶之失公二十年而思公犹若新岁时候问安否以为欣戚碑而思之不已最后复祝之识者谓公不作黄京兆损于颍川时第非人辄得迁故耳兵部之长曰郭公应聘故与公有分谊公雅逊之然所以助郭公不鲜郭公病至悉以事寄公取画诺而已会其乞骸骨归公代署部念卫士之苦在艘三老而三老之苦在中贵人媵克临就役则前跳其不跳者亦竟破家以是行伍日虚至不成军乃疏陈其弊诸悉募诸篙师而官为馭之且稍丰其直大约费可二万五千金米三万石今卫士所乐输者已万五千金国家不过更益金米之半而不取役三老中贵人无所侵牟行伍如故根本不忧拨于大计便报可公又图所以又安留京者条四事上之曰重事权明激劝严叅罚豫会计诏下所司一一如公指始中贵人不便公请谋从中扞之不得留京十万众欢噪振地曰顾公实生我公逡巡不敢当曰故大司马郭公之遗指也与今大司马傅公之诲也然众益德公及公病而参问叩卜者踵相接于道丧归送而哭者祖祭者不可指数曰天不欲人行德耶何以夺我公留京之缙绅大夫咨咨涕洟相顾曰空无人矣计至都辇上君子诧叹曰方欲借公北与谋天下事而遽靳之耶至乡乡之人无贵贱老少一辞而嘘噫曰自此不复见典刑矣其称宗戚者则曰无所觐恩泽矣天乎我安依矣盖公孝友忠信故天植其奉太恭人也自髫髻以至发颁白终日夕无小违色自平居以至疾痛大故无弗诚信至开九裘用恬穆终犹依依孺子慕也当其副宪湖

广所治辰沅奉太恭人以行抵九江而风涛作公念道险远重为老人忧谋且疏归养疏发而后长跪以闻太恭人始亦难之既怡然安之矣伯氏待公严而有恩公事之兼父师其卒也痛哭委顿欲绝抚其遗孤绍夔为授室就塾分财产均于长子绍芳乃二少孺所不敢望之矣有二女皆为择配奩饰亦先于己女每出奉太恭人必偕丘嫂并毳无间姑嫁于王者家毁则迎养之曰即吾父也舅老而贫亦养之曰即吾母也既死则皆公乎葬矣姊适沈提学子善而病公视汤药唯谨子善病亦如之既先后卒而所以字其二孤者如子善也已二孤夭而所以字其孤孙者如二孤也公间自语吾安敢望古人所云生者不愧死者无憾则或庶几耳公通仕籍者三十四年里居得十之六性温然与人不为町畦而中实耿介门无杂宾所还往仅三四戚故杯酒文义从容竟日而已声色驳杂之好无所干强学力行然不欲以为名每见谈东越良知之学者辄颦蹙曰夫子不称一贯乎而曾氏直以忠恕承之此为善证夫子者也柰何而曹之不善证东越也识者服其切而裁邑大夫重公数从质疑难公谆谆为戒茧丝海悬蒲伸覆盆然绝不令人知所自其勇义若渴避报若浼视九族则若身也九族之资之则若困廩也故公生而擅长者称其没而哀之惜之若一口也公始娶王氏吾从兄女卒于公郎刑部时以公饶守最赠恭人再以子绍芳翰林检讨最赠如之淑人之父家落其王父母与父母皆公治葬继孙氏前后封亦如王淑人举一子即绍芳方以文行为天子侍从臣娶周继娶陆赠封皆孺人孙淑人举二子一女绍芾娶周继陆绍芬娶叶皆邑诸生女适归起霁孙男四同德娶周同度聘吕而夭同应聘沈绍芳出也同吉尚幼绍芾出也孙女三长嫁金履庄次嫁王元爵次字于某曾孙男一公之卒检讨以事闻于朝下宗伯太宰议予祭及葬而特赠都察院右都御史盖异数也检讨与其仲季将奉公厝于尚书浦鸣宇圩之新阡而手具状垂万言乞余文劓诸丽牲之石余忝公姻分少于公三岁而同入为学宫弟子仕同朝郎同署晚节里居相望一水间虽不敢望公行谊之实而风猷意气彼此有概中者能以不文辞检讨不能以不知公辞公叙而铭之其辞曰

末俗其衰日下日趋君子所悲身令之人而古是狗谁则葵之公实古人其行虽矩而识则规事亲从兄于道为庸唯纯则希施不见迹廉不近名直不取睨公信于人白日朗照莫可指訾公所自信屋漏尸居毋所愧欺大臣之节表于留枢惠克厥威循吏之效于饶于京范公我师卦数既周终少司马复同所归元子象贤厥材栋隆高平异时曰粹曰礼以拟仲季夫谁不宜后千百年敦薄廉顽视此丰碑

弇州续稿卷一百三十一

●钦定四库全书

弇州续稿卷一百三十二

(明) 王世贞 撰

○文部

△神道碑

资善大夫南京刑部尚书盘峯李公神道碑

盖嘉隆之际天下之欲为完人者必勇退辞尊以隐约奉其志即贵而至公卿大人亦必时蹶时起与毁誉错而幸者得其完然未有履顺居正声实并泰终始亡玷若李公者也公生世七十有二年仕宦余三十年林栖又十余年居家为孝子持身为节士治民为循吏立朝为贞臣读书为正学割名而名依之负势者不能屈工谗者不能间岂其所遭际良也厥亦有所以致之者矣公之薨上为辍朝治墓再赐祭恩礼甚至然士大夫犹以崇赠易名之典未霈为公惜而其子太学生一鹤独曰未敢数匭上恩也必得天下之能不朽吾先公者行求得世贞俾志神道之石而手创其行事累数万言以请世贞于公为通家子素慕称公其何敢辞按状公讳迂字子升更字子安其先咎繇为帝理官一曰李官而至其后伯阳生于李树下遂以李为姓事久远难明所知者唐文皇之后嗣曹王皋尝官豫章子孙遂为豫章人元季有曰俊者三传而至友恭世受农友恭有子六人仲时佐成进士为刑部郎最少子时中生宣政宣政生封公素馨封公娶太淑人有三子公其伯也生而端重不妄言笑从师受章句輒诵九岁从封公避宁难南康山中手一编不置封公目之曰日者言我不从公交车门上事而衣豸横金者二十年得非以若耶遂谢诸生不复应试而公既长补博士弟子前后为学使者张大司马时彻李太仆舜臣徐少师阶苏大司马佑所奇赏四公者一时目为龙门者也最后试于乡得第六人明年遂成进士肆事礼部尚书袁州公试诸进士诗而雅重公以称于人人亡何当选进士为庶吉士或谓公籍此可与也公以念其父母欲省覲愿得一奉使役归御史大夫熊恭肃公浹闻而叹曰步武荣名而却之以成其志吾乡有人哉遂以奉昭圣皇太后遗诰使蜀蜀王与其抚按藩臬守令馈遗公金帛珍货甚厚公悉却之其使滇滇之守帅黔公以下馈遗与公公之却之俱如蜀道贵竹有一千户用绳下严得诬且扞文罔公知其冤为白状于抚臣雪之其人知而道追公欲有所劾公辞德弗任也还且谒吏部选时袁州相矣与之姻娅者要公往曰是公固知足下奈何坐而失一佳曹郎公卒弗往曰不往不过南尔南于养吾亲便遂得南兵部车驾主事司故积造舟资巨万计而前是郎司出纳者不能无染指以十之七予卫卫复私十之二仅半与役卒耳尚书张文定公邦奇一见器公

遽以委之公请于张公会司务及曹郎坐堂皇上集役卒使吏权而名授之又时时手较其所权者以示警卒皆欢服张公下公法为絜令寻进其司署负外郎遇诏恩实授封公与范淑人拜诰命如公秩公念欲移疾侍二尊人养而封公不可乃与妇秦淑人谋迎之留邸躬视膳羞选珍而进之又與封公与登鸡笼眺牛首泛龙江攀六代之遗踪于返照秋色间封公大欢乐谓公曰者之言验矣使我身得之孰与而得之为两世荣也寻公之乡人宋庄靖公景来为尚书一日谓公蠹累积矣非子孰与扫除公请任之得其最巨者诸卫贡舶责之卫卒之饶有力者官给其直而中贵人监之直尽入中贵人橐而受责者挫其产以偿而犹不给公请毋令中贵人监亦不以责卫卒而官董之宋公如公请后入为御史大夫公卿出祖龙江宋公曰所与周旋士人多矣耿介者虞其才恢廓者虞其守于李郎吾复何虞已独留公促膝论天下事久之乃别去自是与公构姻好公寻进武选郎中黠卒孙宁富而横积忤守备魏公魏公列其侵盗孝陵墻地为市肆居货下御史狱治宁复自辨而他所株引且数十人上怒诏大司马大宗伯与司寇御史大夫廷尉核其事大司马者韩恭简公邦奇也韩公以属公而宗伯之属章榘御史龚秉德皆共事然资公而决公行履其所宁列市肆居货实然不犯孝陵墻地魏公不悅以气加公公与御史折之出其上魏公屈疏闻宁得丽轻典株引者尽释韩公大奇公引与吏部郎杨忠愍公继盛辑定乐志满考实授擢山东济南知府济南领州邑三十晨兴案牒旁午吏杂取进之欲以尝公公判决如流至缓者投之地曰而宁不知缓耶更尔立杖斥若矣隶齐泰者与吏陈栋比而为奸私一日过堂下公忽呼使前曰泰来而与吏通耶泰谢无有然色变公使搜其懷则陈栋之贿目在并扶而逐之曰而第归自力为善吾不尔竟也于是豪猾咸惴惴奉三尺而治公按行狱滞囚得大辟者王明高廷芳梁文纲傅景翠冤状摄知证而理之更具狱上中丞应公大猷进公握手而语曰二千石尽如君天下当无冤民时久旱公力疾而出雩于坛三日而雨已又雩于坛三日复大雨于是齐鲁之属郡旱饥独济南稔民复业者二千户时流民三千人就食新城新城令惧甚公以便宜发仓粟赈之又大帑金市牛具赋隙地授舍而耕新城骤益民三千所垦田称是山东诸藩臬禄俸皆资之太山进香者珍贝锦帛织作之类藩臬而下贮之藩司郡邑而下贮之郡其长皆私其重者公独会诸僚剂等之各为封识使次第持去不以毫髮益守帑部使者闻之曰胡威之清不加于此矣藩司亦愧如公指德王请惠民药局两台业许之公执弗可已复请织染局公复持不可既而曰吾去守无几时而王请不已终当为王有于是改建祠以祀薛文清王文成二公使儒生读书其中公又饬文庙及学宫一新之与博士弟子谈说经术彬彬有邹鲁风当入覲大计吏公为天下郡守第一剧盗李邦珍与其兄邦瑞横行燕齐间公刺得其所戚厚刘邦辅者授箠掩捕之先后皆授首当奏绩先尚书公抚其地与御史合疏保留之亡何进湖广按察副使济南吏民挽轡而留者以数十万计齐泰哭之恻至呕血公谓吾故绌汝胡哭也泰曰公绌我若神明我日戴公以处得不为恶而今已矣虽欲补黑衣之役事公不能矣故吏部郎申公旆道闻公善政赋诗纪之少保殷公士儋

以文记去思其父老咸勒石以传之湖广任入贺万寿还省覲复之任遂监其省试公前后官齐楚皆入棘所得士多有闻而楚録公独任其程序文遂以纯雅冠一时进布政司右参政监督显陵工是时守备中贵人张方繇司礼出贵甚顾折节礼公具食公必为饱因好谕之方大服更谋于公为减驸从节厨传省燕乐公旦日与偕程工役勤惰扶其惰者若勤者手赐之一卮酒以先期告成御史林腾蛟督课额至楚访公楚事宜公陈三事谓罢冗征裁冗官革冗费其目人人能言者而辨利害甚皙辞甚修林君读而叹曰晁董不过是矣即施行如公指寻迁广西按察使公念广西絶遠而二尊人渐老不耐途路欲请告而见尼不得乃留秦淑人侍养而单车之广西任时靖江王与诸宗阅而各上章相诤下台台下藩臬以藩使之慊不任也使公先公帅以谒王王谢病不见公乃奏记王曰大王以某之来为宗人耶某非为宗人也为大王也某之来内欲全大王亲亲之心外以明大王尊尊之分如是而已耳大王之必欲拒某者何也王乃许以翌日见见而蓄怒待公等坐定王盛气言曰不穀之先王奉高皇帝恩以有兹国当摄诸宗人诸宗人不受摄而子大夫乃右之何也公对曰大王宜自责毋责诸宗人也王益怒曰何谓也公曰大王能念高皇帝恩甚善先王者高皇帝从孙也以罪废嗣子悼僖王贤而高皇帝复王之名虽一郡其礼秩威命实大国也今岭以南毋贵于大王者诸宗人之众亦毋如大王者乃大王挟贵以凌诸宗人诸宗人亦挟众以抗大王夫有司者故出诸宗人下者也诸宗人甘心有司之约束而裹足不入端礼门大王能忍之乎忍之是大王徒拥虚器耳不忍之则王与诸宗人之诤无已也且宗人之去贱无几罪易胜也其指逾万数不易尽罪也有如天子一旦赫怒咫尺之诏下大王宁能偃然而已乎某等所以见者愿大王之为悼僖王不愿如先王故曰非为诸宗人也为大王也王色动乃前就公曰先生何以幸教不穀唯先生哀怜之公遂说王曰大王急下教自责令诸宗人一切听台议某等请分诸宗人为十余房房择一笃行长者长之其长得以惩训不率重则付柱后惠文耳大王无与也月朔必朝见祭必从请名请昏必以属大王则大王之贵长在而诸宗人亦服王曰善具如公指台为疏亦如之靖江遂宁公念其二尊人无已上疏乞休不报而转四川右布政使蜀王闻之曰是少年时却吾国币者耶诸藩臬郡国老吏亦悉之不严而肃左使毫不治一切以属公祛其蠹若洗亡何进湖广左布政使御史将入司试促公来提调公故缓驱曰吾不欲坐收右使成时李中丞宪卿大征苗公调兵饷毋乏又日夜计楚覲吏贤否头须为白当入覲宿邮中盗以左使当巍橐夜窥之亡所得得一稍重者踰垣而出之则古石砚也弃而去之盗事发谓人未有左使橐如是者寻以中丞论转饷功赐金一镒而太宰课公绩复为天下藩臬第一当迁而公复上疏乞归养不报时蜀与右辅之抚臣皆缺而蜀人尤欲得公袁州相尚在柄以公不入贿望之进右副都御史治右辅公至即疏请固关隘考军实计储饷复疏请行保甲法定审编严窝禁设险分堠以时哨警俱报可中贵人冯保深州人也有兄之女当嫁而道中盗可五十人剽其资装金钱以去兄疑讎家为之白州州守审之诬纵遣之遂白公谓守纳盗赇公语守若不受赇吾悉之盗当自

露其人退而复白之监司为捕讎家锻炼五毒强诬服引同盗者至百人狱上公曰冯氏始讼牒五十人而今乃至百耶悉得其诬服状破械纵使去中贵人闻而怒甚具疏草以语公卿大臣欲论守贼而公故庇之大司马杨襄毅公博谓曰吾不知守知中丞公毋太草草当以质中丞遂贻书问公公报曰不佞以民命若太山此官敝屣耳所能者为贵人责捕盗不能为贵人理私讎亡何真盗果自他邑发中贵人惭而厚以金帛谢公公不受北兵大入自墙子岭而躡京师东北公闻警使其将祝福三千骑入勤王偏将申绍祖王尚忠继之而自以大兵踵其后兵至都门敌渐敛已而诸镇兵悉合蹙之境外破之公所部鹵斩伙事闻赐白金文绮寻入为工部右侍郎时上方大兴祠祀治玄熙洪应诸殿万岁坛修裕王邸南关重城益城张家湾公先后以职见委用严见惮综理精密中贵人将作大匠不得有所侵牟上亦心器之矣诸工次第就咸有所赏劳遂增秩二级考三品最赠王父母封父母俱如其秩公复上疏为二尊人请告不允亡何封公之讎闻公痛不得视含敛恸哭昼夜不絶声一切贖赠皆返服除召补南京兵部右侍郎佐麻城刘端简公采属军政铨选无敢以私奸者寻进兵部左侍郎都察院右佥都御史总督二广诸军兼理粮饷倭方大入侵掠左广公驰轻车赴之甫抵吉州而抚臣熊公汝达方调兵与角公手书慰勉熊公且密授诸将方畧公复疾驰至端州诸军大破倭斩鹵以千计俄诏公兼巡抚左广余如故公乃大搜罢浙兵之不称者散遣之选募骁勇分配诸将而时时拊循慰赐加渥士奋欲効死时右广大帅俞大猷智而廉左广大帅郭成勇而贪公悉其肺腑以授大猷而其馭郭成则错用威信使叵测古田右广乱藪也公请平之上便宜八事俱报可公调狼土兵十三万七千人分七哨进攻以大猷及副参游诸将军统之而参政柴涑副使邵惟中等监其军檄湖广将士固守东安黎平隘防奔逸身自端移镇梧州节制之申飭军令严赏罚仍戒毋妄杀毋鹵财物兵进荡其寨栅六十五其大酋韦银豹擒黄朝猛战死余酋二十二以次就縛斩首万余降余众二万古田故邑也公请进为州使监司填之而他增将卒置学宫选良吏疏上俱报可公以功进右都御史赐白金四镒文绮四左广苏继相世蟠据揭阳之黄寨僭称王而其党曾魁据石碇杜高山据大节相犄角为声援流劫遠近郭成故以总督刘公焘檄讨破之且下矣而继相通成之私人戈楠入贿于成以免公刺得其状召成切责之曰左广费大司农金钱岁可二十万今三盗如故而汝若不闻也者日幸酒被色歌舞自愉快安乎且汝之入三盗贿而纵之也吾非不知姑贷汝死责后効汝能自勉励否成惶恐叩头曰蒙贷成死苟不擒三盗者必不敢复戴首而谒交戟也公调兵二万人使成与诸将分将之成乃强自力斩弋楠以走师遂破继相众穷追之获于五房后破擒曾魁兵少倦杜高山乘间袭夺资饷以去公切责诸将蹶之破其大节寨穷追获于古铜鼓障石岩前后得村栅三十六俘斩千余人贼属四百人自拔归者二百余人投崖阱自焚雉经死者不可胜计复进破海丰贼曾朝元下村栅十一鹵斩五百余朝元砣死复破继相之党杨仁寶于九重坑追之至鹅毛山而获俱磔于市得贼田二十万顷予民捷闻赐白金二镒文绮四时舶主许瑞者拥万众出没近岛诸

帅私其赂而阴蔽之时取羈縻而已会倭三百犯广之大金门而许瑞相引恫喝为重诸将入问策公笑曰吾已付倭许瑞矣以武往即千人不必胜也第令裨将将卒二百人往俾摄市人立睥睨间而使监司檄喻瑞若名事中国而不纯今急取倭自効不者大将军悉二广兵殲若矣非可赂免也瑞皇怖掩倭艘悉获以献公前后所捕诛倭及剧盗凡十大胜不肯报捷或谓公胡不报冀得一勇爵以贻子孙公谢曰上威德与诸将士力我何功且家世业儒何可复侵介士路耶而亦会同年新郑公以首辅兼太宰故尝贖封公而公却之以公为慢已及其寿六袞诸侯之币亡弗重者公独以尺书挟两吴絶进乃寘之地而唾曰岂书生酸而至是第用我贾名耳以故于公功多所裁削公弗顾清遠■〈风贝〉风作地震英德开建诸邑大水急发庾賑贫者因上疏引罪且乞裁黄蜡芽茶铁锅鱼牙柘茨银珠乌梅铜锡麻枲铁线胶翎诸滥税不报他疏若停逋税以安反侧查滥俸以省虚冒修水寨以资战守严门禁以固重地稽商税以慰民望究武职以饬戎政祠名贤以崇正学得报可两广赖之至今公念范淑人笃老凡三上疏乞休不获请又陈情乞归养上乃进公南京刑部尚书以便之而公又感嗽疾以骸骨请御史赵焯又为之请始获允所积廩金五千悉归之公帑诸从官曰例也公笑曰我以不贪为例右广帅郭成感公恩哀诸金寶瑰竒以献及监司守令得荐者簠金道中公悉麾却之曰将由吾廉未彻耶阿堵物何以溷我范淑人见公归而喜宿痾顿除公偕秦淑人所以娱悅之者百端偶病■〈疒带〉下公忧之甚范淑人见公瘠而瘁谓曰我无他畏暑耳得甘澍即解公与秦淑人斋戒露祷大雨竟宿太淑人立起至开九袞而终公老矣犹作孺子啼其治棺殮必诚信特不用浮屠及俗礼庐墓如封公时公未除服而南刑部缺尚书廷议犹及公然公已无复世念颜所居堂曰止足治冢莹去家六里而近名之曰顺宁时时偕其弟学宪某及子姓宴游其间于于如也间御笋輿或跨欵段纵遊山水名胜与田更野父相问讯不知其为贵人也足迹于城府可数台使监司守令或门生故吏屏干旄而过公公欣然为具鸡黍烧笋蕨清言竟日不倦去亦无所报谢晚岁名德转重慰荐无虚剡属江陵公当国与公有分契乡人入都者谓得一书先容公具草几千言曰崇寬大以存政体曰慎用人以肃官常曰宥直臣以开言路曰修战守以重邊防其言絶割至非人所堪其子请易之公不可既而曰上春秋方鼎盛此公犹稚视之且汰极矣是安能久故刘御史台以论纠江陵削官里居公修书问之授饗加璧焉刘君受饗反璧以空刺报谢谓其家人曰李公望重且大拜安可以我故累之公笑曰我知刘生刘生乃不知我彼以我犹未忘世也及刘死戎所公哭之恸公素强少疾晚而益壮长耳秀豪又素多阴德人且以为百岁无恙中夕忽谓二儿吾生平不妄挞一卒不妄收一钱不妄作一语仕宦三十年不来一指摘优游林下十余年不萌一悔吝既贵且寿可以见先侍郎地下矣以不善积着挫故遗产不免使尔曹馁奈何不久竟以微疾卒遠近奔哭者且万人公孝友天植其事字舅弟甚笃分祿以遗之又以遗疏属之贫者环所居数里饥则糜寒则衣死则櫟槨盖亡不于公室乎取及阼公之室中则■〈木喿〉然也卒之日秦淑人出王母所赐金始成殮

其子鬻所分产始成墓呜呼可不谓贤哉公于古人好称诸葛孔明裴中立韩稚圭司马君实刘器之于前辈称刘伯温王伯安其以政事行术居师友间者韩恭简宋庄靖熊恭肃杨襄毅杨忠愍及郑端简晓也蚤岁穷理性之学然不欲有其名时华亭相公为领袖贯鱼而进者不可胜数公益秘之曰学以明道也而以干进得无愧业举子者乎公所为诗及文不甚多然往往清畅古雅有汉唐人风气尤工八法人得其一赫蹏輒宝藏之所著有诗文集续集十一卷遗集一卷摘稿二卷皇华录一卷京畿奏议四卷两广奏议八卷济南议稿二卷郢曲同声楚越吟稿西轺集祗役杂言各一卷修遘杂考三卷国朝考二卷皇华便省录清音竞秀录星槎万里录官中纪事各一卷行于世者半公以正德辛未生以万历壬午卒春秋七十二秦淑人者名家女也再受五品三品封能佐公于德置貳二赵氏刘氏举丈夫子四一鹤以例为太学生初娶熊继魏赵出也次一鹏以公荫为太学生娶张后公一月卒次一鹤亦以公荫为太学生娶宋即庄靖公之女孙器公而许婚者也皆秦淑人出也一鸥早卒刘出也女二一许字万安仁早卒一适雷映孙男五女四婚嫁皆名族一鹤能读公书美而材其状草吾不能悉志志其大者铭曰公为世贤七十二年虚七之一未涉理乱其出其处各得中半处则鸿逵其羽可仪出则龙变膏泽滂施厥位厥寿彷彿宣圣公也及门庶闵冉并古称三立为三不亡公神行天宁与魄藏

资善大夫南京礼部尚书立庵李公神道碑

大宗伯李公之卒也以成化末而上既为之中牢祀且治葬鳌溪之阳矣故事三品以上得树碑神道纪其功行而公有子以逮孙曾奕世显重然里俗朴因循不能举而公之五世孙元甫自大司成来守南少宗伯实践公故署一旦请于世贞曰吾李于蜀幸不恣恣然重自大宗伯公始而忍不一标着之乎且夫不得志于格而有所强者非夫为人臣者也得志于格而置弗举者非夫为人后者也甚矣吾俗之朴也子为我志之世贞谢曰子之辞信虽然不穀不任也元甫固以请乃据其状而志之志曰李之先楚南郡公安人也元季有南郡燹避徙入蜀即富顺而家焉再传而为侍郎公志聪又传为侍郎公继宗皆公赠也公讳本字立之别号立庵生而朗雋异凡儿父私器之乃曰吾家世隐约无显时奈何有此子而复弃之农乎稍长俾从师受尚书甫属文即已负奇有声踰冠举于乡已拙南宫又三年为正统戊辰成进士选改翰林庶吉士踰年授检讨当裕陵复辟遣祀北镇医无闾还与修大明一统志成复与修裕陵实录迁编修再迁为侍读庚辰分校南宫试得谢文庄一夔状元及第余亦多显者久之擢南京太常寺少卿踰九载始进南京礼部右侍郎当公时翰林为清曹而于职自编摩外无可自显见朝行中以冷局目之而士行修终不肯以其官贫故倚权势有力以市公尤其表表者始当授检讨人或谓公不有给事御史可陆梁公卿间乎公谢弗应曰贫自吾分吾不与易也盖十余年一再转羸马青衫日曝直金马门殊自得及转容台秩稍优然益南徙而公益安之间从诸胜遊

相约为文字饮三山二水惟意所往不知岁之云暮最后始擢为侍郎重矣门柳萧然不设重牡亦无有阑出入者时眉州万少师安当国能立贵贱朝士而公亲其乡人又两举乡会试称同年者也眉州之子翼暴起为少司马与公同列一日过公从容曰公有意北乎但以一赫蹏属我立为公效之公哂然适送之出见圈中豕指而曰而父子欲圈我乎使我依而北者何异豕也眉州闻大怒曰吾且圈若南遂弗召公亦欣然自悦也凡六载始拜尚书然公意已倦时贻蜀中亲故书曰速营菟裘吾其老乎寻寝疾卒时成化之乙巳秋也得年六十有九当公卒而有羣鹤悲鸣遶舍久之乃去人咸异之发其橐仅图书冠服而已为之谋贖置邮乃得归公为人广颡丰颡踈眉目望之若神仙也坦荡不设城府里如其表与人处无贵贱皆可狎然至欲干以非道则颜立頽判然自遠居恒恂恂类无事者其趣义急友甚于饥渴之得饮食也为文章平实典雅有治世台阁风诗亦称是第公不自矜诩要以足志适情而已故多不具草即具草亦多散佚不可收拾今其存者见昭德续集中殆十之一二而已为诸生时尝有所往逆旅主人延接甚至俄出酒饌甚丰怪而诘之则曰夜梦神语有十八尚书来晨起泛扫市牛酒供张以待公即其人乎虽然独公一而已何以称十八也既而思之公姓名皆寓十八不偶也其前征乃若此公配廖早卒亡子赠淑人有三子皆贰高出也长曰文昌以公荫补凤阳府照磨季世昌以乡进士官濮州学正文昌子曰陝西按察副使凤凤子工部都水司郎中方至父子皆以伉直名其时元甫名长春郎中君之子也世宗朝按察君以御史上章为公请赠谥不报嗟乎照磨君用尚书子仅幕官九品不以为屈赠谥于公分也御史力能得之所司独不得亦竟不复请乃至七尺墓道之石尤所谓得志于格者踰百年而今始举噫嘻朴不已甚乎虽然以视今之贵势公子簞金帛宰执之门以求所得志者何霄壤也公起田间孤生致位八座五易世而甲第不絕诸孙枝至若干人纪蜀乘者娓娓其贤不置口亦盛矣诗云高山仰止景行行止世贞何人哉乃藉公以不朽

铭曰井鬼之间岷峩孕灵乃笃巨公英宪之间人文渐昌公始登庸东序西清冰心玉姿金钟大镛文戒灭质葆真弗雕以完淳风位戒踰德含用弗竟以保令终爰启后人济济绳绳寢攸寢丰谁其嗣者步武銓坡徊翔秩宗追遠反始顾瞻鰲溪悠然禹功我闡其玄石笋勒之有繚其虹

弇州续稿卷一百三十二

●钦定四库全书

弇州续稿卷一百三十三

（明）王世贞 撰

○文部

△神道碑

巡抚山东都察院右佥都御史前中大夫太仆寺卿阜南陆公神道碑

陆之先华亭自娄侯逊始也其后机云以文学擅天下声而他族之在江右者九韶九渊并挾孔氏不传之秘后先为东南冠绂然未有如今中丞公仲季之盛者始中丞公与其仲氏少保公树声用经术取鬼科俱藁文苑标而又能相砥砺名德至贤公卿乃其所得于心学者吾不知于韶渊何如要之当圣门不为后矣中丞于秩为第四品其卒也法当仅得祭而故尝卿太仆领中大夫诰中大夫三品下于是两台以中丞讣闻而以太仆故秩请诏予祭复予墓法得树碑神道少保公哀思无已手纂公事行累数千言其子太学彦楨别纪复万余言属不佞贞曰幸为叙而铭之贞视宫保公通家子素严公而善太学乃为之叙叙曰公讳树德字（阙）父曰赠太宗伯公鹄娶沈夫人有三子而公其季也公生而端重颖敏读书能通晓大义工属对父母绝怜爱之然贫不能资束修时少保公已前赘于李矣而沈夫人复逝公哀毁骨立已而里中薛君见少保公而奇之谓李父曰吾仅一女安得才如而婿者赘之乎李父曰有之即吾婿之少季某也是时公年十三矣薛君请于赠公欲得女尚公赠公抚公而泣曰苟而母在吾何忍弃之薛乎手钱一挺纳公褰曰与儿作美食公饮泣而别已而得美食辄以奉赠公赠公尝而怪之征所从得则皆出自袖中盖公未尝私一钱也赠公泣叹曰儿殆纯孝矣公自是文思飙发所受经凡四师皆谢不任而最后乃事少保公得其诣独深公益自励勤苦非丙夜弗就枕公虽名为赘尚未授室及少保公之成进士而公补博士弟子也薛君归公于家使举亲迎礼僦一乡大夫车御公公力辞曰士而大夫车非礼也竟以徒步往时人异之明年当乡试公不利有司而少保公时以移疾予告赠公谋而欲地道焉公不悖曰是蔑我也始进之谓何谢弗应又三载始举乡荐明年下第归又三载以少保公预试事不听入自是公连蹶者垂二十年而赠公亦已捐馆矣公之在公交车时属其伯氏夜中盗尉微得其主名欲以为功而见微者不胜楚自诬服公察其有冤色夜密听之得其兄弟自相诘语而征其状知为尉卒诱使证也力请释之俄而真盗得赠公喜曰是儿非竖儒异日得备李官不足为矣公成进士业四十余有善少保公而怜公才者引之就馆选公逊谢曰病不受占■〈亻毕〉也就选人格得严州府推官于是赠公言验矣公在事益精明虽耿介绝俗而不喜为烦刻其于单赤尤能曲体其隐以故仅三日而声称着闻公于事勇往无所避太守意忌之弗善也公亦弗为动然至守当入覲公署郡事而抚公有所萋菲属公

调守何状公力为明其无他守竟以是得免公弗使知也然至奉檄按武义令令夜行橐有所居间公叱之出尽法无贷龐御史尚鹏于僚属鲜当意者至公独无间言曰廉士廉士公以卓异征当授给事御史而会少保公召为少宰公于法避道拜刑部主事始公之征吏民哭拥者以数万讞遮公不得则肖公像祀之于孔道以见思公既郎刑部少保公实不赴少宰召也公不鄙其官益治文法无害而与其同舍郎郑履淳等游相与砥砺名节履淳上疏论时政大有所指摘实从公谋具草公始欲聯姓名会疏中语称少保公乃不果而履淳得廷杖錮缙骑狱前是公以进士肄事时尝具諫草其言絶戇有人所不忍闻者同年萧某读而寸裂之谓公死为名耶即死且累上德而至是复语公第小忍之职行及矣亡何公果改礼科给事中时庄皇帝每视朝及经筵默不发一语公谓易上下交为泰非与公卿辅弼相论难何以勵君德而酬万几上疏极言之不报公又条议诸邊计甚明晷顾语多侵总督谭襄敏纶公既迁兵科为右给事巡视京营而谭公入督迎谓公不谷戴惭颜以见惜公疏直稍有所齟齬不者不穀可奉以免咎矣公岁且满（阙）得举刺而所善者缙帅朱忠僖希孝其私人（阙）以属公公立论罢之迁其科左巡视内十库公择诸中贵之谨愿者好语之曰输戶以公等抑勒留难之故破家者屡矣然非自公等始也吾欲言则伤公等不言则不忍于破家者公等胡不自谋之而令我曹得为名诸中贵愀然相戒有所约束矣亡何公以册封周赵二王国悉却其馈俄迁礼科都给事中皇太子将出阁公疏所以资睿学者而未归之身教语割而精当是时新郑江陵二相国读公疏而叹曰向永流也俄而太子出阁公以侍班拜金币赐诏天暑暂辍东宫讲读公力诤之报闻当是时庄皇帝颇倦政而日月交蚀旱魃起公前后疏皆危辞侃侃而上不豫公疏请慎药餌内言伐阴之剂不可服其请详保护则欲言仲夏亢阳之月所宜谨其指益危上意不恠然以公言者难之为留中独下公所请召辅臣以资静养疏而诸大珰噉嚙谓辅臣晓医耶必静养而召辅臣如我曹何公亦不顾而诸珰中复有请开戒坛为上造福田利益者业得请矣公复抗疏言佛法故非圣世所有特其空寂澹泊稍有合于吾儒寡欲养心之旨故其说久而不废若乃戒坛度僧男女丛杂宣淫道侈固佛之所深恶者奈何轻信左右之说而遽复之夫陛下不以圣躬为虞无所事佛陛下而以圣躬为虞则大禹之恶旨酒成汤之不迕声色万全道也亦佛所契也上为停戒坛当是时新郑江陵之好衰而互为构公平心其间无所附丽二公亦两噐之曰是不难陆少宰弟有尚寶卿刘者上书讥切时政其大指在新郑公以非所宜言且得罪或谓公宜特纠之公曰彼言事者我何以纠且奈何緣执政指无何上晏驾时中贵人保橫甚新郑决筴去之而公与言路各有疏发其奸私不胜保遂逐新郑而并齟诸言者独不能有所加于公会当议祧庙公请毋祧宣宗而祧睿宗以嘉靖初所建世室奉之议虽格不行天下闻而韪之于是宫保公复召为大宗伯矣公于法复当避仅移尚寶卿满三载始擢应天丞甫至而当举乡试事棘以内外咸公主之織巨井井尸及两台使取充位而已公于丞事毋所不精密吏洗手奉法惠浹闾井又尝以推摄大司成事诸生服其行循循就矩寻改太

常寺少卿连摄翰林光禄鸿胪篆故事九列若四品持资簿待迁亡满考者而公前后凡七年以中贵人保在事故然公了无所缺望其任职奉公事有裨益非诸公所敢当已进南京太仆卿卿治滁故遊地也公不可第取前辈王文成公建义仓及教授诸生遗意行之而入为太仆卿甫上进今官出抚山东于是中贵人保者业得罪窜矣公益发舒且感上知思有以称塞即驰入境首问民所愉苦示之廉一切供张悉罢去与按使者约脯修不相入车门絶私书僚属相戒为慎公间留客不过酒茗鲑菜而已客偶谓齐优一何拙耶公念必藩司宴有之次日入谒以微言自引咎不已众相顾错愕不敢对而优宴絶矣齐鲁之诘盗者滥公悉集成案覆之而出其冤者又请裁募兵费苏里甲戒苛罚俱得报可东人大悦公素不喜食肉其行部所给奉不过蔬粥一算噐而已捶朴不妄施独于贪墨吏无所纵舍时时一按核皆以为神明然公体羸而竭精吏事遂病脾会德藩之宫后有白云湖者故民佃也而夺于王业已归民矣而宦者与中贵人之代保者宏有连必欲复之公执不听然益邑鬱不得志上疏请告归太宰杨公巍叹曰吾独不能为东人借公须臾耶为上言公之贤而请听之计病痊且必用报可公得请使院俨然一无所赍持至道途之资亦谢絶吏民拥车而号者竟百余里车积不得行公为之挥涕既归阖门谢客惟与少保公相对谈说道理巍坐竟日间召儿辈侍立颇及微时事海以修身居乡大要尝一侍少保公行田里中儿争指目曰非两疏也耶公蹶蹶不敢当曰吾何敢望少傅受吾自以犬马病不任耳公凡三被台荐与少保公鴈行既而预湖广之推则公病矣公为人孝友忠信其事父母独能得其欢死而哭之毁伯氏之食于家非公与少保公弗裕也公之庄爱少保公亚于父其砥节秉行壁立万仞之志畧同然少保公寬颇以辞色假诸子姓而公更侃然以故咸乐就少保公而摄公之严惟公亦自比于程正叔先生以为不如家兄也居官所与遊皆当世豪杰所言皆天下大计所莅处必闾閻利便生平未尝以私于人亦不受人私其于諫忤旨及犯权要人者数矣然而竟以其身免歷位融显优遊令终岂非天哉呜呼孟子所谓富贵不能淫贫贱不能移威武不能屈为大丈夫者非耶公病且亟忽谓彦桢曰吾殆不起矣吾欲有所言彦桢强谓公医屈指而俟痊何虑至此也公笑曰医误矣吾屈指而俟尽遂命笔书后命所以戒勗良至素爱抚其一孙一见而遣之曰天君泰然矣无所复挂碍寻少保公来视公起坐举手揖谢曰兄教我育我今又来诀我不得终奉周旋奈何少保公强颜而谓曰若必不至此若兄来视若疾非诀也公曰弟自知之兄不知也且此小事亦何足道少保公泣数行下公独怡然已呼从子珣使卜葬得吉而后止至病亟命彦桢诵所作诗犹为易一尾语既而曰无所事此恬然久之目瞑矣比就殓颜邑如生公春秋六十有六小于少保十三年少保公气殊王名位亦不相及乃其为嘉万间完人一也元配即薛累赠淑人有子一即彦桢以公荫入太学有文行娶潘继张薛淑人既前卒继配董累封亦如淑人薛之歿董来为政矣公有所施于妇家必前薛而后董董亦安之且能抚彦桢以成亦前公卒女四适太学生张仲文举人范允谦者薛出也适太学戴士毅冯大顺者董出也孙男三景星殤景鹏聘李景皋聘季墓

在某所

铭曰有美平原毓于东南载称二龙小或文标大者道显而用弗丰厚积骈光乃有中丞义取兄从史臣争臣各操天权万论所宗公捧白简以叩九阍百辟动容天子曰俞惟尔之言黄屋加崇九列婆娑毋以弁髦而旷庶工载旬载宣以奠齐鲁若草偃风有昊弗仁弗使终惠用疾明农进则表仪退亦模楷威风逵鸿何天之衢而铄其翻与凡鸟同譬彼双钩其雄丽霄一沈九濛名德弗磨守臣请之上轸帝衷锡冢云间祀以中牢宗伯司空我铭公碑马鬣之间有光若虹

刑部主事累赠通议大夫吏部右侍郎胥峯陆公神道碑

不佞贞之起官金陵也得日从今大司寇陆公与绳游因习知公家先德而公之父胥峰公与先大司马公同举于辛丑公复与不佞同举丁未亡弟太常懋与公之仲氏故学宪君同举己未则修世讲者三焉而司寇于先德尤亟称胥峯公曰吾先公之为尚书郎也厄于谗中蹶既以不穀故获封尚书礼部郎中家居垂三纪及见不穀之为大理卿而后捐馆也乃不穀以大理卿遇诏恩赠公如其官再起以吏部右侍郎最赠公复如其官而不及见矣伤哉以地下之灵获邀惠于故太师徐文贞公志而铭之矣令甲三品京朝官神道当有碑而阙焉无又敢以累吾子不佞敬谢司寇有文贞公文在畴敢毗之司寇曰毋尔扞也其称世讲而习不佞者无如子嫻于辞以先公有闻者亦无如子余固逊不获乃谨叙曰陆之先浙嘉兴之平湖人自唐丞相宣公贲以经济亮直重天下其后至宋而为枢密副使旋吉六世孙正博学高行薄元德不仕以寿终学者私谥曰靖献先生子应奇应奇子士贤隱德皆如之士贤子曰宗秀者仁庙时以才征陞见应对称旨上嘉之使就吏部选人不就乃赐白金楮币归归而大出粟麦賑灾上于籍中识其名赐之玺书而旌其门曰尚义传子珪尤好为义举授官廸功郎而子銀自以文显仕为程乡令有惠政其民思而祀之至今后以子孙贵累赠至右副都御史銀子淞则益大显举进士累官光祿寺卿有大臣节父子俱祀祠乡贤其贈始如銀而后如公则公之父也有丈夫子五伯曰工部侍郎贈尚书杰次刑部司务棐次贈精膳员外郎槩次即公而少者南京吏部司务集也公生而颖异八九岁时屹屹如巨人既长工属文光祿公奇而爱之踰冠见背公哀毁过礼服除试于学使者以为第一时仲氏以诸生试不时至而学使者欲朴之不受径出学使者大怒捕得将痛捶格而后行汰时已解衣当受罚公伏其上愿代捶格且哭且诉其辞清辨酸楚学使者懼然令公起并以其仲氏免公屡试于乡不利乃读书别墅勅断家事大小无复关我学不成不归矣后学成而以例入大学时司寇年十七耳挟与俱试俱中式而公得第四人士林艳之再上遂成进士高第授刑部（阙）司主事即理漕运刑时督漕者御史中丞张性狠躁而公务持平动以典章自矩积不相能中丞

自见齧言路夺职而妄意公中之更中公以大察罢归公怡然曰吾未获一伸于宦命也即为德于乡谁能难我公所为德最先者曰族倡其诸子司寇辈市善田若干畝以贍之为科条曰优老劝廉育材助婚助丧养疾无弗称给矣宗故有世德祠复市善田若干亩以供春秋粢盛无废祀矣先世诸墓祠在乡郭者复市善田若干亩以预缮缉无告圯矣季子建天心书院合族之少儁者实之复市善田若干亩以资膏油楮墨无惰学矣役于官者复市善田以充其募直无困徭矣公乃曰可以及中外亲矣母王淑人之外家墓地远公为之饬周垣植封树使奚奴护之妇父沈翁贤者也歿而其诸子窳甚为经纪其家事俾不颠踣又为置墓田丙舍刻其遗文以传公乃曰可以及吾知故矣友人朱民準死徙其子自近而命司寇推田舍殖之毛寿官者死贫不能具棺殮悉为之料理且治葬华山者宁海人也遇于武林契合穀之终身不倦王父程乡公卒于常山逆旅主人与有劳焉公时甫髫又不在也见主人之子若孙必馈恤之岁岁恒若新公乃曰可以及疎矣有所施予多不问其主名尝舟行过汉塘或言有五棺暴于路者即捐髀而归诸土岁生辰合诸老人八十以上者宴而出钱帛劳遗之以为恒盖公有四子一司寇光祖二乡进士光裕三学宪光祚四乡进士光宅皆能悉帑以佐公施惟公意之向而公亦能顺性作仪不强其所不足司寇意气慷慨饶天下大计尝从大帅幕讨倭寇出入兵间其握铨与中贵人忤至沦死夺职公不以介意也盖父子间自相为知己若此平湖故无城是时先司马督抚浙公首建议请城城成而免于倭患人无不德公者公生平无他好独好佳山水司寇之以太常夺职时公与游当湖即其傍创报本塔放鱼矶明心堂悠然亭扁舟往来其间后又于杭之西湖治行窝与客探禹穴访兰亭遗迹穷天台赤城之胜徘徊于桐江钓台想见莊子陵之为人慨然久之乃归筑室于天心院而额之曰赤松入定处盖以赤松子自寓也公虽老顾强无疾一日自西湖返问前额上呼从者曰未也亟命上之自是微露惫色数问大儿至否三日取所制寿服被体端坐而逝当是时司寇甫以大理卿召至真州忽心动驰归犹及呼皋某复躬含殮也公以弘治十六年癸亥生其卒以万历三年乙亥得寿七十有三妇曰沈淑人有美行四子者已见前而三学宪出后其弟赠礼部公四乡进士出为吏部司务乡进士沈淑人所钟爱也公割以后司务公公四兄弟皆显贵而独赠公少而溺于水公哭之恸以学宪后之于是赠公亦贵矣今距公歿十三年诸子独司寇在树名迹为股肱重臣而诸孙若干人有以胄子入太学与太学及郡邑博士弟子累累科第当未艾也诸曾孙若干人有弱冠取乡荐者矣余详状志中呜呼陆之世德遠矣上不敢拟后稷氏我琅琊之在晋宋六季庶几埒之然琅琊以功陆以德公之为德于陆也广施而廉取用其实遠其名所以能保世滋大哉

铭曰以上士始而以下大夫终人主贤其子俾以上大夫封伯子上卿而叔大夫中父跻九列兄佐司空诸士而称中下者累累不可指穷秩有庠崇厥德则同公秉其衷取俭而报丰太师志之光于幽宫予勒坚珉以标陆宗岂惟陆宗实模楷乎大江之东

赠通议大夫刑部左侍郎耿公神道碑

余官金陵获从今御史大夫耿公定向遊一日俨然而造余再拜曰不穀愿有请也不穀所以有今日者实惟我王父司寇公力微王父是无不穀也微王父之诲之犹无不穀也日者甲申之召不穀已倦游矣诸弟子谓可无出不穀未之应也而仲氏定理独曰王父恣恣地下未奉一命之旌兄能恣然而已耶不穀以是强出至今官而中间合中丞少司寇之绩而上之天子赠公为左司寇而王母封亦称之制辞褒扬备至于是王父始有闻于世虽然其归魄之所兆域定矣不能有所侈大计独考令甲当有七尺之碑树之神道意者藉吾子之一言乎不然何以光昭上之宠灵而发王父之潜德余唯唯耿公乃言曰王父讳大振字鸣甫耿之先于春秋为国姓至汉而大着封侯将相者以数十计其后子孙散处江黄间元季兵起有均用公者以材武从里中少年据险自保受朝命为镇抚高皇帝畧定楚地国寶公挈其次子必安从而命长子必顺奉母徙之麻城遂定为麻城人顺子思敬孙洪曾孙世庸成隱德弗耀至公而始治经术补博士弟子有声从弟教授公光者少颖公出其余资之取科目而顾不能自致荣显凡再试不利輒念其父母老谢去以共养笃谨闻寻后先考终公柴瘠逾礼附身附棺纖悉周慎闻党称之始公已壮而父不厌家政公曰吾知为子而已及父没而公有四子亦皆立公分授之政曰吾不任为若曹役也且丈夫安能埋七尺米盐丝枲间日闭户危坐读书凝尘满席湛如也公貌修伟举止俨雅不矜而庄见者肃然衿绅之徒与深谈竟旦暮霏霏若吐芬屑余不得博公一肯色以故交遊渐寡公亦简出外市廛之迹可数也妇李淑人贤而相敦既前卒公遂不再娶御家以礼法诸孙十余人晨朝问所业以不得诮呵为幸顾独爱不穀自襁褓时手之不离抱夕与偕寝甫齠而疹发甚厉侍者皆秽恶之公独置之腹不穀之父封公垂泣请曰疹有毒奈何以肺腑亲之公不听盖移月而不穀愈始辞公腹自是有所受经史及撰着文秬之属耳必徇公口手必歷公目盖十四而遣从帅业粗已就矣及病革犹数谓先封公儿何在毋惊之妨其业也不穀自顾亡足独当公岂公有灵鉴谓不穀当有成耶嗟乎公能审不穀成不能见公成也今者若足以报公又焉谗知公之必有知也悲哉余敬报耿大夫大夫世所尊信以为真儒贤者自叔梁氏之启圣而无繇皙响松之属皆以子有闻然未有能率祖者今天下以大夫贵知公天下希贤之士以大夫贤知公公所为不朽者岂一司寇而已耶公寿七十有一歿二十年而大显诸孙十余人定理能从大夫于道定力任蜀郡守几如文翁今为闽督学使者铭曰玄德弗昭昭自闻孙等彼闻孙亦饶哲昆三命之崇贲于丘樊惟乔有根洪流有源我瞻伊人典刑斯存

累赠资政大夫南京礼部尚书随庵杨公神道碑

曩余卧舂中时得一再奉南京礼部尚书杨汝大遘而至丁亥之冬余强起佐南兵部而汝大继起长吏部复相继之任其私第仅隔垣可通警欬于是汝大无夕不相过从谈笑甚适也一日忽严冠服服以素悴其容葳其币再拜而请曰非此日吾几失吾子非吾子吾几无以慰吾父母地下于是乃复言曰当吾母之见背也不肖孤甫十龄矣又十九年而先公亦见背不肖孤时在公交车矣然而未释褐也又十年而孤始以工部员外郎绩获赠公奉直大夫官员外郎如孤而母为安人又十年而孤奏浙江之按察副使绩奉直为中宪官如孤而安人为恭人又十一年而孤奏工部右侍郎绩中宪为通议官如孤而恭人为淑人又五年而孤承乏南京礼部尚书复遇诏恩通议为资政官如孤淑人为夫人凡四锡命而人臣之荣已极然皆不及见矣痛哉不肖生也鄙未知所以光昭先人之令德其改兆时仅一乞故陈宗伯公之志铭而未愉快也今者始闻之令甲秩九卿二品者墓得树华表具威仪而铭其丽牲之石于隧道惟吾子惠之一言没者存者皆不朽余谢不敏不获则谓子之先公其隐德余素知之然当子之宦未达则不能自表于闾井之外而今者子一达而九重之上遂能精言之屡言之天下莫不信其为长者然子尚未已而必欲得余言岂有真信者于其衷而不容已耶余请为子终言之公生而颖异于书无所不窥始而受尚书既受易皆能通其旨而于易尤精发为文章川涌霞蒸补博士弟子试輒儻然未尝一露得意色而至试应天輒北其困者数矣而未尝一露失意色家贫不能工施予然至遇人之困阨急难未尝不惻然棘衷也其自居困约则恒坦然尝谓士之处夷险穷达祸福百状我焉能强遇以从我而又焉能役我以徇遇譬之旅人第有随遇而安耳因自号随安子所授经术诸生呼之曰随安先生环堵萧条不蔽风雨为诗歌歌之诸生和之若曾氏之商音中金石诸生咸洒脱有省曰先生殆教我以安也平生一介不苟取有二子而度子大且贵则日训以清白曰勉旃即贵当益自励毋隳我家声盖谓宋大儒龟山先生时也而所心仪乃娄师德吕蒙正曰可以养德亦可以处世于乡党亡所不煦煦独至显贵人輒谨避之曰为恭则太劳不劳则贾祸盖终其身无几微悔尤子大又语太夫人而泪潜潜堕也曰自归我遗安公未尝一日鲜衣甘食遗安公出教授自给一委太夫人以留事太夫人竭力以供舅姑而御臧获以俭勤昧爽先之而作向晦后之而息遗安公虽以贫故不能工施予间有所谓惻然棘衷者太夫人强应之未尝以匱告也盖三十年如一日矣然遗安公犹弃我于公交车太夫人则弃我童时安能使我无悲子若之何余告之曰礼女子虽贵不得树碑神道吾为之附志之可也公讳启明字升之寿六十四太夫人朱氏寿仅四十八杨之始即所谓山先生者有子迥迥生航以枢密编修判常州老而居常州之无锡数传为公源者始迁苏之长洲定为长洲人源生琼即公皇考也赠亦南京礼部尚书子大又曰孤不能悉吾祖惟闻公恒语吾安敢望若祖若祖无择言无标行乡里亡论识不识咸推为长者然迹所以长者状不得也呜呼兹所以有子大哉公生子二长曰咸娶邢次即子大名成为一代巨公名臣娶周继吕赠封皆夫人女三适朱佩朱文瑞朱佐皆以母夫人故孙男三大润举应天荐娶陈继华大滋

荫胄子娶王大濬聘侯俱子大出孙女八其归庠生李柯朱大鸮者咸出适都指挥吴士俊太学唐正己韩与善徐汝良兵部主事申用懋太学生吴瑞征者皆子大出也墓在吴县之凤皇山

铭曰士屈于遇又夺其年所可伸者其天则全为德不名名之曰玄何以征伸嗣贵且贤亦有闻孙蝉缓绵延畏垒其居延陵尔阡我诗于碑永永不刊

弇州续稿卷一百三十三

●钦定四库全书

弇州续稿卷一百三十四

（明）王世贞 撰

○文部

△神道碑

中宪大夫广西提刑按察副使累赠资政大夫都察院右都御史兼兵部右侍郎鳌江吴公神道碑

鳌江公者嘉靖间名臣也为广西按察副使而归归五岁而卒春秋五十有九公卒之十年而其子大司马公子彬成进士又五年而子彬为驾部郎满考制赠公中宪大夫又十四年而子彬以岭西制帅遇诏恩赠公御史中丞其大夫为通议又八年而子彬以岭南大制帅奏绩赠公御史大夫领少司马其大夫为资政又二年不佞贞起佐南枢叨从子彬之后子彬一日右顾而言曰事固不可知以先公之材而贵不过三命以华之不材而乃至七命乃又获以其命命公华也何敢言材盖未几而子彬稽首以请曰日者以葬母夫人故赖上大恩先公之墓容获拜饰矣而隧道之石阙焉未备敢藉子之一言以文之不佞谢不文既而曰辱子彬之爱兄弟也于鳌江公犹子也敢辞按状公姓吴氏讳世泽字宗仁鳌江其别号也世为福之连江人其先有施州守赧曙政术数传而为连江簿绳祖岁侵能发家粟以赈邑人德之是皆在胜国时四传而为司训公寅尝割股愈母疾当贡而让其次之贫者亡何有沙汰之命则先生亦已贡矣人咸以为义感司训公子瓊饶隱德公之父也以公赠为膳部郎再用子彬贵赠如公瓊娶赵夫人而举公公生奇

颖凝重举止异凡儿稍长日诵千余言属对往往得隽语赠公异而益课厉之读书恒至丙夜犹未已为公交车业益工又能以其暇精弧矢之技寻补博士弟子学使者行部往往称公文俾冠其侪已而校肄礼射公又辄命中学使者目而叹曰是子文武才也公以正德己卯领乡荐至嘉靖癸未而捷南宫高第廷试出身同进士授吉安之庐陵令庐陵岩邑也赋繁而俗囂或为公难之公曰清慎吾所自有患不勤耳自是出入恒戴星欽欽坐堂皇治牍决谳不以事贻来日邑赋牒成公令上书户名下书粮几何而中断之藏其上之半而第校粮多寡以为轻重役既定而后合之人无知者榜之通衢亡不翕然心服然莫测公之所自得以为神明公于讼狱单辞立剖然往往繇物情微丽法而已不好为文深缭绕苛细庐陵之民爱而服之乙酉沿檄入司棘所取多知名士而邻邑令同年进士王君激长于公公兄事之政取相磨切又同入棘而王君得吉水罗文恭公洪先卷以示公相与叹赏属填榜启封而左使严者职提调于罗之父宪副公有隙阳摘他误欲弃之王君慑不能独持公从傍力诤曰此人当为国器不可弃也罗既荐而后果状元及第以德学名世遂称公门下士终其身满三载擢南京礼部仪制司主事进精膳司郎中以诏恩实授王君用其舅张相公重在铨曹力推毂公公不悻曰留都吾故乐之不汝藉也王君乃为移公南之验封以示意明年公出为严州守公谓严当英景时若商文毅姚文敏二公相继以大魁登宰辅父子兄弟冠冕一世而今胡寥寥也乃首拓黉宫葺号舍别改梵宇为正学书院集诸生之颖俊者居其中而身往课励之业成矣则诲之以躬行又念郡狎于僻险武备弛不饬大辟射地树之亭曰观德而募材官及良家少年躬教之射于是严人始知射明年括苍寇据遂安梓树坞矿近万人公勒习射士往驰之掩得其酋魁而散其胁从一方偃然时五月连雨蛟蜃并起涨水攻郡城不没者三板公昼夜行睥睨间分集小艇于乡落以拯溺者而遂安潦尤甚其令不能有所慰抚饥民数百辈剽掠伊毛二大姓廩汹汹不可制公曰是令激之也首勒停令而与陆司理愚按行剽所劝富室贷粟以赈咸响应恐后公谓司理必至邑而后赈谷聚众亦聚矣聚且酿斗下令各乡谷即各乡赈之顷刻众散尽公乃徐取其首祸者抵法而已司理余乡前辈也甚材而服公如神君公亦抚之能尽得其材用郡有公家徭为六邑所苦公曰民困极矣奈何复劳之检库得余金四千六百仓得贮谷五万九千余石请之台悉以抵徭已又请于台蠲赋十六六邑讙呼如更生潦之明年复旱公徒步祷于神雨立澍公所为仁政非一而其著者清狴犴之积冤赎纳户之粥子寃失火之令搜驿传之蠹尤为人所称尝出而遇私宰牛者牛逆脱狂触人不可近忽走之公與前伏而若诉者公正牛主法而归牛于良士使之耕以老士大夫为作异牛歌甘雨謠丁酉公复入司棘所得名士尤多久之擢广西兵备副使使郡人阨道攀挽不可得遂为勒碑纪遗爱始公得严以严俗朴而民淳喜曰可以藏吾拙矣及公至而水旱荐臻叛者四起人谓公昔喜之谓何然公不动声色而叛宁之严复为严公亦喜曰此拙者之效也广西之迁将有事于安南既抵任则安南请受约束仅以苍梧府江二郡付公居闲无事意有所不悻即拂衣归人以公有文武才不大展

为恨公夷然不屑也时时与故参政遊君璉御史王君德温相酬倡为率真会篮笋轻刀惟意所之解天裘葆天倪即百岁不为过也而竟卒矣公孝友内至念赵夫人之不逮侍也与贈公之不待贵也语及之泪輒浸淫堕矣事继母陈宗二氏皆备志物如所生抚幼弟如子已立矣而犹不忍析箸也然外和而内劲其始与计偕邑令推金以賔公心鄙之而不能却俟其行乃归封识如故德温称公无一函入政府无一字入公庭惟与诸君子與当道城连江而已城成而倭卒至薄之不可下故公歿而邑之士民请于台祀公卿先生社严之士民亦请公祀名宦公娶即陈夫人有贤淑声能佐公于德子一即大司马其字即子彬名曰文华娶即德温女贈夫人继娶陈封夫人女一适陈瀚孙男三长承照娶游次承熙娶陈次承烈聘林承照以子彬奏三品绩承熙承烈俱以岭南功拜胄子遊太学孙女一适陈一是曾孙男二孙女二俱幼公有诗若干卷曰缶鸣集不琢而畅有刘白风于乎子彬之不敢论才于公固孝道然使竟公之诣于中外不勒彝不名熟釜吾不信也夫虔刀之授不征于览而征于遵三槐之植不发于旦于吾王有之及公父子则更灼灼彪炳矣于是不佞贞之出仅一载余而所谓盗贼水旱者时时蒿目不能不扼腕于今之君子而益致仰于公严州之政不忘故为之

铭曰公产何所濱连江欲海浴日成名邦乃托金螯志竒惊读破万卷射迭双湖以征僬魁南宫百里出宰苏疲癯陪京礼乐何雍容步武要津不汝从山郡僻简安吾慵谁呼阳侯鞭毒龙樵门鼓钟波擊撞公操版筑分土功十室捐困惠贫莛剽攘弃戈来称农乃振文教扬武风治平不数前吴公岭右之徭何狩凶望公前茅厥角崩上书倦遊臣欲东飘然长霄恣冥鸿欲以不尽遗阿蒙有子国柱寄元戎金书煌煌碑丽空嗟嗟胡不生鼎钟袞而槐根践厥梦

累贈资政大夫南京礼部尚书石溪姜公神道碑

万曆十七年南京礼部尚书姜公寶以奏三载绩中道而上疏曰臣幸值昌时忝八座甫获以职事入覲天子之阙廷而年事过衰且抱邁轴之疾不任行敢以骸骨请上重惜尚书之去而念其年至不欲烦以政特加太子少保而命所司予三代诰于是少保之父贈右通政公金加贈资政大夫南京礼部尚书其配孔恭人进封夫人公盖再被玺书矣天子所以褒扬隱德先后至少保樞而勒之石且谓世贞故事官至京朝三品例有铭以文其丽牲之石而今者乃有当也敢以累子世贞谢不敏则谓少保子之事先公晚盖弃子二十五年而始得四品又二十年而得二品宜子之不愆然也虽然丈夫生世莫重于人主一言之华袞而先帝之所褒称守礼敦信安贞抱朴孝友身范清白家声今上之继褒则游思坟索养澹丘园且以其淳风高节比于鲁连薛包昭昭乎日星之揭而子尚可无己乎不然不佞姑任其述可也公字纯甫别号石溪其先四岳裔沦于江左自溧

阳徙丹阳为巨姓凡六世皆不仕至大八公昕益拓其业娶于潘有五子而长为公大八公之称尚书与潘之称夫人亦少保赠也公生而明悟有器识大八公异焉将属以儒起而公为最长子家政夺之大八公既多子用或不时给而又前逝公遂为家督而老母诸弟俯仰皆以属公公竭心力任之赖所娶孔夫人携帑装颇厚能不私其有十一在室十九在家以是获稍稍支吾而仲弟最能得母夫人意公缘以宽之仲日腴而公日以瘠弗计也孔夫人有子三曰宪曰窠曰寔即少保与窠皆夙慧公日夜课之学曰吾所未及获志于先公者在若曹窠与少保试诸生间甲乙冠故丹阳令来汝贤以文操其柄独心折二子而推重公不使备民礼恒呼之曰姜封君姜封君然公竟不及见少保之贵以卒而窠亦遂不偶公为人恺悌忠信又曾读书通大谊晓筹划既渐老而有令子族指众不能无纷纭公必为之宛曲调解直者微伸之冤者雪之以是咸推服为三老祭酒季弟古田令未之任道卒而遗孤宫在稚积负可千金诸索负者将瓜分其产公谢曰毋以为也即闻之官必不忍鱼肉士大夫之后而饱诸君幸宽其子钱某请任之以田租岁若干代偿索负者咸服居数岁负足而宫产亦不废因以成立公尝出宴遊遇浙中一伶察其意不舒间谓曰少年何自堕此行径伶懼然曰不容已也劝令改业而俸窠教之业成卒为邑知名士凡公所行多称是性至孝虽处约而能养母夫人以优与葬大八公俱以礼公卒之年六十有七而孔夫人尤以贤称盖前公二十有九年卒所举自三子外尚有二女而武进金夫人续之亦为公举二子二女曰寅曰宋五子中独少保取伦魁入读中秘书为史官两督学政三备九列拜南成均祭酒以直道抗悍相罢去寻起长容台歷少宰大司寇以至今官其政术学行为世儒宗名臣诸孙如干人而有士（阙）补胄监士昌为戶部郎中其志行不愧少保子

铭曰姜之先四岳后为太公孔则元圣称万世宗夫岂不神明其胄而支庶流播伏于井窞天作之合俾以德俪俾振其趾而中挺喆嗣八坐之崇贲于匹氓闾阎之行天子所扬溯彼渊源厥流必长载曰舟穴沉沉以归凤凰和鸣锵锵奕世其昌

武畧将军以都指挥体统行事赠通议大夫南京都察院右副都御史屏岩石公神道碑

大中丞石公应岳奏其三品之绩法当赠封皇祖及考而故皆以武功贵考屏岩公珍至指挥僉事以都指挥体统行守御事矣前是中丞为都给事中遇国庆当封公官高仅授武畧将军至是乃上言近例父武爵卑于子者仅以子品冠武衞非故事且失人臣効忠报亲之指请以臣官官臣祖父报可于是公与其父懋庵公正俱得赠如中丞官盖特恩也中丞既拜命将援礼立七尺丽牲之石于神道而属世贞铭之曰先公之背孤而葬也有志而无碑以不得碑也今者得之矣而更恣恣焉将何以光昭主上之大德而表

先公未竟之志吾子其惠之言按状公字国璠屏岩其别号也石之先滁州来安人有显祖者从高皇帝起兵有功授百户传子源调锦衣卫再调闽之镇海子全始调漳之龙岩所传子懋庵公则公之父也世世守故官懋庵公娶于黄不宜子后始置贰萧而举公懋庵公虽用武事终其身然好习儒家言尝从故布衣陈真晟先生遊其学益邃公虽晚子爱而见课督甚严恒谓悦礼乐敦诗书而将中军者何人哉使若瞋目跳荡五步不留行亦一夫之技耳于是公感奋力学懋庵公卒公戚易咸备时生母萧前背公矣而嫡母黄尚在孝养靡所不笃公之始袭百户时仅二十耳而老成廉慎驭士卒以恩义善骑射晓韬铃之畧御史监司行部独目公曰此儒将也寻有山寇犯龙岩时文武吏皆就台核独公居守寇之犯以乘虚人情汹汹公励士乘城为备而出奇计获其酋五余悉溃散已奉檄平上杭大王山坝寇寻饶平大盗张璉之众突龙岩以吕公交车攻城城土隤公募死士出家镪盛酒食飧之人人殊死战乃解公前后功多然以官卑遠故不録久之从击龙头寨剧寇始与赏居恒叹诧谓生以过庭故习博士家言竟老一兜鍪如先君望何而会中丞少俊朗负大人之志即授以经术凡一试诸生即褒然再试即贡三试即荐于乡四试而成进士入读中秘书为庶吉士改直金华省为给事中再迁都给事中始一称快曰吾可借口地下矣然公亦自以从破罗旁巨寇功进副千户世袭抚按交章荐公良将才遂超拜今官又进武畧号方大振刷有所为而得疾遽卒矣公为人洁廉于士卒不私一钱所抚恤如赤子卒之日众聚哭于军曰公何自舍我去耶我曹何以终怙性坦洞不设城府推表见里而务出于寛厚邑有黠豪工持人短尝挟公得百金而去及中丞之贵也因所亲叩门请偿公靡之去曰吾自欲与若非若强也今乃欲使我复为若耶其人不得偿局踏谢去乃人人颂公长者公事嫡母及抚三弱弟蒸蒸雍雍如也公以嘉靖甲申生以万厯己卯卒得寿五十六娶林封安人再封淑人子男四长即中丞娶丘继陈封皆孺人今赠封如林次应崧国子生娶黄次应岐娶翁次应峤聘连诸孙若干人而长者惟盘以公荫袭累官福建署都指挥僉事惟砺以中丞荫补胄子嗟夫石之欲以儒振者自懋庵公而下至公再世矣卒不能身有之迨中丞而用公教追隆两公长九列而据独坐则岂唯振之殆光絶哉虽然使公不死而竟其究提戈万里策勋旗常又何可量也是宜铭

铭曰石之先赳赳武伉迨公厥考始以儒将公之将惠慈不私甫命登坛天复妬之及儒之庸不于其躬而于中丞荣褒峻封洋坑之原有光如虹帝纶昭回永贲玄宫

△墓碑

中奉大夫江西布政使司左布政使天目徐公墓碑

徐公讳中行字子与徐所受姓具韩愈所造偃王庙碑中其系凤阳人也洪武中进

五公者坐徙江南之长兴遂为长兴人进五生亨六亨六生农隱有子五人而最少者为封刑部公某刑部公以儒行显闾党间娶许安人善女红有子三人而最少者为公公生而颖警十数岁即能为举子业旁及古文辞十六试于邑邑令黄公光升大奇之谓是儿国器也寻遊邑庠为诸生亡何举乡荐遂进遊南太学益为古文辞公白皙美姿容眉目如画能食酒工谐笑所周旋亡非贤豪长者以故藉藉公交车间凡十年而成进士授刑部广东司主事公既以文辞有声实而尚书为顾公应祥其外舅行也甚赏异之间谓曰郎所业足自名必欲舍而趋古者则毋若他曹郎李攀龙又谓不佞世贞虽少亦其次也公自是交驩吾两人而同年中若梁有誉宗臣吴国伦咸来相劇切公遂取旧草悉焚之而自是诗非开元而上文非东西京而上毋述矣而会郎杨继盛者上书劾相严论死犹在系公时时橐饘食之间一入相慰语慷慨歔嘘泣数行下杨君谓公毋入且生得失生得失相严当舍我而与若讎也公不顾而太宰李公默雅能知公文拟入内阁司两制不果给事御史缺拟以曹郎徙公名在第三复不果而公念父母老上疏乞南曹便养报闻会决江北辟便道归省寻迁员外郎事竣还朝转贵州司郎中时杨君已得死丧归公解橐而追贖之相严乃伺诸尝贖杨君者而太宰复中蜚语下法曹当公献公稍丽轻辟诏不许公恒自念太宰知我我以法报且不可而乃不获以法报我之自谓何然相严则益不怪公矣公寻使论江南狱大小悉以情所全活以数百计事未竣出知汀州府公至而广寇萧五拥万众猝来寇郭外男女争避入城城者阖之有相蹈藉死者公亟戒勿阖而身坐闔前引絙别涂俾男循左女循右入第令遠斥堠而已诸县令各受公教饬兵登陴贼不能破行围指挥董珣垒系累男女数百公以一旅解之尽斂其俘归公策贼且走走必繇高吴道俾武平令徐甫宰伏兵徼破之擒其酋寻推功徐令不自居公又策山海寇无已时而三图当要冲议城之以一通判控治得报可自是寇益解散汀一切治而公入计甫毕而丁封刑部公忧治丧以毀瘠闻起补汝宁府其治如汀时伊王负上宠创筑城垣及诸不法事甚伙公当往会勘人窃危公是不易析也公缓颊数语利害王悚听立毀垣及省诸不法大猾中通判何君以法何君义不受逮雉经死而猾踞横自若公为捕致于理汝人快之公两治郡悉能平其赋且格他横赋而其治本经术稍傅比以礼节在汀祠故死事指挥王月糈故孝子丘文岐子在汝筑天中台别立何仲默祠暇则行学宫课授弟子文谊旌赏其卓然者当京朝大察吏公前以迁后察格不当复察而相严尚在政察及公当左迁士民拥车遮道觴公且哭且絮语浹日不得发始公策东郭河善崩筑堤障之未就而闻报曰吾不敢以不终事也堤成而后辞事其以汀守覲垂发泣谓巡臬曰守尝欲城右郭捍叵测矣凿河以紓两汀水之会而杀其反与射以完城形胜矣而皆绌于力未举即以不职谢汀人而兹愿之未塞也明公其有以喻来者其后杨守世芳城右郭金守立爱凿河皆具如公指以故两郡人思之为立碑而曹司空亨汪司马道昆纪其事公归旦夕奉母许安人怡怡如也有两兄而伯中孚蚤逝子其子咏养而教之仲中和贫推与已田宅中外姻戚恃而举火者恒数十人公性好客客时时满坐所恨惟疊耻

饌食取咄嗟办而不问所自来其童干亦喜客之至而娱之冀以得自纾即稍（阙）缀韵语或操一艺者问公衣则衣问公食则食问公所嘘荐则为草荐书或数十函不倦公以是益困而太夫人从容谓公曰汝不念来日耶而不为祖且上英断正臣新柄国不以时白见冤状勉图功名自効而刺促一廛茗水上也公感乃之吏部选甫六日得长芦之转运判官为判官之三月迁瑞州府同知许安人老寿死其讣与除目荐至公奔归恸欲絶念无以报地下因请李攀龙铭其葬而世贞传之时少师徐公与太宰胡公内重公超为山东按察僉事且欲进移公学职会以丧闻乃止服除补湖广巡武昌武昌首道也隳案积委充宇公精心剖之立洗陈氏之后曰柯彩凤者负湖为盗舟藪公掩而毙之狱搽其积粟藏镪以赈饥人所活殆万计江南北窘于渡公为立值责渡子毋横索有溺者官且棺瘞之溺而不报则以罪其地人黄鹤楼毁公计以废殿材新之而阙梁栋寻江涨大木随水而下者数株以树楼良称楚人异之积资为云南布政司左参议寒暑毋间行部出则用什伍法练士入则缓带延儒生讲说私文彬彬矣以贺万寿行悉留其携书数千卷真公库迁福建按察副使遂为其省右参政有黠而蠹于仓者凡七十家公廉得之以轻重受谪自是军食足毋困出纳逾年进按察使三治其省政益习岁时献决漫平而城西有积水百顷一山踞之公乃捐俸入创亭榭胜处沿堤植桃李轻桡徐进与寮从称觞赋诗闽人指谓使君何必减山荆州哉监省试所得多名士人录文有传者入覲毕迁江西右布政使右使于务简往往高卧而公独以精勤称寻迁左布政使司领郡至十余所馆三王国子侯而下禄食供亿以千万计而他所请质平亭综核顷刻百端造请台使筵馆饷无虚日公谈笑应之咸叹伏以为神而实中耗矣一日宗室有阅者交发其阴私事公思所以保全之不得忽眩不能语昇归卧正寝中夜卒其窆若右使张公辈跣而救公弗及也中丞刘公行视公贫弗能丧乃与张公谋捐帑金治美材殓之而余弟世懋方分部南康惊而奔以一日夜至力为经纪其道路费始得归公之丧归也诸王子侯与其寮若属及郡之荐绅大夫縞而几哭其吏士巷哭其耆妇孺拥而野哭道所经守令师生亡弗祀也公之客及交遊满天下闻者亡弗呜咽悲谔曰公奈何死公且无子已而曰公可以死矣即无子有子矣盖谓其德就名树也公孝友敦睦寬然长者其舌有臧而无否轻财好施不为帑藏泛爱亲仁久而弥笃所庄事李攀龙盖不敢以友进者终身矣吾曹若宗臣梁有誉蚤死攀龙高简少延纳国伦与世贞不耐毋口语而世贞性复脱疎即操觚者思甘心焉而于公靡间言以故得醍醐称一曰国老和而甘且善剂也公于诗格高而调逸近体宏丽悲壮读之神耸文步趋古昔所立卓尔有青萝馆集续集若干卷天目山堂前集若干卷青萝馆集则汪司马序之矣公卒以万厯戊寅十月十三日距其生正德丁丑得寿六十有二配杨安人有二女长适候选经歴周文政次适太学生蔡鼎铉举一子而殇所子咏为独子当归后兄乃以咏第三子承孝为殇后承公重嗟哉公始号龙湾更号犬目山人葬在城东之里许高桥下世贞念无以効公为伐石勒辞而树诸阡以示永永

铭曰公生有自出有为也君子豹变其文蔚也歿而有归兹其委蜕也谁欤树碑俾勿替也四海之内皆兄弟也微言之存后天坠也夫人兮自有美系也

前工科给事中赠太常寺少卿贞山陆公墓碑

陆公者讳粲字子余一字浚明其先汉豫章都尉烈尝为吴令而其人思之及死葬吴之胥屏亭遂留家焉至宋季而有十九朝议者避兵徙长洲之陈湖遂复为长洲人公故家陈湖而时时读书贞山中学者尊称之曰贞山先生当陆之盛几倾邑而族父少保完者故立大功领太宰大司马重于天下公守诸生绝不依附之及少保败而独公皤然乃自以经术秋文为少傅王文恪公所知赏曰是子也成将掩我因出其所撰着属公核之间有所异同輒志于后曰陆秀才谓我当云云文恪公之卒而公尚未离诸生也公亦不以此自名而其举于应天再举会试皆以春秋冠其经生比对策故辅石文介公瑤大奇之拔真第一而公乡中有忌者匿公策他所俟且半而后出之石公大恨曰吾为人所卖公闻之亦不肯名石公客而以选改翰林庶吉士凡七试皆居第一经生慕称之谓王文恪公复出而其谈说古文辞者以公伯仲庐陵眉山公意殊不自怪惟究心经世之学学成当授官首辅杨文襄公试之复拟第一留充史馆议礼诸臣骤贵而张桂尤幸用事至各为密疏以诸吉士皆前相宏私人也于是上惑之俾各出就选人格而公尚以高第补工科给事中公拜给事中之三日即上疏言京边诸要务因及人才学术国家理乱大策杨公读而叹曰吾向者以文士待陆生几失之贾长沙之侑生家敬輿未论也公益感奋复上时政四事皆时所不易言者月中疏凡三上杨公愈欲一当公公愈自引避竟不肯名杨公客寻奉勅清坊廐马公验其非壮者疏请斥市之岁可省刍粟直数万中贵人不便之为蜚语中公发其奸因条列牧政十事皆报可诸阉气夺初用京朝官主各省试公首得浙江所收多名士其程义雅驯为天下冠还守故职时庆阳伯之奴张与他人斗而其人不胜輒杀其母将以诬张法司讞得之且丽大辟矣其人迫则行赂东厂而庆阳伯康陵之外家也大阉窥上心内薄之即疏证张实殴其母死非其子杀欲以动上果下三法司会讞而都御史熊恭肃公等力持前狱上怒为夺熊公官余镌秩有差公抗章谓熊公不当夺官狱不当反厂阉不当徇其辞甚危上怒逮公廷杖之创愈奉职如故张桂时并相挟上眷事欲凌杨公杨公扼腕而已而桂尤鸩寻与张角宠而孽公奋曰决痛者乘其将溃此非时耶夜草疏千余言力陈二相之横以为不蚤去必乱天下其攻桂尤切方属草而鬼啸于庭公叱曰非二氏家鬼耶何自阻我草具亟上之上大感动为罢张桂而特镌桂保傅以示倾听公然犹难辅臣体置公狱将薄倣之而会詹事霍文敏公韬者故与张桂议礼合而以疏辞位为上所重既失党而孤且疑出杨公旨遂抗章涅杨公而为张桂鸣不平上乃召张公俾入辅还桂所镌保傅狱成公得重杖谪贵州都匀驿丞

而杨公蒙不韪以行事体变矣当公之疏行犂下大小无不加额颂圣明而目公奇男子至是则俱奄然索矣有泣于都门外者都匀在深山中公裹创以单车至驿不携家惟读书而已所创述一出人争传之以拟故王文成公为迁客冠冕居岁余量移江西永新令永新方若劫而乐讼以讼为生公至首严保甲法什五相调察奸无所容公钩得舍劫者主名凡数家出不意扑禽之而其最雄者彭震徙党数百千出没邻郡不可究捕公念郡狱有大侠故尝与震好能知其处召谓曰若欲生乎欲生为我縛震来因授以方畧使壮士数辈挟之往遂縛震又计縛舍劫之豪左氏者皆毙于狱讼师积猾横行里中有名为彪为虎者公悉捕执之大者死小者戍其它断孤产辨冤狱一邑惊服以为神明公乃曰害去矣吾可进之教纂曰礼仪式杂他条约数十讲之学宫而后布之士民欢趋若流水他邑视以为师帅台荐萎腾公念太夫人老而相张方在事曰我犹堕彼睚眦宁独宽我上疏拂衣归台使者如失左右手吏民以数万计哭而挽之莫得也相与貌公像其纪思称颂之文至成卷帙公归杜门无事多购异书习读之于刘向所谓七畧者其校讎几徧以至老释方伎黄衣稗官之书无不通晓尤精先朝掌故家言与客谈纒纒若贯珠其披摘精义指踪经畧尤出人意表客亡不怵然自失也公于文本出左氏太史公然不求肖似辞达为诣人始目公以庐陵眉山为不能尽公然要之有互发者其节奏经纬斐然成章则犹西京之辙也诗虽匠心而冷然见古调不欲与俗酬倡是以篇什差少岂曰邾郯无讥已耶盖尝啻知鼎矣台察监司郡邑守令时时造公请质公一切不为私居间至于闾左利弊国计大小未尝有所避隱也语及忠孝节义娓娓流羨至切齿污浊眉宇壮色犹隱隱于是听者服公之公而忘其激慰荐之剡积可十百而公絕不通燕中贵人问而当其论紕张桂时中尝訾及分宜氏更分宜贵用事重于二人其修隙又倍之公以故卒不用霍公者颇自悔恨前事尝荐十余贤者而公与焉又使人郑重通殷勤公不许曰天下事俺为若败而何污我也霍公亦不以望公人两贤之公事太夫人孝甚老而失明所以娱悦之者万方晚节稍稍具声伎以共膳饮人或误訾公及太夫人捐馆舍即日开阁散遣之时公且耳顺矣哀毁踰节遂委顿以暨不起病既革顾影叹曰虚有此七尺不以马革裹而朽之牖下也呜呼盖可悲已公为人疎眉目美须骨棱棱起读书视微短然数行俱下于伯氏字而敬其供养孀姊亚于母又为表其节行而传之季采材而不获庸以死公痛之形神为减损与人交有终始善故徐训导元禄则力拔之诸生中岁时恤其家又善故史丞■〈斌上金下〉缓急未尝以匱辞竟以女归其子然二君皆乡长者陆长史鍾张郎中约老而慕公义请以身后托公许之没（阙）存恤其子孙毕身无怠公为诸生及仕宦（阙）王文恪杨文襄二公客然时耿耿不忘（阙）知己而谓故鸿胪丞钱公贵其童子师也图像（阙）时致酒脯焉华学士子潜公同馆友也慕公敬间有所资给公称心而取亦不谢其令永新而尚书尹公台者方籍公交车公异之与深语遂为莫逆晚年世贞以童子见公饮之酒曰是非凡儿也迨叨第进士以书上公公降辞报纳良至盖公卒之十年而其子延枝始以彭征君状乞尹公志其葬又六年而庄皇帝即位

诏録故言事者公以尝迁他官格小迁又二载而华公明之台台具以请天子特赠公太常少卿所以褒嘉甚至又二十年而延枝始以墓碑请曰吾父实识君微君文后世谁知有陆太常者余谢曰微余文后世谁知有陆给事者虽然于谊不可辞公以弘治甲寅生卒以嘉靖辛亥春秋五十有八父曰如隱居士应宾母即胡太夫人娶盛氏故右都御史应期女子一即延枝娶毛氏女二长适太常少卿王有壬次适太学生史访即■〈斌上金下〉子也孙男二女二所著有春秋镌附注胡传释诗文奏议烟霞山房书尺庚己编若干卷未成者见闻随笔钩玄抉秘礼史二记注释又若干卷墓在贞山之南黄村

辞曰三吴靡靡善脂突公于其间独挺发贬剥百子祢经术丘迂风神固为骨下视修轼时入出褒然公交车思郁淳为郎荷囊备琐闼口嘘长虹贯日月柄臣逡巡魄几夺浮云为纒帝聪室臣不肤立宁寸裂鬼方遥遥天一髮信心而行瘴为豁永新大豪若距脱爱养单赤俛得活飘然奉身返岩穴焉能为官中屈节飞黄骨腾未秣刷甫驰康庄遂一蹶长离横空翻中録即羽可仪亦空设煌煌金书下丹阙太常穹碑际云揭呜呼陆公真人杰高岸可谷名不灭

弇州续稿卷一百三十四

●钦定四库全书

弇州续稿卷一百三十五

（明）王世贞 撰

○文部

△墓碑

中顺大夫应天府府丞道山凌公墓碑

故应天府丞道山公卒于嘉靖之乙卯而葬于戊午又二十二年而其子太学生玄佑以故太子赞善罗文恭公洪先之志铭与宗人中丞儒之状而来拜且泣曰惟是先君子忝贰陪京秩第四品年四十三虽夭获为闻人而今墓木拱矣隧左丽牲之石阙焉不文敢以请世贞乃亦泣曰不佞而父友也而父之辱为友者若而人独不佞在且老矣不佞尝读班史至曹氏之为京兆阡也以而父行谊政术彬彬焉奚啻不彼若而忍使独泯

泯请题其石京兆阡而系之文其文曰公姓凌氏讳汝志字云鹄道山其别号也凌之先自烈亭侯统始以才节着其后称甲族而支蔓于吾郡及通泰吴兴姑熟间至元而有太乙者兄弟三人居常熟之塘北里再徙于直塘遂为吾太仓人数传而至赠兵部左侍郎缙以孝弟力田闻一子曰石林公昆其封为工部主事赠如缙则皆用少子尚书云翼贵故石林公娶陈淑人而生公公资淑嫩六岁未能语语则晓读书所授輒诵甫长工属文补博士弟子屡试即颖脱公晚出以名高故里舍儿修酒食郟而构之当是时御史黄仁山谪为吾州守而给事中王聘来倅俱异公貌而试之曰是子也才且非能为郟者寬其牒以上司理王与齡王君有人伦鉴复试之则益竒之曰国噐也顾尽骂修郟者曰若曹断断齿牙子直修忌耳胡但郟也悉扶出之而慰勉公俾复为弟子遂以优等既学宫久之举应天试连举进士授江西之宜春令宜春故贵相里人意公偏偏易忤不者当以谓能见私而公雅自持约畧如常时所行而已一切不见刻深而间能钩吏伏以权为操舍吏恐憊献其悃单赤便之每课绩輒为其省冠而尚书尺一征以高第擢刑科给事中贵相心服公材謬相引而有二大臣尝市廷尉絜法以显且名为得贵相意公立劾罢之贵相莫能难也自是公迁工科右兵科左以至戶科为都给事中前后用质諒便习大体重公卿间诸寮有戇见忤者不更事者皆頼公宛曲剂解以免而公益自任发舒必达所不可其在工科按京兆奸私前尹已迁为大僚劾罢之在兵科督察京营与权帅彻侯鸾仇鸾败劾谪其夤缘冒子任者侍郎一人通政一人又尝上章请禁计吏贄为勾稽法实戎伍皆下所司着为令其在刑科科之长以缓大臣狱在戶科而礼科臣以不与竹宫祠厘荐香公皆与佐决得廷杖然不为沮公所居官輒称踰于前后数公而又以能高当迁卿寺念父母老而乡数中倭乞便地以养得应天丞公之丞应天属尹缺遂领尹事即以爽干称忽病疽甫溃而岛寇流犯近地遊奕自冶城抵朱雀桁刁斗日夜不絶公褻创调兵食与大司马相表里已稍解严即有畿试公为提调自始事至彻棘小大必亲众方翕然服公神采而公巾屨不支矣既病革强起执石林公陈淑人手而泣曰儿不孝不能终事二大人以为恨玄佑哭则正色曰吾乘命往而若以儿女子态■〈殪上心下〉我何为呼酒尽一噐呼笔赋诗诗成而瞑公为人长身玉立秀眉目朗彻如画善言笑喜义施与人交不设城府能食酒至数斗然所当官不废尤饬内行惇孝友家室中外藹如也第性刚不能藏人过稍间即忘之其为诸生而贫则不轻下人以故俛得竒祸而至贵显则不复上人潦倒书生半面者叩之立应汤沐浆酒荐出与欢适亡间当是时长安街邸不减郑公业亡论大小亡不推公长者少授尚书公经因相与砥砺行谊遂同荐于乡为隆万间名臣天下以公之开嫩尚书公之宏密畧相当而公遽已矣语曰人不可以无年信哉公配顾封孺人有容德敏而惇信其代公而子代父而父者又若干年而卒祔公葬子一即玄佑娶张续娶王女三适某某子某女某世贞谓世庙之季天子持成意而后启皂囊封少有当者公首尾諫垣七年所建白靡不符节契也即以波遣及而上不为蓄怒公亦不为沮此岂易言哉不知者意公有所挟夫公有所挟而何以触其私人也夫岂直私人

即禁计吏贲者宁非彼私讳也公真亮臣也已是宜铭

铭曰公有美才循吏帅师节湊窾解百弊自披白简所陈天听为移其与人交剪棘剖篱霁景条风云行雨施朗儒坦易天下信之和而匪流圆必中规遇所不可如矢发机与立与权人或未知阐幽者谁呜呼噫嘻

明江西按察副使畏斋薛公墓碑

嘉靖初王文成公守仁与其徒日讲良知之学有风之者即谓其为非圣贤之徒不足以语圣贤之学不知舍三者而从吾所好不佞窃谓公言激也夫使良知之学明遇遘而发之气节为功业为文章亦何不可苟岐而二之而加取舍于其间吾故曰激也自文成公歿其诸弟子各以其资而得其识之所近毋论能为文成公与否良知之学亦藉以大明于天下而大江之阴有薛公甲者少不及事文成公始以明颖治经术工时义为博士弟子冠既心薄之其父浮休先生章用古文辞着声东南公亦遂以古文辞名既复心疑之曰龙门昌黎可轻觊耶即不啻若龙门昌黎于真我何益自是日潜心朱氏遗书曰此吾师也汲汲焉探讨之是厘而署其室曰畏斋以自检谓敬吾未敢能吾姑以畏阶之耳即步武语默酬酢出处一依準绳居然武夷白鹿弟子也第其为诸生则恒冠诸生捷于乡于南宫射策于金马皆不废时义举进士隶事礼部即以政论见赏其尚书遂拜兵科给事中而当其在礼部时给事之长信州公与方士邵元吉比而进亲蚕图南北郊议得上心进学士仍兼长吏科公偶与其侪语而叹曰是焉能蔽吾考功令耶而及公之拜给事则有忌者已谗之信州耽耽公矣公为给事之二月即上封事谓新进之士多感恩思奋伉易而练不足惟陛下虚懷以听之开霁以容之若震之以威折之以辨则无有能摅吐其愚者又谓宜用祖宗故事御平台宣召卿士与商畧政机则下情不隔明良志同又谓进退大臣宜以礼不宜使小人倾夺长胃竞之风末则痛言方士异端其人与书皆斥屏之毋使乱政上颇嘉纳而信州怙宠与太宰方公诟而侷胜谓公意讥之且疑所谓方士者指元吉也恚甚嗾其所善给事饶秀论糾公阿奉太宰镌秩为湖广布政司照磨公以进士得给事甫二月得谪以给事得给事论糾皆出非常而识者颇用气节归公公殊不敢当会有致文成公传习錄者诵之霍然大悟曰解我缚者阳明先生也吾向者听命于耳目手足而强持之今者耳目手足听命于我而我无与也微先生吾徼纏死矣故其居楚臬尝署黄州所发擿如神明及通判明州修治东湖址汇水而省费以万计稍迁同知保定府一切皆以良知应之而稍有未尽莹者则益磨切文成公之遗言而证诸高弟子若邹谦之聂文蔚王汝止钱洪甫欧阳崇一诸贤反复下上已而有超然自信者常谓格物即所以致知慎动即所以存养成物即所以成己无暴即所以持志贯在一中约在博中于是文成之学益备而鹜于虚高脱顿者稍有所折衷矣公之自保定而超金按

察也实饬蜀之叙泸兵事乌蒙乌撒皆土酋也始乌蒙强乌撒弱强者欲复故界而监司更避强名弗欲与盖四十余年狺狺也公曰乌撒衷乌蒙辟我惟衷之是徇而讳强乎明年播州与永宁复争地始播之赋重而永宁宽播之民阴以地归永宁久而播觉之其酋两强而争更巨川南东二道俱袖手而公夙有德于永宁之女酋谕之曰毋论汝辟也强以其民为我德于是前后之侵地悉平始抚臣欲为播而胁永宁以兵公持之曰毋烦兵用兵之是挑永宁叛也抚臣始恚公而卒惭服其言公又为清诸卫所之伏田兵饷遂足凡所经画皆利便讴谣载道久之超为江西按察副使饬赣州兵事如初赣故文成公开府地也公喜自得师悉取其遗指画斟酌之有巨寇叶廷春曾祖华者并负山而窟狡黠不可猝制公殲以秘策若承蜩威声大振已为之清屯粮却塩税布团操立小学赣人相颂称以庶几故文成公而公所治与袁州比壤袁州相之庐产党戚错居赣如绣公颇持三尺裁之不少借以是大失其父子心属大计吏颀指言路劾罢公公赉喜谓子弟身今吾有也使袁州宿怨而责我以艰巨碁盗随之何所问身是故信州玉我者也袁州食我者也归而按行田里曰是不可为政乎取东鲁王氏书课田父为之瘠鹵转而膏腴傍亩益拓当是时王汝止钱洪甫尚无恙而罗达夫唐应德材高而亦能尊文成公学而稍出入焉时时过从公与之扬挖青衿受业者众然公实以朱氏学海勗之曰羿教人射必以彀率学者亦必志于彀率恒也俟其成而后进之几矣公性不喜涉公府岁首仅一谒迹可数也守令叩公庐与谈兴革利弊间并痼苦亶亶矣倭寇屡犯邑公乃从徙入城凡再上兵使者今太保王公书其言治兵创堡咸中窾诸从公则利永不从则不永邑令钱鏞笃信君子也以师礼事公为循吏而死于难公哭之恻移书幕府得赠官录后祠以祀之祠成而公记其状甚悉公于他诗文鸿鬯尔雅然未尝一语离学所著述有易象大指四书口义心学渊源录心传书院讲艺文类稿及续稿数十百卷行于世公娶于邵前卒继谈有丈夫子四遇逢造皆诸生遇以选贡前卒迎今为鸿胪序班女四孙男五嫁娶皆名族迎官金陵与余善谓余不能尽知公学而颇娴于文事将托之言树七尺之碑于墓道以垂不朽呜呼公故不以气节功业文章自期其究亦有厄于命而未获尽者然视文成公可谓具体而微矣使公尽废而日从事讲学何以称公哉

铭曰新安近曾东越斯孟其入不同乃同其竟公游新安而得东越如水春泮如暝明发既武东越不废新安毋使游学凌节避难世趣事功气节文章与道为一云何弗臧称公以此称亦浅矣舍而他称我又何纪

累封中宪大夫太仆寺少卿若斋朱公墓碑

朱公讳管字懋卿尝自号若斋学者因称之曰若斋先生朱之先世为漳之漳浦人王父德寿几百龄而终县宰为躬亲遭丧父鲁以好礼称于乡寿亦至八十六有丈夫子

四人公其季也生而朗俊不凡父噐之欲令以儒显而公受经得春秋补博士弟子员文有奇气为学使者潘简肃公潢所赏识顾其自喜奇益甚用是大试輒不利至于剖析训故则甚明哲而又夙从父修礼容每部使者行学宫雍容进讲周折不失尺寸羣耳目属之矣诸释奠乡饮推为诸生祭酒公既久困学宫而伯氏叔氏皆前死而公独身任父养歿又任其丧葬及收养死者之嫠而抚其孤以是益困至鬻其城中第徙于乡夷然不屑也公有子今少司寇天球国噐也教之学成乃叹曰余髮种种而乃与儿子辈角纸上语耶因谢去博士家言而司寇果以其岁中乡举明年成进士再迁南京礼部主事封公如其官已累佐藩臬视山东学政入为南京太仆少卿封公复如其官公既贵顾所御袍服冬夏仅二裘而已其它大布单帽无异田父司寇居官洁廉无他蓄俸入恒裁十之五以遗公公輒量散之族属亲友不别立私帑也当其为子不以父累诸兄其为弟不以诸兄之嫠孤他累有寡姊迎而养之以至死而丧葬不废凡公所为义非以名高也者其中心惨怛发于无所为而行于不容已司寇以礼部满考至京而适有杨忠愍公继盛之祸殡于城西寺出哭而赙之杨故论劾分宜相者人以为司寇危公闻之曰命故自有属彼狡何能为哉及司寇之迁太仆也公则曰儿渐贵渐揜人眼鼻得无以直累乎穆庙之初元新郑与江陵挟潜邸旧比而躡重张甚司寇以母服除至都下意不平欲上疏请赐裁抑语泄言路受指齧之得外调归而谢奉职无状公笑曰不尔尤吾向固逆知之司寇自是侍公山中二十年不出公意殊自快也公虽爱司寇而待之严每庄坐侍立竟日海谕璽璽皆先圣格言不及家事每怪士风日偷薄居恒叹曰吾覩夫簪笏者非复故衿裾之步也子孙不必仕当转徙深山中全其朴耳每闻朝事有不可意者咨嗟废食若金壬之挫善类輒弹指叱叱或继之以詈又有人伦鉴司寇门生谊故多显仕因縁来谒公公与语而合则更见之不合不更见也司寇因以差次其所就恒不爽晚节名益重郡邑礼聘当乡饮大宾公一再赴之而已逾七十称衰老谢客不复接八十而以寛乐终终之日族戚来吊酌者靡不哀巷哭邑叹趾相啣曰乡不复有巨公长者矣盖公与人处直而和未尝以贵色加贱未尝以前辈色加少年岁侵身先其施有大兴身先其劳所谓臙行而人悦之宜其失公而悲也公性喜购书恒积至充栋自书以外无长物为封公且三十年屋不益椽亩不益租嗟乎所以貽司寇者厚矣公少则好古文辞赋必称屈宋文必称班韩欧苏诗必称乐天尧夫不必尽有之要其所诣不浅矣公配陈氏有妇德先卒封安人赠恭人子二长即司寇陈出也次天佑贰某出也女三人适陈濂郑超程恺孙男七笃敬笃信笃弼笃叙笃烈举直举善女三一适王挺一适进士苏民俊而夭一未嫁司寇之试政秋官也余守尚书郎识之而未尽也迺忝长南秋官乃得相朝夕钦其清真亮简君子也司寇亦不予鄙一日俨然来造曰先公之葬当有碑而阙焉无文今以累子征其状自太宰陆公光祖状主详陆公之知公父子详也乃敬叙而铭之

铭曰维朱之先代隱德未致于庸德乃积源遠者流不可息皇祖与祢寿几百公实

嗣之开八袞弱龄属文神奕奕具眼者畴詎能识有子而才振天翼而登铨曹奏厥绩被公金绯鬢未白公安练衣嗜藿食五服外内宗执戚祿与共之靡嘆惜左準右规俨家则大篇商歌振金石与縁俱尽信所适郁郁葱葱还住宅以属司寇昭世泽我铭其隧过必式

国子助教吴昆麓先生墓碑

国家以六经四子义造士为羣孰冠最无当于古然至成弘间吾郡王文恪公鏊能以精纯尔雅之致发之凡一甲子而晋陵唐中丞顺之因以益畅其羽翼则有故薛学宪应旗今姜宗伯寶皆能自振励駉駉与古文辞角而并不朽矣而吴先生宗高先后遊三君子之门遂与姜公同举丙午荐一时方名大噪而先生居恒不自恠曰训故家去道不为遠然欲得圣人之心难矣而况饰之以澹辞束之以声偶割綴帖括以求悦于人目不亦鄙哉于是博采而精思务于求圣人所以立言之指而后托之笔繁简必剂文质必谐其文出而诸握管者走相语曰此正脉也此为故王文恪公法门也绣诸梓不脛而四驰通都大邑中亡不传先生之文者读之去而掇科第如寄其所亲指授亡论已然先生在公交车几三十载再厄家难一厄疾一厄失卷一厄失京兆繻余皆报罢而至所谓失卷者其经子义见赏于所司将首荐而行求表论不得竟莫知所繇先生虽九上而九不售然其名不以不售故小损前是有归先生有光者藉甚公车声而先生继之每试主司羣以得二先生为快既失之相与徊徨叹嗟如身见抑者而二先生已放棹归矣归先生年六十幸收一第然宦竟不达以死而最后先生始弃而署大名之长垣教事环长垣而郡邑博士弟子争执经受业请难先生曰去之余不可以言勇弟子麋集再拜曰遇而文恪不遇而先生何径庭也先生乃人人讲授咸大喜饱归而先生更自以材望屡登台刻仅二载余入国子监为助教秩虽左然地清而格高比比台諫选第所治多文事不能自表异先生貌瓌梧动止华雅慷慨谈说天下大计若指掌少时能挽强策蹻恒自谓使我得十万骑横行匈奴中狼居胥不足封也国子祭酒太原公既熟先生名而察其才长于干济故下帷而礼之至举典簿之所难者以属先生先生爬搔其宿蠹着为絜令岁省以千计他代人阴不利于先生先生不能尽閤其才其不利者与忌者合而中之遂出通判汀州府先生仰然叹曰吾其归矣吾岂薄倖不为顾所以栖迟一国子者将有待也夫汲长孺起田间天子委以符竹贵至二千石然泣不欲往愿为中郎出入禁闥补过拾遗今我危且得中郎而遽弃之倖欲使我屏息而伺太守之颜色为进止我何以宦为遂投劾吏部拂衣归时时野服见客曰我昆麓中人也昆麓极大荒西为天柱盖尝拟以自况云嗟乎天既以倜傥磊砢之材付先生而资之以年又资之以利用之业其于世必有当者毋论世之期先生即先生亦自信以为不竟恣恣而或丰或靳骤夺若幸若舞有不可控揣者则何也先生为人广额丰下度其元径尺余少以风采标格纵冶遊无所不极

意中岁悉谢去之敛而就绳準晚节泊如也归之日左经右史佐以古法书名画彝鼎瑚簋之属与客摩娑鉴赏铭饮竟日不倦有五丈夫子皆玉立长君之鹏少君之龙先后成进士仲君之美荐泽宫叔君之鹄以武起为宽佃峪提调季君之珍荐应天诸孙十余人稍长者皆补庠序郡国监司守令干旄溢其间先生虽多谢不报然闾里出入恒延颈相望以为神仙人而先生业杜德机无所托于唾壶之歌乃一室之楣尚署之曰未了呜呼其深意可念矣先生讳嵌宗高其字吴之先为无锡人后迁于武进遂为武进人 世受耕读称长者然隐约不仕在先生十二而僇朗有声父至愚公始竒之时居王母丧即毁擗狗礼若成人矣二十而为诸生奔父之难脱之于狴犴以其间读书属岁侵家人雪糜而进之喀喀喉中不知饥也与诸兄弟友爱无间父恶叔子崖寘之邑狱先生阴脱之父移恚先生代受笞不敢辞少者岑亦有狱逮先生之脱之如崖而加力也既罢国子归而伯氏岩老矣先生相持而泣晨朝上膳约畧如上父其季弟崑能食酒所诣必与偕油油然畅而后返尤敦气谊重然诺趣人之急先于己尝偕计北上当发而故人邹炫客死江阴不能敛先生回舟赴之解橐装为殓久之乃成发时杜虞部伟张云南祥鸞徐给事常吉以文行着江南用年事推先生先生弟蓄之其交谊为海内所美述先生工于诗诗有中盛唐风文则自庐陵眉山而上之可屈指也世固有知先生者乃掩于经子义不能尽所尽则仅经子义而又不获以显惜哉前是先生病且殆梦驾而叩若王者居王者肃客揖曰欲屈公交车徒未备何遽来也见若先生之祖祢请王者盍返先生先生既返若觉呼童子为我具牒谢彼王者病霍然已客以病已贺先生先生曰勿贺也居月余病复作乃叹曰吾年已六十四于易为未济男之穷乎且吾祖数止于是吾父复止于是吾又何冀饬诸子之侍者曰葬我毋请贵人志铭也吾自有赞在之鹏至自官率诸弟葬先生相顾而哭曰吾父虽有成言吾曹奈何从世眼终恻恻吾父乎且也赞自吾父草有挹损耳乃手具状而托张云南裁之乞汪司马伯玉志铭伯玉惇史也又久之之鹏为户科给事中而世贞守兵部侍郎于白下给事谒且请曰先子幸得尝识君非敢贵人例君也倘惠之一言树七尺碑于沈庄阡与伯玉俚令具之后世世有述焉余悯而许之之龙今亦为工部郎中余详志中

铭曰生世而得为人天之授之其竒赢莫伦先生赢于名而竒于身乃又赢于子孙呜呼授者以为幻而受者以为真吾谁与论

赠文林郎徐君新墓碑

徐君之卒也以隆庆丁卯三月与妇陈孺人合葬虎邱之平子圩而居亡何善青乌者过而睨之曰穴且有水已而其子今侍御申卜于神得尘中变侯门改葬百事宜语异而试之椁果濡尾亟启而栖诸原行相地娄门外某壤曰吉而君之友有梦君舟于李王

神庙侧者叩之曰此吾新居也盖是时甫兆于是益相诧以为神而君之墓成矣其成葬也则万历乙亥之冬十二月又明年举进士其后侍御出按岭表及河南归而谓不佞贞曰余先君与妣之有隐德也故志之矣而未悉也今者有丽牲之石于新莹不敢以当神道而援东京之例以干吾子其惠一言而勒之余曰唯唯按状君讳履和字子乐别号三石其先为汉处士孺子后有寿者宋淳熙间司教于苏遂家常熟之直塘四十传而为朴徙长洲之采云里用积着起家其子赠刑部公耀能廓大之富至倾郡有子曰履祥贵为尚宝少卿君即刑部公次子也母曰浦孺人赠公得君晚生未几公捐馆舍君童时即敏重有大志稍长嗜学工制科业补博士弟子转入太学上舍祭酒试而异之谓必自致公交车而君之始受产也不敢与伯敌然能操其奇赢分乘家老馭而息之家用日以饶于是精專其思共养母氏而以其暇筑园馆蒔花药修竹茂林高台曲池宛转向背皆有胜会遇佳日选客而进之觞奕留连竟夕不倦每语客人生行乐耳须富贵何时君故外靡而内俭其恒饌不三簋训课侍御及诸子咸肃然则其训不使与客会曰吾不爱束湿汝亦不爱汝狎弛也素笃友谊睦姻族周闾里所以扶义恤困居然有朱家季次风然不欲使人称之年三十八而病病且革召侍御兄弟戒曰勉之务壹体毋授人间也取贷券悉火之曰不以虚名贻若怨也陈孺人者成均祭酒霁孙女也少而美慧通内则善女工其相君也能成君于德为生侍御而卒仅二十有一继娶吴有子三人晋锡又锡蓄锡其详具志中盖公卒之一年而葬九年而始徙十一年而侍御成进士十六年而始封逝者与存者又相成也

铭曰丰其德而嗇其年有后贵且贤再徙而昌奕奕绳绳以永无疆

御史大夫吴公平岑冈猺蛮碑

连江吴公既即家起拜御史大夫兼少司马尽护岭东西诸将公至军悉集诸将策筴先其重者于是岭右之府江大桐江猺与平乐昭平永安荔浦之猺媾而为乱已金鹅松栢深埔之猺复继乱公前后发兵荡平之斩首垂二千俘贼属三百有奇听抚者千余业已奏闻膺上赏诸猺服公之威神而感其德只咸涤面拱手以请旦夕之命而独岭左之惠州曰岑冈其先故浞寇池仲容之支藪也当王文成公守仁之诱擒仲容也悉殲其党二十四巢而独岑冈之一巢最险遠不可下王公业使就抚取羈縻而已巢之酋曰李鉴鉴死其子文彪继之以诈力驱使诸巢亡敢不服而有所任以为谋主者曰江月照尤犷黠尝出劫掠败王师执倅司理万户以去南赣之持节者讨而仅胜之文彪跳九连山失妻子寻还故巢鳩其亡散复振官为归其妻子乃稍定文彪死月照妻其故妻子其子威焰逾于文彪时尝縛鞭郡倅之则壤者已剽劫商绢已又多僇其党之自遠者事稍稍露吴公怒曰撮尔猺敢干天子之威命以荼毒我生灵谓惠州守时雨汝司察治月照闻

而惧遂称兵以其纪纲之仆据隘喉咽之其傍寨之有力者羽翼之猥巧者耳目之守廉得其状以闻公公乃属藩参显臬副某守时雨将军梦鲤等练卒搜乘分布要害曰胥后令仍属藩参及守县购傍寨曰弃月照自归者赦而罪能以月照来者军正议赏赏同首功诸寨响应缚月照道伏毒死致其尸余寇李珍等因成资据险自固时时出剽畧公檄诸军夹攻贼度势不支繇间道出江西之龙南定南等处师尾而急击大破之俘斩二百四十有奇余坠崖堑死者不可胜数捕胁从千五百人皆释弗诛没贼田几五千亩以予屯卒捷闻吴公及诸君赏赉有差惠州守与其父老相语桶岗四塞天险为诸夷最以王文成之宏畧拥百胜之兵乘破竹之势而不能得志于弹丸赤子之地六十年来其人不复知有三尺法甚者如夜郎王谓汉孰与我大也吴公不费尺刃斗粮坐缚其凶酋如一孤豚而后扬兵胁诸党众俟其出而尾击之百世之巢穴一旦而尽空然不以多杀为绩俾千五百人之胁从悉保其首领何吴公之智且仁也岭以东为寇者不且曰我狺何如月照险何如岑岗今彼之谓何螳螂之臂我则焉敢斧不佞守高拱而安吏民之上诸父老饱饭鼓腹亡意外警谁之力也贻书属世贞使纪其事世贞故熟吴公窃谓公始治岭西已并治五岭前后斩馘以万计荡巢穴以数百计化贼而良者又以数万计此于公功牒十不当二我安能悉登石惟是志守与父老之所欲効于公者而已吴公名文华数更歷藩臬治常为天下最藩参吴氏臬副卢氏守黄氏将军洪氏其赞石画亲军事当公亚潮同守王懋中惠同守郑天佐倅赖岳和平令陈源湛裨将而下数人皆预有劳者也法得附书

辞曰元二之厯圣睠于南扫其鲸鲵以填斧灋壮者僂磔孥亦俘鹵遂剪荆棘以立军府四帅迭兴咸告武成茅土既开旗常是旌天回春阳剂彼霜雪有裴吴公丕谟丕烈第舞羽干毋憚莫邪返尔死魂授之生涯五岭欢腾斩削冯陵息其余惫以时寢兴箐平瘴披一照万里畴不加额自愧厥始岑岗之巔实惟宇下恃彼牙爪转嚙行旅昔在先朝虎士万羣谋臣将之为飙为云仰覩兹冈造天万仞崖■〈山上罅下〉砮豁缩不敢进六十余年寔繁丑徒梗我王畧逋我天诛羣谋大兴是剪是刈公曰无庸摄厥附离悍酋不庭鸱张獠奔以间得之如縛孤豚六师迅发如电之掣虽负螳斧而魄则夺蹙之龙南血波肉山千五百人碣盎之间公释弗诛赎为编氓籍其膏膺授以力耕昔也盗粮今则国储工惠商流欢嬉道涂御圉弗障锋镝长锈人各自爱愉佚老寿谁谓疥癬其痕胷腋和扁祛之不砭而液守匿乃庸爰归吴公公复不有归我圣皇五岭诸管穹海靡际衿裾耒耜以永世世

寶山堡碑

寶山者何海埃也其称堡者何志海防也前文皇之十三年而平江伯瑄上书言语

定之南百里而遥其海多沮洳不利漕艘宜裒土若山者以识之诏曰可俾以漕卒筑其高为丈者三十其方为丈者百天子至勒碑以纪之而中贵人以及海舶之收启亦取标焉至万历之四年整饬兵备石参政以公叔杲与副帅都督黄公应甲谋以其地南距川沙北距吴淞二镇皆五十里而近吾吴门户也初有旱寨兵额四百余属寨废而兵徙填吴淞后复以急之故割副帅之部士三百于故寨左曰新城顾去山十余里不足以瞭望去民家逵缓急不足以收聚城隘而出入仅一门樵采之路厄守不足以坚其便毋若依山为堡广其隍崇其墉坚其甃侈于所谓新城者募近地中豪而下及商旅实之岁汛则副帅悉所部填其地以北控川沙而南控吴淞诸戈船嫖姚校尉诣幕府受约束分水陆出哨而宝山之瞭指掌于数百里外于形势最便乃奏记中丞宋公仪望侍御邵公陞合疏主之下大司马议报可大司马下中丞侍御中丞侍御下王公公念城工巨且有台府公署营舍之类不易举察于属而得郡丞施君之藩俾总之城城而版筑陶冶伐材采石诸琐屑不易亲则以委百户过聚辈凡为岁者再而工告成延袤四百九十五丈为门四楼如之月城三之敌台之在角四楼如之他墩台十二中丞署一兵备署一副帅署一海防丞厅一练兵厅一千户所厅一军营舍六百五十楹费金若干米若干皆资之若卢之肺而大帑不与焉一不以烦民属王公去而代公者为按察使冯公叔吉规画自王公而吏士闻冯公至而思奋者日登登冯冯也于是施君纪其凡而命辞于余俾示永永余窃惟兹堡为东南最要害汤信公之嫔兵修海戍自越以至燕齐且百而不及之至平江伯而始请为墩后平江伯以至今百五十年倭事起首尾三十载增戍者又百而不及之至王公而始请为镇乃今屹然保障矣间者波警不屡发冠带之士握算而谈节俭于将吏斥墩日有所省乃王公及一时诸公独不然君子谓兹役也真远猷哉易既济之六四曰繻有衣袽终日戒戒而终日又胡虞也谨纪其事而系之铭曰

句吴之滨洪波立天控东南夷万艘所骈帝省其防有山突焉不震不蹇垂二百年王公说险于斯取旃因高就污为深为坚鞭画掬分馨鼓闾闾百堵虚耸九衢弦直辕门有伉肃肃交戟公署既辟乃营我空惠工通商戎丑攸宅墩偃连烽星标重译鲸鯢授首兹役可息桑杜之间我闻在昔不备不虞不可为国维辟司徒率先庶职勒之丽譙以垂无斲

重修慧庆寺碑

具一切智释迦所以悉達多歷万劫身弥陀所以无量寿故知慧缘庆启庆繇慧成非庆无以表权非慧无以明实金篋前引则三途不迷摩珠在懷斯七寶咸萃住解脱者萨埵之实地种方便者真相之法门兰若所自兴慧庆所由署殆非虚已相此化城实吴吉壤在元延佑三载大智识比丘宗璵以慈悲化四兵用坚忍穿七札魔波旬众望寶相

而皈诚阿育利王指铜梁而悔杀用鸠法施创此丛林鹫岭分来黼藻震丹之境雉林开后奕叶阎浮之区然而夙业所牵风灾难免光空阵于罗睺净宇荡为尼连插汉雕梁类空中之阿閼凌波贾舶恍云表之浮图所赖熙朝更逢开士苍鹅指天而上击白马蹄土以悲鸣创成化之庚寅歷正德之辛未曰苟完矣未尽善也世庙之末有歛地婆罗门吴诚明者悟多寶之宿根发布金之希念即因陀刹摩之地为龙洞舍卫之坛规仿竹林用成精舍时吾州淮云寺无尽律师精通五演洞括三乘闭户行道不替羯磨登坛授戒郁为法将吴生闻而异之礼请住持交露之台山神伏而献果飞香之阁天女跪而散花珠匿敝衣必待马鸣之用凌空卓锡用警白鹤之来此师愿力弘深果行精猛自一钵一衣外悉充檀那不属己橐用能创盖三十五佛寶殿一区优填企景白玉雕龕般若寻风黄金化像须弥八寶巍乎不动之尊帝释三桥俨若接引而至师以大事甫尽报身宜捐僧臆周天奄然顺化上足明秀继之寻此前因恢彼往志虽仍旧贯普加新饰复殿丹楹虹霓吞吐重廊绣拱日月蔽亏仍于正殿妆严三世大佛涌壁三大士十八阿罗汉圣像辨影龙窟窥形梵天白毫标入定之光金杵显降魔之力鹿苑之增辉茂苑鹫山之授记吴山海若按波而不扬修罗戢刃以革面缁素填溢哀祈震天班黔竞趋首面投地时有本里善男子沈璠特捐家田斂师遗体并以余圳作常住资明秀谓昔者法轮之再转则王父司马公之勒记也若闻孙之绳武吾斯未能苟宰官之现身敢忘护法愧以长语勒之坚珉

辞曰句吴之墟实多福田其最名者万寿承天应物为有以漏称緣宁如兹刹佛所雅言一念不昏厥慧斯圆众善奉行厥庆乃全第一圣谛希有妙铨标揭招提彼岸岿然有善智识发愿精坚一切檀施庄成严缘巍巍世尊大士翼焉如海金山光彻大千尽欲界人获筏济川铜堞自摧铁围为穿火宅焰腾俄成青莲以此功德永不唐捐委顺斂迹毋侵化权我勒贞珉仰止斯贤敢规法嗣善护持■〈施，冉代也〉

重建横山高皇帝御诗亭碑

去广德州之西北五里有山曰横横山之颠■〈山上酋下〉拔云表为诸山其神曰张真君相传汉神雀中尝于此地礼斗道成而后人为祀之又台之世载祀典勿替台左有潭有龙栖之或曰即真君神也州人祷雨輒澍应高皇帝既下金陵规取东越驻六师横山徘徊礼斗之台与禅师语而大悦乐焉作七言一絶以纪已又憇真君祠得七言一律其语皆宏丽开朗下上洛颂沛风间憇祠之律故太宰蹇忠定公义刻而亭之矣絶句亦有刻石山之颠者不知何自亭亭成亦不知何自毁也守周瑛新之又毁倅邹文庄公守益复新之又毁凡五十余年碑伏莽而莫之顾万歷癸未平湖陆侯某以进士高第来守广德究民恫苦与体为一明年四月不雨至五月又不雨侯贬服蔬素以祷未应有

称山神及龙于侯者亟徒步往百叩首以请俄而雨骤起于坛四郊尽浹侯徧行山间以谋答神之大贶及巔使吏除莽莽尽而碑见侯伏读之惊叹曰异哉高皇帝洗干刷坤以还万古之中夏即一字之施木石与有光荣而广德为三辅近地其民人闻六师之蹕而获蠲税役至于今世世饮德即文武之道未坠地奈何弁髦而委诸莽毋乃吏阔踈其视听以致此陨越亟树碑损岁俸僦工为亭以覆之左为堂辅之曰喜雨志感也更稍左饒龙潭之祀志报也右为堂曰尊亲志寓也堂后饰礼斗台志始也于是州之绅衿黔庶濮阳某等若干人既以其财力共子来而具其状三请世贞为之记世贞辞不获窃尝从公卿后预寓目国史高皇帝佐其帅据滁以旱祷于丰山祀之栢子潭注矢者三而誓之三日大雨涤以丰熟其后世贞尝道滁夜繇丰乐亭过是潭古栢丛筱森阴却月沉波无底若有神物蜿蜒其下广除之中穹碑龕嵒归而警怵若龙章在目夫人主之所至曰幸高皇帝至滁祷于丰山効滁税役蠲其至广德祷于横山効广德税役蠲夫是二州者不亦均大幸哉然而滁之山独显于史着于志而广德之山其显著不相当乃至圣谟之洋洋与神武之赫奕亦时晦而时废不滁若者何也微陆侯其将竟委之莽而已耶噫嘻广德自此重矣侯亦可谓知所重矣是役也为堂者二祠者一台者一其费再倍亭不以名其记尊君也陆侯之政与神明通禁杀女者省费以百千计而首新大成殿畧之不为详以非侯意也乃志而系以铭曰

皇天厌乱乃笃高帝手抉银汉洗涤腥秽金陵所凭惟古称最帝省其方以临吴会民大欢悦蠲省租税横山之颠六飞所憩天章彪炳卉木荣施守视非谨盖藏圯废龟螭横草文武坠地有虹烛霄莫究所自我闻真主靡灵不卫神之失职能无内愧爰示以旱俾我侯至侯诚既格雨泽斯霈爰伸报虔周相坛壝恍若有覩怫郁紫气披莽得之既欣且惴亟树栋宇护此焱焱为堂翼之寔坚孔丽神赖厥休式廓祠祀崇峯虬跃澄渊鼎沸如出于莫星纪之次譙其铭者古爽鳩氏以告后人毋忘护视

重修宁国令西安徐公去思碑

徐公之始令宁国也盖其时业踰冠云宁国于宣为下中邑地赋亦下中而父老以故令之不能勤恤之也乃亦有所苦而窃少徐公徐公去诸生几何何以能遽悉官中事而覆露我公至左顾平帻而宣髮者曰三老耶助我教化者何猥而伙也曰非也里之老日听约束者也公曰去之毋庸尔曰将以勾摄里中徭徐公曰里自当徭不以徭故仆仆尔亦不尔故重里扰也间有讼者当逮其耦听讯则羣胥■〈鱼戢〉■〈鱼戢〉然听受牒矣公以牒付讼者曰而以其耦来不烦吾胥也居无何民以公之徭薄而刑省也相率来受计则邑胥絶迹不出里郭门里老亦不时入郭门矣而更尚谓公经生不习城旦言有所当上牒欲以尝公公不复问故草顷刻数赫蹶悉率不絶响既成上丽法而下伍

情吏咋指叹曰神君神君豪相率为奸有瘦亩至六百者赋史不能诘公钩得之曰吾不咎汝往也姑以补邑之重赋者赋故不一种皆有中豪以下领之其人黠而以役为家恒病民孱则以家殉役或病豪公俱罢之曰民得自输令何纷纷也则两完矣公遂悉取徭赋之额平亭其大细缓急为一编书曰民得此不为吏聋瞽吏得此不能越而鱼肉民以故吏日在令眉睫间而畏之若鬼神民去令罟罟何啻百里煦煦乎若赤子之依于慈母之膝也堂且圯公曰令安忍勤民之财力而以我宁宇既而曰令幸去必圯后令且困民属令有舆梁之募在邑而羨公计其直之相当也呼工筹之不日而堂遽新乃以次第拓宾馆饰社塾立义庾毫不以烦民民相顾莫知所繇公于肺石之积亡所入私橐日饭脱粟干■〈月肃〉鱼而已计口而炊节腹而进邑用是大饶公乃曰可教矣朔望入学宫进博士弟子谈说经术傍及艺文颖者实之贫者饩之膏油之复以间延乡三老与述高皇帝大训俾绎厥旨以转勗其子弟曰此吾下车时意也婚葬吉凶裁以成数咸彬彬礼让节俭矣当是时邑之人以愿得长奉公公亦愿得长牧养其人而以才任剧调丹徒丹徒人耳公善状羣相逆于宁国之境曰而君吾天也丹徒之人弗许曰吾君故吾天也而安得有之度不可则相与征杨大夫嘉庆文于去思之碑而又未已则相与肖公像于去思之祠时祝而祈岁焉公已去丹徒为吏部郎矣丹徒之碑公而祠公如宁国公弗知也宁国人曰故吾令徐公而已丹徒人亦曰故吾令徐公而已亦弗知徐公之为吏部郎也盖又十余年而仁和沈君谦令某县时时过宁国见吏民诵徐公之善不置已汲汲若有营者曰公之祠且敝矣公新其堂宇爱吾人之力一不以烦而吾曹安忍爱其力以无新公之祠公之门人许成器者叙其状甚详会沈君迁吴郡同守曰吾乃今知所以用吾仰以许生之状来求纪其丽牲之石余诺而未敢也会公自选部出卿太常沈君亦以迁解郡乃记而仍系之辞公名一櫟字汝材别号宾梧衢之西安人今令新水君卿谟遵公之画一而饰之于祠有力焉法得附书

辞曰在汉良令惟中牟密霖霖春滋煦煦冬月其民甚朴而思实深岂无德音金石尔心暨于延光乃颂成皋乃颂藁长以表攀号成阳之唐荡阴曰张故吏父老门生门童勒之丰碑蔼然永懷厥朴少雕于道不违有斐君子若徐令君发轫宛陵妙年斲轮冠仪逾弱乳哺颁白援经作谏黠吏摄魄察廉任烦移宰岩都若夺所天巷哭野呼各征厥知碑而纪之爰祝爰尸则古所稀刳羊炙豕以荐公宫公不来歆我心则痾神人分殊诚感则降神操天权公握人纲其官何所洪公之山五湖之浔■〈山截〉嶮潺湲我纪我诗宣士之思以準公龄

弇州续稿卷一百三十五

●钦定四库全书

弇州续稿卷一百三十六

(明) 王世贞 撰

○文部

△行状

明特进光禄大夫柱国少师兼太子太师吏部尚书建极殿大学士赠太师谥文贞存斋徐公行状（上）

公姓徐氏讳阶字子升淞江之华亭人也其先自河南徙为华亭风泾乡人世代受耕不仕至高祖公德始成以仁厚喜施予闻里中呼之为佛子徐佛子徐有子公贤公贤子公礼皆不废为长者而公礼尤斤斤守然诺急义敦让公礼有四子其长曰思复公黼少子旒思复公以文无害繇吏部选人授宣平丞再补宁都丞所至着廉公惠慈之政其吏民讴思之满九载课最当迁竟谢去弗顾旒亦举乡贡有声公交车间徐始大思复公娶于林继娶钱皆夭最后娶顾而举公及赠太常典簿陈南京刑部右侍郎陟公贤之妇沈公礼之妇黄暨思复公顾夫人皆以公鼎贵推恩累赠三公皆为特进光禄大夫柱国少师兼太子太师吏部尚书建极殿大学士妇皆为一品夫人天子所以褒扬隐德政术备至而宣平宁都二邑至为祠以祀思复公华亭亦祀之于乡贤如召信臣故事时人荣之公之举也寔于思复公宣平官舍甫一岁而女奴抱公窥智井堕焉小吏之妇号而出之则绝矣居三日忽苏五岁思复公以宣平绩还道括苍岭公复自舆而堕其下沈深峭石戟拒无全理顾夫人恸哭而已既而衣挂于树从容下卒不死思复公又尝置公于古刹读书刹故多魅僧苦之公宿而魅不出思复公始心异公俾就外傅受小学以至四子甫阅岁悉成诵思复公补宁都挟公以从尝归自他邑公出迎思复公戏谓公父远回子远迎父子之恩天性也公应声曰君居上臣居下君臣之义人伦哉思复公益大异公教之属文即工属文十五而补博士弟子又二载以优等试应天不利归亡何而大司马聂贞襄公豹来为令试公而奇之曰是子国器也因进公以圣贤之学而公亦慨然自奋以一第不足名公年二十而督学萧君鸣凤负人伦鉴试公第一食于庠再试应天学士董公玘得公文于黜而异之取以冠诸试者会有所齟齬不果然犹为第七人梓其文会试复在高等既廷对大司寇林贞肃公俊得公所射策谓当第一以属内阁时少师杨文忠公廷和居首揆用子嫌不预读卷诸阁臣持故事谓林公所取抑居第三人赐进士及第当入谒杨公独目属之曰此少年名位不在我辈下已而顾少保费文宪公宏公柰何不

以衣钵属此少年费公盖第一人也其后公官与二公埒又与杨公俱宣力鼎革间而名寿终始则过之寻授翰林院编修予告归娶沈夫人明年八月北上当是时言事者以不当上尊亲意逮讯戍谪累累公行而遇故谏官安盘翰林杨慎王元凯皆狼籍血肉中公出橐装遗之或谓有尾舟而诤者公行意自若顾独以时事稍异有二亲在身未敢许忽忽不乐至清源夜忽梦思复公帕首而名呼公者再辄心动返棹还抵彭城而讣至矣公号哭驰归毁瘠营葬明年大庆覃恩得赠思复公如公官顾夫人为太孺人服除次且久之乃入都复故官寻奉命授中贵人书故授书者晏入早出一切以苟简文具而已公曰毋易此曹此曹能僨天下事于是寅而入申而出课业必谨约礼详说毋不欣欣倾听时上严亡所假贷中人为流言以不如正德时饶者公谓正德时何可得若曹晚不能悉旧事今虽严宽于宪孝朝多矣且正德以饶故贵人亡不用侈坐法若曹不覩宪孝朝诸冢莹甲第相望耶咸拱手曰命之矣寻充经筵展书官俄复充廷试受卷官预修大明会典再以选修祀仪成典盖上所最属意以一代仪礼职编纂者不能数人而公与焉顾首揆永嘉公缘上意请正孔庙祀抑绌王号下儒臣议相顾慑誓无敢异同者公独条具其三不必五不可状甚暂疏上永嘉公盛气召公于朝房面诘之公徐理前说至高皇帝尽革岳渎号独不革孔子号而语遯乃曰高帝少时作耳何可据也公对曰高帝定天下而后议礼宁少耶且圣人之文无老少不尔明公议四郊何以据高帝少作也永嘉公颊尽赤乃复谓曰尔谓塑像古礼否公对曰塑像诚非古然既肖而师事之久何忍毁也永嘉公曰程子有云一毫髮不似吾亲何以亲名之公曰有一毫髮而似吾亲毁之可乎且明公能必列圣之御容无毫髮不似乎哉而何以处之永嘉公语塞则益怒曰若叛我公曰叛者生于附者也某故未尝附明公何以得言叛他相桂文襄公翟文懿公咸为公股栗劝公谢公弗应揖而出于是上亦缘永嘉公意为说以辨公当具疏请罪独言不称职当罢不言议非是有旨外补而会他御史有继之者下都察院论罪汪荣和公鋹馆院章复缘永嘉公意谓此邪议寔公倡之致摇国是宜正法以示天下牒具而漏之公时沈夫人病前歿独遗二岁孤今太常卿璠家人环泣谓必死公探橐中装得金二十投之曰以此为棺殓费属其孤于乡人李刑部日章沈进士愷曰幸归我太夫人已而曰太夫人有陟在足养也君父赐我死即死耳盖怡然委顺云亡何而少司寇闻庄简公渊中丞唐文襄公龙力为解乃隐公名而缓其辞狱上上亦弗问也公得添注延平府推官始公自弱冠取甲第为侍从臣出一语而天下艳传之履相踵于户公意不自恠益从聂贞襄公游及同年欧阳文庄公德相与讲求良知遗训及以天地万物为一体反之身心而后出之不阔疎口语而已至于国家典训章程比详闾阎大小利益靡不用以为学而他缀羽绩绣移商刻征以骇怵耳目者舍不之取一旦伉慨持论从容于霆霹之下而弗为动天下益信公之足以大受而尚意其自禁近出为小官纵不鄙薄之有故事可以优游养重公独不然曰宦大小非王臣耶且盘根错节所以增益我者不浅乃驰归泣谢太夫人弗获朝夕罪而单车驰之郡至则连摄郡事公昼夜拮据案牒清宿系者三百人更输银法毋得落

猾胥手毀淫祠剝社学取乡所教授邓柝书燔之而采宋大儒之格言谐之韵俾稍习诵俗翕然变时大盜窟尤溪险而四出剽郡邑势张甚分巡诸金事偁欲以属公捕而难发言公奋请身任之乃设方畧悬赏格以授三老穷其窟旬日而得酋首并余党百二十人人以为神满三载迁湖广黄州府同知当发其吏民以十家酺酒道傍泣称觞公为人人醺遂步至舟贻书谢父老父老相率勒之石诸生追送至建宁乃别抵严陵而提督浙江学校之命下其官金事公归拜太夫人已娶今张夫人仅八日而奉太夫人之浙既履任岁周行郡邑必徧大较以正文体端士习为先他务钩棘晦僻以相高者虽名士弗录既唱诸生第人人语所以甲乙故即见斥者得自名而后折之不得已而施檟楚示惨然色诸生人人退自快服也御史礼公修浙通志垂成而有以势强之伸屈者公毅然不可乃废第业具草遂为后志张本三载改提督江西学校其官副使所摹画一如视浙江时而加详密公所称良知学本故王文成公守仁而文成于江西最显著自公推行之且像文成而祀焉其地遂有生像公以祀者前后两省试偕计士所登式半公造第一人而他亦无不优等其后服官政中外践台省以政术名者比比吏部初拟荐公尚宝卿国子司业太常少卿俱不果最后以皇太子出阁妙选官属公为司经局洗马兼翰林侍读以四品服俸居职公之初至江西也时相夏文愍公言羣从子姓有欲幸进者公面撻之曰乃公居座主以而曹属我悔不以而曹属我进也夏公闻之不悦故于初官案选不及公而言官有所指列夺而属之吏部许文简公讚采物情得公遂以公应公去国十年矣而赐环盖犹未强仕属承华政稍简得以其暇与故邹文庄公守益罗文恭公洪先郑端简公晓赵中丞时春唐中丞顺之輩相琢磨为圣学益切俄而太夫人捐馆公哀毀骨立悉屏谢时俗尚以古礼行之三载不御内是时太夫人得请赐祭官为葬矣甫服除进国子祭酒未上上再问公何以迟迟意盖有属也公之为祭酒下令诸生满而厯事他曹者必以久次毋得用贵人居间置籍以稽膳银之数谓典籍曰吾代汝弭谤也复为籍籍诸生之淑愿使月朔廷诵之以吉服受淑籍素服受愿籍曰忝在师长毋所逃若愿也诸生人人相戒勉二籍矣久之擢礼部右侍郎遂迁吏部乃榜于壁曰咄汝阶二十一而及第四十三而佐天官国恩厚矣何以称塞所不竭忠殫劳而或植党以摈贤或殉贿而鬻法或背公以行媚或持禄以自营神之殛之及于子孙吁可畏哉故事吏部大僚鐻车门所接见庶官不能得数语以示严冷公曰若尔何以能尽人才也乃痛折节修辞色而下之见必深坐亶亶谘访吏治民瘼遐陬幽鄙因以窥见其人顾见者亦自喜得少宰心愿为之用公益有搢绅问声以为恒太宰熊恭肃公泐雅重公自以得共事晚公亦不复守循默轍相与励廉节獎恬退振淹滞抑奔竞一时翕然归称于熊公而会熊公以直諫忤旨去唐文襄及吾郡周恭肃公用相继之二公重公不异熊公而又老多病公数奉旨署部事当是时有行重宝贿方士求大司马者取上指胁公至再皆弗应后其人为大帅竟坐败绩抵罪而公所推毂宋庄靖公景张襄惠公岳王文定公道欧阳文庄公及范大司马鏞皆天下所共信以为长者大计吏公复代周公司之尤能于毀誉外定去留亡论留者即去

者亦心服亡敢望周公卒公推闻庄简公渊闻公考老人以为非上所急公弗顾也闻公入未几公改兼翰林院学士海庶吉士公虽名不废课习而脱去所谓骈俪帖括之旧推所真得于身心者訾媿说之又间勗以国典民事其后多卓然及公世而称名臣咸归公善诱功公满三品考录璠入太学踰年掌翰林院事复充会典副总裁会典虽再更定而事由诸曹草创往往相矛盾上即位后数兴革大礼礼官不胜绵蕞公始为创义例挈纲领井然一代程书久之廷推公入内阁不果寻擢礼部尚书学士如故疏辞温旨不允礼部之为政者久好以寛大养弊至公而肃然更始凡王国爵封秩谥并文武大臣陈乞祭葬公皆哀之以请报可定为絜令其考诸蕃通事太医诸生皆为裁画一即猾吏有拱手受而已时庄敬皇太子冠公受命赞冠甫成礼而暴疾薨公当议丧礼以上及百官皆为替之服百官仍诣门哭上不恠谓天子絶替不制服其百官服可无诣门哭临礼着诣停柩所辅臣读至服可无而句之曰以青衣角带往可也公曰不然絶替者天子也非百官也曰可无诣门而已非可无服也且未有哭临而不衰服者定义以齐衰服临上使中涓诤而是之令宫中仍皆服衰公遂为庄敬册谥副使已命题主上察公慎勤又有所应制文字独多称旨召入直无逸殿庐给供饌如例寻赐飞鱼服公遂请立皇太子不报自是连上疏请之又与同直四臣请之皆不报盖次当继庄敬而立者裕王是为穆宗而景王与同岁差少中外未测上指所向公恐有钓竒者故请之亟最后当冠因而及婚礼若开讲公复请以齿叙先裕而后景复不允既冠公赞景王冠偕诸大臣谒于临保室上使中涓问二王行坐何若公曰有上黼座在坐则俱向西可也行则遵伦序且祖训严谁敢紊之毋何诏二王婚俱出就外邸公手疏言臣过虑有二端王邸隔仅一墙耳名位既不别而■〈执上目下御均众能保无闻声以上尘雍睦之听又往者九重之内有慈庆有神寧有鹤禁而后人主之势沉沉今者仅二王耳而悉就外邸臣不能不为陛下寒心也复畹中万寿节推恩加太子太保北兵阑入塞遂薄都城时事出仓卒中外汹汹公念诸营皆子侯无可将者亟请赦诸边将在廷尉狱若戴纶李珍輩复其官俾诣行营自効报可复手疏请上还大内亟召羣臣面计兵事上褒公忠爱而尚难还内召羣臣时内阁推公督视九门公亦慷慨请行上倚公左右自安故特用其副王少宰邦瑞而谕公意焉会有中涓陷敌归者以敌求贡书闻云不许我则进兵上以示公及辅臣分宜公嵩等且召对便殿上顾谓当何处分宜对曰敌饥困不足患公曰敌万众薄城剽杀人若刈菅尚何论饥急谋所以御之耳上顾曰善复问敌求贡书安在分宜出诸褒中曰礼部事也上复顾公公曰敌重且深矣不许恐激之怒许则彼逞而厚要我上曰苟利社稷珠玉皮币何爱焉公曰事有甚于珠玉皮币者陛下所不能受则柰何上悚然曰卿虑之逺虽然当何处公曰请计缓之上曰何谓缓公曰遣译者至营而诘之以无番文故且征其情实实则令暂出边用前岁成例贡马行赏互市往返少日我城中之备完而援兵日益集敌且退不退我从而拒之可十全上称善者再分宜乃进曰上幸出一视朝上不荅公从傍舆之上曰可尔得无遽耶公曰敌兵薄城下人心惴惴倚陛下而重得一蹕声若亢旱之得雷霆

宁骤也上始首肯公出而会廷臣议皆言求贡非本情不可许公因兼酌所以面请者疏闻而上果视朝申饬中外甚厉会勤王兵四集敌亦饱且去乃下公疏不许贡时聂贞襄公以副使为民都御史何公栋久废公疏荐其才即用之上又密谕公善后策公言营兵久浚而得弱今欲转之强宜责新帅鸾京城楼橹废守兵懈向者幸敌自退耳宜责督臣邦瑞及定西侯傅前敌以边备弛得阑入宜以严候火治亭障责新抚镇勤王兵独延绥卒可留今疲矣宜恤诸道募兵者皆文臣预选而不预战宜参之一二廉将得敌情毋如用谍用谍毋如大同宜增选上皆虚已听焉时以诺延三卫我外藩而导敌入境集贡使显责之公谓事虚实未可知显责之虚则彼愤而自疑实则彼罪不赦将显叛我而我不能讨是驱使就敌也不若责之以扞圉不虔使彼易受而后抚之众咸服公念敌外讧纲纪内溃天下事且不支而上待我厚不忍负之既以召见拄分宜公口至是益发舒亡所顾公之用雅非分宜意而前是太宰缺廷推公当补上犹怒之谓方侍朕左右何辄拟外迁见以为旦夕且大拜南床缘分宜指饰他事有所苛撻上不听益厚公分宜箴亡以间之且愧惧而孝烈祔太庙之议起初孝烈皇后崩上欲祔之庙而念压于先孝洁皇后又睿考入太庙非中外公论恐千秋万岁后所祧主或非仁宗而睿考遂下公定议欲以孝烈先祔公合诸大臣议朝房大约以女后无先入庙者请祀之奉先殿时诸公相顾莫敢应独礼科都给事中杨思忠以为然疏上上大怒谓公与思忠专之足矣何诸臣为令再议公不获已乃小婉其辞以为太庙九室皆满若以今上论仁宗固在所当祧第此乃他日圣子神孙之事而仰烦皇上身自议之臣等愈有不安于心者夫夏庙五商庙七周庙九今更递益之于太庙奉先殿各增二室而升祔孝烈皇后则仁宗不必祧而孝烈可速祔上难于增二庙谓公故设难以阻之愈怒促更议祧仁宗祔孝烈所以督责公甚峻公虽不获终守前说然天下信其为正上后于元旦摘杨君表误杖之百而氓之冀以警公分宜因遂谓公可撼锋距百出公坦然而已时大帅鸾骤有宠利诺延之弱欲掩之以为功谓其实导敌请发兵征之下公与兵部议公曰征之易耳一征而永撤我百八十年之藩篱且侯鸾所谓导谮达者即得之谮达所夫安知谮达之不利其土沃而假手我也我得其地不能戍将毋为敌外囿何乃弗果征金事赵时春以山东募卒入卫颇精侯鸾恶而欲并之谓赵君暴且貳流言渐狎闻公挟纆帅炳出犒所以慰谕有加归语中贵人福俾婉曲白之上乃又弗果并侯鸾虽内衔公第时方与分宜争权相构不暇也而会偕蓟帅有获间功上复下公及兵部议侯鸾分宜辈俱获上赏乃仅录公一子入胄监而上特手注加公少保分宜为忸然自失久之寻兼东阁大学士参预机务仍掌礼部事候代者服除而后解公上疏辞温旨不允始侯鸾自诡以必大破敌得上要契眷宠无两而其后言益不讎顾益纵肆邀请无已上已心厌之然中外犹畏其焰亡敢及者会鸾疽发背不能将边警沓至尚嘍喑不肯吐大将军印公密言其不可恃乞蚤更置将上叹曰吾非不知之欲甚其所为耳乃因兵部疏驰使夺其印鸾一夕自恨死时家卒五百人多降卒亡所属公谋于纆帅炳俾厚抚之寻令就外新帅时陈其后鸾事发妻子僇东市家见籍而

麾下亡一晷者公又言入卫兵越数千里弃家室委顿途道而提督禴不能抚户部复从而削其饷不能亡怨嗟又兵部所议明岁入卫兵仅四分之一夫愆侯鸾之噎而遂废食非计也乞罢禴复故饷益入卫兵上以问分宜有所异同遂寝久之上报公禴已罢矣卒已饷矣独入卫非例夫门庭固而堂自安何京师之虞焉公对所谓门庭者大同蓟镇耳今大同残而蓟镇弱何以言固幸添调西卒以付外帅陈使有警而后入其于堂户相臂使亡害公因颇及京营积弱状上乃嘉公忠懷而询京营之所以弱今振之何繇公谓营兵皆市人子食不给仍匿迹为舆僮以其羨共妻孥日练之则劳而生计薄劳则苦薄则怨怨且苦则生谣诼故其帅务为姑息以相保食寝而已今欲大振之必明赏罚欲明罚必先赏赏则财告匱矣臣以为宜汰去老弱者万人或数千人仍核其虚冒而取其饷以充赏费然后罚可行兵可渐振也上嘉纳之自是眷公日益重一品满三载进阶光禄大夫柱国再进兼太子太傅武英殿大学士六载兼支大学士俸录一子中书舍人两予诰命再以筑外城功录一子中书舍人加少傅满九载赐兼金文币新钞肥豕上尊改吏部尚书宴礼部百僚陪列视礼如元辅焉赐勅谕谓公通明济世端洁范俗因事纳忠识微发逆蓄久积厚施之不穷计熟虑深谋无不获盖公自入直即听于西内乘马所赐有麒麟服有绣蟒服他金帛不可訾数会兵部员外郎杨忠愍公继盛论分宜公罪状而中有二王皆知其奸语上怒下忠愍锦衣狱分宜谓二王深宫何所知我奸杨庶僚何繇知二王之知我奸必有交关其间者属锦衣帅炳加根究公戒炳即不慎一及皇子如宗社何又为危语动分宜曰上仅二子万一根究得之必不忍以二子谢公所罪左右耳公独柰何显结宫邸怨也分宜惛然惧乃寝然以公尝议薄御史锦宗茂罚益疑公矣锦宗茂故论分宜者也公之主癸丑会试得进士四百人其后亦多名臣而所录文简切温厚为后先冠是时倭事起上以所蹂躪多公乡而公又晓畅军事以故数厘询问时抚按亟告急请兵而职方郎谓兵发则倭已去谁任其费大司马惑之公持不可乃以羸卒三千人往公上疏争之曰江南腹心地也捐以共贼久矣今据抚按奉报或云来者未已或云意不在抢而在扰势不欲去而欲留彼皆真有以验之而部臣于千里外乃能踰度贼之已去又踰度其去而不来而阻援兵不发置此腹心地于度外臣所不能解也夫用兵之道当计发与不当发耳不当发则毋论精弱皆不发以省费当发则必发精者以取胜而柰何用虚文涂耳目置此三千羸卒与数万金之费而餒贼臣又所不能解也大司马乃惧请发精卒六千人俾偏将军许国李逢时将焉国已老逢时敢深入而疎骤击倭胜之前遇伏溃当事者方以发兵为公咎冀因而摇公而公所请入卫西卒其帅陈鳳力战郟敌敌遁巡不能入乃悟曰公所请发兵留兵策无异也将自有堪否公复上疏谓法当责将校战而（阙）守令者将校一不利辄坐死而守令偃然自如及城溃矣将校复坐死而守令复仅左降此何以劝惩也夫能使民者守令也令为兵者一而民者百柰何以战守并责将校也夫守令勤则粮饷必不乏守令果则哨探必不误守令警则奸细必不容守令仁则乡兵必为用臣以为重责守令可也公又请罢浙江抚臣与更江南督臣皆报许时

江南无见兵所调兵独永保二土帅强新有王江涇捷其奏事邸校来谒公以酒食慰劳之且贻之文绮俾各选精兵万人待调二土帅感激行千金以谢公不受所以慰劳之有加故一承檄而万人立至遂大破倭几尽捷闻公预赐金币优渥盖上知公之于策倭事尤中綮也公念敌移庭牧宣大与我杂居士卒不得耕种米麦每石直至中金三两而所给月粮仅七饘半菽且不继时畿甸二麦熟石止直四饘可及时收买数十万石石费五饘可出居庸抵宣府费八饘可出紫荆抵大同大约合计之费中金一两而士卒可饱一月食其地米麦价当亦渐平具疏上上大悦令密撰谕行之寻录边功推一子中书舍人以予仲琨敌既轻我而牧宣大者久不肯出塞大同右卫益困樵采俱绝城旦夕且下而督臣顺与御史楷比而内贿求速迁以避之大司马计以无所出于是吴给事时来劾大司马罢之而逮楷顺上赫然起故大司马杨襄毅公博于部而命别推督臣代顺又已命右侍郎江襄敏公东暂行顺事而复有言江公不任者公谓东以暂行而又疑之恐无固志上即命杨公出为督而谕江公不得推阻仍诏缙帅炳推二校参军事公召炳授之方畧俾授二校以佐江公卒解右卫围顺楷者故皆分宜客也吴君业已胜即上疏极论分宜公而刑部主事董君传策张君翀继论如吴君分宜念公于吴君张君俱座主而又董君乡人具其故白上若公嫉之者即上不尽信亦可用以自解而上果为动下三君犹命缙帅炳考掠必求其主名三君濒死者数四卒以正对得远戍乃解而分宜犹谓人事岂必由彼但彼好为忧时愤俗语语尽而继以泣少年好名者日丛焉非以事使之以意使之也公亦不为辨唯自直出多称病谢客而益恭谨于应制笔札

弇州续稿卷一百三十六

●钦定四库全书

弇州续稿卷一百三十七

（明）王世贞 撰

○文部

△行状

徐文贞公行状（中）

上久而察知公忠廉有所谘问故密以示分宜公者皆舍而之公寻加太子太师念公久宦令尚宝丞璠代归祭扫仍给驿会上所居永寿宫灾徙居玉熙殿隘甚分宜念故

宫工巨不易复欲请上还大内则不敢乃请徙南城上以南城故英皇尝御地不恠乃以永寿工属公公计之楚蜀甫肩息不可复属之伐材即伐材亦不可以岁月计而时方营三殿有余材其小而不中程者以当永寿则尚巨请以责司空雷礼可计月而就诏如公议仍命公之子尚宝丞璠兼工部主事同阅视公乃率雷公与大司马杨公等之工所计度土石程工力搜缙社侵冒仅百日而工就不复增天下赋时上复自玉熙徙居玄都殿闻京师内外多盗意恐恐欲以大营兵入卫公谓外兵卫宫禁非便请以锦衣缙卒卫玄都而营兵列宫城外为储胥以相屏蔽报可上寻自玄都徙新宫更名曰万寿宫嘉公忠谋进少师兼支尚书俸录一子中书舍人而璠亦超拜太常少卿时公言边事则荐故辽帅杨照与偏将马芳董一奎之材勇上即为擢用论有司失职则言吏部不当徇贿嘱上即为罢欧阳太宰而拔今少傅安阳郭公代之论选庶吉士请赐御题以防泄鬻严诃察以防挟迻上即为罢选于是中外喁喁觐圣意所右左谓治有机矣会公满十二年考赉金绮钞缙羊酒如九载予诰命赐宴礼部公固辞乃以白金四十两彩币四表里充焉勅谕褒公行醇而学邃识朗而器宏雅度虚襟得大臣之体竭忠谋国无私便之图奖廉惩墨而官箴用植崇俭戒奢而士习渐移选将练兵而边防克振缓征宽赋而民困稍纾盖实录也亡何而邹御史应龙论分宜公父子上勒分宜致仕下其子世蕃狱戍之命吏部擢御史五品京职上虽以御史言去分宜然念其供奉久怜之而左右入其间者从容言非严某谁为上奉玄上忽忽不乐手谕公及次辅袁文荣公炜欲退奉事玄如法传嗣治安天下令拟诏行公等谢不敢而吏礼二部奏迁邹君通政参议得旨矣忽复奉谕责公等不拟诏而谓二部臣皆奉赞者何一旦官此邪物公复言退而传嗣非独臣等不敢闻命天下皆不敢以为然邪物之转二部奉旨而后行之臣不敢传亦不敢泄不报时邹君内危甚谋于公公曰第之任有某在毋虑也已而上不欲公久直曰久直无以杜儿辈奸公谓陆博走马使酒狭邪为奸长安中者不在外弗杜也甘言比周相合而为奸于朝堂则在内犹在外也上悟辍分宜直庐以赐公中外人情大安于是公始为政书三语悬之直庐朝房壁曰以威福还主上以政务还诸司以用舍刑赏还公论于是公卿大夫咸侃侃冀行意矣会袁公数出直公请以时邀至直所同拟旨上不可公谓事同众则公公则百美基专已则私私则百弊生乃从之时给事御史以抨击钩党贵臣过当上觉而恶之再下公欲有所行遣公委曲调剂得轻论会问公知人之难公对曰大奸似忠大诈似信自古记之知人则哲唯帝其难念欲有以易其难者惟广听纳而已广听纳则穷凶极恶人为我撻之深情隐慝人为我发之未用者不滥进矣已用者不滥留矣故圣帝明王有言必察事大而言实者行之其不实者小则置之大则薄责而容之以鼓来者上称善良久自是于白简所封进即小忤弗深治而言路恃公强益发舒矣公弟陟既以九列久次当迁公令勿遽北故其为廷尉为少司空司寇皆在南而太常君再请急还里休沐以示自远公约勒子弟居乡者毋得干有司政其谕有司亦如之时户部岁请御史余粟宣大公谓巡按权重于余粟御史而熟宣大事且可以时低昂其直遂归之巡按工部请开例

而议及赃罚公谓赃罚例以济边市穀者今一切充筐篚宜严禁兵兴饷日益增民益困今敌稍轻矣宜裁省逋额不分年而征民何所措手宜以缓急征皆取诏旨行之吏民大悦伊王坐法锢皇祖陵訾当籍故事籍訾者悉入内帑公示意抚按俾部禁物应格而余金钱二以充边用一以补宗藩之禄不给者中涓争欲蝇袭之弗得也先是广大盗张珽猖獗公荐张中丞臬授之策平之臬病归倭复犯广公荐吴少司马桂芳为文帅出裨将汤克宽于狱授之策败之倭复大犯闽公荐谭中丞纶为文帅以戚将军继光为副授之策大败之上以张珽功归公公力辞弗就仅拜下赏公念以曩者自信州执政内阁臣始预边功赏以至分宜重则加孤卿录荫轻亦兼金重币败而不与其罚欲自解则先附玄威以中上意而将士効百死取功名于锋镝者肆为稽故以要之故于奏功疏拟旨云军功论赏非实在信地战守者不得与其将士功次立限速勘以闻内阁臣自是不复预边功赏矣乃至大朝工完公自拟仅从赏金一镒二币上手笔加半当是时将作大匠徐杲有殊宠既已久絺尚书衔欲崇以太子太保公力诤而止人谓公苟一染指焉能为杲诤也然上神圣益察知公贤久而益置肺腑以万寿节进公兼建极殿大学士俾中书舍人琨为尚宝少卿久之寻复以第三子瑛为中书舍人公当考十五年满逡巡未敢请上知之赐金币羊钞珍馐法酒如前而勅吏礼二部具公政绩以闻请加公特进录一子尚宝司丞赐勅褒谕宴礼部给三代诰命上报曰卿等所议思加都可仍加上柱国以示特眷公力辞上手批曰卿忠诚公正念切邦民辅政多年勲猷茂着奏绩加恩彝典不逾览奏情词恳切上柱国及部宴允辞其余宜悉承恩命以副朕眷荅忠劳至意仍以金帛为宴资如前前是公尝以例乞骸上欲公自拟留旨不可则谓何不令炜代我言公谓炜之拟留使臣知而后闻即臣拟也上乃批荅卿念在邦民诚图宁固辅首居正宜赞朕不及罔弃是思搢绅咸鼓舞加额以上之知公逾于公自知也上尝赐公玉带仍侑以白金一錠曰为带资又择蟒衣赐公手授所谓教子升天者令衣以入公病痰嗽遣御医徐伟视疾中涓赐猪羊甜酱瓜茄酒米如例已复出尚方珍剂二甌命司礼贵臣木贲手札喻公虚火一疾惟湏自慎既不可用寒剂又不宜名降火又有谓痰随气降此非治法也但仍以凉平性品用之便消顺耳又青州白丸子真者亦效非其本地合者无益至于牵扯背肩痛当以祛风顺气之剂间服之亦少资云前是上尝为永嘉公调药温喻籍甚一时及公而二乃所喻公尤淳切若家人父子公感泣不敢言归上时慕玄素术多所服饵公往往持之而方士熊顛与蓝田玉胡大顺比而为妖妄炼水银托乱语进曰金书天章是为先天水银长生之药上以问公公力言其不可轻饵乃已又以乱当请而不下问公公对谓紫姑附笔亦有之第此曹非能究其术大较与所遣使媾结得上旨乃能荅今不得上旨故不能荅耳且蓝田玉胡大顺诱张恫喝以挟取人贖不可信亡何俱以妖露论死北兵由墙子岭阑入直趣通州报至公立草勅命大帅侯寰等为九营营郭外文武大臣英国公溶等巡视分守九门缙帅朱希孝帅其腹心将校往来千擷以故敌虽外讐如庚戌而京辇内整亡敢为盗窃者先是上方有竹宫祠厘杨襄毅公时守大司马得警急不敢奏

而谋之公以便宜檄宣府帅马芳宣大总帅江襄敏公各率兵入援芳兵先至公请于上亟赏之又请重江公权俾诸道兵俱属焉敌阻白河水从通退掠香河上令看详杨公奏公请亟先备顺义而以奇兵徼之于古北口敌果趣顺义不能入乃走古北口遇叅将郭琥伏而败死者以数百千计颇得其所鹵人畜辎重始上以杨公不蚤闻患之甚且叵测公念能为县官任重晓畅边事者毋如杨公即一旦失之缓急何倚乃备言博虽以景命祠厘禁不敢上疏而二镇兵皆其所素檄者上意稍解公自是为杨公画策往往先上所向事必中便宜乃从容为上言亡论练事如博即舍博畴能委心事县官如博者上然之自是注倚杨公不复替矣公请收战士骨瘞以大冢具十中牢为文祭之九边卒咸加额颂天子恩德明年敌复窥黄土岭及一片石上忧以问公公谓有白文智在而胡镇董一元兵相肘腋三人者皆梟将亡虑也亡何敌果为文智所拒却上悦超予二官吏士人赉一金时天下委输皆在张家湾敌垂涎久公请城之出光禄上供羨三万金以往城成设裨将一隶以通州卫兵五百人■〈立乞〉然重镇矣奸民为白莲教者匿燕中与恶少年赵李輩相结幸一旦有间探赤白丸而起公刺得其状属大司马捕诛之三辅齐鲁汴晋间其魁株累见法余党无所容相率解散去公自袁文荣公卒后独当国意不自安数上疏请增置辅臣而上数难之大意以公孤忠且才足专任公乃密疏乞休谓曩时阁臣居首者以不时请骸骨人主欲留则留之不欲留则不留故不得攘此位为私物而恩威常出于上此例也上曰而亦徇例耶夫而自为计美矣非所以为君为国之义也今惟有增置二员同汝辅政足耳公局踣言臣虽庸宁不知天恩之与圣知若此而忍负之所以不欲久用首臣者窃为主权国政计俾恩威常在上而纪纲法度不至为久而专者所攘耳于是公缘上旨复请益二辅而上复难之令俟数月慎择乃可公言臣不敢避难顾衰转甚矣内阁事体繁即开敏者非假以岁月不易周悉万一旦夕之间溘先朝露即有继者何所取裁夫人才须作养于一二十年之间而取用于数十年之后今以为可即可以为未可恐未可以数月就也上自是与公谋进太宰严公讷大宗伯李公春芳入辅而起太宰郭公于忧扣满代严公郭公公所荐也盖时有觊之者而公以其不满朝望故诘焉上以少宰缺问公谁当补公荐少司马胡庄肃公松少司寇毛公恺少宗伯高文端公仪及新郑公拱上后次第大用如公指新郑公之主乙丑会试也上以进题字有所触不怪以问公公为剖析本义乃解盖前是乙卯主应天试者亦以文义有所触頼公而解人谓非公则逮谪如累岁故事矣廷试当读卷公令诸受卷者参伍其数而分授读卷大臣诸读卷大臣铨其可读者以授首臣与众共之第其甲乙而进之上宿弊尽革寻奉命选庶吉士公具如廷试既开馆所颁条教至今以为式始公之为大宗伯以至首辅十五年而请册东宫疏凡数上上春秋高意不欲言继嗣事辄报寝朝野忧其端以为且有所更树奸人从而阴为蠹矣一旦诏景王之国咸鼓舞称庆久之上忽下谕公谓郊庙弗躬早朝久废如要我为不能矣今疾病多形体弱目下便至卦尽之年止宜卷身奉玄传继不可延者且待人必无休矣汝其加思或密同在直诸臣计此为安美易为之事不然恐后艰

丑耳公皇恐对大畧谓传继之事臣不敢闻命若同在直诸臣计之恐不免漏泄或生事端自古艰丑之事必有絶等凶恶之人及有大奸大逆在其左右然后至令妄作今皆无之圣明勿过疑也复奉谕汝昨对何又传退之云然后弗美耳昔有久等之怒今时又非昔日公复言昔日久等之怒臣未能仰悉是谓昔人曾有此怒抑谓昔年曾有此怒也若谓昔人则今贤孝非昔人比谓昔年则恐乃是离间之语圣明勿听也复奉谕汝对不知指昔指今夫昔成祖注意在孙子弗之同嗣位有说焉百年五十矣可不蚤思贤孝难必吾所言或不甚妄公复对昔成祖之在位久仁宗之在位促皆是天命其继承之间史册所载自明上道德隆备天命所归而今之贤孝又中外所共闻者万万无可疑虑公既已报而不得其自月余景恭王上书以上不豫请躬诣玄岳祈醮以尝上诏下公所公知为中涓泄之方谋所以阻止者而王亦病复上书求医公请遣医乘遽往治而拟旨王既有疾宜自静摄玄岳之醮遣官代行可也王谋乃寝无何王竟薨长史以讷闻故事闻讷当王妃不当长史上问之公公念楚中田土湖陂可数万顷俱为景所侵租入而赋犹在民即小缓诸藩有因而请佃者急为上言景府乏老成人所以有此误恐误复有大者宜遣一信臣往公草勅令其慎护王枢祇奉灵筵宫眷日用必令给足内外出入必加谨严库藏存积之费禁戢王人毋容侵攘田湖租赋之籍悉归所司毋容欺隐既成而以指谕抚按令奉诏行之获永为楚人业云公之始三上疏寝食尽废上意故稍稍释而左右遂有以为奇货可市者会恭王薨乃止公始复能寝食然其事秘公亦絶不以语人而其后言官啖喉者谓公不能蚤请建储公虽畧言之亦不敢深辨至公八十而辅臣白发之人主为布之德音所谓定国本于危疑而公疏始稍出天下晓然知公之有宗社功非浅鲜也公熟计国赋入不能衡其出事以节俭为主上缘祈雨故欲建雩坛又欲更兴都故宫殿公以库藏匱郿襄水力沮而止尚衣监臣席宠奏补匠役千百人公请减其半若内官供应二监库缘而请补公直以诏旨裁之内库之司钥者盗宝货多惧露故纵火冀以解公发其事抵罪至徐沛大水黄河溢得大司空朱公衡治之凿夏邨等镇新河百二十里计工费以巨万计人或谓公不难费耶公曰国喉咽也舍而不治即岁岁计之为巨万者可指屈也河工成漕自是毋阻天下塩额独准扬重岁赋六十余万金应上供司农为五十万金而前是分宜之客鄢懋卿以都御史出经理肆为蠹盗乃欲以利孔诡结上心搜宿逋及积羨得百万金以闻遂定为岁额额辄不登而商渐困至有雉经者不则亦鸟兽匿公熟知其弊俾御史发之拟旨仍旧额额亦登流徙悉复公既以恭谨得上意即贵重甚幸矣而其为恭谨不衰上或有所委使通夕不敢假寐应制之文沓至促应有诸少年所难者未尝隄顷刻期人以谓公叹曰君天也父也吾敢违之亡论信州傲而僂分宜慎而重夫分宜者特不善用重耳宁可废慎也吾岂不知愧诸少年计以得上意此耳得上意而后可有为于天下夫欲为一己名不难谁与上共天下者上果日益爱公又时时采外议公以是益重所论建裨益亡间当公之前天下无所不中兵水旱沴厉乘之赤白之警岁不虚月分阃以上第无论贪债事一语不上指立就逮缇骑操银铛旁午道路大者诛

夷小者窜谪而政地诸公复有窃上颜色为威福者数千里而外不能探所自益惴惴不自保计唯有徙橐长安中论直市六尺躯而已公既日以宽大广上意又不自崇高竿尺往复有吐必露穷微远戍往往若身历之咸慑于不敢隐而快于得自尽故公在政地大约缙骑逮省减十九廷尉若卢无所用深文虽其宛曲剂解之力多亦以意发舒少僨事故也公于他量情罪多所纵舍而独馭贪酷吏严所坐狱必竟不少贷其杜干请絶苞苴亡论公家车门即长安公卿邸中俱肃然亡敢以筐篚出入者大计捧贺寮吏皆有余赀归老吏白首相惊咤以目创见无有时海中丞瑞为户部主事上疏极言上过失他所以讽讥公亦不少上恚甚逮置诏狱欲杀之且谕公于南都理别殿栖止以避瑞公谓主圣则臣直瑞固戇然不过仰恃圣明在上洁一直谏名耳杀之则成其名容之则益见圣德之广上始抵公疏地已徐取读之已又取海君疏读之得毋死当是时以海君能触上上能不杀海君为异然亡能名公者今具见世经堂集中时上久疾忽忽不愈谕公欲幸兴都公谓其辞缓因据上体不耐辇路劳为对而上意忽决诸中涓贵人皆具■〈恋，布代心〉模糗糲之类六军且甲矣以问公公力上言南幸事臣所以不敢从命者一以为圣躬计一以为国事计往者兴都之幸为已亥距于今二十七年矣皇上自度精力之壮健孰与往时计圣体违豫十有四月矣毋论彼二十七年即更度体气之康豫孰与此十四月前夫辇行不及宫居之安途次不及殿庭之适计天佑圣躬岂必远行而后获万康之庆也已亥之岁敌警甚轻彼时犹遣辅臣行边六卿出督内而九门外而三关俱设大臣帅重兵以填之今之边境声息时闻内外官军未甚整练而六飞远狩都辇空虚狡逆之谋倘或窃发圣驾在外能不惊忧抑不特此二事而已至于有司科敛小民如圣慈所轸念全楚兵荒频仍如抚按所奏陈者臣尚未之及也上指奏内狡逆之徒倘或窃发独乙之而报公曰此八字不可作常视其罢行于是中外讙呼若再生公之初属草也顾太卿辈而叹安危在此一纸耳上必成行吾请死之久之上病益甚公问安报以病状甚苦而戒公可少虑辅理非轻者当是时阁臣并公为四人而上有所顾问独公他阁臣取充位而已以是不能无后言公弗复顾时穆宗犹在裕邸而有误传上晏驾者承奉李芳得之使使访公公惊语曰谁为若言上故无恙殿下分则臣也亲则子也此岂吉事而可报者为我谢李君一轻动立取大法且上累殿下芳悟乃杜门不纳传者又二十余日而上大渐遂崩当大渐时公念上英断类高帝晚节独斋醮土木织作不已民力小困而一时抗言廷诤得罪者虽其志若已伸而未牵复欲自登极诏发之不能无疑于改父而于上克终之德未光夜饮泣具遗诏草恐泄之不敢以语同列而至明日始奉讳乃偕入直诸大臣诣裕邸请入临丧仪出诸褻王按而行之无害遂具诏草上之报可诏下朝野举手相贺至有喜极而恸者时朝仪废不讲已二纪余而上享天下久登极吉凶大典亡所考见初元老臣仅公一人在公动据章典酌以物情从容应之自中条理逶迤大服公所上登极诏草所以奉宣德意救弊补偏者视遗诏尤详至天下以二诏拟嘉靖登极诏为正始正终第一政嘉靖登极诏故相杨文忠公所草也文忠盖前言之世以为知人上大行

皇帝谥议谥册是曰世宗肃皇帝公所草也寻以例乞休奉旨卿辅弼首臣忠诚体国勋庸茂着中外具瞻朕兹嗣位眷倚方切宜益竭谋猷赞成化理所辞不允亡何而胡应嘉之事起应嘉者吏科都给事中也故不悦于新郑公前是误传世宗晏驾时诸入直者争移其直庐书籍器用以出公独不动应嘉缘是而劾新郑谓其蓄二心頼上病溃不问新郑以是恨应嘉刺骨会吏部都察院考察庶僚已得旨矣应嘉乃复论救给事中郑钦御史胡维新新郑之乡衮时在事合而拟旨谪应嘉为编氓公惜应嘉罪不至编氓而一时弗能救诸给事御史合疏请留应嘉而他给事遂有论亂新郑者公乃具疏谓论救考察非体臣等所以拟斥应嘉给事御史谓宜开言路广德意所以请留应嘉臣等欲守初说则涉违众而无以彰陛下恩欲从所奏则涉徇人而不能持陛下法因两拟旨以进乃薄应嘉罪改从外谪当公上疏时新郑之乡衮复与公力争至失色稍稍闻外言路之攻新郑者姿上因相激为詈其傅公益坚而移讎者亦遂显矣公尝从容语新郑人主之尊能以谪斥威言者不已而至杖杖不已而至戍且长系戍长系不已而至僂然竟不能杜其口有如海君者出吾曹人臣宁可以力胜新郑益不悦公复引疾辞奉旨卿辅弼元臣德望隆重朕方虚懐倚托赞理化机岂可以微疾引退开经筵公知经筵事上孝洁肃皇后孝烈皇后谥议谥册亦公草也以登极恩进中书舍人瑛尚宝少卿重録大典成加支正一品俸命题世宗神主赐金币初议以三月发梓宫而中贵人犹迟之风钦天监前其期为二月公谓去玄堂日益远非便且无故而促发引之期岂所以全圣孝也执如初议时上欲幸故邸命拟旨行公与同列上疏谓祖宗时非郊祀幸学耕籍未有轻出者今上即位无几于诸大典未一举行而先幸故邸何以示天下后世疏上旨遂从中下已而礼部及科道皆有疏公复据以请止凡三上皆不报然上竟以顷刻归不移日矣亡何御史齐康有所论列上为远谪康以慰留公公引咎乞骸骨凡四上于是九卿大臣皆为公辨雪且挽留而齐康者新郑之门人也都御史给事御史推其端以为出新郑因劾康并及新郑遂去国而公始出视事

弇州续稿卷一百三十七

●钦定四库全书

弇州续稿卷一百三十八

（明）王世贞 撰

○文部

△行状

徐文贞公行状（下）

南京振武营新军者当先帝时杀户部侍郎以要粮赐置不问用是益骄时当颁九边赏故事无及南京者会得匿名榜有所要胁辞悖厉甚公曰往者已失刑再邀赏得赏亡所用国法矣时操江都御史唐公继禄当朝辞公属之曰营兵即变有郭成李锡刘显外兵足制之城大不忧据也忧其据孝陵于法不宜攻耳若往可伺之一有变即以江防精兵走孝陵道而时有三都督之任者皆边将公使以家丁百五十人往曰新军易与耳苟生变即疾击杀之以为若功不而罪也公度兵已严乃因兵科疏拟旨系旧军者各令还卫招募者随营食粮终身愿归农者听顷刻而军散亡敢哗纂修实录公为总裁上天暑停日讲公固请勿停不报郑王厚烷当出皇祖陵輓公请御书褒之岁益禄百石王故以进谏忤先帝旨者也于是大小言事得罪臣僚及以冤见抑者次第登用或有径造崇显者矣而言路气益张上时有所不堪谕公等科道官不谙事体敢屡欺言是何意卿等详处来说公草奏言科道官遭际昌时思効报荅第性气粗率则言或过当事出风闻则语或失实其不谙事体诚有之然天威在上以臣等度之非敢为冒犯也谨录申圣谕令彼各省改以仰承皇上天地宽容之德草具而有同列尼公者柰何不薄谴之公曰即上遽有谴我曹且力争而乃导之谴乎则曰如上谕详处何公曰今谕令省改即处也及疏上上亦竟弗罪也御史李君惟观乃上疏请毋得诘言者以广忠益公拟旨报闻上以笔乙之而给事中冯君成能复推其意为疏语婉而加详同列谓公将无复作报闻乙乎公拟荅曰听谏乃朕素心即善言未尝不嘉纳昨谕乃为不谙事体者若等自今宜审所言以称朕意同列皆难之公曰夫己氏者不难言而我乃难拟也昨所以乙者正谓未有以开上意耳有不可吾请自当之及拟上上果不异而时有一邑丞王邦直者条奏时务颇剴切公拟旨称其多切时弊该部为看详毋以官卑废言于是人人称颂君明臣直时有中旨令翰林臣撰中秋致语公惊谓先帝神主犹在几筵即小小宴乐犹不可而况致语之盛哉臣等必不敢奉诏上于是并罢宴上欲以九月诣天寿山行祀诸陵公与同列言皇上此举盖重祖宗弓箭之藏切岁时霜露之感非他游幸比第天子之孝以保安社稷为大故龙輶发引尚不亲送山陵二祭止于遣官今自大雨而后禾稼淹没坊舍摧塌万乘亲行六师供亿何以待之盖持者再而上不听乃盛陈北兵窥伺叵测意以闻始报俟异日其明年春警稍解上竟行谒陵礼甫至斋宫而使中贵人滕祥李芳以意问曰行礼在次日上欲轻骑一出观形胜可乎公曰上以祀来乎以观形胜来乎以祀来则先游而后行礼非所以展孝思也祥等曰然乃祀毕而后出游故事扈驾万人人给一金公时在告兵部误以二万人请而给止万金流言籍籍公至陵所始知之乃宛曲慰藉令骑兵给六镮步兵给四镮得无他兵部复请令蓟镇总督镇巡而下各以兵扈驾疏上公谓公

等赏缙具乎夫营兵以赏薄籍籍矣柰何复召之来使籍籍也且兵悉入敌乘虚有所侵犯谁任其咎拟旨令总督以标兵一枝入卫余勿动盖是时诸中贵人业以枕守土臣而橐之公借以塞其窍诸不能无忿忿而忽奉旨以太监吕用等分监团营兵公率同官上疏谓今无所谓团营者且中官坐营起于景帝而革于世宗臣望陛下以世宗为法以兵政隳废为虑上不怪所以督责颇峻而公等诤愈力乃为寝前旨俄复命修内教场勒中贵人习骑射公因御史言复率同官上疏谓陛下此举盖因边方多事居安虑危故示边臣以意使之振戎饬武耳如御史言则有防微杜渐之虑臣等窃谓边方远禁地近圣躬重戎务轻当先帝时尝欲立二内营而复止之此必有深意在不可不三思也事亦寝一时传诵上听谏若转圜不尔几复成正德时事而公等所以又安宗社功非小敌分道入边其犯近畿者土蛮自墙子岭入掠滦河西而犯山西者破石州等郡邑公以京师及诸陵尤重今二边闕而黄台吉者尚匿不露形恐其悞兵东西援而突入以捣我之虚急请切责总督刘焘等督兵随敌剿逐仍阻守滦河勿容西渡其黄花等镇加慎堤备以防黄台吉窃发仍发京兵一枝驻通州以护陵寝保漕饷俱取旨行之时上御经筵毕面询公以战守方畧公条对甚详上首肯久之盖上方秉渊穆至是始一奉玉音敌退当第失守状时蓟镇颇能尾敌鹵斩至千数然不蔽罪俱有旨逮抚镇以下置诏狱问公谓蓟镇吏士自托以获功当迁赏而骤问逮其帅不无骇忿当缙骑行戒之曰吏士遮而曹诉第云山西失事重而蓟镇轻法不得不逮以示警耳必不以山西例例而帅必不以而帅罪掩若等功兵部已为若等上功籍矣缙骑业至镇吏士万人环拥马首哭且絮几不得发以公指谕之立解散圣诞加恩录公一子尚宝司丞赐衣一袭盖犹用世庙故事也疏辞温旨不允公一品考九载复满九载上疏自劾求去有旨卿辅佐先帝久着忠诚翊戴朕躬勲猷益茂兹九年再满朕心嘉悦着照旧赞理不允辞应得恩典吏部议拟来看公遂力求去且请吏部毋议恩典复奉旨卿先朝耆硕才德兼隆经国筹边功在社稷朕已命所司议拟重加恩费用示眷酬何又求去宜遵前旨即出赞理以副朕怀不允所辞吏部议疏上奉旨加公支伯爵俸录一子锦衣卫千户赐勅褒谕宴礼部而少卿璠超为太常寺卿公疏辞仍求去复奉旨卿才兼文武久着勲劳特加异典以示酬眷宜承命即出辅理不允辞会耕藉田公与九推礼乃不敢言去而辞恩命上乃曰卿忠贞茂绩加恩非过览奏具见谦慎伯爵俸并部宴准辞其余宜承朕命诏册今上为皇太子时甫五龄遇公等于御道西召公谓曰先生每辛苦公等顿首谢因谓殿下茂龄宜读书进学皇太子顾公而曰我已读三字经矣又曰先生每请回如是者再睿音琅然不摄不骤公出而以手加额曰宗社万世庆也老臣即归死瞑矣工部奉旨建寿宫公谓先帝作永陵在十五年后今上登极未几而遽有所建立小民无知或妄生口语诏己之俄复奉旨内官监太监李佑往苏杭监织作时以诏令就停久矣公疏阻之不可得念佑素贵而其人颇长者乃尽以宿弊告曰公往毋言利今夫利归公者一而归下者二柰何代之受讟也吾欲使台臣搽去之是又代公受誉也公何不与台臣共其誉且教其以所织作径进御前毋落局中

少年手李君曰善一如公言时有小瑄以事干巡城御史不应则詈御史御史怒执而笞之羣瑄趣之司礼所欲论亂御史公业为解得免而御史乃论亂瑄其党百余徼御史于午门外殴辱之御史大夫王公廷欲上疏亂羣瑄以问公既已许寻念疏即行彼瑄争自匿欲得其主名则且展转不可究诘万一彼先之以诬我祸且叵测先朝事可监也乃使人致司礼之上佐曰尚文者语之曰诸贵人羣殴御史业何处文倨谓内外各有体相公毋但为御史惜公曰吾非为御史惜为国家大体惜且为司礼诸公惜耳文怪问何谓公曰毋论御史王臣即天子临御之所而羣殴人能保上之不怒乎诸公何不以时调得其人而速奏之即外廷有继者其轻重在诸公手而上必不怒诸公体故在也文悦以告其长滕祥悉得其主名参之王公疏继上羣瑄窘不能自匿又无可以宛转地道者悉就逮杖其首恶三人百发边戍余九人各六十为南京净军公既以诏旨省诸镇进鲜夺太和事权与诸监局工役而所持诤又多宫禁事伸者十且八九往往假宛曲而行久之其人益侧目所谓承奉芳者既贵与滕埽雅好名自负以吕强郑众之流时时言外廷事所司以格裁之不能快而归咎公谓公主之公亦觉其意会諫幸南海子不聽遂上疏称衰病乞休奉旨卿德望优隆练达政体安攘大计方頼赞襄岂可引疾求退再疏辞再奉旨卿才德优裕精力未衰朕眷倚方隆岂可屡疏求退宜即辅理不允辞寻遣中贵人至公邸谕指公惶恐出视事时同列来视公疾问何以不拟旨见俞诸公相谓毋论不忍舍公我曹焉敢拟俞旨公曰不然公等今不拟而令异日诸阉拟之乎先帝四十五年收此曹权归之公等万一复失之可惜也时种马大为民间累而官不得其利公令减其价倍而入之官太仆岁赢金数十万以备边用而民困苏时户科左给事中张齐初使边纳边商赋有所挠大司农格而不遂事且泄乃故为大言耸公欲发兵十万袭边民之入敌曰拜牲者为奇功以解公哂而斥之迫则上疏请考察庶僚及聽大臣自陈以非例持不聽益迫遂露劾公六事多御史康陈语得旨褒公忠诚体国朕所素鉴张齐辄敢恣肆诋诬姑不究调外任及公再上疏辞奉旨卿屡疏乞休特准致仕着驰驿去寻以公同列疏请加恩谓公辅政多年勲劳茂着朕念其年高屡疏乞休用允所请着寫勅谕差官护送还乡仍月给米六石岁拨夫八名以示优眷至意于是九卿大臣给事御史各上疏留公且为公辨雪而都御史王公廷独探得齐纳贿事下诏狱核而戍之公得请以次日谢恩其又次日朝辞赐白金五十两新钞三千贯彩币四表里大红织金云鹤彩币衣衣有副公既辞公卿大夫送者至倾都邑而父老耄稚次且涕泣后先攀拥不得行亡何南京之给事御史及外台臣相继而请留公者接踵俱报闻公甫抵家而勅谕至其称公谓遭济时艰善藏其用专司揆席独运钧衡黜伏庸回屏除贪墨宣扬遗命与四海以更新翊卫朕躬聽百官之总已俾予一人垂拱之休皆十八载辅相之力方切毗倚共致升平而屡托微痾力求避位举朝有勉留之疏在卿坚肥遯之情朕非不欲屡任老成而又不忍烦以机务特赐俞允敦锡玺书公拜诵之感激涕下因谒诸祖莹勒所锡告辞于石公故居近城西隅潞水曰少湖尝读书其傍自号曰少湖学者尊之不敢以官与字称而曰少湖先生其

后读孟子存心养性篇而有深契更其斋曰存学者遂复尊之曰存斋先生当公拜首揆日少湖水忽踊起高八尺余踰两时始息人谓蒸云从龙膏泽四海其兆殆不虚也公日杜门展一编间泚笔有所著述或劝之于湖滨筑庐舍蒔花木以自偷适者公笑不荅生平无姬媵丈室萧然布衾缊袍往往至敝恒食唯二簋菜羹粝饭间佐之脯醢而已三子间以甘旨荐则却之曰故非吾所嗜也公虽已得老然望益重刺史干旄时造户请质门生故吏踰越山海执贄问益公不忍距其意人人叩两端则皆大喜以虚往实归而间及天下事老臣惓惓忧国訾臬不休见若以为志千里者新郑公复暴从田间起兼握铨柄内銜公而更疑之倾危之徒遂以公为贄诋媒翕訛顷刻万状于是召齐康复张齐而爪牙吏横出为郡邑守令至号召奸黠创狱以拟太常君兄弟几不免公第曰儿子坐得富贵固当且夫祸福者犹循环然而可预择也事稍白亡何新郑败益大白公具衣冠望阙拜曰天子圣明念老臣无罪何以报塞大恩自是益宽然亡所竞人或问以前事者公笑曰老而好忘忘之久矣性友弟尤喜施予既让新第于前母兄归自延平念其产挫割田二百畝贍之归自江西赎故乡先生何君之第以还其子东屋三间俾为先生享室西屋三间使其子居余屋收僦租为衣食费以太夫人之爱施氏妹也迎其夫妇归侍太夫人推家共之亡间痛仲弟陈早殇而季君陟有余子琳俾为后而授以所得胄子叙琳仕为太常典簿以其官推赠陈公所用意厚非直欲无死陈且欲使季君之子仕也晚节与季君及从弟升邻日欢会无间恒曰吾昆弟在者仅三人季昔稚齿亦渐脱而何忍露蹊径为及季君卒公恸哭为哀辞以祭有曰閭重门而昼掩郁高堂以夕空畅徘徊而四顾曷由一接君之音容闻者悲之公于天下事无所不通晓而家江南少而察小人依至黠悉赋役利害屈指借箸缕缕言之即三老主计所不能及其居政府日稍无岁江南之人倚公若家长公亦自任乳哺衽席之事既归属大水言之巡按御史邵君陞具疏改折漕粮所贷得十一明年又大水田卒污莱民相椎剽不已力言之中丞胡公执礼为具疏寻用危语抵政府获改漕粮蠲存留之半停征鳳阳马价十三而颜料马草等银一切悉罢不征又明年大水复移书政府折荒田漕粮十二独其为洗马还里而松江守锐欲量田公持不可行守谓公所庄事邹先生邹先生不量安福田乎此百世利也公曰安福之赋无异则赋之多寡按田数可知故人往往减畝而鬻田松之赋其则至三十余赋之多寡必计则以为筭故人往往减则而鬻田弊在减畝量之弊可革也弊在减则不在量也故安福之利在量田松之赋在稽则用各异也守信公遂罢不复量盖四十年而量田之说行乍以为名美而民不胜扰怨声闾道路人益思公言孙元春举进士公贻书发明敬肆之义诲以坚志力行勿怠勿恐交游中有慕悦势利者谈说恩怨者厌惰职业者鲜腆服食者沈色酒酒者一切谢遠之必卓然不惑乃成大丈夫毋负我既授刑部郎公复贻之书谓得此官有为汝不平者悞也吾殊为汝喜夫无竞之地可以遠忌无恩之身可以遠谤勉之勿生厌薄而志迁转则汝福耳进德修业汝衣食也衣食之苟具而可骄人乎哉如互相标榜高立门户非独乖遠害全身之道为已之学故不如是前是公与二三巨公

明王文成公良知之学又推仁体以示人而居宰辅日计吏与朝士之为是学者相率诣道庐醮会以要公主盟公虽在直不能出而问有所酬荅遂相率梓公书以为存斋先生教言间一二假公名重者以为公私我而忌者真以公为私彼而苛撻其短公不与知也至公与元春札其所要归曰为己所戒曰标榜立门户读之而噉然发蒙矣江陵公之奔丧示若荐公以代者而公已老贻书辞之又为元春辞改官语具集中公年八十江陵乃率同列上疏谓公当世庙时承严氏乱政后能矫枉以正澄浊为清惩贪墨以安民生定经制以核边费扶植公论奖引贤才一时朝政修明官常振肃海内治平皆其力也又引先帝居藩邸时世庙忽有所疑从容譬解其疑乃释此一事独臣居正知之耳所有存问之典宜从优厚报旨谓公辅佐皇祖翼戴先帝忠勤端亮茂着勲劳今年及八旬足称荣寿特勅遣使存问赐白金五十两大红纁丝蟒衣一袭彩币四表里以示朕优礼耆硕之意旋奉勅谕古者公孤在朝则坐而论道更老在学则宪而乞言惟尊贤尚齿之仪寔褒德劝功之典矐言耆硕着有勲庸世咸仰为达尊朕岂靳于殊数卿才优王佐学擅儒宗早驰誉于清华歷试功于盘错简知皇祖晋陟台司履忠顺以事一人持廉靖而先百辟当金壬之既黜更治化以维新惩贪污而仕路肃清獎忠直而真材彙进申明典制多安边定国之筹默运枢机有尊主庇民之畧定邦本于危疑之际宣上德于弥留之中翼我先皇嗣基图而抚方夏保予冲子升储贰以奉宗祧方倚重于黄扉遽乞闲于绿野后先多绩朝廷资其典刑终始完名寰■〈宀禹〉想其风采自天纯佑俾尔寿康届兹八旬斂时五福匪直先民之楷式寔惟盛世之祯祥朕祗遯先猷追惟旧德粤稽功载申锡宠章于戏卫武虽在耄年箴儆不忘于国晋公已解机务安危犹系其身惟我宗工不殊前哲其茂绥蕃祉慎保修龄尚谋黄髮之询用慰苍生之望时行人及公里而太常君故在侍尚宝卿少卿与孙光祿少卿皆以使事归沐诸孙之为太学为诸生与当为尚宝锦衣者垂二十人公率以迎于河之浒至第开读陈所赐于堂感极歔歔垂白之叟与诸文学掌故嘖嘖称羨以为辅臣八十有賜者仅毛文简贾文靖然无专使玺书守正被旌者刘文靖谢文正诸公有专使玺书而无特賜象龙之袞则林下大臣絶不复沾被而公玺书所褒辞隱然阿衡师尚父又他所不敢望也于是公卿大臣若江陵公而下数百人推本上意为寿辞若干万言公合而梓之以玉音所称名之曰荣寿行人返命公使其孙元普上疏谢而末复劝上清心省事讲学勤政崇廉直屏贪邪缓征科寬役赋识者以为言简意尽不胜老臣倦倦余忠焉诏官元普为中书舍人寻得请改录其子如元普前是公谢政归遇世庙讳日晨起望阙拜哭蔬食竟暮穆庙崩亦如之以为常岁有诗识痛归十五载而天子加异恩非一即毋论禄位名寿于君臣之际相为恳至亦近代所未有矣公生而白皙秀眉目美须髯端坐竟日无跛倚湛然冰玉及接之而藹然春温色笑袭人有所谈论霏霏皆芬屑或盛气欲临公者见而自融释博辨之士将敖公以所不能而不忍也公既贵极人爵且老寿推以为达尊而所荅谢士大夫毋论卑少即蚤暮风雨不避赤牋必精谨毋令失意或风公胡自苦乃尔公正色曰毋众寡毋小大毋敢慢非我先师训乎

即不穀不敢当君子宁忘服膺焉然公竟以过劳得微痾寻愈元旦朔公具衣冠望阙拜成礼诸子姓罗列陈椒酒为寿而地震者再有疑之者曰是何祥也得无虞于哲人耶亡何郡邑守长复以诏例致彩币羔醴公为觴觞之甚洽也居月余属寒疾小损犹能作细楷牍以贻亲知己寢剧然犹自餽厉逍遥于室一日忽呼太常君集子弟而俞之曰吾受国恩厚无以报是在若等吾旦暮且去矣案头槭一册指曰待吾去而后可启槭也太常君忧皇甚于名医无所不致咸请进药公拱手谢曰劳苦诸君胃弱甚药何能补且吾数尽此矣更一日语左右若欲起坐者俄脱然而逝太常君哭启槭则所以经纪身后咸备而其大者毋乞恩毋侈祭毋作斋醮毋远送塋殓止单练幅巾深衣不得用金玉缯绮盖公前二岁手笔也太常君奉行之唯谨而中丞郭公思极已具疏闻上震悼辍朝加祭者三为十二坛工部郎余君寅治塋追赠太师谥文贞录一孙尚宝司丞鸣呼诸所以哀荣终始之典极矣公生以弘治癸亥九月二十日卒以万历癸未闰二月二十六日距其成进士及第周一甲子有丈夫子三人即所谓太常卿璠尚宝卿琨少卿瑛者也璠沈夫人出娶赠汀州守李公锦女封孺人赠淑人琨瑛皆继张夫人出娶南京太仆卿范公惟一女封宜人瑛娶前太保左都督陆武惠公炳女封宜人李陆皆前卒女一适太学生顾九锡孙男十九人长即光禄少卿元春娶瑞安丞朱云炯女封宜人次即太学生元普娶四川右布政使潘允端女肇荫官生天元昉聘教授臧文弘女元昭聘太学生王翼恩女元晖聘詹事府主簿吴驭女元晔聘太学生施顺祯女元曦聘太学生潘玄授女元■〈日女〉优给锦衣千户元暉元曜元晷皆璠出元材元家聘贡生李鸿女元植元朴元枢皆琨出元忠聘太学生陆光任女元性聘御史许乐善女皆瑛出孙女（阙）人嫁大理寺评事包渐诸生陆堦及受陈梦鸾恩生林有麟太学生张世良聘皆璠出嫁礼部仪制员外董嗣成及未字者皆琨出一未字者瑛出曾孙三有庆娶尚宝卿沈玄华女元春出迎庆中书舍人廸庆元普出曾孙女二受刘承禧聘元春出一未聘元普出公所著有世经堂集若干卷续集若干卷诸诏诰典册涣汗之号密勿之对皆在焉学则若干卷家训若干卷年谱五卷爱程纯公先生言谓其能得圣人蕴手录之若干卷爱白香山诗又爱苏长公诗若文谓其能畅情事节之若干卷太常君兄弟将以某月某日塋公于湖州某山之赐莹而以治命纪公之行履属世贞状世贞伏自念在郎署旅谒公于燕中邸公以先御史大夫有朝行旧又辱与季君司寇同年进而与之语是时世贞数以公事失缙帅意公从容解之世贞不悟语侵公公弗色忤自是坐先大夫难退伏田里者十年无一字以干公亦不知公尚能记否隆庆之元始叩阊上疏为先大夫辨雪亦不敢以私请公是时方有新郑梗不获尽如志而先大夫得免于丹书之籍而以故官就土自是有一命起世贞于田间而公亦得谢政归矣官满或公除待次以至避言里居岁必造公公必留款语及三才之恒变朝典之新故人才之是非国家兵事之得失未尝不三复焉公固未尝不跃然世贞之管窥而忧其趺弛然既忧之而又复护之尚以为可用者而世贞竟自废负公矣独于文章最为晚合然世贞颇能悉公之有根柢而公能悉世贞之达而不为吊诡

故世经堂集成首见命为序公之寿世贞凡再劾一言之颂其颂不称公之盛而独称公之难盖自古宰相之佐理天下其难未有如公者其能善用难亦未有如公者公读而首肯之当是时犹未能尽公以为分宜时公但默而善藏其用而已不知其密勿之陈奏未尝不侃侃娓娓中情实破要害也窃尝谓世皇如白日之丽天而忽为震雷雷霆公徐剂其震迅之势而为霖雨是故似难而实易穆庙如白日之丽天而浮阴时时翳之公直欲解驳其阴翳而复为白日是故似易而实难然公去国十五年矣天下所以晏宁而化被蛮貊者安能遂废公德也嗟乎世之善称大人进而伊周退而更其说云势故不得不尔第有如称公之可以亡异辞乎虽然藉令有善称公者孰有如人主之善称公者乎人主之善称公后先无虑千万言又孰有如易名之二言所谓文贞者乎今夫馆阁之为文也人例而狎得之文而所谓敏学好问也亦人例而狎就之至公乃以道德博闻举也则駸駸乎洙闽遗哉清白守节之谓贞我知之矣其举曰大虑克就非公其畴当焉呜呼奠宗社席黔黎公之大虑也君子于嘉隆之际可想见矣是谥也前公为名相者仅一人曰杨庐陵所谓清白守节者也禄位名寿庶几其埒矣竖儒焉敢第勲业即駢駢振振昼绣晨珂突然于华亭里者不亦径庭哉世贞窃谓公宽厚如丙弱翁敏练如姚元之强记如杨遵彦宏远如王子明镇定如韩稚圭忠顺勤劳则庶几诸葛孔明柔物采望又有吾家始兴所不能及者即亡敢窃附华袞之后污不至阿而为伊周也读太常君状核而旨似无容世贞口顾于一二寮案之际若有愆而救于嗾者则非公所著年谱与世贞所以报公意也昔永叔称范吕之平虢尧夫削而不书子瞻状金陵之流伎司马以为实录何则不敢缘生者以掩死者也世贞从公宇下久且幸而当无讳之朝其容洎涩于笔以取讥南史氏惟赐裁削付之记室称藁草焉幸甚

弇州续稿卷一百三十八

●钦定四库全书

弇州续稿卷一百三十九

（明）王世贞 撰

○文部

△行状

累封通议大夫詹事府詹事兼翰林院侍读学士爱荆王府君行状

府君姓王氏望为太原自嘉定之南乡寺沟割而系太仓州籍遂为州甲族而有谦者起家莆田县丞以廉惠称莆田丞子侃侃生自然公铄自然公之仲子曰友荆公涌友荆公宏爽有才器积纆累微起家至埒素封而不废为长者里中人好称之娶徐淑人而生府君当娠时友荆公尝梦一岐角鹿负图籍而入室其夕府君生遂名之曰梦祥及长而字奇征皆以志梦也府君在襁褓伟哲异常儿六七岁则以警颖善诵闻里中老儒张俸先生寘之膝而属以对其语奇张先生曰是非凡儿也强为我弟子我终当食而力及长遂受张先生经而当是时海濱之王皆饶乐以渔猎自娱府君独喜为制科文辞读书往往至丙夜十八试有司以异等补州诸生寻奉例入太学即复有声太学尝一再就省试不利而时人固目属之科甲中宁能少东海王生耶而友荆公之难起州大姓王永者与公嫌名也而又邻一日御史以名捕王永故匿不出而阴行赍捕者使更捕友荆公以自脱公出对簿则所坐皆里胥受贿鬻狱事公自度无有也顾卒迫不知所置对而狱益急时府君少不习讼事强自力代诉言父子世农业未尝为里胥为里胥者王永所受请皆有主名御史乃更捕王永永急则据摭公他事冀以两解而里讎交鬩其间欲两弊之不决者数年而御史为闽人舒某者威严甚府君念大仇在肘腋步武外皆操两弊念不者即以奇货可居而独妇吴淑人之弟某儒侠嗜义与谋之合乃相扶携趣御史于毘陵云间白冤状尝一日夜步往返三百里足蹠血流濡缕吴淑人亲为浣濯烹伏雌以饌而邻妪有馈薯蕷者并羹之府君饥甚携筯就釜食将下咽忽吐而大恟曰我父今何所而我甘此味耶吴淑人亦相对泣遂覆羹以蔬食荐矣时讼久不解事力日薄而吴淑人有装具悉出资友荆公而府君方橐籥得入侍见他囚寒馁甚因尽出其私钱衣食之诡曰吾督家公有不忍色为之行意耳非以吾市德也自公之就逮府君无日不搏■叩神求拯一夕假寐有若神告者曰必藉汝王氏祖而解府君觉不知所谓俄有驰邮报者曰按君为登州王御史言府君悟以语吴淑人曰神所称王氏祖者非王君耶急投牒王御史称冤怜而下之理官立辨里人陆司谕之裘时犹为诸生悉府君父子事作代父辨冤录又为文寿友荆公谓世人即百岁亡子何以能寿友荆公亦时时谓府君吾业已五十余其前我而身也自是以后则而我身也府君故以奉友荆公署其斋曰爱荆人谓爱荆君真能用爱者矣府君俱谢不敢当惟时时语二子元驭家驭毋忘而祖之艰危母忘而母之弟吴君德而已府君既以家难弗获竟儒术然宽博有智度长可七尺广■丰頤修眉美髯望之突然如神人也而元驭年十二髻而试于提学冯御史天驭冯公大奇之寘榻前手摩其顶已指其敝韦戏曰若父贫耶有子如此而靳一幅帛也已顾侍立者宜兴方令吾失言是儿非纨袴家物乃父当亦奇士元驭入学宫即廩学宫屡试必冠而家驭亦继振府君复以材貌重友荆公得从容家秉为德于乡矣盖府君生而母徐淑人见背后母陈淑人有子曰光禄君梦臣小于元驭一岁陈淑人不能无移意然府君所以事之益恭谨虽燕见必修色而进之退而所以抚光禄君如元驭也师馆家塾孳孳不倦矣元驭

兄弟少而为诸生有声然每就试府君必携以行龠舍择僻而远器者与同卧起小出则鏹其户牡呉君间风之曰儿子邑邑面墙何以发文思府君徐曰如舅言日见市曹子鲜衣怒马者其文思不当大发耶呉君笑而已以故元馭兄弟生平无狎邪游不解耳目好虽其性之笃诚亦府君有以模楷之也府君年四十四而元馭魁应天试四十六而友荆公以老寿终府君哀毁如孺子治丧葬易戚咸备当友荆公之疾革也手为二产券以授府君及光禄君府君泣语元馭女姑为我承之吾不忍见也既承券前谢友荆公泪交于眶不能出一语友荆公亦觉之为挥涕曰有子如汝复何恨今乃伤汝意者悔不前焚券也府君尽出其私装以为丧客或言友荆公所居积厚甚今皆何在以风府君正色拒之曰我受券故不薄也难得者兄弟古人我师哉其又二年而元馭会试第一廷试复以第二人及第报者踵至府君潜然曰痛不令吾亲见之既而曰天惠我厚矣惟有夙夜勉励毋负耳会西堂成扁以益谦见志焉其年授鸿胪寺序班不赴又二年而家馭应乡荐又一年元馭以翰林编修满考封府君如其官又三年而家馭会试第五人廷试二甲高等五十八以登极恩进封右春坊右谕德六十四以大婚覃恩进封詹事府詹事兼翰林侍读学士呉淑人亦自孺人进宜人以有今称府君二十年间三命至宫臣首易银绯而金紫然衫带皆故暗褻裘垂垂浣补之迹宛然篮輦弊至不任肩从者一二苍头不知其为贵人也诸干旄至吾州里必造请府君人人相缀接甚有礼叩之事即不应直指陈者不欲言其名尝屏人语府君贤子始仕寒素虞桂玉先生岂有意乎则有里富室之某狱在府君拱手曰幸足薪水不敢以私屈明公三尺当友荆公在系而乡人挟诈而称赎田者然实无价王永既以陷府君而负鬻讼名亦与焉府君不得不予田既贵而王永死其子女舟来归罪府君好谓曰两欲自解难耳非故相讎也吾父幸白而汝父死何请为诸挟田者悉寘不复问且曰吾居恒语二子市勇不如市德夫柔弱者天之道也吾敢忽诸府君家人男女千指饶为之衣食而厉其禁有交关外事者醉与人鬪争者折阅市货缙以上者收治亡所纵应门必择老干使伺一切核则赏掩互与同罚或误收他姓亡奴及盗鬻田宅主人以片纸来立还之不少靳尝游光福山置梅杏数十树归至十里市恶少年来呼于舟曰我园主人子也误收若伪银来求易耳府君笑谕之我安得伪银市有识府君者批少年颊曰此人前后作此狡狴多矣今乃犯长者请惩之官府君复笑曰谢公意良厚乃欲破我遊山戒此人贫不过欲再得我价耳卒偿之时元馭侍色微不平府君曰若有知以金丸弹雀者乎柰何使我掷金丸也元馭乃更谢不及也而市人惊指相目安得此语殆圣者欤府君性不爱妄费虽一金行之必以当而其居窶时属大侵割其母钱米为糜粥州之四门以食饥者又募人收浮尸葬之既从张先生游为光禄君娶其孙女又命元馭与其子元蒙遊缓急赠遗不乏余姚叶先生儿子日师也没且三十年其孤駮而贫一旦窶行来谒府君悯之为具汤沐酒食厚遗之与约岁必一来必以土物厚酬其直而后归叶氏子以有家府君固不获经术显然其治经老不忘尝与元馭兄弟谈俱叹服不如博士弟子试而出诵所为文府君戲第某当前列某当不得意皆验少亦尝

为诗既以其无益弃去吾州之立新有薄其文献者府君乃取明偶先生桓而下若干人之辞纂之曰太仓文畧今行世吳淑人亦知书尝佐府君读史至古忠臣节士未尝不交口啧啧叹也既府君于嘉靖末覩邸报言官有击相嵩不胜杖且戍者顾元驭兄弟曰若曹能为之乎死吾不恨矣吳淑人曰异乎吾所闻夫为人臣而危身殉名使吾君负不韪非福也因持论不相下而罢元驭既以高望长词林稍进礼部右侍郎而江陵相不服忧元驭风止之不听乃大逞志于言者元驭抗责之又不聽于是谋请告省覲归府君闻之曰善大臣不可以名累国体顾谓吳淑人今而后知若言之有味也元驭遂归无何家驭亦自河南提学副使移疾归相与奉府君吳淑人欢甚府君亡他嗜好独好植花木尤多聚五色鞠牡丹至数百千本晨起未盥栉即跣履行篱落间手自培溉虽大寒暑亡间佳时多遊虎丘石湖天池诸山水间一舟泛钱湖徘徊两高三竺六桥上下山僧渔翁恠其状伟噉嚙语此岂官人耶府君亟引舟避匿而少亦一从猎得名鹰玩之谓人支公有言爱其神隼耳及翫梨园戲复谓人此最琐琐亦足以观成败见哀乐晚节悉谢絶不复近儵然一榻而已府君雅性不食酒留客沃之必使醉往往丙夜不示倦色其食兼数人然居禽肉粝饭得饱为程遇客则备水陆穷膏腴至罢酒而蒸荐如故既已才吳淑人弟而感其捐家为己悉中外事委之总大纲而已吳君没始稍稍经营有数质库聽其息至久而中耗元驭以闻府君急收之尚有什一二存府君曰收之其耗露矣不责偿且益翫我责之急彼不死水火则桎梏耳姑示不测以空名縻之及府君卒而诸库橐皆如洗也又遗令毋得问乡里诸责且析其券以故业渐落不能知友荆公时府君虽肤腴然骨尤挺劲立踰时不徙足步履御内如少年方寢熟而微闻人警欬或履声即醒以为常咸谓府君神气清裕不百岁不止已涉冬忽属疾若有滯物伏胸臆间食渐減不能快寢以瘦削元驭兄弟忧之甚于国医靡所不延请吁天礼神无早暮休而竟不效以卒府君且卒意扬扬不乱顾吳淑人吾欲闻金刚经语吳淑人为诵之且聽且瞑府君以万歷壬午十月九日卒距其生正德乙亥九月九日得寿六十有八元驭兄弟恟毀几死而苏者数矣吊车踵至久之小定乃上疏乞府君祭墓而中有云他人有子或恃禄以养而臣父乃羸粮橐以资臣兄弟之廉他人有子或借交以豪而臣父乃杜门敛迹以教臣兄弟之让人以为实录云故事三品不满考不得全墓诏特予全墓而谕祭与前后三告身辞褒媿扬厉即大臣所不敢望盖异恩也余少于府君一纪幸生同里闻得托交而余稍浮沉宦路至纳邸节归乃时相过从其过府君尤数余好饮不以府君不饮沮府君不饮不以余饮厌至台察监司而下见亦必余二人偕且久而余微司府君未尝语及私至询土俗察民利便疾苦嚶嚶言之也乃其隱恶扬善多所救解则余且心服府君而府君亦谬许余长者府君之宗人尝醉于张参将榜有所侮参将不胜忿列之台为下捕而后谿于府君有连辄移怒参将府君摧谢不能约束宗党而已参将实廉而才后语及参将辄推轂不已参将亦不自意得此于府君也余时时偶府君谈说多农家晴雨丰荒与乡前輩故事间一及朝家所以揣摩物情顛析国是处分剂断往往破节中窍即达官老吏所不能穷也余

尝语元驭矫矫风节则吾子万事不理舍子尊人奚属使繇甲科当平世何至出弘治间钩阳钱唐下哉直而温详而坦刚而无虐慈而不靡好义而不居其名庶几古之所称巨公君子矣元驭兄弟既选地得寺沟口之新阡而佳距故莹仅百武司空为治奄岁且具乃谋以乙酉之（阙）月葬而请辞于立言君子记羨中之石具草至数行辄哽咽不能复下笔盖踰岁稍属而谓余知吾父子兄弟者莫若子耳幸有以损益之余谢不敏窃自谓始而辱府君友晚善元驭兄弟遂莅事府君今而已矣念无可以小効者谨为之润色具状如右府君元配吴淑人事见前令无恙二丈夫子元驭名锡爵家驭名鼎爵其科第名位亦见前元驭娶于朱故黄令邦臣女封淑人家驭娶于庄故白水令某女女二适徐可贤曹晋学皆太学生孙男三衡太学生锡爵出其二皆幼鼎爵出锡爵有女三人长女适太学生周秉忠少女字吴某中女道成仙去世所称晏阳子者也

资政大夫都察院左都御史进阶荣禄大夫赠太子少保谥恭定笠江潘公行状

万历之十年壬午十月十六日都察院左都御史笠江潘公卒于家其明年癸未巡抚都御史郭公思极以讣闻上震悼赐谕祭者二遣官营墓赠太子少保已而命翰林臣考公行锡之谥曰恭定明兴大臣得谥恭定者仅故大司徒年公与公而两年公故尝宣力泰顺间■〈立乞〉■〈立乞〉砥柱者也法所谓敬顺事上纯行不爽公于年公有光而天子之制命与祭先后辞褒扬公材德政术不啻称是中外闻而歆言之于是公之子学宪君允哲方伯君允端将以某月某日葬公赐莹之某兆伐石以俟巨公大人之志若铭而属世贞状其事以备采世贞故习公又与学宪君姻好所愿为执鞭者也敢以荒落笔研辞公讳恩字子仁别号湛川已更号笠江其先毘陵人至元季而有添二公者避兵徙上海遂为上海人添二公生静庵公某某生端原公麟仕为所大使麟生默轩公庆多行阴德信然诺有乡里称以公贵赠都察院左都御史有二子其季为颺庵公奎负干用仕为项城尉课最当迁自免归颺庵公始娶于赵天继娶钱乃生公尝拜公封为按察僉事而钱先逝赠宜人矣最后颺庵公复拜公赠为左都御史钱亦为夫人而公复为赵力请赠如钱公生而明颖疑重离襁褓即不妄言笑宛若成童六岁父教以四声高下扬抑不两日而悉之稍长受经术所构制科义蔚斐有声补邑博士弟子试辄屈其曹偶无何台试第一且廩而属有诸生当贡而居丧服除者必廩而后贡公悯其老曰吾何所藉一食而忍皇皇其长者推以予之嘉靖壬午公年二十七举应天乡试第九人明年登进士甲科授祁州知州州岁当均赋公至之未几为正册籍清弊核隐户无匿田田无匿税参伍新旧衷而济之高下称平其吏民故朴鲁两造之顷不数言而决咸搏颊称快以去当入覲用治行异等调剧得禹州州故名御讳悍王国也有子侯豪戚环卫之属而其俗亦强侈既闻公治祁名稍稍敛迹而公一切以宽平处之独谢絶居间亡所徇其人大服至为语曰毋相讎避潘侯毋甚口愧太守公在禹未几而积贮为列城最会岁侵发庾而

贷之无饥者寻擢南京刑部员外郎吏民思公讴謡不已至生祀之遗爱祠以配郑上卿公孙侨汉丞相故颍川守黄霸语见州志中为南刑部一岁所而以钱夫人忧归满三载服除得刑部员外郎时天下当乡试而执政者新议更其卜制以为不当以取舍属监司御史特遣京朝郎往而公用文高首得河南所拔多知名士而少傅郭公朴尚书刘公自强魏公尚纯侍郎喻公智至与公并贵八座声称相埒程序文亦以尔雅为诸方冠还署之亡何迁广西按察僉事提督学政广西故僻而椎于训故外亡所娴习公乃增益秋文所先者启之而其要归在于敦本实贵器识以故自公后荐南宫者不虚岁而名臣亦间出时靖江王骄勒其国卫卒之子弟毋得充诸生即充诸生而试者必以贿不则银铛其父若兄公谓立贤无方非耶移文长史司谓王复勒诸生试者吾立论糺汝王闻之悚然诸尘乃获试而公尝署按察篆又以勾捕王所匿大猾必得乃已王滋衔之其后竟以与御史监司竞而上疏首诬及公上为遣给事法曹缙校置狱勘公亡所侵王夺禄国臣以下抵罪公之视学政居职自称隍于前后数公而其摄廉察篆尤亡害考最锡诰遂进四川布政使司左参议分守川东西北三道所至督有司轻平其徭赋察见冤滞其理所在夔人尤德之迁山东按察副使巡察海道所部登莱饥郡邑亡见庾民习逃徙枹鼓间作公多方设法劝募赈贷之因借其力以辟荒芜乃严约束布尔目民方见以畏懷有生色而御史檄公监试事录成进御而时相有修郟于御史者摘其语以为讥讪诏逮御史及提调监试臣者遂及公时传上怒甚且叵测公曰上明圣讷忍以语真人死且上也即死之而生之毋非天也我安敢避旃而又何所觊为已入狱寔对公自若赦出狱亦自若滴广东河源典史公遂之河源沿檄归覲頤庵公道转赣州府推官丁頤庵公忧归服除补福州府亡何转南京太仆寺丞再转南京礼部祠祭郎中复为江西按察司副使整饬赣州兵备兼分巡岭北道公既坐无妄谪而资歷久亡出其右者以故自河源尉凡四转而复守故官舳舻错于道席不及暖公亦不及有所设施而缙绅先生不能以声色窥公而益信其为公辅器公之在赣属峒寇渐平迁浙江左参政分守杭嘉湖道方按部海塩而岛寇猝至围之数匝时城无见兵公鼓舞吏人昼夜睥睨间不少懈贼知不可破乃解时谓塩官孤城非公在鱼肉矣而公进云南按察使未上擢江西右布政使居无何遂迁浙江左布政使凡三转而始为政首革赃吏出纳之弊郡邑来上赋者如寄已而其民洞知之郡邑亦不得缘是而取竒羨又数佐其台使者禁斥贪墨浙人称便复提调试事所得知名士逾于山东时入覲与太宰御史抗辨贤否多降心从公甫竣事擢都察院右副都御史巡抚河南下车问父老闾左所疾苦得黄墨绶上不职状輒移文显责之至有望风解绶去者徽恭王托玄修盍上而子庶人载堦继之益为伎尝轻行去其国以覘其留都又多掠良家子充后宫占民田所贼杀无辜数十百事闻下公公与御史悉发其状论废徙皇祖陵削其国秩尽夺所占还民徽既失国伊庶人复为伎伎甚于徽公首铄其锋剪厥羽翼其后竟得罪豫州部稍稍息肩矣公尝整矿卒付裨将将之以赴岛寇有功与赐金币亡何迁刑部右侍郎寻擢南京工部尚书公至扁其中堂曰敬义以示僚属曰

事君而思见利而思思过半矣即榷芜湖龙江两税者陷于蠹不自拔公乃择敏慎郎与之衷画一而着甲令焉务以不苛取而国课亦足督修皇祖陵及孝陵又完上以其速而能节也嘉之赐白金为两者二十彩币二有副召为刑部尚书时吾郡人督留饷都御史章公焕故尝有疏以经畧中原名触上讳坐他事逮而诏法曹究所由将坐以诽谤公谓章非所宜言然其意在忧时耳巡抚云南都御史幼公居敬将征东川夷调兵饷不能无扰而与征南沐将军相抵沐将军中之亦坐逮将坐以擅兴激变公谓幼特行事不当物情耳事取旨非擅兴夷狡不良不为激变二公虽竟远戍然得不死而上仁明亦不以为公累也改都察院左都御史公疏辞有旨卿老成端肃风纪重任特兹简用宜承朕命不允所辞以二品满三载闻上遣中涓赐钞缙羊酒予告进阶资政大夫封二代录一子入太学公自是再上疏请飭台纲剔吏弊苏民瘼前后几二十条凿凿中窾上皆嘉纳之命所司举行大风霾上疏自列不允偕太宰考察庶僚评隲必以公议即分宜尚在事不能有所下上其指一时凜然称肃充廷试读卷官是时方伯君成进士为刑部郎以材调礼部而给事中某欲借以倾太宰而遂及公公复上疏自列上念公春秋高优诏许致仕而特为太宰明所以迁方伯君意公既归阖门养威重顾生平无他嗜独嗜书晚而弥笃未尝一日释卷自六经子史以及国家典故毋论金匱石室之藏即虞初小黄衣所纂靡不手录而彙之一室萧然唯图书自环而已诗根柢东京邺中间及开元大厯文则规摹昌黎四子以上沿先秦要而归之六经纯如也始擢第而贄所业于乡先生陆文裕公深陆公高自标许意不可一世士而独心折公语人曰文不在兹乎吾何敢居先达焉公既位日尊名日益重金石之辞沈陵谷者不得之身毋以瞑不得之父兄毋以子弟于是争趣公公不忍逆距其意咸有所撰述俾之实归以故晚节其文益富益畅而有法性孝友其事頤庵公与钱夫人备志物之养丧葬祭飨戚易不偏胜时公既得老而诸弟温州君惠刑部君忠光禄君恕皆相继自引归三君故尝受公经以至有官秩公业八十余则其最少者亦七十为筑四老堂于第西疏泉种竹备林野之致而学究方伯及公少子都事允亮间以之官休沐归省侍公出则金紫银艾相络绎处则悬曲旃奏钟鼓欢燕弥日亡间人谓洛中耆英非一姓而陆贾李迂哲之俦要以酒食选耳盖于古公无拟也公念有余田首捐以供诸墓祭岁时合宗族飧之因以稍赙其贫者良者而扶其不率者又推以助里甲之应供者他所著家训井井盖不特潘氏规而已公之归台使者无岁不慰荐上未及用而最后谢中丞登之温侍御如玉复以公应诏上老之特诏进公一级公前是以诏恩当为资德大夫至是为荣禄大夫今上之六年复以诏恩有司具币饩存问时人益荣之公素强无疾又善玄素之术能摄精气时时遯脑顾犹陋之与方外客还往相与顛析葛稚川邓之学谓丹砂可化而人见其耳目聪瞭步履矫健以为即亡论冲举可不死矣而会允亮卒公犹能强自抑已而刑部君复卒公乃叹曰四体也而废一将柰何且使我踽踽人世乎自是多忽忽善忘寻感脾疾月余而逝矣距其生盖弘治之三月二十六日也享年八十有七公为人广额丰下修眉秀目丰度凝雅渊淳山峙望之而知其为贵人

也生平无喜愠色即仓皇迫之而不能得其履步疾辞与人处坦夷不设城府尤不喜为脂常馥馥室无杂榻囊鲜余刺以是竟其身居官眷取予当得代轻舫垂橐而恒秘之曰我何以示人廉隐恻恳至以求便利民寻推不自居曰我何以示人惠自其长藩臬至八座多悍相宰铸日人谓即不相齟何以能庸公不知公韬光善藏不激不随有以庸之也善乎孙文恪公之称曰吾在铨诸藩臬之长未有不通问者独不能得潘公一刺异哉能不通问者必其不受问者也若潘公者可铨也公之乡有少师徐文贞公宗伯陆平泉公者其言著蔡也徐公谓公学自濂洛行则曾冉自通籍以至悬车出入险阻跋涉万里蛮烟瘴雨之途靡所不历间以微絃婴制禁都官桁杨之味靡所不尝竟能保躬完名出险就夷鸿猷懿烈为贤士大夫所推重陆公则谓公长者淳实居身廉靖鲜衒饰以暴人耳目而其中介介不可犯猥滥请谒者望风屏迹一时朝士皆惮服公以为前后居中执法者罕公若也学宪兄弟尤宝重之以为公实录世贞不佞继有言焉可乎汉兴御史大夫与丞相侔埒重也其可屈指数者周大夫昌之强力贡大夫禹之清直薛大夫广德之敢言尚矣公不必尽有其迹而提身轨行从容养重进而仪于朝退而仪于野者又何多逊也盖余尝按部汝南过太康之墟而感于先朝之顾大夫佐者行业着于耳目而名实不被其身上书请之朝得赠少保溢端肃搢绅颇快之夫以顾公之贤任职百余年而始见伸然而问其家仅一牧竖子耳不能名其祖与今所被之盛公甫狷馆而中丞请之宗伯核之不踰时而诸典具备毋论公之寿考福履其子孙抑何蕃且贤重也然则造物所培覆不可铢量寸计也已公始娶于包氏赠宜人加赠夫人继曹氏封宜人加赠夫人先公卒其事行见公志亦陆宗伯公着也子男三长即允哲陝西提学副使娶王氏赠孺人加赠恭人继项氏再封如王次即允端四川右布政使娶顾氏封安人加封宜人次即允亮南京后军都督府都事先卒娶储氏赠孺人继王氏封孺人咸以学行政术彬彬世其家女一受南寧府通判瞿讲聘早殇俱曹夫人出孙男八云驥国子生娶孙氏云枢官生娶杨氏云龙国子生娶顾氏云夔国子生娶莫氏云鳳国子生娶赵氏云献国子生娶吕氏云柯娶顾氏云楚聘姚氏孙女六长适官生陆彦祯次适国子生徐元普次适国子生乔拱辰次受王士驊聘次未字曾孙男二曾孙女四长适国子生顾晋次受吳宗玄聘早殇次受乔某聘次未字所著有易经辑义三卷诗经辑说七卷诗韵辑畧五卷美芹录二卷祁州志八卷笠江集若干卷行于时

弇州续稿卷一百三十九

●钦定四库全书

弇州续稿卷一百四十

(明)王世贞 撰

○文部

△行状

亡弟中顺大夫太常寺少卿敬美行状

亡弟讳世懋字敬美先大司马公尝命之曰吾闻东海有鳳麟洲尔才庶几埒而兄乎署其读书之室曰麟洲既甫宦而以家难归奉母郁太恭人隱居闾閻中慕王君公之行别署号曰墙东生宦小达思自挹损更署曰损斋然而天下故知弟号麟洲其称如故吾王之先自即邱子讳覽诸孙文献公讳导传其子讳某世世贵显至五季而有讳仁镐者为吳越王镇海节度衙推居严之分水遂为分水人世孙宋左司諫讳縉有名臣称

(阙) 传至讳梦声薄元德不肯取廛仕仅应行省辟为吾吳之昆山州学正几四十年遂为昆山人后割隶太仓州徙为太仓人皇祖考讳倬歷官至南都少司马以政术行谊为弘治正德间名臣赐祭予墓皇考讳(阙)至都察院右都御史歷督抚薊辽诸军更六大镇为嘉靖名臣以口语中权奸歿最后复故官加赠大司马赐祭予墓妇即吾母郁太恭人十九归于大司马公明年丙戌举不穀又十年丙申举吾弟弟生而秀颖非凡儿眉目如画三岁即善操切其下家人重足而立父母絕怜爱之稍长益务为寬厚出就外傅读书辄成诵应对机警蠡出八岁而不穀举于乡弟五鼓披衣起坐大司马公怪而问之曰吾有忧耳何忧曰忧他日之后吾兄举也大司马公大悦每为人说之居四载不穀守刑部郎燕中而公繇御史驟迁中丞南北御圍倭寇无寧月弟皆从其忧虞艰险百端独弟与太恭人共之始弟甫十齡而病损先天气几成瘵戢其身医药间大司马公怜之甚不欲强以占■〈亻 毕〉任之而已弟病小间忽忽不自得因取迹时程序经义诵而仿之别成一篇置案头大司马公见而心异焉谓太恭人几失此儿乃始教以属文而延乡进士茂才先后授经塾中非久辄辞去曰某不任师也是能见鞭影而驰中间尝一归就州试即冠诸弟子大司马公念而促使去不竟试以学籍进补国子诸生祭酒郭公鑿试而奇之擢寘前列乙卯当应顺天试其文已籍籍人耳而会有忌大司马公者謫书题小误独其文不入内棘弟乃归侍公使院公故以经术擅诸生名晚而益精其业为弟日切磋者三载比再遊太学试屡第一尤为祭酒敖公铎所称赏遂试顺天与乡书然诵其程序文者犹以为屈而大司马公意尤惜之欲伸之于南宮课业益笃弟所构易义亦益精明年登己未会试当射策公交车其文与书皆工受卷者欲上之大相所故事首甲必大相分读而大相严时嫉大司马公甚相客时与弥封者知其指掣去之遂得三甲肆事兵部弟驰謁大司马公于使院泛瀾久之盖北兵方深入公帅勵将士逐走塞外而大相

方媒公以纵敌弗击虽坐仅镌二秩而诸将校皆捕系论死公谓弟曰吾祸止镌秩耶弟叩首泣曰未敢必也公谓弟去从朝夕升散吾得老田里作编氓足矣时方议拔进士为庶吉士人谓大司马公以郎君才诸进士中谁俚者取之若承蜩耳公意为动弟独曰柰何作此念非独慕止足也人方鱼肉公不免而欲变化风雨耶谢弗往俄而御史之白简上矣盖是时御史受相严客鄢中丞指中丞受相严指以是上而得天子怒逮下狱以失守论当是时变出叵测太恭人跳而之燕中邸与弟抱首哭亡何不穀解青齐绶亦至欲与弟上书请代而大司马公间而曰上怒方炽是沃之膏也毋速我死而客亦摭相严意更以危言胁之不果上第相与楚服奔走搏颊诸政地涂炭委顿以间橐籥或入而视疾强颜以进含辛而出盖无日不若形影偕矣会事小挺几且得长系弟始从不穀操管为诗悲歌顛顛大司马公见之为泣数行下已而破颜曰而乃得从而兄雁行吾愿奢矣何必膏腴其门也盖明年之庚申而公竟不免吾兄弟痛极濒死者数矣步扶丧车下潞河且哭且蹶乃以一蹇卫更代行又虞太恭人之毁伤也时时慰问已得民舟凡两月而抵家各不自意全时方苦大水灾乡居盗四起抵暮火光与噪声应不絶乃谋请太恭人偕妇子輦城居而诛茅构丙舍于藁葬之侧三时进食哀号中夜叹咤誓以蔬素辅粥时余兄弟皆尪瘠而弟以夙疾故尤甚每月朔入城起居太恭人太恭人怜而忧之手和肉羹以畀弟泣弗忍领也凡二十七月而始茹■〈廿晕〉毕三载始除服然犹被白帽单衣不敢预宴会听声乐与人间庆吉礼唯于诗酒夙所嗜不免时时濡首相与畅佛鬻磊块而已不穀以久宦去太恭人膝下而弟供养之日长能得其意念大司马公有遗产而世父之子四人家渐挫将大割以贍之而宗党有窳困者时王父所置义田属之冢孙不治亦谋有所更益太恭人严不敢以闻而私谋之弟弟曰此懋夙心也宛转入白太恭人许之是以得稍稍全义举皆弟力也弟之始为诗用不穀故因习知不穀之友故李于鳞徐子与宗子相余德甫张肖甫及今吴明卿张助甫而其所心服乃于鳞大司马公之丧过济宁于鳞单骑出吊弟哭不能言而且拜且睨于鳞亦目属之弟既服除请于太恭人与不穀间过俞仲蔚及吴中周公瑕黄淳父袁鲁望张伯起兄弟薄游名山水有所酬倡出一语必翕然叹服而录以叩于鳞又为书盛相推挹于鳞大惊赏呼之小美至曰小美真才子也又谓不穀阿奴咄咄火攻伯仁不虞燎须耶不穀报之頼其迹来好米汁得少宽耳不然何所迹逼汪伯玉余同年兄也其文辞与于鳞并擅名海内自闽以书先余余为言敬美且出其近诗数十草伯玉亦大惊赏过望书问遗不絶当是时子与宦不达多卧雪中于过从易而明卿为通家兄弟诗邮往来稍不落莫矣弟既以大司马公冤不白与不穀皆絶意进取治小圃居第之左余名之曰离齋一轩曰鷓适度经史古文图籍之类充仞其中盖又无一朝夕而不形影偕也其从兄曰世望从甥曰曹昌先昌先尤有文皆善排调有淳于东方风弟出其险奇语以相角久而厌之澹辞取适而已盖三载而相嵩父子败又六载而庄皇帝登极为隆庆丁卯相国徐文贞公辅之涤冤滞旌直臣拔遗佚一切与天下更始不穀苦疡几死小间与弟泣告太恭人将伏阙下上疏辨雪时弟甫

举一子未弥月而殇不顾也疏既上属新郑相有所不平于徐公谓徐公多洗丹书暴扬先帝过其语外流太宰杨襄毅公甚宽大司马公而难新郑事几格弟与不穀相对洒泣萧寺中会新郑去国而邊臣行勘者以功状闻盖八阅月而始获伸弟居闲无事益刻意于诗诗益工是时留都之台垣当有所论荐而弟及不穀与焉不穀谓弟汝当出以慰我先公地下吾留侍太恭人襄毅公固欲俱起之而太恭人果欲趣弟谒吏部选于法当得郡邑弟行至河间道中而报除南京礼部仪制司主事不之吏部选而径为京朝官皆异数也而不穀业已召守故官天雄部杨公贻书不穀谓南而弟欲以近供养存者而姑北且报国而慰逝者不穀再疏辞俱见寝于是与弟俱勉之官而南仪曹职务简弟得以其暇肆力于古文章而六季之绮丽名胜觴酒词笔靡所不领会居无何以郎中褻病摄曹事而魏公之事起魏公者老而无嫡子其长子邦瑞弗爱爱嬖姬郑之子邦寧会公之前夫人薨夤缘请于上以郑继封得诰命邦寧名为嫡矣诚意伯者知其事而故憾魏公且欲因而夺其权寄谓若卒幼子嫡耶吾当廷论之魏公乃隱其事不敢以邦寧请而诚意伯之计拙则阳谓大司成勋臣之子当封者不入成均习礼为不敬大司成是而悉督促之魏公谋诸大司马刘端简公刘公曰余辱公肺腑乃敢对夫公之今夫人非正妇也而邦瑞生又在先则均庶也庶而不以长有国法在魏公矍然以邦瑞应事繇仪曹当白部少宰林公嫌时领部喜而谓弟中山王之德遠矣能蔽其后人不违礼而诚意伯者大失望顿足曰今年燥舌正为奴谬与邦瑞善而为之谋曰吾故善大司成若贿我我以半予之可得驳行而大司成之属郑者谋与诚意伯合乃各以意胁大司成曰邦瑞业四十矣而始不称胄子者何以邦宁故也且邦宁不为嫡而何以母拜天子诰称国夫人不驳异日公当任其咎大司成复是之为驳而返之仪曹复返之魏公魏公中悔曰刘司马误我乃以二子俱请林公甚恨之然无以难也弟奋然移于中都督幕曰郑夫人故妾也其受封应否非所敢论第邦寧既生未封之先则断非嫡出之子邦瑞庶而长邦寧庶而幼何两请之有林公大喜谢第一言而徐氏之事定使吾部自兹重矣后邦瑞卒为嗣魏公镌禄诚意伯拙大司成罢而后以无贿白都人至今称王仪曹不馘法也弟在南仪曹仅岁余而迁北为仪曹员外郎于职捡缉牒详谨亡害尚书殷文通公知之而太恭人苦沈痾于家不穀时迁山西按察使上疏乞扶侍不报会太恭人疾良已始出之任至秋而复发不穀移文两台不待请而行至泽州得讣昼夜驰而弟上书以病予告至池河始得讣先两日抵丧次以太恭人之不及侍疾也搏颊哭自数且絕而苏自是弟与不穀伏苦块如丧大司马公时唯百日之后时时亲笔研于酬酢不能尽废而已壬申之初冬始禫服偕一二友生泛太湖陟两洞庭各有诗纪之明年正月服除以四月抵都下十月始补祠曹意泊如也祠曹诸郎王君象坤刘君应麒孙君鑰博雅名士弟皆与之善以志行相砥砺悉取古今子史益于经济者朝夕讨论不倦寻迁尚宝丞盖是时同年故人有莅其上者意不自安而弟事之益恭以是得谨厚声尚宝居闲无事益以其间致力古文辞而故人黎惟敬在东掖李本寧在玉堂欧楨伯在成均丘齐之沈纯甫在郎署李惟寅在环卫刘

子大史元秉在缙帅日相与征逐诗酒之社而弟时时握牛耳又善书所挥染篇翰流艳人目忌者缘饰有游闲公子之称而是时傅御史上疏论时事触大相怒下狱得戍弟与石廷尉拱辰合而为治装已刘御史自辽左论劾大相就缙系事且叵测拱辰上书大相请宽之疑其出自弟而弟又与拱辰偕诣相客李尚书所劝之尚书唯唯已睨视弟而私曰石君木强殆王生文之而弟方奉上命吊祭秦藩既至行礼动止详华世子国臣靡不心敬之其币重弟受滄返币还与抚公藩臬游揽长安诸胜迹浮大白弄不律而江西叅议之命下矣弟怡然不以为意时不穀方在郟乃取蓝田道经商洛山中八百里而后及相与礼玄岳下饮均城栖泛澜而别弟之外选也咸谓出大相意而南垣遂缘以蔑不穀时不穀已改南大理卿矣遂以聴别用归里弟惴惴恐不自免乃精心讯牒勤职业而所治南康道务简无所自显见而御史张君简行部其地因狱与俱之九江饶州时分巡副使未至一切讞审狱牒讯牒公移悉以付弟相知戲曰是常习司空城旦书乎弟曰未也且以仕学耳及其治之輒精而于考核官吏语皆核而文米称是张君以为材而异之时巡抚潘中丞时良者弟故人也所以慰藉保持甚至寻入贺万寿抵都下诸诗酒人与忌者皆在弟平心其间不为町畦唯小愆慎耳既陞辞间道具絮酒鸡炙哭于鳞之墓因游灵岩陟泰山观日出祇謁阙里孔林皆有记及诗还至玉山引疾移文两台乞休俱不许盖弟犹虞大相之深于伎也既不获己之任所治益精明尝从侍御赵君耀按部至饶州而大相母迎养至京中贵人导从大相之弟都帅使使寄弟有年家分能一出会乎弟谢以故事不敢离直指致庖廩而已都帅忽忽不恠曰我故不足辱王叅赵君雅伉直心不附大相以是益善弟其满也特荐弟堪学政而潘中丞之荐辞尤媿寻迁其省按察副使所任驿传时江右之驿传最繁苦不胜其供亿则多取之民民又不胜其给则为议减削之过当乃至学官有徒步出入者弟为下诸郡议衷其平上之台台是之着为令已兼馆司篆及署分巡道分巡当省会至繁猥弟于吏事益习有所讥驳即老吏莫敢措手尝据案草上下牒两吏更迭录之腕指痛欲脱盈庭之讼取片言立决吏私相目使君真神人也寻入棘监秋试御史邵君陞素悉弟才事皆以委之弟所取多名士而程序二策及后序尤以博雅称俄当入计南昌李令者以进士任可五载矣其始用小苛办得上人意屡登荐书以是益骄成贪于酷用伎自掩司府相摄莫敢谁何弟于考语独借夏日刺讥之台悟以属弟尽发其奸状遂露章劾而令用酷去且抵罪弟之入计也藩司之同事者新不能有所悉亦以属弟当省台大会方岳核二千石及黄绶以下噤自废弟于中独侃侃条对诸所救解可指数太宰目送之语人曰才难不其然乎今者覩练事敢言独吾晋藩长与江右臬而已而弟以劳故且冒寒得厉颇剧上章乞骸骨辞甚至太宰故知弟才而以不胜忌者出之外屡得台荐语意悔之遂用以拄下石之口而免南台抨既闻太宰亟称弟益欲收之至是寢其奏而会山东缺学使者太宰欲改补使乡人一曹郎即风弟卧所弟谢曰某用臬使覲不幸有狗马疾今遽起是以臬使病以学使起也太宰贤其意弗迁于是疾稍间例謁辞大相改容谓弟行矣旦夕当从事大藩山东非而任也弟谢不

敢当归而闻仙师晏阳子事而慕之以书托师之父宗伯元驭自通愿一挂籍充都养是时不穀业已前见录矣师悯弟诚与元驭可许也贻书谓弟明敏絶世而戒以上智利根存其实则务匿其名自信笃不论人未信既承道门印可便当专神凝虑以待机缘向人且勿言色且勿动若愚若昏和光混俗而内念凜凜常如帝师对面又谓居官学道不可着一分秣艳气弟得之喜不自意别去不穀窃意弟有所托且宦薄而勤励故益甚尝署案而有一字异者停笔呼原案校之谓吏曰若亦能手欲以一字变斯狱乎吏叩头谢不能曰此出后曹胥手耳亟呼胥胥恐则投缳矣解而苏并致之法盖弟离事之半歳而邮弊不可指数悉为欸以属诸郡守曰此皆乘诸君及我之离事而恣为蠹者也毋论诸君无与即署者新亦不易悉但核其人与事来我为一惩而改之不以他累于是邮弊洗矣然弟不专狗法必以情佐理而行尝鞫一父子相讼者而父辟甚弟为痛杖其子且诲之己乃命杖其父其子匍匐前护请以身代弟始释之父子感悔如初有袁帅者好侦诸曹得其事谓弟曰三代不啻是矣甫百日而移视陝西学政道故里而晏阳子已立化自恨弗及徘徊久之欲勿上不穀谓曰吾既已失先君子意汝勿为尔也盖先君虽在厄未尝不戚戚以己故辄二子为恨至是弟始束装就道既之任其所行约束明畅藻雅为他省冠诸生欣得师试贡士毕行部三原耀州延安未毕而有两京台琐白简前是大相不欲持父丧而鱼肉抗议者元驭争之力不应遂请告归省大相心媿之时时露辞色而晏阳子既以化元驭具其事属世贞传而弟手书授之梓给事某御史某乃极论元驭与不谷涛张为恠幻而留省应之至波及弟与故沈太史懋学业已报闻弗竟矣而弟慨然谓学使者为诸生师帅即弗竟而业已见指摘何颜复教授诸生乃移文两台乞骸骨而单车之境上度台疏发即买一舴艋径归诸生有竭蹶而送者犹为之讲说执文不倦时元驭之弟家驭亦自河南谢学政归天下闻而高此两人以比元驭其贤于不穀遠久之大相死太宰第诸道学使此两人俱上考家驭侍其兄苦块弟起家提调浙江学政上疏辞不赴弟名益高而惜之者谓县官需材甚急岂有材如弟而竟老丘壑者甲申春不穀亦辞南京刑部侍郎召就医药而弟以冬复起家提调福建学政闽浙俱天下文学地其视关中不啻倍蓰余乃谓弟可以出矣余处子又处无乃偃蹇天子之命而伤地下心于是弟意始决以岁杪之任而大试期迫矣星驰至汀而邵武而建宁以两月毕事遂驰至漳漳故才藪即龙溪一邑民间待试者八千余人诸生称是而守令皆弟同里人荐绅先生展转为其子弟请属不可屈指数强有力者至藉开府中丞指以胁弟弟一切谢絶之而唯专其心神以从事诸卷恒丙夜不寐其所扬挖毋论前列即当下中至擿斥者丹铅之外继以精评盖榜出而人人无异词至得覩所扬挖语不啻叹伏矣已试泉其法如漳试兴化前使之未竟者其法如泉还试福其法如兴化以三月毕而诸生及民间之见遗而援故事求再试者八郡悉集且数万人弟一一收试之而度期且迫弟令人自署名卷角而自封之不别为号于是顷刻就试试毕而付卷胥吏使公阅之有挟父兄私书于卷者有自署其父兄名卷中者悉弃不收收者仅十之七而加严阅焉于是居间倩代之弊絶矣

弟后先所拔多名士及试撤棘榜开俨然可数而解元李光缙者困诸生久弟覩其文而异之俾饬学宫遂冠闽士翕然归弟鉴裁而弟尚以所试第一人少应格意恨恨不乐更三年则第一人之彙征者无限而弟已不及覩矣弟所颁条约在关中雅已着声而闽之士习窳而侥幸者众则其于规愈严而法益核闽人敦行好古学几为之一变俄进其省左叅政分守福兴道时从侍御杨君按部兴化杨君性严察于司道鲜所当意独雅重弟事与之谋弟多所宽解入贺万寿冒暑行至吴门以期远暂憩里中得迁今官报犹以左叅政祗役抵都下竣事而后拜命时三相公乡人太宰有通家契皆下榻而请益弟披吐无讳于元驭尤切至弟既之金陵履太常任金陵搢绅先生欣得一遘以为祥麟威鳳户屨恒满有所报诣倒衣出迓恐后笔研之请无虚日弟尚能应之不作厌斲态且尽欲遶江山之名胜补昔游之所未足绪成一家言而劳疾大发心肺火上升于喉咽间结阨成痰噎每食必多错逆不尽受时吾吴之两台使者条论乡国事宜以大司马公之冤仅雪而功未尽讎为歉礼部议赐公两祭全葬不穀再疏请得赠如今称盖身后之事畧备矣弟拟上书乞假归从不穀世贞奉裸将饰兆域以鲜近例逡巡不果意殊邑邑久之病日益深乃移状于卿沈为具疏请下尚书吏部极称弟贤姑予急治病病痊而有司奏起用如六卿大臣例报可时不穀被命留京轻行迓弟于奔牛弟时形瘠而色多火然神气殊劲爽相劳苦案医药与方舟而归不穀既不能出又不忍于弟业上书请一丘矣弟谓向者兄不云乎余处子又处将偃蹇天子之命而伤地下心且上之待我先公厚此一时也兄寧能愬然而已乎余无以荅第朝夕候伺弟消息小益则为寝食不遑尝避而饮泣者数矣弟微知之强自饰而见我则不获请至明年戊子二月密戚知友饯别儿子新居弟尚乘小篮舁从澹圃纵观优旃举一觞始去又数日促余过别步履趑趄谈论畅余乃得自引然日悬念无已时至初夏方昼寝而家人来云弟病益甚无起色为之惊堕床及阅其手书则曰吾食虽不至脾而神甚王不死也然意者欲安我耳有录其分产遗戒多理身齐家要语所析虽草头木屑井井不遗漏料理身后衣棺丧葬哀礼为俭令他人积日而计之弗及也且曰吾自今端坐以俟期而已其入与妇子诀靡不俯首饮泣不敢仰视弟洋洋自如明日一家人至则报进粥无苦已又一人至则进肉矣然自是颇矻矻著述有澹思子望崖内外编经子臆解属岁大侵饿莩盈道日有死者弟乃倡诸大姓出困米煮粥以啖之全活可万计死者用浮屠法延名僧诵经礼懺七昼夜瞻拜甚谨沾沾喜曰吾胸中更无事矣然弟故课责子姓望之甚急而其于诸生试义分别考校他好不能夺至是益勤而性稍卞善恚忽欲葺离蕢园一岛力不称愿顾橐已匱于前施及法事矣意时时不乐子姓窃忧之将百日病复大发二日而粒绝又二日为季夏闰望前一日晨兴命移席中堂强起坐饮少水亭午呼楮墨手书一纸与余诀大槩谓种种恶证俱现恐在旦夕弟性敏有胆决加以学力定力遂能轻死破恋六亲既已无情即见兄如不见也未复谓天下虽荐饥圣主能蠲赈事尚可为唯愿庙堂勿固宠勿近小人勿听人言搜求人过诸君子勿偏见勿立党勿思报复即死无憾既械书未发迫瞑目力起使人掖而据胡床

盥水于足既毕儿辈问有言否曰四月书已尽之复何言曰不昏散否曰无念何所昏散
翛然遂逝不穀时外出抵暮归而家人以书及讣至小子骏时在邸匿讣而以书授不穀
曰叔父亟矣读其书二百余言既有致结法尤精美无一笔误泣谓骏此当未大故也更
三日人来无复生理矣骏度不穀心稍定乃以讣告呜呼痛哉弟以嘉靖丙申生歿于万
厯之戊子春秋仅五十三耳不穀长于弟十年齿髮尽堕去死无几乃不死而令弟死也
弟至性几曾闵明悟埒子贡博裁亚子产敏练如贾生其事大司马公太恭人以志为养
效盼若一不穀意所属弟恒恐失之也弟间有所请不穀未尝不心唯也尤笃伦理重名
谊其施予视不穀稍裁而能不失宗党戚执待而举火者亡虑数十家闾左岁时咸有所
周恤居恒不轻为公府居间间有之必宗戚之困阨横赋及冤抑不伸者若州里大利弊
与单赤恫苦侃侃不惮详矣嗜义若渴有所闻于昼即终夕不寐有所闻于夕唯恐未曙
汲汲行之然犹识长虑悠然能见事后虽三老更事者见之恒自失少亦微有耳目之好
触一语立断遣之不少牵系世望每自愧其濡首且谓大兄非沈溺者仁而少断以是不
及弟耳居宫好为条教烦不至琐尤能曲畅物情因事为功属吏之廉而有材者必为之
达于上即不至赃滥未尝不弘掩覆以是多感弟浹肺腑始以受大司马公举子业遂精
治四子及周易独会之趣不专训诂晚视学政傍通诸经皆能叢其大要亦喜读释老氏
言初以资翰墨耳既受县阳师诲且多从衲子游于西来之教往往有所发明独于宗门
似未得机轴若乃致虚极守静笃如老子所云者亦行之而未能深诣也既病久稍见定
力去而恬然殆有未易窥量者顾弟不讳言二氏学恒谓吾于两庀殄亡所贪苟阴用其
实而阳诋其名或假窃其似而自文其陋者俱耻之以故躬书县阳师传而所撰着望崖
编等书亦皆其中精至语识者谓不下白香山晁文元于诗虽自济南始其所涵咏多汉
魏晋宋以至盛唐诸大家然不肯从门入亦不规规名某氏业而神诣之境为胜七言律
尤其蹕絶者文出入西京韩欧诸大家间采刘义庆世说自以为得彼三昧而于游名山
记尤详婉有力善持论往往以识胜少即工临池行草萧散小隶踈行得晋人遗意晚而
弥好之病甚已絶意吟咏然犹为陆司寇阴司马作行楷盖絶笔也性嗜佳山水其登泰
岱观日出憇灵岩谒孔林入关过华岳具行滕布屨自青柯坪而上西北临大漠稍南眺
岷峨积雪东俯中原一昔而下谓平生之观毋隄此矣行部江右穷匡庐表里之胜按闽
纵浪九鲤湖诸山为幽絶观归自关中单骑走龙门砥柱嵩山少林神禹之所疏凿而菩
提达磨之所绍统者慨然若覩其人至洞庭两山京口三岛固几案间物也意与境会辄
为文以纪之诗亦称是独其于华岳谓文不能胜于鳞于鳞已悉之我复何道尤好栽花
果晚治一圃悉构闽岭奇卉及牡丹芍药莲菊之异名者菽之作学圃杂疏谓儿辈吾他
无所溷汝异日日致一花供我目足矣嗟乎使弟不死假以岁月纵其所诣其政术必为
成弘良臣学术必约而窥濂洛之藩吟咏必肩二李超何薛博综广识庶几宋金华杨新
都书孰之名亦必侵寻文祝抗衡而一旦并夺之造物者之于弟何其酷也弟娶妇章氏
封安人归化令宗实女以淑若著称弟亦庄之无间言子四士驷太学生娶袁山东提学

副使公尊尼女士驩州学生娶沈吏部员外郎公璟女士駉聘史锦衣指挥同知公继书女章安人出也士駉聘韩南京礼部右侍郎公世能女侧室汪出也女四适云南按察副使杨公道亨子太学生继英次适兵部尚书凌公云翼子玄泰次适兵部员外郎杨公士元子庚颖次字南京国子监祭酒赵公用贤子开美适凌者侧室魏氏出余俱章安人出也孙女二人字徐道隆为士駉出也所著诗文不穀为哀而梓之得五十五卷余所著闽部疏三郡图说窥天外乘二酉委谈学圃杂疏前已行人间呜呼马曹慨亡于人琴东亭悼衰于梁栋不穀虚得名耳实不如吾弟令幸未死尚能执管纪述其行事而祈不朽于作者至哀无文宜其挂漏繭悞若此唯怜而不拒之岂唯亡者之感将存者世世之感也不胜望迫切之至

弇州续稿卷一百四十

●钦定四库全书

弇州续稿卷一百四十一

（明）王世贞 撰

○文部

△志

右泉郁公暨元配刘孺人合墓志

我外王父右泉公之捐馆舍也实丁未八月十一日云居七岁而墓而未有志铭也其二十又七载为甲戌之月日而外王母刘孺人始亦捐馆盖年九十矣又五载而公之二女暨其子谋于世贞兄弟将合公之兆而属世贞曰是恶可以二老人泯泯也公之所以未及志铭也伤哉难言之矣日公墓而先大夫视浙师曰姑少间微余畴能悉公者乃竟用王事鞅掌终而未及志铭也呜呼微不佞畴能继先大夫志也公姓郁氏其先晋之高平冠带族徙而吴者有节推公己又徙而昆有朝议公待制公入明而居常熟之沙头后有宪僉公华容公刘孺人者家常熟之穿山亦着姓其后悉割隶太仓遂俱为太仓人而孺人之父曰高平公玠与华容公善许以孺人字公公生十四年而华容公卒官公匍匐万里以丧归是时宪僉公移官滇上有母沈太宜人其留侍者张宜人称公祖母而公之母曹孺人凡三世皆哭华容公其老者至寝疾公入茹荼痛隱色而加慰养出治丧事

哭踊如礼亡何沈太宜人竟卒宪金公持服归居岁余亦卒君以孤童三更大变其居丧治家肃如也乡里人相指目郁氏有子矣而华容公父子为廉吏不能无忧饘粥刘翁闻而曰幸依我毋责若币也公遂与孺人成礼于刘氏而会闻曹孺人病相与归奉汤药不解带而更侍者数十昼夜其居曹孺人丧视如华容公加治则孺人相之也自是复往来刘翁所而孺人之母曰蒋有材行以孺人一女故且贤之数徙橐于郁孺人不自名其有以佐公用而张宜人老且病困公率诸弟孺人率诸弟妇奉汤药如曹孺人始曹孺人之卒也谓孺人曰吾不逮姑也以累若安得异日若妇之为若也张宜人曰若代吾妇妇吾累若嗟乎安得异日若妇之为若也公之诸弟窶不能家谋尽欲毁先庐而公乃窃叹曰毋若吾宪金公之手泽乎哉孺人曰无伤也归而谋之母蒋复益橐以给诸弟俾徙箸逾于旧然公自度产日益挫孺人乃以勤俭佐之鼓舞僮使得其力稍稍裕矣公踈眉目善言笑好客客虽卑小母使失意而所遭若贤贵尤周还不失其于族为大宗子然行卑其长者大父伯叔父资其谋而幼者资其决即孺人时时出酒脯损装橐岁时就公夫妇欢如也治一圃隔舍西水有鱼池花木桃李柑橘之属酒数行甘鲜通进呼卢藏彊竟日夕忘倦公故仕官家子能熟习公卿大夫之业而性尤好之所抄录参考积数十帙人或有疑者叩之立应则相顾曰是未尝走百里外其腹岂缙绅籍耶乃又似肉谱公尝谓士必繇科第可以摠而其为诸生不利入赘为楚府典宝不肯赴生平仅一再御冠带而已竟以幅巾单练终其身自吾妣之为公长女而归先大夫为御史而世贞后成进士公乃大喜曰吾始者得闻之而今得见之又身与有之也然亡何以脾疾卒得寿仅六十有三始公年四十八时有一子曰刘将冠矣而夭痛极不欲生孺人悯之曰吾已则已耳公尚可子也为谋置貳彭举一子曰钧钧生弱目犹闭孺人抱而舐之始开为其弱也日置之股自是复连举子钺钺视若钧矣孺人之所出者次女归于王为吾再从兄世完又次女归于陆为秀才旅携以文学名然皆夭亡子依孺人以居久之而倭寇作是时钺已出后公之弟遂孺人乃谓钧钺曰卒寇至而吾三嫠者不易完也幸长姊城居可依耳若曹勉之毋荡佚我先人庐产而孺人徙居日适先妣自燕归岁有岁共缙钱米帛日有日供醪肉■〈施，酉代方〉粉之属而孺人老卧床褥二女时时起问痾痒荐汤沐以至中夜呼粥饮不待再而具最后生则复为婴儿而逝若寝熟者皆二女力也二女于格当旌业上之部使者矣公复举一女亦彭出归奚某钧尝娶吕氏生子某女适诸生王应宾育于陆之嫠者钺娶（阙）氏生（阙）呜呼世贞少则侍公悒悒尔雅所谈说引喻居然有前辈典刑已矣邈乎辽矣孺人之拮据治生逮下为德以不妬成公后及其晚节居顺恬约以不忤成二女节孝良哉乎母也乃若公之先吾父母往也顺也且获终孺人之大墓固也其后吾父母往也为吾父母之后者而俾之志宁能无伤也其志而不铭者何不敢铭也公尝有官矣而称右泉公者何别号也亦公志也公讳遵字子道宪金公讳容华容公讳勳其书讳者里人邵弁也

中宪大夫浙江按察司按察副使定山袁公生志

公之解温处节而归也时犹在强仕云天下惜其壮而才用之不竟而扼腕于萋菲之遭公顾頹然以酒自放絶口不及宦时事者二十余年一日治寿藏而颇次其生阅履歷以属世贞曰吾老矣宁藉子之言而市吾知于吾所不知之后人虽然吾甚爱子言而亦唯子是信子姑有以愉快我世贞通家子也又获肺腑事公即不文而敢以辞公名祖庚字绳之其先袁氏出汝南为蘓之吴县人竹雪翁纲者赘于长洲阳山之惠氏遂为长洲人纲生瓘曰梅月翁有四子季曰阳涇翁校则公之考封中宪大夫荆州守也娶于朱封恭人寔生公公生而警颖至性过人六岁时中宪公有里中逮至挫产朱恭人尝旰不得食而宿少食以饲公公竟弗肯食曰儿讵能先母饱也十四工属文母舅太守公见而大惊曰是儿必为诸生冠居二岁补邑诸生又三岁廩于学自是僑声鬻跂起而又三岁当郡及学使者试遂连冠诸生秋举应天荐明年春荐南宫成进士公时甫踰冠白皙美丽出则人目属之而又夙负秬文声谓且首应馆选公谢曰生不恒鸡鸣戚施平津门何自分翹材一席地已果弗预选则谓公京秩可有也公又谢曰生不能于元子思坊半面令公亦何自京秩也已而果得绍兴府推官公坐主尹太史台闻而益贤重公指谓人夫夫真定山也定山者公故别号也公之为推官其始人犹以少年易之公乃抑绌舞文吏两造立剔吏蹶踏无所容手乃狱成则又若老吏吏为心死曰吾不能从公籍衣食矣公遂以才假守事寻兼馆山阴会稽两篆每晨朝奏牒数十案皆满士大夫纳谒踵相次而公愈整暇又能以其间过从燕会稽山镜水公虽用严明得吏畏其事单赤恻乎惟恐伤之也视公帑若私帑即一钱不妄用之也郡人相率呼公袁青天袁青天云已或称袁父而台使者后先核公治办状皆最凡以卓异荐者六褒獎亦如之满考应尺一征至吏部部之佐张文毅公治尝为公坐主而才之拟公给事中则以年未三十格再拟公验封郎则又为他有力者格仅得礼部主客司主事寻劳日本贡使于南都护之归锡宴四明礼度卒获还转精膳员外郎进郎中公以望次当转仪曹间谓其偶曰安能郁郁日抱案视人鼻孔行止同舍郎乡人某不欲言其名故调公曰审尔当膝折耶公曰为县官拊循黔首胡折也同舍郎乃以语用事者袁君厌承明矣亡何出知湖广荆州府荆州有悍王数以计困守守毋得善去者公慷慨曰彼非人臣子哉遂之郡前是守日供水取之沙市沙市去郡斋十里而遥公指斋傍地曰是可井也他果菜亦故取沙市供公既为井而又指傍隙地曰是可圃也诸宴会器故取之肆公谓藏吏曰是可置而恒也繇是日所动息毫髮不以烦民守五鼓起坐堂皇吏以次请署公一目之则曰某事急某事缓既署竟进两造者使毕吐其情伪以词组而决顾视日犹未昃也乃曰守休矣悍王时使人覘守何状已又覘庭空而车门外食馆亦空无淹宿乃谬为恭敬公有朝谒輒留饮悍王扬觶而曰守饮几何公徐曰唯王命之王欲浮大白公则亦浮大白王告弗任公乃亦报弗任然竟不能得公一醉态盖始甚驩既而慨然曰毋令守见短也而公所赍给诸王孙奉缙以季

支母愆约公每谓人守市爱赤子名而使天子之维藩日口腹之是虞顾恣奸黠为陆海胡倒置也悍王以是益心服公而不敢他有所干请一切治理流闻台使者娄腾荐书上公以二尊人老上书欲归养相国华亭徐公力止之曰守轻舍荆耶荆数十年无此守则何能轻舍守譬之用兵势已如破竹而可中止哉守之考三载绩今相国张公以太史里居贻公文二章指具如徐公语在郡志中当是时浙数中寇而温处当其冲朝议急之以公才迁其地兵备副使公至则发兵徼寇惰归大有所斩获事闻赐白金文币其又明年寇大举犯温且万人温见兵不能三之一而又以分布故益弱公念盘石扼寇出入道轻骑先据之寇寻来争不能得乃散掠四野而公所伏卒亦时得其掠者首时男女避寇趣城襁相属守将欲拒弗纳公曰吾在他不虞开门纳之所全活以万计而乡人王按察德自诡知兵从乡里异军苍头要公过议军事欲以轻骑夜入郡视毋时德所领骑不能数十百公止之曰公不能得贼要害柰何遽穿其中希万一幸德不聽未明遇贼遂鬪死公购得尸犹裸露即解所衣缁锦衣之调棺敛治丧事而露章督府自劾时公所部他将军娄有斩获人谓且缓之当以功赎而公不可曰柰何以一官故忍于逝者时督府胡公宗宪按察德同年也遂上公所自劾书得旨镌一级调用胡公乃谓公公功可赎也吾不忍于逝者公谢曰固不佞意也始戚将军继光以援兵至而公身逆之道逢田中子疑其状甫渡江而田中子哨声起诸伏尽发急追公不及而从者多糜碎公叹曰使我不为王按察者非天乎而前是永嘉令江潮以墨闻公持之急又着其事考语公虽归待次而属大计令自度不得免銜公甚乃恣蔑公因觊得自解而有慎御史者入令谗輒疏公不职报罢公乃笑曰善乎御史之言使我异日不终为王按察者非天乎而公之解温处事郡邑有恒馈可直五百金公以问从吏曰例也公笑曰例自吾始尽郟之几无以为归计而幸中宪公工垦田田可赢千畝公乃节缩浮费傍产小拓季岁加三之二既蚤废放于酒而吴多佳山水花之日月之夕非艰疾无虚晷然所携不过一尊榼与二三故人共之以故不橐损而其奉二尊人昕夕伏膺唯谨既咸跻上寿以歿治丧用孝闻里中公既俭于财不能为浮施而至族戚谊故有缓急未尝不立应也善谑浪不恒矜莊间及义愤则慨然见声色吴中岁娄侵而长吏佐之虐者公时时窃叹每谓人吾不能如前辈陆浚明盖陆公于公知己而好指诮不避显贵人故公尤恶深文吏每云法不可尽使我尽法者我何让张廷尉赵少府也其始司理绍兴而守荆凡再与乡试事得沈通政束为浙士第一后以直谏名闻天下他所举若王少宰篆马廷尉三才张大叅楚城皆表表者故陈方伯子兼寛中而缓事人或谓与公性异而交好至白首无间言先司马公与公同举进士长于公一纪而事每推公居谓剗剧贾锐我能并鹜康莊至泯机杜权不如遠矣夫以公之一为司理一为守皆雄剧郡而皆有赫赫声者其于嘉靖中循法吏畴能再屈指也夫所谓泯机杜权者三事大臣用也然而卒不验者何也王按察不沾首贼不为损功公不严待墨令不为损名嗟嗟乎功名之际信难言哉不然以公之才廉而何至如陈寿语应变将略非其所长又何至作黄次公损治郡名也虽然纵天弢解天裘屈信逍摇以乐长年公

可谓不受侮造物者矣公所治圻在吴邑阳山西之鸦哺墩先墓其偶文王二恭人而虐其中以俟曰吾不讳世讳也达矣哉公以正德之己卯岁生生六十二而寿藏成明年而世贞志之凡三娶文恭人而有子一人曰太学生思娶唐氏女孙男二诸生懋贵娶朱氏懋质聘毛氏曾孙男一士骥聘刘氏王恭人举一女适唐某最后曰谢孺人以例不及封无出侧室二惠氏亦无出潘氏举二女许氏徐淳孝徐熙学皆搢绅名族

张幼于生志

嘉靖中以制科之业称公交车者无若吾郡吴三张曰伯起曰幼于曰叔貽幼于始字仲举一曰敕叔貽寻夭而是二人皆厌去其业为古文辞益壮丽其名亦益着幼于交遊徧海内咸欲荐不朽之策于幼于弗顾也一日东访余弇中而请曰有乐丘之石以干子余愕弗敢应已而曰不佞少长于君八岁柰何任君身后幼于曰固也世有不可知者我先子则犹可得之子子先我则无若子何兹乃有二幸夫及子之身而得不朽我也与我及之身而得覩子之所不朽我也子以为何若然则何以不君传而志为幼于又曰传者传也志者志也我藉子而传之乎则无若藉子而志我之志也于是为张幼于生志幼于初名鹏翼已更名献翼其先自凤阳徙而金陵已又徙而吴为望族王父準能积着起家有四子以伯氏叔氏材任治生弃之贾而仲季恂恂守经术仲卒繇乡举至台郡司理季游太学得金吾幕职而叔氏遂大廓其产以谊侠闻至倾郡邑叔即幼于之父所谓云槎处士冲者也当是时处士以才能振其姓家所蓄三代敦鼎尊彝古图画书籍器翫即代称膏华者莫敢抗居恒自叹谁与我守者世得无以蔡中郎目我乎已而伯起生又七年幼于生皆生而白皙娟好秀丽每出市人连袂矚盼属之曰谁家璧儿当非复尘世间物父怜爱之为置师塾日诵数千言稍受笔即能破累纸而所造语奇徃徃出意表年十七即以诗贄故翰林待诏文翁文翁世所推伏前辈无两辍食而读谓其客陆礼部师道曰吾与若俱不及也趣延入酒之而是时伯起业已名文翁客居数岁遂客及叔貽陆君亦折行而与幼于称诗友故皇甫按察沔彭处士年黄处士姬水今刘按察凤尤相得唱酬无虚夕当是时操觚者以不得幼于一语为歉幼于寻游南太学两司成至不敢抗师礼引以为上客然至每大试辄不获僦伯起虽一获僦其试南宫亦略如幼于故借悲叔貽之天而相率为厌去然幼于之所谓厌去独举子业耳故治易至是益深湛其思自比于絶韦折挝而不已盖十年之中而成三易曰牺经约说曰牺经杂说曰牺经臆说已有读易纪闻读易韵考学易标闻后先将数十卷时人徃徃以博核归之而未有能颺习者幼于意不恡乃尽谢其故冠裳幅巾短褐买轻舫呼笋舆纵游吴越诸名胜建牙握节之使邦君大夫与搢绅逢掖之贤豪长者多幼于所故识即非故识而耳幼于名者亡不延颈愿结欢张先生先生乃肯顾我幸甚坐未定辄命酒酒至则赋赋罢则谈谈剧则卜夜稍不迹方以内黛粉蛾绿肩随之矣盖咸以何点拟幼于惟幼于亦自谓通隱也筑室石

湖坞中貌点兄弟像而祠之始幼于之及处士公也虽甚见怜爱而义方斩然小弗称则
赐朴而嫡母叶太君欲而摩煦之若创其股生母许少君以有子故代家秉其诲幼于不
颀为慈幼于精專其思以奉父及二母于三子中最为得二母心父及叶太君相继歿幼
于刻像私室以朝夕起居至伏膺荐馈哭声殷殷不絕少君为之感动曰我幸亡恙是儿
修辞色而奉养我他日卒不讳柰儿目枯何其事伯起莊甚然伯起介少可而幼于多许
晚节虽小异趣然未尝一息而忘推兄也吹埙和箎洋洋盈耳矣痛叔貽蚤逝亡以为地
下者则谒志铭于余诸传谏哀挽多属之巨公名人云吾所不欲得不敢以加吾兄吾所
欲得不敢不力于吾弟人以为实录幼于念处士公先仲季父物其奉侍二父益谨所进
羹甘以日计非产之珍以月计衣履翫好以岁计五服之内宗戚中表有恃而室家者急
朋友之难逾于已若故诸生刘乔祖姚懋言兄弟讳昆徐玄素许高朱三重医士马应龙
游客张昂王人佐辈或馆饩或治丧墓或受孤寄或解纷难其始分谊不甚深徃徃竭财
力为之弗计也若素所敦重及贵人长者弗暇计矣幼于既以显重性又好客击鲜饮醇
之欢亡虚日以故环所居顾家桥里巷车骑冠盖委积前后不絕守令倾耳而待幼于亦
时有關说然不颀为所偏私人不能以是病幼于其兄弟所居重于二千石然善自挹损
舍人子有外鬪即被伤委顿犹好谢其敌而自引过至盗财物而露者犹掩覆之不使竟
也事详家儿私语中家儿私语者幼于所自着也幼于念以任侠姿挫产仅图籍存而许
少君益笃老不能舍之而北所蕴藉不得摠游迹渐近不敢过数百里外娶妇朱为吾女
甥贤亡子中岁为幼于置貳举三子而妇物三子曰里曰伋曰顷以伋嗣叔貽意尤念之
为仿颜氏家训九十八条垂四万言以示轨物他所著诗文又数十万言其行世者十之
六弇山人曰余读幼于私语遠本天道迩证人事上标先德下述己构喆昆懿交纤善毕
罗即毋论三子荅问为何所以立扬资事之道备矣所著诗文最伙不名一家言其旨亦
以先后为至未大要才固而溢学积而宏今不必离古不必合匠心成法过境辄会斯所
以为秬苑之雄乎哉古者亲在不称老今许少君八十七箸无害而幼于虬须猬磔双权
若玉饮噉御内如少年乃遽敛其雄心而谋束身之地以身托得无为吊诡乎哉吾敢以
其志志之且为约曰自此而吾与子所乏者非日俟而续焉可也

御史大夫连江吴公平岭西前后功志

前是吴公以御史中丞抚岭西而岭东西无不被寇者当是时御史大夫凌公以十
万众荡平诸巢穴而独以西寇属公公练卒搜乘广储蓄申赏罚转怯令勇因形为势寇
已厯厯堕股掌间而会谍得昭平三屯最强而孽最甚即励将士卷甲而趋大破之穷追
出其背鹵斩渠酋以下千三百七十余级俘血属三百有奇牛马粮仗称是捷上加禄一
等锡金币优已北三河池啼咳诸寇复丛起公议先其急者选将士分道袭击复大破之
剗其腑鹵斩渠酋以下四千八百余级俘血属三千二百有奇牛马粮仗蕝于前捷上诏

录一子入胄监锡金币差次之而公已八为右司徒矣未得代丁内艰去当公之破贼时輒行视要害立城邑民人其良者而储胥之俾專精其力于南畝画赋给役比于中土天子时时心念一卿士能寬我南顾忧今者安在盖甫服除而太宰以全岭之大帅请即进公御史大夫尽护岭东西诸将吏民一切得便宜从事于是岭西之诸将吏民欢欣鼓舞若离乳之赤子复归父母之怀而其威德之所流闻则岭东之人望公亦若望岁公至而士饱马腾将吏覬勲唯敌是求公曰不穀拜天子之命绥靖若曹不可究武姑以时消息久之府江之大桐江猺起与平乐昭平永安荔浦猺媯而抄略行旅剽处庐畜浸淫及远众议大征公曰大征费巨莫措也且示之声迫使匿也潜分兵为四哨属文武大吏将之几十余战躡其穴百十余处鹵斩酋渠以下千余级俘血属百有奇抚而即业者五百余家而亡何金鹅松栢深埭等寇复继起公即移师合岭东之劲为五哨分道掩擊复破之鹵斩酋渠以下八百余级俘血属二百有奇先后捷上诏录一子入胄监锡金币如前盖闻之岭东之地沃饶而其三垂迫于闽粤及西南诸水国无所不通道是故利在海而害亦在海岭西之地磽埆深岩大壑箐棘毒瘴徃徃而是自职方之图益辟而与猺獠接其人皆喜乱不忧死胜则猬集败则鸟窜是故利不在山而害在山岭东之害故驟定无论国家之于猺獠取羈縻而已间不胜其扰一搜捕之然亦仅仅取惩艾虽以韩襄毅之果王文成翁襄敏之筭亦不能尽快其志自隆万之闻执政者始务以威胜之决筴除剿于是凌公与前后大帅殷刘诸公皆极其兵力不避鎔耶之懼而贼之授首于锋铄者十已八九矣公之佐诸公当右臂时其兵力不踰胜贼乃能鼓其所不足而鹵斩恒过当及其继诸公为大帅其兵力数倍贼矣顾必抑其所有余而鹵斩若稍不称捷亦不时上公岂不爱肘金横玉之报顾上以节县官之帑而下以惜生人之命其爱有甚于肘金横玉故也语云霜雪之后必有阳春吾兹为岭右称休矣召穆公之诗曰矢其文德洽此四国公岂不亦仁人长者哉公故与余知交而中表陆生某御公德自岭归而以事状授余余为之叙其畧如此陆生倘以示公则为我并告公公今政成且入辅矣即有代者愿以班定远之语任都护者语之也公吴姓名某尝视学其地有贤声当二千石吏治时为天下最拜玺书金帛之赐云不独以武功显

张司马定浙二乱志

万历十年之四月兵部右侍郎铜梁张公肖甫兼右佥都御史来视浙师故有幕府亲兵四千五百人其人多括苍头郡民家子颇选而故胡少保倚之起战功饷资至麋县官廩不訾故赵尚书来代稍稍为裁缩然犹月一金而其兵分营九岁率以七营防海汛汛毕乃归是时承平久当国者有所向以棄孔为急而士大夫争言汰冗费稍及兵饷于是给事中疏请减营兵廩三之一无已而复请以新钱半之当幕府议钱法壅不行无所得食则相率号于两台使者居间幕府幕府吴中丞善言尝守吾郡用循吏治效驟迁不

习兵弗聽令予钱自如乃汹汹为恶语冀以恫喝止吴公而吴公益持之坚顾仅两台使言之诸司道傍睨亡助者于是兵有二黠魁曰马文英杨廷用媮其党噪于治饷金事王许之门许之跳遂阑入幕府吴公匿他室迹得之遂拥而至营所以窘辱之者万状两台使来为请命稍稍解然犹责吴公自书脍削状以库金二千为酒食资乃纵之归其明日二黠魁与他黠者自相团结更约束曰毋杀人毋掠财出入必媮队甲而中逵乃阳自缚以诣吴公及两台使曰吾二人寔为之请受法他无与也然兵皆匪办待矣诸公调知其状姑好语慰藉之莫敢谁何而具其事闻上庙议以轻用兵则五千组练乘愤用壮势何所不至轻用帅帅或贱且选懦则兵益骄而他鎮皆胠决擊振而起顾独张公贵臣自令至填抚江南上谷皆以谈笑埽内乱是可樽俎治也于是公出而得便宜行事之命吴以勒还里候勘公既拜命即促装朝辞而吴公候代于苕霅间亡何而市民变复作杭十万室五民蚁袭几与冯翊扶风埽迹来文渐密日相厉以湿束弗堪而城中诸栅各设役夫司干擻诸土著户捐钱粟募游手充之前二岁始更其法必以身受役者既惰不任又相率倚豪有力以免而游手骤失募亦怨上虞人丁佐卿侨处素舞文与市大猾相结假利便言之监司守令俱不聽意忿忿曰谓我曹无爪距营兵之不若耶既而谋诸市大猾曰官易与耳兵一振即茅靡且今跨襦裆子扬扬九衢徒手饮酒肉官杜门不敢加拂息而独柰我何诸大猾稍稍动而会佐卿坐他法郡杖而囊之三木诸大猾遂嗾众夺之亡赖子冀得为所欲为者立响应至千人谓一二荐绅是能免应役者相率焚毁其第劫财帛以逞于是遂破两台使者门尽挟其衣装以出监司而下走匿佛庐仅免而张公方与吴公代抵嘉禾而警至公问候人曰兵哨海者发耶曰发矣留者一营无故耶曰犹未动也公曰速驱之尚可离而二也于是从者皆惴恐无人色公谈笑自如以五月朔抵台治事而诸亡赖啸聚益众尽毁诸栅及他丽譙揭长竿裂所掠相衣帟之衰白刃而向台者可二千余且欲拔储胥以入公乃从数卒乘肩輿出迎谓之曰女曹毋反反则天子移六师至族女矣且女必有所苦与甚不平众乃以司夜役告曰吾所苦苦而豪有力者独不受役诉监司郡邑若无耳者是以不平公曰易也柰何以女一愤易女族即下令除之众始散去众虽已阳散而气益张其饥欲益炽乘夜复大掠诸巨室且徧火光烛天其器与巷哭声达旦公秉烛坐堂皇草檄谕以祸福质明而布之通衢众取裂之剽益甚公怒曰余奉命戢悍兵此乱民之不讨兵胡受戢已而计曰过可使也乌合可刈也命遊击徐景星俾以二营兵入召伍长而抚之曰前幕府诚误夫驱汝死而不使汝一饱汝宁无怏怏也今者使汝以功饱可乎众唯唯则又曰市亡赖子乱成矣且无他劳不可以汝曹例为我尽力讨捕之毋多杀多杀不汝功众踊跃聽命则又进马文英杨廷用密谓曰自缚而请者汝耶二黠魁谢死罪公笑曰壮士故不畏死虽然死法矣毋与而名者女为我倡众捕乱功成讎论赎有赏也即不幸死死义终有名今柰何不令天下称义士而叛卒乎哉二黠魁亦踊跃聽命公乃召徐景星出所从骁勇为中军俾营兵次之郡邑土团又次之严部伍明约束遂前薄乱民败之于菜市桥火场又败之褚家堂又败之官巷口又败之童

家桥皆即行剽所就俘累累反縛而诣台者百五十余人而丁佐卿在焉公前已要台使者至即讯得其倡谋者挟刃而腰金帛者九五十余人皆斩梟之辕门余悉放归舍于是诸亡赖子鸟兽散不敢复吐气而郊遂之猾谋为应者甫及门而遁唯恐迹之矣公上疏具其事大约谓有司奉行太过裁馘太甚苟欲以自成其名而不顾国体不察物情酝酿酖毒积久必溃夫兵变民变此特二端耳天下隱忧尚有深于此者庙议为之动稍稍厌悔操切言于上下公所言诸郡国有所寬減而賜公飞鱼衣及二品服色以示褒异公念此悍卒犹未丽法急之则或生变假他事以罪之或密掩而毙之则法不振且人人自疑因阳谓二黠魁曰功差足赎矣予之冠带榜于营曰还而饷饷如赵尚书时不以钱累若也咸帖然服独二黠魁者始贾众怒辱吴中丞而当其自縛时又要众以一死蔽若曹诛姑予我棺殮给妻子费众敛赠簠金数百既免而不复反橐始大恨曰成我曹叛名者二豎也而又卖我公既豁达大度治军虽不废法而不为烦苛众亦沾沾喜以张公幸赦我且厚我然其气不无寢溢往往遨遊廛市间儿子视其人而加武断焉人亦惴恐相奉承莫敢谁何公既以廉得各营倡乱者名属春汛复当发七营哨公乃令治兵监司徐君顾君辈建牙誓师甫严而游擊徐景星以名捕营各一人若陈德胜若方子龙若李文高若张贤若陈文满若吴章成若卢州诣台诘之曰女乱先也吾故欲贷女天子三尺不贷女遂斩之已复捕马文英杨廷用至曰女故自祈死今得死晚矣且女美衣偷食而骄于众又胁其资既免而不反橐夫复何言又斩之九九首陈辕门外而使使驰赦七营卒曰天子不欲尽僂女女自揣当死不今而后当尽力为国御圍众人人股栗已伏地泣曰赐我生者公也所不以死报公者有如日公又召其与讨乱民者二营谕曰吾得女主名而故隱之念向者尺寸劳耳且不欲食吾言二营卒伏而泣曰赐我生者公也即公不遗我尺寸所不以死报公者有如日城中外吏民耄倪謹且呼曰我曹今者有生趣矣所不以死报公者有如日全浙之士民俄闻之俱加额曰浙自是无警矣弇山人方卧病绪闻之客起而叹曰夫岂唯全浙吾吴自是无警矣夫岂唯吾吴环浙而省者皆无警矣吾不能他及当浙兵之初变而他幕府迫则为檄广额外优以媚兵兵醉饱倨谓市人若曹不父事我即一旦悔何及盖至宿昔犹惴惴焉今而后知有天子三尺者谁力耶当公之疏再上上大悦进公右都御史兼左侍郎趣还都其顾君两徐君而下迁賚有差而追褫故中丞监司秩人以为当云弇山人曰吾少长于张公一岁郎署时从六七君子慷慨谈说千古俯一世皆有余锐焉公独沈深雅靚藏用不露乃今信之矣夫市民之鼓乱也狂刃若猾公单车直入恬然而亡挠色要之集义所生者非直胆勇已也诛乱民利用速诛乱卒利用缓不佞窃或知之速而能审缓而能密则非不佞所与知也公之赴浙不佞尝为诗以周条侯郭汾阳期公真能不负不佞哉诗云君子如喜乱庶遄已君子如怒乱庶遄沮斯公谓矣

邢故河间望其先以国为氏周公旦之叔子所谓邢茅胙祭者也盖一再见于春秋而其仕齐者曰蒯瞶以节显仕曹魏者曰颺仕元魏者曰峦曰虬咸以政术显曰邵独以文学大显至唐而曰君牙者以武功显至宋则益显不可屈指其为州邑不尽同然皆中原人无有籍江右者明兴而江左之邢始散缙绅间及嘉隆而中原之邢乃复显其徙自河间而为山东之临邑者盖世世称上豪而岢岚公某以读书明经举乡荐遊太学为吏部选人得岢岚守满九载以节惠闻尝坐迕中贵人瑾称诏罚粟千石岢岚公橐若洗方忧之计无出一夕而粟山积于雉门较其数则倍之矣岢岚公有二子伯曰赠公某仲曰处士公某赠公之为经术沉沉也又尝哀然诸生间以故雅自负伯子都諫公如默成进士累金吏科都给事中而赠公时甫膺贡顾不肯受封曰使我何以见岢岚公然竟不第以博野司训终终而后得赠如某公官赠公有三子长即都諫公数长青琐廷诤岳岳有古直臣风而与其僚论事不合为所中谪郡司理谢政归仲断事公某豪爽有风槩例补太学上舍授并州行都司断事季封公某习经术不就傍晓医家言试礼部高等当得给事大医令念亲老乞德藩良医以归封公与断事公俱名能治生得计然白圭之法以宽息之而家隆隆起顾皆好施予义散其赢不顾尝合三千金新孔庙及学部使者贤之而旌以棹楔曰世德名家封公以子山西道御史侗贵封如其官自封公之上距岢岚公三世矣皆有衣冠不齷齪田里而岢岚公有一弟某不仕子某荐于乡第六人仕为宁晋令令中子复应选贡有声岢岚公四丈夫子长即赠公其次为某贡如赠公独贵至顺德郡倅叔某不仕季某举乡荐亦第六人名能诗而夭都諫公有九子长某以书事世庙拜中书舍人仲举乡试而会都諫公之见背早不及家某复以久宦削之九子者橐枵然也封公复先为经纪田产各直五千金甲第一区未室之俛半补太学而后治私断事公其相之矣封公有三子则今御史侗长而御史少即颖异十八而膺拔萃贡又六年进士高第以文学名海内其业分受之封公居恒称封公之治太史公也殆不减刘小中垒杜征南之于左氏日雌黄之与乙而丹铅加表矻矻无停手岂不贤于吾家子才误书倍蓰哉都諫公每曰吾在责琐十二年不如季氏一青黎二载叹其以仕夺也御史之叔若季为诸生擅奇儁故芥视科第矣其与中书君九人者距岢岚公而四世者也中书君长子某视御史为犹子而齿相若复同举乡荐诸舅弟亦鲜不具衿绅者此距岢岚公五世者也即他若宁晋顺德断事三公复不下数百指咸彬彬称是侍御谓余好谈说公侯卿士年表及荐绅闾闾之盛盍为我志之余谢不敏窃睹士大夫所称邢氏之盛于山东非甲而乙毋暇论崔卢李郑即元魏之际所谓曰峦曰虬曰邵者亦安能踰胜今日哉古之显以世胄次亦门荫此为滋生者也差易而今则必自七寸管搏而以大小得之此为拔起者也则甚难试屈指而数邢之显人不少皆拔起安在其相籍也虽然舜有膺德而人蚁附之岂唯人蚁附之即造物亦蚁附之夫栽培倾覆天之恒也是溉是封人之恒也余所闻于封公尚为德不已环临邑而里居者无不衣食于邢若庾廩然盖不止河之润九里已也

三吴之吏民日加额侍御有后矣都谏公而上遠不能悉以余所闻邢之显安在其不相籍哉惟是不佞之先琅琊着于晋于宋齐梁貂绵蝉联长淮并盈后千余年而仿佛复始几与中原之邢相望则所谓籍者庶几共之矣

旧丞相府志

入西华门数百武更入重门又百余武有大门北向其高与诸宫殿等为三门以通中涓指谓余此故丞相府也广廷延衰老树嵯岬其间已而有堂巍然南向繇堂背以入中涓曰此相府后堂也其壮丽亦可敌诸宫殿桧柏杂植皆数拱余东南一树亦老矣曰此五穀树也当初夏时其实若稻麦者则稻麦登为鱼形则大水已复繇堂背入薨栋逾壮丽曰此相府庭中十桧皆两列其本相距可十武而枝樛结为门若虬龙对攫奇恠不可名状曰丞相所植也丞相为谁曰故僂人胡惟庸也树之前数十武有■井曰胡相于井傍凿一孔别取井酒转注之诡为醴泉出邀高帝亲幸因而伏甲谋不轨者也自丞相府而西数百武复有门自西门而又西千武而始为西门楼则大内矣考之赠司礼监太监云奇墓碑与中涓所称者畧同奇南海人也以内使守西华门时胡丞相居第距门甚迓而欲谋逆诡称所居井涌醴泉邀上幸而伏甲以待奇侦知之亟走当蹕道勒上马御言状气鬱舌馱不能宣上恚甚左右挝捶乱下奇臂将折犹奋指逆臣第上悟登西皇城楼而眺顾见丞相第中壮士裹甲伏屏间数匝亟发禁兵捕擒之而后召奇气絶矣诏赠奇内官监左少监赐葬太平门北中山王墓之左有司岁时致祭嘉靖中守备高隆王堂等复上其事请于朝特赠司礼太监加谕祭而少司空何孟春文其碑石与中涓所指称正等但考之国史则谓惟庸以骄恣渐露不自安而会故所居定遠里第井忽生石笋水涌起数尺三世冢墓火光烛天遂以为己瑞有非分之覬会右丞相汪广洋以巽慝不能持正外谪益自疑而其子尝走马衢道中误践人死上怒欲使之抵偿惟庸请纳马赎罪不许于是构故相太师韩国公李善长诸将吉安侯陆仲亨平凉侯费聚御史大夫陈宁中丞涂节同谋逆节恐事露奏发之尚书商黻时谪为省更亦发之上亲赐鞫皆验惟庸与陈宁皆■〈石宅〉死节坐不早告亦死而姑寬善长史之纪兹事详矣第不及醴泉出要上临视而伏甲谋为逆也云奇发惟庸逆谋功甚大而史佚之且又以府第醴泉溢为故里第石笋发井涌起数尺何抵牾若此第上既登城楼覩伏甲掩捕之得反状矣而又何假于涂节之告变也岂节以事发始首故不免于死耶然既谓之丞相府则惟庸妻子皆居之不应在西华门内而堂室之为层者三又轩敞无可蔽蔽几内皇城直徼者一览而当悉之亦不待云奇之告上之登而后见也甲士入西华门门者岂不之觉察将无丞相府私第始犹在故西华门外后西华而广之并其第録故耶惟庸虽有宠见重似必不先赐第于中山王诸功臣且在禁中而又南向其高与宫殿等要或中涓狎旧闻谬指以为惟庸第故耳余故为志之而不敢饰其疑以俟后考

后旧丞相府志

旧丞相府云胡丞相府也既高大逾等而又在禁中南向余以为必非高皇帝所赐若自治第恐必不敢或以为中书省则又误按高帝初下金陵即故行御史台改为中书省居之其后称吴王徙居旧内而别立中书省以居左右相国平章左右丞明年即帝号徙居大内而旧内与中书省如故省中丞相以下至六尚书侍郎各有堂合当不下数十而此特五楹二层耳纵傍有废地东西仅百武不足以容诸公卿大夫也十三年革中书省析为六部仍析大都督府五之御史易台而为院稍杀其秩后院太平门外与刑部大理寺列今欲问故省府与台之遗址而不可复得矣岂即五府五部地耶然上下金陵即有此省府及台自当与旧内相近其后始卜大内以就钟山形胜居都城偏左一隅不应预建省府及台于宫之两傍也夫以国家全盛二百余年之迹泯泯不可复究而况南宋之行在与李唐之故宫又至孙吴司马晋宋齐梁陈千载之陈迹耶然彼尚隐隐有一二可指数者而今乃不然即使不佞而欲继平子太冲之绪握不律以叩掌故者其谁为我荅噫吾不意金陵之文献仅仅如杞宋可叹也已

弇州续稿卷一百四十一

●钦定四库全书

弇州续稿卷一百四十二

（明）王世贞 撰

○文部

△疏

为南京五城房差疏

南京兵部职方清吏司案呈奉本部送准都察院咨开题覆南京都察院右都御史海瑞题前事该都察院复议勅下南京兵部将南京都察院奏内刻内夫差备查府部寺六科等大小衙门要见某衙门曾设有直堂直厅皂隶若干名或各官名下各分台轿带马各若干名作何差遣系何钱粮各衙门有无看守宿风系何名役若干名若原无直堂

直厅者应拨火夫看守其街道曾否设有更铺系何役巡更各官私宅应否用火甲守宿其守宿巡风或长差或更番用其力与征其银孰便至于礼部出表拜牌内官监内守备国子监等衙门薶修打扫每年吏兵二部及各衙门常规取用者此时暂时短差将何拨送作何处分除小票滥取已经奉有明旨裁革者永宜裁革其中尚有开载不明或与在京不同者再行会同酌议停当仍行应天府查所属每年编摆各衙门应役差役逐一询访就衙门大小繁简通融剂量应减者减应留者留仍将合用之人画为一定之规分款开注会本具奏请旨施行然后刻为成书传示久远等因覆奉圣旨是钦此钦遵咨部送司查得南京府部院寺六科等大小衙门原设有直堂直厅银两多寡不齐各照额数支給各该衙门听雇台轿带马跟随各役仅供日间役使其街道设立更铺系民居照房轮流火甲巡更防守南都地广民稀各公署私宅坐落旷僻相离民居隔远火甲势难相兼巡守是以先年量拨五城地方人夫协同守门库子等役巡风守宿俱更番拨轮朝去暮来听其力役至于出表拜牌并各衙门薶修打扫俱系五城轮拨地方人夫一时应用悉照书册及行据应天府回糴所属编派各衙门应用差役似难裁减等因前来呈乞会议案呈到部臣等会同南京都察院右副都御史王用汲议照南京各衙门直堂直厅银两皆为雇役以供舆马之用此项人役及明始集投暝即散原非有干掇之役难以责之宿守至于火甲之设专为防护地方巡缉贼盗无容别项差拨南北相应一体但京师民居稠密公署私宅鳞集栉比铺甲便于看守巡军易于呵护南都地广民稀公署私居相去远卫卒单薄声援难继而户兵刑工等部俱有库藏狱囚文卷之属干系匪轻不免兼用五城地方各附近人夫协同看守轮流差拨夜宿支更晨回营业费既不伙人亦相安但行之既久弊孔日滋而五城兵马司渐多徇情滥拨所委吏胥又复乘隙科诈积棍便于包揽贫民窘于繁难原任右都御史海瑞目击其弊力为裁减刊刻成书上请以为永远之计而左都御史吴时来等复恐裁减之数尚有遗漏旷荡之泽或未尽沾再有兹请复蒙勅下会议臣等谨将奏刻内夫差除革议内条款先已裁革外其存议内五款逐一复加酌议如各衙门公署并公务打扫执灯等项暂取用于一时合用人夫相应仍旧者也若五城看监自有弓兵抽分竹木厂亦有军余可备看守帝王庙久已停祭朝天宫习仪报恩寺行香道众僧房亦可打扫各官私宅守宿更夫五名者减二名三名者减一名以上通计人夫一百三十二名相应减革者也各官遇有升迁离任看宅人夫即行停拨其应天府所属编派各衙门差役悉从旧议无容裁减今将会议过合用夫差逐一开具题请伏乞勅下都察院再加酌议覆请明旨咨行臣等将后项酌定夫差刊刻成书广晓居民臣等仍将拨差事宜置立循环格眼文簿印铃给发五城兵马司每日将拨过夫差顺序填注每拨一差给以号票与甲夫执照方许应役朔日将循环文簿送部司稽查吊对号票仍呈报巡城御史一体查考如有册外妄拨一夫私出小票冒取一物者遵照原奉明旨事理听本部及都察院并科道官指实叅奏施行庶事有成规人知遵守少省居民繁复之役仰诵圣主怙恃之恩无穷矣缘系南京五城房差事理未敢擅便

议处聽用船只以供大典疏

南京兵部车驾清吏司案呈奉本部送据管理船政主事王永宁揭称奉本部札付准兵部咨为钦奉事内开潞王之国合用船五百只除将到湾马快北粮等船尽行留用又将附近卫分减存粮船卫官座船催拽备用如再不敷又于官民船内雇用外仍差官賚文前来本部添取马快船三百只趋河路未冻押赴抵湾备行本职如数修理差官管押赴京又奉札付准工部咨取寿宫栝子松树九百一十八株坐派苏松杭州三府行令各该抚按專委府佐贰官总理采办完日责差能干官员押解带惯熟园丁沿途浇灌合用船只仍咨本部拨取马快船装载备行本职预备修造各等因查得本部马快船六百只专供进贡之用案照嘉靖三十九年亲王之国兵部除照例查留在湾各船外添取本部马快船二百只犹苦于难支今额外之内既倍于往日而取用之命又会于一时查本部马快船除先期出差者已二百四十只未尽抵湾兵部无从查核故添取三百只今在坞船三百六十只所余者止六十只耳工部支用尚恐不敷而今冬及明年贡船又将何赖事实难处伏乞批司查议等因奉批车驾司议报该本司署郎中事主事倪涑看得工部所取栝子松用船原无定数且业已属之各该抚按委带员役押解浇灌是于本地装载启行矣若又使之迂道南都请换部船不唯稽延耽误事多推诿恐树木移徙或有他虞彼此俱为不便似宜移文该省即用原船管押赴北之为妥也兵部取船三百只已奉明旨宜依数修理如期押解以慰皇上笃念亲亲之仁但奉旨用船五百只而本部已解三百只所缺者仅二百只耳兵部又多方设处必能足用其先差船二百四十只谅已陆续抵湾当为剩物似宜移文兵部仍以贡事为重将前船余剩者作速放回以备进贡之需其今冬及明年春夏进贡各船如龙袍船一十四只鲟鱼船一十八只枇杷船二只杨梅船四只鲜糟笋船四只藕鲜船五只菜臺船一只苗姜船六只芋苗船二只紫苏糕船一只制帛船三只共计船六十只此系上用及太庙荐新宜照常期不敢迟悞外若器皿板枋杉楠板木诰命苙布杉条竹器画匣板枋铜丝网鹈■（汙勅鸟）木等项此皆可以少迟者如蒙题请将前项钱粮俟船回之日仍照起数一并解发如遇公侯伯赴京賚捧内使升迁乘座暂照出差官员应付勘合令于各衙门取讨座船或径由陆路俟船回之后仍依旧例则贡事无误而他费亦可省矣万一不虞之事更出意外则查原减旧船未拆者量行修理俟后用完仍抵正数在今既非额外之费而在后亦无弃置之船其夫役则照例选食粮之人以充甲计各夫之数以贴银有事则用无事则止不必编审以滋扰亦不必另募而难散其银米则查旧例添取三百船约增行粮几三万石今升勺不用取之于此尚有余饶但候船并运于贡事无秋毫之损而增船添甲于运官无秋毫之资且会计今昔之数虽尚谓之节省而爱惜钱粮之心则皆谓之糜费凡在库之积皆朝廷所有臣子惟为皇上守财耳苟钱粮既省而又于国事无误亦何必于增修也等因到部

臣等看得兵部咨内称潞王之国用船五百只除将到湾马快北粮等船尽行留用又将附近卫分减存粮船卫官座船催拽及将官民船雇用外仍差官赍文前来本部添取马快船三百只当查本部马快船先期奉差抵湾者已二百四十只若加以到湾北粮及附近减存粮船卫官座船又雇用官民船只于五百之数似已彀足无复需三百之船矣第亲王之国圣朝大典宁备而有余毋宁缓而不足臣亦将见在聽差船只星夜催促修完措置夫食计重九前后可以下水抵湾之期必在冻前但船数止六百只今发行者三百留湾者二百四十则见在之船不过六十只而已而工部咨到又开取寿宫栝子松树九百余株坐派苏松杭三府行令抚按专委府佐贰官总理采办完日责差能干官押解仍咨本部拨取马快船只装送到湾夫寿宫栝松于事体尤重岂敢迟滞但前上贡之船既留而后之国之船复发一时实难措处况松株园夫既取之三府而不以三府之船径载使之迂道而来易舟而往不惟劳费更烦亦恐他虞不免又照明年二月以后南京内府监局工部太常寺衙门进贡各船若龙袍系供御之服鲋鱼等项系荐新之味制帛系庙祀之需决不敢有误常期其自今冬起一切器皿竹木铜锡等项似在少缓伏乞勅下兵部将潞王之国船只约彀五百之数已满或将旧留者放回或将续发者停止以备明年进贡之用如一时前船未回聽臣等酌量事体缓急为起数前后不必拘泥每年月期仍勅下工部将苏松杭三府栝子松聽彼处抚按衙门径自委官解送庶几两便不至耽阁至于将原减未拆旧船量行修理俟后用完仍抵正数一节盖为万一意外之虑顾在今处分业已无误且亲王之国之典不常有而寿宫之松不常移以皇上之神圣恭俭有不洞念留都根本之计而行撙节爱养之政者乎臣等皆以为仍旧便縁系议处聽用船只以供大典事理未敢擅便

为议处禁役工食疏

山东司案呈奉本部司狱司禁子孙守智等呈为前事守智等百名募顶广德句容等州县额编禁子看守狱囚昼夜不休诿意各州县多拖欠工食银两迄今三年屡告牌催辄以停征抵搪餬口无计衣装尽典恳乞转借支給以苏蚁命等因奉批该司查议看得禁子之役原系力差后因隔遠不便每名征工食银九两闰加六钱募役顶当实给工食银七两二钱余银刑具囚茶油等项公费出其中先该兵部题奉钦依各处该解皂隶银两俱限该年正月以里解部如有起解过限先将赍批人役叅问仍转行巡按御史查提耽悞官吏问罪如律抄招缴报今查各州县解到者已不免后时而通州昆山常熟嘉定上海武进江阴宜兴无锡等县全欠万历十六年带闰年分并十七年分银两和州宁国旌德当涂兴化全椒淳安麻城等县全欠十七年分银两昆山县仍欠九年分银一十一两常熟县仍全欠十年分并欠十五年分银一十八两上海县仍欠十五年分银九两通共欠银六百二十六两是以诸役屡屡苦告呈部牌催亦经数次随该昆山等县回称

见奉抚按明文停征夫人情一日不食则饥矧禁卒日事干擻夜严铃柝风雪之夕未尝
休暇以此苦役而责三年枵腹之人情委可悯各该州县耽悞之罪亦无辞矣但地方灾
伤上供诸费犹且议停必欲取办移文则被灾之地一时难措且欲待其解到则啼饥之
役坐视奚堪查得万历六年间该本部题为遵奉明旨追没隐匿财物事追火者陈洪借
约银两并追偿变卖房屋什物等项共银三千七百九十九两二钱二分先奉圣旨着南
京刑部收贮随发上元县库收外合无照所负之数题借支給候以后丰熟之年立限严
追解部抵补上不费公储而下可以济各役燃眉之急似为便计等因案呈到部该臣等
看得禁卒昼夜应役不得番休今重犯尚有囚粮而典守者衣食不给其哀迫恳告之情
夫岂得已但州县之玩愒固亦有年而目前之凶荒诚难措办臣等当查得本部各项贓
罚连年解济邊用已尽惟此一项尚可借支合无恭候命下于陈洪名下原贮银两内暂
借六百二十六两分散禁子孙守智等支领当差候年岁稍丰立限催征前后新旧银两
补还如各该州县仍前挨年容本部查叅及提吏究革臣等未敢擅便为此具本专差典
吏李万臣賚奏请旨

为地方疏

广东清吏司案呈问得犯人罗春招系南京留守前卫军有散拘在官本卫江东驯
象门千户所正千户陈郜于万历十六年十二月二十三日蒙外守备等衙门札委夜巡
向与省发周二邻住春因跟随陈郜就在伊家住宿万历十七年八月初四日午时有问
结伊鳳先存今故男伊文汉行至周二门首见佛前供有瓦香炉一个潜入窃取间当被
周二见获比时春在陈郜门首看见就将伊文汉左右颧颊左血盆左■〈月合〉膊左
右前肋右臂膊腰眼各打伤左肱肘脊背连两后肋两臀各跌伤仍用绳鎖见陈郜比陈
郜明知事轻要得邀功生事不合故违酷刑官员不论情罪轻重辄用夹棍等项因而伤
人致死者武官革职随舍余食粮差操事例又不合责令春同不在官徐仓将伊文汉拶
起致将手指拶伤复用夹棍将伊文汉两脚踝夹起逼令招贓伊文汉供无别贓比陈郜
仍令春等向伊文汉两脚踝夹处用榔头狠打成伤比陈郜见得伊文汉伤重令春叫周
二认前香炉比周二不肯出认陈郜又叫春向周二在官雇工人周禄说称只要你替周
二见官认前香炉我供你饭食等语至初五日将伊文汉带禀巡逻刘都督见得事小释
放讫陈郜又不合令春将伊文汉责令问结总甲王虎鎖禁更铺以致伊文汉负痛难忍
于本日辰时在铺自缢身死该南城兵马司俞兵马揭禀刑科并巡视王御史及外守备
等衙门俱批该城相验伤痕明白具由通详叅送到司审各情俱的将春问拟因事威逼
人致死律引例充军王虎杖罪送南京大理寺审久回司于春名下追给埋葬银两发遣
发落外照出陈郜有罪系军职另行案呈到部叅照南京留守前卫江东驯象门千户所
正千户陈郜叨职干擻恣行凶恶据伊文汉偶窃无主瓦炉计贓未直一贯原无重情辄

尔非法拷讯逼令招盗虽称自缢实系刑伤含冤者情有可怜酷刑者罪何所解相应参提究如律例縁系军职未敢擅便为此具本専差典吏蔡芳賚捧谨题请旨

乞恩勘辩诬蔑仍正罪削斥以明心迹以伸言路疏

近覩邸报吏部题覆南京兵科给事中王良心福建道御史王许之论劾臣侈矜旷肆縁由奉圣旨王某差照旧回籍聽用钦此臣本天地弃物无韉线之长而负丘山之慝以致言官交章指擿分当屏殛以谢公论圣慈矜悯犹令聽用臣但当席藁自刈饭蔬没齿岂敢妄逞浮辞上渎天聽第窃详王良心之论臣臣不当齿需次之籍王许之之论臣臣不当复称人于世使臣尚齿仕籍则臣生有余愧使臣不得称人则臣死有余耻据许之谓臣吴姬越女之艶充斥户内昆山弋阳之调错杂庭中且容一优人宣淫导欲伊族士夫羞之嫁秽于孙副使密揭于胡巡抚真之法典臣犹欲溺而庇之其污褻丑态尚有不忍形之齿颊者此臣所谓不得称人于世者也臣向因年近三十无子先臣存日为置二妾生三子其一病故今之存者仅生子老妾与臣妻而已爨姬樵青俱无可以侍巾栉者见在可勘也臣守先臣之教家僮大小数百指无一薄晓音律及妆饰面首者见在可勘也臣自癸酉葬臣母后既忝仕路不能终废声乐而于回籍乡闾之会不能独谢优戏前岁偶于公会见一优之长壮者年已四十余客指谓臣此孙氏之淫客陆象贤也臣实丑之不许足迹一践家庭今年四月胡巡抚访察枷号致死万口称快旋闻昆山县知县程达亦将孙氏之妇勒令自尽与臣风马牛不相及今忽谓臣家门之丑嫁秽于孙氏得非为孙氏游说者嫁秽于臣耶夫访察之由与陆象贤孙氏妇之所以死胡巡抚程知县可问也臣族之忝士大夫者运使三接主事周绍录事定鼎有无密揭可勘也其它谓臣杯酒艶句结官私之欢而嘱托以取盈杯酒往来之礼诚有之若为人解一事因而得一钱臣所未尝敢也见在道府州县有司可问也臣之乡搢绅以至于闾阎小民可问也又谓臣探要津过官经由苏杭遶道伏迎投刺请谒甚有陪送半月不返者臣自归田以来二载有余止是大理寺卿陆光祖约臣出会于宝带桥一饭而返光祖与臣同年世契且以名行相砥砺者也此外自九卿科道吏部但有经苏杭者毋论不及臣面亦未接臣一刺俱见在可问也又谓臣居藩臬惟厚罚赎以易奇货结交游臣厯青州兵备浙西分守湖广山西臬长不曾动支赃罚送人何况置买奇货唯任大名兵备时间沿旧例馈乡士大夫不过斗酒束素而已今虽年远俱有案卷可勘也又谓臣擢巡抚则扰百姓之供应索土司之馈遗票支四出致府县官有大手段难陪贖之怨縁臣驻札郟阳地非孔道日给资之廩银与百姓毫无干涉其襄南一带因奉明旨通行守巡裁节岁省千计承差小票不曾乱给一纸止是乡搢绅公礼查照常规动支解剩赃罚然务从简薄时有小手段之谓未尝一令有司陪贖抚院底簿可查也臣所属地方原无土夷止因风闻附近施州卫宣抚招讨长官身故累年通不告袭恒称护印土司于抚按衙门诤争岁无虚月臣窃

谓土夷不以王命为尊以印信为重将来渐不可长偶因条陈事宜谓土官必须告袭及施州卫不得勒索该部覆请通行先年给事中杨节以为失策尚不敢以为然今乃谓臣索土司之馈遗将误以臣为施州卫官矣兵部原卷可查也夫古之人于不廉者讳而曰簠簋不饬于淫乱者讳而曰帷簿不修亦可谓忠厚矣然一被其名则没世不齿今无故而加臣以贪淫之名又举一郡七邑之所共秽于孙氏者而秽臣臣不足惜所惜国体耳若良心之攻臣其持论甚正其事亦多实第不如所言之过甚耳臣罪诚有之臣当先臣之遘祸不能以死请最后获昭雪又不能固其匹夫之守而腴颜复出臣罪一也既出之后亦欲少有所树见而才劣识闇苟且岁月虚糜官廩臣罪二也情事既与人异不能攻苦服素以追先哲独行之风吴俗修口腹臣不能以恶草具奉客而有酒食之累臣罪三也性好泉石治一园而出后为家干有所增饰而弗能毁雅嗜图籍因傍置古器先产尽挫臣罪四也臣生平不曾延纳方士唯翰墨之客恃其旧知引类以来心实苦之而不能拒诚有如良心之所言者臣罪五也臣不能自閤其雕虫之技有所撰述或以浮誉见忌或以微辞取忤心虽悔之业已无及臣罪六也有此六罪与良心之所论者合而臣尚可以玷需次之籍乎且南中之攻臣者三矣不胜不止而留臣一线之息以资无尽之口臣固有大耻抑且有大惧为此情实迫切恳乞天恩勅下吏部都察院通行各该衙门从公覆勘臣言果无一虚然后正臣之罪将臣原官尽行斥削以谢言路臣布衣耒耜老死无憾若臣言有一虚即盘水加剑有古之法典在臣万死亦无憾不胜恳迫激切之至

为恳乞天恩辩明考满事情仍赐罢斥以伸言路疏

本年玖月贰拾肆日接到邸报南京广西道监察御史黄仁荣奏为大臣故违明例欺冒恩典恳乞斥夺并究司臣扶同欺罔以重考核事内叅臣滥冒考满恩典缘由奉圣旨吏部知道钦此臣奉职无状名实未孚致来憎口自当杜门藉藁仰候明谴夫复何言第于心迹未明事体未一而以臣之故波及铨部大臣不得不一白之于君父也臣于万历四年内以巡抚郟阳右副都御史转南京大理寺卿未任该南京给事中杨节论劾臣奉圣旨王世贞既操守未亏着回籍听候别用于万历七年内起补应天府尹未任间复该南京给事中王良心御史王许之论臣奉圣旨王世贞着照旧回籍听用至万历十一年科道等衙门会荐起用十三年内起补应天府尹随升南京刑部右侍郎臣以夙病不能莅官蒙恩准在籍调理俱无到任续该抚按衙门屡荐及南京礼部尚书袁洪愈特荐吏部题覆起用至十五年十月推补南京兵部右侍郎次年三月初一日到任管事扣至十七年六月初二日通前右副都御史历过俸共三十六个月例应考满查有吏部见行事例两京考察论劾改调者但以调官之日为始不得一槩通理臣思得两任所支之俸皆兵部侍郎与巡抚都御史相接中间虽补应天府尹通无到任侍郎为升任之官所支非调官之俸且先后再起俱由廷荐非闕调除但既查有新例不敢隐蔽前情径自赴部

而三载考绩有黜陟幽明之典又不敢不行申请仍前支俸管事以故备由移咨南京兵部转咨吏部以为进止续准吏部咨称虽系见行事例又有万一偶遭诬误无玷公评自当另议不以改调为拘及查本官文章行谊望重士林久贲丘园再登廊庙正所谓公评无玷不应以改调为拘者也前后所历过俸月自应通理等因臣方敢于六月初二日诣南京吏部过堂以初四日离任行至淮安地方接得邸报蒙恩升南京刑部尚书比时既已离旧任于考满事体不容遽已即将南京吏部咨结通咨到吏部续准吏部咨题请父母本身及妻诰命縁由奉圣旨准给与及题请荫子王士驩备详节次回籍縁由谓臣虽经论劾然节奉有前项明旨于行检无碍奉圣旨准荫夫荣先录后希觐圣主华袞之褒以为终身重此是臣子至情人孰无之臣岂能独有所异惟是不敢毫发隠蔽以冒叨非分之恩泽此则臣之束发自励而不敢渝者也且臣于将满之际移咨吏部止具前后出处及所实历之俸以请耳非敢有所欺罔也及得咨许而后行闻命而始以南京咨结送吏部据以题请其荫子疏内明开被劾縁由亦未尝有所欺罔也夫该部具实以闻皇上据理以许虽天地高厚之恩以庸劣具臣当之心有所不安耳法岂有所舛哉臣自郟镇以迂直失权臣指再被訾擿闭戸读书未杀世故者一纪于兹矣未尝染指幸门希心要地藉使前者苟赴刑曹之命比当再满恩典久沾何乃舍昔分所应得之官而今遽躐希所不易得之典哉御史黄仁荣独据以为臣罪极其丑诋至谓臣荒淫纵肆曾经给事中杨节王良心论劾夫劾臣者节良心尚有王许之仅叁人耳先后论荐者无虑数十人岂三人之劾者独当而数十人之荐者皆不当耶岂荒淫纵肆之状三人与仁荣独知之而数十人者皆不知耶又以臣气力足以摇撼该部欲荫则荫欲升则升且谓侍郎李江六年之满不升而臣三年之满骤升为骇荫子之说前已明之不敢复赘彼不知臣之通仕籍已四十三年矣班行之内无有在臣前者若使据三年六年之资而不通计科第之远近则吏部一守资簿职耳何名为铨衡也臣岩穴久废之人强起就吏又在遠地散曹焉能有所摇撼又谓里名胜毋曾子不入盖责臣以大义不当作刑官是也臣父昔年见陷权奸身蹈奇祸臣岂惟不当作刑官亦不当作官矣第先帝雪臣父之冤复其故秩臣故不敢不出皇上表臣父之功赠尚书赐祭墓随召臣于草莽之中臣又不敢不出臣所愧者出而碌碌尸位不能报上恩耳况东西南北惟上所命国家法制森严非若宋人之可以情请而他改也夫挟言路之势至欲废百年之台规而独析吏部之条必欲改一岁之磨勘臣以为似失轻重也且仁荣待臣非薄当臣之入考满使人致书币于扬州寄名笺索诗为其父母赠比时既不以臣为非一旦决裂若此其意殆更有所为耳臣衰不待年誉不胜毁苟课臣以考功之状则毫无可称擿臣以中正之条则动有余咎纵仁荣不言臣固自知之今大臣之体日削言路之气日张仁荣之论臣不胜不止臣不去仁荣亦不去皇上固不忍以台谏之单辞而伤铨部寛平之体亦岂宜以臣之一人而沮台谏伉锐之锋伏乞先斥臣归里以谢仁荣仍下吏部都察院将臣所得恩典应存应褫定为画一臣虽蔬食没齿了无所憾臣不胜惶悚待罪之至

弇州续稿卷一百四十二

●钦定四库全书

弇州续稿卷一百四十三

（明）王世贞 撰

○文部

△疏

为光复孔庙旧典订定从祀诸儒以昭圣化以慰众心疏

臣自束发而从诸生后诵法孔子髮今已尽白矣窃覩圣道炳如日月愈久愈新即自汉唐宋以迨前元而隆崇之典亦愈久愈盛我高皇帝因仍无改且式廓之至宪孝二朝采贤臣王恕周洪谟等议佾舞则益而八笾豆则益而十二盛矣极矣蔑以加矣世宗皇帝下明诏易像为主易王称师此万古独信之真足破迂儒浅陋之见然其意未尝不欲致其隆崇而一时辅臣礼官以言礼骤贵曲加迎傅遂至佾舞笾豆之数皆有所裁损下仅同诸侯王而大成殿名更为先师庙上不得与释道并绅衿之士入与骏奔色沮而不敢吐者六十年矣天下后世不免有所窥见以圣主隆师重道之盛心附末世尊君卑臣之微指臣窃以为奉行过之也今幸遭礼乐将兴之会当议论无讳之朝若不以时改正后复何冀为此冒昧上请乞下礼官及馆阁大臣会议除木主师号外其余一切光复其于圣化不为无补臣又考得庙祀所谓四科十哲者盖孔子偶追陈蔡之厄思不及门之士而记者追列其人耳不然何传道若曾子者而不与也顾使宰予冉求滥竽其间窃所未晓夫宰予相齐身中田常之难其中所纪虽不尽核然而朽木粪土之谓见鄙圣门短丧自便之私得罪名教冉求为季氏陪臣聚敛以益其富鸣鼓之攻非徒之责凛乎霜钺陛下以孝治天下故追咎权相之夺情以廉励百僚故屡饬有司之掎克而予求于臣子之伦何如天下万世之论何如乃使之偃然于大圣一堂之上与颜闵比肩何其谬盩不伦至此也臣以为宜降置两庑必欲补十哲之缺则有有若南宫适二子其言行盖为纯嫩庶可从颡孙师之例进补臣又考得嘉靖年间于从祀诸儒有所进斥固极精当然所进欧阳修者文章士也其行谊政术亦在中上独尝议摘易系非圣无法而骤贵之臣祇以其所著濮议微合新礼遽登从祀臣以为登欧阳修不如登范仲淹仲淹力振

纲常首扶神器又能于戎马倥偬之际以中庸诲引张载俾成大儒仲淹之贤视欧阳修何啻倍蓰合无并将臣前后所言进斥四科十哲及两庑诸儒道礼官馆阁大臣会议定夺庶几圣道益隆圣德益显臣本腐儒窃覩追隆孔子之典委益于累代而骤损于盛朝不无有慨于中及抵南京尝以春秋丁巳顾瞻庙貌徘徊堂庑私心摇摇怦怦如有所失敬披肺腑一得之愚遂忘尸祝越俎之戒陛下采之公议归之独断臣不胜幸甚斯道不胜幸甚为此具奏

为申飭部规傍及时务少有献纳以効裨补疏

窃念臣海濱弃臣不谢时宜苟安畎亩飭中待尽陛下过采廷臣之议还贰常伯之秩俾赞留钥恒慚滥竽亦欲少抒一得之愚奉佐维新之化而知识短浅志虑昏忘间者傍观延采粗有闻见厘为九款其间多有臣职守所關者伏乞圣明勅下该部斟酌覆请其应行应寝非臣之愚所敢与闻为此开坐具奏

计开

一武举之设选用新任幼官指挥千百户及各官应袭儿男示以有勇知方之教使备干城腹心之选且许六年一次比照武举事例取其马步射技及策论明习中式者得以应试会场兼资推用踈劣不堪者黜革但以武举之法而加之黜革之人则是首二场之不合式者反得以拙避咎而便骑习射之士徃徃以长见短其于事体大属不安合无将初贰场马步射不入格者仍令入第三场其骑射拙而策论颇工或策论拙而骑射甚精者俱免其黜革若有奇材伟畧明识博览绰绰乎艺文之表者即杜预之拙不穿札韦叡之弱不习骑间亦破格收录一二臣又考得唐宋以来天下郡国俱设太公望庙配以穰苴孙吴韩信诸葛诸名将今独两都有武学而南不为太公立庙国家采其策而畧其祀读书而忘其本甚缺典也合无于南武学隙地更创太公庙一所仍查前代旧典以诸名将配俾师生于丁日释奠先师以戊日释奠太公庙行礼庶使纓弁之徒少知报本之谊而于振扬武功作兴士气亦不无小助伏惟圣裁

一国家之制公侯伯及武职大小官员上下马不得用机衣去地必过五寸非直以其纨袴而故裁之盖欲其便骑习武备一时缓急之用也节经言路申明奉有严旨两京一体遵守然臣自入南京所见都督锦衣下至坐营官无不乘輿以两驂肩拥者盖武弁之门其有蓄马之枥寡矣积偷成懒积懒成忘浮慕荐绅褻博之风豢就纨袴骄惰之熊尚安望其披坚执銳分士卒横草之功抑控从送工疆場趋风之技哉臣以为所当急行禁革如有犯者聽臣本部及科道衙门叅究重治若文臣一槩用輿出入非臣职守所敢

与闻独兵马指挥职在干掇役当奔走似与武臣事体相同当一体禁革伏惟圣裁

一南京叅赞机务实兼内外守备之职而分理之非直以佐行文移苟且具员而已有匡救弥缝之责有防杜遏折之机是以职居夏官而班首六卿时当考绩则免其离任何者诚重之也今每遇叅赞缺守备官倭以旧例不行会请署事官员苟徇一时之便罔思留钥之重相沿成习殊非事体臣以为南之叅赞重于北之协理协理缺则兵部为之请署叅赞缺则守备当请之九卿会行兵部右侍郎无侍郎即行别部尚书侍郎之掌印者兼理其于慎几微裁横肆不无小补若曰领勅官非奉上旨不得径署则提督粮储操江大臣独非领勅者乎而何以会行署事也伏惟圣裁

一高帝统一区宇化家为国一时功臣如六王者既以弘治诏官其后人为锦衣卫指挥使又以嘉靖诏进爵通侯世世勿絶恩德至隆渥也而一时当事大臣不能详考故实独遗所谓太子太师颍国公傅友德太子太师宋国公冯胜者考之友德于洪武三年以战功封颍川侯其后下秦陇转破阶文遂定西蜀高皇帝躬御天藻首颂肤功寻统大兵三十余万荡平滇南拓土万里归启公封数提将钺终老牖下胜于洪武三年以平定汴洛秦晋功封宋国公列于卫国公愈之上自是连总雄师北殲强敌勋臣榜中名列第三止是金山之役偶以一眚微忤上旨然任遇无改名爵如故二臣之歿在洪武二十七八年间上既倦勤于政一时勋贵大臣通未有议及赠谥及袭封者后世因其优恤之微遂饰以嫌忌之说使高帝之心不白累朝之典尚泯臣以为是二臣者功不下六王而报同几庶甚非报本追远兴灭继絶之义也合无勅下吏礼兵部会同馆阁大臣查考金匱石室之藏详核二臣社稷之勋或追崇王爵或加赠上公赐以易名之典仍推求子孙比照弘治六王事例荫録指挥等官倘用事人为嫌则汉之末季尚有追录酈绛之后者宁谓圣明御极而有所不逮也伏惟圣裁

一臣以万历二年任郟阳巡抚尝极言勾军远戍之苦大约谓应勾者孱弱之氓就毙道路奸黠之辈甫至即逝且以一军而致累押解二人使之无罪而废庐产鬻子女触冒寒暑凌厯瘴险以与军共一旦之命于万里之外请令于原籍五百里内从便改补则以天下之兵补天下之伍而伍不缺且其便有四应勾之户乐于近而不易规匿使吏胥得策为一便应补伍者宜于水土而不至困絶为二便近则不逝逝亦易迹为三便解户不至破家为四便盖疏上而部臣以方遣清军御史恶臣沮挠寝不为覆盖十余年而勾军远戍之苦日甚一日未能继臣而言者又臣至南京兵部见各都督府有解军湖广四川者一军而用千户一员舍人一名给驿传送计其乘骑传廩之费往返不啻百金且方今审慎邮传至监司守倅科道部属之任不给符繻而护一罪人至戍所乃屈卫官主之又使之驰驿往返何政体之倒置一至此也合无勅下该部将臣前疏详酌通行及行本

部此后解军仍照外县金解伏惟圣裁

一南京鞬毂之地其一应差役最为烦苦而迩年以来贫富不均轻重失剂大至破家小亦损橐其弊端多自五城兵马指挥盖兵马指挥起家贵郎不繇经术猥巧捷给之才虽不乏而廉公恪慎之守多不闻臣自入京以来怨讟之声满耳窃谓上元江宁二县知县本系亲民之官又皆科目之选而于编役一事了无所關甚非事体合无今后遇有编役五城巡视御史会同应天府行上江二县正官同兵马司官编审呈请裁定庶几私弊肃清人心协服妄意此法于北京亦便伏惟圣裁

一上元江宁二县知县高皇帝盖仿古长安洛阳二令之制而高其秩为正六品非特标异赤县实欲昭重神京其后更以秩高不得与给事御史之选即治行称最者不过为散曹郎次则郡倅州长而已且在京鞬之下颇多牵掣遂使甲科推避不肯就选而类以举贡充之任者志望日以卑事权日以轻而体面日以杀甚非高皇帝标重神京赤县初意也臣又思得府之下为州州之下为县天下之州大约二百有奇而雄紧者居其半大则连城小亦百里其体高于县而止以格不得给事御史故甲科之选遇之则蹙额而思避士民之品及之则抵掌而见狎及主爵之抑之也虽以高第入副曹郎不计旧资惟录新俸授主事者高卧而得监司而此犹不敢望郡守往往神采沮废威令不行亦岂古时贤君所以重守令意也合无此后上江二县知县缺必以进士二甲选末或三甲选首补之政绩卓异者比照部属改科道事例不妨取擢其宛大二县及顺应二府推官亦同凡遇各州正官缺亦必先其雄紧者多以甲科除授次则及县令之有声实者升补入佐曹郎论俸升迁必从州任并筭若有政绩卓异者六年之外超补郡守三年之外径迁吏礼清曹庶物情既平吏治可望伏惟圣裁

一贪酷不谨官员遇朝覲考察累朝奉有明禁不得收录至于诏恩加级复官通不覃及祖宗德威明若日月严若霜霰而自近年以来矫抵过正务通物情至壬午一诏不申朝覲考察二禁一切径行复官至因而加级者有矣朝覲虽极贪酷有指不行提问矣贪酷去官者不追原领诰勅矣此何以激惩百吏慰服众心合无勅下吏部都察院查照累朝诏旨通行天下凡遇贪酷不谨官员一切改正不许复官加级提问军徒追夺诰勅如例伏惟圣裁

一苏松常三府财赋甲天下半而簿书期会狱讼兵防徃徃称是旧止以按察副使一员统之精神伎力管摄难遍奔走逢迎疲顿不支以故设有叅政一员专理税粮坐札苏郡苏郡之人以不堪抚按驻节之烦而并厌之倡为阻议乍设乍革其后巡按御史邓鍊请复而不果今者新设水利副使许应逵于松江其人资望已深名位故重合无量升

叅政一衙令其兼管税粮不妨于松江坐札大抵水利方兴之际则以水利带税粮水利既通之余则以税粮带水利员既不繁事亦易措且此二官实相表里言者若以其扰费而复尼之臣窃谓天下诸藩之赋大者尚不敢望苏州一郡而设有藩臬二司有设税粮水利各府俱有守巡兵备等官岂独易于诸藩而难于三府也又岂独诸藩之务繁于三府而三府之供亿窘于诸藩也夫屑屑焉为朝夕饷粥缕析而铢计此闾阎之氓所竞而荐绅大夫之所不言也臣又有欲陈者即三郡有巡抚有巡按有操江有巡江有巡盐有巡仓而以一兵备应之到任必谒出巡必迎必送其抚按年节生日小有吉凶之事必叅是尽收兵备之日力而委之道路也窃以通行一切禁革为便伏惟圣裁

会劾司礼监张鲸疏

臣等窃覩邸报该科道衙门交章论劾提督东厂办事官校司礼监太监张鲸及锦衣卫提督办事官校左都督刘守有等罪状皇上于御史何出光疏辞批下法司将事内有名人犯提问刘守有革任回籍张鲸策励供事该法司问明奉旨邢尚智监候处决李登云张继德烟瘴地面永远充军独于张鲸止令痛加省改策励供事而鲸弟都督张书绅所犯亦从免究以故中外汹汹不平法司抗辞执奏九卿大臣科道等官聯章论劾而吏科给事中李沂辞尤愚戇不根致触圣怒下镇抚司用刑严究其批谕内阁九卿虽云张鲸已有处分而所谓处分者则但听其引疾乞休准私宅调理而已夫私宅调理者所以处中贵人老疾之辞而非待罪人之体也张鲸罪至无将法所不宥皇上之意不过念其供事日久侍奉微劳不免屈法以示宽未必予假以需用而遽迓物情传闻惊诧意张鲸必多方以求复进蓄愤以思一逞且谓刘守有重臣也一疏而斥逐甚易邢尚智等余党也一献而死戍不疑而元恶大憝之张鲸乃宽假之优恤之不一而足臣等未测圣意所在第窃闻之书曰从谏弗拂去邪勿疑又先贤诸葛亮云宫中府中俱为一体黜陟臧否不宜异同今皇上之待言路若此其待近习又若此臣等不知于从谏去邪宫府一体之谊何如也且三尺法者高皇帝所定以贻皇上者也九卿大臣皇上所与共理天下者也法司皇上所用以正纲纪者也言路皇上所藉以发奸伏者也今以一张鲸而骖三尺之公法以一张鲸而屈盈廷之公论切为皇上惜之臣等职在踈逃见多后时特以备员部院宜切股肱上不忍累皇上之圣德中不忍釀宗社之隱忧下不忍丛天下之指议为此激切具实上请伏乞大奋干纲将张鲸仍行尽法究问或谪发南京闲住遗下监厂职事急选老成清慎之人代之明示中外不复收用其李沂见奉廷杖死生未分倘蒙小减俸以微职効用邊徼则陛下雷霆之威更为解释而日月之明无不离照矣天下幸甚臣等幸甚

披诚献言仰裨圣德圣政疏（系南九卿会上具草）

臣等恭阅邸报内朝仪自万历十六年九月以来皇上视朝稀简乃至正元嘉会万国嵩呼策士金门传胪玉殿国家莫大之典俱未蒙临御逖迩臣工谒辞思一瞻天表亲承德音而不可得寻奉圣谕朕近因动火免朝臣等不胜忧惶乃今询知圣躬万福而两月以来犹然未闻视朝臣等于上忧圣体之念虽少安而仰虞圣德之心则转切窃唯我太祖高皇帝栉风沐雨以取天下御极三十余年未尝一日不视朝亦未尝一疏不躬览故能统一华夏享有上寿衍祚无极皇祖世宗皇帝虽以晚年躬修玄理迹若倦勤而亲阅章奏朝发夕下手揽干纲威摄羣小然凭几一诏尚有余悔乃闻近日逖迩章奏少或诋諆时事或触冒近习辄留中不下二祖七宗以来未有如此者也祇是正德中权奸刘瑾朱宁江彬乘上不省章奏盗匿私家大小数千余本后皆举宗殲夷始将原本搜出贖讯史册以至于今此前事之明鉴也臣等于上年十一月内及大小九卿科道等官追论司礼监太监张鲸罪状乞行斥逖亦在留中数内臣等所以不敢死诤者窃意皇上前已处分必无系恋而比闻天怒不恒圣衷未定小人睥睨覬觐之情当何所不至羣党趋附羽翼之谋亦何所不有万一复寄要枢彼必创为迎合之策以固其宠收召不逞之徒以张其权尽修睚眦之怨以快其志广开苞苴之路以补其橐貲忧社稷流毒缙绅窃谓皇上既以天下公议而去之不当复拂天下之公议而用之也抑又闻之醇醲适口而为腐肠之药妖丽悦目而为伐性之斧五步之内怒而流血非万乘之剑也屏帷之间不备不虞非九重之固也皇上之宝位乃高皇帝所授之位皇上之圣躬乃先帝所寄与天下臣民所仰属之躬伏望上念宗社之系为重下不以臣等刍蕘之言为轻日御朝门躬亲庶政俾臣工快覩四夷朝贡之使仰瞻天颜清豫忭舞欣悦凡有章奏实时付阁拟票该部覆题行止内节嗜欲之好外杜奸邪之窥亲近儒臣讲详治道使经筵日讲之规不致久废将见圣德日隆圣政日媿臣等幸甚天下幸甚臣等虽在隔逖分均股肱不忍默默尸位以故不避斧钺披沥肝胆冒昧上陈不胜悚惧战栗之至为此谨具奏闻伏候勅旨

恤典事疏

武库清吏司案呈奉本部送据原任南京兵部尚书今病故阴武卿男官生阴镕通状告称有父阴武卿由嘉靖三十五年进士除授南京户部云南司主事丁母忧复除刑部浙江司主事升本部江西司员外郎陝西按察司提督学校佾事江西布政司左叅议本省按察司副使隆庆四年改广西提督学校副使福建布政司左叅政万历二年升江西按察使陝西布政司右布政使本司左布政使应天府府尹太常寺卿万历十年升都察院右副都御史巡抚保定地方本年六月内历三品俸三年考满具奏奉圣旨阴武卿着就彼复职蒙给诰命授通议大夫荫一子入监读书时因边夷内附叙录军功获蒙钦赏寻升都察院左副都御史協理院事兵部右侍郎转本部左侍郎十三年三月内历三

品俸六年考满具奏奉圣旨阴武卿授正议大夫资治尹屡因军功俱蒙纪录十三年八月内升南京工部尚书十五年循例自陈奉圣旨卿职司留土宜益用心供职不准辞寻改南京兵部尚书叅赞机务不幸于十六年七月二十九日在任病故缘照国家旧典凡两京文官二品见任并致仕病故者例有赠官赐谥祭葬录荫况历尚书实俸已经三十三个月偶因王事劳瘁染疾身亡相应遵例奏请缘谕只身扶柩还乡并无丁男堪以诣阙不得已谨将履历缘由备状赴告代为题请等因送司案呈到部卷查本年七月二十八日尚书阴武卿病故随该臣世贞等题报去后今准前因臣等看得本官才识精详行业端慎入仕三十三载无公私纤毫之讥居官一十九政有乐利久远之绩视学则宏菁莪之化屡腾荐书抚畿则着保障之猷数蒙优赉迨赞留务逾展吁谋绥辑流移驯扰骄悍人但见其镇静之底绩而不知其拮据之苦心至于羔羊之节终始不变易箠之际垂橐萧然伊男匍匐奔丧间闕扶柩势不能叩阍陈情恳乞身后恤典臣文华有交承之谊臣世贞托僚窠之末知之最真悯之实至查得万历初年本部尚书刘采吴岳致仕身故俱蒙圣恩备予赠谥祭葬又上年内南京都察院右都御史海瑞病故右副都御史王用汲代为题请恤典今阴武卿历官深于海瑞勤事着于采岳臣等代请又与用汲相同为此据实具题伏乞勅下吏礼二部俯赐给与赠谥祭葬庶几恩造有终劳臣知劝缘系恤典事理为此具本

弇州续稿卷一百四十三

●钦定四库全书

弇州续稿卷一百四十四

（明）王世贞 撰

○文部

△疏

衰病不能趋任恳乞天恩特准致仕以保余生疏

臣年五十九岁系直隶苏州府太仓州人嘉靖二十六年进士累官都察院右副都御史提督郟阳等处军务升南京大理寺卿听用万历八年内蒙改应天府府尹未任间该南京科道官王良心王许之论臣纵肆奉旨照旧回籍听用万历十年内科道衙门举

荐人材内有臣姓名吏部覆准起用十二年正月二十六日覩邸报吏部题为缺官事圣旨王世贞起应天府府尹钦此臣行能浅薄出处乖踈生平不善雕饰以来憎口方闭门思讐没齿无凯猥蒙圣恩过采言官之荐旋允铨部之请铲瑕洗垢起骨嘘枯俾尹留京复齿九列今干行在御离照当天朝靡幸位野鲜遗喆臣虽至愚极陋亦思依附风云驱竭犬马上酬生成之大造下补东隅之曩失而赋分有定与愿相左蒲柳易衰桑榆渐迫自往岁一疾踰历三时虽藉医药强起称人而髮白殆尽齿余无几精神耗弱动止曠惫若遂竭蹶趋命必将委顿道途即使龟勉赴官亦当昏忘职业又窃思之臣所可见者不过韉线之微而所愧者乃有丘山之累夫以旃席之上夔龙接武弓旌之地麟鳳萃止而以衰病不肖如臣者叅之小则有滥竽之讥大则有败羣之诮亦非所以裨益治功称塞德意也臣情出由衷事非得已伏乞勅下吏部许臣致仕仍守闾井臣未死之年沐浴圣化歌咏大业或可少効涓埃之报无任恳切待命之至

旧疾转剧再乞天恩赐容仍守田里冀存余生疏

臣于万历十二年正月内覩邸报补臣应天府府尹自揣才力衰庸不堪驱使已具本陈情乞休去后本年二月内接覩邸报吏部题为阙官事推得臣与太常寺卿温纯俱堪任南京刑部右侍郎奉圣旨王世贞升南京刑部右侍郎随据部咨到臣比时臣窃自念世受国恩生乏士节虽亦敷历中外粗効犬马之劳而虚糜廩禄未收桑榆之效陛下体之仁不遗葑菲温纶之锡再贲蓬茅臣虽蠢陋无所知识岂敢忽忘蹇蹇之忠株守硜硜之见坐畏驱策偷即宴安而小人福过灾生心长晷短旧岁邁轴之余转成膏肓之患即今胸膈痞闷头目岑昏肌肉渐消步起无力犹冀圣慈俯亮乞骸之请获遂丘首之私乃于三月二十三日复覩邸报该吏部覆臣疏奉圣旨王世贞着遵新命赴任供职钦此臣虽欲自力龟勉就道而病势转增医药罔措生趣渐远死期垂迫窃复自思所以早衰之故祇缘生稟既薄举动任情不思濡首之节竟乖伐性之戒营卫踈脱真元耗漓积渐至此内悔何及夫慕虞廷都俞之盛者虽不敢希夔龙之接席沐舜世仁寿之风者或庶几与鸟兽而冯生陛下若还臣以一丘赐臣以余日尚可希冀万一苟完残躯臣实迫切无所饰假伏乞勅下吏部查覆许臣致仕或在籍调理不胜感激俟命之至

衰病不能赴任恳乞天恩赐保田里疏

万历十五年十一月初十日接到邸报吏部题南京缺官事该南京兵部缺右侍郎推得臣与南京大理寺卿舒应龙俱堪任奉圣旨王某起南京兵部右侍郎钦此窃念臣以革茅下士蒲柳弱质于人无所比数先年缘病得衰积衰成懒以故并托物外之迹自远维新之朝盖再蹶而不敢凯出再起而不能应召者于今十有一年矣今年九月内陛

下采廷臣之议伸礼官之守俾臣之先臣某得沾赠官祭葬尔时臣即拟竭蹶奔走叩首玉阶而病不任行且例无亲谢仅以一介单辞干冒宸严方切悚惶莫知所措不意复尘启事获玷除书夫自古君上之恩莫大于荣施其亲而人臣之感恩亦莫深于得致所欲于其亲陛下之恩若此苟非木石其躯孰不镂骨思报即使肝胆涂地亦且并心不辞况陛下躬被尧舜之德勤思唐虞之化公卿大夫涤虑而奉职业搯擊而谈仁义岩穴之士稍有一长自见一识可采者亦延颈而思効而弓旌之召再及于臣臣虽不才束髮读书服膺古训犬马余忠刍蕘鄙识亦欲藉未尽之年而窃致之但伏而自思有必不能出者臣自壬午之岁构恙膏肓几与鬼伍虽赖医药勉强支持然而髮白殆尽齿落无余脾胃削弱饮食减省元气耗于少年之曲蘖心血枯于中岁之笔研即虽年未笃老而厌厌无复生气岂能鞅掌刀笔追定国之精明毕身疆场等新息之矍铄若谓卿佐稍崇南曹差简可以优游禄食苟免愆戾躡取崇显不虞负乘则臣之一出匪以报国祇为身谋上孤奕世生成之恩下隳居平进退之义陛下亦安所用之臣不胜惭沮微念伏冀圣明悯臣俾以原职致仕臣得沐浴天泽歌咏盛治含哺鼓腹以毕余年倘遂溘然此诚不泯为此

衰病侵寻情事荼苦恳乞天恩放归田里以安余生疏

臣年六十三岁由嘉靖二十六年进士通仕籍者已四十二载保丘壑者复十有三年昨岁蒙陛下过采廷臣之议俾臣起自南畝佐枢留京比时臣得患有眩晕脾泄等症齿堕髮落展转汤药未有起色特以世受国恩再厘简命岂敢守硜硜之志而忽忘蹇蹇之节以故一疏之后不敢再辞扶疾赴任属饥孳流离物情摇艱臣与僚长忧惶拮据苟尔无事不意于闰六月内接到家信臣弟南京太常寺少卿世懋患病身故父母倾背同气之亲仅余一人而奄忽长辞含敛莫及痛悔丛集忧愧并深昼则顾影而悲夜则伏枕而泣以致前疾顿发历时莫瘳肌肤日削形神判离虽犹勉强升散而自度此身去死无几矣此念未泯尚欲抒闻见之一得効涓埃之小补而智识短浅志虑昏忘上之不能扶谊引分佐国家之大计下之不能绳回搜伏暂时政之大几苟且塞白无裨政体自顾且恧人其谓何臣葵藿之念徒倾而狗马之病转甚若更隱忍栖迟积以日月宁惟不免滥竽之讥实恐一旦先露之溘展转彷徨不知所措为此迫切陈情乞恩特下该部查例准臣致仕归里臣得一视臣弟墓事从容医药苟藉桑榆之暖少救蒲柳之衰病疾余生皆属恩造即遂不起与圣世长辞盖棺之论或可少寬而首丘之愿亦为无负臣无任哀恳俟命之至

再乞天恩赐归田里以明心迹以保晚节疏

先该南京广西道监察御史黄仁荣论劾臣欺冒恩典缘由该吏部题覆奉圣旨考

满通理系酌公评既明系题准事例原无欺冒王世贞着照旧供职随该臣奏为恳乞天恩辩明考满事情仍赐罢斥以伸言路事奉圣旨考满事情已查明了王世贞着遵前旨照旧供职钦此该吏部前后咨行到臣臣以行实不孚致来指摘仰荷圣明察臣之诬掩臣之短不即诛斥俾仍故官臣虽鞠躬尽瘁不能仰酬恩造万一旦自履任以来仅二月余而闭门待罪已四十日鰥旷之罪复何所逃以故砥砺此心即日视事第伏而思之乃有不容不去者夫难进易退介士之微节也守己量力达人之恒规也大较攻臣者以臣为冒进而称臣者以臣为恬退今所以哓哓而辨者恐事体之未明耳既明而复隐忍不去是外避冒进之名而中乖恬退之实无论有愆于称者而何辞以谢攻者其不容不去一也臣自去冬及春以病乞归者一以衰乞归者一今更及替矣而复隐忍不去岂昔者病而今遽愈昔者衰而今反壮耶虽置百喙何以自解于人人其不容不去二也臣所同列部院寺司之长贰其人皆秉皦皦素丝之节劾几几赤舄之诚而臣独以匪德不类忝之更复隐忍不去宁唯腠颜实亦败羣其不容不去三也抑又有不能不去者臣之右目近以触热哭弟失明矣医药未效而左目时复蒙蒙于披阅案牍必有所不便其不能不去一也自昨冬以来膂膝酸软拜起鲜力倘于谒陵朝贺之际倾跌失容宁不有玷大礼其不能不去二也臣负此三不容不去与二不能不去而尚可馘馘濡迟贪恋禄位不唯天下疑臣之迹而臣亦内愧臣之心苟臣之晚节狼狽至此皇上亦安所用之臣不胜慚惶一念激切归诚伏冀天慈特赐骸骨归里臣无他长至于躬耕南亩以共赋税歌咏盛德以绍风雅亦恐不下恒人唯皇上一鉴悯焉臣无任恳切待命之至

为新旧疾病大作不能供事旷职负恩乞赐罢斥归里疏

臣近以奉职无状招尤愧心乞赐骸骨荷蒙天恩收采部议下降温纶俾臣照旧供职臣时久抱宿痼内外潮热胸膈痞闷疮疖徧身时若点墨第以新奉明旨不敢抗违勉策衰弩扶病视事不意右足胫面骤发疽毒扶曳蹒跚苟完称贺谒陵大礼归即困卧床褥宛转呻吟前所苦疮疖乘而为厉终夕不获一寝嗽粥不尽一器气息憊憊势不能支缘臣东南竖儒生而薄弱少寡将慎既不能无曲蘖房室之累而中更家罹兼抱书癖侵剗肺腑雕漓性灵后因杜门静摄断塞欲窦几一纪而稍稍复恒自戊子一出衰态陡现寻哭臣弟太常少卿世懋过当右目失明次年哭臣弟之长子士驷左目亦渐昏眇不能辨看文字只今心胆震掉腰膂酸慄外貌似足支吾退而自揣生人之理几尽矣又窃自思惟臣岩穴废才分不当出所以强颜忍诟参备朝列者缘三世仕宦俱叨显官皇上旌臣父于覆盆之余随拔臣于销骨之后诚欲薄有所効以伸涓埃之万一而地位踈渺才识迂浅于几时政之阙失民生之艰困国是之混淆士习之漓薄不能出一语只字以弥缝匡救臣之负上恩重矣臣病不痊臣职逾旷负恩益深苟旦夕溘先朝露不唯犬马不食其余臣亦何以瞑目臣不敢援养疾近例希觐异时惟冀圣慈特赐罢斥归里臣不胜

恳切待罪之至为此具本专差办事吏赍捧谨具奏闻伏候敕旨

为患病转笃恳乞天恩特赐俞允生还故里疏

臣向以哭弟丧明兼积劳■〈谷丸〉致成宿痼新正复苦右胫疽毒徧体痠瘠昼夜烦热食饮稀减陈情乞休去后尚犹勉事医药庶几有瘳不意旬月以来胫毒愈甚半身麻木动履不能加以闻见异常關心触目无非懣鬱以致食饮愈艰膨胀呕逆其症侵寻将与亡弟等臣年已六十有五元气耗漓精血荡散譬之枯木朽株虽值阳春岂有生望为此迫切陈情恳乞圣恩特许生还归骨先陇臣生死衔结无任哀恳瞻恋之至为此具本专差办事吏赍捧谨具奏闻伏候敕旨

恭谢天恩疏

该万历十四年内巡抚应天等处右副都御史王元敬会同苏松等处巡按御史邓鍊题称臣父原任都察院右都御史兼兵部左侍郎臣王某生前劳勩未蒙旌恤十五年内礼部覆奉圣旨照例与祭墓随该臣奏请故母恭人郁氏比例并祭及思得臣父积有微勋未沾赠谥乞恩覃及该礼部覆奉圣旨是照例与并祭当即移咨吏部覆奉圣旨王某准赠兵部尚书钦此本年九月十九日苏州府知府俞嘉言赍捧恩命于臣父墓所开读祭讫除领到墓银四百两辟治兆域建创碑亭外臣俯伏拱听德音中至勋劳独茂逸忌滋兴鞅掌筹边殒身对簿已咨公论犹悯遗忠语语华袞之荣字字肺腑之痛子姓戚属靡不呜咽摧倾父老妇稚亦共欢忭鼓舞丙舍为之增色宰木顿尔回荣窃念臣父束髮登朝素丝自励偶以微勩受知肃朝拮据十年艰闕万死委身锋刃毕命疆場先皇帝光照覆盆恩覃解网始而齟齬横臣之齿寻复齟齬忌者之舌遂使隆恩未竟滞魄长孤臣偷生食息腩颜俯仰出愧桑梓八痛松楸幸遘圣明俯采廷议皇纶涣发天汉昭回出少府之缙钱割大官之珍饌票姚高塚获表祈连之勋令尹余忠遂寬若敖之馁夫日月能烛幽隱而不能施雨露能泽萎枯而不能照乃知大造信矣兼之念微臣病废一丘徒抱倾葵之愿即先人衔感九地宁忘结草之诚中孚已深于豚鱼后世当効其犬马无任感激踊跃之至

为到任谢恩疏

臣自南京刑部右侍郎养病起任南京兵部右侍郎通理提督抚治右副都御史前俸三年考满离任行至淮安府地方蒙恩升授今职以八月二十日于京口驿准到吏部咨文于本月廿七日望阙叩头谢恩到任管事外切念臣朴簌庸材樛栌小器弱冠通籍

即攻司空城旦之书中年弃官已安廷尉雀罗之态不意竽滥遂佐留枢虽因人薄有建明而程劾畧无寸补方俟黜幽之典乃膺掌禁之迁荣将惧并感与惭会唯司寇叨刑诰之寄三尺之法当遵而建康为鞶鞶之遗五方之俗难一乘秋之鹰鹯搏击固非所任入夜之狐鼠凭陵宁忍坐狎瘡而作士尚不忘咎繇之陈谟吏以为师犹欲进蕙公之敬狱臣无任感激屏营之至

乞恩俯念先臣功行推申部议特赐恤典以光泉壤疏

臣以垂老积毁之余谬忝留京常伯之贰而病与衰会力不心从仰荷殊恩仍保一壑臣惟戢身汤药衞德床第岂敢复以家门之私干渎宸聽但以天地大义惟君与父臣父衞茹之冤虽获雪于先朝而未竟之典不能不仰赖于陛下陛下荣施臣父朽株之造使无憾于生者垂体微臣寸草之诚使无愧于死者则臣父子千载一时之遇亦万分一得之幸也用是不惮披沥肝胆为陛下陈之切念臣父故都察院右都御史兼兵部左侍郎某夙以孤忠受简世庙八奉玺书六更大镇驱驰南北捍卫边陲虽财赋出没易为脂染而束修自励冰蘖之操可贯神明其在浙福积斩倭级前后三千创筑城垒大小数十上感宸眷谓为真忠移镇大同事由独断临发之际杭城男妇大小拥道遮哭无虑十余人暨督蓟辽三镇前后五载以战守之功荷迁官者一荫子入监者一世袭千户者一赐金帛者九最后边城破敌斩首八百余级于法当封而数以口语诋触权相严嵩致成仇隙累风勘邊给事御史郎中等官毛摘罪过咸莫之应乃以春防小挫值臣父寝瘵杜门喉其客御史方轺露劾谓为托疾避事从中排诋致九重有投杼之疑臣父衞覆盆之恨至隆庆元年内臣以按察副使家居伏阙上疏陈情辨理荷蒙先帝特下吏部转行兵刑二部及顺天抚按等官覆勘功罪明白吏部题奉圣旨王某准复原职臣时获启稿塋之骨以归夜城举生存之衞以题墓道于愿差毕岂敢复有覬覦而会巡抚南直隶右佾都御史林润会同巡按御史温如玉提学御史周弘祖奉诏奉应得赠谥祭塋大臣润疏谓臣父材久着于用世德素重于乡评巡按顺天即能捍卫通州保全畿辅提督浙闽遂为平定倭寇殲厥渠魁在宣大则决策战守而捕斩首级百余在蓟镇则极力调度而遏截敌兵六次以迄清河之捷献馘八百余颗偶遭敌众之突入阴受权奸之陷害死非其罪公论其惜虽经伊子具奏蒙恩准复原职而十载邊陲劳迹难泯罪既昭雪功应议录其如玉弘祖二疏尤极揄扬臣不敢一一举渎天聽当时礼部大臣以先大学士高拱与先大学士徐阶争权不睦纵毁阶为广市私恩彰先朝之过举谓父与阶有乡井之旧惑于其说牢不可解而是时应恤者都御史朱纨则复以干擻商舶不便其所私亲故独于覆疏内谓臣父敷歷邊疆勤劳难泯朱纨操持清苦行谊足称但一则被谴之余众论未定一則聽勘之后事状欠明姑候另议而臣与弟世懋俱叨言官荐用剔瑕洗垢臣既滥竽台省世懋复窃秩清华而独臣父迄今泯泯泉下每一思之五内陨割中间屡欲有所

陈请而已故执政辅臣方外假综核之名内擅威福之柄臣实耻从干贷恩泽切思向者众论未定今则十有六年矣故少师李春芳铭臣父墓比之岳飞少师徐阶序臣父奏议拟之贾陆此二辅臣者皆言有準裁不阿所好者也浙省会城專祠于未复官之前太仓学宫附祀于甫复官之际闽人则复祠于武夷而浙省通志与蓟镇湖广皆载之名宦于众论不可不谓之定也该部覆疏原俟另议恩旨亦无报寝即今圣明中天幽隱毕照贤喆在事集思广益臣父叨尘八座之末屡膺专闕之寄苟使太常抗议考功责实自可无事勾请而年祀渐遠耳目就沦臣老日侵臣病日笃即使一旦溘先朝露何以藉手见臣父地下臣父既已就窀穸必不敢复冒司空钱帛以侈莹域臣有三子令修士农之业必不敢援引前诏希望荫录惟是赠官易名赐祭之典查有故兵部侍郎杨守谦曾铣事例相合及臣母故封恭人郁氏后臣父十年而逝亦有赐祭旧例可引为此力疾具疏恳请伏乞敕下该部详考臣父前后邊功宦迹叅以乡评酌以士议于臣疏果无异同赠官锡谥并给臣母谥祭如其不然臣并受诬罔之罪臣为亲乞恩于朱紱事岂敢妄相援及但念其竭诚为国引义自裁身歿之后家徒四壁魄滞浅土与狐兔邻二子寄食伶仃朝不及暮且衰弱蠢愚控诉无阶廉吏之效一至于此陛下伸蔽帷之义宏枯骨之仁倘赐并及则士民之大愿也非臣所敢与也臣无任激切哀恳之至

援例陈情乞推圣泽以光泉壤疏

原任南京刑部右侍郎在籍养病王世贞奏窃念臣之先臣都察院右都御史忬累树邊功构罹谗祸该臣于隆庆元年内奏雪复官寻该南直隶抚按提学诸臣题请恤典未经部覆臣以衰病连绵在籍调理伏枕余生覆盆絕望兹者忽蒙圣恩过采今任抚按王元敬邓炼之疏礼官复议奉旨照例与祭葬臣惟望阙叩头陨泣感谢以俟恩命窃复自念臣有母郁氏先年臣父任金都御史时以臣满刑部主事考封恭人后臣父十年身故比时臣父未蒙追恤不敢越次陈情今者臣父获理兆域兼饬鼎釜而臣母托在同穴独不沾一餽之惠臣私心痛之查得见行条例有品官封赠者亦许并祭臣父叨列六卿正二品臣母受封四品于例颇合为此恳乞天恩敕下礼部一赐查举不敢望别设坛品止于谕文之中并及臣母封恭人郁氏庶九原枯骨一体沾恩臣之兄弟既感彻肺肝荣藉存歿则尚有无涯覬觐之私不得不尽吐君父之前而效之公道大明之日夫先臣沉冤极枉苟削丹书亦自可以无恨然复官之后抚按诸臣仍交章为之请恤者乃自为叙功非雪罪也而礼官据公论采乡评问课司勲问馘司马始有今日之命盖又非泛常恩泽之比矣夫论功既在应恤之科而恤典又特重邊功之例祇因抚按原疏不曾明开祭葬赠谥等项故该部不敢辄行移咨并覆若有待于臣之自请者臣诚不胜罔极终天之感敢于孝理之朝自外曲成之泽伏望皇上并行该部覆查先臣历任督抚功次量予加秩易名以光盛典此风励臣工獎率忠孝非止臣一门父子衔结论报而已也臣无任哀

恳迫切之至

俯念先臣勋劳忠荃酌采公议特赐赠谥祭葬以伸国是以慰泉路疏（附）

切念臣故祖父都察院右副都御史朱纨叨举甲第黻历中外垂三十年精白之操无愧神明丹赤之衷可表天日世宗朝先以四川按察副使整饬威茂兵备即与大帅何卿提兵深入荡平巨寇决胜之策臣祖为冠特蒙逾格旌赏后督南赣等处军务振扬国威雕剿山越功在旦夕而浙闽之间为土人构引倭寇蚕食沿海郡县民不聊生朝议用臣祖以前官巡抚其地兼督军务臣祖夙夜运筹寝食无暇精选武勇将吏分布要害申明军法戈船壁垒精采一新自是连破巨贼斩馘无算优赐累下臣祖感恩思効力探祸源搜剔奸私不避权贵加以刚腸疾恶视贪吏如仇讎以故通夷者慑重足之威舞文者衔束湿之恨驾捏流言簧鼓时耳至以臣祖擅杀夷俘为罪臣祖思系西南丑类拥巨艘挟凶器肆行掠卤岂但夷俘原奉勅谕鞠问明白斩首示众何名擅杀而故辅严嵩父子必欲勒臣祖重贿臣祖时已移疾归家无橐装可应感慨引决其后同事之臣如按察副使柯乔辨理生还叅将卢镗复职升用寻以余寇猖獗东南版荡垂十载而后宁海内为之虚耗识者谓若留臣祖在事一二年可以无此祸矣故于隆庆之初巡抚都御史林润巡按御史温如玉提学御史周弘祖合疏称臣祖志节勋劳应加赠谥祭葬而浙闽士大夫尚有衔臣祖者于覆疏中谓臣祖操持清苦行谊足称但聴勘之后事状欠明姑候另议今又十有七年矣臣祖生为廉吏田鲜负郭身殒之后臣父孤羸力不能任窀穸藁葬荒山数武之外鞠为茂草伏膺烝尝不能修举臣父今复不胜冻馁死矣臣兄弟二人餬口乡井朝不保暮气谊之士无不为臣祖称冤贪墨之徒乃至举臣祖为戒今幸圣明在上公卿洗心奉职无善不扬有隱必照而臣祖生罹陷弃死滞覆盆封鲸之绩莫酬除蠹之忠尚郁况今公议久定物情共怜而臣不以时恳请倘复如臣父死于冻馁何以见臣祖于地下为此匍匐行乞至京不避鈇钺陈情上奏伏乞皇上特下该部仍将都御史林润御史温如玉周弘祖原疏逐一查勘明白特照例予祭葬仍赠官锡谥不唯报德报功之典推及于细微而任事任怨之臣亦知所感奋臣以草莽冒干天威无任迫切恐悚之至

恳乞天恩比例录功以光圣治以励人心事疏（附）

臣惟圣主之所以整一寰■〈宀禹〉垂拱而成安壤者唯赏罚而已若乃议赏而至延世慎终而复追遠此固鼓舞之大权而亦使民归厚之要道也是以孙叔之后见收于负薪甘陈之封仍广于易世窃念臣高祖都察院右都御史韩雍弱冠成进士为名御史用廷荐擢右佥都御史巡抚江西等处即奏革宁府护卫开百年曲突之谋进督宣大

诸邊复破却迤北强敌为一时干城之重属景泰天顺之季以迨成化初年广西荔浦修仁大藤峡等处蛮獠广东高雷廉等处并海面流贼作乱攻剽城邑杀僇王臣一时文武大吏虽望如柳溥材如叶盛不能决策平荡以致贼势猖獗羽檄纵横百姓罹涂炭之苦九重深宵旰之虑臣祖繇兵部侍郎出叅浙藩尚书王竑会推左佥都御史赞理南征军务比时虽与都督同知赵辅共事而臣祖勅谕尤重事寄独专臣祖受賑启行陈师鞠旅誓不与贼俱生当率汉达官军十五万分三道并进直捣大藤峡诸蛮巢穴擒斩贼酋池大狗李吉衡杨光志等共四万一千余级夺回被虏男妇二万余人平除寨洞八百三十六处奏捷上闻赵辅进封武靖伯臣祖升左副都御史仍留巡抚成化三年内蛮寇复发臣祖督兵征进柳州大容山北流容县鸡冠山博白等处擒斩贼酋郑昂等共一万九千余级四年五年又历征进谢仙牛领山等处擒斩首从贼七千三百余级丁忧离任该兵部会推升右都御史总督军务仍理巡抚于梧州地方开设军府振扬国威六七八年征进团邓山南宁等处擒斩首从贼共八千三百余级十九年征进七里沙田高乡等处擒斩首从贼共七千九百余级节奉宪宗皇帝褒獎勅谕见在臣祖前后功次国史家传广志及兵部堂稿可查臣祖因拮据军事心力耗损跋履瘴险病疴交侵乞归养疾未老而逝荷蒙圣恩给予应得祭墓子某自以二品考满荫授光禄寺署丞弘治十年内该总督两广左都御史邓庭瓚巡按广西御史邱天佑合疏称臣祖无前之伟绩善后之宏猷地方军民家颂户祝若使国家无臣祖是无两广矣礼官覆勘无异题请于梧州府立祠春秋飨祭惜一时铨曹失伸崇赠之典本兵未及世赏之议而臣祖居官廉洁宦橐萧条胤祚衰微饘粥空乏既不能伏阙陈上回九重之顾又无强有力者以为之援因循至今虽岭徼之香火尚新而桑梓之烝尝不继臣代居冢嫡实切痛心切念赵辅虽为总帅其督战进止皆出臣祖拱手受成获开茅土世世不絕又有县丞陶鲁者一部曲耳虽累积战功位至藩伯而获级前后不满二万得锦衣千户世袭及查近年尚书殷正茂凌云翼俱以两广功次荫世袭千户臣祖运筹决胜之绩比之辅鲁孰重孰轻披荆棘路之劳以拟殷凌孰难孰易必有能辨之者又查得右都御史顾佐奉职仁宣之朝近以抚臣题请超赠少保臣祖勋伐更优年祀尚近于赠官尤宜为此比引前例陈情奏请恳乞天恩下吏兵二部覆查无异将臣祖优赠及予臣世袭锦衣一官不唯臣祖衔恤于九泉而臣亦回生于一线疆场之吏咸拊膺而效死绥荒服之氓亦加额而思报德矣臣无任

弇州续稿卷一百四十四

●钦定四库全书

弇州续稿卷一百四十五

(明) 王世贞 撰

○文部

△偈

贝多寮偈 (有叙)

玄幻影庵之步武有廊焉乃不能寻衰倍之其中以度佛书数十百卷居士榜之曰贝多寮贝多者西天竺树名也其正语曰多罗此云岸树高四十有九尺荫如之叶广长如佛舌色光泽可鉴宜黄白金漆书凡阿难总持之文悉在焉今所谓贝多者筠也桑皮也茧也非叶也其语汉语也非梵也其书梵也非西竺也其义则经于是居士以属天弢道人俾为偈曰

如是我佛在舍卫慈愍一切诸有情愿以正法尽摄受而彼初地及四天乃至无垓阐提智如以一蠡测大海佛以种种因縁故广为譬喻及解说分别三乘大中小醍醐酥酪非异味所得深浅随根性前后四十有九载爱弟阿难所总持苏伐罗汁多罗叶衣以微妙净白鬘象马驮载百千夹今汝所藏独不然妙法大乘大方广菩萨亲受佛心印梵天帝释共宝护汝今奉行不唐捐在昔开士空中书风雨避去不侵湿而况谭润善弟子毫端往往吐舍利乃云啖蜜以甜故徒蜜得甜无论蜜四十九载佛说法至竟无一法可说汝当谛识妙明心是贝多者筌蹄等

梓行法华经偈

善行比丘发心梓行大乘妙法莲花经弟子无名居士王世贞倡诸善智识以贵资之合掌和南而作偈曰

我闻佛世尊在耆闍崛山广会诸天天人而说妙法华亿万百千界六种大震动大梵天帝释天阿修摩睺罗有想及无想人非人等众一切悉皈依诸有学弟子声闻阿罗汉各各佛受记各各当来佛宝塔千由旬忽徙地涌出而升于虚空口出大音声往劫灭度佛来听说妙法大方诸世界无央无际各化七宝树下踞师子座一一化身佛来听说妙法佛以摩诃愍宛转示方便三界诸盲子悉登白牛车脱离火焰宅不受三途苦譬彼逃亡儿一旦遭慈父而亨积珍贿实非家外宝导师双树林明星时证道云胡僧祇劫已成等证觉说法五十年住世七十九云胡寿无量万劫长不灭紫磨真金身厘丈有六赤云

胡卢舍那千丈徧法界药王暨药上昆季二萨埵以何因緣故焚身作供养妙音观世音东西二萨埵以何愿力故在在表应圆普贤法王子药王与勇施毘沙门持国领佛所嘱累故说陀罗尼云胡十罗刹咒恼法师者头破作七分乃知妙法华为大乘经王权实互相显理事了无碍人天所尊礼遠过於头目受持读诵人传寫教人寫功德比财施一分之亿分而此支那国大信行比丘念各有漏福往往皆唐捐是故衣钵资悉捐付剗我闻印施力如佛丈六躯化为百千亿又如湏弥目有目皆得观以此况功德真不可思议我佛说法时上慢五千众羣然各退散而佛不制止恐益疑谤辟今兹沦末教阐提蔑戾车日结阿鼻緣而有此比丘是故善智识相与成胜因譬五百商众各捐一株木造巨采瑤船珊瑚摩尼珠玛瑙砗磲等富可及七世以此况功德复不可思议昔有法达师诵持此经咒已满三千部反乎见曹溪恍忽一句亡虽则一句亡其诵恒如故虽则诵如故不为经义缓敢以告比丘及发心菩萨持此作法檀共证无上果

为半偈庵主王百穀作五十像偈

汝不從像生亦不偕像留云胡自西来住此支那境云胡坏色袍藤笠皂方履云胡头陀行而不除须发云胡示淫欲亦不堕深染稽首两足尊我今已知非觅非不可得非非亦非是名障与利障乃至绮语障一切悉芟蕪亦不求声闻纯行菩提道昔如来说法四十有九年而无法可说今汝称半偈维摩不二门半偈义不负

题妙喜泉偈

宋张无垢侍郎作阿育王寺妙喜泉偈曰心外无泉泉外无心是心即泉是泉即心或者疑之以问居士心是妙喜泉是育王云何不察合而为一居士曰来汝其聽取妙喜未来泉在何处妙喜来止泉即发生心非泉乎泉非心乎谓余未然妙喜其次之妙喜泉大师复作偈题其后曰谓泉即心谓心即泉无垢居士作一串穿有出有入有正有偏居士恁么妙喜不然徐六担板若见一边泉只是泉难唤作心心只是心决定非泉是义不正亦复不偏泉乎心乎亦非弃捐拟议思量十万八千此碑在寺中沈于水近始出之钱子撮一本见示盖所谓宗门无肯语也虽然亦只是打诨作筋斗跳耳因复补一偈

谓泉即心谓心即泉无垢合之作一串穿心只是心泉只是泉妙喜打开各在一边渴饮两瓢足则弃焉一串一边俱没交關妙喜未来曷尝无泉妙喜既来泉亦能言寄声寺僧再与沈渊无是无非且寬眼泉

演苏眉山十八罗汉偈

十六应真者佛十六大弟子分居四大部洲皆梵相也后作梵汉各八老少如之则已失其意矣其称十八者何居然苏长公业已为之颂而其辞超迈洒脱居然葱岭门风龚嘉兴手书勒石以一通遗我不觉有会遂别为之偈其不称颂者示不敢与长公齿也

第一尊者结跏正坐鬼使稽顙于前侍者取书通之

偈曰结集甫周魔使来言为再转轮将遂涅槃我以縁来亦以縁去不嗔汝遂不因汝在

第二尊者合掌趺坐老人发蛮奴牖中有琉璃饼贮舍利十数

偈曰佛有舍利诸天建塔我传佛心焉用此物不作敬想不作慢想是故不起趺坐合掌

第三尊者晏坐巖中白沐猴献菓

偈曰白猴捧菓候我出定问汝自来有无佛性莫知有无来自牛头一失懒融了不可求

第四尊者侧座屈三指荅胡人之问

偈曰我闻天龙只一指禅用之不尽垂五十年指屈而三将用三世或表三果俱置不视

第五尊者临渊抱膝而坐神女出水献书

偈曰尊者临渊必无羨鱼龙女何为出而献书贤劫所藏经皆诳汝如来在生默无一语

第六尊者拊釋狮子而坐驯扰若家畜然

偈曰兽中轮王此釋狮子一念皈依立失王位帝释懷忧来问尊者不贪血食天食奚取

第七尊者临水侧坐有龙出焉吐珠其手

偈曰念汝吐珠为汝说法鸟王得汝饥不能啜汝珠一献遂不复再我说法竟我法常在

第八尊者立膝而坐有神人涌出于地捧盘献宝

偈曰入无想定不自见何物神人乃以宝献我有一宝不堪汝偿鹅王食之依旧鹅王

第九尊者食已覆钵持数珠而坐童子构火具茗又有埋筒注水莲花池中

偈曰作五观已杨枝净牙活火烹茗灌水灌花是花倏起代我说法而彼灌者一枯死骨

第十尊者执经正坐仙人焚香於前若修供者

偈曰香以合知离则无有汝供非气我受非熏仙人五通此一不通我无一通与（阙）皆空

第十一尊者趺坐焚香侍者拱手胡人捧函

偈曰鼻息偶触何從何着由是意消恍然真觉我此旃檀价值罗浮利那烬寒了无可酬

第十二尊者入定枯树中神腾于上大蟒出于下

偈曰泯泯孤坐神腾于上谁为侍者下有大蟒福不蟒报业不我与汝喜即我我嗔即汝

第十三尊者倚杖垂足而坐有虎过前童子怖甚匿而阙之

偈曰倚杖山岬有虎过之童子怖焉匿而窃窥我无分别不知为虎汝无杀心虎不

噬汝

第十四尊者持铃杵诵呪有蛇一角若仰诉者

偈曰梵响凌云天乐不作而有诉者蛇而一角业由心造谁汝当怨汝诉非诉我见非见

第十五尊者须眉皆白胡人拜伏于前

偈曰是长老者湏麋皆雪前如来生后如来灭汝若为人终无息期若不为人住此奚为

第十六尊者横如意跌坐下有童子发篆烟侍者注水花盆中

偈曰有益自花有垆自烟我不竖义如意长眠童子何知而水而火烟烬水涸无来溷我

第十七尊者临水仰视飞鹤其一下集侍者附之一童子取果实投水中似餒鱼

偈曰有鱼比丘鹤勒那众自业自縁谓佛操縱戾天跃渊其乐匪真曷不听法蚤弃二身

第十八尊者植拂瞪目而坐有二童子破石榴以献

偈曰童子得榴以荐其师如大轮王千子累累我以慈悲而乳法喜尽大地中孰非我子

觉上人修头陀行中歳剃染乞余一偈

令子祝发成比丘形似遠得归如梦始醒顽石说法子当勉聽子之长技颇工丹青虽应世法不作汝能莫起爱想有爱有憎当子去时无一可凭回心大雄勿缚小乘畅则海天厄则渊冰子如不然问佛法僧

合造妙法莲花经送补陀潮音庵护持偈

妙法莲经诸经中王我观世音菩萨中王众善智识合造此经二十四部归于补陀大士道场如音梵音与海潮音罔昼夜间一切圣凡能转此经縱为经转功德大小永不唐捐我见是利故说此言乌王龙王修罗波旬皈依拥护持有毁侵者头破七分

观一之上足曰果沙弥自号空山余不能和诸君子诗而姑为偈语问之

若欲空汝山汝山作么空若不空汝山作么山不空汝山既已空汝空元不空以此不空义为汝成真空

△颂

释迦牟尼世尊苦行像颂

不可说劫前香稻如来今何以尚在学地摩耶夫人腹中诸天拱护说法今何以无一阍黎侍兜率宫受上妙天食供今何以仅一麻一米丈六金刚不壞法身今何以瘦削乃尔下生时周行七步今何以两足如系指地指天称唯我为尊今何以默无一字咦竟孰非而孰是

释迦如来成道像颂

菩提树下明星现际霍然一悟别有天地大三千界尽收脚底阿僧祇劫总入目皆菩提帝释咸大欢喜以法轮时至而独波旬请速涅盘曰无饶我魔事真耶戏耶咦波旬如是云门亦如是

太上郡真图颂

太上郡真圖一卷被鬢髮中坐者太上老君道德天尊李讳其左立而侍者东岳上真卿司命茅讳次右弼侍帝晨桐栢真人王讳右立而侍者玉虚侍中左相张讳次九天都官大使旌阳真君许讳皆阴功宏巨真斑高峻与帝出王辅教行化者也左斑方而右趣者文始真人尹讳冲虚真人列讳南华真人庄讳司少卿东方讳参同真人魏讳罗浮先生葛讳上清司命南岳夫人魏讳九华玉真妃安讳东华司命杨讳上清真人许讳水官监郭讳蓬莱都水监真白先生陶讳太白真人孙讳希夷先生陈讳紫阳真人张讳凡十五尊皆博综九流潜修百行与形偕妙游艺入神者也右方而左趣者东华帝君王讳

九天圣师元君苏讳清微天圣师真君朱讳正阳真人锺讳纯阳真人吕讳海蟾真人刘讳重阳真人王讳丹阳真人马讳长真真人谭讳长生真人刘讳长春真人丘讳玉阳真人王讳广宁真人郝讳清淨仙姑孙讳我师昙阳仙姑王讳凡十五尊皆默修无漏葆真还元顿超上乘了悟普现者也世贞沈沦障业为日已深迫惟根源去尘杳隔然未尝不皈依大道拔慕高玄仰瞻法相永奉香火近闻郡城黄氏颇藏善本因购请一帧逾十余位尚阙右方东华等四圣重阳等八真适翰林检讨信阳王祖嫡远寄元人所图犹备精妙又承我师指示圣祖元君真君名号輒乞良工以意模寫位为之颂其左右方次第略等年岁为之至于名位大小功行深浅故非下土小兆所敢臆定颂辞芜陋犹足汗颜第管窥蠡测虽全体未曙而昭昭混混一端不爽譬之如来法身或百由旬或仅丈六大乘初地所覩不同以比一切阐提差有间耳其颂辞曰

太始浑沦中分二气兆庶林林畴醒长寐惟我玄元尊超象帝元始令息灵宝曩弟应期毗教入周乃备何以征往青牛在继何以征旋青羊在肆坐啸玉局天真列侍韶音金振微文珠缀卓冠九州岛炳烺遥裔谓司命茅女策昆季良常句曲盘石天市即宫其间总摄羣位次则桐栢王子所治芙蓉为冠白珠衣缀柱劔而谈金庭中事张君阳都宝策恒佩龙旗虎贲以为容卫虬髯电目埽制妖魅赫哉许侯拜都官使与张同绩而惇孝谊千秋度师石函标识济济四尊班崇秩贵与帝出王演化敷惠于惟（阙）方凡十五尊右趣而前恂恂閤閤紫气在空识者闕门守中致柔以保谷神五千微言奉而书绅列子所贵肆任治身不生受之伯昏冷然御风且将二句畴云宕心西方是尊漆园泆洋若壑纵鳞抉息踵源渡逍遥津勿讶齐物超物自珍彼所息死匪死而存快哉曼倩德几与邻海鸥武皇众狙贵臣支离滑稽跌宕沈沦譬之醜漓不汨厥醇渊渊伯阳默窍先天问易重轻权之一斤颠倒坎离以济乾坤悟则吾主迷则吾宾稚川师郑宏览玄坟而苦丹砂句漏是厘胡不返照以修昆崙是故三贤倦迹亦伦有嫿贤安冲默静仁遂感羣灵授以秘文三十一卷蕊珠玉宸总辔霄空仰掷云轮金台夫人实产郁嫿云髮瑶姿五齐馥芬下匹杨椽示偶证因携手紫庭齐駟九闈有美杨椽如玉出堊技追逸少悟等子贡天期既協離離和气吴越万神职司所统长史默修非礼无动灵真未即心香遥奉玉斧前引虎牙后拥翼以远游七世所种景纯瓌竒大瑰丸弄猎色匪荒沈饮宁纵深几为人以义自衷修然兵解得无所痛皎皎贞白都水非重独志超伉羣能博综松飙清吹烟霞法供方瞳左炯神识先中华原圣童器大难用逢屯雾隱遘泰云从秘方之撰与陶司讽物命匪戕仙秩母降希夷王佐避世瀕洞宁为社樗诘作国栋五龙授法鼓跌不夢莲花遁形栩栩若狂紫阳至人与物无闕胡为三遣仆仆迎送同类为饵造化所讼皈心禅那始脱冥雾右方之真数亦如之左趣而前熙熙怡怡东华王君青阳肇倪御太晨宫胎易仙基抉要标潜以示锺离真中之真师表之师大史司寇裔有淑姿是为元君生而狗齐弘静高明至德巍巍度籍童真以荐西池于赫真君能静且慈昭灵博德列职清微启

我国姓翼我皇厘靡幽不烛母危不持云房虬髯頰而环奇顶分双鬢日兮月兮居谓生
门乃藏死机蓓蕾玉蒂葳蕤铅枝纯阳挺秀而锤是规五试皆过一真自持劔断无明丹
起沈尸养魄朱陵混迹浮提宗成相辽感累卵危五鼎万锤弃之若遗醉跨白驴引碧眼
儿大海鱼乐长空鸟飞有髯如锤肤皙而脂是曰重阳与禅同归郁郁金莲一蒂匕枝尽
大地间受玄风吹宜甫朗悟遂首师资三髻表尊十化分梨鬪贫不贫无为而为超登三
宫翱翔紫微谭子长真末疾寢剧抱足分和湏麋再植是故与物无竞为德金光顶透恬
然安寂刘君冠弱而慕玄默松筠并清雪月交白分形狷狂阐化京国何以前征三生井
石丘公蚤颖重阳法嫡礪溪高蹈王庭前席正杀化贪与世生息长春之春造化罔极彼
美■阳师所遥锡饮酖委和避兵先识金绯被躬等若逢掖印心虽间显教斯赫广宁隐
卜而知归墨志頼王坚行由谭激沃桥水观如達磨壁竟邁神君发挥心易孙姑悟道与
鳳分翼各探骊珠罔象先得用气莫龕舒缓见则醍醐仙乐悠然自适吾师闺秀千载正
脉补陀现应清微详迪西池奏名北斗落籍日现云表离中坎画凡此羣真应世后先或
学而能或生而然或擅总持或谛妙圆或示无文或工立言溥博渊泉如天如渊我仪图
之朝夕奉焉譬毘卢佛变化亿千法相叵测畴能写旃一刹那际三身现前慈威大小各
所覩縁下土虬兆别心静专宝以周还逍遥永年

广圣主得贤臣颂

汉王子渊此颂成于宣帝时其槩言圣主遇臣之难贤臣遇主之不易一旦得之欢
然交欣论说无疑鸿毛顺风巨鱼大壑胡禁不止曷令不行太平之责塞优游之望臻臣
藉君而显君享臣之逸虽孟氏之急先务孙卿之请布基何以易此第不原所繇得之本
与既得之之用是以谈业甚微而无真术究绩虽宏而鲜隼味况彼杂霸之朝仅庸核能
之辅而举盛际之事归之殆犹其时眩神鸟之五章而不审鷓雀之非德也敢廓其旨探
其原而嗣颂其辞曰

昔陶唐命南北正以司地天而人辅缺焉乃登妣氏于有鰥俾橐九有而司化权实
惟五佐以胥后先赫乎逃哉莫可拟测已成汤氏之开殷纪也凡五进阿衡而五捐之忽
合忽离是何后臣之艰厥而托国之需迟耶迨武丁之征说而姬文之遇尚精诚贯彻虬
幽夢遂超徒步而拜卿相此所谓天作之合帝启其衷万姓藉以奠安三灵寄而崇隆然
我观夫伊氏之为佐也厥人纪之肇修繇从谏而弗违俨明命之顾諟敬恭洞乎神祇革
夏政而抚九有实一德之所茂绥说启心而沃帝在虑善而动时监成宪以无愆学古训
乃有获粤丹书之示戒敬怠胜而頰凶吉此深宫之燕间而四夷之所景式盖孟氏有言
将大有为之君必有所不召之臣学焉而后臣之夫是以卑而长为天下尊今夫纲维纷
脞易画也疆圉弱削易益也甲雕兵瘦易饬也礼弛乐废易师也其最艰者君不有其德

而唯臣之德臣不爱其心而君心之非之是格彼夫高平之任术与博阳之济宽虽栉比其一支殊未探乎大端营平折冲广汉钩距于黄中外稍称平恕赵尧等之司四时若畧法乎先王虽匈奴崩角而孽已兆于椒房政若粲乎其外嫩而精膏烁焉而内亡夫沛乎巨壑纵鳞翼乎鸿毛顺风龙变云蒸森附景从岂不快哉如披聋盲然必内涤百私外采庶忠泰之九二宁不曰上下志同而其繇曰包荒用冯河不遐遗朋亡是以吉莫巨乎涣小羣而危莫峻乎月几望贤与否其相辽敬怠類于毫芒当齿爪之未坠又何异乎肺与肠夫岂唯其下者即周公之赤舄而非金滕几不能保其终厥咎宁直成王呜呼盛哉亦可畏哉

汪门烈女方氏颂

方氏之死汪道耆也蓋称烈女云夫既已归汪矣何以不妇也曰不成妇也其不成妇何女十三笄而归汪氏然事姑室也居五年其舅姑命之曰以冬十二月与道耆成礼秋七月而道耆病溺血甚女始视汤药然而弗面也道耆且死意若有忧者女闻之曰是其为我乎即絕粒道耆死女始发蒙袂而面曰吾夫也制斩縗服尽哀家媪谓曰是不为夫胡服也女曰不为夫而胡以舅若父姑若母不为夫而胡以奉汪氏之烝尝于寝也吾女也然而非方女也旦日伯氏司马公来婢子夹持出跪请曰以舅姑及亡者之后伯氏前致辞谢诸内外尊戚至夕沐浴自缢死死时光明满室及殓而貌逾于生也其得称烈者何风人之为风也发于情止于礼义妇之死夫义也情得毋十二乎哉女之死夫不及情者也虽然未字而夫非夫也为他人死也女女而归汪有妇道矣妇而未伉不及情矣其发以义其止以礼是足以当风之首乎司马传而表之不佞世贞继颂焉其篇曰

英英白华其白乃雪女而妇节其矢也洁皎皎白璧既白且坚妇而女身其归也全生而事之惟舅与姑死而面之乃以为夫生而字之其迹处也死而殉之其心许也

弇州续稿卷一百四十五

●钦定四库全书

弇州续稿卷一百四十六

（明）王世贞 撰

○文部

△像赞（有序）

吴中徃喆像赞（有序）

吴中徃喆像赞者故百有十六岁周翁寿谊翰林编修高先生启前工部郎张先生适都昌令俞先生贞木布衣王光庵先生宾陝西按察使王公英给事中黄公钺太子少师赠少师荣国姚恭靖公广孝吏部左侍郎赠尚书许公斯温左副都御史吴文恪公讷按察僉事直道陈公祚詹事府少詹事赠礼部右侍郎刘文恭公铉御医盛先生寅太子太保赠少保陈僖敏公镒太子太保俞公士悦太常卿夏公■〈日上永下〉礼部主事吴公凯处士杜东原先生璠参政祝公颢武功伯大学士徐公有贞浙江提学副使张先生和进士郑先生文康吏部左侍郎叶文庄公盛右都御史韩襄毅公雍按察僉事刘完庵先生珏参政刘公昌开封府知府鱼公侃福建右参政陆公■〈日上永下〉工部右侍郎孔公鏞南京大理寺卿章公格南京左副都御史章公律礼部尚书赠太子太保李文安公杰太仆少卿李公应祜太常少卿侍读陆公鉞礼部尚书赠太子太保吴文定公宽浙江右参政陆公容布衣沈石田先生周湖广左参政姜公昂河南右参政吴公愈南京左副都御史陈公璠南京刑部尚书刘公纓少傅大学士赠太傅王文恪公鏊先南京兵部右侍郎公讳南京刑部尚书赠太子少保吴公洪工部尚书龚公弘礼部主事杨先生循吉少保吏部尚书陆公完都察院右副都御史毛公理江西右布政使王公秩赠礼部尚书百岁毛翁弼太子太傅礼部尚书赠少保毛文简公澄祁州守张天方公安甫太子少保南京吏部尚书赠太子太保吴文端公一鹏应天府通判祝先生允明明太仆少卿都公穆解元唐六如先生寅南京吏部尚书赠太子太保朱恭靖公希周南京刑部尚书赠太子少保周康僖公伦翰林待诏文先生征明右都御史盛公应期翰林孔目蔡先生羽南京刑部尚书顾公璘都察院左僉都御史陈公察太子少保吏部尚书赠太子太保周恭肃公用少保大学士顾文康公鼎臣太常卿赠礼部侍郎魏恭简公校国子博士徐先生祜卿南京刑部右侍郎赠左都御史周公广南京太常寺卿方公鹏按察僉事方公鳳刑部尚书赠太子少保吴公山太子太保兵部尚书赠少保王襄敏公以旗大理左寺丞周公鳳鸣南京兵部右侍郎王公积国子司业王先生同祖右春坊右司直郎兼翰林检讨张公寅右副都御史朱公紈通政司参议张公寰江西右参议王公庭都察院右副都御史王公守国子博士文先生彭和州学正文先生嘉光禄寺丞陆先生鏊工科给事中赠太常少卿陆公燾太学生王雅宜先生宠提学僉事袁先生袞浙江按察僉事皇甫先生濬吏部员外郎王先生穀祥太仆寺卿顾公存仁按察僉事皇甫先生汧南京刑部尚书钱公邦彦按察副使沈公■〈流上金下〉四川布政陈公鏐礼部左侍郎赠尚书瞿文懿公景淳尚宝司少卿陆公师道布衣彭隆池先生年布衣俞先生允文先右都

御史贈兵部尚書公諱太子太保大學士贈少保嚴文靖公訥布衣陸包山先生治太子少保南京吏部尚書贈太子太保袁安節公洪愈兵科左給事徐先生師曾少司寇雨亭陳公瓚質山黃先生姬水太僕寺丞直內閣歸先生有光應天府丞王公執禮都察院右副都御史贈兵部左侍郎張公任山東按察副使袁公尊尼南京兵部右侍郎顧公章志浙江按察副使張公振之亡弟太常寺少卿世懋河南按察副使王公鼎爵都督僉事鎮守浙江總兵官楊公尚英凡一百十二人皆吾吳中賢懿炳炳自明始者也大者樹德砥行羽翼聖道股肱王室次亦奔走疏附批鱗犯顏直臣循吏之流也含章韜鍔斯所以山澤之臞摠藻修辭斯所以執文之英老成代往典型杳絕借彼膚相永之丹青計亦左矣稍叙其事附以詠言離之尚茫然合之斯可征哉然則楚庄何必色驚于優孟北海無煩呼飲于虎賁也詩云高山仰止景行行止仆雖不敏竊有志焉然而榱棟莫任譜牒散佚况于遺像掌故曷考非力所及寧無挂漏所期同志推而廣之云爾

周翁壽誼者崑山人也有隱德高皇帝洪武之六年癸丑翁一百有一十歲矣蘇州守魏觀始行鄉飲禮賓翁而首之又六年高皇帝召見便殿賜宴慰撫有加予冠帶給驛舟楮弊遣還踰年乃卒計翁生當在宋之淳佑四年甲辰跨元及明凡三國十三帝而不肯仕改革之際兵燹數矣而竟無恙晚邁真主卒以顯榮夫豈偶然哉壽誼名也又頗類別號若私謚其裔孫金華守后叔與余善此像得之后叔之子廷棟

贊曰宋之遺黎元之逸民明之三老晚邁昌辰中罹兵燹孑然獨存不琢者天不刊者身

高太史先生啟字季迪別號槎軒長洲人少明穎有縱橫才略而好為歌詩天藻秀發徃徃超宋元人乘而上之直接開元大曆而不能盡去劉白之習者小為才使耳元末張士誠竊吳自王而其上佐饒介之多羅致文學知名士為幕客而第其篇咏奉金帛為壽先生恒首冠然不肯臣士誠至高帝即位召修元史授翰林院編修史成特拜戶部侍郎先生以少不習握筭辭詔賚鎰金使歸需異日用先生歸教鄉里自給時魏觀自太常卿奉玺書守郡賢先生而禮之欲徙郡治成乞先生文上梁而衛帥誣觀徙治為有異志先生亦逮至都論腰斬時年三十九天下惜先生才而悼其冤所著有缶鳴集若干卷文集若干卷

贊曰明詩之昌如匯九江而公濫觴其追正始若康庄軌而公嚙矢辭冕離蟬冀以天全而竟死冤杳然丹青可滅者形不泯者名

工部郎張甘節先生者吳人名適甘節其別號也洪武中以歌詩鴈行高子啟天子

闻其才而辟之累迁工部郎中坐斥法谪迁广州税课大使卒先生貌白皙疎眉目其卒时且五十矣而像甚少

赞曰于乎先生媿音姿兮少与诸贤工书诗兮甯不称困庶离菑兮客死无恨以完归兮

俞都昌先生贞木初名桢后更名贞木字有立吴县人既冠以学未成弗娶负笈受永嘉陈公麟易遂傍读它经史为古文辞元季杜门隱居淡如也洪武初以荐者起知韶之乐昌父丧归服除补都昌后先有廉介声再以母丧归遂不仕老而郡守姚善礼之为僚宾主参幕中画会坐株累有应天逮事白卒于邸建文之三年七月也得寿七十有一明年勤王事起太守善族而先生以家无恙

赞曰而貌之熙熙而须之离离而巾车之委蛇版荡兮以身完湿束兮良于官肥遯兮而嬰狴犴客死兮而不罹患天耶人耶若循环兮其不可端

王光庵先生宾初名国宾字仲光长洲人有异才于经史子集天官乐书兵家稗志靡所不该览犹邃于医而属世鼎革刑（阙）用重先生意不乐之且母老乃自晦为清狂不娶不仕其貌故以寝又以药黥面及肘股间鬚髮短服行歌道傍故旧有访之者輒箕踞扞虱不相酬对以益自废晚而太守姚公善知之微服再三叩乃稍稍露其奇姚公大叹赏为具宾主成礼而去先生孝其母年七十且死抱母不舍呼娘娘者数而后絕既絕之后一日其家闻杖履声则先生哭曰天乎奈何令我舍娘娘去乎久之哭始已先生所著有光庵集吴中名贤纪吴下古迹诗

赞曰万邦帝臣兮噫畴不利宾兮噫国之遗民兮噫母之遗身兮噫卒以泯泯兮噫

王按察先生英者昆山人也高帝为监察御史以忝勤职事当上意尝手书敦厚王英赐之又标于殿柱累迁陝西按察使以疾乞休归先生位三品而乡居恂恂若无官者尝孑行至河岸而轻薄子值而偶触之遂挤先生于水先生振衣起至家家人怪问之曰吾偶失足耳竟不言其事

赞曰古有刘宽厥名称之亦有娄公至德可师公位小让而于德齐编须嬰鳞率以身归长者哉噫

黄给事先生钺字叔扬常熟人举乡试尝为某县典史后举会试以进士高第授戶

科给事中建文之末出募兵于海上闻京师不守自投于琴川之桥下死妻子从之

赞曰事固不可论以建文之亡而士大夫争先而为故主死者若饥之食而渴之就凉岂所谓杀身成仁志士之分而手足腹心亦施报之常烈烈叔扬其没者固颓然而付清波而其不没者尚凛然而傲秋霜也耶

姚恭靖公广孝长洲人初为僧名道衍字斯道博综释典能为诗公虽以方外名而内劲侠有道士席应真者精兵家言与公邻寓奇公而密授之顾益自晦秘人少识者独吴人玉行异之曰是未遇时耳万户侯安足道哉寻以高僧侍燕邸燕王之欲起兵其谋皆自公发之又尝佐王治军事佐庶子守北平从王下京师其策秘不传也王既即大位思公功数欲爵之辄固辞仅为僧录左善世三年立世子为皇太子妙简僚佐公首为太子少师赐今名监修永乐大典出抚畿甸赈诸郡饥还奏辄称褒上礼之呼为少师而不名公虽有赐第不居居萧寺既病笃上亲候之问何所言对曰业出家矣又何言卒年八十五赠荣国公赐祭墓上自为文纪其碑比于元刘秉忠官其养子继为尚宝少卿太子即位追思公功再加赠少师配享太庙嘉靖中停配享祀于大兴隆寺公所著有诗文集若干卷道余录若干卷按王文恪公纂吾吴志谓公不娶卒不蓄髮而于他纪闻又云尝见其像大兴隆寺红袍纱帽秃顶而肥今像乃永乐三年笔七十有三矣面皴瘦而白须飘然恐未真乃以意摹得之

赞曰刘诚意之事太祖与姚荣公之佐太宗俱筵帷帐勒鼎钟顾所以报诚意乃不若荣公之丰至传荣公者寥寥焉岂身讳之而不自明抑史讳之而不有其庸嗟乎首发杀机睚眦就功不娶亡子蹈迷复凶所谓归儒者不尽而为墨者不终耶

许少宰斯温字叔雍吴县人为邑诸生久次膺贡入太学诏选太学生当授官者公名为第一擢署刑部郎曹事迁监察御史出为广东揭阳知县未上召仍守故官以荐擢北平按察副使时燕王起兵北平版行公领大兴县事佐世子守城曹国公来攻城世子用公计却之王即大位驿召公拜吏部左侍郎赐白金百两彩币八有副世子为皇太子公兼左春坊左赞善时汉赵二邸相继为窥伺而公东宫寮也且有守城旧内忌之中公下狱庾死年仅四十三皇太子即位赠行在吏部尚书公有材畧尤长兵事死未悉究人俱惜之今像丰硕而有容威

赞曰文皇龙变从者云蒸公翼抚监以完北平功名鼎来若川之盈一蹶而蹶夫岂人能天予之时乃嗇之龄嗟彼诗人误讥青蝇

吴文恪公讷字敏德别号思庵常熟人公生失恃弱冠白父冤且雪而以丧归苦节砺行益究心理性之学发为文章有根柢以昆山令荐至京时杨文贞公士奇辅东宫贤而称之文皇召见于斋殿奏对称旨白衣偻顾问洪熙初用学士度荐授监察御史出按浙江超拜南京都察院右佥都御史考满迁左副都御史仍理院事公先后所莅皆台职凛凛有风裁而不轻为操切以是获正直忠厚称年未七十乞致仕归十有九年而卒得寿八十六所著有思庵前后续集小学解性理羣书补注陈北溪字训晦庵诗文抄吴草庐文粹文章辨体详刑要览

赞曰吴公树惇乃以文称其所为文匪忝躬行一践端公再履中丞无竞无綵不孤不朋岂唯保身亦以完名

陈直道公祚字永锡吴县人永乐初登进士改翰林庶吉士寻补方面公超为河南右参议与臬司争事谪佃太和山宣宗初诏试诸谪佃者公为第一人拜监察御史弹射不避贵势风裁大振出按福建还复按江西上书劝上读大学衍义上怒甚谓此吾几案间物竖子将谓吾目不知耶而又怒所谓邪佞以奇巧荡心语即械之并其家属悉下狱且籍其家凡五年而英庙即位赦复其官出按湖广益自励风力寻露章劾辽王不法复逮下狱论死久之辽逆节露诏出公死改南京公论事益切满九载出佥福建按察事福建故悉公墨吏望风解印绶去以年且七十乞休卒得寿七十五公之卒也天下毋问识不识皆推其直故称为直道陈公今像幅巾深衣且老矣而秀挺之色宛然须眉间故非凡流人也

赞曰公气如金百炼愈刚公心若江万折必东公直则矢遇坚必洞前有伏机徃徃反中死我者人不死者天天实锡之七十五年

刘文恭公铤字宗器长洲人别号假庵公少有至性母疾割股啖之且吁天请代竟不愈哀毁几殆以善书荐入翰林明年中乡试遂授中书舍人公虽以书荐而博学能文章其自居闇如也预修两朝实录成迁兵部主事仍供事内庭复预修宣庙实录成进翰林侍读特命教习庶吉士进侍讲学士时同乡杨侍郎翥以潜邸入见上馆于公尝从容荐公可大用上然之有泄于公者公自恨曰是必杨先生馆于我而累我如是乃阳为室煬以谢杨使它徙寻充经筵日讲官转国子祭酒条教笃密有李安成风时景皇帝迫大计欲易储诸公卿从舆之将上疏公独辞不与丁继母忧归诏夺情复固辞不赴服除复职睿皇帝既返正阅公卿疏独公无姓名而心善之会选青宫案即擢詹事府少詹事俾侍讲读忽暴病卒年六十五赠礼部左侍郎公于修词艰法取雅洁每篇成必旬日而后出之有假庵稿

赞曰公于文辞以简而工其于登朝以退而庸众目之恬帝谓为忠天嗇其年而丰其宗子孙芘芘郁作栋隆

盛先生寅字启东吴江人少从王宾先生学医尽得其术永乐中治中贵人盍竒验闻于上召对称旨授太医院御医东宫良姊娠而过期命先生诊之曰此血疾也以娠治不治东宫恚而曰寅肉足食乎乃欲败我子上为用先生药而繫先生以俟明日疾大已乃赦先生赐金币直数千缗宣宗朝先生尤重以御医掌院事上尝幸内直房而先生与同官奕弗及屏上命之终局且授韵俾赋奕诗明日上倚和焉以老乞休周文襄公故善先生而饷赋余米百石先生却之贻以诗有鱼龙江海夢雀鼠稻梁谋语文襄终身愧之以高寿终今像渥而秀眉目美须髯一士流贵人也子孙多至大官而业医者尤显名

赞曰执而餘文居下而近君秩卑而行颇尊宜乎其后之多闻

陈僖敏公鑑字有戒号介庵吴县人举进士授监察御史满九载迁湖广按察副使以母忧归服除补山东副使未上复以父忧归服除时方有三殿工命公补浙江而督木鲁家务超拜都察院右副都御史镇守陝西提督宁夏延绥边兵脩公风神整峻美须髯人望而畏之顾其中宽然长者豁達有大度不为一切苛辨其居官所至有声绩而于關中尤着凡三载还朝亡何复诏公往又三载还佐院事不踰岁公复往且许便宜行事又三载而进右都御史诏与靖遠伯王骥更迭治军骥老将顾推称公正德末始召还掌院事上亲北征留公居守六师震惊敌乘势入犯公以左都御史按行通州以南护边人避敌始公以长厚得陝吏士心每行部下车则澍两立降人有疾病誓为公担肩子輒愈公出则老稚妇女争前嘯呼愿得一担公笑弗却也至是陝大饥其卒数万人上书愿得公为帅诏公间往且賑之竣事还赐玉带金币羊酒会易儲加太子太保时同理院者王公文后公而气陵公出其上公如弗闻也者会得未疾乃乞休命驰驿归又三年而卒赠少保謚僖敏今像奕奕如有神蓋公卒而陝郡邑争庙而祀之若肸鬻者

赞曰髯而伟盼其尊若神敏而宽中易知有亲靖遠前驱束鹿后臻大雹严霜谁适阳春帝缓西忧公在三秦

俞士悦字仕朝长洲人举进士为监察御史迁湖广按察副使再迁浙江右参政公长身鐵面声如钟人望而畏之所至发擿奸伏有神明称迁河南右布政使未上召为大理寺卿敌入寇京师进右都御史佐都督卫颖营德胜安定二门敌退迁刑部尚书以易东宫加太子太保公之为刑部则斤斤三尺人稍有怨者南城返正下公狱谪戍鐵岭卫

赦还复原官卒年八十今像乃朝衣冠而色加厉须强半白

赞曰崑崑俞公强直自遂髀髀斤断鷗鷗秋鸷灭火呼霖天回鬼悸鐵岭匪遥青宫宁贵我瞻遗肖悚焉思畏

夏太常公■〈日上永下〉字仲昭昆山之清河里人初从母他适冒朱姓其名■〈日上永下〉举进士始复为夏改翰林庶吉士公为庶吉士独以工楷法得幸文皇帝一日谓曰■〈日上永下〉而来夫日乃可傍睨乎其更置之上遂改为■〈日上永下〉俾侍东宫于南都得预密务寻驿召命书宫殿榜授中书舍人东宫即位入直文渊阁秩满进考功主事加五品俸久之以荐出知瑞州府凡五岁入覲留为太常少卿进太常卿用年至乞致仕归公前后仕宦逾四十年终始职文翰不能大有所见其归也颇以诗酒自娱适跌宕山水间所畫竹石争宝重之卒年八十三赐祭及葬今像美少而冠仅二梁当是中书舍人或庶士寫

赞曰成进士举而书其职三品京朝而终老于翰墨世所赏者不以文而以竹石不戚乎其志而优然以自适一壑一丘藹乎风流其东方先生之俦而差达于郑台州者耶

礼部主客司主事冰蘖吴公凯字相虞昆山人也美风仪器局整峻为诸生以善书预修永乐大典书成赐金币归膺贡入太学举乡荐久之授刑部广东司主事改行在广东司主事两职皆剧曹明理持法为时所称告归省母还改礼部主客司竟以母老乞侍養优游林下者四十年年八十五而卒故大司寇刘广衡少保寇深曹旧僚也太宰李秉曹后进也咸以公辅期之而不偶甚惜之寄问重迭公一不荅今像似中年笔

赞曰宦不必达以完其名既富且寿而保康宁有子显庸孙枝绳绳取之独嗇予之自贏

杜东原先生璠字用嘉吴县人少孤从陈嗣初翰林学古文辞于书鲜所不通尤能写山水合作处不减胜国诸隼先生为人敦茂长者尝割股愈母疾而秘之故武功伯徐有贞为作东原生传卒年七十九诸生会葬者千余人私谥之曰渊孝先生今像丰美而秀眉目和色藹然袭人盖中年所貌也

赞曰孝而自秘之不欲示独行也文而以隱终不欲与时竞也其貌温如中则劲也吁嗟先生用德胜也

徐天全公有贞初名理字符玉已改今名举进士改翰林庶吉士章皇帝亲御文华殿试其文擢为第一立授编修久之进侍讲公于书少所不窥能诗歌善行草得长沙素师米襄阳风然不为一切无用学凡天官地理兵法刑名水利种种精究己已敌兵大入公以侍讲行监察御史募兵河南还进右谏德河决沙湾拜左佥都御史往治之河工成擢左副都御史佐院事寻与中贵人吉祥武清侯石亨迎太上皇于南城复辟进兵部尚书翰林学士入内阁参预机务论功封奉天翊卫推诚宣力守正文臣特进光禄大夫柱国武功伯兼华盖殿大学士公念吉祥亨横甚谋制之为所中谪广东参政逮下诏狱且论死释编氓金齿赦归吉祥亨败始复冠带自便凡十余年而卒年六十六吴学士为状称公短小精悍目光射人今像且老矣而冠貂蝉服侯服故不能释然也

赞曰赫赫武功天质胡异职司艺文乃慕经济万象肃括九河康又功成倏忽皇舆奠位辱以荣伏毁繇名致瑕瑜千载矛盾一世

祝大中公颢字惟清长洲人为诸生不欲赴乡试久之为有司所强乃一试而荐又不肯赴省试其又明年有司复强之复一试而第授行在刑科给事中出为山西右参议进其省右参政公歴官仅三政垂三十年所至能举职而其在山西兴学校表先贤白冤狱它善政不可指数甫六十致仕归与徐武功刘完庵诸先生为诗酒社公年最长而最后死春秋七十有九吴文定公志其墓谓公初举进士一日入左顺门而巨珰以旨召公及其同年四人入内馆出诗目而试之问其故曰上知若等名姑为一诗欲使勒习中贵人书也公不应竟出为给事而以内艰归土木之难起景皇帝诏夺情以都御史起复复不应迨服除逡巡守故官起复事史不载而文定公长者为史官当不妄

赞曰诸生不试难于出内馆不诗难于屈中丞不就难于夺十年不迁难于悦六十弃官易于退居约不厌易于食是惟四难复二易以此归来获长世公能致命复遂志

张筱庵先生和者昆山人字节之生而警颖卓朗善属文尝病目而夜篝灯读书不休遂以其一废与其弟穆俱应南宫试而自念必上第而穆于文小劣遂易卷以入曰吾可迟而得也已穆举第二人而先生亦次二十七既廷试执政者竒其策而欲首之诃知其一目也抑之二甲第一和遂谢病归以修国史召补（阙）部主事迁郎中遂为浙江提学副使所校士毋论多寡即第甲乙工者前辨质先生句摘其纰而后斥之人大骇服寻移病归卒年仅四十九其为诗文皆雅健有法诸子孙多显者穆亦至参政

赞曰鸣惟先生隽朗超羣文亦称是其气馥云为弟易草观过知仁穆亦继之为时文人敦睦之风后裔弗沦郑介庵先生文康字时义昆山人颀而伟躯意豁如也举进士

自以不能俯仰流俗属微恙即乞告归以此终其身先生居恒杜门蹒跚少公府迹于书无所不窥而尤善经生义所指授多显者虽用隐约成好至于表忠烈称勲伐未尝不慷慨有深味也故叶文庄公盛仕通显而时时推先生以为不可及今像殊魁然非山泽癯也所著有平桥稿若干卷

赞曰一命未膺飘然里居升斗未沾耕而读书歿无易名生不辟除以拟靖节人或谓喻吾不知其它其藻弗如

叶文庄公盛字与中昆山人举进士为兵科给事中进都给事中时英庙北狩陷敌敌大入犯京兆而东西南夷并起公疏不时上所建画及弹事皆精当当是时于公称真司马而公为真夕垣于公社稷臣公实亚之出为山西右参政协赞独石诸军事时入城俱创敌仅余一毁垣公至则皆鼎新之搜卒乘课屯种除戎器遂渐以富强号雄镇焉英宗即位驿召至京面慰谕久之擢右佾都御史抚两广者七年所斩获叛蛮以数万计用议事入京迁左佾都御史抚宣府宣府公故所参政地益大课屯田收其羨易战马至千八百匹增筑堡七百余入为礼部右侍郎改吏部迁左侍郎佐其长以公明尝一赈畿甸荒议關西边事谓河套未易搜东胜未易复因条上增兵守险数事盖至于今有味焉人主方向用之俄暴病卒年五十五公有文武才好读书博洽章故所至有声实而其抚两广也稍损于宣府独石时今像丰皙而有英气称其为人

赞曰岌岌己己实隳王纲公长夕垣出甸朔方内则著龟外则金汤股肱惟臣膂力方刚天实招之爰逝我梁惜哉壮猷不逮孝皇

弇州续稿卷一百四十六

●钦定四库全书

弇州续稿卷一百四十七

（明）王世贞 撰

○文部

△像赞

韩襄毅公雍字永熙长洲人弱冠举进士明年授监察御史行治河以强干称按江西威名益大振墨吏望风解印绶去以计平吉虔寇故相陈循良之甫移广东按察副使即荐为右佥都御史再抚江西循得罪戍公坐左迁山西按察副使俄入少卿大理复为都御史佐台事能以从容剂台长之暴伉者治宣府军政未几以左佥都御史同都督辅等率师十五万讨广寇公分兵捣其窟荡平之前后俘馘四万一千七十人斩大藤峡置嶂戍控御捷闻进左副都御史以忧归起家右都御史总督两广军务主副将官三司悉听节制仍许便宜从事久之与中贵人不平为所讦诏释不问公乃乞致仕公归而南北慰荐亡虑数十章皆不报则犹以中贵人故也卒年五十七广人肖而土木之以为神今像伟然紫色而小须

赞曰卓卓韩侯淮阴同锐上谷云蒸洪都风厉乃睠南顾受赈斯寄遘险必辟靡坚不脆火燎箐藤霜驱瘴疠功成谤兴舍用长逝

刘完庵先生珏字廷美长洲人少遇况守钟推择为吏先生谢不愿吏愿得补诸生守许之举应天乡试补太学生以材举授刑部主事迁山西按察僉事提督屯田任职亡害甫五十乞致仕归以寿终先生孝友恭谨与人居无失色顾操履绝介特人亦不调色干之及有所觊动也老而嗜学不衰为诗尤长七言清丽可咏书正行出赵吴兴画山水出王叔明皆逼真世甚珍之所著完庵集若干卷今像色青黑于铁棱棱如不可犯者

赞曰未老而归以署其庵吾知其完老而大归用以盖棺吾不知其完虽然不人之千人亦不我干庶几其完刘椽园公昌字钦谟吴县人生而颖敏读书过目辄诵工属文十九举乡试第一明年会试第二人廷试高等以疾予告久之授南京工部主事召修宋元史迁员外郎郎中出为河南按察副使提调学校满九载始擢广东左参政又五岁以母忧归明年复丁父忧服除疾不能起以卒年五十岁公以诗名振郎署间翰林先生见而畏之其莅河南所斥削不少借以是中忌者偃蹇不得推迁其中亦不能无少望所著有胥台凤台金台嵩台越台凡五稿若干卷悬笥琐探三卷中州文表若干卷他未成书千余种

赞曰公之文采五色渥洼著书穷年冀成大家虽则成家犹未离驹世无伯乐老而盐车以此自悲若贾长沙蓬累可也得毋过乎鱼公侃字（阙）常熟人也举进士为部曹郎以能治剧迁河南开封府知府开封居会省而所领三十六州邑最号繁剧且俗羯羗不易治而公一切以惠文弹治之于上官无所阿私苞苴避匿不敢进旦夕所进惟脱粟鲍鱼菘菜而已满考称疾归公归家益贫妻子不免饥寒而节操益励台使者有所馈遗不受既病久困床褥妾以一瓿粥啖之辄呼曰廉官何不食肉糜竟死不能具窀穸时

同邑有钱听者至布政使亦廉而故有父产时人为语曰富不爱钱钱听贫不爱钱鱼侃

赞曰鱼之为物以骨鲠称公乃姓之卫史以名凡二千年有光其声尚湖汪洋虞山峥嵘公骨已朽公神犹生

故福建右参政陆公讳■〈日上永下〉字孟昭吾郡之常熟人也而居太仓之卫城登景泰辛未进士授刑部主事歷员外郎郎中能以文学饬吏治于法比井井矣而性仁慈时有所宽贷其视狱日多蓄猫于狱以辟鼠害囚之重繫者得无伤死两按河南山西大狱俱以明允称旨藉藉有公卿间声矣而仅以久次转今官至则首捕舶商之行剽于海者僂之繕理戍城及甲仗一新又筑漳泉二郡海堤海不能侵郭闽人服其威惠竟中蜚语罢归以疾卒年六十公为人磊落慷慨与人交有终始居恒谓人生寄也即家亦寄安能有所别择而碌碌为子孙作巢穴故不谋生产而所至即官舍或僦居必小饬斋室蒔花竹时戒内子储名酝甘果玆错以待不时之需客过必留留则咄嗟立办至卜夜而犹未已其遇元夕张灯合乐帐饮虽侯家不过也以故三事而降至同舍诸曹靡不愿交陆比部云公所为得公卿间声者以此而毁亦随之率用此失官虽然后之称侠有度者必归公也曾孙瑚仕为御史至知府亦有公风

赞曰达埽王孙不颯已侠同孟公不踰轨安得其人与终始

孔公镛字韶文长洲人也宣圣五十代孙举进士知都昌县以姻连宁藩故改连山先后有惠政遂试知高州府久之即为真公以计谕降大盗酋又数数破他剧贼论功迁广东按察副使就填其地公所剪刈大小以数十百计威名遂益振其后为广西按察使台檄公讨荔浦贼贼望公帜骇曰是故高州孔副使耶知有走耳遂一鼓平之进食二品俸迁左布政使甫上事擢右副都御史抚贵州清平有苗阿刺者以黠悍善筭而挟其子溪能敌百夫父子豪长溪洞间二十余年数伤杀官军无如之何公刺得其厚善者清平指挥授之策而诱缚之入为工部右侍郎舟至富阳暴卒年六十三赐祭及墓祝允明谓公之卒白气自舟尾上直贯天表盖日正中也而荧荧然星矣允明遂目之为孔镛星

赞曰我战则克闻之先师公苗裔耶厥用乃宜干櫓礼义韬■〈韦今〉书诗际地环天牂牁罗施孱者怀德黠惕其威歿而一星灿如其箕请招巫阳试为问之

章公格字韶鳳别号戒庵常熟人父孟端为御史有声公举进士授南京工部主事迁刑部郎中擢广东按察副使歷云南按察使福建左布政使入为南京光禄寺卿转大理卿致仕公所至能举职而不为表暴以希赫赫声归田垂二十年熙怡乡里间亡忤言

敖色兄弟助教仪参议表中丞律与公皆通显而公独称长者公寿八十今像丰頤而长伟然福德君子也

赞曰仕而显融归而寿康行无污隆口絶否臧立长者朝居长者乡而推长者万石东阳积厚兹深是以流长

章容斋公律字鸣鳳大理卿格之弟也后大理一举成进士授刑部山东司主事迁江西员外郎明法理讯狱亡害擢保定知府保定最为雄剧郡多豪不易理而公处之斤剴理解遂以吏治声表三辅初其父御史公忤其台长见黜而是时当公所治其长故已殆而家籍势犹横会坐事人谓公且甘心焉公叹指其坐曰此三尺地也而吾敢修先人之怨卒从正法公以课高迁云南右参政父丧归服除改广西左参遂为其右布政使尝督兵平荔浦獠加正二品俸转贵州左布政使遂进右副都御史抚云南公所至有方面勲然大要不能踰于守而其在云南也与巡按御史不相善会其人以考察斥而公迁南京左副都御史理院事遂具疏讦公受夷贿俱槛致廷尉按验不尽实御史谪佃塞外而公得冠带闲住自是郁郁不乐属疾卒年六十六今像亦雄整与大理公颀颀

赞曰公才卓犖饶股肱郡所惟伸法罔展和温六韶披炎百蛮委赆拂衣明农毋损厥问

李文安公杰字世贤别号石城常熟人十七举乡荐凡三试而登进士上第改翰林庶吉士授编修进侍讲满考迁侍读学士以春宫恩进兼左春坊左庶子徙为南京国子祭酒加禄俸以忧归服除改太常少卿兼侍读学士遂迁南京礼部右侍郎入为本部左侍郎进南京吏部尚书改礼部以事忤刘瑾致仕归用老寿终赠太子太保公高简雅自重不为觔馘以故在翰林最久号为淹滞而其任常伯也亦不能得中贵人驩迨逆瑾诛名为且用之实不召也今像发鬢鬢白矣而犹有矜严容

赞曰简简文安国之老成淡以自藏矜而不争虞山尚湖诗侣酒盟逍遥徜徉以退为荣我怀伊人亡愧易名

李太仆先生初名甡一名应熊字应祜后以字行更字贞伯长洲人举乡试不第入太学中贵人慕先生名而言之祭酒欲以为弟子师先生弗往用善书选中书舍人入直文华殿诏诸舍人书佛经乃上疏言凡为天下国家有九经不闻佛经也上恚杖而释之寻罢殿直迁南京兵部武选员外郎以忧归服除补车驾寻迁职方郎中转南京尚宝卿久之进太仆少卿乞致仕归卒年六十三赐葬如例先生刚介慕立奇节所至与人争辨

引经证典莫能难也博学能诗善法书顾耻以是见名晚节益卞急不能容以故多畏而避之今像须眉郁然而有不可犯之色

赞曰侃侃太仆清强以果遇触必达达所不可抗论丹宸夺色青琐众谓僚寮视若么么慨焉拂衣却轨避时见而肃然退无遗思遭世坦迤乃获完归

陆太常公鉞字鼎仪昆山人其先冒吴姓会试第一人廷试第二人始奏仍陆姓授翰林编修预修英庙实录成迁修撰侍皇太子讲读公貌清丽善为容止当进讲皇太子目而亟称之满九载擢右春坊右谕德太子立是为孝宗进公太常少卿兼翰林侍读充经筵日讲官再赐白金文绮楮币属羸疾予告驰驿归亡何卒讣闻赐祭及葬官一子为中书舍人公之在翰林以端谨清峭称其为文简劲有法而不喜为敷腴诗亦如之所著有春雨堂集若干卷有张泰亨父者与公同里同年同馆而蚤死其诗实胜之公今像乃少年时笔也

赞曰公昔登庸直宪飞龙倡彼介鳞以时景从储之玉堂储之青宫台铉步武而忍告终悲夫悲夫公之弗辰孝德方隆

吴文定公宽字原博学者称为匏庵先生公补诸生久次膺贡入太学乡试第三人举会试廷试皆第一授翰林修撰迁右谕德为左春坊左庶子擢少詹事兼侍读学士进吏部右侍郎转左侍郎以左侍郎兼学士掌詹事府直东阁司诰敕久之进礼部尚书余若故卒年七十赠太子太保公宏亮粹夷为文章务典雅不事诡僻书法眉山能起雅去俗在翰林余三十年前后主会试及分典者各再纂实录及会典者三于国家大典制考据详核众无敢先之者公望郁跂乃见阻忌人公澹然弗屑也今像似中年笔疎眉目丰下而长美髯脩脩望而知其巨公长者

赞曰弘治诸贤郁为昌朝而公其时鹤禁元僚匪澄而清不矫以翹大义昌言若空中标退而澹然怡神寂寥国悲愍遗世惜屯膏夫惟弗庸是以独超

陆式斋公容字文量昆山人举进士授南京工部主事外艰服除改兵部职方主事迁武库员外郎进职方郎中内艰服除改武选擢浙江右参政以大计罢明年卒年五十九君白皙丰下秀眉目博学能文章有经世志其郎兵部时最为其长所委信封事条上日数千言皆以属公西域胡进狮至秦峪關乞遣大臣逆之安南数与占城鬩议发兵至讨公俱力言之而寝公又言锦衣百戶韦瑛诬害良民十余人当诛中贵人所举金齿腾冲参将昌佐不当用又举都督僉事王钦梁宏非有功不当除上为勉听之而其所上封

事若储养台辅教导勲戚爱惜人才久任巡抚经理京卫选练禁兵均平钞法慎重会议皆凿凿中利害即与他部事有所侵忤弗计也其治浙尤有神明称而以失色一郡守为所挟开橐得吏赇金致谤免公既负材且晚遇意有所欲为而出不意免以是自恨属疾竟不起所著有式斋稿浙藩稿归田稿式斋笔记封事录太仓志水利集问官录菽园杂记若干卷

赞曰渊渊陆公赋材实丰乃薄雕虫乃慕屠龙佐计枢廷数厘皂封其秩维卑厥猷则崇晚而旬宣忽以蹶终易箠之际中犹蕴隆

沈石田先生周字启南长洲之相城人自号曰石田晚更号白石翁以处士卒年八十三先生博学无所不通喜为诗其源出白香山苏眉州兼情事杂雅俗当所意到訾亵不得休书法双井矻矻未化至丹青之学久而天下愈宝之以为北苑巨然徐熙父子复出胜国诸贤勿论也先生生短小而皙眉目媚秀如畫今像则已老所谓见其杜德机者非耶

赞曰退兮若不胜澹兮若无求诵其诗以为白香山又若以为苏眉州聽其谈或小吏之黄衣迹其隱则钓父之羊裘其骨仅一丘而丹青被乎九州岛者耶

姜沧碧公昂字恒俯太仓人生而端凝介特举进士出知枣强县以最闻入为监察御史尝上疏论劾方士李孜省得罪廷杖病起乃以亲老乞改南出知河南府再以亲老乞便郡不许疏上至三乞为郡僚或州邑博士吏部惜之为改宁波知府前后将九载请归养者再复转福建左参政抵家卧不起久之母寿终服阕吏部复以参政起公而公卒矣公所莅官俱以廉能称日取俸廩鬻少鱼肉共母其与妻子则羹菜相对茹矣时卫帅尚贵盛而浮慕公伺公休沐羣羔鹰布币踵门则公已从间道易服出矣其不苟取老而弥笃即贵势有力毋敢通關節者有子曰龙负文武才居官饶声实而權谗口以归后颇不能自检于声色云

赞曰其持己也廉其养民也惠以此循守令夫复何愧其事上也方其掇下也肃以此名御史夫复何慙少而嶷然老而萧然以此称乡先生夫复何言

吴遯庵公愈字惟谦冰蘖先生凯之子也少而颖敏强记既成进士授南京刑部广东司主事久之迁员外郎郎中进四川叙州知府凡十二年始擢河南右参政明年致仕居林下者二十五年而卒年八十四仅少于冰蘖公一岁耳其在留曹能持法与中贵人忤老成慎练为其长所器重荐之藩臬不果而得叙州叙为蜀饶郡然最西偏夷獠杂处

公不鄙其人精心抚字结以恩信众皆悦从马湖守安鳌判故土酋也抚臣以大兵诛之公在行间参谋画料敌若指掌时复用兵贵之都匀转饷不乏然赏有及有不及公不以介意在郡九年课农桑兴学校户口滋植风俗淳美为诸郡最而业已倦遊矣里居优游自奉养喜宾客和谨得后进心有女三人归陆伸文征明皆名士而归王氏者有子同祖以才入中秘皆侍公周旋以是宽乐终其身

赞曰仕不九卿曰上大夫寿不九袞曰八十余宅相所貽兰蕤玉枝父子耆喆为乡闾师

刘公纓字与清其先江西之清江人明兴隶戎藉为苏州卫人公为御史而有遗以古印章曰鐵柯者因自号以见志生而磊珂竒特及长长身玉立眉目踈秀辞吐琅琅由进士两令武陵滕邑俱最召拜河南道监察御史出按福建再按广东所至有风裁而于广东尤着还朝偕其寮疏论外戚中贵相结为不法忤旨得杖满九载擢太仆少卿又三载以佥都御史抚四川久之哭子成疾归有荐者复抚四川前后凡六载所绥怀得蕃落心而茂平贼功尤伟有金币之赐寻以例裁革还朝改抚湖广为大瑯瑾所憎用蜀事下狱自理得释仍故官迁南京大理寺卿入为兵部右侍郎明年进南京刑部尚书凡三上乃得请恩礼周浹居十余岁值世庙即位赐羊酒存问乃卒寿八十二祭墓如制公所至有纪述独不能尽得乡曲声

赞曰强直自遂宦以有声虽歷膺仕而无速成老而赐归桑梓余荣龔龔乡曲遂稽易名

陈成斋公璠字玉汝长洲人举进士改翰林庶吉士授兵科给事中累迁刑科都给事中擢大理寺右寺丞转左进右少卿复转左为南京左佥都御史进左副都御史前后俱佐台事兼督操江诸军以病乞休卒年六十七赐祭墓如例公始起诸生从吴文定公为古歌诗不屑程序义坐是久困场屋间会试所射策以能悉僻事李文正公拔而寘前列公所居官皆天下雄剧职而自恨不获用文史显恒悒悒不乐李公志中盖言之然其前后能勤励不失官誉老成明练亦一时巨擘也

赞曰公起经术而颀法吏虽本緣餘乃心文事留台弹压江介控制岂伊匪雄竟睨初志诗人有言不求不忤

王文恪公鏊字济之别号守溪学者称之为震泽先生吴县之洞庭人也十五而从父遊太学即以文重公卿间居九年应天试第一明年会试复第一廷试得第三人及

第时论犹谓执政抑之故授翰林编修满考迁侍讲修宪庙实录成进右春坊右谕德公居翰林日杜门读书为古文章使门者谢客勿通刺即一见之亦不轻报谢以是得简贵声而人愈慕之久之乃以荐拜侍讲学士经筵日讲公每进讲至天理人欲君子小人之互胜輒拳拳致详上有所幸中贵人广颇导遊西苑左右谏不听公为讲文王不敢畋遊章上罢讲以谓广曰讲官所指殆若曹耶好为之自是游益省矣选东宫寮为少詹事兼学士迁吏部右侍郎所上筹边八事多见采纳会其父忧归服除仍故职正德初九卿伏阙上疏请诛中贵人瑾等召至左顺门使它中人诘所由诸九卿相慑唯唯独公以危言继尚书文后事几济而变瑾等业不知也公遂从廷议以左侍郎兼学士入内阁踰月进戸部尚书兼文渊阁大学士未踰岁超加少傅兼太子太傅武英殿大学士会公救故尚书文大夏右都御史一清罪请成废后吴氏丧稍与瑾意忤而初议亦微露公益自危乃坚请归赐玺书给驿与廩良厚公凡两典乡会试其程文为本朝冠海内博士弟子亡不传习之而千古文辞在河东庐陵间精简有法度凡归之十四年而世宗即位举故事遣行人存问赐金币益輿廩一时存问者将十人而公独上书且以所着讲学勤政篇进优诏报闻卒年七十五赠太傅所著集二十余卷今像丰硕而敦须强半白衣蟒绣蓋归田后所寫也

赞曰孝宗以还实始风雅而擅经术如公益寡迨正德时厄同白马公以相归卒老牖下完爵完身并以名完匪德之难完福为难俯仰世才寥焉恹叹

吴立斋公洪字禹畴吴江人举进士为南京刑部主事歷员外郎郎中明允而慈时时出家廩以食长系者久之擢贵州按察副使母丧归服满补广东巡视海道海道故称利藪公搜其弊且尽又为御史画策得羨钱数万缗以广公署持中官之困官舟者又尝辨异冤罪妄杀广人称之为副使之十二年而转福建按察使濒行阉帅夜走橐珠賧曰公行矣某非有所干毋疑也公笑曰行者賧不有一束书乎而何以珠为立郟之其为福建所治狱畧如广东尝以便宜发粟賑建宁延平之饥者入为太仆寺卿久之迁工部右侍郎理易州山厂转左侍郎拜南京刑部尚书治邓宁河之后田宅于中贵人瑾有忤勒致仕致仕之十五年再进阶而后卒得寿七十八公卒时诸子山岩皆至大官其后显者不絶今像白皙而丽为太仆时图于吴文定邸者也

赞曰嗟乎公一法吏子继之复廷尉民不冤用长世司寇吴考及嗣始为郎旋正位庆之余衍来裔

龚公弘字符之嘉定人也举成化戊戌进士司理严州入为南京刑部四川司主事迁广东司员外郎司事最剧所治狱大小百五十余咸当进吏部文选郎中出守兖州府

以治行卓异与宴赏久之擢浙江右参政以亲老乞归养凡十三年始起为福建右布政使迁湖广为左使寻入应天为尹以都察院右副都御史总理河道兼督漕运仍故职为工部右侍郎兼佥都御史累疏乞休进尚书致仕卒年七十有六公为人廉洁尤以明慎能剖讞冤狱时人神之所至多惠政当正德中中贵武臣更擅权势数与公值公行意自若独不能有所加进退绰如也王父少司马与公同年硕交而俱有方面勲俱称天下长者

赞曰懿懿龚公行修而端政理甫畅而歌考盘归侍二亲菽水承欢起领闽藩载游楚沅遂寄留尹作砥揭澜玄圭告成公乃即安进大司空归老之官蔼蔼桑榆西日未残进退以道生死毋讐

杨南峯先生讳循吉字君谦吴县人举进士授礼部仪制司主事先生敏洽工古文辞居曹事简好读书然颇郁郁不得志乞改校官便养不许遂请致仕时年仅三十天下闻而称之居十二年而上书复请建文帝号礼曹为大惊不敢举其案頼天子宽仁不罪也先生既负高简癖又好以学穷人徃徃至颊赤而久废中不能亡动意顾亡能尉荐之者武庙南狩至金陵以名故驿召先生至则命乐府小令试之且将授伶官职先生大愧私于幸臣得免归而先生名大损然其为僻益甚顾尚书华玉时以藩伯道吴用一币贄先生促膝论文事欢如也郡伯为会折简邀顾公先生忽色变起策之出曰野人安敢与郡公争客戒其子来曰以前币置舟所即返呼之慎无应也顾公寻迹先生徃谢罪竟闭门不出顾公每举谓人过吴不可不造杨先生亦毋易造杨先生先生晚节益落莫尝自为生志卒年八十九所著有诗文集金小史吴中徃哲记奚囊杂纂诸书今像如其年尚犹使人畏之

赞曰才太高迹太奇始而服中而疑终而非噫先生何所归

陆公完字全卿长洲人也状魁梧有巨人之度三十举进士即授监察御史尝按河南而行部之汤阴夜梦冕丈夫来见鼻左有黑志次日谒岳忠武王飞庙庙貌圯矣而像之鼻左微蚀若志者悟而饬有司一新之复梦前丈夫来郑重谢已而惨然曰公得无类我乎公后歴臬副长以左佥都御史抚宣府入为兵部右侍郎转左侍郎时大盗刘六刘七杨虎齐彦明等剽投山东河南以至畿甸其锋莫敢当议置帅而公奋请徃讨之诏以原官提督军务许便宜行事公鼓舞诸将连摧破之遂追而蹴之大江狼山悉殲其众自都察院右都御史进左都御史加太子少保再进兵部尚书加太子太保改吏部尚书进加少保公以书生当仗钺寄节制万里立功故国遂长中台董六师领百官威望甚重而其在按察使时为宁王宸濠所器既入兵部而王持之以中贵人緹骑帅之挟遂不能坚

所守许之复护卫亦有所赋谢最后王反狱株累并逮系公且繫叹曰武穆之祥其在今矣既论死未减得戍福建久之卒于戍所年七十公颇读书通晓文事好集法书名畫之类其功名虽不终尚为后进喜事者所称

赞曰畴谓吴儿而不习兵千里一麾前无坚衡入长中台遂领枢庭保阿統均天子所凭吴闾之间有云其薨弗慎厥藩栋折榱倾易不终日而介在贞

弇州续稿卷一百四十七

●钦定四库全书

弇州续稿卷一百四十八

（明）王世贞 撰

○文部

△像赞

都察院右副都御史毛砺庵公理字贞甫吴县人也举成化丁未进士久之授南京工科给事中与其僚先后糾守備太监蒋琮两广总镇安遠侯柳景不法咸抵罪又抗论辅臣丘文庄公以该博佐刚愎为学士则有余为宰执则不足时人韪之病告起北户科进兵科右以言事失大司马指大司马为冢宰公出叅议山东以病乞休进左叅政仕凡十年起为南京鸿臚卿转太仆卿进右副都御史督操江改抚治鄱阳公长身瘦劲在谏垣以言事着节居官有声实故归而人颇荐之然以致仕加级法不得起而所善同年陆太宰特起之又屡得要迁公意不自安乃乞归年八十二以老病卒公为人质直勤俭议论多材力有筹策之畧其治生累贖至巨万而名不损

赞曰南垣风采东省张施知难而退哲人炳几再起九列以佐中司于秩则隆跃者疑之归而治生计然我师

江西右布政使讳秩字循伯其先亦即丘贞子之裔也不知所自从故与余父少司马公通宗而不名族盖称王父曰叔父二十八成进士为郎久之始迁广东按察僉事时大珰瑾责谢贿公独不贿瑾亦不问为僉事持法有声巡按御史瑾党也欲以声势加公

不受御史为屈迁兵备赣州为副使讞决益精明数擒巨盗遂进江西按察使迁右布政使姚源大盗起公数从事兵间躬冒矢石擒斩无算然不专逞诛僇所抚降者多曰彼亦赤子也时公与同年陆太宰先后官其地皆吴人而皆为宁王所器重王尤念公至欲媾姻好公逡巡谢不敢当归谓其子曰是人也志满而气扬好武事善张大必且为乱不出十年矣遂以侍养归会暴得疾卒后王果反太宰坐株累抵罪

赞曰公有方面勲江西之政与陆齐名而屈于寿其用不究于戯用之不究者乃所以保其身后耶

毛百岁翁者讳弼吾州里舍子也少敦厚无饒言垂九十而其孙少保澄状元及第当是时少保父已卒而翁老病卧床第间久之得杖乃稍稍起且起且卧耐进粥竟至百岁有司为立人瑞坊以配少保而后卒正得百岁矣后赠礼部尚书今像殊怪伟可畏

赞曰生而百岁人之瑞有孙及第家之瑞秉礼遵义天下瑞

毛文简公澄字宪清号白斋晚更曰三江吾州人也举进士第一人为翰林修撰修会典成进右春坊右谕德侍东宫讲读以登极恩进左庶子兼侍读为经筵日讲官赐金带母丧归寻以中人瑾摘会典误落左庶子服除仍侍读明年迁侍讲学士又明年进学士掌院事教习庶吉士擢吏部右侍郎转左侍郎进礼部尚书赐玉带正德末充奉迎使与大学士储迎今上于兴邸赐白金千两彩币十有副寻加太子太保録世荫锦衣指挥固辞久之乞休加太子太傅道卒赠少保公孝友天笃性简易不设城府好推毂贤士大夫迨问之则曰吾不记也至其所职司乃介然见勇气议僇宸濠发王书告庙一以故典行之又尝与王大司马琼廷诤脱彭总制于死当推冢宰力辞之而以荐乔庄简公追崇献皇帝礼议起公与杨文忠诸公力持数四至触天怒不为阻迨公归而后礼成识者谓亡论礼是非公几不足而忠有余矣

赞曰言若不出口而折羣喙貌若不胜衣而树孤砥步武卿相而守若处子出入旃夏而视犹闾里其柔为用而刚为体者耶

吴文端公一鹏字南夫长洲人也弘治中举进士改翰林庶吉士授编修预修通鉴纂要满考进侍讲充经筵讲官预修孝庙实録成当迁时中贵人瑾怒公等不时谒用扩充政务调迁公南京刑部员外郎转礼部郎中瑾伏法公仍为侍讲以久次迁侍讲学士出为南京国子祭酒转太常寺卿仍南京世宗初始召拜礼部右侍郎转左侍郎奉诏使安陆题献皇帝神主竣事赐金币寻以左侍郎兼翰林学士掌詹事府典内制修武庙实

錄完賜金幣優等進尚書予告歸省還出理部事再加太子少保南京吏部尚書垂一考乞致仕許之給輿廩有加公貌穎秀而龐饒器量寬然長者為文亦典腴有成弘間風居翰林垂二十年不遷而以史成得南曹郎尚書以下多故旧局躓不安公抱案自若學士故不當祭酒祭酒不當南公得南祭酒祭酒不當南太常公得南太常南太常不當久公獨久尚書內典制不當出理部公獨出理部禮部尚書非得罪不南公以遷命南人皆為不平且意有沮之者公亦不以形辭色歸凡十四年而後卒卒之歲得八十有三贈太子太保予祭葬

贊曰以恬養資不求速榮以朴養文不求速稱八座青宮既丰且亨八袞文端遐考令名譬彼大河不匱不盈

祁州守天方張先生安甫字汝勉筱庵先生之從子也先生生而秀朗工屬文登弘治庚戌進士授祁州守以節惠著聲論最當擢會丁母憂歸服除意不欲出曰仕為親養耳親今安在徘徊久之乃上疏乞休馬端肅公在冢宰異之曰宦垂就而棄若脫屣真恬士也特奏進二級有金緋先生凿方池筑亭其上因自号天方环植卉竹左图右书吟哦其间意豁如也先生优游里居余三十年而子寰复贵又能弃官侍养以故益自寬于吴越名山水无不游游輒有题咏若马鞍淀山巴城诸胜固几案间物耳先生潇洒自得与人处和而不流公府居间尽絕以故晚节望益尊时与大司寇周康僖公齐称而先生独不以位显年八十四元旦忽谓寰吾其归乎蓋三月而示微疾临终翛然若脱者邑与祁俱有祠

贊曰仕而逸（闕）而葆真挫名名依抑志志伸匪道匪釋消搖自在游方之內亦游方之外彭澤恨天香山慚貴所不殊者坦中无累

祝京兆先生允明字希哲長洲人生而枝指故自号枝山又曰枝指道人先生天質穎絕讀書目數行俱下于古載籍靡所不該浹自其為博士弟子則以文辭稱而不能致深湛之思以故雅鄭時揉錯然至成弘際名能復古者先生蓋先登矣書法魏晉六朝至顏蘇米趙无所不精詣而晚节尤橫放自喜故當為明興第一為人好酒色六博不檢勵頗不受方內士賞許其令興寧政術顧时时以嗜好奪之迂應天府通判致仕所著祝子通祝子雜罪知蚕衣浮物記語怪蘇材小纂興寧志合詩文數百卷卒年六十七今像乃朝衣冠老矣而尚腴澤或云不能全類之

贊曰先生之文縷古餘今其為詩歌庀景匠心獨于八法形而下者蠕蠕十指若役造化超明轅宋與唐上下跌宕沈冥景純斯亞

都南濠先生穆字玄敬由丹阳徙为吴县人先生生而嗜学能为古文辞数奇不得补博士弟子教授里中时吴文定公以少宰忧归里奇而言之抚臣何公提学林公檄入应天试遂中式又三年而成进士授工部都水主事改南兵部武库已迁虞衡员外郎进主客郎中年五十四乞休吏部贤之为请于上以太仆少卿致仕又十四年而卒先生为郎数奉使必游游必凌幽险探奇胜考究掌故搽金石古文摹搨抄录亡少挂漏归老之日门无杂宾灶不突烟意澹如也惟日以讎讨著述为事卒之日家唯藏书数十卷所著有南濠诗畧文跋诗话宾话玉壶冰听雨纪谈周易考异史外类钞金薤琳琅学士大夫争购而藏之以为帐中秘今像虽冠进贤服金紫居然一山泽臞也

赞曰强仕而儒以为数奇谁与辟之俾歌宾诗婆娑一官未老乞归谁与旌之俾易金緋难进易退其容渊渊博学多识其腹便便未路翕訾畴白畴坚猗欤先生独全其天

唐六如先生寅字子畏一字伯虎吴县之吴趋里人以诸生举乡试第一当赴会试而有所同载者以贿主司得题事株累罢为吏谢弗就先生材高少嗜声色既坐废见以为不复收益放浪名教外尝一赴宁王宸濠聘度有反形乃阳为清狂不慧以免卒年五十四先生之始为诗奇丽自喜晚节稍放格谐俚俗冀托于风人之指其合者犹能令人解頤畫品高甚在五代北宋间今像颇质而野顾犹袭太学衣裾若重戴者可悲也

赞曰夺汝荐冒以掾汝何恶谗面腴朴其外文其中咄惜哉以乐穷以穷工艺乃终

朱恭靖公希周字懋忠其先昆山人徙居吴公初释褐为翰林修撰修会典成迁侍读久之中人瑾矫制夺侍读仍为修撰再以实录完复侍读进侍读学士迁南京吏部右侍郎转礼部再转左侍郎进南京吏部尚书公敦谨诚厚性自规矩以状元及第六品二十年不迁意澹如也佐礼部属大礼垂成诸辅臣相继罢去公犹持旧说忤上旨时方贵操切而公大察而科臣无与者或谓公私之故公抗章自辨言科臣故应考者少即臣以言路私之固不可如避言路嫌而诛责之尤不可且臣老不称职唯有去耳上虽难公去而公意益决温旨给夫廩良厚公归近三十年中外荐者近百疏竟不起公之为恭敬虽匹妇孺子毋敢慢取予即一介不苟吴俗薄而内严畏公有不善曰吾何以见朱公其黠者曰秘之幸毋使公知也公举状元以丙辰犹及见新丙辰状元而后卒卒之年八十有四赐祭葬赠太子少保今像颓然一翁而谦谦抑抑小物克勤之意可掬

赞曰公之乞归威鳳渐鸿天下仪之公为长者祥麟驺虞天下化之无用之用其用乃弘公存吴重公歿吴轻岂惟吴轻世悲老成

周康僖公伦字伯明别号贞庵昆山人中弘治丙辰会试归葬其祖母以己未廷试除保定新安令有政声入为监察御史时武庙初即位所上封事多剴切巡居庸關以忧归服除补故官出按山西还掌诸道老成不阿激迁南京大理寺丞久之为大理右少卿寻擢都察院右佥都御史佐院事复以忧归服除起佐南院提督操江寻转右副都御史佐院如故迁南工部右侍郎俄改兵部右侍郎时上欲振风纪以大学士张公璉掌都察院而公佐之转左侍郎寻进南刑部尚书未上召为刑部尚书时大学士桂公萼去位而给事中应奎灿所论桂客李鹤鸣等事颇有连同去位者张公至天津而返好谓公桂亦（阙）矣为宽鹤鸣狱以待公谢不敢旬日南刑部尚书（阙）推左侍郎许公赞内批以公补南而许公代之公居南刑部无害以七十乞休不允寻得请致仕里居凡十年而卒赠太子少保公之归颇与其乡里老人为诗酒社善大书有眉山豫章风骨当是时天下以公为长者而亟用之所至少官谤然不能如其子精核成名法家

赞曰当公之前务于抗人主以伸三尺当公之后务屈其三尺以希人主色公剂其间不随不激幸而非久乃获全璧然所谓康者渊源流通公则近之而至于僖之小心畏忌则不若靖之宽乐令终也耶

文衡山先生者初名璧字征明云故丞相天祥裔也避其祖璧讳以字行更字征仲长洲人十六而父温州公林歿于官郡寮合数百金贖先生郤之曰孤不欲以生污逝者既服除补诸生下帷读书恒至丙夜而以其才傍及诸执文及书绘皆精絕先生所严事故吴尚书宽李太仆应祜沈周先生而友祝允明唐寅徐祜卿吴徐工古文歌诗吴又能书李祝工书祝又能古文歌诗沈唐工绘事又能歌诗而皆推讓先生以为不可及先生小隶师右军父子古隶师锤梁畫师龙眠吴兴尤精絕诗得中晚唐格外趣独于文取达而已而其试亦不利久困诸生中甫贡而台使者荐之试吏部得翰林待诏预修史史成賜金币时故相杨文襄公张文忠公皆贵用事争欲客公而公不往亡何致其事归先生归而以翰墨自娱造请戶屨长满顾所许独书生故人子属为姻党而窘者即强之竟日不倦其它郡国守相贵戚连车骑富人子行珍宝里门外不能博一赫蹏而先生所最轻许者藩王中贵人曰此国家法也蓋正德中宁邸以厚币聘先生固谢不肯往未几宁败天下称之先生暇则一出遊近地佳山水所至奉迎恐后居闲客过从焚香煮茗谈古书畫彝鼎品水石道吴中耆旧使人忘返如是者余三十年年九十而卒卒时犹为人书志石停笔栩栩然若蝶化者人以为仙去不死也余故尝识先生今像最逼真

赞曰先生之才以迨书绘庶几吴兴所独胜者高蹈蚤引卒完厥名先生之诗以逮寿考小隲务观所尤胜者不以文事受役平原能使吴雅能使吴敦能使吴重谁言不用

不用之用斯其为用

盛值庵公应期字斯征寅之后也徙家长洲二十成进士授都水主事治济宁闸公始为持法矫伉乡人吴少宰宽过而稽故之旬日吴公不以为忤公自是益发舒戚里近幸有挟私物者輒没之时中贵人李广凭上宠横甚其家人慑公威投醪水中以是羣愬公广怒嗾其党秦文诬公逮下锦衣狱谪丞云南安宁驿擢禄丰令稍迁顺庆通判奔父丧归服除为长沙府同知进云南按察僉事分巡金沧道公前后所莅以公强廉节称其在金沧尤能折土酋角坐持镇守中贵人梁裕奸私为所中复逮下锦衣狱诸大臣言官救之得释而前已进其省副使乃之任超为河南按察使歷河南右布政使以至左公复与镇守中贵人廖銓轧伺得其阴将论之銓伏乃已时武皇帝幸榆林公不加赋而供张悉備幸帅彬从欲有所苛责公不应卒亦不能害也亡何拜都察院右副都御使抚四川平天全招讨高文林及流贼谢文仪乱玺书褒獎赐金币以继母丧归服除起抚江西有惠政进兵部右侍郎仍兼副都御史督两广军事公至欲以气压节帅监军且大有所振刷而谤起矣寻破归善贼及思恩土酋后先斩首虏二千二百俘半之方论功而公以避言得改工部右侍郎理易州山（阙）谢病归河决徐沛特起公都察院右都御史治之公上议四策曰疏曰浚曰筑曰改疏者疏上流而杀之浚者浚故道而顺之筑者筑长堤而障之改者改则地而不与之争诏曰可其以春和兴而公业用便宜行事大调兵夫僸上言者援诏书劾公不待旨輒发盛冬困吏士冰雪间上怒夺公职归凡七年以庙恩复致仕寻卒年六十余公气矻矻不肯屈下人其数踈也或望之故然不能不思其材也今像亦称是

赞曰是为直臣于弘治为材臣于嘉靖之世夫以君仁则臣直君明则臣材能一伸之而不能竟者何哉

蔡林屋先生羽字九逵居吴县之洞庭西山因自号林屋山人先生生而警颖能读古文奇书既长工属文又能为歌诗高自标榜以为韩柳不足言吾所撰着先秦两汉少陵不足言吾于篇章建安西京或谓稍近浓隳不至吴中单薄者而已正行书亦遒劲间临兰亭十七帖人或从傍指摘其离者先生曰不然吾非临右军吾乃教之为诸生与文待诏征明齐名而已他孰不尽能颉颃其外若相善内不伏也为诸生者四十年而贡以太学上舍就选人尚书意怜之曰此故蔡生耶授南京翰林孔目二载致仕归卒年七十余无子今像目棱而颀张须猬磔老矣而气不衰

赞曰士有显晦兮造物权之为文慕古兮谁则怜之踟躅兮而竟弗前侘傺兮而犹自怜归来兮西洞庭之石田

顾东桥先生者讳璘字华玉其先吴县人也徙家留都为江宁人先生二十一成进士为诗歌与刘麟元瑞朱应登升之齐名曰江东三才子由郎署出守开封坐累谪入为南京吏部郎复守台州歷藩臬所至有声实自山西臬再迁浙江左布政使转巡抚山西右副都御史引疾乞休吏部言其太骤以布政使致仕先生居闲无事多纵游山水间觞咏自适者十余年而始起家巡抚湖广入为吏部右侍郎以督显陵工留为工部左侍郎兼都御史陵工成进尚书兼修承天大志先生开局聘楚故名士宦废者王廷陈颜木王格分任之书成乃不称旨迁南京刑部尚书被论致仕卒所著有息园诸集若干卷先生诗富才情格不必尽古而以风调胜徃徃脍炙人口文小弱然亦宛宛雅趣延接名流如恐失之有弟璵以按察副使谢病归才不能如先生而峭厉过焉

赞曰弘正之间天昌厥辞李何（阙）之邊王翼之■〈足必〉■〈足敝〉中原江左其谁昌穀后劲公乃先驰绵丽才情纾徐规矩六季风流庾鲍庶几

都察院左佥都御史虞山陈公察字原习常熟人举进士授南昌府推官入为监察御史按滇蜀久之迁太仆少卿谪潮州府教授复为信州倅晋浙江按察佥事俄超副使遂迁山西按察使山东右布政使浙江左布政使入为光禄寺卿改都察院左佥都御史提督南贛汀漳军务乞休归卒年八十三公为人短小精悍负直节慷慨喜事其为御史数上章阻上巡幸建皇储条数中贵人不法再夺岁奉最后上廷鞫给事中杨言怒甚公忽大呼曰臣愿代杨言死上目摄公不为阻退而奏书极论之上竟不罪也其迁太仆垂六十矣而犹荐代人太仆例不当荐代人故谪所居官青衫款段再日一肉按核墨吏若仇归而僻居监司守令过从者时出所饭麦饭佐以薇藿而强进之又作吴语刺刺是非不少借以后进谒公者少有能得公色以故相率指摘公谓非情实余谒公公老矣强而谈死节砺行之士犹张目齿击云

赞曰公在国兮咸以为司直兮归里兮或以为吊诡兮宁矫而徧兮毋瓦全兮宁无理口兮内无疚兮

周恭肃公用字行之别号白川吴江人举进士授行人擢南京兵科给事中迁广东左参议转山东按察副使治临清兵备进福建按察使河南右布政使遂以右副都御史镇南贛入佐理台事迁吏部右侍郎转左侍郎下除南刑部右侍郎寻迁右都御史长南台为南工部尚书改刑部太庙灾乞休里居者十载而以工部尚书召理河道改督漕运入为左都御史长台事满二品加太子少保寻改吏部尚书卒于官赠太子太保公有文行其为给事中侃侃不失职然亦不激诡所歷方面杖节领镇俱以廉勤干济称为侍郎

四掌部事縉紳賢之坐尚書鉉所嫁禍下除公默默不自明以是益信其为长者晚而秉宪握铨天下想望风采凡再司内外察见斥者不能修怨当是时贵溪分宜二相势交轧公处之宽如也可谓高朗令终者矣

赞曰才不见长善无近名力雄万夫外若不胜于垣于台于鉴于衡是以令终显融昭明吴江之清公与俱清吴江之平公与俱平

顾文康公鼎臣初名同以夢改今名字九和别号未斋昆山人举进士第一为翰林修撰预修孝庙实录迁侍讲转左春坊左谕德兼侍读世宗初为经筵日讲官移疾予告久之病良已复官寻迁翰林院学士掌院事明年超拜詹事府詹事学士如故久之迁礼部右侍郎寻以吏部左侍郎掌詹事府事进礼部尚书兼掌如故屡教庶吉士监录累朝宝训实录成加太子太保主考会试进兼文渊阁大学士皇天策表礼成加少保太子太傅兼武英殿大学士上南巡狩承天公佐皇太子监国其敕公有内自禁掖外而都城及边陲并大小百司庶务悉以付卿语盖皇太子方幼冲上所以寄之于古亡两去公长七尺虬须虎颧目炯炯射人声吐如钟性■〈足斤〉弛好声酒及内人或以风之意殊弗屑也自其在班行上固以目属之及进讲益称旨亟欲大拜而为故相孚敬所阻止然上内怜公即言路见抨射愈苦愈不听也前后所赐白玉金宝束带麒麟飞鱼蟒服御书银章金绮食物不可胜计公以病噎在告久之乃卒年六十有八赠太保赐祭及葬遣官护其丧归所著有诗文杂集合奏议凡若干卷公不好修乡曲名以故少称者而其所疏筑邑城丈田均赋久而见其利始思之为疏乞专祠以祀诏曰可

赞曰高文大篇虎颧虬髯为多士魁为大臣师晚而登庸为帝所废屯膏未施谁其尼之则壤城城没始见祠

魏恭简公校字子才昆山之真义里人弱冠举乡试其明年举会试皆高等寻授南京刑部主事进郎中移疾归召为兵部职方郎中不赴居久之起为广东按察副使提督学校父忧归服除调补赣州兵备副使乞休再补河南按察副使仍提督学校入为大理少卿改国子祭酒以进讲忤旨调太常少卿进本寺卿提督四夷馆遂致仕中外交荐皆不起卒年六十一赠礼部右侍郎公始在郎曹时与故大司马胡永清李立卿为经济之学已与故少宰余子积为身心之学居恒谓上天之载无声无臭惟潜龙近之其大要在主敬而敦践履天下盛行王氏学公与之不甚合而其召用也实出故相萼当是时故相璫忌而排之唯上亦以公迂不复用也公卒之日天下信以为贤长者而学废不传久矣余尝获侍公俨若寺所塑阿罗汉者今像仅志其大都耳

赞曰主敬之学实程叔子而公奉之务敦践履凡所著书亡适非体是故讲筵垂用而尼道之不行公其已矣此洙而微宁不悲只

徐迪功先生祜卿字昌毅吾州人也而徙于郡先生自为诸生即与唐寅文璧相唱酬有名而其语高者上彷彿齐梁下亦不失温李以为快既成进士始与大梁李梦阳信阳何景明善而梦阳稍规之古自是格骤变而上操纵六代而出入于景龙开元间初若芟驾不受羈徐而察其步骤开辟鲜不中绳墨者当是时吾吴中独先生能狎主中原盟而惜其蚤死不获持牛耳然迪功集谈录艺亦足以雄矣先生为进士时上忽使中贵人问先生与陆深名顾深得馆选先生弗得也授大理寺左寺副居久之郁郁不得志乞徙南便养而会以失囚改国子监博士以贫病卒年仅三十三时王文成公守仁为吏部郎初与其侪谈道先生骤见而悦之亡何卒王公为志铭意若欲当先生师而谓其诗与谈艺录皆非其至者操觚之士争笑之先生貌戍削血不华色非饭颗吟瘦将亦通眉长瓜之伦也故不如以诗名吐纳何益矣王公语尤诞不情

赞曰诗途百端其流相倾短钉为工酬（阙）聳声弱者萎蕤强者凭陵吴之不竞夫岂才情天发神秀乃锤先生孤鹤嘹唳威鳳騫腾蛾眉新月万古春冰惜哉中夭竟寒齐盟

弇州续稿卷一百四十八

●钦定四库全书

弇州续稿卷一百四十九

（明）王世贞 撰

○文部

△像赞

周玉岩公广字充之太仓州人举进士为莆田令母忧归补吉水公前后皆着廉能声性尤公强不发人私书不受一切请托而以便益语者即亡论刍蕘皆立报其在吉水流贼骤来攻剽公矢众而拒之卒以城完征拜监察御史未几即抗疏言四事其一喇嘛僧盍上为淫侈宜亟投之四夷以御魑魅其二上毋得狎伶工如臧贤辈至引同光故事

为戒其三钱宁故宦官奴乃纵之胄国姓称皇子使天下日惴惴有国本虑其四诸讨贼大帅至校卒皆首鼠不战与贼并完而独暴民骨草野大可恨疏入宁怒甚矫制谪广东怀远驿丞使刺客缘道徂擊之公易道士服间行得免广帅武定侯勋狠而贪阳使使结好公薄其人不报勋伺公入省谒台纂而致之府痛杖数下几殆公骨立行意自若移建昌令复有惠政吏部除御史以公名上钱宁识之复矫制谪公加远世宗初召复故官道迁江西按察司僉事明年擢其省副使九江兵备寻改其省提学大察天下吏治旌卓异者十三人公与焉遂超为福建按察使填守中贵人内慑公行百金为贄公寘之库中贵人惧谢罪乃与约毋挠我三尺而后返之又尝檄止中贵人之牟于织者将三载以右僉都御史抚江西墨吏惮公威名多望风解印绶去而公又欲限豪右田夺其赢归之贫民其豪右弗便也策之朝用事者以例革公巡抚寻擢南京刑部右侍郎又二年得暴疾卒数年予祭葬又三十余年始赠都察院左都御史公貌严冷无笑容与乡人语不操乡音今像盖得大都云

赞曰豸冠峩峩上摇星辰白简谔谔逆批龙鳞万目睽睽指为直臣大明中天其气始伸

南京太常寺卿方公鹏字时举昆山人举进士为南京吏部主事累迁郎中公通经术修行教谊有大人望而是时天子方追崇大礼朝士自卿相而下靡不欲考孝宗皇帝而别崇兴献王如宋濮王故事进士张璫独请考兴献王而称孝宗皇伯考尚书廖公纪时于后堂见诸曹郎而问曰张生议云何众莫对公独曰是宜反之心而已廖公曰善语稍稍闻外于是给事御史争以他事论罢廖公而公用积次迁浙江右参议行部有老成声然念言者且见侵因移疾归而亡何璫所持议大伸既廖公田间起柄铨衡而公亦拜提学副使甫上召为右春坊右庶子兼修撰寻主顺天乡试公以一言合暴通显谓非意所得悒悒不自解而新贵人亦谓公不能终附丽意嫌之会迁南京太常寺卿遂再移疾请告亡何他臣僚有请告者内批削公新衔以右庶子致仕卒年七十余公好读书著述自娱为文章典雅老成母问风木弟鳳常为南台御史有直声

赞曰汰众求心以是信也履进思退以明志也覃思著书以文隱也没而微言胡泯泯也

故广西提学僉事方改亭公鳳者矫亭先生鹏介弟也少以经术艺文与兄齐名又同举进士天下艳称之曰二方授行人选得南御史以母丧归服除改北出按真定当武庙时政在中官武弁公所论劾不避以事见忤乃复请南寻移疾归嘉靖中复补南而所陈皆天下大计会张桂大礼之议起公力言其非是既二人者骤贵公又力糾之寻出视

广西学政公引疾不起时矫亭先生以太常得请先后卧林下先生杜门著书而公放意诗酒踪迹俱不及城府其议礼时有所不合天子亦知之然能各信所是以行其志天下所称二方者名俱不挫公一子一孙皆荐乡书以是晚途益畅适卒年八十余公卒久之而少子范成进士今像颇明秀似中年所貌者

赞曰久宦而官不大起仕贵伸其志何必金紫既寿且康多美孙子可以瞑矣

吴切庵公山字静之故尚书洪子也举进士为刑部主事歷员外郎郎中满九载弗迁以同诸曹郎諫南巡得杖久之始为山东按察副使擢陝西右参政改浙江以尚书丧归服除即家迁福建按察使歷浙江左右布政使公所至以廉靖长厚有士大夫声遂擢都察院右副都御史抚河南公尝持临漳王之藁宗急为所中左迁浙江左参议事益白以江西参政入为应天府丞复拜右金都御史抚四川亡何迁右副都御史提督南贛汀漳军务未上道擢刑部右侍郎人谓公当径上公曰前抚臣之候余代经年而又稽之无乃非人情乎乃赴南贛得新代始之部俄转左侍郎遂进尚书諫官论翊国公勋罪下狱勋故宠幸久众未测上意首鼠两端公奋曰吾知法耳遂丽勋大辟狱上上内惜勋而难公守为持其奏不下会勋庾死狱中上发怒责公故迟讫亡人臣体褻为民以寒月单车行将抵彭城暴发疾卒年七十三隆庆初复其官予祭葬公伟躯干音吐如洪钟与人语洞见底里不设城府今颇类之

赞曰公之用法终始在寬及其究也以法失官虽则失官其道乃完白帽单练以附桐棺天王圣明还司寇冠

故赠少保王襄敏公以旗字士招其先吴县人也以豪徙江宁籍焉二十六成进士公白晳广额丰辅音吐如钟初仕上高令即有声入为河南道监察御史按河南能制叛瑯璟寢其谋再按福建平泉漳大盗以亲老侍养归凡十年服除而后起提调三辅学政迁南京太仆少卿改北进光禄卿擢右副都御史抚郟阳入以左副都理台事移兵部右侍郎诏经理漕河工成加禄一等还守故官进右都御史理南院入为工部尚书改南都察院左都御史寻迁兵部尚书时陝西三边总督曾公铣慄銳喜事欲以十万众逐河套敌戍其地与大相夏文愍公言意合下公会文武羣臣议公虽迫夏公指而心难之乃具疏请缓之姑预算兵食足而后可大举上悟即日逮曾公而以公代之朝辞锡金币以行曾公虽以敢往得敌憚然多用军兴法征调其下不能堪公至一切罢去之唯饬墙堑增台堡课屯耕为守计而已号令简靖不为烦苛其下大悦之敌亦自引避遠徙其后稍稍阑入公辄檄诸部逆击破之所卤斩及生口牛羊庐帐不可胜记上嘉其功赐金币者十三玺书獎论者二録胄子者三加太子少保以至太保卒赠少保谥襄敏祭葬如例呜呼

始终之典脩矣公为人宽博有远识敏信而慎毋论居官其居乡亦推以为长者今像色稍紫则以老且塞上故

赞曰王徙金陵而始吾吴积庆百年始鍾大夫厥才有余而识亦如宽然长者不疾不徐孝养既终端公服除膺仕华阶悬席若虚玄圭告成遂叅庙谟控制万里为国储胥师中三锡围玉纒朱高冢祁连返魄故都既以全归复永令誉

周山斋公鳳鸣字于岐故尚书康僖公子也举进士为刑部福建司主事迁广西司员外郎进郎中时宁事败而钩党竟干累岁不决公以郎中出谏之立报上轻重亡枉者母丧归服除补山东司是时诸曹独广东领緹骑狱最号难治而尚书李公承勋特器公责公理其篆公至则滞案一洗李公改大司马遂奏以公移职方李公才于世少双顾尽以大司马事委公曰使诸曹郎尽若吾何妨坐啸耶公遂进为大理左寺丞是时康僖公尚书刑部而公丞大理时人荣之公竟以持法忤旨罢归公归凡十八年而中外荐者六十疏部为数数报闻则犹用前忤也公卒年六十三今像丰下而长若犹有隱忧者

赞曰公佐司评法比于理其郎夏官谋出以计使当虞廷若咎繇士以平暴乱以诘奸宄夫谁弗良中道而止

王司马公积字子崇别号虚斋太仓卫人为人敦谨详审家贫力学举进士为武选主事以便养亲乞南得礼部迁南车驾员外郎进武选郎中出为广东左叅议佐灭恩平积寇以忧归服除补陝西左叅议迁贵州按察副使饬威清兵脩监省试甫毕迁湖广右叅政遂佐万中丞破塘西囤苗而以省试累谪两浙运盐副使寻进其省僉事俄又进其省按察副使明年为福建右叅政佐朱中丞破倭擢山东按察使遂为其省右布政使再入福建为左擢都察院右副都御史抚山东迁南京兵部右侍郎以目眚乞休久之卒年七十八公有勘乱才事未及呐然若不任者及之则砉然中节既至而叩之又若不任者三佐藩而三以战功得金币赏然不肯为人言兵事其补陝西也候阙踰岁至卖衣装为餽炊费乃上书乞休吏部为愧而后补之仕宦四十余年仅具中人产蓋吾乡之推廉靖长者自先王父后公其擘云今像虽两目盲而意了了春阳可掬

赞曰有美司马温如其玉虽则如玉甚栗而朴难无求避功弗庸録乃克忠孝信友嫻睦晚虽丧明犹百身赎胡以百身敦鄙薄俗

国子司业王先生同祖字绳武昆山人也先生丰下长目美须和易坦洞不设城府二十四荐南宫明年始廷试改翰林院授编修为诗清丽有唐人风善草隶一时才名大

噪而新贵人有同年者故为先生所轻内衔之假大察逐先生归盖十余年置东宫官僚以编修兼司经局正字起故同辈皆显重而先生犹仆仆一羸马青衫仅迁国子司业时先生书刺字奇大人颇怪之北兵岁大入边杀掠吏民先生上书请捐内帑数百万金以间通北荒外之敌与中国夹攻而不得其主名凡再上御史以非所宜言糾正之先生益愤愤不自得请上还宫改元创新政以整齐宇内改元上所讳也见之恚甚几欲置大辟寻解斥为民先生大悔恨暴得风疾久之卒先生虽官挫名损然负材不获究至今为流辈所惜

赞曰贾生久斥召而上书三表五饵其术以疎岂无为汉誓归匈奴改元似谀还宫似直其直乃尔谀耳亦逆臣子爱君曷维其极

右春坊右司直郎兼翰林院检讨张晓川公讳寅字仲明与其伯兄辰先后举乡荐而公成进士授高安令以忧归服除补宜春令有政声召为南京河南道监察御史风裁凛然以追论故相及北台长忤旨谪判高唐量移守安州不见迁客态精心职事吏人悦之擢南文选郎中公以直道姿蹶起质有其文颇郁然负公望时大补官僚而相夏所登进不甚谐时望诏太宰更补公遂得今官公之补既雅非相夏意而与其僚争礼为所中罢归公归自壮年阖门灌园读书动止有矩则人且冀其复召而竟弗召也老且死矣春秋六十有三子孙彬彬世其风

赞曰一蹶而起畴为之庸再蹶不起畴扼其冲以直而始以直而终天乎人乎于我何恫

朱秋崕公紈字子纯长洲人其母遘家难生系中稍长为诸生孤苦自立既举进士授知景州改开州俱以廉惠干济称擢南刑部员外郎进郎中改武选再改考功俱仍南部出为江西右叅议迁四川威茂兵備副使以平深沟诸部寇功赐金币加等母丧归道迁贵州左叅政服除补山东寻进云南按察使歷山东右布政使广东左其在广东以封川捷再赐金币进都察院右副都御史督抚南贛汀漳未几改抚浙江兼督福建海道诸军请一切从军兴法诏许之仍听便宜行事公有文武材畧清强峭深悉墨吏大猾如仇讎前后所操切黄墨以下多望风解印绶去视事日悉扫一切应酬蚤夜申约束通海内地奸民当是时瓯粤闽粤诸贵人家于海其处者与在朝者谋务破败公所为至革巡抚为巡视稍削其权公闻之益怒数上章廷辨因而有侵执政语执政闻之亦不善也公提兵平漳州同安寇抚岛夷六百人移填定海娄破贼余皇又大破贼于温盘南鹿诸洋凡数上捷仅一拜赏而最后悉平佛郎机黑白番舶虏其酋并余众四百余有传其为变者公传令悉诛之言官遂訾公妄杀时公以移病得予告而削职听勘之命下矣公居恒

叹吾贫无贿赂不任狱病痔不任狱负气不忍诟不任狱纵天子不欲死我大臣且死我大臣即不死我而二粤之人必死我我死自决之不以授人也乃草生志慷慨引酖以卒年仅五十有八自公得罪后其官亦罢不设中外摇手不敢言海禁事居数年海寇大作东南为鱼烂者二十余年而后定识者以为不罪公海当无寇而二粤士大夫犹噤然谓寇自朱纨始

赞曰去恶不尽公不止以贼遗君公所耻搜巢累俘断腰膂赏不酬劳置之死为奸报讎饱奸饵倒埋太阿涩秋水万厯之年振神气惜哉胥江哭冤鬼

张通政公寰者字允清即筱庵公之从曾孙而叅政穆之世嫡也父曰安甫以进士再补知祁州年四十余即引告乞休太宰马端肃公贤而请予之四品服优游里间几大耄乃终学者称之曰天方先生公亦成进士知开州母忧归服除补济宁入为刑部员外郎乞休养父父终补故官以选为通政司右叅议九庙灾自陈得致仕遂不起公为人恺悌好乐多通纵游山水间遇佳胜即累月忘返有具酒招之者无贵贱辄赴谈笑竟夕引接名流不惮折节筐篚之赠欣纳亡餽讓间辍以资贫乏者亦不较也为诗及书皆以自娱适而已不自珍贵所至墙壁挥染自满卒年七十六吴俗为乱以下紫姑仙徃徃得君诗类其生平云今像丰腴皙颯须落拓潇散若有所自得者

赞曰匠心而文若诗亦匠手而书之匠口而谈匠足而游乎山之颠而水之湄其山水之日羸而庙廊之数竒仕者以为吊诡而隱者以为墨屎其与物无忤而于道不违者耶

江西布政司右叅议阳湖王公庭长洲人也举进士歷南曹郎有声出为江西按察司僉事精勤于职然公素恬退少宦情累乞骸骨不得请既迁叅议遂决归公归仅及艾与故文待诏先生征仲王吏部先生祿之日从事山水觴咏间优游自适而公尤以耿介守节不苟称晚岁过老颇健忘其子孝廉敬臣悉精力废学业而颯共养焉公得其宽终寿八十余

赞曰成进士而不蕲荣以文行着而不希名有子孝廉能以德承噫将使挟轩冕者望车间而却轨腾颊舌者指园庐而吞声者耶

都察院右副都御史王涵峰公守字履约吴县人也其先章姓公为诸生时与其弟宠俱工秋文笔札之事而名不如弟然状貌特伟丽举止详华时人咸器之成进士授南昌府推官入为吏科给事中出按秦地边事还为都给事中迁光祿少卿大理寺少卿南

京都察院右佥都御史协掌院事兼督江防归迁右副都御史理留储母忧归服除补总理河道之任不久卒公孝友慎廉隅有干理才与物无忤而厄于年未究时咸惜之

赞曰公与厥仲聯鑿秋苑仲厄于遘而弗克显公起政术九列婆娑造之弗长究也如何厥仲所得与公孰多南京国子博士文三桥先生讳彭字寿承故待诏征明子也先生少承家学善正行草书尤工古隶咄咄逼其父以诸生久次贡授秀水训导擢国子助教于南京时七十余矣先生敦直坦易于进退取予皆称心而受不为饕让人以待诏故多优假之七十六卒

赞曰父子俱有艺文而俱不得志于科目羸马青衫潦倒散局然父视之若蜡而子甘之若饴各行此是不论彼非

和州学正文文水先生讳嘉字休承彭之介弟也其书不能如兄工而画得待诏一体鉴赏古迹亦相埒以诸生久次贡授乌程训导擢今官老矣乃移文乞归归而乞书畫及请鉴别者履相踵先生犹一一应之至困惫不支乃卒年八十三先生不能如兄浑然天真然有分辨不苟取

赞曰维名与寿以及技艺宦薄家贫各足于志拟父则子视兄则弟

光禄寺丞陆弘斋先生鳌字伯载昆山人也长身玉立疎眉美须与人谈说和熏蔼然而中实耿介举进士尝从王文成公游稍推魏恭简公于经义多所著述欲自立门户不名一家师授刑部主事迁光禄寺丞以疾请告得致仕归台省使者尉荐无虚岁而其子不肖有秽言怒而杖煞之为怨家所中夺职坐是不振然先生雅食贫寄迹一书院环堵萧然不蔽风雨澹如也客载酒过先生辄醉醉则陶然若不知有身世者而间一觴之五岳方寸识者窥其微不能忘世云以例复故官仍致仕卒年七十八

赞曰居官而蚤引恬居家而晚食贫为学而不务立名以是终其身不知者疑其伤慈而知者以为亡愧于大伦

陆贞山先生粲字子余一字浚明生而朗秀长身玉立美须髯自其诸生时则已为王文恪所赏识曰是子也材非吾翰林所能有也而久之乃举乡试魁其经明年会试复魁其经以进士改翰林庶吉士凡七试皆居首当是时新贵人张桂长翰林先生耻为之寮约诸庶吉士毋得往见张桂銜之中于上谓皆故相费公宏桃李以故当散馆公仍试第一而仅得工科给事中先生上言请开弘文馆与博闻有道之士讲说政术开太学举

贡诸生途与进士并王国及教官材者一体迁擢士毋得乞远方远方二千石以上毋以不及调行太仆苑马盐运毋以下考迁又上久任使慎考察汰冗官复制科四事皆次第采纳故相杨公一清见辄叹曰子自爱真经世才也先生以是益自信论事亡所避主浙江试还而法司与厂卫狱互异上右厂卫至为斥台长浹先生力信其不可以是得上怒下诏狱杖三十寻释之时张与桂俱继相拟杨公后先生遂露章劾其奸上为之罢二相一时朝廷肃然望治而上寻入霍詹事谄语谓先生缘杨公指于是首召张而杨公不自安更请去而先生再下诏狱以谪矣先生之自都镇驿丞迁永新令有善政其士民多讴谣之而念相张数蹶起不能不相中且母老上书乞致仕归里居凡十八年中外论荐者无虑三十疏而皆报罢先生以母老多戚戚为选声色以娱之而已不能无染指及母死悉屏去之先生性伉爽每语意气及不平事慷慨攘臂须尽张其为文精雅有法得班氏及韩欧遗意

赞曰其貌余识之朗乎其欲仙其辨余听之沛乎其河悬其文余读之后永叔而前孟坚其志余窥之宁璧碎而不瓦完尽其言庶几经世之贾陆老其才将无筹边之范韩也耶

王雅宜先生宠字履仁后字履吉吴县人先生与兄履约俱为邑诸生而名过之顾累试辄不利以年资贡入太学试复不利竟死得年仅四十先生朗朗玉立饶姿制又能为雅言言不及猥鄙诗好建安三谢及盛唐文学迂固甚似之顾材薄于中不尽有也书始摹永兴大令晚节稍稍出己意以拙取巧婉丽迻逸为时所趣几夺京兆价今像是二十后笔翩翩美少年而识者叹其不永

赞曰岂弟君子温如其玉其鄂郁郁曷不乔木曷不藏璞鄂瘁而枯玉陨而泯女所形徃名弗皆沦女实永年

袁胥台先生袞字永之吴县人生五龄即知书七岁赋诗有奇语十五试应天即驰声场屋间又九岁而举乡试第一明年廷试第二甲第一人改翰林庶吉士时新贵人张公者以先生所射策尝荐居首而亟言之欲以见德先生不荅亦不往报谢以故当授官密言于上谓诸少年浮薄非大器皆左之先生仅得刑部主事主试河南所识拔多知名士还改兵部之武选未几而司不傲于火以先生当于陬夕逮下狱特论戍湖州则犹张意也先生既工文章精笔札而湖当山水间凡所讽诵著述传远近虽在戍而名益重久之赦归起南武部主事迁职方员外郎广西提学金事駸駸显矣偶意有所不可遂拂衣有所经游名山皆为文记之先生归而家横塘据石湖之胜著书行吟豁如也卒年仅三十六所著文集二十卷皇明献实二十卷吴中先贤传十卷世纬及岁时记周礼直解又

若干卷

赞曰秋文沾沾以自喜兮六籍洋洋取足已兮经济秩秩不吾以兮少而亨衢嗟中否兮宁自隐约焉歛歛兮

前浙江按察僉事皇甫少玄先生洵字子安故重庆守録之子也曩弟四人长曰冲仲即先生叔曰沆季曰濂皆以科甲文学着声先生成进士累官礼部祠祭郎中得其尚书心尚书入相会置东宫僚属以先生补右春坊右司直郎兼翰林检讨甫上而为言路所訾外谪浮沈久之始以南刑部郎分臬浙东复坐计吏谪待次里中郁郁不乐病卒先生视其叔氏稍饬廉隅矣而自矜重负气矻矻不肯下人故宦屡蹶不达其卒也同舍郎蔡子木哭之曰五字沈吟诗品絶一官憔悴世途难人颇惜之

赞曰有四玉树挺威明庭咸阻干霄仲复先零呜呼宦之不达人或与之龄之不永岂人所为

王酉室先生名穀祥字禄之长洲人美姿容性颖敏善书畫为古文辞连擢进士改翰林庶吉士踰月而解就甲资得工部屯田主事改吏部之考功转署文选员外郎数行郎中事先生持选法不肯阿私尚书鉉渐以得郤意忽然不乐念母老乞归养而其兄故为岭南幕官尚书用例格先生谪倅真定遂归养母者几三十年太宰李公默雅重先生奏起之卒不应最后相国徐公阶为政以大名倅起先生即补南选部谓旦夕且卿列先生复不应亡何膺末疾不能言竟卒年六十七先生有书癖所抄録古文籍至数百千卷咸精好令人不忍触手人以书畫求者不肯辄应杜门却扫一室之内琳琅金薤溢如也今像且病矣犹煜煜然足映带余子

赞曰居津要而若奉朝请中无竞也家廛里而若在箕颍不敌应也再起官而再若无心长静也嗟嗟胡斯人而有斯病也

故大中大夫太仆寺卿东白顾公讳存仁字伯冈举嘉靖壬辰进士为余姚令有声征拜礼科给事中以灾异上疏极论时事忤旨廷杖六十谪佃保安州自是往来塞外者几三十年不得归隆庆元年奉旨召用未上擢南京通政司叅议亡何迁顺天府丞再迁大理右少卿进太仆寺卿公自流入起不二载而至九列感上恩条论时事皆可见施行又请重太仆丞选及论马政之弊报许公于是聘归丞有光草寺志而身经理其凡书成上疏乞归诏许之公为人敦谨重然诺好行义尝致田以贍族又益置田以资里之长赋者济南李攀龙为文记之素强无疾七十余犹矍铄拜起如壮年俄遘疾卒讣闻予祭塋

如例

赞曰循吏于邑直臣于朝长者于乡中为流人垂三十年弗改厥常闻义若渴嗜善若饥恶若探汤有传有记附之家乘焕乎文章曰乡先生尸而社之为后进纲

云南按察僉事皇甫先生沆字子循百泉其别号也父曰重庆守録先生兄弟四人皆有文采冲不得志于公交车以死涪濂与先生虽得第然其官不大显而先生自工部郎外补不能其职改国子博士旋起为南京吏部谪同知某州为御史王言所捕亡命得解补开州超同知处州寻迁云南按察僉事大计中白简归处乡复为陈御史所窘家几破先生性和易不设城府为诗文沾沾自喜好声色工狎游而不能通知户外事以故数困然信心而行以文自娱于诸兄弟中独寿老年八十乃卒其诗五言律最工七言次之有钱刘风调文慕称六朝然时时失步

赞曰宦拙而穷貌短而佻其志器器其乐陶陶修辞之士而年最高者将无外为之鉴而中不劳者耶

弇州续稿卷一百四十九

●钦定四库全书

弇州续稿卷一百五十

（明）王世贞 撰

○文部

△像赞

故南京刑部尚书景山钱公邦彦字治征呉县人也公生而长身玉立清劲瘦削如华亭鹤由高安令用卓异拜吏部主事歴司勳司封以至选部员外郎遂为考功郎中迁南京通政司叅议歴太常少卿卿再迁大理卿刑部右侍郎转左侍郎遂转南京刑部尚书六十余乞休寿九十台使者以故事请天子为之赐彩币羊酒俾抚按臣存问仍续廩给扶盖及门而公不待矣公生平修慎详淹居官无公私譴杜门里居优游志物之养年虽笃老而五官之用不衰美食甘寝以至于终奄然若蝉蜕矣言行纤巨动见模楷为荐

绅先生祭酒者垂三十年海内艳言之公卒之岁东莱有郭大司马宗皋者九十一亦卒

赞曰吴多巨寮八座绳绳至于寿考我公独赢岿然灵光进止仪刑帝所显褒世所艳称北郭南钱俱为列星

沈江村公■〈启，山代口〉字子由吴江人举乡荐七上春官始第授南京工部主事以具上供楼船及修陵寝事为其尚书所知考绩改刑部进员外郎郎中察能出知绍兴府请于台平其属邑会稽萧山新昌赋其人德之时朱中丞紈严舶禁而郡要路荐绅为恐喝间阻且持美迁啖公以公能得中丞驩而解之公不听遂衔公刺骨而公迁湖广按察副使公方佐其中丞张公岳破黑苗寨以功状闻而绍兴之间行公罢而朱公寻坐累不良死公归絶口不言官事筑室仙人山以著述自娱耳目聪明饮啖步履如少年久之卒年七十八子孙多显者公所著有家居稿南北稿西台稿越吟稿楚吟稿鸡巢岭稿南厂志牧越议畧吴江水利考杜律七言注晴窗便览若干卷

赞曰弗用之全乃全其天虽嗇于官乃丰其年

四川右布政使雨泉陈公讳鏐字子兼吴县人举进士为工部虞衡司主事累迁都水司郎中擢四川按察僉事提督学校转湖广右叅议河南按察副使以御史孙昭论调归里中积数载起家补云南迁四川右叅政遂为其省按察使以至右布政使一旦移疾致其事归又数载乃卒年七十其政术具余所撰传中公为人坦洞不设城府寬然长者而中甚耿介其始自工部榷江陵税再起婆娑滇蜀皆天下饶地而晚不能具中人产构一堂广袤仅寻丈而扁之曰已寬其自蜀归也余迎谓之曰劳苦公旦夕开府何渠厌紫微事也公顾笑曰吾见夫陆栈水峡之险遠也不欲以一棺累妻子耳盖天下方以归高公公殊不屑也公善八法精行草擘窠怪伟迻丽而其于榜署书尤妙所撰诗文亦洒洒顾不肯注思曰使吾以是见役何异拮据案牒乎轻刀短屐独游山水间客召之饮即饮饮少即隗俄坐睡不复问孰主也其任真类是

赞曰行不脂辖止不树垣匠心条畅与时盘桓出入畏途其天乃完众皆噉噉我独恬然逃名近名一切舍旃我仪古人清和之间

瞿文懿公景淳字师道别号昆湖常熟人少工制科业有声而久困诸生间既得荐遂为会试第一人己廷试复第二人天下学士大夫翕然称之以比于王济之唐应德而公夷然弗屑也有所撰随请辄应不复涂窜取辞达而已公貌眇小体若不胜衣而气端劲与贵幸大臣语侃侃亡少屈尤脊举止严取予而不欲有其名与后辈谈子易温直令

人宛然想见成化弘治之际公自编修进侍读左春坊左谕德侍读学士以至迁太常卿掌南国子祭酒为南吏部右侍郎礼部左侍郎兼学士中间再分试礼部一主武举及应天试知制造总校大典诸文学重事无弗与者而至迁拜则往往逊其侪其始以忤宰相故最后其乡人与门生相继秉国公澹然自如也以病请告卒年六十三赠礼部尚书始公以甲辰举而前举甲辰第一者储公瓘与公官位年望畧同其谥亦同

赞曰公貌温温其言便便其履坦坦而学渊渊鹄起巍科鸾栖木天视若固有其中坦焉及乎栖迟亦遂泊然不琢不雕大化以全

陆五湖先生师道字子传长洲人踰冠举乡试又七年始成进士故太傅李文康公时阅所射策而赏异之曰此董晁间人也而书又得锺王法取以为第一天子偶有所轩轻抑置次甲除工部都水主事久之改仪部入直内阁制策当是时人以为清华格而先生意不欲游其伍请告归养母者十四年母丧以孝廉闻使者交荐之不起寻病瘵又数年始起为祠部主事召署祠部郎中就迁尚宝司少卿尝一使秦邸还署司事病益甚复请告归又六年而卒年六十四先生长身玉立美须眉仕宦垂四十年立朝不满一考其请告之日杜门读书为文章及书画皆入能品慕文待诏征仲行能独折节师事縱游湖山间不轻入公府意泊如也少尝受经王禄之俱仕非久即高卧天下俱以为威凤仪鸿而公晚出不能有所为人用以是相轩轻则不然禄之病公亦病也禄之病弱弱故不肯出公病瘵瘵乃心膂闷不甚了了以是强出不然公岂齷齪吓腐鼠者哉公所著书文集并续别集左史子汉镌数百十卷藏于家

赞曰女媭美兮重之以修能佩桂椒兮又袭之以杜蘅飘独立兮岩之阿姿絶代兮将奈何横天置兮伏修坂君不顾兮日将晚舒予足兮就康衢方驰骋兮复次且末路薄兮察秋毫归来归来兮不可以久叨

彭隆池先生年字孔嘉吴人以文行举为郡诸生寻谢病免得寿六十二以卒其事行详余所撰志中先生博学于载籍多所通晓顾自匿长恂恂退让君子也口不挂人臧否以故足迹不能出百里外天下信其为长者书初法晋人已为楷其小者信本大者清臣行草则子瞻予与先生善今像最逼真

赞曰子之文章尔雅周详其为人也子直易良酒德温然非几尽忘不为城府谁窥女壖不为棘荆谁虞女伤是以吴趋畏垒之乡

俞先生讳允文昆山人少为诸生以布衣卒年六十七事行见余所为志中先生善

病不能弃其家遠出以故虽食贫而能保其志老而名转高诗善五言古选气调殊不卑所乏精思耳歌行絕句如披沙拣金往往见寶小文之有韵者佳尺牘亦不落夹正书古而饶小法以置唐人中未可辨行笔自米襄阳曲踊跳荡更过之姿韵弗及也今像乃黄彪所写戴貂帽披紫裘秀眉飘须神仙中人也

赞曰其貌皙兮而古其处僻兮而古其行质兮而古其文则兮而古其书劲且泽兮而古古之人古之人生何幸兮偕子亲中道睽兮长苦辛托余志兮以弗泯

严文靖公讷字敏卿常熟人举进士为翰林院庶吉士授编修满九载进侍读超拜学士寻进太常寺卿兼学士再进礼部左侍郎改吏部进礼部尚书改吏部前后兼学士如故加太子太保进武英殿大学士亡何以病予告归公少通颖工艺文善书尝一主试应天乡试及会试以撰玄文当上旨得骤贵重所赐有绣麒麟蟒服它赏亦称是而性畏慎每上一命下皇恐局躄无所容在吏部时而徐文贞公阶当国益自励为清公苞苴不行然铨务多文选郎陆光祖主之拱手而已既归病良久则父封公与母夫人尚无恙其家庆与李文定公春芳相望于江南北而公之为恭谨益甚虽少年书生与之讲钩礼所贲予寬貸其声多在闾井畎亩间积二十年而后卒寿七十四其卒也咸嗟惜之讷闻官给葬祭賻贈少保

赞曰德于朝浅未竟也德于乡终有庆也折节为恭久而自然口絕雌黄腰若杯棬是非公卿之盛节而末俗之所艰也耶

布衣陆包山先生治字叔平吴人也事行详予所撰传中先生生而磊落负文采有姿制为故太傅王文恪公所识异游祝文二先生门其于丹青之学务出其胷中奇以与古人角一时好称之几与文先生埒先生倜傥嗜义爱慕学士贤豪若渴富家儿賚重资踵门谢弗纳也家支硎旁有山水之胜艺菊数百本五色相鲜佳客至辄解衣伏雌斗酒弥日夜不倦有腴田数顷忽尽弃之构祠以祀其先祖而依焉后老病卒年八十一余尝泛太湖陟西洞庭先生携一幙以随其家不知也归而悉貌其胜以貽余曰非子诗不足以当余画又尝用丈二赤宋时纸画桃源图见貽余至今愧其意焉先生久次诸生且病御史贤之而俾以贡名若当辟者先生遂却衿裾御也

赞曰身不越井重一世兮迺者服节遠者艺兮曰艺斯浅深乃志兮九九之梦斯征岁兮所迫身后余为之识兮

太子少保南京吏部尚书贈太子太保袁安节公洪愈字抑之吴县人也尝举乡荐

第一遂成进士授中书舍人拜礼科给事中出为福建按察僉事兵备建宁迁河南布政司右叅议转山东按察副使提调学校湖广右叅政入南京为太仆寺少卿太仆光禄太常卿乞致仕归久之始起故官进工部右侍郎都察院右都御史礼部尚书以考绩入朝改吏部盖自少卿而后凡八徙终始不离南京抵家上书乞休许之特加太子少保寻续廩给扶不久而捐馆矣春秋七十有四公生而清介质直孝友忠信不苟然诺与人交不设城府通仕籍者四十余年以三品里居垂二十年容膝之庐不增一椽得月资辄与诸兄饮食共之南亩无所拓出入徒步或泛小舫从一奚僮而已为给事日尝紕铨司翰林各一人翰林权相入幕客也铨郎方握秉而又能得权相意公极论其奸私又他语多撻太宰幸上知之为之逮铨郎斥翰林而公且抗疏直言权相误国状疏成垂上而建宁之命下矣其在南台又能明御史之直言即忤旨不顾他条奏皆凿凿可行所莅多去思第公居之澹然未尝示人以德色晚节名转重士林望之以为麒麟凤凰云公素强无疾得小疾遂逝若蜕者今年春忽画一像寄余俾赞之余赞之以复公仅半月而公卒余乃复徙其子都事一鹗别模其小者而复为之赞之呜呼余昔之赞公公生也而今乃忍赞公死也

赞曰疎眉方瞳秀下而丰踰七十而有少容敦薄廉頑模楷是宗而一旦夺之岂造物之不容虽然天子葵之士林崇之为名臣于万厯为完人于嘉隆高朗显融令始令终于嗟乎袁公

徐鲁庵先生师曾字伯鲁吴江人也登嘉靖丁未会试移疾归至癸丑始廷对赐出身改翰林院庶吉士授兵科给事中再迁至左给事中有所建白皆凿凿可施行者而是时上春秋高所任大相把持言路君念母老身不任谴而又不忍嘿嘿乃移疾归归之日即独身跳之城外别墅岁时伏腊还谒家庙一见妻子而已覃思著述皆翼经而证史颇及时务亦喜作诗工取达意天官累檄之出不应最后径补故官力辞卒年六十四有司祀之学宫

赞曰吾闻之有言责者不得其言则去去以全志亦以全厥身而永终誉又闻之人有不可为也而后可以有为嗟嗟先生乃竟不为卒以全归耶

故少司寇赠御史大夫雨亭陈公讳瓚字廷裸常熟人为诸生举于公交车有儁朗之目以进士授永丰令节惠慈民其下称之尝徙故聂贞襄公罗文恭公游而所得于文恭者尤邃征为刑科给事中再迁左给事中巡察京营前后上军事甚练为故相徐文贞公所重时文选郎墨而馱法公上疏极论之而荐故岩穴弃臣某某等上讳言弃臣杖之朝堂六十谪为民公葛巾野服奉其父纵游山水间若不为官者隆庆初首拜吏科左给

事中言事益激切徐公益重之俱见施行而亚相高公狠而数轧徐公弹射之不避后徐公归高公得志而公已为太常少卿矣竟见中以考功法当外谪公仍故服奉父游如初凡十五年而始补会稽丞迁漳郡再迁南仪部主事俱未上进郎中公始一出超进南通政司叅议复召为太常少卿改右通政转左为南京太常寺卿入拜都察院左副都御史迁刑部右侍郎转左以至卒年七十一赐祭葬如例公佐台台纲凛然其佐法曹操执不挠貌棱棱若不可犯者杯酒谈笑春温蔼然及有所不可义形于色百折不为挫真伟人哉

赞曰直而温温而栗介于石不终日表里如一终始亦如一

黄质山先生者讳姬水字淳甫父曰五岳山人省曾以博学工古文辞着声先生生而颖异试公交车业不利弃去刻精为诗五言古律皆深入唐人之奥文亦峭劲其大不能如其父然有美爱可传者生而嗜古负遗世之僻不与俗谐其辨识书画器物称赏鉴家顾多谢客客至而雅者始见延然不能具五簋而酒茗脯炙必精旨雅语竟日不倦卒年六十六今像溪刻寒苦古狷者流也

赞曰文不取时行不取俗别心为工谐已成独何以征之形骸土木

故太仆寺丞直文渊制敕归震川先生讳有光字熙甫昆山人也生而美风仪性渊沈于书鲜所不读而尤邃经术长于制科之业自其为诸生则已有名及门之屦恒满而先生方以久次膺贡寻举应天省试第二人故相张文毅公治时主试得先生文而奇之大以国士相许然至公交车辄报罢行年六十而始登第又不得馆选出令湖之长兴隃三载仅迁判顺德府高新郑其座主也以大相秉铨怜先生屈拔为太仆丞寻以太仆入司制敕气稍发舒而浙之台使复苛撻之先生方属疾郁郁不乐遂卒先生于古文辞虽出之自史汉而大较折衷于昌黎庐陵当其所得意沛如也不事雕饰而自有风味超然当名家矣其晚达而终不得意尤为识者所惜云

赞曰风行水上涣为文章当其风止与水相忘剪缀帖括藻粉铺张江左以还极于陈梁千载有公继韩欧阳余岂异趋久而始伤

应天府丞王华松君讳执礼循伯先生之孙也少孤贫力学徙归有光先生受易为诸生久之举乡荐又久之成进士授建宁司理入为南京刑部主事召改北以母老乞终养归母服除补仪制主事署员外郎改尚宝丞擢南光禄少卿转大理丞考最抵家道进应天府丞盖终始不离南者三载余而竟以病不赴卒年七十公任司理有声实而不蘄

合上官故得中迁无愠色其改而北也座主时据上宰腾绰匪遥而太夫人且八十君叹曰奈何以一官而易我一日养哉既为郎久次不迁意泊如也君未尝一日废书不观能文章晓医术孝廉之声蔚如矣

赞曰乡俗日漓取资吻唇生七十年弗汨其真士习日猥巧攘竞先历六七政弗刑其天了不异人人自无之曷不百身吁嗟君兮

都察院右副都御史赠兵部左侍郎瀛峰张公讳任字希尹嘉定人少工公交车业二十举乡荐又四年成进士授工部都水司主事出督造清江漕艘以勤能称迁署虞衡司员外郎治武库甲仗与侯鸾忤见中谪判大名迁同知嘉兴会相嵩颇拔忤鸾者遂以公知袁州袁其乡郡也公首惩其积横舍人子以母忧归服除补严州进山东按察副使贵州叅政念其父老病上书乞休不待报发太宰贤之为转陝西宪使以便归省而父不待矣服除徘徊久之乃出补云南即调河南转浙江右布政使再转山西公所至以清淨简约持法无害不蘄赫赫上下安之在山西久而不迁会故人有推毂者遂以副都御史抚广西时广寇大披猖公与总督合讨之而公由西道进捣其巢穴屡破贼积级至万级卤获男女牛羊器械称是天子大悦下司马论功而公以病■〈谷丸〉卒矣遂以所当迁左侍郎为赠予祭葬录一子入胄监公卒之年五十有七予少于公二岁而与公同第相善居恒谓公垂老矣而不失赤子心贵至列卿不改布素节历夷险百端不夺处女行富可埒邑封不增白屋饰家众千指寂如无人者友人殷都以为知言

赞曰嗟若有怨衣若不胜不为物先不受恶憎歷宦无害卒告武成仁者之勇廉者之能

袁呉门先生尊尼初字仲后字鲁望胥台先生子也弱冠举乡试又二十余年而成进士授刑部主事乞南得仪部改南吏部之考功进郎中擢山东提学副使传巡抚者有所憾于先生论当调时大计吏省台为格不下而先生已离境矣遂乞致仕归先生性和易坦亮不设城府好酒至穷日夜而人事亦不废读书强记于诗喜眉山于文喜潜溪务以详贍为则其在刑部时故高相拱受知于胥台先生而拔先生会试真高等数托具玄草先生心恶之遂力乞南而最后擢先生亦高握铨事也先生素以和易得乡里声晚节忽多躁恚盖未几卒年仅五十有二所著诗文若干卷今像秀眉目而面皆酒红鼻黧

赞曰咄咄袁仲生宏亮中不它贍详嗣洁峻与父各成家混俗不颀名隐酒适天和二十应公交车高第四十余五十纒金紫忽复困沈痾閤若空中华所得能几何是以蓬蒿士修言谅匪诬

南京兵部右侍郎赠都察院右都御史观海顾公章志字行之父曰济以刑科给事中蚤卒公成进士授行人迁其司副以至正转刑部湖广司郎中引疾归疾已补故官出守饶州进湖广按察副使乞归养母母卒服除起补广西入贺万寿道迁贵州右叅政俄进广西按察使乞休以右叅政归用荐者起山东按察使入为南京光禄寺卿寻代余为应天尹以至今官卒年六十四公为人孝友忠信洁廉温直毋论不以显贵加于人即终身不示贤智色所居官之日少然往往有声实而其守饶则惠利之政人至于今诵之不衰尹应天节省诸邑供费爬剔宿蠹为之一洗佐兵部属其长缺多署部篆采郎倪冻议上之朝岁减官舶三百余艘裁费以十万计而长年不至破家今已定着絜令公之卒也留都诸军肖像而祀之以岁时致祷有子绍芳今为翰林检讨云余起家复代公兵部出处之迹时亦相埒而毁誉辽邈矣

赞曰骨清而神癯貌和而辞雅名不人先实不人下宦不过循吏而称不过长者抑公西华有云政惟弟子不能学也

张起潜君者讳振之吾州人也字仲起少于余二岁后十二年与余弟懋偕举己未进士授处州府推官入为监察御史督通州仓务移疾归大察中忌者谪临清州判官迁广信府通判遂为其府同知迁南京兵部员外郎转文选郎中出知吉安府乞致仕不待报归坐斥为民起知杭州府进按察副使饬温处兵得疾乞休卒君为人忠信廉洁既成进士与讲学者游抱大人志居官所歷皆有声实而其在吉安尤以精勤恤单赤銳意兴除爱礼贤士大夫其保振属吏不啻乳哺子而疾贪苛若仇讎尝按举一令为有力者所持不能快遂决意归其斥也盖瘼为所中伤云君归而其士民思之若父母至为祠生祀之用是得再起杭杭俗凋劫猥狙如吉安而冲■〈谷卂〉过之君益思所以称塞者而精力已小不迨矣既病益自强奔走道路以至死死而称勤事非偶然也居乡尤能折节为长者里中豪犯之亦不校州师生上其行祀于学宫

赞曰后吾而生先吾而死吾不忍其泯泯以标其长者行而循吏绩以竣夫信史

河南提学副使王和石君者讳鼎爵字家馭太仓州人今太子太保武英殿大学士元馭之弟君生而冲夷澹泊与人交周详有情谊少依其兄从师受经术善自刻厉工文辞会试为第五人廷试亦高第授刑部主事调礼部移病归病良已累迁至主客郎中而元馭为礼部侍郎君以嫌请南得验封郎中久之擢今官视河南学政时元馭秉节抗权相以归有女仙去君于家庭议论微有不同而媚权相者故疏伸君以抑元馭君不自得意拂衣归归仅踰岁复起用而君之尊父病矣与元馭不解带而昼夜奉汤药以至终时

人称之为服除君亦病不治卒时余弟敬美亦告归海内有称二王者则君兄弟而又有称四王者则滥及余余实不能当也然余弟与君相继卒而余两人者尚无恙也呜呼其亦可悲也已

赞曰朝有良宰是曰元方孝友明信节行文章畴其媿之君实鴈行握兰建礼秉铎大邦有所不可弃之若亡国竇家琛造物所妨君与余仲后先凋丧使余二人踽踽凉凉终天之痛敢诅巫阳

骠骑将军中军都督佷事镇守浙江总兵官杨公讳尚英字时俊其先九江之德化人以功得千户调镇海卫公生而有膂力猿臂善射及长长七尺余虬须燕颌顾盼若神踰冠嗣父职属倭乱海上公起行间水陆大小数十战多有功积级累数千其官自署指挥佷事实为指挥使都指挥同知以至都督其职自把总刘河叅将于通泰于盐城于苏松副总兵于浙直总兵于浙其阶自昭勇明威以至骠骑将军其罢也拟以云中副帅召不果感末疾郁郁以卒卒年仅五十一公有胆决饶权畧抚部曲以恩信故去而多思之归勅大第治园池握槊命诗钟鼓之声不絶行金若流水不五载产尽挫其歿也至无以敛余兄弟与之善为经纪之今像焯然犹若生也

赞曰吴子文弱武则不竞公贾其勇以与倭竞剪其鲸鯢■〈风贝〉止涛靖在师中吉王三锡命良弓就弣高鸟犹侦牖下之辞夫岂非幸

弇州续稿卷一百五十

●钦定四库全书

弇州续稿卷一百五十一

（明）王世贞 撰

○文部

△像赞

琅琊先德赞（三子附）

不肖贞既获购乡贤大夫士之像而赞之矣于先德乃泯泯焉则何所道罪乃复摹集成册自先大王父赠司马公始至亡弟太常少卿敬美不揆愚陋窃効推测之知僭为之赞而叙之夫寬博恬恬不显其积去町削畦以貽后人则赠公之行也仕不媚上善不近名以拙养和岁计有余则工部公之行也吏治赫赫去后见思大度深仁与物同体则司马公之行也虚心实腹动止自矩殉国爱民知无不为御史大夫公之行也宦薄自解垂橐萧然坦外夷中戏不诡道则黄陂令公之行也进退取予灼有定见严冷简重居然前辈则学宪公之行也秀发端疑周详淹理文彩絶世行复皦然此太常弟之行也虽名寿未跻乎睢陵勋位少逊乎始兴而裔出仁里生当休代格量弘济行术纯洁皆存则为仪歿而可社阴德流衍子诉代食者也诗云高山仰止景行行止宁有覩此而不肃然恭跃然慕者乎仪部光州运使附焉差亦不忝

封知县累赠南京兵部右侍郎先大王父夷庵公讳（阙）字尚殷少读书修行不乐仕进忠信肫切与物无违家大人尝语不肖公有田三千畝岁收不能盈一困里中有丐者借贷者以其时至则令从佃人所取资故也而又嗜酒好客每晨起坐于门里中儿过之小堪坐谈者辄呼入而酒之酩酊至暮乃散去不复问姓名也张淑人间谓曰生计日薄奈何公笑指少子曰此钹花金带人也谓长子仅钹花银带人耳或可望金我何忧贫少子者王父司马公也长子则工部公五品而以老遇诏恩赐爵一级得横金盖公尝遘胡僧受相书一卷遂得其妙云然不轻为人相

赞曰有产而不营有术而不以名可仕而不求荣不知者以为天之长物而知者以为敝不新成其水之滥而木之萌也耶

先伯祖易轩公者讳侨字德高成化乙未进士授江西武宁令外艰归服除补山东曹令前后九载始入为南京工部营缮司主事内艰归服除补故官久之进都水员外郎复为营缮郎中授奉政大夫以老疾致仕用两宫尊号恩进阶四品卒年七十有四公为人诚直详谨悃悃无华凡两为令俱有及民之政而不善事上官取声誉其在郎署亦淹久成进士者二十七年而不登方面晚而仅有金绯以为林下饰意泊如也与先大父司马公昆弟大父事之甚庄

赞曰褐其服厘其貌不以为田父则亦乡三老乃儒而真乃吏而循课绩不后人而官次不先人噫嘻公于名实所谓居其主而尽却其宾者耶

呜呼此我王太父少司马质庵公之像也贞不能及公而以岁时展谒公像盖凜然悚然已又戚然孺慕也工摹而小之仅志大都耳小子何敢述焉有王文恪乔庄简诸公

之碑志在公讳倬字用检别号质庵自分水徙而昆山为邑弟子已割昆山之支乡为太仓州遂为州人举进士授山阴令甫七月父忧归政声赫然冠八邑邑人祠之服除补余干以计破信丰大盗复持母丧忧归补兰溪其所著循吏声大较如山阴其人祠亦如之入为南京山西道监察御史以謇直明干闻尝偕其寮劾污选郎横中贵人及尚书方面大僚之不职者俱报可进贵州兵备副使时新中米鲁祸公柔而绥之以（阙）威咸大悦服例革归补琼崖兵备岷州千家村黎叛公当用兵数移师期以怠贼忽率兵捣之遂尽破平其巢奏立千户所黎遂戢郡人专祠祀之亡何进广西按察使遂进广东右布政使破诛临贺砦酋活其从迁四川左布政使察钱穀出纳稽故弊洗之时大盗蓝鄢势张甚且逼省有议焚郭民居以远贼者公曰是非能远贼乃张贼也令洞开诸城门严兵以待之贼闻不敢逼彭公为总师檄州邑课私马从军以万计公匿弗下而令各乡落马入城避贼其缓而遗马贼者死马既入而后课之数具足又檄司以明日日中饷熟粮四千石于军公督市户分道抵军日未直舂数溢矣彭公竒而称之拜右副都御史抚顺天属邑大饥公请通仓米拾万石赈之未至先给军官俸两月直而所在贸奉米以赈米至民不饥所全活以万计北兵侵边公会兵御之屯马兰峪乃策曰敌诃我西必以东捣我虚矣为三覆以待敌果溃东墙入伏发斩获过当悉徼其被卤男妇归久之进南京兵部右侍郎公老矣后先凡十余疏始得请给驿还里且命有司岁时存问盖异数也卒年七十五公孝友天性好施予豁達大度家产不能及中豪而割其田千畝为义庄以贍族所居官廉而不务皦皦名凡三令岩邑其民之思之虽桐乡密县不过也吴人至今称公比于范文公云吾族兄世芳尝谓吾不能悉称公其藹然天地生物心即目中无两也公轻眉秃鬢秀目细而长矍然若不任衣者

赞曰昔我元公滥觞于王始兴浚之长淮汤汤厥流千年寢微忽昌笃生府君佩德不忘三令剧邑咸树之棠仁则祥麟直为神羊双辕欲耳驂驪夷荒心不泉易操偕鬢霜叱馭叩棘不为子阳又若营平白首筹羌晚而翛然为政于乡若毫若倪我裘我粳是咏是歌小异庚桑四候序分独居春阳五福所膺富则小爽凡我子孙食胙曷量振振绳绳以莫不庆府君之像如岳斯苍府君之流复与淮长

黄陂令任斋公憬者为诸生举于乡久不利公交车谒吏部选人得黄陂令政事清简其吏民爱而称之满三载以入覲毕事忽叹曰使我束带而见督邮孰与衣轻裕蹶不借使苍头携一鸱夷从而卧马鞍山足也请于吏部得致仕归公为人好酒色六博不修威仪而孝友忠信内行淳备任真推物喜施与甚有乡曲间声未六十而卒有子世仁以贵郎累官通判温州府类其父

赞曰仕不蘄显聊以染指产不营富取于足已善不近名冥冥而已酒色六博他人

为累公行三昧以是游戏君子称之達士之致

先世父布政司都事公讳愔字民服别号静庵先司马公之长嫡也少以货入太学其侍奉之日最长性谨愿无他好独好授新声童子使具粉黛为优戏昼夜翫之无厌又好构华屋垒山凿池多莳花木以至挫产弗顾也不食酒然饮客恒至移旦夕居恒谓客不恨我不得作一日相公相公不得一日作我胸次坦洞无城府豁如也即有讎隙者见其急难惻然思拯之矣卒之年七十有八有子四人长詹事主簿世德志行与父殊而少子世望有父风

赞曰少而有游闲公子之乐与名好色与声任性達生与物无营不起怨憎噫此所以寿考令终无蹇无倾也耶

呜呼此我考御史大夫赠大司马思质公之像也公长身美姿秀眉目目光炯炯射人貌之仅得十六耳貌而小之仅得十四耳小子何敢述焉有少师李公春芳申公时行御史大夫王公廷少傅许公国按察使李公攀龙之志传在为隳燹纪其畧如左公讳忬字民应少而失质庵公也因自号思质见志举进士授行人司行人选补江西道监察御史皇太子将出阁公列三事其一崇师傅一遴宫寮而最后则以慎择六局丞郎为言独详于正德之乱政而自青宫者又劾罢缙帅中贵人出按湖广糾吏必青绶而上雪冤滯振纲纪悍瑯不敢挟重为虐寻按顺天府治畧如湖广而加寬北兵攻古北口公策边必溃骤上书言状而以通州要害身据之天子首得公疏以备边事责大司马大司马惶恐谢罪而侦公方擐甲却敌睥睨间遂擢公右佾都御史治军饷亦随调亡乏公乃上疏请城京师郭及通州张家湾又请毋益大营伍而增寘总督调边士兵以拱卫都陵俱报可久之移抚山东会岛寇大起改提督军务巡视浙江及福兴漳泉诸郡寻以重之改巡视为巡抚公乃选良将募卒制艘砺刃以必尽敌而后已尝捣贼于横屿已徼贼大洋皆破之已又大破贼松江郭解其围公前后娄出奇制捷幕府上功次不张大以故仅娄得中赏而小不利即引咎亡蔽匿且不他倭天子终以公为忠再问相嵩不对时北兵入云中急手勅吏部进公右副都御史銜抚之盖用内阁大臣例也公发而浙吏民数万人拥车哭竟日不得发至云中疏请内帑金十余万以賑手自稽察度支郎不获牟合诸鎮破敌斩首过当进兵部右侍郎兼右佾都御史遂转左侍郎兼右副都御史总督蓟辽保定军务是冬拒敌却之进右都御史赐金币荫一子世袭千戶自是稍与相嵩鄰矣初大司马杨公博雅知公诸所斥陟边将亡不取公意相嵩屈其贿而公又时时与客叹嵩横且败奈国事何相嵩闻而益恨之次骨明年以敌入湾河夺一官其又明年却敌始复之自是所报功俱见抑所赏不过金币而练兵之议起矣始公以土著兵必不能抗敌名为美而实耗县官廩相嵩谓公调兵为挟敌糜国上亦不能无疑公谍敌且大入上疏言之不报

而敌果入既事定御史承风旨论公病不任事遂逮公而公他将兵破敌斩首至八百级亦不报而公遂不免最后不肖贞言状特赐洗雪复官呜呼竟何及也公为人孝诚悌内行淳备宽仁喜施意豁如也与人交不为城府识士善任所委争愿为死读书过目成诵为文有骨力尤长奏牍少师徐公阶读而善之以为诸葛武侯陆敬舆之流也居官洁廉谨出纳虽相嵩忌之甚风给事御史伺其隐卒不得

赞曰司马之才畴介而嫡丁卯同生少乃岐嶷义方之诲王母是职长而文就骏发五色以俭成施用德为力义质礼行高明柔克悌君子邦之司直白简峥嵘中瑯辟易清霜九夏雄风七泽燕市埋轮左冯坚壁清笳夕奏呼韩削迹惟帝所凭师中三锡飞粟川盈伏乌山积士饱思奋马亦腾枵袞衣东土曾不暖席闽越之间岛夷充斥草创军府罄我石画奔命东西剝心夙夕连城数十手所斲墼组练三万余皇五百翁若一身臂指胁息鲸鲵血波烽燧少息帝省云中移屯安国捷书昼报天颜宵恠开府于檀兼调兵食遂长中台载领西掖锁钥之寄迫若加膝挟纆温纶兼金大帛思媚一人损体靡恤焉能剥民养君蠹贼甘言酖毒颺气矜戟张网弥天以纵鸷击功大不赏谴微辄摘天高听卑谁为察识岳既遘秦于亦中石炎炎铄金耿耿化碧翔阳丽霄幽葩亦晰遗孤藐然伏阙披臆帝曰吁哉洗尔丹籍太宰司马函书乃绩获具威仪以归窳窳嗟嗟造物有丰有啬啬者位寿丰者名德府君之德流而不溢以润子孙食报无斃食之无斃痛亦靡极再拜遗像汎澜鬱塞提学副使颺斋王公世芳余从兄也十八举乡试又十六年而始成进士授刑部主事其妇父毛文简公时官大宗伯天下推以为长者而公避其重乞南得礼部累迁吏部郎中出知赣州府以清简为政吏民化之时詹事南海霍公韬贵幸甚道经赣州公待之无加礼霍公既素耳公名心重之以语太宰方公献夫迁其省按察副使提督学校公公廉不发私书而所汰斥隲于进者以故颇不得其士心而不能有所訾于公会人主用辅臣言改先师像为木主杀其礼公独缓之不肯下总督钱如京言之调江西兵备副使公遂拂衣归不肯赴得旨下江西狱具坐闲住后以诏恩复官竟不起卒年六十一公长身丰颺秀眉目食兼数人能于士大夫间持前辈节侃侃如也江南守令势日重所部毋论贵贱趋事恐后公畧行其意自若然莫有睚眦之者而慰荐亦少矣

赞曰避贵若浼望乃归偃蹇朝执官不衰持经崇圣抗帝威引分自高世趋卑一斥不复势所宜

先兄温州倅前川先生故黄陂府君子也讳世仁字君美生而孝友忠厚与人交尤坦易胸中无柴棘少以例补国子生四十谒选得分宜丞迁江西布政司都事转福建都司断事超通判温州府无何引疾归君故好食酒蒲博日召客为侠游家稍稍挫既入官即自髡饰先大司马虽季父行与同生甚相得所居官皆得司马公力既公为权奸所中

君日悲思哭泣无度遂遘疾以卒年仅五十有四今像不甚肖当是没后所寫者

赞曰愿而文坦以有容性不习吏于宦乃通其末俗之长者而赞郎之雄乎宦之通由司马公生而同死而同是曰始终

吾弟南京太常少卿敬美者讳世■〈樊，心代大〉别号麟洲又号损斋或曰墙东生二十四成进士以家难归卧者几十年召补南仪部主事转北仪部员外郎归守母丧服除补祠部改尚寶丞出为江西右叅议转按察副使改督陝西学事移疾乞归起督浙江学不应再起督福建学迁其省左叅政入为今官病复请告归卒年五十三吾弟生而白皙及长美风神眉目如画性明颖以经术称诸生间寻益读先秦东西二京语而專精古文辞余事乃及笔札李于鳞覩而竒之每贻书予不忧阿奴火攻耶盖机云二苏之目所繇矣孝友天至笃伦理晚途尤惜名检庭闈之内肃如也前后居官必着声实为上下所爱重其于闽学标水鉴矣然竟以劳瘁棘中感噎疾遂不起敬美志大雅已得文章名不欲居之穷探六籍傍及二氏有所综核裁订彬彬成一家言其于吏道尤精识治体工物情使其不死何可量哉死之日海内绅衿靡不有兰摧玉折之叹若不佞则有恸而呼祝余而已嗟乎余长于敬美十年齿髮秃落尚不死而使敬美前死也余生平姓名在人齿颊间数起蹶以笄滥八坐弟于中正之品考功之令媿矣而不获正九列人耶天耶余故不忍赞敬美像又乌能不赞敬美像也

赞曰三补吏而三师帅诸生歷署外中厥衔若水有瑜无瑕矍然其名其所収乎人者乃大踰于若兄品登三而不足褒数五而仅余有志不遂中道殒殂其所得于天者乃不汝兄如天所予夺吾不能暂而不能不汝惜人所月旦吾不能知而不能不汝悲非汝之像何以寬我思覩汝之像使我泪若纒縻呜呼貌而笥焉时一展之

故礼部仪制司主事君任用者余五服外孙也长于余二十五年而同荐于公交车君既久试不利然益治经术工属文遂为礼部第二人初授太常博士迁礼部仪制司主事奉使归倭寇猝围城君佐其令昼夜行睥睨间寇退而有间令于御史者君冒暑入谒为辨絮且愤不相得而出明日御史为具召君于席感病扶携出就逆旅中遂卒年五十四君为人外朴而内辨于郎署中最有长者声母项以节被旌君年虽艾犹依依膝前作孺子恋也盖后君数年而以寿终

赞曰以君之工时义何不可遇而栖迟至暮噫嘻天乎胡予之缓而夺之遽

故光州守警斋君者讳三锡汝懷仪部任用之从弟也少颖敏工时义连举嘉靖己

丑进士守光州时年二十五有干辨才吏民称之然用伉直多忤上官中以法罢归君时未三十宦不振无以资生乃杜门节腹不通世事者久之积货累数千金父封公卒分橐装甚厚君独不取其为人朴实无他腸然不能骯骯谐俗故少搢绅间声而闻党后进多推为长者晚节稍自偷日与亲知置酒山水间人咸异之卒年七十孙泰亨临亨俱博雅有文藻临亨亦己丑进士

赞曰不取不予遠名遠刑始而治生既而達生何以占德振振绳绳

河东都转运盐使司运使少葵君者名三接字汝康以进士为长垣令调浙之景宁迁南京礼部祠祭司主事久之进郎中出守柳州再调征江迁河东运使以大计中白简归君居官能持三尺不阿狗不喜作面背交见若以为傲者故所至有声实而易受人中自令以至守凡甫被调甫显重而遽斥君之得斥仅五十归得奉其父母终及侍兄光州君以老恂恂济济出入颇为后进楷模者三十余年而卒卒之年八十三今之像老而修劲飘须臆颊福德人也

赞曰若工而拙達不胜沮工于民宜拙于上忤晚途敬修其善可数乡之祭酒俗之长者

朱贞吉像赞

矫矫王孙实表江藩中和且平正直而温逍遥朱邸如息蓬门通无狗物介不违俗割荣国秉降志儒服交友忱恂檐闰若淑念彼宗公遙追不忘亭竹猗猗可以羹墙文匠淮南字挟风霜人亦有言艺成而下贾其余力纵情挥洒不兴龙水江都鞍马文氏三絕巧者点悟撫景归囊飞毫染素疑汝无长以无短故万里神交白首犹新惠我好音乃见尔真飘须秀眉渥颜丹唇陋彼陈王力辞遠游白蛤轻裕冕绂同休垂藻竹帛快哉千秋

管将军像赞

便便兮十围之坦腹巍巍乎七尺之长身使其据白虎之高会则单于仰而称大人坐黄龙之巨舰则陈卒望而称江神奈何提千兵控三翼以受幕府之束约入促缩而出逡巡简书之擿娄下气鬱悒而不得伸虽然少则不爱其股以疗沈瘵而报吾亲中则不爱其躯以擒夷酋而报吾君为孝子为忠臣醉尉莫敢呵武安不能嗔吾将虚戟武之左方以待若能与褒鄂之伦英姿飒爽而俱不泯也耶

金九布衣像赞

累累兮衣若不胜粥粥兮状若无能所弗居者世情之逞而所默取者造化之羸闭其兑塞其门见以为终身不勤不知其所以勤和其光同其尘见以为屈而不伸不知其所以伸侏儒饱欲死混沌凿欲死西邻贵而徙东邻贫而徙而汝独少若此老亦若此岂犹龙公之所谓舌者灼然胜乎齿耶

日峰先生像赞

洞兮其不为城府也坦兮其与物无忤也志和而履恭秀外而寬中化者真若被时雨而坐者则以为坐春风也耶

汪元蠡先生小像赞

丰下而颀尽美且■〈髟上思下〉其人则今而古冠衣壁有金石闾藏书诗夷威雅武嫫母呶訾家不中豪乃以豪隳晚节陶然道乃庶几桑户反真列御颂之

上人像赞

此四大最调而六根无累时耶将握麈尾毛而据狮子位时耶色温温兮有众生之可接目炯炯兮无一尘之为翳貌之者已得其形而赞之者独得其意盖知其慕初地之大乘而必不为辟支之自利者耶

秋月上人像赞

其髮甚短而髭甚长帻或褐而袍则方头陀其暂而苾芻其常者耶僧俗之膺一百有六而犹未央者耶吾闻夫佛坐六十小劫若弹指顷彼百有六年者又何异乎石火之与电光余以师之身而拟师之像果孰真而孰妄将刹那之不可保者像与身超恒河沙劫而不壞者师之法相也耶

陈子有先生像赞

有一君子五畝之宫其宫何树维松与枫舒其足敛其容神定而澄气凝以充諝不万年傲不元龙其肃若秋霜者汝南之仲举而藹若春阳者颍川之仲弓也耶

達磨像赞

东寻冠達達不之契頼可大师了此緣事流沙既返新罗复至老婆心切汲汲人世愿我他日亦复如是

平泉先生像赞

气肃而澄神凝以王其不可测者湛然止水之衷而微可覩者嶷然断山之相在儒林望之则若鳞鳳而法门得之以为龙象者耶

故同守孙君像赞

学优而仕以儒饰吏请益无倦以死勤事操洁而礼恭貌矍而神粹问谁之子清简公裔是岂唯箕裘之不忝将无愧于易名而侑公于乡先生之祝者耶

喻隱云道人像赞

骨耸而清神溢而凝玉陇圆兮止矗银海秀兮内澄人所识者充然之大宅而所不可识者渊然之三庭虽然軋始不言利为善无近名此庄易之卮语吾寶而荐之先生

少溪吴先生像赞

名邑名里名家之子神情朗畅姿韵都靡或飞大白或握麈尾春风袭人郁若兰芷避世金马戢路铜官时长渔樵间御衣冠东山屐厉北海尊寬吏耶隱耶两亦有之仙耶凡耶粹莫可知意者兼治生之靖节而未离欲之希夷也耶

卓光祿像赞

颊渥而丹鬢泽而鬢美盼工言接若饮醇或狎渔父或游大人或称山癯或侍帝宸其可图者游闲公子之貌而不能寫者逍遥物外之神与之饮见以为嵇阮与之邻见以为朱陈其達生也季长君蒨其薄宦也曼倩季真诵其诗若左司随州读其书则茂先景纯吾犹惜夫造物之忌多取而能所之未尽除去大道能无隔尘也耶勉之更十年而状子若木鸡者庶可当道民矣

兴化李叅军像赞

貌腴而泽神舒以粹（阙）傅之子相国之弟其曠籍之丰美若归德于父兄而风标识度所以倾士林而仪闾里者乃其所自致何必曰季方之贤难为兄而第五之名齐骠骑也耶

水月观音像赞

一水一月常湛常彻如如不动了无相涉一月一水是水即月八万四千水八万四千月而彼八万四千身皆此一身摄我见再拜谓是真相试问真相了莫知向我赞非赞非赞亦妄

陈氏六石赞

谁鞭六雄树之广除巉岩风棱戍削廉隅七曜不足五镇有余畴疑此君非耳目娱牛李之间不可亲踈矫矫元龙其豪欲输拜而颂焉彼宁受誉

张幼于先生像赞

白晳飘须宛若神人薄游翫世泛爱亲仁西京则平子之赋解太学则林宗之人伦书淫则侵寻乎玄晏胜具则陟健乎许询喜何山通隱之求笑于陵溪刻之陈下之渔樵或可狎而上之天子不得臣其可怪者经术闻稷下而碣石不筑宫公卿咸倒屣而羔雁不及门噫世故有任之者曾何足以挂子之顰

项少岳先生像赞

吾读子之诗于二十年叙子之诗于一纪之前然不识子之貌而今者始得覩子之肖子之渥如其容郁如其度者庶几有征于斯而超乎壻之表而冥乎天之倪者竟不可得而窥终不若诵吾之叙与子之诗

黄生貌余像以去且索余题赞

聊以应之我不识我而汝识我以我借汝亦无不可汝欲我偕往而我不汝往以我

重汝其策转左然则如之何曰尔为尔我为我请用从火

李处士像赞有序

李翁之卒也则沈瓚比部状之而吾伯玉司马志墓矣其子某以翁像请赞曰有伯玉志业不朽矣所不释然于逝者明公一言耳而友人袁长史来从舆曰吾故识李翁伯玉之言信矣伯玉称翁应恩诏当京兆尹推择而旌之冠带矣今胡以犹处士服也曰一再御之竟弗复御也何以称儒而贾也曰李翁故兵家子少读书能属文以生窳不克共二尊人养故夺而贾之也又何以称贾而儒也曰李翁故操持什一善心计然不寝然诺而亦有天幸恒右之初年贾雄于里既而雄邑至雄郡然被服造次必以礼靡侠游少年之好所至辄倾其贤豪长者故羣而归之儒也翁少无子过壮乃连举丈夫子五一日尽焚其券直千金曰吾不欲责他人息而累我后弟贾所累积不能如君而母私之甚颇耽耽目翁翁阳不觉损橐以益弟至再弗恤也然则李翁非直貌儒者而已夫李翁有丈夫子五女一而婚嫁之役几毕身而胡以称儒而佛也曰翁晚而得喜上人者与之游有所证自是奉经典不恒茹鱼肉尝佐修瓦官寺工已又佐修玉皇阁工其它檀施不可胜计尤以断一切恩恋为法根盖属疾而其妇死了不悲曰生幻寄也妻子幻聚也奈何刺促溷我灵境为疾革戒诸子勿哭危坐者五日翛然而逝儒耶释耶凡儒以为有者释必以为无儒以为无者释必以为有其定见所由不同其定力一也余故与伯玉有瓦官缘复以间过玉皇阁覩翁之绩伟如改容而谓长史子之言信岂惟伯玉之言信乃赞其像曰汝之阅世七十有七年胡髮之宣而貌之睟然胡然而贾胡然而儒又胡然而释胡迹之殊汝撷其精而汰其粗夫撷其精以还佛祖可使儒亦可使贾汝乎像乎幻者尽而不幻者无恙乎

又题幼于像赞

子宣其髮而朱其颜太夫人为之母而里也仞也顷也三玉树为之子而日尚羊于其间覩者以非神即仙矣著书满车可以黼人目者百千年矣胡为乎寓委形于丹青而又劫劫焉西走金陵而托余之敝帚以传人貌荣名噫其然岂不其然

闫希言道人像赞二章

椎其髻跣其足丰其辅皤其腹曝炎旭凿冰浴一单哈四时服帝之弄臣天之逸民游戏人间逍遥无垠不涉思维何况贪嗔留气卫形离凡合真羽化为迹舍利为身其无所不之而有所不混者耶

希言希言蓬头蓬头吾能臆其名与貌而不能诘其修能覩其去而不能测其来由
能辨其为散仙而不能定其品与流我不子从子不我留呵呵休休

太子少保大冢宰袁抑之像赞

辅则丹而鬢尚宣肤则腴而骨甚坚城府不设荆棘自刊白简之所讥弹当宁为之
震动而自视恒欲焉清风之所披拂士林为之景从而待之殊泊然其舍车而徒者大夫
中歲之操肉食而藿者君子终身之权彼续廩给扶与青宫之峻迁乃人主欲自尽其道
而公何与旃噫处也而系朝野之望出也而不琢其岩穴之天岂鸿羽可仪而鸿迹莫攀
者耶将蓬戶为龙门而烟霞其市廛者耶贞磊块人也非夫子而谁与之执鞭

大叅吴明卿先生像赞

少而与登徒子并儁晚不与三闾大夫同悴其不可殫者汪然之度而不可挠者浩
然之气优游自足潇洒无累夫是以髮宣而神王颊赭而肤膩唯稍琢其天倪而沈湎于
诗书六艺之府叅合文类与名为伍如摩诘画如迦叶舞不知者以为仅张楚而知者称
其陵厉千古噫斯人也其兄事于鳞君而弟蓄元美甫者耶

老乳母王氏像赞

媪生八十有八年矣少而苍然老而粹然五官未衰颯齿几全不耕不蚕二簋重绵
其乳我也为岁仅三周而其食于我也卦数已尽而犹不我捐人耶天耶将释氏所谓緣
也耶

王叔敬六十像赞

虎颯虬须望之伟如颜丹髮宣即之藹然雍容襟裾被服诗书小隱帝城和光閭閻
相国之孙清卿之弟棘丞为父鼎甲犹子问着不言别有天地

江南仲像赞

诗以自娱不蕲取名医以利物不蕲治生飘须渥颜神藏骨坚或水而山或游市廛
或公卿间吾不能定其品问之洪阳散仙

弇州续稿卷一百五十一

●钦定四库全书

弇州续稿卷一百五十二

（明）王世贞 撰

○文部

△祭文

祭曹中丞文

呜呼大江西来擘峡滔滔浴景双轮衔云万艘小汇渚宫是生人豪其豪于宦早践三馆铁冠霜栗白简星灿四履所及百城屏翰其豪于政称霹雳手尺檄衡飞片言立剖金紫胁息黄墨奔走其豪于诗挥洒惟意长空摩雕峻坂驰骥跌宕真宰鼓吹意气其豪于饮糟丘是营中山千醉后军一醒履弛纓絕粉泽纵横凡公之豪为世暮指所世覩者公之余耳荷衣赤芾蓬户朱邸不见嗣宗乃絕臧否公我父行识荆未尝乃公桑梓为余疆场邮筒数飞云汉自章乌丝素书以受雌黄他山之石谊取攻玉曝献敢辞神交则慝曾未何日报公不禄金堤溃流龙峰推谷呜呼哀哉有旨在觞有纒在弦百美当心如何弃捐岂握鲸鬣而逐青莲或化为箕游神九天天与令子公信有后人与令问公信不朽玺书且下上冢牛酒以此酌公当亦肯首呜呼哀哉尚飨

祭刘封君文

呜呼古称盛德获报不于其身必于其子孙然至身为德而能贵其子子贵而能及其身此固造物之所靳予而世之显者又或赢于天而畸于人公学穷五车而业困一第盖髮垂颁而始观国之宾其初可谓屯矣及廷尉君之骏发也甫踰冠而翹然遽登乎要津夫仕莫崇乎九列锡莫侈于三命凡立三朝而公三得之易于人主之一嚔考功氏之所貶者曰文誉茂扬行谊克敦司封氏之所嘉者曰行惇孝友才具经纶乃至饬躬砥行学古通经则又公之所被于光禄勳者也今夫士冥修于衡茅之下而受知于九重之尊其所宠灵光大亦足以自伸矣然公受之若惊享之若泯过其里者疑其畏垒之居而即

之者以为羲皇之民不琢其文以还浑沦谓齿虽毁而复齟髮虽頽而宜鬢胡一疾之告弥遂奄然而返真岂所谓五福者不免于考终命而都官若卢之狱不当为廷尉不冤之民耶贞辱宦游公卿又辱与公之子亲乃不获贄帛以登公之堂而歿不能执紼以从公之輶徒结思于巴江与三峡之暮云跪衔悲而奏■〈此上夕下〉聊以托于芷苹呜呼哀哉尚飨

祭封少师李翁文

呜呼天笃圣君必有贤臣天毓贤臣乃畀吉人吉人者何我永懷公实生少师乘时奋庸少师作霖以膏九土谁为出云公实大鹵少师作楫以济大川谁为产材公实名山凡此相业曹随宋守归德于公少师不有凡此相门衣锦佩璧归报于公少师不食公有贤配如鳳如鸾公有喆孙为玉为兰过公之里太和所委入公之堂百顺所萃觀公之容藹若春融接公之谈穆如清风世乐婆娑久而厌之條焉乘风煜然化箕贞等视公实大父肩少师视贞子晁之间驥脱服箱康庄凿落驤首长鸣追感伯乐所以南州千里酒絮今我一觴府主之父呜呼哀哉尚飨

祭陆胥峰先生文

呜呼自浙而西冠盖之族其最华者唯平原陆中吴以南仁让之里其最贤者惟公桥梓公登上庠褻然鸚荐斂儁南宮秉法淮甸持衡要人齟齬以归淼淼平湖悠悠乐饥荀产八龙公得其半伯也膏宇叔亦翔汉仲季见田厥占文明寬衿大紳委蛇里庭公虽三世不称膏腴过从诸郎拟中大夫国则华胥乡犹畏垒恂恂长者抑抑君子人境可乐胡为厌之甫及杖国而遂骑箕鹤馭垂旌天棺瘞玉悲者百身颂者五福惟先中丞岁辛在丑射策金马从公之后唯岁在未伯氏叔氏则贞与懋后先尾驥古称世讲再世而已宁如公我兄弟父子贞旋自郟懋旋自燕距公仙游甫及期年椒浆蕙肴敢告灵輿公神行天为我踌躇呜呼哀哉

祭王员外道立文

呜呼公之游黉贞宰相从九年以长实兄事公癸卯之秋爰荐仲氏以逮及余复称公弟余倦而归公始颖脱婆娑公交车徘徊下列及余三起见公承明执手欢笑有踰平生郟襄西迈公尚留滞邮筒械心殆无虚岁余甫纳节公氏职方痛哉除书与讞相将公于词章珠玑咳唾晚而藏腴大羹不和公于谈辨川涌霞舒晚而葆光澄襟湛如六馆四明出入人师矻矻穷年宛若退之秩宗考工九载为郎偃蹇不调又若冯唐天于才贤夫

岂无属何用之晚而夺之速青衫沓拖瘦马戍削何予之廉而享之薄万里归魂千秋夜台公今已矣聊寫余哀尚飨

祭周云川先生文

呜呼世之所欲得者贵寿多男子而已公贵矣然品犹屈而称四寿矣然衰望七而未至多男子矣及歿而执丧者仅徐卿之二则凡世之所欲得者公固畧有之而其所欲得之极者乃逊让而未备公之为开而开政报优佐泉而泉人理进牧而牧事修俱无论矣独其片言而折如林之白刃于道周不至挟倭而剷吾泉脱泉人数十万之命于狼虎之喉某闻之活千人者必侯公之功独见掩于忌口而不收虽公易箠之际娓娓焉而道其详某亦窃冀以延年而又不讎呜呼岂古语果难征而苍苍者果难知耶或大算有定而莫能推移耶抑公久不当寿而藉此以后其期耶将不逮身而发于子姓孙枝耶公以易而师我先君寻以易而为我师先君之下帷者五岁而贞之请益者一晷方郟节之初解欣杖屨之日追忽二豎之绵延痛昊天之不愍遗凡为某师者二而皆有颂以嘉其耄耄乃独使我操管而奏公之诔辞愧无以报公而还二子经徒抱遗编而自悲呜呼哀哉尚飨

祭冯右山公文

呜呼公生三十四年而始成进士为名诤臣为循守令者仅十三年而遽谢事及其以齿德尊于乡称乡先生者踰三十三年而后奄然而仙逝岂造物之所隆施者材而其所靳予者位夫既不尽竟公之用而又畀之象贤之嗣意者欲佚公之身隆公之享而俾为公嗣者善继公之志耶凡人才之挺生必有益于斯世入而为政于朝棱然白简之銳出而为政二邦藹然甘棠之蔽归而为政于乡则九里之河所渍也为政于家则万石之风所被也橐笔侍从人见以为公之所自致紆紫横金人见以为令子之所推贵而孰知其两相成而两相契耶所谓契者父子之间互为知己而所谓成者子以父而贤父以子而贵夫公之寿已开八袞而众犹惜其未既盖覩其黔鬢朱颜庶几藐姑射之姿而闻其握枢杜权将有得于籒素之秘耶公之子方显庸念不以一朝之菽水而易九鼎之崇味叩枫陛而陈情指椿庭以扶侍既就养之无方乃志物之咸备公始怡然还其子于朝家而还其身于元气呜呼五福既完百顺攸萃荣哀始终去留无滞公神洋洋何所不际独垂白之门人望灵旗而雪涕敢致酌于浆椒复崇肴于■〈木边〉蕙溯流风以写钦灵庶几其来憩呜呼哀哉尚飨

祭张东沙文

呜呼惟公令德皇所惠绥少而释褐中而解龟晚專一壑踰期及颐五十五年朝野半之出为甘霖九有渐滋处为庆云五彩彪离潜珠自媚渐羽可仪湛思著述笃老不衰俯汲衿绅鼎贵不移上下千古出入百氏齿牙余羨流芬遐裔迹絕公府人疑简贵在彼艺林嵇阮公譬浚冲小子叨承把臂数驰尺牒贲草先誅溲勃之微采不我弃神交岂敢及门则未呜呼不朽者文不泯者名八座匪贵词组为荣八袞匪寿千秋若生石椁司马庐山长平宁如茂屿天畀佳城椒浆虽薄可以荐诚尚飨

祭秦虹洲文

呜呼公起高第为郡司理入郎青琐献国之是营护将作靡恤胼胝银台进叅典客文轨于藩于臬之纲之纪甫长旬宣遽中萋菲归而治生以营甘旨上有慈白下有令子衍衍斑斓辅以金紫其最得者教育多士衍洙泗流汇为浙水醉白名堂通德标里兰玉之外皆为桃李雀舫载觴鸱弦盈耳天既丰之享不为侈胡忽夺之委顺而已贞少于公垂迨一纪鹿鸣并歌鹄行齐趾晚而获归文字知己遇余必酒酒不忍止我醉欲眠公亦不起或飞大白或掷麈尾人拟公仙公故自拟乐则三之福且五矣呜呼风标鲜令容徽温美耳热矜辞听者亦喜一旦都尽令人心死百身曷赎九京莫起呜呼哀哉尚飨

再祭秦子成方伯文

呜呼公之举高第入青琐徘徊九列为良二千石不佞之志略言之人亦能知之其剖直温慈所居官前后有声实而得材于二浙尤盛不佞之志略言之人亦能知之归而奉太夫人有佳子弟内极伦常志物之娱外有泉石声酒之乐不佞之志略言之人亦能知之其用而未尽究也奉太夫人而弗获终也有佳子弟而未见其登用也此公之所没而难于瞑者也不佞之志略言之人亦能知之而今者公葬矣生而聪明正直其精爽必不昧不佞愿有以告也夫生而得为人已不易公独贵且富焉其宁无所自耶贵且富不易而又有文有宦迹有乡党称又宁无所自耶公之身不为世名臣则必禅栖羽客之隼而其小有所未满者此非歉于前乃有所待于后也公虽冥冥中幸精專其念毋昧其本上而皈依大道下而求续阴功则公歿不歿也未满者乃满也不佞病不获亲举觴而此一觴不为虚也公其鉴我醺我哉尚飨

祭子与文

呜呼子与其在秋蚤乍有异传使我心捣曾未翼日嫩音贻好豁然若释若还重寶

仲冬之月归自避言匿迹惊声忽闻叩门茗雪之间其讷腾喧嗣孤竖奚袒跣崩奔余始
怛割既而中疑得非秋乎又未几时中表陆生至自江西杯酒犹接遽尔告睽呜呼天耶
夺我三益伯玉有言子所矜式唯于鳞朝而元美夕于鳞已矣子复长隔忆在西曹子诗
已成忽涤往诣尽汰浮名惠而好我携手同行诗匠开元文轨西京子之旧侣或挽或笑
其它异趣或呶或召子如弗闻拊膺高蹈譬渴遇饮辞晦获曜吾侪小人哓哓器器子探
骊珠祢而弗骄醜翻之柔靡所不调薄夫为敦鄙心用消游士失职其寒栗斯子握大杼
衣之被之岂唯苦寒亦复调饥子为大灞是舖是糜贝锦之虞得子而誉回车之恸得子
而路刺渝踵接响应景慕来则麋集去亦狼顾子之通籍垂三十年亥步所穷东西南天
春与雨偕秋与霜还左图右书其中萧然呜呼子与六十岂天其惜子者百岁犹少被紫
纁金藩伯岂眇其祝子者三事犹小忽尔文星遽陨微垣奄然万卷戢之一棺绮疏月沈
蕙帷霜寒洪都迢迢蠡水漫漫生人之戚莫若陨身余不甚戚谓子不泯荣名在口千秋
若新岂乏黄耆与土并陈生人之穷莫若无后余不谓穷谓子不朽微言在耳听者如旧
岂乏孙枝忘彼先冑余所急者归子孤坟且与余仲鸠子遗文余所恨者知己沈沦踽踽
凉凉何心独存宗生之逝余困饘藿及讷于鳞哀逸并作迨闻子音萋菲方铄词人阳九
余遘差薄然是三子死而非死余虽后死乃绝生理既忌丘壑复惭朝市子芬众口余秽
人耳哭于鳞诗字千二百老而才尽非子是惜抚棺一恸聊表余臆雪溪咽流天目菱色
呜呼伤哉呜呼痛哉

再祭子与文

呜呼岁聿云暮冰霜凄其菰城之东君始大归埋玉其中千秋永睽无以慰君七尺
丰碑树之隧傍过者式之文人无行为世所訾是故表君玉质金徽文人无用为世所窥
是故表君南奠东绥文人无命为世所悲是故表君不朽其期君有篇章如星日垂不以
时隆不随代卑二三友生肺附胆依人谁不悉畴用赘为凡我告君岂为君知不昧者心
不泯者辞昔酌于鳞其言仅期我春哭君溪流已澌山河结惨水瘁草萎归而一疾几遂
不支穷冬畏途妇挽儿追岂不尔思室是远而爰因树碑附陈一卮存有神交没则神驰
呜呼哀哉尚飨

祭宋廷尉望之文

呜呼孜孜奉国知无不为古人有之窃以为疑孜孜奉国知无不言古语有之窃不
谓然公为名令为名御史惠声直声洋洋世耳迨乎藩臬毁誉叅之虽三折肱号为良医
入佐回牧以逮廷平密勿赞襄功在无形帝睠南顾汝往开府唯予喉咽唯予肺腑公持
三尺提衡百城墨吏惴避赤单讴迎余皇蔽天一鼓而窜精鏐縻丝皇褒有灿凡有所知

不敢藏臆凡有所为不敢爱力其位愈显其功愈高萋菲生焉众睨用劳留棘之迂似右而左公实器器无所不可君明臣直是以求伸伸我者君抑我者臣抗彼言路如触乳虎虽莫我屹愈坚厥怒譬陟崇冈大明光光其下蒙雾跬武迷阳帝曰毋害实干城尔姑即而家以需特起公之归来左书右图岂其邑邑而遽告殂呜呼丈夫盖棺始定直道古心良法微行试令青蝇为公吊客昔驳公疏谓公强愎试再读之何如贾陆一死非欠百身曷赎公昔留棘实后予除临欲荐予而竟踌躇谓子虽才谗尚罔极今者强起果罹兹厄公之知予胜予自知我今悲公公悲不悲千里緘词奏之總幕恩江絕流阳山折嶂呜呼哀哉尚飨

祭姚府尹文

呜呼公长台端世皇之中出入周秦绣斧■〈马聂〉驄白简所上屡回重瞳藹然春滋以剂霜风逮乎晚节西臬东藩长为县官拊循元元提躬若卑峻道则尊凜然秋霜以剂春温京兆之政匪循赵辙扫去苛烦务循简切偃蹇诸贵婆娑九列抗手青门纓羈绶继箸水洋洋与泌俱清杜门却扫课仆长耕前矩后规左准右绳守令师之曰乡先生公之在台余郎西署杯酒再亲如豁云雾乡郡匪遥浮沈异路分首垂白飞书表素公之二子璧合芝骈美秀而文白眉最贤数枉扁舟访余娄川尔汝之契实托忘年覩寿者相谓岁当百徐子长逝公亦归息木稼峰颓显智同厄审公之讣吊徐始得徐几一恸老泪欲枯尚有余酸以赴公庐炮肉荷筴浊醪瓠壶侑以兹文公茹之乎尚飨

祭华学士文

呜呼我师江湖萃灵金玉其相盖三十而受书藜阁四十而徊翔玉堂五十而戢身志养聊为德于一乡又二十八年而始游东岱又六年而始归北邙其魄则与大坠而俱奠其神则偕元气而并翔一往者鲜令之风标而不磨者隽永之文章令子既象其贤闻孙载绍厥芳墓树文范之碑里表通德之坊虽哀师之宋玉亦何必仰天而问巫阳効临穴之一悲姑以寓夫心丧

祭陈封君文

呜呼公年七十既壮而康志虑淳明体骨坚强穆如清风藹若春阳有子而贤伯曰元方初典雄州三辅之望入丞夏卿谋谟孔臧帝嘉厥源庭诲乃章文鏐辅腰朱绂斯皇棫全楚材若柱若梁桃李之阴覆及公墻公志甚怪而气亦扬用是耆指其庆莫量干旄溢填羔鴈成行忽尔仙游譬被朝霜贺者在途哭者在堂仿佛闻歌万年之觞玉醴余尊

化为椒浆福善岂为人命靡常贞所惜者老成凋亡公如不亡其神洋洋或俯而歆或升而翔尚飨

祭王封君宫詹文

呜呼地炁天倾大美弗圆生人之趣时或阙焉公擅其羸造物所专七尺长躯其腹便便眉修髯丰辅隆权嶷若断山静若湛困望之俨如即之温然素封之业植自任樊公享其成行德匪艰出肆成均籍甚豪贤丹穴双雏日升霞骞以官官公温纶自天被紫横金乃朱其颜望为大人又若神仙庭布羔鴈巷咽旌旃守相弭耳待公一言公有献纳而无居闲太原之宗厥指累千是煦是育俾糜颠连申以义方弗纳于愆艺菊东篱栏药圃田伯解玉堂仲辞豸绣归而侍养委蛇左右五福畴伦三乐备遘云胡美疾纏绵僂僂百身曷赎万方莫救人不释然公实龐茂将等松乔而仅中寿公不释然二子■〈亩犬〉畝苍生望霖屯膏未究呜呼宁复如公侃侃蹇直而指必依厚宁复如公崇跻九列而服■〈执上目下〉犹旧宁复如公河润九里而不矜其有宁复如公游寶藏府而双振其裒宁复如公处江湖而练朝典如世胄宁复如公谢子墨而谈术如悬溜是以宗惜著蔡乡追典刑虬峰陨岳牛女摧星一识含辛闾左涕零惟余与公里闰同生公推长年余忝先登自解郟帅事公以兄处则接席出必聯乘我饮公舖各出所能晚与伯子受敌师盟视公季父段服趋庭我心则降公让未应若小子懋忝伯同升公抚以子或礼以朋自公之疾实乖寝兴公疾小损余匕为增前是七夕坐而几憑谓余不腆交非世情焉覩起色杯酒沈冥德音琅琅余耳犹停惝恍化鹤汗漫骑鲸生死各天欲哭吞声爰庐瑶席爰荐清醑陈我卮辞慰公千古为贤者父为仙者祖皇纶旦夕隰于袞黼郡国流芬衿绅腾■〈此上夕下〉然此世荣曷足多吐有薨岿然易仙之府导师金篋其光烛路不昧本来即复而所毋若世愚博作黄土尚飨

祭封少司马双塘汪翁文

呜呼惟汪代为歛鼎族其指不亿惟伯父惟懿亮夷真比于周家以本发迹中播于盐弗爰厥息爰砺我鏃丰我筮选而荐之有司亦既俛获乃曰浅用我于武而弗我悉我其舍旃穆卜于双塘之室厥室伊何丹灶是容客有羽衣翁眸遽青顾谓所知彼岂廷我黄金可成是以太夫人佐之勤而橐卒弗盈伯子玉立为国司绳上若曰予一人所冯推本原始夫是以十五载而三锡金紫仲食伯勋超补胄子翁如弗闻也者曰毋废我耒毋润我屋毋表我里鹿裘箠冠狎步眈晦醅醕醪陶然而已伯子赞宥旦夕三事而弃其司马以请将二老人之系用弗宁于位上谓铨宰毋夺司马志惟孝惟忠予所偕毗伯子言旋以耕代禄躬为子职仲砥于学以志代物翁志乃恠广馱之中太和融之逯迹蓼之

此欲界耶而有仙都之宫于宿为弧于乔为松柏也冥鸿又若卧龙仲九苞其彩而汗血其驄以此旦夕胡歷弗綿以此汤药胡恙弗痊而太夫人溘焉以先甫三周而翁亦遂厌人间夫此人间翁何厌焉岂生理之適尽将天期之不可遭呜呼伯父惟小子贞获齿荐于司马惟司马实覆露我而又勤诲我遂波及于小子懋是掖是假俾捧盟盘于社小子贞兄司马而弟仲子以逮懋左提右挈思树风雅俯仰天地其和调弥寡翁之履顺靡所不芻窃所深虞疚此存者呜呼黄之山抵■〈山羲〉双塘之水弥弥所不迹往而已神驰絮酒鸡炙跪而械词不朽之托将任之丰碑也哉

祭郭叅政文

呜呼天有神气鬱鬱嘉隆谁为吐之乃笃我公公自小官已着奇节如彼太阿飞霜截霓凶渠伏莽日夜伺间公发其私举宗诛窜万姓之愤摅于一旦夔妖闰位点我常伯公持其衡削黄冠籍千秋之诬剖于顷刻公惟不言言则朝阳公惟不为为则秋霜雕鹗横空或若鸾翔虎豹在山亦着麟祥入丞考功苞苴逆避出佐江藩单赤思庇岂以莼鲈而动归讫千里之壮时托老骥金曰公卧毋遂暖席天子夙夜待公司直公亦曰然天生我才衡门之泌岂足饱哉尚书尺一旦夕且下而胡造物竟不公假易箒之际■〈立乞〉然如生或佐胥涛策鞭风霆或登武丘控馭金精忌者鼓唇贤者疾首彼徒翩翩孰掣其肘人有公快公无人负惟贞与懋起自胥靡公舆新沓以尘荐启处者出者谷有余耻唯昔射策公偕锡爵虽登要清雅非中乐时藉公强以起余弱而公已矣税驾幽阁吾侪小人何心偶存岂无狗知岂无感恩芜语椒浆聊用招魂呜呼哀哉尚飨

祭刘子成中丞文

呜呼吾与子别垂三十年青门之饯竟成各天追昔云司与子周旋寒夜篝灯于鳞在焉子出子诗及于鳞篇各揜姓名杂之他编谓余毋问以意选旃予始寓目遂拈子诗次于鳞篇且乙且疑子之沾沾溢于须麋予谓毋尔前若涟漪子稍沈深毋乃庶几其次匪驯而多振奇意非于鳞其孰能之子始大惊起拜定交呼酒酒我少妇视肴淫诵冥搜昼尔于宵予有淮役逮乎趣朝子时睥目版筑分劳叹此竭蹶所得岂饶幸毋外我为我解嘲曾未几何分符贵阳三苗率从五服用章帝睠东顾肃此江防再锡玺书银钺绣裳卷千铎稍收三余皇立剪蒿莱坐起夷疮嗟予伏苦子笃不忘绋袍一袭银钩数行天道靡恒忽荣忽枯子中萋菲予起菰芦岁癸在酉获报襜褕其又二载叨领郟符子使丐言铭先大夫状自吴生其文甚都谓子所痛于鳞冥途生则羨予及徐与吴自是邮筒一再往还予之纳节归卧弇山忽有信闻来自间关余为吐哺喜动于颜不得子书乃传讷言精神沮消涕泪洑澜命酒忘杯舍筯告餐见者切怪惟有长叹子之诗章与子勋名虽未

终究可以汗青吴生状之余志及铭复何憾哉光施九京所不悉者与子交情陈碑未勒絮酒徐生张旒甫发素车范卿予独非夫次且屏营矫首南云愀然寄诚呜呼哀哉尚飨

祭曹甥比部文

呜呼履斋君之长于吾实二十有二龄而称为甥鹿鸣宾筵之荐实吾父友而称吾为舅吾固不敢偃然而当尊而君亦未尝不隤然而处卑见君之隤然者若以为易狎而中之介然者实不移君垂五十而成进士其得之甚难则其居之也若有未然少有所齟齬飘乎若脱屣之易其于人也一介而不妄予宜其橐装之苟完而其没也至不能具周身之棺君恒以为医之活人近而政之活人缓故其所梓医经传凡数百千卷其流行天下殆徧而及其病不能得一方之力以免又恒以为人生不贵得志而贵适意以故于珍衣甘食细旃广宇一切若飘风之过眼而咀藜短褐悠然容膝之室而无所累昔康乐之痛若人谓通蔽其互相妨若君之所通在宇宙而其所蔽在毫芒惟歌哭之相寻盖天命之靡常呜呼履斋骤即之而不知其为贵人者有之然未有不知其为敦朴君子也与之谈而不能相酬塞者有之然退而未尝不称其伉直无讳也即缓急而不尽副者有之然未尝不许其推表见里也君存而犹夫君尔君死而后知君不可以死也一杯之羹其享此耶其不尔耶一言之■〈此上夕下〉其以为知己耶其不尔耶岂能必君之享与知聊以寫吾思而已

祭慎子正侍御文

呜呼端公夙领诸生泓渟渊着如土在型及捷公交车百里蜚声断割肤敏如刃发矧入揆南台百僚几几毋开大桁行行且止燿艷师尹使我多垒为寇肺腑为民■〈虫尺〉虺邦之大夫民莫敢訾忧在宗社而顾其私臣言扬廷臣身伏机毁我室庐褫我冠衣虽则褫毁臣心奚愧大明中天郅埽魑魅用公之语安公于退苕流拱碧菰城还翠公于其间诵读诗书缕若蚕丝老为蠹鱼墨池菡林以佃以渔君卿笔舌人乃畏诸或征文献黻我皇明或采志牒宠彼山灵缀以己言附之姓名杜预沈碑扬雄拟经伊余晚合公偶声知带水浮家十岁其期岁必一来来则移时季必一书书则问奇曰余凿坏世氛甫谢不奉公问自春徂夏乃闻短造遽即长夜遗魄虽寒壮心未化呜呼黄金如山曷用铸身三望八驂泉途曷陈公虽歿矣不歿者神千载菰芦乃有此人

祭冯封君文

呜呼翁之跻耄而方伯公治我四郡兵事也则四郡之搢绅先生皆有言焉其言虽

人人殊致然大要谓方伯为国之桢而我翁为国之瑞其祝翁者愿翁无疆之寿以表尔东浙若威鳳祥麟之仪游江山峩然而增丽愿翁无疆之寿以安我方伯公小则储胥乎江左大则屏翰乎宗社若应龙得云以夭矫九夏衔枯而望被既方伯公舍我而袞衣全楚也则某等日先其子弟勤竹马之候于南浦翁里居而杖屨无恙也则某等又日从父老后効台莱之祝而东觐如是故未已也咄嗟哉异哉此音胡为而至耶将翁福之全而为造物者忌耶将我民之无良而不令沐方伯公之赐耶不腆千里之肺与郁鬯之酒侑以芻若币而寓翁翁其为我吐之去而乘飞鸿之躋上宾于帝若曰女其逍遥于易迁之宫以需列真位毋致方伯毁毋久宅忧于里世人望方伯如望岁焉然则翁履顺之归归尔真宅洋洋乎我曹为胡为戚然于遗脱方伯公南溟之息息不过六月蓬蓬乎九万里而风斯在下我曹又胡为怒如虞其不终惠耶

弇州续稿卷一百五十二

●钦定四库全书

弇州续稿卷一百五十三

（明）王世贞 撰

○文部

△祭文

祭凌侍郎夫妇二代文

维太素翁媪叶媿之若鸿得光葆真蕴醇为德必潜源深流长笃石林公广心大度易直子良惟陈夫人惠行淑姿以顺承刚诗书之业久而不替其用始昌厥穴既丹鳳产三焉彩羽煌煌伯巢阿阁造化夺之弗究其祥仲也葳蕤贲于丘园仅若孟皇天笃季君纵之九苞永言翱翔跋歷臬藩遂长三台以绥四方帝眷南顾五岭大憝恣其披猖汝将明威饬率武吏材官挽强六道并进覆彼穴巢断膂披膈强寇十万倏忽扫除若烈日霜爰立城郭爰布斥埃爰分土疆帝嘉厥劳俾领司空留政是纲畴昔之岁若王父父外内覃庆纶綍自天属有征行鬱而未扬季拜稽首敬宣德音以贲幽藏百里而内守令上冢牛酒相望世讲之契实笃小子逮我鴈行敢荐芜辞逝者若生存者毋忘尚飨

祭胡侍御文

呜呼胡君抗疏批鳞以赞国均时称直臣干星回辰归而食贫练衣葛巾以游隐沦时称逸民茹蔬采薪匪名之狗要以成仁夔夔在亲蔼蔼在邻太丘树惇林宗人伦集客虽麇定交必抡其爱肫肫其象閤閤客以为茵已乃悬鹑客以为困已釜生尘失无入顰得不及唇惟酒藏身亦能和神时吸厥醇四候自春如琴其楫如箭其筠豹文而堙龙性而驯尔车既巾尔席既珍周序登垠鲁郊损鳞不为王人遽称帝宾世路竟屯夺君经纶君复何论翛然返真慧麓嶢嶢慧泉涟齋君年露晨君名大椿往迹已陈风采如新溪茭涧苹为我逡巡

祭太师徐文贞公文

呜呼君揽治纲相叅治权弘治之末孝皇吁天天之咎之公实产焉嘉靖之初世皇临轩公之咎之射策褻然入擅三长出试百艰晚握大斗与天周旋尽塞幸穴独留化源弥留一诏雷雨九埏浴日丽空转坤旋干逊序成归凡十六年如裴如富徜徉洛城树表逺迹系时重轻公所损益今犹国经公所树培今犹国楨始奉帝命惠我黔蒸九九为期功圆行成毋念人世人世浊腥鞭虹馭箕以还玉京公之勋德王言是冯国史藏媿口碑流馨不腆寿言余小子贞比于华封差信而征今之酌公可以无赘始贞弱冠谒公旅次笑语从容傍及六艺寻覩贞文未允公意胡乃屈诘辞達为贵余谢不敏各行所是迨执三尺而抗緹骑其帅断断奋欲相噬公默调解毋使狼狽先君之思托葭莩契惟我先君积忤败类贝锦愈织镕毁方炽霆霤纷如莫可控避公力既竭公心恒惴惟贞兄弟扶服归东寒灰覆盆没齿长终岂无尺书莫适为通公捧翔阳以挨屯蒙贞乃伏阙疏诋奸凶朝拜夕下三台景从而何数竒厄彼狡童公如弗闻宛曲从容雪先君冤録其旧庸获改卿服安即幽宫天雄之节滥及小子公谓延祖可以起矣移部吴兴拜公梓里筐筐不施一刺而已公不自德我何敢齿公与深谈听然而喜叅伍章程错综名理以及兵事如针芥水逮于敝帚亦复莞尔贞之叙公文明以止风行水上匪涣而责往犹感恩晚乃知已我宦小达公喜弗胜中遭流言公仇青蝇我之嗜饮公忧如醒我之甚口公耳如慙岁一造公肝腑为倾拏舟送我徙倚怳营自贞凿坏甘从道氓公貽尺书始置宦情儿子甫荐公眼复青勉以祖武期之再鸣贞也凉德与世呢斯语及先君臆泪自垂下石何众拯溺者谁肮脏七尺不受人知归而顾影何所吐竒以是感公思一报之岂无贤喆姱节美志矫然独立翛然遗世世名趣焉以公有累公任其难彼任其易等彼云達宁如雨施以是报公冀伸兹意三载蜗庐穴蛰渊沈两造公庭匪閤匪壬自守木义敢荐鲜禽藿豆浆壶聊以表忱公于此时不墮中阴或享钧天或栖寶林肯游人间俯为我歆不尽者辞不泯者心呜呼哀哉

祭太师李文定公文

呜呼昌期五百储精岳渎蒸黎冯生以迨国策天乃与之大人之福畏途荆棘席之上弗茹弗吐以成家相天乃与之大人之量公产维扬金相玉暎发为文章陆离彪炳垂登强仕始乃献靖遂魁大廷徊翔玉堂祠厘竹宫和歌栢梁仅逾十朞而步岩廊既叅铨部晋领宗伯北扉视草西宫曝直孤卿七命康侯三锡始贰魏公宽犹弱翁既受萧规画一以终车门寂如无金可通台席既移公当辅首六卿志行乃绝指授匪月几望匹亡无咎悍佐见侵澹乎若忘薄有菟裘■〈干卩〉沟之阳介不终日匪舍而藏帝褒温纶以宠其归肃肃宵征上介导之■〈马上衣下〉蹄兼金冰纨黼丝公登于堂有母若父有季翼如厥绶亦组子及孙曾为世者五追惟锡第黔鬓朱颜王父无恙世数亦然请告以归称觞膝前自有父子自有君臣畴如我公完福备伦续廩给扶衍衍毕身为良赤松为度绿野耆英之会光于洛杜位则潞公德乃司马清商一部足以长娱何必云母然后快乎天期既迫不得须臾大江南北南有两德星岁隕其一公与文贞左辅右宰并跻玉京昔余先公鸣鹿偕肆小子不类南宮附驥余曰叔父公乃弟视丁卯伏阙偕懋上书以雪覆盆公为拮据泉台之照藉而获苏懋晚登朝望公云霄公乃蔼蔼毋忘下交与公主器复忝同曹忽闻流讟相向摧咽南州之谊千里奔谒而我何为病足如继絮酒炙鸡侑以芜词公宾帝所宁复我思江云黯结未往神驰呜呼哀哉

祭太师张文忠公文

呜呼有君以来恭已垂裳以劳付臣孰如我皇有臣以来尽瘁代终以逸归君孰如我公公秉化枢垂及一纪尽扫骹骸与民更始橐钥含机太阿养光嘘为春风拂为秋霜百辟洗心夙夜乃职有蠹必洗靡吐敢匿片纸万里一嘏千忧精神响应疾于置邮如日丽空何幽不显譬彼景风何草不偃河漕万艘先期委输武骑千羣无烦秣舖大农白粲少府缙钱其崇若山其深踰渊百粤九邊士饱马腾汇为汤池鬱则金城属国贡琛越裳重译黄屋之尊与天曷极遂超太傅真拜太师上冠三台下总百揆诏书不名犹曰子房彼鄴彼留亦莫敢望公有家严贵并师臣生死九命荣哀一身公有慈帟通籍两宫月鲜虚赐食必上供九有趣宗八荒骈轨如何一木万事长已呜呼浴日补天挽化回元简自帝心播自王言显融昭明光大宠灵载之椽史勒之口铭世有颂声曰周曰伊我弗敢从污不至私在唐赞皇复为元之才惟戡难勛表救时惟余跣弛世一长物公汰众毁俾寄戎钺拙于避言竟成铄金或弃或收雅非公心喻訾之口妬我壑丘赖公保全无碍熏修我实忧公食少事烦岁抄微辞以当报恩公亦自谓疲于津梁褰裳欲从限天一方其言在耳其人不作大斗辞垣乔峰隕岳人亦有言算遠造促虽鞭之长不及马腹呜呼寄轸

岩廊埋魄山阿森森象贤为陟者多帝曜长辉国威恒振公神行天夫复奚恨

祭俞仲蔚文

维万历七年巳卯秋八月癸酉朔越三日丙子俞仲蔚先生卒其又六日癸未友人王某始能以酒炙羹饭往奠而哭之曰呜呼仲蔚天与之隱俾辟世尘天与之文隱不就沦天与之贫俾滌世态天与之德贫不见惫天与之艺辅文而行天与之友翼德以称凡子之羸皆受之天其不知者以为嗇焉有子而痼有媪而衰有孙而孩有女而嫠人所言嗇嗇于目前吾所谓羸则千万年在汉恬冲无若叔度微言蔑闻胡以殆庶在晋藻雅玄晏先生未究八法墨池隕声子之于诗上窥建安尽洗色泽天骨嶮岬其于他文单辞辄工衍为赋誄亦表春容子之于书愈小愈妙柳骨褚姿凿山阴窍稍纵而行襄阳米颠强弩斫陈儿驹嘶烟与子剧谈耳不尽酬稍出片辞确乎阳秋入子斗室春风蕩然虽迹闕闕心遠地偏子之闕左干旄时溢及乎公庭夔絶子迹皂帽蒙头隱囊庇肘手綴目营图左书右徐■〈卅舛〉清葬时进甘果调鹦听莺日以自课六合之外子或冥思一室之外子不与知营卫精坚可永无败如何一疾遽尔长夜呜呼仲蔚吾昔进子以交子与自是三人遂成尔汝徐生泛爱惟子是笃殷勤分橐訾臬推穀徐之不禄子后我先入雪痛哭拊棺一言窀穸之期为树丰碑我文子书曾未移时子亦告逝谁为终此二子之责俱在后死月晦叩门子病向■〈谷丸〉回眸眄睐托我以臆谁谓一睽地老天荒遗骸在木遗文在床他所不能能使不朽所不终事有如此酒呜呼哀哉

祭沈修撰君典文

万历之辛巳七月故翰林国史修撰沈先生君典俨然而来玄都谒羣真寻与锡爵世贞繾綣者久之而后别明年壬午之二月其友青浦令屠君隆遣书来谓君典且治装北首矣亡何君典亦以书告别矣又一月所而有传君典病者矣又一月所而有传君典死者矣其传者落魄亡竖叅互不伦以故锡爵等怪而絀之且谓君典年仅踰不惑不当死气清骨劲髓实而精完不当死重节槩信然诺急人后己而中寬然长者不当死自坟典丘索百家众流射馭音声支离覆逆靡所不博综其精神实有以摄之不当死生负竒兆感异梦又为师真之所注挹不当死而亡何青浦以讎至矣乃定死矣呜呼今者亡暇论君典不当死乃又有不可死者以天子之临轩收天下士袞然而举为第一人将望之以异日寄宗社之大事不可死天下以是期君典不可死君典少喜谈兵走塞外指搗形势思以勒迹于燕然不可死士俗蔑典礼而力欲树一赤帜于茅靡之地不可死文虽高而未成一家言学虽博而未究其归不可死今定死矣君典之死耶岂唯吾二人惜之天下之人能惜之而吾二人之所臆结而不能吐者念君典志度世而不久世口无生而中

伐生上不能报师真而下无以慰知己耳然以君典之秀异廓落即死其神岂遽泯泯者第业已圜居不能走水陆絮酒炙脯而躬哭君典谨叙其事使奴某告之殓所而系以辞曰呜呼君典为死为非如鳳翀霄而铄羽仪八极初朗而即屯夷桂酒椒浆奠子一卮子之未生此身为谁子之既歿子将安归以字呼子子当应之应我者谁子当自知竺干先生手珠牟尼冥冥之中岂无子师而我沈沦虽生何为呜呼哀哉

祭沈封君鐵山文

呜呼天不可必以公明德而上有令父为公启家为公作则公有令子丛兰握璧其二显者中外列宿炳焉华国谓天可必以公明德而纶封甫颁鼎养未极歌者在堂哭者在室凡此二端循环莫测七十之年世所夸翊于人为赢于公为嗇呜呼波岫眉睞冰雪肤致莹如姑射轻则若士非骨而仙则养所致彼二竖子何能公■〈殪上心下〉神与天游六凿自避妖哇既遠秣醇罕嗜坦荡朗洞虚和夷粹适已内足不求不伎与疽何与而发于背仁心为质泛爱亲贤恤没存孤生死一言任到惭交张范差肩环沈之里惠慈藹然我廩我帑资之若源排难息诤乃有居闲虽行富德毋侵吏权造化何忌而夺公年公之夙惊托于吟咏近师香山遣适吾兴公之余事舒为草圣遠慕山阴天然欲胜沾沾自喜娓娓必应虹霓繚戾龙蛇拏竞夏敦商彝漆书壁经扬挖金石傍逮丹青黄衣小吏白马竖生亦复搜采以破沈冥千载目前使余神醒惟余小子托交三世所谓令父渊淳岳峙所谓令子鸾翔鷲逝而公其间或乔而竦或梓而企无忧作述尤欣志事少憾者寿难测者天独我庄叟笑曰不然贵至阿衡寿极彭篯乘此业识苟娱目前当其尽时谁能不怜呜呼有身有患无生无灭区区五福么么琐屑真宰戏尔抔作一物擲而还之如鸟笼脱自兹以往谁箴谁括纵横大年调笑日月公其首肯为我一醞尚飨

祭沈封君礪山文

不佞始而诵公之祖水西先生白简之文则知其练事扶义编须批鳞盖嘉靖间一直臣也既而接公之父守西先生于庚午之春则知其淹洋辨润博解人伦盖隆庆间一通人也又既而与公之伯子游又一饮仲子于吴江之濱则见其鸾停鹤峙玉琢兰芬宛然卫叔子杜弘治之俦而藹乎其可亲也不佞既幸而知公之祖父与公之子伯仲君然与公仅一见所依稀者公之貌而所聆者数语之寒温第以公之父而意公为令子以公之祖而意公为闻孙以伯仲君而公义方之训奕奕乎其有闻既又久之而公憲亮之度雅素之风渐得之月旦之真公甫踰强而伯子贵甫及艾而仲子显下大夫之服与天官部之典即身致之者不以为晚而公鬢鬢朱颜与诸耄耆之封公周旋于文酒之社而无少倦岂意服政之年而遽膺宾帝之选呜呼川盈日升众以拟公福之无疆弄月吟风众

以拟公乐之未央举人间世之所羨忽一旦而夺之而归于乌有之乡岂非凡之庆不易必者取之若寄而福善之理最可必者倏焉而无常虽然公有名爵生不为徒公有令子歿不为亡公又安得不夷然而举不佞之一觴也耶

祭黎惟敬少叅文

呜呼丙辰之春胥会招提余使而东于鳞乃西宗徐并鑣觴榼提携明卿继之若鸟逐栖却误伯承改辙几迷君甫毕试其颊犹厘竭蹶而趋式燕以嘻余戏谓君生黎熟黎君笑而答生熟均半搜其衷中乃多篇翰虬龙鬱屈虹霞灿烂二京可嗣五岭推冠余时吐舌口不及赞改席卜夜清吹妙弹遏云停空呼斗插汉君独颓然乐靡及乱庶几新沓不作中散曾未何日南北各天君椽銮坡余耕甫田世之弃余如一败旃公独寶之若狐白焉倦羽赭鳞银钩灿然愧无玉案以报琼篇散若蓬飞聚则丝牵余部吴兴君为不速颠倒裳衣酒炙相属遂登岷山探讨松竹颜公注樽磨藓以读放舟碧浪改席浮玉明月飞镜皎洁天目高山激弦迴波流曲名画法书恣君品録屈指千载此胜畴续其后五岁余领同卿君佐两制出入承明休沐之暇余或逢迎款段系门凿落细倾仅火再鑽乃西郟征君唱骊驹余音裊旌丙子之冬纳节归耕君时起告访我园亭短屐轻刀一二友生蹶披■〈山赞〉岷览擷葱青宾主东南胜事颇并粤峽之南炯焉文星知君得老悬车羊城鳞羽虽艰音邮互继君健饮噉百年可致有友楨伯书及家弟豫章片石刻君梦记谓一羽流矫矫其袂致音元美君为我使醒而笔之三日忽逝若醉若寐又若蝉蜕非君仙游则我鬼趣君有令昆亦有哲嗣并君其三俱拜天曹縉绅之阔孰与君高雅量冲襟恬进洁操千顷宏陂静不为涛千仞层嵯陟不令劳广文之絶供奉之豪君实兼之所享独饶有宫易僊郁乎岵毳二子栖焉服饵逍遥信君所梦君必与遨逝者奚憾存者奚切

祭余德甫宪副文

万厯癸未之冬十一月而乡人姚匡叔自南昌来言德甫宪副余丈七十矣余恍然而悟曰几忘之为排律一章及録所撰再补五子篇一章侑以不腆之币寓匡叔寿之未报而为今年甲申之春三月上巳吴明卿自武昌过我酒甫洽而曰德甫以人日化矣不觉黯然而低徊泪涔涔下也居一月而始能为文又一月而寓芻帛絮酒于君之乡人喻邦相酌而告之曰呜呼昔在燕中偕歴下李谁其和者宗吴徐子君最晚入而与李齿踞坐飞觴遥握牛耳我之少君且周一纪有所弹射君必披靡我以君兄君不我弟我困家难浮系于燕君时自闽捧镜尧天倭行见慰为我橐饘分手倏忽二十五年我之起家君赋归田去鲤来鸿岁必一传彼参此商同辉异躔松柏者操萍蓬者縁追维曩者甲乙之岁歴下一书傲睨流輩谓独德甫差强人意障彭蠡澜立豫章帜探骊龙寶益女牛气浩荡

九派不属三事余亦云尔万古居寄仲氏宦归沾沾自论得尚孺子奚忝陈蕃数君之迹不及国门亟访衡庐遂倾瓦盆酌冰烹伏见子逮孙事事清真语语直温惆怅野别殷勤醉言余乃恍然感念没存重咏五子君实首焉忆在冬仲余时忽忽客有姚生谓君七袞始草新诗侑以廷实仁君和音共保元吉明卿来访褰饮未毕云不慙遗君逝人日朗照黯淡回风萧瑟沈鹜若梦徊徨如失追惟我君野鹤鸡羣风骨戍削凌霜遏云材既梗梓德亦兰熏与物无营凝神不分畏垒之里鸡犬忻忻腊不必残日不至曛真宰何为忌彼斯文我之薄劣学道靡获生胡可恋死胡足惜乃为君痛亦复何益君神行天莫可揣测千里生刍絮酒鸡炙岂必君飧聊表余臆呜呼哀哉万古斯夕

祭太子太保严文靖公文

维万厯之十二年八月十二日乙卯光禄大夫太子太保吏部尚书武英殿大学士养斋严公以寿考终正寝越十日而始讣闻于其年家子南京刑部右侍郎王世贞时以疾在假又十八日而为九月之初十日癸未始能扶携至公第以玄醴素羞酌几筵而告之曰呜呼士挟册而诣公交车有终其身不获售者而公不三举而登甲第士之登甲第者以玉堂为妙选而公不再试而入中秘其入者苦为资簿所持往往有冯公之叹而公不二十年而至鼎贵其贵者以学士为荣汲汲有重金之羨而公自侍读一转而践其地大臣之不能两得者密勿之与统均而公由太宰而称辅臣昔圣门之贤喆尚不能无风木之悲而公乃兼得之于其二亲在世庙之操切数以吏事诛斥三公而公无纖芥之适以及身世之所最难调者台谏少年之口而于公独不能致其谗谮乃至天子之所锡賚褒予则有三鬯九酝以供宴飧之乐而象龙雕玉以为在笥之珍盖日三接而月三锡其数不可以具陈公终不以鼎釜易菽水而飘然自放于东海之滨及其归也晨兴而问美寝移晷而问美食稍间而虞之山琴之水无往而不寄吾杖屨之迹盖触耳无噫声感目鲜悴色呜呼此世法之最胜而人伦之极则也乃公终不以其一时之乐而废其忧翼翼小心唯患是虞亦不以其七命之贵而加于贱匹夫匹妇或能胜于盖九里之滋实本于河润而四时之气独得其春敷貌而出者以为鼎席之贵语而处者则意其环堵之儒于释氏之慈悲虽避其名而居其实若老子之三寶实采其精而食其腴以公之盛德当何恙之不除岂人事之犹有憾奉天期而不得须臾呜呼宗戚哭于堂臧获哭于庭中邻里哭于巷诸生哭于学宫田父罢耒织妇罢红其哀同矣天子为辍朝而议后事宗伯治祭司空治竊司封议赠太常议谥国有史家有志其荣备矣若通家之小子宁容一喙以致辞唯先民有言上为天下惜而下以惜吾私其庶几耶呜呼哀哉尚飧

祭张起潜宪副文

呜呼张君仁以义用行不愧影寝不愧梦和若狗俗介若矫众徐而考之靡所不衷昔为诸生数寄食贫有父及昆取资一身虽至纖芥不以累人无雕而朴无漓而醇及筮司理若骥辞阜而骋康衢靡所不造其齿则少其吏何老收锐葆精以慈为宝晋列台端匪霜而寒甫埋纲轮遽褫武冠武（张武也冠惠文冠）浮沈外僚我心则殫宁以枳棘而厌厥官入署留铨冰壶玉衡出领剧郡匠石庖丁护持戟单慈如哺婴化诲冥顽专如祝岭君贵廉吏如贵鸾凰其恶贪残如恶虎狼伏机倒射弛柙见伤失职当诛天王圣明白简爱我角巾私第耕则长沮居则畏垒怡怡从兄娓娓训子浆酒藿肉甘心没齿大明当阳魑魅伏藏尺一起君俾牧钱唐番番黄耇厥角若崩父我母我约我周行君之劬劳狗知感恩君之疾疚食少事烦再命甫被二竖见援胡惠于杭而嗇于温呜呼久屈而伸天若使然旋予而夺则又疑天白璧当碎畴能使全奚取造物奚堪百年民之多蹶况彼末路谁为县官牧养黎庶曰蠹曰蛾狙窃蟹步摄君正色使彼敛惧俗薄下趋如水走坂乡之黄口甫登仕版矫虔批根甚口睥眼藉君醇德相与推挽而皆已矣靡可复冀长淮涸流亨霄塌翅嫩行良德消之一泪宏畧遠算束之一槽客有蒙庄吊而见嗤万蚁纷纭粒粟狗之墨突不黔志在救时尽若我曹虽存何为念君生平食不再味是以奠君鲑炙亦赘恒俯苦节文量匡济俎豆其侧知必无愧呜呼哀哉尚飨

祭徐鲁庵给事文

呜呼公起孤生取高第入木天诵中秘拜夕垣赞国议天下艳而称之然挂仕籍者逾三纪而立朝者不四岁其试南宫而获僦丁未也舒徐内观凡再愆期而后射策金马天下高公之难进而不知其有漆雕未信之志其为给事也淹详外观凡再徙官而再乞归里天下高公之易退而不知其有王阳必回之馭公之归也逢掖其衣环堵其宫邑人而不邑居野居而不以家从天下意公有方外之乐而不知其睢于于方之内以终造物优公无累之晷而公焚膏以继之若蠹鱼之蚀羣编若牛毛而蚕丝天下意公有不朽之图而不知其聊以取足而自怡余欲以词赋拟公于正则而公不为怨以训故拟公于季长而公不为侈以宦薄拟公于曼容而彼不足者鲜著述以自见以沈思拟公于子云而彼不足者负美新之余耻然则兹日酌椒浆而告公也情也异时祀考亭之宫而配公也礼也呜呼公其吐之哉

祭张瀛峰中丞文

呜呼公甫冠弱已歌鹿鸣谁其颀颀余少二龄并荐公交车并翱帝京东署西曹聯驱分直邊尘冠天我留公谪蔽芾甘棠所至辄植余解青臬公始领郡虽则需迟亡陨厥问南甸罗施北领三晋握手燕中甲戌之春余髮种种而公甚鬢为德虽旧为声则新其

又五载公开大纛以帅桂岭余起京兆练川昕夕清尊倾倒岁寒之盟世路清夷或厄物情或困天期我不成行公不成归与公定交垂四十载扫石迟公公竟不待孤槎虽返旅魂安在呜呼哀哉岭右之师馘讯执丑露布虽驰竹茅未剖天子惜公胡不生授威扫夷苗身侮魑魅枢庭之席乃成虚俟缙绅惜公靡资大计公之里居其犹畏垒公之提身尚若处子公之室庐中人而已不为微言搜■〈娄 卩〉元精不为奇节猎较誉名不为捷足蝇袭世荣公实长者讵惟数端物情所便真宰所宽胡不下寿遽遭凶残盖棺之余皇泽霈霈乃有恩纶锡之釜鬻乃宏竈兆以象桂林乃申崇赠乃延世赏麟趾在庭■〈马上衣下〉蹄在帑天乎若远福善不爽余抱癖疾栖止禅宫与世缘乖长谢吉凶惟此一觞械泪酌公呜呼哀哉

祭姜师文

呜呼公老而吾里之称前辈长者盖落落若晨星矣公歿而所谓晨星者若将就日而益零矣风妬乔柯霜摧暮荃既无老成何资典型嗟乎悲哉仁礼提躬孝友成性求之口无诺责省其私靡窳行盖人伦之师表而前哲之皎镜也吾州之文采则有之而躬行日且不竞矣公之一宰邑而朱陵之址其棠阴是繁再司谕再主试而晋楚之间桃李多在门然公欲然若不与至成蹊而竟无言方半刺之书最忽投簪而乞去迨全台之挽留竟掉首而靡顾视巨源则尚少拟靖节而差裕知者赏其廉洁而不知者以为迂固呜呼桑榆之晷其晷偏长松柏之枯其枯愈芳履坦而行履坦而藏委顺以存委顺以亡公固溘焉而令存者伤昔公在诸生屈为童子师贞不识公公未余奇迨公里居始纳节归杖屨过从山颠水涯我师四公有望九而不及三者及八而踰之三者有望八而不及三者及七而踰之三者相去各五岁则广推之骆与公及司谕之朱观察使之季也或齿尊乡国或望重朝野迺将举一觞于祇林之下丰标峻而冠服雅须眉皓然贞以老门生侍侧而行酒炙使绘工肖之庶几香山洛下之社而今已矣姑饮泣而奠一觞公其享我也耶尚飨

同乡祭赠詹事学士王公焚黄文

于赫东海孕英为公肥遯丘园贲不于躬乃笃令子祥麟渐鸿乃笃闻孙双凤二龙公既全归久而显融国有大庆爰自两宫圣孝所覃庶尹羣工惟公父子歿赠存封鹤禁銜坡冰衔再重煌煌天章华袞并崇寂寂佳城顿回郁葱宫詹拜前者秩宗守令牛酒鼙鼓逢逢竭厯田父讙讙儿童公辞玉京驂虬旆虹何以征假肃然灵风

祭华明伯广文文

呜呼昔我秋官公不近名而为善不责报而后施其富若倾邑而其仁重于天下后世顾自贤其子以先生必能畅不尽之蓄而光其声于来杞乃先生官不能隄一命名不获沾一第余固已惜先生之遘而闵其志夫先生之于文枝叶于庐陵眉山而根柢于濂洛洙泗夫岂惟质古而有合抑亦通今而不悖矣其学自九流百家三仓八法以至于齐谐之所识述皆能略笔其辞事矣宦虽不及達然亦优游广文自足乎青毡之味矣产虽稍劳落然亦从容素封不至为乐饥之泌矣虽恭默不言而义方之训自行于子弟矣虽極楚不施而内外之节肃然于闾第矣晚而杜门息交絕贄不识者以为悵若简而识者以为于陵之不取不予季路之不求不忮矣盖造物之于先生故有丰而有嗇而先生之所凝承亦有通而有蔽通者固周旋于礼法而蔽者尚不失为仁义其嗇者不过人世之浮荣而其丰者絳县之甲子矍乎其善饭谢庭之兰玉森然其有继吾翁若翁固托骥于畴昔而子吾女复倚玉于兹契余少于先生十五年髮且种种矣夫何羨于后死亦何憾于前逝敢酌楚客之浆聊以当雍门之涕惟灵爽之如在庶不我乎遐弃呜呼哀哉尚飨

祭张听泉文

呜呼公年七十九矣而后终其终也人犹惜之盖以百岁期翁也有子成进士为循吏矣而后终其终也人更惜之盖惜公之未封也然是七十九年之中衣取足体食取足口而已未尝一日而慕乎外之丰别味被色按宫调征所以熙春阳而娱子夜者未尝一日告惫而嗟穷人见其恂恂乎似不能言而不知其制行之信果见其貌退乎若不胜衣而不知其精明之内融是故为翁之乡后进者推翁之诚恇而谓其为王彦方之伍为翁子之邑吏民者感翁之义方而谓其有万石君之风然则寿何必百岁而飨何必万鍾人固戚然悼翁舍白日而就长夜翁则怡然谢尘累而游乎太空虽然老成渐凋藉壮为雄忠信渐薄倚嚚为讐既不能起翁于九原而回淳古当从孝廉于里间以厚道而日相砻有酒匪醲有肴匪崇荐此悃诚为我从容呜呼哀哉尚飨

弇州续稿卷一百五十三

●钦定四库全书

弇州续稿卷一百五十四

（明）王世贞 撰

○文部

△祭文

祭王光禄文

呜呼先生处浊不设机为善不近名与物鲜忤规心自成仕则称朝市之隱归则重月旦之评往者携手与观化城甘果徐荐松醪细倾醉固陶然醒亦无营谓当上寿松乔可憑曾几何时溘焉就冥贞等积衰实虞世婴吉礼不及季昆凶礼不出一城盖先生之大故改鑽而始知又改鑽而未能修瓣香束帛之诚惟夫人之闻道彷彿南真之受箴于上清岂度世之微旨不能制伉儷之颓龄将真体无關乎四大而至人不贵乎长生然则逝者奚以悲而存者亦安足矜悟面目之本来长湛然而圆明尚飨

祭章太学衡文

于戏章君少负材美名公之后循吏之子既娴笔札复习诗礼动则春风静则秋水吾以吾弟托交姻戚每过君里遊从莫逆客必选佳坐必卜夕岂无显者踪吾莫得昆湖之阴虞岭之阳兰舟笋輿相与尚羊见即欣欣如鱼出防别辄昏昏若鸟倦翔垂及二纪吾栖祇树君病叩關强再三晤虽柴而墨犹甘匕筋曾未几何报君物故疇为肺腑仲氏与张竭蹶以趋治君之丧衾棺既周三月乃葬谁谓君贫松梓成行呜呼生寄死归贤圣皆有生不眉鬣死无心负桑户返真伯伦全酒酌君一觞为我釂否

祭叶教授文

呜呼翁之长余踰三十年其在戚属亦吾父肩凡两司铎声东南天胡为曳裾偃蹇兔园屣趾嚙雪灶突避烟晨趋戟门使余恻焉食饮汤沐薪粢杂骈肥马鲜驹出入后先有所陈讽王亦解颜予告东归邮繻用传惠弗克终岂余则然翁甚伉直不为机關履坦而行委顺而旋隱酒隱诗竟以天全晚有文孙登鹿鸣筵三老祭酒里其舍旃翁之风骨鹤癯松坚翁之襟懷跃鱼戾鸢目细而方匪聃则籛胡为一榻委蜕其间岂厌世纷而归道山余所怆者念旧懷贤窃以荐翁溪毛圃荃尚飨

祭长房仲兄文

呜呼惟我王父寔鍾双璞连城既剖乃有三穀奕奕庆门丈夫子六中违废箸稍歌隔谷枯荣异枝托本乔木霆霹中摧修龄独促呜呼哀哉惟兄之始夙有憑扈中外二祖

为国师柱母曰爱子将舅是附舅曰令女归为而妇鼎列裊陈金铺璧护初游贤闕改肆象胥一官垂及忽舍而去策肥衣轻饮醇击鲜红妆昼帷素质夜筵惟意所师隄四十年奕品入能诸艺亦然拙于用长短于收全遂捐故庐鬻我土田土田既鬻尽室皆徙耕于废丘十八在水儿饥女寒其嗜不已室人之谪若风过耳盘龙纵呼卢雉不起以此邑邑食不能匕用饶得贫用贫得死呜呼哀哉兄之寸衷泊乎真纯毋论讎敌貌之则泯前有伏讥信足屈伸鰐令肆奸鱼烂其民兄谒上官攘臂以陈琐尾之口兄不逡巡中表昆弟以及外亲衣食之余时推羨缙众许遗直亦或称仁兄今逝矣食指数十进而啼号退则饮泣有季曰望差自强立贞等佐之归窀于隰计其存者析缕数粒以时婚嫁不至拮据仰悲原鵠畴问其急俯悯巢鳩畴与为緝呜呼痛哉尚飨

祭大兄文

呜呼人之所难得者寿兄至七袞而后终寿矣其服食导引之志则若有夺焉而未获究人之所相高者胄兄以王父叙而得官贵胄矣其膏晷穷年之志则若有阻焉而未获就仕而留省宫臣几矣兄欲宣名汗青而不得则刺刺乎竟没齿以为疑子而玉立芝茂竒矣兄欲其拾芥金紫而不得则营营乎目悬旌而如有追兄既不满一世之人而亦不能使一世之满其身盖其所自负者大而其自信者真是以释褐而寻坎轲挂冠而就沈沦羨者以曼容之善退而惜者谓仲翔之相屯呜呼痛哉贞荷天子恩纳郎节方拟从诸兄弟而优游里中胡仅一岁而妬我仲君乃复妬我长公也且我王父有我二父而为诸孙者六前妬仲君贞固以拊心而内痼今柰何使我独称兄而不获鴈行以从容忆孟春之晦为兄荐百岁之觞兄尚勉举而醺之今者孟夏之阳为兄酌各天之卮乃弟劝兄而不酬即兄醺而弟不知自今而徃即与诸季从为竹林一日之期能遽忘于二逝者而不怅然以思眩然以悲耶呜呼痛哉尚飨

祭张仲慧文

呜呼子之襟宇玉洁春温子之志意凤矫云騫发为文词芳若润荪其犹妙龄皎若鼉噉绛河天杓赤手可扞而厌世器折节师门曷不华阳萧条其魂儿女之私谐此媾婚一疾弥留投誓蝉媛夫岂子心子宁食言大宅尽销方寸犹存易箒之际噉无瞽昏呜呼凡世所惜蹶骏康衢峰阳孤桐爨而焦枯秦庭隕璧寥法珠衰严病慈仰天呜呼门户何寄宗桃曷图少妇红颜總帷影孤抚此弱息厥声呱呱如为子寃母君蒙庄殇子椿龄彭聃夭亡天地遒尽我何盡伤纵浪大空擲忧混茫其言虽大大而无当凡此二端吾不子陈子既噉然必无堕沦父母以前谁为子身易箒而后子为何人金石可敝不敝者神天地有尽无尽者真何以凝之用志不分幽明路睽其理则均我师洋洋靡所不臻不见

兜率乃先世亲子其前驱我犹隔尘明水芬椒鉴此微禋

祭婿及女文

当嘉靖之丙寅而吾女华安人卒于蓐其三年为隆庆巳巳而葬于泗洲其又六年为万历乙亥而吾婿礼部起龙卒于苦其又四年为巳卯而改卜砖桥之壤以葬迁吾女祔焉而居士乃以酒二卮饭二孟脯腊果蓼之属而告之曰呜呼女之歿也时余病痍而弗及诀也谓且追汝于夜台而返余辙也女之归土也余时宦游而弗及抚也又弗获以薤露悲汝也婿告殂以苦次而余方持郟节有驱驰之事千里之酒絮而弗能酌也九歌之招械而弗获陈于祭也今而婿始成葬矣余始成相矣女以迁而获合余始再覩其藏矣是余向者徒谬称尊而于二逝者殊卤莽也吾女生二十岁而合于婿合二岁而离离又八岁而幽之合复继之噫何室之短而穴之长若斯耶合兮离兮天兮人兮呜呼哀哉

祭华甥文

呜呼汝何以死也丙子之秋吾入酹我师以及汝父汝出见我泽皙而肥吾始虽以慰心而中不能无少疑及巳卯夏送我师及汝父之二輶汝再见我则皙者苍矣肥者实矣吾方以为喜然未几何而汝之病音乍闻而讣继之天乎天乎何疑者之终是而喜者之竟非吾始得汝病状而甚忧既而闻所谓曹德者老医也止弗肯去以为必可治吾恃以稍安何安者不足恃而忧者乃其宜夫曹德者老医也岂病状若此而犹不去将毋以利而昏其知汝祖母之祈神下巫无所不至矣而竟不能救汝于死又何取于斯也呜呼汝死则死耳忽而辞汝祖母及汝母以往也其所赖以生者已矣忽而见汝祖父及汝父于地下也其所瞑而死者亦已矣汝祖母必为汝父立后吾女或不至作馁鬼然所谓常飧者未可拟矣人理悠悠天道茫茫存者歿者靡不痛伤有知无知尽此一觞呜呼哀哉

祭师锡从侄丈

万历之庚辰十二月二日有报从子师锡太学逝者余方卧东斋室为起哭失声命余子士骐奔哭之又十日乃以斗酒炙鸡羹饭往奠拊棺而哭且告之曰呜呼天乎孰为使汝至此极也汝之大父传汝父以逮汝凡三世为冢嫡矣汝父歿而有汝在汝一子则病痍且剧危哉乎然犹有一线之息也夫汝父歿而不谓歿者以有尔也汝子亡而不汝虞亡者以汝尚壮能子也今而所谓一线者亦已矣天乎孰为使汝极至此也汝白皙广颡而丰下谓汝必自致贵厚也读书工诗文与人坦坦无城府谓汝必贵且寿也居心依于长者不刻苛谓汝必有后也汝父不能得汝大父意然大父以汝故未尝不心喜也汝

父不能得闾里名然闾里人以汝故不敢不为礼也是皆以此三者待汝而又已矣是汝上无以慰汝祖而下无以答闾里也天乎孰为使汝极至此也人谓汝死于酒我独悲汝侘傺鬱邑而无聊不得已而姑托以逃人谓汝死于色我独知汝虑不孝之罪大不得已而戢身于枕席人谓汝且五十不为夭吾独痛汝生人之趣得之若多而实少呜呼韦裳一袭桐棺三寸寡妇长号诸臧欲遁汝身尽矣家尽矣汝之身事不尽而心事亦不尽吾酌汝以兹觞而哭汝以俚言汝能呀然而谷应耶能快然而鲸吞耶将逝者其冥冥而存者乃消魂呜呼哀哉尚飨

祭奚生文

呜呼惟外王父晚有媵息爰归于君遂来称戚惟君之先有良菟裘逵若仇池瘠非寝丘君少而成师織倪密以勤奉入以俭奉出聿拓其家有子及孙何必兰芝既芬且蕃岂伊观光而游上都拮据握筭竭蹶修途君朱其颜而甚鬢发胡为一疾永与世诀载酒崇肴饯君九泉无尽者人有尽者天

祭张母某太夫人文

呜呼光祖等辱与太夫人之子肖甫游称昆季也则太夫人称仲母矣始肖甫为滑令而光祖令浚也盖良声隆隆然比壤矣然不以多滑令而多南溧公与太夫人之教也肖甫入郎司农而世贞郎法曹也良声又隆隆然比舍矣然不以多司农而多南溧公与太夫人之教也南溧公歿而太夫人专为母矣隽尹之引经与柳大夫之持法谁成之加匕而丸熊者成之也肖甫拜中丞治吳最厄于言而归天下以屈归肖甫光祖等不为肖甫屈而独为喜者喜肖甫之能精太夫人养也既而公是出天子顾深出卿留都辅三辅天下以伸归肖甫光祖等不为肖甫喜而为太夫人喜者喜太夫人之能用肖甫显也太夫人业以捐肖甫事县官虽有离忧其志乐也固存顺而歿宁矣天子之不能骤竟肖甫长三辅之不能终有肖甫德与士大夫之不能尽识肖甫用者柰之何哉太夫人独不为少一待耶若光祖等之谬称犹子也生弗获升堂以拜没弗获裹糒以奠墓弗获执紼以歌薤露而徒具芜辞寓之巴烟楚雾之间曾哀猿怨宇之不若即肖甫故私之而寬之而太夫人其以为何光祖等亦自以为何呜呼哀哉

祭魏太媪文

呜呼太媪八十而归正寝也寿矣令终矣乃不佞有余感焉始太媪之事（阙）公也公且老而太媪不一日而废井臼之操也属（阙）公歿太媪未三十而遽称未亡人

自是却铅华而弗御者固五十余年如一日矣公有子三人太孺人哭且死而苏曰吾庶几依伯氏以老乎则緝■〈糸 辟〉洗以佐长君家而长君甫及强而亡也乃又哭且死而苏曰吾庶几依仲以老乎则緝■〈糸 辟〉洗以佐仲君家而仲君又甫踰立而亡也则又哭且絶而苏曰吾尚有季足依也比少君治经生已歌鹿鸣于应天太媪为缮第舍治圃易家庶几立矣而少君犹之乎仲君且无子也太媪乃大恟曰吾莹莹将安归乎乃依仲君之子恪自是老且死矣少君之两政皆在越而弗获迎太媪养也太媪未三十而寡寡五十年而弗获旌其弗获终为妇也弗获专为母也无子而有子哿矣有子而竟无子也世之所谓穷者也然易箴而诀恪曰吾不愧存者矣掩窆而见（阙）公曰吾不愧逝者矣贞不敏虽不能举太媪之大节以扬诸朝而粗亦能表太媪之志寓诸■〈此上下〉以侑一卮太媪其吐之乎呜呼哀哉尚飨

祭师母季夫人文

于维夫人温恭俭慈产自膺胄乃习书诗择配而字始归我师饗殮朝夕必诚必恪躬荐舅姑靡不允若师无虞养以精于学出入中外必慎必端躬修阃政苞苴罔干师无虞顾以精于官师不他媵夫人代媵寒饥苛痒先意为顺用此终身厉声靡进师不他友夫人是友经营堂构俶垦畴亩有谋则谐赖以无咎凡师之行右矩左规既宜其家夫人则之顺为嬪德肃为母仪胡不百年中道而止莹莹我师与影相倚岂惟良俚且悼知己夫人大归其安冥冥默佑吾师俾康且宁椒浆蕙肴弟子之诚呜呼哀哉尚飨

祭汪司马母夫人文

万厯戊寅十月始得我伯母胡夫人讣其月有行役十一月归里寻病明年巳卯之正月病良已乃能为文絮酒炙鸡寓祭之曰呜呼自母之媿太公而有伯子司马寔以千秋之业启贞不佞握牛耳而左顾曰若其执盟盘以从明之持国秉者良谓伯子我寔急子子不急一二于宵以益我栋隆繇是贞不佞之姓名出伯子吻而入天子之四聪伯子不安于朝而不佞贞即不安于渚宫郟节之纳也与司马部之请告也踵相继而浮沉乎里社之中伯子吾兄也非吾友也小人无母伯子之母吾母也母生而贞不佞不获升堂病而不获讯候也乃伯子之以讣偕状来而不佞贞方据梧而称霜露不获裹粮疾走也今又匝月矣乃始告一介絮千里之玄酒不佞之无以为生者解也又无以逝者籍手也盖茹耻忍负而已吾闻之状母既殮成服而帷之内伯子率仲及其妇若诸孙诸妇告诸从子妇与功总之服各就位帷之外其首为叔舅氏而吴氏叔与兄罗之两甥次之门外宗老负东墙诸妾妇负西墙而蒲伏堂之下者男女仆可百辈甫举哀而声坟地稍定而诸各以其职得母之孝敬睦婣慈恤朗懿者细大垂数十百事其少者质长者而信亲者

语踈者而信始以告太公而太公惋然悲已嘿然若深味也顾谓伯子状之而以谋不朽于立言之士嗟乎即贞不佞欲有所効于母者而已矣有所言世且以为耳秽矣且今而后有天子之纶綍与公卿大臣之颂若誄然亦无所事而伯子之文成自足以世世矣今且以告母母而有所知耶将快心于兹逝其不然耶而归一切戚疏于太空即不佞者方愧其涕与言之俱无从也

祭凌夫人文

猗欵夫人柔嘉婉嫕宁惟女红寔闲内则少归于凌乃殫妇力公为诸生家徒立壁夫人拮据旦纺夕织其事舅姑饗旦浆夕寬公于读毋使中惕公歷藩臬以贤服休四开大府一钥神州为马伏波为萧鄴侯夫人佐之或从或留从则输吐以贊公猷留则鎖钥以分公忧帝曰保氏青宫是寄鱼轩翟茀夫人从贵帝曰胄子帅余緹骑汝欲娱彩畀汝使事公子归来步障十里叅差兰玉斯皇朱紫伐鼓撾金亦既乐只称百年觴夫人曰止吾事竺干蔬食二簋衣不曳地首鲜重珥帝念公功趣还宥密统此貔貅以卫王室公谢不任乃三陈疾松栢倦霜桑榆借日人曰二疏今复见一誓偕百年厥欢未央胡厌朱门而就玄乡谓子若孙抑毀以襄吾游甚乐公母蠹伤惟帝优公有龙其章宗伯予祭司空治丧生歿荣哀备极伦常予视公兄夫人则嫂有子肩年复締姻好方训孙息使修苹藻以期异日奉太君老云胡不待我心则懊崇俎陈觴为具草草灵之歆之缓我如搗尚飡

祭史鴈峯太仆陈太恭人文

始嘉靖之癸亥故致仕太仆寺少卿鴈峯史翁卒于家三年而少子锦衣君元秉以公破岛寇勋入环卫积劳至大帅蓋距公没之二十余年而为万厯之壬午锦衣之母陈太恭人卒天子念公勋与锦衣君劳命大宗伯锡祭大司空锡塋于是锦衣君奉丧归将以侈天子之惠大启莹兆以祔而其姻生大理卿王世贞寓香帛牢醴而告史翁及陈太恭人曰呜呼当嘉靖间翁以学行受张桓之简膺王裴之寄其用虽不竟究而天下信以为名大夫士一屈而归卧玉女之涘百里趣德千里趣声以乳我舍我其贖力虽日削而天下信以为士富而附仁义及其毀家而纾国难结客而勤王事不知者以为非山林之轨而知者以为世家巨室与布衣异符卿之一迁与罔牧之再命荫锡之三被狭者以为上恩之过渥而达者以为尚不足酬其一二独造物之巧或驟而夺之或缓以归之其迹者不可强而遠者终可期以公素封之业不获授之齐眉而代有终者乃小星之淑姬公厚德之报不食之朱公之长男而干用誉者乃兰庭之弱枝当太恭人之媿其才斂而可述者仅恭与僖去翁而称母其德舒而可见者则俭与慈呜呼翁以一上士归而委迁从九列之后祭以大夫塋以大夫不可谓不厚矣太恭人以一嫠媿而从锦衣君日食大官

之烹黄腸给之尚方丧车置邮以行不可谓不荣矣翁借天子恩以成燕翼之谋锦衣君借天子恩以全乌哺之诚然则翁与太孺人其衔恩于九京而锦衣君其効节于干城者庶几毋忝所生也耶

祭朱母何太孺人文

呜呼太孺人之侍王孺人也则以宵征示恭矣其佐古沙翁也则以夙兴示勤矣其抚在明也则以义方示训矣其持家秉也则以程费示俭矣其御臧获也则以均施示惠矣在明之耗于气谊也取诸太孺人若寄也其耗于耳目也取诸太孺人若錙也禄养而太孺人无得色也耕养而太孺人无忤色也诀而手在明无恋色也归而面古沙翁无歉色也不亦烈烈如丈夫哉以是言荐太孺人将吐之乎在明听之能无辍哭而为太孺人慰乎

祭俞仲蔚嬪文

呜呼仲蔚之存蓬蒿满堂恃嫂而薤如鸿得光仲蔚之亡嫂寔理丧能使黔娄不废称康其貌差强其神内伤是以三周九夏在床有子而病病乃膏肓含饴弄孙小慰嫂膻我同袁闳处土屋自揜仲蔚问讯不续密戚过云摧尔兰玉怛焉怵心驰此急足惊而告我厥祸愈酷若子括髮以头壁触孙既蓐蚁嫂亦就木当此俭岁可以观人谁与脱骖畴谋附身天道茫茫福善曷臻下见仲蔚嫂毋缕陈鬼而有知益彼酸辛闻子后庭厥媵载娠人定胜天麟趾振振嗣当酌言以宽嫂颦呜呼哀哉

祭兵宪李君祖母余文

呜呼斗牛储精下汇鄱湖锺为令族曰李曰余亦有女贞以相丈夫维李之宗道州敏肤丧厥元配宗祧是图维余之萼庶其我跗夫人来归则有舅姑采彼毳甘以共浆餼退拊總帷孀焉一孤夫人闵之以酌逝者汝遗我鞠矢不负汝谓道州疆必富男子病不任妇荐二淑女无歌小星爰即寧处熊罴之祥十岁三举汝衍汝豫我粥我乳我不任妇而实任姆秩秩积仓轧轧机杼道州之政时藉叁伍卒为循吏能餽簋道州之乡蔚有嘉誉何以孝廉于夫人取天不恤李既夺道州而孤甫成造物见仇泣谓嬪查和我栢舟食则共牢寝可同裯谓二孺子勉思箕裘毋苦丸熊毋厌膏油次公嶷然入司帝犹遂长霜台不竞不絀出牧吴兴开府东婺来者欢迎去则追讴如旱望云如暑获秋植我禾黍芟我稂莠民之戴公如戴元首公稟大海寔自二母公之退食拥笏垂绶王母海前慈母海后为青州隼为河东柳邦人祝公愿夫人寿天不愁遗谁与其咎二竖为虐三彭狂蹂

属纆之夕握次公手金汤万里为天子守毋毁若性以殉老嫜归报地下庶几无负邦人士女戸哭巷走夫人去公公尚我有敬陈芜词侑以椒酒如在其上如在左右呜呼哀哉

祭章母陆太孺人文

呜呼吾往者与归化君游日读书嗜酒不问酒所从来与所供读而差自给者以有太孺人也今者与太学君游问产矣然亦好客及酒酒所出良而客必尽意去者亦以有太孺人也太孺人有四女以适婿皆贵富而其女皆孝谨工治生习于内训亦以有太孺人也太孺人为令妇为令母以德相夫若子以勤力先家众然而声不出闺闼之外者则是太孺人不事褻暴以希誉也其四女皆力足以甘旨太孺人然而犹攻苦食淡者则是太孺人不欲以已故伤四婿惠也其仲婿为吾弟以故当归窆之期荐束刍而酌以椒浆夫以归化君之窆而世贞为志之而且铭之以太孺人之窆而吾弟为志之而且铭之太孺人其偕归化君而安于地下哉尚飨

祭周母陶夫人文

呜呼昔余宗姊获奉师氏病弗任室卒以夭逝爰择夫人以为继配婉孌静专夙夜兴寐佐师于读时乃修饗及典方州遂擢半刺良二千石闽海户祀或从或留咸秉内寄俾无却顾精白王事师既倦游甫谋息憩有堂翼如其室孔丽问谁营之夫人筹计三子二女鸾停鹄峙迨师告终母仪愈■〈职，赤代耳〉女无停织男不废耜中外斩然亲故毋二门庭肃秩闾党归惠云胡末疾奄尔长逝诀不能口聊示以意慈徽永杜繡帷长闭呜呼哀哉贞少侍师一受经义懋虽晚进忝厕内弟二三郎君不我遐弃过从莫逆兰金爰契闻讣蠹伤衿辛辟呬鬱金苾芬为夫人酌灵輶虽西为我少迟呜呼哀哉尚飨

祭王母某太夫人文

呜呼太夫人岂不一女丈夫哉其事舅姑而相夫子也执馈之悖与鸡鸣之傲优乎彤史之遗模矣夫子歿而太夫人称母也比部与进士君所繇发舒其长者为名司理为名法曹而次者亦需次于公交车然太夫人不以二子贵一日而忘义方之训二子不以其贵一日而忘乌鸟之恋故出者轻于去其官而处者重于出而为仕宦其存也供养病也汤药歿也殓含凡所以为太夫人者必诚必信而无遗憾然太夫人明年九袞矣其病不能待者六十日耳诸与二子游者靡不相约为芎膏醇酌以俟称觞之期而贞亦构不腆辞备华封之百一乃未何时贺者未进而吊者至客之辞不以祝而以诔则比部与进士君之未滿者其犹在是耶虽然太夫人归其全而还二子于朝俾各以其用声施于当

世则往者太夫人之形而不往者太夫人之志也有肴在笱有酒在觶誄亦何悲颂亦奚异尚飨

祭钱母某太夫人

于维太君婉孌性成如璧斯璞若金在型嗣配尚书肃靡和鸣谁鹄其雏大司寇公仪则母之齿乃女兄孝慈焉既和且丰爰举叔子振振麟趾钱是用繁几百其指兰芬玉茂尚父之里维昔恩纶母子责授太君拜前司寇拜后五珈泽首五釜滋口太君九袞于时王正司寇寔肩八十五龄紫玉盈堂羔帛充庭倾都涸邑以为盛事西瑶之台金母所治既宾南真太君其貳改岁孟夏返于寿藏天子所赐题辎黄腸万翼之百两将将蹇余先朝从司寇后今者道门辱仲孙友絮酒莫躬筵几莫叩不腆之■〈此上夕下〉颂而不悲云胡不悲五福俦偕眠牛伏龙螭首跌龟淑魄莫处灵輶飀逝独留司寇永为世瑞神之假斯毋我遐弃

祭冯叅政文

呜呼昔司諫公吾州于牧遴其哲又是程是督兄为元子衿裾相属十八其岁秀眉湛绿泚笔而挥倾珠奏玉灵虬腾空腰■〈马上衣下〉驰陆齿予鴈行名岂龙腹平阴先鸣抚已则恧不相接者垂一纪余始自郎署慰兄公交车广辅重颺伟哉丈夫韞籍晁贾倾倒张苏俯睨辈流不为竖儒陵阳之玉其犹未沽余谢青臬归婴百罹兄始骏发翱翔天衢筮仕清郎三礼克举出赞江藩作匡庐主排剥理解无俟斤斧迂仰彭城漕路伊阻兄之太阿光乃稍吐九河奠流百邑按堵袞衣旬宣奄有东鲁疏胶之役畴不首俯兄执其是以扞政府荣路在前逡巡舍旃归侍諫议以终天年余时倦游纳节归田岁必过我晤语留连太原龙门年则兄先家有季方亦复叅焉兄之藻辨湍奔瀑悬迹则鸿冥气乃虬奋舖醅流离步履迢迅余未耄老而衰则甚白发渐童齿堕如齧谓兄必出余敢忘遯漕纲之拜兄果应之不薄手板与少年偕鞅掌西东美疢是依天夺国琛以施蒿莱不覩华轩乃有灵輶壮者若此衰者可知东林之步限于虎溪絮酒鸡炙迹系神驰呜呼以司諫材不竟世庸卒开八袞高朗令终殒焱之文其雄丽空剗剗之传其声不穹里有专祠再食学宫歿而不亡得子如兄兄之歿矣大化所权兄之不亡是在象贤呜呼哀哉尚飨

祭周师及陶夫人文

呜呼夫子之弃诸生也蓋九年矣乃始议墓墓而陶夫人之逝也前亦一年矣乃始

成合丈夫子二玉立而贤孙枝之长者巍巍而少者之娟娟去其堂则榱栋之焕然归于域则松柏之卷然有一门生苍颜华颠敬享以不腆之牲而为之执紼以相后先又勒辞于隧中之石以传夫子当右顾夫人而问曰吾其安于瞑矣夫人当亦欣然曰夫子勗我以代有终也庶几不辱命矣然则存者当有悲而无憾没者有不作而无不幸其茹我耶否耶后死者亦安能久耶余能不夫子之朽而能不自朽耶夫子其终茹余毋使余疾首

祭王学宪家驭文

呜呼事故不可知盖先三载而公谢中州之学篆以归也时长公已在二尊人膝下矣天下之所望以麟游凤仪者虞其不易致若孟氏之所谓三乐则绰然而无所亏曾岁月之几何而封公逍遥于门则太山颓矣内子溘然而下从则帐蕙灰矣二孺娟好相继不育则庭玉摧矣公朝与哀朝而夕与哀夕也盖未尝一日而覩其眉之开夫上有垂毫之母而内无代养之妇悲莫悲于短筭痛莫痛于斩后始以公为一世之雄而今乃擅天下之穷其所谓三乐者独一仰不愧俯不怍可奉之以始终耳呜呼公之与余也始而落然既而缠绵又既而肃焉不知者以为长公与仙师之所推及而知者以为心期之匪愆公固谬推余以古人而余亦信公之为巨贤追唯畴曩纳节还乡与影为俦踽踽凉凉长公继之如鸾得凤吾弟三焉夷犹彷徨及公之旋世称四王蹇余行之謏劣内深愧其无当长公既拜金瓿之覆吾弟亦膺木铎之聘余以衰迟偃蹇朝命物情所向待公为政何彼竖子能为公病岂人定之虚言不能与天而争胜余之留无益于乡党仅能朝夕公之汤药而已而公讳其大归竟不获伸执手之托虽然不朽之计余寔心诺以俟长公谋安公于乐土之椁呜呼公真已矣入公之堂拊公之几右而惨者独一犹子欲以慰公何可慰耶欲止余泪胡可止耶呜呼哀哉尚飨

六十酹女弟墓文

呜呼女弟汝有知耶为无知耶其犹在冥趣耶否耶吾今满六十矣记汝疾甚时吴阊舟中与汝诀痛汝之慈仁短折而羨汝之得从先府君地下也盖又十年而先太夫人复往就汝矣而吾独不能从死又不能固其匹夫之节而强应玺书召长藩臬佐台寺出则托于吏民之上有冠纓之飾与輿马之奉处则称乡祭酒有衣食之饶与园池之适吾之负汝一也又记诀汝时弟懋为言姊即不讳长兄能为文不朽姊汝犹挥手以谢泫然泪盈眶而不收今汝志在吾集中其辞既鬱塞不能畅汝之衷悽又不能为瑰丽以表汝之懿媿其负汝二也向者吾至虞山之足未尝不治鸡黍视汝墓痛哭而后返或岁再酹或再岁三酹最踈乃自落尘网中则稍不继矣闭關以来絕迹矣其负三也自汝歿之十岁中未尝一夕不夢汝也其又十年未尝一月不夢汝也五六年来岁仅一再夢汝耳岂

吾之痛渐杀而思有时怠耶抑汝果已离冥趣耶呜呼吾今满六十矣虽名为学道而亡所指授发大半白齿落殆尽就汝近矣今遣苍头以卮酒酌汝墓汝有知耶为我告先府君先太夫人曰死者即不生生者且死我又何憾哉如无知也我去无知之能几而暇汝痛也

弇州续稿卷一百五十四

●钦定四库全书

弇州续稿卷一百五十五

（明）王世贞 撰

○文部

△祭文

祭沈商城文

呜呼公真大归矣去太公之定二岁有奇耳其素旒之飘摇俨然公父之就墓而直杖之号踊则疑公之犹在而称儿夫亲歿而魂追之亲墓而魄依之君之所以自处者良足而使君之子弟戚友能无感痛而累歔呜呼谁为戚友继我公媿公女我子其戚甚懿而独以凉凉避俗之故不获从公之执紼然尚能为大招之■〈此上夕下〉以寫余哀铭幽宫之石以摭公志而予之子公婿也乃两以公交车之役北上病不得躬汤药歿不得治丧事今兹又不及隧以观公体之封闭将何以解也公用虽晚而不失进士官虽薄而不失循吏闾左衔德交游服谊且夫万厯之世公以精廉核察声冠两河而藉畝之令下寧夺时相操切之意而不使万乘之主下与小民争利夫仁者必有后公之后穰穰而济济者寧非公之所自致耶公亦可以少慰哉尚飨

祭华太孺人

惟灵出自名族佐我巨公兼惠内外并媿德容公三男子如凤河东仲氏秘书自夫人躬鸣鸪之爱弗间于衷公之家政威于素封夫人承之不言乃雍多避少进撙节静恭公之云徂如岳摧峰鍾禡未已伯季下从夫人母仲无成代终畝既南辟室亦栋隆为门

户计乃割慈衷仲以艺选橐笔从容鸾冠翟裼匪日而月露薤忽晞秋護易茁千里扶服
茹块饮血公之门人贞少且劣甲子亦周微霜被髮我女公子前已偕穴百感攢心一衰
切骨是以生刍不获躬擷械辞寓觞为我一醕呜呼哀哉尚飨

祭兵部顾侍郎文

呜呼公何为而遽至是耶公之名德如岳方崇公之福泽如川方至公之位遇台鼎
步武公之子姓兰玉森继忽天期之不待偕百庆而靡碎夫忌盈者固造物之恒事然以
公之雅量宏津方优乎其有余彼胡然而见忌当公之在野也士林固延颈而望出其在
朝也则莫不加额而相慰至于没则始而疑中而悸既乃羣咨而陨涕里不春巷不市以
为失一长者而旃席之上又若失一典刑之前辈吾闻夫人情者即天意也岂天高而听
不卑将所谓意者不可测而所谓情者不足恃耶虽然公弃官而奉太夫人子道精矣先
后所居官以节惠称臣道成矣出以无心处必有名施不伤惠谦不匿情盖不尽之福授
之于三子而未竟之志太史君为之敬承生既无作没岂不寧呜呼余少于公三岁而公
以姻娅之故丈人行我而不难屈余既前公而歌鹿前公而释褐公两后余以处复两后
余以出京尹之篆余授公而若脱卿亚之组公继我而森发公卦数仅周遽乘大期我纵
未死能复几时頽照倾波逝者如斯我不暇为我忧而暇为公悲耶夫哭死而哀非为生
者以公悲公初不關我荐以三鬻酌以三雅公知不知无所不可尚飨

祭李伯承尚寶文

呜呼齐鲁文学蓋出天性公登上第肄棘寺政其于歌诗业已彪炳余齿最劣托载
末乘公不余少有倡必应余朴汝削汝装余镜睥睨一世扬挖千春天寔妬之公出邑臣
余既失公而得于鳞谢生厠焉皆公邑人吴骈宗徐楚仪国伦表东海风袂京洛尘下犹
大厯上则先秦公稍晚收为司农属与四五子杯酒征逐调不必谐当心则伏栢梁征和
平津馆穀遂叅法从尚帝玺穀余与于鳞或使或牧岱宗一角太湖一曲公倦长沙霜风
凄其归歌濮上春雪霏微曼玉敲金少女色丝于鳞不吊谁当鸡尸大国之赋公其任之
亦有句践倔强江淮川途阻修鳞羽沈飞三十余载旷然音徽间有酒客过履道里谓公
俨如香山居士其貌逾壮而辞甚绮四部之傍治圃称此木药绯桃文瓜缥李蛮肢素口
珠绿绡紫令色璀璨目韶音媚耳名位小逊齿则与埽遗编百帙等脰羣舌造物所靳佛界
亦缺伯道之哀今古同辙俯仰尘代渺身转子絮酿臙肉以伸遥诀余衷聊寫敢必公餽
呜呼哀哉

祭行太仆徐公文

呜呼在昔癸卯州试作者九人八登上第公偕小子与名其次公升我沈我起公踴
泊乎晚节并赋归田屈指鸣鹿四十四年公既黄耆余亦华颠伏枥之叹不形酒间九月
几望风雨剥啄为嫂庀墓不朽见属掖扶强拜薨语艰续曾未二月公亦就木呜呼哀哉
公于绩文不必先秦风驰电烁惟意是臻公于谈理不必程朱川盈卉敷惟心是模筮理
长沙其政岳岳人端西台其言谔谔维扬之鹺千商口碑所蠲省者州万有奇三辅西楚
械朴多士凡百萌蘖今皆桃李桃李既阴萋菲间之拂衣归来直水之湄老氏三宝公所
崇推公曰不敢先曰俭与慈三宝之崇俭乃独冠食毋再簋衣必三瀚居取容膝门絕改
观累織积微未可訾算公有三子长游太学仲季差少嶄然头角尼父齐龄柱下同着与
化俱尽云胡弗乐余少于公十载而羸后死斯文敢忘夙诚荷筮肉芬瓠壶酒清为我鉴
歆小缓骑鲸尚繪

祭李进士元泾文

呜呼先生宗伯犹子光禄素封策名公交车游艺国雍三十余年而弗竟庸出入靡
时惟意是从举体无凡有好必工姑布子平方药射覆尤喜堪輿如亥如璞筮布帆穷
水走陆见为任侠中实长者敦睦宗姻愍惻鰥寡间发气谊多所施舍有田百顷依稀郑
公与客共之食恒不充是以中挫裁足自供探竒志怪抵掌捧腹謔浪风流惟日不足七
情所鲜哀惧恶欲余壻庆门齿偶相若余弟辱交深肺腑托晚合太原过我尤数忽不见
者垂三月余乃闻善病与食饮踈蝉蜕一榻翛然太虚治命洒洒不三言足归骨龙山为
期必速蔬食玄酒毋烦牢肉呜呼不修净土而中无秽不希长生而達生趣有丈夫子双
壁并峙蕙肴兰蒸玄酒一卮前死后死能复几时灵胡不乐我亦奚悲

祭从孙比部仲孝文

呜呼惟我琅琊遥遥华胄既显江左州世而复伯王父公鹄起高第爰笃文孙曰学
宪氏衿裾岭表模楷昭代歿而可社典刑犹在岂惟燕翼亦乃貽厥是用笃尔光此闕闕
积学需次诸生有声射策金马褭然羣英两佐秋官于南于北皋陶洲问苏公敬式出叅
州郡惟勤（阙）私书不发以律提身天衢甫亨中道而积彼其萋菲还我桑梓寓公于
吴栖迟衡门彭泽巾车于陵灌园伏腊过我谈笑相属貌虽清羸炯然眉■〈日录〉曾
未几时讣音忽传人理未竟天期曷延呜呼哀哉祿不千石寿未六旬仕仅通籍产止中
人子生视贞五载之后子生五载而始有懋尘世瞬息先后奚论惟是存者黯黯消魂呜
呼哀哉尚繪

祭故教谕朱师八十三翁文

呜呼元真未漓乃笃我公至文无章大美弗庸释褐水衡仍司泮宫三咏菁莪衿裾
黼黼资籍渐深旌书娄下未晚除目将寄民社而公翛然巾车返驾徜徉清泌婆娑桑拓
五畝之宅邑田中半土毋改辟室必仍贯肉辞羸簋衣取掩骭恭不敢先人以为悞贞年
十八从公受经半岁而必贞忝先登春风蕩然绛帐余馨公逊不居以我为朋始贞倦游
公尚家食朱绂青衫先后解职公眸炯然发宣齿白自怅蒲柳仰羨松柏偶语二客我有
骆师九十四年视履不衰公少十龄行将及之二客哑然俱已骑箕余痛失声仰天而諄
骆犹异方公实乡闾含敛弗视余乃非夫秘不发丧抑谁之辜扁舟载浮哭公殡所屈瓠
为壶折荷充俎醪青糒崇神其茹吐倘逢骆师方驾天府呜呼哀哉

祭故广州司理骆师九十四翁文

呜呼南极敛精东越泪和稽山黯其夺色镜水涵而无波里杵悲以罢春缶声歇而
畴歌惟大老之不愆遗使我中侘傺而泣滂沱昔先公之听鸣鹿实从公而夸附骥谓至
德之可师非服膺乎末艺贞年十五以易从事鉴汗血之一斑谓千里其可致称我寶刀
之咏若新刃之发硎以元公而见拟托虔赠之可凭师困公交车司理百城吏若严霜之
被体民播青天之颂声偶用酒德中讥领郡十部扬而未足单辞抑而不振贞心大度了
无所恨犍留步返舟轻石镇二麦芄芄其被垄五柳依依以当门或垂钓清溪或行药中
园笑贺监之滞淫陋潘令之陵援乡饮见推为祭酒齿德殊当乎达尊惟余小子叅藩于
浙师来自东醴酒时设颜犹渥丹鬓未全雪虽居间而匪私终啾缓以难别循是以还岁
修问遗当伏生授书之岁致封人三祝之辞惭糠秕之为导实缀璧而聯玃贾鹰扬之壮
气寫蝇头于素丝师为介弟择婿而得大司马用是优游晚节徜徉里社惟中丞之揽辔
表通德之精舍回夕照于维桑噉春雨之甘蔗小尔从容狎隍百年而乃帝予九龄仅益
四焉忽莞尔而观化奉入机以周旋岂直同辈之渐尽即子孙其溘先絮酒炙鸡遥荐灵
几既已哭吾师复潜然而念我先君子蓋尝后师十五年以生而前师二十五年以死慨
修短之殊絕泪浪浪而不能已

祭太常卿国子祭酒座主王稚川先生文

呜呼我公姑山锤粹入叅史局兼司内制三领成均陶冶多士天下歎焉未筦枢寄
叔孙太常荀卿祭酒雍雍九列若若两绶天下歎焉未位朝右西曦饷晷南山假田踰七
望八颜童发宣天下歎焉未登百年思覃著述学黜训诂车洛舟闽以追邹鲁天下歎焉
未祀两庑凡世所歎非公所悲公有喆嗣晚而夺之遗经曷授与影互依虽公所悲非公

所恨危躬秉谊世不我信事与心暌名随位尽昔在世皇轻用三尺捍相乘之甘心遗直
公言不可义形于色其事垂解儉壬为间粥其筴曰养虎遗患公时扼腕为我长叹惟余
小子首发其端意公门人必得彼欢公諫弗讎公志已殫贝锦滔天簧鼓反复谓公貌言
中实酖毒彼其之子有耳无目筮孤竹贪鲁男子淫火不辨玉毁求砾金彼其之子有胸
无心呜呼我公雄骨山峙辨屈千人气蓋一世以此居显能无见忌烟霞五湖松菊三径
古称丈夫蓋棺事定天不可论人则已胜侯生守玄非謏劣宜登徒九辨庶以明师絮酒
兰蒸迹系神驰

祭刘大司空文

呜呼我公天骨挺秀碧梧并长玄鹤等瘦百能尽敛一虚为受温其良玉微则醇酎
妙年公交车躬策见奇巨源雅量叔则令姿冰鉴玉衡舍公其谁既长考功竟谢铨司两
政留京九列婆娑人以为少公以为多其茹蔬糗其室薜萝所以省寺不异岩阿棘卿再
除司寇旋贰他为相戚且摄行事公之割荣逡巡如垓拜命邦土遂改归计公之提身莹
若处子公之居乡靖若畏垒胡不百年甫半而止硖江涸流黄牛陨址余弱弟懋偕公同
荐与余神交岂必多面飞书累讯頽鲤瘳鴈得公讎音乃自朝彦帝铉黄腸已复而土匏
余此身一室夏甫何以将遥絮酒藿脯所怜各天詎意千古呜呼哀哉

祭唐宪副文

呜呼在嘉靖中公成进士而我先公寔附驥尾南安之政为循吏轨入叅兵谟时惟
多垒扼腕言计气摄诸郎西川险遥贤喆回翔一赞旬宣三提台纲惠则春风威乃秋霜
天衢甫畅衡飏斯妬铄羽清时踈迹中路里社浮沈枋榆早暮或鼓或罢孰知其故阮籍
长醉屈平独醒醒醉之间于斯取赢时过博徒间狎樵青衣冠敦贤何必畦町清质浊文
与义为偶往贞登朝辱收小友贞时少年寔勇于酒如衡邁融尔汝公受晚师竺干而迹
杨朱是以邻壤音尘渐踈两世之交能怱然乎蕙馥椒浆饗公冥途

祭邵元化文

惟子素儒温恭朴茂学足润身材亦肯构余少不敏辱从子后子游頽宫屡膺都肄
见赏通神谓为国器蹉跎不偶遂谢学事归守世业以医自名家有神膏立令死生治无
择富讎不取赢有嗣颖发遗经是笃文禽五彩见者属目揽辉未试扶摇可卜课耕之余
佐以俭勤年踰下寿产过中人胡不鼓缶拮据累身笔砚之交瞬息四纪洛洛晨星独余
在耳浆酒虽薄有泪荐子呜呼哀哉

祭从弟瞻美文

万历十五年丁亥夏四月而吾从弟瞻美病噎不能食时犹未甚也世贞每从乡中视之輒有加至重九之次日骨立矣因属余以后事其谈说慷慨无儿女子态擘画皆有绪神气不衰尚能引酒一白人乳一瓯薄糜一椀十九日上有事先君子之塋犹能先期策杖入叩首口诵祝辞琅琅也余以故得自宽报谢练川诸君子还至中道而得讣矣仓皇驰归视汝汝已就木矣环汝而哭者男女十余曹累累然经矣三岁之孤抱而觅爷爷无处矣嗟乎安能使余肠一寸折也记吾使维扬归汝已逾冠为诸生其时汝方趺弛食酒渔色陆博纵遊畏见长者然独知亲向余不余避也余酌汝则醕食汝则饱规汝则受余亦不汝弃也迨余用家难与少弟敬美归汝介于其间顷刻不相离也自是汝行日益修志日益立般乐怠敖日以削减虽汝自谓麻中之蓬而吾亦窃信他山之石矣世父有丈夫子四汝最少汝以极意侍奉最能得其心然其歿也虽尺地片瓦不以厚汝而使伯仲专之知汝能让也汝共养生母踰八袞矣轻暖甘毳之必致然寸丝尺缕不以厚汝而使女弟私之知汝能友也伯氏众蓄汝汝拯其嫠子妇而恤焉俾忘嫠也叔氏时简汝汝收其二孤孙而诲育焉俾忘孤也是汝不以藐废厚也邯鄲姬有蛊汝而欲嫁者几成聘矣余一厉色而即止是汝不以昵废正也百里之内称汝友者解衣推食之不遑死必祭丧必赙然而视其橐则空空矣是汝不以贫废谊也汝年过五十而未有子人谓汝为德若此当不使斩焉汝后已而果有子矣今岁汝子当■〈疒尔〉势颇危人复谓汝为德若此■〈疒尔〉者当不死俄而■〈疒尔〉良已矣此二者汝之所不能必之于天而天卒予之汝以未衰之年保汝所固有之身而天忽夺之何也且夫噎者起于鬱塞而弗舒恚怒而不获解今汝之所少者独子而其所虑者子之■〈疒尔〉皆遂矣何所弗舒也闾左以吾兄弟故推汝祭酒出乘车宴专席侧耳而听颦笑而又何所弗解也然则汝之所可必者天而所不可必者亦天耶其卒予者天之定其忽夺者天之弗定耶汝于生死之际似已了然其恋恋不忍释者八十之衰慈三岁之弱稚耳汝母已斥聪明忘志虑而日进匕箸当不有他即不讳而身后之具已周任之易也汝子已■〈疒尔〉吾当鞠而抚之以俟成长虽然聊以尽吾心而已吾长汝五岁其身之不保而能保汝子耶庶几吾弟壮异日当代吾吾子与诸从又壮异日当复代吾弟亦无过忧而子也呜呼瓠壶之酒蕉盘之肉居与汝共之吾今者荐汝汝能餒否汝餒而予莫知也予有餒而汝莫劝也余竟安能以毋悲耶虽然余去汝无几时矣余不悲矣

祭大司空徐公文

呜呼岁昔龙蛇天不愍遗以我公往士类缠悲惟余小子邁轴之是泥不腆■〈此

上夕下）言托之家中以荐公之几距于今忽六载矣题湊黄腸像塚祁连马鬣之封爵
鬱芊芊天子之所以终惠劳臣者既渥且专胡遭回之既久而魄始宁归其千百年永宫
于斯若乃公神无所不之盖虞山之足滕公之佳藏也宜春之社则朱邑之桐乡也大桁
之里则张纲之洛阳也南昌之四履则陈蕃之豫章也三楚之墟则木铎之所耳提也滇
海之邦则惠文之所弹治也即不嵬峩其庙貌亦家祝而人尸公何憾于一没独典刑之
不可追呜呼不泯者心未尽者用难必者年有限者梦后死斯文其责在予聊缀一传志
公大都魂而有知鉴此生刍

祭汝康宗老文

呜呼子我宗老既贵且贤为乡祭酒八十二年择履而行揆雍乃言薄取慎予以全
其天始用经术斐然名士廉不近名和不失己出入中外数蹶数起虽则数蹶竟被金紫
畴谓造物妬之使归上有亲侍下有兄依二簋萧然战胜而肥蔗境逾甘梓里晚晖余行
虽前敢慢其二张拱以趋实尔殆背昔者称筹期之百歲曾未何时展转床第月朔之前
黯淡数语若所深忧匪以外侮爱子稚孙责在存者肤肉垂尽所寄肝腑迫欲走诀讣音
随来歿纵子宁余能不哀薄俗阅墙亦曰殆哉王诛鬼责子无轸懷尚向

祭韩封公侍讲文

呜呼鍾扶輿之盘礴袭东吳之英异既媵修乎儒术复躬勤乎穡事口无诌辞行不
诡类及豚鱼者中孚之感通神明者孝悌之至然而名不登于有司誉不出乎闾閻田彼
南山乐此清泌是用天锡之报报以喆嗣伯子树惇而工良技抉岐黄之特传将仁寿乎
一世遂篋农书列籍下士次笃仲君蔚为国珍射金马之清问窥青藜之秘坟进讲东观
教胄成均三衡多士伟哉以人赞陪京之礼乐佐常伯而擎星辰公起衡门遂阶近臣亟
赐黼裳娄拜王纶惟鸿渐之饮食衍衍覩燕居之德容申申割尚方之腴供沃大官之上
尊而公若固有之黜盈削忻羨荣者以为布衣之极而杜机者犹谓畏垒之民八十三龄
泊焉一梦等彼吹光中无摇动祝史告公以大归素旒飘飘于雾霏合九郡之素车填雍
门而驰送薤露之章转唁为颂惟门生与谊故流西州之长恸贞私寔深其敢忘痛絮酒
藿炙以为公供且祝之曰公其缓鞅行将有宗伯致奠司空致贖以大賁公之塋公能无
陟降哉尚飨

祭陈司寇文

呜呼公起诸生而宰剧邑其俗狷狷蓋天下之所不易称循者而遗思之在人去三

十载而犹若新铨司之干没与悍相之衡睢盖天下之所摄而辟易者而白简之弹射凡
娄上而不遗力其宦之穷至一拜杖一编氓一逯窜皆天下之所不堪而享之则甚甘其
后之达若佐纳言长容台中执法少司马席未暖而輒移皆天下之所艳以为骤者而居
之若固有盖可生可死百挫而不可夺者公之操或出或处无入而不自得者公之道光
霁萧洒蔼然而春融者公之襟风棱戍削凝然而壁立者公之貌呜呼寿隃七袞古亦稀
矣秩至三品今不卑矣然则士论之所鬱而未满者将无谓其豹变之文与鹰扬之武犹
有待而不尽施夫固以公为天下惜而不以位寿为公私余生后于公八载而仕先于公
九年时踈时起迹若比肩然公竟以璧完而余尚未能瓦全同处也公愉畅余曲局同出
也公行遂余行恧同学道也公得骨余得肉然则后而生者奚长前而死者奚促耶奠公
一觴公其歆否余固不能信公之必歆而能信公之不朽也呜呼哀哉

祭王少荆光禄文

呜呼公少而为赠太保公之爱子佚而食其封既而为封宫詹公之令弟佚而受其
衷晚而为武英相公之季父佚而享其崇所遇可谓丰矣公不以赠公之封而轻为浇不
以封公之规而阴为娆不以武英公之崇而遽为骄所以自处者超矣与公游者以公为
处子与公邻者以公为畏垒知公者以为璞含而不知者以为茅靡公于德庶几能止矣
天之所以厚公者固无所不备而公之所以凝承于天者亦无所不至譬之泛海而得千
斛之舟盛醪而得十石之器宜自今以往公之辰皆花月泉石之辰而公之身长为花月
泉石之身柰之何一病而遽艰于饭再病而遂返其真嗟末俗之渐下思挽漓以归醇惟
我公之是藉胡为乎溘然而就沦以封公七十而杀其二武英公尚痛其眉寿之无几而
公今又杀其一纪则武英公当亦不能已于懷而为公之子者又何如其毁耶去吾之居
而东不能数百武而公死吾弟太常死江侍御死旒相望于目而哭相警于耳盖半岁之
间而悉收其贤士大夫而付之蒿里彼洋洋而过者以为造物之无章若此我何惮而不
为长蛇封豕也呜呼余且归矣归而畴与依畴与吾呼卢而白飞且逝者俱不作又何以
识余归之是而不归之为非寓絮酒于白门望东沧而泪滋岂灵旗之必假聊以寫乎余
思

祭江侍御文

呜呼震泽趋海中汇为江诞毓文武以饒我邦带砺君家世有麾幢君之先子始业
章缝谁承家学君独颖出敛其铍锋以俟一发麟经灿然并驾乡達当阳癖左奚必穿札
箠令巴西譙周之乡厉憑其骨以为灾祥君如弗闻正直平康麦秀两岐雉驯于堂誉命
上逮尚书尺一畀尔豸冠以肃南术乌府清霜白门皎日济以恬和共頼寧謐寻陟北台

令闻益孚一疏治水再疏蠲租起骨加肉吹律嘘枯解自倒悬聚而欢呼愿君朱绶愿君黄耆大德得位仁者必寿胡讵之传疾于转首丹旆驱前素輶在后乡失贤者国沦蓁臣嗟嗟昊天胡乃不仁溺人于渊并讎拯人如可赎兮人百其身厄闰之月余仲并逝与君同里又复同岁岂其修文而同厥事逝者已矣存者何冀玄武之堤时蹋骢蹄每一戾止黯然而兴思所惜者大讵止襟期絮酒鸡炙君其吐之

祭张肖甫太保文

呜呼余郎比部而兄令滑滑固岩邑锐若砺发三辅腾最其声跂躄于鳞比壤为二千石兄贄所业与相难质彼时寓书循吏非一而此少年必不可失谁狎齐盟宗吴楚楚兄时晚入不分邾莒■〈足必〉跋词酒纵横笑语其器温如不茹不吐戏谓五君彼巨源者非佩两绶则登三府兄寻奉使五岭之东余忝持节遂歌齐风参差各天寥廓双鸿所不直者余十五冬壬寅之秋开府吾吴执手契阔悲喜游俱授余草土登之荐书余起兄蹶兄还我逋飞潜异踪复垂十年兄肃皇威以殲浙奸长鲸遁逃海波晏然入长西台遂领中权北门之钥畴能舍旃过我弇中剧饮三宿畴其相者司马伯玉三星在天列宿羣属贯石撻金调丝谐肉自兄登坛劲敌束手再飞辽捷建威细柳虹玉围腰鹊金悬肘谁其衣锦鲁公拜后蓊人憺志兄曰无狃残民以逞黩武非经黄屋长尊黔首救宁古有南仲亦曰营平城我朔方抚彼先零元功告成乃典邦政一意明节齟齬权幸幸门既窒羣鼠趣迸兄拜稽首臣责不称天子曰俞给驿以归俾尔昼绣桑梓其辉牛酒上冢躡弩先驰陋彼临邛小臣奚为定军之西忽陨巨星涪巴涸流岷峨权倾庙隳伟栋国隳长城沈慈海航拔词林旌胡遽溘然上应祲氛天汉骑箕祝融化云太常易名熟釜勒勋毕万牖下夫复何云所不释然厄闰之月余弟既陨兄复同蹙漏尽星踈天残地缺朝讞骤闻神魂陨越兄有心事皎日长空兄有襟宇霁月光风藩篱不隔蹊径莫踪间一秋杀无妨春融大事顷刻断在不疑筹边决策动合机宜为唐汾阳为宋稚圭年位差亚文采过之呜呼经世大畧束之一棺其史甫青其骨已寒虽则有寒其心尚丹痛惟仲秋有西飞翰上言强饭下言相思悉梓厥文俾余序之余偶后死敢以拙辞兄所不朽岂其见资吴蜀万里踰越险路云栈莫驱峡江难泝蕙草三枯椒浆空絮唯此一心兄其或茹呜呼哀哉

祭魏国公少轩文

呜呼天眷有德笃我高皇扫除羣凶统一万方谁其元勳惟中山王宇宙再辟日月重光爰启两国殉节沈几扈圣燕京奠址留畿惟太保公树德务滋享国久长余五十朞公为世子维家之庆敛其文武以事温靖岂必当官是亦为政太保之薨始拜功令悦乐敦诗以将中军虎旅十万罔敢獬奔得公一言煦如阳春紫气不漓黄屋长尊汗马之勳

孰贤平阳椒房之戚孰贵窦梁甲第连云膏畛相望僮奴亿指粉黛成行将之以谦御之以礼接公之颜柔若处子叩公之里泊若畏垒公族虽繁靡不敬只戊子之春辱公周旋既简揖让仅余寒暄久而益真厥意藹然曾未几时讣音忽传乃闻治命不朽是寄三孤茕茕砉石待志庶几异日上太史氏载酒崇肴以为公慰呜呼尚飨

弇州续稿卷一百五十五

●钦定四库全书

弇州续稿卷一百五十六

（明）王世贞 撰

○文部

△佛经书后

书破邪论序

虞永兴世南书迹本自希而楷法尤不易得小者惟破邪论序稍大者孔子庙堂碑而已破邪精能之极几夺天巧所以不入二王室犹似不能忘情于蹊径耳当时永兴与傅公同朝自当以博雅亮直相契许而此序诋亢不假借岂非二义互雠各精护法故耶考之唐史止言奕邺人为太史令以武德七年上书诋浮屠法又上十二论言益痛切帝善之未及行贞观十三年卒年八十五而宣律师记传则云奕范阳人少入周通道观隋开皇十二年事中山李播为道士武德初入京谒道王岵为上宾遂通其女妇寻拜太史令武德四年上减省寺塔僧尼十二事高祖览之废诸州寺塔贞观十四年暴卒又引唐临冥报记及冯长命绝梦俱谓以谤佛作泥人泥人者泥犁狱也余尝载之宛委余编第十八卷谓傅公在武德初年已望七何得有奸私事临终书青山白云语必不堕泥犁毋乃宣卫道雠异之恒及考傅公十二论引据治体正学必以李老孔子并称然则公果少入通道观事李播为道士耶将无武德之际天子崇老氏为鼻祖不免借重求胜耶考傅公论虽极排诋未尽输攻宣间流遁穷亦愧墨守特以大道无诤止谤不辨鲁卫竞兵忘我文祖秦赵吞社不知非子则此纷纭之论俱未为得也三代之际未有佛法而治安且长东京以还既有佛法而乱亡且天此言却不足辨榆罔太康夏桀商纣幽厉三世胡尝不暴外丙仲壬二世哀平胡尝不促七雄刘项胡尝不杀羿浞新莽胡尝不篡若以无佛

为绩彼当谁执其咎然而此桑门者被坚固铠操却敌戈而曰拓拔太武宇文武李武与柴世宗皆英辟也三武以废佛教故不踰年晏驾拓拔感厉被弑宇文李柴皆仅三十六而夭且无后赵徽以废佛教身幽死王庭绝漠为法门之快然姚兴最奉佛尸未冷而举宗殲夷秦社屋梁武最奉佛陷侯景诸子鱼肉死而梁鼎夷且以石勒石虎之暴戾焉而事佛以阿育王齐文宣之酗杀焉而事佛阿闍世王之弑父隋文之攘君焉而事佛以胡灵武墨之淫武加杀焉而事佛其稍能终善焉者差阿育隋文而已若以有佛为功此当谁执其咎要之佛用方便为德然不能度无缘人因懺除为功然不能脱定业去慝就福则刹那净邦假福掩慝则步武阿鼻虽云不可思议常理昭昭固非爽也若使归驩虞于大雄责纆连于竺干岂惟帝释掩耳即阿修罗亦将抵掌而笑我竟矣

僧侏禅师传后（一曰僧稠）

览侏禅师传密行妙解化匝元魏高齐之际一时龙象盖南岳让天台顛所不及也第考朝野纪闻全载二书则谓侏少作沙弥往往同辈犷酗角力輒以劣弱见侮祈于金刚神求庇一夕梦神现大身执杵通令食筋尽一钵觉而力骤发同列犹侮之因横蹋殿壁行数百步跃首至于梁者数四乃引重千钧拳捷骁武动骇观听遂证果入林虑山构寺宇穷极壮丽齐文宣闻而怒欲僇之躬率数万骑往讨侏领僧徒候于谷口帝怪问侏曰陛下欲加法贫道恐血污伽蓝故尔受僇帝大惊礼懺既设馔毕谓侏曰闻师得力于金刚神欲一见可乎侏曰此人力耳当为陛下见少神力因勅诸梁木起相搏声若霆震摧迸纷坠帝惧而止之遂听侏度人造寺无得禁止今传不载其食筋呪木事第云出家落发识神厉勇及受十六持胜法节食鞭心九旬食米量至四斗又遇懷王西王屋山两虎交斗咆哮震岩乃以锡杖中解各散而去齐文宣加害领徒预逆因而感悔此却符合又传谓齐干明元年四月十三日辰时絶无患恼端坐而终异香满寺茶毘之际白鸟数百徘徊烟上悲鸣移晷二书所载则又云于并州营幡子未成遘病临命愿为大力长者既成此功后三十年隋文帝过并州见此寺而涣然若记处分营造其寺遂成当时故谓文帝大力长者也寻传所以不载者得非谓侏师业证四果位居五地岂得乞灵乌刍现身国主习小乘业作有漏因耶然考之文帝以魏大统七年生生二十年而始为干明元年今乃称侏师后身则尤可笑因附记于后以补传之阙且证别记之谬

题南阳国师传后

司空于顛问紫玉大通禅师曰如何是黑风吹入罗刹鬼国师曰于顛客作汉问此事作么生顛失色师曰者便是黑风吹入罗刹鬼国代宗在便殿指观军容使鱼朝恩谓南阳国师曰朝恩亦解佛法朝恩进问曰何谓无明从何而起师曰衰相现前奴也解问

佛法朝恩大怒师曰即此是无明无明从此起二段极相类亦大俊快然禅和子徃徃用此伎俩久之不直钱矣于司空原籍是罗刹鬼国人鱼军容落地便结无明种子一生于其间作活何烦问对也

知玄法师传后

佛祖统纪谓知玄法师自成都谒僖宗优礼之赐号悟達寻归九陇定中见菩萨摩顶说法言讫即隱俄见一珠入玄左股隆起痛甚上有晁错二字玄知夙业即右膝安卧而逝世言玄之前身汉州三学山知铉法师临终感病与玄正类及考神僧传知玄邂逅一僧患迦摩罗疾候视无倦至别僧曰子后有难可徃西蜀彭州茶陇山相寻二松为志后玄居安国寺僖宗礼之赐沈香座忽膝生人面疮眉目口齿俱备以饮食喂之则开口吞啖因忆僧言入山寻访二松之间佛寺俨然故僧出迓甚欢遂留止宿告以所苦曰无伤也山有泉旦灌之即愈及明至泉所方掬水际疮忽人语曰未可也公不读西汉书乎曰读曰既读之宁不知袁盎杀晁错乎公即盎后身吾乃错也累世求报于公而公十世为僧戒律精严不得其便今公受赐过奢名利心起故能害之而迦诺迦尊者以三昧法水洗我我去汝不为怨矣玄乃掬水洗之痛彻髓绝而复苏遂愈回顾寺无覩矣玄因卓锡其地述水讖三卷寻二本所传虽一知玄前身袁盎而其事无一同者第其为冤报则一耳岂盎陷错虽深而它行尚可错被冤虽惨而余因为劣耶因识于后

书佛祖统纪后

自景德传灯録出而续之者至合为五灯其统则释迦世尊而下为迦叶阿难陀中有马鸣龙树以至菩提達磨为西天二十八祖達磨来本土为初祖以至慧能为六祖而衣钵絶矣六祖之后最显者二宗曰南岳让青原思让之下为马祖道一而道一之后其着复五宗而此统纪则宋僧法盘别立教宗以法华为经天台为统止观为门曰三谛所谓中谛者统一切法真谛者泯一切法俗谛者立一切法为此一秘之藏不显蓋三惑覆之于是立三观以破三惑曰空观者破见思惑证一切智成般若德假观者破尘沙惑证道种智成解脱德中观者破无明惑证一切种智或法身德大抵其义竖于龙树演于南岳让而备于天台智者自達磨西来之后一洗而空之直截简易最为高明之士所倾信而此说渐屈法盘乃推南岳让以继龙树推天台智者以继南岳而自提婆達多以至般若多罗西天之所奕叶而径畧之乃至斥禅那于别传引辽人焚坛经寶林传以为快谓虽异途而不敢不赞者贤首藏师叛去而窃用其义者清凉观师公为异同而自立己意者慈恩基师又谓圭峯密私用其言而专以四禅八定次第之学何用儿戏以侮耆德呜呼天台非非统也止观非非门也醍醐酥酪皆乳也钗钏杯盂皆金也物尚无净而我何

诤为且夫之燕者惧南其首耳吾北首而或水或陆陆而或骑或步即岁月之小异何患其不至哉近有一妄庸僧口尚乳臭目不识三昧而辄作披荆钺以攻贤首皆法盘辈为之俑也故虽精博如李长者超绝如大慧杲而不敢以为我师以其有诤心也何况法盘又何况此妄庸僧一么么也

书佛祖统载后

元僧华亭智常作佛祖统载其名与统纪同而立例却异自七佛以至二十七祖中国六祖一花五叶为主而教典正传净行神足亡所不该又效涑水通鉴编年之法为之其用心亦勤矣第有不满人意者释迦既为始祖且系教主即当详其罔明兜率之缘与生时化导之迹不宜大畧一误也末世如观音化身为宝志僧伽弥勒为传士契此文殊普贤为寒山拾得尚犹记之而此四大士亲助世尊行化瑰伟奇绝舍利弗须菩提皆佛大弟子而曾不得与诸高僧并记二误也我佛未生之前编年何用至于三皇诸纪皆路史稗官之谈怪诞不经又与佛典非合而备载之三误也佛生之后震旦世次沿革志其一二以为年纲足矣而备载不切之政滥纪无涉之人四误也志存伐异即猖狂甚口之辞必收事取党同则鄙俚不经之语亦录一语有助则小人尽为君子一事相睽则贤者遽成不肖五误也大槩所熟五灯会元而已而于全藏未为淹通挂漏不少六误也僧维际会恩礼贵富取眩俗目书之有味七误也须大出子墨一番作用去十之八益十之三然后可称释史不愧法门聊志于后以俟异时

第二卷载太古诸君盘古天皇地皇人皇氏五纪太昊炎帝少昊颛顼帝啻帝尧帝舜夏商诸代既在七佛之后又非释迦同时至于三皇以前语出稗官事多荒诞畧之可也即如太昊在位仅一百十年女娲在位一百四十年而共工大庭以下凡十五代而通一万七千七百八十七年则人各得千余年天子矣岂理哉少昊既云黄帝子而系黄帝复云十八代一千五百年颛顼既云黄帝孙少昊之从子而系少昊复云十代四百九十年帝啻既云黄帝曾颛顼从子而系颛顼后云八代五百二十年帝尧既云黄帝玄孙帝啻次子而系帝啻复云九代二百五十八年何自相矛盾至此也

第三卷世尊降生成佛事当详而反畧其生也曰二月八日其出家也亦曰二月八日又曰十二月八日今天下俱以四月八日浴佛而以腊月八日治粥供佛及施僧则两二月八日恐未确

穆王乘八骏游西极孝王时外国进二尺虎四角犀宣王时史籀改大篆平王政出方伯秦始逐诸侯客东巡琅琊刻石何预佛门事后放此

老聃身长四尺六寸额凸眉龕反唇蹇鼻髑尖胯聃耳鬣头诸丑状谁见之复谁纪之盖道家者流妄称其有八十二种好相似于世尊故释氏之徒从而加毁也史记云老子入河沙不知所终而于纪己卯年着其薨亦无证夫子独详而不敢有所警者以夫子之徒方馭世故也

始皇癸未沙门室利防十八人来自西域帝恶其异俗以付狱俄有金刚神碎狱门而出之此事殊诞妄不足信

第四卷中郎将蔡愔博士王遵等西访佛道至大月氏国遇迦叶摩腾竺法兰二师而迎之归恐非实录当是摩腾法兰自来也

释道比较焚经事妄是时无道经且所称大臣皆不合吾前已辨之

第六卷支公养鹰复养马大违佛戒且晋世高僧皆以老莊得儒声于本教故自浅

孙兴公许玄度于佛有何關而传之郗嘉宾为桓氏弱晋者也尔时诸僧唯不过得数百缗便相称述耳

第七卷肇公为姚兴所杀不知何故讳之不讳师子慧可无玄高高而讳肇何也第他传所谓将头迎白刃一似斩清风恐亦系傅会是不类肇公语

第八卷谢灵运谋反弃市于佛何關

僧道不拜王者可也若不拜父母则惟世尊始得

第九卷達磨观世音大士化身也而志公亦称大士化身同时显化南北人用为疑是不必疑千百亿身之二人耳

范晔魏收以其能叙述释氏而无贬辞不知晔之逆乱收之淫鄙去崔浩李德裕何霄壤也

第十卷载文中子事甚详以其语有西方之圣故也

第十一卷谓唐高祖受禅百官拜舞僧但山呼拱立鄂国公尉迟敬德金吾卫将军刘文靖奏曰僧未登圣俱是凡夫何乃高揖王侯帝令定优劣编入朝典按此时尉迟公方在宋金刚部下作贼文靖为内史令亦无为金吾卫将军

原州五石青质白文成字秘讖女主武王代有天下于佛何与

英法师之颖朗善记其什公之俦乎而洁烈胜之于道稍不足者绮语耳

第十二卷黄梅弘忍大师夙生事余于本传辨之

吴太后武曌之淫乱而能弘佛法岂真能知佛法者即权教所不弃岂止枉寻直尺得獐失兔而已

阿闍世虽杀父不赦十二时中尚有善念如二雌者善念永绝必堕无间

嵩岳珪与岳神论话信是雄爽然尚非极则语第十三卷法秀施袈娑回向寺领玉箫进玄宗事既诡诞而未复及淫褻语殊乖本色

元鲁山虽不为僧服及作僧语而有僧行附纪之可也安禄山陷长安玄宗入蜀而守臣有与禄山偕反者其人曾为闾守有画像在路次玄宗见之大怒以剑斩像首其人在陝西首无故忽坠正史稗史皆不载最为诞妄可笑大慧杲引之以证禅悟而知常复载之何也

第十四卷观军容使鱼朝恩于帝前谓慧忠曰朝恩亦解些子佛法即问忠何者是无明明从何而起忠曰佛法衰相今现帝曰何也忠曰奴也解问佛法岂非衰相现朝恩失色大怒忠曰即此是无明无明从此起其语与大通答于頔恶风吹入罗刹鬼国一机轴然于能心折而鱼更起忿端干差胜耳鱼与忠复有问对语太峻险且无大意味渠方威振人主恐忠未便作此剧折或其徒有粉饰耳

第十五卷清凉国师澄观代宗大历元年戊申奉诏入内敕译华严德宗贞元十二年丙子命河东节度使李诜迎澄观入京同闕宾三藏般若译乌茶国所进华严盖再译也十五年进号镇国大师加天下大僧录至开成三年戊午始示寂俗腊百有二可谓宿德矣清凉得法于南阳忠一径山鼓为人王所尊礼然不闻忠国师之推毂江西一石头迁而清凉之推毂百丈大珠南泉西堂药山归宗故当别有意也

第十六卷大颠折韩昌黎书系僧雒伪撰吾前已辨之柳子厚少年急功名不自检犹无害晚途逵宦邑鬱侘傺至死而为神以恐喝求祀望阿修罗趣且不可得岂可以其作绮语赞僧媚佛而谆谆录之也

知常有论谓周武废教时沙门犯颜抗争殆数十人及唐高议沙汰而惠乘玄琬知实法林等皇皇论争引义慷慨亦见法门有人大厯而后祖道既兴吾门雄杰尽趣禅林至武宗议废教而稍能持者仅知玄一人而已虽上意不可解大数不可逃而变故之际无一辞可纪亦吾徒失学之故也寻知常此语太■〈公上鹿下〉生然亦未宜尽废宋宣和世亦然

自十七卷以后唐时宗门伎俩几穷赖赵州临济别作提掇警策一番五季而后法席愈盛作者林立第觉诸大德徃徃自学问中融脱得来虽辨才无碍天藻秀发而能踏江西顶透曹溪髓上者吾未之多见也

了元虽诗僧尚有葱岭气息洪觉范则一削发苦吟措大耳

陈隋之际焚身有崖菩萨者其人甚奇事甚伟而此不之载

政和帝既拙释教于宣德门观灯为一龠眉行童指斥殆无可对随而杜口虽炮烙刀礮杂下竟不得其一声铁围山丛谈夷坚志皆详之而此亦不载

张无垢九成居士中龙象也与妙喜若一人而今绝不之齿岂有所不足耶

张无尽求台諫要得呵佛骂祖与司马二吕诸贤放对正是拟作无佛论时识见也后作护法论便与蔡元长别乃知佛力不可思议耳晚岁翛然事外未必无得吾向者疑之过是不见屠儿广额耶

又云朱仲晦少年不乐读时文因忆一尊宿说禅直指本心昭昭灵灵一着十八岁请举时从刘屏山屏山意其必留心举业暨搜其篋只大慧语录一帙则是言也禅者谀大慧而借朱先生为重之言也朱先生生平无书不读所坐正于钻故纸无出头处果尔岂所谓晚来未必了了者耶

宇文虚中为宋使金至翰林承旨久之以忌者构其欲结南客杀金主举族烧死今

云寿百八岁无疾跣趺援笔朗吟而往岂实录也其诗所谓英名留付世人传当是被僂时绝笔语耳于释门何与

所载李屏山鸣道集其掎击闽洛时有得有失而序之者湛然居士移刺楚材也移刺即耶律辽姓之讹音吾向者甚嘉楚材之功而疑其用处有佛图澄僧稠意今果然耶将为释子后身也

刘元城曰孔佛之言相为终始孔言毋意毋必毋固毋我佛言无我无人无众生无寿者其次第若出一人第孔以三纲五常为道故色色空空之说微开其端又云所谓禅一字六经中亦有此理達磨西来禅话大行佛法弊矣若渠不来佛法之灭久矣某之南迁虽平日于吾儒及老先生出处得力然亦不可谓于此事不得力吾常谓元城在元佑党最为杰然投荒万里垂暮年而节不挫肤色不少变怪其定力之所自今了不讳贤于诸贤多矣然坐此不得收理学籍噉孔庙?齋老先生者涑水公也涑水心行几希闵子卜夏然于死生处恐不如元城了了

帝师帕克斯巴史云八思巴又曰巴特玛皆误也其制词称名巴喇密特巴勒丹其文始全而赐号曰皇天之下一人之上阐教宣文辅治大圣至德普觉真智佑国如意大宝法王西天佛子大元帝师盖自有释氏以来其光显尊重未有过焉者也心印不如達磨神足不如图澄开敏不如罗什记臆不如一行不过小持法咒呗而已而猥被世表之宠秉内外释教之权不亦幸哉

色辰帝一蕃裔也虽不通经典而亦有闾合处大约北鄙人性好杀得佛教虽不能止贪而亦少可止杀阿闍不可无世尊阿育不可无瓠多若琉璃若太武则末如之何也矣

题笑道论后

老子化胡诸经既见斥于道藏不复见而乃见之佛藏甄鸾笑道论中盖一亡赖黄冠所作不学寡识之故也惜笑之者尚未尽耳中言周幽王时将尹喜化胡隐首阳山胡王疑焉始镬煮之而不热老君大瞋考杀胡王七子及国人一分并死胡王方伏令国人受化髡头不妻授二百五十戒老子遂变形左目为日右目为月头为昆仑山发为星宿骨为龙肉为虎膈为蛇腹为海指为五岳毛为草木心为华盖乃至两肾合为真要父母又文始传云至罽宾檀特山中彼王以火烧之水沉之老子在莲花中诵经如故王求哀悔罪老子乃推尹喜为师语王曰吾师号佛佛事无上道王从受化尹喜遂为罽宾国佛

号明光儒童又广说品云清和国王与其妻造元始天尊所听说法皆白日升天王为梵天之首号玄中法师其妻为妙梵天王下生鬪宾号愤陀力王杀害无道玄中法师须化度之乃托生李氏女胎八十二年剖左腋生而白首经三月乘白鹿与尹喜西游化愤陀王为沙门成讴譌曰释迦牟尼佛化胡消冰经与文始传畧同而谓尹喜推老子为师玄妙篇又云老子入關至天竺维卫国入于夫人清妙口中至后年四月八日剖左腋生举手曰天上天下唯我为尊三界皆苦何可乐者然则为释迦佛者老子也尹喜也老子之先世妻也又老子序及文始传云道生于东为木阳也佛生于西为金阴也道父佛母道天佛地道生佛死佛会大坐法地方也道会小坐法天圆也僧见天子王侯不拜象女人深宫不干政也道士见天子守令拜者为臣寮干政也道会饮酒者无过也僧会不饮以女人饮酒犯七出也道会不斋以主生生须食也僧会持斋以主死死不食又女人当节食也僧独卧以女人当守一也道士聚宿男故无制也又化胡经云流沙塞有加夷国常为劫盗胡王患之使男子守塞常忧因号男为优婆塞女子男为加夷所掠又忧其夫为夷所困因号女优婆夷又化胡经云下古世薄天生风雨地养百兽人捕食之吾伤此际故尝百穀以食兆民于是三皇各奉粟五斗为信求世世子孙不绝五穀生神州又化胡经云老人化鬪宾却后百年兜率天上更有真佛托生舍卫白净王宫吾于尔时亦遣尹喜下生从佛号曰阿难造十二经更与前相矛盾也化胡经又云喜欲从聘聘曰若至心从我者当斩汝父母妻子七人头者乃可去耳喜乃至心自斩七头将至聘前便成七猪头其父母妻子故在噫其乖舛鄙俚浅陋不经若此不惟不足辨并亦不足笑也

弘明二集后

弘明集者梁释彦惊述广弘明集者唐释道宣述也大要与黄冠争角以掎击拒闭为功姑取其卫教而已而不计其辞之愤与夸也惊公所述多东晋宋齐人语既不能畅其笔札而于所览西竺文言亦浅鲜口若吐而吃指若舒而掣者盖理为辞窒辞为理困攻固非输守亦匪墨如是而已若宣公述则缙衣诸贤承梁武弘法之后其书尽出而修辞亦渐畅第姍詈诞慢不特彼教之所不堪承而我古先生亦为之啜呕矣其佳者不能胜陈琳之檄张汤之案而拙者则一村社鬪汗耳彼黄冠又其下者无一息犹龙公派何足与辨也寻宣此述与续高僧传可谓笃信好学不可谓之知道也其志于释门立功名其事则史其文则藻于吾儒盖郑康成范甯之伦不可与望濂洛關闽也余因妄有所评若達磨而下诸祖其造类孟子智顓类朱子而皆胜之永明寿业可与朱子埒而大胜之大慧杲性质类程叔子学类陆子静而微有低昂此语出两家故当皆不喜然自有识者

虚一书观世音大士行实后

主内道人即虚一子其名为惟愷不知何许人也始王学士元驭得紫姑仙乩法于關西老儒有所叩輒应而中鄙之不复秘惜偶传于吾乡季颖其始至或称铁拐李或称纯阳吕或张果或俗所谓八仙者皆集而持坛之僊则恒曰虚一子亦或称虚一真人云权诡幻变种种种其始布沙而乩运之令人识而转録未久则或真纸于案忽不见已而忽复见焉则满纸矣所谈亦时时有意谊而书法则或类楷又似篆又或似古隶而皆不成字其所称仙名非一然皆一人笔也六月初余偶以高丽茧二小帖乞之即持去已而累从余索昙阳仙师篆笔弗敢与九月廿八日复约于季颖之父观察公所授余其一帖即所自次观音大士述也按大士縁起行愿始于无始劫观音佛而现于见在释迦佛位佐阿弥陀在西方极乐国而慈悯徧于娑婆界考之合藏不闻有所谓妙庄王及王女名妙善者岂千劫中一劫内事耶然妙净三十二应土应以女身得度者即现女身而为说法此事容或有之且使闺■〈巾达〉之内人人能去贪痴持般若亦大士之所不弃也独怪主内翁得道丈夫子不当习委巷俗夫语作笔墨观耳若其文辞之雅致固可诵而篆笔遒劲骏鬣闯李当涂徐骑省藩三月功力■〈出页〉尔得非曾见我师它迹耶神人道殊其不易究测如是因识其事于末

文待诏修竹堂寺募縁疏后

万厯壬申今陆司空与绳为晓上人谋复修竹堂寺而问疏于余余得学人语数十应之今又七年矣而晓公从文司谕休承所见其先待诏征仲修寺疏墨迹蓋前正德壬申岁也晓公异其事以诚请休承亟许之而示余属题其后窃惟瞿昙老师有授记悬讖之说而澄志诸大智承之以显示化迹今待诏非能预识者余非能洞因者其为疏语何以距一甲子不爽也岂所谓释证者故有合耶晓公自安居后能于一切大觉前为吾与司空结龙华异日縁见待诏吾四人当破颜一笑也卷首钱叔宝补画王舜华古隶署题及休承不妨于九品外散花矣

题手録昙鸾法师传后

吾师自今岁元旦神游有所化度而徃徃自题曰昙阳子蓋圣师朱真君所命也金谓昙者世尊双氏之一而师又首见度于观世音大士及覩所注金刚楞严维摩诸经皆超然妙解以为能兼综二氏之精义而一之至临化之顷普谕四众谓即昙鸾菩萨转世度一切有情而众始恍然若啖火枣而悟三生然未有举昙公事者净居多暇偶阅续高僧传至第六卷讲义部遂能悉之因畧删其芜易其讳而书以示同学者按昙公既已纳三藏留支戒焚陶贞白所遗仙方奉十六观经证净土矣歷千余年而复出人间世现女身而为圣师上足岂莲花坐下有所少怠于无量寿佛之旨而小示谪耶不知昙公之复

为昙阳子正所以明大道之不二与去来出入之无碍耳贞白礼鄮县阿育王塔表胜力菩萨称而昙公奉十六观后尚着调气论而传所称有对病识缘语则在当时已显然二教之合而其徒乃相诤讼如宿雠不亦可叹也耶又宋比丘宗晓纂乐邦文为昙公作传而中云师正持诵次忽一梵僧昂然入室曰吾龙树也所居有净土焉以汝有净土心故来见汝师曰何以教我即应声曰已去不可及未来不可追现在今何在白驹难与回言讫而失师以所见胜异知时至矣即集众盛陈教戒因令高声唱阿弥陀佛乃西向瞑目终按续高僧传仅称公示疾不载此事将无宗晓欲侈西方化而傅会之耶抑碑中语耶夫龙树圣者也不应作此肤语而其文亦与六季不类聊志之以示传疑云

百八岁老比丘像赞后

余为秋月师像赞可十月而始以像来因据而书之时庚辰之嘉平腊望日也更半月师寿满诵弥陀珠数矣记佛肋生以至背痛之日为寿仅八十岁或云七十九而嗣称祖者独阿难与达磨最高而自后法门耆宿西竺东旦徃徃有之然自大期而上则仅屈指也今按满百岁者则有惠秀那连提黎耶舍小过是者阿喜那单道开百二岁者澄观百七岁者二祖慧可百八岁者灵坦日照百十岁者帛僧光法藏百十一岁者那烂陀寺戒贤百十七岁者佛图澄百二十岁者道房赵州之从谏百二十八岁者嵩岳之慧安百三十岁者僧械僧羣行遵道仙加一岁者二祖阿难百三十八岁者广州圆明百五十岁者东土祖之达磨百五十五岁者圆寂百五十六岁者菩提流志二百七十岁者三藏钵怛罗三百余岁者僧景法喜六百岁者纯陀三藏七百岁者磔迦国大林菩罗八百岁者中天竺达摩掬多千岁者西竺长耳一千七十二岁者西天宝掌今师腊比于法藏僧光尚逊其二然自兹而徃尚绳绳未艾也佛法不贵长年而贵得悟悟则七岁龙女不为少不悟则亿劫天寿不为多今以世理观师我得如师足矣以出世理望师师詎可胜我而已哉勉旃勉旃

手书真际禅师十二时歌

右真际禅师从谏十二时歌是百十二岁前于赵州观音院作多以其庸陋俚俗非师语余独谓为不然寒山拾得犹不能掩大士面目今掩之尽矣居然一退院头陀耳明潭老师百十一岁吾不知所诣于赵州若何老境仿佛近之因手写一通寄师却下一转语此十二时歌会否会则菩萨于异类中行不会则凡夫实际耳

题赵松雪中峯老人行道歌后

中峯老人行脚歌真得游戏三昧第谓不学赵州上门寻谿似小过也赵州竿木随身要勘破天下禅和子本相出圣入凡不可踪迹老人昂藏九尺躯圆顶嶷嶷踏尺二革履所至人天供奉当输一筹耳松雪居士为老人入室上足每得法语輒不惮传写所谓人间合有数百本此其一也余尝见其大洞玉枢经墨迹于浙东一荐绅家与此结构正同不必置雌黄也

跋四十二章经

右四十二章经摩腾法兰自中天竺携来以梵书纪梵音至吴兴赵承旨孟俯乃以汉语作汉字要之能受如来心印作东震旦功德先后一也承旨精八法咄咄逼晋人而此书尤遒媚萧散有王会稽父子风若能乞精手如章藻柘作石木二本搨之则尤我如来千百亿化身之一证也得之者慎无和为筐笥间物哉

赵吴兴小楷圆觉了义经跋

圆觉了义经是婆伽婆入道三昧赵文敏为中峯和尚书之以资管夫人冥福宜其结法之精圆嫩润如此也书至文敏是如来寿命品不可思议非复圆觉修持时矣吾家弟有文敏法华六卷行笔草草骨似胜而肉小不足此卷旧属于钤山氏今落梁溪吴子可谓得所近于惠山道中匆匆见之今得再展恍忽如苏长公踏五祖道场且熟且疑至跋尾始了然老衰之态可叹也

赵吴兴手书圆觉经后

余于锡山道中华生出此卷见示乃宋纸之绝佳者独讶其结法之圆熟而波发过媚运腕少弱拟于吴兴犹在疑似之际再为华所强漫尔署题别后忽忽记得曾见此跋于吴兴木本盖书于行书圆觉之后为管夫人营福于中峯禅师而中峯为梓之仍手跋法语于后偶遇章仲玉道其事仲玉色沮谓一飞鳧偶得吴兴与中峯一札言送经事盖真迹也因乞仲玉作此小楷贖本而书木本之跋质之吴氏子得五十金而去余因失笑老年鉴赏破败若此而王百穀尤甚然吴兴木本更自廓落无竒真龙似龙何常之有所叹者末俗之狡狡而已

严文靖临赵文敏四十二章经后

少保严文靖公故精八法第于魏国赵文敏公书不甚规规效颦今覩所摹文敏佛

说四十二章经墨妙譬之周昉貌赵即殆得其神彩情性固公临池之力深要于此经有神解冥契者故不觉其转蜚中鹄之妙至此也公虽不名佛其操行制念与此经六卑慈平实鲜不合者眉山氏谓范蜀公为学佛作家而自托临成都讲堂帖为得右军三昧则文靖公哉经云以此深心奉尘刹是则名为大报恩公之子有焉

王阁老书佛祖传灯偈

王元驭阁老旧尝为空山果上人书佛祖传灯偈而云前七佛以为劫前久远未可据也不知自释迦如来至达磨皆用梵天语今裁作五字等之诸经偈皆非文言之故实第其理无二耳上人一衲一蔬粥朝夕羯磨元驭尚虞其徧现沙界于收摄处未尽渠拥宫锦袍噉大官膳日坐朝堂拮据万几乃不虞收摄乎哉噫徧现中有收摄羯磨中有走作未易言也余误入元驭网于此际未暇勘破惟有归从果上人而已

揭钵图后

余所闻鬼子母揭钵图宣和秘殿所藏后有赵文敏吴文定沈启南诸跋为宜兴吴大本物归之陆太宰全卿后入分宜宰相家至籍天府今亦落人间矣陆公复有元朱君理所摹绝精转之顾马湖孔昭后有顾及张银台二跋则余所见也余以大藏鬼子母经考之微不合故跋语不能无异同后得宝积经证之乃知此图之有所自也第二经皆佛语而不相蒙若此韩君世延出示一本其真吴氏物耶抑摹本耶而位置严密精理入神无毫发憾语有之兰亭无下品信然哉

弇州续稿卷一百五十六

●钦定四库全书

弇州续稿卷一百五十七

(明) 王世贞 撰

○文部

△道经书后

周公瑕书黄庭内景经

黄庭内景经者乃太上道君于蕊珠宫作七言咏歌以发修命缮性之要生人一身归宿皆在泥丸而作用皆在心三庭三田之内有余地焉真人在已莫问邻一语若预知后之有取于西邻者为拈破之即飞升度世资之有余裕矣此经自景林王真人传之南岳魏夫人凡仙经四十余卷而此为首南真迁化后几三十年而后传之东华杨司命而此复为首司命以今隶传护军长史许思玄少子上计掾道翔道翔之子黄民避乱入剡并诸经寄东阊马朗家晋安守孔默罢郡还闻而以重币勤礼恳之黄民而始得传写孔不及奉诵而其子熙先综先才而狂谓经语诵之万徧即得仙以为妖妄被酒悉取燔之后诱其舅范詹事暉反族灭而缮写人王兴私各录一本自随渡钱塘漂没仅内景存乃深信万徧之说甫诵而火毁其庐再诵之露台而雨渍其袞遂气结贸历日死深山中而经卷之在二氏者绝矣王灵期造黄民而恳得之輒加损益傅以丽藻遂盛行于世而黄民归钱唐乃留真经一厨付马朗后荏苒不复能取而卒马氏宝奉之其人皆寿考大富三世移事佛而经稍散佚其后正本录本杂寓于陆修静孔璪杜京产顾欢锺法师楼居士诸公所陶隐居百方购得之陶有神鉴独能辨杨君及二许真迹而内外景悉备闕之茅山今道藏所存本是也此与右军固无与不知何緣宋思陵有临本考之宣和书谱不载恐所得右军内景经亦贗本耳载考此经一名太上琴心文一名太上金书一名东华玉篇孔熙先兄弟以为读万徧輒得仙而笑之不知授者非凡师乃仙师也受者非凡骨乃仙骨而又慈惠忠信耽注元真者也受而斋九日用玄云之锦九十尺金阙凤文之罗四十尺金纽九双以谢师沐浴居僻室九十日而诵万徧一日当得百十余遍亦不易易也今此经托之梓徧天下而耳目之授者何师而受者何人也即十万徧奚益矣余自承本师晏阳子诲时时默讽亦已成诵文仲子休承许为余作小楷奉持之一月而休承目眇手战不能终诺乃改以乞周公瑕公瑕日受役碑板间乃能舍而为余结此段方外緣亦佳事也

解大绅书黄庭经

解春雨才名噪一时而书法亦称之能使赵吴兴失价百年后寥寥乃尔然世所多见者狂草其所以寥寥者亦坐狂草故今此纸小楷黄庭全摹临右军笔婉丽端雅虽骨格少逊却不输詹孟举陈文东也按右军所书黄庭是外景非内景与南真所传杨司命者虽理同而句字小异亦微有断缺当是渡江以前南真受之景林真人者偶尔逸出行世故右军得而书之今大藏中内外景经则陶贞白访寻司命手书的派也数年内与黄长睿分析甚苦今可以无辨矣

王逢年书黄庭外景经

黄庭所以称外景者以内景故别也始景林真人授二经于南岳夫人当其未解化时其家人已漏之世而特多诂误右军所传今盛行者是也南岳夫人以兴宁二年下降再授之杨司命转录之许长史而长史之孙黄民传之马朗家宝藏之其后陶隐居购而置诸松风阁上之御府即真诰所载今道藏的本也以右军遗刻较之比于道藏本多者为句二为字十少者为句二十五别者为字一百四十四颠倒者为句十一为字十字衡而句权之则兴宁本长而右军本短瞭矣然天下以书而信右军不复能以义而求兴宁本是以有行有不行也余深欲得一名士书之以便供奉而会仲蔚死休承老公瑕逵出吾乡王舜华仿右军体差不俗因乞书之此经真玉晨妙音与内景相表里独不能如内景分别五官六腑之部次运用明切而可遵承耳然一字不作人闲谈也

程孟孺搨右军黄庭内外景经

宋思陵有御临右军黄庭内景经考宣和书谱及右军真迹石刻录俱无之不知其所自第临笔极精雅有态小近肥弱耳又右军外景致佳本今皆在家弟处贞欲一切持诵而纸墨稍渝敝不甚便老眼谓家弟为我响搨此二本家弟以让程孟孺孟孺壮年工临池心手迅利故不啻虎贲典刑也按内外景经致语有详畧而大旨寔相表里或以内景为灵寳所授而外景为老君所述者恐未必然窃以为皆灵寳秘文而内景后出故目独详而旨加切耳其称内外景与内景之分为三十六章外景之分为上中下三篇俱后人傅会为之非本意也内景首尾二条似上真既传之世而咏叹扬诩且以示传者式耳外景定本首亦有太上灵寳作真言解说身形及诸神与此正类不然其不以为王灵期之增益者几希因志于后

黄老黄庭经

余于道藏中得一卷曰黄老黄庭经妄庸人标之曰太上黄庭中景经盖欲以配内外景也其注曰上清元命真人李千乘李君不知何许人尚不及考其出处窃意其经与注皆李君笔也自古训故之学未有精悉至此其精悉之极也则先经而后注也或先注而后经也皆未可知也是故曰李君笔也于文则踳蹶而趣内外景不及也岂天与人之别乎然而近古矣谈理则黄庭之羽翼也征韵则琴心之遗响也友人王舜华以小楷书之尤自楚楚可爱舜华文而颠恒自谓小右军用以相夸诩予谓此经真成中景若始得称小右军因大笑而罢

黄庭经合右军墨刻松雪墨迹

右军书黄庭有以时代置喙者有谓为吴通微笔者如黄伯思董道辈要是胸中微有书眼中无珠耳毋论陶通明启事可据试取宋搨石本观之唐以后人能办此否也赵吴兴临笔精嫩之甚第不可合看合之觉石本如绛云在霄舒卷自如临本或不免羊欣之叹耳吾此语殊有意须于宣城诸葛家叩之乃能得所以

文待诏书常清静经老子传

余久不受润笔资而华孟達昆季厚贖币而来请铭其王父之墓郟之至再三乃抽一笈投案上而去启械则文待诏书常清静经后附以太史公所著传小法楷法皆极精妙前貌老子像虽彷彿自赵承旨而聃耳修眉神采俨若生动岂惟出蓝而已按葛仙公记此经授受云自东华帝君帝君东汉人王姓七真所奉教主也后圣帝君据羣灵位业图为第四天主在第三天太上老君后老君则所引经中语者仙史诸贤欲尊老子为老君而不能合则谓为穷劫以前之上真时出应世大约荒唐不可考而经又最后出辞旨俱不能如苦县是以明理之士徃徃为之置喙余亦不敢狗也待诏跋尾谓为北山炼师书充福济观常住福济观不知在何地而炼师之骨业已朽矣入吾手非遠当亦他徃聊识其末以贻得弓者

赵吴兴书阴符经后

阴符经古未有自唐初褚河南先后奉命书百七十卷今石刻存者贞观六年行草一卷永徽五年正书一卷而欧阳渤海亦有贞观六年正书一卷其大小皆踰黍米而皆妙绝赵吴兴此纸盖据欧阳本为正故至圣我以时物文理哲而止跋尾名姓为某人书及前收藏二印皆刮去之止余一子昂印当是收藏家不能慎落飞鳧手惧为所踪迹故耳字稍大于欧褚二家结法出乐毅洛神而时叅以此海精严紧密中神彩流动故当是吴兴最合作笔也按河南行草于理哲后有故曰圣人不朽二十六字考合藏经皆无之而正书则有自然之道静至进于象矣凡六十九字而文亦不同道藏别一本复有哲人以虞愚我以不愚圣人以期其圣我以不期其圣故以沈水入火自取灭亡在自然之道静前因而注者仅侯善渊邹诉耳其同褚正书本而注者亦仅李荃而胥元一继之其同欧阳本而注者则有黄居真曹道冲沈亚夫任道明蔡氏唐淳俞琰刘处玄袁淑凡十余家又颇证后增百字之谬此吴兴所以的然据欧阳本也其标阴符作阴苻却误苻草也苻洪之改符而苻也甚明吴兴善书而徃徃有右军偏旁之累此亦一证云

又

道藏内阴符经凡数十种注释亦如之而独此赵文敏书最为定本他经注有谓天性人也人心机也立天之道以定人也为杜光庭所增而削之此人似未见欧褚李荃本若光庭五代时人也有削天生天杀道之理者夫道之理诚谬然不可削也愚窃以为当云盗之理观下文曰天者万物之盗天有生杀乃所以为盗耳绝利一源用师十倍当云千倍不当云十倍也夫三返之为万倍则绝利源之为千倍可推矣夫贼不以祸而曰昌盗不拟止而曰宜此经之深旨也天之至私用之至公生死互根恩害相生其五千言之秘乎哉他本有自然之静六十八字朱元晦谓其理独妙非也辞旨俱与前文不类元晦不过以其有阴阳八卦律吕诸语而深契之耳不知有此正所以非阴符也阴符之妙一机而已矣机一逆而已矣凡巧士得机而顺畅之经必逆而敛之固穷之穷似误而非误也敛也知我罪我其斯言也已

徐太仆藏仙师篆阴符经

余侍师次过同年兄徐太仆所亟问余师所重二氏何经余对以释则心经金刚楞严维摩道则道德黄庭阴符太仆咋舌谓前六者则既闻命矣若阴符之为阴何居也且是经三百字而少顾曰贼曰盗曰杀曰死曰机委委见之夫岂圣人所忍言余时不敢对居两月而师首以所书正篆阴符赠太仆太仆捧持若拱璧以异锦装之乞余题其后余乃谓太仆可以有言乎凡天地之气阳主施阴主敛施主顺敛主逆阴符之为阴也以敛以逆故也逆取而顺守之是故曰贼曰盗也杀者所以生也死者亦所以生也皆机也吾子欲度世而存乎将顺世而往乎太仆曰善初师所书阴符且十本余儿骥亦沾赐焉而独太仆所得最神妙儿骥骤见之色动乃欲益它墨迹以互市者余笑曰此亦可以逆而取乎太仆觉之乃止

紫姑仙书阴符经

此经我昙阳仙师重之前后为人书数本而世贞独不敢请偶有仙降于孙荣祖氏试叩之即欣然见许以辰日相示因屑箔金界青纸置孙密室中至日而经成后称上洞海天南极惟慈尊者书又云自始修至祥符二年记诵三万六千五百通而白日羽翰矣然考之此经乃九天玄女授之黄帝轩辕氏贞观中欧阳信本褚登善俱有奉敕书开元世李荃为之注故而自后注故者凡数十家今谓文阳真人证真时所道玉蟾翁摘尘而是义始聆下土大不相合且书法虽精整而过于巧媚多以意撰造良乖正始疑即孙氏所炼鬼仙笔也其人自云徽人尝为郡诸生颇习养生家言年四十七而逝大槩豪爽儂

利有才识幻变顷刻种种而不能脱冢墓间气陶贞白有云作才鬼不作顽仙似为此君解嘲

周公瑕书道德经

晋史右军传及书断俱云为山阴道士写道德经笼鹅以归而梁武陶隱君所评右军遗迹则称有黄庭经青莲居士诗直谓黄庭换白鹅黄长睿则以右军有道德而无黄庭为诗误洪景卢则以右军有黄庭而无道德为史误又有云诗史两不误者然今世黄庭之迹依希尚存而道德则自古絶响矣今年六月望后友人周公瑕避暑弇州园为作小楷二经道德极精严有古意而黄庭真迹之仍孙矣此子吾吴城一时右军仆之得此亦何异买王得羊哉惜无晁■〈石襄〉白鹅作润笔因题于后以志吾快

又

周公瑕往年为余书老子道德经五千言亡何而失之岁庚辰公瑕归自泲中念且老从我索一传客或谓公瑕迫得传而余恨失经以从臾公瑕续书之昔人所谓焕若神明顿还旧观者殆不偶哉既装成裘而志其后按太史公传老子谓楚苦县厉乡曲仁里人也姓李氏名某字伯阳周守藏室吏也居周之衰乃遂去至闕闕令尹喜曰子将隱矣强为我著书于是老子乃著书上下篇言道德之意五千言而去莫知其所终又云老子百六十余岁或言二百余岁以其修道养寿也又云老子之子名宗宗为魏将封于段干宗之后假仕于汉孝文帝而假之子解为胶西王太傅其本末甚明然自太史公言道家使人精神专一动合无形瞻足万物儒者博而寡要劳而寡功道家宗老子而儒者宗吾孔子孔子之教盖万世人王取则焉而其徒不明两家之始所合遂抑绌老子以为异端而老子之徒其庸鄙诡诞者覩西来之迹宏竒高大炫耀一世遂不暇与吾儒辨而更窃渍其余渾以求与之角而并传盖艳释迦之称累劫则谓在伏羲为郁华子在祝融为广寿子在神农为大成子在轩辕为广成子在少昊为随应子在颛顼为赤精子在帝喾为録图子在尧为务成子在舜为尹寿子在禹为真行子在汤为锡则子在周始为老子夫轩辕之世广成居崆峒千七百年而其后犹未已也遠者姑亡论已前是而为广寿为大成后是而为随应为赤精又何人耶且尧舜禹非异代也一时而为三子何迁逝之速也三代以还贤公卿非乏纪也又何为而不一及也乃至谓老子生于商为周文王守藏吏曰鬻鬻子武王时迁柱下史成王时守故官为经成子遂西游流沙康王时复归曰郭叔子昭王复西迈云云盖又傅会化胡经之说也竒释迦之有三十二相及七十二好相则亦曰七十二相八十好相也伟释迦之长丈六尺则亦曰丈二尺也不知孔子九尺六寸人以为长人而异之若丈二尺而人不怪且骇者未之有也且史何以不载也夫老子至

圣也其化而为太上灵真至尊也又奚必借西方之事而矫饬之然至儒者之所抑绌而指为异端者又可笑也老子往往皆格言其体至虚而不无其用至大而不能泯其迹精以治躬粗以治天下取之固逢原矣大道废有仁义知惠出有大伪六亲不和有孝慈国家昏乱有忠臣知言哉君子之于世甚无乐乎其名也仁义也孝慈也忠臣也其名不得已而有之故曰絶仁弃义民复孝慈絶者絶其名复者复其实也将欲喻之必固张之将欲弱之必固强之将欲废之必固兴之将欲夺之必固与之谓倚伏负胜造物若诱人而使之盈盖使理国缮身者于张强兴与之际惛然而思警也非以导人巧也夫不得老子之所以立言不解其文义而妄为之辟荀卿氏所谓贱儒也世贞一言而当获谴于今之为二家者然使吾老子孔子而在以为谴哉不以为谴哉

章藻书老子要语后

老子凡五千二百七十七言曰五千言者举成数也其言道德经者后人所崇加也曰上下篇者以竹简重而分之也其上曰道经下德经者后人谬也老子之位业天中天也其言人中天也遠而治天下治而至于久而不可废近而治身治而至于终其身不殆者恒理也亦恒事也谷神玄牝众妙之门启焉抱一守雌专气致柔始露不死机矣然是奉天者而非开天者也是歷世者而非出世者也吾故曰人中天也凡老子之言中曰私曰利曰得志曰取天下皆是谓其理当然耳取势决是以不讳諄也探机精是以不避险也夫然后后世得而羣訾之外若乖于吾儒之所谓无所为而为善佛之所谓不住色而布施者不知本意故不尔也若夫欲夺固与欲弱固兴之类盖言造化巧也亦非以诲巧也然而不善用之则巧矣是经也曰五千言今何以仅四千二百九十言约之也约之者何谓其授人诤也约之而理固未尝不备焉不然吾不敢约也书者谁章藻仲玉也

王元驭书仙师批点黄庭道德二经

贞常以黄庭道德二经荐师观既返贞卒業所圈点不过二十余所窃怪其少叩之师若曰人所恒奉持者不必我也若所解者不必我也若所不尽解人所不恒持而我有契于言象之表者试为若拈一二焉不然圣人之言犹天然谁得而去之而亦何用我丹铅为于是炳喆道人亦为贞书一纸

王学士书黄庭经

元驭学士书法在虞褚间而过自挹不肯与墨池盟间兴到作一薄蹠竟则裂之或有求者复不应以故行世絶少今年乃为华亭徐长孺书黄庭内景经神采风调翩翩出

蹊径外吾不知于汝南公主志枯树赋如何当亦不落夹矣书阴符者信本登善度人者诚悬金刚者子瞻法华大洞玉者子昂余皆获寓目焉纵跌宕八法能如易迁宫中人写玉晨蕊珠语耶昔许黄民所藏杨司命书内景已散佚贞白先生间闕访购久而后得之长孺仅一叩而得元驭手授不亦大幸哉今人知寶右军残误之外景而不知司命有内景惜其灵翰永秘聊为拈出之以元驭书作司命隆準可也

嘉兴周逸之刻黄庭内外景经

黄庭内外景经皆景林王真人传之南真魏夫人者夫人既上升而复以兴寧二年降授杨司命当未化前业已漏之世故右军得一书之黄长睿乃据此公厌代之岁在兴寧前而驳以为贗殆非通人论也第外景以此公墨妙故脍炙后世而内景独宋思陵有搨本余遂寥寥者得非真人在已莫问邻一语为叅同悟真度胤所妬耶昙阳师特拈出之而周生复能仿右军迹勒之石以布永永毋论作飞天仙人观海内吃井水人皆知有二景其为玄真指南功德岂唐捐哉因敬识于尾

周逸之石道德经

晋史右军为山阴县■〈石襄〉村道士书道德经笼鹅以归余尝忆真诰所称右军逝后浮系四五载始得解谓坦腹公品在支遁远游间生平无它业将繇府主索部民物写经受佣直二条轻垢罪耶第此经竟沦佚不获与黄庭并传世毋论右军即宣和秘藏真迹以千计独缺此经而周生乃能以精书勒之乐石拓本示世人书之能似右军与否其能博鹅羣与否吾皆不知其意则良媿矣因欣然捉笔题后

题赵松雪书大洞玉经

真诰言大洞玉经读万遍当白日上升杨许二掾妙迹不复可得得吴兴松雪公书此经足矣阳德观察出示贞焚香静阅数过觉右军北海出入结构中拂拂有天际真人想异日观察于清虚小有紫微云林谒诸帝真以此卷为贄乃跋尾有王生姓名不亦大愉快哉

赵松雪玉枢经

玉枢经称雷声普化天尊法语是杜光庭辈拟撰耳赵文敏好为人书佛经又奉敕缮写几满藏至道经独有黄庭常清静洞玉诸经洞玉余所见有两本其一属何元朗内

翰一属王阳德大叅皆神品也此经称道弟子后转奉某为人削去以供养礼诵故尚作折近始装池成卷而世亦未有识之者休承谓小变孟法师体恐亦未是大要李北海出入耳结法极紧密而力大遒劲披拂之际咸有妙趣而数百字中得一二字不称者或意忙笔迅故也当与余柳河东禊诗同识赏

章仲玉书大洞玉经

按黄庭内景经其首章云咏之万遍升三天而末则云约得万徧义自鲜又云过数已毕体神精黄华玉女告子情真人既至使六丁即授隐芝大洞经然则黄庭礼诵圆满而后隐芝大洞经出知其不易也考之南岳夫人青篆文以故所受于景林王真人者用甲寅起安启手经始传得道之子起安者兴宁也以兴宁二年正月辛亥朔四日甲寅授司徒公府舍人杨君大小凡十余篇俾转授许长史掾父子而大洞黄庭皆在焉掾以太和五年长史以泰元元年后先化去而掾之子黄民避乱入东阡马朗家晋安守孔默悬于黄民得之令晋安吏王兴缮写而兴私复缮之各一通孔氏藏为其子综先熙先焚毁而王兴私缮者渡浙江遇风漂佚仅黄庭存而复败于雨于是二家所得都绝寻又有王灵期者悲悬于黄民而得之窃加损益盛其藻丽依王魏诸传题目张开造制凡五十余篇流布京师及江东诸郡黄民艳其盛而秘其所藏本却就王求写转相讚重而真本之在马朗者以黄民卒而匿之后为山阴何道敬窃传以授女师锺义山而他小篇上之陆修静崇虚馆锺后闕不以归楼仅从抄得数篇而已马氏之藏与楼氏诸本为徐孝标杜京产顾观戚景玄朱僧标葛粲王文清严虬吴昙拔褚伯玉章灵民孔总诸士俗家分传几散尽而陶贞白始捃拾其大半而叙之以为翼真检今考此经皆五言古体其文隐邃深密与其诰内所纪南真中候紫微九华定录之辞皆相类第不若黄庭之尔雅而中间多说身形诸神名字实有与之相表里者或谓浮黎玉宸于赤明龙汉之间岂无正始之音出于雅颂典谟之表而卑卑若是推原厥旨大要俯度世人则不得不俯就世格欲使之易信易晓故尔玉经则经文之后必有符必有呪呪语亦说诸神名而不甚古符篆用笔小简体圆而用柔其注者曰太玄赵真人而传之者熊邻真经则每篇首别有章章后必有呪呪后必有图图后必有法法后始为经经后必有祝此祝语皆托之天王上真其辞最近古而不无蹊径此岂杨君所受本耶抑即王灵期所藻饰耶若章呪图法则为观妙先生朱自莫与蒋宗瑛手无疑符篆用笔小繁体方而用刚与玉经诸符全不类而经则大约相同第觉玉经稍整洁故特乞章藻仲玉作赵吴兴体录其三十九章正文而已若所谓文昌大洞者则蜀之黠鬼或妖人冠以俚浅诡诞不根之说而托之梓潼张神盲道士不察而收之大藏仅堪供祖龙一炷耳何足道哉何足道哉

周之冕书庄子要语后

庄子亦人中天也其位业所受则天中人也其言有條然而出世外者则亦人中天也出而不能尽不获如大雄氏者则又天中人也为言几数十万今吾采之而周生为録之者十不能一耳然皆粹乎莹然若穀之得凿酥乳之得醍酪而砂矿之得烛银也自庄子之言出而后世之修辞者猎其竒务识者资其博拘方者疑其诞而守经者病其诡彼皆有以来之虽然彼固有以来之于彼无与也吾采之吾以自为而已于四者亦无与也

莫廷韩书叅同契

太极阴阳之秘尽泄于易而小之于卜筮先圣孔子续之盖韦篇三绝而后赞以什翼于是天纲人纪备矣汉真人魏师独以其乾坤坎离兑艮之妙敛之于一身而度世维世交相为用而不悖千古之谈玄者寔祖之而宋儒如朱紫阳更为之注故虽不获尽叩其精微而衿襟者至今敛衽焉独中二条微露橐钥之一端所谓金以砂为主禀和于水银者抱朴子必归之金鼎之丹植禾当以黍覆鸡用其卵者薛紫贤必要之白虎之弦其理诚有之故不若内取诸身之为妙也不佞虽不能晓契其妙而奉持一念则赖友人莫廷韩以精纸作精楷见貽庶不孤矣廷韩此笔丰美华艳有蓋珠仙人态殊令人加敬魏师讳伯阳见于后离合诗而仙史谓其神丹就以与二弟子二弟子死已自服之亦死余二弟子乃不肯服下山营治殡具公乃徐起以匕药入死者口咸起即乘云上升而二弟子归不复能迹矣犹游行人间得不死也其化迹如此

书關尹子要语后

昔關尹子望紫气一缕于函谷之东而知犹龙公之至今不佞读關尹子一句而知其非關尹子书虽然是后世识玄理晓养生苦思振竒者之所撰其言非以托關尹子也何以故能识玄理晓养生苦思振竒者必不以關尹子重以關尹子重者其人必剽黄老庄列之卮绪而为之屈于旨伸于辞恒也今此所屈者辞也所伸者旨也故曰非以托關尹子也乃王生为余书者则竒已甚矣思愈苦矣夫亦可以已矣夫

书天隐子后

天隐子一书司马子微述谓传之天隐子疑即子微所自着也注叅同者见以为浅近志悟真者见以为局小而亦自有理至谓胞胎有形已呼吸精血岂可去食而求长生则所谓见其一未见其二者子微之术不过郟病延年而已夫道苟不得病何必郟而年又何必延也其谓坐忘者因存想而得因存想而忘语故精

化书后

化书者观化也凡自有而忽无自无而忽有皆化也其自有而渐无自无而渐有者亦化也以我推物以物推物物以物物推天地皆自有无之际得之而葆身理天下之道寓焉其旨远其辞文其言约而中是故识者曰此非齐丘之所著而真人谭峭景升之所著也景升书成而授齐丘使行之齐丘匿而以己名焉或曰齐丘既得书忌景升而杀之或曰醉而以皮囊之沈之水为道家者曰景升羽化者也齐丘不得而杀也宋人之传奇至云有渔而得一皮囊藻苻封之若驼鸟卵启而得一人齁齁熟眠醒而问渔者曰化书行乎曰行矣吾在此甚乐幸复为我缝而置诸水此傅会也夫渔者何以知化书之行夫渔者得人而复置之水宁有是理哉是书也吾以为齐丘必窜入其自着十之一二而后掩为已有如五常一章忽云运帝王之筹策代天地之权衡则仲尼其人是也彼盖所以名齐丘意也若景升必不推仲尼亦不必附于儒者又齐丘于观化之际辄自称小人所谓不考而招者一笑一笑

弇州续稿卷一百五十七

●钦定四库全书

弇州续稿卷一百五十八

（明）王世贞 撰

○文部

△书道经后

敬美书阴符经金碧古文龙虎上经

此经于道藏中最炳赫有名称凡三十五条一千二百九十字其大要言坎离铅汞之用与参同契相表里是六季以后修真绩文之士所拟箴恐非太上玄真语也家弟懋自覲归为余书阴符经因更书此合成一卷清燕焚香于团焦中诵之亦不减魔天半偈

乩仙书阴符经

有仙降于孙氏者为余书阴符经一纸甫踰月而复为天台赵广文书一纸其为余书称南极惟慈尊者为赵君书则称上洞敕掌超度事升委植钧道者顾篆法结构正同而跋尾复引余相劝勉疑即此一仙道号有二也赵君用是装潢成帙而乞余一言之署夫余乌能窥阴符即有言又乌能为赵君益第愿赵君去身六贼以见天五贼毋若木之滋火而身受克毋狗在目机而使内观塞万化安百骸宅凋三光度亿劫其孰能外此三百言耶经后又有回头歌一章辞若龊龊而所以警赵君者至矣昔释迦世尊作转轮王时得魔天半偈尚能成道而况此经与此歌也耶勉旃异心易迁宫中毋忘此老度师也

虚一书太上内观明道经

虚一子所书第二帙其标题为太上内观明道经然仅经中第三条内所释命性心意志智慧魂魄血精荣卫身形质体躯神灵生死道二十三句一百六十一字考此经在道藏第一百六十伤字函后尚有百十四字今削不录而别录三十八字于后所谓知道易信道难信道易守道难于第九条内有之然本文有信道易行道难行道易得道难得道易守道难与此亦不尽合也伤字函内七卷皆肤浅剽缀语而此经所释名义尤纰漏其为杜光庭辈伪撰无疑唯第五卷内外日用经小为切近顾虚一不之书而书此篇又辄用己意增损其后何也独篆笔精致迻紧且粉黄金作之所费掠剩力当不少感其诚为识而真之篋笥云尔虚一事见前

元始上真众仙记

此记别标为葛洪枕中书而序辞称于罗浮山夜半静斋忽降一真人授书谓二仪未分溟滓鸿蒙状若鸡子有盘古真人自称元始天王游于其中凡六劫而忽生太元玉女相与通气结精还居玉京山宫殿凡一劫而一施太元母生天皇十三头治三万六千岁其后天皇生地皇地皇生人皇太元母又生扶桑大帝东王公号元阳父九光玄女号太真西王母太上真人元始天王弟子也金阙老子太上弟子也其职如世之有司徒丞相耳它灵真衔名往往与位业图相出入至所称张衡杨云为北方鬼帝治罗浮山嵇康为中央鬼帝治抱犊山伯夷叔齐为九天仆射周公旦为北帝师屈原为海伯王弼为北海监皆真诰所不载却又有大可笑者洪化去在晋惠中而许暎许穆许玉斧郭景纯皆生南渡以后与洪不相及又云二许为真人未有掌领又似未见真诰全文者夫好夸饰而不核古以是作伪书久而始逗露一何幸也道藏若此类多不可尽摘摘其尤著者

仙师书大通经

此经在道藏太玄部人字函仅百四十二言而分为真空文理之妙二篇按太玄部诸经俱云灵宝大道君玉宸宫物第不知所繇授而考其辞义与阴符黄庭及真诰它所传绝不类岂灵仙应化在宋时即俯从宋格耶若乃如空无相湛然圆满如如自然慧照十方则葱岭之微旨也致静致和则中庸之格言也唯所谓心生性灭心灭性现则似指意为心非吾古先生之所谓妙明本心耳然于理无弗合也晁阳仙师书以授从子驹将无谓驹犹在方内外间不欲但明一色边事耳考经后余一偈云有法悟无法无修解有修包含万象体不挂一丝头落语当曹溪下荷泽上师故削之耶抑偶不暇书耶为补志于后

常清静经

老子所著唯道德五千文见正史而所谓常清静经者通二章不能二百七十言然不尽见信于吾党大约谓其文颇浅易往往掇拾经传之余与道德若出二手及称自葛仙公受之东华君东华君受之金阙后圣以上遡西母而晋迨六朝诸公都不齿及之又道释之诤起人主下明诏以道德为真西升化胡为讹而至于常清静亦无及者遂以为后人之傅会然历考宋季南北登真如王马刘丘辈多引其语以证至道而松雪诸君遂精书而宝传之吾无所折衷姑乞公瑕书以附道德之后备一家言而已虽然子思作中庸解之曰庸平常也南泉禅师亦云平常心是道然则平常语固道也

许真人石函记后

石函记上下卷按此函既为许真君所载而中所构撰皆不类晋人语盖自张紫阳而后陈泥丸白紫清继之俱以无碍之辨才发性命之宗旨一时门弟子模仿为之末宗骯骯之气可掬乃至所为醉思仙歌亦托之真君大还丹歌则托之吴猛铅汞歌托之严君平龙虎歌托之阴长生破迷正道还丹歌托之锺离云房敲爻■〈摇，土代才〉头坏赠别方处士题王先生庵门赠乔二郎鄂渚二道谷神直指大丹诸歌托之吕洞宾还丹破迷至真三歌托之刘海蟾鄙俚冗沓不能脱沿街鼓筒气如出一口不知长生之四言何其古雅得正始之音而海蟾五言古风锺吕近体清逸秀劲何尝不飒飒唐氏本色耶此必陈上阳之流为之饰画无盐唐突西子良可恨也若其中有一二精至语不妨作摩天偈例取之

坐忘论

杨用修谓司马子微坐忘论为坐驰误也殆见其名未熟其语耳子微所谓执心住空还是有所既不合理又反成病若心起皆灭不简是非则永断觉知入于盲空若任心所起一无所制则与凡夫元来不别若唯断善恶心无指归肆意浮游待自定者徒自悞耳若徧行诸事言心无所染者于言甚善于行极非此皆从方寸中锻炼一番过来故于受病处极悬至乃尔其治心之法则曰息乱而不灭照守静而不着空行之有常自得真见又云疑则任思悟已则已必其有思思则以智害恬为子伤本若烦邪乱想随觉则除毁誉善恶皆即拨去莫将心受心不受外名曰虚心心不逐外名曰安心心安而虚道自来居如此下语即吾夫子之母意毋必毋固毋我何以异也去曹溪黄蘗亦自不逮以此言忘何云坐驰吾故曰用修似未熟其语也

灵宝真灵位业图

灵宝真灵位业图者华阳陶隐君通明造大槩依约真诰所传而稍编次之余疑以为后人傅会书耳而序辞颇质雅而不快爽类陶笔因手书一通备采翫中有疑误者畧拈出之其第一第二天主世所崇奉如元始天尊玉晨玄皇大道君是已其第三天中位太极金阙帝君李姓下注壬辰下教太平主者何人也考第二天右位首帝晨后圣玄元道君下复主壬辰运当下生则是此君见居右辅次当补处如观自在而所谓李姓及玄元号者非伯阳甫而何然至第四天中位太清太上老君又宁非伯阳甫也三位之内栢成子高蒲衣支离被衣王倪啮缺卞随华封北人子州善卷长桑秦佚接舆伯昏郟间庄列之所寓言者往往皆见而末乃有老聃岂不以庄生所纪有老聃死一条故耶是不知老聃之即为老子且皆寓言也葛玄既列第三左位曰太极左仙公而复见之第五散仙赤松子列第二左位曰左圣左仙公南极南岳太虚真人而复见之第四散仙召公奭既为第五右位之右保而复见之第七左位其更可笑者吕政为北帝上相曹操为太傅司马懿为宾友而周文仅与之同列周武下作部将中间张绣韩遂严白虎盗贼之雄公孙度刘封偏方之剧何苗卖兄庾亮召乱皆非令终而并列贵职得非因循真诰之口传而不加考订耶考通明传所载著书在世者一百六十六卷入山者五十七卷都不载有此终恐后人傅会耳

又

余始意第三天中位李君即伯阳父及得方诸青童王君所撰上清后圣道君列纪云李讳弘元一讳玄水字子光一字山渊盖地皇之胄以上和七年丙子三月生于北国天刚山李氏家五岁好道二十辞亲远蹈感天帝下教流光拔粲授以郁仪大章大洞真经给以曲晨羽盖饮以徊水玉精贻以素羽玄翻后道成而紫微上真天帝玉清君遣太

景琼輿下迎授书为上清金阙后圣帝君上升太清中游太极宫下治十天唐承之年积数有四十六丁亥之间前后在中间鸟兽之世国祈启竭东西称霸以扶弱主主有纵横九一之名建号光迹昌元其后甲申之岁前后种善人除残民役水交其上兵火绕其下到壬辰之年三月六日圣君下临兆民矣此语似讖纬又似受记不知上和为赤明龙汉前后与所谓壬辰者今已过耶为未过耶其事不可知若壬辰后圣则非伯阳父明矣王君职为上相又有上保大丹宫南极元君上传白山宫太素真君上宰西城宫总真王君盖李君四辅也一云西城总真即远游也真诰有上相青童大君而不言姓王又自有西城王君此以青童为远游悞其文亦似后人笔

三茅真君传后

关中王令赐绂自白光禄启常所来携光禄手刻三茅真君仙传伏读之即真仙通鉴所传而颇加详者也真君化迹显在名山纪之真诰与南真石函并炳烺耳目夫复何疑所恨玄门操觚之士不通史学猥加藻饰以召瑕攻竟成蛇足耳不佞请得而畧言之夫所谓百十二字宝号者受之天乎受之人乎受之天不过真诰所称而已受之人不过唐宋以后所封而已不应烦杂至此且袭北极文昌之纰漏也秦时封彻侯至少不过蜀应文信及始皇时王贲王离赵亥赵成冯毋择而已以李斯为丞相尚不得侯而何以有长平侯偃广信侯熹也战国有号无谥始皇不立谥何以又有长平恭侯也定録仲君以景帝戊戌生至武帝元朔元年举贤良拜五官中郎正按元年为癸丑仲君仅十五耳是岁虽下郡国举孝廉不闻举贤良也西汉官无所谓五官中郎其以上书拜郎中者主父偃三人耳不闻拜中郎也征和二年转太子太傅按是岁为癸丑戾太子反若在前则与少傅石德及宫臣皆从诛在后则不立太子设太傅也元凤元年拜破胡校尉武威太守是岁为辛丑时不设破胡校尉官保命季君以庚子生武帝建元三年举方正不就按是岁为癸卯君仅四岁耳又云游梁国为孝王上宾时孝王薨十余年矣宣帝地节二年自洛阳令转西城校尉是岁为甲寅君年已七十五然是时亦无西城校尉官也元帝即位仲君拜执金吾季君拜五更大夫转西河太守按是岁为初元元年癸酉仲君年九十五季君亦九十三不应尚之官藉令九卿二千石有此寿俊人主必当旌异史必为立传亦不应寂寂乃尔且九卿年表执金吾为冯奉世无所谓仲君也亦不设五更大夫官大抵事玄者不当以其饰而恣为谈守儒者不必恶其饰而遂生谤取理而节可也长夏无事偶书于后以示王令倘可遗光禄小删之何如

桓真人升仙记

吾于丁卯秋中避迹弘法寺抽道藏翔字函小帙曰桓真人升仙记吾甚爱之因手

书一通盖谓记内所称西蜀华盖山李桓仙君授觐金丹大药与飞步隐身诸诀既成而海之俾从陶隐居为门弟子披发跣足执锄为圃十二年吾当举之上帝诏升云天且谓陶有三是有四非所四非者其一注药饵方书杀禽鱼虫兽救治病其二好算星度穷究天机潜厌鬼神言人休咎其三种植花木耕锄山林伐木匠屋自持声势亲近朝廷其四望想太重便希升仙创待仙楼造降真馆又谓陶雕琢文词劳神典籍穷究经旨好述异事且求真不一潜神二门言菩提行修西天记作往生文道释并修则上帝未见用也觐如言而往果如期上升四非之说故余所甚契及后稍暇读其全文而鄙之以其沓拖猥杂殊无六朝风气而徧考诸藏有高道传云桓法闾字法舒不知何许人隐居华阳馆十余年一日有二青童白鹤自空而下隐居欣然谓已当之童曰太上所命桓先生也隐居计门人无桓姓推执役者得法闾诘之曰常行默朝之道亲朝上帝已九年矣隐居更欲师之法闾辞不许乃恳曰某于求道勤矣而尚淹世者非有过耶幸为访之法闾驾白鹤而升三日密降隐居室谓先生阴功着矣而所修本草以■〈亡上虫下〉虫水蛭之类为药利在人害在物以此小淹一纪乃解形当投蓬菜都水监此传乃道士贾善翔撰进成都李汝成驳之以隐居玄门董狐岂有异人居门下而不识者又得隐居墨迹南平王所造清隐馆即弟子桓法闾所居邵陵王又有隐居化后法闾犹存无先期上升之说而法闾受法高弟其非执役固明甚也据贾高撰传谓都水监之说为门弟子真钱所预告者又考隐居所着冥通记则周太玄从定录赵丞得之南真夫人者都不言法闾也若此上升记绝似唐末宋初人所作其前载李桓命桓法闾师隐居语尤诞妄且是时隐居尚存何得称贞白先生盖不知贞白为化后所赐谥也造伪书者赖有逗漏不尔令人头眩

书张天师传后

天师一传盖因世谱而作其牵合傅会不可言请得而条辨之其云和帝即位闻其有道以三品印绶征是时汉未有三品也征为太傅封冀县侯此又因卓茂事而传之者也太傅位三公上大邑通侯岂平世而遽及草野且此岂细事而史册之不载也神符所受能执笔一遥画而千万鬼众俱死又能使之活则一时西川之厉太上固颀指靖之而有余又何必纵之为害至极而假手天师制之也阳都之人多深山穷谷王法所不及施故天师以便宜摄之彼地即生齿亦不过数万耳何以有三万六千种外道也夫一画而能杀鬼太上实授之而又责其过当杀气秽空者又何也张鲁以汉中降魏封侯善终史传甚明而云不受封爵白日升天且曹子建着论称其时道术之士甚详而不及鲁鲁子卫隗俱无所谓奇术者而况上升也且岂有子女十余辈累代升天而无一纪者自晋世而昭成而椒而仲回而迥而符而子祥而通而仲常而光而顺而士元而修而湛而秉一而善而季文而正随而干其寿高者皆百岁小亦不下九十何至于曜召见之后子孙之

寿皆与常人等盖前代系数不明而又少少则不得不以寿弥缝不明则可以影响故也大要与镇南而后其印剑符篆虽存而未必一一修持其修持者未必一一皆验至宋真宗之世颇好其事以故稍稍出而应之然亦无可以耸动者至宣政而虚静先生继先出其倜傥变幻君臣各相竞为文彩而其后人因之有世谱耶真诰虽时时称天师第呼之曰陵耳亦不甚重之

马明生阴长生传后

马明生阴长生其师弟皆以精诚得道而文彩焕发诗尤其是汉晋间上乘语非余子所可及也

周紫阳传

紫阳真人周季通事尤伟奇第其一时所遇中岳须子玄衍门子赵陀子上卫君沙野先生宁先生淮南子成张子房李伯阳高丘子陶安君青精先生李子耳赵伯宣幼阳君司命君墨翟子司马季主刘子先谷希子王乔赤松九老仙都君合黎山皇人黄台万毕先生九气青童小真君龚仲阳之类多传记所著闻者恐未必不是理也又所谓中央黄老白元无英三君皆黄庭经内身中之神而传以为实且黄庭以晋世下传而季通为汉宣时人也夫其传季通自成耶抑为弟子所撰耶使季通自成之不当泄漏乃尔使出弟子撰岂能一一亲证若是窃谓紫阳此传及黄帝汉武王子登等篇于事非不无而为攻神仙之学所藻饰更使人有蛇足之叹

纯阳神化妙通纪

纯阳一百八化为道士苗善时编次要多傅会捏合而成者其灼然可信不能十之五也如第二黄梁梦觉乃即卢生遇邯郸吕翁事而小变之开元中人与文也第九化谓隐华山称麻衣道者以理参同点化陈希夷先生按希夷传称时与吕公往返而麻衣道者则僧服而相钱希白盖又一真也第三十四化与邵尧夫相质事尧夫生平语无所讳顾绝不及此又所谓吾一念动子便知之吾寂然子茫然此拾南阳国师残语也且尧夫惟能用加一倍法算耳亦不能得他心通第三十六化徐神翁处踞坐侵吕惠卿仍作词喻之考神翁传无此事唯曾对人云吕某与某曾一过耳其人稍得第五十三化垂虹桥题飞梁压水词是一寄士拟作第八十四化载推钱车入罐后又于东平遇之乃一幻术人江湖纪闻记之第九十九化言徽宗幸宝篆宫设醮云云当时有记之者甚详云林灵素开讲上听之讲毕而香炉下忽得一纸云捻土焚香事有因大都宜假不宜真云云然

首句不言世上纷纷炼汞银亦不载道人于上前以泥和成锭用猛火锻之霞光四出遂成真银锭锭上一诗如模铸也第其间却有至语不妨采翫

刘海蟾传后

海蟾子讳操字德成燕山人十六举甲科至上相为正阳锺离真人所度弃而学道初以为耶律时相考（阙）耳所谓举甲科在唐而拜相则在守光然（阙）晋兵至城下其危如累卵何待正阳言之而后悟第不知其时事势之迫若此守光（阙）猜忌若此何以能脱身去位出家而史之不载何也得非用事于刘仁恭父子当权寄而非真相也耶醉骑白驴五言一章佳甚宛有唐人风何遽载其得道后陵轹神庙事尤奇

金莲正宗记后

金莲正宗凡七人重阳王真人生十二岁而丹阳马长真谭生二十九而广宁郝生三十一而玉阳王生三十六而长生刘生三十七而长春丘生四十八而遇纯阳真人得道五十二而与玉蟾和灵阳李同居二公皆有证悟者五十六而化长春丹阳长真五十七而化玉阳广宁五十八而化长生明年正月遂解形其后丹阳最先成道诸真亦以次成皆有神奇之迹而长春最晚成复屡失之末而遇蒙古太祖片言投遘胜残去杀全真之教大行于天下无不知有所谓七真者大抵道家之有重阳犹释门之有达磨其前皆教典而后乃为宗门长春于道稍平实岂所谓参也竟以鲁得之耶道门既曰性命双修王马二公亦极论养气而遗身蚤逝又似不及命者长春临去以脾疾至卧团侧而化后又别无神奇此所不可解也

玄风庆会录后

长春丘真人见太祖于西域雪山之阳所面告者几三千言畧叙师传之旨戒以大怒则伤身大喜则伤神大思虑则伤气而惓惓以节色欲为首傍及保国爱民用贤薄赋之事北人性颇好杀疑其桷凿而太祖乃叹赏不已呼为神仙锡以便宜金虎符领天下道教夫以佛圖澄之神奇能海鸥石勒然亦危者数四而勒亦不能用其言长春何以得此于元祖耶一说长春能呪餅水生金莲花元祖是以信之考谱传俱不载录者曰移刺楚材疑移刺或耶律讹也其官称侍臣昭武大将军尚书礼部侍郎元至至元后始有侍郎亦不属尚书省此恐误

又

后考湛然居士西征记颇称长春之短湛然即楚材别号也此移刺者当别是一楚材

又

丘长春道门之法嗣也其学实得之禅以片言悟蒙古太祖俾总领其教而其徒不能尽贤往往侵占寺刹以为宫观或改塑三教像以老子居中孔子居左释迦居右或皆侍立后四传而至所谓孟格皇帝用少林僧裕奏辨审得道士李志常等义堕焚化胡等经斥道士为僧者十七人还佛寺三十七所又至色辰皇帝再焚诸道经复僧寺二百三十七所塑像悉令改正而道教屈矣昔寇天师谦之以符篆法佐拓拔世祖世祖因而尽废释氏僂僧人寇悔而欲谏之则无及矣呜呼其师为医弟子蓄毒以杀人师亦乌得无罪哉

手书鸾大师调气论畧与张仲慧

余考宣律师所著鸾法师传云有调气论著作郎王劭注之而徧访其本不得后阅道藏延陵先生集服气经得此一则为踊跃不寐昔人谓获古奇文奇事如获珍珠船恐亦亡以喻也此篇似非全书但其辞简质尔雅断非六朝以后人笔而末语四大不调由于二起凡气节量一任自然足洗搬运采炼之谬我昙阳师示张仲慧云太上无生其次达生其次贵生今此云但能不以生为生乃贤于养生也何后先之妙契乃尔故知世尊得菩萨道时得寂灭为乐一偈穷劫后成佛垂涅盘际为弟子言之不唐语也因书此一纸贻仲慧

书悟真篇三注后

紫阳张平叔作悟真诗歌发明金丹秘旨中间回互隱伏虽未易窥测而其大指不过二端曰身中求者身外求者身外之说于楞严经十仙所谓交媾坚固而不休息意同不敢遽谓其无而其事甚鄙其机甚危其品甚卑其効甚难薛陆二子之注释犹显晦相杂至于上阳子陈致虚者而无余蕴矣且其辞旨之放浪狂诞滑稽陋褻灭天道伤人理而其罪之尤大者曰侮圣言蓋王法之所不容而地狱之所精俟者也其曰实而有者真阴真阳也同类有情之物也虚而无者二八初弦之气也有炁而无质两者相形一物生焉所谓一者真一之气凝为一黍之珠此其本旨也然至引度人经曰元始悬一宝珠大如黍米在空玄中其侮圣言一也又曰顺之则为人逆之则为仙为佛为仙乎犹可而谓

佛由此而成至云苦行雪山六年达磨面壁嵩少九年皆此物也然则是二圣人者先采丹于女子而后作此伎俩也夫佛不必论达磨者得道已百余年谓中州有法器可传故面壁以示之机而始得二祖今岂所以语达磨其侮圣言二也佛经云如露亦如电谓一切有为之法幻且速不可持也今以证其功之速而易抑何舛也丈六金身释迦之化身也今引以喻十六两何所取也又云马祖未修大药而枯坐求佛是有磨砖之讥然则南岳让者诱马祖而为淫者也其侮圣言三也灵山会龙子戏珠真摩尼宝珠也而引以为女子之铅是龙女于大众中市淫于世尊也其侮圣言四也要之道光之罪在行而致虚之罪在言道光之背师致虚之诬佛其揆一也然而道光有得致虚无得也嗟乎紫阳之旨愈显而愈晦使天下有以悟真为误真者则三子哉

白紫清指玄篇

紫清白真人玉蟾师事陈泥丸泥丸之道亦得之于薛紫贤矣而紫清所著辨惑论修仙三等炼丹三成皆取自身已不假西邻其它如谷神不死玄关显秘诸篇皆妙合黄庭微旨又何尝不与悟真相发挥歌辞逸妙往往有辨才无碍机用紫清之仙格所以独胜也第紫清六十四岁卦气已满而始得道吾侪其庶可冀乎泥丸化迹似不可晓

诗歌之横逸痛快无过于白紫清凡张紫阳陈泥丸之什皆近真其它则不过陈上阳辈依仿而成虽纵横辨博而实少精理乃托之许旌阳罗公遼鍾吕刘海蟾马自然辈吾谁欺欺天乎又有金丹证道四歌云太上老君作尤可笑也

书金丹四百字后

紫阳之精蘊独有悟真篇耳后所谈禅语其门人尚以为非实录而忽有此四百字者余始得而读之窃见其精深微妙虽与悟真相表里而提唤处尤更紧快文字亦雅纯无支离隐互之病然尚疑其姹女南园手持土橄榄龙虎交战洞房云雨之说或有涉于问邻者寻得其前序读之所谓以身心分上下两弦以神气别冬夏二至以形神契坎离二卦以东魂之木西魄之金南神之火北精之水中意之土为攒簇五行舍眼光凝耳韵调鼻息缄舌气为和合四象以眼不视而魂在肝耳不闻而精在肾舌不吟而神在心鼻不香而魂在肺四肢不动而魂在脾为五气朝元以精化为气气化为神神化为虚为三花聚顶以魂在肝而不从眼漏魄在肺而不从鼻漏神在心而不从口漏精在肾而不从耳漏意在脾而不从四肢孔窍漏为无漏然后知其絶无所谓西邻之说而悟真篇指亦可挽而归之一身然终不能不小抵悟序尾有因马自然去讲此数语汝其味之寻又读白紫清集有谢紫阳书谓昨到武夷见马自然口述谆谕出示宝翰凡四百言字字药石

甘露洗心毛骨洒然又固以知紫阳之所授者紫清也岂紫阳以薛氏之注误天下而指挟身中之秘救正之耶将无紫清所得泥丸授受之微或独悟之见惧其说之不信从而托紫阳以神之也马自然古仙也不为紫阳使者曰马阳象也曰自然取不矫饰义也疑亦紫清所托谕也夫以紫阳四百字之序辞明皙若此而尚有陈上阳鼓其唇舌以宣淫诱贿则良可叹已

玉清金笥青华秘文金宝炼丹

近复覩此书谓张紫阳表奏上帝着此圖论中间幻丹说力辟彼家之妄而归之身其理颇正功用亦颇近而不能无掇拾迹盖后之学道者忿薛陈辈之误注悟真而托紫阳以正之也据序乃提学金事石淮着而谓遇刘中贵得所藏本至正德甲戌而后出其为膺作可知

宋搨黄庭经

右军书法琅琅者行体兰亭小楷黄庭兰亭本最多然肥瘦疎密种种不能尽合独黄庭如出一手余所见前后数十本皆然恐是秘阁续帖本广行人间耳今覩沈同卿纯甫所藏独幽深澹宕其风格姿韵遠出诸本之上岂秘阁之前别有一佳本耶抑太清楼翻刻之最初搨耶纯甫素工八法能日临一过不患不作飞天仙人也

程孟孺黄庭经

余前后见宋搨黄庭凡数十本此其最精老杜题画所谓毫发无遗恨波澜独老成唯此足以当之或谓是秘阁中续帖一纸余不以为然人间十七帖大胜淳化天上也陆子深学士诗云山中亦有闲功业搨得黄庭上白麻异日与东圖共之

弇州续稿卷一百五十八

●钦定四库全书

弇州续稿卷一百五十九

（明）王世贞 撰

○文部

△书道经后

书真仙通鉴后

麻姑坛祠记颜鲁公所撰而赵道一倚之撰蔡经传第其中所云麻姑再拜但不相见忽以五百余年又说接待以来已见东海三为桑田及姑取米掷地变为丹砂方平笑曰姑故作少年戏也吾老矣不复喜作此狡狴变化然则方平之得道当在盘古氏以前而及其作方平传云东汉之东海人举孝廉除郎中稍加至中散大夫孝桓帝时主太尉陈耽家三十余年尸解而去则方平之再过蔡经家百余年事耳度其终始不过二百岁许人而何以老于麻姑又云沧海三变为桑田也岂方平间于东汉时一出耶或别有一方平耶或过蔡经家事有之而传方平者耳傅其名姓而不尝见其文耶前传言镇青城山丸仙宝室天而后云镇昆仑亦自相抵牾

车子侯扶风人汉武帝爱其清静稍迁其位至侍中一朝语家云我今补仙官武帝思之为作歌云云按此即奉车子侯也奉车子侯霍去病之子也帝使从封禅太山一夕而死帝思而歌之又语其家道士皆言子侯得仙不足悲桓氏新论则帝出圣才有朕兆子侯则没印故畏恶杀之今因其语似为仙去又不识去病子而谓之车子侯尤可笑也

太极真人杜冲以周昭王二十七年闻文始尹先生登真乃灵宅栖玄学道康王特赐金百镒完葺本第赐号曰楼观闻老子在周为藏史孔子犹及闻礼后始西度函谷尹先生挽之为草五千言今云昭王十七年尹先生得道一误也康王者昭王之祖也今云赐金百镒完葺本第二误也恐系傅会不可信又云周穆王好尚黄老崇建灵坛立庙置老君及尹真人像尤可笑彼谓穆王时有老君观耶又杜冲真以昭王二十七年始学道道成而宗年二十受业焉年一百五十余岁至厉王十三年而上升彼谓昭王去厉王时有百七十八岁耶楚康王事尤诞王翦灭楚已虏其王负刍矣何得复有康王

周义山传是一博畅才人文字然历引所见诸仙真皆传记纪载无一创闻至所谓黄老无英白元君则又黄庭经传世以后语今云是汉宣元时人得道恐未可信费长房以失符为鬼所杀华佗以愆期为曹瞒所诛此方术人也而列之仙可乎长房之得符自壶公见范晔汉书甚详丹台录云壶公姓谢名元一恐附会语刘寛不闻其有仙道特真诰载之

路大安传尤为不经据大安以顺帝汉安元年壬午生至惠帝永康二年辛酉当为寿一百八十年矣而是时王戎仅七十耳乃谓大安为甥而戎为舅其卤莽一至此且惠帝永康元年四月赵王伦反自为相国明年正月废帝于金墉城四月反正改元永宁是永康无二年也惠帝不辨菽麦人也一年之内见废于赵王伦复辟之后齐王冏专政帝食息不自制而何以能召大安驱禳厉疫所谓上真授记年与名同可以冲天遂以大安元年白日上升然年号实太安非大安也此类殊不一聊辨而志之

据真诰陶隱居所纪许黄民原无得道不当列之仙传也胡长仙事甚奇幻倣儗第在中宗武后朝当遠出叶静能张果上而史于方术不载又太平广记搜剔不遗余力于叶法善罗公遠辈纪载甚详而独不及长仙何也得非有所增饰耶

许真君除殄妖蛟及拔宅飞升甚幻奇倣儗足以竦动凡俗照耀一世今遗迹尚存讖记都在独晋史搜罗神恠不减虞初傍及义云而乃遗敬之一不可晓也郭景纯之抗王处仲于行刑人及鹊巢树亦载之而顾絕真君化鸽之迹二不可晓也真君所居既非深僻寿至百三十六岁白日冲举家属门故何止百人而有司都不举闻三不可晓也真诰扬许所载晋室诸贤迨尽岂有长史系真君从弟而了不之齿四不可晓也陶隱居徧访仙迹若渴若狂而于真君事独杳然五不可晓也今者龙沙高过豫章城地仙之事当有验者而先师晏阳子诗所谓五陵教主世多不能悉而注真君传者以东门之镇为宛陵南门之镇为浩陵西门之镇为鹊陵北门之镇为涪陵中门之镇为泰陵以实其分野太遠而名亦创新未知其是否

王子年能预知苻坚南伐之必败而不能守能预知姚萇之子无畧得苻登而不能知身之见杀于萇手此大谬也岂释氏所谓还债耶将无以述讖纬谈休咎为真宰所罪耶正史不言兵解恐传者增饰之其所著拾遗记十卷蓋不待毕而知其诡于道也

项曼都者诞士也与昔所传古强蔡京之流相表里其曰斥仙人者人而指目之耳而以为真仙何无识也徐启玄为王大夫治女金英事恠甚不可言而又涉无谓得非启玄者欲窃其女故为障眼隱形之术诌张以摄之耶

萧子云据南史以侯景之乱避地（阙）而卒今云还萧山再徙居清虚馆遇神人降言馆之东北有都水坑水自东注可以徙居萧又徙家寓焉厯二纪余一旦上帝赐玉册封元洲长史仍司郁木福庭之籍神仙之府八十二口同隱世不复见吾不敢以为的然夫子云名卿大夫也清虚馆在萧山之近隅非若地肺桃源之深阻也其家八十二口又非一人也何以居二纪而不致人主之傍求族党之踪迹其卒之地与岁史无异书者

何也且书家者流必举子云以为口实宁有迁化之奇彰彰如是而一不之及意或羽客之栖止清虚者会张杜昙永之仙迹而牵引子云以为重耳

吴道子画迹虽神奇然是一工师耳正史野史载其出处甚详且明未有以为仙者而今云得神仙术周游人间玄宗闻而诏入宫庭有粉墙数寻俾画山水道子请用墨浆一缶泼于壁以幕覆之俄顷请上临视山水林木人烟鸟兽无不备具而且精妙道子徐步指点岩下一小洞叩之忽开一童子于侧道子奏曰此洞有佳致臣请入为陛下先遂跃而入俄顷门闭守城卒曰道子出矣上再往视所画处乃莹壁无复山水何齐东野人诞漫无稽一至此也是不知吴道子之供奉明皇最久画迹满宫禁及长安寺宇也可鄙可笑一至此

许栖岩事不可知而所称对太乙元君引黄庭老庄三语云但思一部寿无穷真人之息以踵其精甚真却似有解悟后令道士算劈太华何神立海桥何鬼又是寐语大约此文唐人传奇如嵩岳嫁女南溟夫人之类

刘忠州晏所遇王十八事见太平广记其文典其事亦核但以所好如此所遇复如此而位宰相领盐铁不思转首而取窳僂利令智昏其斯之谓欤

嵇叔夜传谓舜听佞臣言而杀伶伦八人又云晋文帝令康北面受诏教宫人康不肯从帝杀康于市又一齐东野人矣

司空在南北朝为三公齐明帝之世宁有司空张岳耶东昏嗣位日寻杀僂岂有容司空解官令百僚饯送事耶大抵多宋徽时缘饰以乞恩泽者种种皆此类也

玄真子隐沦之无累者也几于道矣然所谓铺席水上安坐饮酒来往若飞与颜鲁公作别挥手上升则正史稗官与吴兴掌故俱无之可谓画蛇之足矣

张果宇宙初辟白蝙蝠精也叶法善既以太极紫微左仙卿谪降其格高果远甚何以一泄果宿因遽殒绝耶

明皇月夜事一于西凉州观灯两游月宫而其所奉引之人曰叶法善曰罗公远曰申元之盖一事一人而所传闻异辞耳然恐亦诬罔不足信也申元之张云容事别有传奇甚详

郑遨迹极奇然是隱逸之有至趣者也非仙也欧阳子五代史何以遗之

谭紫霄在五代时已识得庄列之旨与释氏合岂不开士哉辞荣谢施百五十而恬然以解贤于杜光庭遠矣黄损仕南汉时为尚书仆射忽遁去三十二岁而归题诗竟去亦奇矣然此诗所云惟有门前鉴湖水春风不改旧时波凡四句皆见贺季真集恐好事者妄传之耳崔伟事诞幻不足信灰袋道士张口如箕五脏悉露见酉阳杂俎然已于舒虚寂传见之而又皆翟天师干佑弟子疑必有一误

李升传与元白饮有絕句所谓谁能无路趣名利臣事玉皇归上清者鍾离云房传亦有之谓为吕先生作当以升传为是

纯阳传不当入邯鄲卢生事邯鄲吕翁开元中所遇也纯阳尚未生

贺员外传谓有乔仝者少得大风疾去家自弃荒山遇水部教之啖松腴年八十上下水如飞数从水部东游过维县元佑初来见苏子瞻曰吾师尝游密州识君于常山道中意若喜君者子瞻留之不可吾师以上元期我于蒙山矣子瞻作诗送仝并以絕句五解寄水部自是世无有见者考子瞻集有之诗甚佳子由亦有赠然其时有识者云仝妄人也元无识贺员外得诗竟去夸于人遂絕不见子瞻

陶隱居孙思邈陈圖南三先生皆不能断九重还往觉陶公微涉有意余素好博综负才鬼之慕则陶公我师晚来殊厌射欲从孙先生乞数丸药救道上贫子归借希夷一枕传五龙睡法耳

水丘子语不多而煞有至理当是得道者

王筌传始遇一妇人乳长于脐（阙）曰吾萧三娘也按西京杂记妇人乳垂三尺者北斗中第七星东方朔知之

张拱传载道士语曰神仙以辟谷为下然却粒则无滓浊无滓浊则不漏由此亦可入道子房诸人乃以丹药疗饥固已迂矣汝欲得此道自此不淫色可也灼然之事吾所服膺

余读宋史林灵素传怪其诞幻甚口而无它奇术今览此传则又甚矣中间有与史不合者故记之传言灵素本名灵蘊灵素者宣和所赐名也其所称以术召致刘后事比

之少君致李夫人尤怪伟史云灵素谓蔡京为左元仙伯王黼为褚慧而今云蔡京乃北都六洞魔王第二洞大鬼头童贯则飞天大鬼母劝帝诛之又云与张虚静侍帝晏游禁中见元佑奸党碑因与虚静各俛首致敬上诗云苏黄不作文章客童蔡翻为社稷臣三十年来无定论不知奸党是何人帝翌日以示蔡京京惶恐乞出而已灵藟居通真宫密室人所不能入京探知其有黄龙帐金龙床朱红几案以为僭妄而疏论之上即与京掩入其室则明窗净几别无一物京乃伏罪而至云实时致西王母降于其室则又诞也史言大水犯都城灵素竭其术不能退而传云水自太子致但请太子拜之当自退其后复上疏云臣初奉上帝命为陛下去阴魔断妖异崇大道赞忠贤今蔡京鬼魁童贯国贼任以重权付之兵卫国事不修奢华太甚切忌丙午丁未北兵长驱流血万里两宫天眷不能保守因乞骸骨归乡降诏不允至冬全台攻之灵素即日封闭赐物携一童子步出国门帝赐宫于温州居之明年八月朔携奏疏托温守上于朝授弟子张如晦偈而化去先于郭外相墓令于穴下更开深五尺见龟蛇即下棺见五色气不候盖土即走至百步外俄而山崩石裂不知所在帝闻而震悼赐文而祭之其官曰高上神霄玉清府右极西台仙卿雷霆玉枢元明普化天师洞明文逸契元应真传道辅教宗师金门羽客冲和殿侍宸行特进太宰同中书门下平章事上柱国鲁郡开国公食邑八千七百户实封三千户赐紫玉方符通真达灵元妙护国先生云至渊圣即位索取元赐七宝珠寻墓所不可得复有雷电蛇兽之异渊圣大惊使使赐御香设醮致谢封为通真达灵真人据此传称为尚书左仆射赵鼎谪后所撰似必有据而史辞第云食邑实封云云不知政和官制无封邑也

皇甫坦即尝为淳熙定光宗后者淳熙晚见间椒风遏之至死所谓皇甫误我即此人也此公故有道术然传不过据碑志谀墓之辞耳陆务观西游录尝过其居殊有轩轻语姚平仲朱仙事大有纪之者绝类锺离云房若此夜功成即不终裹马革亦当于通侯甲第五欲瓮中淹杀苏养直事盖别有纪之者非赵所张饰第尝见一小说忘其名云苏晚年病殆得丹药以起与洪庆善云云后竟以老病终亦无所为元日欢饮达旦披衣曳杖出门驰而立化事也养直少有文行眉山长公尝为作研铭太阳太阴女几诸仙此稍晦其辞耳列仙传记之盖容成素女之术也如楞严经所称坚固而不休息者天地间自有此理亦自有此事第不可为训耳

钩弋夫人奇女也为武帝所识孕十四月而产昭帝燕齐方伎之余士尚好言之若以为仙则梦呓耳

传以麻姑为王方平妹尤可笑此事惟颜鲁公所撰坛记一见之何尝有兄弟语

紫素元君传所载任生事疑即传奇所称封生也韩太华为韩安国妹贰师将军之妇得道在易迁宫中若贰师妇则以巫蛊僂矣意化不在事后耶安国老死者三十年而贰师始贵当是最稚妹耳

王进贤传尚书令衍之小女为愍怀太子妃洛阳乱刘曜掠得之渡孟津欲乱之进贤骂曰我皇太子妇司徒公女而羌夷小丑敢干我乎即投河死其婢田六出亦不屈投河死遇嵩高女真韩西华得度居华阳易迁宫真诰记之甚详按本传太子妃字惠风刘曜拔洛阳得之以赐其将乔属欲妻之惠风拔剑抗詈而死其死节同特死水死刃小异耳惠风以抗刘曜得死而父衍以劝石勒即位亦得死死等耳不有愧其女乎

徐仙姑传仆射之才女年数百岁常如二十四五人独游江湖间寓止寺院有恶少数辈欲以刃制而辱之姑笑曰我女子也而能弃家云水不避蛟龙虎兕岂惧汝鼠辈乎即解衣卧遽彻烛焉众大喜欲趋之忽皆僵坐口不能言明日姑徐理策出山久之乃解姑往来江表颜色转少其行如飞所至神明畏敬亡敢以非意干者愚谓毋论姑得仙道即之才有女能如此真所谓淤泥中莲花也第不知少时何以过活花姑为女道士黄灵微也行止亦相类

李腾空乃李林甫女人以为疑不知林甫亦谪仙也而况其女乎大抵宰官贵臣多夙生有来愿者要在籍失之耳

书陈上阳金丹大要后

陈上阳者名致虚元人也道家书几无所不读于文虽不能雅驯而亦闳肆辨博成一家语其论精气神援据法语警策动人金丹药物妙用亦自可采而至鼎器一章所谓偃月炉者必取之女子之身中则谬矣吾独怪其妄引儒释狎侮圣言以为其罪不减调达善星于悟真篇后已详言之迩来江陵宜黄尚遭毒手不知二大夫下泥牒阿鼻时亦与此老革相见否

李素庵中和集

余始得此书而读之觉其紧爽有味其于一切内外丹药吐纳伸经之术如黄庭参同悟真之类皆指以为傍门小道而究其大指多出禅门如四祖启法融南岳醒大寂语又杂以中庸饰之大要欲成一家言耳非必有所得也吾所闻如尹蓬头赤度子所见如阎蓬头刘大瓢辈逯者至数百岁迯者亦自强力饮嗽兼人傍门小道行之久久亦自有

益第不能出世耳此曹子眉山公所谓啖猪肉者也李先生所谓啖龙肉美者也

书诸真玄奥集成指玄篇第六卷后

此卷所论金液还丹最为详切其引喻亦甚当而不涉彼家话紫阳之诤臣紫贤上阳之司败也

我晁阳师将化之夕以十六字授张厚德而志之曰絶笔也张子装为卷虚左以示世贞曰惟是先师之命所以诏不谷而览者称厘厘焉则子以为奚若世贞乃拜手曰道至矣尽矣蔑以加矣子有心而子自了之曰子而由人乎哉抑鼻祖之训曰常无欲以观其妙又云上德无为而无以为上仁为之而无以为无欲也无为也三圣之道道之管也虽然欲不可作麓观也为不可作外观也凡境接而中有爱皆欲也凡履境而中有动皆为也静而湛然廓然动而不失所以湛然廓然是故无欲无欲也欲亦无欲也无为无为也亦无为也斯心了矣了心即佛矣了心即太上及吾夫子矣晁阳师之训诸子弟盖未有如张子者也何言厘厘哉

弇州续稿卷一百五十九

●钦定四库全书

弇州续稿卷一百六十

（明）王世贞 撰

○文部

△杂文跋

题杨忠愍公三札

先友杨应芳以一身持宗社大计维万古宏纲虽片纸只字皆从忠肝义胆流出以故人争拱璧视之覩此与少司寇吉阳何公三札可知己记应芳下狱时不肖以橐籥获侍谈笑从容谓留铨有三君子郑公晓吾所师杨公豫孙吾所友何公吾师友之间又谓吾即死以累足下不者三君子可不朽也明年君赴义已杨公用中丞卒官郑公用大司

寇卒于里盖十二周而应芳之天大定赠秩易名专祠録后之典备而何公亦老且死矣不朽之托是三君子者不一酬也而余幸与少师华亭公终之人不可以无年信夫何公之子仁仲以三札索余题后不觉泪下沾楮

题袁柳庄卷

明兴以相术名世者独袁太常珙尚宝忠彻父子太常术尤神妙而稗史仅载其识文皇龙潜一事即姚少师广孝奉敕撰志铭亦不能致详仅有云事具九灵山人戴良传而已偶有鬻书者以一牛腰卷来则戴传与诸公之序跋皆俨然戴传极为典核而诸公中如苏平仲唐愚士王达善曾子启胡若思辈尤号文学知名士又有所谓僧道衍者即广孝也余故稍为次第之而命学生王应宾书志铭附于后庶几异日传方技者不至寥寥此亦其一助云尔

又题袁柳庄卷

双槐岁抄记廷玉自丁丑谒成祖于藩邸至己卯遣归为民人周继祖讦告按察僉事唐泰械至京释之惟命大医院使戴原礼取相书以进壬午六月成祖登极命千户张勇典膳徐福驿召之既至拜太常寺丞又云廷玉尝以事过靳见一妇乳女于榜廊哭甚哀问之云夫当戍赵州今在酒肆饮毕即行矣廷玉恻然与俱至肆所诘其夫曰我韩岭金世忠也居以卜度日今缺戍为族人赂卒长以我行廷玉为相曰此尚书骨也勿虑因代偿其酒价且贷米二斗赠之曰富贵毋相忘金至戍以卜行文皇召而试之金有才辨应对蠡起不穷遂得幸迨举兵俾署长史篆累迁兵部尚书兼詹事此皆可以补志传之佚其相金公事甚奇然永乐中诸贤题赞皆极称廷玉之验而了不及此事何也因附题于后以备考

题李文正都氏节义卷

李文正公宾之为太仆都先生玄敬序其先节妇唐氏及义士文信事而手书之都氏之后微而玄敬有女归于陆司训肖孙年九十一而终文正以词翰名天下搢绅大夫得其只字若拱璧而两家文献独司训之子昌孺在因举而归之为昌孺母者栢舟之操既不愧于唐而昌孺复博雅能古文辞又庶几成都先生宅相者其寘之青箱中昔人所谓文敏外孙多异书此亦一证也

先司马翰墨后

先大父司马公以厚德名天下覩此与余干令沈君书何必减令尹子文作令者亦不独余干人置一通坐隅贤于崔子玉政论多矣捧诵之余不胜先德之感敬题以归沈君之后人

又

右王父司马公与管方伯先生尺牋凡十六通其三通以命侍史余皆手笔也前辈为人谋必忠信书辞宛曲详缦如家人兄弟然此畧见之内五羊一札云广东二司十月间死者四人皆以忧迫故当是瑾竖窃国时事其忧生畏谗良甚矣然至所谓人食米一升何往不可度日却大是名语读之未尝不洒然也方伯公以老成善吏治有声弘正间与少叅虞先生三人称石交故因其裔孙承时之请而志之

题周氏交游书札

故周康僖公按山西所得朝贤尺牋二十五通其最显者贾少保鸣和郑司徒体元高司寇肃政周司徒子康孟少宰时元陈少司马邦瑞王中丞应韶魏太常子才及王父少司马公高时理粮饷郑抚其地故所往复独多前辈详于事情而简于称谓犹可征也叶文庄虽列晋衔而专治乃独石独石上谷地也衡州君既误属之而仲蔚又误称之何耶孙清非壬戌及第者当是一填守人耳并二宗室书非真迹似亦宜去之太仆不忘其先乃尔异日修通家故事者此卷足矣

张幼于四跋

幼于才有余而此铭能以不足持之非特阅世之言盖内观而有深得之言也昔人读政论昌言而欲人置座右误矣此铭乃堪置人座右耳

又

慧山泉实天下第一余所尝中泠康王谷俱不逮也吴僧圆显編集泉之诗文而邑人尤叔野续之尝属余序今得幼于赞又当为集中第一矣

又

幼于十箴皆精切而口舌耳腹四箴读之尤令人惛然即不佞奉以周旋可以无大咎矣

又

武王受丹书后无所不铭幼于殆得其遗意唯不能忘情于文间出巧语不能忘情于世间出感慨语耳虽然亦可观矣

题竹醉翁集后

顾翁以五月十三日生里中谓之竹醉日云以是日徙者毋弗荣者顾翁既老而乐其名自称竹醉翁所为诗文悉以竹醉弃之而申学士刘侍御其撰传若赞则或称醉竹云夫竹之为竹苍翠劲挺虬须龙鳞修干密节夫人而能知之若所谓醉吾不能悉其状意者藉地粕挹天酒柔篁新粉使人狎而易为把臂欵顾翁之所托于竹醉吾亦不能悉意者思其林若叔夜之傀俄其玉山欵吾虽不能悉竹之醉然时时游于竹仅识竹虽不能识顾翁（阙）于顾翁之诗而窃于其所谓峭蒨青葱者而识其似也异日顾翁进我于竹间吾将醉而更悉之

徐长孺诗卷

屠明府长卿于县斋清暇约沈山人嘉则为乐府五七言绝句各廿章而命不佞嗣响焉一时诸名士如徐长孺辈皆有属和之什雝雝乎盛矣记胜国末吴中饶介之以醉樵歌试诸名士独张孟简第一得黄金一挺高季迪次之得白金三斤余各有差屠明府斋库萧然当别无所觊觊齿牙一余羨耳长孺修辞甚蔚丽有才致当不负明府甲乙榜也其以为何如

题徐氏族谱序记卷

古者相里氏相马氏而独无相人氏然凡称相士者多以相得名者也今读马司业一龙俞宪使宪王宪金问所撰徐氏族谱序记极称其家世为江左乔木而所推重则文甫与其子应福相术之高夫许负一妇女耳以其术封鸣雌亭侯传国一再而袁氏之为天纲为客师者显于唐为珙为忠彻者显于明位至九列遂号鼎贵族今徐氏之族于江左久矣固不待相术显将无以相术益重耶抑三君子之言能益重其术与族耶客有李时养者名善之而乞余题其后

题所书诗与曾生

吾友曾舜征衡楚间名士也吾往岁以文拔舜征于楚棘中褻然首冠盖三战而三不胜一日来谒余问先生读何书何所结撰有以教我否余谓读书垂五车一句不得用著书余二百卷一字不足存舜征俯首大快以为会心至诀将别忽出高丽精茧乞书近诗余亦漫为应之既满卷始悟而笑曰乃令我作诳语人舌不至鼻乎哉虽然吾向者犹不能忘工拙今乃并忘之是以拙日甚也子以为足存或不足存是不在我虽然子而忘我拙必能忘子之工忘则纯纯则天惟无战战且必胜哉

题所赠张平叔诗后

百谷谓平叔壮游嵩中五岳西华峨眉俱以褰裳陟顶所阙者东岱南衡耳昨来面诘平叔则北岳乃曲阳舜祀之所而其在浑源者了未之识也恐西华自青柯坪而上非骨腾肉飞者未易度平叔蹒跚笨伯断乎不能过彼一步也且东岱南衡几席间地何故坐失之平叔解嘲谓峨眉震丹第一山苟陟此足准三岳矣因乞余一言平叔姓字全冒张紫阳紫髯丰頤亦类有道者故篇中稍及之

题旧赠汪仲淹诗文后

甲戌冬余别仲淹燕邸手书此文一诗当时忽忽从车尘中得之了不复记忆今八年矣而复从仲淹所读一过譬之酒谈寤语虽复不伦而往往见真性然仲淹不以余言为荐其攻古文辞益精而去时趋益远所可恠者向虞太公诤而太公乃安之卒与伯子共养以天年终而余与余阿敬亦后先解绂而自匿于畏垒之里岂向者真醉谈寤语耶将无昔者迷而今者寤则仲淹胡为乎沾沾敝帚而强余拂拭之也其归而质之伯子

题月槎诗卷

入園来不能受笔研役而为李时养所强书赠月槎子五言律挂幅又得杂诗一纸久之月槎子以牛腰卷来谒署尾则吾里之荐绅先生词翰咸萃而予杂诗者俨然在焉内程大伦书则予所赠诗王应宾书予四月二日即事第三作也月槎子方外士也方外之士于人间世一切无所好而乃好诗又好书者何也予诗不能工书又不工二君子又不欲蔽予丑而月槎子复好之不一而足岂月槎子有叶公癖予尚得谬称龙之似也耶诸贤中有真龙者月槎子且惊而走矣

题文昌祠投词后

文昌星也于天官家为奎若璧而今以属之梓潼张恶子张神于蜀甚烺烺第其品在云长翼德间独所谓七十二化及主文昌福禄乃至上拟佛天尊号则皆托之乩笔或吃菜事魔人附会之今天下所在有祠而吾州之祠成于陆参政孟昭乞张真人题额后有周舍人宗勉手书投词与陆参政文量杜古狂思男跋二陆周杜皆吾乡名搢绅长者其事为天顺甲申而今则万厯之壬午垂百二十年而手泽若新道士费生辈又能世宝之可念也周后复姓马其名绍荣累官太常少卿直秘阁以书显孟昭以任侠显文量以政术显思男以丹青显张真人者不署名考而知其为元吉去题额之二年而为成化丙戌坐虐杀不辜极刑论减戍铁岭遂为玄教之玷漫尔志之

题张应文杂着后

张君应文尝手録近着数千言以示伯子厚德伯子转示余不觉弹指叹服记泊徐阡时君与余札复往累纸嚶嚶然自诧得古文龙虎之秘冲举可计日而实未脱抱朴上阳前后窠臼今仅两匝岁而廓然尽洗之遂能双佩大寂紫阳两心印横直颠倒无非单刀入阵手段异时陶隱居不免翻供桓真人扫除矣君它作不尽求合古矩矱而瑰奇博辨要自不从凡口中来至粥语粥卦冰壶先生传淡而不厌比而有余风故非徒以文滑稽者也虽然君殆仅仅言之者尔若余乃深得其趣者第日夜老是中而不能赞一辞以此输君耳君诚深得之何不托一钵来就我煨折脚铛而尚恋恋伯子鼎养耶

题手书国史张文忠公传后

有于国史録得永嘉张文忠公传者因为手书一通以贻其孙汝纪贞尝见元驭学士言世纪多出江陵张公手以简严为贵诸大臣生卒行履往往裁削至尽而独于永嘉公传手笔最为典核虽微词小托而推挹良深大瑜小瑕即古传李赞皇奚让矣岂江陵之才畧器业有足相当于中复有真契耶后两公易名俱得文忠其宠灵位望于中兴无三焉永嘉公没而有太师赠江陵生拜之迹其终始恩遇若有踰于永嘉者而永嘉之丝素矣

题郑少谷传丁戌诗后

郑继之傅木虚皆闽人而好操秦音称少陵氏后继之虽野率然入颌犹劲挺且多

感慨时事木虚如搏沙作炊都不成饭不知何以擅此声闻中也继之尝有诗云觉来天地终归尽炼得丹成亦可怜春秋仅三十九以歿木虚弃妻息创大还自诡冲举可致卒卒病死无奇而所赠程半刺茅阳者老而弃官服食草木寿至九十三人固难论也程之孙孟孺文学要余跋存故事耳余乃为二君子树牙頰亦赘矣

题与程应魁诗后

诗成孟孺读之意不恠曰束发弄声律来今种种矣公奈何不有以诲我且公不善书何以独后先论书余笑曰管公明云善易者不论易吾不善书是以论书也吾倦吟矣懒融所谓牛头二十年所得都忘何以语子虽然无法可语即语也子于胎骨森然独少脱换耳必下真种子使如羚羊挂角无迹可寻乃为诗也孟孺复请曰公已具真种子乎与我哉余笑不能应

题弇园八记后

余草弇山园记凡八篇余七千言矣而意犹有未尽者复赘数语于后始余卧离菴园之鸚适轩与州治邻旦夕闻敲朴声而恶之行求得隆福之右方耕地颇僻野而亦会故人华明伯致佛藏经于其地建一阁以奉之前种美筱环草亭后有隙地若岛杂蒔花木捧经之暇一咏一觴于其间足矣辛壬间居母氏忧小祥谢客无事而从兄求美必欲售故乡之麋泾山居得善价而去山石朝夕堕村农手为几案碁盎之属巧者见戕亡赖子不得已与山师张生徙置之经阁后费颇不訾其西隙地市之邻人者余意欲筑一土冈东傍水与今中弇相映带而瓜分其亩植甘果嘉蔬中列行竹栢作书屋三间以寢息而亡何有楚泉之除余故不别治生与仲氏产俱以授家干政其人有力用而侈余自楚迁太仆则所谓土冈者皆为石而延袤之倍中弇再矣余亦不暇问自太仆领郟镇迁南廷尉以归则东弇与西岭之胜忽出而文漪小西之崇薨杰构复翼如矣时与推故第敬美徙居其间乃复治凉风堂尔雅楼及西三书舍则余指也盖园成而后问橐则已若洗第惜政才不能诘余以山水花木之胜人人乐之业已成则当与人人共之故尽发前后肩不复拒游者幅巾杖屨与客履时相错间遇一红粉则谨趋避之而已客既客目我余亦不自知其非客与相忘游者日益狎弇山园之名日益着于是羣讪渐起谓不当有兹乐嗟乎贤者而后乐此余岂有胸无心者第一时狃成事不能如吾家仲宝毁长梁齐之易今悉弃去弗顾戢身一团焦草衣木食以此没齿而犹喋喋为此记者欲令子孙知吾过耳李文饶达士也为相位所愚至远谴朱崖身既不能长有平泉之胜而谆谆焉戒其子孙以毋轻鬻人且云百年后为权势所夺则以先人治命泣而告之呜呼是又为平泉愚也吾兹与子孙约能守则守之不能守则速以售豪有力者庶几善护持不至损天物

性翰为茂草耳且吾一转盼而去之若敝屣吾故不作李文饶之不能为主而吾能不为
主似尤胜之子孙晓文义者时时展此记足矣又何必长有兹园也

题敬美书闲居赋后

敬美归卧澹圃有感于潘安仁闲居之适手书其赋而系之跋余谓敬美殆爱其辞
与二圃风景果蔬花木之属有相当耳若安仁盖热中而强为雅语者夫拙宦则故博士
亦足何必望尘贾侍中学圃则洛涘故佳何必濡首石氏金谷一不审而余波及人白首
同尽致并板舆所奉者而失之矣然自安仁败后洛中滔滔即玉楼金埒锤为磷火郁为
草莽浸淫以逮中原无咫尺赋中地而我娄水一曲当时已自晏然今吾与敬美幸而生
太平之日未老弃羈继相与夷犹于澹圃中虽百安仁何敢望哉然敬美此书肤理细致
而多媚趣骨亦不乏翩翩出祝氏上与安仁此赋却足征二絕也

又

后有元馭一跋峭语直气森森可畏千载枯骨生前作事不审尚得见此君

题手书诗与赵太宰后

汝宁赵太宰先生遣信索余近诗先生为八座长方黑头弃之若敝屣天子强留不
得而书来惓惓以予兄弟出处为念岂季子见遗金不拾而令五月披裘公拾之耶因书
寄七言三十章中间多有赠送家弟者区区凿坏之故与家弟所以亟出亟归归而不复
出大约尽之矣兹与先生约异日以一芒屨谒先生嵩少王屋间便当把臂入林不然而
天子问山司徒启事吾侪名姓若不识可也

题所与陈道易长歌后

余与麓阳先生陈道易交三十年矣六年前自清源来访余弇园极言汝宁风土之
善与汝泉尚书之嫩足依谋卜居焉寻别去不复相闻已忽有传道易非常耗者凡三至
不免投杼与家弟及二三友生太息泛澜久之今年春得尚书一札云且归矣陈道易买
田甚近可以暖老余惊喜过望作数行报之云更得一陈道易也六月九日避暑弇园道
易忽具冠服投刺相访余忽■〈衤义〉衣出迓而左右皆猜恠以为鬼物几欲取桃汤
洒之为语其故相与大笑命酒留连竟日时尚书已得请予告矣吾吴中虚号佳丽苦岁
侵不已食指众无长策应之见道易谈汝宁易作活几欲割儿辈一人从之往依尚书而

不忍也因作长歌书以赠道易归与尚书读之不呼大白罄三斗酒者吾不复弄笔砚矣

题王三公槐荫

王氏之望在琅琊者从始兴文献公渡江以郭景纯讖与长淮并盈涸在太原者以晋公祐手植三槐识语而征于文正公至今艳称之琅琊之裔振振绳绳不肖窃托荫焉太原之裔播在商城则有三公者喜施予焚责券能感异僧远托涅槃而子自宝益为德不替诸孙曾代繁衍而季问遂举乡荐出仕有声实季问之同年生刘太常淳为之志传李廷尉已颜之曰三公槐荫而吾乡沈进士孚闻复为之说甚详夫以晋公之不蘄合世主以全符氏百口三槐之识若执左契而苏长公以仁者必有后归之然考之史文正公有子不甚显而显者乃其仲氏岂文正之仁在大中祥符间不能如晋公耶即不如晋公何至不如仲氏耶要之天道福善亦偶然耳执善以论福更自千里且夫为阴德者不独不使人知之已故不自知也季问两弃邑令以扶侍慈人饭僧听经托钵行化并其名而匿之若不自知为德者而犹不能忘情于其先则近厚聊以答其意而小广之

题所书九友斋歌后

余方持节郟中而以念此九友故作十歌志归无何移南廷尉寻避言还里除留尹不就而是九友者朝夕与余周旋甚适也寻有所感触以为天下之能适我者必殫我遂复作反九友斋歌束身入昙阳靖然尚时时取二藏幡之而远近之责余文者踵至不可拒因复自悟役我方寸以殉人目此雕虫业不小苟从净名居士入不二门而藏亦筌蹄耳拟于岁朝誓佛前一切扫除之而喻子邦相尚喜余九友斋歌以嘉素责书余姑书以复而志其尾要知光明藏中无一物毋论前九歌非当即第十歌所宝此幻躯令邦相觅之不可得差小契耳然则最后一歌亦赘也邦相其谓为何

题与天界寺僧诗后

隆庆己巳正月余自魏郡移浙省取道留京与家弟会宿天界寺遇大雪留滞者将五日时主僧半峯公八十余矣匆匆为米汁所困仅能成一诗亦不及付此僧别去十四年而其雏孙秋潭访余恬澹观则头亦鬢鬢白问半峯公化去亦十许岁矣止之宿雪复垂垂下因成一诗志感会渠出行卷索书因并前作付之雪鸿指爪老宿幻躯所不足论更十四年秋潭能踪迹我于市廛中乃为奇也

题所书近作

大参利瓦伊楨先生出佳册索书得前后赠寄先生与宴会古近体共九首后有余楮复得七言近体十首余年来畏苦思匠心所造都忘工拙然犹未至大落夹至于八法素所不讲又以三钱鸡毛笔作之既成取视真若涂鸦先生书法妙一时乃敢以此溷邨侯架良可笑也第不遂覆瓿令耳孙辈藏之作季子缟带故事差可耳

题王太史二姑山记后

不佞读颜司徒麻姑坛记慨然想见姑与王方平二上真之灵迹而不可得今年王太史胤昌过余恬澹靖出所廿游二姑山记读之觉九咽作青精气两腋习习风生因戏谓太史君是方平裔宜其精至乃尔第不见方平现云杪如卫子卿何耶麻姑以人胜耳从姑之胜远过于麻姑历千万年而君始拈出之所结縁甚深矣异日以为太史治可也太史笑曰吾而方平裔足下独非方平裔也耶命题其后

题与徐长孺三札后

余一岁来得报长孺三纸大要以长孺欲相师故力拒之而会长孺亦用太君善疾故阻此来今年正月太君疾良已而长孺就宗伯聘与辰玉共竹林下铜盆食五日一过观次佐焚修又不废制科业可谓双举其肘矣第以余三纸皆代笔必欲得手书而后快无乃于前书空有之说尚未彻了耶将犹美■靡而及其笑步耶吾家子敬尺牍妙天下安石得辄批后还之古今人好尚不同乃尔

题送敬美弟十律后

去年为敬美弟寄送前后得七言律十篇吾弟始以病乞归吾不虞其病既而不获请吾不喜其留其别我而还江右吾不怆其行移视关中学政吾不美其迁十篇之中盖九致意丘壑焉吾弟不少忤出卷素俾尽书之且云阅诸生卷疲则取以当浊醪遇少得意则取以当药石快哉言也支道人游王孙邸云诸贤覩其朱门贫道以为蓬户审尔则驱六传按部五陵何异蹶履度青柯坪吸莲花掌露哉吾弟行矣毋相忘当扫县阳观半室以俟

题王阳德别墅廿绝句

余既为阳德成旻湖别墅记矣阳德复以肖甫五七言绝句各十题寄示曰子能悉

倚韵和之乎余戏谓阳德子何独不廉于我也属长夏无事遂完此责不知于肖甫如何愧辋川多矣虽然霜后必以乳柑三百颗报我

题汪仲淹新集后

仲淹生平尚节槩不寝然诺然不无仲孺之累其为古文辞雄爽有调而或不免士衡之芜余每一规之辄一小异今年与李本宁来不疑自淇来则恂恂长者已而尽出其新篇读之沈着温茂一倡三叹有余音矣老子曰为学日益为道日损其仲淹之谓耶子之兄伯玉先生人伦之冰镜也归而质之以为何如

题泃塔诸诗后

余五载圜居仅一出吊徐文贞还而徐孟孺以泃塔僧来要余便道同泛礼塔舟子误之将抵泃而暮将渡而大风雨仅一推篷指点得宛在水中央小态耳兴尽回棹居两月而僧以沈山人嘉则冯太史开之屠仪部长卿诗来三人词场射雕手也未复有袁长史履善和章长史亦故人欣然诵之初亦洋洋盈耳转诵之却觉少会心处令人转忆少陵摩诘

题辩疏后

余此二疏凡一具而不止一上而不达矣其草于何存之曰所以志也昔余之起自田里而补魏也南琐台荐之曰宜使佐治国史也故相徐公故宰杨公曰可一面也于是再疏辞不得而徐公去国矣已杨公亦去国矣余自浙参而长晋臬也属老母有采薪而故相高公起长铨高公者先大人同年也而余伏阙请辩时高公与徐公争权而有恶言余是以用母疾乞休高公寝弗覆也而缓其限且语人曰是将卧而待迁乎会老母疾已强赴晋卒卒完棘事老母病复发即单车驰归且上章自劾当是时苟及老母而削籍至尽者快也寻以老母讣闻高公知之曰向者之乞休情乎复寝不行而南中之给事为王为张者御史为姚者其门下士也犹举高公旧语而修之于覲时疏及我矣罪我以与杨忠愍周旋而酿先大人祸蔑我以居先大人丧而纵淫乐先大人之中祸也固权臣陷之自有繇所谓与杨忠愍周还者余疏中语也居丧之苦与吾弟懋偕不茹荤不入内不预外事迨服除而缟素不听声乐也当是时与高公同相者李公张公知之维高公亦知之故琐台语不用也余服未除而抚巡有荐未即吉而补楚臬当是时杨公复为宰寻罢余再与棘事甫毕而迁广西辖未一月入领太仆明年之九月余以中丞节督治郟楚念母以报上及知己有所见辄言言有示许者与示闻者往往戇直不中节而谗间入矣前

是余与楚棘事愤伪学之披猖发策一及之而其魁方用事又与余同年往往阳托善余而阴造不根伤政府语使人不可闻会余量移南廷尉人谓且见疎其魁乃授指于南琐而杨公之疏上矣寻得旨解职候别用故相徐公时里居谓余曰且辩乎余曰不难辩也今犹鸡肋我辩之是求用也居二载起尹应天徐公曰且趋命乎奚辩哉余曰不难趋也趋之是急官也不辩是爱一官甚于人也辩而辞彼许余辞余快也怒余辩而褫之亦快也故事上疏者具揭于三相及宰臣余谓舍人子揭所重张公先疏而后揭毋先揭而疏揭先之彼必阻是市伪也舍人子强为黠者也既唯唯不知其何所受先具揭张公果力止之且为辞见危已而复见甘也限且迫矣垂上事而给事某御史某某之章复上矣又加我以污浊不根事是二人者亦讲学壬人也探意于其魁其魁尚犹用事所以告之如告杨公也仍得旨解职候用余时不胜冤具此疏乞置狱勘而后请死既而叹曰上寛我不诛尚鸡肋我而又何辩之为不辩有自明者辩而有不终明者且彼竟以我求用也已矣夫已矣夫已矣而竟存草者不敢使上见之及政府见之将使里之人见之如以余言信者余犹可以称人于里也不然核而摘我我犹可及死以实三君子之口而快其魁之志也已卯孟夏朔日志

题何将军卖剑歌卷后

张司空破格擢雷焕令丰城而发干莫于九地之下其求之勤若此今何将军特以一贫故捐二十年所佩之宝剑而鬻之抑何衰飒不振也而诸名士顾争为长歌以壮其举毋乃各欲自露其锋与不平之气耶将军毋轻弃此剑异日有知将军者以一骅骝将五百骑西出玉门取楼兰首思复得此剑晚矣唐人诗曰时平壮士无功老语有致可悯吾亡友俞仲蔚独不然其歌宝剑云天下长令万事平匣中不惜千年死此殆为老夫发何将军首肯之乎噫前有元振后有仲蔚而诸名士不已何也

陈公直道编后

余尝谓野史不可尽信作考误数卷以正之吴中陈直道公永锡为藩参为御史三用抗疏忤旨濒百死而益劲天下之人能言之而友人刘子威侍御撰续吴先贤赞于公若有所未满者盖谓公宣德初逮治请室凡五年乃得释复其官则亲前已死狱中乞行服不听又乞归葬乃听至所述赞云作数跌不悔佚兴佚废至陷其亲于囹圄以死不为服虽成直臣名然以此易彼是岂有不得已者则凛乎霜钺之加即逝者有知公无以自解矣后得柯少詹潜所著年谱读之乃公以宣德辛亥下狱明年壬子父思恭死弟礼死又明年癸丑母顾死兄佑死又明年甲寅从子■〈王扁〉死又明年乙卯而后释诏夺情复故官公恳乞归殡终丧新天子悯而许之三载戊午服阙还朝寻出楚而有辽王之

犹然则所云不终丧者谬也夫公之出处非后进所敢议百折不挫之操岂区区一富贵可溺者子威又复云其后世官亦有显者乃多智计用和谨贵显者谓方伯子兼也子兼视余丈人行折节而见友其人清简冲澹恬于进取有凤皇千仞之操母论智计语不相当即和谨亦非所以拟之当子威之成书余不及与相杨榘第子威以文名世其书必传故余一拈出附于直道编后子威不谓余以厚道望生者将必罪余以曲笔媚逝者也余固甘之矣

所记疏白莲沼治芳素轩后

疏白莲沼芳素轩之阅月即为之记人或谓余何健笔研乃尔余笑曰非也吾昨者过离觞园覩危薨杰构瞥起凡二十余楹跨据桥道而昔之所谓鸚息轩碧浪斋壶隱晞发二亭与花树梧竹无一存者仅余前小岛与綠萼梅婆娑映照而已始悟陵谷之变迁是千万年事市朝之转徙是百年事而兹园乃一转盼间事耳归而取吾记读之厯厯犹可数不然则是园者乌有先生而已天下之寿者莫若山山之不尽真者不必寿今吾山与吾记俱幸而有闻于天下虽然吾固知山之寿不能胜吾记之寿也何以征之过永州者觅子厚之愚谷诸胜不可得得之其文夫真山川且然况不尽真者哉

题祝希哲诗后

祝京兆好书自撰数律以其能得晚唐人三昧也亦好作此结法以其稍出眉山双井上也吾所见人间凡十余本此其最翹楚者聊为拈破

汪禹义与子书后

汪禹义与其最少子书凡十四虽小赫蹏必方幅随意数语必端雅有味结字虽草草必具真行法陈苏州德基拟之陶靖节示俨等疏靖节吾所不敢轻言贤于陈暄多矣尧卿其奉以寓羹墙之思哉

书所作乞花场记后

徐孟孺与陈仲醇偕筑读书处于小昆山乞名花实之目之曰乞花场而属余记自余之记成而颇有艳之者会孟孺葬母于天马山治丙舍依止之遂举以归仲醇而别筑室于锤贾山去小昆山五里而迤其室甚陋而地尤胜曰服除吾将以为鹿门率妻子居之仲醇意不能愬然于孟孺也扁其馆曰徐来孟孺亦不能愬然于乞花场也属陆茂才

万里书余记曰吾且时寓目焉恍然若吾身之坐起斯场也昔韩退之还名画于独孤生而记其事今画不知所向而记烺然犹在人世间何况庐舍卉木之迹转眼而付之田更樵牧之手求之暮烟秋雨而不可得当不若求之于此记也孟孺能荐余言否

屠长卿诗后

屠长卿手书五七言古近体二十四章寄余金陵长夏读之令人忘暑其宏丽奔放真才子也若陆平原之材多张壮武之不实小所不能免耳诗语大半道情而夸特甚蕊珠宫所首禁者此不过英雄欺人第今后世视之如李青莲疑其仙去不死余报以一章欲其杜门壁观者十年玉京云駟长安蒲轮总当骈集长卿故不首肯余指聊识其后以自傲

徐武功与诸贤送韩襄毅公总督两广卷后

此韩襄毅公再起帅岭南而故相徐武功先生饯而叙之一时诸君子若夏太常 ■ 〈日上永下〉徐方伯瑄张大参颢刘宪金珏钱方伯昕冯宪副定并徐先生为十人以少陵氏上哥舒翰开府勲业青冥上交亲气槩中诗语为韵而分赋之者也今独业字韵阙盖徐先生叙而不及赋故先生既以分韵而悔谓襄毅公之忠勲戡乱与哥舒之贪残起衅不可同日语奈何以哥舒拟公虽然亦仅取一时之致云尔以哥舒之不能当襄毅岂俟徐先生言之少陵氏异日不云乎寄语防边将慎勿学哥舒譬之韩昌黎之奉于司空书与实录顺宗纪故自为冰炭也是之则为诗与书非之则为史故文士恒例耳独怪玄宗委膈而付哥舒者十余年必使之尽耗河西陇右之财力以病剧不任而后暂已襄毅公之繇中丞而晋大夫繇提督而拜总督宁不隆寄渥锡哉公筭路蓝缕以开岭外百世之安然未能竟三载不病而强以病免嗟乎何幸将之久而贤将之弗克久也是二语也以哥舒则不可以襄毅公则可而是十君子也其名位词翰皆三吴一时选词组零落无异吉光之羽人且宝之而况为公之子若孙者哉

书瓦官寺刻二记二诗

金陵多古名刹其地又多据山水之胜然往往为声酒所污余甚厌之凡三过瓦官寺寺僧独具茗以嘉蔬起麪饼供余辄欣然为饱有载酒从者俾移庖万竹同春二园盖寺僧守梵网木义甚严不忍以口腹破之故也会僧刻余二记二诗因举晨钟午饭二语拈出题其后且戒游者慎毋以酒食下地狱种子也

题寄渔卷

人有不识王弘之者问渔师得鱼可卖否弘之曰吾钓亦不得亦不卖此真所谓寄渔人也题额者陈道复亦玄真子之流序之者王敬臣则羊裘老翁上动星象第不可责之笔墨行径耳觉得两画不署姓名尤堪鼓枻屈大夫前新正杜门疏乞保守鉴湖一曲覩此殊更潇洒

韩氏藏祝京兆所澹记及袁永之诗后

嘉靖初韩襄毅公诸孙有号所澹者乞故祝京兆希哲记而希哲手书之一时以为二絶而是时袁永之兵部与君善后先记诗凡三十五首永之诗名噪一时无能举其书者而书却有风态可赏希哲大都不无枫落吴江之恨韩君之子懋赏合装为一卷偶令余题其后余谓当襄毅公时勲位隆重而韩君乃其亲孙又尝参督府佐都纲能汰膏腴于五鼎中而得不厌之味懋赏贫且浆酒藿肉之不给而又能守其先之训以此迹遗后人其于澹当更难也澹乎相与更勉之

题陆中丞漕白粮疏草后

余既以陆生之请传其尊公阜南大中丞事勒石于其赐莹之阳矣既而得公所上隆庆封事而叹曰陆公其犹有遗称乎哉是余之罪也夫公前后封事凡数十而此其最有德于三吴之人者何以知其然也凡漕卒之艘万其实粝六师食之民之艘千其实啗天子六宫食之卒怙其众而骄其民曰吾为官运也而私运也恣鱼肉之抑之不得先斥堠津梁之人亦抑之且鱼肉之曰而私运也于是民益损其橐至一锤而至一石又往不及期中贵人乘而侵牟之业挫产不能偿公乃与前督漕使者潘君谋疏其状上闻大司农酌之报可于是民漕不得名为私与卒分道而行毋所陪偿天子六宫亦遂早食新矣抑岂三吴之人德陆公大司农亦且德公夫一言而为百世利计孰有大于此者而余遗之嗟乎此非余之罪也陆生慷慨别梓公之疏以行而俾余识其后且曰太史公传贾长沙其治安策不载载之新书世固急言其策而后及传有以哉

游金陵诸园诗后

余旧游燕吴诸名园多以诗纪之诗多七言律而今年二月自家抵郡过徐少参廷裸园得二首三月自郡抵金陵金陵之园不减李文叔所纪洛阳次第游之得十四首适武林卓澄甫光禄以素卷索近诗而冻笔不能应吾乡人章藻工吴兴结法令录以与之

澄甫有园在塘西甚雅丽而余不获游有如异日蹑蜡屐相过能以家酿百斛润笔当更为澄甫园新诗并向者诸作悉手书之第澄甫之爱其酿甚于吾诗及书恐不能也

题牛首诗文后

余与姜宗伯陆李二司寇方司农参牛首及祖堂献花岩既毕而为记记之又为杂体诗咏之欲手书付山门而懒拙转甚展笔而复缩止者数矣会周公瑕自吴中来公瑕书法妙绝金陵缙白亡不爱其挥染者因以属之虽老尚能挥汗结此缘事也六季及唐以来释氏之文仅一王简栖头陀温子升寒山碑而已余皆托之伯施信本登善北海清臣诚悬以传孰谓书小秋山僧其善藏之

题故昆山刘令画像碑记后

刘侯之令昆山也属主上方嘉隆汉宣之效责吏治守令而侯独精心为之前后俛六载始以高第征拜台察又俛四载而士民益讴思之不忘相与伐石树之五父之衢而支学宪可大记其绩刻之以垂永永诸生归有祯既倡其事而又图侯之像于绢素搨支君之文于后俾不佞为之题尾侯之在事则不佞贞跼伏田野间得窥侯之一二大较诚与明合其所近必先实而后名其获必先下而后上其指必先教化而后刑罚所急必单赤而亦不废衿绅之礼以故侯之泽愈久而愈深其士民之讴思亦愈久而愈不忘也侯今晋为天子中执法自是而中二千石而九卿而三公故不至作黄颡川朱桐川厖厖班史一循吏而已也夫一循吏故不足名刘侯然为昆山人名刘侯又安能舍循吏哉蜀人勒文翁像石室至今尸而祝之归生其用蜀人故事俾侯像与支君并不朽可也

莫愁湖园诗册后

出三山门半里许得一弄颇閤寂其北街为莫愁湖园魏公之介子廷和所分受者也诸公子名园以十数皆奇峭瑰丽第天然之趣少目境亦多易穷而此园独枕湖带山颇极眺望之致游者远车马之迹而与鱼鸟相留连诚故都之第一胜地也莫愁不知所得名若梁武乐府所称十五嫁为卢家妇十六生儿生阿侯不过状其闺中之绝而已及沈佺期古意则易为征人之妇宗词艇子难系则又易为北里之冶更误矣廷和治台榭亭馆以快游者又合许太常之记邢太常之额与羣贤之诗为巨册而属余跋之翩翩佳公子哉余游晚亦会园以大水故芜废不治然乔木修筠与斜阳远浦菰蒲苹芡相映带其趣亦自不乏也因检囊得近作一律四绝句书之而复徐君曰不佞归矣亟治之报我瓮中当更成一诗寄君作神游可也

题李金宪墓志铭后

李金宪良材捐馆之第三年而其冢嫡胜任扶服走金陵谒余铭既应之复拜且泣出卷索以请曰是将摹之石而藏诸窆以慰我先君子地下矣毋若李之存者何幸手书此素留为我李家宝庶春秋飨祀出而展之以比于大训河圖乎性不喜书适病疮十指皆屈强姑令侍史録之而强题其后昔韩昌黎手书欧阳四门哀辞而识之曰余生平手书仅此二通而已以遗崔清河刘彭城然不闻其家请之也今李生乃能昌黎我乎吾文既乏二长书又不解八法李氏如有瓿覆其舍诸吾固知生之请误矣

题彭公甫先生传后

余读天台山人所撰彭公甫先生传不觉三乙三叹惜其早逝而不相及也先生崛起草泽之中年甫胜冠而能不为占■〈卜毕〉所绳即以圣贤之道自任其智崇而礼卑即取予微节辨皙不苟易簧之际绰然定见定力矣嗟乎先生之寿仅二十有九使得从吾夫子宫墙之末加以三载即不敢论入室希（阙）庶亦在堂庑间哉若天台山人此传盖曾子称吾友意也

张应文诗跋后

吾友张子始好葛稚川张平叔家言谓内外丹皆可成而神仙可立致余不荐者久之乃潜心葱岭之教多所注释又久之复悟一切放下洒然无一丝罣今年仲冬寄余诗偈如干首则单刀直入葛藤斩断盖深得黄蘗赵州三昧而以游戏出之者使余舌吐汗浹不能收虽然余只是暂时岐路耳张子可留却鳌山顶上受用

弇州续稿卷一百六十

●钦定四库全书

弇州续稿卷一百六十一

（明）王世贞 撰

○文部

△墨迹跋

右军鹞不佳帖

鹞当是右军诸孙小字右军自誓墓后谓我卒当以乐死然间语凝之辈蓝田望不逾我而位遇辽邈当由汝曹不如坦之耶今又云鹞等不佳都令人弊见此辈吾衰老不复堪此曹公有云生子当如孙仲谋人于子孙虽豪贤不能忘情剧可叹也此帖连白石枕邨中战场诸迹为濮中李少师柬之家物米元章之父阿奢以奕胜获之遂为米氏物后有尊德乐道印见元章书史甚详今则割为一卷而有开成二年柳公权记一条岂全卷题字亦随之而割耶结体比它迹形势稍廓落而遒耸雄迈有威凤翔霄神骥追影势余老矣后先所见右军父子手笔唐临至八本譬之玄奘入五印度覩薄伽梵金光明相能不悲喜敬题于后

王大令送梨帖

敬美弟自燕中归得大令此卷后有柳诚悬文与可二跋考诚悬跋盖并右军思言叙卒何期但有长叹念告不二字俱误以为大令故有剑合延平珠还合浦语米元章鉴定之遂拆为二卷而子瞻所题家鸡野鹜同登俎春蚓秋蛇总入奁君家两行十二字气压邨侯十万籤盖右军思言帖尾也元章左袒大令故不谓为然而诚悬跋后细题又一帖十二字连之语皆为元章所削去恐后览者以诚悬跋语致疑备记于此若大令笔虽稍有剥轶而存者犹自煜煜射人眉睫间元章所称天真烂漫故不虚也诚悬构结淳古生平锋锷敛尽隐然有羹墙思吾弟其善有之

虞世南汝南公主墓碑真迹第三跋

余初阅此书以为视右军头眩方帖有入室之妙后见米元章书史谓头眩方即虞所书双钩本在鲍傅师家俗人添入羲之两字及考黄长孺记浚阳人入山得大石中空内有小石刻羲之头眩方比之绛帖字稍纵逸各有妙处然则绛帖头眩方盖永兴临右军笔耳余悬断之语似不减老米目击也米又言宋世大令永兴极不易得真迹虽好事家亦无之然则余之有此碑宁啻吉光半幅耶

隋贤书出师颂

史孝山出师颂系古章草法在宋时有两本天府志索幼安所谓银钩之敏而人间则盛推萧子云余旧于文寿承所见一卷上有佑陵泥金御题征西司马索靖书与宣和瓢印盖天府本也第黯■〈雨上黠下〉不甚可别细翫其行笔处亦似微蹇涩往往有枫落吴江之恨今年秋家弟敬美购得一卷其大小行模相彷彿而结法特加道密古雅墨气如新又有大平公主胡书王涯仆射永存珍秘二印越国公锺绍京半印褚尾米友仁敷文鉴定以为隋贤书遂入绍兴内府余窃谓二迹皆自幼安临出特绍兴之所入者佳而宣和之所藏当小次耳小米不能别所以而槩以隋贤目之大似暗中摸索余良幸获再覩此希世之珍所小不满者子云奇迹遂以永绝令人慨叹

褚临兰亭真迹

唐人临右军禊帖自汤普澈冯承素赵模诸葛贞外其严整者必欧阳率更而佻险者咸属褚河南河南迹尤多米襄阳既于书史称得苏沂家第二本以为出他本上然考之是双钩廓填耳书史又云右军笔精大令日寒二帖薛丞相居正故物后归王文惠家文惠孙居高邮并收得褚遂良黄绢上临兰亭一本乏贖之官约以五十千质之后王以二帖质沈存中而携褚书见过请售因谢不复取后十年王君卒其子居高邮欲成婚事因贺铸持至高邮以二十千得之此本藏深山民间落黄拾遗熊手以百三十金售余后有襄阳题署备极推与且云是王文惠公故物辛巳岁购之公孙瓛与书史语合按苏家本于崇宁壬午闰六月手装此则壬午之八月手装耳书法翩翩逸秀点画之间真有异趣襄阳所称庆云丽霄龙章动采庶几近之盖山阴之喆嗣而苏本则其仍孙何得甲彼乙此耶今年为万历丁丑上距装裱之岁盖七甲子少三正朔耳安得不六倍其直也又有李伯时一跋虽真迹而似非题此卷故剔之以戒蛇足

颜鲁公书竹山潘氏堂联句

唐太师鲁郡文忠公在吴兴日宴客于竹山潘氏堂联句而手书之凡十九人如处士陆羽僧皎然李观房夔辈皆知名士而所谓粲颀须者于公为子姓皆有文行官爵具家庙碑中公此书遒劲雄逸而时时吐姿媚真蚕头鼠尾得意笔大较与家庙颀颀而此乃手迹又当远胜之第宣和书谱实载之目录而考无佑陵御题及宣和瓢印前仅冠以缉熙殿章而后有米元晖鉴定按缉熙殿理宗朝所建也虽隆准宛然能无邯郸子舆之惑乎哉不知靖康之变玉盃金鱼散在人间虽以光尧悬勇爵饼金购募而应者拆洗去之小米能别书不能别所以或为讳其自至理宗日始加以秘殿章识耳此事与杨少师神仙起居法极相类晋府图书则当见收于恭王以永乐之籍入纪纲手而后佚之如高克明雪霁山行之类不可胜纪余既书此人或笑余直当以八法定真贖不当琐琐出处

令后人目以为黄长睿也

徐骑省篆书千文后

此宋右散骑常侍邠州行军司马徐铉鼎臣篆书千文宋寿皇以赐魏仆射杞者后有诸名贤题跋按骑省篆法朱长文肩之妙品以为能继李秘监绝学于丧乱之余其行笔点画皆精严有法度今此千文虽未敢谓得岐阳峰山之秘而螺匾隐然文武兼济其为真迹无疑独寿皇称赐尚书左仆射同中书门下平章事魏祀而系载淳熙考之杞以干道二年十二月拜右仆射同中书门下平章事至三年十一月而罢八年改左右仆射为左右丞相明年为淳熙改元以后固无所谓左仆射而杞于其时已卒未尝为左仆射也得非好事者为画蛇之足耶老谬多遗忘聊记所闻于后俟真赏者鉴定焉

按此书亦不恶而少劲密无徐骑省古意跋尾皆一笔俗书以至御笔与玺皆伪作盖不特官称之误已也吴中一子欲售余不应乃强余跋读毕怏怏而去后闻售之嘉兴项氏得百金盖割去余跋而后欺之也谚云若无此辈饿杀此辈然哉

林和靖杂诗

右和靖林处士君复手书七言近体五首其语冲夷可咏而结体尤峭劲然有韵态不作崑崑骨立也苏长公一歌其推许此君至矣然至诗如东野不言寒书似留台差少肉二语便是汝南月旦何尝少屈狐笔也留台者李建中也尝分司御史台考之集称西台以偶东野当更称耳长公书法匀稳妍妙风神在披拂间而丽句层出尤刺人眼始钱唐人即孤山故庐以祀和靖游者病其湫隘因长公诗后有我笑吴人不好事好作祠堂傍修竹遂徙置白香山祠与长公配故迨于今香火不绝乃其遗迹与长公同卷价踊贵十倍太史公有云伯夷叔齐得夫子而名益彰若君复者抑何其多幸也欤

范文正道服赞

范文正楷书道服赞遒劲中有真韵直可作散僧入圣评赞词亦古雅所谓宠为辱主骄为祸府是歷后得之非漫语也跋者皆名贤大夫而独文与可黄鲁直柳道传吴原博最着鲁直结法端雅了不作生平险侧而过妍媚极类元人笔如揭伯防陈文东辈亦能办之恐鲁直真迹已亡佚为元人所补耳成化中御史戴仁赞书颇得吴兴意而名不琅琅故拈出之

又题伯夷颂

此帖与忠宣公告身跋之月余而其后人主奉不能守作余质库中物者十年矣余闻之数责其以原价取赎不得今年初夏悉理散帙分授儿辈因举此二卷以归主奉且不取价嗟夫余岂敢以百金市义名顾满吾甘棠勿剪之愿云耳为范氏后者时时念文正公之手泽为它人者远则念伯夷近则念李总管庶几其常为魏公家有哉

范忠宣告身后

题忠宣公告身之一月而为吾家物又十年而始复为范氏物微吾非若有矣昔灵武中兴有以大将军告身易一醉者当其身则可范氏之子孙慎毋以忠宣公为酒资哉（后觅其家付还之故云）

六大家十二帖

余得蔡忠惠安乐扶护二帖黄文节睢州毕大事二帖于柘湖何良俊氏忠惠帖皆手札藏于其外甥谢氏者仓卒间不作有意笔天真烂漫而结法森然自如文节小似涉意险峻与流利相错前一帖神采尤更焯焯更数年中得苏文忠祭黄几道文于朱司成大韶家送梅花帖于嘉兴盛氏考祭文是元佑三年书玉堂视草匆匆间精思构结乃尔后有钱状元跋真而不能佳去之送梅花帖大自古雅十指拂拂吐生趣又得米襄阳殷令名帖于故人徽州李守道氏颜真卿帖于华亭杜生亦柘湖旧物也二帖皆跋古碑及墨迹者神骏有风姿虽字不过小楷而有径丈之势第后一帖极讥颜柳之挑剔而已首犯之何也李少师东阳一跋颇精故留之又得赵文敏骑从帖于嘉兴盛氏弭节帖于吾州周应元氏周藏此帖二百十五年矣以余之喜书也辍以相赠二帖剧有右军父子风圆俊精纯可爱最后得薛翠微三札于王宗伯锡爵氏薛书迹传世至少而余独得上清时享四帖于此三帖此君书名不能敌四贤而结法自山阴似不甘其下文休承上清等帖啧啧称此不意有偶然之遇因留其二于赵前而附旧跋于尾其一帖并卷内昔藏苏公久上人米老诗二帖另真宋贤墨迹卷然二书最致佳品于此卷未易雌黄也吾于六君子书竭资力二十年数得数汰如波斯大舶主采宝山非一地亦非一时也但不至作彼曹剖身駮耳因详记于末以示后人

宋名公二十帖

右宋名公简札合一卷翰林学士李宗谔送从表兄诗中有云铜鱼四明守当是知

明州也宗谔字昌武饶阳人故丞相昉之子仕至右谏议大夫王文正公旦嘗荐参大政以癯相钦若阴中止其称学士当在景德二年后呼表兄为腹兄不知何所据按老米谓宗谔主文既久当时试士无易书例故争为肥褊朴拙以投其好今考之果尔然则公书虽不见赏专门亦负时趣耶范仲淹者字希文吾吴人有二帖遗尹师鲁舍人此其一也尹时谪居故帖内云云朋友之道尽矣跋者多宋元人吾仅留尤袤常之无锡人以秘书监终谥文简范公由政府以兵部侍郎知邓州卒累赠太师谥文正轼者苏轼字子瞻眉山人为吏礼兵部尚书翰林承旨以端明龙图二殿学谪儋耳赦归提举玉局观终赠太师谥文忠此寄久上人帖古雅为生平尺牋最墨光奕奕射人眼睫应接不暇黻者米芾吴人以乳媪荫得官止礼部员外郎知淮阳军此送提举通直诗结法雄爽有逸致而不至作生平佻险其书黻则郇公行押体也又絶句一首无姓名而有缉熙殿宝考其诗是黄庭坚语庭坚字鲁直豫章人由史馆累谪宜州卒追谥文节此书翩翩老致而结构森然诗亦婉致所谓春来诗思何所似八节滩头上水船殆类余近日伎俩可发一粲绍彭者薛绍彭字道祖中山人号翠微居士累官秘阁修撰知梓潼路漕与弟嗣昌辈俱有名所谓河东三凤者也此与赵大年借墨帖古气淳淳遒劲中盖余所宝三帖之一也沈与求字必先德清人以知枢密院卒谥忠敏自谓屏迹里居当是知潭州丐祠时也世忠者韩蕲王也字良臣庆阳人以三镇节致仕卒史称其目不知书晚岁忽有悟能作字工小词据与司农总领帖当是太保领元枢时耳而结法颇遒丽恐其时尚未入悟或佐史笔也允文者虞允文字彬甫仁寿人以左丞相兼枢密使出宣抚川陝进少保封雍国公谥忠肃此公盖南渡名臣灼然者吾以其慷慨议恢复近张魏公而识时宜胜之书法出锤成侯虽不能精诣亦自古汪藻者字彦章德兴人仕累禁近后以显谟阁学士谪死藻有文行饶志节其书亦出入米襄阳衡者叶衡金华人以右丞相枢密使窜郴州后复官予祠衡以进士十年取相位以宰相片言得罪时多疑之书虽不免墨猪而有拙意且以力胜王十朋者字龟龄乐清人年四十七状元及第又十七年而以龙图阁学卒所与书极辨者不知何许人想亦工佛法者公可谓能卫道矣蒋璨字宣卿绍兴中为户部侍郎敷文待制史不载载书史所题冲寂观二诗极俚浅而书笔圆嫩翩翩得晋人意考诗注称伯考太师枢密当是蒋颖叔颖叔嘗知密院其称太师则以子阶歷侍从加恩故也冲寂观在阳羨乃其家香火地绍兴甲子已不无黍离之叹今不知有遗迹否王淮字季海永嘉人以左丞相枢密使罢为大观文卒谥文定札子当是答故相或执政者其人亦非下中以庇一戚故受朱紫阳掎击无余地张纲字彦正丹阳人嘗至大参以资政殿学士致仕卒谥文定用太常驳改谥章简此札似得致仕恩谢执政又为其子先容耳范成大字致能吴人假紫微使金人起声至参政后以大资领祠卒谥文穆其书最得二家法此小草亦离离可爱孝祥者张孝祥字安国乌江人以词翰名弱冠及第歷典大郡官显谟阁直学士卒年仅三十又七安国射策合执政得状元得状元而忤执政不调良可笑也楼钥字大防鄞人累官叅政以大资领祠卒谥宣献其书辞黯然而札亦称之

了翁者魏了翁字华甫蒲江人以枢密同佥督视江淮军马赠太师累封秦国公谥文靖公名位俱亚真文忠而恤典远过之此书仓卒为密戚吊慰故旨恻而辞絮笔亦草草张即之字温甫孝祥从子以父孝伯荫补官至直秘阁寿八十余与孝祥俱擅临池名而即之尤琅琅此行体不足言然却不堕恶道余初得十五纸于昆山六观堂周氏内有不知名人及吕资政嘉问钱枢密端礼余恶吕之盗从祖公弼疏草而示王介甫也钱之附汤思退而左张德远也故汰之并汰不知名者寻得黄忠节一纸于曹进士茂来虞忠肃一纸范文正一纸于其后人蒋宣之一纸魏文靖一纸于从孙定鼎詹簿遂并旧所秘苏米薛三纸合之得二十纸吾家尔雅楼何必减吴兴墨妙亭哉尤可快者能汰钱吕作书家一董狐耳

东坡手书四古体后

坡仙所作煎茶听琴二歌南华寺妙高台二古选中间大有悟境非刻舟人所能识也南华诗最后作考其书是海外鸡毛笔所挥染故多纖锋大抵能以有意成风格以无意取恣态或离或合乍少乍老真所谓不择纸笔皆能如意者也人云公书自李北海此书独得之汝南公主志枯树赋余见公墨妙多矣未有逾于此者敬美自燕归出示余漫题其后俟长夏无事当尽取四诗和之

苏子瞻札

千乘侄屡言大舅全不作活计多买书画奇物常典钱使欲老弟若劝公卑意亦以为然归老之计不可不及今办治退居之后决不能食淡衣粗杜门谢客贫亲知相干决不能不应副此数事岂可无备不可但言我有好儿子不消与营产业也书画奇物老弟近年视之不啻如粪土也

苏长公此札家人语耳而中余病如描寫蒲传正不知作何许状想亦是好奇落魄不问产业者数百年中乃亦有此两人也记以自规且自笑也

苏长公书归去来辞真迹

坡公为卓道人契顺书靖节先生归去来辞于法书中最为高名而余所见者石本窃怪其腕力弱而锋势纖脱戏以为三钱鸡毛笔罪过归田后从文休承所得真迹阅之真所谓回头一笑百媚生六宫粉黛无颜色者懊依生平石本观皆卤莽耳契顺吾吴定惠院行者院今为寺尚在吴俗藿靡乃有此奇人与奇事惜犹为名使非行脚本色而钱

世昭纪闻则谓佛印了元有一札附契顺与公公跋语了不及了元岂故略之欲以见契顺重耶了元札大要谓权臣忌子瞻为宰相耳人生一世间如白驹之过隙二三十年功名富贵转盼成空何不一笔勾断寻取本来面目又曰昔人问师佛在甚处师云在行住坐卧处着衣吃饭处没理没会处死活不得处子瞻胸中有万卷书下笔无一点尘到者地位不知性命所在一生聪明要做甚么计苏公得此当汗簌簌下三日不应漫然都不及也靖节归去来辞是羊沟内三尺地事坡公与契顺所作是鲸海外万里地事以此自拟与拟契顺皆不类跋语以鄱阳校蔡明远拟契顺又不类题尾者永乐间馆阁二公皆以字行皆得赐谥文靖而才气与公又总不类（此亦是佳临本耳为休承不免曲笔）

坡老洞庭春色中山松醪二赋

洞庭春色中山松醪二赋实此公酒经之羽翼成而絶爱之往往为客书所谓人间合有数十本者余与敬美所见石本一则草而瘦一则楷而放与此迹颇不同此迹不惟以古雅胜则姿态百出而结构紧密无一笔失操纵当是詹山最上乘观者毋以墨猪迹之可也赋语流利伉浪亦自可儿计此公将过岭留襄城恰得五十九岁与余正同余不赴刑部侍郎庶可免岭外游第断米汁来仅旬日已与二赋无缘不知此公而在能首肯否

山谷书昌黎诗

生平见山谷书以侧险为势以横逸为功老骨颠态种种槎出独此录昌黎送符城南读书诗小行体尽敛其怒张之气而为虚婉与兰亭异体同用尤可宝也昌黎木强语山谷爱之其示相与送符事相类第昌黎晚节贵盛故其谈读书之效津津然山谷以笔札得罪流离放逐生儿愚鲁亦是佳事何必强之读书耶放笔一笑（此书是真迹而经水渍以故不能佳）

山谷伏波神祠诗临本

山谷书刘禹锡经伏波神祠诗最为奇逸有滢洄飞舞之势后有张安国范致能李贞伯文征仲诸跋皆佳初自华东沙氏售于吾馆甥叔阳意忽疑之持以见畀偶囊涩不能应得旬日留托王君载双钩而俞仲蔚廓填之虽不尽得其妙比之搨石尚少一重障也卷今为嘉兴项氏以重价购得佳人属沙咤利矣可怜可怜

薛道祖墨迹

宋思陵称北宋时唯米襄阳薛河东得晋人遗意虞道园则谓黄长睿有书学而笔不逮识绍彭最佳世遂不传米氏父子举世学其奇怪弊流金朝此卷雪顶山诗帖能以拙藏巧上清连年帖皆书所作得意语波拂之际天趣益发在绵帖与上清微类而加圆熟通泉帖咄咄逼右军几令人有张翼叹大抵笔多内擻结取藏锋妙处非乍看可了前辈语固不虚也道祖襄阳同时人尝以从官典郡与刘涇俱好收古书画翠微居士其别号也

薛道祖三帖卷

翠微居士薛道祖书学最古法最稳密而世传独最少惟道园亦自恨之十五年前余尝得上清连年实享清适四帖以示文仲子仲子大快以为所睹惟晴和二像随意吟三帖不谓复覩此真足以轩轾六朝追踪汉魏今年忽于元驭宗伯所见此三帖不觉失声叹赏居月余偶及之则云偶以寄吾弟家驭矣家驭亦不甚鉴许又月许而家驭自留都辍以见况云公何自爱之吾不敢知也世固有遇有不遇岂道祖书遇余而不遇家驭兄弟耶抑家驭兄弟割所爱以殉余而故隐之也仲子又亟称道祖所临襖帖尤妙絕此卷实尝落余手以贄西川王大夫作先公传度不可再返惟时时属大夫子续之勿轻与人而已跋有居仁者陆姓亦胜国能书人

又

此大三皆与大年者盖宗室令穰也画品超絶与道祖翰墨契甚深吴文定跋惜其不列于四大家为之扼腕按道祖之先少保嗣通者书法有舅氏褚登善宅相时人语云买褚得薛不落夹而道祖与米元章实齐名故元章贻之诗云世言米薛或薛米犹言弟兄与兄弟然嗣通笔怯不逮登善乃得列欧虞四大家道祖品高无逊元章顾独不得与苏黄四子并者嗣通■〈足必〉跋墨林旭素颜柳尚未出而道祖时四子数已满故也与道祖颉颃者章惇蔡京卞俱有可观以人故不齿云

米元章跋奕碁图

围碁坐隐出神仙手本是雅事而为米老作聚头磕脑语使人憎畏然再翫之亦自有颠趣书笔极遒劲有意作纵逸而少姿态不使人爱若冯海粟待制毕力作此歌与此书皆可到也跋尾亦类元人乃不知所以（后有善鉴别者亦云是元人但不能辨其为冯海粟耳）

米元章尺牋

坡老题米元章所藏右军思言三帖云君家两行十二字气压邺侯三万籥元章笔不尽如右军然亦奕奕神彩不作强弩砍阵势数之得字至三十二吾不知孟氏所藏书视邺架如何其赏爱之当亦不下坡老也第方先生以受知先帝一语谓为贻坡老者则不然元章苏门后进中醜翻往还竿尺极绵笃决不作世情盐醜语名讳一印章亦画蛇之足聊为拈出之勿使强解事者作口实也

羔羊居士饮中八仙歌

羔羊居士者名升逸老其字也宣和中尝以草书进御得官此卷少陵八仙歌暮年纷披老笔有怀素杨景度遗意乃其字逸老遂欲弟视右军何也得非所谓骑骡馱馱欲度骅骝前耶杨用修识其意第疑其为南唐王文秉则大误矣

宋徐内翰小楷莲经

徐内翰作细楷莲花经以为无漏因不知多宝药王悬记嘱累诸品皆种种权摄耳罪福俱空何所住耶此公称自信居士乃不能信心即佛良可叹也

宋元人墨迹

此率皆尺牋宋人得三纸元人得九纸而中间最知名者宋人如吕龙图嘉问钱参政端礼然皆不成字符人如邓学士文原张方外天雨外其间不知名人翰墨颇有絕佳者以此知赵魏公之所倡率于胜国八法功不浅浅也

张即之老柏行

余所谓温甫好书老柏行此即其一也峭骨成削如画枯木丑石而中间微带一点生气凡温甫书余悉以乞好事者不惜今春晒书偶于败簏得之稍为装池俾伴古迹若螯之守鲤金象之配玉不念乘风飞去耳

张即之书杜诗

张温甫书如苏家木假山秃节挺秀槎牙四出此卷更勃郁有生气其所托旨于杜歌四章盖愤中原之陆沉冀恢复之有日然未久而黍离继之良可慨也内舅甥作舅主又倒寫凡两字盖老手多悞无足致疑

又老柏行

张温甫虽以世胄起家然其痛中原之板荡忧宗国之黍离往往于翰墨发之故特好书孔明老柏行而所谓根若青铜霜皮溜雨者老笔槎牙亦自相类第余前后所见凡四五本皆不能快而我州牧仰松公所藏最为杰出盖其风神豁格绰有生气如自巫峡雪山间来者公絶宝爱之以为足当雪堂双井则仆未敢遽许昔张彦远评估谓伯英书价可以敌国岂张氏诸贤为清河左袒例当尔耶一笑

宋司马温公梅都官王荆公王都尉墨迹

右宋贤遗墨四帖皆真迹也涑水公全得古隶遗法少姿耳生平不作行笔与韩魏公同意宛陵以诗噪一时与欧九齐名此书古雅殊胜之今人于书知欧九而不知宛陵名之不可以已如此金陵结法草草紫阳笑之谓公一生那得忙如是然双井极推重以为有狂素风杨家秘余不能决独叹此公之于涑水文学行谊无不差池而晚途乃若冰炭此公无一笔楷涑水无一笔草于此可以窥见其微王副车翩翩浊世佳公子也覩此札知其步趣詹山至矣独不能得其风神耳春月病疡十指如槌而强为题此恐不免貂尾蛇足之诮

米赵四帖

右敷文阁直学士米元晖书一纸翰林学士承旨赵子昂书三纸敷文所跋乃其父元章临唐陆柬之帖今临帖已不可见矣敷文奉旨鉴定故结法精密远胜它作夫以小臣之临笔而至厘万乘之宝藏思陵之好尚可想也承旨与幻住庵主赤牋前后累数十百纸此牋皈向尤切结法尤婉丽可爱归田一赋出入河南北海用意小过所与直翁书内云自冠便知读书属文中间不幸为杂好所分如弹琴绘画吹箫奕碁日夜不休尔后觉吹箫不甚佳最先弃去次知琴碁为理甚长而世俗皆不解于是极意讨论既得其说亦弃去不复而独于画未能忘情而人不知其用心之苦此等语非直公实录亦风流有味今世人宝承旨画不啻拱璧此老知之地下履齿亦折矣

题孔炎所藏宋仲温絶句后

汉以白鹿皮荐苍璧不过值数千耳而皮至四十万宋仲温一纸诗既不工字小劲而寡天趣吾弟及助甫诸君跋尾却大有俊笔真所谓本末不相当矣隆准诸王孙先后故多奇诡哉

苏长公三絕句

苏长公画竹草草数笔不伦不理而浓淡间各自有天趣书笔只两三字带诚悬余俱本色苍劲之中媚态雅韵靡所不足七言出律入古有声有色有味第不当于骊黄之内求之余几欲为东图和此韵既而放笔曰不若且容此老独步

题詹侍御藏马麟棊鲜于伯机歌行真迹后

督学使者詹君明甫出其先世所遗马麟古棊图及鲜于伯机书长歌一章于今汪司马伯玉之记赵司成汝师亡弟太常敬美之跋而示不佞世贞曰吾詹数百千载为抚名族盖至宋淳熙中而詹氏圃之棊即以奇古见图其圃可知己且又百年而元之才僇若吴幼清戴式之虞伯生鲜于伯机揭曼硕俱有歌诗纪其事其歌诗皆称其人而独麟之画伯机之书以精妙擅名海内今又三百年矣吾詹之族指转蕃宦而显者不絕而问其图与歌诗皆不知所向何况此圃与此棊盖唯有指点想象于暮烟秋黍之滨而已不穀乃以偶然而得之其费不过数鍰之直而詹之宝虽连城万金璧未与易也不穀将有意于先生之一言故特携之白下以待先生而家不戒于火它图籍悉委之烬而图与歌岿然若灵光之独存岂造物者以詹氏文献故巧而归之复巧而全之耶其归也其全也是殆非偶然者世贞窃谓楚弓之人失人得当其身可耳若周鼎之忽沦忽出承宗祧之后而为世守者其重当何如耶是以春秋于盗窃宝玉大弓与得之不一书者何志守也麟之画伯机之书即非为詹亦不必詹之后人得之且以为拱璧今在詹而为詹宝者又当何如哉姑用是赘兹卷目以语明甫第相壤而得吉以植棊大辟圃而藩之与兹卷相禅于千百世此非其祥也耶

题米元暉手书诗后

米礼部芾寿止四十五而其子敷文至八十二书法则不啻箕裘而已此敷文所书诗叙语后缺一行诗六章前缺一行纷披老笔適媚险譎是晚年最合作笔诗句云我今将及古稀年可证也若其语之沓拖潦倒不无南渡门面老颠家风

弇州续稿卷一百六十一

●钦定四库全书

弇州续稿卷一百六十二

（明）王世贞 撰

○文部

△墨迹跋

赵松雪书千文

右赵承旨千字文不言是何年书当是至元以后延佑以前无疑也盖其功力既完精神正王故于腕指间从容变化各极其致中有疎而密者柔而劲者生而熟者缓而紧者出山阴入大令傍及虞褚不露蹊径正以博综胜耳文待诏乃谓师李北海吾未敢荐也三十年所见千文真迹多矣绍兴董氏智永真草从规矩出风度当为第一本三辰顾氏怀素草从风度觅规矩当为第二本此卷折衷二僧间具体而微不免屈居第三若赵模时代虽古而韵不足鲜于枢骨力虽强而气不清四五之间尚为幸矣敬美试核之不谓楚盲师强辨璞否

又

今年六月有故人以赵文敏公千文来售者初阅之则潦草酬应厌勑笔墨之意可掬为再三过时时得佳字重翫之则构结波策有不容言之妙觉右军父子出入腕指间文休承谓生平见公草书仅二本此本尤佳絶盖公以至治二年壬戌四月廿八日书以六月辛巳捐馆中间闰五月十八日曾跋子敬十三行洛神赋谓老疾不能作跋雨后稍凉书此盖去书千文仅二十日耳是宜其有厌勑色而老手斲轮运斤成风之势故不容掩然公自是翰墨縁且尽矣余置书画縁亦于今日尽临纸黯然低回久之望日晒书题

赵松雪书归去来辞

赵吴兴书归去来辞极多独此为第一本妙在藏锋不但取态往往笔尽意不尽与

余所宝枯树赋结法相甲乙余生平见苏长公鲜于伯机及公书此辞不少然见辄愧之自己郊冬决策不出明年弃家作道民稍堪一舒卷然陶公好酒乏酒费余好酒酒费颇不乏而年来厌谢杯勺以此竟输公一筹人间世贵人嗜书画若渴独此辞以见讳得免近始属吾弟敬美敬美倦游且归矣归则远出吾上再能作赵公书步陶公辞第畏酒一筹亦恐不免输却因戏题于后

又

彭泽天隐人作此天隐文字一绝也以吴兴书书之二绝也以吴兴画画彭泽像三绝也吴兴称右军兰亭能乘退笔之势而用之此书正是退笔疎密师意不堕贞伯奴书消四绝也吴兴此画尤出尘跌宕道元伯时间独得彭泽风气五绝也跋者柯敬仲黄子久诸名儒深于二家理六绝也幸不入长安朱门为吴兴里人姚生所得不减彝斋之宝定武七绝也观者吾弟敬美近弃秦中绂彷彿柴桑栗里之致而吾与元驭学士以两道人从旁舆之八绝也去重九不四日天高气澄大是展卷候九绝也恬淡观中焚香阅之髯枝四垂篱英欲舒居然松菊三径十绝也题此后吴兴固为我绝倒彭泽当亦不免作虎溪笑如何

赵松雪书归田赋

赵吴兴子昂书张平子归田赋有以为类宋人者当是见其取态谓米襄阳见其藏锋谓薛河东耳不知结法自二王来而大令分数独胜其视二子居然有闭门造车开门合辙之妙与余家所藏天马图赞杂诗迹正同大较高处在肉不没骨筋不外透虽姿韵溢发而波澜老成譬之丰肌玉环作霓裳舞谁不心醉平子此赋殆是解太史令五年内作聊以寓其萧散跌宕意耳春秋至六十三尚作尚书典枢要岂若渊明之真能咏归去来者史固称其少工属文贯六艺善机巧以后身之蔡中郎始究八法而兼综之千载而得吴兴其才技风流大有相赏契者而丰生老諄不学仅取归田之名而恣其甚口于宋王孙宁非所谓蜉蝣撼大树耶且吴兴卒于至治二年年六十九而今谓延佑以后七十余时笔结法妙脱蹊径非祝希哲十九首畧近之而嗤其颓笔老态遇杀风景人无可奈何因附志于此

赵松雪行书唐诗

余尝评吴兴作北海书往往刻意求肖似胜而不及独此数诗笔以自然发之风骨秀逸天机烂熳佻而能紧真有出蓝之嫩六观堂藏赵书无不佳者阴符经枯树赋及此

而三今皆为九友斋中物矣书此以志沾沾

赵松雪墨迹

赵吴兴拟古五首尖利遒逸出入李北海所谓本色书也赵有本色书犹沈启南有本色画第非最上乘耳然结法无一笔失度要之极真无可疑者末一札稍自放逸以不经意故佳耳书辞却可笑称无等僧录吾儿无等者僧字也然前后自署名唯谨至吾儿二字辄提上盖公笃于佞佛其夫人管氏致书中峰和尚称女弟子而公所度坟庵僧即拜公为义父以故书辞中皆僧俗两家事使世眼人见之鲜不以为贗者第果膺笔却不作此理外称谓也

赵松雪洛神赋

赵吴兴洛神赋乃中年笔不甚经意而时时有法外赏十行后姿态溢出宛然惊鸿游龙也叹赏之余为题其后

赵松雪手书十五诗后

赵吴兴自谓此十五首不让唐人中间致语如北来风俗犹存古南渡衣冠不及前白鸥自信无机事玄鸟犹知有岁华平生能着几緉屐负郭何须二顷田白露已零秋草绿斜阳虽好暮云稠南渡君臣轻社稷中原父老望旌旗故国金人泣辞汉当年玉马去朝周其用意使事间出唐人表所以不及唐人亦坐此若书法则密不掩态媚不胜骨上可以入大令室下亦踞北海客右矣据题延佑五年书付从子玠是公为翰林学士承旨最承恩日也盖六十有四岁矣以故书法入化境如此跋尾子俊者玠父也公集中有倡和诗其书如王谢家子弟虽散髮蹑屐亦自有贵门风

赵松雪书秋声赋

赵承旨此书英标劲骨谡谡有松风意要当与秋声斗雄而行间茂密丰容缛婉春气融融波拂间故赋所不能兼有也承旨书与欧阳少师文皆中古而后最鲜令标举者惜不能脱本来面目尽脱之何必减羊中散褚爱州

赵吴兴管夫人仲穆三札

赵承旨与妇魏国管夫人子仲穆总管各有寄中峰禅师书一通吾弟敬美得而宝之又为志之计中峰所得赵公家竿尺故不止此公行状称元延佑帝及太后爱公翰墨有应制则命管夫人与仲穆副其体而藏之秘阁曰令后世知子昂父子夫妇皆工八法也人王法王后先欲得公笔作藏宝第公一瓣心香则寓幻住庵久矣逃虚老人何用复晓晓为空门饰蛇足然老人书亦自遒婉堪与幻住守衣钵惜署尾失计称青宫少师

鲜于伯机游高亭岩诗记

鲜于困学氏博学负材气貌伟而髯类河朔伧父余见其行草往往以骨力胜而乏姿态畧如其人以故声称渐不敌赵吴兴人谓吴兴以己书三纸易困学一纸焚之恐未必尔也此游高亭岩记及诗凡一千六百五十六字见铁网珊瑚中字兼正行体大小如宣示而备有褚柳笔法其文亦典贍可喜独所纪净师草圣以为钱唐人家所收王逸老合作皆其笔却大误逸老名升别号羔羊居士宣和中尝献草书称旨得官至绍兴时年八十余乃终杨用修着墨池璫录谓逸老南唐人名文■〈禾秉〉又误也逸老不合狂拟右军两见诬作僧俗人可发一笑

鲜于伯机杂诗

开卷数行疑以为文征仲正德间书以后结法稍不类然不敢断为鲜于伯机笔也伯机行草颇纵而有骨然不能尽除河朔气此书极有风度结字似疎而实密波拂之际姿媚横生比之他笔犹更楚楚跋尾困学翁为去矜书去矜字必仁伯机子也盖用右军与子敬例伯机卒时年四十六其称困学翁亦以去矜故云

赵吴兴诗迹

赵吴兴诗落句云梅花心似铁此老恐未渠能尔然阅其句法之遒健与结笔之劲挺恐不如也陈生强我题真佛头抛粪赧然久之

吴兴擘窠行草遒逸飞动似米颠而骨胜之然不可更过过则班彦功矣落句云白鸟忽飞来青天一片云殊称是

元名人墨迹

右元名人墨迹余后先所遴凡二十五纸拟以配宋贤者其人稍不敌其书法不啻

如之聊为叙次如左赵孟俯字子昂吴兴人以荐累官翰林学士承旨赠江浙行省平章魏国公谥文敏公于八法无所不精诣而尺牍尤举举得二王三昧此书虽造次亦自有风度不可及也书辞谓年已耳顺又云有召命使臣在门当是皇庆癸丑以集贤讲学上冢归召为翰林讲学耳雪庵者僧也溥光其名元晖其字李其俗姓累拜昭文馆大学士赐号玄悟大师善擘窠正书元时宫殿榜署皆其笔此纸乃与门雏者故草草耳然亦自有诚悬骨内所云太后临寫五台碑文名额此亦一证鲜于西溪者名枢字伯机西溪其号也又号困学氏渔阳人以太常典簿终此一词藁耳而陈枢者藏之二十年而又记之书法迺美不可言正与余藏高亭岩记诗同一结构邓文原字善之锦州人徙家钱唐累官翰林侍讲学士出为湖南廉访使赠浙江行省参政谥文肃公书名雁行吴兴而不及也此一札乃报人志墓者独迺逸可爱胡长孺字汲仲婺人博学而贫耿介自命赵文敏极重之仕不显以长山盐司丞卒戴表元字帅初庆元人以文行称为信州教授归两用翰林修撰集贤博士召不起二君不忝文学隐逸者流所题皆范文正伯夷颂诗语平平正得伯平而已库库字子山喀尔氏累官学士承旨提调宣文阁崇文馆后以江浙平章召天子且倚以相而遽卒然仅赐银五镒以葬而赠谥皆不及不可晓也史称其得晋人笔意单牍片纸人争宝之书家者流至引以抗衡吴兴而此跋殊草草不称虞集字伯生蜀人以荐累官奎章阁侍书学士赠江西行省参政仁寿郡公谥文靖此诗乃贻白云闲公者自称无住庵主计其时日且眚矣而老笔纷披可念揭傒斯字曼硕富州人累官奎章阁供奉学士以侍讲学士总三史卒年七十二赠豫章郡公谥文安史称其文严整简当诗尤清丽善正行书今此送遠上人序于书法文体见一斑而浮屠语则未也顾安字定之仕为泉州路总管府判官善墨竹有与可风此札与天启僧者行笔亦圆熟吾衍字子行太末人游寓钱塘好古博学负气尤精篆籀理自谓出李阳冰徐骑省上偶以微絃自恨沈死宋承旨濂尝传之此五诗仅去俗以书法拥燹不称令人兴索乔夔成字仲山考元史皆不载仅见之右军干呕帖朱巨川告跋书法不能佳而考据颇精洽据此诗尾谓早岁苦吏事丛脞不为诗当亦是一州邑官也张伯淳字师道杭之崇德人举童子科再举进士累迁翰林侍讲学士其书所谓序乃送一校官者结法美而圆亦名笔也杜本字伯原清江人博学工文能缮性人主征之不起数赐金币上尊最后以翰林待制召竟不起学者皆称清碧先生余尝见其一碑书极清丽似吴兴第少弱耳致此札乃不甚离俗李简字士廉庐陵人移居吾昆山不仕能工诗尤精于堪輿家言此诗虽不佳而小涉禅理后有和韵名植者不知何许人也张天雨即伯雨也师吴闲闲度为道士自号贞居又号句曲外史善诗及书书尤迺劲有风骨重虞揭诸公间此札多言雅事楚楚可念汪泽民字叔志婺源人累官礼部尚书致仕贼破宣州不屈死之赠浙江行省左丞谥郡公谥文节台哈布哈字兼善巴约特氏举其榜第一人以翰林侍读学士出为江东道宣慰使都元帅台州路達嚕噶齐死庆元方氏难赠浙江行省平章魏国公谥忠节以工篆隶名二公所题亦伯夷颂读其辞其能仗节死义不偶也郑元佑字明德浙之遂昌人仕至

浙江儒学提举此君以右手脱骭任左第书法润而有度无左一笔伯温者周伯琦字饶人也以崇文太监出为陕西行台廉访使晋江南行省左丞治吴见縻张士诚不能死高皇帝薄其罪得老牖下幸也伯温精篆籀隶古其所书九日诗似是流寓笔杨维禎字廉夫会稽人号铁史又号铁箴道人博学豪诗歌自谓不减晋氏风流仕元为浙江儒学提举高帝召修胜朝史不受官归以老死此赠寫真陈伯玉歌歌与诗豪纵之气可掬二君声实不相下晚而薰莸故不必盖棺也郟瓚即倪瓚字符镇无锡人别号云林居士又自称懒瓚至国朝始卒君以画名世而书亦得大令法此诗颇能去俗饶介字介之番阳人号华盖山樵自翰林应奉金江浙廉访张氏承制以为淮南行省参政颇用事诸文士趣之入明以不良死此札清丽流放览之洒然王蒙字叔明号黄鹤山樵赵吴兴甥所谓承平公子有故态文敏外孙多异书者是也洪武初起家泰安州守坐法死叔明以画重胜朝号四大家而书亦遒骏此尺牋家人语故佳其外又有陆绪者不得其人以词翰故留之元自赵文敏倡临池一时士大夫慕习其学是二十五人即不以书名者书靡不合作即强半以诗文名诗文多不成语真足恹叹嗟夫安得令文敏伯机子山辈不必书已作而尽寫马致远王实夫郑德辉关汉卿搦语虽雅郑不伦亦足表毡裘之盛为一时快哉

虞伯生赐碑赞

道园先生正书八分俱入能品此卷为柯九思博士作赐碑赞用笔若草草而中自遒劲有古挑截法其文辞尤雅净可诵虽然令舜华一经意亦自到也（王舜华求跋似是其笔故云）

虞道园诗

道园先生书法可甲乙库库赵此书笔虽遒而结法小疎诗语亦不任经意独结尾使事押韵皆狙骏可喜耳

虞贯二学士诗迹

右奎章阁侍书学士虞集伯生翰林侍讲学士贯云石海涯墨迹合一卷云石西域人其文不能如伯生而材器磊落志行卓诡亦一代奇品也伯生诗起语颌联殊不类生平唯一结稍疎俊耳书亦称是云石四时宫词差温丽可咏纵书渴笔苍然而皆不免幽燕气所谓康昆仑琵琶手也须段师印证之乃得一净洗

柯敬仲十九首

柯丹丘敬仲于四体八法俱能起雅去俗此以古隶书古选宜其合作也十九首中多叹荣华之不久人命之难期敬仲始受知人主司书画考功晚途肮脏流落江左盖于篇中有深慨焉是以波拂虽古雅而不无圉圉意昔人谓右军书告誓则情怫郁柯生殆近之矣

张伯雨书诸公赠言

昔怀素师有自叙帖与梦英石刻皆诸名士大夫诗今句曲外史复手录松雪道园海粟诸公尺牍岂方袍鹤氅人例不能忘一切有为迹耶第此稿纸不经意而结法极遒俊得晋诸贤意留之后人作山家清翫乃佳耳

赵吴兴真草千文后

永禅师书真草千文后先散施江左僧寺盖千余年而余于会稽董文玉侍郎家观八百本中之一本自恨此生如值阿闍国一见不再见今年在敬美弟处获观赵吴兴此纸所谓焕如神明顿还旧观者非耶其结法遒紧圆润工力悉敌而波磔之际往往锋铄中发异趣酸馅之气为之一洗跋尾皆国初名士如宋承旨父子王待制胡山长苏太史吴殿学名腕中有眼者然不肯作仆此狂语仆老矣后必有以为知言者

俞和张伯雨真迹

紫芝生俞和书法秀润圆熟真得吴兴三昧不敢谓之出蓝要亦在堂室之间若句曲外史张伯雨不拘拘八法而遒挺有生气要不可以方内目之此卷紫芝所临乐毅论当令楚王大惊其抵掌故不至婢作夫人也句曲游天平山记及八绝句皆吴中胜事尤可披赏此书本作深山道士观或进以散僧入圣纯甫谓为何如

杨铁崖真迹

杨廉夫作湘竹龙吟辞赠老伶杜清清盖出所藏鹧鸪文箫寿杨而侑以其伎又命小娃歌杨所作铁龙引倚而和之故赋此为赠题云老铁醉笔末又有冯以默七言律邵思文长歌不知名竹西者绝句其结法小异而墨色正同疑皆即席之和也余谓老铁心肠如铁腕如■〈金截〉正为小娃一歌软却耳彼老伶手三尺竹何能动之然味其调要须铜将军铁拍板乃称耳又岂区区小娃所能按也

明唐宋二子墨迹

唐应奉文笔在金华二太史雁行而不以书名今所书山阴樵者叙极端劲有颜平原朱巨川告体宋南宫今隶及章草三纸皆古论书三昧语其结法从力命表出师颂来入眼若疎野而实秀密筋骨横溢要不可以蹊径求之嘉则跌宕墨池四十年不离豫章一步今得此当轶尘而奔矣其善有之勿谓齐中少年所掩也

宋克书张良史笔意

宋仲温作今隶多间以章草然未有如此卷者结法极精紧而波法又甚秀逸令人有溢目趣吴文定王文恪二公跋尤更朗朗特以余家藏张长史笔意善本校之中间大有漏误如使知是道落一是字岂得任感戴衍一得字从行误作促行其谓误作谓其书之未能误作求能末以成画误作成书及后巧谓布置称谓大小二条总论一篇皆不録盖胜国时此书行世甚少仲温似未见全本故漏误因之以吴王二公之博雅而不能辨何也友人俞仲蔚于书法尤妙因托令补之而为拈出所以不然后有董道黄伯思纷纷置喙矣

吴中诸帖

右吴文定公寛一纸歌行古选各一纸仿眉山太欹斜当令长公见之攢眉耳祝京兆允明文待诏征明各二纸王征士宠一纸皆尺牋京兆最草草而最有致陈太学道复二纸其后一纸楷书行题名不辨为道复也乃知此君晚退耳今辍以赠张长舆而题其后长舆日临池不知小可得力否

损本三君法书

前一纸为天全先生送景寅参政联句三十韵行体遒美杂有褚米法跋尾始自放天真烂然而至后一纸水龙吟慢则筋骨姿态种种横逸或锋利若错刀或虬健如铁丝最合作书也又范庵先生钱塘三律纵笔自喜神采奕奕射人此翁极谄人奴书而亦不免有豫章吴兴意然至曩时所谓院体一扫尽之又西涯先生杨子洞庭二律为陆水村公书未及毕而以酒至解是时陆尚为御史未几先生大拜陆遂不敢请而跋其事跋今在名贤遗墨中余后先四得之合为一卷以便批览盖天全西涯二公名位相敌而范庵以风节翱翔其间不肯下一当合也天全书固自有飞动势二公尚法而此特纵遂皆为

生平极意笔二当合也为诗三为词一而首皆缺有二字者有二韵者有小半阙者三当合也夜光之璧不以损而减朗况予所得皆照乘者哉因题之曰损本三君法书

李西涯诗

李西涯先生最得意此岳阳楼二律故辄为人书之而书笔亦遒逸横放可喜虽然谁能为讖悔此二障也

诸贤杂墨

此卷乃李范庵先生家藏物内有李文正公吴文定公各二纸张东海沈石田各一纸皆尺牍之与先生者祝枝山一纸尺牍文衡山二纸一诗一尺牍都南濠二纸俱诗则与先生之子元复者又先生与子家书一纸按文定后二纸皆及亡友周原已身后事详恳隐恻至不忍读范庵先生与子所谓诸事便当如我死一贫正不要人知读之令人悚然前辈风格往往如此吾每得吴中诸名迹好以归其后人尝归汗漫游卷于许太仆初归祝京兆贻款鹤书于王吏部穀祥归李文正都事节义序于其外孙陆秀才圉独李氏后无可归者记而俟之

三吴诸名士笔札

诸名士笔札吴文定原博祝京兆希哲王太学履吉陈太学道复各得二纸沈山人启南李太仆贞伯顾尚书华玉金先辈元玉陆詹事子渊王中丞履约王吏部禄之彭山人孔嘉各一纸又有名承举者号痴翁者皆白下人考其笔意似亦隐君子也吴公后不完札与希哲后谈琐事一札道复小诗笔意俱更遒美华玉结构清密子渊尤雅俊而不能无意元王履吉翩翩自快履约行边时书寄履吉者所及时事缕缕其谓江陝二省程文冠诸省盖一时郎署名手也禄之与履约札谓举笔目眩闰之则成双笔且属不可闻衡翁语剧可笑盖是时衡翁踰八袞尚能作蝇头楷故也禄之自是草草吴兴如一束枯枿而已孔嘉虎丘诗既不俗而书笔流利不作眉山体骤看之未有不以为文氏者

题陆氏藏交游翰墨

吾州先達陆式斋公以文学节概名一时尤有经世才而其官浙藩时中萋菲不获展公为尚书兵部郎最久所与交无非当世知名士若卷中吴文定李文正李文安三公陈克勤陆鼎仪李贞伯张亨父张汝弼文宗儒六先生皆其人也陆公有子曰安甫博学

而文安甫二子曰肖孙象孙肖孙子曰昌孺象孙子曰吉孺吉孺死象孙遂絕然皆世世受经术以修辞显而昌孺复能手葺诸贤之迹成卷以示余且谓此所存者千百之一二耳吾饘粥之业废而姑以此并吾身与吾庐而仅为三也虽然若鼎仪若亨父亦皆吾州人鼎仪之后衣裾尚有存者第不能守其先人之典籍而亨父则为若敖之馁久矣昌孺其犹贤乎哉余故为详识之以勉其后人之世守者若以乞它人不直一饱饭也

李贞伯书古选祝希哲音释后

咏诸诗况若与曹刘潘陆三谢周旋及再览贞伯太仆希哲京兆大小楷笔又似彦辅叔寶冰清玉润相倚映也虽病眼眇昏不能不为之乍青

又

目疾小愈复从廷韩处借阅一过觉英玄顿朗太仆生平楷笔余见之亦不少往往不无佐史叹独此书精密秀劲与余所藏鍾成侯荐季直表跋皆妙品也第此老画法磔法皆自虞永兴来而大骂人奴书所不可晓孔嘉不待题印能悬定之许具一只眼若希哲草草批乙亦堪散僧入圣不难辨也余方选集三吴楷法几欲夺之以义不可而止因识于后

李贞伯游滁阳山水记

李贞伯先生记游滁阳诸山水数千言其文词宛悉秣至有周益公范大资陆秘监风考其时为成化癸巳以中翰谒告归与宜兴静怡翁者偕至滁访翁之子太仆丞瑞卿相与游而作者也静怡不知其姓名当是有齿爵者李先生记成之十五年余而为南太仆贰卿署于滁按记而游游而作歲月当无复遗憾矣先生以书开吴中墨池其腕法甚劲结体甚密而不取师古往往谓赵吴兴以为奴书故其玉润亦不尽满之余所见数十本大抵小楷不能十一又不无佐史之叹独此记于劲密中发古雅俗骨换尽天然妩媚当为目中第一儿曹其善藏之

姜立纲书

故姜太仆立纲书此四子全文句读各有圈甚精当是先朝春宫进读本也结法圆熟端劲妙不可言初见絕以为沈度学士书徐觉其波磔处小露锋铄乃敢定为姜笔噫嘻今两制诸君不复能办此矣

先大父交游尺牋

尺牋一卷皆弘正间名臣所与王父司马公者为大宗伯章文懿公懋少保彭襄毅公泽中丞毛公理大司空孟公夙御史大夫周公季夙大司徒李公瓚少司马任公汉大司成陈公霁御史中丞王公崇文大司寇周公伦光禄卿刘公干太宰夏公邦谟凡十二人共十四章一称臧尚未复姓故也章公前辈彭公为总帅虽令人代书而字殊细辞亦精谨其它有不尽尔者王公为先郎中公同年子年事亦辽邈而后一纸纵笔自快周公乡里科第相去二十三年夏公部人相去至三十三年而书法亦廓落讲礼如敌盖一为御史一为吏部郎当其时风习已不甚古矣后十一札则皆蜀中旧寮其人声实不大显而颇能详其时蓝鄙兵事故附存之此卷旧在伯父房仲氏处贱直偿博进今年偶见之于乡人陈生所以二金赎得装潢付儿辈此卷在它人所如灵武告身不能博一醉若在吾家则虽败角如意亦青箱中物留之勿复偿博进也

武氏藏交游翰墨

吾太仓之未为州而城居者陆参政孟昭太常鼎彝参政文量以政术文学显天下称之为三陆先生而万户武侯号矢庵者后先与之友以诗相倡和侯之孙曰勳复为文量馆甥勳之孙字周卿领卫事最贤而能死难周卿之孙宪卿谒余而出三陆先生所与矢庵酬和诗而龚大司空弘胡司徒璉王司寇鼎桑通判悦之作附焉盖一时名政术文学人也则亦相酬和者也夫吾州之为卫者二诸万户不下数十人然多以纨袴败其世风屈指不易数盖至问其故居且不可得而况于其前人所还往与酬和之遗迹乎哉今独武氏之故第岿然其木日以乔而甘泉之井尚无恙又能守其先世所酬和名卿大夫之诗而帙之其为善守而勿替何如也后人事事不能如前人独于诗母和韵母聯句以此不落笑海中

弇州续稿卷一百六十二

●钦定四库全书

弇州续稿卷一百六十三

(明)王世贞 撰

○文部

△墨迹跋

国朝名贤遗墨五卷

右有明名贤遗墨第一卷二十人故翰林学士承旨太子赞善大夫金华宋文宪公濂以文学佐内秉为一世宗匠而所与徐大章书修谨甚笔法尤遒密可爱杨铁篷先生维桢七言律一章句句使事虽劲丽而不稳妥书笔却遒逸足称散僧入圣先生会稽人元儒学提举也不肯食明禄以其尝预史局且卒于洪武八年故收之胡仲申先生翰亦金华人以郡教授终其名在宋文宪王忠文间此书亦贻徐大章者颇极推许之致张羽浔阳人以太常寺丞不良死所作雪樵传事与文皆清逸而隶法则韩择木派也王達无锡人革除靖难间两为翰林院学士折简一僧谓徐殿下尚未授职得非谓中山王少子膺绪乎亦以见当时称谓如此解公缙一名缙绅吉水人初建内阁为首臣以左春坊大学士兼翰林院学士出叅议交址下狱死此六絶句怀南安旧游作也时时见才情笔势尤遒俊然墨气胜而结构小疎从子祜期临右军一札家鸡宛然而换鹅意遠矣祜期初以学士累戍辽左后赦之为中书舍人七十余尚供奉史局胡文穆公广题渔父辞剑图记以舟子辞金事擬之盖谓子胥宋瑞略相当而舟子渔父其节侠同而史佚之以为恨然文穆拈笔时恐不能无色涩也公庐陵人建文中状元及第累官文渊阁大学士翰林院学士赠礼部尚书再赠少师杨文贞公士奇赠东筦丞一律一絶句劲笔纷披与语俱老公初名寓以字行亦庐陵人累官少师兵部尚书华盖殿大学士赠太师名位器业一时名臣也胡頤庵先生俨南昌人以国子祭酒兼翰林侍讲进太子宾客致仕杨文敏公荣建安人以少师工部尚书谨身殿大学士卒赠太师金文靖公幼孜初名善以字行临川人也为太子少保戸部尚书武英殿大学士赠少保三公同官内阁而同为胡文穆题渔父图其一为古骚二为五言选调同书法小行楷亦同曾公棨梁公潜亦题此图则皆歌行而语皆胜曾书法尤自精雅可爱亦吉水人也甲申状元及第以少詹事兼侍读学士卒赠礼部左侍郎梁西昌人以右赞善佐东宫坐间瘐死李忠文公时勉凡二纸其一跋江毋传其一题陶靖节度履图公安福人以国子祭酒致仕赠礼部左侍郎初谥文毅忠文其改谥也清忠劲节风表百世而结法乃婉媚而有致王文端公直泰和人文安公英临安人同举进士改翰林歴史局宫坊学士少詹事礼部左侍郎典内制无弗同者海内称为二王先生而其自侍郎以后名位恩宠始迴絶文安瞠乎非埒矣今所送诗俱以初拜官遠地者其诗律笔意乃又无不同也陈文定公敬宗与李忠文同为祭酒天下以南北师范称之陈公为祭酒十八年不迁卒年八十有八其诗亦题昭关图者小楷斐亶饶晋人意公之负临池名固不虚也魏文靖公驥怡寿堂记为吾郡华氏书者精紧有腕

力公萧山人以南京吏部尚书致仕卒年九十八眉寿为我明文臣冠而行业亦称是陈公琏挽李士文序词翰俱清雅公东莞人为四川按察使吏部言其文而不善宪纪顾得改南京通政使领国子祭酒后以礼部左侍郎终甚奇事也卷凡二十人二十一纸而江西独得十之七云

第二卷钱文肃公习礼临江人也四十余入翰林以礼部右侍郎致仕卒年八十九此迹一挽章耳以公品清贵故留之杨公翥吾郡人繇荐入翰林为郕府右长史郕王登极公老矣累进礼部尚书食禄不视事卒年八十五所书梅轩记为陈有成作有成故太保僖敏公镒弟也其辞翰皆颓然长者高文义公毅扬之兴化人以少保太子太傅工部尚书谨身殿大学士兼东阁大学士致仕卒赠太保其叙余青阳集毅然有解金带赠王舍人疏庐陵束鹿气而书法却妍婉令人作留侯好女子观于肃愍公谦钱塘人以少保兼太子太傅兵部尚书中谗死赠太傅公精忠大节载在国史此诗乃题黄子久江山万里图者以不切于图故割置此马公愉临朐人状元及第以礼部右侍郎兼翰林院侍讲学士卒赠尚书张文僖公益上元人以翰林侍讲学士死土木难赠学士二公皆登内阁不跻极品所题城南书屋诗为戴文进笔藏余家今留置于此徐天全有贞吾郡人初名理累官华盖殿大学士封武功伯削爵谪金齿放归卒送僧素庵住持宣府弥陀寺序乃少年书而中有涂乙笔殊秀劲弥陀寺上谷名刹也建于谭大将军广杨东里先生尝记之林学士文题张氏手泽记辞翰皆质胜张之先适者吾郡人洪武中十才子也尝仕工部郎谪广州宣课大使死学士闽人进士及第踰四十年而尚滞五品其后仅加太常少卿致仕当时固如是也商文毅公辂淳安人三举第一人及第仅四加载内阁又五年而至少司马学士归田仅十年复召累进少保吏部尚书谨身殿大学士又十年而归归又十年而卒赠太傅韩襄毅公雍吾郡人二十九为金都御史抚江西后累进右都御史总两广诸军此二札皆与吾乡练纲御史者韩公推赏独至盖以才气合也彭文宪公时安福人状元及第之明年即入内阁旋出再入以少保吏部尚书文渊阁大学士卒赠太师所书乃挽章而有高谊旧为乡里重直言曾感帝王尊语得非为李忠文作耶刘参政先生昌吴县人弱冠登高第而官不甚達先生以博识名今题宋江山簿推恩告身而疑其制不能考何也太子太保吏部尚书赠太师三原王端毅公恕报少保闵庄懿公珪一札以惠书为谢是时问遗可推已然笔颇谨细不类北人恐佐史为之以公名臣第一不敢不存也太子太保兵部尚书赠太保青神余肃敏公子俊一诗味其语似于严郡谒范文正祠作少师太子太师吏部尚书华盖殿大学士赠太师宜兴徐文靖公溥一诗则卷册中长语也公弘治中首辅颇以宽靖长者称刑部尚书盱江何文肃公乔新与郁秋官札乞琬琰集春秋纂言恳恳且云别后日益衰迈闲中惟以经籍自娱而已楷法极谨细无一笔苟正与志传所载合太仆寺少卿长洲李公应祜初名甡生平负气有大节放舟一律亦得小致语此公以书名而波拂间时露崛强殆类其为人已翰林院检讨白沙陈先

生献章大儒也然以一膺荐贡士作省臬书而词旨纵放又多潦倒笔半不成字且误称闵公为宪副而旁注一长字岂与闵契深不规规世法耶亦足以见尔时人之朴矣国子监祭酒冰玉罗公璟以趋朝赐面小词寄陆鉞太常笔法颇欲学宋仲温而未成长然当其时亦铮铮不知何故遽让长沙礼部右侍郎领国子祭酒方石谢公铎为人作一诗不知何题而颇清雅其名位品裁卷首尾正得平无轩轻也卷亦二十人帧如之而吾郡稍稍有余者

第三卷李文正公东阳二札书笔俱清丽而后札与倪公岳者然不称同年或以馆契重耳公长沙人隶燕中戎籍累官少师太子太师吏部尚书华盖殿大学士赠太师倪文毅公岳一札乃寄同年闵庄懿珪者公时以宫保长留铨而闵公以宫保正中台乃自称友生又不及闵别号亦可见尔时之朴也公后入为吏部尚书卒赠少保太常少卿兼侍读陆春雨先生鉞哭用常一排律过亨父故宅一律翰林院修撰张沧洲先生泰哭子五绝句皆销魂语也二公皆吾州人皆负文学而皆不获中寿以死其后皆凋落而张尤甚用常不知何许人似是官乍显而溺死亨父即张不知结韵刘后村相与何事太子太保兵部尚书赠太保华容刘忠宣公大夏二札一与郁公即前卷所谓秋官者一则其子华容令华容令余外大王父也都察院左都御史赠太子太保戴恭简公珊一札寄闵庄懿者二公皆孝庙昼接贤臣想见其时为之慨羨屠襄惠公瀟在吏部数行要闵公出郊过谈且云有奇果一品未荐竟不知何物也公鄞人以太子太傅尚书罢归召领都察院卒赠太保礼部侍郎兼侍讲学士赠尚书新安程公敏政礼部尚书赠太子太保常熟李文安公杰各有诗投吾州陆文量而山庄二绝有味乎言矣文量名容吾州人有经济才以浙江左参政中萋菲罢归所举德清道中语真能引分自安者而罢未久以邑邑不乐疽发背卒何也思玄子桑悦常熟人负才而躁为柳州通判侘傺失意故其语曰鸕鹚道我行不得杜宇劝人归去休又云投荒此日无言语不与宗元竞柳州虽弘旷不足而旨趣亦悲切矣书尤纵诞可恼海钓萧显山海人按察僉事以病归此君书名彷彿张南安而圉圉未称雪赋禁体复步险称奇宜其都不成语也吴文定公宽莲溪挽章作苏体极古雅咄咄逼真谢文正公迂卷册语耳王文恪公鏊与杨循吉一札有前辈虚度而为俗子蛇足一印章不能洗之文定长洲人文恪吴邑人连举壬辰乙未会元及第文正余姚人则乙未状元也吴至礼部尚书翰林院学士赠太子太保谢至户部尚书谨身殿大学士王至户部尚书武英殿大学士俱以少傅太子太傅赠太傅三公年位声实伯仲也第文苑之绩吴王居优清朝相业谢尤表表矣太子太保刑部尚书赠太保洪襄惠公（阙）一札乃抚顺天时致闵庄懿者少师太子太师吏部尚书华盖殿大学士赠太师顺德梁文康公储一诗乃宫坊时送王冬官者南京吏部尚书封新建伯余姚王公华一札乃宫谕时简闵庄懿者闵时长中台也侍从邀御史饮而勤拳为其长乞半日假亦见当时法纪之严三公通人也不无馆阁方面劳而有豪贤之累往往烦白简然俱宽然长者太

子太保刑部尚书赠少保林贞肃公俊南京礼部尚书赠太子少保邵文庄公宝各诗一纸诗吾所未论其书一畝细若焦螟而着刚劲一麓浓如蛭螭而表儒雅人云书笔能观人心行不敢信也卷二十人凡二十二纸而吾郡得十之四

第四卷南京吏部左侍郎泰州储文懿公瓘次韵雨花台一律诗拙而微有句书拙而微有笔少保太子太保吏部尚书赠少傅太原乔庄简公宇题戴文进画歌此老以词翰名歌语步骤起伏全自李长沙派流出才小乏耳书法当亦如是太子太保吏部尚书陆公完吾郡人也才畧勲猷冠一时而失计作袁丝身名俱败其书亦李长沙诗跋也弘正间赏识如此太子太傅礼部尚书赠少保毛文简公澄吾州人状元及第尝佐陆公于吏部恬静无欲于鼎革之际持议侃然其与王父书谈公私情事皆实境而笔尤拙吏部尚书赠太子太保泰和罗文庄公钦顺毛公榜第二人也学行尤自超家书一纸寄仲氏按察叔氏中丞者颇及一时桑梓事南京礼部尚书赠太子少保华亭顾文僖公清为陆太宰赋也适园诗甚有致语与罗公笔俱清劲新建伯南京兵部尚书都察院左都御史赠新建侯王文成公守仁一絶句毋论公理学勲猷巨公已诗秀拔有致结法亦楚楚卷中阅至此大醒人目南京吏部尚书昆山朱恭靖公希周也适园诗亦为陆太宰赋者公生平不作一行草笔此书极谨细而无取精微其与辞足先辈风太子太保南京兵部尚书赠少保无锡秦襄敏公金一札乃及抚楚时与台使者公嘉靖间能臣也南京礼部左侍郎赠尚书王文定公瓚送王父归田一章其书似学高闲■〈巧上言下〉光而不得笔公以无心称新礼得调南亦竟用是得嘉谥事固难料也应天通判长洲祝先生允明书家龙象也一札虽草草亦自有天趣江西提学副使北地李空同先生梦阳陝西提学副使信阳何大复先生景明文章家麟凤也吾尝见李先生寫七尺碑大有颜平原笔而此札拙畧乃尔何先生仿李长沙而指小滞三诗出语便自不凡工部尚书赠太子太保建业刘清惠公麟生平于尺牋留意此札却有事际语而书笔尤得圣教风吴县东桥顾公璘才名与刘公伯仲而诗语尤俊此则小竿尺耳亦见一斑公官至南京刑部尚书前翰林侍读学士赠学士蕲县丰公熙三诗戍闽时作也辞笔俱清密有致其子坊以南考功主事谪归坐事后易名道生才艺亦跨灶而狂妄之行家声隳矣此札多风语可笑书笔殊拙畧而中有八法非学士可及也翰林院待诏长洲文先生征明与王中丞履约书甚详待诏生平无此苦盖丧其第三郎君时也白香山叙其诗自谓分司后无一日不乐止哭子两章得悲境耳待诏殊似之太子少保吏部尚书赠太子太保吴江周恭肃公用书一纸公为宰当相臣操秉日而能以职自完者也南京兵部尚书赠太子少保增城湛文庄公若水诗一纸太常寺卿赠礼部右侍郎昆山魏恭简公校尺牋二纸二公虽齿悬絶而一时成进士又一时以道学鸣者也考湛公诗盖年九十一矣而游衡岳闻公以一棺自随前后诸生导护之颇行胜地作书院此岂其时耶魏公牋盖与周充之侍郎父子而与其子者尤近里着已读之悚然此卷二十人得二十二纸最多名贤大夫而亦多书

家者流吾郡仍十之四云

第五卷少保太子太傅礼部尚书武英殿大学士赠太保昆山顾文康公鼎臣一纸乃与王父司马公书也寒暄语亦自详缛詹事府詹事兼翰林院学士赠礼部右侍郎陆文裕公深早朝及禁中观雨诗二首词翰俱清丽然比之公生平差为落夹太仆少卿王南原先生韦雪中简顾英玉诗仅小有致而后云读乐天八骏图至泣下故当尔也先生馆试诗有雕栏十二昼沉沉画栋泥融燕初乳句传缙绅间今似未能称太仆寺卿邵康僖公锐在江藩时一札与周充之侍郎不多语而惻然有共济意太子少保南京户部尚书赠太子太保武进周襄敏公金亦嘉靖中能臣也词翰亦自楚楚前翰林院修撰赠光禄少卿新都杨公慎以博学名世而书亦自负吴兴堂庀此与姜龙宪副札亦自一斑翰林院修撰进贤舒公芬与杨俱状元及第俱有直谏声而舒公早夭至于清节则大径廷矣贵溪夏文愍公言舒公榜进士也官至少师太子太师吏部尚书华盖殿大学士以谗死此札与其邑朱令者公时在政府贵态淳淳辞旨间而结法却老苍有李西台风詹事府少詹事兼翰林院侍讲学士赠礼部左侍郎东广黄文裕公佐所为拟天宝宫词六首实嘉靖宫词也词笔俱婉丽有旨今少师太子太师吏部尚书建极殿大学士华亭徐公阶与余往复书札颇不少而此则见贻诗也公名臣不拟以诗翰名然亦自稳密都察院右副都御史吴兴王公守一札是行边后寄其弟履吉者内言劾榆林帅及中贵人忤当道意几致纷纭在其时已如此王太学宠即履吉也所书独乐园记语紧密而饶韵人谓乃兄书不下履吉以名掩不也其间实可容数人右春坊右赞善赠光禄少卿吉水罗文恭公洪先一小札乃与吾师季观察者此公极有翰墨声以小故圉圉不快陈太学道复长洲人一律四绝语平平耳而散草极古澹在怀素林藻间是得意笔也吏部员外郎长洲王先生穀祥小札数行亦可观溧阳马君一龙者余同年也仕至国子司业在翰林时使青州为余书纪行万字皆小行割其百之一于此吴邑彭先生年游虎丘得五言律四首马君狂草不堪与颠史作奴彭先生藁行眉山顰步而此皆能脱生平窠臼可重也其后三纸河南按察使济南李攀龙于鳞福建按察副使广陵宗臣子相诗各一江西左布政使吴兴徐中行子与书一余所得于三君子者不啻牛腰卷而仅留其一以志感耳中间于鳞名最高其文辞最古而书最拙几不成字故人梁思伯集李与献吉仲默三札而曰此何必减元常逸少也余甚感其言卷中二十人为二十纸而吾郡亦十之二

余后先所鸠我明名笔凡竿尺小文歌诗之类合之正得百人因厘为五卷或名德已着而八法无闻或倡雪雄举而临池卤莽所不敢废苟使伯英乌巾敬元白练即蹈隐沦亦在旁采比于赵宋蒙氏之际郁郁乎盛矣或谓老铁硃然洛下遗顽不当厕之维新之代第考其词笔似是晚年毋妨两收良足压卷或谓達善茅靡鼎革之间元玉筴失屯夷之代全卿外私广陵之托九和内酣汾阳之奉虽艺有通塞而名俱下中猥以桑梓无

辨竽瑟第其名位勲伐亦自炳烺非为错滥或又谓人一落魄举世所唾屈指全数更赢百一所宜汰削靡使败羣正以爱其书笔不轻人废今附之先学士之后览迹如存品士焉有虽愧惩一之严无妨则百之数余聚法书后先数载劳同狐腋好比珠船然甫完帙即拟韬之了不再展赏鉴之家笑以为老鼠搬生姜其何辞以对

三吴墨妙卷上

右三吴墨妙卷上为华亭沈学士度養心亭记作隶古体虽不甚去俗然已出宋人上弟大理少卿粲手柬小行遒逸有度武功伯天全徐先生有贞太和登祀赋及送夏提点诗稿草种种有笔意特不获纵耳时尚未改名也太宰钱文通公溥竒花歌事与书法皆新异而语平平不甚称宗伯倪文僖公谦与僧求竹帖却无意而有笔陈祭酒鉴为练从道义塾衍庆堂记从道景泰中健御史也陈日临褚摹褉帖故似之而原本过佻不若鲁男子之善学耳南安守东海张先生弼书昌黎石鼓文歌是其最得意笔遒纵怪逸高一世而不能去世法李少卿应祜与梭园先生札梭园者刘钦谟也所论鲁斋文及借书具见前辈能好学千里不及私李笔本遒而不无佐史叹吾长洲沈石田周仿双井仅得其竦肩寒俭耳不得势也此三诗尤圉圉宗伯吴文定公寛与贞伯一札辨乡饮碑字亦如贞伯之寄钦谟其与陈玉汝一札具见友朋真意而书亦能去俗太傅王文恪公鏊要客落成数行比之生平稍有肉柳州倅桑思玄悦咏懷诗在弘治庚申具语意似以米鲁用兵故耳书法视南安又邹鲁矣祝京兆允明二柬所论皆琐屑事而超逸乃尔顿令人神醒翰林孔目蔡林屋先生羽一诗语亦多警俊惟程字韵押不过其书骤见之未有不以为征仲少年笔者唐解元一札草草其书软熟亦不恶文待诏征明石湖三诗清语老笔殊觉近人大司寇周康僖公伦送秦给事谪官亦尤劲此老初不以书名而晚颇琅琅亦可以见一斑也凡十七人二沈钱张松之华亭人徐陈李沈吴祝唐文吾苏之长洲人王蔡吴县人桑常熟人周昆山倪上元人

三吴墨妙卷下

右三吴墨妙下卷顾尚书璘与弟英玉论作诗法甚详人谓英玉不甚惇鴈序观尚书署已号而字呼其弟居然典刑徐髯仙霖虽尺牋数行亦自郁跂于頽然中见老手陆文裕深五十自寿二章亦典雅书法最遒丽风骨苍然唯结构一二笔小涉疎耳金赤松琮赤壁二赋墨气腕力俱胜三君子俱得三昧者行家要推元玉士气则让子渊徐博士祜卿以诗甲海内而书极少不多见二絶句非其至者然亦有江左王谢门风行笔遒雅一时在文蔡间余于王家馭提学见真迹乞其兄元馭侍郎手搨之翩翩出蓝矣陈太仆沂二絶尤楚楚其仿眉山当在文待诏下吳文定上顾横泾璪即所谓英玉者也以宪副

罢贫死生平节目磊砢人谓风槩踰伯此诗与笔则小国之赋耳殊不堪鲁卫也王茂才逢元结法颇温茂得晋人意太仆韦子也事事不克负荷而临池一技远胜家尊陈白阳道复书鱼游春水古诗而笔大似林藻骏骏乎有杨少师风王雅宜宠小行五绝句是初变旧体者遒骨颠姿与冶态并见而不免伤有意然尚足压卷国子王司业同杜征仲甥也词翰爽朗酷似其舅奉化令徐长谷献忠诗颌联有味而次联遂失粘岂所谓倒绷孩儿耶袁提学袞寄王履约诗是初年作者以故尚矜局结法亦密而不能宽然自如王选部穀祥索乡录帖亦足征好学一斑老笔纷披尚有生气朱九江藩为余书数十诗成一卷今割得二首词旨婉而疎书却疎隽婉雅得唐人散僧入圣意陈方伯鏊一律乃蜀中寄余者笔亦流利可喜彭山人年三绝句调张伯起小楷极端谨而辞旨逸荡可谓二反卷凡十六人徐子仁金元玉陈石亭王逢元皆金陵人二顾则吾吴人而家金陵者陆子渊松之上海人徐伯臣华亭人陈白阳吾苏之长洲人王履吉袁永之陈子兼则皆吴县人王绳武昆山人朱子价则扬之宝应人

祝京兆真行杂诗赋

京兆此诗是才情初发时语此书是工力初透时笔以故于用意不用意间最得妙理余绝倾赏之而王百穀以为文休承临本之佳者得休承面印证乃大快今年闭关来诸名迹尽付儿子辈案头仅余此乃以寄穆丈俾示虎儿作临池一小助可也

祝京兆文稿

祝京兆希哲操缦稿一卷凡记三杂记二十三说五传一叙二吏侷一戒一铭一书体二曰真曰直行法错锺欧吴兴凡六千三百三十九字盖弘治以前书也故不能尽脱滞俗而中有绝佳与古人争胜毫发者世眼或未之识耳

祝京兆六体书

沈启南拟画若北苑巨然大痴黄鹤靡所不酷肖独于云林未尽尔也或谓其巧力胜之故祝希哲拟十余体种种逼真而至苏黄是腕指间物却时失之此卷以沓拖作眉山以矜局作双井几堕老匏白石叟窠臼毋亦坐巧力太胜耶此外虽于眉眼未尽是然抵掌谈笑令人跃然有黄初永和想象先但宝此足雄墨藪间不必购淳化宝晋矣

祝京兆书七诗

祝京兆生平好书晚唐句独此王右丞岑嘉州杜少陵钱左司刘随州诸公七章乃唐人第一才情诗其所作行草则吴下第一风骨书今年盛夏客有携过山堂者为读再过阴飏骤来急雨助爽九咽皆快雨后暎南荣纵览八法跌宕遒逸种种幻变与云霞并舒卷大快事也客喜谈玄自诡冲举可立致余笑谓之此诗固佳但多叹老嗟贫怨别伤乱语异日勿携之道山金庭中不免羣真驳放也客笑不答第趣余题之而去

祝京兆感知诗墨迹

在昔延之五君子美七哀非托况前哲即狗感故知而吾郡文征仲亦仿之第皆逝者献吉仲默则稍稍兼存没而祝京兆希哲则以古体怀逝者以近体怀存者为人十有八为诗十有九盖独王履吉得二章以孔穉忘年之契深耳此书乃晚年笔尤雅健儿曹不知何自得之喜于怀知之目拟赠其师龙身之先生而合仇英所图竹林七贤成一卷岂谓持此谒先生便堪把臂入林耶得援戴司农例后堂受经之暇博一醉足矣欣然为捉笔题其后

祝京兆草书二歌

此书初览而甚骇其牛鬼蛇神以为不类京兆稍一再展而后觉其妙非京兆不能也其取势全用元章而清臣筋平原骨隐隐自露诗歌亦称是虽然以拟右军之虚和右丞之秀雅则俱有所不足耳

祝京兆书成趣园记

祝京兆希哲为华光禄尚古成趣园记几三千言状其峰峦池馆纡余曲折之胜不遗余力其书法颇出赵吴兴然吴兴遒而媚京兆遒而古似更胜之余初得一本付骏儿为楷式八月自金陵过里中华之宗人叔逵强以投余辄去追而返之不肯纳稍间校前本行款大小不甚远而结构微有出入然各遵其妙岂光禄有二子京兆各为书一本耶华之园余八十载不复可踪迹而此记尚存言之不可以已也如此

祝京兆诸体法书跋

祝京兆拟古以下四章拟黄庭春游二章拟兰亭差小若闺怀则曹娥洛神之流耳古言一跋拟章草跋及古调亦然而微涉仲温然皆古雅有深趣昆福寺以下五章锋微敛六宫戏婴图以下三章锋微露然姿态似胜不知洵然谁拟要之自晋人流出朝元引

以下九章拟眉山秋夜以下四章拟双井小米山水以下二章及渡口一拟南宫（阙）风神宛然第中间微杂一二已笔盖不欲为韩干似也修夕辞以下六章结法与黄庭并观书之卷末当似拟赵吴兴恐吴兴尚少此一段古趣余老矣所见京兆墨迹不下百余本未有若此之种种臻妙者真令人心折内所拟欧颜峭者病姿庄者病韵二家本自难学毫厘千里少损连城可惜二月病疮金陵十指木强览此兴发题其后真是狗尾

又

书之古无如京兆者文之古亦无如京兆者古书似亦得不似亦得古文辞似亦不得不似亦不得

题祝氏迹

祝希哲五诗真迹一字外老笔纷披始露轶尘之妙使皮相之眼覩之未有不以为张翼之乱真也诗语弱而有佳趣大似晚唐人或即希哲老忘不能辨姑识于是

祝京兆书夷坚志

祝京兆手书夷坚丁志凡三卷皆小楷虽不甚经意而结体出吴兴时时有晋人法计此例之为卷尚当有九十七今不知所在矣夷坚志在诸说家中尤为卑猥庸杂即刻本览一过便舍之不足留何至作此不急事耶京兆任诞好怪与景卢臭味合宜其尔也比之待诏杜阳春风斯下矣

祝京兆书祖廷贵墓志真迹

祝京兆此书虽仿眉山而微堕樗寮槲然斤斤有古意其文吃吃期期极步趣古而乏古意可谓两反也

祝京兆书李太白传后

太白歌诗既奇其人与事又奇不敢望司马子卿手作传得李延寿亦小快无奈宋景文于喉咽间作嗫嚅语令人愤闷幸而有祝希哲书之差足快也祝书初看若草草而不乏意又似沓拖而不没骨依约虔礼纬干间然以拟太白诗尚隔一大尘

文待诏行书

右文待诏行书先友诗八章岁朝次日立春七章对雪三章皆五言古体过竹堂一章春寒一章次蔡九逵汤子重王履仁各一章履约二章皆七言近体流丽清逸时时有会心语书法摹圣教序遂无毫发遗恨优孟虎贲不足言也晚笔虽老苍觉稍离去之耳此诗书于外家为吴遯庵参政时正德之甲戌也岁朝所谓开岁四十五吾行已云衰然又四十五年而后游道山人人生固难量也此帖今归吾吾年已五十四不知后日云何捉笔一叹

文待诏书杜阳编

苏鄂杜阳编乃郭子横洞冥王子年拾遗之类而自诡胜之以其颇杂时事也文待诏征仲小诗以精楷录之无一笔失度昔人称孟蜀王仁锠好手录书至数千卷卷皆白藤纸细书极为端好每候朝尚于檐子上得一二番若待诏与仁锠真可谓笃好书者也第公以诚实心信侈诞事以精谨笔书狂肆语大若相反者聊识于后

尤叔野赤壁卷

余以癸酉七月望与守巡三君同登赤壁泛大江痛饮剧谈于月色中几达曙乃成此二律今春卧弇山园屈指四周岁矣无锡尤叔野得文待诏征仲书苏长公二赋托待诏子休承补图口占余诗俾录于后余名位何敢望苏公不幸讥谗起蹶之迹乃复过之俯仰今古可发一慨征仲书小楷古隶皆工独休承所画绝不类而苏公赋语奇胜处小似过情异日叔野能壮游当为一勘破本来面目也

文待诏小楷周召二南诗二王目录

文待诏后先书周召二南中字谊之类诂者及临江二王帖目录中之有元章长睿考订语者皆作蝇头小楷精工之甚第毛诗全传当更有数百千条二王帖当更有大令而今不知落何所矣待诏此书在正德已卯业五十岁而矻矻作老蠹鱼不休当是通德里翁张乌巾合作一人前辈用力精乃尔真使人慨羨

文征仲手札后

右文待诏公征仲手札二十八纸中多与赵梁父陆子传二先生者赵先生之孙某

陆先生之馆甥也装池成卷俾余题其后余尝考之晋唐以还名笔于高文大篇绝不多见所存唯尺牍今海内传文公春容之作既富而寂寥数行如兹卷者亦复宝之不啻拱璧亦盛矣哉第卷中多谢饷物语即不过一算器食公勤拳手书以报知世之欲得之也昔颜鲁公贵至八座而乞米乞鹿脯于李太保岂鲁公临池不公若抑（阙）岩穴之包苴更饶于廊庙也若二先生者贤于姚麟殿帅多矣

跋文待诏欧体千文

文待诏不多作率更体所见唯张奉直墓表石刻及此千文手迹耳石刻小于皇甫碑笔近肥千文细于化度铭笔稍纵于整栗遒劲中不失虚和舒徐意致佳本也唯彭孔嘉中岁书有出蓝之美晚节则一束楚耳夏日三四舒展令人忘暑

文衡山手柬

文待诏与韩懋赏及祖父三代手札大要是谢饷物语耳懋赏能宝之且乞诸贤题识以侈之贤于戴山姥姚殿帅多矣

文待诏书程乡令遗爱碑墨迹跋

昔太丘长文范陈公卒而蔡中郎伯喈为文勒于碑且手书之古今以为胜谈今读盛宗伯端明所志程乡令平湖陆公遗爱碑亦何以异也陆公名德不敢遽谓如文范然程乡之政循循殆欲过太丘矣宗伯之文与人亦不敢遽谓如中郎晚途一蹙差类之至于少年风节矫矫亦中郎流亚也中郎之所撰中郎自书之宗伯之所撰文待诏征仲书之以待诏之小楷虽不敢望中郎之八分要亦有云仍也太丘有子元方季方元方之子长文贤贵者累世程乡之子光禄卿光禄之子少司空尚书郎郎之子大司寇学宪名德不下陈氏而盛过之人谓长文公惭卿卿惭长司寇学宪于其先则有光矣司寇之子基忠出其碑乞不佞跋盖谓不佞能尚论前哲而俾之厕于徐文贞许太常陆少保莫方伯之后将无使不佞作盛公慝也今海内所知称者大司寇耳以语光禄卿则恻恻何况乃程乡公虽然陆氏之文献固程乡公滥觞也毋念尔祖聿修厥德基忠勉之乎哉

文王二君诗墨

文征仲先生诗有致书有格王履吉先生诗有格书有致此册作于嘉靖改元壬午征仲年五十二履吉仅二十八视晚岁结法稍不为遒紧而风韵却更蔼然诗亦楚楚称

是赵承旨称右军褰帖谓乘退笔之势而用之二先生皆能用退笔尤可爱也

续名贤遗墨卷

续名贤遗墨一卷首为杨铁崖廉夫七言律句句使事而古人姓名居其六甚可怪余所以收廉夫书者盖入明之八年而后捐馆也所以廉夫压卷者虽明人不为明禄縻也王学士逵善折简一僧内云徐殿下尚未授职得非谓中山王少子膺绪乎亦以见当时称谓如此林学士（阙）题张氏手泽辞与翰俱质胜此君及第垂四十年踰七袞而尚滞五品彼时故如是也解舍人祜期临右军二纸字大于本书而踈隽自喜似不失春雨门风马宗伯性和张学士士谦所题城南书屋诗其画为戴文进笔余故有之今割此二纸刘参政钦谟余太保子俊跋诗皆卷册中物也而皆真迹陆太常鼎仪伤张亨父二诗不能佳不知亨父何与刘后邨也趣韵之难乃尔罗祭酒明仲似得宋仲温笔而未成长然在其时亦铮铮张修撰亨父萧金事文明各诗一纸文明书鴈行汝弼而今仅先驱亨父何也谢文肃鸣治李文安世贤谢文正于乔亦卷册中笔耳然各微有致程侍郎敏政合处不减李宾之而时带俗气林贞肃待用邵文庄国贤之所可重者固不在书也第邵稍近临池而尤行行陆太宰全卿跋李文正诗余割留于此以备一家顾文僖公廉为太宰赋也适园诗着意笔也殊令人眼明王文定廷献赠王父司马公一章仿汝弼而稍麓劲刘清惠元瑞与履吉尺牋甚佳盖敌手相值耳元瑞书已见前余喜而复留之顾文康九和复先王父纸当是以先逵故加审谨魏恭简子材手札二纸严凝笃励使人悚然书所不论夏文愍公谨简朱令令吾乡人辞旨贵态淳淳第笔苍老可取也王中丞履约寄弟履吉家信内言劾榆林帅及中贵人忤当道意几致纷纭在其时已如此王吏部禄之一小札也与履约笔俱楚楚大抵诸公以人重其能兼以书重者十不三四耳全卿九和公谨最贵而不无齿颊微恨漫识于此

弇州续稿卷一百六十三

●钦定四库全书

弇州续稿卷一百六十四

（明）王世贞 撰

○文部

△墨迹跋

有明三吴楷法二十四册

有明三吴楷法第一册吴郡宋仲温书赵文敏阁帖跋按文敏跋阁帖而叙及书家源体故当有意仲温亦似以有意书之结法精纯圆嫩比之七姬帖差不为古然亦足以曠带来学矣陆子渊谓陈文东品胜仲温又有以文东肉胜仲温骨胜者文东此书圣主得贤臣颂笔法全仿永兴精熟可爱而亦微使人狎又书张怀瓘録章草三品人名氏韦续五十六种书怀瓘十体断内章草一条杂正行体而皆有小法风度溢出所临急就几于优孟抵掌释文小楷尤精后书叶梦得及自撰小跋皆与前三书笔同大抵仲温作章草劲而露文东则柔而蓄正书其犹鲁卫也高槎轩季迪所作眠云轩诗虽非大得意语而翩翩度骅骝前书法亦近仲温特小疎耳此君既以事见法而又寥寥象贤此昏几于吉光零羽矣姚道衍广孝书所作凡（阙）十（阙）首得意句小楷亦楚楚而自谓笔不佳故多偏锋王文恪陆文量纪姚公年或以为八十四或以为六十五按公以永乐四年书此自云七十二而十六年始物故国史称其少时与季迪杨金载齐名则为八十四无疑也吾吴诗盛于昌穀而启之则季迪书盛于希哲征仲而启之则仲温若文东则云间之破天荒者二沈鼎贵此其滥觞故纪之如右

第二册沈学士民则凡三纸其一为孔子世家其一为金氏墓志铭王赞善汝玉撰其一字稍大为诸葛武侯出师表沈大理民望字最小为虞书益稷篇孔子世家笔劲而气拘余皆圆懿肉好真鲁卫也波折处于永兴尤近虽温雅可亲而不无佐史之叹夏太卿仲昭以书供奉者四十年而始为吴文定公书此一帋吴公时尚为太学诸生也太卿公业已老矣而精谨乃尔令人肃然卢中令为己凡二帋一种德堂记一拙斋诗皆遒劲而不克去俗其可恨又非二沈比也

第三册有拙斋铭一赋一诗三杨宗伯仲举为铭钱山人子书为赋杜山人用嘉陈山人绍先刘少詹宗器为诗其辞与书法俱伯仲也徐武功元玉二帋其一临褚河南哀册文行体盖微得其势耳遒放横逸则双雕并运意其一东原生传东原生者即杜用嘉也有隐德而文公此书盖中年笔颇于虚和中出姿态书传后者吾吴周鼎伯器结法亦萧洒伯器工属文顷刻千言立办尝韦鞞叩金尚书军门从破闽寇仅得一幕官以老又国初亦有一周鼎伯器者樵李人文行亦相类然非此伯器也

第四册李太仆贞伯凡二纸一纸临兰亭记而行笔皆赵吴兴公生平以奴书谗吴兴此何也陈言疏谓中书舍人多至八十余员盖当时传奉之敝人所蹙额捋喙者抗言

之无隐且以攻天曹大臣不能如杜祁公之谒斜封直哉言也第身非台琐而诃詈过当所论蒋生者是都御史琳子琳以冤死而公称其为极刑后亦是牛呵宿因然考之家乘及国史俱不载当是疏垂上而尼耳吴尚书原博王医师墓表中有涂乙然无一笔潦草吕翁墓表字稍大俱步趣眉山而时时有锤意蔡九逵孔目嗣命议以秃笔取劲姿尽骨全大抵李吴纯绵裹铁蔡则强弩透札然李不尽汰俗吴不尽汰浊蔡不尽汰生以此小有恨耳

第五册祝京兆古近体诗十五首是行卷上公卿者中多曹娥洛神风格清气朗朗射眉睫其辞亦秀隽不作晚岁应酬而所儼元日早朝排律重押新人臣字不可晓也又杂诗二首别构一体久看乃能识其用意处右皆早年笔演连珠并序十三首卿峦风木行一首尺牋四首皆中年以后笔骏骏逼欧褚黄道中致甫字说稍大约斋间录又大则皆晚年笔进可入元常室退亦不让伯施所谓幽深无际古雅有余明兴一人而已黄道中致甫者吾故人淳甫初名字也为其尊人五岳山人乞集序润笔余谓此汝南家乘奈何界人则曰使不佞而仍故名与字知非公有也且公文成非汝南家乘乎为一笑而留之

第六册祝京兆劝农图记赤壁赋着思录序字体俱不能小其楷法亦得十之七八而淳古秀劲之气溢出结构间或似率而密或似拙而巧信乎书家上乘也唯赤壁一赋隋健而小涉佻耳劝农图记又自超骏骏在赵吴兴上旧有文待诏画一帧余姑割爱去之而留此书第七册祝京兆梅谷记比之劝农帖差大成趣园记又大于梅谷本作正体微取行法以助姿耳而不胜其笔势遂作行然遒劲古雅中媚态溢发天真烂然真墨宝也成趣园记文虽涉繁然明婉有味当是润笔不乏耳第八册文待诏征仲书皆小楷其一为余录早朝近体十四章用古高丽茧结构秀密神采奕奕动人是八十四时笔也其二古诗十九首极有小法其妙处几与枚叔语争衡是八十八时笔也又一条三行射礼有鹿中云云尤精甚而考据典核偶于散帙得之附于后其三书锦堂记差大于古诗结力遒劲是六十七时笔也其四拙政园记及古近体诗三十一首为王敬止侍御作侍御费三十鸡鸣候门而始得之然是待诏最合作语亦最得意书考其年癸巳是六十四时笔也吾所缀缉皆待诏中年以后书真吉光翠羽萃而为裘后人慕临池者其宝有之

第九册文待诏甲子稿诗凡五十二首文八首极精谨可爱而不甚脱学究气是时年仅三十有五闻公每岁辄手书其诗文前后凡六十余册皆为徽贾从其家购之此特吉光之零羽耳徐博士昌穀落花七言律十章是未见献吉以前语生于沈启南文征仲而趣胜之小楷如新莺未成长音羽宛宛自见春意赠仇东之二绝句则皆进于是矣待诏又有致仕三疏中不无涂窜而结法亦佳家弟乍目谓为公稿本费十缗得之以乞余

偶章简甫之子藻见而摩娑不已曰吾父笔也郡守欲梓之付吾父录以示公故有涂窜寻别录一本留公处耳余遂作章简甫观已而笑曰昨乃眼中耳今乃耳中眼也漫附于此俟家弟归当诘之

第十册钱文通公原溥书陈氏碣铭盖宋仲温派也矜矜负峭骨所乏者姿耳张南安汝弼二五言律皆倒韵而语亦平平后有数行极推伏陆务观以为李杜之后便到此翁小巫气索宜其尔也南安多狂草吾吴人又不好收之今此小行杂楷法几于优钵昙花然纯熟中有紧密恐不减李贞伯陆文裕子渊小楷尤不易得今此尺牍凡四首中间行法十三楷法十七居然有北海吴兴风度其语却多凡情可笑张侍郎文光者陆公门下士也陆以书荐之贵溪相得供奉永陵骤显贵第不为临池家所许而此兰亭叙特楚楚如士人所恨不堪三复耳云间自二沈后不复能与吾郡抗衡南安踣躅黄池文裕跳梁城父宋晋不竞或思狎主终未足撑天半壁

第十一册王履吉闵已赋进学解千字文皆精入永兴三昧极书家之嫩观矣然不如拙政园一记四诗张琴师传浑浑有锤太傅意使人爱而复敬之然又不如退之琴操使人敬而不便解大抵以古藏雅以拙成巧在八法独觉等觉间庶几上乘之将達者也跋尾仲蔚与家弟评此君书若讼而皆有讼理故两存之

第十二册陈白阳复甫千字文屈原传各一帋此君字不易楷楷不易小而吾乃兼得之又陶靖节诗三十七首尤觉以拙胜字形稍大而于昔人评右军书黄庭曹娥各尽意态今求所谓正则渊明观者不可得也唯酷似山田中一老父或以无求于世少可采耳

第十三册杨宪副梦羽法驾曲三章为故相夏文愍代笔耳老腕遒而少姿致王考功祿之与其师履吉尺牍精谨有法后有陈履常墓志铭及答同年伊侍御书皆藁草兼正行结法彷彿吴兴而傍堕僧趣名实俱损矣陈方伯子兼三槐堂铭蝇头体妍秀而少逊骨蜀中诗自云仿锤太傅体古雅而微乏韵陆尚宝子传金剪刀行张烈妇二章全得麻姑坛法而以色泽傅之遂为一时书家冠诗调亦典丽生平所希若杂文二章则中多窜改而笔法亦自清劲文博士寿承为余书五子篇五子者谢榛李攀龙徐中行梁有誉宗臣并余六也为篇凡二十有五寿承此书最为圆熟丰妍其后五子稍有去取辞亦微改易第其人并书家四君皆游道山仅余一硕果耳循览之际为黯然低回久之

第十四册文休承学正为余书沈宋苏杜诸君七言律二十二首是七十九岁笔而精谨雅丽逾于少年时又书嵇叔夜养生论及苏子瞻续养生论清俊之极而微觉佻卞

彭孔嘉山人书余广五子诗及近体数首是古高丽茧能于率更内斟酌温劲精泽光彩动人盖中年最合作笔也若晚途则一束枯草耳许元复太仆一帋老笔圆嫩流利而所书龐居士传语尤可喜黄淳父居士前一古体虞永兴之有锋铍者后十二诗是晚年笔差小退周光韬叔初出道复而此书醉乡语酒德颂精严有古意程大伦子明全摹征仲而鸚鵡鷓鴣两赋风斯下矣乃知共父元晦之竞师承殊未足确也

第十五册俞仲蔚为余书少陵七言律四十六首皆隋珠卞玉第何緣用起语四字作题却大可笑书极有小法得柳诚悬度人经意虽小伤挑剔无妨大雅又一帋书见赠古体八章稍加圆熟已上皆六十以后书又一帋古近体凡十四章尤精谨可爱周公瑕为余书王维李颀崔灏高适岑参七言律三十四首郑喁津阳门行一章皆精雅工致而津阳尤细而有法又自作诗二十章字形稍大笔亦稍放二君子自履吉而后狎主齐盟者也纸有宋经笺蜀笺高丽茧皆余山房中旧藏胜于鱼文侧理多矣

第十六册徐奉化伯臣书黄庭内景经一帋伯臣本非当家用笔圉圉而时吐锤意初为飞鳧人加染古色杂识旧印以希重价余一见而辨以示其子文果泣曰先子得意笔也又黄彪遗我参同契用赵吴兴贗识以示客客多以为吴兴也割去之留于此册盖重其文也伯臣笔生然久看逾雅彪甚熟然久看愈俗此书所以贵人品也余识伯臣吴兴时年七十七矣自诡黄金可立就然不两月而卒今故北书谬脱者三十之一又阙后六章然则伯臣之所谓黄金者可推也彪与伯臣年行不相及其品亦薰蕕特以经故合为一卷

第十七册顾德育牡丹一赋结法酷似征仲唯老密处有别耳袁提学鲁望书七言近体十五首其辞与笔皆流利典详而乏古意王逢年舜华诗十三首政如吴中子弟轻俊而不受绳墨书亦如之至所谓七十二号可怪可喜可笑皆有之留以供醒睡可也张伯起书李供奉絶句五十二首又李杜高岑律体十一首此君生平临二王最多退笔成家虽天趣小渴而规度森然矣毛豹孙书王江陵絶句二十六首亦自楚楚

第十八册王学士锡爵书郭景纯游仙诗七首学士自挹不主墨池盟笔法秀颖依稀翡翠兰苕状家弟提学懋书周诗不能尽合大雅而老健足风骨亦是当家莫太学云卿书中唐律钱左司七首刘随州九首韦苏州三首皇甫兄弟四首郎士元二首韩君平四首卢纶员外二首司空图侍郎张玄真子各一首清丽有态殊足诗句雁行其自作近体瞠乎不伦矣王太学穉登书王右丞七言絶十九首书不能称诗其书所自造七言律廿三首雅相当矣大抵书贵骨胜不贵肉胜莫君肉胜而佳王君骨胜而不佳此不可晓也

第十九册王太学衡书司马长卿大人赋王好仙道甚厘于此赋似有深感故笔意翩翩近之又陈思王五言古体张茂才元举陈山人尔见各得十六首陈王此诗极建安黄初一时选又谢康乐十章则徐太学益孙笔也康乐才一斗继陈王八斗后余一斗似属少陵少陵歌行为文茂才肇祉书者十三首盖四之一耳王虽骨未成而有飞腾蹀躞之势徐能起雅去俗惜用笔不遒张子则公瑕之衣钵陈生则子兼之箕裘而小不免俗肇祉佻侧仅仅得从父休承而都无精理小阮若是何缘入竹林为之一笑

第二十册皆杜少陵七言歌行陆士仁得十四章文从先得十一章顾绍辰得十四章钱允治得十九章始予以为五言选莫盛于思王谓能穷雅之变也七言歌行莫盛于少陵谓能极风之变也故乞诸名家合书之总二册此册皆近时名笔端雅有致陆当擅场佻侧寡情顾风斯下矣

第二十一册楷笔人垂徧而得吾州王应宾（阙）吴郡章藻仲玉因乞王书盛唐歌行李峤宋之问郭元振各一章张谓崔颢各二章王维李颀岑参各三章高适四章草书李白十六章酒间一展咏真足动金石遏行云第王学娜如子亦能窥藩章仿隆池生小足竹堂以槩永兴率更未之得也后有余简会张元凯子予见过书近作十七首毋论结法其诗与诸贤作河南屏脚庶几不辱耳

第二十二册唐人绝句娄孟坚得王勃以下七十二首徐奉礼兆曦得朱庆余以下三十二首沈昌期得贺知章以下四十八首周茂才子先得杜甫十六首缘不相知检故小有重者而自王龙标李供奉外唐人快语几尽矣偶后有余帑而康太学时万尤山人道恒过此因戏令康书坡仙洵经一则尤书异域数事俱足鼓吹幽闲者六生翩翩属城书史之隽儿驹汗血可望千里但未遇曹成王于蹄尘下定低昂价耳

第二十三册庄子逍遥游王履吉之从孙慎修书也逍遥游横肆奇诡超轶象外而以圉圉未舒之笔纪之殊不相当也华茂才之方书连昌宫辞琵琶行精密可爱吾从子士驷甫脱涂鸦而亦写骆宾王歌行颇有致将来不妨箕裘僧大林书所作平倭行一帑伉浪非本色其结法颇近率更然是藁本非为经意笔也僧明因书顾欢袁粲明僧绍孟景翼张融酬徃释道优劣事见南史明因与余善是方袍中之粗有意者金用元宾妇书履吉白雀诗凡三十二首元宾为履吉上足故书法亦因之绵丽多态而闺■〈巾达〉之气未除昔贤纪六朝唐诗俱以僧及妇子殿尾吾故仍之盖采枯树屏脚故事耳

第二十四册皆石刻宋仲温书七姬瘞志烺烺人目以为奇事奇文奇书按所谓潘

左丞者张王贵壻也后归明老牖下以死既负妇翁又负此七姬高季迪词与杨用修跋得其情矣仲温此札不为工取其能去俗存古耳祝希哲王文恪墓志精整端严刚柔剂克完然垂绅佩玉气象毛夫人志铭运笔差圆形差匾古雅称是唐初诸君子微带一二行笔能斟酌伯施信本间几欲踞河南上书家最上乘也陆翁墓碣字稍大而最古元常之典刑矣昔元佑秘阁续帖取右军兰亭乐毅厕之真迹盖谓无他本故也二君子书名为我明第一而此又其手勒石者不妨用此例存之

王履吉书杂诗跋

此卷乃履吉后先为金元宾书者其月夜登上方一帋何大复六子诗一纸皆紧劲似疎而密牛首山秘书省召试各一纸风神逸秀翩翩与白雀诗帖同结构甲申五月一纸自谓大醉书岂所谓真大醉耶然颠纵而中自有骨可翫也跋尾两朱君子价最与履吉善故四诗皆凄惋动人而书法尤精谨象玄盖竭蹶而趋者又有龙文者罗氏也与逆人同见法欲去之感右军帖楷侯君集名氏以为狭而止

王履吉赠何氏诗跋

右履吉先生赠何元朗兄弟诗仲蔚休承题尾谓其与白雀寺赠王元肃诗同结法盖先生庚辛以前笔丰润秀美字字取姿态而不能无肉胜至其末年则风骨遒逸天真烂熳交错掩映有不可形容之妙元朗兄弟视先生虽后进而才实迫之以故其奖许健羨不啻口出虽任谢齿牙之芬何以过是二卷今皆落余手毋论先生早归道山而所谓元肃及元朗兄弟成异世人久矣书毕一叹

王履吉诗墨

履吉此册泛太湖登东西洞庭诗十之八语虽壮而不甚秀似不能与湖山斗奇也若其书之遒媚潇洒姿态溢发置之销夏石壁无愧色矣

王雅宜诗稿

王雅宜履吉山房杂兴古近体五十七首颂一首凡三千七百七十字皆作小行体而正书仅十之一盖丁亥岁笔也时书道已成故虽不甚经意而自然精整正书尤自超诗语亦在雁行

王履吉小楷四六

履吉此书皆四六雅语盖青箱白朴之流亚也懒儒卤莽覩此真令人汗下虽然履吉有此锦囊而竟不售何也李银台嗜法书而于小楷尤甚聊为跋而归之

王彭二颜体书

彭孔嘉为余书送王大夫入覲长韵皆家庙八关斋体乖离中失去后一行及名跋今年春偶得王履吉一寿颂亦此体虽峭整微逊而润秀胜之履吉故永兴入室也与平原圆方殊不类不知何由与孔嘉并得其门也前辈书家工力类如此余既甚爱而愧之因合为一卷以寓目焉

陈白阳诗稿

陈白阳道复杂诗一卷为篇八十二多近体为字三千七十兼正行体中虽有涂乙处而行笔大小无纖毫失度结构虽小倾侧而不疎时时见意态世人不甚重陈书至于诗则覆瓿久矣故特收之

陈道复书陶诗

陈复甫书能于沓拖中生骨于龙钟中生态以柔显刚以拙藏媚或老或嫩不古不今第不脱散僧本来面目耳此所书陶诗尤为合作然世知之者益鲜矣知之者谓之自然虽然比于陶诗自然尚隔尘也

陆俨山手札

陆文裕公结法无一笔苟虽寻常家人语施于所亲狎者亦精审遒密有二王尺牍遗意观此与周一之四札可知己一之虽视公后进然皆能诗博古而腰膂间皆有傲骨宜其相得如此

题丰存礼诗后

丰存礼傲睨一世而倾倒嘉则乃尔信乎为才服也计其书时当已病辟痲无一笔不颤而犹有山阴典刑诗虽不能整栗而命旨绸缪宛然建安遗韵也昔裴成公病剧回

盼一语犹能使夷甫心折今得无类是乎嘉则有世人皆欲杀吾意独怜才叹故为题其后

丰存礼手札

俭岁鲜食人有以丰道生手书杂说鬻者竟月无所遇余乃以五斗米得之其所论文骂宋儒前阙数行亦不甚成语所论诗自喜其江天楼独倚风雨酒初醒亦恒语耳金潞太史以为胜少陵勲业行藏之句则亟称之有胡瑛者以拟赵嘏则极骂之其论书稍推文太史祝京兆次则陆詹事而于马一龙沈恺王逢元陈鹤杨珂沈仕皆痛诋丑拟不遗余力二沈不闻有临池名乃亦置喙何也其评沈仕谓如夏四倚主夏四何如人当是一贵家仆丰或曾见侮耳人言此君憨定不虚也然行笔最遒劲结构亦密比之生平书最为合作留此以备一家

又

丰考功病马行中虽杂用唐人语法亦不能无少瑕而感慨悲壮寄托恳至其书擘窠行草为吾乡张银台寰作且引孙过庭所云感惠狗知为一合其自负亦不浅矣展卷犹囿囿至五六行后笔意逸发风骨洞朗令人如见古人而中亦有不满意处然使骂陈沈杨马则有余矣吴中前辈每见黄翰书则弃之吾甚愧其意然丰书比黄故大自径庭不可同日语也

又

余每览丰人翁书辄怪其胸次有服能聚古碑于笔端而腕指却有鬼掣搦之不使纵其外撇以取姿态孟孺所藏此卷乃与其乡人包明府者前二诗句与笔皆有精采后则皆尺牍老手纷披殆若东城父老谈开元斗鸡事虽复纚纚举举不免沓拖人翁生平不齿王履吉以其结构疎故履吉当亦不齿人翁孟孺精八法者其为我哀之

蔡侍郎诗

子木于余为先達而齿位不甚高故于燕中诗相规酒相狎也此卷距今二十有八年其捐馆亦十二年矣览之不胜山阳之慨

李于鳞诗牋

于鳞素拙书不待发龄石七十函已有讹笔而余辈爱其辞更取以为妩媚尝戏谓子与此何必减宣示黄庭耶于鳞所遗余尺牘诗篇极多不无零落前年闻其讣始帙之为一卷手加料理时时有泪痕渍纸上余老矣留示儿子欲令其知前辈交谊且审一时有奇人奇语也

吴峻伯诗

峻伯为比部郎时与余同舍长夏无事墨和笔精遂书此一卷诗时得清语但调未去偏耳书法亦丰妍但骨未离弱耳当是时峻伯名甚盛却折节于余与于鳞山东以后顿长一格后官渐高不复能尔也初夏晒书为手装藏之时峻伯久捐馆季子稼澄翩翩起矣

方元焕书荆轲传

方晦叔尝欲书太极图说西铭以赠余余谓不如荆轲传尚得一快读晦叔遂以行草书此传见寄青社当时北方之学者山斗晦叔得片纸只字珍若拱璧今来吴中不直一钱盖晦叔目中无书学腕中无书力而好以意行笔宜其沦落乃尔余爱荆轲传文甚不忍以覆瓿而姑留之既以贺晦叔之遇而又惜荆卿之不遇也

黄淳父书田园杂兴钱叔宝图

范文穆致能手书吴中四时田园杂兴凡六十首真迹在余所杂有眉山豫章襄阳笔意龙蛇飞舞真墨宝也句不能甚工然描寫吴中风物人情可为曲尽吴兴凌玄旻复精择之仅得四十首托故人黄淳父书而钱叔宝为作图叔宝入白石翁三昧又家吴趋其描寫诗意亦曲尽矣玄旻之尊人同守君稚德出示余俾题其后按文穆作此诗时以大资领洞霄归里第未几物故而又用蚤贵北使元西南帅岭蜀入备法从参大政其获高枕于石湖之濱者无几而稚德成进士出入省郡仅数年而避谗归卧余虽稍稍困馘歷然亦家食之日多自今而往吾二人相与结一泛宅緣于麦陇翳桑间细取致能句味之所得当尤不浅也第玄旻汗血而与淳父俱凋丧不无哲人之感书毕泫然

弇州续稿卷一百六十四

●钦定四库全书

弇州续稿卷一百六十五

(明) 王世贞 撰

○文部

△墨迹跋

俞仲蔚书月赋

祝京兆好写希逸月赋人间合有数本余所得乃毛氏物遁逸苍鹗駸乎长沙清水何但双井徐君出仲蔚此书则全法老米亦京兆流亚也希逸老去始知隔千里兮共明月为同人所笑不知后来何以见推乃尔

俞氏四舞歌

仲蔚以五言选澹雅得诗家声而时时作绮丽有情语所谓正平大雅固当尔耶第极力仿明远而中入长吉思过苦也其书足河南三昧而诚悬骨森然力过大也仲蔚在当时不甚首肯我然词翰至此亦足以豪矣

俞氏书世说新语畧

俞仲蔚入雪道阻雨无赖漫书世说新语数十条余尝谓与仲蔚坐便似晋人周旋得仲蔚数行便似晋人赤牋今以晋人笔笔晋人语其快又何如也惜乎仲蔚死矣一展册间不能不兴羊昙西州恸杜甫人日叹耳

俞仲蔚书

陆楚生尝以素册索仲蔚书隆庆丁卯诸诗中杂正行体内正书别有一种风骨絶道劲古意鬱淳不可言又篆及八分各数行八分吾尚见之篆尤不易也仲蔚生时人为作一顿美食或荐数软语得其书令乃闻有并金购者昔戴山姥鬻扇增直百钱而后知右军之贵楚生今乞余题尾将无追悔其得之少耶仲蔚方为叶道士摄去矣计当奈何

又

余自归里中每旬日仲蔚輒有诗及尺牋见贻而輒为人持去甚或童子裂以炷油而一友生乃欲持此册博余两月粮何也念仲蔚不复作而此书殊秀劲有风骨其诗无七言遂不堕笑海且此友生即徒手亦能得我二月粮以故如其请应之而识于后

俞仲蔚小楷赵皇后昭仪别传后

近年吾吴中小楷当推俞仲蔚几与文太史雁行履吉孔嘉俱不如也仲蔚此书乃赵飞燕姊弟别传于遁媚绰约中寓大雅典刑殆是赵女班姬合而为一耳然外传实西京俊语别传是隋唐人长语仲蔚宁肯舍周鼎而寶康瓠计当更有外传一纸今不可复得矣

俞仲蔚行草后

俞仲蔚行草结法全出米元章然元章以态胜仲蔚以骨胜态胜者尚以仲由未见孔子时气象目之不知于骨胜者尚又何如也虽然使二子并见柳诚悬必与仲蔚把臂入林矣

王逢年书雪赋

惠连雪赋裁得数语佳耳不似伊家七岁女儿能道柳絮因风起也王舜华以狂草书之自谓秃师三昧恐亦未入祝京兆堂室第比之马溧阳陈山阴差有士气耳徐君复命李士牧圖之亦足铮铮三絕

周芝山赠范生歌

余尝见虞道园失明后书真如盲子行路且神彩都尽今览周芝山翁所书赠范良父歌殊不尔也良父云翁时八十两目俱枯令人以手拟笔即纵意为之出入双井襄阳风骨伟然不两月捐馆殆絕笔也新春遇翁乡人亦周姓而盲好象戏其艺几及神品不待人说即能应着快此两异事欣然书之第手疮作剧以两指挟管都不成字又有沈嘉则跋亦潦草之甚令后人观之不谓一卷皆盲书也

僧大林词翰

新都汪仲淹出僧大林遗藁一册见示大约词翰皆清瘦有法而伤单薄少余致虽不尽洗俊韶本色亦不至作毡根吃藤条语大林故住持郡之竹堂寺歿而晓虚白继之其遗稿多散佚不无长吉友人之恨虽然晓亦何可尽非令诗而贯休书而■〈巧上言下〉光而至今在者何益也

古选古隶

诗自风雅外当以古诗十九及建安三曹为準若整丽至三谢而极矣嗣宗元亮故是画中之有逸品卉木中之有筠竹不当以时代论也癸酉冬余自楚汛大江束还舟中同行者长洲陈道易玉山程孟孺俱能作古隶因稍择诸篇之尤者俾书之道易至九江孟孺至金陵而别又二年道易访余郟阳行台足之始成帙二君子于隶法不能极深研几然不作三崔及开元以后笔犹之帙中无齐梁月露语也案头时一展视欣然独赏苏长公有云胜对俗人诵梅二丈诗远矣

古隶风雅

二百篇为古今有韵文字之祖余尝恠吟讽者高或至西京而不能复泝而出其上训故者仅组织而屈为时义而不能悟而究于用故于艺苑一编亦微及之以示夫有志者间一潜咏觉其篇法句法字法宛然自见特不落阶级不露蹊径所谓羚羊挂角无迹可寻耳适华茂才之方周茂才之冕过余九友斋偶与谈古隶自文待诏父子歿几遂絶弦而二君子颇挾许昌孔庙之秘因采诗之半以授简而二君子又懒于笔所书者仅得十二耳谓余僭而启秋苑之则则有之谓余僭而附于删诗之末则何敢也二君子古隶书三百篇不为辱第转令人忆中郎石经妙迹永絶令人长恹

又

读诸公诗不觉失笑天下才一石子建何尝八斗灵运何尝一斗仅可升合计耳肠肥脑满语不足信

章藻摹琅琊法书墨迹十卷

右章生摹晋右将军会稽内史赠金紫光禄大夫羲之字逸少正书凡十帙为法书之第一卷内临锺太傅力命宣示二帖皆宋搨秘府佳本按宣示为承相始兴公寶爱以

授右军右军以授王修修死从殉遂不传传者乃右军别临本梁武所谓势巧形密胜于自运者也故即黄长睿之考而置以压首卷书家不载右军黄庭内景而光尧在南内有御临本此必渡江后购之人间而手摹之者虽其软美肤致得之思陵居多而不无山阴隆準且又修内司致佳本弗忍去也外景乐毅俱有完本不完本完本则烂若舒锦不完本则零若遗珠三复之余觉不完者差胜二书见驳通人几成子朝之诬至有以为吴通微及王着笔者此中尚可容虞褚数人不知通微辈能办之否第欲以为贞观内府及锺绍京家藏物则未敢也曹娥碑憔悴宛笃云有幼女漂流之态东方朔赞道逸潇洒令人作天际真人想苏长公谓颜鲁公东方赞字字临此书虽小大相悬而气韵良是古人意当有会耶杨用修云霜寒其右军之懿乎不能两行而意自舒绰有余告墓文以乏佳本故所摹觉圉圉国史异纂云真本具年月日者江寧瓦官寺■〈氏鸟〉吻内藏物归之岐王不久而火失之世所传者藁本不具年月者耳此本乃有年月岂岐王未火之先有勒石耶

右摹右军杂正行体为法书之第二卷内临锺成侯墓田帖凡五行按贞观御府书目列于右军下而行数正同当不诬也兰亭三叙其一定武损本一唐板本一褚摹真迹本皆余所珍秘者定武本致佳无可议板本字稍麓行亦高阔而饶波发翩翩风流与圣教相出入褚摹本后有米元章跋与书史所载正合长风帖在淳化成侯迹中独黄长睿以右军少年未变锺体目之甚当盖右军它札称长风要与此同不应成侯时先有长风语也它若玉润来禽何如极寒奉橘鲤鱼雪晴转差薪茶受鹅石脾小祥增哀轆轳十四帖皆灼然者长睿谓毒热为唐文皇所临元章谓头眩为虞永兴别迹虽似各有据然既为文皇临迹亦无碍孙枝且永和祀遼鲜有不出唐人硬黄者而奈何独断断此一则也元章之论则以结体纖润微类永兴不知永兴别迹故是临此本者当是时有发江南山一碑中有小石刻与此本无毫发异不应永兴未生前已书石也且后有右军名署尾故留之僧怀仁集圣教序记及心经虽不无偏傍凑合或不必尽本笔而字体行模精整雅洁遂为法书之冠临池之士盖至今利頼之余所藏石本是宋初榻以故章生得效其技也

右摹右军行草第一卷为法书之第三卷破羌成都清晏此郡山川讲堂都邑九日七十雪侯弘遠知念言叙若耶晚可安善道意时事儿女诸从昨见譙周饒行参朝明府廿七谢生中郎女虞安吉宅图东旋清和迁转廿八嗽面积雪足下秋月狼毒西问又西问自爱安西得告小大佳向久委顿六日还里信云知君脚中深慰日午小园龙保临书凡五十六帖内破羌一帖是米家船至寶最为神妙真足压卷而它书多出贞观内府琅琅有名之笔与淳化相半黄长睿置啄亦少第谓饒行一帖乃贾曾送张说文盖唐人集右军书为之而此则其残阙者又谓深慰为文皇所临与第二卷毒热同予前谓右军遗

墨安能保其不一一唐人临也钱行书法寔神妙安忍舍■〈施，冉代也〉昨见君亦集成然亦用此例小园子一帖元章强排作大令谓其小縱放耳抑何待右军之陋也此郡逋弊元章以为予王怀祖者而长睿驳之事理诚然（阙）当是与谢安石安石在右军治交甚笃意当其入桓大将军府或初拜仆射时右军故与之作肺腑语也晚可真迹在余所仅影响耳

右摹右军行草第二卷为法书之第四卷知问诸贤官奴采菊服食后服食十七日逸民里鲒叩竹后叩竹择药月末賑民豹奴敬问飞白后飞白又后飞白丹杨太常热日朱处仁盐井胡桃龙保黄甘六日胡母豉酒虞义兴笔精司州尝新麦秋袁生来居还镇得见敬和七日隔日近日五日谢光禄徂暑月半敬豫长风谢生十一月皇象逵妇君晚嘉兴尚停凡五十六帖淳化阁帖敕字十七帖与临江石本相间错皆烜赫着声者官奴干丝鬱勃有飞白势裹鲒虞义兴得见三札芒颖射人豹奴独擅章法长风遂为行书辨鍾部一证裹鲒袁生真迹余曾于朱太保处见之或云是唐临耳

右摹右军行草第三卷为法书之第五卷散势昨得连不快小佳反侧月半廿二廿三虞休建安一日侍中敬豫清和追寻临川小大太常乡里可耳母子廿三帖皆得之淳化及临川者内元章以一日一起归之伯高追寻归之大令长睿皆不谓然且云追寻字势语意皆不类诚然（阙）却谓临川一帖有子嵩语以为右军不相及不知内云子嵩之子正相及也且子嵩何必庾顛姨母山阴二帖是石泉公进御者锋势遒鬱劲利不可言省书罔极想佳东比不得眠各可诸患大多患十四日热甚出都敬问诸贤江生西中郎勿杀生末春四月有理北军雨晴遠近廿三帖从秘阁续帖中録出者吴兴大周嫂夜来公孙得书政履六帖从宋搨杂帖中録出者尤崛竒出人意表内末春全是章法与豹奴类它若淡问千呕及此月二帖在余所二谢书一帖于江右人家见之然皆唐临本也

右摹右军疑迹为法书之第六卷如正行笔阵圖二帖皆出自江东李王所正书瘦劲与欧阳率更并驱几不可辨行笔尤自豪爽有公家大将军椎鼓态宋人俱不以为的且谓李王讹书独米元章纪之云纸紧薄如金叶索索有声赵竦得之于一道人章惇借去不归大抵非李王所自辨可证也张怀瓘列嵇叔夜于上上品之第二云吾常有叔夜草絶交书一纸非常寶惜有人以右军二纸请之吾弗与易也今此妙迹絶不可复覩矣此卷后有湘东所进絶交书晋右军云云而秘阁续帖则直定之曰李懷琳蓋以窦息述书赋中有云爰有怀琳厥迹踈壮假它人之姓字作自己之形状而注则谓怀琳大急就嵇康絶交皆托之右军质得数万钱而质家苴以应贞观之募第结法虽沓拖多卧势不能作山阴内擲笔然圆熟畅俊不妨张翼之乱真也他若适得书知欲东差凉奉对屏风奄至此穆松先灵枢慈颜噉豆初月蔡家平康阔别足下时事集期旋洛荀侯小大佳阔

转从阮公月末蒸湿白耳诸帖皆从淳化搨出而元章长睿俱掇以贗本理似有据故别为一册或谓既审其贗胡不割爱而留使夺嫡是不然昔人谓买王得羊不失所望北海惜中郎而延虎贲老成典刑之论故自不俗也

右摹晋中书令赠光禄大夫侍中太宰宪公献之字子敬书上卷为法书之第七卷多正行体内小楷洛神一纸又不完本十三行一纸考赵吴兴孟俯谓所得之陈集贤所十三行仅二百五十字系晋麻纸字画神逸墨彩飞动为天下法书冠又谓宣和书谱所藏末有柳公权跋语者其行字笔意皆同而小乏韵胜且系唐硬黄纸定以为临迹今皆不完本未有柳跋正宣和所藏也洛神全文后先秣林所不载今何缘有此岂即柳公所谓人间合有数本之一耶白骑遂本在锤部考之唐开元中滑台人家应募进御者乃大令所临而误属之锤为改正置此九日帖见石泉公寶章集辞中令呈文气开美有芥视轩冕意而结法极似李北海当北海从此中一派流出耶乞假一表与霜寒并美居然大雅高出辞令此后有相过右使节过思恋不审又思恋及夏节操之卫军静息夏日后思恋天寶十一日昨遂肾气仲宗黄门外甥冠军可必诸舍阿姑承舍月终东家后操之复不审嫂等鄱阳鹅羣敬祖凡三十二帖风神焕然逼乃公奈何髭圣辱之枯枿饥隶耶第操之二帖与本部中结构不大悬今尔分属未晓所谓敬祖鄱阳重见阁帖第五卷而长睿谓敬祖为承祖子武冈侯協字不相及協右军之从祖昆也以归右军乃当而笔小不类鹅羣风骨气槩极为苏黄诸贤所推而长睿以险遽斥之又举帖辞崇虚刘道士语谓山阴崇虚馆乃宋明帝泰始时造后大令六十年固也崇虚既是观字佳名何必山阴又何必至泰始哉长睿欲以考核作书家董狐则可耳欲以八法擅司马徽水镜吾未敢许也

右摹中书令子敬书下卷为法书之第八卷皆行草内诸舍诸女授衣奉别想彼承姑愿余灭书阮新妇奉对得书两玄度慕容前者鬱鬱桓江州疾不退来恒省前书鐵石后鐵石玄度忽动新妇鸭头丸阿姨戮奴后鄱阳不审极热冠军服油转折还此西门日寒追痛疾来知汝不数都与彼人孙权等诸帖最雄俊奇崛有致笔而黄米诸贤乃徃徃加喙谓玄度二帖内有仁祖为军司语二公卒年大令不过十余岁不相及当非右军书耶然谓结法不类右军又以极热服油书语皆后代人伪作又以桓江州一帖半见右军部考张彦远录右军法书信有之则当为张旭怀素辈作耶然以大令之不相及与右军书录语而证其非大令则可以右军大令必不作狂草而尽举疾不退以下斥而属之旭素则不可按宋自元嘉以后有戏学部此必一时诸贤或取大令父子语或集其书作之不必至旭素也长睿又谓阁帖第五卷章草昭烈孔明问对语与此中一帖辞旨结构皆同而尽欲附之右军谓右军有豹奴帖亦章法故也然豹奴密而紧此散而拓或总大令书或亦是戏学之论不可必故仍附大令部而备载其说

右摹法书之第九卷为江东始祖丞相録尚书事中外大都督扬州刺史始兴文献公导字茂弘故光禄大夫即丘贞子览之嫡孙抚军长史嗣即丘子裁之子也始兴之从兄使持节侍中都督六州诸军事大将军扬荆江三州牧武昌公敦字处仲即丘次子治书侍御史基之子也从弟平南将军护南蛮校尉荆州刺史赠侍中骠骑将军武陵康侯廙字世将即丘第四子尚书郎正之子也从弟平北将军徐州刺史海陵恭侯邃其父未考始兴诸子散骑常侍后将军会稽内史赠卫将军荟字敬文敬和之二子散骑常侍卫将军尚书令赠侍中车骑将军开府仪同三司东亭献穆侯珣字符琳侍中长兼中书令珉字季琰正伦之子司徒左长史廡东亭二子侍中太保录尚书事扬州刺史华容文昭公弘字休元侍中骠骑将军太子詹事豫章文孝侯昙首豫宁之子侍中尚书令左光禄大夫开府仪同三司赠司空简穆公僧虔简穆二子冠军将军庐陵王中军长史赠太常懿公慈字伯竇金紫光禄大夫散骑常侍临汝安侯志字次道子太子詹事度支尚书筠字符礼内世将五纸敬和四纸简穆伯竇各三纸休元二纸自始兴而下正传九七代右军诸子自大令外今存者右将军会稽内史凝之豫章太守操之黄门侍郎徽之豫章得二纸此外又有中军将军循及涣之等各一纸史称右军七子知名者五人玄之凝之操之徽之献之而不及涣之黄长睿则谓涣之为右军子又皆定其为真迹而云凝之得其韵操之得其体徽之得其势涣之得其貌献之得其源长睿博精不减仓曹此当有的据可补史传之漏记我简穆着评云自过江东右军之前独平南为最书传右军画授明帝又云右军谓洽弟书遂不减吾又云亡从祖珉笔力过于子敬子敬戏之吾弟如骑骡馵馵欲度骅骝前长睿服膺则在平南简穆正书启事而颇以劭廡三帖为贗岂所重在方雅而拙圆熟耶青凤之裘片羽千金况为之后者焉敢以悬断而去取之也

右摹智永真草千文为法书之第十卷永则右军将军之裔孙也于陈永兴寺披染正行章草俱入张怀瓘妙品永师尝手书正草千字文八百本散江东诸寺此八百本中之一也伯施谓永师一字直五万计当为十万缗加以標目各十五字又当为千五百缗矣此虽书家自相贵语亦足征永师声价后一纸阁帖误收右军部中今改正于此当永之在南其以书名于北者独太子少保褒而永尚有从子曰■〈莫上乡 下〉曰涣者亦以书称于隋而位不显余每叹吾琅琊入李唐后不唯簪组向稀而词翰都谢始兴之裔宰相尚余四人书之可知者唯秘监绍宗而已岂淮水犹未涸而墨池一派先受壅耶窆泉书赋谓右丞维平章事缙亦琅琊人恐误维缙与所纪知敬知礼皆大原河东望

摹苏长公真迹

余于眉山苏长公无能为役凡公生平长技十不获一而独贤劫以来所受风味习

气时时有相入者昨年始悉取诸名贤文辞稗官谐史小有關於公者即笔之总得十二卷而家所藏公墨迹石刻小楷藁行草圣之类为诗为文为卮语几百番儿辈欲分得之垂割而客有周（阙）徐长孺章仲玉及吾从子驷素善公结法因令各响搨大小彙为七帙藏之山房其体之倣傥权奇出入变化所不暇析内煎茶聽琴四咏归去来辞及跋王晋卿山水歌祭黄几道文谢送梅花诗与久上人帖则皆于真迹搨出者以故几若赵郎之见貌周昉并其情性得之不止王孙之隆準而已也昔人之评公书者或目以墨猪或讥其画字或病其跛偃或谓其多病笔又腕着笔卧故左秀而右枯要之举不足以累公舍此则所谓吃井水地无不寶爱公遗翰称赏不置口而余最心与者二评其一王履道云世之学公书者多矣剑拔弩张骥奔猊抉则不能无至于尺牋狎书姿态横生不矜而妍不束而严不轶而豪萧散容与霏霏如初秋之霖森疎掩抑熠熠如从月之星纤余宛转纚纚如萦茧之丝恐学者未易至也黄鲁直云东坡道人少日学兰亭故其书姿媚如李北海至酒酣放浪意忘工拙字特瘦劲似柳诚悬中岁喜学颜鲁公杨风子其合处不减李北海至于笔圆而韵胜挟以文章妙天下忠义贯日月之气本朝善书自当推公第一此二评者诚为知言然公故非当家政自以品胜耳品者人品也不尔请看吳通微王着或又曰否否李丞相鍾太傅生身刀笔中来閩井之佞魁耳不中与会稽吳兴作奴而何以鼎峙万古也余无以应退而志于尾

徐髯仙手迹

余生平所得近代名迹如仲温希哲征仲履吉辈至多独于徐髯仙子仁颇爱之而不能多得以为恨久栖靖室于一切毫翰付之乌有矣而新都汪仲嘉忽以此卷见示皆书青莲居士作为蜀道难梁父吟天马阳春二歌前有尊酒行凡五章书正草得二体正体乃有古隶笔似欧阳兰台草书半得章法而实步趣会稽其精雅妍媚使人啧啧生赏惜腕力少弱以登兰台堂则有余叩会稽室或不足耳漫题其后付儿辈藏之以备一种

题舍弟敬美书杂帖后

吾家右军分甘青李二札右丞辋川一疏能于萧散中作清景俊语苏长公种橘帖亦庶几焉诵之不待毕觉仲长统萧大園田父矣仲氏敬美以黄庭小法书之时出入洛神览之不待毕觉王着鲜于枢佐史矣右军长公所云敬美澹圃已饶得之吾虽不获西入關寻辋川遗胜记与敬美以壬申九月望夕登包山穷灵盛之迹俯瞰太湖天水一色已而攀曲岩探幽谷出没丛薄间栖鸟格磔土豹殷殷寻得竹径而出月色逾莹羣碧摩天黄云绣垄此景似更絶第不能作此疏耳嗟乎是三君子者亡论其文辞一齿姓名三日犹芬甘不知后千百年人于吾二人何如也

穆光胤书父文熙诗

穆考功文熙寄余近作内有拟少陵秋兴八首而其子光胤集右军书书之者偶一僧相过拈以示之问其书似右军否曰似似问秋兴似少陵否曰不似不似余不觉失声笑曰不似不似似亦不似不似与似总是不是男儿堕地自名自位勿作第二人勿落第二义僧亦笑曰此戏也而具少禅理即令少陵再和秋兴右军重书兰亭其似耶不似耶因记其语

穆光胤临七姬帖

穆生临宋仲温七姬帖陶靖节杜少陵诗歌皆极精与真本对核之几不可辨虽然仲温仿锺太傅史黄门不免婢作夫人矣今得无犯重儻笑乎近有充相公舍人子者相公不识也以问舍人子亦不识以问舍人子之舍人子乃识之曰此吾舍人子也吾不欲令儿曹临写恐原主不识也

吴贤墨迹

家馭提学出吴中诸名公墨迹九十一帧内希哲书昌谷诗英英并秀如两玉树皎然风尘外物征仲抵掌玉局莲花乃似六郎矣伯虎脱尽平生后一札笔意大似周越而诗不称第与梦晋俱不失狂奴态元馭学士命余题尾诸公翰墨尚易得独昌穀零落几于吉光片羽矣家馭善有之勿令人持去也

杨南峰墓志

文征仲先生以古隶书杨君谦先生自草生志若可谓二絕者第君谦负古文声毋论其辞枝而不修即生平轩豁得意在弘治己酉挂冠而数语极为牢落最骖顿无状在正德庚辰再趣行在试乐府嘉靖丙申献九庙颂及华阳求嗣仪而叙致津津不容口老諄一至此耶曷不于庚辰前亲三尺土耶然则文先生此书之佳故不为此老幸也

俞仲蔚墨迹

古诗十九首工与锺王宣示兰亭同品具耳目者皆知其为寶地面苦无蹊径可寻仲蔚悉平生力竭蹙趣此二端纵不能于词场墨藪中执牛耳退亦不失尉佗矣秋日览

仲蔚书十九首其似耶称耶所不论差胜读俞氏集一卷

王行父藏王稚钦诗迹

仆生平以不及遘梦泽先生为恨今日得见先生词翰又得与先生之从子行父遊足矣当呼子墨泚楮尾时觉行父亦沾沾自喜不知先生在芙蓉城闻之以为何如耳

王稚钦书五言律诗

天下以才子归稚钦先生谓若大绅子启之倾写不倦则误矣构结鍛琢极有工夫一句一字亦皆有色泽意态若项西楚關汉寿不能得其九战絕甬道淹七军之妙而仅以叱蒯烦馘颜良嗜乌跳荡之粗目之为万人敌也此卷皆五言律尤自长城书法故不必成就而翩翩自赏宛有征仲中年以前笔先生信奇人哉

朝鲜三咨

余所得朝鲜国三咨合为一卷其一乃弘治八年咨辽东都指挥使司护送贺东宫千秋节者其二嘉靖四十一年咨礼部进贺万寿仪者其三则万历十一年咨礼部进献慈圣皇太后仪者前后相去九十年更三王而楷笔谨细如一纸若玉墨若淳漆朱色浓透而咨字行押似以牙刻刷而精为之润色者其敬慎而能恒若此宜其享国之久远也贡物止各色细苧花席豹皮种马蓋洪永之际每贡有金银器餽大约可千余两宣宗皇帝以非其土物戒使弗进以故其国人感佩职贡益勒比于甸服圣主薄来之仁与不贵异之谊岂不踰越前古万万哉因窃识之以见字小之与事大实相因而成也

弇州续稿卷一百六十五

●钦定四库全书

弇州续稿卷一百六十六

（明）王世贞 撰

○文部

△墨刻跋

禹碑

余所有岳麓禹碑凡三本其一本差旧而无注释其一本刻之绍兴者后有张明道跋颇伟而注释字粗拙之甚其一乃木本刻之长沙者前有宋张世南所纪后有明湛若水跋沈镒释义杨慎歌及小序顾璘季本熊宇前后序文书体亦有作八分者而丑俗尤甚释义是三家社学究语耳乃自诧以为神禹梦中所授当令人唾杀中间与杨释异者凡十三字俱无的然可据觉杨义差雅会得其手书歌序释跋因定装于所藏旧本之后而张纪湛跋顾辨乞友人以小楷补之余尝谓此碑定非大禹文亦非大禹笔而不敢遽谓为嬴秦以后何贤良所行世即人间旧遗本而衡山之石久已泐其文理之不可读以石泐故而杨沈之释字亦多以意会之未必其果合也虎贲微似中郎孔北海尚爱之况隆準公真龙裔耶杨书贻吾乡周太仆复俊者其家人摩去之字法亦可重也

又题禹碑

杨慎曰释文第六句旧作南暴昌言余疑文义不贯字形亦不类思之不得是夕梦一鱼首黄衣指谓曰此南渎衍亨四字也寤而观之形义两协其所谓思之不得鬼神将通之耶沈镒则曰夜梦一长人挈古铍授之其色黄高尺许口傍横书三字某宫造下有篆文悉如龙蛇草木之形寤而忘首一字及旦诵释文恍若素识云云不知者以为文人矜夸之习类然耳余以为仓籀所不尽载时俗所不能辨不假之神何以征信耶聊记以资一噓

跋鲁相晨庙碑

按赵明诚金石录谓鲁相晨有两碑皆在孔子庙中其二云鲁相河南史君讳晨字伯时从越骑校尉拜建宁元年四月十一日到官正此碑也其文独完好可读数十行后字稍大结法益遒美后有题尾称大周天（阙）二年其书亦用武氏体虽倾侧而字势可爱余在青社时为陈道易持去且二十年矣一日忽见归曰吾于古隶法得十六于受禅得十四于此碑余笑曰公可谓鲧鱼上竹竿不离故步何得云尔陈亦大笑史君时尚存而称讳古文多有之

吴天玺书

昔有诗云中国书流让皇象六朝文物重徐陵似为江左张价象所书吴天玺碑出篆入隶高古雄逸要当与蔡中郎抗衡成侯受禅固自超方之此碑不免峯山之于岐阳矣昔人故非欺我然徐陵之于文实不可与休明同日语也

汉隶校官

右汉溧阳长潘干校官碑光和四年立按四年之碑若逢童三公穀坑君无极山神敬仲蔡湛孙根凡七见于集古金石录而此独阙如者盖宋至绍兴十一年溧水尉喻仲（阙）始出之固城湖滨官舍在欧赵二公后耳结法最为高古伯仲西岳劝进间第多漫漶不可读番阳洪景伯为之注释而阙其二十七字符至顺中济阴单博士禧宦游其地复考辞义之可通者得十六字因手书景伯释文而附所补于后吾弟今获本乃旧搨而不载单禧所为跋释文止着阙字而不载禧所补何也岂此本在禧刻前为洪景伯书耶景伯书又何以步趋赵吴兴也碑今在溧水溧水汉溧阳地更搨一本验之即见按此碑恐是元人翻刻真本而别令善赵书者作洪景伯跋耳

秘阁续帖

右秘阁续帖第三第四卷此帖既不易得而又皆右军书多纵笔变体极可爱内四月一日帖及后右军诸子书称弘白黄长睿谓为伪帖欲去之甚当第文寿承跋尾以为中数帖类米老所临者则非也此帖刻于元佑中米老书学尚未着不应其模本已达中禁当是唐人临笔耳

续帖第九第十所谓贺知章者似二王杂帖语今以归贺不可知虞柳二君迹不类平日而甚有好致柳尤遒逸无名二纸其一诗亦唐语其一札似临晋帖飞白五字出古隶若李怀琳书絶交书寿承以为至精无以加而山谷者人乃谓往在三馆于阁下观怀琳临右军絶交真迹大有奇特处今观此十未得二三乃知怀琳之妙如此其所谓十未得二三者尚足以驰鹜后世也卷尾天监二年至臣云小楷湘东所进云云行草皆怀琳临笔今人却作嵇康书媒鬻而辨者以为怀琳伪为康书亦谬也唐人十二月节帖词既鄙琐书亦无雅致但结法差紧健中间尚可包王着周越耳

泉州宋搨淳化帖

余少得淳化阁帖飞白浓墨二种皆作赝古色乃泉州翻刻本也当时絶竇爱之后渐觉其波磔之际多有可恨乃至结构时时有讹笔觉其非古后先为人持去不惜今年

始从吴中得此宋搨完善本以较余所藏大观绛帖虽少逊比之他刻大径庭矣凡泉刻则五卷智果而后缺十余帧其它不尔也传阁帖者邯鄲子與日益繁而降準日益少故为志而藏之

甲秀堂帖

客有售陈氏甲秀堂帖五卷者石鼓文泰山铭皆缩小字为之及秦氏三玺文尤淳古可爱蔡中郎九疑碑虽见宣和书谱而行笔絕类开元孝经陈思王诗及鷓雀赋亦然黄伯思辨其为李怀琳辈贗作似有据也余则苏明允才翁子瞻蔡君谟黄鲁直米元章笔札耳按昔人谓甲秀堂帖前有二王颜鲁公迹世所未见一云季氏也此本蓋零落不完者其人不复翻淳化大观欲与之配亦壮矣

索靖月仪帖

今年冬得黄熊所携索幼安月仪帖一卷按幼安真迹为宣和殿所藏而先已刻之秘阁续帖中米元章与其友人书谓月仪帖不能佳而黄长睿遂未信以为贗物独董道称其笔画劲密它人不能睥睨然亦是唐人临手也月仪有正二三月九月九十一章俱称具告君白了不可晓其辞亦错杂絕不类晋人尺牋而中得一二古雅如黄初时语然终不可晓也此本刻颇精楮墨亦佳有古色或是阁帖真本故存之

真定武兰亭

兰亭如聚讼自宋已然即以定武一石言之有肥者有瘦者有五字未损者有五字损者何子楚王明清谓唐时诸供奉搨此帖独欧阳率更逼真石留之禁中他本在外争相摹搨而欧本独不出耶律德先入汴得而弃之杀虎林流转李学究家以至复入公库所谓未损本也定武薛帅子绍彭摹之他石以应世购潜易古刻于湍流落左右五字微劓一二笔藏于家大观中人主知之取进御龕之宣和殿壁师陷诸珍寶悉逐北去而此独留宗汝霖得之以进光尧至维扬而复失之所谓损本也然则绍彭之所别摹者亦得称未损本也夫损本既有两种不易辨而先搨者又不可得蓋不能不取极于损本矣董道谓定武非欧笔为汤普彻临亦未有据至所云肥瘦本或以定武有二石或以搨法少异格之殊不知辨千里者不当在骊黄内也此帖乃五字损肥本余生平所见非少俱不能及虽以摹搨之多小有剥蚀而风采迥出诸本上徧考古证凡五处皆合若管弦之盛上不损处有小龟形与是日也第九界行颇肥痛字改笔不模糊兴感之由由字下类申列叙之列其可如劲鐵则可不待讼而胜矣帖为陈直斋物后有直斋印识赵吴兴常从

其姻亲万户者索之而不遂书法尤遒媚可爱吴兴得独孤本自诧以为遗墨之冠而尚汲汲于此本其声价当何如也余旧有一歌于定武本颇极推许而实不称今割以题其后云

宋搨圣教序

圣教序虽沙门怀仁所集书然从高宗内府借右军行笔摹出备极八法之妙真墨池之龙象兰亭之羽翼也余平生所见凡数十百本无踰于此者其波拂钩磔妙处与真迹无两当是唐时搨本耳去岁嘉平猎得此本今年伏中复得定武兰亭为自快自赏者久之穷措大余生一何多幸耶

又圣教序

圣教序未裂本余徃徃得之多为人乞去而留其颇佳者此亦其一也怀仁既善书又从文皇借得真迹摹出以故虽不无偏旁辘合而不失意他集右军书者未尽尔也

宋搨兰亭

姜尧章所记定武兰亭五字或损或不损偏傍结构与在明秘藏本不必尽合然一展阅间纸色搨法知为北宋时物无疑也悦生堂一百十七刻以修城为甲而定武诸本次之古懿永兴宣城又次之在明其自保爱故当不出此数种也

兰亭二石刻

前一刻为陈缉熙家褚摹兰亭跋者王文端文安徐武功诸贤皆名晓八法而不能辨余有张澄石刻与书史正同始辨其为褚摹而米临见弇州集中后一刻为赵吴兴临凡二本有十三跋甚精以登善之神俊子昂之嫩艳而结构全用己法尚不能抵掌何论斂胎然登善有意于离者也子昂有意于合者也米之于褚在有意无意间者也缉熙别作廓填今在池湾沈氏余又尝于六观堂周氏见十三跋书经笺工甚而不无毫厘之辨石刻则东书堂之初搨耳附识于此

跋周邸兰亭

兰亭褰叙自陶九成所纪贾秋壑家藏修城定武一百十七刻又卅年而周邸之刻

继之其声价剧出诸刻下虽有定武及肥瘦褚摹唐赐五帖之不同而结构波拂一一出宪王指腕无山阴神骏意第龙眠画与王手书诸说却他本所无亦足称褻史余前后得十余本久而厌之则皆为他人物今年得一本乃东书堂初搨王所自寶者黑处若纯漆白处若栗玉即不知淳化李廷珪墨澄心堂纸何如其它恐未多让也譬之尹夫人虽不称絕代而韶粉靚饰遇邢姪娥未进时亦自足赏保不作他人物矣

古兰亭选序

古刻无繁于兰亭者其石自隋唐二刻及定武后何止数百千本而所聚名刻亦无繁于贾秋壑平章者凡总为册分十支为刻得一百二十七而至元末数易主而归于钱唐谢氏陶宗仪见而笔之以为希世至寶今不知落何所当受妬于祝融阳侯矣余生平觀佳本不满二十然多秋壑以后而所藏墨迹仅唐摹一本石刻定武损一本唐本木板一本佳耳又次仅此六刻以视贾则黔娄视赵子固则不贫戏识于尾

玉板兰亭叙麻姑仙坛记

两年内得玉板小兰亭叙于黄羽渊得颜清臣麻姑坛记于傅伯雅其刻搨差古雅而精不类它本因合之为一帙蓋山阴之圆剂鲁郡之方而后集大成如夷清和惠不相胜而相用可也第恐山阴艷然作曾西色耳

宋搨右军行草帖

右军草书二帖亦光尧笔也蓋杂选右军精书极意摹仿为之而刻搨皆修内司妙手纸墨又不減澄心奚超以故温润蕴藉光彩焕发第稍肉而媚不脱本来面目内破甑一帖尤目所未见然似大令结构非右军也象先以为如何

临江二王帖

跋之后七年而家弟自燕中得最完本亦云临江石刻前有目錄是谢湖袁氏遗物然细翫之是木本以余本较之神采似稍胜考余本王畧帖尾有懷充二字又方印二曰永存珍秘曰墨妙笔精蓋米氏私识也袁本皆无之又袁本服食帖食字仅二点误为令字而余本下有一二小带笔作食字明甚然则袁本之为翻刻无疑也第当亦是宋梓纯墨搨余本乃蝉翅搨内补大令前数条与袁本正同祝京兆一跋称赏不遗力而书尤妙絕因备志之

汪象先二王小楷帖

象先出此刻余望而知其为秦汝立舍人家物未系陈道复小篆数行盖得之华从龙比部者最为精絶所谓秘阁续帖本也弟卷首兰亭是定武损本想从龙以前好事者合而成册耳家弟敬美尝从东沙华氏得全本前有锺成侯戎路贺捷二表后有右军誓墓大令洛神与欧虞褚柳名迹凡四十余纸惜不令象先见之

汪象先大观帖

淳化阁帖化身为潭绛泉汝戏鱼井栏（阙）徃徃不脱本来面目独太清楼帖乃逊功帝出秘府墨迹令刘无言辈摹勒登石者阁帖则出王着手着精于法故形色不爽无言妙于势故风韵尤胜（阙）人谓太清为淳化介弟母亦陈氏二方难为伯季者耶缘太清无别本以故世尤艰得之得亦不能备余以甲戌宦燕中朱忠僖物故仅踰月而得之其家人盖卷之二四五八十耳四卷皆飞白而一卷独淳黑唐礼部玄卿所补赠者也今年为丙戌汪象先出所购则第一二三四五卷神采更自焕发可爱云亦得之燕中而周公瑕遂定为朱氏物不亦信耳而废目耶余后复得第七卷不完本于吴门乃右军笔尤佳絶今并在儿骥处象先果有意乎不妨作延津合也太清复有后十二卷则秘阁续帖原本仅改其标目耳而益以人间所流传十七帖及孙过庭书谱余复得其五卷然秘阁续帖原搨也因复志于此今象先夜眠不着

跋陈季迪绛帖

诸帖自淳化之外昔人评其骨法清劲足正王着肉胜之失独于南朝唐季帝王后续以宋太宗差为蛇足耳潘师正手自摹刻所谓毫髮无遗憾波澜独老成者后有旭素真卿帖则皆高节度汝砺增入国初入晋府石本零落非复旧观矣此卷不能四之一然纸墨精致神采烂然当是宋搨之极佳者吉光片羽豈尚千金季迪其寶藏之王百穀所称黄淳父十卷今在吾儿所中多不同异日可为延津之合否

杂二王帖

杂古法帖一册凡三卷后先得之飞鳧人者皆晋人尺牋右军二十四思陵临右军四大令四谢太傅一王东亭一皆宋搨也首卷前称兰亭续帖卷第三考之诸家石刻不载而笔意极精佳次卷吴兴等帖尤有锋势不知是寶晋帖中物否思陵赐米敷文临书

十三纸见米跋今仅存四无一笔失度恐是双钩廓填也临江石刻二王书极为详备而月相酷早追伤诸贤道护州民大周嫂不知松来初月见尚书十一帖大令十二月授衣东家三帖皆彼中所遗者故收而藏之吉光零落偶获片羽岂敢还望成裘第勤缉之不已将来尚堪一半臂也

宋搨乐毅论

沈存中谓乐毅论是右军手书刻石唐文皇将以殉墓此殆是梦中语而莫廷韩复以梦中纪之按此论乃右军手书以贻子敬者至梁武已疑其为摹迹而陈文帝时赐始兴王贞观中进御十三年命起居郎褚遂良排署至中宗朝太平公主携出以锦袋装之后变起咸阳老姬窃得为吏所迹迫则投之爨下宋有二石本其一秘阁所刻其一高绅学士家所藏盖它摹本之寿诸石者也此帖乃光尧太上于损斋手搨付石而石工及纸墨皆修内司第一品精致流利精彩射人而结构柔缓丰肉少筋不待再勘本色毕露矣家弟有黄庭经一卷与此及戎路表正同予故能辨之非谓眼力亦胜廷韩也

宋搨戎路表

戎路表宣和御藏所记最为琅琅黄伯思董道北攻守若翰墨毋复余论第余所见两石本皆劲而纖长又不无剥蚀此刻独完好纸墨皆精翩翩有宣示风然是思陵手搨似不无肉胜之叹廷韩善书而不善鉴故题语孟浪若此

曹娥碑

曹娥碑小楷则右军轶尘行笔则蔡卞竭蹶矣不谓中间尚藏北海其流利丰妍肉不欺骨自是可人若题碣隶古八字奇逸飞动隐然蔡中郎典刑后先两北海必相与痛饮也

又

右军曹娥碑搨法近古而精又文氏停云馆物昔人谓此书如少女漂流于波浪间今求所谓漂流波浪之势了不可得意者其憔悴宛笃外弱而中劲庶几得孝女意于形似之表欤

智永真草千文

智永真草千文崔氏所藏真迹薛嗣昌刻之长安漕司者翻本尚完好但太瘦生且波发处多有可恨此纸晚得之徽人汪生是枣本耳而肥以长安石本较之不啻江妃之望玉环也刻手工拙固如此哉今智永千文独推史家碑疑此即是也

又

智永真草千文宋薛道祖子嗣昌刻之永兴军漕司中其石尚未泐而余有一搨稍旧者甚明白可爱晚得此本有嗣昌跋正同而稍昏暗且又木本当为翻刻无疑而细考之波磔处剧古雅遼胜旧藏本乃知漕司石良已非故物矣木本乃宋翻凡出宋人手必佳吴子辈虽竭蹶而趋之不似也

隋八分孔庙碑

孔庙碑隋汝南主簿仲孝俊文其称述圣德与曲阜令陈仲毅裔行相上下盖六朝之谀习也隶古是崔氏父子余规虽挑截未精犹时有汉意更一转则入唐矣

宋搨右军三帖

吾后先所得黄庭三四种时有佳者独不能得宋搨近于汪仲淹处得秘阁续法帖定为宋搨而此本及乐毅论尤觉精彩不甚失笔意会先已藏曹娥碑更致佳本因合而留之昔人谓黄庭象飞天仙人乐毅论象端人正士不得意曹娥碑若花蕊漂流幼女捐躯于波间余反复详翫第见其美而已所谓端人正士飞天仙人以意揣摩或互有之若幼女捐躯之状竟不可寻也岂余两肉眼不能辨大士法身耶将书家者流多作诳语自标置耶不觉为一笑而题其后

王右军文赋

覽右军书目原无载士衡文赋此亦一旧搨虽笔意圆嫩而少国士风岂南渡后光尧重华与我明周宪王戏草耶

跋王右军笔阵圖李卫公上华岳书后

右军笔阵圖凡二本其一正书差小有率更之清劲而小怯其一行笔甚道逸而不

能脱俗气或以为江南李主笔或谓李主不办是然断非右军迹也亡论非右军迹即圖说非右军所著也何者右军十二而过江神州已委弃矣所谓之许之洛者何语也此圖之误也华岳碑乃张昶非张旭也此书之误也李卫公上华岳书粗豪不成语断亦后人附会之谈而结法却秀颖有唐人气以其皆宋搨极精嫩故合为一本置山房中配怀琳絕交书成贖古一故事云

又

笔阵圖有真行二本皆以为右军书余以为无论张昶作张旭字误而已其文亦非右军语乃六朝之好事者为之余此正书真宋搨笔力遒美彷彿信本而古雅胜之行书差纵佳处与俗处相错当亦是季重光以前物也李卫公上华岳书文尤沓拖一无意人所拟撰其书却有意出入右军永兴间然右军避家讳故以正为政而此云聰明政直何也

小酉馆选帖

余尝取家所有古墨刻行草非丰碑所记全文者以雪堂义墨例例之彙而为册得十有七其一唐文皇屏风赞仅后半屏耳笔法圆熟流美真所谓帝王第一也其二蔡中郎九疑碑九九十字虽再入刻手尚具典刑出师颂甚古雅然谓索靖恐未敢定也或是萧子云耳右军十二月帖殊紧密子敬辞中令帖极有天趣然使李北海竭蹶趋之或可到唐摹九帖右军二帖最竒古与秘阁续帖所载者同结构徽猷僧虔三帖皆正行尤更焯焯褚河南哀册枯树吾家石也其三李北海荆门行极类云麾碑而差弱诗大似元白时语而不类当再考之张长史千文二十三字忽肚痛三十三字竒逸飞动然恐非其至者破除帖稍圜紧然不知是长史笔否徐季海心经一览之知为眉山所自然眉山却少渠一二俗笔也颜鲁公临右军三帖尤胜以为鲁公觉神气清紧以为右军觉锋骨劲露祭伯父从子二文与争坐帖皆稿草之妙境也余自有宋搨佳本此仅得其半且似襄阳所摹以其旧刻故聊存之其四怀素圣母帖最琅琅者陝石坚好至今尚未泐藏真律公三帖多游丝笔遒美异几千文不能无小疎讹当由刻手误耳竟是真迹其五其六其七皆苏长公寄文与可三十韵字差小松醪赋楚颂一纸差大皆正书而不能不带行笔贵在取姿态耳又陶诗孟夏草木长一首人生归有道一首种豆南山下一首行书殊古雅其石在吳中乱山近始得之又草书孟夏草木长一首则加放矣卞山龙洞诗稍楷其石在吳兴又醉翁操饷雪浪酒诗颠逸不在杨少师下摹怀素一帖右军二帖皆浓墨本是苏家法耳稍叅以古便觉斐然孤村微雨莱州雪后各一诗亦行书而皆有意其后瞻字见古押法建昌宫词是名笔中之有异境者书妓女杂诗是无意中之有余态者又尺牋

十四研铭一皆居平小行法也又书禅语六言一章及少陵诗二章花气薰人七言絶一我肉众生肉五言律佛偈一则狂草也鲁直前身一女子耳其书多仿怀素诗多作禅语何也又一纸樊口舟中烛下眼花头眩更观东坡醉笔重增睡思此公于书最重坡公者何缘出此语其九其十其十一皆米襄阳尺牋九十八章俱遒逸有气读至书内芾老矣先生勿恤廷议荐之曰襄阳米芾在苏轼黄庭坚之间自负其才不入党与此大可笑又可恼也张颠俗子变乱古法惊诸凡夫自有识者怀素少加平淡稍到人成而时代压之不能高古高闲而下但可悬之酒肆此虽太肆然不无意也收得逸少初月尚书二帖智永所临五帖皆希世之珍高压颜张数等足与公西风争长于思用处购得锺隐三间无瑕紫玉砚以董源林石易凝式二帖层云峰承晏墨易怀素二帖又获端凤研一那研一凤研一洞庭石高一尺许声如玉形如凤如飞仙如云叶凡再言之此令人忌且馋发也又一词及手札杂诗小叙俱有神采王畧帖尤英伟第纵书右军墨迹后胆几大于斗矣又吉老墓表极有势然非七尺碑上物也祝寿诗一庆云现诗一鹓鸪天词一贺圣朝词一后皆有子友仁跋纵笔颠放了然不让乃父似非卑梓之道其十二张文靖守五札极为圆熟韩子苍一札亦遒美以无他刻故存之其十三赵承旨子昂心经一千文一临兰亭叙一临枯树赋一乐志论一盘谷叙一皆行笔绝得晋人意淮云寺诗一化缘序一则稍大而北海为多其十四宋仲温续书谱作小章法而不甚草出塞诗稍大能草而不甚章徐武功元玉水龙吟慢神骏有米家风陆文裕子渊来鹤诗极能酌北海吴兴间微觉瘦骨中有肉恨其十五祝希哲古诗十九首和陶诗廿首皆翩翩有大令风其十六希哲榜柅歌曹子桓诗数章皆剧有章法老健可爱芙蓉池作献之终不似也公燕一章绝得眉山笔情诗似胜老米以时有子敬意故也十八学士歌水调歌头逃暑诗似米似黄似素不可名状其它书尺书记亦种种可观其十七王履吉白雀杂诗是病后笔姿态溢出稍觉有意耳道复壬辰作比之生平极不草草第以拟古人终有愧也

李靖上西岳书

李卫公上西岳书不见正史意者影响之谈如虬髯客传类耳其书亦似唐末五代人笔虽不能整栗而微有意卫公将畧为唐初第一功最大故好奇之士多传之

欧阳率更九成宫醴泉铭

今世惟欧阳率更醴泉铭多旧本当是宋人好临仿其书而石坚致耐拓耳余所有二本皆从故家散帙中得之而笔墨尤精美可爱秀劲之气射人眼睫间小白猿公手信乎当与羊鼻公语同传也

虞恭公碑

信本醴泉帖最易致而又最完好化度帖最残缺最不易致而声实倍之独温虞公碑酌乎其间余所见凡数本有佳者而此亦其一也

大唐宗圣观帖

此碑建于武德九年二月内给事中骑都尉欧阳询撰序侍中江国公陈叔达撰铭观以祀文始真人尹喜者神尧尝幸其地用币焉故其徒相与侈大之其文辞稍雅净而隶古亦遒婉可爱疑即询笔也考本传询官位正合叔达以黄门侍郎判纳言事而此云侍中盖武德三年改纳言仍为侍中耳宰相表则叔达以二年正兼纳言九年十月坐事罢而传遗之当以此碑为定

欧阳率更化度碑帖

书法自率更而始变晋体然谓之楷则诚楷也醴泉铭最大最易得温虞公碑次小次易得邕禅师碑最小最不易得第其结构精紧风华烨如体方用圆以劲藏媚则邕禅师而外诸碑瞠乎后矣余生平慕好之而三购本皆不能全第一本可读者二百三十三字第二本仅二百十九字然藏之徐文裕公家后有陆詹事子渊胡中丞孝思跋詹事数行精甚盖其时已极重之二本俱佳不相上下而彼此互有无此不可晓也第三卷九四百四字中间亦可读而结法不如前二本远岂在宋时有翻刻本耶然胡以追蠡至此或云有马生者得善本临搨而梓之者也姑用以装尾

褚河南孟法师碑铭后

此孟法师碑乃中书侍郎岑文本文谏议大夫褚遂良书也首脱唐京师至德观主七字尾脱年月衔名三十三字碑叙脱百余字词脱二十七字当是割表后历世久远罅池零落故耳第的然唐刻唐搨本波拂转折处毫髮遗恨真墨池中至寶也考褚公以贞观十六年书时尚刻意信本而微参以分隶法最为端雅饶古意余尝于黄熊所见而絶爱之参差未成贸今归曹进士绳武相去里舍不百武得朝夕寓目一何幸也碑目见赵明诚金石录又余有旧翻本证之辨为褚书不然世不以为信本者鲜矣

云麾碑

余所有李北海云麾碑凡数本而此其最佳者其风骨之尖利与姿态之佻俊尚可于波磔中寻之信墨寶也

弇州续稿卷一百六十六

●钦定四库全书

弇州续稿卷一百六十七

（明）王世贞 撰

○文部

△墨刻跋

张长史千文石刻

右千文乃葛邲丞相家藏物即褚纸亦宋户口册其为宋搨无疑独以归之懷素非也旭肥素瘦又云肥劲难瘦劲易云公定论久矣此帖雄伟神骏种种惊人乃不作牛鬼蛇神态昔人所称沈右卫肉飞仙非长史谁能当之特为鉴定而题其后

又

始余验其书迹肥不类懷素定以为张伯高而又疑其锋势小缓而肉胜谓伯高不至此后览董道广川书跋有高闲千文而云闲书不多存于世其学出张顛又云闲知随步置履于旭之境意者此为高门帖乎宁使此帖减价毋宁使老顛受诬于地下也识以俟考

唐隶夫子庙记

夫子庙碑为渝州刺史李邕撰宋州刺史张庭珪书邕语亦似知尊夫子者第任书可耳不当遂任文也庭珪官至太子詹事着直声家藏二王墨迹甚伙书小史谓邕所撰碑碣必请庭珪书此亦其证也第所谓古木崩沙闲花暎竹者尚未得尽其致耳

唐僧懷恠实际碑

右隆闡法師碑僧懷恠撰及書頗亦能為其家言筆法尤圓嫩有聖教遺意后稱天寶二年至明年則改年為載矣趙明誠金石錄極詳備而遺此似不可曉

顏帖

晚又得文忠與李大夫二帖澄師一帖祭伯父一帖附裝坐位帖后澄師帖極偉勁而小過於拙有篆籀意李大夫祭伯父風骨遒逸神采驚人與坐位結法正同據題當有祭侄季明文而今失之令人悵然米顛謂顏行書尚可教其任誕乃爾然亦不為無意也

又顏帖

書家鐵手腕當推顏魯公第一如前數帖皆稿草不經意而天真爛然徃徃有步武山陰意至于文則愈窳改而愈不快人有不勝其絮與沓拖者何也魯公在唐舉制科又中文詞清麗科此尤不可曉

題顏魯公汝越帖

右顏魯公送劉太冲叙石刻其文不能盡全考米元章書史謂此叙真迹在王欽臣家后有欽臣名印因與唐垆兩出書各誤收卷去垆剪去將才不偶命而德其無鄰又云碧筴宜墨神采艷發龍蛇飛動觀之驚人今此才不偶命十字全似模刻在唐氏前而缺叙首語却不可曉其行筆與乞鹿脯帖祭濠州泉（闕）二文同而結體稍弱元章所謂神采煥發則有之龍蛇飛動未之觀也豈刻手有工拙故耶

金天王廟題名

顏魯公金天王廟題名極遒偉而三戈法不無可恨后題行筆尤老勁有逸趣所云奉命來此事期未竟止緣忠勤無有旋意未又作二語人心無路見時事只天知蓋可悲矣當是又二十年使李希烈而重題者也公一厄李輔國再厄元載三厄盧杞其初題名自蒲下迂饒實用載故至使希烈而死矣公之裻固杞為之其獲死義亦杞成之也覽畢三嘆

題家廟碑贈顏判

余尝评颜鲁公家庙碑以为今隶中之有玉筋体者风华骨格庄密挺秀真书家至寶而其文比之生平所结撰尤自详雅以语颜氏之后人则又其家至寶也今年冬吾州别驾小山君以家乘来乞序始知为公之裔孙播于茶陵者因举以归之君清白有循吏声异时所树立当不媿此八尺碑毋徒曰书家一箕裘而已也

集颜书默庵记

赵宣抚此文颇清雅可读集颜书亦在仁恠二懷之间览之则樊川之胜与方外之适俱可想也

后周祖庙碑

后周太祖庙碑蓋宇文氏也其文与书亦出赵宁张仁愿书行笔殊草草意小胜耳丹石之不能谨严始自李太和滥觞于仁愿至二米极矣故志之

华岳昭应碑

右碑序颂华阴主簿盛■〈广外翼内〉为故相许国苏文宪公颀祈雨获澍而作者也侍御史刘升书按赵明诚金石錄于唐碑搜访殆徧而独遗此升书亦仅一见于他碑而已书法八分颇適美可仲季惟则升卿而乏汉意聊为錄之

玄元宫碑

此碑建于天寶元年而阙碑额考其辞当在整屋为玄元宫玉真长公主实主之公主睿宗最幼女也碑序为仓部郎中戴璇颂为户部郎中刘同升撰末云开府仪同三司尚书右仆射曾孙戴伋书则建碑年号蓋追成颂序之日而称者也伋官至仆射而世系年表列传俱无之赵明诚金石錄亦失不收俱不可晓者书法八分颇秣艳第以肉胜蓋兼开元徐史之法而加损益者也

少林寺戒坛铭

少林戒坛铭开元三年为学生张杰书当是时杰应尚少且不以书名而笔法老成乃尔又时未尽习帝书故犹有瘦劲意

李阳冰书三坟碑

按此碑为李曜卿兄弟三墓其人皆有文学早仕宦而不寿以歿最少弟季卿撰表而宗人阳冰以玉筋刻之也其石犹故物故无传改之讹舒元舆所谓虫蚀鸟步鐵石隔壁龙蛇骇解鳞甲活动庶几于此见其一斑

易州鐵像碑颂帖

右易州鐵像碑颂开元廿七年崇文馆校书郎王端撰行易州録事苏灵芝书端此文多颂故太守卢晖德政词猥旨琐不复可解灵芝此书遒劲有逸气然令景龙间虚和之度扫地矣宣和谱谓其有成就顿放当与徐浩雁行戈脚复类世南夫季海诚有之以拟二王永兴吾未之敢信也谱又谓灵芝尝为易州刺史郭明肃书侯台记宋时墮金中金人每以墨本诣摧场需绢十端始易一本妬者竟碎之今此碑幸尚完而求其所谓十绢之直理不能得一也物完毁贵贱要自有时然亦有不可解者

圭峯禅师碑

圭峯禅师宗密法门龙象第以多所游讲著述一时不能无疑于达磨慧能之宗旨而裴丞相休独能知之然至累千言而为之辨则亦赘矣自心而证者为法随愿而起者为行行有殊法则一即四语已尽之是时柳诚悬铭书名天下仅以之篆额而自书文者深欲有效于密也书法亦清劲潇洒大得率更笔意裴能知密为四依十地人其自际当亦不远而没后为于阗王子显姓名于背岂犹未能离轮回耶抑亦所谓随愿而现者也记于此俟耆宿质之

李抱玉碑

右鳳翔泽潞行营副元帅凉国武昭公李抱玉碑杨文贞馆撰颜文忠真卿书见赵明诚金石録余得之乃一旧拓本最精好而中缺两处凡二百许字蓋成帖后脱落见残非石泐也杨公衔称赠司徒当是文成而卒于位其家乞颜公追书之故耳大厯中名臣无如二公者而一撰文一书丹在凉公诚幸也第公起邊将中兴名位差肩李郭而能守忠节以显融终介弟承之又大开方面勲且公一武弁能力辞王爵辞司空辞左仆射以视仆固懷恩辈不天壤哉然则微二公公故不朽也非幸也

至道御书帖

右至道御书法帖凡十一卷六十一条宋太宗晚年笔也太宗以淳化之三年勒晋唐名迹于枣又二年而书此其步趣诸名家遂无一笔脱衒高处可逼唐文皇第不能超乘而上耳书辞多格言亦类屏风帖每条下一敕字似亦仿文皇故事搨手纸墨皆精嫩可寶也

梦英篆书偏傍字源

梦英篆书偏傍字源自谓秦斯虽妙尽方圆而点画简畧直以墨寶归之李监而已与郭忠恕能继其美复錄忠恕报书于后第吾子行诸君絕不取英篆以为少师承而忠恕书末所谓何人知之惟英公知之亦大含讥讽何也然英篆笔亦自整劲跋语正书出信本皇甫君碑骨稍露耳聊记而留之

杪高僧传序

汤休碧云之句乃文通语也谓之释氏之文学可乎陶学士文真法门之畫葫芦者英太师书亦笔塚之盜枯骨者不足辱吾书意也

夫子庙堂记

夫子庙堂记程浩撰而僧梦英追书之浩文是唐人中之沓拖者英书是柳法中之蹶张者不足存也

郭忠恕三体阴符经

右郭忠恕三体阴符经其二大小篆其一隶也忠恕篆笔几与徐铉埒而尤以工小楷名畫品入妙仕宋为国子主簿用酒狂得罪贬能自卜死日或云仙去不死也阴符最为唐人所重褚河南前后奉敕书至累百卷中亦多精语是老子以下鬼谷以上人作但非黄帝书耳忠恕既谪仙人宜其有会屡书之而不足也

唐宪宗庙碑

宪宗陵庙葺于开寶六年其撰者为宗正丞赵某书者为待诏张仁愿俱沓拖不足

观当是时艺祖方经营海内祀典之不遑而首注心于宪宗者盖深有感于帝之威畧与藩镇之横而赵韩王之说所由进也天下从此定矣

汾阴坛颂

汉武帝封泰山还祀汾阴何所取义而唐玄宗宋真皆因之良可笑也颂文为王文正旦撰亦天书之绪谈耳尹熙古者书院待诏差有圣教笔而不能免通微院体聊为志之

跋苏书醉翁亭记

苏长公此帖乃新郑公得之徽废邸者初出时举朝争诧赏以为神奇既刻石行吾吴人之稍识临池者无不以为贗本所以为贗本者其一谓公既为人草书醉翁亭记不宜更及刻石之跋其一谓公正行真迹石刻传世者徃徃多卧笔左靡而今独拗为右劲又其中正书絶寒俭不类余初亦为王逸老陆务观张温甫之好事长夏稍取展翫见其渴笔纵笔拂策磔掠之际森然有折钗股屋漏痕法则又以为公兴到书而最后列公种种行草拟之则又不类却是墨池一段大疑犹其跋尾赵吴兴宋昌裔沈启南吴原博遂无一真闻入石时文寿承作此伎俩新郑原本无是也要当尽割去之乃可备一家耳

东坡乳母铭

此刻在黄州近有人于土中得之盖子瞻亲书于石者以故比之他书尤淳古遒劲其用墨过丰则颜平原之遗轨也

海市诗

坡公以十月至登祷海神而见海市为诗自幸比于昌黎之祝融余以五六月再行部至登海仅一市而风散之海神岂真具眼耶为之一笑

坡公杂诗刻

右坡老书黄州诸作五言古一首七言近体六首词七首中故有致语而压韵使事殊令人不快书笔翩翩自肆间出姿态于矩度中尤可爱也公压嫌字韵云雪似故人人似雪虽可爱有人其词翰却不远此语

喜雨亭表忠观二刻

坡公作喜雨亭记在鳳翔军事推官年可三十余作表忠观碑在知徐州年可四十余喜雨文虽爽儻而不尽脱书生习书笔故熟而不无沓拖意若表忠结法谨严而姿态自足故应以年事作阶级耳公此碑颜体大书世所盛行而少有传其小者尤可贵也

坡公行草定惠院海棠诗刻

坡公好书定惠院海棠歌真迹留人间凡十数本而此其醉书赠张房元明者于踈纵跌宕间自紧密有态大槩如良马春原骄嘶自赏故不作欸段駮駮步也余以壬戌七月望登赤壁歌公前后二赋旋访定惠遗址求海棠而不可得览公此刻不觉怅然或谓公自爱其诗或谓公蜀人以海棠蜀种时俱滞齐故屡书之以志感公又尝有赠妓李宜絶句云东坡居士黄州久何事无言及李宜却似西川杜工部海棠虽好不吟诗其托物寓意或怨或适不可指数也

南宫父子词笔

前为旧搨江西帅司帖元章寿词乐章都不成语而笔气超迈雄逸若有神助元晖诸跋亦自劲隼非若居平之仅成欹倾而已后三帖称是内收得逸少初月一帖痴事痴语俱奇絶而书尤妙览之令人痴思亦陡发

王庭筠先主庙碑

涿州有昭烈庙王庭筠撰记及书篆庭筠在金与党赵辈俱负能书名行笔絶类南宫父子正书稍存廉隅虽筋骨不乏而姿态逶迤矣当阳之役不以（阙）而以民永安之命不以家而以贤自是名语

又

涿郡为昭烈桑梓地故金人亦知立庙以祀而王庭筠为之记且书之庭筠作行草得海岳三昧此书乃楷笔杂有张从申柳诚悬风骨而小以米意运之遒逸踈朗亦可贵也

杨太初书重阳歌

观重阳此诗岂淮南东方而后仙真例不能作雅语耶杨生此书酷仿涪翁仅作迩年沈启南耳

嵩岳庙碑铭

右嵩岳中天王庙碑卢崖州撰有唐季衰繭之风孙崇望盖以书待诏者运笔固圆熟毋乃通微院体之遗耶

淮源庙碑

淮源庙碑乃汉延熹六年淮阳太守为民祈福而民作者碑已漫漶不可读元人杜昭守唐州新其祠乃延待制吴炳叅用汉隶释法书旧文于石而刻之余初恠其文词殊尔雅可读书法杂有西岳碑体而不能洗开元习见炳跋始了然跋书作正行亦得李北海王黄门遗意乃知胜国时临池不乏人也

华阳十二颂

华阳十二颂者故陶贞白先生造颇着良常地肺之胜而大旨不能出真诰外具见隐居集其后署名紫阳观主刘行矩等立不知即行矩书否耶此书不能尽展然体方而用圆微有张长史郎官壁记意可竇也

东魏孔子庙碑

东魏修鲁孔子庙碑见欧阳公集古録公絶不取其文特以其用笔不俗而字画多异聊存之今考之果尔盖崔司徒之遗轨而公家兰台之滥觞也庙为兖州都刺史李仲璇所修仲璇其字不著名赵国栢仁人栢仁当为栢仁碑误按仲璇勲阀名位亦不薄而史不之载岂以其非平棘裔耶庙修于静帝徙邺之五歳时贺六浑日与黑獭劲东西之鹿未归而司土者能从事于学校可佳也

蔡有邻章仇玄素碑

唐淮阳司马赠东太守章仇玄素碑为翰林学士内供奉蔡有邻书法取以时趣不能甚古而于严劲中微有情似胜韩择木玄素者剑南节度使兼琼父以子贵恩封其文散

琐纪诏辞门阙而已兼琼利臣齷齪李杨二右相门不足道第天寶七载之碑见于金石録者凡八而有邻书独有名而独见遗所不可晓

集古録跋

右欧阳文忠集古録跋石刻三卷中有杨博士南仲刘敞原父释各一通刘复有跋一通尺牒如之蔡襄君谟跋二通与裴煜如晦尺牒各一通公复自与君谟尺牒一通余皆公手书跋公文章妙天下而于考究小不能无憾其持论亦有近迂者居恒谓辨古文奇字全得杨南仲章友直力而又盛推原父博学无所不通原父却谓人好一欧九惜不读书耳得非以是哉余见公墨迹凡三所与此结法同而不能如其神采当又全得石工力也目錄计亦有刻石而序书出君谟手吾弟当徐访之

永福寺碑

按至元十三年常福生以饶州降授其路总官建此寺至延佑六年而碑始立相去四十三年矣其文与事俱不足道独赵文敏书为晚年笔其规模李北海遂无一笔失度不止优孟虎贲之似而已也往事已非那可说想文敏丹石时不能少此感

御服碑

元成宗感异梦致御服于终南之万寿宫赵叅政世延记之集贤孟俯书之集贤此书乃承制又中年以后笔当最妙而出入北海有不胜其婉媚者何也

龙门建极宫碑

为神禹作建极宫而功就于羽流命出于朔主吁可叹也王鸚姚枢皆一时名胜而书与文不副望亦其时为之

鲜于太常千文

伯机此书雄劲飞逸而时时有高闲笔当由洗河朔气未尽耳跋尾行书亦秀润而小疎比之吴兴尚在雁行

祝京兆小楷选刻

世人徃徃称京兆行草而不知其楷法之工时出赵吴兴上如王文恪志铭精严端劲中生气流动是金石第一手韩孺人志铭陆翁墓碣古雅之趣拂人眉睫会道观记稍不能整栗而天真藹然唐初诸君子帖虚和流嫩出虞入褚故是晋宋间物燕歌行高处迫元常下亦不失宋儋欵鹤文絶类大令不当以蹊径求之袁介隱詠翩翩自肆柔不病肉秋风歌老笔崛强踈不病筋味泉赋二十行外隶分流溢可与兰台道因并观独阴符扇书乃行草以有小法故存之此君伎俩胜（阙）山神多矣因合成一帙时自披赏安知后人不与晋唐小楷并传耶

题罗生书医无闾碑后

万厯甲戌征北前将军今宁远伯李公成梁能胜敌而欲侈其功会今太宰梁公梦龙以少司马奉命犒师勒绩于医无闾山而歛士罗文瑞书之梁公奉绳墨从孟坚故其辞稍严洁而不夸逸罗结法自清臣诚悬是以適庄而不馱馱说者犹谓此功小胜耳不能当北单于左校所俘获亦不能什之一然万厯之天下治于和熹时明师应而汉黠医无闾迹而狼居胥遥应则壮迹则无勤又李将军崛起戎伍中果势壮徃以百战取彻侯印甚贤于窋车骑也噫铭亡论已罗生亦幸哉其名与其书兹山同不泐也夫

定武兰亭后

余所见定武兰亭前后亡虑数本而致佳者五其一在潘方伯允端所后有赵松雪十五跋而实非独孤长老本蓋时有吴氏子见独孤本而乞松雪书之者最后一跋可验其二在余所为松雪执友陈直斋物蓋松雪从人乞直斋藏本不得而陈氏之后人用以并装于尾者其三在家弟所亦有元人题跋其四乃贾秋壑为制置使时得之前辈刘菊庄秘监者不知在百二十卷中作何甲乙纸墨差更明润闻今在项元汴所其五当为今詹博士东图所藏后独无旧题识又苦装潢人去其石龟迹然第六行之稍阔与它针眼丁形蟹爪之类则了了可辨识者以为五字损本无疑也虽然东图精公法故当得其连城夜光于楚工眼表必待此而后辨亦浅矣

寶晋斋帖

寶晋斋帖者宋礼部员外郎南宮米芾元章手摹二王以下真迹入石者也凡阁帖所载俱置之元章自得右军破羌诸帖与顾虎头畫维摩天女故名其斋曰寶晋云人皆谓元章特妙临摹又工作古书畫色以真贗本并示人人徃徃不能辨此帖虽古意藹然

而不能脱米家腕法譬之康昆仑琵琶宁堪段师再听余此疑不可解览东观余论谓此公好观古帖而议论阔踈好摹古帖而点画失真然则前辈固已言之彼好事人语何可尽信也

宋搨鼎帖

右鼎州帖二十二卷今所存者仅七卷耳而中有颜太师清臣杨少师虚白徐吏部季海行草多诸帖所无者旧装极草草于纸背皆作絳帖字余以其摹搨不甚类意疑之而不能辨頼后跋尾尚存盖刻石在绍兴之廿一年江左偏王战争尚未息而发遣张斛通判赵子浚乃暇结此翰墨縁甚可念也编次者武陵丞赵铨与子浚当俱皇族考之陈绎曾公鼎帖石硬刻手不精虽博而乏古意信然哉鼎州今常德郡其遗迹仅有孔明张旭两墨池而鸿都之石遂荡然无复存者无由一窥全文为之浩叹

王子裕先生墨刻五跋

赋中有苏长公前后赤壁余尝谓如文中之有漆园书中之有飞白畫中之有董巨要不可用湘累蜀贛招摭诘曲例之今王子裕先生乃能纵笔以飞白写其辞遒逸劲迅神采飞动真可谓两合矣余家藏陈道复书赤壁后赋其坚伟庶几并驾然飞而不白终当让先生一头地也

王先生登武林晴晖楼歌起颌两韵全是青莲家法中颇出入唐人然雄逸爽劲诵之如食哀家梨快不可言若行草则多渴笔神采飞动令人思颠旭醉素先生之子汝明搨石斋中以寓羹墙之思仆谓曷不龕之楼壁与西湖对当两高云起雷电轰掣时方知此歌与此书之妙

王子裕先生手书玉芝翁歌其八法絶得坡仙三昧若吴原博先生为之风骨虽有余神观似不足先生故当品先生下也诗歌婉润飘逸真之坡集中唯烟江疊嶂贈畫御容师二歌可具宾主余俱避舍呜呼先生往矣所谓仙而谪者非耶

子裕先生手书若波罗密多心经人以为得眉山卧笔非也正自徐浩侍郎八法中来余尝见侍郎书此经仅钱许大丰容态泽全与此相类汝明刻石置之孙萝庵中使观自在以天眼见之当相印可矣

右军專用宣城诸葛兔毫其书兰亭则以鼠须为之各适其合也近来陈白沙先生

縛茅草作筆故白而不飛適而不能逸王仲山先生多作擘窠及飛白狂草宜其有取于赤城椽筆也若歌中縱評鍾王以下書法則超然出于毛穎楮先生表矣

弇州續稿卷一百六十七

●欽定四庫全書

弇州續稿卷一百六十八

（明）王世貞 撰

○文部

△畫跋

蕭翼賺蘭亭圖

余嘗聞趙太史用賢有楊儀憲副舊藏蕭翼賺蘭亭圖後為文徵明待詔所書吳說傅朋跋偶借閱之太史遂舉以見贈深愧其意悉輟年來酒鎗茶具之類為報此圖向去已千載雖絹墨就淪而神采猶王母論老比丘與潦倒書生體態曲盡雖蒼頭小妓捧卷執役無不種種臻妙所見古賢名迹多矣未有能過此者第傅朋跋內云翼詣辨才朝暮還往性意習洽一日因論右軍筆迹悉以所携御府諸帖示辨才相與反復折難真贗優劣以激發之辨才乃出右軍蘭亭相示翼既見之即出太宗詔札以字軸真懷袖間閣立本所圖蓋狀此一段事書生意氣揚揚有自得之色老僧口呿有失志之態此恐未為實錄考何延之記乃是見蘭亭卷後辨才不復安梁檻上并翼所携二王諸帖并借臨寘于几案間後辨才出赴人齋翼遂私至辨才房取得之便赴驛長凌懇報都督齊善行使人召才示詔驚倒欲絕何嘗于初見時即奪取也且老僧跌坐一床諸執役者浣杯噓拂自若賓主从容寧有爭理口呿不合正為蕭生指擿蘭亭瑕疵不能無甚口耳何傅朋之不審如是其謂出閣右相竊又有疑此畫大抵根抵延之記辭當右相時恐未着聞即有之是文皇所諱寧敢着筆又安知不為陳閔周昉也考宣和畫譜載御府有吳侁畫賺蘭亭圖今本無御題玺記又稱顧德謙在江南時以畫名偽唐李氏云前有愷之後有德謙其最異者蕭翼取蘭亭圖風格特異但流落未見此本豈即德謙筆耶傅朋語多孟浪獨所記收藏承傳甚明在宋世推重已若是今當何如待詔楷法尤精絕便足稱山陰嫡嗣余仍乞待詔子休承補書何延之記于後休承年已八十余雖時時見拙筆未墮家聲楊氏

尚有定武一帖审其非恪为去之余自有真定武及褚摹帖柳诚悬书羣贤诗孙绰后序庶几兰亭之事备矣

夫子杏坛图后

大廷尉陈公玉叔寶藏其父宪使公所貽夫子杏坛图出入必奉以偕至蜀而教铎所振与文翁相后先此图出则石室弟子皆披靡矣今年宦游金陵携以就世贞得一恭展吾夫子据盘石坐而鼓琴有穆然深思之度七十二子或环听或追趋虽各自为态而左準右规不失閤閤侃侃意其行笔精紧设色古雅品在神与妙之间独程巨夫跋谓为吴道玄则吾未之敢从道玄生平以神气胜运笔衣缕若菰条所谓吴带当风者与此絶不类或出陈闳李思训手声价何必减道玄巨夫元初为大官尝廉访江南者也不当在裴晋公前第晋公遗墨吾故尝见之元和八年公方自舍人为中丞何暇办此蝇头楷宣和御押繇来在书畫禪首今书之跋尾与印文皆讹玉叔苟能割爱去之余当用海岳庵例改题曰唐名人畫杏坛像素程巨夫跋玉叔许之否

晋公子重耳出亡图

少保铜梁张公卒而其子锦衣君某某辈来请志铭所贄玉带重锦悉归之独收此一卷乃晋公子重耳出亡图据跋或以为李伯时则驳之者以行笔粗细不类或以为赵子昂则有思陵小玺在二者俱所未论独徐察其笔力精紧遒密不事铅华而自具一种生气乃至驰骋追逐转盼耳语之状无有丝髮遗恨当是北宋以前第一手余所蓄古人物畫多矣独阎立本萧翼赚兰亭周昉听阮与此三絶可寶也所惜者此图当有二十余帧今存者十帧耳而三皆不可考其可考者仅重耳之出蒲僖负羈之私謁与齐桓公具宾主而多从马齐女与舅犯谋醉公子寘之车而出之秦宗女之来纳者五人既渡河舅犯辞而投璧于河介子推中流舷立而笑之及以车旗冕服返晋而已诸图故当大有致惜乎其不为完璧也虽然比之吉光片羽不为奢哉公子之事伟矣返晋之后其纳王破楚召狩盟国锡命之事尤伟恨不更作一图如周家王会以明得志而独纪此琐尾流离之状蓋其所谓不得志乃所以为得志张本也

宋徽宗雪江归棹图

宣和主人花鸟鴈行黄易不以山水人物名世而此图遂超丹青蹊径直闯右丞堂奥下亦不让郭河中宋复古其同云遠水下上一色小艇戴白出没于淡烟平靄间若轻鸥数点水穷骤得积玉之岛古树槎蘖皆少室三花快哉观也度宸游之迹不能过黄河

艮岳一舍许何所得此景岂秘阁万轴一展玩间即晓本来面目耶后有蔡楚公元长跋虽沓拖不成文而行笔极楚楚与余所藏题听阮图同结构一时君臣于翰墨中作俊事乃尔令人思艺祖韩王椎朴状

又

据蔡楚公题有四图此当是最后景耳题之十又六年而帝以雪时避狄幸江南虽黄麾紫仗斐亶于琉璃瑶岛中而白羽旁午更有羨于一披箬之渔翁而不可得又二年而北窳五国大雪没臙足缩身穹庐与殄毡子卿伍吾尝记其渡黄河一小词有云孟婆孟婆你做个方便吹个船儿倒转于戏风景杀且尽矣视雪江归棹中王子猷何啻天壤题毕不觉三叹

宋名人山水人物畫册

杂宋名人山水人物畫一册有曰赵大年云山者峰势出没罨霭中草树暎带下为清流白石不减南宫父子有曰李唐春江不老者古松据大石欲攫峡口崩流汇为怒涛陵岸直上百步未已于诸畫中最为师子吼有曰刘松年溪隐者山田者翠屏削立云表孤庄枕清涟平畴交远风各极其致曰马远观梅者老挺踈枝秀出物表对题御书一絶句沓拖不成语复不成字体承定以为宋高宗笔余谓高宗必不落夹乃尔当是光宁所题也远又有曰松下挥翰者一老人据案絶似犹龙公但不知定否五千言耳觉天骨与天机并秀远又曰观瀑者不敢当栖贤三峡或于天竺六桥间雨后得此微尚有曰夏珪远浦归帆者三树掩暎斐亶天际一帆断岫明灭自足好致有曰赵千里水阁纳凉者当是状其邸中景耳六月阅此薰风自来饶令人忘暑有曰金谷园者写五十里锦障宛然在目以无名款屈署此殆不减陈閔李思训有曰柳洲者以二月间辋川小泝西湖曲尘拂拂恨少青帘点缀曰高阁观潮者则钱塘一曲耳都不见伍大夫拍堤势有曰寒山拾得者偃蹇自恣可掬想为世尊作贵辅疲津梁不得不托鱼服以逃有曰阎次平小景者岚顶■〈角戔〉■〈角戔〉当作叔明鼻祖其它绿树丰缙甚近自然有曰次平松溪别业者尤精劲可爱乃知唐伯虎周臣于此取之不尽有曰李嵩内苑图者或光尧德寿宫冷泉小景耶若以拟宣和延福诸位则大寂寥有曰松下鼓琴者大具悠然自得意内不见署名而人物冠服都雅恐是马和之有曰松间醉卧者忽忽幕天席地时其阮嗣宗耶刘伯伦耶不知有吾身此乐最为甚令人作糟丘侯想有曰雪阁者险而瘠絶惟小具暖帽足曲肱耳便不烦洛阳令剥啄有曰霞岭扁舟者宛然孤鹜齐飞境渔舟欸乃入高柳夕阳中老子于此兴复不浅有曰风雨泊舟者虽■〈雨上黹下〉晦霖霖而不作阳侯怒舷底足浊醪便不妨倚枕听敲篷滴沥有曰采莲图者殆若耶溪莲女耶独不能貌

笑隔荷花共人语耳有曰柳阴放棹者意甚佳而小恨剥落有曰刘阮天台者大类前金谷而自然胜之天台石梁今渐坦阨可涉而求欲界仙都一尺地不得矣刘阮事当不诬其谓半岁而当人间数世不敢以为然也有曰高阁燕息者丽敞静好而不作五侯炎色其晋公午桥白傅履道甲乙耶署名不能雅或休承别有据聊因之右为帧凡二十有七其可考者仅八人赵大年名令穰宋宗室也官（阙）州观察使千里名伯驹南渡后宗室也至浙东兵马钤辖李唐河阳三城人有名徽宗朝阎次平待诏仲子有名孝宗朝李嵩夏珪刘松年俱钱塘人马远河中人俱有名光宁朝后先祇候翰林赐金紫是八人者虽不敢望李成范宽北苑西台之盛而跌宕残山剩水间亦无有与之执鞭弭而周旋者后二帧则空绣其一是滕王阁景右向而虚其左填以王子安诗序其可辨字百之一二其一亦当是阁景左向而虚其右所绣字尤细若蚊睫令少年离朱于晴窗下辨之不能得十余字以考韩退之所为记复不合竟不知其何文也画品精工之极与书俱不可望蹊径况敢雌黄虽然昔人称薛夜来为针神而唐季女仙有卢眉娘者于一尺生绢绣法华经七卷今此三寸绢仅得七百字唐文似亦不足多诧也列子谓宋人刻沐猴棘端纪昌以燕角之弓搆蓬之箭射虱贯心而悬不絶噫吾向者以为寓言耳世固不乏此手与此眼哉

宋人杂花鸟册

右宋人杂花鸟一册凡二十八帧为竹鹤一为松鹿一为梅月双雉一为桃花游蜂一为梅竹幽鸟三为梅竹双鸟一为双榴幽鸟一为白头冬青一为梅花小鸟一为杏花白练一为碧桃瓦雀一为枇杷青鸟一为翠禽香柑一为白榴小鸟一为鹞鸽之在雪树者一枯柳者一雪滩者一为芦渚九鹭者一为来禽黄颌者一为苍鹅之在梅花下而理羽者一浴者一为鹤鹑者二为鱼虎之立莲房者一立枯荷者一为游蜂墨蕙者一其渲染生色穷态极变与真宰争胜毫楮间徃徃能夺之惜废题款不显画人名而所可辨者仅赵昌马远吴伯毛和吴珪及宗室彝斋孟坚而已昌品在神妙间远次之子固亦有士风不俗其它于画史不甚琅琅而致佳乃尔藉令李后主宣和帝用宋明围碁例作大中正而徐熙黄筌边鸾易元吉佐进退丹铅间不知其妙又当何如也耶然余此本是汰数十本中得者当为眼底第一

宋画香山九老图

家弟自秦中归手一卷相示云得之朱大叅孟震者考之似是香山九老图多正统以后不知名人跋仅有咸淳时一僧复误装于后而雪斋老人者至目为赵大年笔大年长山水小景汀洲芦鴈不言作人物及界画楼台也画史称刘松年有九老图此岂其笔

耶乐天自归洛六十八而得风疾乞骸以刑部尚书致仕至七十而愈乃会故懷州司马胡杲年八十九卫尉卿吉旼年八十六右龙武军长史郑据年八十四益州长史刘真年八十二前侍御史内供奉卢真年七十八前永州刺史张浑亦年七十而秘书监狄兼謩河南尹卢贞以未七十虽与会而不及列合之得九人饮于履道里之居第皆有歌诗纪之而乐天自叙其事所谓洛社耆英会也一曰香山九老者乐天时时游香山之龙门寺故名而是图所谓有亭有船有叟白须飘然若依稀乎履道里者然考池上篇水五之一竹九之一岛树间之而今水与树胜而竹太不胜又无中高桥石罇红莲折腰菱华亭鹤红绡紫绡蛮腰素口之属而分配琴奕书畫以缀其寂寞不知松年旁礪时当尔耶第其绢素之精与位置结构之匀整往往有宣政间应制风范吾生平雅慕乐天自纳节来颇治弇山园以希十五年后耆英之盛而今复厌且弃之矣兹与吾弟约异时肖吾貌必不为乐天如不为僧赞宁者当为百三十六歲之李元爽哉

题惠崇江南春意

惠崇诗僧也畫品不能当荆關半而今所觀平湖小屿汀花水禽渔舟茅舍便娟映带种种天趣故非南渡后人所及者老米谓五季以来畫江南景稍清远者輒为王摩诘而实非使不作惠崇题识将无以为摩诘耶此卷自杨先生应宁而归之陈从训从训亦京口人也春时唤小刀焦山北固间出图而歌张志和桃花流水按之当与江山俱响应矣

醉道士图

此图文休承司谕鉴定以为李检法公麟所作叙其家世收藏甚详且谓张僧繇曾作醉僧图传于世怀素有诗云人人送酒不曾沽终日松间系一壶草圣欲成狂便发真堪畫入醉僧图道士每以此嘲僧羣僧于是聚齏数十万求阎立本作醉道士图并传于代于是范长寿亦为之而公麟继焉考郭若虚图畫见闻志及坡公所临怀素絕句信然然求其所谓为公麟不可得也后阅坡公外集尝题一图云朴素不喜酒观正父醉道士图甚畏执杯持耳翁也章子厚题其后云仆观醉道士图展卷末诸君题名至子瞻所题发矇絕倒坡公再题云熙宁元年十二月二十九日再过长安会正父于毋清臣家再观醉道士图见子厚所题知其为予矇也持耳翁余固畏之若子厚乃求其持而不可得者他日再见复当一矇子厚复题云酒中固多味恨知之者寡耳若持耳翁已大苛矣子瞻性好山水尚不肯渡仙游潭况于此而知味乎宜其畏也按仙游潭事别见一小说所谓??命能杀人者二公一好酒一不能饮而又俱工谗故尔然譬之两讼师子厚尤囂也此图所载道士（阙）者二十矣从而醉者十有七为醉之事称之为曲尽潦倒落魄情状而

独少执杯持耳翁亦大缺典余故补二公相谑语记之以为壶史一段佳话也

李龙眠理帛图

此图精工古雅之极据冯海粟倪云林定以为理帛图然缝纫亦有之又定以为李龙眠即周昉不是过也海粟歌爽朗有奇致结法踈野正是真迹云林与邓文肃皆负墨池声孔炎其善寶之

李伯时姑射仙图

列子称藐姑射之山有神人焉肌肤若冰雪绰约如处子然不言其乘龙御气而此李伯时所貌与逊功帝所题谓为姑射仙像考宣和畫谱亦有之当不误也后有绍兴图记及赐朱胜非四字当是以故相领宫观侍讲席沾此葛楚辅跋笔意殊遒美第称绍熙二年尚书左仆射按公以四年始自元枢称右丞相而此云左仆射仆射之不为仆射者十六年矣杨廉夫陈道复后先鉴定以为真迹二公之笔或老而劲或放而雅更的然可寶也桑慎等三跋亦佳故为题其后

题刘松年大历十才子图

潘子过余示此卷乃刘松年绘大历十才子其树石琴阮茶灶之类皆精密得五季随意而人物尤妍雅有韵与此君所图西园雅集颇埒毋论真迹临本翩翩伯时子昂季孟间矣十才子为钱左司刘随州郎员外独孤常州卢郎中孙舍人崔集贤之属其诗名脍炙人口不已而流溢丹青致足羨也虽然名者造物所忌诗以陶写性灵抒纪志事而已要不必有此名即无论邨中沦谢而是十才子无一登三事者岂所邁人人絳灌耶追昔抚今不觉愊然因而墨池一泓生小鳞甲也题后行自悔矣

赵千里畫大禹治水图

秋日马用昭叅军出赵千里写大禹治水图见示命题百穀畫家董狐以为得周文矩笔非千里所能办而吾弟敬美自陝归尝纵观砥柱辨其治龙门三峡时事余不善鉴畫又不获观砥柱之胜唯有叹赏惊絕而已吾家夷甫论人物以经阿平品目则不复措意今有两阿平在予复何言

又

跋后复从马君索阅一过其人物古雅之甚真有非赵千里所能办者千里秀丽而小绵弱去此尚在寻丈外此北宋以前人作但不必周文矩耳

庐陵五公像

沈纯甫藏庐陵五君子像出示余俾题尾欧阳少师以文冠宋氏而周丞相杨秘监亦窥藩焉其博识则皆出蓝矣承相虽不甚矫矫然天下信其为长者秘监难进易退超然不滓于韩史之手人尤高之杨通判之死难胡侍郎之抗疏遂皦然与日月争光所谓一掷得卢者庐陵山邑获有之为千古文献嚆矢盛哉纯甫弹事不减胡公而一时遘祸尤烈其文辞已駸駸在丞相秘监前异时勿令欧阳独步可也秘监之子东山先生代着廉劲声而文信公收宋三百年正气恨不覩其像为此卷小阙陷跋尾刘须溪真逸民不俗也

张端衡山水

此二畫以少陵二语为题系各两韵不能佳书亦沓拖平平耳后有一诗云端衡写作无声诗留与拙堂伴幽独书体出眉山而不能去俗欸曰次仲印识又曰司马当是温国孙或司马才仲弟也考畫史端衡张姓京口人举进士调句容尉以丹青名此图秣淡斐亶中有遒劲飞逸气风树涧溜絶得郭河阳笔云岭墨韵间似僧巨然今人见懵董山便归之襄阳父子以故有题作米元晖马端衡者乃至以为司马君实及老章此尤痴人前说梦大可笑也且书法似出一手而强作三四体蹊径宛然欽之宜急去此蛇足仅留次仲一跋纵不能超宋复古燕穆之亦岂出南渡残山剩水下哉

古十八学士图

彭茂才出示此图其人物器饰台榭工致古雅之甚是五代北宋人笔无疑文待诏征仲跋其后云损益周文矩文会图而加精者也或云是十八学士图曾见仇英临本不舛然以余所摹兵科藏本勘之亦不甚合第图止十六人而前有毁损小帧许故当是十八人也内贵人幘皆长耳直领衫腰束带或系丝帛或有方团而垂挾尾贱者幘皆短耳盘领衫窄带似饰铜鐵考之晋唐二史與台奴隶皆束铜鐵带第云幘裹进贤冠则长耳惠文冠则短耳初不以贵贱分此却不可晓乐有笙笛箏瑟阮之属中一歌者凡六人皆地坐据斑文褥一人倮立持乐句所谓部头也此最近古或人云征仲微是其伯子寿承笔然翩翩有父风彭子要余题尾因畧记之以表一代之制且为异时玉堂高会张本云

再题十八学士卷

每阅卷中苏世长状貌为之絶倒因记其在隋二事其一大业中为都水使者炀帝尝谓之曰卿面何类病驴世长再拜呜呼以手据地蹙项败面作病驴状羣臣掩口而笑帝大悦赐帛百尺其一在陝里邑犯法不能禁乃引咎自挞于廛伍伯疾其诡鞭之流血不胜痛呼晷而走因戏书卷后再阅之宁不再为絶倒也史称其有机辨嗜酒简率无威仪盖宛然矣第其仕唐能直諫又有子良嗣为通明相神尧数赏其直而数调谓之当亦以此

摹古畫后

右集古畫摹四本合一卷其一为顾凯之女史箴内当熊一段顾本乃是五代人摹笔余尝于丁卯秋都门外萧寺中见之独爱所畫当熊事元帝貌竒伟有帝王度额上壮髮如昭仪传语熊势直上可畏僖仔挺往而意舒徐两宫监交戟熊宛然若生后闻在嘉兴项元汴所未及摹先乞陈方伯子兼略节本传数语以俟今年秋始得请于元汴之兄少参子信足其事其二为阎立本萧翼赚兰亭图是唐人絶高手周昉李昭道之流然非立本也畫潦倒书生及老僧张口争辨从者扬汤止沸状皆妙絶千古后呉说传朋记此图流传乃文待诏所书者咄咄逼黄庭余既已获之赵太史不忍数展亦摹之而乞休承临待诏书休承长于待诏书时五歲宛尔箕裘也其三周昉擘阮图真迹得之陆司空与绳其画擘者听者虽耳指间皆有生趣丹青之能事极矣本挂幅今摹作行卷后有宣和题押蔡元长诗今俱乞公瑕书之其四王摩诘奕碁图有宣和题识而不甚真似是画院笔然亦工致此卷旧藏陆太宰全卿转入昆山顾氏后复为袁绳之宪副所得余别见摩诘所为序及与其弟缙裴廸三诗意甚爱之因从绳之借摹而乞俞仲蔚小楷题叙诗于后盖明日而仲蔚病且死矣盖絶笔也摹出仇实夫之子以故大都得十之八九譬之襖帖不减欧褚临迹也余每见画苑诸家盛推唐以前画多神妙品不敢尽信今观此摹本毋论仇实夫即使赵呉兴毕力为之亦不敢望其藩篱何况下者盖精工古雅之迹可寻而生峭流动之气难学故也近代呉子辈才得元人一二笔輒目中无北宋以前故为拈出之

鬪风图画

此卷为鬪风图五帧林子焕作子焕于书画史俱不载而画笔颇遒紧可鴈行马和之小篆系诗尤淳雅可重解大绅每章以行草释而后跋之神采奕奕动人大绅所谓吏

部侍郎许公者考其时则吾郡叔雒先生也叔雒名思温佐长陵以靖难显名取大官而能竇此其亦思王业艰难之所自乎今以语介胄纨绔之士知者鲜矣

清明上河图别本

张择端清明上河图有真贋本余俱获寓目真本人物舟车桥道宫室皆细于髮而絶老劲有力初落墨相家寻籍入天府为穆庙所爱饰以丹青贋本乃呉人黄彪造或云得择端藁本加删润然与真本殊不相类而亦自工致可念所乏腕指间力耳今在家弟所此卷以为择端藁本似未见择端本者其所云于禁烟光景亦不似第笔势遒逸惊人虽小麓率要非近代人所能办盖与择端同时画院祇候各图汴河之胜而有甲乙者也吾乡好事人遂定为真藁本而谒彭孔嘉小楷李文正公记文征仲苏书呉文定公跋其张着杨準二跋则寿承休承以小行代之岂惟出蓝而最后王禄之陆子傅题字尤精楚陆于逗漏处毫髮贬驳殆尽然不能断其非择端笔也使画家有黄长睿那得尔

又

按择端在宣政间不甚着陶九疇纂图绘宝鉴搜括殆尽而亦不载其人昔人谓逊功帝以丹青自负诸祇候有所画皆取上旨裁定画成进御或少增损上时时草创下诸祇候补景设色皆称御笔以故不得自显见然是时马贲周曾郭思郭信之流亦不至泯泯如择端也而清明上河一图歴四百年而大显至劳权相出死构再损千金之直而后得嘻亦已甚矣择端他画余见之殊不称聊附笔于此

梁楷叅禅图

图中毖刍为宰官说法大有恣第未见的然为梁楷笔考溧城公集亦不见此三偈而结法秀逸潇洒（阙）同叔欹倾沓拖体全不类偈辞读之便堪拍碎金面碁盘是径山石头本色亦非此公所办也缝篆乃柯奎章家物印文眉山苏氏云云恐苏后人收藏私识耳伯起多米颠伎俩强标之曰梁楷画同叔书欲博余新集两部而休承复依违其间但令佳足矣何必真同叔梁楷哉

题马远山月弹琴图

马河中画笔意殊楚楚秀骨天发不堕蹊径所小恨者若孙虔礼之于书耳此图一道人焚香鼓琴于山月清泉间尤自超絶孔炎王孙走使二千里索余题鉴余方清斋谢

客拈笔为作数语试于夹池读之此琴或能与众山皆响也

阅古堂石刻马

阅古堂马石刻不言是何人笔长仅尺咫而为马四十余其骄嘶逸驰雄争野适之状种种神绝当是长康道硕笔非曹韩而下所能办也堂在韩平原南园平原藏书画倾天府刻此于石盖亦宝爱之极后为胜国诸名士凡十九人歌诗各极驰骋而不能得少陵丹青引一句令人慨然兴才难之叹

蘓黄小像

旧传苏长公为五祖戒后身黄豫章为涪州学佛女子后身及读其诗觉长公瑰丽而稍沓拖类吴兴富儿郎豫章矫劲龌涩不耐软款绝无支公顾妇姿态今观二遗像而得其矍然嫣然者乃信所传之非妄也孔炎以为何如

二赵书画归去来辞

余生平好靖节之为人而不能忍饥又不任负耒中间强颜一出盖望而愧之独于其文章虽愧之而不能释手今年春得此卷于幼于以为二赵名笔谓千里画子昂书也画中草树俱秀发而人物尤精雅有生趣当是北宋笔何止千里若子昂则纷披纵放老手出入北海不复寻山阴门径矣署尾称延佑七年八月书于杭州盐桥寓舍考之传公以六年自学士承旨予告还还三年而卒其时盖六十七亦可以书此辞惜小晚耳题笔重为抚然

又

家有陶靖节归去来辞赵千里画子昂书以为三绝故将军曾子澄走二千里来访我海上慷慨语合适橐耻无以佐行色因辍赠之且以银装吴钩侑焉子澄百战取将印一失口而见斂归畊汝阳山中蘧蔭之舍蟹螺之畝与柴桑无异其浊酒清歌放浪自快亦不减靖节翁第人谓吴钩侑归去来卷非分将无冒老子韩非同传讥乎是不然靖节咏荆卿亦岂嘿嘿遂忘世者有如子澄提此钩断北单于首博斗大通侯印乘四望车却以归去来卷手持掷还王大夫亦岂不快事哉丈夫为龙为螭何所不可因书此以俟

赵松雪画山水

赵承旨书画垂三百年赏鉴家愈宝购之以其能集大成也此图布景设色极精密而时时有象外意不作残山剩水一笔当于辋川营丘间求之评者稍有墨渝之惜是不见邢姪何敞衣曳帚裴令君麓服乱头态耳何足寘眦喙其后

赵吴兴画两马

吴兴画两马其前马从容细步与前人顾盼呼侣之意后人攀鞍欲上不得后马搐尾顿蹄欲驰而后隐忍态描写殆尽偶一开卷宛然若生故不必以龙■〈髟上者下〉鳳臆嘶风逐电为快也

题黄大痴画

大痴老人黄子久作此图庵霭戍削各极其致而秀润苍古之气自出尘表盖自荆關中来而微采马夏者也余故游钱塘桐庐诸山大都类是披卷恍如见故人便欲卜一廛其间而不可得故于诗三致意焉诗韵本铁箴道人杨廉夫欲以奇胜故取险诤而遂无一语合作步之者王逢姚公绶辈皆名手亦为韵所牵塞白而已余能笑之而复步之将使后人复笑后人也第廉夫名压胜国东南半壁天书法亦自老劲一时耳鉴之士至忌大痴而争趋铁箴余谓顾子其姑无论铁箴而寶大痴可也顾子字汝善故相文康公诸孙以文学世其家

钱舜举画陶征君归去来辞后

吴兴钱选舜举画陶元亮归去来辞独多余所见凡数本而此卷最古雅翩翩有龙眠松雪遗意第少却僮仆欢迎稚子候门三径就荒松菊犹存一段柴桑景当是兵燹时不免破镜耳宋南宫仲温以章法书此辞遒密劲媚却堪作三絕也钱太宰溥谢少宗伯字马太常绍荣竭蹶而趋仲温尚不至邯郸步马初冒周姓后始复故余病店初起值小凉跋此忽忆南史载元亮与彭城刘遗民雁门周续之同隐匡庐傍时谓之浔阳三隐元亮任真乐天冥迹隐显故当推为龙首遗民迹挂尘外而栖心净土犹涉趣舍聊屈称腹续之金华之学着声九重竟接万乘虽不膺蝉冕而移止钟山以歿犹恐不称尾耳今世三尺儿知有元亮而无能举遗民续之者故附志于此

题古画王昭君图

余覩王昭君出塞图后先凡三本颇具汉家威仪而呼韩邪来迓则极骑吹驼毳毡车弓檠之盛宾主初覩欢情与肃容两称而此图则仅导者数胡骑亦有汉儿一以琵琶后随一橐驼载服装而已虽复低眉掩抑作怯寒状而■〈执上目下〉御皆宽然暇逸意是出塞以后事跋尾当有题识今失之不辨何人与何代然其用笔殊精密而番马犹有■〈足必〉跋骄嘶之致宛然胡瓌张戡家风似非南渡以后供奉手所办也昭君以良家子困掖庭不胜牢悵愤郁慨然请远适又用其俗配呼韩邪子生二女此与张元昊何异而书生弄笔往往深怜而重与之独渠宗介夫得其情与事曰汉恩自浅胡自深人生乐在相知心虽然坐此二语令人勘破其方寸不待许冯瀛王而后恶其不纯也则可笑已

题王叔明湖山清晓图

叔明成文敏宅相故于丹青独妙冠一时余所见多矣其向背出没皴点分理小不无虔礼之恨独此卷最为超絶晓色初动湖翠山紫直扑人眼睫间其树皆作白莲社中法尤见古雅非近峰数拳断以为摩诘不亦公麀矣叹赏之不足故歌之而仍题其后

水亭图

此水亭图乃永嘉王朋梅为吾吴朱泽民写者考图绘宝鉴王振鹏字朋梅得幸元仁宗赐号孤云处士旧吴志泽民以文学为赵承旨荐授国史编修迁镇东儒学提举再起浙省叅谋摄守长兴以终按朋梅于字义无取恐亦别号而孤云则仁宗所特赐也跋语俱称征东提举元故无此官镇东或路名然亦不可考矣朱之后若宪副公尚书公能大其宗世世奕叶无事乔木而为之子孙者再失再复愈宝而爱之求诸名公诗什以侈大其事宋时郡有秘校者其乐圃之胜闻东南然再易代而不可究迹至读元少保卢宾客诸咏而若新即画力亦仅五百年耳所托以不朽者文也勗之哉

梅竹双清卷

梅独为百花魁而竹能离卉木而别自成高品者以其精得天地间一种清真气故也竹自文湖州苏端明后有梅道人吴仲圭以至近代王孟端而梅则杨补之外独推山农王元章然吴子辈谓其命旨涉浅为境易穷而往往下其品几于无处生活今年六月信阳王太史祖嫡以元章梅仲圭竹合一卷寄余开卷时令人鼻端拂拂有玉清蓬莱想遂乞休承诸君为诗歌美之而余继焉或谓戴凯之范致能所撰二谱至数百千种且以大庾万树涓滨千畝而此寥寥一枝胡取也是不然正复以简贵胜耳卷首为沈民则学

士题元章仲圭各有诗弁尾而梅前有一歌亦自麓豪周疑舫伯器跋第赏其语不能辨其人考印章有所谓会稽外史似杨维禎而词气亦类之第不闻其别号竹斋阙疑可也卷后收藏有东吴文学世家印岂故为吴中物太史偶得之耶似有不偶者故附记于后

美人调鹦图

此图不知谁作有坦坦者题作梅边美人图又有题为杏花者最后陆子渊詹事鉴定为周昉美人调鹦图盖画中红杏一树枝上一鹦鹉美人倚盘石授小花引之当以子渊题为正坦坦不知何许人有玉堂学士章记洪武中刘三吾学士别号坦坦翁当即此公而九十翁沈梦麟元官入国朝不仕而三典乡试其它若顾博士曹子文辈皆国初名士也刘学士词翰俱已毫不辨其为杏花固当画笔是五季宋初之絶精工者虽靡周昉题识断非后人所能办也

赵承旨画陶靖节事

赵承旨好图陶靖节高逸事及归去来辞余先所覩凡十本皆不能如此图之妙其工力与李伯时抗衡而曲尽潇洒夷穆之度令人宛然有北窗羲皇上人想所貌王檀二江州龐叅军皆极意模写唯貌颜始安延之作丰肥而髯为不得沐猴态疑承旨未见世说一段语耳标署书亦甚紧密是中年笔故圣教十七北海仅十三管将军藏之家二百年矣一日于海■〈风贝〉震撼戈甲戛札中袖以示余相为叹赏者久之因语将军一饭斗米秤肉挂五两乘长风破万里浪安用此物为将军笑曰不然尉迟鄂公一部清商送老韩蕲王策蹇卫西湖六桥何必减柴桑风致审尔题尾者当亦不甚愧承旨

沈公济画

吾郡沈启南以丹青妙天下而赏鉴家如王百谷辈谓不如启南之父公济独推以为神品吾生平所见启南尽大小余三百品公济仅二卷耳此其一也遒劲缛密远近斐亘使人应接不暇赖有印识可辨不则以为王叔明戴文进矣世眼迷离知有启南不知有公济而好奇如百谷遂至伸公济而抑启南皆不得为确论

题沈石田画册后

沈启南先生此八帧掩映绵冪遂为吾吴地传神或犹以书法疑之盖少来精谨尚守渠家民则法未及作双井老态故也

钱舜举画李白观瀑图

右钱选舜举写李青莲观开先瀑布图毋论此君神采欲飞动即一骑一从亦见生色唯两瀑不甚雄之直下三千尺势当由小窞边幅耳图后缀舜举一诗不免蛇足又有刘文成宋文宪胡文穆三诗皆名手而首则解大绅印记及小楷五字絶佳当时刘宋题后归大绅而文穆始题之耳后为上海朱太学邦宪家物邦宪余故人也白皙美姿容酒态絶出青莲上诗亦鴈行歿可二十年矣嗣子上林家教举以遗余噫在人间世作太白观在上林所作邦宪观亦可也余何所与为成二歌题后还之上林聊寓雪鸿之迹而已

孔炎所藏古牛车图

秦汉之世鬪国骛于骑战故七萃之马不给而天子或乘牛车其后更以为美而加饰之至王君夫苟道将之所尚极矣第使羣豪衣火浣御油碧而角偏辕之技于邛洛大道间犹足以畅此车所载輜重耳而诸老■〈牛 孛〉疲顿吁喘之状有何可赏而劳厉归真辈极意描写之吾弟张助甫李本宁又竞作才语于后其可笑也已

弇州续稿卷一百六十八

●钦定四库全书

弇州续稿卷一百六十九

（明）王世贞 撰

○文部

△畫跋

听琴轩图卷

太子宾客胡頤庵先生俨初举进士乙科授华亭教谕以忧归补长垣遂迁桐城令入馆阁辅青禁长成均最后用二疏之例以归大耋终于家而此图琴清轩为黄鹤隐居赵文笔其一记为金华谢南一记为南邨陶九成一七言长歌为安胡老人王士显一五

言古风为钱塘范立考其歲月蓋皆华亭所得而公自记则长垣时语也赵文画出黄鹤山樵王叔明其气韵皴法极类之小有穉笔耳谢出陈文东王出宋克范亦藩窥吳兴与赵画皆有可观而皆不显然望而知其为吳兴派也陶九成独作小篆其人最负博洽声所辑说郭辍耕錄书史会要皆行世会要则杨鐵史宋承旨为序之蓋相距二十余年而犹无恙故足称邑耆宿也卷为豫章王孙所寶藏一旦舍而赠我胡公其乡先达不当舍而余不当受特以千里走使寓高山流水之感于所谓琴清者不得已而留之行笈为识其后仍手书一纸以报作朱邸故事云王孙多■〈火贵〉字宗良其诗秀儻有色味不减渠家晦

戴文进江山胜览图

此少传乔庄简公所作长歌也图为钱塘戴文进所书江山胜览颇斐亶有致公歌辞亦瑰伟第有感于旧游以为唯金陵以东之景当之太原黄子廷綬为其伯父贄寿言走数千里而貽我此景在晋中絕不易得而吾吳在在有之此画亦广于吳而鲜于晋独庄简于王父司马公为石交敬留其遗迹而僭书此歌于后以还黄子俾留作太原一佳话且令吾书与吾家乡烟水付之黄子目中可也

沈公济画

前览王百谷评谓相城臞樵老人画入神品且云出其子启南上向者曾一见此老笔不甚快意忽张幼于惠此卷长可三丈许纵横点缀浓淡深浅间劲骨老思溢出第求其所谓神品竟不可得也岂百穀用志不分而余仅见其杜德机

周砥沈周宜兴山景

匊溜生龙崑小景抵掌子久白石翁铜官秋色则蓝于懒瓚矣余尝以八月游阳羨从二九改陆趣张公善权再访史氏于丹青之胜鸡肋一二覩此不觉恍然如遇故友当时白石翁欲以己画作鴈媒不意并媒失之应亦不快然此二图遂成延津之合毋论得失俱佳事也

王孟端竹

王舍人孟端以画竹名天下而知者尤赏其有絕俗之标此卷直干自阿瞻丛筱綠老可適劲中出姿媚纵横外见潇洒蓋繇方寸间具有潇湘淇澳一派不觉流出种种臻

妙耳惜题诗者馆阁二三君子如王宾客汝玉辈词翰虽若楚楚觉寂寥不称李文正公
宾之乃为杨文襄公应宁赋一长歌于后辞既瓌伟而行草亦自跌宕快意非真于画趣
追望羊当繇诗底无全牛耳聊赘数语

沈启南画定斋图

沈启南先生作定斋图不知为谁当时有曹时中宪副者以文行着别号定斋得非
其人否此图山石树卉虽掩映潇疎而微飏澹云不作郁浔披靡斋中人亦自湛然图书
得所有会稽王凝尘满席意盖真能写定境者也吴文定公一歌剧称启南画而不题号
似非斋中所请者然其书却佳甚皆真迹也

赵子惠藏石田画虞山三桧

余旧游虞山致道观摩娑古七星桧久之思以一诗志其胜而语不敌后得沈启南
先生所图乃其最奇者仅三桧而先生后先纪游十余章皆附于楮尾兴到遂成一古体
和之又数年而赵博士子惠复出先生所别图三桧见示而命余以旧题题尾先生于丹
青中夺真宰柄或荣或瘁顷刻万变兹帧所谓愈出愈奇而余诗既莽莽不能造小致语
博蟠虬屈鐵之胜而书复沓拖可厌所谓一解不如一解其置之勿令人作狗尾梢也子
惠居天台万山中而又乔木世家长松八桂琪树建木璀璨怪伟当有如孙兴公所咏者
按图求之故自不乏何必区区一虞山殫也七桧皆梁时种至宋而腐其四宋人为补之
云昭明太子手植者误昭明足迹未尝出建业百里外也吾前诗语亦漫承旧志尔

沈启南金焦二山图跋

昔人有诗云长江如白龙金焦双角短自诡以为善名状盖两山之对雄久矣而未
有图之者白石翁乃能于三尺赫蹠中写沈深滄郁之势一开卷而此身若登鐵瓮城东
西指顾真奇观也然考翁题句实未尝登焦山今郭五游次父剪茅于焦之最胜处而杖
履往来金山若家圃顾舍而宝爱兹图出入必与偕不忍释手岂幻者真真者幻耶余不
能辨以问焦光光不荅次之金山问了元元曰四大本空五蘊非有老僧如是山亦如是
彼翁者欲于何处着丹青苏长公闻之曰诳语阿师难画两山真面目只緣身在两山中
五游了此义否不了当以图与我

周履道沈启南二画

周校书履道沈山人启南画宜兴龙岩小景及铜官秋色各一帧后多有名贤题咏若桑民怿文征仲黄应龙辈皆可宝者今年夏以考绩忽忽发金陵谈叅军思重强置余行李中而去归后小间展之至卷后乃有余一跋真米元章所谓惭愧杀人者也记数年前曾为思重书此念欲返之思重既不可留之篋笥亦不可行求大雅士得盛君原济因以归之君挟肘后神术重三吴多游行荆溪试一披览与诸溪山印证孰胜其合也为我醕三大白赏之

跋沈启南太石山聯句图

余始从吴兴凌玄旻所获覩李贞伯先生所书大石山与吴文定张子静史明古三君子聯句其结法精劲道密为生平冠而诗亦险刻有昌黎城南鬪鸡遗调后则杨君谦和章祝希哲文征仲徐昌穀徐子仁署尾尤可爱而独轶沈石田启南图玄旻乃托钱穀叔宝补意钱固佳手玄旻意若有所不足者而乞余题以解嘲未几而家弟敬美偶购得沈图一阅之则墨气秀润如欲滴庵霭掩映大有致觉顾长康王子敬山阴下语为不远间与玄旻之父大夫及之缓颊欲为延津之合不得也此图后联句则吴文定书似不能当贞伯而沈亦自和一五言古体余老且倦游矣大石在屋檐下尚阻一蹶履而启南画贞伯书百年内奇物既分散数百里外而后先寓目焉事固不可晓也敬美善秘之亦有以宝钩青蚨之谈进者乎母在子当不它之矣

沈启南梅花图

燕山雪花大如掌蓟门而北一白万里而恨无梅罗浮大庾间梅花满天地参横梦醒翠禽啁晰别是一境界而苦无雪独吴越诸山水间在在不乏沈启南先生画雪不下摩诘巨然梅虽作本色然亦能攀杨无咎弟蓄王冕陈宪章此图一时遂为二种传神致足赏也今年冬晴遂不见滕六公而甌餅一枝寥落不快意偶获寓目兹卷觉眉宇间朗朗神王九咽为爽不佞老矣无暇蹶不借横玉簫泛水晶叵罗结孤山铜坑一段胜縁小盘礴时尚能谓宗生之不我诬也

沈石田画

沈启南先生画十帧帧系一絶句为楚州为高邮为广陵为扬子为句曲为天平山为马鞍山为垂虹桥为西湖之岳坟为下天竺寺江以北凡四皆无山而江以南则山五而水一真清远奇丽之观也高斋展玩间自谓不减少文卧游足以掩關矣十絶余皆有和仍托诸君子继之

茶坡卷后

此茶坡图故中丞刘公家物也苏长公恒云茶欲白墨欲黑茶欲新墨欲陈二者正相反今所谓茶坡与刘公者俱不可见而白石翁之墨犹若新良可叹也图后有王父司马公一歌因悚然敬题其后

沈石田虎丘图

沈石田先生此图为虎丘写而读先生手书诗与匏翁歌似皆以游灵岩雨兴败而次日得虎丘足之者盖以灵岩不可雨故也若虎丘则毋论雨它风雪花月之境无不与人宜者余尝再游灵岩其一亦遇雨委顿返而雨中宿虎丘兰若汲第三泉拾松枝煮茗啜之取所携酒脯从僧雏作起曲饼供赋诗小酌至夜分后犹闻四山歌声隐隐出檐溜树滴外若灵岩有此当不得二公败兴语也

题沈石田涤斋图后

范良父出所藏涤斋图图为白石翁沈周笔而吾乡毛文简公记之诗者三人余所知文待诏潘司空也白石翁与待诏以书画名天下余无所复赘独文简公所造皆笃实近里语不作后人孟浪而书法亦精谨如司马文正无一笔造次尤可重也今年入春忽自厌鄙四大外内皆尘壘污浊覩一涤字令人爽然如以甘露浸心腑漫识数语

林居图

此图乃白石翁沈启南早歲为北山僧作其仿黄鹤山樵遂无一笔失度图成垂二十余年而始题诗又三十年而始弃僧而归文待诏所杨君谦蔡九逵王履吉白贞夫皆和之又六十余年而始归余余又和之后有属者与和者定皆非凡士也

沈翊南画

此画乃白石翁弟沈翊南为邢丽文作后有朱尧民黄应龙诗四君皆弘正间知名士也葑于六门最僻野丽文家徒壁立而一时慕称之比于通德廉让为黄君诸孙者亦可以省矣

文待诏玄墓

四景玄墓为吴中最胜地迩年僧贫寺废少有游者余尝一蜡屐至虎山桥而止深以为恨今得文待诏所写四景阅之恍若置身此中矣陆子傅先生以诗画师事待诏愧其意故晚节有胜游必偕遇得意輒命丹青以授之此盖其最合作者

又千岩万壑

文待诏之爱陆子傅先生如瞿昙叟于鹜眼子靡不曲示上乘至此卷则双林树下解脱三昧悉倾倒无余矣公瑕以千岩竞秀万壑争流拈出之可谓名语然至儼以山阴道上行似未伦也余尝雪后步虎溪览香垆背雨后自紫霄南岩叩天柱絶顶时时近之然此老生平足迹所未到也人胷中故自有丘壑哉

又人日诗画

余有文待诏手书甲子诗至除夕止此为乙丑当是新歲第二试笔也待诏有寂寞一杯人日雨句画作一荷伞人穿小桥而出殆实境矣寿承题谓惟跋尾三人在今并寿承皆亡之零落之恨岂惟高蜀州为掩卷三叹

周东村画张老图

当宾鹤公存日好古声价不减胜国倪元镇顾阿英今览周臣所为图俨然清秘阁金粟山房也然不闻二君有伯起为之孙又为之赋以着思输公一筹矣

唐伯虎画梅谷卷

梅谷者当是吾吴德靖间名士唐六如伯虎为作图祝京兆希哲题署而王太学履吉选部禄之各赋一诗殊足三絶偶以示文休承休承谓尚有京兆一序及待诏一诗不知何緣脱落因补书旧和杨补之柳稍青词于后甫成而信阳王胤昌太史书来以元章补之梅竹为赠因举以报之古人折梅寄远故诗中用驿使语为雅事第不知仙骨寒香一辞条后所存几何故不若邮筒中尺素之堪远也自今后南北山房各留之以备歲寒一（阙）生如玉川子所云忽到窻前疑是君犹足代面

唐伯虎画

余尝有唐伯虎桃花庵歌八首语肤而意隽似怨似适真令人情醉而书笔亦自流畅可喜考跋辞当有图一帧而失之别购以补卒不甚称也今年三月花时见李士牧藏伯虎一图深红浅红与浓绿相间渔舟茅屋天趣满眼宛然桃花庵景物意欲夺之卒不忍而亦不忍割吾所有歌以予士牧姑为题其后士牧志之吾两家异日必为延津之合也

唐伯虎赤壁图

吾尝以七月望登赤壁酒酣耳热歌坡老所作二赋飘然欲仙者久之然坡后赋所纪及伯虎此图俱与景不甚似当相赏有象外意耳伯虎才气仿佛此老而穷达绝不埒却有一事相关坡于黄冈作中吕满庭芳词结句有百年强半来日苦无多见者缩舌以为诗讖无几而入釜坡领岩部出入贵要者十余年而后谪又八年而后逝伯虎祈梦九仙得中吕满庭芳五字至年五十三骤见坡石刻词而恶之趋令彻去寻病卒夫词语不讖于作者而讖于见者何也以其为二君子且黄冈故事因漫及之

唐伯虎画宾鹤图跋

友人张幼于以故唐伯虎先生为其王父写宾鹤图乞余跋伯虎丹青妙天下独此图一叟乌巾白帽据坐大树傍一朱顶鹤窠荆扉而出于宾鹤意小不伦岂叟为宾鹤顾为主耶然度叟羽化之日今已踰七十年有如一且坐幼于先人塋华表而鸣唳者焉知非叟也耶又焉知鹤之为叟也宾之为主也伯虎之昔非而今是也耶余又焉能辨之图首有文征仲古隶可宝他图及文辞鹤雀伍耳幼于去之可也

摹辋川图后

右王摩诘辋川图临之者郭忠恕再临者仇英实夫也其二十绝句书者文待诏征仲也余尝谓读摩诘绝句更一览辋川图觉便如上下华子冈斤竹岭骋于宫槐陌泛南北垞欹湖柳浪徙倚木兰柴茱萸泝即文杏馆而休焉酌金屑之泉与裴迪秀才对语不知我之为摩诘摩诘之为我与否也然则摹本何必实夫而书亦何必征仲哉

题文待诏画册

文待诏所图十六帧多东南名山水虽间以险绝奇胜为功而不离清远萧散之致

稍一展视觉秀色幽韵直扑眉睫间此翁真易仙宫中也顿各有周公瑕陆子传一绝句内补公瑕阙者王百谷三君子故竭其心思腕力而趣后尘以拟三绝则吾未之敢许此图为朱子朗作今属徐建甫氏要余题其后赖余老任作云霞观耳不然几令三日不成寐

三辅黄图

按三辅黄图秦始皇帝二十五年作朝宫于渭南上林苑中廷可受十万人车行酒马行炙其志阿房宫云一曰阿城始皇帝因惠文王之遗趾而拓之规恢三百余里离宫别馆辇道相属阿房前殿东西五百步南北五十丈上可坐万人下可建五丈旗不知即朝宫耶抑更创之耶若所称萑阳橐泉步寿蕲年之数及取七王宫材而模写之者皆在三百里度内矣此图能写其曼衍陡绝之状其雄丽奇险所不论当是唐人阎右伯李将军本而仇实夫所临者若杜紫微赋虽乖本色不能如上林子云长杨而纵横磊落要与南山并崖■〈山上罅下〉祝京兆书法滔滔莽莽清渭同其滌洄真传古中一雄观也已丑初春恭谒大内还感我明之俭德兴亡秦之穷奢因执笔纪其后

题周官饮中八仙图

周官所图饮中八仙歌不唯人物衣冠器饰皆古雅而醉乡意态种种可念当由伯时子昂藁本化出若其时固开元天宝全盛之际宜其如此也自是而后宫掖旃席之间皆以酒为政而妖色主之霓裳羽衣之曲未终而渔阳鞞鼓动矣豹孙举以贻我方右目于眚曲藁是讎为展览再过亟还之不然恐复堕糟丘中为此曹子淹杀也

刘氏藏甲申十同年会图

甲申十同年会图余所见凡三本一本于大司徒益都陈公家一本于太保吴兴闵庄懿公家一本于太保华容刘忠宣公家其序皆太师长沙李文正公手书而公所赋诗视诸公独伙又多代人书此图自弘治癸亥至万历己丑盖八十有七年矣而衣褻犹若新犀玉参差青紫辉映神观眉宇奕奕有生气试一指问之其师师而坐衍衍而食者将李文正挥洒内制之暇乎抑刘忠宣戴恭简亲承天问之后乎闵庄懿抗（阙）三尺而得遂志者乎王襄敏平蜀寇而旋凯者乎谢文肃讲诵弦歌之余晷乎无论其人不可作其时不可遘而其事亦不可再不佞贞叨第丁未于今四十三年矣同榜二太师一太保已前逝今在朝者仅四人藉令三相君亡恙沈严若太乙贵神其肯甘末坐以与诸卿佐周旋若李文正者哉其肯不厌笔札之役为诸卿佐九书其文若诗者哉嗟嗟宜不佞贞

之有感于三不可也此会比洛中耆英差彷彿而弘治之视熙宁殆过之刘忠宣可伯仲司马文正富文忠今为忠宣之后人比部君书此聊寓执鞭之慕云

弇州续稿卷一百六十九

●钦定四库全书

弇州续稿卷一百七十

（明）王世贞 撰

○文部

△画跋

仇英九歌图

仇实父图九歌凡九章章各有征仲待诏书余所见数本皆阙礼魂而此则并国殇去之其仪从人物都不详仅云中君有少云气河伯持杖御一龙山鬼乘赤豹乃类虎而已山鬼殊窈窕令人消魂其它种种有生气待诏意似草草而笔势泛澜可爱余尝谓屈子偶歌此以下神后人各自出意摹写其髴简工拙之不同宜也此卷笔虽简而意足视他本不啻胜之因识于尾

题仇实父临西园雅集图后

余尝见杨东里先生所题西园雅集图乃临李检法伯时笔有崇山绝壑云林泉石之致与此图畧不同此图仅一古桧一恠石一立壁捉笔书者为子瞻学士从傍喜观者王晋卿按卷对竚者蔡天启倚树睨者李端叔彼图则有张文潜而无端叔此图据方石画渊明归去来辞者即伯时握麈尾观者苏子由握蕉扇者黄鲁直抚肩立者晁无咎捉石者张文潜按膝者郑靖老彼图有端叔而无靖老益以陈无己若摘阮之陈碧虚与听阮之秦少游说法之圆通大士与听法之刘巨济题壁之米元章与傍观之王仲至则所同也彼图有名姬二曰云英春莺而此皆削之杨先生又云曾见刘松年临本无文潜端叔无咎器物小异而僧梵隆赵千里亦尝摹之此图吾吴郡仇英实父临千里本也余窃谓诸公踪迹不恒聚大梁其文雅风流之盛未必尽在此一时盖晋卿合其所与游长者

而图之诸公又各以其意而传写之以故不无抵牾耳实父视千里大有出蓝之妙其运笔古雅彷彿长康探微元佑诸君子人人有国士风一展卷间觉金谷富家儿形秽因为之识尾

题海天落照图后

海天落照图相传小李将军昭道作宣和秘藏不知何年为常熟刘以则所收转落吴城汤氏嘉靖中有郡守不欲言其名以分宜子大符意迫得之汤见消息非常乃延仇英实父别室摹一本将欲为米颠狡狴而为怨家所发守怒甚将致叵测汤不获已因割陈缉熙等三诗于仇本后而出真迹邀所善彭孔嘉辈置酒泣别摩挲三日而后归守守以归大符大符家名画近千卷皆出其下寻坐法籍入天府隆庆初一中贵携出不甚爱赏其位下小珰窃之时朱忠僖领缇骑密以重货购中贵诘责甚急小珰惧而投诸火此癸酉秋事也余自燕中闻之拾遗人相与慨叹妙迹永绝今年春归息弇园汤氏偶以仇本见售为惊喜不论直收之按宣和画谱称昭道有落照海岸二图不言所谓海天落照者其图之有御题有瘦金瓢印与否亦无从辨证第覩此临迹之妙乃尔因以想见隆準公之惊世也实父十指如叶玉人即临本亦何必减逸少宣示信本兰亭哉老人馋眼今日饱矣为题其后

送沈禹文画册

此册前有壮游鸣盛四字为许初元复玉筋篆画凡十有六帧皆绢素文待诏征仲五仇英实父二陆治叔平一陆师道子傅一谢时臣思忠二文嘉休承一钱穀叔宝二陈括子正二其副叶则宋经笈各有唐诗一联皆待诏书书体兼真行草篆隶古法有峰山受禅二王渤海鲁郡怀素眉山双井襄阳翩翩鸾翥凤舞画则全仿诗意为之俱秀逸有深致而文仇尤自超着不让马李叔文二则周天球公瑕彭年孔嘉所譔楚楚小楷孔嘉尤更精绝诗十有二则子傅及其弟安道陆粲浚明顾奉金用徐伯虬许闰张凤翼休承元复叔平文伯仁顾云龙皇甫昉子循各又分古诗语题之虽河梁之美少输前哲而临池之迹独擅一时内伯虬故迪功昌穀子也浚明不能工书又不好作近体然代者大是佳手金用不办此十指考其笔踪殆是妇作用妇规摩履吉声名大噪或谓出蓝后又有王穀祥祿之及陆芝二章则皆赠别之什而诗题之阙者二矣册为沈大谟禹文北上谒选作禹文翩翩佳公子时方盛年善词翰裘马醪肉问遗文士不絶故于其行也合吴中名笔出所长以赠之禹文得太常簿参两督府迁肇庆守竟以好客故产尽削寄死为若敖之馁久矣余偶得此册念与禹文同时者俞仲蔚刘子威因各乞一诗以补二题之阙不两日仲蔚物故余乃为足成之所谓柳条花气联也偶有钱生者叔宝子来看摩娑久

之曰此二诗吾犹见之即待诏及其子彭也画尚有待诏一帧今以休承一帧代之其叔宝一帧亦续补盖有窃而杂入他册者故也此册中人仅有一二存欲归之沈氏则已无守者因识而藏之异日别录一通焚禹文墓所以薄酌侑可也

陆包山写生卷

画家写生右徐熙易元吉而小左黄氏父子政在天真人巧间耳宣和主稍能斟酌之明兴独吾吴沈启南入熙室而唐伯虎于黄氏有出蓝之美陈复甫后出以意为之高者几无色下者遂脱胎矣叔平此卷卉草果蔬之属四十二种种有天趣而不至出骊黄外度几能斟酌者印文甚古雅而署字不类岂所蛇足也耶漫题不觉满帙

再题游太湖图记

余以癸酉游太湖游之明年而陆丈为余图图成之二年而余果避言还里过陆丈时已病矣犹津津谈明年当为公貌太和以媿太湖作天下大观亡何竟捐馆今年仲蔚过我弇州园出此册摩娑久之偶有宋纸二番属小楷书余记于后仲蔚楷法尤遒嫩高处在欧柳间余文不足以当三絶然施之太湖粗亦不俗而陆丈竟不能践八十二之约以成我太和观则可叹也

文伯仁溪山自适卷

东南佳山水太湖之抱于三吴者最号清远然大较山不胜水自富阳而溯新安之黄山白岳尤奇峻然往往水不能胜山五峰文伯仁家吴中足以穷水之胜矣而犹未快乃因游新安遂尽攀其奇而发之于丹青余近得一寓目真若坐篮輿翠微间使人应接不暇区区山阴道上行乌足以当之哉此君稊而好骂坐不知胸中何以富此一段丘壑也

文文水画

余从吴氏得诸名士手书诗王中丞履约二纸太学履吉四纸王吏部禄之袁提学永之各二纸皆有画配而缺其一画不著名氏欵识疑以为文待诏征仲盖吴氏为待诏外家故也乃以示待诏子休承摩娑叹息审为渠五十七年前笔诸君皆已物故久矣为补其缺而跋于后内酌酒桂林一帧其所新补也当是时休承尚少而苍老细润不减家尊真可谓画家羲献矣老来精神伎俩声实考据事事埒之四君子词翰与画亦足三絶

故识而留之山房

画南北二词后

题柳窥青眼相传国初人作可谓曲尽张绪风流至马致远百岁光阴有感激超旷之致而音响节奏又自工絶元人推以为词中第一殆非虚也其词既别南北而复分其早春暮秋景地乃谒钱叔宝作图而周公瑕复以正行二体书之风日清美于文漪堂呼三雅佐展卷亦不辱矣惜未有雪儿以红牙句拍唱耳

题画会真记卷

撰会真记者元微之演曲为西厢记者王实夫续草桥梦以后者关汉卿此卷八分题類者文彭小楷书记周天球録曲者周及彭年俞允文王逢年张凤翼潘德元王复亨顾承忠管稚圭张复吾弟亦得一纸画者钱穀尤求辨张生即微之者赵德麟録者王廷璧千古风流艺文吴中一时翰墨能事尽此矣会真记谓崔氏有所适而不言归郑恒西厢记则谓许郑恒而卒归张生后有耕地得崔莺莺墓志者其夫真郑恒也或以岁月考之亦不甚合合不合所不暇论第令老夫偶展阅之掀髯一笑如坐春风中万卉过眼何预蒲团事耶为题于后

天文地理摠图

吾州有陶翁存仁者年七十余始得天文地理方圆二图摹之其后复增摹两畿诸省十五纸海外三纸字皆蝇头而精工有楷法界画细若游丝极可爱此翁后至八十余尚能月作两本供桂玉资今已矣考之浑仪图经亦不尽合以备故事可也

李郡写旅獒图

李郡出所画旅獒图索题内大酋之状貌瓌竒饰装瑰异与诸小番之恠丑么琐且俱能戢鬻桀为威施种种情性得之第所谓旅獒者大犬也见孔氏传疏甚明又左氏公曠夫獒焉杜预注亦云猛犬也今乃画作一緑狻猊大约如近代所贡者然不作黄色若佛书所称青狮则尾大于斗又其种久已絶不闻作贡郡五指如悬槌少加问学亦何必减萧世诚职贡阎立本王会耶为题于后以勗之

题莫廷韩画郊居扇

廷韩此画种种郊居风致视休文赋不啻过之其赠孟孺标格亦絶相类而云东公乃疑其意以为二君皆非此中物至欲与之分半席者谢幼舆日作王大将军长史然恒自谓一丘一壑而顾长康亦桓南郡客颇能画幼舆于丘壑间人亦许之夫士相赏有迹外趣耳令仆果赴河南尹何必减履道里主人也季秋望后一日解嘲题

莫廷韩竹扇卷

箒面画竹便是两重清真境廷韩聚十名笔卷而藏之虽不能出入怀袖作泠泠天籁篋笥中别有一种潇湘界矣珍重珍重

题小桃源图

余所见桃花源图如赵伯绣文征仲陆叔平诗如陶元亮王摩诘皆令人神爽飞越如身游其间独至武陵求所谓真桃源而不可得岂陵谷沧桑之说果尔耶异日扁舟醉此桃花下三日足矣因题一诗以为张本

又题画池上篇后

读公庐山草堂记末云弟妹婚嫁毕司马秩满则必左手引妻子右手抱琴书终老于斯以成就我平生之志清泉白石实闻斯言然公记成未几而刺忠州郎礼部司内外制连典剧郡入貳司寇而庐山之诺竟虚非此池上一篇何縁能讖语业第公以太子宾客进少傅尚书分司致仕二十余年中尝尹河南者三岁余顾高逸之胜芬人齿舌至于今不衰春日与元馭四十余即谢礼部侍郎翰林学士归以一黄冠偃息蓬茅中余亦弃弇山园泉石之胜从之贺季真八十余始以礼部侍郎集贤学士乞黄冠得鉴湖之一曲唐史乃传之隱逸何也古人事多不可解

陈提学藏百马图

余尝见赵魏公天闲五马图金鞮玉勒徙倚流苏线下四紫衫奚官极意秣刷噫贵则贵矣孰与此所图百马骄嘶逸逐于平沙大荒之为适也第龙髻凤臆往往有之而权竒之兰筋不露当是葡萄宫苜蓿过饱而肥耶今五单于解辫长平冠军方高咏栢梁无所事粟汝歌丰颂瑞之后旦夕东封五色云锦庶几有攸頼哉陈君相士之九方歟也必能别而曹骊黄牝牡之外第不审谁无负千金价

尤子求画关将军四事图

关将军庙成客有请图廊壁者余谓公以勇烈冠一时则无如白马先登馘颜良首樊城破曹氏七军僂龐德降于禁以勋猷垂身后则无如七日役神鬼建玉泉寺为荆州第一刹驱风雨剪蚩尤俾河中盐政复故夫白马樊城之迹人人能言之而后二事稍秘按天台智者以隋开皇十二年至当阳上金龙池月夜有具王者威仪二人一长而美髯丰表一少而秀发长者前致辞曰予关某也彼某子平也汉末分扰事不果愿死有余烈叨王此山敢问大德圣师何枉神足智者曰欲建立道场耳神曰愿愍我愚特垂摄受此去一舍山如覆船厥土深嘉吾二人当为力建一刹供护佛法愿师安禅七日以须其成师既出定湫潭万尺化为平陆栋宇焕丽巧夺人目神即受五戒智者具书晋王广上其事锡以佳名而公遂为此寺伽蓝神矣智者所谓肉身菩萨也宋正和中解州解池盐至期而败课輒不登帝召虚静张真人询之曰此蚩尤神暴也帝曰谁能胜之曰臣以委直日关帅可也寻解州奏大风霆偃巨木已而霁则池水平若镜盐复课矣帝召虚静而劳之曰关帅可得见乎曰可俄而见大身遂充廷帝惧拈一崇宁钱投之曰以为信明当勅拜崇宁真君也两藏所记当不谬而史志俱遗之岂用夫子不语怪神例耶按黄帝经序曰皇帝杀蚩尤其血化为卤今之解池是也又真定有蚩尤塚七所每当祭蚩尤其日白气贯天则蚩尤之主盐池盖数千年犹在耳公固义勇使不受天台戒作玉泉功德纵不令堕蚩尤道其去阿修（阙）也尤子求善丹青闻余语而绘公四事于绢素以献子求之所能貌者桓桓糾糾之气与指撝跳荡分身百应之神奇而已公所为功与其志不得也因敬为拈出之始貌公者皆赤面赤马而先师所见者则皙而微醜马亦纯白故子求特因之

李郡画渭桥图

唐文皇渭桥一盟虽神算无遗亦是大不得已事非李药师阴山（阙）鬪雪之何异城下此图承传颇久然往往仅作挂幅而李士牧独能创为长卷且其叙六师之整暇靖肃大得萧萧马鸣悠悠旆旌意而獬豸之输琛委贶蒲伏威施其尊中国之体至矣第颡利方拥百万众跳梁近甸未必恭逊乃尔史盖多饰辞讳辞耳又文皇虬须猬张神采逼人此后小酌之勿作清穆垂裳观也

李郡画美女图

李士牧手貌美女自西施以至红绡凡六十人虽人仅一身而絢履■〈执上目下

）执并其标格情性得之可谓工且详矣第中间二吴品仙品不当与滕伎并列而郑袖南威丽娟夜来玉奴丽华碧玉紫云李娃霍小玉之类却更不可遗也翔凤房老是绿珠前辈不当作小婢装当更商之长夏倚病展此图何异维摩天女第色尘虽不绿影而晓晓数语似输一筹

题海峯卷

后海峯卷为乡前辈金同文先生别号有祝希哲署题希哲又与唐伯虎各为一诗而手书之先生之子学正元龄分训吴兴时与文休承同舍复乞休承补图遂足三绝吾州故滨海然有海而无山学正翩翩仙骨请与共谗之数千百年后焉知巨鳌不失足使阆风蓬莱翻来此作一段实话耶

陈道复牡丹

陈复甫作墨牵牡丹甚得徐熙野逸之趣记宋有去非先生者作墨梅绝句至今艺林以为与梅传神复甫岂其苗裔耶何无声之诗与无色之画两相契也

为徐太仆爨题马鞍山图

余后先游马鞍山得古近体五首远者二十五年近亦二十年矣嗣是凡四游皆邦君见邀于车马行色中不及搦管今于岩泉太仆公处覩此图不觉恍然若梦既而命书此诗则又赧然自愧得无为山灵所笑以不复唱渭城耶异时丘壑之日长当与公摄衣登绝顶尽取唐人句和之又恐有华山约束不获如愿柰何姑识此以俟

为章仲玉题保竹卷

人云竹祖孙不相见今章氏园不易主而王父所手植宁有存理章之僑简甫乃能征蔡九逵文征仲许伯诚袁永之黄勉之王禄之以文词纪其事而王文恪太傅胡孝思中丞为大书署顾文休承复图之寘之三尺篋中盖三历祀而淇园秀色犹若新也仲玉善保之夫岂直祖孙一相见而已

题洛中九老图

右洛中九老黄鹄图以遗余者鹄南阳人依武昌吴明卿以居貌寝甚年二十余而

能曲尽老人傀俄婆娑态余因戏与约更二十年貌我置其间得否九老中独香山居士小解事人或谓海山仙宫有居士一院居士不首肯曰归即应归兜率天吾意颇与之合审尔当貌我作十三岁儿骑黄犊吹笛三生石傍也

长江万里图（有王蒙识非）

余旧有黄子久长江万里图又于一友人处见夏珪所图皆极微茫庵霭黏天无际之势而不能一一辨所自然皆自武昌泛洞庭沿江陵而上趣峡口入蜀乃足称万里此图则自武昌溯汉江遶故郢度襄樊抵太和山而止盖喆匠朝真即舟次所得而貌之者也即无论是否黄鹤山樵其结构渲染有不合者鲜矣余自癸酉岁以楚臬出京口抵武昌又于武昌入汉诣郢陵丙子解郢镇登太和下襄江诣郢陵按之皆歴歴在目眇独自采石而上九江蕲黄之间江山秀发不可指数而此却寥寥因志于后以俟黄鹤之徒补之

题爻生画

语云天庖万匹皆吾师此古人匠心之妙也然自荆关李范北苑巨然而下皆有承传小加化裁耳迩来白石翁衡山待诏亦然至于仇实父则鲜所不摹拟然而人巧极矣吾久不踏足吴阊门乃闻有称爻质甫者以为叔宝休承入室上足今览其盘礴斋笔信有出蓝之美所恨不能舍蹊径而上之昔人论诗羚羊挂角无迹可寻噫嘻岂惟诗而已哉爻生其勉之

钱舜举画水僊跋

钱舜举在胜国以丹青名一时几与吴兴鴈行而卉草尤自超骏度骅骝前矣此卷水僊为华氏世藏零乱中有绰约迎风承露种种姿态百出盖舜举得意笔也后有欸识而失之华生以为恨乞余题尾噫待欸识而后真浅之乎真矣

周之冕花卉后

胜国以来写卉草者无如吾吴郡而吴郡自沈启南之后无如陈道复陆叔平然道复妙而不真叔平真而不妙周之冕似能兼撮二子之长特以嗜酒落魄如李邕卓不甚为世重耳日坐弇园与花事周旋此卷遂来争胜聊题数语不觉芳英烂熳笔端

题倪驾部胜游画册

宗少文好山水爱远游西陟荆巫南登衡岳欲怀尚平之志不遂晚归江陵叹曰老疾俱至名山恐难徧覩凡所游履皆图之于室谓人曰鼓琴动操欲令众山皆响故自贤哲高风丹青佳话昨晤倪驾部霖冲出其所图二大册则凡平生宦辙所经繇都邑之巨丽山川之名胜皆在焉而俾余宫洗王廷尉詹吏部亡弟太常各书其旧作于副简且曰少文处而吾尚出彼故不得以羣方为几席而吾亦不得专一室为卧游虽然少文之杖屨仅楚服耳而吾之辙向固已倍蓰之吾之游未已而图亦未已也我故当胜余谓驾部膂力方刚经营四方子宁一亩坏老父而已耶且彼能以一室而收楚服之全子乃能以一篋笥而收彼之为图者又数十楹宁但胜彼第俟子之功成而后为少文子之篋笥中当作輿地图矣余异日欲帧书一诗必腕指且痛姑于此塞白焉

题张复画二十景

隆万间吾吴中丹青一派断矣所见无踰张复元春者于荆关范郭马夏黄倪无所不有而能自运其生趣于蹊径之外吾尝谓其功力不及仇实父天真过之今年长夏为吾画此二十帧携行梁溪道中尘思为之若浣因据景各成一绝句题其副楮复画貌山水得其神余诗貌复画仅得其肖似更输一筹也杨公伯谦游艺之好比余更深因割以贻之倘于机务小暇时间一展翫庶几夔龙席间不尽荒箕颍色耳公其以为何如

弇州续稿卷一百七十

●钦定四库全书

弇州续稿卷一百七十一

（明）王世贞 撰

○文部

△佛经画跋

王摩诘罗汉后

摩诘丹青之妙出入吴李间别造逸品而又精心奉竺干教以故所貌罗汉至多余

旧觀一牵乃演教图有御押是宣和殿藏物此则其散在人间者虽剥蚀之余神采尚自焕发足令波旬合掌龙女献供下视贯休梵隆辈蛇神牛鬼奚啻霄壤矣

李伯时十六罗汉

余所觀贯休画十六应真以险怪眩时眼梵隆则潇洒饶意态然未有如李公麟检法此图之精者其木石帷几龕细异笔僧雏老少后妃婆罗门侍胡山神服装异状然不作离车相诸俊比丘儵然有尘外度剧是合作跋尾吴兴赵肃书真得承旨家风吴郡刘珣金宪颇称伯仲沈周先生则居然双井云仍矣此李应祜太仆家藏物不知何緣落德州张氏手复归我楚弓之失得何足论也

善财参观世音三十二变石本后

右画善财童子参观世音大士凡三十二幅皆石本云是李龙眠居士笔不可知然法相端严体势绰约窈窕非龙眠不能办也帧帧各缀一偈无论工拙是当行语依稀妙喜幻住家风考之华严本经善财所接大善智识五十三员独文殊弥勒为至而观世音仅补陀一见耳龙女化佛亦自文殊成之不知何緣阑入观世音法门而龙眠为之图此开士又以偈为之赞且善财之始见世尊年固十二及参诸方得道已百二十所谓童子者以童真不坏也即文殊亦然今作六七岁儿状大谬虽然此图权也华严亦权也以权显实即得以实破权即不得余将为下一转语云道宣觀此努目而诉之薄伽梵薄伽梵曰钝根阿师且置菩提達磨闻之曰且喜没交涉

画西方十六观经

余既感鸾法师受菩提流支西方十六观俾故人尤子求效丹青之士而子求之子道恒能楷书仍为我系经文于后字体径寸颇遒劲可观会阅藏至阿闍世王经与元馭学士相对扼腕不平其事而僧修礼辨十惑论果有权文学者谓频婆罗贤王也应救而不救之阿闍世逆子也不应救而救之为世尊失政之大而修礼则谓观经有云频婆娑罗幽闭置于七重室内自然增进成阿那舍阿那舍者名为不（阙）生欲界阿闍心生悔热遍体生疮经云若不随顺耆婆语者来月七日墮阿鼻狱详夫幽愤而升上果虽外凶而内吉冥日而超下界虽名死而实生救之即翻损任之即自益至若身疮而心热罔知回向之路业深而报近将坠泥犁之城救之即为益任之即为损斯即观其所应救救之以为益察其所应舍舍之以为利而曰应救而不救之不应救而救之圣心虽微知之何陋矣然定报受之而不易明业之难犯也重罪悔之而以轻明行之可革也今父子咸

进于道何顛不扶贤愚并从于化何来不劝按此荅既不明究所以强为解事全属遁辞何以示训窃详频婆娑罗于毘富罗山射猎无故杀一五通仙致被誓于未来世必报此命又阇世王已于毘婆尸佛初发阿耨多罗之心则阇世此生杀父之罪固重于山海而夙根之善与受冤之深亦有可言者佛若救频婆娑罗而生之则此债终无了期故授之佛经使成阿那舍果以酬其贤而听其幽死了彼冤对不为异世之累至于救阇世王疾却有深意盖佛法有救生无杀生阇世罪虽重佛不能为诛也其人既旧发菩提且受冤苦虽染恶疾命卒不当絶也人王法王相倚成化人而不仁疾之已甚则彼肆其无所顾藉之恶而滥僂释种破灭佛教其祸有不胜言者故因而利导之俾之去恶从善以敷畅大化不为厉梗然则阿阇世之不死其卒寿也所以得尽卒寿者余福也考之卒经明言略受地狱之苦然而出为帝释为轮王以至成佛夫为帝释轮王成佛此权语也其云地狱实语也夫地狱之寿有定数有与诸天齐寿者有穷劫者何得言略受也言略受亦权语也考之观经月光大臣云劫初至今恶王贪位而弑父者万八千人则彼中视为恒事佛虽示戒西人未必遽遵急于救时而缓于立训盖亦佛道当然耳第有可恨者毘富罗山五通仙既发讎报深誓又非多生眷属何以不为他人而必为王子以陷弑父大僂耶此必有任其咎者然而于佛无与也

画观弥勒上生经

汪仲淹乞余为其妇作志铭而以观弥勒上生经为币经首有释迦授记慈尊圣会图及兜率陀天内院三图皆瑰丽侈贵之观而经笔亦方整下题有燕山张继者当是宣英时名手也计当复有下生经而不可得按弥勒者梵音本梅■〈口呈〉丽耶此云慈氏也慈氏之初发心在释迦前以一进一退故释迦超六劫而先证菩提考法华经日月灯明佛时文殊以妙光菩萨为上足弟子作七佛师而文殊八百弟子中有求名菩萨贪着利养虽复读诵众经而不通利多所遗失是为弥勒而弥勒亦自称心重世名好游族姓至然灯佛出现于世乃得成无上妙圆识心三昧识性流出无量如来而释迦于是时仅一献花布髮之男子耳此其为前后辈可证也第然灯佛见释迦即授记作佛而弥勒又歷诸无央佛踰七佛至释迦而始授记夫释迦之精进在然灯佛前不应始献花布髮其精进在然灯佛后则不应先弥勒而授记也弥勒紫金身十六丈而释迦仅丈六尺弥勒寿八万四千岁而释迦仅八十岁弥勒行化之地东西长四十万里南北广三十二万里王国鸡头末城周围四百八十里而释迦所化仅五天竺诸胡地周不过十万余里净饭所都与王舍所栖其城不过四十余里而已弥勒之地若琉璃镜平无丘陵坎窞人无夭札病疔战鬪而释迦皆返之所谓五浊恶世也夫以释迦之縁果功德俱若不能如弥勒然法华化城喻品乃谓大通智胜始成佛而释迦与弥勒阿閼十六世尊亲为之子净修梵行智慧明了其事在往过去无量无边不可思议阿僧祇劫前兹时不知弥勒发心

与否寿量品则谓释迦成佛以来无量无边百千万亿那由他劫盖示菩萨行于历劫以显再成耳而徧考大藏弥勒皆无之疑本未成佛至当来世而后成也释迦正报身为千丈毘卢遮那于色究竟天成佛释迦仅亿身之一身耳而弥勒则未闻他有报身也释迦二辅文殊普贤皆古佛现菩萨身以示无两大耳而弥勒之辅无着未登十地天亲甫脱二乘去二大士恐殊有间也初地学人既不能作德光论师径登兜率揖弥勒而叩之又不能尽扫此无益之疑而拘拘于一阶半级宁不为宗门老宿所笑聊识于此以志余陋

渡海阿罗汉像

摹龙眠居士李伯时渡海阿罗汉像一卷一力士负戈而立若卫法者诸阿罗汉出没烟雾波浪中然各有所持乘筇而虎者横锡而狮者龙而握其角者手香垆而立三足蟾者共一槎者其一操如意一操葫芦吐云气袅袅不絶端坐五色云者卓锡而立背若龟首尾若龙而不角足差短者立一蔡者指端出云云际双鹤盘旋者二少髡无有所践而波没趾者一负筇一捧经而皆矫盼鹤不已者骑大鲤鲤戟髯而哆口者立大蛎若石手一钵飞锡前引者老龕眉眉垂至肩项衲而五水神拥之者肩筇挂一羽扇而践巨袱者立于龟者前现小二堵波有白毫相合掌而礼之者立蕉扇手一贝叶者立五色兜罗云者合掌而掌端之气佛刹从中现者侍者小沙弥四皆轻行无碍盖始抵龙藏则两玉女奉几几有香鼎一军持二稍次龙子女各一合掌而迓龙君挺笏继之二玉女捧扇翼之宫官四人复翼之从僚四人复翼之旌幢幡盖舆辇戈戟之属缤纷摇曳庵霭显晦不一大抵卫法之神势甚狞猛而专诸阿罗汉飞行自在游戏三昧波鸣浪激而甚暇龙君伟而肃龙子女娟好而静从官怪傥而恭其纂本之妙若此不知于真迹又当何如也吾闻之尽阎浮提罗皆当充金翅鸟王食能脱其口者独娑竭主而已乡故遇如来踞狮子坐时輒献花顶礼与闻出世大教而如来及诸弟子大菩萨阿罗汉亦时时降其宫说法至末教垂倾悉贝多所书者付之居士此图之为娑竭主无论第不知为曼殊室利与诸法眷度龙女时耶将舍利佛大目捷连讲经时耶抑龙树尊者取华严时耶诸罗汉时在阎浮提中而莫之识是吾曹尚不能如娑竭龙有法眼也其不充鸟王食者几希矣

再题白莲社图

余尝跋赵松雪图白莲社临本颇亦有所考据而图为陆与绳取去跋今留弇州稿中后游匡庐憩东林寺访遗像断碑于荒烟落照间视虎溪不数十武仅涓涓细流叹怆久之今者复一覩此图与前位置虽小别而彷彿见大都偶阅僧优昙所著莲宗宝鉴为略辨之按中土释教自永平而后虽日以滋盛而识限因果毋关性心图澄神异志存弘护道林卓萃乃阐老庄远公独能思绍先绪取证罗什删繁绌邪以净信念佛为宗诚开

士之要轨也第刘遗民雷仲伦宗少文张莱民张秀硕周道祖诸公虽复神情朗洁而尘迹犹存发愿之后往来室家恐亦未隐至乃汰灵运挽靖节固征裁鉴之精严第必置甌酒以待征君似亦小为名使非如来本戒又西来本地以法性言之尚不为实而况雁门乃寄生之乡何足多恋至烦诸弟子别创西林以仿新丰毋乃赘乎又优昙谓公以经律未备禅法无闻乃于内更造净室请一禅师率众习禅令弟子逾沙漠求禅经度江表四辈咸得修习又谓罽宾国■〈马犬〉跋陀罗因请至庐山语远公云西天传法祖师大迦叶直下相承二十七祖有般若密多罗者在南天竺行化慧灯相传至达摩多罗为二十八祖着禅经其略亦云然故远公为序曰达摩多罗者西域之隽禅训之宗宝林集与传法正宗论因之达摩多罗者即菩提达摩愚不敢遽以为信也夫达摩未来性学犹蔽虽露思惟修字而实不及最上一乘比其时中原鼎沸江左偏安西僧避乱越符姚之境而南者犹间有之南僧西迈出秦蜀度葱岭求经请法其人谁也又所谓禅师者其人谁也有禅师何以不焯焯闻也且远公以太元十一年丙戌建东林寺成至义熙十二年丙辰卒相去盖三十年梁普通元年后庚子而达摩至建康距远公卒已一百四年跋陀罗离长安而至东林又前二十年达摩领师戒绍祖席者六十七年而离西土又十余年而西返虽如梁武所云老寿百五十余岁第其时仅三十余耳恐犹在王宫未参师面何由而遽自称祖何由而遽着禅经令诸四众传习何由而抵建康后一语不及旧着一字不追远公然则禅经故非达摩法言经序又非远公遗笔习西方者曷为之引禅而自重习禅者喜得之将引经而证祖要皆非实录也仆此公案似了了第恐远公闻而赧脸谓老书生何强预方外事却无以应之

又题十六应真后

昔人画十六应真皆以唐梵老少分配以避过庭风草之讥而不知其实有不然者独此不作唐相少年相甚为得之据三藏师于执师子国得佛涅槃后八百年庆友罗汉住记云薄伽梵般涅槃时以无上法秘嘱十六大阿罗汉并眷属等令其护持使不灭没及勅其身与诸施主作真福田令彼施者得大果报第一尊者宾度罗跋啰惰阇与千眷属住西瞿尼洲第二尊者迦诺代蹉与五百眷属住北迦湿弥罗国第三尊者迦诺迦跋厘惰阇与六百眷属住东胜神洲第四尊者苏频陀与七百眷属住北俱卢洲第五尊者诺矩罗与八百眷属住南瞻部洲第六尊者跋陀罗与九百眷属居耽没卢洲第七尊者迦理迦与九千眷属住僧迦茶洲第八尊者伐阁罗弗多罗与千一百眷属住钵刺拏洲第九尊者戍博迦与九百眷属住香醉山第十尊者半托迦与千三百眷属住三十三天第十一尊者啰怛啰与千一百眷属住毕利扬瞿洲第十二尊者那伽犀那与千二百眷属住半度波山第十三尊者因揭陀与千三百眷属住广胁山第十四尊者伐那婆斯与千四百眷属住可住山第十五尊者阿氏多与千五百眷属住鹫峰山第十六尊者注茶

半托迦与千六百眷属住持轴山若一应天人修供此十六大阿罗汉及诸眷属随应分散往赴隐圣同凡受供舍福今按西土斋衬必供佛及罗汉圣僧而以宾头卢为首宾头卢疑即宾度卢跋罗度阇之讹略也又按经藏中有外道婆罗门谤佛谓无神通者立五丈竿悬钵食于其杪而号之曰吾以食施瞿昙弟子能飞受乎不能者当出吾下盖知佛戒弟子不得受外道供也时舍利弗不忍佛戒之犯故隐而过之宾头卢不忍佛道之屈故飞而受之以是见摈捷椎不获从佛迁化而至今犹在声闻果中然则是十五应真者其犹有小未满故耶抑所谓受无上妙法护持不灭没者耶果地愚所不敢辨特以世之像应真者不得十六之说故志之于此

再题梵隆罗汉卷

后考得梵隆字茂宗号无住吴兴人思陵极喜其画见輒为品题之其白描人物山水皆师李伯时气韵小不逮耳真吾九友斋中方外佳侣也

朱君璧摹劫钵图

劫钵图吴中有二本此本为元朱君璧所摹宣和秘藏迹相传鬼子母有五百子在人间食人精血殆尽佛愍之乃摄其所爱最少子置之琉璃钵中母求佛出其子不得则竭魔力与其魔众举此钵复不得则四百九十九子各以所从鬼兵数万排山倒海掣雷电以击佛枪刃矢石所抵皆化为莲花盖愈恚愈不得技穷而后改意回向誓不食人乃以其子还之与此图合第考之大藏中鬼子母经则谓佛游大毘国时有一女多子而喜盗人子与其子共噉之亡子家亦不知阿谁取里哭巷议如是非一阿难闻而白佛佛言此非凡人故现鬼子母是母有千子半在天上半在世间皆为鬼王一王从数万鬼上烧诸天下烧人民吾当伏之便勅诸沙门俟其夜出掩取十数子闭精舍中母还不见子号哭寻子乃复勅沙门导使见佛佛为委曲开譬示以罪福俾皈依五戒实时得须陀洹果结约千子皆从护法今二十诸天中所貌鬼子母天是也即不闻有劫钵事岂好事者以魔波旬烧佛与佛摄毒龙归钵二事傅会而成耶将法显奘公辈自西域来别有所受耶余皆不敢论独念佛以大慈心行坚忍力化强暴若转圜鬼子母以一念回向脱万劫罪而立证初果可猛省也若其笔力之精劲入神则有顾马湖张银台二跋何容喋喋

圆泽三生图

圆泽师行径颇类栽松道者其事甚奇宋人所作画更奇虞文靖公以古隶书传尤更奇虽然此师能预审去处已得无漏通其作牧牛儿知来处又能一见呼李洛守得宿

命通而三载恋恋不肯入锦裆姬窠乃至不欲行斜谷道中既遇时又与李泣别何也岂道腊逾七十反不如十三岁儿洒落耶此一段未勘破故为拈出之

书文征仲补天如狮子林卷

胜国时则天如和尚为高峰嫡孙中峰主鬯行化诸刹作狮子吼已乃挂锡吾郡选地得狮子林郡中诸善智识用幻住庵故事运瓦择木成此兰若遂以幽竒冠一郡丛林天如尝有十六绝句颇纪其胜法嗣善遇辈遂厘十二景而洪武初王先生彝高太史启谢太史徽张水部适王处士行皆游而有绝句纪之前是朱提举泽民图之矣徐布政贲复图之倪山人瓚今赵善章复图之真迹不知散落何手百五十年而文待诏征仲重貌其胜而书彝启之作系而归之主僧超然者超然没归之竹堂僧福懋不能守归之歙人黄汴几若落异域矣汴歿幸而归之昆山周鳳周歿其家又不能守而吾弟敬美始得之余乃拈天如绝句授敬美伊仿征仲例以小楷系于末闻十余年前狮子林尚在而所谓十二景者亦半可指数今已转授民家陆氏纵织作畜牧其中而佛像峰石老梅奇树之类无一存者嗟夫如来迁化后尚不能长有王舍给孤独竹园而一天如力乌能使狮子林垂二百年而岿然无恙也敬美意似欲尽购三四君子图大较谓书画力更可得数百载将以救兹林之泯泯然总之幻耳天如一幻人狮子林幻地今皆已幻化而乃欲徇此幻迹了幻念耶故不若中峰老人之以幻住名庵也因复赘我幻语

△道经画跋

题葛仙翁移居图

詹东图出此卷示余云葛仙翁移居图不知是何人所作其貌人物绝得吴道子王瓘遗意树石则荆关也前一夫甚悍而短肩行李诸药囊瓢铍衣籍之类皆在焉二少女步而从一携琴一提药笼六白羊先后之二村童长者亦肩衣幞而牵一茧角黄■〈牛孛〉则仙翁乘焉黄冠蓝衫可似四五十许人色腴而意殊暇手一编且行且诵少者拊小黑犊翼之后水牯牛则白衣姬乘焉三婴儿少者在抱稍长者襁而肩左又长者踞半牛背凡为人之事十雅俗老少各极其致为羊牛之事九踟躅偃蹇各极其态而要之皆有物外赏更一纸则山谷老人书七言律题后结法莽苍遒劲是晚年得意笔也考之太极左仙公玄不娶无子纵有之生平如幻三昧岂不能尽之一幞似当为稚川子稚川曾娶南海太守鲍姑女弟不知此老移居在散骑常侍领大著作前将解勾漏令后耶稚川亦无子晚而就子广州参军望养此三婴儿竟不成长或寓言耳吾诗与书俱不敢望山谷觉少悉稚川事东图以为何如

钱舜举画洪崖先生

此吴兴钱选舜举所写洪崖先生像也神采秀发意象闲远望而知其非人间人家弟尝寄余一本乃宋人笔更佳而后缺一帧题以为葛稚川移居图余辨以为洪崖像弗信也得此本证之乃屈按列仙诸史传谓先生长七尺五寸眉目如画常御乌纱帽红蕉衣黑犀带短鞞鞞携筇竹杖今像正尔而后一人短而阔若段柯古所云弄臣者其执即六角扇也余四人大小不一即橘术葛律拙也其挽而不前者一白骡即雪精也肩者即铁如意长盈壶常满杯文榴酒榼自然榴杓一云垂云笠方木橈二玄书葛木如意魏惠壶木栢杓也盖靡不合者舜举拙于书而最后有题句云去岁无田种今春乏酒材从他花鸟笑佯醉卧楼台此先生诗也然先生又有二诗云下调无人采高心又被嗔不知时俗意教我若为人又入市非求利过朝不为名有时陪俗物相伴且营营语甚浅而有味舜举似不知也始余嗜古书画器物几成癖乃先生更甚焉而一时名士若李太一赠孔子木履郭翰复赠孔子二仪履杨炯复赠孔子石砚与扬雄鉄砚田游岩赠尹喜龟王戎如意杖杨齐哲赠嵇康鍛锥刘守章赠四皓鹿角枕司马子微赠淮南王药杵白魏肃赠陶潜琴隐居芙蓉冠刘长新赠王乔笙张守珪赠尺八寸海虾蟆牙秦休庄赠河上公注道德经藁本周子恭赠古帝王像素亭赠谢灵运须僧翛然赠迦叶头陀钵智远赠蔡邕焦尾琴葛洪刮药篋余始而笑以为何所辨真贗既而私喜以为灵真嗜好若此何况我辈第今年秋尽捐所藏付儿曹仅荷一被一瓢佛老书十余卷入城南精舍此身洒然觉先生之尚有累也先生讳氲一讳蕴字藏真晋州神山人赵道一谓其年九十三四月八日尸解于洪崖古坛至八月复见于晋州复尸解而徐慧谓其初乘白驴从五童入洪崖古井后复不知所终道一谓其慕古洪崖先生因自号洪崖先生而慧则谓即古洪崖先生也夫洪崖先生固张氏乃黄帝之臣伶伦也一见于卫叔卿传再见于班孟坚赋三见于郭景纯诗四见于陶贞白真诰盖遐逝之灵真而希夷之妙迹也张氲先生出处灵幻故静能公远之俦而博综艺尚庶几贞白伯仲耳且使古洪崖而在则吾孔子尚当称东家丘桐栢真人当称吹笙少年而何器物之足羨故须以道一所纪为正

五星二十八宿摹本

今世人称五星二十八宿真形图为阎右相立本笔按宣和画谱载立本仅有五星及（阙）房宿二像耳若张僧繇吴道玄则俱有之而今不可得矣此卷乃摹梁令瓚本令瓚宋人故有声画院中愚于丹青所未暇论独怪是星宿在九天宁有此委琐诡怪状即有之何从令人见而写之且牛星作牛女星作羊千古灵匹一旦兴尽真堪供噓嗚耳余曾见一本云是吴张藁与此全别而段柯古所记昴如剃刀毕如笠觜如鹿头参危如

妇人靨井张翼如足迹鬼如佛胷柳如蛇星如河岸轸角如人手房如瓔珞心女如大麦尾如蝎尾箕如牛角斗如人拓石牛如牛头虚如鸟娄如马头胃如鼎足云出佛书而阙亢氏室壁奎则又别矣然恐是星形耳非星神形也附志以备考

又为莫廷韩题五星二十八宿五岳真形图

莫廷韩所藏五星二十八宿图乃梁令瓚摹本致佳而微与阎右相本不合其段柯古所载如笠如鹿头如足迹等则又遥矣又五岳真形图不知是金母所传汉武的本否若五星名氏则澄澜青凝之类二十八宿姓则鞞耶尼之类五岳名氏则玄丘目陆之类余皆有别记记之不暇一一为廷韩书也廷韩仙才胜汉武远能去彼多欲此图当长侍衣衾不随栢梁火飞去矣其以余言为然耶否耶

题八仙像后

八仙者锺离李吕张蓝韩曹何也不知其会所繇始亦不知其画所由始余所覩仙迹及图史亦详矣凡元以前无一笔而我明如冷起敬吴伟杜堇稍有名者亦未尝及之意或妄庸画工合委巷丛俚之谈以是八公者老则张少则蓝韩将则锺离书生则吕贵则曹病则李妇女则何为各据一端作滑稽观耶乃至迹者紫姑灵鬼往往冒真人而上援此八公以相蛊惑尤可笑也是八公者不佞能考其七而疑其一为志之锺离公者讳权字云房尝以裨将从周孝侯败于齐万年跳终南山遇东华王真人得道至唐而始一出度纯阳自称天下都散汉吕公者讳嵩字洞宾父让尝举进士不第遇正阳真人得道在五季及宋时化迹最着而又与正阳度刘海蟾已度王重阳及自度何仙姑张珍奴之属张公者讳果隐恒州中条山见召于唐开元帝与叶静能辈诸公比而公最为长者自言尧时官侍中叶公密识之曰混沌初分白蝙蝠精也授银青光禄大夫放归天宝初尸解蓝公者不知何许人恒衣破蓝衫黑木腰带跣一足鞞一足醉则持三尺大拍板行歌云蓝采和蓝采和世界能几何红颜一春树流光一掷梭后语多不能悉至濠州忽掷鞞带拍板乘云而去韩公者讳湘昌黎之从子少学道落魄他乡久而始归值昌黎生辰宴怒之公曰无怒也请劾薄伎以献因为顷刻花每瓣金书一联云云横秦岭家何在雪拥蓝关马不前昌黎不悟遣之去后果谴潮至蓝关公来候昌黎乃悟因吟三韵以补前诗竟别曹国舅者苗善时传不能举其名第言丞相彬子皇后弟少而美姿安恬上及皇后重之一旦求出家云水上以金牌赐之云诏书到日如朕亲行抵黄河为篙工索渡直急用金牌相抵纯阳见而警之遂拜而得道按皇后乃侍中彬孙女金牌云云大约里巷委谈也审尔所谓曹公者当作青巾少年不当作髯而翼善冠也何仙姑零陵市人女也纯阳以一桃与之仅食其半自是不饥颇能谈休咎老而解化亦苗善时云考之他野史谓

仙姑晚而枯瘠其言休咎亦不甚验赵道一仙鉴则谓纯阳所度者赵姑名何者也有仙姑何姓者开元中羽化去合在纯阳前若李公者诸方外裨官都不载独闻之乱云讳元中开元大历间人也于终南山学道四十年阳神出舍为虎所残得一跛丐乍亡者而居之不可知也令锺离吕公而游人间必从东华挟海蟾与重阳辈而八令张果先生而取友则必从赤松安期次则静能公远张洪崖胡长仙辈而八必不屑屑求瓦合诸公方逍遥乎上清亦必不仆仆焉一符之是听而受尘凡役也不佞此跋即受乱头詈所不恤矣

全真四祖八仙像

自我教主东华帝君得统于太上而传之锺离正阳正阳传之吕纯阳纯阳传之刘海蟾凡三真人而后为我王重阳重阳真人之有全真也犹达摩大师之有禅那也见若以为创始而不知其自海蟾而上遯之太上见若以为无师之智而不知纯阳海蟾之显度而默授之也盖至于重阳而教始大明矣自重阳而为丹阳之马长真之谭长生之刘长春之丘广宁之郝玉阳之王媿丹阳而称女真者又有清静之孙凡八真人盖至于长春而教益大行矣前四真者亘千年而不为遥后八真者聚一时而不为近三百年而一真而不为少一时而八真而不为多亡他遯有縁而成有时也吾始乞李郡为此图既成而吾弟敬美自江右臬以覲归且发因辍以予之敬美颇向道而厌事我长春以八十老公应元世祖之聘往来大都扶服数万里而不以倦称者救物故也善救物者事应而中不累功满而不自有出不碍道处不违性敬美而苟悟此当金莲煜煜火宅中俄顷成清凉界何必朝夕仙师哉

仙奕图

故协律郎冷起敬以画鹤之诬瓶隠其所图仙奕张三丰道人已详记之今年春有携售者以直太昂不能应聊为摹其大都因戏谓石室仙奕太迟取滑待诏天人奕太速孤山仙姑妇奕太巧恒山仙奕太拙吾不知此仙人于巧迟拙速何似有粲者姝乐于橘中叟遠矣漫为题尾

又

仙奕图今在张伯起家初无冷起敬题款止据张三丰一跋为二仙遗迹故见重耳然跋内称与宋司户参军赵孟俯于四明史卫王府覩唐李思训将军之画按弥远与孟俯生不相及复称以此图奉送太师元老淇园丘公而末云永乐壬辰三丰遯老书尤可笑考壬辰为永乐十年而前是五年丁亥上遣胡忠安访三丰于武当则先期已隠化矣

七年己丑丘淇公败没于迤北全家谪海南矣岂有至壬辰而三丰复出淇公更生者耶都太仆号博浹而此易事不能辨何也漫志于此

弇州续稿卷一百七十一

●钦定四库全书

弇州续稿卷一百七十二

（明）王世贞 撰

○文部

△书牒

南都八坐贺元驭相公启

迺者巽书洊至涣汗频颁当九重特达之知亲书上考覃八命穹崇之寄晋领孤卿马鬣荣施祖曾承华之峻秩鱼轩骈集姑妇长乐之崇班兹日之李赞皇屈从齿胄他时之韦都尉无忝象贤缙绅已倍恒欣乡国尤传盛事伏惟某官阁下中吴孕秀东海涵灵智崇礼卑动由成性言规行矩妙合自然左氏之业就素臣仍公好恶董生之书成繁露始对天人国士无双褒然南宫之选首廷魁第二允矣太史之呈祥再领成均多士皆其陶冶两裁帝纪一时赖以权衡自鲁连拂莱海之衣而严陵系桐江之鼎南阳隐士独称为卧龙洛下儿童皆知有司马傅岩特召无藉金张之援汉殿同升共推丙魏之媿清标着于平日故中夜无可却之金白麻播于内庭而外朝减征声之宴上不枉道以求合下毋养交而借名人皆望之植同已排异已公不谓尔涣小羣成大羣为国则举不避讎远嫌则恩无归己若水若旱必与圣人同其忧一话一言务安社稷以为悦当慈颜之底豫或少展其愁眉若睿听之转圜庶几缓其归念此盖一人之有庆以致三后之协心虽临轩之眷命有隆而循墙之让德弥着谓青宫一品已坚辞于达书之辰彼素丝五紵实远逾于章甫之贵匪故夺公之守殆将伸国之经某等素切仪刑遥深踊跃惟诏功诏德自古则然而有君有臣于斯为盛皇天之产名世已过五百余年贤者之在中书何妨二十四考

荅上襄王

初秋伏惟大王德履倍常集兹千福世贞不能事贵人退伏田野自戊寅再辱灰心世路偶有感证削迹道门言官之谬举与向者之见攻皆付之山神伎俩而已而大王拳拳念存且以东山之出推爱友于南溟之抆致望燕翼感悚徒切岂敢仰承惟是大币玕筵岁赐为恒野人烦暑尽除调饥有赖不敢不拜嘉耳后宫兰梦闻尚未协厚积时施且小节杯笋行当绳绳振振鄙日望之蒙委中和轩等诗及题对谨草古体大小七章以塞明教素不工大笔及拙于格对惟冀尊慈见亮周茂才名士书法时义皆可观蒙大王设醴之惠感深刺骨并此附谢不宣

又

下走天地长物丘壑余生麋性莫驯蜗涎自润虽挫名未尽或见齿于人间而削迹已深久忘机于海上不谓大王恩深笃旧宛尔楚宫之穆生志切怜才念兹梁苑之枚叔岁厘命使躬贲王纶兕笋制自尚方裹蹄出于南徼竟陵所饷足骄叔夜之鎗成都可沾无俟阳昌之典饮醇何既报德难名

又

岁厘信使函致温纶如天之贶愈隆倾日之忱莫効敬惟襄国大王殿下温恭成性孝友提身发政施仁美化既行于南国亲贤笃旧遥惊尚寓于中吴即枚叔之拜赐梁国何以过是惟孝标之陈谢湘邸恐不称焉下官濱海陋儒东山小隱偶承人乏误玷恩私薜荔不深远志化为小草桑榆渐迫文无但有当归于圣主未竭股肱之诚在私门遽罹手足之变方当愤瞽徒切悚惶仰挹大王之雄风难随神女之行雨下情无任感激瞻仰之至

荅楚王启

下官备员臬司托在宇庇尔时大王毓德东禁未接庶寮徒企音徽竟睽瞻仰嗣是十有五年大王应期御国礼士登贤义问仁声江澄岳耸下官烟霞成痼丘壑自私误来弓旌叨佐枢轴骏骨何补菟裘遂荒不谓踈逖之姓名荷蒙清燕之采録远劳命使勤宣德音餽獎逾涯惭汗无已太和胜地玄武真官承欲修治道途以便恭谒岂唯至念所当祇承亦是下情由来深愿第此留省游邁阻饥中产方困征输下户甫离沟渎祇有三四中贵一二勋臣但笃营生未晓縁事况下官虽有半面之识于此辈故非通财之交谨尔奉辞有孤来雅所赐币礼敢依数告完诸惟寬宥下情无任惶悚之至谨启以闻

荅樊山王

今寰宇丰洽文轨大同即朱邸诸贤王不获辞远游戴鹖弁以树干城之绩而获以清闲之燕寄惊毫翰流誉竹素抑何盛也乃者豫章三子侯大梁灌甫南阳子厚桂林云仙皆与不佞雅相闻固自琅琅一时然皆爵仅公乘禄等铜墨未有拥南面之尊佩绿盩之华而修三不朽之业如大王者也伏读训辞谦光蔼然循览诸什贲文以止令人敛衽嘉服世贞老矣少不如人今精已销亡矣大王过听而褒旒之不知其心之与髮俱短也鱼鸟之踪转入深僻方塞兑杜机叹听反视为婴儿之不暇安能复作长卿敬礼游白雪之苑坐绿苔之阁乎哉以此负大王大王勿怪也不腆大士经呪一夹是贞所刻者山园记一帙是贞所撰者大王试一寓目焉庶几若不肖之获奉清尘也冬寒为宗社为道珍爱

又

前者草草一书稍露倾挹而足下过垂旒褒寻以名世之文见示俾效琢劘且荐糠粃之导足下借视听于聋瞽固自盛心第使空空鄙夫偃然而当敬礼之托则大不类矣陈生言足下告之先王之庙而后遣信其笃诚足感也披窾而受弹射所不恤其虚受足钦也至读书辞概及千载慷慨用壮一唱三叹使我忘聋瞽而跃然起矣足下能勿露其丑否陈生又言足下礼士若折爱贤若渴虽处朱门而等若蓬户每谓人且字我毋以南面目我此藩国之盛节小山之高致也仆用是忘其贱愚而修布衣之礼以进足下亮之

荅黎丘王

世贞燥髮登朝则闻曾大父先王濂洛间隆準也河间东平不足拟矣既闻踰古稀跻大耋以为诸侯王师表翩然乘白云而游帝乡则尊父今国主继之文采五色光映江表虽八公在门而异端自屏曾见信阳王太史道奉常声容文物之盛使人翩然动在齐之想不谓渥洼龙种复有如大王者出今大梁灌甫优游经术豫章宗良用晦南阳子厚纵横词藻贞吉综艺于洪都云仙玄举于桂林然皆奋自踈裔垂沦白屋未有出深宫游朱邸冠远游被赤舄谢狗马琴色之好而思操竹素之业以流映千载如大王者也甚休甚休世贞不佞何足以与斯文而大王过听远贲大教春温汉回穆如洒然虽山川阻修鳞羽犹间而公子执轡之恭梁王授管之雅于楮墨间隱隱见之加以琼章睿书云霞舒卷龙蛇飞动淇园青葱托之绢素挂我四壁触目琅玕又吴兴大士像检法阿罗变无论真迹摹笔宛然若新拜赐之顷汗洽于背世贞老矣卢蒲之心亦短田光之精久销日坐

一龕行断诸业不揣鄙陋勉成六絕句以昭来美伎俩如是而已大王如更辟小山展兔苑以招来名俊则有屠礼部长卿胡进士元瑞及吾乡周公瑕曹子念王承父王百穀皆虚左物也门人游日益尚在曳裾其人长者诗亦可与进而不无酒过唯优容之幸甚问寝多暇为道自玉以膺庆祉不宣

寄用晦

近有家人自南来却致足下报书转附吴地者乃知汉上之信非易矣而杨中丞所使使到首扣足下之耗不获也岂玄亭寂寂鲜与此曹相闻耶向书云久苦脾疾虽已勿药尚未腴足下方盛年胡乃尔每诵陈思王求通亲亲表及所下教觉此公腹闷当不消足下有德甫相倡酌时时出滕王阁望大江高歌纵酒故为胜之此间故事不出按部又少过客其为面墙殆甚足下然一切吏事稀简眠起颇适因得以其间理丹铅之业意似爱之不敢作春明梦也外刻书画十余种俱完如法书要録名画记之类皆在殊足供足下麈尾资惜去人不能多携令各上一部

又

日坐弇园泉石间意有豫章使者则故苍头至矣启缄得足下书悲愤感慨都不忍读三诗妙语溢出至万古风流文苑借五湖春色主恩私此是琅琊汗后偈足下何从得之嗟乎仆人间一长物耳世自用之世自弃之于仆尚无与而乃劳足下方寸间五岳也别册如发波斯装环瑶夺目即小有微点无损连城宗良每见必长咄咄逼人诸王孙赖足下先驱骄嘶纵骋无复蹇态豫章异时风流不减邨下矣报言促卒未能厌来愿想当尽见之也所喻果有中散驾此间一钵亦足藏神龙不妨弥月布衣饮第恐白云不肯封丹房为偷儿窥伺耳家弟作吏知亦不恶而颇抱子猷之兴徐卿至足下相与挽之何如明卿斥似不出政府意但非所急也蒙损贖佛经呪三十卷一启函而知为长陵时物二沈诸君笔跋尾果尔若其精絕殆似芥子之纳须弥固不可思议也却往古玉道冠一丹成可簪而就鹤背也二诗各书一扇其湖紬土布比于季子之缟又竹一帧元顾定之笔及诸隼诗少助高斋寓目不一

又

子与书来云与足下间一相过从犹未得沈酣如竹林时也游客方生谓足下倡和微倦得非日事九转大还之术乎区区顽健如昨窃谓从死生大关勘破一切有为皆梦幻泡影第勘破后终无着落郤转于见在耳目口体间小取适耳此语虽卑可为知者道

也秋来举一孙即纵身杯酒至今未离口然意殊不厌之独苦文字见役如责博进耳物情时事顷刻万端亦一切听其顺逆德甫野处当周旋少踈诸王孙少年纷纷艺苑谁为千里驹者家弟坚欲拂衣止之不可足下须与子与一商之嘉禾道中对客不一

又

张生至得二书其一附姚山人其一附张生者足下始而为我喜既而为我不平春荣秋悴顷刻在足下方寸间仆却似观局人耳弛担乡井灌园读书差足送日无故而尺一呼之又无故而白简逐之譬如梦中了不知其所以也仆自庚申而后食息起居事事愧心宁独出处第生平无声色奇衰之好与所谓居闲伏谒者然彼偶不中窾耳况吉夫每以续史见属觉事大未敢担承两藏出没无所得五十之年倏已过四如何如何子与不禄且无子昨入雪一哭之至作十日病亦曾为料理其墓事第登其堂独未得足下及德甫一言以为怪即其子弟亦怪之今始知足下将有谏些之属幸毋缓也目前宁有泛爱亲仁若子与者潘中丞能厚足下而不克荐德甫亦是世法中常理家弟计已在省得时周旋足下欲重勒淳化帖问之张生云是旧泉刻耳如顾舍人勒阁帖尚不能佳幸再计之闲来思得诸宗室于文字尺牒姑以字行而别取一字如证明之为征仲者如何有一信幸即付家弟可也手疮口授待人笔不一

又

家弟归自言于足下不能数数也则以近例束湿云而足下亦多自引避德甫林居遂不获作三雅会乃知人间世不可晓如此仆自逾始衰梦境将觉于一切意味靡所不厌今春忽似有所证即析薄产授儿曹别创小团焦僻所入秋可成即徙居之一褐一苾蔬食水饮作头陀行径矣惟翰墨间责小未偿然亦不至作绮语足下于此尚微退似当入不二门而丹灶之火未息良所不解金砂黍珠造物至靳纵予之天上宁有财色神仙也佛不离心丹不离身仆此二语非孟浪者足下勗之南阳王孙父子有二札附足下亦能诗而雅尚书画古器其子尤可念二十工古文兼习举子业尝试于学使者輒居首仅以一束素旌之而已令人邑邑宗正条善书者章生自言客南昌常寄食足下所甚服高谊又云足下赏鉴家有古眸子而无古物亦可笑也目疾口授不一

又

久不奉兄问昨姚匡叔来出手书一纸则先辅国龙沙翁已西游不胜惋叹每见陆楚生称翁丰秀宏博有天人相即百岁所不足论今虽丹井就寒石函未证而哲萎之岁

上肩尼父于宁顺至理夫复奚憾匡叔又言翁能预定去日当四大分离恬然坦然了无怖乱丛林耆宿所不能及兄易戚备至倾赀治丧不以烦三弱弟朱邸中莹然一孝廉俱足羨也辱谕德甫出弟书云云弟已忘之大约兄所不足者非才也挫锐同尘是犹龙公处世法弟年来少得一二益故以此分奉兄兄既已荐之更复何赘卒成挽章寂寥数语殊不足为重欲更有所效而新正笔研之誓已于佛前结却柰何柰何匡叔当自有说也节毁强粥以全大孝不宣

又

仆自庚辰以后入观经行而苦喧嚣迫耳至甲申夏荷上恩得保一壑以九日避地海隅者匝岁寻用夜戒栖止山园虽视家小便而应酬见侵几复成一酒人仅以断欲之久粗顽健耳姚匡叔来得手教具悉近况且云足下独任先辅国丧财力俱困病痞累月足征孝诚足下又惓惓念及德甫身后闻渠长器多才艺能自树立且精堪輿家言第二第三郎君文笔健胜令人意豁幸寄声长器欲得德甫地下文但以一介将事状来勿躬及也区区余生念及蓼莪方寸欲裂以故悬弧之月逃之菰芦中饭僧诵经大旨之贶非所敢当勿以不恭罪我甚幸甚幸匡叔还便附此不悉

又

向从姚匡叔所知兄纯孝自奉先君侯大事后即长斋佛前精心禅那今者余世辅来谓兄益坚凿坏之节洞究出世之旨一切无明抖擞殆尽而不能无中口语山神伎俩何足挂意付之不见不闻而已先君侯身后辱以隧中一片石见委岂唯吾兄有临淄敬礼之契而先君侯实备河间东平之媿不俟调辞亦无愧色唯是伤于太详有妨身后念仁人孝子用情之笃不敢以简自贵也世辅善青鸟语第吴中士人栖形藏魄之地菟裘牛眠种种具足遂使长技弗施妙指永闕仆仅了得德甫一念耳此子才识精确议论英发第不免小负国武子之过兄幸以长者之道时琢磨之伯玉两走使邀仆秋游白岳明卿却欲东泛沧海第计其时以天子之恩命奉之先壑则且扫境以待明卿兄亦有意乎仆苟完此事生死皆了境也薄侑附报不一

又

始姚匡叔候仆于昆山道中既而别去及仆以三月朔之任无几则匡叔寻抵白下止鹞峰然绝不相闻五月行尽始迹得之已出足下见寄诗及牋各一纸申各天之怀壮观潮之致缘仆之此出大非不得已岩居十二载末杀世途草衣木食以了余日不谓除书

再及坚辞不可咸以先子新沐恩施无可更作偃蹇而病弟颇能噉肉糜起止如恒人故割念一出冀非久当遂初服入官之后便不由己而病弟之讷至矣既不获挽之人间又不能先之地下六十余生为日几何而堪此创痛也病弟在时尽有定力问匡叔当能言之足下当同此怀其于诤些发自赤衷不敢赘请闻比来道履清胜杜门优游自有物外之致掇国一事垂成而变然陈王尚欲辞远游此何足当足下一唾耶匡叔去便聊此附问百忧茫茫书不能寫亮之亮之

答宗良

苍头冒暑裹粮而致足下讯书以新诗动我起色所损饷杯盘足珍金华良常供噐甚荷雅念每读足下一番诗輒一番竒进鍊字琢句皆从苦心得之纵入醋瓮中不受淹浸要当表仪昭代岂直白眉朱邸而已记得三年前取生平故人自前后十五子外人各一章而足下与焉倦于取知足下弗能寄也仆今年拟不受翰墨责然尚忽忽旧逋计至秋中可解移疾之疏赖故人在事得以瓦全何胤先生伤巧退矣夫巧退之于巧进虽雅俗不伦其有待一也德甫遂尔泯泯可叹数行附慰用晦为我达之不一

又

每得公一番诗輒复一番竒进才情融美格意朗畅朱邸中乃复有斯人哉豫章诸秀翩翩藻逸公与用晦为之冠冕子良子云輩不得专美于前矣宗正条能抑公一时不能抑公后世也仆却得南垣力偃息弇园嗽溪卧石花竹禽鱼皆来亲人左图右书息以酒茗真足乐而忘世惜时时为俗事见烧耳辱见褒獎过情非所敢当素册漫尔挥写近律不免污纸见饷李迪画许氏说文增高斋一观第阿大生平无长物勿复尔也拙诗扇头并薄物将远意乞鉴入

又

生竟不能遂握手耶贞吉一发先之此竒不可复再矣熟知兄晚境不堪聊萧一觞一咏且用娱性杜门中千百年后不乏知己物情鹵莽任之而已尊诗若成帙仆当为撮其媿异者行之标曰国秀集足下岂有意乎比来欲为德甫任地下而其子不以状来亦不闻用晦为具草何意也用晦晚途殆不可解大梁灌甫宗正死矣此君博学通经术皇族之楨干摧折可念仆与弇州草木俱老昨秋偶传一诀粗足支持以待师期无足道者拙诗书扇寄怀李生致一卷素不知欲书何作幸示知不一

又

谭道人来再得手教及石兰馆诗读之令人齿颊皆芬中间虽不无一二可商者然自是良璧无损连城前拟题国秀集窃谓兰者国香也因僭改曰国香集而为序之并录前后往复诗及复成读足下诗一篇于卷勿轻示人恐见者不无碍眼鼻夏间所闻极不可人意初亦为疑骇徐而察知妬妇之口也然令子累足下故不浅今能改玉否仆岩穴之踪复见物色以有此画蛇之足业上疏力辞恐不能如所请当再图之雕虫之技兄落醮鸡瓮中尚可转入苦海淹杀乎谭生却有方外风可与也余不具

答南阳孔炎王孙

数千里走使以诗及书存我高枕间读之令人跃然起色也承见示有好古癖此是洞天清禄宋时诸王孙蓄法书名画有千种者今木天中秘亦不能尔可叹也理帛图古雅之甚且妆奩器用似唐人惜为水所渍小失神耳冯海粟诗颇豪其误字潦草拙手本色不足疑也马河中画清绝可爱乘兴作一短歌并题数行破我绮语戒矣舍弟适自朝天回以尊札付之并附洪都用晦书彼中尚有贞吉善诗瀑泉善书画似不减用晦也王屋桐栢二图从容乞休承为之公瑕作齐云游若仲蔚成异物久矣今附墓志去并有薄致外承铜雀瓦画卷之贶荷荷余不悉

又

徐司寇北首而始以君侯书见贶无鳞羽可附遂缺然报谢中实耿耿盖君侯所得于徐公云云者无几而果玷除目即上疏恳辞至公交车而为政府阻遣无何南床之白简上矣仆本不能出强之使出今获赋遂初幸也弟生平无声色好今以见诬何异以声色诬师子野颍川丞也始常构一阁奉佛藏旁有水竹桥岛之属名之曰小祇园后增奉道藏而傍畝颇益辟出后家人辈复有所增饰今定名曰弇州园盖取庄子山海经语也君侯津津乎言之且欲击汰南渡乎往者尝以宗正条喝用晦而止第仆且为记记成以寄君侯试读之便若徜徉泉石间矣天柱之登呼吸与帝聪通乃慷慨歌我三章异日获藉手以朝大罗玉京则君侯惠也内乡李先生人便附此适对客不一

又

下走自厌世网见牖灵真业已弃家而不能远今秋复为儿曹一鸣公私见迫勉强应酬始犹染指既而嚼■〈虫葛〉又既而螫牙蹙额矣门下举以为快且复传所云休

粮服气者误也第絶房室来三岁暮饮少许酒荤肉都断以此形神渐相属耳佳篇种种
道上别纸见示若谓不能得仆一言而与贤器蝉嫣不休者有故门下名已就矣齿牙余
羨正须于少年儿郎发之且彼实国器也春草驰情卷强步之不能佳然是春草本色语
所示昭烈像的系宋本非昭烈耳渠鬢秃所以世说有露涿君之谓今美鬢非也且前后
皆增传者二跋尤可笑语既不伦字画临摹蹊迹宛然三册叶差强人意而破碎不堪装
潢独眉山豫章像佳耳题数语当不辱休承已游岱三君子书当如命也公嗜古若渴恨
不此间一游目

答南阳子厚王孙

数千里裹粮命使手书及新诗念存使者将足下意谓十二时中行住坐卧无非见
不佞者使乎有味言之也公天质颖秀神明焕发虽生王家而蹈儒履不染爱乐早探竹
素既负倚马之才不迷亡羊之径故所结撰朗朗郁郁乃尔第闻习制科业甚工误矣使
公能窥洙泗之汇勒成一家书则可不然吾夫子所谓赐也贤乎哉夫我则不暇矣夫天
以日遗足下又不以富贵浊足下何以酬之仆老大摧废一丘一壑雅意所甘今春忽似
得少证于有为之迹悉便放下第不免破例为足下作一诗也如何如何书刻数种附贤
乔梓清览不一

又

徐司寇来拜君侯书词旨竒峭不减胎簪熊耳四诗滔滔与桐栢争流盛哉仆于文
章鸡肋耳何当于足下而猥以八斗见推八斗故是君侯家故事也司寇言足下甚工于
公交车业此又大可念矣陈王正所谓八斗才者也然至欲辞远游戴惠文解朱绂佩青
绶而甚或乞领一队从大司马骠骑之后彼诚不欲用文苑哉一身虽然令后世以方文
烈子丹何霄壤也君侯勗之力致不朽而已仆本不足言跌宕文史聊以自宽不意为世
所知又不意为世所恨于鳞子与平生石交相继雕谢书及令人怆然周象贤作襄阳寓
公婆娑曳裾忧在桂玉如何如何偶便附此不敢致他物拙集唯乔梓共之不一

又

得所寄三七言律寄儿子二五言律他诗五章皆宏丽精切字字不苟虽未脱蹊径
要之武步间耳乐府在家弟所者尚未取览渠云大有当家句儿曹骰子选偶得一卢何
所取足下快而语津津若有味者载翫书辞所云托溷羣狐箸膩颜恰宗条束湿黄髮之
期亦何可必蓋大可悲矣虽然仆窃有以进足下子建求自试愈切而子桓父子愈抑之

即令果领大将军印俘权馘禅亦不过一邓征西王镇军耳宁以千载思王易之然此犹非其至者淨饭诸子姓尽入雪山达摩视第三王子若蚍蜉出世业成万劫长在足下柰何贱此贵彼也因成二律相广勿笑老夫才得出潮便歌公无渡河也往年初答足下诗醉中命笔絶不复记忆最后复成一诗了不知其何似岁杪检拙稿读之乃觉前后相袭如一即为订改今録去于友声集中破数行梓可也友声二字有所自否白水草堂有真人事难措觉诸公亦似不能快仆久于笔研外觅生趣今段似未能忘工拙也一晒

答朱贞吉

闽人王良材来得手教与所致诸石刻博山之类俱领讫昨岁姚生者来能谈豫章朱邸事谓老匡几至忧廷尉有二壮王谋国秉垂成而属之一王孙踈且贫者今得教乃知此王孙为足下伯氏也足下脱屣千乘以让伯氏虽子臧延州之谊亦何足多然足下乃须幻影庵诗夫一庵容膝犹谓幻影雕薨寶楯谁匪蓬荜即二子亦非伦当是悉达达摩上足耳仆即拟捉笔作一歌恐类神秀偈流汗怵忽不遽成语今先如委草像贄染来笺上之倘欲登石改小行令舍弟书之可也姚生又云用晦丹已成知仙道非远而足下印章乃穨有家僧当由莲台玉京避妨坐位故耳仆比纵横二藏中异日往来足下用晦间何异屈伸臂项今犹困世法不免津梁如何如何王生淳实君子人已援明卿例以二絶句与之念彼伎俩何以终老可悯可悯偶有一帖乃是弘治间丹阳孙氏刻太清楼迹附供临池之玩不一

又

昨岁从用晦所使人尽得洪都诸贤书独不得足下书以为怪寻闻足下不欲穨附庸而以大国之赋来固日望之也乃鲤緘手书与蠶丝之妙辞煜然照我茅茨矣诸诗五言极古雅有建安风歌行警丽竒峭近体亦自铮铮中间用字落字触眼不凡何幸朱邸中见白眉如二三君子也损饷诸品多清闕阁物身非何胤何以濫竟陵之贄家弟每书来輒诵高雅不已与曩时张复合果如来教偕用晦方舟弇山丘壑足以藏竹笈也恐终虞避宗正条则为貌兹园以寄君侯斋壁借抚琴动操之资何如扇头恶诗小报来美并有薄物将臆唯鉴存不备

又

十月淨居时忽有陆山人持公一纸读之乃知薄游楚泽踰秣陵小憇金焦将访我恬澹观以西河之戚而返令人怅仰无已岂东海之濱未合有真人迹耶每念陈思王黄

初五年令有举翻触四隅之悲赵大年丹青殊絕而所貌不过京陵间五百里山水为千古缺陷世界公贤于二君子多矣弟未知锦囊中三絕可推惠一二否仆名为弃家而不能断乡里应酬与雕虫凤障明年必须痛割之所余久要一念因姚匡叔便附点清览外山园诸记非以其文辞或足当公卧游耳加食自爱

又

足下文采风流照映江右能使朱弦振响丛桂增色一旦袭蝉冕谢清从策卢敖之杖追尚平之屐又获与伯玉授简本宁方舟吾家兄弟从歌白云之謠唯冀足下与本宁留一诗刻名琬琰后三千年作弇山故事耳见委一序二诗并草书一一如命但署字无大笔猥弱不成观足下自书之留仆名可也见宗良用晦幸为致声尤望挽章薄爵托姚匡叔致之余德甫之贺诗托匡叔奠章托邦相不知后先得达否万里之外以身为本自爱

又

姚匡叔来得足下八行以为慰足下即不复远游匡庐彭蠡间轻舸小犂当不乏也仆慕道而未有指授畏笔研如鹺而未能尽郟知酒之害生而时一中之儿子辈失意于真我无涉而不能尽置之度外何老人之多拗也匡叔道返草次附报自爱自爱

答云僊老人

昨朱师人便草草数行为报计已彻览矣屈指翁今年政得八十又六而姚匡叔来则亟称其黔鬢朱颜健步履美饮嗽神明之用即四十许人所不如坐定出翁所授书读之则拳拳见悯以仆向衰之年必不能于身中觅先天一点且引正阳翁所指人身七事无不属阴为证嗟乎翁之欲拯我可谓切矣先师见示一偈有来一是天尊语来一之一初亦类翁指及叩之则云不必外求而黄白男女又八戒所明示且南宗白虎弦气注诘多自矛盾而近所传金丹四百字亦似止以身中觅鹄与北宗合故于来美未尽荐耳公果有意辱收为弟子拈指要诀着为法语附之邮筒仆即不能遽奉行必不敢慢亦不敢泄也一二年后师期果不蚀小有所得当毋吝于翁如其杳然则虽间关万里负笈执贄有所不辞仆不妄语人也匡叔复出翁大作数种往往窥天心透月胁蒙未得尽倾畧但惊其古雅神丽五言絕似真诰遗响而七言则悟真之上乘也朱烏拜賜第不能化双鳧以从栖八桂如何不腆之辞聊见仰止并刻佛经山记土幌侑械唯为道自爱

又

三岁间两拜书及诗何翁见为之切如此也张给事书后发乃先至姚匡叔书最先发最后至然匡叔所传翁密信则拜海深矣男女之术先师所戒第戒者交接耳若服饵之方翁实证得不在列也仆自甲申仲春接先师飞偈二百言责仆心境不淨且缓传道之期欲使自悟恐衰年未能待语及此神魂惛然倘翁授以秘诀苟固色身以俟师期异日仆有微验亦不敢自爱也匡叔行便附此不一

省亭

姚匡叔来承手教副以雅贶甚感甚感仆比再玷朝命疏辞弗克咸谓先子近荷恩恤不容更复偃蹇勉尔涂抹辈流既少形影自怜近更得亡弟耗几至陨絶旦夕寻初服矣匡叔欲更作友雅堂一诗以续余茧殊为蛇足勉尔塞白殊不能佳又薄侑将意乞照纳荷荷

臬州续稿卷一百七十二

●钦定四库全书

臬州续稿卷一百七十三

（明）王世贞 撰

○文部

△书牋

上昙阳大师

窃念弟子世贞三生浊品半世行尸出没爱河浮沉苦海衰相已现顽冥自如伏承我圣祖弘开玉毫之光我仙师曲赐金篦之导故得皈依大化抖擞凡尘割欲辞荣弃家入静所苦宿障犹重钝根少通虽我仙师微示跃如之机而弟子尚苦弥高之叹间于金丹正理一书窃窥一二以为此道不假外求但未究玄牝何方铅汞所在又不知谁为真土谁为火候闲习静坐以待来期而渐近顽空通无着落稍不散乱便属昏沈因守师龛

不能远入深山公私应酬时见侵迫儿女痲痒亦稍牵怀昨年豚子侥幸及尊父元驭家难出外支持因而感病又不能蚤断笔研苦役形神岁杪春初羸尪几殆今虽渐尔复故正恐真元内索版筑何施一逼大期遂孤深托又见尊父衰毁隩当疾疾洵加百忧频仍一骨憔悴加以时望转重物情争趋第恐服除之后举家怱怱不获坚守初盟前疾愈深刹那不保不唯彼有堕落之讐而弟子亦负颠危之累今距我仙师化期已正三载为此竭诚衔苦恳告弟子残冬三月粗了各处文责于甲申正月初一日誓不领诺其家累大小悉从舍置惟日禅坐经行逍遥恬澹一俟仙师指引不论远迩束身便行所望少分刀圭之余以固此蒲柳之质庶几不妨跋涉且便持循尊父狼狽至此知我师必垂哀悯仍望特惠灵丹授以法旨解其疲惫豁彼沈迷弟子苟有退悔誓缟皎然万死莫赎不胜哀祈迫切之至为此具申伏惟尊慈鉴察

答存翁相公

伏蒙惠示金刚经谨即安顿佛前朝夕捧诵又辱前谕谓与孙曾远别不觉凄然此从慈爱中来非牵欲比亦须以空蕴胜之一切洗尽如不能遽尔势须将顺亦勿令扰内境勿令容住心乃佳耳初地学人遽于大宗门弄舌恐不免吃杖五台久不相闻想只在有为迹中驱驰便间幸微风之

又

新正伏惟神明起居万豫胜常下走自闭关来仅能修焚诵业裁酒食味体中宿痲稍稍除减而已无明夙习如败叶旋扫旋积无能为力唯翁大淨名长者有以诲之承示徐宗伯之简所谓此一时耳下走千疮百孔人也且又落魄不能事边幅虽使自抡择亦不免驳放何敢强辞无盐唐突西子所不自意者既见爱于我翁而又见知于仙师俱叹之骊黄之外虽然我翁之见爱尚期以应世而仙师之见知则许以度世度世事大岂凡骨所堪正恐世弃之物终不能无负翁意耳与绳司空仲春过锦里此是一良晤但下走不敢一日离观若翁开八袞天子之贺使来却当冒禁请假超侍左右或得邂逅与绳也余不具

与申相公

世贞业自废来谬唯口吻余生寄迹方外不敢轻以寒暄无益之语上渎尊重而门下惓惓为桑梓軫恤荒痲至情则数于同乡搢绅中与闻之獎与玄修齿及不肖则又于荆石公书窃睹之矣然而竟不能具咫尺之书申谢盖懒散之癖已成唯弘度不屑屑也

言者以先师传为咎此虽草自荆石公而实成于不肖乃蒙相公曲垂宏护苟免大僇第微闻有继之者向某于荆石公谋撰传初意实为乡井狂愚之辈毁誉万端涛张百出欲以先师言行之正格之而见闻所得微涉张皇然不敢有一字增餽也首祸自世贞即流窜幽囚皆所甘心独念先师以名家女节烈志行可贯日月大道夙就仙班首列而不能免汗蔑二亩之宫以奉上真七尺之龕以安遗魄而不能保岁月此则所为痛心疾首而不容于喋喋者也伏惟相公为大弘护大檀越福德宁复有既耶负罪之人词旨阔踈统祈台亮诸容专候起居并布感私不宣

又

昨岁春杪伏蒙相公不鄙赐以大诲曾未何时而晋登元辅上沃一人下揽百揆虚已延纳弘度包容使作行之地欣欣效职进言之路坦然荡平中间委曲调剂于国体物情之际真有良工苦心未易以形容者间与荆石宗伯先生言之唯有加额称叹而已世贞生平蹶??动与毁会废弃以来病树伤禽蚓食蝉饮无复世念不意相公赐悯洗其瑕垢俾仍故物感激之余亦拟鞭策弩钝以报圣君贤相之恩于万一而昨春卧病绵歷三时今虽强尔称人齿髮堕尽羸瘵未复深唯凿坏之故相公亦素知者乞骸小疏区区至情非有毫髮矫餽相公以天下为度必不忍一夫失所少存乡曲之私亦必不夺匹夫之志第令所司覆允放归草野余生一饮一息皆大造也下情无任恳切之至仰祈台亮万荷

又

春中伏惟燮理功成道体与宗社苍生俱万福世贞不材辱在陶铸两月之间再点除目国恩深矣相公之念旧怜才至矣惟是世贞所以不能出与不堪出之故大约具前启中乃至入春以前旧痼复发衰相尽现仅余两齿亦复摇动行不数步輒觉疲繭此前启所未悉也小疏再上万不获已唯冀悯而放之虽罢斥所甘若荆石宗伯年在服政且国是所憑与世贞万万不同必不至相援为岩穴故事也下情无任迫切待命之至

又

世贞避喧深落与鹿豕邻而贤器长公俨然辱临之执礼恭修辞雅启械而腠露发篋而币见则相公下体之爱温温恳恳真若春籟之吹物而大指乃令草建言公祠记夫以言公之文学其在圣门固自翹然而相公方秉颜闵之德佐中兴圣主骏骏远出其上顾以乡党先进之故特捐赐金大启祠而祀之末学小子覩兹盛事宁不欲附姓名于后

以借不朽第相公言语妙天下方为艺苑所矜式而故自惜其如椽之笔委而授之衰病荒落自外名教之人窃恐耳观者从而议其后也忆四岁前有以斲宅学宫为丙舍以祀言公者曾索不佞一诗后始解其矫诬市名而悔之乃闻一二大老亦几为所惑人无所不至唯天不容伪信然哉荆石先生感圣主之隆眷与相公之深知谊无可容辞者特为仲氏病■〈谷丸〉而太夫人恋恋故次且欲于途次上第三疏耳今仲氏病良已太夫人已成行亡复他矣区区感激情事有小启亦于荆石先生处奉上今不敢赘大币自长者礼不敢辞而草莽之臣当此隆施且以千金而享敝帚分又所不敢领也伏惟台慈见亮不宣

又

春来伏惟台候万福世贞古所谓歷落崎嶇人也少不能修乡曲之誉杯棬而出又不能事言路委顿而归归又不能奉名教而迹于方之外窃自意不可复雕琢而相公收之爨余置之席末优以卿佐之秩使不惭于乡里而复曲全匹夫之志使无恨于丘壑啜粟饮浆衍衍毕岁经行默坐栖息得所秋毫皆吾君与相公之赐也避喧遯野同于聋瞽然时时与荆石先生相习因得预闻朝事一二日且窃窥相公良工苦心之畧盖自楚晋更霸俱握牛耳其甚者径行而亡所忌既凿九阍之混沌使疑其有问鼎心而揆地不自安继则用巧以求必伸太阿之柄倒持而授左珣之手而揆地不易树加以后进少年轻銳持论涛张翕歛诡譎万状自非相公积诚以格之沈几以待之如调弦之有缓急如剂味之有凉暖其不酿元和之党錡与太和之朋党几希矣迹者主上悉屏耳目之好事取寬大如召太原録諫臣止内操天下方欢忻鼓舞以颂圣德而所谓良工苦心者至是而始显斲轮之妙即轻銳持论诸少年亦不能不心服也今国是已定宫府肃穆惟宗庙社稷之灵三后協心同底于道毋使奸人得乘间而起以耗我国家元气世贞老死称太平之民不亦大幸哉荆石先生非不欲报国恩酬知己特以太夫人之故牵滯于手足虽北首犹未决也不腆之币并布区区伏惟照亮不宣

又

岁杪寒沍伏惟相公调燮多豫台候万福野人不能知天下大计惟于邸报中覩圣主神明之畧惠鲜之政以为相公匡翊赞襄之力居多而间从荆石相公所得一二则中间斡旋转移良工苦心有非笔札口舌之所能述者又相公与二相军门肃清无暮夜之可却故乡寂寂不识有大官人居第舍人子出入布素无异单窶此则繇来名世之所希邁者也世贞藉台庇获保丘壑为太平黔首于分已逾虽以先人身后之事见抑于忌者日夜腐心如线不絶口之机犹可乘时以希万一然且次且局躄陈情之牒漫灭者至再

而不敢上诚惧桑梓之暖上累太阳之公照耳今者微闻按臣会巡抚以条陈之款请于事体稍妥倘命所司得赐举行不唯逝者可以瞑目而生者亦当没齿衔结之感皎然天日向草鄙牒似不敢复尘尊览但彼疏既属条陈势必简畧恐于该部前所以见尼与候议之故先人辽左微续俱未之详故敢冒昧以闻应否具疏一唯台裁指撝不敢专也下情无任恳迫惶悚之至

又

迺者先人蒙圣天子厚恩赐两祭全葬及崇赠夏官之长已于九月十九日守臣奉纶音抵墓所行礼讫兆域增辉草木奋色九泉有知宁不衔感而况于生者窃惟嘉靖之季先人颇効微劳奔命南北十有余年而以不能曲事权幸之故鼓簸簧舌回互天听一扞文罔衔冤覆盆盖十年而始遇先帝鼎革之初不肖乃敢上章陈情羣贤在朝公议稍振获返名位而河南之重与乡袞构虢者齧及兹事致宗伯之听遽移三台之荐遂格嗣后苦于河南之修虢荆楚之刻深蒲坂之移伎不肖强颜在位则惭见吏人窜迹归里则痛瞻宰木有臆无口破涕为笑庶几苟保余生复覩天日而直指二使推相公桑梓之暎以疏具荐若非相公力主于上荆翁斡旋其间则河南之旧论横流蒲坂之遗指默炽而先人恻恻复成戊辰故事矣是先人之一身前相委骨之而相公始肉之也不肖兄弟之得为人得为人子亦相公畀之也今夫主上之恩天地也而相公之恩日月也凡在临照孰匪生成然而不敢以一犊一?称报者其分悬也故于主上则具疏而已于相公则具启而已且相公素丝之风久着暮夜之知并絶岂敢冒昧以寸丝尺缕渎严重哉唯是区区赤忱小欲摅吐而拙讷不文不足以玷记室幸鉴而亮之无任铭刻悚踊之至

又

不肖世贞等窃闻之墓碑之兴昉自东汉大要皆子孙门故所以用情于逝者不忍遽朽其白骨而曲为之计然数千年以来不能尽值其时与人中卿柳州未登于峻位任温燕许犹忝于体裁乃至人伦之鉴即诸君及德輿介甫辈尚愧折衷稍能备是者独韩退之欧阳永叔二三君子其人而已得其人而身值之者则又甚鲜也以先人之冤与世贞等之不肖不幸而罟网于分宜又不幸而覆盆于新郑然犹幸而值今天子之圣明相公与荆石相公之仁喆得以伸雪沈懋上沐恩纶没存之宠光与衔结之感痛具于前启者固非名言之所能罄述乃犹有深幸者所谓值其时与人也夫以相公之贞心宏度岂下丙房裴韩而贵极一人之亚文擅千载之衡不啻今之退之永叔也任温燕许无足言矣而不肖等辱在桑梓之末又辱以笔研见许步趋又辱悉先人之生平而扶翊之以有今日则所以荣施枯骨使千百世之后尚知有先人者非相公其谁也己巳之冬先人

粗复名位归魄窀穸故相李文定公志铭其幽矣十八年濯隧道之壤而趑趄缩朒不敢请辞而登丽牲之石诚有待也今以向者所草行状及文定公志铭录呈记室唯冀相公哀怜之特赐挥洒勒之坚珉以示永永先人乃终不朽不肖等死且不朽无任恳切俟命之至

申许二相公

伏惟储宫协吉皇情大豫我相公创定之勋加禄荫爵俱未足以酬十一第仰窥眷倚之特重益谗调燮之枢机而迩来事体纷纭宫府微迁此时相公一段苦心有未易言者是以不敢为门下贺也区区衰劣乞休杜门俟命岂敢与外事第僚长阴司马一旦奄忽旅榭遗孤间关万里所有身后恤典无为奏请者不揣与新僚长计为具题此君详慎温平而中实耿介通籍三十三年歷官一十九政公私之纖譴不及声实之大较俱深倘于应得赠官之外更予易名庶可以酬塞贤劳砥砺士行不才樗栎衰薄得赐一丘以安归骨则相公之大惠也无任悚仄之至余不敢赘闻

上申许二相太宰同

谨启世贞朴簌小材行谊无所比数且年虽未至笃老而蒲柳之质望秋先零十年之间托迹物外蜗庐自濡无复世念久矣昨岁先人蒙赐祭墓赠官夏卿于地下之荣已极而不肖世贞复起自田里佐枢留都窃念主上生成之恩与相公知己之谊既不忍负而遽此清时岂不欲乘际而出追迹夔龙之后以沾沐恩光少竭狗马之诚以仰图补报而病与衰会力不心从至閏六月终复得亡弟太常少卿世懋之讣念先人遗气唯此子形影相从肝腑两附一旦失之神魄沮丧志意昏忘遂为暑毒所凌脾疾积时汤药罔疗随欲具疏乞休而复值僚长之变所遗部事乏人署管勉强扶病支持今病转深而吴司马亦已抵任矣陈情小疏实系恳切真至固不敢以迟暮偷安亦不敢以謏劣自阻区区一念实欲乘此未死之日归治亡者窀穸筑室先塋苟就医药不至貽描写之资未甚乖初服之愿足矣门下始而造之幸终就之则生死衔结之感乞归后尚当专人恳领所许先传碑兹未敢溷渎尊严下情无任悚仄待命之至

又

迩者颛驰小启敬布先人泉下之感并恳渎椽笔为千载不朽计盖去人甫半道而有留都副枢之推下情无任慚悚区区樗栎下才久不齿于月旦故舍而甘心乎方之外懒惰无成踟躅非据不自意真宰怜而拂拭之念其资歷颇深故优以右职体其筋力不

任故置之南曹自惟奉令承教可幸无罪且先人既被隆锡贱子复辱深知岂敢以退为高偃蹇朝命唯是蒲柳之质望秋先零伐牧之余去爨何几即不自量龟勉而出旷废随之小则虞生耳之车大则成覆途之辙似非相公所以曲全而终惠之也陈情小疏情非不得已台垣清峻不敢尽露其私荆石相公则悉之矣万惟垂亮获遂微愿其为衔结当何如耶时届冬寒唯为道为宗社苍生自爱不宣

又

春来伏惟台候万福世贞么么赖真宰陶铸特回先人幽日之光申以如天之赐诏墨未干除书游及起自岩穴俾厕庙廊谊无可辞恩不忍负暨小疏未允不免于本月初一日朔履部任得以窃窥高帝宗社之宏謩六代江山之遗胜职事稍简懒拙粗安虽负香火之私盟未削觚棱之夙守惟是三吴鱼腹之余尽是鹄形之葶委顿枕籍盗窃纵横中户以上迫若倒悬虽蒙涓滴之恩未息催输之苦留都差号小収然军民繁伙米价腾踊四城之内日报死者羣公亦谋所以赈恤之及以漕卒退运给粮上请想在軫念又闻汴洛齐鲁之间灾伤尤甚相公上代元首之忧下恻黔黎之困固无俟于喋喋也履任疏役便聊此奉候兴居诸惟台亮不宣

弇州续稿卷一百七十三

●钦定四库全书

弇州续稿卷一百七十四

（明）王世贞 撰

○文部

△书牋

与许相公

世贞于甲戌岁奉台范燕中再辱教颺远及外镇辛巳以流言株累小启上渎过蒙体亮海存自是相公晋领青宫入参黄阁天下之士毋论识不识咸以富文忠司马文正奉拟加额称庆而素辱知爱如贞者乃不获通咫尺之问则以久放草野自外名教而不

才名氏误齿启事之末不无踪迹为嫌然至于私心何尝一日废景仰也迺者圣明求旧岩穴彙征而除目滥及清时盛际大贤当涂宁不思自雕铄以希一割之用特以衰病连绵精血耗损迂踈无补蹠??多玷且向时所以凿坏之故有不能逃于洞察者乞骸小疏实出由衷惟冀台慈亮允世贞得以保此丘壑苟完迟暮皆大惠也下情无任恳切待命之至

又

伏谏荣膺册命晋陟中台宠渥日蕃眷注弥笃惟是西河之戚少为庆门之累第是世界小小缺陷处计不以一哀而废万几之重也今圣德日新国是渐定中外欣欣跂望至治我相公与一二大老正己御物侃侃国是人皆知之而中间斡旋调剂之妙良工苦心固有未易以形容测识者世贞向蒙相公悯其衰拙赐保丘壑惟是麋鹿之迹不敢上渎夔龙之听而间者曾于吴明卿参政集序中谬承齿及深山之石被以华袞被者顽悍不自知观者当以为何如其荣也兹有鄙愚先人于穆庙初蒙恩昭雪复职抚按学使继以恤典为请一时礼官惑于浮言勒令候议贞虽日夜腐心切骨而不敢上陈情之疏者始则避操切用事之臣继而畏桑梓借暎之地故也近乃微闻按臣与抚使会上三吴利便置之条陈款中于事体稍妥乞垂矜悯赐舆所司举行覆盆覩天起骨加肉衔结之感均于生死向草鄙牒似不敢复尘尊览彼疏既属条陈势必简畧恐于该部前所以见尼与候议之故先人辽左微续俱未之详故敢冒昧以闻若应否具疏一唯台裁指撝不敢专也下情无任恳迫惶悚之至

又

不肖世贞等窃闻之世人所欲伸其不忍于亲者计无所复之则欲求所谓贤贵而有文辞者论次其行事以传之不朽当左马之世天下未知有志铭家传之属其所撰着惇史盖以自伸其见闻而付之公议东京而后以逮六季始间有之至于今而极矣然往往走京攀托崇显以苟眩一时之耳目而其人未必皆文即文矣而未必皆贤而称惇史此固不足道即有志于贤且文矣而世未必生左马次亦韩欧则为人子者之不遇也左马之世未有志铭家传固无论至韩欧握结撰之柄以临一时而所应未必皆贤则宰文者之不尽遇也先人固不敢遽谓贤然于赤心奉国宦业乡行粗亦信于识者既已辱相公之知而拔之覆盆之下获沾华袞之褒可以长瞑九原矣唯是区区无己之念所欲为不朽计者不能无渎于下执事相公今之韩欧也几希乎左马矣而又佐明天子称良宰辅与两公同心而致格心之学丙魏姚宋固未敢望相公也而不肖等又托乡井之末而承齿牙之流羨非一日矣相公固不藉先人以为宰文之遇而先人与不肖兄弟其遇当

何如哉敢露旧草行实与太师李文定公志铭奉览而希一传以勒之坚珉先人乃终不朽不肖等死且不朽

与余相公

伏自相公登上第入史馆世贞窃以服膺大名矣而麋鹿之迹多在草野中间虽一玷朝行则值辍讲在告不获趋承下风然至于宏廓之度冲夷之襟足以超崧高吞云梦者未尝不于荆石宗伯处耳之也伏自登庸之际属多鼎革而相公与一二元老上弼圣德下厘庶政挽回士风收采物望盖班班在耳目无论一夫一妇当此青阳布令之际奋然欲见其光彩而况如世贞者得称为人久困吏议甘心覆盆自远回照一旦辱相公铲雪其瑕垢而用之何忍矻矻以朽株自待第一病三时强起药物齿髮堕尽智力昏聩所谓少也尚不如人老而精已销亡如田光烛武殆又甚矣且庚辰凿坏之故有不能逃于洞察者乞骸疏上惟冀早赐裁允为黄冠遗老不玷清朝诸贤其拜大赐宁有既耶干渎尊严仰祈台慈鉴宥不备

又与余许二相公

季春伏惟神明起居台祉万福世贞朴簌小材耳相公拔之毁废之中再迁卿贰固大臣休休之度然所以为世贞者亦过矣不揣凿坏一念具于前启不谓微诚未蒙见亮趣令赴职身非木石亦思少効犬马庶几可以上狗恩知而前病骤发渐至狼狈度非朝夕可愈若复偃蹇朝命不唯有乖臣子之节将必坐贻简书之谴唯冀俯赐鉴亮遂乞骸之请区区自顶至踵皆恩造也

与杨太宰

仲春月朔驰一介具乞骸之疏窃以微情恳渎台听嗣是复污除目而赍札赍咨两使之来俱辱我翁手书以世贞之不材灰烬余日岂有生趣而我翁曲赐培植既还九列寻佐六曹乃至再枉尊重以尺一先施于草茅中间譬指樊籝倦倦骨肉之爱即某生不能报国恩其于门墙知己亦何敢负第以病骨日成衰相内现庚辰凿坏心盟有不可负者追惟畴曩蹻蹻之迹尚在人口踈脱之辞多触时讳自得罪言路之后匿影物外姓名不能相通圣主威断非常即有处分不由拟议恐一旦为门下药笼之玷其悔吝当何如耶嵒嵒司马虽以翁指见示然为世贞朋友谊切其意亦犹尔今疏辞已无言不得不称疾剧唯我翁悯而赐覆得以余生饱暖圣泽秋毫皆翁赐也感恩狗知之余惟有寸悃辞不能文惶悚无地不宣

又

自我翁之再出则中外耸然想见风采如司马文正之入汴而统均之命下亡论搢绅衿裾加额相庆以为清明之治可旦夕望而半岁以来羔羊之节皦皦朝着而苞苴远却于数千里之外贤者功用神速固如此第征辟之命轮鞅交驰岩穴之儒茅茹彙征而猥及不肖如世贞者岂我翁笃念故旧不胜遗簪敝履之思而少屈藻镜耶世贞虽愚亦窃晓兹时为千载之一苟可少策弩钝以自显见颖末追雪曩耻而蒲柳易衰樗栎垂腐岂唯田光之精已销亡而卢蒲嬖之心亦向短矣且生平多口语又不能事边幅以得罪言路废弃以来窃希涂泥之龟而避就祀之牺已非一日矣语云畏首畏尾所余无几贞虽出其能无首尾畏也至于庚辰凿坏之故又有言所不能尽者乞骸一疏实出由衷万万无贰伏惟我翁矜而赐允焉贞得为唐虞之民以观元首股肱之盛诚大幸也下情无任祈恳待命之至

又

昨为舍弟懋賚凭人来拜我翁大海随有数行奉复不意其尚未達也荆石先生上疏人归复拜大海惓惓有加且辱询及昨春大疏下走方掩耳时事不敢臆说但鄙意窃谓江陵罪诚有之然大要始于激成于满而左右前后无一正人以为之夹持故至此耳诸少年纵欲极意快复不过交结二字可以一网尽而何忍以覆载间必无之事书生所必不敢萌之念而加之凿混沌窍败股肱体乃尔盖尝与荆石先生言之亦深以为然春寒尚峭惟为道为苍生自爱

又

自太原公北上曾附一空棹及桃花岭一歌塞白嗣后不敢以寒暄无益之辞轻渎清严惟是明公秉铨以来开诚布公虚己听善不以毫髮成心与之不以矫强为峻而苞苴逆絶于数千里之外觉翁家太尉尚犹有暮夜之知为烦也贞之先人以勋劳见忌谗者遂陷吏网盖八年而始为隆庆之丁卯伏阙一疏仅仅复官三台交章恣恣见抑自是又十有八年而为万厯丁亥贞萍梗之迹虽时有蹶起而此心摧哽未尝一日而寬愧心之惨亦未尝一日而忘覆盆之照也会事与时左即欲矫首自鸣其道无繇不意抚按两君合辞奏请褒恤事下宗伯覆上得赐祭墓兹时贞固不肖岂无望蜀之念特为天泽不可重干礼官不可复强故仅以故事为先慈恳沾俎豆之末惠而太原公见悯于疏草稍加润色得移贵部明公上广圣恩下采物议念先人汗马之劳矜不肖乌乌之私慨为题

覆蒙恩遂长夏官命下之日乡里自父老以至儿童靡不称庆丘垄自宰木以及丙舍靡不生色逝者存者嘘枯肉骨思効衔结于世世既而自惟明公之为德深矣然必不责讎于细微而贞以不与知之故虽例有所谓具揭者亦无由先期而叩车门以投之下吏是何明公之含弘光大而贞之偃蹇无状也愧感之极辞不能宣惟明公亮之

又

迹者先君子荷翁提翊得沾崇赠破幽为显起骨加肉区区不胜衔结之感故走一介于恭谢疏便少布下诚寻去人甫中道而贱名忽玷山公之启以有南副枢之命盖向者于覆疏四语已叨翁过情之褒而昨会袁裕老具述翁见评八字则更使人慚悚不敢当若乃夏官优峻留务稀简翁之所以曲体不肖者至矣礼称君子行不俟驾东西南北唯上所使分也而况上之所以待先君子若此即使鞠躬尽瘁毕命王室尚不足以称酬恩狗知之万一岂敢偃蹇明诏以退为高但惟此身少多戕贼衰在老先癖与疲会即使龟勉供事隳废因之必酝人言纵复优游伴食苟免简书中衔鬼责然则贞之一出不唯以其报恩者负恩而我翁之知不肖亦无异于不知不肖也乞骸一疏情非得已唯冀见亮放归以保余生铭刻不朽裕老体亦清强意无固必特以拜起不便势须扶掖乃有此请或稍缓当自力也余不敢赘

又

贞以么么上荷陶镕既申先人邦政之崇阶寻寄贱子留枢之上佐小疏辞避复荷勉留捧诵报书二语与前袁裕老所云得之评隲者字字无异虽万万不敢当此过情之褒而我翁所以许与不佞者盖出肺腑矣国恩不敢忘知己不敢负已于本月朔日履任讷觉八座之典刑尚肃庶僚之检饬差存六师之演练不废不佞可藉以竽滥苟安但三吴鱼腹遗民半菽不继弱者沟壑强者桴鼓中产以下悉困征输借贷售鬻苦于无主此不佞所亲覩而复亲尝者闻长淮以北秦齐并豫之墟灾更甚之不佞窃谓目前之小民可悯将来之大计可虑我翁方履统均之任切痼瘵之恤何以豫之见五台司寇称服盛德有味其言今沧汇复副司空四十二年同榜之契复可追寻于三山二水间翁必为之南顾而抚膺也赍疏人便聊此奉候兴居并伸下悃不宣

又

恭谏天省六年春官一品在我翁平章之续报若已迟而圣主眷毗之深施则惟重同年三百自三相公外统百官者唯翁一人登三台者亦唯翁一人而已世贞不能悉远

事独忆王端毅公秉揆之日即拜太保正与我翁同岁此公以直声振天下而至休休有容之度蹇蹇匪躬之节我翁似不多让迩来扶翊国体培植士类不取上指务当众心则非世贞一人之私言实中外搢绅之公仰兹因疏役之便聊申候忱非敢云贺伏惟鉴纳不宣

又

谨启世贞不识时宜建白迂缓仰仗裁酌又以衰病且恋恋骨肉之私遽尔乞休上负门下造就大恩不胜惭悚唯冀哀怜而放之归守先人之垄作一太平长物足矣敝僚之长阴月溪公隆万间一纯臣也歴官一十九政无公私毫髮之撻其劳勩独多行业无损一子奔丧间关万里本部代为题请赠谥唯我翁念之得蚤赐优覆万幸乞骸之人杜门待命岂敢他及特以僚案谊分临没之托有所不容已于懷耳无任惶恐之至余不敢瀆

董宗伯

长君来拜领盈筐大贶捧读教札累数百言至扇端见赠长篇并枉访返棹一律题山园二律格调高爽辞旨雄丽无论远逼开元而饰獎逾情使苏壤弃余均荐兰蕙昔任彦升不惜齿牙余芬借引后进昌黎题长吉壁欲骤令得名操觚之士以为美谈贞之薄劣乃兼得之忭喜狂发不知所裁第留尹之补非繇时私乃是夺我丘壑就彼樊羈耳方以心迹未白上疏控辞倘不得请恐竟成狼狽日夜忧之计无所出而猥蒙赐贺固我老伯通家丈人至谊非衰劣所敢承也长君枉驾时适有州大夫会次辰以先忌东归踟躕丙舍虽一获参承遂缺杯酒之敬怒如调饥不揣奉酬排律一和返驾小律一自愧续貂不能掩帚唯有以教削之为幸名园大厦神仙官府迫于私冗未获展拯衣之诚无繇窃窥其盛数也如何不腆仪币幸毋麾斥为慰

又

世贞不自量其骯馊琐尾妄欲偷安此身方外入園以来于生平知旧一切简弛乃至通家尊宿肺腑所切如我老伯者亦仅一私淑起居于元馭学士不能弛阿段修竿尺而贤器长兄则俨然以笈教币贶捧诵之余既跃然喜且慙然愧心也道体健胜造物所笃视履饮啖剧谈久坐神明怱溢足以暎带少年数辈而来示忽复有疲羸之叹岂沈昭畧所云清虚日来滓秽日去耶向者获奉几杖山园诸亭馆泉石之胜便是欲界仙都小有洞天然此犹作外境观今谓更创别馆遶以流泉深居兀坐拟迹头陀倚榻长吟饰巾

待尽夫此饰巾待尽即是不作寿者相上德无为而无以为无生至理要从此关研出虚极静笃先天白露惟我老伯恒存之而已世贞虽示却家累尚以家故旅谒公府而于长公处不能一伸杯勺之敬能无为达者所笑新岁拟颺启通候先此附谢伏惟鉴亮不悉

又

迺审贤器大行公以使事南归令孙祠部兄将以起色北首而我老伯方膺难老之锡优游于上岂惟天伦之盛际抑亦人文之极观也冬初见医士盛生道老伯微为骨鲠所苦因而咽中气壅颇碍食饮凡六日而解今得大教果然盖外来与内召其病形虽同病去即复固不可同日语也所喻静中为杂念所扰不能绵绵若存此是多劫夙障受生本根加以居平耳目缘染岂能一切断尽唯在求所以胜之令其有起辄觉熟则渐息耳贞所谓病人说病方当不满和缓一笑也九月间常德喻君见过其所遭乃地仙薛翁于衡山中授法颇极简易然行之者十不五得贞幸而三日得之一月间周身殆徧亦自快畅第以家弟聚首人事旁午米汁缘诱墨卿见陵十寒之暴渐尔不酬今季方已远尚平粗毕昆虫闭关此其时也刘生所受似的但不知为老伯尽述否大覲过渥非謏劣所胜又惧不恭勉尔拜嘉欲有薄效山童近益蠢弱无可使者附之上介轻简之罪唯大雅宏度见亮于形迹之外耳手冻代笔并希原宥不宣

姜司寇

新岁懒病相藉而坐乡居远不免入城与市器接笔研遂复尘日来稍有意以糠粃引珠玉始寓目大集一二则伯玉丈所谓论道者十三经世者十七尽之矣第窃于感慨引义雄强劲直之表觉得有一种肫肫其仁处惜茅塞之久不能为翁描写出以此负翁耳翁望崇而实茂体用皆道今北台南铨两席俱虚宁不以一相借耶天下事尚可为翁尚可任天下物外之境贞幸分一曲所恨内境未尽涤去时不得櫛柄耳偶有客徃洪中敬以翁指闻伯玉丈得教想无所异春秋事义翁心神所注夫子而在不悲获麟当从容读之草草奉复不次

又

前使甫以报书去而传邸报者天子鉴门下之恳诚而予之告然后命固谆谆矣寻陈道易至出手书及大币所以慰藉不佞者良至既乃欲使之効一言于王父尚书公之墓石又使之献其敝帚于行卷夫不佞胡能为世德重秋蝉之吟虽不能尽废然自入靖来都忘工拙久矣如何予告一歌固出鄙悰况重之以尊命第结语蒲轮之望当不满翁

抚掌又似非野人本色翁试观之此经纶手何可终老商颜断芝■〈属 卩〉术也且必皋契在位而后草莽得伸箕颖之操仆实望翁光辅清朝以收治郡功名区区凿坏庶可长保耳道易传尊示似欲见询葛尧缘先师虽有所许而实未有所授不过木食草衣旦夕焚诵冀消宿慳以俟期至耳而应酬未能尽割又颇受责笔研春来一病几至狼狈此其效也翁但读净名金刚圆觉三经参以宗门老宿心要然后证之黄庭道德参同悟真下手自易为佛为仙同一关捩子也二笋华丝俱不敢领谨拜西颺以见至情道易得翁将来埋骨有所其感当何如耶外薄物侑械不一不一

陆与绳

承见许鄙辞出献吉上弟何敢望献吉比之时人或小有致耳至所谓持论间诡邹鲁不佞诚有之生平只于皮髮上窥一二譬之行脚僧从讲师坐下拾残语既不晓求得辄书之又不晓割爱自今当洗心以受针砭矣别论云云深纫肺腑至爱华亭公所论固是但弟颇知求退之涉干进陈辩之来多口以故付之默默至于心迹在覆盆有不能自白者不能不頼生平故人耳虞仲翔云天下有一人知我者死不恨今有吾丈又有肖甫及石拱辰足死矣亦何必扬廷而后谓之白也肖甫甫拜中山节即有太夫人之讣委顿扶服踰山越江甚为虑之功名小事耳大计见方面报似能惜才后先两漕忽留忽动亦见作用处日会黄羽渊及晓上人谆谆致尊意以节饮为属便欲覆盆毁爵而为弇州园梅花所阻柰何望前到云间谈及当掀髯一大笑也

又

得报札中及季君变后事事相累如糺丝无可理绪处中年邁此令人闻之亦为酸鼻第正欲于此中窥兄定力耳兄所以疑昙阳师谓是楞严第七卷中人不意其透此一通也立脱俄顷间万化在手恨不令兄见之疑城一破莲花不远矣弟比捐家累坐起斗室与元驭东西两头外迹若可观中实未有也空山沙弥颇究心禅那俗腊半七十矣而犹童真谓兄是韦■〈马 犬〉天拈香参礼并求引与月庭讲席之末不敢望执榘椎竖尘尾勺水余润足解热渴惟不靳是荷

又

岁邸辱大老俨然赐临其日苦中寒不汗遂不能奉浹夕之诲质明出访舟次追逐于恬澹观小楼中头犹岑岑心怦怦也不然岂不能买一轻舫十里促膝乎而忍令观东五尺沟作虎溪别也窃于尔时伏聆悬河之辨种种病不能酬应一二非独病也即孟子

與之门非狂若淳于生辨若告子谁敢有进其得射其失者虽然以吾丈之爱我深弟安敢终自默也吾丈欲为出世之业则弟窃以为吾丈视佛太轻自视太重凡吾丈所深得而倾信者固佛之所降伏魔道护持国土权迹而已其最上乘机虽则知之却未尝于心地上体贴一番以故于人间得失荣辱毁誉小有所触即不能无动此虽见二乘人犹恐不能无避舍而况十地菩萨乎裴休相公法门中龙象也没后作于阆王于阆一小国耳当懿昭际不闻有所兴阐佛法也此公未见黄蘗圭峯未谈般若不妨作相作节度既见而既谈之使天下归以为龙象而柰何作相作节度富贵如故也于阆之报业报也非福报也吾丈如小屈而为经世之业更弟有所虑江陵公虽恣然尚聪明又吾丈生平腹心友也一见而不能信再见而不能容况其它乎吾丈旦夕入国门所接见无同时侣彼皆外为逊而内侧目者也弟每见吾丈终日语一叙往事则皆已是而人非论人才则皆已长而人短果尔恐今之不即尽究吾丈用无异昔也弟经世一念久已灰冷独于出世不敢便自暴弃但业障既深根器已损十二时中念及畴昔放佚过恶万状但有悚汗而已以弟之愚不肖而乃敢自比于波旬之半偈者诚念吾丈之爱我深也江陵身后狼狈至此虽皆有以取之然诸子尽削籍而言者齟齬未已发露丑声闻之海外得无伤国体乎前刻二十五圆通诚如尊示即改正并诸刻经呈览诸篇品不分以便读耳然似亦不如不分也月庭法师见间希致意大抵吾侪多生智识只欲共登灵山不堕落而已

又

别后以五鼓发舟凡三宿而抵家则长者之妙音声时时在耳舟中小简聊命笔为亭记如秀首座作偈欲呈忍大师輒面赤汗下而沈生任之曰是无碍针水契也遂请而书之彼且欲为骨董先容耳元驭宗伯见即问兄然以兄所诣证之彼不甚首肯异日恐非两棒一喝所能了也手疮痛不任笔亮之

又

山斋风雨留连夜分娄浦云树纒纒杯酒固我老丈不遗故人至意而中间微言依约若有垂悯岩穴之穷而欲寘之廊庙之末席者盖未几而一二大老如宰公辈其见念当亦同之以故有留尹之命弟虽愚陋岂不知清时之有味与圣主之赐环故人之推毂不可仰负弟生平蹠??不善修飾堕少年齿舌间幸以废弃见宽耳岂可龟勉复出以供描写吾丈深爱实出肺腑与其狼狈而后保全之孰若舍而置之是非之外也且庚辰初春有香火心盟非我老丈不敢以闻老丈大乘法器以能仁为妙用而弟贪辟支小果不妨并生佛世乞骸之疏唯冀从臾早覆得被褐茹蔬以终天年大赐多矣异时无可避嫌少有所得不敢不仰佐老丈庙猷兹则未暇也春气初煦唯为道为苍生自爱

又

当吾丈在政府吐哺之不遑而能念存故人音尘不隔觉草莽之色殊添其偃蹇耳岁杪覩除目有南省之命初亦小疑骇既而谗为吾丈自请之盖欲处无竞之地以消物情操或跃之机以善出处耳而五六少年膈肥脑满必欲求胜以树言路之帜此则大可恨亦大可忧也嘉靖初元彭济物事极相类相去恰一甲子今济物犹自赫然而诸利齿者安在哉承已上书请告恐未即如愿法堂前草深一丈矣归而理出世之业弟虽衰尚能捧拂以从元驭阁老廿四日行矣此公殊不喜少年作伎俩将来鼎承之地可以屹然宫府亦不至矛盾也肖甫岁杪一札云左腕小不仁计吾丈别时当已勿药元枢阙落霸州公手不免有长孺仲升之感如何家弟頼大庇滥竽闽宪第日拮据作老博士头颅如雪浮荣几何第有可怜而已兹走一介代候起居锦停之际酬应纷如毋烦报言为嘱

弇州续稿卷一百七十四

●钦定四库全书

弇州续稿卷一百七十五

（明）王世贞 撰

○文部

△书牒

潘大司寇

前者造次一书为儿子称感激之私即辱报贶儿子入雪不腆币不足成享而长君署之上客之席申以全体之荐则更有惭感而已世贞不能事言路以致憎口又非江陵公所讎弃者杜门凿坏饭蔬饮水匿迹方外苟延残喘于分已逾亡所覬愿台省推毂之疏偶尔竿及殊不關方寸而我翁书辞则惓惓若谓尺一不下于朝体非宜即仆不出无害两美盖未几而有留尹之目矣得无我翁具以此意为当轴者及之耶半残之人不敢以逸民自拟且清时有味国恩可虚唯是庚辰香火一盟今耳舌尚在而忍负之四载块处吉凶讯问不及里闾之外固有恶其狂简而谅其放弃者忽具冠冕作京朝官宁能免

于齿吻间也当发疏而家人辈有请暂缓小时谓十年故节夺为有司之长稍俟一转而后乞骸贞私心咲之审尔毋论非方外所宜言亦岂人臣之节耶一疏不获请则再疏而村童无可使者又损儿辈橐唯公悯而从舆焉得为太平黔首幸甚余辞不赘为道为苍生自爱

又

舍弟来复拜大贶手书之辱公几务千绪不忘故人而勤存之乃尔使我蜗庐涎满雕虫气王乃舍弟感公之知赖公之指教日津津不容口也至三四乡戚公且乌而及之矣子与右辖行辄附通起居并所草芝林一律书扇头附上计当已达弟避暑园居差有泉石花竹之趣左图右书清醪芳茗时合其适第一念无明漏未尽又时时襜褕间之不得作羲皇上人耳公读之当复拍手思昆山精舍矣舍弟有还役聊此附候溽暑自珍重不一

又

贞所谓偃蹇不利人也羣毁指摘之余世苟耳其名即以为秽掩而亟走公独怜而三致意焉且为道其所不平而强其所平者以见慰何用情之笃至此也九月内控辞之疏力谕小仆先上之公交车而后投副于政府不知何縁颠倒致彼见尼以大义相迫责狼狈就道未半而省垣之白简上矣以贞情事岂可更玷朝籍往者既不能固其匹夫之节腠颜而出又不能攻苦衣簔以从公孙宏唐尊之后挟雕虫之小技而跌宕自放又不幸为逐臭者之所蝇袭宜其及也弇园竹树渐盛石亦益色游口见饰罪状诚有之第房椳之内仅一老妻老妾并影为四阿段樵青不晓伎乐至于孙氏之秽真风马牛不相及今强排作一韩熙载良为介介耳公大勋旦夕且就玄圭告锡入赞百揆即贞且自幸为平成中之一物而以焦思劳神故有羨于磊块寂寞之人此则所未解也家弟得本省小免跋涉台使扬廷皆我公培植之力渠故倦游且不忍于手足痿痹有归思耳势恐不易也此间得徐子与信最晚病卧惊絶走一介候之江介道相左于元夕后接家弟书始具其详是卒风疾耳竟不及一语后事穷途旅榘家弟与右使力为致之幸已抵家而嗣子咏归宗以咏之少子继幼殇为后咏长子无他望不免乘隙射没嫂复不少忍争辨纷纭家事大有可虑贞此扶病一行不但哭逝者且欲为存者料理及处置归骨地耳情具五挽章并贞起罢六诗于几事清暇一读之庶几子与若生敝室未远也雅贶谨拜嘉并有不腆之敬统祈鉴纳不次

又

旬前辱贤器亲家自治所驰使见海且伸以贺仪兹复拜教赋之辱唯是山泽之腴珍所以慰老饕者靡不祇领矣先君子覆盆之冤虽获雪于隆庆之初元而身后之典复为忌者所沮区区饮茶掇素而不敢吐者二十年于今矣不谓两台之疏忽上而宗伯核之三老主之遂获以军功从二品全葬隆天厚地之恩方感激之不暇而岂敢复有憾于所缺亦岂敢遽有他觊然一时之龃齟后微得之盖犹新郑之余焰而蒲坂之遗授也最后陈情仅为先妣乞并祭耳而上恩滂霈遂有兹赠大出望外中间所以非笔札可述弟六十余生藉此以瞑目三十年离别之父子藉此以相见地下悲喜之情孰有可喻者翁骨肉之真爱若此而尊者之隆赐又若彼何敢言鄙亦何忍言鄙第以贺为名则有怒然泫然而已耳溧阳之政颂若神君弟固已逆决其然第名臣大业此其发轫未敢遽用为贺也袁太宰近绝不相闻记春时曾附一诗约其归共萝薜之社不谓乃见牵使出也弟窃自笑前后所毁者一身耳前毁纵未尽实今誉乃大过情部覆虽似尚以老马见拟识途不知伏枥多岁已绝千里之念若五台司空大望久鬱必须暂出以慰苍生弟却不敢劝驾不然彼不贡禹笑我则将何胤疑我也太原虽与推轂恐申杨二老本意居多渠一瓣香却为翁但目下未有缘耳东南水灾遂无一片干地当事者非不蒿目剥肤但长淮以北旱复甚焉古所称不得已之边费可已而不已之内费恐天听未便回司农犹按故事如何儿子春时料理文笔亦渐有致为老荆厌厌床蓐汤药萦身迹复移心土木之累将来不免又作画饼弟亦付之抔沙一观而已适感微痾口授不一

又

遠承信使问存手教累昏藹然如奉春阳之照而币赋过隆且辱以先少保公地下二十年来未镌之琬琰见属岂不佞所敢任也区区虽少于老太五岁然衰惫独甚仅以久绝房室粗足支吾自亡弟见捐别是一种境界以故上书恳乞骸骨而不蒙赐允强尔涂抹然覩时事若此何心复恋庾粟何颜复陪朝彦适大司马合诸公上疏而不佞为之具草今录以请教然不过了南中体面而已来春必当嗣恳奉敕帚洒扫先人之塋若老太才畧遘际与不佞绝异必罄荒度之畧而后可言报必俟玄圭之锡而后可言报无论太原公相知之深即有识者俱不异也太原公一片为社稷怜才热心可融金石第未获伸志于两观必且乞休天若祚朱或可无洛阳余姚故事也使回聊此附谢并致薄私握管之役必献岁盥沐而后可从事也冬寒未剧唯为道为宗社苍生自爱不宣

沈宗伯

赵定宇司成回及小僮将致台教一一祇领窃念先子微勋滞冤饮恨黄壤者于今

十有八年矣不肖贞等强颜食息吞声隱忍无由扣阍而伸覆盆之苦赖两台傍采公议于条陈疏中及之然非门下憫而覆请则复如戊辰之恣矣先子虽薄有横草之续然二品尚未满考非门下憫而特请则何以沾两祭全葬上跻八座当此之时不肖自谓于愿已酬于分初满不敢复萌望蜀之念致貽画蛇之诮而辱太原公见示谓明主可以情吁贤宗伯可以理干故于并祭先慈之疏辄冒昧以赠官为渎而门下复憫而咨铨部以有大司马之命门下为国家秉礼布公岂以不肖贞兄弟一么么而屈天子之大纪毋亦念逝者之冤未伸而言官之请非狗也然则太原公之相为亦若是耳夫古人薄感恩而重知己以不肖兄弟之感为亲感也非他恩比也先子地下而不泯泯也则于门下知己之感又当何如也唯是冢枯岩栋无由报塞即所称衔结亦属虚辞聊一陈其耿耿而已承委有请告之章而上数厘勉留之命海内仰望喁喁在翁唯国本国脉国是三者不能不重劳心神如何秋气向深为道为宗社苍生自爱

荅大宗伯陆平泉公

世贞跌宕欲界中赖先师指迷少愆宿憊栖止道门第累重障深毫髮未有所得已误为人影响又属荆石见强俾次先师遗事词旨纰弱纪忆遗挂方惧不免谴责不意遽漏之记室过蒙谕獎若以为窥见一二者愧汗无任老伯果位中人虽现宰官而不染六欲加以耆宿龙象时过法堂印证荐肯深入三昧贞顽聋之质尚未堪受棒喝兹时但于十二时中思己过而已雅贶谨与荆石同拜嘉尚容铨日候讯先此附谢贤从温然玉映法门之嫩器也珍重珍重

又

伏审天赐难老遂跻八袞恩褒再下粲若日星荐剡姿腾崇踰山斗蓋昭代之祯祥岂直家邦之光重而已也贞忝窃通家子弟其为庆仰殆百恒情深欲一效卮言以寓封人之祝而值有家门不得已之事因循嗷嗷以至今日歉负何言大兄来辱损手教曲垂獎诱捧诵之余不胜慚感初从两客旅见大兄不详所以遂失雁序之敬浹晨两谒俱不获面惟冀巨贤长者见寬于形迹之外耳中丞公名德不能揄扬十百过辱称谢何以当之薄仪非敢云贺伏惟亮纳

徐宗伯

伏惟门下首膺简眷正位宗伯朝埜艷羨以破格登贤为国家第一盛典乡邦第一盛事鄙意则谓国家积德为年者二百有奇今五单于款塞八荒重译唐虞三代所不能

隄胜而郊庙之典未尽協礼乐章未尽明备尔雅必赖名世之贤以典司作述此其时也门下其人也草茅之念时一热中专拟修咫尺之书以为门下贺而谬言之第复自念此身已播弃物外作佛奴道民而乃轻及庙廊事耶以故逡巡次且而不敢闻乃至寒温之讯遂阙焉亦自信长者宇量必见寬也世贞一凡骨耳少堕纨绮受汨世欲中邁凶凡絕人道七情所侵根器尽损且服官居乡俱鲜善状虽不至造优波夷罪于白业净业岂有毫发而妄作天际真人想何必一阐提然俊见咲第蒙晷阳先师度引蓋于百事厌倦之际驟得之譬则倦羽就栖瘦弩顾秣易为合耳以故损家授儿辈束身一室中朝诵夕焚草衣木食不敢斲倦虽未有所授证而垂尽之躯稍就轻安居恒自幸以生平快意于酒鲸吸牛饮疑宵质明傍观者尽为寒心今未病而获省之其幸一也生仅不渔色耳而不能节四十之后心殊慄慄有卒然之虑今亦未病而屏絕之其幸二也烹宰物命辄为惨中肥浓腐腸渐不为美而宴会比之闾右独数今得一切废简其幸三也宾客遠近麇集征逐如践更而今亦一切谢絕其幸四也即无论异时可受证与否以此无事之日优游竟其天年蓋棺之后获免墮落于愿已宏独笔研二物向度高阁而为荆石公所委不免复犯绮语戒竟成事柄荆石初意实为闾井多恠妄不根语藉此以证之耳中间若有涉于张大者然皆得之亲见闻非有所緣饰于其间也言官持国是正人心以猖狂罪握管者夫谁不可乃必欲甘心于荆石加以危词中之以隱祸又欲使得道冲举之人不能保一畝之宫与六尺之蛻抑何忍也苟非门下哲几存体怜才笃故委曲调剂以一言悟当轴心而相公复垂弘护之德区区此香火地立枳棘矣贞之为黔首为黄冠为赭衣固所不论荆石何以辞于厥父母也此君别有揭辨计己尘门下览唯门下一深鉴之倘终此大惠于求胜者之口大檀越功德真所谓无量无边不可思议者耶世情险薄物态反复自今而后塞兌杜机作壁观婆罗门如更急之唯有一行滕一瓢一笠被髮入山而已临楮不觉惘然统祈台慈悯亮不宣

又

自老丈之为楚志成弟始得窥史笔之妙出入迂固蓋无一不与鄙意合者归自郢而老丈继之后觀所金石一二如春雪楼记之类无论其文词超着渊淳所以獎借下走者不惜牙齿之羨私心非独仪之且感之矣而恨未悉其全旋闻已付剗秘弗甚行以故锦旋之日橐未解而辄有请未辱见报会朱令来漫以相属遂获卒業两集洋洋乎巨丽之观也岂直博学宏才足以黼藻盛际于垂世经世绰有余资沾溉来进当不少矣斋语一二则纵有异同亦复何害况弟数年来甚推穀韩欧诸贤以为大雅之文故当于熙甫不薄第无繇相闻耳且使弟不见幸老丈老丈中厌薄弟则何以上烦绳準也独所辨周同志铭事緣弟与周非石交见其俚词诡态亦颇咲之而有传其强项肮脏者丙辰去国絕不知其罢官与捐馆之由及岁月属忧居而其子俎以状来请志怜而漫书之皆据

状语耳使云所谓祠郎者即翁丈母论非忠厚道耳目抑何涂墜至此也谓曾参杀人羊祜行酖得无自纳败阙在高明当自悉但老丈以斋语辨而弟以周志酬却似大虚中着两纖翳小当自融不待青苹力也见邸报台垣言路大似矛盾国体所损不小老丈虽当后乐时能无一挂眉否弟乞骸未允改疏移疾前两日计已上矣万万无出理承以严旨为念即斥削甘之矣道旃何日过里当烹葵洗笔以待尚有耳中腐鼠谈一笑而掷之海外也手笔草草不恭希照亮

又

两郎君到先后拜老丈手书方襜褕见客汗出如浆诵所叙致尘尾胡床与世尘都絕语不待毕而此身已洒然若在清凉界矣弟匹夫之节不固误念失足公私万冗猬集病躯同气至亲奄忽长辞不能一诀辟如善星比丘无故生入泥犁其为愧悔何可名状迩来小有章疏塞白即具乞骸之草继之尚可缉芟还蔬以半面谒左右也局体变矣吾曹多纳破败使九重之聽疑而寺人得快其说老丈当亦知之郎君皆国器赵司成亟言小者尤儁而少功夫吾家两豚故不敢望第司成之许亦如是然长者既消摇清凉界中而弟以襜褕之语荐却似木桃之报琼玖也一笑

袁抑之

昨有数行附观海书中上老丈计已达矣近家弟言见邸报已触新襖噫称快久之是庙廊以八座优耆硕尤以风纪托正人也吾丈所以报塞至意俯慰羣望者何待鄙言第奉贈絕句中已蓄此计不浅矣比有麟阳矫矫而月林东泉佐之老丈与之对峙真自有生气弟留尹之补实出非意岂尚以其龕材足驱使耶田光先生所谓其精已销亡矣且弟何如人而敢与贤者并彙征业具疏恳辞必得请而后已辱手教谆谆劝驾爰出肺腑弟非不欲借此而南以奉朝夕顾不忍庚辰凿坏一念徒有引领而已昨奉慰时误传是少郎君乃贤季也幸自寬方银台欧虞部弟之故人吾丈欲令賜和则可见贈则不必也弟于除夕偶得一聯云有铁皆成错无弦始是琴次日即谢笔研矣虞部乞休意以犹在推敲弟前书觉大径率小鲁司空君子也会间当自知之

又

前者得老丈所示勘御史疏草读之不任忻服即与元驭侍郎相加额而叹以为大臣巨公所见自出恒人表即此子不获完璧然于国体士气裨益良非浅矣弟故是口吻间物属厌之后觉得一切滋味如嚼■〈虫葛〉聊以懣尘器蔬食布衣聊以懣侈欲瘞

砚烧笔聊以懣绮语如是没齿而已岂敢用不出为名亦岂敢妄意出世之业第此事本不无此理尤不可废昔范蜀公生平诋佛而其澹笃无他嗜好苏子瞻以为真学佛作家蜀公未之荐也吾丈今之蜀公种种佛位事故自日用不知耳方允治扇头诗致之吾丈得非吾丈尝属之耶词旨清隽有味糟粕性灵四字轻重便是识得源头者若缙山子乔言大非吾任也幸为致声以谢引年虽故事恐非君相侧席至心弟亦不愿吾丈果此请耳

又

前者家弟之从役来复拜老丈手书诵之恍焉如覩闻春中当考绩竟渡江而北竣事之便或可锦旋然金瓯之覆久矣恐不能就弟于小山丛桂间耳家弟比想得朝夕复寻戊辰己巳之约弟索居哉然想象此欢不能奋飞至于地垆煨榾柮熟薯■〈廿豫〉蹲鸱老瓦盆倾若下春亦能使天上故人流涎也比闻有旨册立元良召用诤臣真圣主大节清朝盛事大察近矣偶记郭中丞抚吴吴民至今思之张中丞九一治夏州能破匈奴胆柰何一眚相弃捐若言路寻端竞胜老丈以微言销之何如野人及此亦可称杀风景也余不具

答阴大司马姜大宗伯

向者草次奉复于生平倾仰之私未获伸其万一兹复拜大诲金玉之音若自云表而坠中间饰奖过隆推挹良重非謏劣所敢承耳贞本以衰劣无补清时而病弟尚尔厌厌故上疏陈情乞骸今既不得请而病者粗有起色且贪与盛德周旋其于登龙之夙愿倚玉之私诚更自有深慰者拟于仲春望前启行小憩金焦至朔履任人回聊此附复容嗣布不宣

寄刘司空

七年前吾丈方宅忧而不忘故人致书帛于三千里外当时虽草草附报而峡路修阻江鳞难溯阙然不能通一问老丈之再入朝则世贞方且匿迹于方之外以与乡之贤者比而致憎口长安之书问遂绝而老丈犹不弃鄙辱惠之书而又不能报将以世贞为何如人也当宰物者之失调寒暑叠至霆霓与雪霰杂下而独恬然不失度汪澜洄澹无所不偃靡而独屹然而不摇皂囊之墨无所不涅而独皦然而不淄翁丈非独沈几烛微所操持者定矣世贞蹻??之踪行与毁会今者除目出自非意且念不敢贞香火之盟而出已上疏恳辞期于得请不能复奉清尘领大海如何如何荆老人便聊此布候起居仰

惟台照不备

又

向者感吾丈之数厘存我而又推食及儿子不然之灰无以为报而会荆石公之役者有事于留都辄草草伸其鄙概不谓轺车由襄西趣硤遂坚东山之卧踟躅空返自是心旌日摇摇于楚蜀间矣吾丈耿洁冲素与物无罣而沈几先物独出尘表令人景慕贞久堕齿颊间晚而小遽之一壑余生虽不敢遽攀后尘亦粗足自了矣灼日薰天一旦澌尽独留快在人意留瞥在人口要之实有可怜者亦无敢及之也赵太宰亦小波及可恠此老精志吐纳当不置此事阿堵若少宰司空作何状复有怜之者否家弟朝夕差池荆老亦时相煦沫弟恐终非野人有耳兹因殷守无美便附此当不至作前时洪乔浮沉也此子文学吴中白眉而忠信明决任侠好谊一入藻镜必为药笼中物溽暑加凜自爱

上御史大夫王丈

我公去国而专烟霞之胜者十四年于兹矣西台霜色盖犹凜凜焉陈相公以师傅归里若岷峨竞秀天汉而相距不数里而近即自古犹难之夫岂直西川盛事已也贞匹夫之节不固为世眼所困诱之使出逐之使归再诱再逐而犹不已造物固善侮人自取侮何尤也宿障偶未至深灵真步武拔之苦海今已弃家室一瓢一衲旦夕所奉楞严圆觉道德黄庭周易中庸而已生平受笔研役悉已绝之独念丁卯春于萧寺一奉教不获再侍杖屨足称缺陷世界敢因长公观察信便附候兴居向者于友生所闻翁中岁曾遭异人受秘言不敢遽有证请也其然否希一宗之示引领西盼何时忘之

答少司寇陈公

顾京兆使来得手教殊恳恳老丈贪与仆周旋故以精辞反复开谕谓仆当出而不知仆有不能出者仆何敢望老丈直臣也不出则见以为名高而无以昭主上盛德且成先帝过仆出故无益处不成隐特以庚辰初念不能负耳彼此汛扫心境乾净应无所住则庙廊之与岩穴皆为净土也汝师宫赞书来亦云上与揆席诸贤向元驭宗伯几有司马入汴气象但渠步武不离太夫人如何新渠先生朝夕相与幸致声不一

又

前者小僮归辱报书及大贖所以慰存厘至感荷无已岁寒之节久而逾劲诸贤仰

藉以为正人赤帟是瞻是依贞岩穴不固徇情一出靡补清时佛门所云业识茫茫无本可据殆谓是矣且病弟在汤药妇在床第转首之际便自天涯真所谓六州四十三县铁不能铸此错也吾老丈望重资深必不俯就留省岂不尔思室是远而奈何奈何赍奏人去聊附起居之候不宣

答耿中丞

昨岁枉季公驾一挹容范接绪言觉种种自别后从管东溟所得闻翁起居之详殊令人倾注世贞妄庸人耳■〈足必〉跋名欲场无息肩所颇亦厌之以故先师易为指引三四年外迹虽若夷澹而内境实未莹洁展转自讼过累百端而雕虫一技尤甚以故拟于岁正谢絶笔研之役而宿逋犹尚扰扰不谓黄解元来致翁手教复以其王父宪副公之不朽见托宪副公名臣黄生名士也而我翁今之大贤人也世贞不胜好德一念遽尔许之然自此堕诳语业矣岩穴搜访竽及不肖而翁名世之佐尚尔濡迟将无一二论思之老未能逊揆席耶虽然玺书旦夕下矣翁以天地万物为一体亦宁终翹然若世贞则自信其不可而已黄生回便附此唯为道为苍生自爱

答陈中丞

世贞鄙人也偶以宦迹获差池贤昆玉间而门下尤幸爱之盖至燕中之宴接郾台之贶存未已而俾荐其雕朽之技则中心时摇摇悬旆焉蠖伏以来与世未杀而门下方奉玺书莅全楚中外交口而颂小冯君九卿高第旦夕大拜而间及于荒落无似之人锡以温言侑以兼金海错新诗之所嘘拂寒灰习习生气矣唯是俯念区区出处若不佞之薄劣与不当点仕籍夫人而知之当时何縁聩瞶眼耳谬见竽及今之废置固自其所幸得卖身作佛家奴披缁冠黄百念已灰乃不慎于笔札腥人齿舌终始累大将军保持为愧耳辱喻林烈女事毛发为竦与先师所秉靡异今虽示迹天残当为易僊宫所收无疑也黄绢所不敢拟谨破例数言或可饑之丽牲之石附而不朽耳薄敬不能颛致简褻之罪宥而识之万荷

答范司马

久不奉清问然穆如之风时时在仰贞比待罪西藩山川阻修便道归里避言长告差可以驰价奉候起居而逼岁入春日为人事酒食所苦无须臾之间乃何翁来则拜大海惓惓不佞之出处与存歿之屯夷念徐生之硕果怅文士之百六嗟乎以执事造国手袖之东海之濱歷三朝而不再展况其下者然闻执事方杜门谢客左图右书下上千古

此腐鼠宁能当一顾也所喻欲彼此各出书目互补其阙失甚盛心也家旧无藏书自不佞之嗜之颇有所著蓄二藏外亦不下三万卷而戊辰后薄宦南北旋置旋失未暇经理今春构一书楼于弇山园度之长夏小闲当如命也闻古碑及抄本毋隃于邺架者若家所有宋梓及书画名迹庶足供游目耳何翁健骨天与至欲得一二外护遂成道恐亦是江湖间语念其远来而贞适病齿痛无以应之柰何柰何伏枕附答不详容嗣尽

又

屠田叔来致公手教谓张大司马先容之札为黄掾所浮沉贞虽不获发函启诵拜神交之赐深矣诗篇大雅叙往踪申契阔泐泐乎有余致焉大司马长者不腆之辞媿不足以报地下而翁爱护其短芬之齿牙间又借生平雕虫之业而许之谓若可以自老忘世者乃不佞受之负惭色矣诸刻已再领贖其商子却是新属梓者种种精好每羨邺侯架头三万卷牙籤玉轴思欲效服子慎共扫除之役而不可得迹者于衰懒中忽若有覩却思借祖龙火焚胸中无明字障将望车门而却遁矣我翁大总持结漏已尽能无不罪鄙言否竹墟公虽不获侍朝行而知其贤于权门若浼归而恬穆无愧乡先生祀社者即微田叔一日雅且愿托以不朽而况重之以公之诲乎诚惧其不文然不敢辞也外拙诗未足酬来美惟为我藏拙幸甚

又

贞不能切于笔札误为贵邦诸贤所强俾任地下之役既成而于逝者亡所当方涩于汗愧而门下复奨飭之是益贞愧也自惟世弃得以苟离尘网懣夙生障而无明一念犹未尽勘破舐犊之恋时时攻中儿子粗获一名第支持门户足矣今遘却更踰分追维大易持盈之训犹龙宠惊之旨盖惛然有余惧焉而门下复重饰奨之是重益贞惧也春时晤沈嘉则昨复瞻屠长卿俱称翁海鹤神姿健爽日胜摊书万卷渔猎其间以为海上三神之乐无以过是而来教若微有所不快者岂帝释宫中未断修罗小警耶一卷楞严破之有余矣朱老故人也第与之谈不免以手为口耳使旋聊此奉覆诸容嗣布不宣

弇州续稿卷一百七十五

●钦定四库全书

弇州续稿卷一百七十六

（明）王世贞 撰

○文部

△书牋

与元驭阁老

前以日势晚更不获追随分袂时睹兄悲惋之极乃知千古河梁尚为鹵莽弟虽勉强作夷然态过舟便不能禁声泪哽塞斜阳在衣与影相吊凉凉踽踽几若鬼趣口占二绝句云欲作男儿别将情强折磨更堪天上泪翻比世间多一叶轻刀梗绿苹惊看蓬底两轮巾道人却有分携泪丞相何无祇候人语绝稚不工少见实际耳至岳王市则已暝舍舟就篮舁上衣薄中夕寒加以洽日小饮及噉樱桃脾疾乘之虽不废巾幘岑岑若醉梦中四体都不相属适儿子遣信云兄定于廿四日成行矣尚欲于数里外僻地更展缱绻兹何时也食息之不暇而勤存故人乃尔弟此浮脆之躯审如日者言因縁在异世而何忍恣然也三日内热去当自力而前不则泚笔以效葛藟之献不便沉沉也闻老嫂欲少留为辰玉毕姻期始北于计亦便太夫人有兄朝夕不至萦悬耶病笔数行不次兄亦不必作烦长报也

又

昨以不能挫情买舟趋杨家桥拟之郭生则近视遠公虎溪则遠矣老兄当此倥偬尚能具斋膳为浹日谈小奴子亦沾缙钱之惠别时幸有二公在彼此不复露酸楚察兄眉端隱隱心泪弟亦不免块结既别且三里忽有一叶装章生来知兄遣之破我孤闷也目前无所急惟急次公病良已太夫人高枕而北兄亦小展眉头窃窥太夫人意欲就兄養则内恋次公疾欲留视次公又恐兄因而有归思蓋兄之归虽不为大拂兄以太夫人归则有所不安于心耳兄宜委曲相体为妙弟日夕窥兄欲求兄之所不足者以效箴规而不可得惟愿兄于一切善恶勿遽信勿遽发而已前偶谈及诸生论命信口误下一语弟之不能出与不可出兄固信之弟之所最畏者世福所最不欲叨窃者虚名位也万一相知齿及幸以此意止之弟老且衰矣不敢望孤峯独宿若寻圓泽行径恐不便能相识言及怅然别后得排律二章书扇头请正庶几出入懷袖间如相覲也

又

别吾兄一月余而四得手书皆满纸叹睽离则多泣李之致感庭帙则动报刘之思念病弟则嗟鸰原之难避人块处欲于情字着力而读之一过未有不泫然者念无由缩地如何谗途中悬章业为太夫人力止之止之是也前者见兄称邸报止苑操召谪谏二事海内已加额诵圣德又传上意悯旱躬自大内徒步谒南郊祈雨即成汤桑林之禱何以喻此兄既上受特眷下为朝野景慕要须有爱君忧民惻怛孚尹至意酬之若但以名节自砥饬避嫌避毁厘厘成就此身乃中士之节非所望于上臣大贤也迩来岩穴搜剔殆尽第恐衰迟勉起者不引身而思完晚节则杜口而苟窃重位果势壮往者不逞材而陵驾一时则易节而巧取快捷方式此四端士何益人国哉利孔不可遽开开者见其利而当之受其害毋论青苗即近日丈量其名何尝不美也江南灾伤比比而追较逋课民间怨咨尤甚然使一切从故则奸顽之民自托于荒区者益得志而良善不被泽非唯不被泽且中有所不平而混沌凿矣其要策莫若择良有司然良有司之弊亦自二端其以治办可喜希上人知者官事举而闾阎不胜其过为隐恻宽恤以收小民之心者使上收其怨而后之君子当其难兄如择得其人必以此意戒之俾以实心实政上为国下为民中为名节乃可耳各省试用翰林京僚甚善然须宽其禁令自创试录风檐寸晷之文不可用用之则闽浙四五省而外疵丑百出宁不貽笑天下又闻教官一二科会试者得与考官若尔则皆广西云贵人耳言官具如此识见而宗伯一切唯之何称为大臣庶吉士每岁当考考取不得过十四五人留者不得过五六辈人材约畧等耳孰科不当储相也禁谄谀抑奔竞戒虚浮节侈靡兄欲上此疏甚善莫须与元老商之否武弁不贿不得迁兄所素知宜以此意告元老及大司马可也近传武英中书多江南富势人子用贿少者亦三千金此岂尽入中贵人橐耶即尽入中贵人橐尚有考察可以惩于此处放过即无策矣又云云兄于此辈不必痛绝亦不必太吐情事惟劝其沈静高简以养将来之用且弥目前之谤弟徐察世事大抵有因必有果有业必有报必非在隔生也道体虽以劳思小违知不为累次公俟兄渡江即日归后饮食似加而膹胀未尽消蹇君延京口医已至大较目下必无他若病根未除将来不免费力耳弟比粗安如常近料理宿障以毕六月决能洗笔砚作逍遥遊兄以滋味太薄忧我真骨肉之爱过仲冬生辰或后当小有所进今则未敢也

又

前有一札附使者去计当已彻览矣旬日前得邸报兄于季夏十二日见朝旋接手教知以事阻面恩又可得五六日始履任圣德日新政府肃穆大法小廉千载一时所谕禁止趋承一疏此励风俗正人心大机括诸老聯名尤更无迹弟乡意偶自同想辱见采矣御史赵大夫清公裁正即有耳者当不它而邊徼一台僚敢尔露章排诋不惟轻犯公议抑亦大损国体但弟尚未见疏辞一云颇齟及海少宰而昨得次公数行谓赵亦欠检

点为彼所持贤者举动不可不慎也。想当尔尔慈宁工兄避之是也。昔日徐少师以万寿宫完蒙重升赏为达者所讥。其后当国于大朝殿及邊功一切不预。可谓不遠之。复次公初自京口归病甚使人徊徨无计。后复彼医补剂。燠消至尽。日噉粥八瓯。肉味称是一月前。燠忽渐作粥。減至二瓯。足疲少力。今渐定矣。所喜脾气实而不燥。不至作目前忧。但复却彼医而延云间新者。弟以临敌易将阻之。且劝令就外室省家务。似尚未转圜也。郎君谩谩裁抑下人。靡不叹服。老成夷粹。自是国器。兄何虑之深耶。弟近草得为先君乞恩疏。具稿奉览。中间遂及秋崖朱公。兼念其清苦。子弟无力。援请且系部覆。并称者。故耳。恐终非事体。幸即裁定。指示每作兄启。不能不蝉缓。又不能不及。世事大损岩穴门面。勿笑勿讶。秋暑方溽。加飧自爱。

又

自李客部州太守北行相次。以一信奉寄。虽亦知其不可贪。与兄相闻。欲少致慰解之意。耳避生泖塔中。以八日抵家。则得前一书。虽以次公病为忧。而颇及时事。且叙主上勉留之意。甚笃。而严未易三请。而道体似尚在汤药间。寻又得一书。则次公病状。想已悉方寸乱矣。虽反复数百言。而终始不离伤次公。而虞太夫人。次公之讷达。而兄情事。又当何如也。然去人以廿七日发。今五旬矣。而兄之信未至。岂老嫂不欲裂兄病腸。姑讳之耶。将无悲痛之极。不能下笔也。今忽已终七辰。玉见谋。暂杜门。却吊检校遗橐。颇井井有绪。渠尚能饮噉。容色不至过槁。兄今所急。惟太夫人及辰玉耳。在天下。则兄重在宗祀。则辰玉尤重。渠遭此大变。而神色湛然。事至能应。遽到器也可以少寬兄内顾矣。太夫人幸未归。归则日见病者之狼狈。与身后之凄楚。必少生趣。兄念太夫人之离隔。亦必少生趣。今得团栾目前。且辰玉月杪赴云间。了冯氏事。献岁后携而北上。偕太夫人。爱女左右。寬譬尚可。庶几无他也。辰玉事弟。初不敢预。唯劝之于彼行礼。尚可省议论耳。兄之辟横议。止新工。又所減省民财力。何啻百万。迹者计吏垂橐。小民按堵。若更得一二年。展布以为麟趾。螽斯之地。何深广也。名者造物所忌。归后阴德未便如在事时。而名转盛。切为兄虑之。弟儿女粗无恙。六十之年。虽神明不甚滞。而齿落都尽。不能如张丞相之啖乳。若先师更不垂指示。惟有枯骨而已。以故甲申二月之训。时时在心。即不藉祝宗。祈死实不畏死也。

又

朱婿行后不四日。而得老兄札。且令辰玉见过。问归计于我。具悉至情。弟戇拙无所识。知窃谓太夫人不宜归。归则但有伤痛耳。兄不宜與太夫人归。归则但有悬思耳。亦不宜再告。告必不得。请且使人以卜君臣大义。议兄后耳。有如太夫人不便归。兄嫂旦夕慰解。寻辰玉携新妇北上。使太夫人破涕而进杯匕。兄忘亡而壹意谋国。上策也。太夫人即

不肯留而嫂侍行小料理毕而尽室北上次策也太夫人归后四五月兄以太夫人疾毁告而乞侍养下策也度必不得耳得则亦上策也给假之说不必如尊虑记得本朝自洪熙元年金文靖公以省母假正统四五年杨文贞文敏文定以省墓假若正德中二刘阁老省墓则内意已定归一月即上乞休疏耳此外未之闻也江陵假虽不同其事非远兄能无小不安乎且上既为兄免至日朝度肯遂兄高致国恩若此兄亦何忍遽言归哉此语不当出弟口香火一念弟亦宁便忘之顾事势有万不得不不然者辰玉实同此识更自酌之何如余不具

又

弟赖庇色身颇固惟以城居役役酬应笔札之逋旋止旋开为计已穷惟有从鲁连之后而已兄为弟推轂甚廛毋论初心不忍负久已作方外行径柰何复出供人抚掌谓恬憺观六尺地如终南山也家弟之迁又几成而变张司马亦云弟意欲渠一得南除小简是非不知尊意何若赵汝师转宫庶故是元老调停处但渠不爱官爱其说之行耳责难任怨是其所长伐异好胜是其所短兄须护其短而收之太夫人至八月必须尽室而北主上必不许兄归兄必不得请而徒以公私两念交战于中未有战胜而肥者今者计吏回询之云唯兄门如水耳二三大老亦有相慕者其它则筐筐如故稻田之说岂一人可办一时可成大抵生财不如节财兴事不如减事作书毕而一邸报至学使者极论海大夫此何意非海公欲有齧于使者而漏之耶

又

前送太夫人之使归有一纸附去计已彻记室矣今岁不易得兄信闻之辰玉云家书亦自懒题近颇以脾寒服官桂附子后部有若痔者然趋朝犹若故当是未甚耳虽然桂附不宜多服多服未有不受其累者太夫人料理家事已毕宽严适剂贤女旦夕出合北上之期在中秋前兄别意似不必更动国恩深矣又不废天伦之乐夙夜不寐乃事二人人间世何可多得哉外传吾兄在政真酷暑中玉壶冰第羊羔素丝亦只六七大老耳又闻新郎君敛兄门下使用人各九金兄固痛裁之而自家僮奉行约束之外余不尽然其它诸公更不相体京债何时可完莅政居乡又何能不纳赂不居间也老諄妄闻妄言亮之

又

昨浦进士归得书具悉近事六月唯朔日至七日热耳此外俱凉爽入夜则如深秋

而燕中乃奇热了不可解岂南北气候顿异耶数日觉有残暑雨暘时若更得半月无他吾州花稻可以全获唯水乡有十二淹没者耳而小民希望恩泽无已至于坍岸抛荒必须踏减抚按当言而不言使万姓缺望官寮不当言而言使九重见疑其失均也但恐此后在事之臣且未敢露章陈情两大老主张亦不易耳郡县存积赃罚已自单薄若搜括一空缓急何恃所赖诸老维持大珙阴挽随有天语勉从第于捐俸助工内发百余言圣意尚未平将来诚如兄虑兄乞休一疏幸而不上此等事只宜坚执不当便决去就也兄所谕诸台司大小赀币夫价一切辞之甚当辰玉亦自能斟酌大槩他处毋论即本地或受薄赀以荅其意其它以父命辞之何嫌于不恭更欲兄与二三大老谋必以此意喻台司郡邑勿厚行礼至于坊楔尤为有迹盖留赃罚事事既与上意微左万一所任耳目傍猎巷议以诸老之谏止为已地即圣明不聽而稍有所疑将益难执持矣近见会试诸卷多奇然亦不失常士而两京十三省多几至于二三场絕不成文理其咎在于学使者止出四书义而同考皆遠方教职此二端者多士之厄而吾两宗剥肤之灾也今进士数多而选壅戊子必有在部者窃意两京必当于今取用各省必间择二三司理至于教职却责巡按临时考校文理精通者勿论新旧勿徇请嘱庶几可望实才不大猥杂弟此身粗健但城居不减邮驿宗戚排解之辞无不入耳骨肉公私之累无不入心乡居僻遠客多迹逐观处喧湫老怯寒暑安土和光四字有味而难噉可叹可恨房学使论海大夫事既可恠亦可笑房不少愆似为过寬然海不请归亦觉无味岂人之恶失官尤甚于死耶三进士之救海自是少年肠肥脑满意态责之太峻当必出自上裁非兄与大老意也近来综核名实之意长而优借旁求之意短兄于此不免用一苦心为望

又

书辞于诸少年描寫情态即赵邈卓画虎品第罪状即大廷老吏断案亦不是过第不愿恒出兄口耳兄名位俱重华袞斧钺在于一言此曹疑则扇惑多岐怨则诽讪甚口即不必人人苏张能使君子化为虫虻亦可忧也鄙意窃谓彼中有朴忠无他若邹吏部辈者直亮有素未经沾染若艾光禄辈者恬退自守不慕名爵若邓太史辈者亟召用之仍与诸老洗汰物议深重之人勿少顾爱则白赤有归爝火自熄先人未滿之事日夜腐心然使出而后得便遽归似非臣子之道苟如舍弟所拟辞官之疏可附陈情夫君上有酬功之典然后臣下得遂陈情之私今欲偷安自便而更祈恩泽万无此理也唯兄教之辱谕诸老意欲弟以诗删为据稍成损益葺为一编弟尝谓作者不鉴古有斯言于鳞此删遗憾不少必欲厌服羣心少假时月乃可周大夫得迁复见寬台察兄之厚德也新守致佳士民之福也兄言朝事能使人攢眉弟谓乡里间亦难使人开口所可自慰者兹事小有緣证暂与家弟作两三月团栾駮侄骏儿文笔稍兴发耳骥儿迂不识人戇不省事懒不读书亦无如之何次儿疟大发症止旧症时现宗門毫无一效小女賴盛医力起

矣按君行事大强人意学使者倨下而扫事然至秉介摘弊毕竟不如憎口之甚也曾长洲已补顺天瞿元立可得台幕俱感兄培植兄以古道厚德行之彼何所谢杨忠愍子应尾惇实君子也幸为优处之辰玉远识详虑不唯兄之令子且亦益友见当自悉

又

近覩河功不引阁臣禁止抚按用赃罚交际精采煜煜果出自吾兄想诸老方在同舟不得不心服耳洗马意气褊激殆甚诸少年第心事终非阴险者羝羊之迹不知在何处兄幸以厚待之以诚格之得全终始为妙弟曾有一书附顾太史人去中为先人祈请疏草不知无沈浮否中间未妥处幸赐裁削目下尚不敢有举动耳家弟得迁本省殊有味缓而后入固佳自是长藩臬亦佳太宰非相薄者兄万勿过念弟色身渐坚而望道益渐远矣向子期知贵之贱不知死之胜生也且为太平之民以俟尽而已次公病已九分愈为一忿复发今尚在进退幸彼祸根既拔此病根当自除勿忧也周守节俭长者本无他过而民俗好作无根之谤万勿听之将来得人却在兄藻鉴耳

又

米壻归不接兄手教以为恠渠云作得二纸毁之别作书付周守从役既其人以所携书来启读之则愤激用壮使人惭汗簌簌下弟不肖托在肺腑迂戆不晓事时时有之至于有闻不敢不告有见不敢不吐忧治世危明主虽以九重之崇高尚无畏其逆鳞不意兄之见过深也兄之心事如青天白日行事如冰壶璧月忧国如理家守身如处子何待弟而后知亦岂区区数青蝇所能点污第窃闻周书云小人怨汝詈汝则皇自敬德藉令周公在政史佚进言即有不当计亦改容而谢不及未闻麾而斥之门墙之外也管蔡流言太过迫而金縢之鑄如故未闻启而诅之神也前所指云云亦据偶闻而与辰玉及之本无成心亦非有定见老兄以为无他定无他耳至于奸鄙谗谄之辈兄所素知者弟实未之及也见委疏即以初五日叩上真拜焚之觉得首句有县师密示法旨随縁应世语当是拜相时所传在甲申二月以后不知曾及弟否自死生辱荣秘偈既下已冥心隔生无复希觊譬之哑子噉苦瓜苦在喉咽近传微有巴鼻或可苟延若诸公鸡肋之念殊为蛇添一足先君子身后固不肖所腐心者虽然不肖之罪深矣即有所效何赎也

又

月前有数行附使者去意气相期觉不相识便相契也不知老兄能无厌其姜桂乎向者为先人未了事以小疏草渎览此疏都不成事体又捩人眼承许从家季商推谓必

俟弟出而后可上则弟已絕望矣偶朱中丞之孙致申相公之札于抚公行有司议报窃恐同事异请则先人若为公论所后者将来益难措手仓卒谋之王兵使沈同守皆忻然为转达两台弟乃携家季谒抚公于句曲按君于阳羨则抚公谓垂得代不任具草而按君已具草置之条陈一欸且云老兄两已精言之矣夫为德而不使人知此是老兄生平行径第被恩者有深浅耳若乃泽及枯骨流施不报此则愚兄弟腐心之感即九死不能化也计此疏迫岁必已停封过新正十日乃得上老兄幸毋泄之至期弟当拜章恳兄并恳申许二相公沈宗伯也直指所陈余六条皆切吏治民瘼唯复粮道一事畏失元老指然弟却觉其灼然可行不知高明相许否杜门八载道遇亲友皆咄咄谓为怪物怪事然自不容已今复归蛰矣陈仲醇弃诸生徐孟孺亦遂裂繻大是俊快有锺少参者来迫一见归而疗发于面俄顷而逝徐太仆支学宪父皆物故矣虽然视百十三岁僧无常则齐物论也兵使人便附此余俟后悉

又

自周大夫役归得吾兄手教嗣后北来之耗遂絕而弟却累有书奉讯最后一札则按君以先君子及朱中丞恤典事置之条陈之欸弟窃获豫闻之而有所恳者计兹时已投公交车令但不知岁杪禁封得无碍进御否前者州郡公移虽上之台皆阁不行而条陈之说尚秘弟不敢显然投启于公府第人子一念区区岂有覩此机而忍自己者又恐欸内事畧而不备辞缓而不切年祀向远见闻寝疎所司视为故常寢不之论即见悯而论之而先君子南北十年之间闕辽左八百之勋级谁为详者若于祭墓二端之外不小加益则弟腐心之痛未释也以故辄走一介归命左右然自吾兄之外唯元老次相及宗伯而已其于堂属铨諫诸地不敢遽有所溷也次相应否上书亦唯尊裁前具奏稿不当复读览弟于事体本末颇详小足为覆疏之资万一事机有不得不上者却烦兄大赐删改庶不至决撒貽笑众目兄于按君处尚两为精言之而不使知今日故应无俟喋喋犬马衔结弟虽有心亦徒口耳大造固不问报于一物也家弟与弟自阳羨归于腊月十八日各完向平之累渠于二十日即赴留京任矣辰玉兄新岁当益精进但须少资丽泽之益不知何人足当之吾州韩大夫老成虚受敏事爱人下车之日远近大小翕然神君之称催科尤更得法仅卒岁而所限四分报足矣甚哉百姓之易感也（阙）亦似好问者而事未练睟睟胥逸要不似人口之甚也前见胡司农有起色大合公论郭中丞之得民大旱霖也柰何以一眚弃之为江陵厚者不必否兄所素悉也冬寒不至剧而未见雪将来岁事殊未可料小仆须得部覆乃敢言归太夫人与老嫂万福余不多赘

又

别喻本州岛熟区代偿此是为官府出脱罪名计难称爱民彼盖以吾州赋减四升为可增耳不知州畝窄狭即肥者岁租不能过一石比之他邑石三四者虽减四升之赋而尚少二三斗之租岂能复代坍荒赔纳且坍者核实请除荒者设法募种自是常理何烦纷纭唯与元老大司农裁之不一

又

初传东昌白莲教之徒倡乱饥民附之今闻渠妖已获余党解散似不必深求但中原至關中一带荒甚今賑恤之命时下足征圣主深仁相君至意所虑奉行之人苟且塞责民不沾惠且将来无力播种何由得转菜色吾乡元日之暮风雷陡作自是连阴者踰二十日岁事未卜人情汹汹前守虚报之数既已处分则此项钱粮自在民间已经蠲贷何可复征抚按不请司农不豁使人主失信小民胥谗此事虽微關係颇大唯老兄留神考察消息想不久当得小人中有可原者君子中有可恨者若吞舟漏网纤鳞鼎俎则非所望于清时也文人落魄弟故怜之文人无行却不能讳柰何柰何

又

兄每书于时事之外更深隱忧求退之中别寓深指弟亦不敢详问兄社稷臣也受恩知己深非见几洁身时矣兄所云阁制于部部制于司外廷制于宫禁老成制于少年四语妙甚妙甚便是摹寫尔时景象造物手弟却僭添二语云实事制于虚言肝胆制于皮面弟出处心事既蒙兄相亮更复何言铨曹见寬目下省一番无益费苟安丘壑足矣足矣陆大行近会两次颇知自悔将来可受琢磨冯太史品格遠胜但不知能稍降心否刻经贖原不经手南中龔舒司寇端为戚里一吊此恐未能服其心海老于大察殊老成无偏伎虎豹在山藜藿不采兄许之是也大槩风节意气既成一渊藪贤者不能自拔巧者借以自匿虽兄大力未易荡平唯在精择而亲之遠之耳

又

有数行附冯氏乞文人去计已达矣小仆往所恳为先慈求并祭事不识疏已上否于事体无碍否倘得允于礼工二部领付府文移甚便但此仆蠢甚恐不解此得老兄一指示为望弟自昨岁九月至今脾气强健疮疡若洗肌肉甚腴谓可粗保色身以俟师引乃于此月十三日四更忽有大声发于中楼之下楹者三若炮又若巨鼓若板裂弟起坐默唯此非师真示谴怒耶抑大数垂尽鬼神前报耶甲申之末语验矣岁已迟暮而俗事凡情憧憧不已荏苒牵纏恐终堕落不若速死期之隔生已属家干密制戢身之具纵不

能填塞爱窟剪除业根冀以澹泊减之耳柰此顽躯未便能了老兄功行转积得请之后尊师必自度引幸念香火深契提掇沈沦即儿子辈不曾与谈勿谓弟迂也家弟大察后于除目杳然即陪推亦不及得非尚在人齿頰耶于此心故自无愧第先魄虽久归土既蒙恩祭墓或暂给短假一归唯兄教之太夫人老嫂邸中万福辰玉近文可寄一二以式儿辈迩来建言旧臣连转要地凛凛生色既可光彩清朝且可塞诸少年之口主上富于春秋青宫缓建未为不宜但闻圣体时有违豫大权间或旁落兄之隱忧非以是耶韩守益良于官人心慕爱失囚已获仅余一人而抚台必欲叅处倘持为免究其于保全循吏不无小补吕令声大畅遂不减韩两地之福也

又

半月前从贤叔父处得闻兄家信又奴宾数行至知老兄既为改小疏复易诸宰执书至新都相公处特为补一纸使弟苟免简脱之罪始弟闻部覆无移咨铨地语安敢复萌他覬唯稍修飭莹隧树碑构亭求二三名世之作以先君子可以瞑目弟辈可以下见足矣不谓老兄用情之厚处事之妙一至于此昨覩邸报奉旨于照例之上下是字谗为咨部无疑先子苟获增秩厕六卿之后则岂唯弟二人不朽于心子子孙孙百世之感也始録报者误谓墓不及半家弟亦信之既而部疏至则中引军功获全墓矣弟生世何幸始遇我仙师拔之于毒海火宅之中洗涤无间无明之累今又遇老兄俾先子叨国家追遠之恩酬生平尽瘁之念而弟亦得具面目称人子于未死之顷但既已趺弛怠缓无以仰报仙师而今老矣所以报老兄者计又穷矣奈何奈何太夫人与尊嫂闔门清胜闻辰玉之闾中娠者二李青莲诗云双珠出海底俱是连城珍然以酬相业及阴德未为厚也

弇州续稿卷一百七十六

●钦定四库全书

弇州续稿卷一百七十七

（明）王世贞 撰

○文部

△书牋

与元驭阁老

十二日晚奴宾归得手教并诸老报言烧烛读之不胜感慰质明而先君子赠官之恩命到矣贞不孝不能饬行砥节又不能事嘉靖贵人致先君子以疆场之役中萋菲之谤逦遘祸网盖七年而贞始获叩阍陈见冤状荷先皇帝厚恩予故官而至三台之请恤复为郑人余毒所尼藁葬者又十七年而复用台请拜两祭全葬窃于逝者不能无缺望而生者所受之分则已逾涯故并祭之疏止为先慈不敢更有他覬而老兄俯念契谊特以便宜改疏辞启事以有此赠先君子有知当瞑目地下矣弟生平不拟受人恩向者苦海此身赖先师拯而脱之煎爇而十七年沈憊之冤又得老兄而拔邊臣希絕之典得老兄而举世世子孙犬马兄家尚不称报塞也谕文既嫩且详兄言出自元老尤见至意緣盛暑不便行礼家弟心不自安拟请一假虽不知果否然须至季秋乃敢举乡土不幸吳天降割自五月四日至六月十四日淫雨连绵洪流泛滥吳江昆山常熟及吾州之西境皆汇为巨浸自此以东绵花积潦根茎萎烂蔓草侵袭唯海濱贵庄附近畧有存者然不过十分之一耳抚台报灾按君闻亦继之但传彼曹子意似执改折存留二端而又欲置吾州于末区涓滴之泽何以活涸辙之鲋哉乡人望二相公殊不浅但鄙意以为老兄与元老之蒿目岂但桑梓其剥肤岂直身家但自赵宫庶疏后上意不能无疑于吾地而今仅寂寥二疏宁足感发宸衷黯澹长语岂能预折部计意欲各差与道府连疏迭上庶几召对赐问可据以为垂死之民请命緣弟分守吳兴时率黄守各上一疏不闻朝论以为非果沾旷荡已力与当事者言之不知其见聽否也

又

前者一书附曹氏人去颇极纾区区衔结之感其后祇为故乡淫雨为灾不减嘉靖四十年而民之积困又有甚于彼时者今惟抚台上疏按院继之恐圣意未尽信司农不敢请而两相公不免桑梓之嫌以故欲各差与道府并上而莫有能慨然者谓无此例不知吳民之阽危宗社之大忧已在旦夕而尚可引例自尼乎前书为曹氏人所却而有舍亲之探亲者辄附之去不知其能达相府否按院非时得一见亦甚惓惓韩守之恳切为民毕竟目前所少吾乡韩襄毅岭南勋烈真光絕前后而报功颇微燥发知读书即为扼腕今其家庙亦见夺于徐氏嫡裔衰落见者怆然渠似有所陈渎虽年祀小遠而物情未厌老兄一赐吹嘘固贤者所不避也然弟可谓满腹不达时宜家弟给假有疏否余不敢悉

又

前徐使归得手教两纸中间老兄见慰之切与悯念贤妹骨肉至情一一领悉弟以先君子荷圣恩崇赠兼祭墓二典俱从优处昨覩邸报题给诰命想非久可得已树二亭于墓道左右刻石以章如纶大礼苟完下见逝者地下足矣唯是衔结君相一念耿耿于中不知何所报塞家弟乞假亦为交戚中以君亲事重相责不得已有此举老兄沮之亦可家事任长有弟在政不须归也读教辞重为舒司寇张宗伯惜且示将来赐环之意而于向所云诸少年一切宽之不吝拂拭诸葛武侯裴晋公以上作用深服深服主上富于春秋储嗣藩衍岂复有渐邸之虞兄片言斥之彼当魄夺口噤何当挂念

又

周郎归得老兄手教具悉近况所喜太夫人清宁虽小有系念不至过伤兄阖门平善辰玉将有充闾之庆日夕伫想汤饼胜会至期当亦与儿辈举觞遥贺也七月中■〈风贝〉风猛雨复作诸水区苟存之圩复时时溃溢而吾乡花损亦不细尤可恨者外状尚不甚狼狈不免微有异耳今东南无地不水灾中原及西北无地不旱灾而宫费边费转繁浩所望诸老回天之力不浅韩守忧民之心与恤民之政万口啧啧若处曹郎悍仆事殊不为过弟先已为解纷曹郎归强其引愿谢海渠即行奠彼此释然矣弟以老妻病废床第忽忽医药今始小定可延月日寻先府君蒙圣天子大恩与老兄高谊以有兹非常之遇拟九月行礼后驰疏谢恩并陈咫尺之书于三大老以布区区即此生之事已毕而忽闻有袁公推毂杨太宰覆用明旨报俞此蛇足也弟岂敢偃蹇朝章亦岂能芥屣名位祇为年事侵寻香火萦挂耳倘得自此寝推深纫体念若遂冒北除必不能赴勿怪弟作何胤思也

又

前日按台与兵道差人俱有一信附去计已达记室矣唯中间有一小封乃传喻君法不无误否自七月后风潮海濱之花俱横摧挫虽外示生色而一盘不留俱已成齐物论矣此间物情汹汹望恩甚深流言甚讹弟极知兄与元老苦心但国用如此其窘而江南处处灾伤岂能徧行蠲贷弟三儿俱以造宅贴居延医请祷酒鎗法书之类悉锢人质库中行贷无所伎俩已尽非不欲沾旷荡之泽令儿辈小展眉头诚知其难处也

又

密纸所示语语肝腑字字涕泪弟昨覩郡公云得自抚台漕粮蠲免四分改折六分而改折者又于明后岁带征此则圣主之至仁与三相大司农之吁画而老兄于其间苦

心尤更百倍吳中士民当已知之但不能如弟知之切耳国本大计虽一时醉语要自根心所发诸公但宜静以待之伦序故在不宜更有所激幸羣瑯中未有识汉宋故事者万一點慧贪功之徒凿破混沌一时回天未能碎首无益此自书生腐见不知可裨智者千虑否所云先后发使密访灾伤江南处处洼者蛟宫高者瓠脱彼必不能大枉其实弟窥九重微指似属贪酷官吏若遽以此塞责不无枉滥且将来恐如成正故事却大可忧耳江南设水利宪臣议尚未定或有以为当设金事者或有以为宜复御史者或有以为宜特遣大臣者复御史不过仍委兵道多挟郡僚恣行威福滥馈津要临期一以文移塞责而已下僚多一番应承百姓多一番骚扰至于添设大臣尤属童稚之见彼岂有不避艰劳不求速化如夏忠靖周文襄者况年力愈衰体面愈重费用愈广何益之有无已则金事乎于民为近于检为慎所见目前如某次则某皆其人也然鄙意则以未烦铨曹议定官府先须抚按计处钱粮今东南民力竭矣救死不贍安能枵腹而事版筑若损官储而借之賑饥则可然仓庾竭矣何所请发而以供役徒且今岁之潦在湖海之涨下流满而不受不在上流阙而未泄也弟以为此事宜小缓唯先有司帮筑圩岸为主盖费小利大目前之至计也家弟病根颇深迩虽小间尚未全复休沐故园静以需之此实上策弟力與其归幸勿相沮

又

旬日前有张游戎役去緣其人轻行易达亟为附一书因附述鄙见计当不浮沈也十九日守臣銜上命于先冢行礼时积雨乍晴风日清美道路纵观草木吐润弟以脾疾积弱尚能勉强拜舞悲感摧咽追唯先君子不泯之心与弟终天之痛虽荷圣恩浩荡得小解释至于终始曲成老兄一人之力也今具疏陈谢并二老处亦申区区感激乃于吾兄毋论尺丝寸缕不敢有所效虽一言亦嚔掬而不能吐窃恐失吾兄宰相不収恩之指宁使弟负草木不谢荣之罪也日来闻主上霈发明旨沟壑之枯暂苏目前但不知将来何如耳入城谢守臣及诸戚执觉闾井尚自繁雄十里之外一望渺然室鲜下趾野无寸土真堪痛哭若使侦伺者迹稍及遠此情亦必上闻但虑其妄希内意罗摘事端作将来祸萌如弟前所云奈何适覩邸报老兄再恳疏乞休圣眷若此岂能俯遂高致第借以感动天意或开悔悟之端风示具僚使知易退之节则可耳弟为先君子神道碑求元老传求颖翁却不揣奉恳为我破例赐一赐葬记盖此事之顛末非尊兄不能详悉亦非椽笔不能发挥岂惟令逝者不朽存者子子孙孙奕世之光也所应给诰命已具题不知出何公手亦无由通问计进呈后幸发副本来砉石久矣度此月贤子舍当免身而未见熊罴之报望之长君场事近矣惊人一鸣尽洗前相门曳白之耻周郎转益潇洒无异寒素渠兄亦可人坚吾业行俱进贤从近考亦优取弟赖庇荆妇虽展转床褥可不死矣舍弟病势殊可忧今以医药将摄体气渐复而根尚未除须静养经年底保元吉移疾之举毫非

有它也前者请急兄似不能无疑而见尼之使弟独疲然又幸其不归归则委顿矣

又

前有小仆去上一书计已彻览矣寻得九月初八日信知可作归计弟固未敢许也无何勉留之旨萎下至鸿胪宣谕累朝所以待元辅者圣向可知尊兄亦不得坚其卧矣第此举绝不可少万一帝聪感悟而求其端羣瑯慑服而反其故其为益非浅鲜也区区十月来饮食差健精神亦王但以家弟病久寝瘦削旅进旅退根株未除而乡间第四弟竟因此症长逝令人且痛且骇且忧幸圣思宽大诸老见亮获遂生还弟得朝夕医药维持或不至狼狈耳每念兹时辰玉兄当有充闾之庆未见报至前月十八日大儿妇幸举一雄虽儿障上肩道业退尽而于家庭之慰亦粗足老荆渐自持支三儿不废开卷第大者日寻土木拟于腊月移居此凶岁极为不易耳郡邑诸生愈汹汹日于台司齟齬凌氏若仲子不出诸凶长遁将来祸竟不可解如何七十老翁炼尽世事不能戢一朝之忿殆天也弟追思往因蒙蔽之害毛骨尚悚先君子诰命不知可领得否求尊兄与二大老文不敢相促弟此心真若饥渴兄必不忍不终其惠也徐卿二雏以徙箸小静迭且姑任之所怆然者念南野无令子耳贤妹有尊兄当无所忧张平野读易篆刻完附去两部刻手颇似精弟初诺其请序不免露丑尊兄宁能斲一言之重耶水田黑若蛟宫高乡白如瓯脱献岁前后必多萑苻之变幸有李使韩守在庶不至决撒也海大夫遂不起万里孤棹可怜此老一出无所建白然终有虎豹在山藜藿不采之势袁太宰是达道但施之于弟不免知人之累耳

又

初五日黎明北门王大谒选来索书云以陆路行易达故述所欲报者付之不谓此子以橐涩捃拾尚在吴闾可笑也是日午方与儿辈拥膝作诞辰小饮而急足以南副枢之报至次早即买舟候病弟于毘陵丹阳间八日夕而始得面覩其瘦削之甚虽食噉复故而病根未除今获生还从容医药倘保无咎皆尊兄赐也弟之忝窃实尊兄与裕春兄力然不敢与先君之恤病弟之归同感盖弟之私心有不能不出者三有不可出者七所云不能不出者乙酉之秋因有戒心于乡落复徙城居稍牵家门遂涉官府见烧族党蔓及亲交加以笔札自贻之戚觴酌流连之累日鲜虚晷坐不暖席私甚苦之而南省散寂稍堪杜门谢客其不能不一也昨春得尊兄书示此意弟虽力辞而再及之则不能绝起色今忽为坚卧之举是以不诚卖友若何胤矣其不能不出二也先君子蒙被上恩于身后粗备未能报塞万一今复偃蹇朝命以退为名则垂君臣之分义其不能不出三也至所云不可出者向己心许仙师弃官学道中间服膺安土之训沈痛隔生之期若无甚

系于出处者然名动之根未断而好爵之縻遂安其不可一也差可解者博兄为先登耳然兄之出繇圣主之简眷物情之欣拥片言而海内蒙福小动而朝宇改观弟有一于是乎其不可二也弟之出苟以酬恩为辞然此南省之佐优游伴食何政可効何恩可酬倘自此而渐有委寄衰年謏才迂癖懒病宁保其不落夹乎其不可三也弟残岁一转首便六十三矣过此则卦数尽矣仙师不云莫待年龄八八元精已去难收今此林居虽未蒙授道亦未尽守戒然与其出而见弃之深孰若处而见责之浅其不可四也弟即出多不能一年少不过七八月即谋拂衣耳迹者老臣乞骸往往报留小则姜司寇傅司马白简青蝇大则海大夫一棺万里弟既知之而坐蹈之乎其不可五也弟素乏墙壁濒年以来始则依贤者以逃毁既则因韞椟而长价一出则尽失之矣昔有教沐猴捧茶而献客者甚恪客戏以栗投之弃茶于地而取器尽碎弟得无类之乎其不可六也家弟之受疾颇近膏肓其在白下忧之恨不能缩地一往今幸获谐对床之守而忍复成隔谷之叹乎其不可七也反复思之即弟未脱凡情尚蒙时趣然何忍以其三不能不出而易其七不可出哉凡此情事既不敢轻渎于斧宸之前亦不及尽露于旃厦之上惟尊兄肺腑之契方敢冒昧以闻小疏得从臬裁允成就弟小结果大幸也海大夫直臣赠官易名恐未可亡区区尚谓艾穆邹元标邓以缜当及时用之东南水利觉尚可缓目前若必用大臣则郭中丞思极李兵宪涑徐尚玺贞明皆可仗节仍久而任之郭才高李心实徐其亚也然须以资储为本先君子赐塋非得尊兄椽笔终是缺典于待弟谊亦似不容己二相公处亦恳一相促诰命得遂付前去役否

又

前发辞疏之半日而家弟所遣一介上病疏者以尊兄之手教来多公私大计欲作报则无及矣弟之前疏及小启其时出意尚十三不出意尚十七及日视家弟之病旅进旅退肤色枯瘁根株未除自此入春将有大可忧者老荆因卧床第展转须人病女命仅悬丝旦夕鬼录且大珰所云云虽于此心无毫髮愧然张宗伯缘此拂衣而弟可冒此命驾乎故因徐侍御便附此倘得从臬赐保丘壑尊兄之大惠也不然橐如洗矣再疏当得七八金付去力又左右无可使者兄忍坐视之乎袁进士查税粮应除豁者不下数十万此君之苦心极矣然弟窃疑其无此理及道使以府中条荅见示细阅之大都有以别增派而并入正额者以此额而挪应彼役者有虽系近增而必不可省者有可省而部必不肯省者中间可以通融裁节恐不过十之二耳弟劝道使将应减之数无论可否悉达司农聽其裁处其必不可减且有着落者开款晓谕百姓知之不然是袁以虚言任德而诸君以实心任怨也此君欣然许之矣水利若设金事闻南兵曹有倪冻者可用若御史中丞则弟向所举或不负耳

又

昨见内臣看记法司一旨尚书何罪可认先朝何事可法李公似宜执请乞归不望如林见素得作熊北原周贞庵可矣此大隱忧也弟所上乞骸小疏不知可见允否后疏无可措辞而家弟病不知可以情恳否袁进士所条列见以为名美而实不尽然兵公屈之来方与面对可行者行之所谓寬一分民受一分之赐但大司农未必如所请耳京考取进士及近省推官知县固忧其不能无弊终视老教谕为优且庶几无鱼目夺明珠之恨记得辛卯两京时用主事博士中书行人两三人尤不可测何如昨闻有请巡按主内帘者又闻江南进士不差巡上江此何例也至因而请改北道又何例也兄传石司空语可怪可笑毋论弟不曾与兄齿及张大理此君子于弟有知己之契虽梦寐亦不曾訾及之王稚川先生与之儿女姻也前事了不相及后事絕无所闻青天出魍魎兴妖作孽此君遽信之亦不足道矣当弟燥髮时即熟闻韩襄毅公威名且筭路篮缕以开岭南功甚大赏甚薄而后之冒功者却甚厚偶遇其子来请聊为作数行诚不虑及嫌疑之际有如兄教者死罪死罪余不悉

又

新正两得尊兄手教而积奴归则嚶嚶一纸爱弟靡所不肺腑海弟靡所不药石服膺之感匪直书绅而已弟于菩萨行毫不肖似老婆心间有之然亦不至热拍也止是面皮软不能力拒人而已只如韩氏子初为徐少参陵夺其先祠托戚友引诉弟无辞以对姑善待之以后复来出一疏稿相示云欲诣都上疏求数行达尊兄弟以年久遠劝其勿轻动此在广中抚按或彼地人在台琐者明扬乃便偶见其稿太芜杂据案小抹削之实不为具草及與其行也襄毅公之勲劳有庙有谥而无赠荫虽若阙典在遠且嫌不为之处可耳乃至动元老之骇烦尊兄之虑则弟罪也弟既不遂乞骸之请贱体粗顽健又不能以卮辞再渎天聰拟仲春十三日戒行三月朔履任所携不过束书旧衣五六苍头而已杜门读书抱關击柝当一一如喻决不敢蹈好名生事作众生寿者相但遇事激中或有不能自制者且卦数行尽来日几何时想师真五内如裂度必不能久幸兄体亮病弟势虽半减根尚可忧痰或壅阏喉咽秽气渠亦自能解脱不以功名为念而俭岁不给教儿过紧终不似乃兄之迂散也诚难舍之而出且病妇展转床席大少生趣病女告革在呼吸间方汨没尘事与构接鬪此时景象兄以为何如耶諗太夫人万福辰玉兄竒进兰玉安长所以慰其心者至矣駮侄却是可望骏儿依稀分数然皆少年儿不足婴虑独骐儿髮种种矣要之非仕路人任之而已凌司马事赖二老主持后两数中寢名位虽损身家可保矣然年来营菟裘太费帑藏渐虚不至如人所言当时抚公守君在郡若小振威怒以泄众愤时有操纵以寓保全可自定矣计不出此而惟务模稜致万口腾沸所在蜂

起大臣之体与士子之习两败俱伤岂不痛哉兄计欲徐尚玺治水甚当且召邓艾诸贤尤见至意第兄谓五品以下官高自引重睥睨山中以要朝廷破例此恐是宋世程朱家风非今人行径也但患其不肯卧与卧而不高耳且所谓例者嘉靖末年与近日例也非初年及宪孝时例也袁太宰遂成一完人朝家待之若此真是美事又闻为此公及陆平老议夫廩平老八十郡议优礼上之两台可得崇进否州大夫之贤明至矣独小纵其僚蚕食少一段风裁松江喻守果敏任事尚玺之流亚也性小急卞近看常博士将来一能吏袁黄进士一段为民苦心弟力劝兵使察其中可行者一一呈两台或题奏或径处即不可行者亦乞抚台咨部斟酌毋使小民怨讟兵使欲定画一之规不必岁岁府议颁降使吏胥得以上下其手此策却佳第未知能果此举否先君子诰命事复荷周旋没者存者未知何以为报因便附谢

又

积奴归拜手教寻又于使者处得一纸具初念存出处之际弟窃揆之心既不敢以病辞又不敢为名计暂拟小出以答君父大恩庙廊知己但念至师海八八之期此中辄如猬磔而病弟进退尚在医药次且不果者月余而病者渐露起色谗非咽证故以此月十三日发舟拟三月朔履任途次不甚迫促顽健胜常深惟染指之后筮禄少时即寻猿鹤旧盟天上故人于兹时见亮不竟汨没苦海乃为终惠耳正月类恒阴晦幸元旦谷日上元花朝皆开朗此月雨暘微调田家始有生望第民食已尽饿莩狼籍剽掠纵横古刹丛祠日有缢者或溺或僵无地无之中户以上既困征输又须修筑坍塌圩岸慰留逃死佃人以图秋事求贷则无贷者鬻田则无买者仰屋窃叹计无所出此则弟体贴实际语也吾州荒水区不甚多而所谓熟区者花田十之八九与荒水无大异故韩守欲均派灾伤弟不敢阻之而劝其姑缓荒水将来或有恩贷或不能全足皆以属之然他邑不尽尔抚台行府议分荒区之折一二以与熟区盖为熟区之不尽熟而荒区之不尽荒故也此何所不可而士夫复羣起而呶及之水利之役属徐贞明甚佳何以尚杳然也闻豫州之境草根树皮一空至有人相食者秦晋齐鲁次之目前之苦可悯将来之变可虞弟昆冈顽石耳尊兄当局者何以厝懷

又

前一书乃京口舟中修得者以待朱郎之人而愆期不来弟亦不能待廿八日抵龙潭明日宿栖霞颇染指江山之胜又明日止郭外以本月朔履任留都部规差整肃初至即有阅三城试武学之役佐以人事寝食不遑更三五日差得息肩小绎恬憺之旨暂博闲居之趣此间无大可喜可愕可愤懣者但得病弟日见起色老妇卧床第暂伴一年半

载食此后却求尊兄放生耳应天常镇地方比之吾乡小有半收然京城内外饿莩不絶漕卒罢役者旧规仍给月粮军余亦给七分而使之包办一项工料往年汪司农别处工料而悉革之今岁罢役者多米价腾踊脱巾之声渐闻穿窬之事实繁今两部拟稍给之会疏今上恐大司农嘍喏唯尊兄一主之部长阴公寛厚精密事事得体所见若王复庵之清简陆五台之伉爽方采山之质素李岷山之恬慎皆佳品也王麟泉以江警出巡未返余俱在途姜鳳阿果势壮往精神奕奕大似其家子牙少年辈必欲勒之归而挫其锐何也王继山华松俱长者而实井井继山寓公署不庇风雨皆迟暮可悯有许京兆者朱考功者材气一时白眉也向云倪冻驾部真可任艰剧顾观海留数世之利于诸军皆此子成之世乏全才缓急之际拖泥带水不可少此等人赵司成意气虽欠和平居官甚得体台諫中亦有以危言间之者弟劝其一切勿聽省多少闲气管东溟不知可小破例否

又

三月中賚疏人去及王华松光禄便役共得启事三纸计俱已达左右矣伏惟太夫人万福老嫂清胜辰玉兄微疴就安尚羊经秬步武千里兰玉芬滋当复吐新萌矣得家信病弟比之昨秋虽小轻而视春初未见减目下不便至狼狈将来殊为可忧病妇若足延岁月而久卧床褥多患多躁甚难调摄袁氏女天后血胤亦絶老兄看弟况味何似若更上乞骸之章迹涉躁妄且难为主爵者第一思之愧悔无及至于念庚辰之心盟五内如磔目下姑以恬憺御之将来更从尊兄结一放生縁耳草茅微见不无一二然稍大则见以为妨室稍远则见以为迂阔稍细则见以为琐屑稍近则见以为庸凡不取厌于苍老即貽轻于少壮且作无口匏伴食许时而已海忠介公前有寛减夫役条陈固不尽妥而于都人实有微惠业已行矣而御史台复议更减其大指不过为各直宅夫有五名者有三名者以北例之小不平耳然不知南北异势此间私居宛若公署寫遠荒凉干陬单薄僚长因覆疏太迟虑吴有督过之意径欲从革而卿士大小嚣然弟劝其为调停计五名者量减一名其它亦有裁省然不能多姑以塞白而已僚长有霜露之恙其稿乃弟草也若倪冻郎中之处船政岁省费及全活疲卒皆以万计却是留京第一佳事与此等虚言不同要之都人不苦编差之少繁而苦编差之不均其权蓋属兵马兵马之不才五城使者右之也剧令人思海公唯有此老墙壁方能为此老弹压使更平气晓事何以加之

又

自离娄汭抵白下七十日凡三附候起居而为启者四縁被吾兄之爱深自忘其势分之悬絶也北来消息谗太夫人万福尊兄老嫂令子兰孙俱胜常为慰南中部事稀简应酬粗毕山水园林之胜差足遊目以其暇杜门养拙胜里居矣而家弟病势旅进旅退

春末痰咳拥逆喉咽作气粥量顿减十之六七瘦削枯稿仓皇析资产治后事使弟闻之肝胆寸裂既不能裂冠毁冕欲上书乞骸势必不得请中夜起坐唯以眼泪洗面而已最后得一信于立夏之日痰忽下降火不妄冲食不抢逆健进匕箸神畅肤腴者半月矣得九夏长若此便可望八九月起色但病根已深恐终无济理渠书辞亦欲以兹时要弟归视唯尊兄悯而存之可也春雨连绵二麦皆萎黄幸旬来颇晴霁高原晚穗或可希觐三四传闻故乡水复涨低田弥漫不便插蒔且米价腾贵已半岁余而北方流移至者踵接虚馁之腹受粥过分立胀而死粥复告尽矣无论都城内外流民近八千人弱者沟渎强者萑苻固仁人之所深痛而智士之所隱忧徐给事言之恳恻特以误闻南仓有储粟九百万石故请棗三百万石致骇物聽仓中实积仅二百六十二万石计岁出八十四万石得三岁储耳三岁之羨尚可三十万石以此平棗亦可苏江南北目前大司农酌而裁之亦不为难事而迟疑不覆使鹄形之民延颈愁叹且漕粮请留仅准二万又定价七钱是为国家作商贾也昨奉明旨諄切且禁革遏余尤紧要江北剽抢近少敛而太湖中嘯聚千人声势颇张抚按督率便宜诛捕不知肯如谕奉行否

又

旬前有小启奉问计已达矣賚奏千户归复拜尊兄手教知道体甚胜唯臂脾作楚此不紧關计且就愈矣葛藁之见无所不垂采第传闻圣上弥月不朝又不見公卿问安之疏或以为欲修嘉靖故事如尊兄所示未免小违豫不可不慎重也兄股肱重臣主上所眷倚岂可用去意杂之如弟矢志一出处处皆悔尤耳病弟消息近颇佳若稍进退则八九月间大可虞渠亦忧之弟欲于兹时归里一周旋七月初不免乞骸惟兄亮之憫之南中虽米价如故而已久晴二麦之存者尚可望半收闻故乡亦然吾州稍有栖畝又得李使韩守之优恤比之他邑微见一二生气太湖嘯聚似不至如所闻但不可不扑散如明谕尔周郎纯雅清澹乃兄亦尔竒进緣系曾经以南告北于例小碍赵司成于此处见斡旋渠所陈请多见行想必为之一快也潘司空以御史大夫起治河中外翕然推服圣度之弘与诸公之推轂首珣之贤要当在懷恩覃昌伯仲弟岂肯以前所云云语人也朱考功清望甚重要不是留省物先公诰命拜领文不敢称颂即书笔絕似率更子孙世世之寶也此君容專谢周郎行附此不一

弇州续稿卷一百七十七

●钦定四库全书

弇州续稿卷一百七十八

(明) 王世贞 撰

○文部

△书牒

与元驭阁老赉疏

人归得尊兄手教骨肉之爱种种恳悉而至于獎廉直急材谓核实用于上臣之谊宛然敬服敬服此间即积潦之后骤得晴二麦差回十之三四而一晴遂至四十日中间虽有小雨未成霖霖麦租既以潦萎麦穗复用旱枯为天公者亦不仁哉南北米价有及二两者熟地亦不能不一两饿莩载涂流尸蔽水中户以上目前尚可支吾闰六七八九月何以度日兴言及此心胆寸折太湖寇势颇猖獗闻欲发兵取之不知可成擒否自奉明旨严抢夺之刑申遏余之禁物情稍定南都卿士大小迩来无一败羣者济济可敬弟欲求异材可以寄缓急硕德可以寄表仪者似难其人杨震老今晨北首矣兄为何以尚鸣不平为艾穆推毂阳秋词组便足吐气钱非致政方伯耶弟初颇疑李见罗乃有此事昨果闻滇中宦游者与之讼冤以为未至如直指所陈许京兆至欲为之辨疏具草一揭徧达政府亦自成议论一者见友道之不薄二者彼法门中殊有护法人

又

弟以闰六月十八日自莫愁湖归忽得亡弟书一纸盖十四日午时絶笔也字虽不甚楷而遒雅有法首云前已作死计不意复延百日余事体一了当夫复何言此番种种悉证俱集力愈气浅甚难支持恐在旦夕矣弟性敏而有胆决加以学力定力故遂能轻死破恋但不能受苦为仙师窥破今日方死手下此工夫宁耐不然躁与乱遂不能摄持矣惟日请印师辈诵佛千声余无事也六亲既已无情即见吾兄犹如不见天下虽饥荒圣主能蠲赈事尚可为惟愿庙堂勿固宠勿近小人勿听人言勿搜人过诸君子勿徧见勿立党勿思报复则世界自平矣此外又有百余言祇是寄嘱留都故人语絶不及私结法无一笔误弟尚谓可得三五日延别发骥儿信则遽以是夕逝矣呜呼痛哉痛哉儿书谓神色虽萎损而气度如常妻子有问者皆不答弟云但看四月内遗嘱而已街鼓动忽唤水浣足已据胡床而坐左目瞑小时右目亦瞑问不昏散否犹点头顷之脱然蜕矣有目来未见比丘道人能若此者在彼教中尚不谓奇我法中自是磊落男子汉独弟过恶丛累晚路小警寻复蹉跎致覩此变六十三年去死何几而朝夕茹茶饮痛也且大马之

齿踰亡弟者十矣私意非久当挂冠相守小时以一把骨付之今即死后亡弟矣亡弟死犹有兄死谁为之弟者曩时窃忧其不能过秋令渠亦自忧之故欲及其存日乞骸一归诀而今竟何及也老兄生平视吾两人真踰骨肉且此子年位名行约畧与次公鴈行展弟书必至痛哭流涕亡弟所云庙堂四语不惟道兄不着亦似与诸老无干但将死之言毋论其善与否一采之可也若诸君子云云弟当觅何人道道之亦水投石而已四月遗嘱必欲以志铭奉悬盖以海内知己无兄似者计必不忍以例却弟于兹时方迷乱不复能具行状当俟后期旬日以来昏昏惘惘形神不相属或梦或醒或嘘或泣中得絶句诗数之凡二十四首竟不知作何语今录以奉吾兄并示辰玉欲令知吾痛而已万寿在迩不敢辄露章移病九月间必欲伸此念归理葬事草状请志并为刻其遗文辞慰藉孤嫠惟兄怜而放之勿视为秦越也宁但情所不能留四十二年涂抹至此而尚不知休不中为后生辈唾杀

又

旬间有户科赉奏人去附报亡弟讣音并叙苦情一二计当达记室矣昨徐似野之婿呉生来得尊兄手书尚以亡弟向安为慰读之转更悲咽耳弟自十八日晚得信次日即苦脾疾强进药饵久之乃愈愈数日复发今尚在料理老泪渍目眦烂睛昏过午辄茫茫痠痛徧两手股奇痒奇痛而为乡里戚执诸太学及荐绅慰唁者所苦襁褓报谒归而賁泣自念生平奉先君子讳奔太夫人丧并此为三虽号躡小减却有一种单裳衰飒之气总之生趣尽矣弟自思年来不能守师真之教虽作官人强酬应饮酒噉肉犹有可解者曰不甚累方寸独文字一障觉负吾师不浅耳亡弟真是一佳士亦足称能臣有识见有志力有胆决直为事事求胜人役此心至构奇疾以死杀我身者名旨哉吾曹大抵无不愧见吾师者亦微觉吾师大漠然异日谁与充五陵弟子者如何如何兄书所云陈心穀中丞弟不识其面闻此公甚正而恚禁余亦未可全非台抨偶值上怒去之可惜

又

赉册人回接到手教凡二纸皆极国事家事身事之详字字肺腑但尚以亡弟之向安为慰何南羽之未易北达如此诵及使人长恻不自禁七月念六日敝僚之长阴司马尚与弟同阅监生卷出榜觉有病色劝且出部静养小时至廿九日己刻痰忽上涌喘急医不及呼药不及进实时絶矣如来所谓命在刹那间岂诬语哉此公虽仅小于弟一岁然容色壮丽鬢髮利齿政如四十许人弟老态种种毕露安敢望久存于世也归思郁悖不可言念未过万寿节且部中乏人方当署篆不敢遽请然出则骇故人奄忽之不再归则痛亡弟冥驾之莫追且以四十二年科第迟暮龙钟跬步牛后所谓不自了断断如张

君者当亦了之耳潞邸之国羣议遂谓册立之事决在明春言路便欲借以了前件不知上意纵有之不欲令出臣下大抵喜事者多知事者少只难为把舵者邸报第四皇子薨逝诏从简节足占俭德今又有一种妄谈谓寿宫利长不利少恐起衅端又谓郑畹尝诉人失圣上万福榑木甫童何縁有利不利齐东之语此焉足摇撼哉方署事而北兵咨到除留黄马快船已入湾者外尚要三百只限在冻前不无促迫计亦不至误也故乡得雨今岁似可望収而民困已甚私橐如洗新赋或可支吾旧逋恐难议偿也周元孚尚未到任此间欲仗为益友当调其英锐使就老成但弟非能久待者三进士似可収矣春时李武定以书币相闻甚输写而尚未能答之如兄所云便使元孚有虞芮之愧王中丞天真烂然久自可敬大鸿胥明年七十矣光禄次之何惜靳一归老之秩成其恬澹耶陆司寇时时欲折台臣角一段直气英气弟甚畏服之南中所见无非君子或神采少不胜北然此地亦何烦神采司马精密周慎忠厚老成失此国器可惜弟欲为之请恤而无其例俟其子到后图之兄言董其昌春间曾一再接见匆匆未能叩其详闻此子综博尤精内典而文义深至与辰玉作战场未知谁胜负也

又

吴给事之役归拜手教满纸大为亡弟伸骨肉之戚而曲为弟慰解以纾其肝腑之痛而挽其垂尽之命真情语故自迥异弟非不知感知悟勉强裁割但情发去来寘之实不毕耳欲草一祭章而不能下笔何况行实须归后大恸三两番方有条理前得兵部咨潞王之国需马快船三百勒于河冻前抵湾以事体重大紧急即将见修明年贡船进完重九前一日开■〈舟邦〉遄发矣但本部止有船六百而前发进贡者已二百四十其见存者仅六十耳而工部复有咨行令苏松杭三府采办栝松千株俱责取部船装载期在二月间盖前发之船未还见存之船无几而太庙荐鲜又不容缓矣万不得已欲将前项松株委解于浙直抚臣盖采彼之材因彼之力于事势稍便计尊兄与二老在政必不至抵牾也条陈十事多琐屑无關治体然皆卑卑可施行者惟傅颖公冯宋公追封谥荫一条见之不以为迂阔无益则以为久遠难明虽老兄意亦当尔但弟则谓此国家最大最缺之事所以救高帝之薄而二百年快慙之在人心者实不可已也至于孔庙之复全盛典与十哲之斥宰予冉求两庑之进范仲淹弟此念蓄之已久老死之日岂敢复留臆嗔间即诸公不遽行作异时公论张本何如李本宁有一书极感兄维持其弟事本宁之待弟可谓观过知仁此兄年来甚老成吴明卿屠长卿已矣汪伯玉复不振老兄幸曲培此硕果以示右文之意何如骥儿附张大行舟北上此番似能少克偏性兄痛槌策之渠不至作前时冥然悍然也寿宫扈从劳当备常弟自得逝者信即病虽强起应酬殊觉狼狽撤棘之后与三儿慰解遂大能饮噉体气殊王得非悔星且尽乎一笑

又

七日前传辰玉领解信深为国家得一真才庆若老兄盛德之报与高门故物不足异也知当过自挹损然太夫人与老嫂之喜慰可想第二人之张与第三人之董皆名士翹楚又出一会大奇弟前妄谓董必不能敌辰玉兄似输一筹也昨始接兄八月二日教乃刑部奏人归所致者濡迟可恠兄极言陈中丞之贤然横为金壬所排一归便须三四载只如许府丞为友辨揭固不甚雅然其人实有才在应天政事殊卓萃此御史者不为不迎合也见邸报觉得上意似有所动以左班官相率为回护兄与二老不在急切挽回而在从容开晓然大臣与台諫亦思有所以自树立者奈何纳招款于左右也兄前所云云弟求其人而不得今乃得之耶异哉异哉王中丞真佳久始悉之兄胸中水镜自别亦要防其沾入而直者及此诡不在彼党者未必皆洞达底里者也弟前疏只是闻见中小条目孔庙一疏若迂若滞然自谓生平定论不知兄能首肯否张肖甫变亦在闰六月黄杨之厄一至此哉

又

五日前得老兄报书及辰玉见寄试卷读之大叫絶倒得未曾有闻张董卷亦已梓行但尚未见郑生者何人乃亦在会耶兄言欢喜障业已知之何待弟赘若弟则仅有烦恼障而已入冬差健饭髀肉亦小长而月来脾泄间发一行即止而忽有廉将军之累者一以故迫欲归尤不任北耳今已杜门待命不当复与外事弟念旧僚长阴司马之勤慎穩愜清修详雅目中所希歷官三十三年无公私小撻且系在任病故恐蜀中抚按不便题故与代者吴司马议疏请而弟为之草不知易名之典可不恠否肖甫大司马事体何似弟窃谓此兄功业与其乡人余肃敏公相伯仲有兄深知不至竟恣恣也弟用儿曹见以一封事塞白而后成归然疏节阔目发不中窾且畏首畏尾身其余几庙廊之上得无咲其言以为黔之驴乎即驴非驴马亦非马矣今昼则了笔砚债夕饮数杯就枕辄梦返故乡与先父母周旋恐亦非长久物得早归附于白香山贺四明之末足矣言官疏多留中似非盛世事当康陵世瑾宁彬乃有此厌匿伎俩某给事一谪不知何縁人人快心然弟尚窃为政体惜也俞守雅量能积阴德第如法纪何所传有司颇与袁抑之不甚异兄亦谓此老无分寸也喻君已明无所复置喙晋陵之谤渐白而才实可李使君吴中福星也韩守吾州福星也（阙）之行外议殊汹汹虽不能如兄所示之确要自大失故步弟尚疑之此君一介不取且无子求归其情甚真且久何以狼狈乃尔得非中贵人心恨之故颠倒破坏其名耶若（阙）之徒不能忘情于江左而南冠君子大有为之内应者天若祚朱必无此事言之自君实而君实竟不免可畏哉天久当更定也周恭先者几就绪而毋不待矣雷轰荐福信然哉

又

前者接老兄十月初七日书更后踰旬而九月念七日之书始到蓋差官在彼候覆本至十月垂尽而始发故也贡船求小缓与松枝付之本地此皆赖老兄之力得寬弟入部时船政久已毕但见疲卒得苏岁省万计彼晓晓者宁足顾哉孔庙一疏弟故知庙廊之不易行但留此议论以俟异时若出諫官之口恐宗伯不便束高阁也他所条陈皆琐屑不足道若傅冯之事以为迂阔则嘉靖中兴灭继絕四侯一伯何以不名迂阔也今之贤者所见惟目前诚不愿老兄之明睿而亦为此见也贤叔父于月朔遂不起一岁间吾州遂失三善人真可嗟叹老兄上奉明主下奉慈闈万毋以此无益之悲烧乱灵府但渠身后少老成知事者而兄家老干前又物故不可不一整顿约束汪司马出固佳不出亦佳惟时时人荐剡使文社生色少傅之厚冢宰之裁各行其是可也

又

弟上疏乞骸当于亡弟初报讣之时而以部阙署人蹉跎至十月则已晚矣肌体虽渐腴而脾气尚滑酬酢小寬笔砚转迫骨肉乖离知己凋谢故欲乘老兄之在柄恳请骸骨归哭亡者作杜门计私冀万一得复承师真警咳不终墮落而微诚不亮更厘温旨赐留欲遂坚凿坏再寻前请恐拂老兄及元老宰公至心若便出视事却更成一段虚套付少年唇吻非關触藩实乃维谷如何如何献岁以后当再图之兹时却烦老兄不浅向者狂谈孔庙事体逆谗其难行有老兄一人鉴赏足矣弟以考察古人见咲则不敢心服试与兄屈指自孔孟以及宋氏诸儒谁不考察古人者嘉靖中两庀大有进斥岂其时人独明晓而至弟独迂阔耶张肖甫司马实有胆局树南北勲颇伟但于情字不能裁洗阔畧小节耳若以簠簋之微饰而苛夺其易名之典则杨文襄王襄敏王恭襄又何如也杨震涯已莅任弟牢落中之一慰也王鸿胪明年七十正月拟乞休必无缺可处以沈三洲淮例优进以全其雅尚如何沈银台进士淹滞可悯何以尚尤铮铮者何以许而不与老兄幸念之骥儿极感周恤厚爱得时赐循循之诱不落魔境于弟心足矣功名事大而渠父福薄不敢他有所望也弟恒勉之以人品必称吾兄时义必规辰玉莫更沓拖如父拮据如叔也部咨尚未到未敢出视事于元老亦未敢轻渎乞一叱贱名不备

又

廿九日部咨到奉旨有屡荐起用字面留省丞郎所不易得此皆尊兄与元老优假至意而部覆语亦以兄故相慰借殊至但非过时衰劣之人所敢当耳归日境界亦大茶

苦弟留此絕无意味业识茫茫前路无据奈何月朔只得强出了升散而已向者条陈以在南无故牒可考又不敢一切谏询以故多所抵牾仗尊兄裁鉴大半允行迩新宗伯忽有一书极言孔庙之疏当行而有沮之者其辞颇情恳不知的出真意否吏曹言颍宋二公録荫为无有承当之人恐生冒滥是也若赠官易名有何妨碍且嘉靖初颍公已特奏專祠滇中论已定矣大抵前事实系面上眉言之者故自迂阔窃谓当今之世似不可废面上眉毛亦不可尽亡迂阔也

又

昨有一启在辰玉书中托冯咸甫寄去想彻览矣日来见邸报圣主威断非凡缙帅至贵倨也弃之若脱蝸阉党一论死一永戍爪牙剪矣顾尚留此祸本于肘腋令其茹怨蓄忿乘间而溃且中外之人亡问识不识轻有所窥测谓上意偏重若此貂珣之势尚何所底极耶窃以法司必当再请台纲必当邀九卿论劾言路必当合奏而尊兄与二三大老必当力持勿使九仞之功亏于一旦也南中虽有言恐无益于事兄曾言李宁远事弟颇留心此公实良将也讷讷不出口有李将军风长子利口不甚见实效若次子之骁雄诸偏裨少及之者缓急不可失也御史大夫一疏于三吳造福不浅然非兄在政谁能必行三冬亢旱近始得雪吾乡当亦有之明春二麦可以望熟若此阉决去区区老眼尚可拭涤以观太平昨覩太宰感事一疏严旨诮责恐难展布如何如何周抚台为民之心殊切裁省似有次第惟闻北运贴数过减人情稍不安耳水利不辞胼胝而颇咏于■〈影上思下〉想是过严所致物情士论俱属李养愚不知与韩守可登卓异否刑部刘主事被叅无不称其冤者明春大计吏当有一番登进南中所见何以尚似不可不优处朱廷益倪冻周弘禴王学曾皆表袁者周于意气中间老练适诸寿贤赴任见过与之谈识见大进非复吳下蒙也岁晏萧条生趣遒尽无可复道不一

又

昨有一书附賚疏官役去当时虽见台琐连击此阉不容口法司罪状既明叅语亦厉而圣意终是爱恋未见果决以故急欲法司之再执九卿之公劾言路之合奏而老兄与二三大老之力持尚虑其激成正德故事今諫臣逮究雷霆叵测此阉仅准调理雨露已滋如此而望祸本之遂芟内势之不振得乎諫臣语诚狂戇触讳然草茅新进人何知有张冯而文致之法也前者此阉之罪状发之虽自首珣而老兄一段作用自妙其苦心有未易言者何物侍御敢尔妄语波及虽然却有别机括虽不能使此阉不怨而能使上心不疑将来尚可以扶维正论杜遏奸萌第遠方之人不能推见至隱未免传影逐响间成低昂耳圣谕念及老兄家恤不啻骨肉亦何忍仅以形迹报之吳司马欲约九卿有所

攻救为沮者而止然亦觉得未妥盖南中所闻往往过时只了得自己体面而已弟归思暂息为此徒鬱淳新岁终当一息疏却仗兄维持首丘也仙师比有消息否即归终堕落耳闰头阉肉体至今若生不知朱青霞去时何如

又

二十日晚因见朝事纷纭偶有邮便附一启豚儿所令转上次日迫暝始得李沂给事廷杖为民之报而于此阉无所不处于旨无所不温令人扼腕气寒五更时吴司马遣人趣具疏稿烧烛仓皇为之司马稍改朱语及一二紧重字面疏将发而小九卿及三法司各有疏草矣闻翰林习先生前已有疏去留都具臣踈逸闲散岂能上动天听亦只得了自己体面而已初谓马侍御疏祇为三老解疑地耳既读疏辞乃觉其不尽然也此事原系吾兄妙用然秘不传今马疏一出而天下之呶呶窃议者焉能人喻户晓惟愿吾兄不洁其身名以图善后若兄足一动此阉复出天下大事去矣初传户部疏有三分折一之说物情欣欣谓米价可稍平今读全文乃知全征在官留三分之一至米贵时方糴仍责价七钱而于各项板席之类俱无所免岂惟朝四暮三并废阳予阴夺何此司农之残忍揅克一至是也桑弘羊刘晏虽能富国尚不免于身此君之无后必矣弟计惟有一归归亦无开眉日差胜作厚面皮官人耳余不敢及

又

半月间凡三致书吾兄虽知其烦渎触目激衷有不容自己者初传李给事受杖之顷三老欲面奏平台而为首档所阻兄与歛相痛哭正言归即求去既得邸报读之老兄露章自劾且极论重处言官之失忠诚惻怛字字药石语语肺腑若温纶慰留固优待辅臣之体于圣心必有感悟者自此优假諫臣决去阉毒日月之蚀光景旋圆亦何损之有复闻彼给事不至大故汹汹稍定然中外隐忧谓此阉尚在肘腋恐其复幸酿成直瑾之祸兄能保得不至是否上之所以待兄不啻骨肉而兄之所以报上必竭股肱若几之一字在弟则可在兄则不可也圣谕内有亡女事弟谓叔字讹耳既覩疏辞知必长闺淑使者问之果然矣兄为国忘家于此际只得痛割若太夫人及老嫂悲苦当何如仲冬一月间先夺贤叔父又夺令女约畧弟之遘际亦同但弟衰骨莹莹尤所不堪耳骥儿曾以近作就正否云间士论极惜喻守不知铨曹何以处之若松常有缺倪冻为佳弟非私此人也赵司成极服大疏以为二百年阁臣所无此文生平眼中创见渠虽上请告疏而意气甚平知庙廊之不薄之也王鸿胪七十矣不敢引年而以病请不知可一处否董龙山物故矣世界本自缺陷盛满之极令人爽然元夕前后两豚欲来相看留之此间俟弟小疏得请同归可也卦数已周元精日耗一及仙师之偈若负毛刺沈休文年近七十久处端

揆方虞骸骨而乞归老之秩弟官虽微必不至是也使者便聊附讯伏惟鉴亮

又

安庆贼皆饥民中间骁捷者不过十八人总之不能三百人前者醉指挥乘生马为炮所惊阑入贼垒被杀余卒亦有死者彼不能乘胜破无城之邑掠库藏放囚募徒而守一穷山之寨今官兵四集无虑七千塞其走路旦夕当成擒耳近牧所军支天策卫仓粮此仓低洼为积水所渍下多黝黑而攢典军斗又以沙土插和军犹见其插和状欲趣发之而为巡栏隶卒所驱因而闻闾郎惊却走司农已治其为弊者敝部随捕其首倡者六人用军法惩之矣恐流言传播庙堂汹汹敢预闻之场事已近辰玉兄故当嵬峩若衰门退鹳岂敢过有希觊弟毋论官兴索莫即望故乡亦怯归惟皈依一念尚不敢遽自弃耳卦数已周生趣遁尽如何如何賚疏人去附此不一不一

又

昨启事中偶及支粮喧竞一条附污清聴不谓司农丞郎惧谗日私于吴给事黄御史匿彼本情颠罪喧者縁天策卫仓素低洼受水米脚二尺皆黝腐不堪仓攢军斗怨于包赔故恣情揅和沙土于昨冬闕给牧马所军已不胜其苦矣今春复当给散军情惶惶方拟求改别仓不得而于临支之际亲见攢斗辈于壁山上撤去砖瓦而下水及沙土羣欲搜抉其弊而巡栏儻隶以竹篋马鞭捶之使下众情不分因而喧噪拾瓦砾土块飞击主事惊走然非敢有所犯也巡栏儻隶非有所伤也司农虞变以别仓给之归火伍矣此所卒独多约七千余人僚长呉司马摄其众仅捕五人捶之亦仅三十弟窃以过寛不足惩创然何至若言路新进之张皇摇撼也庙廊当自镇静不假弟言建储诸疏何悉留中人情未测圣意所在良为汹汹弟乞骸之情真且久矣若坐待一转当为鹓雏所咲必考绩而后去修途酷暑襁褓奔走又似为子孙作马牛也余不悉

又

近接二书甚得尊兄为国去奸妙用不惮挫名以伸志弟固已预窥之矣第此奸虽谢肘腋尚在窥伺而内有奥援不无可虞所喜者司礼秉笔逶进而同事诸瑯多厌畏之恐未便复振也建立疏太杂太速弟之所见窃与兄同彼奸所云云亦自一种议论但以小人迎合之心而傅会亲藩嫡庶之典则可恨耳今上有圣母下有三公九卿上重名义严祖训不至有他但皇子茂龄讲读又似不可缓如何如何高郎科场一疏似因物情但老兄之高名大节岂他宰相可拟而辰玉之宏才博学又岂他胄可望渠亦波及之愧于

鼎珰之耳矣然犹不至尽废公论而兄之辨疏似过激烈于相度不免小有妨自今以后愿兄勿留滞胷次诸有指摘高生及称峻使者皆置勿听斯佳耳弟之乞归非有他意因见迩来乞休请告者多不见允间思两义俱堕之训寸衷若刺若更赐留不免俟至六月与兄一面即归卧矣儿子衰迟岂敢附辰玉青云之尾且在弟不免蛇足为老子头皮计亦宁俟此耶

又

前有宗人大理便附一启盖时因见邸报中礼曹郎齟齬场屋事刺促不能安故有所陈欲老兄置之若无彼既不敢妄相污蔑亦何容与之哓哓甚口哉昨见覆试之役竣而一比部复有所指斥致触天怒逮问兄与元老复有辨寻得其疏读之则其辞逾直逾峻而大意却以兄之前疏过激有以致之耳兄与元老必当救之前杖李给事上当任其过今若究及主使重有行遣过不在上矣贤郎不入场深可惜壬辰故不妨作榜首暂屈一时亦何害小儿不寄文来而以游辞相枝梧知其必无望也安庆贼本不多而颇有骁黠者官军以乌合不练之众而挑之始则安庆轻敌死一指挥一千户既而黄州复轻敌伤一故守备执去一州倅又既而安庆之故将黄甲军亦见劫凡三败矣一故叅将往抚之为所留三镇之抚臣号令不齐将庸兵弱酿成贼势如更不已势必调楚顺靖一宣慰浙江一营兵就近如呉司马者暂出督之庶可荡平虽然至此则所损不浅浅矣呉司马所条请弟不敢与赞襄亦不敢有所沮盖司马初至见三营之卒弱而骄不可使又以损军之令重卒有不虞不可使之出敌故为挑选军舍余丁得五百余人别成一军教练精熟寻常可以弹压骄卒遇警可当冲锋跳荡弟所虑者恐庙廊之议以为有军不用而别起军外之军增饷外之饷或有齟齬至于旗牌之请盖縁欲借以稍聳骄悍之气为缓急调遣之谋耳不知鞞毂之下可给旗牌否今叅赞之责虽重而号令不能出一城鞭朴不易施一校宜司马之有请也惟二三大老裁之弟小疏得见允便是万幸不迁官不沾恩亦省福之大助也归后万一获沾仙师警效贤于八座多矣惟吾兄悯之右拇指疮剧不能握管授简侍史亮之亮之

弇州续稿卷一百七十八

●钦定四库全书

弇州续稿卷一百七十九

（明）王世贞 撰

○文部

△书牋

与元驭阁老

日覩邸报老兄五疏坚卧不出而温旨慰留益笃上之于兄谊兼师友恩则父子岂宜以不根之语而遽惚然于所天此间物情无不钦辰玉之才而惜其沮至于兄前疏未免以为过激古之一个臣休休有容殆不如此愿老兄一意为国为民慎勿以往事介怀勿以彼党挂口在兄出之无心而左右前后宁无有乘间而修其郗者求悦而进其端者即二三谏臣糺驳殊不为公论所许察之察之弟不为兄言谁为言者骐儿潦倒场屋得窃一第脱老头巾诚为大幸所虑者向衰之门祚薄福之余龄邁此更成蛇足耳此几年来粗知好恶路头或不至大差第懒散任真矫枉过正未便恰好唯老兄时时提命之俾以无竞之心居不争之地慎其行定其衷将来无辱门墙足矣董子遂复翹然深服兄神鉴不知渠天人策云何是玉堂佳人物也小疏已下而不见覆归梦时时故园若此请得果便是蛇不添足也安庆贼首悉已就擒人心就定真失之东隅收之桑榆矣吴司马才望为东南倚重遽欲高枕疾不至甚而脾弱可虞弟但劝其精近医药此身尚堪报国也耿楚侗归思亦真弟既求去岂敢劝留老成可惜耳王继山所处亦是佳事何以尚老矣渠不过欲易一腰章作难如此可叹可叹闰希言者七月以前果患脾泄销瘦寻复壮腴往来潇洒十月念三日忽过孔千户索汤三浴坐倚壁而脱七日颜色不变至今犹僵坐龕中非所谓异人耶独于三月内促弟记甚急此不可晓耳疮未全愈作此书不能悉

又

差官回连得尊兄两次手书具悉迩来诸人意态此事既往愿勿留之胷中兄所云但开骂人口不生害人心此是实际语害人心兄所素无骂人口亦小省之何如弟乞骸之疏又不蒙赐允教云兀老决不肯放宁放弟不放兄已矣弟虽不肯居触藩之羝而不免为在檻之猿考满期逼不能复请计以畏热取陆道以早暮行六月下旬可抵郭门之外入朝后从二相乞先人碑传拜尊兄愍亡弟志铭而后陈情请老亦一便也儿子未知甲数名次将来仗大庇苟免州邑之苦足矣州邑本是男子当作之官而此儿懒嫚支持不过五夫子所以不许子羔也武选郎王一言丁忧妄意主事周弘禴可径补渠以言事谪外跨五六年矣乃闻复有疏极论诸章奏留中之不宜第未覩其辞恐过于切直未免又劳二老一番调护奈何吴司马病不至甚而微有可虞然眼前终是老成明练人闻尚

欲上第二疏弟但劝之近医不劝之归老也

又

弥月不奉清诲此间亦无北便而前者敝僚长吴司马所上条陈疏亦不见下部盖途中有潞藩之阻几成隔绝司马发疏之日而偶感微症以故再上乞骸疏一月以来日进粥仅两瓯今则不能一瓯甚或两三口多便呕哕肌肉尪瘦气息惛惛恐遂成隔塞渠欲再发疏即行弟力止之且呼医调理但恐后疏不能待耳耿大夫虽起而舌尚微结肤色亦欠润此间方少司徒张少司空年虽已过而耳聪目明步履轻健噉肉饭不异少年方尤敏练于疏中所陈一字不合夫病者不得请而不病者横见厌君门万里斯言非诬弟季夏二日满三载矣又二日即北发以畏暑从陆取便朝夕然不能免驱驰之苦得见老兄一伸肺腑及露齿髮于元老太宰见之即仿王父故事乞休苟免后生描画足矣若使结选郎以求迁媚言官以求容必不能也周武选弘禴惓惓以犹子为言闻果楚材也武选所上疏甚正第恐前后俱触中官讳托以出位妄言中之耳若尔必费兄调停但不忍事却于路头甚正其不背兄表里如一也世路下矣山神伎俩有尽老僧不见不闻无尽请以是言进

又

前者材官回得老兄一书甚详科场事而畧于他虽外议狺狺吠声尚未能尽明主司与诸生之冤而弟心则已皦然矣唯末尾所谓方今之忧在内不在外在君德不在吏治弟宁受弥天谤不欲一日默默以自全也又云出处之计兄到五月中自见当时仓卒以为漫然而适会有急足去乃仓皇为吴司马达病笃乞休至情又不免为弟考满事体请质书发之夕于杨太宰陆司寇处始得其详故于楮尾畧及之陆司寇要耿大夫极劾旧奸而及其摇动皇储事旋闻此奸尚未入台省寂然用是中止弟窃与太宰计以为上累月不视朝一切章奏稍关政要者俱留中即此奸不入圣德圣躬又宁无可流涕太息者哉杨公大然之托弟具草而赵少宰意甚合九卿之奏已畧而陆耿更相摇撼杨不能无小动故疏发而质之吾兄及元老以为行止弟窃谓我曹此举纵不达机亦不倍理今大小九卿合上万一圣心有毫髮之悟二三大老寃为纳约改玉改趋固大幸也即触颔下而有加于首事之人弟必具实自陈附义同日必不独留食留京腐粟故乡蜗涎之壳尚足自濡亦岂不为幸哉吴司马不去势未能出弟尚不成行未知何日可握手一谈衷曲儿子似欲觅一小差不知可许否余不具

又

弥月不奉清诲此间亦无北便而前者敝僚长吴司马所上条陈疏亦不见下部盖途中有潞藩之阻几成隔絶司马发疏之日而偶感微症以故再上乞骸疏一月以来日进粥仅两瓯今则不能一瓯甚或两三口多便呕啜肌肉尪瘦气息惛惛恐遂成隔塞渠欲再发疏即行弟力止之且呼医调理但恐后疏不能待耳耿大夫虽起而舌尚微结肤色亦欠润此间方少司徒张少司空年虽已过而耳聪目明步履轻健嗽肉饭不异少年方尤敏练于疏中所陈一字不合夫病者不得请而不病者横见厌君门万里斯言非诬弟季夏二日满三载矣又二日即北发以畏暑从陆取便朝夕然不能免驱驰之苦得见老兄一伸肺腑及露齿髮于元老太宰见之即仿王父故事乞休苟免后生描畫足矣若使结选郎以求迁媚言官以求容必不能也辰玉兄此三载当遂通天地人为大儒一第何足溷骥儿仅得两信信不过三十余字其懒散可知于簿牒恐不胜耳此外絶不敢有他望周武选弘禴惓惓以犹子为言闻果楚才也武选所上疏甚正第恐前后俱触中官讳托以出位妄言中之耳若尔必费兄调停此子但不忍事却于路头甚正其不背兄表里如一也世路下矣山神伎俩有尽老僧不见不闻无尽请以是言进弟却有一心事请教嘉靖三十三年后先人以式遏功荫原卫所副千户以辽左功荫一子送监读书不幸遘祸变时兵部原咨为舍妹夫张生收得后以见还弟必不敢以子孙当此念亡弟未登三品而士驷系渠嫡长今先人荷国大恩及兄提雪得祭墓赠官会作礼部行兵部查功以荫子送监为报今欲借此荫与士驷而兵部前咨礼部后疏皆灼然有据求老兄从容问司封部若可行当于复职之后别上一疏陈乞如其不可亦不敢强聒也

又

五月念八日得尊兄手教前是复得一札于时事更详弟曩者附启盖專为考满事例微有齟齬耳兄教絶不及之乃吏部回咨絶不见许而且示美辞又骥儿信中颇传太宰与兄计欲一处而兄教又絶不及之弟以六月四日发金陵十二日抵淮而秋卿之报者至矣乃知兄不居恩不露几真古大臣之盛节与仁人之用心兄家魏公沂公不是过也弟科甲虽偶深而资薄则尚浅加以謠咏之余当此壅滞之际而一旦超同列而陪八坐静而思之寧不恻然颊赤汗下耶闻既有新命身可以不至京又获以其间归哭亡弟焚黄先人之塋于私计可谓便矣念遂欲称疾乞骸似非人臣之节为神理所忌且大猷在九月中旬只得暂履新任一过残歲当迭上陈情之章赖兄而后可以首丘也昨覩圣谕甚温平藹然有悔（阙）政之意得非以诸老前揭耶将后别有揭耶南中之疏戇而不至触鳞主上可称豁达大度矣弟在南都蒿目亢旱祠祷莫应洿池智井处处枯竭苗不及种种者不一与花荳尽复萎死闻吾乡土方数千里更甚仅有二麦可以支持目前而卒歲之食常额之赋将来何所取办戊子春尚有宿储于巨室者今则空矣计太仓尚

可支数年必须尽蠲兑运之米或蠲其半而以其半减价改折庶几周余之黎尚有孑遗而潢池之警差可少弭不然天下事未知所税驾也诚知二三大老调剂甚难言者主上未必信左右未必喜司农未必担当然宗社之安危万姓之生死实系于此若太平宰相谁不乐为之吾地一时幸为循吏所聚若李兵使李代巡韩大夫熊嘉定尤其矫矫者李真古人也韩之才可以弘济石守初到即能尽革书房宿猾众口称快周中丞之小拂物情在初至耳其后殊自佳且精心为民诚勤露祷为人所称南床过刻遽尔哓哓将来何以使任事之臣耶吴司马诚佳人再上疏而即有起色甫命下而食寝甚甘微气若耳信乎出处有定数弟为国惜此老成耳

又

前有小启附工部赉奏人去方疮在腕指不能执笔托之侍儿歉甚歉甚前晚本部官役回得三月十四日书今晨复有官役回得念九日书相距半月而尚以科场事芥蕙及读辰玉兄书亦然盖辰玉之才与老兄之无意天下之人能信之而主试与诸生之冤尚未尽白老兄之力救饶伸尚未尽着宜乎贤桥梓之方寸五岳也今旷然若发朦矣弟满期在六月二日拟以陆路避热缓行避劳七月初可抵都下一领大海然后谋归适见吏部十三年题准事例一应大小改调官员以调任之日为始不准通考似难成行但弟调任应天原无到任支俸再起应天升刑侍亦无到任支俸后起兵部则以特荐所赴之任非调用之任也所食之俸非调官之俸也与前例本不相同然物情叵测事变难期万一至都门而见却则有腩面目何以见人以故先具咨于吏部俟其报言以为行止即不许惟有一归而已方张甚健而过言其老司徒小迟而即咎其旷虽庙堂相明终鲜生气第四十三年科第十六年中丞化一老触藩之羝然必不敢作趣水之阳鱉以负兄吴司马近小能进粥日得二盞然亦多呕逆气息惛然渠归思甚迫实病势使之此君才识远胜前人心事亦光明独前条陈疏欲添一军则冗费而有隐忧请旗牌则骇人而非国体弟故泥之不得庙堂所处当也贱体觉胜去年或不至如顾观海而日为笔研所磨折自作之孽夫复何言

又

得尊兄七月内信具悉至意太夫人慈颜小违豫食饮亦差减而骨肉之变沓至即傍观之人亦无不为之蹙额酸鼻者而况于兄乎第主上敬兄如师范体兄如父子况时事渐异譬之大海风涛中一二长年三老于理于势可以去乎于情亦可以忽然去乎藉令得请扶侍以归太夫人与兄触目无非感伤计唯有迎徐氏贤寡妹入京相慰朝夕差为要耳亡弟既辱许惠言便足不朽亡者亦瞑目地下润笔之仪不敢破兄戒第令诸孤

何以自安弟以讞审事迫仓皇就道念七日履任矣右目眚尚未复光医云可疗任之而已脾气颇调适肌肤向腴不困酬应第所覩机括如此议论如此意兴索莫殆无复余猷歲一俟杨陆二老引年后即陈情乞骸骨兹时唯兄切念之厂阉复召上之昵恋牢不可破窃度此人似尚有余惴小才浅识亦未必能荡天闕摇地轴数日内闻杨司马将会九卿具疏击之而元老有书力阻蓋慮激之情尚轻而防疑之意甚切杨故中止而陆耿二老銳甚杨恐无辞以复元老苦不可言弟姑劝陆君首以解彼蓋知上之必无他且欲了此一段事也览山人方士鸣冤辞真堪愤塞此岂彼竖子所办耶作如此险譎伎俩反成鹞突岂谓世眼皆朦胧世耳皆聾瞶无奈此两给事何蓋疏一发而鸣冤之纸贵矣渠固欲上知之得无墮其计乎弟此归晤抚按皆真切爱民而按之寬平精练善收物情兵使之详敏恳笃尤目中所稀见吾州守及各县令真荒年穀也上之改折停征倒悬少解皆二相公回天之力唯賑银一事于常镇及吴县不可缓其余州邑目前似未须此且行之稍不得法则皆入于黠吏奸胥大豪之手于单赤故不沾也若能苟留三分之二以助开河既不废賑济之实又可兴明歲之利不知此说可行否赵司成之转南秩宗与张司业之转司成皆妙赵尤合机宜惟赵（阙）之不北与罗康洲之不起皆未塞物情耳赵心事襟宇皆更光霁品格尤出诸公之上不敢蔽也儿子闻有归省之说然选期不遠往来一番徒增费劳且归里之人多咎不胜誉倘以请教止其归可也

又

旬日前有到任谢恩之便小启附计已彻览矣久不得北音不知太夫人食息如何尊兄况味如何弟初见两台臣敢排其长欲变成规新进小生诋诃鼎铉以自为名青天白日恣舞魑魅盆池盎沼亦生风波既骇且愤游兴索莫决意乞归但以履任未几遽杜门请告迹涉轻率欲挨过残歲俟杨陆二公引年之后即连章恳请不谓黄（阙）之疏前已噬及株累銓曹一槩目之欺罔掇拾杨王口吻之余附以刻深文致之语弟考满事后任自以荐起非關调除且所歷乃侍郎升任之俸非府尹调官之俸然尚用前例不敢自安于心咨请吏部吏部谓例内原有偶遭詿误无玷公评者不拘此例仍谬垂饰獎许之通理故赴部耳今以弟为欺罔而谓吏部亦属欺罔何也且以出处议弟则可以考满糺弟则不可疏下之后杨太宰赵宗伯吾家廷尉汤考功及五六相知见过俱云陆五台欲擢吏部不能守画一之法而首举弟不当考满汤不当不赴部处处为人说之缘汤官尚轻故无及者陆与弟相厚不应至此蓋无心之失耳弟名实不孚毀誉争重不去则祸未已故不能不一辯白因而乞休倘不见许则有再上而已失足一出悔吝百端真所谓六州四十二县铁不能铸此错也

又

太宰尚移书见勒及托陆台老令止再疏盖不欲弟之归耳今世路狭促物情险巇若此不归何待无论出处局面即以凡情言之兄视弟何部可移何年可满日竦竦忧逸畏讥之不遑煦煦焉和色调舌以事言路羣少年之不暇且志兴消沮面颈短缩纵有昌言直气触吻而止如此人者将焉用之今之小疏不敢傍及一人似若寻常套子而区区此衷无毫髮不真亦无毫髮贪恋兄一垂悯商之元老得遽遂完骸骨大惠也若下铨部必当见尼盖此公以在朝为佳事以强留为深爱故耳

又

前者乞休之疏计兹时已下如见怜而许之则歲除尚可抵家弟所以强出视事者盖恐偃蹇高卧复为少年苛擿以为尸旷又虑不见听则新春可杜门称疾请归庶为合宜耳今言路诸君贱老贵少喜躁厌恬日夜布尔目于南北以吹抉大臣之过而南中疏逖尤是齿牙间软物中伤者若屠羊之在肆噤不能发一声弟尚何颜可以在列何心可以供事耶耿司徒辨其身之不遑而乃为弟具勉留之疏虽其草之不获上却刻于集中中间过情之誉必招人訾笑第弟生平待之觉鹵莽覩此转益惭惶耳迺者亡侄士驷之变恐累尊懷仓卒仅达之辰玉念此儿孝友忠信温文练事实以亡弟箕裘继之不意一痞狼狽至此行年三十而未有子幸妇孕已七月尚可希冀万一然天意见摧之惨那可必也弟成年哭亡姑亥年哭亡从弟子年哭亡女哭亡弟今年哭壻又哭犹子两家之变故若此知兄必见怜恐亦不能不动伤虎色也

又

兵部官役及疏吏回连得尊兄手教谕太夫人万福阖门迪吉为慰弟素望不孚玷知已尊兄与大老曲垂慰留以全体面己为幸矣第出山初念原以两载为期昨自叨冒一转此念逾切第以国恩知已不欲决裂拟强颜视事至二月初旬而后引疾不意月朔以后毒发右胫其巨如股其楚如刑痕瘡遍体奇痒暴痛夜不成寝肌肉消削神气索然以故不能待期恳上乞骸之章幸尊兄怜而舍之别具一草付骥儿万一不得请即继上也闻王御史条陈疏内有御史黄某论尚书王某不行而反遭其毒给事杜某论尚书耿某甫归而外补继之不知后说云何及有无指染但此事与弟毫无所涉御史自知当出故预点破耳然弟尚胡可恋恋腐鼠也雒评事一疏当令此曹皆辟易雒切实似在海忠介上但不知居平清劲能如海否以造物之不竟酷正月四日亡侄驷得一遗腹子若得成长不幸中之幸也吾宗京兆赖兄力得一迁恐家居避歲或不能不一来所谕周毅轩议论初亦籍籍盖出机戶之口不至躬为苞苴也韩守丁忧民失所怙恃难其代者一

方民命所系兄幸留神渠考满已久而父不得封甚可悯考选之说闻江西人传之余具贤子书中不敢赘

又

久不领大教此心悬悬自覩元旦起居注与恭读勅谕羣臣知天子明圣逾于先朝而兄与二三大老忠诚之所感格不为浅也鲸张委顿若此伏莽之戎欲火当暂息矣而念火转盛如何计弟疏到之日已奉处分不尔第二疏万乞与元老太宰一言拔之苦海归国故园即死亦快右胫不痊疮痍数种彻夜不寐孑然一身形影相吊生人之趣尽矣一春阴雨非风即雪陶弘景爱惜景光今匏系空室春事遁尽如何如何王御史忽发猘辞谓黄御史中弟之毒此人自知年例之及故欲强劫吏部耳今有四大老在内太宰在外弟若有毒焉能逃轩岐之舌乞归之人必不与辨但无端张弟之伎俩与南九卿之威风且被毆之人而反责之保辜此则大可笑也

又

弟为疮所苦者垂两月至仲春之末旬通夕不交睫恶食废酒又三日势忽大减而僧达观者来与之谈胷中洒然已而又惕然至明日得儿骥信又明日拜手教不觉起舞称快连举大白食亦顿尽二缶老兄拔我于热沙而赐之甘露酒也生我父母知我鲍叔知言哉两御史一迁一谪与弟了无涉然终是小有不安得归则自快矣

又

弟自归思鬱淳杜门三月以日为歲幸老兄曲体愚父子不得已之情为元老计放之生还感刻无量第骥儿信云疏于初一日上又一信云初五日上邸报传至十日尚未之见而南中诸僚纷纷乞归恐遂成齟齬昼夜愁疑寢食俱废今晨从张司农所得接报札便是枯苗沾雨老树回春笼鸟槛猿飞走有期何快如之弟小疏既迟前辞恐难复用不知骥儿曾携请教否若得御批径下可以无他付之部议与杨震老同覆新太宰恐不无轩轻之疑须老兄力主持耳太夫人闻上已发舟辰玉侍行后延期十日而复不成发虽黄宗伯之去未必当而留邸之策未为失也鲸张得罪降谪即免南徙财尽技穷度无复振理国家大气数料不在此竖一身徒使思变之人欲火忿火倏起倏灭耳韩守之遗爱弟从众情许为作去思记兄亦宜有言以慰其三载之劳勩可也去役急不能复为辰玉作书计辞亦尽此矣

又

自三月朔得尊兄手教知归计有绪食饮骤进疮疡亦痊又二十日而信复杳然方愁坐一室寻复得兄教则归已成矣眉头稍伸至二十五日得邸报晨传蒙恩许回籍調理且示不终弃之意此皆吾兄见怜言之元老特赐主持苟成一小结局不至狼狈盖兄之于弟无往非生成造就而先君子昔日之恤与弟今日之归尤所镂心刻骨而不泯泯者也弟之始出自计不能过一载今二载余矣已过期矣佛经有云顺逆皆方便何物两侍御亦能佐我归思要之亦善知识也在檻之猿继笼之鸟恨不能实时奋飞次晨即发之栖霞小憩陆五台诸公多追送者然出处之况邈若河山有达观比丘相为砥砺生死关甚苦弟始甚向之既而自笑才脱一缚又就一缚且权放下以俟他日此比丘不敢便谓透悟于见见解中却甚精确而行亦专至与莲池比丘江南两龙象也近属家干于畀园丛筱间筑一静室颇远尘嚣归后杜门息交且图安乐唯三儿子累遭俭岁公私逋负丛积亡弟集已完欲于后卷刻兄志铭幸即留神先君子神道碑亦望从舆元老盖砬石以待久矣时事不敢与闻唯愿益宏茹纳少秘锋颖鲸瑯之不振宗社之福也圣体近何如威刑得小宽否畎畝一念尚有耿耿者兄得无笑其为杞人否丹阳道中遇骥儿平头奴北上聊此附候并布区区不宣

又

前有书附陈谢悃计已达记室矣归抵家园泉石如故花竹日新杜门却扫与禽鱼相流连间呼贤叔及二三老友杯酒相慰儿子辈佐以谈谑一切世态不挂眼先右军云卒当以乐死殆非虚言所苦疮疡已脱脾气久调肌体稍腴儿子向言过衰似欲得尊兄怜决归计耳中夜魂梦亦清适间念及仙师偈诲竦然汗洽前路虽迫亦是细事唯业识茫茫无本可据为忧耳前后接兄两札后意正同且欲弟斋戒启求上真指迷嗟乎我曹行径若此岂肯便垂怜悯虽然弟亦不敢不勉兄云有密揭上上即为感动而用邹尔瞻圣明推肺腑之爱若此岂便舍兄兄亦何忍遽舍也前者抵报有旨急推林下见任补太宰王司马何以首推又何以不用耶得非上意别有所属与外议交左耶石东明之入计府固为曾处阙不知其于握算何如终是一长者大江南北处处菽二麦之收似可倍常将来更得秋成儿辈亦可觅生活恃者岁耳不在大司农也记得往年曾与尊兄谈及张助甫盖惜其有保障之材而非敢保其为无瑕之璧也兄以夏州之绩而知之陈给事自以其才而荐之弟何尝私一张助甫哉使以是波及弟弟亦无所不受若两御史者为弟佐归计固善知识也我文殊大士有云顺逆皆方便何敢尤之钱进士谒选便附此此子温然如玉与布素不异谦冲俭约一介不苟诸郎君无不检束者而此更褻然倘选当邑令幸以北方善地处之承欲为儿子处有使事一职计兹时已定曾梦乡宅大水涨溢甚

可观或可望都水也弟初仕作刀笔吏浮沉四十四年叨厕八座而不免以刀笔吏终故自有命哉林下一叟作天上贵人书而蝉缓不休已矣当为猿鹤所笑

又

朱堦回接手教及见请假之疏与慰赉之命知道体违和询之朱堦云所感不甚剧但元气小弱烦热见凌耳私心摇摇如悬旌而不能驰一介以承消息昨接六月初九日书知己全平且具传迩来时事之详鸱翼小敛獠口亦戢而庙廊雅意欲渐收林下诸贤此是第一要务审近复举一孙不胜喜慰呼儿曹酌酒相庆盖不唯盛德之后麟趾振振而次公之烝尝永有托矣秋风莼鲈之思兄何尝有一刻忘乘新凉唤舫■〈舟符〉奉太夫人归锦里选东南珍腴以佐匕箸即王乐溪过第如所教圣上之眷知如此岂得便遂高尚兄亦何忍负之目下雨暘颇时农欢满耳虽米价尚腾而秋事可望第闻邳徐以北二麦无颗粒收禾黍今得雨否主上前月再临朝云慈宁强之然亦兄抗疏力也第■〈执上目下〉御之流譏有耳所不忍闻者蜂■〈蠢，万代春〉有毒卒生不虞奈何杞人漆妇尚不能忘忧何况二三元老把舵者宜兄之必欲去而又不可言去也李使君离镇道中一物不将去行李三肩苍头二人实时苗胡威之清不是过也中丞贤否册造完久而不即行毕竟欠稳妥韩守绝矣新大夫能继之别驾以下皆奉职州民之福也弟向传喻生诀三日气来效甚切而信周流一身真似能宣鬻导和者然过两月归脑后渐微渐缓行之渐无味矣不知本伎俩固止此耶抑持之不坚耶三日内亦未易功欲不息念欲不杂久而不至则病矣弟年来少病整似得断欲力然右目昏眇牙齿堕尽目前六七十老人大有胜弟者盖先天之授本薄少年琢之故自不易收也初归畏暑尚未出理事唯亲知强欲阑入不能不一见之然送迎不敢出内闼入冬不免料理焚黄一谢官长报亲故通吊慰过此复杜门矣

又

前月使者便附信去是时弟方恶食断饮粥不尽一器中腕气微腾上遂止消息甚不佳幸其不增盛医至审为痰火非膈噎也服药颇效今气不腾上矣粥尽一器更进半矣肤色亦稍润矣行年六十有五于人间之事粗备宁复别有挂恋桑榆之荫能复几何即使此症不成它症亦可上道更何足言所恨长负先师临化之望难追暴弃之愆冀于痊可更自荡涤精进耳兄之必欲求归恐亦兹意然上方寄以昭塞之重待以元辅之礼旃厦帷幄其相倚仗若一身宁忍便舍况边事孔棘庙算未定大臣之谊固如是耶西寇本小弱闻借兵顺义然其精骑不能满万而汛扫我师若汤浇雪其轻我甚矣昨见用郑司马为经畧而先宣大多予之金帛而不言用兵唯切责顺义绝其贡市盖谓郑能得顺

义肺腑之心而用赂使之掣兵以归明旨切责欲以张中国之威而摄顺义之胆可谓苦心之极若此伎俩苟穷何以作第二策弟老病旦夕待尽之人犹自皇皇兄能置之度外耶故乡雨旸调畅吴县小有班驳余俱大熟米价顿减花收不费小民菜色既回中人俯仰无累弟亦粗可责三儿供养矣抚台恩威并行廉靖不扰真师帅父母也兵道州守尚未抵任乡井亦无它坚吾亦颇振作骥儿倘以弟病乞归幸止之已向安无虑也手疮不能作楷勿讶代笔不次

又

得尊兄十月书知念存之切且详近事弟不谓一疾狼狈至此攻补两难医药罔效日嗽三盃薄糜痰气时壅仅存皮骨气息而已弟已委顺待尽儿曹强欲活之延一坐功者恐亦付之无益追惟先师化后之旨知其不永及领甲申之偈事在隔生而乃自暴自弃于一切应酬奔走笔研酒食之累不能裁节有渝师盟惭负天地此心如螫然不敢一念相负所愿吾兄异日归侍师真千万莫忘提携冥冥之中不至堕落哀恳天下事尚可为边警虽急亦宜从容图之但把舵之人自吾兄外仅一瑶老然亦在危疑之际兄更看何人可以备缓急否建储诸疏天怒异常而发之郑氏又增一番疑畏兄昨书所谓大艰苦者此也骥儿粗能自立惟两小者志业未成不能不累指教耳虽然抔沙眷属有何沾恋太夫人万福无疆辰玉天下之宝自爱自爱

弇州续稿卷一百七十九

●钦定四库全书

弇州续稿卷一百八十

（明）王世贞 撰

○文部

△书牒

申相公

具启后复拜教示窃覩迩来好事少年各有所主争为排击以博名高而徼异日之

利乃至风纪之长言路之首反为庶僚之所跽籍虽似有以自取然国体坏且尽矣赖相公与二三大老以正论持之而以宽心假之强喙少息每读明旨及铨部之覆未尝不击节叹服也雒生忠直非圣度之宏与相公之调解已齏粉矣承示南中喜事妄言者略处一二而其党魁以黄生之迁用为下走累下走旦夕去国且有相公洞照不与之辩也传闻元旦召对且见二皇子想册立有机若召瑄之旧说深入恐未便豁然相公亦宜从容相机而动幸毋激也病语漫浪伏祈亮原

申许王三相公

谨启下走以樗栎凡才斗筲小器久废岩穴分甘沈沦往岁先人既荷昭旷之典除书旋下于分于情俱无可辞强颜一出叨忝非分致憎白简主上既悯其非辜又强之供事虽怀忧谗畏讥之念犹深感恩狗知之私不敢不勉策弩蹇追随班列而自献岁以来为造物者所惩右胫毒滋一足如刖疮痍徧体呻吟累旬食饮减少胷鬲痞结肌肉枯削精神恍惚昔人所谓钟鸣漏尽而夜行不休真僂民也陈情乞骸之疏万万不得已诚知上负国恩下负知己耿耿之怀期之銜结蒙许为先人不朽敬奉以归及其未瞑刻之墓道以惠子孙为赐大矣下情无任哀恳迫切之至

杨二山太宰

谨启下走以蹶弛不才名实乖盭见憎白简贴累铨府赖我翁明目张胆再厘大疏辩其非辜乃至乞休之章过垂饬奖曲为挽留下走非不欲勉修职业以上报国恩下酬知己而蒲柳之质已过秋零枯朽之株无复春望月朔以来疽毒发于右胫痠痛徧于全体寢息都废粥食衰减只今呻吟展转苦不可言为此冒昧陈情恳上乞骸之疏幸赐垂悯于苦海热沙中作甘露洒下走生死无非銜结迩来每诵邸报凡我翁所覆掙击疏辞语语存国体依国是而亦不欲伤少年敢言之气庙断徃徃如之可谓中心无为以守至正矣而被言者亦时有以自取昔人有云去河北贼易去朝中朋党难惟翁为天下强留作中流砥柱去国之人不当复以此言进唯宗社苍生一念有不容已耳雒廷评疏可谓一滴师子乳化百斛乳为水而主上乃优容之足征圣度之宏唯册立更行海内之望悬矣某御史之迁下走岂敢预闻而某御史乃以为言盖欲避将来之年例而肆口以箝人亦何敢辩第物情险巇若是焉敢复恋一官以贻清朝之玷哉所喻佛书春和当即刷上不次

姜大宗伯

前得大教以先宗伯公神道碑见委兹得承手书赐督方杜门请告勉尔应命不知可灾石否承示谱传不详孙枝而志辞又前作者今益绳绳矣故不敢备书不然另刻铭后可也见迹来邸报否国体损尽庙廊调剂技穷不得不撰勅谕耳唯雒生一疏见圣度之宏且海内尚有人三月归棹当径造玄亭请教也不一

耿司徒

昨台役归拜手教知未还故邑暂憩郡城且仍有卜筑金陵之意此殆造物者欲得高贤临贲为旧都生色耶贞于歲邸再疏乞休不允入新正之四日足疾身痠不愈复上疏引疾乞休复不允然庙廊诸公业悯而欲放之于三月朔疏四上矣计旦夕当得请也黄侍御之外迁于贞了无干涉王侍御乃引以见咎王之谪得非又受仆中耶此等事三尺童子亦能明之且贞有一归而已何所庸辨迹来觉得心体打迭稍干净遇境不至扰扰亦渐洒落第恐是暂时岐路耳翁拟上书留我且为我白心迹感恩知己要俱有之然不若下圭匕甘露濯我胸腑也迹来朋党聚讼朝堂几遂鼎沸幸上圣明元旦宣戒谕一勅稍尔帖息然而其意尚未已也第攀上君子要须于泰之九二体贴爻辞一字不放过彼亦何能为之有适翁门生宁国梅台祚抠衣之便敢布其私惟赐裁教为恳

潘时良

久不奉教迹来台履万福玄圭告成紫诰重颁忠臣孝子之报盖两兼之矣知己上引年之疏当此之时主上倚鄴侯如左右手宁忍相舍第胼胝极矣返之入坐以论道兼作行差可而尚忍劳以瓠子之役耶贞于国家直眉毛耳垂尽之身尚縻人齿牙而庙堂必欲留之以苟存体面贞虽不才寧能恣恣饱金陵米耶业已三上书不得请唯有再上耳迹日奉牍纷纷若聚讼揆席清严不减闾门市喧非主上寬仁诸老调剂几至于不可解矣然丘壑之与讦直少年相结未尝一日而忘快意而太原不能不树口吻其怨愈深毋怪乎牛李洛蜀之为伎也翁以为何似贤郎孝廉在溧阳威德甚着去后吏民讴思如出一口彼狡者业自败夫何伤于日月比见诸老寂无所闻不欲更起疑端姑置勿论可也盛族有诖误前事者伪作孝廉书求解不敢答其事亦不必追结也儿妇北行得尊舟津送感深刻骨然鄙意尚谓骥儿之南补胜其妇之北上病疮不任手书悒悒不悉仰祈照存

王言卿方伯

屈指奉违大雅多歷年载门下既壮而贞则已过老矣緬惟清贞之操开敏之才扬

歷中外所至声猷卓然以资以望计无能相踰者比来歲与民妬处处无一乐土艰巨之托当在早晚劳来旋定必有大设施以慰羣望贞自丙子归里闭關十二年而谬被物色执节不固强颜苟出尤悔随之今月乞休之疏闻已有见许消息即买舟江口为归算计矣昨秋以奏绩归里一哭亡弟因念门下岐山三鳳錄其少羽与魏氏之失懋权同太原相公之丧学宪君亦仆里中相望者世界缺陷大都不能圓滿良可叹也太史公比当益清胜信使迩来教颺过渥启械若覲拜赐增膺聊此附谢并有薄侑以布区区统祈鉴亮

张给事

仆以衰病乞休杜门待命亦心计公当治装而北旦夕且至京口方欲走一介通咫尺之书而使者固先之矣字字肺腑语语金石惜仆鄙陋不足以承下风第偶有所见不敢隱大抵今日在庙堂自谓一公论于庶僚亦自谓一公论而不能相用高者发意气卑者依势要居山林者欲出而不能遂则成愤激据旃厦者畏其出而苦抑之则成排挤当局者迷真识临岐者背初心閃倏千变莫可控揣执事但中立不倚徐而察之得其所由所安然后鸣之白簡着为赤帟不然且勿轻动也仆为故人所误苟出然自分不过一歲间而已不谓荏苒遂至二載尤悔百端决意乞骸了不以萋菲为恨也季春朔之疏闻攀上君子怜而许之旦夕可问故园矣承示六编足征清河文献之盛与贤桥梓金玉至心仆得托名不朽何幸如之归日多暇当勉尔塞白外薄物将意非敢言懇伏祈照亮

邹孚如

昨者上事人回接手教及致三疏草有味乎言之也首疏初见宰公同九卿上之忤旨而不悉之以为剗切渊粹老臣忠君爱国至意天真流溢蓋疑其草者而不可得得之足下了然矣第二疏于事体极明哲审尔仆所叨恩典或可无他不知曾具题否若后疏则详而不杂直而不肆其始若逆耳而终则当悦心贾陆之材略衡向之经术不是过矣雒生封事莽莽激伉似胜公大雅则不及也迩来后生意气树党排击纷纷不已今得无为虞芮之交馁乎雒生乳一滴散百斛乳矣公可且舍章俟时作选郎斥陟贤否一番胜十疏之上而不用也仆决归矣不归断无出视事理当取公大集细効丹铅焉而后有以复也仆与儿子书絕无小人之忌而君子之疑语公或误闻之乎疏下考功千万相劳一决拔仆于炎海也不一

喻邦相

仆以仲秋之抄抵留都任更二日而元孚以急足来致公所示诗大骇不知所谓蓋

偶未见公拂衣之报也次日俞驾部来谒叩之云舟已发矣又次日而从元孚所得信云尚未发也亟归灯下作数行使吏驰之舟所则发矣云雨虚无缥缈倏忽使人恍然若失又爽然称快也神龙不可鞭御麟鳳詎能羈■〈廿奴〉真男子哉归侍太公二簋之奉怡怡如也出而眺匡山俯彭蠡一衿裾间物耳仆守志不坚为人所误苟出应世见讥白简虽荷圣明昭雪然破甑在地寧堪收补所以累疏恳辞迹似蒙见怜已买一舟江口相待矣视公虽落第二义然尘土幸未深或不至为猿鹤憎也有周山人道在者能诗善谈笑意欲谒公于豫章贪与公相闻以数行付之俟作弇园归人细和佳章奉赠也方饵药不一

张冬官

仆自暂归休沐冒余暑履金陵任仅一月中流言杜门乞休两阅月始出出不能旬日即闻犹子之变入春三日又复以病请告今尚在医药间忽忽无好怀抱以故于生平故人都不能具竿赤初从邸报得大疏心窃疑之岂其有霜露之恙耶既而知其无恙也乃曹子念极道公杖履游从之乐不减东山且时时见谢公捉鼻语令人神思爽然仆真小草矣今者似不遠之复旦夕得请即老不能追随■〈足必〉跋于少年场一觴一咏步武当不遠也子念又言公有迁葬之举且为令先叔备极情文自是厚德高谊非仆可赞教翰雅贶专使遠存毋乃破公不作洛中书例耶国是纷纷尚在迷局固不敢出仆口亦不当入公耳聊发一慨而已薄侑附械伏惟鉴纳

宗良君侯

柳陈父来得老兄笺教如奉颜色比想道履佳胜宗正约束渐寬匡山彭蠡之间不妨轻刀篮笋当尽吐胷中之奇以示不刊仆老矣齿落已尽右目渐昏忽忽笔砚所见窘几无复生趣况以簿书酬应杂之所得几何而擲此桑榆之日以故决意上书乞骸只在旦夕矣昨秋归哭亡者屈指生平交知称兄者于鳞德甫子与子相公实称弟者肖甫及吾家阿敬今仅明卿伯玉及仆无恙耳洪都朱邸三儁已失贞吉兄与用晦白头昆弟也如闻尚有参差私所不解名者外至之物何容置我方寸耶昨有一僧号达观者与之谈觉得一切都放下唯于回向处尚懒散此味不敢独享敢以荐兄不一

傅金吾养心

仆生燥髮而习闻公侯世家列传慨然念傅颖公之功大而报微也既登朝则再上书一报闻一议而竣后命然不知公之后絕与否也今者得执事书世系志乃知执事之

曾王父后于季公者季虽后于公友仁而实颖公之子也以颖公之功与傅之多明德执事又贤而好文能无忘其先而蔡子故人也又为之介绍以请则何敢辞恨荒落不文无以报塞至意耳得蔡子古文数十篇遒劲峻洁仆之畏友也执事高斋中可谓得人矣玉带非病骨所胜且仆例不曾受人润笔谨领二币以见来雅本草发明甚有条理执事刻之其仁远矣谢谢书刻侑械不一

王都阍

移疾杜门两月与春色相负得故人一信盎然自愉况乃重之以珍味乎后信乳柑尤佳绝今年温郡无运艘王大叅失约龙博士迁刘将军死分绝此味久矣剥之则香雾蔼然咀之而甘露溢齿便若与王会稽相对也仆乞休移疾凡四疏矣今晨似有生还消息想所欲闻者有贵司公牒小迟已托之府大帅矣手疮草草不一

王松屏

当不孝兄弟伏阙时辱先宫保公盼睐如骨肉又辱为先尚书作传盖时时在心腑矣而山川阻修鳞羽阔焉亦尝再奉候书而不蒙报岂令先公保嗇天和于一切竿尺皆谢绝耶将无所托之人皆殷洪乔也每从蜀中士大夫窃闻起居皆云朱颜宣髮气充而神王若有得于玄素之秘者彭佺所不足道也迩覩邸报则已游帝廷矣天不憖遗指南何托第上厯圣衷于太宰宗伯太常司空之所职司咸举焉而宫保公灼然中兴一代名臣孰得而拟之贞衰病强出处非其据已杜门三请告矣适贵邑之旧吏来告别仓卒中不能具一些而仅以不腆之芻帛徃道远而其人未可信不敢从腆唯长者亮而存焉以宫保公之高朗令终显融昭明老丈可稍抑性以为天下计矣余不能多及

沈箕仲大叅

昨春承使者專讯草草裁报计彻记室久矣执事行部多在匡山彭蠡间涵贮方寸发为文辞与斗文争雄胜何快如之前得贤叔氏书叙病状使人酸鼻旋闻已勿药甬东江阁有海王之输杯酒啸歌膝下幼子稚息娟娟如玉何必嗷嗷侯门博冷酒炙耶仆老矣虽忝列常伯而实无深知者亦无以自见虎欲嚙人不避豪贤势殊可畏以故前后乞休凡四疏闻攀上君子怜之旦夕可觅莼鲈乡矣朱虞對学宪凡三四寄问而不值遣信者且涉嫌疑不能作报烦为一致声喻邦相真男子也干旄亦时过从否不可失之适周山人道在便附此不悉

倪仁甫

仆至都门憇观音阁诸故曹长皆会而独不见执事怪之则知以内艰归矣为执事分哀则不能欲有所效生刍之敬则无繇方在惻惻间而使者至矣出所致教辞读之泫然涕涔涔也执事通家故人也为先慈以不朽请仆虽困笔砚宁忍以不文辞既得卒業大状草则执事之文巨丽极矣中间挥表淑德及尊公与贤昆季之令行嘉祜所不敢废若贤昆季交游之盛无关内则者窃有所汰矣尊公在法不当称太称太不无触忌也子女嫁娶之详或刻于铭左或执事增入之亦不妨厚币所不敢辞却有不敢不腆之敬惟登之几筵是慰

张伯起

昨过吴门急欲归哭逝者不能叩求志园精庐为恨归病脾已病右目稍起即为乡人腰项所困忽忽不知作何状念抑之太宰逝矣典刑渐沦知己遁尽仆小于此公十年而长于亡弟亦十年昨哭吾弟今又哭抑之中间何以自存能不悲怖唯吾兄与仆齿在雁行庶足相依共此桑榆之日第望箕颖高踪当息心而却虽然中秋后必强一相见献歳入春不妨共斜川之纶也不一

张幼于

前冗次草草作报计已彻记室矣抵家仅月余病与人事各得半而又有上冢及吊海邑潘氏之丧间之忽忽又将治装矣衰与懒会意殊不欲出而又不能不暂出崦嵫之日能复几何而轻以道路擲之且念抑之太宰奄逝使人神沮此公名位禄寿殆无可憾所惜者典刑渐沦知己垂尽耳姜宗伯得请且复加白香山分司之秩足下亦一之否兹遣信相闻为中秋后期念劬丈烦致声亦于彼时当领教也不一

王百谷

金陵旅中每辱足下书至满一小篋而来谒者以足下为筌蹄不索报径去故不能尽酬仆腴颜小草报政至淮而返过吴门不入急欲归哭亡者到家仅月余上冢及吊上海潘氏丧忽忽复将治装矣计中秋后两日可专造半偈斋贺老蚌生珠尚可补汤饼之会母爱子抱知当不靳也谋野集盛行市肆间纸为贵而不以见惠者将无不欲不佞尺牘小进耶唯念之

答张元春

京师逐客如蝇袭腥散而复聚留京客则蚊子■〈口替〉铁牛无血可饱亦无驱者足下何所惩而不来或虑疟病君子所以中沮耳仆考满一事似小有齟齬俟回咨报许乃可成行三千里酷暑长途甚怯不拟以身试之足下乃遣人一看即得何自损嫂机杼中物乎又不忍拂足下意聊受而以他物将酌幸勿怪仆今春颇能食饮气体亦稍腴然桑榆之照能复有几任之而已

李允达

前者辱长笺数百千言新诗古近体种种皆极输写尔时为都试诸生所困重以友于之戚忽忽无复生趣不知所裁报仅得一诗塞白亦不解作何语不谓足下之爱而忘其丑若此也缁衣之好陟冈之思盖无处不是亦无念不笃至于后所示一笺八律蔑以加矣顾仆何人而敢当此念金华古多灵仙异人独于文章未数数明兴若宋承旨王待制之流可谓博雅君子至于返古探始尚未之敢许也不图迩来超识有如胡元瑞者元瑞之外乃复覩足下足下于元瑞所著诗藪尚疑其进信阳而退历下缘元瑞从信阳入门此一瓣香不得不归之耳足下第从历下入无害也前书示先青州公状拟不佞志其墓中之石循览状辞私心伟之欲握管而迫它冗未果兹辱再及之敬闻命矣今年六月以考绩北上抵淮而有新拜归扫先垄哭亡弟与邦君大夫宗戚友生酬酢忽忽亡须臾之间而使者走金陵而南粮尽促报甚急故不能详刻诗一册仓皇读之觉其神采趣味俱朗隽唯追琢之功少逊耳律诗押韵尤不宜脱隐侯腔律者三尺律也望后当复之白下然以新正决上书乞骸三山秀色恐不能迟子之驾如何雅贶拜嘉并有薄侑不一

吴国贤

远承手教雅贶深感至意独启事太用世法非生平故人施之于同调同志者后勿复尔也辱委为二孺人同表墓古似无之念兄伉俪之笃聊尔命笔第来状甚古而仆表则今恐不相当且未足灾石耳强识略奇书也梓之必传第不可不加详核兄出当以何月谒选此地赤邑倘借重为金陵生色何如仆已乞归冀得请矣余有别布不悉

答徐孟孺

别后时时在懷仆不能自慎以来憎口第吏部职掌有被劾调用官负以调官到任之日论俸不得并前一槩通理但仆原系荐起非由调除侍郎非改调之官未尝一日支

调官之俸质之铨部铨部却引十三年奏奉钦依有偶遭罣误无玷公评仍准通理许而后成行彼此俱无欺冒也此御史者不知而妄言之欲驳无玷二字遂加苛饰今者部覆甚详明旨甚确仆虽有辩辞一疏或多不允第仆素薄宦情出非不得已且物忌多取人贵知足已决意乞骸必得请而后已兄但识之来春二三月可访我于弇州书室也人情士风败壤已极一见旧阍复用绿林之戎砺刃以待山人鸣冤兄见之否太原公能不立髮也承專使手书见念之情真踰骨肉感甚感甚余不次

华孟达

迩从除目中得足下补官报不胜慰情既作选人非久无虞桂玉而浙又天下首藩幕府多暇轻刀篮笋从容于吴山西湖之间一切烟霞泉石诸胜都归锦囊中矣得手教知以兹月中旬履任兼辱清觥况如亲承颜色仆已四上乞骸疏矣颇闻庙堂见怜有相许意五湖长印复当见归想足下亦为我称快也所需吴方伯书谨如命此公怜才且复具眼见足下自当下榻把臂岂假鄙言而重耶王都阍亦为作一书其人亦佳士也与往还殊足慰寂寞仲达兄幸致声薄侑不一

张叔琦

仆自戊子夏得吾亡弟耗已又得尊先公厌世耗悲陨之后顾影忽忽若不知有此身者唯欲效一言以自托于不朽则后死之责耿耿一念无己业为亡弟状其行矣仲春初使者万里来得手教及刘玄子比部所草尊先公行状而以地下之石见拟也不佞即不敢不辞然何忍辞适会上书杜门引疾乞骸得少余日次第成此仆生平覩李于鳞之孤峻絕俗尊先公之恢廓并包以为世无能鼎足者若徐子与汪伯玉差近先尊公姑未论其文其材用似不及也先尊公之功业伟矣志语不当及吾曹倡酬谐谑细事然尊先公精神所注故不能去之今庙堂之不右文士久矣去之操觚少年将以我为傅比也陆太宰每语至易名辄为扼腕欲言之主爵仆独谓于兹时即得必不畅人意日久论定谁能小轩轻哉所寄尊先公遗留物无论润笔是尊先公手泽受之不可却之不可其晋公重耳出亡图北宋名家也行笔极精密细劲而拂拂有生气正何必李伯时第考重耳出亡几三十事而今仅十帧可考者七事而已以此不能为完璧今置之案头朝夕展翫令人思尊先公也古铜香盘留供世尊前若玉带蟒袍值过重且非老病尚书所可望御者却附使者返之薄芻币修几筵之敬不一一

与騷侄等家信

昨午后得汝及驢儿书汝兄駟以十五日三鼓奄然不觉惊晕絕倒此儿孝友忠信温慈和理生平无纖芥过最能得我意一旦舍我而去何以慰我老懷且生平遭遇偃蹇未尝一舒眉头今更夭折痛哉痛哉闻汝嫂妊身已七月倘得举雄犹足少报为善者然既夺汝父又剪汝兄天意叵测如此又安敢必也汝母既在哀疚中复遭此变情事可知汝与駟宜朝夕委曲慰劝以上有大事未襄下有儿女未了强进粥药自排解汝嫂尤宜抑情保嗇汝兄不絕之线系伊一身沟渎之谅不为节也柩停楼下差便但不知出殡时廊下可容发棺否不至拆墙否开丧事应寝蓋父服未满礼称罪人不在母之存否寄去门帖可写用若近房兄弟至亲好友谊不容己者间一领之赆发亦不可缺汝兄死百事大小在汝駟矣汝身亦不甚强壮须加意节慎今令驢儿帮汝凡事仍与潘省老曹永懷计议坟上穆位尚未葬泾水何得言冲若冲汝祖位下右胁于次房或不宜耳既已拈破可备价买金氏田改通泾头又闻人言东边过街楼不宜亦当拆毀第此等皆小疵未必其应如此之速而祸如此之大得非新宅位置有所不妥乎从容延堪輿家一看如何高低乡田系汝兄者恐管庄人生别意可禀汝母严核之我于前月初六日晚梦汝父对我言我象碁心法之妙唯此儿能继之一旦狼狈至此寻淚十行下覆面涎涕溢口失声我亦痛哭而醒甚疑之蓋两日而汝兄病信到矣以故忧之特甚然犹谓世无可治之痞亦无遽死之痞盛后和即到亦无如之何然不谓其速如是也和州之术神矣竟无反矣痛哉痛哉余不能尽

弇州续稿卷一百八十

●钦定四库全书

弇州续稿卷一百八十一

（明）王世贞 撰

○文部

△书牋

答汪象先

贤叔父来得足下手书申契阔之雅及损饷扇盒俱领讫尊公衾中无恙侍膳读礼之暇著作日新不朽大业成矣足下足称佳子弟第近闻稍有纷纭蓋叔父云尔得非以

酒德小累耶勉旃自爱仆自入春来于生人之好一切从澹唯文字结习时时往往作挠耳方欲驱埽之而足下乃犹嗜其土苴耶聊附一部去不足存也贤叔父出足下所藏三种戎路表黄庭经右军杂帖皆宋搨纸墨精甚然是思陵手临殊于大雅不足阴符经乃祝希哲书刻石者后有颜真卿云云一行下褚遂良字割作贗帖耳希哲六体书极真而不能大佳其仿眉山双井尤劣漫为提出想足下不以为讶也病目草草不次

又

不见足下十年矣每长公过我偕二仲杯酒流连念若少一人者乃足下竟不复过我不敢以为望第觉山园少足下足下亦少此山园两缺事耳长公作大縁事于金焦间帝释天龙人非人等俱拱听第不免折芦老僧一笑如何计还罨已久闻为叔氏授室腊月十八吾家少儿亦尔自此可完向禽之诺矣茅平仲磊落男子也惜仆方习静倦饮不能数周旋书已为致之矣太清楼帖佳甚政何必出朱忠僖乃为真耶二王楷亦然但非秘阁全本耳一一为跋讫并扇附纳珍味祇领薄有所报勿以为褻幸甚

答华西湖

公集成而需不腆之言以弁也则孟達兄弟尝露之矣今公复以诚恳而二子先容焉仆虽陋敢忘其诺且幸而未及献歳墨卿犹在御也公年今七十有七耶而好吟不已思托于豪贤如百谷辈以传甚壮之念之使者将集至时已迫暝啜术粥毕即烧灯畧读一过大都多和平尔雅之旨第集名骋游未甚合至乐府诗余而后知靖节之赋闲情不虚也仆久不受润笔而公所贶皆机杼中物不忍孤来美谨拜嘉独诵书辞未类意以为仲达笔不则郁人文也昔陈琳为曹骠骑作书子桓疑之而复托琳以书辨公得无类是乎然书以叙悃信情而已不必作此吃吃也一笑

答华孟达

华与吾王为世讲而又世姻也顾独不识足下乃至耳中亦未有足下而一旦忽拜足下书及诗乃至并得足下全集而读之仆跌宕翰墨之场三十余年矣所接海内名士殆尽而于一衣带水地羔帛还徃中失足下良可怪也虽然士怪不终合不怪晚也足下以臭味偶入故所饰奨仆太甚使仆惭于前辈长者及吾先友然而足下自从灵扁得之非随世漫笑哭者仆安敢复置喙也足下诗在浓淡间时具悠然之趣而调复朗朗文简劲有法尺牍尤隽永苦乏踵门者不能尽足下才耳过此当日益弘诣诚未覩其止也后序为仲氏将足下授之意耶抑自草耶自草者仆又失一人矣伯仲之亟称郁人文者操

觚凡几年其人未老否不然仆又失一人也小暇幸与偕来仆将启弇州园而扫容觚之石以俟雅贖种种云霞之润溢我几席后一月当成序及报草先附不腆之谢于从者幸亮存为嘱

又

日来携集丐序者麇至意殊苦不能应之独至诵足下诗文辄令人爽然捉笔构语不觉清飏之入懷也梓之当令晋陵纸贵第不知仆重足下将足下重仆耶所愿更益充吾学养吾气气完而学富遇触即发有叩必应吾常操彼之柄以役之而不受彼役乃足称大家耳六朝以前所不论少陵昌黎而后苏氏父子亦近之惜为格所压不得超也北地济南格超矣其诗不受役文不能不受役也足下勉之辱示郁人文要须一见之不则得其著述亦可所饷名迹种种第山房中非缺此而损足下橐装后勿复尔也序稿呈览外薄意附报不一

又

足下念我至矣第每得一信则文日益多又益奇且工也所致左氏谋间及两生往复书病中强读之不厌人文之嗜古笃矣毋论谋间出左氏卒卒竿尺语亦左氏也仲达谓其敷言似子云毋论不见敷言即卒卒竿尺语时亦子云也乃至作迂殷诵洛语于寒暄讯问间亦几乎牛刀割矣奈之何不使握如椽笔效丹墨旃厦也仲达才本高俊语时出以法故让耳大江以南操觚之士仆必识之而以问足下间得百一应耳以及人文及仲达则百问而百不应噫嘻我知之我知之不佞披■〈才昌〉于天下垂三十年而今乃信诸所以得名者非吾所得意者也大丈夫贵心赏耳虽然亦愿有以效三君子夫日月星辰其垂象亘万古而长新者元气布也黄河之流歷万里东注海而不屈者元气贯也不有孟子庄周战国策司马子长足广乎玉虽贵仆愿三君子化工之叶木也不愿三君子玉工之叶玉也仲达书中徃徃有好仙语意欣然若有会但不宜误读抱朴子悟真篇落汉武黄金灶温柔乡穿耳仆过中秋即入团焦涂墜四周如袁夏甫惠生五车一字不得用儿曹甫踰髻即令受产以此尚愧龐公足下为我觅诸名士翰墨深愧来意之辱为留沈氏则一帋其它却附纳勿见讶也食品拜赐归田歲间所为文辞得四十卷只堪覆甌耳

又

郁人文来云以太公违豫故足下从事医禱间甚苦不能走一介讯问而使者以手

书至矣四絕句朗朗是金台宫中语但朴实无所证块守一室焚诵为业仅欲息机埋照以俟异日之引而过为诸贤饰画令人且惭且畏太公当以勿药比来江左殊有百歲人毋虑也足下文必传世丹穴渥洼体格已成但长其葳蕤极其蹀躞可耳吴中顾山甫诗而隱者也品格高甚贫不能暖突惟足下一过访之承损饷食物破例领半以章来雅后勿复劳筐篚也

又

灵駟见访时适于俗客有所畏拟以日下春烹葵烧笋作物外谈而云雨飘忽不复可踪令人怅然足下诗譬之宋卫己自成国采而为风可删者少贤仲氏则大邦赋也然尚未受命于东都虽磬控纵送洵美且都而少一段如组如舞在仆既蒙物外之赏当必有所效幸小寬之羸病初起气息憊憊流火之前或得如约也金刚经是宋佳刻而解者一村老儒开口说波罗密比之荆公三昧尤误今却附璧勿讶勿讶

又

仆自仲秋后体始得小挺而日苦笔砚役忽忽无寧思足下诗大抵成就少可受雌黄者故未及勘却为仲子勘一番然亦任意兴时发时懒去取或未当仲子天才大有神至语亦有从苦思入者第下韵入字徃徃未穩協以故句饶专力而篇少全功譬之未攻之璞驟令拙工见之不免相累老卞耳昨见宗伯公意不甚满仲子尺牘以檀左法不可恒用恒用则为人所窺郁人文小语自咀自誉可耳难于贵洛阳纸也此语似有致足下识之别纸所谕大阮欲得诗序仆于新正誓絕此障矣今则未敢悬却也百谷好于笔吻间作业不唯调此公亦似调仆呵呵

又

前者承足下与山甫枉驾出所梓新编见示俾为之序既而读之徃徃取清适而绌雄竒贵风度而略气格若吴子诸近作多辟支佛果非大乘十地菩萨位也以足下已诗证之大有胜彼者可知己内篇之目尤未献服众志憎兹多口以故拙序多归美山甫实欲为足下解纷耳亦不必与山甫言足下更后十年当率诸侯攘夷摈楚而后谓之盟主不至作句践纵横江淮间而已仆所评拟似不必列卷端中间取一时俊快未可便称汉廷老吏也何如何如

又

向者足下过金陵时方苦应试之士麇集襁褓报谒挥汗成雨于生平知己竟遂寥简此歉何如亦恃长者见亮形迹之外耳足下为名场所耗磨别托贖郎以了壮游之兴若长卿文人次公循吏俱繇此阶何自为屈倘携近集百卷燕中如陈伯玉故事当一日而名动公卿太原公故知足下必为倒屣仆之此书亦赘疣耳区区衰老对镜自憎加以手足之痛乞归不遂当图再上其它笔砚之债牵累无以聊生足下亦怜之乎西虜纵横南盗猖獗而肘腋之间隱忧复深见太原公眉头恐亦无舒理雅贖祇领聊附薄报不宣

华仲达

吾师昙阳子以阳九日示化也则拳拳不佞寡言省思矣居二日而足下书至夫不佞皇皇焉若有所失惴惴焉若渊冰之践而遂遗训是思安能复以卮辞溷足下虽然足下之念我殷矣其文工矣仆又且闭关果尔遂失足下矣夫向者与足下伯氏书谓三君子为造化之叶木也毋为宋人之叶玉也夫雕虫者文也其谁能不叶玉谓叶玉而不失叶木之意也篇有眼曰句句有眼曰字字有字法句有句法篇有篇法此三者不可一失也顾世叔者不知何如人某吾粗识之彼自作佗父眼耳求足下一报罍恐不易得也抱朴悟真之误非谓抱朴悟真误也谓读之者误也真人在己莫问邻太上若预逆后人黄白交接事耳仆毫未有得其闭關也譬之沐猴效禅僧坐今又以足下故而违寡言少思之戒幸言不耐长而思不耐沉以此小自解耳大贖拜嘉少有不腆之效亮纳为荷

又

得足下书读之其书仙也再得足下诗咏之其诗仙也已而窃窥足下之心腑颅骨仙也然而微有疑于足下仙者非谓足下不仙其志与气也非谓足下有大父及嫂与诸孺子之累也以能一习未洗耳虽然不于足下验之乃于仆验之仆自奉先师海拔之于炎宅苦海中跽而矢天以出世为急亦能捐此鸡肋还县官矣捐蜗庐与蟹螺之产付儿子矣山池馆榭之靡丽名迹古器之瑰奇澹如嚼蜡不挂口矣后庭故无人绝不寘意矣入關来亦焚笔砚然既焚而时忽置之此念不能都尽以此时出没为太虚累仆老矣犹不能尽之何况足下方鼎盛其春秋凌西京攀先秦而慕三代之英别镂五藏唐突真宰东家食西家宿殆亡是理也先师一脉自葱岭来荡识虑词藻而空之数十坚固不论已仆亦偶及之安能强若所就而从我退之文人其所诣岂仆敢望然晚节自为绛桃柳枝所黼啖硫黄鸡炙死毒耳何名仙去也歲晏冰雪且学昆虫闭關足下与郁人文幸勿来春中隔溪禅堂成或足憇长者辙耳勉旃自爱

又

人文归无何而伴复至则二诗爽然快目稍一诵之九咽作青精气长谢君王莫赐环知言哉仆于至道无丝髮得唯世縁一念粗息耳又所引仙师示赵沈二子语具见超识足下遇真师者何如人哉即祖耄母寡儿女累累不碍真如火宅中正可下莲花种子仆苦未办此聊借境以逃耳昨见二三友生云足下能前知果尔却不敢荐也纵有之勿作圣证佳耳楞严经中世尊语可畏昆季诗皆宜和而意不欲累笔砚兴至当一为之不一

又

郁人文忽忽土木人也以弃诸生故来便自不凡斋居不能学逺公破木义呼酒与匡坐许时觉钟鼎色射人眉睫出其文左氏也亦须念樊宗师障可爱亦可畏也足下好仙而疑我晁阳师于禅则足下所好仙楞严中十仙也以此度世可耳何渠能出世仆不敢为足下道破今学士家刻师集展能识之尊大父所苦想已勿药高年幸倍将摄不一

又

仆自十月来苦脾弱削之甚而受役笔砚不休气息憊然几不可支每读贞白先生作才鬼胜顽仙语大为所误元驭与家弟苦相制勉进一肉勿开卷矣旬前读公诗且大半大抵神来之语迥自意外天成之句高出物表特以体裁未定瑕瑜时出方欲少效雌黄为公作忠臣得来谕虚挹乃尔益不忍相负矣新诗尤多警致并容请质瞑眩中阁笔再三不一不一

又

仆一入夏秋来病时间时起小挺即料理伯仲诗而为地下之人所苦不得精治之得所示新诗思益竒进令人心折此月尽可以授简矣所云近事不足挂之胸臆大抵外魔有尽内魔无尽若以此介介则终为彼么邪子所胜矣一笑一笑

又

数得足下书于仆致精恳而又有物外契故不敢辞而僭为之叙第所去取有出于一时兴倦意懒者足下与伯氏再商之可也名世之语故不在多不朽之计亦不贵速吴

子辈眼既少珠吻乃多刺昨因喜胡元瑞近体诗许之小过情渠不免沾沾为羣喙所囁
几无避处足下自爱自爱仆笔砚縁非久当断矣

又

仆无故为人所悞仓皇出山生平兄弟一旦奄逝无由执手为终天恨部事无几消
长安米不尽唯竟日矻矻笔砚蒲团遂荒初春略应酬人事则笔砚又荒矣秋深颇有建
白即上疏乞休而不见允出月当再恳弇山一片石尚可偃蹇卧也足下风度潇洒故事
杨君玉斧之流灵真悟契逍遥俟期何物阿堵足以婴念第闻亦有奇疡当是行持偶过
旋已就愈自爱新诗冷然之致令人神思飘越小间当为奉赞且图和也闰希言去殊畅
遗体岿然比之何蓑衣丁野鹤为胜足下何自损文房之饒乎却有薄报不一

华存叔

得教及损饒名酝询幼兹具谗道履清豫跌宕诗酒间殊足生活不似长公日沉沉
燕坐而已仆自十月来忽尔羸弱渐成骨立为家弟及友人所强稍进一肉补之不能终
头随行径殊自惭愧公念我且悉至爱所云幼兹和美易谐而少坚苦恐徒箸之后为应
酬所夺仆亦觉之见辄相规切第王简穆一言长梁斋便自辍胜于乐令清谈累日也公
书法駉駉大令以故多外拓笔日益工而结体益廓落竿尺往返小敛之何如近刻山园
十记将完之后却奉览不一

又

时闻足下善病状辄为悬忧得手札云向康豫且词翰斐然审跌宕杯酒间尚有余
劲也仆一太行坂傍驥耳导师解羈络而饮之清泠以故易为驯丰草长林差自得意然
欲调此飞腾蹀躞态于不饥渴时亦自难也所云潘大司马口仆不置此自误爱仆耳非
爱道也果爱道者胡不以一介来叩仙师羽化所以而刺促修冶城公行径兹附拙撰师
传乞足下试一读之能暂脱五时衣御白帽握麈拂趣故自无限也

汪仲淹

记别后曾附一书足下竟不晓何人亦不晓作何语与何事仆侍师野次狎风见侮
疴鬼几遂委顿今虽能步履饮啖尚未是完人益信此色身合离刹那间业分产授儿曹
生平嗜好洗刷多尽一俟师羽化即披破衲入团焦矣向亦曾以报长公不审相领略否

念足下嫂良而天且不欲食前约破例成此志铭而足下别纸为小竖失之遂尔草草第此文在长公召陵师或可当陈郑一赋耳适乡人瓜戍者便附此不一

又

新安戍归得手教知叶熊罴之兆不任踊跃欲界天中乐无以易此者计长公起色满大宅当相与侍太公作汤饼饮耳七月初仆及元驭学士俱见侮二竖子几各委顿惟长公亦同之此曹么么都无眼耳却不如唐诗鬼犹能畏花将军歌也芜辞不足以显逝者而郑重相谢又申之以经像诸物种种妙好既不敢郟复无可酬如何如何弥勒经佛面竹留之大叅同室中余从儿子博得伯虎一畫将意不知其足相当不也先师化像石刻仅存大都生时煜煜不定相虽僧繇无所措手聊附去一纸拙草大传成不敢望称传神或十可彷彿四五耳家弟体多羸疾而抗志物表虽有秦中游恐不作久计想亦长公欲闻者余不一

又

歲晏凄其冰雪交沍窳伏一斗室中如蠶瓮蚕而使者忽来出手书累纸言言皆啗沈水屑至以豚儿策名为我欢剧携如意舞此儿■〈足必〉跋名场初亦有千里之势一蹶后遂无复情不谓伏枥小鸣忽尔惊人第嫌其蹠弛不为遠器耳仆坐此不免出与里舍子酬酢赖其出门得以弛担然疲惫之余形神了不相掇真所谓逐兔而失麋者也世法中人尚以我此言非信耳长公何善病若此此自有繇太公捐馆不无孺子慕一也入有进通之戚出有景升之感二也块处一室不能作山水畅动止圉圉受贵人目三也祈言者麋集言必惊人即不至梦肠出亦走入醋瓮矣四也此四者皆非所以深根固蒂长生久视之道也惟足下可进此言惟足下旦夕能慰解耳两月前见有传吴明卿非常者寻得渠手迹为之惊喜如再生吾家阿敬遂补浙江学坚卧不出吾亦不强之盖老来朋旧遒尽若晨星何况手足遠者冀使之存近者不忍其遠故自不能不尔潘氏文已脱藁却付之去为太公事郑重若见濡滞者然亦非遠矣墨赞更为补码语献歲之期惟日跂之不一

又

足下率仲嘉偕侍长公而过我真千载一时弇园虽丽不得当也或仆与家弟悉索敝赋以从差可捧盟盘耳初覩长公玉色小悴殊为邑邑浹辰复伺之壮气在大宅间更王且健进匕箸顿以豁然唯觉食不胜肉淡液溶溶喉咽须小省节之乃佳耳方太古墓

志为足下完此心诺应否付尧治非仆所敢与也所拟见访海上及同肖甫诸贤游弇园澹圃清洋留别凡四七言律皆不可已者幸从舆长公仲嘉速为之潘生作报书用币更三日文成即付急足也足下篇什自足笼罩时辈元瑞器不胜才吻不谋腕脑满肠肥谈笑间柴棘何足与较也见委单幅书旧草诸子之一疥足下壁如何如何

又

自与兄别已满三月不知于何日侍长公杖履闻本寧近始抵留都贞吉想久返豫章矣仆断荤味来已八十日徙乡落复七十日唯为长公草一文及了十余宿负今便洒然矣昨忽传长公非常旋审其妄独怪黄舍人不驰一介来索草其说为何赵宫赞云许相不肯为长公推毂或妬妇之口未可信也方中丞亦起家邹彦吉再罹白简屠长卿遂至削籍彼虽皆有以致之然右文之意安在唯家弟得小舒气已就途矣适遣人贺长公退院头陲无一物可以将敬亮之亮之

又

前者望兄侍长公而过我弇中则日手一帚埽三径矣及元敬至而怪紫气之薄也盖娓娓为称兄善病状令人心折业欲遣一苍头走歛而无可使仅附数行于潘景升不谓其尚留滞也已而有传兄起色者兹拜手教及叩来怦恍然若再得一仲淹何慰如之唯益加进匕箸亲医遠内以防春事承赋二诗具谗至向弟实无所得向来稍涉矜持两迨骨立今稍腴健政得滋味力耳昨偶有语报赵汝师云不能不死而能不畏死不然恐悞贤昆玉清问大作拟卒业而初归自泐有不得已冗来怦促报甚急匆匆不克详异日并污素卷附纳不次

又

足下称西湖诸词客大会选伎征声分韵赋诗足使天镜中增淡妆浓抹之胜乃至念及丘壑长物使荐其昌歎菟陆于三鬻八俎间则非其任也计长公已还馱为叔子授室吾幼儿亦欲同之自此乾坤间有两无事人矣比来遘异人粗有所得于郟病尤神念欲荐之足下并以助长公扶老之具不知夙縁当何如耳茅平仲已为达书于兵使者其人似河朔伧父可以义托惜晚遇耳使回聊此附复强饭自爱

又

前者得长公信云兄日唯啜乳几至絶粒为惊忧累日迩接手教叙致娓娓且询之使人饮噉已如故良足慰心亡弟得长公大篇足以不朽虽如天之赐亡以加矣而贖币不一领何能自安当令犹子别图所以修芹芷之敬耳许相公书来为长公推穀之意厯矣即为致之二相及宰公昨得乡衮报言似尚有扞格也仆方悔其出如误食蛆带敢以此味献贤者耶吴翁晋诗可压三千坐客闻贤金玉日三粥何以能作平原孟尝哉一笑余不次

又

得足下书满纸文采焕发足占神王私心窃喜之其所尤深喜者目前辈流徃徃面独足下有知己之言耳所云荆老执政亡弟仙游恬澹之宫香火虚矣讼狱之劳孰与寥廓之安入座之贵孰与长生之乐此意谁能拈破即拈破谁肯为弟举者长生事殊渺茫苏长公云若活七十年便是百四十却能小小理会迩时业已上书乞骸不得请则于新歲引疾计当无齟齬也足下知吾有犹子之戚耶天之待亡弟可谓酷矣亡论其贤差任箕裘世固有老者病者百死不死而少壮者忽遽死造化奇譎不可量也比张少司空迁大司农中外皆谓长公用翁左司马署右宰例有成言矣而至今尚未推岂铨垣尚与政府角耶计不它补当自定矣此腐鼠不足以当鸛雏一吓且足下拟仆归而仆拟长公出毋乃非当哉故不敢闻之长公聊为足下一及耳仲嘉薄游不称意如何方将草其尊人志旦夕且脱稿象先之楚可成归否吴翁晋寄诗诗甚雄爽排律如入武库甲仗森严计已返雪不能作答书交游之中独峻伯有此子纵横艺苑恢张父业可念也余不尽

又

见贤从即问兄起色云尚未脱然要当屏谢一切节食鲜饮久当自佳齐云之约毋论山水清胜岂有叔夜玉山之颓然吾坐者四而不一报者（阙）云一回相见一回老能得几时为弟兄虽浅语能令人深叹合诸贤故是胜事但仆殊畏喧豗惟有偏舟独造而已俞仲蔚墓表幸为一促长公其子已息心但仆于此处不能放过亮之亮之

汪惟一

记在郟中初夏午睡足汲石泉煮虎丘新笋啜之乘兴为足下扫竹里馆记既成而读之不觉失笑即腐毫史汉人少此一段境味也遂欲奉寄无繇歲杪晤子与樵李道中叩足下踪迹谓倦闽游业返拱矣仆以量移归里以避言赐沐无间关道途之苦而获息涎蜗殼九友斋十歌所懷一旦还我天假余生当徙入二藏中觅生活不敢复噉（阙）

）矣世人自当妬吾处不当妬吾出也侔来辱笺教损饷种种扇头二诗壮丽精切怨而不怒古印新刻所谓五湖长不敢不拜来意之嘉陶隱居十賚未足多也第长下衍一者字于义不相当能为我别刻古印见寄尤妙勿谓老人得陇望蜀也所成鄙言卑卑亦似小有寓并徃拙集一部秘之毋轻示人不一

汪仲嘉

每从行卷中得足下诗辄抚掌称快今者二章复琅琅乃仅能以一律奉酬虽卒卒他冗亦緣与家弟仅割连城之半耳长公龙跃艺苑为千秋盟主二仲率大国之赋以从谁不授歎惟益选将搜乘毋示敌瑕以防不测耳詎可口舌求胜又新都多烈侠覩季布灌夫更用为快吾乡士风柔脆骤见之无不骇传者唯足下从容一规之通家骨肉情至不自觉其切偲也稍间阅徐子仁卷乃用意笔珍谢谢天日集兰谱各一部附览不一

又

冰雪中使者以长公及二仲书问讯足下至发篋笥藏而贖我又不以寿名使我不能却惟是长公申后访之期仲淹叙起色之详于报书中具之足下所示诸篇甫拟卒業而归自泖塔复为里中儿所迹逐小欲缓使者行而促归甚迫仓皇勉成肇元东林一律书扇头塞白而已于仲淹二章欲稍措意则不能也仆自五月谢一切笔砚获稍息肩九月避警入城小有不得已之役寻为他人窥胁遂复浸淫比之于旧虽十损八九尚不能作无事人近更有一种无赖子伪刻注孙武批选古文时义谈艺诸书纒繆庸陋冀以规目前利又有初学少年勉强一见即诡称门人偶得两语辄敷演为序冀以博目前名仆已置之度外矣恐长公所必不免幸即以示长公及仲淹共一笑也寒甚呵冻作草附侍史书之幸不罪

又

献歲前后皆奇寒客至即围垆而饮笔砚皆冻以故新编词翰惊絕而尚不能效雌黄一字老懶固当尔闻长公佳胜倘遂东游兄必具青鞋以从来玉阁中以紫气为候也闻仲淹疾已平少年事未尽却当虞春讯故人李时养兄所素知也毋论其技即其人长者幸荐之长公且闻龙司理有李遠之好能先容否冗次不一不一

毛豹孙

行时辱枉送虽不获一把袂而扇头之作不减河梁暑则怀袖寒则篋笥何敢忘也仆过时之人强就笼槛束带追随贵游少年无非惭愧江山名胜满目小小篇什差足献酬而造物妬之亡弟之耗至矣念生平唯此一弟匪直同生亦忝知己垂尽之年倏尔夺之令人何以为生张肖甫太保逝矣此间有阴大司马徐魏公者皆小于仆一二岁食顷而亡多年闰道人罗近溪俱化异物闰虽似有去地然亦不敢望其来也以此仆决欲归一两日间乞骸之疏当下第恐攀上君子妬吾闲耳赵少宰大雅亦时往还李生者尚在芙蓉幕中足下如有意夺何究五色簪仆不敢不为缓颊第未审主人意何如也太宰公将发何不附之而来赵公非久当得北子念谓足下问鸿都北门径取者五人而臃附者数百人可笑也且此何足以辱大雅不一

李仲子能茂

仆为圣主误恩失计一出踣躅留省冶城之铁不供铸错方圉上书陈情归与病弟相守而病者不待五十年手足一旦判离哭泣无节形神不亲方杜门就医药忽得足下长笺以幼于绍介启而诵之锵锵乎何瑰丽悲壮若是也昭代作者济南新都足下微抑新都而右济南此自独见亡所容喙第饰许及仆所不敢当耳足下又谓吴越间有动为僻棘好创异谈自谓追躅邃古得非刘子威吴瑞毅诸君哉此不过日取三苍五雅杨雄方言之类字剽而句拟之以文其陋足下但读左国短长贾谊史迁数大家言何尝有此也若尔更不如昌黎河东庐陵眉山之为快嗟嗟文之不易言久矣若说诗者亡虑十余家徃徃可采而独兰溪胡元瑞氏最为博识宏览所著诗藪上下数百千年虽不必字字破的人人当心实艺苑之功臣近代无两渠必欲仆序之亦以避标榜之訾尚未脱稿足下得之否六诗具见栖托它诗及文称是荆山之英武库之良小加磨淬不患不作国器虚益满损翦之而已先青州行状已征雅属胥后命诗宜和病甚不能措思聊以一章塞白亦不知作何语亮之亮之

李伯承

昨岁郭年兄之使者称老丈有非常之耗其辞甚悉但惋移日念二千里走介之难辄附不腆之辞及粗帛以往忽新安余老至称老丈道履万福不觉惊喜绝叫如再得一东岱也唯闻有目眚然子夏之经术左丘之国语不妨于此际成之此老致公明儁一编足为中原吐气想当次第付梓矣草率附报不悉

弇州续稿卷一百八十一

●钦定四库全书

弇州续稿卷一百八十二

（明）王世贞 撰

○文部

△书牒

李驹

仆自杜门习静来于今三载矣生平故人竿尺尽废以故无能一问吾侄起居然至相识自济上来者未尝不谆谆也昨秋知以贡至都下就台试而燕金复贵令人怅然金茂才至忽得手书披诵之余恍若面覩此生颇能道吾侄家事云歲收多歉长吏佐之颇以食指为累无暇治尊公业与书中语相类唯赵中丞为尊公立一绰楔标之曰海内文宗少足吐气耳仆断欲来满千日一切荤味不沾口饮省十之六七待先师海期而人事未尽谢絕尚受役笔砚间不知此身堪受垆锤否七子之后人无一如意者豚儿仅一鸣旋复杜口造物忌名可畏可畏许长史犹在人间诚出不意闻虽不良于行而饮噉不少减却寿征也殷少保咄咄遂尔奄化不获见近时光景可叹可叹外白金二两少资膏油之费可也

曾麟兆

承念及仆出处事为立髮扼腕过矣仆本菰芦中人耳差读书及雕虫之技于世本长物而世偶用之又不容而逐之俱可也不幸偶有泉石书畫之好为僮辈从舆成一园又略置九友斋中物囊橐如洗今歲荒为公逋相厄不免挫产矣声色之奉生平絕无之今以风马牛事见污差若无谓苟举毁誉于一切空似亦不足动公方寸五岳也苦疮痍时作痛痒得一愈后卧起自若游戏翰墨拍浮酒船公思之更以为羨矣知读书山中今秋背城借一显即墨老将作用拭目而俟承损饷鹅鲈荷荷每黄州人至曲生嘈嘈自语得佳伴矣余不悉

刘少石

献岁先后两厪数千里之使而慰存我何足下之高谊如此仆本不能出而恳辞之疏为政府勒归则两白简上矣南床不为知我然亦不为不爱我也五十之年倏已过四界此余日读书灌园行当更忌我耳然亦不能别颁江湖约束也足下读礼之暇益精进以成惊人之鸣子鹅腊鲈拜祝当时苏长公只言黄州猪肉不审其故今且付青州从事作伴也手疮口授侍史不次

潘景升

自伯玉倡古文诤中而诤中市人毋不为伯玉言者亡论伯玉所草太夫人传即状议诤挽之类靡不苍然渊然古色所以为太夫人不朽者诤中足矣何所少而必欲得仆不腆之辞赘之来书几千言甚法而葩独所饰许仆过当以仆生平所伏膺文则伯玉诗则于鳞藉令二君子以屈赵一日之好推合左师岂其区区宋赋而匹晋楚足下正自欲得吾文耳念欲以不文辞而仲淹苦聊萧之曹子念又称足下佳人也少而多长者游其它诗文亦称是以故不能终拒第使我供地下役等覆瓿则可乃使之与伯玉并驰所谓张子布见之耶大币援白香山例以半资刻佛经余筐筐报足下亮之亮之勉进饘粥自爱不不一

李生寅

仆已舍身道庐百事尽废而独受役笔砚未已春夏来为病魔所侵忽忽厌之每思忘言之会嗒然相际而至读足下诗辄似迦叶之闻天乐虽定中犹为起舞屠长卿所云力去雕饰天然冲夷诚为实录第既赏以天然不当复言力去耳方饵参朮不能覩缕外山园记张氏刻兰谱附览不一

颜廷愉

仆自闭闕来一切谢絶无所延纳而足下俨然自天东南踰三千里而来以公瑕先容我则贄文授币叙生平倾挹之素礼恭而辞敦皆非謏薄所敢当者仆老矣行且削五官而为混沌足下复将凿之乎则仆有惊而走耳虽然足下非欲速成者也以求益者也则仆安敢守区区塞兑之戒而虚足下三千里之诚不小效其一得夫文有格有调有骨有肉有篇法有句法有字法今覩足下集并集中诸君子语非北地济南新都弗述其格古矣骨树矣句字修矣所少不备幸相与勉之而已文之所以为文者三生气也生机也生趣也此三者诸君子不必十全也无但诸君子即所称献吉诸公亦不必十全也愿足下多读战国策史汉韩欧诸大家文意不必过抨王道思唐应德归熙甫旗鼓在手即败

军之将僮羣之马皆我役也至于诗古体用古韵近体必用沈韵下字欲妥使事欲穩四声欲调情实欲称穀率规矩定而后取机于性灵取则于盛唐取材于献吉于鳞辈自不忧落夹矣足下稿称曲弄新声夫曲弄者拟即委巷也得无犯虬户铄溪之咲乎新声者今辞曲也求竒而拙希雅而俗易之为便卢先生集有信来希致一部

陆无从

公生平故人渡大江走五百里而以文事相托且此公又年家兄弟也仆于文故不自爱重第自重九日于上真前有誓矣若冒昧为之何以辞于上真亦何以辞于邻里亲戚谨并来币附纳亮之此间惟有梅花未残公策一蹇而来尚能呼浊醪相对公若欲求名笔或可商者面告不一

徐生

仆自丙子冬避言归里即便托迹麋鹿曳尾泥涂中间辱仙真见收游方之外与世路未杀虽以相知故人如老丈者亦不能通咫尺之书道区区申款款而抚州周使君侔来乃辱赐存披械诵之恍若覩紫芝眉宇令人神爽第饰獎过涯非謏劣所敢承耳方仆盛壮时妄自意以为班史而后纪传之体猥杂偏胜左氏而后编年之书繁简失次亦欲整齐其事与辞勒成二家以追迹盲腐至于国家泛埽荒秽照映千古而二百余年来无一人受兰台之管者乃上称金匱下衷稗官方欲谢絶人事冀有所结撰而一行作道民不敢捐半生精神于笔砚毫翰间且虑见闻少有未真不忧人非亦有鬼责以故遂抑不为吾丈絶世才也方以盛年得离世网天假之日有事于此谁能妬之昔柳州以史事责昌黎然谓必史职而后任史事则非也孔子岂尝职鲁柱下乎哉每覩台鼎频革羣俊彙起虽以仆之不肖堕人齿颊尚有萎玷除目而不能以格外用贤者良可叹也虽然执事宁以九十老亲易三公重乎人去聊尔布复并粗刻附览不一

王宣

仆一丘自放学道无成踈懒之极笔砚如讎而足下尚以鬮枝见迹万里遠教礼恭而意专使人赧汗沾背别纸新诗得多壮丽语至见懷之什尤更琅琅仆抑何幸也足下故褻然称蜀士矣来书有十科不试小孝克勤语则居然一陈公甫先生矣世无彭惠安不登荐剡可叹可叹虽然时颇清矣无意北游作惊人之鸣乎足下所称贤叔御史大夫旧知己也陈传相则通家前辈也以不敢通境外问便间为我致声欲构数语作报而去鸿遒发不肯为半日留仅能书扇头近作覬充足下懷袖间物耳礼圖蜀椒祇领不宣

王逢年

得足下书知悬磬之室复为盗憎仆亦遘此仅余一犀叵罗两玉环径持去然自此可高枕矣摊书满床不复顾也见示十二评甚俊朗有致独仆一生人厕徃哲后得无为足下知人累耶所闻似有高子业所见有宗子相或可当汝南月旦否洪氏典已败一弟两子贖可三千金仅十之二存耳墓田事俟诘得其详方可奉复余不尽

刘生

仆山栖禅观履迹不出郭外者八年矣近以先公身后闻部使者有意及之携家仲叩谢于阳羨句曲间半月而后成归则五尺应门持尊方伯所惠书币及足下之新篇嘉贶至矣足下以歲晏且有贤季姻事遄返然衡门不题鳳则足下尚有意乎而仆匏瓜之系如故可嗣迹也嘉禾一衣带水春花烂熳时有剥啄者必足下矣所示诗篇宏丽有致唯排律句似盛唐而篇似六季于见投之作尤甚幸少调之赠贺长昌一序足征高尚时义竒俊汗血千里亦须小酌羈鬣耳冗次未能奉酬先此附复并有薄致不宣

又

屈指小效先中丞地下之托于今九易寒暑矣感歲月之遄迅与人世之睽隔时时抚心叹嗟独不得足下一耗仆闭關且久学道无成稍徙园居以便休沐属愁霖滯淫畏及饘粥忽忽无赖中乃有武昌双鲤溯我清池暎槭而足下之名姓在焉颠倒欲狂发读数行始知玉树已成凌霄骤折回禄相妬连云俱烬何世界之缺陷如此徐征后辞则太夫人恃粥无恙孤孙俨然复举一雄先中丞遗集不为狂焰所凌今得锱梓以图不朽尚足以为足下贺也以仆之衰懶其于雕虫之技真若嚼蜡而交游见进受役亡已所委穠稂之导不减踐更特以先中丞之故契足下之孝思谊不容已初拟留使者旬日可脱草而渠以足下有深秋中散之驾力辞而去聊此布复庭实不敢复劳彼徃薄有侑启亮之亮之

丁右武

贞无似辱王父司马公国士之知念无以报之地下而公勤请至再累书近千言且贞生平所倾慕者又在公以故受命之日不移月而具草不移日而脱草僻居亡可使者仅以授之嘉定君托转致门下不谓其尚未达也兹复拜大海隆币专使三千里见督则

贞之罪莫可逭矣敢录上请正其以灾石不憚斤削公乃受楚旬之寄虽非以优贤者然得用骢马故事为福一方犹胜优游郎署也且朝事虽若清明而贤者犹自相抵牾使人莫测二多誉四多惧近也敢以迂愚之见进嘉定有大造于其邑所授南曹尚未足以报赵汝师虽萎转而恒邑邑为其言之不尽用耳罗近溪先生近一过而别盖斐然成章悠然自得者恨不能留之大觥不敢尽郗并有薄附以比献縞不外是荷

徐茂贤

昨家弟自闽归道武林谓必挟足下俱得下榻作数日欢而云雨杳然当繇不及相闻耳每诵足下诗不忍释手至于八章足嗣秋兴奉酌仅得其半故是小巫之索然所以属望之意良不浅矣屠长卿近相闻否伯玉过彼想复作数日滞淫也家弟九月末可还里兹时足下能一命驾否黄鸡紫蟹田家不乏咏酬谑浪主人所饶幸勿孤此良邁也伯玉便附此不悉

余生

得书叙致尊公先生大故及足下治丧抚孤苦心独行之详令人酸鼻用晦所报亦同至欲为朱公叔刘孝标续一论以志感大抵末俗宜然毋足怪者姚匡叔则云足下能自树立不隳家声两弟一子文笔卓犖凤毛之嫩不减河东尊公足慰地下矣示以秋期过访乞志铭仆与尊公契谊非常必当破例应命但以一介携状来山川阻修毋劳跋履匡叔还草率附报不一

王舜华

得书知为广陵游者半歲甚适归而有漂摇室家之叹夫广陵天下之豪任刁程卓之宝萃焉以兄之才藻且高自标置彼曹拥簪治装之不暇今舍而趣之严居自放之人若以为监河侯者则兄之计过也仆自庚辰委身道民付业儿辈月责十金即一切衣食燕会酬酢之费皆取给于此间得官府小致币资粗省纷纭卒歲计之亡織髮贏三儿卜筑未竟公私逋负不完今者淫霖恣虐稻田汇为巨浸花地尽成瓠脱何忍向之为不情之索且彼纵未有目亦故有耳其耳兄之声实久矣安能强之今搜橐得二金佐一醉之资勿罪菲薄文殊师利畫像返上緣斋室已满不能供养故也镜古帖评与诸贤往论颇不异新诗多飒飒之致附谢不一

张生

拜书娓娓叙令先公与先府君鞭弭周旋之好未及豚儿笔墨扬挖之契而仆居其间所当讲者三世矣而最后乃始奉清诲称神交虽晚不晚也书辞古劲宏丽雅是六代前笔惟小屈意公交车之业一第不足难足下豚儿再挫近方埋辙两孺子依之亦解学步但仆以衰劣惧世福向深非道民之利耳于麟先生可念十七年泉下人乃子复继之吾辈能无媿生耶足下证及令人泪琅琅不自禁陈茂才北上附此勉旃自爱

夏山人

仓卒为足下具鸡黍忽忽几忘之而足下乃犹寘广心池小岛方寸必欲去之以为快缘足下别后举此以问游者游者皆大笑仆遂不能决且念俭岁费数十工为毁瓦画墁计非迂则谬足下幸勿留意非此池芥蒂乃足下自芥蒂也同年之子赵一凤妇尤殉死事仆固重之而去冬其从兄一麟来请传冒寒具草已而一麟绝不来已而与一凤之母及季前后来闻相诟于门最后其母与季复来遂书传付之仆为逝者不朽谋非为存者衣食谋也今便录一通附去内有一字足下须斟酌付一麟亦可所示哀诔其辞仆所未能悉然见足下一片高谊热心敬服敬服和赠诗容缓期以上足下称字甚古然施之知己乃当耳余不悉

刘后庵

向者作伯玉司马兄弟书欲为伯玉安顿余年且谓兄道得大行于新都匪唯仁人之利溥亦是谋生之一助也而喻君先已至彼兄遂不面伯玉荐福之雷信哉缘薄矣寻拜手教及诸记之惠乃知天遣兄与宋子溥游天台鴈荡永嘉括苍尽搜诸名胜而发之为巨丽奇瑰之辞盖有不偶者不然兹时方襁褓于猗顿程郑之门而已仆名虽事外而身滞尘内羨此壮游两腋欲飞兄能过我借麈尾吐烟霞语否余不具

吴函虚

窃闻贵邦之累崇费埒素封者徃徃不能举其先业所繇充而迹乃有慕仁人孝子之行于其亲思所以显扬光大之存而有颂祝序记之类没而有志表传诔之属然不过走长安中介绍贵人名衔以侈其乡里而已执事乃能以不朽寄之伯玉司马远而为王父志其墓近而为光禄记其祠亦足矣复更欲得不佞以重表王父而寿尊君何执事之笃孝而右文也执事之所扬挖金华诸贤以及二李而独假借不佞非不佞所敢当第足下之情最切文最丽仆固不能无心动而况有司马之惇史仲嘉之勤言以为先容又安

敢以绮语戒辞也虽然田光先生有言太子见光盛壮之时而不知其精已销亡矣执事所见犹故仆也即不得已而露其拙执事将掩袂而走耳雅赋不敢私助之阿兰若以为吾二人福田并有薄侑附报不一

郭舜举

向者得效尺寸于令先公地下顾其辞萎薳不能称贤者盖时时愧心焉当时见公毁瘠委顿状甚仪其孝而窃忧之寻谗公宦金陵歷清曹至奉天子玺书董岭东学政盖不唯撫问之日昭而占道体之益充也则有余慰矣兹厘五千里外羊城之使者捧罗浮仙人五色笺以稚川子之遗丹侑焉仆昔犹能专一壑而今者金陵马曹吏也何足以当清问仆故爨材无采栢之用向者齟齬言路分与鹿豕老丰草长林间而适我仙师见援盖倦乏多慨之人易为趣舍斗室蒲团谓足投老偃蹇朝命至再而仙师以縁未至未有所授会同事之人已出拜相而先君子复蒙圣恩地下留枢之命疏辞报闻咸谓不宜再渎失计苟出遂不能与病弟生诀此痛何言幸未为时趣所向固不敢效子南槌床之恨当亦不至作渊源掇梯之悔也亡者已矣念其名业已小就且有四佳儿足慰地下独仆犬马之齿叨长十歳生趣已尽何况宦情业上疏乞骸骨下铨部矣旦夕得请当治一容棺之墟待尽而已公见念深又惓惓及亡者乃敢布之寄示欧桢伯全集此公能自了生计不似黎惟敬之零落也薄意侑械并有书仪寄桢伯烦致之冬雪作寒南中当异加餐自爱

张茂才

向者得足下书笔甚古思甚竒学甚宏博今者复得足下书则笔益古思益竒学益宏博而前后所示通家之谊藹然儿子津津谈高节雅度不容口东吴菰芦中当不办有此人也十六应真精工之极加以变化则真伯时矣然亦是宋人内局佳手三跋却佳汉臣二画惜其失神不妨名笔足下篋笥之珍推以见赠得无伤惠耶念欲璧完恐拂来美第不如发二巨甌泛平原督邮如对张绪风流耳昨歳先君子以两台之请宗伯为覆赐全葬二祭又以鄙恳得赠大司马于人子之愿粗满第仆复玷征书固辞不允未免蛇足耳衰朽不才叨长家弟十年今家弟用病归而仆乃冒病以出能无愧于处者以足下见念之切聊一闻之不腆将遠忆惭于英琼赐亮为荷

李季宣

屈指真州城外之席于今十五年矣足下之年甚少而仆亦非老当时披襟谈艺所

当无前足下意固当艷之蓋未几何而有避贤之请婆娑故林偃蹇时趣蒲团五尺息此幻躯于分已足而匹夫之节不固遂成小草金陵山水差号佳胜游目骋懷亦自非乏第病鸰在念悬鶉满前苍生之愧当逾于安石百倍也足下乃捐手书苟相獎饰使仆何所藏面长歌宏丽感慨益我多矣审足下已捷乡荐尚滞公交车兹又承太夫人之讳读礼余阴渐养经济以俟公除仆老矣髮秃齿墮形神仅接无能仰酬来美如何虽然俟小间当勉效一言之复也薄物将意不尽

徐孟孺

向者见足下所草宗谱私心已竒之偶以及郁君乃足下则走使致书盛相推谓不当让于鳞牛耳而一时得与绳廷尉札又谓仆出献吉上昔文王嗜昌歠仲尼慕之眉结而后咽二君子者得无有偶然之嗜耶抑亦相浮慕云尔献吉草昧功在祛除于鳞矫矫实再九合仆虽有秦楚之赋何敢以狎主自期所赖足下诸贤左右提挈耳仆生平毁誉中人晚而厌名且畏之方拟戢身二藏间作残活计时游糟丘可以终老幸毋用虚褒相藉也时科之业抛去已三十年忽得足下二义读之觉齿吻间有种种新味江瑶柱不让矣记序尤自苍然咄咄相逼特不宜为豚儿过嘘拂以长其傲方苦作答书草草不及详诸容嗣尽

又

昨过廷韩所一晤不暇深语适于生云邀足下送我至青浦虽以侵晨发犹数回首望云间鷁不得乃鼓棹耳足下书来适同此懷佳章爽朗有致歲晏人事如织不能效反歌之和如何见示数十条良悉精进至意聊草数行为荅而未及详大抵足下所问多于外境上着力今宜但取三百篇及汉魏晋宋初盛唐名家语熟翫之使胸次悠然有融浹处方始命笔勿作凡题僻题险体险韵盆入恶道俟骨格已定鉴裁不爽然后取中晚唐佳者及献吉于鳞诸公之作以资材用亦不得临时剽拟至于仆诗门径尤广宜采不宜法也足下苦心非他后进比所患天趣时乏蹊径尚存然宜从容涵泳得之毋助长也近作可全写示不恶面適當自省进素册小暇完上不一

又

向足下见过以仆案头有佛书偶一读之乃是尘劳海中觅小驻泊处耳而遂举诸耆宿法语见询欲令为足下剖大事公案是佛弟子于火焰狱问调达觅清淨境也可发一粲耳足下谓龐居士一切空诸所有为櫛柄窃意足下方为有所苦故若本无所有何

以空为然却自有不空者在故名真空不然则顽空也又复举大慧师谓思量较计不得将心待悟不得是句亦划非句亦划为问觉此语似专为足下设足下既有所苦而欲空之却汲汲然思量较计将心待悟不划是不划非终日于是非中求出是非此又病也古先生成佛后尚为摩耶夫人忉利天说法足下尊慈见衰证医药奉侍当忧则忧当劳则劳其它眷属亦只以应尽之分处之便是大道举手动足着衣吃饭本无深理只于此不涉攀缘思想亦道也足下苦于此体究又增一番葛藤矣巾衫绦履原不曾系束足下心何妨叅禅念佛亦岂必坐公衙判案牍入出兜鍪剑戟中方下地狱种子火宅生莲花变清凉境白日恶风吹堕罗刹鬼国只在一念间耳仆本毫髮无所得昔人云不辞为公道尽恐公他日怨我偶疲口授侍史辞不能次亮之亮之

又

豚儿封手札至缕缕悲恳恨不于两月前当为介绍于先师所俾亲为印证也第先师于诸弟子实不有所授叩之则曰坚其志澹其味守此八戒以俟我于五载之后而已固请之则曰吾非秘而弗早授子早授子无益也仆犹记禅门一龙象以所解姿质师而姿不荅恚而辞去又数载忽大有所悟始遥瞻礼曰倘师为我遽拈出我何以有今日哉即令仆果无耻抗颜而踞师席足下有问仆何以荅也足下不问仆不荅庶乎师弟子也然而足下与仆俱不能也足下但奉持先师之语五载后不以足下见先师者有如日执贽授馆之念幸毋起仆不得不为泄柳段干木也方苦作报书不一

又

得足下书知秋来苦汤药无暇呼棹然清梦时时落我弇州园矣仆比闰月苦河鱼之疾者旬日寻复病目幸已无恙近始举一孙兼家弟拜万寿回跌宕杯酒间意气差自强想所欲闻者承谕史记诸本凌生近致评林一部来乞序仆颇念其刻之精而病其采之杂然至膏夕加铅槩差为便耳茅君何能深太史公即用修所长颜籀李善家语亦不得其精神要眇余祭酒刻本尚未见传所删削出吴兴董宗伯手亦不审然否足下又询仆楚中发策中有太史公生不遇左氏传语记出一宋老儒而忘其人当时极然之以为周纪诸侯世家寥寂之甚且所纪时时抵牾再览刘歆移太常博士书谓鲁恭王壞孔子家壁春秋左氏所修皆古文旧书藏于秘府伏而未发然则太史公时左氏诚未出或出而不备又其书云左丘失明厥有国语而不及左传槩可推也足下又谓褚先生别补十一篇不宜错诸传中令人有玉石之恨第其人识短耳其文辞似不减中垒新序可别为一卷附于后不然今汉人语何几而忍弃之也秋来校正拙集鱼豕之误八百余字增入说部六卷所谓卮言别集者易之曰宛委余编而斥盛事异典别行之公家赐小瑯宫姬

事亦增錄矣集所以名四部者賦詩文說為部四耳亦七畧遺例也丁南羽筆意精新使
多見唐宋名迹將來彷彿仇陸所委跋及扇頭詩俱不免污蜚鳧先美器病在速成宜多
讀精思緩收目前之譽幸相與勉旃范牧之佳士也死后猶能結烟花一段致語第非大
雅所宜耳洛神賦織美有余或恐吳興之優孟且無的然一跋倘減去十五或可借以小
料理也羔羊居士紛披老筆隱然懷素過庭結體第寂寥數行粉素脫落而此公品在翠
微居士下索直太昂須殺其半損餉二刻俱佳搨珍感珍感對客草次不悉亮之

又

得報書滿紙具悉雅況姜塘一曲何異匡山竹溪諸名儒制撰當令紙貴第青蓮暫
阻鯨吸恐令風流之士失望耳陸楚生作小簡來云李時養游白下張復將為燕中之行
子念促裝向閩酒人星散遠亦從此逝矣此語殊可憐第吾儕所割愛詎止一二端逐麋
之犬寧顧兔耶殘歲別公次晨即得華陽真耗敢忘精進但蒲團一尺地游思紛起殊艱
剪削僅能作焚誦廟祝譬之小兒學塗鴉何日可勒勲墨池也蘇子瞻外紀殊草草意似
好其人与其事聊為纂集而昨秋奔走侍師病復奪之不暇掃敗葉客又無可任者公既
為我摘出復誤便希改正如二三君子能梓之亦是藝林一段佳事也小兒新歲始曉約
三四友生麗澤與辰玉各一宗而皆取裁于荆老公書即與荆老讀之承餉水仙新箬風
塵外色味■〈奩斗〉仙師所蓄泉荐之何必減華陽樂所念時序流易此身危脆相賞
之余亦重以相感懶甚不能躬執筆小間當裁一詩別書箠報謝不一

又

自奉仙師入觀即與荆老拾松枝煑新泉作菊苗荳角供而覓足下不可得方共怪
之既得足下書披瀝衷悃激迫之深至欲逃家室賣身削髮以充掃除一力即呼荆老誦
之相與惓然神賞此雖二祖立雪斷臂之懇亡以大諭此雖然仙師示誨愛敬君親而足
下七十老母時時臥床第柰何亟舍而栖托二百里之外乎即緩急叩棊几呼粥藥誰與
應者世人鮮遠識所左右前後老母者亡不以一第為悅一旦舍而就方外服亦非所以
慰衰慈也仆非有出世根器仙師見憐西山之日無復久照且于一切障累漸輕故援而
拔之然實無毫髮得可以資足下亦焉用借為例廿一日乃仙師岳降日足下可馳來拈
一瓣香作弟子券仆當誦而焚之宣父云欲速則不達猶龍公亦云輕諾必寡信足下宜
加三思仆言不能再也

程巢父

得手教累纸谬见饰奖以为可厕古作者悚息悚息至欲选鄙集使卷袞与于鳞相当俾成二家言又令仆生见之甚媿雅意之辱仆在郟中偶失拙草二袞縁无副本踰月而后检得之意不能无动而会其地饶梓武昌饶刻工遂有加灾之误既成为诸贤所念竟不获蔽其丑以为恨今何幸遇足下具法眼为我一精汰也昔谢茂秦每论诗辄言当割爱而意不能自决以属于鳞泚笔抹之大叫称快乃知陈王敬礼之谈千古不虚也却有一谗附闻于鳞居恒谓渠高不能当仆巨仆戏荅垓下之战项王卒可十万人淮阴侯以三十万当之而又孔将军居左费将军居右皇帝在后乃一得志耳今与于鳞兵数埒恐不当也读休阳志宛然鲁春秋竹书纪年昔颜惟乔志随而杂用左氏编年体以为竒今又大竒也序当作大约七月间可脱稿仲蔚以数行先容足下材自高见当把臂入林矣奚所托介绍也暑中酒困倦握管口授侍者以书幸亮不恭

弇州续稿卷一百八十二

●钦定四库全书

弇州续稿卷一百八十三

（明）王世贞 撰

○文部

△书牒

林近夫

自与公燕中别不得更闻问为恨方与客醉海棠花下而使者至矣启槭读之宛然若面莫州见寄之什宏丽悲壮一倡三叹他作多称是文气竒峻咄咄逼人吾七子之后故不乏也公亦知文士运否犹在阳九蒙气未涤伯玉请急遂成高卧明卿憎口顿尔削籍家弟与李本宁俱妬金马三尺地仅一子与硕果耳仆本无勇进意谬为时私叨忝至此今获赋遂初宁非至愿二十年斥买法书名畫金石古文典籍至数千卷山园泉石台榭花竹几夺天造虽先世薄积为之一埽而区区残日不墮苦海三儿大小俱能读父书幸于司马文园白香山多矣安能更遂人眉眼风尘自没耶使者言公所领郭门之外旧与贼共今贼与民俱尽矣侨治一空城得无碍啸歌乎为作数行凌司马属之可即至也

于鳧先

仆老矣甚畏时名而迹来为噉名客所困几欲凿坏塞瓮忽得足下书目若涤而醒者已又得足下诗吟赏不置口既读书词所谓生十有六年语知足下犹未及冠也何齿之少而才之老如此记仆年十五时目不知诗偶为塾师所强赋寶刀仅就二句塾师异之蓋又三年而始晓开古诗书帙其视足下今日何啻霄壤虽然亦窃有一得以献夫千里之驹不能无逸蹶也不逸蹶不足以征千里然使负千里而意不免逸蹶终千里累也是在足下勉之而已何日可一面且与儿輩商推经生业既在世法中不能舍此自见勿谓老人多澹语俗语也诗一篇不足以酬来美聊见鄙赏而已余不具

又

辱笺教烂然盈纸二诗慷慨可诵知趣寄之深且笃也足下既以国士见与仆安敢以凡格报向仆所以亟称足下不容口谓足下年少而才高所师法古异日不至作噉名客要为有可以垂后者然谓足下璞也非敢遽谓足下玉也玉不琢不成器夫岂唯琢而已其磨砢润泽蓋不可歲月计也今骤读足下诗其声若铿锵而调若高朗者苟铢铢而计之未易屈指訾也诗有起有结有唤有应有过有接有虚有实有轻有重偶对欲称压韵欲稳使事欲切使字欲当此数端者一之未至未可以言诗也足下文差健而有古意然篇法则未讲也句法竒然句病乘之字法竒然字病乘之而俱不自觉也仆以为足下且勿轻操觚其诗须取李杜高岑王孟之典显者熟之有得而稍进于建安潘陆陶谢文取韩柳两家平正者熟之有得而稍进于班马先秦其气常使畅才常使饶意先而法即继之騫然昆吾之切而后加以磨砢润泽未有不瑚簋者也仆与于鳞撰着可备足下游艺资耳不可徇而步趋也方苦文责填委又以城居不能絕杯勺筐篚之役来卷须俟旬后细批抹荅诗书扇并上外一扇附徐长孺可致之

陆山人

令叔来拜手教其辞甚宏典而冲然若有藉于不佞者知沧海之不择流也及读所草胡陈二先生传与伯玉司马书而知公志向之定学术之正且纯也今天下争靡于简易之门高者入于禅广者流于墨而不自知其于切问近思实践之学遠矣迹来识者颇亦忧之大有所抨击然不免负竞胜之心既不能窥见其底里无以破其銳而坚吾城不过南床一白简耳执事之论探本务实之论也贤于欧阳永叔矣仆数竒自放不能为人间完人而又多少年偏嗜堕绮语障今过五十始知悔然无及矣执事岂误闻之而谓其少有知耶太常公死节事灼然人口曾于楚中得一书曰矾园杂錄华容孙世其笔也所

纪与公家辨畧大同执事如有意乎仆虽不文能为之传或叙以章显之后世似有好仆言者故可久也令叔去迫卒卒不竟所欲言仰祈照亮

彭钦之

向者足下见过时仆方病头瞽不能酬荅非敢学高坐道人胡语也私心念且得罪于长者即为书二跋一歌于卷恐不足懺悔而足下盛为书饰獎之二诗见貽铿然之音斐然之藻有余荣矣蒲轮定非此生物不敢当足下指逃禅故有所托近却蒙师真指示玄元一窍欲拂拭方寸地以凝承之而未能但有十二时中思已过而已呵佛骂祖行径断乎不能而足下乃以是推之长孺又从而质之纵贫里人有檀施心其如无寸缕升粟何诗当和縁绮语亦是过中一端第将来终不能已也方苦报书不一

黄玄甫

不腆之文以不能奉扬常侍君媿行之十一为惧何自乃劳千里命使屣文之丝与古刻名杯骈贖也周礼拟笥之商山之橘吾将老是乡哉常侍君以衣衣我以觴觴我惠更渥矣王方伯先生亟称兄时义之胜以为当与古文辞并驱读之信然哉里有荆石宗伯具五色眼聊以相质今附去所批斥足为良玉之攻仆桑榆之日以文事故不落寞第不堪征迫欲于水中建一避债台想足下读至此为一鼓掌也今年家弟作计吏北行当聚首京邸二三君子寄声勉旃外拙诗书扇头将意并有所报于常侍君幸致之不悉

又

晋阳贾人来得足下书及屣丝毛罽银钥种种之饷皆非深山道士所宜蓄特以千里故情深于侨札不克辞耳承令先公大变审已就窆无由絮酒炙鸡以效区区行状捧诵并它文一篇览讫每叹于鳞游岱仆以畏深沉思不能代执牛耳有足下无忧盟盘矣仆近来行径殆如优儿弄蛙作经师王孙学禅坐于声响形迹小类其中故无有也足下云来歲公交车一应诏后拟与明辅兄渡江见访恐足下其时拥传驱弩鹿豕之踪何自受觅明辅清真简贵如逸少水陆四千里能无疲于津梁哉助甫神骏康衢万里而小踠足于晋殆是二公宿縁得相煦沫令人叹羨近刻得数种经有完者先以奉览并寄明辅助甫龙华蕊珠随分可结縁也常侍公健饭向所偕陈中涓闻且九十矣而尚无恙鹿祁之宫三易坐者何修短悬殊也家弟感足下无异足下感托致谢不腆芻帛为我布之隨前由拳集者屠长卿着也彼駸駸欲渡黄池足下畏之否

陆启孙

往时故人陆茂才为足下乞安履山房诗念足下与顾山甫耳中五弦也遂慨然应之第辞烦局不获畅以为恨两月前方卧瘍辞客而小竖晚以一刺见示则有足下名姓且附双帕及伯氏贞山先生集而仓卒不成报足下雅度不作赵壹狺狺而仆偃蹇威明远矣今走一介候足下及山甫倘惠然临之即三径草没一丈不惜躬除刈也不腆之敬未足拟缟惟幸裁之

张太学

伏承笺教累纸具见足下慕道之笃且生平留意于内外大丹家言所得不浅浅也敬羨敬羨第欲以此转达昙阳师则所未敢贞不肖辱师真度引然尚未获预闻存持大要闲阅经典小有疑难叩证未蒙一荅第畧引之使之自思自悟而已今足下出平日耳目之绪所谓傍门二乘以求决于清虚自然之灵真窃恐不能得其一嘘■〈医，口代酉〉也九转之说盖自古记之内可以出凡度世外可以拯贫起死然中古而后天地之气薄而砂汞药物之类俱驳烈而不中炼其人往往不能保固元神勤修功行而仅以一贪生好利之心为之是故以秦皇汉武之强力举天下寘于三尺之鼎而黄金卒不可成大药卒不可就今其授者不为盗则杀人而受者不毁家则捐命足下不覩韩退之集及洪景卢所记乎采取之说亦是汉武帝时始盛其所谓彭祖经云素论者皆后人附会以迎合人主之淫心而已参同悟真虽稍露其指而至于薛紫贤辈始精微而复张大之夫大道之要不过曰顺之则为男为女逆之则为仙为佛而已若紫贤辈所谓精微者则自泥丸而下直抵于女子之弦而后为顺取女子之弦气逆溯而上以入于泥丸而育于丹田而后为逆所谓张大者得之仅顷刻其大若黍珠而十月结胎九年静养之后可以朝真谒帝役使万灵后天地而不老夫敲竹引龟不能则必炼己以待敌未见敌而先入彼家矣一采而不遇则它采再采而不遇则又它采未获胜而又流入彼家矣是二端者毋论其不易成即成而清虚灵真之府可使财色之徒错列于其内哉足下所引四大一身皆属阴不知何物是阳精与涕唾精津气血液七般灵物总是阴之一言也此非鍾吕之言乃薛紫贤辈倡彼家者之言也谓男子自有漏而后即无先天然则王重阳马丹阳诸真是皆近五十有妻子者何以不言采取也夫黄庭灵寳道君之第一经也道德太上老君之第一经也其言曰真人在己莫问邻何处远索求姻縁又曰致虚极守静笃專气致柔如婴儿而已执事不于二圣经之求而徒致惑于参同悟真之微言致信于假托鍾吕之剿说何也夫薛紫贤者二氏之罪人也故白真人醉言曰我是雷霆辛判官弟子干紫贤何事其又再传而李莹蟾诸君则尽取而弁髦之矣足下但决之此心觅之此身其于二宗之说不必问也足下三十年坚固仙也仆初地发心人也今骤而以狂语报窃以为足

下非笑则詈仆姑据所见而已幸一识而存之

黄山人

仆不识足下而足下损书及三诗一畫且书法翩翩自肆有京兆太原风诚四絕也读诗语知在于君舫中仆虽匆匆间宁惜一茗盃隙于君何自秘之仆老矣不自惜受役笔墨余三十年而今且自悔欲尽付祖龙手足下乃谬见推一不敢当也百事倦而无复致味始皈道门根器损敝恒惴惴焉以不任是惧足下又谬见推二不敢当也念旦夕且入关而足下意不可虚聊付数行为报其于来美百不讎一如何如何寓宇甚广而湖海之日长勉旃自爱

顾少玄

前月幼兹所致长歌读之令人两腋习习风生有天际想第其时苦行役不及报言又损饷百合根以馋口故即噉之亦不及作煎合黄精并进以此两事俱负公如何如何避寒处一蜗庐如蛰然尚未得静中趣献歲须悉焚笔砚杯勺令无毫髮系累或有可以语公者第恐转败公兴耳幼兹索信草草不悉

李仲吉

始见足下所构时义竒之以示荆石学士则又大竒之不以第二理相期寻拜足下见示手教纵横翕辟云车风马令人有挥斥八极想昔贺监见李供奉呼为谪仙人足下故谪仙人也其欲交仆则足下已在幸舍不难朝夕其欲师仆则仆无可师者且仆生平不敢当师名于互鄉之童子而况足下哉亦有以仆始末告足下者乎仆不幸而弱冠成进士名又不幸而好饮好谈曠好一切铅槩之末技又不幸而不能自爱往往轻露其丑以故狂名满天下客所不得志于人则借名仆其稍得志于仆则遂狎仆狎而不能大得志则又猜猜及仆仆又蹶弛亡长者誉而负轻薄文士名衔负心之痛而牵富贵当止足之地而乏勇决垂朽之骨作人齿颊间物中间愧心畏心厌心悔心数起数灭庚辰歲首藉灵真警诱少知创悟决筴屏家累絕世情束身入观然仅得作一焚诵道人而已内省根器则为七情所蚀追惟畴曩则为百誓所障阳月以来日寢一日亡尺寸之益十二时内思过不暇岂敢恣口般若妄草大还以簧鼓后进下阿鼻种哉足下审必欲见友者则有先师之训诫而入默而守以此交相勗而已荆石公意则似欲足下于占■〈亻毕〉间小就绳墨以修应世之业世愿酬而后求度世出世无难也仆意亦不异辱示偈殊得葱岭法步履见过相为印证第恐维摩默然耳

袁大

辱笈教累帙具谏向道之笃先师挺自末法默抉真关余芬流羨光景灵赫虽一阐提识良多若亡以至大笑而中间信心亦自不乏第浅根之士往往希求福报利益譬之缘木求鱼了无可异明识之士不免堕二种见其一摛华志怪以奇钓名其一利小欲速羊乘是希不知先师八戒之外本无别传能划无明种子净身心口业鬼神将通印证非远其心经金刚圆觉黄庭道德诸经可时读之参同悟真宁不便解毋作外境解也尊公?下当是积湿幸自将息三十余年老兄弟一衣带水几遂胡越怅然怅然余不具

吴汝震

庚辰歲首仆以倦一切称病弃园至孟冬朔复弃园携瓢笠及佛道书数卷入白莲精舍觉遠公结庐之为烦第不能学渠削髮耳足下书来疑仆假补劓而有所著述误也仆方懺绮语障之不暇而何敢复问笔砚又谓仆尚可一出又误也巨源絕交在咫尺外久矣陆法和云出家之人尚不贪大梵帝释位而况区区一鴟残鼠唯是读足下新集击节久之忽令人有老骥千里思寻亦兴尽而止前劳足下遠致张氏牡丹本种之一年尽成单叶然此地妖丽百种皆沉香亭锦步障中物既繁且贱正不须遠致汴洛也第仆亦已付之不见不闻矣见委五扇破例塞白并薄有所侑不一不一

何仁仲

仆承乏郟中时有乡人陈道易者来盛谈足下贤而好文能时时举仆诗语而前歲归里中则殷无美出足下书及诸篇偕来是时心益艳好之欲通一启为谢而川途阻修忽忽无鳞羽之便蓋至于今若调饥矣盛夏散髮谢客高卧虽古人亦倦梦之忽得教札及它作种种不觉霍然而起凉飈飒瑟起须麈间恍若崔延伯聽田僧超壮士歌状既以自快且自笑也足下诗声调气色高朗华秀微有一二可商者少磨砢力耳不为瑕也见命任尊公表墓忆仆在朝时尝以通家子弟一接颜色后苦浮沈相左不获申请益之愿第耳其风猷材气足以笼蓋一世晚节退处讲学证道威鳳仪鸿诚人中杰也三品卿佐例当得树碑神道惜仆非其任耳别示仲芳诸札有生死之托而集不载将无王司马削之甘露园四絕句如教书四纸附上审尔不免疥公壁也拙集及新刻附览中秋后得脱稿使者可以来矣佳币拜惠不一

申五常

向者衰病暑冗并于一时以故于足下不能多所周旋然至孝思之纯笃词藻之娴雅则心仪之矣乞骸杜门始获检顾衡字学宪前状读之尊君信所谓孝友笃诚君子也仆固愿效执鞭者矣独私溢一端不为通论而我朝尤所不宜如吴陈二聘君之道德李献吉何景明徐昌穀薛君采之文章文征仲之行艺而不之及何可轻施之尊君也故取妄论而削之若于它不敢不极揄扬矣审不以为然者或不用仆文或于状两行之勿更劳使者仆仆也不一

陈仲醇

孟孺来得手教及佳笺竹如意之贶念仆非永讷二张何以辱此异贶作小诗挥洒及夜卧搔背痒时辄思覩足下烟霞眉宇耳审尊人万福次君得入试为慰足下天才溢发秀语匠心故与蒲团不相妨身隐焉文此犹未是实际语慎毋使泉石落寞也仆违心而出去东山一步地便成千里悔何可言孟孺归附此不悉

荅晋生

昨足下与子念辈偕叩门私窃异之既得见惠书及试卷时义悦若隋珠之错投动心眩目真天下伟丽盛观也退而始获读所谓嘉禾颂者则彬彬东京建安风矣邻壤相距一舍许归四载而不知有足下仆之罪也足下之执礼甚恭意甚笃若不以仆聋瞽而借视听者第来书所引喻非当不敢不一言之仆鄙人也少从师业占毕得进士举已而厌之然不能求太上所谓汨没于雕虫之技者踰三十年而无所成中遭家难强颜为人又不能隐约食苦以修匹夫之节误被时私出入台寺又不能规腰腹饰边幅以谢物情销骨之余仅尔肤立惟怜才一念或可少附于孔文举任彦升之后而执事以握髮吐哺之一端遂进而拟之周公毋论仆不敢当足下之文美美则必传传则当为有识者所窥也屠长卿吾畏友此君具眼者必能拔足下于骊黄外然亦不敢不专達之后却当为筌蹄耳古文若颂者及新诗乞颁示一二良驥摄景而驰其价乃辨于蚁封之内时义少加精检何如余不具

荅曹子真

向者不腆之文不足以为贤者重盖至于今有余慙焉而使者至将手教启而读之则亶亶数百言推谢饰獎靡所不顯即仆慙乃重之矣叩使者谓执事尚健饭日读书弄笔墨不衰令人啧啧仆自逾知非之歲数凡四屈指而始知悔觉一切忧怒从喜乐生毀

从誉生失意从得意生所读书一字不得用所撰述文业一字无可传欲弃之蓋献歲而后能次今已作头陀全真行径矣是故于执事书而重有慝也然至得执事诗而辄和之其以为尚有可传也耶其不可传耶其世法耶其非世法耶执事姑一览而用覆瓿可也嘉则流寓于松陵大槩依青浦君方沾沾艺文未敢以此告雅贶种种烟霞色味谨拜嘉并不腆将臆鉴存为荷

郁人文

足下抱三代敦彝以梁清数顷陂自环作武陵观世人莫可踪迹之而乃俨然造我顾不能手烹伏雌烧笋蕨以供而第使儿子侍酒又令整整雨中还蓋至于今慝焉足下何用为谢恨五载前不见足下然见之当令足下如杨朱受犹龙公擿也秦右伯郭叅知传觉已行世纵未能人人悉足下当亦有心赏者腐令史成欲藏之名山瘞公每志石一埋之麓一埋之壑乃至摩诃迦叶奉佛伽利入鸡足其事不同要之所期于后世一人也天假足下资又证足下贫而佚以日勉旃毋忘铅槩与二三君子期而已仆实未有所证而于一切世緣欲尽尚恨刺促遠不及向子平迹不及袁夏甫怅然怅然

与周生

从尊君得足下弃家信已又闻自六和归杜门看内典六时清淨誓絕世緣足下是再来人未染欲阿罗汉仆虽不至于情中作生活然大段脱此科臼不得出出没没何得具须眉称男子以故语足下辄面赤汗浹自恨其霄壤也印上人出足下所与书以妙宗钞请质渠亦能解释第恐是狮子坐旁听来非繇蒲轮上证彻于足下少所饶益足下如拟把茅蓋头作知见宗钱塘沈莲池是千五百人善知识须往一见之羯磨两夏三冬亦可如不欲钻故纸马大师所云即心即佛是单刀直入法又六祖云心迷法华转心悟转法华亦此意也仆非晓了者只是借花献佛耳

荅章子敬

得足下书见念拳拳至读三诗则洒然如覩矣二律爽朗不凡然尚小有查滓古选既极宛孺更自適劲第饰獎过涯非仆所敢当耳仆之畏名如城南老母畏佛无地可避前以野父争席为佳至于足下门生之刺尤令人愧死生平幸以不登高坐不受人礼拜仅能汲汲征引如常不轻比丘谓可懺悔宿业今一旦居此名而无其实宁不忧入黑门如昙摩讖乎更烦转语咸甫兄即如蘓门秦张之属亦只小存前后进意耳十月初二传脱稿并成和章但不能称塞来美食味之贶知兄不易破例拜嘉山园记粗扇侑械乞照

入

荅靖江陈生

久不闻问时时在懷仆自昨歲因同事者疾戚频仍意绪为之恍惚豚儿偶忝先鸣亲友若见聊萧稍出应之不无酒食之累遂成羸瘵委身药餌差得小挺劲耳足下所见示及释先师与印上人书语皆精切然金丹正理数卷内也有之仆意亦尔同为下手处无的证耳年来苦笔砚之役而未能郟此实伤生一大奇验歲邸当尽去之且收敛身心以俟师期此外无足言者末俗薄恶凡知者必忌不忌则不知足下轻出至寶以求俗知仆以为知者无几忌者至矣石蕴玉而山辉藉令有陵阳君识而荐之楚廷楚廷之利非山之利也足下自拟插标仆谓不若藏诸椟也荆石公孤介一字不为人轻作邑令兢兢闻且至当为足下言之虽然佛劝忍辱道言和光足下但守此四字以保桑榆之日胜于借客也病懒口授作报不一不一

又

得足下书于法门可谓辨才无碍矣觉得紫阳真人无端簸弄使上阳輩啖啖不休足下且从身中炼出真足下仆当拜下风焉今日勉为世緣所迫方在冗沓而病弟进退忧心如捣无緣酬酢至于调相之说足下误矣仆老且死岂能作平津客草次奉复容嗣布

宗子培

前者有李太师人役附数行通候然不敢轻渎老伯先生迨人归得足下书则知老伯善饮嗽健步履旦暮不释卷神明之用不衰已使者来复得足下书则老伯业九十矣而益强忆先府君歌鹿鸣时同年之长者山阴骆先生与老伯今骆先生九十三矣二先生相望于杨子之北钱唐之南若恒衡之对峙而先府君之在泉台跨二十六周矣不佞之从贤伯氏结社论文彼此朱颜驰骋千古歛忽而成二天其亦二十七周矣盖欣然而为老伯羨则又泫然而为贤伯氏及先府君悲台莱之颂甫乱而风木之思与山阳之感继之故自不能已也向时每念足下仅一子无为贤伯氏后者今闻少君乃有四男子当不忧若敖馁又闻献歲后北上谒吏部选老伯强无恙且有少君侍可以寬内顾旬后成一歌诗贺老伯并作张肖甫少保书倘可为足下地道也仆已断文墨歌诗亦大是破例今奉经像移徙乡落一瓢一衲作退院僧不从儿輩乞衣食也足下所望奢不能应勿讶讶今先冯大叅小牍欲其達抚台为弧旦添一佳事耳余不具

又

得书知己公除当此俭岁而虞桂玉未遑作选人拜令先君九十翁所著续经解肃然敛服即稷下诸贤不是过也且闻有公举乡贤之议父为儒林之哲子擅文苑之芳并列俎豆齐圣先食岂不休哉闽中遗稿恍如见三十年地下故人颜色且怆且快可使续刻十之八九而以临终绝句殿焉同侪七子犹有铜梁贵盛绝伦若用颜光禄例称五君仆与明卿硕果耳而仆晚节不固转为小草恐在所削足下何自浮羨之衰迟过时病鸱在念旦夕且归耳冗次久稽从者又不能详唯足下亮之

答僧明得

知足下踞狮子坐为一众说大乘功德无量如仆老措大耳流浪苦海无复息期赖先师拯拔俾得假一线缘求出生死路今十二时中思过之不暇何敢妄树门户别黑白缘乡人有隆上人者自叅方归云拈榘椎以来纸上葫芦出口入耳了无所得先师悯其志行为易名号令其尽息众缘扫出翳障若四祖之示懒融耳此僧全是退院行径六时焚诵经行坐禅之外不作有为独以不能为方袍故人关说资供动此曹岐舌流闻足下过听着论揜之因而颇谤及先师始宗伯公有闻意殊不能平仆劝之以三界内外何所不有并育并行何所悖害且我曹奉麝提戒修阿兰那行而已此哢哢何足动我径寸也宗伯时亦首肯寻从果沙弥所得足下书累纸初若辨其无谤者三复微意则足下之谤不必有而足下之疑未尽释也仆不得不一言以报足下不过守楞严十仙语耳是十仙者当佛未生时不获闻大乘而所谓坚固不休息者多黄白男女之流正先师之所戒而其它亦傍门外道耳佛教既行而仙家者流如紫阳重阳二宗匠何尝不从心性内下手何尝不证禅那也六欲天位故泛言常格耳五浊恶世亦且凡圣同居彼中岂无菩萨权位又岂无精进超格天人足下日讲华严经佛不称仙乎十地菩萨不称仙乎今奈何以其名而遽忽之也坐脱立亡即不亡祖师禅未梦见在古德常有是言足下举之是也第终日捉佛子呵佛骂祖老比丘于去时一表坐脱立忘者几何去而复来者几何足下未证此地不可妄攀拟也足下又云贻戒弟子有奏闻天曹行显僂语夫天曹诸真自有不染欲者要非如来时所云下道又焉知不为菩萨权位耶先师欲摄中下根退心人不得不作险语即如念彼观音力还着于本人又鬼子母护法令人头破七分如来故容之着于经籍令出先师口足下以为何似仆诚不忍于足下却有一言效芹曝之献我如来说法祇树竹园止令弟子乞食不置常住产一者欲去（阙）二者欲不作匏系耳不谓足下留意衣钵令三尺稻穗缚此浮云身受辱田父夫大目捷连狮子尊者方可言定业苟有以致之则不尔也足下且宜闭关于身心细点检一过勿轻谈般若勿着论昙谟最法

门将也尚不免入黑漆门可畏也已陆司空先生大善智识然腊月二十四近矣亦望足下相勗之彼裴休相公精入圆觉三昧特以不能断六根尘仅作小国王耳不解复圆顶相也什公云但采莲花勿问淤泥仆淤泥中语足下即不见采其毋患

弇州续稿卷一百八十三

●钦定四库全书

弇州续稿卷一百八十四

（明）王世贞 撰

○文部

△书牒

答张肖甫司马

今晨得手教一纸系仲冬发者向所附报札及不腆物计久彻记室矣弟乡居已半歲日饱藜藿坐蒲团俨然一有髮头陀耳辱谕云云家弟不能不就饵恐世味日深去道益遠元馭虽再疏辞必无得请理孟夏当首路犹欲上第三疏弟力止之渠当未已也弟处仅一僧无心有亦已赴讲堂恒顾影自笑他日只履西归故自无碍兄病在手是偶感寒或肝肾间小违耳天子方倚以腹心何至动拂衣兴计兹时已勿药即锦衣昼游而粉黛宵拥亦未是长生诀也弟迩来小健政得独眠力耳

又

上谷使去有报书不腆之币计其人当久達矣仆自九月间捐家儿子辈翻从渠乞一衣一食以度日耳虽于名病欲根小能划刈而中年气衰散乱昏沈二魔时时作耗为奉先师遗蜕且元馭有晨昏累不能削迹遠徙深山以此怅怅读足下岳麓道院记恍若耆阁崛山语足下岂阿难陀后身耶仆虽已谢笔砚于佛道胜緣亦拟随分赞叹但足下已道尽何緣复作扈语唐突也前见与推秋官部计大察后必穹转而除书尚寂寂当繇尽以北门相拟耶足下拂衣之念时自动计亦不必耳今单于解辫烽火长息兵卫晝戟燕寝凝香亦何异淨土道山观但于一切世法不生住见自佳耳仆尝谓吾侪既出俗当

以进为退诸公在世法中当以退为进进者道机也退者欲障也或此重而彼渐消或彼轻而此自入要不必尽同但牢执橦柄而已两月前得明辅书亦颇道其病状彼素清羸便当以嗣息置之度外家弟入关非久亦当归葢亦拟于此事着脚故也柴汪二生何以得此足下盛德故不止九里润谢客人为足下札一见吴生名势都尽何以应之闻所闻而来见所见而去自是叔夜家风一笑一笑春尽而寒不已塞外想更倍之加飡自爱

又

足下飞传从天来车怠马烦而能深念我驰使者慰存副以隆贶中间申缙缙叙契阔宛然以合并为快而弟乃依于一龕香火傍足若举而受继者能无为嵇向所笑然至破绮语戒为足下前后草四诗无论其厌笔砚久不成语要自方寸不容已处出之足下但取其不文可也钱唐几复作杨完者宅庙算用足下真自超吾侪小人谋不及夕得饱饭安枕足矣汾阳故是鬻借征书非久当更下青雀北上泊胥江于烟波杳霭中有戴笠荷瓢冒交戟者必王生也当更破米汁戒作竟夕酣耳

又

昨甫移居即入关而柴生以报书来仅从容坐揖问起居健胜相与称慰心而别不旬日而上谷阳鸟至剖素诵之缕缕肺腑也前所及养生事殆似野父食生芹菹苦笋萌而甘以奏大庖谓且令人蹙眉齟舌而足下厌三鬻八珍之腴而深味之甚愧甚羨第大丈夫逍遥顺风出则磨墨盾鼻檄五单于解辫立取通侯印入则佐庙廊大议俾搢绅景附赤帟善类为千载光若木食草衣托迹鹿豕又非所望于豪贤长者也助甫得推迁正是从长鎗大劔中脱出断断齿牙然须足下衽席之乃堪老玉关耳不然杜征南无洛阳饷安能以瓠领踟躅襄阳也别札所喻足下之为我深矣昨歲得政府慰藉语审其非漫然而会舍弟入覲以一札报之力言薄劣不齿士类不任官恐为门下知人之累想当见寬矣即今奉师真化后捐家豎子辈一瓢一褐一束书入茅舍朝暮蔬食虽米汁养和举不能三合读圆觉黄庭如小儿进饴蜜足下谓此人尚堪寄亭障任否辱为家弟出处计之当渠故自有意或暂往而后成归也损奉过渥会于水南筑禅堂即辍施作功德想不唐捐也豎子劳齿及试义似胜前而落一老校官手遂成委顿第公家千里驹尚俯首蜀道而况中下驷乎迟之异日或得更修通家一段緣也曾将军大奇人而伎俩多又不堪小受见之佳不见亦佳姚京兆会典在居平时易耳今想不偶此二纸竟作豫章浮沉亦无妨也腕创口授侍书不一

又

伏承谦光下问弟既深肺腑之爱且虞肤剥之灾苟有一得岂敢自秘第下邑去钱唐十舍许传闻异辞难以遥度鄙意窃谓此曹虽弄制帅股掌间然其时不挟尺刃不行剽杀人必有宿黠为之指使意似尚覬收拾庙议所云云似已得之吾兄宜密访首恶三四人即为处置此外畧分等第行遣或发总戎所小加惩戒当自帖服所虑一众窟宅久在钱塘左右前后多其密戚死友缓则径漏消息或因而缘饰诘张别孽祸端又闻前者作剧后各汛地戍卒俱至近郊谋为应援不审其事有无有之则更可虑也傅明州有夷舶果尔使之効力自赎功成肆赦亦是一机兄所云比之安庆诚难然以营平之老成汾阳之寛大威望既重福德亦深潜运默消当有不动声色而安若泰山者弟素乏远识且自入園来于世事一切遗落何能仰益高厚与绳兄想当奉为倾倒亦望兄从容讽其解散僧会可也吴中丞长者不宜有此气数适然耳吾兄素存厚道无俟喋喋湖山高会似非时所喜在兄政不必尔盖可借以示暇适安众心也

又

马校父子回得前后教札皆肺腑语居恒与家弟言当市人掙白刃时兄单车直入虎狼之窟獎率骄兵俾以罪为功顷刻戡定国势君威两无所损弟向所许大尉之六传汾阳之单骑今真验之天颜豁然温纶褒予龙袞■〈马上衣下〉归便蕃之钊千载一时令史册不落莫良足深羨寻有专使至复拜种种渥赐疆疆制自闕宾致自单于大司马御以行边于三尺雪中进紫驼酥弹白檀槽差不辱耳长爪梵志夜寒拥坐诵呗呪固便其如非苦行本色何玉冠越丝蜀扇皆精好唯饶瓷叵罗太大不中盛米汁耳当以阳羨莽荐之贤器入太学何异得郭林宗秋棘颖脱所不足道儿子场屋中长物耳何敢仰攀骥尾頼兄惠以兼金作其气或堪充漳河三日粮也又辱委曾阳白寿言此老有一面之识且为兄効力亦复何辞念已倦笔砚久思境藜芜塞聊试为之或用馘骸随人意见择耳殊不足入郢人目益岷山重也来币却未有名即附璧幸寛不恭之罪华亭公贺文弟亦有此役而怯于操管江陵相病势云何或云已无恙而尚未见出观吴越三批万里外了了中窾若此那可病也

又

自兄别后每念一世伟人福德之盛絶无可相埒者盖未几而覩大司马叅知六军之报又未几而覩都统三镇之报又未几而覩辽左大捷之报则官保世禄有故事在朝命且复下矣当时王伯安子衡跌宕李何徐薛诸公间独以功名显重至开茅土珥貂横玉为铅槩中树赤帜差快耳兄固灼然继而称三杰兄之推毂我勤矣乃至筹筭出处于

言表见深爱焉非骨肉而贤杰者畴能以此诲也弟之不出直以不忍倍心盟耳它固未暇计及也计此疏必获请即获请而弟尚以无故而叨卿佐衞又窃恬退名世福转厚道縁当转薄为恐何况出也宰公两书娓娓意良厚便间幸为我谢之念旧怜才少见其比与绳兄亦然弟不免作负恩汉矣赵汝师宫赞一札云大司马有去志代之者非王司徒即兄也于事理宜尔窃以为围玉悬金更不如北门鎖钥之易也覩邸报长公拜緹骑长明后歳与次公两魁文武榜于通家气色不浅吴明卿过我宿山园十日而别神气犹王弟得余德甫人日耗为之黯然此兄齿亦不薄但遂成隔生耳助甫跳踉在我曹中作少年军事小简宜其能治私也汪伯玉新歳来差善饭每睹荐剡不相及咄咄怪叹兄全集刻成否余不具

又

屈指清洋分袂忽忽周歳中间凡五辱笈教而弟自所使上疏两村童外不能别遣信问有句先容而为之附音者诚知其不可贪露其区区不暇恤也兄之一身系宗社重轻天子方举三辅而尽属之藉以高者也弟过八月病良已九月则益壮而苦乡里项领至笔砚受役无少息肩以故于正月朔移入丈室誓大士前一切断絶惟残歳宿逋不忍便负刺促向三月可作无事人而至二十日忽有留尹除目庙廊于弟故平平得非兄抵镇之后有所推毂耶弟初念已于庚辰春初掷付东海若万万无出理亦不敢以偃蹇朝命为高第守此匹夫之节苟余半残之躯于菰芦间引疾谢客客曰此不作官人也可无复用面孔相困于弟足矣足矣且今岩穴之儁搜剔殆尽仅留一人充隐何所不佳乞骸之疏盖并昔所谓听用者埽去之不欲放着人口耳矣园泉石谬谓在王阳德上兄于阳德用摩诘辘川例挥洒不己而独为弟惜一题品耶似不见楣间扁龙蛇郁盘其迹犹尚新也腊月顾益卿来叩关沾沾自以得奉幕府约束为快此君信自可儿李寧遠弟不识其人积战级至万而书生犹齟齬之似不晓诸上公彻侯功案也家弟似尚可出闻亦有推毂者不知竟何处赍疏人去附此通起居

又

昨得宰公所致兄第一书又于龚嘉兴所得第二书枕弟岩穴长物耳然其自爱当不异每见北来人道兄坐将坛一指顾间神采奕奕曠蔽万乘而弟卧起茅屋粗自肤立与田夫野父鬪健尺鷃之于大鹏其逍遥亦不异也城居时苦剥啄酒食征逐无己而尤所苦者文字之役如责博进不得已转徙入穷乡一衲一瓢事事谢絶忽军将叩门如玉川子所云惊周公者使小奚迓之则薊门遠使慰以手札副以药资瞿唐子石更是良材不忍焚当付之骥儿作此寶也所论具悉以我夙练之师而灭此区区属国残骑压卵承

蝸未足拟易兄不希用事之指不爱通侯之赏独以坚忍持重应之百年之藩篱无坐彻之忧两地之锋镝无相向之害即赵营平之远犹羊巨平之深仁宋广平之长虑彼三平者故当不胜张铜梁也仆长诵远公言愿檀越安稳彼亦无他以为名语故知兄所荐也时事非所解亦非所敢言百世之后不知作何物评目前且付之幻境而已拱辰书云云家弟或不免濡足弟甚念之然不如元馭忧方大耳世弃伯玉于黄山白岳间大是其乐土而不必以为然雅贶既不能逆拒又无以可报玖者毋罪其琐屑是望秋气向肃北塞先之珍重珍重

又

弟以情事异常于悬弧之月避之泖塔中为先人诵经焚香且懺宿垢而已一切筐篚皆絕而老兄特损二月奉且侑以异僧颅骨白玉杯盘使雀罗之门骤尔增色念欲辞诸左右而老兄甲子方周亦将小効区区故尔勉拜嘉虽至戚如家弟相知如伯玉不得援而强我也儿子过承长者慰存至与拱辰丈携榼出视剧饮乃散公卿废此节久矣竖子何自得之此儿学未成笔未熟不可尽诿之命春时覩兄请事屡见诘难知必持正之效而小人乘间窥伺遂成贝锦圣明在上公论在下彼自貽伊戚兄社稷臣也岂可以此动归思唯益秉孤忠自信不惑夫鞠躬尽瘁者臣分也不可则止者臣节也赵汝师称辱兄肺腑之爱故托以情字进规盖兄之福德不可及处正在此第元枢要地不得不少斟酌耳承示益见虚受之懷弟却不免为杨徐二子相渎良可笑也汝师果势壮往而与元馭各守其是弟甚忧之两贤岂相厄哉兄幸一劝汝师含章可贞或从王事乃所以为光大之智耳兄所拟于助甫叙功处改一京调足征高谊盛德即彼不出尚存体面渠似小得蒲坂阳城力事事悉归江陵则易证而亦易信虽江陵亦冤也元馭一札似尚欲鸡肋我老矣衰相尽现安能调气柔音于言路少年前作媚耶且岩穴间留一二长物亦自佳家弟久困折腰意兴都尽却不能无望嘘借耳兄既称戚将军有储胥之绩赵思廉颇恐廉亦思用赵人也张榜得故地服兄用才之当亦见元馭古道塞中丞人便附此外汝师书希即转致之不一

又

骥儿归备述尊兄见念之笃偕拱辰丈携榼出访萧寺以诸父行踞三公贵而折节于一布衣孺子此谊不见搢绅中久矣大贶骈蕃种种造次附塞中丞役为谢想当已達矣窃念尊兄今歲花甲遂周台候万福眷隆九重光表八极文潞公在元枢眉山颂之有精神如破贝州时以兄方之殆不足言矣弟名为慕道而实无所得师真渐杳前路可知幸懒癖已就而诸公见寬获保一壑家弟赖大庇有留京太常之除苟脱手板少年前优

游无竞之地缮身理性何乐如之兹以入贺万寿得侍教席从容文酒将无恨少一人耶但彼此无它异日作两岁星于吴蜀间足矣太原公近书渐向天水君天水亦不甚差宗社之福也助甫叙绩如老兄初拟否伯玉司马过我吴门避暑浮玉尚滞留未归此兄无复畅理令人怅然不腆器物不足仰拟琼瑶亦见野叟芹曝耳已托山人李郡图岷峨天柱拟赋长歌以祝而图偶未成俟成当专附上也余不具

又

昨者周公瑕复致老兄一信云于出差进士处得之何兄见念之切如此骥儿居恒谓兄待以小友抚以子姓而其次则感拱辰丈而推汝师兄以为海内模楷三君子而已家弟所赉弟书及不腆之敬计久已达矣渠赖吹嘘之力得脱手板优游散署近想与三君子欢洽状真令人妬兄又称搢绅语以弟微有起色非也弟因曩岁仙师虽微示道机而不授之穀率探讨诸方蹊径匪少欲求之身外则所不敢求之身中则又不讎加以年事衰迟乡居寒僻移止城市不免为儿女作痛痒袂衣见官长时时有之遂为人所迹耳兄试观弟即出有可以行志否攀上君子有能见容者否一丘一壑庶堪自保毋至烦兄虑也太宰久不出岂真病耶老兄既朝望所归必当仰借助甫得光复兄于友谊国是两得之矣戚少保真名将惜老矣不知物议定否薊镇督抚两公梓兄前后诸奏而寄弟以糠粃之导弟岂其人耶脱稿附览幸赐斤削不然则为兄辱矣秋气方深珍重珍重

又

家弟自赉捧还复拜尊兄手教及貂皮辽参之贶所以为扶老计者深矣弱女垂命得参而起弟往还句曲阳羨间不苦头风皆大赐也家弟与骥儿叅侍之次辄称吾兄厚德高谊贞心雅度于海内少双仅拱辰兄可鴈行而骨肉之爱施于吾三人者亦仅兄与拱辰汝师而已弟自先朝戊辰冬江左三台为先子请恤而礼官惑于故新郑相之绪论抑候另议弟腐心之叹久矣而江陵相方事操切故嘿不敢请太原公在事曾具一疏草托之渠初不示难色既家弟北上归而述元老意谓必需弟出而后举是以蹇人上天厨门木象生肉足矣唯有摧咽愤谔而已乃闻按君会抚公上疏与故朱中丞紈俱寘之条陈列款中按君云太原公两及之若中丞亦元老意也此事在宗伯宗伯公有通家契分必不作前人忍第条陈之款必略而先子与朱中丞之冤酷始末非可更仆数以故具前草附览幸为乘间一达之至恳恳宰公方大察吏杜絶书牍亦须吾兄从臾倘得小改名衔弟藉手以见先子地下足矣比想道履豫胜弟九月间遘一异人授方极简要行之三日而验苦家弟归日从事乡里酬酢且曲生相诱墨卿见凌多间断耳歲杪为少子卜室先事苟完即游方之外不难也汝师时相会否家弟大欲作合左师转烦颊舌必大老如

兄调停其间庶不至分洛蜀也弟从来不曾为兄称一武弁近覩游击张榜者凡两任刘河洁廉爱士卒方畧整裕将来大将选也然微负气不能受大帅苛责或可量移否吴淞旧帅林君能纾家为官亦可取者知兄必不以为私也村仆策蹇水路诗轴尚不能附亮之亮之

又

前者儿骐北上薄有不腆之敬以渎记室计彻览矣蹇使君将发驰一札云是兄书启之则仅数行具知所详示者在赵汝师宫洗处而汝师所发役则已久当是时兄尚未奉统平之命然德星故煌煌燕中矣三少年几欲决千金堰灌洛城元驭相公一疏幸而孤注胜之然亦危哉此老宦情本薄且恋恋菽水故虽处旃席之表而多箕颍之况而家驭一计复触之不知当作何状也今年秋榜出搢绅蒙气颇甚李家辕下驹旦夕作老博士明卿落莫而三郎君无可慰意者如何仲氏白首折腰少年前意虽怜之然精力尚堪驱策一方即入备京辇五侯鯖未易噉也所需拙集后帙约二百余蹇君已使小史録完云抵鎮驰上第多鱼豕之误不暇一料理殊不足秽邺架也蹇才真发硎之刃而博大饶远识步之兄后似不下蒋大司马之于武侯也戚将军近作三日会囊底智尚足■〈距必〉跋蓊门亦自意气阳羨之卜非实语也弟近进小滋味营卫少畅然齿落已尽矣悬弧之日避客操舩泛柳塔乞僧粥度日而两故人远书适至差慰牢悵草草附复不次

又

向者奴宰北行以小启附渎未几而从邮递得兄去国之报谓且不及既而此奴归解篋中装则兄之报札俨然且惊且喜知以上不视朝艰于面辞故也承兄示具悉所以中贵之巧于含沙台臣之甘于承唾弟忧之久矣已而得吾乡太原公札则极为扼腕不平且称兄贞心大度宏猷远畧一两歲间征书必且西指审尔则国家之福而非兄之福也位极人臣赏至延世出控万里入领元枢正兄家子房从赤松子游时也岷峨之分福星长自煜然岂宜复出令人目之将星与旄头角光曜耶弟虽不落虚言饵然颇虑一玷除目觉辞谢往返之为繁从太原处得宰公鹓雏腐鼠之喻似见寬矣橐不至羞指不至痛经禅之暇间唤欢伯于山顛水涯何快如之唯是先君子被沐祭塋二典外人子之情尚有希覩于一贈乃闻拟覆前三日既许而变不知何说也忌者尚以我为太庙之牺而主者已见属为泥涂之龟则可笑耳年家严文靖公遗集诸子以得兄珠玉之导为荣日夜踊跃待命计兹时休汝之车骑小简可以完诺矣向辱兄托梓大集此间凌氏足住手闲当一呼而集也余唯健进匕箸以慰天下望不宣

又

家戚严氏之僮归得老兄报札一通颇申契阔展惊曲然似未悉弟小草事也已会富顺李宗伯云近与兄相闻饮噉宏壮步武轻矫弟不免有伤逝之感情在我辈故易拘牵然毕竟为兄扫却无明障子小泊清淨安乐世界逝者功却不少弟竽滥留省颇得以其间问三山二水之胜仗此游履差慰槌床不意病弟为二竖子深入膏肓旅进旅退至季夏之闰十一日忽剧至十四日街鼓动遂不起亭午犹能勉自力手书见诀颇诧定力于生死关打破间语国是絶不及私最后据胡床呼水濯足豁然脱去念此子虽不获长年然名行粗立器业粗就小时从于鳞把臂竹林进之小友中路谒兄于交戟之内申以同志笔砚之润今其存者差不肤立令后世知有王季子亦幸矣独痛不穀得此子作三十年蛩蛩距虚而一旦失之举武蹇蹶何以自立顾影茆独何以破涕且弟老矣异日七尺躯不知付之谁褰言及肠且寸寸断宁但九回而已传誄之属所望于兄不浅弟以词组先容从子辈当九顿以请也此间有阴大司马温恭长者泛爱亲仁每见和气拂心袭面不谓倾盖遽成断金此公仅六十余气体若四十许人示痾两宿倏焉长逝台省之间中流失砥岷峨之际则半岳摧峰矣想兄闻之当亦同此悲咤也太原公前者于兄实深东山之望渠为国一片热心故自不凡交游之间殆过矍圃仅明卿伯玉长庚配月助甫差更燭火后进之中屠隆长才徐桂儁才胡应麟宏才吴稼澄逸才俱堪点染晚趣向辱糠粃之导于大集一俟卒業不敢不效其愚也薄物将候贤郎必有并奋而继兄者儿曹亦在试衰门若此敢有他覬乎不一

弇州续稿卷一百八十四

●钦定四库全书

弇州续稿卷一百八十五

（明）王世贞 撰

○文部

△书牋

汪司马

前月晤长君谓公儼以兹月初出泐中于钱塘候奠谭司马真巨卿高谊比会梁舍人知谭公輶辂以旦夕至絮酒竣酌当返第吴门一衣带水能扁舟见过增此间泉石色乎舁园虽小伏雌斗酒可佐一月欢弟却买舴艋侍几杖东西成汗漫游也秋气渐澄紫蟹黄雀在在不乏幸毋失之家弟计方出都门吴明卿昨寄音似亦有中散驾合并之乐于迟晚尤深迩来见邸报事事佳夷夏宴无逾此时所歎者日望卧龙之出以安吾曹于蜗壳而追锋尚未下何也知不足动鸛雏一顾聊及之耳不腆食物敢犒从者仰祈麾顿为荷

又

得太夫人之讣而报书时属以乞骸疏尼公交车不克上简书既迫狼狈就道然亦妄自意抵建业后所使人能兼日豚膏糗糗可以无变芟泽而道为二君子所妬归则二竖子亦随而凌之然寝喻亦不能忘此事也公所具行状创竒而指妙得未曾有太夫人足不朽矣即仆亦欲有所效能无小巫之索乎哉仆之出处故是人口颊中物但生平无声色奉今横以见污有所不堪耳忽出之忽还之造物者似有见侮意然出不能三舍而返昔人谓一官转首若梦幻然今犹幸未成梦也子与暴亡不能及一语后事竟无子而旧称子者自以子与去仓皇立十歲孤使人蒿日向相与赠和六子乃子与于鳞茂秦公实子相及仆耳是五人者皆化去为异物仅一硕果能不侘傺公固戚焉在疚然上以奉老伯父下抚爱弟为天下文苑立赤帜千秋之躯强粥自爱仆比饮噉不甚减神爽差王而筋骨不称且作老衲子行径矣田畝少于郑公业白若瓠脱官逋迫紧酒器悉落典家手方谋谢客减冗食而不能以语人即语人又谁信者明卿数欲买舟游吴而临发辄有阻为子与当不免一行矣些章芟帛敬授一介外近作及哭子与一纸附览不一

又

汪山人禹义来得手教知强粥读礼不以灭性为老伯父忧第仲君复有内戚谁为治溢米者可念也贞踈懒日积色根已断第不能却酒肉以此尚遠津梁耳子与残客乍退少作烧者唯遠书日进督责文逋甚苦所谓自贻伊戚如何如何今天下以公一言为赤帜然元礼谩谩人尚未敢有狎也禹义短髮矣而心甚长句不得眼篇不得尾当令曹子念商之业已为作序第不知能使我舌覆鼻否汪惟一遂欲以身代徐氏子乞墓文似非体俟咏至当令具状与币拜门下以祈不朽也家弟在豫章颇习吏今年吴中大水吾州仅犹有干地然是一岛夷耳完国赋外遂无以为百口筭公或未肯信也禹义去附此不一

又

世贞备乏郟鎮时检橐中稿忽失数卷竟日惘惘不乐已得之他所乃叹曰是不足爱也而不能割奈何会以不携家故有羨廩而其地饶梓乃属梓人剖之聊以藏家塾备遗忘而已而为亲知者所伺强之又不能闕诚知其碍拂息召謠啄然而不敢自悔者弹射之所加雌黄之所被尚足受而能改也岂其敢谓一家言以希后世名而执事海内龙门也片言华袞畴不悉之且仆素获幸于执事又畴不悉之执事以仆之幸而过赏其言海内以执事之赏而信仆言大惠也以仆之言而累执事明大罪也以故虽一及之牒未谋之次君然而不敢专价布币以启者有此惧也乃执事忽然惠赐启械之际知为叙言踊跃絶倒即牒未既惊惶悚仄汗涔涔下矣执事谓汉以长沙嚆矢两司马加盛焉而明则北地肩长沙仆与于鳞肩两司马又谓两司马于诗书之教不相兼而于鳞兼之又谓于鳞不尽得仆广而仆间一二企于鳞诣者则是仆遂抗膺而踪古人也天下固已悉执事之幸仆矣仆尚一二侥幸执事之赏以苟有称其以仆不腆辞而波及执事者能无八九也虽然执事文美矣尽善矣论笃矣纵令天下后世尽废仆言不能废执事叙也曹子桓知文章不朽盛事而不能令思王公干辈润色品定之乃区区致衔结于成侯之玦玉仆尝快其不伦今于执事百世感当何如也辱委伯母志铭非不欲有所效然状笔之为春秋孔氏也非吕氏也其何能加焉勉具草焚芻拜而进之其加笔削而后登石烈女事竒甚传又竒甚此皆贞所借而不朽者也不腆另具统惟鉴纳幸甚

又

掩关日忽次君来以公之手书及大币至因得长跪问太公安及公孝履良慰不佞所次太夫人志铭以慑公状都不成语乃至灾石能无媿也弟为七情所凿一行尸耳而天慈见悯证遇非凡故知真诰所纪语语皆实恨根钝障深未有以仰承之公多生中法器也静中亦自一返照否次君折节禅门数叅龙象已非昔日仲淹矣主人见弓影而病安能以杯勺困客公毋虑也公既以许表仲蔚墓即延陵剑诺矣安能以一切相例盲子方用币于公次君便宜却其二布余书刻香匣惟少慰其诚幸甚目疾不能执笔亮之亮之

又

次君行后为仲蔚请不朽计当已達矣青鸟晏生者持公札见示方为二竖子把头足展转一荒圃目■〈目夤〉齿击不能读且蜗庐蚁封两已成无所复劳之为治装及

称之一二友生处小不落莫行色耳公禫除计已及期日侍太公杖屦无起色第如宗社苍生何弟厌苦此六尺身受役三寸管初卖作佛家奴近乃转徙称道民惠子五车不啻作龐居士鞏置海矣公长于弟一歲固自松柏亦宜少斟酌鴟夷子皮泛五湖客江淮间小侯倔强可也弟于九月入精舍欲焚弃笔砚仅留一管以荐公珠玉侧而未覩全筐是以迟迟然异日终不敢负旧戍陈生感恩造云欲奉谒龙门贪附一信不觉缕缕秋气初深加殮自爱

又

戍卒自罽中归得次君报札云小竖咄咄来病君子且遠甯矣寻次君之绍者来拜教亦如之玄冥行夏令武安频阳之虐遍江介虽仆与元馭丈几不免焉入圜气乃小得舒耳先师云期以重九日挥手辞万众刹那立化有辞世歌不知即老丈所傳者不又自赞六语往往类悬懣者不若所答诸善知识学人数十种皆精切至理如六祖禅又如大医王药也承献歲欲见访紫气北来肉眼尚能识之第兹时恐拜新命前茅所指当不罪野人以野服见也比为元馭属草先师传得万余言其事颇详核不经化工笔恐不足称也更五日可脱梓无及矣后当致之公能有意否仆已弃家儿子辈困焦中一瓢一缊损饷洪涯先生物既不可却复无可酬如何如何大集完者即不敢以例及不文辞糠粃之导也冬寒自爱

又

沈君典太史来谒辞师龕而后北首沾沾得御元礼云卧斋阁者五日公拏舟送之可得六十里几欲同载至吴阊以粮尽而返此君自负相法出唐举上谓公嶷如乔岳又似狮子王必须受应侯印审尔吾侪小人可以鼓腹含哺矣仲淹向者虞其龙性乃闻湛然冲然如谢传终日无妄语将繇曲生为木义扞耶昔读马新息传论季良伯高事后季良以事见法而伯高至二千石终谓为知言及考真诰伯高用谨信获度为地仙乃知任侠之去道遠也弟虽已舍家入观为元馭学士有晨昏恋不能被髮入深山仅作一焚诵头陀而已脱苦海却滯淤泥彼岸尚自辽邈可叹可叹仲蔚墓草宿矣盲儿迫欲得公文数刺促耳境幸念之倘有以慰地下也适旧戍便附此并上仙师集不一不一

又

戍卒还致公手教初启封而以碧纸署则大骇既读知太公之归道山也酸鼻者久之念太公获封时犹盛年今者副八座开八袞与太夫人差池蔗境公拥笏垂鱼率仲子

以左右侍养伦常志物之备人世无拟即太公履顺而逝当无复小遗念虞公无涯之孝思有不容三公易者此非笔舌所可释也闻夏来善病用艾至百壮虽已全复不无有关肺腑公之身天下万世身也惟小自消息以全大孝贞比转入一室焚诵之暇闭目冥坐酒取敌寒不过三勺食取御饥不过二簋然羸臃绝矣笔砚行且焚弃而独以千里之外生平故人地下托不能一一都谢卒读公教则既命之其若荒落何家弟爱身而能知足得小几微连遂投劾耳非以为名高也公莹然在疚而能念之即为道尊意荒词絮酒托之一介不能如南州蹶屣千里如何如何余不具

又

惟是太公大故贞不能仿南州故事一絮酒新都之几而乃劳次公直杖千里扶服稽拜公力疾而命之辞又副之大币以地下为托毋论不佞窃从子弟行即所不欲效犬马之报于知己者有如日所愧三载来讎睨笔砚等之娥睽捧心而惴畏其凿剝骄不我受役者久矣抑谚有之物无两大是以太阳雨天燿火敛熄公如欲不佞吐一言何不小制口腕而务极千古之变如兹状哉即不佞何以属囊鞬焉有潘之恒者致其家状谏挽之类凡数十篇即自抑以下驷皆驄步也此皆得公为方圆之至弟猖狂三十年而吴门市态犹故真足愧死偶脑满及之道人作薤蒜兴渠语令诸天回鼻可笑可笑读公书具善病状询之次公亦云然冀已久隍祥太公履顺而往于人间世无复憾矣千载之躯幸自寶爱其它眷属抔沙耳又文思亦宜暂寬诚知斲轮游刃能无少累方寸弟一象罔耳毋疑其妬妇口也次公腴泽殊足喜象先何以尚留钱塘耶彼地骄卒脱巾肖甫暂出鎮想当一相闻明卿再以近制来沾沾水国夜郎王亦自足生活独菰城墓草且宿耳言及悒悒不一

又

解鴈继整得八行虽尔寂寥知为明公手笔了若覲面第中所云瞑眩咯血及读次公书辞甚危今虽已勿药犹自凛凛前覩次公云公年来衣绵须五重漫谓腹围如孔父何以乃尔固知此血从嗣宗恻得来将无苦子云白鳳之梦乎儿子不学而暴得名弟之謏劣自挫无几时复染指世福益我疾疾耳公骨肉我故为我喜欲狂当不为我悲也太公已荷天子宠灵光施于汪世世也敢忘刀笔之效俞仲蔚子刺促久矣不能不代之致声念公苦而复以苦公者请亦老人十扃之一也呵呵

又

周侍御来得书知道体大胜于山园领教时殊为畅慰弟已于新歲誓不受笔砚责计独有一寿言及遠游赋逋未完耳穀日方杜门而亡何再濫除目即万万无可出而具疏上书及往返无益于竿尺苦不可言寻先师微旨似不欲弟遽被髮入山又不令寻小行径此生无复望不免作圆泽例行不又知有符繻否也周侍御所难在破格耳格一破则早晚亨衢元馭近方有戒不作政府书当从容與之适明卿过此欲留小时暂游酒食狱如何造物者私肖甫甚而妬德甫遂夺之可叹春事渐深强饭自爱

又

前是里中儿归得一札知入春善酒食健饭而曹子念自武林从潘生所复袖一札乃云稍不如前于杯勺亦疎章台春色久不挂尊臆当繇笔砚间小受累耳精思能蚀脾土唯裁省太甚何如辱谕弟之玷除目与太原出处不相关乃是杨石孙赵三四君子见凿混沌以了彼一事弟亦只是不忍负所念非敢计及它也乃今所日闻见则畏途羊肠苦海鲸鬣诚不忍以半残之躯餒之耳别纸具见公尚少年责人如东湿公千古躯安能杯棊与之周旋弟既窃知已诚不欲相溷也李本宁久在罽中想诸贤大能居停弟文责亦渐疎秋凉当勉撰芜辞一称封人之祝便可焚笔砚矣仲蔚墓表不谓尚未脱稿盲子日刺促不休无以应之奈何余不具

又

弟以重九日转徙村落杜门深居即猿鸟无相窥者久而家弟遣一械至启之则为贵里人方生书又一械而我老丈之迹俨然焉其为方生徼不朽于其皇考钱唐守即毋论吾丈惓惓而钱唐守文苑中快士也弟岂无执鞭之慕如绮语誓在世尊所何然家弟业已先辞之矣弟于九月初即询戚少保请草老丈寿言一章十月初复狗黄舍人请继草一章其时未即誓也虽然为吾丈而小渝譴固甘之矣钱唐一僧来言老丈为伊蒲桑门之馔广供五十大善智识作华严会踰两月而后解计方深居禅观不容更相渎以尘中之辞今且在世法故自不可废弟自经卷衲衫外不以一物自随搜儿子囊得二币至薄劣不堪玷筐篚有未将之敬而已舍人杳然无一介来索草甚可怪今托吴城工书者章藻作正行二帋先以奉览其书或可留也向歲见过及相送分题都不记韵草草二律附扇头去似觉贤伯仲未免失约倘成为我书一纸欲置之楣间勿更金玉尔音也家弟碌碌见诱世网而不自觉无能挽之如何奴子逼歲除幸速遣归为慰

又

昨驰旧苍头裹粮为饬中行而心犹摇摇如风旌今者得八行便如世尊伏兜率天降矣区区蔬笋长辞亦何足当脍炙而顾有嗜焉岂天宫玉楼亦须人间措大语耶縁知命时狗黄舍人请而今适后有戚少保之役故于叙中不能不及之戚公书来言明年亦欲得文以为不佞光重则鄙言者一巨螯饵也弟贞所不忍齿者诞所不敢闻者寿公如有意乎于六尺蒲团地得法语数行足矣闻以兹月为先司马作无遮会而莲池和尚亦预焉此子今之远宣也得一人斋胜斋五百声闻众矣弟苦年来益见烧衿裾不膻而蚁寝溲亦碍不得已转徙深落为逃影之所何尝有所希证公勿轻听次公言次公好奇多闻或欲借以作方便津梁耳杖履果东即夏甫安能不彻土室出相周还亦欲令公见我土木也家弟终絪时网无力挽之奈何物情滔滔有一言以解曰天若祚宋必无此事公善自消息相与期出世之业不尽

又

今歲虽欲谢笔砚屈指公悬弧之旦必欲破例为之而黄光禄乃以书币请若乃区区之诚别寓之诗歌而已公以文章主海内盟九合一匡齐桓为盛自今虽衣裳之会亦宜少息以蕪养黎元弟尚为人刺促不休重九后即转徙入深林一蔬一衲度日而已仲淹意似欲公且事禅那次修三摩钵提不敢不以闻也

又

前是得大教谓且偕元敬少保而访我弇上则喜色油然见大宅已闻元敬钱唐信则又喜已客至云曾读所刻三游记云云则又大喜已元敬子然不以老丈来则黯然沮诘老丈所以不来故为仲君之羸疾也则又大沮元敬业为言仲君卧起须力奄奄不能久语也乃使人蹙额恨不能翼而飞度饬中一问汤药也独悬大记堂中率子弟罗拜而诵之所以千古不佞至矣第知我者将以老丈舒舌不至鼻不知我者庶几以我为亢桑无趾之流而我何以应之仲君所苦既久恐汤液未易奏必籍蒲团百日而胜亦有以此道进者否元敬之容色悴矣然尚能轰饮酣尚慷慨有封狼居胥意弟谓不虞少保不推轂至推轂将有所不忍言者幸吾乡元驭一瞑眩药国是旋定吾曹得偃息衡门之下即元敬裹白帟而从赤松子游可也潘生役便附此候动履志鄙感仲君有起色幸以示我不一

又

介还附不腆以谢计久彻记室矣传道履殊清佳次君亦有起色良慰弟乡居苦小

警而客多相迹者复徙入城酒肉征逐展转无是处画虎不成徒供人笑资耳昨偶与吾乡赵宫洗书士大夫语气节则蚁走而趋涉讲学则鱼贯而进独文苑一途蒙气尚在有忌无惜令人思李宾之杨应宁既而悔之弟此语亦迦叶舞也姜司寇书成而强不佞序因得诵翁所撰序文毋论雄奇振绝凿凿史狐笔也第此公谓翁贬其师以见弟子美则有所不忍当再三求改订亦厚道也翁姑应之而别存其藁何如刘子昏镜之讥不佞又所不免矣客有李时养者善奕奕负国手名而其人善长者求谒门下幸与进之且为一游扬于乡党幸甚花期之约倘紫气遂东当扫来玉阁以诎不宣

又

昨者元敬少保至则出翁所撰沧洲三会记焚香诵之千八百言言华袞譬之服神丹者虽喜其能洗髓而忧其不得当也乃不及一寿字使不佞可奉以饰茅堂之壁大颀深矣德星荧荧若移部而紫气未东则元敬一称仲淹病状至稽行李盖不佞之致怅于云雨之虚无者浅而致疑于不测者深也适潘景升有一急足便附此况门下矣方为客所苦买舡跳之泖湖湖中三畝地塔院据之高可以眺深可以隐殆不减维摩丈室寻复见迹逐狼狽而返则翁之使者以大诲渥币至矣使者文其辞谓为候即非候而出翁筐篋何忍言返虽然知翁之必我亮也敢拜嘉一二以见远忆承许示春仲之期花事小繁远上人岂特宽约当手操军持贮米汁以待仲淹有起色且新诗奕奕足征无恙不似吾宗家馭以身作渠兄出处也元馭悲思之极必欲归第上意留之决奈何弟稍顽健正得酒食力耳绝无毫髮证晓可叹可叹骤寒为道自爱

又

贤小阮偕其友吴子俨然而过我则以门下之尺一见示俾践成言而西新安佳山水生平在梦寐间况中散之驾税吾华门者四矣而不一报弟尚得称人哉季秋必发装所不践成言者有如日承示诸入诘道缕缕若指掌公之念我切矣老人不任跋履当必从水明卿岂能受约本宁庶几然闻有生母之戚恐未易出亦不必烦诸君子此间当挟子念或骥儿侍行也仲君豫之六五未覩起色前所受喻君术神验第恐下部痿痹者气不能及耳如公必不宜缓须于卦数前行之见时当为相传余不具

又

前贤从还诘并有故人刘子天民便俱附一书想已達矣刘似淹留彼中想老丈已下榻第渠所传行之验否仲君比何似弟饮噉差胜前肤色腴粹次儿宿痼渐除小者萎

试有司不落夹从兄笔砚间若足慰者而老妻骤得末疾甚危仅可不死耳都无复起色愁霖滯淫饘粥之地汇为巨浸眷属委顿尚可以搏沙一观解之若啼饥敲朴之声则匪直停耳已也蓋剥肤矣向期于八九月叩玄亭陟黄山礼白岳辖且脂矣而先君子荷上恩得从六卿例祭葬有司定于彼时成礼纷纭至冬畏寒未能出门笃慚巨卿捷逊叔夜计老丈闻之当为于邑也明卿信来似欲东访恐亦作子猷故事适汪禹义之孽子元勳来贪附一信此子粗似有意其家纵不弟蓄之即古无枚皋哉屠长卿大拉攏可叹不如徐茂吴翩翩作唐人语也淹佳二仲致声不一

又

不奉德问者几半载矣弟所矢志而成洪中之辖者自元旦以至八月如一日也而会太守期以季秋将天子命上冢则诸邦君大夫宗党戚执牛酒日至匍匐而踵门叩谢者无虚晷至孟冬晦稍息肩而区区复滥除目矣病弟得告自江口入孟河驰往候之凡半月所而始见则羸然非故状矣归上书乞骸杜门待命然朝夕从病者所视汤药忧疑百端忽忽如作恶梦新岁初乞骸之请不遂拟复上书陈情而鞏上君子且以大谊见谄亦会病者稍有起色始谋以仲春望前西发然尚欲谒白岳歛黄山拜老丈于里第以践夙诺取宣城道之白下而亲友及子姓羣咻之虽病者亦以为不可故龟勉改道京口登北固望浮玉慨然叹焦光之不可作冒雨抵龙潭晨游摄山颇穷泉石之胜则又自恨此身之不能作明征君第悚然而以江令之忘国辱己为戒诸比丘道老丈盛德津津不容口且谓五月中结夏此山门也喜而志之三月朔之部任留事号稀简第初至不免有公私累然颇以其间涉猎诸名胜阅孝陵垣饭灵谷寺蒋庙叩中山王墓读高皇帝碑出访袁抑之先生于天界寺已偕羣公饯之燕子矶饮魏公北园寻纵游东西二园及齐王孙同春园访友高坐寺践雨花台憩木末亭而后返今复且应姜宗伯王鸿胪召有牛首献花之集后先皆有诗纪之差为不负王生暮年第犹不能如抑之之以葛巾芒屨散浪取适也此境故佳然月不能七日日不能三时耳而歲灾民饥米价腾贵寒雨滴沥二麦可虞四野多经渎之葶六师露脱巾之萌刺耳蒿目不忍视听两得里中信饘粥之业与鱼鳖共百口嗷嗷无计可哺而白纸催租督责不已加以病者如家弟刺促医药进退叵测老荆宛转床第死生未分辍食废寝无时无之村童三四人鲜可与语者仰屋窃叹而已区区七尺仅以外境养之而以实际销之乃悟老氏有身之患而吾薄伽婆无生之乐也方司徒每语必举老丈云八月当过此又贤从一医云以八月来僧言五月者误也瓦官寺刻两记于石且香火吾二人一给事杜姓者上疏欲尽庐其居镕其像人其人以自附于昌黎氏之后虽知其说之不行不免小耐不敢作彼檀越耳谨颺一介奉咫尺之书代身以叩门下不宣

又

前墨客黄生来得手教既而贤从叔来教复加详且有文事四品及机杼之制种种未闻台城士人更拜剡下岩穴饷也当贤从叔来适得亡弟计四体若判五内俱磔委顿六尺簟上血泪涔淫了不知所云亦不能作一小语今者魂神小定乃敢以状闻左右始四月初闻亡弟问其时已委■〈谷丸〉见所寄析产书遗嘱之类以为不得起矣俄而顿能噉肉饭步履健迅与僧无心有纵谈出世法往来澹圃东第若不病人弟用是得自宽然微闻病根未除而颇覃思著述料理花木课子救荒种种不废心甚忧之至月之十一日忽暴发十三日始绝粒十四日犹自力作诀弟书数百字语不及私颇虞及国是以不朽奉托次及元馭明卿甚暂而理结法亦不苟复呼无心有诵佛号千遍街鼓动坐胡床呼水濯足已复危坐瞑目小时遂逝次日就殓肤色和柔不碍伸屈诀书中自谓有定见定力当果尔逝者得此亦千百人之一耳弟业六十余死亡无日岂堪遘此光景初拟明岁决挂冠亡论相守淹速欲以一把残骨付之而竟乖变若此且先王父司马公有诸孙六人诸孙女四人今渐尽矣独弟茆然与影并而已计长于此子十年弟不死而此子死者何也渠名行粗自立仕至京朝官第四品三子皆已崭然头角异时循吏文苑苟占一姓名且有太史公在亦何恨死次公比想何如承示意有命驾之期钟山大江兹时己气色弟当为亡者百叩首以请不朽先此附闻少君异禀故亡俟赞郎然次公既不任胡不举故纁归之余不具

又

每得翁教多从贵里人携来贪闻起居一二而忘倦接然其去或不以辞遂不能悉作报向者传重九后出龛矣又云以少君弄璋之庆且止昨读手教乃果然尔毋论弟心折即天阙石碓龙江玄武之间色飞而复沮者不知其几何时矣昨见畚中丞报政剡翁褻然其冠一剡何足以重大贤君子要自采风者自为计不令人呼俗眼耳张给事房侍御闕而累王中丞如张所谓二十年弄马骑反被驴扑者要之告讦一开局体遂变居间之书可从易作耶弟自亡弟变后又覩平生故人如张肖甫及戚少保阴司马徐魏公皆小我一二年倏忽倾弃以故渴欲归理容棺之墟前月孟浪作小建白旋上书乞骸倘得请可以取道白岳报叩门下第以亡弟丧不能它行耳丁明府自是佳令又能以文雅饰之大计当在高第选弟向滞人股掌间安能为力此间大有断断者当不足相害也笔札旁午殊不尽意亮之亮之

又

数拜尊文书虽多为乡戚执先容者弟因而得承动定甚慰悬注故都为新都士人藪无五日不相接则尊丈之匕箸加损靡不悉之次君第如故要之断房室裁酒食减劳思是养生第一理其它导引服饵损与益略相当毋轻试也闻仲嘉有意外讼今定何如不致大损橐否不穀以亡弟之变忽忽思东归小有建白随上书乞骸而微情未彻至厘勉留辇上君子有谓即十上而十不听者如何如何归亦无一尺宽眉地盖兴本自消索迩来并生趣亦遁尽矣两犹子来相与抱首痛哭小间料理其遗诗文得若干卷刻之次第其事为行状新岁则令其驰叩门下悬七尺之碑以不朽也昨得一信乡衮少傅公推轂尊丈甚至铨曹第以无缺柱之缺至当无以解也尊丈岂以一出置灵府要自公论不可混耳迹者龙蛇特甚多年闰蓬头亦化去特化迹瓌竒磊落故是异人罗叅知闻亦能潇洒似犹在亡弟上大抵苟于心镜小磨洗亡不效者吾曹为笔砚葛藤无了期要须借黄蘖师荡除之胡元瑞至瓜洲而病五十日不食气息惛然昨自力遣信求不穀一传以暝大可悯也即勒令南矣程司农丈方艳其盛而遽闻讣音世界直是缺陷令人惛然黄生行附此力薄不能有所助也不一

又

前从楚邸人得老丈教言欲为玄岳结礼拜缘第留都自一二中贵外无可语者而此中贵又为与绳丈共以阿育舍利殿缘前损其橐似不能为冯妇矣弟却有所悬密藏上人者法门中龙象也欲尽梓行大藏经如磧沙尼故事其发心甚诚而为利益甚大与绳及冯太史开之各叙其缘起即弟亦效颦焉顾未有大展法语深启信心若老丈者老丈得理几于裴相国张天觉运笔隃胜白香山蘓长公倘不惜一刹那挥洒当使毫端时现舍利眼底悉证菩提三天子鄣善信林檀施云集不日成之老丈功德与迦叶难陀并重必不唐捐矣亮之念之余不具

又

弟以五月将发金陵而仲嘉至自洪中出老丈教及雅贶展阅如奉颜色自是间夕辄一会仲嘉亦称之诸公间然不能有所地道六月四日河桥与仲嘉别九日抵广陵一晤伯子属有楚中使事治装忽忽征其橐甚垂十二日抵淮阴其夕急足以移官之命报为停三日发公移与书之三相国太宰膺首南矣二十三日抵家自计幸免襁褓干谒之苦且获以其间扫先垄息园庐于私计颇便第抚亡弟殡宫与孤嫠相对长恸归则病妇卧内病儿卧外舍人子告旱灾者累累出游里中问存故人多为异物往往折心畏影复以讞审之期迫不敢多恋桑梓且图中秋之太平门外行堤柳间矣献岁必当自力上疏乞骸念老丈东山之卧甚坚而庙堂大有物色者或出或处同心断金故不以区区形迹

间也即弟苟得请而蒲轮尚未下决取道奉谒从杖屨黄山白岳间所食言者有如日亡弟條已过朞歲矣葬期在庚寅之腊敢仿东京诸九列以下故事不佞具状草而以墓碑请儿辈在苦次不能躬走饘中九稽顙堂下所具先弟之遗币唯老丈念而存之埋土之骨所恃以不朽者在老丈九泉而有知也其敢忘踊跃秋气渐清为道为天下自爱

又

弟以二十五日抵都门更二日履任所谓男子张君嗣附之疲欲死者仅余气息而已讞审发疏不为苦独作长安交游书近五十函头目为岑岑故不能如刘仆射一日百函然须蝉缓不休不若彼时之寥寥数语也寻吴太学稼澄来已张贡士文光来已畚宗汉来独张袖中出老丈书谈近况良悉仲淹至不能噉粥而仅举乳势亦亟矣不知老丈所饵大丹可用否弟之疚心蓋不特谈虎而已也诸犹子所遣奚雏既已在彼恐不能愬然斥之且归成风贯虱之手能忍不为吾生死两人一出耶张生颇淋漓但未经绳削吴生已离汗血翩翩神骏当与徐茂吴分镳此间比当亦逐客客无所之则当走饘中道闻饘中米价贵极累累皆有菜色方司农尚不肯归客何所得食计亦左矣时事大不可闻吾曹大臣小臣在朝在野日相寻闋阅以招卞庄子之刺良可叹也弟一过新歲即上书力请骸骨以老归必不负齐云之约以病恐有所不能矣吴使便附此不一

又

犹子之一介回得翁为亡弟墓碑胜于中郎吏部遠矣此子前死事事可痛独此一端差为幸耳即以付犹子使觅七尺佳石及公瑕之尚能握管付之剗剗流脰人口吾曹竟当不知如何也犹子所上器币比之元微之家贄白少傅不能十一而不见纳愧何可言大颺勤存弟却不能偃然自蹈不恭外薄有所侑非敢附于献縞也仲君噉粥无苦诚为大庆知高居太函絕迹尘鞅下土之士望若以为崆峒广成而顺风下拜者时时有之蓋吐握之夙风所致也弟报政一事横为忌者所诬賴上圣明洞察得以无它然失足罗网自貽伊戚夫复何言今唯有恳疏乞骸而已往者以六州四十三县鐵为错今者以檀公三十六策走为上也仲嘉比何所往审象先如翁所云留之饘中申以义方之训可也明卿所苦殆尤甚时事消息似不能佳两乡粒食艰已极矣将来不知税驾之所一叹

又

承以迓者流言之故专信驰书见慰至七言二律贵于双明珠遠矣弟留信且两日欲效狗尾之续而一语都不成既幸无催租人何緣兴败良可耻也公知弟哭吾仲耶不

知又哭吾犹子駟也仲有四子此儿长而最贤不意奄逝岂惟家室之痛悲哉血胤已絕唯子妇有妊八月或庶几万一耳弟乞归疏又再上矣倘不赐允明春必当引疾乘新水归海上扫迹先垄不能复出事诸少年也邹考功始为弟辨疏留中耿御史大夫之疏更自过情幸为人所沮然不合刻置集中徒增一番颊舌耳年过桑榆百念俱冷不唯毁者不螫舌誉者亦一切无味出处之趣要亦同之张萱到否此子材似胜文光翁晋诗故精深然未遇之人不宜遽工工则造物见忌恐以自没得次君书神采奕奕故知其健饭也余具渠书中不一

弇州续稿卷一百八十五

●钦定四库全书

弇州续稿卷一百八十六

（明）王世贞 撰

○文部

△书牋

答吴总督

始中表陆生造谒门下时索贞一书先容贞以门下深仁衣被绅裾无一失所而况陆生有布衣之旧落魄已极必在所悯岂敢借门下之泽以为己润以故不敢应暨陆生归则门下先赐牋下存慰藉深至织文之丝比华绣段紫端之石并美青玉使贞惭感无地陆生手一纶乃门下前后功次意使贞纪之贞年来衰懒之甚于笔砚问滋味淡如嚼蜡小有酬应散若团沙门下知爱之素不敢自秘其拙惟是二广之所不乏者功也门下无快意无觊心日以清德先之以慈悯行之恒使鸾鳳之意胜于鹰鹫漏网之寬隃于血刃此则贞之所深悉而窃效发挥于一二者也陆生之嗣子行便聊此附闻元功告成旦夕入辅山泽之癯无由嗣接音尘南望兴懷耿耿不一

王总督

向者猥辱大海注存匆匆报言未罄固心仪之矣我翁文武并用为国之祲凡有识

知靡不拭目以期钟鼎之业兹者召自东山晋钥北门辽左之威等于雷雨蓟鎮之固隩于金汤师中三锡已征其一矣岨岨大司马开豁大度秉枢之后得翁为代真若李临淮之继郭汾阳精采一新詎直萧规曹随而已哉贞虽误习雕虫久已厌悔年事衰迟心力疲竭即有笔札酬应仅堪覆瓿而我翁过垂獎借不惜齿牙且使于大司马诸牍当糠粃之导真足愧死念使者仆仆三千里勉尔塞白倘不斲梓人须痛賜斤削庶无貽笑草次附复未竟所懷秋气向暮唯为宗社顺时自爱以迓隆眷不宣

温司徒

老丈开府全浙下走杜门故里云泥既殊且乏生平之素而遠书慰存贖币继之且使荐其敝帚濒行纒纒不能自己乃知尺素论心遠逾会面千里神交贤于比邻殆非虚也有致翁恤灾疏稿至者读之以为剴切恳至当事者行之三吴垂死之民庶几有起色及闻疏至都而见尼物情郁郁然未尝不加额愿翁之有后也贞久废过时之人絕意世途而晚复见饰蛾眉混沌势不容已腩颜一出惭沮无地所冀羣龙满朝非日可藉手拂衣耳賚疏人去聊附候私不一

寄胡司徒

公衮衣江左既覆露我而复食我礼我行台之夕以部内人才賜榘不谓齿颊余生亦賜収采不然之灰岂堪作药笼中物恃以笃旧之深等之遗簪敝履使稍有颜色草野间耳昔人云知己重于感恩贞岂敢一食而忘左右第此身作佛奴长安贵人问遂久荒絕若破例通此政恐不免见唾杨太尉计不以我落落也江左行台大府周吉水王三原明敏博大故当归之若清公慎勤孜孜奉国自燥髮以来未有见如我公者白面书生始自頤指既而传声既而求胜不胜不止此真可为太息流涕也第庙堂眷注愈深而我公求去愈决君臣大义政自了然计天池之息不过六月公既富于春秋天又相假以喻璧之阴便当寻本来面目作出世计即异日吐其余经世不过沧海一滴耳贞甚悔擲此日于雕虫蠹鱼中譬之奢子产尽始晓作活虽复无成亦或可免沟渎也荆石宗伯家刻晁阳大师编并有薄物将遠臆不拒为荷家弟行部或得相闻唯有以教督之

又

西秦东吴相去万里欲附数行于鳞羽而不可得歲前见翁起自岩壑复领鄴侯之寄不胜私庆以为国脉民命必须精忠劲节胆力俱称者任之大司农非翁不可而贞一衰懒过时之人絕意世路久矣乃亦从翁后而玷除目良切惭愧特以先君子被国恩至

再而贞之被命者亦至再若复偃蹇称病以自为名人将不食其余故亦龟勉而出今抵任矣马力易隳鸰原在念岂敢上比我翁同日而语耶昨歲一遣人谢恩一遣人乞骸皆以未得翁入朝之报不敢具渎而最后去人以一槭见归槭启而荣光骤发则大教在焉恍若覩眉宇而奉谈笑何贞之踈而翁之厚也故乡板荡且为鱼鳖皆旧所拊循之赤子也唯为一轸虑是祈赍疏役便附布区区不悉

寄胡雅斋司徒

自三歲前从家弟处得门下一书旋有报启嗣是间阔焉虽鳞羽之径絕然于此心未尝梦寐忘也昨春从邸报覩荐剡除目甫为小快而旋有齟齬者真令人气塞所谓王尊一身何乍贤而乍佞耶屈指戊寅冬篝灯促膝微言在耳犹自宛然蓋此老疑根之未除而吾吴俗薄恶有以成之也间与元驭先生谈及相与振腕以为毋论才力若明公即清慎勤三字举世孰有相拟者唯迹来郭中丞其为小民称说颂美毋异于韩黄二颖川而亦不免夫郭公之不免则世路之责而使明公之不遽伸则吾吴人责也元驭今大拜矣苟壹志为县官论材修古上臣之道当安能舍明公与郭公仆自废且老矣坐蒲团三尺起此五岳方寸屣提所不与也适宁夏张中丞有一使便附此不知能達记室否语及悵悵何时见旌麾出函谷关动我西叹不一

答冯文所提学

昨■〈足 敝〉■〈足 薛〉东徙案头无一书卷而仓皇完十余宿逋其文多不经意而偶自斐然独最爱执事集最欲有所效而琐弱不成语不知其何祥也岂吾西竺所谓縁也耶使者甫发而执事教札复继之其卓诡宏丽亡复论抑何感慨蓄育深且至也仆老矣且感先师名根之砭恐恐焉若古之畏影而驰者偶记桓文之业皆练卒侵壤以成其资故一战而遂主齐盟宋襄以弹丸之地欲用其虚贵假义抗鸱张之楚故一盟而辄见辱今执事之兵选矣其壤广矣文武之胙舍大树奚适即世有宋襄何足虞也执事所论胡元瑞甚精而亦甚公沈雅闲适是渠所短于此得一针膏肓之痼当便脱矣彼自负诚太高雌黄月旦亦不自禁然未至如所闻之甚当由贵乡一人传之过耳家弟误被时趣不能终固簿书夺之则无有整师而抗执事者自爱自爱佳集当更卒業不一

沈少宰

献歲方新台履万福入奉经术以沃毗圣德出秉藻镜以登进善类蓋不待爰立之命而贤者功用已大光显矣豚儿归备道翁惓惓至意不以涂龟之踪是弃而谓雕虫之

技可收至欲见委赞述先德而李使君至则首为翁致拜托拳拳之命贞虽謏劣无状特冒譎词之戒储笔砚以待久矣岩穴遗耆收録殆尽不谓謏劣遂尔滥竽虽愚无所识知当此圣朝夔龙济济亦思自拂拭以仰观其盛而自昨春一病淹歴三时为医药所挽得称人于世然髮堕齿落精神销亡烛之武之少尚不如人而况老耶且自庚辰之春以死灰自期避处空门一蔬一褐苟免饥寒藉以没齿乡里之人亦有信其隐沦者今并此匹夫矻矻小节而弃之复何取也小疏乞骸情出由衷唯蚤赐覆得为太平之民万万足矣春气渐和为道为苍生自爱

与夷陵王少宰

前者浮言汹汹时贞不胜其郁懣轻破山野之禁轻吐其愚以渎尊重而门下不以为譎而慰之且闻事起时曲垂弘护使调達善星厉谤不至滔天贞与荆老得以苟存一畝之宫焚修饮啄不至顛沛皆大赐也夫阴翊善教保完竖儒此自门下宿植福因亦是将来不思议功德贞无所用感无所用报第反之此心有不容己者敢因荆老使便布其区区门下景星卿云海内共仰加以赤诚推人洞见底里悠悠易生毋论荆老即贞闻之亦付之一笑何足动门下方寸哉柱石之躯万万倍加保爱汝泉小鲁二老素辱知念自惟麋鹿之迹不敢上援冀门下清闲之燕一言叱及而已余不复赘

答戚少保

族子艺持一歌欲以荐之门下托仆先容仆读其词而壮之为作数行相寄却从渠得明公前茅消息欲操轻刀奉候于吴阊而足迹不蹈其地者四载所矣第扫弇园一片石以庶几追踪浣花之遇而今晨使者忽至拜手札勤拳至爱迫于简书忽忽南指仆宁无清梦逐五羊使者飞熊之旆乎渔阳十载能使隍堞尽为金汤天骄敛迹黄屋增崇蒙内史赵营平不足相拟而一时借公以南彼虽兢兢其视一旦夺魄宁能遽作秦会之乎岭表素服威名双甄所指瘴疠全消尺檄甫驰鲸波自偃讵无足劳公神者异日万户侯印当扞莽首乎取耳道人不当复作此语为公一击唾壶勿讶勿讶过钱唐想当与肖甫司马周旋附数行与之公至岭有一札寄黎吏部盖为其乃父惟敬致生刍耳渠里中有故岑给事用宾者于仆有知己恩为一访其诗文此间欲刻之过此当掩关焚笔砚也不腆将敬进近作山园数记博一解頤余唯加滄自爱

又

夏时辱手教云葛之颺草草奉答未悉所欲吐兹复承大海及麋丝觥杯种种珍惠

公毀家以养壮士不足而又损橐中装勤存故人且仆土木之躯不堪文绣久矣一褐一苴足了寒暑两月来遂断米汁皆无所用之特以双鱼万里其尾尽頽恐重累行李不敢不拜嘉耳昌黎莅潮鳄鱼为徙今公甫杖钺而鲸鲵窜伏海波不扬文武为宪效固章章若是第何以取彻侯印归从赤松子耶仆之不能出虽坐不敢负香火一念然亦内揣筋力外察事几余日无多坚冰可畏故虽上负国恩下负知己有所不能顾耳公高我以轻世之节而厚我以度世之事却非所敢当也伯玉司马六十仆固愿为效一言之祝而适其姻人黄光禄来请业已许之公之爱司马与不佞夫岂光禄所可同日语以故不免刺促子墨今録去或不堪疥司马壁则且置之何如公又谓明年当援司马例而寿我则又所不敢当也伯玉之文岂直玉案璫瑶而已第仆所谓不敢当者其说有三先大夫中谗饮恨寿仅辞天仆自过五十四来便忽忽愧生而岂忍以六十言贺骄我先人一也二者司马为文必以蛾眉饰我而仆行能下劣亡可比数嫫母之饰愈增其丑二也先师戒辞遗训恳恳为名作戒而乃犯之三也且仆以五日后入深林焚笔砚公亦无从迹我即迹我亦不能报勿讶勿讶岑给事赖公与支学宪不朽仆旬前草一序少徇知己而使者适至今并报支君书附上幸转致之此二文当亦称絶弦矣艺侄从事幕府苟窃升斗以糊其口为幸已弘乃重辱齿牙之借耶姚老习養生亡所归而后皈命西方技亦穷矣第其所生云仙子者却是傍门第一流公欲固此色身不可失也秋气益深南中当亦佳是爱

又

清洋一别此心摇摇若悬旌于蓬菜三神之下矣送者至丹阳即知仲氏柳塘公大变南越夜郎相去万里幸先后解组可以塌箬丘壑而造物妬之若此不能不令人致恨于缺陷世界也仲冬得肖甫司马一札是时犹在鎮惓惓以老丈为念谓北门鎖钥折冲万里非公不可托仆致意累百余言昨得蹇中丞数行亦具道边事无可赖者惟赖公与谭襄敏公故所筑敌台耳必不近舍魏尚遠思颇牧第闻黠敌转骄歲币日益皆私取之部士月饷鹑衣鹄形一贫刺骨即巧妇如公能空铛作饭否汪司马近挟二仲与龙徐二司理来高会数日杯酒毫翰间谈大雅不置随憇金焦溯流摄山栖霞度暑仆恨未能从也迩来頼庇顽健大儿塌翼得周旋左右两小者备名学宫不至落莫想公所欲闻者止止堂集序勉尔塞白殊不足灾木也雅贶拜嘉附有縞敬幸不罪鄙褻为荷

答吴司徒

世贞向者自废草莽而我公方步武天衢黼黻帝藻唯间从一二交游耳高誉沾余馥而已匹夫之节不固苟出应世始获以名姓相通而识荆一念蓋至于今犹阙焉门下建牙握节扫瘴烟而日月之旗常之绩与新息铜柱争雄计相特召三台在迩而太夫人

在念毅然请告天下高其事而懿其心乃令甥来将大教腆币则以太夫人幽宫之石见托志铭恸然颜汗又以太夫人之美节姱行福祉寿考于海内宁有几门下之为勋臣为循吏为名儒正士于海内复有几而天子之所以宠灵光大其歿存者又复有几而不朽之重委之謏薄无行齿颊狼籍之人何也世贞自昨歲来弃妻子草衣木食于笔砚都已谢絕而门下业已为知己又令甥数千里扶服道路不获自蔽其丑唯更斟酌之勿使灾石可也柱石之躯幸自抑嗇以终大孝

王司徒

向者台旌北上山中得邸报艰欲驰一启奉候而不可及矣国家根本在积贮而积贮取给东南今以大司徒之政畀之正大精详之人如我翁者固六军万姓之命所仰系而区区东南桑梓之私尤可藉以衽席者也癸未比壤皆稔而独敝州与嘉定以民力之不给与雨之不时潮水之不及济稻禾半焦加之■〈风贝〉毋疫鬼积虐之余民尚未有起色也唯我翁一念之而已世贞謏劣齿颊余生逃墨自放无复世念而除目濫及此必我翁与二三大老念旧推轂之效第蒲柳易衰樗栎无补非复东土周还左右时精神意气矣且诸贤在朝与彙征茅茹者皆一时之选而以不肖之躯参之所谓腐骨馁鱼能败锅羹者其不重貽知己之辱耶抗疏乞休实出衷腑倘会梦翁台老幸一从輿不至再渎幸甚干瀆尊严无任皇悚之至

御史大夫吴公

自翁之晋领中台持天子纲也贞时卧田里弹指称庆曰国是自此定矣既而连得览所上大疏皆凿凿中窾而至挽留耆硕旌礼恬退于盛世之德增光重焉所谓通達治体奚让哉贞衰劣过时托迹方外不齿人数久矣上恩霑及先魄谊无可辞冒昧苟出竿禄无补惭负益深如何如何昨者海公悯念闾阎之苦有所减省行之二年独于贵院所列守宅更夫一事诸公持之甚力是以迁延至今昨始覆上所谓寬一分民受一分之赐者也伏惟尊裁幸甚余不敢赘

答徐太常伯仲

前者徐孟孺称师翁道体渐康以故于元馭宗伯便仅附一书通臆不复走介卓午而孟孺书到忽传有非常之耗且骇且疑少间则使者所将之讣继之矣痛哉痛哉天不慙遗一老海宇失望元龟何托赤帟何表至于区区顾凯羊昙之感蓋不止懷依鎮海支策西州而已孟孺致尊谕计遗疏事且令具草忆得先朝大臣自景泰以前所未创见惟

天顺中宁阳侯陈懋太平侯张輶文安伯张輶成化中会昌侯孙继宗三四勲戚而已嘉靖之季李顾二文康时在位故有之若晦庵木斋林下诸大老皆不闻也当是时林尚书俊以尸谏忤旨顾尚书可学以觐恩见讥非例也第我师翁光辅二圣功在社稷八袞时受主上隆礼大眷以此酬恩纳忠或不妨破格耳不揣庸陋僭拟数言驰去须与与绳司空一商议却付大兄询之三老可上则上不必拘也三五日间即当奔哭几筵面悉不次

荅李太仆生时

仆匏系一茅庐百事沈简而独生平故人尚在方寸第以授家儿辈仅挟两苍头自随不欲从之借残力通讯问公乃能念我千里裹粮授使者竿尺慰存副以烟霞之贖何感如之公待次久为侍太夫人朝夕不能遠宦虽公家令伯何以过是时事殊可观暂出应彙征之数染指而归亦无不可仆槁木之躯竖子尚见凌得公寄万氏抄药方良足山中生活矣不腆刻佛道经数种并山园记附览不一

荅陈太常

昨歲以馆师柴氏役便附通起居辱报书满纸皆肺腑之爱而柴氏举宗荷长者盼睐不至勾贷以其家完会有先师羽化事卒卒无由致咫尺之书以谢乃者复拜大海过赐饰獎捧读之余良切皇汗走荼毒余生僂以时私不知创悔墮人齿颊归田以来百念灰冷而猥承灵真降悯汰其臭浊俾吸清冷非分之来莫审所以今虽损家付竖子木食草衣作焚诵行径第返省内境则七情所侵根器已损追惟往因则百愆所积障业非浅岂足凝承大贖解脱世外倘即未填沟壑获以余日息黥补劓小省泥犁种子足矣翁丈步武鼎铉润泽土庶举口动笔皆是阴功若复澹泊明性蓬戶朱门何所不可先师垂训以八戒为先其教走与宗伯公亦只寡欲薄味省事去思固灵根之本以俟将来顶门一勺甘露而已此外都未有及也走生平绮语方在懺悔即有撰述愚贱无征而宗伯公见强为传良非获已今既已露之无由更秘敢附上十册其宗伯所撰行实秘之青箱适闻为一友窃而梓之俟其成当别奉也辱谕聊此奉复呵冻不一不一

荅周鸿胪

贞齿颊之余人世长物力不从心懒与遘会故块处一室窃比于息黔掩劓之人而已而门下念通家未行之雅惠以教言过垂獎饰使苏壤登筵春容大章见属弁辞使穠稂导玉愧何可胜嘉降之际斗山东南贞仅从邦人侧耳芳问而已不谓垂晚得披琉璃寶藏应接不暇别梓诸大疏便是贾长沙虽失意绛灌尚足耸动朝野自是而后豸角嶷

嶷仅能触懦夫孺子而已何所得公一卮语也中间先君子朽魄仰頼荣施事虽不行亦尔小吐诵之不胜九京之感以故不敢持笔砚戒勉效一言第譎劣不足传亡以报塞如何如何次公材高小铍鸾翻与时扬抑以成变化坝簾之暇幸勉之勿遂作凿坏计也初暑为道加飡自爱

又

昨自仲君起部返而荐其敝帚以为佳集之导至于今愧之不意明公复以先光祿翁之不朽托也读所状佐邾邑事令我神爽尹翁归所谓文武具备者非其人耶而奈何以格阻之然有贤伯仲足以偿矣自惟先司马身后明公倡正议于朝即格不行犹有生意仆敢忘笔札报而病瞽忽忽且仲君见迫甚不能效沈滢之思幸毋即灾石不然为我斤斧焉芟帛附枕殊慚简褻希鉴入朱明迫矣谨拜簞葛之贖以助我懒烂然之币敢附之仲君毋以不恭而罪之天下之躯强进饘粥为禱

又

昨歲委承教札深切念存迹见次公佐无为之报知尊服已禫除书旦夕下矣庙廊搜剔岩穴仆之不肖亦且竽滥而况明公与侗老皆具内圣外王之学术者乎第仆衰病无状且有心盟惟知凿坏而已年来为笔砚所役忽忽成瘵已于新正誓断之而黄解元者以明公之教札来为渠王父宪副公不朽计奈何许之是仆不免诳语僇也不许是二千里之匍匐与明公之命皆委之草莽也殆将以此为絶笔矣次公计已之任大白若辱盛德若不足幸致声告之不一

与王尚寶

自庚辰来忽忽块处于道无丝髮之进仅能以懒慢疏离戚故之交而已执事北上既行而后知之某始则为言路所踪几有窜逐之累其后则复为言路所与谬从推轂之末以故不敢一通长安问虽至厚如执事者亦付之漠然诚知其非谓执事必见亮于形迹之外也始闻建礼之除复覩尚玺之报出入禁闥密迹天颜固一时羣公推贤求旧至意然后来之薪得无又前积耶仆已卖身作佛奴而留尹一补良所不解虽不然之灰无所复动而上章投启纷纷者数日唯冀诸贤一从臾使守此丘壑足矣仲君别驾邢州宦况想佳胜不一

王鸿胪

前者草率附谢自愧不腆兹复承雅诲敦促上道且谓仆蹶履石头之辰正门下挂冠神虎之日也仆初以衰劣不堪仕路而病弟方在汤药故上书陈情乞骸今既不得请而病者粗有起色且贪与盛德周旋少时不免图买舟小一出耳然门下既深丛桂之招仆亦何心小草之恋耶唯是太仆官署名为仙府意必大雅居之而迩来山公启事多好轻俊少年积薪之叹知不足挂门下齿有世道责者宁无一扼腕部役回便聊此附复诸容面布不宣

詹中丞

向者不腆园池辱玉趾光重大为山灵增气别后飞书见宠披衷露素则匪特篋笥之光而已也门下心事如青天白日襟度则霁月光风令回互幽隐之人见之神沮魄夺圣朝召用直臣畀以风纪与一二大老若宋文贞范文正者与之同心底道何其盛也连读大疏于明纪纲扶正学盖凛然有生色焉独仆以齿颊之余亦滥竽征彙执节不固竟成小草之任以来未尝不心仪大贤长者亦非尽由冗夺特以衰庸过时之人跋胡蹙尾惭负故人虽有区区寸丹未敢布之尺素不谓门下猥先大诲副以贶仪至于奖饰逾涯汲引非分则有令人恧然颊赤汗下而不敢当者今天子为念元元三公九卿涤心罄虑以承德意真千载一时也语有之邦有道穀耻也不佞齿墮已尽髮无茎黑如以穀而已何所逃耻旦夕唯有一归门下其念之暑雨郁蒸调摄良艰唯为宗社苍生自爱

荅王中丞

屈指癸酉之秋得接光霁于黄鹤鹦鹉间后凡三拜郢中之寓高情雅谊人间世所希值不知不肖何以得此于翁也一卧沧洲麋鹿之踪遂与世隔而门下扬历戎臬肤功告成仗钺甘凉寻阻忧艰再奉玺书保厘关右岩壑之余为翁加额者再蹙额者一而河山阻修鳞羽莫致虽有此心不敢望故人之见亮也而西使远来猥施大贶手书慰藉披示肺腑至于中间欲屈中散之驾而竟沮子猷之舟诵之使人神思飞越若接眉宇而聆德徽也石经累神用遂成完书仆虽作老蠹鱼其间不恨死矣迩来顛毛尽白髮落无余岂堪复出供人描画而横为除书所迫加以攀上君子见谓先人沾恩甚渥不当偃蹇以自为名谋之不审遂铸此错门下不以嗤其愚而饰奖之何也关中比歲旱甚米石万钱赖仁公抚绥不尽填沟壑今闻得雨麦秋甚佳不知东南凋劫当何如耳偶成奉懷一章并有薄侑不敢当英琼之报庶几献縞之诚惟冀亮存万荷伏暑唯为宗社苍生自爱不宣

与谷司马

屈指奉门下大教十五易歲朔矣中间仅于郟鎮一候起居嗣后避言窜伏田里不能作境外信蓋深念之朝事鼎革羣贤彙征明公造国手也不根之谤久已辨雪推轂之章毋虑十数即同事者起南台首九列亦已倦游而蒲轮乃尚未下何也传闻明公时时策一蹇纵游名山咨访异人求出世之学当事者用以相亮不敢烦以事耶则如苍生何世贞朴簌且不能事言路以貽玷知已然用是得谢笼鞅获邁仙真迁化之奇与指引之切恨衰愚弩下不能有所拟承惟饰巾待尽而已除书两及乞骸未允乍愚乍贤不知其何说也再疏恳辞冀必得请即削斥甘之明公出而宰物如杨公乎则世贞或且有起色焉然竟不若荷一瓢戴一笠以从公为五岳之游也小刻二种附览不一

弇州续稿卷一百八十六

●钦定四库全书

弇州续稿卷一百八十七

（明）王世贞 撰

○文部

△书牘

凌尚书汝成

舍侄孙行聊附一启谢注存之感申契阔之懷实不敢有所请益而大海以混俗见许则岂贞所敢当所谓动极思静静久则动念复生惟无动无静而一归恬澹公两语已是金丹妙诀第要察识喜动喜静之念原是客念一切刻去之于富贵繁华中提出本来面目便是火宅莲花若仅少欲知足减损秣艳分数亦只是小歇泊法暂时行径耳恐未可以言恬澹极则也弟虽弃家块处鹵莽销日即便得芹曝滋味何以为献舍弟蚤衰勸案牘入计时已露章乞骸兹所谓以微罪行耳归后课农训子求不失四民职不至迂愚如乃兄也非公骨肉至爱何以闻此

又

两日来扶病奉侍虽老丈惓惓欲垂度引而弟实无所得以故仅以寒暄市里之谈进兹辱教令人愧悚无已弟自入春羸瘠之甚为子弟辈所强间补以滋味今渐觉小转皆为我喜而独我老丈责其信道之不笃勉以无生之旨此实爱我之深遠出于儿女子昵昵之外弟欲界一凡夫耳先师不胜元馭父子之恩与接度有緣一念勉弟嗇精養气保爱色身左右元馭以俟海期未尝有所授也即于机微露一二弟愚钝无所知即小有知亦不敢影响妄作以趣异径不幸而有采薪之忧若遂不起方在轮回何敢妄证无生上附夕死老丈功名富贵已极福业双重不归之空不得第于此时却便空不得也佛云无生而实云不灭仙不云长生而实无死弟苟于此际有所得则此色身亦不必厌离而自不为累矣大抵方在洒扫应对尚未敢言学地岂得便有所恋舍作众生寿者相耶老丈姑识之不一不一

大宗伯杨公

生平仰止十载闻问不谓于紫气杳雾中得一遂之所以移病在告不辞拥篲操楫弟觉此鄙吝之身为春风甘露披洒却不虚也元馭先生孤介少许可独为翁心醉贞袍系草室如袁夏甫未能踵门请益秋爽或可轻刀见过否时事每一闻輒一邑邑翁忧世乐天两不相倍其以为何如家弟造谢聊附不腆之敬扇头恶作并希教和不宣

荅王司寇

屈指西曹从翁之后获朝夕者于今四十年矣一会于张园再会于行台扬挖秋文论说时事杯酒佐之蝉媛不休寻复会于漕河之舟中则翁方按部悠悠旆旌而贞且裹首以病见矣郢楚之役奉职无状甫量移而白简继之杜门息黔则翁方将天子命按阅幽蓟储胥之奏等美营平而造物者见妬俾以忧归自是麋鹿之迹相望于越山吴水间而翁方以明堂之栋梁为匠石所急贞一社撻耳乃误为启事所先庙廊之意得非重翁以铨枢寄而姑难之耶翁于经济性命之学会通其精微而以一贯之今海内无所不水旱国用匱竭賑贷莫措饿莩填道残骸蔽野念能拯之者翁耳仆之小草诚悔不安为栢也惟有一归而已贤郎致大集得寓目焉河伯见东海若而失宜也雅教币贖何敢当之却有不腆之侑并上拙集贤郎奕奕清令材用不凡一觀接悦如翁之在眉宇也谨以为贺

赵太宰

世贞门下一故吏也不以为贱而进之友又辱肺腑交乃至敝帚荐于华堂大币私于下橐非一日矣齷齪不能事言路再点白简遁迹草莽于影响仇而门下方坐政府握铨柄以故不敢辄通咫尺之书然至于仰止之私未尝敢一日忘也门下遗爱如羊开府清白如杨太尉今台鼎姿移万目趣仰即南北统均之地与严先生对峙而为百僚表率岂不盛哉乞骸之疏胡至再上非不佞所解也白傅黑首分洛门下少于此公数年而遽休汝于私计得矣如苍生何迩者江陵公祸起搢绅兢兢居恒与元馭学士言使江陵能以待门下礼待诸公诸公能以门下所以待江陵者待江陵则休休之与济济两相成矣何至乃有今日令人气叹贤郎骏发梓暎喜慰之私无由一达门下儿子蹭蹬场屋苟窃一名何足挂长者齿而津津不啻口出盖道谊骨肉之爱良兼之也李驹之友来言门下袞衣东土时为于鳞特竖一坊曰海内文宗昔孔北海之表通德里似矣然不若门下之荣施枯骨也且康成所得亦不如于鳞快往时陈道易以大海及二币来方卧鼻念无可托以报者即有所致付之道易所想彼亦无繇自达于车门也外颇籍籍传渠叵测久谓非人间人今似再得一道易矣贞名若学道者而实无所窥髮种种至有忧生之虑受役笔砚亦未尽能割窃欲小露其拙而使者刺促无暇授简俟篇成并旧作成一卷如门下不得请致之白下差易如得请亦必驰信汝上不至作道易浮沉也张助甫差强人意肖甫落落竟成底定功门下亦许之否王大司马故人而贤相及致声不一

张助甫

弟自重九徙乡中旧居丛棘自藩形影相守日噉三粥以度余暑惟故人竿尺时有及者而足下讯独自万里来减季俸以为米汁资弟月来此好亦垂断唯抵暮浮两荷叶不能三合即令至百年费亦不尽所贶非佛顶盖乃天竺中法师茶毗后即舍此盖骨盛净水于世尊前供之为西方繻故彼藏亦自大珍重并向者舍利白■〈迭瓦〉足称小祇园三寶矣弟之六尺久付人齿颊幸不即糜碎而谬被剪饰岂敢顿忘戊寅之辱且筋骨羸散委迹物外佛奴道民髡钳已久藉此一壑容棺而已岂敢饰画阳乔唐突箕颡足下甫踰知命飞而食肉金印悬肘政当累累胡为作此倦世语所喻秋时萋菲如浮沕旋起旋灭亦何足道大槩迩来六七少年台谏不直发自意气实以左珣借耳目窥伺罗织为造化之径因而羽翼牙爪者又不下数十辈耳观舌书吠影射影转自实繁幸元揆颇善调停虚已推毂遂相司马世路小当暂清夷也肖甫每书来叹王明辅孑然一身若退院僧而夸足下跳梁蛰蛰振振未已然彼乃不自觉其跳梁耶近故人刘大司马一嗣子不肖陷囹圄间气犹未绝帑庾立尽老孀继之归骨无所伯玉虽有子多不称意世界故缺陷耳要如二甫及吾家兄弟自无几也释氏离而忘之吾儒与老氏畏而持之于世法出世法有无二义不可不一剂量屠郎作达不已宜其折齿所恨右文之意微短耳元瑞以吾曹假之故恶少若莫生辈力肆诋谋方杜门而事千古益笃此曹子当不战屈也辱

寄家仲氏物已付其子矣渠为荔枝所诱不免闽越一行有两子俱补诸生而小者三试皆首遂应都试足下长器岳岳必不作第二义也叔纵不名痴要须让武子见父宦游何状不歌蜀道难耶旧藏两犀杯乃宋物尚有神彩团栾话无生后取紫醪酥点西京葡萄于此杯对进之当不恶吴织稍精亦可抵裴相国衲衣又拙诗书扇见臆统希麾置为荷

又

前辱大贶薄有报臆间者阔焉度不能于五千里外得起居之详唯间从邸报仕籍彷彿若面兄而已云中上谷之间外患时时■〈足必〉跋独不敢望贺兰山作咳唾兄之威德一何盛也式遏功成当入司中执法不则以中二千石移大镇事在匪远弟生年仅过张苍相之半而牙齿见齶殆甚今唯以乳糜度日而已乃闻尚有鸡肋我者幸而中沮不然又增商颜一辱也元驭正人第刚肠疾恶太甚昨疏虽快人意弟祸水一决拔地拉遯又当大有纷纭且闻太仓告匱宣索不已何以竟之吾兄行当预其忧者不若弟之仅为杞人而已也昨始得汴录渴欲见贤季贤器名不可得吾家两犹子及肖甫元驭之子皆然独不见楚录耳今岁贵胃钱神虽絶巍峩而名士之寂寥程义之苟简恐矫枉不无过正儿子北上已过彭城胡元瑞坐卧弇园者四日出门后举一雄却是可喜事黄幕僚以书来云兄见委使且寘之荐剡中即死不足以报德附此不一

又

自昨冬附使者致谢后不能再一通问讯虽曳尾途中未尝不作天际故人想弟金庭玉关相去万里冥鸿之翼犹且难之而足下念我间关一介六月长途流金铄石不辞喝死喘息间启械发行李恍若清风之投怀也齿颊余生岂堪复与诸少年并进而横为造物者所弄以有此补旋见憎幸未为冶城轻薄揶揄耳林居之日吾不与易跌宕词翰差不落莫亦不顾足下相怜也强敌西牧正与足下所部相关磨墨盾鼻飞组系单于颈固男子事然远公有云愿檀越安穩彼亦无它老人厌事语然不敢不为兄告也愁霖再旬一望巨浸饘粥之产白如瓯脱计无所复之方頼曲生以解磊块辱损奉即付酒家可得百甌却取白葡萄佐之耳子与一夕奄逝几作若敖之馁家弟为经纪其丧始得归仆粗复经纪其家且以七尺碑报泉下也家弟所领驿传得逍遥滕王阁望西山雨然失匡庐主人以此恨恨赵侍御乃能于迹外相念耶幸为致声余情具别帑不一

又

往家弟西首时业有翰墨戒且传足下虽量移紫薇省所治犹在玉门以故不获附

咫尺之间而近得家弟书独称与足下相旦夕云尽得京兆扶风故地而守之已又云兼理外台篆吾未晓新制所快者数万里浮萍忽聚若胶漆耳已又得一鲤银钩宛然悦作郾中观且举向误诗语若讖者信哉损饷二种皆梵天化物始弟得宋窑补陀大士全像及仙师三十余篆心经供奉之窃与善信苾芻语更配一舍利足称三寶耳不五日而致自足下抑何神也弟详此件白色而细似是僧寶已制一粟金小合装之尚冀灵明感通庶几康僧会之应云耳白氎精莹轻润目中所希当时世尊受供亦不过此谨裁作称量衣拟谒圣师时服之或可藉换凡骨珍荷珍荷两日间有致邸报者足下长山东臬而有整飭字何耶足下四履不西秦则东秦百二十二之地山川风物皆入锦囊中人间世快事也足下才与相法必大贵愿勿住一切相勿恃有漏因常识取本来面目为异日刹那计弟虽离苦海而彼岸尚遥不知究竟当何似耳歷下朽骨必蒙荣施第儿驹作老博士弟子不厌弃否有数株马鬣衣三尺土否言及使人怵怛见父吟兴当益王选人事如何家馭学宪便附此縁此公方持嫌一札外不能有所致也加飡自爱

又

前所得秦中书及舍利白氎后欲通一问而不可得王家馭视学大梁仅附数行不知其不作殷洪乔否家弟每相对辄及谈足下风度不减山季伦王平子往往捧腹至云以一杯酒翫积逋寇于股掌间十万敌骑遁巡解散不敢小睥睨诚壮之艳之然不免左顾而唾恐猎心之起蒲团也造物者既借足下渔阳复移之晋臬岂霸朝开府须张孟铎为宰分桑梓计耶王明辅沾沾以得足下旦夕弟剧称合中姬雅能宗门语此是龙华会宿世根勿仅以苏家朝云例待之可也仲归后王家馭亦归与元馭偶明辅矫矫玉立王氏风流似非乌衣马粪诸郎奉玺绂弄笔砚者可拟足下肯作一歌伟之否肖甫佐枢廷足下开府纵复欲从赤松子万户侯印待二子而三勉旃强饭自爱

又

前有一书附家馭提学致足下休汝时又有数行托明辅方伯致晋阳公署计当已悉達矣世贞自入園来塞兌黜聪无复他慕惟二三故人犹时时在方寸而舍第入辄话足下凉州谈笑制敌方畧与消庄浪骄卒事不觉麈尾之缺唾壶也钱唐之变开府公俛仰此曹股掌中太阿倒授付之无可奈何即令足下在宁复有此纷纭言及懋懋臬司逋迁若传舍而除目独于足下少悵当由全晋鎖钥需时而寄耶或借重秋棘如椽之笔则不免一坐紫薇堂耳明辅受庇宇下时时相晤语便是两水壶相暎闻黄玄甫亦以文事见幸审尔则足下席不为无人又陈常侍者老而尚健饭好客意不至衰减足下当毋为苦寂寂也此间旦夕元馭而仲氏佐之纵不能精进不便退果后进中屠长卿文笔不可

当胡元瑞益矫厉异日囊鞬中原须厚集其陈以待余不一

又

黄文甫有一介归附不腆之启及刻成佛道经数种计已彻记室矣倪同安过吴门遣信相闻则足下之手书麁丝俨然在焉知二姬踵谢遗孤呱呱安仁之况可想也不佞乃以为足下方困劲敌二姬捐躯纾难有余忠矣夫岂直祝融回禄之相已也弟髮种种行尽唯貌不甚枯瘠正得千日断欲力耳詎便如所闻姑射冰雪前覩邸报足下偕推浙藩私心摇摇谓可于薜荔中一望旌节然足下功名在西北今天夺呼韩逝左右贤鹿蠡断断将军之绶非足下谁佩肖甫属市人倡乱时单车直入虎穴真过孟贲远吾曹有张氏二甫何妨不高卧也明辅比当益清适黄生能作西京语然非公交车中物足下幸有以规削之所云两常侍供张足销日陈老而益为共谨尤可念也诸经加校订颇不误再上一部并白玉冠得之肖甫者聊以将臆野人献芹献所美耳足下勿讶

又

昨歲有倪令者自晋道吴门以兄之尺牋双丝至得闻兄与明辅相倡酬而黄生亦与捧砚又后有陨璧之痛为怅惘作一书奉慰兼附小物付去又旬日而倪令以其物返云羊肠诘曲仅以书往耳又三月而书亦返矣既豚儿应公交车卒卒令其俟吴门欲精作一书及诗致之方岳邸中而冒寒作汗两日夕渠又不能待矣世界缺陷亡论吾曹合并之难即邮筒亦不易也夏州之拜觉已迟数月大丈夫杖旄钺拥铁骑登赫连台坐受呼韩稽顙然后勒颂贺兰铭勋熟釜亦一快快事也肖甫于笑谈间再销奇变师中三锡文士不为无用矣陈道易自汝来得兄数行若犹以鸡肋启事为仆喜者岂雕鹗乘秋厉空乃欲挟鳧鹖与相翱翔耶仆百念已灰虽儿女眷属亦以抔沙譬之天竺苦县吾师也安能复低眉贵人供后生子描畫哉近以枯羸见迫亲友小进滋味于伊蒲未宜千里责文役方寸于蒲团尤碍寻当誓佛前烧笔砚一粥一蔬了腊月二十五事矣家弟邁小圃戢身其间虽繕性未渠而達生亦颇胡元瑞七言霍骠骑也沾沾自喜以得御足下云舍琅琊君而外唯张君舍张君无所措意矣吾为之击节慨赏足下读仆前后语将无疑吾谈空说寂非实际耶摩诃迦叶闻干闥婆奏音而舞亦是宿习偶未忘耳此间沿海州邑中大水及厉疫死者数万人今复虞旱闻关中五歲旱而今忽大水天意将何如也适便附此不一不一

又

前者黄经幕索一书为报因附之寻有所补书五子篇计已達矣边人歎塞烽燧长偃正足轻裘缓带时耶乃不以一诗见忆何也上已日吴明乡见过饮噉如昔貌甚壮唯近诗小觉肤立耳寻尽出旧作见示终自稳足弟已久断笔砚緣不得不为小破例作数语之导也余德甫已于人日长往生世所不免且与于鳞同甲子而多十四歲噉饭亦复何憾弟所谓情发去来置之未易耳张肖甫谓王明辅成一有髮芘乌而足下振振麟趾却忘自己所飧之盛造物冯生岂可于铢两上较论弟始上乞骸疏不获请乃复上移疾疏两日尚未覩邸报想亦当不异也区区不出止是不负初念宰公以八座相啖亦不暇置方寸今段纷纭乃尔国是将何所憑足下试味之以为尚可出否耶世事一切勘破独身心二境尚未尽了了则挥手入光明藏矣

又

春来闻南床獬口狺狺及吾兄意极骇恨及覩与大同胡君仅各一疏而疏辞亦不若彼二子之甚以为庙廊必有调剂不谓舛错至此夫以文学材气如兄故当不为绛灌所寬然何至并万里金城而弁髦之寻当数行诘肖甫肖甫亦甚为兄扼腕欲于叙功疏内拟移留景云曾与太原道之弟即有数行致此公矣想当不异也攀上君子亦尚有鸡肋我者已力辞之太原及天水盖老諄久废托迹方外懒癖成痼安能低眉事言路少年此曹子于头上安眼尻后着口有何準绳足憑也欲驰一介造兄庐通候舒懣懣之懷而十年絕境外之交老马尽僵无识途者而大教复先之矣二诗宏丽精切如聆警欬分俸之贖又似伤惠如何旬后家弟賚捧北上令一苍头附至宿州取宋道访蔡致不腆之诚先此附谢不宣

又

前者材官去空槭附之然中具一消息想当不浮沈也计兹时已得代还里玉树盈前杯酒团奕不烦呼客恐大纛高牙紫衣将炙不与易其畅也家弟以賚捧归将北首而得南容台之报此虽散负亦自清简若兄果如大司马所拟署留都九列暂尔婆婆度无不可即用肖甫故事今不少保耶元瑞虽落夹过我时家报举二雄脱帽欢噉抗眼一世唯为兄不平耳见父今移何官得何地叔氏贤器不免复于小战地争雄想益褻然也吾二子二侄俱適上于鳞旧有句云意气还从我辈生功名且付儿曹立驹已矣唯兄与阿敬三人共之耳拙诗二章并有薄侑去力弱不能多致外信阳王太史书物烦使者转致得数行以报为幸

又

使者水陆二千里单行度歲驟見之令人心折既出橐发书则又爽然神王也御史中丞休汝从车骑飧牛酒贤于袁将军十倍宜足下之耳热称快也弟征书旦夕且下纵安石风流不能长有东山之乐耳弟处息一小楼无异头陀行径而不能不为人作法事九月邁一异人依方行之大似有证验恨为米汁墨汁见染不免有作辍兄所云辇上君子会取弟作颊上须麋要自非急弇巾一曲自谓不减鉴湖也肖甫围玉而归岷峨之间大可巢窟却为国家轻舍一栋未见堪代之者如何如何精镠油玉成二卮二斗又损秦中二复陶谚所谓内外俱牵绵矣山人无以为报殊惭青案别楮具肝膈不一

又

使者归有八行附讯所喜流言尽弥庙堂伫属尤厪征书当旦夕下矣今年花事甚佳弟虽老强自力以米汁偿之但不能作兄跳梁少倩间耳方司空与家弟为兄周旋良苦司空却以流言赐罢家弟亦少涉抔饭之疑寻而释然然坐此微滞推迁世事反复殆同儿戏何足挂齿唯是先君子获一伸于台使者宗伯兄之乡人也面许二相君以赠官而忽中变仅予祭墓闻亦兄之乡人阻之故然上恩德不为薄矣弟老无以为报学道无成所欠一死苟飭先塋少露宠光当于傍凿容棺之穴蔽此丑质何所不逍遥兄得无诤之否偶信阳王太史人便附此不宣

又

歲事萧条方引疾上书杜门待命朝与病妻夕与病弟相对甫事医药即忧衣食郁闷中得兄遠使手札为之破颜唯是损饷器币过隆非岩穴所当耳又辱念及先君子锡以奠仪綠已辞之邦君大夫敢告先塋而后附之使者上恩深重得沾两祭全塋复有夏卿之赠浩祭两辞皆极华袞蓋二相之力而太原居多不唯死者若生者亦可死矣独南枢一除翻为蛇足病弟虽见减损而根株未拔兄念此光景能忍心而出乎业上疏恳辞未知庙廊之上能相亮否兄材高一世关西前后三政啧啧人口而未见新命良所未解春时獠狂自鸣自吠曾密叩之太原未尝有所闻也瓮牖绳枢之人何所任德使旋聊此附复扇头一诗志臆兄似少一段佳事耳薄侑希鉴存不悉

又

歲杪懷人而足下遠使手问至弇中大快然是时仆已勤征书矣而足下未知也家弟病矣而尚未有它也春初而仆所露章乞骸者不获请一念不坚遂成小草犹幸江山

名胜帝城风物足以游目而抒吾之奇勤为诗歌序记之类庶几备金陵一稗史而闰夏行季病者渐■〈谷丸〉遂成异物闻讣之顷肝胆寸断自是哭泣无节饮食渐减心志皇惑形神沮丧又值比士之歲故乡亲友麇集加以秋令奇热襁褓应客慰唁之札一一酬报而好事者复用文事见苦譬之瓠窳污邪而受积潦几于此中浸杀盖未几而肖甫之计又至矣骨肉知己如晨星渐疎计吾曹独足下与明卿伯玉在耳仆长于足下七歲在世之日当不久何堪眼底有此零落业上疏乞骸旬日间得俞旨即轻刀南下矣足下向夸击鲜浮白左挟燕姬右拥赵女于少年场极豪举之致仆颇不以当心然家弟受闽博士家言矻矻不休以孽兹症归而左绳右矩不免于死有闫头陀者六十年不近女媵收敛若婴儿寒暑一衲孤行人间前一夕立死矣足下计故非左但吾老不能从耳甘凉之间兵变江起足下造国手乃不借以一刀圭之寄而纵之摩摩乎窃所不解虽然弟亦非所以爱足下也久苦不得便而吴老去聊以奉候方司空丧尚未能吊之如何余不次

又

冬中吴山人游汝有尺素双絶之附因详仲氏不禄耗闻我同戚冀分我哀不审其不作殷洪乔否既而足下自得讣于潘大夫所知己之痛发之十章遠使千里冲冒冰雪而走我金陵俾致梓里披械跪读天真烂然一字一泪会有小奴归即寄之四从子矣緣亡弟遗言不敢勤故人片楮之贖辄以便宜附返止令孤儿奏些陈书于几筵而已弟以季秋杪上时事典礼两疏小解竿慚孟冬中旬继即陈情乞骸中间杜门四十五日苟完笔砚宿负因料理亡弟诗集先已登梓寻次第其文付之孤侄輩俟完当专一介九叩门下以冀珠玉之引旦夕草行状成亦当有所请兹尚未敢也燕中消息大似不佳未审天意何如耳弟开歲后当再上疏以必归为主得遂首丘无恨蓋棺足矣足矣大梁乡书至贤季令器遂尔寥寥若衰门之不振固其宜也长垣君可一转否胡元瑞赴公交车病阻瓜洲伏枕五十日而尚未起今须得活恐无复北理冗次不一

与李临淮

门下之握符留省彼此一通问余则于扇头寄音而已乃至杖钺六军当齐汲绛勃之寄天子所憑人臣无两而不能驰一介之使操下里之音于龙江祖道自附于鼓吹铙歌之末固懒嫚之习成然亦岩廊丘壑之分絶故也向者数闻彰武之治师隐然有古名将风而门下继之更复琅琅弟横槊赋诗彰武或恐有所不暇也无论彰武自开国迨今振觚管于蝉冕者谁欤定襄其皎皎者尔即公家武靖王博学好文为一时东第之冠而遗言散佚颇深鳳毛之恨此道得公而始畅要之古亦未尽也仆弃官学道一无所成犹欲理残物而用之雕虫之障深于鸩毒抔沙之緣尚自黎骨坐视此身荏苒复堕苦海

耳家弟在容台依然有六代三山緣差不恶也适故人之子王将军元周履任便附候起居并成一诗书扇奉尘清览余唯为国自爱

荅冯方伯

明公坐黄鹤楼俯鸚鵡洲芳草则当念能赋之祢正平晴望汉阳歷歷芳树及听隔江小语则当念能句之崔左司李供奉南楼翫月次当念庾司空履声与胡床谿浪致谈俱舍不之念而乃念弇园拳石勺水与中庭一方之月又因而拳拳于齿颊中残物若不佞者何也毋亦明公之过为长者将不佞如嫫母魑靡或有当于一嗜也耶明公念弇园不知不佞贞与此园緣欲尽已并家析授儿子辈别构草堂僻地仅容膝旦夕披一衲入此中蔬食水饮了此生矣明公骤见此当骇以为诞且怪不知败子回首晓作家緣但恨晚耳吴民望明公如望歲然以孙中丞公资簿言之似未便转移明公固全楚德星也将非吾吴民所得有矣李使君在吴兴若神君吾吴恃以无恐诚如尊谕方侍师野次草率报言不尽伏惟台慈鉴亮不宣

又

仆自衲凿世法缩足一团焦中朝暮圆觉黄庭数卷而已不敢复论天下事而自壬癸间乃有以相闻者然转闻之转不可解如明公天下才也毋论其它即吾江左萑苻蜂起之后明公一下车而更束约募材武旌旗鼓吹肃然如李临淮之将朔方诸盗魁皆鸟兽散去黔首得不废耕凿者谁力也三事在步武而力壅遏之必尽屈其挥霍一世之精神才略而归之牢悻寂寞之地是遵何说哉昔者杨遵彦除赵彦深用识者谓将欲行千里而舍驥馱策蹇驴将无谓是也虽然天逸明公以盛年而假以余晷明公所灵承之而为垂世出世之业则大有待矣豚子素乏家教偶尔猖狂一鸣謏薄非分但有惭惧独叨从贤长君后贞得借以修通家之契于门下用为慰耳拜祝过渥餽獎过隆皆非所敢承特惧懼不恭之咎勉尔拜嘉使还聊此附谢并布不腆之敬伏冀弘纳

弇州续稿卷一百八十七

●钦定四库全书

弇州续稿卷一百八十八

(明)王世贞 撰

○文部

△书牋

顾宪副益卿

前者观一上人来道公轻舟垂访斗靖方欲扫松花煮芥菽以待而云雨虚无杳不可即寻稍知以简书故倍道东迈当赤城霞起飞瀑界空时以一瓣香遥礼即隐隐灵輶何必访此委蜕丈室也钱唐脱巾之变意谓非公不能平见肖甫司马论偶合亡何而公果有钱唐转埽彼奸凶于杯酒谈笑间二人真人龙也使庙廊用才尽如此天下更得如公者三四人吾曹卒当乐死无虑矣元馭大故频仍忧悴不复可堪仆甚苦孤立且名为弃家而家强来蔓葛又不能尽扫笔研障恐不免负公等期如何子念颇言公善病状公才大于吏牋虽游刃无全牛食少事烦尤所当戒见承父饮亦不能如前大抵长淮以南人至五十当别作一番养摄可尔子念侠者感公持病延礼津津不置口岂便以干襄阳辛长沙望公二嘉紬系公遠念不敢却而道人无长物扫篋不足为报如何唯公亮之而已张守古循吏也喻丞古名士也公冰镜自悉当无俟鄙言不一不一

又

始有称足下豁达慷慨奇男子者既而窥见绪余一二则以为姚紫微李赞皇其人也嘉平小阁盘礴久之于谑浪杯酒间露超识玄诣悟向者尚见其龙之似耳仆之不能出亦只是不忍负然诺一念非敢以为名亦非敢他有希覬也既得请而稍觉其有味耳别后犹复受笔研役不休以此深愧足下故自重九徙处乡落植棘自藩谢絶一切酬应荤血味亦絶不沾口唯晚寒犹举两叵罗昼日无事拈乌丝书小絶句一二以此知迦叶定中之舞难尽洗耳足下旦夕当杖钺而尚奔走三辅故所未解昨一晤王承父于王宫端墓所得承起居归不半日而拜足下教贖辽叅大足饱秦厨可以御寒念我至矣元馭先生受主上眷若此谊不可不出而家馭病甚所举两儿旬日内为异物太夫人念之以此刺促行计如何深山道人及此亦似育儿作臂苍走黄语也当不满足下一卢胡春寒自爱

又

维扬倾盖弇楼信宿人间世与老兄会仅一再耳余俱托之简尺中而不知神交之

契固有出于简尺之外者易云书不尽言言不尽意今者拜逵使手书则言意亦略尽矣分俸可以助廉三貂可以御寒珍药可以扶衰此皆老人所急然得无损中丞飨士之帑耶比岁来天下皆灾而辽阳为神京左臂呼吸生变非老兄为之抚摩振摄几至成脱巾之变矣中州倚兄如长城搢绅望兄为赤帜宁能奉寬东山朝晡视大夫人膳即把酒杯拄颊看长江云物耶弟眉毛也何足關頤颊间事昨岁为上恩优先君子于地下而留枢之召继之辇上君子俱谓不当复偃蹇朝命者为谋不审仓卒而出过时之人触处皆成悔恨且遂不获视亡弟含殮此痛何胜亡弟之精全耗于闽中一任而奔走不已遂酿成膏肓之病医药之伎殫而莫效幸四大分离时能自力去恋去怖遂不昏散耳己为收检其遗文付之剞劂名业颇成有四子而才目可瞑矣独余六十老兄形影相吊生趣遒尽何以过日乞骸之疏已下铨部倘得遂归计尚可收拾半残之躯视其窀穸也向老兄尚不欲太原公轻出于弟可知又不欲弟费心思于雕虫之技今皆相负老而受役太仓粟复受役子墨客卿何以戴面目见老兄大疏叙本自弟意缘未奉明教藏之家塾归即可以命笔矣万一不得请当遣人取来卒业而后从事非若他文之可以苟且唐突也舍甥曹子念笃于谊故亡弟身后全得其力快阁成橐如洗矣第渐衰恐不能胜塞外寒承尊念当以谕之承父访老兄至无锡以陈生一泣遂作剡溪棹王辰玉书来盛称之以为山人中圣贤弟以为不入都门可也嵇吕之驾何惜三千里肖甫长逝于公私俱可深惜昨遂有祭塋而无谥国家报功臣之典非吾曹所知也不腆无以酬万一如何余具别帑不悉

王大叅阳德

前月吕氏人回拜公手教谆谆肺腑语至于精丝古器妙画种种瓌宝山房展视眉宇间皆烟霞色也感哉何可云喻公虽脱屣时荣高居旷览而政府方需材用艰巨之寄恐终不能释如贞真所谓可笑可詈人也若一念火不息则一身又堕齿舌矣自公离此境界又别其详不能具陈或从容子念当得之耳陆司空归后再相闻尚未获面俞仲蔚遂成异物钱叔寶亦几游岱闻康山人复将北首新命严切恐亦非优游地也加飡自爱

又

忽忽奉违道范且五岁矣昨春时荷师真汲引弃家谢世事束身入一茅庵中耳目尽废遂忘与门下相闻屈指公除已久召命且下江南父老俱切云霓之望第闻东山志坚区区世缘恐不足仰累耳贞出没苦海虽未望彼岸小即安流澹寂余味无由分供所草昙阳僊师传附览倘有一二可采择者庶几頤吉小助耳余情曹子念当悉之

又

昨冬承公祖垂念儿子诲勅丁宁蔼然骨肉谊也又居然长者风每与儿子言之戚戚感动也永嘉瓊苞当以韵胜福橘非门下见怜无缘复沾此味子念时时称门下悠然之乐远出右军分甘上籍令朝望推属不敢以一征车奉易东山兹趣方与家弟共之而已区区行径全是一头陀而毫髮无所进盖举世法之所谓乐者稍尽去之独所谓苦者犹见趣不能舍也宗伯昆季至今犹在委顿中无以相解如何贤长公澹然自远苏眉山所称范纯景真学佛作家无缘一叩质为恨子念上谒便草草布此加飡自爱

又

小仆从子念归者得公手教嗣后山川阻修彼此间阔入春风雨连绵郁郁无好思偶得小晴从常博士及族人都运詹录泛小舫问梅花使者以书及筐柑至即取分尝之风味殊绝得示收藏至三月间更佳儿辈馋口恐不能待也舍弟在金陵当略寄一二右军有分甘帖可作两家故事矣吴峻伯与公同甥馆其子稼澄表表才士将过访幸善遇之

又

自门下高蹈远引偃蹇时趋有威风千仞之风而山水之佳丽服御之饶嫩所以娱蔗境而适龙性者诚令人羨之妬之今者拜手教则长公西华先生仙逝而羣从中有能代应中外者亦继之仆前岁冬仲失从弟望虽无它长而亦能以酒食相劳慰今者闰夏六月遂失吾敬美弟矣何两人之不幸之同也世界缺陷自昔而然弟西华先生已逾古稀林栖之日长似无可憾而亡弟仅五十三于世法甫畅遽化异物仆更失足一出匏系马曹至不能视含殮其为愧痛又岂可同年语也张肖甫太保与吾州江侍御亦俱于是月不起黄杨之厄至此哉辱委西华先生地下之托谊无可辞但目下责文如责逋小寃至月未必脱稿送贤从比部君处瓊果拜赐附谢

寄敬美弟

数日前曹凤阳有信归云吾弟决归计而不明所以意甚疑之昨始接吾弟手书初得病状令人忧骇寻审向愈为之稍解既而览所拟上疏稿与乞休之意云云且悲且喜且快且服不知精爽之飞动也吾不如远矣凡众情所谓吾弟春秋鼎盛才识精练物望渐归前路渐畅一旦捐而弃之以为疑且惜不知吾弟保此完身以答丘壑保此完志以

免濡染不尽之福后人享之不竟之用儿辈继之亦缺陷世界中一佳算也且吾所私慰者有四桑榆之晷朝夕聚首剖甘娛目足以老死此一慰也家乘人事时一分任教授儿辈辄用相寄此二慰也坝箴互发洋洋盈耳至于文责亦得小寬此三慰也世缘尽时有所付托不使俗尘墨我去念此四慰也记别吾弟至季冬朔后愈悟宦路之不美非唯畏讥且恐失身又念四大不调刹那难料诸所耽好即须割舍一切享用渐觉无味欲扫而空之又无巴鼻忽忽不乐行入新年忽自调畅元日赋诗尾语若讖蓋未几而僊真之大海至矣今已告上苍誓絕仕念断色根诸凡酒肉之数十去六七日损一日三两年间可作净行头陀矣计吾弟亦于兹时读道书习静功若有得者奇哉元驭正是同盟不知可容三人否今遣王经相迎旬日后当再遣信也外诗二章志喜并近作四律附览不一

又

与吾弟分袂时落日黄流离态满眼而意殊穆然知大道无系莼鲈可待耳抵闾则已街鼓动矣月色清彻可鉴毛髮西风作寒肤粟骤起念吾弟旦暮马蹄间殊不易纵新丰斗酒可解劳终不若从儿女拥炉煨榾柮也与元驭丈读疏辞几泪下吾弟坚至若此何患无成第出处之际贵于无迹勉了棘事小慰三秦豪杰望俟除目下拂衣归卧尤自脱洒若移疾请告一涉纷纭恐不无牵阻幸再酬之金生云刻江西赠行诗文满一卷书画佳者闻亦携数种不访毛仙翁张氲先生故事也香灵芝已收得不知作何用可于净名室中供佛否關中诸贤墨迹为我收一赫蹏母论小诗或竿尺皆得老翁作儿态由习气未除故也骥儿别时苦予针砭勤学修行便是人伦人伦即道也

又

得吾弟书具审已履南康任匡庐在屋上彭蠡在屋下深秋红叶穷冬白雪嵯峨萧瑟不可名状真仕境之僊都息心之妙轨也既吏牒稀简民俗淳朴粗可跌宕文史从容翰墨以顺应之何必憧憧丘壑承所评隲吾诗文二端之业大都士龙之好兄而词藻艳发要非清河所可几及中间持论往往破的如所谓离观则逸若无闻辘泊则天然一色字险者韵必妥韵奇者声必调天壤之间若为预设又所谓大能使之小小能使之大虚能使之实实能使之虚遠能使之近近能使之遠断能使之续续能使之断虽言大非吾所敢当要之自结撰以来未有造微极深至此者记吾守尚书郎时稍一搦管得致语沾沾与吳下昌穀差肩足矣何敢望献吉然至读献吉文心则已疑之又一时驰好若晋江毗陵二三君子有作每读竟辄不快者浹日以是尽出世嗜别心古则词坛之盟歷下牛耳当时亦未敢以齐楚之赋而歌代兴也天不爱年苟有所就庶几二三子之末不恣恣于世足矣若乃标赤帜抉玄珠必致之境期之千古何期定论近出友于于其身亲见之

岂不快哉世无真才才乏通方二语灼然惜不能浮三百大白赏此耳所喻本宁近覩其文笔矫矫吾弟宜厚集坚墉避其焚舟济河若于诗则以偏师待之而已其它固未暇劳齿颊也与胡郎论已前当刻置集末文未坠地必有赏音者因附答大致云

又

所示千文书法圓熟秀爽非唐人不能题尾半行称欧阳率更恐不必尔率更耸肩露骨与此殊不类其卒在高宗初正储宫时当时集圣教序者不闻避治字讳也但以唐人价酬之足矣题字在卷下有主书妾承华署字尤可喜又考此书为李夔藏物中尝落徐铉骑省手焉知非窦泉所赋诸贤如裴行俭孙过庭辈耶

又

前日午食时应门者归出除目相示果不负前拟也吾弟年资既郁望实复峻启自山公辟同贡禹羣好见迫清时难负公凭至便可束装南首矣昔人所称琅琅闾阖之学者前后北面称弟子故亦非偶乃若区区所祝吾弟在公虽勤毋耗神用遇境虽浓毋忘恬憺物情虽辘毋太收采国老虽调毋废姜桂出拥节旄则沛然膏泽入陪旃席则侃尔正议勇退初念长自急流持之使可籍手见我仙师则老兄之念毕矣若乃先公未究之志与有待之事吾弟固饶为之非我所虞也计当东归辞墓未卜何日蹲鸱薯蕷乡所不乏佐以浊醪为青灯促膝小语势似不能入城无妨各天恐遂千古或操一轻舸作十里别也

又

昨盛氏人回得手书知痰火虽未洒然而势却渐减所言汪伯玉齐云之约诚有之蓋前岁伯玉与二仲过我酒间以为前后凡五访我海上而不一报将为千古嵇吕所笑尔时慨然许之春间特使其小从子来约为九月之会又欲南要吴明卿李本宁东要屠长卿徐茂吴吾意殊不乐报书力止之但以扁舟楚服携两僮一登山而已然老来不任道途之苦意尚未决今据吾弟所闻乃尔便堪攒眉辞社岂能把臂入林也此兄好奇而重文事业已世弃不复点检乐彦辅乐地故自足乃欲使我作失行老嫠耶夜来卧小楼楼之下非常三响恐非仙师警策唯有节饮省荤俟尽而已此外却无大愧怍也瞽者于生持书求谒适有所欲云不觉娓娓

又

前有数行附瞽者于生去中间无他言唯道所以不能却伯玉兄之故将来恐不免负约耳闻喉间尚有微碍此是痰火上升久之或于此处作孽不可不预防吾弟但寄一信香及片纸书不传人誓来焚之佛前即脩写寄去不必远寻喻君也诸文觉驹侄有精思不能全嫩临亨爽净少筋两騷侄朗儻有势病小在多然得隼必矣此间坚吾却不凡意气凌驾驕时露神采骏颇见风韵而不能纯从此百篇后乃可望其成章兹则未也吾于去岁中已决意凿坏即谤沮侮弄俱作山神伎俩观无所复恨时时见除目却与吾弟不相涉乃至遂恹一陪得非前口语犹在此曹膏肓耶长干花下称吏隐人何所不佳迩来裁抑言事少年至矣而獎进旧言事臣不已当轴者一段微意亦自佳我于本月十三日夜四更大声发于中楼之下楹若轰炮又似鼙鼓者三侍者皆魄夺为之揽衣起坐而思曰得非仙师示警耶将钟鸣漏尽时耶甲申之末示验矣死亦何足畏隔生何不可日有塞爱河断疑网以俟期而已尚不能如刘伯伦付之一锺不免密令政仆觅戢身之器俟先府君谕祭后于傍穴推坚土亦不凿桓家石也宾所賚疏计已上缘出自荆老意必无齟齬但渠装竭恐不解领两部文移下府大约祭期多在八月蓋盛暑中劳府主又祭物易坏而一时有司乡士夫宗戚各欲有所伸不便也碑亭已寻址五月可竖其详政能悉之儿辈无可替心力者吾弟不能归驹力亦自不少抚公必欲叅失事者道府亦须一及韩守似不免夺俸矣如此贤守即摧挫其精采可恨也古林公即北俟其归而谢之邓直指却不容后即荐语亦自知已徐太学病笃尚与吳竞不已两虎不足惜第诸长年三老渐就死地小不忍耳盛大哥今日入土矣余不尽

又

戴玉阳归得吾弟书具悉近况时事可忧物情多变皆不足萦虑唯是吾弟宿痼根未尽除既不甚轰饮诸内外事皆裁减而噉饭小逆辄与痰俱壅必吐而后已将来防其隔塞此时盛后和往太平治台使疾可遣人邀之入京一诊视至囑囑吾弟既请急未遂所谓尽吾心与分而已家事任长可以无归北转既劳于体面亦不为美食指太众匍匐道路殊非雅观莫若且住留都来岁夏秋作滁阳醉翁亭主人未为不适祭典之期拟于九月望后三日皆妥月末当遣骥儿致书俞府君听其自择时序凉冷潮汛方壮便于舟楫月盈之候通夕可行第其时邦君大夫乡党宗戚多以飨奠之礼来于竖厂置酒馈饩之类费颇不訾至行谢又在其外原领四百数恐不免增十之七八况又未便入手儿辈橐涩无可处分势必行贷又乏主者何如■〈风贝〉风剧恶水乡堤圩复有隕者高乡幸不十分损昨偶行田尚未蒿目初亦傅荆老不甚肯主张荒事非也蓋上意以關中封土石上呈触怒不免人人自危疑耳今台疏迭上羣呶纷然大老意既稍强司农口亦微柱必有可望者吾向所以欲各台及道府连疏正谓此也昨忽传抑之辞太宰而让及不

肖不知何说要之老僧不见不闻无尽而已先垄立两碑讫工便荷一锸生埋土中亦足何必添足于蛇也老妻两日小安过此酷暑或可无大故临峯弟粥饮日不过二瓯艰苦非常肌肉消尽亦只旦暮人耳邵圭峯痲重痢亦重死活未分少葵以水灾忧郁而死二君诚痴汉唐娄江亦物故矣死生细事不烦我瞿昙老师处分即漆园叟便可谈笑了之韩守治曹氏之恶仆又治荆族之无赖者虽众口称快却不甚宜赖其信吾言差有挽回也吴金事得荆老痛詈之书稍息凶焰然于中证转急提婆达多自豪杰可敬可敬昆令以吏盗库多所追攀物议颇及之未免为解纷朱少南讼事几大败调停之功不敢遽任南北灾荒宫边浩费诸老技力渐困将来未保税驾之所沧海横流一苇不安吾曹亦未便是高枕地也萧生骤疴尚迟两日附此信不一

又

作书后偶见邸报袁裕老相荐之语深笃详至乃尔此兄故亦相知迩来颇简略此段殊出意外部覆虽四语而推许颇重居忽自叹毁者誉者前后一人耳虽然亦更自警省毁者失实是以受上真见怜誉者过情恐不免为造物所忌既奉有明旨或不免一推岂敢偃蹇以为名觉得身中亦渐衰且初夏声警非常不可不唯后悔以是言之终不若凿坏之为愈也邵圭峯一疾不起虽其自取亦自有可怜处临没之际唯感吾兄弟两人故当尔也泰亨兄弟事复大决撒今亦粗有头绪矣少葵死后甚有纷纭亮臣自长者其兄大抵无人道盖不止一端也前见吏部题先大人诰命计其时已撰述吾弟有便音寄荆老托其先寄藁本来盖碑石已砻专待镌刻而领轴一岁自有次数故也行祭后数日当即遣人上疏谢恩及致诸老书问吾弟宜预收拾以待偶检旧刻纶音世赍录失去二十余叶今补刻完要增先大人赠诰谕文及吾弟福建提学勅谕于后可即付来余不具

又

连日两作信方付去人而吾弟书已至初三夕之梦所谓红花者既与症合若精心服之必验石竹洛阳花不知其性云何当时骆师在家从先伯父受旱莲合乌须药而已岂此老九十四龄之征耶吾弟发明年挂冠之兴亦是一时感慨南曹九列幸无干系黏身尽可婆娑仙师所传恬憺二字大旨在出处外吾州风潮于花初不甚损以后冷雨热日侵袭不已今则生意渐少耳稻尚无恙终不比昆山之甚也吾州作灾九分八厘吴县七分余俱十分想内意不能全美要亦不似往年昆士夫好谤多怨何足凭也老荆终乏起色于月日殊可延华壻所传谬甚抚台二事下邑未尝遵行不必作书谏止武三甫到家而妇娠在危笃余具前纸

又

前自驷侄归得吾弟病耗寝食不宁故遣奴承恩相问寻从驷所见弟手迹知体中向清强且盛后和安意在彼调理使我慰心闻僚长已为上疏部无不覆之理杜门澹圃形神俱佚病蒂荡除自是第一筴也郡守初定十六日行谕祭礼而以待旧兵使遂至愆期是日戚执至者凌杨徐三大老而下何止千人冒雨冲泥匍匐委顿暮犹未绝更两日亦复累累十九日大晴守臣始至行礼男女挟道何止千人啧啧叹赏宰木生色丙舍銜照惟是捧诵玉音肝腑寸折血泪涔淫不能自禁耳奠祭之盛目中所鲜而赍发亦自不訾宾主两敝屠宰烹爨大是惨心业无可奈何且与印上人计诵经懺度而已十六日之雨低乡复增淹没高乡稻亦多烂花遂无复余朵幸传圣恩蠲免不止屯膏吾父子尚可糊口两日间只得诣府及各邑报谢此番劳费心自甘之瞻美骨脱如鬼而声气尚不衰两日进一留京人药稍能饮汤乳或可希觐万一二相能为民请命而大原犹见苦心然将来隐忧尚不止此今国本国脉国是无一可着口处凿坏之人尚不免忧天当局者可推矣南都公卿以不俱赐奠吾弟计何所报答若书则俟驷侄或北去人寄上也余不悉

又

前者得书急令王鲤归看虽知吾弟定见定力从容脱洒计必渐安而此中终是忧疑周氏昆玉云曾面见吾弟容色小畅饮食时进但读析授一帋字字肝裂又分惠及三子使受者不安两日后李相来复得信及驷侄骏儿书知于立夏之日痰壅顿解进粥不逆喉腥亦除寝止稳快喜甚喜甚新剂虽效亦宜酌量少服从此日减至秋不发矣此间阴雨连绵米价腾踊北方流移之民接踵而至五城日报死者以千数其它郊郭之外又不知其几京尹煮粥噉之可至五月吾力劝二司农出仓米继之除掌科疏极好而误言平糶二百万石以救近省不知仓米实数二百六十二万石每岁贍卒八十二万石仅有三万之积耳户部已覆奉旨而不知其说云何咨尚未到江北抢掠处处蜂起闻吾乡太湖中有船数百其酋称顺天王物情汹汹不知吾弟所闻如何吾欲极陈一番以了此身事但不止要领无益于事茫茫天地间不知死所得吾弟病可且以笔札消日而已李相回附此不一

弇州续稿卷一百八十八

●钦定四库全书

弇州续稿卷一百八十九

（明）王世贞 撰

○文部

△书牋

陈玉叔

不佞之辱收门下者五阅岁朔矣春容寂寥之章盖再拜赐焉而竟未及炙颜色奉齿牙之润然而鄙心则怵怵营营恒恐其不得当也郕中为蜀山余支虽道路非邈而叫窾径庭鳞羽羞缩不腆之好不能借通一介而王使君人来则手书大贶新诗刻集种种充庭矣蜀地固多文士如相如子云王李大小苏近时用修少海辈雅已彬彬作者后进得公一陶铸勃兴之士当不复让数君也仆迂书生耳误膺时趣获抽草芥与显者周还每自谓于世真长物然一官之在仆亦自赘疣公用此见美得无不满鹄雏笑乎家弟使秦甫入闕遂得江藩报金马浮沉第须有岁星面孔即春明天涯语尤不虚也前二书方媿点公记室甚荷窃者为魏收藏拙乃更有取敝帚何也勉尔塞白剧不足存外近体二章其一却步严韵殊惭形秽今年梓拙稿成得百八十卷所刷行既少而道远重虞去人装聊上说部一种之半或足佐握麈耳花溪朦地见许砉石以待初亦跃然既不能不作小巫索也且元戎百队时时过从挥洒不乏何所容吾手耶盛雅却心领械朴多劳加飡自爱

又

得公丙子书及篇章之贶盖旦夕服膺矣避言东归与世事一切未杀即不能覩除目覩除目亦时忘之乃知后山叅知转浙臬而公代者居无何而急足以大教新诗及雅贶种种至矣胡公之勤存故人不鄙小技乃尔尊甫老先生万福计锦还得一娱侍公秉铎全蜀绍明文翁之业而光大之寻又当天下喉咽寄即萧相国刘司空何足多哉诸篇雄爽雅秀大得江山之助仆亦自放一丘一壑间即为雕虫所引堕绮语障意故甘之钱尤二老书少选即转致所需丹青理并拙题俟公秋还上纳也鄙集于说部大有损益先上一部有续刻者亦俟此期致之损饷蜀笺佳甚恨不得启南希哲结此缘第薛涛笺多小幅而五色元微之所谓菖蒲花发五云高是也近有一客拟作掌大赫蹏亦足书小絶句聊贡十幅并墨搨数种扇头一诗将臆统祈裁纳不备

又

山中自护其懒与世味疎阔乃独明公笃念不忘且以家阿敬臭味之故惠我好音侑以腆贖比之玄度坐致诸侯之饷幸遇过之二酉园记何其神奇瑰丽至此也觉我三弇寂寂矣然以我记当明公记略各置几案间匪直神交亦足神游矣仆所抄録名园别墅记赋叙之类殆三百篇诗可三千首尚未删订大记一入便堪压卷念欲付剞劂而装未办奈何荔枝考博雅殊伦唯大序所谓相如赋上林而未及者似小可商相如赋辞

■〈木答〉■〈沓，木代迂〉离支据史记曰荔枝政此果也二序既家弟为之仆得无赘疣乎哉既不即焚君苗研它委唯命便还聊附报言并伸不腆鉴存是恳

又

前有一书及拙诗附南康张经幕去计已彻记室矣豫章千古名胜陈徐风流至今在日子安退之之文与西山南浦之云此其小者紫薇公事不足当明公霹雳手搜竒访秘抉灵传神以垂不朽宜并日为之不然玺书一下不可留矣仆赖庇蜗涎自濡粗了身事先君子蒙恩赠恤粗了心事自今而往无所非适君乃糟糠之妇宛转床褥饘粥之业尽成瓿脱付之搏沙观及减灶方而已明公四履之地固多君子邓太史邹勋部不出而舒司寇张宗伯徐尚玺相继归得无冀北空羣之叹乎却有一恳故余宪副德甫者令先公之同年而仆与于鳞之石友也束修自励羔羊之节白首无异所为诗实能矫厉江右之派以开正始其遗集数卷明公幸与沈箕仲先生一计梓之且赐一序其子孙多任务文辞而家特贫更祈俯垂眄睐仆老废矣不能为力朱穆刘孝标之刺甘之矣所以借寛者实在明公余不敢尽

又

累辱大教恍如与太丘盛德周旋使人鄙吝自消兹者获覩全集如执化人之祛而登其城含龙女之珠而入其藏眩目怵心生平之观极矣乃使复序之毋使从汪伯玉司马后岂敢以才尽为沮又岂敢以形秽为嫌但自得病弟不祥之耗肝腑寸折形神不相守加以竖子见凌襁褓麤集间从食寝之间一试笔墨既成而读之了不知着意处倘门下不以覆瓿而灾之木赐斤斧可也念门下别集多与亡弟倡和稍一取读不觉失声长恸门下步武云霄而仆旦夕丘壑相见未期蓄盲万绪殊不能尽

邢子愿侍御

自明公去我龔中忽忽累日正以奇人难覩奇事不恒且垂当弦絶而有鍾期之赏勉成四诗小寓感怀而文思荒落都不成语又以宪台严切不敢轻溷次且久之忽骑将至充庭之实衡茅乍暖儿稚欢谔启械捧诵大教字字肺腑第饰奨隄分非挫名塞聪之人所敢当耳辱委记序念子才名裔何必減崔卢四宗若充部中正汝南月旦则彼固瞠乎后矣贞受明公深知无所效尺寸之报敢以謏劣为辞第献岁已断笔砚缘不免于佛前一懺悔也尺牋俊语使人醉心至于结法妙入圣教三昧家弟所别得四昏更焕若神明即付儿子寶藏不敢作换羊肉故事也所覬多多益善耳山堂一扁虚白已久毋金玉尔音使山灵失望别谕欲梓续集訾费已办贞前既露丑于人兹复何缘于长者前而作此不情齟齬特以名戒颇严师期向近恐非所宜吳下操觚者众人人珠玉或以鱼目之荐而仰谓明公昌歎之嗜乞姑已之当募能书者录成一部上之邺架异日绣斧所临不妨剖■〈厥欠〉仍祈玄晏一序黼之简端此则感恩知己之恳也仲春敬扫石开径以俟先此附谢不宣

又

久不得尊问良切悬驰忽拜手教披诵如覩知前武昌之札付之从弟浏阳簿小奴俱落鱼腹良深惋怅即簿赖公庇获免大计而先已曳裾王门无非数也三吳口碑至今尚新楚中吏人与他词客侠韦诵盛德高谊津津流羨独用事少年戈戟手吻者以操切钩索为功仆向已疑之得公教故当不异知曾参杀人颜渊盗饭此岂足相染而竟有秦回之命将无宰公借以少塞其从容为公善后而遽有请告之举毋乃伤于用壮乎仆固不能不为天下惜才然公得扶持二尊人极志物之养暇则按澹圃图筑室读书其中约于履道多于独乐亦何所不快夫千秋之业与一时之业孰重真我之乐与人我之乐孰深正恐异时复忌公处耳前岁宰公凡三致书见笼仆苦辞之复誓断之太原公前似可保一壑但学道无得虽未蒙甘露酒觉方寸间不易承且文酒二累犹时中之恐终下地狱种子如何家弟尚滞滯闽地纵不作子南槌床难亦已败子猷命棹兴恨不即呼之相与促膝净名室也见委拙志校毕附览俟托王判君梓上不一不一

又

林将军鲤虽頽其尾而尺素若新则已拜肺腑之赐矣兹者陈生复以八行来愈覩临池之妙庾车骑所云焕若神明顿还旧观者非耶陈生极称大雅之致且园林靚丽馆宇崇洁读书游艺事事皆真公亦自谔青李来禽之嫩欲分甘不得而乃有羨于吾圃之朱櫻者太山櫻桃见之史传于贵地移种不易耶仆近于龔中隙地凿一白莲池构小轩临之傍为二斗室池前因土建阜阜三垂皆蓁竹其故圃老树纵横石色苍鹵花事益繁

区区五官藉营卫力不至衰与外境相籍桑榆足暖所苦晏坐高眠之日时时人事文责夺之素拙书法尤怯腕痛公所闻日临眉山数纸误也太原赫奕天路家仲婆娑留省各自一世界枋榆中仅余硕果若风霜见竟可免剥落第师问向疎天公黯黯叵测今岁不死当猛一奋迅了此大事向所去仆与于鳞近体承示终付剗剗即不念损公帑能无饬画无塩之诮乎小技未尊幸为已之虞永兴墓志因刻手章仲玉他往小（阙）令揭上草尊大夫寿章絶似村社老翁语取其实境而已余唯强饭自爱

又

不奉清诲于今凡五献岁矣每念叔度汪量鄙吝自消紫芝眉宇名利都忘而山川间之无由绪晤奈何奈何闻三径日辟百卉时茂左图右史眠读如意日临黄庭兰亭数种读离骚饮美酒名士之业绰然矣仆请告杜门会朱考功偶有所闻可谓鸿鹄已翔于寥阔弋者犹慕其仪羽也审己不能有所点矣仆一丘一壑足以送老而谬见物色为先君子蒙厚恩贲恤谊不敢复过为偃蹇腴颜一出遂成亡弟各天之恨已矣今方料理其遗诗文■之仍为状其行谊履歷冀博诸贤椽笔以荣朽骨兹尚未敢请也公素笃牙期山水之知能不体凝献人琴之痛乎向辱示论澄心堂墨帖以仆所缉古今法书苑徧考之不着唯遇顾汝修秘书云曾藏之三载是真南唐搨也纸墨不在淳化大观下想当然耳陈生鹵莽得从事门下固逾分而遽死台察之一怒则又冤也世事大抵有兹因乡人陆成叔便附此成叔有美才而困朝夕不能无望于盼睐也余不悉

答王明辅方伯

傅华亭来复得手教满纸吴晋山川阻修自黄池一盟后大抵有来鸿而无去鲤以故不能亟修竿屨于足下非特懒慢之为累也张肖甫有书甚念足下踽踽而羨张助甫之■〈跣必〉跋且子姓绳绳然渠世福尤自倍助甫仆谓冠达对达磨时身为帝者子姓羣从皆爵真王视只履胡僧奚啻霄壤而不能下一转语与野干何异观自在后身法眷何止千万要当于彻境迷途论负义耳近江北有田父故崇明人年四十五矣忽有所证诵谈义者三日而之野次取火燎下衣甫爇即腹轰烈心肺皆露火球迸出顷刻而烬青烟一缕贯云表吾曹为文义牵蔓故不能了了如此人足下所称岂亦其曹偶耶仆不耐乡里项领走乡间得一深落藩棘而居世味稍薄先师虽时一警省尚未授橐钥却从小儿辈学洒扫而已荆老三岁间但有劳毁苴麻未释白麻遂下虽复坚考盘之操何以解于人主前家弟为尺一所迫已度武夷握手板家馭虽病亦且出矣仆幸脱身在丘壑而荏苒迟暮恐不免狗窦作他生事前有诗其二语云心事栽松道者门风泄柳先生足下努力勿唐捐此光景也画竹二幅乃建昌一少王所寄置之壁间足助潇洒强饭自爱

又

昨有小启拙集附报谢于贵乡之估客计已达矣仆比能饮噉开卷亦差易记忆而齿髮变堕不无忧生之叹小圃泉石日旧花竹日新坐起万卷蠹食蜗涎聊足濡饱第文酒二端人生雅事而微苦受役释氏归之无明之障抑或有之吾丈园涉成趣当不减仆而玄理禅观时时会心且无能以剥啄相饶者其乐当何如耶张丈今为贵省辖计得相周旋弟既妬之行复成叹诧未知此生能复与吾丈握手纵噉否兹因便聊尔布候起居方有小冗言不能尽

又

两日从先垄归追感往痛忽忽如不欲生得足下教翰飞坠如暂脱爇沙中受四禅天甘露洒恨随得随失此境不能久驻泊耳所谓头陀能会祖意者得非胡楚玉乎鸠摩罗什有云淤泥中生莲花但采莲花勿问淤泥可也又谓一先辈面若桃李云云此恐亦是延年却病法未证形神俱妙理又谓俯仰人伦心精便尔流逸此大难裁断足下自当于轻重难易间择之耳吾乡王元驭宗伯第二女辟穀已五载矣每入定辄二十余日而解色逾敷粹生仅能辨字忽通解两藏尤精玄理常云教本无二学人自岐之仆以为此宿世人也教门耆宿其始本从衣食计入何由得理吾侪虽似得理恐涉见解如仆根器为七情所损此时日偿少年时诸业债不能何暇计将来也一叹一叹与绳司空归后再相闻尚未及面当以足下书寄之足下欲质与绳以士大夫持论高当事误之故当由所持未是耳王新建掀揭之业尚自性质中出济以馘歷成此作用恐非大本达道也人材区以别矣毋论背朱趋陆即二公当贾平章地亦未必能支持蒙古也与绳计不首肯鄙言即足下当发一晒家弟彻棘后有奏计之役豚儿此试絶可望而卷落老广文手不得一批字今但督令毋令膏油而已子与政为儿子计并其父失之与家弟经纪其遗事树七尺碑少报泉下周公瑕无子而存愈仲蔚有子而歿董侍郎性严细令人不堪遂成宇宙间一叹咤皆足下所讯及聊尔附报玄甫佳士也即不登公交车于艺林中立汉帜矣初冬强饭自爱

又

夏时曾附一书颇及近致不知达否尊丈今年正五十弟欲致尺缕之贺念以为身外物无所用之欲从俗效一言则皆舞队小儿致语伦也不足以辱有道者耳目第昔人所谓半百之年公始及之仆已过五二老人相值可傲不可贺也尊丈年至北中郎已为

良二千石甫及谢掾登外省极品然是时尚在苦海中耳乞身之后与方袍黄冠游谈空说有虽风止浪息然犹未达彼岸也弟业障深重分已沈沦不意真慈见怜曲为指引旷若发蒙今已尽授家儿辈一切移心之物悉洗除之断欲来可九月杯勺不令过十俟重九后师化去即荷一衲携佛道书数十卷入精庐作死心计矣念交游中独尊丈可以此意奉勉因徐使君便附一札过此亦不复能相闻矣珍重珍重

又

得仲冬书屈指垂三阅月而后达叹黄池之会不易也日望公熊罴梦乃谈二竖见凌状令人竦然上党叅为天下冠公乃正得其力耶中年血气不易复自今而往愿加保爱如补劓如抱卵绵绵若存用之不勤乃佳耳草木金石之类病在则为药去病则复为病不足恃也弟捐家累入净室来所同志者元馭学士又一比丘无心有亦先师所度也颇晓诸部守木义小足朝夕黄冠中欲得如公所云善友所不易耳见示理欲之几间不容髮似亦能自了惟游念乍起乍烧亦姑任其起灭而已不与之较也奉去近草先师传一册其成道始末及化迹俱在大抵能合三教者始能出三界公第发信心咫尺便自陟降仆非诞语者勉旃自爱鹿角霜胶少许其制法差精可自用也■〈廿糜〉姑豆豉种种皆禅悦味拜颺

又

夏来颇得提婆达多力借口谢絶一切应酬元馭学士外仅三夕与无心有默坐五晨与家弟敬美小语耳寂寂中忽承足下问如色究竟天坠石不觉千日之为远捧诵知皈归先师遂能舍身如冠达敬服敬服自非具宿根大智勇何以针水遽契先师每言荷担者不必尽眼底安知公非即其人耶疏辞为踧宣一徧封贮元馭处俟信香至当达之所寄金拟铸钟磬各一识尊名氏其上朝夕考击庶于来美不唐捐也余金付工雕师像一附上以便瞻礼此工巧木都十得五六耳辱谕小五台二僧化迹之异如口吐三昧火焚身此阿难陀作用出三十尺肠示异香游戏三昧尤为诡说第不知是游僧或土著否若游僧者大乘菩萨阿罗汉显化即土著亦是再来人二果以上地位故不可思议也敢乞再详履歷及偈语见示弟迹来验得禅那法门暨纯阳重阳诸真入路无毫髮异惟纯觉遗身与形神俱妙处小有参差耳然至身外身则又未尝不一也向苦游思时扰我灵台自作之魔不易祛荡如何如何公久已得定力合下便自惺然当不如弟之苦卓尔也别纸一聊有所述弟无以酬至意之辱为愧冬寒珍重珍重

又

前者郡人之晋便有报书及刻僊师像一函不无浮沈否所寄金与元驭宗伯计之易下金为钟磬二寘香几及刻像工费颇相当兹复拜教札及莱豉之饷皆领讫仙师所书观心经在道藏内以其简省易入耳非行所撰也黄庭有二种梁丘注近核而无当于理刘长生注者仙师颇许之然自发意之谈非闕训诂阴符有数种注尤多污劣皆具全藏中人去急不能一一呈览耳元驭恒谓余法照图悟经仙师耳受之圣师者其语皆禅那而时切事理类四十二章语当时实许授之吾二人忽袖而去不知其意云何但能一切清静澹泊勿助勿忘涵泳之久自有证悟不必于文义增葛藤也助甫旦夕为欢萍蓬之值大是宿缘第公尚忧其文字障得非功名障耶是皆不易摆脱所云少姬者应是裴休相公歌院苏学士惠州■〈土答〉中物然助甫好狡狴英雄欺人不可尽信有数行并附彼烦为致之家弟勇退诚如公言归后却作老农课儿子辈读书仆正得其力异时托一钵头陀雪山或须让乃兄也不一

又

晋阳之问岁再至团焦而吴家遂无过黄池一步者每北望即神惛然三夕来愈入方寸而足下书至矣乃承有尊嫂讣安仁之悼目前所不免第此是乘缘而来缘尽而去无足大怪者志辞极典雅古法森然始谓足下不能忘情于伉俪今乃知不能忘情于结撰也汾上之篇梓自朱生亦见足下与助甫一斑足下为宗祀大计房室故安得便絶第不可作洪景卢王宣子耳勿忘勿助间自有一种斟酌若断杀生可以去业谢荤血可以清志足下果坚此盟不敢不效赞功仆一朽株耳去冬为儿子涂抹勉出对客两月余早晚入观焚诵过劳几遂羸顿今则复为故吾矣独不免袷衣一谒节使者州郡大吏及受役千里笔研不能尽作头陀行径以此惭足下遼问所喻晋阳三岁疫复大饥何吾地之同此惨也昨春至冬郊郭之外处处行疔枕籍而死者不可胜数七月阳侯大作濱海之民悉饱鱼腹吾州及嘉定死者将二万人鹵潮所滄花豆之地悉成瓠脱司农与黔首为鹺征敛转迫计惟有死徙耳仆虽置此身方外能免蒿目幸张肖甫近处分九首恶军心帖然此间夜卧差可安枕助甫建大纛夏州磨盾鼻书贺兰山石二君子为词场■〈足必〉跋增气不似王氏泯泯而已家弟遂坚凿坏朝夕煦沫独元驭鸡骨向隅无如之何玄甫复塌翼古敦彝恐遂无识者若儿子之斥甚佳非言所既大币附返亮之亮之

又

不奉教言者二载所矣每闻道履清胜足慰吾侪各天之思而充闾之庆未彰则又恍然若有所失第不能无藉于药饵则以温补为主勿助强阳寡欲清心待时而动可也

仆以先君子蒙恩恤至厚丘壑之身再玷朝命三辞而不见允失计一出遂与亡弟竟成永诀悔痛之极生趣并尽迹者上疏乞骸而温纶见留攀上君子复不蒙亮警刘越石有云破涕为笑殆兹时矣今岁贤哲遘陨亡弟之外复及肖甫乃至多年闫希言朱青霞罗近溪亦相继化去闫君俄顷而逝肉身存龕四十日而不坏不倒真异人也近溪亦甚潇洒但不知何如耳亡弟似有定力仆为鸠集其遗诗文近五十卷刻之刻成当奉寄门下求珠玉之引以垂不朽想当不靳也兹因故雷户部家人便此不悉

答沈箕仲

念与公执手祇园时可一纪所岛树楼榭差位曩昔而公之文价突兀与易京之台争雄又能贾西省作玉堂青琐两气象独仆容衰于郑当时面皱于波斯匿不免为山色所笑耳日者承公按节茂苑深欲驰一介相讯与元驭宗伯计之恐坏深山道人例踟蹰未果则候史以大币手教至矣仆齿颊之余人理遁尽以故易为捶挞第比之广额摩登负愧不浅世眼睥睨固当公何自垂青焉岂四明狂客有故事耶休汝后想朝夕于贤叔父嘉则作竹木醉幸为我致声不忆少浚冲否此间屠青浦殊精进可念也

又

仆以贤淑氏嘉则游从之故得见收于门下自江城促膝契阔者逾二十载使车枉诲不闻问者亦一纪有余然每从交游中道明公惓惓垂盼之深仆之此心当亦无异也江右人文之地自东京以还于今千三百年盛且极矣复得公秉铎而振之又当何如也匡庐九迭扬澜九蠡在公方寸久矣今复聚眉睫间两奇相值必有不朽之业以示后世彼三王一韩不足拟也仆懒衰自放于道无得俟期而已尚有故人一念乃豫章余德甫也此君清修令劭以文章为江右嚆矢见摧忌者抱道削荣终始无玷正所谓乡先生没而俎豆于社者乃不获从李司空万太常之后唯公与二三乡达商之诸子食贫然其人材足继也遗集虽托玉叔先生梓行亦希一从舆为慰嘉则老而得子且有家矣游道益笃恐不免年少窥人莫云卿死矣使方伯公何以送日偶便附此不悉

又

向以故人余德甫盖棺之论轻渎左右乃承俯念而为询之多士则见格于忌者而门下右笃文故之谊深矣江右固文明之区自门下鼓舞振得之遂蒸蒸郅隆而南昌被泽最先其发尤最盛当仆往者奉启时实欲以匡庐彭蠡之胜仰佐挥洒亦使江山益色而来教谓献吉先生坐困此不能尽得意于古文辞因绝不为此固门下过自摧抑之意

然以亡弟不起之故证之则此官于古文辞诚有不易兼者亡弟膏肓二竖自闽中入盖以八月之间而完七郡试句字扬挖不遗荒遐甫息肩而从事案牒著述称之痰火上升以渐成噎神太劳则竭形太劳则敝子渊视远孔明食少殆非虚也仆衰年误出竟成小草肺腑至痛詎直手足业上疏乞归而不蒙天允近颇为料理亡者诗文五十余卷梓之并辑其行事以求诸贤如椽之笔为不朽计此外无足言者承雅贶并新刻拜嘉正学祠一记得其大矣薄有所侑比于献缟唯照存不一

弇州续稿卷一百八十九

●钦定四库全书

弇州续稿卷一百九十

（明）王世贞 撰

○文部

△书牒

钱杨诸大老

适见诸乡达尊老先生见示不胜皇悚袁了凡进士惓惓为民造福至意仆岂无人心者而不为从臾之纵使仆不思为三吴之士庶计独不思为子孙计乎始兵公见示以苏松二郡条对仆览之中有灼然可裁者亦有势不能裁者此见为可裁而实那作他额不肯裁者于可裁之中又有须两台奏请者亦有可径行者仆劝其奏请宜明径行宜速即势有不能裁与挪作正额者亦开款咨部倘得宽一分民受一分之赐即该部定执不允然后榜谕士庶知晓毋使袁君受德而诸公受怨至于兵公欲定拟画一以为十年规则毋使每岁造册官有详略之殊吏得上下其手仆美而劝之何尝敢有沮也夫言事者之易而当事者之难易者之怯而难者之勇此恒情也抚公素不通书札往来今忽以仆借口则恒情之外所不可测矣毋乃兵公之误传或抚公之误听乎哉不然彼岂忍嫁祸不才使得罪于诸乡达尊及士庶也谨当露书以白兵公望日至郡谒抚公力从臾之苟不尽心为民请命者有如日适遭亡女之变草草不悉伏祈照亮

王云竹大叅

世贞无似辱从老伯于东省许之臭味之末间以职事不能时执通家子弟礼盖至于今歎焉天助谗慝夺贤者之用不获使布之嘉隆间然八闽之地士子瞻依如泰山北斗依稀元晦先生之在延建所伸又孰多也家弟自闽还私幸获侍几杖谓谖谖松下风不减元礼而蔼然春温胜之即世贞甚妬其邁而悔昔者之鹵莽也敢因藩役人便聊布区区世贞积衰成懒汨没苦海似稍离去而雕虫之障犹在今亦且付之亡是公矣陈林二年伯不敢草率通姓名便幸致声不备

徐子与方伯

岁暮有宣城张簿者赴闽中一函不腆之书以附得无浮沉否唯是闽之于郢楚也则岂惟风马牛之不相及而足下之专使者再矣飒飒二章以宠光我毋论饰獎过情即不佞五十非天墨墨苟生耳幽忧之抱尽于自述及答家弟长篇今录上当为我一酸鼻也示新稿读之雄辞丽字层出而饶气槩或中稍有蹊径者小订之即堪入梓不佞一序便是岑楼寸木何足增高而惓惓于伯玉两言者欲破世人标榜之疑也然无乃蛇而足乎哉子相专祠足征友道不坠非足下不能作此揆人眼鼻事仆亦安敢居薄立就一碑辞付去力或可相藉不朽耳家弟有长安之役褰帷二华莲花间足称壮游要其过此一會相与登蓼顶亦大奇也足下得无色飞否拙集四月未可全就今先寄艺苑二十五卷盛事异典述六卷又驳书画家二种皆足佐兄麈尾之资余具别楮不一

又

三日雨客小稀遂能草鸚鵡赋以语此鸟即展翼歌舞冠中五萱花尽筮备极美俊促唤尤叟为传神书此赋以貽足下如携过豫章与德甫用晦诸王孙共和咏之此间亦当邀吳中名俊成此一段佳话也山园书楼成洁不容唾悉徙诸书名画古器充之披览之余焚香燕坐佐以清茗得二十年不作襜褕客足死矣足下方被张君嗣苦见之为抚掌一大笑也丽人计亦当侍行幸时念幻身无常观不然乐天游虎丘结语亦可暂充例耳阿敬闻已捧表而东故不复为寄音潘中丞及德甫用晦书幸即致之德甫不能无望中丞拂拭中丞长者然亦须怱怱差得强前两画如不称可发来成则以价转付其人近又见伯起有冷启敬仙奕马和之国风二图却佳弟恐直太昂耳却上观音一轴可送内子礼供是方便法门第一品也余物将微意不一

又

方晏坐焚香念足下而使者将手教与赋仪种种至矣知己抵洪都任叟及侍姬俱安稳为慰德甫尚屏迹耶即十载分袂闻足下到当屨及于室皇安忍濡滞也用晦寻当孺首诸王孙争自媚不得则相妬小迟之亦佳且今年久爇至前月晦始鲜弇园泉石花竹来近人而为文字之役所苦未暇时应之此段碌碌几与簿书无大异仆恒谓山栖是胜事稍一萦恋则亦市朝书画赏览是雅事小一贪痴则亦商贾杯酒是乐事小一徇人则亦地狱好客是雅事一为俗子所饶则亦苦海吾与足下皆多生业障未即易摆脱奈何奈何近得明卿书意殊廓落其守为吾州杨仁甫极相推挹同守则张羽王也乃约以今月望后访我海上计必道洪都与二三兄弟轰饮也家弟以前月入京不免折腰更三五日计可免矣德甫似无复畅理足下但留神少为三径之资如何白鸚鵡益驯警前所画果未尽美今仍勒尤老一纸仆为书赋补后不知可备篋笥否

徐孺东

仆生平不自量妄意欲整齐一代史事以窃附于古作者之后于国家大纲及名公卿将相忠义孝友儒林文苑之类十已庶几七八独念不能得所谓循吏者即稍得之视班范所记寥寥不能称会自奉先师教辍意不复措手而曩年辱公惠然过我窃聆所陈覲经济大略私心异之既而公布币而以令先公之志铭请始恍然而若有触则令先公句容之政蓄之心者二十年矣而不能悉以故自别后辄敢以书奉促而公方拮据三辅稻田使者未暇也昨以先君子追恤事谢两台至句容句容之父老诵之若新也盖未几而公之教与事状至矣仆生平作志铭不能二千言独与令先公遂倍之即不敢自诡惇史将以致区区执鞭之慕而少慰仁人孝子之用情然以质诸事状则挂漏謏劣不可名其愧公即必以灾木当偶事状传之勿孤行也三辅自石晋至宋皆委以与敌废为刍秣渔猎之地间有不得已而为汉儿口腹计者亦仅二麦黍稷之属播种其中听天自活而已元之后至正时始有建议擘画如公者行之未久而辄中沮古今事若合一辙昨得顾益卿中丞书盖深痛其明效之已见而大绩之莫继也虽然天果有意于社稷斯民耶必终以此事付公不然而亦必有继公而兴者勉旃自爱康生云公此归且闭闕与定宇太史作蒲团行径甚佳第定宇既不出而继峯洪阳又嗣公而去位邹司郎前请告斗牛之分郁然剑色第不念庙廊之上遂空羣耶不有君子其能国乎可叹可叹大赋拜嘉却有薄附将意不一

莫子良方伯

徐长孺来道我公向道之笃因得承动履清豫盖未几而使者至矣披手书诵之更隃所闻于长孺者第谓八子为魔计穷担石夫九子魔母耳八子乃遂魔父耶长君才艺

柳吳兴所不敢望多取造物故蹶霜蹄仲季之间有勿药者公之未竟其在兹乎第一切眷属往往缘聚等之萍值则太疎援之肝腑则太密公文学名世而不涉绮语扬歴多载而不雕太朴位等常伯而名冠隐逸迹混朝绅而籍列丹台即不必生佛世诵大乘经已是辟支果位人唯略于小粘滞者加摆脱而已仆苦海中一贾客也风浪所窘方虞身命遇导师示路易于回楫当时弃家室谢名势外若有可观者而今且一岁余矣凡事未尽祛凡情未尽洗蒲团三尺地与魔共之以此凛凛恐负师真岂能有毫髮余润足相为耶唯是闻之师黄庭云百二十年犹可还此是上古气完质厚之世今则不尔盖下寿以后此皮囊无复可藉若因而别有所采又自贻伊戚意者外却累身内却累心使湛然惺惺不昧因果当自有受用处耳近来肉食人谈般若但作有为却是梁武帝初年证不满达摩师一句也穷子作活只在目前献之波斯藏中徒资笑噓秋暑未蠲强饭自爱

又

昨者贤叔子枉顾以翁之手教大贶来谓至云阳而返徒使人想象紫气于晋陵锡山间而微有传仙迹乃在金陵市门又云有见之者贞以故数从叔子邸再三奉访而不可得贤非右军乃烦张廌苦竹之避贵岂豫章更劳何点后门之迹耳帐且惭惟翁天锡难老遂跻八袞名德之重岂减平原政复不以浮荣轩轻耳贞为手足之变情事不纾且从冗如猓俟小间当具一卮言且修斗酒尺丝之敬兹具聊伸奉候而已秋气渐深若是自爱

王家馭

萧齐一饭遂不能操舴艋从祖道客后也意长者置我于迹外耳天中壮游木铎所过固不待封人而后识蓍易龟畴之地于盈虚消息有遐观焉何必悻然以一归为快也向者仙师传授简长公黽勉从事所不自安者其辞之沓拖委琐不足发挥大道中间灵真化靖之迹或虞以漏泄见嫌耳不谓流入台琐间作暮夜贄也仙师如日月纵阿修罗掌亦不能障之宁况两么么如仆与长公俱久弃人间事一瓢一笠何地不可容所惜此曹子作调达生入无间耳不惑之说外似推借贤者伸其剿辨实欲离间人骨肉使之内讧公既着诚身后长公复推腹言表仅仆以一晒佐其间而已家弟在秦中亦郁郁思归鄙意则谓与公俱少缓投劾使圭角融尽徐徐议之何如野人且欲焚笔研而复啖缓此纸殊增惘然秋暑自爱

又

里人张生所得公报书及大赋未几而使者至复得书且及翠微居士三纸不胜感媿此公书法实不减眉山豫章襄阳诸贤而名不能自振其所传世甚少独仆得其临兰亭叙一纸及上清等四帖兰亭叙久已寄王南岷翁矣昨从长公所见此帖深以嘉赏而长公不甚信后月余偶谈及之不谓长公遂以报公而公遂割以见贶也是墨藪一佳话然仆毋乃作米颠馋态乎比里居获侍太公杖履而长公归复见私不自惭葭倚殊窃蓬生之幸也长夏逃暑开卷弄笔无时不感二桴章惠以隙日第雨师作虐阳侯乘之饘粥之地俱为巨浸吾州小似得干土然亦是一孤岛耳忧生之外更深隐虑如何如何闻胡中丞疏甚切不知攀上君子肯一南顾否使旋聊此附谢文太史楷书千文是书乞外家吴氏者白石翁画鸡一轴颇称兴到笔非敢仰酬来美聊附侨札之意惟鉴存是望兰梦想当不遽固食息之祝也

答邹孚如舍人

记在武昌获奉颜色执事方妙年而蕴藉有大人度当是时私心已倾倒之不啻林宗之于黄生也十载来阔不闻问见执事通金马籍为之快然曾来阳过访颇述推挹之爱乃者遽使冒暑走二千里而见存烹鲤跪读宛然若接警效中间饰奖过情披豁无隐又读先时洪乔所浮沈一札二诗执事之爱我故当出曾君所述之外也新诗托寄幽玄措语温雅少加琢磨自可上薄唐人希踪六代而关键处间有可商至于韵狎尤似草率不无微损连城辱见委辄尔信笔点窜知公大雅必不至作牛竒章憾也时义之美使人一唱三叹吴子辈虚自标榜即研石成臼不敢望见脚底两小儿一年十六一十五矣差能辨黑白一见之几欲下拜即付令卒業耳长儿偶掷得卢寻复作塞殊不足当执事笔札藻赏寄题读书草堂诗塞白而已坐年来无意工拙不足疥君壁也一笑厚币附壁近有山园记寘之案头或足当卧游也酷暑加飧自爱

又

与足下别十五年矣不奉教札者亦垂五年仆匹夫之节不固遂成小草栖迟白下以惭为日而亡弟竟不能待舍我而去自是神魂益消沮无复生趣上书乞骸杜门待命而江鲤忽来剖之则明珠累累盈我几案至赤牒申叙契阔之致请益之诚绸缪宛笃使人心醉兴寄超迈复令神爽不知起色之溢乎大宅也来谕古人欲有所撰着以自见后世必用志不分神有独至可以成一家言而近有友人好我贻书相规以为丈夫耳目口鼻与尧舜等奈何弊精神于小技即三都之赋视若五禽之戏耳此语也孟子舆已先之曰尧舜与人同耳非直立德之士能言之即杜甫毕生于诗咏中尚独谓文章一小技于道未为尊又曰许身一何愚自比稷与契则隐然若有所窥见然甫之所谓稷与契者安

在而其诗名至与天壤俱敝则彼之自歉以为小技者也孔子称诗可以兴可以羣可以怨迹之事父逮之事君若仅以忠孝二言或粗征其实以示天下后世安能使之感动而得其所谓兴与羣与怨也尧舜与人同故子輿氏之微指然非其文之瓌伟雄畅安能灼然为万世标藉令深山一田父偶创此语又孰听而孰传之也第此语自不可易仆老而犹汨汨笔研中受世人役则当以此为瞑眩之药而足下且两用之可也彼用以文其拙者非夫也读足下为先君状自是一代奇男子虽于贵寿之报未极然至今凛凛有生气足下有新都公志而复思表之表之是也而以属不佞未也虽然不佞不敢隐其拙而阙孝子之情倘以灾石乎即不佞重有愧矣读赠亡弟长律瑰丽宏整擘缓周详自是当家弟未卒其辞而肠寸寸折血泪迸集不能已已急为录出付从子焚之灵輶前若赠仆二古风四近体名世之言直可与明卿并驾稚欽辈不足当也顾今受之者非其任耳用卿家法故相卿昔之哲媛以呼所天不为见简亦不为强造宋人集句有为郎憔悴却羞郎以对与我周旋宁作我虽极工致上下不相蒙不若足下之尤稳惬也仆前谓老諄但夸无一字盖以初学道故欲坚绮语木义今便当改之兼成一律奉谢日力不足余附异时带征之例何如雅贶拜嘉薄有所致殊歉赠缟不一

沈纯甫

始家弟贺万寿归问所进交游则执事也已从邸中见大疏姓名则又执事也既平头捧尺一而前启械姓名则又执事也不佞天地之僇人也进则愧忠退则愧孝当世路者强而被之衣冠不获自决荏苒至此何能祓濯以见执事执事毋乃有昌羊之嗜而忘其顰眉螯舌耶念欲买舴舻载新■〈酉刍〉以追候檣李而病肺弗果然心旌已在大庾南矣扇头一诗托思蔼然五岳之盟余髮种种而心甚长若麟阁不容尽白眼为公道尽他篇雄爽称是过兰溪有胡元瑞彭稚修足谈豫章会用晦德甫亦当少驻第未知家弟能为匡庐主人否岭南山水故自佳万里之外以身为本勉旃自爱祭鳄鱼后则公赐环之期余不一

又

仆蹶弛歷落人也少而遘闵不能卓然树忠孝节晚复自放名教之外足下辱见收之而先施于牢悵寂寞之乡非有胸无心者敢一日而忘足下昨蒙家弟发携李使而不相闻遂不获通尺札于左右而足下复以书问存今者鹄首舂吴閩矣又不能操豚蹄斗酒以一轻舳候足下足下当以仆为何如人也今海内慕义抗节之士以足下二三贤为赤帜响附景从必有以奇事进者虽然不愿足下之轻用其奇也大抵人主之倦于好言在銳言者迫之小人之轻为小人以乱国是亦君子迫之所赠足下诗意亦尔中间与吴

先生交尚不能深若赵先生石交也刚肠快吻窃惧其锐而几于激也幸相为日昃之见委跋庐陵五君子像已污讫寔足（阙）何歉若有韵之言出彼固瞠乎后矣行戎稿序必不敢负夙诺但不知若干首文若干篇倘许与寓目焉而后命笔始得少畅耳不腆之币不足以辱行李唯赐存是悬长途沍寒为道为苍生自爱

沈君典

天假之缘游从数日获一窥公真隋珠和璧而不轻露其照夜古德云出家是大丈夫事非将相事公大丈夫也如将相之缘未尽何仙师以化去后十五日而寓梦于元馭兄并撮不穀凡再宿再梦俱如之其惓惓于数君子甚笃也公乌乌瑟摩护法天寄亦须于世法中了之要非面壁枯坐人所办耳此月朔后一日奉先师龕入观时久薰东南风甚冻云合抵舟而雨就陆寻霁麾幢音伎二里许送者观者数十万人入观成礼久之复大雨中间征瑞种种不欲为公轻语仆得托栖此观合得长奉香火充净人于愿已弘不敢复望蜀也方拟奉纯阳祖师而难像本公所赠适至又胜信阳王太史前事矣公前寄两札皆至一似为开之来谒师蜕而过里不入可讶讶然长卿致渠竿尺一巨册读之大是奇文与长卿俱非仕路物耳昙阳观记精劲古雅且饶致语中间惟有小可商者与元馭计定后即登石矣劳役甫息肩良苦笔札幸宽简略之罪不一

又

自公行后即麻城周起部来云有一夕拜以宗伯充贄于政府袖草者久之而返璧台省之间盖汹汹矣而亡何太牢之疏继之寻部为停寝旬日而台抨复继之如此孙郎吃语欲止江东小儿啼不得而能止我辈学道耶然宗伯不免作小有为事具揭一辨及报启上诸执政一丸泥封龕室谢絶香火与我曹作壁观婆罗门而已宗伯咄咄谓先师胡不示一信仆谓清虚小有天下视人间世若一器贮数蚊蚋于方寸中鼓发狂闹了复何涉庸讎知不以此验我曹精怠耶得公教果不异鄙意心谢心谢申相公徐大宗伯后先有札云政府意殊穆然且能以平语答圣问审尔彼善星调达者枉以身试阿鼻狱耳前所云夕拜宗伯门弟子也末法中遂至此可恨亦可悯也申公又云公急须北上半足踏凤凰池便人人息啄此恐非谬语惟更察之小儿落夹至停廩大抵与司柄者分任咎耳今颇有焚舟意冀应公前破字诀也两小孺风气却上要恐闻之直指之辖北矣渠已决策荐青浦君得无为威明党人之好沮乎挥汗不一

又

仆向所以劝公暂出者非谓一出处足以了公平生事正谓物情汹汹不欲过示崖异耳燕中报音悉返大抵意自有为非欲与道雠也借此一番獠口于意已满此曹子伎俩亦有尽仆与学士可保方丈萝薜地矣昔时钱王筑衣锦城罗隐劝其楼堞皆内向未几而徐绾之变从中起仆所虞得无是耶今已絶腥味不入口朝诵夕坐然不过于毛髮上作小观耳顶门针咽喉刃了不知所用也公何以教我家弟乞骸于入计时已有疏上今段固近决裂亦不至显然仆窃谓公虽不负泉石盟更须上一病疏微为宛转且毋令学士作逋逃主念之两儿子粗知行文辱公见急附闻不一不一

又

三日前青浦一书至谓公已束装旦夕北首矣而其夕冯开之吉士来云亦从青浦得公问意殊快之二妙差池风沼毋论小山丛桂之色夺而增润玉堂且使噉猪肠小儿少息唇吻是亦佳事信香来接飞翰字字肺腑又于元驭宗伯处见张公子二书中间遣辞叙致波溢藻烂始犹疑其文人少实而恳至处要自由衷公所云二十字谤政府殊亦聪明宁不知无酖人羊叔子者祇缘公偃蹇林皋若为异议诸君立赤帟故宵人得借以行贖一入金明门立冰释矣第三厅尚是隔壁觅声恐未中肯綮正亦不必介意我师往往戒仆和光兹行无以为赠唯此二字而已青浦计可望除目脱此枳棘便甚消摇仆虽貌为捐世累而时见刺促即尸坐一蒲团亦自碌碌绵竹耗殊杳然（阙）其尔自不善觅亡所怪也向书楼堞内向盖谓元驭及仆家庭间魔而苦之然吾辈方寸地何所不有言及但更竦然近方料理佛道诸经可捧诵者刻之尚未完青浦内迁时当附上也此行须从陆如张所拟为便余不一

又

孟夏朔后二日元驭宗伯见谓公家苍头来乞法并仅持少君一书云公病热须此以解极为悬悬欲驰信相候念无可使者适得青浦一札云已自勿药但元气卒未易复耳公出不过一世身耳自爱则万世身也不自爱则刹那身也先师遗训俨然亦复时加紬绎否青浦业为公展告第令天上公子知果以病欲不任非繇敬亭山色相殫则佳耳与宗伯俱有家庭之戚而宗伯为重古称缺陷世界非独吾二人顺受之而已兹附青浦倅奉候加飧自爱不一一

茅鹿门

某待罪贵郡无状辱长者怜而容之盖拜赐于今八载矣罔寺时贤器柱受至欲负

笈力辞之而后已濒行不能以一符繻为别缘不如御史有佩印处处得发故也每念执事负经济才文学政事于世无两中遭萋菲竟阻鼎铉乃至贤器麟趾凤毛昭代之瑞齟齬一青衿而复褫之所谓着朱骑马者果何人哉世贞幽谷之灰不然久矣加以趺弛自废偶值天公一闭眼暂然■〈足必〉跋今之委顿固其所也山园小有泉石春来花竹日新作老蠹鱼散帙了不知厌间以尊酒佐之酒倦则游游倦则卧慙羨俱黜怨亲亦忘所恨宿业未满为征文人刺促不得并谢笔砚耳承大海谆谆拜诵白华楼续稿神气殊王毗陵之后主盟独公矣史记题评斟酌二君更自有入心语异时尚有所进固公之余惠也

许殿卿

仆业已塞兑蜗壳自老而于生平故人不能尽置意外两岁前齐中信言公属末疾方念之而昨冬遂有传与明卿俱游道山者岁杪得明卿书春闰复从金茂才得公书及一绝句令人快慰若秦庭之还我双璧也金生颇能道公及李千里家事云公虽不良于行而饮噉转健神明不衰即以此百岁可也绝句书扇头供一餐不备

又

得书满纸皆肺腑语而笔迹非复成侯之旧当是用伏生口授故事耶陈生云兄神观小頰口履俱涩而饮噉犹不衰此境本非佳要能一切空之更自受用兄故尝莅赵州赵州老子百二十时光景故不异也若白沙先生于世法中潇洒故可耳未敢便以出世许之闻贤郎能禄养两孙渥洼神僮歴块可期仆赖庇犹日倾凿落噉不托三儿粗能读父书独于鳞墓草十七青矣子驹复化异物遗孤虽衿裾学宫而蓬蒿私室吾辈得无愧生趣之厚耶兄家玉润国之瓌宝甫登九列而见左时趋回辕下泽然内有足下外有于鳞千秋之业不可鼎峙而三耶寄声勉之不一

弇州续稿卷一百九十

●钦定四库全书

弇州续稿卷一百九十一

（明）王世贞 撰

○文部

△书牒

沈光祿

屈指西湖良会于今十二岁周矣每念吾丈冲虚恬淡恺悌易直黄叔度陶元亮之伦出处之际如云卷舒加以太夫人大耄万福优游奉侍天伦之乐靡以加矣弟初不能蚤引来此繁言幸自在家锄菜而世网及之又以饵忌者口良可叹也春来偶有创悟一切放下且作头陀行径矣闻仲君勇割爱欲离诸烦恼深所敬慕何年得谒法门一领指示也

李仪部

贞自杜闕来不敢与闻世务而自见泉兄与公前后大疏诵之为击节叹赏移日盖皆出于常情之表而实中于事理之的故也贞生平蹶弛不能事言路齿颊余生自远名远岂有可以当公意者而况雕虫之技无益身心亦厌之矣乃辱过听见泉兄使效太公称觴之祝不佞何能为重虽然公贤者也太公当必贤又闻公上疏日知且得谴情罪于过庭太公怡然慰勉之又世贞之所愿效执鞭者矣春来欲简思虑俟小间当成一长篇仍以数语弁之报塞至意却觅便人专上不悞也雅贶不敢辞谨勉拜嘉附小敬于使者仰祈念存不宣

又

自门下之宅忧里居暨除服也所俨然而辱临之者所以筐篚交者所温颜色而慰存者指不胜屈矣而仆方自外名法耶稚子不获锁松筠间以野服奉接一茗而已亡芻羹麦饭之荐迨彩鹞北首又不获操舴艋具豚蹄斗酒之敬门下用深山道人例寬之则可然固当忘之也乃犹于拜命之后娓娓笔札若寘仆于方寸间者何也仆亦长物耳懒不任腰膂劣不任齿舌故托而逃诸自附于曳尾之涂逍遥枋榆没齿自足岂其别有希覬而门下过听辄举之人将使仆为鼠璞岂所敢当哉仪部之除似足小塞时情然自是三年前物清通简要故当以王裴相拟此不足淹也荆老虽尚有凿坏之志而圣眷乃尔似不当复偃蹇矣少陵有云二三豪后乘时出整顿乾坤济时了努力自爱使仆托此济一笠一衲坐朴握饱冷淘为太平之民以死不亦快哉使旋草次附复不宣

又

向者以尊命作太公寿言是时方欲谢绮语屏游思不能仰体仁人孝子至意而草草一歌塞白数月来不复终此戒染指翰墨则殊愧悔其卤莽也仆向者勸世之念适与境会故戢身自遠殊无所证得市井草莽举体皆凡惟有待尽而已执事何自以世外之乐相羨豚儿久困名场一振翼而铄随之且令息黔补劓从事音贤糟粕之责司马壮游大非其任承执事念存敢不致令感戢主上英断公卿争似励羔羊之节而神武之门尚有挂冠者不识尊见以为何故朱使君人便草草附复不次

朱吏部汝虞

前有刘氏之干去草草数行知己达而是时王父学正公之志铭粗已脱稿卒卒附上乃劳使者冲暑长途骈赐大海厚币之辱王父世世长者式穀貽后而贞荒落之余不能修其辞以为地下重则有惭汗而已骥儿归谈公道谊之爱津津不容口至谓清德雅望治行第一王裴之选舍而他之颇置不满于造物者此儿独好德一念可耳其它无所不懒辞科之业疎脱自恕弃置分也白下名胜诸贤萃止固足小畅若使游太学所谓十年犹有臭者谁能洗之耶次儿扶病入试苟厕一名不至寢■〈谷丸〉足矣小者粗可槌策聊慰目前赵汝师转宫庶自国老调停之意多然此君殊郁郁不自快不爱作东方生陆沈大官醪肉中也邹吏部何以请告得非亦生此落落耶仆老矣于世事殊不欲闻为公偶及之勿笑野人市态不尽也外不腆将侑乞照入爨甚口占代报不悉

又

逼昏而高轩见枉非有墙头之过几遂疊耻青灯促膝玄谈少疲佐以时事名胜所会令人忘倦弟孝伯无长物虽六尺簟亦为儿子携去不能止宿云雨虚无殆若梦寢以此恨恨耳山居耳目涂墍赖公闻所未闻圣主悯旱步祷南郊蔼然桑林为牺气象新司农不知如何有以仰承德意否前与赵汝师宫洗谈及有诗纪之其落句云藉令指日相司马未若得雨烹弘羊此闾阎意也汝师前有一札为公念甚厪忘出之今以附览刘君以为许草墓表似其妇状至即命笔丁太仆不审何所托此二段恐未免破戒奈何外纪赠一排律请教山中不可无此客亦不可无此咏不腆之物不足以酬来美聊见情耳幸麾置之

答户部刘介征

仆懒病自放虽掩耳名世交游中有传贤金玉姓字者双鸞振羽自闽海而徊翔玉京不减孝标兄弟昨虽得朱嘉定书恻怛间犹疑其梦不意衡门碧苔破长者之辙既接大雅觉芳兰袭人旋领绪言则屑金纷吐昔人有云所见更胜所闻殆非虚也仆尔时困河鱼暂不觉极终以不能持久竟无由停孝廉船惘惘终夕执事之留书复至矣仆何人敢妄拟韩忠献执事翩翩眉山长公也如同叔秋期见过尚能烹伏雌炊新稻以待虽然幸毋语人谓病夫破凿坏盟也承谦光下询以诗文所模楷画马者云天廐万疋皆吾师何必模索曹韩遗迹也若庀材贵博则赵宋以前名下定无虚士惟效取其神骏略其玄黄牝牡而已雅贶种种拜嘉

又

与执事别来可两岁则时念大雅不置矣所尤怅然者不一接国征眉宇耳前时拜执事所草状今又得新刻读之令人作太史公留侯想其须眉风骨当掩暎元孚懋权辈虽不接不恨也辱示诸篇种种清丽有致唯于一二字音不甚妥即国征似亦不免小加丹铅之力美而传矣烈妇从容就义尤胜感慨用壮者家弟既任表墓地下之文仆固不敢辞弟大藁前为小奴置乱帙而失之问之朱虞封云渠有别本旦夕从南曹索之可得也朱君有遗爱于练川要当求之古循吏久废笔研草草成二章奉寄扇头纸素俱勉尔塞白辱贶存之雅小伸报私统祈照亮

又

衰懒相籍与世末杀不谓长者蹶履修讯杯酒扬挖使我岩阿生色丛桂滋芳盖尝左顾而问竖子汝目中有此客否所恨回风云旗倏来倏逝至今恻怛犹在梦境也向问公家孝标何以不方舟公谓有少家事未料理寻当相诣而紫气未更苔迹自若意且轩车上都接翼天路矣忽奉来教知有秋风之折且以生存不见识无以借口地下为叹使仆赧赧泪下不自知其无从也庚辰榜中贤仲与天雄魏吾乡顾称三才子二子皆幸相周还独不及识此君今遂成异世所谓缺陷天地耶夫岂直公门哲人之萎而已也不知有遗诗文可哀录否见示文二章诗二十八首皆翩翩有风致骨力遒紧直足称作者独见投二律奖饰过情耳仆固已谢笔研小俟春愉或思仰酬来美今则未能也损饷皆异物而仆不能当异人如何不腆附报不一

周元孚

自兄往返晋楚间凡三得书而所报者或不达及见括苍除目意可以毋敝邮筒矣

偶有传兄得金陵转亦会山僮无可使者以故中沮今乃辱大教详恳多致殊愧仆之落落盖岩穴例不可施之兄也所叙山水之清胜刺史之朗洞足以忘谪即不免随台牒行望邑而所至输吐方寸了然无纖芥累子厚罪人不足论贤于退之潮阳远矣仆为一大事委身明真而未有所就近偶从容受却病法而驰或可苟延岁月以俟师期他非所敢望也太原公不获终香火缘亦出无奈中间与言事诸隼时左要自别有意曹子念者仆甥也而与邦相石交日夜来促为其太公寿言而未及许兄之见委与邦相之深指既不忍负又不能无愧色于曹生故叙略中及之然亦繇文通才尽作此有限狡狴耳仆实无可以代笔者兄勿疑也数日内山妻中风疾几殆差得小挺尚是床第间物卒卒不竟所吐亮之亮之

又

前括苍丞使者去附一报言匆匆不知作何语昨遇一客来云公自会稽还郡治寻复繇郡至会稽筭輿行千岩万壑间争流竞秀且具称公意度轩豁不作迁客牢慄态私甚快之老人健忘竟不记客作何名姓也仆岩居稿坐就木为期都不知世间有苦乐事一时乃尔骈集先君子身后为忌者所尼久矣赖两台之疏以有祭墓仆本上疏乞沾老母而太原公为之地道先君子遂得赠大司马仆即瞑目从地下足矣霖雨襄陆饘粥之业白波卷空食指既众不免饥寒催征迫责蒿目剥肤苦又当何如也然此皆仆一身事耳主上食息全委三吴一旦狼狈至此譬之人腹膏腴耗竭何以支吾且闻大江以北秦晋燕周齐鲁之地草根树皮皆尽孳死枕藉桴鼓卒起比之江左又不可言此则仆与公辈共之者公今在事行当更甚耳金明门内光景机局非仆所预闻偶余生便附此不悉

又

自纳郟节归于今年矣既畏作燕中书而执事又时有使命不能究鳞羽所向故间者阔焉而执事再辱慰存乃至拳拳以出处为念何执事之笃旧故好行谊也仆故下中人耳世以雕虫之技而过称之已而苛责之皆非也家有园池图籍之类酒浆脯■〈施，酉代方〉不乏虽用送日每一小间芒刺中起此不能与人言之家众内外绝不习声伎墨墨以死耳而妄以东山之乐加我良可叹也前得留尹报即驰一介上书阙下冀返初服以明心迹而去人狡故泄之见尼政府亡何而南床之白简上矣执事所喻云云安敢有忿世心然胡能不长往也江南七郡根本之地一旦汇为巨浸民且鱼鳖执事素精天官家言丁丑封事仆所心伏第不知此水与此星相应否分野不相关否自此可遂弭否尽室危巢不知所之须仗金篦一指导耳白葛藤簟伏日所需敢不拜赐拙集一部又新刻二种如命附览年来跌宕此中第揆眼鼻不能梓也审已在道征车触暑珍重珍

重

又

抱影茆然忽有天人谪堕剧语久之似于人趣天趣俱尽街鼓初动酒阑长揖又似阿闍国一见更不见耳洛阳少年即无所持议犹捩絳灌眼鼻况复张胆扼腕与之争是非耶出处小事不足为兄喋喋唯有熟读大易老子而已仆多生结习落雕虫技中束髮来即于人口吻过活今作一焚诵头陀尚恐不免唯信命而已长公见委诗序本非敢承读荐先君子一刻不觉懼然神位遽尔授简既成读之却是佛头抛粪将无以怨报德耶一笑一笑新集沈雅有致已足名家小有一二可商聊为拈出欲重连城之美比来不欲沈思扇头之作是冲口语不足污兄怀袖也邹守龙倅二章幸为致之不一

又

昨使者归草草附报谓以寿明卿便相闻一致覩缕计兄踰祥近禫小纾至痛读礼之暇得以内观心境外究世法公论显矣服除之后必且征用却有可忧者诸君子抑郁之气甫舒肠肥脑满轻为吐摘而宫府之际颇多异同旃席之表不忘伎忌恐至其时又作一番面目耳仆本不慕长生而误见拔于先师词组针芥遂成掩闕奈夙障未除受责笔研春来一病几作巫尪邁此夏旱仅堪一炬深秋始有起色验得诸名欲忿恨根俱未便净除得小澹而已遇触则起乘起则发要须谢絶一切于蒲团上断除之耳

又

自足下别无几而南北之奇货学士君者亦波及仆幸鸡肋无深味获见寬于渔樵之计无恙私分已隃乃执事犹隐隐起方寸五岳谓世人前后三忌仆嗟乎世人何当忌仆仆亦何足忌此但以名义见绳耳足下不覩金刚经所谓先世罪业以轻贱故消灭者假令仆乘此一懺宿障脱无明结善果为幸不亦大哉承有太夫人之变蠖伏团焦不能絮酒千里如何沈君典忽尔沦逝令九子挫愕威明俊人之痛千古如新然闻颇伤所恃足为龟鉴又传沈绳甫亦死戍矣足下谓人间世覩此当何如也管使君口足下不置所云先慈九京之托有吳明卿在足下奈何近舍持正耶适邹使君人便附此惟以礼自抑勉进饘粥不宣

又

两日负病侍足下杯勺别后复病复负病而强从事笔研得数语倦即乙之无何而沈吏部屠仪曹两君至矣不能即谢絶病益甚草草塞白近谓家弟尊父丞邾与肖甫平浙变皆凛凛有生气而付之孱手可恨也佳集亦以病不克卒业毋但欲效雌黄而不敢虽然足下能抑才以保格舍象而先意去色泽而完风骨大难大难所望入思更沈就琢加细而已然亦已在叔嗣继之间非当涂翩翩可拟也

邹彦吉

自覩执事闽宪除目喜而不寐者久之闽故多文士近益鹊起几揜覆呉会而有执事为之师帅譬以武安君治秦兵谁复有与之抗衡者以执事文益以闽之佳山水相为曠发彼柳刺史之柳州么■〈麻外骨内〉牢骚何足道也虽然为执事之喜得闽尚不如为闽之喜得执事也审锦节已抵延陵里方命子墨修不腆起居之敬而使者已先之竿尺在棨筐篚在廷应接不暇执事之爱仆岂直以葭莩故仆老矣名为学道而实无有猥被时私再点除目夫取长林之麋鹿而被以鞢络宁有不惊走者已上书恳辞不得则有再请耳执事之饰奨无乃非知己乎哉岁杪小奴归自齐安致大作比之前集有开阖步骤而微示嚙蹶然自此而进之一日千里矣呉明卿大叅来与王行父偕王生之事执事诚欲尸而祝之明卿亦津津高雅不置渠哭徐子与墓还当复取道执事乡里何以待之南行过呉闾亦问外家否则仆山园仅一衣带水得少日周旋不为不佳也拙言奉送侑以呉缟唯賜麾置是荷

又

村童自无锡归得执事报言满纸方徘徊咀赏而使者寻迹之至则烟霞之阻种种且得纵目诸作灵芝一赋颂而有风若对楚人五七言古近体一倡三叹余音袅袅令人心醉所喻竹素之好托寄千载是仆鄙尚之偶同至于出世大业稍一染指则羣味嚼蜡矣仆归田后拙集粗已成即束之高阁间复自叹生平得萋菲力不浅晚途幸不堕饵诱保此一壑曝背而美敢忘其献第恐造物真宰不便相舍耳承委作小传虽谢翰墨或能破戒为之俟得一面商方可命管如所谕肖工亦须于阿堵见神明也酷暑小蠲即先了二幅及效丹铅之后闫君夙所倾向今已憇弁园即遣舟迓之下乡也大夫经三册附览不一

又

向者辱惠大教时属苦疴卒卒不能效丹铅之致而劳执事记忆乃若以刍蕘为可

采者损饷藤杯壶席种种皆山家清玩味以年来戒饮虚此三雅俨然千里意耳全集三复不忍释手往往有法门调辞外味读二君子所撰序私谓未罄名言之妙及仆操觚管又更缩朒不快非繇才思荒落当是大美难状耳其置之毋容佛头抛秽也仆方外之迹虽若能自潇洒而俗累时复中之不足为公道周户部吴大叅计时相闻千秋赤壁矾当复郁郁生气语及令人爽然无由作梦中道士也簿物将遽臆又一札附周生烦为致之不一

又

自公覲还辱问遗诗教之爱仅一报答而已不复能遣信相闻而叶茂长去家索数行先容想久已得达当时记李献吉一绝句黄州江北使君清赤壁山留万古名黄州小儿骑竹马来时相送去时迎计公还郡日此光景宛然亦无所措仆语每见黄人道公文章政事之美冠绝一时风猷意度又当不减吾家会稽父子令人叹赏赤壁时时鼎新不识雪堂定惠遗迹亦可一表扬否周户部想时得相闻适走价为吴明卿称寿附二绝奉讯故当不如献吉琅琅也去人志弱幸为遣一骑护之至兴国为荷初冬未寒加匕自爱

又

公时剖符而南停锦慧山之麓仆方治地毘舍布髮然灯于一切闾左间事俱无由识之旋闻露冕之地乃是宜黄公前奉使一集云蒸龙变已足鼓吹隆万嗣响元厯今复擅此江山之胜吐欲胸臆露之笔端当又何如其盛也待尽之人百念灰冷独此结习未尽忘能推鼎鬲动我食指否友人周二鲁起部过山中相为谈及不觉跃然此君宏博高亮当是陈豫章下榻人不止公同榜之雅而已澄源公藉公周旋想不至落莫楚侗先生读礼况味何似偶便附承动履唯为道为吏民自爱

又

始执事抗章请告与用事者连遂坚岩壑之尚而仆亦凿坏自废臭味偶同虽心期未间而俱有夏甫之癖仆之不能西犹执事之不能东也先人蒙被上恩责及泉壤仆复误见物色请告不允谊难复坚梁溪之役乃欲以谢肱而唐突子季窃谓必见屏门墙之外而执事欢然出访携榼夜语啾缓忘倦非为他舟所强当遂停严谯之钥矣自入白下以来苦公私酬酢卒卒唯有愧悔加以凶饥蒿目惨心狼狽万状虽有江山之胜与羣贤之雅不能解我眉头寸结向许草玄岳游稿序几落梦境今乃恍然泛澜咀咏觉仆旧帚形秽多矣宿诺不可终负搦管强应无复小致唯不惮揭己之短以见执事长则耿耿一

念耳有王野者见大序盛称之及读其诗齿吻间似有爽气后出之秀也不辱执事炉锤矣杨太宰雅士岂以一闭门而毁泄柳属其考最北矣归当叩之必令作异时把臂缘也酷暑挥汗口占授稿宽其不恭幸甚幸甚

王司副

公之滞散局于五年矣翹林馆急士如此岂能于公忘之公大雅宏度铢视时荣固知不以介怀而当世道者恐不能辞其责也仆齿颊余生懒成癖矣晚来小得歇泊处自谓三公不易曾将军才略盖代而器度未称禅理入窟而雄心未忘恐两失之渠似欲挽仆使出仆乃欲挽渠使归公试以为何如初暑愁霖易中人强饭自爱

林太平

某自分衰劣无当于世割荣挫名以拙自藏而门下过听元驭先生之语若以为有足当者问存数及筐篚郑重乃至举宦路中所加于八座之称谓而施之于岩穴无用之长物混混见饰宁有不畏而走者唯门下怜之亮之即不遐遗赐赫蹠数行足矣颍川政成赐金增秩此维其时若吾郡朱使君当联翩而应九卿之选拭目以俟所喻陈希夷仙翁睡像在太平欲令仆与元驭先生赞之先生方襄大事而有爰立之命吊者在堂庆者在庐恐无暇辨此第以世法言则先生方起南阳之卧而雨施九有以出世法言先生却自醒而就尹氏之梦也如何如何仆末学稚识不足以执鞭此翁第意得翁本传以自亳州真原徙武当九室岩终于华山云台观中间再应诏入大梁其足迹未尝至太平也岂至人神游汗漫莫可倪测耶传又谓先生睡恒仰卧于此法亦或小异以公至意勉缀数语不免佛头抛粪耳幸毋灾石也春阳乍布余寒尚凛加飧自爱

凌常州

久不奉清徽时时在念贤郎至白下忽承教贶愧焉如覲怒如之怀于兹慰矣仆岩穴朽株抹杀世路谬见物色有此忝命恳辞不允念以先人初被身后隆渥之典分当少竭弩钝以副万一龟勉就道既浮沈陪副无可自见且饥葶蒿目病鸩刺衷触藩之羝徒有一悔而已公何见而饰奘之谗高卧湖濱吐欲清遠著作不休衣被士林得所刻翰藻觉大有增益家仲遂获荐全帚甚幸甚幸贤郎伟然国器也愁试想自脱颖初见未效掄扬诸容嗣布不次

万广平

魏城分手整得二十年人间世何以堪此仆老矣林栖一纪分絕世念因先君蒙被上恩除目继之猥云图报更成笏滥迩来因亡弟之变陈情乞骸不为庙廊所许忽忽夫复何言秋初许敬庵京兆致公手书藹然念旧之情溢于言表读学易斋集而后窃窥公造诣之精深一至此也人生正为耳目口鼻作过不浅故直以良背消之赵州栢树子无佛性直从无见解处撞杀精诚之极遂大豁然亦或稀依公于渊源处得二程于作用处得尧夫公甫真实潇洒两不相碍若其它文雄姿爽辨实自眉山东越家风而根究归宿要自胜之心服心服（阙）区区宿业受役雕虫自愧自悔不浅京兆用世才而见龔不免小缓如江西陈中丞辈俱不可挽去者之贤留者之耻也如何如何故同年刘同野之子归便附此不一

沈司正伯英

仆衰劣过时之人误被时趣持节不固滥竽一出初缘病弟病妻势危朝夕料理汤药甫尔小间简书忽迫仓卒就道遂不能南造呉江踵门谒谢此念未遂怒如调饥抵白下与次公相还往弥月之后忽致门下书贶念欲走一介以候行旌则闻已絕江而北矣谗还朝逾月曹事清暇道履佳适以门下之高明大节出自铨部暂借司正谓当亟还故物不亦假重寅清步武卿寺而尚尔迟迟者将由迩来壅滞后薪复积耶夫常格非所以待非常之人此则仆之所不敢与知也区区窃禄无补归思郁跂小俟秋凉当力上陈请之疏以寻初服无足言者役便聊此附候兴居并有薄侑不宣

臬州续稿卷一百九十一

●钦定四库全书

臬州续稿卷一百九十二

（明）王世贞 撰

○文部

△书牋

呉明卿

吾郡之梓人来以足下之手书及大集见示得窥全豹且饱齟腹不胜畅慰随草一纸为谢并附微侑不谓其人尚浮沉也因忆献岁前后尚有两书报足下而忘其邮数千里外固当不易耳兹复致前帙适蹇使君来访屈指千秋之业即以授之俾为指南耳谿体气胜佳且有含饴之乐秋来双桂更锺庆门吾家两小阮亦似可望异日修通家之好当不虚也肖甫遂真作少保围玉甚俊第恐不为颜始平所收足下以元驭大拜戏我初地发心尚不贪转轮王位况宰官耶元驭元美两不涉也所云有齐云之游便以一棹访我伯玉书来亦同此怀当营两糟丘相待秋暑尚溽强饭自爱

又

足下一舫■〈舟符〉破二千里浪而拜先大夫之墓因以访吾兄弟此谊当不减范巨卿嵇叔夜弇中虽陋薄日烹一伏雌亦足以少淹从者而王生力相阻谓足下畏热不堪道路为归计甚迫忽忽相舍既审足下憇垂虹曳足练酌中冷欸牛首与邦君搢绅留连弥月乃大悔恨毋论孟公笑人即不能挽青牛之纽为我成五千言而去也八月望李本宁来九月初欧楨伯亦来楨伯谈与足下晤语岁尽周秀才来称足下归后至蕲访顾氏兄弟因得一邂逅且致足下声良慰仆不堪城市之饶以九日避徙深落荆藩墀户禅坐经行噉糜粥佐以蔬茹荤血絶口饮可三五盞然不复对客尚未断笔砚然絶无应酬以此没齿而已元驭非常之眷不能不仰答家弟为尺一所驱接浙而行家驭虽病除目亦在旦夕矣所谓四王者当仅区区硕果谚所谓看盘核也大集付剗剗当以完周生言足下北园短钉峯石未足游目而他庄舍皆有名山在几案间山头飞泉处处不絶皆可引以穿舍作池流觞养鱼而都不料理何也仆乡间地亩许一池一阜梅竹具体而儿骐手经营自咤絶胜弇中世固有夜郎王哉呵呵

又

自传足下有内召消息旦夕在望已而见臬长之薪积者三四疑其故而不得然不意其遽有白简也白简有之然不意其覆罢覆罢有之然不意其报可也大抵蛾眉宫妬羊肠世险于窥伺者无怪独陶铸之地不应萧条至此足下溲落三十年竭厯万里计方以息肩为快千秋之业亦不借一官甲乙所惜者右文之朝乃有此事耳弟坐起万卷间以新葺良酝佐其倦山园水石日涉成趣而微苦客谒及征文人刺促不减催赋念所苦乐惟足下同之迹亦有传北来耗者谓且见收録李少卿云丈夫岂堪再辱耶以故絶不置方寸所谓老死是乡足矣家弟诗比益进而忌者亦益进匡庐吏事稀简有山水足畅少留寄禄亦终拂衣子与迁辖洪都得时相闻又德甫辈不落莫也肖甫甫开府而有太

夫人之讷助甫差自强伯玉业掩关尚令人不忘之良足叹也贤郎才气汗血千里而不能免銜槩之累宜加精进小儿今春始似知学者于鳞意气功名二语遭姍骂数场然是吾两人今日事寄去二诗比之二十年放歌虽衰飒然不至愤厉用壮如何念欲走一介相闻而会有姻家杨兴国便敢附诚杨敏秀有干才惟足下相为成之余不具

又

杨使君家属行有不腆之启币及扇头二诗计已彻记室矣无何得杨君札津津善足下不置且欲为尽梓全集而以叙见委仆谓此君能尔足下可以朝夕矣贤郎比益进业天纵足下以余日纵横艺苑当此缺陷世界中不可不自快也仆比于山园构一楼颇具清幽之致因尽徙诸书名画古器以充之置榻其间信手披览虽米颠宝晋倪迂清閼恐不能远相过也时时有香茗美酝之类佐其倦间一纵步竹木垂荫清溪白石画桥油舫在在不乏微苦为襜褕子所挠然不尔造物小儿又相妬矣骥渐解杜门仲季风气亦日上阿敬前后遂举五雄以语足下当一抚掌若子与不能不眼赤也此君于季夏履任德甫用晦差不落莫阿敬已有赍捧之役日下可相会余不一

又

秋中得足下及杨使君书云已买舟将访我海上急麾阿段涤弇园一片石以待及使者将手教来云连有宗党之戚未成行色沮久之知更谗花月为期则日日从江梅探消息不能待桃李也仆自入夏移息兹园有法书名画古翫之属暇则步履松竹间听鸟声临清溪垂钓调赤白鸚鵡又有白鸚鵡作叅军语间一过家课大儿文义次二孺风气日上九月幸举一孙里社杯酒大足藏身唯文字夙障未尽往往供人役若责负进以此小不快耳相君颇自悔两移书示且推毂足下弟观此人岂真青云物耶家弟拟入境即移文两台乞休恐彼中未便许但渠意已决尼之不可杨使君迫欲梓足下文集以序见托比来更成杳然何也张羽王流落可念足下幸为游扬诸监司间此子足称名士沾沾自喜以故不受世路容然聊萧之亦甚矣侯老故长者不作柴棘可亲也子与宦况既适亦不必过为子息计身在足矣辱扇头新诗把翫如面仆亦有两诗试读之履当及于寝门外也客次不一

又

得书知有新妇戚且岁侵不能无虞于谋生世界故自缺陷无足论也前后记辞腴于柳柳州矣诗尤快人臆觉与张羽王往返者尤胜羽王亦自翩翩踰于生平但弟与此

君急难中有所援昨以一时扇头慰之而了不答何也杨使君欲梓足下前集累以叙见属但得卷目便可命管城子矣弟自丙子归沐絕不为出计一丘一壑差足送日而误有鸡肋之命辞疏至公交车而见尼遂为年少所窥其所萋菲语毫髮不相涉第园池酒食差为丰美虽与客共之不能无愧心也杨使去适入霁哭子与不及附书登堂后事事可为酸鼻今录去奠章挽诗杂咏足下虽游神钧天读之当为失声也弟许其家作墓碑伯玉任志铭传当以仰属适刘子成中丞儿书至知此老亦遂化异物吾与足下幸后死若大白之配残月每握管作墓中文辄怅惘累日生趣向尽奈何奈何贤郎计当褻然儿骥文笔差熟而见屈于学使者不免为补国子矣饘粥之地白于瓠脱有司责赋甚力尊壘之类尽作人质库物而为此不急务可叹可笑舍弟比宦迹定矣余不一

又

杨使君人归得足下手札及损佳贶因获承动履且许以来春入茗下哭子与遂访我于弇园无任悬想扇头一诗叙致歿存天真恳笃寓寄酸楚所谓长歌之哀胜于恸哭殆非虚也不揣嗣音非敢自托和郢粗见我兄弟同心之契耳尚未得楚贤书伯氏想当褻然不知李驹在齐何如豚儿秋试卷觉远胜前岁而斥主者命也今岁饘粥之业大半巨浸久困公私责首妆饮器尽入质库而贫戚游士尚不见宽俞仲蔚以八月钱叔宝以九月皆化异物其症悉同殊令人有忧生之感近伯玉司马忽寄一书来中为弟叙四部稿最为高古但奖饰过甚引拟不伦或恐增少年笔舌耳弟在郟中已作比丘行径但不能絕酒肉今来转更泊然而世求我于声色名利间直大耳三藏也弟已任子与墓碑足下不可不作一传余不悉

又

前有一札附杨使君人去讣已达矣弟自仲冬生辰念及先大夫见弃之岁忽忽意不欲生者数日而不能语人自是一切世味皆灰冷岁除后忽有所证遂断房室叔宝后复不死然至今床第矣屏服翫日或一肉或茹素酒损十之七八更半岁后可作有髮头陀矣而笔砚间夙障重未即能尽损家人生事产出入了不挂意而乡里酬酢亦未即尽谢却岂亦老人十扞之二也杨使君快士也每述足下不置口且盛欲刻大集云足下以少骚赋故尼之夫骚赋何關壯夫事杨除目亦只在旦夕恐不能完此段佳话如何足下东游之兴何似昨闻汪司马亦欲来此而竟未果符纁久已絕附客舟往返又恐盜憎行路殆无所不难也家弟入覲病发请告会小间遂为所物色见尼江湖间殊少气色除目霰下而羽王尚萧条鲙鱼上竹竿可发一叹吕相公遂不起少郎果移家不能不累足下将牢也杨骤行仓卒不竟所吐亮之亮之

又

杨大夫使回得足下一札承闻善病状连苦无岁蝗蝻继虐剪棘构室而材不继卖文自给时复笔枯两地数千里何事事相同若此弟乃能尽洗一切耳目口体之好儿子十二三即付以田舍图籍僮奴予卮酒告之曰若辈能杜门不犯三尺足矣其它长赋践更任尔力大小吾不复与也旦夕披一衲携佛道书数卷入小兰若矣云山冰井记惜不于疟鬼作热时得之当令五内顿爽今者青女渐近一读冷气侵骨不免呼功裘耳所委歌诗亦似有兴而语不称法当由能所心一懒俱尽第不知足下执笔时亦肯小放真宰闲否杨大夫久不迁相当郁郁渐不及足下梓集事羽王西征注辞甚修而宦转蹭蹬奈何然亦不可尽归之命也秋气渐凉强饭自爱

又

岁时三得足下书而所与书偕来者强出圜一寒暄而已业授家儿子辈其母齷齪守困不能应客所谓此园记仲氏志铭者再见之亦再报启致叹赏而不审其浮沉与否兹更辱手记满纸离索之怀与消摇之赋盖两备之仆宿根顽钝至今未有所证第于此心不敢自佚朝夕焚香诵经三时默坐一褐一饭一菜一茗此外不以累妻子惟米汁故好不能遽断夜进仅五小杯雕虫夙障无容尽洗或一应远方故知死诺而已别诵诸哀挽之作始知足下于交谊笃远不堕孝标齿吻中间情事宛缚无闲长语而篇法尤胜长歌当哭信然哉子与遗文乃闽人郭生收去近始编类得八卷以寄家弟云有二册者为他一生窃之非关汪惟一也家弟方更从其家搜索及尺牘之类幸肖甫填浙剞劂有托耳汪生诗删窜入鱼目至上玷于鳞为识者唾笑于子与尚似有羊昙一恸不至如足下所谓弟久不相闻云已得末疾恐就木矣足下集成须早授梓为海内词人指南亦少宽仆与于鳞捃摭之苦又曹平原所云后世谁相知定吾文者覩子与寝寝觉此语之味深家弟虽皈心道门然以其间理农圃课儿辈诵习黠于伯氏多矣一笑二俊今秋当联翩脱颖儿子嗟咤俛首老博士业甚令人怜之然亦无如之何钱唐脱巾吾辈已办跣走今虽幸小贴而隐忧非浅故人仅肖甫一硕果而置之风霜鸟雀中傅张羽王曳裾今在何邸展转沟壑俱可念也杨丞人便附此初夏犹冷加飧自爱

又

十月初兰溪胡元瑞来云见闽人谢某新刻有哭足下绝句方食时箸为堕地终夕彷徨既驰信从肖甫所问之不获报乃有一楚人游宦者云武昌见伯子入棘试义佳足

下当无故以是稍自寬而使者至矣披緘不暇读但絕倒称幸甚而已海内豪杰適尽唯吾二人者歷落若长庚之配残月胡可遽与嘒嘒小星等泯楚书至伯子复塌翼即肖甫三维助甫一弟一子及李驹亦尔而豚儿乃猥先一鸣小足吐气迦陵频伽诸和雅音自是竞新矣足下所云云非直肺腑亦大是左券弟门户足寄寧敢蹈藉天福而此忝稍觉隄分于恬澹中不免蛇足之惧耳长篇大帛走价千里诚知兄念我爱我然得无衣钵一事于孺子有深私耶渠已北上谨拜瓦鼎诗轴附信致之余仪璧返亦坐拘例耳来示北园花竹日益胜而有酒食之累弟久闭關弇园游履踽踽不能矫首楚望即子与残客非足下又谁托耶诵三山记殊洒然西塞诸矾玄真枕席地向者一过之若飞鸟而已王竹甫者亦善攻字琢句然得心应手终当让足下也弟于一切有为都谢絕笔研役犹未尽每恨三十年前误入此因今日受此果然见兄纵横■〈足必〉跋眉宇间犹似有起色以此知习气难除不独大迦叶耳伯子高才困名场久不无畏首尾宜鼓其气而充之季子国器足下自能炉锤毋俟赘也偶从书肆得豚儿两筌蹄今封去或可佐千虑之一恶诗书扇并宋搨圣教序充书室清翫不一

又

前使者至得吾兄手札及诗如自合浦还明月珠喜尉之极粗于一律见其大都耳所谓心之精微言不能尽江陵殁后宇宙间遂一翻覆全楚巍巍兄独超物外当时忌者安在哉弟一稿木耳向时不任毁今亦不任誉第为眼底应酬及笔研所困终须被髮入深山或可了此一段未了也周弘■〈衤仑〉户部至云足下近谒太和归锦囊所收当不訾能相寄示否肖甫胆略遂不下郭汾阳助甫亦渐■〈足必〉跋为吾党增色黎惟敬逝矣作梦既成两日而遂委蜕大奇事也叶山人茂长奉谒便附数行先容山人才气磊磊恐足下门客先无此人得无又空北园厨料耶一笑

又

仆自正朔为儿辈举屠苏毕即足下六袞觴耿耿胸臆矣而会病羸至春中而剧药餌不离口又时时为戚友强以笔研之役如责博进六月病痞七月病脾八月甫起色而伯玉肖甫访我弇园元瑞仲淹辈亦麇集几复作高阳故事九月始息肩勉为足下草此寿言既成都不晓何语年来弃家儿辈为俭岁所窘一丝一粟亦不从之贷乞欲遣老苍头蹶屨而西即以行路难为解蓋刺促者久之而后成发扇头二絕皆真境真事也台垣委易楚地诸贵人亡不臲臲者独不能动足下北园清梦问字乞言之客踵相嚙也亡论廷尉罗雀门当亦不寂寞矣第仆已誓佛前于献岁断笔研犹恨足下居僻不获以牛耳相赠俾跨有大江以南操管之士沾沾景从然舍足下与伯玉何适伯玉亦现衰徐征其

匕箸不大损小足慰耳肖甫则真大贵人也家弟课子读书学稼为圃进不慕二甫达退不作乃兄迂优然大足生活所虑挫名未尽或为弋者所慕耳贤伯季学故当大进仆长儿兴尽已归粗代酬应二孺知弄笔墨聊以暖目前而已

又

知吾兄至吳關为羣彦所挽谑浪杯酒纵横翰墨令湖山一益生气二令差不俗比之此间千石奚啻霄壤前所遣苍头想已奉仙舟入雪矣每念二十五年之别合并旬日谈笑差足相快然至别后忽忽如梦却又恨春梦之不长也分韵三章勉已塞白又得谒墓一首久不复问工拙矣行父复致前币不欲再返俟齐安王生后便当一修缟纻之敬也并仲美俱烦致声彭生事已悉吳子辈恶心肠乃尔何以面足下使孝标在兹时不知作何语也姑缓之必有以处西望楚云心寸寸折不备

又

方畏客而刘山人者以足下书至破例见之此君悬河之辨不必一一破的亦使人忘睡所示欲东为我举六袞觴第与人无所比数蓼莪之痛桑蓬独深以故买一舴艋避客菰芦中弥月而后返中寒作楚亦所不恤足下第举中散故事惠而好我携手同行不唯泉石增色鉞壘亦嘈嘈也佳集稍得从容诗故所服膺文华亦自冠冕一代觉新都相公所评似但及有韵何也仲冬始见楚录而二倩不与令人扼腕一段蒙气似尚在吾曹兄不闻李驹耗耶已游岱矣白雪楼作他人物幸两雏补诸生尚小慰地下仆第二儿病弱尚在汤药间小者文势小进与两犹子似可更结通家缘家弟啖荔枝已饱或量移矣元驭自以手足之痛乞骸不已非有他也前有报书樊山邸附眼镜足下何繇不达余不尽

又

昨息庵上人行便数行申契阔之私计已彻览矣数日内都邸报知圣躬违豫所谕疾状似非盛年所宜有既而一郎官上书过切至触天怒自江陵夺情之后絶廷讯久矣似亦非盛世所宜有且恐羣少年不察揆地苦心又作一番描画也如何如何吾丈虽寄迹江湖当不忘宗杜如弟及此却不免杞人谗也年来忽忽厌俗殊不怯死近得一简便法或似可不暂死承欲访我海上当设醴茗羹于舂中以待青灯促膝所欲倾吐者方内外悉有之计吾丈当不异颺俟俟家弟白下之期在岁邸闻不一一

又

新岁不闻问昨邂逅一故司农郎熊姓云欲叩玄關直自太和归以微痾谢客且谓秋间访我东海上寻故刘子成中丞之子一介来出老兄数行则熊所云信矣犬马之齿本不足言且蓼莪刺中焉足以辱高驾惟是先君子十七年未竟之事赖台议见伸天子之宠灵施之隧表大官之飨得知己老门人餽之于私慰矣先君子二品未满考而宗伯引军功得全葬先恭人仅四品封而两与同祭此殊典也弟以宗伯疏不及赠谥不复请而太原公念乡前辈故特为之改疏草以上今获咨封部矣然且匝月而未见覆得非为弟未有尺书谓之傲慢见尼耶主上所以勤施劳臣已足其荣固不在一阶半级也子成集固宜叙然有兄先之安能不虞形秽哉此间滫霖几四旬饘粥之业汇为巨浸咄咄中具报不竟所吐亮之亮之

又

刘将军去有不腆之物附八行以报计彻记室矣麻城王生者来云足下且以盛夏抵秣陵访我于牛首燕矶间时有传伯玉亦且至者使我梦境亦自神王既审足下且未成行伯玉复改期秋杪为之怅惘移日仆兹出成小草且寒香火之盟而江山名胜亦足游目却不免有五悔出后家弟虽不成噎而痰火时炽汨没汤药不能归视之一悔也病妇展转床第遘此俭岁三儿饘粥之业尽废二悔也初意染指即寻遂初而诸乞骸者俱不得请三悔也欲有所建白而度必无益嗫嚅喉吻间竟成伴食四悔也白下士子所萃适当试期挥汗酬应五悔也足下高卧北园曳足甌甄洞以清风为故人诚若霄壤虽然悔之晚矣自贻伊戚夫复何云足下方为李中丞致拳拳而此公中文罔令人丧气适邑子俞易之便索数行以见贪得近况漫尔附闻不次

又

仲子来拜手教具山中之况已从礼补陀僧所得第二札其时尚未审亡弟之戚也无何使者至得第三札则有见挽亡者六章蓋字字皎人珠矣使他人见之尚且酸鼻而况为之兄而自相知已者耶又况衰羸待尽之躯将并二人为一者耶至于感激思报一念之私有非笔札所可述矣弟病削将三月近始能进匕箸第形神忽忽无复生趣前有小疏塞白出月初继上乞骸之章亦知归故里百忧丛集无筴可避且拟视亡者兆域求不朽之辞少慰地下即掩關却扫饰巾待尽以自附于首丘之义云尔肖甫兄亦于闰月二十日长逝此兄名位已极膝前振振绳绳亦复何憾但国家失一缓急倚仗人吾曹益零落可叹耳耿大夫云见楚録伯子复失利仲子儁才必自能腾蹕第少年之染颇深弟

数促之不肯归以此负足下耳弟欲不言似负足下益深言之恐复蹈癸酉之疑如何勉成长公七十诗既羨之行更妬也雄章崇肴即付之孤侄俟弟行状成专人拜致不腆之币请太史公传并伸谢也不一

又

前有两书附复计俱已彻览矣刘典宝来得足下书似专为谒玄岳修路功德而发及读疏辞虽不必本色语而自古雅畅利非足下老手未易到也修路毋虑数万金贤王盛念与足下高谊此两大檀越弟何敢不奉佐一二但南都遭此大侵中产以下未转菜色安能劝率使作眼外不急之务诸募者兢兢不过两厂织局三中贵守备一魏公而已魏公近贲其家方治丧墓请恩恤费且万计须从人贷勾三中贵前以陆司寇相拉募明州阿育王塔缘颺蹙而应腴颜而出何可更作冯妇也昨岁五月饿莩十万人京兆之粥竭而当事者不能以单辞劝富家捐升斗之惠即使弟不恤号召之劳亦谁为响应者夫以堂堂之列卿而为藩国募缘似亦非体以故轻辞以返王之币而详辞以解兄之疑虽然彼若能以大辨才开大因縁弟亦不为沮也有苍头一似是兄家干欲得刘太傅书兄既无来示又不知其意聊为草草应之胡元瑞诗藪附去渠故有宏识于足下昧平生而深景慕殊不多见季子云久在芜湖颇有所闻幸勿简义方勤加剜琢肖甫前书已具之李中丞不成死矣舍诚意而务修身遂至名与身俱敝惜哉闻新正有意金陵便当日望云气于龙江口也

与郭中丞

世贞自凿坏以来于世事一切不敢入耳目亦不敢挂齿而至开府台察监司郡县诸公则以家族桑梓之故不能遂漠然年来水旱疫疠为灾百端而敝邑尤甚所以苟安寝食不至一夕而三徙一饭而三辍者盖唯藉我公祖而已阳月覩台省流言则自缙绅先生以迨田畷红妇靡不骇愕咨嗟甚至欲甘心于豺口而会尉留之旨旋下用是稍自安乃者公祖之辞疏甫上而得请量移之命因之当路者果何说也岂其不悉公祖之贤将弁髦家族桑梓而不之恤耶抑借以是调停言路也公祖夙慕惕厉躬行俭素宴游之迹不及别馆筐筐之施减损数倍集思广益勤恤民隐而为之爬搔衽幘之奨掖循良俾之得尽其才力而悔其所不及即听事之所人置一抚公在上葭屋之侧陋与戟门通而靡所不达不佞燥髮所见闻二十余公恐未有如公祖者也自周文襄之为惠王端毅之为直而彭惠安之为详恳屈指而置公祖居其四奚愧也燕中之去呉三千余里士民往返不虚日即目有不能逮何至并无耳也场屋之事下走承乏楚臬则彼中已有预荐者藩司一二公能为之而故使走知之走以故辞两房卷不阅而左辖得以为奇货既启封

则舒侍御者无如之何矣盖尝相顾而与走窃叹毋论公祖即逝者如舒侍御亦冤也十二年以前仆时忧居乡则见有谈何心隐与邵樗朽皆大侠也其所为如在吴兴在新郑诸事皆目所不忍闻也毋论其捕逮与瘐死非公祖所繇即自今而后二三直指不能衡情法而毙一大侠此又何说也江陵之忤愆与一时之奉行者诚有之然不至人人皆奉行事事皆忤愆也今有所不合则皆援之正而有所合则皆斥之邪仆以为毋论被斥者即江陵不为冤亦未尽不冤也公祖归不过六月息耳去而移福一镇无非王土王臣独吾吴分浅耳下走自麾节驻吾吴不能一趋候于交戟之下昨夏过敝邑则属有采薪之忧又不能望见颜色而今者又不能从父老攀挽其为蒿懒自逸何可言独娓娓于笔札间而贱且愚未必人慕而信之即公祖得无以为譌语耶虽然下走非为譌语者也聊以泄其不平而已领教未期为道为苍生自爱

王太仆

汉上获晤清徽于今垂十五年矣中间虽一致郢襄之问载附舁中之书然以十五年例之其间阔可知也昨冬季二孝廉来称翁天赐难老神彩殊王饮噉胜少年时而诸从及孙枝连翩森举蔗境之嫩津津不容口乃者从白下接令孙太学所称述大过之已而出翁所寄二诗知翁之念我深矣已更出全集得尽窥巨丽之盛而贱姓名之辱存于篇章者指不胜屈也不佞贞何足以当翁臆何翁之为长者而不佞贞之为小人也蒲柳之质衰在老先无复世念久矣先君子既荷主上恩恤而身复偃蹇朝命至于再三惧负幽明勉强一出窃谓留省优暇苟便懒拙而麋性多惊鱼乐难问悔不可言兹因便聊此致候私并成一诗书扇将意非敢自附玉案也贤从光禄墓草虽宿门楣益壮中丞衔冤夜郎幸为致声自爱邹律之嘘当在非远余不及赘

与张司业

山中扶病领大海者两日霍然病良已盖见公本体既自澹然而于人情物理又复条畅虽有应迹而无滞心所以药我者至矣成均之拜固以诸生表仪仰借然何不还公白虎一尺地其于启沃圣心陪赞国是岂浅小耶玉堂诸贤自公外所心仪惟有两定宇耳赵公故是天地间阳明之气所锺今遇所不可即愤愤乞归似发之太早敛之太速邓公坚卧不出奈何此于出世大业甚近且易但以洵仰师弟间答问公案照之觉但得其体未得其用也似俱少公大还一点化耳仆齿颊余生于出处甚细出故无益处亦非高但凿坏一念发自庚辰春仲必不敢渝乞骸疏上想庙廊诸公当见亮也荆老鸡骨支床然有膾德而人悦之响从景附徒足相苦而已春气渐和珍重珍重

弇州续稿卷一百九十二

●钦定四库全书

弇州续稿卷一百九十三

（明）王世贞 撰

○文部

△书牒

石拱辰司马

张肖甫人至致公手札大教若羨弟之处而犹使之与其忧者弟处故自有心盟然亦见时事未可着手且弟面上眉耳世始縻之一官以了彼事弟纵欲有所为宁肯信之欲有所言不羣咻而攻之已幸又宁肯虚心而受之耶前见邸报公复进少司马深为世道喜不敢为公喜也今得来教则隐忧娓娓知公亦不自以为喜矣所谕谒陵之费且百万夫谒陵诚祖宗故事第当时不过费十万金而已何必九倍其数蓟边之练卒二十年矣何以属国之骑旅入而不能支江陵晚途骄恣贪狠而宵人又为之翼而长其伎罪固当然有交结紊乱一律可引也胡至诬之异谋且堂堂天朝而主上所师礼之臣至异谋于国体不少损元气不小壤耶六七少年其修怨者不过快心于一击干进者不过求合于一喜而了无毫髮忠君爱国之念当事之臣虽极调剂支吾而太阿倒持事权傍落将来貂珣之毒与缙绅之祸不知其所底止赵汝师固贤者弟殊不敢信其能任大事所见惟一王元驭能持平识大体虽小伤迫急得慎重如公者夹持之必有可观而病弱又多骨肉之恋似不能出柰何家弟承公与陆与绳推毂之爱此番或不容已但非所以爱之也弟方避徙林居一粥一蔬以了残日而为公所挑不觉堕口舌阿鼻覽毕幸付祝融为慰

又

昨岁见吾丈移疾疏即走一介至滁阳奉讯而文旆已北首矣川途阻修鳞羽莫继虽仰止大雅时时在懷而音尘迥絶不谓有刘长洲之便得奉教札恍佩穆如之风惟是鄙言不足以发令先公潜德而法书丰碣表之燧道何以令信本迴车愧谢愧谢吾丈之

贤所谓北斗以南一人而已渐遶之羽固足仪世而庙堂诸公不为苍生强借何也嫠妇不恤纬吾丈宁能偃然高卧于漳滨竹林间耶若弟昨者一尘启事真所谓骰子选也亦自度其不可出上书力辞已投公交车而会有尼之者盖未几而南床之白简上矣吾丈以正人餽獎则不敢当此曹子以为邪人稍有所不能受耳弟之三起家俱非本意其前两起属台谏尉荐归田以来止是不能拒绝游客园池为家干过有修饬无缘复毁耳声色之好生平泊然今乃无故描写作一韩熙载良可叹也赵选部芳声英英在耳今得暂归与吾丈相磨切不朽之业甚快甚快幸转为弟致声外两疏稿附览后疏垂欲发而徐相公力止之已付之忘言矣欲吾丈少知其梗槩故也弟两少子颇能读其父书前岁举一孙甚颖秀天惠余日跌宕书史翰墨间政恐人妬吾处耳吾丈麟趾亦遂振振否家弟归迁本省小简跋涉之劳物情若此恐亦非久计也承念存并赐札当觅便致之余不一

又

中秋闻吾丈有东门之遘为忽忽废食寝数日高嘉定来得手书知后庭有就馆者期在十月而穆少春札亦云胎气佳以星数推之当举雄则又欣欣喜色见大宅屈指汤饼之宴复逾旬矣弟有三儿大者业差就小者亦似能读父书今损家付之一月不令一见而不能忘情于故友乃尔岂所谓老人十扃耶复又有一扃此身自见废来偶有所证掩耳世途以为林壑之乐不减四禅天至欲拈瓣香谢言路二三君子而时时迹玺书不下漳河傍輒弹指浩叹此非欲以苦事挠吾丈欲得实心坚力如吾丈者居其难而后吾侪得保其易也今天下见为治者形耳如何如何穆兄负经世才而逆辄之不使展然彼之逃于诗也亦甚矣经世是仁者事度世是智者事出世是二地以上事然亦只在一念耳诗偏名术也视酒色差不俗然损道一也昨念吾丈极草草成五言四绝句预贺夫既以薄之而复蹈之得无为穆兄咲乎语云倡优拙则铁剑利吾丈覩其拙而知其不大损于道也晁阳子化事想或闻之其所以化恐未悉也今录上一通欲吾丈知天下有真人有真理幸毋以为痴人寐语也

又

昨刘长洲人至得穆兄所致手札虽与吾丈联姓名云贤器病危甚意不能及书草草数行作报殊更忧之舍弟自覲归云会赵吏部知贤器竟不起为弹指叹诧者累日夕弟自偶有闻证来儿女子之累付之抔沙观久矣今设身处吾丈五内忽若猬刺不知作何法解也吾家夷甫痴语未暇论东门蒙庄亦姑置之但为吾丈宗祀大计则莫若豁哀以葆真节欲以全神时至则行聽其自然勿正勿助长乃第一义也天道有知必不使贤者如吾丈斩焉绝其后时事极矣天下之寶尤当为天下惜之弟百念俱已灰惟觉此身

未即死当倾耳以聆吾丈芳问耳兹因赫司理便附此尺一中有司理公交车中有魏懋
权真天雄一枝桂也

又

前者因令人唤儿子归草草一札附问不意其人道病淹久我公入台之后唐突威
严乃不见责而辱之书且侑以一絶则几杖之赐矣来教娓娓谓不才尚在可收録者未
几而即有留尹之命知公所以培植不佞不浅也不佞生平趺弛无雕飾又不晓事言路
萎致憎口戊寅再辱希复世念会庚辰春孟偶有所证捐家入茅舍饭蔬饮水一裘一葛
以保此半残之躯即吉凶讯问都废人固有咲其愚而悯其能自固者苟冒昧复出将以
我为如何人也昔有使王孙奉橐而进茗者戏以一栗投之即捐橐于地而趣就栗不佞
之不为王孙者几希羣龙满朝岩穴向尽吾丈与二三大老尤自杰然即天下所可言可
为者皆已言之为之如迩者大疏及月林公疏是也即使不佞出亦安能有所加也乞骸
之章必得请而后已久废物外村童无可使者又念损儿曹橐唯公怜之从臾焉麟阳月
林二翁皆旧辱教爱不敢以私渎闻便间希叱名道意不备

又

前时刘长洲人去有报札计已達记室矣道体当益健胜麟儿襁中应自崭然头角
绳绳之喜入熊罴梦者此非其时耶台鼎易铉名为贤喆彙征而殊有不尽然者偶从邸
报见一御史忘其名所上疏以直臣未有为说差强人意记仆在罔寺时江陵虽文深尚
犹表表不谓晚途狼狈至此盖诱之者使昏激之者使伎语有之不伎不求何用不臧又
云涓涓不塞将成江河岂欺我也第入茅庐来絶无所证祇于闲中勘得身世皆幻春仲
一病荏苒几殆亦遂任之幸而自活家弟归旦夕相煦沫差足相老间为世道念湏公与
元驭出磨洗乾坤一遍毋论元驭草土即攀上君子肯许展公十指否此语近亦似伏枥
老骥不知两钝足已卖作僧庐长住物也一咲一咲长洲应召便附此不一不一

又

前者刘长洲之报启甫去而老丈之教札复来盖以豚儿叨忝故喜浸淫于大宅即
不啻如弟自言之也此儿向亦有微锐可以一鬪今强弩之末矣殆如木鸡矣诚不意其
叨忝之若是也弟既犹在世法中不能如我古先生一洗而空之若乃诵大易之盈虚味
老子之宠辱则惛然有余惧矣吾丈何以教我襁中郎君迟于言动故自无碍但令作美
食食乳母佐以粥糜勿遽沾腥味当以渐充强况后庭复兆熊罴之梦所谓老蚌出双珠

德门故事何足疑耶少春大悔欲毁诗梓聪明人易拨如转圜今但秘之可也渠诗故自有气骨孤行之当自美爱不然弟亦何惜糠粃之引耶长洲覲便聊此附谢并布不腆统惟照亮

又

家弟自燕归得我老丈教札慰存勤恳至叵罗与托尚方精醪天子所以锡劳臣者乃亦举以见赐会儿侄及孙凡八人适集举以属之曰异日谁当为石司马公者饮此各奋而争先则无弗沾沃者矣弟自入年来影不出郭门几若虎溪之限遠公而近闻有司之举先君子及朱中丞孰之恤典也仓皇走谒台于阳羨句曲间乃闻已寘之条奏之歎矣先君子之见抑则以高宗伯修新郑之绪论谓徐文贞庇乡戚而中丞之有遗郟于通倭者也咸勒候另议弟之腐心不朽者十七年于今矣幸自台建白发之则当事者可以无桑梓之嫌而被恩者可以洗丐乞之辱但在条陈则于始末不能无畧而先君子南北十年之劳辽左千级之绩或未之及纵无阁寝而沾被未沃人子终天之恨终无以自释矣宗伯公通家之契且与弟有文字知意必不薄恳老丈与崛老从舆之并達于祠部君生死骨肉之惠也情在迫切余不敢赘

又

前月有便附小启及穆太公墓表去计已彻记室矣月之十八日薄暮得亡弟十四日见诀书一纸大槩谓四月初已作死计不意更得百日此番种种恶证俱集力惫气浅甚难支持恐在旦夕且自负有胆决加以学力定力故遂能轻死破恋今日方下此死手工夫宁耐不然遂躁乱不能摄持矣六亲既已无情即见吾兄亦如不见天下虽饥圣主能蠲赈事尚可为唯愿庙堂勿固宠勿近小人勿搜求人过诸君子勿偏见勿立党勿思报复则天下自平矣此外复有二百言多致意故旧语不及私弟时已煎迫若在尼连河中然尚谓其辞理明皙结法迺美冀得数日延也别发儿曹一纸则以是夕街鼓动逝矣痛哉当临絕时呼水洗足匡坐湛然如定如寂了不怖散亦无痛苦念惟此子名行粗立文业粗就诸儿三者已亦崭然头角可靡憾矣独年仅踰夭位不称才且仆叨长十年去土何几乃不死而令此子死也崦嵫余日烟霾眯眼戟然之躯顾影局促生趣尽矣愚兄弟得奉侍长者与元驭相公皆荷深爱不啻骨肉哭死唁生知当为我惻惻也偶因秋省役便敬布腹心得赐一言或诤或赞以为死者不朽幸甚区区俟过万寿节即上书乞骸归治窳窳于先塋之傍且结茅作丙舍朝夕三遗魄预凿容棺之墟以待未审攀上君子能矜此情否三吴亢旱已极赤地千里尧汤之灾未闻接踵司计者何以待之余不能赘

侯舜举方伯

昨张生归草草贽数言为报未既所吐永嘉山海之胜见谢监诗为东南冠而门下方握词坛牛耳九合之余倦而息焉以与二三胜逵跌宕文酒以此上酬天公何快如之仆亦有一圃足畅邑当孔道为客所黜无复生趣今蠖窟一团焦尚复迹之不已旦夕唯有缁衫行滕耳客之佳者曰曹子念其人负奇气工为文词虽须髯戟张如侗父与之谈则醍醐也渠游贵郡为报王大参阳德知已然其意以不登鴈宕不谒二谷公是世界缺陷事唯门下进之初夏未热加饭自爱

又

仆为郎时从故吴中丞峻伯张太仆有功游业已闻公名矣垂二十余年而始于行卷中见所造杂诗若文更以为西京开元间人而又十余年而读公全集乃获尽巨丽之观如渔孟诸而猎云梦也三载前有张山人兔缺如方千自言馆公别业已舍去游金陵今年复来访足加跋如庾玉台手一楫启之则公札也以为果公札耶则公于秣苑称前辈非公札耶抑胡其瑰丽而尔雅也或张山人借以重焉山人恐未易办也虽然无似敢縁此而修咫尺之书以从门下后尘幸收之仆齿虽少于公然蒲柳易衰一切俱谢去于三尺蒲团地了此生耳公负絶世资必当为出世业时不可失也峻伯有子稼澄以诸生称诗大是后来之秀亦闻之否余不具

答刘方伯

世贞自丙子以来含饥抱惭于闾井者四载偶有小证始拟寘此身于轨迹之外而未能庙廊之上收拾陈物猥及衰残顾影自叹不能出应非敢用为名也夙业障成误落雕虫窟中影响见迹俾长小国之赋使从事齐盟苟不爱齿牙流羨即来识者所笑不以为磨昏镜则以为嗜昌歎如其不尔怨亦如之以故塞兑掩耳蜗庐蠖伏寧自絶于贤人长者而令子仲君忽负笈相枉适世贞以先君子事出谒部使者于句曲阳羨半月始得归门者出一敝刺而后知之乃来价复以门下大教隆币与仲君之高篇见辱矣门下海内名家出入中外踰三十年鼎铉步武拂衣高蹈蚁观一世而折节赐推唯是过情之誉所不敢当乃其辞旨之精丽警絶则下走之所忻为执鞭者也冢器玉折岂唯贵门榱栋之痛当为天下惜之仲君方辞璞却湏加琢劂之功不患无陵阳赏识也如开岁春和能嗣前驾则弇中山灵先为除径以待或能少助千虑之一外薄物附忱不具

答丁太仆

仆衰懒杜门与世路隔绝家弟间致大疏一二与左降叙复始末不觉壮气攻中浸淫大宅寻晤汝师宫洗则谓门下躬行君子不为名高其所欲舒吐盖未竟一二而朱嘉定汝虞亦复亶亶且谓门下将俾効不朽之役于王父司马公盖饮泪涔涔沁心腑矣仆故崎■〈山钦〉坎廩人也生不受人知乃独受司马公知于疾风板荡之日有余寄焉迨公养重梓里仆则偃蹇衡门暨强起仕路而公已游僊都宦辙见左无由一酬桥公之墓而叩陵嬪之堂自谓此生无可仰报而使者至将致大教果以神道一碑见委司马公三品大臣天子赐葬而此独阙焉不文事固不偶然也仆于东土所见公担荷三四大事有出于铭状之外者仆虽愚敢不自勉第来谕褒飭过当夫以太山北斗之拟即昌黎得之尚不能无愧色而况仆万万不及者哉洗笔研来已半岁不免复烦墨卿污之且负香火有所不顾矣滁山水永叔伯安二先生啸歌之地并门下而三汛涤意气自见天则区区除目非所以为贤者重也朱令有中牟密县风而上人未尽知想当不惜齿牙余羨伏暑未蠲为道自爱

顾太仆

向者门下请告宅忧梓里之日仅一奉颜色于山观而不克报访又承致令岳士雅先生诗集累帙而不能报谢又以其时有笔札戒不获附不朽于九京罪过种种犹曰岩穴之臞固云霄之所弗深计者乃迩先君子赖羣公恩庇得沾身后而贞匹夫之节不固强出从大夫末则于门下固首当投刺自通负荆请罪者也门下以正直忠厚柄国家之公是者累年而始释之进陪九列步武八座盖不直乡邑之光重而已憇伯罔之堂诵斯臧之句则一纪前有如不佞者在焉特衰劣过时之人无所比数不足以辱大念耳賚疏人便肃此附候寅阳丈不敢轻渎便间希为致声不次

荅李惟贞大叅

仲冬为不肖腐心之辰以故泛一叶为泖中菰芦匿而诸以筐筐见辱者尊则执事亲则吾敬美皆不敢发械诚欲以例他客也公祖犹以此介介将无谓不肖薄之乎罪死罪死子念冒热驰二千里为其故府主称祝走虽为地道借一力于麾下诚贪与公祖相闻耳渠用期迫穷日之力故不及请非敢弃髦长者之惠也得教不以常调为意使长孺闻之积薪之语从咽中下矣然何至大计吏时敢狺狺其吠耶此曹子纵有胸无心当不若是不过一二蔑戾车耳儿子失学放黜其宜岂敢更有希觊贤器比当益大就昨伯玉司马来云与公祖为半日饮每语必先不肖使人鼻端拂拂有金华洞天想家弟似得賚捧役旬后或可趣下风大颺拜嘉并有薄物将侑乞鑒入

又

伏承赐示以袁生所具查应减税粮宿弊及该府复议令不佞看详惟是不佞衰懒乏心计且素不习于钱穀出入之数无以奉酬德音皇恐袁生为民苦心大堪敬服但止是见一边语中间有以别项增派而并入正额者有以此额而那应彼派者有虽增而必不可省者有可省而必不能省者亦有可以通融处置所谓宽一分民受一分之赐者明公须会府县正官细讲一番请之两院将应减之数不论其可否一达户部听其回报其必不可减且有着落者晓谕百姓勿妄希冀不然愚民无知妄谓袁生减粮数十万为三吴造福而上官壅遏之是袁任其德而诸公任其怨也适见庙廊大老亦有书来云云不敢不以闻若乃明公欲定画一之规不使每年议派则革吏弊宽民瘼杜浮言之大端也二册暂留看倘急须当别封上不一

又

仆不佞自郢里之卜夜与岷山之浮白别后輒怛然自失以为奇人难再奇遭难三不谓天假之縁得从宇下忘形尔汝披胆天日盖三年如宿昔焉别后则讯问之信岁无虚季金错之饷械无空筐春初以太夫人之寿言见委恨不知耳知之宁有待教而后具草者芜废之余不能深湛其思俾辞与事洽而明公不遠千里颛使遠谢郑重其辞又绸缪其贶仆即不受伤廉之歉宁无过情之耻乎武昌山水多名胜仆时苦棘事间以诣台纷纭不久量移无缘一极登泝之乐明公风流姿槩胜小子百倍当无复遗憾第资望崇深恐不能久淹耳敝邑望公如望岁岂有意乎仆虽老尚能从儿童竹马后也所喻甘君者并得其书诚奇士也明公称其保持邹司勲事忤柄臣而不悔前偶得一公书云邹入铨无它长唯推穀甘救陶善鍾而已矣陶鍾无足道若以甘咎邹宜甘之复见龔訾也论甘者以驳嗜之小疵而舍其狗义之大节嗟乎世见诚可悯也所报甘书并寿言稿附覽欲知仆之许彼至耳适老妇患风疾憊憊医手仓皇不悉亮之亮之

又

屈指与明公清洋夜别六寒暑矣自是歷三使君有三迁而至九棘列中台者明公仅一转屹然于振衣台之阳岂武昌鱼美足恋耶无乃叶公之好龙非好真龙者也贞以先君子久鬱泉下蒙上恩隆重而召命再临力辞不得攀上君子多相譬说一念不坚遂成小草乃至病弟奄忽竟阻面诀贞何人斯而亦用荆公家故事耶苦痛惭恨不可言昨草具小疏苟且塞白冀竽滥之谓小宽旦夕当乞骸骨耳明公不以一出为非而曲垂獎

餘使人涔涔汗下不能禁柰使君非面是人者当由爱而亡丑耳亡弟遗诗文颇足不死
今为刻其诗将成矣冬尽补刻其文毕当以呈覽请正也大币祇领并有薄侑不宣

张都諫

向者门下以先德之重不遠百里俨然而辱临之虽不敢自爱其丑而值有遠客累
不敢具杯茗为敬盖于今歉焉乃复更劳大海重之以珍餌虽以不恭是惧勉而拜嘉汗
固簌簌下也日苦役役不能事笔研敬闻命矣仲夏之暮当脱稿专人驰上先此附复不
宣

又

向者遠劳尊驾賁惠先塋仅得一踵谢堂下嗣后杜门请告且以病弟拮据汤药至
不能叩明公臙首之北而荐咫尺之书奉送此歉何如迩覩邸报知进补天垣主持国是
海内方拭目以瞻金鉴之上第明良一时百揆时叙无足以当白简者唯时进格心之论
亟采下民之咨务济艰巨毋专直声使圣德愈隆国脉愈永乃鄙情所惓惓耳贞衰劣过
时之人以先子蒙上大恩又不敢累抗朝旨狼狽一出惭悔百端兹因賚疏役便聊伸候
私伏惟鑒亮幸甚

周都諫

世贞不能自削其雕虫之嗜而遽灾木徃徃污人目观又不能修乡里月旦以得罪
贤者即不遂伏斧钺蠖屈草莽息黔之暇间及笔墨聊以送余晷而已不谓门下汰羣訾
而録存之万里命书布以大币俾为尊諫议公寿言悚息不知所裁报惟是海辞行述二
帙古雅絶伦尝鼎一脔足占大烹牛耳之盟是在执事仆所撰造止是苟就来旨组而成
篇譬之佛语未离小乘今具稿呈上即不以覆瓿似未足疥公壁也出处之示知门下悞
我至矣破甑何足复论纵令理之岂堪炊饭食人况蒲柳易衰姜桂犹在未尽之躯得嗣
相闻异日借门下一字华袞为嫌耳薄物侑将下忱不一

又

伏惟明公以花封高第超补諫垣复以青琐名臣遴司铨务一时耸然快覩为清朝
盛事而白简先后传播遠迩类皆謇谔畅练恒傅国体国是不为诡激以徇时趣区区固
心仪之矣惟是荐贤大疏羣材彙征万目耸动而贞之踈狂不肖却为滥竽其间惟且骇

且愧不知所以垂及一载有留尹环赐实皆缘大疏为之张本贞得苟雪前谤复脩朝列固盛惠也亦素心也第蒲柳之质早就凋零樗栎之材不任雕铍加以去春一病淹歷三时今虽稍起神爽颓废中间凿坏之念尚有不可言者乞休小疏上尘台覽实出由衷无毫发虚诞唯冀怜而从臾焉贵科及省台诸老先生以笔札告匱不能徧启仰祈均亮下情无任恳切之至

余德甫

晨报衙而杨中丞之使趋庭谓必有足下书迫扣之不得而家人自吴中者有足下诗札则自西而东又复西而北且五千里矣足下服除忽已三改火耶屈指吾党十余人其不走长安尘者即卧夜台耳独足下矐于山泽词组一事皆带烟霞气真令人艳羨第所覩右文之朝乃寥寥无足下迹则不可华子师贾豎耳当拜公日尚推管幼安吾侪亦安能自恕用晦之念足下深矣即仆与子与不啻也子与方忧台使者而荐疏佳甚明卿亦有内补耗想足下欲闻之扇头一诗寓懷并新刻薄物希麾置之春暖加飡自爱

又

得足下书感慨用壮几不可读二诗一字一泪第使仆息心复小警急置之篋笥他日作一字一珠观耳舍弟初信但云足下有外服今始知为后母太恭人也天乎何以有此始者羈于官不能奉一生刍以叩首先大夫今又恋恋五畝不能买一舴艋作吊客与足下携手匡庐之顶抑何惫也区区叨忝已踰分今幸而遂初服快于弛担优游杜门贤于补劓矣第酒食翰墨本生人趣日见饶不休更成苦海如何如何念足下于文士中最为高行而陵阳之璞今尚未有剖者明卿遂削籍子与仅以长者得免尚在啜嚙间伯玉与家弟尤更籍籍然此亦常理常情无足恠者用晦似欲轻裘访我弇园足下能方舟乎审尔伏雌斗酒主人所不乏也子与尚在广陵年踰耳顺而买花不已皮之不存毛将安傅足下便间徐风之扇头一章不能酬来美聊见情耳余不具

又

昨子与书来云足下仅一入省作两日会而别家弟复谈足下山居时状令人色飞杜门高枕谢絶尘世良快第未知此中所得实际何如耳弟自九月举一孙即为亲友以汤饼相期无日不酒山园石益旧花竹益新暇则泛小艇溪间或入藏经阁抽一编翫朱鱼调赤白鸚鵡足忘老矣所苦者文字之业私心好之而受役不休如责逋赋以此更成业障舍弟方盛年习为吏当婆娑一官佚我于长林豊草而乞休甚坚不可止如何亦湏

足下与子与方伯计之

又

家弟归自覲得足下贖书宛然如奉颜色又亟称足下林居阖门養性偶一入城若威风栖囿相惊指以为希有之瑞亦何必减李元礼陶元亮自于鳞长逝忽已十载当时虽尔惋痛亦不至神伤以此子业就足死故也雪中哭子与还輒忽忽自失念人生有尽行且及之每为人作志铭投笔长叹丈夫何至与地下结緣也春来忽若有警于一切无明造作种种悉拟放下似亦得五六分力矣念足下澹泊成性素自近之輒用此味分献不审肯领畧否近作数章在用晦处足下可取观偶目病而能书者少故也亦觉微露消息念之念之余不具

又

端居多暇时时念兄不忘屈指依稀开七袞而姚匡叔来乃云已举寿觞矣仓皇成五言一长律致华封之祝又春时偶忆前后五子已同夔圃合其存者为申五子篇手録并上计兄得之当呼酒独啖独醺也足下长于弟一纪而神情逾王老蚌之珠其光炯然弟断房室来满四岁矣春时困二竖子殊不得其力唯唤主人翁惶惶易晓耳匡叔与家弟争言足下乡居雅致何必减靖节柴桑靖节攢眉不肯入遠公社兄亦岂其意耶毋论入社与否西方自不无不可于眉眼下放过也冬寒加浚自爱

弇州续稿卷一百九十三

●钦定四库全书

弇州续稿卷一百九十四

（明）王世贞 撰

○文部

△书牋

赵汝师

每得公教札輒喜而不寐精进若此何所不诣弟自误作生计者三十余年临要紧时一句唤不来一字用不着非唯唤不来用不着觉驱遣之尤难瞿生宗门之学甚精第恐更为宗门所牵将草鞋空踏破耳渠必欲往江西大抵江西三处坛场罗稍大胡似高李似实然不过宗门余派耳今以儒道盖之未免遮掩补凑不为朗着故于此子行不劝亦不阻俟勘破后返照此心恢恢故自有余地也弟尚未曾描写上大人将来或得小小实用譬之饥渴时箪食壶浆耳食前方丈恐却有不堪入口者如何所喻乃宇宙间盛事亦是宇宙间新闻但默识之异时自见不足动公方寸五岳也虞卿子无以应命弟子于书原不曾购求止是憑鬻书人见贻故耳公亦不必劳神作此无益事也

又

得教知尚书尺一甚峻不免北首尔时物情辐辏所谓男子张君嗣附之疲欲死者但以恬澹二字应之而已春仲遇闰可于阳月抵都庶免襁褓之苦圣主当阳蒙气尽豁宫府大小屏息奉法足下既以书生抗絳灌以一丝系汉鼎天下公论待而赤帟千钧之弩勿发齷齪智深勇沉所以为大勉旃自爱仆自残岁入春来竖子见陵四大展转无有是处任之而已所需拙文当録出俟春暖可必如约方欲以敬礼玄宴相托岂敢寶其敝帚坐索重享耶

又

城隅分袂河岳方寸归舁艱兀间悔夜谈之卤莽差胜元馭宗伯耳宗伯归与述兄饥渴意渠亦惘惘不胜计于书尺自悉之威风神虬世所景慕词组出口即为月旦小尔举趾便作模楷然在末法中亦有捩人眼鼻者纳污藏垢酝智养勇以期可久可大贤者当自饶之聊致莫助之爱而已拙文塞白意故未已更成一排律并赠吴太史其一牋及扇补附吴者幸为致之君典良友已矣向见兄谈丁丑事令人骨腾而屠令状所不详知别有纪录倘付侍史发下可据而表其隧也向晤徐给事甚佳燕中故人如王师竹太史魏懋权博士相见通为致声他有问及者第云名教外一长物老諄自废何足挂齿长途向暄善自消息不一不一

又

别后再接吴门及途次手札已有传公见朝迁官宫洗三邸报至令人眼明公岂以一官半级为荣正为自此开彙征之路贤者鱼贯而进耳每传除目自八座以至郎吏皆

可人此固执政者能虚心秉公不树桃李荆棘而公与二三君子蓬麻之植不可泯也区区此身此心皆如死灰不但无嘘者即嘘之亦不然矣第恨入春转困蒹轴药饵渐狎无复歇时而笔研之役转深若此縁不断譬如蝇鑽纸窓终无出头理新正便当一切尽扫去之耳先师似于山阴他处微露一消息此大可慰荆老柴瘠良甚而哀思不已酬酢转详物望既厯将来恐碍蒲团大事雨亭先生一月三转知为公力亦差足为贤者吐气第此卧苟不坚似公于波罗渡口挽转之也如何如何秋气开美为恬澹二字留神不一

又

腊月内连得公手教具起居之详且知仆两信皆已達又于荆老处谗公所述时事多可叹可恨野人幸脱世网岂敢复预闻况年来姓名可更堕长安城作齿吻间物耶唯是野人芹曝有不容已于公者公是千古伟男子满胸臆皆浩然之气刚肠疾恶遇事輒发贤于我曹栖栖碌碌虱处禪中者固百倍矣第不当小而用之轻而出之夫亦有以如来法号告者乎释迦者能仁也牟尼者寂默也盖惟寂默而后显能仁之用也无已则有请告暂归乎凤凰翔于千仞兮揽德辉而下之在公犹绰绰余裕也仆行年五十九名为弃家而实未能尽当为龐居士马宜甫咲杀幸宿病良已而顽健胜于旧时献岁即闭关谢絶一切酬酢亦不敢领笔研役而旧逋尚不少湏至初夏乃可洗尽也邢子愿欲刻鄙集已力辞之大抵利根自可湏臾名根着力一铲削耳瞿汝立来云有北使附此不一不一

又

昨苍头唤游子有数行奉叩起居计已達矣兹辱手教满帋具仞向道之坚与忧时之切所谓并行不悖者仆自残岁来三改火病羸憊憊秋中参术始见功肌体渐腴神气亦王但苦笔札役未已一入新正必于上真前作誓断絶之矣不然终为一窝墨滓淹杀无了期也昨因病检出数年来诗文一百余卷掌故杂事七十余卷冬邸可就绪异日当露丑于公求公一序幸毋相负也第此一念如迦叶舞恐终堕绮语障柰何柰何承示交游中新得邹谏议且日与徐驾部周旋此大足为丽泽益邹公负中外望太重一时公卿当惕息自勉无可以当白简者万一宫府微有不同■〈执上目下〉御少尔违节轻为论建偶致逆鳞羣公不免纷纭又增一番事矣湏公不憚斟酌务全国体乃佳徐君向托草其尊人志铭而未见状来非仆敢宿诺也元驭忧毁之余为物情所膾悦吊者不已病亦无已新妇复遘疾俄顷便逝见元驭羸状骇惋不可言公别帋劝驾之意良笃仆谓出世经世皆赖此身吾侪小人不知其它唯以身为急耳近来除目种种可观孙选部诚名士似得公力不浅儿子流落京邸使凿坏之人尚碍眼耳可恨可恨今闻已归差足慰矣

张肖甫便附此不一不一

又

新岁三日会瞿汝立云吾丈复动归念有北人便即手作数行附之计已達矣汝立去之旬日而见邸报则复庵宫允为吾丈上请告疏盖甫奉讲筵之命而即杜门何丈之勇于去也近事诚所不快然宫府之与言路两皆有以取之亦各有未是处大抵三代而后不必事事皆当意人人皆可观亦只是小小补贴耳除目屡下田野宿物收且尽而次及于仆齿舌之余即不出岂足为高吾丈视仆生平亦岂泊然无宦情者第嚼■（虫葛）之味觉于戊寅凿坏之誓坚于庚辰今虽上负赐环下负推毂有所不容已也疏不称病而称乞骸盖欲避调理之说断将来宦路吾丈念之念之计此时当已在道而未见部覆将无政府不自安强尼此行以为廊庙重耶

又

丁侍御迎家人至接手教及仆出处云二三君子意以为似不宜轻动张肖甫司马虽娓娓劝驾而微旨畧如吾丈汪伯玉司马有书亦尔乃知豪杰之见骨肉之爱与世情故絕不同也仆实未暇于中较量只为庚辰心盟必不敢负而已若宗伯公故当别论此公出果能行义達道酬世抚物当亦为上真所许不然自当急流勇退尚未至老所虞病不任耳仆于外迹差近而心境未清杂念时起且世福转深则道緣转浅虚名日甚则实德日损以此恐恐不敢恋桑榆之晷期之隔生或易为力耳迹来处分多出圣断不旁落大是佳境第某人消息若何乡袞得自安否吾丈所称近况与物情反侧之故大抵当坦然待之惟月旦小加斟酌枢机时一检慎可也初与宗伯计以留院相期不谓属之贵宗亦似稳延陵既特迁峻陪而吾丈仍故绂何也见补少常则孙太夫人果物故矣家弟尚未覩除目渠似无可无不可台懿武定氏而宰公中丞不以为非则祸似不易解吾丈可作培植语勿有所加也不然彼之疑忿转深而于先师谈过之戒小成抵牾矣瞿元立第三弟复文懿一何陵夷至此耶可叹可叹闻有使命疏到日当不及为仆借言然使仆至三疏则苦矣余俟面悉

又

昨草草数行附使者以谢计行期当在月朔儿子出送荆老属其少湏于郡以图一饯仆身滞环堵而心摇摇挂故人青雀间迹荆老告别作大啼仆虽勉自制收泪胸臆终不能忍盖自爱弟入闽后二三故知抟扶殆尽岩穴中仅一硕果形影相吊衰相渐现恐

不能待诸贤功成之日却笑安石老諄强以丝竹消之计惟有空王一法而已公欲消摇留署为六月之息亦佳仆意不欲太原公有所措置且亲近公与洪阳及收召邓先生輩布列有位而已邓似未肯公便间一舆之何如水利一策尤长塞外不唯可实邊庾亦足制牧马但湏因地利顺民便如世尊所喻调弦之说乃不生变第目前欲捐数十万金作母而缓收其子于数年后恐司农眼孔不易入也昨岁收独常熟昆山俭而吴江次之吾州与嘉定似小舒但积侵之后菜色犹未复耳此事抚按可以调停要湏庙廊作主大抵蠲赦利于顽猾而柔良不沾賑恤偏于小豪而单赤鲜与一日不可无良有司如嘉定令数十曹江南膏血当不媵尽偶为贤者一及之勿复谓朽株尤有火气也扇头诗亦小见微意而衰落之余都不成语衣物至微尠宁足报伸侨札之好耳钱氏墓表已脱稿幸为转致侍御君不一

又

家弟归得手教及询之家弟云云亦相同抔沙作饼势无复合但终不至犯名义而显为摧挫南雍一块土似足藏身仆岂敢作攀上解淡生活沾沾充隐弟实无能用我者近遇一异人传持颇有小验甘老邱壑以俟师期足矣瞿元立得补台幕即资虽小屈而体面差佳但不堪桂玉知何文举生珠之贺不胜安仁悼亡之戚想得公依止不至损耳杨户部应尾忠愍公之子当洒扫公门幸一慰藉之儿子懒废得公与沈宗伯相为警策可望焚舟之举仆却不敢别有希冀也族子養志老而贫以一簿为蹄涔附此信不悉

又

家弟归拜手教具切念存仆蜗涎自濡蚓壤粗具于世縁鲜所干涉独先君子身后一事为忌人所抑腐心者十七年于今矣曾有疏草托太原公而会家弟北首属令上之乃云得所闻俟仆勉出而后成上仆不胜愤懣叹曰此所谓马生角乌头白也儿子曾举老丈教必湏抚按或台谏建白乃可私心甚然之其道无繇也长至后故朱中丞诸孙出燕中闾郡缙绅与兵道书见示中间为中丞阐发幽潜恳恻悲壮之极云自吾丈手笔且谓抚公已行郡核矣仓皇与家弟谋以抚公为朱中丞请而不为先君子请同事同乡一举一置人其谓何弟复何颜焉请恩泽亦何辞见逝者地下旋走谒抚公句曲则郡并以先君子报而按君条陈之草具幸皆在列矣谓太原公再及之念此事在宗伯宗伯有通家分谊且素辱文字知必不作前人忍既出台谏公议如吾丈向拟事体亦较稳愜第条陈列款势不能详加以年祀向远见闻稍异各曹之于政府不甚关白非吾丈慷慨一言之谁为援者中丞尚未复官今始得复则已复官者自应获赠亦事理之常太宰处不免借重大司马矣按君痼瘵民瘼诵吾丈大疏嘖嘖感叹条陈中二款实縁吾丈意为之尚

惧司农之扞格也献岁闻当上会典例有宫端之擢不然亦光学被金紫凤凰台一片地知雅意在揽辉恐不能相俛而下也瞿汝立前闻病阻良用悬懷覩除目殊慰此官比之二部掾却有生色艾光禄何以不召亦必用故事相尾耶吾乡延陵有子不他聘其恨转深盖以东土之抨全出吾丈又谓二三君子转目之云退婚自渠故耳渠俟大察后拟北上欲作官不至放对吾丈第以静默待之可也儿子承规切明春始得一意笔研次儿托庇所苦良已残岁复为幼儿了尚平之累可作无事人矣余不具

又

儿子在都再书具感肺腑之爱及归极称公气谊识畧以为生平日中无两但欲举世法之所艶者以加诸凿坏不能出之人复举世情之所最忌者以錡樗朽无用之物则非知我爱我之意耳生平屈指故人元馭爱我而不甚知肖甫知我而不能尽公之见知太过见爱太深是不特粉黛土木且将文绣牲牺矣年来齿落无一二存者衰相屡现即使腠颜苟出不特上负师真下愧同志公试观朝贤若此时事若此仆之墙壁若此而能有所谓剂得乎欲因而有所见且为县官作纈毫益得乎万勿齿及仆也主上诚不世出之主迩来作用大似世庙乙未以前光彩而恤民一念又似胜之灾异种种正是天心仁爱惟闻有可忧者腐肠之药与伐性之斧耳昨见荣转宫庶遂领坊事六典载笔成周之史佚白虎横经元佑之正叔公但雍容步武以俟天人之合五岳小起方寸即以吾师恬澹二字消之则所深望于故人也水田之说向见徐孺东极称其利仆亦深以为然但思二百年来岂无一人识如孺东者中间必自有故故不甚从舆之将来能竟其用否瞿元立有子大可喜见间幸为致声家弟承诸公雅意得一南除庶不以棘刺中打筋斗也区区续集将二百卷在肖甫处鱼豕之讹不胜讎校将来不免求椽笔一叙之亦名根未铲之证也肖甫博大自是一巨公迩来能自持正即有齟齬何害然湏頼公时时警策以善其后汪伯玉近相过数日罗汝芳周思久二先生一饭而别其来歴不同皆异人也余不敢赘

又

儿子归得公手札具肺腑语随作一报封肖甫司马邮中致之计当已彻覽矣是时儿子言公极称于所知谓仆尚可一割故哓哓数语殊自悔之牝鸡岂亦堪牺而故断其尾乎一笑来谕谓姑与无町畦任其处分要归洁己此是野人芹曝由来所献纯甫此官便是吏隐于中少得恬澹趣岂受彼牢笼若尔瞻即日请假觉少揆人眼鼻善类皇皇如摇旌矣公所云瞿元立云云仆近来觉得机轴若此元立但勿于格外作念立足干处彼不得而亲踈有何不佳文章一小技于道未为尊少陵亦自言之何况我輩向亦偶为此

曹子鸣其不平耳管君近益精心佛门然好作有为迹得非苏晋逃禅意耶家弟以赍捧之役五日后可到矣冒酷暑驱驰七千里宁无殷深源周子南之叹目下且欣聚首以浊酒浇其磊块而已承有令子舍之戚尤非旅邸所堪不能奉慰聊此草复不宣

又

前有小启附使者去计已達矣得太原公近书于吾丈甚注存以仅余一直臣硕果不食不当更令南此当是真际语耳吾丈见示语甚适宜于此要见大学力家弟冒暑驱驰赍捧私心怜之欲为求一留司以稍弛担且不捩长安眉眼仗吾丈大力今果得之其感慰当何如也仆学道无得衰懒相籍仅成一酒食汉浮沉里社不敢作应世想亦不敢作出世想而昨传圣问及贱姓名者此何所自幸三四大老寬我一壑中长物不至劳齿頰也言路汹汹得小定否瞿元立竟不能小示超格耳缓既有味卑散亦有味但桂玉可虞耳孙齐之两儿峥嵘足慰贫病余不敢悉

又

迺有两信通候计久已達矣仆残人也初度之日方寸若螫惧客见踪故买一舴艋避之泖湖塔中礼佛饭僧冀小资冥福而已何足以当长者贺且縻丝文犀岂木客山都所宜濫耶来谕知且委蛇史局即不作柱下玄同于长沙太息少忍嗔间此是下情由来所愿八俊之说向亦微闻之今了然矣当事者不欲用公言然不能不用公意也与其激而使恶孰若引而之善虽然独行遇雨若濡有愠此甚不易也高帝在天之灵使此曹之终为吕强懷恩则善矣太原以友于之戚迫欲归而不得今作何状公了不及之天下贤者宁复有几彼此为宗社苍生勿以议论小矛盾使宵人得投间也君实与子瞻晚好几不终千载遗恨肖甫大度长者近见启事微抵牾得非持正之效耶仆老矣灰且冷矣而犹有习气在妄谓时贤语及气节则蚁奔而附稍涉理学则鱼贯而上独文苑一途转更鬱塞公大将也与肖甫方在柄忍不为小立赤帟耶家弟滞闽颇苦折腰少年前仆谓入长安中亦焉能免折腰也但二十八年科第稍可悯耳来币附璧却有野人之芹知不以为美或不忍拒也春气渐和为道自爱

又

自吾丈别后感事懷贤之念时时触中特以尊迹未定远信难托牢慄之思又无可告语者仅能于元立子澄处一相问慰耳吾丈途中有一札与太原公语多右二子渠颇不怪吾丈入朝后一书见及云宫洗比见貌和而气平但胸中尚有二子在更后一书释

然矣二子山陵以前未必非羣然而攻之者未必是今圣见已定国是已昭诸老在政第当以虚心受人语实心处天下事不为利害谋不作人我相太平未有不可致者吾丈尤不必轻及予告请南信心而行中立不倚此所望于大贤君子也闻太原请假想亦为山陵一事劳愤致伤今复得仲氏讷恐不任手足之痛奈何肖甫丈豁達大度入领兵柄宗社福也唯要于情字上小破除耳仆少能进匕箸而齿落殆尽衰相种种与死为邻唯不畏死差与人异大师信益杳然方以悬弧之日避客栖柳湖塔院供佛之余与僧共噉风雨萧条景物晚莫所喜以故人问若貂■〈衤詹〉■〈衤俞〉不圻而暖却附复不次

又

久不闻问良用悬懷两台为先君子及秋崖中丞条请恩恤前是一介以咫尺之书奉恳计已達矣太原公曾为致情于台使者故托之今尚未有定论想部中为册立午朝二事微左又考察自陈纷紜旁午故未暇及第人子区区之情真以日为岁耳得北考察报甚寬将无调停之说行两相持而交馁耶令人慙慙觉得南中差有耳眼野人不应作此寻闹语当咋指自怨太原公近札云公所上疏虽忤旨密致书于两台令寻公微指从容行之不意公不知翻以为恠所谓恠者必非亲得之小一辨明何如此公与公本生死契鄙意殊不忍贤者之自为敌也仆今年六十有二赖小得将牢力粗坚色身以俟师期诚不愿复涂抹也闻大司马之去复繇中贵人清时有此可叹可叹适归熙甫先生次子北上索数行先容渠中讎见法仆苦为雪之今事解而家破矣弹铗悲歌中多伏枥语以公谊人且好熙甫祈一闻之余不悉

又

前出候病弟于奔牛见之则首问吾丈起居云八月九月间霜露之恙来病君子不能从事笔研不然先人垄头一章当不讓景宋矣然今已勿药今拜翰教果然且谗知直温寬栗之诲能使诸生肃然而心服二百年宋李复见今日窃谓省院大小南北径庭何啻倍蓰独南雍之重逾于北雍人材固尔也仆老矣衰与懒乘之学道虽无所成然窃聆希夷澹泊之旨实不敢以天下事措懷况病弟婆娑据梧老妇呻吟待尽袁氏之女又只旦夕矣方拮据医药之不遑而能弃之出乎老丈盖信仆之可而不能信仆之不可仆于此月之十九日已发疏乞骸必不得请当谋再上非不知上恩不可负知己不忍违且贪与贤者少日周旋恐有所未能也凌氏自貽之戚然爱子就逮羣获见法亦足以泄众怒矣叅疏得无乃过乎又不知将来作何结束也使旋聊此附复不次

又

昨者草次附申区区出处鄙见而我老丈以大义见裁必欲使之一出盖先君子受上恩至深厚而家弟近复以病乞身仆更偃蹇朝命以自为名罪何所逃老丈责我是也且甲申之滥竽老丈有力焉然以为未可出今者以为不可不出老丈岂宛曲随人作圆方者且病弟大有起色矣仆亦何辞以贪一壑第衰态如此安能强自振刷以小补国家苟冒昧尸禄异日狼狈而归老丈怜之晚矣捧袂之期或在春晚也别谕六生事缘袁之长子诚可怜他不尽尔且所犯题剧不小台纲凜然岂可以儿戏望之仆固已测老丈之惠不克终亦不愿老丈之终此惠也凌氏有三尺可无复言矣使旋此附复不次

邓太史汝德

前于许敬庵京兆处拜先生手教匆匆未及作答旋闻有经筵之召私与太原公往复三四意必欲先生一出以光圣朝倘念太夫人高年不欲远离或朝叅应酬有妨静摄则留都玉堂小可栖托不谓中途复上请告之章艤首遂南确乎不拔真初九潜龙也第方天下文明之际或可少一见乎泐仰师弟所论得用不得体得体不得用先生是大乘菩萨不宜入辟支佛果仆以亡弟之痛旦夕归矣而为此言先生将无咲其不情也同年刘同野子便附此不一

吴太史

世贞懒废僻处蜗庐每公过吾州即拜尊刺之辱知而仓皇追迹至河浒则云帆缥缈于清洋玉山之间虽从者不忍题凤仆宁无赧颜君子之至于斯也圣主不憚罪己手诏起二龙渊潜复返论思之职千载一时甚休甚休惟是贤者咳唾之余天下以为口实所望一立善类赤帟而已么■〈麻外骨内〉琐屑似不足以烦方寸也仆故名教外长物舍身之未能苟以藏拙便懒百念灰冷惟懷贤耿耿未尽忘窃成一排律赠公与定宇太史书之扇头及不腆即附定宇致之知不麾弃幸毋以示人可也勉■〈施，冉代也〉自爱不一不一

徐宫谕

曩时公自山中北上而贞以匏系斗室不获闻问遂致阙焉无一介之使今春乞骸请告两有苍头此行此心望公如望日而病废之人不敢徧作朝贤书问有所挂漏则生得失以故益自沮而公不我弃也惠之教言副之武録则奚啻几杖之见媿矣公瑰奇之文冲夷之度清孤之操所谓材则榘杞德则金玉而能黯然而不露太音希声其在兹乎破

山之劔轻用之而光夺锋挫者何足与议此也区区已老而且有凿坏盟乞骸之不得故移而请告非敢复有他觊也旦夕转徙长林丛薄中为七尺之坎以待耳兹因学海太史便附此社稷苍生之躯唯自爱不一

冯开之太史

前有一书附果上人去縁果欲收月溪讲师之骨而瘞之为数行先容计已達矣同州王老来却得先生教言欲于秋凉访我海上村中紫葵白茄所不乏独仆虽习葱岭家言尚是门外汉不足与先生棒喝相持第二儿子驢虽稚似窥见一斑其时幸与達观禅伯偕一勘之也王老志乃可志耳此公少时好摄生无所得始游五台从苦行妙峰比邱讲而又无所得慕昙阳师之迹而过江又无所得以西方为三十六最后策然已老且好酒不耐枯淡湏大善智警策之作隔世縁可也敝城有海寧寺者其正殿一佛二菩萨像端严妙好为江左第一而殿久圯势且及像果上人之师明因者慨然欲葺理仆亦勉力为助之资且半而不能继不敢妄损先生橐欲借一言之重于里中好善者即无异大檀越也屠长卿遂杳然无复迹尚不至作善星比邱先生能以白牛车唤转之乎不次

弇州续稿卷一百九十四

●钦定四库全书

弇州续稿卷一百九十五

（明）王世贞 撰

○文部

△书牋

王胤昌

下走负蹶弛之性乏乡曲之誉既不能曲意以事诸言路贵人又不能早自引退以来兹憎口执政见怜不褫其服俾存一线需次乡井为愿满矣为分足矣海内士大夫即不以媚白简而无下石则有之未有能见惜者也即见惜者有之未有能排狂澜树赤帜为下走一鸣不平者也毋论他人不能即下走亦不能也何者转饭既窥明洁非易与嫂

并处表介寔难且令下流之士哓哓自洗人不寔之不听则以为不自量作复出地而已
诚不意庙廊之上持天下万世是非之柄如执事者而为我致辨也执事之文天下万世
诵之执事所持是非之柄天下万世信之凡下走所欲言者执事已言之而又何足寔笔
舌也虽然执事知己也知己而不为尽谁当尽者且事本末未易明也下走砉砉一介之
操亦未易述也当严氏炙手时其意亦以为仆足罗者盖数近而数远之终不能罗我而
会故人杨仲芳当论报密使人告急且有托孤之语是时家君方踟躕边寄念欲显救之
则不敢阴为之则不能而座主王太常称严氏客亟往与谋因为隐以讽之而不见听寻
仲芳受祸之次日只鸡斗酒饮泣致奠稍损橐装津遣嫠弱严氏后微闻之意不乐然仅
令铨曹勿与司铎而已至大计吏尚未议逐也又二年而先君以疆场之议见谗又二年
而先君以疆场之事见祸此为下走激也者抑非激也激则下走尚不能称人何论一官
哉奉讳之际转踊绝食自分必死偶不死耳归侍老母抚弱弟以处苦块至于禫服不茹
荤不入内不踰丧幕此乡党三尺童子所知者当是时自谓戴盆何以望天故虽公除之
后葛巾布袍直履陶器自吊丧问疾之外不敢预一切庆贺礼不敢领公府尺帛不敢与
宴会何况音乐晨起辄读佛书以果归因用空灭现稍足自支至于养生之书亦绝不置
览明非本趣也磊块之极不能不付之酒取其沉昏毋所知觉而已歎宵牛饮当自有人
第非下走耳下走之废弃者十年然国家之所僇辱严氏既稍足当而先君用伏阙之章
见雪复还故官得从改葬奈何责下走以讎国也下走固不敢为矫矫然自弱冠登朝绝
不覩狎邪面家守先训大小千指无一晓音律者年近三十无子先君为置二媵连举三
子其媵一死一存存者亦且老矣唯生平好诸书名画古坟典之类即废箸鬻衣有所不
顾近置一圃颇有泉石台榭花竹之类足以区遣余日即使其人举以督过下走不能从
也夫人各行见而已其所以毛摘下走则非其责下走以出处则何敢尽废下走岂吓腐
鼠恋恋一官者往时所以不能坚凿坏之节有二其一天子雪先君而后用下走且一时
公卿故人所从臾谊不敢已诺而自遂其二则欲有所效于先君未已也然令下走服官
仆仆刀笔于朝事民瘼小见寸补则犹可勉而就寝食不然而令之佩玉衣锦夷犹夏旃
之表鸣驺坐舆偃蹇吏民之上人虽不言能不内媿于志乎虞仲翔有云死以青蝇为吊
客即一人知我者不恨今有执事一人在夫复何言自今而往已矣靡所不杜口矣舍弟
行聊此附闻并往拙刻请正縁方删易未为成书秋末当别上一部也清朝簪笔映照远
迹加飡自爱倘因北风复惠德音

又

丁丑夏拜公手教及所为仆辨诬书至秋中而家弟有赍捧役谨附报启一通并拙
集上之归诘所往则云公赐沐归信阳矣其书与集留之赵定宇太史竟不知其为洪乔
浮沉否也贞不能自固匹夫之节强出供人齿牙需次里居一丘一壑游戏子墨之林足

以老矣无端为尺一所驱恳辞之疏至公交车而被阻方在踟躅间二白简复见齧矣虽慈母如公能亦无三至之疑乎第贞所愧迹者一出所愧心者园池饮食图籍之类耳此外不敢有毫发负横山烈妇録始得见全文公一片惻怛慷慨心乃尔第令仆视此妇却不免汗颜也学圃蘩苏旧得抄本于确山令颇有鱼豕之误今刻本甚佳且有玄晏之序昏为贵矣梅竹二古迹清絶楚楚九友斋增岁寒之益休汝诸客得无少寂寥乎有梅谷一卷吾吴前辈名笔也不足以酬来雅聊见缟素之重耳见谕得拙集若是近岁增校者不敢再上有新刻二种附覽辱委乔峰亭记欲留去人五日而授之渠不能待当更觅便专纳也木天之地待公气色太夫人不可以板舆侍乎幸疾其驱以慰物情不一

又

贞业以擲身方外七尺团焦作夜郎王国青云故人不能在臆独我公大雅醉心之久间一二怦怦憧憧而里人金生归称与公比邻得数奉教云公且用使事于春仲渡江访僊迹因而过我无何曾将军至其言亦合审尔则云窝苍苔甘心破长者辙矣老僧纵得半月忙无不可将军鬓发渥颜犹能开五石弧虽舌底莲花纵横而语及经世鼻息哂然不能无动意第才大非世人所能用也仆生平不晓谈兵雕虫之技乃是多生业障填人齿牙未满今方掩耳之不暇而将军必欲餽蛾眉于混沌使之倚门可咲亦可畏也将军诚感公重公高谊薄云天厚德闻■〈宀禹〉宙幸解我二人缚放之清冷岂不快哉时事转眼倏忽万变不知者以为变知者以为常耳计当不满大智识一笑也献岁加飡自爱

又

贞自凿坏来弇山片石久不沾异人迹而明公俨然临之音徽恬雅清畅真秋月春风草木所被蔼然生色惜廻风云旗言别恍忽不能少留日夕耳得教知以水涩改陆车马风尘不无跋履之苦抵家侍太夫人寝膳当自调适第时事颇佳不宜濡迟命驾以渴馆阁诸公之臆损贖诸刻具谗大雅文字故不凡独未拜二姑山记梓耳如贞向草乔峰亭记琯鏤鎖屑久而更愧之何足厕公亭壁别昏见谕捧诵不胜酸鼻以公风木之思若彼肺腑之爱若此即贞虽不文敢不勉强握觚翰以从事第入春夏善病病得之思虑多拟于来岁初一日焚笔研残冬先谢竿尺若公具行实以秋冬间附来当一一如命慎勿顛介布币也曾将军能不出否必出无为倒屣者且或有意外幸止之秋风渐凉为道自爱

又

屈指与公把袂时恰周岁矣腊尽而使者果至以手教大币介令先公之状来何孝诚笃恳若是也司马子长于李将军盖慨然深悲其不遇矣故于所著传描寫委曲殆尽千载之下犹使人立发酸鼻仆之托契门下宁后少卿先明威之视李将军竒数则过之矣虽李将军有阴祸而先明威世世有阴德宜其子孙之显陋相辽迥也鄙文不能当子长万一公试读之或亦能令逝者不骨耳弟自别公即善病病至八月而解委顿一榻栩栩如蝴蝶今则顽健胜故矣独苦身意俱不能净笔研之役仆仆无道时不获已誓之佛前新岁从断絶耳邓先生大乘法器也公所赠诗相结为世外縁固善弟东方曼倩不陆沈金马耶仆于和韵非所能辱见命不敢不勉为之殊愧形秽又忆得昨有诸子篇并书一扇头附覽区区此念欲于名根力铲削然一札二百言终始不离名如何如何不满犹龙公一诧也复陶拜嘉币仪却纳并有经刻土布之类附遠意照入不次

又

两月来见邸报有居忧信窃意已之朝矣而今乃未之朝也则日侍太夫人汤药躬含敛附于棺者勿之有悔焉矣公真孝子哉仆荷公国士之知于先将军有通家子弟谊窃欲持三寸管而效不朽之微劳于竹素顾其辞曼弱不成语方且愧之而使者以手教至过相挹谢若真可相藉而重者是益仆愧也区区之视太夫人与先将军等岂敢独有所靳公之不忍破仆戒也则鲍子矣元馭宗伯方一切谢絶而于公所恳则似有许色仆当时时为从舆之必不至误大事于其时窃亦欲托片言于絮酒之末而今则未能也庙廊访旧猥及不肖萧艾之微岂敢与国香并席以故力辞而守此丘壑然实不负庚辰初念耳乃公以先公未究之典为言则无所逃罪第所以为地下痛心者区区忠勲为权臣所抑屈向既白之幸而获雪则亦可以藉手地下矣仆发且种种苟得所谓未究之典而亟归则是以一出徼恩也出而所可建白者为何所可禰塞者为何恩益深颜益腴位益高遣益重将何以藉手先师也旦夕惟有转徙深僻蔬食水饮为容棺之墟以待耳近来料理拙文数年内所涂抹不下于旧大槩绮语障深不忍付之秦火无以应命先师传板在荆老处亦模糊惟云间新刻完好而案头适已尽却后可觅寄也大觐祇领薄奠附之来使殊为不虔伏冀情亮

又

七月初有信至张助甫中丞因附咫尺之书侑以不腆不知无浮沉否遠辱使将手教两帙中具尘冕之抱与栖壑岩之致令人爽然读二记毋论其文辞巨丽而已乃其感慨蓄育陶洗超脱而又不为吊诡此秋林之根柢物好之针砭也所示馆阁诸公借老丈

为仪羽移书侣道有司劝驾而公益坚考盘远追誓墓今世路清夷贤者彙进必使巢由
奋庸固似违性若夔龙在野恐有任其责者公似未得高枕而卧也闻木天之地不无吁
咈君子为敌隐忧未浅以公长者稍为调停之亦可龙蛇卷舒故自易耳仆因师期转踪
汨没七载茫未覩效迺始遣一异人所传殊为易简即此法治耳疾神于社公之酒多矣
不敢自私聊以奉荐无碍上人从管登之结夏天池未久徃之南海欲追焚师故事仆谓
逵磨既东来二祖不西徃且入番之路蜀与凉而已海舶多暹罗占城去天竺殊杳然此
师良为失计取其一念而已登之迹远公之西方而心子牟之魏阙公之不来是也随其
心净佛土净如何所教证种种何必染削经行然后穠苾葛哉画十六应真并古铜缶陶
盃皆清閤阁中品但仆一褐随身虚长者之惠如何所谓有此异物必择异人归之可也
秋深珍重珍重

又

昨公以出处深致见询切谓公考盘之操甚坚乘轩之愿甚薄而于大谊未甚当且
今台垣三大老视公輩行不为前坊馆诸贤则瞠乎后矣而鼎贵至紵金紫下者亦银绯
即公出而以一青衫立龙尾侍臣之末即不出而使巨材宿学高节正议之士卧箕而洗
颍恐俱非夔龙之席之所安也今得教果然矣车既脂矣马亦秣矣苟公以经世之蓄应
世何官不可居以出世之学应世何官为我累满盈之戒是犹龙公学问犹未是西竺古
先生学问承念及先君子葬祭其疏自两台使而成之宗伯但宗伯许为移铨曹议赠有
成言矣而忽中变疑亦贵乡一二老阻之顾圣主之恩不为薄矣长夏有事先陇少露宠
光便于傍凿一容棺之穴下见逝者不至大媿足矣足矣公拳拳见询喻君乃楚之常德
人其传甚的而证甚奇第令真气一至自然为我周流如轮王七寶若后所云云未之敢
信也渠曾云有病耳者从自获聪公能誓不传人后当密以相告亦不必问此君也北上
之序俟小闲具草今则未暇也富贵两字中人如膏肓愚侮人若牵傀儡何至今日公始
恨之惜之乎强食自爱余不悉

又

每从邸报问吾丈除目不得不知文星之尚在角亢也使者冒毒暑水陆二千里至
则其一病矣俾就肆便汤药已而出棧则大海与诸刻种种具列令人心目一醒前后三
记博雅絶伦老丈之爱石虽与李贽皇牛奇章同而所以用其爱者异彼特以强有力致
之耳石如有灵其沾沾于老丈当不啻胜二公也缺陷说勘破物理三列传尤见高谊以
老丈所不足者岂仆一卮语而见需若此年来甚苦雕虫之技受役于人刺促无休息时
弟义不容已不免拈笔草数百言既成而读之都不知作何状今録稿上如不以覆瓿者

当画乌丝于蠶纸书小行致之燕邸也张阳和太史一入凤池便优转銮坡不俟秩满必以此例待老丈此语度不满高明一噓然亦恒人之情耳仆受常德喻布衣诀誓不妄传人昨祇为家弟病佛前懺罪书与之仍勒彼勿泄今为吾丈不免又破戒矣万勿轻泄为仆下地域种也至祝至祝两芝杯拜祝与三儿逌酌蓊门薏苡酒便是覩芝字余不一

又

献岁以来娄从邸报知门下超佐成均峻长坊局兼清武黄儒者之荣甚矣要之凤皇池汪濊恩波终不足以溷箕颍一派清冷也贞自昨冬叨玷除目上书乞骸未蒙见亮当时朝野知故咸谓先君子拜地下之锡非常若更偃蹇朝命以自为名非臣子之道勉一出悔吝百绪加以饿莩蒿目隐忧刺衷病弟尚在邁轴残荆宛转床第寝食之间无一不是处以故于天上故人非不欲通咫尺之间而惭沮次且忽忽更若遗忘乃更承不鄙惠以德音中间字字肺腑言言金石贞何人斯而敢当此向诵大疏草于鄙心甚合迟之十余年而后得上既上而所亟行者景庙实录而已建文之光复诚不易然终是万古不可磨灭之论是疏也始基之矣故当有知音者张阳和宫谕未论出世与否要是大经世人县首衰门之嗟威明絶锷之痛岂惟一家一人之私也门下谓其噉粥少而肌渐削未几物故乃云近所感恙亦畧似之以为忧此君骨耸而太枯神短而多役是以不免门下气清质厚心坦思裕故是句曲华山中人也何忧之有向所传喻君法虽于闻根未必效要足小康或公行之未合作耳二室诸记诗便是山史董狐从姑附庸既蒙胙土少室从盟复得狎主何幸如之仆老来始获一寓目三山二水小有题咏惜其晚合所谓不及檀郎年少时也非久当遂初服并以请教不一

又

世贞方请告杜门与客茅生者谈茅生故尝习老丈仆谓当今冲雅如黄叔度退讓如羊巨平渊博如杜征南文采如陆平原者老丈一人而已茅生为咨嗟叹赏久之盖质明而老丈之平头以书至矣契合一何神也老丈书凡二通申契阔则怅河山之隔悽然不能奋飞叙雅寄则动箕颍之思快然若披云雾至于流悼亡弟载读些言使人一字一泪也肠寸寸折矣亡弟器业粗就名闻粗章有佳子姓粗继诚如老丈所禰但天地间无故失一善人舍此衰劣垂尽之兄而去之令存者何以度日区区违心而出尤悔万状且日受笔研债不休生趣尽矣以故恳上疏乞休第不知庙廊诸君子肯怜而放之否老丈书谓比来益与药物亲日噉粥仅一器此外辅以少茶果颇与张宫谕相类贞于三月前已得喻窃谓不过偶然食饮小失宜尔且老丈精神渊着何物宫谕可比今得教尚未平而询之来人语亦如之不免悬注大槩药物攻治太峻则益侵脾过补则愈妨食噉唯在

去思去烦去忧去患而已黄蘗赵州俱有对症药要在自得之龙华山寺便是老丈异时白业堂亦号绿野镀金佛作栴檀观亦得作丹霞烧亦得知美丑唯心则去舍无恋矣太华山赋瑰丽之极岂贞玄岳所能唐突去人急不及题后俟有北役便驰上或当更在先也今岁龙蛇殆甚此间阴司马卒魏公卒蜀中张司马卒盖皆小于贞一两年不特亡弟有闫希言者顷刻坐脱罗近溪者谈咲而去则皆老宿也然进于一时可叹可叹付之无可奈何而已薄意将侑不一

李本宁参政

山中无复世缘虽故人时时梦寐而关途阻修何由一通讯问乃飞鸿宛然尺素系之别楮数百字皆肝膈语且被我以复陶食我以红盐口体之间无非雅贶菰芦中顿尔神王矣关中学使京口无两此其才卑卑满百何敢望一于鳞第其览识中窾汲引功深于鳞高简龙门自拟物情轩轻故不尽诬也以公秀杰之才小斟酌其间便足光掩畴昔仆比待罪邻壤因得窃窥秦风之雄但于时业稍觉粗旷又乏师友渊源公欲取江左清华之气叅之甚善甚善家弟赍捧还力欲乞休尼之不可今已杜门玉山道中第闻两台意不合或未能赋遂初耳助甫磊砢有气甫别我向玉门关觉颌燕突突除目乃冯君任当是以才举且新宰公郎署交也宦行达矣知太公时少违然以尊甫日左右之兰玉森绕夷犹其间何恙不已嫂近迁长安计亦日胜容乃公健在佳儿时至自来毋为助长也仆于九月举一孙杯勺益自迫焚香烹茗展法书名画信步花竹间调赤白鹦鹉俯碧澜施食朱鱼甚适间为责文进人暂苦如博士弟子完日课此外皆夜郎王国也公欲援助甫例索四律贫不能当咸阳繇仅以其半书扇头供一咲不具

又

凿坏之人与世路隔绝初不知王父朝议公讷缺焉生刍方惧无以白于尊甫方伯公而执事惠然数千里之书剂以数万里之物岂玄奘甫自五烽入耶何梵夹之饶瑰奇也秦中学政械朴则杨应宁翹然耳仲默于鳞差能以古文谊振之而执事遂双举其肘玺书褒然谓且入陪九列而尚少徐之岂玉堂诸公不能不介介青紫耶然天中紫微省毋妨吐气耳舍弟遂获步武宁非至幸渠以前疏故意微齟齬知执事省覲情笃当为促之贞老矣不意天假之灵得懣一切宿业卖身作道家奴足以没齿彼白简中杨王二三君子且拟以一瓣香谢之执事何自用于鳞竟不肖不肖每及于鳞至于今愀然神伤也承示欲有效于朝议公贞之托肺腑者两世矣其何敢辞十月入关与杯盂笔研缘绝杯盂之贶敢返诸来伴而请受笔研役第碑志已得人不知何所任之冬寒北地尤剧加浚自爱

又

秋初贵乡人有携尊公尺牍先容者盖五载前笔耳为泫然久之而以闭关故不能尽副其意却附一札报公一芻一豢荐尊公几不知其无浮沉否也地下之托即以贤桥梓肺腑所素照且不忍以不文辞而况重之诸公子无己之孝思乎哉弟所虞者楚材如邓林人操椽管而隧上下石俱以属人口中物如愚昆季则不能无正德时康李隙耳念欲返使者而使者坚其请谓且迫塋强浣故研从人乞残笔墨而了此终恐不能无负至意也所祝双杯盂縁从梵网木义断酒以故輒附璧敬拜三絶之辱芻帛将遠意长须碌碌樵汲无可使者亮而置之不一不一

又

前者不腆之文不足以为尊公地下重而遂劳灾石盖至今有余媿焉屈指尊服已公除暂为大方作一福星不旋踵而入佐庙谟定国是使吾曹长保丘壑深所望也仆之踪迹见若似微有得者而不知其空空如也草衣木食鰥居匏系聊以懣宿讐汰沈浊而已家第能谢浙绂差足畅兹叶山人茂长便附此山人长诗歌饶意气三千里慕公上谒不敢望孟云卿之于昌黎公必不至作刘义也初夏未暄为道自爱

又

水行三千里去家七周月而访我弇中仅八日而别别时亦不觉异别后忽忽如失且桂魄转莹令人益思叔度弇中山池不能百畝昨秋得汪伯玉张肖甫胡元瑞春时得吴明卿最后得足下与来不疑而汪仲淹凡两与焉仆所以报山灵者亦不薄独诸贤尚默默金玉尔音以此世界小缺陷耳见属一序二七言律于寝溲处觅之及写九襞帑四清江帑十罗文帑指节尽痛而无益于足下徒疥壁而已日苦酒食征逐复有官中事一过重九则有被发入山不复能顾妻子足下青年鼎贵天纵以才出则衣被一世处则曠带千古绰有余地第羊肠诘曲猢猻口■〈犴牛〉牙埋光铲锸以埃蒙气之豁可也蚌珠勿剖时至自吐公家犹龙公亦不废子孙唯戒临敌轻丧吾寶敢以此荐足下勉■〈施，冉代也〉加飡自爱

又

夏秋以来久不见老丈除目意疑之谓当事者即不鮮好真龙何以不至都下遇一

楚客云已丁内艰矣既不能得其详而村仆又无可使者遂缺絮酒脯修之敬而贤仲氏至则以老丈之大教隆币来始知所丁者生母匡夫人也读行状将数千万言其文笔古劲叙致详委毋论已老丈所以描写匡夫人之才行与有功于李氏者抑何伟也非有仁人孝子之心如吾丈不能发非有檀左司马之笔如吾丈不能就仆真是受成而已特以体不能太详不免有所裁损有负至意如何如先君子歿八年而始复官又二十年而始有赠有祭有墓噫亦艰矣仆始可藉手而见地下矣第留枢一补大是蛇足头童齿豁岂堪涂抹而与诸少年游且病弟虽小间尚在医药病妇呻吟床褥宁能恣然业上书乞骸矣不知当轴者可容镜湖一曲否叔季二君幸为我致声闻王太仆先生尚健饭真大奇事其以登第之年生者仅恃粥耳粗芡绛帛筒布附荐几筵不一

又

贤仲氏孝廉归有小启及太君志草寄上想已達矣仆乞骸之疏既不得请而诸君子颇见挽以先君子甫被上恩谊不容负且留事稀简稍可藏拙龟勉而北至京口繇龙潭宿摄山探明征君之遗址则愧生读江总持之遗编则厌发几欲转轂南向次且不果人事小间独处一室念病弟身在医药尚多进退老妻笃困床第了无起色而诸老之乞休者俱复报闻无筴可寻遂初真所谓六州四十三县鐵不能铸此错也足下比哀思当小纾不朽之业已成勉思太上之立以酬造物每遇相知念足下材高肮脏谓公除之后宜即出以抚世酬物第觉得文苑一段蒙气悒鬱不散无论吴明卿不复振即汪伯玉仅得一荐剡而复报罢仆之鸡肋故非尽繇子墨客卿也若足下能如佛图澄海鸥朝贤则无所不可少泉公乃孙人便聊此附候起居不一

又

前月得手教倾挹之深且具悉苦块近况况如面覩屣丝不敢遽裁量篋而藏之以俟改服两玉卮启棗烂然温然适两儿就试至此传饮竟夕不忍释手其人如玉诗言故不诬哉金陵名胜足可娱目曹务简省不妨吟啸特以夏来饥馑狼籍使人无可着足处闰月十九日得亡弟讣遂别作一魔境界区区长于逝者十岁焉能久存即不死亦何心在世旦夕唯有乞归耳痛此子甚强特以闽中冒暑驱驰穷夕披阅釀此奇症病中犹能有所著述以自摅见大怖将至恬然坐脱兄闻之固不能忘情于人琴亦当有所印证于来去也近料理其诗得十五卷付梓将竟文令从子輩録出续梓之必期玄晏先生一序以附不朽当更有专请也仲君事知己无他兄友于之笃士林所羨即有信北上当为太原公致兄谢意似传彼中月旦于仲君微有颍水之謡倘可风之改玉改行亦何难也少宗伯于兄厚矣偶及诽调一端云玉堂故侣尚有不能平者此亦何足深念男儿堕地便

自有命如伯玉诸贤竟尔杳然不能使后世无憾于右文之朝耳贤妹丈于极冗中一接不及少尽甚歉外有薄（阙）念四絕句附覽不一

弇州续稿卷一百九十五

●钦定四库全书

弇州续稿卷一百九十六

（明）王世贞 撰

○文部

△书牒

荅顾益卿中丞

弟十五年前所交游多文学气谊磊落不恒之士入靖来耳目无所关涉强起之南都所交游则多老成名德长者其爱我知我前后亦如是晚而得吾兄盖兼之矣前覽诸疏其所规画注措了然指掌文辞既鬯而复古雅然弟所深服者不居功不急效有古士会父子之风与赵营平经遠之畧不似今之逐逐功名之会者而已也以故于大疏序拟少摭其区区而南中正值多事匆匆拈出读之殆如梦语适有袁鲁望学宪之长壻张太学奉访聊附之以上而使者复至矣损俸以供故人酒又益之以珎貂名药而亡弟处又拜厚奠尊兄于故人之谊若此弟何以为报耶弟乞归不遂荏苒满考抵淮而拜新命遂以间归里既免驱驰襁褓之苦而不废赠荫应得之典于私计诚便第抚亡者殡宫与孤嫠相向恸哭归对病妇视弱儿忧旱悯灾无一开眉处七月连得雨吾州十可救五六他邑则不能一二收矣来春饿莩恐不减戊子潢池之变势所必至今外忧未已而根本之虑又有不可言者南九卿再疏颇恳切皆弟所属草摠束之高阁矣太原公屈为谏臣以走为上策而不果廊庙之上智力俱困如何弟于谏审事不免于八月抵任至正月必乞骸矣尝与太原公书谓凡之一字有在国者有在身者国之几兄能先之而弟輩所不能身之几弟輩能先之而兄不能也兄以为然否承甫不成行于铃阁小寂寞然遂成山人高节子念贫甚得兄怜之便是雪中炭也方为里舍儿腰领所苦卒卒作报殊不悉伏祈照亮

吴大司马

翁之高才雅望其在贞之耳者余三十年而翁之知有贞当亦如之自翁之见命受伯母太夫人墓中之役而始辱称文字交用是贞数荐其敝帚而翁之所以褒擢赐锡之者不啻百朋之益今者复受命伯父御史大夫公隧表之役其于感恩狗知之情未能抒其万一而翁过自摧谢轻舆见过欸曲绸缪使人情事欲绝贞之此行可以小缓执爵都门候疏太傅之车尘乃为虚辞所感狼狈治装翁破其静摄赈钱稠缦导送勤复何翁之厚而贞之薄也濒行见翁神采清澈映带我辈追悔前日不能为国留贤而翁政府密书谬见推借谓可自代则贞又当追恨十指当斫取讥吾乡衮不小也江风为崇进寸退尺忽忽勉成一序付之曹郎不知可小重翁行李否芦夹竟日无一往来人尚未知翁成命及代者何公却似梦中呓语翘首锤云无任惆怅不一

庄中丞

不佞贞之获附骥于嘉禾也盖廿载于兹矣中间虽一奉德音而麋鹿之踪多寄岩壑更不获亲炙有道之容而消其鄙吝唯时时于交游中窃聆风猷而谈政术有向慕而已昨岁承有杖钺江右之报为彼地士民称庆未几而寻预北司寇之推则庙廊之上固虚席而待门下恐匡山左蠡之间不能长有德星也贤器骏发高第豚儿过时之人获步后尘复续修通家之契幸也辱不赐鄙而远使致大教将以如天之赐且弘垂奖饬何以当之适以考满事为南床所擢盖贞以例问而铨部以例许乃敢成行俱非敢欺罔也方杜门待罪忽忽中不克覩缕薄有小效唯高明亮存之不宣

荅徐大宗伯

弟以十二日抵淮而得叨忝之报又三日而得刻报即以次日走一介投咨结于铨部而艤首南矣取廿三日到家谒先祠哭亡弟以次与邦君大夫师门姻戚酬酢甫定即拟买舟玉峯练川之间冀领清诲因小报娄江之饯而河鱼见妬委顿三日甫有起色而使者奉如天之赐至矣教辞累幅所以为弟慰喜者津津不啻自口出而三难之说弟初亦不觉之今恍然若有悟者第以不才而位遇差隩先人又隩吴中前哲则惛然惧且腆然愧矣吴文定边廷实顾华玉三君子者弟尚不敢望下风今乃令当之翁岂饰画无塩唐突西子者盖爱而忘其丑故耳独一时之遘真于私计良便盖此迁稍先十日则遂废考满之典稍后十日不免行役之劳且未能便望里门一恤其私果何如其幸也癸卯师门弟齿最少八座最晚而秩稍卑白香山有云越国山川吞碧海杭州城阁入青天吴兴卑小君休厌为是蓬莱最后仙其弟之谓耶大赐出自长者不敢以例辞姑勉拜嘉四日

后当敬造门下不唯欲会叔達子柔所谓紫云者并拟请见之试刺史肠何如耳诸俟面
悉不赘

山阴王相公

曩甲申之冬相公与太原相公同日大拜毋论远近加额有君实晦叔并命之謠而
世贞时方伏岩穴仅与羣蠕共仰而已不敢以贱姓名自通而迺者白麻再下郑公起复
朝野之欢有加则世贞厕丞郎之后仅从寮长聯銜荐状于戟门之外又微闻将命者有
他不知其能彻电覽否也踈庸之迹屡起屡蹶晚癖归懒与世味益左滥竽尸禄日切归
计不意荏苒满考行时别吴司马于病中出相公报札乃知司马以留务谬荐及不肖而
相公亦过许之盖别之未几而秋官之命下矣司马计沾沾自喜第当之者惭汗不自禁
耳世贞固未尝得奉下风而仰清尘将无相公方厘吐握之懷故采及于葑菲之贱邪分
当竭蹶北首展谒堂下一倾其肺腑而问之识者皆云既有新命例不当入都门坐是中
止而敢以不文之启上渎今财赋之地连遭尧汤之变尽为瓿脱公私俱困人鬼未分朝
野横议蠹起猾发堂上竒兵不在小人而在君子惟相公与三四大老当必有大作用大
干旋其间顾非贱愚所能与知也鄙俚无识干冒尊严不胜皇悚

赵汝师

仆以得北咨晚仓皇治装又坐亢旱毒暑不敢有所过从而独谒公辄辱留款至醉
饱行时一切不敢赴钱而公独盛供张使玉阳公主之而身避抗席无论居平道义之爱
其一时所以隆施于不肖者何如也初传陆司寇代震涯太宰而仆代之未敢信行至淮
报者至果然矣更三日乃使材官赉南铨部咨结以往即转艤首南矣衰迟懒散之人得
与诸贤并升而又不废所得恩命且以其间归哭亡弟抚病妻焚昨岁所领先大司马诰
黄于墓真幸事也念即欲乞身恐涉负恩非臣子之节故勉拟秋季履任完大獻三月作
归计矣馆选已定玉堂诸贤通有迁转成均之说灼然不错愿公暂一赴之仕止久速混
于无迹此吾夫子大段作用也山鬼伎俩有尽老僧不见不闻无尽左右前后伎俩太原
公不能以不见不闻处之却以献于公如何儿子无复得预选理然不得更自有味公意
想同之不一

王春陵

世贞久玷一壑于世无所比数滥竽留省日抱归悰以故于我翁左右仅以公事一
再通咫尺之书而迺者叨冒除书方惧非任而翁俨然以大教先之谦光下临贲饬逾分

岂贞薄劣所敢仰承伏谗台履万福威德遠播四夷宾服八荒偃然惟是兗豫以南江表中外赤地千里民无半菽今虽赖圣恩隆沛可以稍起沟渎而萑苻之警恐将来未已唯翁一留意焉抚填之寄则汝南张助甫襄垣郭致中其人也今虽起而未用此不可缓也役便聊尔附谢辄申区区伏惟鉴存不宣

冯侍读

世贞向者辱令先季祖少洲公道谊之爱已待罪青社则承令先叔祖冶泉公文字之契盖三十余年矣嗣后则窃闻尊父老先生风猷政术表着一时至门下而遂晋读秘书入侍讲幄簪笔法从冠冕词林如迓者楚棘程义虽仅吐一斑遂尔蹕絕今古吾家文恪文成非所敢望也世贞少而不敏亦窃希慕觚管之业而实无所成就垂尽之年不意复覩名世之作者寻又闻考绩恩纶正当门下如椽之笔不胜踊跃私幸念贞行能下中宦迹低薄荆妻庸庸闺阃孱妇俱无可称纪若先公之尽瘁王室南征北讨孤忠劲节功大不赏易世之后始见褒旌赠官祭葬今已粗备详具所上志传行状中唯是先母郁恭人裔出名家端丽婉孌事先君以慎待二孤以义家难二载吁天请代后死十年克终不懈于古彤史差不腴颜门下幸警而详着之则我二先人地下之光子孙世世之感也不腆粗币愧不成享唯冀亮存万荷

葛检讨

不佞贞以甲戌春获瞻先太保端肃公于朝列寻窃从长公龙池先生于罔寺俱沐杯勺殷勤之欢盖至于今耿耿焉壬午之秋门下褻然领解东省明年遂登鼎甲读中秘书晋领史局于端肃公盖有光焉而儿子骥亦窃玷南省蹉跎濩落几复不偶不意得预公交车之席而门下实司藻鉴焉韩退之以不出大贤之门下为惧骥可以无惧矣惟学术不加益志行不加以负大贤之知则惧滋甚耳唯门下诲而勗之乃所望也世贞衰老无状久废田野误中物色竽滥留枢今又谬叨恩寄日抱小草之愧唯懷贤狗知一念有不能自己者敢因役便布其区区伏惟照存万慰

沈纯甫

贞辱老丈肝胆之契前后见于尺牒者非一而至靖庐促膝澹园夜饮数旧论心不过一二昔耳然与家弟仅三人今其一已为异物矣人间世缺陷可叹可叹自我老丈赐环之后为除目所急遂正九列然高才直节不能俯仰时趣与政地少齟齬奉身而归天下高之且谓太翁太夫人俱大耋无恙老丈得日视甘旨寧以三公易介惟是节闻翩然

有蓬萊之游生事葬祭了无所憾二尊人真福德人老丈真孝子也贞老矣偶后家弟死然去死亦无几强颜而出强颜而食禄今又强颜而迁计惟有一归耳天不悔祸根本之地水则白波际天旱则赤地千里周余之黎靡有孑遗老丈读礼之余寧能恣然不置念耶用行舍藏固孔氏家法然终不以蜚鸟之视而忘击磬之心也如何冗极不能躬造几筵短些生刍聊寄仰止唯亮存之

又

前者匆匆成一些奉奏先翁灵几得报书诵所惠志状者而后愧荒辞之未能悉也执事俨然在衰经中犹不忘勤存故人而颛使遠来惠之以德音申之以雅贖盖愧焉若复奉颜色于澹圃中然益痛家玉树之摧折而欷歔不能禁也老丈念及此更益其黯然矣世贞老矣今以行役之便得治其私所以未敢乞骸骨者非其地也月末强之任苟完大猷岁晏上书归里度老丈未即禫除尚当呼舴舺径造通德里门结一浮家泛宅緣第恐老丈苍生之望与猿鹤相妬耳天下事尚可为若夔龙巢许之地无分蜀洛则宗社之幸也见委黄庭俞张二跋敢不如命第不能逃愧于续貂耳冗次不一

许孟仲京兆

自公之别垂一载矣忽忽如有所失每念清茗菰芦何异颍水门下方侍奉太公击鲜饮醇以穷无方之養盖终身欣然乐而忘天下也第今水旱频仍公私耗竭计庚寅春夏之交又当如戊子矣大则潢池小则萑苻其兆已见非得名世之才如公者数輩分布要地以绥凋劫而销祸变将来不知其所终也公亦有意念之乎大学述一书及荅问数篇仆不知古今本何如第觉公提掇唤醒精神跃然得千古不传之秘王文成是单刀直入作用为其徒说得虚幻没巴鼻公与之虽不无小抵牾而实相发即紫阳先生亦不能不以元功见讓也秦中诸文种种有意有色而凌云之材扛鼎之力又能称之必传无疑唯杂咏一卷虽佳境层出而小涉议论时露蹊径遠则唐人之清詣近则陈王之自然要湏于此处小加留神耳仆不才然辱公之知若此岂敢辞糠粃之导俟得命以全著作见委卒业庶有以报也暑气初蠲为道为天下自爱

张助甫

向有一启附吴山人去及报使者书计当俱達记室弟以六月初报政至淮阴而有今命归哭亡弟则羣从泣血而举足下与明卿之些于殡宫相向有余悲矣八月杪强之金陵任决策以正上疏乞骸而会台臣有得罪于其长者计铨部当必外迁谋以弟之不

当报政与铨部之不当许欲媒郗而塞其窍啧啧烦言赖主上洞察之更着为令甲然弟意兴消沮了无复余乞骸之章苟不获请当再三请计半残之身旦夕为吾有矣足下凡再与开府推弟私计之寓宇之内无一寸稔地大则潢池小亦萑苻势所必至非得才如足下者三四人镇定之吾不知所税驾也故人畲宗汉明府过贵郡附此此君诗在贞元大历间而人则可当五柳先生元紫芝不直以其官配也唯足下念之余不一

王师竹

伏审道体胜常令问日畅昨覩玉堂诸公以次迁擢殆尽而我公宿德重望乃独岿然行且奉及矣武试事想当仰借急欲得序论策一读以窥经济大畧仆赖庇以六月报政至淮而拜新命既获免襁褓之劳又不废赠录之典中间以便归故里治其私亦云幸矣独归抚亡弟殡宫对孤嫠累累更增一段苦惊耳不能遽割时趣勉尔之任第国是未定国本未立吐突进李绛出水旱频仍疾疠为毒前路茫茫有何可据高明必当饶定见定力也役便聊此奉候并言区区外亡弟行状一帋附覽

李本宁

夏初见邸报内朝仪知足下已入金明候除目不得适以报政离金陵抵淮而有新命返鹁故里则不能时得邸报久之乃闻有大梁之补中州和淑八方所凑道里适均于布宣县官之化为易且七年前旧物似非偶然者第凤凰池故人步武八座宁忍坐视足下折腰外服赐环之召当不遑耳仆老而不能自决遂挂世网今既叨冒此迁赠先覃后于世法若所谓荣者殊不异波浪中一沤泡耳何足论也归后抚亡弟殡宫对嫠妇孤儿累累满眼肠为寸折次第收拾其遗诗文梓之天下大矣念能操千古觚翰黜陟者独公与伯玉明卿三四君子而亡弟皆得奉下风今以风猷气谊托王元驭为志铭伯玉任墓碑赵汝师作传似可无憾独所恃以不朽者其遗诗文诗文之所赖以广而久者足下与明卿耳彼玄晏之序三都何能唐突不腆之币敢尘记室伏惟鑒纳为慰

李使君養愚

昨因一材官候学院者不得消息资尽告归为作数行计已彻台覽矣吾郡鱼腹之余赖门下加意抚绥蠲其繁苛而赐之樽节二麦亦遂有秋可以少回菜色不意天未悔祸两月之间旱魃为虐播种之地若焚若赭闻门下为民请命之诚至厘且笃此间三事庶尹忧惶亦如之而了不之应今计穷矣即旦夕获澍无及矣计惟有亟飞报旱之章然后按实续奏庶几当事者不以后时齟齬然行之者两台而主之者实门下也震崖定宇

华松诸公实同此愆而贞敢先焉惟亮而采之幸甚

陈都諫

向者以岩穴之踪樗朽之材辱匠石见采俾得备明堂榑栌之一用盖私心感之而不敢以言报也丁亥之冬仅一相闻竟末由躬造门下请教旋闻晋擢天垣陪与机政大疏之在邸报者徃徃寓正直于忠厚先体要而后操切私心仪之窃意承满考至都得一望见颜色欲有所摅吐而今者叨新命归候旨于留京之近地忽忽如有所失方今三公九卿秉羔羊之操谏官极骨鲠之选庆历圣德此其时矣然而国本未立也国是未定也国天未安也此三者必明公所深留意而不佞之所拭目以俟者也人役发匆匆未竟诸容嗣布不宣

袁都事

仆以前月廿二日入叩尊公高斋握手剧语而出第觉其肤色稍萎黄肌体亦渐削以后连得两书伸弇园虎丘之约辞旨迺爽书法苍劲曾未何时而讣音至矣天乎痛哉仆不觉哭失声惘惘忽忽累日夜即拟奔驰修生刍之敬而病脾病目方以身付医药不能出门仅一效薄贖于伯子计兄此时已在苦次矣闻尊公所感微恙无所苦顷即奄然真人之去留固无碍也名德位禄几无所憾惟以百年为期尚未满愿耳闻两台已上请恤之章固宜尔也谥法当得清简或端简之义正直无邪一德不懈于尊公称也驰奠之期在中秋后先此奉闻不一

穆少春

前者刘侍御以令先太公之状来问墓表于弟兹时忽忽为亡弟含辛勉尔塞白并不腆芻帛就托刘君奉寄后得石东老书知己達矣而未奉尊兄一帑将无弟文不足以为九京重耶惶愧惶愧尊兄孝思纯笃谈礼之暇他念不杂必有著述之大者以垂后若东老荣位隆崇委寄专笃而能持之以勤守之以默且遂举雄真足慰吾曹属望仆老矣再疏乞归而不获请两具说言草而不见庸儿子之幸荐不足以解亡弟之至痛如何如何已饰容棺之墟于先君子侧得请之后即消摇俟期而已适汪山人沂去附此此老七十九而游不已诗思亦不衰云与尊兄有故契贪一相闻第不知其能達迟鸿台否也外二刻专为亡弟者附覽不一

弇州续稿卷一百九十六

●钦定四库全书

弇州续稿卷一百九十七

（明）王世贞 撰

○文部

△书牒

申相公

本部材官回蒙台教慰存因及肘腋表里之奸祛除不易而相公之苦心妙用不佞虽在遠外亦窃窥一二矣区区情事荼苦精神衰耗故急欲归守先人之塋治亡弟之葬饰巾以待旦夕非有虚假惟尊慈亮之不使小疏成一虚套则大赐也迺者朝事甫定而后进不经事人遽以不根无涉之事窃其影响冀有动摇主上圣明隆眷亡毫发之疑而大疏所谓令女捐馆壻寻别娶且天下之爱壻岂有胜于子者子既不令入试于壻宁有夤緣此数语可剖示天下万世人乃者覆试之役甫竣而狂口又复哓哓致触天怒方快物情第追究峻使不免又成汹汹计相公与荆老必当申救自今以后愿相公一志任宗社苍生之重事固有什百于此者么么妄语何足介懷安庆贼本不多而颇有骁黠者官军以乌合不练之众而挑之始则安庆轻敌死一指挥一千户既而黄州复轻敌伤一守備执去一州倅又既而安庆之故将黄甲军亦见劫凡三败矣一故参将徃抚之为所留三镇之抚臣号令不齐将庸兵弱釀成贼势如更不已势必调楚顺靖一宣慰浙江一营兵就近如吴司马者暂出督之庶可荡平虽然至此则所损不浅浅矣吴司马所条请贞虽与闻而不敢劝沮盖司马初至见三营之卒弱而骄不堪使又以损军之令重卒有不虞不敢使之出敌故为挑选军舍余丁得五百余人别成一军教练精熟寻常可以弹压狂呶遇警可当銜锋跳荡贞所虑者恐庙廊之议以为有军不用而别起军外之军增饷外之饷或致齟齬至于旗牌之请盖緣欲借以稍蓄骄悍之气为缓急调遣之谋耳不知鞞鞬之下可给旗牌否今参赞之责虽重而号令不能出一城鞭朴不易施一校宜司马之有请也唯相公裁之

又

长夏赫曦伏惟相公台候万福世贞不肖忝从乡曲之末时远门墙之外而相公猥推太原公之爱而爱之又察其亡他而録之洗瑕收瑜起骨加肉相公之当国寔在癸未之岁甲申正月即赐补京兆亡何遂有少秋官之迁又矜其情事许之休沐仅踰三载复有少夏卿之起受命以至今月不能二朞遂超躐两官正秋卿矣又怜其骭■〈骨莖〉不任磨勘特与太宰计破例而听其报绩矣虽使世贞之父兄为世贞谋与世贞之自为谋孰有能如相公之委曲不遗者也世贞以月之四日出白门十二日抵淮已促装从陆而道得新命咸谓于例不必复进京祇将南吏部原咨具由送之吏部彼当为题请复职贞得以其间归哭亡者且为先君焚黄于墓道私计诚便矣第此衔恩酬知一念未得陈之堂下九叩以布区区则更有所不安耳侧传邸报主上焕发温纶隐然省己尊贤至意视朝亲政俱有定期此相公与二三大老挽回感格之功而南都一疏亦不至糜碎于雷霆之下知圣度天聪固不尽委之曲蘖也第江南累月不雨赤地千里巫尪见殛旱魃愈逞禾苗俱不及种种者及花荳之类又俱萎枯百无一长虽二麦颇秋可以支持目前无衣无食何以卒岁又况加以敲榜之刑剜其已枯之膏而使供繁重之赋乎纵使尽蠲其额而赈其垂命者恐犹未免于戊子之祸也相公吴人也太原相公亦吴人也其知吴之受灾为至真其欲为吴请旦夕之命为甚切但恐人主未必信左右未必喜而大司农未必能出而任之则相公之于调剂亦甚难矣虽然不敢以相公调剂之难而遂絶望于调剂也先君子之隧虚而弗克树石者垂二十年矣向者以相公之曲成而赐赠修冢又承相公之许以雄文冠之朽骨为之若肉草木为之色飞而迄今未有领也虽一日万几倚马之才亦何所难其挥洒哉为此专令豚儿代领伏冀垂赐并有薄效以志区区不宣

又

昨以九卿会疏去役之便敢附布区区计已取进止矣世贞赖相公大庇已于廿七日履任縁邮繻艰请不便于役者故俟会审疏便与谢恩疏同发迟缓之咎不能辞也世贞少习城旦家言老而不尽忘拮据刀笔或可苟免大戾惟见两台之长与属僚争论纷纭不已山人鸣冤盖失志求进之徒其操术甚奇其措心甚险不免大费相公苦心而衰劣过时之人惟有逡巡作骸骨计耳许相公凡三为汪伯玉司马作书而最后云敝郡称才独一汪司马尝执鞭弭从诸公之后似亦颇承许可附于知交今服阕久矣竖儒言轻不能推毂使坐老丘园心甚惋惜倘得假一言之重于当事者当事者诚因重明公以重汪司马则区区之说易入也伏惟留神其辞甚迫切岂以南都散曹返能加于揆地耶不过以世贞辱相公及太原相公太宰公知己之遇谓可以进言耳不佞与伯玉交知不能逃相公神鉴然兹事何敢预也先司马赖相公大恩得葺理墓田丙舍唯是七尺之石塋于隧道久矣而相公至今尚靳一言诚知一日万几然以倚马之才不过费半夕晷耳贞已衰老倘不能待是无以藉手地下也献审疏上縁热审者过多今仅得一人耳闻中宫

将有大庆不知可免行事否余不敢赘

又

迩者世贞以乙休之疏奉渎清燕盖衰暮之年薄劣无状自当归骨故里而迩来言路诸君贵少贱老吹毛求疵无所不至南都踈逖供其食噉而被论者如屠羊之在肆噤无一声何颜可以在列何心可以供事今者即不见允明春自当引疾唯冀怜而舍之闻召瑯能自损抑上眷亦不至甚人情稍定众向稍一但中宫已及大替未见的确中外谓上令秘之恐未有此理而南中台省已请册立九卿复将继之无乃太蚤乎杨司马差能持重不然走未见其可也蒙许以先子神道碑岁底可完不胜踊跃谨录后沐恩典赠官祭葬缘由并子女之详呈覽倘即挥赐贞当躬奉以归树之先垄子子孙孙感德无极不胜恳切俟命之至

申许二相公

前者赍谢恩及会审疏人便一通贱名于记室计已彻覽矣贞不才奉职无状以报政一事见齟台臣而傍牵旧谈横加污蔑分合席藁以俟严谴但贞前者因查有前例而后任之事与所支之俸为兵部侍郎故当以升任论与调官者不同故具咨铨部铨部益以后例过垂饰奖俾亟奉行其后叨忝新命以南部咨结送铨部铨部据而题给赠荫非贞所敢擅专亦未尝有毫发欺罔也计旬日来已奉明旨处分或斥或削已定但区区生平心迹不能自白敢具疏以辨万一见留更布大恩放归免滋多口幸甚幸甚或云有所受之或云别有所为贞俱不敢言第一归在念倘得奉相公大篇刻石先垄死有余荣矣余情具疏揭中兹不敢赘

又

谨启世贞行实不孚邊幅鲜素以致见憎谗口仰仗圣主之明与相公委曲维持调解得无雨于丹书乞休小疏又辱勉留贞苟非木石寧不思洗涤心志鞭策弩钝以少酬恩造第于出处之疚心与宦曹之触目一经拈出惭悔无地语云畏首畏尾身其余几顾影而叹不肖之身所余且尽矣况前路几可余日可数若仍冒昧隐忍丛积毁忌更来指摘纵相公怜而欲全之晚矣再疏陈情非敢毫发欺隐惟冀俯念特赐允俞瓦全此身乃相公终始之大德也先人不朽日夜在心并祈留意万感

许相公

谨启贞以岩穴长物老不适用虚名见采滥竽留枢自揣衰庸恐貽败羣之诮颇安寂寞不作触藩之想萎冀乞骸冀全晚节而屡厯温慰未寻遂初前后二禄荏苒三岁第满百擿茫无寸补既辱我相公破例许之赴部行至淮阴忽得邸报则骤脱丞郎之列而遽随令仆之后惊喜过望惭惶继之此固我相公求旧之至仁与怜才之高谊然使予者不伤明受者不色耻则非贞所敢当也且岩穴之下惭先登于伯玉休宓之间愧后尘于定之进退维谷展转负刺迹虽苦暑疾尚拟竭蹶登陆叩稽堂下以展惓惓一念第询之长宿皆云既奉新命不当入京且大猷在九月中而秋省遂无一长官恐于事体有碍不免侧伏金陵傍邑得旨而后履任伏惟高明垂警东南之旱赤地千里禾不及播绵不成茎此祸比之丁亥殆甚即使圣恩蠲免赐之余生无衣无食何以卒岁兴言及此腸为寸折相公社稷苍生之系衷久矣幸不惜一投手举足之劳为此周余之黎解倒悬之苦下情无任恳切之至

又

迹者以咫尺之启申候兴居兼识感忱附布不腆过承獎錡推以如天之赐惭皇局踏莫知所当世贞仰窃台庇自淮返艤便道过里得治其私旋用猷审期迫星言俶途已于前月廿七日履任矣贞少习城旦家言复亲刀笔之役窃谓可藉手苟免咎戾但蒲柳易零樗栎无用恐终负门墙知己大恩耳兹谗六载考绩丝纶涣颁晋秩宫师复冠天省録后赐金流光揆席凡在朝绅靡不加额称庆而况受知之深如不佞贞者其为欣忭何可言喻敢具一启少伸下私唯是先人辛勤一生南北御圉忠而获罪虽荷上恩昭雪所恃以不朽者独赖相公片言华袞耳既蒙赐允唯得早惠托之坚珉此则贞之所日夜镂心者也所示汪司马伯玉已敬達之元老及太宰矣相公之命不敢不将巨寮出处岂远臣所敢预闻也审决疏上闻中宫将有大庆不知可无行否余不敢赘

杨太宰

前月之廿八日得贵部回咨洗其既往加以隆褒破例赐容得从考绩已属逾涯之幸而豚儿骐复致尊旨谓且将有后命实出意外即于满日过部又二日离京行至淮阴而司寇之报至矣世贞么么下士潦倒陈人科第虽似小深资望实为甚浅不意遽躡羣寮之上超从八座之列自唯曩者避言里居无复世念翁拔自遐野畀以留京曾未匝月晋佐司寇非常之格施于迁人众所骇羨先君子虽获昭雪而天泽不究寻见壅沮大宗伯过采台议获沾葬祭尚复嘍喏一官而翁朝得小疏夕为题覆使冢中之骨获被常伯之荣世贞今官仅南卿佐耳窃禄未久而遽有此擢且又少延月日俾得遂家门之私翁

之盛德譬若大造之于物无不蒙其生成而于造物之中有独厚生而曲成者则不肖贞之所独私也旦夕拟叩都门瞻天之后即造堂下九顿以致感激之诚然后小献刍豢庶抒葵藿而问之旧宿皆云既有新命不宜入京且九月当大审而部无一人者在者于事体未安以故冒昧辄赍南天部原咨并上而身返真州或以间一视仲氏殡所焚黄先人之塋终始皆恩造也下情无任铭刻尚容专布不宣

又

前者赍公移官役去有不腆之启少致感忱令豚儿上之未奉教荅寻有兵部官役回则贵部所覆赠先录后二咨俱已到矣我翁生成造就之恩非复常言常辞可以罄述世贞自淮阴闻命以便道得归扫丘垄少致手足之戚寻以会审期迫束装就途前月廿七日已履任矣萧规之后或可苟免罪愆第未老而衰种种相现加以国是未一伏机渐露若隐忍尸禄恐终负门下知遇耳我翁国之菁蔡狂澜藉以砥柱善类藉以赤帟者也与一二大老似不可言去岁荒民贫萑苻未已必湏得才抚臣若张九一郭思极者料理之其次许孚远可用也又其次倪冻可用也是四人者皆不能满于物情然缓急之际在采其所长不必较其所短也新都相公为汪司马三致辞于不佞矣最后所云敝郡称才独一汪司马尝执鞭弭从诸公之后似亦颇承许可附于知交今服阕久矣竖儒言轻不能推毂使坐老丘园心甚惋惜倘得假一言之重于当事者当事者诚因重明公以重汪司马则区区之说易入也伏惟留神岂谓不佞踈逃散曹能预大臣之出处意者谓不佞辱翁与二大老之知欲令抒其鬱鬱耳不佞不敢不以闻终不敢预也别楮聊将积忱仰祈鉴亮

又

旬日前上到任疏人去有小启奉布区区计已彻览矣不意到任之时黄侍御之疏已发既奉旨下贵部想已处分不当复赍但贞向者申明后任系升官之俸荐起非听调之人于例似不相合故具咨以请然不敢擅自行止而辱老先生猥加饰奖谓原有无玷公评不拘此例之说回咨既到方敢治行又辱老先生体念覆给诰荫于荫子疏内明开曾经被劾缘由未尝有所隐讳也世贞盛年时不自检饬口吻之间多生荆棘笔札之际或树戈矛以来憎毁致成口实虽晚途岩穴稍知慎默言路借之犹得涛张为幻含沙射影第以贞为欺罔虽则不情然物忌多取叨忝过分犹所甘心乃至波及长者以宽厚公平之政而诬以扶同党庇之谓至于司属宁有他弊而欲勒之同斥贞虽有胸无心其负芒刺何可言喻此子方挟言路之势两犯台长欲废宪规于贞何有第年来颇相见昵行时追致赈币索诗为其父母忽反目甚口若此中间所谓习幻化被黄冠者数年矣贪

心难断臆颜复出此语傍讥了无忌惮又谓气力足以摇撼该部亦似别有所指盖自斥阉复进山人鸣冤之说行而物情大变矣魑魅魍魉闪倏于青天白日之下攫市于通都大邑之中贞虽苟免不去后祸未已倘得怜悯放之归田则老先生之终惠也下情无任皇悚恳迫之至

又

贞以素行不孚致来指撻乃辱我明宰公悯其非罪护其所短两疏覆核不唯九关之浮翳一扫天听竟回而传之士林知不肖之心迹尚得称人于世者皆大造力也邹考功之疏可谓仰体上臣之盛心下表怜才之独念但愧非謏劣所敢当耳比时辩明小疏实出一时愤懑既发之后良自惭悔后得儿骐信乃知我翁为之删削俾无树敌又戒勿再申前请翁之曲成一物至矣尽矣第试视不肖之身岂堪复任鞭策不肖之性质岂能过为舂舂脂阿以事言路诸少年者哉况未老而衰目眇齿落筋骨缓弱步履艰难仅有一弟化为异物从子令淑又复垂命情事若此焉望其复有所展布也乞休小疏非敢有毫发虚罔唯冀曲体俾遂生还苟存晚节不至为门墙之玷则终始大惠也伏覩大疏剴切忠亮贤于王端毅韩忠定遠矣无论绎改未见悅从此则遠臣之所深忧痛惜者也张沧老此推甚愜众情第贞所始知者清标厚德耳既而识其尽瘁之节应变之才万万不敢望也台老亦同此懷余不敢赘

耿司徒

昨使者致带补来谓不欲领区区俸耳后使至乃始启封视之其光烂然即骇鸡夜明之珍恐不能遠过乃我翁用侨札之谊而不佞虚衔负羈之愧也传杜君疏辞不敢有毫发訾于长者寻其微指乃是欲激翁使鷓首必不北耳恭覩温纶嘉予淳笃上不以恒格待翁翁乃可以恒格自外耶昨北省复有言及新司农矣语云虽无老成人尚有典刑今老成若姜若方若傅懿之几尽而尚复欲灭扫之是并所谓典刑者不欲一二余也寧但老成而已孝宗朝三原洛阳钧州吴兴寿考者至八十少亦七十余黄发在列素丝五紵委蛇从容以予嗣圣而逆瑾輩顷刻而削逐之遂尽翁以为孝庙时治耶武庙时治耶夫使逆瑾为之天下不敢言而尚敢怒今以济济台琐之臣而甘心逆瑾之技俩乃不闻有怒者何也翁入朝幸为三老冢卿台长一言之若但调停两可不一分别天下何时而可望复孝庙耶适江北诸生有梓翁留贞大疏者虽以故不及上然翁緇衣之好则有目之人咸睹记之矣昔人云生我者父母知我者鲍叔仆无敬仲之材与生平之契而翁之知视鲍叔更甚何以为报贞虽隐忍不至有胸无心既为人拈出唯有一归而已再疏稿附请教知尚滞真州不腆肴酒以犒从役唯麾置之为荷

石拱辰司空

秋来伏惟道履万福兰玉芬茂为慰世贞叨窃大庇以报政行抵淮而拜兹命主爵者不以贞之奉职无状而峻陟之又为之破例以请得贲及先尊慈而录其后人所以滋培不肖者至矣念国恩未报知己难虚故勉而复之官第恐日深日负终且作乞骸计耳寿陵大功计指期可竣门下又当有非常之典今望实隆鬯纯白无疵孰有如门下者藻镜之地必当仰借第国是未一物情未安且中枢要地复有登进渠必不能安保富贵万一侵夺外权三事以下当有一番风波狂澜砥柱窃为门下望之又窃为门下忧之贞近归故里抚亡弟丧对孤嫠妇子累累展奏门下所贻些辞肠寸寸折附去行状一纸可以知其槩也穆敬甫兄何以都不闻问想所草大公墓表不以登石矣赆疏人便附此少布区区不悉

詹思亭

昨者承教颺逮及草次奉复嗣后不获频修问讯缘南中虽稍寥简而衰病频仍又遭手足之戚忽忽过日想门下必能见亮也邮书中每覩大奏于国体事几徃徃妙中肯綮累见褒予盖不待骨鲠之节有素也所蕴藉宏矣贾傅宣公何人哉唯国是未一言路纵横日胜日负莫知底止而根本肘腋之地大有不可言者门下必有定见定力毋俟喋喋也贞以误恩过深龟勉履任然刀笔之外茫无寸补恐逾久则负国逾重旦夕唯有乞骸归卧而已役便聊此附候起居朔气渐深唯为宗社苍生自爱不宣

杨本庵

自贞之先君子获从先太傅襄毅公之后尘覆盆之烛则自先襄毅公发之而不肖兄弟亦荷拂拭草莽以至今日仅于大事两陈些辞实不能効万一之报而自废岩穴木石与居于长者遂至沈简擢发何以数罪唯长者御清尘而不肖浊水或冀稍见宽耳迺过故里李兵使以先襄毅公荣哀录见命为序贞虽椎无文敢不藉手以报九京也唯是初至白下百冗猬集稍闲则颺藉觚管以从事矣伏惟我翁入佐元枢督治方中进秩赐金未足上酬正位入坐若陟禽之继尹旦当在朝夕尚容专贺先此附候并布区区不宣

潘印川

昨者途次附复计已彻覽矣弟已于前月廿七日抵任卒卒人事兼有审录发疏及

竿牍之累寝溲无暇念之金陵仅三月而耳目之内风波万状魑魅魍魉纵横于青天白日之间老太见山人鸣冤否乃二三渠党所合成毒药欲以扶鲸而抑诚倾太原而疑吴县不尽一网不已也南垣两疏反堕其计中南床之论吴悟斋而波及二三老若处之则拨一蜂窠矣吾侪虽幸不及身宁复有毫髮宦味耶旦夕计有归耳适家间小僮徃视儿子有小衣装此间已具一马牌之济上倘老太得续与之大惠也病冗草次不一外亡弟志铭附覽并有薄侑照纳为荷

温一斋

贞自叨佐留枢仅从邮便一通候于长者即辱教札饰奖逾涯荣于华袞重于璫瑶矣恭谂门下晋长中台仍领国储汉之初固有以御史大夫主计者昊天降割三吴之民无岁盖鱼腹者一而魑妖者再矣沟渎之余所存何几今虽圣睠南注霈泽汪濊可以小苏目前而来岁之计固不知所终也向者覩翁宽恤之疏故尼弗克上而仁人之心与经世之畧已识其大幸有以终惠之世贞衰弩待尽一壑不自意出又不自意迁惟是国恩未酬勉尔之任然度终无可以称塞者旦夕唯有乞骸骨耳雅斋公方壮胡以竟不起殊令人短气世途万变物情汹汹门下必有定见定力不佞请得承教焉不备

李大司寇

自甲戌冬于清源一奉教旣旋有附报嗣后间者阔焉门下峻德宏猷师表一代贞虽闇不晓事宁无秉彝景行之好同于众人特以岩穴下士于世无所比数不敢唐突尊严昨佐留枢又苦病戚相仍因循迄今门下之记室遂不敢通一帑良切皇悚惟是门下迈德淑问远肩咎繇力持巨珣剪其爪翼海内拭目以望风采今其人复用矣砥柱狂澜窃为大贤望之懃疏人便聊此奉候兴居并抒下悃伏惟鉴亮

蹇司徒

不奉清问者一岁余矣伏审台履健胜令问宣鬯二尊人万福为慰贞岩穴陈人掩关俟尽既不自意出又不自意迁中间以报政行至中途而返既获释车马烦怠之苦又不废先后赠録之典于私计便矣第碌碌无补转负国恩中夜思之若负芒刺东南水旱之灾极矣周余黎民靡有孑遗主上赐贷赐賑湛恩汪濊目前似可小苏然献岁之忧未已也三吴故翁四履之地也上以翁佐司徒是以翁惠吾三吴之人也惟朝夕为栗庵公一言之其造福不浅贞等之属望亦不浅去役匆匆不克覩缕伏惟照

亮周中丞李侍御

谨启吾三吴之民自遭丁亥浚水之傲鱼鳖其居瓿脱其畴戊子一岁之间饿莩塞途僵尸蔽川加以役病为虐余黎之存者十不能二三至今年春赖我公祖爬搔宿赋而为之樽节民始有生气二麦稍收旦夕几一饱民始离菜色不意四五月间天复降割旱魃逞其凶威以成大旱此间三事大夫京兆令长祈请靡效赤地千里洿池圻裂智井竭涸禾苗不及插蒔其所余种且尽稿死矣故乡来者不絕俱云彼地之旱尤甚虽以我公之精心为民昼夜露祷亦未响应已矣无可复望矣惟有飞章上报旱荒嗣后勘实续奏庶几圣主沛发好生之念庙廊诸公得以拱手将来倘如丁亥故事周余之民尚有子遗计我公祖拳拳宗社苍生至念疏已前发区区为桑梓请命情不容已惟冀亮原万息

巡抚应天周中丞

世贞赖大庇奏绩至淮而有新命休沐过郡洁诚晋谒阁人见辞及委汧而庖廩之惠至矣抵家拜饩币问存又拜贺仪及綽楔之贲感佩不可言念欲一造戟门展谢并拟伸其区区而贱躯为劳暑积凌遂苦河鱼之疾左目忽眚方戢身医药未任舟车窃因一介以启事上尘而附申不腆之敬自不佞发留都还敝里诸道路所经由万口一辞以老公祖惓惓为周余之民请命于天而不得则又请命于天之子辞旨恳恻言言肺腑闻按君继亦有勘疏上矣二相在事于桑梓当无所不留意者第恐更以桑梓之故见疑于上之左右及大司农跋胡■〈士丿田疋，上中中下〉尾有不能尽展其作用耳所赖老公祖与按君终始力持之今所赖者公帑及巨室耳公帑如洗巨室如扫必无所取賑即賑不得法徒滋奸胥中豪之橐何益之有闻太仓储粟尚可十年计唯有省兑运之粮全灾者免次灾者折二端而已织造可暂停否金花可半减否至于迳者抢米一事非饥民也盖打行恶少耳将来必以便宜梟示首恶一二其势立消不然未知所税驾也郡城睥睨可憑凌而上祸在剥肤如何如何竖儒偶有所闻不敢不以告若兵道之忧国忧民实心实政吾老公祖与按君相与咨询令策而行之又一州五邑之守令皆廉能吏也唯曲全而加鼓舞焉幸甚中秋后勉之留省便道晋谒尚容嗣布不宣

弇州续稿卷一百九十七

●钦定四库全书

弇州续稿卷一百九十八

(明)王世贞 撰

○文部

△书牋

荅吴明卿

在金陵接足下书剧称道友王君得叅同悟真之妙且云欲俨然临之及抵家而来教复云云知足下之倾倒于王至矣弟素不解度世家言自奉昙阳仙师法海始谓天地大矣神仙于其中亦一事之小涉竒者要当有之于是颇亦好焉而十年以来所接见卓然称名家者亡虑数十若小道傍门却微微有所证而无益于大道然其道逾大则愈无实其说逾玄则愈无效其贬剥愈精则其受擿者愈幻眇而不可诘苏长公猪猪肉之辨政谓此也迩年道人灾朱青霞死叶仙死任少海死皆了无竒独阎希言死而无疾且不腐云仙中尉虽未死两目盲矣去死何几且仙师以弟与元馭世縁尚未断故不示以大道恐生泄慢弟至来春决恳乞骸骨归归则王君当过我与嚶语而别亦未敢便伸外护之诺也弟以六月二日满四日出金陵十二日抵淮而有新命即移铨部以先大司马及先太夫人之诰命请而脱身归矣所以不亟乞骸骨而至来春者以上恩重不拟遽负之残岁或亦有所为故也迩者九卿两疏皆弟具草虽俱留中而后一疏上似小有所悟今附去欲足下知我之不徒出也王行父集得足下一序便足不朽复何俟狗尾之续乎且其文秣厚深至感恩知己俱有之仆或不能然也刻手闻已有之若善书者即为作数行从章仲玉觅之初归感暑河鱼之疾颇■〈谷九〉不复能手具草不一

又

麻城之价往有一书及薄物附报计当已彻记室不揣兹有恳亡弟太常敬美之歿忽踰期矣弟梓其诗甫毕工而从子驷騮辈继梓其文合之得六十余卷念此子甫成进士而遽先君子之大故于幽忧荼苦之余强自力为诗尝以荐之于鳞于鳞大赏异之称为小美自是始自爱益工诸体而傍及古文序记志传之类垂三十而大就辱足下及徐子与汪伯玉咸见收为友其后宦日益通遊道日益广与不佞忝有二王之目敬美业复工楷其乞文而以书偕请者户屨恒满不似乃兄之谥墓而已也所心仪虽于鳞然与之同调而异裁若用事寫致似小胜之盖七言近体为最矣古文辞尤长于记记尤长于遊誅赞则彬彬焉临歿治命以风素气谊托元馭相国名其藏伯玉碑其壑赵汝师司成别为之传而集叙则奉恳足下以足下方握千古文柄能使一言之华袞殆无足下若也

唯弟深以为然故使驷騮等洁先筐之遗币而具集与弟所草状以请唯惠然而授之叙死者不朽死者之子孙亦不朽弟抵家忽忽踰一月为谏审事迫拟仲秋之抄履任承欲南走金陵相访木落之候江山尽出即苦旱饥有薄俸可博长干酷不从儿辈乞残沥也服食求神仙多为药所误吟啸适意以竟天年相与共勉之不一

又

凡三得老兄书皆为王君而最后其人来矣其所谈是张紫阳薛道贤之遗绪而于陈上阳之说颇熟是弟初入靖所闻者不知其几矣盖其理实有其事亦实有而行之甚难故多变其辞而有借紫阳之说更驳紫阳者以为身中自有龙虎自有铅汞黄庭所称真人在己莫问邻是已然弟以为此就先天之未琢者而言若先天既琢不能不取之西邻第此法不得真师口诀亲指毕竟亦影响而已盖行之败名次败家最后败身吾辈既忝衿裾无故聚羣少女而与道人尘聚必败名聚羣少女必丰其食用筑大厦居之环以高垣闭以重门费且不貲必败家筑基不固临敌不审即紫阳亦知其危矣行之而不得流而为三峰采战必败身是故先师所以致恳于黄白男女之戒也此君面少神气似无所得骨相甚凡似无所成而以大言盖头小有不合则悻然作色不谦虚不沈静似无可受锻炼处兄但少读丹书少接方士故轻为所动耳弟则不能也拙诗奉酬具别纸不一

又

弟以八月廿六日至金陵卒卒酬应兼有谏囚发疏及作都下书甫一月拟小息肩而南床之白简下矣其意以弟违例考满铨部违例见许俱属欺罔不知弟之始移咨乃以侍郎系迁官之俸非调官之俸且以荐起非由调除为问而吏部回咨则直引例内有偶遭诖误无玷公评者不据此例为荅且谬加饰许而弟始成行俱未尝有毫发欺罔也计兹时部已覆寝但弟不得不一辩明因而乞骸骨耳物忌太盛亦戒多取弟半年间一子登第一子荫录身忝八坐赠及尊慈取亦多矣盛亦过矣知止知足我犹龙公之训前者欲遂坚卧又恐非人臣之节故勉强来此拟献岁即请告然已晚矣计唯有一归而已吴刘二子人来得兄数行则从子所遣求亡弟文集序人尚未达盖中途为盗所憎重遣之故迟耳王生所学陈上阳之长语于事实有而于势极难慎之慎之吴子欲求二妇墓表本非体念其意故应之此子状甚古第钩棘牵缠太甚于鳞之所以不甚快人意者也左马先秦有是乎哉余不一

又

犹子之奴相归得手教及亡弟之集序已成诵之不觉悲感从来覆涕至襟足下文章家董狐也亡弟之华袞重矣前一日而伯玉之墓碑至次日足下文亦至乃信范张元白生死之交故不诬也奴相言足下肤甚腴神甚王方治第太守衙斋右可以无击柝矣而数里之外湖庄为盗窥丧其资斧僮仆乃闻盗公然构讼此何说也弟奏三载绩自奉上新例得部咨而后发横罹豺口虽事例已大明然复何心请金陵米已决归计矣故园未芜此身尚在何所不可独不能从王羽人演石杏林陈上阳伎俩兄言弟恶其简傲不深探其精微则误矣但望兄与之并驾翱翔云路弟亦不能顺风而拜称天师也张子文光便附候此子文虽未成就却自汗血脉脉髑孔中出其抵掌谈笑一一类足下虽优孟不过也一笑

荅邢知吾

昨者从陆成叔便仅一通候起居并附所闻此不足溷高聽乃犹置之臆膝间耶豺口狺狺只以夷陵君一事相累其它妆饰之辞所谓本无此事但图对偶亲切者何足道也寄来新诗宛宛有情致俊而且丽自足名家公所示北人难雅语而寡叶声自诡差长大都已得之诚不愿公为敖辟骄志之齐风也唯寓思稍加研深耳大小文尤更古雅冷语散辞出入东西京间采世说读之令人心折仆所以差能赤帟一方者政为能舍吴装耳公能不为北所束何所不佳胡元瑞诗藪亦见否其采可谓博而持论可谓精尚不免有偏枯处公宜一觅之亡弟已矣近为梓其遗诗文将五十卷尚未成成则当寄览也拙草行状附去公能不斲一些谏否仆比健饮噉精神差胜去年但思恬澹五尺地邈若胡秦上疏再乞骸不可得近与南杨太宰感时事之不佳累欷长叹者累日太宰合九卿极论之而仆具草太宰若得罪仆请附同日可以成归不然未免襁褓北上还当奉叩高斋一晤即掩關故里矣虽建业水亦不复饮也所谕觅山师张姓者用石多而天趣少又善索工直无锡吴老之子却佳公若遣一介来当为致之陆成叔故有才情而多口过又好作青楼记室是以饶蝇点终自飞鸟依人俞仲蔚育子死血胤絕矣可怜可怜适右手腕间一疮不能手书亮之亮之

俞华麓

昨者草次以莆田尉从曾孙养志微惠于门下则辱门下拂拭之得免第下中矣乃复厘教币遠存启槭读之十年契阔宛然在目使人南望兴懷仆老矣匹夫之节不固腴颜小草苟冒一迁自失家弟来形影相吊年逼桑榆意趣索莫八坐谬迁一息叨第自世法视之若可以补贴老境如白香山所云者要之真嚼蜡耳公盛年膺宦声实并鬯为世名臣勉旃自爱承欲得手笔以报得无污蚩乎知不以换羊恐不免覆酱甑也一笑

荅邹孚如

仆以九月四日发金陵十二日抵淮而有叨转之命盖皆赖太宰及诸曹贤之力得免于盛暑竭蹶道路襁褓京辇且于报政恩泽不废亦云幸矣归哭亡弟抚孤嫠病妇在床仆夫告岁忽忽无复生趣大审期迫强之留省仅二十日而有审疏便匆匆作数语投邮中亦不自忆其为何也独记得尚能问邹尔瞻司勋未补之故盖一日而得邸报司勋补矣至暮而两苍头使至筐实盈庭启函则为赤牒凡四牒各有致集韵四篇便是曹刘陶谢羣坐一堂出俊语相搏若所纂成诗文集灿然备矣草次不得卒業第觉其精光射人古法森森至于云梦志格新而调古语劲而意高是诸志之冠仆所不能也集名临云楼亦自鲜雅序辞不妨品隲若所以名楼之旨故当有记阐之兹不必也览足下书执礼恭而所以寄托不佞甚至第再读之觉足下之心未甚虚而悬格于咸阳之市以待人之增损也仆鹵莽而誉者诚有之或一时之偶合或异时之过期诚不自觉其言之过也若小示不足于笔则大有不足于心者足下于文可谓有大力矣将来当自名世仆亦何庸寘其所不足也所欲删改诗文数字谨如教迩来时事渐异盆池盎沼骤起颺浪青天白日忽现魑魅仆尝戒儿子以无竞之心处不争之地然只小小休粮法耳于世道无补也迫则捐身以明节缓则先几以完志仆义尚在缓旦夕当力请骸骨以归耳损饷过渥非清郎所宜恐孤来美故勉拜嘉以献縞之义附焉秋深眠食自爱不悉

又

自仆中南台白简忽忽具一疏为辨所敢小自安者得之贵部之咨许与明例之可据而已其生平大概往往在毁誉中堕人齿颊虽使仆自作中正亦不能定其品而不谓宰公于覆核之外谬加獎饰而老丈复特疏申辨盖不特许其雕虫之技而复涤其素丝之染至于出处之际尤人所难知今不唯使区区抗颜于一时而尚可辞于后世管敬仲有云生我者父母知我者鲍叔执事仆之鲍叔也第鲍叔之才不能如敬仲而执事实高于仆数倍以此言之则执事之见知更难而仆故当百其感矣虽然朱家一博徒耳为德不自名而乃使执事名之乎哉宰公为国怜才必不欲仆去以成其上臣之操故为删削疏草之愚戇而又勒勿再上仆亦粗有血性者何至箝口结舌生吞金陵之米而又奴颜婢膝以日媚言路诸少年求苟容而已耶今天下苦旱灾者十而八九腹心之脂膏则已尽矣国是未定伏莽实繁青天白日时出魑魍盆池盎沼亦起风波执事试论之仆尚可留乎跋胡■〈士丿田疋，上中中下〉尾所余无几计必有归耳大泽归而有可以奉报者必不敢自弃也佳集希世之珍必当一效丹铅且献糠粃幸少缓之不知者将谓我为标榜不然则用以报恩也邹尔瞻命久不下如何我朝有此事例否一叹

荅郭太史美命

吴广文来拜手教捧读再周不觉霍然若洗已而泅然汗下也公命世之英飞声秋苑者盖有年矣既金马射策白虎横经长扬之赋流布人间动为世则而乃过垂饰奘若以仆为可与语者夫以北地之雄强信阳之秀隩新都之宏博尚不足以当公中正之条而盟坛牛耳乃见委于邾莒之赋不佞则何敢言三楚故多异材仆牵丝之日即获与吴明卿下上而识魏顺甫李本宁又既而识陈玉叔晚途乃识周元孚邹孚如明卿成矣本宁次之顺甫玉叔又次之明卿顺甫诗胜文本宁玉叔文胜诗所谓晋楚齐秦匹也元孚以气胜孚如以思胜二子之于李陈其犹在季孟之间乎哉若行谊志节卓犖奇伟则固超乘而上矣不谓未死之年复得一当公诗草三编飒飒白雪之调大而未化时或有之文在西京彷彿董贾经国手也要在无倦而已楚之先辈辞权尚在台阁长沙之广通黄冈之偏至蒲圻博而寡要茶陵健而少情自仆有识以来此权乃稍外移勉之今当复归台阁矣适承公有家艰欲致生刍未有游鲤今以张子文光便聊尔布忱承念尊大夫之与先大司马场屋之雅不胜悲感如公有所委不敢不尽也张子有俊才风度谈谑全类明卿少年时渠语至公輒俯首称服识故有真哉不腆二律不足以报绣段聊志相念而已余惟节哀自挹以全大孝为慰

毛侍御

伏承遠使以大教惠存披示肺腑副以如天之贶且愧且感贞六月初以报政北上抵淮而叨冒新命艤首遂南得用其间归哭亡弟抚病妻然孤嫠横目呻吟满耳加以南畝告灾舍中儿刺促不已属漦审事迫仓卒就道竟无有瞬息舒眉处既之任未几而南床见齧谓于报政事例有碍与铨部俱属欺罔仆于报政先有咨于铨部实以前例有疑谓后任之俸非调官之俸而仆系起用之人非调补之人取铨部决之铨部回咨却以十四年题准见行事例偶遭诿误无玷公评命仆亟行乃敢行耳彼此实不敢毫髮有所欺罔也特仆名行不立衰老无用且物忌多取半岁之中躡叨八坐一子忝第一子冒荫其来憎口固所甘心计铨部已有覆疏谊不容默且辩且乞归凡老丈之所见贺者皆造物与羣情之所见忌者也己令人刈畝园草矣初谓老丈资望深重自宜留任内台旦夕乔擢而暂借绣斧按行中州谓当轴者亟欲为彼地士民造福然老丈揽辔之后斥阍复召人情变迁为鬼为蜮如虺如蛇不可揣测乃知天所以默佑盛德不浅也吾州所恃者花耳复为虫所蛀若高低稻禾稿死之余俱受风秕计其初穿■〈奘斗〉之费十不酬一虽圣恩浩荡且折且停而米贵转甚明春之祸恐不减昨岁老丈所云进则忧国退则忧家固有位者皆同之也若伏机隱祸恐又有甚于此者如何如何使旋聊此附谢尚不敢

修筐篚之报统容嗣布不宣

荅张梦夔

仆蠖伏草莽十五年所于世之贤豪长者一切沈简昨偶失意作白门小草则自所亲接外逖迤之诗章竿尺往往麇集至不能徧读而所覩未有如门下之盛者门下自云十岁而楞严圆觉十五而道德南华二十而屈为制科之业三十而复寻伊洛之宗则门下固三教圣人之上足也蜀地相如子云不足拟矣何论近时用修然而折节见推以仆雕虫之业许窥一斑者何也岂太山之穹窿而有资于培塿耶嵩岳游极闳丽之致与二室并雄矣岳忠武志窃窥门下之志节焉博而裁良史也钓台集则尊公之隱德着矣述节编则公家之内则隆矣承念谨成三节五言乐府一双梅七言歌一然不能有所裨于崇深也初秋当诣都门一领教先此附候不一

荅殷无美

前朱郎去有数行及后复致一纸计俱达记室矣赍武録人来得手教累数百言叙致所以不能见存之故且谓仆若有意督过之者非仆指也仆年已迟暮生平故人相隔数载岂不欲得片纸只字以当千里之面然夔蜀勾吴道里险远于鳞羽甚艰太守拮据案牍计吏扶服期会及入曹之后酬酢尚未能徧何暇议此且执事一作书必欲绸缪倾倒娓娓訾訾而更破郎官月俸如今者事又何疑于寂寥也仆自丙戌腊尽邁老姑之变明年四月荆妇猝中风五月瞻美感噎六月敬美亦如之日忧懣万状七月得先司马祭葬赠官诏九月有事先垄虽心腑小纾而悲感交集十月阿瞻死十一月蒙恩起佐留枢出候阿敬于奔牛即上疏力辞不允相知者咸谓上恩深矣即不能为身出独不能一为逝者出有所効耶故勉与病弟割明岁之二月出抵郡而少女之归汝南者物故矣闰六月得弟讣五内俱裂病卧久之强出视事足下谓此光景与太原公何异耶彼尚有天下事可易心有老母可解颜而仆尚碌碌恋金陵太仓粟者何也白简言之故当独不当摛及考满事欲破壊明例以表能触铨府耳仆中心之愧已被拈出且前路已极余日几何于此而更不求去非人也倘过太原公与日峯考功一从舆之君子爱人以德幸毋为我留地狱种子承示与骥儿及二三君子为兄弟尔汝交甚美事也儿近稍觉老成亦知事但本性既疎僻其忽详忽略或厚或薄尚未有定则兄幸时有以规之寄亡弟吊仪及与骊侄书即发去矣但骊病甚不知能作报启否此亦区区一种归思也见日峯石岩希致声不一

丁元父

自公之被尺一征也时方絶淮而南休沐故里忽忽公私之冗无繇一附问讯然至于私心未尝顷刻而忘左右也迺者杜门待罪稍出即得青琐之报不胜浣慰第所虞者公刚肠直气既当言责欲抒所欲吐不复濡忍今天下大者君德圣躬而言之如水投石了无所济唯士习民瘼此二端所不宜缓然民瘼显而易见不难于言难于处耳士习幻而叵测要湏洞究其肯綮深中其要害痛说一番纵不即行使此曹知所愧畏可耳老成之臣皆数十年所培养即成弘之际三老六卿孰匪黄髮而今动輒驱除之但为慄锐喜进之地吾不知其何意也目前立名易持大体难愿公思之仆失足一出致貽悔尤为故人玷业已再上疏矣苟不得请献岁后即移疾矣唯公见悯与主爵者从舆而放之归大惠也小儿想当得奉颜色余不敢赘

荅常博士

迺者部役自京回拜手教满纸仆之爱公重公实秉彝一念之好耳于高明岂有所效而过劳郑重致谢若以为公之有今日仆之力居多则岂仆之所敢任也向者公欲就南而仆谓公宜北岂以北为公荣盖声问易流考选甚便诚欲公之大展其酝藉也公练达老成仁心为质一时国器目中无两第于慷慨恻怛之际不免微露英发幸小韬晦之以防忌者仆考满至淮而有南司寇之命得借便一抵家哭亡弟焚黄先人之垄于私计便矣欲遂坚卧不出但既入手而遂袖之似非人臣之节故欲于季秋孟冬间暂之官了大审事入春即上章乞骸骨矣治行之际极匆冗中乃得公去思碑亦一快心事也余不一

荅龙君善

刘将军至复得所惠手教及扇头诸篇把翫不忍释手永嘉故饶山水弦诵多暇不妨游履以一觴一咏消之大足生活刘将军沾沾得奉足下末席自诧生平希絶之遇永嘉东道主若阳德大叅园林供张声伎事事不乏所乏者百觚量耳足下但对之独酌亦无妨仆荏苒忽及满考意得至春明门与诸公酬酢忘其小草为岩栖如伯玉迁客如足下辈一小吐气而行抵淮阴輒有南司寇之报返棹南矣归哭亡弟抚病妻按行舁中陂池皆龟圻舍家儿讼岁絮不已都不知有生人之乐且未免以官曹为逋蕪数月间更决归计也足下幸自寬六月暂息扶摇非遽加飡为故人慰不一

弇州续稿卷一百九十八

●钦定四库全书

弇州续稿卷一百九十九

（明）王世贞 撰

○文部

△书牋

王辰玉

前者草率以闻见轻陈之左右意从容为尊公达之不谓相闻致勤五岳方寸也大槩中人而姑为名高者负知负德古今不乏小人怨汝詈汝皇自敬德反而有礼禽兽奚难兄之恳恻宛转代尊公别白即仆寡昧宁至有胸无心者为簧鼓所诱也嗣后尊公信耗亦绝岂易所谓浚恒之凶耶然以先君子大事不得不忍訾仰干惟兄朝夕从臾使仆得藉手以见地下足矣圣主英断非凡仆陈情之疏亦不敢必上一听贤乔梓进止祭墓之外希及赠谥区区人子无已之情岂以望陇遂及蜀也吾州韩大夫佳甚八十老人谓生平未尝覩此贤守尊公上为宗社下为桑梓当一展眉头矣

又

前者小奴行以先君腐心事奉告寻又奉数行于浦进士所计已达矣昨得家弟留都信云尊公复有书托先事于旧抚公事虽无及而见为之切真踰肺腑且可以卜按君之疏之济矣仆闇■〈勿上月下〉于事机又不能识人纵笔信臆语语棘矜而足下推尊公之爱以亲兄弟呼我以良医目我令人惶汗无地仙师示现诸方之迹兄得之必真即尊公处已觉两相闻矣而仆则杳然盖自甲申一偈以名动之根为戒顶门针膏育药即非木石草芥宁不动心摄魄者第仆数年来虽是暴弃于淫贪险鹜粗不至染而前誓顿乖后期转逸再途未语似在隔生以故两岁之间忧心如醉又无可披豁者翻藉碌碌以支吾邑邑譬之呼酒解醒醒终作祸耳九月中所遭喻君其人姑勿论而遇师却真授方却的三日之间真气一动徧身周流诸所谓交任■〈启，月代口〉入泥丸击铁鼓开天门细至于手足指甲皆应期而达甚细甚详一月之后气若小微而时时脑中作补状此君不自秘惜第受之者十不能三四应耳徐孟孺陈仲醇飘然方外周氏子似不及前然圣狂尚未可测也当发心时凡夫菩萨当退心时菩萨凡夫仆未敢便认退心迹得

无似之乎兄且无慕二菩萨可也

又

自前一书附足下伸肺腑之感嗣后不能数浏览尊太夫人及母夫人以下俱清胜尊公晋擢宫保兼领秘殿诚为高门盛事然此自一年前物耳唯闻后庭有熊罴之兆乃足慰心幸加慎爱足下比索居须觅二三佳友为会文思乃大发骏儿比屈绍兴胡茂才与贤叔共笔砚胡奇士也毋乃太奇何更不如贤叔之自然精采耳仆半年来无小疮痍脾胃渐健肌肉亦腴此气之助也儿女病者皆有起色差慰目前第卦数行尽消息转更杳然读兄石堂钟磬语尚有生趣至尊公画虎之谗意气都尽矣奈何兄有密闻幸垂示毋若尊公之秘之必待激而后发也近颇闻相府之仆用事者极驯谨而依草附木不能无作怪贤叔祖处尤甚或云微纵之徐君小似寂寂但与吴尚作梗耳幸密发之过庭万勿轻露春和珍食自爱

又

得尊公与足下书俱极肺腑语致先君子事尊公之用情极矣赠官一节本不甚系轻重但使有祭葬先君子可以慰地下仆可以称人地上亦已足矣岂藉一阶半级为荣哉但此阻似亦有因盖仆于隆庆初伏阙陈情独高新郑与华亭公有隙修余谪于先君子而辛襄城为腹心据琐垣当时亦曾露异议于同事者仆久已忘之今则豁然而悟矣蒲坂嗣新郑之意而山陝河南又广二相之意以故腾谤于家弟而致阻于我宗伯太宰不能坚持以有此然仆之有推除大是蛇足必不能出而目下多一番扰扰儿辈无能资橐装又无能受笔札者尊公之知我反不如太宰之爱我也辱问喻君所传初唯默知其处以静坐为主忽一得之则此气周身流行殆徧在我则无意无必彼则至巧至信一月后却归脑中修补惜有酒食酬应之累不免作辍耳喻传后名大着颇闻好货乃好色盖其人不必佳而其术佳其师不必仙而师之师仙也闻兄家姪身者乃正配尤可喜将慎保惜在足下耳其详具尊公书中兹不赘

又

昨有一书附舍人子上相公度所欲告兄者无以异耳故不复别赘昨周三哥人归得手书语语皆肺腑大声之警自谓必身当之故促老斡制一容身之具以俟期至九十二日而山妻病大作又七日而气绝矣赖汤药之力复苏今纵未便作异物床褥间一朽株耳仆虽愚不及情亦不至作抔沙观料理医卜治身后三儿孥皆如洗蓬垢扶掖无缘

与之谋事日曠闷欲以少酒豁之了不知放杯处家弟近緣浮言不平偶触烦致痰火于
喉咽间作祟却不似渠兄之顽健也人所大患为吾有身一妇一弟皆从身得到此不免
作众生相如何三儿穷达付之天公大者渐老小可念耳第不忍其忧惶仲以一病躯加
瘁尚不知将来结局唯赖君相恩先人获沾恩恤稍有辞于地下前所上疏不知得达宸
聽否计尊公在事当不他也张司训生还故里感悅不可名状常君已息心除目矣而尊
公意若犹许之者何也韩侯转自佳十囚失一此不足为累相府车门若畏垒余颇寂然
徐郎疾亦未至剧（阙）所坐目■〈目夤〉口喎耳而闾里之怨丛积遂不减宫允台
牒时下（阙）惴惴有余警焉不闻伤类惩辙者何也周三哥便似更得一儿竖吾少子
一昔而逝却非疹也沈氏人便附此不悉

又

自得先君子赠官报及奴宾归拜尊公手书及吾兄一札中间委曲用情无所不极
而愚兄弟未死之念亦无所不满适有两信便然仅能为尊公作一书道区区之感而不
能尽却以地方水灾异常必须大加蠲贷尚恐资生之策茫然小民至冬不免流移逃窜
深知尊公与元老忧国忧民之切必无俟于吾辈之喋喋者第长淮以北中原山陝无不
饥馑上之所倚唯在江南而内费益侈司农告匱必非其所乐闻者岂唯不乐闻将谓台
臣借此以媚二老而二老借此以结乡里之心必不能无捍格以故迫欲各台及道府纷
然上疏以请辞危事迫庶几可以上回天聽下挂计臣之口而尊公得以斡旋于间顾一
时诸公之畏事甚于畏乱动輒以例为疑民且死矣乱且作矣尚何例之可言适徐簿便
附此簿与尊公有世契当无俟鄙言也河鱼疾甚手颤且眇憊憊中不次

又

近者两承手教具切念存之切尊公道体清胜兄德学益竒进新举英物成长深慰
遐思仆三月来脾气充健神观渐足第日为病弟刺促此心无顷刻安近得医药力始示
起色老荆沈沦床蓐譬之长系者袁氏女则旦夕人耳骐儿春时犹有笔研兴今则索然
日寻土木驢为巫禱所苦骏为贴屋所困加以岁荒两地征输食指繁众不知作何结局
小疏可得请否出处之计至今犹在触藩唯视病弟痊否而已三年前蒙先师训励似在
隔生此念未尽死妄期消息而尚杳然尊公上所寄心膂也岂得自遂其洁唯有放眉头
展肚皮慨然担当一番不可而后止魑魅魍魎既多岂能以符力驱摄唯示青天白日使
之自消耳草草附此详具尊公书中不一

又

得手教累纸具切肺腑之爱尊公所以见海者尤更药石敬当比于韦弦仆十年前在千迷道中名姓堕猪鬃关几被嚼碎然此衷却不甚惭愧故依稀为上真所许今赖尊公夹持月旦稍升物论见趣而尤悔实多矣病弟虽见半减而食饮尚小妨痰涎时壅浊气上升每一念之心如猬磔病妻不敢称半人延岁月而已兄既谓此人可出出又可久毋乃非情耶今岁荒甚而大儿急于兴工小者贴之俱竭仲儿故贫而淹没更甚所授三儿书画之类入人质库今亦尽矣公私逋负茫茫无一长策一冬至春阴雨连绵人情恹恹念且无岁唯是岁朝穀日上元风气美淑差可保耳袁了几条议虽有可行与不可行者仆力劝兵公请之两台或题请或咨部事不宜缓毋为人任怨不知其意云何想当不大异也今秋兄必大捷坚吾与驪侄分数故多骏儿却少然不至如驪之杳然也二陆亦可望第当有出于意外者山东诸生杨烈者异人也此人他日得第必为国珍今则未可中耳尊公所欲用人甚当兄须为从臾之匆匆不暇甘寝怀抱恶剧先师恬澹待之亦似可过王尉台便附此不悉

又

仆以十三日离家三月朔抵任病弟病妻割念而别尘劳满体世情满眼虽未敢于恬澹之念有所变迁而回想初盟则地狱刀剑森森矣此官幸不作坑塹但不免伴食之诮如何如何其诸事体备尊公书中兹不赘两儿在宜兴试小者笔胜而首篇大穿凿二儿此番颇胜数次俱可望科举坚吾驪侄则皆一二名中人也袁氏小女竟成异物荼苦已不可言而新得子又殇造物之无情如此道情世法两地茫茫如何如何今岁兄必首掇驪之附驥仍似舍弟之与尊公却倒转南北耳前见尊公信云欲用徐贞明何以不见除目外议尚以艾（阙）之不起邓（阙）之不补为缺然清燕之暇幸一达之冗极不一

又

昨有任后题知疏去草数行奉候计已达矣官中颇无事但五城日报饿莩及缢溺者闻吾乡更甚麦秋虽似可望而阴晦不恒人情尚汹汹吾乡案到贤叔坚吾与从子驪俱领批而两儿失利骏此番文意逞而气不畅语疵而理不切虽微有风气得不胜失宜其尔也驪比之两次差通而遘此厄要是詹君用意崇雅黜浮耳骏方杜门思讐有孟明焚舟念然急切岂能便改手况工夫全乏纵得观场亦无益也驪直要入监橐中无一钱而谋此不切事可怪可笑要之二子俱不宜出试且用三年功力或尚可希覬病弟殊未见收功春事可无他却甚忧其八九月仆既入樊笼求脱不可业老矣造物所以优我者

不过一南省卿所以抑我者不过一白简即极不过一大梦皆非所萦懷唯作此行径恐日渐一日无面见我师真耳太夫人万福佳儿长成阖宅平善兄复藻思焱发所以慰尊公而纵之一意国是者足矣童生案尤有可笑者（阙）若騷与坚吾尾兄之驥尚不失通家一段緣也余不次

又

迩不数闻问知方与诸友相切磨风气日遁上一战而霸此其时也仆在此与影相对开卷弄笔亦不知有离索之苦譬之一比丘移别寺住持耳祇是偶值试岁五日輒往太学拜上舍更少时诸茂才益垒集矣征文之役殆甚里居心甚厌之而不能拒然此二端皆自作之孽实无可怨尤也儿辈喜事时刺促欲仆有所陈说不知日覩邸报事事强人意若掇拾旧谈以了事过为可骇以钓名皆非吾分也目下旻雨小时米价亦稍落闻长淮以北禾麦皆收儿曹皆赤身丐儿耳仆毫髮不以累之月俸尚堪度日故不敢遽言归过秋入冬便力求尊公放还故山与病弟相守人言我为贫而仕当无不笑者要之脱此窠臼不得也驢儿稍就格而才气索然骏犹时杂庄列语纵得与观场必无可望駉駉辈倘一获僦即病弟延年药也兄俯作胄子不足为贺第便于入场免弄此间司成口舌亦佳耳九卿贺启出仆手文侔俗不足言或于尊公心事小见一分兄试观之李吉士于前月十七物故矣行时见其病小愈神亦清朗闻好色如故此是其命短处周三兄已有圈书之役剧可喜中石事必济但须待六省人完此间桂玉极艰相累不浅如何如何

又

得兄书具悉三老之云云盖过疑羣不逞之妬口而误出添足之下计仆故不以为然然有所闻而不告似非骨肉之谊今兄之卷一出则三老啧啧叹赏而妬者亦自心服觉得尊公微伤动气耳坚吾书述贤叔祖身后事极详乡失善类族失师表真足酸鼻人但知其遗帑之厚而不知其薄若此南畝既不多新举之儿似太少未谗其故第恐昆石尚不能无血气之累下人生事或有之兄家斡仆又逝良为可虞令姊丈又在都下仆以为劝令尊公以一札托坚吾令暂铃束之何如仆迩来亡弟之外骨肉渐尽知己零落以故迫欲乞归诚知归之无益于亡者归之不能即死与归之但深其痛且冀杜门息器或覬聆师真之警效于万一不意不获请而博一温旨又博兄之力挽过饰使我作一虚套子如何孔庙疏诚知其不见行要世间人留此议论耳见李掌科一疏似为礼折衷又似为仆解淡一笑驢儿感尊公与兄情谊刻骨第能法兄为文不至落节法兄为人不至落魄足矣家门衰悴之余诚恐折乃公福不敢有过望也周元孚已到此虽意气如故而渐尔老练可喜颇与倪郎中忧及船政之不能久得渠一揭甚明録以呈尊公唯燕间致之

张仲立生子大可喜辛为道意骀駮两孤适在此商略作行状毕日專求尊公及兄如椽之笔也不宣

又

前月廿八日得尊公手教具悉独不及仆考满及升迁事而骐儿一信云与太宰议代陆司寇又于考满无阻及后征之了不异盖尊公议定而不泄恩施而不居大臣之道固如是也闻旧规既领新命身不必入京但以南铨部咨往即得题请复职而恩典亦随可得且获以其间归哭亡弟抚病妻焚黄先人之塋又免酷暑驱驰之劳襁褓伏谒之累秋毫皆尊公赐也此归欲遂坚卧但叨窃已过甫入手而即袖之似非臣节且揆神理不免九月间驰入留都了大猷事献岁即决归计此时却恳兄为尊公从臾之勿作前逗遛也故乡之旱极矣禾苗之不及种者十八种而萎枯者又十八其存者固无几也目前可恃者麦而夏至秋冬之际靡论赋税何所衣食明春单赤之苦恐不下戊子而中产以上其苦又非特戊子而已大司农方下书勒停有司奉俸完旧逋是何枘凿之一至此耶尊公与元老又当作一番极难事今万姓之命待苏于二相而二相皆吴人上恐未必信左右恐不能不相沮大司农恐不能便担当中夜为尊公思之计无所出适覩邸报有乞假调理之章非以渐作归计耶上之所以待尊公至矣尊公之所以报上者犹未可言尽也一不宜去乱有征矣宰相之难未有甚于此时者二不宜去仆非不欲尊公出热海而超然于清凉之境谊与势俱不可也小儿欲求一差归视其母不审应否坚吾复有母之丧且妨试事室如悬磬而又遭此凶岁医药丧葬之费复不訾可叹可悯兄之曹氏姑得奇疾而卒太夫人闻之何以聊日唯秘而勿宣可也因念高门自贤叔父母变后徐氏姑之夫继之贤叔祖继之令姑姊又继之岿然者唯太夫人及令尊公与兄及两儿耳岂邓林之一枝独茂而余皆枯萎耶仆兄弟姊妹亦遒尽孑然一身缺陷世界无足言者袁嵩阳贫甚不能具饘粥意欲得北迁仆谓此官非贫于南而饶于北也周中石亦将有北行盖穷而无所之耳朱五舍大病初起欲与仆偕北幸不成行须秋凉可也薄物将候不一

又

前自遘訖之后屡有书上尊公时方在抢攘又计所以欲告兄者已悉之矣故不复赘乃兄贻我一札不唯五岳方寸白虹缭绕而中间描寫小人情状洞究事体机關详且核矣彼御史者自去岁以来颇露悃悞示殷勤每读一诗片札未尝不对人津津嗟赏也近因台规之疏触忤其二长恐铨部见斥急欲摭其隙以塞之而会有力言仆之不当考满者与曾见台之不曾考者故锐然而登白简更以无玷公评一语遂肆及我之行检当时辩颇出一时激发故令骐儿请正于尊公去其甚者足矣何至使太宰删削至尽也此

人已出按部闻欲移疾外论羣然不平仆对人唯言会典不载致有纷呶渠本非有他也世路险巇物情变幻若此而尚可夷犹其间骖骹闾飒苟窃升斗之禄耶不归何待仆履任不三月而闭门待罪几三之二法曹多有叅疏以故强出视事而一面乞休得兄与尊公鼎言谋之元相不下部覆得批休致万幸也不然于来春二月必请告矣家间信来驷侄痊愈之后胸腹间或结一块痛不可言昼夜不能就枕日啖米饮仅瓯许肉消至骨大热不止医药未效念先弟见弃诸羣从中唯此儿最贤孝而忽狼狽至此使人何以苟活书及涕泪涔涔前见有史馆冠带之疏周三兄必当预其列朱郎武第亦足助尊公解頤不知何时可得选也太夫人比康胜尊堂阖宅安善为慰不一一

又

兄每一书来字字肺腑若深知仆之当去而又不忍其去者宛然天真流溢令人感叹无已今江左与中原不得志之徒多结好名负气者以伸其所欲又各自为党掎击不止使国体荡尽陈君之见攻想是于史李之际微有偏主耳然御史台风纪之地吏科言路之长为人跽藉不直一文可叹可叹黄御史之外迁与我何毫髮与而其党举以为言盖借我以钤吏部也如此世界如此光景尚可一日恋此腐鼠耶昨驷儿书付之骊儿亦曾送兄看否赖此逋者得获送官闾并不根之谈自息然所谓江左不得志之徒未尝一日而忘异日地也仆之在此日如坐垆炭上若不获去只得觅雒廷评行径耳与尊公从臾千万放之归便是一杨枝露洒也驷侄得遗腹男庶几为善之报想兄知之必为称快贱体日来渐觉衰弱只好收拾残身以了余日检掇余念以期隔生余无可言者手疮甚不能作书奈何

又

前有便信之都皆匆促而计所以告兄者尽尊公书中故不复措意乃屡承手札拳拳皆肺腑语令人感愧无地区区衰病已入膏肓顽儿致一服当归而国手益之以王不留行刀圭入口九窍皆快闻报次日即发归即卧舁中风气清淑花竹鱼鸟争来相媚暇则呼儿子辈侍匕箸贤叔坚吾二三知己相与较阴晴谈风月时进酒筹欣然忘其数也承尊公见诲杜门却轨自是请告故事将来唯笔研债未能尽除盖比岁水旱三儿之蓄如扫所有书画酒鎗首装之类悉入典库国赋茫然未知所处骊驷私负约各近千食指众多往往枵腹仆不能复责其供养搜橐得少余俸可以支持至冬若不藉此小润笔明年立稿矣骏笔向苦鬱塞支离近觉充畅且课与其兄驷及两犹子会习时业诚知得陇望蜀神理所忌然于世法中不容已也五日前曾梦乡间故居水大涨溢溪池皆满顺流而归甚畅私谓骊或可得都水见尊公教欲为之计一差归省似亦近也每过亡弟所见

驷棺老泪横流退抚遗息长大端正有气骨差为之解驷之死遽迹大小人人痛惜其志行兄所素悉幸为草一传不至泯泯同草木亡弟志铭亦望过庭之暇一怱恚尊公百世之感也钱孙二进士居乡为乡人所称重钱尤淳■〈廿马〉可爱近时浇风为之一洗计兄已知之贤叔祖坚吾自是明达君子不负留后昆石患疽恙颇重发不当背可治也道印之徒少而老成且各与半给俸奉香火若何可达尊公裁之不宣

又

朱壻归得兄手教具悉颇以尊公所苦为忧寻得六月初九日信则前苦已尽平而兄复有弄璋之喜此德门大庆事也主上英明能信爱尊公若此岂得便遂雅尚不若且不挂口亦不置之念今视朝聽讲已成虚文唯得小节豪饮大减威刑使肘腋之地稍安意外之祸不作则尊公归亦得不归亦得候气之效已为尊公详言之矣伎俩只如此无大益也承欲为两儿谋令就北试非骨肉深爱何以有此驢儿不能赍一月粮与其母不能作三月别骏儿之橐索然岂暇办贤闕行径耶会考两次觉驢颇有神色騷与陆仲鸣虽不奇进终利场屋骏则尚须垆锤也申相公为先君子神道碑纖悉不遗而文特精雅有大力必传之作也亡弟更得尊公一志铭区区亦可以死矣千万留神从臾坚吾日苦刺促文思几至茅塞故乡旻雨稍调秋事可必如去岁独东海之傍大熟租入亦倍有以为有天又有以为无天者见郁轮袍声调古雅开拓得元人三昧云更有别作不知可寄示否达观莲池俱法门龙象达观更脱洒然结习未尽除不敢便谓悟境也毒热兀兀裸袒偃卧益感尊公见就之深不一

又

前使者去方在病中仅以一书附尊公于兄处不能复作此病几遂成不起之证幸觉之早而盛后和来诊脉知其无他用药粗有次第今嗽粥甚调畅惟元气弱耳自此戒杯勺疎笔研将来尚可作一木石鹿豕也尊公所请不允当更焦郁圣上以元老之礼礼之以腹心之寄寄之今边事孔棘举朝劬攘兄度此理势可得请乎纵得请于臣子之心安乎仆之急尊公归殆不减尊公诚知其未可也故乡岁事甚佳亲故无恙贤姑贤叔俱安静坚吾颇加整摄亦俱收敛惟吴金宪喻利而敛合州之怨陆行人负气而逞匹夫之勇陆以能治吴为义举少年附之日闕不已识者快吴而甚陆二子皆有官不作而树牙吻之戈戟可惜可惜仆垂死之人而及闲事第发兄一笑耳余不尽

弇州续稿卷一百九十九

●钦定四库全书

弇州续稿卷二百

（明）王世贞 撰

○文部

△书牋

屠长卿

始家弟归自都下津津道所新知尽豪贤文士也而独称屠长卿者尤瑰竒不伦既沈嘉则一言之而此间有曹生亦于行卷一再见长卿诗而言之仆自念且老矣幸尚得当生安能缩地成倾盖之故而亡何使者至矣启械读之累数千言舌为燥而不忍乙且畏其尽也雕龙绘辞碧鸡宏辨鞭霆掣雷搃金拊石一扫千里前无留行即使庄生谈天季子论人尤且捧盟盘而让牛耳况其它哉足下虽雅言二李先生而其许不佞独至念不佞独切甚谓不佞辞有于鳞有献吉有往哲而又自有元美广大变化所以极玄斯言也岂不佞所敢当然不敢以不佞故而掩足下之鉴也文章大观竒正离合瑰丽尔雅险壮温夷何所不有此数言者执事所独造精理之言也平生辛苦虫鱼自况出竒间道终属偏师子云十六字狱案也然其为太玄法言则然诸赋及谏单于入朝疏不尽尔也于鳞居恒谓富有之谓大业日新之谓盛德拟议以成其变化为文章之极则余则以日新之与变化皆所以融其富有拟议者也间欲与于鳞及之至吻瑟缩而止不意得絶响于足下也至足下稍有疑于仆夫足下岂惟仆疑也将仆子箴也夫仆之病在好尽意而工引事尽意而工事则不能无入出于格以故诗有堕元白或晚季近代者文有堕六朝或唐宋者仆亦自晓之偶不能割爱因而灾木行当有所删削也嘉则雄于文与张大司马之宏博稍加以深沈不惮绳剪其传后何疑沈冯二君非足下精言之即仆知之亦豪举耳沈君归尤大气色太史异世尚思为之执鞭况乃今日哉佳集诗语秀逸有天造之致的然大厯以前人文尤瑰竒横逸诸子两都而持论破窾胜之第足下之年与结撰日升川至今以姓氏称集似小未宜也或寓别号或斋名称稿何如扇头一诗不足当旗鼓第区区莫助之爱倘不以人废也方困客数就草数起而使促报甚迫不一

又

公五言絶复佳甚仆似小优于七言然亦不免为事縛耳嘉则至复得手教及扇头诗再读之觉芳兰袭人中有与太白少伯抗衡者第二子恐不能作多多许多亦不能无出入也大抵在情事间不縛不离乃为佛法上乘要与公共勉之嘉则谈公不絶口仆生平愧文人无用一言今日赖公吐气曹子念须髯如戟亦解作情语奋然携所作请正想亦当针水契也

又

乡者语足下谓具一启当为上之师真也居三日而有鲤鱼之札至其緘口密而貌甚整以为果上之师真也则驰一介投元馭宗伯发而知其误乃师真莞然解頤顾谓元馭姑志之此子才识志行非肉食者伍也第福业尚未竟应须于苦海中了之又再三致声但坚持启中语时至当有为若师者不必我也盖元馭之报札云尔又三日而始得足下书具悉仆于班生品中下错也试令足下迹仆以为粗能读书晓古文辞而已不以为世所恒言名利酒色人也几希即令仆之左右前后亲信者不以为名利酒色人鲜也即令自迹而能令必自信以非名利酒色人亦未敢也一旦误见许于上真即幡然而应之其屏黜一切嗜好若承螭而不为难然后知向之于是四者浅也足下之节坚矣其好善恶恶至矣是四者当不足以累足下窃亦以迹窥足下所不释然者名耳夫名岂惟不释然且好之夫岂惟好之且好之甚即仆所自验其后来而最后去者亦此物耳名者毁之孽也毁至而名败犹之乎可也名成而小不称则造物所忌也夫岂惟忌之且侮而戏之滔滔者皆是也独吾吴中剧耳足下过自摧抑谓兰台石室名籍素定而不敢覬子不仙固不敢覬兰台石室之有名籍子不登兰台石室又安知名籍之不有子耶丈夫患无志耳木可使穿石石可使作镜而况一身中事耶勉之勉之师真之旨仆当与足下共勉之

又

得手教具感护法至意别纸数字想李使君报札也此君敏爽固应作针水契第坐客何人得非吾邦大吏乎所谓阐提见不足与校也兄不旬日已成仙师传详丽出刘中垒上郭光禄陶都水未足儼第仆居一再侍仙师意似不欲太漏光彩又亟戒仆寡言而篇中过情之谈往往滥及仆仆不敢辞世法谤恐得罪上真耳记向者师与兄书谓大道知之不言言之不文兄不能忘言且又文矣其姑秘之以为篋中之寶若中间小有传闻异辞輒另列上从容质元馭先生可也由拳集读之真如太阿出匣霜风飒然又似甓社湖头覩明珠目眩睛遯不佞焚笔研来无数日而慄然有起色结习之不易祛若此序中徐长孺不满六尺能作才语多多许亦可念也雅贶拜领遂附不腆之敬惟恐藹渎为

荷

又

得手教满纸具见精进至意足下上有老亲纵不能具三釜共旦夕五斗足分差胜菽水一行弃官世法薄恶谁为相念者且神君坐堂皇鸟雀昼下浮云卷舒悠然自得何异深山道士轻徭省荒贍贫理冤种种皆太上功德何似作旁观人仆虽具一片心无繇吐口足下但守先师戒勿正勿忘勿助一切爱憎烦恼以外境待之毋预灵台事五载当自有奇证也尔时或可了夙诺但恐浓艳中更成寿者相不若于今易作众生相耳仆向衰之景未尽而却非關果勇独居殊自足快不知究竟何如足下云欲见访若八骏传呼不免学泄柳干木如以一苍头至者仆虽不及遠公安忍拒彭泽令不援虎溪故事也隔水禅堂成尤可憇昨徐彭二子为元驭挟过破例见之舍亲王茂才索一札先容不知曾贄行卷否先师传更无可议幸其意亦然无妨纸贵也

又

每读足下由拳集见与冯开之书輒媿媿不置私窃怪咤以为何物冯郎乃能倾倒足下寻得足下所致开之尺牋诵之令人口吻习习吐五色气如夜行鄂杜间遇蹶剑御风客亡论为仙为侠要不作人间人非足下当之旗乱辙靡矣仆中间所最爱者七月一书于放逸中出精理其它叙事殊藻雅有思不知他文定何如当亦不落夹也此君材高信如足下言能幡然者异日不妨散僧入圣不然恐堕谢康乐道不得过白莲池一步也又足下与君典书皆似为此君先容谒元驭直塘者而竟不至得非中流言谓元驭督过之深耶子絕长者乎长者絕子乎大可叹也别纸缕缕纵微足下辨亦宁信此事第仆既面壁不复耳世口又不获口世耳如何如何抑开之牋中有云信子之心行子之事任子之命敢借以为献沈嘉则岂亦有桓征西势耶乃能笼罩足下与开之若鷲雏何也将无夙世緣耶此语莫使闻之

又

仙师龕以朔后二日子时发徐墓先七日与元驭祷于圣师自是剧晴然暖气拂拂如暮春东南风怒甚意忧之舟发三里而雨抵北郭浓翳忽轻隙日四注云物鲜驳中乃有一星煜然道俗效旌■〈施，童代也〉炷香前导约二里而遥夹輦观者亡虑十万人即稚子靡敢作骄笑态既入观安置再毕复大雨明日偕诸弟子之元驭所叩师阁礼上真与师像时阁前有香井故师所选凿也维仆与家弟懋往者一沾赐焉则与诸弟子

约人醮一杯甫徧而从行者更取饮则甌中余水忽大浊以视井井亦浊矣兹事不欲闻之人特以报足下亦欲为足下精进助耳前后启二通俱拜祝于几而焚之最后莫廷韩致足下一纸云欲令渠作小楷丹石而就剞劂甚佳传文精絶无可复措商榷内九日化事云顶作两髻而后却称祀徐郎墓截右髻置之似小抵牾盖是日以截右髻故巾裹发前横玉冠寻解见授去巾为左髻耳弟去前双髻语可也足下或有公期来此一瓣香了未尽心仆虽痛谢客尚堪修庙祝装以见

又

月来不见公竿牍一见之觉九咽中作甘露洒爽不可言仆虽已捐家累入观夙兴粝食仅能作一焚修人三庭沉沉未有觅钥处先师示慰亦为倦马顾秣加一鞭耳非遽有所印证也谕及使人愧汗公何时能一见过元驭丈好种植不下苏长公环流花竹滢郁峭蒨此间外境殊可观近从续高僧传得鸾大师遗迹兼他所考据又得二三事輒仿传体以一记藁之垂脱稿矣元驭丈刻公传将完却并上也公才太高诚于淡之一字加力应世出世何所不可田叔九絶句甚佳向熟其人落落穆穆故此中物也

又

蜗庐抱影闻履声而避犹时时为乡里项领及他方竿尺所苦然至足下一书到輒洒然自快唯恐其读之遽尽也游仙古选及送先师十絶句故是金台宫中语令秦嬴双成辈以凤头鹅管奏之金母必将欣然而思和也发足下书顷开之亦至俨然深山道士观觉章台风流淘洗顿尽云斋素来已三月果尔则输三车菩萨一着矣兄与开之才正敌于大道入路小殊然各自有进处仆外状可耳殊未得精进实如何如何来札当以示学士相钦叹也两种香拜祝即于师前爇之宜真子始以（阙）点鬼耳不意能慕至道去迹亦甚竒小儿顽愚何縁便任千令升役亦尚未见之

又

得教札饰奖令人愧死无地仆虽名为弃家而日见溷进香者琉璃光所谓聚蝇方寸鼓发狂闹间苦亲旧搜索必获而后已诚知恶动非静縁在学地不能不尔元驭每相谈及輒为攢眉不知遠公何縁必须靖节也足下云车中枕上朝夕不忘提醒此心而名障欲根苦不肯断具谏别后体认之切政恐足下不自觉耳既觉之故不难克也妙明真心与妄心本无有二悟则为真迷则为幻知色即是空则知空即是色所以水沍为冰冰融为水若别求照心以破幻心则又误也足下试一体察自朝至暮刹那之际何往而非

声色香味触法感乎但听其自来自去不于此而生住心可耳足下谓不当以六祖偈而废秀法师此是实语不诳语秀法师但不合得衣钵耳黄梅示学人何尝一日废拂拭正谓拂拭不透无繇窥最上乘忍大师一片热血少灌顶处不得不堕六祖壳耳且秀法师以识字失之六祖以不识字得之吾侪所坐病不可不猛省也晚来出足下书元驭读之叹羨无已聊用附复不一不一

又

学士方苦河鱼检囊得宋人山水花鸟两巨册相与披阅甫竟而足下诗卷至尽读之称快不已一日而获两巨丽观学士遂忘如偃成一大笑此何必减陈琳头风檄也学士谓足下晨理十万家讼赋发百函牒如刘南昌夜燃青藜油七晷如刘中垒何物白驹假足下春容篇什也上不虞真宰嫉下不虞丹元君诉乎仆谓不然春萌夏敷必须东君发舒一徧然后秋水涸天根见不尔于万寶告成时能无更吐颖萼也足下雕绩满眼中亭亭初日芙蓉虽极精思出之自然异时采风当入葢珠宫乐府何虞也言路君子本以学士作奇货鬻之不售徒自下阿鼻种耳佛言无诤儒者不辨学士庶几近之如仆则鲸剿人作过即论鬼薪何碍所畏外魔易内魔难划耳足下有皇甫威明恨何必尔世宁不晓西州豪杰正谓度辽少替人也一笑嘉则昨在吴阊有数行相闻掷来高僧诸传法藏碎金俱领讫不一不一

又

长孺来一再相过匡坐小语輒念叔度大雅思一倾倒而使者则以手教至矣承欲假行媵便轻刀见访故是夙懷弟与学士商之谓彼此尚得齿颊中令君三日香不无碍贵人鼻息姑自抑止如何仆于焚诵暇亦拟如野干学比丘坐第有可笑者于难忍难割处颇得斤斧力而时时受役笔研于不切身应酬亦间尔枝蔓白黑二念能不令起而不关心游念不能不起移白莲栽清水中未见吐田田叶当由根器腐耳四诗从葱岭葢宫来不妨风人之致独过见饰獎非所敢任幸寬之俟兴到或能少酬来美也所致有公即为达讫此公虽善名理而不复措意竿尺仅以一刺报谢惟兄能置维摩诘之赏于言外乃可也吾二人曾有肺腑托之长孺想当悉之君典遂不出關令人五咽皆作青精气也

又

足下书至之三日而君典苍头亦至矣所叙致与足下报同此入虽秘书郎与奉朝请何异必不捩人眼鼻祇緣敬亭一片石为月旦所依故逸口易生一踏金明池此曹唇

吻立解矣张郎故雅好文慕古亦自过庭之际窥得之足下除日至未耶如至者何以趣舍人装开之常为念之开之又云足下易于感恩仆谓不至是所忧足下轻于推腹耳此君得丙夜促膝谈使人都忘口戒遂成齶齶大抵阿兰那人也人我相俱已轻但不宜诱菩萨行耳京口之变物情汹汹幸有李使君足仗李于此处颇作小阴德恐足下要闻之

又

扇头五六言絶把翫不忍释手青天无恙语近过蒙庄彭殇境三舍若磨铜作镜彷彿祖师禅矣辰玉得之知当豁情散哀也当辰玉纷纭时学士忽见谓君典家有人来乞法井而不得其手书云病势甚可畏仆忧懣之极从楚俗筵筮详其旨似犹善汤药句中杳絶后耗今得足下信当无复深虑聊作数行慰之且如来教略下一针或可于便邮致之否除目尚自杳然故当不闕足下五月初当为太公效不腆地下苟必欲露丑于石则章藻其人也余不多及

又

旬日前有传君典太史非常者仆絶不信之以为吴中人甚口当时用前病剧误而足下已有信来云且勿药故不宜遽至此居数日而辰玉自南都附一书亦云云方疑之寻而伯玉司马书亦至矣此君短小精悍筋骨遒满亲受先师指证以为即亡论后日月等松乔小自消息可以尽本寿而竟为二竖子所凌造物者果何意耶昔人推济胜具无隍于许玄度者而燹至一帖遂成不起岩穴筐篚竟复何益交遊中俱言此君有长卿茂陵之癖而广综吴兴之艺日进北海之客得无伤于所恃耶追念先师所授书与戒弟子遗训毛骨竦凜若以进道为疑仆宁负吾友不敢负先师与大道也伯玉以状属梅生而自任志铭又强仆以传殆未知有足下耳足下幸任传毋已仆敢效不腆于隧道一石可也迩来闻见可怪可忧可喜种种或鬼或神或魔或亡赖子作幻古宿有云老僧不见不闻无尽敢以此言进足下幸一切汰省之归之恬澹方与元馭时相勉耳向仓卒具草不足为先公地下重万毋灾石也

又

仆百不获已有此云间之役所可自解者往返得接足下一谈耳足下清徽韶音与两夕风月等快而虚夷澹泊胸中一片不朽业销灭都尽归与元馭言之叹服无已大抵吾曹不患不日益患不日损耳所饷都布单衣遂不下拘尸那城白氎欲作一诗纪之而夺他文债未就小间却污佳扇别令阿段驰上也家弟计已饱张公玉女色可返棹元馭

为尊公恋美疾刺刺无舒眉时令人敝见之小儿试事粗能成文辰玉孟孺笔陡健想皆所欲闻者记春时有甬里赵生见过以古今文辞见示似可进者而苦数奇今复出手篆百韵古诗读之不知于葢珠本色云何若俗调粗亦了了耳今附致足下异日或可作药笼中一物也

又

前者吾兄使使相别即驰一介将不腆之书币于吴阊而仙艤已发矣旋以付使者知当不浮沈也舍靖以来吉凶之札不能出一城外而姓名犹籍翹材馆以故长安故人虽至懿密如兄者亦不敢一通问得手诲娓娓如面所云名根洗削且尽欲根不易除此是体验真至语仆何所置喙第兄于欲素泊澹或是年力方壮触境偶发不能自禁稍裁之当自弭戢耳名根却恐未易除贾生曰贪夫徇财烈士徇名夫徇名之过烈士所不免乃知其中人深也无所触则潜伏而不之见有所触则驰骛而不自觉吾侪日日受役名中意未之觉耳兄再从容体验之如何仆昨春一病几委顿幸而不死为子弟强小脯修差得复念百事可解而雕虫之业政与名媾其累心重而耗精血不浅以故新正于大士前焚香誓断之然宿诺尚扰扰未尽静也留尹筭及乃是庙堂搜宿物见而怜之耳此念已于庚辰岁首炼过必不至复动乞骸疏上兄可为我一缓颊得早赐覆罢含菽饮水有余荣矣区区此时此身如寒号鸟逼岁无一羽可采放之自活不逾于在网罗耶春暖加飧自爱

又

仆自重九日辞曷靖移止乡落环堵丛棘耳目无所覩闻而元驭先生与家弟言足下遘萋菲问得之何自何白简不肯荅但云咄咄怪事而已夫豺狼之搏欲饱其嗜蠖虺之嚙欲泄其毒此二者于彼无一言譬之獠犬骤风撻之者伤犬亦垂毙东教以为偶然西竺表其夙障自可彼此无恶同归解脱足下铅槩之业千载垂就如欲息而成之真宰所借日中未昃脱欲奉仙师之遗训则足下自称不能晦迹遊道太广虚名累身造物所忌便是实际语今幸为足下铲去之消摇寂莫一丝不挂柳州有云祝融回禄之相吾子味哉言也间与家弟语文士一段蒙气在顶上似尚未散即不能为足下投逸有鼻宁不有子美子瞻故事可以收桑榆之用耶仆亦似多此一见蹇使君云搢绅怜才惜冤颇有为解装者审尔尚可亡虑桂玉太夫人含饴弄孙足慰目前倾倒之期多在浴沂自爱不

又

自足下东归后虽尝亟附讯问而不能有所致伯玉昆仲称足下间过诤中与诸贤
扬挖风雅微相抵牾要当于口吻之际小柔之耳越客来多谈兄不能作生活居间小润
輒与客共之乃者得手书所叙窘状真令人鼻楚太夫人■〈廿马〉老岂可令与兄分
苦昔人有炙鸡奉母而以麦饭食客者遇达士则为定交遘盗侠则至焚舍要终不以客
而易母也足下虽不作于陵仲子溪刻自处第客来不成炊清谈而别炊则脱粟草具厨
鲜宿肉当亦有相亮者三千里哭沈君典若必巨卿素车白马故当不易即用孺子絮酒
炙鸡例轻刀一叶何所藉三四十金也燕中交遊近始有明足下不及乱者弟縛口之獬
舌犹狺狺化鸩之鹰眼尚耿耿天地虽广知音者希大要置身法中放情物外千古之身
谁能便就不使至泯泯足矣仆偶未死耳何足为足下道所云蓬门不启始觉耳目神明
皆为我有万念都灰冥心此道颇得证验甚慰慰弟恐是暂时岐路启门之后六贼縁入
依然故吾未可便谓证验也所谕阿敬在仕路作火宅莲花否乃兄结胞莲花中不能不
吐火焰此何可保哉大儿近始移止乡落谋借三余次儿善病时亦潇洒小者于铅槩之
末间值知己辱问及深感通家之■〈廿马〉辰玉十二日奉太夫人尽室北上矣徐孟
孺有阿母之变圉圉苦块中仆不能尽却笔研役然未曾受尺缕一斗粟以是有愧而不
进者实无可奉为不腆十金窃比于微生之醢佐太夫人一月甘毳不一

又

得足下书千言引我通介之间竟我出处之迹中间释疑解嘲无所不极虽使仆自
言之必无以过第仆不敢大自标鲜为识者捧腹耳长篇之致要亦如之而乱语毋恋管
炳则如下三危之露醒此尘吻岂唯发蒙乃知足下之爱我终自与世人异也仆所以不
能坚匹夫之节者盖有渐自入十尺靖以后谓苦海震艤中得遇导师天下之乐举无以
易者初不因同志之大拜而生羨亦不縁同气之出宦而自孤祇为先师未有所指授间
从所闻得其一二影响行之輒不效而茹素久脾髡衰滑枯坐无聊形神削惫茅茨之庐
暑不敌日寒不敌风乃改就园居随俗消息气体稍稍复故而儿女之私与逯迯酬酢来
饶之矣居恒忽忽当此寛大显信之世而先君子仅以故官就土人子死则已不死何以
自安而会台使上书乡袞垂悯覆盆之苦得达九重饰域鼎祭遂同六卿密印金书正位
司马盖谢疏在国门之外而仆之征书复下矣一时诸公谓上恩不可久负朝命不可偃
蹇故不能如甲申之坚辞龟勉一出冀小有所报効而遘此百六字内衡生半转沟壑才
弱智浅冗散一官惭颜如甲已矣旦夕惟有归耳长卿胜井丹一语足下至今尚懋懋向
者小夫不能于眉睫上安足下一犬吠形百犬吠声仆固保曾氏之不杀人如证者何事
久逯明矣独迯来汹汹尤不可解谚曰宁逢恶宾莫逢故人信非虚也足下既自谓于大
道独遇明师抉真秘便当奉母杜门优遊理性间有著述期之不朽十年之后天上之云

駢与人间之蒲轮一时并集兹时固唯足下自择耳然仆妄谓足下才太高志太锐气太扬不唯戈戟世态亦恐枘凿道机勉旃勉旃老子所云昏昏默默又云和其光同其尘愿共勉之与绳司寇为国怜才诚如足下言每见相与扼腕足下仆尝谓目中珠胸中金石皆不可少者张太学人便附此不悉

又

屡得足下书及雄篇佳箒之贶不能一一作答及岁杪始闻太夫人九十大庆欲草小序或长歌奉贺而忽忽为俗縁所夺因至今怒如调饥今幸有朱定国茂才便而尚未暇命笔敢布不腆之币以当台莱之祝幸赐存焉足下英敏絶世而于二门微渺深造故易为方袍黄冠长语所动若踏得实地一分则此曹自当于垣外遠遁矣仆已再上疏乞休俟得请谨奉候于五湖烟水间也沈嘉则闻病甚虽起不能久待唯足下一濡煦之不失为长者亡弟竟遂不起足下能不惜片言慰其身后乎顽儿偶窃一名粗了诸生事于仆固无与也春气甚融为尊人为道自爱不宣

弇州续稿卷二百

●钦定四库全书

弇州续稿卷二百一

（明）王世贞 撰

○文部

△书牋

喻邦相

自入覲仅一报言于门下嗣后遂不获通问知大雅当见容也兰溪固孔道计公出囊底应之讼庭春闲湛若神君桃花流水不废舒啸仆比于中外事一切未杀所不能尽置者故人耳邑治后堂记终拟破戒以完宿诺第不审作何题有使寄示庶不得捉笔也曹子念以踽踽故不免作闽遊唯公一念之宋潜溪先生诗得脱梓否拙草仙师传并王学士父子所著附览

又

承尺书及枣二宫具切念存胡元瑞别致一纸则多与公及吾家仲氏宴酬之咏令人眉间有栩栩色仆茅舍成矣旦夕候师羽化即荷一瓢数卷入其间不作一切有为业惟生平故人未能尽洗去或搅我华胥境耳家弟有闕中新命取道故里过贵治尚能续旧游宋文宪骨朽青城倘结习未忘尚为公思效衔结也

又

足下方晨朝吏民孰计利害施行之至于日中昃而馆人有授餐者君子之至于斯也未尝不得见也则岂其饶余晷而顾急我以名酒酒我山泽之珍食我而又必我记厅事之壁即不佞晨夕作佛道家奴诵华严法华楞严金刚黄庭道德诸经不号而嘎而为足下吮毫草此记皆大奇也然足下好仆不已不宜官而仆为记不已不宜道自今而后小取节焉可也扇头一章飒然其音又有纪遊诸作令人起色浸淫满大宅姑自抑谒不使便和酒味殊絶足洗数十年月旦耻晚与王宗伯酌之共得十盏便陶陶然尊公诗正与同格想风度亦称是李盘峯先生天下推以为巨公长者何幸得见其言足下念之与宋承旨诗同样道至厚也曹子念不落莫且可以藉手入闽小具三径资老鸡狗社足矣

又

子念归殊能谈彼中吏民口碑且得公数行以为慰未几而皂衣至出公见念之诗诵之与元馭学士相对爽然慨知己之不易也始学士见强草传实虑传闻异辞转有诺皋虞初之诬耳少所见多所怪不意遂以为口实也第言路诸君子自有为一时捉鸡不着尔区区已办行滕草履百补衲作囚窜计幸而圣恩见宽得仍事香火旧犹啖少干腊鱼■〈月肃〉今尽屏之一木棉布袍足体于公所赐轻罗薰肘不过属厌儿辈而已唯是真气不足御外侮种明逸所谓山中寒寂聊以养和者然夜举不能五六酌名酝二甌手自启闭足了一冬事矣珍谢珍谢家弟发疏即归今抵家已十日此子故少欲知足挂冠一念为匡庐小淹迹者纷纷政自赞其果决今便课儿辈读书老农老圃活计不乏不至乃兄之愚且诞也公幸毋过忧拙诗扇头将意不足仰酬并薄物侑緘不一

又

昨见浙録策文气郁葱乃闻有借重者寻一从曹子念获承起居之略初拟仙舄过

吴门或得一聚首谈契阔而拜手教知有临安少尹之除虽音徽未接而鳞羽差易独念迁客中望实孰有如公者而例以常调相待私所不分然其去二千石差径近可步武也儿子蹉跎场屋苟厕一名代仆支持门户于愿已满今忝更似蛇足且念以凉德受之于老易遗旨不无悚然愧且惧耳公通家契深喜慰之情溢于言表感荷感荷仆園中久与懒便昨不免小出应酬殊若不胜今已遣之北首即日寻旧团矣名酒故自养和乃益之以大币得无伤惠乎恐蹈不恭不敢辞却有薄效希照纳为爱

又

得教累纸以尊公传见托仆辱知己之爱无所効之得一効于尊公则仆之幸也入春后谢他累从容笔研间或得少趣耳九友斋歌卷久已付之子念所渠云托姚山人者致之想不至浮沈枝山卷曾见徐茂吴言及而不之见想偶忘之此君意似佳所为诗亦有才情萋菲之谗锢人圣世永絶生机良足叹息张开府廓落大度与人交有终始足下以感恩报之可耳亦何必尽知己也太守君长者所云云是以二三贵人待我不如以裴庆先生待我也渠日拮据吏事事烦食少为寄声自爱庙廊名能拔淹滞獎循吏而除目无太守及足下得无似龙之好而已耶顾益卿过此颇能言足下治状酒脯之贶无以为报如何如何岁晏忽忽不次

又

前者吾丈引起潜太守云云仆荅之即吾郡有裴庆先生何不以见期而用二三贵人相唐突乎盖未几而玷除目则吾丈复举前语实之且亶亶劝驾仆不敢以戏对矣大抵仆之不可出者有四其不能出者有二緣仆心事本自不当作仕路人乡为当涂者雪覆盆之冤而啖其有后命一时不获固匹夫之守遂成触藩其不可出一也萋菲之谈虽不尽是其见咎亦不尽非奈何以白首余生成人人口实其不可出二也四年杜闕作有发僧欲小洗宿慳耳今遂以恬澹观为终南径其不可出三也江陵故不引蔽仆非力与抗者今奈何从诸贤茹拔其不可出四也病后衰态种种即作官人不过縻县官太仓粟耳必无可以大展効者动而黑业随之其不能出一也匹夫之诺尚不拟负宁有心许吾师而忍负之哉其不能出二也以故于旬日前具乞骸疏上之而恳辞于衡柄者期得请乃已昨复有转南少司寇报以虚名滥国恩以世法损道緣益令人慚悚耳将来又不免刺促且累儿辈损橐山童奔走道路也太公传已脱稿为故人子王世周索去并索书枫谷二絶句渠似欲藉以先容作酒费耳子念出素册求别书传侯其行当付之知道体强而范侍御当还省千陂甚苦借事炼心亦一法也此君无半面交而慰藉再三从容为我谢之不一

又

使者来复过损筐筐拜嘉之际虽叨大惠殊愧伤廉至于启湘云靚团月近体长歌璀璨夺目则不觉馋涎之自溢也中间饰奖隄涯固非薄劣所承而才情妙丽语意精切宛转顿挫处尤自使人心折王学士见之亦为击节不能已欲草长歌奉酬而苦材尽偶李士牧在坐令寫西湖小景扇头寂寥数语不足僭攀玉案也衰残无复世念幸而得请初上疏人归诸公报书多相挽者后一疏多见羨者亦有自恨者事势固宜然也白简纷纭大抵不脱好胜快心意若劲挺而中含迎传足下忧之故当除目想在非遠如北转过吴门幸为我一枉棹尚能茗羹麦饭相待曹子念何日归可以偿博进否昨有项生信附余德甫一些想已致之暑未甚酷加飧自爱

又

前靚吾丈括苍除目为之喜而不寐十七年循吏名家文苑先达一郡守何足为荣然半刺之格则已超矣会曹子念趣钱塘相送草草数行奉闻而渠到彼则台旌已前发三日矣山郡清晏抚字之暇不妨啸歌吏民来暮之謡计已载道不腆一律寄赠久疎此緣故鬪飒不能工而时得潇洒语公以为何似闻同年何观察以久病卒此君意趣不凡故当登逸品不知其后人何如有遗文足传否遊山记幸寄两部利瓦伊楨使君必亟相会杯酒扬挖时亦念及弇山人否台郡王司寇敬所永嘉侯方伯二谷王大叅旻谷亦相闻否荆老入辅洪阳在事冀羣睨自消但邓定宇尚尔坚卧如何岂汾山所谓但见其体未见其用耶伏热不一不一

又

曹子念造永嘉为故府主寿实欲得从括苍公一周旋耳归而过我首问与括苍公诗酒酬倡作何状不弱退之东野否子念亟为言公病疽于金华旦夕视之若晏平仲之拊景公背也仆为愕然已乃曰今溃矣且有起色矣而后仆始安第此病剧须补参芪之外佐以粥肉括苍事稍简可卧治勿躁勿恚勿近内乃得百全耳仆观居苦陋而迓器不宜昼乡居苦遠而多警不宜夜今徙弇中小便然日为亲友所征逐亡已又时时有儿女子之累与笔研之债居然一欲界凡夫耳家弟以入贺万寿归道得南容台除目差自发舒九月末更得一聚首也公停锦里时邓太史当相闻有北上意否朱邸中少年有颖出者否尊公计益健胜明年正八十耶子念念公走一介南聊为附讯不一

又

昨秋知兄病良已还领括苍事一切就理为慰入春后太公来就养高斋耶业已满八十兄御金绯从子姓称觴上寿出而郡之寮邑之长佐复率其士大夫吏民奉觴上寿故人间世之极荣盛快事也仆固当效一言而子念日过相趣待以之括苍窃意子念未即成行而忽忽为他文责所先已而有山妻未疾之累不旬日而贵寮诸贤之请至矣方刺促医药中无须臾间念辞之则不忍于太公两叙之则力有所不及单为作之则不能无愧色于子念不得已更托子念之卮语组而成章然馥馥狗俗知其无当于作者也仆老矣赖兄同宗道者力粗有所证肌力稍壮足以俟期而夙障见牵无可逃避大司空李公之子以司空事见属为神道碑廷尉宋公之子以廷尉事见属为传用晦王孙近一札云德甫儿于正月辞豫章求德甫及龙沙辅国志铭想留滞兄所矣此皆于谊不可辞者以江右一方而地下之委顿四此手腕何时可宽也山妻疾纵不即去我分无起理不堪见儿女涂炭以此点缀暮景黯然无色安能涂耳目绝情态为寒山之稿耶元孚奇人要当于格外相赏子念非久造门下区区之惊当于彼悉之不一

又

前有一书附丞倅去役记已彻记室矣余生至拜手教具悉太守卧理之况盖山水清嘉民吏驯谨六季所称新安东阳尚似不能无讯牒累眉山公治密噉杞菊记超然台然不能不致愧于斋厨之索公殆似胜之也余生所致谢守祠记犹娓娓以不腆之辞为口实公故爱而庇其丑耳名酝薰肘之贶足征老饕比来连为用晦孺东之二尊君及德甫草志铭颇损枯肠幸不至烦曲笔耳大江以北旱荒者比岁树木髡瘝殆尽饿莩枕籍而江南脂膏之地汇为巨浸大司农计无所之唯有屯膏不下耳即无论他地贵省之贤者邹司勳徐尚玺张宗伯舒司寇相继去邓太史坚卧不起国尚可谓有人乎莫与司理言之恐复动渠方寸五岳也先君得祭葬及赠官小解终天之痛想公所乐闻者余归无以资行李奈何于鳞云如此高斋色萧条尔自看有味乎言之也余不一

又

舟中得接杯酒谈笑未几为道使者夺之竟不能如顾园夜雨沉沉深酌也欲奉候于南津不得遂放舟为顾司马执紼人良以怅然五日为贱降与儿曹拥垆小坐而传有误恩诘旦即呼舫候病弟于丹阳道中覩其瘦削意甚忧之归即发乞骸疏杜门待命矣过吴城为凌氏事刺促肩輿走之虎丘僧房与袁太宰剧谈而舟始至乃有尊翁老先生之名刺在焉不及报访归舟又复相失仅一晤余世辅与闻起居耳承欲为陆平翁宗

伯举耆德于两台疏请优异此盛世事也记正德十六年五月壬午致仕南京礼部右侍郎章文懿公懋以言官荐升尚书致仕时年八十五矣明年遣行人存问予夫廩行人及问而公不起嘉靖元年五月丁卯致仕户部尚书韩忠定公文以言官荐加太子太保予诰命荫子给夫廩遣行人存问时亦年八十五二公皆以新政应诏事例小不同然大槩不妨援请要之乎翁功业视忠定虽未足名位视文懿则有余先后相望皆巨公长者朝议必无扞格兄此事甚伟亟行无疑也二诗书扇头请教不一

又

向于袁进士处见老兄条议减省云间额外之征具见为民实心与精计宏略使台司酌而上之司农采而行之百世之利也李使君云兄所请优礼平翁宗伯公移已到又于友人处见为阜南中丞举恤旌贤笃旧故是明府君第一义迩来仁闻转浹讴謡载道保障之意踰于茧丝多矣唯闻三邑之佃人顽悍者动以官府明示为辞劫持良善糶入私橐而国课又不能悉蠲是上下迫而驱有田者于穿地也夫田主未有敢竭泽者也竭泽则佃人遁佃人遁则田主之田荒矣幸留神裁处又传兄性微急速而直遂即使一过坦然当之者难乎其面矣窃效所见以比韦佩弟受知爱深重不得不言勿以为讶别一楮却不免为请恳亮之亮之

又

前有一信附于生去计已彻记室矣徐孟孺来复得手教具悉今天下处处饥馑而三吴尤甚此仆燥髮以来所未闻覩念欲赈助公帑如洗计唯劝借土豪以有余补不足而已而一时诸公无有实心行之者独明公先以德感继用威慑缙钱困粟所积万计死亡流移之祸独寛于接壤其福德何如耶即一二不逞之口乌足以胜闾井公议勉旃自爱新诗种种皆自实际有味乎哉仆失足暮年铸铁成错无可为道笔札余润间与江山相映发要之一无明障而已周元孚初有外迁转补学宪之说得报乃移南武部朝夕相处大是佳事想公闻之亦为一快也陆生彦祯以渠先人沾恤伯氏拜恩感公嘘借之力刺骨乃公名德真无愧乡先生没而祀之社者也不识可及公而举否孟孺归草复不一

陈宪副于韶

公既标英百祀仆亦不至腐草艺苑之嗜各自束髮兰臭石坚其人往往同之而中外出处若巧相避者非巴中一鲤将遂成缺陷世界矣诸体种种臻妙大抵气完识完学完以故无所不有亦无所不畅令人心醉公云三十年前燕中一相接今亦都忘之意公

当是虬髯虎颧白皙伟男子而眉宇间秀色不可掩又不作佷态其文不获见意亦当如三峩插天长江下泻千里百折不溢不挠第皆以诗测得之不知此生有见理否拙序便是糠粃之导所贻二律峥嵘闪烁乃不惧大巫而遽和春雪俱可笑事今年束笔研小阁为公兴发遂尔破戒具草念覆瓿是公卿人子云故事恐不免耳张肖甫尝亟称公此子廓大落穆故当作贵人廊庙忌之小夺其日不朽大业能无让公一筹耶叙公诗者邱谦之张羽玉仆尝识之偃蹇沦落邻死而已以此知词人尚阳九也公所别寓八近体感慨之致几于八哀殆不止华阳文献中有甘征甫者仆老同年记其遊太岳挂冠碧霞祠而返谓能脱屣浮荣重内轻外且享松乔之祉而竟不及中寿耶如何如何雅币拜贶外新刻四种并一扇将侑不一

陈提学

昨忽闻文旆已抵家当是上请告疏矣圣政维新公业不忧内顾兹时叩嶮坂非回驭地也迩来玉峯娄水何必减箕颖令人神王先此奉讯容嗣悉不备

甘金宪

仆东海之畸人也少而齷齪事公交车业稍得离去为古文辞以天之灵从于鳞遊时时与子与明卿辈相下上久之复从伯玉遊自是汨没其中者且四十年虽薄有雕虫之声于海内而中实渐厌之以为小技不尊虚饰弗庸去立言之君子何啻径庭晚途偶有所证于羽化者亦能挂冠捐室不问生事减省儿女之累屏絶一切嗜好而独于笔研夙习时厌时中乃悟大迦叶定中之舞程伯子观猎之喜非欺我也数年以来操觚之士毋问远迹若以仆为有知识者时荐其技以冀仆一言之定而争事剽窃妄立门户毋论其所构撰即自通之牒多者舂容千言少亦数百言然未有尽当仆意者今得览执事书抑何巨丽辨爽激诡之若此也其解说文字之所由来备体用极正变神情之传会与天识之超解使人骤读之而魄悸徐味之而心醉者及所叙尊公事又复淹雅遒劲度他文当亦如是仆所为快岂唯磬然空谷之音而已耶至于饰獎过情却不敢当仆年来笔研之习不能尽谢如前所云云然磬控纵送稍自便习虽涉方寸无甚别刻但不忍拂仁人孝子之用心不免馊馊逐好时时伤多以此愧古人耳盖古人制文之权长在我而仆制文之权多在人故也然审如维楨大叅书辞于尊公寿言可免兹病矣惟楨又言执事之保持邹司勳而忤强相不顾也凜凜生色矣昨者偶见一公书以邹之推轂执事为病宜执事之复见齷于时趣也丈夫磊落心事如青天白日廊庙可岩穴亦可即荒徼卑官亦可执事上有尊公为知己自今以往无地而非自适之地无日而非不朽之日也勉旃自爱雅贶祇领附伸薄报不宣

张起潜

贞也病自废居坎塞允与世末杀吾丈簿书倥偬不忘故人改岁之际再辱教颺勤存何高谊若此家弟归颇能道公廉慈慎敏之政当为江藩第一人而不仁疾之已甚则贵府主不幸有之猘犬失性因而傍噬然至坚白如公彼亦何能缙磷也贞迹为能弃家而世累亦时见烧内境与之相应为孽唯惴惴以上负灵真汲引是惧乡井蒿目皆鱼鳖之余幸二麦小稔支吾旦夕然秋事尚未可料见传邸报庙堂始似怜及亦云晚矣努力加飧以俟尺一之召不宣

管金宪

承示楚侗先生与吴周四书及公答楚老书反复诵读不能释手楚老有实见实力又勇于卫道确然回澜之柱也邓老者不知何许人当是一遊髡耳其它语亦未可尽非独所谓色欲者造化工巧生生不已之机遇境不容不动既动不容不为则生时当吃百七捧死后下无间狱矣亦复何足道哉李卓吾却自有一段脱洒处第恐苏长公所谓谈龙肉未曾噉过耳公于二贤未湊泊处加调剂便是和羹手小过当即加针砭不减汉廷狱吏案祇是词气太驰骋引葱岭语多或恐楚老未大印证也今便传荆老家弟订之仆于有为迹颇放下唯内境未尽调伏觉得达磨六祖大寂断际语有味虽然此亦药也我无一切心安用一切药愿与公共之生死细事耳何况出处已驰苍头上第二疏却似劳诸君子作大耳三藏也呵呵见具区先生幸致声久不能修境外吉凶礼唯亮之而已

又

前者与罗周二君子过我卒卒便去几若乘回风而驾云旗者罗公谈二子事近李赤语亦多迁就然胸中别有一段洒落处留近溪子数帙稍取读之未论尽合作要亦于中有得力处此公聪明不如王汝止而胸次似胜之周君笃实沈毅人也兄以为何若承示海会庵记理公大善知识也不由学问入者必不退堕兄此文极类宋潜溪氏典畅详核要非门外弄笔头汉所及大方既名震环宇传法付偈语甚草草何以长明祖灯削之可也所示第二儿驢縁自前岁多读宗门书偶于其中得小櫛柄评判纵横为瞿元立所荐大抵暂时岐路耳今者碌碌病乡举体皆凡兄所诲示顶门一针俟渠有进方敢语之两儿厕名衿裾无足为道承念存感感旬内暑雨无事乘兴欲草大奏序而乱帙中失之不可得幸检示一通为荷手疮令人代笔幸恕不恭

支礼部

世贞捐家付儿辈携一瓢一衲佛道书数卷入观即何论燕中诸生平故人不复能以竿尺相往矣独念公长者豚儿是陶冶中物异日得成一器敢用相托又王邓二太史有隔岁笔研债今以偿之非公不能致也徐公拜大宗伯此是将来为公作衣钵例耳却有一奇事博笑徐公为庚戌前庚戌为席公书又前庚戌为杨公宁皆以他曹入不繇馆选者也近草得昙阳仙师传文笔冗弱不能精姑取核耳慎莫使人闻之初春尚寒为道加飧自爱

陈太守

仆罪僇之余偷活人世倏踰六十无所不惭悬弧垂迫为乡党见趣则逃之泖湖菰芦中过旬日而归以为幸可免矣而使者将大教至启楫而虹霓之色现则长篇璀璨夺目小间而诵之铿然中宫商也弟獎饰过涯非所敢承夫以仆之待罪草莽岂敢忽负恩私偃蹇朝命盖亦悲贺诞意耳而门下误以为高沈冥苦海师真虽见拔刷而未有指引加以凡骨夙就鄙习难祛衰惫之躯唯切厌离而已而门下误以为有得凡门下之所予则仆之所恻衷而腩颜者也然不敢不领留之篋笥以为好耳朱履却附纳新刻诸篇种种园林燕集蹑屐径造何子点之通隱也酬和挥洒流辉秋林谢临川之逸藻也罢郡里居庭芜不剪杨荆州之清峻也天目石梁雁荡诸记中语则葱岭万里蒲团咫尺往往见大雄圆觉心要感应一解霞外一书其于修性积功之助深矣公岂区区文章家噉名者哉方有微瘡口授作报不一

詹少叅

始门下过吾州而仆获以不腆泉石荐又获以杯酒及不腆之辞荐然而门下实先之既别而获以竿尺机杼相酬荅固幸然又门下先之今者门下又先之书且侑以衣器果饵则门下之■〈廿马〉存故旧与仆之懒慢无状抑何霄壤也计书自贵地来已久门下尚未悉仆请告状而谓其不可不一出仆自再辱白简意亦不敢修怨于今之得罪者特谓有此六尺身不能自保而付人之齿舌胡可以复玷冠裳故甘心于草莽而会与元驭宗伯交辱真师一言之许遂折节而事之于世念若死灰不复暖矣今不意见録于启事使玷八座之侧门下视仆生平蹶起中外非一日矣非敢用不出为名诚有所不能出者为之主也然而天下之事有不可卒然解者以门下之在先朝抗疏言事批鳞裂肝非近时诸贤可拟万一而岭南拂衣又自超迈谓今日必首起起必首擢而除目尚尔寥寥且不待见薪而叹其积得非材太大名太高譬之毛嫱一入宫而尽夺万色不为彼利

耶仆盖与元驭屈指而待矣门下见仆书当不满一笑而疑我不出之非真然世故当强门下出不当强仆出也第门下出则国是有可忧者异时当与元驭共之非仆所与知也薄物附存不一不一

朱太守

仆懒废匏处不获时通候问兹启天降割于我吴淫雨为虐几至四旬敝州比之昆吴虽稍高阜而种花者十之八积潦三日稍晴不一日复潦其花根茎皆萎烂无余而稍西北之区俱汇为巨浸诸稻田之不救者半而可救者亦游青而已以阖州言之仅余二十之一而乃闻有以为缓者私所未解也二相公之产俱已成瓿脱其于剥肤之忧蒿目之惨宁岂下于仆辈但渠自定字司成被诘之后不免避嫌而此心实望诸公祖之上闻但疏止两台辞不迫切则圣心视为常套而司农亦无所取征必仗老公祖与松江太府各上一疏兵公亦迭言之庶几二相公可借以耸动天听于召对赐问之际亦可尽言无讳若止是寂寥两疏而预定改折存留二说以为该部之地于恩泽必涓滴而已何以活枯弭乱不佞分守湖州日曾与湖守黄思庵上疏告荒郡人颇沾旷荡拙集可据唯公祖慈仁惻怛之衷窃窥之素矣敢昧死为遗黎请命惟亮而赐裁焉幸甚幸甚

弇州续稿卷二百一

●钦定四库全书

弇州续稿卷二百二

（明）王世贞 撰

○文部

△书牒

陈给事

向者偶以微痾阖门就药饵耳不闻明公北上之信不能以尺书寸缕为侯会慎吾公始知轻舟蚤发虽亲友无一及者懒慢之罪若少缓而仰止之念则愈耿耿也迩覩邸报见大疏所陈皆至切要于国体民瘼彰彰矣迩者处处灾荒乡井尤甚长淮以北先赈

大江以南先蠲此定势也然大农告匮内帑不发不知庙堂何以预之贞衰劣过时之人
误见物色乞休不遂龟勉之官伴食无补加以病弟在懷思归郁悒无足道者部疏役便
附此不悉所吐诸容嗣布不宣

荅王给事

贞故尝从贤季父司寇先生游已从乡书得其三子名褒然而豚儿以间言曰有某
者其于制科业媿矣迥矣非敌也于是知有执事而至甲申之岁传大疏至伏读之不觉
神竦魄夺虽举朝汹汹而国是有在然则执事者非直青箱之白眉抑青琐之赤帟也嗣
后于仕籍中不覩执事姓名意为请告而今者得书知有家戚执事戟然在疚不遗一技
走使二千里悉出其笥珍以醒尘目何幸如之执事所评北地济南信阳吴郡大梁秋林
衡准也独厕及不佞猥加獎饰不唯不佞抱非分之耻而将使天下谓执事有偏驳之嗜
矣归里以来不能尽谢笔研于文稍更鸡肋诗自七言律外皆成鼠璞大抵少陵之漫兴
未必真而文通之才尽不能掩也执事诗新丽之极时出人意表古选则风人之托胜而
歌行则骚雅之藻极欲征八斗要于歌行见之记序皆出西京叙致详婉忽更遒絕乃记
尤琅琅矣又执事治朗陵时号神君案牍为繁而撰述过半夕郎多暇乃稍寥寥不得其
说拙序聊塞白耳真佛头抛粪也冀异日全集出而仆不即死尚能为一言以懣今誓别
訣拜祝深感且愧不腆不足以报希亮入司寇公杖履之间幸为致声余不具

李侍御

贞始而待罪楚臬则门下尚未至既而于役襄甸则门下以予告行以故不获奉颜
色承下风而窃从邮筒拜饜饜之诲又获覩所梓净明忠孝诸经窃窥门下于度世经世
之间执其枢矣自是十年来门下出而谔谔归而皎皎难进易退之风使人爽然而贞蹠
■〈跣也〉之迹数堕唇齿而今稍得自寬为丘壑一长物矣荆石宗伯时时为言门下
之高节媿行次公之宏才大略使贞抚膺而动识韩之想乃忽拜大教雅贶若谓贞可以
与语而进之者至读惜阴轩藁见丽雅之思好生编征仁爱之深而论语外篇则羽翼圣
门之旨深矣此书贞故窃有志焉亦稍成编而不能如门下之博也秘弗敢出矣贵乡胡
王二先生无恙否邓定宇深于禅观仰山所谓祇见其体不见其用闻间幸一叩证门下
与之偕为苍生小出亦不走也使旋草次奉复不一

丁侍御

贞以衰病待尽之躯而家器烦要冲之地虽貌为舍尘俗而仆仆应接寒暑早暮无

问宛然都会中一倚门倡耳以故弃而逃之于乡落旧地凿坏墉户聊以束摄身心而已非敢妄觊出世度世之业自外名教也门下不鄙买舟数百里而见访于城不遇又数十里而歷诘曲僻迂之道而见访于乡又相体而不必见仆虽木石宁能不愀然也幸舍弟偶过此得一相接不负仰止之渴而贞之偃蹇亡状浮于皇甫规张荐矣计门下公除已久而尚未北首又应门者云尚持麤素果何服也迩来时事屡变如白云苍狗宫府异同掎击万态国是何属朝纪何藉野人本不当及此而门下行且与其责者何以教我使安此一壑也仰体冲素空槭附谢不一

毛侍御

念与门下分袂时正满岁矣而寻得武陵书则缱绻犹面复从家弟所窃读教旨以欲举王父八十年之陈迹而新之以俎豆于先思州王司马之侧则门下厚德高谊也仆固不敢以私感然亦不能不以私感而鳧舒鸞视以祈黔中信通咫尺之书而不可得即仅得一信戟门沉沉谁与典谒者以故次且迨今心欲腐而贵竹之使者复至矣计使者以八月发人日始到跋履山川其难阻可想状而递角无恙橐币若新中间叙致娓娓犹若望仆以可有为者仆非敢以不出为名于方外之事亦无所觊羨直是衰与懒会耳自得请后少年颇见迹不堪逐逐避徙乡落日噉三盃糜羶血屏尽癖好书酒亦不经口眼拥衾度日而已天子捐相印以授荆石公行人导前蒲车在门即虽欲凿坏而遁疇可得也姚公救时正须藉广平骨力此光景似不易逢足下于兹时在台諫当益朗朗家弟一出几希嗃矢夫既或治之余何言哉不似石守道不能嘿嘿也乡里不幸张起潜以劳瘁物故亦是世界小缺陷处门下所示孙司空郑方伯先后同此叹司空著述甚多吊慰之暇可以搜辑毋使散佚否方伯垂当开府而遭此厄正如叅军携蒲马万里旅衬尤可悯也胡佺宪乃有此义仆仆故尝纪任使君韩令二馆夫事而不得其名以为恨此仆应有名或能为作数十语也縞带微琐不敢渎门下清严聊成一律书扇头并附近作庶几把握之余于奉扬仁风或少助耳南中气候异宜唯节宣自爱

又

不佞于世无所比数忽忽虚度六襄门下按部絕域勤存不佞贖之重锦饰以袞辞固有颊赤汗下而不敢当者然岂敢遽以辞却而偃然不恭于君子又何忍劳万里之使使其腩然于道路惟是区区不得已之念必不能拜嘉敢托便邮而布之左右不佞自庚申不即从先君子于地下忍疾偷活盖一日而肠九回丁卯之春先帝发覆盆而为大明之矚先君子得以其官葬不佞亦稍稍称人而自是不获守其匹夫之节出应朝命又为舍儿所惑颇治园池庐舍器翫之属私心未尝不愧之悔之庚辰以来名为弃家入道实

欲托谢世路苟完残念布衣蔬食用毕此身而已古之履顺居裕者尚不忍于悬弧之日征亲故聚饮食而况不佞哉门下今之曾闵其必以不恭见罪固也向者承见委虽不敢竇其敝帚然尚未及命笔而有三月甲令门下尚以为谢乎则不佞复且颊赤汗下矣荆石阁老受圣眷非恒箕颍之念虽切而夔龙之让甚殷势不得不一出特以次公病甚而太夫人眷眷盘桓踟躅事甚难心甚苦今勉且北耳赵宫洗亦已就道迺复有攻吴宫谕李太仆者国是方纵横人口赵恐不免请告请告亦自佳所云梁有贞故人公实弟也岂有酖人羊叔子哉赫君岁杪亦相闻惜不以托之即门下亦不及托渠命固縲继耳胡君二义仆草次作数语弟不堪灾石子兼三大字极隽伟峻伯文亦自楚楚非公高雅谁为致此者乃知李约并移萧字石似不晓摹搨一笑一笑夏蒸唯为道为苍生自爱

刘日孚

遠使手教见贲大贲具初念存仆以考绩至淮阴而有叨转之命返棹归里得一哭亡弟抚病妻且免车马襁褓之劳于私便矣第恶况种种无处可以舒眉且念大审计迫仓皇走金陵履任一月寢息无暇甫息肩而有南床白简摺摭考事谓仆与铨部皆欺罔不知皆有题准事例可据非欺罔也计当有处分矣第造物忌多取仆半岁之间躡迁八座一子登第一子荫録上及尊慈下逮内人取亦多矣知止知足犹龙公有成言仆尚安能久作贯城一星耶业已上章乞休不得则有再请耳览吴国贤强识録尝鼎一脔可以知味兄能校而梓之洛阳纸当为贵然刻手勿轻用楚人楚人无佳手故也秦中丞有年家之谊第不如邵中丞书既不易达当铭于心俟其訊问相及当即托之

张侍御

仆山野长物于世无所比数而再辱專使将致手教大贲慰存獎饰往往踰分兹复以家弟忝窃与观贵邦人文而乌及之何可报也伏读海辞知揽轡之余偶袭风露盛德天相知已勿药第不无跋履之艰案牒总总虽神明理解亦不能不小烦灵府幸稍便裁省以凝天和区区久弃物外左右顾盼无一五尺可使者不能一候交戟之下不腆附使殊慚简渎亮之亮之寒气向深惟为道为苍生自爱不宣

又

某匿迹田野然以门下之仁声善教洋溢浙藩而吾吴获承下风不胜秉彝一念荐其芜辞而门下不遗其丑玉案金错之报盖殷殷然即有所少效不足以当而门下之犹念存之也顷复拜手教大币之辱则门下勤施之益无已而区区之愧亦无已矣顷承揽

饬三辅埋轮大疏前具于邸报见之某齿颊长物也何敢自比于荆石先生而门下以相引则甚悚不伦一丘一壑走之伎俩尽矣荆石先生荷人主肺腑之知与天下膏泽之望谊不容不出乃以次公病甚而太夫人念之小次且闻再疏不允或不免首路也使旋聊此附覆并布不腆春中尚寒惟为道为宗社苍生自爱

与邓侍御

世贞侧伏州里自燥发以来所见直指使者前后凡四十余公独门下最为神明所按驳真使人神悚气慑而一切持之以公心应之以虚己乃其善善之意尤自悠然其长小时见传有郭似庵公者虽极称琅琅似犹未及门下也先公之滞魄三十年矣而独门下表而揭之此事虽与抚台并列而发之自门下先公不泯之善若足以当门下指而扬廷之剡更复及小子贞其辞又特加媿岂小子贞亦有袜线善足采耶今者先公得全荷国家全典以安于九京而贞复滥竽留省门下固以公心待愚父子小子贞纵能为不肖忘恩敢为先公地下忘德也此念郁积久矣家居时无一介足使而门下入领台端旋按闽部莫可踪攀迹来复遘亡弟之变魂魄惊沮形神支离不能修尺一以通交戟之内乃者心事稍定敬托鸿羽少布区区唯门下之德威在岭在闽不啻在三吴也岂有意乎棠阴故地哉则有王忠肃韩襄毅开府故事在贞不胜颺望秋暑初蠲唯为道为苍生自爱

荅赫侍御

自门下之去郡理几三载矣而士民讴思若新即不佞与荆石宗伯旦夕所不能释口而念已废业久野人姓名不足以褻清览亦会云泥复隔鳞羽飞沈无由一布其区区乃大翰鼎颺忽若从天而坠忆旧惜暎种种慰存则又明月之投懷也贞自犯羣喙弃身道民懒病相藉去鹿豕无几而门下犹以世理相期则非所敢任耳审台候万福还台在迩持国是正士风念惟门下可以此言进辱喻得贞恶词翰偶有一素卷不免露其丑而适坐儿女累多谬误不谨外不腆献縞附之使者并祈亮纳不宣

荅詹侍御

向者读公之大疏以为批鳞犯颜古遗直也既而闻公之出处则令人有振衣千仞想然庆云威鳳可望而不可即意鄙陋辱长者先之明月投懷和风被襟酒德既洽遂忘尔我至于扬挖风雅综核名实虽超情物表而不睨方内桂檝缥缈渐入虚无乃徽音致语犹聆聆在耳间也方别后念乏闽便不获追谢并承动定而使者以手教至矣拙集如小乘僧经论满车犹滞外道得良师指示幸矣何敢上劳证明麋鹿之性久安长林自顾

腰领皆非世物匠石须巨材以为明堂梁栋用干霄如执事尚在睥睨外而况不肖耶见饰之辞良非下衷所云倦遊抵家杜门谢事日读佛书事孰有大于此者愿自此以后勿助勿忘而已雅贖种种大食一器尤米汁所便珍谢珍谢

荅慎侍御

避暑山居跌宕图史翰墨中时以酒茗佐其适不知一壶之外天地也公误闻之子与而又为仆误言之乎唯是空谷蹉然不胜快心且有所扣质走笔以复虽不敢言饱归庶几不至空往返耳芟实拜贖谨分之儿女使酬食指之动并还书三种俱领讫外所需如数附览子与有四画托表委是宋人笔但破壞之极良费装池九月间公果至观之当别有妙品足娱目也余不具

来书王维桃源行云物外起田园起字不知何解即今起房屋俗语之所由始也王建诗妾家高楼连苑起亦此义

温庭筠诗云招客先开二十双此句不解所谓一双五畝也本句云四十双盖二百畝也见唐书南诏传官给田四十双为二百畝陶南村辍耕録则谓一双为四畝

陶弘景传云吾见朱门广厦虽识其华乐而无欲往之志望高岩瞰大泽知此难立止自（六字竟不知何义）恒欲就之

知此难立止句谓不可便住也六朝人文笔大抵晦涩如此

欧文忠诗谱补亡后序末云增损图乙不知何以为图何以为乙

原本云增损涂乙涂者涂抹也乙者勾止之也乙字义见东方朔传

宋晏殊庭莎记不知莎是何物

莎有二种草也又树也树似桃榔亦有面

又

得遠使知己抵吴门用驟寒返棹将无亦兴尽耶仆自入春小有所证一切绮语多

识及有为之迹尽皆损削唯日嗒坐而已所喻长孙大尉祀议感帝即感生帝也以正月辛巳祈穀祀之高祖太宗皆配见唐书礼乐志第三卷其文俱称感帝非误也向年在燕中有一贵人问家弟索慎子而仆无之后闻其觅得送去云其书不能佳故不复追寫也翁殆如陆澄多读仲寶书二十年而每厘下问足征大雅之度见索苏长公诗乃元板有注释者今附去亦可省奚奴仆也

又

大火初解宴憩林樾间而使者以鸡头至矣且有山萌海菹佐之何执事念旧敦诺若此仆自接方袍牵滞公案者二十年而今稍得遇真师指要路若谓透禅机如坡老则未敢也且坡老是说禅非悟禅也别纸所示库露真记是北酒名尚未的也活剥生吞盖讥其全用他人语记是张昌龄非张九龄也稗即棺也今书作稗误岁一漆之欲其坚久不壞也古人墓中用漆灯盖漆能不畏土故耳若内外则一凭公意然不如漆外之为妥也茅山碑华亭城中友人俱有之第不肯为公卑价耳日来欲扫闻见尽付之海若而受公刺促不获聊用塞白不一

弇州续稿卷二百二

●钦定四库全书

弇州续稿卷二百三

（明）王世贞 撰

○文部

△书牋

魏司勳懋权

日与王使君以大魁期足下及小录到令人意兴都尽使君欲邀足下过吴中以佳山水相畅即仆执殳艺苑儿辈负笈经场亦何必遽叩木天读中秘书也足下第来金龕玉鲙酿露采芳盖不特邾莒之殄而已董生亦复可相携否贤兄先获僞甚佳毋论异日仲之所得与伯李孰多有沂公淳安义相待也王使君诚足称知己足下丹成此其外护

一笑

又

三年来不敢通燕中贵人一札虽至亲知如吾兄者亦尔寥寥正谓此猖狂姓名捩人眼鼻耳周大夫至得手教及拜大觐之辱知前有书遘殷氏浮沈而此书亦见妬阳侯依稀仅能辨字再读之则感激用壮隱然若五岳起方寸者足下过以苏长公见儼仆何敢望长公长公元佑完人也仆之此身如井上螭李无非齿痕久自不堪应世世谬用之耳戊寅再辱南床已息意时趣江陵公再托致区区了不敢报中年气衰懒与倦会一切滋味都似嚼■〈虫葛〉唯好读西竺书希出世之学而津梁杳然会吾先师出金篦导之不觉有会而自其化去学士授简见委不自量妄有铨次不腆之辞岂足以易世诬民言路误取为贄耳第仆不敢毫髮有所尤伎每诵古先生所谓奉经受轻贱先世罪业悉从消灭为之欣跃自愉快间一追思往讐皆地狱种子则毛发尽竦间者儿子蹭蹬名场仆亦任之而已不谓獯豸一语遂窃足下衣钵诚可怪可笑春时周元孚户部言足下几亦中含沙之射来示果尔足下才太高名太重齿舌流羨人輒以为口实幸秘之眷之夫千钧之弩不发于鼯鼠破山之剑不施于砧石燕志云智深而勇沈盖勇者所以藏智也沈者所以养勇也仆老矣所见唯足下可寄诚不愿足下轻用之也周大夫索报书匆匆附此山中独享之味无由分赠薄物等于献縞耳长公侍御在荆州时有一札数诗见教佳甚江鳞无遡波者遂阙修谢幸先为致声儿子北上当專裁候也冬暖加飧自爱

又

仆坐卧一静室虽妻子眷属皆视为抔沙独所不能忘情者知己故人所不能尽却者笔研耳昨冬从周大夫得公书捧读至再喜色满大宅旋草一牋并附一丝托代周之入覲者蔡倅报公会其人以殿去别取道还里无从质之儿子北上匆匆数行亦以所欲言者尽前书故耳儿子失利后有留滞燕中说云自公发之既得长公书缕缕公遂絕影响必无见弃理当繇蔡倅浮沈耳今再録一通去并仆近作五子篇呈览知仆夙生之障于故人笔研俱不浅也长公宋广平陆敬輿之流也遂作中兴第一事公文彩映世加以谔谔故不必乃兄力足使絳灌侧目太常奉使近例所鲜礼成之后归与二凤侍太公法酝为觞宫袍制彩人生之乐无以加矣步武青琐纾徐小却谁为公画此策者仆老矣作伯仲书人且以为处仲击唾壶不知其迥然泊然也季君不能复强■〈目舌〉幸为我致声

又

得手教知自秦中归为太公称觴毕为长君把袂即故人之念系之矣向草五子篇觉犹以文士名兄宜兄之不我肯也扇头之作其蓄旨太上乎第结语锋距太隼或能使见者不欢秦中诸篇有意有气有风骨嵯峨萧瑟幸少以脂泽调之不然恐少年微作王允宁窥也儿子自燕中归极称得奉贤伯仲教津津不减龙门异日仗切劘毋论为璧为珷不至作求价沽足矣仆病歷三时幸而自起逐逐子墨客卿献岁必焚之作一壁观婆罗门相见无期加飡自爱

又

仆自九月徙深落了不闻时事偶于腊初得元馭先生信言魏懋权过司勳矣始为国家喜得一正人作将来水镜既而为足下喜则以老先生高年不致有意外耳足下望太重材太高恐为时所趣而忌者亦乘之幸小自消息沈以养勇仆于诸縁虽不敢谓放下至尽要亦去十分之九岁杪尚为邢州赵生草其父司马公传过此笔砚尘矣黄州周二京兆作一段竒俊事令人咽吻称快当伏青蒲时不至声警警尻益高即骑羸马乘荒障亦复何害元馭且有起色而以仲氏连丧二雏且病甚太夫人念之更作齟齬遣役上第二疏附此代面赵生书传并上念其道遠且习足下也倘役至幸即付之长洲令曾凤仪瑚琏也而甚泽于道初政微为乡里亡赖所累旋即了然邑人方歌泽门之黔而遽中中山之篋仆与家弟甚惜之即元馭兄弟亦甚惜之匪以谊故私也贫不能谋谒选装不知有径补例否足下倘置之魏博百雉间异日必获从中牟俎豆也请以吾言证之邹孚如司封丈致声自爱不悉

又

昨王元馭先生上第二疏人便有小启附候起居并以文稿属寄邢州赵秀才甫发而昆山丞将吾丈手教至且寓二晋绮知其不我遗也是夕后得周元孚京兆全疏读之快甚其破的如千钧之弩抉摘奸幸情状如虎头之寫肖此曹子纵复揜拳甚口于长安中厌厌九泉人矣记癸酉楚棘五经元皆成进士而三皆长者即周与曾长洲邹司封也曾方不利世法然实金玉君子前所云洛魏之间勿失此佳令也仆近方晓不耐烦颇不受俗縁约束雕虫小障渐能驱之儿子亦微有物外之识而僻性自好两小者将来风气似遁于此际不尽作抟沙观以此愧我仙师耳屠长卿作达狼狈至此甚矣才之为人害也即尽明州东湖水何能洗文人无行四字为之怅然适徐太学孟孺便附此并申不腆徐生文学行谊要当于古人中识之试小与周还必当作糜乳合也王先生谊不容不出而为次君病太夫人恋之故不能出今病者起矣便间一言之太宰公余不悉

魏考功懋忠

不佞卮人卮语岂足以为尊公老先生重而年来厌勸笔研修辞之不能即有所撰述疥壁而已吾丈乃郑重獎饰徒使人有愧汗耳李先生之为其尊人乞言其意犹吾丈也仆之欲有效于李先生亦犹欲效于吾丈也伎俩尽此而止则如之何邹先生南矣诸贤一时聚金陵是极精采事第胸中不可着此意亦不可使人艳此迹仆虽杜门一凡夫也既不敢妄希出世又不慕长生所恨心境扰扰不能莹彻耳名者道之累汨没此中四十年晚始知畏之然畏之亦非也并所谓畏者忘之或庶几耳李使便附此珍重珍重

又

谓不佞不好名则欺公念其与真我背而驰且犯吾师如愚若昏戒也则凜然毛骨竦矣有所结撰成亦间一爱之念其耗神气犯绮语而役役受责无已也则又腩然愧戚戚然苦矣独于太公固心仪者非一日然不尽以三郎君故也公之直节高天下而次公附焉次公之文誉满天下而公肩焉李公之政术成矣然而不佞之所心仪三君子者则又非以是三者故为其有为已之学也用是见委寿言不能以例辞而又不能破例而不辞姑援昨岁之诺以胁改岁之子墨而泚之然都无复构思又无暇加雌黄也其不足以重太公而慰三君子明矣公何赖焉李先生贤者也太史公有言晏子而在愿为之执鞭何况当吾世而为公金石友即不命及不佞且愿附名姓于龙门而乃重之以悃诚亦为其太公寿耶第无若有成言何儿子亦强言幸誓不至诗无已则公以状来而仆龟勉为长句且作小引庶几可塞白也然自此当舌不至鼻矣吾州有六生者其人不足惜而罪不至死得公力言之毋毙杖下亦一阴德也加飡自爱

又

自贞窜田野不敢与世路接而前者不获已有江陵之使乃承门下见附一札惓惓通家之旧至于新诗数体二十余章往往直逼开元而河朔风骨故在徘徊吟咀恍若与懋权相对自是五湖之鳞无遡江而上者仅有加额西向而已今年夏则从除目谗公已入台从弹事见公大文如君实献可不胜叹服仆勾吴鄙人也蜗壳之涎聊可自濡误而入世网又误而习雕虫么■〈麻外骨内〉之技终其身饱人齿牙今幸不至迷复一切扫去塞兑结舌作头陀行径以老足矣兹因儿子偕计聊伸候私三凤阿阁光艶絶世儿子倘承下风知无靳片羽垂荫暎也冬暖惟加飡以慰苍生之望不一

又

仆百念俱衰落不能忘故人儿子间入靖沾沾谈伯仲志行不置云二君子皆当于古人中求之仲氏差尚露锋距觉伯氏尤笃恳举体无几处仆谓此儿素汶汶何以解作阳秋语今得书知公固已收之药笼中矣十四年前按部南乐一接太公恂恂长者再倅名郡满三考而僻居不蔽风雨是时不能如陈豫章设孺子榻孔北海表康成乡盖时时心愧之即微三郎君固欲效一言之赠以补前过况重之以公之请耶第昨于佛前自誓新正后断笔研役今幸残岁拜公命尚不至破例也儿子有外家役未即归欲留使者三五日作报书仆可得脱藁草而归思甚迫不能挽如何如何迩来朝宁颇縁公议獎借忠直而于格心一段都未讲求诸贤各欲自成其名务为搏击以致谗人得伸其巧将来官府日睽事变日新诚不知所底止公之忧确矣仆复叨叨及此诚杞人也厚币却上二扇头诗佳甚仆不能自秘书扇以复岂直篇数输公一筹哉冬寒特甚曝背之味无由奉赠不一不一

又

两月前得公所致书及致次公集读之不觉泪涔涔下也盖时有亡弟之变尚未久念次公才足以追翔阳于邓林而中道渴死若亡弟之业稍成名稍定其寿多于次公十岁差小可解而少于仆亦如之天乎胡不使两才子方轨而驰而遽至此极也则为之兄者情事各可推已辱示诸诗读之比之于旧温如栗如者不异而多琢磨之致敬服敬服见委次公集序不能佳盖从涕泪尘土出之自无可当心者无以灾木可也仆前有所条议姑塞白耳孔庙一疏粗谓于道不诡乃闻犹在齟齬而条议之章至不发抄老来苟出为少年所轻乃尔迩者忧病糾纏死期渐迫以故上疏乞休窃谓攀上君子不知仆仆亦不知攀上君子尚可恋恋金陵仓粟哉骐儿幸得复接待颜色幸有以诲之渠虽渐晓世故终觉有姜桂也太公万福此是公真境卿寺之擢虽向崇峻要不足溷灵府唯自爱不

詹东图

别公未周岁而来不疑偕李叅政本宁过我不疑公旧识也本宁与公晤于歙每酒间谈奇人奇语必及公抵掌搯擊如曼倩少君相征逐权奇夸诩靡所不有相与大笑引白满醕亡算盖二豪去之旬日而仆断荤酒仍修头陀行又八日而欧楨伯来又二日而辞县靖转徙村落与亲故谢絶又四日而公至城以书来矣藉公以二十日前来大堪与本宁辈操不律倾凿落囊鞬相属旗鼓相当使我弇山增壮色不者以五日前亦足率敬

美子念从公及楨伯青灯促膝也而已矣所谓缺陷世界信矣书辞娓娓若犹谓仆可如贡大夫卖田买车牛而出者仆之不出非敢以为名高亦非有所希冀于世外之业直自量不能出耳假令仆出于今舌锋笔铎之杪宁能真一喙一指乎哉公宏略可以应世藻辨可以动俗行矣清庙细旃之上当不能舍公且今不乏才有公数辈在亦何所藉仆也醉茶轩名甚新所命指更新仆故断文字诗或不至尽断第不欲受人约束耳请俟长昼以阳羨点惠山七盃兴发淋漓烂熳可满一纸方朔像雄尾拂新刻皆领讫亦有薄物比于献缟希亮纳林生为公所獎借当是佳士第晚矣亦缺陷之一端也丁君扇污讫并上不一

又

昨见除目不任欣慰金陵帝王州玉堂神仙府而老兄以一广文超为其寮总攀三山之名胜追挹六代之风流其快当何如仆一壑自放与世末杀昨秋偶有小遘得支吾残日不至潦倒然去大道益远矣辱损饷桃杯二片不必果西池物仰佩至意深于方朔公精诚发于梦寐以有新诗仆故不能作太傅东山之乐亦不至如少陵西蜀之苦第不知伯玉又当如何耳词翰转益精嫩使人不忍释手醉茶轩名甚新警作歌却甚难连日以水灾为桑梓作说客襪襪奔走挥汗赋此极不惬意不晓是文通才尽也薄物不足酬来美聊见侑耳余不具

杨襄阳

执事行窃谓除目只在旬日内方拟治一杯于花径祇候而蹉跎遂成数月别野人不能问世事但尔时迁除大有不可解者达士大观正当不满一笑耳兴国土民似饶余福明卿尤觉縁胜想当于真宰前祝留公张羽王落魄可悯金陵之行或足少畅郁悒第一觞一咏间不无又树矛戟如何如何仆近为疴鬼所侮浸淫不已几遂委顿然自此万念俱扫尽旦夕作有发头陀矣使旋附此不一秋气向深加飡自爱

又

春时乡人周茂才归则称公有霜露之恙尚未已而明卿大叅为言勿药伏惟小畏风自消息无他也襄阳久借公作羊开府上佐即岷首汉江之思将来并深永矣第除目久未下吾郡楼台颇称近水而坚贞自信者乃不蕲得月耶仆非敢以不出为名懒病苟活迹于逃禅耳元驭学士犹在禅而遽膺夫爰立之命为国家培真气为善类树赤帜吾曹借桑榆之暎以自暖抑何幸也所喻尊公寿言仆忝葭莩之末覩兹盛事即微公托宁

不欲小有效于管榘第以数月来有笔研戒而明卿本宁为之前茅更难称继恐重虚仁人孝子之至心不获已谋之曹子念而润色之或有当也大币具勿遽臆谨拜嘉并附不腆之报希照纳初春向和惟厚自节宣以迓眷祉不宣

欧桢伯

久不闻问寤寐劳思传两制之擢执政悬待而除目尚尔寂寂岂国子先生未成进学解乎梁舍人来得惟敬书知旦夕北首愁未办装耳仆老此山镇粗馐浊醪翰墨自宽了不知其薪之积也春来作梦无非故国遂与春明门绝矣舍人便聊附此贵僚吴君者材甚高步武台垣而出倅远郡其说可得闻乎余不具

又

春时得兄一札及寄雒馆集诵之令人洒然清光入怀不能已己弟汨没尘海中荷先师援拔不至为六贼钩牵入阿鼻狱于分已过岂敢妄有希覬如高令公王恒山也若言路齟齬则固甘心受之诸凡詈我辱我者皆代我懺悔宿慳耳正郎之迁比之少陵检校已超此不足为兄贺于操觚之士少一吐气乃足贺也惟敬高坐羊城跌宕诗酒且在世法中光景殊佳足慰晚途曾侍御按吾吴其人宽大长者而于出处一念尤当作物表观惜以病去不获相叅承兄有使风二君为一布区区可也寻兄往札有托赵汝师语未审何事汝师凡三见不暇叩之兹殷无美行附数行扇头二律破例见鄙仰吴翁晋客金陵诗甚奇幸物色之初暑骤溽强饭自爱

又

虽甚念足下而不能作金陵问亦以凿坏之人与世末杀者例固如是耳适刘计部一札来云足下已请告旦夕当发此何必减二疏即少赐金何害蔬食水饮哉都门供张啧啧填道弟不如钟山一片秋色寓无声之情独至耳惟敬虽厌世足下遽归文星之在百粤分者欲移当复停五羊顿不落莫矣金陵将无复人如何欲作一诗赠足下而刘氏人去迫且年来有苦吟戒以是且止然终亦不敢负也昨戚少保去曾托致惟敬奠文一章又托访求岑绍兴遗诗文鄙意欲梓而行之生平不受人恩特此君一刻出意外小欲报之地下足下会少保幸从舆焉山中白云不待分供彼此共之自爱自爱

又

仆乞骸见格其说穷不得已而以病告杜门却埽俟命曳尾而故人尚有剥啄者吴明卿见过仅少平原两日酒戒文戒破我殆尽幸此中无染着不至作谢公离别恶耳昨秋见临淮诸君子送兄散髮海隅之什日夜想象聚寶雨花钱别冠盖不减二疏而竟尔寂寂乃知疏至公交车而止当是一时庙廊意不欲去面上眉耳区区齿吻余息处亦无所成名特以初心不拟负且自顾老矣安能脂色软语事言路少年诚不欲重貽盖棺玷非敢藉手西行符繻也佳章见赠理事无所不畅第以文成贞白见拟非吾任耳小俟兴到当勉倚和俟兄一成行即上之充艤符压载仍托五牟使者寄罗浮主人使候于大庾傍也前周生所附去像赞方愧抛粪佛头何劳郑重此复

又

与兄西關夜别即走乡落蔬食禅栖者匝岁为病所窘不免食肉为盗所憎不免入城为故人所强不免复亲笔研自是碌碌一故吾无足道者唯见岭南人问得兄起居状知尚健饭豪吟虽叅商异境犹是一天仆小于兄十岁齿落殆尽髮无数茎黑者姑作逍遥观待期而已秋间荷主上恩德宰地见怜先人得赐祭葬赠官自此可以下见泉壤若山公一启便为蛇足少不自揆当作小草兄无用见美也朱提举人将致手教及扇头大章恍如覩紫芝眉宇喜剧欲枉輒成小律附上并薄有所侑殊不敢当玉案亮之

又

夏时曾有一书附去不知达否三见南海偕计者问足下起居云食履神明不衰吟咏益王且传有壮游之兴令此江山生色第仆自强起以来忽忽无复是处此邦名胜虽足畅游目小小篇什差亦厌讎然既成而中愧之矣为得亡弟耗食寝都废三秋九十日眼眶无一日干生理遒尽何况宦情已上书乞骸下铨部得覆允便可买扁舟而东于墓田丙舍稍一饬理刘伯伦云死便埋我故是达生要亦恒事耳张肖甫遂为异物今岁不堪龙蛇指不能尽屈也相嘱无多谈加餐鬪健而已郭学宪寄兄全集读之于眉峰得小展不一

寄瞿汝立

闻已束装将西首矣白葛黄粲充衣钵费谨悬拂子俟公一口吸尽西江水当借余润漱肺腑也

荅况吉夫

用晦使来承贖书及诗读之了知微意所属令人悚息不敢当然起色未尝不浸淫满大宅也仆固不佞兹意蓄之久矣虽会出入朝野未遑息肩然所以不敢轻举笔者说有二其一尝笔之卮言以为千古而有子长亦不能成史记何也西京以还封建郡邑官师宫殿名不雅驯不称书矣其诏令辞命奏书赋颂鲜古文不称书矣其人有籍信荆聂原尝无忌之流足模寫者乎诗有尚书毛诗左氏战国策韩非吕不韦之书足荟蕞者乎窃恐未能继也其二则当有罪我者史记千古之奇书也然而非正史也如游侠刺客货殖之类或借驳事以见机或发己意以伸好今欲仿之则累体削之则非故且天官礼乐刑法之类后几百倍于昔矣窃恐未可继也虽然执事之知我深矣其属我切矣不佞焉敢终自弃以孤君子之明惠意者其自东京建武始乎执事卧家踰十载岂其已有所撰述姑欲借仆以自证耶即有之幸毋作帐中秘可也仆生世不谐终老毁誉间今获假微谴偃息泉石为幸己弘第春来花竹日新苦酒食见迫卒卒无须臾之间草次奉报不一

荅张羽王

昨杨大夫行时偶患眼疾不能事笔札而大夫自意迂可以无入境且云足下亦旦夕除目下矣以故不及草报书然亦野人懒慢常习足下何督过之深也扇头新作令人悦焉如覩七年前面西征注文极尔雅便觉郦道元江文通为赘知复沿檄金陵稍与其山水人物相接差足舒吐每读柳河东集叹其所负挟衅甚大而谪止司马移地止柳州其郁悒忧懣之极至有不可以为生者足下之不遇过河东何啻倍蓰然而无一字半语之怨何也人之度量大小相去远矣仆已授家儿辈束身入茅舍不将一物自随觉胸次湛然尚能成一诗书扇头奉赠自此焚弃笔砚矣

荅王龙溪

自辛未夏获一奉颜色于今七改岁朔矣每见张守君道翁饮食步履耳目之用不少衰方在仰羨以为钱塘一衣带水懒废自阻无由侍几杖而聆德音忽拜大海及新刻数种捧诵之余不胜感服此道理在孔门若五百白牛乳阳明先生于内点出醍醐然服之既久仍以为酪自翁再一点破使人咽喉间作甘露快世人不问罗什之啖针而槩疑其有室无怪宣律师未晓三车菩萨地位也守君甚念翁春和一命扁舟游吴中诸山水观万物一体之妙且令后进有所启发何如余不具

荅凌绎泉

昨自吴兴还情事黯然得接清论游别业评隲名画法书网鱼荐酒便是出苦海登四禅天解维之后梦境亦爽归欲作一诗纪其胜并题仲君盟鸥馆旋为俗事所夺万姓类纂史记纂二序亦未及命笔方拟杜门养痾于汤药之暇完此诺而使者以手教至矣栖贤笋是竹中第一品当令玉版师避坐谨以惠山泉独荐之作禅悦味供不敢轻待也谢去咎姓纂附上或可少助博洽湖山清晓四字钩上手疮不能执笔亮之亮之

胡观察伯安

公明德君子也歷官二十五年不改初服不求速化杨文懿公所自拟以青裙白髮之节妇非公孰当之然而文采烂然五色若滇中之赋与文见一斑矣笃生贤子则丹穴之雏一和鸣而畅昭代之盛诸所以黼黻泉石娱快性灵者种种来谕谓髮尚纯鬢健嗽雅步虽受稟之龐淳亦内外二境之美有以凝成之也惟麟趾已征而含飴未遂然亦只在早晚间耳仆未老而衰无意人世蒙上真见喻薄晓去来于分粗满今者之迂真为蛇足已悬疏力辞冀必获请伏承饰獎兼贲大贶非所敢当但恐孤千里遠意勉尔拜嘉不腆附于献縞仰祈鑒纳不宣

司文选泽民

伏审门下明德宏猷久重铨地迺者晋握大柄登选贤哲以黼清时甚休休世贞衰劣过时之人踰伏草莽不堪拂拭加以亡弟骨肉深痛陈情乞骸门下特垂勉留过弘饰獎重增惭汗惟是报书猥及先君子事则旷若发矇五内俱震緣往时宗伯覆台臣之请仅予祭葬贞已冥心引分无复覬觐止是具疏为先妣乞并祭而已乡衮太原公为改疏辞得以移咨贵部荷明公与太宰二山公贈覆得叅八座太原公误示覆自选部以故贞有不腆之启仅达之选君子不复知自明公大造于先君子即世世犬马不足为报而乃懵然无所识知明公固不以为德如不佞有胸无心何谨此附陈感私然不敢以筐篚累盛德也亮之亮之

荅帅膳部

世贞里居若瞶而偶传有帅君者自北曹乞分司白下尝以片言拄宗伯饰勤口私心壮之又传帅君工为古文辞初秋病疴愤愤中而南昌胡生以尺楫介我启之则读一诗一衮而皆藻其语隽永其味又若以贞为可教而降心者起色骤上满大宅念留司无他帅向所传帅君必执事也世贞抱膏肓之疾蒙不齿之谤其断断自白下而操刃者又执事之省人执事尽汰之而以过褒饰即不肖感恩狗知之无已白下诸君子得无疑执

事有偏馭之嗜耶執事古文辭鮮所不宏麗而擬古其巨擘也乃見贈之篇精博老蒼惜令不肖當之辱耳世貞久墮調語業近荷師真見戒行且入關塞兌黜聰焚棄筆研而執事之見厘若此亡已則妄進一言大抵有韻與無韻語其軸一也庀材宜博師匠宜古入思宜深篇主脈句主眼勿庸勿晦勿促勿碎凡數者執事之所饒辨也而復以此進吳札之獻縞獻所貴也拙詩書扇頭不能酬來美當青女時屏之篋笥而已

孫文選

貞不佞嘗從燕中事先文恪公又一再接再伯氏叔氏諸先生而至于門下則若疎闊者然門下之賢與文學節槩天下莫不知而其于銓部之政則尤脍炙人口家弟相見能嘖嘖道之而趙汝師宮贊每一書來輒稱服不已謂羣賢雖滿朝當無出門下右者不佞固自放世外然不能不熟知有門下也門下秉銓政來歲余矣所推轂中外及岩穴几盡然類多忠信亮醇瓌竒儁特之人而猥劣如貞乃亦濫塵啟事此則所未喻也貞一疎狂士耳往年先君子難不能從死而又輕出雖欲有所為不獲遂而歸家仆見誤治園圃食酒買書籍有豪聲為白簡所中雖不必盡實要非無謂晚途雖稍若有征塊處窮約而實自放名教之外妄希出世之業此豈有毫髮足當于門下者毋亦門下惜其本志不甚污濫薄曉鉛槧之業為足收錄耶將二三同年故舊在事者稍一游揚之不欲峻拒耶仆于出處至微細出固無益處不為高特以疾病連綿衰朽侵迫欲苟保半殘之軀以毋為門下知人之累唯此一念則甚真且決乞骸疏上幸即為處覆賜歸則門下大惠也干冒尊嚴無任悚仄

萬兵部

自往者得效一言之敬于公之先人于今四閱歲矣蓋猶惴惴焉以不文為愧山中不能數承起居惟從邸報見公有尺一征而又見拜司馬部蓋當事者欲以腹心干城寄公非漫浪除目也區區自廢成癖日與世左蔬食草衣燈火一龕以終其身足矣兒子謏陋不文誤玷賢書遂使賤名復齒人間而公至舉以稱賀得無重仆之愧且懼耶野人見傳呼而驚誠驚之也大司馬挾伐之威無所不加而江南歲屢侵閭閻展轉盡矣公亦嘗一念及否兒子便附此以報草草不竟所懷統祈照亮

弇州續稿卷二百三

●欽定四庫全書

弇州续稿卷二百四

（明）王世贞 撰

○文部

△书牒

应黄州在明

招提握手垂三十年萍梗江湖无复理值然至西曹借躯缓颊以为赴义者其在耳目间犹信宿也公治郡一不称时趣即脱屣之因山为林葑药酿酒隱然仲长乐志之风比之柴桑殊不寒俭闻贤器复继武更足慰目前仆自废蓼莪一丘一壑蜗涎足润而誓墓不坚腠颜强出身在人手名在人口如堕苦海无复出期庚辰以来始能痛割去之生平嗜翫不挂一丝诵白马之遗编抽玄牝之秘旨长斋六时忏悔宿慳以此了余生粗觉具少味耳恨无能分供也教授俞先生自诡与公莫逆因其归聊尔附候并有所刻两藏经典数种呈览不一

唐滁州

不佞王父司马之获从文襄公后也世父藩幕君且同塾师矣而先御史大夫在散署时又获奉文襄公拂拭不佞又于班行中一再接状元公颜色则辱公世讲之后非一日矣不佞有雕虫之好且好称说循吏业而执事工诗工文章工为州邑则不佞之称神交又非一日矣张令君又亟称令先君之有隱德也执事谆谆赐之书重之以币■〈亻界〉追为志铭不佞纵能辞地上乌能辞地下第卒卒少须臾间俟长夏无事当敬具草以俟后使来可取也新诗多爽朗有致八咏之章所谓不虚美贤于上韦左丞哥舒开府多矣寄明卿而宠灵及于不佞知执事之见存又非一日也

范司理

得执事报书具金丹大指此更数明师歷数十读而不能决者执事一览了之遠则僧一行近则程伯子不是过也仆似亦有管中之窥粗与执事合然而不敢从者同类有情终属污褻恐异日不免天宫驳放一也未免于人小有所损损人以益己非造化心二也筑基之际少不如式不能无决撒三也临敌之际万一不胜则败随之四也取之而不

得则必他取其势流而为彼家五也广有采择淫声外闻得罪名教六也后读黄庭真人在己莫问邻何处远索求姻缘始豁然若有悟以叩师真亦遂膺合执事从容涵咏之久当必自会也赐环故有说惟荆老亦同之或水或土皆蓄深意此时未敢为执事道尽杨生非忠臣后非有文行王生非工诗非贫仆不敢与还往亦不敢以闻执事执事意果不异敬服敬服使琉球二书拜教后却奉纳也

张司理

衰懒杜门苟简一切即君子之至于斯或有不克见者属明公按部则首沐干旄之枉嗣后一奉酒语三接茗谈不意垂尽之年获覩海内伟人归与儿曹及之且诧且幸明公虚受若万斛之舟炼事若百煅之金而查滓融冶襟度超豁尤出意表至于折节文士傍撷艺林不逐物情讳世忌文举彦升之伦不足多也信使远驰致手教累纸倾倒之懷彼此无异少公翩翩丽藻机圆语妙自是当家稍一涉猎冷然心赏惟于仄韵叠句小妨吟咀盖中原之音多以平入仄若献吉于鳞茂秦则无此累矣其它名家少有能避者俟从容当为一一铨出所命拙序固不敢辞第未免佛头抛粪奈何卒卒口授不次为罪

曾长洲

仆以穀日谢亲交应酬而笔研旧逋尚未及洗拟至暮春始得一切放下从辟支禅了此生四日前忽有以除日至者恍然莫知所繇当是庙廊搜括陈人殆尽因而竽及耳仆向者匹夫之节不固腩颜朝列见憎白简即今日不出岂能于卞田充隱弟不欲负庚辰香火一念以此上孤赐环之恩下拂推穀之谊有所不恤兄谓动静原无去来皆一心所造此是造极语仆之不动心是本无出意非關学力也旬后不免走苍头上乞骸章小损儿辈橐他无足言者使回附谢不一

又

承损饷新茗领讷喻及出处具见超脱仆尝与陈雨亭银台言有应迹而无住心则居士之与宰官何别但庚辰初念不可负耳邢侍御长者故不惜为一倾倒然未尝为击唾壶何由窥我千里也黄图解元再相会否亦有所告否大抵吴民易感亦易怨士大夫易誉亦易毁惟信我之不可夺者余则采物情而酌之可也末世断断避嫌之事贤者为之矣

又

儿子輩初自吴归云台意似不佳流言籍籍殊为悬情旋闻已消释甫自慰而家弟驰信来谓得之王中丞所则白简有所指摘矣足下心事如白日中天唯是小不避形迹然亦何足相染家弟又谓所拟量移于一方施绛帐审尔亦不至出恶声也足下但自反照追省于此际加涵養琢磨却是一番功力每读孟子称四十不动心而又曰动心忍性同此心也而又有动有不动此公案不可放过大抵吾人未到圣贤地位不怨不尤则可不愧不怍则不可仆老矣木食块处于一切世事皆未杀无能为足下鸣聊致莫助之爱而已前月末将断笔砚觉得于胡庐山先生未了一念捉笔成衡齐序既脱稿而读之殊不能有所发挥以此灾木不如覆瓿也两日计当移疾请假聊此奉慰加飧自爱

又

清上人来得兄书趯然之音令人耳开若聆大吕兄之爱我深矣念我切矣独所谓三喜者于仆未之有契也仆卧舛中粗自蜗殼特为乡亲友所饶不胜其烦寻得留都一大老书极夸省台静胜而会副枢之命尘念一起遂成地狱种及至此间为试士困以酬酢兼苦笔研之繁种种魔境盖未几而有亡弟之变矣肺腑中裂形神不亲以故恳上乞骸之章而不蒙赐允且未敢再上支吾至来春当图一决平湖丹阳慷慨有志行人也麻城广大教化主也若谓其禅谓其理学谓其養生则愚固未敢信也兄谓世果能用仆耶仆尚可用耶迩来小建白微窥其兆矣孔庙一疏自谓独见诸公中亦有以为信然而卒见寢夫焉能用仆也兄试读之以为不然则仆不可用也今年阎希言去境极佳肉身至今不壞闻罗近溪去亦自潇洒潇洒仆或可自信不壞吾不能也清上人幸一二接语福德僧也学行俱入大乘境但未知透悟何如耳此二门各有人独吾儒太牢落（阙）朱之格物王之致良知故自匪同若致得尽格得尽终自成一局面不狼狈也兄明年得一南清曹可乎仆且归恐不能待耳余不次

徐推官桂

公以一轻刀破臆而访我知寄惊良厚夜谈虽小畅然以老病畏寒不能步履而从舛中尚是小缺陷新诗有学有才情有字有句必名家必传后无疑也唯在乎熟之而已李杜沈宋王孟诸贤百年而后岂以品山定名代次第耶小间能成一诗以壮公意兹则未及耳新刻三种附览

徐嘉定

刘介征雅士也坐间觉温风时时袭人与小语虽未际极亦有诣会恨仆方困河鱼不能多盘桓耳乃用郑重为谢使我愧陈孟公梅雨周洽讴歌溢耳其波入娄者则练之余也公方劝农省敛而念及方外病叟损饷种种新葺薰柑敢不拜嘉窑洗初启封光彩溢射虽叔夜鎗元常缺美宁过之第仆夙有此好聚亦不少庚辰岁偶感其累心屏付儿辈不置眼久矣静室中注尊坏饮竹床木几无直一瓿物何敢溷此珍器乎却附使上之幸宽其不恭也殷无美豪饮剧谈故自足赏徐茂才者奇士久困辕下非公焉能使之骧首长鸣也余不具

傅司训

公入剡余五载矣经术行谊为诸生表仪仆虽土室如夏甫亦窃耳之而复从邸报中覩荐剡则益大慰惟是长器见顾亦云已有百里之除而尚何寥寥也从政者新矣岂尚欲持久任之旧耶仆夙障不能扫除见陵二竖老态种种而辱存念过深饬羹非当损饷皆广文斋中物挟以烟霞色令子猷意爽尚恨不能为扁舟之造也杜武库左氏癖者千余年而得公砭之昔人仅能通鉴纪事本末留第一义以属公皆大快事所委糠粃之引不敢辞第受役笔研方苦而病益甚幸少宽之冬中必不敢负宗伯公即取去作中郎帐头物且云欲有效于门下仆尚未获卒业也秋气向深加飡自爱不一

又

公以学行渊着表表人口荐剡再腾实张司马与直指使之识也仆何力焉而猥用相谢毋乃使草莽之人得窃朝市权乎以公之材入长六馆出宰百里少足展骥而当事者仅用常调量移虽复匡山彭蠡之胜日供几席如攄吐不令尽何行矣除目且继下矣左传属事仅一见之而荆老即秘为帐中物如蔡中郎之于论衡再叩之第云尚有欲商榷者仆愧糠粃导精梁翻足相辱以故不敢再请也麋鹿之性与丰草长林狎特欲脱羈络以保余年耳非敢偃蹇朝命袭高洁名今幸得请矣食物种种皆烟霞味谨尔拜嘉厚币却纳并有杂刻侑览不一

吴断事

天骤寒伏团焦中蜷局如猬方取楫楸煨之而使者冲风雪来以种种山味见饷染指之余饭及妻子此感何如承示病目大抵中年以后精神不甚在阿堵唯清心断欲节饭勿食煎炙五辛及他浓味静以俟之不可责效攻治也春事殷时公病愈扁舟见访仆尚能破例一出瓠壶盛浊醪荷叶裹蔬糗为公作弇园主人也一笑

吴詹簿

入雪中哭故人几失公幸免题鳳一作罗浮梦然至侵晨出候则仙舟已发矣怅仰间更辱报谢九畹道人与玉版师皆阳羨山中高品屈作畀园供为辱矣輒以东海三醉胄相报尤辱也或公拍浮酒舫时更以为佳耳腕疮草草极不恭亮之

又

冲寒抵阳羨遂造玄亭忽忽如梦声伎供张之盛都已忘之唯孟公高情与叔夜酒态依然可想耳新构一轩枕白莲池颇幽洁得公所惠竹床竹墩置其中佳客至可坐八人更以公甌中菇佐酒便增一段潇湘色小簾疎帘此间故不乏也像赞几作篋笥物检出并二扇污乞奉上殊不足录所命振始堂记堂在何园园何地何名中何亭馆卉树竹石以何年他属以何年归幸一赐示庶笔底纵横且不落寞也余不具

文子駢

应门者至团焦出公刺惊唤小篮舁竭蹶抵河口则僂艦在缥缈间矣无威明之疾而有季长之慢如何可解家弟言公遂焚牒不出昔陶公去彭泽尤以束带见督邮故今河南雄郡也同守贵是督邮上官何所感而飘然弃之令人想见千载箕颍间色公如有意和归去来乎请具子墨客卿以俟间与家弟言先待诏公在玉京当拍手叹呼佳儿或博士先生鼻息不能无小哂然耳一笑

凌际叔

仲夏辱公枉驾而应门滂拒遂成题鳳以故于陆生便致其不自安而公不以为罪遠厪教存副以隆颺愧感何如世人好言太史公而于班氏遂成鹵莽譬之习书者归右军而忽忘大令不知父子家法纵有小乖不能以寸公此书行所谓班氏朽骨得蒙荣造矣第往往令小鸟抛粪佛头殊不为雅业已相许旬后可令人见取不免为公作蛇足

凌郡丞

季君之使至复拜手教倦倦念我年来正得顽悍力耳所谓山神伎俩有尽老僧不见不闻无尽也家弟移台疏甫上即弃繻出關於前月七日抵家矣赏心者谓其好道讎

迹者以为吊诡不知其自倦游一念借之归作老农老圃耳生平于故人竿尺殊鹵莽前岁始晓令侍笔者录得数纸及检子与明卿子相书百之一并仆近稿录去姑塞白耳屠青浦处为作一纸公可令苍头别持索之家弟亦令检得少许后附上也不知公所梓合今古人或颛本朝否鄙意以长书论事理若望之少卿子长之类小简叙寒暄如晋人致语分作两部庶为全璧唯公自裁之

又

前谓交遊翰墨尚当有数种故作此报既令儿辈检则多失之今仅上二卷聊以存姓名可也仆比来百事俱灰冷菜羹豆藿一饱后即兀兀枯坐而千里故人以笔札见役意软不能作白眼鄰之诚有如公所笑宿障者若序吴朝卿文则坐陆生见迫以贫病老儒可悯寂寂数言聊用塞白殊不關方寸也王百谷善竿尺仲蔚意不能新却善守陈调亦可收采否汉书评林序应于难弟所见之是了前岁诺亦公所笑宿障也不一不一

刘子威

忽承教札修礼过共非弟鄙劣敢承弟本无所受亦无所证止是蒙师真度引于苦海中一掉头耳去彼岸殊自辽邈也来喻此形已弊久生无乐王道者亦言吾丈精进之甚至厌此四大便拟割之夫厌恋等弊耳如来所谓众生相寿者相也四大诚幻造然欲借此修持异日有身外身不妨舍此皮囊兹则未可也继首坐香烟未絕倏尔脱去尚为虔侍者所笑以其落阴耳勿助勿忘毋欲速毋见小敢以为吾丈告二诗虽降格而精诣之意故在白香山见之当击节纯阳老僊或便未荐如何王道者见亦无大谬徐验其定力耳

又

季秋之朔为儿子苟忝名场报者羣噪匿避一室两日而应门以尊刺见示则僊舟已西迈矣念仆非皇度辽公非鴈门守何敢偃蹇称疾得罪左右乃公不以见尤手书缱绻有加于昔至新集之觐恍如被穆如而聆钧天也弟本毫髮无所得状若可以捐俗者迺为乡里麀集勉强趣承今始一弛肩忽忽如梦追唯获者皆幻累者独真欢喜之障殆重于忧苦障矣公自是晨下谪此缘犹在绮语一扫而空之为望所需诸经刷装都未及却从家弟所觅得一部附览不一不一

又

昨岁杪得张幼于一札来云公猝中末疾不良于行已复得一札云有起色矣已又闻之人曰平矣故不敢通讯问以渎阁者而私心之为忧为疑为愈则亦三也乃乐天和尚至则于锡头得手教满纸公之念我笃矣九月遘喻少君与受静坐诀三日而真气动不着意想而法门所称开闢交脉者畧尽得之周身殆徧今则归脑中了不竒且时时为杯酒征逐所夺无足为公道者笔研一途少时肠肥脑满勇于构思浮名见被时亦热中今老且厌倦矣而黻者不止譬之岁计入不千缗而日食且万钱胡以应之又志表之类虽称为谏墓尚是仁人孝子一念至于后进少年偶得一二隗语便欲据西京超大厯居官仅考中下輒称韩冯翊黄颍川老而不死多作诳语畏入地狱公何所见而翻赐艳且公之才高于仆仆固知之亦公所知也大集已付剗剗毋论海内及后世即眼底已有俞君房吴瑞穀郁人文王少卿四锤期矣何至作伯牙嗟也所示颠倒凌厉者为何人弟处絶无相间公者于公处当亦不间仆纵有之何足挂耳人生不满百长懷千岁忧当是有情痴也使有身后名不如一杯酒此则安乐法也乐天者与之谈时时诣会后知其坐天池以词组挂塔托钵者虽薄业作瓿脱聊尔应之疏辞似宜稍益华实恐见者以为杜德机少损施心也如何如何

殷无美

昨承足下见示君典学士书知不以不肖而弃之且许春时垂访海上甚感足下道君典新筑所谓伊人宛在水中央令人洒然如梦醒记仆副山东宪时故吴中丞峻伯为学宪尝与诸贤酒间戏言志峻伯谓宦辙不必中土即滇蜀闽广须尽歷之饱其山川风物最后亦须坐尚书省押尺一乃告老耳仆谓鄙愿不及此愿得二顷陂四围列植梧竹垂杨芙蓉之属陂中養鱼数千头中构一岛筑高阁三间其下左室貯书籍及金石古文右室尽貯美酒傍一小室具茶灶灑釜兼畜少鲑脯瓜菜阁上一榻两几读书小倦即呼酒数行醉輒假息岛傍维两蜻蜓艇客有问竒善觞咏者以一艇载之来一艇网鱼佐酒不问朝夕饮倦则相对隱几兴尽便复载去若俗客见挠者虽叫呼竟日了不酬应以此终身足矣峻伯问谁可当俗客仆谓坐尚书省押尺一者公即是也众大噱笑而罢峻伯谢贵州节归病死竟不得如愿而仆幸有园林山池之属然在城市中自贵游以至田父野孺皆得狎之不能拒也不意君典一诣便尔第闻其垂橐恐不能究仆语中境且朝望甫殷寧容于东山坐啸耶前送足下诗方醉极偶成即以付书房不复能记何语后检出始知迭用韵真倒弮孩儿也已改押矣今再书一扇呈览倘寄君典亦佳余不赘

又

泥金至练川者初似不在足下与子念聳叹咤移晷及得足下信而后喜可知也以足下才寧复终老公车然数受造物侮仓皇不能不寔欣戚其间如子念所传儿子岂不關痛痒政谓其尚堪■〈足必〉跋耳一贺札在袖中垂磨灭恐野人姓名堕长安便作齿颊间物次且久之而足下之悔已先我矣中间见饰过情仆何能为德于足下足下名故高于仆非若东野少游之有藉于昌黎眉山也金马褒然高第旦夕步武木天比之菑川生则殊少精彩奕奕足映射后生数辈拜相封侯故不为晚唯在沈深其智勇俟时而发之耳虎榜几四百人足下固多长者游同志者为何同调者为何仆虽老尚能呼子墨以俟也春来羸病几至委顿頼药饵扶持渐有起色贝锦之余乃复有齿及者真画蛇之足也宗伯知我哉曳尾龟以泥途为快久矣诚不慕太卜之寶藏也儿子憨甚何地无三余于千人口头捏怪亦任之而已中夏尚凉北土当益加凜自爱

又

前见足下耳热沾沾得窥斲轮妙用第谓出语必不经人道则又与学士计之此本目前物恐搽山网海翻为罔象所笑惟幸录示一二以解我疑夏令改中久霁犹自清和披阅之暇时举一觴以佐余銳勿但如萧世诚仰面看屋梁也新刻左氏颇精并有浆脯笋菹少许将意苏长公外纪能为我小料理否足下一目数行不过假两夕力结奎壁天上緣亦是佳新补博士弟子遂无一相识者令人愤闷愤闷

又

前拜手书叙离睽之懷与彼中风土物情况若坐至喜堂促膝对语也适见王二云如姬免身又得一雄良为兄称快若乃循吏之绩遂冠三蜀荐剡之美追踪古人此固兄能事也游刃多暇燕坐斋合江山之胜尽收之锦囊能推示一二以慰老懷否仆观处湫隘渐不耐寒暑徙之乡落又为客追迹更成劳费夜警入耳转归舂中昨岁九月邁异人授以一诀颇得其力四体小畅恨为乡里腰领所苦文酒二责时时自中恐不免堕落耳闻羣上君子尚犹有齿及者仆老矣匏系一室即不敢望作五湖长何至脂颜于诸少年前也传张氏子弟存者尚能自活仆前闻其狼狈意似怜之深感兄见为于故相谊不至是也更欲草一文奠刘司空而懒未命笔去人迫不及矣所命素卷不知欲书何作扇先污乞附上陆楚生欲买舟造兄大有问舍意今似不成行矣亦兄之幸也家弟在南省甚清适子念迩构一楼橐涩未就儿子卜居淡圃之左亦窘物力周生坐客遂不减其父时吾家阿瞻举儿秀美大创厅事及傍水阁不免负素责矣奈何王二见过云感兄恩凡三附书不浮沈否欲伸丝萝之约故自佳偶为一達之余惟珍食自爱

丁休寧元甫

使者自休阳来拜嘉讯大币已出教札并前所浮沈于伯玉司马一出读之不觉拊膺加额故有情生于文文生于情语求之古人古人有足下文不能通足下情求之今人今人能悉足下情不能诣足下文于目中所见信无两也追奠先大司马些章感激用壮使他人见之尚为心磔而况不孝乎然至所以慰地下之灵而寬不孝兄弟之大罪者又何宛笃周至也第非不孝所敢当耳足下美政久而益新加以锦心绣肠圭璋令器大计之后必晋擢台省议国是然蛾眉揆目不待入宫而后妬慎之慎之仆自得亡弟耗懷抱剧恶靡复生趣且覩公卿中贵于我而少于我者倏忽之间便为异物故决意乞骸上章待命于弛担中谓少得息肩而文债填委岁聿行暮多藉手而入土者忽忽应之转更作笔研犹阱欲作一二诗送足下朝天而不能幸少寬之必不后也邹孚如千里乞文以诸什见赠大有心致足下外渠与周武选曾博士皆志趣高朗不羣何癸酉之榜多贤乃尔令人快然长途自爱不一

黄司训

夜归自顾园雨中得接眉宇虽匆匆不数言然知足下为长者既读见投诸作味其清穩永隽叹曰侍御公有子矣寻闻云间诸生称足下清操至行束修不行而悔无倦复叹曰华亭有师矣徐孟孺来谈足下媿不一而足则相语曰县官有人矣既出篋得足下书执礼恭而见饰至更令人颜面汗洽不敢当仆东海孱书生也妄意鉉槩之业不能自闕以有此声晚而好佛又改趣事黄冠执志不坚复堕尘网一语一步皆成悔尤足下但迹黔驴之龐然与其声之鉉然而疑其有长技耶误矣误矣曹事小间于江山之胜当小有酬厌以示足下兹则未敢余不多及

赵司理

自足下以令先公不朽之托而过我舟中也时方抑塞憔悴未尽吐其奇然而一接清范聆绪言霏霏若楚兰之流芬使人鼻观自爽别后仆转入幽静足下公除再补校艺蚕丛射策金马荣问休畅自分浊水无望清尘不意岩穴之迹不固误玷征书备乏留省盖去足下宦游之地仅一衣带水而衰懒无由通候问乃辱足下以大诲先之叙旧懷贤绸繆繾綣累纸未既悉读羣编珠池玉府其诸寓公奉使之什宛然长庆间攀大厯署园之拟懷县连珠之仿博生不啻如之仆固喜其来而悲其晚也乃子与德甫明卿则先得足下真令人妬深春雪之雨非敢遽酬亦是下情由来所愿但近接亡弟讣悲咽摧哽一字不能成咏痛唯此子怜才好士风尚不浅使遇足下必把臂入林而今已矣命也据

梧授简辞多不伦大赋拜嘉并有薄侑不足当琼亮之亮之余不次

弇州续稿卷二百四

●钦定四库全书

弇州续稿卷二百五

（明）王世贞 撰

○文部

△书牋

答周寧国良案

向者承公大雅之爱盖时一醉心焉长路伊阻音尘不接则摇摇如悬旌矣公缓步青琐抗颜丹陛文彩风流映带一时慕者趣风忌者继之此世法之常无足为怪若乃九子诸山为公几案谢朓李白诸贤遗咏当公杯勺从容匠心挥斥千古则達士之遐轨迁客之希邁也世贞天地间长物耳倦游之余偷息一丘偶有所窥自附于野麋涂龟之后丧魄轩冕衔恩贝锦盖非日夕矣公之饴许虽若爱我毋乃使我掩耳乎哉敝郡卑湿不足以当公褰帷倘其惠然尚能披襟领教沈太史名士蚤夭托在邻壤幸一垂盼其家江使君归卧比安乐否承雅贶附谢并有不腆比于献缟仰祈鉴纳万荷

龙司理

仆来留都将一岁矣所接饬中诸名士亡虑数十咸籍籍称老兄仁明之政迥出辈流而亲贤爱才种种高谊乃知汪先生不为阿好也初见广文之请心甚叹服高贤识见故自不凡永嘉枕海腋湖千岩万壑名胜自古而山腴海错足以佐酒卮秘监之吟讽右军之挥洒非老兄孰能三之仆之岁数与易卦俱满矣失计误出遂成小草友于奄忽不及面诀人生几何而邁此荼痛昨冬粗有建白恳疏乞休而不蒙天允今春当复继请弇中三径与一二蘧庐尚未芜也闻新都相公甚为汪先生推轂而齟齬忌者然再登荐剡矣想当有出理第时事消息大有可忧东西二垂已非疥癬肘腋之间渐成痼疽如何如何盼谷公想朝夕晤对阳湖天絕令人色飞不妨一月卧游也黄甘见分已自珍美又重

之以机杼乎唯是扇头佳什渐当懷袖如对叔（阙）风度珍重珍重人事猗集小间当思所以报和也不一

密藏上人

前得一瞻法相兼领慈诲刹那间如甘露洒第飞锡莫追则又成阿闍缘一见不再见使我耿耿在想向者敬诺粗叙已于新正斋日完讫第非个中人效顰作门外语了无益于缘事耳汪居士其信解裴相国张无垢流也文笔则胜之馥中善信如林得渠片言檀施自积故为颦作一书達公不惮跋涉则妙矣憨山和尚福德士也过我精舍与陆尚书共饭而去仆愚不能参领要似复还师观道印亦在此周旋想欲闻者不一

陈司理

始不佞在郟时而曹甥子念以书来为执事先云将有先公不朽之托于墓也及归而子念云墓期迫从伯玉司马请撰矣伯玉犹之乎不佞也既嘉则来则道执事之意未已而赐币大教旋一平头将之盖启槭而肃如也先公为嘉隆间名臣天下所共仰而不佞亦尝一望见颜色固愿为之执鞭者生平好掇拾文献为一家言岂以执事命之而更有阻耶第志铭既出伯玉而神道碑复自维南宫洗一小巫夹二大巫间神气当立索矣传体不他及子姓又事取大者故不能徧想已悉许君不作铭辞似是墓表体三品大臣赐祭墓当有神道碑不当表执事更一请之许君何如闻已禫除旦夕北首为国家持大体赤帜善类先公建方面勋而不获伸其学于朝宁之表是在执事宏大之而已

于泽州

往者见公诗而异之以于鳞心印有在矣自是间阔不闻问盖仆尝入备九列者半岁所公甫捷南宫而以艰去若相避然信所谓缺陷世界也今得上党书极倾吐之致新诗朗朗明月投懷而公所善屠长卿沈东霍周元孚皆时得效蒹葭之倚则岂必捧盟盘亲杯酒谈笑尔汝始为交友哉于鳞羽化忽垂十载子与复成异物矣存者家弟外伯玉及三甫然各天一方鲜可上下唯有读书灌园暇则以浊酒浇磊落耳铄金之毁久置度外所恨于二藏不得力来期渐迫良足慨叹见惠诗选遗珠乃李氏青箱也梓之恐为年少所窥且与公共之秘为中郎帐内物何如汪时元所行非尽出于鳞笔削中间亦多遗恨安得与公青灯促膝一商榷也长卿才甚宏丽间有士衡患多之累宰此荒剧不废啸歌真敏手也异日中兴循吏文苑唯二公所择耳山西风气萧瑟加飡自爱

王蟾芬

仆虽以幸获从事于公棗梓之末缘素昧颜色不敢以贄通也郟城寂寂空谷甫启门而使者至开械捧读则叙神交之往衷申兑丽之来资悠然隽永有余味矣子与乃仆三十年故人数离声合惜不能尽献顽石以攻其玉然至语万里时时比邻矣玉叔则迨今犹是竿牍音问之友姿得其诗读之以为可鹤背馭风乃有言其人魁然河朔长者也孙山人肩瓢笠而访我姿城里时属阴晦小儿争噪之以为物也者至与扬挖文史叙国家典故几夺何宪五花簪后来郟中相与两月避暑亦能用麈尾代袁家瓿是三人者而公皆与之相下上因而推及于我收之门下之籍得毋为彼知人累乎哉百一集诗皆精嫩圆秀珠而径寸足媚川矣亦何必三斛也四文能于天心月胁中下钓缙得寶又复竒健令人噤伏仆譬之乎好谈玄者三十年守丹灶不敢离故步一寸依然凡铅君身自有仙骨旦夕玉京矣何所资下士耶不揣扇头一歌非敢仰酬贙美聊见情耳大币实拜长者之賜新刻数种并杂物比于献縞统祈鉴纳不宣

朱在明

仆自昨冬多应迹且受寒入春忽善病几委顿家弟强为进肉食以药饵辅之髀肉隱隱起月来偶感疟肉忽低今复渐起矣得书知念我而足下亦同此疾何二鬼之好病君子也新桃二种皆佳乃至倾筐之饷分遗乡里笃老即饫孺子耳华亭梓刘长生注黄庭经要当于训故外赏之并仆所作山园十记附去或亦当足下卧游也

又

得书知近况为慰长生真人注黄庭殊不为黄庭计要自各畅其妙耳然入门与得力亦不在尽解要自偶有际耳仆此言大似孟浪第实不外此数日内张肖甫汪伯玉两司马狎主我瓮中社而胡元瑞洪山人与伯玉二仲麋至仆强病与之饮噓霍然良已以故子念不敢进公之使者二诗既出子念手颇与俗题称匿之册中尚可掩拙今乃欲疥彼壁又矜彼懷袖乎勉强捉笔不免老米所谓慚惶杀人也一笑一笑

又

贤伯氏枉驾不能为浹日饮良用歉然公至永嘉探故人因为天台鴈荡之游未闻嵇吕有此胜事知奚囊所积不訾愿安承教适以先人不得已事出句容转访阳羨见者谓是怪物所遇不免纷纷解嘲今复归蛰矣仲氏与子念亦偕行然未尝一日作公青鞋

白笈行径也雅贶拜嘉入春当扫径以待

刘锦衣

自舍弟入覲后有一札奉候起居更辱报贶之雅自是仅从一二友人所窥吾丈调剂国是斡旋造化之妙而贞寄迹方外游鹿豕而居木石不敢轻以野人姓名数渎台重然至私心未尝不依依也先师以夙缘契上真以节谊脱世网以静悟为入门以恬澹无欲为教主而贞苦海中人也蒙援而出之以故弃家室捐身名谢絶一切人间之好而不顾虽上乘若未有证而区区色身小觉轻安矣荆石宗伯具草以传见委盖欲举其正大明白者以杜夫妖妄之见耳不意其反见目为妖也词若稍有张大然得之亲见亲闻非有所粉饰也区区余生可幽可窜可辱所不分者乃至欲毁供奉上真三楹之屋与蜕形七尺之龕耳兹事頼相公及一二元老主张吾丈调护可以无他但窥伺之徒以荆石公为奇货不无隐忧唯冀台慈弘护大檀越功德与须弥并崇下情无任悚迫恳覬之至

又

甲申之冬拜翁名香嘉鲈之惠旋有小启及成一排律附谢不知使者无浮沉否天上故人几事万绪无容复念及草莽即仆岩穴之迹不妨转深亦未暇上援第今者失计误出几成小草亡弟一别遂至终天乞骸未遂形影羈孤忽忽计无所聊如何如何昨覩邸报知言路微指自有所属全不为翁而一刻即归虽见孩于遠迹而天之待翁良亦厚矣翁食太保莊襄公横草开疆之勋环卫以后自积忠勤今得赐归以太传而拜太保公之墓翁之仰承于天不为不隆矣二百年缙骑帅居此官者独陆武惠朱忠僖及翁三人而已武惠之精敏与忠僖之寛厚翁殆兼之而调护保全良工苦心是二公者俱不及也仆所见士大夫多矣于翁有深惜而无遗讥以此长有绿野可也亡弟托契非常翁必有作俾之不朽敢因吴明卿大叅使便聊尔附闻明卿执文絶世而林居有饶日得相过从倡和杨司徒之于薛播州江开府之于徐祭酒又成楚社一盛事也近况无可相语唯有归耳余不悉

曾子澄

天假之缘复从师竹太史得公一晤言惜夜色苍莽烟波飘瞥更成悒悒耳公才大非仆比然世之不能用仆与不能用公一也仆于四岁前已灰心矣所以劝公收精敛明于商山中寻一片紫芝地盖实有所证也张司马报书至矣谓曾故材将仆亦耳之第传在闽中大负俞将军正气堂集中所谓十不可者即此子也嗟夫俞将军何必减江陵公

哉第物情如此岂必待智者而后决见太史幸致声刻二记完当多惠数纸也

又

别后匆匆如失念磊落奇男子若公者诚目中无两旋闻过松陵与沈嘉则一邂逅足畅吴兴凌大夫斤斤守钱库不暇设应门三尺至卖书劔作归装人间法大概如此耳仆七月为疟鬼所侮几委顿九月侍仙师羽化于直塘即捐家付儿子輩荷一瓢一衲佛道书数卷入精庐当老死是间不拟出矣七尺易料理渐以轻安唯椰子大一处起灭作幻未便廓清之耳公大善知识得準提三昧何以教我近草得仙师传试读之何似窃谓出世人作出世事本不离开世间毋奈一阐提众何昨始与师竹太史一相闻有心哉此君觉亦有深高枕意不知得果否沈令报言似为公畧处分墓田事已谢之且属之矣上谷张中丞书问公何以不成访仆谓非石头路滑将繇菜羹水浅也一笑

顾山甫

沈日章市口也顾独能谈足下苦节高蹈令人鼻端拂拂有烟霞间想不谓岁邸一见之张生所然意足下眇小山泽癯耳乃魁然顾躯河朔一大侠酒酣耳热慷慨挖扬骚雅下上今古宛然南华说劔彭泽咏荆轲状男子不可测乃尔两月复从沈所得足下书若以仆为可与言者诸体诗一帙读之调高格苍警句时出令九原可作迪功必为叹赏念欲割镘与沈谋梓而一序之觉为百穀道尽矣百穀所谓平原患才多者也拙诗二章见鄙况知不足酬来美等于缟带而已谢都尉乃能客足下耶褚伯玉过王僧达郡斋止于谈松桂千古不谓非信然哉

洪山人

斋庐邂逅未能择野菜作乳糜以待而诲语清切则饫公醍醐之味深矣得教知以冰雪息驾秣陵改艤南向将遂归永嘉鴈山龙湫当自气色第恐翹材东阁待公而暖寒凌解严逍遥顺风无所不可邓隱峰云竿木随身逢场作戏似亦不必硜硜一节也仆且衰矣浮沈业海中虽怵忽若覩彼岸尚自杳然乃可复堕尘缘入鬼趣耶公爱我深矣所以用爱则未也新岁为道俗事见挠不克详报亮之亮之

王承父

岁晏峥嵘日为应酬文字见役刺促无时息肩殆不止如足下所调而已歌辞奇逸

宏丽第足下米汁之好逾甚安能托钵乞斋饭耶酒徒兼词客亦佳似不必于中有取舍也顾君志铭已敬诺恐亦足下所讥袖中物既已讥之而复介绍以请之何也一笑

又

饭后偶一出而遇陈氏人得足下书读之始知有太君之变令人酸鼻块处不能躬致束刍之敬俟元驭丈入当谋所以少尽也此君虽善病而风骨更转嶠然思亦朗朗仆仅一坚顽石耳玉师误许之恐费椎凿力而不得寶如何如何游仙歌故应是未居忧前笔竒隽溢出种种烟霞色相然是鹤背时语非坐蒲团守丹灶时语仆不合爱而咏之数过无明业发混沌复欲破也公毁定亦当为我小破齿耳余不一

又

仆虽已凿坏然于生平二三故人不能遽舍方寸岁中有客谈足下天台病状令人心酸旋闻已勿药又云即起未能洒然欲走一信驰讯而云雨虚无竟莫可踪迹兹辱示八行恍如面奉颜色何慰如之足下云三十年光景为吟诗弄酒送却此二端亦未可尽非第酒能使人病何仆尝戏言苦吟不如痛饮乐第饮道成可朽生骨吟道成可不朽死骨今犹能为足下举之取衷可也自壬午改朔太原公无日不病则元驭无日不愁以至大故鸡骨支床几遂灭性即仆亦不能安寢息也足下向示行实当即送元驭所无从问之今始令其苍头检散帙尚未得尊命改作记鄙意以不若昆崙山人传为得盖传可该记记不能该传也刻经有数种留俟足下吊太原公致之不一

又

足下过访时方在沈冥妬足下俨然冰玉数以大白相沃冯陵不已宜足下之我恨也诵来教庄语雅谑时时有之则齐东酒酷也然足下我规也则我师也仆以九月遘一异人授我以谷神之诀三日而证矣絕饮者余一月而家弟归促膝欢噱不觉时一中圣觉其无害复成豪举然足下去之明日而此异人旋来见谄良苦今则戒童子每会不过三叵罗止矣故曰足下我师也虽然足下向大作醉则厌醒人一作醒人便厌醉者足下故当自厌今今当复自厌故也何足下之智于处己而畧于处人也向望足下亡所携已忘之大约是阮家竹林中长言耳足下戒我饮而后许携一斗白菊酒白菊固佳乃欲以一斗酒作我一岁资也呵呵读诸诗转多转不忍释手向谈虽哺醴之余亦似欲为足下效齿牙之羨而惧赤眼者之恶发若足下所举十年以前争依名家以自起十年以后又且击名家以自立甚者手摹拟而口雌黄自欲成佛作祖不嫌操戈入室此大中时病然

究竟言之苟能尽埽宿障天女鳩茶一切皆空即使未铲名根大树蜉蝣任其摇撼后千百年王承父无恙仆亦无恙此曹何为者序稿呈览欲手书付劄缘无格纸恐误行款坐是中止亮之余不一

又

得足下手书满纸兼示白下诸诗恍然如覩管幼安眉宇所谕顾益卿中丞于辽阳幕府秣圃筑亭储酒蓄井以待足下且分一月俸及紫团参貂襜褕为饷即仆亦叨沾焉此君书辞小半是念足下语曹生亦在所怜昔人所称高谊薄云天于此君见之矣近得王辰玉数行推足下为山林之圣若一入长安门未免降作班固表中第三品第能单骑从渔阳度山海關而东小忍旬日口吻即入莲花幕矣足下尚望附仆而北耶冬初小有建白即上书乞骸骨未蒙天允献岁当复请耳举朝击一大挡不能胜朝门咫尺作笔札唇吻战场六十余老人尚堪于此地觅生活耶迩来日了文债形神不摄终须于墨池中淹杀无计回避如何如何吴叟谱序亦其一也才尽不复能佳塞白而已逸史仅存一本俟得副即专致邺架不悉

又

足下以仆留滞周南故不平耶仆之不能北盖尝誓之太原公所而南八座又无缺耳非庙廊有意薄之也热官难作不见少宰迹日遭獬豸口耶仆近再疏乞骸不获请部辞极嫩太原书来云元老寧放我必不放兄考绩在六月不免襜褕一行力与二老言过即归坚卧矣彼寧能以一官羈我令老死白下也益卿念足下甚足下但渡白狼河勿问丹鳳池可也辰玉称足下山林之圣恐是欲足下坚山林之节耳草次不具

张子予

前闻足下无端为直指所窘瞻美归云尚在浮系世途好烧琴煮鹤寧止一人一事怅然怅然仆已寄迹方外不复甘腐鼠而饿鸱见吓转甚近戏语瞻美云吾欲出张将军难不如入就张将军易也如何节腹所余金少许助洗沐费又喻兰溪新刻景濂先生诗或可醒困眠也足下何不委批整伯子跌宕笔床茶灶间亦足送日李于鳞云意气还从我輩生功名且付儿曹立语故有味也献岁成一歌拟赠伯子不果今为出之若沾沾者不无更作乃公行径乎

王丈格

始者叨楚臬获再沾咳唾之惠既徙郟镇则渺然矣而犹幸再于尺牒若奉面也归田以后吴楚各天鳞羽辽邈云梦之梦托之于缥缈想象间竟成子虚而已近始于贤从中丞公处得闻起居之畧令人爽然作天际真人想天锡难老岿乎与太衡并峙诸山培塿斯下风哉贞不自量委起委蹶供人齿颊雕虫之役惫不得休近始能一自创捐家而出乃知披缙顶黄亦寻常男子事耳非久或得顺风而造公问道也短札附中丞公以达不敢劳作荅唯幸存之

刘玄子

仆避嚣遯墟落间一岁所矣而见迹者麋至不贷而会复小有鸡狗警不免复入城栖龕中方闭闕谢客而使者以大贶至矣长笺娓娓则金兰之契藹然新诗尔雅则玉案之酬不薄及开藏征大集读之乃有见遗七十四韵者仆故未之覩也即覩之寧能卤莽足下若此仆自束髮操觚来于今年六十矣生不受人恩知己之感时时有之然自于鳞二三君子外亦未有大逾胜足下者也足下欲仆一言以为珠玉之导仆何敢辞第笔研之戒数盟之佛前而輒倍之今岁六月始真断矣奈何息壤在彼请少迟之隧而及泉可也足下才高而学博其气若祖龙之吞六雄其庀材用事又若征六雄之宫材而聚之咸阳先谏议藻语逸情虽未易及此二端者当归小许公耳诸体无所不妙长律排比填押不无武库利钝小加磨淬便成干莫又闻足下精于玄理倘不我薄指示一二以相印证骐儿时称足下奇男子今当握手公交车无美入计元瑞就试及江右有吴生太原有黄子皆其人也相与上下千古其乐何似勉旃强饭自爱

刘将军

向者偕足下与在明子念登缥缈披襟畅饮雅俗信口觉足下于斯际萧然神澄故知长枪大戟中不能着正平大雅也质明遣一介操豚蹄斗酒出候舟次则足下复与在明五鼓发矣后有不腆之币附在明致足下不谓其尚未達也信使千里而来手书勤拳写致肺腑古体见赠宛尔栖泊令人心折特獎饰过情非所堪承耳他作种种有独诣之致尤可喜者不蹈他人影子惟淘洗未尽小存蹊迹耳永嘉珍苞冠絕诸果魏文佺父乃以西凉葡萄胜之不满一笑仆岁得之王阳德大叅及近沾侯公子叶别驾之惠第今臆自足下先之一时传咀以为快事并他饷皆酒家上佐也诗宜和但迫冗小违迟之不一

又

辱手教满纸及册中诗歌字字从肺腑流出不蹈袭一语令人爽然足下之穷甚矣千里名骏骧首长鸣仆虽负孙阳之识而不当燕昭之寄徒有叹惜而已今西北并州诸部与好叛之士合大是隐忧安庆小寇亦非疥癣闻并菜色犹尚化离仆不知税驾之所计唯有一归而已归则又似负国家甚悔一出之为小草也龙君善奇男子借足下以慰落莫大是胜遇此间笔研填委应酬又时夺之春日稍长必当成一诗奉和也损饷黄并百头十有六全然不免书生风味若君善所致则佳矣草草奉复不次

何将军

公别后稍取新集读之甚清丽而乐府七言古五言绝尤宛宛有情致饶俊语大抵苾刍诗脱俊韶气将军诗脱兜鍪气乃不受少年雌黄耳公诗得之矣吾吴中惟元凯都尉能于盾鼻上弄不律纵横■〈足必〉跋遇须厚集其陈以待之余不足畏也警公喉咽间意似欲仆一言之弁而仆已厌笔研不能应矣在告弗克呼蓝鬻出访拟烹一伏雌以待并有薄致不一

傅伯安

自门下之北征则拜教颺之辱而仆方恋蜗壳涂墜耳目不能侦骢马之踪仅以一械报谢而已乃者匹夫之节不固遂成小草而门下方引疾高卧威凤千仞固非槛猿笼鸟所敢望也山中读举贤大疏如汪伯玉司马威元敬少保文武为宪邦家之桢岂不足一当启事而动成掣肘元敬已矣伯玉而犹跃渊良可叹也家弟以拮据文事致中膏育委笃不起仆虞渊之照厌厌就堕何心复作官人以故恳乞骸骨而微诚未亮更博勉留为识者笑计当终一决耳陆成叔出公手书约与荟叢古今诗篇且云书成当令不佞序之不佞何能为役惟是千秋不朽盛事以公神鉴固当上合删述第取材宜广定格宜宽李于鳞之不能厌服众志可戒也成叔为桂玉所驱杪岁戒途惟公悯之一

陆中复

向者辱委先中丞公神道碑草次塞白在公不忝太丘而仆则有愧中郎多矣孟孺来顾复拜手教过弘饰奘且郑感谢使仆颜更如甲别纸所示及读上喻太府书具见仁人孝子迫切至情先中丞贤者太府岂所不悉特以乡先生没而祀于社谋及卿士谋及庶人此重典也今以众请而未举以足下一书而遽行于厚道则有余于公道微不足矣且询之诸有识者咸云太速须墓后而虞神主归于庙而后神位登于学宫礼也念足下倦倦作太府书当极致秉彝之好唯不敢相促此公性急恐以足下为不达其意脱生纷

纭则无及矣见诸公当为道至意不一

弇州续稿卷二百五

●钦定四库全书

弇州续稿卷二百六

（明）王世贞 撰

○文部

△书牋

荅胡元瑞

一邮卒自西南来者得足下书累纸纸累数百千言见懷五言十律读鄙集七言二律他杂诗三卷生不覩巨丽之观久矣何幸于足下见之而又身当之耶始者见家弟与曹甥子念称足下已又见殷无美称足下近得家弟一书谓纵横艺苑中自于鳞外鲜所畏顾独畏足下与李本寧耳本寧文笔峭峻而指竒新能出人表足下宏放奔逸若飞黄蹶景顷刻千里而步骤操纵有度不至负啮决之累诗格调高秀声响宏朗而入字入事皆古雅家弟畏之固当即令仆整帙而遇前茅不亦三舍哉而自庚午辱与本寧之尊人方伯公游其明年辱与本寧通其又二年癸酉辱与足下尊人少叅公游其又明年辱与本寧游而于足下尚未有通也诚不意足下之过知仆若是足下谓诗文骚赋虽用本相通而体裁区别独造有之兼诣则鲜又谓精思者陋而简于辞博识者滥而滞于笔笃古则废今趣今则遠古斯语也诚学士之鸿裁而秋林之匠斧也亡论目前足下执是以程昔之人而且难之顾独过举以归仆则岂仆所敢当哉记仆初游燕中仅踰冠与于鳞輩倡和时妄意一策名秋苑不至终作吴地白眼儿足矣既稍有知识私心所慕好虽不能如执事所谓亦畧近之而中间三十年来数起数蹶官中刀笔十之三家门宗戚大小十之六幽忧病苦又时错之加以不幸负邈籍之好膏油之晷多夺而奉杯勺以故不获尽究其力于学生平所撰述既不能自裁割彙为一帙偶失数卷彷徨废寝适郟中有余梓以不携家有余俸稍为钁镂置之家塾用备遗失而已不谓露其丑于足下而足下复好之也以足下才虽过于称仆而暂于论学乃尔仆尚何所道勉旃深造自得而已才骋则御之以格格定则通之以变气扬则沈之使实节促则澹之使和非谓足下所少而进之

进仆所偶得者而已本寧前有一信至荅之极卤莽行将录一通寄彼也诗不能尽和聊成二律四絶少酬来美广文先生彭稚修者故是足下同盟计日相与下上张令以惠文弹治矚氏豪彼中士论云何有便指示为幸

又

喻兰溪人来得足下手书及丝葛之贖念我深矣新诗朗朗咏之令人神王仆初拟八月入茅屋三时清斋与比丘道人共行径已授产儿辈生平所好古典籍法墨名畫之类悉不留阿堵中文字结习与生平故人亦不免一刺独足下未识面为恨耳信如来札所谕有叔夜千里驾尚当于团焦穴一窠对话信宿也仙师化在旦夕世外之冗遂不减尘中不克覩缕外芙蓉幄一顶戈扇二握庶足下帷帐明月懷袖微风若与不佞相晤也谗方校讎宋太史诗此公亦何幸然不免令足下神瞽耳一笑

又

两日前奉师龕入观未暇寻三田主人仅拟息肩华胥以苏病骨而足下所成昙阳登真篇已及令人两腋习习有飞动意又家弟西筴似不以一学使为重得足下六篇重耳气色高华真足扑太华三芙蓉挹瓣中沆瀣近亡论李本寧不知仲默于鳞前亦有之否仆老矣拟办两青鞋作西归津梁计不意中道为易迁宫所要然玄關一窍大较非异足下仙材也能有意捐夙障从我游乎

又

每念海内才子如兄辱推挹以为确然国士如兄而至今不获一见寧非缺陷世界也以书及诗授子念南而失之复以诗及书授子念北而又失之古所谓万里比邻者独于兄乎不然何也兹舍弟之江右复以扇诗及书币往盖三易矣八月间当削迹遯世得亡与兄竟为神交之人哉有叔夜千里驾幸蚤图之至望

又

足下聚书三万卷插架不减邨侯日枕席坐卧其中世间事无足上眉尖胸次者以仆所见当今博洽士陈晦伯可称无二然不无书簏之恨杨用修颇以缀属称而踈卤百出点检不堪自李献吉戒人读书当令此道弥厄海内故不乏隼流纒一篇一叶有味便厌薄六代以还即晋唐诸史高阁束之矧其余者自分此生已矣何意晚岁从少年中得

足下家弟每啧啧足下过目不忘髫髻时读书几与身等今已学亡不窥浸浸有雄视百代意而独稍降心于仆噫足下故刘子政张茂先辈也仆非其人讵敢当剡溪一棹何日来东倾筐倒度与足下连床作十日语望之望之

又

向者一月内所致两书悉达其见寄五言律十章近作数种俱领教足下诗大抵格调高古音节鸿鬯目中所见自屠青浦外鲜偶者即老将非十万卒凭坚城当之未易支也唯歌行汹汹不无才多之虑小加裁损乃愜中耳仆年事转暮日求藏身挫名而不可得绮语作障不减追逋所尤可恨以此身付齿舌以此日耗酬酢念奇人如足下非一促膝晤言寓托千古亦缺陷世界也殷无美有父丧恐偕计便亦须入吊之当扫彘园片石以俟舍弟将入覲可同行否尊公在滇想自佳外拙诗二章书扇头请正曹子念亦足下意中士也因其谒永嘉王使君聊尔相闻不一

又

喻兰溪邦相人来辱长笺见诲副以衣履新诗种种启之如龙泉太阿乍出匣霜风肃然不能矐盼仆遂得见懷及游仙十二章即异日跨一蹇游芙蓉城出橐装以骄毛僊翁张洪崕先生不亦大幸哉第仆之此举正为挫名避思朝夕焚埽冀小忏绮语宿僭耳而过为贤豪长者描饰之又动迦叶定中蹈舞习恐终成堕落奈何奈何所命绿萝馆集序足下方如日升川盈岂仆一语所能定仆亦何自破笔研戒以世人理待足下而足下意似不可已且虑后世有两奇不相值之叹故勉而命笔仆于交游少所推仅于鳞耳有足下于鳞不为死也气色高华声调爽俊而纵横■〈足必〉跋有挥斥八极凌厉千古意仆三十年中所接如足下真耳目中无两所望者思西京未雕之质平原才多之戒而已邦相无一毫俗吏态游览倡和令人慨想临川之美足可纸贵见除目尊君已复故物第碧鸡万里不虞初平羊作石耶一笑一笑新暑未剧加浚自爱

又

辱损致全集瓌奇雄丽变幻纵横真足推倒一世仆向为足下作序仅覩计偕岩栖二种中诸体尚未备故末以西京建安相勗今读卧游诸作古诗乐府已深入汉人壶奥平处尚可驰骛公干仲宣不知曹氏兄弟为何如耳歌行如赠汪司马等篇才思滚滚不减信阳而送沈纯父七百言气骨铮铮并驰北地尤为当行近体自是当世所推于鳞外首称独步可也仆老境何幸获此大观使旋附致不一

又

生平交友垂尽何意凿坏之日复接海内贤豪如足下于愿足矣恨肺病方深不能竟所倾吐然与足下神交十余年彼此邮筒所致肝膈底里亡不具陈所少者惟一面耳今足下俨然而命千里之驾且云以仆故勉为公交车一出即握手片言固贤于十年众也以仆而观足下诗必大家文必名家第体气清羸宜稍节泛酬驰骛之作四十以后必须讲求出世住世学问仆今未有所得不能相告也欲作魏茂权太常书亦以病不果夜来嗫嚅一律为钱而方寸冲冲迄未能就俟儿子北上致之

又

久不见奇男子得足下一顾遂愈头风属其时尚憊憊不获大倾倒为恨虽然针芥相投固不在尔顷也足下河东赋久已就吹嘘上天此其际矣纵公交车令不尔而以场屋相困出囊底亦足了之知无落夹也华阳碣石间四方豪儁云集足下便为登坛大帅中兴诸将建节亡若岳侯之年少者艳羨艳羨倘小毕经生业障结伍制军约束旗鼓弘正嘉隆之业自此而三宇宙间一大快也鞭弭中原遂有人否以报老夫属儿子北上手笔记存不一

又

仆有书附舍弟去而足下书附喻令之使来计其日不相远昔人所谓神交信非偶矣计舍弟与二贤登高酹酒赋诗一时之盛第坐中不无少一人否仆于世故一切抹掇不愿与贤豪相接八月闭闕虽警欵不落人耳矣如何如何初暑愁霖强饭自爱不一

又

得手札以家弟一归为快暮年兄弟差获聚首诚如所言仆既举体皆凡事渠亦方治老农老圃业何敢上希皇民伯仲也阳春馆之作必须了此而后焚笔研第兴不易发何如必欲役丹元子为之有所未敢也一笑

又

损致新刻真如山阴道上雪后行令人应接不暇惟谬以鄙言冠之不免佛头抛粪

耳仆于足下非不极倾向而气吃词屑不足以发近却乘兴为足下作得阳春馆甘絶句
或可赎兹序罪耳久已付子念不谓尚作殷洪乔使还附致不一

又

使者来伏承尊甫先生杖履无恙足下日弄雏亲侧为乐不可言山房清燕门无杂
宾日坐卧四部书中游目千秋恣意万卷孝标士深殆难为前加以春秋甚富稍益岁年
震旦中将遂无竹素可窥者奈何仆尝谓弘嘉之际诸公积业亡不斐然惟博综一途寥
寥絶响仅一杨用修而讹戾盆出余益下风恐遂成国朝大缺陷今既得元瑞不虞此矣
宇宙鸿业将来足下一人望之翬之仆老矣师丹多忘沈约耄昏何能以五鹿之角岳岳
公前也尊翁先生传据足下原草点定成篇不能于意外描写如太史之传万石君班椽
之传龚渤海缘迹来小有证验方在斥虑惮于吮毫耳蹄枣种种拜领勿笑老饕迹信阳
王内翰致古铜缶一自言得之冢中贮水加冽希世珍也昔人云异物须归异人仆得之
无所用聊以侑柬不宣

又

张幼于来致足下哭家弟七言律十六章及寄仆五言律十六章高华雄鬯整栗沈
深而用事用意变幻百出描写如生可谓当代絶倡岂直今人不能为即古人未易也仆
尝谓元瑞诗纪律森严则岳武穆多多益善则韩淮阴至年少登坛■〈宀禹〉内风靡
非太原公子不足当之家弟生平所推轂仅于鳞与吾元瑞今已矣人琴俱亡不胜感恻
宜足下过于用情方图梓其遗集幸为作一叙毋忘鄙言

又

仆故有秋苑卮言是四十前未定之书于鳞尝谓中多俊语英雄欺人意似不满仆
亦服之第渠所弃取却未尽快人意得足下诗藪则古今谈秋家尽废矣方对客草草不
一

又

仆于文章本不能入玄解而谬为诸贤所诱轻于操管生与人齿吻偕晚途学道又
不能守绮语戒轻于操管乃至上累师真下累良友老衰无味姓名复螫人齿吻方欲搏
颊啮指以自惩创而足下更诱之不已岂必欲盐车我耶足下所与论隲千载前后诚隼

语仆尚称病未能四诗歌之喜气浸淫满大宅尺牒乐府拟古霍然而起屨及于室皇矣急取维摩不二法门作小转首乃得解始知闷婆奏乐迦叶定中起舞非虚事也十九首最难言离之则虞落节前辈俱所不免合之则虞捧心于鳞亦微用为累足下加之矣唯在更刊锋巧露其质木而已阳春馆额并十六咏仆不能夷犹其间亦须受足下一寄但日来已断苦思俟其自来毋为日可也足下麈尾恐不能佳偶得一柄奉佐谈津不一不一

又

山中良晤殆匪偶然别后时时于松竹葱蒨间輒念风雅而懒放杜门不能得严江之棹通咫尺问衰病残人不堪笔研新正朔日于大士前誓断此缘然尚矻矻了残岁逋而除命两至虽寒灰无复火念而上辞疏草辞启无益竿尺日有三四往返殊令人厌苦奈何奈何畚园胜赏奄有一时豪杰真足千古诸贤怯于先鸣得郢雪倡之不虞寡和矣二酉山房日与作者揖逊念之神王见委记系岁前面许必不敢负第小宽我俟兴至即命笔也藏书目序非不感兄见推亦宁无标榜之畏幸且秘之去岁已作得末五子篇今录上亦用心赏心期可也助甫中丞近有书至意服兄而甚易长卿大海从鱼跃长空任鸟飞二语甚有味尊公长者而推兄之爱勤勤不已过庭之余为我道谢不一

又

家人自处州归者得足下手书具悉此曹子忌足下大似蜉蝣撼树若仆则逃名之不暇而暇惜雌黄之口乎哉浙中一同人传足下非常者初亦为骇然既而谗其妄也仆今年六十死人口者不知其几而竟无恙然后来必须一实也呵呵漳南颜生踰三千里而来谒其文慕古而未达诗则远矣无以酬之令谒足下为小加垆■〈缶垂〉可也

又

足下书凡三及矣其寄示诗藪者又再矣始而胡运副来时值大暑病河鱼且哭亡弟无虚晷一行见客即为客所困流汗送迎襁褓报谒凌晨出门薄暮始归归不暇问食且踞虎子委顿欲绝矣以故于胡君处欲作一诗送之不能其作足下报书尤不能盖报足下书非可据案立就故也后得一书知以诗藪序为急第三书亦如之足下于诗缘世定格缘格定品以故秩然经纬而至于本性之情穷极窈眇因常究变曲尽别剔昔人所谓上下三千年纵横一万里前无古人后无继者殆非虚也足下意以此序非仆不可仆生平不自爱其文即三家之社如君家钉铍者亦且应之而今得遂以卮语为诗藪前驱

岂非至幸极快虽然兄说之尽矣何所复赘且足下于有明作者虽极为假借以彰一代之盛然犹不尽惜雌黄而至仆独过垂饰奘几遂超何李之乘许及亡弟亦在鴈行窃惧世人之笑我以我互相标榜也虽然仆岂敢以拙而避足下之工又岂敢以嫌而孤足下之望旦夕必须一搦管露其丑秽足下病稍间即脱稿上记室也今年长夏如坐炽垆中悼逝忧生荼苦百绪而东南操觚之客无不以诗为贄噫吁亦盛矣大抵肤响粗备精理不足且庙堂之上往往讳言此事伯玉不登启事明卿永絕荐剡本寧厌厌苦块长卿茂吴逐逐衣食他遂无一振者大抵诸君亦微有以取之然何至使清朝右文之意如扫也此当有任其责者足下自爱公交车之事当与儿輩共之不朽大业则唯足下是寄仆旦暮人耳无能为矣尊公万福闻老蚌生珠甚为慰心事然须顾惜蚌胎两英物当益长成相见未期北望怅然不一不一

又

前得足下书始能一报荅然谓公交车已至长杨邸故付邮筒寄之豚儿所昨忽覩苍头接足下黯澹片纸乃知扶病抵瓜洲病益甚日啜粥不尽一器甚为悬情及览书辞见托作传且谓病恐不可起须此文而瞑酸楚宛笃使人肠寸寸折虽然足下年未强仕虚恬少欲何恙不已而虑至此剧也恐拂病者意敬为作传且驰一介相慰问足下自爱勉进匕箸鷓首且南归见二尊人颜色弄稚子畅其忧思行且愈矣诗藪少迟当为草序足下不朽大业已就天下万世知有胡元瑞矣寿夭穷达一付之度外达磨惠能黄蘗赵州语不可轻放过也雅贖祇领足下至此尚能为故人衣食念乎薄意附侑不一

黎吏部（故人惟敬子）

贞自丙子纳节丘壑自放戊寅再辱无意人世因获方外之证屏处蜗庐交游尽废虽以公之清标令望如威鳳祥麟世所快覩而贞托在世契之末既无繇一奉清尘又不获通咫尺之问惟是尊公长者辱在肺腑残岁尚蒙记存并隶笔三字焕若神明五月从家弟所得欧楨伯虞部寄朱王孙刻所撰梦记齿及不穀方以为竒而跋尾则云三日而逝真梦楹之奠矣尊公文彩艺能操行标格大率与吾吴文待诏伯仲诗并禄位过之寿则少让此老有芙蓉城消息矣寧能不日望尊公作寮寀也贞亦善病病辄羸削草一奠章数倦数乙都不成语然而脱稿久矣鳞羽为虞适得戚少保便附上副以瓣香布素幸为奉之几筵尊公全集曾付梓人否刻成见寄一部以留吾子孙也

沈嘉则

昨有姑布生求谒顾冲庵托足下先容贪欲得足下信为发数行计已达矣比从朱君所得累纸文义灿然且以仆所草拙序为谢而以朱君传为托窃自惟一念之误落譌语障笔研受役垂老矻矻不休深自厌之而不能脱也乃于足下故所愿为执鞭者即有所讚述恨其未尽何郑重乃尔曹君文亦须撰无但足下介绍即其人长者而著作多尔雅不至令我曲笔也第舍弟初归人事波及甫解襁褓即勇杯勺脱稿须在中秋夜不免更烦苍头一来耳所示佳章领海并海鰕之贶以佐酒即当念足下耳薄物附忱不一

又

自仆入園后少能与客相闻然至如足下故不受客例也厨人扰扰当是王宗伯烹露葵烧笋蕨作宾头卢供耳质明而一苍头以足下刺进即驰讯家弟所艤首西矣得书知复出甬计旦夕过由拳能与长卿偕访否威明虽善称病寧为赵壹此间苦竹不深必不至作张廌有把臂入林而已言路伎俩渐穷猥用宗伯塞白遂谤及灵真仆齿牙余涩也复何足道正忧此曹生作善星比丘耳子念迫桂玉不免远游张将军诗为兜鍪揜却埋之丰城非足下谁为出之余不多及

又

昨冬偕戚少保与足下高会时觉奕奕神王春时闻足下岁杪举一雄又嗣得一雌不胜喜跃男子长贫不为害所不可缺者此事耳足下以何日过吴中当浮大白相称快也甬中人来齧齧屠长卿至不可闻闻足下以大义持之因而抵牾大厦拉攏非一木所支朋友中不可无此段事徐吴江入台矣偶便附此容修贺不一

周公瑕

昨有数行及先师像紬绵捧去不得报言恐去力浮沈耳黄庭内景校雠颇精计足下欣然便为捉笔两藏妙典及近代名手几满一簏箱独少压卷者异日欲结葢珠宫一大缘勿谓道人习气未除也■〈休上一下〉承叔寶犹在人间而不能握管意兴败尽梅花屋两日当甚佳翠禽啁啾恼足下清梦莫更又以为萼绿华否

又

得教具悉念存之切公筑室避喧数十里外春日如小年风气清淑于绿阴红雨中焚香燕坐乘兴对邓尉山色弄笔写黄庭贻王元美故人间第一快事何缘似一叶舟兀

兀了此私所未解勿谓仆以贪心作挑鬪语迫促能事也吴君诚佳士其如得之晚何月来避客苦竹以公书勉见之仅落穆数语而别耳殊无以慰其意也

又

仆自昨秋冬时感霜露小恙耳而为乡里应酬所困病羸削至春三月而始知就医六月病痊三日良已又七日食微不能谨右腹掣痛如直塘所苦且作汗五日良已则腹羸削今大有起色矣第不遇枚叔发陈琳檄耳肖甫昨有一札云伯玉已至钱唐而不相及以为恨一得代则呼青雀相尾访我弇中将使我投杖而曲跃乎今得公札信然公念我至又推食食我第果饵过丰不无破山人例也中秋后先月色佳甚明圣之回公与伯玉作赵武屈到而羣诗人捧盘敦以从诚大奇事足下所言坐骂者何人虽然此湖久为丝竹粉黛所溷何异武安侯第今其主者戚大将军部曲耳尚不敢望田丞相焉能使坐客无灌夫也公有意于偕肖甫伯玉而过我弇园目界虽小根脚自大一觔一咏足令公肺腑楚楚也昨伯起集成刻仆所草序而烦公大笔如白鹿皮荐苍璧愧不可言中有三误字已报伯起改订之矣余不一

张幼于

新凉方有高阳客日跌宕杯笋间而使者持古阿罗汉像至几欲下拜以米汁供之即日逃禅室成可移奉矣新集见委商定不佞何能为役第窃窥足下此番识解比旧殊异百尺竿头上一人步人也五七言近体皆佳而七言尤自铮铮态度都雅音徽清嫩时造真境七言古絶似高岑而间有费力处押仄韵少操吴音诸铭玄思古调得周家三昧杂文齐梁而上能以东京之质御之不作近代歌头曲尾祭文甚藻奇而押韵亦不免操吴音此或白璧之小瑕也更似宜撰五言古一二章压卷端何如见传戴仲德雉经且骇且惜得无为厕鬼所引耶不然非有魏齐之迫岂以一公子难见而遽授首也然此子自谓相法星命不能过三年有一瞽者云戴君内恕耳恐不能过一年其术何神也蔡孝廉既许西馆便当来贄迎之半月后可发泛彭蠡登匡庐亦何异洞庭家山水也弇园泉石殫人纵除目下得一小镇当不以此地易之姜司成汪司马故是庙廊之器岂關仆菰芦人耶足下自厘我輩胸次耳

又

得书及明卿分韵四章者佳而排律尤整丽谗且买舟诣白下就明卿何必减郭生之于羊叔子也仆自入观来足迹不能一出城独以送伯玉肖甫至清洋口而止与明卿

蝉缓夜乃抵玉龙桥宿归不免就佛前忏悔何能作吴阊游也子与遗集为其门人汪生郭生所佚诸诗及尺牋祭文之类可四五卷遂不作李长吉近不作康德涵而遘负心汉乃尔宜与足下相倡酬之有所失也石湖名胜当与游人共之昔固非足下有今亦岂徐氏物异日质之范致能当相与拊掌大笑足下见仆弁园记跋否一切勘破人人抔沙事事嚼■〈虫葛〉耳新茗拜祝附谢

又

仆业已得请专一壑矣即不敢希补劓之隙成一家言或庶几抱卵之工小遂所慕而城居与嚣尘接衣裾麈集殆无已时不扰扰墨逋则征逐书邮以故匿迹旧里幸有苦竹畝许剪茅其阳长日宴坐一室如土狗木鸡日进三盃糜佐少盐蔬晚酌亦不过一二合使余线息而已不谓尚存故人齿录娓娓慰借隱囊綦履觉竟陵之餉子暂尚为侈也所云百谷以数行见排耳报语不中噉书又拙恶不足换羊肉如何家弟不免复罨世网与足下相对时当不言酒食阿鼻苦袁宗伯见寄一疏草为御史解难故自超如姜司寇二君子出必有以自见不至作仆泯泯腐草虽然饥而食则并之如不饥者虽刍豢亦嚼■〈虫葛〉耳足下既时时相亲亦闻其鼻息否

张伯起

昨以不能具主礼又不获展三载契阔以是歉然足下大雅故当不置方寸也金吾举体金吾司空满口司空虽见惯者不能不呕哕乃忍使叔度周旋其间乎仆近驱儿子出复窳入观中而尚不免竿尺之累二尺蒲团面生衣矣佳集尚未及尽展俟家弟自松陵归即付之若糠粃之导必不敢作隔岁逋也次君得一会南阳朱邸父子皆才人其子子厚尤可念也仰止足下甚亦有以慰藉之否

又

残岁受役贵客却作朱修之面孔不能与足下旗鼓相当盖至今犹恨之吴中如足下不肯就公交车文子駢甫得佐大郡视若敝屣真桐乡一丝也令长平冠军里中儿愧死矣春寒甚忽忽拥炉几与笔研讎近始得舒勉效佳集珠玉之导久不措意工拙既成读之不知何语足下为我藏拙可也仲君越游恐不能大快出门十步外无孟尝信陵不如足下抱膝为佳耳

王百穀

春来数从游客得足下手教旋闻有遣樊之耗所传非一不敢转致候问今始悉之蒙示诸篇至古离别令傍人一读尚堪涕零何况作者项王拔山盖世不能割情虞兮足下此段抑何忍也第使不唤江郎覆水可再收今已矣其斥雌颜竣勿见徐以净名观处之天女当自来侍耳孤愤诗曲尽时变见赠之作奕奕有神致未能一一拈讚欲成奉荅奉慰两章方对客不及下笔少选驰一介报谢却有所致也黄雀名酝拜祝当佐茂世半日拍浮矣辱委畫跋不免污茧却上

又

仆自东徙于竿牒都废然至读足下一札数行輒用洒然于灵府中下一沆瀣也比益清胜章生称两郎君俱游泮甚慰甚慰邹彦吉眼中安刃致此断断却尽为家弟作巢窟不尔何地可着除目耶屠长卿虽过作达第罚作鼓吏必不敢仍操渔阳挝何至遂削籍可叹可叹所覩家弟白首见招小畅耳文苑中一段蒙气尚未豁天日也足下所称李本寧固自宜尔楚衣倭行少年固已尾之一着朝士服即揽其袂矣仆在人口过活一世晚始小自由解弢隳襄以了余日木食草衣觉轻肥之瞠后此味愿与足下共之闻谈思重日驾舡符纵饮吴市橐中装尚可作万人供何至如足下云负郭不能半苏季子审尔即使日噉脱粟仅堪活七人半耳呵呵

又

扇头二律精切婉丽于烟霞中作情事语我世尊虽开不二法门不能不为破颜也仆本羊肠服箱欵段疲极思息借此以逃诸贤不察以为类有小得者每一循省若负芒刺春来多香火客罗雀之门剥啄不已公结语莫种五陵花微旨宛然仆方苦之终须被髮入山耳朱在明云公乃虞及桂玉甚讶之读五库书翫古金石丹青亦足自饱必不至作原思赵壹也吴生诚佳士如来谕所恨得之晚仆转从儿曹丐衣食度日贵人竿尺尽废何以慰之

又

扶病与公相见惓惓如不能续语公殆季梁我矣别后渐自能起小辅以药食览镜欣然觉形神复亲公知之当为一快也久旱将雨公所谓北牖晚凉西山爽气故自佳尚未及田家停桔槔浊酒相命计岁功之为亲切也何观察所致新刻不足言独仆旧于周氏录得游山记四巨册久滞渠架今始归我恍如见故人矣章生旧携一札书云致李使

君者不言是何人今知是观察即达之矣扇头絕句附去非敢相诮欲公于方寸中觅普陀落伽真境耳一笑

又

二诗具见风人之致至及屠孟卿则忽懼然怜之与恨政当各半耳仆六时晏坐澹然无营足下嘲我未能遽焚君苗笔研笔研故当焚但世无士衡以此二物得小延第令生坐若史云釜可也吴幼安乃能念仆但仆腴颜偷生言及悬弧腸寸寸磔安敢当贺即足下以孤山例访我虽谢客尚能具浊醪脱粟以待不然者索我东海云气中矣

又

自春徂夏得足下书凡十余纸而不能一荅报缘以足下书绍者一见而目为筌蹄絕去不复顾膏肓之懒当亦任之知不谓我薄也迩来贱体颇健但山妻暴感末疾頼盛三从鬼门夺回今尚是床褥中物瞥见儿女忧悴之状令人忽忽鲜生趣知足下有意外事处仲终是英雄不与季伦同趣何时过我当以抔沙一观销之今年宗伯用御史言先君子得沾上恩仆可藉手地下附闻不一

又

夏中出门见皂衣人致足下一书及食物二种寻令人迹之不可得矣闻足下近有微恙旋已勿药周郎发矣何不泛轻舫出京口指燕矶而上穷秣陵花月之胜乎仆自二月失计别猿鹤日就笼檻方欲起冶城之鐵以铸错而前閏十九日忽得亡弟讣骇痛絕倒次日遂成疾觉疾转甚今尚在汤药间念昨冬贤兄奄逝足下损瘦至不可识认然足下深友于之痛而仆则兼知己之感足下唯伤逝之悲而仆则兼忧生之恨且仆长于亡弟十年矣余日之几何乃遭此事痛唯亡弟名行粗立雕虫之技着于宇内中岁颇收循吏之绩晚节顿悟无生之旨三儿崭然仅一小者未见头角耳所恨年不配德位未称才流唁盈朝含軫同志已矣独冀得足下一诂或小传耳仆过圣诞后当上书乞骸归归即料理墓事俟行状脱草方敢踵门拜请兹则未敢也病中欲成一奠语尚不能仅得廿四絕句辞不伦类聊附足下一读之伏枕口授不一

又

得足下手书知近有霜露之恙旋已平善长卿一赋能腐毫而聘茂陵女宜其消渴

也足下倚马千言故未至损灵府然造物善妬才多以尤物中之幸自消息勿落彼度内
仆长于亡弟十年尚鼓棹苦海与鲸鲵作敌耶业上书乞骸骨足下当候我于枫桥烟雨
间矣马叅军佳人也而未足妬乃亦夺之遗橐萧然几无以殓仆亦小效脱骖之贖渠遗
言娓娓以志铭见托须足下先状之故尔谈叅军病卧旅邸大是辽落今似可起矣仆亦
再过之不能如刘丹阳甘轻薄尹足下何自有三至之疑乎传街中盛行谋野集乃不以
相寄无虑中郎谈进也一笑

弇州续稿卷二百六

●钦定四库全书

弇州续稿卷二百七

（明）王世贞 撰

○文部

△书牋

荅王少卿

昨春吴瑞穀来以其所撰集求序去而谒刘子威知其必针芥合也果然矣今读足
下集序则贤金玉皆其门人也而瓣香乃在子威子威序足下集时露嚅喏夫足下于瑞
穀有出蓝之美于子威有当心之嗜一伯牙而得二鍾期何所复藉不佞而卒收之也足
下文追琢太始于联缀摹写当推独步大约古句十四古字十六篇法虽小逊时时叅伍
少须于元精真机中更一番陶冶蹊径应自絶矣仆笔研宿障老未尽祛受役于人无足
道者子威人便附此不悉

余中丞

世贞托在宇庇而以习懒成癖一壑是耽虽日佩威声沐德泽而竟不能一纳履于
交戟之下自前者仅修赤牋之后亦不敢以寒暄无益之谈博长者德音踈阔之罪复何
可逃世贞与三吴诸士民鲜腆不德以致昊天降割淫霖肆毒即以敝州言之花居十之
八而流潦所停根茎萎烂其禾稻之在西与昆交界者皆汇为巨浸矣闻门下具疏为民

请命不胜感激但闻诸司理来云敝州以稍高阜拟次不知潮长平岸水不即下花之祸殆甚于水乡之禾稻也伏惟明公一赐哀悯更有薄计具别楮并希照亮

又启敝郡为二相桑梓之地其受祸之真切与不忍之情尤有甚于仆辈者但自赵司成被诘不无避嫌一念而具疏者独两台恐上意以为常套不相体察自难执请鄙见以为台下可谕指道府各报水灾使飞章迭上上意必为动或召对或赐问可以情实告即司农亦不能为梗矣仆在湖州分守时与郡之黄守同上疏荷蒙圣泽所宽恤比之嘉杭三倍此隆庆己巳年事也全荒者请赈次荒者议蠲若改折及存留寧可使部覆不可此间发端唯台下载之余不敢赘

荅穆考功

仆虽以引疾子告而复为世人所迹蜗庐剥啄无已故徙居深落一切谢絶独于生平故人如公与（阙）二三君子时时动方寸盖无何而使者至矣所论皆自肺腑语使我恍然如登迟鸿之台而被穆如之洒也读百将提衡足使兜牟唤醒人人韩白第不令栖岩饮泌之士思隳解其弢裘耶公诗律雄浑奇崛所当无前唯小洗伧气足使唐人退舍目前无足难也蒲坂余烈尚能鞭捶少年作被羽先登今似小屈矣庙堂名为急材而材如公乃犹在拟议耶前见举世所推龙门之鉴而尚疑公太纵横者仆谓行千里而弃赤骥策蹇驴古人所叹今得无再哉强饭自爱终不但使唾壶缺也杯斝既是恩赐何可脱赠使抱纯钩子母之忆又不敢虚公至意抵暮呼儿辈三举每举仅二分盖已与米汁缘断故也向托何序缘以徙舍废书籍久忘之幸赐示已为公畧破酒戒复当破文戒作数语不然糠粃于百将提衡可也询使者知贤子曰从事秋文甚快适有建昌一宗王惠松雪斋大士像并题署皆精絶辍为维摩丈室之供余土织将意麾置是荷

又

自石丈之司问与王兵使之在事得再三相问讯嗣后间者阔焉不谓乃有刘长洲天假之缘以吾丈之书至也盖宛然若面矣弟所草记序小有致若二古诗激亢用壮殊媿大雅吾丈何缘尽登之石陈生笔意可爱但不当下赘某体某体作蛇足耳镌去之可也刻手与搨工俱佳河北乃有此三絶吾文诗赋矫矫宏丽勒之高台不与繁丛啸吹相雄长耶新正卒忽多事不能尽和聊和其奇石歌一章以报来美弟之本末具石丈书中不足满达者一粲也每读少陵句世人皆欲杀怪其过甚今得无类是耶第此曹子不善妬如吾丈与仆乃当妬其不出耳山园偃息自佳何必丝与竹山水有清音此弟素尚而乃以为有声色之奉亦大可笑事也赵选部见念似以二君子推及不然孔北海知世间

有刘备耶幸为致声谢之所喻云云不佞岂敢当三君子鴈行昨闻歛士有选拙诗文与于鳞并传者止之恐不得也此书成当又增一番侧目耳不腆之敬附函不一

又

刘长洲所复拜尊丈手教衣紬之赐及诸石刻种种具见念之深与林居雅况令人跃然起色思御风而登迟鸿台也不佞少年齿舌中人也吾丈独汰羣论而修饰之使蕢藁登于椒兰之上虽然不佞心迹尚恐吾丈与东泉丈之未释然也不佞自束髮以来叨玷仕版持法肮脏与权邪触属先公大故恨不获从地下然三年之内何尝茹葷御室十年之内何尝具衣冠预燕会近三十无子先君为置二妾有三子其二妾之一存者今且老矣房栊閤然黛粉削迹生平鲜丝竹之嗜臧获守先戒无一人晓声律止是曩昔于兰若西创一阁安两藏经前树茅舍修竹环之乡有废圃余峰石之类徙置其后成池中一岛小草之日付家仆干为增筑东西二坡岁益月增水树桥榭颇称奇胜生平好古图籍及诸书碑刻至脱衣鬻之不惜米汁为累旁及鎗壘此外了无所涉然家帑用是垂罄兼以原田无岁催科迫急所爱之物时时入质库与人共之年及棗榆欲与儿輩筑一居址尚未就而世猥以江东富人与游闲公子见目良可笑也且仆之所繇致毁可指数也其始在楚棘偶得讲学诸君不可意事因发策偶及之非谓讲学之不宜谓徒讲学而不修行之不宜也而一时言路有切齿者矣其后在郟无事自惜敝帚恐有散佚姑梓之梓而复为二三知己所强遂出之少年腸肥脑满不能尽持国老之论弹射所及更成戈矛仆尝偶语门下生未有抵吾州而不游弇州园者然退而致讥者不少矣未有抵吾州而不需弇州稿者然退而致恨者不少矣业已成矣付之无如何而已杜门一载宴集稀简流光忽忽每自怅然为七情所伤根器已损不得窥古先生守藏史之藩何暇断断鸣其不平特以吾丈与东泉丈知己也丈夫不于不知己人称屈不得不于知己人求伸二君子苟一信之可以瞑目矣拙诗何幸得与大篇并传扇头之句所谓形秽者非虚也和奇石歌押文字乃久字之误幸正之东泉丈以子病至废笔研可骇不知是前时在大理所虞者否刘长洲初至颇闷闷近传神君之政遂冠七邑名下固无虚士也长君书笔遂逼乃公第得之率更为多小和以晋法庶异日对金马勒燕然足倾倒世人耳初冬尚暄为道自爱

又

前有一书附刘令人去计已达矣兹时已知石丈主器病笃甚为悬忧舍弟自覲归云见赵吏部称病者已不起石丈痛甚无以聊日须鞠生解之而吾丈方极意剝刻千秋之业不暇从此生周还弟自入春小有信解于眷属一缘洗垂尽乃为石丈数起念至寝

食俱中废也渠所邁若此虽蒙庄叟维摩诘解不得惟吾丈乃解得盖情感之极精理所不能胜当暂以粗事胜之可耳弟山园日佳古文金石名畫日益临岐一物将不去读书五车著述千卷亦觉临岐一字用不着以故尽从屏谢且别创小茅舍作头陀行径耳同志者王宗伯元驭也家弟以病乞休而不得遂世缘固未易断耶贤郎风气道上石丈遂无此世界缺陷信然信然

又

岁晏寂寂而嘉定令自魏来者致吾丈教言满纸诵之皆肺腑也新诗比旧骨格大成长而情事复隱愜乃知十年前提婆达多是吾丈大善知识也骤见贤郎书且骇且快不敢论右军抑懷仁比丘复出矣以贤郎笔笔吾丈诗真足双美梁车十二乘皆在光摄敬服敬服第仆有百尺竿头一语輒敢奉献吾丈不可无内擲随语琢磨必令入无间贤郎不可无外拓随手变化必令彻无体不涉门径不墮阶级乃可卓然名家若圉圉故步大者江淮间句践小则夜郎王耳弟自正月偶有闻十月守一關一切身外事悉从未杀几欲举书籍笔研付之祖龙而至报吾丈书起色隱隱现毫端乃知叅合文类无明夙习未易除也近草得昙阳仙师传附览此殆非师意窃恐世口世耳张大苛擿皆不能经故以椎语破之即得罪弗敢恤也边镇之说得非尚欲牺牲我乎弟虽梦中亦不作此境宇宙广矣随地可埋骨非吾丈与拱辰不敢遽以告也元驭莹彻如冰玉况是上真眷属足可依更一有气力者持之吾事庶有济哉雅贶拜嘉薄酬不足以当玉案聊见情耳互寒自爱

又

月前有乡人马材官使滑附一札及刻佛道经数种致左右计已达矣仰间忽拜手翰及扇头新诗之贶读之若洒井露而被芳飈也忽不自知烦暑矣念自前岁杪卖身精庐尚不能忘故人以四絕句报足下又作四絕句为石丈梦兰之祝托高嘉定上之今读足下与石丈书了不复相關得非作洪乔浮沉故事耶刘长洲致所梓明七言律选觉虹色缭绕盖图穷而匕首见矣何雄丽精切若此此书成于近体可作大指南足下金篦之力非浅第仆乃亦濫竽与三君子方驾恐不得志少年以偏嗜訾足下耳国初诸贤淘汰觉太严如高季迪虽格调小降其才情足以掩带一代或可加益否八句有歌行数章又落韵有傍出者夫律者律也抑或可少删否伯子书法每一见辄一大奇进足下诗既凌驾开元伯子书复彷彿永和河朔二伧父纵横若此吴子輩于何处生活仆老不足言恐家弟亦不免卫夫人泣耳骥儿老大落魄今虽游场屋焉敢希尾骥驥也所喻欲于诸著作作为糠粃之导前者为凌子所强了此宿障极不足污璽当从容图之拙诗二章足下试

目之知其忘言于工拙也

又

三月中三得书皆肺腑语而最后以豚犬获厕贤书为踊跃不寝诚哉通家之契固如此也弟惛然之况殆尽东泉文书中而犹有不能释然者贤器尚尔暂蹶燕楚齐蜀吴诸录至于鳞明卿肖甫助甫元驭诸公子皆寂寂即不佞胡心独欢赵大叅何以拂衣将欲从二君子鼎足吟社耶抑有所不足于目耶台垣易曜蒙气犹然封殖之厚则不止一人矣东南沴厉异常阳侯贾虐敝邑数武之外目不忍开如何如何足下与东泉仁心为质恐不能忘世虑也刘长洲覲便聊此附谢并布不腆统祈照亮

张见父

前闻足下有都下行作选人也已而选人目无闻也将厌其折腰五斗米耶长公飞而食肉立功万里外足下代操文管于汝南月旦之地何必减骠骑矣仆生平于出处不能无愧迹然自强为山公所黜耳未尝一经由仆意也好山水不能徙家家焉而谬为一岛一池以自适罪一好图籍不惜装橐以致剽产罪二好为文文不能厚匿讳而时有所持衡罪三好客不能以恶草具进而身亦缘而负酒食累罪四此四罪诚有之若谓仆耽声色娱财货居闲请托如浊世公子则似更有一人也度足下久悉之不宜及所以偶及者亦为此月旦地耳长公命使裹三月粮盛暑始抵吴以酒资资我以井果饵我方寸五岳骤起不平宁若秦人视越人之肥瘠也金陵诸贤捶撻真可畏然此曹昼伏夜动作壁鬼耳一语撮之立消不足言也适有小儿妇父沈商城便附此不一

王光州仲叔

昨谗门下以公除入朝复补旧垣因得阅治河大疏凿凿中窾且承须校文之命不任浣慰然未几而蜀垣之除目下矣内意非所敢知第大丈夫入则为长孺之拾遗出则为淮阳之卧理龙德变化故非常情所可测也世贞衰迟过时之人强颜一出触目尤悔加以亡弟太常大变神魄衰沮小有建白即恳疏乞归而踈阔亡当用事者既迂之而又尼之不使之得遂一去之愿进退维谷方在彷徨而使者将手教至尚欲引之于非分之地藉令仆尚有此念藏书万卷尽堪紬绎比之孟坚仅少子卿叔皮遗撰耳岂必石渠乃继南史所恨十载蒲团酿成衰朽皮骨于出处两义俱堕如何玉现集遂与赤城霞色争标不知伯玉序重公抑公集重伯玉也太华旧有于鳞记奇古而少发挥王履道详缚而让裁剪公于斯兼之矣然峨眉声价宁下太华既以僻远不登秩祀何自复缺公记使岷

巴气短耶幸念之仆过此残腊当再图归计耳雅贶祇领附有薄报不一

又

仆海濱鄙人也雕虫自画晚未闻道独幸此生当少时得幸于尊父司寇公已而尽窃其微言读之已又获读贤从给事君之持论篇什已又从白下与次君职方游所不满者不识公与叔子耳今者一日而遘公所著浮弋草读之如司寇公也俨然若周还沧海之若而覩赤城之霞出没也不亦快哉叔子计当亦不遠也大篇有响有象有色有格有情有调稍加沈穩即开元大厯诸家不足畏也中州召父之业成玺书旦夕下矣倘肯有意乎吏隱哉鵠鵲鳳皇之胜龙蟠虎踞之雄与次君相披览仆虽老尚能操七寸不律以从也雅贶不敢辞聊有薄物比于缟带亮之亮之

冯咸甫先輩

春时得接足下清范而甫受同事者约不能有所繾綣自是阙焉不闻问空谷跼然则使者以德音至矣乃知见讯之素为河伯所窥大篇殷殷金石声不妨晚合诸梓无非夜光而七言犹自超音象鸿爽才情调畅要当于岑李钱刘间求之别致时义典雅精洁殊堪程序适家弟入观与王宗伯晤而出相证咀叹无已既稍各露其见以骨太胜味太玄欲小柔隽之不识可否仆老矣坐夙生障少而负雕虫之癖受役笔研狂怒獠走垂四十年姓名忍人齿颊而不自觉近始愧且悔欲于古先生前一忏洗之今足下乃以同嗜而谬加饰獎至举昔贤之所灼然而鸣一代者相拟则非所敢任也夫材不难专诣而难兼工评书者谓逸少正隶天然不能如元常草行工夫不能如伯英而以能撮二子之长为胜今足下复以此胜理许我言大又非所敢任也足下材甚富年甚少力甚强将无异日逸少乎仆虽陋何敢作卫夫人泣抑以仆所见有屠长卿胡元瑞者其人秦楚赋也足下悉甲而临之于大陆之野为百尺坛进盟盘握牛耳不亦大快事哉而以饶不佞唯有走而匿之洛阳之责台耳小律一章非足以酬来美足下但怜其破例可也棐几甚适所需但嫌于过丽不称瓠壶瓦研耳

又

往者得足下诗而快之遂已命笔而适有阻者亡何病症且病腹痛而谈客偶及今绛灌事气不能平漫借足下集发之既已付使者而后读则甚悔毋论其所标许不能当足下已也足下业已付剗劂则无及矣徐泽夫刻此经意甚佳而书梓二手都不称第因足下寄惠得徧施僧俗知大士缘起不至作优婆夷观足下功德固不浅也仆羸弱惓惓

意不欲生而征文者不减尔日催科吏念廷尉京兆传非可草草塞白且于京兆吁代一大事此中若攢芒刺愧痛不可言以是笔促缩而不忍下然终当为足下一强决之也汪司马墓道之诺踰年矣今闻其旦夕且至意甚卒卒过是则小宽耳章子敬近况何如为致声不一

又

仆自春夏交困邁轴勉强从事笔研都无复生趣然尚能闭门任剥啄苍苔纵横成理而抵中秋稍稍肉骨会伯玉肖甫相继来元瑞与汪氏二季佐之浹昼卜夜都不甚疲然自是遂无繇谢客笔研障转益深向者称责进今殆似阿鼻狱矣念廷尉公僊游则已久而京兆公方万福又此题不易措手故稍迟迟今得教乃尔又似不可缓此月尽或可脱藁使者但以孟冬之五日来可也钱塘望夕大似莲花会俱云为魔波旬所娆要是缺陷世界足下乃以为美耶珍味拜嘉附谢儿子归已六日附闻不一

又

方未杀世情而故人间入念乃忽得手书及近作殊足慰契阔扇头见寄之什尤便清令读之洒然小俟有兴或能奉和也越游记叙致波澜当与贤叔父贵游差池所上贤叔父书始知足下大忧桂玉然尚有生气不至如柳州叙失意落莫牢悵耳吾家阿大不晓治生时复有公私责将来恐亦不免上叔父书两措大鬪贫何减马宜甫也元宵前后仆实不在城应门者亦不以刺相闻足下故当相亮廷韩得无疑其拒客否便见题凡鸟亦自井之两日前为海寧寺僧明因作足下书修殿缘募足下室如悬磬岂敢以檀越相期或借重于乡之善智识可耳与太原公作姻家故自佳若辰玉则足下之裴叔则卫叔寶也太原之钦尊公长者不啻口出足下知之

王泰字先辈

昨春为病魔所侵几遂遊岱頼公妙方以起八月至四月食息无苦神气亦王念多生叅合文障受役世人灵腑一寸耗磨不休残日几何刺促向尽以故新正于佛前誓断之而所授宿逋至今犹在墨渾中浮沉过夏则为无事人矣公既起我而又不忘度我所示皆秘密藏仆旧闻约畧无异春时偶蒙警戒欲捐此残缺之躯专事心境以证来果今得公教如发蒙矣便当一意行之耳淮漕李中丞故贤者今屈公得无有世外之慕乎尊翁比益康胜有大茅君在何虑不百岁大觥渥迭几杖之愧也薄效非敢足酬聊见相与之情使迫口授代面不宣

光先辈

足下黄元甫之友而于鳞先生之乡人也其见存仆固宜仆于雕虫技殆夙生障耳汨没者垂四十年所损笔札以千万计而于道无所发挥此番叅合之化不归将来何所底止以故居恒瞿然惧焉幸而吾师悯之示以金篦俾出迷途而返之正然且五年矣而尘债不获却尘念不自洗行则僂僂止则兀兀与接为构日与心鬪何以探天机而备纯白哉不获已赤身从二童子走乡落携佛道书一束单蔬半菽隳体塞兑以俟师期而已不然即槁死毋悔也足下之书辞甚竒念甚殷而旨甚玄妙第饰奘亦甚过仆混沌久溃亡所虞凿将不使萌见猎心乎哉银环一窍先师秘之仆既无所知不敢强对然葱岭苦县终始如一中间机用小贰足下固已近之亦何烦置喙足下所引陈王二先生窃谓白沙识处高阳明用处高用高矣恐不免为高所累又不知二先生于来处得透彻否名根得归尽否何李无论于鳞在今日恐亦未能舍而从我盖此君子所好已深而所自居大是故也足下与玄甫皆困羊膻而足千里者平津江都故非小年人第不欲以腐鼠相吓勉旃为道自爱

阮先辈

前者与足下别方困俗冗寝溲不得间以故不克具杯酒通殷勤既足下行后复拜书币至以其诗集成属不佞序不佞得稍稍卒业其辞气跌宕不羈累数百言而才未尽中间僂语杰思时时足名世而疵累故不能尽洗甚或近体有失严者有走韵者既陆生任其笔削当无复憾第吾闻前辈徐昌谷始与文祝诸君倡和既斐然矣见献吉而悔尽弃之及诗成自选成帙所谓迪功集者是也迪功亡乡人不解事刻其别集外集数卷而名小挫矣仆今虽勉为足下序异日不朽之大业成将无悔之乎使还附序稿去并有别侑希鉴入

陈季迪

昨雨中辱高轩见枉仓卒未竟所欲吐而足下雅言亦似在吻嚙间不能毕退而读扇头之赠则见托良深大书四帧诗气清而调逸书亦遒劲称是卧雪斋记古色烂然中间宛复深至恍然历下复生二祭文絶得昌黎意而左史之笔又胜之足下才非仅闽士才也若以此调趣世恐亦非世眼人也公交车之业少自贬损何如谗今日谒太学元旦当暇过此一谈薄物非敢云贶以赠缟相例耳不一

与胡观察伯安

忆自癸酉之秋别公黄鹤大别之间今复覩癸矣自惟春容大雅使人如醉醇醪忠信寬博天下信其为巨公长者而世鲜推轂不登三事良可慨叹第此浮荣耳来教所云年逾耳顺而须髮无一茎白此便是实际实响仆虽差少于公而衰态毕露故于仙师前朝夕焚扫冀一忤之而障深业重殊自杳然何能为公役也令子天士国器举世不能二三明公有余不尽之留富矣美矣蔑以加矣过庭之际幸为致声不一

又

公子元瑞至知有弄璋之庆仆于时快甚不暇作寒暄语辄呼酒飞大白数十巡坐客亡弗倾倒甚咸谓公厚德宏度故宜有此既元瑞北上归过我弇山则闻大庆再矣仆之喜可知也每叹元瑞雄才絕世然亦颇忧其为造物所忌今而后明公可枕暮年万事当毋问矣孟尝君崔信明咸以五日生一声冠唐初一誉隆战国令孙以是日悬弧天意了然公子旋附候不一

弇州续稿卷二百七